


Tjukurpa Palya



Portions of the Holy Bible in the Pitjantjatjara language of
Australia

Tjukurpa Palya

Portions of the Holy Bible in the Pitjantjatjara language of Australia

copyright © 2019 Bible Society of Australia

Language: Pitjantjatjara

Translation by: The Pitjantjatjara Bible Translation Project, Wycliffe Bible Translators and Bible Society Australia.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

PDF generated using Haiola and XeLaTeX on 11 Nov 2022 from source files dated 22 Nov 2019

b29b7786-0954-5b75-82cb-3657182b63d6

Contents

FRT	1
Genesis	4
Exodus	111
Ruthaku	188
1 Samuelku	196
Niyamayaku	248
Esther-ku	255
Psalm	262
Proverbs	278
Aitjayaku	281
Itjikilku	294
Danielku	299
Tjawilku	332
Aimatjaku	335
Jonah-ku	342
Maikaku	347
Akaiku	351
Malakaiku	354
Matthew-ku	359
Markaku	453
Luke-aku	504
Johnku	596
Acts	657
Rome-aku	743
1 Karintjaku	787
2 Karintjaku	827
Kalaitjiyaku	854
Ipitjaku	871
Pilipaiku	884
Kalatjiku	896
1 Tjitja-lanikaku	907
2 Tjitja-lanikaku	917
1 Timitjiku	923
2 Timitjiku	935
Taitatjaku	945
Paalimanku	952
Iipuruку	955
Jamesaku	987
1 Peterku	998
2 Peterku	1011
1 Johnku	1019
2 Johnku	1028
3 Johnku	1030
Jude-aku	1032
Revelation	1036

Tjukurpa Palya

Nganmanyitja munu Małatja

Published by Bible Society Australia
Sydney
GPO Box 9874, Sydney, NSW 2001

Tjukurpa Palya
The Bible in Pitjantjatjara, Central Australia
(Containing Old Testament Portions and the full New Testament)

Copyright © 2002, 2007, 2019 Bible Society Australia

Cover illustration by **Nyuwara Tapaya**. Used with permission.

1st printing 2002 (750)
2nd printing with revisions 2007 (500)
3rd printing 2009 (700)
4th printing 2013 (500)
5th printing with revisions 2019

Nganmanyitju Nyakula Wangkanytjaku

“Tjukurpa Palya” Godaku tjukurpa, panya paluru palumpa walytja kutjupa tjutangka wangkangi, kaya nyiringka walkatjunu munuya nyiri palunya tjananya rawangku kanyiningi.

Panya nganmanyitjuya Moselu tjana walkatjunangi wangkatjara kutjupa tjutangku kułukułu. Kala tjukurpa nyanga palunya tjananya wangkapai, “**Tjukurpa Palya Nganmanyitja**.” Panya iriti mulapaya tjukurpa nyanga palunya walkatjunangi wangka lipurungku nyanga alatji:

הָרֶץ : וְאֵת הַשְׁמִים אֵת אֶלְגִּים בְּרִא שְׁבִירָא

Tjukurpa nyanga paluru kuranyitja mulapa Genesis chapter 1 munu verse 1. Ka tjukurpa nyangatja ngaranyi nganampa wangkangka nyanga alatji:

Kuwaripatjara mulapa Godalu ilkari munu manta palyanu uwankara wiyangka.

Ka panya Jesulu mantangka nyinaralpi tjukurpa nyanga nganmanyitjanguru anangu tjutangka utira tjakultjunangi, munu paluru tjukurpa kutjupa tjuta kułu wangkangi kuwaritja tjuta kułu. Ka paluru ilkari kutjupa malaku ankunyangka małangka wati kutjupa tjutangku nyiri tjutangka walkatjunu tjukurpa palunyatjara Kurunpa Milmiltu nintinnyangka. Kaya Jesulu iyantja kutjupa tjutangku lita tjuta kułu walkatjura iyanu ngura tjutakutu Jesuku walytja tjutakutu. Kala tjukurpa nyanga palunya tjananya wangkapai, “**Tjukurpa Palya Małatja**.” Wati paluru tjana panyaya nyiri tjutangka tjukurpa Jesunyatjara walkatjunu wangka Kurikingku nyanga alatji:

εν αρχῃ ήν ο λόγος, καὶ ο λόγος ήν πρὸς τὸν Θεόν, καὶ Θεός ήν ο λόγος

Tjukurpa nyanga paluru Johnku tjukurpa chapter 1 munu verse 1. Ka tjukurpa nyangatja ngaranyi nganampa wangkangka nyanga alatji:

Kuwaripatjara mulapa uwankara wiyangka Godanya nyinangi, ka palula tjungu kutjupa nyinangi ini Tjukurnga. Panya paluru Godanya alatjitu.

Ka nyiri nyanga “Tjukurpa Palyangka” tjukurpa Malatja uwankara ngaranyi Jesunyatjara panya walkatjunkunytja. Palu tjukurpa Ngañmanyitja Moselu tjana panya walkatjunkunytja uwankara ngaranytja wiya tjara kutju ngaranyi. Ka nganaña tjukurpa palyalpai tjutangku tjukarurungku Iipurungka munu Kurikingka tjungu palyantjikitjangku rawangku arkaningi tjukurpa nyanga palunya tjukaruru mulapa ngaranytjaku nganampa wangkangka.

Nyuntu nganaña ngurpa Jesuku yunpaku, panya iriti kamara wiya ngarangi palunya putukurapamilantjaku. Palu nganaña ninti panya Jesunya wati Jew nyinangi, ka palumpa malpa tjuta kuļu Jew tjuta. Munula ninti tjanampa mantaraku munu tjanampa nguraku. Ka nyiri nyanga “Tjukurpa Palyangka” picture tjuta ngaranyi nganaña tjukurpa nyakula wangkara tjukarurungku kulintjaku.

Ka nyiringka ngururpa picture kalatjara tjuta ngaranyi, ka nyura picture nyanga palunya tjananya nyakula kulilku kuwaripatjaranguru panya Godalu manta palyantjitetjanguru munu małatja mulapakutu panya Jesulu pitjantjikitjangku wangkanytjifikatu.

Ka picture palula tjanala małangka map tjuta kuļu ngaranyi manta tjuta munu uru tjuta kuļu nintintjaku, ka nyanga palunya tjananya nyakula nyura tjukarurungku kulilku ngura ini tjuta panya Israelnga munu Itjipanya munu Rome-anyu munu ngura kutjupa kutjupa tjuta kulukulu.

Ka Revelationta małangka tjukurpa kutjupa ngaranyi nyura nyakula nintiringkunytjaku ini *Ara Tjuta Anangu Israelkunu Tjutaku*.

Ka palula małangka kutjupa ngaranyi nyura nyakula tjukurpa kutjupa kutjupa tjuta ngurintjaku nyiri nyanga “Tjukurpa Palyangka”. Panya Godalu tjukurpa aرا tjuta nganañala wangkangi kulira nintiringkunytjaku munu wangañarangku kulintjaku. Palu kutjupa-ařala tjukurpa kutjupa puťu ngurilpai, kala tjinguru puťu ngurira nyiringka małarku mulapa nyangama kalanya alpamilani tjukurpa ngurintjaku.

Uwa, ka nyura tjinguru tjukurpa nyakula wangkara kutjupa-ara walka tjukutjuku nyakuku tjukurpangka ngururpa ngaranyangka katu nguwanpa nyanga purunypa - *. Munu nyura uti kililpi ngaranyangka nyakula nyiringka tjaru nyawa munu nyura piřuku nyakuku kililpi kutjupa line-nga tjaru. Ka kililpi palula itingka tjukurpa kutjupa ngaranyi, panya tjukurpa nyara paluru nintini tjukurpa nyara katutja tjukarurungku kulintjaku. Ka nyura uti nintiringkunytjikitjangku tjukurpa pala tjaru ngaranytjanya nyakula wangka munu palulanguru nyakula wiyingkula piřuku katu nyawa munu kililpi panya katutjanguru piřuku nyakula wangkara waļanma Godaku panya tjukurpa. Palu tjukurpa panya line-nga tjaru ngaranytja tjuta Godaku tjukurpa wiya, palu nintini kutju nyura Godaku tjukurpa tjukarurungku kulintjaku.

Uwa, munu kutjupa-ara nyura Godaku tjukurpa nyakula wangkara walka tjukutjuku aňangitja nyakuku nyanga purunypa:

Anangu nyangangku nintini tjukurpa Godala tjapintjatjara.

Anangu nyangangku nintini tjukurpa Godanya walkura mirawaňinytjatjara.

Anangu nyangangku nintini tjukurpa utira wangkanytjatjara.
Uwa, ka nyura tjukurpa nyangatja riitamilantjikitjangku Kurunpa Milmilt-a-warara tjapila, ka paluru nyuranya nintilku nyiri nyanga Godaku tjukurnguru. Panya Jesulu palumpa nintintja tjutangka wangkangu alatji,
“Nyura ngayuku mukuringkulampa uti wangañarangku kulirra palyanma ngayulu wangkanytjita. Kana ngayulu Mamala tjapilku, ka paluru Kurunpa Milmilnga nyurala unngu tjarpatjunkuku nyurala tjungu tiutjara nyinara nyuranya alpamilantjaku. Ka Kurunpa nyanga paluru nyuranya tjukurpa tjukaruru nintilku.” (Johnku 14:15-17a)
Alatji Jesulu wangkangu.

Uwa, ka Mayatja Jesulu Christalu nyuranya pukultju pulkangku kurunpa pukulmara kanyinma. Uwa mulapa.

Tjukurpa Ngañmanyitjatjara Genesis Nyangatja Ngañmanytju Nyakula Wangkanytjaku

Nyangatja Godaku tjukurpa. Munu tjukurpa nyanga paluru tjakultjunanyi Godalu uwankara wangkara paluntja ilkaritja tjuṭa munu mantatja tjuṭa kuļu, panya kuka, tjulpu tjuṭa munu aŋangu tjuṭa kuļu. Ka tjukurpa nyanga palulanguru nganana kulini Godalu aŋangu wiru mulapa palyanu kutjupa kutjupa uwankarangka munkara nguwanpa. Palu tjukurpa nyanga paluru tjakultjunanyi aŋangu Godala tungunpungkula kuraringkunytja. Ka nyara palulanguru nganampa ngaranyi pungkunytjaku nganana kura tjuṭa palyantitjanguru.

Uwa, tjukurpa nyangangku Abelnga tjakultjunanyi, munu Noah-nyatjara kuļu tjakultjunanyi, panya paluru pula Godanya pukulmankunytjikitja mukuringangi munu pula tiṭutjarangku alatjiṭu Godala wanganarangku kuliningi.

Ka nganana tjukurpa nyangatja nyakula wangkara nintiringkuku panya Godalu palumpa walytja tjuṭa kalkuntjtjaku (nyawa 9:9 munu 15:18 munu 17:4). Panya paluru ngurkantanu Aipuramanya, munu palumpa katja Isaacanya, munu palumpa pakali Jacobanya kuļu paluru tjana palumpa walytja mulapa nyinanytjaku. Munu paluru Jacobanya ini kutjupa tjunu ini Israelnga, ka wati nyanga palulanguru Godaku walytja tjuṭaringkukatingi maļatja maļatja, panya Israelku katja 12-nguru panya Josephala, Judah-la tjanalanguru. Kala palunya tjananya uwankara kulipai ini panya *Israelkunu tjuṭa*.

Ka kuvari Aipuramanya tjamu pulka nyinanyi aŋangu Godaku walytja maļatja maļatjaku, panya ngula Paulalu walkatjunu lita panya Rome-alakutu iyantitjangka nyanga alatji,

“Kaya Aipuramanya purunypa Godaku mulamularingkupai tjuṭa kuvari nyinanyi, panya tjananya kuļu Godalu palumpa mulamularingkunyangka tjukarurunmanu Aipuramanya purunypa. Ka nyanga palulanguru Aipuramanya nganampa tjamu pulka nyinanyi Godaku mulamularingkupai uwankaraku.” (Romans 4:11).

Tjukurpa nyanganpa ngarinyi:

- 1:1—2:25 Godalu uwankara palyantja
- 3:1—5:32 Aŋangu tjuṭa Godala tungunpungkunytja
- 6:1—9:29 Noah-nya tjana uru pulkangka wankaringkunytja
- 10:1—11:32 Wali Wara Pulka Palyantja Ngura Ini Papilanta
- 12:1—25:18 Godaku maļpa Aipuramanya
- 25:19—26:35 Aipuramaku katja Isaacanya
- 27:1—37:1 Aipuramaku pakali Jacobanya
- 37:2—50:26 Jacobaku katja Josephanya

Godalu Uwankara Palyantja

¹ Kuwaripatjara mulapa Godalu ilkarī munu manta palyanu uwankara wiyangka. ² Palu manta uwankara ulṭu ngarangi, ka uru kutju tjiwariwari ngaringi pulka mulapa, ka mungawalurungku tjutuningi. Ka Godaku kurunpa para-ngarangi үрungka katuwanu. ³ Palulanguru

Godalu wangkangu, “Kalalar!” Ka kalalaringu. ⁴ Ka kalalarinyangka nyakula Godanya pukularingu wiru mulapa ngaranyangka. Munu paluru mungawaluru munu kalala titutitu, ⁵ munu ininu “Munga”, munu “Kalala”. Ka kalala ngarala mungartjirira mungaringkula piruku ngalyatjinturingu.

⁶⁻⁷ Ka Godalu piruku wangkangu, “Uru pala tjarariwa munu katu tjaru ngarima ka ngururpa ala pulka ngarama.” Ka paluru wangkanyangka mulapatu tjararingu, panya Godalu wangkangku uru tjarañu munu katu tjaru ngarinytjaku wangkangu munu ngururpa ala pulka ngaranytjaku. ⁸ Munu tjarara wiyaringkula paluru ala panya ngururpa ngaranytja ininu “Ilkari.” Ka tjintu nyanga kutjaritja mungartjirira mungaringkula ngalyatjinturingu.

⁹ Ka Godalu wangkangu, “Uru pala pulka tjaru ngarinytja ma-kitikitiriwa ka manta utiriwa.” Ka mulapatu alatjiringu Godalu wangkanyangka. ¹⁰ Ka manta utiringkunyangka Godalu ininu “Manta”, munu paluru uru kitikitiringkula ngarinyangka ininu “Uru Pulkanya”. Munu paluru pukularingu wiru mulapa ngaranyangka. ¹¹⁻¹² Munu palulanguru wangkangu, “Mantangka ukiri tjutariwa munu punu kutjupa kutjupa tjuña kuļu pakala, punu uninypatjara munu punu maitjara tjuña kuļu uninypa waltytatjara waltytatjara.” Ka mulapatu pakaņu ukiri punu kutjupa kutjupa tjuña mulapa uninypa waltytatjara uwankara. Ka Godanya nyakula pukularingu wiru mulapa ngaranyangka. ¹³ Ka tjintu nyanga mañkuritja mungartjirira mungaringkula ngalya-tjinturingu.

¹⁴⁻¹⁶ Ka Godalu wangkangu, “Ilkaringka pala tili tjuña utiriwa nyinara manta irnyantjikitja kutju kalalaku, kutjupa tjuña mungaku.” Munu Godalu tili pulka kutjara tjunu, kutju pulka mulapa ini tjintu kalala irnyantjaku, munu kutjupa tjuku nguwanpa ini pira mungangka irnyantjaku. Munu paluru kililpi tjuña mulapa ilkariningka tjunu mungangka irnyantjaku. Munu Godalu wangkangu, “Tili nyanga palula tjanalan-guruya anangu tjutangku nyakula kuliklu tjinturingkunyangka munu mungaringkunyangka munuya pira ma-ngarinyangka nyakula kuliklu pira kutju ngarala wiyaringkunytja, munuya palulanguru kuli, nyinnga, piriyatku kuļu ngurkantankuku.” Ka mulapatu uwankara alatjiringu Godalu wangkanyangka. ¹⁷⁻¹⁸ Panya paluru tili tjuña ilkaringka tjunu manta irnyara utintjaku, tjintungku pakara irnyara kalalankunytjaku, pira kililpi tjuña mungangka irnyantjaku. Alatji paluru tili tjuña tjunu munga kalala titutitu rawa ngaranytjaku. Munu paluru nyakula pukularingu wiru mulapa ngaranyangka. ¹⁹ Ka tjintu nyanga kutjara kutjaritja mungartjirira mungaringkula ngalya-tjinturingu.

²⁰ Ka Godalu wangkangu, “Pala urungka unngu kuka tjuña utiringkula tjutariwa antipina kutjupa kutjupa tjuña mungilyi mulapa, wañampi tjuña, uru unngutja kutjupa kutjupa uwankara. Munu ilkaringka tjułpu kutjupa kutjupa tjuña parpakara para-ngarama mungilyi mulapa.” ²¹ Alatji Godalu wangkangku palyanu wañampi kutjupa kutjupa pulka tjuña munu antipina kutjupa kutjupa tjuña, uru unngutja uwankara paluru tjunu urungka unngu para-ngaranytjaku. Munu paluru ilkaringka para-nagaranytjaku tjułpu kutjupa kutjupa uwankara tjuña. Munu paluru nyakula pukularingu wiru mulapa ngaranyangka. ²² Munu paluru tjananya uwankara pukulmanu wangkara, “Kulunytjararingkulayanku tjułaringama. Uru unngutja tjuña urungka mungilyirira lipiringama,

kayanku tjulpu tjuṭa kuļu mantangka tjutaringama.” ²³ Ka tjintu nyanga mankur-kutjiritja mungartjirira mungaringkula ngalya-tjinturingu.

²⁴ Ka Godalu wangkangu, “Mantangka utiringkula ngarama para-ngarapai kutjupa kutjupa tjuṭa, panya kuka tjuṭa, munu kuka wiya tjuṭa kuļu, ngultju tjuṭa munu inura tjuṭa, pulka tjuṭa munu tjukutjuku tjuṭa kuļu, tjuninguru ankupai tjuṭa kuļu utiringkula para-ngarama.” Ka mulapaṭu alatjiringu. ²⁵ Godalu mantangka para-ngarapai kutjupa kutjupa uwankara palyanu, inura kutjupa kutjupa tjuṭa, ngultju kutjupa kutjupa tjuṭa, munu tjukutjuku tjuṭa kuļu, tjuninguru ankupai tjuṭa uwankara mulapa. Munu paluru uwankara nyakula pukularingu wiru mulapa ngaranyangka.

²⁶ Palulanguru Godalu wangkangu, “Wanyula nganananku purunypa anangu palyala nganaña purunypa nyinanytjaku.* Kaya anangu paluru tjana kuka uwankaraku mayatja ngaraku antipina tjuṭaku, tjulpu tjuṭaku, mantangka para-ngarapai uwankaraku, pulka tjuṭa munu tjukutjuku tjuṭaku kuļu.” ²⁷ Munu mulapaṭu Godalu anangu palunu palurunku purunypa. Ka paluru pula wati munu kungka. ²⁸ Munu Godalu pulanya pukulmanu alatji wangkara, “Nyupali tjitji tjuṭatjararingama, kaya nyupalilanguru walytja tjutaringama munuya manta winkingka ma-mungilyirira nyinama malatja malatja, munuya ngura tjuṭa mulapa palyanma tjiwariwari pukulpa palya nyinanytjikitjangku. Munuya kutjupa kutjupa uwankara mayatjangku kanyinma, antipina tjuṭa, tjulpu tjuṭa, kuka tjuṭa, mantangka para-ngarapai uwankara kuļu tjungura.”

²⁹ “Munu nyawa! Ngayulu ukiri uninypatjara kutjupa kutjupa uwankara, punu maitjara kutjupa kutjupa uwankara, mai mantatja uwankara kuļu mantangka tjunu nyura ngalkula pałtjaringkunytjaku.

³⁰ Munu ngayulu mai ukiri, mai parka pulka mulapa mantangka tjunu kukangku, tjulpungku, mantangka para-ngarapai uwankarangku ngalkuntjaku.” Ka mulapa alatjiringu Godalu wangkanyangka. ³¹ Ka Godalu uwankara palyantjatjanungku nyakula pukularingu uwankara wiru mulapa ngaranyangka. Ka tjintu nyanga mankur-mankuritja mungartjirira mungaringkula ngalya-tjinturingu.

2

¹ Uwa, alatji panya Godalu manta ilkari kutjupa kutjupa uwankara wangkangku palyanu, mantatja urutja ilkarijtja uwankara kuļu. ² Paluru panya tjintu mankur-mankurpa palyara wiyanu munu palulanguru tjinturingkula nyinara pakuwiyaringu piruku palyantja wiya tjintu panya 7-ta. ³ Munu paluru tjintu pala palunya milmilmanu palumpa tjintu wiru ngaranytjaku, panya tjintu pala palula paluru pakuwiyaringu uwankara palyara wiyanjtjanu.

Kaana Ini Edennga

⁴⁻⁵ Nyangatja tjukurpa nganmanyitjatjara panya Mayatja Godalu manta ilkari uwankara palyantjatjara. Ka panya nganmanyapa manta ilkari palyannyangka ukiri munu puṇu tjuṭa mantangka wiya ngarangi, panya Godalu mina ngangkalitja mantangka puyintjaku iyantja wiya kuwaripatu. Ka manta tjawara runyura kaana palyantjaku anangu ngaranytja wiyaṭu

* ^{1:26} Ngananya panya wati, minyma, tjitji tjuṭa kuļu wangkapai anangu tjuṭa nganampa wangkangku, palu Jew tjuṭangku tjanampa wangkangku adam wangkapai panya wati nganmanyitjaku ini purunypa.

kuwaripa. ⁶ Palu manta unngunguru aruma purunytju pakara pupara manta tulykuningi.

⁷ Palulanguru Mayatja Godalu manta mantjinu munu wati palyanu mantanguru. Munu paluru wati mulya puura kurunpa tjarpatjunu, ka wati paluru puntu winki wankaringu. ⁸ Ka Godalu kaana palyanu kakarara ngura ini Edennga, munu nyara palula wati panya palunya tjunu. ⁹ Munu paluru mantanguru pakaltjingaпу puни kutjupa kutjupa tjuta wiru mulapa mai wirutjara paluru ngalkula paltjaringkunytjaku. Munu puни kutjara kutjupa kaanangka ngururpa tjunu. Panya puни kutjunguru anangungku mai ngalkula titutjara wanka nyinaku, palu puни nyara kutjupanguru mai ngalkula paluru nintiringkuku nyaa palya munu nyaa kura.

¹⁰ Ka ngura nyara Edenta uru pulka ukalingangi karungka, ka ukiri puни tjuta ngarangi urungka itingka. Ka karu paluru kaananguru ukalingkula tjararingkula karu kutjara kutjararingu ini nyanganpa – Pitjannga, Kiyannga, Taikiritjanya, munu Yupuraitinya. ¹¹⁻¹² Ka karu Pitjannga ngura ini Apilala ngururwanu ma-ngarira ukalingangi. (Ngura nyara Apilala gold wiru mulapa ngaringi, munu pantipai wiru mulapa, munu apu kutjupa wiru mulapa upula purunypa kuли ngaringi.) ¹³ Ka karu panya Kiyannga ngura ini Kuutjula ngururwanu ma-ngarira ukalingangi. ¹⁴ Ka karu panya Taikiritjanya ngura ini Atjiriyala kakaraawanu katakutjara wati-ngarira ukalingangi. Ka karu kutjupa panya Yupuraitinya.

¹⁵ Ka panya Mayatja Godalu wati panya palunya tjunu ngura nyara Edenta kaana atunymara kanyintjaku munu manta tjawara runyura mai pakaltjingantjaku. ¹⁶ Munu Godalu wangkangu palula, “Kaanangka puни maitjara tjuta ngaranyi, ka nyuntu palya puни uwankaranguru mai mantjira ngalkunma. ¹⁷ Palu puни kutjunguru ngalkuwiyangku wantima, puни panya palya munu kura nintilpailanguru. Mai pala palunya wantima, panya puни pala palulanguru mantjira ngalkulampa nyuntu mulapa iluku.”

¹⁸ Palulanguru Mayatja Godalu kuliningi, “Wati nyangatja kutju nyinanyi ngaltutjara, malpa wiya. Wanyu kaна palumpa malpa palyala palula tjungu nyinara alpamilantjaku, ka pula pukulpa nyinama malparara.”

¹⁹⁻²⁰ Ka panya Godalu mantanguru palyanu mantangka para-ngarapai uwankara kuka kutjupa kutjupa tjuta munu tjulpu tjuta kuли. Munu paluru nyanganpa uwankara wati panya palulakutu ngalya-katingu kutju kutju nyakula ini tjunkunytjaku. Ka wati paluru nyakula ini tjuta wangkara wanangingi, ka paluru tjana uwankara initjararingu tjulpu tjuta munu mantangka para-ngarapai tjuta, ngultju tjuta munu inura tjuta kuли. Palu nyanga tjanala uwankaranguru kutju wiya ngarangi watiku malpa.

²¹ Ka palulanguru Mayatja Godalu wati palunya pulkara kunkuntjunu munu kunkunpa pulka ngarinyangka kantilypa kutju mantjinu munu mantjira iltjanpangka piruku malakungku tjutunu. ²² Munu paluru kantilypa pala palulanguru kungka palyanu munu palyara wati panya palulakutu ngalya-katingu. ²³ Ka wati paluru nyakula pulkara pukularingu munu Godala wangkangu alatji, “Ai! Nyangatja ngayulu purunypa, panya nyuntu palunya ngayulanguru palyanu, ngayuku tarkanguru, ngayuku

iltjanpanguru. Kaña palunya inilku, ‘kungka.’ ”* ²⁴ Ka pala palulanguru panya, watingku mama ngunytju wantikatipai munu kungka altira palula tjunguringkupai munu pula kurirara kutjuringkupai iltjanpa kutjuṭu. ²⁵ Ka wati panya paluru pula nikiti nyinangi kunṭa wiya alatjiṭu.

3

Pula Kurirara Godala Tungunpungkunytja

¹ Palu kutju liru Godalu palyantja ayinayini mulapa nyinangi kutjupa uwankarangka waintarinytja. Ka tjintu kutjupangka liru paluru pitjala kungka panya palula tjapinu ngunti kurantjikitjangku, “Yaaltjin kulini? Panya kaana nyangangka puṇu maitjara tjuṭa ngaranyi. Ka wanyu mulapa Mayatja Godalu nyupalinya painu puṇu nyanga uwankaranguru mai ngalkuwiyangku wantintjaku?”

² Ka kungkangku wangkangu palula, “Wiya, Godalu palyanmanu ngali puṇu tjutanguru mai mantjira ngalkuntjaku. ³ Palu mulapa puṇu kutjungurulinya painu ngalkuwiyangku wantintjaku, puṇu nyara kaanangka ngururpa ngaranyi, nyara palulanguru. Alatji paluru ngalinya painu, ‘Mai palunya pampulwiyangku wantima ilunytjaku-tawara.’ ” ⁴ Ka lirungku wangkangu, “Wiya, palatja ngunti wangkanytja. Nyuntu ngalkula ilunytja wiya. ⁵ Godalu alatji wangkara painu panya paluru nintingku kulini nyuntu mai palunya ngalkula nintiringkuku munu Godalu purunytpu nintingku kulilkul palya munu kura. Pala palu purunyarintjaku-tawara Godalu nyuntunya painu.” Alatji lirungku wangkangu ngunti kurantjikitjangku.

⁶ Ka lirungku wangkanyangka kungka panya paluru puṇu panya nyakula kuliningi, “Ai! Mulapa nyangatja wiru mulapa ngaranyi. Ka nyanga wiruṭu ngaranyi ngalkuntjaku.” Munu paluru mukuringkula kuliningi, “Ngayulu kuwari mai nyanga palunya ngalkula Godanya purunypa ninti mularariku.” Munu alatji kulintjatjanungku paluru mai panya mantjira ngalkunu. Munu palumpa kuri ungu, ka pula tjungungku mai palunya ngalkunu. ⁷ Munu pula ngalkula mapalku kulinu kura palyantjatjanungku munu pulanku nikiti ngaranytjatjanungku nyakula kunṭaringu. Palulanguru pula nyalpi pułka tjuṭa puṇu ilingenuru mantjinu munu wakara tjungurra mantara purunypa kutjara palyanu munu pulanku karilpa karpira angatjunu.

⁸ Munu pula mungartjirinyangka kulinu Mayatja Godanya kaanangka unngu para-ngaranyangka, munu pula ngulu kumpinu puṇu tjaṭangka.

⁹ Palu Mayatjalu wati panya palunya tjapira nguriningi, “Yaaltjingkan nyinanyi?”

¹⁰ Ka wangkangu, “Wiya, nyuntu kaanangka para-ngaranyangka na kuliningi, mununa nguluringkula kumpinu panya ngayulu nikiti ngaranyi.”

¹¹ Ka Godalu wangkangu, “Nganalunta wangkangu nyuntu nikiti ngaranytja? Nyuntu wanyu puṇu panya palulanguru mai panya mantjira ngalkunu? Panya ngayulu painu ngalkuwiyangku wantintjaku.”

¹² Ka wangkangu, “Wiya, kungka nyanga nyuntu ngayunya ungkunytjaluni ungu, kaña ngalkunu.”

* ^{2:23} Jew tjuṭaku wangkangka ini panya *wati* ngaranyi alatji “Ih”, ka ini panya *kungka* palu purunypa ngaranyi tjungu nguwanpa alatji “Ihha”. Ka palu purunypa ngaranyi wangka panya English-ngka panya *man* munu *woman* tjungu nguwanpa ngaranyi. Ka nganampa palu purunypatu ngaranyi, wangka panya anitji, panya watila wangkapai *wampunpa* munula minyma wangkapai *wamana*.

¹³ Ka Godalu kungka panya palunya wangkangu, “Nyaakun nyuntu alatjingaṇu?”

Ka wangkangu, “Wiya, lirungkuṇi ngunti kuraṇu ngalkuntjaku, kaṇa ngalkunu.”

¹⁴ Ka palulanguru Godalu lirungka wangkangu alatji, “Nyuntu kungka nyangatja ngunti kurannyaṅkaṇa nyuntunya ngapartji kuraṇi. Pala mantangka para-ngaṛapai kutjupa kutjupa tjuṭa nyinanyi, palu ngayulu nyuntunya kutju kuralku kutjupa tjuṭa wiya, kankuya aṇangu tjuṭangku nyuntumpa mukuringkunytja wiyangku alatjiwantiku. Ka nyanganguru nyuntu titutjara tjuninguru kutju para-pitjalinkuku kata ulpuru-ulpuru manta tjuningka pampura. ¹⁵ Kaṇa nyanganguru liru kungkararangku nyupalinku rawa kuraringkula pikaringkunytjaku palyalku, ka nyuranku liru tjuṭangku munu aṇangu tjuṭangku rawangku pikangku pungkuku. Panya aṇangungku nyuntunya kata kantura puruntankuku, ka nyuntu palunya paalpa patjalku.” Alatji Godalu liru panya wangkara kuranmanu.

¹⁶ Munu paluru kungkawarangka ngapartji wangkangu alatji, “Nyuntun ngayula tungunpungkula mai ngalkunu, ka pala palulanguru ngayulu nyuntunya ititjararingkunyangka paku pulka palyalku, ka nyuntu iti kanyira pika pulkaringkuku. Palu nyuntu wati kuriku pulkara mukuringkuku, ka paluru nyuntunya mayatjangku kanyilku.” Alatji Godalu kungkangka wangkangu.

¹⁷ Munu paluru watingka ngapartji wangkangu alatji, “Ngayulu panya nyuntunya wangkangu puṇu panya palulanguru mai ngalkuwiyangku wantintjaku. Palu nyuntu ngayula tungunpungkula kuringka kulinu munu mantjira ngalkunu. Pala palulanguru kuwari manta uwankara kuraringanyi, ka ukiri, puṇu tjuṭa wirura pakantja wiyaringkuku. Ka nyuntu mai ngurintjikitja pulkara mulapa warkariku titutjara alatjiwantiku ilunytjakutu-wangkara. Kuwari mantangku nyuntunya pulkara pakuni mai ngalkuntjikitja warkarinyangka. ¹⁸ Ka mantangka pakalku ukiri kurakura tjuṭa tjlkatjara tjuṭa, ka nyuntu mai ilytjtja kutju ngalkuku. ¹⁹ Munu nyuntu mantangka mai pakaltjingantjikitja pulkara mulapa warkariku akuri-akuri pulka. Palu nyuntu pulkara warkarinytja wiyangku wantira mai tjukutjuku mantjilku munun puṭu nguwanpa paltjaringkuku. Nyuntu titutjara alatjiwantiku ilunytjakutu-wangkara, munun ilura manta pala palula tjunguringkula piruku mantaringkuku. Panya ngayulu nyuntunya mantanguru palyaṇu, ka nyuntu ilura piruku mantaringkuku.” Alatji Godalu watingka wangkangu.

²⁰ Ka Adamalu palumpa kuri ininu Eve-anyā, panya minyma nyanga palulanguru aṇangu uwankara utiringkula wanka nyinaku małatja małatja. ²¹ Ka Mayatja Godalu kuka miringuru mantara palyaṇu Adamaku pulampa Eve-aku, ka pula tjarpangu.

Godalu Adamanya Pulanya Eve-anyā Kaananguru Paira Iyantja

²² Palulanguru Mayatja Godalunku kuliningi, “Kuwari aṇangu paluru pula mai panya ngalkuntjatjanungku nganaṇa purunytju nintingku kulini palya munu kura. Kala nyara palulanguru nganaṇa kuwari palunya pulanya kaananguru paini małakungku pitjala puṇu panya kutjupanguru mai ngalkula titutjara wanka nyinanytjaku-tawara.” ²³ Munu Godalu pulanya kaana panya ini Edentanguru paira iyanu ankula ngura kutjupangka manta tjawara runyura warkarinytjaku. Panya Godalu wati mantanguru palyaṇu, munu pulanya kuraringkunyangka paira iyanu manta panya palulatu maikitja warkarinytjaku. ²⁴ Munu pulanya paintjatjanungku

kaanangka kakarara-pitinypa angelpa nyalpitjara tjuta ngaratjunu munu tjula waṛa pulka kuļu tjunu, kaya anga-ngarangi aŋangungku puṇu panya palulanguru małakungku pitjala mai ngalkula wanka titutjara nyinanytjaku-tawara. Ka tjula pulka panya paluru ayinayini tili winkitjara uri-uripai aŋangungku nyakula nguluringkunytjaku.

4

Kainnga Pula Abelnga

¹ Ka Adamanya pula Eve-anja tjungu nyinara katjatjararingu. Ka Eve-alu wangkangu, “Tjitji nyangatjanı Godalu ungu. Palulanguruṇa palunya inini Kainnga.” ² Munu pula ngula piruku katjatjararingu munu palunya ininu Abelnga.

Ka Kaintu pulkaringkula manta tjawara runyura kaana pakaltjin-ganngi, palu Abeltu pulkaringkula tjiipi tjuta kanyiningi. ³⁻⁴ Munu pula ngula Godanya ungkunytjikitjangku kutjupa kutjupa tjuta katingu pulampanguru, Kaintu katingu mai tjuta kaananguru. Ka Abeltu katingu tjiipi kułunypa katja nganmanyitja. Munu paluru pungkula kuka kanpitjara wiru mulapa Godanya ungu palumpa pukularira. Ka Godanya Abelku pukularingu paluru kuka katira ungkunyangka. ⁵ Palu paluru Kainku pukularinytja wiyangku wantingu. Ka Kainnga pulkara mirpañaringu munu paluru mulyararingu.

⁶ Ka Mayatja Godalu palula wangkangu, “Nyaanguru nyuntu mirpanarinyi? Nyaanguru nyuntu mulyara-mulyara nyinanyi? ⁷ Nyuntu tjinguru tjukarurungku palyantjatjanumpa pukulpa nyinama. Palu nyuntu panya tjukarurungku palyalwiyangku wantingu, kanta kurangku nyuntunya unngu waruṇu nyakula mulyara-mulyararinytjaku. Palu uti nyuntu kura palunya kulilwiyangku wantima nyuntunya kura mularmankunytjaku-tawara.” Alatji Godalu Kainta wangkangu.

⁸ Ka kulira wantingu munu ankula palumpa małanypa Abelnga wangkangu, “Arali pułikutu.” Munu pula anu pułikutu, ka katira kułangku pungkula iluntanu małanypa panya, munu pungkula wantikatira małaku anu ngurakutu.

⁹ Ka ngula Mayatja Godalu Kainta tjinpinu, “Nyuntumpa panya małanypa yaaltji?”

Ka wangkangu, “Wampa! Ngayuluṇa ngurpa! Iti wiya paluru, wati alatjiṭu, ngayulu aṭunymara kanyintjaku wiya.”

¹⁰ Ka palulanguru Godalu palunya wangkangu, “Wiya, nyaanguru nyuntu małanypa pungkula iluntanu? Utin wantima! Palu kuwari nyuntumpa małanypaku milkalingku mantanguru ngayunya wangkanyi nyuntunya ngapartji pungkunytjaku. ¹¹ Nyanga palulanguru kuwari nyuntumpa tjituru-tjituru pulka ngaraku. Nyanganguru nyuntu manta tjawara kaana puṭu palyalku. Panya mantangka nyuntumpa małanypaku milkali tjutingu nyuntu palunya pungkula iluntankunyangka. ¹² Ka nyuntu tjinguru manta tjawara runyulku ukiri uṇinypa tjunkunytjikitjangku, palu ukiri panya mantanguru pakantja wiya alatjiṭu ngaraku. Kan wantira ankula ngura tjuṭangka waara titutjara para-pitjalinkuku munun ngura panya kutjungka puṭu nyinaku.” Alatji Mayatja Godalu Kainta wangkangu.

¹³ Ka wati panya paluru wangkangu, “Wiya, nyangatja wituwitu mulapa. Nyuntu alatjingannyangkaṇa ngayulu puṭu wanka nyinaku. ¹⁴ Panya nyuntu kuwari ngayunya ngayuku mantanguru paira iyani, kana manta piruku tjawara puṭu warkarinyi. Nyuntunin ngayunya mauntananyi

nyuntula mìrangka nyinanytja wiyaku, kaña kumpilpa tiütjara nyinaku. Palulanguruña ngura wiya waara para-pitjalira nyinaku ngura kutjupangka kutjupangka, kañiya añaŋgu kutjupa tjutangku tjinguru nyakula pungkuku.”

¹⁵ Palu Godalu Kainta wangkangu, “Wiya kulila! Añaŋgu kutjupangku nyuntunya pungkunyangkampaña ngayulu tjananya ngapartji pungkuku walytja palumpa 7 kuļu.” Munu alatji wangkanytjatjanungku paluru Kainta añaŋgungka walka tjunu kutjupangku palunya nyakula ngurkantara pungkuwiyangku wantinytjaku. ¹⁶ Palulanguru Kainnga pula kurirara Mayatja Godanya wantikatira anu ngura Edenta kakarařa, munu pula ngura ini “Para-pitjalinkunytjala” ngura tjunkula nyinangi.

Kainkunu Tjuta

¹⁷ Ka ngula Kainnga pula palumpa kuri tjungu nyinara katjataralingu munu pula palunya ininu Iinakanya. Ka nyara palula ařa Kaintu ngura tawunu palyaningi walı tjutatjara munu ngura palunya ininu Iinakanya palumpa katjanguru. ¹⁸ Ka ngula Iinakalu katja utinu ini Iratanya, ka palulanguru Iratalu katja utinu ini Maiyutjailnga ka Maiyutjailtu utinu katja ini Mitjutjailnga, ka paluru katja ini Lamikanya utinu.

¹⁹ Ka Lamikalau kuri kutjara altingu ini Atanya pulanya Tjilanya. ²⁰ Ka Atalu katja kutjara kanyinu ini Tjapalnga pulanya Tjupalnga. Ka Tjapaltu ngula pulkaringkula kuka ngultju tjuta kanyiningi munu tiintatjara paranyinarinangi. Ka Tjapalkunu tjutangku malatja malatjangku panya palu purunytju kuka tjuta kanyilpai munu tiinta wiltjara nyinapai, tjamu panya Tjapalnga purunypa. ²¹ Ka palumpa malanypangku Tjupaltu ngula pulkaringkula inma mayu wiru wangkatjingara kuliningi puňu alatjara puura munu puňu kita purunypa wangkatjingara. Ka Tjupalkunu tjutangku malatja malatjangku palu purunytju puňu alatjara puura, puňu kita purunypa wangkatjingara inma mayu kulilpai, tjamu purunytju.

²² Ka Lamikaku kuri kutjupangku Tjilalu katja kanyinu ini Tupal-Kainnga munu uňtalpa kuļu kanyinu ini Naimanya. Ka kutangku ngula pulkaringkula ayananguru palyaningi alkara, tjula, tjitjula, munu kutjupa kutjupa tjuta kuļu.

²³ Ka tjintu kutjupangka wati panya Lamikalau palumpa kuri kutjarangka wangkangu, “Ata munu Tjila, kulilani pula! Ngayulu wati yangupala pungkula iluntanu ngayunya pungkunyangka. ²⁴ Ka panya Godalu wangkangu Kainku ngalkilarira añaŋgu 7 iluntankunytjikitjangku. Munu palu purunypatu kutjupangku ngayunya pungkunyangkampa paluru añaŋgu tjuta mulapalta nampa 77 iluntankuku ngayuku ngalkilarira.” Alatji Lamikalau wangkangu kuri kutjarangka.

Tjiitjinya Munu Inatjanya

²⁵ Ka Adamanya pula piruku katjataralingu. Ka Eve-alu wangkangu, “Nyngatjani Godalu katja kutjupa ungu Abelku arangka nyinanytjaku, panya Kaintu Abelnga pungkula iluntanu. Palulanguruña katja nyangatja inini Tjiitjinya.” ²⁶ Ka Tjiitjinya pulkaringu munu ngula kuri alřira pula katjataralingu munu palunya ininu Inatjanya. Kaya nyanga palula arangka añaŋgu tjutangku Mayatja Godanya wangkara walkuningi.

1-2 Ka nyangatja Adamaku walytjapiti ma-tjuṭaringkunytja malatja malatja. (Panya Godalu aŋangu palyaŋu palurunku purunypa alatjiṭu. Ka paluru pula nyitayira kungka. Ka pulanya palyantjatjanungku pukulmanu munu pulanya ininu “aŋangu”.) **3-4** Ka Adamanya yiya tjuṭa 130 nyinanytjatjanu piruku katjatjararingu, ka katja nyanga paluru mama purunypa alatjiṭu, ka palunya ininu Tjiitjinya. Munu nyara palula malangka Adamanya piruku yiya tjuṭa mulapa nyinangi nampa 800 munu tjitji kutjupa tjuṭatjararingangi. **5** Munu paluru tjlpi mulararira kutju ilungu yiya 930 nyinanytjatjanu rawa mulapa.

6-8 Ka Tjiitjinya pułkaringkula yiya tjuṭatu nyinangi, munu 105 nyinanytjatjanu katjatjararingu munu katja palunya ininu Inatjanya. Munu palula malangka paluru piruku yiya tjuṭa mulapa nyinangi nampa 807 munu tjitji kutjupa tjuṭatjararingangi. Munu ngula mulapalta ilungu yiya 912 nyinanytjatjanu rawa mulapa.

9-11 Ka wati panya Inatjanya yiya 90 nyinanytjatjanu katjatjararingu munu palunya ininu Kinannga. Munu paluru piruku yiya tjuṭa mulapa nyinangi nampa 815 munu tjitji kutjupa tjuṭatjararingangi. Munu paluru ngula mulapalta ilungu yiya 905 nyinanytjatjanu rawa mulapa.

12-14 Ka wati panya Kinannga yiya 70 nyinanytjatjanu katjatjararingu munu palunya ininu Maalalilnga. Munu nyara palula malangka paluru yiya tjuṭa mulapatu nyinangi nampa 840 munu tjitji kutjupa tjuṭatjararingangi. Munu paluru ngula mulapalta ilungu yiya 910 nyinanytjatjanu rawa mulapa.

15-17 Ka wati Maalalilnga yiya nampa 65 nyinanytjatjanu katjatjararingu munu palunya ininu Tjaritanya. Munu palula malangka piruku yiya tjuṭa mulapa nyinangi nampa 830 munu tjitji kutjupa tjuṭatjararingangi. Munu paluru ngula mulapalta ilungu yiya 895 nyinanytjatjanu rawa mulapa.

18-20 Ka Tjaritanya yiya tjuṭatu nyinangi munu 162 nyinanytjatjanu katjatjararingu munu palunya ininu Inakanya. Munu palula malangka paluru piruku yiya tjuṭa mulapa nyinangi nampa 800 munu tjitji kutjupa tjuṭatjararingangi. Munu palulanguru tjlpi mulararira ilungu yiya tjuṭa mulapa nyinanytjatjanu nampa 962.

21-22 Ka wati panya Inakanya yiya 65 nyinanytjatjanu katjatjararingu munu palunya ininu Mitjutjilanya. Munu palula malangka Inakanya pula Godanya malparara nyinangi yiya tjuṭa mulapa nampa 300, munu paluru tjitji kutjupa tjuṭatjararingangi. **23-24** Paluru panya Godaku malpa titutjara nyinangi palula tjungu, munu yiya nampa 365 nyinanytjatjanu paluru ilunytja wiya arkayiringu, panya Godalu palunya kultukaṭangku wanka mantjinu ngarira ilunytja wiyaṭu.

25-27 Ka wati panya Mitjutjilanya yiya nampa 187 nyinanytjatjanu katjatjararingu munu katja palunya ininu Lamikanya. Munu palula malangka piruku yiya tjuṭa mulapa nyinangi nampa 782, munu tjitji kutjupa tjuṭatjararingangi. Munu paluru rawa mulapa nyinara ngula mulapa ilungu yiya nampa 969 nyinanytjatjanu.

28-29 Ka wati panya Lamikanya yiya nampa 182 nyinanytjatjanu katjatjararingu munu palunya ininu Noah-nya munu wangkangu, “Mayatja Godalu panya manta kuraṇu, kala palulanguru maikitja pulkara mulapa warkarira pakuringkupai. Palu tjitji nyanga Noah-lu pułkaringkula ngalinya pakuringkunyangka paku wiyaliku pukulpa nyinanytjaku.” Alatji paluru wangkara ininu Noah-nya. **30-31** Munu tjitji palunya mantjintjatjanu malangka Lamikanya piruku yiya tjuṭa mulapa nyinangi munu tjitji

kutjupa tjutatjararingangi. Munu paluru ngula mulapalta ilungu yiya tjuta mulapa nyinanytjatjanu nampa 777.

³² Ka wati Noah-nya yiya tjuta mulapalta nyinangi nampa 500 munu palulanguru katjatjararingu munu palunya ininu Tjimanya. Munu palulanguru katja kutjupa kanyinu ini Aamanya munu piruku kutjupa kanyinu ini Tjaipitjanya.

6

Anangu Tjuta Ma-kuraringkunytja

¹⁻² Kaya tjiti tjutatjararingkula anangu winki mulararingu munuya manta winkingka ma-nyinara wañanangi. Kaya nyara palula arangka ilkaritja tjutangku anangu tjutaku untalpa tjuta nyangangi, munuya yunpa wiruku nyakula pulkara mukuringangi palunya tjananya altinytjikitja, munuya kunta wiyangku altingi tjana mukuringkula.

³ Ka Mayatja Godalu nyangatja nyakula tjituru-tjitururingu munu alatji wangkangu, “Nyanga palulangurya anangu tjuta kuwari ngayuku kuruntjara titutjara nyinanytja wiyingkuku, panya paluru tjana iltjanpatjara kutju mantangka nyinapai unytju. Palulangurya anangu tjuta kuwari itinguru pulkaringkula yiya 120 kutju nyinanytjatjanu wiyingkuku, nganmanyitja tjuta purunypa rawa mulapa nyinanytja wiya.”

⁴ Ka nyara palula arangka munu malangka kulu anangu pulka tjuta nyinangi ini Nipilima, panya ilkaritja tjutaya ananguku untalpa tjutangka tjunguringangi, kaya tjanampa tjiti tjuta kanyiningi ini Nipilima tjuta. Kaya anangu tjutangku kuwari wati Nipilima tjuta kulilpai iriti nyinanytja, munuya tjananya mirawanipai wati mirpanju pulka tjuta, kutjupa uwankarangka waintarintja.

⁵⁻⁶ Ka Godalu anangu tjuta pulkara kuraringkunyangka nyangangi, panya paluru tjana titutjarangku kura kutju kulilpai palyanyku nyinanytjikitjangku kulilwiyangku. Ka Godanya pulkara tjituru-tjitururingu putu palya nyakula munu kulinu, “Nyaakuna panyatja anangu nyanganpa palyara tjunu mantangka?” ⁷ Munu palulanguru wangkangu, “Anangu nyanga ngayulu palyantja uwankaraña kuwari iluntara wiyaliku, kuka tjuta, mantangka para-ngarapai tjuta, tjulpu tjuta kulu uwankara mulapa. Panya ngayulu palyantjatjanu kuwari pulkara tjituru-tjitururingu. Utina panyatja tjananya palyantja wiyangku wantima.” Alatji Mayatja Godalu tjituru-tjitururinga wangkangu. ⁸ Palu wati kutjuku Mayatjanya nyakula pukularingu tjukaruru nyinanyangka, wati panya ini Noah-ku.

Noah-nya

⁹ Ka nyangatja tjukurpa panya Noah-nyatjara. Panya paluru kutju wati tjukaruru nyinapai, palya mulapa, ka anangu tjutangku palunya kura putu ngurkantanangi. Panya paluru Godala wangañarangku kulilpai palumpa malpa mulapa. ¹⁰ Munu paluru katja mankurtjararingu ini nyanganpa Tjimanya, Aamanya munu Tjaipitjanya.

¹¹ Palu Godalu anangu kutjupa uwankara nyangangi kura mulapa nyinanyangka, kaya manta winkingka anangu tjutangku pikangku pungkula wañingi mirpanju alatjiwu ngalturingkunytja wiyangku. ¹² Ka Godalu ngura uwankarangka nyangangi kura pulka ngaranyangka, panya anangu uwankara kura mulararingu.

¹³ Palulanguru Godalu Noah-la wangkangu alatji, “Ngayulu anangu uwankara wiyanjtikitjangku kulini, mantatja uwankara kulu, panya tjana

kura pulka mulararingu manta winkingka. Ka palulanguruṇa tjananya uwankara alatjiṭu wiyaliku. ¹⁴ Ka nyuntu pauta pulka palyala punu palyanguru, munu pauta urilitja munu unngutja kuļu kititjura aļa tjuṭa patila alawanu uru tjarpanytjaku-tawara. Munu pauta unngu ruuma tjuṭa palyala tjuṭa nyinanytjaku. ¹⁵ Pauta palunya palyala pulka mulapa nyanga alatji, wara pulka palyala nampa nyangatja 133 metre, munu kultunguru mitjuramilara palyala nampa nyangatja 22 metre, munu mantanguru mitjuramilara palyala katukutu nampa nyangatja 13 metre. ¹⁶ Munu minangka-tawara pauta katu kuļu palyala, palu katu palyara tjura tjukutjuku kantilytja katu panya katutjangka kantilytja ngururpa aļa tjukutjuku para-ngarala wanantjaku. Munu pauta unngu palyala ruuma katulkira katulkira maņkurpa ngaranytjaku, munu pauta kultungka tuwa kutju palyala tjarpanytjaku. ¹⁷ Kaņa ngayulu mina pulka mulapa iyalku mantakutu uru pulkaringkula katuringkula mulapa tjiwariwari ngarira aņangu uwankara kuka kuļu ұrungku tjutura wiyanjtjaku. Kaya mantangka para-ngarapai uwankara iluku, kuka tjuṭa, kuka wiya tjuṭa, tjudpu tjuṭa, aņangu tjuta, uwankara mulapaya wanka nyinanytjatjanu uru tjudkira ngakara iluku. ¹⁸ Palu nyuranya ngayulu kalkuņi wankaru kanyintjikitjangku. Ka nyupali kurirara munu nyupalimpa katja maņkurpa munu tjanampa kuri maņkurpa kuļu, paluru nyura pautangka tjarpala wankaringkuku. ¹⁹⁻²⁰ Munu nyuntu kuka tjuṭa, kuka wiya tjuṭa kuļu ini kutjupa kutjupa uwankaranguru kutjara mantjira pauta unngu tjarpaljura kurirara kurirara, munu tjudpu ini kutjupa kutjupa uwankaranguru, tjuninguru ankupai ini kutjupa kutjupa uwankaranguru kuļu kutjara kurirara kurirara tjarpaljura pauta unngu tjana kulu wankaringkunytjaku. Panya paluru tjana uwankara nyuntulakutu kurirara kurirara pitjaku nyuntu tjarpaljura wankaru kanyintjaku. ²¹ Munu mai pulka mulapa tjintu tjuṭaku mantjira pautangka tjarpaljura mai kutjupa kutjupa tjuṭa kuka tjuṭaku, kuka wiya tjuṭaku, tjudpu tjuṭaku munu nyurampa kuļu.”

²² Ka Noah-lu wangañarangku kulinu munu Godalu wangkanytja uwankara palyanu.

7

Urungku Katuringkula Uwankara Wiyantja

¹ Ka pauta panya palyara wiyaringkunyangka Mayatja Godalu Noah-la wangkangu, “Pauta unnguya tjarpa nyupali kurirara munu nyupalimpa katja maņkurpa munu tjanampa kuri maņkurpa kuļu. Panya ngayulu nyuntunya kutju nyangu tjukaruru palyanyku nyinanyangka, panya aņangu kutjupa uwankaraya kura kutju palyalpai nyinanyi. ² Ka panya kuka kutjupa kutjupa tjuṭa ngaranyi nyura pungkula warungka tiliwakařa Godanya ungkula walkuntjaku. Kuka panya palula tjanalanguru tjara mantjira pautangka tjarpaljura 7 kutjupa, 7 kutjupa kurirara kurirara. Palu kuka kutjupa tjuṭanguru kutjara kutju kurirara mantjira tjarpaljura kutjara kutjupa, kutjara kutjupa. ³ Munu tjudpu kutjupa kutjupa uwankaranguru kuļu mantjira tjarpaljura 7 kutjupa, 7 kutjupa. Alatji kuka, tjudpu, mantangka para-ngarapai uwankaranguru tjara mantjira tjarpaljura paluru tjana wankaringkula ұrungka maļangka pautanguru ukalingkula piruku mantangka nyinara ma-tjuṭaringkunytjaku. ⁴ Uwa, kuwari nyanga tjintu 7 ngarala wiyaringkunyangkaņa ngayulu mina pulka iyalku mantakutu, ka mina paluru kalala mungangka rawangku

puyilku pira kutjara nguwanpa, ka manta winkingka uru pulkaringkuku munu ngayulu palyara tjunkunytja uwankara wiyalku, anangu tjuta, kuka tjuta, tju_lpu tjuta ku_lu, mantangka para-ngarapai uwankara.” Alatji Godalu wangkangu. ⁵ Ka Noah-lu wanga_narangku kulinu munu Godalu wangkanytja uwankara palyanu.

⁶ Ka uru pulka mantangka wirkankunytja arangka Noah-nya wati iritija mulapa nyinangi yiya nampa 600. ⁷ Munu paluru pula kurirara pautangka tjarpangu urunguru wankaringkunytjikitja, ka pulampa katja ma_nkurpa munu tjanampa kuri ma_nkurpa ku_lu tjarpangutu. ⁸⁻⁹ Ka Godalu mantangka para-ngarapai uwankaranguru nyitayira kungka ngurkantanu munu Noah-lakutu ngalya-katingu, kuka tjuta, tju_lpu tjuta, kutjupa kutjupa tjuta ku_lu. Ka Noah-lu tjananya uwankara pautangka tjarpatjunu Godalu wangkanytjitungka. ¹⁰ Ka uwankara tjarpara wiyaringu, ka palulanguru tjintu 7 ngarala wiyaringkunyangka uru pulka mulatu manta tjutunu.

¹¹⁻¹² Uwa, Noah-nya yiya panya 600 nyinanyangka malangka pira kutju ngarala wiyaringkula pira kutjupalta piruku ma-paka_u kutjararinjtjik-itja, ka nyara palula-arangka mina pulka mulatu manta winki apu murpu tjuta ku_lu tjutunu. Panya urungka unngu manta unnungururu mina kutjupa pulka mulapa ngalya-paka_u, ka urungku panya mapulkaringkula ma-lipiringkula mantalta tjutunu. Ka panya ilkareringuru mina pulka mulapa punkara tjunguringangi uru panya mantatjangka munu ka_la_la mungangka ku_lu rawangku puyiningi pira kutjara nguwanpa.

¹³⁻¹⁶ Ka panya palula kuwaripangka Godalu wangkanyangka Noah-lu mantangka para-ngarapai kutjupa kutjupa uwankaranguru kurirara kurirara mantjira pautangka tjarpatjunu, kuka kutjupa kutjupa tjuta munu kuka wiya tjuta ku_lu, ngultju tjuta munu inura tjuta, tju_lpu kutjupa kutjupa tjuta munu tjuninguru ankupai kutjupa kutjupa tjuta ku_lu Noah-lu tjarpatjunu. Munu palulanguru paluru pula ku_lu kurirara pauta unngu tjarpangu, ka pulampa katja ma_nkurpa Tjimanya, Aamanya, Tjaipitjinya tjana ku_lu tjarpangu kurirara kurirara. Ka tjana uwankara tjarpara wiyaringkunyangka Godalu tuwa patinu.

¹⁷⁻¹⁸ Ka panya minangku rawangku puyiningi kalala mungangka pira kutjara nguwanpa, ka uru mantangka pulkaringkula katuringangi, munu ngati pulka mulapalta ngaringi tjiwariwari. Ka pauta panya palunya urungku katuningi, ka urungku katu nyinangi. ¹⁹ Ka urungku panya piruku katuringkula tjaalyngarala puli murpu wara tjuta uwankara tjutura patinu munu uru kutju ngaringi tjiwariwari manta winkingka.

²⁰ Munu uru paluru piruku_u katuringkula katu mulapa ngaringi puli murpungka waintara nampa panya 7 metre. ²¹ Ka uwankara mulapa mantangka wanka para-ngaranytja tjuta ilungu uru tjkira, tju_lpu tjuta, kuka tjuta, kuka wiya tjuta, tjuninguru ankupai tjuta, uwankara mulapa wiyaringu anangu uwankara ku_lu. ²²⁻²³ Uwankara panya mulyanguru tjaanguru ngaalymankupai ilungu uru unngu. Mantangka wanka para-ngarapai uwankara mulapa wiyaringu Godalu urungka wiyannyangka, anangu tjuta, kuka tjuta, kuka wiya tjuta, tjuninguru ankupai tjuta, tju_lpu tjuta ku_lu uwankara paluru wiyanu. Ka Noah-nya tjana pauta panya unngu nyinanytja tjuta kutju wankaringu. ²⁴ Ka uru panya pulkangku manta tjutura ngaringi rawa alatji_u tjintu nyanga alatji_u 150, panya pira panya ma_nkur-kutjara.

8

Uru Pulka Tjaruringkula Wiyaringkunytja

¹ Ka Godalu Noah-nya tjananya kuka tjuta, kuka wiya tjuta, tjulpu tjuta kulu watarkurintja wiyangku kulinigi alatjitu pautangka panya nyinanyangka, munu walpa iyanu manta winkikutu uru panya rungkara tjaruntjaku, ka mulapatu uru panya katu ngaranytjatjanu ma-tjaruringangi. ² Ka uru unngu mulapa manta unnungunguru panya mina pulka piruku ngalya-pakantja wiyaringu Godalu angatjunkunyangka. Munu mina panya ilkaritja Godalu markunu, ka piruku puyintja wiyaringu. ³ Ka uru panya pulka purkara purkara tjaruringangi rawa mulapa pira mankur-kutjara. ⁴ Ka nyara palula arangka uru tjaruringkunyangka pauta panya nyinakatingu puli katu ngura ini Araratala. ⁵ Ka uru panya piruku purkara tjaruringangi pira mankurpa, ka nyara palulanguru puli murpu tjutalta utiringu. ⁶⁻⁷ Ka nyara palula malangka tjintu 40 piruku ngarala wiyaringkunyangka Noah-lu pauta unnungunguru winta tjukutjuku alanu munu tjulpu kaanka iyanu, ka paluru uringka katu rawa para-ngarangani uru panya ma-tjaruringkula wiyaringkunytjaku patara paṭara. ⁸ Munu Noah-lu piruku iyanu tjulpu kutjupa ini kuukuuku ankula nguriṇa nyakunytjaku manta utiringkunyangka. ⁹ Palu uru tjiwariwaritu ngaringi kuwaripa, ka kuukuuku panya mantangka nyinakatinytjikitja putu ngurira malaku wirkanu Noah-lakutu. Ka Noah-lu mara katuringkula palunya mantjira ngalya-tjarpatjunu malakungku pautangka. ¹⁰ Munu Noah-lu tjintu 7 ngarala wiyaringkunyangka patara kuukuuku panya palunya piruku iyanu. ¹¹ Ka kuukuuku paluru ankula mungartji malaku pitjangu puṇu alipa nyalpi tjaangka kanyira, puṇu wanka, panya tjulpu paluru kuvari kutju kaṭantara ngalyakatingu. Ka Noah-lu nyalpi nyakula kulinu, “Munta-uwa! Uru panya tjinguru tjaruringu, ka manta utiringu.” ¹² Munu paluru piruku tjintu 7 kutjupa ngarala wiyaringkunyangka patara kuukuuku palunya piruku iyanu, ka paluru ankula ma-nyinangi malaku pitjawiya.

¹³ Uwa, Noah-nya tjana pira 10 nguwanpa pauta unngu nyinangi, ka tjlpi panya Noah-nya yiya nampa 601-aringu. Ka uru uwankara mantangka tjaruringkula wiyaringu. Ka Noah-lu pauta katutja aranu munu para-nyakula nyangu manta ma-piltiringkula waṇannyangka. ¹⁴ Munu paluru piruku pauta unngu nyinangi manta pilti mulararinjtjaku paṭara. Ka nyara palulanguru pira kutjara ngarala wiyaringkunyangka manta uwankara piltiringu alatjitu.

¹⁵⁻¹⁶ Ka Godalu Noah-la wangkangu, “Pautanguru palaya ukaliwa nyupali kurirara munu nyupalimpa katja mankurpa munu tjanampa kuri kulu. ¹⁷ Munu kuka tjuta, kuka wiya tjuta, tjulpu tjuta kulu uwankara pautanguru walatjura tjana wararakatira mantangka nyinara tjutatjararingkunytjaku munu tjutaringkula ngura winkikutu lipiringkula nyinanytjaku manta winkingka.” ¹⁸ Ka Noah-nya kulira pautanguru ukalingu palumpa kuri kulu munu katja mankurpa kurirara kurirara. ¹⁹ Ka kuka tjuta, kuka wiya tjuta, tjulpu tjuta kulu, mantangka parangarapai uwankara pautanguru ukalingu walytjarara walytjarara.

Noah-lu Godanya Kuka Tiliwakara Ungkunytja

²⁰ Ka Noah-lu pautanguru ukalingkula mantangka pitjilpa pulka palyanu, munu paluru kuka palyanguru mankurpa mantjinu tjinatjara mankurpa munu tjulpu mankurpa kulu munu kuka palunya tjananya

pungkula pitjilta katu warungka tiliwakanu Mayatja Godanya walkura ungkunytjikitjangku. ²¹ Ka Godalu kuka tiliwakannya mayu wiru pañtinu munu pukularira unngu kuliningi alatji, “Ngayulu panya anangu tjutanguru manta nyanga kurañu uru pulka iyara, palu kuwarina tjanalanguru manta piruku kurantja wiyangku wantiku alatjitu, panya tjaka anangu tjutangku tjitjinguru rawangku kura kutju kulilpai. Palu ngayulu anangu tjuta, kuka tjuta, ngaalymancupai uwankara piruku wiyanjtja wiyangku wantiku alatjitu, nyanga kuwaritja purunypa piruku palyantja wiya alatjitu. ²² Ka manta nyangatja ngaranyangkampa wari munu unytjunpa, kuli munu nyinnga, kalala munu munga titutjaratu ngarakatiku wiyaringkunytja wiya alatjitu. Ka piriayakutu kutjupa piriayakutu kutjupa manta tjawara uninypa tjuta tjunkunytjaku titutjara ngaraku, munu palulanguru kuli kutjupa kuli kutjupa mai pakara kururingkunyangka urantjaku titutjara palu purunypat ugarakatiku.” Alatji Godalu kalkura wantingu titutjara ngaranytjaku kutjuparinytja wiya paluruñtu.

9

Godalu Noah-nya Kalkuntja

¹ Munu Godalu Noah-nya tjananya palumpa katja mankurpa pukulmanu wangkara, “Tjitji tjutatjarariwaya, kaya nyurampa tjitjinguru anangu tjuta piruku ma-tjutaringkuku malatja malatja, munuya ngura tjutangka ma-lipiringkula nyinaku manta winkingka. ² Kaya mantangka para-nagarapai uwankara nyurampa nguluringkuku anangu tjutaku kuka tjuta, kuka wiya tjuta, tjuninguru ankupai tjuta, tjulpu tjuta, antipina tjuta kulu. Ngayuluña nyara palunya tjananya nyuranya unganyi nyura pungkunytjaku, mutta tjinguru paintjaku, mutta tjinguru kanyintjaku, mutta tjinguru nintintjaku. Ka nyura tjanampa uwankaraku mayatja nyinaku. ³ Ngañmanytuña anangu tjuta mai kutju ungangi ngalkuntjaku, palu nyanga palulanguruña nyuranya kuka kulu unganyi ngalkuntjaku maingka tjungu. Ka kuwari kuka nyanga paluru tjana uwankara ngaranyi nyura pungkula ngalkuntjaku. ⁴ Palu kulila! Kuka pungkula nyura milkali winki ngalkuwiyangku wantima. Alatjina milkalingka-tawara angapaini, panya milkalingku wankaru kanyilpai pulykungka ankula. Pala palulanguru milkali milmilpa ngaranyi ngalkuntjaku wiya. ⁵ Ka tjukurpa pulka nyangatja ngaranyi, panya anangu tjuta uti anangu kutjupa tjutaku pukularima tjananya mirpantu pungkula iluntankunytja wiya. Tjinguru anangu kutjungku anangu kutjupa miri pungkunyangkampaña ngayulu palunya ngapartji pungkuku. Munu palu purunytju kuka inurangku anangu patjara iluntankunyangkampa ngayulu kuka palunya ngapartji pungkuku. ⁶ Panya ngayulu anangu palyanu ngayunya purunypa nyinanytjaku. Palulanguru nyura uti anangu kutjupa tjutaku pukularima tjananya mirpantu pungkula iluntankunytja wiya. Palu tjinguru nyura anangu kutjupa mirpañtu miri pungkunyangkampa, anangu kutjupangku nyuntunya ngapartji miri pungkukutu. ⁷ Ka nyura uti kuwari tjiti tjutatjararingama anangu tjuta piruku ma-tjutaringkunytjaku. Munu nyura tjuta mulararira mungilyirima munu ngura tjutakutu lipiringkula manta winkingka nyinama tjuta mulapa.” Alatji Godalu Noah-la tjanala wangkangu. ⁸⁻¹⁰ Munu palulanguru piruku tjanala wangkangu nyanga alatji, “Kuwarina nyuranya kalkunu, nyurampa walystja tjuta kulu malatja. Munu ngayulu mantangka para-ngarapai uwankara kulu

kalkunu, kuka tjuṭa, kuka wiya tjuṭa, tjulpu tjuṭa uwankara panya nyurala tjungu pautanguru ukalingkunytja tjuṭa. ¹¹ Nyanga alatjina nyuranya munu tjananya kuļu kalkunu panya uru pulkangku manta winki piruku tjutuṛa kurantja wiyaringkuku. Manta nyanga winkingka ngaalymankupai uwankara uru pułka nyanga purunytju piruku tjutuṛa iluntankuwiyangku wantiku. ¹² Munu ngayulu kutjupa kutjupa katu tjunkuku nyura nyakula kulintjaku ngayulu kalkuntja, panya ngayulu nyuranya munu mantangka para-ngarapai uwankara kuļu kalkunu, nyurampa walytja tjuṭa kuļu malatja malatja. ¹³ Ngayulu ngangkalingka tjutirangu tjunkuku nyura nyakula kulintjaku ngayulu panya kalkuntja. ¹⁴⁻¹⁵ Ka palulanguru kutjupa-aṛa ilkari ngangkalingku tjutunnyangka tjutirangu ngururpa utiringkuku, kana ngayulu kalkuntja panyatja kulilku, panya ngayulu mantangka para-ngarapai uwankara, anangu uwankara kuļu uru pulkangka piruku tjutuṛa wiyalwiyangku wantiku. ¹⁶ Ka tjutirangu ngangkalingka utiringkunyangka ngayulu nyakula kalkuntja panyatja kulilku. Panya kalkuntja paluru titutjara ngaraku wiyaringkunytja wiya alatiṭu.” ¹⁷ Alatji Godalu Noah-la tjanala wangkangu tjutirangu nyakula kalkuntja panyatja kulintjikitjangku, tjana kuļu kulintjaku.

Noah-ku Katja Mankurpa

¹⁸ Uwa, Noah-ku katja maṇkurpaya pautanguru ukalingu panya ini nyanganpa Tjimanya, Aamanya munu kutjupa Tjaipitjinya. (Ka Aamanya panya Kainanku mama.) ¹⁹ Ka wati nyanga maṇkurnguru anangu tjutaringu munuya ngura tjutangka ma-lipiringkula kuvari pułka-anangu nyinanyi manta winkingka. Wati nyanga maṇkurpa anangu malatja malatjaku tjamu maṇkurpa, panya anangu uwankaraku tjamu maṇkurpa nyanga paluru tjana. ²⁰ Ka Noah-nya panya mai pakaltjingalpai nintipuka, munu panya pautanguru ukalingkunytjatjanungku paluru mai kiripitj-warara pakaltjinganu kaana pułkangka. ²¹ Munu paluru kiripitjinguru waina palyanu munu tjikira tařangkaringu munu mantara anangitja arara nikiti ngaringi tiinta unngu. ²² Ka katja kutjungku Aamalu (panya Kainanku mamangku) palumpa mama nyangu nikiti ngarinyangka, munu tiintanguru pakara wangkangu palumpa kuṭa kutjarangka. ²³ Ka Tjimalu, Tjaipitjilu pulanku mantara mantjira katura piningga piningga tjunkula nyakuwiyangku tjutukatira tiintangka tjarpara mantarangka tjutunu mama panya nikiti ngarinyangka.

²⁴ Ka Noah-nya watarku ngaringi kunkunpa munu ngula kutju wankaringkula kulinu katja malatjangku palunya nikiti ngarinyangka nyakula kuranmankunytja. ²⁵ Ka paluru tjituṛu-tjituṛurira alatji wangkangu, “Kuwarinā Godala tjpini Kainanku tjituru-tjituru pulka palyantjaku Aamaku panya katjaku! Ka Aamaku kuṭa kutjarangku palunya mayatjarira pułkara wituwitulku palumpa pulampa waṛkarinytjaku. ²⁶ Wanyula Mayatja Godanya mirawaṇima, Tjimaku panya God! Ka kuvari Tjimalu Kainannga mayatjarira kanyilku munu palunya pułkara wituwitulku palumpa waṛkarinytjaku. ²⁷ Ka Mayatja God, wanyu Tjaipitjiku tjiti tjutaringkunytjaku palyanma, kaya ma-tjutaringkula malatja malatja tjuṭa mulapa nyinama, munuya wati panya Tjimakunu tjutangka tjungu nyinaku tjanampa ngurangka. Munu Kainannga tjura Tjaipitjiku pułkara waṛkarinytjaku, ka palunya paluru mayatjarira kanyilku.”

²⁸ Ka uru panya pułka mulapa ngarira wiyaringkunyangka małangka Noah-nya piruku yiya tjuṭa mulapa nyinangi nampa nyangatja 350.

²⁹ Munu paluru tjilpi mularariralta ilungu yiya nampa 950 nyinanytjatjanu, rawa mulapa.

10

Noah-kunu Tjuṭa

¹ Ka nyangatja uru pulkangka małangka Noah-ku walytjapiti ma-tjuṭaringkunytja palumpa katja mañkurnguru malatja malatja. Panya Tjimanya, Aamanya, Tjaipitjinya tjana katja tjuṭatjararingu, kaya palula tjanalanguru aŋangu ma-tjuṭaringu malatja malatja.

Wati Tjaipitjilanguru Anangu Ma-tjuṭaringkunytja

² Ka wati panya Tjaipitjilu katja nyanga tjananya utinu Noah-ku pakali tjuṭa ini nyanganpa – Kaumanya, Maikaakanya, Matainya, Tjapannga, Tupulnga, Mitjikanya, Tiratjanya tjananya. Ka nyanga palula tjanalanguru aŋangu ma-tjuṭaringu. ³ Ka Tjaipitjiku katjangku ini Kaumalu katja mañkurpa utinu ini nyanganpa – Atji-kinatjanya, Ripatjanya, Taukamanya tjananya mankurpa. ⁴ Ka Tjaipitjiku katjangku ini Tjapantu katja nyanga tjananya utinu ini nyanganpa – Ilaitjanya, Tatjitjanya, Kitimanya, Rautanimanya tjananya. ⁵ Ka nyanga palula tjanalanguru aŋangu ma-tjuṭaringu, aŋangu panya Tjaipitjikunu tjuṭa. Munuya үrungka itingka nyinara waŋanangi, munuya manta tjukutjukungka kuļu nyinangi үrungka ngururpa. Paluru tjana ngura kutjupa kutjupangka nyinangi maŋtalpa maŋtalpa munuya wangka walytja wangkangi.

Wati Aamalanguru Anangu Ma-tjuṭaringkunytja

⁶ Ka wati panya Aamalu katja nyanga tjananya utinu Noah-ku pakali tjuṭa ini nyanganpa – Kuutjanya, Itjipanya, Lipiyanya, Kainannga tjananya.

⁷ Ka Aamaku katja kuranyitjangku Kuutjalu katja ini nyanga tjananya utinu Tjipanya, Apilanya, Tjapatanya, Raamanya, Tjapitikanya tjananya. Ka Raamalu katja kutjara utinu Tjiipanya pulanya Titannga.

⁸ Ka Kuutjaku pakali kutjupa nyinangi wati ini Nimaratanya. Wati nyanga paluru kunyu nganyiri pulka mulapa nyinangi kuwaripatjara.

⁹ Panya Mayatja Godalu palunya witulyanu kukaputju pulka mulapa nyinanytjaku, kaya nyara palulanguru aŋangu tjuṭangku tjakangku wati kukaputju nyakula wangkapai nyanga alatji, “Nyuntu wati panya Nimaratanya purunypa kukaputju pulkanya, panya Godalu nyuntunya Nimaratanya purunypa witulyananyi.” ¹⁰ Ka Nimaratanya panya nganmanypa mayatja pulka nyinangi ngura nyanga mankurku ini Papilanku, Irilikaku, Akataku tjanampa. Ngura nyanga mañkurpa manta nyara ini Papilaniyala ngarangi. ¹¹⁻¹² Munu manta nyara palulanguru Nimaratatalu manta kutjupakutu ankula tawunu pulka tjuṭa palyanu manta ini Atjiriyala. Paluru tawunu panya pulka tjuta ini nyanganpa palyanu Ninipanya, Rayupatja Iirnga, Kaalanya tjananya, munu tawunu kutjupa ini Ritjinnga kuļu palyanu ngura Ninipala pulala Kaalala ngururpa. Ka ngura Kaalanya panya tawunu pulka mulapa ngarangi.

¹³⁻¹⁴ Ka wati panya Aamaku katja kutjupangku ini Itjipalu katja nyanga tjananya utinu Luutanya, Anamanya, Layapanya, Napatunya, Patjarutjanya, Katjulunya, Kapatunya tjananya. (Ka wati panya Kapatulanguru aŋangu ma-tjuṭaringangi ngura panya ini Pilitjiyala, kaya tjananya wangkangi ini nyanga alatji “Pilitjiyanya ngurara tjuṭa”.)

¹⁵⁻¹⁹ Ka Aamaku katja Kainantu katja nganmanyitja utinu ini Tjaitannga, munu palulanguru katja kutjupa tjuṭa utinu ini nyanganpa – Iitanya,

Tjaipunya, Aimurnga, Kirkatjanya, Ipanya, Aakanya, Tjinnga, Apatnga, Tjimarpa, Amatjanya tjananya. Nyanga paluru tjana uwankara Kainankunu tjuta munuya paluru tjana ma-tjutaringangi malatja malatja, munuya walytjarara walytjarara ankula ngura tjutangka nyinangi. Ka manta tjanampa alatji ngaringi Kainankunu tjutaku, alintjaranguru ngura ini Tjaitantanguru ngalya-ngaringu ulparirakutu ngura ini Kirartakutu ngura ini Kaatjala itingka, munu wiluraranguru uru panya pulkanguru watingaringu kakararakutu ngura ini nyanga tjanalakutu Tjatamalakutu, Kumralakutu, Atamalakutu, Tjipuwimalakutu palula tjanalakutu tjanampa manta wati-ngaringu manta kutju tjana. Ka ngura Tjipuwimanya panya ngura ini Latjala itingka. ²⁰ Alatjiuya walytjarara walytjarara nyinangi Aamakunu tjuta, munuyanku ngura kutjupa kutjupangka nyinara wangka walytja walytja wangkangi.

Wati Tjimalanguru Anangu Ma-tjutaringkunytja

²¹⁻²⁵ Ka Tjaipitjiku pulampa Aamaku kuتا Tjimalu palu purunypatu katja tjuta utinu Noah-ku panya pakali tjuta ini nyanganpa – Ilamanya, Atjurnga, Apakatanya, Luutanya, Aramanya tjana. Kaya nyanga palula tjanalanguru anangu ma-tjutaringangi munuya walytjarara walytjarara nyinangi. Ka Aramalu katja kutjara kutjara utinu Tjimaku pakali tjuta ini nyanga tjananya Utjanya, Uulanya, Kitjunya, Mitjikanya tjananya. Kaya wati nyanga palula tjanalanguru anangu piruku ma-tjutaringangi munuya walytjarara walytjarara nyinangi ngura tjutangka. Ka Tjimaku katja kutjupangku ini Apakatalu katja nyangatja utinu ini Tjilanya, ka ngula Tjilalu katja utinu ini Iipunya. Ka Iipulu katja kutjara utinu kutju ini Pilikinya, kutjupa ini Tjakanunga. Ka ini panya “Pilik” wangkanyi “tjarantja” tjanampa wangkangku panya wati Pilikinya nyinanyta-ara Godalu anangu tjuta tjaranu munu wililytjingara iyanu ngura tjutakutu manta winkikutu. Uwa, Noah-ku katja Tjimanya wati Iipukunu tjutaku kutju-tjamu, panya wati Iipulanguru anangu tjutaringu malatja malatja.*

²⁶⁻²⁹ Ka Iipuku katja kutjupangku wati panya Tjakitantu katja tjuta utinu ini nyanganpa – Alamu-tatanya, Tjilipanya, Atja-mapitjinya, Tjiranya, Aturamanya, Utjalnga, Tikilanya, Upalnga, Apimailnga, Tjipanya, Upirnga, Apilanya, Tjaupapanya tjana, tjuta mulapa. ³⁰ Kaya nyanga paluru tjana ngura tjutangka nyinangi, panya ngura ini Mitjalanguru ma-nyinara wañaningi kakararakutu ngura ini Tjipartakutu ngura pulitjarangka. ³¹ Uwa, alatjiuya Tjimakunu tjuta walytjarara walytjarara nyinangi, munuyanku ngura kutjupa kutjupangka nyinara wangka walytja walytja wangkangi.

³² Anangu nyanga paluru tjanaya Noah-ku katja mankurnguru matjutaringu uru panya pulkangka malangka, munuya anangu winki mulararira manta winkikutu lipiringu malatja malatja, munuya lipiwanu alatjiyu nyinangi ngura kutjupa kutjupa tjutangka manta winkingka.

11

Wali Wara Pulka Palyantja Ngura Ini Papilanta

¹ Ngañmanypaya anangu uwankara wangka kutju wangkapai nyinangi. ² Munuya palulanguru kakarara para-nyinara para-nyinara ngulalata ngura uringa ukiritjarangka wirkara ngura tjunkula nyinangi ngura ini Papilanta. ³⁻⁴ Munuya paluru tjana wangkangu, “Wanyula

* **10:21-25** Wati Iipulanguru panya anangu Israelkunu tjuta utiringu Aipuramanya, Isaacanya Jacobanya tjana.

tawunu pulka palyala nganaña tjungu nyinanytjikitjangku uṭuļu kutju, ala lipikutu ankula wililyarantjaku-tawara. Munula wanyu ngururpa palyala wali waṛa mulapa ilkarikutu. Kaya ngula malatja tjuṭangku wali nyanganpa nyakula urulyarara kulilkumunulanya mirawaniku alatji wangkara, ‘Munta-uwa, Tjamulu tjanaya kunyu nyangatja iriti palyanu ninti pulkangku.’” Alatjiya wangkangi wali pulka palyantjikitjangku. Munuya wangkangi, “Wanyula tjuminta tjuṭa tjulpirnguru palyala munula warungka tjunkula wanti ka kampara wituwituringkuku, kala palulanguru wituwituringkunyangka mantjira wali pulkalta palyala.” Munuya mulapatu palyanu tjuminta tjuṭa tjulpirnguru, munuya kutjupa kutjupa kitijurunypa uranu tjuminta tjuṭa katulkira katulkira tjakatjunkunytjikitjangku. Munuya palulanguru wali tjuṭa tjumintanguru palyaningi apunguru wiya.

⁵ Ka Mayatja Godanya ilkariringuru ukalingu tawunu pulka palyannyangka nyakunytjikitja, wali panya waṛa mulapa palyannyangka kuļu nyakunytjikitja. ⁶ Munu paluru nyakula wangkangu, “Nyanga tjanapanya walytjapiti kutjutu nyinanyi wangka kutjutjara. Pala palulanguruuya tawunu pulka palyani wali waṛa kuļu tjaṭu warkarira. Palu tjinguru pulka nyanga palunya palyantjatjanungku tjanapanya kulira kaṇany-kaṇanyarira piruku kutjupa pulka mulapalta palyalku. Munuya palulanguru tjanampa kutjupa kutjupa uwankara palyantjaku ngaraku tjanapanya mukuringkula.

⁷ Wanyula ukalingkula tjananya tjarara tjanampa wangka kutjupa kutjupara, kayanku wangka kutjuparintjatjanungku wangkara puṭu kulilkum. ⁸ Munu tjananya Godalu tjarara wangka tjanampa kutjupa kutjupanu, kaya wali pulka panya wantikatingu piruku palyantja wiyangku munuya tjaratjara ankula wiyaringu ngura kutjupa kutjupa tjuṭakutu walytjara manta winkingka titititu nyinanytjikitja. ⁹ Ka tawunu nyara paluru panya ini Papilannga, wali panya waratjara. Panya ngura nyara palula Godalu aŋangu uwankara tjarara tjananya wangka kutjupa kutjupanu, tjananku ngapartji-ngapartjingku wangkara puṭu kulintjaku. Palulanguruuya uwankara tjaratjara ankula wiyaringu munuya ngura tjuṭangka lipiringkula manta winkingka nyinangi wangka kutjupa wangka kutjupa.

Wati Tjimalanguru Anangu Ma-tjutaringkunytja

¹⁰ Ka nyangatja Noah-ku walytjapiti malatja malatja matjuṭaringkunytja palumpa katja Tjimalanguru. Panya uru pulkangka malangka yiya kutjara ngarala wiyarinkunyangka Tjimalu katja ini Apakatalu utinu yiya nampa 100 nyinanytjatjanungku. ¹¹ Munu palula malangka paluru piruku yiya tjuṭa mulapa nyinangi 500, munu tjitji kutjupa tjuṭatjararingangi. Munu palulangurulta ilungu rawa mulapa nyinanytjatjanu.

¹²⁻¹³ Ka Apakatalu yiya nampa 35 nyinanytjatjanungku katja utinu ini Tjilanya. Munu palulanguru paluru piruku yiya tjuṭa mulapa nyinangi nampa 403, munu tjitji kutjupa tjuṭatjararingangi munu palulangurulta ilungu.

¹⁴⁻¹⁵ Ka wati panya Tjilalu yiya nampa 30 nyinanytjatjanungku katja utinu ini Iipanya. Munu palula malangka paluru piruku yiya tjuṭa mulapa nyinangi nampa 403, munu tjitji kutjupa tjuṭatjararingangi munu palulangurulta ilungu.

¹⁶⁻¹⁷ Ka Iipalu yiya nampa 34 nyinanytjatjanungku katja utinu ini Pilikinya. Munu palulanguru paluru piruku yiya tjuṭa mulapa nyinangi

nampa 430, munu tjitji kutjupa tjutatjararingangi munu palulangurulta ilungu.

¹⁸⁻¹⁹ Ka Pilikilu yiya nampa 30 nyinanytjatjanungku katja utinu ini Ruunya. Munu palulanguru paluru piruku yiya tjuṭa mulapa nyinangi nampa 209, munu tjitji kutjupa tjutatjararingangi munu palulangurulta ilungu.

²⁰⁻²¹ Ka Ruulu yiya nampa 32 nyinanytjatjanungku katja utinu ini Tjirakanya. Munu palulanguru paluru piruku yiya tjuṭa mulapa nyinangi nampa 207, munu tjitji kutjupa tjutatjararingangi munu palulangurulta ilungu.

²²⁻²³ Ka Tjirakalu yiya nampa 30 nyinanytjatjanungku katja utinu ini Nayunya. Munu palulanguru paluru piruku yiya tjuṭa mulapa nyinangi nampa 200, munu tjitji kutjupa tjutatjararingangi munu palulangurulta ilungu.

²⁴⁻²⁵ Ka Nayulu yiya nampa 29 nyinanytjatjanungku katja utinu ini Tairanya. Munu palulanguru paluru piruku yiya tjuṭa nyinangi nampa 119, munu tjitji kutjupa tjutatjararingangi munu palulangurulta ilungu.

²⁶ Munu palulanguru Tairalu yiya nampa 70 nyinanytjatjanungku utinu katja ini Aipamanya. Munu palulanguru katja kutjupa utinu ini Nayunya, munu palula malangka utinu katja malatja ini Arannga.

Wati Tairakunu Tjuta

²⁷⁻²⁸ Ka nyangatja tjukurpa wati Tairanya tjananyatjara, panya Tairanya Aipamaku, Nayuku, Aranku mama. Ka Arantu katja ini Lotanya utinu, munu palulanguru wiyaringu mamangka mirangka ngura tawunu ini Aarala manta panya Papilaniyala, panya nyara palula paluru iti ngaringu, Arannga panya. ²⁹⁻³⁰ Ka Aipamalu kungkawara ini Tjiirainya altingu, palu Tjiirainya putu tjititjararingangi. Ka Aipamaku malanypangku Nayulu kungkawara ini Milkanya altingu palumpa panya malanypaku untalpa Aranku.* Ka Nayuku malanypangku Arantu katja kutjupa utinu ini Itjakanya, Lotaku malanypa.

³¹ Ka palulanguru tjlpi Tairalu kulinu ngura ini Kainanku ankunytjik-itjangku nyara palula ngura tjunkula nyinanytjikitjangku. Munu paluru walytja tjuṭa altingu palula tjungu ankunytjaku. Ka Aipamanya pula kurirara Tjiirainya palula tjunguringu munu palumpa pakali Lotanya kuļu Aranku panya katja. Munuya paluru tjana uwankara ngura panya Aaralanguru ma-pakaļu munuya ankula ankula ngururpa wirkanu ngura ini Aaranta munuya nyara palulalta ngura tjunkula nyinangi ngura panya Kainannga wantira. ³² Ka ngura nyara palulalta Tairanya yiya nampa 205 nyinanytjatjanu ilungu.

12

Godalu Aipamanya Wituntja.

¹ Ka Mayatja Godalu Aipamanya wangkangu, “Nyuntumpa walytja tjuṭa wantikatira ara nyuntumpa ngura kuļu munu manta kutjupangka ankula ngura tjura nyara palula nyinanytjikitjangku. Kaņa ankunyangka nyuntunya ngururpa nintliku manta palunya. ² Ka nyara palula ngayulu palyalku nyupalilanguru aŋangu tjuṭa mulararinytjaku malatja malatja nyuntumpa walytja tjuṭa, kaya manta nyara palula walytjapiti kutjuṭu nyinara waňalku ngura tjutangka. Munu ngayulu nyuntumpa

* ^{11:29-30} Nyangatja tjakangku iriti mulapa walytja ilatja altipai tjukarurungku.

palyalku nyuntu pukulpa nyinanytjaku. Kaya anangu ngura winkitjangku nyuntunya kulilku munuya kuliṛa nyuntunya mirawañiku. Kaña nyuntulawanungku tjananya palyalku pukulpa nyinanytjaku.³ Mununa anangu tjutangku nyuntunya pukulmankunyangkampa ngayulu ngapartji tjananya pukulmankuku. Palu tjana nyuntunya kurannyangkaña tjananya ngapartji kuralkutu. Uwa, ngayulu nyuntulanguru anangu uwankara manta winkitja palyara pukulmankuku.” Alatji Godalu Aipamanya wangkangu munu witunu ankunytjaku.⁴⁻⁶ Ka nyara palula aranya Aipamanya tjlpi yiya nampa 75 nyinangi. Ka Mayatja Godalu ankunytjaku wangkanyangka paluru wangañarangku kulinu munu ngura panya Aarantanguru ma-pakaṇu palumpa kuri Tjiirainya munu palumpa malanypaku katja Lotanya kuļu. Munuya katingu mani pulka, ulytja pulka munu tjiipi tjuta, nanikuta tjuta, tangkiyi kamula kuļu uwankara ngura Aaranta mantjira tjungura tjungura kanyintjatjanungku. Munuya anangu warkaripai tjuta kuļu katingu ngura pala palula ngañmanytju mantjira kanyintjatjanungku. Nyanga uwankara alatjituaya Aarantanguru pakaltjingara katingu ngura panya Kainanku.

Munuya rawa ankula ankula ngula manta panya Kainanta wirkanu munuya piruku tjukutjuku ankula wirkanu puṇu milmilta ini Muuraila ngura ini Tjikimala itingka. (Palu ngura pala palula Kainannga ngurara tjuta nyinangi ngura waltyangka, nguratja tjuta.)⁷ Ka Mayatja Godanya utiringu Aipamala munu wangkangu, “Nyanga paluru ngura panyatja, panya ngayulu ungkunytjikitjangku kalkuntja nyuntumpakunu tjuta nyinanytjaku.” Ka palulanguru Aipamalu pukularira pitjilpa pulka tjunu Godanya wal kuntjikitjangku.*

⁸ Palula małangkaya paluru tjana ma-pakaṇu ulparira ngura panya puli tjutatjarakutu. Munuya ma-wirkara ngura tjunu tawunu ini Pitjulta kakarara tawunu panya kutjupangka ini Aila tjangati. Ka Aipamalu palu purunypaṭu pitjiltjunu munu Mayatja Godanya wal kuningi.⁹ Palulangurya Aipamanya tjana piruku ma-pakaṇu ulparira munuya rawa ma-pitjalinangi manta panya Kainanta ulparira pilakutu.

Aipamanya Ngura Ittipala Wirkankunyta

¹⁰ Palu manta pala Kainanta ailuru pulka ngarangi, ukiri wiya pilṭi alatjitu. Ka palulanguru Aipamanya tjana manta pala palulanguru ma-pakaṇu wilurara manta panya ini Ittipalakutu nyara palula unytju nyinanytjikitja ngura ukiri pulkatjarangka.¹¹ Munuya ankula ankula ma-ilaringu manta panya Ittipala. Ka Aipamalu palumpa kuringka wangkangu Tjiiraila nyanga alatji, “Nyuntu minyma wiru mulapa, ka tjinguru nyuntunya Ittipanya ngurara tjutangku nyakula kulilk, ‘Ai! Minyma wiru mulapa nyangatja.’¹² Palu tjana ngayunya nyakula kulilk, ‘Nyangatja tjinguru palumpa kuri.’ Mununiya tjinguru ngayunya pungkuku nyuntunyakitjangku.¹³ Ka palula-tawara nyuntu tjanala alatji wangka, ‘Nyangatja ngayuku kuta.’ Kaya palulanguru ngayunya pungkuwiyangku wantiku mununiya atunyamankuku.” Alatji Aipamalu wangkangu palumpa kuringka Ittipanya ngurara tjutangka ngunti wangkanytjaku.

¹⁴ Palulangurya Aipamanya tjana manta Ittipala ma-tjarpangu. Ka Ittipanya ngurara tjutangku palumpa kuri Tjiirainya mulapatu nyakula kulinigi, “Ai, minyma wiru mulapa nyangatja.”¹⁵ Ka mayatja panya

* ^{12:7} Tjakangkuya pitjilpa pulka tjunkula waru kurulpa katu tjunkula kuka tiliwakalpai Godanya wal kuntjikitjangku.

Piiraku warka mankurtu palunya nyangu, munuya tjanampa mayatjangka ankula tjakultjunu minyma wiru nyakunytjatjanungku. Ka Piiralu wangkangu palumpa walikutu ngalya-katintjaku. Kaya mulapatu ngalyakatingu. ¹⁶ Ka Piiralu Aipamanya kutjupa kutjupa tjuṭa wirura ungangi palumpa panya kurikitjangku malanypa-palku kulira. Munu palunya ungu tjiipi tjuṭa, nanikuta tjuṭa, puluka, tangkiyi, kamula tjuṭa kuļu, munu anangu warka tjuṭa kuļu palunya ungu mani wiya palumpa warkarinytjaku.

¹⁷ Palu Godalu nyangu mayatja panya Piiralu Tjiirainya mantjinnyangka munu palulanguru palunya pikatjaranu, palumpa walingka warkaripai tjuṭa kuļu. Kaya uwankara pika pulkaringkula ngarira wañingi. ¹⁸⁻¹⁹ Ka Piiralu kulinu munu Aipamanya altira wangkangu, “Nyuntu ngayunya ngunti kurañu. Nyangatjañin ngunti ungu nyuntumpa malanypa-palku kaña altintjikitjangku mantjinu. Palu nyanga paluru kunyu nyuntumpa kuri. Walangkunku mantjira ma-kati!” ²⁰ Munu paluru wangkangu palumpa warkaripai mankurta Aipamanya pulanya ma-katintjaku. Kaya ma-katira ngura ilytjingka Itjipala itingka pulanya paira ma-iyanu. Ka pula Itjipanya wantikatira anu kutjupa kutjupa tjuṭatjara, panya pula Itjipala mantjintja uwankaratjara.

13

Aipamanya Pula Lotanya Kutju-kutjuringkunytja

¹⁻² Uwa, wati panya Aipamanya kutjupa kutjupa tjuṭatjararingu, panya paluru kuka kutjupa kutjupa tjuṭa mulapa kanyiningi tjiipi tjuṭa, nanikuta tjuṭa, puluka, tangkiyi tjuṭa kuļu munu apu tjiilpa, gold pulka kuļu kanyiningi. Munu paluru pula kuriarangku nyanganpa uwankara Itjipalanguru katingu munu pula tjina-arangka anu kakarara munuya ma-itipirira ma-wirketu manta panya palulatu panya pila Kainanta ulparira. Ka palumpa malanypaku katja kuļu palula tjungu anangi wati panya Lotanya. ³⁻⁴ Munuya nyara palula ngura tjunkula tjukutjuku nyinara piruku ma-pakañu alintjara, munuya ngura kutjupangka piruku matjunu munuya palulanguru ngurili-ngurili para-nyinangi pilangka panya Kainanta ulparira. Munuya ngulalta wirketu ngura panya palulatu Pitjulta Aila ngururpa panya nganmanytjuya alintjraranguru wirkara ngura tjunkula pitjiltjunu. Munu pitjilpa panya palulatu arangka wirkara Aipamalu Godanya walkuñu.

⁵ Ka wati panya Lotanya kuriitjara Aipamala tjungu para-nyinarinangi munu paluru kuļu kuka kutjupa kutjupa winki kanyiningi tjiipi, nanikuta, puluka tjuṭa munu anangu warka tjuṭa kuļu. ⁶⁻⁷ Ka nyara palula-arangka anangu Kainannga ngurara tjuṭa munu Piritjinya ngurara tjuṭa kuļu nguratja alatjitu nyinangi ngura pala palula. Ka ukiri pulka wiya nguwanpa itjanu tjukutjuku kuka tjuṭa mulatu ngalkula paltjaringkupai wiya. Palu Aipamaku Lotaku pulampa kuka tjuṭa mulapa, ka pula putu kuliningi ngura kutjungka tjungura kutjutu kanyintjikitjangku. Ka Aipamaku warka tjuṭangku munu Lotaku warka tjuṭangku tjanampa mayatjaku kuka tjuṭa atunymara kanyiningi, munuya kutjupa-ara ukiri-tjiratja ngaparku wangkara pikaringkupai.

⁸ Ka nyanga palulanguru Aipamalu Lotala wangkangu, “Wanyu kulila! Nyuntu panya ngali walytjarara, kayanku nyanganpa nyaaku rawa pikaringanyi? ⁹ Wanyuli kutju-kutjuriwa munuli maunjalpa kanyinma. Nyuntu tjinguru nyarangka ankuku, ka ngayulu nyangangka nyinama.

Munta tjinguru ngayulu nyarangka ankuku, ka nyuntu nyangangka nyinama. Ka-puṭa nyuntu-warara ngurkantara, kana ngayulu mala.”

¹⁰ Ka Lotalu para-nyakula nyangu karu nyara Jordannga wati-ngarira ukalingkunyangka wimaru lipi pulkangka, munu kulinu, “Munta nyarat-jampal ngura wiru mulapa karu urutjara ukiri pulkatjara Mayatja Godaku kaana puruny whole munu manta Ittipanya puruny whole. Tjinguruna nyara palulakutu ankula nyinaku kuwari.” (Ara nyanga palula-arangka tawunu pulka Tjatamanya pula Kumaranya ngarangi palya Godalu piluntankunytja wiya.) ¹¹ Munu Lotalu karu wimaru Jordannga ngurkantara anu ngura ma-tjunkunytjikitja kakarara-pitiny whole. Alatji Aipamanya Lotanya pula kutju-kutjuringkula maŋtalparingu. ¹² Aipamalu panya manta Kainanta ngura tjunu, ka Lotalu panya ankula ngura ma-tjunu Jordanta wimarrungka ngura panya tawunu Tjatamala itingka, ilytjingka wiya. ¹³ Ka ngura pala palula anangu panya Tjatamala nyinanytja tjuṭa kura mulapa nyinangi watarku alatjitu Godanya kulilpai wiya.

Aipamanya Ngura Ipuranta Ankula Nyinanytja.

¹⁴ Nyanga palula malangka Lotanya ankunyangka Mayatja Godalu Aipamala wangkangu, “Pala nyuntu ngaranytjalanguru purkarangku para-mirara waŋara manta winki nyawa. ¹⁵ Ngayuluŋanta manta nyanga uwankara nyuntunya ungguku nyuntumpa waltytja tjuṭa kuļu malatja malatja, ka nyuramparira nyurampa alatjitu titutjara ngaraku.

¹⁶ Panya ngayulu palyalku nyuntumpa waltyjapiti winki mulararinytjaku malatja malatja, kaya minga puruny whole mungiliyi mulapa nyinaku puṭu kantamilantjaku. ¹⁷ Ka kuwari ara munu para-nyangama manta winki, panya ngayulu manta nyanga palunya uwankara nyuntunya unganyi.”

¹⁸ Ka palulanguru Aipamalu tjana ma-pakaṇu munu ankula tawunu ini Ipuṛanta itingka ngura tjunu puṇu milmilpa tjuṭangka ini Muuraila. Munu paluru pitjilpa pulka palyanu Mayatja Godaku palunya walkuntjikitjangku. Munu ngura nyanga palulangurulta para-nyangangi.

14

Lotanya Tjananya Warmalangku Tjulyara Katinytja.

¹⁻⁴ Ka wati ini Kitu-layamanya manta uwankaraku mayatja nyinangi Kainanku kuļu. Paluru ngura ini Ilamala nyinangi Kainanta alinytjara kakarara nguwanpa. Ka palula itingka tawunu maŋkurpa ngarangi, ka ngura nyara maŋkurpa mayatja maŋkurtu kanyiningi, wati panya Kitulayamaku malpa maŋkurtu.

Ka ngura tawunu kutjupa ini Tjatamanya uru ini Ilunytjala itingka kampa ulparira ngarangi manta panya Kainanta. Ka Tjatamala itingka tawunu kutjara kutjara ngarangi, ka anangu ngura Tjatamala tjanala nyinanytja tjuṭa anangu Ilamanya ngurara tjuṭaku kuraringkupai, panya mayatja Kitulayamalu tjana yiya kutjupa yiya kutjupa anangu palunya tjananya Ilamalanguru pitjala pauntjingara mantjilpai mani pulka, mai pulka, ulytja tjuṭa munu kutjupa kutjupa tjuṭa kuļu. Kaya palulanguru anangu ngura Tjatamala tjanala nyinanytja tjuṭangku rawa 12 yiya ngulu-nuguļu nyinanytjatjanungku raparingkula kuliningi tungunpungkula pikar-inkunytjikitjangku ngapartji mayatja Kitulayamaku tjanampa. Munuya palulanguru ngura panya tjuṭanguru tjunguringu wimaru ini Tjitimala munuya warmalaringu Kitulayamaku tjanampa ngapartji.

⁵⁻⁷ Ka mayatja panya Kitulayamalu kulinu tungunpungkunyangka munu paluru altingu ngura panya maŋkurtija warmalarinytjaku, munuya

tjunguringkulalta ngalya-ukalingu tjananya pungkunytjikitja. Munuya ukalingkula kutjupa tjuta-warara pungu tawunu ngururitja tjuta munuya ngura kutjutja pungkula piruku ukalingkula ngura kutjupitja ngapartji pungu munu pungkula wiyaringkula piruku ukalingu ngura kutjupitja ngapartji pungkunytjikitja ngura panya Tjatamala tjanala kakara-pitinya.

Munuya pungkula wiyaringkula kulinu Kitulayamalu tjana piruku ngura kutjupitja tjuta ngapartji pungkunytjikitjangku. Munuya ngalya-ukalingu, kaya ngura panya kutjupitja tjutangku nyakula ngulu wirtjapakanu ulparira. Kaya Kitulayamalu tjana nguluru waṭaparanu, palu tjana wala pulka ngulu wirtjapakanu. Kaya puṭu waṭaparara waṭaparara pakuringkula wantingu. Ka tjana ngulu kumpira alatjitu anu.

Kaya Kitu-layamanya tjana malaku ařuringkula kampa wilurarawanu anu. Munuya tjana malaku pitjala piruku kutjupa tjuta pungkunytjikitjangku kuliningi munuya Ama-likakunu tjuta-warara pungu munuya palulanguru Aimurkunu tjuta ngapartji pungu. Munuya nyanga palunya tjananya pungkula wiyaringkula kulinu ngura panya Tjatamanya pungkunytjikitjangku munu Tjatamala ititja tjuta kuļu, ngura panya Kumaranya tjananya.

8-12 Kaya Tjatamaku mayatjangku munu ngura ititja tjutaku mayatja tjutangku kuļu tjanampa wati tjuta alt̄ingu wimaru ini Tjitimala warmala tjunguringkunytjaku, kaya mulapaṭu uwankara tjunguringkula paṭanangi warmala wati panya Tjtitulayamaku tjanampa. Kaya wirkanu palumpa tjanampa pikalta. Palu puṭuya ngaparpungkula pungu panya tjanaya tungun-tungunpa pulka kaya puṭulira ngulu wirtjapakanu.

Palu mayatja kutjara, Tjatamaku Kumaraku pulampa mayatja, wirtjapakara manta uwilatjarangka wirulyarara punkara piṭi ngatingka tjarpangu, kaya mayatja ngura maṇkuritja kutjulta wirtjapakara kumpira nyinangi pulingka. Kaya Kitulayamalu tjana ngura panya Tjatamala Kumarala pulala tjarpangu munuya kutjupa kutjupa uwankara mantjira katingu mai ulytja winki munu anangu kutjupa tjuta kuļu. Munuya wati panya Aipamaku katja Lotanya kuļu witira ma-katingu palumpa walytja tjuta munu ulytja tjuta kuļu, panya paluru tawunu Tjatamala nyinangi. Munuya Kitu-layamanya tjana ma-pakaṇu ngura walytjakutu kutjupa kutjupa tjutatjara.

13-16 Palu wati kutju tjana witira kanyintja tjirkara ngulu wirtjapakanu kumpira, munu wati Iipurula wirkanu panya Aipamala munu palula tjakultjunu uwankara panya palumpa katja kuļu witira katinytja. Ka nyanga palula ařangka Aipamanya wati ini Mamaraiku ngurangka ittingka nyinangi puṇu wara tjutangka. Panya paluru pula nganmanypa malparingu, ka palumpa malanypa kutjara kuļu Aipamaku malpa nyinangi, ini Itjikalnga pula Ainanya. Ka Aipamalu palumpa katja Lotanya katinytja kulira palumpa wati warka kuṇpu tjuta alt̄ira tjungunu warmalarinytjaku. Ka wati Mamarailu tjana palumpa malanypa kutjarangku kuļu tjanampa wati warika tjuta kuļu tjungunu Aipamala tjanala. Munuya tjunguringkula wati panya Kitu-layamanya tjananya pikangku waṭaparanu, panya palumpa katja katinytjitungka. Palu Aipamalu warmala maṇkurpa nguwanpa katingi nampa panya 318, munuya tjananya waṭaparara waṭaparara nyangu nyinanyangka munuya ngat̄alpatu ngarangu ngura ini Danta. Ka tjana watarku alatjitu nyinara waṇingi.

Ka mungangka Aipamalu wati palumpa tjuṭa tjarara tjunu kapuṭu kutjupa kapuṭu kutjupa para-arintara ngura tjanampangka. Munuya watarku nyinanyangka paluru tjana urulyku wirkanu tjilira pulkatjara. Ka panya tjana nyakula ngulu-nguluringu munuya kulinu, “Tjinguru nyanga tjana winki mulapa pitjangu!” Ka Aipamalu tjana pungkula waintara tjara kutjupa ngulura wataparanu. Kaya ngulu wirtjapakanu maralpa alatjiṭu ngura tawunu walytjakutu. Kaya Aipamalu tjana waṭaparara ngura ini Awupala ma-wirkanu panya ngura ini Tamatjakala alinytjara munuya ngaṭalnguru wantira pitjangu. Munuya malaku pitjala Kitulayamaku tjanampa nguranguru kutjupa kutjupa uwankara mantjinu panya tjana Tjatamala pulala Kumaralanguru kutitjura katintytja uwankara. Munu palumpa katja Lotanya kuļuya mantjira katingu palumpa kutjupa kutjupa tjuṭa kuļu panya tjana kutitjura katintytja tjuṭa. Munu wati panya witira katintytja tjuṭa kuļu minyma tjuṭa kuļu mantjira malakungku katingu, panya tjana ngura Tjatamala pulala Kumaralanguru witira katintytja tjuṭa.

Wati Milkitja-tikalu Aipamanya Wangkara Pukulmankunytja.

¹⁷⁻¹⁸ Ka ngura Tjatamaku mayatjangku kulinu Aipamalu tjana Kitulayamanya tjananya pungkunytja, munu paluru kuliningi Aipamanya tjana ngalya-pitjanyangka ngaparikatintjikitjangku. Munu mulapatu ankula ngapari-ngapari wirkanu ngura wimaru ini Tjapala panya tawunu ini Ipuranta alintjara. (Kuwarila wimaru nyara palunya ini wangkapai, “Mayatjaku Wimaru”.) Ka wimaru nyara paluru ngura tawunu ini Salemala itingka kuļu. Ngura pala paluru ini Salemanya iriti ngarangi munu maļangka ini Jerusalemanyaringu. Ka wati ini Milkitja-tikanya nyinangi Salemanya ngurara tjuṭaku mayatja munu palumpa tjanampa wati inma kanyilpai kuļu nyinangi, panya paluru kuka pitjilpa pulkangka tjunkula tiliwakalpai Godanya walkuntjikitjangku Mayatja panya Katutja Pulkanya. Munu paluru Aipamanya wati-pitjanyangka kulira mai waina kuļu palula tjanalakutu ngalya-katira ungu. ¹⁹ Munu paluru Aipamanya pukulmanu alatji wangkara,

“Mayatja God, nyuntu katutja pulka mulapa, munun ilkari manta kuļu palyanu. Wanyu, wati nyanga Aipamaku palyanma pukulpa mulapa nyinanytjaku! ²⁰ Kalanku nyuntunya Mayatja Godanya pulkara mirrawaṇima Katutja Pulkanya, panya nyanga tjananya nyuntu witulyanu tjanampa mirpaṇtju tjuṭa pungkula waintarintjaku.”
Ka palulanguru Aipamalu kutjupa kutjupa tjuṭa wati Kitulayamala tjanalanguru mantjintjatjanungku tjarara tjukutjuku ma-ungu Milkitja-tikanya mai, ulytja tjuṭa.

Aipamalu Ngura Tjatamaku Mayatja Malakungku Ungkunytja.

²¹ Ka Tjatamaku mayatjangku Aipamala wangkangu, “Nyuntu uwankara kanyinma panya Kitulayamalu tjana tawunu Tjatamalanguru mai, ulytja, kuka tjuṭa mantjira ma-katintytja, palu ngayuku aŋangu tjuṭa kutjunı malakungku uwa.”

²²⁻²³ Ka Aipamalu ngapartji wangkangu, “Kuwariṇanta nyuntunya tjukarurungku wangkanyi Mayatja Katutja Pulkangka mirangka. Ngayulu kuwari nyuntumpa uwankara nyuntunya malakungku unganyi mai, ulytja, kuka tjuṭa kuļu. Tjinguruṇitju Godalu kulira tarilarara ngunti wangkanyangka pungkuku. Palu ngayulu mulamulangku wangkanyi nyuntunya uwankara alatjiṭu malakungku ungkunytjikitjangku. Ngayulu kutjupa kutjupa tjukutjuku kanyintja wiyangku uwankara nyuntunya

ungkuku, panya ngayulu kanyinnyangkampa nyuntu tjinguru alatji ngayunya wangkaku, ‘Ngayuluñanta nyuntunya ulytja pulkakutuñu, Godalunta ungkunytja wiya.’ Alatji wangkanytjaku-tawarañanta kutjupa kutjupa tjuña nyuntumpa kanyintja wiyangku uwankara małakungku unganyi.²⁴ Palu ngayuku wati tjuñangku nyuntumpa mainguru tjukutjuku mantjiningi ngalkukatinytjikitjangku. Palya? Ka nyanga ngayuku małpa Mamarainya munu palumpa małanypa kutjara kuļu ngayula tjungu anu, ka nyuntu tjinguru tjananya tjarara ungama. Palya?” Alatji Aipamalu ngura Tjatamaku mayatjangka wangkangu.

15

Godalu Aipamanya Kalkuntja

¹ Ka nyara palulanguru Aipamanya ankula ngurangka wirkara nyinangi. Munu paluru munga kutjupa tiinta unngu nyinara ira-nyakula nyangututupu kutjupa irnyannyangka munu paluru kulinu wangka Godanya alatji wangkanyangka,

“Aipama! Nguluringkuwiya nyinama. Ngayulu nyuntumpa kutitji purunypa, panya kura kutjupa kutjupa tjuñangka-tawarañanta nyuntula anga-ngaranyi. Munuña ngayulu nyuntunya ungkuku kutjupa kutjupa pulka nyuntu ngayunya wangañarangku kulinnyangka.”

²⁻³ Ka Aipamalu ngapartji wangkangu, “Mayatja Katutja Pulka! Nyaakuñin kutjupa kutjupa pulka ungkuku? Panya ngali kurirara kutju maralpa nyinanyi. Nyuntu panyanin ngayunya tjitji ungkunytja wiya ngayuku ulytja kutjupa kutjupa tjuña ngayulu ilunyangka małangka mantjintjaku. Palu ngayuku wati warika kutju nyinanyi mantjintjikitja wati ini Iliyatjanya ngura panya Tamatjakanya ngurara. Palurunti ngayuku uwankara mantjilku ngayulu ilunyangka.”

⁴ Ka Mayatja Godalu piruku palula wangkangu, “Wiya, nyanga nyuntumpa war̄kangku Iliyatjalu mantjintja wiya nyuntumpa uwankara nyuntu ilunyangka małangka, nyuntumpa katja mulatu kutju mantjilku nyuntu panya utintjitungku kutju.”⁵ Munu Mayatjalu palunya ırılkutu katira wangkangu, “Ira-nyawa ilkarı nyara munu kilipi tjuña kantamilala. Nampa pala palu purunypa aŋangu nyuntulanguru ma-tjuñaringkuku nyuntumpakunu tjuña.”

⁶ Ka Aipamanya mulamularingu Godaku. Ka nyara palulanguru Godalu palunya mulamularingkunyangka nyakula tjukarurunmankula walytjanmanu.

⁷ Munu paluru wangkangu Aipamala, “Ngayulu Mayatja Godanya, panya ngayulu nyuntunya ngalya-katingu ngura nyara Aaralanguru manta panya Papilaniyalanguru, munuña ngayulu manta nyanga winki nyuntunya ungu nyuntu walytjangku kanyintjaku.”

⁸ Ka Aipamalu ngapartji tjapinu puļu kulira, “Mayatja Katutja! Ngura nyanga walytja tjuñayanku nyinara wañani. Kaņa puļu nguwanpa mulamularinganyi. Wanyu-puta kutjupa kutjupa palyala ngayulu nyakula mulamularingkunytjaku panya nyuntu ngayunya ungkunytjitetjaku.”

⁹ Ka wangkangu, “Uwa kuwariñanta nintini. Ka nyuntu nyuntumpa kukanguru ankula mantjira ngalya-kati puluka kutju, nanikuta kutju, rama kutju paluru tjana panya kuļi mankurpa nyinanytjitetjaku munu kuukuuku kutju aralapałpalpa kutju kuļu ngalya-kati.”

¹⁰ Ka Aipamalu ankula mantjira ngalya-katingu kuka mankurpa tjułpu kutjara Godanya ungkunytjikitjangku. Munu katira puluka-warara pungkula kata tjlpirpungkula walytjarpungkula ukalingkula kutjarañu

munu walytjarpa kutjara lipira mantangka tjunu munu paluru kuka panya kutjupa kutjara palu purunypaṭu walytjarpungkula tjunkula wañanu kampa kutjara, ka ngururpa ala ngarala wañaningi. Munu paluru tjulpu kutjara pungkula walytjarpungkuwiyangku winkitu tjunu kuka pulkangka tjungura kampa kutjara. ¹¹ Ka tjulpu panya kirkinpa tjuṭa pitjangu kuka ngalkuntjikitja. Ka Aipamalu tjananya pitjanyangka anga-ngarala painingi.

¹² Munu paluru rawangku nyinara paṭaningu Godaku, munu mungartjirira tjintu tjarpanyangka ma-kunkunaringu munu pulkara kunkunaria ma-tjukur-tjukurarira pulkara nguluringangi munu tjititingangi. ¹³ Ka Mayatja Godalu palula tjukurpa wangkangu alatji, “Nyuntumpa walytjapiti ma-tjuṭaringkuku malatja malatja munuya ngula ngura malikitjangka ma-wirkara malikitja tjutangka tjunguringkula nyinaku. Ka tjananya nyara palunya ngurara tjutangku warka pulka ungkula pulkara alatjiṭu pakulku munuya pungkula kulu wituwitulku. Kaya nyuntumpa walytjapiti paku pulka nyinaku ngura nyara palula rawa mulapa yiya nampa 400. ¹⁴ Palu ngayuluña malikitja nyara palunya tjananya ngapartji kuralkuṭu nyuntumpakunu tjuṭa kurannyangka. Kaya nyuntumpakunu tjutangku ngura nyara palunya ngurara tjutaku kutjupa kutjupa tjuṭa mantjilku ulytja tjuṭa, mani pulka, kutjupa kutjupa wiru tjuṭa, munuya mantjira ngura palunya wantikatira ankuku kutjupa kutjupa winkitjara. ¹⁵ Palu kuwari nyuntu rawa mulapa nyinaku munu tjilpiringkula ipilypa alatjiṭu nyinara iluku punkata-punkatarinytja wiya. ¹⁶ Kaya nyuntumpa walytja tjuṭa malatja malatja tjutaringkula ngura panya malikitjangka titutjara nyinaku yiya nampa 400, munuya palulanguru tjuta mulararira malaku pitjaku ngura nyangakutu. Panya kuwariya nyangatja ngurara tjuṭa nyinanyi manta nyangangka anangu panya kura tjuṭa, palu ngayulu ngula kutju tjananya paira iyalku tjana kura mulararinyangka kutju. Kaya nyara palulanguru nyuntumpakunu tjuṭa tjarpara nyinaku ngura walytjangka.” Alatji Godalu Aipamanya wangkara kalkunu.

¹⁷ Ka tjintu tjarpara mungaringkunyangka ayinayini kutjara urulyku wirkanu piti warutjara munu waru tjangi tili pulkatjara kuka panya tjutangka. Ka waru panya pitingka puyu pulka pakaningi. Munu pula kukangka ngururwanu wirkara ma-pitjala ma-wiyaringu ayinayini panya kutjara. ¹⁸⁻²¹ Ka pala palula-aṛangka Godalu Aipamanya kalkunu alatji wangkara, “Ngayulu nyuntumpakunu tjuṭa ngula manta nyangatja unganyi walytjaringkula ngurararinjtjaku. Panya manta Ittipala itinguru alinytjara karu ini Yupuraitilakutu ma-ngaṛala wañani, manta pala pulka palunyanu unganyi nyuntumpakunu tjuṭa. Palu ngura nyanga palulawanu panya anangu kutjupa kutjupa tjuṭa kuwari nyinara wañani panya Kinkunu tjuṭa, Kinitjikunu tjuṭa, Katamanikunu tjuṭa, Iitakunu tjuṭa, Piritjikunu tjuṭa, Ripaim tjuṭa, Amurkunu tjuṭa, Kainankunu tjuṭa, Kirkatjakunu tjuta munu Tjaipukunu tjuta, anangu tjuṭa mulapa.” Alatji Godalu Aipamanya wangkara kalkunu.

Ka Aipamanya Godaku mulamularingu, panya paluru waru ayinayini kutjara urinyangka nyakula kulinu, “Mulapa Godalu ngayunya kalkunu.”

16

¹⁻³ Ka Aipamanya tjana rawa nyinangi ngura nyara Kainanta kuli nyinnga 10-pa. Ka Aipamaku kuringku Tjiirailu tjitji puṭu kanyiningi palumpa. Munu paluru kulinu palumpa kungka warkaripai ini Aikanya panya Itjipanya ngurara Aipamanya kalkura unggunytjikitjangku tjitji palumpa utintjaku. Munu paluru wangkangu palumpa kuringka, "Mayatja Godaluṇi tjitji wiyaṇu. Ka nyuntu uti kungka nyanga ngayuku warkaripaingka ngarima. Ka tjinguru paluru tjitji ngalimpa kanyilku panya ngayulu puṭu kanyini." Ka Aipamalu kuliṛa palya kulinu.*

Ka palulanguru Tjiirailu kungka panya Aikanya ungu Aipamanya palula tjunguringkunytjaku. ⁴ Ka palulanguru kungka paluru ititjararingu. Munu paku nyinara paluru kaṇany-kaṇanyaringi munu Tjiirainya kuranmanangi alatji wangkara, "Nyuntu itiku ngurpa, ngaltutjara. Kanatju ngayulu ititjararingu małatja mununa ngayulu Aipamaku kuriringu."

⁵ Ka palulanguru Tjiirainya tjitru-tjitururingu munu Aipamanya wangkangu, "Nyangatja nyuntu kulira tjukaruruntjaku Aipama, panya nyangangkuni ngayunya kuranmananyi. Ngayulu panyaṇa nyuntunya ungu kungka nyaratja, ka paluru paku nyinara kaṇany-kaṇanyarira ngayuku rawa kuraringanyi. Kalinyawi wanyu Mayatja Godalu nyuntunya ngalinya ngurkantara ngananya kura, tjinguru nyuntu, tjinguru ngayulu."

⁶ Ka Aipamalu ngapartji wangkangu, "Uwa palya! Palu nyuntulta kulila panya paluru nyuntumpa warkaripai. Tjinguru nyupalinku pungkula wiayingkuku, tjinguru nyuntu palunya paira iyalku. Nyuntulta kulinma." Ka palulanguru Tjiirailu Aikanya tjuni pulka wirura kanyilwiyangku kurara pungangi pulkara mulatu. Ka palulangurumpa kungka panya Aikanya ngululta wirtjapakanu ulparira palumpa ngura waltyjakutu.

⁷⁻⁸ Munu paluru ngura ini Tjuuku iwarangka ankula ilytjingka ngururpa wirkanu mina walangka paku pulka. Munu mina tjikiṛa nyinangi pakuiyaringkunytjikitja, ka angelpa Mayatja Godaku palula utiringu munu wangkangu, "Aika! Nyuntu minyma panya Tjiiraiku warkaripai nyinangi. Yaaltjingurun pitjangu? Munun yaaltjikutu ananyi?"

Ka wangkangu, "Ngayuluṇa ngayuku mayatjangu wirtjapakanu."

⁹ Ka angeltu wangkangu, "Wiya, małaku ara munu palula nyinara warkarima." ¹⁰⁻¹¹ Munu paluru wangkangu, "Nyuntu kuwari katjatjararinganyi munun inilku Itjumailnga, panya Godalu nyuntunya kulinu ilytjinguru mirara ngatjinnyangka puṭu kuli-kulira. Munu paluru palyalku nyuntumpa katjangu ḥanangu ma-tjuṭa mulararintjaku malatja małatja, kaya mungili mulapa nyinaku puṭu kantamilantjaku. ¹² Palu nyuntumpa katja tangkiyi inura purunypa nyinaku wati pikati mulapa, kaya ḥanangu tjuṭa palumpa kuraringkuku munuya wantiku. Ka paluru palumpa waltyja kutjupa tjuṭaku mirpaṇtju nyinaku kalypa wiya." Alatji angeltu minyma panya Aikala wangkangu.

¹³ Ka Aikalu kulinu, "Mulapanatju Godanya nyakula ilunytja wiya wankatu nyinanyi? Wiya, mulapani wangkangu." Munu nyara palulanguru Mayatja Godanya ininu nyanga alatji, "God Panya Ngayunya Nyakupainya". ¹⁴ Palulanguruya ḥanangu tjuṭangku kuwari mina pala palunya wangkapai alatji, "Ngura nyanga palula panya palunya nyangu Titutjara Nyinapailu". Ka mina panya paluru kuwaripaṭu ngarinyi ngura panya Katitjala pulala Piritjila ngururpa.

¹⁵ Kaya Aikalu kulira małaku anu Tjiirailakutu munu nyinara nyinara katja kanyinu Aipamaku. Ka Aipamalu tjitji palunya ininu "Itjumailnga".

* ^{16:1-3} Tjakangkuya iriti alatjingalpai tjitji wiya nyinara.

16 Palu tjitji wirkankunytja-arangka Aipamanya tjilpi mulapalta nyinangi yiya tjuta 86 nyinanytjatjanu.

17

Godalu Aipamanya Kalkuntja

1 Ka ngula Aipamanya tjilpiringkula yiya tjuta 99 nyinanyangka malangka Godalu palula utiringkula wangkangu, “Ngayuluña God Witulya Pulkanya. Kanı nyuntu ngayunya wangañarangku kulinma munu tjukaruru mulapa nyinama kutjupangku nyuntunya nyakula kuranmankunytjaku-tawara. **2** Ngayulu panya nyuntunya kalkuntjanा palyalku munuña nyuntulanguru anangu malatja malatja ma-tjuta mulararinytjaku palyalku.” **3-4** Ka Aipamalu kuliṛa tultjungarąkatira ngalyangku manta pampunu Godanya wal̄kuntjikitjangku, ka piṛuku palula wangkangu, “Kulilani! Nyanga alatjiṇa nyuntunya kalkunı, panya ngayulu nyuntunya tjunkuku kutju-tjamu pulka nyinanytjaku manta winkitjaku ngura kutjupitja kutjupitja tjutaku. **5** Palulanguruna kuwari nyuntunya ini kutjupananyi, ka nyuntu Aipamanya wiyaringkula ini kutjuparinyi nyanga alatji, ‘Aipuramanya’, panya ngayulu nyuntunya ngurkantanu anangu ngura winkitjaku kutju-tjamu nyinanytjaku.* **6** Ngayuluña nyuntulanguru palyalku anangu malatja malatja ma-tjuta mulararinytjaku, kaya ngura kutjupa kutjupa tjutangka nyinaku walytjarara walytjarara mungilyi mulapa. Kaya kutjupatjara mayatja pulka nyinaku ngura tjutaku.

7 “Munuña ngayulu kalkuntja panyatja rawangku kuliklu, nyuntunya kutju kalkuntja wiya palu nyuntumpa katja, pakali puliripiti malatja malatja kuļuña uwankara kalkunı. Ka kalkuntja panya paluru tiṭutjara ngaraku wiyaringkunytja wiya alatji. Panya ngayulu nyuntumpa God nyinanyi, munuña nyuntumpa walytja tjutaku kulu God nyinaku malatja malatja uwankaraku. **8** Ka panya nyuntu manta nyanga Kainanta pitjalा nyinangi malikitja. Palu ngayulunanta nyuntunya manta nyangatja ungkuku, nyuntumpa walytja tjuta kulu malatja malatjangku walytjaringkula ngurārarira kanyintjaku tiṭutjarangku. Munuña ngayulu palumpa tjanampa God nyinaku malatja malatja uwankaraku.”

9 Munu Godalu piṛuku wangkangu Aipuramala nyanga alatji, “Ngayulu panya nyuntunya kalkunı, ka nyuntu kulu ngayunya ngapartji kalkunma ngayunya rawangku wangañarangku kulintjikitjangku. Nyuntu kutju wiya, palu nyuntumpa walytja tjutangku kulu malatja malatjangku uti ngayunya kalkunma rawangku wangañarangku kulintjikitjangku. **10-13** Uwa, ngayulu nyuntunya kalkunı, ka nyuntu ngapartji ngayunya wangañarangku kulinma, munu nyitayira tjuta watiringkunytjaku palyala nyuntu munu nyuntumpa katja munu nyuntula tjungu nyinapai uwankara kulu. Ka nyuntumpa katjapiti pakalipiti kulypalpiti nyitayira uwankara malatja malatja palu purunypa watiku arangka tjarpama. Mamangku uti iti nyitayira wirkankunyangka tjintu 8-nguru palyanma. Munu panya nyurala war̄karipai tjutaku iti nyitayira tjuta kulu palyanma. Munu nyura anangu ngura kutjupitja nyurala war̄karinytjaku payamilarampa nyitayira tjuta palu purunymanama munu tjana iti nyitayira tjuta kanyinnnyangkampa alatjinamatu. Ka watiringkunytja pala palulanguru nyura uwankarangku kuliklu, ‘Mulapa Godalu nganananya kalkunı,

* **17:5** Ini Aipamanya wangkanyi *Mama Wirunya*, ka ini Aipuramanya wangkanyi *Mama Ngura Winkitjaku*.

munu kalkuntjatjanungku paluru palyalku alatjitu wantintytja wiyangku.’
14 Ka tjinguru nyitayira kutjupa watiringkunytja wiya nyinarampa paluru ngayuku walytja wiya, munu nyurala tjungu wiya malikitja alatjitu. Panya ngayulu nyuranya kalkuntjatjanungku wangkangu nyitayira tjuta watiringkunytjaku, ka kutjupangku wantirampa kalkuntja panyatja wiyanin.”

15 Munu Godalu piruku Aipuramala wangkangu, “Palu nyuntumpa kuri panya ini ‘Tjiiranya.’ Ka nyuntu kuwari palunya piruku Tjiiranya wangkanytja wiyangku ini kutjupa wangkama nyanga alatji ‘Tjiiranya’, panya ngayulu palunya kulu ini kutjupananyi. **16** Ngayulu palunya pulkara pukulmankuku, mununa palunya ititjararingkunytjaku palyalku nyuntumpa katja kanyintjaku. Ka katja pala palulanguru anangu matjuta mularariku malatja malatja, ka minyma paluru tjanampa kutju-kami pulka nyinaku. Paluru tjana ngura kutjupa kutjupa tjutangka nyinaku walytjarara walytjarara mungilyi mulapa. Kaya kutjupatjara mayatja pulka nyinaku ngura tjutaku.” Alatji Godalu wangkangu Aipuramaku kuri pukulmankunytjikitjangku.

17 Ka wati panya paluru kulira walkuntjikitjangku tultjungararakatira ngalyangku manta pampunu. Palu paluru unngu kulira ikaringangi panya paluru kuliningi, “Ngali panyalinku tjlipi pampa mulapa. Yaaltjingarali tjitjitararingkuku? Ngayulu irititja mulapa yiya 100 nyinanytja, ka Tjiiranya palu purunypa*tu* irititja mulapa yiya 90 nyinanytja iti kanyintjikitja wiya.” **18** Munu paluru Godala tjapinu, “Wanyu-puta Itjumailnga palyanmanama ngayula arangka nyinanytjaku?”

19 Ka Godalu wangkangu, “Wiya, nyuntumpa kuri mulatu Tjiiralu katja nyuntumpa ngula kanyilku, ka nyuntu palunya inilku Isaacanya. Munu ngayulu Isaacanya palu purunyjtutu kalkulku mununa palumpa walytja tjuta malatja maletja kulu kalkulku, panya ngayulu nyuntunya kalkunu, palu purunypa. Kalkuntja nyangatja titutjara ngaraku wiyaringkunytja wiya alatjitu. **20** Palu ngayulu kulini nyuntu Itjumailku tjapinniangka, mununa palulanguru palunya kulu pukulmankuku palunya tjitji tjuta unguula, ka palumpa walytja tjuta mulapa nyinaku maletja maletja. Paluru katja tjuta nampa 12 utilku, kaya katja paluru tjana mayatja tjuta nyinaku ngura tjutaku. Kaya palula tjanalanguru anangu matjuta mularariku maletja maletja Itjumailku panya walytja tjuta. Ka Itjumailnga tjamu pulka nyinaku anangu nyanga palumpa tjanampa.

21 Palu nyuntumpa kuringku Tjiiralu ngula iti katja kanyilku ara nyanga palu purunypa yiya kutjupa. Paluru panya ini Isaacanya nyinaku, kana palu purunyjtutu palunya kalkuni panya ngayulu nyuntunya kalkuntja purunypa.” **22** Munu Godalu Aipuramala wangkara wiyaringkula palunya wantikatira anu.

23-27 Ka tjintu pala palula panya Godalu palunya wangkanytja ara Aipuramalu wangañarangku kulira palumpa katja Itjumailnga watiringkunytjaku palyanu munu palu purunypa*tu* palyanu nyitayira uwankara palumpa ngurangka nyinanytja tjuta, panya palula warkaripai tjuta, tjlipi tjuta, wati tjuta, tjitji tjuta, iti tjuta kulu uwankara alatjitu. (Kutjupa tjuta ngañmanypa iti ngaringu Aipuramaku ngurangka, ka kutjupa tjuta paluru ngura kutjupangka payamilara ngalya-katingu palula warkarinytjaku.) Ka wati kutjupangku Aipuramanya palu purunyjtutu watiringkunytjaku palyanu panya Godalu wangkanytjitetjangka. Nyara palula ara panya Aipuramanya tjlipi mulapa nyinangi yiya tjuta 99 nyinanytjatjanu. Ka panya palumpa katja Itjumailnga kungkatja nyinangi yiya 13 nyinanytjatjanu.

18

Godalu Aipuramanya Katja Ungkunytjikitjangku Kalkuntja

¹ Ka Aipuramanya ngura milmiltä ini Mamaraila nyinangi puṇu panya wara tjutangka itingka. Munu tjin̄tu kutjupa paluru wiltjangka nyinangi kuļi pulkangka tiinta tjaangka, ka Mayatja Godanya palula utiringu. ² Panya Aipuramalu watarku nyinara nyinara ma-ira-nyakula nyangu wati maŋkurpa ngurangka itingka ngaranyangka. Munu nyakula paluru mapalku pakara ngapari-ngapari wirtjapakanu munu tjanala kuranyu tultjungarākatira tjananya walkunu ngalyangku manta pam-pura. ³ Munu tjananya paluru markunu wangkara, “Wati wiru tjuta! Waara ankuwiyangkuya wantima munuya ngayuku ngurangka wanyu pakuwiyariwa tjukutjuku. Panya ngayulu nyuranya pukulmankunytjikitja mukuringanyi. ⁴⁻⁵ Wanyu kaña ngayuku war̄karipai kapiku witula nyuranku tjina paltjintjaku. Kaya wanyu puṇu nyanga wiltjangka nyinara pakuwiyariwa, kaña mai kuka mantjila nyura ngalkula paltja ankunytjaku. Nyangatjana pulkara pukularingu nyura ngayuku ngurangka wirkankunyangka. Wanyu, kaña nyurampa palyala.”

Kaya alatji kulira wangkangu, “Wiya wirunya! Pukularinya nyan-gangka nyuntula tjukutjuku nyinanytjikitja.”

⁶ Ka Aipuramanya mapalku anu palumpa kurikutu tiinta unngu nyinanyangka munu wangkangu palula, “Tjiira! Walangku mai ulu wiru mantjila munu rungkara paula.” ⁷ Munu paluru wirtjapakanu palumpa kuka tjutakutu munu puluka yangupala kaŋpi pulka ngurkantara mantjinu kuka tjula wiru mulapa munu ungu wati palumpa war̄karipai, ka pungkula palyara paura warpungu. ⁸ Ka Aipuramalu kuka panya pauntja munu puluka ipi, kurimi kuļu mantjira katira tjananya ungu wati panya maŋkurpa, kaya punu wiltjangka nyinara ngalkuningi. Ka Aipuramanya tjanala itingkatu ngarangi wiltja kutjupangka.

⁹ Kaya palula tjapinu, “Yaaltji nyuntumpa kuri Tjiiranya?”

Ka wangkangu, “Pala tiinta unngu nyinanyi.”

¹⁰ Ka kutjungku palula wangkangu, “Ngulana yiya kutjupa malaku pitjaku, ka nyara palula ara nyuntumpa kuringku Tjiiralu iti katja kanyilku.”

Ka Tjiiranya tiinta tjaangka nyinara tjana wangkanyangka kuliningi. ¹¹⁻¹² Munu paluru iti kanyintja wangkanyangka kulira ikaringu, panya paluru pula kurirara pampa tjilpi mulapa iti kanyintjikitja wiya. Munu paluru ikaringkula kuliningi, “Yaaltjingarali ititjararingkuku? Ngali pampa tjilpi irititja kutjara.”

¹³ Ka Mayatjalu ikaringkunyangka kulira Aipuramala wangkangu, “Nyaanguru Tjiiranya ikaringanyi? Paluru tjinguru anařa ikaringu ngayulu wangkanyangka. ¹⁴ Kulilani! Kutjupa kutjupa wanyu wituwitu ngaranyi ngayulu puṭu palyantjaku? Wiya ngayulu ayinayiningku palyal-pai alatjitu. Ka panya ngayulu wangkanytja mulapa alatjiriku. Ka yiya kutju wiyingkunyangka ngayulu małaku pitjaku, ka Tjiiralu iti katja kanyilku.”

¹⁵ Ka Tjiiranya pulkara nguluringu munu ngulungku ngunti wangkangu, “Ikaringkunytja wiyanatju nyinangi.”

Ka wangkangu, “Wiya, nyuntu ikaringu alatjitu.”

Aipuramalu Godala Ngura Tjatamaku Tjapintja

¹⁶ Palulanguruya pakara anu wati panya maŋkurpa. Ka Aipuramanya kuļu tjanala unytju anu wangkara iyantjikitja tjananya. Munuya

tjukutjuku ankula ngura kutjupangka wirkara walunyangangi ngura tawunu ini Tjatamanya. ¹⁷ Ka Mayatjalu kulinigi, "Utinatju tjukarurungku Aipuramanya tjakultjunama ngayulu nyanga kulintja. ¹⁸ Panya Aipuramaku walytja ma-tjutaringkuku malatja malatja munuya winki mulararira tjana alatjiu manta walytjangku kanyilkku. Ka panyaña palula tjanalanguru anangu manta winkitja palyara pukulmankuku. ¹⁹ Panya ngayulu palunya ngurkantanu palumpa tjitji, munu palumpa walytja tjuta malatja malatja ku lu paluru nintintjaku, tjana ngayula wanganarangku kulira tjukaruru nyinanytjaku. Panya tjana ngayula kulira tjukaruru nyinanyangka mulapa palyalku ngayulu Aipuramanya panya kalkuntja." Alatji Godalu unngu kulinigi.

²⁰ Munu palulanguru wangkangu Aipuramala, "Ngura tawunu pulka kutjara nyara ngaranyi ini Tjatamanya pula Kumaranya. Palu tjukurpa kura kunyu tawunu nyanga palumpa pulampa ngaranyi. Panya ngayulu kulinu anangu ngura nyara kutjarangka nyinanytja tjuta kunyu kura pulka mulararingu. ²¹ Kaña kulintjatjanungku kuwari ukalingkula ngura nyanga palunya pulanya nyanganyi. Mununa nyakula kulikku tjukurpa kura panyatja tjinguru mulapa, tjinguru ngunti, tjinguruya anangu tjuta kura pulka nyinanyi, tjinguruya palya nyinanyi?"

²² Ka palulanguru wati kutjara malakukutura anu ngura Tjatamalakutu. Palu Mayatjanya ankunytja wiya ngarangi Aipuramala munu pula tjukurpa ngarala wangkangi. ²³ Ka Aipuramalu Mayatjala arkara tjap-inningi nyanga alatji, "Nyuntu wanyu mulapa anangu tjukaruru nyinapai tjuta ku lu wiyalku anangu kura tjutangka tzungura? Nyaakun anangu palya tjuta ku lu iluntankuku? ²⁴ Tjinguruya anangu palya tjuta nyinanyi nampa 50 ngura nyara Tjatamala, ka nyuntu wanyu anangu winki wiyalku anangu palya tjuta ku lu? Wanyu tjananya wantima iluntankuwiyangku panya anangu palya tjuta nampa panya 50 ilunybjaku-tawara. ²⁵ Nyuntu wanyu anangu palya tjuta ku lu iluntankuku anangu kura tjutangka tzungura? Alatji wiya, panya nyuntu manta winkingka tjukarurungku ngurkantankupai munu panya nyuntu anangu palya munu anangu kura tzungura palu purunymankuwiyangku wantipai."

²⁶ Ka Mayatjalu wangkangu, "Uwa palya! Ngayulu anangu palya nampa panya 50 Tjatamala nguri ra nyakula palulanguru wantiku tawunu palunya anangu ku lu wiyanjya wiyangku."

²⁷ Ka Aipuramalu piruku wangkangu kunta-kunta tangku, "Nyuntu panyan Mayatjanya, kañatju kurangku nyuntula arkara wangkanyi. Wati mantatja ngayulu, nyuntula wangkanytjaku wiya nguwanpa. ²⁸ Palu tjinguruya anangu palya tjuta nampa 45 kutju nyinanyi 50 wiya. Ka nyuntu wanyu anangu winki wiyalku anangu palya nampa 5 wiya ngaranyangka nampa panya 50-ngañka ngatalpa?"

Ka Mayatjalu wangkangu, "Wiya, ngayulu tawunu anangu winki wiyanjya wiyangku wantiku anangu palya nampa 45 nyinanyangka nyakulampa."

²⁹ Ka piruku Aipuramalu palula arkara tjapinu, "Palu tjinguruya anangu palya nampa 40 kutju nyinanyi. Kan nyaalku?"

Ka Mayatjalu wangkangu, "Wiya palya, anangu 40 palya nyinanyangka nyakulaña palya wantiku."

³⁰ Ka Aipuramalu piruku wangkangu, "Tjingurutjun ngayuku mir-pañariku piruku ngayulu wangkanyangka, palu wanyu-puta wantima

ngayulu wangkanytjaku. Tjinguruya aŋangu palya nampa 30 kutju nyinanyi ngura pala palula.”

Ka wangkangu, “Uwa palya, aŋangu 30 palya nyinanyangka nyakulana wantiku.”

³¹ Ka Aipuramalu piруku wangkangu kuŋta-kuŋtangku, “Piруkuŋanta wanyu tjapinma? Kurangkuŋa rawangku tjapini, palu wanyuni wantima ngayunya pailwiyangku. Palu tjinguru nyuntu aŋangu palya nampa 20 kutju nguriřa nyakuku tawunu nyara palula? Nampa nyangatja nyakulan wantikutu?”

Ka wangkangu, “Uwa, ngayulu nampa panya 20 nguriřa nyakula ngura palunya wantiku wiyanja wiyangku.”

³² Ka piруkuŋa wangkangu, “Wanyu ngayuku mirpaŋariwiyangku wantima, kana kutju-ara piруku wangkaku mununa palulanguru wangka wiyingkuku. Palu tjinguru nyuntu nampa 10 kutju nguriřa nyakuku? Munun yaaltjiriku?”

Ka wangkangu, “Wiya palya, ngayulu tawunu palunya wiyanja wiyangku wantiku aŋangu 10 palya nyinanyangka nyakulampa.” ³³ Munu alatji Aipuramala wangkara wiyingkula Mayatjalu wantikatira anu, ka Aipuramanya malaku anu ngurakutu.

19

Angelpa Kutjara Lotala Wirkankunyta

¹ Ka angelpa panya kutjara mungartjirinyangka ngura Tjatamala wirkanu. Ka wati panya Lotaku ngura tawunu pala palula ngarangi.* Ka paluru unytju tawunungka itingka ankula nyinangi kaitangka, iwarangka itingka. Munu paluru angelpa kutjara pitjanyangka nyakula mapalku pakara ngaparikatingu munu pupakatira ngalyangku manta pampunu pulanya walkuntjikitjangku. ² Munu wangkangu pulala, “Mayatja wiru kutjara! Ngayulu nyupalinya kanyintjikitja mukuringanyi. Wanyu pula pitja ngayuku ngurakutu munu tjina paltjira mai ngalkula munga kutju ngari. Munu pula mungawinkila ara.”

Ka pula wangkangu, “Wiya palyantili urilta ngariku, nyanga wali tjutangka ngururpa.”

³ Palu Lotalu pulanya pulkara altingu, ka pula waŋanu munu palumpa walingka tjarpangu. Ka Lotalu mai nyuma pulampa palyanu mai panya pilytja yiitja wiyatja, ka pula ngalkula paltjaringu munu ngarinjtjikitjangku kulinungi.

⁴ Palu panya pula ngarinjtja kuwaripangka wati Tjatamanya ngurara winki pitjangu tjilpi, yangupala kulu Lotaku ngurakutu munuya walingka para-tjatutjura anga-ngarangi. ⁵ Munuya mirara wangkangi Lotanya nyanga alatji, “Wati panya kutjarampa yaaltji panya munga nyanga kuwari pula pitjala nyuntula ngarangi? Ngalya-kati pulanya, panya nganana pulala ngarinjtjikitja mukuringanyi.”

⁶⁻⁷ Ka Lotanya urilkutu pakaŋu tjananya wangkara markuntjikitja munu pakaŋa tuwa patira tjanala wangkangi, “Malpa tjuta! Alatjingara kuralwiyangkuya-puta wantima pulanya. ⁸ Palu kulis! Ngayulu uŋtalpa kutjara kanyini watiku ngurpa kutjara. Wanyu kana palunya pulanya ngalya-kati, kaya-puta mukuringkula palula pulala tjunguringama. Palu wati nyanga kutjaraya kuralwiyangku wantima, panya paluru pula

* **19:1** Wati panya Lotanya Aipuramaku kuṭaku katja.

ngayuku ngurakutu unytju pitjangu ngayulu al̄tinyangka. Kaña ngayulu pulanya wirura kanyini ngayuku ngurangka nyinanyangka.”

⁹ Palu wati panya tjuta Lotaku pulkara mirpañaringu munuya palula wangkangu, “Kitikitiriwa!” Munuyanku wangkangi, “Ai! Wati nyanga Lotanya malikitja pitjangu nganampa ngurakutu munulanya nyaaku wangkara tjukaruruni? Utilanya wantima paintja wiyangku panya paluru malikitja.” Munuya palunya wangkangu, “Kuwarilanya uwa wati panya pulanya! Ka nyuntu tjinguru ungkuwiyangku wantinyangkampa nganaña palunya pulanya kurantjatjanungku nyuntunya pulkara mulapa kuralku pulala waintara.” Munuya kaputu-kaputurira palunya pulkara untuningi munuya tuwa kañantankunytjikitjangku kuliningi. ¹⁰ Palu wati panya kutjarangku wali unngunguru tuwa alara Lotanya witira ngalya-ilara tjarpatjura tuwa patinu. ¹¹ Munu tjananya wati panya urilitja tjuta kuru patinu tjlpi, yangupala uwankara, kaya para-para-panytjunmara putu tuwa pampuningi alantjikitjangku.

Latalu Tjana Tjatamanya Wantikatinitya

¹²⁻¹³ Munu wati panya kutjarangku Lotala tjapinu, “Nyuntumpa walytja kutjupa ngura nyangangka nyinanyi? Tjinguru katja, untalpa, munta waputju? Ka-puña tjananya mantjira ma-kati ngura nyanganguru, panya kuwarili tawunu nyangatja wiyanı anangu winki. Panya nyangatja ngurara tjuta kura mulararingu, ka Mayatja Godalu kulinu anangu ngura kutjupitja tjutangku tjananya puntura wangkara wañinyangka. Munulinya iyanu ngura winki wiyatjaku.”

¹⁴ Ka Lotalu kulira anu palumpa waputju kutjarakutu palumpa panya untalpa kutjaraku kalkuntjitatjaku, munu pulala alatji wangkangu, “Warpungkula pula ngalya-pakala munu ngura nyangatja wantikati. Panya Mayatja Godalu kuvari tawunu nyanga palunya wiyanı anangu winki.” Palu nyanga pula mulamularingkuwiyangku ngunti-palku kuliningi ngalyapa-ngalypangku wangkanyangka-palku.

¹⁵ Ka mungawinki mulapa ngalya-tjinturingkunyangka angelpa panya kutjarangku Lotanya walawalaningi wangkara, “Walawala warpungkula pakala munu nyuntumpa kuri untalpa kutjara kuļu ma-kati ngura nyanganguru ilunytjaku-tawara, panya kuwarili ngura winki wiyanı anangu tjuta kuļu.” ¹⁶ Ka Lotalu warpungkunytja wiyangku purkarangku kuliningi. Palu Godanya wati panya palumpa ngalturingu palunya wankarunkunytjikitja, ka angelpa panya kutjarangku palunya miñara pakaltjingara katingu urilkutu palumpa kuri munu untalpa kutjara kuļu. ¹⁷ Munu palulanguru Tjatamala urilnguru angelpa kutjungku tjananya wankarunkunytjikitjangku ma-iyantu alatji wangkara, “Ma-wirtjapakalaya puli murpukutu wankakitja! Munuya ngururpa ngaranytja wiyangku wantima munu małakukutu nyakuwiyangku kuļu wantima ilunytjaku-tawara.”

¹⁸⁻¹⁹ Ka Lotalu wangkangu palula, “Nyupali panya nganañanya wirura kulinu munulanya wankarunu. Palu wanyulanya parari witulwiyangku ila nyinanytjaku wangka. Nyaakun puli pararitjaku witunu? Tjingurula ngatalpa iluku nyupali tawunu nyangatja wiyanngangka. ²⁰ Palu nyaratja nyawa, tawunu nyara tjukutjuku. Nyara paluru tjinguru ila nguwanpa ngaranyi, kantila nyara palula wirtjapakařa tjarpapra wankaringkuku ngatalpa ilunytja wiya. Tawunu nyara paluru tjukutjuku patu nguwanpa wiyatjaku wiya. Nyara palulakutulanya wanyu witula wankaringkunytjaku pararitjaku witulwiyangku.”

²¹ Ka tjananya wangkara witunu, “Uwa palya, nyara palulakutu wirtjapakala, kana ngura palunya wantiku piluntankunytja wiyangku.

²² Palu wala pulkaya ma-wirtjapakala. Panya nyura kuwaripa mapitjanyangka wantinyi pungkuwiyangku kuwaripangku paṭara, palu nyara palula ma-wirkankunyangka kutjuṇa tawunu nyangatja piluntara wiyalu. Walawalaya ma-pitja!” Alatji angeltu tjananya wangkara witunu. (Ka ngura tjukutjuku panya paluru ini Tjuwanya panya ini “tjuwa” wangkanyi “tjukutjuku” palumpa tjanampa wangkangku.)

Godalu Tawunu Tjatamanya Kumaranya Pulanya Wiyantja Anangu Winki

²³ Ka Lotanya tjana munga warangka wala pulka ankula ngura nyara Tjuwala wirkana tjintu ngalya-pakannyangka. ²⁴ Ka nyara palula ara Godalu ilkar̄inguru purku tili winki iyanu pulka mulapa mantakutu tawunu panya Tjatamala Kumarala pulala punkantjaku. ²⁵ Ka kampara alatji wiyanu tawunu nyara kutjarangka wali, anangu uwankara kuļu munu tawunu pala kutjarangka urilta kuļu pilangka ukiri, puṇu, puti uwankara kampara nyarunu, anangu winki kuļu urilta pilangka nyinanytja tjuṭa kuļu wiyanu. Ka ngura nyara paluru nyaruringu alatji.

²⁶ Palu Lotaku kuri malaringangi nguwanpa munu malakukutura Tjatamanya nyangu munu tjalturingkula mantangka tjakatjunu iwitiwiti waṛa purunypa.

²⁷ Ka tjir̄irpingka Aipuramanya tjintukutu pakara tatinu ngura panya Mayatja Godanya pula ngaranytjalakutu. ²⁸ Munu wirkara walunyanganzi Tjatamanya Kumaranya pulanya nganmanypa ngaranytjitja, munu nyangu puyungarala wanannyangka manta winkingka pulka mulapa waru wanangaṛangku rungkarä tilintja purunypa.

²⁹ Palu panya Aipuramalu nganmanytju Godala tjapinu anangu palya tjuṭa Tjatamalanguru wankarunkunytjaku. Ka panya Godalu kulinu Aipuramalu tjpintja munu panya palumpa katja Lotanya wankařunu palumpa kuri munu unṭalpa kutjara kuļu. Munu malangka kutju Tjatamanya tjananya ngura panya tjuṭa warungka wiyanu anangu winki.

Lotanya Munu Palumpa Unṭalpa Kutjara

³⁰ Ka Lotanya ngura panya Tjuwala nyinanytjaku nguluringangi munu paluru tjana unṭalkira unṭalkira anu pulikutu munuya tatira kulpingka ngura tjunkula nyinangi. ³¹ Ka kangkurungku palumpa malanypa wangkangu nyanga alatji, “Panya Mamanya ma-tjilpiringanyi kuvari, ka wati kutjupa tjuṭa wiya ngaranyi ngalila tjitji utintjaku. ³² Utili Mamanya waina ungama, ka tjikira tarangkarira ngalila ngarima, munulinya tjitjitjaralku palumpa waltyjapiti piruku ma-tjutaringkunytjaku malatja malatja.” ³³ Munu pula mungaringkunyangka mulapaṭu Lotanya waina pulka ungu, ka tjikira tarangkaringu, ka kangkuru palula tjunguringkula ngaringu. Palu Lotalu kulintja wiya alatji unṭalpa palula tjunguringkunyangka, panya paluru pulkara tarangkarira watarku ngaringi.

³⁴ Ka tjintungka kangkurungku wangkangu palumpa malanypa, “Ngayulu panya Mamala mungangka ngaringu, kali uti piruku palunya waina pulka ungama munga nyanga kuvari, ka nyuntulpi palula tjunguringkula ngarima kali kutjaraṭu tjitjitjarariwa.” ³⁵ Munu pula mungaringkunyangka piruku waina pulka ungu mama panya, ka tarangkaringu. Ka kungkawara panya malanypa ngapartji mamangka tjunguringkula ngaringu. Ka Lotalu kulintja wiya alatji palula tjunguringkunyangka, panya paluru palu purunypaṭu tarangka pulka watarku ngaringi. ³⁶ Alatji

Lotaku uŋtalpa kutjara iitjararingu mama walytjangku tarangkangku tjitji utinnyangka.

³⁷ Ka kangkurungku iti katja kanyinu munu palunya ininu Mawapanya. Ka tjitji nyanga palulanguru aŋangu ma-tjuṭaringu munuya winki mulararingu małatja małatja aŋangu panya Mawapakunu tjuta. ³⁸ Ka malanypangku kuļu iti katja kanyinu munu palunya ininu Pinaminya. Ka tjitji nyanga palulanguru aŋangu ma-tjuṭaringu munuya winki mulararingu małatja małatja aŋangu panya Aimankunu tjuta.

20

Aipuramanya Pula Pimalikanya

¹⁻² Ka Aipuramanya ngura panya Mamarainya wantikatira anu ulparira munu ngura tjunkula nyinangi pilangka Kainanta ulparira ngura ini Katitjala pulala Tjuula ngururpa. Munu palulanguru piruku ankula ngura kutjupangka ini Kirarta ngura tjunkula nyinangi. Palu ngura Kirarku mayatja nyinangi wati ini Pimalikanya. Ka Aipuramalu ngura pala palula nyinara nguratja tjutangka wangkangi nyanga alatji, “Minyma nyanga Tjiiranya ngayuku malanypa.” Alatji paluru kuri palumpa malanypamanangi.

Ka mayatja panya Pimalikalnu wati palula warkaripai wituṇu ankula Tjiiranya mantjira ngalya-katinytjaku, panya mayatja paluru palunya altintytjikitja mukuringangi. Ka mulapaṭu ankula mantjira ngalya-katingu, palu Pimalikalnu minyma palunya altintytja wiyangku kanyiningi kuwari-pangku. ³ Ka munga kutjupa Godanya utiringu Pimalikala paluru ngarira tjukurmankunyangka munu wangkangu palula, “Nyuntu kuvari ilunyi minyma nyanga palunya altirampa, panya paluru ngañmanytu altintytja, kuritjara.”

⁴ Palu Pimalikalnu Tjiiranya panya altintytja wiyatū nyinangi kuwaripa munu palulanguru Godala wangkangu alatji, “Mayatja, ngayuluṇa watarkungku wangkangi palunya ngalya-katinytjaku altintytjikitjangku, palu altintytja wiyatūna kuwaripa pataningi. Kanin nyaaku ngayunya iluntankuku ngayuku aŋangu tjuta kuļu? Nganaŋala tjukaruru nyinanyi. ⁵ Palu Aipuramalu panya walytjangku Tjiiranya malanypamanu, ka minyma panya paluru palu purunypaṭu Aipuramanya kuṭanmanangi. Kanā ngunti mulacularingu munuṇa kuri wiya-palku mantjinu ngurpangku, palu kuralwiyatuna.”

⁶ Ka Godalu palula piruku wangkangu, panya ngarira tjukurmankunyangka nyanga alatji, “Uwa, ngayulu ninti panya nyuntu tjukarurungku palunya mantjinu ngurpangku kurantjikitjangku wiya. Palulanguruṇa nyuntunya anga-kanyinu ngayula tungunpungkula kuraringkunyti-jaktawara, munuṇanta angatjunu nyuntu minyma palunya pampuntjakutawara. ⁷ Palu kuvari minyma nyanga palunya małakungku uwa wati palumpa kuri. Wati paluru panya ngayuku wangkatjara, munu paluru ngayula tjapilku nyuntumpa, kaṇanta wantiku iluntankunyti wiyangku. Palu nyuntu małakungku ungkuwiyangku wantirampa kulinma panya nyuntu munu nyuntumpa aŋangu tjuta uwankara iluku.” Alatji Godalu Pimalikala wangkangu paluru ngarira tjukurmankunyangka.

⁸ Ka mungawinki mulapa Pimalikalnu palumpa mayatja tjukutjuku tjuta uwankara altira tjakultjunu panya Godalu palula mungangka wangkanytja, kaya kulira pulkara nguluringu. ⁹⁻¹⁰ Ka Pimalikalnu Aipuramanya altira wangkangu, “Nyaakun nganaŋanya ngunti kuraṇu?

Ngayulu wanyu kutjupa kutjupa nyuntumpa kurañu, kan ngapartji ngayunya kurañi? Nyaakun alatji palyañi?"

¹¹ Ka Aipuramalu wangkangu, "Wiya, nguntiña kulinu ngura nyanga Kirarnga ngurara tjuta Godaku ngurpa-palku. Munuña kuliningi, 'Tjinguruñiya minymakitjangku pungkula iluntankuku.' ¹² Palu mulapa minyma nyanga paluru ngayuku malanypa. Mama kutjutjali, palu ngunytju kutjupa kutjupalimpia. Kaña palunya altira kanyini ngayuku kuri.* ¹³ Ka panya Godalu ngayunya mamaku nguranguru wantikatira ankunytjaku witunu, kaña ankula ngura kutjupangka wirkara minyma palula wangkapai nyanga alatji, 'Ngayuku mukuringkulampa anangu malikitja nyakula palula wangka panya ngayuluña nyuntumpa kuña. Alatji wangka ngayunya atunymankunytjikitjangku, palya.' Alatjiña ngayulu Tjiiranya wangkapai."

¹⁴ Ka palulanguru Pimalikalau Tjiiranya małakungku ungu Aipuramanya munu kuka kutjupa kutjupa tjuta kułu Aipuramanya ungu tjiipi tjuta, puluka tjuta, munu wati kungkawara war̄karipai tjuta kułu palunya ungu paluru tjana palumpa war̄ka tjuta nyinanytjaku. ¹⁵ Munu wangkangu Aipuramala nyanga alatji, "Nyangatja uwankara ngayuku manta, ka nyuntu nguraku mukuringkula manta nyanga lipiwanungku para-ngurirra nyawa munu manta wiru ngurkantara ngura tjunkunytjikitjangku."

¹⁶ Munu paluru Tjiiranya wangkangu, "Ngayulu kuwari unganyi nyuntumpa kuña mani panya tjiilpa pulka mulapa nampa 1,000. Alatjiña unganyi panya anangu nyuntula nyinanytjita tjutangku nyuntunya palya ngurkantankunytjaku tjana ngunti pampuntja kulintjaku-tawara. Mani nyanga palulanguruya nyuntunya kulilkul palya mulapa."

¹⁷⁻¹⁸ Ka nyara palula-arangka Pimalikaku kuri munu palumpa minyma war̄karipai tjuta kułu tjitji wiya alatjiñi nyinangi. Panya Godalu tjananya tjitjiku wiyanu Tjiiranya tjanala tjunguringkula nyinanyangka. Ka małangka Tjiiranya małakungku ungkunyangka Aipuramalu Pimalikaku tjanampa Godala tapingingi, ka Godalu tjananya piruku tjitjitararingkunytjaku palyañu.

21

Isaacanya Iti Wirkankunytja

¹⁻² Ka Mayatja Godalu ngañmanytu kalkuntjatjanungku Tjiiranya palyara pukulmanu tjitjitararingkunytjaku. Ka mulapañu ititjararingu munu tjiłpi Aipuramaku katja kanyinu panya palula ara, panya Godalu ngañmanytu kalkuñu. ³ Ka Aipuramalu iti palunya ininu "Isaacanya". ⁴ Munu tjintu 8 ngarala wiyaringkunyangka Aipuramalu iti palunya watiringkunytjaku palyañu, panya alatjingantjaku Godalu wangkangu.* ⁵ Nyara palula ara Isaacanya iti wirkankunyangka palumpa panya mama Aipuramanya tjiłpi mulapa nyinangi yiya 100 nyinanytjatjanu.

⁶ Ka Tjiiralu wangkangu, "Godaluñi iti nyanga palunya ngayunya ungkula pulkaña mulapa pukulmanu munuñi ikaritjinganu. Kaya kuwari anangu kutjupa tjuta ngayulu iti kanyintja kulira pulkaña pukularira ikaringkuku ngayula tjungu.* ⁷ Anangu tjutangkuya kuliningi ngayulu minyma tjitjiku ngurpa, palu kuwariya kulira urulyaralku panya ngayulu tjiłpi Aipuramaku iti kanyinnyangka. Paluru panya wati irititja mulapa

* **20:12** Tjakangkuya iritilpi kuri walijta ilatja altipai. * **21:4** Genesis 17:12 * **21:6** Iti paluru ini Isaacanya, panya ini nyanga paluru wangkanyi *Ikaringkupainya*.

palu nyawalta, kuwari iti katjatjararingu.” Alatji Tjiiralu pukularira wangkangi.⁸ Ka iti panya paluru ngunytju ipi tjikira pulkaringu munu pulkaringkula maiku ngapartjilta nintiringu. Ka nyara palula aña panya ngunytju ipi wantinyangka palumpa mamangku Aipuramalu mai pulka mulapa palyanu aŋangu tjutangku pitjala ngalkuntjaku palumpa katjaku pukularira.

Aipuramalu Minyma Aikanya Pulanya Itjumailnga Katjarara Paire Iyantja

⁹ Ka minyma panya Aikanya Aipuramaku ngurangka kuwaripaṭu nyinangi palumpa panya warkaripai, minyma panya Itjipanya ngurara. Ka panya minyma nyanga palula Aipuramalu ngañmanytju utinu katja panya ini Itjumailnga. Ka kutjupa-aña Tjiiralu nyangangi palumpa katja tjukutjuku Isaacanya kuṭangku inkatjingannyangka.¹⁰ Munu paluru nyakula unngu nyararingkula wangkangu Aipuramanya, “Minyma pala warkaripai katjarara pulanya paira iyala. Panya ngayulu mukuringkunytja wiya minyma pala palumpa katjangku nyuntu ngula ilunyangka nyuntumpa ulytja, kuka tjutanguru kuļu mantjintjaku. Utu ngayuku katjangku kutju mantjinma nyuntumpa kutjupa kutjupa uwankara nyuntu ilunyangka.”

¹¹ Ka Aipuramalu nyangatja kulira pulkara tjituru-tjitururingu kulira, “Nyaakuñatju paira iyalku ngayuku tjitjitar?”¹² Palu Godalu tjituru-tjitururingyangka nyakula wangkangu Aipuramala, “Tjituru-tjitururingnytja wiyangku wantima nyuntumpa katjanguru minyma pala nyuntumpa warkanguru kuļu. Palu Tjiiralu nyuntula wangkanyangka wantiwiyangku palyala. Panya ngayulu nyuntunya kalkunu nyuntumpa kuri Tjiiralanguru nyuntumpa walytja ma-tjutaringkunytjaku malatja malatja mungiliyi mulapa nyinanytjaku. Ka kalkuntja nyanga paluru ma-tjutaringkuku Tjiiraku katjanguru pala Isaacalanguru, Itjumailtanguru wiya.¹³ Palu ngayulu minyma nyuntumpa warkaripaiku katja tjitji tjutatu ungkuku, panya tjitji paluru kuļu nyuntumpa katja, Itjumailnga. Ka palumpa walytja kuļu ma-tjutaringkuku malatja malatja munuya mungiliyi mulapa nyinaku.”

¹⁴ Ka mungawinki mulapa Aipuramalu pakara mai mantjira mina tjutinu yakutja purunytja kuka panya miringuru palyantjtingangka munu minyma panya Aikala piningga tjunkula palunya pulanya katjarara nguranguru witura iyanu. Ka pula Aipuramanya wantikatira anu munu pula ilytjingka para-pitjalinangi ngura ini Piitjiipala itingka.¹⁵ Munu mina wiyingkunyangka minyma paluru katja wiltjangka tjunkula wantingu punu mutumutungka.¹⁶ Munu tjukutjuku ankula paṭupatau nyinakatingu kulira, “Katjanyatju nguwanpa ilunyi, ngaltutjara. Kanā wanyu paṭu nyinama ngayula mirangka ilunytjaku-tawara.” Munu paluru nyinara pulkara ulangi.

¹⁷ Ka Godalu tjitji panya ulanyangka kulinu munu angelpa witunu palumpa ngunytjungka ilkariringuru wangkanytjaku. Ka palula wangkangu alatji, “Aika! Nyaaringkulau tjituru-tjitururu nyinanyi? Nguluringkunytja wiya panya Godalu kulinu nyuntumpa katja wailu-wailu ngarira ulanyangka.¹⁸ Pakara ara palulakutu munu palunya mara witira pakaltjunganma munu ampura pukulmanama. Panya ngayulu ngula palyalku tjitji nyanga palulanguru walytjapiti winki mulararinnytjaku malatja malatja.”¹⁹ Munu palulanguru Godalu minyma palunya kuru

alañu, ka paluru kuru alaringkula nyangu mina piñi munu ankula yakutjangka tjutira katira ungu palumpa panya katja, ka tjikira palyaringu.

²⁰⁻²¹ Ka Godalu tjitji palunya pulkaringkunyangka atunymara kanyiningi. Ka paluru ngura ini Paranta nyinangi talingka munu punaraku ninti pulkaringkula kukaputju alatjiñu nyinangi. Ka palumpa ngunyjtungku kungkawara ngura Itjipanya ngurara mantjinu palumpa katjangku altintytjaku.

Aipuramalu Pulanku Pimalikalu Ngaparku Kalkuntja

²² Ka kutjupa-ara ngura panya Kirarku mayatja pulkangku Pimalikalu palumpa malpa ini Pikalnga altira katingu. (Pikalnga panya palumpa warmala tjutaku mayatja.) Munu pula Aipuramalakutu ankula palula wangkangu, “Godanya mulapa nyuntula titutjara ngaranyi nyuntu kutjupa kutjupa uwankara palyannyaangka. Palurunta mulapa alpamilalpai. ²³ Palu kuwarini nyuntu ngayunya Godala mirangka kalkunma nyanga alatji. Ngayunya ngunti kuralwiyangku tjukarurungku wangkama ngayuku waltyja uwankara kuļu ngunti kurantja wiyangku wantima, munu ngayuku pakali puliri tjutangka kuļu maļatja maļatjangka tjukarurungku wangkama. Panya nyuntu ngura nyanga palula pitjala malikitja nyinanyangka ngayulu nyuntumpa malpa wiru nyinangi kalypa mulapa, ka wanyu palu purunypaťu ngayuku malpa wiru nyinama munu ngura nyanga Kirarngu ngurara tjutaku kuļu kalypa nyinama. Alatji wanyu nganañanya kalkunma kalypa wiru nganampa nyinanytjikitjangku.”

²⁴ Ka Aipuramalu wangkangu, “Uwa palya, ngayuluña nyuranya alatji kalkunuňi nyurampa kalypa wiru nyinanytjikitjangku.” ²⁵ Munu Aipuramalu piruku kutjupa kutjupa wangkangu Pimalikala nyanga alatji, “Ngayuku wati tjutangku mina piñi tjawañu, palu malangkaya nyuntumpa wati warkaripai tjutangku pitjala mina palunya angatjura kanyini waltyjangku-palku.”

²⁶ Ka Pimalikalu wangkangu, “Wiya ngayulu ngurpa nganalu tjananya witunu mina nyara palunya angatjura kanyintjaku? Nyuntu panyañin ngañmanytu wangkanyta wiyaťu. Kaña kuvari kutju nyanga kulinu ngurpangku.” ²⁷ Ka palulanguru Aipuramalu kuka tjuta Pimalikanya ungu, panya tjiipi tjuta munu puluka tjuta. Munu paluru pulanku ngaparku kalkunuňi. ²⁸ Ka Aipuramalu palumpa tjiipi tjutanguru lamalama kungka 7 tjarara maunṭalpa tjunu. ²⁹ Ka Pimalikalu nyakula palula tjapinu, “Nyaakun alatjinanyi?”

³⁰ Ka Aipuramalu wangkangu, “Wiya, nyuntu lamalama nyanga nampa 7 mantjila, panya alatji ngayulu nyuntunya ungkunyangka aňangu tjutangku nyakula mulapa kulilkupanya ngayulu mina piñi panya palunya tjawantja.” Alatji Aipuramalu mulamularingkunytjaku ungkula palula wangkangu Pimalikala. ³¹ Kaya ngura palunya ininu Piitjiipanya panya nyara palula Aipuramalu pula Pimalikalu wangkara pulanku kalkunu ngapartji-ngapartjingku.

³² Ka pulanku alatji wangkara kalkunyangka Pimalikanya pula malparara ini panya Pikalnga malaku anu ngura Pilitjiyalakutu. ³³ Ka Aipuramalu ngura pala palula Piitjiipala manta tjawara puňu uňinypa ini Tamarika tjunu puňu pulka pakantjaku. Munu paluru Mayatjanya walkuningi, God Titutjara Nyinapainya. ³⁴ Munu Aipuramanya manta nyara Pilitjiyalala rawa mulapa nyinangi.

22

Godalu Aipuramanya Arkantja

¹ Ka ngula Godalu Aipuramanya arkantjikitjangku altingu, “Aipurama!”
Ka wangkangu, “Uwa! Nyangatjaña nyinanyi!”

² Ka Godalu wangkangu, “Nyuntu panya katja kutjukurutjaku Isaacaku pulkara mukuringanyi. Palu kuwari palunya mantjira kati ngura nyara ini Muriyalakutu. Kañanta nyara palula puli murpu panya nintilku nyupali katjarara tatintjaku. Ka nyuntu puli nyara palula katu palunya pitjilpangka katu ngaritjura munu palunya pungkula warungka tjura kampara mulururintjaku ngayunya walkura ungkunytjikitjangku.” ³ Ka mungawinki mulapa Aipuramalu pakara waru tjiwuru alkarakangka atura tangkiyingka tjunkula karpiñu. Munu palumpa katja Isaacanya altingu wati palumpa warkaripai kutjara kulu, munuya tjunguringkula mapakanu ngura panya palulakutu panya Godalu wangkanytjalakutu.

⁴ Munu ankula ankula tjiripi mankurarira Aipuramalu ngura palunya nyangu parari wati-ngarinyangka. ⁵ Munu paluru wati warika kutjara markura wantikatingu, “Nyangangka pula nyinama tangkiyitjara pañara, kali katjanya ngali nyarangka ananyi Godanya walkuntjikitja, munuli walkura wiaringkula mañaku piruku pitjanyi nyupalilakutu.”

⁶⁻⁷ Munu Aipuramalu Isaacanya waru panya tjiwuru katinytjaku ungu munu palurunku tjuña, waru tjangi kulu katingi. Munu pula anangi, ka Isaacalu wangkangu Aipuramala, “Mama!”

Ka wangkangu, “Uwa katja, nyaa?”

Ka wangkangu, “Mama, ngayulu nyanganyi waru tjangi tjiwuru kulu ngali katira, palu kuka lamalama wanyu yaaltji pungkula warungka Godanya walkura ungkunytjaku?”

⁸ Ka Aipuramalu wangkangu, “Wiya katja! Godalulinya paluru alatjitu walytjangku lamalama unganyi, ka ngali palunya mulururalta unganyi.” Munu pula kuwaripañu anangi.

⁹ Munu pula ankula ankula wirkanu ngura panya palulalta, panya Godalu palunya nganmanytju wangkanytjitjangka. Ka Aipuramalu wirkara pitjilpa pulka palyañu munu kurultjunu pitjilta katu. Munu tjitji panya witira ruupangka karpiñu munu mantjira pitjilta ngaritjunu kurulta katu. ¹⁰ Munu palulanguru tjuña mantjira nguwanpa murutjunu liringka iluntankunytjikitjangku. ¹¹ Ka ilkaringuru Mayatjaku angeltu palula mirara wangkangu, “Aipurama! Aipurama!”

Ka wangkangu, “Uwa, nyangatjaña ngaranyi!”

¹² Ka tjitjiku ngalkiltu anga-wangkangu alatji, “Tjitji palatja wantima pungkuwiyangku. Panya kuwarina nintiringu mulapa nyuntu Godala wanganarangku kulilpai, munu palan wangañara mulatu katja pala kutjukurutja nyuntumpa Godanya ungkunytjikitjangku kuliningi wantiwiyangku.”

¹³ Ka Aipuramalu mañakukutura nyangu kuka rama ila ngaranyangka puñungku yuruwilya witira kanyinnyangka. Munu ankula rama panya mantjira katira palunya ngalkilpa pungkula pitjilta katu tjunu warungku kampara mulurunkunytjaku palumpa katjaku arangka. Alatji paluru palyañu Godanya walkura ungkunytjikitjangku. ¹⁴ Munu Aipuramalu ngura nyara palunya ininu nyanga alatji “Mayatja Godalu Ungkunytjanya”. Ka palulanguru kuwari añañu tjutangku alatji wangkapai, “Mayatja Godalu palumpa pulingka ungkupai.”

15-16 Ka Mayatjaku angeltu ilkaringuru piruku Aipuramala wangkangi alatji, "Mayatja Godalu nyuntunya alatji wangkangu, 'Ngayuluñanta mulamulangku kalkuni ngayulu alatjitu nyuntunya pulkara pukulmankunytjikitjangku, panya nyuntu ngayunya wanganarangku kulira nyuntumpa katja kutjukurutja ngayunya nguwanpa pungkula ungangi wantintyta wiyangku. **17** Kana nyuntunya kalkuni nyuntumpa walytja ma-tjuṭaringkunytjaku malatja malatja, kaya mungiliyi mulapa nyinaku kililpi tjuṭa purunypa munu paki purunypa, panya paki kułuny-kulunypa uru pulkangka itingka nyinapai, palu purunypa nyuntumpa walytja ma-tjuṭaringkuku malatja malatja munuya tjuṭa mulararira nyinaku munuya malikitja tjuṭa warmalarira pitjanyangka pungkula wiyaliku munuya ankula tjanampa ngura tjuṭaku mayatjariku. **18** Uwa, nyuntu ngayula wanganarangku kulinu, ka nyara palulanguruna ngayulu nyuntumpa walytjapitinguru anangu manta wikitja palyara pukulmankuku.' Nyanga alatjinta Mayatja Godalu wangkanyi mulamulangku." Alatji angeltu ilkaringuru Godaku tjukurpa Aipuramala tjakultjunu.

19 Ka Aipuramanya pula katjarara malaku anu wati panya warkaripai kutjarakutu, munuya tjunguringkula malaku anu ngurakutu Piitji-ipalakutu. Munuya ngura pala palula rawa nyinangi.

Wati Nayukunu Tjuta

20 Ka ngula tjakulpa Aipuramala wirkanu munu wangkangu nyanga alatji, "Nyuntumpa panya malanypa Nayulu kungka ini Milkanya iriti altingu munu pula tjitji tjutatjararingu munu pula kuwari katja 8-tjara nyinanyi. **21-22** Nganmanytju pula katja ini Uutjanya kanyinu, ka Uutjalu pininu Puutjanya, ka Puutjalu pininu Kimuwilnga (panya Aramaku mama), ka Kimuwiltu pininu Kitjatanya, ka Kitjatalu pininu Aatjunya, ka Aatjulu pininu Piltatjanya, ka Piltatjalu pininu Tjitolapanya, ka Tjitolapalu pininu malatja ini Pitjuwilnga." **23** Ka Pitjuwiltu panya ngula unṭalpa ini Ripikanya utinu. **24** Ka Nayulu kuri kutjupa kuļu kanyiningi ini Raumanya Milkaku panya nganati. Munu paluru Nayuku tjitji kutjara kutjara kanyinu ini nyanganpa – Tipanya, Kayamanya, Tayatjanya, munu Maakanya.

23

Aipuramalu Kulpi Payamilantja Tjiiranya Tjunutjunkunytjikitjangku

1-2 Ka Aipuramaku kuri Tjiiranya pampa mulararira ilungu yiya panya nampa 127 nyinanytjatjanu. Paluru panya nyinara wiyaringu ngura nyara ini Ipuranta manta panya Kainanta ngururpa. Ka Aipuramanya kuri wiyarinkunyangka katku nyinara ulangi pulkara tjituru-tjitururira. **3** Munu palulanguru pakara ngura wantikatira anu anangu iitakunu tjuṭaku ngurakutu tawunu panya ititjakutu munu tawunu kaitangka wirkara tjanala mitingku tjunguringu.* Munu paluru tjanala tjunguringkula tjapiningi nyanga alatji, **4** "Ngayuluña malikitja manta nyanga nyurampangka nyinanyi, panya ngayulu iti ngaringu ngura parari mununa pulkaringkula kutju pitjangu ngura nyangaku. Wanyuniya nyurampa manta tjukutjuku ngayula tjalamilala, kana pala palula ngayuku kuri tjuṇutjura."

* **23:3** Tjakaya iriti mitingi wangkanytjikitjangku tawunuku kaitangka itingka tjunguringkupai.

5-6 Kaya wangkangu palula Iitakunu tjutangku, “Wiya, nyuntu wati pulka ngananala nyinanyi wiru mulapa. Ka nganampa kulpi tjuta ngaranyi miri tjuṇutjunkunytjaku, ka palya nyuntu kutju wiru mulapa ngurkantara, munu pala palula nyuntumpa kuri tjuṇutjura. Palya? Panya nganaŋa uwankara mukuringanyi nyuntunya kulpi ungkunytjikitja.”

7-9 Ka nyangatja kulira Aipuramalu pukularira pakara tjanala kuranyu pupakatira manta ngalyangku pampunu, munu wangkangu, “Munta wiru tjuta nyura! Munuya wanyu piruku kulila! Wirungkuya-puta tjapila wati pala Ipurannga panya Tjawaku katja paluru kulpi ini Makipilanya ngayula tjalamilantjaku, panya kulpi paluru palumpa mantangka ngaranyi kantilytja. Ka paluru mani nampa wangkanyangkaña tjukarurungku payamilalku nampa panya palunya alatji, ka kulpi panya paluru ngayuku alatji ngaraku ngayuku walytja tjuta tjuṇutjunkunytjaku.”

10 Ka wati panya Ipurannga palula tjanala tjungu nyinangi tawunu pala palula kaitangka, munu paluru Aipuramalu tjapinnyangka kulira wangkangu anangu tjutangka mirangka nyanga alatji, **11** “Uwa, wati wiru nyuntu! Kulila! Nyuntunyaña nyanga ngayuku walytja tjutangka mirangka unganyi kulpi pala palunya nyuntu kuri tjuṇutjunkunytjaku, mununanta manta pala kulpingka ititja kulu unganyi.”

12-13 Ka Aipuramalu pukularira piruku tjanala kuranyu pupakatira manta ngalyangku pampunu, munu paluru wangkangu wati panya Ipuranta anangu tjutangka mirangka, “Wiya wirunya, palu ngayulu nyuntula payamilantjikitja mukuringanyi mani nampa panya nyuntu wangkanytjitjangka. Wanyu-puta mani mantjila, kaña kulpi nyara palula ankula ngayuku kuri tjuṇutjura.”

14-15 Ka Ipurantu wangkangu, “Wati wiru, ngayunya kulila! Manta nyara kulpitjaraña ngañmanyiju payamilañu tjiilpa tjukutjukungka nampa nyanga alatji 400-ngka kutju. Ka palya nyuntu mani nampa nyanga tjukutjukungka payamilala, ka kulpi nyaratja nyuntumpariku alatji nyuntu kuri tjuṇutjunkunytjaku.”

16 Ka Aipuramalu nampa kulira mapalkungku palyanmanu tjaruntjaku wangkanytja wiyangku. Munu mani tjiilpa nampa 400 tjukarurungku kantamilara ungu wati panya palunya anangu tjutangka mirangka.

17-18 Alatji manta panya paluru kulpi puñu winki Aipuramakuringu. Manta paluru panya ngura ini Makipilanya ngura Mamañaila kakarara, ka wati panya Ipurantu Aipuramala tjalamilañu anangu Iitakunu tjutangka mirangka tjana tawunuku kaitangka itingka nyinanyangka. Kaya nyangu Aipuramalu tjukarurungku payamillanyangka. **19** Ka palulanguru Aipuramalu palumpa kuri Tjiiranya katira tjuṇutjunu kulpi panya palula, manta panya Kainanta ngururpa. **20** Ka kulpi panya paluru kurulpa ngarangi Aipuramaku tjanampa palumpa walytja tjutaku kulu. Panya ngañmanyiju Iitakunu tjutangku kanyiningi manta nyara palunya, munuya Aipuramalalta tjalamilañu ka palumparingu.

24

Isaacanya Munu Ripikanya

1 Ka Aipuramanya tjlipi mulararingu munu pukulpa mulapa nyinangi, panya Mayatja Godalu palunya rawangku pukułmařa kutjupa kutjupa tjuta mulapa ungangi. **2-4** Ka Aipuramaku wati warkaripai kutju nyinangi mayatja palula małatja wati tjlipi, munu paluru wati warka kutjupa tjuta atunyman kupai munu Aipuramalu kanyintja uwankara nyakula

atunymankupai, munu wati warka tjuṭa kuļu witulpai warkarinytjaku. Ka Aipuramalu tjilpi panya palunya altira wangkangu, “Ngayuku katja Isaacanya kuri wiya nyinanyi, kaña mukuringanyi nyuntu ankula palumpa kuri ngurira mantjintjaku. Palu ngura nyanga Kainannga ngurara kuri palumpa mantjintja wiyangku wantima. Nyuntu alinytjara ara malaku ngura nyara ngayulu iti ngarintjtakutu, munu ngayuku walytja tjuṭanguru kungkawara ngurkantara mantjila kuri palumpa. Wanyuni Mayatja Godala mirangka mulamulangku kalkula ngura nyara palunya ngurara kutju mantjintjikitjangku. Panta nyangani pampura tjukarurungku wangka, kaña pampura kalkunyangka nyuntumpa mulamularingkuku.”*

⁵ Ka wati tjilpi paluru wangkangu, “Uwa palya, ngayulu ankula nyuntumpa walytjanguru palumpa kuri ngurilku nyuntumpa katjaku. Palu tjinguru kungkawara ngayulu ngurkantankunytja ngayula tjungu pitjawi yangku wantiku ngura nyanga palulakutu, kaña yaaltjiriku? Tjin-guruna Isaacanya ngura nyara palulakutu ma-katiku nyuntumpa panya ngurakutu, mulapa?” Alatji paluru tjapiningi Aipuramala.

⁶ Ka Aipuramalu wangkangu, “Wiya, wiya! Ngayuku katja nyara palulakutu katiwi yangku wantima. ⁷ Uwa, mulapa ngayulu ngura nyara palula iti ngaringu, ka panya ngayuku walytja tjuṭa nyara palulatu nyinanyi. Palu Mayatja ilkaritjangku ngayunya ngalya-katingu ngura nyara palulanguru. Mununi ngura nyangaku kalkunu manta nyanga Kainanku ngayuku walytja małatja małatja ungkunyti jikitjangku palumpa tjanamparintjaku. Pala palulanguru ni kulila, panya nyara palulakutu ankunyangka Mayatja Godalu nyuntula kuranyu angelpa iyalku, ka nyuntunya nintliku ngayuku katjaku kuri tjukarurungku ngurira mantjintjaku. ⁸ Ka kungkawara nyuntu ngurkantankunytjalu tjinguru wantiku nyuntula tjungu pitjawi yangku. Palulanguru kutjuñin kulira wantima ngayunya ngañmanytju kalkuntjatjanungku. Palu ngayuku katja katintjya wiyangku wantima ngura nyara palulakutu.”

⁹ Ka kulira tjilpi panya warkaripaingku mayatja palumpa Aipuramanya pañta pampunu, munu kalkunu panya Aipuramalu wangkanytja uwankara wanganarangku kulira palyantjikitjangku.

¹⁰ Munu paluru kamula 10 mantjinu Aipuramaku kamula tjuṭanguru. Ka Aipuramalu kutjupa kutjupa tjuṭa palunya unkul'iyanu ulytja wiru tjuṭa kungkawaratja, pu linguru palyantja wiru tjuṭa munu kutjupa kutjupa tjuṭa kuļu, ka paluru kamulangka tjunkula karpinu katira kungkawara panya palunya ungkunyti jikitjangku palumpa walytja tjuṭa kuļu. Munu paluru ma-pakanu wati warkaripai tjutatjara manta ini Mitjupu-taimiyalakutu, panya manta nyara palula alinytjara wilurara tawunu kutjupa ngarangi Aipuramaku malanypaku ngura wati panya Nayuku.

¹¹ Munu tjilpi panya paluru ankula ankula tawunu nyara palula wirkara kamula tjuṭa pupatjunu mina pi tingka itingka tawunungka urilta. Ka panya mungartji-mungartji ngarangi, panya kungkawara tjuṭa waringka minaku pitjapai. ¹² Ka tjilpi panya paluru Godala tjapinu, “Mayatja wanyuni kulila! Panya nyuntu ngayuku mayatjaku Aipuramaku God. Wanyuni kuwari nintila Isaacaku kuri ngurintjaku, ngayuku mayatja Aipuramanya pukularintjaku. ¹³ Ngayulu nyanga minangka paṭara ngaranyi, kaya kungkawara tjuṭa kuwari wa linguru mina tjutintjikitja

* ^{24:2-4} Tjakangkuya iriti alatjingara pañta pampulpai mulamulangku kalkuntjikitjangku.

pitjanyi. ¹⁴ Kaña kuwari kutjungka mina pinngka katinyangka nyakula alatji wangkaku, ‘Wanyuṇi mina tjikintjaku ungama nyuntumpa pala pitinguru.’ Ka tjinguru paluru alatji wangkaku, ‘Uwa, tjikila! Kaña wanyu mina kutjupa kuļu tjutilku nyuntumpa kamula tjutaku kuļu.’ Ka paluru alatji wangkanyangka Kulilku, ‘Munta-uwa, mulapa Godalu mayatja Aipuramanya kalkuntjatjanungku palyanu munu kungkawara nyangatja palumpa katjaku ngurkantanu.’” Alatji tjilpi panya Aipuramaku warkangku Godala tjapiningi palunya kungkawara tjukarurungku nintintjaku.

¹⁵ Ka paluru tjapinnyangka kungkawara ini Ripikanya minaku ngalyawirkanu piti wara pinngka tjunkula. Ka kungkawara nyanga palumpa mama panya wati ini Pitjuwilnga. Ka wati Pitjuwilku panya mama ngunyntju pula ini Nayunya, Milkanya. Ka paluru panya Aipuramaku malanypa, Nayunya, Ripikaku panya tjamu. ¹⁶ Ka Ripikanya kungkawara wiru mulapa munu watiku ngurpa nyinangi. Munu paluru mina panya pitikutu ukalingkula piti panya warangka mina tjutira tjaalyngaratjunu munu pinngka tjalira malaku pitjangi. ¹⁷ Ka wati panya tjilpi ngapari-ngapari wirtjapakanu palulakutu munu wangkangu, “Wanyuṇi mina tjukutjuku ungama nyuntumpa pala pitinguru.”

¹⁸ Ka wangkangu, “Uwa, tjikila!” Munu paluru piti tjarura witira kanyinu paluru tjikintjaku. ¹⁹ Munu tjikira wiyingkunyangka paluru wangkangu, “Kuwarina mina pulka tjutini nyuntumpa kamula tjutaku kuļu, tjana kuļu tjikira palya ngaranytjaku.” ²⁰ Munu paluru pitinguru mina winki pupatjunu piti kutjupangka panya kukangku tjikilpaingka, munu malaku wirtjapakanu mina pitikutu piruku tjutintjikitja, munu paluru mina pulka ilara katira tjutira ngarangi kamula tjutaku tjana tjikira palya ngaranytjaku. ²¹ Ka tjilpi panya paluru kungkawara palunya wangkawayangku ngarala miranngi kulira, “Tjinguru nyanga palunya Godalu ngayunya nintini Isaacaku kuri katintjaku.”

²² Kaya kamula tjutangku tjikira wiyingkunyangka tjilpi paluru palumpa ulytjangu mantjinu ringi tjukutjuku mulyatja, munu munytjul-paku manguri-manguri kutjara. Munu palulanguru kungkawara palula ringi mulya alangka tjarpatjunu, munu munytjulpa kutjarangka manguri-manguri kutjara tjunu. Ka ringi nyanga paluru, manguri-manguri kutjara kuļu apu gold-nguru palyantja mani pulkatja. ²³ Munu tjilpi panya paluru kungkawarangka wangkangu, “Mama nyuntumpa ini ngananya? Tjinguru paluru ruuma kanyini nganana palumpa ngurangka ngarinintjaku munga kuwari?”

²⁴ Ka wangkangu, “Ngayuku mama ini Pitjuwilga panya Nayuku pulampa Milkaku katja. ²⁵ Ka nganampa ngurangka mai ukiri pulka ngarinyi kamula tjutangku ngalkuntjaku munu tjanampa ngaripai kuļu ngaranyi. Ka ruuma kutjupa ngaranyi nyura ngarinintjaku.”

²⁶ Ka palulanguru tjilpi panya paluru pukularira Mayatja Godanya walkuntjikitjangku tultjungarakatingu, ²⁷ munu alatji walkura wangkangu, “Mayatja, nyuntu wiru mulapa, panya nyuntu ngayuku mayatja Aipuramaku God, munun palumpa mukuringkula wanganarangku kulira palyanu panya nyuntu palunya kalkuntjatjanungku. Panya nyuntunin ankunyangka tjukarurungku nintinu ngayuku mayatjaku walytja tjuta, nyanga Nayukunu tjuta.”

²⁸ Ka kungkawara panya paluru ngurakutu wirtjapakara uwankara tjakultjunu palumpa ngunyjtungka munu walytja tjutangka kuļu. ²⁹⁻³⁰ Ka palumpa kuļa ini Laipannga kuļu palula tjanala tjungu nyinangi. Munu

paluru nyangu palumpa małanypangku mulyangka, munytjulpangka kułu kanyinnyangka munu tjilpi panya paluru wangkanytja uwankara tjakultjunkunyangka kuliningi. Munu nyakula kulira mapalku pakara anu tjilpi panya palulakutu mina panya pitingka patara ngaranyangka tawunungka urulta. Munu ankula ma-wirkara nyangu tjilpi panya paluru kamula tjutatjara ngaranyangka. ³¹ Munu Laipantu palula pukulutu wangkangu, “Palya, nganampa ngurakutu ngalya-pitja. Panya nyuntunya Mayatja Godalu wirura wankaru ngalya-katingu. Nyanga palula wanyu ngaranytja wiya ngalya-pitja, panya ngayulu ngañmanytju nyuntumpa ngura palyanu ngayuku walingka, mununa nyuntumpa kamula tjutaku kułu ngura palyanu.”

³² Ka tjilpi panya paluru anu palumpa walikutu wati panya palumpa malpa tjuta kułu, munuya wirkara tjarpangu walingka. Ka Laipantu kamula tjutanguru ulytja uwankara mantjira tjunu munu kamula tjuta ungu mai ukiri ngalkula paltjaringkunytjaku munu ngura ngarinytjaku tjanampa palyanu ukiri piltinguru. Munu palula małangka mina tjutinu tjilpi paluru tjina paltjintjaku, palumpa malpa tjutangku kułu. ³³ Munu palulanguru tjanampa mailta paura katingu tjana ngalkuntjaku. Palu tjilpi panya paluru alatji wangkangu, “Munta! Wanyuna ngayulu tjukurpa wangkama nyurala mai nyanga ngalkuntja kuwaripangka.”

Ka Laipantu wangkangu, “Wiya palya wangkama, kala kulinma.”

³⁴ Ka paluru nyanga alatji wangkangu, “Ngayulu Aipuramaku warkaripai. Paluru ngayuku mayatja. ³⁵ Ka Mayatja Godalu palunya pulkara mulapa pukulmanu munu palunya kutjupa kutjupa tjuta mulapa ungu nyanga alatji, tjiipi tjuta, nanikuta tjuta, puluka tjuta, munu mani gold tjiilpa kułu pulka mulapa ungu, munu wati minyma palumpa warkarinytjaku tjutatu ungu, kamula tjuta, tangkiyi tjuta kułu ungu palunya. Ka paluru pulka mulartjara pukul-pukulpa nyinanyi. ³⁶ Ka palumpa kuringku Tjiiralu pampa mulararira katja kanyinu palumpa, ka paluru katja palunya uwankara ungu, panya ulytja, kuka, kamula, tangkiyi, tjinatjara uwankara paluru kanyintja ma-ungu. ³⁷ Mununi kalkuntjaku ngayunya wangkangu kuri palumpa katjaku ankula ngurira mantjintjaku. Alatji paluru kalkuntjaku wangkangu ngayunya, ‘Kuri ngayuku katjaku kungkawara ngura nyanga Kainannga ngurara mantjintja wiyangku wantima. ³⁸ Palu nyuntu alintjara ara małaku ngura nyara ngayulu iti ngarinytjitjakutu, munu ngayuku walytja tjutanguru kungkawara ngurkantara mantjila kuri palumpa.’ Alatjini wangkara witunu Aipuramalu.

³⁹ “Kaña palula tjapinu, ‘Palu tjinguru kungkawara paluru ngayula tjungu pitjanytja wiyangku wantiku. Kaña yaaltjiriku?’

⁴⁰ “Ka paluru panya wangkangu, ‘Wiya Mayatja Godalu nyuntunya nintilku. Panya ngayulu palula titutjarangku wangañarangku kulipai, ka paluru angelpa nyuntula kuranyu iyalku, ka nyuntunya nintilku ngayuku katjaku kuri tjukarurungku ngurira mantjintjaku nyara ngayuku mamaku walytja tjutanguru.’ Alatjini wangkara rapanu Aipuramalu.

⁴¹ Mununi wangkangu, ‘Palu nyuntu nyara tjanalanguru kungkawara kutju ngurkantankuku, kaya tjinguru palumpa walytja tjutangku wantiku palunya nyuntunya unkul’iyalwiyangku ngalya-katintjaku. Nyara palulanguru kutju nyuntu kalkuntja panyatja wantima kulilwiyangku, tjana unkuwiyangku wantinyangka.’ Alatji Aipuramalu ngayunya wangkangu, ka nyanganा pitjangu.

⁴² “Munuña panya kuvari mina pitingka wirkara tjapinu Mayatja Godala nyanga alatji, ‘Mayatja! Nyuntu panya ngayuku mayatjaku God, Aipuramaku. Wanyuni kuvari nintila Isaacaku kuri ngurira mantjintjaku. Nyanga alatjina arkara ngurkantankuku. ⁴³ Kuvariña minangka itingka ngaranyi, munuña kungkawara kutjupa minaku pitjanyangka nyakula palunya tjapilku, “Wanyuni mina tjkintjaku ungama nyuntumpa pala pitinguru.” ⁴⁴ Ka tjinguru paluru alatji wangkaku, “Uwa, tjkila, kaña wanyu mina kutjupa kulu tjutilku nyuntumpa kamula tjuṭaku kulu.” Ka paluru alatji wangkanyangkaña kulilku, “Munta-uwa, Mayatja Godalu kungkawara nyanga palunya ngurkantanu ngayuku mayatjaku katjaku.”

⁴⁵ “Ka ngayulu panya Godala tjapinnyangka mulapaṭu mapalku ngalyawirkanu kungkawara panya Ripikanya piti waṛa piningka tjunkula, munu paluru minakutu ukalingkula mina ilaṛa pitingka tjutira piningka tjunu ngurakutu katinytjikitjangku. Kaña palula tjapinu, ‘Wanyuni mina tjkintjaku ungama.’ ⁴⁶ Ka paluru mapalku piti tjaruṇu wangkara, ‘Uwa, tjkila! Kaña nyuntumpa kamula tjuṭa kulu minatjanula.’ Kaña tjikinu, ka paluru kamula tjuṭa kulu minatjanuṇu.

⁴⁷ “Kaña palula tjapinu, ‘Nyuntumpa mama ini ngananya?’ Ka wangkangu, ‘Ngayuku mama ini Pitjuwilngu panya Nayuku pulampa Milkaku katja.’ Kaña palulanguru ringi tjarpatjunu palula mulya alangka, munu manguri-manguri kutjara munytjulpangka tjunu. ⁴⁸ Mununa tultjungarakatira Aipuramaku God walkunu. Ngayulu palumpa pukularira palunya mirawañingu ngayuku mayatjaku God, panya paluru ngayunya tjukarurungku ngalya-katingu nyanga palulakutu ngayuku mayatjaku waltya tjuṭakutu, munuṇi tjukarurungku nintinu kungkawara nyanga ngayuku mayatjaku małanypaku puliri. Kaña nyakula kulinu, ‘Nyanga palunya Godalu ngurkantanu ngayuku mayatjaku katjaku.’

⁴⁹ “Uwa alatjiṇu wangkanyi, ka nyura yaaltji kulinu? Nyura wanyu ngayuku mayatja Aipuramanya pukularintjaku tjukarurungku palumpa katjaku kuri iyalku? Uwanmaraya kaña kuliṛa pukularima. Palu wantirampaniya utingku wangka, kaña kungkawara kutjupa ngurila.”

⁵⁰ Ka Laipantu pula Pitjuwiltu mamaṛarangku ara nyanga palunya kuliṛa tjlpi panya palula wangkangu nyanga alatji, “Wiya, wirun nyangatja wangkanyi nyuntunya Mayatja Godalu ngalya-katintja, ka ngali wiyanmankunytjaku wiya alatjitu ngaranyi. Nyangatja paluru kutjungku palyantja Mayatja Godalu. ⁵¹ Nyangatja Ripikanya. Palunya mantjira ma-kati, ka wirkankunyangka nyuntumpa mayatjaku katjangku palunya altiku, panya alatjingantjaku Mayatja Godalu wangkangu.”

⁵² Ka nyangatja kuliṛa tjlpi panya paluru pulkara pukularingu Mayatja Godaku munu pupakatira ngalyangku manta pampura palunya walkunu.

⁵³ Munu palulanguru paluru palumpa ulytjanguṇu mantjinu mantara tjuṭa, munu kutjupa kutjupa wiru tjuṭa apu gold-nguru, tjiilpanguru palyantja tjuṭa, munu Ripikanya ungu mantarangka tjarpanytjaku, munu wiru panya tjuṭa tanpantjaku. Munu paluru Ripikaku kutu, ngunytju kulu maungukatingu, kutjupa kutjupa wiru tjuṭa mani pulkatja tjuṭa.

⁵⁴ Palulanguruya tjlpi panya paluru munu palumpa malpa tjuṭangku ngalkula tjikira paltjaringu, munuya ngura pala palulalta ngaringu munga kutju. Munuya ngarira tjinturingkula pakara tjlpi panya paluru wangkangu, “Wanyuni malakungku iyala ngayuku mayatjakutu.”

⁵⁵ Palu Ripikaku kutangku ngunytjungku kulu arkara wangkangu, “Wiya kuwaripangku wantima, ka kungkawara nyanga paluru tjukutjuku

ngananganala nyinama tjinguru tjintu 7 tjinguru tjintu 10, munu palulanguru nyuntula anama. Palya?"

⁵⁶ Ka tjilpi panya paluru wangkangu, "Wiya wantir'iyalalanya markuntja wiyangku. Panya Godalu ngayunya tjukarurungku ngalya-katingu kungkawara nyanga palulakutu. Wanyulanya-puṭa wantir'iyala, kaṇa kungkawara palunya mayatjakutu kati."

⁵⁷ Ka pula katjararangku wangkangu, "Wanyu paṭala, kali alṭi kungkawara palunya, ka paluru kulira wangka." ⁵⁸ Munuya Ripikanya alṭira tjapinu, "Yaaltjin kulini? Nyuntu ankuku wati nyanga tjilpi palula?"

Ka wangkangu, "Uwa palya, ngayulu ananyi."

⁵⁹ Kaya palulanguru Ripikanya palula tjanala tjungu iyanu palumpa ngunytjungku, kutangku, walytja tjutangku kulu. Munuya minyma pampa panya Ripikanya itinguru kanyintja kuļu palula tjungu iyanu.

⁶⁰ Munuya Ripikanya pukulmanu alatji wangkara, "Nyuntulanguru anangu mungilyi mulapa ma-tjutaringkuku malatja malatja, kaya tjanampa mirpantju tjuta pungkula wianma alatjitu nyuntumpa walytja tjutangku malatja malatjangku kuļu." ⁶¹ Ka Ripikanya palumpa kungkawara warkaripai tjuta kuļu pirtji-pirtjira kamulangka tati-tatinu munuya tjilpi panya Aipuramaku war kangka tjunguringkula anu. Alatji wati panya tjilpi paluru Ripikanya nguriṛa mantjinu munu ma-pakara anu malaku palumpa mayatjakutu.

Isaacalu Ripikanya Altinytja

⁶² Ka nyara palula-arangka wati panya Isaacanya pilangka nyinangi Kainanta ulparira, ka palumpa ngurangka itingka mina pitī ngaringi, panya mina pala palunyaya wangkapai nyanga alatji, "Ngura nyanga palula panya palunya nyangu Tiṭutjara Nyinapailu". ⁶³ Munu nyara palula nyinara paluru mungartji kutjupa ilytjikutu anu unytju, tjinguru urukulin-tjikitja. Munu ilytjingka ma-pitjala kata ma-katura ala mirantjikitjangku nyangu kamula tjuta ngalya-pitjanyangka. ⁶⁴⁻⁶⁵ Ka Ripikalum kamula katunguru wararingkula nyangu Isaacanya ngalya-pitjanyangka, munu paluru ukalingkula Aipuramaku war kangka wati panya tjilpingka tjapinu, "Wati ngananya nyaratja ngalya-pitjanyi?"

Ka wangkangu tjilpi panya paluru, "Wiya, nyaratja ngayuku mayatja, Isaacanya." Kanku Ripikalum nyangatja kulira raikingka yunpa tjutunu.

⁶⁶ Ka wati panya tjilpingku Isaacala wangkangu, "Nyngatjana ngalya-katingu nyuntumpa kuri." Munu paluru tjukurpa uwankara tjakultjunu panya paluru ankula kungkawara mantjintja. ⁶⁷ Ka Isaacalu Ripikanya mantjira katingu palumpa ngunytjuku tiintakutu munu palunya kuri altingu. Munu paluru palumpa pulkaṛa mukuringu, ka Ripikalum palunya pukulpa palyanu panya wati paluru ngunytjunguru tjituru-tjituru nyinangi.

25

Tjitji Kutjupa Tjuta Aipuramalanguru Ma-tjutaringkunytja

¹ Ka Aipuramalu kuri kutjupa altingu minyma ini Kituranya. ² Ka paluru katja tjuta kanyiningi Aipuramaku ini nyanganpa – Tjimarannga, Tjakitjannga, Mitannga, Mitiyannga, Itjipakanya, Tjuwanya tjananya. ³ Ka Tjakitjannga wati Tjiipaku pulampa Titanku mama nyinangi. Ka wati panya Titantanguru anangu ma-tjutaringku malatja malatja, anangu panya ini nyanga tjana Atjurkunu tjuta, Litutjikunu tjuta, Liyumkunu

tjuṭa. ⁴ Ka Aipuramaku katjangku ini Mitiyantu katja tjuṭa utinu ini nyanganpa – Ipanya, Ipunya, Aanakanya, Apitanya, Iltayanya tjananya.

⁵⁻⁶ Ka Aipuramalu minyma Kiturakunu tjuṭa kutjupa kutjupa wiru tjuṭa ungu palumpa panya katja tjuṭa, munu palu purunypaṭu minyma Aikakunu kuļu ungu palumpa panya katja Itjumailnga. Munu palulanguru tjananya uwankara parari ma-iyanu kakarara katja panya Isaacala itingka nyinanytjaku-tawara. Ka ngula Aipuramanya wiyaringkunyangka Isaacalu palumpa kutjupa kutjupa uwankara mantjinu.

Aipuramanya Wiyaringkunytja

⁷⁻⁸ Uwa, Aipuramanya yiya tjuṭa mulapa nyinangu nampa nyangatja 175 munu palulangurulta ilungu. ⁹⁻¹⁰ Ka palumpa katja kutjarangku Isaacalu pula Itjumailtu palunya katira ngura panya Mamaṛaila kakarara tjuṇutjunu kulpi ini Makapilala. Panya kulpi pala palunya Aipuramalu nganmanytju payamilañu wati Iitakunungka ini Ipuranta munu panya palumpa kuri Tjiiranya pala palula nganmanytju tjuṇutjunu. ¹¹ Ka Isaacanya palumpa mama tjuṇutjunkunytjatjanu piṛuku ankula nyinangi ngura nyara mina pititjarangka, panya mina nyara palunyaya wangkapai nyanga alatji, “Ngura nyanga palula panya palunya nyangu Titutjara Nyinapailu”. Ka Godalu Isaacanya pukulmanu kutjupa kutjupa tjuṭa palumpa palyara.

Wati Itjumailtanguru Anangu Ma-tjuṭaringkunytja

¹² Ka nyangatja Aipuramaku katja Itjumailku walytjapiti palulanguru ma-tjuṭaringkunytja malatja malatja. Itjumailnga panya Aipuramalu minyma ini Aikala utinu Tjiiraku panya warkangka. ¹³⁻¹⁵ Ka Itjumailtu katja tjuṭatu utinu. Ngañmanytju paluru utinu katja ini Nipayatjanya, ka Nipayatjalu pininu wati ini Kitarnga, ka Kitartu pininu Atapilnga, ka Atapiltu pininu Mipitjamanya, ka Mipitjamalu pininu Mitjimanya, ka Mitjimalu pininu Tumanya, ka Tumalu pininu Matjanya, ka Matjalu pininu Aatatanya, ka Aatalu pininu Timanya, ka Timalu pininu Tjiturnga, ka Tjiturtu pininu Napitjinya, ka Napitjilu pininu Kitimanya. ¹⁶ Nyanga paluru tjana uwankara Itjumailku katja tjuṭa nampa panya 12. Ka katja nyanga 12-nguru pułka-añangu ma-tjuṭaringkula malatja malatja ma-nyinangu palu purunypaṭu. Munuya paluru tjana walytjarara walytjarara nyinara wañanigi ngura kutjupa kutjupangka. Kaya Itjumailku katja panya 12 walytjapiti kutjupa kutjupaku mayatja nyinangi ngura walytjangka walytjangka. Munuya tawunu tjananku walytjangku walytjangku ininu. ¹⁷ Ka Itjumailnga tjlipi mulararira ilungu yiya tjuṭa mulapa nyinanytjatjanu nampa panya 137. ¹⁸ Kaya Itjumailku walytjapiti ma-tjuṭa mulararingu malatja malatja munuya manta lipiwanu nyinara wañanigi nyanga alatji panya Ittipala kakarara ngura ini Tjuulanguru ma-nyinara wañanigi kakararakutu ngura ini Apilalakutu. Munuya paluru tjana Aipuramaku walytja kutjupa tjuṭaku tiṭutjara mirpañtju nyinangi kalypa wiya.

Jacobanya Pula Iitjunya Iti Wirkankunytja

¹⁹ Ka nyangatja Aipuramaku katja Isaacaku walytjapiti palulanguru ma-tjuṭaringkunytja malatja malatja. ²⁰ Panya Isaacalu pułkaringkula yiya nampa 40 nyinanytjatjanungku Laipanku malanya Ripikanya altingu panya wati Pitjuwilku unṭalpa. (Pitjuwilnga ngura panya Aramanya ngurrara, manta nyara Mitjupu-taimiyala nyinapai.) ²¹ Palu Ripikanya panya puṭu tjitjitararingangi, ka Isaacalu Mayatja Godala tjapiningi palunya tjitji ungkunytjaku. Ka Mayatjalu paluru tjapinnyangka kulinu, ka palulanguru

Ripikanya ititjararingu munu paku nyinangi. ²² Palu Ripikala tjuningka iti kutjara nyinangi, munu pulanku wirkankunytja kuwaripangka tjununngu pikaringkupai. Ka ngunyjtungku wangkangu, “Nyaaku pula tjununngu pikaringanyi?” Munu paluru pu tu kulira Mayatja Godala tjaminpalula wangkara utintjaku. ²³ Ka Mayatjalu tjaminnyangka kulira palula wangkangu nyanga alatji,

“Tjitji pala pululanguru pulka-añangu utu lu kutjara ma-tju tarinkuku malatja malatja,
panya palumpakunu tju tarinkuku, ka nyara kutjupaku palu purunypa tu tju tarinkuku.

Munuya paluru tjana utu lu kutjara titutitu nyinaku.

Ka utulu kutju witulya pulka ngaraku,
palu utu lu kutjupa upa nguwanpa ngaraku.

Ka kuta panya malanypaku war kariku.”

Alatji Mayatjalu Ripikanya utira wangkangu.

²⁴ Ka palulanguru iti wirkankunytjaku ilaringu ka Ripikalukatja kutjara kanyinu. ²⁵ Ka kutanya miri tjin-tjinpa nguwanpa inyu pulka, ka palunya ininu Iitjunya. ²⁶ Ka katja malatja mapalku wirkanu wanapari kuta paalpa marangku witira, ka palunya ininu Jacobanya. Ka katja nyanga pula wirkankunytja-ar Isaacanya yiya nampa 60 nyinangi.

Iitjulu Palumpa Malanypa Kutanmankunytjikitjangku Kalkuntja

²⁷ Ka tjinji paluru pula pulkaringu, ka Iitjunya kukaputju mulapa nyinangi, munu paluru ilytjingka pukulpa para-ngaрапai kukaku ankula. Palu Jacobanya wati piluntju munu ngurangka kutju nyinara warkaripai. ²⁸ Ka Isaacanya Iitjuku pulkara mukuringkupai panya paluru pukultu ngalkupai Iitjulu kuka katinyangka. Palu Ripikanya Jacobaku pulkara mukuringkupai.

²⁹ Ka tjiiripi kutjupa Jacobalu mai tjuu warungka kutjannyangka Iitjunya kukatjanu wirkanu paltjatjiratja pulka. ³⁰ Munu paluru Jacobanya wangkangu, “Ai! Ngayulu pulkara paltjatjiratjaringu. Ungaman mai pala tjuu tjin-tjinpa.” (Kaya nyanga palulanguru palunya ini kutjupa wangkapai “Iitamanya” panya “Iitima” wangkanyi “Tjin-tjinpa” tjanampa wangkangku.)

³¹ Ka Jacobalu wangkangu, “Uwa palyantinanta ungguku, palu wanyuni ngayunya kalkula, kaña nyara palulanguru kutju nyuntunya uwa. Panya nyuntu ngayuku kuta kuranyu iti wirkankunytja, munun palulanguru nyuntu kuta nganmanyitja mamangka arangka ngaraku paluru wi yaringkunyangka. Munu nyuntu panya mayatja nyinaku nganampa walytja uwankaraku munun mamalu kanyintja uwankara mantjilku paluru ilunyangka. Ka nyuntunya Godalu pukulmankuku mununta kalkulku, panya paluru tjamu Aipuramanya mama Isaacanya kulu kalkuntja purunypa. Nyangatja uwankara nyuntu mantjilku kuta pulkangku. Palu nyuntu nyanga ngayuku maiku mukuringkulampa ngayula-warara wangkara palyanmara ngayulu nyuntumpa arangka ngaranytjaku kuta purunypa.”

³² Ka Iitjulu wangkangu, “Wiya palya! Ngayulu panya kuwari paltjatjiratja pulka nguwanpa ilunyi, mununa wanyu ilurampa mamangka arangka ngaraku? Wiya, ungaman mai kaña palya nyuntumpa kuta nyinanytja wiyariwa mununku malanyari.”

³³ Ka Jacobalu wangkangu, “Wiya mulamulangku ni kalkula ngayunya kutanmankunytjikitjangku, kañanta palulanguru ungguku.” ³⁴ Ka Iitjulu

mulapatu kalkunu palunya kutanmankunytjikitjangku, ka Jacobalu palunya mai tjuu ungu nyuma kulu. Ka ngalkula tjikira paltjaringkula pakara anu. Uwa, Iitjunya kuta nyinangi, palu paluru ngunti maikitja malanyaringu.

26

Isaacanya Ngura Ini Kirarta Nyinanytja

¹ Ngañmanya panya Aipuramanya nyinanytja ara ailuru pulka ngañangi manta nyara palula munu wiyingku. Munu ngulalta piruku ailuru pulkaringu. Ka Isaacanya Pilitjiyanya ngurara tjutankutu mayatjakutu anu wati panya Pimalikalakutu ngura panya Kirarta nyinanyangka.

² Panya Mayatja Godalu Isaacala utiringkula wangkangu, “Ngura nyara Itjipalakutu ankuwiyangku wantima, munu ngura nyangangka kutju nyinama panya ngayulu nyuntunya nyinanytjaku wangkanytjitungku.

³ Nyuntu ngura nyangangka alatjitu nyinama kana nyuntula tjungu nyinama munuñanta pukulmanama. Panya ngayulu nyuntunya munu nyuntumpa walytja tjuta malatja malatja kulu ungkuku manta nyanga palunya uwankara, munu panyaña ngayulu nyuntumpa mama Aipuramanya kalkuntjatjanungku kulira tjukarurungku palyalku wantinytja wiyangku.

⁴ Ngayuluña palyalku nyuntulanguru aŋangu ma-tjutantingkunytjaku malatja malatja, kaya mungilyi mulapa nyinaku panya kililpi ilkaritja tjuta purunypa, munuña palunya tjananya manta nyanga winki ungkuku. Ngayulu tjananya pukulmara palyalku, munuña palula tjanalanguru aŋangu manta winkitja palyara pukulmankuku. ⁵ Uwa, Aipuramalu ngayunya wanganarangku kulinu, kana nyara palulanguru nyuntunya munu tjananya kulu pukulmankuku. Paluru panya ngayulu wangkanytja uwankara, ngayuku tjukurpa uwankara kulu wanganarangku kuliningi wantinytja wiyangku, kana pala palulanguru Aipuramalu kulintjtjunguru nyuntunya munu tjananya kulu pukulmankuku.” Alatji Mayatja Godalu Isaacala wangkangu. ⁶ Ka Isaacalu wanganarangku kulinu munu ngura nyara Kirarta nyinangi ngura kutjupakutu ankunytja wiya.

⁷ Kaya wati Kirarnga ngurara tjutanngku palumpa kuriku tjapinnyangka Isaacalu alatji kulinu, “Tjinguruya wati nyanga tjana Ripikaku mukuringanyi, panya paluru minyma wiru mulapa, yunpa wiru. Kana tjinguru kuri walytjanmankunyangkaya palunyakitjangku ngayunya pungkula iluntankuku. Palula-tawarana palunya malanymankuku, kani tjinguru wantiku pungkuwiyangku.” Munu paluru alatji kulira tjanala ngulungku wangkangu ngunti nyanga alatji, “Wiya, minyma nyangatja ngayuku malanypa.”

⁸ Ka ngula wati mayatja panya Pimalikalau palumpa walinguru walunyangu, “Ai! Nyaratja Isaacalu Ripikanya ampura nyunytjuni kuringkupalku.” ⁹ Munu paluru alatji nyakula wati kutjupa witunu Isaacanya altira ngalya-katinytjaku palulakutu. Munu pitjanyangka wangkangu palula, “Minyma nyara paluru-manti nyuntumpa kurimpa! Kan panyatja nyuntu nyaaku ngunti palunya malanypanmanangi?” Ka Isaacalu wangkangu, “Wiya, ngayulu kuliningi tjinguruniya ngayunya pungkuku minyma nyanga palunyakitjangku. Kana iluntankunytjaku-tawara nguluringkula palunya kurinmankunytja wiyangku malanypanmanangi.”

¹⁰ Ka Pimalikalau wangkangu, “Ai! Nyaakulanyan ngunti kuraningi? Wati kutjupa tjinguru ngunti ngarima nyuntumpa kuringka nyuntumpa

malanytja-palku, ka Godanya nganampa mirpañarima munulanya pikan-tanama, kala kunṭaringama nyuntu panya ngunti wangkanytjjangka.”

¹¹ Munu Pimalikalupalumpaañangu uwankara ngulutjunu nyanga alatji wangkara, “Wati nyangatja palumpa kuri. Pampuntja wiyangkuya wantima, panya añangungku palunya pulanya pampunyangkaña wangkaku pungkula iluntankunytjaku palunya.”

¹² Ka Isaacalu ngura pala palula manta tjawara uñinypa tjunutjunkula wañanu ukiri maitjara pakaltjingantjikitjangku. Ka mulapañu ukiri pakara mai pulkatjararingu. Ka ngula kururingkunyangka Isaacalu mai pulka mulapa uranu, panya Mayatja Godalu palumpa pulka mulapa palyara palunya pukulmanu. ¹³⁻¹⁴ Ka paluru kutjupa kutjupa tjuñatjararingu. Paluru ulytja pulka, kuka tjuña mulapa kulu kanyiningi, añangu panya palumpa warkaripai tjuña kulu. Kaya Pilitjiyanya ngurara tjutangku nyakula palunya nyararingangi paluru pulka mulapa kanyinnyangka.

¹⁵ Munuya palulanguru palunya nyararingkula palumpa mina piñi tjuña piluntara tjutura patinu, mina panya Aipuramaku wati war̄ka tjutangku nganmanytju tjawara wantintja Aipuramanya nyinanytja arangka.

¹⁶ Ka Pimalikalupalumpaañangu tjuñatjararingkula kunpu pulkaringu, kala nganaña upa nguwanpa. Wantikatilanya! ¹⁷ Ka palulanguru Isaacalu tjananya wantikatira anu ngura kutjupakutu munu wirkara ngura tjunu Kirarku wimarrungka, munu pala palula rawa nguwanpa nyinangi. ¹⁸ Munu piñi panya palunya tjananya paluru piruku tjawara mina utinu, munu paluru mina panya tjuña ininu, ini panya palu purunypa tjuña, panya palumpa mamangku Aipuramalu nganmanytju ininangi.

¹⁹ Ka Isaacaku wati war̄ka tjutangku piñi kutjupa tjawañu minaku wimaru panya palula munu tjawara mina utinu. ²⁰ Palu Kirarnga ngurara kuka kanyilpai tjuña pikaringu Isaacaku war̄ka tjuñaku wangkara, “Mina nyangatja nganampa!” Ka palulanguru Isaacalu mina palunya ininu “Pikaringkunytjanya”. ²¹ Ka Isaacaku war̄ka tjutangku mina piñi kutjupa tjawañu, kaya tjanampa palu purunypa pikaringangi Kirarnga ngurara tjuña. Ka Isaacalu mina palunya ininu “Tjanampa Kuraringkunytjanya”.

²² Munu palulanguru Isaacanya tjanu Kirarku wimaru wantikatira anu ngura kutjupakutu munu ngura tjunkula piñi kutjupa tjawara mina utinu. Kaya añangu kutjupa tjuña tjanampa pikaringkunytja wiya mina nyanga palulanguru. Ka palulanguru Isaacalu mina palunya ininu “Ala Lipinya”, munu wangkangu, “Kuwari Mayatja Godalu nganananya ala lipikutuňu, kalampa ulytja, kuka, kutjupa kutjupa uwankara tjuña mularariku manta nyanga palula nganaña nyinanyangka.”

²³ Munu nyara palulanguru Isaacanya anu ngura Piitjiipalakutu. ²⁴ Ka munga pala palula Mayatja Godanya utiringu palula munu alatji wangkangu palula, “Ngayuluña nyuntumpa mamaku God, Aipuramaku. Nguluringkuwiya nyinama panya ngayulu nyuntula tjungu nyinanyi. Ngayuluña nyuntunya pukulmankuku, ka nyuntulanguru añangu matjuñatingkuku małatja małatja, panya alatji tjuñantjikitjangkuña kalkunu Aipuramanya, ngayula panya wanganarangku kulilpaina.” Alatji Godalu Isaacanya kalkunu wangkara. ²⁵ Ka ngura pala palula Isaacalu pitjilpa pulka palyanu Mayatjanya walkuntjikitjangku. Munu walkura wiyingkula paluru nguralta tjunkula nyinangi, kaya palumpa wati war̄ka tjutangku piñi kutjupa tjawara mina utinu.

Isaacalu Pulanku Pimalikalu Ngaparku Kalkuntja

²⁶ Ka wati panya Pimalikanya Kirartanguru palulakutu pitjangu Isaacanya nyakunytjikitja. Munu paluru palumpa mayatja palula malatja kutjara kuлу katingu, kutju ini Awutjanya panya palumpa malpa mulapa, ka kutjupa ini Pikalnga panya palumpa tjaultji tjułtaku mayatja. ²⁷ Ka wirkankunyangka Isaacalu tjapinu tjanala, “Nyaaku nyura ngayulakutu pitjangu kuvari nyanga? Panya nganmanyapa nyuntu malpa kura nyinangi ngayuku, mununi nyuntumpa nguranguru paira iyanu malpa wiyangku.”

²⁸ Kaya wangkangu, “Wiya, nganaña nyangu Godalu titutjarangku nyuntunya alpamilannyangka, munula kulinu, ‘Uila Isaacala tjunguringkula ngaparku wangkara kalkunma kalypa nyinanytjikitjangku.’ Kala wanyu nyuntu nganananku kuvari kalkunma kalypa nyinanytjikitjangku. ²⁹ Nyuntulanya kalkunma nganañanya pungkunytja wiyangku wantinytjikitjangku, panya nganaña nganmanytju nyuntunya pungkuwiyangku wantingi munula nyuntunya mirpantru paira iyantja wiyangku purkarangku witura ma-iyanu. Ka nyuntu wanyu palu purunyapa nganañanya pungkuwiyangku wantima. Alatjilanya kalkunma. Panya nganaña utingku nyanganyi Godalu nyuntunya alpamilara pukulmankunyangka.”

³⁰ Ka Isaacalu tjanampa mai pulka palyanu munuya tjunguringkula pulkara ngalkula tjikira paltjaringkula pukularingu munuya ngura pala palula munga kutju ngaringu. ³¹ Munuya mungawinki mulapa pakanu munuya nyara palula ara ngaparku kalkunu kalypa nyinanytjikitjangku. Munuya kalkuntjatjanungku wangkangu titutjarangku kulintjikitjangku wantinytja wiyangku. Ka palulanguru Isaacalu tjananya wati panya mankurpa wangkara iyanu tjanampa malparinkunytjatjanungku.

³² Ka tjirirpi pala palula Isaacaku wati warika tjułangku pitjala tjakultjunu panya tjana piti tjawara mina utintja. Panya tjana wirkara wangkangu, “Awari! Ngananala tjawara mina utinu.” ³³ Ka palulanguru Isaacalu mina palunya ininu “Kalkuntjanya”. Palulanguru ngura nyara paluru ini nyangatja ngaranyi “Piitjiipanya”, panya ini nyanga palunya wangkanyi, “mina piti kalkuntjitia” tjanampa wangkangu.

Iitjulu Kuri Malikitja Kutjara Altinytja

³⁴ Ka wati panya Iitjulu yiya nampa panya 40 nyinanytjatjanungku kungka Iitakunu kutjara altingu malikitja kutjara, kutju ini Tjutitjanya panya wati Piiriku untalpa, kutjupa ini Patjimatjanya panya wati Iilanku untalpa. ³⁵ Palu kungkawara nyanga paluru pula Isaacanya pulanya Ripikanya pulkara tjituru-tjituru palyaningi kura nyinara.

27

Isaacalu Jacobanya Pukulmankunytja Iitjunya-palku

¹ Ka Isaacanya tjilpi mulararingu munu kuru paulyarira pułu nyangangi. Munu paluru katja nganmanyitja Iitjunya altira wangkangu, “Katja, yaaltjin?”

Ka wangkangu, “Uwa, nyangatjaña ngaranyi.”

² Ka Isaacalu wangkangu, “Nyawanı katja! Ngayuluña tjilpi mulararingu mununa tjinguru kuvari nguwanpa iluku. ³ Ka-puła nyuntu punara mantjira ilytjikutu ara kukaku munutju kuka wakara kati. ⁴ Munu ngalya-katira paura palyala kuka wiru mulapa panya nyuntutjun kuka wiru palyalpai kaña pukulpa mulatu ngalkupai. Mununa palulanguru

ngalkula paltjaringkula ngayulu nyuntunya wangkara pukulmankuku ilunytja kuwaripangka.”

⁵⁻⁶ Ka Ripikalu kulinigi Isaacalu katjangka wangkanyangka. Munu Iitjunya kukaku ankunyangka minyma paluru katja panya malatja Jacobanya altira wangkangu, “Katja kulila! Ngayulu kulinu nyuntumpa mamangku Iitjula wangkanyangka. ⁷ Alatji paluru wangkangu, ‘Kukatju wakara kati mununi paura uwa kuka wiru mulapa, kana ngalkula pukularira nyuntunya wangkara pukulmankuku Mayatja Godala mirangka ngayulu ilunytja kuwaripangka.’ Alatji paluru Iitjula wangkangu. ⁸ Palu katja kulilani, munu ngayulu wangkanytja palyala wangañarangku. ⁹ Nganampa nanikuta tjutakutu ankula yangupala kutjara mantjira ngalya-kati kanpi pulka kutjara kuka wiru, kana paura palyalku kuka wiru mulapa panya nyuntumpa mamangku pukultu ngalkuntjaku. ¹⁰ Ka nyuntu katira palunya uwa ngalkuntjaku, ka paluru ngalkula pukularira nyuntunya wangkara pukulmankuku ilunytja kuwaripangka.” Alatji ngunytjungku Jacobanya wangkangu.

¹¹ Palu Jacobalu wangkangu, “Palu ngayuku kuña inyu pulka kana ngayulu miri wiruly-wirulypa inyu wiyatjara. ¹² Ka tjinguru Mamalu ngayunya pampura kulilkul ngayulu Iitjunya purunypa wiya, mununi ngunti kurannyangka kulira ngayunya pukulmankuwiyangku kuranmankuku.” Alatji Jacobalu wangkangu kuranmankunytjaku-tawara nguluringkula.

¹³ Ka ngunytjungku wangkangu, “Wiya wanti nguluringkunytja wiyangku, katja, panya mamangkunta nyuntunya kuranmankulampa ngayunya waintara kulilkul kura, nyuntunya wiyangku. Ka nyuntu ngayunya wangañarangku kulira ankula nanikuta kutjara pungkula ngalya-kati.” ¹⁴ Ka palulanguru kulira anu mantjintjikitja, munu pungkula ngalya-katingu ngunytjukutu. Ka paluru paura palyanu kuka wiru mulapa Isaacalu pukultu ngalkuntjaku. ¹⁵ Munu palulanguru Iitjuku mantara wiru mantjinu munu Jacobanya tjarpatjunu. ¹⁶ Munu palula miñangka nanikuta panya miri inyu winki tanpanu piningga kulu. ¹⁷ Munu kuka panya wirunyalta Jacobanya unkul’iyañu mai nyuma kulu palyantjatjanungku palumpa mamakutu katinytjaku.

¹⁸ Ka Jacobanya mamakutu ankula mama walkura wangkangu, “Mama!”

Ka wangkangu, “Uwa katja! Ngananyan wanyu?”

¹⁹ Ka Jacobalu wangkara Iitjulu-palku wangkangu, “Ngayuluna katja panya ngañmanyitja Iitjunya. Panya ngayulu nyuntu wangkanytja palyanu. Wanyu pakara nyina munu kuka nyanga ngayulu katinytja ngalkula, mununin palulanguru pukulmanamalta.”

²⁰ Ka Isaacalu urulyarara wangkangu, “Yaaltji-yaaltjingkun mapalkungku kuka wakara katingu?”

Ka Jacobalu wangkangu, “Wiya, Mayatja panya God nyuntumpangkuñi alpamilañu tjukarurungku nguriña wakantjaku.”

²¹ Ka Isaacalu puñu nguwanpa mulamularingkula wangkangu, “Ngalya-ilariwa, kañanta pampula. Nyuntu wanyu mulapa Iitjunya?” ²² Ka Jacobanya ngalya-ilaringkunyangka mamangku pampura wangkangu, “Nyuntu Jacobanya purunypa wangkanyi, palu nyuntu miña Iitjunya purunypa.” ²³⁻²⁴ Palu paluru kuru paulytju Iitjunya-palku kulinigi panya miña inyu pulka Iitjunya purunypa pampura. Munu paluru pukulmankunytjikitjangku kulinigi munu kulira piruku tjapinu, “Nyuntun mulapa Iitjunya?”

Ka paluru wangkara wangkangu, "Uwa, ngayulu Iitjunya."

²⁵ Ka Isaacalu wangkangu, "Uwa katja! Kuka pala ngalya-kati, kana ngalkula wiyaringkula nyuntunya pukulmankuku." Ka Jacobalu kuka panya katira ungu munu waina kulu ungu tjikintjaku, ka nyinara ngalkula tjikiningi.

²⁶ Ka palumpa mamangku wangkangu, "Uwa katja! Ila pitja mununi mitamita kutjara nyunytjula." ²⁷ Munu paluru nyunytjuntjikitja ilar-ingkunyangka Isaacalu palumpa mantara pantira Iitjunya-palku kulinu, munu palulanguru palunya pukulpa palyanu alatji wangkara, "Awa! Ngayuku katja pantinyi kaana wiru purunypa, panya Godalu wiru tjuta pakaltjingantja purunypa. ²⁸ Ka Godalu ilkarunguru nyuntumpa mantakutu kulyarpa pulka iyalku munu manta nyuntumpa wiru palyalku ukiri uninypatjara pulka pakantjaku, kiripitji pulka tjuta kulu pakan-nyangka waina kulu palyantjaku. ²⁹ Kaya aŋangu ngura kutjupa kutjupa tjutanguru nyuntumpa war^karipai nyinaku, munuya nyuntunya walkuntjikitja nyuntula kuranyu tultjungarakatiku. Kan uwankaraku mayatjariku nyuntumpa walytjapitiku, kaya paluru tjana nyuntula kuranyu tultjungarakatiku nyuntunya walkuntjikitja, aŋangu panya nyuntumpa ngunytjunguru tjutaringkunyta tjuta kulu. Ka aŋangungku nyuntunya kuranmankunyangkampa Godalu palunya ngapartji kuranmankukutu, munu aŋangungku nyuntunya pukulmankunyangkampa Godalu palunya ngapartji pukulmankukutu." Alatji Isaacalu wangkara pukulmanu palumpa katja Jacobanya ngunti kulira Iitjunya-palku.

Iitjulu Pukulmankunytjaku Palumpa Mamangka Pulkara Tjapintja

³⁰ Ka palula malangka Jacobanya pakara ankunyangka palumpa kuta Iitjunya pitjangu kukatjara. ³¹ Munu paluru kuka wiru paura katingu palumpa mamakutu, munu wangkangu, "Mama, wanyu pakara nyina munu kuka nyanga ngayulu katintjya ngalkula, mununi palulangurulta pukulmanama."

³² Ka Isaacalu tjapinu, "Ngananyan wanyu nyuntu?"

Ka wangkangu, "Nyuntumpa katja panya ngamanyitjana, Iitjunya."

³³ Ka Isaacalu nyanga palunya kulira pulkara tjititingkula wangkangu, "Nganaluni panyatja wanyu kuka panya katira ungu? Kana kuvari kutju ngalkula wiyanu nyanga nyuntu pitjanytja kuwaripangka. Alatjituna palunya pukulmanu, ka palulanguru palumpa pukulpa titutjara ngaraku."

³⁴ Ka Iitjulu nyanga palunya kulira unngu kuraringkula mirara wangkangu, "Mama! Ngayunya ngapartjini pukulmara."

³⁵ Ka Isaacalu wangkara wangkangu, "Wiya, nyuntumpa malanpangku pitjala ngayunya ngunti kuranu. Panya ngayulu nyuntunya pukulmankunytjikitjangku kalkunu, ka paluru anga-pitjangu, kana palunya pukulmanu nyuntunya-palku."

³⁶ Ka Iitjulu wangkangu, "Palu mulapa nyaratja ini Jacobanya,* panya nyangatjani pirukutu ngunti kuranu. Panya paluru mungatu ngayunya mai ungkula wangkangu malanpaya nyinanytjaku paluru kutaringkula ngula nyuntumpa arangka nyinanytjikitjangku. Munu kuvari nyanga paluru nyuntulakutu anga-pitjangu, kan palunya pukulmanu ngayunya-palku. Mama! Kan ngayunya kulu pukulmankunytjaku ngaranyi?"

³⁷ Ka Isaacalu wangkangu, "Wiya, ngayulu panya ngamanytju palunya nyuntumpa mayatja tjunu. Mununa nyuntumpa walytjapiti uwankara

* 27:36 Ini nyanga Jacobanya wangkanyi *ngunti kurantja tjanampa wangkangku*.

tjunu palumpa warkarinytjaku. Munuña palunya ungu mai waina kulu. Ka katja, palulanguru nyuntumpa mala pirkku palyantjaku wiya ngaranyi.”

³⁸ Ka Iitjulu pirkutu pulka raja tjapiningi palumpa mamangka alatji wangkara, “Mama! Nyuntu wanyu kutju-aṛa kutju pukułmankupai? Wanyuni ngayunya kulu pukułmanama.” Munu paluru putu tjapira ulangu.

³⁹ Ka Isaacalu palunya wangkangu, “Godalu ilkařinguру nyuntumpa mantakutu kulyarpa pulka iyantja wiyangku wantiku, munu paluru manta nyuntumpa wiru palyantja wiyangku wantiku ka ukiri wiru pakantja wiyatju. ⁴⁰ Ka nyuntu tjulatjara rawa aŋangu tjułtaku pikaringkuku, munu nyuntu palumpa warkaripai nyinaku Jacobaku panya paluru nyuntumpa kułtaringu. Palu ngula nyuntu palula tungunpungkula pikaringkuku Jacobaku ka paluru nyuntumpa mayatja wiyaringkuku.” Alatji Isaacalu Iitjunya wangkangi kurangka nyinanytjaku.

⁴¹ Ka Iitjunya pulka raja mirpañaringu Jacobaku panya palumpa mamangku palunya pukułmankunyangka. Munu paluru iluntankunytjik-itjangku kuliningi Jacobanya. Munu kulinu, “Mamanya ilunytjaku ilaringanyi, kaña ilunyangka ulara wiyaringkula palulanguruulta Jacobanya iluntankuku.”

⁴²⁻⁴⁵ Palu Ripikalu kulinu Iitjulu alatji wangkanyangka munu tjiturutjitururira wangkangu, “Kuwari ngayuku katja kutjarangku pulanku pungkula ilunyi, kaña tjintu kutjungka palunya pulanya kawalinkuku.” Munu palulanguru wati kutjupa witunu Jacobanya altira ngalya-katinytjaku munu pitjanyangka wangkangu, “Katja kulila! Nyuntumpa kułta Iitjunya pukularinyi nyuntunya iluntankunytjikitja wangkara. Ka katja wanyu ngayulu wangkanytja wanganarangku kulinma munu mapalku ankula nyinama ngayuku kuta Laipanta ngura nyara Aaranta. Munu nyara palula nyinama nyuntumpa kułta mirpañpa wiyaringkunytjaku patara. Panya ngula paluru watarkuriku nyuntu panya palunya ngunti kurantjtjtjaku. Kaña palulanguru wati kutjupa iyalku nyuntunya małakungku altira ngalya-katinytjaku. Palya?”

⁴⁶ Ka palulanguru Ripikalu ankula Isaacala wangkangu, “Ngayulu kaar-kaararingu Iitjuku kuri kutjarangka tjungu nyinara nyinara, panya paluru pula ngura nyanga Kainannga ngurara, kura kutjara. Ka tjinguru Jacobalu palu purunytytu kungkawara ngura Kainannga ngurara altiku, kaña palulanguru kaar-kaararira paku pirkaringkuku.” Alatji Ripikalu Isaacala wangkangu panya paluru kuliningi Isaacalu Jacobanya iyantjaku.

28

Isaacalu Jacobanya Laipantakutu Iyantja

¹ Ka Isaacalu Jacobanya altira pukułmara wangkangu, “Katja! Kungka nyanga Kainannga ngurara altinytja wiyangku wantima. ² Palu ngura nyara Mitjupu-taimiyalakutu ara nyuntumpa tjamu Pitjuwilku ngurakutu munu kungka ngura nyara palunya ngurara alti nyuntumpa kuly-palku Laipanku unṭalpa. ³ Kaña God Witulya Pułkangka nyuntumpa tjapini nyupalinya pukułmara tjiti tjuta ungpunytjaku, kaya palula tjanalanguru nyuntumpa walijta ma-tjuła mularariku małatja małatja munuya ngura kutjupa kutjupa tjułangka nyinara wañalku. ⁴ Ka Godalu nyuntunya munu nyuntumpa walijta tjuta kulu pukułmankuku. Panya paluru ngañmanytju Aipuramanya pukułmanu, palu purunyapa

paluru nyuranya pukulmankuku munu manta nyanga malikitja nyuntu kuwari nyinanytja nyuranya unguku, ka nyura anangu kutjupa tjutanguru tjulyara walytjangku kanyilku. Panya Godalu Aipuramanya nganmanytju kalkunu manta nyangatja ungkunytjikitjangku palumpa walytjapiti malatja malatja kulu.” Alatji Isaacalu Jacobanya pukulmara wangkangu.

⁵ Munu palulanguru Jacobanya iyanu ngura nyara Mitjuputaimiyalakutu, palumpa kulypalpa Laipantakutu. Panya Laipanku mama wati panya Pitjuwilnga ngura Aramanya ngurara. Ka Laipanku malanypa Ripikanya panya Jacobaku pulampa Iitjuku ngunyntju.

Iitjulu Piruku Kuri Kutjupa Altintytja

⁶⁻⁷ Ka malangka Iitjulu kulinu palumpa mamangku Jacobanya pukulmara kuriku iyantja ngura panya Mitjupu-taimiyalakutu. Munu paluru Jacobanya mamangku wangkanytjita kulu kulinu panya kungka Kainannga ngurara altintytja wiyangku wantintytjaku. Palu Jacobanya wanganara ankunyangka kutju paluru kulinu. ⁸ Pala palulangurulta Iitjulu kulinu, “Munta-uwa panya! Ngayuku mamangku kungka Kainannga ngurara wantipai alatjitu mukuringkunytja wiyangku.” ⁹ Munu alatji kulira Iitjulu ankula Aipuramaku katjangka Itjumailta kungkaku tjapinu, ka palumpa untalpa ini Maalatjanya palunya ungu wati panya Nipayatjaku nyarumpa, ka Iitjulu altira kanyiningi kuri kutjupa kutjarangka tjungu.

Jacobalu Ngura Ini Pitjulta Ngarira Tjukurmankunytja

¹⁰ Ka Jacobanya ngura panya Piitjiipanya wantikatira ma-pakanu ngura panya Aaranku. ¹¹ Munu paluru ankula ankula ngura kutjupangka ngururpa wirkanu munu mungartjirinya ngakula ngura tjunu. Munu paluru katamala wiyangka apu mantjinu munu kata tjunkula ngarikatingu. ¹² Munu paluru kunkunpa ngarira tjukurmanangi tjukalpa mantanguru ilkarikutu ma-nagaranyangka, kaya Godaku angelpa tjuuta ngalya-ukalingkula ma-tatinangi tjukalta panya. ¹³ Munu paluru Godanya nyangu palula itingka ngaranyangka, ka wangkangu palula nyanga alatji, “Ngayuluña Mayatja Godanya, panya nyuntumpa tjamungku Aipuramalu ngayunya walkunu, nyuntumpa mamangku Isaacalu kulu. Kaña ngayulu manta pala nyuntu ngarintjanya nyuntunya unganyi nyuntumpa walytja tjuuta kulu malatja malatja. ¹⁴ Kaya paluru tjana ma-tjutaringkula winki mularariku malatja malatja, munuya minga purunyarira mungiliyi mulapa nyinaku. Munuya ala lipiwanu nyinaku alintytjara kakaraña ulparira wilurara. Kaña nyuntulanguru munu nyuntumpa walytjapiti malatja malatjanguru kulu ngayulu anangu manta winkitja palyara pukulmankuku. ¹⁵ Palu kulinma! Ngayuluña nyuntula tjungu pitjalinkuku munuñanta atunyntju kanyilku. Munuñanta malakungku katiku ngura nyangaku. Panya ngayulu kalkuntjatjanungku uwankara palyalku wantintytja wiyangku.” Alatji Godalu Jacobala wangkangu paluru tjukurmankunyangka.

¹⁶ Ka Jacobalu wankaringkula wangkangu, “Ai! Mulapa Mayatja Godanya ngura nyangangka ngaranyi, kaña ngurpañu pitjala ngaringi.”

¹⁷ Munu paluru ngulu-nguluringkula wangkangu, “Ngura milmilpa nyangatja Godaku ngura! Nyanga ala ngaranyi ngura ilkaritjakutu.” Munu alatji wangkara piruku kunkunaringku.

¹⁸ Munu mungawinki mulapa pakara puñi panya katangka tjunkula ngarintytja mantjira murutjunu ngula nyakunytjikitjangku munu paluru

uwilangka kurpira milmilmanu apu panya palunya Godanya kulintjikitjangku. ¹⁹ Ka ngura pala palula itingka tawunu ini Latjanya ngarangi, palu Jacobalu ini kutjupa tjunu “Pitjulnga” panya ini nyanga palunya wangkanyi “Godaku ngura” tjanampa wangkangku.

²⁰⁻²¹ Ka palulanguru Jacobalu Mayatja Godanya wangkara kalkunu nyanga alatji, “Nyuntu ngayula tjungu pitjalinkunyangka, munu atunytju katirinkunyangkampa, munu mantara mai kuļu unggunyangka, munu malakungku ngayuku mamaku ngurakutu katinyangkampa ngayulu nyuntunya mayatjanmara walkulku ngayuku God. ²² Nyangatjana apu murutjunu panya tjana nyuntunya kulira walkuntjaku ngura nyanga milmiltä Godaku ngurangka. Munuñanta ngayunya unggunytjangu tjarara tjukutjuku malakungku ungguku. Tjingurunin puluka 10-pa ungguku, kañanta puluka kutju malakungku ungguku. Munta tjingurunin tjiipi 20 ungguku, kañanta tjiipi kutjara malakungku ungguku. Alatjina nyuntu ngayunya unggunytja uwankaranguru tjarara malakungku ungguku titutjarangku kuli kutjupa kuli kutjupa.”

29

Jacobanya Laipanku Ngurangka Wirkankunyta

¹ Munu palulanguru Jacobanya piruku anangi ngura panya Aarantakutu munu kakarara ankula ankula wirkanu. ² Munu nyara palula nyangu mina piñi ngaranyangka. Ka pitengka itingka tjiipi tjuña ngarira wañingi uñulu mañkurpa, panya tjana piñi pala palulanguru mina tjutira unggunytjaku pañanigi. Ka piñi tjaangka apu pulka anga-ngaringi. ³ Kaya wat i tjiipi kanyilpai tjuñangku tjiipi panya tjuña uñulu kutju kutju minakutu ngalya-katira apu tañpa piñi tjaanguru uñtura wanara mina utilpai, munuya palulanguru tjiipi tjuña mina tjutira unggupai. Munuya tjikira wiyingkunyangka apu panya malakungku uñtura wanara angatjunkupai arangkañu.

⁴ Ka Jacobalu wirkara wangkangu tjiipi kanyilpai tjuñangka, “Wati wiru tjuña! Nyura ngura ngananya ngurara?”

Kaya wangkangu, “Nganaña Aarannga ngurara tjuña.”

⁵ Ka Jacobalu tjinapu tjanala, “Palu nyura wanyu ninti wat Laipanku panya Nayuku katjaku?”

Kaya wangkangu, “Uwa, nganaña ninti palumpa.”

⁶ Ka piruku tjinapu, “Ka paluru palya nyinanyi?”

Kaya wangkangu, “Uwa, paluru palya nyinanyi. Palu nyawa nyara palumpa uñtalpa ini Raitjilnga tjiipi tjuñatjara pitjanyi.”

⁷ Ka Jacobalu tjanala wangkangu, “Palu nyaaku nyura nyangangka nyinara pañani? Panya nyangatja mungartjirinyta wiya kuwaripa kañalañu ngaranyi. Uti nyura tjiipi tjuña minatjanura malakungku katiku ukirikutu, panya tjananya yaatangka tjarpatjunkunytjaku ngaranytja wiya kuwari-patu, nyangatja kañala.”

⁸ Kaya wangkangu, “Wiya nganaña mina unggunytja wiyangku pañani tjiipi uñulu kutjupa kutjupa uwankara pitjanytjaku. Palulanguru kutjula apu panya uñtura wanara mina utilku munu tjiipi tjuña mina tjutira ungguku.”

⁹⁻¹⁰ Ka Jacobanya kuwaripa ngarala wangkanyangka Raitjilnga ngalya-wirkanu palumpa mamaku tjiipi tjuñatjara. (Raitjilku mama panya wat i ini Laipannga, Jacobaku panya kulypalpa.) Ka Jacobalu wirkankunyangka nyakula mina pitikutu ankula puli panya uñtura wanara Laipanku tjiipi

tjuṭa tjutira ungu. ¹¹ Munu palulanguru Raitjilnga mitamita kutjara nyunytjura pukularira ulangi. ¹² Munu palula wangkangu, “Ngayulu panya nyuntumpa kunṭiliku katja Ripikaku, panya paluru munu nyuntumpa mama ngunytju kutjutja.” Ka nyangatja kulira Raitjilnga ngurakutu wirtjapakaṛa mamangka tjakultjunu.

¹³ Ka Laipantu kulira mapalku wirtjapakanu palumpa ukarikutu ngapari-ngapari munu ampura mitamita kutjara nyunytjuṇu munu altira katingu palumpa ngurakutu. Ka Jacobalu kulypalta uwankara tjakultjunu ngura nyara palula tjana nyinanytjatjanungku Isaacanya, Ripikanya Iitjunya tjananya kuļu. ¹⁴ Ka Laipantu kulira palula wangkangu, “Nyuntu ngayuku ukari walytja mulapa.” Ka Jacobanya nyara palula nyinangi pira kutju munu palumpa kulypalta warkaringi.

Jacobanya Laipantu Warkarinytja Palumpa Untalpa Kutjarakitja

¹⁵ Ka Laipantu Jacobala wangkangu, “Nyuntu panya ngayuku ukari munun nyaaku unytju ngayuku warkarima. Utinqanta kutjupa kutjupa ungama. Palu nyaa ungkunytjakun mukuringanyi?” ¹⁶ Ka panya Laipantu untalpa kutjara nyinangi, kangkuru ini Liyanya, munu palumpa małanypa Raitjilnga. ¹⁷⁻¹⁸ Ka Jacobalu pulanya nyakula Raitjilku kutju pulkara mukuringangi, panya Liyanya wiya nguwanpa kuṛu lanma-lanma, palu palumpa małanypa kuṛu mantjil-mantjilpa kungkawara wiru mulapa. Ka wati panya paluru wangkangu Laipanta, “Uwa palya, ngayulu Raitjilngakitja nyuntumpa piruku warkariku yiya tjuṭa nampa 7-kutu, kanī palula małangka ngayunya uwa altinytjaku. Palya?”

¹⁹ Ka Laipantu wangkangu, “Wiya palya. Ngayulu tjinguru wati kutjupa unkulampa pukularinytja wiya nguwanpa, palu ngayulu pulkara pukularinyi nyuntunya ungkunytjikitja palunya altinytjaku. Palya nyuntu ngayula nyinara warkarima.” ²⁰ Ka palulanguru Jacobanya yiya tjuṭa warkaringi nampa panya 7 Raitjilnga altinytjikitja. Palu panya Jacobanya Raitjilku pulkara mukuringkunyangka yiya panya 7 paluru tjana mapalku nguwanpa ngarala wiyaringu tjintu małkurpa purunypa.

²¹ Munu palulanguru yiya panya 7 ngarala wiyaringkunyangka Jacobalu Laipanta wangkangu, “Uwa, yiya tjuṭa waṭalpi wiyaringu! Walangkuṇi uwa nyuntumpa untalpa.” ²² Ka Laipantu mai kuka pulka mulapa palyara anangu nguratja tjuṭa altingu pitjala ngalkula pukularinytjaku Jacobaku pulampa Raitjilku. ²³ Palu mungaringkunyangka Laipantu untalpa ngañmanyitja Liyanya katira ungu Jacobanya, ka Jacobanya palula tjunguringu Raitjilta-palku. ²⁴ Munu Laipantu kungkawara warkaripai ini Tjilpanya palumpa untalpa ungu palumpa warkarinytjaku.

²⁵ Palu Jacobalu ngarira tjinturingkula kutju nyangu, “Ai! Liyanyampal nyangatja, Raitjilnga wiyampa.” Munu paluru ankula Laipanta wangkangu, “Nyaakuṇin Liyanya ungu? Ngayulu panya yiya tjuṭa nyuntumpa warkaringi Raitjilngakitja, panyatja! Kanin nyaaku ngunti kuraṇu?”

²⁶ Ka Laipantu wangkangu, “Wiya nganana tjakangku untalpa ngañmanyitja-warara altingu ungupai, munula palula małangkalta małanypa ungupai. ²⁷ Palu kulila! Nyanga kuwarila mai kuka pulka ngalkuni tjintu 7-kutu nyupalimpa pukularira, kanā palula małangka Raitjilnga nyuntunya ungkuku, nyuntu yiya tjuṭa kutjupa nampa 7 piruku ngayuku warkarinyangka. Palya? Kan kuwari Liyala tjunguringama tjintu panya 7-kutu.”

²⁸ Ka Jacobalu uwanmanu, munu paluru Liyala tjunguringangi munga kutjupa munga kutjupa tjintu panya 7-kutu. Ka palulanguru Laipantu untalpa małatja palunya ungu Raitjilnga, ka altira kuri kutjaratjara nyinangi. ²⁹ Ka Laipantu kungkawara warkaripai kutjupa ini Pilanya ungu Raitjilnga palumpa warkarinytjaku. ³⁰ Ka Jacobanya Raitjilta kuлу tjunguringu munu palumpa pulkara pukularingi panya paluru Liyaku tjuku nguwanpa mukuringangi munu panya Raitjilku pulkara mulapa mukuringangi. Munu paluru Laipanku piruku warkaringi yiya kutjupa tjuṭa nampa panya 7.

Liyalu Tjitji Tjuṭa Jacobaku Kanyintja

³¹ Ka Mayatja Godalu nyangu Jacobanya Raitjilku pulkara nguwanpa mukuringkunyangka Liyanya wantira. Munu palulanguru Raitjilnga iti kanyintjaku wiyanu, munu Liyanya kutju ititjararingkunytjaku palyanu. ³² Ka palulanguru Liyanya ititjararingkula paku nyinangi munu iti katja kanyinu munu ininu Rupinnga panya paluru alatji kuliningi, “Godalu nyangu Jacobalu ngayunya wantira tjituru-tjitururinyangka, mununi palulanguru pukulmanu katja nyanga ungkula. Ka tjinguru palulanguru mukuringkuku ngayuku.” Alatji Liyalu kuliningi. ³³ Munu palulangurulta piruku tjitjararingu, munu katja kutjupa kanyinu, munu wangkangu, “Godalu ngayunya katja kutjupa ungu Jacobalu ngayunya mukuringkuwyangku wantinyangka nyakula.” Munu palulanguru palunya ininu Tjimiannga. ³⁴ Munu paluru ngula piruku ititjararingu munu iti katja kutjupa kanyinu. Munu paluru wangkangu, “Ala! Tjinguru kuvari ngayuku kuri ngayuku pulkara mukuringkula ngayula tjingu alatjitu nyinaku, panya ngayulu katja mankurpa palumpa kanyinu.” Munu paluru katja palunya ininu Levinya. ³⁵ Munu palulanguru piruku tjitjararingu minyma panya paluru munu katja kutjupa kanyinu. Munu paluru wangkangu, “Kaṇa kuvari nyanga ngayulu Mayatja Godanya kutjulta mirawaṇinyi.” Munu katja palunya ininu Judah-nya.

30

Jacobalu Katja Kutjupa Tjuṭa Utintja

¹ Palu Raitjiltu Jacobaku tjitji kanyintja wiya alatjitu, munu paluru palumpa kangkuruku nyararingkula wangkangu Jacobala, “Nyaakun ngayula tjitji utilwiyangku wantinyi? Ngayulu tjitji kanyintjikitja mukuringanyi. Palu ngayulu tjinguru iluku iti wiyatū.”

² Ka Jacobanya palumpa mirpanaringu munu wangkangu, “Ngayulu Godanya wiya. Paluru nyuntunya palyanu tjitji wiya nyinanytjaku.”

³ Ka Raitjiltu wangkangu, “Nyangatja kungkawara ngayuku warkaripai ini Pilanya. Utin nyanga palula tjunguringama, ka paluru ititjararingkula kanyilku tjitji ngayuku. Kaṇa tjitji pala palumpa ngunytru purunyariku nyuntu kungkawara palula utinnyangka.” ⁴ Munu palulanguru Raitjiltu Pilanya ungu Jacobanya kuri kanyintjaku, ka Jacobalu palula tjunguringu.

⁵ Ka palulanguru paluru ititjararingu Pilanya munu katja kanyinu Jacobaku.

⁶ Ka palulanguru Raitjiltu wangkangu, “Ngayulu Godala pulkara ngatjiningi tjitjiku, kaṇi pukultu kulira ngayunya katja ungu.” Munu paluru ininu Dannga katja panya palunya.

⁷ Ka palulanguru Pilanya piruku ititjararingu munu Jacobaku katja kutjupa kanyinu. ⁸ Ka Raitjiltu wangkangu, “Ngalinku pulkara wangkangi kangkurulu ngali tjitjinguru, kaṇa palunya wangkara kanmarmanu

kuwari tjitji nyanga kutjara wirkankunytjanguru.” Munu tjitji palunya ininu Napatalinya.

⁹ Ka Liyalu tjitji kanyintja wiyaringu, munu palulanguru kungkawara palumpa war̄karipai ini Tjilpanya Jacobanya ungu kuri kanyintjaku. ¹⁰ Ka palulanguru Tjilpalu Jacobaku katja kanyinu. ¹¹ Ka Liyalu wangkangu, “Ngangari! Alatjituñatju ngayulu katjatjararingu.” Munu tjitji palunya ininu Kaatanya. ¹²⁻¹³ Ka Tjilpalu pirukuñu katja kutjupa kanyinu Jacobaku, ka Liyalu wangkangu, “Ngangarku! Pul̄karaña pukularingu.” Munu palulanguru wangkangu, “Kuwariñiya minyma tjutangku ngayunya pukularinytjanmananyi.” Munu palulanguru katja panya palunya ininu Atjanya.

¹⁴ Ka ngula ukiri wiita ma-piltiringkunyangka Liyaku katja ngañmanyitja ini Rupinnga anu wiita nyara palulakutu munu nyangu puñu kutjupa ngalkula ititjararingkupai yunpa mingkulpa purunypa ini “manturaiki”. Munu mantjira katingu palumpa ngunyutju Liyalakutu. Ka Raitjiltu ungkunyangka nyakula Liyala ngatjini, “Ungamañi puñu pala palunya.”

¹⁵ Ka Liyalu wangkangu, “Wiya, nyuntu panya ngayuku wati ngañmanyitju angatjunu, munun nyaaku piruku ngayuku nyanga katjaku puñuku ngatjini?”

Ka palulanguru Raitjiltu palula wangkangu, “Palu nyuntu puñu pala palunya ngayunya ungkulampa palya Jacobala ngariku munga nyanga kuwari. Palya?”

¹⁶ Ka Jacobanya nyara mai wiitanguru mungartji pitjanyangka minyma panya Liyalu ngaparikatira nyakula wangkangu, “Nyuntu ngalili munga nyanga kuwari ngarinyi, panya ngayuku katjaku puñu panya ‘iti ungupai’ ngayulu ungu Raitjilnga nyuntula ngarintjikitjangku.” Ka palulanguru munga pala palula pula tjunguringkula ngaringi.

¹⁷ Ka Godalu kulinu panya Liyalu tjitjiku tjapinnyangka munu palunya palyanu, ka palulanguru paluru ititjararingu munu Jacobaku katja kutjupa kanyinu, ka mankurpa kutjararingu palumpa minyma panya Liyaku. ¹⁸ Munu paluru wangkangu, “Godaluni ungu katja nyangatja, panya ngayulu kungka ngayuku war̄karipai Jacobanya ungkunytjtjanguru.” Munu palulanguru ininu tjitji nyara palunya Itjakanya.

¹⁹ Ka Liyanya pirukuñu ititjararingu munu katja kutjupa kanyinu, ka palulanguru katja mankur-mankuraringu Liyaku. ²⁰ Munu Liyalu wangkangu, “Godalu ngayunya wiru mulapa ungu katja nyangatja, katju mankur-mankuraringu. Ka ngayuku kuri Jacobanya tjinguru pulkara pukulariku katja nyanga palumpa tjuña kanyinnyangka.” Munu palulanguru ininu Tjipulannga tjitji panya palunya. ²¹ Munu ngulalta Liyalu untalpa kanyinu piruku munu ininu Tiinanya kungka kutju.

²² Ka palulanguru Raitjiltu tjitjiku ngatjinnyangka Godalu kulinu munu palunya tjitji kanyintjaku palyanu, panya paluru tjitjiku ngurpa nyinangi rawa. ²³⁻²⁴ Ka minyma panya paluru ititjararingu munu katja kanyinu Jacobaku. Munu wangkangu, “Godalu ngayuku tjaka wiyanu, kaña iti katja kanyira pukularingu. Kaña Mayatja Godala pirukutu tjapini katja kutjupa ngayunya ungkunytjaku.” Munu palulanguru ininu katja panya palunya Josephanya.

Jacobalu Pulanku Laipantu Ngaparku Kalkuntja

²⁵ Ka palula mañangka Josephanya iti ngarintjanyangka Jacobalu palumpa kulypalata wangkangu Laipanta, “Wanyuñi wantir’iyala ngura walytjakutu

ankunytjaku. ²⁶ Munuṇi uwa kuri munu tjitji tjuṭa, panya ngayulu nyuntula warkaringi nyanga tjananyakitja. Nyuntun ninti ngayulu nyuntula rawa pulkara warkarinytjitu. Utin in wantir'iyanma."

²⁷ Ka Laipantu palula wangkangu, "Wiya, kulila! Ngayulu ninti panya Mayatja Godalu nyuntulanguru ngayunya pulkara pukulmanu, munuṇi kutjupa kutjupa tjuṭa mulapa ungu. Ka nyuntu ngayuku pukularirampa uti wantira nyinama. ²⁸ Palu nyuntu wanyu yaaltjiṭu ungkunytjaku mukuringanyi? Wangkaṇi, kaṇanta nyuntu wangkanytjanyaṭu payamilalku."

²⁹ Ka Jacobalu alatji wangkangu, "Uwa, nyuntu ninti panya ngayulu nyuntula rawa wirura warkaringi, ka nyuntumpa tjiipi nanikuta tjuṭa winkiringu ngayulu kanyinnyangka. ³⁰ Panya ngañmanytjun nyuntu mañkurpa kanyiningi ngayulu pitjanytja kuwaripangka, ka kuwari tjuṭa mulararingulta. Kanku Godalu ngayulu nyuntula warkarinyangka nyuntumpa uwankara pulkaṇu. Palu ngayulu nyanganguru walytjangku ngayuku palyantjikitja mukuringanyi."

³¹⁻³² Ka Laipantu tjapinu, "Nyaananta ungkuku?"

Ka Jacobalu wangkangu, "Wiya, palya wanti, kaṇa nyinara nyuntumpa tjiipi, nanikuta tjuṭa rawangkuṭu atunyamanama. Palu kutjukuna mukuringanyi. Wanyuni wangkara palyanmara, kaṇa ankula nyuntumpa kuka tjuṭanguru tjiipi maru tjuṭa munu nanikuta nyintañ-nyintañpa tjuṭa kuļu ngurkantara maunṭalpa tjungunma ngayukurinytjaku. Nyuntu alatjingantjaku kutjuna mukuringanyi, kaṇa palulanguru nyuntumpa tjiipi nanikuta tjuṭa rawangkulta kanyinma. Palya? ³³ Ka ngula nyuntu ngayuku tjiipi nanikuta tjuṭa pitjala nyawa, munun tjiipi piranpa, nanikuta maru tjuṭa nyakulampa ngayunya ngukara kulila, 'Ai! Nyangangku ngayuku tjiipi nanikuta tjuṭanguru kutitjura katingu.' Palu nyuntu tjiipi maru, nanikuta nyintañ-nyintañpa tjuṭa kutju nyakulampa ngayunya alatji kulinma, 'Munta, nyanganpa palumpa kuka tjuṭa ngayuku wiya.' "

³⁴ Ka Laipantu kulira wangkangu, "Uwa palya, nyanga alatjina palyalku nyuntu wangkanyangka." ³⁵⁻³⁶ Munu tjirirpi pala palula Laipantu ankula palumpa kuka tjuṭanguru ngurkantara tjarara maunṭalpa tjunangi. Paluru nanikuta nyitayira tjuṭanguru ngurkantara tjunangi nyintañ-nyintañpa tjuṭa munu walka manguri-manguritjara tjuṭa kuļu. Munu paluru nanikuta kungka tjuṭanguru kuļu ngurkantara tjunangi walka manguri-manguritjara tjuṭa pirantjara tjuṭa kuļu. Munu tjiipi tjuṭanguru kuļu ngurkantara tjunangi tjiipi maru tjuṭa. Munu uwankara tjarara maunṭalpa tjunkula paluru katja tjuṭa wangkangu tjiipi nanikuta palunya tjananya tjintu mañkurpa ma-katira maunṭalpa kanyintjaku. Ka Jacobanya ankunytja wiya nyinangi munu Laipanku kuka tjuṭa kanyiningi.

³⁷ Munu palulanguru Jacobalu puṇu miṇa kaṭantara miri kutju kutju mantjiningi ka kutjupa ngururpa miri winki ngarangi. Ka miri wiya piranpa ngarangi, ka palu purunypaṭu miritjara maru ngarangi. Ka puṇu paluru walka piranpa maru, piranpa marulta ngarangi. Munu paluru puṇu miṇa tjuṭa kaṭantara palu purunypa uwankara palyaningi. ³⁸ Munu katira mantangka murutjura waṇaṇu kapingka itingka panya kuka tjuṭangku pitjala tjikilpaingka itingka. Alatji paluru tjunu tjikintjikitjangku pitjala nyakunytjaku kuka tjuṭangku. Panya tjakangka tjiipi nanikuta tjuṭa pitjala minangka itingka tjunguringkula kutjara kutjara inkapai tjitjikitja.

³⁹⁻⁴⁰ Ka palulanguru puṇu panya walka piranpa marutjara nyakula tjiipi nyara palu purunypaṭu walkatjara walkatjara tjunangi kuka ngunytju tjuṭangku. Ka Jacobalu kuka nyangannguru lamalama nyintañ-nyintañpa

walka waratjara tjuṭa tjarara maunṭalpa tjunangi palumparinytjaku. Palu panya kuka kutjupatjara paluru nyara kuka kutjupa tjuṭakutu manyakunytjaku ngunti ma-ngaratjura wantingu, panya Laipanku nanikuta walka waratjarakutu tjiipi marutjarakutu. Kaya kuka paluru tjana nguntingku ma-ngarala inkara tjitji nanikuta walka waratjara nyintan-nyintanpa kulu tjunangi, munu tjitji tjiipi maru tjunangitu. Nyanga alatji Jacobalu palurunku kuka tjuṭa palyara pulkaningi, munu tjarara maunṭalpa kanyiningi palumparinytjaku.

⁴¹ Palu kuka panya kanpi pulka tjuṭa tjunguringkula inkanyangka kutju Jacobalu puṇu panya walka piranpa marutjara tjuṭa tjanala mirangka murutjunangi minangka itingka, kaya nanikuta tjuṭangku kitikititi walka waratjara nyintan-nyintanpa tjuṭa tjunangi, kaya tjiipi tjuṭangku lamalama maru tjuṭa tjunangi, uwankara Jacobakuringkunytjaku. ⁴² Palu kuka panya nyurka-nyurka tjuṭa tjunguringkula inkanyangka paluru punu panya tjuṭa murutjunkunytja wiyangku wantingi, kaya lamalama kitikititi walka wiyatjara tjuṭa tjunangi Laipanku. Alatji Jacobalu palyaningi palumpa kuka kanpi pulka tjuṭa kutju, ka Laipanku nyurka-nyurka tjuṭa kutju. ⁴³ Ka panya Jacobaku tjiipi nanikuta winki mulararingu, ka paluru panya aŋangu warkaripai tjuṭa kulu mantjinu munu kamula tjuṭa, tangkiyi tjuṭa kulu paluru mantjira kanyiningi winki mulapa.

31

Jacobanya Ngulu Wirtjapakantja Laipantanguru

¹ Kaya palulanguru Laipanku katja tjuṭangku Jacobanya kampangkaṭu wangkangi alatji, “Ai! Jacobanya kuka tjutatjararingu nganampa mamanguru. Paluru uwankara katingu nganampa mamaku kuka tjuṭa.” Ka Jacobalu kulinu tjana kampangkaṭu wangkanyangka. ² Ka Laipangga kulu Jacobaku kuraringangi nguwanpa. Ka Jacobaku kuliningi, “Ai! Nyangatja ngayuku malpa panya ma-wiyaringanyi. Ngali panya ngañmanypa mukulya nyinangi Kulypalnga ngali.”

³ Ka Mayatja Godalu wangkangu Jacobala, “Malaku ara nyuntumpa mamaku ngurakutu nyuntumpa walytja tjuṭakutu kulu, kañanta ngayulu nyuntunya katirinkuku.”

⁴ Ka Jacobalu wati kutjupa iyanu Raitjilnga pulanya Liyanya altira ngalya-katira ngururpa lurtjuringkunytjaku ngura nyara paluru kuka kanyintjala. ⁵ Munu pulala pitjanyangka wangkangu, “Ai! Nyuntumpa mama ngayuku malpa wiyingingu panya ngañmanypali mukulya nyinangi. Palu Godanya ngayula tjungu tiṭutjara nyinangi, god panya Mamalu Tjamulu tjana walkuntjanya. ⁶ Ka nyupali kutjaraṭu ninti panya ngayulu nyuntumpa mamaku pulkaṛa mulapa warkaringi rawa mulapa. ⁷ Palu paluru ngayunya ngunti kuranningi munutju paluruṭu kalkuntjatjanungku rawangku kampa kutjupanangi. Palu Godalu ngayunya anga-kanyiningi kurantjaku-tawara. ⁸ Panya wati panya paluru ngayunya kalkuṇu kuka walka nyintañ-nyintantjara tjunkunyangka ungkunytjikitjangku, ka palulanguru kuka tjuṭangku tjunangi walka nyanga palu purunypa kutju. Kanpi piruku kampa kutjupara wangkangu walka waratjara tjuṭa kutju ungkunytjikitjangku. Ka palulanguru kuka tjuṭangku tjunangi walka waratjara tjuṭa kutju nyintañ-nyintantjara wiyangku. ⁹ Ka nyanga alatji Godalu nyuntumpa mamaku kuka tjuṭanguru mantjira ungangi ngayunya. Ka ngayuku tjuṭaringu, ka nyuntumpa mamaku ma-maṇkuraringu.

10 “Panya mungaṭuna tjukurtjunangi nanikuta kulunypa tjuṭa tjunkunytja arangka, mununa tjukurpa nyangu nanikuta nyitayira nyintan-nyintanpa munu walka waratjara paluru tjana kutju inkara tjitji walka palu purunypa tjuṭa utinnyangka. **11** Ka ngayulu tjukurmankunyangka angeltu Godalanguru ngayunya ini wangkara wangkangu, ‘Jacob!’

“Kanu wangkangu, ‘Uwa nyangatjana.’

12 “Ka wangkangu, ‘Nyawa! Nyanga nanikuta nyitayira nyintan-nyintanpa walka waratjara tjuṭangku kutju inkara tjitji walka palu purunypa tjuṭa utini. Palu ngayuluna nyanga alatjirinytjaku palyani nyuntunya ngunti kalkunyangka Laipantu. **13** Ngayulu panya God nyuntumpa, ngura panya Pitjulta utiringkunytjanya. Panya nyara palulan nyuntu puli murutjunkula uwilangka kurpira milmilmanu, munu panyanin kaļkuņu. Ka kuwari nyanga nyuntu ngura nyangatja wantikati munu malaku ara ngura panya nyuntu iti ngarinytjitatjaku.’ Nyanga alatjini tjukurmankunyangka angeltu tjakultjunangi.”

14 Ka Raitjiltu pula Liyalu nyanga palunya kulira wangkangu Jacobala, “Nyangatja ngalimpa wiyaringu mama ilunyangka ngula ngali mantjintjaku. **15** Mamangku ngalinya wirura kanyintja wiya kutjupitja purunypa wantinyi. Munu nyangalinya nyuntunya ungu panya nyuntu palumpa war karinytjaku. Kan palulanguru war karira palumpa pulkaningi mamaku, ka panya nyuntu war karira palumpa pulkantja paluru ma-ungkula wiyanu. **16** Ka panya uwankara Godalu mamanguru mantjira nyuntunya ungkunytja nyaratja ngalimpa, munu ngalimpa tjitji tjuṭaku kuļu. Ka nyuntu nyanganguru Godalu wangkanyangka wangañarangku kulinma ankunytjikitjangku ngura walytjakutu.”

17-18 Ka palulanguru Jacobanya pirtji-pirtjingu palumpa mama Isaa-calakutu małaku ankunytjikitja ngura nyara Kainantakutu ngura walytjakutu. Munu kamulangka palumpa kuri tjuṭa, tjitji tjuta kuļu tjunkula mapakanu munu kuka nanikuta, tjiipi tjuṭa ma-pakaltjingara ma-unṭu-unṭura wañanigi. Munu paluru uwankara katingu paluru ngura pala Mitjuputaimiyala nyinara mantjintjatjanungku ulytja tjuṭa, kuka tjuṭa, tangkiyi, kamula tjuṭa, anangu war karipai tjuṭa kuļu.

19-20 Palu paluru palumpa waputju Laipannga wangkanytja wiya anu, panya Laipannga nganmanypa anu palumpa tjiipi tjuṭa tjiiramilantjikitja ngura kutjupakutu. Ka Raitjiltu palumpa mama ankunyangka małantara ngurangka tjarpara palumpa mamaku god puñunguru palyantja tjuṭa kutitjura katingu. Palu Jacobanya watarkitja nyakuwiya paluru mantjinnyangka. **21** Munuya paluru tjana uwankara ulytja tjuṭa mantji-mantjira warpungkula ma-pakanu munuya karu urutjara ini Yupuraitila ma-itipirira ma-pitjangi puli murpu tjuṭatjarakutu ngura ini Kiliyatatalakutu.

Laipantu Jacobanya Malawanungku Wataparantja

22 Ka tjintu mankurpa wiyaringkunyangka anangu kutjupangku Laipanta wirkara wangkangu Jacobanya ngulu-ngulu ankunytja. **23** Ka Laipantu nyangatja kulira wati palumpa walytja tjuṭa altira kutjukutjungkara tjunguringkula ma-wañanu. Munuya wañara wañara tjintu 7-arira wirkara nyangu tjananya ngura puli murpu tjuṭatjarangka ini Kiliyatala nyinanyangka. **24-25** Panya Jacobalu tjana puli murpu katu ngura tjunkula nyinangi. Ka Laipantu palumpa walytja tjuṭatjarangku palu purunypatu puli murpu kutjupangka ngura tjunu. Ka munga pala palula Laipantu ngarira tjukurmanu Godalu palula wangkanyangka alatji, “Jacobala nyuntu wangkanytja wiyangku wantima. Palunya pauntjingara

kuranmankuwiyangku wantima, munu kalypa-kalypantja wiyangku kulu wantima." Alatji Godalu palula wangkangi ngarira tjukurmankunyangka.

²⁶ Ka mungawinkilta Laipantu ankula Jacobanya wangkangu, "Ai, nyaaringun? Nyaakunin panyatja ngunti kurañu, munutjun ngayuku uñtalpa kutjara warmala purunytju katingu? ²⁷ Nyaakunin wangkanytja wiyangku wantikatira kampangkatu kumpira anu? Utinin tjakultjunama nyuntu ankunytjikitjangku, kaña nyuntunya pukulmara inma inkara iyanma. ²⁸ Palu nyuntun warpungkula anu, ka ngayulu kami tjamu tjuta uñtalpa kutjara kulu nyunytjura wangkara iyantja wiyatu. Alatji kura nguwanpa, utin nyuntu alatjingantja wiyangku wantima. ²⁹ Palu tjingurunanta ngayulu pungama nyuntunya wati tjutatjarangku, palu mungangkani nyuntumpa mamaku Godalu anga-wangkangu nyuntunya wangkanytja wiyangku wantintytjaku. ³⁰ Uwa, ngayulu kuliningi nyuntu watjilarira ankunyangka nyuntumpa mamaku ngurakutu, palu nyaakun ngayuku panya god tjuta kutitjura katingu?"

³¹ Ka Jacobalu wangkangu, "Wiya, ngayuluna nguluringkula kulinu nyuntu ngayulangru nyuntumpa uñtalpa kutjara mantjintjaku-tawara. Palulanguruna kampangkatu anu wangkanytja wiya. ³² Palu nguriranku nyawa nyanga ngayuku añangu tjutangka. Tjinguru kutjupangku man-tjinu nyuntumpa god puñnungru palyantja tjuta. Ka nyuntu ngurira man-tjinnyangkampa ngayulu añangu nyara kutitjura katintytjanya nyakuku mununa palunya pungkula iluntankuku. Nganaña nyanganyi, nyuntumpa wati tjutangku kulu nyanganyi. Ka nyanga nganañala mirangka nyuntu para-ngurira nyawa munu nyuntunku nyakulampa mantjira kati." Alatji Jacobalu rapangku alatjitu wangkangu, panya paluru nyakunytja wiya Raitjiltu palumpa mamaku god tjuta kutitjunkunyangka.

³³ Ka Laipantu Jacobaku tiintangka-warara tjarpara putu nyangu, munu palulangru Liyaku tiintangka tjarpara piruku putu nyangu, munu palulangru Liyaku pulampa Raitjilku minyma warkaripai kutjaraku tiintangka tjarpara putu nyangu. Munu palulangru Raitjilku tiintangkalta tjarpangu. ³⁴ Palu Raitjiltu panya god nyara palunya tjananya kutitjura kamulaku tjatalangka unngu yakutjangka tjunu ngañmanytjulpi. Munu paluru kuwari nyanga tjatala palula katu tatira puuntara nyinangi tiinta unngu. Ka palumpa mamangku tiinta unngu putu para-nyangu. ³⁵ Ka alatji Raitjiltu wangkangu palula tjaalymara, "Mama! Nyuntu ngayuku mirpañ-mirpañarira wangkanytja wiyangku wantima, panya minymaku tjaka ngaranyi, kaña palunyatjara pakantja wiya nyinanyi. Palya?" Ka panya putu mulapa ngurinu wati panya Laipantu.

³⁶ Ka palulangru Jacobanya pulkara mirpañaringu Laipanku munu palula wangkangu, "Nyaananku katingu? Kura yaaltji-yaaltjiña nyuntumpa palyauñu kañin mirpañarira wañaparañu ngayunya? ³⁷ Nyuntu wanyu tiinta ngayukungka tjarpara kutjupa kutjupa nyuntumpa nyangu? Wiya alatjitu. Nyuntu putu mantjira uralta tjuñanyi nyuntu nganaña uwankarangku uti nyakunytjaku, panya wiya alatjitu ngaranyi. Ala! Nyuntu nganañanya kura putu alatjitu ngurkantananyi. ³⁸ Palu ngayulu rawa mulapa nyuntula nyinara warkaringi 20 yiya. Ka tjiipi, nanikuta nyuntumpa tjutangku rawangku tjuñangki kulunypa tjuta, kaña kuka rama nyuntumpa kuka tjutangru pungkula ngalkuwiyangku wantingi. ³⁹ Ka panya kuka inurangku tjiipi patjannyangka ngayulu nyuntulakutu katira miri nintilwiyangku wantingu nyuntu nyakula papangku patjantja kulintjaku ngayunya ngunti ngukantjaku-tawara. Palu ngayulu ankula

tjiipi kutjupa mantjiningi ngayuku maningka munuña katira tjunangi tjiipi panya palula arangka. Panya ngayunyañin wangkangu mungangka kalala kuļu tjiipi nanikuta kutitjunkunyangka ngayulu payamilara tjunkunytjaku panya palumpa arangka, tjiipi muu nanikuta kuļu. ⁴⁰ Panya tjutaraña ngayulu nyuntumpa warkaringi kuļi pulkangka munu munga wari pulkangka kuļu munuña puťu kunkunaripai.

⁴¹ “Panya alatji rawa ngayulu nyuntumpa warkaringi kulingka waringka yiya panya 20. Ngayulu nyuntumpa unṭalpa kutjarakitja warkaringi yiya panya 14, yiya 7 Liyanyakitja, yiya 7 Raitjilngakitja. Mununa palulanguru piruku yiya nampa 6 warkaringi nyuntumpa tjiipi nanikuta tjutanguru ngayulu mantjintjikitja. Ka panyan nyuntu kalkuntjatjanungku rawangku kampa kutjupanangi. ⁴² Palu Godanya ngayula tzungu ngarangi God panya ngayuku tjamuku munu mamaku, Aipuramaku pulampa Isaacaku. Tjinguru Godanya ngayula ngaranytja wiyangkampanin ngura iriti maralpa iyanma. Palu Godaluńi nyangangi ngayulu pulkara nyuntula warkaryangka pakuringkunytja wiya, munu palulanguru nyuntunya mungangka painu ngayunya wangkanytja wiyangku wantinytjaku.” Alatji Jacobalu palumpa kulpalata wangkangu wati panya Laipanta.

Jacobalu Pulanku Laipantu Wangkara Ngaparku Kalkuntja

⁴³ Ka Laipantu Jacobala wangkangu, “Minyma nyanga kutjara ngayuku unṭalpa, ka palumpa pulampa tjitji tjuta ngayuku pakali tjuta. Ka nyanga tjiipi nanikuta tjuta nyuntu katinytja kuļu ngayuku. Ala! Nyanga uwankara nyuntu para-nyakula nyanganyi ngayuku uwankara. Kanā ngayuku unṭalpa kutjara kanyintjikitja mukuringanyi, ngayuku pakalipiti kuļu, palu Godalu panya ngayunya painu nyuranya markuntja wiyangku wantinytjaku. Kanā yaaltjiriku? Putuña kulini. ⁴⁴ Palu wanyuli nyinakatira piruku wangkara kalkula, munuli ngura nyanga palula pitjilpa palyala kalkura rawangku kulintjikitjangku.”

⁴⁵ Ka Jacobalu palya kulinu ngaparku kalkuntjikitjangku munu apu kutju mantjira murutjunu kalkuntja rawangku kulintjikitjangku. ⁴⁶ Munu palumpa walytja tjutangka wangkangu apu kutjupa tjuta mantjira pitjilpa tjunkunytjaku. Ka pitjilpa tjunkula wiyannganya Jacobalu pula Laipantu pala palula itingka nyinakatira mai kuka ngalkula wangkara kalkuningi.

⁴⁷ Ka pitjilpa panya palunya Laipantu wangka palumpangku ininu nyanga alatji, “Tjika Tjaatutjanya”. Palu Jacobalu ini tjunu palumpa wangkangu nyanga alatji, “Kalitanya”. ⁴⁸ Ka Laipantu Jacobala wangkangu, “Pitjilpa nyanga paluru ngaranyi ngali nyakula watarkurintjaku-tawara ngalinku panya kalkuntja.” Ka pala palulanguru Jacobalu ngura palunya ininu “Kalitanya”.

⁴⁹ Munu Laipantu wangkangu, “Kanā Mayatja Godala tjapini ngalinya atunymara kanyintjaku ngura nyanganguru tjararingkula paṭupatu nyinanyangka.” Kaya palulangurulta ini kutjupa tjunu “Mitjapanja”.

⁵⁰ Munu Laipantu Jacobala wangkangu nyanga alatji, “Tjinguru nyuntu ngayuku unṭalpa pungkuku, munta tjingurun minyma kutjupa altiku, kanā paṭu nyinara kulintja wiya nyinaku. Palu kulinma panya Godalulinya nyanganyi. Palulanguru alatjiriwiyangku wantima munu ngayuku unṭalpa kutjara wiruña kanyinma. ⁵¹ Nyanganpa nyawa, nyanga pitjilpa tjunkunytja munu apu panya murutjunkunytja. ⁵² Nyanga paluru pula ngaranyi ngalinku nyakula kulintjaku. Ka nyanga palulanguru nyuntu apu nyanga kutjarangka ngalya-waintarira ngayunya

pikangku waṭaparantja wiyangku wantima, ka ngayulu palu purunypaṭu ma-waintarira nyuntunya pikangku waṭaparantja wiyangkuwantiku. Palya? ⁵³ Ka Godalu ngalinya kalkunyangka nyanganyi, God panya ngalimpa tjamu Aipuramaku munu ngayuku mama Nayuku kuļu, munu paluru kalkuntja panya palunya wiyanjaku-tawara ngalinya nyanganyitu kalkuntjatjanungku wanganarangku kulira palyantjaku.” Alatji Laipantu Jacobala wangkara kalkunu. Ka Jacobalu palu purunypaṭu wangkara Laipannga ngapartji kalkunu mulamulangku Mayatja Godala mirangka, panya palumpa mama Isaacalu God panya palunya walkulpai Mayatja witulya pulkanya. ⁵⁴ Munu palulanguru Jacobalu kuka mantjira pungu munu puli murpu pala palula warungka tiliwakara Godanya ungu palunya walkuntjikitjangku, munu palulanguru palumpa walytja tjuta altingu palula tjunguringkula ngalkuntjaku mai kuka. Munuya ngalkula wiyaringkula munga kutju ngaringu puli pala palula katu. ⁵⁵ Ka mungawinki mulapa Laipantu pakara palumpa puliri, pakali tjuta, uŋtalpa kutjara kuļu nyunytjura wangkara wantikatira ma-pakaṇu malaku palumpa ngurakutu.

32

Jacobanya Kuṭa Iitjulakutu Ngapari-ngapari Ankunytja

¹ Ka Jacobanya kuļu ma-pakaṇu munu ankula ankula ma-paturingu, ka angelpa maŋkurpa Godalanguru palula utiringu. ² Ka nyakula wangkangu, “Nyangatja Godaku ngura!” Munu paluru ininu “Maanaimanya” ngura pala palunya.

³ Ka Jacobalu wati maŋkurpa iyanu tjakulpa ngura Tjiirtakutu palumpa kuṭangka wangkanytjaku Iitjula. (Ngura nyara paluru panya ini kutjupa Iitamanya) ⁴ Alatji paluru tjanala wangkangu palumpa kuṭangka ankula tjakultjunkunytjaku, “Ngayulu Jacobanya panya nyuntumpa malanypa mununa nyuntula kuṭa wirungka ma-tjakultjunanyi panya ngayuluṇa ngura parari ngalimpa kulypalta Laipanta rawa nyinangi mununa kuwari kutju nyanga aruringu ngurakutu. ⁵ Munuṇatju kuka puluka, tjiipi, nanikuta tjuta, tangkiyi tjuta kuļu katinyi, ka anangu ngayuku war̄karipai tjuta kuļu ngayula tjungu pitjanyi. Kanı kuṭa wanyu kulila! Ngayuluṇa nyanga tjananya nyuntulakutu tjakulpa ma-iyanu nyuntu kulira ngayuku kalyparingkula pukulpa patantjaku.” Alatji Jacobalu wangkara iyanu Iitjulakutu wati panya war̄ka maŋkurpa, kaya mulapatu ankula tjakultjunu Iitjula.

⁶ Munuya malaku aruringkula Jacobala wirkara wangkangu nyanga alatji, “Nganana ankula tjakultjunu nyuntumpa kuṭangka, ka paluru kuwari wati tjutatjara pitjanyi, 400-tjara.” ⁷ Ka Jacobanya nyangatja kulira pulkara nguluringu. Munu paluru palumpa anangu tjuta tjarara uṭulu kutjara palyanu munu kuka tjiipi, nanikuta, puluka, tangkiyi, kamula tjuta kuļu palu purunypaṭu tjarara uṭulu kutjara palyanu. ⁸ Panya paluru alatji kulinigi, “Tjinguru Iitjulu tjana pitjala uṭulu nyanga kutju pikangku pungkuku, ka uṭulu nyanga kutjupa tjuta kumpira wirtjapakalku.” Alatji Jacobalu kulinu munu tjarara uṭulu kutjaraṇu.

⁹ Munu palulanguru Jacobalu Godala tjapinu, “God, ngayuku tjamu Aipuramalu nyuntunya walkulpai ngayuku mama Isaacalu kuļu, kanı wanyu kulinma! Nyuntu panya ngayunya witura iyanu ngura walytjakutu malaku ankunytjaku ngayuku walytja tjutakutu, munu panyanin ngayunya wangkangu atunymankunytjikitjangku ngayulu palya pukulpa

mulapa nyinanytjaku. ¹⁰ Palu nyaakuñin rawangku munytjangku unganyi munuñin wirura katirinanyi, panya ngayulu kurakura mantatja alatji. Panya ngayulu iriti puñu tjukaratjara kutju karu uру Jordanta itipiringu Aarantakutu ankunytjikitja maralpa alatji, mununa kuwari nyanga tjuña mulartjara małaku pitjangu nyanga utułu kutjaratjara. ¹¹ Wanyuni atunymara kanyinma ngayuku kuta Iitjula-tawara. Panya ngayulu nguluringanyi Iitjululanya pitjala pungkula wililytjingantjaku-tawara tjitji minyma kułu. ¹² Panyatja kulinma, panya iriti nyuntu kalkunu ngayunya atunymara tjukarurungku kanyintjikitjangku, munu panyanin kalkunu ngayuku walytja ma-tjułaringkunytjaku malatja malatja, kaya mungiliyi mulapa nyinaku panya paki kułuny-kulunypa uру kantilytja ngarira waninytja purunypa, puñu kantamilantjaku.” Alatji Jacobalu Godala tjinpinu palunya tjananya atunymankunytjaku.

¹³ Munu nyara palula ngarira tjinturingkula Jacobalu kuliningi palumpa kuka tjułanguru tjarara Iitjunya ungkunytjikitjangku paluru mantjira pukularinytjaku. Munu paluru ngurkantara tjarara maunyalpa tjunu alatji, ¹⁴ nanikuta ngunytju 200, nanikuta mama 20, munu palu purunypa tjiipi ngunytju 200, tjiipi mama 20. ¹⁵ Munu kamula ipitjara 30 palumpa tjanampa kułunypa tjuña kułu. Munu puluka ngunytju 40, munu puula 10. Munu tangkiyi ngunytju 20, tangkiyi mama 10. ¹⁶ Munu paluru kuka nyanga tjananya piruku tjarara utułu tjuña palyanu, munu palulanguru wati war̄karipai tjuña kutju kutju tjunu utułu kutju kutjungka katirinkunytjaku munu tjananya wangkangu, “Ngayula kuranyuya anama wanapari wanapari, palu kapuñu kutjuñu ankunytja wiya ngururpa ala kutjupa ala kutjupa wantima.” ¹⁷ Munu wangkangu Jacobalu wati kuranyu ankunytjala nyanga alatji, “Ngayuku kuta Iitjulu nyuntunya nyakula tjapilku alatji, ‘Ngananyanku mayatja? Yaaltjikutun ananyi? Nganaku kuka tjuña nyangatja nyanga nyuntula kuranyu ananyi?’ Alatji paluru nyuntula tjapilku. ¹⁸ Ka nyuntu tjapinnyangka palula alatji wangka, ‘Wiya, nyanganpa nyuntumpa małanypangku Jacobalu iyanu nyuntunya ungkunytjaku. Panya paluru maławanu pitjanyi.’ Alatji palunya nyakula wangka. Palya?” ¹⁹ Munu paluru wangka palu purunypa wati ngururitja ngururitjangka wangkangi tiana kuka utułu kutju kutju katira Iitjunya nyakula wangkanytjaku. ²⁰ Munu paluru tjanala wangkangu, “Munuya watarkurinytja wiyangku palula wangka panya ngayulu maławanu pitjanytja. Palya?” Alatji paluru tjananya wangkara iyanu, panya paluru kuliningi, “Kuwari ngayuku kułangku kuka nyanga tjuña ungkunyangka tjinguru ngayuku kalyparingkuku, mununi kuwari nyakula ngayuku pukulariku.”

²¹ Munu kuka panya palunya tjananya Iitjunya ungkunytjaku kuranyu iyara paluru nyinangi ngurangka munga pala palula.

Jacobalu Pulanku Godalu Tjalira Anta-waninytja

²² Munu Jacobalu munga pala palula pakara kuri kutjara tjitji 11 palumpa mantjira kuri palumpa kutjupa kutjara kułu mantjira katingu karu uру ini Tjapakalakutu, munu tjananya ma-itipirinytjaku wangkara iyanu. ²³ Munu tjananya ma-iyara piruku palumpa kutjupa kutjupa uwankara kułu ma-iyana palumpa war̄karipai tjtangka. ²⁴ Munu paluru wantira kutju nyinangi małaringkula.

Ka wati kutju pitjala pulanku lirintara anta-wanira para-wanira para-wanira munga war̄angka. ²⁵ Ka wati panya kutjutjangku Jacobanya punkatjingantjikitjangku pułulinangi, munu palulanguru

palunya angkalpa pampunu Jacobanya, ka tjunta kutju angkalnguru tjukutjuku ngalya-pakañu. ²⁶ Ka wati panya kutjutjangku wangkangu, “Wantir’iyalañ! Nyangatja wañalpi tjinturingu.”

Ka Jacobalu wangkangu, “Wiya, nyuntu ngayunya pukułmankunyangka kutjuña nyuntunya wantir’iyalku.”

²⁷ Ka palula tjapinu, “Ini ngananyan nyuntu?”

Kanku ini wangkangu, “Jacobanya.”

²⁸ Ka wati panya kutjutjangku wangkangu, “Nyuntu kuwari ini ‘Jacobanya’ ngaranytja wiyingkuku, munu nyanganguru nyuntu ini ‘Israelnga’ ngaraku, panya nyuntu Godala tungunpungkula lirintara ańta-wańira ańta-wańira waintaringu, ngayula kutju wiya wati tjutangka kulu.”

²⁹ Ka Jacobalu tjapinu palula ngapartji, “Palu nyuntu ini ngananya?”

Ka palula wangkangu, “Nyaakuñin iniku tjapira ngurini?” Munu palulanguru Jacobanya pukułmanu.

³⁰ Ka Jacobalu wangkangu, “Ngayulu mulapa Godanya yunpa ilangku nyangu. Munuña ilangku nyakunytjatjanu nyangatja kuwari wankatu ngaranyi.” Munu palulanguru ngura palunya ininu Piniyalnga. ³¹ Ka tjintu ngalya-pakannyangka Jacobalu ngura pala Piniyalnga wantikatira ma-pakañu, munu paluru lurparinangi panya angkalpa pikatjara. ³² Kaya nyanga palulanguru Israelkunu tjutangku kuwari kuka ngalkula pulyku angkalitja ngalkuwiyangku wantipai, panya Godalu Jacobanya tjunta pampuntjitjangka.

33

Jacobanya Pula Iitjunya Tjunguringkunyta

¹ Ka Jacobalu nyangu Iitjunya wati tjutatjara pitjanyangka 400-tjara, munu palulanguru palumpa kuri tjuta tjaraña kutju kutju ngaratjunu munu palumpa tjitji tjuta ngunytjungka ngunytjungka tjunu. ² Munu palulanguru tjunu kuri mała altinytja kutjara palumpa pulampa tjitji kułu kuranyu ankunytjaku, munu palulanguru Liyanya palumpa tjitji tjuta kułu ngururpa tjunu, munu palulanguru mała tjunu Raitjilnga palumpa tjitji Josephanya kułu. ³ Munu Jacobanya palula tjanala kuranyu anu munu palumpa kutangka ilaringkula 7-arangku pupakatira manta ngalyangku pampunu. Panya alatjingaraya walkulpai.

⁴ Palu Iitjulu palulakutu wirtjapakara ampuṛa mitamita kutjara nyunytjuñu munu pula kutjarañu pulkara ulangi. ⁵ Ka palulanguru Iitjulu paranyakula nyangu minyma tjuta munu tjitji tjuta kułu, munu palula tjapinu, “Añangu ngananya tjana nyanganpa?”

Ka Jacobalu wangkangu, “Wiya kuta, tjitji nyanga palunya tjananyani Godalu ngayunya wirungku ungu.” ⁶ Ka minyma panya mała altinytja kutjara palumpa pulampa tjitji tjuta kułu pitjala Iitjula kuranyu pupakatingu. ⁷ Ka palulanguru Liyanya munu palumpa tjitji tjuta kułu pitjala pupakatingu, ka palula małangka Raitjilnga pula Josephanya katjarara pitjala pupakatingu.

⁸ Ka Iitjulu Jacobala wangkangu, “Ka kuka panya uṭulu kutjupa uṭulu kutjupa pitjanytja yaalitja tjuta, panya tjananya ngayulu kuwari nyangu?”

Ka Jacobalu wangkangu, “Wiya, nyuntu ngayuku kalyparingkunyjakuna iyanu.”

⁹ Ka Iitjulu wangkangu, “Wiya małany, kuka tjutaña kanyini. Palya, kanyinmanku!”

¹⁰ Ka Jacobalu wangkangu, “Wiya, nyuntu ngayuku pukularirampa wanyu mantjila nyanga ngayulu ungpunyta. Panya nyuntu kuwari ngayunya kalypangku ampunnyangkaña nyuntunya yunpa nyakula pulkara pukularingu Godanya yunpa nyakunyta purunyapa. ¹¹ Ka wirungku-puta mantjila kuka nyanga ngayulu ungpunyta tjuṭa. Panya Godalu ngayunya pukultjungku ungangi tjuṭa mulapa ngayulu mukuringkunyta uwankara.” Munu Jacobalu rawangku mantjintjaku wangkara wituwituningi, ka palulanguru Iitjulu kuka panya tjuṭa mantjinu.

¹² Munu palulanguru Iitjulu wangkangu, “Ala, walawala pakala, kali nyuntu ngali tjungu ara!”

¹³ Palu Jacobalu wangkangu, “Wiya, kuta kulila! Nyuntu ninti panya tjitji tjuṭa mapalku pakuringkupai, kaña tjiipi nanikuta ngunytyu, puluka ngunytyu tjuṭa kuļu atatjura katintjikitjangku kulini nyanga kuļunyapa tjuṭatjara. Tjingurula nganana tjananya warpungkula kaļala warangka katira katira iluntankuku uwankara. ¹⁴ Palu wanyu nyuntu kuranyu anama, kaña maļawanu ngayulu purkara pitjama tjitji nyanga tjuṭatjara munu tjiipi nanikuta tjuṭatjara kuļu, munuñanta ngula ngura nyara Iitamala waņara tjunguringkuku. Palya?”

¹⁵ Ka Iitjulu wangkangu, “Uwa palya, kaña wanyu wati ngayuku wařkaripai tjara kutjupa nyuntula wantikatiku?”

Ka Jacobalu wangkangu, “Wiya palya ara! Ngayulu pukularingu nyuntu kalyparingkunyangka munuñanta watiku ngatjintja wiya.” ¹⁶ Ka tjintu nyara palula Iitjunya ma-pakaňu palumpa ngurakutu Iitamalakutu. ¹⁷ Palu Jacobanya anu ngura ini Tjukatjalakutu munu nyara palula yiwala palurunku palyanu munu tjulypinypa tjuṭa kuļu palyanu kuka tjuṭaku. Kaya nyara palulanguru ngura nyara palunya ininu Tjukatjanya panya ini nyanga palunya wangkanyi “wiltja” wangka Iipurungku.

¹⁸ Uwa, Jacobanya panya wankatu aruringu ngura Mitjuputaimiyalanguru munu wirkanu tawunu ini Tjikimala manta pala Kainanta. Mununku paluru ngura tjunu urilta tawunu Tjikimala itingka. ¹⁹ Munu paluru manta pala palunya payamilaňu wati Aimurkunu tjuṭangka mani panya tjiilpa pulka ungkula, nampa 100. Ka Aimurnga panya wati Tjikimaku mama. (Kaya tawunu Tjikimanya ininu wati nyanga palulanguru Aimurku katjanguru.) ²⁰ Ka Jacobalu manta nyara palula pitjilpa pulka palyanu Godanya walkuntjikitjangku, munu ininu “Godanya panya Israelku God”.

34

Wati Kutjupangku Liyaku Unṭalta Ngunti Ngarinytja

¹ Ka Jacobaku pulampa Liyaku unṭalpa kutju nyinangi ini panya Tiinanya. Munu tjintu kutjupa kungkawara nyara paluru anu wařikutu minyma Kainannga ngurara tjuṭa nyakunytyikitja. ²⁻³ Ka ngura pala palumpa wati ini Aimurnga mayatja nyinangi ngura ititja tjuṭaku kuļu. Ka Aimurku katjangku Tjikimalu nyangu Tiinanya wirkankunyangka, munu palunya witira maunṭalpa katira palula kampangkatu ngunti ngaringu. Munu palulanguru kungkawara palumpa pulkara kurunpa winki mukuringku munu nyinara purkařangku wangkara ngultjuningi palumpa mukuringkula. ⁴ Munu palulanguru palumpa mamangka Aimurta wangkangu, “Mama! Ngayuluña kungkawara nyangaku pulkara mukuringanyi. Wanyu palumpa mamangka tjapila, kaña altira kanyinma.”

⁵ Ka Jacobalu kulinu palumpa uŋtalpa kampangkaṭu kurangku pampunyangka. Palu palumpa katja tjuṭangkuya kuka tjuṭa paṭu kanyiningi, ka palulanguru Jacobanya kanmarpa nyinangi palumpa katja tjuṭa pitjanytjaku paṭara. ⁶ Ka Tjikimaku mama anu Jacobala wangkanytjikitja. ⁷ Kaya Jacobaku katja tjuṭangku palumpa tjanampa małanypa pampuntja kulira mapalku pitjangu kuka panya tjuṭa ma-wantikatira. Panya paluru tjana pułkara tjituru-tjitururira mirpanpa mulararingu, panya Tjikimalu mulapa kura palyaṇu Jacobaku uŋtalpa. Utu paluru pampulwiyangku wantima.

⁸ Ka Aimurtu wirkara wangkangu Jacobala tjanala, “Ngayuku katja Tjikimanya pułkara kurunpa winki mukuringanyi nyuntumpa uŋtalpaku. Wanyu palunya uwa pula kuriara nyinanytjaku. ⁹ Utu nyuranku untilpa tjuṭa ngayuku katja tjuṭa ngalya-ungkuku kuri altintytjaku, kala nganana ngapartji nyuranya ma-ungkuku kuri ngapartji altintytjaku nganampa uŋtalpiti. ¹⁰ Panya nganana mukuringanyi nyura ngananaala tjunguringkula nyinanytjaku nganampa nyanga mantangka. Ka nyura ngura kutjupaku kutjupaku mukuringkula palya payamilala, munu ngura ala lipiwanu para-nyinama ngura kutjupangka kutjupangka. Munu nyura mukuringkula kutjupa kutjupa tjuṭa kuļu payamilanma munu ngula piřuku tjalamilanma mukuringkula.” Alatji Aimurtu Jacobala tjanala wangkangi.

¹¹ Ka palulanguru palumpa katjangku Tjikimalu ngapartji Jacobala tjanala wangkangu, “Wanyuṇiya wirungku ungama kuri altintytjaku, kana nyuranya ungkuku kutjupa kutjupa uwankara nyura ngayula ngatjinniangka. ¹² Wangkaniya, nyaaku nyura mukuringanyi? Nyaana nyuranya ungkuku? Mukuringkulaya pułka mulapa ungkunytjaku wangka, kana nyuranya pułka ungkuku nyura wangkanytjitatja. Panya ngayulu kungka pala palunya mulamulangku altintytjikitjangku wangkangi.”

¹³ Palu Jacobaku katja tjuṭa palumpa tjanampa małanypa pampura kurrantjtjanguṛu Tjikimanya pulanya mamarara ngapartji pungkunytjikitja mukuringangi. ¹⁴ Munuya alatji pulala wangkangu, “Wiya, nganana putu nguwanpa nganampa małanypa unganyi tjitjingku altintytjaku. Nyara palulanguru nganana kūntaringkupai tjitjingku altintiangka. ¹⁵ Palu nyuntu nganana purunypa watiringkunyangka kutju nganana nyuntunya altintytjaku ungkuku, nyuntumpa walytjapiti kuļu ngananaanya purunyarinyangka. ¹⁶ Nyara palulanguru kutju nganana nyuranya altintytjaku ungkuku nganampa uŋtalpiti, munula ngapartji nyurampa uŋtalpiti mantjilku nganampa katja tjuṭangku kuļu altintytjaku. Munula palulanguru uriwiyaringkulalta nyurala nyinaku, munula nyuntu nganana anangu kutjuringkulalta nyinaku. ¹⁷ Palu nyura watiringkunytja wiyangku wantinyangka nganana nganampa małanypa mantjira katiku, munula ngura kutjupakutu ankuku.” Alatjiya Tiinaku kuṭa tjuṭangku wangkangi Aimurta pulala Tjikimala.

¹⁸ Ka Aimurtu pula nyanga palunya kulira palyanmanu. ¹⁹ Munu palulanguru wati nyanga Tjikimanya warpungkula tawunukutu anu Jacobakunu tjuṭa purunyarinytjikitja panya paluru pułkara mukuringangi Jacobaku uŋtalpaku. Paluru panya kuṭa pułka nyinangi wati Aimurku katja kuranyitja, kaya tawunu nyara palunya ngurara tjuṭangku palunya mayatjanmankupai. ²⁰ Ka Aimurnga pula anu tawunuku kaitangka mitingiku tjunguringkunytjikitja. Kaya wati panya palunya ngurara tjuṭa kuļu pitjala kaitangka tjunguringu mitingi kulintjikitja.

²¹ Ka Tjikimalu pula wangkangu tjanala, “Nyara Jacobanya tjana wati palya tjuṭa nganampa malpa tjuṭa. Wanti tjananya ngura manta nyangangka palya nyinanytjaku munu tjana payamilaṛa tjalamilantjaku kuļu palya wantima. Panya ngura nyangatja manta parariwanu ngaranyi. Ka nganaṇa tjanampa unṭalpa altinyi, ka tjana ngapartji nganampa unṭalpa tjuta altinyitu. ²² Palu wati nyanga paluru tjanaya alatji nganaṇala wangkangu, ‘Nyura nganaṇa purunypa watiringkunyangka kutjula nyurala nyinaku aŋangu kutjuringkula.’ ²³ Ala! Palyanmarala tjananya munula tjananya purunyarima. Panya tjana nganaṇala tjungu nyinanyangka palumpa tjanampa kuka nganampariku, munu kutjupa kutjupa tjanampa uwankara nganamparikuṭu.” Alatji Aimurtu pula tjanala wangkangu palumpa pulampa walytjapitingka.

²⁴ Kaya wati ngura pala palunya ngurara tjuṭangku nyangatja kulira palyanmanu munuya uwankara Jacobanya tjananya purunyaringu panya tjana naŋmanypa tjitji tjuṭa nyinangi munuya watiringu.

²⁵ Kaya wati panya Aimurnga Tjikimanya tjana ngura walytjangka walytjangka rawa nguwanpa nyinara pakuwiyinganggi. Ka palulanguru tjintu maŋkurpa ngarala wiyingkunyangka kungkawara panya Tiinaku kuṭa kutjara Tjimiyanna pula Levinya pikakitja pitjangu, tjula wara pulkatjara. Munu pula tawunu panya palula tjarpala wati uwankara pungkula wiyanu panya tjana walı unngu watarku nyinara pakuwiyingkunyangka. ²⁶ Munu pula Aimurnga pulanya Tjikimanya kulu pungkula iluntanu, munu pula pulampa malanypa Tiinanya Tjikimaku walinguru mantjira katingu ngurakutu tawunu pala palunya wantikatira. ²⁷ Ka panya paluru pula pungkula wiyanngka Jacobaku katja kutjupa tjuṭangku pitjala nyangu wati miri tjuṭa ngarira waŋnyangka, munuya ngura pala palulanguru kutjupa kutjupa uwankara mantjira katingu, panya Tjikimalu tjanampa malanypa Tiinanya kurantitjanguru mirpaŋarira. ²⁸⁻²⁹ Munuya nanikuta, tjiipi, puluka, tangkiyi, kuka uwankara yaata tjanampanguru pakaltjingara katingu, munuya tawunu nyara palula walı tjuṭangka para-tjarpala kutjupa wiru tjuṭa uwankara mulapa mantjiningi. Munuya minyma tjuṭa, tjitji tjuṭa kuļu ngura nyara palunya ngurara uwankara mantjira katingu, Jacobaku panya katja tjuṭangku.

³⁰ Ka Jacobalu Tjimiyanta pulala Levila wangkangu, “Nyupali ngayunya kurakutuṇu alatjiṭu. Panya nyanga palulanguru Kainankunu tjuṭa munu Piritjikunu tjuṭaya kuwari nganampa mirpaŋarinyi, munuya aŋangu kutjupa manta nyanganta nyinanytja tjuṭa kuļu nganampa kuraringkuku. Munulanyaya tjinguru tjaṭuringkula pitjala pungkulu. Kaṇa yaaltjiriku? Panya ngayulu wati tjuṭa kanyintja wiya tjananya pitjanyangka pungkula waintarintjaku. Kaya palulanguru nganaṇanya uwankara pungkula wiyalu.” ³¹ Kaya wangkangu palumpa katja tjuṭangku, “Wiya, wati nyarangku nganampa malanypa kurangku pampuṇu, kala palya pungu, panya puṭula wantingi.”

35

Godalu Jacobanya Pukułmankunytja Ngura Pitjulta

¹ Ka Godalu Jacobanya wangkangu, “Pakara ara ngura nyara Pitjultakutu, munu nyara palula ngurararira nyinama. Munu pitjilpa pułka palyala ngayunya wałkuntjikitjangku, panya nyara palula ngayulu nyuntula utiringu nyuntu Iitjuku nguļu kumpira wirtjapakanngka.” ² Ka palulanguru Jacobalu palumpa walytja uwankarangka wangkangu munu

añangu palumpa waṛkaripai tjutangka kuļu nyanga alatji, “Waṇiraya wiyalā pala god ngalypa-ngalypa tjuṭa nyura panya tjanampa nguranguru mantjintjatjanungku. Munuyanku puntu uwankara paltjira mantara kuwaritjangka tjarpa nyura kampa kutjuparira kura panya tjanalanguru mantjintjatjanu palyaringkunytjikitjangku.”³ Palulangurulanku ngura nyangatja wantikati munula ara Pitjultakutu. Kana ngura nyara palula Godanya wałkuntjikitjangku pitjilpa pulka palyalku, panya God nyara paluruńi ngalkinu ngayula kura wirkankunyangka, munu paluru ngayula tjungu titutjara ngarangi ngayulu para-pitjalinkunyangka.”⁴ Kaya palulanguru god panya ngalypa-ngalypa uwankara Jacobanya ungu tjana kanyintjatjanungku, munuya pinangka manguri-manguri tjuṭa kanyintjatjanungku kuļu ungangi Jacobanya. Ka paluru uwankara tjuṇutjunu puṇu waṭa pulkangka itingka tawunu pala Tjikimala itingka.

⁵ Munuya palulanguru Jacobanya tjana palumpa añangu tjuṭa kuļu ma-pakańu. Kaya tawunu ititja ititjangka añangu nyinanytja tjutangku tjananya ankunyangka nyakula pulkara mulapa nguluringangi, munuya tjananya pikangku wañalwiyangku wantingu. Alatjiya nguluringkula wantingi panya Godalu tjananya miral-miralpa pulkangku katinyangka.

⁶ Kaya Jacobanya tjana ankula ankula wirkanu ngura panya palula ini Latjala panya ini kutjupa Pitjulngā manta nyara Kainanta.⁷ Ka nyara palula Jacobalu pitjilpa pulka palyańu munu ngura nyara palunya ininu “God panya Pitjulku”, panya ngura nyara palula Godanya palula utiringu paluru Iitjulanguru wirtjapakannyangka.⁸ Ka nyara palula minyma panya Ripikanya pulkantjanya ilungu ini panya Tipuranya. Kaya palunya katira tjuṇutjunu ngura nyara Pitjulta ulparira puṇu waṭa pulkangka itingka. Munuya palulanguru puṇu palunya ininu “Puṇungka Ulanytjanya”.

⁹ Ka Jacobanya ngura Kainanta małaku wirkankunyangka Godanya piruku palula utiringu munu palunya pukulmanu.¹⁰ Alatji paluru pukulmara wangkangu, “Nyuntu panya ini Jacobanya nyinangi, palu kuwarinanta ini ‘Israeln̄ga’ wangkanyi.” Alatji palunya Godalu kampa kutjupara ini tjunu.¹¹ Munu panya palunya wangkangu, “Ngayuluna God panya Witulya Pulkanya, uwankarangka waintarintja. Ka nyuntu tjitji tjuṭa mulapa kanyilku, kaya palula tjanalanguru nyuntumpa walytja ma-tjuṭa mularariku małatja małatja munuya ngura kutjupa kutjupa tjutangka nyinara wañalku. Munuya kutjupatjara małatja małatja mayatja pulkaringkula nyinaku.”¹² Kana manta panya Aipuramanya pulanya Isaacanya ungkunytjtja nyuntunya ngapartji piruku ungkuku nyuntumpa walytja tjuṭa kuļu małatja małatja.”¹³ Munu alatji wangkara wiyaringkula Godalu palunya wantikatingu.

¹⁴ Ka palulanguru Jacobalu apu pulka mantjira ngura pala palula ngaratjunu Godalu palula wangkanytjtja rawangku kulintjikitjangku. Munu paluru wainangka uwilangka kuļu apu palunya kurpira milmilmanu anangu tjutangku nyakula Godanya kulintjaku.¹⁵ Munu ngura palunya ininu “Pitjulngā” panya.

Minyma Raitjilnga Wiyaringkunytja

¹⁶ Kaya palulanguru Jacobanya tjana ngura Pitjultanguru ma-pakańu, munuya anangi ngura ini Ipuratjalakutu. Ka Jacobaku kuri Raitjilnga muṭi paku anangi munu palulanguru iti wirkankunytjaku ilaringkunyangka paluru nyinakatingu tjitji kanyintjikitja. Nyangatja Ipuratjala wirkankunytja wiya kuwaripatuya ngururpa nyinangi. Ka minyma nyara paluru paku pulkangku putu nguwantu iti kanyiningi.¹⁷ Munu paluru

ma-walykuringu nguwanpa pakuringkula. Ka minyma palula tjungu nyinanytjalu wangkangu Raitjilta, "Nguluringkunytja wiya, nyangatja tjitji nyiṭayira wirkana." ¹⁸ Palu Raitjilnga panya waṭalpi ilunytjikitja ngaringi, munu kutju-ara ngaaly Mara palumpa katja ininu Pinuninya. Ka malangka mamangku ini kutjupa tjunu Pintjimannga.

¹⁹ Ka palulanguru wiyaringu itiku panya ngunytju, kaya palunya tjunutjunu ngururpa ngura ini Ipuratjaku iwarangka itingka. (Ngura nyara paluru panya ngañmanypa ini "Ipuratjanya" ngarangi, palu malangkaya ininu "Bethlehemanya".) ²⁰ Ka Jacobalu apu mantjira ngaratjunu ngura pala palula Raitjilnga kulintjikitjangku, ka puli pala paluru kuwari ngaranyi alatjiṭu aŋangu tjutangku nyakula minyma panya palunya kulintjaku. ²¹ Munu Jacobanya tjana ma-pakanu munuya ankula ngura ini Mikitala Iitala waintara ngura tjunkula nyinangi.

²² Ka ngura nyara palula nyinaralpi Jacobaku katjangku Rupintu palumpa mamaku kuringka Pilala tjunguringkula ngaringu panya mala altinytjala. Ka Jacobalu kulira pulkarra mirpañaringu.

Jacobaku Katjapiti

Uwa, Jacobanya ini kutjupa Israelnga munu paluru katja panya 12 utinu palumpa kuri kutjara kutjarangka. ²³ Panya Liyalu kanyinu Rupinnga (panya katja ngañmanyitja), Tjimiyanga, Levinya, Judah-nya, Itjakanya, Tjipulunnga tjananya. ²⁴ Ka Raitjiltu kanyinu Josephanya pulanya Pintjimannga. ²⁵ Ka Raitjilku minyma warkaripaingku Pilalu kanyinu Dannga pulanya Napatalinya. ²⁶ Ka Liyaku minyma warkaripaingku Tjilpalu kanyinu Kaatanya, Atjanya pulanya. Panya katja nyanga palunya tjananya Jacobalu utinu ngura nyara Mitjupu-taimiyala.

Jacobaku Mama Isaacanya Ilunytja

²⁷ Ka palulanguru Jacobanya anu palumpa mama Isaacalakutu ngura panya Mamarailakutu Ipuranta itingka, panya ngura nyara paluru Aipuramanya pula Isaacanya nyinanytjtija. ²⁸⁻²⁹ Ka Isaacanya rawa mulapa nyinangi yiya nampa panya 180, munu palulangurulta wiyaringu. Ka palumpa katja kutjarangku katira tjunutjunu Iitjulu pula Jacobalu.

36

Iitjuku Walytjapiti

¹ Ka nyangatja Iitjuku walytjapiti palulanguru ma-tjuṭaringkunytja malatja malatja. (Ka Iitjunya panya ini kutjupa Iitamanya.) ²⁻³ Panya Iitjulu altingu minyma ngura Kainannga ngurara maŋkurpa ini nyanganpa – Atanya, Awu-lipamanya, munu kutjupa Patjimanya. Ka minyma panya Atanya wati Iitakunuku unṭalpa ini Ilanku. Ka minyma Awu-lipamanya wati ini Anaku unṭalpa, panya Ananya wati Ipalakunuku katja ini Tjiipiyantru. Ka minyma panya Patjimanya wati panya Itjumailku unṭalpa, munu wati ini Nipaiyatjiku malanya.

⁴⁻⁵ Ka ngura nyara Kainanta nyinaralpi Iitjunya tjitji tjutatjararingu. Panya minyma Atalu katja ini Ilipatjanya kanyinu, ka Patjimalu katja ini Ruwilnga kanyinu, ka Awu-lipamalu kanyinu katja maŋkurpa ini nyanganpa – Tjitjunya, Tjalamanya, Kuranya tjananya.

⁶ Ka palulanguru Iitjulu palumpa kuri maŋkurpa, katja unṭalpa tjuta, kuka tjuta kulu katingu ngura kutjupakutu parari palumpa malanypa Jacobanya wantikatira. Panya palumpa kutjupa kutjupa uwankara Kainanta mantjintjatjanungku paluru katingu, wati minyma warkaripai

tjuṭa kuļu. ⁷ Panya Jacobanya pula manta nyara palula kuka tjuṭatjara tjungu nyinanytjaku manta lipi nguwanpa ngaranytja wiya. Palulanguru Iitjunya anu ngura kutjupakutu.

⁸ Munu ankula ngura pulitjarangka ngura tjunkula nyinangi ini Tjiirta munu nyara palula rawa nyinangi. ⁹ Ka Iitjuku katja tjuṭanguru palumpa walytja ma-tjutaringu malatja malatja. Kaya palunya tjananya ini wangkapai “Iitamakunu tjuṭa”, panya Iitjunya ini kutjupa Iitamanya. ¹⁰⁻¹³ Palumpa panya kuri nganmanyitjangku Atalu kanyinu katja kutju ini panya Ilipatjanya, ka paluru katja mankur-kutjara utinu ini nyanganpa – Timannga, Uumanya, Tjipunya, Katamanya, Kinatjanya tjananya. Munu Ilipatjalu piruku utinu kuri kutjupangka ini Timinala katja kutjupa ini Ama-likanya.

Ka Iitjuku kuri małatjangku Patjimatjalu katja kutju kanyinu ini panya Ruwilnga. Ka wati nyanga paluru utinu katja kutjara kutjara ini nyanganpa – Naatjanya, Tjiranya, Tjaamanya, Mitjanya tjananya. ¹⁴ Ka Iitjuku kuri kutjupangku panya ngururitjangku ini Awu-lipamalu katja mankurpa kanyinu ini panya Tjitjunya, Tjalamanya, Kuranya tjananya.

¹⁵⁻¹⁶ Kaya nyanga palula tjanalanguru Iitjuku walytja tjuṭa mulararingu malatja malatja. Panya Iitjuku katja nganmanyitjanguru Ilipatjalanguru palumpa walytja ma-tjutaringu, panya katja tjuṭanguru ini nyanga tjanalanguru Timanta, Uumala, Tjipula, Kinatjala, Katamala, Ama-likala tjanalanguru. Nyanga paluru tjanaya panya Iitjuku pulampa Ataku pakali tjuṭa.

¹⁷ Ka Iitjuku katja Ruwiltanguru palumpa walytja ma-tjutaringu malatja malatja palumpa, panya katja tjuṭanguru panya ini nyanga tjanalanguru Naatjala, Tjirala, Tjaamala, Mitjala tjanalanguru. Nyanga paluru tjanaya panya Iitjuku pulampa minyma Patjimatjaku pakali tjuṭa.

¹⁸ Ka Iitjuku kuri Awu-lipamalanguru palumpa walytja ma-tjutaringu, panya palumpa katja tjuṭanguru ini nyanga tjanalanguru Tjitjula, Tjalamala, Kurala tjanalanguru. ¹⁹ Uwa, nyanga paluru tjana uwankara Iitjuku walytja tjuṭa malatja malatja panya Iitamakunu tjuṭa, panya Iitjunya ini kutjupa Iitamanya.

Wati Tjiiraku Walytjapiti

²⁰⁻²¹ Ka ngura nyara Iitamala aŋangu kutjupa tjuṭa nganmanypa nyinangi ngura walytjangka Iitjunya tjana pitjanytja kuwaripangka. Paluru tjanaya wati ini Ariku katjaku walytja tjuṭa ini Tjiirku. Panya Tjiirtu katja nyanga tjananya utinu Latannga, Tjupalnga, Tjipiyannga, Ananya, Titjunnga, Itjanya, Titjannga tjananya, kaya nyanga palula tjanalanguru Tjiirku walytja ma-tjutaringu malatja malatja.

²² Ka Tjiirku katjangku Latantu utinu katja kutjara ini Arinya pulanya Iimannga. Ka nyanga palula pulalanguru palumpa walytja ma-tjutaringu malatja malatja. (Ka Latantu pininu kungka ini Timinanya.)

²³ Ka katja panya Tjupaltu utinu katja ini nyanga tjananya Alapannga, Manatjanya, Ipalnga, Tjipawunya, Awunamanya tjananya. Ka nyanga palula tjanalanguru palumpa walytja ma-tjutaringu malatja malatja.

²⁴ Ka katja panya Tjiipiyantu katja kutjara utinu ini Aiyanya pulanya Ananya. (Wati nyanga paluru Analu kunyu ilytjingka kanyiningi palumpa mamaku tangkiyi tjuṭa munu kunyu nyara palula mina wala nyangu mina warutjara.) ²⁵ Ka palulanguru wati nyanga Analu tjitji kutjara utinu katja ini Titjunnga munu untalpa ini Awu-lipamanya. ²⁶ Ka wati panya Titjuntu katja kutjara kutjara utinu ini Imatannga, Itjapannga, Iitjarannga,

Tjirannga tjananya. Ka nyanga palula tjanalanguru palumpa walytja matjutaringu malatja malatja.

²⁷ Ka Tjiiraku katjangku Itjalu katja mankurpa utinu ini Pilingga, Tjaapannga, Akannga tjananya. Ka nyanga palula tjanalanguru palumpa walytja ma-tjutaringu malatja malatja.

²⁸ Ka Tjiirku katja kutjupangku Titjantu katja kutjara utinu ini Utjunya pulanya Arannga. Ka nyanga palula pulalanguru palumpa walytja matjutaringu malatja malatja.

²⁹⁻³⁰ Ka nyanga paluru tjana uwankara wati panya Ariku walytja tjuṭa nyinangi malatja malatja, panya paluru tjana tjutaringu palumpa pakali tjutanguru ini nyangannguru panya Latanta, Tjupalta, Tjiipiyanta, Anala, Titjanta, Itjala, Titjanta tjanalanguru. Munuya paluru tjana uwankara nyinangi ngura nyara Iitamala.

Ngura Iitamanya Ngurara Tjutaku Mayatja Pulka Tjuta Nyinanytja

³¹ Ka ngura panya Israelta mayatja pulka nyinanytja kuwaripangka ngura Iitamala mayatja tjuṭa nyinangi wanapari wanapari, munuya palunya ngurara tjuṭa mayatjarira kanyiningi.

³² Ngañmanypa wati ini Pilanya mayatja pulka nyinangi. Paluru panya wati ini Piyaku katja wati ngura Tinapanya ngurara. ³³ Ka wati nyanga Pilanya ilunyangka malangka mayatja kutjupa nyinangi palumpa arangka wati ini Tjupapanya panya wati Tjiraku katja. (Tjiranya panya wati ngura Patjuranya ngurara.) ³⁴ Ka palulanguru Tjupapanya ilunyangka mayatja kutjupa malangka nyinangi palumpa arangka wati ini Uutjamanya ngura Timannga ngurara. ³⁵ Ka Uutjamanya ilunyangka wati Pitataku katja ini Aatatanya mayatja nyinangi Uutjamaku arangka. Wati nyanga Aatatalu warmala tjutatjarangku wati ini Mitiyannga tjananya pungkula wiyanu ngura manta ini Mawapala. (Aatatanya panya ngura tawunu ini Apitjinya ngurara.) ³⁶ Ka Aatatanya ilunyangka palumpa arangka wati ngura Matjirikanya ngurara mayatja nyinangi ini Tjamalanya. ³⁷ Ka palulanguru Tjamalanya ilunyangka wati ngura Rayupatjanya ngurara palu purunypaṭu mayatja nyinangi ini Tjaulnga. ³⁸ Ka Tjaulnga ilunyangka palumpa arangka wati Aka-puwaku katja mayatja nyinangi ini Paalananna. ³⁹ Ka mayatja nyanga paluru ilunyangka wati kutjupa ini Aatatanya palumpa arangka palu purunypaṭu mayatja nyinangi. Paluru ngura tawunu ini Paulanya ngurara, ka palumpa kuri wati ini Mataritaku unṭalpa ini Miitapilanya, panya wati ini Mitjapaku puliri.

⁴⁰⁻⁴³ Uwa, ngura Iitamaku mayatja tjuṭa nyinangi wati panya Iitjuku walytja tjuṭa malatja malatja. Mayatja paluru tjana ngura walytjangka walytjangka nyinangi manta Iitamala lipiwanu, kaya palula tjanalanguru tjanampa walytja ma-tjutaringu walytjarara walytjarara, munuya nyinangi ngura walytjangka walytjangka. Wati mayatja paluru tjana ini nyanganpa – Timinanya, Alapanya, Tjitjitunga, Awu-lipamanya, Ilanya, Pinannga, Kinatjanya, Timannga, Mipatjarnga, Makatilnga, Iramanya, tjana. Wati nyanga paluru tjana panya manta nyara Iitamala mayatja tjuṭa nyinangi ngura walytjangka walytjangka, kaya palula tjanalanguru Iitjuku walytja ma-tjutaringkula nyinangi malatja malatja.

¹ Ka wati panya Jacobanya ngura Kainanta rawa nyinangi katja tjutatjara. ² Ka tjukurpa nyangangku tjakultjunanyi Jacobanya tjana nyinanytja.

Ka Jacobaku katja ini Josephanya wati yangupala nyinangi. Munu paluru panya wati kuṭa tjutangka tjunguringkula tjanampa mamaku tjiipi nanikuta tjuta atunymankupai. Ka wati panya kuṭa paluru tjana ini nyanganpa – Dannga, Napatalinya, Kaatanya, Atjanya. Palu wati nyanga paluru tjana kunyu kura nguwanpa nyinapai. Ka Josephalu kura nyinanyangka nyakula pitjala mamangka tjakultjunkupai.

³ Ka Jacobanya katja pulka tjutaku mukuringangi, palu Josephaku pulkara mulapa mukuringangi, panya palurunku tjilpingku kutju malatja mulapa wiyakutu utinu. Munu pukularira palumpa Josephaku upukuta wiru palyanu. ⁴ Kaya kuṭa tjutangku nyakula kuliningi, “Ai! Mamanya tjinguru nganampa kuraringanyi munu palumpa kutjuku mukuringanyi.” Munuya paluru tjana nyararingangi Josephaku munuya palumpa putu kalypa nyinapai.

Josephalu Tjukurmankunytja

⁵ Ka munga kutjupangka Josephalu tjukurmanu munu mungawinki ankula palumpa kuṭa tjutangka tjakultjenu, ⁶ “Awai! Wangkakuṇa? Ngayulu mungangka tjukurmanu munuṇa alatji nyangu. ⁷ Panya nganana tjungu warkaringi ukiri mai wiitangka. Munula kaṭara wiyareringkula uṭulūra karpiṛa ngaratjunangi. Ka palulanguru wiita panya ngayulu karpiṛa tjunkunytja uringu munu katuringkula tjukaruru ngarangi. Ka nyura panya karpiṛa tjunkunytja tjuta ankala tjaruringu munuya manguri-manguri para-ngarala waṇara pupakatira walkuningi wiita panya ngayulu karpiṛa tjunkunytja. Nyanga alatjiṇa tjukurmanu.”

⁸ Kaya kuṭa panya tjutangku tjukurpa nyangatja kulira pulkara kuraringu palumpa. Munuya wangkangu palula mirpañ-mirpañtu, “Palu nyuntun wanyu nganampa mayatja pulka? Wiya nyuntun nganampa mayatja wiya. Nyuntun kutjutjangku ngunti wangkanyi.” Munuya paluru tjana pulkara kuraringkula palumpa kalyparingkunytja wiyangku wantingi panya paluru tjukurmarā wangkanytjanguru.

⁹ Ka ngula Josephalu munga kutjupa piruku tjukurmanu munu piruku tjakultjenu kuṭa tjutangka, “Kulilaya! Pirukuna tjukurmanu munuṇa alatji nyangu, tjirirpi, pira, kililpi tjuta 11-tu tultjungarākatira ngayunya walkunnyangka.” ¹⁰ Munu paluru ankula palumpa mamangka kuļu tjakultjenu. Ka paluru kuļu kulira mirpañaringu munu palula wangkangu, “Tjingurunkun nyuntu kulini ngunyṭjulu ngali munu kuṭalu tjana nyuntunya mayatja pulka pupakatira walkuntjaku. Palu wiya. Nyuntu tjukarurungku tjukurmankunytja wiya. Nyuntu ngunti wangkanyi.” ¹¹ Munu palulanguru Josephaku mamangku rawangku kuliningi panya palumpa katjangku tjukurmankunytja. Palu kuṭa tjutaya kuliṛa rawa kuraringangi palumpa munuya putu kalyparingangi Josephaku.

Josephanya Kuta Tjutakutu Ankunytja

¹² Ka Josephanya ngurangka nyinangi palumpa mamangka ngura ini Ipuranta. Ka palumpa kuṭa tjuta anu ngura ini Tjikimalakutu tjanampa mamaku tjiipi kanyintjikitja ukiri pulkangka. ¹³⁻¹⁵ Palu tjirirpi kutjupa Jacobalu witunu katja panya Josephanya, “Ankula tjananya nyawa

nyuntumpa kuṭa tjuṭa, palyayawi nyinama, munuyawi tjiipi tjuṭa kuḷu palyanyku kanyinma. Munu nyakula pitjala ngayulalta tjakultjura.”

Ka Josephalu wangaṇarangku kulira anu ngura panya Tjikimalakutu. Munu paluru ankula ngura nyara palula wirkara tjananya putu paranguriningi, “Yaaltjingkaya nyinanyi?” Munu putu para-nyakula, ka wati kutjupangku Josephanya nyangu para-ngurinnyangka munu pitjala wangkangu, “Awai! Ngananyan ngurini?”

¹⁶ Ka wangkangu, “Ngayuku kuṭa tjuṭana ngurini panya tjiipiya ngalyakatingu ngura nyanga palulakutu ukiri pulkangka kanyintjikitjangku. Tjinguru nyuntu ninti. Tjakultjuranı, yaaltjingkaya nyinanyi?”

¹⁷ Ka wati panya kutjupangku wangkangu, “Uwa, ngañmanytjuṇa nyangu tjananya nyangangka nyinanyangka. Kaya ankunytjikitjangku wangkangi ngura ini Tuutjantakutu, mununtiya anu.”

Ka Josephalu kulira wañanu tjananya ngura nyara palulakutu munu mawirkara nyangu, “Munta nyangatjampayal kanyini.”

Kuta Tjuṭangku Josephanya Iluntankunytjikitjangku Kulintja

¹⁸⁻²⁰ Kaya kuṭa tjuṭangku nyangu parari pitjanyangka kuwaripa. Munuya ngurkantara wangkangu, “Ai! Nyaratjaya nyawa, panya paluru tjukurmankupainya wirkanu.” Munuya palulanguru nyakunytjatjanungku wangkara kulinigi palunya pungkunytjikitjangku alatji wangkara, “Utile pungkula iluntara palunya wellangka wañima mina nyanga wiyatjarangka. Munula palulanguru mamala ngunti wangkanyi papa inurangku patjara iluntankunytja-palku. Ngunti-puta palangku tjukurmankunytjatjanu wangkama wanka nyinara, ka ilu ngunti wangkawiya.”

²¹⁻²² Ka kuṭa panya pulkangku ini Rupintu kulinu tjana wangkanyangka munu paira wangkangu, “Wantiya iluntankuwiyangku munula wanka tjarpatjura wellangka mina nyanga wiyatjarangka munula wantikati.” Rupintu alatji kutjungkul unngu kulinigi, “Kana ngula małakungku pitjala mantjila ngayuku małanypa tjanala malangka mununa iyala Mamalakutu.”

²³ Munuya Josephanya ilaringkunyangka witunu munuya palumpa upukuta panya wirunya mantjira tjlpirpungu. ²⁴ Munuya palunya katira piṭi panya ngattingka tjarpatjunu mina wiyangka parari putu tatintjaku. Munuya anulta ngurakutu mai ngalkuntjikitja.

Josephanya Ngura Itjipalakutu Iyantja

²⁵ Munuya nyinara ngalkula ngalkula nyangu wati malikitja tjuṭa kamula tjuṭatjara katakutjara wati-pitjanyangka. Paluru tjana panya Itjumailku pakali tjuṭa ngura Kiliyalanguru anangi Itjipaku kutjupa kutjupa tjuṭatjara anangu Itjipanya ngurara tjuṭangka tjalamilantjikitja.

²⁶ Ka Josephaku kuṭa kutjungku ini Judah-lu kulinu wati-pitjanyangka nyakula, munu wangkangu tjanala, “Nyaakula nganampa małanypa panya wantinyi piṭingka nyinara ilunytjaku? ²⁷ Utile nyanga tjanala tjalamilanma, nyanga ananyiya katakutjara. Nyangatja nganampa małanypa waltyja mulapa, kala nyaaku iluntankuku? Tjalamilalala.”

²⁸ Ka kuṭa małanypa tjuṭangku kulira wangkangu, “Munta-uwa, tjin-gurula nyanga alatji palyalku.” Munuya ankula Josephanya wellanguru mantjira katira tjalamilanu Itjumailku pakali mañkurta. Ka tjananya ngapartji mani ungu tjiilpa tjuṭa mulapa. Munuya palulanguru katingulta Josephanya manta kutjupakutu ngura panya Itjipalakutu.

Kuta Tjuṭangku Josephanya Mamangka Ngunti Wangkanytja.

²⁹ Palu tjana Josephanya ungkul'iyānu kuṭa panya pulka Rupinnga unytju ankunyangka. Ka paluru mala kutju pitjangu Josephanya mantjintjikitja wellanguru. Munu wirkara putu nyakula pulkara tjituru-tjitururingu, mununku mantara anangitja tjilpirpungu palumpa malanypa-tjiratjangku. ³⁰ Munu paluru ngapariringu palumpa malanypa tjutakutu munu wangkangu tjanala, "Josephanya wiya ngaranyi! Kana nyaa wangkaku Mamala?"

³¹ Kaya malanypa tjutangku nintingku kulira wangkangu, "Wiya, nanikutala-puta puwa munula upukuta palumpa milkalingka nyitira katira Mamala nintila. Ka nyakula kulikku inurangku patjantja-palku." Munuya mulapaṭu nanikuta pungkula upukuta panya mantjira nyitinu milkalingka. ³² Munuya katira nintinu mamangka watarkitjangku-palku. Munu tjana ngunti wangkangu, "Nganaña ngalya-pitjala ngururpa nyangu upukuta nyangatja mantangka ngarinyangka munula mantjinu. Tjinguru nyuntumpa katjaku nyangatja, mulapa?"

³³ Ka Jacobalu nyakula ngurkantanu munu wangkangu, "Uwa, mulapa upukuta paluruṭu." Munu pulkara urulyarara wangkangu, "Tjinguru mulapa inura pikattingku patjanu ngayuku katja. Ngaltutjara, ngalkulanti wiyanu." ³⁴ Munu alatji kulira pulkara ulara ulara palumpa ulytja anangitja tjilpirpungkula waningu munu ulytja walyku-walykungka tjarpangu, munu rawa mulapa katja-tjiratja tjituru-tjituru pulka nyinangi.

³⁵ Ka palumpa katja tjutangku untaltu kulu pitjala palunya putu kanmaranangi pampura, palu kanmararinjtja wiyangku alatjiwantingi. Munu wangkangu, "Ngayulu kuwari wiyaringkunytja wiya. Ngayulu ilura kutju watarkuriku." Munu palulanguru paluru rawa alatjiwantingi tjilpi panya Jacobanya.

³⁶ Kaya wati panya Mitiyannga ngurara tjutangku Josephanya ngura Itjipalakutu katira tjalamilanu wati ini Putipala. Ka wati nyanga Putipanya Itjipaku mayatja pulkangka ini Piirala ititja mayatja tjukutjuku munu paluru kanyiningi Piiraku wati tjaultji tjuṭa, munuya paluru tjana mayatja Piiranya atunymankupai.

38

Judah-nya Munu Kungkawara Ini Taimanya

¹ Ka nyara palula arangka Jacobaku katja Judah-lu kuṭa malanypa tjuta kulu wantikatira anu kutju wati ini Iirralakutu tawunu ini Atulamalakutu.

² Munu nyara palula nyangu kungkawara Kainannga ngurara wati ini Tjuwaku uŋtalpa, munu kungkawara nyara palunya altingu wati panya Judah-lu. ³ Ka kungkawara nyara paluru ititjararingu munu katja kanyinu Judah-ku, ka Judah-lu ininu Uurnga. ⁴ Ka palulanguru piruku ititjararingu munu katja kutjupa kanyinu munu ininu Anannga. ⁵ Ka palulanguru Judah-nya pula anu ngura ini Kitjipalakutu munu ngura tjunkula nyinangi, ka ngura nyara palula pula piruku katjatjararingu, ka ngunyjtungku ininu Tjilanya.

⁶ Ka ngula katja panya nganmanyitja Uurnga pulkaringkunyangka palumpa mama Judah-lu kungkawara ini Taimanya palumpa ngurkantanu altintytjaku. ⁷ Palu wati nyanga Uunya kura pulka nyinangi, ka Godalu palunya nyakula pulkara mirpañaringu palumpa munu palunya iluntanu.

⁸ Ka palulanguru Judah-lu Uuku malanytja wangkangu wati panya Ananta, "Kungka nyanga wanakalangka ngarima nyuntumpa inkañingka munu palula tjitji utinma. Panya nyangatja nganampa tjaka kuṭa tjitji wiya

ilunyangka malanypangku minyma wanakalangka utilpai, ka tjitji paluru ku^laku tjitji nyinapai.”

⁹ Ka Anantu tjitji utintjikitjangku kuliningi palu piruku paluru kuliningi, “Tjinguru^{na} tjitji utira, ka tjitji nyara paluru ngayuku wiya palumpara ngaraku ngayuku ku^laku.” Munu palulanguru palumpa inkaⁿingka tjunguringkula ngaringi wanaka^{la} panya Taimala, palu paluru mulamula tjunguringkunytja wiyangku wantingi tjitji utintjaku-tawara, ka Taimanya ititjararingkunytja wiya ngarangi. ¹⁰ Ka nyara palulanguru mulamula tjunguringkuwiyangku wantinyangka Godanya wati palumpa mirpaⁿaringu munu palunya iluntanu.

¹¹ Ka palulanguru Judah-lu palumpa mingkayi Taimala wangkara iyanu, “Ankula nyuntumpa mamangka ma-nyinama ngayuku katja Tjilanya pulkaringkunytjaku pa^tara.” Nyanga alatji paluru nguluringkula wangkangu panya paluru kuliningi, “Kuwari tjinguru Tjilanya ngapartji iluniⁱ palumpa kuta kutjara puruny^{pa}.” Ka palulanguru Taimanya ankula palumpa mamangka rawa ma-nyinangi kutju ku^li tju^{ta} wati panya Tjilaku pa^tara.

¹² Ka ngula mulapa Judah-ku kurilta ilungu wati panya Tjuwaku un^{tal}pa. Ka palulanguru ulara ulara wiyingkula palumpa malpa wati ini liranya pula anu ngura ini Timinalakutu palumpa tjiipi tju^{ta} tjiiramillyangka nyakunytjikitja. ¹³ Ka kutjupangku tjakultjunu kungkawara panya Taimala palumpa mingkayi ngura panya Timinalakutu ankunytja. ¹⁴ Ka kungkawara paluru kuli^{ra} mantara panya kuri-tjiratjangku kanyintjanya araltjanu munu mantara kutjupangka tjarpangu munu yunpangka raiki angatjunu ngurkantankunytjaku-tawara. Munu ankula nyinakatingu ngura tawunu ini Inaimala kaitangka itingka iwara panya Timinaku iwarangka Judah-ku pa^tara. Panya paluru nyangangi Judah-ku katja Tjilanya ma-pulkaringkunyangka munu kuliningi, “Nyaakuni altinytjaku ungkuwiyangku wantinyi Judah-lu.”

¹⁵ Ka Judah-lu iwarangka pitjala palunya nyangu munu kulinu kungkawara kulantju-palku nyinara nyaliringkunyangka, panya paluru yunpa raikingka angatjura nyinangi. ¹⁶ Palu Judah-lu palunya ngurkantankunytja wiya panya palumpa mingkayi munu palulakutu ma-pitjala wangkangu iwarangka itingka nyinanyangka nyakula, “Uwa wala pitja, kali ngarima!”

Ka palula tjapinu, “Uwa, kaⁿin nya^a ungguku ngayula tjunguringkula?”

¹⁷ Ka wangkangu Judah-lu, “Ngulananku iyanⁱ ngayuku kuka tjutanguru nanikuta yangupala.”

Ka kungkawara paluru wangkangu, “Uwa palya. Palu wanyuⁿⁱ kutjupa kutjupa kuwaritu unytjungku uwa nyanga ngayulu nyuntumpa kalkuntjtjaku mulamularingkunytjaku, kanⁱ kalkuntja unggunkunyangkaⁿanta malakungku ungguku.”

¹⁸ Ka Judah-lu tjapinu, “Nyaananta ungguku nyuntu mulamularingkunytjaku?”

Ka wangkangu kungkawara panya paluru, “Uwanⁱ pala liritja nyuntunya initjara munu pu^{nu} pala tjukara ku^lu.” Ka mulapatu^{tu} Judah-lu pu^{nu} panya tjukara munu liritja ku^lu ungu palunya. Munu palulanguru kungkawara panya palula tjunguringkula ngaringu, ka paluru tjunitjararingu. ¹⁹ Munu palulanguru ngurakutu ankula mantara araltjanu raiki panya yunpangka angatjunkunytja ku^lu, munu mantara kutjupangka tjarpangu, mantara panya kuri-tjiratjangku tjarpa^ra kanyintjala.

²⁰ Ka Judah-lu palumpa malpa wati Iiranya ungkul'iyau kungkawara panya palumpa nanikuta, munu wangkangu kungkawara panya palulan-guru mantjira katintjaku palumpa panya puu tjukara munu liritja kuu. Palu Iiralu ankula kungkawara palunya puu nguriningi. ²¹ Munu wati panya ngura Inaimanya ngurara tjutangka tjapinu, "Yaaltji kungkawara panya kulantju panya iwarangka itingka nyinangi?"

Kaya wati panya palula wangkangu, "Wampa! Nyangangka kungkawara kulantju nyinanytja wiyaatu."

²² Ka palulanguru malaku ankula Judah-la wangkangu, "Putuna nguriningi kungkawara panya palunya. Wiya ngarangi. Wati nyara palunya ngurara tjutangkuniya wiyanmanu wangkara, 'Nyangangka minyma kulantju nyinanytja wiyaatu.'"

²³ Ka Judah-lu nyangatja kulira wangkangu, "Wiya palya, wanti rawangku ngurilwiyangku, ka kanyinma. Tjinguru ya anangu tju ta ngalimpa nyakula ikaringama rawangku ngarala ngurinnyangka. Ngayulu palunya nanikuta ungkunytjikitjangku kuliningi munu panyaqanta ungkul'iyau palunya katira ungkunytjaku, palu putultana nguriningi. Palya ma-wanti."

²⁴ Palu pira mankurnguru anangu kutjupangku Judah-la pitjala wangkangu, "Nyuntumpa mingkayi Taimanya kulantjuringu munu paluru kuvari mukala nyinanyi."

Ka Judah-lu nyangatja kulira wangkangu, "Katiya munuya tilira urkuwaani warungka."

²⁵ Kaya kungkawara panya palunya mantjira katingu. Ka kungkawara paluru wangkara iyanu palumpa mingkayikutu alatji wangkara, "Ngayun-yanu ititjaraanu puu nyangaku waltyangku. Kaya nyawa munuya nyakula ngurkantara nganaku nyangatja puu nyanga tjukara munu liritja kuu."

²⁶ Ka palulanguru Judah-lu nyakula ngurkantanu puu munu liritja kuu panya, munu kuntasringkula wangkangu, "Wiya, paluru tjukaruru, ka ngayulu kura. Utina panyatja palunya ungama ngayuku katja Tjilanya palunya altintjaku." Munu palulanguru Judah-lu palunya walatjunkun-ytjaku wangkangu munu palunya piruku pampuntja wiyangku wantingu.

²⁷ Ka palulanguru ngula kungkawara panya Taimanya tjuni iniringkunyangkaya nyangu, "Ai! Kuvari iti kutjara kanyini minyma nyangangku." ²⁸ Ka palulanguru iti miña kutju-warara wirkanu, ka minyma panya palunya kanyilpaingku puturu rituwana tjukutjukungka miña mapalku karpinu munu wangkangu, "Nyanga paluru-warara nganmanypa wirkanu."

²⁹ Palu iti paluru wirkankunytja wiyangku miña panya malakungku ilanu puturu winki, ka iti panya kutjupangku waintarira nganmanypa paluru-warara wirkanu. Ka minyma panya kanyilpaingku iti panya kuranyu wirkankunytjanya wangkangu, "Munta, nyanga alatjingga-an kuranyu untura wirkanu!" Kaya iti palunya ininu Piritjinya. ³⁰ Ka palula malangka iti panya miña karpintjanya wirkanu, kaya palunya ininu Tjiranya.

39

Wati Ini Putipalu Josephanya Payamilantja Ngura Itjipanya

¹ Ka panya Itjumailku pakalipitingku Josephanya katira manta ngura kutjupangka Itjipala ma-ungu wati kutjupa manikitjangku wati ini Putipanya. Ka wati panya paluru mayatja tjukutjuku nyinangi tjaultji tjutaku.

Tjaultji nyara paluru tjana panya mayatja Piiraku ngura atunymara angakanyilpai. ² Ka Josephanya wati panya Putipaku ngurangka nyinangi munu ngura pala palula wirura palumpa warkaringi, panya Mayatja Godalu palunya pulkara alpamilannyangka. ³ Ka Putipalu nyakula kulinu, “Munta, mulapa Godalu palunya alpamilanı ngayuku tjukaruru wirura warkarinnytjaku.” ⁴ Munu paluru palumpa pulkara pukularira wangkangu wali ulytja uwankara palumpa atunymara kanyintjaku. ⁵ Ka palulanguru Godalu Putipaku wirura palyaningi Josephalawanungku. Ka palumpa ngura wali uwankara palya alatjiıt ngarangi, ka palumpa kaanangka mai pulka pakaningi. ⁶ Ka Putipalu nyakula pulkara mulapa Josephaku pukularingu munu palunya tjunu palumpa kutjupa kutjupa uwankara kanyintjaku. Munu paluru atunymara uwankara palumpa kulintja wiyangku mai kutju kuliningi palumpa ngurangka pitjala ngalkuntjikitjangku.

Putipaku Kuri Josephaku Nyaliringkunyta

Palu Josephanya wati yangupala wirunya munu yunpa wirunya mulapa anangu lipula. ⁷ Ka palulanguru Putipaku kuringku nyangangi munu nyakula nyaliringangi palumpa. Munu kutjupa-ara nyakula Josephala wangkangu, “Wai, nyuntu ngali ngariku?”

⁸⁻⁹ Ka Josephalu wiyanmara wangkangu, “Wiya, kulila! Ngayuku mayatja Putipaluni wali nyangaku tjunu palumpa kutjupa kutjupa uwankara atunymara kanyintjaku. Munu palulanguru kulintja wiyangku wantinyi ngayulu uwankara tjukarurungku kanyinnyangka munu panya pukulpa alatjiıt nyinanyi. Palu nyuntunya kanyintjakuni tjunkunyta wiya alatjiıt. Panya nyuntu palumpa kuri ngayuku mayatjaku kutju. Ka ngayulu tjinguru nyuntula ngarirampa kura pulka mulapa palyalku Godala mirangka.” Munu palunya wantingi alatjiıt. ¹⁰ Palu minyma paluru rawangku tapingini tjirirpi kutjupa tjirirpi kutjupa Josephanya palula tjunguringkunytkaku. Palu paluru kulira alatjiıt wantingi rawangku.

¹¹ Munu palulanguru Josephanya tjirirpi kutjupa urulta warkarinnytjatjanu wali unngu ngapartji warkarinnytjikitja tarpangu. Ka anangu panya wali unngu warkaripai tjuتا wiya ngarangi. ¹² Palu minyma panya Putipaku kuri kutju unngu nyinangi munu paluru Josephanya nyakula pakara ma-wataparara upukuta witira wangkangu, “Josepha! Wirun mulapa! Yaaltjin kulini? Ngarimali.”

Palu Josephanya tjirkanu paluru witinnyangka, ka minymangku panya upukuta palumpa pulkara witiń ka paluru arara wantikatingu witira kanyinnyangka, munu ma-wirtjapakanu urilkutu.

Putipaku Kuringku Ngunti Wangkanyta

¹³ Ka minyma panya paluru upukuta kutju mantjira kanyira pulkara mirpanaringu. ¹⁴⁻¹⁵ Munu paluru ngunti kampa kutjupara wangkanytjikitjangku kuliningi munu warkaripai tjuتا altira wangkangu, “Kuuta nyangatjaya nyawa. Wati panya Iipurungku nyangatja wantikatira ngulu wirtjapakanu, panya paluru ngayulakutu pitjangu mununi witiń ngarilinkunytykitjangku. Kaña pulkara mirangu. Ka paluru upukuta wantikatira ngulu wirtjapakanu. Ngunti palunya ngayuku miitangku palya-palku mantjinu, kanı ngayunya kurańu.” ¹⁶ Munu paluru upukuta panya kanyiningi Putipaku pańara.

¹⁷ Munu Putipanya ngurangka wirkankunyangka nyakula piruku wangkangu ngunti, “Wati panya Iipurungkuńi kurańu nyuntumpa panya

wärkangku. Paluruṇi pitjala witiṇu watarku nyinanyangka ngarilyinkunytjikitjangku. ¹⁸ Palu ngayuluṇatju pulkara mirangu, ka paluru upukuta nyangatja wantikatira wirtjapakaṇu.”

Josephanya Tjailangka Tjarpatjunkunytja

¹⁹ Ka Putipanya kulira pulkara mirpanaringu Josephaku. ²⁰ Munu wati tjaultji tjuṭangka wangkangu witira katira tjailangka tjarpatjunkunytjaku. Tjaila nyara palula panya mayatja Piiralu wati kuralpai tjuṭa tjarpatjunkupai. Kaya pała palula Josephanya tjarpatjunu.

²¹ Palu Mayatja Godalu palunya tjaila unngu nyinanyangka wiruṛa atunymanangi. Kanku paluru pukulpa alatjiṇu nyinangi palya mulapa. Ka tjailaku mayatjangku palunya nyangangi pukulpa nyinanyangka munu palumpa pukularingu. ²² Munu palulanguru palunya tjunu wati nyara tjailangka nyinanytja tjuṭa atunymankunytjaku. Ka tjananya uwankara para-nyakupai, wati panya Josephalu. ²³ Ka tjailaku panya mayatja pulkangku wantingu Josephalu uwankara kanyintjaku panya Mayatja Godanya Josephala tjungu nyinangi. Munu palunya nintiningi tjukaruru wiruṛa wärkarinytjaku, ka uwankara palya alatjiṇu ngarangi Josephalu kanyinnyangka.

40

Wati Kutjarangku Tjailangka Nyinara Tjukurmankunytja

¹ Ka ngula Mayatja Piiraku wärka kutjarangku palunya kuraṇu Piiranya. Wati panya kutjungku waina Piiranya palyara ungpupai, ka panya kutjupangku mai nyuma paulpai Piiraku. ²⁻³ Palu paluru pula kuranyangka Piiralu pulanya mirpaṇarira tjailangka tjarpatjunu panya kuralpai tjuṭangka tjungu nyinanytjaku. Ka nyara palula panya Josephanya kuļu nyinangi. ⁴⁻⁵ Ka tjailaku mayatjangku Josephala wangkangu pulanya atunymara wiruṛa kanyintjaku.

Ka pula tjailangka rawa mulapa nyinangi, munu palulanguru pula munga kutjupa kunkunpa ngarira tjukurmanu. Paluru waina panya ungpupaingku tjukurpa kutjupa tjukurmanu, ka paluru mai panya paulpaingku kutjupatu tjukurmanu. ⁶⁻⁷ Munu pula mungawinki pakara rawangku kuliningi munu pula puṭu kulira tjituru-tjituru nyinangi.

Josephalu Utintja Pula Tjukurmankunytja

Ka Josephalu wirkara tjituru-tjituru nyakula wangkangu, “Nyaanguru nyupali tjituru-tjituru nyinanyi?”

⁸ Ka pula wangkangu, “Mungangka ngali tjukurmanu munuli puṭu kuliningi. Ka aŋangu kutjupangku pitjala ngalila kulira utira wangkanytjaku wiya ngaranyi.”

Ka Josephalu wangkangu, “Godanya ninti, panya nyupali tjukurmankunytja paluru kutjungku utilpai. Walangku pula wanyu wangka panya nyupali tjukurmankunytja, kaṇa kulira Godala tjapilku ka paluru utilku.”

⁹⁻¹¹ Ka wati panya waina ungpupaingku-warara wangkangu nyanga alatji, “Ngayuluṇa ngarira tjukurpa nyanga alatji nyangu mai panya kiripitji puṇu ngaranyangka ngayula itingka miṇa maṇkurtjara. Ka puṇu nyara palula nyalpi tjuta mapalku pakanningi inuntji kuļu. Ka inuntjinguru mai kiripitji pakara kururingu. Ka ngayulu kanyiningi mayatjaku panya walpayata, mununa kiripitji mantjira walpayatangka marangku tjulkunu tjuratja uru tjutira wamarinkunytjaku. Mununa palulanguru tjaalyngaratjura ungu mayatja Piiranya.”

12-13 Ka Josephalu kulira wangkangu wati panya palula, “Kulilanı kana utilku! Panya puṇu kiripitji miṇa maṇkurtjaran nyangu. Pala palulanguru kulinma panya tjiripi maṇkurpa ngaraku, kanta palulanguru Mayatja Piiralu nyuntunya tjailanguru pakaltjingalku panya palu purunypatu palumpa war̄karinytjaku. Ka nyuntu panya piruku walpayatangka waina tjutira ungkuku mayatja panya palunya.

14-15 “Palu nyuntu nyanganguru pakara piruku wirura war̄karirampa-puṭa kulinma ngayunya munu wangka mayatja panya Piirala ngayuku ngaltungkingkunytjaku munu ngura nyanganguru pakaltjingantjaku. Panya ngayunyaya witira katingu ngura nyara lipuru tjutaku mantanguru ngura nyanga Itjipalakutu. Kaṇiya ngura nyangatja ngurārangku ngapartji piruku witira tjailangka tjarpatjunu wiyanguru alatjitu.”

16-17 Palu wati kutjupangku mai nyuma paulpaingku kulinigi Josephalu tjukurmankunytja panya wirura utira wangkanyangka. Munu palulanguru raparingkula wangkangu, “Wangkakuna? Ngayulu kuļu tjukurmanu alatji, panya ngayuluṇa piti maṇkurpa tjalira katangka katulkira katulkira katingi. Palu kutjara ultu, ka kutju katutja mai war̄uly-war̄ulyitjara mayatja Piiranya ungkunytjaku. Ka mai panya palunya tjulpu tjutangku pitjala ngalkuningi.”

18-19 Ka Josephalu wangkangu, “Uwa, kulilanı kana utilku. Panya piti maṇkurpan tjukurmanu. Nyara palulanguru kulinma tjintu maṇkurpa ngaranyangka mayatja Piiralu wangkaku nyuntunya tjailanguru pakaltjingantjaku. Palu pala palula malangka nyuntunya kata katantjaku wangkaku mununta kata katara puntu kutju punungka uititjunkunytjaku wangkaku. Kantaya tjulpu tjutangku pitjala ngalkuku.” Alatji Josephalu utira wangkangu wati panya mai paulpaingka.

Josephaku Wangka Utiringkunytja

20-21 Ka panya palulanguru tjiripi maṇkurpa wiyingkunyangka Piiraku tjiripi panya wirkānu, paluru panya iti ngarinytjtja. Kaya tjiripi pala palulalta war̄ka tjarangku mai pulka palyanu kuka kuļu Piiraku malpa tjutangku tjunguringkula ngalkuntjaku palumpa pukularira. Ka palulanguru Piiralu wangkangu wati panya kutjara waina ungpai munu mai paulpaina pulanya tjailanguru pakaltjingara katinytjaku palulakutu. Munu wati panya waina ungpai malakungku tjunu piruku palumpa war̄karinytjaku, palunya waina palyara ungkunytjaku.

22 Munu wangkangu wati panya kutjupa iluntankunytjaku wati panya mai paulpaina. Panya Josephalu wangkanytjtja alatjitu utiringu.

23 Palu wati panya waina ungpai Josephaku tjukurku watarkuringu, munu panya Mayatja Piirala tjpintja wiyangku wantingu Josephanya tjailanguru walatjunkunytjaku.

41

Mayatja Piiralu Tjukurmankunytja

1 Ka Josephanya rawa nyinangi tjailangka. Ka ngula kuļi kutjara ngarala wiyingkunyangka Itjipaku mayatja Piiralu munga kutjupangka ngarira tjukurmanu, munu nyanga alatji palurunku walijtjangku nyangu karu pulka uru ini Nayilta kantilytja ngaranytja. **2** Munu paluru nyangu puluka 7 urunguru ngalya-pakannyangka urungka unngu ngaranytjatjanu. Paluru tjana kuka palya kanpi pulka. Munu paluru tjana urunguru pakantjatjanungku karu kantilytja ngarala ukiri ngalkuningi.

3-4 Ka palula małangka palu purunyapa puluka 7 kutjupa uru panya palulanguru tu ngalya-pakanu. Palu paluru tjana palya wiya nyurka nyurka tjuṭa. Munuya pakara puluka panya palya tjuṭangka itingka ngarangi karungka kantilytja. Munuya palulanguru nyurka panya tjuṭangku puluka panya kanpi pulka tjuṭa ngalkula uwankara wiyanu. Ka alatji tjukurmankunytjatanu mayatja panya Piiranya wankaringu.

5 Munu palulanguru małaku kunkunarira piruku tjukurmanu nyanga alatji, panya ukiri mai wiita ngarangi miña 7-tjara mai uṇinypa pulkatjara. Ka mai uṇinypa panya paluru tjana piltiringkula wiru ngarangi urantjaku. **6** Ka palula małangka ukiri kultu panya palula tu piruku pakanu miña 7 kutjupa mai uṇinypa kurakuratjara kutju-kutjutjara panya walpa warungku kampara kurantja. **7** Ka mai nyanga kulingga kampara kurantjitjangku mai panya nganmanypa pulka pakantja ngalkula wiyanu.

Munu nyanga alatji tjukurmankunytjatanu mayatja panya Piiranya piruku wankaringu munu ngarira kuliningi, "Munta, tjukurmanangimantina." **8** Munu paluru mungawinki pakara nyinara puṭulta kuliningi, "Yaaltji-yaaltjina panyatja tjukurmanu?" Munu palulanguru altingu palumpa panya wati nintipuka tjuṭa munu ayinayini palyalpai tjuṭa munu ngangkari tjuṭa kuļu. Kaya pitjangu Piirala laku. Ka paluru tjanala tjakultjenu tjukurmankunytjatanungku tjana kulira palula utira wangkanytjaku. Palu tjana puṭu kuliningi utira wangkanytjikitjangku, "Nyaala wangkaku? Puṭula kulini?"

Piiralu Josephanya Altinytja Utintjaku

9-11 Ka palulanguru wati panya waina ungkupaingkulta kulinu, "Munta-uwal panyatja! Wati panya Josephanya ninti." Munu paluru Piirala wangkangu, "Kurangkunanta wantingi. Utinanta panyatja nganmanytjulpi tjakultjunama panya nyuntu ngalimpa mirpañaringu munu panyan ngalinya tjailangka tjarpatjenu tjaultji tjuṭaku mayatjaku walingka. Kali nyara palula nyinara nyinara ngulalta munga kutjupa ngarira tjukurmanu, paluru kutjupa, ka ngayulu kutjupatu. **12** Ka wati lipuru nyara palula ngalila tjungu nyinangi. Paluru panya yangupala tjaultji tjuṭaku mayatjaku warkaripai. Kali tjukurmankunytjatanungku palula tjakultjenu. Ka ngalila utira wangkangu tjukarurungku. **13** Ka paluru panya wangkanytja mulapatu malangka utiringu. Panya nyuntu ngayunya pakaltjingara małakungku tjunu nyuntumpa warkarinnytjaku, munun wati panya kutjupa mai paulpainya iluntanu."

14-15 Ka Piiralu nyangatja kulira wati warka kutju tjailakutu witura iyanu Josephanya alṭira ngalya-katinytjaku. Ka Josephalu tjailanguru pakara ngankurpa kaṭanu munu mantara palyangka tjarparpa anu Piirala laku. Ka Piiralu palula tjakultjenu alatji, "Mungangkaṇa tjukurmanu mununa mungawinki pakara nyanga tjanala tjakultjenu. Kaya puṭu kuliningi ngayula utira wangkanytjikitjangku. Palu kutjupangkuni wangkangu nyuntu kunyun tjukurmaṛa wangkanyangka utira tjakultjunkupai."

16 Palu Josephalu mayatja panya palula wangkangu, "Uwa palya, kulilaltani! Ngayulu kutjungku tjukurmankunytja uwankara puṭu walytjangku utira wangkapai. Palu Godalu ngayula nintinnyangka kutjuṇa utira tjakultjunkupai. Kuwariṇi Godalu ngayula nintini tjukurpa nyanga nyuntumpa utira wangkanytjaku nyuntula, kan nyara palulangurulta kulira pukulariku."

¹⁷ Ka Piiralu tjakultjunu Josephala, “Nyanga alatjina tjukurmanu. Ngayulu karu panya pulka uru ini Nayilta kantilytja ngarangi. ¹⁸ Mununa nyangu kuka puluka kanpi pulka tjuṭa tjapanpa uru unngu ngaranytjatjanu ngalya-pakannyangka. Kaya puluka paluru tjana pakara karu kantilytja ngarala ukiri ngalkuningi. ¹⁹ Kaña piruku nyangu uru palulanguru puluka 7 kutjupa ngalya-pakannyangka nyurka-nyurka tjuṭa. Kaña nyara palulanguru nyakula urulyaraningi, panya ngura nyanga Ittipala ngayulu nganmanytju nyakunytja wiyat puluka kantilypa uti nyanga palu purunypa. ²⁰ Kaya nyurka-nyurka tjutangku pakara ngalkula wiyanu puluka panya palya tjuṭa. ²¹ Kaña ngayulu nyangangi paluru tjana ngalkuntjatjanu tjuni paltjaringkunytja wiya nyurkaṭu ngarangi. Mununa nyara palunya nyakunytjatjanu wankaringu.

²²⁻²³ “Mununa malaku kunkunarira kutjupa ngapartji piruku tjukurmanu nyanga alatji, panya ukiri mai wiita ngarangi miña 7-tjara mai uninypa pulkatjara. Ka mai uninypa panya paluru tjana piltiringkula wiru ngarangi urantjaku. Ka palula malangka ukiri panya palulatu miña 7 kutjupa piruku pakanu mai uninypa kurakuratjara kutju-kutjutjara panya walpa warungku kampara kurantja. ²⁴ Ka mai panya kulingku kampara kurantjitungku mai panya nganmanyapa pulka pakantja ngalkula wiyanu. Alatjina nyangu, mununa tjukurmankunytjatjanungku ngayuku wati nintipuka tjuṭa altira tjakultjunu. Kaya puṭu kuliningi ngayula utira wangkanytjikitjangku.”

Josephalu Piirala Utira Wangkanytja

²⁵⁻²⁷ Ka Josephalu kulintjatjanungku Piirala wangkangu, “Uwa, nyuntun kutjara-arangku tjukurmanu. Munu ara pala palula pulalanguru kulinma tjukurpa kutju nyanga alatji, Godalu nyuntula nintini ngula nyaaringkunytjaku. Panya nyuntu puluka 7 nyangu kanpi pulka tjuṭa. Munun palu purunypaṭu nyangu ukiri mai 7-tjara mai panya pulkatjara. Nyanga ara kutjaranguru kulinma kuli nyinnga 7 ngarakatiku mina pulka mai pulka itjanu pulka mulapa. Palu kutjupa nyuntu nyangu puluka nyurka-nyurka 7. Munun palu purunypaṭu nyangu ukiri mai 7-tjara mai uninypa kurakuratjara kulingku kampara kurantja. Nyara ara kutjaranguru kulinma kuli nyinnga 7 kura ngarakku ailuru pulka, nyara yiya panya palya tjuṭa ngarakatinytjala malangka. ²⁸ Nyangatjana mulapa wangkanyi, Piira, panya Godalu nyuntula nintini ngula nyanga alatjirinytjaku.

²⁹ “Palu panya kuwari nyanga nganana manta nyanga Ittipala winkingka pukulpa nyinaku mai pulkatjara yiya 7. ³⁰⁻³¹ Nyara palula malangka yiya palya tjuṭa ngarala wiyingkunyangka yiya panya 7 kutjupa ngarakku ailuru pulkalta. Ka manta piltiringkunyangka mai wiya ngarakku. Kala ailuru pulkangku manta winki kurannyaangka paltjatjiratja nyinaku tjituru-tjituru mulapa. Munula mai panya pulkangka nganmanyapa nyinanytjitetjaku watarkuriku alatjitu.

³² “Ka nyuntu panya kutjara-ara tjukurmanu panya kutju pulukatjara munu kutjupa mai wiitatjara. Pala palula pulalanguru tjukurpa kutjuringu, panya kuwariqanta utira wangkangu yiya palya tjuṭa nganmanyapa ngarakku munu palula malangka yiya kura tjuṭa ngarakku. Ka nyuntu tjukurpa kutjara tjukurmankunytjatjanungku alatji kulinma, ‘Munta mulapa nyangatja Godalu palyalku kuwari nguwanpa.’ Palurunta mulamulangku nintini tjukarurungku.” Alatji Josephalu utira wangkangu mayatja Piirala.

33-35 Munu palulanguru piruku wangkangu Piirala, “Mai wiyingkunytjaku-tawara-puṭa nganmanyju wati kutjupa ngurkantara nintipuka pulkanya, uwankaraku ninti. Munu palunya tjura mayatja nyuntula itingka nyinanytjaku ngura nyanga Ittipaku mayatjarira mai purkarangku atunymankunytjaku. Munu wati mayatja tjunkula wati warķa kutjupa tjuṭa kuļu tjura wati nyara paluru tjananya wituwituntjaku. Munu tjanala wangka alatji, ‘Kuļi palya tjuṭa ngaranyangkalpi wati paamatjara tjuṭakutu ara munuya mai uninypa urannyangka nyakula tjara tjukutjuku mantjira kati wati mayatjaku tjuwa pulkangka mai ngaripaingka tjunkunytjikitjangku ailuru panya pulkaku paṭara. Nyanga alatji paama uwankaranguru mai tjarara mantjila kuļi kutjupa kuļi kutjupa yiya panya 7-kutu-wangkara. Munu mai tjunkula atunymara anga-kanyinma kutjupangku kutitjunkunytjaku-tawara.’ Alatji tjanala wangka. ³⁶ Ka mai paluru tjana paṭara ngariku ngulaku ailuru pulkaringkunyangka ngalkuntjaku. Alatji nyuntu palyannyangkampa anangu tjuṭa paṭjtatjiratjariwiya nyinaku, wanka titutjara.” Alatji Josephalu tjakultjunu mayatja panya Piirala paluru kulintjaku.

Piiralu Josephanya Mayatja Pulka Tjunkunytja

37-38 Ka mayatja Piiralu tjanala wati kuranyitja tjuṭangku kuļu kuliṛa pukularingu Josephalu tjanala alatji tjakultjunkunyangka munuya palyamanu. Munu Piiralu tjanala wangkangu, “Palu Josephanyampa wati wiru mulapa. Nyanga paluru alatji Godaku kuruntjara wati palya. Utila nyanga palunya tjunkuku, panya wati nyanga palu purunypala kutjupa puṭu ngurkantankuku, palu Josephanya kutju wiru mulapa.”

39-40 Palulanguru Piiralu Josephala wangkangu, “Nyagatja mulapa panya Godalu nyuntula nintinu uwankara. Palulangurula uti kulini nyuntu panya ninti pulka mulapa kutjupa uwankarangka waintarira nyinanyi. Kaņa kuwari nyuntunya mayatja pulka tjunanyi ngayula maļangka, ka nyuntu mayatjarira ngayuku ngura kanyilku. Kaya anangu Ittipanya ngurara uwankarangku nyuntula wanganarangku kulikku, ka ngayulu kutju nyuntumpa mayatja nyinaku. ⁴¹ Uwa, kuwari nyuntu ngura nyanga Ittipaku mayatja pulka nyinanyi anangu winkiku.”

42 Munu palulanguru Piiralu Josephanya mayatja tjunkula maranguru ringi arara Josephala marangka tanpañu. Ringi nyanga paluru panya mayatja pulkangku kutju kanyilpai. Munu palunya ungu tjarpanytjaku mantara wiru mulapa. Munu liringka kuļu tjunu nikilitja gold-nguru palyantja wiru mulapa anangu tjuṭangku panya liritja kanyinnyangka nyakula mayatja ngurkantankunytjaku. ⁴³ Palulanguru Piiralu Josephanya ungu tjinka wiila kutjaratjara panya mayatja tatira para-ngarapai. Munu paluru kuranyuringu tjinka palumpangka, ka Josephalu palumpa tjinkangka tatira malawanungku wañaningi. Ka Piiraku wati tjaultji tjuṭangku kuranyu ankula anangu tjuṭangka mirara wangkangi, “Wattikitikitiriwaya alangka pula ankunytjaku.” Alatji pula anangi anangu tjuṭangku mirara Josephanya mayatja kulintjaku, “Ngangarku! Nyawaya mayatja kuwaritjara pala pula Piiranya para-ngařanyi.” Alatjiya nyakula kulinigi Piiralu panya Josephanya ngura Ittipaku manta winkiku mayatja tjunkunyangka.

44 Ka Piiralu palula wangkangu Josephala, “Ngayuluña mayatja pulka mulapa, palu nyuntu mayatja ngayula ititja munun atunymara kanyilku uwankara ngura Ittipala. Kaya anangu tjuṭangku nyuntula kulikku wanganarangku.” ⁴⁵ Munu Piiralu ini kutjupa tjunu Josephanya ini

Itjipanya ngurara panya “Tjapina Paniyanya”. Munu palunya kungkawara kuri ungu ini Atjinatjanya. Paluru panya wati tjukurtjaraku untalpa wati panya ini Patiparaku ngura panya Anannga nguraraku.

Josephanya Mayatja Pulka Itjipalawanu Warkarinytja

⁴⁶ Nyanga palula-arangka panya Josephanya yangupala yiya nampa 30 itinguru nyinanytjatjanu. Munu paluru mayatjarira Piiraku ngura wantikatira anu ngura kutjupa kutjupa tjuṭa para-nyakunytjikitja manta pala Itjipala. ⁴⁷ Ka kuli panya palya tjuṭa ngarakatinyangka mai pulka mulapa pakaningi paama tjuṭangka Itjipala yiya kutjupa yiya kutjupa. ⁴⁸ Ka Josephalu wati warkaripai tjuṭa wangkangu mai uninypa paama tjuṭanguru mantjintjaku, kaya mantjira katira tjunangi walī panya pulka tjuṭangka ngura tjuṭatja. ⁴⁹ Paluru tjana mai panya pulka mulapa mantjira piti tjuṭangka katira tjunangi paama kutjupa kutjupa tjuṭanguru. Ka Josephalu panya piti maitjara tjuṭa katira tjunkunyangka ngañmanytju kantamilanigi. Palu tjana ngura tjuṭanguru winki mulapa ngalya-katingi, ka pakuringkula wantingu puṭu kulira.

⁵⁰ Ka ailururingkunytja kuwaripangka Josephaku kuringku Atjinalu katja kutjara kanyinu. ⁵¹ Ka Josephalu katja inintjikitjangku wangkangu, “Ngayulu panya ngura nyangaku pitjangu waltyta tjuṭanguru kawankatira, ka panya niya tjailangka tjarpatjunu wiyanguru alatjitu. Palu palya, panya Godaluni tjailanguru pakaltjinganu mununi pukułmanu, kanā watarkuringu ngayulu panya kurangka ngañmanypa nyinanytjitu, mununa waltyta tjuṭaku kulu watjilarinytja wiyaringu. Palulanguruṇa kuwari katja nyanga ngañmanyitja inilku ‘Manatjanya.’ ” ⁵² Munu piruku katja malatja inintjikitjangku alatji wangkangu, “Ngura nyanga palula panya ngayunya tjailangka tjarpatjunu watjilpa nyinanytjaku. Palu palya, panya Godaluni ngayunya katja kutjara ungu. Palulanguruṇa katja nyanga malatja inini Ipuraimanya.”

Ailuru Pulka Manta Winkingka Ngaranytja

⁵³ Palulanguru yiya panya palya tjuṭa mai pulkatjara ngarala wiyaringu. ⁵⁴ Ka ailururingulta. Munu ailuru pulka mulapalta ngarangi rawa yiya 7. Panya Josephalu ngañmanytju wangkanytjita mulapatu utiringu. Ka ailuru panya paluru manta Itjipala kutju wiya ngura ala lipingga ngarangi. Palu Itjipalaya mai pulkatjara nyinangi ngañmanytju utulura tjunkunytjatjanu panya walī pulka tjuṭangka.

⁵⁵⁻⁵⁶ Ka ailuru panya paluru pulka mulararingu, ka paama winkingka mai wiyaringu ngura Itjipala munu ngura kutjupa uwankarangka kulu. Kaya Itjipanya ngurara tjuṭangku paltjatjiratjarira pitjala pulkara ngatjiningi Piirala maiku. Ka paluru wangkangu, “Ankulaya Josephala tjapila munuya paluru wangkanyangka kulinmatu.” Kaya ankula tjapiningi Josephala. Ka Josephalu alaṇu walī panya pulka tjuṭa maitjara panya, munu tjananya ungangi manikitjangku Itjipanya ngurara tjuṭa. ⁵⁷ Kaya anangu kutjupa tjuṭa kulu rawa pitjangi ngura panya kutjupa tjuṭanguru Itjipalakutu mai Josephala payamilantjikitja, panya ailuru manta winkingka ngaranyangka.

42

Josephaku Kuta Tjuṭa Itjipalakutu Maiku Ngatji Ankunytja

¹ Palu Josephaku mama, tjilpi panya Jacobanya ngura panya Kainanta nyinangi katja panya tjuṭatjara. Ka ngura nyara palula kulu ailuru pulka

mulapa ngarangi. ² Ka Jacobalu kulinu ngura panya Itjipala mai pulka ngarintja munu katja tjutangka wangkangu, “Awai! Nyaakula nyangatja kawarurira nyinara puṭu kulini? Wanyuya ara ngura Itjipalakutu. Nyara palula kunyu mai pulka ngarinyi. Ankulaya payamilala. Palu kuwarila ngura nyangaku mukuringkula nyinara mai wiyangka uwankara ilunyi.”

³⁻⁴ Kaya palulanguru mamangku wangkanyangka kulinu Josephaku panya kuṭa tjutangku, munuya anu Itjipalakutu wati panya 10-pa. Palu Josephaku malanypa Pintjimannga Jacobalu markuṇu, panya paluru ngurangka kanyintjikitja mukuringangi katja panya malatja kutjupangku pungkunytjaku-tawara. ⁵ Kaya kuṭa tjuta aŋangu kutjupa tjutangka tjunguringkula anu Itjipalakutu maikitja, munuya rawa ankula ngula wirkana ngura panya palula.

⁶⁻⁸ Ka Josephanya panya Itjipaku mayatja nyinangi, kaya aŋangu tjutangku maiku mukuringkula palulawanungku kutju payamilalpai. Kaya Josephaku kuṭa tjutangku palula wirkara pupakatira ngalyangku manta pampura mayatjanmanangi. Palu tjana palunya ngurkantankunytja wiya alatjiṭu kulira wati Itjipanya ngurara-palku.

Ka Josephalu kutju palumpa kuṭa tjuta mapalku ngurkantanu, munu paluru tjanala wangkanytja wiya ngarangi wati malikitja purunypa. Munu paluru tjananya mirpaŋ-mirpaŋtu tjapinu, “Ai, nyura ngura nganalanguru pitjangu?”

Kaya wangkangu, “Ngura Kainantangurula pitjangu mai payamilantjikitja.”

⁹ Palu Josephanya tjanampa ninti munu pupakatinyangka nyakula kulinigi, “Panya ngayuluṇa iritilpi mai wiita tjukurmara tjakultjunangi nyanga alatjirintjaku.” Munu alatji kulira wangkangu, “Nyura tjinguru nguntintjurira pitjangu maikitja-palku ngura nyangatja para-nyakula malaku ankula nyurampa mayatjangka wangkara warmalarira nganaŋanya pitjala pungkunytjikitjampa.”

¹⁰ Kaya kuṭa panya tjutangku ngulu-ngulungku wangkangu, “Wiya, nganana pitjangu nyuntula mai payamilantjikitja kutju. ¹¹ Nganana uwankara kutarara kutarara mama kutjutja, munula kura nyanga purunypa kulilpai wiya palyanyku nyinapai.”

¹² Ka Josephalu piruku wangkangu, “Wiya, nyura pitjangu ngura nyanga nganampa para-nyakula ankula ngula warmalarira malaku pitjala nganaŋanya pungkunytjikitja.”

¹³ Kaya paluru tjana piruku wangkangu, “Wiya! Nganana nyanga alatji-alatjiṭu nyinanyi kutarara kutarara mama kutjutja ngura panya Kainanta. Panya nganmanypala nyinangi 12, ka nganampa malanypa kutjupa nganmanypa wiyaringu, kalampa malanypa malatja kutju ngurangka nyinanyi mamangka.”

¹⁴ Ka piruku Josephalu wangkangu, “Wiya, panya nganmanyujuṇa wangkangu nyurala nguntintjurira pitjanytja. Nyura tjinguru pitjangu nganampa manta nyakunytjatjanungku ankula ma-wangkara malaku pitjala nganaŋanya pungkunytjikitja. ¹⁵ Tjinguru nyura tjukarurungku wangkanyi, munta tjinguru nyura ngunti wangkanyi, palu arkaṇiṇa nyuranya kuwari. Panya nyura wangkangi nyurampa malanypa ngurangka nyinanytja. Ka paluru ngura nyangaku pitjanyangka kutjuṇa nyakula mulamularingkuku. Palulanguru kutjuṇa nyuranya wantir'iyalku ankunytjaku nyurampa ngurakutu. Mulamulangkuna nyurala wangkanyi, panya mayatja Piiralanuṇi tjunu mayatja ngura nyangaku. Ka nyura nyinara

paṭanma ngura nyangangka nyurampa małanypa pitjanytjaku. ¹⁶ Kaṇa kutju nyuralanguru wangkara iyalku palunya ankula mantjira ngalya-katinytjaku. Palu nyura kutjupa tjuṭa nyinaku tjailangka unngu paṭara, munu nyurampa malanypa wirkankunyangka kutju pakalku. Ka paluru pitjanyangka kutjuṇa nyuranya kulilkulukarurungku wangkanytja. Palu paluru pitjanytja wiyangkampaṇa nyuranya ngukalku nguntinytjurira ngura nyangaku pitjanytja. Alatjina mulapa kulilkulukarurungku wangkanytja wiyangka.”

¹⁷⁻¹⁹ Munu palulanguru Josephalu tjananya tjailangka tjunu. Kaya nyara palula tjintu maṅkurpa nyinangi. Ka Josephalu tjintu maṅkuritjangku pitjala tjanala wangkangu, “Ngayuluṇa panya Godanya kulira walkulpai mununa nyurampa ngalturinganyi. Palu nyurampa malanypa ngayulakutu ngalya-katinyangkampaṇa nyuranya pungkuwiyangku wantiku.” Munu paluru piruku kampa kutjupara wangkangu wati kuṭa kutju ngururitja tjailangka kanyintjikitjangku. Munu tjananya kutjupa tjuta wangkangu, “Palyaya ma-kati mai panya nyura payamilantja walytja tjuṭakutu pałtjatjiratja nyinanyangka pałtjantjikitjangku. ²⁰ Munuya palula małangka nyura wati panya nyurampa malanypa ngalya-kati ngayulakutu. Kaṇa palunya nyakula mulapa kulilkulukarurungku wangkanytja, mununa palulanguru nyuranya pungkuwiyangku wantiku, mununa wati panya tjailangka nyinanytjanya pakaltjingalku.” Kaya paluru tjana kulira uwanmanu.

²¹ Munuya Josephaku wangka kulira tjananku wangkangi wangka tjanampangku nyanga alatji, “Munta-uwa panya nganaṇa iritilpi nganampa malanypa wati kutjupa tjutangka tjalamilanu, ka tjinguru palulanguru Godalu nganananya wantir'iyanı alatjirintjaku. Panya iriti Josephalu nganananya alpamilantjaku puṭu wangkangi, kala kulira wantingi munula ngalturingkunytja wiyangku ungu. Ka palula małangka wiyaringu, ngaltutjara. Kalanya ara panya palulanguru tjinguru Godalu kuwari wantir'iyanı.”

²² Ka kuṭa pułkangku Rupintu wangkangu, “Panya puṭuna nyurala wangkangu pungkuwiyangku wantintjaku, ka nyura ngayunya kuliliwiyangku alatjiṭu wantingu. Kala nyangatja nganampa ngapartjilta utiringanyi nganaṇa ngapartji ilunytjaku.”

²³ Nyanga alatjiyanku wangkangi Josephala miṛangka wangka ngurpangka-palku. Panya Josephalu wati kutjupawanungku tjanala wangkangi wangka Itjipanya ngurārangku, ka wati paluru ngapartji tjanala tjakultjunangi wangka tjanampangku. Palu Josephalu tjananya kulinu uwankara tjana irititja kulira wangkanyangka, kayanku watarkungku ngarala alatjiṭu wangkangi Josephala wangka ngurpangkapalku. ²⁴ Ka paluru kulira nyakunytjaku-tawara tjukutjuku mapaturingkula ulangi. Munu palula małangka ulara wiyarinkula małaku pitjala wati tjaultjingka wangkangu palumpa kuṭa ini Tjimiannga witira ruupangka karpintjaku. Ka Rupinta tjanala miṛangka paluru Tjimiannga karpiṭa tjailangka katira tjarpatjunu, panya kuṭa kutjupa tjuṭa ankunyangka małaringkula nyinanytjaku.

Josephaku Kuṭa Maitjara Małaku Ankunytja Kainantakutu

²⁵ Palula małangka Josephalu palumpa waṛka tjuṭangka wangkangu palumpa kuṭa tjuṭaku yakutja tjuṭa mantjira mai panya uṇinypa yakutjangka tjaalyngaratjunkunytjaku. Munu piruku wangkangu mani panya kuṭa tjuṭangku maiku ungkunytja kampangkaṭu malakungku yakutjangka

tjarpatjunkunytjaku maingka tjungu. Munu mai kutjupa antjakiku ku_{lu} tjunkunytjaku wangkangu tjanampa. Kaya mulapa war_{ka} tjutangku alatji_{nu}.

²⁶ Kaya ku_{ta} tjutangku yakutja panya maitjara tju_{ta} tangkiyingka utitjura karpi-karpira ma-paka_{nu}. ²⁷ Munuya ankula mungartjirira ngura tjunu. Ka ku_{ta} kutjungku yakutja kutju araltjanu tangkiyi mai ungkunytjikitjangku. Munu ala_{ra} nyangu mani panya paluru mai payamilantja maingka katu ngarinyangka. ²⁸ Munu nyakula urulyarara wangkangu, “Pitjalaya nyawa. Mani panya ngayulu mai payamilantja nyangatja ngarinyi yakutjangka.”

Munuya ku_{ta} panya tju_{ta} kulira kurunpa tjituru-tjitururingu munuya wati panya Ittipaku mayatjaku pul_{kara} ngulu-nguluringkula wangkangi, “Nganana panya mai nyangatja payamila_{nu} mani nyangangka, ka nyaaku mani nyangatja malakungku ungu?” Munuyanku wangkara pu_{tu} kulira tjinapiningi, “Nyaaku Godalu ngana_{nanya} rawangku wantir’iyan_i? ”

²⁹ Munuya ngarira tjinturingkula ma-paka_{nu} ngura Kainantakutu. Munuya ankula ankula ngurangka wirkana palumpa tjanampa mamangka. Munuya palula tjakultjunu uwankara nyanga alatji, ³⁰ “Nganana panya ankula ma-wirkana wati Ittipaku mayatjangka. Kalanya mirpan_m-mirpan_t puntura wangkangi, ‘Nyura tjinguru nguntintjurira pitjangu ngura nyangaku.’ ³¹ Kala wangkangu, ‘Wiya, nganana nguntintjurira pitjanytja wiya. Nganana wati palya tju_{ta}, tjukaruru nyinapai. ³² Nganana nyanga alatji nyinanyi ku_{tarara} ku_{tarara} mama kutjutja ngura panya Kainanta. Panya nganmanypala nyinangi 12, ka nganampa malanypa kutjupa nganmanypa wiyaringu, kalampa malanypa malatja kutju mamangka nyinanyi ngurangka.’ Alatjila wangkangi wati panya mayatja palula.

³³ “Ka nganana wangkanyangka paluru kulira pu_{tu} mulamularingangi munu alatji wangkangu, ‘Kuwari_{na} nyuranya arka_{ni}. Tjinguru nyura ngunti wangkanyi, tjinguru nyura mulamulangku wangkanyi. Palu kutju uti nyuralanguru ngayula nyinama, kaya mai mantjira ma-kati nyurampa waljtja tjutakutu panya tjana tjinguru paltjatjiratja nyinanyi. ³⁴ Palulanguru nyurampa malanypa panya malatja mulapa ngayulakutu ngalya-kati. Ka nyura katinyangka kutju ngayulu nyuranya wati tjukaruru kulikku, mununa palulanguru wantir’iyalku nyurampa panya ku_{ta} tjailangka nyinanytja nyurala tjungu ankunytjaku. Ka nyura palya ngura Ittipala nyinara mai payamilalku ngurakutu katintjikitjangku.’ Nyanga alatji ngana_{nala} wangkangi wati panya Ittipaku mayatjangku.”

³⁵ Palulanguruya yakutja panya maitjara tju_{ta} mantjinu pit_i pul_{ka} mai ngaripaingka ala_{ra} tjutintjikitjangku. Munuya kutju kutjungku ala_{ra} nyangu mani panya paluru tjana mai payamilantja maingka katu ngarinyangka. Munuya nyakula pu_{tu} kulira mama ku_{lu} pul_{kara} nguluringangi. ³⁶ Ka mamangku kulira tjanala wangkangu, “Nyaaku nyura mukuringanyi ngayuku tjiti tju_{ta} kawalinkuntjikitja? Panya nganmanypa Josephanya ankula wiyaringu, ka Tjimiannga kuwari wiyaringu, ka nyura kuwari mukuringanyi Pintjimannga ma-katintjikitja. Ka_a ngayulu ngaltutjara pul_{kara} tjituru-tjitururinyi.” Alatji Jacobalu wangkangi.

³⁷ Ka ku_{ta} panya pulkangku Rupintu wangkangu mamangka, “Ngayunyan_i Pintjimannga unkul’iyala, ka_a pul_{kara} atunyamanama mununa

ngula malakungku ngalya-kati nyuntulakutu. Palu ngayulu malakungku katinytja wiyangkaman ngayuku katja kutjara palya iluntananyi.”

³⁸ Ka Jacobalu wangkangu, “Wiya, ngayulu ngayuku katja nyuntula puṭu iyan̄i, panya palumpa kuṭa ngunytju kutjutja ngañmanypa wiyaringu, ka nyangatja paluru kuwari kutju nyinanyi. Kaña palulanguru puṭu maiyan̄i ankunytjaku kutjupangku pungkunytjaku-tawara. Panya ngayuluṇa tjiłpi mulapa munu nyanga paluru ankula ilunyangkaṇa pulkaṛa tjiturutjitururira iluku.”

43

Kuta Tjutangku Pintjimannga Itjipalakutu Katinytja

¹ Palu ngura pala palula ailuru pulka rawa ngarangi. ² Kaya mai panya Itjipalanguru katinytjitja ngalkula wiyanu, ka ailuru panya ngarangi alatjiṭu. Ka mai wiyaringkunyangka Jacobalu katja panya tjutangka wangkangu, “Araya piruku ngura nyara Itjipalakutu mai payamilantjikitja munuya mantjira ngalya-kati.”

³ Ka katja kutjungku Judah-lu wangkangu, “Uti nganana nganampa malanypa malatja Pintjimannga ma-katima. Panya Itjipaku mayatjangkulanya wangkangu alatji, ‘Nyurampa malanypa panya malatja kati-wiyangku wantinyangkaṇa nyuranya piruku mai ungkunytja wiyangku wantiku.’ ⁴ Ka nyuntu nganampa malanypa ngananaala iyannyangka kutjula palya ankula mai nyuntumpa payamilalku. ⁵ Palu nyuntu iyalwiyangku wantinyangkala wantira nyinanyi, panya wati mayatjangku wangkangu ngananaala, ‘Nyura nyurampa malanypa ngalya-katiwiyangku wantira ngayula puṭu ngatjini maiku.’”

⁶ Ka Jacobalu wangkangu, “Nyaaku nyura wanyu tjakultjunangi nyurampa malanypa wati nyara mayatja palula? Utı nyura wantima wangkawiyangku. Nyura tjakultjunkunytjanguru nyarangku altingu nyangatja nyura ma-katinytjaku. Kaña pulkaṛa kulira tjituru-tjitururinyi.”

⁷ Kaya wangkangu, “Wiya, paluru ngananaala rawangku tjapiningi wangkanyangka kulira nintiringkunytjikitjangku. Nyanga alatji tjapiningi, ‘Nyurampa mama nyinanyi? Ka nyurampa malanypa kutjupa nyinanyitu?’ Kala palula watarkungkuṭu tjakultjunu. Panya nganana nganmanytju kulintja wiyatū palurulanya malanypa katinytjaku wangkanytja. Palu nganana tjakultjunkunyangka kutju wangkangu malanypa katinytjaku.”

⁸⁻⁹ Ka Judah-lu wangkangu mamangka, “Wiya, Pintjimannga ngayunya unggul’iyala, kaña ngayulu atunytju kanyinma mununa wankaru malakungku ngalya-katiku. Palu wiyangkampa ngayuku tiṭutjara mirpanpa nyinama. Ala, kuwaritulanya wanyu unggul’iyala, kala mapalku ara maiku nyuntu nganana uwankara mai wiyangka ilunytjaku-tawara.

¹⁰ Panya nganana rawa paṭara nyinangi maiku ankunytja wiyatū. Tjingurula ngañmanytju unggul’iyannyangkampa ngura iriti ankula mai mantjira ngalya-katima, munula pirukutu ankula mantjira ngalya-katima.”

¹¹ Ka palulanguru Jacobalu kulira wangkangu, “Uwa, tjinguru palya Pintjimannga kati. Palu ngura nyanganguru kutjupa kutjupa tjuṭa kati kiṭi munu tjuratja munu tjau munu mai taṭu, kutjupa kutjupa tjuṭa kulu. Munu katira mayatja panya palunya pukulmankunytjikitjangku ma-uwa. ¹² Munu mani panya yakutjitia kuļu malakungku katira ma-uwa. Tjinguru nyarangku ngunti tjunu mani panyatja. Munu piruku mani nyanga kutjupa kati mai kutjupa payamilantjikitjangku. ¹³ Palyaya warpungkula ara, munuya Pintjimannga kuļu ma-kati mayatja panya

palulakutu. ¹⁴ Ka ngayulu kuwari Godala tjapini mayatja nyara palumpa nyurampa ngalturingkunytjaku. Ka palulanguru tjinguru ngalturingkula Pintjimannga pulanya Tjimiyanna ngayulakutu malakungku iyalku nyurala tjungu. Palu tjinguru pula nyurala tjungu pitjanytja wiyangkampa ngayulu ngaltutjara katja-tjiratja pulkara tjituru-tjitururiku.”

¹⁵ Kaya palulanguru katja tjutangku kutjupa kutjupa panya Kainannga ngurara tjuta mantjiralta ma-pakanu ngura panya Itjipaku mani pulkatjara, munuya Pintjimannga kuлу katingu. Munuya rawa ankula wirkanu ngura nyara palula munuya Josephala pupakatira mayatjanmanu kulira wati Itjipanya ngurara-palku.

¹⁶ Ka Josephalu Pintjimannga tjanala tjungu ngaranyangka nyakula wangkangu wati warika panya palumpa wali kanyilpaingka, “Wati nyanga tjananya kati ngayuku walikutu. Munu kuka pungkula paula, panya kałala nyanga kuwari ngayulu ma-pitjala tjanala tjunguringanyi mai kuka ngalkuntjikitja.”

¹⁷ Ka palulanguru wati warika paluru tjananya katingu Josephaku walikutu. ¹⁸ Palu tjana katinyangka nguluringu panya alatjiya kulinu pulkara, “Nyaakulanya palumpa walikutu nyangatja iyanu? Mani panyanguru-mantilanya. Paluru tjinguru alatji kulinu nganaña kutitjura katinytja-palku panya yakutja tjutatja. Palulangurulanya kuwari pitjala mirpanarira wangkaku munu tangkiyi tjuta nganampa mantjira makatiku. Munulanya tjunkuku palumpa rawa warkarinýtjaku mani wiyatja unytju kutju.”

¹⁹⁻²⁰ Munuya alatji kulira wali panya palula wirkara urilta ngarakatira wangkangu wati panya Josephaku war kangka, “Wati wiru, wanyu ngarala kulila. Panya mungatula ngura nyangaku pitjangu mai payamilantjikitja, munula mani ungkula mai mantjira malaku anu. ²¹ Munula ankula ngururpa ngarira yakutja maitjara tjuta alara nyangu mani panya nganaña maiku ungkunytjanya ngarinyangka. Munula kuwari nyanga mani palunya malakungku ngalya-katingu nyuntunya ungkunytjikitjangku. ²² Palu mani kutjupala katingitu mai piruku payamilantjikitjangku. Palu nganaña maingka katu mani ngarinyangka nyakula putu kulinungi, ‘Nganalu nyangatja wanyu tjarpatjunu?’”

²³ Ka wati panya Josephaku war kangku wangkangu tjanala, “Wiya palya, nguluringkunytja wiyaya! Panya nyurampa mamaku godangku mani panyatja yakutjangka tjunu nyurampa. Ngayulu panya mantjinu mani panya nyura ngayunya ungkunytja.” Munu palulanguru wati panya war kangku ankula Tjimiyanna mantjira ngalya-katingu tjailanguru, ka paluru kułangka, malanypa tjutangka kuлу tjunguringu.

²⁴ Ka wati paluru tjananya tjarpatjunu wali unngu munu wangkangu, “Kałala kuwari ngayuku mayatjangku pitjala nyurala tjungungku ngalkuni.” Munu paluru pitingka mina tjutinu tjananku tjina paltjintjaku. Munu paluru pakanu urilkutu palumpa tjanampa tangkiyi tjuta mai ungkunytjikitja.

²⁵ Kaya paltjira wiyaringkula nganmanytju urara tjunangi kit, tjuratja, tjau, mai tału kutjupa kutjupa uwankara Kainantanguru katinytjatjanungku Josephanya ungkula pukulmankunytjikitjangku. ²⁶ Munuya pitjanyangka nyakula palulakutu katingu munuya ungkula tultjungararakatira ngalyangku manta pampura palunya wal kunu.

²⁷ Ka Josephalu tjananya tjapinu, “Palya nyura? Ka nyurampa mama palyatu nyinanyi? Panya nyura mungat palunya ngayula tjakultjunangi.

Ka paluru wanyu wankatu nyinanyi?" Alatji paluru tjanala ngunti tjapiningi mamaku ngurpangku-palku.

²⁸ Kaya wangkangu palula, "Uwa, nganampa mama wankatu nyinanyi pukulpa." Munuya piruku tultjungarakatira tjaru mulapa ngam-palngarala palunya wal^{ku}nu.

²⁹ Ka Josephalu nyangu palumpa małanypa Pintjimannga panya pula ngunytju kutjutja, munu wangkangu watarkitjangku-palku, "Munta-uwa, nyangatja nyurampa małanypa małatja panya mungatu nyura ngayula wangkangi." Munu paluru Pintjimanta wangkangu, "Godalu nyuntunya pukultjungku kanyinma." ³⁰ Munu alatji wangkara Josephanya ma-palku pakara anu tjananya wantikatira ruuma kutjupakutu palumpa malanypaku ulanytjikitja kuta tjutangku nyakunytjaku-tawara. Panya paluru małanypaku pulkara mukuringkupai munu nyakula pulkara pukularira kuta tjutangka mirangka nguwanpa ulangi.

³¹ Munu ulara wiyaringkula yunpa minangka paltjinu tjana ulanytja ilanypa nyakunytjaku-tawara. Munu wiyaringkula małaku pitjala wati panya war^kangka wangkangu mai kuka kulu ngalya-katira taipulangka tjunkunytjaku. ³² Munu Josephalu taipula kutjungka nyinara ngalkuningi kutjungku. Kaya palumpa kuta tjutangku munu małanypa kutjungku kulu taipula kutjupangka nyinara ngalkuningi. Kaya Itjipanya ngurara tjutangku taipula kutjupangka nyinara ngalkuningi, panya tjaka paluru tjana anangu lipuru tjutaku kuraringkupai nguwanpa munuya tjanala mai tjungungku ngalkupai wiya.

³³ Palu Josephaku panya war^kangku tjananya kutarara kutarara taipula kutjungka nyinatjura wananu wanapari wanapari kutanguru malanypakutu. Kaya wanapari wanapari tjunkunyangka nyakula urulyaranu pulkara, "Ai, tjukarurungkulanya tjunu kutanguru malanypakutu."

³⁴ Ka Josephalu palumpa taipulangru mai kuka waina mantjira ungzul'iyanu tjanalakutu ngalkula tjikintjaku. Palu paluru mai kuka pulka mulapalta Pintjimanku ungzul'iyanu. Alatjiya paluru tjana kutarara kutararangku Josephala tjunguringkula ngalkula tjikira paltjaringu, munuya pulkara pukularingu.

44

Pintjimantu Walpayata Palumpa Kutatja Watarkungku Katinytja

¹ Ka palulanguru Josephalu wati panya warka palumpangka wangkangu, "Nyanga tjanampa yakutja tjutangka mai uñinypa panya urara tjaalyngaratjura munu mani panya tjana nyuntunya maiku ungzunytjtja małakungku tjura yakutjangka unngu maingka katu. ² Palu ngayuku walpayata wiru mantjira malanypa małatjaku yakutjangka unngu tjura maningka tjungu." Ka Josephalu alatji wangkanyangka wati panya war^kka paluru palyanu.

³ Ka mungawinki munga-mungangka Josephalu tjananya tangkiyi tjutatjara ma-wantir'iyanu ngura panya Kainantakutu małaku ankun-ytjaku. ⁴⁻⁵ Palu palulangru Josephalu palumpa panya wati war^kka wangkangu, "Warpungkula tjananya wanara nyawa! Tjinguruya ngururpa ma-pitjanyi, munu tjanala wangka alatji, 'Ngayuku mayatja nyurampa mirpañarinyi panya nyura palumpa walpayata wiru mulapa kutitjura katingu. Panya paluru nyurampa wiru mulapa tjukarurungku palyanu, ka nyura nyaaku palunya kuranu? Panya walpayata palangka

paluru kutju tjikilpai. Nyaanguru nyura katingu? Walpayata palatja milmilpa panya kutjupa-ara paluru walpayata unngu mina nyakula tjukarurungku ngurkantankupai ngula kutjupa kutjuparintjaku, panya paluru wati ayinayini. Nyura panya palunya kura pulka mulapa palyanu walpayata palatja katira.’” Alatji Josephalu witunu palumpa warika ankula tjanala wangkanytjaku.

⁶ Ka wati panya palumpa war kangku kulira tjananya wañanu. Munu tjanala wañara tjunguringkula tjananya tjukarurungku wangkangu panya Josephalu wangkanytja uwankara. ⁷ Kaya kulira rapangku alatjitu wangkangu palula, “Wati wiru! Nyaangurulanyan alatji puntura waru-warungku wangkanyi? Nganaña walpayata palunya kanyintja wiyat. Panya nganaña tjukaruru nyinapai kura palyalpai wiya. ⁸ Nyuntu ninti panya nganaña mani panya yakutjangka ngarintytjtja Kainantanguru malakungku katira ungu nyuntunya. Munula nyuntumpa mayatjaku walinguru gold munu tjiilpa kutitjunkunytja wiya alatjitu.”

⁹ Munuya piruku rapangku wangkangu walpayata panyatja kanyintja wiyangku-palku, “Palu tjinguru kutjungku walpayata palunya kanyintyngampa palya nyuntu palunya pungkula iluntara munu nganañanya nyuntumpa rawa war karintjaku kati.”

¹⁰ Ka Josephaku war kangku wangkangu, “Wiya, kuwariña walpayata panyatja nyurampa yakutja tjutangka ngurirku. Ka wati panya paluru walpayata kanyintjanya kutju ngayuku war ka nyinaku, ka nyura kutjupa tjuta palya ngurakutu ananyi.”

¹¹ Ka palulangurya Jacobaku katja tjutangku mapalku tangkiyi tjutanguru yakutja tjanampa mantjira mantangka tjunkula wañara araltjanu. ¹² Ka wati panya war kangku yakutja tjutangka nguriningi walpayata panya palunya. Nganmanytu kuña pulkaku yakutjangka puñu nyangu, munu palumpa malanypaku yakutjangka ngapartji puñu nyangu. Munu puñu nguriña piruku palumpa malanypaku yakutjangka ngapartji puñutu nyangu. Munu alatji nguriña nguriña puñu nyangu malanypa tjutaku yakutjangka. Munu palulanguru malanypa panya malatja mularku Pintjimanku yakutjangkalta nguriña nyakula mantjinu walpayata panya palunya.

¹³ Kaya kuña panya tjuta nyakula kawaru-kawaruringu munuya pulkara tjituru-tjitururira mantara tjanampa añaangitja tjlpirpungu, panya tjakangkuya tjituru-tjitururira ulytja kañantankupai. Munuya puñu kulira yakutja tjuta tangkiyi tjutangka malakungku utitjura ngururnguru malaku anu wali panya palulakutu wati panya Josephaku war kangka tjungu.

¹⁴ Ka Josephanya ngurangka nyinangi palumpa kuña tjuta Judah-nya tjana malaku wirkankunytjaku pañara. Kaya mulapatu wirkara palunya nyakula kuranyu tultjungarakatingu nyakula ngalturingkunytjaku tjanampa. ¹⁵ Ka Josephalu tjananya puntura waru-warungku wangkangu, “Nyaaku nyura walpayata ngayuku kutitjura katingu. Ngayuluña wati ayinayini munuña kutjupangku kutitjunkunyangka palunya nintingku purunypa ngurkantankupai.”

¹⁶ Ka Judah-lu wangkangu, “Wiya, nganaña puñu kulini nyuntula wangkanytjikitjangku. Yaaltjingarala wangkaku panya nyuntu nganampa mulamularingkunytjaku? Wiya puñula wangkanyi. Tjinguru Godalu nganananya kura irititjanguru pikakutuni. Kala uwankara kuwari

nyinaku nyuntula rawa warkarintjikitja, paluru kutju walpayata kanyintjanya kutju wiya, nganana kulu.”

¹⁷ Ka Josephalu tjananya wangkangu, “Wiya, uti wati panya walpayata kanyintjanya kutju nyinama munu ngayuku rawa warkarima unytju mani wiyakitja. Ka nyura palya ara malaku nyurampa mamakutu.”

Judah-lu Pintjimanku Ngalkiltu Josephala Wangkanytja

¹⁸ Ka Judah-lu ngalya-ilaringkula tjapiningi Josephanya wati Itjipanya ngurara-palku kulira. Alatji paluru kunta-kunrangku tjapiningi, “Mayatja, wirun mulapa. Panya nyuntu mayatja Piiranya purunypa nyinanyi pulka mulapa. Wanyuni kulila mirpanarintja wiyangku kananta tjakultjura. ¹⁹ Nyuntu panya munga tu ngananaala tjapinu alatjingara, ‘Nyurampa mama nyinanyi? Malanypa kutjupa kulu?’ ²⁰ Ka nganana wangkangu, ‘Uwa, mama nganampa nyinanyi wati tjlipi munu paluru ma-kanyini nganampa malanypa malatja panya tjlpiringkula wiayakutu utintja. Ka kuta palumpa ngunytju kutjutja iriti wiyaringu, ka palulanguru kutju nyinanyi ngunytju kutjutja. Ka Mamanya palumpa pulkara mukuringanyi.’ ²¹ Ka palulanguru panya alatji tjakultjunkunyangka nyuntu wangkangu ngananaanya palunya ngalya-katira nyuntula nintintjaku. ²² Kala wangkangu panya, ‘Wiya, tjinguru paluru palumpa mama putu wantikatira pitjaku. Tjinguru paluru mama wantikatinyangkampa malangka Mamanya iluku.’ ²³ Ka nyuntu panya wangkangu, ‘Wiya, ngalya-kati alatjitu. Nyura palunya ngalya-katinytja wiyangka ngayulu nyuranya piruku mai ungkunytja wiya. Palu palunya nyakula kutju na nyuranya mai ungkuku.’ ²⁴ Kala kulira panya malaku anu Mamalakutu munula palula tjakultjunu. ²⁵ Ka ngula Mamalulanya witunu Itjipalakutu ankula mai piruku payamilantjaku. ²⁶ Kala wangkangu palula, ‘Wiya, putula ananyi Pintjimannga wiyangka panya mayatjangku nganananya mai ungkunytja wiya palunya katinytja wiyangka. Palu nyuntu Pintjimannga ngananala tjungu wantir’iyannya kala palya ankuku.’ ²⁷ Kalanya mamalu tjituru-tjitururira wangkangu, ‘Nyura ninti panya ngayuku kuringku Raitjiltu katja kutjara kutju kanyinu ngayuku. ²⁸ Ka kutju panya ankula wiyaringu. Tjinguru kuka inura pikatingku palunya patjara wilypanpungkula ngalkula wiyanu panya ngayulu palunya piruku nyakunytja wiya. ²⁹ Kana yaaltjiriku malatja nyanga paluru nyurala piruku ankula kawalirira wiyaringkunyangka. Ngayulu tjinguru pulkara tjituru-tjitururira iluku, panya ngayulu tjlipi mulapa.’ Alatji nganampa mamangku wangkangu ngananaala.

³⁰⁻³¹ “Kana kuwari tjinguru Pintjimannga wiya ma-pitjala wirkankuku, ka Mamalu putu nyakula pulkara tjituru-tjitururira iluku, panya katja nyanga palumpa paluru pulkara mukuringkupai. Munu paluru panya tjlipi mulapa katja-tjiratja iluku. ³² Ngayulu panya wangkangu Mamala, ‘Ngayulu nyuntumpa katja malakungku katinytja wiyangkampa ngayuku titutjara mirpanpa nyinama.’ ³³ Palulanguru na kuwari ngayulu nyuntumpa rawa mani wiyakitja warkarima unytju ngayuku malanypaku arangka. Ka palunya wantir’iyala kuta tju tangka tjungu mamakutu ankunytjaku. ³⁴ Palu putuna ananyi mamakutu palunya wiya. Ngayuku mama putu nyakula tjinguru iluku. Kana alatjiku mukuringkunytja wiya.” Alatji Judah-lu wangkangu Josephala wati Itjipanya ngurarrangka-palku.

45

Josephalu Kuṭa Tjutangka Palurunku Utintja

¹⁻³ Ka Josephalu kulira walytja tjutaku ngalturingkula nguwanpa ulangu, munu wangkangu palumpa war̄ka tjuṭa pakantjaku ur̄ilkutu tjana kutju kutarara kutarara nyinara wangkanytjikitjangku. Munu palulanguru anangu malikitja panya war̄ka tjuṭa ma-pakannyangka pul̄kara ulangi. Kaya ur̄ilta ngaranytja tjutangku kulinu pul̄kara ulanyangka munuya ankula tjakultjunu mayatja pul̄kangka panya Piirala. Ka Josephalu palumpa kuṭa tjutangka munu palumpa malanypangka kuļu wangkangu, “Ngayulu nyurampa malanypa panya Josephanya. Ka ngayuku mama wanyu palya wankatu nyinanyi?” Ka tjana kulira kawaru-kawarurira nguluringu munuya wangkawiyaringkula ngarangi.

⁴ Ka Josephalu wangkangu, “Ngalya-ilariwaya.” Munu ilaringkunyangka piruku wangkangu, “Ngayulu panyaña nyurampa panya malanypa panya Josephanya panya nyura ngayunya iriti manikitjangku unggul’iyanu ngura nyanga Itjipalakutu. ⁵ Palu uti nyura ngulu wiya ngarama ngayunya iyantjatjanu ngura nyangakutu. Panya nyura kutju ngayunya iyantja wiya, panya Godalu kuļuni ngayunya iyanu anangu tjuṭa wankarunkunytjaku. ⁶ Kuwari nyanga panya yiya kutjara ngarala wiyaringu ailuru pul̄ka, palu piruku nyanganguru ma-ngařanyi yiya kutjara maŋkurpa ailuru pul̄ka panya paluruṭu mai puṭu pakaltjingantjaku. ⁷ Ka pala palulanguruṇi Godalu iyanu nyurala kuranyu ngura nyangaku, munuṇi tjunu mayatja pul̄ka nyurampa nyinanytjaku mai wiyaringkunyangka nyuranya maingka wanka kanyintjaku nyurampa tjitji tjuṭa kuļu. ⁸ Ala palatja! Nyura ngayunya iyantja wiyaṭu, palu Godaluṇi ngalya-katingu ngura nyangakutu. Paluruṇi tjunu Piiraku malpa ngali tjungu nyinanytjaku munu ngura nyanga Itjipaku winkiku mayatja nyinanytjaku.”

⁹ Munu palulanguru wangkangu tjanala, “Mapalkuya ara malaku Ma-malakutu munu palula wangka ngayulu kuwari nyurala wangkanytja alatji, ‘Godaluṇi tjunu Itjipaku mayatja. Palu Itjipanya manta pul̄ka ngura tjukutjuku tjutatjara, ka nyuntu mapalku pitja Itjipalakutu ngayula nyinanytjikitja ngura ini Katjinta. ¹⁰ Palu nyuntu kutju wiya. Uwankara ngalya-kati nyuntumpa katja, unṭalpa, pakali, puliri tjuṭa kuļu munu tjiipi nanikuta, puluka tjuṭa kuļu uwankara ngalya-kati nyuntumpa ulytja winki kuļu. Kananta wirura atunymankuku ngayula itingka nyinanyangka ngura Katjinta. Panya ailuru pul̄ka rawatu ngaranyi munu yiya kutjara maŋkurpa ngarala wiyaringkunyangka kutju wiyaringanyi. ¹¹ Kanā nyuntunya munu nyuntumpa walytja tjuṭa kuļu maingka wanka kanyintjikitja mukuringanyi nyuntumpa kuka tjuṭa kuļu mai wiyangka ilunytjaku-tawara.’ Alatjiya ankula tjakultjura Mamala.

¹² “Uwa, mulapa nyura ngayunya nyakula ngurkantananyi malanypa nyurampa. Ka Pintjiman, nyuntu kuļu ngayunya nyakula kuṭa ngurkantananyi. ¹³ Ankulaya ngayuku mamangka tjakultjura panya ngayulu Itjipaku mayatja nyinanytja munu uwankara nyanganpa nyakunytjatjanngku kuļu tjakultjura. Palulanguru ya mapalku ngalya-kati.”

¹⁴ Munu palulanguru wangkara wiyaringkula pul̄kara ampuningi Pintjimannga munu pulanku ampura pul̄kara ulangi. ¹⁵ Ka Josephanya rawa ulara kuṭa tjuṭa kuļu ampura mitamita kutjara nyunytjuningi. Kaya palulanguru kuṭa tjutangku pukularira aṛa tjuṭa wangkangi palula.

¹⁶ Ka wati kutjungku ankula mayatja Piirala tjakultjunu Josephaku kuṭa tjuṭa pitjanytja, ka paluru kulira pukularingu palumpa malpa tjuṭa kuļu.

¹⁷ Munu paluru wangkangu Josephala, “Nyuntumpa kuṭa tjuṭa wangka mai pułka tangkiyi tjutangka luutara ma-katintjaku ngura nyara Kainantakutu. ¹⁸ Munu wangka tjananya mama walytja tjuṭa kuļu mantjira malaku ngalya-pitjanytjaku. Ka ngayulu tjananya ngura wirunya unganyi manta nyanga Itjipala, kaya pukułpa mulapa nyinaku mai pułkangka. ¹⁹ Munu tjananya wakina tjuṭa uwa kaya ma-katira kuri tjuṭa munu tjiti tjuṭa munu mama kuļu mantjira ngalya-kati pakungka-tawara. ²⁰ Palu wangka tjanala ulytja kutjupa kutjupa uwankara tjananya wirkankunyangka wantikatintjaku, panya ngayuluña tjananya wirkankunyangka ulytja wiru, kutjupa kutjupa wiru tjuṭa kuļu nyanganguru ungkuku tjananya pukułpa nyinanytjaku.” Alatji Piiralu Josephala wangkangu.

Josephalu Tjananya Mai Pulkatjara Mamakutu Iyantja

²¹ Ka Josephalu nyangatja kulira tjakultjunu tjanala. Munu tjananya ungu wakina tjuṭa, munu mai kuļu ungkul'iyau tjana ankula ngururpa mungaringkula ngalkukatintjaku. ²² Munu tjananya mantara kutju kutju ungu tjarpanytjaku. Palu Pintjimannga paluru ungu mantara kutjara mañkurpa munu palunya ungu mani pułka mulapa, panya Pintjimannga palumpa malanypa pula ngunytju kutjutja. ²³ Munu tangkiyi 10 luuta pulkatjara palumpa mamakutu ungkul'iyau kutjupa kutjupa wiru tjutatjara Itjipalanguru. Munu paluru tangkiyi 10 kutjupa ngunytju tjuṭa kuļu ungkul'iyau mai uñinypatjara munu mai kutjupa kutjupa tjutatjara nyumatjara kuļu panya ngururpa mungaringkula ngalkuntjaku. ²⁴ Munu tjananya wangkangu, “Ankulampaya pikaringkuwiya pitjalinama.”

²⁵ Kaya Itjipalanguru ma-pakañu munuya ankula ngula wirkanu palumpa tjanampa mamaku ngurangka Kainanta. ²⁶ Munuya wirkara mamangka wangkangu, “Mama, nyuntumpa panya katja Josephanya wanka nyinanyi. Paluru manta nyara Itjipala mayatja pułka nyinanyi ngura uwankaraku.”

Ka mama Jacobalu pułkara urulyaraña wangkangu, “Ma-wanti! Nguntinatju kulinu ilunyangka-palku.” Munu paluru pułtu mulamularingangi.

²⁷ Kaya tjakultjunu Josephalu wangkanytja uwankara. Ka paluru kulira wakina tjuṭa kuļu nyakula mulamularingu munu palumpa katjaku pukularira wangkangu, “Mulapa ngayuku katja wanka nyinanyi. ²⁸ Wanyu kañatju ngañmanytju ankula nyawa ilunytja kuwaripangka.”

46

Jacobanya Tjana Itjipalakutu Ankunytja

¹⁻⁷ Munu palulanguru paluru pirtji-pirtjingulta ankunytjikitja palumpa katja tjuṭa kuļu. Munuya ulytja uwankara utulura uititjunu tangkiyingka wakinangka panya Itjipaku mayatjangku tjanampa iyantjitjangka. Munuya kuka tjuṭa kuļu tjungunu katintjikitjangku puluka, tjiipi, nanikuta. Palulanguruwa katja tjuṭangku mama panya tatitjunu munu tjanampa kuri tjuta, tjiti kuļunypa tjuṭa kuļu wakina tjutangka. Munuya ma-pakañulta Itjipalakutu uwankara katja uñtalpiti, mingkayi tjuṭa, pakali puliripiti kuļu.

Munuya ankula ngururpa ngaratjunu ngura Piitiipala. Ka Jacobanya ukalingu ngura pala palula, munu pitjilta katu kuka pungkula tiliwakara Godanya ungu paluru pukularinytjaku. Panya palumpa mamangku Isaacalu palu purunypatu ungkula walkulpai God panya palunyatu. Palulanguru mungangka tjukurmankunyangka Godalu Jacobala wangkangu mirara, “Jacob! Kuliniñin?”

Ka Jacobalu wangkangu, "Uwa kuliniñanta."

Ka Godalu palula wangkangu, "Ngayuluña Godanya nyuntula wangkanyi, panya nyuntumpa mamangku ngayunya walkulpai. Ka nyuntu palya Ittipala ankula nyinama nguluringkunytja wiya panya ngayuluña nyurala tjungu nyinaku. Mununa nyuranya nyara palula nyinanyangka palyalku nyurampa walytjapiti ma-tjutaringkunytjaku malatja malatja. Panya nyuntumpa pakalì puliripitingku tjitji tjuṭa mulapa kanyilku, nyuntumpa kulpalpitingku ngunytjupitingku kulu. Alatjingara nyuntulanguru walytja tjuta mularariku malatja malatja. Ka ngula mulapa nyuntumpa walytjapiti malatja tjuṭa mulararinyangka ngayulu piруku tjananya ngalya-katiku malakungku ngura nyanga Kainantakutu. Mulapanा nyanga alatjingalku. Ka nyuntu ngula katja Josephala mirangka ilunyi." Alatji Godalu wangkangu Jacobala paluru pukularinytjaku katjangka mirangka ilunytjaku. Munuya Piitjiipala ngarira tjinturingkula ma-pakañu Ittipalakutu.

⁸⁻²⁵ Tjana panya tjuṭa mulapa anu Ittipalakutu Jacobaku walytjapiti. Panya Jacobaku kuri ngañmanyitjangku Liyalu kanyinu katja mañkur-mañkurpa munu unṭalpa kutju ini Tiinanya. Paluru panya Rupinngawarara kanyinu, ka paluru pininu Tjimiyanga, ka paluru pininu Levinya, ka paluru pininu Judah-nya, ka paluru pininu Itjakanya, ka paluru pininu Tjipulunnga, ka Tjipuluntu pininu kungka Tiinanya.

Ka katja nyanga tjana katja tjuṭa ngapartji utinu Jacobaku pakalipiti. Rupintu katja kutjara kutjara utinu ini nyanganpa – Anakanya, Palunya, Itjurangga, Kaaminya tjananya. Ka Tjimiyantu katja mañkur-mañkurpa utinu ini nyanganpa – Tjimuwilnga, Tjaminnga, Awutanya, Tjakingga, Tjuuwanya, Tjuulanya tjananya. Ka Levilu utinu katja mañkurpa ini nyanganpa – Kiitjannga, Kawatjanya, Mirarainya tjananya. Ka Judahlu utinu katja mañkur-kutjara ini nyanganpa – Tjilanya, Pirijinya, Tjiranya tjananya. (Palu palumpa katja kutjara ngañmanypa wiyaringu ngura panya Kainanta ini nyanganpa – Uurnga pula Anannga.) Ka Itjakalu katja kutjara kutjara utinu ini nyanganpa – Tulanya, Puwanya, Tjatjupanya, Tjimirannga tjananya. Ka Tjipuluntu katja mañkurpa utinu ini nyanganpa – Tjiranya, Ilannga, Tjaalilnga tjananya. Anangu nyanga paluru tjana uwankara Liyalanguru utiringu Tiinanya kulu anangu 33.

Ka palulanguru Jacobaku kuri malatjangku Raitjiltu tjitji wiya nyinara kungkawara panya palumpa warkaripai Jacobanya ungangi ini panya Pilanya palula tjunguringkunyangka tjitji utintjaku. Ka Jacobalu Pilala katja kutjara utinu Dannga pulanya Napatalinya. Ka nyanga paluru pula ngapartji utinu katja tjuṭa, Danku kutju ini Uutjimanya, Napataliku kutjara kutjara ini nyanganpa – Tjatjilanya, Kuninya, Tjitzanya, Tjilimanya tjananya. Nyanga paluru tjana panya Raitjilku ngañatinguru Pilalanguru utiringu anangu 7.

Ka palulanguru Liyalu kungkawara panya palumpa warkaripai Jacobanya ungangi ini panya Tjilpanya palula tjunguringkunyangka tjitji utintjaku. Ka paluru kanyinu katja kutjara Kaatanya munu Atjanya. Ka Kaatalu utinu katja mañkur-kutjara kutjara ini nyanganpa – Tjipannga, Aakinya, Tjuninya, Ittipannga, Irinya, Aratanya, Arilinya tjananya. Ka Atjalu utinu katja kutjara kutjara ini nyanganpa – Iminanya, Ittipanya, Ittipanya, Piriyanya tjananya munu unṭalpa kutju ini Tjiranya. Ka Atjaku katja kutjungku Piriyalu katja kutjara ngapartji utinu Atjaku pakalì kutjara ini nyanganpa – Iipanya pulanya Malkiyilnga. Nyanga paluru tjana panya Liyaku ngañatinguru Tjilpalanguru utiringu anangu 16.

Ka palulanguru Jacobalu katja kutjara utinu Raitjilta panya Josephanya pulanya Pintjimannga. Ka Josephalu ngura panya Itjipala katja kutjara utinu palumpa kuringka ini Atjinatjala. Katja paluru pula panya ini nyanganpa – Manatjanya munu Ipuraimanya. Ka Pintjimantu utinu katja tjuṭa mulapa 10-pa ngura nyara Kainanta nyinaralpi ini nyanganpa – Pilanya, Pikanya, Atjapilanya, Kiranya, Naimannga, Iiyinya, Ratjunya, Mupiminya, Uupiminya, Aatanya tjananya. Nyanga paluru tjana Raitjiltanguru utiringu aŋangu 14.

²⁶⁻²⁷ Ka Jacobaku katja uŋtalpa tjuṭa, pakali puliripiti, kulypalpiti paluru tjana tjunguringkula 66 aŋangi ngura panya Itjipalakutu. Ka Jacobanya tjana Itjipala wirkara Josephala palumpa katja kutjarangka tjunguringkula aŋangu 70-ringulta. Kaya Jacobaku mingkayi tjuṭa kuļu anu.

Jacobanya Tjana Itjipala Wirkankunytja

²⁸ Ka Jacobanya tjana panya ankula ankula manta panya Itjipala tjarpangu. Ka mamangku wangkangu katja kutjungka Judah-la alatji, “Nyuntu wanyu ma-kuranyurira wangka Josephala ngalyangaparikatinytjaku ngura pala Katjintakutu.” Ka paluru mulapaṭu wangkanyangka kuranyurira Josephala wangkangu.

²⁹ Ka tjana Katjinta wirkankunyangka Josephanya palumpa tjinkangka tatira ngaparikatingu palumpa mama nyakunytjikitja. Munu palula wirkara nyangu palumpa mama munu pulanku pulkara ampura ulangi pukularira, rawa nyakuwiya nyinanytjatjanungku. ³⁰ Ka Jacobalu wangkangu katjangka, “Kuwariṇa kurunpa pukulpa mulararingu, mununa palyalta ilunyi nyuntunya nyakunytjatjanu.”

³¹ Palulanguru Josephalu wangkangu tjanala, “Wanyu kaṇa ankula wangka Itjipaku mayatjangka Piirala nyura panya pitjanytja nyara Kainantanguru. ³² Ngayulu wangkaku palula panya nyura puluka, tjiipi, nanikuta tjuṭa Kainanta kanyintjatjanungku uwankara ngalya-katingu nyurampa ulytja tjuṭa kuļu kutjupa kutjupa uwankara. ³³ Ka mayatja Piiralu nyuranya altira tjapilklu alatji, ‘Warka nyaangka warkaripai nyura?’ ³⁴ Ka alatji tjapinnyangka nyura palula wangka, ‘Nganaṇala puluka, tjiipi, nanikuta tjuṭa kanyilpai nganampa mamangka tjamungka arangka.’ Ka nyura alatji wangkanyangka paluru wangkaku nyura nyinanytjaku ngura nyanga Katjinta. Panya Itjipanya ngurara tjuṭangkuya aŋangu kuka kanyilpai tjuṭa wantipai tjungu nyinawiyangku. Pala palulanguru Piiralu nyurala wangkaku maunṭalpa nyinanytjaku ngura nyanga Katjinta.” Alatji Josephalu wangkangu palumpa walytja tjuṭangka.

47

Josephalu Kuṭa Tjuṭa Piiralakutu Katinytja

¹ Munu palulanguru Josephalu kuṭa maṇkur-kutjara ngurkantara katingu mayatja panya Piiralakutu. Munuya wirkara Josephanya kutjulta ngaṇmanypa tjarpangu munu wangkangu Piirala, “Ngayuku mama munu kuṭa tjuṭa pitjangu Kainantanguru puluka, tjiipi, nanikuta winkitjara ulytja winkitjara kuļu. Munuya wirkara nyinara patanī ngura nyara Katjinta. ²⁻⁴ Ka nyangaṇa katingu ngayuku kuṭa maṇkur-kutjara nyuntu nyakunytjaku.”

Ka Piiralu nyakula wangkangu tjanala, “Warka nyaangka nyura warkaripai?”

Kaya palula wangkangu, “Nganaṇa puluka, tjiipi, nanikuta kanyilpai nganampa mamangka tjamungka arangka. Munula pitjangu ngura

nyangangka nyinanytjikitja panya Kainannga ukiri wiya kuka tjutangku ngalkuntjaku. Kala wanyu palya nyinaku ngura nyarangka, Katjinta?"

5-6 Ka Piiralu wangkangu Josephala, "Palyaya pitjangu nyuntumpa mama munu nyuntumpa waltyjapiti. Ka Itjipanya nyanga manta pulka, ka paluru tjana palya ngura nyara Katjinta ngurara rira nyinaku, panya ngura nyaratja palya mulapa. Ka-puta tjinguru nyuntumpa waltyja kutjupa tjuta kuka palyanyku kanyilpai nyinanyi. Palunya tjananya-puña wangka, kaya pitjala kuka nyanga ngayuku tjuta kuлу kanyinma."

7-8 Palula malangka Josephalu palumpa mama Jacobanya ngalyakatingu Piiralu nyakunytjaku. Ka Jacobalu wirkara Piiranya wangkara pukulmanu. Ka Piiralu palula tjapinu, "Nyuntu yaalara iti ngaringu?"

9-10 Ka paluru wangkangu, "Iriti mulapanा ngaringu, panya yiya nampa nyangatja 130 nyinangi. Mununa ngura nyaranta rawa parangarangi. Palu ngayuku mama munu tjamu pula rawa mulapa nyinangi ngayula waintara. Ka ngayuluна pulala ngatalpa nguwanpa nyinangi mununa kutjupa tjutanguru rawa tjituru-tjituru para-ngarangi." Munu alatji wangkara wiyingkula Jacobalu Godala tjapinu Piiranya pukulmankunytjaku. Munu palulanguru anulta ngurakutu.

11-12 Ka Josephalu kulinu Piiralu wangkanytja munu palumpa mama, kuła tjuta, waltyja uwankara katira tjananya ngura panya Katjinnga ungu alatji tjananku kukatjara nyinanytjaku manta panya Itjipala. Ka ngura nyara palula itingka ngura tawunu pulka ngarangi ini Ramatjinya. Ka Josephalu tjananya uwankara mai rawangku ungukukatingi pukulpa nyinanytjaku.

Anangu Tjutangku Mai Josephala Mantjintja

13-14 Ka ailuru panya rawa ngaranyangka ngura uwankarangka Itjipala Kainanta kuлу mai pakantja wiya alatji ти ngarangi. Kaya anangu tjuta палтјатјиратјарира wailu-wailuringu munuya Josephalakutu rawa pitjangi maningka mai payamilantjikitja. Ka mani panyatja paluru katipai Piiralakutu. Palu tjana maningka mai payamilara mani wiyaningi. **15** Palulangurya mani uwankara wiyingkunyangka Itjipanya ngurara tjutangku Josephalakutu pitjala ngatjiningi mai ungkunytjaku alatji wangkara, "Nganampa mani wiyingu. Mailanya uwa палтјаку ilunytjaku-tawara. Nyuntun mai pulkatjara."

16-17 Ka Josephalu wangkangu, "Mani wiyangkampaya kuka puluka tjiipi kutjupa kutjupa uwankara ngalya-katira uwa, kaña nyuranya mai ungkuku." Kaya palulanguru puluka, tjiipi, nanikuta, tangkiyi, nyanytju uwankara maikitjangku katira ungangi. Munuya mai mantjira ngalkula wanka nyinangi nyara palulanguru.

18-19 Palu kuli kutjupangka palula malangkaya piruku pitjangu palulakutu maiku ngatjintjikitja. Munuya pitjala wangkangu, "Mayatjan wiru. Nyuntu panyan mani kuka puluka, tjiipi kutjupa kutjupa uwankara kanyini nganaна ungkunytja. Kala mantangka kutjulta nyinanyi. Ungamalanya ilunytjaku-tawara mai. Palu nyuntu mai ungkuwiyangku wantinyangkampa nganaна ilura wiyingkula ka manta kutjuringkuku. Palu wanyu paama nyanga nganampa mantjila mayatja Piiraku nganananya mai ungkula. Munu nganananya kuлу mantjila palumparinytjaku, kala nganaна palumpalta warkarima palumpa paama tjutangka. Alatji palyala munulanya uwa mai uninypa nyuma palyara ngalkuntjaku munu uninypa kutjupa kuлу mantangka tjunkula mai kutjupa pakaltjingantjaku."

²⁰⁻²¹ Ka Josephalu tjananya mai ungkula tjanampa paama tjuta Itjipala winkingka mantjinigi mayatja Piirakurintjaku. Panya ailuru pulka rawa ngarangi, kaya paama kanyilpai uwankarangku tjanampa paama Piiranya ungangi maikitjangku. Munuya anangu Itjipanya ngurara uwankara Piiraku war̄kariningi manikitja wiya maikitja kutju. ²² Palu Josephalu watı tjukurtjara tjutaku paama tjuta payamilantja wiyatı, panya Piiralu tjananya inma kanyinnyangka mani ungkupai, kaya mani pala palula mai tjananku payamilaningi.

²³ Munu Josephalu anangu uwankarangka Itjipala nyinanytja tjutangka wangkangu, "Panya ngayuluña mantjinu uwankara nyuralanguru Piiraku mununa nyuranya kuļu mantjinu nyura Piiraku war̄karintjaku. Mununa kuwari nyuranya unganyi uninypa tjuta mai panya nyara mirka ngarintjtanguru nyura mantangka tjunkula mai kutjupa pakaltjingantjaku. ²⁴ Ka ngula mai pakannyangka katara uṭulurampa kanira nyura kutjungku kutjungku mai uninypa tjara-tjarara uṭulu 5 palyala munu palulanguru uṭulu kutju mayatja Piiranya uwa, munu uṭulu 4 palya kanyinma nyuranku mai palyara ngalkuntjikitjangku munu uninypa kuļu mantangka tjunkula pakaltjingantjikitjangku."

²⁵ Kaya palula wangkangu, "Nyuntu mayatja palya. Nyuntu nganañanya wankarunu ilunytjaku-tawara, kala nganana palya war̄kariku mayatja panya Piiraku." ²⁶ Nyanga alatjiya nyinangi Josephalu wangkanytjtangka kulira munuya yiya kutjupa yiya kutjupa rawangku mai urara tjarara tjara tjukutjuku tjukutjuku Piiranya katira ungangi. Palu watı panya tjukurtjara tjutaku paama tjuta Piiralu mantjintja wiyangku wantingi, kaya kanyira mai walytjangku pakaltjinganingi munuya Piiranya tjarara tjara ungkunyta wiya.

²⁷ Ka Jacobanya, panya ini kutjupa Israelnga, munu palumpa walytjapiti pukulpa nyinangi manta Itjipala ngura nyara Katjinta. Munuya tjana tjitji tjuta kanyinu. Ka uwankara tjanampa pulkaringu ulytja, mani, mai, puluka, tjiipi, nanikuta uwankara.

Josephalu Jacobanya Kalkuntja

²⁸ Ka Jacobanya nyara palula nyinangi kuļi nyinnga 17 ara munu palulatu tjlpi mulararingu yiya tjuta mulapa 147 nyinanytjatjanu. ²⁹⁻³¹ Palulanguru paluru uparingkula kulinu, "Ngayulu ilunytjaku tjinguru ilaringu." Munu paluru witunu anangu kutjupa ankula palumpa katja Josephanya altira ngalya-katinytjaku. Ka Josephanya pitjanyangka paluru ngaripaingka nyinara wangkangu, "Ngayulu wiyingkunyangkañi katira ngayuku mamangka panya itingka tjuṇutjura ngura nyara Kainanta. Wanyuni nyuntu kalkula ngura nyanga Itjipala tjuṇutjunkunyta wiyangku katira Mamala itingka tjuṇutjunkunykitjangku."

Ka Josephalu wangkangu, "Uwa, palyananta nyuntumpa mamangka itingka tjuṇutjunanyi."

Ka mamangku wangkangu, "Palu ngayulu mulamularingkunytyaku ngayunya kalkula alatji. Pañtanı pampula, panya nyuntu ngayunya pañta pampura kalkuntjatjanungku mała puťu wantinyi."

Palulanguru Josephalu pañta pampunu munu kalkura wangkangu, "Ngayulu nyuntunya ilunyangka katira tjuṇutjunanyi ngura panya Kainanta tjamula itingka." Ka kalkunyangka Jacobanya pukularingu munu ngaripaingka waṭungararakatira Godanya walkunu, palumpa pukularira.

48

Josephalu Tjamu Kutjara Jacobalakutu Katinytja

¹ Ka Josephanya ngurakutu małaku ankula nyinangi. Munu ngula kulinu palumpa mama pikatjararingkunyangka. Munu palumpa katja kutjara Manatjanya Ipuraimanya pulanya katingu tjamu nyakunytjaku. ² Ka wirkankunyangka aŋangu kutjupangku tjarpara wangkangu Jacobala, “Nyuntumpa katja Josephanya pitjangu.” Ka Jacobalu kulira tiwilpa ngarintjatjanu purkara pakara nyinangi ngaripaingka. Ka Josephanya ma-tjarpangu katja kutjara kułu.

³⁻⁴ Ka Jacobalu nyakula wangkangu, “Iritini ngayula God witulyanya utiringu ngura nyara Latjala manta Kainanta mununi pukulmanu wangkara, ‘Ngayulu nyuntunya ungguku tjiti tjuta. Kaya nyuntumpa katjapitingku tjiti tjuta mulapa utilku ka małatjangku małatjangku tjiti tjuta mulararinjtjaku palyalku nyuntumpa walytjapiti tjuta mulapa. Ka ngayulu manta nyanga Kainannga tjananya ungguku tjana walytjaringkula titutjara nyinanytjaku.’ Alatjini Godalu wangkara pukulmanu. ⁵ Ka nyuntumpa nyanga katja kutjara panya iti ngaringu ngura nyanga Itjipala ngayulu pitjanytja kuwaripangka. Palu ngayulu palunya pulanya kuvari katjanmananyi paluru pula mama tjuta purunypa nyinanytjaku panya Rupinnga pula Tjimiannga purunypa. ⁶ Palu ngula nyuntu katja kutjupa tjuta utinnyangkampa palunya tjananya ngayulu katjanmankunytja wiya, ka paluru tjana ngula Kainantakutu ankula ngura walytjatja mantjintja wiya kuła kutjaraku ngurangka kutju nyinaku Ipuraimaku pulampa Manatjaku. ⁷ Uwa, ngayulu palunya pulanya katjanmananyi pulampa panya kaminguru, ngayuku panya kuri Raitjiltanguru, panya ngayulu palumpa pukara mukuringangi. Palu panya paluru nganmanypa wiyaringu ngura nyara Kainanta iti panya Pintjimannga kanyira, nganaña ngura panya Mitjupu-taimiyalanguru pitjala. Kaña kurunpa pukara iluru-ilururingu, mununa palunya tjuṇtjunu iwarangka itingka ngura tawunu Ipuratjala itingka.” Alatji Jacobalu katjangka wangkangu Josephala. (Kuwariya ngura panya “Ipuratjanya” ini kutjupa wangkapai “Bethlehemanya.”).

Jacobalu Pakali Kutjaraku Godala Tjapintja

⁸⁻¹⁰ Munu Josephala wangkara wiyaringkula waintara nyangu palumpa pakali kutjara ngaranyangka. Paluru pulanya nganmanytju nyakunytja wiya ngaranyangka, panya paluru kuru paulpa. Munu paluru nyakula wangkangu, “Yaalitja kutjara palatja?”

Ka Josephalu wangkangu, “Nyanga paluru pula panya nyuntumpa pakali kutjara, panya Godaluni ungu ngura nyanga Itjipala.”

Ka Jacobalu wangkangu, “Ngalya-kati pulanya ngayulakutu kaña Godala tjapilku pulanya palyara pukulmankunytjaku.” Munu pulanya ngalyakatinyangka ampura mitamita kutjara nyunytjuṇu.

¹¹ Munu wangkangu Josephala, “Nguntina kulinu nyuntu nganmanypa ilunyangka-palku, mununa nyuntunya-tjiratja rawa tjituru-tjituru nyinangi nyuntunya piruku nyakunytjikitjangku kulintja wiya alatjitu. Palu Godalu ngayunya ngalya-katingu Itjipalakutu nyuntunya nyakunytjaku nyuntumpa katja kutjara kułu.” ¹² Ka palulanguru Josephalu pulala wangkangu, “Alatjultulta wanti pula tjamunya ampuntja wiyangku, palya.” Munu Josephanya mamangka tultjungarakatira ngalyangku manta pam-punu palunya walkuntjikitja.

13-14 Munu pakara wangkangu palumpa katja kutjara tjamungka itingka tultjungarakaninytjaku kata witiра pulampa Godala tjapintjaku. Munu paluru kuتا tjamu wakungka tjunu munu malanypa tjampungka, panya tjakangku kuta pampulpai marа wakungku panya paluru nganmanyitja. Palu Jacobanya mukuringu katja malatja marа wakungku pampuntjikitja paluru kuranyu ngaranytjaku. Munu paluru marа waku tjunu malanypangka Ipuraimala munu marа tjampu tjunu ku tangka Manatjala.

15-16 Munu Josephanya pukulmankunytjikitjangku Godala tjapinu pakali kutjaraku alatji wangkara, “Mayatja God, nyuntunya ngayuku tjamu Aipuramalu kulira walkuningi ngayuku mama Isaacalu kulu. Kanı nyuntu panya rawangku ngayunya katirinangi munuñin wankaru kanyiningi. Kanı nyanga kuwari nyuntula tjapini atunyту kanyintjaku nyanga pulanya. Ngayulu nyanga pulanya katjanmananyi, ka nyuntu wanyu pulanya palyanma. Kaya anangu tju tangku pulanya nyakula kulikku, ‘Munta, Godalu nyanga pulanya palyara kanyini panya paluru Jacobanya Isaacanya Aipuramanya tjananya palyara kanyiningi, palu purunytju ту pulanya kanyini.’ Alatjiya palunya pulanya ngurkantankunytjaku palyanma. Munu Mayatja God, nyuntu pula kurtjararingkula tjitji tju та utintjaku palyanma palula pulalanguru waltya tju та mulararinytjaku malatja malatja.”

17-18 Ka Josephalu mamangku marа tjunkunyangka nyakula tjituru-tjitururingu kuta katangka marа waku tjunkunytja-tjiratja. Munu mama marа witiу Ipuraimala katanguru katura kuta katangka tjunkunytjikitjangku munu wangkangu, “Mama, nyuntu ngunti marа tjunanyi. Kuta nganmanyitja nyangatja. Tjura marа waku palula katangka.”

19-20 Ka mamangku wiyanmankula wangkangu, “Wiya, palya ngayulu kulini. Kuta Manatjalanguru waltya tjutaringkuku palu malatjakulta tju та mularariku kutaku tjitjingka waintara.” Alatji Jacobalu malanypa katangka marа waku tjunkula wangkangu paluru waintankunytjaku pulka nguwanpa, munu kuta katangka marа tjampu tjunkula wangkangu ngatalpa ngaranytjaku. Munu piruku pakali kutjarangka wangkangu pukularinytjaku alatji, “Israelnga ngurara tju tangku nyupalinya rawangku kulikku watarkurintja wiyangku palya mulapa nyinakatinyangka nyakula. Munuya kulintjatjanungku tjanayanku ngapartjilta Mayatja Godala tjapilku nyanga alatji, ‘Mayatja God, nyuntu wanyu nyanganpa ngapartji palyanma Ipuraimanya Manatjanya pula purunypa tjukaruru nyinanytjaku.’”

21 Munu pulala wangkara wiyingkula palumpa katja Josephala ngapartji wangkangu, “Nyanga kuwaria uparingkulalta ilunyi. Palu Godalu nyuranya rawangku kanyilkku munu ngula nyuranya malakungku katiku Kainantakutu manta panya nganampakutu. Panya manta nyara paluru Godalu Aipuramanya Isaacanya ngayunya ungkunytja. **22** Ka panya manta nyara palula ngururpa ngura ini Tjikimanya ngaranyi ngura wiru mulapa mina pulkatjara. Panya ngura pala palula anangu Amurkunu tju та nganmanypa nyinangi, kanı panya tjanampa pikaringkula tjananya paira iyanu. Kanı kuwari ngura nyara wiru palunya nyuntunya kutju unganyi nyuntumpa kuta tju та ungkunytja wiyangku.” Alatji Jacobalu palumpa katja Josephanya wangkara pukulmanu.

1-2 Palula małangka Jacobalu palumpa katja uwankara altingu palula tjanala wangkanytjikitjangku. Kaya palulakutu ngalya-pitjangu. Ka tjanala wangkangu, “Katja tjuta ngalya-ilariwaya, kaña nyurala ngañmanytu tjukurpa wangka ngula nyanga alatjirintjaku. Kaya kulinma ngayulu kuwari wangkanyangka panya ngayuluña nyurampa mama Israelnga.” Munu paluru wangkangi katja kutju kutjungka tjukurpa kutjupa kutjupa tjuta katja ngañmanyitjanguru małatjakutu. Palu paluru tjukurpa katja tjutaku kutju wangkawiyangku uwankaraku kutju wangkangi pakalipitiku puliripitiku ngunytjupitiku kulypalpitiku małanypitiku uwankaraku małatja małatjaku.

3-4 Munu paluru Rupinta-warara wangkangu nyanga alatji, “Rupin, nyuntu ngayuku katja ngañmanyitja, panya ngayulu kunpu pulkangku nyuntunya utinu, ka nyuntu wati kunpu pulka nyinangi kutjupa tjutangka waintara. Palu nyuntu wati inura nguwanpa panya nyuntu ngayuku kuringka ngunti tjunguringu kura mulapa. Munun palulanguru kuranyu pulka nyinanytjatanu nyuntumpa małanypa tjutangka małaringkula tjukutjuku nyinaku, nyuntumpa walytjapiti małatja małatja kułu.”

5-7 Munu palulanguru Jacobalu Tjimiyanta pulala Levila wangkangu nyanga alatji, “Nyupali panya pikati kutjarangku ngunti anangu tjuta waru-waruringkula tjula warangka wakara wiyanu, munu palu purunypaпу nyupali puluka tjuta marpanypa unytjungku kaṭanu kaya puṭu anangi, ngaltutjara. Uwa, nyupali panya kampangkaṭu tjaalymara wangkara kulilpai anangu kutjupa tjuta pikangku pungkunytjikitjangku, kaña nyupalila tjunguringkunytja wiyangku wantinyi alatjitu. Pala palulanguruна Godala tjapintja wiya nyupalinya pukulmankunytjaku, munu nyupalimpa walytjapitiku kułu tjapintja wiyaṭu. Panya nyupali pikati pulka kutjara, kaña palulanguru nyupalinya manta ungkunytja wiyangku wantinyi ngura nyara Kainanta, kaya nyupalimpa walytja tjuta malatja malatja ngura walytjangka nyinanytja wiyaringkula ngura tjanampangka kutjupa nyinaku ngayuku katja kutjupa tjutaku ngurangka.”

8-9 Palulanguru Jacobalu Judah-la ngapartji wangkangu nyanga alatji, “Nyuntumpa walytjapitingku mirpaṇtju tjuta pikakitja pitjanyangka pungkula wililytjingalku, ka nyara palulanguru nyuntumpa kuṭa malanypa tjutaku walytjapitingku tultjungarakatira tjananya mirawaniku nyuntumpa walytjapiti. Panya paluru tjana witulya pulka mulapa lion purunypa, kaya kutjupa tjutangku tjananya nyakula pulkara nguluringkuku munuya wantiku alatjitu tjanampa pikaringkunytja wiyangku. **10** Panya nyuntumpa walytja tjuta mayatja pulka nyinaku malatja małatja kułu mayatjatu wanapari wanapari nyinaku tiṭutjara, ka anangu ngura kutjupitja kutjupitja tjutangku tjanampa nguranguru wiru tjuta katira tjananya ungkuku mayatja pulka nyinanyangka. **11-12** Ka nyara nyuntumpa walytjapitiku ngurangka puṇu kiripitji tjuta mulapa pakalku manta lipiwanu, kaya waina pulka mulapa tjkurra palyalku. Munuya kuru tjitin-tjitinpa nyinaku waina pulka tjkintjatanu. Ka puluka nanikuta winki kułu ngura nyara palula para-ngaraku ukiri pulkangka, ka nyuntumpa walytjapitiku katiti piṛanpa mulapa ngaraku puluka, nanikuta ipi rawangku tjkintjatanu.”

13 Palulanguru Jacobalu Tjipulanta ngapartji wangkangu nyanga alatji, “Katja, nyuntumpa ngura ma-ngaraku ngura ini Tjaitantakutu, ka nyuntumpa walytjapiti uru pulkangka itingka nyinaku. Ka nyara palulakutu pauta pulka tjuta walpa pulkangka-tawara pitjala nyinaku.”

¹⁴⁻¹⁵ Munu palulanguru Itjakala ngapartji wangkangu alatji, “Katja, nyuntumpa walytjapiti tangkiyi kuŋpu mantangka pakuringkula ngarintja purunypa luuta pulkatjara. Panya tjana para-nyakula kulilkku, ‘Muntauwa, ngura wiru nyangatja.’ Munuya ngura pala palula pulkarā war̄kariku ulytja pulkatjararingkunyjikitja, munuya pulkarā war̄karira puṭu wantiku kutjupangku tjananya pauntjingara war̄kamilantja purunypa.”

¹⁶⁻¹⁷ Munu palulanguru Danta ngapartji wangkangu alatji, “Katja, nyuntumpa panya ngunytju Pilanya, ngayuku kuri Raitjilku panya war̄karipai. Palu nyuntu katja mulapa ngayuku nyuntumpa kuta tjuta purunypa, panya nyuntumpa walytjapiti ma-tjutaringkuku malatja malatja ngayuku walytjapiti alatjitu nyuntumpa kuṭa tjutaku walytjapiti purunypa. Kaya paluru tjana kutjupa kutjupa uwankara tjukarurulku Israelkunu uwankaraku. Munu paluru tjana tjaultji nganyiri pulka nyinaku liru mulya-purkutitji purunypa, panya liru paluru iwarangka itingka paṭara ngarira nyanytju wati-pitjanyangka nyakula tari patjalpai, ka nyanytju waṛarakatira wati panya palula tatintjanya punkatjingalpai, palu purunypa tjana warmala tjuta pitjanyangka paṭara urulyku pungkuku.”

¹⁸ Munu katja panya 7 wangkara wiyingkula Jacobalu Godala tjukutjuku wangkangu alatji, “Mayatja, ngayulu nyuntumpa paṭani ngananya ngalkira wankarunkunyjaku.”

¹⁹ Munu palulanguru Jacobalu katja kutjupa tjutangka kuṭu wangkangi Kaatala-warara nyanga alatji, “Katja, wati mirpantju tjuta warmalarira pitjaku nyuntumpa walytjapiti pungkunyjikitja, palu paluru tjana witulya pulkangku tjananya pungkula ngulura wililytjingalku.”

²⁰ Munu palulanguru katja kutjupangka Atjala ngapartji wangkangu nyanga alatji, “Katja, nyuntumpa walytjapiti mai wiru mulapa pakaltjin-galku, kaya mayatja pulka tjutangku tjanala payamilalku.”

²¹ Munu palulanguru Napatalila ngapartji wangkangu nyanga alatji, “Katja, nyuntumpa walytjapiti malu inura purunypa pukulpa parangaraku munuya tjtiti wiru tjuta kanyilku.”

²² Munu Josephala ngapartji wangkangu nyanga alatji, “Katja, nyuntumpa walytjapiti nyaa purunypa, panya puṇu kiripitji karu urutjarangka itingka pakara pulkaringkula mai pulkatjararingkupai, palu purunypa nyuntumpa walytjapiti ma-tjutaringkuku malatja malatja. ²³⁻²⁴ Ka panya wati nganyiri tjuta punaratjara pitjaku tjananya wakara iluntankunyjikitja, palu tjana nguluringkunyjaka wiyangku rapangku ngarala tjananya wakara wililytjingalku, panya Mayatja Godalu tjananya witulyankunyangka. Panya paluru ngayuku God witulya pulka mulapa uwankarangka waintara munu palumpa walytja tjuta rawangku atunymara kanyilpai, panya wati tjiipi kanyilpaingku tjiipi tjuta wirura atunymankupai, palu purunypa. Panya anangu tjuta nguluringkula apu murpukutu wirtjapakalpai wankaringkunyjikitja, palu purunypa Godanya nyinanyi Israelkunu tjuta wankaru kanyintjikitja. ²⁵ God nyara paluru nyuntumpa walytjapitingka titutjara tjungu nyinara tjananya atunytju kanyilku, panya paluru witulya pulka mulapa uwankarangka waintarinintja. Paluru rawangku palyalku tjananya minangku puyintjaku, munu paluru mina waṭa tjuta kuṭu manta unnungurū pakantjaku palyalku uru kuṭu karu tjutangka titutjara ukalingkunyjaku. Ka ngura nyara palula nyuntumpa walytjapiti ma-tjutaringkuku malatja malatja pakalipiti puliripiti kulypalipiti ngunytjupiti kuṭapiti tjuta mulararinintjaku. ²⁶ Uwa, tjukurpa nyanga ngayulu nyuntula wangkanytja wiru mulapa ngaranyi kutjupa tjutangka waintarinintja pulka mulapa, kaṇa Mayatja Godala tjapini tjukurpa nyanga

paluru nyuntula utiringkunytjaku nyuntumpa walytjapitingka kulu. Ka paluru nyuranya wiru tjuta ungkula pukulmankuku, panya nyuntu katja wiru mulapa, nyuntumpa kuta tjuta purunyapa wiya.”

²⁷ Munu palulanguru katja malatjangkalta ngapartji wangkangu Pintjimanta nyanga alatji, “Katja, nyuntumpa walytjapiti panya papa inura pikati tjuta purunyapa nyinaku munuya rawangku anangu tjuta pungkukatira tjanampa mantara munu kutjupa kutjupa tjuta tjanampa mantjira katiku.”

²⁸ Alatji Jacobalu wangkangi katja tjutangka wati panya 12-nga. Kaya kuliningi kutju kutjungku, “Munta-uwa nyanga alatjiriku ngayukukunu tjuta.”

Jacobanya Wiyaringkunyta

²⁹⁻³² Palulanguru katja tjutangka wangkara wiyaringkula wangkangu, “Ala, kuwarina wiyaringanyi mununa pukulpa tjunguringanyi miri ngayuku walytja tjutangka. Kanya kati Kainantakutu mununi tjunutjura tjamula mamala pulala itingka kulpi panya ngura Makipila, panya nganmanytju payamilanu ngayuku tjamungku Aipuramalu paluru ilunyangka tjunutjunkunytjaku. Paluru panya payamilanu wati ini Ipuranta, wati Itjakunungka. Nyara palula panyaya tjunutjunu ngayuku tjamu kami Aipuramanya Tjiiranya pulanya munu malangka ngayuku mama ngunytju Isaacanya Ripikanya pulanya kulu tjunutjunu. Kana ngayulu nyara palula tjunutjunu ngayuku panya kuri Liyanya. Ka nyura ngayunya nyara palulatu tjunutjura kulpi panya palula.” ³³ Munu Jacobanya katja tjutangka wangkara wiyaringkula palulanguru kankara ngarikatira wiyaringu.

50

¹ Ka palulanguru Josephanya mapalku mamangka punkara ngarikatingu munu palunya ampura mitamita kutjara nyunytjunu pulkara ulara.

² Munu paluru wangkangu palumpa wati warka ngangkari tjuta palumpa mama mantjira puntu palyantjaku ngula tjunutjunkunytjikitjangku.

³ Kaya mantjira warkaringi miri panya palula rawa mulapa tjiripi 40 ara. Panya tjakaya Itjipanya ngurara tjutangku miri nganmanytju palyalpai. Paluru tjana nyitilpai uwilangka kutjupa tjutangka kulu, munuya karpilpai raikingka rawa palya ngarinjtjaku unaringkunytjaku-tawara. Kaya alatji Josephaku mama miri palyarunguningi. Kaya anangu Itjipanya ngurara tjuta kulu Josephala tjanala tjunguringkula tjituru-tjitururira ulangi tjanampa mamaku rawa mulapa tjiripi 70 ara, pira kutjara.

Jacobanya Kainanta Katira Tjunutjunkunytja

⁴⁻⁵ Palula malangka tjana ulara wiyaringkunyangka Josephalu wangkangu Piiraku warka kutjupa tjutangka, “Wiru ngana, ankula Piirala wangka nyanga alatji, ‘Mamaluni ilunytjikitjangku nganmanytju wangkangu palunya ngura nyara Kainanta katira tjunutjunkunytjaku. Kana kulira kalkunu palumpa katintjikitjangku, panya ngura nyara palula panya paluru nganmanytju ngura palyanu kulpingka tjunutjunkunytjaku. Kani wanyu wirungku wantir’iyanma palunya katira tjunutjunkunytjaku. Kana palunya tjunutjura malaku pitjanyi.’ Alatjiya tjapila Piirala.” Kaya anu Piiralakutu munuya tjapinu Josephaku.

⁶ Ka Piiralu palyanmanu palula ankula wangkanytjaku alatji, “Uwa palya, ma-katiraya tjunutjura ngura nyara palula panya nyuntu kalkun-tjitjangka.”

⁷⁻⁸ Ka Josephalu nyangatja kulira mama panya miri mantjira ma-pakanu ngura nyara Kainanku palumpa malanypa munu kuta tjuta munu walytja uwankara kulu. Palu tjana ngunytju tjuta tjitji tjukutjuku tjutatjara wantikatingu ngura panya Katjinta, puluka, tjiipi, nanikuta tjuta kulu. Kaya Piiraku malpa tjuta mayatja panya tjukutjuku tjuta kulu Josephala tjanala tjunguringkula anu munu wati kuranyitja tjuta ngura Ittipala winkinguru kulu. ⁹ Ka wati tjaultji tjuta kuuya anu nyanytjungka tjinkangka tjananya atunymankunytjikitja. Alatjiya tjunguringkula anu winki mulapa.

¹⁰ Munuya ankula ankula ngula karu panya ini Jordanta kakarara wirkanu manta nyara Kainanta itingka. Munuya ngura tjunkula nyinangi tjirirpi 7 ngura panya mai uninypa mantjira ararangkupaingka itingka ini Atatala. Munuya nyinara ngura pala palula pulkara ulangi Jacobanya-tjiratja. Ka Josephalu mama-tjiratjangku ttituru-ttitururira inma palyaningi tjirirpi kutjupa tjirirpi kutjupa 7 arangku.

¹¹ Kaya Kainannga ngurara tjutangku itipikutura nyangangi pulkara ulara wañinyangka. Munuya wangkangu, “Ngaltutjara tjutaya nyaratja Ittipalanguru pitjangu munuya pulkara ulanyi.” Palulangurya ngura pala palunya ininu Apila Mitjuraimanya. Alatjiya ininu tjanampa wangkangka.

¹²⁻¹³ Kaya ulara wiyingkula Jacobaku katja tjutangku palunya miri ma-katingu ngura panya Makipilakutu munuya nyara palula kulpingka tjunutjunu kulpi panya paluru nganmanytju wangkanyitjangka. (Panya kulpi nyara palunya Aipuramalu nganmanytju payamilanu wati Iitakunungka ini Ipuranta palumpa kuri tjunutjunkunytjikitjangku.)

¹⁴ Palula malangkaya Josephanya tjana uwankara malaku anu Itjipalakutu.

Josephanya Palumpa Kuṭa Tjutaku Kalyparingkunytja

¹⁵ Palu Josephaku kuṭa tjutangkuya ngunti kuliningi Josephanya palumpa tjanampa kuraringkunyangka-palku ara panyanguru, panya palunyaya nganmanytju kuraningi. Munuya mama wiyingkunyangka kuliningi, “Kuwari-mantilampa malanyngampa mirpanarikulta nyanga mantangka kutjumpa.” ¹⁶⁻¹⁷ Munu palula tjanalanguru wati kutju anu Josephalakutu tjapira kulintjikitja. Munu wirkara alatji wangkangu, “Mamalu panya nganmanytju wangkangu ngananala alatji, ‘Nyura kura tjutangku iriti Josephaku kuraringkula palunya iyanu ngura kutjupakutu. Palu nyura uti Josephala tjapila nyuranya kalypangku wantinytjaku ngapartji pungkuwiyangku.’ Alatji Mamalu nganananya wangkangu. Kala kuwari nyuntula tjapini nganana kura palyantjtanguru kalypangku pungkuwiyangku wantinytjaku. Wanyu nganampa kalyparingama munu ngapartji kulilwiyangku wantima, panya nyuntu nganana Mayatja Godanya wal̄kulpai nganampa panya mamangku purunytju.”

Ka Josephalu kulinu, “Nyaakuṇiya nyangantu titutjarangku nyanga alatji kulira wangkanyi? Ngura iritina kalypangku wantira watarkuringu.” Munu nyanga palunya kulira ulangi.

¹⁸ Palulangurya kuta panya tjuta ngulu-ngulu pitjangu Josephalakutu munuya palula kuranyu tultjungarakatingu wal̄kuntjikitja. Munuya wangkangu, “Ngananala pitjangu mani wiyatkitja nyuntula warkarinytjikitja.”

¹⁹ Palu Josephalu wangkangu tjanala, “Wiya, ngulu wiwaya nyinama. Ngayulu ngapartji nyuranya pungkuwiyangku wantinyi, panya ngayulu Godanya wiya. ²⁰ Nyara Kainanta panya nyuranku nganmanytju

walytjangku kulinu ngayunya kurara pungkunytjikitjangku. Palu Godalu arা kutjupa kulira palyanu nyura ngayunya kuranytjitjanguru, mununi Itjipalakutu iyara mayatja pulka tjunu ailuru pulkangka anangu uwankara maingka wankaru kanyintjaku. Kaya palulanguru kuwari anangu uwankara wanka nyinanyi ilunytja wiya. ²¹ Ala, ngayukuya nguluringkunytja wiya nyinama. Ngayulu nyuranya palyanyku kanyilkku nyurampa tjiiti tjuṭa kuļu.” Alatji kalypangku wangkara Josephalu tjananya kurunpa rapanu, kaya kulira pulkara pukularingu.

Josephanya Wiyaringkunytja

²²⁻²⁴ Munu nyara palulanguru Josephanya rawa nyinangi Itjipala palumpa walytja tjuṭangka tjungu. Ka palumpa katja Ipuraimanya tjiiti tjutatjararingu, ka paluru tjana pulkaringkula tjana ngapartji tjiiti tjuṭatjararingu. Ka Josephaku katja kutjupangku Manatjalu katja utinu ini Makirnga, ka paluru pulkaringkula palu purunypatū tjiiti tjuṭatjararingu. Ka Josephalu rawatu nyinara nyangangi tjiiti nyanga palunya tjananya iti ngarinyangka palumpa pakalipiti munu kulypalipi, munu tjananya paluru pukultu ampura kanyiningi.

Palulanguru yiya tjuṭa nampa 110 nyinanytjatjanungku paluru kuṭa tjuṭangka malanypangka kuļu alṭira wangkangu, “Alatjītultaṇa wi-yaringanyilta. Ka nyuranya Godalu rawangku muṇu nyuranya ngula Itjipalanguru ma-katinyi ngura panya ngaṇmanytju Aipuramanya Isaacanya Jacobanya ungkunytjitatjaku.” ²⁵ Munu Josephalu palumpa walytja tjuṭangka tjinpinu tjukarurungku kalkuntjaku alatji wangkara, “Ngula Godalu nyuranya ngura panya palulakutu ma-katinyangka miri ngayunya kuļu ma-katima, mununi nyara palula tjuṇutjura. Palya?” Kaya mulapaṭu kalkunu katinytjikitjangku.

²⁶ Ka palulanguru paluru wiyaringu tjilpi mulararira yiya nampa panya 110 nyinanytjatjanu. Ka palumpa walytja tjuṭangku miri palunya nyitira palyarungura karpiṇu muṇu pakutjangka tjarpatjunu paṭara ngarintjakku.

Israelkunu Tjuṭa Itjipalanguru Ma-pakantja Exodus Nyangatja Nganmanytju Nyakula Wangkanytjaku

Nyangatja Godaku tjukurpa. Munu tjukurpa nyanga paluṛu tjakultjunnanyi aŋangu Godaku walytjapiti Israelkunu panya tjuṭa. Panya paluṛu tjana ngura Itjipala nyinangi parari mulapa ngura walytja wantikatinjtjanu. Panya paluṛu tjana ngura nyara palulakutu anu maikutu, ka tjananya Jacobaku katjangku Josephalu atunymara kanyiningi.

Ka ngula Josephanya ilunyangka małangka yiya tjuṭa mulapa ngarakatingi, kaya Itjipanya ngurara tjuṭa tjanampa mayatjaringu aŋangu panya Israelkunu tjutaku munuya palunya tjananya pulka pauntjingara wituwituningi war̄karinytjaku munu tjananya kurara pungangi.

Ka tjukurpa nyanga paluru tjakultjunanyi Godalu tjananya Itjipalanguru pakaltjingantja. Panya paluṛu Mosenya ngurkantara tjunu Israelkunu tjuṭa atunymara kanyintjaku. Munu paluṛu Moselawannungku pika kutjupa kutjupa tjuṭa iyaṇu Itjipanya ngurara tjuṭa ngulutjingantjikitjangku, kaya ngula pika pulka wirkankunyangka kutju Mosenya tjananya wantir'iyaṇu tjanampa ngura wantikatira ankunytjaku. Munu paluṛu Mosenya tjananya katira uṛu pulkangka ngururwanungku wankarunu munu tjaultji Itjipanya ngurara tjutangku maławanungku pikangku waṭaparannyaṅgka ḫungka iluntanu.

Munu tjukurpa nyanga paluṛu tjakultjunanyi Godalu tjukurpa pulka tjuṭa Mosenya ungpunkunytja Israelkunu tjutangku kulira Godala wanġanarangku kulintjaku munu kulira palumpa pulka nintiringkunytjaku. Panya Godanya mukuringangi tjana palunya mulamulangku walkuntjaku. Munu paluṛu tjananya nintinu tiinta miłmilpa palyantjaku munu tjarpara palunya tjukarurungku walkuntjaku.

Tjukurpa nyanganpa ngarinyi:

1:1—4:31 Godalu Mosenya ngurkantankunytja

5:1—6:27 Mayatja Piiranya Mosela tungunpungkunytja

6:28—12:36 Godalu pika kutjupa kutjupa tjuṭa Itjipanya ngurara tjuṭakutu iyantja

12:37—18:27 Israelkunu tjutangku Itjipanya wantikatira puli ini Tjaniyalakutu ankunytja

19:1—24:18 Godalu tjukurpa pulka tjuṭa Mosenya ungpunkunytja

25:1—40:38 Tiinta Miłmilpa tjarpara Godanya walkuntjaku

Itjipanya Ngurara Tjutangku Israelkunu Tjuṭa Kurantja

¹⁻⁴ Jacobanya, panya ini kutjupa Israelnga, ngura nyara Itjipalakutu nganmanypa anu munu paluṛu palumpa katja tjuṭa kurirara kurirara katingu ini nyanga palunya tjananya Rupinnga, Tjimiannga, Levinya, Judah-nya, Itjakanya, Tjipulunnga, Pintjimannga, Dannga, Napatalinya, Kaatanya, Atjanya tjananya. ⁵ Munuya ankula Josephala tjunguringkula ma-nyinangi ngura panya palula, panya Josephanya nganmanypa ankula nyinanytjitetjangka. Munuya tjunguringkula tjuta mulapalta nyinangi nampa 70 aŋangu watı panya Jacobalanguru kanyintja tjuṭa.

6 Munuya rawa mulapa nyinangi ngura nyara Itjipala. Ka Josephanya munu palumpa kuṭa tjuṭa kuļu ngula tjilpiringkula ilungu ngura nyara palula. **7** Palu nyanga palula tjanalanguruya pakalipitiku puliripitiku katjapiti unṭalpiti kuļu ma-tjutaringangi malatja malatja. Munuya rawa nyinara tjuṭa mulararingu, munuya manta panya Itjipala lipiwanu alatjiṭu nyinangi anangu Israelkunu winki mulapa.

8 Palu ngula mulapalta Itjipanya ngurara tjuṭaku mayatja pulka kutjupa nyinangi ini Piiranya panya mayatja ini ngañmanyitja purunyapa. Palu paluru ninti wiya Josephaku.* **9-10** Munu mayatja nyanga paluru palumpa anangu tjuṭangka wangkangu, “Nyawaya anangu nyanga Israelkunu tjuṭa! Tjanaya kuvari tjuṭa mulararingu, munuya nganampa ngura anangu. Tjinguru anangu ngura kutjupitja tjuṭa warmala pitjaku nganananya pikangku pungkunytjikitja, ka tjinguru nyanga tjana tjanala tjunguringkula tjaṭuringkuku nganampa munuya nganananya pungkuku munuya palulanguru tjinguru nganananya pungkula wivara tjana ngura nyanganguru ma-pakalku. Wanyula wangkara kulila munula tjukurpa palya wangkara kuliṛa kalkura wanti ngañmanyitju anangu nyanga paluru tjana piruku ma-tjutaringkunytjaku-tawara.” Munuya Piiralu tjana wangkara kulinigi, munuya kulinu Israelkunu tjuṭa warka pulka ungkunytjikitjangku tjana unytju wiyatkitja rawa warkarinytjaku mayatja Piiraku.

11 Ka Piiralu palumpa wati tjuṭa altingu munu wangkangu, “Ankulaya wati nyara Israelkunu tjuṭaku nyura mayatjari munu tjananya paun-tjingara wituwitunma pulkara warkarinytjaku.” Kaya ankula palunya tjananya mantjira katira pulkara warkarinytjaku wituwituningi wali tjuṭangka. Kaya wali tawunu pulka kutjara palyaningi ini panya Pitjamanya munu Ramatjinya wati mayatja Piiraku wali tjuwa purunyapa paluru ngula mai pulka utulura tjunkukatinytjaku. **12** Ka wati panya Itjipanya ngurara tjuṭangku tjananya pulkara alatjiṭu pauntjingara alkaningi anangu panya Israelkunu tjuṭa, kaya pulkara mulapa ngulu warkaringi. Palu tjana rawa alatjiṭu tjitji tjuṭatjararingangi munuya tjuṭa mulararira ala lipiwanu alatjiṭu nyinangi ngura panya Itjipala. Kaya Itjipanya ngurara tjuṭa tjanampa ngulu-nguluringu, **13-14** munuya piruku tjananya warka pulka mulapalta ungu Israelkunu panya tjuṭa ngalturingkunytja wiyangku alatjiṭu, kaya pulkara alatjiṭu warkaringi mungawinkinguru mungaku-wangkara. Panya paluru tjanaya tjuminta palyaningi wali tjuṭaku, ka tjara kutjupa urilta paama tjuṭangka warkaringi, panya ngalturingkunytja wiyangkuya tjananya pakuningi warka pulkangka.

15-16 Ka ngula wati panya mayatja Piiralu wangkangu minyma panya kutjarangka Tjipurala pulala Puwala nyanga alatji, “Ngula nyupali minyma panya Iipuru tjuṭa alpamilarampa palumpa tjanampa iti nyitayira wirkankunyangka nyakulampa iti nyara palunya mapalkungku iluntara, palu iti kungka wirkankunyangkampa palya wantima iluntankunytja wiyangku.” Alatji Piiralu pulanya wangkara witunu.

17 Palu minyma nyanga paluru pula Godala wangañarangku kulipai munu pula mayatja panya Piiralu wangkanytja palyantja wiyangku wantingi. Munu pula iti nyitayira tjuṭa nyinanytjaku wantingi iluntankunytja wiyangku. **18** Ka ngula mayatja Piiralu wati kutju iyanu ankula minyma panya kutjara altira ngalya-katinytjaku. Munu wirkankunyangka

* **1:8** Piira nyanga malatjalu kulintja wiyaṭu Josephanya iriti Itjipalakutu pitjala nyinara Piira panya ngañmanyitjaku malparengkunytja munu panya ailuru pulkangka-tawara mai pulka utulura tjunkunytja. Nyawa Genesis 41—47.

paluru pulala tjapinu, “Nyaanguru nyupali nyanga alatji palyaningi? Munu nyupali nyaaku iti nyitayira tjuṭa wanka nyinanytjaku wantingi?”

¹⁹ Ka minyma panya kutjarangku ngapartji Piirala wangkangu, “Wiya, minyma nyanga Iipuru tjuṭaya minyma Itjipanya ngurara tjuṭa purunypa wiya, panya tjanaya tjitji iti mapalku kanyilpai ngali wirkankunytja kuwaripangka. Kali mala wirkankupai iti ngañmanypa ngarinyangka.”

²⁰⁻²¹ Ka palulanguru Godanya palumpa pulampa pulkara pukularingu, munu pulampa palu purunypatu palyanu tjitji kanyintjakutu panya pula Godanya kutju kulinigi munu iti Iipuru tjuṭa pungkuwiyangku wantingi. Ka panya Iipuru tjuṭa ilatū-ilatū tjuṭa mulararingi. ²² Ka palulangurulta Piiralu Itjipanya ngurara tjuṭangka wangkara pulkara wituwituṇu, “Nyanganjuruya iti nyitayira Iipuru tjuṭa wirkankunyangka nyakulampa mantjila munuya ma-katira karu ini Nayilta waṇi uru pulkangka ilunytjaku, munuya kungka tjuṭa kutju wanti wanka nyinanytjaku.”

2

Mosenya Iti Ngarinytja

¹ Ka ngura nyara palula wati kutjupa nyinangi wati panya Levilanguru.* Munu paluru kungkawara Leviku waltyja malatja mulapa altingu.

² Ka ngula minyma nyangangku iti nyitayira kanyinu munu nyakula mukuringu munu kulinu, “Tjitji nyangatja wiru mulapa. Ngayulu kuwari kutitjunanyi palunya. Tjinguruya nyakula mantjira katira iluntankuku.” Munu piṛa maṅkurpa tjitji panya palunya kutitjura kanyiningi walingka unngu kumpilpa.

³ Palu minyma paluru puṭu iti panya palunya rawangku kutitjura kanyiningi, panya paluru tjitji pulkaringangi. Ka paluru piti tjuṇatjuṇanguru palyantja mantjinu munu kiṭi purunypa mantjira ala tjuṭangka angatjunu uru tjarpanytjaku-tawara. Munu tjitji panya iti palunya pitingka ngaritjunu, munu piti panya palunya katira karu panya Nayilta urungka tjuṇu tjuṇa-tjuṇa tjaṭangka unngu kumpilpa. ⁴ Ka iti nyanga palumpa kangkurungku kumpira ngarala nyangangi patunguru nyaaringkuku kuwari.

⁵ Ka ngula mayatja panya Piiraku uṇṭalpa urukutu pitjangu paltjin-tjikitja. Ka kungkawara palumpa war̄karipai maṅkurpa kuļu pitjangu, munuya paluru tjarpanyangka urungka itingka para-ngarangi. Palu Piiraku uṇṭaltu urungka tjarpara tjarpara nyangu piti panya tjitjitjara ukiri unngu ngaranyangka, munu kungka palumpa war̄karipai kutju witura iyanu ankula mantjira ngalya-katintjaku. Ka ankula urunguru mantjinu munu katira ungu. ⁶ Ka paluru ala nyangu iti panya kulunypa ngarira ulanyangka. Munu paluru ngalturingu palumpa munu kulira wangkangu, “Nyangatja tjitji Iipuru.”

⁷ Ka iti panya palumpa kangkurungku kumpira ngaranytjatjanungku ngalya-utiringkula wangkangu Piiraku panya uṇṭalta, “Nyuntu mukuringanyi ngayulu ankula minyma Iipuru kutju altingtjaku iti nyanga palunya kanyira pulkantjaku nyuntumpa?”

⁸ Ka wangkangu, “Uwa, ankula alti!” Ka kulira mapalku anu munu itiku panya ngunytju mantjinu, munu altira ngalya-katingu Piiraku panya uṇṭalpakutu. ⁹ Ka paluru wangkangu itiku panya ngunytjungka, “Iti nyangatja kati ngurakutu munutju ipi ungkula pulkala, kaṇanta payamilalku

* ^{2:1} Levinya panya wati Israelku katja, ka wati nyanga paluru panya Leviku waltyja malatja mulapa.

nyuntu ngayuku kanyira pulkannyaŋka." Ka mulapaŋu katingu iŋi panya palunya ngurakutu munu kanyira pulkaŋu palumpa.

¹⁰ Ka ngula tjitji panya pulkaringkunyangaŋka ngunytjungku panya katingu Piiraku unŋalpakutu. Ka tjitji panya paluru palumpa katjaringu. Ka paluru wangkangu, "Tjitji nyanga palunyanā ūrunguru panya mantjinu. Palulanguruŋa palunya inini Mosenya."*

Mosenya Ngura Mitiyantakutu Ngulu Ankunytja

¹¹ Ka ngula Mosenya pulkaringkula watiringu, munu kuliningi palumpa walytja tjuŋa ankula nyakunytjikitjangku, munu paluru anu Iipuru tjuŋakutu munu tjananya puŋkarra war̄karinyaŋka nyangangi. Munu paluru nyangu wati Itjipanya ngurara kutjungku wati Iipuru puŋkara pungkunyangaŋka. ¹² Munu Moselu para-anganyakula nyangu, "Munta, wiyampal nyangatja ngaranyi. Kaŋa kuvari ngayulu ngapartji pungkula iluntara." Munu mulapa paluru wati panya Itjipanya ngurara pungkula iluntara tjawara mantangka tjuŋutjunu munu palulanguru ngurakutu anu.

¹³ Munu tjiŋtungka paluru piřuku anu palumpa walytja tjuŋakutu munu nyangu wati Iipuru kutjarangku pulanku pikangku pungkunyangaŋka. Munu kutjungka tjapinu, "Ai! Nyaakun punganyi walytja nyuntumpa?" ¹⁴ Ka paluru ngapartji wangkangu, "Nyaakulinyan wangkanyi? Nyuntun wanyu nganampa mayatja? Tjinguru nyuntu kulini piřuku ngayunya ngapartji pungkula iluntankunytjikitjangku panya mungartjtja purunypa." Ka Moselu alatji wangkannyaŋka kuliŋa nguluringu munu kulinu, "Munta-uwa! Tjinguruuya uwankara ninti panya ngayulu palyantjtjaku."

¹⁵⁻¹⁶ Ka mayatja panya Piiralu kulinu Moselu pungkunyta munu palumpa tjaultji tjuŋa witunu Mosenya nguriŋa iluntankunytjaku. Palu Moselu nyangatja kulinu munu mayatja panya palulanguru kumpirra wirtjapakaŋu ngura pararikutu ngura ini Mitiyantakutu, munu ngura nyara palula wirkara paluru mina piřingka itingka nyinakatira pakuwiyaringangi.

Ka ngura nyara palula itingka wati kutjupa nyinangi ini Tjitarunyu. Paluru panya unŋalpa 7-tjara, munu paluru aŋangu ngura Mitiyannga ngurara tjuŋaku tjukurtjara nyinangi. Kaya palumpa unŋalpa tjuŋangku mamaku tjiipi, nanikuta tjuŋa mina piti palulakutu ngalya-katingi mina ilara piti tjuŋangka tjutintjikitjangku kuka tjuŋaku. ¹⁷ Palu aŋangu tjiipi kanyilpai kutjupa tjuŋaya maławanu wirkana munuya tjananya paira iyanu. Palu Mosenya painnyangaŋka nyakula pakaŋu munu angangarala markura wangkangu, "Nguluringkuwiyaya ngarama ka ngayulu nyurampa kuka tjuŋa mina ungkuku." Munu paluru mina tjuṭinu kuka tjuŋangku tjkintjaku. Kaya palulanguru ngurakutu małaku anu kungkawara panya tjuŋa.

¹⁸ Ka ngurangka wirkankunyangaŋka palumpa tjanampa mamangku tjananya tjapinu, "Nyaaku nyura mapalku pitjangu? Panya nyura mungartji nguwanpa pitjapai, palu kuvari nyanga nyura mapalku pitjangu. Nyaaringkula?"

¹⁹ Kaya wangkangu, "Wiya, wati panya tjiipi kanyilpai tjuŋaya piřuku pitjangu munulanya painingi. Palu wati Itjipanya ngurarrangkulanya alpamilanu wirungku, munulampa kuka tjuŋa mina ungu mina piřinguru ilara."

* ^{2:10} Ini nyanga Mosenya wangkanyi "ūrunguru mantjintja" Iipuruŋku wangkangu.

²⁰ Ka paluru tjapinu tjanala, “Yaaltji wati paluru? Nyaanguru nyura wantikatingu? Ankulaya altira ngalya-kati, ka nganana^{lala} tjunguringkula mai ngalkula.” Kaya ankula Mosenya altingu, ka pitjala tjanala tjunguringkula mai ngalkunu.

²¹ Ka nyanga palula malangka Tjitjarulu Mosenya marku^{nu} palumpa ngurangka nyinanytjaku. Ka Moselu palya kulinu munu palula nyinangi. Ka Tjitjarulu palumpa un^{talpa} kutju ungu Mosenya ini Tjipuranya paluru altingu. ²² Ka paluru pula ngula tjitji katja kanyinu. Ka Moselu palunya ininu Kaatjamanya, panya paluru kuliningi, “Ngayulu kuwari malikitja nyinanyi ngura tjanampangka. Palulanguruna iti palunya ini tjunkuku Kaatjamanya.”*

²³ Ka ngula mulapalta ngura panya Ittipala tjanampa panya mayatja pulka ilungu ini panya Piiranya.* Palu panya Ittipanya ngurara tjutangku tjananya rawangku pulkara alatjitu warkamilaningi Israelkunu panya tju^{ta}. Kaya rawa alatjitu pulkara warkarira warkarira paku pulkaringkula kurunpa uliringu, munuya pu^{tu} kulira Godala ulara ngatjiningi tjanampa ngalturingkula tjananya wankarunkunytjaku.

²⁴ Ka Godalu kulinu tiana ulara ngatjinnyangka munu panyatja kulinu panya paluru iriti Aipuramanya Isaacanya Jacobanya tjananya kalkunu atunyankunytjikitjangku, munu anangu tjanalanguru tju^{taringkunytja} malatja malatja tju^{ta} ku^{lu} kalkunu. ²⁵ Uwa, Godalu nyangu tjananya Israelkunu tju^{ta} pulkara warkarinyangka, munu paluru kurunpa pulkara ngalturingu tjanampa ngura panya Ittipala nyinara ulanyangka.

3

Godalu Mosenya Altinytja

¹ Ka Moselu wati panya palumpa waputjuku Tjitjaruku tjiipi nanikuta tju^{ta} atunyankupai. Wati Tjitjarunya panya tjukurtjara nyinangi anangu panya Mitiyannga ngurara tju^{ta}ku. Ka tjirirpi kutjupa Moselu kuka panya palunya tjananya ilytjingka katirinangi munu paluru tjananya parari katingu pilangka munkarakutu. Munu wirkanu puli wara ini Tjaniyala. Pulu nyanga paluru panya milmilpa Godaku. ² Ka nyara palula Mayatja Godaku angelpa utiringu Mosela, ka paluru nyangu pu^{nu} pulku^{npa} tilingaranyangka. Ka waru tili pulka pakanningi pununguru, palu pu^{nu} nyara palunya kampara wiyanjtja wiya wankatu ngarangi.

³ Ka Moselu nyakula kulininingi, “Ai! Yaaltji-yaaltji pu^{nu} kutju alatjitu rawa tilingaranyi kampara wiyaringkunytja wiya? Wanyu kana ila ara pu^{nu} nyanga ayinayini nyakunytjikitja.”

⁴ Ka Mayatja Godalu nyangu Mosenya pu^{nu} nyakunytjikitja ngalya-ilaringkunyangka munu parka panya tilitjaranguru palula wangkangu, “Mose! Mose!”

Ka paluru wangkangu, “Uwa, kulininta.”

⁵ Ka Godalu wangkangu, “Piruku ngalya-paljtuntja wiya. Manta milmilpa nyangatja nyanga nyuntu ngaranytjanya, kanku tjinatja pala araltjara. ⁶ Panya ngayulu^{na} God nyuntumpa mamaku, munu Aipuramaku, Isaacaku, Jacobaku ku^{lu}.” Ka Mosenya kulira pulkara nguluringu mununku kurungka mara angatjunu Godanya nyakunytjaku-tawara.

* ^{2:22} Munu piruku malangka nyinara Moselu pula tjitji katja kutjupa kanyinu ini Ilyatjanya. Nyawa Exodus 18:4. * ^{2:23} Ka katja ngapartji tjanampa mayatjaringu ini palu purunpa Piiranya panya tjaka mama ilunyangka mayatjaripai katja ngapartji.

⁷ Ka palulanguru Godalu wangkangu palula, “Ngayulu nyangu tjananya ngayuku panya anangu tjuṭa, panya tjana pika pulkatjara pungkunytja pungkunytja. Panya Itjipanya ngurara tjuṭangku tjananya rawangku pungkula warkamilara pakuni. Kanā tjananya kulinu pulkara kaar-kaararira ulara ngatjinnyangka ngayulu tjananya wankarunkunytjaku, mununa kulira tjanampa ngalturingu. ⁸ Palulanguruṇa kuwari ilkarīnguru pitjangu tjananya pakaltjingara katinytjikitja ngura nyara palulanguru. Mununa tjananya kuranyurira katirinkuku ngura wirukutu ala lipikutu mai pulkatjarangka nyinanytjaku. Palu ngura nyara palulawanu panya anangu kutjupa kutjupa tjuṭa kuwari nyinara wañani, anangu nyanganpa – Kainankunu tjuṭa, Iitakunu tjuṭa, Amurkunu tjuṭa, Piritjikunu tjuṭa, Ipakunu tjuṭa, munu Tjaipukunu tjuṭa kuļu. ⁹ Uwa, ngayulu kulinu Israelkunu tjuṭangku ngayula ulara ngatjinnyangka, mununa mulapa nyangangi Itjipanya ngurara tjuṭangku tjananya pulkara warkamilara pakunnyangka. ¹⁰ Palulanguruṇa kuwari nyuntunya wituni mayatja panya Piiralakutu ankunytjaku. Ka nyuntu ara munu ngayuku anangu tjuṭa Itjipalanguru pakaltjingara ngalya-kati.” Alatji Mayatja Godalu Mosela wangkangu.

¹¹ Ka paluru ngapartji wangkangu, “Nyaakunin ngayunya wituni? Panya ngayulu wati tjukutjuku mayatja wiya. Yaaltjingaraṇa mayatja pulkangka ankula wangkaku? Mununa yaaltjingara nyanga Israelkunu tjuṭa Itjipalanguru pakaltjingalku?”

¹² Palu Godalu palula wangkangu, “Ngayuluṇa nyuntula tjungu ankuku. Ka mulapa nyuntu anangu tjuṭa Itjipalanguru pakaltjingara ngura nyangakutu ngalya-katiku, munu nyura ngayunya puli nyanga palula tjungungku wal̄kulku. Kan nyanga palulakutu malaku wirkara kulikku, ‘Munta-uwa, mulapa panya ngayunya Godalu wangkangu puli nyanga palula wirkara palunya wal̄kuntjaku.’”

¹³ Ka Moselu tjapinu Godala, “Tjinguru ngayulu ankuku Israelkunu tjuṭakutu mununa tjanala wangkaku, ‘Nyurampa mama tjuṭangku panya Godanya wal̄kuningi, kanī God panya paluru ngayunya wangkara witunu nyuralakutu nyuranya ngura nyanga palulanguru katinytjaku.’ Kaya nyangatja kulira tjinguru tjana ngayunya tjapilku, ‘Ini ngananya wanyu God paluru?’ Kanā yaaltji wanyu wangkaku tjanala?”

¹⁴ Ka Godalu wangkangu Mosela, “Ngayuluṇa panya paluru ngayulu alatji Tiṭutjara Nyinapainya. Ka nyuntu anangu Israelkunu tjuṭakutu ankulampa nyanga alatji tjakultjura tjanala, ‘Mayatja panya Tiṭutjara Nyinapailuni witura iyanu nyuralakutu.’ ¹⁵⁻¹⁶ Munu piruku tjanala alatji wangka, ‘Paluru panya Mayatja Godanya nyurampa tjamu kami ngañmanyitja tjuṭaku munu panya Aipuramaku, Isaacaku, Jacobaku God kuļu. God panya paluruṇi witunu nyuralakutu, ini panya paluru panya Mayatja Godalu. Ka nyura ngayunya alatji wal̄kunma Mayatjanya.’ Alatji tjanala tjakultjura.

“Uwa, ankula wati Israelkunu pulka tjuta altira uṭulura, munu tjanala tjakultjura ngayulu nyuntula utiringkunytja munu tjanala wangka panya ngayulu nyuntula wangkanytja. Munu piruku tjanala wangka alatji, ‘Mayatja Godalu panya nyuranya nyangangi Itjipanya ngurara tjuṭangku rawangku pulkara warkamilara pakunnyangka munu pungkunyangka kuļu. ¹⁷ Palulanguruṇa nyuranya rawangku kurantjaku-tawara ngura nyara Itjipalanguru pakaltjingalku, mununa nyuranya ngura panya wiru mularkutu katiku mai pulkangka pukulpa nyinanytjaku. Palu ngura nyara palulawanu panya anangu kutjupa kutjupa tjuṭa kuwari nyinara wañani,

anangu nyanganpa – Kainankunu tjuta, Iitakunu tjuta, Amurkunu tjuta, Piritjikunu tjuta, Ipakunu tjuta, munu Tjaipukunu tjuta kulu.’¹⁸ Alatji tjanala tjakultjura wati pulka tjutangka, kaya nyuntula kulilkul nyuntu wangkanyangka. Ka palulanguru nyuntu palula tjanala tjunguringkula Itjipaku mayatjakutu ara Piirralakutu, munuya palula wangka nyanga alatji, ‘Mayatja Godanya nganañala utiringu panya Iipuru tjutaku God, munu panya paluru mukuringanyi nganaña uwankara ilytjikutu ankunyntjaku tjintu mañkurpa, kala ngura palula kuka pungkula tiliwakara palunya ungkuku nganampa Godanya paluru nganampa pukularinytjaku. Palyala ankuku?’ Alatji nyura palula wangka Itjipaku mayatjangka.¹⁹ Palu ngayulu nintingku kulini panya mayatja nyara paluru nyuranya wantir’iyantja wiyangku wantiku. Palu ngayuku witulya pulkangku kutju palunya kampa kutjupankuku nyuranya wantir’iyantjaku.²⁰ Panya ngayulu kampa kutjupa palyalku Itjipanya ngurara tjutaku mununa kutjupa kutjupa tjuta witulya pulkangku palyalku ngura nyara palula tjana nyakula ngayuku nguluringkunyntjaku, ka nyanga alatji palyannyangka nyakula mayatja panya Piirralu nyuranya wantir’iyalku.

²¹ “Mununa tjananya Itjipanya ngurara tjuta kurunpa kampa kutjupankuku tjana wanganararingkula nyuranya kutjupa kutjupa tjuta ungkunyntjaku wiru tjuta nyura maralpa ankunyntjaku-tawara.²² Ka minyma Iipuru kutju-kutjungku minyma Itjipanya ngurara tjutangka ngatjilku. Kaya ungkuku mantara tjuta munu liringka miñangka tjunkupai tjuta kulu panya gold-nguru tjiilpanguru palyantja wiru mulapa, munuya kutjupa kutjupa wiru tjuta kulu nyuranya ungkuku. Ka nyanganpa uwankara nyura katjangka untalta tanpalku munu nyura mantara panya wiru tjutangka tjarpara ankkuku. Alatji nyura ma-katiku Itjipalanguru tjanampa panya wiru kutjupa kutjupa uwankara.” Alatji Godalu Mosela wangkangi.

4

Godalu Mosenya Witulyankunyta

¹ Ka Moselu ngapartji wangkangu, “Palu tjinguruya wati Israelkunu tjuta ngayuku puñu mulamularingama. Munuya tjinguru paluru tjana ngayunya kulira wantima munuya wangkaku, ‘Mayatja Godanya nyuntula utiringkunyta wiyatū.’ Kaña yaaltjiriku tjana ngayunya kulira wantinyangkampa?”

² Ka Godalu tjinpinu Mosela, “Nyaan marangku pala kanyini?”

Ka wangkangu, “Nyangatja ngayuku tjukara.”

³ Ka Godalu wangkangu, “Mantangka wanī.” Ka Moselu wañingu mantangka. Ka panya paluru liruringu. Ka Mosenya liru panya nyakula ngulu ma-wirtjapakanu.

⁴ Ka Godalu wangkangu Mosela, “Wipu witira katula.” Ka Moselu pitjala wipu witira katuñu, ka liru panya wipu witira kanyinnyangka malaku punuringu.

⁵ Ka Godalu palula wangkangu, “Nyuntula nyanga alatji palyannyangka nyakula tjana mulapa kulilkul panya ngayuluña Mayatja Godalu nyuntula wangkangu, panya Aipuramaku, Isaacaku, Jacobaku tjanampa Godalu.”

⁶ Munu piruku Godalu Mosela wangkangu, “Maranku tjarpatjura mantara unngu.” Ka Moselu mara tjunu mantara unngu munu ilara nyangu mara latjaringkunyta pika panya piranpa tjunpa purunypa.⁷ Ka Godalu piruku wangkangu, “Maranku malakungku tjarpatjura mantara

unngu.” Ka Moselu piruku mara tjarpatjunu munu ilara nyangu mara palyaringkunytja pika wiya. ⁸ Ka Godalu wangkangu, “Tjinguru tjana puṭu mulamularingkuku liru panya nyakunytjatjanu, ka nyangatja piruku nintila tjanala, kaya nyakula nyanga palulanguru mulamularingkuku ngayulu nyuntula wangkanytjitjaku.

⁹ “Ka nyanga kutjaranguru tjinguru tjana rawatu mulamularingkunytja wiyangku wantinyangkampa piruku kutjupa tjanala nintila. Kapi pitingka tairakala karu ini Nayiltanguru munu mantangka pupatjura, ka kapi paluru milkaliriku mantangka pupatjunkunyangka.”

¹⁰ Palu Moselu ngapartji Godala wangkangu, “Wiya Mayatja, ngayunya iyantja wiyangku wantima. Ngayulu pulkara wangkapai wiya tjaa parir-parirpa puṭu nguwanpa wangkapai, mununa kuvari nyanga nyuntula mirangka ngarala ngarala pulkara wangkapairingkunytja wiyat. Ngayulu purkarangku kulira wangkapai, palya wiya nguwanpa.”

¹¹ Ka Godalu wangkangu palula, “Nganalu wanyu watiku tjaa palyanu? Munu nganalu wanyu aŋangu pina patilpai kulintjaku wiya, munu tjaa patilpai wangkanytjaku wiya. Nganalu wanyu kuru alalpai nyakunytjaku, munu kuru patilpai nyakunytjaku wiya? Panya ngayulu kutjungkuṇa palyalpai. ¹² Ka nyuntu ara munu tjanala wangka! Kaṇa ngayulu nyuntunya alpamilalku munuṇanta nintilku tjanala tjukarurungku wangkanytjaku.”

¹³ Ka Moselu tungunpungkula piruku wangkangu Godala, “Wiya ngayulu wantinyi. Wanyu wati kutjupa iyala.”

¹⁴ Ka nyanganguru Godanya puṭu wangkara Moseku mirpañaringu munu palula wangkangu, “Palu nyuntumpa kutampa Aaronnga. Nyara paluru panya wati Levikunu munu paluru wirura pulkara wangkapai. Kuvari nyanga paluru nyuntulakutu pitjanyi, munu nyuntunya nyakula pulkara pukulariku. ¹⁵⁻¹⁶ Ka ngayulu nyupalila tjungu nyinaku mununa nyupalila nintilku tjukurpa ngayuku aŋangu tjuṭangka wangkanytjaku. Panya ngayulu nyuntula-warara wangkaku, ka nyuntu ngapartji palula wangka, ka paluru nyuntula kulira aŋangu tjuṭangka ngapartji tjakultjunkuku nyuntumpa panya wangka. Ngayulu alatjiṇu nyupalinya uwankara nintilku tjukarurungku palyantjaku. ¹⁷ Palu tjukara nyanganku katima, panya nyuntu puṇu nyanga palula witulyangku palyalku kutjupa kutjupa tjuṭa.” Alatji Mayatja Godalu Mosenya wangkara witunu.

Mosenya Itjipalakutu Malaku Ankunytja

¹⁸ Ka Mosenya malaku anu Tjitjarulakutu palumpa panya waputjukutu. Munu tjapinu palula alatji wangkara, “Palyaṇa ankuku Itjipalakutu malaku ngayuku walytja tjuṭakutu. Mukuringanyiṇa tjananya nyakunytjikitja, tjinguruya wankatu nyinanyi.”

Ka Tjitjarulu wangkangu, “Wiya palya, ara! Kaṇa Godala tjapilku nyuntunya atunymankunytjaku.”

¹⁹ Ka panya Mosenya ankunytjikitja kulinnyangka Godalu wangkangu palula, “Malaku ara Itjipalakutu panya nyuntunya iluntankunytjikitja mukuringkunytja tjuṭaya ilura uwankara wiyaringu.” ²⁰ Ka Moselu palumpa kuri katja kutjara tangkiyingka tatitjunu munuya ma-pakanu wilurara Itjipaku. Ka Mosenya tjina anangi tjukaratjara panya Godalu wangkangu katinytjaku tjukara panya palunyu.

²¹ Munu piruku Godalu wangkangu Mosela, “Nyuntu Itjipala malaku wirkara mankurpa panyatja watarkuriwiyangku kulinma mayatja pulka Piirala mirangka witulya pulkatjarangku palyantjikitjangku. Palu

ngayulu mayatja panya Piiranya unngu wituwitulku Israelkunu tjuta wantir'iyantja wiyangku tungun-tunguntu kanyintjaku. ²² Ka nyuntu palulanguru Piirala tjakultjura tjukurpa nyanga ngayulu kuwari nyuntula wangkanytja alatji, ‘Nyuntu panya nyuntumpa katja ngañmanyitjaku pulkara mukuringcupai, palu purunyapa ngayulu añañgu Israelkunu tjutaku pulkara mukuringanyi. ²³ Ka panya ngayulu nyuntula wangkangu tjananya wantir'iyantjaku paluru tjana ankula ngayunya walkuntjaku, palu nyuntu wantingu tjananya iyantja wiyangku. Palulanguruña kuwari ngapartji nyuntumpa katja ngañmanyitja iluntananyi.’ Uwa, tjukurpa nyanga palunya ngula Piirala tjakultjura!’

²⁴ Ka Mosenya pula kuriçara tjitjijara anangi ngura nyara Itjipalakutu. Munu pula ngururpa ngura kutjupangka ngura tjunu mungaringkunyangka ngarinytjikitjangku. Ka Mayatja Godanya Mosela tjunguringu munu palunya arkara pikantanangi iluntankunytjikitjangku. ²⁵⁻²⁶ Ka palulanguru Moseku miitangku Tjipuralu palumpa katja nyiñkarinyangka nyakula palunya ngunytjungkuwu watiñ munu watintjatjanungku mantjira Mosenya tjina pampuñ wangkara, “Nyuntun ngayuku kuri milkalitja.” Alatji paluru wangkangu panya katja palumpa watintjatjanungku. Ka pala palulanguru Mayatja Godalu Mosenya wantingu iluntankuwyangku.

²⁷ Ka nyara palula ara Mayatja Godalu Moseku kutangka Aaronta Itjipala nyinanyangka wangkangu alatji, “Pakara ara kakarara ilytjikutu munu nyuntumpa malanypaku ngaparikati.” Ka palulanguru wati panya Aaronnga pakara anu munu pula mañanykira ngaparku tjunguringu puli panya pulkangka Tjaniyala Godaku panya pulingka. Munu pulanku pukularira ampura mitamita kutjara nyunytruñu.

²⁸ Ka Moselu kutangka tjakultjunangi uwankara Godalu palula wangkanytja puli nyara palula, panya palunya wituntja ngura panya Itjipalakutu. Munu paluru tjakultjunangi panya mañkurpa Godalu palunya nintinu witulya pulkangku palyantjaku. ²⁹ Munu pula tjunguringkula anu ngura panya Itjipalakutu. Munu pula wirkara wati panya Israelkunu pulka tjuta altira tjungunu. ³⁰ Ka tjana tjunguringkunyangka Aarontu tjanala tjakultjunangi Godalu Mosela uwankara wangkanytja. Ka Moselu tjanala mirangka mañkurpa panya witulyangku palyanu tjana nyakula urulyarantjaku, puñu panya tjukara liruringkunytja munu mara latjaringkunytja munu mina uру milkalirinytja. ³¹ Kaya wati panya pulka tjutangku nyakula mulamularingu nyanga alatji palyannyangka. Munuya Moselu pula wangkanyangka kuliningi, “Munta-uwa, mulapa Godanya nganampa ninti nyinanyi, munu paluru nyanganyi Itjipanya ngurara tjutangku nganananya kurannyangka.” Munuya palulanguru kulira pukultu Mayatja Godanya pupakatira walkuningi.

5

Moselu Pula Aarontu Mayatja Piirala Wangkanytja

¹ Ka mañangka añañgu tjutangka wangkara wiyingkula Mosenya pula Aaronnga Itjipaku mayatja pulkakutu anu Piiralakutu palula wangkanytjikitja munu pula wirkara wangkangu nyanga alatji, “Israelkunu tjutaku Mayatja Godalu ngalinya witunu alatji pulkara wangkanytjaku nyuntula, ‘Ngayuku añañgu tjuta wantir'iyantma tjana ilytjikutu ankula ngayunya walkuntjikitjangku inma pulka palyantjaku.’”

² Palu mayatja panya Piiralu kulira wiyanmanu wangkara, “Palu ngananya wanyu mayatja paluru? Ngayulu palumpa ngurpa. Nyaakunua palula kulilku mununa wantir’iyalku Israelkunu tjuta? Ngayulu palula kulilwiyangku wantinyi, mununa palunya tjananya wantir’iyantja wiyangku wantinyi.”

³ Ka pula palula wangkangu, “Wiya, Mayatja Godalu, panya anangu Iipuru tjutaku Godalu, ngalila mulapa utiringkula wangkangu. Palulan-guru nganañanya kanyintja wiyangku wantir’iyanma tjirirpi mankurpa ankunytjaku ilytjikutu, kala nganana kuka pungkula tiliwakara Mayatja nganampa Godanya ungkuku paluru nganampa pukularinytjaku. Palu nganañña tjinguru ankuwiyangku wantinyangkampa paluru nganañanya iluntankuku pika kutjupa kutjupa tjuta iyara, munta tjingurulampa warmala tjuta iyalku, kalanya iluntankuku.”

⁴⁻⁵ Palu watu panya Piiralu pulala wangkangu, “Wiya, nyaaku nyupali Iipuru tjuta wangkanyi warika wantikatira ilytjikutu ankunytjaku? Panya kuwariya tjuta mulararingu munuya nganampa warika pulka palyani, kaña tjananya wantir’iyantja wiyangku wantinyi. Małaku puła ara munu tjananya piruku pulkara warkarinytjaku wangka.” Ka pula putu tjapira anu.

⁶⁻⁷ Ka pula ankunyangka malangka Piiralu altingu watu panya paluru mayatja tjunkunytja tjuta munu tjanala wangkangu alatji, “Nyura panya Israelkunu tjuta pauntjingara wituwitulpai nganampa pulkara warkarinytjaku. Munu panya nyura ilintji pilii tjuta ungkupai tjana tjulpira tjungura tjuminta wituwitupai palyantjaku. Palu kuwariya tjananya wantima unguwiyangku, kaya walytjangku ngurira mantjinma. ⁸ Palu tjana uti tjuminta tjuta rawangku palyanma nampa panya palunyuatu, panya nganmanytjuya palyaningi, palu purunypa. Ka nyura mankurpa palyannyangka pukularinytja wiyangku wantima, panya nyura alatjin-gannyangkaya anangu pala warika tjuta ma-nyaataringu munuya palulan-guru tjana warika wantira ngayula rawangku ngatjini tjananya ilytjikutu wantir’iyantjaku tjana kuka pungkula tjanampa God ungkunytjikitjangku. ⁹ Ka palula-tawara nyura tjananya pulkara alatjiu warakamilanma tjana ngurangka warika wiya nyinara tjukurpa ngunti kulintjaku-tawara Moselu wangkanyangka.” Alatji Piiralu tjananya wituwituwu watu panya mayatja tjuta.

¹⁰⁻¹¹ Kaya paluru tjana kulira ankula Israelkunu tjutangka wangkangu, “Mayatja Piiralu wangkangu nganañña piruku nyuranya ukiri ilintji pilii tjuta unguwiyangku wantinytjaku munu nyuranya wangkangu walyt-jangku ankula para-ngurira mantjintjaku. Palu nyura kunyu tjirirpi kutjungka tjuminta nampa panya palu purunypatu palyanma, panya nyura nganmanytju tjirirpi kutjungka tjuta mulapa palyaningi, palu purunypa.”

¹² Kaya nyangatja kulira Israelkunu tjuta anu ngura panya Itjipala uwankarangka munuya para-nguriningi ukiri panya ilintji pilii. ¹³ Kaya watu panya mayatja tjutangku tjananya pulkara alatjiu wituwituningi warika pulka palyantjaku. Munuya wangkangu, “Nyura uti tjuminta tjuta palyarampa panya nganmanyitja purunypa palyanma tjuta mulapa, panya nganmanytjula nyuranya ukiri ilintji pilii tjuta ungangi, ka panya nyura tjuta mulapa palyaningi, palu purunypaya tjuta palyanma.”

¹⁴ Palu putuya palyaningi, kaya Piiralu panya mayatja tjunkunytjtita tjutangku tjananya pungangi watu panya Israelkunuku mayatja tjuta, panya watu palunya tjananyaya anangu Israelkunu tjutanguru nganmanytju

ngurkantara tjuₙu tjanampa walytja tjuₙa mayatjarira warkamilantjaku. Kaya Piiralu mayatja tjunkunytjtja tjutangku palula tjanala wangkangu nyanga alatji, “Al! Nyurampa walytja tjutangku palyantja wiya tjuminta tjuₙa mulapa, nampa panya nganmanytju tjana palyantjtja purunypa. Nyaanguru? Utiya panya palu purunypatu tjuₙa palyanma, maŋkurpa wiyangku.”

15-16 Kaya wati panya Israelkunuku mayatja tjuₙa anu Piiralakutu munuya wirkara wangkangu, “Mayatja wiru, ngaltingamalampa. Palu nyaakulanyan alatjingani? Nganana panya nyuntumpa warkarinyi, kalanya nyaanguru nyuntu panya mayatja tjunkunytjtja tjutangku nganananya punganyi? Paluru tjana nganananya ungkunytja wiya ilintji panya tjuminta palyantjaku, kala nganana putu palyani tjuminta tjuₙa ilintji wiyangka. Kalanya paluru tjana mirpañarira alkanı tjuₙa palyantja-tjiratjangku. Palu nyuntu uti tjanampa mirpañarima panya tjana nganananya ilintji tjuₙa ungkunytja wiyangku wantinyangka.”

17-18 Ka Piiralu tjanala wangkangu, “Wiya, nyura warkaku ngurpa! Nyura tjukutjuku warkarira mapalku pakuringkupai. Pala palulanguru nyura ngayunya tiutjarangku ngatjini nyuranya wantir'iyantjaku ankula kuka pungkula nyurampa God ungkunytjikitjangku. Malakuya ara warkaku. Kala nganana nyuranya piruku ungkuwiyangku wantinyi ilintji panya pilti tjuₙa, palu pirukuya palyala tjuminta panya tjuₙa mulapa nyura panya nganmanytju palyantja purunypa.” **19** Kaya anangu Israelkunuku mayatja tjutangku nyangatja kulira pulkara nguluringu munuya kulinigi, “Yaaltjirikula? Panya Piiranya mukuringanyi nganana tjuminta tjuₙa mulapa palyantjaku, panya nganana nganmanytju palyantja purunypa. Palu tjana ilintji pilti tjuₙa nganananya ungkuwiyangku wantinyangkampa nganana nampa panya palu purunypatu putu nguwanpa palyalku, kalanya uwankara pungkuku Piiraku panya wati tjutangku.” Munuya palulanguru Piiranya wantikatira anu.

20 Munuya Piiraku nguranguru ma-pakara nyangu Mosenya pulanya Aaronnga tjanampa patannyangka. **21** Munuya pulkara mirpañarira wangkangu pulanya nyanga alatji, “Mayatja Piiranya palumpa wati mayatja tjuta kulu nganampa pulkara mirpañarinyi nyupalilanguru, munulampa kuraringanyi. Ka uti Mayatja Godalu nyupalinya pungama, panya nyupali Piirala wangkangu nganananya ilytjikutu wantir'iyantjaku, kaya nyara palulanguru paluru nganananya iluntankunytjikitjangku kulini.”

Moselu Godala Tjituru-tjiturungku Tjapintja

22-23 Ka palulanguru Moselu Godala piruku tjapinu alatji wangkara, “Mayatja God! Nyaakulanya nyuntu wantingu nyanga tjana kurantjaku, panya nganana nyuntumpa walytja tjuₙa. Nyaakunin panyatja wanyu nyangakutu iyanu? Kaₙa mulapatu pitjala Piirala tjapinu nyanga ngayuku walytja tjutaku. Ka panya ngayulu wangkanyangka Piiralu kulira tjanampa pulkara mirpañarira warka pulka mulapa tjuₙu tjanapiruku warkarinjtjaku. Ka nyuntu tjanampa anga-wangkanytja wiyangku alatjiwantingu. Nyaanguru?”

6

1 Ka Mayatja Godalu wangkangu Mosela, “Nyuntu patala kuwaripa munun nyakuku ngayulu palyannyangka wati nyanga Piirala. Ngayuluṇa

palunya ngulutjingalku paluru wanganararingkula ngayuku anangu tjuṭa paira iyantjaku tjana mapalku pakara ankunytjaku ngura nyanganguru."

Godalu Mosenya Piruku Wituntja

² Munu Godalu wangkangu Mosela nyanga alatji, "Ngayuluña Mayatja Godanya. ³ Panya nganmanypa utiringangi Aipuramala, Isacula, Jacobala tjanala God Witulya Pulkanya. Palu ngayulu palula tjanala tjakultjunkunytja wiyaṭu ini nyanga milmilpa panya Mayatjanya. ⁴ Ngayulu panya tjananya kalkura wantingu manta panya Kainannga ungkunytjikitjangku tjana ngura walytjangka nyinanytjaku, panya tjana nyara palula nganmanypa nyinangi ngura walytjatjarangka. ⁵ Kanā kulinu anangu Israelkunu tjuṭa ulanyangka, panya Itjipanya ngurara tjuṭangku tjananya pauntjingara warka pulkangka pakuningi. Kanā nyara palulanguru kulinu ngayulu panya tjananya kalkunu ngura panya Kainannga ungkunytjikitjangku. ⁶ Ka nyuntu ngayuku tjukurpa tjanala wangka anangu Israelkunu tjuṭangka nyanga alatji,

'Ngayuluña Mayatja Godanya. Ngayulu nyuranya walatjunkuku anangu Itjipanya ngurara tjuṭaku rawa waṛkarinytjaku-tawara. Mulapa ngayulu witulya pulkangku tjananya pikantankuku munuña nyuranya wankarunkuku. ⁷ Munuña ngayulu nyuranya altiku ngayuku walytja mulararinytjaku munuña ngayulu nyurampa God alatjitu ngaraku. Munu ngayulu alatjitu nyuranya Itjipalanguru pakaltjingalku tjanampa rawa waṛkarinytjaku-tawara, ka nyara palulanguru nyura nintirringkuku panya ngayulu alatjitu nyurampa Mayatja Godanya. ⁸ Panya ngayulu walytjangku nyuranya ma-katiku ngura panya nganmanytju ngayulu Aipuramanya, Isaacanya, Jacobanya tjananya kalkuntjitjakutu. Munuña nyuranya manta nyara palunya ungkuku, ka nyurampariku alatjitu. Panya ngayuluña Mayatja Godanya.'

Uwa, nyuntu tjukurpa nyanga palunya tjanala wangka Israelkunu tjuṭangka." ⁹ Ka mulapaṭu Moselu tjanala tjakultjunu uwankara Godalu wangkanytja. Palu kulintja wiyangkuya wantingi, panya kurunpaya uliringu waṛka pulka tjuṭa rawangku palyantjatjanu. Palulanguruuya Moselu wangkanyangka mulamularingkunytja wiyangku wantingi.

¹⁰⁻¹¹ Ka Mayatja Godalu wangkangu Mosela, "Ankula wangka wati panya Piirala Itjipaku panya mayatjangka paluru Israelkunu tjuṭa wantir'iyantjaku, tjana ngura nyangatja wantikatira ankunytjaku." ¹² Palu Moselu ngapartji wangkangu alatji, "Wiya, panya Israelkunu tjuṭangkuya ngayula kulilwiyangku wantingi, ka tjinguru Piiralu kuļu ngayula kulilwiyangkuwantiku, panya ngayulu puṭu nguwanpa pulkara wangkapai."

¹³ Palu Godalu Mosenya pulanya Aaronnga wituṇu ankula wati panya Piirala tjakultjunkunytjaku. Munu paluru pulanya pulkara wituwitunu anangu Israelkunu tjuṭa pakaltjingara katinytjaku ngura panya Itjipalanguru.

Nyangatja Moseku Aaronku Pulampa Walytjapiti Ini Tjuta

¹⁴ Ka wati panya Israelku katja nganmanyitja ini Rupinnga. Paluru katja kutjara kutjara kanyiningi ini nyanganpa – Anukunya, Paalunya, Itjurangna, Kaaminya. Kaya wati nyanga palula tjanalanguru anangu winkiringu tjanampa walytjapiti.

¹⁵ Ka Rupintu pininu wati ini Tjimiyangga. Ka panya Tjimiyanku katja tjuṭa ini nyanganpa – Tjimuwilnga, Tjaminnga, Uwaatnga, Tjakinnga, Tjawanya, Tjaulnga. Palu Tjaulnga panya minyma Kainannga nguraraku.

Kaya nyanga palula tjanalanguru anangu winkiringu tjanampa walytjapiti.

¹⁶ Ka Tjimiyantu pininu wati ini Levinya. Ka panya Leviku katja maŋkurpa ini nyanganpa – Kuutjannga, Kawatjanya, Mirarainya. Ka nyanga palula tjanalanguru anangu ma-tjuṭaringangitu tjanampa walytjapiti. Ka wati panya Levinya tjilpiringkula yiya nampa 137 nyinanytjatjanu ilungu. ¹⁷ Ka panya Leviku katja kuranyitjangku Kuutjantu katja kutjara kanyinu ini Lipininya pulanya Tjimainya. Ka nyanga kutjaranguru anangu ma-tjuṭaringu Leviku panya walytjapiti. ¹⁸ Ka wati panya Kawatjaku katja tjuṭa ini nyanganpa – Ama-ramanya, Iitjanya, Iparamanya, Utjiyalnga. Ka nyanga palula tjanalanguru anangu ma-tjuṭaringangitu tjanampa walytjapiti. Ka Kawatjanya panya tjilpiringkula yiya nampa 133 nyinanytjatjanu ilungu. ¹⁹ Ka Mirarailu katja kutjara kanyinu ini nyanga pulanya – Maalinya munu Mutjinya. Ka nyanga palula pulalanguru anangu ma-tjuṭaringangitu pulampa walytjapiti. Uwa, nyanga paluru tjana uwankara wati panya Leviku walytjapiti.

²⁰ Ka panya Leviku pakalingku Ama-ramalu altingu palumpa mamaku kangkuru ini Tjakapitinya. Munu pula katja kutjara kanyinu ini Aaronnga pulanya Mosenya. Ka wati panya Ama-ramanya panya tjilpiringkula yiya nampa 137 nyinanytjatjanu ilungu. ²¹ Ka Ama-ramaku małanypangku Iitjalu katja maŋkurpa kanyinu ini nyanganpa – Kuranya, Nipikanya, Tjikirinya tjananya. ²² Ka Iitjaku małanypangku Utjiltu katja maŋkurpa kutjupatu kanyinu ini nyanganpa – Mitjailnga, Iltjapanya, Tjitjurinya tjananya.

²³ Ka Aarontu altingu kungka ini Ilitjipanya panya wati ini Aminatapaku unṭalpa munu wati ini Naatjanku kangkuru. Ka Ilitjipalu Aaronku katja tjuṭa kanyinu ini nyanganpa – Natapanya, Apiwunya, Iliyatjanya, Itjamanya tjananya.

²⁴ Ka wati panya Kuralu katja maŋkurpa kanyinu ini nyanganpa – Itjiranya, Ilkananya, Api-yatjapanya tjananya. Ka wati nyanga palula tjanalanguru anangu ma-tjuṭaringu ini panya Kurakunu tjuṭa.

²⁵ Ka panya Aaronku katjangku Iliyatjalu altingu wati Putiyalku unṭalpa. Ka paluru kanyinu katja ini Piniyatjanya.

Uwa, ini nyanga paluru tjana panya wati ngañmanyitja tjuṭa Levikunu tjuṭaku, kaya palula tjanalanguru anangu winkiringu Leviku walytjapiti tjuṭa.

²⁶ Ka panya Aaronta pulala Mosela Mayatja Godalu wangkangu nyanga alatji, “Nyupali anangu Israelkunu tjuṭa ngura nyanga Itjipalanguru pakaltjingala munu tjananya uwankara ma-kati walytjapiti kutjupa walytjapiti kutjupa.” ²⁷ Ka wati nyanga paluru pula panya Itjipaku mayatjangka Piirala wangkangu anangu Israelkunu tjuṭa wantir’iyantjaku.

Mayatja Godalu Mosenya Pulanya Aaronnga Wangkanytja

²⁸⁻²⁹ Munu ngura pala Itjipala nyinanyangka Mayatja Godalu Mosela wangkangu nyanga alatji, “Ngayuluña Mayatja Godanya. Ka nyuntu ankula Itjipaku mayatjangka wangka Piirala uwankara ngayulu panya nyuntula wangkanytja.”

³⁰ Palu Moselu ngapartji wangkangu, “Wiya, ngayulu palyanyku wangkappa wiya, ka tjinguru Piirala ngayunya kulintja wiyangku wantiku.”

7

¹⁻² Ka Mayatja Godalu wangkangu Mosela, “Ngayulu panya nyuntunya palyanu Godanya purunypa mayatja panya Piirala wangkanytjaku. Mununa nyuntumpa kuta Aaronnga tjunu nyuntumpa wangkatjara, paluru nyuntumpa tjukurpa Piirala wangkanytjaku. Ka nyuntu uwankara ngayulu wangkanytja Aaronta wangka, ka paluru ngapartji mayatja panya Piirala tjakultjunkuku munu palunya wangkaku anangu Israelkunu tjuṭa wantir'iyantjaku palumpa nguranguru.³ Palu ngayuluṇa Piiranya tungunpungkunytjaku palyalku, ka paluru nyupalila kulintja wiyangku wantiku. Ngayuluṇa witulya pulkangku palyalku kutjupa kutjupa tjuṭa ngura pala Itjipala Piiralu nyakunytjaku.⁴ Palu paluru nyupalila kulilwiyangku wantiku. Kaña palulanguru ngura pala Itjipanya pulkara kuralku. Mununa ngayulu ngura pala palulanguru pakaltjingara katiku ngayuku waltya tjuṭa anangu pala Israelkunu tjuṭa.⁵ Uwa, ngayuluṇa witulya pulkangku kuralku ngura pala Itjipanya mununa ngura pala palulanguru Israelkunu tjuṭa pakaltjingalku, kaya Itjipanya ngurara tjutangku nintiringkula kulikku panya mulapa ngayuluṇa Mayatja Godanya.” Nyanga alatji Godalu wangkangu Mosela.

⁶ Ka Moselu pula Aarontu mulapatu palyanu Mayatja Godalu panya wangkanytjitja.⁷ Ka paluru pula Piirala wangkanytja arangka Mosenya panya wati tjilpi nguwanpa nyinangi yiya nampa 80 nyinanytjatjanu. Ka palumpa kuta Aaronnga tjilpitu nyinangi yiya panya nampa 83 nyinanytjatjanu.

Punu Tjukara Aaronku

⁸⁻⁹ Ka piruku Mayatja Godalu wangkangu Mosela pulala Aaronta, “Nyupali panya Piirala wirkankunyangka paluru tjinguru nyupalila tjapilku kutjupa kutjupa witulyangku palyantjaku paluru nyakula mulamularingkunytjikitjangku. Ka Mose, nyuntu alatji tjapinnnyangkampa Aaronnga wangka puṇu panya tjukara mantjira mantangka waṇinytjaku Piirala kuranyu, ka puṇu panya tjukara paluru liruringkuku.”

¹⁰ Ka palulanguru Mosenya pula Aaronnga anu Piiralakutu munu pula Godalu panya wangkanytja palyanu. Ka Aarontu waṇingu tjukara mantangka Piirala kuranyu munu palumpa wati mayatja tjuṭangka miṛangka kuļu, ka mulapatu waṇinyangka liruringu.¹¹ Ka Piiralu tjukaranguru liruringkunyangka nyakula wati kutju iyanu palumpa ngangkarī tjuṭa altira ngalya-katinytjaku, kaya pitjala tjana ngapartji palu purunypatu palyaningi tjanampa witulyatjarangku.¹² Munuya waṇingu tjanampa tjukara tjuṭa, ka palu purunypatu liruringu tjukara panya tjuṭa. Palu Aaronku panya tjukarangku liruringkunytjatjanungku liru panya kutjupa tjuṭa uwankara kuulṭjanu.¹³ Ka Piiralu nyakula wantira tungun-tungunpa alatjiṭu nyinangi, panya nyanga alatjirinytjaku Godalu ngañmanytju wangkangu. Munu paluru kulintja wiyangku wantingu Aaronnga pulanya Mosenya.

Kura Tjuṭa Ngura Itjipala Utiringkunytja – 1. Uru Milkalirinytja

¹⁴ Ka piruku Godalu wangkangu Mosela, “Mayatja panya Piiranya pulkara tungunpunganyi munu anangu Israelkunu tjuṭa wantir'iyantja wiyangku alatjiṭu wantinyi.¹⁵ Ka nyuntu mungawinki tjukara panya palunyatjara ankula paṭanma karu panya Nayulta uṛu kantilytja mayatja panya paluru urukutu ngalya-pitjanytjaku.¹⁶ Munu palunya nyakulampa tjakultjura tjukurpa ngayulu kuwari nyuntula wangkanytja.”

Ka Moselu tjukurpa wangkanyangka kulinu munu ankula mayatja panya Piirala tjukarurungku tjakultjunu alatji, "Mayatja Godalu, panya anangu Iipuru tjutaku Mayatjangku, ngayunya iyanu nyuntulakutu palumpa tjukurpa nyuntula tjakultjunkunytjaku. Alatji paluru nyuntunya wangkanyi, 'Ngayuku anangu tjuṭa wantir'iyanma paluru tjana ilytjikutu ankula ngayunya walkuntjaku. Nyanga alatji panya na nyuntula ngañmanytu wangkangu, ka nyuntu ngayula kuliswiyangku wantingi. ¹⁷ Palu kuwarina nyuntula mirangka witulya pulkangku palyanu nyuntu nyakula ngayuku nintiringkunytjaku panya ngayulu Mayatja Godanya.' " Alatji Moselu mayatja panya Piirala tjakultjunu Godalu wangkanytja uwankara. Munu palulanguru piiruku palula wangkangu alatji, "Kuwarina uru nyanga Nayilnga pungkuku puṇu nyanga tjukarangka, ka uru paluru kutjuparira milkaliriku. ¹⁸ Ka antipina uru nyanga Nayulta ngarinytja uwankara iluku. Ka uru panya paluru kuraringkula paṇtiku. Ka nyura Itjipanya ngurara tjuṭangku putu mina tjikilku karu nyanga Nayiltanguru."

¹⁹ Ka Mayatja Godalu Mosela wangkangu, "Aaronnga wangka, ka paluru nyuntumpa panya tjukarangka katura kanyila urungka katu, mina uru pala Itjipala ngarinytja uwankara milkalirinytjaku, ka karu tjuṭa, tjintjira tjuṭa, tjukula tjuṭa, mina piṭi tjuṭa kuļu uwankara alatjitu milkaliriku. Ka ngurangka pitingka tjutira tjunkunytja tjuṭa kuļu milkaliriku."

²⁰⁻²¹ Ka Moselu pula Aarontu mulapaṭu palyanu Godalu panya wangkanytjitja. Ka Aarontu tjukara panya palunya urungka katu wakura pungu uru panya Nayilnga Piirala mirangka palumpa wati mayatja tjuṭangka mirangka kuļu, ka uru uwankara milkaliringu. Ka antipina uwankara karu panya Nayulta ilungu. Ka uru uwankarangka kura paṇtingi, kaya karu panya palulanguru puṭu mina tjikiningi anangu Itjipanya ngurara tjuṭangku, panya uwankara milkali tjiwariwari ngaringi ngura panya Itjipala. ²² Kaya Piiraku ngangkarai tjuṭangku palu purunypaṭu palyanu uru milkalirinytjaku. Ka Piiralu nyangu palumpa ngangkarai tjuṭangku alatji palyannyangka munu piiruku Mosela pulala Aaronta tungunpungu munu pulala kulintja wiyangku wantingi, panya nyanga alatjirinytjaku Godalu ngañmanytu Mosela pulala wangkangu. ²³ Ka nyanga palulanguru Piiralu wantikatira anu ngurakutu panya paluru puṭu alatjitu mulamularingangi Moselu pula Aarontu palyannyangka.

²⁴ Ka anangu Itjipanya ngurara uwankarangku puṭu mina tjikiningi karu panya Nayiltanguru. Munuya palulanguru karungka itingka kitikiti piṭi kutju kutju tjawanangi mina palya ngurintjikitjangku.

²⁵ Ka Mayatja Godalu karungka uru panya milkalirinytjaku palyannyangka malangka tjintu 7 ngarala wiyingru.

8

2. Nganngi Tjuṭa

¹ Ka Mayatja Godalu piiruku wangkangu Mosela, "Ara mayatja panya Piirakutu munu palula tjakultjura tjukurpa nyanga ngayulu kuwari nyuntula wangkanytja." Ka Moselu tjukurpa wangkanyangka kulinu munu ankula mayatja panya Piirala tjukarurungku tjakultjunu nyanga alatji, "Mayatja Godalu ngayunya iyanu nyuntulakutu palumpa tjukurpa nyuntula tjakultjunkunytjaku. Alatji paluru nyuntunya wangkanyi, 'Ngayuku anangu tjuṭa wantir'iyanma paluru tjana ankula ngayunya walkuntjaku.

² Palu nyuntu ngayula tungunpungkunyangka na nyuntunya pulkara tjituru-tjiturunkuku ngañngi tjuṭa mulapa iyara nyuntumpa ngurakutu. ³ Ka

karu uru Nayilta ngañngi tjuṭa winkiringkuku munuya uru wantikatira angalku manta uwankarangka munuya walì nyuntumpangka tjarpaku munuya tjarpaku nyuntumpa piitangka kulu. Munuya walì winkingka nyuntumpa wati mayatja tjutaku walingka kulu tjarpaku, munu Itjipanya ngurara tjuṭaku walì uwankarangka. Munuya mai paulpaingka unngu kulu tjarpaku munu piti mai kutjalpaingka kulu.⁴ Tjanaya mungilyiriku mulapa, munuya para-para-wararakatiku nyuntula itiwana itiwana munu nyuntumpa wati mayatja tjutangka kulu, munu anangu Itjipanya ngurara kutjupa uwankarangka kulu.’” Alatji Moselu mayatja panya Piirala ankula tjakultjunu Godalu panya wangkanytja uwankara.

⁵ Ka palulanguru Godalu piiruku wangkangu Mosela, “Aaronnga wangka tjukara panya katura kanyintjaku urungka katu. Ka nganngi mungilyi mulapa ngalya-pakalku karu uwankaranguru ngura pala Itjipala manta winkikutu.” Ka Moselu wangkangu Aaronta. ⁶ Ka Aarontu mulapatu tjukara katura kanyinu urungka katu. Kaya nganngi mungilyi mulapa uru uwankaranguru ngalya-pakanu munuya ngura panya Itjipala winkingka angara nyinara wañanangi. ⁷ Kaya Piiraku ngangkari tjuṭangku palu purunypatu witulyangku palyanu urunguru nganngi tjuṭa pakara urilta nyinara wañinytjaku ngura pala Itjipala.

⁸ Ka Piiralu wati kutju iyanu Mosenya pulanya Aaronnga altira ngalyakatinytjaku munu pulala wangkangu, “Wanyu pula Mayatja Godala tjapila nganngi nyanganpa wiyanjtaku ngayulanguru munu ngayuku anangu tjuṭanguru kulu, kaña nyuntumpa anangu tjuṭa wantir’iyalku ankula kuka pungkula tiliwakaṛa Godanya ungkunyntjaku.”

⁹ Ka Moselu wangkangu Piirala, “Palya, ngayuluṇa Godala tjapilku nganngi tjuṭa wiyanjtaku. Palu wanyuni tjakultjura nyuntu ara kulirampa, kaña ngayulu nyara palula arangka tjapilku nyuntumpa munu nyuntumpa wati mayatja tjuṭaku munu pala Itjipanya ngurara uwankaraku kulu, ka Godalu palyalku nganngi tjuṭangku nyuranya munu nyurampa walì tjuṭa kuļu wantikatinytjaku, kaya karu panya Nayilta urungka kutju nyinaku.”

¹⁰⁻¹¹ Ka Piiralu palula wangkangu, “Godala ngayuku tjapila mungawinki.”

Ka Moselu wangkangu, “Palya, mungawinkina palula tjapilku, kaya mulapatu nganngi tjuṭangku nyuranya uwankara wantikatiku nyurampa walì tjuṭa kulu, munuya Nayilta urungka kutju nyinaku. Ka nyara palulanguru nyuntu nintiringkula kulilkupanya nganampa Mayatja Godanya witulya pulka mulapa nyinanyi, ka kutjupa palu purunypa nyinanytja wiya alatjiṭu.” Nyanga alatji Moselu Piirala wangkangu. ¹² Ka nyanga palulanguru Aarontu pula Piiranya wantikatira anu.

Ka mungawinki Moselu Mayatja Godala tjapinu nganngi panya tjuṭaku panya paluru iyanu wati panya Piirala tjanalakutu. ¹³ Ka Godalu kulinu Mosenya munu iluntanu nganngi panya tjuṭa. Kaya uwankara ilura wiyingku walingka, yaatangka, urilta munu ngura uwankarangka kulu. ¹⁴ Kaya Itjipanya ngurara tjuṭangku nganngi tjuṭa urara uṭulura tjunu pulka mulapa. Ka mapalku uñaringku ngura uwankarangka munu kura pantingi.

¹⁵ Ka mayatja panya Piiralu nyangu nganngi tjuṭa ilunyangka munu palulanguru paluru piiruku Godala tungunpungu munu Mosela pulala Aaronta kulilwiyangku wantingi, panya alatjirinytjaku Godalu nganmanytju Mosela pulala wangkangu.

3. Kiwinyi Tjuṭa

¹⁶ Ka piṛuku Godalu Mosela wangkangu, “Wangka Aaronta manta pungkunytjaku tjukara panya palula ulpuru pakantjaku, ka ngura uwankarangka Ittipala winkingka ulpuru pulka pakara kampa kutjuparira kiwinyiriku.” Ka Moselu wangkangu palumpa kuṭangka. ¹⁷ Ka mulapatu Aarontu tjukarangka panya manta pungu, ka ngura winkingka ulpuru pulka pakara kampa kutjuparira kiwinyiringu munu aŋangu, kuka tjuṭa kuļu tjutuṛa patinu Ittipala ala lipiwanungku. ¹⁸ Ka Piiraku ngangkari tjutangku witulyatjarangku arkara putu palyaningi kiwinyi tjuṭaringkunytjaku. Palu panya Godalu palyantja kutju ngura lipiwanu angara ngarangi. ¹⁹ Kaya wati panya ngangkari tjutangku wangkangu Piirala, “Godalu witulya pulkangku nyangatja palyanu.” Palu piṛuku Piiranya Godala tungunpungu munu Mosela pulala Aaronta kulintja wiyangku wantingi, panya Godalu ngañmanytju wangkanytjitja alatjiringu.

4. Punpunpa Tjuṭa

²⁰ Ka piṛuku Mayatja Godalu wangkangu Mosela, “Mungawinki mulapa pakala munu ankula mayatja panya Piiranya karu Nayiltakutu ankunyangka wirkara nyawa, munu palula tjakultjura tjukurpa nyanga ngayulu kuwari nyuntula wangkanytja.” Ka Moselu tjukurpa wangkanyangka kulinu munu ankula mayatja panya Piirala tjukarurungku tjakultjunu nyanga alatji, “Mayatja Godalu ngayunya iyanu nyuntulakutu palumpa tjukurpa nyuntula tjakultjunkunytjaku. Alatji paluru nyuntunya wangkanyi, ‘Ngayuku aŋangu tjuṭa wantir’iyanma paluru tjana ankula ngayunya walikutjaku. ²¹ Palu nyuntu wantir’iyanma wiyangku wantinyangkampa ngayulu punpunpa tjuṭa mulapa iyalku nyurampa walikutu, kaya paluru tjana tjuṭa mulapa nyuntula nyinakatiku munu nyuntumpa wati mayatja tjutangka munu aŋangu Ittipanya ngurara uwankarangka kuļu, ka Ittipala wali tjutangka punpunpa tjuṭa tjaalyngaraku munu manta kuļu tjutuṛa patilku punpunpa winki mulatu. ²²⁻²³ Palu ngayuluña ngura panya Katjintakutu punpunpa iyantja wiyangku wantiku, panya ngura nyara palula ngayuku walytja tjuṭa nyinanyi aŋangu panya Israelkunu tjuṭa. Ka tjananya punpunpa tjutangku wirkara kaarakantja wiyangku wantiku, munuya nyuntumpa ngurangka kutju wirkankuku nyuntumpa aŋangu tjutangka. Mungawinkina nyangatja palyalku, ka nyuntu nyakuku punpunpa mungilyi mulapa nyurampa ngurangka wirkankunyangka manta Ittipala, palu ngura nyara ngayuku aŋangu tjuṭa nyinanytjala punpunpa wirkankunytja wiya ngaraku. Ka nyanganguru nyuntu nintiringkula kuliklu panya mulapa ngayulu Mayatja Godanya munu panyana nyuntumpa ngurangka ngaranyi.’” Alatji Moselu Piirala tjakultjunu Godalu panya wangkanytja uwankara.

²⁴ Ka mulapatu palulanguru Mayatja Godalu punpunpa mungilyi mulapa iyanu wangkanytjatjanungku. Kaya kaputu winki mulapa Piiraku walingka tjarpangu, palumpa wati mayatja tjuṭaku walingka kuļu munuya ngura Ittipala lipiwanu wali uwankarangka kuļuya tjarpangu.

²⁵ Ka Piiralu wati kutju iyanu Mosenya pulanya Aaronnga piṛuku altira ngalya-katinytjaku munu wangkangu pulala, “Palyaya ankula kuka pungkula uwa nyurampa God paluru nyurampa pukularinytjaku. Palu ngura nyangangkaya palyanma paṭu ankuwiyangku.”

²⁶ Palu Moselu wangkangu, “Wiya, tjinguru palya wiya nganana alatjingantjaku ngura nyangangka. Panya aŋangu Ittipanya ngurara

tjuṭaya alatji palyannyaŋka nyakula tjinguru nganampa miilaralku kuka puluka tjuṭa pungkunyangka. Munuya tjinguru nganaŋala wangkaku, ‘Nyaaku nyura puluka tjuṭa punganyi? Wanti, panya kuka paluru tjana milmilpa nganaŋa walkuntjaku.’ Nyanga alatjiya nyakula wangkara miilaralku munuya tjinguru nganaŋanya mirpaŋarira apungka atura iluntankuku.²⁷ Palu wanyula ankuku tjintu mankurpa ilytjikutu, munula nyara palula kutju kuka pungkula tiliwakara Mayatja Godanya ungkuku paluru nganampa pukularinytjaku, panya nyanga alatjilanya Godalu wangkangu nganana palyantjaku.”

²⁸ Ka mayatja Piiralu ngapartji palula wangkangu, “Palya ngayulu nyuranya wantir’iyanı ankunytjaku, kaya palya ma-pitja munuya kuka pungkula tiliwakara nyurampa Mayatja Godanya ungama ngura nyara ilytjingka. Palu paṭu ankuwiyyaya ila nguwanpa ankula nyinama. Palu wanyu kuwari nyanga ngayuku Godala tjapila paluru punpunpa tjuṭa wiyatjaku.”

²⁹ Ka Moselu wangkangu, “Uwa palya, ngayulu kuwari nyuntunya wantikatira ankula Mayatja Godala tjapini, ka paluru mungawinki wiyalku punpunpa tjuṭa. Kaya nyuranya uwankara wantikatiku nyuntumpa wati mayatja tjuṭa, anangu Itjipanya ngurara uwankara kulu. Ka-puta nyuntu palulanguru kampa kutjuparira nganaŋanya markulwiyangku wanganarangku wantir’iyanma, panya nganmanyitja purunymankunytja wiyangku, kala palya ilytjikutu ankula kuka pungkula Mayatja Godanya ungama.”

³⁰ Munu wangkara wiyaringkula Moselu Piiranya wantikatira anu munu tjapinu Mayatja Godala punpunpa wiyatjaku. ³¹ Ka Godalu kulinu Moselu tjapinnyangka munu wiyaŋu punpunpa panya tjuṭa. Ka punpunpa panya tjutangku Piiranya palumpa wati mayatja tjuṭa kulu wantikatingu anangu Itjipanya ngurara uwankara kulu. Ka punpunpa kutju nyinanytja wiya alatjiṭu uwankara ilura wiyaringu. ³² Ka punpunpa tjuṭa ilura wiyaringkunyangka Piiranya piruku panya palu purunypaṭu Godala tungunpungkula anangu panya palunya tjananya wantir’iyalwiyangku markuṛa kanyiningi.

9

5. Kuka Tjuṭa Ilunytja

¹ Ka palulanguru piruku Mayatja Godalu wangkangu Mosela, “Kuwarina piṛuku nyuntula wangkanyi tjukurpa kutjupa nyuntu kulira Piirala ankula ma-tjakultjunkunytjaku!” Ka Moselu tjukurpa wangkanyangka kulinu munu ankula mayatja panya Piirala tjukarurungku tjakultjunu nyanga alatji, “Mayatja Godalu, panya anangu Iipuru tjutaku Mayatjangku, ngayunya iyaŋu nyuntulakutu palumpa tjukurpa nyuntula tjakultjunkunytjaku. Alatji paluru nyuntunya wangkanyi, ‘Ngayuku anangu tjuṭa wantir’iyanma paluru tjana ankula ngayunya walkuntjaku.

²⁻³ Palu tjinguru nyuntu wantir’iyantja wiyangku tjananya rawangku kanyinnyangkampa ngayulu pika kura mulapa iyalku nyurampa nyanytju tjutaku, munu nyurampa tangkiyiku, kamulaku, pulukaku, tjiipiku munu nanikuta tjuṭaku kulu paluru tjana uwankara pikatjararingkula ilunytjaku. ⁴⁻⁵ Palu ngayulu Israelkunu tjuṭaku kuka tjuṭa wankarunkuku pikatjararingkuwiya ngaranytjaku, ka tjanampa kuka uwankara ilunytja wiya wanka nyinaku. Uwa, mungawinki ngayulu nyanga alatjingani

ngura nyanga Itjipala winkingka.' " Alatji Moselu mayatja panya Piirala tjakultjunu Godalu wangkanytja uwankara.

⁶ Ka mulapaṭu mungawinki Mayatja Godalu palyaṇu panya paluru wangkanytjatjanungku. Ka kuka tjuta anangu Itjipanya ngurara tjutaku pikatjararingkula uwankara ilungu. Palu Israelkunu tjutaku kuka tjuta pika wiya ilunytja wiya uwankara wankaru ngarangi. ⁷ Ka Piiralu wati maŋkurpa witura iyanu Israelkunu tjutaku ngurakutu. Ka paluru tjana ankula nyangu Israelkunu tjutaku kuka tjuta ilunytja wiya alatjitu wanka ngarala wañinyangka. Munuya pitjala Piirala tjakultjunu. Palu Piiralu piruku panya palu purunypaṭu Godala tungunpungkula tjananya Israelkunu tjuta wantir'iyantja wiyangku kanyiningi.

6. Anangu Munu Kuka Tjuta Kunmanutjararingkunytja

⁸ Ka Godalu piruku Mosela pulala Aaronta wangkangu, "Mařangku pula tjunpa mantjila kulkunguru. Ka Mose, nyuntu mayatja Piirala mirangka katu wanı ilkarıngka. ⁹ Ka tjunpa panya paluru lipiringkula ulpuru pulkaringkuku munu manta Itjipala winkingka angalku. Ka ulpuru panya tjunpa palulanguru pika kunmaṇu tjuta nyinakatiku anangu Itjipanya ngurara tjutaku miringka kuka tjutangka kuļu. Munu kunmaṇu panya paluru tjana raa-raaringkula ala-alaringkula pika pulkaringkuku." Alatji Godalu wangkangu Moselu pula Aarontu palyantjaku.

¹⁰ Ka paluru pula tjunpa warunguru mantjira katingu munu pula ankula Piirala mirangka ngarangu munu palulanguru Moselu tjunpa panya palunya ilkarikutu wañingu, ka tjunpa palulanguru anangu tjuta kunmaṇutjararingu kuka tjuta kuļu. Ka palulanguru pika panya kunmaṇu tjuta kuraringkula ala-alaringu. ¹¹ Ka Piiraku ngangkari tjuta puṭu nguwanpa pitjangi Moselakutu panya paluru tjana kuļu kunmaṇu tjutatjararingu. Ka anangu Itjipanya ngurara uwankara kuļu palu purunyaringu. ¹² Palu Godalu Piiranya tungun-tungunpa palyaṇu kulilwiyangku wantintjaku, ka paluru mulapaṭu kulilwiyangku wantingi Moselu pula Aarontu wangkanyangka, panya alatjirintjaku Godalu nganmanytju Mosela wangkangu.

7. Kunaṭangku Atunytja

¹³ Ka piruku Godalu Mosela wangkangu, "Mungawinki mulapa pakala munu ankula Piirala tjakultjura tjukurpa nyanga ngayulu kuwari nyuntula wangkanytja." Ka Moselu tjukurpa wangkanyangka kulinu munu ankula mayatja panya Piirala tjukarurungku tjakultjunu nyanga alatji, "Mayatja Godalu, panya anangu Iipuru tjutaku Mayatjangku, ngayunya iyanu nyuntulakutu palumpa tjukurpa nyuntula tjakultjunkunytjaku. Alatji paluru nyuntunya wangkanyi, 'Ngayuku anangu tjuta wantir'iyantja paluru tjana ankula ngayunya walkuntjaku. ¹⁴ Ka tjinguru nyuntu alatji palyalwiyangku wantintyngkampa ngayulu witulya pulkangku nyuntunya pulkaṛa alatjitu pikantankuku munu nyuntumpa wati mayatja tjuta munu nyuntumpa anangu tjuta kuļu, nyanga Itjipanya ngurara uwankara. Kan palulanguru nintiringkula kuliku panya ngayulu witulya pulka mulapa nyinanyi uwankarangka waintarintjya, ka kutjupa ngayulu purunypa nyinanytja wiya alatjitu. ¹⁵ Tjinguru ngayulu nganmanytju nyuntunya pika kura mulapa ungama nyuntumpa anangu tjuta kuļu, ka nyura pika pulkaringkula iluma uwankara alatjitu. ¹⁶ Palu ngayulu nyuranya wantingu iluntankunytja wiyangku, nyura witulya pulkangku palyannyangka nyakula ngayuku nintiringkunytjaku, munu anangu manta winkitjangku kuļu kulira ngayunya ini kulintjaku witulya

pulkanya. ¹⁷ Palu nyuntu kañany-kañanypa alatjitu nyinanyi, munu panyan ngayula tungunpungkula ngayuku añañgu tjuña wangañarangku wantir'iyalwiyangku kanyini rawangku. ¹⁸ Ka palulanguru ngayulu mungawinki kunaña pulkanya iyaní apu purunypa punkantjaku ngura Itjipalawanu, panya ngura pala palula ngañañmanypa kunaña nyanga purunypa punkantja wiyatú. ¹⁹ Ala, kuwari wangka nyuntumpa warkatjara tjuña nyanytju, puluka, tjiipi, kuka uwankara walingka unngu tjarpatkunkunytjaku kunañangku tjananya atura iluntankunkunytjaku-tawara. Panya mungawinki kunaña pulkangku punkara uwankara urilta ngaranyangka atura iluntankuku añañgu tjuña kuļu, kaya uti uwankara wankaringkunkunytjikitja wali unngu tjarpama.' " Alatji Moselu mayatja Piirala tjakultjunu Godalu panya wangkanytja uwankara.

²⁰ Ka Piiraku wati mayatja kutjupa tjarangku kulinu Mayatja Godaku tjukurpa Moselu tjakultjunkunyangka, munuya kunañangku atuntjakutawara wala pulka anu tjanampa kuka munu añañgu warkaripai tjuña kuļu mantjira wali unngu tjarpatkunkunytjikitja. ²¹ Palu kutjupa tjarangku Godaku tjukurpa kulira wantingu munuya tjanampa kuka tjuña, añañgu warkaripai tjuña kuļu tjarpatkunkuwyangku wantingi, kaya urilta ngarangi.

²² Ka palulanguru Godalu wangkangu Mosela, "Tjukaranku katula munu wilijura ilkarikutu, ka palulanguru kunatangku punkara Itjipala lipiwanungku atulku añañgu, kuka, puňu, ukiri kuļu ngura Itjipala uwankarangka." ²³⁻²⁴ Ka Moselu puňu panya tjukara katuňu munu wilijunu ilkarikutu, ka palulanguru Mayatja Godalu mulapatu kunata ngangkalingka iyanu. Ka pulkara tuuningi, ka wanangara pinpara mantakutu wirkanangi. Ka kunaña pulkanya alatjitu Itjipala lipiwanungka punkanangi, panya nyanga palu purunypa ngañañmanypa alatjirintja wiyatú ngura pala Itjipala. ²⁵ Ka ala lipiwanungku kunatangku atuningi Itjipala uwankarangka urilta ngaranyangka añañgu, kuka kuļu munu ukiri, puňu tjuña kuļu atura uwankara wiyanu. ²⁶⁻³² Ka Itjipaku paama tjuñangka ukiri panya ini flax munu mai ini paali kuļu kunatangku atura wiyanu. Panya mai paali paluru tiana ngañañmanypa kururingu munu urantjaku ngarangi. Ka ukiri panya flax inuntjtitaratu ngarangi, ka kunatangku palu purunypatú atura wiyanu. Palu mai wiita palya ngarangi atura kurantja wiyatú, panya paluru maļa kururingkupai munu panya uñinypatjararingkunkunytja wiyatú ngarangi kuwaripa.

Palu ngura panya Katjinala kunaña wiya alatjitu ngarangi, panya Israelkunu tjuña nyinangi ngura nyara palula. Ka Piirala wati kutju iyanu Mosenya pulanya Aaronnga altira ngalya-katinytjaku. Munu pitjanyangka paluru pulala wangkangu alatji, "Mulapa ngayulu kuwari kura palyanu, panya ngayulu munu ngayuku añañgu tjuñangku nyuranya rawangku kuranangi, ka panya Mayatja Godanya kutju tjukaruru mulapa nyinanyi, ngayulu purunypa wiya. Palu wanyulampa palula tjapinma piruku kunata iyantja wiyangku wantintjaku, panya nganaña tjituru-tjturu pulkaringu rawangku tuura puyinnyangka. Kaña palya nyuranya mukuringkunyangka wantir'iyaní ngura nyanga Itjipalanguru."

Ka Moselu wangkangu Piirala, "Uwa palya, ngayulu kuwari ngura nyanga palunya wantikatintjatjanungku mara katura Mayatja Godala tjapilku, ka kunaña munu mina tuutjarangku puyintja wiyaringkuku. Ka nyara palulanguru nyuntu nintiringkula kulilkku, panya manta nyanga uwankara Mayatja Godaku alatjitu ilkari kuļu. Palu ngayulu ninti

nyuntumpa munu nyuntumpa wati mayatja tjuṭaku, panya nyura Godaku mulamula nguluringkunytja wiyaṭu.”

³³ Munu wangkara wiyaringkula Moselu Piiranya wantikatingu munu walinguru ma-pakara urilkutu anu tawunu wantikatira, munu palulan-guru mara katuringkula Mayatja Godala tjapiningi, ka kunaṭa mulapaṭu wiyaringu mina tuutjara kuļu. ³⁴⁻³⁵ Ka mayatja panya Piiralu nyangu uwankara wiyaringkunyangka munu piruku paluru tungunpungu Godala palumpa wati mayatja tjuṭa kuļu. Munu paluru Israelkunu tjuṭa wantir'iyantja wiyangku tungun-tunguntu kanyiningi, panya nyanga alatjirinytjaku Godalu ngañmanytju Mosela wangkangu.

10

8. *Tjintilyka Tjuṭa*

¹ Ka piruku Mayatja Godalu wangkangu Mosela, “Ara małaku mayatja panya Piiralakutu. Panya ngayulu palunya munu palumpa wati mayatja tjuṭa kuļu kurunpa wituwitu palyanu ngayulu tjanala miřangka kutjupa kutjupa nyanga tjuṭa witulya pulkangku palyantjikitjangku. ² Alatjina palyanu nyura nyakunytjatjanungku ngula nyurampa tjiṭji tjuṭangka tjakultjunkunytjaku, pakali puliri tjuṭangka kuļu, panya ngayulu kutjupa kutjupa tjuṭa nyanga Itjipanya ngurara tjuṭangka witulya pulkangku palyaningi tjana tjituru-tjitururinytjaku, alatji nyura tjanala tjakultjunkuku ngula. Munu nyara palulanguru nyura uwankarangku nyakunytjatjanungku nintiringkula kulilku panya mulapa ngayulu Mayatja Godanya.” Alatji Godalu Mosela wangkangu.

³ Ka palulanguru Aaronnga pula małaku anu Piiralakutu munu pula palula wangkangu, “Mayatja Godalu, panya aŋangu Iipuru tjuṭaku Mayatjangku ngalinya iyanu nyuntulakutu palumpa tjukurpa nyuntula tjakultjunkunytjaku. Alatji paluru nyuntunya wangkanyi, ‘Nyuntu panya ngayula rawa alatjiṭu tungunpunganyi. Yaalaṛa nyuntu piiwiyarinkula ngayula wanganarangku kulilku? Wanyu ngayuku aŋangu tjuṭa wantir'iyala tjana ngayunya ankula walkuntjaku ilytjingka. ⁴ Palu nyuntu kulilwiyangku wantira tungunpungkunyangkampa ngayulu mungawinki tjintilyka tjuṭa nyuntumpa ngurakutu iyalku Itjipalakutu. ⁵ Ka paluru tjana wirkara manta winki tjutura patilku mungiliyi mulatu, ka nyura manta nyakunytjikitjangku puṭu nyakuku. Ka paluru tjana uwankara alatjiṭu ngalkula wiyalu ukiri panya kunaṭangku atura tjara wantinytjtja, munuya puṇunguru kuļu nyalpi uwankara ngalkula wiyalu. ⁶ Munuya paluru tjana ankula nyuntumpa ngurangka tjarpara tjaalyngaraku, nyuntumpa wati mayatja tjuṭaku walingka kuļu, munuya panya Itjipanya ngurara uwankaraku walingka kuļu tjarpara tjaalyngaraku. Uwa, mungiliyi mulapa nyurala wirkankuku, panya ngura pala Itjipala ngañmanyipa palu puṛunypa wirkankunytja wiyaṭu ngarangi.’” Nyanga alatji Moselu Piirala tjakultjunu Godaku panya wangka. Munu palulanguru pula pakara anu mayatja panya Piiranya wantikatira.

⁷ Ka pula ankunyangka Piiraku wati mayatja tjuṭangku palula tjapiningi wangkara, “Yaaltjiṭu ařangku wati nyangantu nganampa kura palyalku? Wantir'iyala aŋangu Israelkunu tjuṭa tjana ankula tjanampa Mayatja Godanya walkuntjaku. Panyatja kulinma, panya nganampa ngura nyanga Itjipanya kura mulararingu.”

⁸ Ka wati warkatjarangku ankula Mosenya pulanya Aaronnga altira małakungku ngalya-katingu Piiralakutu. Ka pulala wangkangu, “Uwa,

palyaya ara munuya nyurampa Godanya wal kunma. Palu tjakultjuranı, ngananya tjana kułuya ananyi?"

⁹ Ka Moselu wangkangu, "Nganana ananyi uwankara tjitji kulu, tjilpi, pampa, katja, unṭalpa kułu. Munula kuka nganampa kułu katinyi tjiipi nanikuta tjuta, puluka tjuta kułu. Panya nganana ankula nyarangka inkara pukularira Mayatja Godanya wal kulku."

¹⁰ Ka Piırılu palula anara wangkangu, "Wiya, nyuntu tjinguru ngunti wangkanyi. Nyura tjinguru uwankara wirtjapakantjikitjangku kulini ngura nyanganguru. Ka Mayatja Godalumpa wanyu nyuranya mulapa aṭunymara kanyilku? Wiya, ngayulu minyma tjitji kułu wantir'iyantja wiyangku kanyini nyura ngura nyangatja wantikatira wirtjapakantjakutawara. ¹¹ Ka nyura wati kutju ara munuya Mayatja Godanya nyarangka wal kunma, panya palunyakitjangku nyura ngayula rawangku tjapiningi." Ka palulanguru wangkara wiyingkunyangka Piırıku wati mayatja tjutangku Mosenya pulanya paira iyanu.

¹² Ka palulanguru Mayatja Godalu wangkangu Mosela, "Maranku katula ngura Itjipala katuwanungku, kaya tjintilyka tjuta mulapa ngalyawirkankuku, munuya pitjala ukiri, puńu uwankara paamangka pakaltjingtajta ngalkula wiyaliku, uwankara panya kunałangku tjara atura wantintytja tjuta."

¹³ Ka mulapatı Moselu palumpa tjukara katuńu ngura panya Itjipala katuwanungku, ka Mayatja Godalu iyanu walpa pulka kakararanguru ka pulkara wangkangi kalala wařa munu munga wara. Munu mungawinki mulapa walpa panya paluru tjintilyka mungiliyi ngalyakatingu. ¹⁴ Ka winki mulatu tjaalyngarangu manta Itjipala lipiwanungku, panya tjintilyka mungiliyi mulapa palu purunypa iriti ngaranytja wiya munu panya małangka kułu nyanga purunypa piruku ngaranytja wiya alatjitu. ¹⁵ Ka tjintilyka paluru tjana warpungkula alatjitu tjutura patinu ngura winki, ka uwankara maruringu. Munuya ukiri mai uwankara ngalkuningi panya kunałangku tjara atura wantintytja tjuta. Munuya kaana tjutangka mai munu nyalpi punutja uwankara kułu ngalkunu. Ka ngura pala Itjipala uwankarangka nyalpi munu ukiri ngaranytja wiyingingu.

¹⁶ Ka Piırılu mapalku wati warkatjara iyanu Mosenya pulanya altira ngalya-katintjaku. Munu wangkangu pulala, "Ngayulu kura mayatja nyurampa Godala tungunpungangi, munuńa nyupalila kułu kulintja wiyangku wantingi kurangku. ¹⁷ Katju pula ngayuku ngalturingama mununi pula kalypangku kurantja wiyangku wantima ngayuku kuranguru. Wanyu pula Mayatja Godala tjapila, ka nyanga tjintilyka tjuta wiyla nganana ilunytjaku-tawara." ¹⁸ Ka Moselu Piıranya wantikatira ankula Mayatja Godala tjapinu. ¹⁹ Ka mulapatı paluru walpa panya palunya kampa kutjupara iyanu wiluraranguru pulka mulapa, ka pulkara wangkara tjintilyka winki uru pulkakutu unṭura wiyanu. Ka palulanguru tjintilyka kutjupa nyinanytja wiya alatjitu ngarangi ngura panya Itjipala. ²⁰ Palu piruku Mayatja Godalu Piıranya tungun-tungunpa palyanu kulilwiyangku wantintjaku, ka paluru Israelkunu tjuta wantir'iyantja wiyangku kanyiningi.

9. Mungawaluru Pulka Ngaranytja

²¹ Ka nyanganguru Mayatja Godalu wangkangu Mosela, "Maranku katula munu wilitjura ilkarikutu, ka munga maru mularariku ngura pala Itjipala

winkingka. Kaya anangu Itjipanya ngurara tjuta kurutjara purunypa para-ngaṛaku, munuya puṭu alatjiṭu nyakuku.”

²² Ka Moselu mulapaṭu maṛa katura wiliṭjunu ilkarikutu, ka pulkaṛa mulapa maruringu Itjipala winkingka. Munu rawa alatjiṭu ngarangi tjintu maṇkurpa. ²³ Kayanku Itjipanya ngurara tjutangku puṭu ngaparku nyangangi. Munuya uwankara wali unngu kutju nyinangi үrilkutu pakan-tja wiya tjintu panya maṇkurpa maru ngaranyangka. Kaya Israelkunu tjuta kutju pukulpa nyinangi, panya palumpa tjanampa maṇṭara kaṭala ngarangi ngura panya tjana nyinanytjanya.

²⁴ Ka piruku Piiralu wati kutju iyanu Mosenya altira ngalya-katinytjaku, munu pitjanyangka palula wangkangu, “Palya nyura uwankarangku ankula walkunma nyurampa Mayatja Godanya, minymangku, tjitjingku kuļu. Palu nyurampa tjiipi, nanikuta, puluka tjutaya katinytja wiyangku wantikati nyangangka.”

²⁵ Ka Moselu wangkangu, “Wiya, utila kuka tjuta kuļu katima, panya nganampa kuka tjutanguru nganana ngurkantara tjara pun-ganyi munu tiliwakara Mayatja Godanya unganyi paluru nganampa pukularinytjaku. ²⁶ Palulangurula nganampa kuka uwankara katinyi tjara kutjupa wantikatinja wiyangku, panya nganana ma-wirkara wal-ytjangku ngurkantankuku kuka kutjupatjara pungkula Mayatja Godanya ungkula walkuntjikitjangku. Palu nganana ankunytja kuwaripangka puṭu nganmanytju ngurkantananyi.”

²⁷ Palu Mayatja Godalu piruku Piiranya palyanu tungunpungkunytjaku, ka paluru tjananya wantir'iyantja wiyangku alatjiṭu kanyiningi. ²⁸ Munu paluru wangkangu Mosela palumpa mirpañarira, “Pakaṛa ara munu nyanganguru piruku małaku pitjanytja wiyariwa. Tjinguru nyuntu piruku ngayulakutu pitjanyangkampa ngayulu wangkaku nyuntunya iluntankun-ytjaku.”

²⁹ Ka palulanguru Moselu wangkangu Piirala, “Palya, nyuntu wangkanyangkaṇa kulinu, mununa kuwari ankula piruku nyuntulakutu pitjanytja wiya alatjiṭu.”

11

10. Godalu Katja Nganmanyitja Tjuta Iluntankunytjikitjangku Wangkanytja

¹ Ka Mayatja Godalu Mosela wangkangu alatji, “Ngayulu kuwari nyanganguru kura pulka mulapa pika pulka palyalku mayatja panya Piiraku munu Itjipanya ngurara tjutaku kuļu. Ka pala palulanguru mayatja paluru nintiringkula wantir'iyantjikitjangku kulilku nyuranya, munu nyuranya uwankara paṛa iyalku mapalku pakaṛa ankunytjaku.

² Palu kuwari Israelkunu tjutangka wangka tjana uwankarangku Itjipanya ngurara tjutangka ankula ngatjintjaku panya nyurala itingka nyinanytja tjutangka, kaya wiru tjuta nyuranya ungkuku apu tjiilpatjara gold-tjara kuļu.” Nyanga alatji Godalu wangkangu Israelkunu tjutangka tjana palula tjanala ngatjintjaku. ³ Panya Godalu tjananya Itjipanya ngurara tjuta kurunpa kampa kutjupanu wangaṇararingkula ungkunytjaku Israelkunu tjuta. Kaya Mosenya pulkanmanangi Piiraku wati mayatja tjutangku, anangu panya Itjipanya ngurara uwankarangku kuļu, wati palya mulapa kulira.

⁴ Ka piruku Moselu mayatja panya Piirala wangkangu, “Mayatja Godalu nyuntula alatji wangkanyi, ‘Kuwarinā munga kultungka ngayulu parañgaraku ngura uwankarangka nyanga Ittipala lipiwanu. ⁵ Ka nyurampa katja kuranyitja tjuṭa iluku, nyurampa uwankaraku katja ngañmanypa ngarintja tjuṭa Ittipanya nguraṛa nyiṭayira uwankara alatjiṭu. Munu panya nyurampa kukaku katja ngañmanypa ngarintja tjuṭa kuļu uwankara wiyingkuku. ⁶ Ka pala palulanguru nyura ngura uwankarangka katja-tjiratja pulkara ulara tjituru-tjituru mulapa nyinaku, panya ngura pala Ittipala tjituru-tjituru nyanga purunypa ngañmanypa ngaranytja wiyyatu munu panya palula malangka palu purunypa piruku ngururpa ngaranytja wiya ngaraku. ⁷ Palu Israelkunu tjuṭa pukulpa mulapa nyinaku katja tjuṭa wankaru kanyira, kuka tjuṭa kuļu, panya palunya tjananya kutjupa kutjupangku pampuntja wiya alatjiṭu. Ka nyura nintiringkula kulilku panya ngayulu Israelkunu tjuṭaku mukuringkula tjananya wankaru kanyilpai, munuña nyuranya Ittipanya ngura tjuṭa wantipai.’” Alatji Moselu tjakultjunangi Piirala Godalu wangkanytja uwankara.

⁸ Munu piruku Moselu palula wangkangu, “Kaya nyuntumpa wati mayatja tjuṭa pitjala ngayula kuranyu pupakatiku, munuṇi ngayula wangkaku alatji, ‘Ara ngura nyanganguru, munu nyuntumpa aŋangu tjuṭa kuļu kati, panya nyuntula wangañarangku kulilpai tjuṭa!’ Alatjinīya wangkaku, kaṇa nyara palulanguru ngayulu nyuntunya wantikatiku.” Nyanga alatji Moselu mirpaṇtu wangkangu mayatja panya Piirala pulkara mirpaṇarira. Munu wangkara wiyingkula wantikatira mirpaṇpa alatjiṭu anu.

⁹ Palu panya alatjirintjaku Mayatja Godalu ngañmanytju Mosela wangkangu alatji, “Mayatja panya Piiralu tungun-tunguntu nyuntunya kulintja wiyangku wantiku. Palu palya, panya paluru rawa nguwanpa tungun-tungunpa ngaranyangkampa ngayulu kutjupa kutjupa tjuṭa witulya pulkangku palyalku ngura nyanga Ittipala.” ¹⁰ Ka panya Piiralu nyangangi Moselu pula Aarontu kutjupa kutjupa tjuṭa witulya pulkatjarangku palyannyangka. Palu panya Mayatja Godalu Piiranya tungun-tungunpa palyaningi kulilwiyangku wantintjaku, ka paluru Israelkunu tjuṭa palumpa nguranguru wantir'iyanja wiyangku kanyiningi.

12

Katuwanu Ankunyjtanya

¹⁻³ Ka manta pala Ittipala Mayatja Godalu wangkangi Mosela pulala Aaronta pula ngapartji tjanala tjakultjunkunytjaku aŋangu Israelkunu uwankarangka. Alatji paluru wangkangi, “Nyura uti pira nyanga kuwari ma-ngarintjanya kulinma pira ngañmanyitja.* Ka tjintu 10 ngarala wiyingkula nyura uti wati uwankarangku kutjungku kutjungku ankula nyurampa kuka tjuṭanguru nyurampa walytja tjuṭaku ngurkantara mantjinma kutju tjinguru lamalama munta tjinguru nanikuta. ⁴⁻⁵ Palu nyura uti kuka kurakura nyakula wantima munuya kuka nyiṭayira palya mulapa kutju ngurkantara mantjinma tjinguru lamalama munta tjinguru nanikuta yiya kutju nyinanytja. Ka tjinguru wati kutjupa

* **12:1-3** Pira nyanga ngañmanyitja Israelkunu tjuṭangku ininu *Apipanya* (panya nganana wangkapai “March”). Ka panya pira paluru ilunyangka piruku ma-ngarinyi pira kutjupa ini *Tjipanya* (panya nganana wangkapai “April”). Ka pira paluru ma-ngarira ilunyangka piruku ma-ngarinyi pira kutjupa ini *Tjipannga* (panya nganana wangkapai “May”). Ka panya palu purunypa pira tjuṭa ma-ngarira ilura ma-ngarira ilura kululta wirkara piruku nyinngaringanyilta. Ka panya pira ngañmanyitja paluruṭu piruku wirkananyi *Apipanya*.

walytjapiti mañkurtjara nguwanpa nyinanyi munu paluru tjana kuka panya palunya puñu nguwanpa ngalkula wiyalku, ka uti paluru wati panya kutjupa palula ititja ungama kuka palulanguru paluru tjana tjungungku ngalkula mapalku wiyanjtikitjangku munga kutjungka. ⁶ Munu nyura kuka panya palunya tjananya mantjira ngalya-katira ila kanyinma tjintu kutjara kutjara pira panya tjuni pulkaringkunytjaku pañara, munu nyara palulanguru mungartjirinyangka nyura uti Israelkunu uwankarangku kuka panya palunya tjananya kutjungku kutjungku pungkula iluntanama. ⁷ Munuya kukaku panya milkali pitingka tjutira nyuranku kutjungku kutjungku nyurampa yiwañla tjaangka katutja milkalingka nyitila munu kampa kutjara kuñu mañlangka yiwañla pala palula unngu kuka ngalkun-tjikitjangku. ⁸⁻⁹ Munuya munga pala palula kuka nyuranku walytjangku walytjangku warungka paula kata winki munu tjuni winki kuñu, munuya tangkaringkunyangkampa ukiri mayu kurakurangka tjungura ngalkula mai pilytja kuñu. Palu nyura kuka palunya minangka pauntja wiyangku wantima munuya wanka ngalkuntja wiyangku tangka mulapa kutju ngalkunma. ¹⁰ Munuya kuka tjara mungawinkiku tjunkunytja wiyangku wantima. Munu tjinguru tjara kutjupa mañlaringkula ngarinyangkampa mungawinki urara waru tilingka tjarpatjura kampara wiyanjtjaku. ¹¹ Palu ngalkuntja kuwaripangka nyura uti mantarangka tjarpama tjinatjangka kuñu, munu tjukara kuñu mantjira ala-ala nyinama mapalku pakara ankunytjikitja. Munuya kuka mai warpungkula ngalkula ini-iningku. Panya kuka mai nyangatja ini ‘Katuwanu Ankunytjanya’, nyura ngalkula ngayunya kulira walkuntjaku Mayatja Godanya. ¹² Panya munga pala palula ngayulu manta Itjipalawanu para-pitjalira Itjipanya ngurara tjutaku katja ngañmanypa ngarinytja uwankara pungkula wiyalku tjanampa kuka tjutaku katja ngañmanypa ngarinytja tjuña kuñu. Panya ngayuluña Mayatja Godanya, mununa ngayulu Itjipaku god uwankara wiyalku. ¹³ Ka milkali panya yiwañla tjaangka ngaranytjtja tjuñangku nintilku ngayulu nyakula ngurkantankunytjaku, ‘Munta, nyangatja Israelkunu tjuñaku yi-wala.’ Mununa milkali panya nyakula tjarpawiyangku wantira katuwanu kutju ankuku, mununa Itjipanya ngurara tjuña kutju pungkula wiyalku. ¹⁴ Ka nyura Israelkunu tjuñangku tjintu nyanga palunya rawangku kulinma watarkurinyta wiyangku munuya yiya kutjupa yiya kutjupa tjintu nyanga paluru wirkankunyangka kuka mai palu purunypatu ngalkunma ngayunya Mayatja Godanya kulira walkuntjikitjangku. Kaya nyurampa walytjapitingku malatja malatjangku kuñu uti palu purunypatu ara nyanga palunya titutarangku kulira palyanma watarkurinyta wiyangku.

¹⁵ “Uwa, nyura uti tjintu kuranyitjangka yiitja panya mai taltulpainya walingka kanyintjatjanungku uwankara mantjira wañima. Munuya palulanguru tjintu 7 mai pilytja kutju pañra ngalkunma mai yiitjatjara wantira. Tjinguru kutjupangku tjintu nyara palula tjanala mai yiitjatjara ngalkulampa paluru nyurala tjungu ngayuku walytja nyinanytja wiyaringkuku. ¹⁶ Munu tjintu panya ngañmanyitjangka nyura uti inmangka tjunguringkula ngayunya walkunma. Munuya palulanguru tjintu 6 ngarala wiyaringkunyangka mungawinki tjintu 7-itja piruku palu purunypatu inmangka tjunguringama. Munu tjintu nyanga palula pulala nyura uti warka wiya nyinama kutjupa kutjupa palyantja wiya alatjitu, palu palyaya mai munu kuka ngalkuntjaku kutju palyanma. ¹⁷ Munuya ara nyanga mai pilytja kutju ngalkuntja rawangku kulinma watarkurinyta wiyangku

munuya yiya kutjupa yiya kutjupa tjintu nyanga paluru wirkankunyangka palu purunypaṭu palyanma nyanga nyura kuwari palyantja purunypa. Munuya ruuru kulinma panya ngayulu tjintu nyanga palula nyuranya uwankara Itjipalanguru pakaltjingara katingu. Kaya nyurampa walytjapitingku malatjangku kuļu uti palu purunypaṭu aṛa nyanga palunya titutjarangku kulira palyanma watarkurinytja wiyangku. ¹⁸ Uwa, yiya kutjupa yiya kutjupa pira panya ngañmanyitja wirkankunyangkaya paṭara nyinama tjintu 14 ngarala wiyaringkunytjaku, munuya palulanguru tjintu tjarpanyangka mai panya pilytja kutju pauṛa ngalkunma yiitjatjara wiya, munuya tjintu 7 mai palu purunypa kutju ngalkunma. ¹⁹⁻²⁰ Munuya tjintu panya palula tjanala yiitja nyurampa ngurangka kanyintja wiyangku wantima. Tjinguru kutjupangku anangu Israelkunungku munta tjinguru malikitjangku nyurala tjungu nyinapaingku tjintu nyara palula tjanala mai yiitjatjara ngalkulampa paluru nyurala tjungu ngayuku walytja nyinanytja wiyaringkuku.” Alatji Godalu Mosela pulala Aaronta wangkangu Israelkunu tjutangka tjakultjunkunytjaku.

Katuwanu Ankunytja Nganmanyitja

²¹ Ka Moselu Israelkunu wati pulka tjuṭa altira wangkangu, “Ankulaya nyurampa kuka tjutanguru lamalama ngurkantara mantjila munuya iluntara nyurampa walytjapitingku aṛa nyanga Katuwanu Ankunytjanya ngalkula kulintjikitjangku. ²² Munuya lamalama panya palunya iluntankula milkali pitingka tjutila munuya puṇu tjuduktjuku tjuṭa nyalpi winki kaṭantara karpira nyalpi milkalingka tjalatjura, munuya yiwaṛa tjaangka katutja nyitila kampa kutjara kuļu. Munuya nyara palulanguru munga pala palula yiwaṛa unngu kutju rawa nyinama pakantja wiya mungawinki kutju urilkutu pakantjikitja. ²³ Ka Mayatja Godanya Itjipala ngura winkiwanu para-ngaṛaku tjananya pungkunytjikitja Itjipanya ngurara tjuṭa. Munu paluru wali tjaangka katu, kantilytja kuļu milkali ngaranyangka nyakula katuwanu ankuku nyura unngu nyinanyangka nyuranya pungkunytja wiya. Paluru palumpa angelpa wali pala palula tjanalakutu nyuranya tjarpara pungkunytjaku iyantja wiyangku wantiku.

²⁴ “Kaya aṛa nyanga palunya titutjarangku kulinma watarkuriwiyangku munu wanganarangku kulira palyanma yiya kutjupa yiya kutjupa. Ka nyurampa katja tjutangku kuļu uti palu purunypaṭu aṛa nyanga palunya titutjarangku palyanma watarkurinytja wiyangku nyurampa walytjapiti malatjangku kuļu. ²⁵ Ka ngula panya Mayatja Godalu manta panyatja kalkuntjatjanungku nyuranya ungkuku. Ka nyura ngura nyara palula wirkara nyinara aṛa nyanga palunya palu purunypaṭu rawangku palyalkatima yiya kutjupa yiya kutjupa, watarkurinytja wiyangku. ²⁶ Ka nyurampa tjitjingku tjinguru tjapilku, ‘Nyaakula nyangatja kuka pungkula ngalkuni? Nyaanguru?’ ²⁷ Kaya tjanala wangka alatji, ‘Nyangatjala kuka lamalama pungkula ngalkuni Katuwanu Ankunytjanya ruuru kulira Godanya walkuntjikitjangku. Panya paluru ngura Itjipala Israelkunu tjutaku yiwaṛa tjutangka katuwanu anu tjarpara tjananya pungkunytja wiya, munu panya tjananya kutju pungu Itjipanya ngurara tjuṭa munu nganananya wankarunu.’ Alatji tjanala tjakultjura tjitji panya tjutangka.” Ka Moselu tjukurpa nyanga palunya tjanala wangkanyangkaya Israelkunu tjutangku kulira tultjungarakatingu munuya Godanya walkuningi. ²⁸ Munuya palulanguru wanganarangku kulira palyanu uwankara Godalu Mosela pulala Aaronta wangkanytjita tjuṭa.

Itjipanya Ngurara Tjutaku Katja Ngañmanypa Ngarintytja Uwankara Ilunytja

²⁹ Ka munga kultungka Godalu ngura panya Itjipala manta winkingka iluntara wiyanu Itjipanya ngurara tjutaku katja ngañmanypa ngarintytja uwankara. Munu paluru Piiraku katja ngañmanyitja iluntanu munu palumpa wati mayatja tjutaku katja ngañmanyitja tjuta ku lu uwankara wiyanu. Munu piruku tjailangka nyinanytja tjutaku katja ngañmanyitja tjuta ku lu uwankara wiyanu. Munu piruku Itjipanya ngurara tjutaku kuka ngultju tjutaku katja ngañmanyitja uwankara ku lu wiyanu. ³⁰ Kaya munga kultungka Piiranya tjana wankaringkula pakanu palumpa wati mayatja tjuta ku lu munu Itjipanya ngurara uwankara ku lu, munuya nyakula pulkara mirara ulangi Itjipala winkingka tjituru-tjituru pulka utiringkunya ngangka, panya yiwa la uwankarangka katja ngañmanypa ngarintytja tjuta uwankara ilungu. ³¹ Ka munga pala palula Piiralu witunu Mosenya pulanya Aaronnga altinytjaku munu pitjanyangka pulala wangkangu, “Pakaraya ara Israelkunu uwankara! Ngura nganampaya wantikati! Palyaya ankula Mayatja Godanya wal kunma panya nyura ngañmanyitju ngayula rawangku tjapiningi. ³² Munuyanku tjiipi tjuta, nanikuta tjuta, puluka tjuta ku lu uwankara ma-kati. Munutjuya Godala tjapinma paluru ngayunya pukulmankunytjaku.”

³³ Ka Itjipanya ngurara tjutangku tjananya walawalaningi Israelkunu tjuta alatji wangkara, “Wala pulkaya pakara ara munuya nganampa ngura wantikati. Tjinguru nyura nganañanya wantikatinytja wiyangkampa ngananya uwankara iluku.” ³⁴ Kaya mulapa tu warpungkula mai panya ngañmanyitju urura kaputu-kaputu palyantja wanka tjunu yiitja wiyatja piti paulpai tjutangka munuya mantarangka karpira piningga tjunkula katingi.

³⁵ Munuya Moselu wangkanyangka Itjipanya ngurara tjutangka ngatjinu kutjupa kutjupa wiru tjutaku, tjiilpa, gold munu mantara ku lu tjananya ungkunytjaku. ³⁶ Ka Godalu tjananya Itjipanya ngurara tjuta wangañararingkula ungkunytjaku palyanu. Kaya mulapa tu uwankarangku tjananya mapalkungku ungangi Israelkunu panya tjuta kutjupa kutjupa wiru tjutaku tjana ngatjinnyangka. Alatjiya Israelkunu tjutangku tjanampa kutjupa kutjupa wiru tjuta tjanalanguru mantjira katingu.

Israelkunu Tjutangku Itjipanya Wantikatinytja

³⁷ Munuya paluru tjana uwankara ma-pakanu ngura panya Ramatjinya wantikatira munuya tjina anangi kakarara ngura ini Tjukatjaku. Paluru tjana panya anangu mungiliy mulapa anangi, panya wati nampa nyangatja 600,000 munu pulka-minyma pulka-tjitji ku lu. ³⁸ Kaya anangu kutjupa tjuta mulapa ku lu tjanala tjunguringkula anangi Israelkunu tjutaku walytja wiya tjuta. Kaya Israelkunu tjutaku tjiipi nanikuta tjuta mulapa tjanala tjungu anangi puluka tjuta mulapa ku lu. ³⁹ Munuya ngururpa ngura tjunkula nyuma panya wanka yiitja wiyatja Itjipalanguru panya katinytjtja pauningi. Panya tjananya Itjipalanguru paira iyanngakaya warpungkula anu mai yiitjatjara talturingkunytjaku putu patara. Palulanguru mai pilytja kutju paua ngalkuningi.

⁴⁰ Uwa, Israelkunu tjutaya rawa mulapa nyinangi ngura panya Itjipala yiya tjuta mulapa 430. ⁴¹ Munu panyaya yiya 430 wiyingkunyangka nyara palula ar a alatjitu Itjipanya wantikatira anu Mayatja Godaku panya walytja uwankara. ⁴² Ka panya munga pala palula Godalu tjananya atunymara katirinangi Itjipalanguru ankunyangka. Kaya pala

palulanguru Israelkunu tjutangku titutjarangku yiya kutjupa yiya kutjupa munga panya paluru wirkankunyangka ara panya palunya kulilpai panya Mayatja Godalu tjananya atunymara katirinkunytjtja, munuya kunkunpa wiyangku nyinara kulilpai Godaku pukularira.

Ara Katuwanu Ankunytjanya Kanyintjaku

⁴³ Ka Mayatja Godalu Mosela pulala Aaronta wangkangu, "Kuwarina nyupalila tjakultjunanyi ara panya Katuwanu Ankunytjanya tjukarurungku kanyintjaku. Utu anangu malikitjangku kuka mai Katuwanu Ankunytjtja ngalkuwiyangku wantima." ⁴⁴ Palu tjinguru wati malikitja nyuntula warkaripai ngalkuntjikitja mukuringkuku. Ka alatji mukuringkunyangka nyuntu palunya nyuranya purunypa watila, ka pala palulanguru watiringkula kutju palya ngalkuku. ⁴⁵ Ka palu purunypatu nyura anangu malikitja unytju akatjari nyinanyangka ungkuwiyangku wantima ngalkuntjaku, munu anangu maliki kutjupa nyurampa ngurangka manikitja warkarinyangka kuлу ungkuwiyangku wantima. ⁴⁶ Munuya kuka panya wali unngu pauntjatjanungku wali pala palula kutju ngalkunma үрilkutu pakaltjingantja wiyangku. Munuya kuka iltjanpa palyara tarka katantankunytja wiyangku wantima. ⁴⁷ Palu uti nyura Israelkunu uwankarangku Ara nyangatja kanyinma munuya tjungungku pukultu palyanma. ⁴⁸ Ka tjinguru wati malikitja nyurala tjungu nyinanyi, munu paluru tjinguru mukuringanyi nyurala tjungungku ngalkuntjikitja. Ka alatji mukuringkunyangka nyura palunya munu palumpa walytja nyitayira tjuta kuлу nyuranya purunypa watila. Ka pala palulanguru tjana palyalta ngalkuku nyurala tjungungku paluru tjana wati Israelkunu purunyarira. Palu wati, tjitji nyitayira kuлу nyuranya purunyarintja wiyatja kuka Katuwanu Ankunytjtja ngalkuntjaku ungkuwiyangku wantima. ⁴⁹ Nyanga alatjiya palyala wati, tjitji nyitayira uwankaraku, Israelkunu tjutaku, malikitja tjutaku kuлу palu purunyarintjaku, panya wati tjutangku, tjitji nyitayira tjutangku kuлу watiringkula kutju ngalkuntjaku mai kuka panya Katuwanu Ankunytjtja." Alatji Godalu Mosela pulala Aaronta wangkangu.

⁵⁰ Ka Israelkunu uwankarangku wanganarangku kuliра palyanu Godalu Mosela pulala Aaronta wangkanytja. ⁵¹ Ka tjinту pala palula Mayatja Godalu Israelkunu uwankara utulu kutju pakaltjingara katingu ngura panya Itjipalanguru.

13

Katja Nganmanypa Ngarintjya Tjuta Godanya Ungkunytja

¹ Ka Mayatja Godalu Mosela wangkangu, ² "Kungkawaရa Israelkunu tjutangku iti nyitayira nganmanypa ngarintjya tjuta kanyinnyangka iti palunya tjananya milmilmarأa kanyinma ngayuku. Panya Israelkunu tjutaku katja nganmanyitja tjuta uwankara ngayuku, munu panya nyurampa kukaku katja nganmanyitja uwankara kuлу nyura ngayunya ungama panya paluru tjana ngayuku uwankara."

Ara Panya Mai Pilytja Ngalkunytjanya

³ Ka Moselu anangu tjutangka tjakultjunangi Godalu wangkanytja nyanga alatji, "Kulinmaya tjirirpi nyanga palunya munuya rawangku ruuru kulinma watarkurintja wiyangku panya tjirirpi nyanga palula nyura Itjipanya wantikatingu. Panya ngura nyanga palula Itjipanya ngura tjutangku nyuranya pauntjingara pulkara alatjitu warkamilaningi.

Ka tjirirpi nyanga palula panya Godalu nyuranya witulya pulkangku pakaltjingara katingu. Ka tjintu nyanga palulatu nyura ngula yiya kutjupa mai pilytja kutju paura ngalkunma mai yiitjatjara wantira. ⁴ Panya tjirirpi nyanga palula nyura kuwari pira panya ini Apipala ngura nyanga Itjipanya wantikatira ma-pakanji. ⁵ Ka nyangatja panya Mayatja Godalu iriti kalkunu nyurampa walytja nganmanyitja tjuta Aipuramanya tjananya manta panya Kainannga nyuranya unggunytjikitjangku. Palu manta nyara palula panya anangu kutjupa tjuta kuwari nyinara wañani ngura tjutangka, anangu nyanganpa – Kainankunu tjuta, Iitakunu tjuta, Amurkunu tjuta, Pirijikunu tjuta, Ipakunu tjuta, munu Tjaipukunu tjuta kulu. Ka manta nyara paluru wiwu mulapa, ka nyara palula mai pulka pakalpai ngura manta palyangka. Ka Godalu nyuranya nyara palulakutu katinyangka nyura uti ara nyanga mai pilytja ngalkuntjanya rawangku palyanma watarkurintja wiyangku munuya yiya kutjupa yiya kutjupa pira panya Apipala tjintu nyanga paluru wirkankunyangka palu purunypa palyanma munuya mai pilytja kutju ngalkunma ara nyanga palunya ruuru kulintjikitjangku. ⁶ Munuya mai pilytja panya tjintu 7 ngalkukatima. Munuya tjintu panya 6 ngarala wiyingkunyangka mungawinki tjintu 7-ta inma pulka palyanma Mayatja Godanya walkuntjikitjangku. ⁷ Uwa, tjintu nyanga palula tjanalaya mai pilytja kutju ngalkunma, munuya mai taltu kanyintja wiyangku wañima, yiitja kuluya nyurampa nguranguru mantjira wani, munuya ngura kutjupangka kutjupangka kanyintja wiyangku wantima. ⁸ Munu nyura uti ara nyanga palunya palyantjikitjangku nganmanyiju nyurampa katja nganmanypa ngarintja tjutangka wangkara utinma alatji wangkara, ‘Nganana nyangatja palyani Godanya walkuntjikitjangku, panya paluru tjintu nyanga palula nganananya Itjipalanguru pakaltjingara wankarunu.’ Alatjiya katja tjutangka wangkama. ⁹⁻¹⁰ Uwa, yiya kutjupa yiya kutjupa tjintu nyanga paluru wirkankunyangkaya ara nyanga mai pilytja ngalkuntjanya palu purunypa palyanma watarkurintja wiyangku ngalkula ruuru kulintjikitjangku. Munu palulanguru nyura kulira Godalu wituntjtja tjuta kulu wangkara tjakultjunkuku malatja tjutangka paluru tjana kulu nintiringkula wanganarangku kulintjaku, panya Mayatja Godalu nganananya witulya pulkangku Itjipalanguru pakaltjingu. Uwa, ara nyanga paluru walka purunypa ngaraku nyurampa manyirkangka nyura watarkurintjaku-tawara.” Alatji Moselu Israelkunu tjutangka tjakultjungangi.

Katja Nganmanypa Ngarintja Tjuta

¹¹⁻¹² Munu piñku tjanala tjakultjunangi panya Godalu wangkanytja ara panya katja nganmanypa ngarintja tjuta. Alatji paluru wangkangu, “Mayatja Godalu nyuranya ma-katiku ngura panya Kainantakutu. Panya paluru nyuranya nganmanyiju kalkuningi unggunytjikitjangku nyurampa walytja miri tjuta kulu. Ka nyuranya unggunyangka nyura uti nyurampa katja nganmanyitja uwankara palunya ngapartji ungama, kuka panya katja nganmanyitja tjuta kulu. Panya katja nganmanypa ngarintja uwankara palumpa Godaku, kaya palunya ungama. ¹³ Palu nyura tangkiyi nyitayira nganmanyitja tjuta unggunytjatjanungkumpa malakungku mantjila Godalanguru palunya lamalama ma-ungkula ngapartji palu purunypa. Palu tjinguru nyuntu tangkiyi palunya wantiku lamalama unggula malakungku mantjintja wiyangku. Palulanguru nyuntu uti tangkiyi palunya iluntanama ngunti kañantankula. Uwa,

munuya nyurampa tjitji katja ngamanypa ngarinytja tjuṭa Godanya ungkunytjatjanungku małakungku mantjinma mani ma-ungkula.

¹⁴ “Ka ngula nyura kuka pungkula ungkunyangka nyurampa katja tjuṭangku tjinguru tjapilku, ‘Nyaa nyanga alatji?’ Kaya palula tjanala alatji wangka,

‘Panya iriti Itjipanya ngurara tjuṭangku tjanampa ngurangka nganananya pauntjingara pulkara war̄kamilaningi. Ka panya Mayatja Godalu nganananya witulya pulkangku ngura nyara palulanguru pakaltjingara ngalya-katingu. ¹⁵ Panya Itjipaku mayatjangku Piiralu tungun-tunguntu nganananya kanyiningi wantir’iyantja wiyangku, ka Godalu tjanampa katja ngamanypa ngarinytja uwankara iluntanu Itjipanya ngurara tjuṭaku, tjanampa kukaku katja nganmanyitja uwankara kuļu. Kala nyara palulanguru nganananku kuka tjuṭaku katja nganmanyitja uwankara Godanya ungpupai pungkula, munu nganampa katja nganmanyitja uwankara Godanya ungpunytjatjanungku małakungku payamilalpai. Alatjila palyalpai ara nyanga palunya kulintjikitjangku panya Godalu Itjipanya ngurara tjuṭaku katja ngamanypa ngarinytja tjuṭa iluntankunytja.’

Alatjiya katja tjuṭangku tjapinnyangka wangkama. ¹⁶ Uwa, yiya kutjupa yiya kutjupa ara nyanga palunya palyara nyura ruuru kuliklu watarkurinytja wiyangku, panya Mayatja Godalu nganananya witulya pulkangku Itjipalanguru pakaltjingantja. Ka ara nyanga paluru walka puruny whole ngaraku nganampa manyirkangka nganana watarkurinytjakutawara.” Alatji Moselu Israelkunu tjuṭangka wangkangi.

Ngangkali Wara Munu Tili Pulka

¹⁷ Ka Piiralu aŋangu panya Israelkunu tjuṭa wantir’iyannyangka Godalu tjananya ngura panya Kainantakutu tjukarurungku katinytja wiyatū Pilitjiyaku iwarangka panya iwara nyara paluru muṭumuṭu. Palu Godalu tjananya katingu iwara kutjupawanungku ala-warangka. Panya paluru kulinu nyanga alatji, “Wati Pilitjiyanya ngurara tjuṭangku tjinguru nyanga tjananya pikangku pungkuku tjanampa ngurawanu ankunyangka. Kaya tjinguru nguluringkula małaku ankuku Itjipaku. Kaña pala palula-tawara tjananya iwara kutjupawanungku katiku ngura ilytjiwanungku.” ¹⁸ Nyanga alatji Godalu kulinu munu Israelkunu tjuṭa purkarangku katirinangi parariwanu para-pitjanytjaku kakarara uru ini Tjitin-tjitintakutu. Kaya paluru tjana kułatatjara, tjula waratjara kuļu anangi pikakitja.

¹⁹ Ka Moselu tjana miri panya Josephanya katirinangi, panya iriti iluntja kuwaripangka Josephalu aŋangu Israelkunu tjuṭangku wangkangu nyanga alatjingantjaku. Alatji paluru wangkangu tjanala, “Ngula Godalu nyuranya Itjipalanguru walatjunkunyangkampaya ngayunya kulinma ngayuku puntu ma-katinytjikitjangku ngura nyanga Itjipalanguru.” Kaya mulapatu palunya puntu ma-katingu.

²⁰ Kaya Israelkunu tjuṭa Itjipanya wantikatira ankula ngaringu ngura ini Tjukatjala. Munuya palulanguru Tjukatjanya wantikatira anu ngura ini Itjamalakutu munuya nyara palula ngura ma-tjunu panya pila mulyangka.

²¹ Ka Mayatja Godalu tjananya kuranyurira katirinangi. Ka la la paluru ngangkali warangka kuranyu anangi tjana nyakula waṇantjaku. Munu mungangka paluru waru tili pulkangka anangi tjana mungangka irnyanyangka nyakula waṇantjaku. Alatjiya anangi ka la la mungangka kuļu

Godalu katirinkunyangka. ²² Ka ngangkali wara titutjara tjanala kuranyuringi kalala kutjupa kalala kutjupa. Ka waru tili pulka panya palu purunypatu tjanala kuranyuringi munga kutjupa munga kutjupa.

14

Uru Ini Tjitin-tjintinta Itipirinyta

¹ Ka palulanguru piruku Mayatja Godalu Mosela wangkangu, ² “Wangka Israelkunu tjuta malaku ankula ngarinytjaku ngura ini Pii-ayiratjala itingka panya ngura Miikatala pulala uru ini Tjitin-tjintinta ngururpa, panya nyanga paluru ngura ini Paal Tjipanta itingka ³ Ka palulanguru Piiralu kulilku Israelkunu tjutaya kawaliringu munuya ngururpatu parapitjalinanyi pilangka ma-tjarpantja wiyaṭu. ⁴ Ka ngayulu Piiranya piruku palyalku tungun-tungunarintjaku ngayula. Ka paluru kampa kutjuparira warmalarira nyuranya ngulura wanalku. Ka ngayulu nyurampa ngalkiltu wiyalu alatjitu palumpa warmala uwankara. Kaya Itjipanya ngurara tjutangku nintiringkula kulilku panya mulapa ngayuluña Mayatja Godanya.” Nyanga alatji Godalu Mosela wangkangu, ka paluru Israelkunu tjutangka tjakultjunu, kaya mulapatu malaku anu, munuya ngururpa ngaringi.

⁵ Ka ngura nyara Itjipala wati kutjupangku pitjala Piirala wangkangu, “Israelkunu tjutaya anu.” Ka Piiralu tjana palumpa wati mayatja tjutangku kulira mapalku kampa kutjuparingu munuya wangkangu, “Nyaanula panyatja? Nyaakula panyatja wantir’iyanu Israelkunu panya tjuta. Kuwari nganalu tjana nganampa warika palyalku? Panya wantir’iyanula nganampa warkatjara tjuta.” ⁶⁻⁷ Ka Piiralu wangkangu palumpa wati mayatja tjutangka, “Warpungkulaya nyanytu mantjira tanpala ngayuku tjingkangka. Munuya wati tjaultji tjuta wangka tjana kuļu nyanytu tjuta mantjira tjingka wiru tjutangka 600-ngka tanpantjaku. Munuya tjaultji kutjupa tjuta kuļu wangka kulata kutitji kuļu mantjira tjanampa tjingkangka tatira riti ngaranytjaku.” Kaya uwankara ritiringkula tjingka kutju kutjungka tatira mayatja panya Piirala tjunguringu munuya warmalarira ma-pakaṇu tjaultji tjuta mulapa. Kaya Piiraku wati mayatja tjutangku tjananya wituwitura katirinangi. ⁸ Uwa, Godalu Piiranya tungun-tungunarintjaku piruku palyaṇu. Ka paluru warmala tjutatjarangku Israelkunu tjuta waṭaparanu. Palu Israelkunu tjutaya ngura Itjipanya wantikatintjatjanu raparingkula pukulpa alatjitu anangi.

⁹ Kaya Itjipanya ngurara tjutangku tjingka tjutangka nyanytu tjutangka kuļu tatira tjananya malawanungku waṭaparaningi munuya wanara nyangu uru panya ini Tjitin-tjintinta itingka ngurangka nyinanyangka, ngura panya tawunu ini Pii-ayiratjala pulala Paal Tjipanta itingka. ¹⁰ Kaya Israelkunu tjutangku malakukutura nyangu Piiranya tjana warmala ngalya-ilaringkunyangka munuya pulkara alatjitu nguluringkula Godanya pulkara ulara tjinapiningi tjananya wankarunkunytiaku. ¹¹ Munuya Moseku mirpanarira palula wangkangu, “Nyaakulanyan nyanga ilytjikutu ngalya-katingu? Nyaa, ilunytjakulanyan katingu? Utila Itjipala ma-nyinara iluma. ¹² Panya ngura nyara palulalpi nganaṇa nyuntunya wangkangu nganananya wantintjaku. Tjingurula palya alatjitu Itjipala titutjara nyinara tjanampa warkarima. Palu nyuntulanyan ngalya-katingu nyanga pilangka ilunytjaku.”

¹³ Ka Moselu tjanala wangkangu, “Nyaaku nyura nguluringanyi? Ngulu wiyangkuya patara nyawa. Kuwari Mayatja Godalu nyuranya

wankarunanyi, ka nyura wankaringkula nyanga Itjipanya ngurara warmala tjuta piruku nyakunytja wiyingkuku.¹⁴ Panya Mayatja Godalu tjananya ngalkiltu wiyalku. Ka nyura ngarala kutju nyakuku pikangku pungkunytja wiyangku.”

¹⁵ Ka Godalu Mosela wangkangu, “Nyaakun ngayunya ulara tjapini? Wangka tjananya Israelkunu tjuta pakara ma-pitjanytjaku urukutu.¹⁶ Ka nyuntu tjukarangka uringka katuwanungku wilijura kanyinma. Ka uru pala tjararingkula iwara purunyariku Israelkunu tjuta ma-itipirinytjaku uringka ngururpa manta piltingka.¹⁷ Kanä tjananya Itjipanya ngurara tjuta unngu wituwitulku nyuranya tungun-tunguntu wałaparantjaku, kaya tjana uruwanungku wañalku. Kanä tjananya uwankara uringka iluntankula wiyalku Itjipanya ngurara warmala panya tjuta Piiranya kulu, mununa nyanytju tjuta tjingka tjuta kulu wiyalku. Palulanguru uwankara pungkula wiyannyangka nyakulaya aŋangu Israelkunu tjutangku ngayunyalta mirawañiku.¹⁸ Kaya Itjipanya ngurara tjutangku nintiringkula kulilku panya mulapa ngayuluña Mayatja Godanya.” Nyanga alatji Godalu tjakultjunu Mosela.

¹⁹⁻²⁰ Ka panya angelpa Godaku Israelkunu tjutangka kuranyu anangi ngangkali panya warangka. Palu Itjipanya ngurara warmala tjuta ilaringkunyangka angelpa paluru Israelkunu tjutangka malarinkula angangarangi warmala tjutangka tjangati, ka ngangkali panya wara pulka kulu tjanala kuranyunguru malarinkula anga-ngarangi munga warangka. Ka ngangkalingka muñkara maru mulapa ngarangi, kaya Itjipanya ngurara tjutangku puťu nyangangi. Palu ngangkalingka tjangati pitalytjingku pulkara irnyaningi Israelkunu tjutangku uti nyakunytjaku. Kaya munga warangka Itjipanya ngurara tjuta tjanala puťu ilaringangi, panya puťuya nyangangi.

²¹ Ka Moselu puňu panya tjukara katura wilijunu uru panya tjitintinta katuwanungku, ka Godalu uru panya palunya mauntpalpanu walpa pulka kakararanguru iyařa. Ka walpa paluru mungangka titutjara wangkangi munu uru wiyyara manta utinu, ka uru paluru kitikitiringkula tjararingu.²² Kaya Israelkunu tjuta uringka ngururwanu itipiringu manta piltingka. Ka walpangku panya uru tjarara mauntpalpara kampa kutjaranguru ma-nyuti-nyutira kanyiningi tjana ngururpa iwara piltingka ankunytjaku.²³ Ka tjananya Itjipanya ngurara tjutangku tjingkangka munu nyanytju tjutangka kulu tatira malawanungku ngalyawałaparanningi. Munuya iwara panya palulaťu anangi uringka ngururpa.²⁴ Ka palulanguru tjintu pakantja kuwaripangka Godalu ngangkali waru tilitjaranguru walnyakula ngulutjinganu Itjipanya ngurara warmala tjuta, tjanampa nyanytju tjuta kulu. Kaya urulyarara kawaru-kawarurira puťu kuli-kulinu.²⁵ Ka Godalu tjingka tjutaku wiila tjulpirta tjakatjunkunytjaku palyanu tjana walawala ankunytjaku-tawara. Kaya palulanguru Itjipanya ngurara tjutangku ngulungku wangkangu, “Walawalalanku wirtjapakala Israelkunu nyanga tjutanguru. Panya Mayatja Godanya tjanampa ngalkilpa kuwari nganampa pikaringanyi.”

²⁶ Ka palulanguru Godalu Mosela wangkangu, “Katura wilijura uru katuwanungku nyuntumpa pala puňungka, ka urungku piruku ngalyatjunguringkula tjutulku tjananya munu patilku Itjipanya ngurara warmala pala uwankara tjanampa tjingka tjuta, nyanytju tjuta kulu.”²⁷ Ka Moselu wilijunu uru katuwanungku, ka mungawinki mulapa ngalyatjinturingkunyangka uru panya kampa kutjaranguru ngaparku tjungur-

ingkula iwara panya tjutunu. Kaya Itjipanya ngurara tjuṭa arkara wirtjapakaningi ʉrunguru pakantjikitja, palu Godalu tjananya ʉru unngu tjunyinu. ²⁸ Ka ʉru panya paluru małaku tjunguringkula Piiranya tjananya uwankara tjutunu tjingka tjuṭa munu nyanytju tjuṭa kulu. Paluru tjana iwara panya palulatu Israelkunu tjuṭa ngalya-wataparaningi ʉrungka ngururpa. Palu wiya, uwankara mulapaya ʉru tjikira ngakara ilungu. ²⁹ Kaya Israelkunu tjuṭa palya alatjiṭu ma-itipiringu manta piltingka ankula, ka ʉru panya pulka kampa kutjara nyuti-nyutiringkula ngarangi tjananya tjutuntja wiya alatjiṭu.

³⁰ Palu tjintu pala palula Mayatja Godalu tjanampa ngalkilarira tjananya wankarunu Itjipanya ngurara tjutanguru, kaya nyangu Itjipanya ngurara miri tjuṭa ʉru kantilytja ngarira waninyangka. ³¹ Panya Godalu witulya pułkangku tjananya uwankara wiyanu Itjipanya ngurara tjuṭa. Kaya Israelkunu tjuṭangku uwankara iluntankunyangka nyakula pulkara nguluringu Godanya witulya pulka kulira. Munuya pulkara Godaku mūlamularingangi, munu palunya wituntjijaku Moseku kulu.

15

Moselu Inma Inkanyta

¹ Ka Moselu tjana Israelkunu tjuṭangku kulu pukulpa mulatu inma inkara Godanya walkuningi, nyanga alatji,

“Ngayulu Mayatja Godanya inkara mirawaṇinyi, panya wiruralanya wankarunu Itjipanya ngurara tjuṭa wiyyara.

Paluru nyanytju tjuṭa ʉrungka unngu tjunyinu,
wati nyanytjungka tatalpai tjuṭa kulu.

² Panya Mayatja Godalu kutjungku ngayunya witulyankupai.
Nyara paluru kutjungkuni wankarunu.

Nyara paluru ngayuku God,
kaṇa ngayulu palunya mirawaṇinyi.

Nyara paluru ngayuku mamaku God,
kaṇa inma inkara palunya pulkara walkulkku, witulya pulka mulapa.

³ Panya paluru warmala pułka mulapa para-ngarapai, ini Mayatja Godanya.

⁴ Paluru wiyanu warmala Itjipanya ngurara tjuṭa ʉrungka unngu tjunyira tjingka tjuṭa kulu.
Kaya warmala tjuṭaku mayatja tjuṭa ngakara ilungu ʉru panya ini Tjitin-tjitinta.

⁵ Ka panya ʉru pułkangku tjananya tjutuṛa patinu uwankara,
kaya apu purunypa mantakutu ukalingu ʉru unngu ngati pulkakutu.

⁶ Mayatja God, nyuntu witulya pułkangku palyalpai mara wakungku,
munu nyuntu aŋangu mirpaṇtju tjuṭa kaṭantara muṭun-muṭunmara wiyalpai.

⁷ Nyuntu Mayatja witulya pulka mulapa,
munu nyuntumpa mirpaṇtju tjuṭa nyuntu wiyalpai alatjiṭu.

Nyuntu panya tjanampa pulkara mirpaṇarira tjananya uwankara alatjiṭu wiyanu.

Nyuntu panya waru purunypa,
panya warungku ukari kampara wiyalpai,
pala palu purunytju nyuntu tjananya wiyanu.

⁸ Nyuntu panya ʉru puura tjarara iwaranu,
ka panya ʉru pulkanya tali purunypa wati-ngaringi.

- Ka ngati panya tartjaringu munu iwara purunypalta ngarangi.
- ⁹ Kaya Itjipanya ngurara tjutangku wangkangu,
 ‘Wanyula Israelkunu tjuta wałaparara witila,
 munula tjana kanyintja uwankara mantjira tjarara kutjungku
 kutjungku ngurakutu kati.
- Walawalangkula tjula waṛa mantjira tjananya wataparara pungama,
 munula mantjira kati tjana kanyintja uwankara.’
 Alatjiya warmala tjutangku kañany-kañanytju wangkangi.
- ¹⁰ Palu Mayatja God, nyuntu uru panya puura palunya tjananya tjutura
 patinu Itjipanya ngurara tjuta,
 kaya apu tjuta purunypa uru unngu mantakutu ukalingkula ilungu.
- ¹¹ Mayatja God, nyuntunya purunypa god kutjupa nyinanytja wiyat.
- Nyuntu kutjun Mayatja Pułkanya
 munu miłmilpa alatjitu wiru mulapa.
- Nyuntu kutjupa kutjupa wiru tjuta witulya pułkangku palyalpai
 aŋangu tjuta nyakula urulyarara nguluringkunytjaku nyuntumpa.
- ¹² Nyuntu mara waku katuṇu,
 ka tjananya mantangku kuultjanu nganampa mirpaṇtju tjuta.
- ¹³ Nyuntu panya mukulya pułkangku kalkunu Israelkunu tjuta
 wankarunkunytjikitjangku,
 munu panyan mulapa wankaru tjananya katirinanyi.
- Nyuntu witulya pułkangku tjananya katirinkuku nyuntumpa ngurakutu,
 ngura panya miłmilpakutu.
- ¹⁴ Kaya aŋangu ngura kutjupitja tjutangku kulikku.
 Munuya kulira pułkara nguluringkula tjititingkuku.
- Ka aŋangu Pilitjiyanya ngurara tjuta pułkara alatjitu nguluringkuku.
- ¹⁵ Munu panya Iitamakunu tjutaku mayatja tjutangku puṭu kuli-kulira
 pułkara nguluringkuku.
- Munu Mawapaku wati pułka tjuta kułu pułkara nguluringkula tjitit-
 ingkuku.
- Munu panya Kainannga ngurara tjuta kułu nguluringkula uparingkuku.
- ¹⁶ Uwa, mulapa paluru tjana uwankara pułkara nguluringkuku
 nyuntu witulya pułkangku palyannyangka nyakula.
- Tjana tjititingkula ngulungku pakara ngarala nyakuku nyuntumpa
 aŋangu tjuta wati-pitjanyangka.
- Panya aŋangu nyanga tjananya nyuntunku mantjira katingu Itjipala
 pułkara warkarinyangka.
- ¹⁷ Munun tjananya ngalya-katiku ngura panya pułi nyuntumpangka,
 panya ngura pala palunyan nyuntu ngañmanytju kulira ngurkantanu
 nyuntumpa ngura tjunkunytjikitjangku,
 ngura pala miłmilpa nyuntu tjunkunytjtja.
- ¹⁸ Mayatja God, nyuntu titutjarangku alatjitu uwankara aṭunymara
 kanyilku mayatja pułkangku, wiyingkunytja wiyangku alatjiitu.”
- Alatji Moselu tjana Israelkunu tjutangku kulu pukulpa mulatu inma inkara
 Godanya wal̄kuningi.

Miriamału Inma Inkanytja

- ¹⁹ Uwa, Israelkunu tjuta panya manta piltingka itipiringu. Ka panya
 Itjipanya ngurara warmala tjuta uren̄gka ngururpa tjingkangka tatira
 ankunyangka Mayatja Godalu uru małakungku tjungunu, ka tjananya tjutunu.
²⁰ Ka palulanguru Aaronku pulampa Moseku kangkuřungku Miria-
 malu tampurinpa mantjinu inma inkanytjikitjangku, panya marangku

pungkula wangkatjingalpai inma inkara. Ka minyma uwankarangku palu puruny whole tampurinpa tjuṭa mantjinu munuya minyma panya palunya urilkutu wañara inkara inmaku nyapingi tampurinpa panya tjuṭa pungku-pungkula. ²¹ Ka Miriamalu tjanampa inma inkangi nyanga alatji wangkara,

“Inma inkama Mayatja Godanya mirawaninytjikitjangku,
panya paluru witulya pułkangku tjananya pungkula wiyanu, Itjipanya ngurara tjuṭa.

Paluru panya nyanytju tjuṭa uru unngu tjarpatjunu,
wati nyanytjungka tatilpai tjuṭa kulu.”

Mina Karur-karurpa

²² Ka palulanguru Moselu tjananya ma-katingu Israelkunu tjuṭa, munuya uru panya Tjitin-tjitintanguru ma-paćuringkula ma-ilytjingkaringu ngura pilangka ini Tjuula. Munuya tjintru mañkurpa pilangka pitjalira mina putu nguriningi. ²³ Munuya ngura ini Mañala wirkara mina nyangu. Palu mina paluru palya wiya kařur-karurpa. (Ini “Mañanya” panya wangkanyi “karur-karurpa” tjanampa wangkangku.) ²⁴ Kaya aňangu tjuṭangku putu tjikira Moseku mirpanarira wangkangu, “Mina nyaala tjikilk?”

²⁵ Ka Moselu kulira Mayatja Godala pułkara tjapiningi, “Yaaltjirikula?” Ka Mayatjalu Mosela nintinu puñu mantangka ngarinyangka. Ka Moselu puñu palunya mantjira wañingu minangka, ka mina panya mapalku palyaringu. Kaya tjikiningi.

Ka ngura nyara palula Godalu tjukurpa kutjupa tjanala wangkangu Israelkunu tjuṭangka. Munu paluru arkara nyangangi tjananya wanganarangku kulintjaku tjukurpa paluru wangkanytjita. ²⁶ Alatji paluru tjanala wangkangu, “Ngayuluña Mayatja Pulkanya nyurampa Godanya, mununa nyuranya pikatjararingkunyangka palyarungulpai. Ka nyura uti tjukurpa ngayuku wanganarangku kulira palyanma munuya ngayuku iwara tiṭutjarangku wañanma. Kana nyara palulanguru nyuranya tjukarurungku kulira wañannyangka pika ungkunytja wiyangku wantiku, panya ngayulu Itjipanya ngurara tjuṭa pikatjaraningi, palu purunypa nyuranya ngayula wanganarangku kulinnyangka alatjinkunytja wiyangku wantiku.” Alatji Godalu tjanala wangkangu palula wanganarangku kulintjaku.

²⁷ Kaya ngura nyara palulanguru ankula ma-wirkanu ngura kutjupangka ini Ilimala. Ka ngura pala Ilimala mina tjukuła ngați 12-ngka ngaringi. Munu puñu waṛa tjuṭa kulu ngarangi nampa 70. Kaya Israelkunu tjuṭangku pala palula ngura tjunu minangka itingka.

16

Godalu Mai Ini Manna Munu Kuka Tjulpu Kulu Iyantja

¹ Munuya ngura pala Ilimala tjukutjuku nyinara piruku ma-pakaňu. Munuya paluru tjana ankula ankula ma-wirkanu ngura pilangka ini Tjiinta. Panya ngura nyanga paluru ngarangi Ilimala pulala Tjaniyala ngururpa. Uwa, paluru tjana ngura panya Itjipanya wantikatintjatjanu rawa anangi piṛa kutjara nguwanpa, munuya ngura nyanga Tjiinta wirkanu wiki 6-nguru. ²⁻³ Palu pilangka panya mai wiya ngarangi. Kaya Israelkunu tjuṭa paltjatjiratjaringu, munuya uwankara mirpanaringu Moseku pulampa Aaronku. Munuya palula pulala ngalytjurmarra wangkangi, “Godalulanya uti wantima Itjipalanguru pakaltjin-gantja wiyangku munulanya ngura nyara palula iluntara wiyanma. Panya

Itjipala nganana pałtja alatji nyinangi munula ngalkuningi kuka mai pulka. Palu nyupali nganananya ngalya-katingu nyanga ilytjikutu mai wiyangka ilunyjtaku.”

⁴ Ka Mayatja Godalu Mosela alatji wangkangu, “Ngayulu kuwari mai ilkarìnguru iyanì nyurampa, ka mina purunypa punkalku tjintukutu. Ka nyuntu aŋangu tjutangka wangka, kaya tjintu kutjupa tjintu kutjupa mai panya mantangka punkantja uranma. Palu tjintu kutjuku kutju mantjinma mungawinkiku mantjintja wiyangku. Kaña nyanganyi tjananya tjukarurungku urantjaku ngayulu panya wangkanytitja tjana wanganarangku kulira palyantjaku. Kaya tjinguru wanganarangku kulilku, tjinguruya wantiku ngayunya kulintja wiyangku. ⁵ Palu tjintu 5 ngarala wiyaringkula tjintu panya Friday-ngka paluru tjana uti mai pulka nguwanpa uranma tjintu kutjaraku kuwariku munu Saturday-ku kuļu, panya tjintu Saturday-ngka ngayulu mai iyantja wiyangku wantiku.”

⁶ Ka Moselu pula Aarontu nyangatja kulintjatjanungku Israelkunu tjutangka tjakultjunu alatji, “Mungartji kuwari nyanga nyura nintiringkula kulilku, ‘Munta-uwa! Mulapa Mayatja Godalu panya nganananya Itjipalanguru ngalya-katingu.’ ⁷⁻⁸ Panya paluru kulinu nyura rawangku ngalytjurmarà wangkanyangka. Ka palulanguru nyura mungawinki nyakuku Godalu kutjupa kutjupa witulya pulkangku palyannyangka. Panya nyura ngalinya mirpañtu wangkara waintara palumpa kuļu mirpañaringi, panya paluru wangkanyangka kutjuli ngali nyuranya ngalya-katingu. Ka palulanguru Mayatja Godalu nyuranya tjintu kutjupa tjintu kutjupa mungartjikutu kuka ungkuku munu paluru mungawinki nyuranya mai pulka ungkuku nyura ngalkula paltjaringkunyjtaku. Ka nyura nyakula nintiringkuku panya mulapa Mayatja Godalu nyuranya ngalya-katingu.”

⁹ Ka Moselu wangkangu Aaronta, “Ma-wangka aŋangu tjuta pitjala tjunguringkula kaputu kutjuringkunyjtaku Mayatja Godala mirangka, panya paluru tjananya kulinu mulyararira ngalytjurmarà wangkanyangka.”

¹⁰ Ka tjananya wangkangi Aarontu, kaya wangkanyangka malakukutura ilytjikutu ma-nyangu Mayatja Godanya pitalytji pulka irnyannyangka ngangkali unngu.

¹¹⁻¹² Ka Godalu wangkangu Mosela, “Ngayulu kulinu aŋangu nyanga Israelkunu tjutangku ngalytjurmarà wangkanyangka. Ka nyuntu wangka tjanala nyanga alatji, ‘Kuwari mungartji-mungartji nyura kuka ngalkuku munu piřuku nyura mungawinki mai pulka ngalkula paltjaringkuku. Munu nyara palulanguru nyura nintiringkula kulilku panya mulapa ngayulu Mayatjanya nyurampa God.’ Alatji tjanala wangka!”

¹³ Ka palulanguru mungartjikutu wiltjawarangka tjulpu puntaru tjuta mulapa wirkara ngurangka manta angara nyinangi. Ka mungawinki mulapa kulyarpa ngaringi ngura winkingka. ¹⁴ Ka tjintungku pakara kampara wiyanu, ka palula malangka ngapari purunypa mantangka ngaringi. ¹⁵ Kaya Israelkunu tjutangku nyakula papulara para-tjapiningi tjananku, “Nyaa nyangatja?” Panya paluru tjanaya ngurpangku tjapiningi.

Ka Moselu wangkangu, “Nyanga paluru mai panya Mayatja Godalu iyantja nyura ngalkuntjaku. ¹⁶ Munu paluru nyuranya wangkangu nyanga alatji, ‘Nyura uti tjuku nguwanpa uranma tjintu kutjuku ngalkula paltjaringkunyjtikitjangku, tjara malaringkula ngarinyytjaku-tawara. Munuya mungawinkiku mantjintja wiyangku kuwariku kutju mantjinma.’ Alatji urantjaku Godalu nyuranya wangkangu.”

¹⁷ Kaya Israelkunu tjutangku mulapatu wanganarangku kulinu paluru wangkanyangka munuya uraningu. Kutjupa tjutangkuya pulka nguwanpa uraningu walytja tjutatjarangku, kaya kutjupa tjutangku tjukutjuku nguwanpa uraningu walytja mankurtjarangku. ¹⁸ Munuya urara mitjurumilaningi mai panya palunya. Ka anangu panya pulka nguwanpa urantjitjangku alatjitu uranu walytja palumpa uwankara paltjaringkunytjaku, ka panya tjara kutjupa malaringkula ngarinytja wiya. Ka panya kutjupangku tjukutjuku nguwanpa urantjitjangku palu purunypatu alatjitu uranu walytja panya mankurtu ngalkula paltjaringkunytjaku.

¹⁹ Ka Moselu wangkangu tjananya, “Nyura uwankarangku tjara kutjupa mungawinkiku kanyintja wiyangku wantima.” ²⁰ Palu kutjupa tjutangku Mosenya kulintja wiyangku wantira mai tjara mungawinkiku tjunkula wantingu. Munuya tjintungka mai panya palunya nyangu katilykatjara ngaranyangka ka una pantingi. Ka Mosenya tjanampa pulka mirpañaringu.

²¹ Palu mungawinki kutjupa mungawinki kutjupaya anangu tjutangku panya mai uralpai tjintu kutjuku kutju ngalkula paltjaringkunytjikitjangku. Ka tjintungku panya pakara katuringkula kampanyangka mai panya mantangka malaringkula ngarinytja ururingkula wiyaringkupai.

²² Kaya tjintu 5 ngarala wiyaringkula Friday-ngka mai pulka nguwanpa mantjiningi tjintu kutjaraku Friday-ku munu Saturday-ku kuлу. Kaya wati Israelkunu pulka tjutangku pitjala tjakultjunu Mosela anangu tjutangku pulka nguwanpa urannyangka nyakula. ²³ Ka Moselu wangkangu tjanala, “Wiya palya, Godalu alatji urantjaku wangkangu, panya mungawinki tjintu milmilpa ngaranyi Godaku anangu uwankara nyinara pakuwiyaringkunytjaku. Kaya mai panya kuvari urantja uwankara paula, tjinguru nyuma rungkara paula muta tjinguru minangka tjungura arngu kutjala. Munuya paura ngalkula paltjariwa munu kutjupa malaringkula ngarinytja kanyinma mungawinkiku.”

²⁴ Kaya Moselu wangkanyangka kulira tjara kanyinu mai panya malaringkula ngarinytja mungawinkiku. Ka mai paluru uñaringkunytja wiya, munu katilykatjararingkunytja wiyatü. ²⁵ Ka Moselu wangkangu, “Mai panya palunyaya kuvari ngalkula, panya tjintu nyangatja kuvari Saturday Mayatja Godaku tjintu nganana pakuwiyaringkula nyinara palunya walkuntjaku. Ka palulanguru nyura mai panya Godalu iyantja irlita ngaranyangka putu nyakuku. ²⁶ Palu palya nyura tjirirpi panya tjutangka mai mantjilkatima tjintu 6-kutu. Palu panya tjirirpi 7-ta pakuwiyaringkunytjaku ngaranyi tjintu panya milmiltä, ka nyura mungawinki pakara mai panya irlita ngarinytja putu nyakuku.”

²⁷ Palu kutjupa tjutaya tungunpungkula maiku anu irlikutu tjintu panya pakuwiyaringkupaingka. Palu mai panya palunyaya putu nyangu, ka mulapatu wiya ngarangi. ²⁸ Ka Mayatja Godalu wangkangu Mosela, “Nyaakuya ngayula tungunpunganyi? Yaalaraya kulira mulamularingkuku ngayulu wangkanyitja uwankaraku? ²⁹ Kulilaya! Panya ngayulu Mayatja Godalu nyurampa tjirirpi pakuwiyaringkunytjaku tjunu Saturday. Kana palulanguru ngayulu mai tjirirpi nyara palumpa kuлу iyanı nganmanytju tjirirpi panya Friday-ngka, Friday-ku munu Saturday-ku kuлу. Ka tjirirpi panya Saturday-ku wangkara nyura uwankara ngurangka

nyinama pakantja wiya.” ³⁰ Kaya palulanguru mulapatu tjirirpi panya Saturday-ngka ngurangka nyinangi pakara warkarinytja wiya.

³¹ Munuya anangu tjutangku mai panya palunya ininu “manna” tjanampa wangkangku.* Palu mai paluru panya ngapari purunypa munu mayu tjuratja purunypa. ³² Ka Moselu wangkangu, “Mayatja Godalu wangkangu nganananya mai nyanga manna palunya tjukutjuku nguwanpa mantjira tjunkula kanyintjaku nganampa walytjapitingku ngula nyakunytjaku munu malatja malatjangku kuлу. Panya Mayatjanya mukuringanyi malatja tjutangku mai nyanga manna nyakula alatji kulintjaku, ‘Nyngatja iriti nganampa tjamu tjutangku ilytjingka ngalkuningi panya Godalu tjananya Itjipalanguru pakaltjingara katingu munu tjananya mai nyanga palunya ngururpa ungangi.’ ”

³³ Munu Moselu Aaronta wangkangu, “Piti tjaawara mantjila munu mai panya manna urara tjaalyngaratjura munu katira Mayatja Godanya walkulpaingka tjunkula wanti nganampa walytjapiti malatja tjutangku ngula nyakula ruuru kulintjaku.” ³⁴ Kaya Aarontu wangkanyangka mulapatu mai panya manna urara tjunu pitingka munu piti panya palunya tjunu pakutja panya kalkuntjjangka kuranyu rawa mulapa ngarinintjaku. ³⁵⁻³⁶ Kaya Israelkunu tjutangku yiya 40 nyinara mai panya manna palunya rawa mulatu ngalkuningi. Munuya ngura panya Kainanta wirkara kutju mai kutjupa ngalkuningi, panya nyara palula wirkankunyangka Godalu mai panya manna piruku iyantja wiyaringu.

17

Mina Apunguru Tjutintjya

¹ Kaya Israelkunu tjuta uwankara utulu winki anangi pilangka ngura ini Tjiingga wantikatira, munuya rawa para-pitjalira ngura kutjupa kutjupangka ngura tjunkula nyinangi Mayatja Godalu nintinnyangka. Munuya kutjupa-ara ngura ini Rapitimala wirkara ngura tjunu. Palu ngura nyara paluru mina wiya. ² Kaya anangu tjuta mulyararira Moseku mirpanaringu, munuya wangkangu, “Minalanya uwa tjikintjaku.”

Ka Moselu wangkangu, “Nyaaku nyura ngayuku mirpanarinyi? Tjinguru nyura Mayatja Godaku mulamularingkuwiyangku wantinyi munu kulini paluru nganananya wantikatintjya-palku atunyamankuntja wiyangku. Palu nyura alatji ngunti kulinnyangka paluru nyurampa mirpanariku.”

³ Palu anangu panya tjutangku mina ilungku Mosenya pulkara ngalytjurmarra wangkangi, “Nyaakulanyan ngalya-katingu Itjipalanguru? Nyangangka mina wiya. Ilunytjakulanyan katingu nganampa tjitji, kuka tjuta kuлу.”

⁴ Ka Moselu Mayatja Godala pulkara tjapiningi, “Nyaalkuna anangu nyanga tjuta? Nyanga kuwariya kulini ngayunya apungka atura iluntankunytjikitjangku.”

⁵ Ka wangkangu Mosela, “Wati Israelkunu pulka mankurpa altira makati kuranyu munuya wantikati anangu pala tjuta. Munu nyuntumpa pala tjukara kuлу kati, panya nyuntu karu Nayilnga pungu, panya palunya.

⁶ Ka ngayulu nyuntula kuranyu apu taanpangka ngaraku puli nyara Tjaniyala. Ka nyuntu puli nyara taanpa palunya tjukarangka puwa, ka apu palulanguru mina pulka tjutiku anangu tjutangku tjikintjaku.” Alatji palyantjaku Godalu Mosela wangkangu, ka paluru kulira ankula apu

* **16:31** Ini nyanga *manna* tjanampa wangkangu wangkanyi alatji, “Nyaa nyangatja?”

panya pungu wati panya pulka tjuṭangka mīrangka, ka alaringkula mina tjutingu apunguru.⁷ Ka Moselu ngura panya palunya ini kutjara tjunu Matjanya munu Miripanya. Alatji paluru ininu panya ngura pala palulaya Israelkunu tjutangku Godanya ngalytjurmarā wangkangi munuya palunya arkara wangkangi, “Mayatja Godanyampa wanyu mulapa nganañala tjungu ngaranyi? Munta wiya-manti?”

Ama-likakunu Tjuta Pikangku Pungkunytja

⁸ Ka Israelkunu tjuta ngura panya Rapitimala nyinanyangka aŋangu Ama-likakunu tjuta pika pitjangu tjananya pungkunytjikitja.⁹ Ka Moselu nyakula wati ini Tjatjuwala wangkangu, “Wati Israelkunu tjuta ngurkantara munuya mungawinki ankula tjananya pikangku pungama Ama-likakunu nyara tjuta. Ka nyura tjanampa pikaringkunyangka ngayulu puli katu tatiṛa ngarala nyakuku tjukara panya palunyatjara, panya Godaluṇi kanyintjaku wangkangu.”

¹⁰ Ka Tjatjuwalu wanganarangku kulinu Mosenya munu wati Israelkunu tjuta ngurkantanu pikakitja ankunytjaku. Munuya mungawinki ankula Ama-likakunu warmala tjuta pikangku pungangi. Ka Mosenya pula Aaronnga wati kutjupa ini Uunya tjana tjungu tatinu puli katu.¹¹ Ka Moselu mara katura kanyinnyangkaya wati Israelkunu tjutangku tjananya pulkara alatjitu pungkula waintaringi Ama-likakunu panya tjuta. Palu Moselu mara tjarunyangkaya Ama-likakunu tjutangku ngapartji tjananya pungkula waintaringi Israelkunu panya tjuta.¹² Palu Mosenya pakuringu mara panya rawangku katura kanyira kanyira. Ka palulanguru Aarontu pula Uulu puli pulka mantjira tjunu Mosela itingka puli palula nyinakatinytjaku. Munu paluru pula Moseku mara kampa kutjaranguru katura kanyiningi rawangku tjintu tjarpanyangka kutju wantintjikitjangku.¹³ Ka pala palulanguru Tjatjuwalu tjana wati Ama-likakunu tjuta pulkara alatjitu pungkula wiyanu.

¹⁴ Ka palula małangka Mayatja Godalu Mosela wangkangu, “Ara nyanga palunya watarkurinytjaku-tawara nyiringka walkatjura malatja tjutangku kuļu nyakula kulintjaku, panya nyura Ama-likakunu tjuta pungkula wiyan-tja. Munu walkatjunkunytjatjanungku wati panya Tjatjuwala wangka, panya ngayulu aŋangu Ama-likakunu uwankara pungkula wiylaku alatjitu tjananya ngura winkitjangku kulintja wiyingkunytjaku.”

¹⁵ Ka ngura pala palula Moselu pitjilpa pulka palyanu Godanya walkuntjikitjangku munu paluru pitjilpa palunya ininu, “Mayatja Godanya nganañanya anga-kanyilpaina”.¹⁶ Munu paluru wangkangu, “Panya ngayulu mara ilkarikutu katura kanyiningi Mayatja Godalu nganañanya anga-kanyintjaku. Ka panya Mayatja Godalu tjananya tiṭutjarangku pikangku pungkuku aŋangu panya Ama-likakunu tjuta tjanampa pakalipiti kulypalpiti munu malatja tjuta kuļu.”

18

Wati Tjitjarunya Mosela Akatjari Nyinanytja

¹ Ka Moseku panya waputju wati panya Tjitjarunya tjukurtjara nyinangi ngura panya Mitiyanta. Munu paluru kulinu uwankara panya Godalu palyantja Moseku tjanampa Israelkunu tjutaku panya paluru tjananya Itjipalanguru pakaltjingara katingu.²⁻³ Ka panya Moselu nganmanytju palumpa kuri Tjipuranya witura iyanu katja kutjara kuļu palumpa waputjungka paṭara nyinanytjaku ngura nyara Mitiyanta. Ka Tjitjarunya pukularingu palumpa unṭalpa katja kutjaratjara wirkankunyangka munu

tjananya puk_ul_u kanyiningi. Ka katja panya kuranyitja ini Kaatjamanya. Alatji Moselu i_{ti} ngarinyangka ininu panya nyara palula arangka paluru wangkangu, "Ngayulu malikitja nyinanyi ngura walytjatjarangka." ⁴ Ka katja panya kutjupa ini Iliyatjanya. Alatji Moselu i_{ti} ngarinyangka ininu panya nyara palula arangka paluru wangkangu, "Ngayuku mamangku Godanya walkulpai, ka God nyara paluru ngayunya wankarunu Ittipaku mayatjangku iluntankunytjaku-tawara."

⁵ Ka Mosenya ilytjingka nyinangi Godaku pu_lingka itingka ini panya Tjaniyala, ka wati panya Tjitjarulu Moseku panya waputjungku Moseku kuri munu katja kutjara ku_lu palulakutu ngalya-katingu. ⁶ Palu Moselu kulinu kutjupangku nganmanyiju ankula tjakultjunkunyangka, "Nyuntumpa waputju Tjitjarunya kuwari ngalya-pitjanyi nyuntulakutu palumpa untalpa munu paka_li kutjara ku_lu."

⁷ Ka Mosenya kulira ngaparikatingu palumpa waputju nyakunytjik-itja munu wirkara palula kuranyu tultjungarakatira palunya manyirka nyunytru_u. Munu pula puk_ul_u wangkara wiyingkula tiintangka tjarpura nyinakatingu. ⁸ Ka Moselu Tjitjarula tjukurpa tju_{ta} tjakultjunangi uwankara Mayatja Godalu palyantja. Panya paluru Israelkunu tjutaku ngalkiltu mayatja panya Piiraku kutjupa kutjupa tju_{ta} palyantja Itjipanya ngurara tju_{ta} ku_lu. Munu piruku ngururpa ku_lu panya paluru tjana Itjipalanguru pakannyaangka kura tju_{ta} tjanala wirkanu, palu panya Mayatja Godalu tjananya wankarunu alatji_u.

⁹ Ka Tjitjarulu tjukurpa nyanganpa kulira pulkara pukularingu, ¹⁰ munu wangkangu, "Kuwarina Mayatja Godanya pulkara mirawa_linyi, panya paluru nyuranya uwankara wankarunu Piiralananguru munu anangu Itjipanya ngurara tju_{ta} anguru ku_lu. ¹¹ Ka_a kuwari nintiringu Mayatja Godaku panya paluru pulka mulapa god kutjupa tju_{ta} angka waintara alatji_u. Paluru panya witulya pulkangku tjananya wankarunu Itjipanya ngurara tju_{ta} angku pauntjingara kanyinnyangka." Alatji Moseku waputjungku wangkangi Godanya walkura. ¹² Munu palulanguru Tjitjarulu kuka wiru mulapa mantjira katingu Godaku munu pungkula pitjilpa katu tju_{ta} tilingku kampanytjaku Godanya ungkula walkuntjikitjangku. Munu paluru kuka kutjupa tju_{ta} ku_lu katingu Godaku pungkula pitjilpa pauntjikitjangku. Ka Moseku ku_a Aaronnga munu wati Israelkunu pulka tju_{ta} ku_lu ankula tjunguringu Mosela pulala Tjitjarula kuka ngalkuntjikitja Mayatja Godala m_{ir}angka palunya walkuntjikitjangku.

Wati Ngurkantankupai Tju_{ta} Tjunkunytja

¹³ Ka mungawinki kutjupa Mosenya anangu tju_{ta} angka nyinara war_karingi. Panya tjana pitjala palula tjakultjunangi tjananku pikaringkula wangkanytjatanungku, ka paluru kulira ngurkantankula tjukaruruningi Godalu palula utinnyangka. Palu paluru mungawinkinguru mungaku-wangkara alatji_u nyinara ngurkantanangi, munu pulkara pakuringu. ¹⁴ Ka Tjitjarulu nyangangi Mosenya anangu tju_{ta} angka pulkara war_karinnyangka munu paluru wangkangu, "Nya nyangatja nyuntu nyinara palyani anangu tju_{ta}? Nyaaku nyuntu kutjungku alatji_u nyinara ngurkantara tjukaruru_u, ka nyanga anangu tju_{ta} rawa mulapa patara ngaranyi tjana ngapartji nyuntula wangkanytjikitja?"

¹⁵ Ka Moselu wangkangu, "Wiya, ngayulu alatji war_karinnyi panya anangu tju_{ta} ngayula pitjala tjapilpai Godalu wangkanytja kulintjikitjangku. ¹⁶ Tjinguru anangu kutjarangku pulanku wangkara

pikaringanyi munu pula puṭu kulini nganalu panyatja tjukarurungku wangkangu. Palulanguru pula puṭu kulira ngayulakutu pitjapai, kaṇa ngayulu kulira ngurkantara tjukarurulpai, mununa pulala tjakultjunkupai Godaku tjukurpa paluru panya wangkanytjtita.”

¹⁷ Ka Tjitjarulu wangkangu palula, “Wiya, nyuntu ngunti palyanji. ¹⁸ Nyuntu kuwari pulkara pakuringanyi, ka nyanga aŋangu tjuṭa kuļu paku pulkaringanyi. War̄ka nyangatja pulka mulapa kutjungku palyantjaku wiya nguwanpa. ¹⁹ Wanyu kulila, kaṇanta tjakultjura tjukarurungku palyantjaku. Ka nyuntu alatji palyannyangka Godanya pukularira nyuntula rawaṭu nyinaku. Palya nyuntu Godala wangkama aŋangu tjuṭaku munu panya tjananku pikaringkunytjtjaku Godala tjinapinma paluru kulira nyuntula utira wangkanytjaku. ²⁰ Palya nyuntu tjanala wangkara nintinma Godalu wituntja uwankara munu tjanala utira wangkama yaaltjingara tjukaruru palyanyku nyinanytjaku.

²¹ “Palu nyuntu uti ngurkantara tjunama kuranyu ngaranytjaku wati panya nintipuka palyanyku nyinapai tjuṭa. Munu ngulu-ngulu Godala mirangka war̄karinytjaku palunya tjananya tjura aŋangu 10 kanyintjaku, kutjupatjara tjura aŋangu 50 kanyintjaku, munu tjara kutjupa tjura aŋangu 100 kanyintjaku, munu tjara kutjupa tjura aŋangu 1,000-ku mayatjarinytjaku. Palu wati palya tjuṭa kutju tjura tjukaruru wangkapai, munu wati ngunti palyalpai tjunkunytja wiyangku wantima. ²² Kaya uti wati nyanga mayatja tjunkunytja tjuṭangku rawangku tjirirpi kutjupa tjirirpi kutjupa aŋangu tjuṭa pikaringkunyangka ngurkantara tjukarurunma. Palu tjinguru pika kutjupa kutjupa pułka nguwanpa ngaranyangkampa uti tjana nyuntula pitjala tjakultjunama, ka nyuntu kulira ngurkantanama. Palu utiya pika panya tjukutjuku tjuṭa walytjangku kulira ngurkantanama nyuntula tjinapintja wiyangku. Ka pala palulanguru nyuntumpa war̄ka tjuku nguwanpa ngaraku, tjana kuļu war̄karinyangka. ²³ Ka nyuntu alatji palyarampa Godalu kuļu wangkanyangka nyuntu pakuringkunytja wiya war̄kariku, kaya wati panya mayatja tjunkunytja tjuṭangku kuļu aŋangu tjuṭa ngurkantankula tjukarurulkku, kaya ngurakutu mapalku ankuku pukulpa alatjiṭu.” Alatji Tjitjarulu wangkangu Moselu palyantjaku.

²⁴ Ka Moselu kulira mulamularingu munu Tjitjarulu wangkanyangka palyanji. ²⁵ Munu wati nintipuka tjuṭa ngurkantanu Israelkunu tjuṭanguru munu tjananya tjunu aŋangu tjuṭaku mayatjarinytjaku, kutjupa tjuṭa aŋangu 1,000-ku, kutjupa tjuṭa aŋangu 100-ku, kutjupa tjuṭa 50-ku, kutjupa tjuṭa 10-ku. ²⁶ Munuya paluru tjana ngurkantankupai tjuṭa nyinangi aŋangu tjuṭa pikaringkunyangka, munuya tjirirpi kutjupa tjirirpi kutjupa tjananya kulira ngurkantankula tjukaruruningi. Munuya kutjupa-ara pika pułka ngaranyangka kutju ankula Mosela tjakultjunkupai, ka paluru ngurkantankula tjukarurulpai. Palu pika tjukutjuku ngaranyangka tjana walytjangku ngurkantankupai.

²⁷ Ka palulanguru Moselu palumpa waputju Tjitjarunya wangkara iyaṇu, ka anu malaku ngura Mitiyantakutu.

19

Israelkunu Tjuṭa Pulı Panya Tjaniyala Nyinanytja

¹⁻² Kaya Israelkunu tjuṭa ngura panya Rapitimala tjukutjuku nyinara piruku ma-pakanu, munuya ilytjingka ankula ankula pilangka wirkanu apu panya ini Tjaniyala itingka. Munuya pala palulalta ngura tjunu apu

panya murpu pulkangka itingka. Panya tjana pīra kutjara nguwanpa anangi Itjipanya wantikatintjatjanu.

³ Ka Mosenya kutju tatinu apu panya murpukutu Godala tjunguringkunytjikitja. Ka Mayatja Godalu palunya altingu apu murpunguru munu tjukurpa wangkangi Israelkunu tjutangka wangkanytjaku, aŋangu panya Jacobakunu tjutangka. ⁴ Alatji paluru wangkangi, “Nyura panya nyangu ngayulu tjananya pungkula wiyanngangka panya Itjipanya ngurara tjuṭa munu panya nyura nyangu ngayulu nyuranya aṭunymara ngalyakatinyangka walawuru purunytpu, panya walawurungku kulunypa tjuṭa nyalpingka tjunkula katipai, palu purunytpu nyuranya wirura ngalyakatingu. ⁵⁻⁶ Ka nyura ngayulu wangkanyangka wanganarangku kulirampa munu ngayulu panya kalkuntja kulu kanyirampa nyura ngayuku walytja mulapa nyinaku. Panya aŋangu manta winkitjaya ngayuku nyinanyi, palu nyuranya ngayulu ngurkantananyi ngayuku walytja mulapa nyinanytjaku, kutjupa tjuṭa purunypa wiya. Ka nyura maunṭalpa nyinaku palya mulapa, mununi nyura uwankarangku tjukurtjara tjuṭa purunytpu ngayunya kutju kulira walkulkku.” Alatji Godalu Mosela wangkangu Israelkunu tjutangka wangkanytjaku.

⁷ Ka Mosenya Godalu wangkanyangka kulira ngalya-ukalingu apu panya murpunguru munu wati pulka tjutangka altira tjakultjenu uwankara Mayatja Godalu wangkanytja. ⁸ Kaya aŋangu tjutangku utulu kutjuringkula kulira wangkangu, “Nganana Godalu wangkanytja uwankara palyalku wanganarangku.” Ka Moselu tjukurpa tjana wangkanyangka kulira malaku ankula Mayatja Godala tjakultjenu.

⁹ Ka Godalu wangkangu Mosela, “Ngayulu nyuntulakutu kumpilpa mapitjaku ngangkali pulkangka, munuṇanta wangkaku ngangkalinguru. Kaya aŋangu tjutangku kuliku ngayulu nyuntula wangkanyangka munuya palulanguru nyuntumpa rawa mulamularingkuku.” ¹⁰⁻¹¹ Munu pīruku Godalu wangkangu Mosela, “Ukalingkula tjanala wangka aŋangu nyara tjutangka, kaya tjintu nyanga kuwari munu mungawinki kulu ulytja tjananku paltjira kilinara munu uwankara nganmanytpu palyala ngayunya walkuntjikitjangku tjintu nyara munkaritjangka. Panya tjirirpi pala palula ngayulu puli panya Tjaniyala murpungka ukalingkula nyinakatiku aŋangu tjutangka mirangka tjana nyakunytpu. ¹² Ka puli pantangka kutjupa kutjupa para-arintara tjunkula wanara angatjura aŋangu tjuṭa tjarpanytpu wiya mun̄kara ngaranytjaku. Munu tjanala wangka pu lingka ilaringkula tilwiyangku wantinyytjaku. Ka tjinguru kutjupangku puli panya palunya pampunyangkampa nyura palunya iluntanama alatjitu. ¹³ Palu aŋangu palunya iluntankunytjikitjangku marangku pungkunytpu wiyangku apungka kutju atula, mutta tjinguru punarangka wakala. Munu kukangku kulu puli pampunyangkampa palu purunytpu iluntanama. Palu malangkaya palya turampata pulkara miratjingannyangka kutju aŋangu tjuṭa palya pu lingka tatini.”

¹⁴⁻¹⁵ Ka palulanguru Moselu kulira malaku ukalingu pu linguru munu aŋangu tjutangka wangkangu, “Tjirirpi kutjaranguru kunyu Mayatja Godanya ukalingkula nyinakatinyi puli nyanga murpungka, ka nyura uwankara nganmanytpa ritiringama Godanya walkuntjikitjangku, munuyanku ulytja paltjila. Warpungkulaya palyala tjintu nyanga kutjarangka, munuya wati tjuṭa tjintu nyanga kutjarangka kuringka tjunguringkula ngarinyytja wiyangku wantima.” Kaya kulira mulapaṭu mantara tjananku tjintu kutjarangku paltjira kilinanu.

¹⁶ Ka tjintu kutjara ngarala wiyingkula mungawinki kutjupa, mina puruny whole tuura pinpangi, ka ngangkali pulka ukalingu ilkarunguru munu nyinakatingu apu panya murpungka. Kaya anangu tjutangku kulinu turampata pulkara miranyangka, munuya pulkara alatjiu nguluringkula tjititingangi. ¹⁷ Ka Moselu tjananya nguranguru ma-katingu anangu uwankara Godala tjunguringkunytjaku, kaya ankula puli pantangka tjunguringkula ngarangi. ¹⁸ Ka puli panya Tjaniyanya tjutura alatjiu patinu puyu pulkangku, panya Godanya pala palula ukalingkula nyinakatingu waru tili pulkangku. Ka puyu panya tiwilpa alatjiu pakaningi waru pulka kampanytja puruny whole. Ka puli winki pulkara alatjiu uri-uringi. ¹⁹ Ka turampata panya miratjingantjanya ngalya-ilaringkula pulkaringu mulapa. Ka Moselu Godala wangkanyangka paluru ngapartji alunu. ²⁰ Ka Mayatja Godanya ukalingkula nyinakatingu puli panya Tjaniyala murpungka munu paluru Mosenya altingu murpukutu ngalya-tatintjaku. Ka Moselu kulira ma-tatinu puli katu. ²¹ Ka Mayatjalu wangkangu Mosela, “Ukalingkula tjananya wangka anangu nyara tjutangka, kaya angatjunkunytja panyatja katantara tjarpawiyangku wantima ngayunya nyakunytjikitjangku, panya paluru tjana tjarparampa iluku alatjiu. ²² Munu tjukurtjara tjuta panya ngayula ilaringkupai tjutangka ku lu wangka tjananku paltjira kilinankula pa tara nyinanytjaku, panya tjana alatjingantja wiyangka tjananya pikantankuku.”

²³ Ka Moselu kulira Mayatja Godala wangkangu, “Anangu tjuta panya putu tatini puli nyanga Tjaniyalakutu, panya nyuntu wangkangu ngananala pantangka para-angatjunkunytjaku, ka panyala palyanu milmilpa ngaranytjaku anangu tjuta ngalya-tatintjaku-tawara.”

²⁴ Ka Mayatja Godalu kulira wangkangu palula, “Ukalingkula nyuntumpa ku ta Aaronnga altira malaku ngalya-pitja. Palu utiya tjukurtjara tjuta munu anangu tjuta ku lu mun kara ngarama ngalya-tjarpanytja wiya ngayulakutu. Panya tjana paintjitjangka tungunpungkula tjarpanyangka tjananya pulkara pikantankuku.”

²⁵ Ka Mosenya kulira puli panya murpunguru ukalingkula mantangka wirkanu munu tjanala tjakultjunu uwankara Mayatja Godalu wangkanytja.

20

Godalu Tjukurpa Pulka 10-pa Ungkunytja

¹ Ka murpu panya katu Godalu tjukurpa pulka tjuta wangkangu nyanga alatji, ² “Kulila! Ngayuluna Mayatja Godanya, panya nyuranyana Itjipalanguru ngalya-katingu, panya ngura nyara palulaya nyuranya pauntjingara pulkara warkamilaningi Itjipanya ngurara tjutangku. ³ Nyura uti kutjupa kutjupa tjuta walkuntja wiyangku wantima munu ngayunya kutju God mulapa walkunma.

⁴ “Nyura uti pu nu kutjupa kutjupa godanyanmara walkuntjikitjangku palyantja wiyangku wantima. Ilkaritja puruny whole, mantatja puruny whole ngaratjunkula walkuntjikitjangku palyantja wiyangku wantima. Munu panya urutja puruny whole palyantja wiyangku wantima godanyanmara walkuntjikitjangku. ⁵ Pu nu pala palu purunytjaya kuranyu tultjungarakatira walkuntja wiyangku wantima alatjiu. Ngayunya kutjuya walkunma, panya ngayulu kutju mayatja pulka nyurampa God, mununa nyura kutjupa walkunnyangka ngayulu pulkara mirpañaripai ngayunya kutju walkuntja-tjiratja. Mununa anangu ngayuku kuraringku-pai tjuta pikatjaralku, mununa palulanguru nyara palumpa tjanampa

kuranguru pikatjaralku tjanampa tjitji tjuṭa, munu tjanampa pakalı puliri tjuṭa, munu tjanampa pakalitja puliritja tjuṭa kuļu. Alatjiṇa pikatjaralku panya nganmanyitja tjuṭaku kuranguru. ⁶ Palu aŋangungku ngayuku mukuringkula, munu ngayulu wangkanytjitja wangaŋarangku kulinnyangkampa ngayulu palunya mukulya pulkangku aṭunymara kanyilku, mununa rawangku palumpa walytja malatja malatja mungiliyi mulapa mukulyangku aṭunymaratu kanyilku.

⁷ “Ngayuluṇa Mayatja Pulkanya nyurampa God, ka nyura uti ngayunya ini ngalypa-ngalyparingkula unytjungku wangkanytja wiyangku wantima alatjiṭu. Panya kutjupangku ngayunya ini ngunti ngalypa-ngalyparingkula wangkanyangkaṇa palunya pungkuku alatjiṭu.

⁸ “Nyura uti tjirirpi panya pakuwiyingkupainya kulinma milmilpa mulapa kanyintjikitjangku watarkurinytja wiyangku. ⁹ Panya tjirirpi 6 ngaranyi nyura waṛkarinytjaku. ¹⁰ Palu tjirirpi 6 ngarala wiyaringkunyangka małangka tjirirpi panya 7 ngaranyi Tjintu Milmilpa nyura waṛka wiya nyinara pakuwiyingkula ngayunya kulintjaku. Ka nyura uti tjirirpi pala palula waṛkarinytja wiya nyinama nyurampa tjiti tjuṭa, munu panya aŋangu nyurala waṛkaripai tjuṭa kuļu, nyurampa kuka tjuṭa kuļu. Munu panya malikitja tjuṭa ngura kutjupanguru pitjala nyurala nguraṛarinytja tjuṭa kuļu uti waṛkarinytja wiya nyinama tjirirpi panya milmilpa palula. ¹¹ Panya ngayulu Mayatja Pulkangku tjirirpi 6 uwankara palyanu manta, ilkarī, uru munu panya mantatja, ilkaritja, urutja uwankara kulu tjintu 6, munu panyaṇa nyara palulanguru uwankara palyara wiyaringkula nyinara pakuwiyingingu tjintu panya 7-ta. Palulanguruṇa tjirirpi pala palunya milmilmara palyanmanu ngayuku tjintu ngaranytjaku.

¹² “Nyura uti mamangka ngunytjungka wangaŋarangku kulinma mukulyangku. Pala palulanguru nyura rawa nguwanpa wanka nyinaku manta nyara ngayulu nyuranya ungkunytjtjangka.

¹³ “Nyura uti aŋangu kutjupa iluntankunytja wiyangku wantima.

¹⁴ “Nyura uti aŋangu kutjupaku kuringka ngarinytja wiyangku wantima kuri walytjangka kutju ngarima.

¹⁵ “Nyura uti kutjupa kutjupa walytjatjara kutitjura katinytja wiyangku wantima.

¹⁶ “Nyura uti aŋangu kutjupa ngunti ngukaṛa wangkawiyangku wantima.

¹⁷ “Nyura uti kutjupa kutjupa walytjatjara nyakula mantjintjikitja ngunti mukuringkunytja wiyangku wantima. Wati kutjupaku kuriku ngunti mukuringkuwiyangku wantima. Wati kutjupaku waliku ngunti mukuringkuwiyangku wantima. Munu palumpa aŋangu waṛkaripai tjuṭaku, munu palumpa pulukaku, palumpa tangkiyiku, palumpa kutjupa kutjupa uwankaraku ngunti mukuringkuwiyangku wantima alatjiṭu.”

Alatji Godalu tjukurpa pulka tjuṭa wangkangu.

Anangu Tjuṭa Ngulu-ngrulu Ngaranytja

¹⁸ Ka Godanya Mosela wangkanyangka Israelkunu tjuṭa pulkaṛa nguluringangi. Panya kulinuya tjana tuunnyangka munu turampata puura wangkatjingannyangka. Munuya nyangu wanangara pinpanyangka munu puyungku tjutunnyangka puli panya palunya. Munuya pulkara nguluringkula paṭu ngarala tjititingangi. ¹⁹ Ka Mosenya Aaronnga pula ngalya-ukalingu pulinguru. Kaya wangkangu Mosela, “Nyuntu kutjungkulanya wangkama, kala nganana nyuntula kulinma. Palu Godalu ngananala wangkanyangka nganana tjinguru iluku palunya kulirampa.”

²⁰ Ka Moselu wangkangu tjanala, “Nguluringkuwiyaya rapa ngarama. Panya Godanya nganañalakutu ngalya-ukalingu nganana palula wanganarangku kulinnyangka nyakunytjikitja. Panya paluru mukuringanyi nyura kura wantira palula kutju titutjarangku wanganarangku kulintjaku tungunpungkunytja wiyangku.” Alatji Moselu tjanala wangkangu. ²¹ Munu paluru kutju pulingka tatira ma-ilaringu Godala panya ngangkali marungka ngaranyangka, kaya anangu tjuta tjaru ngarangi pulinguru ma-paturingkula.

Tjukurpa Pitjilpatjara

²² Ka Mayatja Godalu tjukurpa tjuta mulapa wangkangi Mosela apu panya palula paluru ngapartji Israelkunu tjutangka wangkanytjaku. Nyanga alatji paluru wangkangu, “Nyura uwankarangku nyangu ngayulu ilkariringuru wangkanyangka. ²³ Ka palulanguru nyura walkuntjikitjangku god ngalypa-ngalypa apu gold-nguru tjiilpanguru kuлу palyantja wiyangku wantima munuya ngayunya apungka ini tjungura walkulwiyangku wantima. ²⁴ Nyura ngayuku pitjilpa pulka palyala mantanguru munu pitjilpa pala palula ngayunya ungama kuka tjiipi, nanikuta, puluka, pungkula tiliwakara. Ngayulu nyuranya wangkaku ngura kutjupangka kutjupangka ngayunya walkuntjaku. Mununa ngura nyara palula tjanala nyura wirkankunyangka ngayulu nyurampa pukulpa pulka mulapa palyalku. ²⁵ Tjinguru nyura pitjilpa ngayuku palyalku apunguru, palu apu tjuta wiruly-wirulymankuwiyangku wantima, panya nyura alatji lipulara tjunkunyangka pitjilpa milmilpa wiyaringkuku kuka tiliwakara ngayunya ungkula walkuntjaku. ²⁶ Munu pitjilpa katu mulapa palyantja wiyangku wantima paltjura tatinnyangkampa anangu tjutangku tjinguru ulytja unngutja nyakuku watiku puntu, ka kunitaringkuku. Pala palula-tawara mantangka palyala.”

21

Anangu Warkaripai Tjuta Tjukarurungku Kanyintjaku

¹ Munu piruku Godalu Mosela tjukurpa kutjupa tjuta wangkangu Israelkunu tjutangka tjakultjunkunytjaku paluru tjana wanganarangku kulira palyantjaku.

Alatji paluru wangkangu tjanala wangkanytjaku, ² “Tjinguru nyuntu wati Iipuru kutju maningka payamilařa mantjini nyuntumpa war̄karinytjaku, munu nyuntu uti wati palunya yiya 6 kutju kanyira war̄kamilanma munu palula malangka yiya 6 ngarala wiyaringkunyangka wati panya palunya wantir’iyanma rawa war̄karinytjaku kanyintja wiyangku. Palu wantir’iyantjikitjangku palula mani ngatjintja wiyangku wantima nyuntunya ungkunytjaku, panya paluru nyuntumpa pulkařa rawa war̄karingi. ³ Tjinguru nyuntu yangupala war̄kaku mantjini, ka ngula nyuntu palunya wantir’iyanngkampa uti paluru kutju alatjitu anama ngura walytjakutu kungka katintja wiya. Palu tjinguru nyuntu wati kuitjara mantjirampa uti pulanyaŋ ngula wantir’iyanma yiya panya 6 wiyaringkunyangka. ⁴ Palu tjinguru nyuntu wati kuri wiya mantjilku nyuntumpa war̄karinytjaku, munu palulanguru nyuntu tjinguru kungka ngurkantara palunya ungguku al̄tinytjaku, ka paluru pula al̄tira tjitji tjutatjararingkuku. Ka nyuntu ngula wantir’iyantjikitjangku uti wati kutju iyanma munu minyma panya tjitji tjutatjara kanyinma palula tjungu wantir’iyantja wiyangku.

⁵ “Palu tjinguru wati panya warkangku wangkaku, ‘Wiya mayatja, ngayuluña nyuntumpa mukuringanyi ngayuku kuriku, tjitji tjutaku kulu, mununa nyuntula rawa nyinanytjikitja mukuringanyi, minyma tjitji kuḻu wantikatintja wiya.’ ⁶ Ka alatji wangkanyangka nyuntu uti palyamanama munun palunya katima walı panya Godanya walkulpailakutu, munu walı pala palula ngalya-katira palunya ngaratjunama tuwangka itingka, munu pina witıra tuwa kantilytja tinatjura kanyıra puṇu iřingka wakara alanma. Ka palulanguru wati paluru nyuntumpariku alatjitu munu paluru nyuntula titutjara nyinara warkariku ankunytja wiya.

⁷ “Ka tjukurpa kutjupa alatji. Tjinguru watingku palumpa unṭalpa tjalamilalku anangu kutjupangka palumpa warkarinytjaku. Ka uti anangu panya paluru kungka palunya yiya ⁶ warkarira wiyaringkunyangka wati panya palumpa warka walatjunkunytja purunypa wantir'iyantja wiyangku wantima. ⁸ Tjinguru wati panya mayatjangku kungka panya palunya altintjikitjangku payamilañu palumpa mamangka. Munu palulanguru tjinguru nyakula kungka palumpa pukularinytja wiya munu wantiku altiwiyangku. Pala palulanguru altiwiyangku wantirampa wati paluru uti mamangka małakungku tjalamilanma wati malikitjangka tjalamilantja wiyangku. Panya paluru ngunti payamilañu kuri palurunku altintjikitjangku-palku munu wantingu kurangku. ⁹ Palu tjinguru wati paluru kungka palunya ngurkantanu palumpa katjaku pula altıra tjungu nyinanytjaku, munu uti wati panya paluru kungkawara palunya mama purunyju wirura alatjitu kanyinma unṭalpa purunypa.

¹⁰ “Ka tjinguru wati kurijarangku kuri kutjupa altiku munu uti paluru kuri panya nganmanyitja titutjarangku ungama kuka, mai, mantara kulu. Munu uti paluru kuri małatjangka kutju ngariwiya kutjarangkatu ngarima paluru pulañu pukularinytjaku. ¹¹ Palu wati panya paluru tjinguru kuri panya nganmanyitjaku kuraringkuku kuka, mai, mantara kulu ungkunytja wiya munu panya palula ngarinytja wiyatı. Alatji kurangku palyarampa wati paluru uti minyma panya palunya mukuringkunyangka wantir'yanma alatjitu palula mani ngatjira mantilwiyangku.”

Tjukurpa Pungkunytjatjara

¹² “Tjinguru watingku anangu kutjupa pungkula iluntankuku, ka palunya ngapartji iluntankunytjaku ngaranyi. ¹³ Ka tjinguru watingku anangu kutjupa watarkungku pungkuku ka iluku Godalu palunya ngalkintja wiyangku wantinyangka. Ka wati paluru uti ngapartji pungkula iluntankunytjaku-tawara kumpira wirtjapakanma ngura kutjupakutu ngura panya ngayulu ngurkantankunytjalakutu munu nyara palula paluru wankaru nyinaku. ¹⁴ Palu watingku tjinguru anangu kutjupaku pulkara mirpanarira palunya iluntankunytjikitjangku pungkuku, ka paluru iluku. Ka wati panya paluru tjinguru wirtjapakalku ngayuku pitjilpakutu ngayulu palunya ngalturingkula atunymankunytjaku. Palu wiya, palunya iluntankunytjaku ngaranyi alatjitu.

¹⁵ “Ka anangungku palumpa mama munta tjinguru ngunyju pungkunyangkampa palunya ngapartji pungkula iluntankunytjaku ngaranyi.

¹⁶ “Ka anangu kutjupangku tjinguru wati kutjupa witıra kutitjura katiku paluru wantinyangka kulintja wiyangku, munu tjinguru palunya anangu kutjupangka tjalamilalku munta tjinguru kanyıra palunya pauntjingara warkamilanma. Ka wati nyara kura palunya kutitjura panya katipainya iluntankunytjaku ngaranyi.

17 “Ka anangungku tjinguru palumpa mama munta tjinguru ngunytju warkinyangkampa anangu panya warkipai palunya pungkula iluntankunytyaku ngaranyi.

18-19 “Ka tjinguru wati kutjarangku pulanku pikaringkula punganyi, ka wati kutjungku wati kutjupa marangku punganyi munta tjinguru apungka atuni, ka panya paluru punkara pika pulka ngarinyi ilunytja wiya. Ka palulanguru kutjupangku palunya katinyi ngurakutu ngarira palyaringkunytyaku. Ka tjinguru ngula palyaringkula pakara purkara tjukaratjara urilta para-ngaraku, ka pala palulanguru wati panya pungkupainya ngapartji pungkunytyaku ngaranytja wiya. Palu wati panya paluru uti palunya mani ungama panya pungkunytyatjanungku, panya paluru pikatjara ngarira putu warkarinyi manikitja. Ka uti wati panya pungkupailu pikatjara panya palunya wirura atunyamanama mapalku palyaringkunytyaku.

20 “Ka tjinguru watingku anangu warkipai payamilalku tjinguru wati, tjinguru minyma wati nyara palumpa warkarinytyaku. Munu tjinguru ngula paluru warkipai panya palunya punungka pulkara pungkuku, ka paluru mapalku iluku. Ka wati panya pungkupainya ngapartji pungkula pikatjarantjaku ngaranyi. **21** Palu tjinguru warkipai panya paluru mapalku ilunytja wiya, tjirirpi kutjunguru munta tjinguru tjirirpi kutjaranguru pikatjara ngarira ilunyi. Ka nyara palulanguru wati panya pungkupainya pungkula pikatjarantjaku ngaranytja wiya. Panya palumpa warkipai wiyaringkunyangka paluru tjituru-tjitururinyi.

22 “Ka tjinguru wati kutjarangku pulanku pika punganyi, ka tjinguru kutjungku minyma ititjara paku pungkuku angatjunkunyangka, ka iti tjeni unngu iluku munu mapalku wirkankuku. Ka wati panya pungkunytyatjanungku uti palunya mani ungama nampa panya palumpa kuringku ungkunytyaku wangkanytja. Palu tjinguru paluru mani pulka nguwanpa ungkunytyaku wangkanyangka wati panya pungkunytyalu tjinguru putu payamilalku. Munu uti paluru ankula mayatja panya ngurkantankupaingka arkara wangkama, ka tjinguru wati panya minymaku kuringka wangkaku mani nampa panya tjaruntjaku. **23** Palu tjinguru minyma panya ititjara pungkunytyanya pikatjararingkuku. Ka wati panya pungkunytyanya palu purunypatu pikatjarantjaku ngaranyi. Munu tjinguru ilunyangkampa palu purunypatu wati palunya iluntankunytyaku ngaranyi. **24** Tjinguru kuru wakara tjalantankuku, ka palu purunypatu palunya kuru wakara tjalantankunytyaku ngaranyi. Tjinguru tjaaj pungkula katiti katantankuku, ka palu purunypatu palunya katiti pungkula katantanama. Tjinguru mara tjina pungkula katantankuku, ka palu purunypatu palunya mara tjina pungkula katantankunytyaku ngaranyi. **25** Tjinguru warungka paulku, ka palu purunypatu palunya warungkatu pauntjaku ngaranyi. Tjinguru pungkula miri katantankuku, ka palunya miritu pungkula katantankunytyaku ngaranyi. Tjinguru pungkula miri raa-raalku, ka ngapartji pungkula miri raa-raantjaku ngaranyi.

26 “Ka tjinguru wati kutjupangku anangu palumpa warkipai kuru pungkula tjalantankuku, ka kuru patiringkuku. Ka uti wati panya mayatjangku warka panya palunya wantir'yanma warkangka kanyilwiyangku kuru panya tjalantankunytyatjanungku. **27** Munu tjinguru warka palunya tjaaj pungkula katiti punkatjingarampa uti palu purunytyjutu wantir'yanma warkangka kanyilwiyangku, katiti panya katantankunytyatjanungku.”

Puluka Walytjangku Tjukarurungku Kanyintjaku

²⁸ “Ka tjinguru pulukangku anangu mirpañarira uñtura punkatjingara yuruwilyangku wakara iluntankuku. Ka puluka panya palunya apu pulkangka atura iluntankunytjaku ngaranyi, palu panya kuka ngalkuntja wiyangku wantima. Palu wati panya pulukaku walytjaya mirpañarira pungkula pikatjarantja wiyangku wantima.

²⁹ “Palu tjinguru puluka panya paluru iritilpi mirpañtju ngarangi, kaya anangu tjuñangku wangkangi wati nyanga palula puluka panya yaatangka tjarpatjura wantintytjaku anangu tjuña pungkunytjaku-tawara. Ka tjana wangkanyangka paluru tjinguru kulintja wiyangku wantinyi munu puluka panya urilta para-ngaranytjaku wantinyi yaatangka tjarpatjunkunytja wiyangku. Ka palulanguru ngula tjinguru anangu kutjupa pungkula iluntankunyangkampa puluka panya palunya atura iluntankunytjaku ngaranyi wati panya pulukaku walytja kulu. ³⁰ Palu tjinguru anangu panya miriku walytjangku wangkaku wati panya pulukaku walytja, ‘Palyantiya nyuntunya iluntankuwiyangku wantima nyuntu nganañanya mani ungkunyangkampa. Utu nyuntu nganañanya mani pulka ungama nyampa nyangatja.’ Ka tjana alatji wangkanyangka kulira uti paluru tjananya mani ungama alatjitu nampa panya tjana wangkanytja. ³¹ Ka tjinguru pulukangku tjitji pungkula iluntankuku tjinguru nyitayira munta tjinguru kungka, ka tjudurpa panya paluru ngaranyi. ³² Tjinguru pulukangku iluntankuku wati warkaripai munta tjinguru minyma warkaripai, ka puluka panya palunya apungka atura iluntankunytjaku ngaranyi. Ka wati panya pulukaku walytjangku uti mani pulka ungama anangu panya warkaripaiku mayatja.

³³⁻³⁴ “Ka palu purunypaÑtu tjinguru wati kutjupangku piÑ ngati pulka tjawalku munu paluru tjinguru pitingka angatjunkuwiyangku wantiku. Ka tjinguru puluka, tjinguru tangkiyi watarku pitjala karalukatira iluku piÑ ngatingka. Ka wati panya piÑ tjawantjalu uti mani ungama panya pitingka tjarpanytjtjaku walytja, mununku palurunku kuka panya pitingka punkantjanya kanyinma.

³⁵ “Ka tjinguru wati kutjuku pulukangku pungkula iluntankuku wati kutjupaku puluka. Ka wati panya kutjarangku uti puluka panya wanka tjalamilanma munu mani mantjira pulanku tjarara ungama. Munu pula uti puluka panya ilunytja mirira iltjanpa tjuña katara tjaranma munu pulanku palu purunypaÑtu ungama kuka palunya.

³⁶ “Palu tjinguru puluka panya paluru tjakangku puluka kutjupa tjuña pungkupai ngaranyi pikati alatjitu, kaya anangu tjuñangku tjinguru rawangku nyakupai palunya. Ka wati panya pulukaku walytjangku tjinguru kulira wantipai munu puluka palunya yaatangka tjarpatjura anga-kanyilwiyangku wantipai. Ka nyara palulanguru urilta ngarala tjinguru wati kutjupaku puluka pungkula iluntankuku. Ka alatjirinyangka uti wati panya puluka pikati walytjangku wati panya puluka miriku walytja ungama puluka wanka kutjupa mantjira palurunku kanyintjaku, mununku uti palurunku kanyinma puluka panya miri ilunytja.”

22

Walytjatjara Kutitjunkunytjatjanungku Małakungku Payamilantjaku

¹ “Ka tjinguru nyuntu puluka kutju munta tjinguru tjiipi kutju kutitjura katiku pungkula ngalkuntjikitjangku, munta tjinguru tjalamilara mani mantjintjikitjangku. Munu uti nyuntu kutitjunkunytjatjanungku

małakungku payamilanma kukaku panya walytja. Tjinguru puluka kutju kutitjunkunytjatjanungku nyuntu uti małakungku puluka mañkur-kutjara ungama. Tjinguru tjiipi kutju kutitjunkunytjatjanungku nyuntu uti malakungku tjiipi kutjara kutjara ungama. ²⁻⁴ Uwa, nyuntu uti kuka kutjupa kutjupa kutitjunkunytjatjanungku małakungku payamilanma. Palu tjinguru nyuntu mani wiyangku, kutjupa kutjupa kanyintja wiyangku maraltu kutitjunkunyangka kukaku walytjangku uti nyuntunya wati kutjupangka war̄karinytjaku tjalamilanma mani mantjira kuka kutjupa payamilantjikitjangku. Ka tjinguru kutjupangku nyuntunya kutitjura katinyangka nyakuku, munu uti paluru nyakula nyuntunya markura wangkama kuka palunya małakungku ungkunytjaku munu kuka kutjupa kułu. Nyuntu tjinguru puluka kutju, tjinguru tangkiyi kutju, tjinguru tjiipi kutju kutitjunkuku, ka kutjupangku katinyangka nyakula wangkanyangka uti nyuntu małakungku katira ungama munu piłuku kuka palu puřunypa kutjupa kułu mantjira ungama kutjararangku.

“Ka tjinguru wati mungangka nyuntumpa walingka kumpira tjarpaku, ka nyuntu nyakula palunya pungkuku, ka tjinguru iluku. Ka nyuntunya ngapartji pungkunytjaku ngaranytja wiya, panya nyuntu mungangka pułu nyakula pungu ngura anga-kanyintjikitjangku. Palu tjinguru wati kutitjunkupai kalala nyuntumpa walingka tjarpaku, ka nyuntu palunya nyakula pungkula iluntankuku. Nyara palulanguru nyuntu kalala pungkunytjatjanu mulapa miriputjuringu, ka nyuntunya ngapartji pungkula iluntankunytjaku ngaranyi.

⁵ “Ka tjinguru nyuntumpa kuka ngultju tjułangku nyuntumpa paamangka ukiri para-ngalkuni munta tjinguru nyuntumpa kiripitjingka unnguwanu unnguwanungku tjarpala ngalkuni, ka tjinguru nyuntu atunymankunytja wiyangkampa paluru tjana tjinguru wati panya kutjupaku ukiri maitjarakutu ma-tjarpaku munu mai walytjatjara ngalkula wiyaliku. Ka alatjirinyangka nyuntu uti wati panya palunya kukangku mai panya ngalkuntjitetjangka tjarara ungama nyuntumpa mainguru mai palu puřunypaṭu.

⁶ “Ka tjinguru nyuntu waru tjukutjuku tililku nyuntumpa yaata pulkangka, ka tjinguru tjilka tjuławanu lipiringkula wati kutjupaku yaatakutu warara ma-kampara wañalku munu palumpa mai kutjupa kutjupa paluru pakaltjingantja tjuła kampara wiyaliku. Ka alatjirinyangka nyuntu uti nyuntumpa panya mainguru tjarara palunya ungama mai pulka palu puřunypaṭu.

⁷ “Ka tjinguru wati kutjupangku nyuntunya ungkuku kutjupa kutjupa palumpa unytjungku atunymara kanyintjaku tjinguru mani. Ka tjinguru wati kutitjunkupaingku nyuntumpa walingka tjarpala kutitjura katiku kutjupa kutjupa panya tjuła. Kaya tjinguru wati panya palunya nyakula witilku, ka uti paluru małakungku ungama kutjupa kutjupa panya tjuła paluru mantjintjatjanungku munu piłuku ungama kutjupa tjuła kułu tjungura. ⁸ Palu tjinguruya wati panya kutitjunkupainya pułu ngurilku, ka kutjupa kutjupa panya tjuła katiku alatjitu. Ka tjinguru wati panya kutjupa kutjupa tjułaku walytjangku nyuntunya ngukara kulilku, ‘Tjinguru nyangangku kutitjunu, ngayulu panya ungkunytjitalu.’ Ka alatji nyuntunya ngukannyangka nyuntu uti ngura panya Godanya walkulpailakutu anama, kaya ngurkantankupai tjułangku nyuntunya kuliṛa tjukarurungku ngurkantankuku.

⁹ “Tjinguru wati kutjarangku pulanku pikangku wangkaku kutjupa kutjupanguru tjinguru pulukanguru, munta tjinguru tangkiyinguru, tjin-

guru tjiipinguru, tjinguru nanikutanguru, mutta tjinguru mantaranguru. Tjinguru kutjungku wangkaku, ‘Uwañi! Ngayukun palatja kutitjunu.’ Ka alatji pula pikaringkunya ngkaya uti katima yiwaña panya Godanya walkulpailakutu, ka nyara palula pulanya Godalu ngurkantankuku wati yaaltjingku tjukarurungku wangkanyi. Ka wati panya ngunti wangkanyt-jalu uti malakungku ungama munu kutjupa kulu tjungura ungama kutjara-arangku.

¹⁰ “Ka tjinguru wati kutjupangku nyuntunya wangkaku palumpa kutjupa kutjupa unytjungku atunymara kanyintjaku, tjinguru tangkiyi, mutta tjinguru puluka, tjinguru tjiipi, tjinguru kuka kutjupa. Ka nyuntu kanyinnyangka kuka panya paluru tjinguru iluku, mutta tjinguru pikat-jararingkuku, mutta tjinguru kutjupangku kutitjura katiku kampangkatu. Ka alatjirinyangka anangu kutjupangku tjinguru nyakunytja wiya, ka wati panya kukaku walytjangku tjinguru ngunti kulikku nyuntu kutitjunkunytjapalku. ¹¹ Ka palulanguru alatji ngunti ngukannyangka uti nyuntu anama yiwaña panya Godanya walkulpailakutu munu nyara palula Godala mirangka mulamulangku wiyanmanama. Ka alatji wangkanyangka uti wati panya kukaku walytjangku kulira nyuntumpa mulamularingama munu kuka wiyaringkunytjitjanguru malakungku payamilantjaku nyuntula ngatjintja wiyangku wantima. ¹² Palu tjinguru nyuntu kanyinnyangka wati kutitjunkupaingku kampangkatu pitjala kutitjura katiku, ka nyara kutitjunkunytjanguru kutju nyuntu uti malakungku payamilanma wati panya kukaku walytja. ¹³ Palu tjinguru inura tjutangku kuka panya palunya patjara iluntankuku, ka uti nyuntu kuka panya patjantjitia mantjira katira nintinma wati panya kukaku walytjangka ilunyjtjita nyakula mulamularingkunytjaku. Ka nyara palulanguru nyuntu palunya malakungku payamilantjaku wangkanytja wiyangku kulikku panya inurangku patjan-tja.

¹⁴⁻¹⁵ “Ka tjinguru nyuntu wati kutjupangka tjapilku pulukaku, mutta tjinguru tangkiyiku unytjungku kanyintjikitjangku. Ka tjinguru paluru nyuntunya wangkaku kuka unytjungku kanyira payamilalkatinytjaku, mutta tjinguru paluru maniku ngatjintja wiyangku nyuntunya ungkuku unytjungku kanyintjaku. Ka nyuntu katira kanyinnyangka tjinguru pikat-jararingkuku mutta tjinguru kampangkatu iluku kuka panya paluru. Ka palulanguru nyuntu uti malakungku payamilanma kukaku panya walytja. Palu tjinguru wati kukaku walytjangku kuka panya pikatjararingkun-yangka, mutta tjinguru ilunyangka ngarala nyanganyi ilangku. Munu palulanguru paluru ilangku nyakunytjatjanungku nyuntunya malakungku payamilantjaku wangkanytja wiya, panya kuka paluru walytjangka mirangka ilungu. Tjinguru nyuntu palunya mani unggukatingi kuka panya palunya unytjungku kanyintjikitjangku, ka mani nyara palulanguru paluru kuka kutjupa payamilalku.

¹⁶ “Ka tjinguru watingku kungkawaraku nyakula mukuringkuku munu palunya arkara ngunti altiku munu palulanguru palunya altira katira kampangkatu unytju palula tjunguringkuku. Ka nyanga alatji palyantjatjanungku uti wati panya paluru kungkawaraku panya mama mani ungama palumpa untalpa altinytjikitjangku munu palunya mulamulangkulta altira kanyinma. ¹⁷ Palu tjinguru kungkawaraku panya mamangku unggunytja wiyangku wantiku wati panya paluru altinytjaku. Ka palulanguru uti wati panya paluru kungkawaraku panya mama mani ungama alatjitu, nganmanypa panya palumpa untalpangka ngarinytjatja-

nungku, munu wantima kungkawara panya palunya altintytja wiyangku mamangku painnyangka.

18 “Tjinguru minyma kutjupangku ira^tingka initjunkupai, ka palunya pungkula iluntankunytjaku ngaranyi alatji^tu.

19 “Ka tjinguru watingkumpa tjiipi kungka, munta nanikuta kungka, munta kuka kutjupa kungka pampura kurannyangkampa wati palunya apungka atura iluntankunytjaku ngaranyi alatji^tu.

20 “Ka kutjupangku tjinguru ngayunya wantira god kutjupa kuka katira ungkula walkunyangkampa palunya apungka atura iluntankunytjaku ngaranyi alatji^tu.

21 “Ka nyura uti anangu malikitja kuralwiyangku mukulyangku kanyinma, panya nyura kulu nga^manypa malikitja nyinangi ngura panya Ittipala.*

22 “Munu nyura uti minyma wanaka^{la} tjuta munu tjitji tji^tula tjuta kulu ngaltunytjungku kanyinma kuralwiyangku. **23-24** Palu tjinguru nyura tjananya kuralku, ka tjana ngayunya ulara tjapilku alpamilantjaku. Kan^a ngayulu Mayatja pulkangku tjana tjapinnyangka kulilk^u, mununa pulkara mirpaⁿarira nyuranya iluntankunytjaku iyalku warmala tjuta. Ka nyara palulanguru nyurampa minyma tjuta wanakalariku munu tjitji tjuta kulu tjtulariku nyura ilunyangka.

25 “Ka tjukurpa kutjupa nyangatja panya mani unytjungku ungkunytjatjara. Tjinguru nyuntu mani pulkatjarangku anangu ngaltutjara mani tjukutjukutjara unytjungku mani ungkuku paluru ngula malakungku ungkunytjaku. Palu nyuntu uti mani nampa panya palunya^{tu} kutju malakungku mantjinma munkararin^yta wiyangku. Panya wati mani unytjungku ungkupai tjutangku mani pulka nguwanpa malakungku mantjilpai nampa panya ungkunytjjangka waintara. Palu nyura nyara tjananya arkantja wiyangku wantima munuya mani nampa palunya^{tu} mantjinma mani pulka waintara mantjilwiyangku ngaltutjara panya tjutanguru. **26-27** Tjinguru anangu kutjupangku nyuntula maniku ngatjilku unytjungku mukuringkula. Ka paluru tjinguru nyuntunya malakungku ungkunytjikitjangku kalkura palumpa upukuta nyuntunya ungkuku nyuntu ngapartji unytjungku kanyintjaku. Palu uti nyuntu upukuta palunya mungartjirinyangka malakungku mapalku ungama waringka-tawara. Panya paluru ngaltutjrarangku upukuta palunya kutju kanyini unytjunarinytjikitjangku, munu mantara yaaltjingka paluru tjarp^{ra} ngariku nyuntu palumpa upukuta rawangku kanyinnyangka? Ka upukuta wiyangku ngayula ulara tjapinnyangka^a ngayulu kulilk^u mununa palumpa ngalturingkuku.

28 “Kulilaya! Ngayunyanⁱya Mayatja Godanya kuranmankuwiyangku wantima alatji^tu munu palu purunypatu nyurampa mayatja tjuta kuranmankuwiyangku^{tu} wantima.

29-30 “Munuⁿⁱya ngayunya wangaⁿarangku ungama mai panya kutjupa kutjupa tjuta pakaltjingantjatjanungku. Panya nyura ngayunya tjara ungkunytjaku ngaranyi nyurampa mai wiitanguru, munu kiripitji wangaranguru, munu alipa wangaranguru kulu.

“Munuⁿⁱya nyurampa katja panya nga^manypa ngarin^yta tjuta kulu uwa, munu nyurampa puluka tjiipinguru kulu katja nga^manypa ngarin^yta tjuta. Palu iti kuwaritjaya ngunytjungka kanyintjaku wantima

* **22:21** Nyara Ittipanya ngurara tjutangku panya Israelkunu tjuta mukulya wiyangku kanyiningi. Ka nyangatja Godalu tjanala wangkangi nyara palu purunyariwiyangku kanyintjaku anangu malikitja tjuta.

tjintu 7 munu palulangurulta tjintu 7 wiayingkunyangka tjintu 8-ngka kutju mantjira katira ngayunya ungama.

³¹ “Nyura panya ngayuku walytja tjuṭa nyinanyi, ka pala palulanguru nyura kuka panya inurangku patjara iluntankunytjtja nyakula mantjira ngalkuwiyangku wantima. Palu nyurampa papa tjuṭa kutjuya ungama ngalkuntjaku.”

23

Tjukarurungku Wangkanytjaku

¹ “Kulilaya! Nyura uti tjukurpa ngunti-ngunti para-tjakultjunkunytja wiyangku wantima. Tjinguru watingku mulapa kura palyanu, kaya palunya alpamilara ngunti wangkanytjikitjangku kulintja wiyangku wantima.

² “Munuya anangu tjuṭangku kura palyannyangka nyakulampa tjanala tjunguringkunytja wiyangku wantira palyanyku nyinama. Tjinguruya anangu tjuṭangku kuutpangka ngarala wati ngurkantankupaingka ngunti tjakultjunanyi, ka tjana nyuntunya palu puṛunypaṭu ngunti wangkanytjaku wituwitunyangka kulira wantima munu nyuntu walytjangku kulin-tja kutju tjukarurungku tjakultjunama. ³ Tjinguruya wati mani wiyat-jara ngaltutjara kura palyannyangka witira kuutpakutu katiku mayat-jangku ngurkantankunytjaku. Ka wati panya mayatja ngurkantankupailu uti palunya ngunti mani wiyatjaraku ngalturingkula wantiwiyangku tjukarurungku ngurkantanama kura palyantjitetjanguru.

⁴ “Tjinguru anangu kutjupa nyuntumpa rawa kuraringkupai nyinanyi. Ka nyuntu tjinguru palumpa puluka mutna tjinguru tangkiyi ankunyangka nyakulampa wantir'iyalwiyangku małakungku mantjira katira palunya ungama. ⁵ Munu tjinguru nyuntu nyanganyi wati panya palumpa tangkiyi ulytja pulkatjara punkannyangka, munu nyuntu uti nyakulampa palunya wantiwiyangku alpamanma tangkiyi panya małakungku pakaltjingant-jaku.

⁶ “Ka tjinguru wati ngaltutjara mani wiyatjara kuutpangka ngaranyi mayatjangku ngurkantankunytjaku. Ka uti mayatja panya paluru wati panya ngaltutjara purkarangku kulinma munu tjukarurungku ngurkan-tanama ngunti kurantja wiyangku. ⁷ Ka nyura kuutpangka ngarala mayatjangka miṛangka ngunti anangu kutjupa kuralwiyangku wantira tjukarurungku kutju wangkama mulamulangku. Munuya anangu kutjupa palyanyku nyinanyangka unytjungku kukanyaṛa iluntankuwiyangku wantima. Panya ngayulu anangungku kura palyannyangka nyakula wan-tiwiyangku palunya ngurkantankupai ngapartji pikatjarantjikitjangku.

⁸ “Tjinguru wati kurangku nyuntunya mani ungkuku kuutpangka ngarala mayatja panya ngurkantankupailu ngunti kurantjaku tjukarurungku-palku wangkara. Palu alatji mani ngunti ungkunyangka wantima alatjitu tjukarurungku kutju wangkanytjikitjangku. Panya mani nyanga paluru nyuntumpa kulintja kuralku, ka nyuntu manikitjangku tjukarurungku-palku wangkaku munu anangu panya palyanyku nyinapainya kuranmankuku mayatja ngurkantankupailu ngunti mulapa-palku ngurkantankunytjaku.

⁹ “Nyura uti anangu malikitja tjuṭa kuralwiyangku palyanyku kanyinma. Panya nyura ninti, panya ngañmanypa nyura kuļu ngura Itjipala malikitja nyinangi.”

Tjintu Nampa 7 Munu Yiya Nampa 7

10 “Ka nyura uti yiya 6 ngaranyangka manta nyurampa ngatira runyura uninypa tjuta tjarpatjura wañanma mai pulka pakaltjingantjikitjangku. Munuya mai pakara kururingkunyangka uranma. **11** Munuya palulan-guru yiya panya 6 ngarala wiaringkunyangka mañlangka yiya panya 7-ta uninypa mai pirkku pakaltjingalwiyangku wantima manta panya yiya kutju ultu ngarira pakuwiyaringkunytjaku. Ka nyura uti mai kutjupa kutjupa tjuta walytja pakannyangka nyakula uralwiyangku wantima anangu ngaltutjara tjutangku pitjala urara ngalkuntjaku, inura tjutangku kulu. Munuya palu purunypa mantjintjaku wantima mai kiripitji, munu mai alipa kulu.

12 “Munu nyura uti tjirirpi 6 kutju warkarima munu palula mañlangka tjirirpi 7-ta warkarifiyangku wantira pakuwiyaringama, ka nyurampa anangu warkaripai tjuta kulu uti warka wiya nyinara pakuwiyaringama, munu nyurampa puluka, tangkiyi tjuta kulu. Ka anangu malikitja tjuta kulu uti nyurala tjungu nyinara pakuwiyaringama tjirirpi panya 7-ta.

13 “Uwa, wangañarangkuya kulinma uwankara ngayulu Mayatja Godalu nyurala wangkanytja. Munuya wantima god kutjupangka tjapilwiyangku, munuya ini palunya tjananya wangkawiyangku alatjtatu wantima.”

Inma Pulka Mankurpa

14 “Ka nyura uti yiya kutjupa yiya kutjupa inma pulka mañkurpa palyanma titutjarangku ngayunya walkuntjikitjangku.”

1. Inma Ini “Mai Piltjanya”

15 “Pira panya ini Apipala nyura uti inma panya ini ‘Mai Piltjanya’ palyanma panya pira nyanga palula nyura Itjipanya wantikatingu, ka panya inma nyanga palunya palyantjaku nyurala ngamanytju wangkangu. Kaya panya purunypa palyanma munuya mai pilytja kutju ngalkunma yiitjatjara wantira inma nyanga paluru ngaranyangka tjintu panya 7 ngarala wiaringkunytjaku. Munuya ngayunya walkuntjikitja maralpa pitjawi yangku kuka katima ngayunya ungkunytjikitjangku.”

2. Inma Ini “Mai Urantjanya”

16 “Munu nyura uti inma pulka kutjupa palyanma kuñlingka nyurampa mai wiita kururingkunyangka urantjikitjangku inma ini ‘Mai Urantjanya.’ Munuya mai urara ngamanytju urantjitia-warara ngayunya ungama, panya ngayuluña nyurampa mai uwankara pakaltjinganu.”

3. Inma Ini “Wiltjanya”

“Munu palulanguru kuñlingka mañlangka nyura uti pirkku inma pulka kutjupa ini ‘Wiltjanya’ palyanma, panya nyura mai kiripitji kuru, munu mai panya kutjupa tjuta puñungka kururingkula ngaranytja kulu urantjatanungku.

17 “Uwa, yiya kutjupa yiya kutjupa wati uwankarangku uti mañkuraña tjunguringama inma nyanga mañkurpa palyara ngayunya Mayatja Godanya walkuntjikitja.

18 “Munu nyura uti kuka pungkulampa mai yiitjatjarangka tjungura ngayunya ungkuwi yangku wantima munu mai pilytjangka kutju tjungura ungama. Munuya kuka pungkulampa kanpi uwankara kukanguru katala munu tjintu nyara palulañu warungku tiliwakala uwankara wiaringkunytjaku.

19 “Ka panya nyura kuli kutjupa kuli kutjupa mai wiita nyurampa kururingkunyangka uralpai. Palu uti nyura mai ngamanytju urantja

tjuṭa katima Mayatja Godaku wałikutu, munu palulanguru mala urantja tjuṭa kutju nyurampa ngurakutu katima.

“Munuya nanikuta kułunypa ngunyjtunguru ipi uru mantjira kuka panya kułunypa palunya ipi ırungka kutjantja wiyangku wantima alatjiṭu.”

Godalu Israekunu Tjuṭa Kalkura Wangkanyta

²⁰ “Kulilaya! Ngayulu angelpa iyalku nyura ankunyangka kuranyurira nyuranya aṭunymara katırinkunytjaku ngura panya ngayulu ngañmanyatju nyurampa palyantjtjakutu. ²¹ Ka nyura uti angelpa nyanga palula wangañarangku kulinma tungunpungkuwiyangku panya ngayuluna palunya witura iyanu tjakulpa nyuralakutu. Kaya paluru wangkanyangka kuliṛa wantintytja wiyangku wangañarangku kulinma, panya nyura palula tungunpungkula wantinyangkampa angelpa paluru nyurampa pułkaṛa mirpañariku munu nyura wantintjangu watarkuriwiyangku rawangku kulilk. ²² Paluru nyurala tjakultjunkuku uwankara ngayulu palula wangkanyta, ka nyura wangañarangku kuliṛa tjukarurungku palyannyangka ngayulu ngalkilarira nyurampa mirpañtju tjuṭa pikangku pungkuku. ²³ Ka ngayuku angeltu nyurala kuranyurira nyuranya katırinkuku manta panya palulakutu, panya manta nyara palulawanu aŋangu kutjupa kutjupa kuwari ma-nyinara waŋanı ngura tjuṭangka, aŋangu panya Amurkunu tjuṭa, Iitakunu tjuṭa, Piritjikunu tjuṭa, Kainankunu tjuṭa, Ipakunu tjuṭa, munu Tjaipukunu tjuṭa kulu. Kaña nyara palunya tjananya ngayulu pungkula wiyaliku. ²⁴ Ka nyura uti tjanampa god tjuṭa pupakatira walkulwiyangku wantima munuya tjanampa inmaku nintiringkuwiyangku kulu wantima munu tjananya arkantja wiyangku wantima alatjiṭu. Munuya tjanampa god panya puñunguru palyantja tjuṭa kaṭantara minya-minyanma, munu palu purunypaṭu tjanampa apu panya wara milmilpa tjuṭa kulu punkatjingara kaṭantara wiyanma.

²⁵ “Munuya ngayunya kutju wałkunma nyurampa Mayatja Godanya, kaña ngayulu nyuranya pukulmara ungkuku mai pułka mina pulka kulu, munuña aŋangu kutjupa pikatjara ngarinyangka palyarungulku alatjiṭu, ka pika uwankara wiyingkuku. ²⁶ Ka nyura ngura nyara palula nyinara minyma uwankarangku tjitji iti wiru kanyilk, ka iti uwankara tjuningka unngu ilunytja wiya wanka alatjiṭu wirkankuku. Ka minyma kutjupa iti wiya nyinanytja wiya uwankarangku alatjiṭuya iti kanyilk, ka tjitji uwankara pułkaringkula rawa mulapa nyinaku munuya tjiłpiringkula pamparingkula kutju iluku.

²⁷ “Kaña ngayulu aŋangu panya manta nyara palula nganmanypa nyinanytja tjuṭa nyurampa ngulu-ngulu nyinanytjaku palyalku. Ka nyura palula tjanalakutu ma-wirkankunyangka nyakula paluru tjana puṭu kuli-kulilk munuya pułkaṛa nguluringkula wirtjapakalku nyuralanguru. ²⁸ Ngayuluña ililpa purunypa tjuṭa nyurala kuranyu iyalku aŋangu panya Ipakunu tjuṭakutu munu Kainankunu tjuṭakutu munu Iitakunu tjuṭakutu kulu, kaya paluru tjana nyakula ngulu wirtjapakalku munuya ngura nyara palunya wantikatiku. ²⁹ Palu ngayuluña tjananya mapalkungku yiya kutjungka ngulutjingara pakaltjingantja wiyangku wantinyi. Tjinguru ngayulu tjananya mapalkungku pakaltjingannyangkampa ngura paluru ulṭu ngaraku aŋangu wiyangka, ka kuka inura tjuṭa mularariku munuya manta angara nyinaku pikati tjuṭa, ka nyura puṭu nguwanpa tjananya ngulutjingalku. ³⁰ Palu ngayulu tjananya purkarangku pakaltjingalku

nyura aŋangu ma-tjuṭa mulararintjaku paṭara. Ka palulanguru nyura tjuṭa mulararira manta pala palula lipiwanu nyinaku ngura winkingka.

³¹ “Ngayulu kuwari manta pulka nyuranya unganyi, panya ulparira uru ini Tjitin-tjiningga ngaranyi, ka nyurampa manta ngaraku nyara palulanguru alinytjara karu uru ini Yupuraitilakutu. Ka panya kakaraṛa uru pulka ini Mititu-raniyanya ngaranyi, ka nyurampa manta ngaraku uru nyara palulanguru wilurarakutu pilakutu. Nyanga alatjiṇa nyuranya unganyi manta pulka mununa nyuranya pulkara witulyankuku aŋangu panya palula nyinapai tjuṭa pikangku pungkula ma-pakaltjingantjaku. ³² Ka nyura uti tjanala munu tjanampa god tjutangka kuļu kalypantara wangkanytja wiyangku wantima. ³³ Munuya nyurampa ngurangka nyinanytjaku-tawara tjananya paira iyanma. Panya tjanā tjinguru nyurampa ngurangka nyinarampa nyuranya mukumukulkku tjanampa god tjuṭa walkuntjaku, ka nyura ngayunya kulintja wiyingkuku munu watarkuriku.”

Alatji Godalu tjukurpa tjuṭa Mosela tjakultjunu aŋangu Israelkunu tjutangka ngapartji wangkanytjaku.

24

Godalu Tjananku Ngaparku Kalkuntja

¹ Munu Mayatja Godalu Mosela piruku wangkangu, “Puļi katukutu pula piruku ngalya-tatila ngayulakutu Aaronnga nyupali munu pula wati Natapanya pulanya Apiyunya kuļu kati munu wati Israelkunu pulka tjuṭa wati 70 tjananya kuļu ngalya-kati. Palu nyura ngalya-ilaringkunytja wiyangku patunguru ngayunya pupakatira walkunma. ² Palu Mose, nyuntu kutju ngayulakutu ilaringama, kaya wati panya pulka tjuṭa uti paṭupatu ngarama. Kaya aŋangu tjuṭa uti tjaru mantangka ngarama pulikutu ngalya-tatintja wiya.”

³ Ka Moselu mulapaṭu Godaku tjukurpa uwankara kulira ankula aŋangu tjutangka tjakultjunu uwankara panya Godalu wangkanytjitja tjukurpa panya tjuṭa mulapa. Kaya aŋangu uwankarangku kulira tjungungku wangkangu, “Nganaŋa mulapa Godaku tjukurpa uwankara wanganarangku kulira palyalku.” ⁴ Ka Moselu Godaku tjukurpa uwankara walkatjunu. Munu mungawinki mulapa pakara pitjilpa pulka palyanu puli panya palula paṭangka, munu paluru puli tjiwa tjuṭa 12 murutjura wanau. Paluru puli kutju kutju 12 murutjunu wati panya Israelku katja tjuṭaku, panya katja nyanga palula tjanalanguru aŋangu Israelkunu tjuṭa utiringkula nyinangi walytjarara walytjarara. ⁵ Munu palulanguru Moselu Israelkunu wati yangupala tjuṭa witura iyaŋu, kaya ankula kuka pungkula tiliwakara Godanya walkuntjikitjangku ungangi, munuya piruku kuka puluka nyitayira kuļunypa tjuṭa pungkula kuka tjara tiliwakara Godanya ungu munu tjara kutjupa paura anangu tjuṭa ungu ngalkuntjaku. ⁶ Ka Moselu kuka tjuṭanguru milkali tjara mantjira piti tjuṭangka tjutiŋu, munu tjara kutjupangka pitjilpa panya kurpinu.* ⁷ Munu palulanguru paluru Godaku nyiri tjukurtjara mantjira aŋangu tjuṭangka nyakula wangkangi, kaya kuliningi. Munuya wangkara wiyingkunyangka tjanā kalkunu

* ^{24:6} Moselu pitjilpa milkalingka kurpinu nyaa nintintjikitjangku, panya Godalu aŋangu tjuṭa kura tjuṭa palyantjitungku kalypangku pungkuwiyangku wantintjya, kuka panya tjuṭa tjanampa arangka ilunyangka. Ka milkali tjara kutjupa Moselu piti tjuṭangka tjutiŋu aŋangu tjuṭa kurpintjikitjangku, ka milkali paluru nintini aŋangu tjuṭangku Godanya kalkuntja paluru wangkanytja uwankara wanganarangku kulintjikitjangku.

wangkara, “Nganaña Mayatja Godala wangañarangku kulilku, munula paluru wangkanytja uwankara tjukarurungku palyalku.”

⁸ Ka palulanguru Moselu piti panya milkalitjara tjuta mantjinu munu anangu tjuta milkalingka kurpinu. Munu wangkangu, “Nyawayu milkali nyangatja, panya kuwari Godalu nyuranya kalkunu atunymara kanyintjikitjangku munu panya nyurala tjukurpa wiru tjuta wangkangu nyura kulira palyantjaku, ka panya nyura ngapartji kalkunu paluru wangkanytja uwankara wangañarangku kulintjikitjangku. Ka milkali nyangangku nintini Godalu nyuranya kalkuntja munu nyura palunya kalkuntja.”

⁹ Ka palulanguru Mosenya tjana Aaronnga, Natapanya, Apiyunya munu wati Israelkunu pulka tjuta kuļu pulingka tatinu. ¹⁰ Munuya tatira nyangu Israelku God. Munuya paluru paltjura ngaranytjitetjangka apu panya karaly-karalypa mulapa ngarinyangka nyangu walka puyula-puyula ilkari purunyapa. ¹¹ Ka Godalu nyanga tjananya wati Israelkunu pulka tjuta pungkula wiyangku wantingu. Paluru tjana panya Godanya nyangu, munuya palunya nyakunytjatjanungku nyinakatira tjungungku mai ngalkula tjikiningi.

Mosenya Puli Ini Tjaniyala Katu Nyinanytja

¹² Munu palulanguru Godalu Mosenya wangkangu, “Ngayulakutu nyuntu kutju ngalya-tatila puli katu munu patala palangka. Kañanta ungkuku tjiwa kutjara panya ngayulu palula pulala tjukurpa pulka mulapa walkatjunu anangu tjutangku kulira nintiringkunytjaku.” ¹³⁻¹⁵ Ka Mosenya pula palumpa wati alpamilalpai ini Tjatjuwanya tatintjikitja ritiringu. Palu Moselu ankunytjikitjangku wati panya pulka tjutangka wangkangu ngurangka nyinanyangka, “Nyanganckaya patara nyinama ngalimpa, kali ngula malaku pitjaku. Nyanga Aaronnga pula Uunya nyinanyi nyuranya atunymankunytjikitja, ka tjinguru anangu kutjara pikaringkunyangkampa palula pulalakutu katima pulanya kalypantjaku.”

Munu palulanguru Mosenya Tjaniyala ma-tatinu Godaku panya puli milmiltä. Ka utuwari pulkangku puli panya angatjunu. ¹⁶⁻¹⁷ Ka Mayatja Godanya ukalingu puli pala palula munu irnyara ngarangi tili pulka mulatu. Kaya Israelkunu tjutangku tjarunguru ira-nyangangi katukutura waru pulkangku kampanyangka-palku puli panya katu. Ka utuwaringku puli panya tjutura ngarangi tjirirpi 6, ka palulanguru tjirirpi 6 ngarala wiyingkunyangka tjirirpi 7-ta Mayatja Godalu Mosenya utuwaringuru altingu.

Tjukurpa Mułumułu Tjuta Chapter 25-nguru, 26-nguru, 27-nguru, 28-nguru Kuļu

Kuwari nyura chapter 24 nyakunytjatjanungku chapter 25 puťu nyanganyi munu nyura chapter 26-nguru 28-kutu kuļu puťu nyanganyi panya chapter nyanga palunya tjananya nganaña Pitjantjatjara walkatjunkunytja wiyatū kuwaripa. Palu chapter 25-nguru 28-kutu tjukurpa nyaa ngaranyi, panya Godalu Mosenya puli ini Tjaniyala katu tjukurpa kutjupa kutjupa wangkanytja. Paluru panya Mosenya wangkangu Tiinta Milmilpa palyantjaku pala palula unngu paluru tjana Godala tjunguringkula kulintjaku, tjukurtjara tjutangku kuļu. Munu Godalu tjukurpa kutjupa tjuta kuļu wangkangi palunya tjakultjura utintjikitjangku panya Tiinta Milmilpa yaaltjingara tjukarurungku palyantjaku, tiinta unngu nyinanytja kutjupa kutjupa tjuta kuļu palyantjaku, munu mantara wiru tjukurtjara tjutaku kuļu tjukarurungku palyantjaku. Tjukurpa nyanga Godalu Mosela utira tjakultjunkunytja ngaranyi chapter nampa nyanga palula tjanala 25-ngka,

26-ngka, 27-ngka, munu 28-ngka, munu píruku ngaranyi chapter 30-ngka munu chapter 32-ngka. Kala kuvari tjukurpa nyanga palunya tjananya muṭumutura arangka tjunanyi tjukutjuku tjukutjuku nyura nyakula kulintjaku tjukurpa nyaa purunyapa ngaranyi chapter nyanga palula tjanala.

25

1-9 Chapter 25-ngka verse 1-nguru 9-kutu tjukurpa nyangatja ngaranyi, panya Godalu Mosela wangkangu Israelkunu tjutangka tjakultjunkunytjaku tjana kutjupa kutjupa wiru tjuṭa kanyintjatjanungku katira palunya ungkunytjaku palula tjanalandguru tiinta panya milmilpa palyantjaku munu unngu nyinanytja tjuṭa kulu palyantjaku, mantara tjukurtjara tjutaku kulu palyantjaku. Munu paluru Mosenya wangkangu Israelkunu kutjupa tjutangka wangkanytjaku tiinta panya milmilpa Godaku tjukarurungku palyantjaku, munu paluru wangkangu, “Ngayulu wangkanyangka uwankara alatjiṭu palyala.” Ka nyura malangka nyawa chapter 35-ngka verse 4-nguru 9-kutu Moselu ara nyangatja ngapartji tjakultjunkunytja Israelkunu tjutangka. Munuya píruku nyawa chapter 35-ngka verse 20-nguru 29-kutu ara panya Israelkunu tjutangku wanganarangku kutjupa kutjupa tjuṭa kanyintjatjanungku katira Godanya ungkunytja palumpa Tiinta Milmilku.

10-22 Ka chapter 25-ngka verse 10-nguru 22-kutu tjukurpa nyangatja ngaranyi, panya Godalu Mosenya wangkangu Pakutja Kalkuntjitja palyantjaku, panya pakutja nyanga palula tjiwa panya kutjara tjukurpa pulka 10-tjara tjarpatjunkunytjaku. Godalu utira tjakultjunu Mosenya yaaltjingara pakutja palunya palyantjaku munu píruku wangkangu pakutja liitangka katu angelpa nyalpitjara kutjara kampa kutjara palyantjaku. Paluru wangkangu, “Nyalpi pala lipi kutjara liitangka katu anga-ngaranytjaku palyala, panya nyara palula liitangka katu angelpa kutjarangka ngururpa ngayulu nyuntula tjunguringkuku mununanta wangkaku nyuntu Israelkunu tjutangka ngapartji tjakultjunkunytjaku tjana kulira ngayula wanganarangku kulintjaku.” Ka ara nyanga paluru ngaranyi chapter 37-ta verse 1-nguru 9-kutu, panya Pakutja Kalkuntjitja palyantja. Pakutja palunya wati ini Pitjaliltu tjana palyanu tjukarurungku Moselu tjanala tjakultjunkunyangka Godalu wangkanytja.

23-30 Ka chapter 25-ngka verse 23-nguru 30-kutu tjukurpa nyangatja ngaranyi, panya Godalu Mosenya wangkangu taipula palyantjaku mai panya Godanya ungkunytjtja palula katu tjunkunytjaku. Munu Godalu wangkangu taipula pala palula mai milmilpa palumpa titutjarangku tjunkukatinytjaku mungawinki kutjupa mungawinki kutjupa. Ka ara nyanga paluru ngaranyi chapter 37-ta verse 10-nguru 16-kutu panya taipula palunya palyantja. Taipula palunya panya wati Pitjaliltu tjana palyanu tjukarurungku Moselu tjanala wangkanyangka Godalu wangkanytja.

31-40 Ka chapter 25-ngka verse 31-nguru 40-kutu tjukurpa nyangatja ngaranyi, panya Godalu Mosela wangkangu lampa uwilitja apu goldnguru palyantjaku Tinta Milmilpa unngu irnyara ngaranytjaku. Godalu purkarangku utira tjakultjunu Mosela kulira tjukarurungku palyantjaku. Ka ara nyanga paluru ngaranyi chapter 37-ta verse 17-nguru 24-kutu, panya lampa palunya tjukarurungku palyantja wati Pitjaliltu tjana.

26

1-37 Ka chapter 26-ngka verse 1-nguru 37-kutu tjukurpa nyangatja ngaranyi, panya Godalu Mosela wangkangu Tiinta Milmilpa panyatja palyantjaku panya tjarpara Godala tjunguringkula palunya kulintjaku.

Godalu purkarangku utira tjakultjunangi Mosela munu wangkangu mantara wara tjuta palyantjaku tiinta unngu waraly-waralyngaranytjaku, munu tiinta katuwanungku ngampaljunkupai kutjara ku lu palyantjaku kutju unngutja, kutju katutja. Munu paluru utira tjakultjunu yaaltjingara tiintaku pu nu pulka tjuta ku lu palyantjaku. Munu paluru wangkangu tiinta unngu mantara wara ngururpa waraly-waralytjunkunytjaku ruuma kutjara ngaranytjaku. Munu Godalu wangkangu, "Ruuma pala tjaatja milmilpa ngaranyi anangu tjukurtjara tjutaku, palu ruuma nyara munkaritja milmilpa alatjitu Pakutja Kalkuntjtjaku ngura." Ka ara nyanga paluru ngaranyi chapter 36-ngka verse 8-nguru 38-kutu, panya Pitjaliltu tjana nintipuka tjutangku Tiinta nyanga Milmilpa palyantja.

27

1-8 *Ka chapter 27-ngka verse 1-nguru 8-kutu tjukurpa nyangatja ngaranyi, panya Godalu Mosela wangkangu pitjilpa pulka taipula purunupa palyantjaku pala palula katu kuka pungkula tiliwakara Godanya ungkunytjikitjangku. Ka ara nyanga paluru ngaranyi chapter 38-ngka verse 1-nguru 7-kutu, wati panya Pitjaliltu tjana pitjilpa nyanga palunya tjukarurungku palyantja Godalu wangkanytjita alatjitu.*

9-19 *Ka chapter 27-ngka verse 9-nguru 19-kutu tjukurpa nyangatja ngaranyi, panya Godalu Mosela wangkangu piintji palyantjaku Tiinta Milmilta para-ngarala wanantjaku. Paluru wangkangu yaaltjingara pu nu tjuta palyantjaku munu ayana wara tjuta tjilpanguru palyantjaku panya pu nu katu para-ngarira wanantjaku munu piruku wangkangu mantara wara tjuta palyantjaku panya piintjingka waraly-waralyngarala wanantjaku. Ka ara nyanga paluru ngaranyi chapter 38-ngka verse 9-nguru 20-kutu, panya wati Pitjaliltu tjana piintji nyanga palunya palyantja tiinta panya milmilta para-ngarala wanantjaku.*

20-21 *Ka chapter 27-ngka verse 20-nguru 21-kutu tjukurpa mu tumu ngaranyi, panya Godalu Mosela wangkangu yaaltjingara lampa panya gold-nguru palyantja munga wara tili winki kanyintjaku titutjara munga kutjupa munga kutjupa.*

28

1-43 *Ka chapter 28-ngka tjukurpa nyangatja ngaranyi, panya Godalu Mosela wangkangu mantara wiru mulapa palyantjaku Aarontu tjana palumpa katja tjutangku tjukurtjararingkula tjarpara kanyintjaku. Alatji palyantjaku Godalu Mosela wangkangu, mantara piranpa tiritja minatjara tjalpawanungku kanyilpai, munu kutjupa tiritja puluwana mina wiya mu nguwanungku kanyilpai mutumu tu nguwanpa, munu kutjupa mutumu tu tjuntawanungku kanyilpai palyala, munu pilpiritja palyala apu tjukutjuku 12-tjara walka wirutjara munu apu kutju kutjungka ini kutju kutju walkatjura Jacobaku katja tjuta ini 12 panya. Munu pilpiritja nyanga palunya pilpirita tanpara waraly-waralytjura. Munu palu purunypatu mukata katatja piranpa palyala munu ayana ringki-ringki gold-nguru palyantja mukatangka tjura ngalyangka kanyilpai. Munu ayana ringki pala palula walkatjura nyanga alatji,*

Milmankunytja Mayatja Godaku Palyantjaku.

Munu pilta walka wirutjara ku lu palyala kultu karpilpai. Munu mantara unngu kanyilpai ku lu palyala pantatja angatjunkunytjaku. Nyanganpa uwankara Godalu Mosela wangkanytja alatji palyantjaku Aarontu tjana tjukurtjararingkula tjarpara kanyintjaku, tiinta panya milmilta tjarpara

*Godaku palyantjikitjangku. Ka ara nyanga paluru ngaranyi chapter 39-
ngka verse 1-nguru 31-kutu, panya wati Pitjaliltu tjana mantara nyanga
palunya tjananya uwankara palyantja Aaronku tjanampa palumpa katja
tjutaku kuļu. Paluru tjana tjukarurungku palyanu Godalu wangkanytjitja
alatjitu.*

*Ka nyanga palulanguru nyura nyakuku chapter 29 panya ngaranyi nyiri
nyangangka. Ka tjukurpa nyaa ngaranyi chapter nyangangka, panya Godalu
Mosela wangkangu yaaltjingara Aaronnga tjananya palumpa katja tjuṭa
tjukurtjara tjunkunytjaku.*

*Ka nyura chapter pala 29 nyakula wanara wiyingkula palulanguru
chapter małatja kutjara nampa 30 munu 31 kuļu puṭu nyakuku panya
nganana Pitjanytjatjara walkatjunkunytja wiya kuwaripa. Palu nganana
tjukurpa nyanga palunya pulanya muṭumutu arangka tjunu tjukutjuku
tjukutjuku nyura nyakula kulintjaku tjukurpa nyaa purunypa ngaranyi
chapter nyanga palula pulala 30-nga munu 31-nta.*

29

Aaronnga Palumpa Katja Tjuṭa Kuļu Tjukurtjara Tjunkunytjaku

¹ Godalu Mosela alatji wangkangu, “Nyanga alatji nyuntu Aaronnga munu palumpa katja tjuṭa milmilmarra tjana tjukurtjara nyinara ngayuku palyantjaku. Nganmanytju puluka nyitayira kulunypa munu tjiipi nyitayira kutjara kuļu ngurkantara mantjila pikatjara wiya, purtjutja wiya, wiruly-wirulya wiřu mulapa. ² Munu mai wiita mantjira rungkara ulu wiřu mulapa palyala munu ulu nyanga palulanguru mai nyuma wiřu tjuṭa paula pilytja tjuṭa yiitjatjara wiya, munu kutjupa uwilangka tjungura paula kaika tjuṭa, munu piřuku kutjupa paula mai nyuma upa-upa tjuṭa munu mai upa palunya tjananya uwilangka nyitila. ³ Munu palulanguru mai nyanga palunya tjananya piti ukiringuru palyantjitetjangka tjunkula kuka panya pulukangka munu tjiipi nyitayira kutjarangka kuļu tjungura ngalyakati Tiinta Milmilpakutu.

⁴ “Munu Aaronnga palumpa katja tjuṭa kuļu ngalya-kati Tiinta Milmilpa tjaakutu, munu tjananya minangka paltjila. ⁵ Munu mantara panya wiřu tjuṭa mantjira Aaronnga tjarpatjura. Mantara panya piřanpa tiritja wara purunytja minatjara-wararangka tjarpatjura, munu palulanguru tiritja kutjupa miňa wiyangka munnguwanungku kanyilpaingka katu tjarpatjura. Munu palulanguru karilitjangka katu tjarpatjura panya muṭumutu tjuntawanungku kanyilpaingka, munu pilpiritja apu 12-tjara walka wirutjara pilpirita waraly-waralytjura. Munu pilta walka wirutjarangka kultu karpila. ⁶ Munu mukata piřanpa katangka tanpara ayana ringki-ringki gold-nguru palyantja mukatangka tjura. Ayana ringki pala palula panya walka nyanga alatji ngaranyi,

Milmilmankunytja Mayatja Godaku Palyantjaku

⁷ Munu palulanguru uwila panya milmilmankupai palula katangka tjutila palunya milmilmankunytjikitjangku.

⁸ “Munu palumpa katja tjuṭa katira tjata wiřu tjuṭangka tjarpatjura. ⁹ Munu palula tjanala kuļu puṭuru purunypa katangka tanpala. Munu palulanguru tjananya kultu kutju kutju piltangka karpila. Nyanga alatjingara nyuntu Aaronnga tjananya palyala tjana tjukurtjararingkula ngayuku wara palyantjaku. Kaya Aarontu tjana palumpa katja tjutangku munu palumpa tjanampakunu małatja małatja tjutangku kuļu tjukurtjara nyinara ngayuku palyalkatiku rawangku alatjitu.

¹⁰ “Munu palulanguru puluka panya nyitayira kułunypa ngalya-kati Tiinta Milmilpaku mu nu tiintangka kuranyu ngaratjura, ka uti Aarontu mu nu palumpa katja tjutangku kułu mara tjunama puluka panya palula katangka. ¹¹ Ka palulanguru mara tjunkunyangka puluka panya palunya iluntanama ngayula mirangka tiinta pala milmiltä kuranyu. ¹² Munu puluka palulanguru milkali pitingka mantjira kati pitjilpa panya kuka tiliwakalpailakutu mu nu marangku tairakara tjura pitjilpa mulyangka, panya mulya kutjara kutjarrangka yuruwilya purunypa ngaranyi, ka milkalingka yuruwilya palunya tjananya nyitila. Munu palulanguru pitjilpa palula tjaru milkali pupatjura uwankara wiyla. ¹³ Munu palulanguru kuka panya puluka tjunı alara tjuninguru muturka mantjila mu nu alu, kapulitja kutjara kułu mantjila mu nu pitjilpa panya palula tjunkula tiliwakala kampara mulururinytjaku. ¹⁴ Palu puluka anangu winki miri tjunı kułu katira ngurangka patu urulta tilila kampara mulururinytjaku. Nyanga alatjingala ngayulu nyakula tjananya kura tjuta palyantjitjanguru kalypangku pungkuwiyangku wantinytjaku.

¹⁵ “Munu palulanguru kuka tjiipi nyitayira kutju ngalya-kati, kaya uti Aarontu mu nu palumpa katja tjutangku kułu mara tjunama tjiipi panya palula katangka. ¹⁶ Ka palulanguru tjana mara tjunkunyangka tjiipi panya palunya iluntanama mu nu milkali mantjira pitjilpa panya kuka tiliwakalpainya kantilypa kampa kutjara kurpila mu nu piruku kampa kutjupa kutjara palu purunypału kurpila. ¹⁷ Munu palulanguru tjiipi palunya kałara mutun-mutunmara mu nu unngutja uwankara mantjira paltjila mu nu tjunta kutjara kułu paltjira mutun-mutunpa kutjupa tjutangka katuku tjura katangka tjungu. ¹⁸ Munu palulanguru uwankara tiliwakala pitjilpa panyangka. Nyanga alatjingaranı uwa ngayunya kulintjikitjangku, ka warungka kutjantjtangku pantı wirungku ngayunya pukulmananyi.

¹⁹ “Munu palulanguru tjiipi panya nyitayira kutjupa ngalya-kati, kaya uti Aarontu mu nu palumpa katja tjutangku kułu palu purunytytu mara tjunama tjiipi panya palula katangka. ²⁰ Ka tjana mara kuka panya palula tjunkunyangka tjiipi palunya iluntanama mu nu milkali mantjira tjarara Aaronta tjanala pina wakungka tjura, mara wakunguru mara mamangka tjura, mu nu tjinı wakunguru tjinı mamangka kułu tjura. Munu milkali panya tjara kutjupa pitjilpa kuka tiliwakalpainya kantilypa kampa kutjara kurpila mu nu piruku kampa kutjupa kutjara palu purunypału kurpila. ²¹ Munu palulanguru milkali panya pitjilpangka ngarintjtja tjara mantjila mu nu uwila milmilmancupai kułu mantjira milkali palula tjungura Aaronnga kurpila palumpa mantara anangitja kułu, mu nu palu purunypału kurpila palumpa katja tjuta mu nu palumpa tjanampa mantara kułu. Kaya nyara palulanguru Aaronnga tjana milmilariku palumpa tjanampa mantara kułu.

²² “Munu palulanguru tjiipi kanpi katara tjura, kanpi wiputja kułu, mu nu muturka tjunitja, alu, kapulitja kutjara kułu mantjira tjura mu nu tjunta angkalitja wakunguru kułu palyara tjura. ²³ Munu piti ukiringuru palyantjtanguru mai panya nyuma mañkurpa mantjila kutju yiıtja wiyatja, kutjupa kaika uwilangka tjungura pauntjtja, mu nu kutjupa nyuma upa-upa. Mai nyanganpa panya Godanya ungkunytja Tiinta Milmiltä unngu taipulangka ngarintjtja. ²⁴ Munu mai nyanga mañkurpa mantjira kukangka panya tjungula. Munu palulanguru mai kuka kułu Aaronta mu nu palumpa katja tjutangka marangka tjura, kaya uti ngayula

mirangka mara uritjinganma ngayunya kulintjikitjangku, kaña nyakula pukulariku. ²⁵ Ka palula małangka tjanalanguru mai mantjira katira tjura pitjilpa panya palula kuka tjara kutjupangka tjungu kampara mulururintjaku, kaña kampanyangka pañtira pukulariku. Uwa, nyanga alatjinjiya warungka palyara ungama ngayunya kulintjikitjangku. ²⁶ Munu kuka tjiipi palunya iltjanpa pilpiritja marangku mantjira ngayula mirangka uritjingala ngayunya kulintjikitjangku. Ka palulanguru kuka nyanga pilpiritja nyuntumpariku ngalkuntjaku.” Alatji Godalu Mosela wangkangu.

Munu palulanguru piruku wangkangu, ²⁷ “Wati tjukurtjara milmilmankunytja arangka kuka tjiipi nyitayiranguru tjunta wakutja, pilpiritja kuļu mantjira milmilmarra mauntpalpa tjura tjukurtjara tjutaku tjana ngalkuntjaku. ²⁸ Munu Israelkunu tjutangka wangka nyanga alatjingara kuka ngayulakutu katinytjatjanungku tjukurtjara tjuta ungkunytjaku kuka iltjanpa pilpiritja, tjunta wakunguru kuļu. Panya tjana alatjingara ungkula ngayunya kuļu waintara unganyi, kaña pukularinyi.

²⁹⁻³⁰ “Ka ngula Aaronnga ilunyangka palumpa katja kutju palumpa mamaku arangka nyinaku munu mantara panya wiru tjuta Aarontu kanyintja paluru ngapartji tjukurtjara pulkaringkula tjarpaku. Ka katja nyanga paluru Aaronku arangka nyinara uti mantara nyanga palunya tjananya tjirirpi 7 tjarpara kanyinma. Panya paluru tjukurtjara pulka nyinara Tiinta Milmila tjarpara ngayuku warķa palyalku, ngayula mirangka. Ka ngula Aaronku katja ilunyangka palu purunypa katja palumpa tjukurtjara pulkaringkuku mamaku arangka, ka piruku palu purunypa ngarakatiku malatja małatjaku.

³¹ “Ka kuka panya tjiipi nyitayira palunya Aaronnga panya milmilmankunytjikitjangku mantjintja katira ngura milmila mina warungka kutjala ngalkuntjaku. ³² Munu kuka nyanga palunya kutjara Aaronnga tjananya uwa mai panya nyuma kuļu kaikangka tjungu, tiinta milmila tjaangka ngalkuntjaku. ³³ Utiya Aarontu tjana kutju kuka nyanga palunya ngalkunma maingka panya tjungu, panya kuka nyanga paluru ilunytjitunguru ngayulu tjananya kalypangku pungkuwiyangku wantingu tjana kura tjuta palyantjtjitunguru, kaya milmilarira tjukurtjararingu ngayuku warķa palyantjikitja. Pala palulangurya uti tjukurtjara tjutangku kutju ngalkunma kuka nyanga milmilpa palunya mai panyangka tjungu. ³⁴ Palu tjinguru kuka munu mai panya nyuma tjara ngalkuntja wiyangku wantinyangka mungawinkiringkula ngarinyangka nyakula tilinma kampara mulururintjaku ngalkuntjaku wiya, panya kuka munu mai nyanga palunya tjananya ngañmanytju milmilmañu.

³⁵ “Uwa, Aaronnga palumpa katja tjuta kuļu milmilmankunytjikitjangku alatjinganma panya uwankara ngayulu nyuntunya wangkanytjitungka, munu tjintu 7 palyalkatima. ³⁶ Munu tjintu kutjupa tjintu kutjupa puluka nyitayira kuļunypa pungkula palyanma ngayulu nyakula tjananya kura tjuta palyantjtjitunguru kalypangku pungkuwiyangku wantinytjaku. Alatji palyaran nyuntu pitjilpa panya kuka tiliwakalpaina kura wiya ngaranytjaku palyani. Munu palulanguru uwilangka kurpila pitjilpa panya palunya milmilmankunytjikitjangku. ³⁷ Munu nyanga palunya rawangku palyalkatima tjirirpi 7 pitjilpa nyara paluru milmilpa alatjitu ngaranytjaku. Ka tjinguru aŋangu kutjupangku pitjilpa palunya pam-purampa nyara palulanguru paluru kuļu milmilariku.

38-39 “Tjin̄tu kutjupa tjin̄tu kutjupa titutjarangku tjiipi kułunypa kutjara pitjilpakutu kati pungkula tjunkunytjikitjangku, tjiipi kutju mungawinkiku, munu kutjupa mungartjiku. ⁴⁰ Tjiipi kuranyitjangka tjungula wiitanguru rungkara ulu wiru palyantja munu uwilangka walwalira pitjilpangka tjunkula tiliwakala. Munu waina kułu walpayatanguru pupatjura ngayunya ungkunytjikitjangku. ⁴¹ Munu mungartji tjiipi malatjangka palu purunypa tjungura pitjilpangka tjunkula tiliwakala. Kaña kampanyangka panti wiru pantira pukulariku. ⁴²⁻⁴³ Uwa, nyura uti tjin̄tu kutjupa tjin̄tu kutjupa ngayula mirangka titutjarangku nyanga alatji palyalkatima Tiinta Milmilt kuranyu nyurampa walytjapiti malatja malatjangka kułu. Kaña nyara palula ngayulu nyurala Israelkunu tjutangka tjunguringkula wangkaku, mununa ngayulu pitalytji pulkangku ngura nyara palunya irnyara milmilmanuku. ⁴⁴ Alatjina ngayulu tiinta palunya munu pitjilpa kułu milmilmanuku, mununa Aaronnga palumpa katja tjuła kułu milmilmarä tjunkuku tjukurtjararingkula ngayuku war̄ka palyantjaku. ⁴⁵ Mununa ngayulu anangu Israelkunu tjutangka tjungu nyinaku tjanampa God. ⁴⁶ Kaya tjana kuliklu panya ngayulu Mayatja God tjanampa panya ngayulu alatjituña tjananya Itjipalanguru pakaltjingara katingu palula tjanala tjungu nyinanytjikitjangku. Alatjiya tjana ngayunya kuliklu, panya ngayulu Mayatja God tjanampa.”

Tjukurpa Mutumutu Tjuta Chapter 30-nguru Munu 31-nguru

Kuwari nyuntu chapter 29 nyakunytjatjanungku chapter 30 munu 31 putu nyanganyi panya chapter nyanga palunya pulanya nganana Pitjatjatjara walkatjunkunytja wiyatku kuwaripa. Palu chapter 30-nga munu 31-ta tjukurpa nyaa ngaranyi, panya Godalu Mosela puli ini Tjaniyala katu tjukurpa kutjupa kutjupa tjuła wangkanyta. Paluru panya Mosela wangkangi yaaltjingara tjukarurungku tiinta panya milmilpa palyantjaku, tiinta unngu nyinanytja kutjupa kutjupa tjuła kułu palyantjaku. Palu nganana tjukurpa nyanga palunya pulanya, chapter 30 munu 31, mutumutura panya palula arangka tjunu tjukutjuku tjukutjuku nyuntu nyakula kulintjaku tjukurpa nyaa purunypa ngaranyi chapter nyanga palula pulala.

30

¹⁻¹⁰ Chapter 30-nga verse 1-nguru 10-kutu tjukurpa nyangatja ngaranyi, panya Godalu Mosela wangkangu taipula tjukutjuku wiru pantipaiku palyantjaku, pala palula katu kutjupa kutjupa panti wirutjara kampanytjaku. Munu paluru wangkangu, “Uti Aarontu yiya kutjupa yiya kutjupa titutjarangku taipula nyanga tjukutjuku milkalingka milmilmanama, panya taipula nyanga paluru ngayuku, milmilpa mulapa.” Ka ara nyanga paluru ngaranyi chapter 37 verse 25-nguru 28-kutu, panya taipula tjukutjuku nyanga palunya wati Pitjaliltu tjana palyantja. Tjana tjukarurungku palyanu Godalu wangkanyangka.

¹¹⁻¹⁶ Ka chapter 30-nga verse 11-nguru 16-kutu tjukurpa nyangatja ngaranyi, panya Godalu Mosela alatji wangkangu, “Nyuntu anangu Israelkunu tjuła kantamilannyangka uti wati tjułangku ngayunya kulin-tjikitjangku mani tjukutjuku nyuntunya ungama. Panya tjana alatji tjukarurungku ungkunyangka tjananya atunytju kanyilkku kurangkatawara nyuntu tjananya kantamilannyangka. Ka mani pala palula tjukurtjara tjułangku Tiinta Milmilpa ngayuku wirura kanyilkku.” Alatji Godalu Mosela tjakultjunu tjanala ngapartji wangkanytjaku Israelkunu tjułangka.

17-21 *Ka chapter 30-ngka verse 17-nguru 21-kutu tjukurpa nyangatja ngaranyi, panya Godalu Mosela wangkangu piti paltjilpai pulka palyantjaku ayana ini purantjinguru. Munu Godalu wangkangu piti mana kulu palyantjaku pala palula katu piti pulka nyinatjunkunytjaku. Munu paluru wangkangu, "Utiya tjukurtjara tjutangku ilunytjaku-tawara piti pala palula manyirka tjina kulu minangka paltjinma Tiinta Milmilta tjarpara warkarinnytjikitjangku munu pitjilpangka kulu warkarinnytjikitjangku." Ka ara nyanga paluru ngaranyi chapter 38-ngka verse 8-ngka, panya watu Pitjaliltu tjana piti nyanga pulka mana kulu ayananguru palyantja.*

22-33 *Ka chapter 30-ngka verse 22-nguru 33-kutu tjukurpa nyangatja ngaranyi, panya Godalu Mosela wangkangu yaaltjingara uwila milmilpa palyantjaku panti wirutjarangka tjungura. Munu paluru Mosela utira wangkangu yaaltjingara uwila pala palula kurpira milmilmankunytjaku Tiinta Milmilpa, munu tiinta unngu nyinanytja tjuta kulu, munu Aaronnga palumpa katja tjuta kulu kurpira milmilmankunytjaku Godalu Mosela wangkangu. Munu paluru wangkangu, "Uwila pala paluru milmilpa alatjitu ngayulu wangkanyangka kutju kurpintjaku."*

34-38 *Ka chapter 30-ngka verse 34-nguru 38-kutu tjukurpa nyangatja ngaranyi, panya Godalu Mosela wangkangu yaaltjingara wiru pantipai palyantjaku Tiinta Milmilta ngarira pantinnytjaku munu kampara kulu pantinnytjaku. Paluru wangkangu, "Wiru pala pantipai milmilpa mulapa ngayulu wangkanyangka kutju palyantjaku." Ka ara nyanga paluru ngaranyi chapter 37-ta verse 29-ngka, panya watu Pitjaliltu tjana uwila panya milmilpa munu wiru pantipai milmilpa kulu tjukarurungku palyantja, Godalu wangkanyangka.*

31

1-11 *Ka chapter 31-ta verse 1-nguru 11-kutu tjukurpa nyangatja ngaranyi, panya Godalu Mosela wangkangu, "Ngayuluŋa ngurkantanu wati ini Uriku katja ini Pitjalilnga. Mununa palula tjarpatjunu ngayuku kurunpa ka palunya nintinu warka uwankara nintipukangku tjukarurungku alatjitu palyantjaku ngayulu wangkanytjitja uwankara. Mununa palu purunypatu kutjupa ngurkantanu wati ini Iitjamakaku katja ini Awu-liyapanya nyanga paluru pula tjungu warkarinnytjaku. Mununa wati palyalpai kutjupa tjuta kulu ngurkantanu palunya pulanya alpamilantjaku, mununa palula tjanala nintinu Tiinta Milmilpa tjukarurungku palyantjaku tiinta unngu nyinanytja tjuta kulu, munu mantara wiru tjuta kulu palyantjaku wati tjukurtjara tjutaku. Ngayulu palunya tjananya uwankara pulka nintipukanu witulyangku palyantjaku uwankara ngayulu wangkanytja."*

Ka ara nyanga paluru ngaranyi chapter 35-ngka verse 30-nguru munu chapter 36-kutu. Ka nyuntu tjukurpa nyanga palunya ngurira nyawa chapter 35-ngka verse 30-nguru wati panya nintipuka tjuta kulintjikitjangku.

12-18 *Ka chapter 31-ta verse 12-nguru 18-kutu tjukurpa nyangatja ngaranyi, panya Godalu Mosela wangkangu Tjirirpi panya Milmilta yaaltji-yaaltjingku kulilkatira tjukaruru nyinanytjaku. Ka ara nyanga paluru ngaranyi chapter 35-ngka verse 1-nguru 4-kutu, Moselu tjanala ngapartji tjakultjunkunytja Israekunu tjutangka. Ka nyuntu ngurira nyawa chapter 35-ngka verse 1-nguru, panya Moselu Israekunu tjutangka ngapartji tjakultjunkunytja.*

Tjukurpa nyanga palunya tjananya uwankara Godalu Mosela wangkara tjakultjunu puli panya murpu Tjaniyala. Munu wangkara wiyingkula

Godalu puli tjiwa kutjarangka walkatjunu tjukurpa pulka 10 munu Mosenya ungu.

32

Aarontu Puluka Ngalypa-ngalypa Gold-nguru Palyantja

¹ Kaya anangu Israelkunu tjuṭangku Mosenya puḷinguru ukalingkunytjaku puṭu nyakula nyakula tjunguringkula Aaronta wangkangu, “Ai! Pakara god nganampa palyala nganañanya katirinkunytjaku. Panya nganana puṭu kulini, yaaltjiringu Mosenya? Nyara paluru panyalanya Itjipalanguru pakaltjingara katingu, munu kuwari yaaltjiringu?”

² Ka palulanguru Aarontu tjanala wangkangu, “Nyurampa kuringku katjangku untaltu ringi apu gold-nguru palyantja tjuṭa pinangka kanyinnyangka araltjara ngayulakutu ngalya-kati!”

³ Kaya anangu uwankarangku paluru tjana pinangka kanyintja uwankara araltjara mulapatu palulakutu katingu. ⁴ Ka Aarontu mantjira gold panya palunya tjananya pitingka tjunu munu palulanguru warungka kutjañu kampara uringkunytjaku. Ka uringkunyangka mantjira piti kutjupangka tjutira puluka nyitayira kulunypa purunypa palyanu, goldnguru panya. Kaya anangu tjuṭangku nyakula tjananku Israelingamara wangkangu, “Nyangatja nganampa god, panya nganañanya nyanga paluru Itjipalanguru pakaltjingara ngalya-katingu.”

⁵ Ka palulanguru Aarontu pitjilpa palyanu puluka panya palula kuranyu munu tjanala wangkangu, “Mungawinki inma pulka ngaranyi nganana Mayatja Godanya walkuntjaku.” ⁶ Kaya mungawinki mulapa kuka tjananku katingu pungkula pitjilta katu tiliwakara Godanya ungkunytjikitjangku munuya kuka kutjupatjara tjunguringkula ngalkuntjikitjangku katingitu. Munuya palulanguru pungkula paura wiyaringkula nyinakatira mai kuka pulka ngalkula tjikiningi, munuya tjikira ngalypa-ngalyparingkula minyma kutjupa kutjupa pampuningi tjana pukularinytjikitjangku.

⁷ Ka palulanguru Godalu Mosela puli katu nyinanyangka wangkangu, “Wala pulka ukaliwa! Nyuntumpa panya anangu tjuṭaya nyuntu panya Itjipalanguru katinytja tjuṭa kuraringu munuya ngayuku watarkuringu.

⁸ Paluru tjana mapalku kampa kutjuparingu munuya ngayulu wangkanytja uwankara wantingu. Munuya puluka ngalypa-ngalypa gold-nguru palyara tultjungarakatira walkura mirawaninyi puluka palunya. Munuya kuka katira pitjilta katu pungkula tiliwakanai puluka palunya ungkula walkuntjikitjangku. Munuya alatji wangkanyi, ‘Nyangatja nganampa God! Nyanga paluru panyalanya Itjipalanguru pakaltjingara ngalya-katingu.’

⁹ Ka ngayulu nyanga palumpa tjanampa ninti, panya tjana rawa ngayula tungunpungkupai. ¹⁰ Kanji markulwiyangku wantir’iyala kaña pulkara mirpanarira tjananya uwankara iluntara wiyalu. Mununa nyuntulanguru kutju anangu tjuṭa mulararinjtjaku palyalku.” Alatji Godalu Mosela wangkangu.

¹¹ Palu Moselu Mayatja Godanya pulkara wangkara markuningi, “Mayatja! Nyaangurun tjanampa pulkara mirpanarinyi panya nyuntu palunya tjananya Itjipalanguru pakaltjingara ngalya-katingu witulya pulkangku?

¹² Ka nyuntu tjananya pungkula wiyannganguru tjinguru Itjipanya ngurara tjuṭangkuya alatji nyuntunya wangkaku, ‘Ai! God panya tjanampangku kunyu tjananya iluntankunytjikitjangku ngura nyanganguru pakaltjingara ma-katingu. Paluru tjananya ngura pulitjarakutu pungkunytjikitjangku

katingu tjananya uwankara wiyanjikitjangku.' Alatjiya tjinguru nyuntunya anara wangkaku. Ka nyara palula-tawara nyuntu uti Israelkunu tjuṭa iluntankuwiyangku wantima, munu tjanampa mirpañariwiya kaly-paringga. ¹³ Panyatja kulila, panya nyuntunya wañalpai mañkurpa, Aipuramanya, Isaacanya, Jacobanya tjananya. Panya nyuntu tjananyan kalkunu palula tjanalanguru anangu tjutaringkula mungiliyi mulararintjaku, kililpi tjuṭa purunypa. Munu panyan kalkunu tjananya manta panya Kainannga tjanampa waltyjapiti ungkunyti kitjangku tjanampa tiṭutjara ngaranjytjaku." Alatji Moselu Godala purkarangku wangkara palunya kalypaningi Israelkunu tjuṭa iluntankuwiyangku wantintjaku.

¹⁴ Ka Mayatja Godalu nyangatja kulira kampa kutjuparingu munu palumpa anangu tjuṭa uwankara wiyanjikitjangku kułintjatjanungku wantingu.

¹⁵⁻¹⁶ Ka Mosenya małaku ukalingu puli Tjaniyalanguru puli panya tjiwa kutjaritjatjara, panya tjiwa pala palula pulala kampa kutjarangka Godalu waltyjangku tjukurpa pulka walkatjura wantingu.

¹⁷ Ka Moseku mal pangku Tjatjuwalu anangu tjuṭa mirara wañinyangka kulira palumpa mayatjangka Mosela wangkangu, "Ngurangka nyara pikaringanyi purunypa."

¹⁸ Ka Moselu wangkangu, "Wiya mira nyaratja pikaringkunytja wiya. Inma purunypaya inkanyi."

¹⁹ Munu Moselu ngalya-ukalingkula ilaringkula nyangu puluka panya ngalypa-ngalypa munu anangu tjuṭa kuļu pukularira wařarakatinyangka, munu paluru pulkara mulapa mirpañaringu. Munu tjiwa panya paluru katintjta kutjara anṭa-wañira kaṭantanu puli pañtangka. ²⁰ Munu paluru puluka panya ngalypa-ngalypa tjana palyantja mantjira warungka tjarpatjura uruňu, munu palulanguru wariringkula apuringkunyangka tjiwangka rungkara ulupungu, munu palulanguru kapingga tzungura Israelkunu tjuṭa wituwitunu tjkintjaku mina panya palunya.

²¹ Munu palulanguru Moselu Aaronta wangkangu, "Anangu nyanga tjuṭangkuntaya kulira nyuntunya nyaa wangkangu, kan tjanampa kulira mulamularingu munun tjananya kura nyanga pulka palyannyangka paintja wiyangku wantingu?"

²² Ka Aarontu wangkangu, "Wanyu ngayuku mirpañarinintja wiyangku wantima. Nyuntun ninti anangu nyanga palumpa tjanampa, panya tjana kura tjuṭa palyantjikitja rawa mukuringkupai. ²³ Tjana alatji ngayula wangkangu, 'Ai! Pakara god nganampa palyanma nganañanya katirinkunytjaku. Panya nganaña puṭu kulini, yaaltjiringu Mosenya? Nyara paluru panyalanya Itjipalanguru pakaltjingara katingu, munu paluru kuwari yaaltjiringu?' Alatjiniya wangkangi. ²⁴ Kaña tjananya wangkangu ringi tjuṭa pinangka kanyintja kutjupa kutjupa tjuṭa kuļu gold-nguru palyantja uwankara ngalya-katintjaku. Kaya paluru tjana kanyintjatjanungku mulapatu ngayunya araltjara ungu, kaña gold palunya tjananya tzungura warungka wañingu, ka puluka purunyaringu."

²⁵ Ka Moselu kulinu Aarontu Israelkunu tjuṭa puṭu markunyangka, panya Aarontu tjananya puṭu paira wantingu, kaya tjana pulkara makuraringu anangu ngura kutjupitja tjuṭangku nyakula ikaringkunytjaku tjanampa. ²⁶ Munu paluru ankula ngurangka itinguru pulkara mirara wangkangu, "Anangu Godaku mukuringkula ngayulakutu ngalya-pitja."

Kaya Levikunu tjuṭa pitjala kaputuringu palula. ²⁷ Ka tjanala Moselu wangkangu, “God panya Israelkunu tjuṭaku Mayatjangku nyuranya Levikunu tjuṭa wangkanyi tjuṭa waṛa mantjira ngurangka para-iluntankunytjaku nyurampa kuṭa małanypa tjuṭa, malpa tjuṭa munu nyurala itingka nyinanytja tjuṭa kuļu.”

²⁸ Kaya mulapatu Levikunu tjuṭangku wangka kutju kulira ankula para-iluntanangi, kaya tjintu pala palula anangu tjuṭa mulapa ilungu 3,000.

²⁹ Ka Moselu Levikunu tjuṭangka wangkangu, “Kuwari nyanga nyura Mayatja Godala wanganarangku kulinu munu nyanga nyura nyurampa katja, kuṭa, małanypa tjuṭa, walytjatja tjuṭa iluntanu. Ka nyanga palulanguru Godalu nyuranya pukulmanu palula wanganarangku kulinnyangka nyura palumpa warķa milmilpa palyantjaku.”

³⁰ Ka tjintungka Moselu Israelkunu tjutangka wangkangu, “Panya nyura kura pulka mulapa palyanu puluka ngalypa-ngalypa palyara walkura. Palu kuwari nyangana piruku puli katu tatira Mayatja Godala tjapilku nyurampa kalyparingkunytjaku nyura kura nyanga palunya palyantjitjangu.”

³¹ Ka palulanguru Moselu Mayatja Godalakutu małaku ankula wangkangu, “Anangu nyangantuya kura pulka mulapa palyanu. Panya tjanaya gold-nguru god ngalypa-ngalypa palyara palunya walkuningi.

³² Wanyu tjanampa ngalturingama kura panya palyantjitjanguru munu tjananya kalypangku wantima pungkuwiyangku. Palu wiyangka ngayuku ini nyiringuru panya kurala, nyiri panya nyuntu anangu nyuntumpa tjuṭa ini walkatjunkunytjatjanungku.”

³³ Ka Mayatja Godalu wangkangu, “Wiya, panya tjanaya ngayula tungunpungkunytja tjuṭa kutjuña nyiri ngayukunguru ini kuralku. ³⁴ Ala! Ara munu tjananya anangu tjuṭa ma-kati ngura panya ngayulu nyuntula nganmanytju wangkanyitjatjaku. Palu kulinma panya ngayuku angel-tunta nyuntunya katirinkuku. Palu ngulanja tjananya kura palyantjitjangu pikantankuku tjirirpi ngayulu kalkuntjtangka.”

³⁵ Munu palulanguru Mayatja Godalu pika pulka tjananya ungu, panya tjanaya Aaronnga wituwituñu tjanampa puluka gold-nguru palyantjaku.

33

Godalu Tjananya Wituntja Pulij Tjaniyanya Wantikatinjtaku

¹ Ka Mayatja Godalu Mosela wangkangu, “Nyuntu panya Israelkunu tjuṭa Ittipalanguru pakaltjingara ngalya-katingu. Ka kuwari nyuntu ngura nyangatja wantikatira tjananya ma-kati manta panya ngayulu kalkuntjalakutu. Panya ngayulu Aipuramanya, Isaacanya, Jacobanya tjananya manta panya palunya ungkunytjikitjangku kalkunu tjanampa walytjapiti małatja małatja kuļu. ² Ngayulu angelpa iyalku nyuranya katirinkunytjaku. Munuña manta nyara palulanguru anangu nguratja tjuṭa pakaltjingara ma-paiṛa waṇaṛa iyalku, panya wati Kainankunu tjuṭa, Amurkunu tjuṭa, Iitakunu tjuṭa, Piritjikunu tjuṭa, Ipakunu tjuṭa, Tjaipukunu tjuṭa kuļuña uwankara paiṛa iyalku. ³ Ka manta nyara palula nyura mai pulka pakaltjingalku munu nyura kuka kutjupa kutjupa tjuṭa mulapa kanyilkü, panya manta nyara paluru wiru mulapa. Palu ngayulu nyurala tjungu ankunytja wiya panya nyura rawa ngayula tungunpungkupai. Tjinguruna nyurala tjungu ankula nyuranya ngururpa uwankara iluntaṛa wiyaliku.”

⁴ Kaya nyanga palulanguru Godalu wangkanyangka kulira anangu uwankara pulkara tjitururingu munuya ulara waningi. Munuya palumpa tjanampa liritja, manyirkangka kanyintja munu kutjupa kutjupa uwankara araltjara tjunangi tjituru-tjituru nyinara. ⁵ Panya Godalu Mosela nganmanytju wangkangu nyanga alatji, “Anangu nyanga paluru tjana ngayula rawa tungunpungkupai. Kaña tjinguru tjanala tjungu tjukutjuku ankula tjananya uwankara mapalkungku alatjitu iluntara wiyalu ngayula tungunpungkunyangka. Ka nyuntu tjananya wangka liritja, manyirkitja, pinatja, kutjupa kutjupa tjuṭa tjana kanyintjatjanungku araltjankunytjaku. Kaña palulangurulta kulilku, ‘Yaaltjingalkuna anangu nyanganpa?’” ⁶ Kaya ngura nyara Tjaniyala Israelkunu tjuṭangku mulapatu uwankara araltjara tjunu, munuya piruku tanpantja wiyangku wantingu.

Tiinta Panya Godala Tjunguringkula Kulilpai

⁷ Ka Israelkunu tjuṭangku ngura kutjupangka wirkara ngura tjunkunyangka Moselu tiinta katira wiltjalpai palumpa tjanampa ngurangka paṭu nguwanpa. Munu paluru tiinta nyara palunya ininu “Godala Tjunguringkula Kulilpai”. Ka kutjupa Godala tjapintjikitja mukuringkula tiinta nyara palulakutu ankupai Godalu wangkanyangka kulintjikitja. ⁸ Ka Mosenya tiinta nyara palulakutu ankunyangka anangu tjuṭa tiinta tjanampangka tjaangka paṭara ngarala nyakupai Mosenya tiinta nyara palula ankula tjarpanyangka. ⁹ Ka Mosenya tiintangka tjarpanyangka malangka ngangkali panya waṛa tiintakutu ukalingkula tiinta tjaangka ngarapai, ka Mayatja Godalu Mosela wangkapai ngangkalinguru. ¹⁰ Kaya Israelkunu tjuṭangku ngangkali waṛa tiinta tjaangka ngaranyangka nyakula Godanya walkulpai palumpa tjanampa tiintanguru ngarala. ¹¹ Ka Mayatja Godalu Mosenya ilangku wangkapai panya wati malparara wangkapai, palu purunypa. Ka palulanguru Mosenya malaku ankupai ngurakutu. Palu wati panya Tjatjuwanya Moseku panya malpa kutju malaringkula nyinapai tiinta nyara palula. Wati paluru panya yangupala wati ini Nanku katja.

Mayatja Godalu Kalkuntja Tjanala Tjungu Pitjalinkunytjikitjangku

¹² Ka Moselu Mayatja Godala wangkangu, “Mulapa nyuntu ngayunya wangkangu Israelkunu tjuṭa manta nyara palulakutu katinytjaku. Palu wangkanytja wiyatunin ngananya ngayula tjungu iyantjikitjangku. Nyuntu panyanin wangkangu nyuntu ngayuku ninti mulapa, munutjun ngayuku pukularinyi. ¹³ Palu ngayuku pukularirampańi nintinma nyuntumpa kulintja tjuṭa, kaña nyuntumpa nintiriwa munuṇantawi rawangku nyuntunya waṇanma nyuntu ngayuku pukularinytjaku. Panyatja kulinma, panya anangu nyanga Israelkunu tjuṭan nyuntu ngurkan-tanu nyuntumparinytjaku.” Alatji Moselu wangkangi.

¹⁴ Ka Mayatja Godalu wangkangu, “Wiya, palya ngayulu nyurala tjungu ankula nyuranya rapalku.”

¹⁵ Ka Moselu wangkangu, “Nyuntu nganaṇala ankuwiyangku wan-tirampa nganananya nyanganguru iyalwiyangku wantima. ¹⁶ Palu nyuntu nganaṇala tjungu ankunyangkampa anangu ngura kutjupitjangku nyakula kulilku, ‘Mulapa Mayatja Godanya Moseku tjanampa pukularinyi.’ Kala nyuntumpa anangu tjuṭa maunṭalpa nyinaku kutjupa nguwanpa anangu kutjupa tjuṭa purunypa wiya.”

¹⁷ Ka Mayatja Godalu Mosela wangkangu, “Uwa palya, ngayulu nyuntu wangkanytjitja palyalku, panya ngayulu nyuntumpa ninti mulapa munuṇa nyuntumpa pukularinyi.”

¹⁸ Ka palulanguru Moselu tjapinu, “Wanyuṇi nyuntumpa pitalytji pulka nintinma.”

¹⁹ Ka Mayatjalu wangkangu, “Uwa palya! Ngayuluna Mayatja Godanya, munuṇa ngayulu mukuringkula aŋangu kutjupa ngaltunyjtungku ngurkantankupai palunya mukulyangku kanyintjikitjangku. Kuwarinaŋ ngayulu pitalytji pulka mulapa nyuntula itiwanu ankuku, munuṇatju nyuntu kulintjaku ini milmilpa wangkaku. ²⁰ Palu ngayulu yunpa nyuntula utiringkunyta wiya, panya aŋangungku ngayuku yunpa nyakulampa iluku. ²¹ Palu nyangatja ngura ngayula itingka ngaranyi nyuntu walungka tatira ngaranytjaku. ²² Ka ngayulu pitalytji pulkatjara nyuntula itiwanu ankula nyuntunya walu tjilpirpangka tjarpatjunkuku munuṇa marangku nyuntunya angatjunkuku. ²³ Munuṇa nyuntula itiwanu ankula marangku angatjunkunyjtatjanungku alalku, kaṇin palulangurulta tjaŋa kutju miralku, palu putun nyakuku ngayuku yunpa.”

34

Moselu Tjiwa Kutjupa Kutjara Palyara Godalakutu Katinytja

¹ Ka Mayatja Godalu Mosela wangkangu, “Puli kutjara mantjila piruku munu tjitjulangka palyala tjiwa kutjara panya ngañmanyitja purunypa, kaṇa tjiwa pala palula pulala walkatjunkuku tjukurpa pulka panya ngañmanytuṇa tjiwa kutjupa kutjarangka walkatjunu kan kaṭantanu.

² Ka mungawinki pakarampa pitjala piruku tatila puli pala Tjaniyala, munu nyara palula katu ngayula tjunguriwa. ³ Ka wati kutjupa uti nyuntula tjungu pitjanytja wiya. Palu nyuntu kutju uti ngayula wirkanama. Munu aŋangu uwankara paila puli nyangawanu para-ngařanytjaku-tawara. Munu tjananya wangka tjiipi, nanikuta, puluka kuļu puli nyanga paṇṭawanungku ukiriku para-katirira kanyilwiyangku wantinytjaku.”

⁴ Ka palulanguru Moselu palyanu tjiwa kutjara panya ngañmanyitja purunypa, munu mungawinki mulapa piruku tatinu puli panya palulaṭu tjiwa panya kutjaratjara Godalu wangkanytjitjangka.

⁵ Ka Mayatja Godanya ngangkalingka unngu ngalya-ukalingkula palula tjunguringkula ngarangu puli panya katu, mununku ini wangkangu, “Ngayulu panyaṇa, Mayatjanya panya.” ⁶ Munu Mayatjanya palula kuranyu itiwanu anu munu wangka katungku mirara wangkangu nyanga alatji, “Ngayuluna Mayatja Godanya panya ngaltunyjtju pulkanya, munuṇa mapalku mirpaṇaripai wiya, palu ngayulu mukulya titutjara pukultju alatjiṇu nyinapai, munuṇa kalkuntjatjanungku tjukarurungku palyalpai. ⁷ Munuṇa kalkuntjatjanungku watarkuriwyangku rawa mulatu mukulyangku kulilpai aŋangu tjuta mulapa. Munuṇa aŋangu ngayula tungunpungkula kura pampunyangka tjanampa kuraringkunyta wiya kalypangku pungkunyta wiyangku wantipai. Palu aŋangu kutjupangku ngayunya wantira kura rawangku palyannyangkaṇa palulanguru palunya pikatjaralku, munuṇa mamaku kuranguru pikatjaralku palumpa tjitji tjuta, munu palumpa pakali puliri tjuta, munu palumpa pakalitja puliritja tjuta kuļu, aŋangu panya ngañmanyitjaku kuranguru.” Alatji Godalu Mosela wangkangu.

⁸⁻⁹ Ka Moselu mapalku tultjungarakatira ngalyangku manta pampura palunya walkuṇu wangkara, “Mayatja, nyuntu ngayuku pukularirampa

wanyu nganañanya katirinama. Añangu nyanganpa panyaya rawa nyuntula tungunpungkupai, palu wanyulampa ngalturingama munulanya kalypangku pungkuwiyangku wantima nganaña kura palyantjitjanguru, munulanya nyuntumparinytjaku mulapa palyala.”

Mayatja Godalu Tjukurpa Pulka Tjuta Piruku Wangkanytja (Exodus 23:14-19)

¹⁰ Ka Mayatja Godalu Mosela wangkangu, “Kuwarina añañu Israelkunu tjuta wangkara kalkuni. Ngayulu tjanala mirangka kutjupa kutjupa pulka mulapa palyalku tjana ngañmanytju nyakunytja wiyatja ngurpatja mulapa kutjupangku palyantjtja purunypa wiya. Ka añañu ititja tjutangku ngayulu nyurala kutjupa kutjupa pulka mulapa palyannyangka nyakula urulyaraña pulkara ngulu-nguluringkuku. ¹¹ Palu ngayulu nyurala kuwari wangkanyangkampaya wangañarangku kulinma. Ka nyura manta nyara palulakutu ankunyañgkana anangu nguratja tjutawarara pakaltjingara ma-paire wañara iyalku, panya wati Amurkunu tjuta, Kainankunu tjuta, Iitakunu tjuta, Piritjikunu tjuta, Ipakunu tjuta, munu Tjaipukunu tjuta. ¹² Palu kulilañiya! Nyura manta nyara palula wirkara añañu nguratja tjutangka wangkara kalypantara purkarangku kalkuntja wiyangku wantima alatjiñu nyuranya kurakutu katintjaktawara. ¹³ Palu tjanampa pitjilpa tjutaya piluntara wiyla, munu puli tjana murutjunkula milmilmankunytja tjuta kuļu kañantara wiyla, munuya tjanampa god ngalypa-ngalypa ini Atjuraku puñu milmilpa tjuta kuļu kañantara uwankara minya-minyla.

¹⁴ “Munuya god kutjupa tjuta walkulwiyangku wantima, panya ngayulu god kutjupa walkunnyangka pulkara mirpañaripai ngayunya kutju walkuntja-tjiratja. ¹⁵ Munuya añañu manta nyara palunya ngurara tjutangka kalypantara wangkara purkarangku kalkuntja wiyangku wantima! Tjana tjinguru nyuranya altiku palula tjanala tjunguringkula tjanampa god tjuta walkuntjaku, munuya nyuranya wangkaku kuka pungkula tjanampa god tjuta ungkunytjaku. Munuya tjinguru nyuranya altiku tjunguringkula kuka panya god tjanampa ungkunytjanya ngalkuntjaku. Kaya pala palula-tawara tjananya kalypantara wangkara kalkuntja wiyangku wantima. ¹⁶ Tjinguru nyura tjanampa kalyparingkula nyinanyangka nyurampa katja tjutangku añañu nyara palumpa tjanampa untalpa tjuta altiku, ka tjinguru minyma paluru tjana nyurampa katja tjuta iwara kurangka katiku tjana ngayunya wantira tjanampa god ngalypa-ngalypa tjuta walkuntjaku. ¹⁷ Munu nyura uti ayananguru god ngalypa-ngalypa walkuntjikitjangku palyantja wiyangku wantima.

¹⁸ “Munuya añañu panya mai pilytja ngalkuntjanya rawangku kulinma yiya kutjupa yiya kutjupa inma kanyintjikitjangku. Panya ngayulu nyurala wangkara wantingu mai pilytja ngalkukatinjtjaku tjintu 7 pira panya ini Apipala, panya nyara palula ařangka nyura Itjipanya wantikatira ngalyapakañu.

¹⁹ “Ka panya nyurampa katja ngañmanypa ngarinytja uwankara ngayuku, munu tjiipingku nanikutangku pulukangku ngañmanytju kanyintja uwankara kuļu ngayuku. ²⁰ Palu nyura tangkiyi nyitayira ngañmanypa ngarinytja malakungku mantjinma lamalama ngayunya ungkula palu purunypatu. Palu tjinguru nyuntu tangkiyi palunya malakungku mantjintja wiyangku wantinyi. Palulanguru nyuntu tangkiyi palunya ngunti kañantara. Palu nyura uti tjitji katja ngañmanypa

ngarintytja tjuta ngayunya unguⁿytjatjanungku malakungku payamilanma wantintytja wiyangku." Alatji Godalu wangkangu.

Munu piruku wangkangu, "Nyura uti ngayulakutu pitjanytjikitja mukuringkulampa kutjupa kutjupa unguⁿytjikitjangku katima maralpa pitjanytja wiyangku.

²¹ "Munu nyura uti tjintu 6 warkarima, munu palula malangka tjintu panya 7-ta nyinara tjintu kutju pakuwiyingama warkarintytja wiya. Tjinguru warka pulka ngaranyi kaanangka manta tjawara wañantjaku, munta tjinguru mai urantjaku, palu tjintu 6 warkarintytjatjanungku tjintu panya 7 wirkankunyangka warka palatja wantima munu nyinara pakuwiyingama.

²² "Munu nyura uti kuli kutjupa kuli kutjupa inma panya ini 'Mai Urantjanya' palyanma nyurampa mai wiita piltiringkunyangka urantjikitjangku. Munu kuñingka malangka nyura uti piruku inma kutjupa ini 'Wiltjanya' palyanma yiya kutjupa yiya kutjupa.

²³ "Uwa, yiya kutjupa yiya kutjupa wati uwankara uti mañkurara inmangka tjunguringama ngayunya wal kuntjikitja, panya ngayulu Israelkunu tjutaku Mayatja Godanya.* ²⁴ Ka manta nyara palula ngayulu añangu nguratja tjuta-warara pakaltjingara ma-pairra wañara iyalku, ka nyura malangka tjarpara nyinara ngurarakuru. Ka nyara palula malangka inma nyanga mañkurpa ngaranytja-arangka warmala tjuta nyurampa pikaringkunytjikitja pitjanytja wiya ngaraku nyurampa ngurakutu munuya nyurampa manta puñu mantjilku.

²⁵ "Palu nyura ngayunya kuka pungkula unguⁿytjikitja mukuringkula mai nyuma yiitjatjara kukangka tjungura unguⁿiyangku wantima, mai pilytja kutjuniya kukangka tjungura ungama. Munuya inma panya Katuwanu Ankunytjanya kulintjikitjangku kuka lamalama pungkula ngalkuntjatjanungku tjara mungawinkiku tjunkunytja wiyangku wantira uwankara ngalkula wiyanma.

²⁶ "Ka panya nyura kuli kutjupa kuli kutjupa mai wiita nyurampa kururingkunyangka uralpai. Munu nyura uti mai ngañmanytu urantja katima Mayatja Godaku walikutu, munu palulanguru maña urantja tjuta kutjuna nyurampa ngurakutu katima.

"Munuya tjiipi kulunypa munta tjinguru nanikuta kuñunypa ngunyjtjunguru ipi uru mantjira kuka panya kuñunypa palunya ipi urungka kutjantjikitjangku kulilwiyangku wantima alatjiitu."

²⁷ Munu palulanguru Mayatja Godalu Mosela wangkangu, "Tjukurpa nyanganpa walkatjura nyura watarkurintjaku-tawara rawangku kulintjikitjangku, panya ngayulu nyuranya kalkunu atunymara kanyintjikitjangku munu panya nyurala tjukurpa wiru tjuta wangkangu nyura kulirra palyantjaku, ka panya nyura ngapartji kalkunu ngayulu wangkanytja uwankara wangañarangku kulintjikitjangku." Alatji Godalu wangkangi.

²⁸ Ka Mosenya puli katu Mayatja Godala tjungu nyinangi tjintu 40 munga 40 mai ngalkuwiya, mina kuñu tjikilwiya. Munu tjiwa panya kutjarangka walkatjunu Godalu wangkara wituntjitja tjuta tjukurpa panya pulka 10.

Mosenya Ukalingkunytja Pul Tjaniyalanguru

²⁹ Ka Mosenya ngula ukalingu puli panya Tjaniyalanguru munu katingi tjiwa kutjara panya Godaku tjukurpatjara, ka palumpa yunpa irnyaningu, panya Mayatja Godanya palula tjungu nyinara pula rawa wangkangi, ka pala palulanguru palumpa yunpa pulkara irnyaningu. Palu palurunku

* 34:23 Exodus 23:14-17

yunpa walytjangku irnyannyangka nyakunytja wiya. ³⁰ Ka Aarontu munu aŋangu panya Israelkunu tjutangku kutju Mosenya yunpa irnyannyangka nyangu, munuya ngulu-nguluringkula palulakutu ilaringkunytja wiya patu ngarangi. ³¹ Ka tjananya Moselu altingu, ka Aaronnga munu wati Israelkunu pulka tjuta palulakutu pitjangu. Ka paluru tjanala wangkangi. ³² Ka palula malangka aŋangu Israelkunu tjuta ngalya-tjunguringkula ngarangu Mosela tjukurpa kulintjikitja. Ka tjanala tjakultjunangi panya Mayatja Godalu palunya puli katu wangkanytja uwankara tjana kulira wanganarangku Godala kulintjaku. ³³ Munu palulanguru Moselu tjanala wangkara wiyaringkula paluru yunpa palurunku raikingka tjutunu. ³⁴ Munu paluru tiinta panya Godala Tjunguringkula Kulipaingka tjarpura kutju raiki panya palunya araltjankupai Godala wangkanytjikitjangku. Munu tiintanguru ngalya-pakara Israelkunu tjutangka Mayatja Godalu wangkanytjitja uwankara tjanala tjakultjunkupai, ³⁵ Kaya yunpa palunya nyakupai irnyannyangka alatji, ka palulanguru Moselu malakungku raiki panya tanpara kanyilpai piruku Godala ngula wangkanytjikitjangku tiintangka panya unngu tjarpura.

35

Godalu Tjirirpi 7 Milmilmankunytja

¹ Ka Moselu tjananya Israelkunu uwankara al̄tira utulura wangkangu, "Mayatja Godalu nganañanya wangkangu nyanga alatji palyantjaku. ² Nyurampa tjirirpi 6 war̄karinytjaku ngaranyi, palu tjirirpi 6 ngarala wiyaringkunyangka malangka tjirirpi panya 7 nyurampa milmilpa ngaranyi pakuwiyaringkula Mayatja Godanya kulintjaku. Ka tjinguru aŋangu kutjupa tjirirpi nyara palula tungunpungkula war̄karinyangkaya palunya iluntanama. ³ Munuya nyurampa ngurangka waru tililwiyangku wantima tjirirpi panya pakuwiyaringkupaingka." Alatji Moselu tjanala wangkangu Godalu wangkanytjitja.

Tiinta Milmilku Ungkunytja

⁴ Munu piruku tjanala wangkangu, "Mayatja Godalu nganañanya wangkangu nyanga alatji palyantjaku. ⁵ Nyura kanyintja uwankaranguruya tjarara katima Mayatja Godanya ungkunytjikitjangku. Nyura mukuringkula munytjangku ungama nyanga palunya tjananya kanyintjatjanungku apu panya gold munu tjiilpa, munu ayana maru ini purantji. ⁶ Munuya mantara wiru ukiri ini flax-nguru palyantja, munu inyu kuka tjiipinguru walka panya puyul-puyulpa, purple, tjitintjinpa kuļu ungama, nanikuta inyu kuļu. ⁷ Munuya tjiipi nyitayira miri kuļu ungama tjitin-tjinpa palyantjatjanungku, munu miri panya rapa purunypa antipina pulkanguru katira ungama, munu punu palya ilykuwaranguru kuļu ungama. ⁸ Munuya uwila mai ini alipanguru katira ungama panya lampangka tjutintjaku tiliku, munu panya kurpira milmilmankunytjaku kuļu uwila palunya katima. Munuya uwila palula tjunguntjaku kutjupa kutjupa paṇti wiru katira ungama, munuya paṇti panya wirutjara piruku katima panya kampara wiru paṇtinytjaku. ⁹ Munu apu wiruly-wirulypa wiru kutjupa kutjupa tjuta walka wirutjara kuļu katira ungama wati tjukurtjara pulkangku pilpirta tanpara kanyintjaku. Uwa, nyanga palunya tjananya nyura kanyintjatjanungku katira ungama Tiinta Milmilku, munu tjukurtjaraku mantaraku kulu." Alatji Moselu tjanala wangkangu Israelkunu tjutangka.

Moselu Tiinta Milmilku Palyantjaku Wangkanytja

¹⁰⁻¹¹ Munu piruku tjanala wangkangi Moselu, “Utiya wati wiru palyalpai nintipuka tjutangku pitjala kutjupa kutjupa uwankara palyanma panya Godalu wangkanytjitjangka. Nyanga alatjiya palyala tiinta pulka ngura milmilpa Godala tjunguringkula kulintjaku. Nganmanytjuya punu tjuta kaṭala para-murutjura wanantjaku munu palulanguru puṇu kutjupa tjuta kuļu palyala kaṭakutjara para-ngaritjura waṇantjaku katu kuļu, munuya ayana kutjupa kutjupa tjuta kuļu palyala puṇu tjuta witira kanyintjaku. Munuya palulanguru tiinta pulka tjiipi miringuru palyala katu ngampałtjunkunytjaku, munu palulanguru tiinta kutjupa antipina miri panya rapanguru palyala palula katuku waṇinytjaku. ¹² Munuya Pakutja Kalkuntjtja puṇunguru palyala munuya gold-nguru liitangka katutja angelpa nyalpitjara kampa kutjara nyinanytja palyala. Munuya puṇu wara kutjara kampa kutjara tjura witira katinytjaku, munuya mantara wara palyala pakutja palula kuranyu waraly-waralyngarala angatjura kanyintjaku. ¹³ Munuya taipula kuļu palyala, munu puṇu wara kutjara kampa kutjara tjura witira katinytjaku, munuya kutjupa kutjupa tjuta kuļu palyala taipulangka tjunkunytjaku, munuya mai nyuma panya Godanya ungkunytjtja kuļu palyala taipulangka tjunkunytjaku. ¹⁴ Munuya tili tjuta witira kanyilpai palyala munu piti tjukutjuku tjuta palyala puṇu palula katu uwila tjutinnyangka tili palula tjanalanguru kampa irnyantjaku. Nyanga paluru lampa tili tjutatjara. ¹⁵ Munu taipula kutjupa tjukutjuku nguwanpa palyala pala palula katu nyalpi paṇti wirutjara tjuta kampanytjaku, munuya puṇu wara kutjara taipulangka kampa kutjara tjura witira katinytjaku, munuya nyalpi kutjupa kutjupa tjutanguru palyala paṇti wirutjara taipula palula katu kampanyangka wiru pantintjaku. Munuya uwila wiru kuļu palyala mai ini alipanguru anangungka katangka tjutira milmilmankunytjaku. Munuya mantara wara palyala tiinta tjaangka waraly-waralyngaranytjaku. ¹⁶ Munuya pitjilpa pulka taipula purunypa palyala palula katu kuka tiliwakara Godanya ungkunytjaku. Munuya puṇu wara kutjara kampa kutjara tanpara tjura wati tjutangku pitjilpa palunya katura katinytjaku, munu warika purunypa puṇu tjuta ayananguru palyara ngaritjura pitjilpa katu palula tjanala kuka tiliwakantjikitjangku. Munuya ayananguru piti pulka maṇatjara palyala wati tjukurtjara tjutangku mina tjutira paltjintjaku. ¹⁷ Munuya piintji pulka palyala tiinta pulkangka paraṅgarala arintankunytjaku. Munuya mantara wara ukiri flax-nguru palyala piintjingka waraly-waralyngarala waṇantjaku. Munuya mantara wara kutjupa palyala piintji tjaangka waraly-waralyngaranytjaku. ¹⁸ Munuya tiinta pulka witu kunpu ngaranytjaku piiki muṭumutu tjuta palyala mantangka murutjunkunytjaku munuya ruupa kunpu tjuta kuļu palyala tiinta witira kanyintjaku. Munuya palu purunypaṭu piiki munu ruupa kutjupa tjuta kuļu piintjiku palyala. ¹⁹ Munuya mantara wiru mulapa palyala wati tjukurtjara tjutaku mantara pala palula tjarpara Milmilta warkarinytjaku. Mantara nyanga paluru tjana panya Aaronku munu palumpa katja tjutaku kuļu.” Nyanga alatji Moselu warka nintipuka tjutangka wangkangu kutjupa kutjupa uwankara palyantjaku panya Godalu uwankara wangkanytjtja.

Israelkunu Tjutangku Kutjupa Kutjupa Tjuta Kanyintjatjanungku Katira Ungkunytja

20 Kaya tjukurpa nyanga palunya kulintjatjanu Israelkunu uwankarangku Mosenya wantikatira ngurakutu anu. **21** Munuya paluru tjana mukuringkula kutjupa kutjupa tjuṭa katingi tjana kanyintjatjanungku Mayatja Godanya munytjangku ungkunytjikitjangku tiinta panya milmilpa palyantjaku. Tjana kutjupa kutjupa uwankara katingi tiinta panya palyantjaku, munu tiinta unngu nyinanytja tjuṭa kuļu palyantjaku, munu tjukurtjara tjuṭaku mantara kuļu palyantjaku. **22** Watingku minymangku uwankarangkuya mukuringkula katingi kutjupa kutjupa tjuṭa apu goldnguru palyantja liritja, pinatja, ringi manyirkitja, kutjupa kutjupa wiru tjuṭa tjana aŋangungka tanparā kanyilpai uwankara. Munuya marangku katira Mayatja Godala mirangka mara uritjingara walkura palunya ungangi. **23** Munuya mantara wiru ukiri ini flax-nguru palyantja kanyintjatjanungku katira ungangi, munuya inyu kuka tjiipinguru walka panya puyul-puyulpa, purple, tjin-tjinipa kuļu kanyintjatjanungku katira ungangi, nanikuta inyu kuļu. Munuya tjiipi nyitayira miri kuļu tjin-tjininta palyantja kanyintjatjanungku ungangi, miri panya rapa purunyapa antipina pulkanguru palyantja kuļu. **24** Munuya piřuku kanyintjatjanungku katingi tjiilpa munu ayana ini purantji munuya Mayatja Godanya ungangi. Munuya puňu wiru kuļu kanyintjatjanungku katira ungangi panya Tiinta Milmilku puňu tjuṭa palyantjaku, kutjupa kutjupa tjuṭa kuļu puňunguru palyantjaku. **25** Kaya minyma nintipuka tjuṭangku puturu pulka rungkara palyanu ukiri ini flax-nguru munu tjiipi inyunguru kuļu puturu pulka mulapa walka panya puyul-puyulpa, purple, munu tjin-tjinipa. **26** Munuya piřuku rungkara palyanu nanikuta inyunguru puturu pulka. **27** Kaya Israelkunu wati kuranyitja tjuṭangku apu wiruly-wirulypa wiru kutjupa kutjupa tjuṭa walka wirutjara katira ungangi, panya wati tjukurtjaraku pilpira tjakatjunkunytjaku. **28** Munuya uwila mai ini alipanguru palyantitja katira ungangi panya lampangka tjuṭintjaku tiliku, munu kurpiřa milmilmankunytjaku kuļu. Munuya uwila nyangangka tjunguntjaku kutjupa kutjupa pańti wirutjara kuļu katingi, munuya pańti panya wirutjara piřuku katira ungangi panya kampanyangka wiru pańtintjaku. **29** Uwa, Israelkunu wati minyma uwankarangkuya mukuringkula kutjupa kutjupa tjana kanyintjatjanungku katira ungangi uwankara panya Mayatja Godalu Mosela ungkunytjaku wangkangu. Kaya paluru tjana pulkara pukularira Godanya ungangi Tiinta Milmilpa palyantjaku munu tiinta unngu nyinanytja tjuṭa kuļu palyantjaku, munu tjukurtjara tjuṭaku mantara kuļu palyantjaku.

Wati Nintipuka Kutjara Ini Pitjalilnga Pula Awu-liyapanya

30 Ka Moselu tjanala Israelkunu tjuṭangka piřuku wangkangu, "Mayatja Godalu ngurkantanu wati ini Pitjalilnga, panya Uwariku katja, munu Uuku pakalì. Nyanga Pitjalilnga tjana Judah-languru kanyintja tjuṭa. **31** Ka Godalu palula Kurunpa Milmilnga tjarpatjunu, munu palunya nintinu kutjupa kutjupa wiru tjuṭa mulapa tjukarurungku palyantjaku. **32** Ka paluru mulapatu kutjupa kutjupa tjuṭanguru wiru mulapa palyara tjungulpai Godalu nintinnyangka, panya gold-nguru, tjiilpanguru munu purantjinguru kuļu. **33** Panya Godalu palunya nintinu apu walka wirutjara tjuṭa upala, rupi, apu kutjupa kutjupa tjuṭa kuļu katara karalykaralyapra wiru mulapa palyantjaku. Munu palunya nintinu puňunguru kuļu wirura palyantjaku munu kutjupa kutjupa tjuṭa kuļu wiru mulapa paluru witulyankunyangka palyantjaku. **34** Munu Mayatja Godalu wati panya Pitjalilnga pulanya Awu-liyapanya nintinu paluru pula aŋangu

kutjupa tjuṭa kuļu nintintjaku uwankara Godalu palunya nintintjtja. Wati panya Awu-liyapanya wati ini Atjimatjaku katja munu walytjapiti Dantanguru munu paluru kuļu ninti pulka kutjupa kutjupa wiru tjuṭa tjukarurungku palyalpaītu.³⁵ Ka Godalu Pitjalilngu pulanya Awu-liyapanya nintinu kutjupa kutjupa wiru tjuṭa ayinayiningku palyantjaku ayananguru, puṇunguru kuļu, munu mantara wiru mulapa palyantjaku walka tjutatjara. Munu pula aŋangu kutjupa tjuṭa kuļu paļu purunytjuṭu palyantjaku nintiningi, kaya paluru tjana nintiringkula kutjupa kutjupa wiru tjuṭa palyalpairingu.” Alatji Moselu tjanala wangkangi Israelkunu tjutangka.

36

¹ Munu Moselu wati panya Pitjalilta pulala Awu-liyapala wangkangu munu war̄karipai kutjupa tjutangka kuļu nyanga alatji, “Uwa, Mayatja Godalu nyuranya kutjupa kutjupa tjuṭa nintinu Tiinta Milmilpa wiru mulapa palyantjaku. Ka nyura kuwari Godalu wangkanytjtja uwankara tjukarurungku palyantjaku ngaranyi.”

Israelkunu Tjutangku Tjuta Mulapa Katira Ungkunytja

² Munu Moselu Pitjalilngu pulanya Awu-liyapanya altingu wati panya nintipukangku palyalpai kutjupa tjuṭa kuļu tjana kuļu pitjala tiinta panya milmilpa palyantjaku. Kaya uwankara wanganara pitjala war̄karingi.³ Kaya Israelkunu tjutangku kutjupa kutjupa tjuṭa katingu Moselakutu Tiinta Milmilpa palyantjaku. Ka Pitjaliltu tjana Moselanguru mantjira palyaningi tiinta panya palunya. Ka Israelkunu tjutangku mungawinki kutjupa mungawinki kutjupa tjana kanyintjatjanungku katira Mosenya ungkupai.⁴⁻⁵ Ka Pitjaliltu tjana war̄karira nyangangi rawangku katinyangka, munuya Mosenya wangkangu, “Nyawa, aŋangu nyanga tjutangkuya tjuṭa mulapa katinyi, paļu nyangatja alatjitu nganana uwankara palyantjaku, panya Godalu palyantjaku wangkanytjtja.”

⁶ Ka Moselu wangka iyanu aŋangu uwankarakutu tjana kutjupa kutjupa tjuṭa piruku Tiinta Milmilku katira ungkuwiyangku wantintjtaku. Kaya kulira wantingu piruku katiwiyangku.⁷ Panya paluru tjana katira tjunkunytja tiinta panya palunya palyantjaku waintara ngaringi tjuṭa mulapa war̄ka panya palunya palyara wiyanjtaku.

Tjukurpa Muṭumuṭu Tjuta Chapter 36-nguru, 37-nguru, 38-nguru, 39-nguru kuļu

⁸⁻³⁸ Kuwari nyuntu chapter 36-ngka verse 8-nguru puṭu nyanganyi nyiri nyangangka panya nganana chapter 36, 37, 38 munu 39 kuļu Pitjantjatjara walkatjunkunytja wiyaṭu kuwaripa.

37

¹⁻²⁹ Paļu chapter nyanga palula tjanala tjukurpa nyaa ngaranyi, panya Pitjaliltu tjana wati nintipuka tjuṭangku Tiinta Milmilpa, tiinta unngu nyinanytja tjuṭa kuļu palyantja, munu mantara wiru tjukurtjara tjuṭaku kuļu palyantja. Paļu nganana tjukurpa nyanga palunya tjananya muṭumuṭura nyangangka tjunkunytja wiyanġku wantingu panya ara nyanganpa ara panya nganmanyitja tjuṭa purunypa panya nganana tjunu chapter 24-ngka malangka. Ara nyara paluru tjana panya Godalu Mosela wangkanytja kutjupa kutjupa uwankara palyantjaku, ka ara nyanga chapter 36-nguru 39-kutu panya Pitjaliltu tjana kutjupa kutjupa uwankara palyantja Godalu

Mosela wangkanytjitja. Palulangurula ara nyanganpa piruku tjunkunytja wiyangku wantingu, panya ara palu purunypa tjuta nganmanypa ngaranyangka nyara chapter 24-ngka malangka. Palu nyangangka ara kutjupa kutjara nganmanypa ngaranytja wiya, kala nyanga palula utira tjunanyi.

38

1-31 *Ka chapter 38-ngka verse 1-nguru 31-kutu tjukurpa nyangatja ngaranyi, panya ayana kutjupa kutjupa tjutanguruya palyaningi Tiinta Milmilpa munu tiinta unngu nyinanytja tjuta kulu. Wati Pitjaliltu tjana ayana nyanga palula tjanalanguru palyaningi gold-nguru, tjiilpanguru, munu purantjinguru. Panya Israelkunu tjutangku katira ungu Mosenya ayana nyanga palunya tjananya pulka mulapa Tiinta Milmilpa palyantjaku.*

39

1-31 *Ka chapter 39-ta verse 1-nguru 31-kutu tjukurpa nyangatja ngaranyi, panya wati nintipuka tjutangku mantara tjuta palyantja wati tjukurtjara tjutaku. Ka nyura uti nyangama chapter 28 munu verse 1-nguru 43-kutu, panya tjukurpa nyanga paluru nyara palula kulu ngaranyi.*

32-43 *Ka chapter 39-ta verse 32-nguru 43-kutu tjukurpa nyangatja ngaranyi, panya wati nintipuka tjutangku kutjupa kutjupa wiru tjuta palyanu Tiinta Milmilku Godalu wangkanytjitjangka. Munuya palyara wiyara tjana uwankara ngalya-katingu Moselakutu, ka paluru nyangangi uwankara palya mulapa ngaranytjaku. Munu paluru nyangu uwankara tjukarurungku palyantja panya Godalu palula wangkanytjitja alatjitu tjana palyanu. Munu palulanguru Moselu Pitjalilnga tjananya palula warkaripai uwankara pukulmanu, tjukarurungku palyannyangka.*

Ka nyanga palulanguru nyuntu tjukurpa malatja nyakula kulilku chapter 40, panya Moselu tjana Tiinta Milmilpa palyara ngaratjunkunytja.

40

Godaku Tiinta Ngaratjura Milmilmankunytja

1 *Ka Mayatja Godalu alatji Mosela wangkangu, **2** “Pira ini Apipala tjirirpi nganmanyitjangka tiinta panya milmilpa ngayuku palyara ngaratjura.* **3** *Munu tjiwa panya kutjara tjukurpa panya pulkatjara Pakutja Kalkuntjtijangka unngu tjarpatjura munu pakutja panya kalkuntja tiintangka unngu tjura munu mantara palula kuranyu waraly-waralytjura kumpilpa ngaranytjaku.* **4** *Munu taipula katira tjura munu kutjupa kutjupa tjuta kulu katira tjura taipulangka katu. Munu lampa panya tili tjuta witira kanyilpai katira tjura munu piti uwilatjara palula katu tjura tili kampanytjaku.* **5** *Munu taipula panya tjukutjuku pantji wiru tililpai katira tjura pakutja kalkuntjtijangka kuranyu. Munu mantara waṛa kuranyu waraly-waralytjura tiinta tjaangka.* **6** *Munu tjura tiintangka kuranyu pitjilpa panya pulka, panya kuka tiliwakara Godanya ungkula walkuntjaku.* **7** *Munu piti pulka panya paltjilpai tjura pitjilpangka mun̄kara tiintangka tjangati munu kapi paltjintjaku tjutila.* **8** *Munu tiinta milmilta para-murutjura wañala punu tjuta piintji palyantjikitjangku munu palula malangka mantara para-tjunkula arintara wañala patintjikitjangku. Munu piintji tjaangka mantara waṛa kutjupa waraly-waralytjura.*

9 *“Munu palulanguru uwankara palyara tjunkunytjatjanungku uwila wiru panya milmilmankupaingka pitinguru tjutira para-kurpira wañala*

Tiinta Milmilpa, munu kutjupa kutjupa tiinta unngu nyinanytja tjuṭa kulu kurpila nyanga tjananya uwankara milmilmankunytjikitjangku. ¹⁰ Munu palulanguru pitjilpa panya kuka tiliwakalpai uwila panya palula kurpila palunya kulu milmilmankunytjikitjangku munu ayana panya warika purunyapa tjuṭa kuļu kurpila palunya tjananya kuļu milmilmankunytjikitjangku. ¹¹ Munu palu purunyjtutu piti panya paltjilpai kurpira milmilmanama, piti maṇa kuļu.

¹² “Munu Aaronnga palumpa katja tjuṭa kuļu ngalya-kati tiinta pala milmilpaku mu nu tjananya minangka paltjila. ¹³ Munu Aaronnga mantara panya wiru mulata tjarpatjura mu nu uwila panya milmiltä palunya kurpira milmilmara paluru tjukurtjararingkula ngayuku warka palyantjaku. ¹⁴ Munu palumpa katja tjuṭa kuļu katira mantara panya wiru tjutangka tjarpatjura. ¹⁵ Munu palu purunypatu tjananya uwilangka kurpira milmilmara tjana kuļu tjukurtjararingkula ngayuku warka palyantjaku. Uwilangka kurpira milmilmankunytja nyanga paluru nintini tjana tjukurtjara tjuṭa tiutjara ngaranytjaku nyanga palula tjanala malangka kuļu kutjupa ngapartji piruku ngaranytjaku munu piruku malatja malatja.” Nyanga alatji Godalu Mosela wangkangu tjana palyantjaku. ¹⁶ Ka Moselu uwankara palyanu Mayatja Godalu wangkanytjitja.

¹⁷ Kaya Israelkunu tjuṭa ngura Itjipalanguru ankula ngururpa yiya kutju wiyaringu. Kaya pala palula arangka pira ngammanyitjangka Moselu tjana tiinta panya milmilpa palyara ngaratjunu tiinta panya Godanya Tjunguringkupai. ¹⁸ Tjana puṇu tjuṭa-warara murutjunkula puṇu waṛa tjuṭa kaṭakutjara kaṭakutjara para-ngaritjura waṇanu katu kuļu. ¹⁹ Munuya palulanguru tiinta tjiipi miringuru palyantja katu ngampaltjunu munu palulanguru tiinta kutjupa antipina miringuru palyantja palula katu ngampaltjunu panya Godalu wangkanytjitjangka.

²⁰ Ka Moselu puli panya tjiwa kutjara tjukurpa pulkatjara mantjira Pakutja panya Kalkuntjitjangka unngu tjarpatjunu. Munu palulanguru puṇu waṛa kutjara kampa kutjara tjunu witira katinytjaku, munu pakutja palula katu liita panya nyalpitjara kutjara katu ngaparku nyinanytja kutjratjara angatjunu. ²¹ Munu palulanguru Pakutja panya Kalkuntja Tiinta Milmiltä unngu tjarpatjunu kampa wilurara munu mantara wara panya waraly-waralytjunu kuranyu, panya alatji Godalu wangkangu pakutja palunya kumpira kanyintjaku.

²² Munu palulanguru taipula panya mai tjunkupai katira tiinta unngu tjarpatjunu kampa alinytjara mantara panya waraly-waralyngaranytjala kakaraṛa. ²³ Munu mai nyuma katu tjunu mai panya Godanya ungkunytjitja, panya alatji Godalu palunya tjunkunytjaku wangkangu. ²⁴ Munu lampa panya tili tjuṭatjara tiinta unngu tjarpatjunu taipulangka ulparira.

²⁵ Munu nyara palula Mayatja Godala mirangka Moselu tili panya tjuṭa tilira wantingu Godalu wangkanytjitjangka. ²⁶ Munu palulanguru taipula tjukutjuku wiru pantipaitjara katira tiinta unngu tjunu mantara panya waraly-waralyngaranytjala kuranyu. ²⁷ Munu paluru nyalpi wiru pantipai tjuṭa tilira wantingu wiru pantintjaku, panya alatjingantjaku Godalu wangkangu. ²⁸ Munu palulanguru mantara wara tiinta tjaangka waraly-waralytjunu. ²⁹ Munu piruku pitjilpa panya kuka tiliwakalpai katira tjunu Tiinta Milmiltä kuranyu kampa kakaraṛa. Munu pitjilpa pala palula paluru kuka tjunkula tiliwakara mulurunu Godanya ungkula walkuntjikitjangku munu mai uṇinypa tjuṭa kuļu tjunkula tiliwakara Godanya ungu, panya Godalu wangkanytjitjangka. ³⁰ Munu piti panya

paltjilpai pułka katira tjunu pitjilpangka muñkara tiintangka tjangati, munu kapi kułu tjutinu paltjintjaku.

³¹⁻³² Kayanku Moselu, Aarontu munu palumpa katja tjułangku kułu manyirka, tjina kułu paltjinu piti panya palula Tiinta Milmiltä tjarpa-nytjikitjangku. Munuya palu purunypału titutjarangku paltjiningi Tiinta Milmiltä tjarpantjikitjangku munu pitjilpa kuka tiliwakalpaikutu pitjanytjikitjangku, panya Godalu Mosela wangkangu alatji palyantjaku. ³³ Munuya palulanguru Moselu tjana piintji panya urulta para-ngarala wañalpaina para-tjunkula arintara wañara wiyanu munu mantara wara kutjupa piintji tjaangka wañaly-waralytjunu. Ka uwankara tjana palyantja piintji unngu ngarangi. Munuya nyanga tjananya uwankara palyara tjunkula wiyanu Moselu tjana.

Ngangkali Wara Tiinta Milmiltä Ngaranytja Godala Tjunguringkula Kulintjaku

³⁴ Ka palulanguru ngangkali panya warangku ukalingkula tjutunu tiinta panya milmilpa, ka Godaku pitalytjingku tiinta panya unngu pułkara irnyaningi. ³⁵ Ka nyanga palulanguru ngangkalingku tjutura ngaranyangka Mosenya Tiinta Milmiltä pułu tjarpangi pitalytingku pułkara irnyannyangka. ³⁶ Ka ngangkali panyatja tiinta panya milmilpanguru katuringkula ankunyangka kutjuya Israelkunu tjutangku ngura kutjupangka pakara ma-tjunangi. ³⁷ Palu ngangkali paluru Tiinta Milmiltä ngaranyangkaya ankuwiya ngura palulatu nyinapai. ³⁸ Ka Mayatja Godanya Israelkunu tjułangka titutjara nyinangi tjana para-ngaranyangka, panya Godaku ngangkali kalala mungangka kułu tiinta panya milmiltä ngarapai, palu mungangka waru tili ngangkalingka unngu ngarapai. Kaya Israelkunu tjułangku kalala mungangka kułu rawangku nyakula kulipai Mayatja Godanya tjanala nyinanyangka.

Tjukurpa Ruthanyatjara Ruth Nyangatja Nganmanytju Nyakula Wangkanytjaku

Nyangatja Godaku tjukurpa minyma ini Ruthanya-tjara, panya paluru Jew wiya ngura kutjupangka nyinangi ini Mawapala. Ka ailuru pulka manta Israelta ngaranyangka wati Jew kuritjara Mawapalakutu pitjangu. Wati panya palumpa kuri ini Nayuminya. Ka ngura nyara palula palumpa pulampa katjangku kungkawara Ruthanya altingu. Palu ngula wati panya Ruthaku mingkayi wiyaringu, ka palula małangka Ruthanya ngapartji kutjuringu. Ka minyma panya palumpa mingkayingku Nayumilu ngura walytjakutu ankunytjikitjangku wangkangi, ka Ruthanya kulu mukuringu palula tjungu ankunytjikitja ngura nyara Israeltakutu Jew tjutangka tjunguringkula Godanya walkuntjikitja.

Ka ngula ngura nyara palula wati panya palumpa kuriku walytjangku palunya altingu. Munu paluru pula katja kutju kanyinu. Wati nyara katja paluru panya Mayatja Davidaku tjamu. Ka ngula mulapalta Jesunya kulu palumpa walytja panya malatja mularnguru utiringu. Ka tjukurpa nyangangku utini panya Godaku walytja tjuta Jew tjuta munu Jew wiya tjuta kulu nyinanyi, panya Ruthanya Jew wiya nyinara Godaku walytjaringu.

Tjukurpa nyanganpa ngarinyi:

1:1-22 Tjituru-tjituru pulka Nayumila tjanala wirkankunytja

2:1-23 Ruthalu mai para-ngurintja

3:1—4:12 Wati kutjupangku Ruthanya altinytja

4:13-22 Nayuminya Ruthanya tjana pukulpa nyinanytja

Nayuminya Tjana Ngura Ini Mawapala Ankula Nyinanytja

¹ Iriti mulapa anangu tjuta manta Israelta nyinangi. Ka tjanampa mayatja pulka kuranyitja nyinanytja wiya ngarangi. Kaya walytjangku walytjangku kulira nyinangi. Ka nyara palula arangka ngura paluru mai pulkatjara ngaranytjatjanu ailuru pulkaringu, ka mai uwankara wiyaringu. Kaya anangu panya tjuta paltjatjiratja nyinangi.

² Ka wati ini Ilima-likanya nyinangi tawunu ini Bethlehemala panya manta ini Judah-la ngururpa. Wati nyanga paluru panya wati Ipuratjalanguru kanyintja. Munu paluru pula kuriara tjitji nyitayira kutjaratjara nyinangi. Ka minyma kuri ini Nayuminya. Ka tjitji katja kutjara ini Maalannga pula Tjiliyannga. Ka panya mai wiyaringkunyangka paluru tjana Bethlehemanya wantikatira anu ngura kakarara mulapa manta panya Judah-nya ma-wantikatira. Munuya ankula manta kutjupangka nyinangi mai pulkangka ngura ini Mawapala. ³ Munuya rawa nyinangi, ka wati panya paluru ngaltutjara ngulalta ilungu. Ka minyma panya wanakalarira nyinangi katja kutjaratjara. ⁴ Ka pula katja panya kutjarangku pulkaringkula kungkawaralta altingu Israelinga ngurara wiya ngura kutjupitja Mawapanya ngurara. Ka wati kutangku kungkawara ini Uupanya altingu ka malanypangku kungkawara ini Ruthanya altingu. Munuya kurirara kurirara rawa nguwanpa nyinangi ngura nyara Mawapala. ⁵ Munu pula palulanguru tjitji utilwiyatj

wiyaringu, ngaltutjara kutjara. Ka Nayuminya mingkayi kutjaratjara kutju nyinangi ngura panya palula.

Nayuminya Pula Ruthanya Bethlehemalakutu Małaku Ankunytja

6-13 Munu ngula paluru kulinu kutjupangku pitjala wangkanyangka ngura panya Bethlehemala kunyu mai pulka pakanu Godalu mina iyannya yangka. Ka Nayumilu kulinu, “Munta-uwa. Kuwariñatju małaku ankuku ngurakutu panya.” Munu mingkayi kutjaratjara pirtji-pirtjingu ankunytjikitja. Munuya ma-pakanu.

Munu tjukutjuku ankula Nayumilu palumpa mingkayi kutjarangka wangkangu, “Awa! Nyupali-puṭa ngurakutu małaku ara mamangka ngunytyungka nyinanytjikitja, kaña ngayulu kutju palya ara. Mununa nyupalimpa Godala tjapinma nyupalinya wirūra kanyintjaku. Panya ngayunya nyupali wirūra kanyiningi ngayuku kuri katja kutjara kułu. Kaña kuwari tjapini Godala palu puruntyjuṭu nyupalinya wirūra kanyintjaku. Mununa nyupalimpa tjapilku wati kuri kutjupaku altira tjitji utira kanyintjaku.” Munu pulanya Nayumilu mingkayi kutjara ampura mitamita kutjara nyunytjura wangkara iyanu pula małaku ankunytjaku.

Ka pula pułkara ampura ulangi palula tjingu ankunytjikitja, munu pula wangkangu, “Wiya, nyaakulinyan małakungku wituṇi? Ngali mukuringanyi nyuntula tjingu ankula nyuntumpa walytja tjuṭangka nyinanytjikitja.”

Ka Nayumilu pulala wangkangu, “Nyaaku nyupali ngayula ankunytjikitja mukuringanyi? Ngayulu minyma pamparingu mununa piṛuku iti putu kanyini. Ngayunya tjinguru watingku altira tjitji utilku, ka tjitji kutjara kuwaripa pułkaringkula ngula mulapa watiringkuku panya nyupali kuwaripangku rawangku nyinara paṭannyangka. Palu palya nyupali małaku ara wati kutjupangku Mawapanya nguraṛangku altintjaku. Mama Godalu ngayuku kuri nyupalimpa kuri kutjara kułu mantjinu, ka ngayulu nyupalimpa pułkara ngalturinganyi kuri wiyaringkunyangka.”

14-15 Ka pula piṛuku ulangi Nayumiku. Ka kungkawara kutju ini Uupalu palumpa mingkayi mitamita kutjara nyunytjura małaku anu ngura panya walytjakutu. Ka kungkawara kutjupa ini Ruthanya palumpa mingkayiku pułkara mukuringangi palula tjingu ankunytjikitja munu palunya witira ngarangi. Ka Nayumilu wangkangu, “Awa Rutha! Nyuntumpa kangkuru małaku anu walytja tjuṭakutu ngurangka nyinanytjikitja munu god kutjupa palumpa nyurampa nyinara kulintjikitja. Ka nyuntu kułu-puta małaku ara tjingu, palya?”

16-17 Ka Ruthalu wangkangu palula, “Wiya, nyaaku nyuntu ngayunya małaku ankunytjaku wituṇi? Ngayulu mukuringanyi nyuntu ngali tjingu ankunytjikitja. Tjinguru nyuntu ngura kutjupa tjuṭakutu ankunyangka ngayulu nyuntula tjungutu para-ngarama. Ngayulu pukularinyi nyuntumpa walytja tjuṭangka tjingu nyinanytjikitja mununa ngayuku walytja tjuṭakutu małaku ankunytja wiyangku wantinyi. Mununa ngayulu mukuringanyi nyuntu purunytju Mayatja Godanya mulapa kulintjikitja. Ka nyuntu ngula nyinara pamparingkula ilunyangka ngayulu wantira małaku ankunytja wiya ngura nyara palulaṭu nyinara wiyaringanyi nyuntu wiyaringkunytjikitjangkaṭu. Nayumi, ngayulu mulamulangku wangkara kalkuni nyuntula tjingu ankunytjikitjangku. Mulapana nyuntula tjingu nyinaku nyuntu ilunytjakutu alatjitu.”

¹⁸ Ka Nayumilu kulinu, “Munta-uwa, Ruthanya mulapa ngayula ankunytjikitja pul̄kara alatjitu mukuringanyi.” Munu paluru wangka pilunarira pula tjungu anu ngura panya Bethlehemalakutu.

¹⁹ Munu pula pitjala pitjala wirkanu ngura nyara palula. Kaya anangu nguratja tjutangku minyma panya Nayuminya pula pitjanyangka nyakula pul̄kara mulapa pukularingu uwankara. Munuya minyma tjutangku wangkangu, “Munta, minyma panya Nayuminyampal palatja, minyma panya pukultjumpa.”

²⁰⁻²¹ Ka Nayumilu pitjala tjanala wangkangu, “Wiya, ngayunya niya Nayuminya panya ini pukultju wangkawiyangku wantima. Panya ngura nyanganguruna kuri munu katja kutjaratjara ankula ma-kawalinu munu nyangaña kutjuringkulalta malaku wirkanu nyuralakutu. Mulapani nyangatja Godalu tjituru-tjituru mularmanu. Kura yaaltji-yaaltjinguru tjananya mantjinu? Palu nyura ngayunya ini wangkawiyangku wantima mununiya ngayunya ini tjituru-tjiturunya tjura, ini panya Maaranaya.”

²² Nyanga alatji panya Nayuminya ngura Mawapalanguru pitjala wirkankunytja mingkayi nyara palunya ngurara kutjutjara. Minyma nyanga paluru pula kulingka pitjala wirkanu ngura pala Bethlehemala ukiri mai uninypatjara kunartjirira ngarala wañannyangka paama tjutangka.

2

Ruthanya Wati Ini Pawatjaku Paamangka Mai Urantja

¹ Ka ngura pala palula Nayumiku walytja wati ini Pawatjanya nyinangi. Paluru panya Nayumiku kuriku walytja mulapa. Munu paluru paama pulka kanyiningi munu ulytja, mani pulkatjara kuļu nyinangi. Kaya anangu tjutangku palula kulilpai paluru wangkanyangka, panya paluru palyanyku kulilpai.

² Ka Nayuminya pula panya ngura pala Bethlehemala tjarpala nyinangi. Ka kungkawara Ruthalu wangkangu palumpa mingkayingka, “Mingkayi, wati minyma tjutangku paama tjutangka ukiri panya mai uninypatjara kaṭara karpiṭa ngaratjunkula wañani. Kanä palya ankuku mai ngalimpa urantjikitja paamakutu? Panya mai tjukun-tjukunpa malarinkula ngari-pai tjana puṭu mantjintja. Kawi-puṭa watingku wangka mai malarinkula ngarintja urantjaku palumpa paamanguru.”

Ka Nayumilu wangkangu, “Uwa palya, ma-pitjala war̄kari mai ngalimpa urantjikitja.”

³ Ka paluru anu paama tjutakutu. Munu ankula tjarpangu wati panya Pawatjaku paamangka. Palu paluru kulintja wiya wati panya paama nyanga palumpa walytja. Munu paluru wati minyma war̄karipai tjutangka malangka mai muṭun-muṭunpa uranangi tjana wantikatinyangka. ⁴ Munu paluru rawa war̄karingi.

Ka ngula wati panya paama palumpa walytja Pawatjanya wirkanu tawunu panya Bethlehemalanguru munu palumpa war̄karipai tjuta nyakula tjananya wangkangu, “Mayatja Godanya nyurala ilaringkula ngaranyi.”

Ka paluru tjana ngapartji palula wangkangu, “Uwa, ka Mayatja Godalu nyuntunya pukulmanama.”

⁵ Ka palulanguru Pawatjalu wangkangu wati war̄ka tjutaku mayatjangka, “Awa! Kungkawara nyaratjampa ngananya nyinanyi?”

⁶ Ka watingku panya ngapartji wangkangu, "Wiya, kungkawara nyara paluru malikitja Mawapanya ngurara. Pala paluru kuwari pitjangu Nayumila mingkayingka. ⁷ Palu paluru ni mungawinki tjapinu waṛkarinytjikitjangku Nayumilu pulanku mai urantjikitjangku. Paluru mungawinki mulapa pitjala waṛkaringi munu waṛkarira waṛkarira kuwari nyanga wiltjangka nyinakatingu pakuwiyaringkunytjikitja."

⁸⁻⁹ Ka wati Pawatjanya Ruthalakutu ma-pitjangu munu ngaltunytjungku wangkangu, "Awa! Nyuntu-puṭa ngayuku paamanguru kutju mai mantjinma, munu paama kutjupanguru ankula mantjilwiyangku wantima. Munu nyuntu minyma ngayuku waṛkaripai tjutangka itingka waṛkarima, kutju mała waṛkarinytja wiya. Munun wati minyma tjutangka mai kaṭara karpinnnyangka wanara ilangku nyangama minyma tjutangka itingka mai malaringkula ngarintjtja urantjikitjangku. Ngayulu wati waṛkaripai tjutangka wangkangu nyuntunya pampulwiyangku wantintjaku. Ka nyuntu waṛkarira waṛkarira iluringkula-puṭa mina nyaratja tjikinma panya ngayuku wati waṛkaripai tjutangku nyara tjutira pitingka tjunkunytjtja."

¹⁰ Ka Ruthalu kulinu panya Pawatjanya paamaku mayatja munu paluru ngurkantara tultjungarakatira ngalyangku manta pampura palunya wal̄kuṇu. Munu wangkangu, "Ngayulu maliki ngura nyangatja ngurara wiya, palu nyuntu ngayunya wirūra wangkanyi."

¹¹⁻¹² Ka watingku panya ngapartji wangkangu, "Wiya Rutha, kulinuna nyuntu kunyu mingkayi wirūra atunyamanangi nyuntumpa kuri ilunyangka munu wantir'iyalwiyangku wirūra kanyintjikitjangku waṇanu. Panya nyuntu kunyu ngunyitju mama waltyta tjuta wantikatira pitjangu ngura nyanga ngurpatjakutu maliki tjutangka tjungu nyinanytjikitja. Nyuntu kungkawara wiru mulapa. Ka Israelku Mayatja Godalu nyuntunya ngapartji wirūra kanyilku, panya nyuntu ngura nyangaku God kulintjanu pitjangu paluru nyuntunya atunymara kanyintjaku."

¹³ Ka Ruthalu kuliṛa palula ngapartji wangkangu, "Mayatja, wirungkunitjun wangkara ipilyamananyi. Ngayulu malikitja, palu nyuntu ngayunya wirūra wangkangu nyuntumpa waṛkaripai tjuta purunypa. Kana kuwari raparinganyilta nyuntu ngayula alatjingara wangkanyangka."

¹⁴ Munu paluru tjana waṛkarira waṛkarira kaṭalarinyangka ankula wiltjangka nyinakatira mai ngalkuningi. Ka wati panya Pawatjalu Ruthanya altira wangkangu, "Nyangatja mai nyuma nyuntumpa. Ka nyanga kiripitji wangarangka tjalatjura ngalkunma."

Ka paluru minyma wati waṛka tjutangka tjungungku nyinara ngalkuningi. Ka Pawatjalu piruku mai uninypa pauntjatjanungku Ruthanya ungu ngalkuntjaku. Ka Ruthalu mai ngalkula paltjaringkula tjara ngurakutu katintjikitjangku tjunu. ¹⁵⁻¹⁶ Munu paluru pakara mapitjangu mai piruku urantjikitja.

Ka Pawatjalu wangkangu wati waṛkaripai tjutangka, "Awa! Kungkawara nyangatjaya wantima pailwiyangku mai nyura kaṭara kultu karpintjtjangka itingka mai mantangka ngarintjyangka mantjintjaku. Munu kutjupa-ara mai panya nyura karpintjtjanguru mankurpa ilara mantangka waṇima kungkawara pala paluru mantjintjaku."

¹⁷⁻¹⁸ Ka Ruthalu urara urara mungartjiringu. Munu palulanguru mai palurunku alkara alkara mai uninypa pulka yakutjangka urara tjarpatjura ngurakutu katingu. Munu paluru ngurangka wirkara mai panya paluru

urantjitja mingkayingka nintinu, munu palunya ungu mai panya kalala ngalkula tjunkunytjatjanungku.

¹⁹ Ka Nayumilu mai pulka nyakula wangkangu Ruthala, “Ngangari! Ngura yaaltjingkan mai nyanga pulka mantjinu? Nganaku paamangka? Ngayulu kuvari pulkara pukularinyi mununa mukuringanyi Godalu wati nyara palunya pukulmankunytjaku nyuntunya wirura alpamilan-nyangka.”

Ka Ruthalu wangkangu, “Ngayulu wati ini Pawatjaku paamangka mai nyanga palunya uraningi.”

²⁰ Ka Nayumilu wangkangu, “Munta-uwa! Mulapaña mukuringanyi Godalu palunya pukulmankunytjaku. Panya Mama Godalu anangu palurunku tjuta watarkuriwyangku rawangku nyakula kanyini mungangka kalala. Panya ngalimpa kuri ilungu, ka Godalu panya pula ilunytja kulira ngalinya atunymananyi wanaka kutjara. Awa kulila! Wati Pawatjanya nyuntumpa inkani ngayuku walytja mulapa. Munu paluru ngalinya atunymankunytjaku ngaranyi alatjitu.”

²¹ Ka Ruthalu ngapartji wangkangu, “Uwa, paluru ni wirura alpamilanu mununi wangkangu, ‘Nyuntu ngayuku paamangka kutju rawangku mai uranma ngayuku warkaripai tjutangka tjungungku. Munun mai uwankara urara tjunkunyangka kutju wiyingama.’ Alatjingaraní wirungku wangkangu.”

²² Ka Nayumilu wangkangu, “Munta wiru ngana! Palya nyuntu palumpa paamangka war karima minyma tjutawanu. Nyuntu tjinguru paama kutjupakutu ankulampa, kanta tjinguru watingku nyuntunya pampunma.”

²³ Ka paluru kuliningi mingkayingku wangkanyangka munu paluru rawa war karlingi minyma panya Pawatjaku war karipai tjutangka tjungu. Nganmanytju paluru tjana uraningi mai ini paali munu malanguru mai malatja wiita mantjiningi. Munu tjana mai uwankara walingka urara tjunkula kutju wiyingu pira kutjara wiyingkunyangka. Ka pula rawa mingkayira pukulpa nyinangi.

3

Nayumilu Ruthaku Kuri ngurkantankunytja

¹ Ka ngula Nayumilu kulira palumpa mingkayingka wangkangu, “Awa Rutha! Wangkaku na nyuntula? Ngayulu kulini wati kuri nyuntumpa nyakula ngurkantankunytjikitjangku nyupalinku altira pukulpa nyinanytjaku. ² Ka nyuntu ninti Pawatjaku panya palumpa paamangka nyuntu minyma tjutangka tjungu war karlingi. Wati panya paluru ngayuku walytja mulapa. Palu kulila! Paluru kuvari mungangka mai araranganyi. ³ Ka nyuntu kuvari minangka paltjira tiritja wirungka tjarpa mununku pantipai wirungka nyitila wiru pantintjaku. Munu nyuntu munga nyanga kuvari ma-pitja ngura nyara paluru tjanaya mai ararangkunytjalakutu. Munun wirka ra utiringkuwiwyangku kumpirra ngarala nyangama tjana ararangkunyangka. ⁴ Munu war kangka malangka mai ngalkula tjikira wiyingkunyangka Pawatjanya nyawa ngura yaaltjingka ngarikatin yangka. Munun paluru watarku kunkunarinyangka nyakula palulakutu panykara pulangkita atira wanti tjina utintjikitjangku munun tjinangka itingka ngarikati. Munu patara ngarima kanta paluru wankaringkula nyakula kulilku, ‘Munta nyangatja tjinguru tjapintjikitja pitjangu ngayulu palunya ngula altintjaku.’

Alatji paluru kulilku munu paluru tjinguru nyuntunya wangkaku ngula altintjikitjangku.”

⁵ Ka Ruthalu palumpa mingkayingku wangkanytja uwankara kulira palyanmanu. ⁶ Munu pakara anu ngura panya palulakutu panya Nayumilu wangkara iyantjalakutu. ⁷ Ka nyara palula wati panya Pawatjalu mai ararangangi, munu ararangkula wiyaringkula mai ngalkula tjikira kurunpa pukularingu. Munu ankula mai panya utulu pantja-pantjara wirura ngarikatingu munu kunkunaringu. Ka Ruthanya purkara mpanykaningi Pawatjalakutu munu pulangkita atira tjina palunya utira wantira malarku ngarikatingu. ⁸ Ka Pawatjanya kunkunpa pulka ngaringi munu munga kultungka urulyarara wankaringu munu kampa kutjuparira nyangu, “Ai! Kungkawara yaalitja nyangatja ngayula itingka ngarinyi?” ⁹ Munu wangkangu, “Awai! Ngananyan ngarinyi?”

Ka Ruthalu wangkangu, “Ngayulu panya Ruthanya. Ka nyuntu panya ngayuku mingkayiku walytja mulapa munun ngayunya atunymankunytjaku ngaranyi. Wanyu ngayunya pulangkitangka tjukutjuku tjutula, kaña palulanguru tjutunnyangka kulilku mulapa nyuntu ngayunya ngula altiku.”

¹⁰ Ka wati panya Pawatjalu wangkangu, “Kungkawara wiru, Mayatja Godaluwi nyuntumpa pukulpa palyanma, panya nyuntu walytja tjuta pulkara kulipai. Nyuntu panya wirura kanyini nyuntumpa mingkayi. Munu nyuntu piruku tjukarurungku kulini tjitjururungku altintjaku. Wati yangupala tjuta ngaranyi kutjupatjara mani pulkatjara, kutjupatjara mani wiya, palu nyuntu tjananya wantira tjukarurungku ngayunya ngurkantanu tjitjururu nyuntumpa mingkayiku walytja. ¹¹ Rutha, nyuntu rapa nyinama. Anangu uwankara nyuntumpa ninti panya nyuntu kungkawara wiru mulapa. Ka ngayuluna palya kulini nyuntu wangkanyangka. ¹²⁻¹⁴ Mulapa ngayulu tjitjururu nyuntumpa mingkayiku walytja ilatja. Palulanguru uti ngayulu nyuntunya mulapa atunymara kanyinma. Palu kulila wanyu! Wati kutjupa nyinanyi ngayuku kuta. Uti paluru nyuntunya altama wati nganmanyitjangku. Wanyu kana wati nyara palunya mungawinki ankula tjapila nyuntunya altira kanyintjaku. Ka tjinguru paluru nyuntunya altiwiyangku wantinyangkampa ngayulunanta altira atunymara kanyilku. Palu palyali kuvari piruku kunkunari munu nyuntu tjintukutu pakara ara nyuntumpa ngurakutu anangu nyanga tjutangku pakara nyakunytjaku-tawara.”

Ka Ruthanya piruku malarku ngaringu munu ngarira tjintukutu pakanu ngurakutu ankunytjikitja. ¹⁵ Ka Pawatjalu pakara wangkangu, “Munta Rutha, pala mantara katatjanku lipira tjura mantangka kañanku mai pulka tjura nyuntu ngurakutu katintjaku.” Ka mulapatu Ruthalu mantara katatja araltjara mantangka lipira kanyiningi mai paali tjunkunytjaku. Ka Pawatjalu mantara palula tjaalyngaratjura iyanu kungkawara panya palula. Ka paluru tjajira ngurakutu katingu.

¹⁶⁻¹⁷ Ka wirkankunyangka mingkayingku tjapinu, “Walangkuni tjakultjura! Nyaaringu?” Ka Ruthalu uwankara wangkangu Pawatjalu wangkanytja. Munu wangkangu, “Palu Pawatjalu alatji wangkangu wati kutjupa kunyu nyinanyi palumpa kuta. Ka kunyu paluru wati palunya tjapilku. Mununi paluru mai nyangatja unkul’iyanu nyuntula maralpa wirkankunytjaku-tawara.”

¹⁸ Ka Nayumilu palula wangkangu, “Ka nyuntu tjituru-tjituruwiyangku Pawatjaku pukultu nyinara patanma, panya palurunta kulini alatjitu

watarkuriwiyangku. Munu kuvari nyanga tjapini wati panya palumpa kuṭangka wati panya pułka tjutangka tjunguringkula.”

4

Pawatjalu Ruthanya Altinytja

¹ Ka tawunu nyara palula Bethlehemala piintji wara para-ngaṛala wañaningu apunguru palyantja kaita kutjutjara. Ka kaita palangka itingka wati mayatja-mayatja tjuṭa kutjupa-ṛa mitingi tjunguringkula wangkapai. Ka nyara palulakutu Pawatjanya ankula nyinakatingu. Munu paluru wati panya palumpa kuṭa palula itiwanu wati-pitjanyangka nyakula altingu, “Kuṭa! Wanyu ngalya-pitja!” Ka paluru pitjala nyinakatingu.

² Palulanguru Pawatjalu altingu wati mayatja-mayatja tjuṭa 10-pa pitjala pulala tjunguringkula nyinara kulintjaku pulanku wangkanyangka.

³ Munu tjunguringkunyangkalta paluru wangangi wati panya palumpa kuṭangkalta, “Ngañmanypa panya Nayuminya Mawapalakutu ankunytja kuwaripangka palumpa kuringku paama kanyiningi. Palu paluru mapakara ngura nyara palula ankula wiyaringu. Ka kuvari minyma panyatja wanakalarira malaku pitjangu. Munu paluru kulini paama panya palunya tjalamilantjikitjangku. ⁴ Kañanta kuvari tjakultjunanyi kulintjaku panya nyuntu ngayuku kuṭangku kutju payamilantjaku ngaranyi. Palu nyuntu mukuringkunytja wiyangku wantinyangka kutju ngayulu payamilantjaku ngaranyi. Ala! Nyuntu payamilantjikitja mukuringkulampa wangka nyanga tjanala miṛangka. Palu wantirampa wangka, kaña ngayulu payamilalku.”

Ka wati panya Pawatjaku kuṭangku wangkangu, “Wiya, palyaña ngayulu payamilalku.”

⁵ Ka Pawatjalu wati panya palula wangkangu, “Uwa palya. Palu nyuntu paama panyatja payamilarampa uti kungkawaṛa Mawapanya ngurara Ruthanya kulu altima, panya paluru wanakalaringu nyuntumpa waltyjangka. Munun palunya altira uti tjitji utinma palula, ngula tjitji panya paluru pulkaringkula paama panya palurunku kanyintjaku. Panya ṛa nyanga paluru nganampa tjaka ngaranyi alatjingalpai.”

⁶ Ka wati panya paluru Pawatjalu wangkanyangka kulira ngulu-nguluringu munu kulinu, “Munta, nguntiñatju paama payamilantjikitjangku wangkangu, palu nyangangkunitju mitingingka tjuṭa miṛangka kalkuningi kungkawaṛa Ruthaku paama payamilara altinytjaku.” Munu paluru kulintjatjanungku alatji wangkangu, “Wiya, ngayuluña paama panya palunya payamilantja wiyangku wantinyi. Palu nyuntu paama panya palunya payamilala munu Ruthanya alti, mununku palulanguru tjitji utila paama panya palumparinytjaku. Panya ngayuku tjitjiku paama wiya palatja palumpaṛa Ruthaku tjitjiku paama.”

⁷⁻⁸ Munu paluru tjinatja palumpa araltjaṛa Pawatjanya ungkula wangkangu, “Ngayuluñanta unganyi nyanga tjinatja ngayulu wantira.” Tjakangkuya ara tjanampa alatjingalpai wangkara palyanmankunytjatjnungku.

⁹⁻¹⁰ Ka Pawatjalu tjinatja mantjira wangkangu wati panya tjuṭangka, “Nyawaya! Ngayuluña mulapa kuvari paama payamilani Nayumila, paama panya palumpa kuriku Ilima-likaku munu katja palumpa kutjaraku Maalanku pulampa Tjiliyanku. Munu nyanganña kuvari Maalanku kuri Ruthanya wanakalarinytja altinyi. Munuli ngula tjitji ngalinku kanyini, ka paluru pulkaringkula kulikku, ‘Munta-uwa, nyangatja ngayuku tjamuku

kamiku paama, kaña ngayulu kuvari wirura alatjitu kanyilku.' " Munu Pawatjalu wangkangu tjanala, "Nyangatjaña mulamulangku wangkanyi nyurala mirangka."

¹¹⁻¹² Ka wati tjutangku Pawatjala wangkangu, "Uwa, palyala kulini nyuntu wangkanyangka. Kawi Mayatja Godalu tjitji tjuta Ruthanya ungama panya Jacobaku kuri kutjara purunypa, panya Raitjilnga pulanya Liyanya tjitji tjuta Godalu ungu. Kawi nyuntu wati mayatja-mayatja pulka nyinama mani pulka mulartjara ngura nyanga Bethlehemala. Kawi Godalu nyupalimpa tjitji tjuta palyanma tjana wirura nyinanytjaku nyuntumpa tjamu ngañmanyitja Piritjiku tjitji tjuta purunypa." Alatjiya Pawatjala wangkangu.

Ruthalu Iti Katja Kanyintja

¹³ Ka palulanguru Pawatjalu Ruthanya altira katingu palumpa ngurakutu kurirara pula nyinanytjikitjangku. Ka Mayatja Godalu Ruthanya pukulmanu, ka paluru ititjararingkula tjitji nyitayira kanyinu. ¹⁴ Ka iti wirkankunyangka minyma tjutangku nyakula pukularingu munu Nayumila kamingka wangkangu alatji, "Kuwarila Mayatja Godanya mirewañinyi panya palurunta pakali ungu nyuntunya pakalingku kanyintjaku pulkaringkula. Kawi aŋangu Israelkunu uwankarangku nyuntumpa pakali ngurkantara pulkanmanama. ¹⁵ Nyuntu panya ngañmanypa katjatjara pukulpa nyinangi, palu nyuntu kuvari nyuntumpa mingkayiku pulkara alatjitu pukularinyi panya paluru nyuntumpa mukulya wirunya nyinanyi munu panya kuvari nyuntumpa pakali kanyinu. Ka ngula pamparingkunyangka nyuntunya pakalingku wirura kanyilku pukulmara mulatu." Alatjiya minyma Bethlehemanya ngurara tjutangku Nayumila wangkangu.

¹⁶ Ka Nayumilu pakali palumpa ampuṇu munu palunya atunymara kanyiningi pukultu. ¹⁷ Kaya minyma tjutangku iti panya wirkankunyangka uwankarangka tjakultjunangi, "Awai! Wanyuya kulila! Kuvari iti ngaringu Nayumiku pakali." Munuya tjitji panya palunya ininu Uupitanya. Ka Uupitanya pulkaringkula ngula watiringu munu kuri altira tjitji utinu ini Jesse-nya, ka Jesse-nya pulkaringkula ngula watiringu munu kuri altira tjitji utinu ini Davidanya.

¹⁸ Ka Uupitaku walytja iritilpi nyinangi Jacobanya. Ka Jacobalu katja ini Judah-nya utinu. Ka Judah-lu katja ini Piritjinya utinu. Ka Piritjilu katja ini Itjurānnga utinu. ¹⁹ Ka Itjurāntu katja ini Ramanya utinu. Ka Ramalu utinu katja ini Amina-tapanya. ²⁰ Ka Amina-tapalu utinu katja ini Naatjannga. Ka Naatjantu utinu katja ini Tjalmannga. ²¹⁻²² Ka Tjalmantu katja panya Pawatjanya utinu wati panya Uupitaku mama. Alatjiuya walytja wanapari wanapari utiningi Jacobalanguru Uupitalakutu. Ka Uupitalu panya katja ini Jesse-nya utinu, ka Jesse-lu katja panya Davidanya utinu, ka paluru panya ngula Israelku mayatja pulka nyinangi.

Tjukurpa Nampa 1 Samueltu Walkatjunkunytja

1 Samuel

Nyangatja Ngañmanytju Nyakula Wangkanytja

Nyangatja Godaku tjukurtu tjakultjunanyi wangkatjara ini Samuelnga, munu wati panya Saulanya aŋangu panya Israelkunu tjutaku mayatja ngañmanyitja, munu mayatja panya Davidanya kuļu. Tjukurpa nyangangku nganananya nintini panya ngananya Godala kulintja wiyangku wantirampa kuraringkupai. Palu ngananya palula wanganarangku kuļira palya alatjitu pukulpa nyinapai. Panya Godanya kutju aŋangu uwankaraku mayatja nyinanyi. Ka panya wangkatjara tjutangku munu mayatja tjutangku kuļu palula kuļira aŋangu tjuṭa wirura tjukarurungku aṭunyamanangi. Palu tjana mayatja Saulalu purunytju walytjangku kuļira palyara putu aŋangu tjuṭa wirura aṭunyamanangi, ka kura tjuṭa tjanala utiringangi.

[Nyiri nyangangka chapter 1-nguru munu 15-kutu mutumutuntja ngaranyi, uwankara wiya. Palu chapter 16-nguru munu 31-kutu kuļu uwankara ngaranyi. Kaya kuwari (2019-ta) chapter 1-nguru munu 15-kutu kuļu tjukurpa winki palyaṇi.]

Tjukurpa nyanganpa ngarinyi

1:1—7:17 SAMUELNGA -Godaku wangkatjara

8:1—12:25 SAULANYA -Israelkunu tjutaya kingaku mukuringu tjanampa mayatja pulka nyinanytjaku, ka Godalu wati Saulanya tjanampa kinga tjunu

13:1—15:35 Mayatja Saulanya Godala tungunpungu

16:1—31:13 DAVIDANYA -Saulanya tungunpungkunyangka Godalu wati kutjupa ngurkantanu, Davidanya, Israelkunu tjutaku kinga nyinanytjaku

Godalu Minyma Aananya Tjiti Ungkunytja Ini Samuelnga

1-17 Kaya Israelkunu tjuṭa yiya tjuṭa mulapa nyinangi ngura panya kalkuntjtjangka ini Kainanta. Ka wati kutjupa nyinangi kuri kutjaratjara. Kuri ngañmanyitja ini Aananya munu paluru tjiti wiya nyinangi. Ka kuri malatja tjiti tjutatjara munu kutjupa-ara paluru Aananya kuralpai munu tjituru-tjituru pulka palyalpai paluru kutju tjiti tjutatjara nyinara.

Ka yiya kutjupa yiya kutjupa Aananya tjana ankupai ngura ini Tjayululakutu tiinta panya milmiltä tjunguringkula Godanya walkuntjikitja. Munuya nyara palula ara paluru tjana mai ngalkuningi urilta. Ka Aananya pakara anu tiinta panya milmilpakutu Godala tjapintjikitja. Palu paluru wati panya tjukurtjara nyakunytja wiya tuwangka itingka nyinanyangka. Munu minyma panya paluru watarku ngarala Godala tjapiningi tjaalytju. Ka winpinpi kutju uri-uringi, palu tjukurpa utiringkunytja wiya paluru wangkanyangka. Ka wati panya tjukurtjarangku iilailu nyakula kulinu, "Nyaaku nyangatja tarangka pitjangu. Paluru Godanya kurani alatji pitjala?" Munu palula wangkangu, "Nyaakun tarangka pitjangu? Utin tarangka wiya pitjama."

Ka minymangku wangkangu, "Wiya, ngayulu tarangka wiya. Ngayulu tjituru-tjitururira ulara ulara pitjangu Godala tjapintjikitja ngayunya al-pamilantjaku."

Ka wati tjukurtjarangku kulira wangkangu, "Palya, pukulpa ara, panya Godalunta tjapinnyangka kulinu mununta ungkuku."

18-28 *Ka minyma panya paluru pukularira ma-pakanu munu ngurangka wirkara pukulpa alatjiyu nyinangi piruku tjituru-tjitururintja wiya. Munu pula kurirara tjunguringkula pukulpa titutjara nyinangi.*

Ka panya Godalu palunya kulinu tjapinnyangka munu tjitji katja ungu. Ka palulanguru tjitji paluru pulkaringkunyangka ngunytjungku katira ungu Iilainya, munu wangkangu, "Panya Godanya tjapiningi tjitji nyanga palumpa, kani mulapatu ungu, kana ininu Samuelnga. Mununa kuwari nyuntulakutu katingu, panya nganmanytjuna tjitji nyanga palunya kalkunu pulkaringkunyangka Godanya ungkunytjikitjangku nyuntula tjungungku tiinta nyanga milmilta warkarira titutjarrangku Godanya walkuntjaku."

2

11-19 *Munu palulanguru tjitji panya palunya katira tjunu wati panya tjukurtjaraku ngurangka, ka wati panya palula warkaringi tiinta panya milmilta. Ka yiya kutjupa yiya kutjupa palumpa ngunytju mama pitjapai Godanya walkuntjikitja munu pula tjitji palumpa ulytja wiru katipai.*

3

Godalu Tjitji Samueltu Wangkanyta

1-15 *Ka nyara palula ara anangu Israelkunu tjutangku Godanya kulintja wiya nyinangi. Ka Godalu tjanala tjukurmankunyangka wangkanyta wiyangku wantingi mankurta kutju wangkangi. Ka panya Iilaiku katja kutjarangku ku lu Godanya kulilpai wiya nyinangi. Ka palulanguru Godalu tjitji tjukutjuku Samuelnga ngurkantanu palula wangkanytjikitjangku.*

Ka munga kutjupa Iilainya pula Samuelnga tiinta unngu ngaringi ruuma kutjupa kutjupangka. Ka Godalu Samuelnga wangkangu, "Samuel! Samuel!"

Ka tjitji panya pakara anu Iilailakutu munu wangkangu, "Nyaapa? Nyaakunin ini wangkanyi?"

Ka Iilailu wangkangu, "Wampa! Nyuntunyana wangkanyta wiyat u. Ankula kunkunari!"

Ka tjitji panya paluru ankula piruku ngarikatingu munu kulinu ini wangkanyangka. Munu piruku pakara anu Iilailakutu. Ka wangkangu, "Wiya, ngurpana. Ankula ngarikati!"

Ka ankula ngarikatira piruku kulinu ini wangkanyangka, munu ankula Iilaila tjapinu. Ka paluru unngu kulinu, "Munta nyangatja tjinguru Godalu palunya ini wangkanyi." Munu tjitji palunya wangkangu alatji, "Wiya, ankula ngarikati munun piruku ini wangkanyangka kulirampa wangka alatji, 'Uwa, Mayatja wangka. Kulini nanta.'"

Ka mulapatu ankula ngarikatira kulinu ini wangkanyangka, "Samuel! Samuel!" Ka Samueltu wangkangu, "Uwa, wangka Mayatja. Kulini nanta."

Ka Mayatja Godalu wangkangu, "Kuwariya Israelkunu tjuta pulkara urulyaralku ngayulu palyanyangka panya kuwarina Iilainya tjananya palumpa walytjapiti uwankara tjituru-tjituru pulka palyalku. Panya Iilaiku katja kutjarangku ngayula rawa tungunpungkupai, ka Iilailu pulanya paintja wiyangku wantipai. Kana nyara palulanguru palula wangkangu palumpa walytjapitiku tjituru-tjituru palyantjikitjangku. Ka paluru wantingi

alatjiitu palumpa katja kutjara kura tjuta rawangku palyannyangka paintja wiyangku.” Alatji Godalu Samuela wangkangu.

18-21 *Ka paluru mungawinki pakara Iilaila uwankara tjakultjunu kuitjunkunytja wiyangku Godalu panya palula wangkanytja. Ka Iilailu wangkangu, “Paluru alatjiitu Mayatjangku uwankara kulira palyantjaku ngaranyi alatjiitu.” Ka Mayatja Godanya Samuela tjungu titutjara nyinangi. Ka paluru ngula pulkaringkula watiringu.*

Palu Israelkunu tjutangkuya kuliningi Samuelnga Mayatja Godaku wangkatjara nyinanytja. Ka Godalu palurunku rawangku utiningi Samuelta, munu palurunku utiningi tjukurmankunytja-wanungku. Ka Samuelku tjukurpa lipiringu ngura uwankarangka Israelta munu ngura ititja tjutangka kuлу.

4

Pilitjiyanya Ngurara Tjutangku Pakutja Milmilpa Israeltanguru Katinytja

1-11 *Ka ngura nyara Israeltakutu wati Pilitjiyanya ngurara tjuta warmala pitjapai Israelkunu tjuta pikaringkunytjikitja. Munuya kutju-ara ngaparku tjunguringkula ila-ila ngaringi tjintungka pakara pika pungkunytjikitja. Ka tjinturingkunyangka pika pulka ngarangu. Kaya warmala tjutangku winki mulapa iluntanu Israelkunu tjuta, wati 4,000. Kaya mankur-mankurpa ngurakutu anu. Munuya wati tjilpi tjutangka wirkara wangkangu. Kaya tjilpi tjutangku tjanala tjapinu, “Palu nyaaku Godalu warmala tjuta wantir’yanu nganananya iluntankunytjaku? Munta-uwa, wanyula arkara pakutja panya kalkuntja milmilpa mantjila tiintanguru munula ma-kati manta nyara pika pungkupaikutu. Ka tjinguru Godalu nganananya alpamilalku nyara palula.”*

Munuya palulanguru wati mankur-mankurpa iyanu pakutja palunya mantjintjaku, panya Iilaiku katja kutjarangku pakutja palunya kanyiningi tiintangka panya unngu. Kaya pakutja panya milmilpa ankula mantjira ngura nyara palulakutu wirkakatingu. Kaya Israelkunu tjutangku nyakula pukularira pulkara mirangu. Ka manta uringu tjanana miranyangka.

Kaya warmala tjutangku kulinu Israelkunu tjuta miranyangka, munuya wangkangu, “Nyaaku nyaranpa miranyi Israelkunu nyara tjutaku ngurangka?” Munuya palulanguru malalta kulinu, “Munta-uwa, pakutja panya milmilpaya kunyu mantjinu.” Munuya nguluringu alatji kulira, “Panya tjanampa God kuwari tjanala wirkara ngaranyi tjanala tjungu, munulanya tjinguru kuwari uwankara wiyaliku, panya alatji nganmanypa ngaranytja wiyat. Kuwari-manti kura mulapalta ngaraku nganampa. Nganalulanya wankalku? Panya tjanampa God witulya pulka mulapa, panya uwankara iluntara wiyanu ngura panya Itjipala. Wiya, tjanana kutju wanyu wati. Nganana wati. Rapariwala ngapartji pungkunytjikitja.”

Ka palulanguru pikalta ngarangu tjananku pungkunytjaku, kayanku pungangilta. Kaya Pilitjiyanya ngurara warmala tjuta waintaringu alatjiitu munuya wati winki mulapa Israelkunu tjuta iluntanu. Kaya mankur-mankurpa kutju wankaringkula anu ngurakutu. Kaya pakutja panya milmilpa warmala tjutangku mantjira katingu, panya Iilaiku katja kutjara kuлу ilungu nyara palula.

12-22 *Ka tjintu nyara palula wati kutju wirtjapakañu pikangka uṭu-uṭu, munu ngurangka wirkara anangu nguratja tjutangka tjakultjunu, kaya pulkara ulangi. Ka Iilailu ula kulira tjapinu, “Nyaaringu nyanganpa?”*

Ka wati panya paluru Iilaila tjakultjunu alatji, “Pitjanguña nyuntula wangkanytjikitja.”

Ka Iilailu wangkangu, “Nyaa? Walangkuni wangka.”

Ka wati panyangku wangkangu, “Wati panyanpaya ngulu uwankara wirtjapakañu, ka uwankara manta-kutjuringu. Winki mulapaya wiyanu Pilitjiyanya ngurara tjutangku. Ka nyuntumpa kuļu. Nyuntu kutjultan nyinanyi. Kaya pakutja panya milmilpa kuļu katingu.”

Ka tjilpi panya Iilailu kulira kankara punkañu munu ngunti katatakira ilungu. Panya paluru yiya tjuta mulatu Israelkunu tjuta kanyiningi.

Ka Iilainya katja kutjara kuļu ilunyangka minyma panya palumpa mingkayi kulira pulkara tjituru-tjitururingu munu nyara palulanguru paluru tjuni iniringu. Ka iti panya nganmanypa wirkanu kuwaripangka, munu wirkara ngunytju palumpa pika pulka palyanu. Ka minyma panya paluru iti katja kanyira pukularinytja wiya watarku alatjiu ngaringi panya paluru rawangku kulinungi palumpa kuri, mingkayi kuļu ilunytjijta munu puťu pukularira ilungu iti kanyintjatjanu. Palu minyma paluru ilunytja kuwaripangka iti palunya ininu Ikapatanya. Ini nyanga paluru wangkanyi ‘Witulya Pitalytji Wiya’, panya warmala tjutangku pakutja panya milmilpa ngura tjanampakutu katinyangka Godaku pitalytjingku Israelnga wantikatingu.

5

Pilitjiyanya Ngurara Tjuta Pakutja Milmiltanguru Kuraringkunytja

1-2 *Palula małangkaya warmala tjutangku pakutja panya milmilpa Godaku wirkakatingu ngura tjanampakutu Pilitjiyalakutu, munuya tjanampa god pulkangka ini Taikanta itingka tjunu palumpa timpulangka, panya nyanga palunyaya pulkara walkulpai Pilitjiyanya ngurara tjutangku.*

3-7 *Ka tjintu kutjupa god panya ngalypa-ngalypa pulkanya Taikannga punkara ngaringi pakutjangka itingka panya palumpa tjukurtjara tjutangku tjunkunytjijta. Kaya nyakula piruku pakaltjingara ngaratjunu. Munuya mungawinki kutjupa piruku nyakula wangkangu, “Awari, pitjalaya nyawa! Nganampa panya god pulkanya katayla ngarinyi pakutjangka itingka, mina kutjara katalypa munu kata kuļu katatakira.”*

Nyanga palula malangka Godalu tjanampa kura pulka mulapa palyanu Pilitjiyanya ngurara tjutaku. Ka tjanala puntungka kalypata purunypa tjuta pakanu. Kaya palulanguru tjilpi tjutangku wangkangu pakutja panya warpungkula katinytjaku ngura kutjupakutu. Kaya wati tjutangku pakutja panya palunya ma-katingu tawunu kutjupakutu. Ka pika pulkañu ngarangu ngura nyara palula kuļu. Kaya tjara kutjupa ilungi, kaya tjara kutjupa pika pulkatjara nyinangi. Ka kaana uwankarangka mingkiri tjutaringu munuya mai uwankara ngalkula wiyanu. Ka tawunu uwankarangka anangu tjuta ilungi.

Kaya ngulalta Pilitjiyanya ngurara tjutangku kulinu tjanampa pika rawa ngaranyangka, “Munta-uwa, kulinultala pakutja panya tjulyantjitunguru-manti pika nyangatjampa wirkana. Walangkultala wanyu katira uwa walytja tjuta.”

6*Pakutja Milmilpaya Małakungku Katinytja*

1-21 Munuya palulanguru pakara małakungku katingu Israelkunu tjutakutu. Kaya Israelkunu tjutangku nyakula pulkara pukularingu pakutja panya milmilpa małakungku ngura walytjakutu wirkakatinyangka.

Kaya Israelkunu kutjupa tjutangku pukularira pakutja panya alara nyakula uwankara ilungu panya pakutja nyara palunya Godalu witinu watitjukurtjarangku kutju pampuntjaku. Ka tiana watarkurira alanu munuya tjuta mulapa ilungu.

7

1 Kaya palulanguru ngura kutjupakutu ngapartji iyanu pakutja panya palunya, munuya watitjukutu ngurkantara tjunu pakutja palunya nyinara atunyamankunytjaku.

Samueltu Israelkunu Tjuta Mayatjarira Kanyintja

2-4 Kaya nyara palula małangka Israelkunu tjuta Godaku watarkurira nyinangi. Munuya yiya tjuta ngarala wiyingkunyangka kutju małaku aruringu Godalakutu. Ka palulanguru Samueltu tjanala wangkangu, "Godanya wanantjikitja mukuringkulaya god ngalypa-ngalypa tjuta-warara wanji munuya Godanya kutju kulira wanjanma. Ka palulanguru Godalu nyuranya wankalku mirpantju tjutanguru."

Kaya palulanguru god ngalypa-ngalypa tjuta waningu uwankara.

5-11 Ka Samueltu piruku wangkangu, "Uwankarala kutjuriwa kana Godala nyurampa tjapinma."

Ka palulanguru anangu uwankara tjunguringu ngura uwankaranguru ngura kutjungka Godanya walkuntjikitja.

Kaya mirpantju tjutangku ngunti kulinu tjananya pika pungkunytjikitjamtinya tjunguringu, munuya tiana ngapartji tjunguringtu ngura kutjungka tjananya pungkunytjikitja. Kaya Israelkunu tjutangku kulinu tiana pika pitjanytja munuya pulkara nguluringkula wangkangu Samuelta, "Nyuntulampa Godala tjapinma rawangku nganananya wankaru kanyintjaku."

Ka palulanguru Samueltu kuka pungkula ungangi Godanya munu pulkara palula tjapiningi tjanampa. Ka Godalu kulinu palula. Kaya warmala panya tjuta ngalya-ilaringu. Ka tiana ilaringkunyangka ilkaringka pulkara tuunu, panya Godalu tuuntjaku palyanu, munu tjananya ngulutjinganu, kaya ngulu wirtjapakanu. Kaya Israelkunu tjutangku ngulura wanara tjara iluntanu, ka tjara kutjupa wanka wirtjapakanu ngurakutu.

12-17 Nyara palula małangka Samueltu puli walu mantjira ngaratjunu munu paluru puli nyara palunya ininu 'Tpinitjanya' munu wangkangu alatji, "Panya Mama Godalu nganananya alpamilanu."

Kaya Pilitjiyanya ngurara tjuta małaku putu tjarpangu ngura panya Israelta, panya Mayatja Godanya tjanala anga-ngarangu Israelkunu tjutaku ngalkilpa. Panya nganmanytjuya Pilitjiyanya ngurara tjutangku tjananya pungkula kanany-kananyaringi waintarira ngura tjuta kułu tjulyara tjanalanguru. Palu tiana ngapartjiya waintaringu munuya ngura panya palunya tjananya małakungku mantjinu.

Ka Samueltu tjananya titutjarangku mayatjangku kanyiningi Israelkunu panya tjuta, munu palumpa ngurangka pitjilpa kutjupa palyanu Godanya rawangku walkuntjikitjangku.

8

Israelkunu Tjuṭangku Mayatja Pułkaku Godala Tjapintja

1-22 *Ka ngula Samuelnga tjilpiringu ngura pala palula. Munu paluru katja kutjara kanyiningi. Ka katja nyanga paluru pula mayatjarungu mamaku arangka. Palu paluru pula palyanyku warkarinytja wiya munu kutjupangku pulanya mani ungkunyangka pula palumpa kura utintja wiyangku wantipai, munu pula alatji rawangku palyara ngura kuraningi alatiitu.*

Kaya Israelkunu tjuṭaku wati kuranyitja tjuṭa ngura kutju-kutjunguru tjunguringkula pitjangu Samuelta wangkanytjikitja, munuya wangkangu, “Nyuntu tjilpiringu, ka nyuntumpa katja kutjara wirura nyinanytja wiya nyuntu purunyapa. Palu nganana mukuringanyi nyuntu nganampa mayatja pułka tjunkunytjaku nganananya mayatjarira kanyintjaku. Panya anangu ngura kutjupitja tjuṭaku mayatja pułka tjuṭa nyinanyi. Ka nganana nyara palu purunyku mukuringanyi.” Ka tjana alatji wangkunyangka Samuelnga kulira pukularinytja wiya, tjituru-tjitururingu.

*Munu paluru Mama Godala tjapiningi. Ka Godalu ngapartji Samuelta wangkangu, “Palya nyuntu anangu tjuṭangku wangkunyangka wan-*gañarangku *kulila, panya tjana ngayula tungunpunganyi nyuntula wiyangku. Paluru tjana ngayunya wantira god ngalypa-ngalypa tjuṭa palyanu tjananya walkuntjikitjangku. Palu tjapila tjanala munu ngulutjura alatji wangkara, ‘Nyaa nyurampa mayatja panya paluru palyalku?’”*

Ka palulanguru Samueltu wangkangu tjanala Israelkunu tjuṭangka, “Mulapa nyura mayatjaku mukuringanyi? Ka mayatja nyara paluru tjinguru palya wiya nyurampa. Kulilaya! Wati kutjupangku nyurampa mayatja pułka nyinara nyanga alatji palyalku — paluru nyurampa katja tjuṭa katiku warmalarira pikangku pungkunytjaku ngura kutjupitja tjuṭa. Ka nyurampa katja kutjupa tjuṭangku palumpa tjanampa tjula wara tjuṭa palyalku munu kuļata tjuṭa kuļu. Ka nyurampa katja kutjupatjara mayatja nyara palumpa kaana tjuṭangka pułkara warkariku. Ka nyurampa unṭalpa tjuṭangku palumpa mai kuka kuļu titutjarangku paulku pakuwiyangku. Ka paluru kaana mai wirutjara tJulyalku nyuralanguru munu palumpa malpa tjuṭa ungkuku, munu paluru nyurampa kaananguru mai wiru tjuṭa tjarara mantjilku munu palumpa malpa tjuṭa tjara unguku. Munu paluru mantjilku nyurampa warkaripai tjuṭa, munu nyurampa kuka wiru tjuṭa kuļu paluru mantjilku palumparinytjaku. Ka palulanguru nyura uwankara pułkara tjituru-tjitururiku munu nyura wangkara Godala ngatjilku nyuranya alpamilantjaku. Palu Godalu kulilwiyangku wantiku. Kulini nyura? Nyangatjana nyuranya ngulutjunanyi kulintjaku.” Alatji Samueltu anangu tjuṭangka wangkangu.

Kaya anangu Israelkunu tjuṭangku wangkangu, “Wiya nganana mukuringanyi mayatja pułkaku nganananya mayatjarira kanyintjaku, panya anangu kutjupa tjuṭa mayatja pułkatjara nyinanyi, kala nganana tjana purunyapa nyinanytjikitja mukuringanyi.”

Ka paluru tjanampa tjukurpa uwankara Mama Godala ma-tjakultjunu.

*Ka Godalu ngapartji wangkangu, “Nyuntu tjanala wan-*gañarangku *kulila munu tjanampa mayatja mantjila.”*

Ka Samueltu anangu Israelkunu tjuṭangka wangkangu, “Palya uwankaraya ara malaku ngura walytjakutu walytjakutu.”

9

Saulanya Munu Samuelnga

1-27 *Ka ngura nyara palula wati kutju nyinangi ini Kitjanya, munu paluru katja kutju kanyiningi ini Saulanya. Wati nyara paluru tangkiyi tjutatjara. Ka kutju-ara tangkiyi panya paluru tjana kawankatingu. Ka palumpa mamangku katjangka wangkangu, “Wati warika kutju mantjila munu pula ankula ngurila tangkiyi panya tjuta.” Palu paluru pula pakara ankula putu alatjiitu nguriningi tangkiyi panya tjuta. Paluru pula ngura tjutangka putu alatjiitu para-nyangangi.*

Ka Saulalu wangkangu, “Wantir’iyarali malaku ara. Ngayuku mama tjinguru watarkuringu tangkiyiku munu tjinguru ngalinyalta pulkara kulini.”

Palu wati panya warakaripaingku wangkangu, “Munta wanyu kulila wati kutjupa wangkatjara nyangangka nyinanyi. Nyara palulaya anangu tjutangku kulilpai, ka paluru uwankara tjukarurungku wangkapai. Wanyuli ara palulakutu. Tjinguru paluru ngalila tjakultjunkuku yaaltjikutungku ngurintjaku.”

Ka Saulalu wati panya palula wangkangu, “Ka ngali palula wirkara nyaa palunya ungguku ngalila tjukarurungku tjakultjunkunytjaku? Panya ngali yakutja ultutjara. Munu ngali kutjupa kutjupa kanyintja wiya palunya unggunytjikitjangku.”

Ka warkaripaingku wangkangu Saulala, “Nyawa, nyangatjana mani tjukutjuku kanyini. Kali ungguku wati nyara palunya, ka paluru ngalila tjakultjunkuku tjukarurungku wanantjaku tangkiyi panya tjuta.”

Ka Saulalu wati panya palula wangkangu, “Ai, wirun kulinu. Walangkuli wanyu katira uwa kalinya nintila.”

Munu pula tawunukutu anu wati panya palunya nyakunytjikitja. Panya tawunu paluru puli katu ngarangi. Ka pula pulingka ma-tatira ngururpa nyangu kungkawara tjuta mina tjutintjikitja pitjanyangka. Munu pula tjapinu wati panya palumpa. Kaya wangkangu, “Uwa, paluru kuranyuringu. Walangku pula wanara nyawa, panya paluru kuwari kutju ngalya-pitjangu nganampa tawunukutu, panya anangu tjutangkuya kuwari mai kuka pulka palyani Godanya unggula walkuntjikitjangku. Wala pulka pula ara, munu pula mapalku nyawa ankunytja kuwaripangka panya paluru ananyi Godanya walkuntjikitja. Palu anangu tjutaya ngalkuntja wiya palumpa patara nyinanyi paluru wirkara inma wangkara milmankunytjaku. Kaya palula malangka anangu tjutangkulta ngalkuni. Ka pula warpungkula nyawa.”

Ka Saulanya pula tawunukutu anu munu pula ma-wirkara nyangu wangkatjara panya. (Palu paluru pula ngurkantankunytja wiya wati nyara palunya). Panya nganmanytju Godalu Samueltu nintinu wati panya Saulanya paluru pitjanytja kuwaripangka alatji wangkara, “Mungawinki ngayulu wati kutju nyuntulakutu iyalku. Paluru panya Pintjimanku walaytjapitinguru. Ka nyuntu wati nyara palunya ngurkantara mayatja pulka nyinanytjaku ngayuku anangu tjutaku tjananya mayatjarira atunymara kanyintjaku mirpantju tjutangka-tawara. Ngayulu nyangu ngayuku anangu tjuta tjituru-tjitururinyangka mununa kulinu tjana ngayula ulara tjapinnyangka.” Alatji Godalu palula nganmanytju wangkangu mungartji.

Ka Saulanya ngalya-pitjanyangka Samueltu nyangu, munu kulinu Godalu palula wangkanyangka alatji, “Nyangatja wati paluru, panya ngayulunanta nganmanytju wangkangu. Nyanga paluru mayatjarira kanyilkku anangu ngayuku tjuta.”

Ka Saulanya ngalya-ilaringu Samueltakutu munu palula tjapinu, “Nyuntu ninti yaaltjingka wati wangkatjara nyinanyi?”

Ka Samueltu wangkangu, “Ngayuluña wati wangkatjara. Ma-kuranyuri pula anangu nyara tjutakutu. Kuwarila nyara palula nyinanyi munula maingka tjunguringkula Godanya walkura mai mala ngalkuṇi. Kana mungawinki nyuntula tjakultjunanyi nyuntu panya kulintja uwankara. Wanti tangkiyi panya tjuta kulintja wiyangku, panya palunya tjananyaya kunyu ngurira nyangu. Palu wanyu kulila, Israelkunu tjutaya nyuntumpa mukuringanyi munu nyuntumpa walytja tjutaku kulu.”

Ka Saulalu wangkangu, “Ai, nyaakuya ngayuku mukuringanyi? Ngayulu walytja tjutatjara wiya. Ngayuku walytja mankurpa kutju, tjuta mulapa wiya.”

Ka Samueltu Saulanya pulanya wati panya warkarara katingu ruuma pulkakutu munu pulanya nyinatjunu taipulangka mayatjaku arangka. Kaya anangu mankur-mankurpa nyinangi nyara palula. Ka Samueltu wangkangu wati nguratjangka panya palumpa kuka paulpaingka, “Ngalyakati kuka panya palunya panya wangkanguanta maunṭalpa paṭara tjunkunytjaku.” Ka wati panya kuka paulpaingku kuka panya tjunta mantjinu munu ngalya-katira taipulangka tjunu Saulalu ngalkuntjaku. Ka Samueltu wangkangu, “Kuka nyangatja ngalkula panya nyangatja maunṭalpa tjunkunytja nyuntumpa alatjiṭu.”

Munuya ngalkunu tjungungku tjintu nyara palula. Ka pula nyanga palula malangka anu Samuelku ngurakutu, munu pula wangkara wiyingkula munga kutju ngaringu.

Samueltu Saulanya Israelku Mayatja Pulka Tjunkunytja

Munu tjirirpirinyangka Samueltu wangkangu, “Pakala pula kana nyupalinya katira ma-iyala.” Munuya urilkutu ma-pakara anu Samuelnga tjana. Ka Samueltu wangkangu Saulala, “Wanyu nyuntumpa pala warka kuranyurira paṭantjaku witula, kana nyuntula kutjungka wangka tjukurpa nyanga Godalu wangkanytja.”

10

1-8 Munu palulanguru Samueltu mantjinu patala alipa uwilatjara munu paluru uwila panya tjutinu Saulala katangka munu nguku kutjara nyuntjura wangkangu, “Mayatja Godalu nyuntunya ngurkantanu anangu tjuta mayatjarira kanyintjaku. Nyuntu tjananya kanyilku wati mirpantju tjutangka-tawara. Kananta kuwari wangkanyi panya nyanga palulanguru nyuntu kuwari ngayunya wantikatira ma-pitjala nyakuku wati kutjara. Ka paluru pula nyuntula wangkaku alatji, ‘Tangkiyi panya nyuntu mungatu ngurintjanyala nyangu. Palu kuwari nyuntumpa mamangku tangkiyi kulintja wiyingru mununta nyuntunyalta putu para-kulira tjutangka para-tjapiningi, “Ngayuku katja ankula wiyingru malaku pitjanytja wiya. Yaaltjiringutju?” Alatji paluru wangkangi.’

“Kan nyanga palulanguru nyuntu ankula ankula nyakuku wati mankurpa paluru tjana Godanya walkuntjikitja ankunyangka ngura Pitjultakutu. Ka wati kutjungku katiku mai mankurpa, ka kutjupangku katiku yakutja wainatjara, ka kutjupangku katiku nanikuta mankurpa. Munu paluru tjana nyuntunya nyakula nyuntumpa pukulariku mununtaya ungguku mai kutjara, ka nyuntu mantjilku tjana unggunyangka. Munun palulanguru piruku ngura ini Kipiyalakutu ilaringkula nyakuku wati wangkatjara tjuta nguwanpa ngalya-ngaparikatinyangka nyuntulakutu. Munun tjanala

kuranyu nyakuku wati kutjupa tjutangku puṇu kutjupa kutjupa tjuta wangkatjingara inma inkanyangka. Ka Kurunpa Milmilnga nyuntula tjarpaku witulya pulkanya. Ka nyuntu wangkatjara palula tjanala tjunguringkula inma pulkara inkaku. Munu nyuntu wati kutjupariku alatjitu. Kan nyanga palula malangka nyuntulta palyala kutjupa kutjupa wiru nyuntu kulintja, panya Godanya nyuntula tjungu ngaranyi.

“Ka nyuntu kuranyu ara ngura Kilkaltakutu, munu ngayuku nyinara paṭanma kaṇanta nyara palula tjirirpi 7-itjangku nyawa munuṇanta wangkanyilta. Mununa kuka pungkula tiliwakara Godanya ungkuku palunya walkuntjikitjangku. Mununa ngayulu pitjala nyuntunya wangkaku nyaa palyantjaku.” Alatji Samueltu Saulala wangkangu.

9-16 Ka Samueltu wangkara wiyaringkunyangka Godalu Saulanya kurunpa kampa kutjupanu. Ka palula malangka Saulanya pula wati panya warkarara ankula ngura panya Kipiyala wirkanu. Ka Saulalu nyangu wati wangkatjara tjutangku Godaku tjukurpa wangkanyangka. Ka Kurunpa Milmilnga Saulala tjarpangu, ka paluru wangkatjara palula tjanala tjunguringkula paluru kulu tjukurpa Godaku wangkangi Godalu palula unngu nintinnyangka. Kaya anangu palumpa ninti tjutangku palunya nyanga alatjirinyangka nyakula tjananku tjapiningi, “Nyaaringu wati pala Kitjaku katja? Paluru kulu wanyu wangkatjara?”

Ka Saulalu tjukurpa Godaku wangkara wiyaringkula anu manta nyara Godanya walkulpailakutu. Ka Saulaku kulypalpangku palunya nyakula tjapinu, “Yaaltjikutu nyuntu anu?”

Ka Saulalu wangkangu, “Ngali tangkiyi nguriningi munuli puṭu ngurira ngurira anu Samueltu tjapintjikitja.”

Ka Saulaku kulypalpangku tjapinu, “Wanyunu tjakultjura, nyaa Samueltu wangkangu nyuntula.”

Ka Saulalu wangkangu, “Wiya, nyanga alatji kutjuni wangkangu panya paluru tjana kunyu nganmanyiju tangkiyi ngurira nyangu.” Munu Saulalu palumpa kulypalpangka tjakultjunkunytja wiyangku wantingi panya Samueltu wangkanytja paluru Israelku mayatjarinytjikitjangku.

Israelkunu Tjutangku Saulanya Mayatjanmankunytja

17-27 Ka palulanguru Samueltu anangu Israelkunu uwankara altingu tjanala wangkanytjikitjangku. Munu paluru tjanala tjakultjunu Godalu tjanala wangkanytja alatji, “Mayatja Godalu nyurala wangkanyi alatji, ‘Ngayulu panya nyuranya iriti pakaltjinganu Itjipalanguru, munu panya anga-ngarangu nyurala warmalangku pungkula wiyanjtaku-tawara.’ Alatji Godalu wangkangu. Palu panya nyura palunya kulira wantira walytjangku wangkangu alatji, ‘Wiya nganana mayatja pulkaku mukuringanyi ngananaŋanya ngura nyangangka atunymara kanyintjaku.’ Alatji nyura wangkara Mayatja Godanya wantingu.”

Munu Samueltu tjananya wangkangu walytjarara walytjarara ngurkantara ngaranytjaku kaputu kutjupa kaputu kutjupa. Munu paluru nyakula wanara ngurkantanu Saulaku walytja tjuta. Palu puṭuya nyangu Saulanya. Munuya Godala tjapinu, “Wati panya paluru yaaltji? Panya paluru wiyatū ngaranyi. Tjinguru kuwari pitjanyi.”

Ka Godalu wangkangu, “Uwa, paluru kumpira nyinanyi nyara kampa kutjupa ulytja tjutangka kumpira.” Kaya mapalku wirtjapakanu palunya mantjintjikitja, munuya altrira ngalya-katingu. Ka Saulanya pitjala ngarangi anangu tjutangka ngurur-ngururpa wara pulkanya tjanala waintara.

Ka Samuelsu wangkangu anangu panya tjutangka, "Nyawaya wati nyangatja! Panya nyanga palunya Mayatja Godalu ngurkantanu nyurampa mayatja pulka nyinanytjaku. Kutjupa nyanga purunypa nyinanytja wiya, panya nyanga paluru kutju Godalu ngurkantankunytja."

Kaya anangu uwankara mirangu pukularira tjanampa mayatjaku. Ka Samuelsu anangu tjutangka tjakultjunangi mayatjaku warika uwankara. Munu paluru nyiringka walkatjunu mayatja panya paluru nyakula warika palyantjaku Mama Godala mirangka. Munu nyanga palulanguru tjananya wituŋu ngurakutu ankunytjaku. Ka Saulanya kuļu palumpa ngurakutu anu wati tjutangka tjunguringkula, panya Godalu palunya tjananya ngurkantara kurunpa rapanu tjungu ankunyangka.

Palu anangu kutjupa tjarangkuya wangkangi, "Yaaltjingaralanya wati nyangangku atunymanuku?" Munuya Saulku kuraringangi munuya kutjupa kutjupa tjuta pukularira unkuwiyangku wantingi. Ka Saulanya pilunpa ngarangi wangkanytja wiya.

11

Saulalu Tjana Wati Ini Nayatjanya Tjananya Pungkula Wiyantja

1-15 *Ka pira kutju wiyingkula mayatja kutjupa ini Nayatjalu tjana palumpa tjaultji tjutangku para-tjatutjunu ngura ini Tjapitjanya, panya Israelkunu tjutaku ngura. Kaya wati Tjapitjanya ngurara tjutangku Nayatjala wangkangu, "Wanyula pika wiyangku nyinakatira wangkara kuļira kalkula. Ka tjinguru nyuntu nganampa mayatjarinyangka nganana nyuntumpalta warkariku."*

Ka paluru wangkangu, "Uwa, palyana kulini nyura panya kalkuntja nyuranya iluntankuwiyangku wantinytjikitjangku, palu ngayuku warmala tjutana wangkaku nyuranya uwankara kuru waku warpura wanintjaku. Alatjinggañyangka kutjuna nyuranya uwankara pungkula iluntankunytja wiyangku wantiku. Ka nyura palulanguru pulkara kuntaringkuku Israelkunu uwankara kuļu."

Kaya wangkangu wati panya Nayatjala, "Wanyun pałalku tjirirpi tjuta nguwanpa, kala iyalku wati mankurpa ankunytjaku ngura uwankarakutu manta nyanga Israelta, kaya nganampa walytja tjutangku tjinguru pitjala alpamilalku. Palu tjana tjinguru pitjanytja wiyangkampa nyura palya ngananañnya palyani nyuntu panya wangkanytjalta." Ka Nayatjalu palyamanu.

Kaya wati panya mankurpa tjakulpa iyannyangka wirkanu Saulaku tjanampa ngurangka. Munuya tjakultjunu anangu tjutangka. Kaya kuļira nguluringkula pulkara ulangi. Ka Saulanya warika wiyingkula ngurakutu pitjangi munu anangu tjuta ulanyangka kuļira kutjupangka tjinpinu, "Nyaaringu nyanganpa? Nyaakuya nyanganpa ulara wañinyi?"

Kaya wangkangu Saulala, "Wati mankurtulanya pitjala tjakultjunu mayatja panya Nayatjalu wangkanytja."

Ka Saulalu tjukurpa nyanganpa kulinnyangka Godaku Kurunpa palula tjarpangu witulya pulkanya munu palunya kuŋpuṇu. Ka Saulanya pulkara mirpanaringku. Munu paluru kuka panya puluka kutjara pungu munu katara muṭun-muṭunmanu. Munu paluru kuka panya muṭun-muṭunmankunytja tjarara ungu wati panya tjakulpa pitjanytja mankurpa Munu tjananya wituŋu wangkara, "Katiraya nintila kuka nyanga kaṭantja tjuta ngura uwankarangka Israelta winkingka. Munuya anangu tjutangka nintira wangka nyanga alatji, 'Kuka puluka nyanga muṭun-muṭunpa nyawa. Nyanga alatjiriku nyurampa puluka uwankara nyura Samuelnga ngalinya

wañantja wiyangku wantinyangka.’’ Kaya mulapañtu wati panya mankurta ankula para-tjakultjunangi ngura winkingka. Kaya anangu panya tjuta alatji wangkanyangka kulira pulkara nguluringu Mayatja Godaku. Munuya pitjala wati uwankara warmala tjunguringu mungiliyi mulapa.

Ka Saulalu wati panya tjakulpa ankunytja mankurta wangkangu, ‘Anku-laya wangka wati panya nyuranya wituntjala nyanga alatji, ‘Mungawinki tjirirpi pakara kalalarinytja kuwaripangka Godalu nyuranya anga-tjutulku nyurampa mirpantju tjutanguru, ka nyura wankaringuku.’’

Kaya wati panya mankurpa tjakulpa anu wangkanytjikitja ngura walytjakutu munuya wangkangu. Kaya kulira pulkara pukularingu munuya tjana ngapartji mayatja panya Nayatjala tjanala alatji ngunti wangkangu, ‘Mungawinkila ngura nyangatja ngurara uwankara nyuntulakutu mapitjanyi, ka nyura palya nganananya kuru nyaala panya nyura nganmanytju wangkanytjatjanungku.’

Ka mungawinkin Saulalu wati Israelkunu tjuta tjarara tjunu pika pungkunytjikitja ankunytjaku kaputu kutjupa kaputu kutjupa kaputu kutjupa. Kaya ngalya-katjarungkannyangka mirpantju tjutaku ngurangka tjarpangu tjintukutu mulapa manta marungka munuya tjananya pungkula pungkula wiyanu.

Samueltu Israelkunu Tjutangka Wangkanytja

Munuya palula malangka Samueltu wangkangu anangu tjutangku alatji, ‘Nganalu tjana panyatja pukularinytja wiyangku wantingi Saulanya mayat-jarinytjaku. Anangu palunya tjananyaya ngalya-kati kala iluntara.’

Palu Saulalu wangkangu, ‘Wiya, kutjupa iluntankunytja wiyangkuya wantima, panya Godalulanya kuvari nganananya wankarunu.’

Ka palula mañangka Samueltu wangkangu anangu tjutangka, ‘Pitjaltaya wala, kala ara ngura panya Godanya walkulpailakutu. Munula nyara palula tjunguringkula Godala piruku kalkula mayatja nyanga Saulala wanganarangku kulintjikitjangku.’

Kaya anangu uwankara anu ngura panya palulakutu munuya Saulanya mayatja pulka ngaratjunu Godala mirangka munuya inma pulka palyara Godanya pukultu walkuningi.

12

1-5 Ka Samueltu wangkangu anangu Israelkunu tjutangka, ‘Ngayulu palyanu nyura mukuringkula wangkanytja uwankara mununa nyurampa mayatja pulka tjunu nyuranya atunymara kanyintjaku. Panya ngayulu kuvari tjilpiringu, panya nyuranya kanyiningi wati yangupalangkulpi. Palu tjinguru ngayulu kura palyanyangka nyura ngayunya utingku kurranmanma. Ngayulu wanyu kutjupaku tangkiyi munu puluka kutitjunu? Munta kutjupana ngunti wangkara pikantanu? Ngayulu wanyu anangu kutjupa tjutaku tjituru-tjituru palyanu? Ka anangu kutjupangku ni wanyu mani ungu ngayulu palumpa kura utintja wiyangku wantintjaku? Tjinguру ngayulu nyanga alatji palyarampana uti kuvaritu tjukarurungku palyanma.’’

Kaya anangu Israelkunu tjutangku wangkangu, ‘Wiya, nyuntu nganananya ngunti kurantja wiyat, munu nyuntu nganananya tjituru-tjituru palyantja wiyat, munun nyuntu kutjupa kutjupa ngananalangguru mantjintja wiyat.’’

Ka Samueltu wangkangu tjanala, ‘Mayatja Godalu nyuranya nyanganyi nyura alatji wangkanyangka munu nyurampa mayatjangku kuļu nyuranya

kulinu. Paluru pula kutjaraṭu ninti panya nyura puṭu ngayuku kura ngurkantananyi.

¹³⁻²⁵ “Ka nyangatjalta nyurampa mayatja, panya nyura mukuringkunytja Mayatja Godalu nyurampa ngurkantanu wati nyanga palunya nyuranya mayatjarira kanyintjaku ngura nyanga palula. Ka nyura uti Godanya wanganarangku kulinma munu palunya pulkanmara walkunma munu nyura uti palumpa tjukurpa mulamulangku kulinma. Tjinguru nyura alatji palyarampa nyura palya ngaraku. Palu nyura Mayatja Godanya wantinyangkampa munu pikaringkula palumpa tjukurta tungunpungkunyangka paluru ngapartji nyuranya wantiku, panya purunypa, panya paluru iriti wantir'iyānu nyurampa walytjapiti.

“Ka nyura uti kuwari pilunarira patanma munuya nyangama, ka Mayatja Godalu nyurala utilku nyura nyakunytjaku. Panya kuwari nyanga mai panya wiita katantjaku ilaringu. Ka ngayulu Godala tjapilku mina tuutjarangku puyintjaku. Ka nyura nyakula nintiringkuku munu nyura kuliklu, ‘Nyaakula panyatja kurangku wati mayatjaku tjapinu Godala nganampa ngurkantaṛa tjunkunytjaku.’”

Munu Samuelsu Godala tjapinu tjintu panya palula, ka Godalu mina pulka iyanu. Kaya anangu uwankara pulkara alatjiṭu nguluringu Mayatja Godaku munu Samuelku kulu. Munuya wangkangu Samuelta, “Wanyu Godala nganampa tjapila nganaṇa ilunytjaku-tawara. Panya nganaṇa kura pulkangku palula mayatjaku ngatjinu.”

Ka Samuelsu wangkangu, “Nyura panya kura palyaningi, palu nguluringkuwiyangku wantima. Munuya nyanganguru Godalanguru paturingkunytja wiyangku wantima. Palunya kutjuya walkunma kurunpa winkingku munu ngalypa-ngalypa pala palyantja tjuta wantima ngunti walkulwiyangku. Panya Godalu pukultjungku nyuranya ngurkantanu nyura palumpa walytjaringkunytjaku. Ka ngayulu mulapa nyurampa rawangku tjapilku wantinytja wiyangku. Ngayulu nyuranya nintilku wiru tjukaruru nyinanytjaku. Ka nyura uti Godanya pulkanmanama palunya walkura kurunpa winkingku. Kulinmaya panya paluru wiru tjuta nyurampa palyanu. Palu nyura puṭu kulira kura tjuta palyannyangka Godalu nyuranya uwankara wiyalu nyurampa mayatja kulu.”

13

Israelkunu Tjuṭangku Pilitjiyanya Ngurara Tjuṭa Pikangku Pungkunytja

¹⁻⁹ Ka ngula Saulaku katjangku munu palumpa tjaultji tjuṭangku pikangku pungangi wati Pilitjiyanya ngurara tjaultji tjuṭa. Kaya wati Pilitjiyanya ngurara kutjupa tjuṭangku kulinu munuya pulkara mirpañaringu Israelkunu tjuṭaku. Munuya uṭuluringu mungili mulapa wati Israelkunu tjuṭa pikangku pungkunytjikitja. Munuya tjinka winki mulata tatirā pitjangi. Kaya Israelkunu tjuṭangku nyangu munuya nguluringkula ankula ngura kutjupa kutjupa tjuṭangka kumpiningi kulpingka, punu tjaṭangka, pulingka, wellangka, pitingka kulu. Kaya kutjupatjara urungka itipirira anu ngura kutjupakutu.

Palu Saulanya nyinangi ngura panya Kilkalta, ka palumpa tjaultji tjuṭaya pulkara nguluringkula tjititingangi. Ka Saulanya patara nyinangi Samuelku tjirirpi 7 paluru pitjala kuka pungkula pitjilta tjunkula tiliwakara Godanya ungkunytjaku. Palu Samuelnga pitjanytja wiya. Ka Saulalu wangkangu, “Ngalya-katiya kuka tjuṭa kala pungkula Godanya ungkula walkula paluru pukularinytjaku.”

10-15 *Ka paluru kuka panya pungkula pitjilta warungka tjunkunyangka Samuelnga wirkanu. Ka Saulanya pakara ma-pitjangu palunya nyakunytjikitja. Ka Samueltu tjapinu, “Nyaa nyuntu palyanu?”*

Ka Saulalu wangkangu, “Wiya ngayuku wati tjaultji tjutangku ngayunya wantikatingi, ka nyuntu kuļu pitjanytja wiya ngarangi. Kaya Pilitjiyanya ngurara tjuta warmalarira tjunguringangi ngura ngananala itingka. Kana kulinu alatji, ‘Kuwarintiya ngayulakutu pika pungkunytjikitja pitjaku ngura nyanga Kilkaltakutu. Ka panya ngayulu Mayatja Godala tjapintja wiyatū. Mununa palulanguru kulinu kuka pitjilta tjunkula palunya ungkunytjikitjangku paluru ngayuku pukularinytjaku.’”

Ka Samueltu wangkangu, “Nyuntu kawakawangku alatji palyanu. Nyuntu Godaku tjukurpa kulintja wiya. Tjinguru nyuntu palunya wanganarangku kulinnyangka Godalu nyuntunya munu nyuntumpa walytja malatja malatja kuļu kanyinma Israelku mayatja titutjara nyinanytjaku. Palu kuwari nyuntu mayatja wiyaringanyi, ka nyuntumpa walytja malatja malatja kuļu nyuntumpa arangka mayatjarira nyinakatinytja wiya. Ka Godalu kuwari ngurkantankuku wati kutjupa anangu tjuta kuranyurira kanyintjaku nyuntumpa arangka, wati tjukaruru palula kulilpai, panya nyuntun palumpa tjukurpa kulintja wiyangku wantingi.” Alatji Samueltu wangkangu Saulala, munu wangkara wiyaringkula anu ngura kutjupakutu.

14

Jonathantu Pula Pilitjiyanya Ngura Tjuta Pikangku Pungkunytja

1-15 *Ka tjintu kutjupa Saulaku katjangku Jonathantu wangkangu palumpa wati warka, “Pitja kali ara Pilitjiyanya ngurara tjutaku ngurakutu, nyara kampa kutjupa.” Palu Jonathantu palumpa mamangka wangkanytja wiyatū. Munu paluru wangkangu wati panya warkangka, “Tjinguru Godalu ngalinya alpamilalku tjananya pungkula wiyanjtaku. Ngali kutjara kutju palu Godalu mukuringkula ngalimpa palyalku alatjitu, panya kutjupangku putu angatjunanyi Godanya.”*

Ka wati panyangku wangkangu, “Wiya palya. Nyuntu alatjitu wiru kulira palyala, kana ngayulu nyuntula tjungutu ma-pitjanyi.”

Ka Jonathantu wangkangu, “Pitja kali ma-ilariwa nyara wati Pilitjiyanya ngurara tjutaku ngurakutu, munuli utiriwa tjana nyakunytjaku. Ka tjinguru tjana nyakula wangkaku, ‘Patara pula ngara pala palula, kala nganana ma-pitjaku nyupalilakutu.’ Tjinguru tjana alatjingalku, ka ngali mulapa arangkatu patala tjanalakutu ankunytja wiya. Palu tjinguru tjana alatji wangkaku, ‘Nganañalakutuya pitja.’ Ka ngali apu katulta tatila. Panya alatji wangkara altinyangkali kulikku, ‘Munta mulapa Mayatja Godalu nganananya alpamilalku tjananya pungkula wiyanjtaku.’”

Munu pula mulapatu utiringu tjana nyakunytjaku. Kaya mulapatu Pilitjiyanya ngurara tjutangku nyakula wangkangu, “Nyawa nyara wati Israelkunu tjutaya ma-ma-manyirkananyi alanguru pakara kampangkaču kumpintjatjanu.”

Muniya Pilitjiyanya ngurara tjutangku nyakula mirangu Jonathanku pulampa, “Ngalya-pitja pula, kala nganana nyupalinya pikangku pungkula nintilku.”

Ka Jonathantu wangkangu palumpa mal pangka, “Ngalya-tatila ngayula malangka, panya Godalu kuwari ngalinya alpamilanı Pilitjiyanya ngurara tjuta pungkula wiyanjtaku, kala Israelkunu tjutangku tjanala waintarinyi.” Munu pula ma-tatinu wanapari munu pula katulta wirkara tjananya pungkula iluntanangi Pilitjiyanya ngurara tjuta. Munu pula pungkula

pungkula tjuṭa mulapa iluntanangi nampa nyangatja 20. Kaya Pilitjiyanya ngurara tjuṭa pulkara nguluringkula tjititingangi ngurangka nyinanytja tjuṭa kuļu. Ka palullanguru manta uringu, panya Godalu alatjinganu tjana nguluringkunytjaku.

Saulalu Tjana Pilitjiyanya Ngura Tjuṭa Pungkula Wiyantja

16-23 Ka Saulaku wati panya ngarala atunymankupai tjuṭangku manyangu Pilitjiyanya ngurara tjuṭa tjanampa ngurangka nguluringkula mirara para-para-wirtjapakarinkunyangka. Ka Saulalu wati maŋkurta wangkangu, "Ngayuku tjaultji tjuṭaya para-kantamilala munuya nyawa ngananya tjanalakutu anu ngura nyanganguru." Kaya kantamilara mula-paṭu nyangu Jonathannga pula wiya ngaranyangka. Ka Saulalu wangkangu wati panya tjukurtjarangka, "Ngalya-kati pakutja panya milmilpa Godaku palula nganampa tjapintjikitjangku." Ka Saulanya wati panya tjukurtjarangka ngarala wangkanyangka wati Pilitjiyanya ngurara tjuṭa ngulu miranytja katuringu alatjiṭu, panya puṭu kuli-kuliraya pulkara alatjiṭu mirangi munuyanku ngurangka pikangkulta pungangi.

Ka Saulalu nyangatja kulira wangkangu wati panya tjukurtjarangka, "Palya wanti, kala mapalku ara." Ka Saulanya tjana palumpa tjaultji tjuṭa kuļu tjunguringkula anu pika pungkunytjikitja munuya nyara palulalta ma-wirkara nyakula urulyaranu, "Ai, nyangatjayanku paluru tjanankuṭu punganyi." Kaya Israelkunu kutjupa tjuṭa Pilitjiyanya ngurara tjuṭangka nganmanyapa tjunguringkunytjatjanu małaku tjunguringu Saulala tjanala munuya palunya tjananya ngulura waṭaparanu Pilitjiyanya ngurara tjuṭa. Kaya Israelkunu kutjupa tjuṭa kuļu apungka kumpira nyinangi munuya Pilitjiyanya ngurara tjuṭa ngulu wirtjapakannyangka kulira tjana kuļu pitjala tjunguringu Saulala tjanala. Ka mulapa Godalu tjananya nyara palula arangka pulkara alpamilaṇu Israelkunu tjuṭa.

Jonathantu Tjuratja Ngalkunytja

24-30 Kaya wati Israelkunu tjuṭa pakuringkula uliringu tjiṇtu nyara palula. Panya nganmanytju Saulalu wangkara ngulutjunu wati uwankara. Paluru alatji tjananya wangkara painu, "Nyura nganmanytju mai ngalkuwiyangku wantima. Munuya tjananya pungkula wiyanjtjanungku kutju malangka palya ngalkunma. Tjinguru kutjupangku nganmanytju ngalkulampa nyara paluru iluku." Kaya wati Israelkunu tjuṭangku nguluringkula mai ngalkuntya wiyatū ngarangi kuwaripa.

Muniya wati panya tjuṭa anu putikutu panya puṇu tjatakutu. Ka puti nyara tjaṭangka tjuratja mantangka ngaringi. Kaya wirkanu panya palula panya tjuratja ngarintjala. Palu tjana mantintja wiyatū panya paluru tjana nguluringangi Saulalu panya kalkuntjitetjaku. Palu Jonathantu kulintja wiya palumpa mamangku Saulalu anangu tjuṭa wangkara ngulutjunkunytja. Munu paluru watarkitjangku puṇu mantjinu, munu tjaṭatjunu tjuratjangka, munu pakaltjingara anytjunu munu unngu wiruringu. Ka wati kutjungku wangkangu Jonathanta, "Kulila, nyuntumpa mamangku ngananaṭala palumpa tjaultji uwankarangka ngulutjunu alatji wangkara, 'Wati kutjupangku mai ngalkulampa, paluru iluku.' Kala kuwari mai ngalkuntja wiyanġuru uparingulta."

Ka Jonathantu wangkangu, "Ngayuku mamangku nyangatja kura palyanu ngura nyangaku. Panya ngayulu kuwari palyaringu tjuratja tjukutjuku ngalkuntjatjanu. Uti nyura tjaultji tjuṭaku nguranguru mai nganmanytju mantintjatjanungku ngalkunma alatjiṭu. Kala tjinguru winki mulapa

iluntanama wati panya Pilitjiyanya ngurara tjuta nganana mai pulka ngalkuntjatjanungku.”

31-35 Kaya tjintu nyara palula wati Israelkunu tjutangku Pilitjiyanya ngurara tjuta pungkula pungkula waintaringu. Munuya palulanguru paku pulka nyinangi. Munu paluru tjana tjanampa uwankara katingu tjipi, puluka tjuta kulukulu munu tjana paltjatjiratjarira pungkula iluntara kuka warpungkula ngalkunu kurangku milkali winki.

Ka kutjupangku wangkangu Saulala, “Nyawa tjana kurani Godanya munuya ngalkuñi kuka milkali winki.”

Ka Saulalu wangkangu, “Nyura kuraringu. Apu pala pulkaya ngalya-unṭura wanara tjura nyangangka kuwariṭu.” Munu paluru wangkangu, “Ankulaya wangka wati uwankarangka, kaya puluka tjananku kutjungku kutjungku ngalya-kati tjipi kulu munuya nyangangka pungkula ngalkunma. Tjana uti kuka milkali winki ngalkuntja wiyangku wantima panya alatji ngalkula tjana Godanya kurani.” Kaya uwankarangku kuka tjuta katingu nyara palulakutu munuya pungu. Ka Saulalu palyanu apu pitjilpa Godanya walkuntjikitjangku.

36-46 Palulanguru Saulalu wangkangu, “Arala kuwari Pilitjiyanya ngurara tjutakutu munula tjana kanyintja uwankara mantjila tjananya pungkula wiyanjtjanungku.”

Kaya wangkangu, “Palya, nyuntu wangkanyangkala uwankarangku wiru kulini.”

Palu wati panya tjukurtjarrangku wangkangu, “Wiya, wanyula Godala-warara tjapila, kalanya paluru nintilku nyaa palyantjaku.”

Ka Saulalu tjapinu Godala, “Nganana palya Pilitjiyanya ngurara tjuta ngulura wañantjikitja ankuku? Ka nyuntu wanyu nganananya iluntankunytjaku alpamilalku?” Alatji paluru Godala tjapinu. Palu tjintu nyara palula Godalu ngapartji wangkanytja wiya Saulala. Ka nyara palulanguru Saulalu palumpa tjaultji tjutaku mayatja tjutangka wangkangu, “Ngalya-pitjaya uwankara, kala ngurila nganalu kuwari kura palyanu. Munula ngurira nyakula wati palunya iluntankuku. Mulamulangkuña wangkanyi Godala mirangka, tjinguru ngayuku katjangku Jonathantu kura palyarampa paluru iluku.” Palu uwankaraya wangka wiya ngarangi.

Ka Saulalu piruku wangkangu wati Israelkunu tjutangka, “Nyura nyarangka kampa kutjupa ngara. Ka ngayuku katja Jonathannga ngali kampa kutjupa nyangangka ngaraku. Ka Godalu kampa kutju ngurkantankuku tjinguru nyuranya, tjinguru ngalinya.”

Kaya wangkangu, “Uwa palya, nyuntu wangkanyangkala palya kulini.”

Ka Saulalu Mayatja Godala tjapinu wangkara, “Nintinmani God tjukurpa tjukaruru. Nganalu kuwari kura palyanu?” Ka palulanguru puñu ngurkantankupai kutjara katu wañingu nyakunytjikitjangku, munuya nyangu kampa nyangatja nintinnyangka panya Saulanya pulanya katjarara. Kaya wati kutjupa tjuta ngurkantankunytja wiyatū ngarangi.

Ka Saulalu wangkangu, “Piruku wani. Ka tjinguru ngayunya kura nyinanyangka nintilku, mutta tjinguru ngayuku katja.” Ka arkara wañingu nyakunytjikitjangku. Ka Jonathannga ngurkantanu. Ka Saulalu wangkangu Jonathanta, “Wangkani nyaan wanyu palyanu.”

Ka Jonathantu wangkangu, “Ngayulu paltjatjiratjarira tjuratja punungka tjałatjunkula anytjuñu. Munuña palulanguru kutju iluku ngayulu.”

Ka Saulalu wangkangu palumpa katjangka, “Wiya nyuntu iluniyi alatjitu panya ngayulu kalkuñu ngalkunnyangka iluntankunytjikitjangku. Tjinguru nyuntu ilunytja wiyangkampa Mamalu ngayunya iluntankuku.”

Palu tjaultji tjutangkuya wangkangu Saulala, "Nyaakun Jonathannga iluntankuku? Paluru panya anangu Israelkunu tjuta kuwari wankarunu. Munu paluru uti ilunytja wiya nyinama, panya palunya Godalu alpamilanu alatjitu." Alatjiya Jonathanku anga-wangkangu Saulala. Ka Saulalu palunya iluntankunytja wiyaṭu.

Ka palula malangkaya piruku Pilitjiyanya ngurara tjuta pikangku waṭaparara pungkunytja wiyangku wantingu. Munuya malaku anu ngura walytjakutu.

47-52 *Uwa, Saulanya panya mayatja pulkaringu Israelku munu paluru tjaultji tjutatjarangku pikangku pungkupai Israelku pikaringkupai tjuta ngura winkingka para-arintara. Munu paluru wati Israelkunu kutjupa kunpu rapa pulka ngaranyangka nyakula palunya ngurkantara tjungulpai palumpa tjaultji tjutangka tjanampa pikangku pungkunytjaku.*

15

Saulalu Tjana Ama-likakunu Tjuta Pungkula Wiyantja

1-3 *Ka ngula Samuelsu pitjala wangkangu Saulala, "Mayatja Godalu ngayunya nganmanytu iyanu nyuntunya mayatja pulka ngurkantara tjunkunytjaku anangu Israelkunu tjuta atunymara kanyintjaku. Ka kulila palumpa tjukurpa. Nyanga alatji paluru wangkanyi,*

'Iriti panyaya Israelkunu tjutaya ngalya-pakanu Itjipalanguru ngura Kainanku ankunytjikitja. Ka panya wati Ama-likakunu tjutangku tjananya angatjunangi Kainantakutu ankunyangka. Ka ngayulu nyangu tjananya alatjingannyangka mununa kuwari nyuranya iyanı ankula pikangku tjananya pungkunytjaku munu tjanampa uwankara wiyanjtaku. Kutjupa wanka nyinanytjaku wantinytja wiyangku uwankara iluntara wiyalu wati, minyma, tjitji, munu puluka, tjiipi, munu tangkiyi, kamula kulukulu.'

Alatji Samuelsu wangkangu Saulala.

4-9 *Ka Saulalu mulapa palumpa tjaultji tjuta altingu munuya tjunguringkula anu Ama-likakunu tjutaku ngurakutu. Munuya anangu tjuta pungkula wanangingi munu tjananya uwankara iluntanu anangu panya Ama-likakunu tjuta. Palu Saulalu tjanampa mayatja iluntankunytja wiyangku wanka wantingi. Munu tjiipi, puluka, kanpi pulka tjuta kuļu iluntankunytja wiyangku wantingu munuya nyurka-nyurka tjuta kutju iluntanu.*

Godalu Saulanya Wantinytja

10-12 *Ka palula malangka Godalu Samuelsa nyanga alatji wangkangu, "Saulalu ngayula kulintja wiyangku tungunpungu. Ka ngayulu pulkara tjituru-tjitururingu panya ngayulu palunya mayatja pulka tjukaruru nyinanytjaku ngurkantanu. Ka paluru ngayuku tjukurpa kulintja wiya alatjitu."*

Ka Samuelnga kulira unngu mirpañaringi Saulalanguru munu paluru ulara Mayatja Godala tjapiningi mungangka rawangku. Munu mungawinki pakara anu Saulanya ngurintjikitja. Ka anangu kutjupangku palula wangkangu, "Wiya, Saulanya anu ngura Kaamultakutu. Munu kunyu nyara palula pitjilpa palyanu palumpa ruurutjara anangu malatja tjutangku nyakula palunya ruurungku kulintjaku. Munu kunyu palula malangka anu ngura Kilkaltakutu."

13-15 *Ka Samuelnga ankula wirkanu Saulala. Ka Saulalu wangkangu, "Mayatja Godalu nyuntunya pukulmanama. Ngayulu panya Godalu wangkanyangka wanganarangku kulinu."*

Palu Samueltu palula wangkangu, "Kaṇa nyangatja nyaaku kuwari kulini tjüpi munu puluka tjuta wangkara waninyangka."

Ka Saulalu ngapartji wangkangu, "Wiya, ngayulu tjaultji tjutangkuya tjüpi munu puluka kanpi pułka tjuta ngurkantara ngalya-katingu Amalikakunu tjutaku nguranguru. Panya tjananya kuka nyanga palunya tjananya pungkula ungkula Godanya walkuntjikitja mukuringanyi. Palu kutjupa tjutala pungkula wiyanu."

16-19 *Ka Samueltu Saulanya wangkangu, "Wiyariwa munu kulila ngayulu nyuntula wangkanyangka panya Godaluni ngayula wangkangu mungangka."*

Ka Saulalu wangkangu, "Uwa, tjakultjurani."

Ka Samueltu palula wangkangu, "Panya ngañmanytjun nyuntu walyt-jangku ngaltutjara kulira ngalturingangi. Palu Godalu nyuntunya ngurkan-tanu Israelku mayatja pulka nyinanytjaku. Munu panya paluru nyuntunya wituṇu ankula anangu nyara mamutjara tjuta iluntara wiyanjtaku Amalikakunu tjuta. Palurunta wangkangu tjananya uwankara alatjitu iluntara wiyanjtaku tjanampa kuka tjuta kułukulu. Kan panyatja nyaaku nyuntu Mayatja Godanya kulilwiyangku wantingi? Nyaaku nyuntu tjanampa kuka wiru tjuta katingu iluntara wantinytja wiyangku?"

20-23 *Ka Saulalu wangkangu, "Palu ngayulu Godala kuliningi. Mununa paluru wangkanytja palyanu. Panya anangu Amalikakunu tjutana iluntanu mununa tjanampa mayatja pułka kutju wanka ngalya-katingu iluntankunytja wiyangku. Kaya tjaultji tjutangku kuka, puluka, tjüpi wiru kanpi pułka tjuta kułukulu ngalya-katingu ngula pungkula pitjilta katu warungka tjunkula Godanya ungkula walkuntjikitjangku."*

Palu Samueltu ngapartji wangkangu, "Wiya kulila, nyaaku Godanya pułkara pukularipai? — kuka warungka kutjantitjaku, munta palunya wanganarangku kulintitjaku? Uwa, Godanya mukuringanyi nyuntu palumpa mulamularingkula wanganarangku kulira palyantjaku paluru wangkanyangka. Nyanga palulanguru paluru pułkara mulapa pukularipai munu panya kuka wiru tjuta ungkunyangka mała kutju kulira tjukutjuku pukularipai.

"Panya nyuntu Godala wanganarangku kulilwiyangku wantirampa kura pułkaringu wati panya kaṇany-kaṇanytju god ngalypa-ngalypa walkulpai purunyapa. Nyuntu panya Godala kulintja wiyangku wantingu palumpa tjukurpa paluru wangkanytja. Palulanguru paluru kuwari ngapartji nyuntunya wantinyi mayatja pułka nyinanytjaku wiya."

24-26 *Ka Saulalu Samuelta wangkangu, "Munta, mulapa ngayulu kura palyanu, mununa ngayulu Godaku tjukurpa kulira wantingu. Mununa nyuntu wangkanyangka palyantja wiyatū. Panya ngayulu anangu tjutaku nguluringangi mununa tjananya wangkanyangka kutju palyaningi. Mununa kuwari nyuntula ngatjini ngayunya kura nyanga palyantitjanguru kaly-pangku wantingtjaku. Wanyu pitja ngayula tjungu Kilkaltakutu, munuli Godanya walkula tjungungku nyuntu ngali."*

Palu Samueltu wangkangu Saulala, "Wiya, ngayulu nyuntula ankunytja wiya, panya nyuntu Godaku tjukurpa kulintja wiyangku wantingu. Ka kuwari paluru ngapartji nyuntunya mayatja pułka Israelku nyinanytjaku wiyanu."

27-31 *Ka Samuelnga para-małakukutuṇu ankunytjikitja. Ka Saulalu palumpa mantara witinu, ka tjilpiraranu. Ka Samueltu wangkangu palula, "Mayatja Godalu nyuntu panya mayatja pułka nyinanytja wiyanu, munu wati kutjupa ngurkantanu nyuntumpa arangka mayatjarira tjukaruru*

nyinanytjaku. Godanya panya mayatja pulka mulapa, rawa nyinapai wiyaringkunytja wiya. Paluru ngunti wangkapai wiya. Paluru anangu mantatja purunypa wiya, munu paluru palumpa kulintja kampa kutjupankupai wiya.”

Ka Saulalu ngapartji wangkangu, “Mulapa ngayulu kura palyanu. Palu wanyuni malaku pitja ngayula tjungu kali tjungungku Godanya walkunma anangu tjlpi wararitja tjutangka mirangka munu anangu Israelkunu tjutangka mirangka kuлу. Kaya nyakula ngayunya palya kulikku.” Alatji Saulalu wangkangu Samueltu. Ka paluru mulapatu malaku anu palula tjungu munu pula Godanya walkunu anangu tjutangka mirangka.

³²⁻³⁵ *Ka palulanguru Samueltu wangkangu, “Ngalya-kati wanyu wati panya Ama-likakunu tjutaku mayatja pulka.” Ka mulapatu paluru pitjangu Samueltakutu pulkara tjititingkula kulira, “Mulapantinatju kuwari iluku.” Ka Samueltu palula wangkangu, “Panya nyuntu tjula pulkangka anangu tjuta pungkula iluntanu, kaya minyma ngunytju tjuta tjituru-tjitururingu. Ka nyara palu purunypa kuwari nyuntumpa ngunytju ngapartji tjituru-tjitururiku.” Munu palulanguru Samueltu mayatja panya palunya katara mutun-mutunmanu.*

Munu palulanguru Samuelinga anu ngura ini Raamalakutu. Ka Saulanya anu palumpa ngurakutu. Ka Samueltu palunya piruku nyakunytja wiya alatji tu nyinara tjlpiringu. Ka Godanya pulkara tjituru-tjitururingu Saulaku, panya paluru nganmanytju palunya Israelku mayatja pulka tjukaruru nyinanytjaku ngurkantara tjunu, palu paluru Godala tungun-pungu.

16

Mayatja Godalu Davidanya Ngurkantankunytja Israelkunu Tjutaku Mayatja Pulka Nyinanytjaku

¹ *Ka ngula Mayatja Godalu Samueltu wangkangu, “Nyaakun Saulaku rawa alatji tu tjituru-tjitururingyi? Ma-wanti! Panya ngayulu palunya wantingu Israelku mayatja pulka rawa nyinanytjaku-tawara. Ka kukaku pala yuruwilyangka alipa uwila tjutira tjaalyngaratjura kati ngura ini Pitjilimalakutu, munun nyara palulalta nyakuku wati ini Jesse-nya, panya palumpa katjana ngayulu ngurkantanu Israelku mayatjarinytjaku.”*

² *Ka Samueltu alatji wangkangu, “Wiya, putu nguwanpana alatji palyani. Tjinguruñitju Saulalu ankunyangka kulira ngayunya iluntankuku.”*

Ka Mayatja Godalu palula wangkangu, “Wanyuni kulila munu pala puluka kulunypa kati Pitjilimalakutu munu wirkara wati pulka tjutangka alatji ma-wangka, ‘Nyanganjana kuwari kuka katingu nyurala tjunguringkula pungkula paura Mayatja Godanya ungkula pukulmankunytjikitjangku.’ ³ *Alatji tjanala wangka, munu wati ini Jesse-nya kuлу alti nyurala tjunguringkunytjaku. Panya nganmanytjuна wati panya palumpa katja kutju ngurkantanu Israelku mayatjarinytjaku, mununa kuwari nyanga katja panya palunyalta nyuntula nintini uwila palula katangka tjutintjaku.”**

⁴ *Ka mulapatu Samueltu wangañarangku kulira puluka kulunypa mantjira ma-katingu Pitjilimalakutu. Kaya wati panya pulka tjutangku ngalya-pitjanyangka nyakula ngaparikatingu palulakutu, munuya*

* ^{16:3} *Tjakangkuya mayatja ngurkantara tjunkunytjikitjangku alatji palyalpai anangu tjutangku nyakula kulintjaku, “Munta-uwa, mulapa nyangatja nganampa mayatja.”*

ngulungulungku tjititingkula kulu tjaⁿpingi palula, “Nyaa? Pikan pitjangu? Munta kalypan?”

⁵ Ka Samueltu wangkangu tjanala, “Ngayuluna nyuralakutu kalypa alatjitu pitjangu nyuntu nganana tjunguringkula Mayatja Godanya kuka nyangatja pungkula ungkunytjikitja. Kayanku Godala mirangka rapa ngaranytjikitjangku milmilmanama, munuya palulangurulta ngayula tjunguriwa kuka nyangatja Mayatjanya ungkunytjikitjangku.” Alatji Samueltu tjanala wangkangu, munu palulangurulta Jesse-nya tjananya palumpa katja tjuta kulu altira tjananya paluru milmilmanu tjana kulu palyanyku ngaranytjaku. Kaya paluru tjana kulu wati panya pulka tjutangkalta tjunguringu.

⁶ Ka Samueltu nyangu Jesse-ku katja nganmanyitja wati ini Iliyapanya, munu nyakulalta unngu kulinungi, “Ai, wati nyanga palunya alatjitu-manti Mayatjalumpa ngurkantanu.”

⁷ Palu Mayatjalu Samuelta wangkangu, “Wiya. Nyuntu palunya nyakula alatji kulini, ‘Wati nyanga paluru wara wiru munu kunpu pulka mulapa, nyanga palunya-manti Mayatjalumpa ngurkantanu.’ Palu nyuntu kulintja palatja, ngayulu kulintja wiya, panya anangungku utitja nyakupai, palu ngayuluna unngutja nyakupai, kurunpa unngutja. Palu wati nyangatjana ngurkantankunytja wiyatu.”

⁸ Ka Jesse-lu katja kutjupa altingu ini Apina-tapanya, ka Samuelta kuranyulta ankula ngarakatingu. Ka Samueltu wangkangu, “Wiya, nyanga palunya kulu Mayatjalu ngurkantankunytja wiyatu.”

⁹ Ka Jesse-lu piruku wangkangu katja kutjupa ini Tjaamanya Samuelta kuranyu ankula ngaranytjaku, ka wangkangu, “Wiyatu, nyanga paluru kulu wiya.”

¹⁰ Ka piruku Jesse-lu wangkangu katja kutjupa tjutangka ngapartji ankula Samuelta kuranyu ngaranytjaku wanapari wanapari katja panya 4-palangka, palu Samueltu tjananya uwankara nyakula wara wangkangu, “Wiya, katja nyanga 7-pa uwankarata Mayatja Godalu ngurkantankunytja wiya.”

¹¹ Munu Samueltu Jesse-la tjaⁿpinu, “Nyuntu katja kutjupa kanyini?”

Ka Jesse-lu wangkangu, “Uwa, kutjultatju nyinanyi malatja. Nyara paluru panya yangupala tjukutjuku. Paluru ilytjingka tjiipi tjuta kanyini.”

Ka Samueltu wangkangu, “Wanyu wati kutjupa witula palunya altira ngalya-katinytjaku. Kala paluru pitjanyangka kutju kuka panya pungkula paulku.”

¹² Ka mulapata Jesse-lu witunu palumpa panya katja malatjaku Davi-daku. Ka ankula mantjira palunya ngalya-katingu. Panya paluru yangupala kunpu pulka, yunpa wiru mulapa, kuru kulu kaltraa wirutjara.

Ka Mayatja Godalu Samuelta wangkangu, “Pala paluru! Ka nyuntu uwila tjutila palumpa katangka, kaya Israelkunu tjutangku nyakulalta kulilku, ‘Mulapa nyanga palunya panya Godalu ngurkantanu nganampa mayatjarira nyinanytjaku.’”

¹³ Ka palulanguru Samueltu yuruwilya panya alipa uwiltjara mantjinu munu kuta tjutangka mirangka Davidala katangka uwila tjutinu. Ka mapalku alatjitu Mayatjaku kurunpa palula tjarpangu munu nyara palulanguru rawa alatjitu palula tjungu nyinangi.

Kaya palulanguru kuka pungkula para tjara tjuna Godaku munuya tjara kutjupa ngalkunu. Ka palula malangka Samuelnga ngurakutu malaku anu, Raamalakutu.

Davidanya Saulaku Warkaripai

¹⁴ Ka Mayatja Godaku kuruntu Saulanya wantikatingu, munu Godalu kurunpa kutjupa palulakutu iyanu mamu palula tjungu nyinanytjaku, munu palunya ngulutjingantjaku. ¹⁵ Ka Saulaku warkaripaingku palula wangkangu, "Kulila, kurunpa kutjupangkunta nyuntunya ngulutjingani mamungku panya Godalu iyantjitungku. ¹⁶ Wanyula wati kutjupa ngurilku, kita wirura wangkatjingalpai inma mayu wirutjara, ka mamungku nyuntunya ngulutjingannyangka wati palurulta nyuntumpa wangkatjingalku, kan kuliralta palyaringkuku."

¹⁷ Ka Saulalu wangkangu, "Uwa, palya. Nguriraya ngalya-kati."

¹⁸ Ka wati warka kutjupangku wangkangu Saulala, "Wati ini Jesse-ku katja Bethlehemala nyinanyi — nyara paluru kita wirura wangkatjingalpai. Paluru wati tjaultji rapa mulapa munu yunpa wiru mulapa munu wirura wangkapai ka Mayatja Godanya palula tjungu nyinanyi."

¹⁹ Ka Saulalu wati tjakulpa iyanu Jesse-lakutu munu wangkangu alatji, "Saulalu wangkangu nyuntumpa katja kunyu iyala Davidanya panya tjiipi atunymankupainya."

²⁰ Ka Jesse-lu mai nyuma tjuta munu waina tjuta kulu mantjira yakutjangka karpira tangkiyingka tjunu munu palulanguru nanikuta yangupala witinu. Munu Davidanya wangkangu Saulalakutu katintjaku.

²¹ Ka mulapatu Davidalu Saulanya katira ungu munu palumpa tjaatarira warkaringi. Ka Saulalu palunya nyangangi wirura warkarinyangka munu pulkara pukularingu, munu palunya warka kutjupalta ungu palumpa kułata, munu tjula wara, kutitji kulu para-katirinkunytjaku.

²² Ka tjintu kutjupa Saulalu piruku wati kutjupa iyanu Jesse-lakutu nyanga alatji wangkanytjaku, "Pulkarana mukuringanyi nyuntumpa katjaku. Wanyu wirungku wantima ngayula rawa nguwanpa nyinanytjaku." Ka mulapatu mamangku panya palunya markunu.

²³ Ka mamuku kuruntu Saulanya ngulutjingannyangka Davidalu kita wangkatjingara inkapai, ka mulapatu wangkatjingannyangka paluru palyaringkupai, ka mamungku palunya wantikatipai.

17

Wati Kalaitjalu Israelkunu Tjuṭa Mirara Wangkara Ngulutjingantja

¹ Kaya wati Pilitjiyanya ngurara tjuṭa warmalarira anu tawunu ini Tjakulakutu manta panya Judah-lakutu Israelkunu tjuṭa pungkunytjikitja. Munuya ilaringkula putingka ngura tjunu ngura ini Ipitja-Tamimila ngura ini Tjakula pulala Atjikala ngururpa. ²⁻³ Kaya Saulanya tjana Israelkunu tjuṭa ngapartji warmalarira anu munuya wimaru ini Iilala ma-wirkana puli katu munuya ngura tjunkula ritiringangi Pilitjiyanya ngurara tjuṭa pikangku pungkunytjikitja panya tjanaya wimaru kampa kutjupangka nyinangi.

⁴ Ka wati nyara palula tjanala tjungutja wati tjangara wara pulka mulapa nyinangi 3 metre nguwanpa. Nyara paluru panya ini Kalaitjanya tawunu ini Kaatjanya ngurara. ⁵ Paluru ayananguru palyantja mukaṭa wituwitu katangka kanyiningi munu kuuta ngapartji palu purunypatu ayananguru palyantja kunpu pulka kanyiningi 57 kilogram. ⁶ Munu paluru tjal pangka kulu palu purunypatu ayana wituwitu tjunkula kanyiningi. Munu tjanangka kułata wara karpintja kanyiningi. ⁷ Ka palumpa kułata wara mulapa waṭa pulkatjara. Wata paluru ayananguru palyantja kunpu

mulapa 7 kilogram*. Ka wati kutjupangku Kalaitjala kuranyu ankula palumpa kuṭitji katipai.

⁸ Ka tjangara panya Kalaitjalu ngarala mirara wangkangi wati Israekunu tjutangka, “Awa! Ngayuku nyura tjaturinganyi ngayunya pungkunytjikitja? Wiya, ngayuluña miriputju alatjitu ka nyura wiya nguwanpa Saulaku kutju warkaripai. Palu wati kunpuyanku nyuralan-guru ngurkantara ngalya-iyala ngayula pikaringkunytjaku ⁹ Ka paluru ngayunya iluntankunyangkampa warmala nyanga ngayuku tjuṭa nyurampariku, palu ngayulu wati palunya iluntankunyangkampa nyura nganampariku.”

¹⁰ Munu tjangara panya paluru kañany-kañanytju wangkangi, “Iii! Walangkuwi pikati palunya ngalya-walatjura ngayunya pungkunytjaku kaña palunya wiyalku alatjitu.”

¹¹ Ka paluru mirara pauntjingara wangkanyangka Saulanya tjana kulira pulkara nguluringkula tjitingangi.

Jesse-lu Davidanya Warmala Tjuṭakutu Iyantja

¹² Ka Davidaku mama Jesse-nya wati panya Ipaṛakunu tawunu Beth-lehemanya ngurara manta panya Judah-la ngururpa nyinangi. Wati tjilpi paluru katja 8-tjara. ¹³⁻¹⁴ Panya palumpa katja ngañmanyitja ini Iliyapanya, ka paluru pininu ini Pinatapanya, ka Pinatapalu pininu Tjaamanya. Katja nyanga mankurpaya ngañmanypa tjunguringu Saulaku warmala tjuṭangka munuya paṭara nyinangi wati warmala Pilitjiyanya ngurara tjuṭa pungkunytjikitja. Ka Davidanya panya Jesse-ku katja malatja. ¹⁵ Paluru panya palumpa mamaku tjiipi tjuṭa atunymankupai ngura Bethlehemala itingka munu kutjupa-aṛa ankula kuṭa tjuṭa nyakupai tjana pikakitja paṭara nyinanyangka, munu nyakula malaku ankupai ngurakutu tjiipi panya tjuṭa kanyintjikitja.

¹⁶ Ka wati panya Kalaitjanya mungawinki tiṭutjara mungartji tiṭutjara tjiṇtu 40-aṛa alatjitu ngarala ngalytjurmarā mirara wangkangi alatji, “Wati pała nyurampa tjuṭayanku ngalya-walatjura ngayunya pitjala pungkunyt-jaku.”

¹⁷ Ka tjiṇtu kutjupa Jesse-lu wangkangu Davidala, “Kuṭanya tjana nyara warmala tjuṭangka tjungu nyinanyi patu, ka walangku wanyu mai nyanga tjanampa ma-kati. Nyangatja mai uninypa pauntja 10 kilogram munu mai nyuma 10-pa. ¹⁸ Munu tjiitja nyanga tjuṭa kuļu katira nyuntumpa kuṭa tjuṭaku mayatja uwa. Munu tjanala ma-tjapila, ‘Palya nyura nyinanyi?’ Munu tjana wangkanyangka kulira pitjalani tjakultjura.”

¹⁹ Kaya mayatja Saulanya tjana Davidaku kuṭa tjuṭa kuļuya wati warmala winkitjara paṭara nyinangi wimaru ngura ini lila Pilitjiyanya ngurara tjuṭa pungkunytjikitja.

²⁰ Ka Davidalu palumpa mamangka wangañarangku kulinu munu munga-mungangka pakara wati kutjupa altingu pitjala tjiipi kanyint-jaku. Munu mai panya tjuṭa mantjira anu warmala tjuṭaku ngurakutu. Munu tjanampa ngurangka wirkara ma-nyangu tjana pikakitja ma-pakannyaangka. Tjanayanku kunpuringkunytjikitja mirara waṇingi.

²¹ Munuya wati panya Israelkunu tjuṭangku ngura tjananku wantikatira wimarungka ngalya-ukalingu tjanalakutu, kaya Pilitjiyanya ngurara tjuṭa ngapartji ngalya-pitjangitu, munuya ngururpa ngarangu pikakitja, munuyanku ngaparku nyangangi.

* ^{17:7} 7 kilogram panya nyaā puṛunypa ...

²² Ka Davidalu mai ungukukatingu wati tjanampa mai atunymankupai, munu wirtjapakanu kuṭa tjuta tjapira kulintjikitja, “Palya nyura?” ²³ Ka Davidanya ngarala kuṭa tjutangka wangkanyangka wati Pilitjiyanya ngurara wati panya Kalaitjanya ngalya-kuranyuringu tjanalakutu munu mirangu wati Israelkunu kutju ngalya-walatjunkunytjaku paluru pulanku pungkunytjikitjangku. Ka Davidalu miranyangka kulinu.

²⁴ Kaya Israelkunu tjutangku wati panya Kalaitjanya ngarala miranyangka kulira ngulu małaku ma-wirtjapakanu ngurakutu.

²⁵ Munuyanku ngaparku wangkangi, “Panya paluru rawangku tjintu winkingku nganananya ngulutjingara pikangku wangkanyi. Ka Saulalu ngananala wangkangu alatji, ‘Wati kutjupangku tjinguru ankula palunya iluntankunyangkampa ngayulu palunya wiru mulapalta ungkuku, mununa ngayuku unṭalpa kuri altinytjaku ungkuku. Ka paluru munu palumpa waltyjapiti uwankarangku ngayunya tax mani rawangku ungkunytja wiyaringkuku.’ Alatji Saulalu wangkara kalkunu.”

²⁶ Ka Davidalu wati tjaultji kutju ila ngaranyangka tjapinu munu wangkangu, “Wati warmala nyarangkulanya pulkara ngulutjingara kurani anangu Israelkunu tjuṭa. Ka uti wati kutjupangku wati nyara palunya iluntankuku, ka piruku ngalya-ngarala ngalytjurmarra miranytja wiyaringkuku. Palu nganampa Mayatjangku nyaa ungkuku wati kutjupangku palunya iluntankunyangka?”

²⁷ Ka wati tjaultji paluru Davidala tjukurpa panya palunyat wangkangu, panya mayatja Saulalu ungkunytjikitjangku kalkuntja.

²⁸ Ka Davidaku kuṭa Iliyapalu kulinu paluru tjaultjingka wangkanyangka munu mirpañarira palunya wangkangi, “Nyaakun tjaultji tjutangka ngarala wangkanyi? Nyuntu uti anama ngurakutu tjiipi panya tjuṭa kanyintjikitja. Kurau pitjangu wati Israelkunu tjuṭa tjananku pikangku pungkunyangka nyakunytjikitja wati warmala Pilitjiyanya ngurara tjutangku.”

²⁹ Ka Davidalu wangkangu, “Wiya. Ngayuluṇa kutjupa kutjupa kurantja wiyat. Tjapiningi kutjuṇa.”

³⁰ Ka Davidalu tjaultji kutjupangka piruku tjapinu, ka tjukurpa panya palunyat wangkangu panya tjaultji kutjupangku nganmanytja wangkanytjanya.

³¹ Ka tjaultji panya paluru Davidala kulintjatjanungku ankula Saulala tjakultjunu, ka paluru Davidanya altinytjaku witunu. ³² Ka paluru wirkara Saulala wangkangu, “Ulla wati nyara palunya ngulu wiyangku rapangku pungama. Wanti kaṇa ngayulu palunya iluntara.” Alatji Davidalu wangkangu.

³³ Ka Saulalu palula wangkangu, “Wiya nyuntu yangupala kulunypa, nyuntu putu palunya punganyi. Wati kuṇpu pulka mulapa nyaratja. Paluru tjaultji rawa mulapa nyinanytja tjtjinguru alatjiṭu.”

³⁴ Ka Davidalu wangkangu Saulala, “Ngayulu ngayuku mamaku tjiipi atunymankupai, ka lionpangku munu barangku pitjala tjiipi patjara katipai, ³⁵⁻³⁶ kaṇa waṇara inura palunya tjananya pungkupai alatjiṭu, kaya wantikatira ngulu wirtjapakalpai. Palu liontu mutta barangku ngayunya arkara patjannyangkaṇa ngayulu lirintara iluntankupai. Mununa ngayulu wati nyara kurakura palu purunypaṭu palyalku. Paluru panya wati Godaku waltya tjuṭa titutjarangku kurara punganyi. ³⁷ Panya nganmanytjuṇi ngayunya Mayatja Godalu wankarunu liontu barangku

patjantjaku-tawara munuṇi palu purunypaṭu kuwari wankarunkuku wati nyara tjangara paluru ngayunya iluntankunytjaku-tawara.”

Ka Saulalu kuliṛa palyanmanu, “Palya. Ankula palunya puwa, kañanku Mayatja Godala tjapilku nyuntunya ilangku ma-katinytjaku.”³⁸⁻³⁹ Munu Saulalu palumpa mantara panya kuṇpu ungu Davidanya tjarpanytjaku. Ka paluru mukaṭa ayananguru palyantja katangka tjarpatjunu munu kuuta ayanatjara karpinu munu tjuṭa waṛa karilta karpiṛa tanpaṇu, munu arkara ma-pitjangu. Palu paluru puṭu nguwanpa anangi ulytja pulkatjara, panya paluru ngurpa nyara palu purunypa tjutaku. Munu paluru wangkangu Saulala, “Wiya ulytja nyanga kuṇpu tjutatjarangkuṇa puṭu punganyi. Ngurpaṇa kuṇpu pulka kanyilpai wiya.” Munu paluru araltjara wantikatingu.

⁴⁰ Munu Davidalu tjukara munu tjangaya palurunku mantjira mapakaṇu, munu karuwanu ma-itipirira puli wiruly-wirulypa kutjara mankurpa mantjira yakutjangka tjarpatjunu munu wati panya palulakutu ma-ilaringu Kalaitjalakutu.⁴¹ Ka wati paluru ngapartji ngalya-ilaringutu, ka tjaultji panya palumpa kutitji katipai palula kuranyu tjungutu pitjali-nangi.

⁴²⁻⁴³ Ka Kalaitjalu ngalya-ilaringkula nyakula kulinu, “Munta, tjitji nyiñkampal nyangatja.” Munu paluru anara ikaringangi, “Ngayulakutun-taya witura iyanu tjitji tjukutjuku?” Munu paluru Davidanya wangkangu, “Punutjara pitjanytja wiya! Ngayulu papa wiya.” Munu paluru Pilitjiyaku godangka wangkangu Davidanya pikantankunytjaku.⁴⁴ Munu Kalaitjalu mirara wangkangu Davidanya, “Walaltatju pitja kañanta pungkula wani tjulpungku inurangku ngalkuntjaku.”

⁴⁵ Ka Davidalu Kalaitjanya alatji wangkangu, “Munta, nyuntumantin tjulatjara kulaṭatjara pitjanyi ngayunya iluntankunytjikitja, palu ngayulu nyuntula pikaringkunyangka Mayatja Godalu witulya pulkangku ngayunya alpamilanı, Israelkunu tjutaku panya mayatjangku. Ka nyuntu tjananya kurarampa palunya kuļu kurańi.⁴⁶ Ka kuwari paluru ngayunya alpamilanı nyuntunya wiyanjtaku. Ngayulu nyuntunya atura punkatjinggařa kata katalku munuṇa kutjupa pala tjuṭa kuļu tjungura wiyaliku uwankara tjulpungku inura tjutangku ngalkuntjaku. Kaya nyanga palulanguru manta winkitjangku kuliklu panya Israelkunu tjutaku God kuṇpu pulkanya.⁴⁷ Ka añaŋgu nyangantu kuliklu Mayatja Godalu tjulangka kulaṭangka wankalpai wiya. Paluru tiṭutjara alatjitu waintaripai pikangka munulanya kuwari paluru alpamilalku nyuranya pungkula wiyanjtaku.” Alatji Davidalu Kalaitjala wangkangu.

⁴⁸ Ka wati panya paluru Davidalakutu ngalya-ilaringu, ka Davidanya mapalku palulakutu ma-wirtjapakanu.⁴⁹ Munu puli yakutjanguru mantjinu munu tjangayangka tjunkula uritjingařa Kalaitjanya ngalya atuṇu, ka puli palula tarpangu alatjitu, ka yunpanguru mantangka punkaṇu.⁵⁰ Uwa nyangatja Davidalu Kalaitjanya tjangayangka kutju atura iluntanu tjulangka wiya.⁵¹ Munu paluru palulakutu mapalku wirtjapakara tjula panya palumpa mantjinu munu kata kaṭanu. Kaya Pilitjiyanya ngurara tjutangku palunya kata katannyangka nyakula ngulu wirtjapakanu.

⁵² Kaya Israelku tjaultji tjutangku munu Judah-ku tjaultji tjutangku pulkara mirara ngulura ma-watarparaṇu warmala panya tjuṭa ngura ini Kaatjalakutu munu tawunu ini Ikarantakutu. Munuya uwankara alatjitu iluntara wiylkatingi, kaya ilunytja iwarangka ma-ngarira wañaningi

tawunu ini Tjaaraimalanguru tawunu ini Ikarantakutu munu Kaatjalakutu kulu.

⁵³ Munuya wiyingkula ngapari pitjala Pilitjiyanya ngurara tjutaku ngura ultungka tjarpara kutjupa kutjupa uwankara tjana wantikatinjtja mantjira katingu tjanampa ngurakutu. ⁵⁴ Ka Davidalu Kalaitjanya kata mantjira katingu Jerusalemalakutu munu palumpa panya ulytja tjuta kulu paluru mantjinu munu palumpa tiintangkalta tjunkula wantingu.

Saulalu Davidanya Nyakunytja

⁵⁵ Ka Saulalu Davidanya pika ankunyangka nyangangi wati Kalaitjaku, munu paluru wati tjaultji tjutaku mayatjangka tjapinu wati ini Apanala. “Wati nyanga yangupalampa nganaku katja?”

Ka wangkangu, “Wampa, ngurpana.”

⁵⁶ Ka Saulalu witunu, “Ankula tjapira kulila.”

⁵⁷ Ka Davidanya ngurakutu malaku aruringu wati panya Kalaitjanya iluntankunytjatjanu kata winkitjara. Ka wati panya Apananya palulakutu ngaparikatingu munu palunya katingu Saulalakutu kata winkitjara. ⁵⁸ Ka Saulalu tjapinu Davidanya, “Wati ngana! Wanyuni tjakultjura! Nganaku katjan?”

Ka palurunku utira tjakultjunu, “Ngayuluna Jesse-ku katja malatja. Nganana panya Bethlehemya ngurara.”

18

¹ Ka paluru pula wangkara wiyingkunyangka Saulaku katja Jonathannga Davidaku malparingu munu paluru Davidaku pulkara alatjitu mukuringangi. ² Ka tjintu nyanga palulanguru Saulalu palunya rawangku kanyiningi mamakutu iyantja wiyangku.

³ Ka Jonathannga Davidaku pulkara mukuringkula palunya kalkunu pula tjungu malparara titutjara nyinanytjikitjangku. ⁴ Munu palulanguru kuuta anangitja araltjara Davidanya ungu, mantara panya pikakitja paluru tjarpapainya kulu, munu tjula wara, punara, pulta kulu palunya ungu.

⁵ Ka Saulalu Davidanya rawangku iyaningi tjaultji tjutatjara ankula anangu kutjupa tjutangka pikaringkunytjaku mirpantju panya tjutangka. Kaya paluru tjana titutjarangku alatjitu pungkukatingi. Ka palulanguru Saulalu Davidanya ngurkantara tjunu palumpa tjaultji tjuta mayatjangku kanyintjaku, kaya wati tjaultji tjuta palumpa pulkara pukularingi, munuya palumpa tjanampa mayatja-mayatja tjuta kulu palumpa pukularingi.

Mayatja Saulanya Davidaku Nyararingkunytja

⁶ Ka Davidalu Kalaitjanya iluntankunyangka malangka tjaultji panya tjuta ngura walytjakutu walytjakutu anangi. Kaya Saulanya tjana ngura tjutangka wirkankunyangka minyma tjuta tjanampa nyakula pulkara pukularira mirrawaningi, munuya inma pukultu inkara nyapira wangkatjingara walkuningi. ⁷ Alatjiya wangkara inkangi,

“Saulalu warmala tjuta iluntanu tjinguru nampa nyangatja 1,000, palu Davidalu mungiliyi mulapa iluntanu nampa nyangatja 10,000!”

⁸ Ka Saulalu inma nyangatja kulinu munu pulkara mirpanaringu, munu unngu kuliningga, “Ai! Davidanya nyangantu pulkara mirrawaninyi paluru winki nyaruntja ngayula munkara. Tjinguruya mukuringanyi Davidaku mayatjarinytjaku ngayuku arangka.” ⁹ Munu palulanguru

Saulanya Davidaku nyararingangi munu paluru palunya tiṭutjarangku nyakula aruningu.

¹⁰ Ka tjintu kutjupa Godalu piruku mamuku kurunpa walatjunu mayatja panya Saulalakutu, ka palula kurunta unngu tjarpangu munu palunya kurara pungangi, ka paluru kawakawaringkula wali palumpangka unngu para-ngarala mirangi. Ka Davidalu Saulaku walingka kita wangkatjingga ningi, panya paluru rawangku alatjinkupai. Ka Saulalu kuļata marangku kanyiningi, ¹¹ munu unngu kuliningi, “Kuvariṇa palunya wakara alatjitu wall pangka tjakatjunanyi.” Munu paluru kuļata panya Davidalakutu ma-waṇingu kutjara-aṛangku, ka paluru tjirkaṇu ka ala wakaṇu.

¹² Ka Mayatja Godanya Davidala tjungu nyinangi, palu Saulanya paluru wantikatingu. Ka palulanguru Saulanya Davidaku nguluringangi.

¹³ Munu paluru Davidanya tjuṇu tjaultji 1,000-ku mayatjarinytjaku munu palunya tjananya witura iyaṇu ankula mirpaṇtju panya tjuṭangka pika pungkunytjaku. ¹⁴ Ka Mayatja Godanya Davidala tjungu nyinanyangka paluru tjana mirpaṇtju panya tjuṭa tiṭutjarangku pungkula waintaringi.

¹⁵ Ka Davidalu rawangku pungkunytja Saulalu ruuru kuliningi munu palulanguru palumpa pulkara nguluringangi. ¹⁶ Palu aṇangu Israelnga ngurara munu Judah-nya ngurara uwankara palumpa pulkara pukularingi, panya paluru mayatja wirungku tjananya ngalkiningi.

Davidalu Saulaku Untalpa Altinytja

¹⁷ Ka tjintu kutjupa Saulalu wangkangu Davidala, “Ngayuluṇanta ungkuku nyuntunya ngayuku unṭalpa nganmanyitja ini panya Mirapanya kuri nyuntumpa nyinanytjaku. Palu nintila-wararaṇi wanyu tjaultji kuṇpu mulapa ngaralampa, munu ankula Pilitjiyanya ngurara tjuṭangka pikariwa Mayatja Godaku.” Alatji Saulalu wangkangi panya paluru Davidanya ilunytjaku mukuringangi. Paluru kuliningi, “Wai ngayulu walytjangku palunya pungkula iluntanama. Wanti kana Pilitjiyanya ngurara tjuṭakutu iyala, kaya paluru tjana palya ma-pungkula iluntara.” Alatji Saulalu unngu kuliningi.

¹⁸ Ka Davidalu Saulala wangkangu, “Wiya, kunṭaringanyiṇa mayatja pulkaku unṭalpa altinytjaku, panya nyuntun ngayuku walytjapitiku ngurpa. Paluru tjana pulka wiya waintara nyinanytjaku ngura nyanga Israelta.” Alatji Davidalu wangkangi.

¹⁹ Ka ngula tjintu waṭalpi ilaringu Saulaku unṭalpa altinytjaku, palu Saulalu Davidanya ungkunytja wiyangku wati kutjupa ini Aturiyalnga ungu wati panya Mawulanya ngurara.

²⁰ Ka Saulaku unṭalpa kutjupa nyinangi ini panya Mikalanya munu paluru Davidaku pulkara mukuringangi. Ka Saulalu tjukurpa nyangatja kulira pulkara pukularingu. ²¹ Panya paluru alatji kuliningi, “Palyaṇa Mikalanya unganyi Davidanya, mununa palu purunypaṇu ngunti kuralku, ka ankula Pilitjiyanya ngurara tjuṭangka pikariwa kaya pungkula ma-iluntara.” Munu Saulalu piruku Davidala wangkangu, “Uwa palya, nyuntu kuwari ngayuku waputjuriku.”

²² Munu mayatja Saulalu wati palumpa waṛkaripai maṇkurta wangkangu Davidala ankula kampangkaṇu ma-wangkanytjaku. Alatjiya palula wangka, “Mayatja Saulanya nyuntumpa pulkara pukularinyi, nganana kuļu. Kan wanyu palumpa unṭalpa altiku?”

²³ Kaya mulapatu ankula palula ma-tjakultjunu Davidala, ka paluru tjanala wangkangu, “Ngayulu wati ngaltutjara mani pulkatjara wiya

munu ngayuku walytja tjuṭa kuļu ngalṭutjara. Ngayulu kutjupa kutjupa kanyintja wiya mayatjanya ungkunytjikitjangku palumpa unṭalpaku, kan-tinī palyaṭu ngayunya ungkunytja wiyangku wantima.”

²⁴ Kaya wati panya palumpa war̄karipai małaku ngurakutu anu munuya Saulala tjakultjelu Davidalu tjanala wangkanytja.

²⁵ Ka Saulalu wangkangu wati panya tjuṭangka, “Wiya, ngayuluṇa maniku mukuringkunytja wiya ngayuku unṭalpa altinytjaku, palu ngayulu mukuringanyi paluru ankula wati Pilitjiyanya ngurara tjuṭa nampa nyangatja 100 pungkula wiyanjtaku. Palulangurultaṇa palunya ungkuṇu ngayuku unṭalpa.” Alatji paluru tjanala wangangi, palu unngu paluru kuliningi alatji, “Kuwariya Pilitjiyanya ngurara tjuṭangku palunya-warara wiyanī.”

²⁶⁻²⁷ Ka Davidalu tjukurpa nyangatja kulinu munu pulkara pukularingu Saulalu wangkanytjita palyantjikitjangku. Ka Saulalu tjintu ngurkantanu palumpa panya unṭalpa altinytjaku. Ka tjintu panya palula kuwaripangka Davidanya anu wati palumpa tjaultji tjuṭatjara, munuya Pilitjiyanya ngurara wati tjuṭa mulapa iluntanu. Munu malaku ngurakutu aruringkula Saulala tjakultjelu, “Nampa nyangatja 200 iluntanu.” Ka palulanguru Saulalu Davidanya ungu palumpa unṭalpa Mikalanya, ka palumpa wa-putjuringulta.

²⁸ Nyanga palulanguru Saulalu kuliningi, “Mulapa, nyangatja Mayatja Godanya Davidala tjungu alatji nyinanyi.” Munu paluru nyakula kuliningi panya palumpa unṭalpa Davidaku pulkara mukuringkunyangka.

²⁹ Munu palulanguru Saulanya Davidaku pulkara nguluringangi munu palumpa mirpantju nyinangi rawa mulapa ilunytjakutu-wangkara.

³⁰ Ka Davidanya panya wiru mulararingu panya paluru pika uwankarangka tiṭutjara waintaringi Pilitjiyanya ngurara tjuṭa pungkula wiyaṛa, panya paluru kuṇpu wiru mulapa Saulaku tjaultji tjuṭangka muṇkara alatji. Kaya anangu tjuṭangku palunya kulira mirawaṇingi manta winkitjangku.

19

Saulalu Davidanya Iluntankunytjikitjangku Kulintja

¹ Ka tjintu kutjupa Saulalu palumpa katja Jonathanngu munu palumpa malpa tjuṭa kuļu altingu munu tjanala wangkara wituwituningi Davidanya iluntankunytjaku. Palu Jonathanngu panya Davidaku pulkara mukuringkupai. ²⁻³ Munu paluru ankula Davidala ma-tjakultjelu, “Ngayuku mama mukuringanyi nyuntunya iluntankunytjikitja, ka ngulu nyangama munu mungawinki ankula puttingka nyara kumpira nyinama, kaṇa ngayuku mama nyuntula itiwanungku ma-katiku, mununa nyuntunyatjara palula tjapilku, mununa paluru wangkanytja nyuntulalta mała tjakultjunkuku.”

⁴⁻⁵ Munu mungawinki Jonathantu mulapaṭu mamangka panya wangkangu, “Nyaanguruna Davidanya iluntankuku? Panya palurunta rawa mulatu nyuntunya alpamilaningi. Wanyu paluru kutjupa kutjupa nyuntumpa ngunti palyanu? Wiya alatji. Kaṇa nyaangurulta iluntankuku?” Munu paluru wiru tjuṭa Davidanyatjara palula wangangi alatji, “Kulila Mama! Davidalu panya ngulu wiyangku alatji wati panya Kalaitjanya iluntanu, ka nyara palulangurulta nganaṇanya Mayatja Godalu alpamilaṇu nganaṇa Israelkunu tjuṭangku tjaultji Pilitjiyanya

ngurara tjuṭa pungkula wiyanjtaku, ka panyan nyakula pulkara alatjitu pukularingu.”

⁶ Ka katjangku panya wangkanytja Saulalu kuliningi munu paluru Mayatja Godala miṛangka kalkunu Davidanya iluntankunytja wiyangku wantintjikitjangku. ⁷ Ka małalta Jonathantu Davidanya altira tjakultjunnangi Saulalu panya wangkara kalkuntja. Munu palulanguru katingu Saulaku ngurakutu, ka Davidanya palumpa ngurangka piruku warkaringi, panya paluru ngamanypa warkarinytja purunypa.

⁸ Palu pika panya paluru pirukulta pakanu Pilitjiyanya ngurara tjuṭaku. Ka Davidanya Israelku tjaultji tjuṭatjara anu, munuya tjuṭa mulapa pungkula iluntara wiyanu, kaya paluru tjana pulkara nguluringkula ngulu wirtjapakanu.

⁹ Ka tjiṇtu kutjupa mamuku kurunpa Mayatja Godalanguru Saulala tjarpangu munu palunya kura kulintjaku palyanu. Ka paluru ngura palumpangka nyinara kułata maṛangku witira kanyiningi, ka Davidalu puṇu panya kita palumpa wangkatjinganigi. ¹⁰ Ka Saulalu kuliningi, “Kuwarina palunya wakara alatjitu wallpangka tjakatjunanyi.” Munu kułata panya Davidalakutu ma-waṇingu palunya wakara iluntankunytjikitjangku, palu Davidanya mapalku tjirkanu, ka wallpa kutju wakanu, ka paluru wirtjapakanu.

¹¹ Ka munga nyara palulalta Saulalu wati tjaultji tjuṭa witura iyanu Davidaku ngurakutu mungangka nyakula tjiṇturingkula mungawinki pakan-nyangka palunya iluntankunytjaku. Palu Davidaku kuringku Mikalalu nintingku kuliningi munu palula wangkangu, “Mapalku ara mungangkatu. Palu ankunytja wiyangku wantirampam, kanta kutjupangku mungawinki pakannyaangka nyakula iluntankuku.” ¹² Alatji paluru tjakultjunangi munu palulanguru palumpa kuri window-wanungku walatjunu mantakutu, ka kumpira anu, kaya puṭu nyangu. ¹³ Ka Mikalalu palumpa watiwati puṇunguru palyantjtja mantjira Davidaku mantarangka tjarpatjunu, munu palumpa pulampa piitangka tjarpatjunu, munu nanikutaku inyu tjunu watiwatiku katangkalta mangka purunyarinytjaku.

¹⁴ Ka mungawinki Saulalu wati tjaultji tjuṭa iyanu Davidanya witira palulakutu ngalya-katintjaku. Ka tjana ma-wirkankunyangka Mikalalu nyakula tjanala wangkangu, “Davidanya pikatjara ngarinyi piitangka.” Kaya małaku anu Saulalakutu witintja wiyaṭu.

¹⁵ Palu Saulalu tjananya piruku małakungku wituṇu, “Ankulaya ngalya-kati piita winki, kaṇa ngayulu palunya iluntara.”

¹⁶ Kaya mulapaṭu tjaultji panya tjuṭa małaku anu Davidaku wałikutu munuya tjarpala nyangu watiwati piitangka ngarinyangka nanikutaku mangkatjara.

¹⁷ Ka Saulalu kułira Mikalala wangkangu, “Utiṇin panyatja tjugururungku wangkama ngayula, palu walatjuran iyanu ngayuku mirpaṇṭju.”

Ka Mikalalu mamangka panya ngunti wangkangu, “Davidaluni alpamilantjaku wangkangu. Alatji paluru wangkangu, ‘Nyuntun ngayunya alpamilantja wiyangku wantirampa, kaṇanta iluntankuku.’”

¹⁸ Ka nyara palulangurulta Davidanya wirtjapakanu tawunu ini Raamalakutu Samuelnga nyakunytjikitja. Munu palula wirkara tjakultjunu Saulalu uwankara palunya palyantja. Munu pula tjunguringkula anu wali

Nayatjalakutu* munu pula ngura nyara palulalta ma-nyinangi, Davidanya pula Samuelnga.

¹⁹ Ka kutjupangku nyakunytjatjanungku Saulala tjakultjunu panya Davidanya ngura Nayatjala nyinanytja Raamala. ²⁰ Ka Saulalu pirukutu wati tjaultji tjuṭa wituṇu Davidanya witirā malakungku ngalya-katinytjaku. Kaya mulapatu wirkanu, munuya nyangu Samuelnga tjananya wati wangkatjara kutjupa tjuṭa kuļu Godaku tjukurpa nyinara wangkanyangka. Samuelnga panya palumpa tjanampa mayatja nyinangi. Ka Godaku kurunpa wati panya Saulaku tjungutja tjuṭangka tjarpangu munu tjananya kuļu wangkanytjaku palyanu, kaya tjana kuļu wangkangi Godaku tjukurpa. ²¹ Kaya tjukurpa nyanga palunya aŋangu tjuṭangku Saulala tjakultjunu, ka paluru pirukutu tjaultji kutjupa tjuta iyanu, ka nyara paluru tjana kuļu tzunguringkula wangkangi Godaku tjukurpa. Ka pirukutu iyanu, kaya palu purunyaringu.

²² Ka palulanguru Saulanyalta anu palula tjanalakutu ngura panya Raamalakutu munu mina tjuṇu pulkangka ma-wirkanu ngura ini Tjikula munu aŋangu tjuṭangkalta tjapinu, “Yaaltji Samuelnga pula Davidanya?”

Kaya wangkangu, “Nyaratja pula nyinanyi, wal̄i nyara Nayatjala ngura panya Raamala.”

²³ Ka Saulanya anu Nayatjalakutu, ka iwarangka ankunyangka Godaku kurunpa palula mapalku tjarpangu, ka paluru kuļu wangkarinangi Godaku tjukurpa tjana purunyntju Nayatjalakutu ankula. ²⁴ Munu ngura palula ma-wirkara mantara palurunku araltjara waŋingu munu mantangka nikiti ngarira ma-mungartjirira ma-mungaringkula ma-tjinturingu, munu paluru Samuelta mirangka rawangku wangkangi Godaku tjukurpa. Kaya aŋangu tjuṭangku nyakula urulyarara kuliningi, munuya wangkangi, “Mulapa nyangatja Saulanyampa wangkatjararingu?”

20

Jonathantu Davidanya Alpamilantja

¹ Ka Davidanya wal̄i panya Nayatjalanguru pakara ngulu wirtjapakanu munu ngura Raamanya wantikatiralta anu malaku Jonathantakutu munu ma-wirkara palula wangkangu alatji, “Ngayulu kutjupa kutjupa palyantja wiyatū nyuntumpa mama kurantjikitjangku. Nyaana wanyu palyanu, kani nyarangku iluntankunytjikitjangkumpa kulini?”

² Ka Jonathantu wangkangu, “Wiya, kulilaŋi! Nyuntunyanta paluru iluntankunytja wiya. Panya Mamaluni tjakultjunkupai uwankara paluru kulintjtija, pulka tjuṭa munu tjukutjuku tjuṭa kuļu. Ka pala nyuntu kulintja, palatja tjukaruru mulapa wiya, panya paluru kulintjatjanungku ngayula utingku uwankara tjakultjunkupai wantintyta wiyangku.”

³ Ka Davidalu wangkangu, “Nyuntumpa panya mama ninti nyuntun ngayuku mukuringkupai, mununta pala palulanguru nyuntula wangkawiyangku wantingi ngayunya iluntankunytjikitjangku nyuntu kulira tjituru-tjitururinytjaku-tawara. Tjukarurungkuŋanta nyangatja wangkanyi. Tjinguruṇi paluru kuwari nguwanpa iluntankuku.”

⁴ Ka Jonathantu Davidala wangkangu, “Munta-uwa! Palu nyaalkuna wanyu? Utiranı tjakultjura, kana palyala.”

⁵ Ka Davidalu wangkangu, “Mungawinkila nganaŋa mai pulka ngalkuni pira kuwaritja utiringkunyangka. Palu ngayuluṇa nyuntumpa mamangka

* **19:18** Nayatjanya wal̄i wangkatjara tjuṭaku ngura.

tjungungku mai ngalkuwiyangku wantinyi, kaña nyuntu palya kulinnyangkampa ankula putingka kumpira ma-nyinama, munuña putingka nyara tjintu kutjara nyinara mungartjiriku. ⁶ Kanta tjinguru nyuntumpa mamangku tjapilku, ‘Davidanya yaaltji?’ Ka tjukurpa nyangatja palula wangka alatjingara, ‘Paluruṇi wangkangu, nyuntu kunyu palunya ngura waltyjakutu wantir’iyala Pitjilimalakutu. Panya tjintu nyanga palulaya palumpa mamangku munu kuṭa tjutangku kuļu inma pułka palyalpai yiya kutjupa yiya kutjupa.’ ⁷ Ka tjinguru nyuntumpa mamangku wangkaku, ‘Uwa wirunya palatja,’ kana ngayulu kulikku, ‘Munta-uwa tjinguruṇa wankaringkuku.’ Palu tjingurutju paluru mirpañariku, ka nyuntu nyangatja kulinma alatjitu paluruṇi ngayunya pikantankuku.

⁸ “Ngalturingamatju! Nyuntu panya ngalilinkun kalkuṇu Mayatja Godalala mirangka malpa mukulya wirura nyinanytjikitjangku. Palu tjinguru ngayulu kura palyannyangkampa nyuntu ngayunya iluntara, nyuntumpa mamangku wiya.”

⁹ Ka Jonathantu wangkangu, “Wiya, alatji kulintja wiyangku ma-wanti! Tjinguru Mamalu nyuntunya iluntankunytjikitjangku kulinnyangkampa ngayulu nyuntula tjakultjunkuku.”

¹⁰ Ka Davidalu wangkangu, “Uwa palya, palu tjinguru nyuntumpa mama ngayuku mirpañarinyangkampa yaaltji-yaaltjingkun nyuntu mungawinki ngayula tjakultjunkuku?”

¹¹ Ka Jonathantu palula wangkangu, “Wanyuli ara nyara pułikutu, kañanta wangkaku.” Munu pula mulapaṭu anu tjungu.

¹² Ka Jonathantu Davidala wangkangu, “Ngayuluñanta kalkuṇi nyuntula munu Israelku Mayatja Godala alatji, tjintu nyara palulalta mungawinki kutjupangka ngayulu kulikku ngayuku mamangku kulintja. Tjinguru paluru nyuntumpa pukularinyi, kaña anangu kutjupa nyuntulakutu ma-witulku nyuntula ankula tjakultjunkunytjaku. ¹³ Palu tjingurunta Mamalu nyuntunya pungkunytjikitjangku kulikku, kañanta kuwari nyanga nyuntunya mulamulangku wangkara kalkuṇi nyuntula tjakultjunkunytjikitjangku. Munuñanta palulanguru ngura kutjupakutu ankunytjaku wankaru iyalku. Palu tjinguruṇa nyuntula wangkawiyangku wantirampa, kañitju Mayatja Godalu ngayunya pułkara pungkuku.

“Kaña kuwari Mayatja Godala nyuntumpa tjapini tjungu tiṭutjara nyuntula nyinanytjaku, panya paluru ngayuku mama ngañmanytju aṭunytyu kanyiningi, palu purunytyu.”

¹⁴⁻¹⁵ Munu Jonathantu wangkangu Davidala, “Ngula tjintu kutjupangka Mayatja Godalu nyuntumpa panya mirpañtju uwankara wiyaliku alatjitu manta nyanga palulanguru. Ka tjinguru ngayulu wankatu nyinanyangkampa nyuntu ngayuku ngalturingamat, panya Mayatja Godanyatju ngayuku ngaltunytyu alatjitu nyinanyi, palu purunypa. Palu ngayulu ilunyangkampa nyuntu ngayuku waltyja tjuṭa palu purunytyu ngaltunytyungku aṭunymanama wantinyta wiyangku.”

¹⁶ Munu pula palulangurulta alatji wangkara tjukurpa nyangatja kalkuṇu, “Utiya Davidaku waltyjapitingku Jonathantu waltyja tjuṭa iluntankuwiyangku wantima.” Ka Jonathantu Davidala wangkangu alatjingara, “Tjinguru nyuntumpa waltyja tjuṭangku kalkuntja panyatja katan-tankunyangkampa ngayulu Mayatja Godala tjapilku tjananya wiyanjtaku.”

¹⁷ Uwa, panya Jonathannga pułkara mulapa mukuringkupai Davidaku palurunku mukuringkunytja puřunypa, munu paluru Davidala piruku

wangkangu alatji, "Ngali panya wangkara kalkunu wantintytja wiyakitjangku, katju ngayuku titutjara mukulya pulka ngarama."

¹⁸ Munu Jonathantu piruku wangkangu palula, "Mungawinki pañala nganana mai pulka ngalkuni pira panya kuwaritja ngalyapakannyaŋka, ka nyuntu wiya ngaranyangkampa aŋangu tjutangku kulira puŋu nyakuku nyuntunya. ¹⁹ Ka palula małangka tjintu kutjupa nyuntu ngura panya palulakutu ara nyuntu panya kumpira nganmanypa nyinanytjalakutu, munu nyara palula paṭara nyinama puli panya ini Itjilta itingka. ²⁰ Kaña ngayulu patunguru punara waniku maŋkur-arangku puli panya palulakutu arkara tjukarurungku waninytjikitjangku. ²¹ Munuña palulanguru tjitiwitulku kulata pañala palunya tjananya ngurira mantjintjaku panya ngayuluna punura waninytja tjuta. Ka tjinguru ngayuku mamangku nyuntunya iluntankunytjikitjangku kulintja wiyangku wantinyangkampaña ngayulu tjitji palula ma-mirara wangkaku alatji, 'Kulata pala tjuta tjangati ngarinyi. Mantjira ngalya-kati.' Ka nyuntu panya kumpira nyinara kulikku munun ngayulu tjangatitja wangkannyaŋka kulinma, 'Munta-uwa, palyana ma-pakara utiringkuku, kanı wantiku iluntankunytja wiyangku Saulalu.' ²² Palu tjinguru ngayuku mamangku nyuntunya iluntankunytjikitja mukuringkunyangkaña ngayulu tjitjingka alatji ma-mirara wangkaku, 'Pala munkara ma-nyawa kulata ngarinyi!' Ka alatji wangkannyaŋka kulirampa ara, pañala Mayatja Godalunta wituni ngura nyangatja wantikatira ankunytjaku. ²³ Palu rawangku kulinma tjukurpa panya ngalinku kalkuntjanya, kalinya Mayatja Godalu ngalinya rawangku nintikatima tjukurpa panya palunya watarkurinytjaku-tawara." Alatji Jonathantu Davidala wangkangi.

²⁴ Ka Davidanya mulapatu kumpira nyinangi puti panya palula. Ka pira panya kuwaritja pakannyaŋka wati panya mayatja Saulalu tjanma mai pulka nyinakatira ngalkuningi. ²⁵ Munu paluru tjiya panya arangkatu nyinangi wallpangka itingka Saulanya, ka palumpa katja Jonathannga taipulangka kampa kutjupa nyinangi arangkatu mamangka tjungu ilatu. Ka wati ini Apananya Saulala itingka tjiya palulatu arangka panya nyinangi. Palu Davidaku tjiya ultu ngarangi. ²⁶ Ka Saulalu tjiya ultu nyakula unngu kutju kuliningi, "Munta, tjinguru kutjupa kutjupa kura pampuntjatjanu paluru puŋu ngananaala maikitja tjunguringanyi." Munu paluru wangkanytja wiya nyinangi. ²⁷ Ka tjintu kutjararingu, ka tjiya panya kutju wiyatū ngarangi. Ka Saulalu tjinpinu palumpa katjangka, "Nyaaku Jesse-ku katja mai nyangaku pitjawiyangku wantinyi? Panya paluru mungartjilpi wiya ngarangi, munu kuwari kuļu nyanga wiyatū ngaranyi."

²⁸ Ka Jonathantu palumpa mamangka wangkangu, "Davidalu ngayula tjinpinu palunya ngura walytjakutu wantir'iyantjaku Pitjilimalakutu. ²⁹ Alatjini paluru wangkangu, 'Iyalani ngayuku walytja tjutakutu, pañala tjanaya inma pulka tu palyani nganampa ngurangka, kanı ngayuku kutangku wangkangu palula tjanala tjunguringkunytjaku tjintu nyangangka. Wanyuni malpa wirungku wantir'iyala kuṭa tjutakutu palula tjanala ngapartji nyinanytjaku.' Alatjini paluru tjinpinu, kaña mulapatu palunya wantir'iyau. Nyanga palulanguru paluru ngananaala tjungu nyinanytja wiya ngaranyi."

³⁰ Ka Saulanya Jonathantu pulkara mirpanaringu munu palula wangkangu, "Nyuntu kura pulka mulapa munun ngayula wanganarangku kulintja wiyaringu. Ngayulu ninti alatjitu panya nyuntu Davidaku malpa.

Ka ngunytju nyuntumpa pulkara alatjitu kuntu tarnganyi nyuntunya kanyintjatjanu. Katja wiru-palkunta kanyinu. Ka nyuntu ku lu uti kuntu-kuntu nyinama. ³¹ Kulila! Davidanya wanka nyinanyangkampa ngura nyangaku nyuntu pu tu alatjitu mayatjarinyi. Palu wanyu ankula Davidanya witira ngalya-kati ngayulakutu, kana palunya iluntara alatjitu.”

³² Ka Jonathantu palumpa mamangka wangkangu, “Nyaangurun palunya iluntankuku? Kura nyaa wanyu paluru palyanu?”

³³ Ka Saulalu palumpa mirpañarira kula ta panya wa ningu palunya wakara iluntankunytjikitjangku munu palunya nguwanpa alatjitu iluntanu. Ka nyara palulangurulta Jonathantu kuliningi, “Munta-uwa, mulapa nyangampal! Ngayuku mamangku Davidanya iluntankunytjikitja mukuringanyi.” ³⁴ Munu Jonathannga pulkara mirpañarira taipulanguru wala winkilta pakalkatingu munu pulkara tjituru-tjitururira mai wantikatira anu, panya palumpa mamangku Davidanya kurara pungkunya yangka.

³⁵ Munu palulangurulta mungawinki Jonathannga anu tjitji mantjira urilkutu Davidalakutu. ³⁶ Munu tjitjingka panya wangkangu, “Kuwarina punaranguru nyanga kula ta tju ta arkara wa ninyi, ka nyuntu wirtjapakara ngurila kula ta panya ngayulu wa ninytja tju ta.” Ka tjitji panya paluru ma-wirtjapakannyangka Jonathantu palula munkara kula ta punaranguru wa ningu. ³⁷ Ka tjitji panya paluru kula ta panya tju ta punkantjalakutu ma-ilaringkunyangka Jonathannga mirangu, “Ma-nyawa, munkara nyara.”

³⁸ Munu palulangurulta wangkangu, “Walawala pulkara wirtjapakala ngarakatintja wiya.” Ka tjitjingku panya kula ta mantjira ngalyakatira Jonathannga ungu. ³⁹ Ka Davidalu puti tjatangka unngu nyinara Jonathannga miranyangka kuliningi. Munu paluru tjukurpa munkaritja wangkanyangka kuli ra kulinu, “Munta-uwa mulapa nyangampal Saulanya ngayuku mirpañpa ngaranyi.” Ka tjitji nyanga paluru panya ara nyanga palumpa ninti wiya ngurpa, palu Jonathantu pula Davidalu kutju kuliningi.

⁴⁰ Ka Jonathantu punara tjitji panya palunya ungkul’iyara wangkangu, “Punara nyanga ma-kati ngurakutu!”

⁴¹ Ka tjitji panya paluru mulapatu malaku tawunukutu anu. Ka Davidanya puli panya palula ulparira kumpira nyinanytjatjanu ngalyatiringu munu Jonathanta kuranyu tultjungarakatira yunpangku manta pampunu mankurara rangku munu pulanku ampura nyunytru munu pula ngarala pulkara ulangi, palu Davidanya rawa alatjitu ulangi.

⁴² Ka Jonathantu wangkangu Davidala, “Palya wantikatilanya munu ma-pakala, kanta Godalu wanka ru kanyilku. Ngali panya kalkunu Mayatja Godala mirangka titutjara malpa mulapa nyinanytjikitjangku wantintjya wiyakitjangku. Ka Mayatja Godalu ngayuku walytja tju ta munu nyuntumpa walytja tju ta ku lu tjungulku kalkuntja nyanga palunya titutjarangku kanyintjaku.”

Ka Davidanya wantikatira ma-paka nu, ka Jonathannga malaku anu tawunukutu.

21

Davidanya Saulalanguru Ngulu Wirtjapakantja

¹ Ka Davidanya anu tawunu ini Napalakutu wati tjukurtjara ini Aimalikinya nyakunytjikitja. Ka wati paluru Davidanya nyakula pulkara alatji tu tjititingu munu ngulungku tjapi ra wangkangu, “Nyaakun kutju pitjangu?”

² Ka Davidalu ngunti wangkangu alatji, “Wati mayatja Saulaluni wangkangu kutjupa kutjupa wiru palyantjaku, mununu alatji wangkara wituṇu, ‘Kutjupangka wangkanytja wiyangku wantima ngayulu nyanga nyuntunya iyantjikitjangku wangkanytja.’ Kaṇa ngayulu ngayuku wati tjuṭa kuranyungku iyanu ngura kutjupangka ngayunya nyakunytjaku.”
³ Munu Davidalu tjapinu wati panya Aima-likinya, “Main kanyini ngayunya ungkunytjikitjangku? Wanyunu mai kutjara maṇkurpa ungama?”

⁴ Ka wati panya tjukurtjarangku wangkangu, “Mai kutjupaṇa kanyintja wiya, palu mai nyanga milmilpa kutjuṇa kanyini wati panya kungkangka ngaripai wiya tjuṭangku kutju ngalkuntjaku.”

⁵ Ka Davidalu palula wangkangu, “Wiya nganana tjaultji tjuṭa tjungu para-ngarala kungkangka ngaripai wiya. Munula kuwari nyanga ananyi kutjupa kutjupa wiru palyantjikitja, palulangurula kungkangka tjunguringkula ngarinytja wiya alatjiṭu.”

⁶ Ka wati panya tjukurtjarangkulta mai panya milmilpa tinta milmilpanguru mantjira Davidanyalta ungu munu mai kuwari pauntja tjuṇu palumpa arangka.

⁷ Ka tjintu nyara palulatu Saulaku tjiipi atunymankupai ngura nyara palula nyinangi wati ini Tuwikanya panya Iitamakunu. Paluru tiinta milmiltä tjarpara Godanya walkuningi.

⁸ Ka Davidalu wati panya tjukurtjarangka tjapiningi, “Tjula waran kanyini? Munta tjinguru tjula wara wiyangkampani kulata kanyintjatjanungku ungama. Panya mayatja Saulalu ngayunya witunnyangkaṇa mapalku pitjangu tjula wantikatira.”

⁹ Ka wati panya tjukurtjarangku wangkangu, “Tjula panya nyuntu mungatu wati Kalaitjanya iluntankunytjitetja mantarangka karpintja ngarinyi nyara kampa kutjupa tjukurtjaraku mantarangka itingka. Ka mukuringkulampa palya mantjira kati.”

Ka Davidalu wangkangu alatji, “Munta, tjula nyara paluru wiru mulapa! Wanti, kaṇatju kati!”

Davidanya Ngura Ini Kaatjalakutu Ankunytja

¹⁰ Munu tjintu nyara palula Davidanya kumpira wirtjapakanu Saulaku ngulu munu ankula ankula manta Pilitiyala ma-wirkanulta wati mayatja ini Akitjalakutu tawunu ini Kaatjala nyinanyangka.

¹¹ Palu mayatja Akitjaku warkaripai tjuṭangku palunya nyakula tjanampa mayatjangka wangkangu, “Wati nyanga paluru panya Davidanya. Paluru panya mayatja purunypa nyinapai ngura palumpangka, kaya anangu tjuṭangku inma inkara nyānpipai nyanga alatji palunya mirawanira,

‘Saulalu warmala tjuṭa iluntanu nampa nyangatja 1,000,
 palu Davidalu iluntanu tjuṭa mulapa palula munkara nampa nyangatja 10,000!’”

¹² Ka Davidalu kulinu tjana kampangkatu wangkanyangka munu nguluringu wati panya Akitjaku palunya iluntankunytjaku-tawara.

¹³ Munu paluru tjananya ngunti kuraningi kawakawangku-palku munu panya tawunuku kaita tuwa piriningi munu paluru tjaanguru wiṭa tjutitjutingi ngaṇkurpawaru.

¹⁴ Ka wati panya Akitjalu nyakula tjaultjiku mayatja tjuṭangka wangkangu, “Nyawaya! Wati pala kata kawakawa. Nyaaku nyura ngalyakatingu? ¹⁵ Ngura nyangangkaya kawakawa ngaṇmanyitja tjuṭa nyinanyi,

kana mukuringkunytja wiya kutjupalpi piruku ngalya-katira tjunguntjaku nyanga ngayuku walingka.”

22

Davidanya Ngura Atulamala Pulala Mitjapala Nyinanytja

¹ Ka Davidalu ngura panya Kaatjanya wantikatira anu kulpikutu ngura panya ini Atulamala itingka, kaya kuṭa panya tjutangku munu waltyja kutjupa tjutangku kulu kulinu ngura nyara palula paluru nyinanytja, munuya ankula palula tjunguringu. ² Kaya anangu ngaltutjara kutjupa tjutangku kulu kulinu munuya wirkara palula tjunguringu – kutjupa tjaraya tarapulatjara, kaya tjara kutjupa tjituru-tjituru kulintja pulkatjara, kaya tjara kutjupangku mani ngatjintjatjanungku malakungku puṭu ungangi. Wati 400 nguwanpaya Davidala tjunguringu, ka paluru tjanampa mayatjaringu.

³ Palulangurulta Davidalu kulpipanya palunya wantikatira anu tawunu ini Mitjapalakutu manta panya ini Mawapalakutu. Munu wangkangu Mawapaku mayatjangka alatji, “Wirungkutju ngayuku mama munu ngunytyu kulu atunymara kanyinma ngayuku paṭara? Kanatju kumpira ankula ma-nyinamalta Godalu panya nintintjaku paṭara.” Ka Davidalu tjapinnyangka Mawapaku mayatjangku palyanmanu.

⁴ Ka mulapatu Davidalu mama ngunytyu mayatjaku panya ngurangkalta wantikatingu, munu tjintu nyara palula ankula kumpira ma-nyinangi ngura ngurpatjangka. Ka pula mama ngunytyu Mawapaku mayatjangka rawa nyinangi Davidanya kumpira ma-nyinanyangka.

⁵ Ka tjintu kutjupangka wati wangkatjara ini Kaitalu Davidala wangkangu, “Kulpi nyanga wantikati munu manta panya Judah-lakutu malaku aruriwa.” Ka mulapatu paluru kulira kulpipanya wantikatira anu manta Judah-lakutu munu wirkara puti pulkangka nyinangi ngura ini Iiritjala itingka.

Saulalu Ayima-likaku Waltyja Tjuta Iluntankunytja

⁶ Ka tjintu kutjupa Saulanya tawunu ini Kipiyala puli katu kulaṭatjara nyinangi puṇu wiltjangka, kaya palumpa tjaultji tjutaku mayatja maṇkurpa kulu palula tjungu ngarangi. Ka wati kutjupa maṇkurpa palulakutu pitjangu munuya tjakultjunu, “Ai! Kutjupangku kunyu nyangu wati panya Davidanya tjana ngura kutjupangka utiringkula nyinanyangka.”

⁷⁻⁸ Ka Saulalu tjanala wangkangu, “Kulilaya wati Benjaminkunu tjuta! Nyaanguru nyura ngayuku mukuringkunytja wiya? Ngayulu puṭu kulini. Tjinguru nyura kulini ngula Jesse-ku katjangku mayatjarira nyuranya kaana maitjara kiripitjitzara ungkunytjaku. Palu wiya. Munu nyura tjinguru kulini alatji, paluru nyuranya kulu tjunkuku nyura tjaultji tjutaku mayatjarinytjaku. Panya ngayulu na nyuranya ngurkantara tjunu wati mayatja tjaultji 1,000-ku mununa 100-ku kulu, palu nyara paluru ngayulu purunytyu nyuranya palyantja wiya alatjitu. Kulilaya! Nyura ngayuku kuraringkupai alatjitu. Nyura panya ninti ngayuku katja Jonathanku panya paluru pulanku Davidalu kalkunu titutjara malpa mulapa palyanyku nyinanytjikitjangku, kani nyura nyaanguru panyatja ngayula tjakultjunkunytja wiyangku wantingi? Munu panya nyura kuwari ngayula tjakultjunkunytja wiyangku wantingi ngayuku katjangku ngayunya iluntankunytjaku Davidanya wituwitunnyangka.” Nyanga alatji Saulalu tjanala wangkangu.

⁹ Palu wati panya Tuwikanya nyara palula ngarangitu tjanala tjungu, wati panya Iitamanya ngurara, munu paluru Saulala wangkangu, “Ngañmanypa panyaña ngayulu tawunu Naapala nyinangi mununa Jesseku katja nyangu paluru tjukurtjara Ayima-likala wirkankunyangka, Akitupaku katjangka panyalta. ¹⁰ Ka Godala tjapiningi Ayima-likalu Davidanya alpamilantjaku, munu palulangurulta Davidanya mai ungu munu tjula waṛa kuļu ungu, tjula panyatja Davidalu panya Kalaitjanya kata kaṭantja.”

¹¹ Ka Saulalu nyangatja kulira mapalku tjakulpa witura iyanu tawunu nyara Naapalakutu Ayima-likanya tjananya altira ngalya-katinytjaku palumpa waltyja tjuta kuļu panya tjana uwankara tjukurtjara. Kaya mulapaṭu pitjangu wangañara alatjiu Saulalakutu. ¹² Ka Saulalu wangkangu, “Akitupaku katja, wanyuni kulila!”

Ka palula wangkangu, “Uwa, mayatja wiru! Kuliniñanta.”

¹³ Ka Saulalu mirpanṭu wangkangu, “Nyuntun kura pulkangku Godala tjapiningi Davidanya alpamilantjaku. Munu panyan kurangku palunya mai ungu, tjula waṛa kuļu, ka paluru kuwari nyanga paṭara ngaranyi ngayuku pika pungkunytjikitja.”

¹⁴ Ka Mayatja Saulala wangkangu, “Wiya, Davidanya panya nyuntumpa warkaripai tjukařuru mulapa nyuntunya kurantja wiyaṭu. Nyara palurunku nyuntumpa panya wati waputju wiru mulapa. Paluru nyuntumpa tjaultji tjutaku mayatja nyinangi, munu nyuntunya wankaru atunymara kanyiningi. Munu paluru nyuntula wirura kulipai wangañarangku, kaya nyuntumpa panya waltyjapiti pulkara pukularipai palumpa. ¹⁵ Mulapaña ngayulu Davidaku Godala tjuta-arangku tjapiningi kuwari kutju wiya. Ka mayatja wiru ngana, ngayuku mirpañarinytja wiyangkutju wantima ngayuku waltyja tjutaku kuļu, panya nganaña kura palyantja wiyaṭu.” Alatji Ayima-likalu wangkangu.

¹⁶ Palu Saulalu wangkangu, “Wiya, nyuntu panyan kura alatjiu palyanu, kanta palulangurulta nyuntunya munu nyuntumpa waltyjapiti kuļu kuwari tjungura uwankara nyuranya iluntananyi.”

¹⁷ Munu wangkangu palumpa tjaultji tjutangka, “Mayatja Godaku nyanga tjukurtjara tjutangku Davidanya alpamilanu. Paluru tjanaya kulinu wati panya paluru ngayuku ngulu wirtjapakannganya, palu tjananya ngayula tjakultjunkunyta wiyangku wantingi. Kaya nyura palunya tjananya iluntara alatjiu.”

Palu tjaultji panya tjutangku tungunpungkula Godaku tjukurtjara tjuta iluntankunyta wiyangku wantingi.

¹⁸ Ka Saulalu wati panya Tuwikala wangkangi, “Nyuntu iluntara wati tjukurtjara tjuta!” Ka paluru mulapaṭu wati panya tjukurtjara uwankara iluntanu nampa nyangatja 85.

¹⁹ Ka palula małangka Saulalu tjaultji tjuta iyanu tawunu panya Naapalakutu, kaya ankula ma-iluntanu anangu winki mulapa wati, minyma, tjitji, iti kuļu munuya puluka, tangkiyi, tjiipi tjuta kuļu pungu.

²⁰ Palu tjaultji tjutangkuya Ayima-likaku katja putu witiningi wati panya ini Apiyatjanya, ka paluru ngulu ma-wirtjapakanu Davidalakutu. ²¹ Munu palula ma-tjakultjunu alatji, “Saulalu Mayatja Godaku tjukurtjara tjuta iluntanu Naapanya ngurara uwankara mulapa.”

²² Ka Davidalu kulinu munu Apiyatjala wangkangu, “Kulila! Tjinṭu panyatja kulinma panya ngayulu Naapalakutu anu, ka panya Tuwikanya nyara palula nyinangi wati panya Iitamanya ngurara. Kana nyara palula arangka ngayulu kulinngi, ‘Kuwari wati nyanga Tuwikalu Saulala

tjakultjunanyi Ayima-likalu ngayunya alpamilantja.' Ka nyanga mulapaṭu kuwari nyuntumpa walytja uwankaralta iluntara wiyanu. Ngaltutjara! Mulapa panyaña nyuntumpa mamangka wirkara tjapinu ngayunya alpamilantjaku, kaya nyara palulangurulta uwankara pungu ngayunya alpamilannyangka. ²³ Ka nyuntu kuwari nguluringkunyta wiya ngayula tjungu nyinama, panya Saulalulinya nyuntunya ngalinya ngurini iluntankunytkitjangku. Palu ngayula tjungu nyinarampan wankaru nyinaku." Alatji Davidalu ngalturingkula wangkangu.

23

Davidalu Kiilanya Ngurara Tjuṭa Wankarunkunyta

¹ Ka tjiṇtu kutjupangka aŋangu kutjupa tjutangku pitjala Davidala wangkangu, "Wati warmala Pilitjiyanya ngurara tjutangku tawunu panya Kiilala aŋangu tjuṭa punganyi munuya mai uṇinypa kuļu kutitjunanyi."

² Ka Davidalu Mayatja Godala tjapinu, "Mayatja, mulapan mukuringanyi ngayulu ankula tjananya pungkunytkaku? Wanyunu tjakultjura!"

Ka Mayatjalu wangkangu, "Uwa palya, ankula tjananya puwa Pilitjiyanya ngurara tjuṭa, munu aŋangu nyara Kiilanya ngurara tjuṭa ngalkila."

³ Palu Davidaku tjaultji tjutangku wangkangu, "Wiya, nganana palumpa tjanampa nguluringanyi. Ka ngura nyara Kiilanya tjanampa ngurangka itingka ila ngaranyi. Kala nyara palulakutu pika ankulampa nganana pulkara alatjiu nguluringkuku! Munula tjananya puṭu wiyaliku Pilitjiyanya ngurara panya tjuṭa."

⁴ Ka Davidalu piruku Mayatja Godala tjapinu, ka palula wangkangu, "Wiya palya, araya Kiilalakutu munuya Pilitjiyanya ngurara tjutangka pikariwa, kaṇa ngayulu nyuranya alpamilalku pungkula uwankara wiyanjaku."

⁵ Ka mulapaṭu Davidanya tjana anu Kiilalakutu munuya Pilitjiyanya ngurara tjuṭa pungkula uwankara iluntanu, munu tjanampa puluka tjiipi kuka uwankara kuļu mantjira katingu. Kaya aŋangu panya Kiilanya ngurara tjuṭa wankaringu.

Saulalu Davidanya Ngulura Wanantja

⁶ Ka wati panya Apiyatjalu ngaṇmanytu tjukurtjaraku mantara miłmilpa katingu ngura Naapalanguru munu Saulalanguru nguļu wirtjapakanu munu Davidala tjanala tjunguringkula anu ngura Kiilalakutu.

⁷ Ka kutjupangku Saulala tjakultjunu Davidanya Kiilala nyinanyta, ka Saulalu wangkangu, "Munta wirunya! Kuwari Godalu palyani ngayulu witintjaku palunya. Panya kuwari paluru tawunu wall pulkatjarangka nyinanyi, kaṇa kuwari ankula witilku patingka nyinanyangka." ⁸ Munu Saulalu witunu palumpa panya tjaultji tjuṭa ritiringkula ankula Kiilala wirkara para-tjatutjuṛa Davidanya witintjaku.

⁹ Palu wati kutjupangku kulira pitjala Davidala tjakultjunu. Ka Davidalu kulinu munu Apiyatjala wangkangu, "Tjukurtjaraku panya mantara ngalya-kati ngayulakutu, kala Godala tjpilku."

¹⁰ Ka mantara panya palunya ngalya-katingu, ka Davidalu Godala tjapiningi munu wangkangi alatji, "Mayatja Israelku God! Panya nyuntumpaṇa ngayulu warkaripai. Kutjupangkuni tjakultjunu Saulalu kunyu kulinungi tawunu nyangangka pitjala uwankara wiyanjikitjangku walı tjuṭa kuļu, panya ngayulu tawunu nyangangka nyinanyangka.

11-12 Mayatja, wirungkuṇi tjakultjura – mulapaniya nyanga Kiilanya ngurara tjutangku witira ungkuku Saulanya, kaṇi pitjala witilku?”

Ka Mayatja Godalu palula wangkangu, “Uwa, tjana nyuranya wantir’iyalku alatjitu Saulalu witira katintjaku.”

13 Ka Davidalu munu palumpa tjaultji tjutangku Kiilanya kuwaritu wantikatingu Saulalu tjananya pitjala witintjaku-tawara. Munuya paraṅgarangi ngura tjutangka ngulu wati panya nampa nyanganpa 600-tu. Ka Saulalu kulinu Davidalu Kiilanya wantikatintja, munu wantira manyinangu ankunytja wiya.

14 Ka Davidanya tjana puḷingka kumpira nyinangi ilytjingka ngura panya Tjipala itingka. Ka Saulalu Davidanya rawangkuṇu nguriningi, palu Godalu Saulanya alpamilantja wiyangku wantingu alatjitu, ka puṭu nguriningi.

15 Ka tjintu kutjupa Davidanya ngura ini Uuritjala nyinangi Tjipala itingka. Panya paluru kuliningi, “Mulapa, Saulalu ngayunya iluntankunytjikitjangku ngurini.”

16-17 Ka Saulaku panya katja Jonathanng anu ngura nyara palulakutu palumpa panya malpa nyakunytjikitja Davidanya, munu wirkara palula wangkangu alatji, “Ngulu wiya rapa nyinama, panya Mayatja Godalunta aṭunytyu kanyini! Ngayuku mamangkunta nyuntunya pungkunytjikitjangku puṭu alatjitu ngurilku. Panya paluru ninti nyuntu ngula Israelku mayatjariku. Ka nyuntu mayatjarinyangka ngayulu nyuntumpa tjaultji tjutaku mayatjarira nyinaku.”

18 Munu pulanku Jonathantu pula Davidalu kalkunu Mayatja Godala miṛangka malpa mulapa titutjara nyinanytjikitjangku, pika wiyatjangku. Munu Jonathanng kalkuntjatjanu anu ngurakutu malaku, ka Davidanya nyinangi ngura panya Uuritjala.

Davidanya Saulaku Ngulu Wirtjapakantja

19 Ka ngula anangu Tjipanya ngurara kutjupatjara Saulaku ngurakutu anu Kipiyalakutu munuya palula wangkangu, “Davidanya nganampa ngurangka itingka kumpira nyinanyi ngura panya Uuritjala puḷi ini Aakilala.

20 Ka nyuntu ngula mukuringkulampa pitja nganampa ngurakutu, kala nyuntunya Davidanya witintjaku nintilku.”

21 Ka Saulalu nyangatja kuliṛa pulkara pukularingu munu tjanala wangkangu, “Wiru mulapa nyangatja panya nyurani wirungku alpamilaṇi Davidanya witintjaku, kaṇa Mayatja Godala tjapilku nyuranya pukulmankunytjaku. **22** Ala, walaya ara nguraku munuya wirkara para-ngurira kulila anangu ngananya tjanaya palulakutu rawa ankupai, munuya ma-nyawa kuļu yaaltjingka paluru kumpira nyinanyi, panya paluru kunyu ayinayini mulapa. **23** Uwa, ngura tjutangkaya para-ngurila munuya nyawa paluru kumpira nyinanyangka, munuṇiya malaku pitjala tjakultjura, kaṇa nyurala tjunguriwa munula ngura nyara palulakutu ara. Ka paluru ngura nyara palulaṭu nyinanyangkampaṇa ngayulu palunya nyakula witilku alatjitu. Palu wiyangkaṇa ngayulu palunya wantintjya wiyangku rawangku alatjitu ngurilku manta winkingka Judahlawanungku.” Alatji Saulalu tjanala wangkangi. **24** Kaya malaku anu ngura Tjipalakutu.

Ka Davidanya palumpa tjaultji tjutatjara kumpira nyinangi ilytjingka puli ngura ini Mayanta ulparira ailurungka.

25 Ka Saulanya wirkaku tjaultji tjutatjara ngura ini Tjipala munuya nguriningi Davidaku. Ka kulintjatjanungku kutjupangku Davidala wangkangu, “Saulalunta ngurini.” Kaya Davidanya tjana anu ngura

kutjupakutu munuya kumpira ma-nyinangi puli pulkangka ngura panya Mayanta. Palu kutjupangku tjananya Saulala wangkangu kumpira nyinanytja, ka Saulalu tjana kulira wañanu alatjitu ngura nyara palulakutu munuya para-nguriningi Davidanya.

²⁶ Munuya puli kampa kutjupawanungku para-nyakula arintanangi, ka Davidanya tjana puli kampa kutjupa palulañu mapalku para-pitjangu Saulaku ngulu. Ka Saulanya tjana ngalya-ilaringangi Davidanya tjananya witintjikitja. ²⁷ Palu wati kutjupangku pitjala Saulala tjakultjunu, “Malakuya warpungkula pitja! Pilitjiyanya ngurara tjutaya nganampa ngurangka wirkanu.”

²⁸ Ka tjananya Saulalu markunu palumpa panya tjaultji tjuña Davidanya witintja wiyaku, kaya mulapatu wantira malaku anu Pilitjiyanya ngurara tjuña pika pungkunytjikitja. Ka Davidanya tjana wankaru anu munuya ngura palunyalta iniñu, ‘Puli Wankarunkupainya’.

²⁹ Munuya ngura panya palunya wantikatira puli kutjupa kulpitjarangka wirkara nyinangi ngura ini In-Kitila.

24

Davidalu Saulanya Wantinytja Wanka Nyinanytja

¹ Munu Saulanya palumpa tjaultji tjutatjara Pilitjiyanya ngurara tjutangka pikaringkunytjatjanu malaku pitjangu, ka kutjupangku palula tjakultjunu, Davidanya ilytjingka kumpira nyinanytja ngura In-kitila itingka. ² Ka Saulalu wati Israelkunu tjaultji wiru tjuña kutju ngurkantanu nampa 3,000, munu tjananya katingu Davidanya ngurintjaku. Ka ngura nyara In-kitila itingka Davidanya wati malpa tjutatjara kumpira nyinangi puli ini Nanikuta Inurala.

³ Ka Saulanya palumpa tjaultji tjutatjara iwarangka ankula ankula wirkana tjiipiku yaatangka iwarangka itingka, ka nyara palula kulpi ngarangi. Ka Saulanya kulpi palula tjarpangu tuwilataku. Palu Davidanya tjana kulpi nyara palula unngu mulapa kumpira nyinangi, munuya Saulanya ngalya-tjarpanyangka nyangangi. ⁴ Munuya wati panya tjutangka Davidala tjaalymara wangkangi, “Ala, panya Mayatja Godalunta nganmanytju alpamilantjikitjangku kalkunu, ka tjinguru alatjitulo tjinntu nyanga paluru ngaranyi nyuntumpa mirpantju tjuña pungkula wiyan-tjaku.” Ka Davidanya maramara pitjangu Saulalakutu munu mantara panya Saulaku tjukutjuku kañanu kuuta tjanatja purkarra mulartu, ka Saulalu palumpa kuuta kañanyangka kulintja wiyatü.

⁵ Palu malangka Saulaku kuuta kañantjatjanu Davidanya pulkara kuntaringu. ⁶⁻⁷ Munu paluru wangkangu wati panya tjaultji tjutangka, “Wantiya kura wangkanytja wiyangku. Nganaña Saulanya pungkunytja wiya, panya Godala palunya ngurkantara tjunu nganampa mayatja kinga nyinanytjaku, kaña palulanguru palula puñu tungunpunganyi. Ngayulu Mayatja Godala tjapini nganañanya markuntjaku nganaña Saulanya pungkunytjaku-tawara.” Alatji Davidalu wangkara painingi palumpa tjaultji tjuña.

Ka Saulalu kulintja wiyatü munu kulpinguru ma-pakanu.

⁸ Ka Davidanya ma-pakanu kulpinguru panya munu ma-mirangu Saulaku, “Mayatjan wiru!” Ka Saulalu urulyarara malakukuturu nyangu Davidanya tultjungararakatira yunpangku manta pampunyangka.

⁹ Ka Davidalu palula wangkangu, “Anangu kutjupa tjutangkuya nyuntula ngunti wangkanyi ngayulu nyuntunya iluntankunytjikitjangku

wangkanyangka-palku. Palu tjanala kulintja wiyangku wantima. Nguntiya wangkanyi.¹⁰ Kulila, panya Mayatja Godalunta nyuntunya kuwari ngalya-katingu kulpikutu, kañanta tjinguru nyara palula alatjitu iluntanama. Panya wati tjutangkuṇya wituwituningi nyuntunya iluntankunytjaku, palu wantinginā mununa wangkangu tjanala, ‘Wiya ngayulu puṭu ngayuku mayatja kinga wiyanī, panya Mayatja Godalu palunya kinga ngurkantara mayatja nganampa tjunu.’ Alatji wangkarana tjananya painu.”

Munu Davidalu piruku Saulala purkarangku wangkangu, ¹¹ “Mayatjan wiru! Nyangatja nyawa nyanga marangkuna kanyini! Nyuntumpa panya kuutanā tjukutjuku ankala kañanu. Tjingurunanta mulapa nyara palula arā iluntanama. Palu wiya, nyuntunyā wantir'iyanu iluntankunytja wiyangku. Ka nyanga palulanguru kulinma, panya ngayulu nyuntunya wiyanjtikitja mukuringkunytja wiya. Mununa puṭu mukuringanyi mayatja nyuntumpa arangka nyinanytjikitja. Panya ngayuluṇa nyuntumpa kura palyantja wiyatū, palu nyuntu panyaṇin rawangku aruningu ngayunya iluntankunytjikitjangku.

¹² “Wanyu kulila, ka Mayatja Godalu ngalinya kutju kutju tjukarurungku ngurkantankuku. Panya nyuntu ngayuku ngunti-ngunti rawangku palyani, ka tjinguru Mayatja Godalu nyuntunya pungkuku, palu ngayulu nyuntunya pungkunytja wiya. ¹³ Nyuntu ninti tjukurpa nyangaku panya añangu tjutangku iriti wangkapai alatji, ‘Añangu kura tjutangku kutjuya kura tjuta palyalpai.’ Ka nyuntu nguluringkunytja wiya nyinama panya ngayuluṇa nyuntunya iluntankunytja wiya.

¹⁴ “Ngayuluṇa pulka wiya, kañin nyaaku rawangku aruṇi iluntankunytjikitjangku? Ngayuluṇa papa ilunytja purunypa, pulka wiya, kañin nyaaku mayatja pulkangku ngayunya punpunpa purunypa wataparanī? ¹⁵ Uti Mayatja Godalu ngalinya ngurkantanama ngananya tjukaruru. Uti paluru ngayunya nyangama tjukaruru nyinanyangka, munu nyuntulan-guru ngayunya wankaru kanyinma.” Alatji Davidalu wangkangu.

¹⁶ Ka wangkara wiyaringkunyangka Saulalu palula tjapinu, “Davida! Mulapan nyuntutu palatja?” Munu paluru ulangu. ¹⁷ Munu wangkangu, “Nyuntun wati palya ngayula munkara mulapa panya nyuntu wiru tjuta palyaningi ngayuku, kaña ngayulu kura tjuta kutju palyaningi nyuntumpa. ¹⁸ Ka nyangatja Mayatja Godalu ngayunya ngalya-katingu nyuntulakutu, kañitjun tjinguru iluntanama, palu wiya, nyuntun wantingu wanka nyinanytjaku. Palulanguruṇanta kulini nyuntun wati palya mulapa. ¹⁹ Panya warmalangku wati kutjupa witira wanka walatjunkupai wiya, palu nyuntun wiru palyanu ngayuku kuwari, munu panyaṇin wantir'iyanu ankunytjaku, kaña palulanguru Mayatja Godala tjapini wiru mulapa nyuntumpa palyantjaku.

²⁰ “Kaña kulini ngula nyuntun Israekunu tjutaku mayatjariku munun kūnpungku tjananya atunymara kanyilkü añangu tjuta. ²¹ Wirungkuṇi kalkula Mayatja Godala mirangka ngayuku walytja tjuta iluntankuwiyangku wantinytjikitjangku, ka añangu tjutangku nganañanya ini watarkuriwiyangku rawangku kulinma.”

²² Ka Davidalu kalkunu Saulala, ka Saulanya tjana ngurakutu malaku anu. Ka Davidanya wati tjutatjara malaku anu ngura panya puli tjutatjarakutu piruku kumpira nyinanytjikitja ilytjingka.

¹ Uwa, ka nyara palula arangka wangkatjara wati Samuelnga tjilpi mulararingu munu wiyaringu. Kaya aŋangu Israekunu uwankara tjiturutjitururira pitjangu ngura panya Raamalakutu tjunguringkula nyinanytjikitja. Raamanya panya Samuelku ngura kaya palunya ngura walytjangka tjuŋutjunu. Ka palula malangka Davidanya ilytjikutu anu ngura ini Mayantakutu ngura tjunkula nyinanytjikitja.

Minyma Ini Apikailtu Davidanya Alpamilantja

²⁻³ Ka ngura nyara Mayanta wati kutjupa mani pulkatjara nyinangi ini Napalnga tawunungka itingka Kaamulta. Paluru panya wati Calebakunu, munu manta nyara palula tjiipi 3,000 atunymara kanyilpai, nanikuta 1,000 kulu tjungura. Ka kuri palumpa ini Apikailnga, kungkawara wiru mulapa nintipuka alatjitu. Palu Napalnga panya wati pikati mulapa munu ngaltunytju wiya alatjitu.

Ka nyara palula arangka palumpa war̄ka tjuŋangku palumpa tjiipi tjuṭa tjiirāmilaningi ngura nyara palumpangka Kaamulta. ⁴ Ka Davidnya ilytjingka nyinangi munu kulinu tjana tjiipi tjiirāmilannyangka. ⁵⁻⁶ Munu paluru wati yangupala 10-pa witura iyanu, “Araya ngura nyara Kaamultakutu munuya Napalta ma-wangka ngayulu nyanga wangkanytja alatji,

‘Wiru ngana! Palya nyura nyinanyi pukulpa? ⁷ Mayatja nganampangku nyuranya kulinu tjiipi tjuṭa tjiirāmilannyangka, mununku paluru mukuringanyi nyuntu nyanga alatji kulintjaku, panya mungatula ngura nyangangka nyinangi, nyuntumpa war̄ka tjuŋangku tjiipi tjuṭa kanyinnyangka, munula tjananya kurantja wiyangku wantingi, kaya palya alatjitu nyinangi. Munu panyala nyuntumpa kutjupa kutjupa tjuṭa kutitjunkunytja wiyangku alatjitu wantingi. ⁸ Wanyu tjanala tjapata pala tjutangka tjapila, kantaya tjukarurungku wangkaku.

‘Kalampa wanyu ngalturingama. Nyangatjala kuwari pitjangu mai pulka ngalkunnyangka ngatjintjikitja. Wanyuya nganampa mayatjaku ngalturingama nyuntumpa panya malpaku, Davidaku, munulanya mai unkul’iyala panya ngananala uwankara walytjarara walytjarara.’

Alatjiya ankula ma-wangka wati panya Napalta.”

Alatji Davidalu tjanala wangkara witura iyanu wati panya yangupala 10-pangka.

⁹ Kaya mulapatu ankula palula ma-tjakultjunu wati panya Napalta, munuya palula wangkara wiyaringkula paṭara ngarangi.

¹⁰ Palu Napaltu tjananya waru-warungku mirpañarira kurara workingu wati panya tjuṭa, “Wampa! Davida yaalitja nyura wangkanyi? Ngayuluna palumpa ngurpa alatjitu, kulintja wiyatja. Nyaaku nyarangku wanyu wati pulkangku-palku kaŋany-kananytju nyinara wangkanyi? Wiya, paluru tjinguru palumpa mayatjanguru ngulu wirtjapakantjatjanungku wangkanyi. Panya war̄ka tjuṭaya mayatja tjuṭanguru kumpira wirtjapakalpai, ka tjinguru paluru palu purunypaṭu. ¹¹ Kulilaya, mai kuka nyangatja nganampa kutju pauṇu ngayuku munu war̄ka tjuṭaku kutju, palu Davidanya nyuranya na ungpunytja wiya alatjitu.”

¹² Kaya wati panya yangupala 10-pa ngurakutu malaku anu munuya Davidala tjakultjunu wati panya Napaltu wangkanytja uwankara. ¹³ Ka Davidalu palumpa panya tjaultji uwankarangka wangkangu, “Ala! Tjulaya mantjila!” Kaya mulapatu mantjinu, ka paluru tjula mantjinutu. Kaya tjaultji paluru tjana ritiringkula Davidala tjungu anu pikakitja nampa nyanganpa 400, palu tjaultji 200 kutjupa-tjaraya nyinangi malaringkula ngura anga-kanyintjikitja.

¹⁴ Palu Napalku wati waṛka kutju anu Apikailtakutu, palumpa panya kurikutu, munu palula alatji wangkangu, "Kulinun? Panya Davidalu wati yangupala 10-pa witura iyanu nyuntumpa kurikutu, kaya palulakutu pitjala wirura wangkangi, palu nyuntumpa kuringku tjananya kurara waru-warungku warkira paira iyanu mai munu kuka ungkunytja wiyangku.

¹⁵ Kala nganana nyakula tjituru-tjitururingu palumpa tjanampa. Tjana wati wiru tjuta ngaltunytju, munulanya kurara pungkupai wiya, panya tjana mukulyangku nganana nyana atunymara kanyilpai kutjupa tjutangku tjulyara katinytjaku-tawara. ¹⁶ Paluru tjana mungangka kalala kulu ngananala itingka para-ngarapai, munulanya atunymankupai wirura wankaru nyinanytjaku. ¹⁷ Palu kuwari nyuntumpa kuringku Davidanya tjananya warkingu, wati panya palumpa tjaultji tjuta kulu, munu mai kuka ungkuwiyangku wantingi, kaya maralpa anu, ngaltutjara. Ka nyanga palulanguru Davidalu tjinguru nganampa tarapula palyalku, nyuntumpa walytja uwankaraku kulu. Panya nyuntumpa kuri wati mirpanjtju alatji, kutjupangka kulilpai wiya. Ka wanyu nyuntu purkarangku kulinma, munu Davidaku tjanampa wiru palyala, pitjala nganana nyana pungkunytjaku-tawara." Alatji wati Napalku waṛkangku wangkangu.

¹⁸ Ka Napalku kuringku tjukurpa nyangatja kulira mapalkungku kulinu Davidala tjanalakutu mai kuka katinytjikitjangku, munu paluru mai nyuma 200 tjunu munu piti pulka kutjarangka waina tjutinu, munu kuka tjiipi 5 nganmanytju paura unmi tjunu, munu yakutja pulkangka mai wiita tjutinu, munu raitjinpa kaputura pulka tjunu munu mai nyuma 200 ilinguru palyantja kulu tjunu. Munu mai nyanga uwankara utulura katinytjikitjangku tangkiyi tjutangka utitjunu. ¹⁹ Munu palulanguru Apikailtu palumpa waṛkaripai tjutangka altira wangkangu, "Nyurawara kuranyuri mai pala tjutatjara, kaña ngayulu nyurala malangkaṭu anama ngayuku tangkiyingka." Palu paluru palyantja uwankara palumpa kuringka wangkawiyangku wantingi.

²⁰ Munu paluru tangkiyingka tatira ma-pakanu, munu puli ngururwanu anangi. Munu ankula ankula para-arintara nyangu Davidanya wati tjutatjara iwara kutju palulatu ngalya-wirkankunyangka.

²¹ Palu paluru pulanku nyakunytja kuwaripangka Davidalu palumpa tjungutja tjutangka mirpan-mirpanṭu wangkakatingi wati Napalngatjara alatji wangkara, "Panya palumpa wati waṛkaripai tjutala wirura atunymanangi, palumpa tjiipi nanikuta tjuta kulu, kutjupangku tjulyantjaku-tawara. Mulapanatju ngayulu palunya tjananya wirura atunymanangi, kanitju nyaanguru paluru kurara pungangi? ²² Palyana palunya kuwari tjinṭu pakantja kuwaripangka iluntankuku, palumpa katja tjuta munu wati waṛkaripai uwankara kulu. Palu wiyangkampa Godaluni ngayunya palya iluntankuku." Nyanga alatji paluru wangkakatingi Davidalu, Apikailnga wirkankunytja kuwaripangka.

²³ Ka Apikailtu Davidanya nyakula mapalku tangkiyinguru panya ukalingkula tultjungarakatingu Davidala tjinangka, munu yunpangku manta pampunu. ²⁴ Munu palula wangkangi, "Ngayukun mayatja! Wanyunitju ngayunya kulinma, munutju ngayuku kuringku palyantjijanguru ngayunya ngukanma. ²⁵ Wiru ngana, ngayuku kuri Napalnga panya tjaka wati mirpanjtju alatji, ka paluru panya wangkanytja kulira wantima. Panya paluru tjakangku kura kutju wangkapai munu tjukarurungku kulilpai wiya. Wanyu kulila mayatja! Panya nyuntun wati

10-pa ngayuku kurikutu witura iyanu maiku ngatjintjaku, palu ngayuluṇa palunya tjananya nyakunytja wiyatū pitjanyangka.

²⁶⁻²⁷ “Palu Mayatja, kuwariñanku mai pulka mulapa ngalya-katingu. Wanyu tjananya mantjira uwa, nyuntumpa tjaultji tjuṭa. Panya Mayatja Godalunta kuwari markuṇi wati nyara tjuṭa pungkula iluntankunytjaku-tawara. Munu nyuntunya kurannya ngayuku kuri kuwari pungkuku, kaṇa ngayulu mukuringanyi paluru nyuntumpa mirpaṇtju tjuṭa kuļu palu purunypaṭu pungkunytjaku. Uwa, Mayatja Godala mirangkaṇa nyangatja mulamulangku wangkanyi, nyuntula mirangka kuļu.

²⁸ “Wati ngana, mayatja wiru, ngalturiwatju! Munuṇitju kura ngayulu palyantjitjanguru pungkuwiyangku wantima kalypangku. Ngayulu kulini panya ngulanta Mayatja Godalu Israelku mayatjarinytjaku tjunkuku, panya nyuntun Mayatja Godaku mirpaṇtju tjuṭa pikaringkula pungkupai alatjiṭu. Kaya nyuntumpa katja munu pakalipiṭi malatja maletja palu purunypaṭu nyuntumpa arangka Israelku mayatjarira nyinara wañalku. Kaṇa nyuntumpa Godala tjapini nyuntunya tiṭutjarangku tjukaruru kanyintjaku kura palyantjaku-tawara. ²⁹ Ka nyuntumpa mirpaṇtju tjuṭangku nyuntunya iluntankunytjikitjangku nyakunyangka Mayatja Godalu nyuntunya wankaru kanyilku, munu tjananya mapalku iluntankuku, panya watingku tjangayangka puļi tjunkula atulpai, palu purunypa tjananya mapalku wiyalu.

³⁰⁻³¹ “Mayatja Godalu panyanta tjuṭa-arangku kalkunu Israelku mayatja tjunkunytjikitjangku. Paluru panya kalkuntjatjanungku palyalku alatjiṭu. Ara panyatja kulila, nyuntu panyan mirpaṇarira aŋangu palya tjuṭa iluntankunytjikitjangku kulinigi. Palu kuwarin iluntankunytjaku wiya nguwanpa ngaranyi, kan nyara palulangurulta miriputju wiyaringkuku. Uwa, ka Mayatja Godalu uwankara wiru tjuta nyuntumpa palyara wiyanngangka, wanyuṇi kulinma watarkuriwiyangku, nyuntumpa panya warkaripai.”

³² Ka minyma panya Apikailta Davidalu alatji wangkangu, “Uwa, kuwarina Mayatja Godaku pulkara pukularinyi panya palurunta ngayulakutu iyanu wangkanytjaku. ³³ Ngayulu mukuringanyi nyuntunya Godalu pukulmankunytjaku panya nyuntun minyma nintipuka mulapa. Kuwari panyan ngayula tjukurpa wiru wangkangi ngayulu kuliṛa tjukarurungku palyantjaku kaṇa mulamularinganyi tjukurpa wiru kutju kuliṛa. Palulan-guruṇa Napalnga tjananya pungkuwiyangku wantiku palumpa walijapiti tjuṭa munu palumpa warkaripai tjuṭa kuļu. ³⁴ Uwa mulapani Mayatja Godalu markuṇu Israelku panya Mayatjangku aŋangu tjuṭa pungkuwiyangku wantintjaku nyuntunya kuļu. Tjinguruṇa mulapa Napalnga tjananya iluntanama palumpa wati uwankara kuļu, palu nyuntu-wararan mapalku wirkanu ngayulakutu wimaru nyangaku.”

³⁵ Munu Davidanya alatji wangkanytjatanu pulkara pukularingu, munu Apikailtanguru mai mantjira palula wangkangu, “Kulinuna nyuntumpa tjukurpa, munuṇanta kuwari nyanga nyuntula wangkanyi kalypangku pungkuwiyangku wantintjikitjangku. Ka palyalta ma-pitja ngurakutu pukulpa nguluringkunytja wiya.”

³⁶ Palula małangka minyma panya paluru małaku anu ngurakutu, munu ma-wirkara nyangu palumpa panya kuringku Napaltu mai pulka palumpa warka tjuṭaku palyannyangka. Palu wati panya paluru tarangka pulka, pukulpa mulapa nyinangi, ka Apikailtu wantingi tarangka nyakula palula tjakultjunkunytja wiyangku Davidaku tjanampa mai katintjatjanungku. ³⁷ Ka mungawinki wati panya Napalnga tarangka ngarira

wiyaringkunyangka Apikailtu palula wangkangu alatji, “Mungartjina Davidaku tjanampa mai katingu palumpa wati tjutaku kulu, munuli wangkangi, ka Davidalu mai ngayulu ungkunytja mantjinu, mununu paluru wangkangu pukulpa ankunytjaku ngurakutu.” Alatji paluru uwankara utingku tjakultjunu palumpa kuringka. Ka wati panya paluru kulira mapalku kututu tuu-tuukatira ngarakatingu munu punkara tiwilpa ngaringi.³⁸ Ka tjintu 10-pa ngarala wiyaringkunyangka malangka Mayatja Godalu wantir’iyanu wati panya Napalnga ilunytjaku.

³⁹⁻⁴⁰ Ka Davidalu kulinu Napalnga ilunytja munu wangkangu, “Wati nyara paluru Napaltu kura tjuta palyaningi anangu tjutaku, ka kuwari Mayatja Godalu palunya wiyanu. Kana kuwari pukulpa nyinanyi, panya paluruni markunu palunya tjananya iluntankunytjikitjangku wangkanyangka. Uwa, Mayatja God, mirawaninyinanta, panya nyuntun Napalnga wiyanu ngayunya kurannyaangka.”

Ka minyma panya Apikailnga wanakalarira ngura arangkatu nyinangi Kaamulta. Ka Davidalu wati mankurpa witura iyanu minyma panya palula ankula tjapintjaku, kaya mulapatu wirkara palula tjamin alatji, “Davidanyanku mukuringanyi nyupali tjunguringkula nyinanytjikitja kurirara.”

⁴¹ Ka minyma panya Apikailnga tultjungarakatingu munu yunpangku manta pampunu, munu Davidaku panya warka mankurta wangkangu, “Uwa, pukularinyina paluru ngayunya altintytjaku, mununa pukularinyitu warka palumpa palyantjikitja, palumpa warka tjuta kulu tjina paltjintjikitja.”⁴² Munu wangkanytjatjanu mapalku tatinu tangkiyingka, munu palumpa kungkawara warka 5 altira tjunguringkulaya anu wati panya Davidaku warka mankurta. Ka tjana wirkankunyangka Davidalu kungka panya palunya altingu.

⁴³ Nganmanytju paluru kungkawara kutjupa altira kanyiningi ini Akinuwamanya ngura nyara Tjitjiriltanguru, munu palulanguru Apikailnga altingu munu pulanya kutjarara kanyiningi.⁴⁴ Panya nganmanytju mayatja Saulalu palumpa untalpa ini Mikaalanya ungu Davidalu kuringku altira kanyintjaku. Palu malangka Saulalu Davidalu kuraringkula untalpa palumpa tjulyara wati kutjupa ungu ini panya Paltiyilnga. Wati nyara paluru panya wati ini Layitjiku katja ngura ini Kalimalanguru.

26

Davidalu Piruku Saulanya Pungkunytja Wiyangku Wantintyja

¹ Ka wati tjutangku ngura nyara ini Tjipalanguru ankula Saulanya nyangu ngura panya Kipiyala nyinanyangka tawunu walytjangka munuya palula wangkangu, “Kulila, Davidanya tjana kumpira nyinanyi pulingka ngura Akilala ngura ini Tjitjimanta itingka.”

² Ka Saulanya tjana wati warmala 3,000-tjara ritiringkula anu ngura panya piltikutu ini Tjipalakutu Davidanya ngurintjikitja.³ Munuya wirkara ngura tjunu iwarangka itingka puli panya Akilala ngura ini Tjitjimanta itingka palu Davidanya kumpira nyinangi ngura nyara piltingka Tjipala.⁴ Ka Davidalu wati palumpa tjuta iyanu ankula nyakunytjaku, “Yaaltjingkaya wati panya Saulanya tjana ngura tjunkula nyinanyi?” Kaya ankula ma-nyakula pitjala Davidala tjakultjunu.

⁵ Ka munga kultungka Davidanya wati tjutatjara anu ngura nyara palulakutu panya Saulanya tjana ngarintjalakutu munuya nyangu Saulanya pula Apananya tjanala ngururpa ngarinyaangka. Kaya palumpa pulampa

tjaultji tjuṭa para-ngarira wañaningi kunkunpa uwankara. (Apananya wati ini Nuupaku katja, munu paluṛu Saulaku tjaultji tjuṭaku mayatja.)

⁶ Ka wati kutjara Davidala tjungu ngarangi Ayima-likanya (wati panya Iitakunu) munu Joabaku mañanypa ini Apitjainya kuļu. Ka Davidalu palula pulala wangkangu, “Wati ngananya ngayula tjungu pitjaku Saulaku ngurakutu?” Ka Apitjailu wangkangu, “Ngayuluṇa.”

⁷ Ka munga nyara palula Davidanya pula Apitjainya panykalkatira Saulaku ngurangka wirkamu tjana kunkunpa pułka ngarinyangka, munu pula Saulala itingka ngarangi kunkunta. Ka palula katangka itingka palumpa kuļata muřutjunkunytja ngarangi, kaya Apananya tjana tjaultji tjuṭa kuļu kunkunpa uwankara ngaringi.

⁸ Ka Apitjailu Davidala tjaalymara wangkangi, “Godalunta kuwari nyuntunya unganyi Saulanya panya nyuntumpa mirpantju. Wanyu kaṇa kuļata nyanga palumpangka wakara mantangka tjakatjurā wanti ka ilu.”

⁹ Palu Davidalu tjaalymara wangkangi, “Wiya iluntankuwyangku wantima, panya Godalu palunya mayatja ngurkantanu kinga nyinanytjaku, ka kutjupangku pungkunytjaku wiya ngaranyi. Palu tjinguru kutjupangku palunya iluntankuku, ka Godalu anangu nyara palunya wiylaku. ¹⁰ Palu ngula Godalu mulapa Saulanya wiylaku alatjitu. Tjinguru paluṛu wati tjiłpiringkula kutju iluku mutta tjinguru pikangka iluku. ¹¹ Panya Godalu palunya ngurkantanu mayatja kinga nyinanytjaku, kaṇa ngayulu Godalu ngurkantankunytjtja puṭu punganyi. Palu wanyuli kuļata munu piti nyanga minatjara kutju mantjira kati, munuli ngura nyangatja wantikati!”

¹² Munu Davidalu kuļata munu mina panya Saulala katangka itingka ngarinytjanya mantjira katingu munu pula anu.

Uwa, Godalu Saulanya munu tjaultji kuļu kunkunjenu rawa ngarinytjaku, kaya nyakunytja wiyatū pula ngarala ankunyangka.

¹³ Palulanguru pula ankula pułi kutjupangka tjukutjuku patu ngarinyangka ma-tatinu. ¹⁴ Munu pułi katungurulta Davidanya mirangu Saulaku tjaultji tjuṭakutu munu tjanampa mayatja Apanala mirara wangkangi, “Apana! Kuliniñin!”

Ka Apananya ngapartji ma-mirangu, “Nganalun palatja mirara urulytjin-gani nganampa kinga?”

¹⁵ Ka Davidalu mirara ma-wangkangu, “Nyuntu panya kunyun tjaultji wiru mulapa Israelku munun palulanguru uti kinga nyuntumpa nyakula atunymanama kunkunpa ngariwyangku, palu wati kutjara nyurala kunkunta ankula ngarangi mayatja panya nyuntumpa iluntankunytjikitja.

¹⁶ Panya Mayatja Godalu Saulanya ngurkantanu Israelkunuku kinga nyinanytjaku. Ka nyura palunya atunymankuwyangku wantirampa ilunytjaku ngaranyi. Nyawa kuļata munu piti minatja palumpa katangka itingka ngarinytja. Kuwari nyura nyanganyi? Pala wiya ngaranyi. Ngalili mantjira katingu!”

¹⁷ Ka Saulalu wankaringkula kulira ngurkantanu Davidanya wangka, munu mirara ma-tjapinu, “Nyuntun palatja Davida, ngayuku panya katja?”

Ka Davidalu wangkangu, “Uwa mayatja. Ngayuluṇa nyuntumpa panya warkaripainya. ¹⁸ Nyaakunin wataparaṇi? Kutjupa kutjupaṇa nyuntumpa ngunti palyanu?

¹⁹ “Mayatja, wanyuni wirungku kulila! Tjinguru Godalu nyuntunya ngayuku mirpañarinytjaku palyani, kan tjinguru kuka tiliwakara palunya ungguku, katju ngayuku kalyparingkuku. Palu tjinguru anangu tjuṭangku nyuntunya ngayuku mirpañarinytjaku palyani, kaṇa ngayulu

mukuringanyi Godalu tjananya wiyanjtaku, panya paluru tjanañiya ngura panya Godalu ngayunya ungkunytjitunguru painu kaña ngayulu wantikatira anu. Panya wangkanguña ankula goda ngalypa-ngalypa tjuṭa walkuntjaku. ²⁰ Palu mayatja wirungkuñi wantima ngura malikitjakutu parari wantir'iyantja wiyangku Mayatja Godalanguru patu ilunytjaktawara. Wanyunu kulila wirungku! Ngayuluña nyuntunya uulinkunyti wiya. Ngayulu pułka wiya tjukutjuku tjitu purunypa. Nyaakuñin pułkapalku ngurini? Panya kutjupangku tjułpu kulunypa tjułtaku puli katu ngurilpai, palu purunypañin ngurini.”

²¹ Ka Saulanya kulira kuntearingu munu wangkangu, “Uwa mulapa, kurangkuna ngayulu ngunti palyaningi. Katja, wanyutju malaku pitja! Panya nyuntuñin kuwari wankarunu iluntankuwiyangku, kananta palulanguru nyuntunya ngapartji wantinyi ngulura aruntja wiyangku.”

²² Ka Davidalu wangkangu, “Nyangatjanku kulaña panya! Wati kutjupa witura ngalya-iyala mantjintjaku! ²³ Panya anangu kutjupangku Mayatja Godanya wangañarangku kulinnyangkampa palunya paluru pukułmankupai. Panya paluruñi nyurampa ngurangka kuwari tjarpatjunu, palu pungkunytja wiyatuna nyuntunya, panya Mayatjalunta ngurkantanu kinga nyinanytjaku. ²⁴ Uwa, kuwari ngayulu nyuntunya iluntankunyti wiyangku wantingu. Palulanguruña ngayulu ngapartji Mayatja Godala tjapini ngayunya wankaru anga-kanyintjaku.”

²⁵ Ka Saulalu wangkangu, “Kananku Mayatjala tjapini nyuntunya atunyti kanyintjaku munu kunpungku wiru tjuṭa palyantjaku.”

Ka Davidanya ma-pakara anu, ka Saulanya malaku ngura waltyjakutu anu palumpa wati tjaultji tjułatjara.

27

Davidalu Pilitjiyaku Mayatja Ngunti Kurantja

¹ Palu Davidalu waltyjangku alatji kuliningi, “Tjingurunitju ngula Saulalu ngayunya ngurira iluntankuku. Wanyu kañatju ngura nyara Pilitjiyalakutu ara, kañi Saulalu wanantja wiyangku wantiku, kañatju wankalpi kumpira maunṭalpa nyinama.”

²⁻³ Palulanguru Davidanya palumpa tjaultji tjuṭa 600-tjara anu Israelinga wantikatira munuya ngura ini Kaitjala wirkara nyinangi, Pilitjiyanya ngurara tjuṭangka tjungu. Ka ngura nyara palumpa mayatja wati ini Akitjanya. Wati nyara paluru Mayakaku katja. Ka Davidaku tjaultji tjuṭangku tjananku kuri, tjitji tjuṭa kułu tjanala tjungu katingu. Ka Davidalu kułunku palumpa kuri kutjara katingu Ayinamanya pulanya Apikailnga. Minyma panya Ayinamanya ngura ini Tjitjarıltanguru, ka minyma panya kuri kutjupa wati panya Napalku kuri wanakalarira nyinanytjanya ngura nyara ini Kaamultanguru.

⁴ Ka anangu kutjupangku Saulala tjakultjunu Davidanya ankunytja ngura ini Kaitjalakutu, ka kulintjatjanungku Saulalu wantir'iyau piłuku ngurintja wiyangku.

⁵ Ka tjintu kutjupalta Davidalu Kaitjaku mayatjangka Akitjala ngatjiningi nguraku nyinanytjikitjangku alatji wangkara, “Nyangatjala nyuntumpa ngurangka tjuṭa mulapa nyinanyi. Palu nyuntu ngayuku pukulpa ngaralampa nganananya tjura tawunu tjukutjukungka maunṭalpa, kala nyara palulalta ngura palyara nyinaku.”

6 Ka nyara palula arangka Davidanya Akitjalu ungulta ngura ini Tjikalakanya, ka palulangurulta ngura nyara paluru Judah-kuringu Israelkunu panya tjutaku.

7 Ka Davidanya tjana manta nyara Pilitjiyala kuLi kutju munu piRa kutjara kutjara nyinangi.

8 Munuya tjintu nyara palula tjanala nguranguru warmalarira ancupai ngura tjutakutu munuya para-ngarala anangu tjuta pungkula iluntankupai ngura ini nyanga tjananya Kitjurkunu tjuta munu Kuutjukunu tjuta munu Ama-likakunu tjuta. Anangu nyara paluru tjanaya ngura walytjangka iritinguru alatjitu nyinangi rawa mulapa. Palumpa tjanampa manta ulparira ma-ngaringi tjarukutu Itjipalakutu. Ngura nyara paluru uril-urilpa pulka.

9 Ka Davidalu palumpa warmala tjutatjarangku tjanampa ngurangka tjarpara wati minyma uwankara iluntankupai munuya tjanampa kuka tjuta katipai tjiipi, tangkiyi, kamula, puluka munu tjanampa mantara tjuta kuLu. Munu paluru ancupai mayatja Akitjalakutu. **10** Ka mayatjangku panya Davidala tjapilpai, "Ngura ngananya ngurara tjutan kuwari pungangi?" Ka Davidalu palunya titutjarangku ngunti kuralpai. Kutjupara paluru wangkapai, "Judah-lakutula anu." Munu piRuku kutjupa-ara paluru wangkapai, "Ngura Tjiramiltakutula anu." Munu piRuku kutjupara wangkapai, "Kiinkunu tjutakutula anu." Titutjarangku paluru alatji ngunti wangkapai mayatja panya palula. **11** Palu Davidanya tjana ngura nyara palula tjanalakutu ankunytja wiyatU. Palu paluru tjana rawa ancupai ngura ititja tjutakutu munuya anangu Pilitjiyanya ngurara tjuta iluntara wiyara anangu kutjupa witira ngurakutu katinytja wiyatU. Ka kutjupa wanka nyinanytja wiya pitjala mayatja Akitjala tjakultjunkunytjikitja, ka mayatjangku panya kulintja wiya Davidalu Pilitjiyanya ngurara tjutaku tawunungka tjarpara tjuta pungkunytja, Israelnga ngurara wiya.

12 Ka wati panya mayatja Akitjalu kulira mulamularingu alatjitu Davidalu wangkanyangka munu unngu alatji kulinigi, "Tjinguru kuwari Israelkunu tjuta Davidaku kuraringkuku pulkaRa alatjitu, ka paluru ngayuku malpalta nyinaku ngayula titutjara." Paluru ngunti kulinigi Israelkunu tjuta pungkunyangka-palku.

28

Saulalu Ngangkaringka Wangkanytja

1-3 Nganmanypa panya Samuelnga Israelta wanka nyinanyangkalpi anangu kutjupa tjarangku miri ilunytja tjutangka kurunta wangkapai Godala tungunpungkula,* ka tjananya Saulalu Israeltanguru paira iyaNu.

Ka palulangurulta ngula Samuelnga ilungu, kaya Israelkunu tjuta tjituru-tjitururira pulkaRa ulangi munuya palunya ngura walytjangka tjunutjunu tawunu ini Raamala.

Ka tjintu kutjupa Pilitjiyanya ngurara tjuta pitjangu pika pungkunytjikitja Israelkunu tjuta. Ka Pilitjiyaku mayatjangku Akitjalu Davidala wangkangu, "Nyuntu munu nyuntumpa wati tjuta kuLu uti ngayula tjunguringama Israelkunu tjuta pungkunytjikitja."

* **28:1-3** Anangu tjutangkuya arkara miriku kurunta wangkapai, ka kulira tjananya ngapartji ngalya-wangkapai. Kaya tjapilpai, "Ngula ngayulu nyaaringkuku?" Ka paluru tjanala tjakultjunkupai, "Nyuntu ngula alatjiriku." Palu nyanga alatji palyantjaku Godalu painu. Nyawa Deuteronomy 18:10-12.

Ka Davidalu ngunti palula uwanmanu alatji wangkara, “Uwa, palya, nganañala tjunguringanyi, kan nyakukulta nganaña tjananya pulkara pungkunyangka.”

Ka Akitjalu Davidala wangkangu, “Palu nyura tiutjara ngayula tjungu para-ngarama, munuñitjuya pulkara atunyamanama, palya?”

⁴ Kaya Pilitjiyanya ngurara tjutangku pitjala ila ngura tjunu tawunu ini Tjuninta. Ka Saulalu tjana Israekunu tjutangku puli murpu ini Kilpawala itingka ngura tjunutu. ⁵ Munu Saulalu Pilitjiyanya ngurara wati warmala tjuta nyakula pulkara nguluringu. ⁶ Munu Mayatja Godala tjap-iningi, “Yaaltjirikulanku?” Palu Mayatjalu palula wangkanytja wiyangku alatjiwantingi. Munu palu purunypa tjukurmankunytja-wanungku kuļu utintja wiyangku wantingi. Ka wati tjukurtjarangku arkara punu ngurkantankupai kutjara waningu nyakunytjikitjangku, palu Godalu puňu nyara palulawanungku kuļu utintja wiya. Munu wati panya wangkajara tjutangka kuļu paluru tjukurpa wangkanytja wiya Saulala utira tjakultjunkunytjaku. Paluru wantingi alatji. ⁷ Ka Saulalu wangkangu warmala panya tjutaku mayatjangka, “Minyma kutjupa tjinguru palakutu nyinanyi miri ilunytja tjutangka kurunta wangkapai. Ankulaya nguriña ma-nyawa minyma nyara palunya munuňiya pitjala tjakultjura, ka palulakutu ankula tjapilku alatji, “Nyaaringkuku kuwari?” Ka paluru miri panya kurunta tjapira ngayula wangkara utilku.”

Ka watingku palula wangkangu, “Tawunu ini Intula nyinanyi minyma pala palu purunypa miringka kurunta wangkapai.”

⁸ Kanku Saulalu nyangatja kulira mantara mayatjaku araltjanu munu mantara kutjupangka tjarpangu aňangu tjutangku mayatja nyakula ngurkantankunytjaku-tawara. Munu munga nyara palula Saulanya wati kutjaratjara anu minyma palunya nyakunytjikitja munu wirkara wangkangu minymangka panya, “Ngayulu mukuringanyi nyuntu wati miri kurunpa altinytjaku. Kuwarinanta ini nyuntula wangkaku, ka miri nyara palunya altira wangka. Palya?”

⁹ Ka minymangku panya Saulanya kulinigi wati kutjupa-palku. Munu palula wangkangu, “Nyuntun ninti kinga panya Saulaku? Panya paluru aňangu miringka wangkapai tjuta paira iyanu ngura Israeltanguru. Tjinguruňitjun ngayunya ngunti kuraňi iluntankunytjikitjangku.”

¹⁰ Ka Saulalu wangkangu alatji palula, “Wiya! Nganaña tarapula palyantja wiya nyuntu wati miringka kurunta wangkanyangka. Mulamulangkuna wangkanyi Mayatja Godala mirangka.”

¹¹ Ka minymangku wangkangu, “Uwa palya. Palu miri kurunpa ngananyan wanyu wangkanyi ngayulu altira nyuntula kuranyu ngaratjunkunytjaku?”

Ka Saulalu wangkangu, “Samuelku kuruntana wangkanytjikitja mukuringanyi.”

¹² Ka minymangku Samuelku kurunpa altingu ngalya-pakantjaku. Ka mulapatu kurunpa panya utiringu, ka paluru nyakula pulkara mirangu munu Saulanya wangkangu, “Nyuntun ngayunya ngunti kuraňu. Nyuntun Saulanya alatji! Kuwarin ngayunya iluntankuku?”

¹³ Ka Saulalu palula wangkangu, “Wiya, nguluringkunytja wiya rapa ngarama! Wanyuňin tjakultjura nyaan nyangu?”

Ka minymangku panya wangkangu, “Wati kurunpa ngalya-pakannyangkana nyangu manta unnungururu.”

¹⁴ Ka Saulalu tjapiningi, “Paluru wanyu nyaa purunypa?”

Ka minymangku wangkangu, “Paluru wati tjilpi kuuta waratjara.”

Ka Saulalu alatji kulira kulinu, “Munta-uwa, palatja kurunpa Samuelku alatjiitu.” Munu Saulalu tultjungarakatira yunpangku manta pampunu.

¹⁵ Ka Samuelsu kuruntu Saulala wangkangu, “Nyaakuñin kurulnguru nyanga altira pakaltjinganu nyuntula kuranyu ngaranytjaku?”

Ka Saulalu wangkangu, “Pilitjiyanya ngurara tjutaya nganampa pikaringanyi kaña puťu kulinu. Nyaalkuña? Panya Godaluñi alpamilantja wiyangku wantir’yanu. Palulaña tjapinu, kañitju wangkanytja wiya. Nganmanypa panya paluru ngayulu tjapinnyangka utilpai alatjiitu, palu kuwari nyanga wiya. Paluru wati wangkatjara ngayulakutu iyantja wiya palumpa aŕa utira tjakultjunkunytjaku. Munuñi tjukurmankunytjawanungku kuľu ngayula utira tjakultjunkunytja wiya alatjiitu. Kañanta nyuntunya kuwari pakaltjinganu ngayunya alpamilantjaku, ‘Nyaalkuña? Wirungkuñi tjakultjura!’”

¹⁶ Ka Samuelsu wangkangu palula, “Mayatja Godalunta wantikatingu munu kuwari nyanga paluru nyuntumpa mirpañtju nyinanyi. Kañi nyuntumpa palyantjaku ngayula tjapintja wiyangku wantima. ¹⁷ Panya Mayatja Godaluñi ngañmanytju wangkangu wanka nyinanyangkalpi, ka panyananta nyuntula tjakultjunu, ka paluru palyani alatjiitu kuwari ngañmanytju nyuntula wangkanytjanungku. Tjukarurungkuñanta wangkanyi, panya palurunta kuwari wiyaní alatjiitu Israelku Mayatja nyinanytjaku. Nyuntun wiyaringanyi, ka nyuntumpa arangka paluru Davidanya ngurkantara tjunkuku. ¹⁸ Panyatjan kulini? Panya Mayatja Godanya Ama-likakunu tjułaku pulkara mirpañaringi munu panyanta wangkangu tjananya uwankara pungkula wiyatjaku munu tjana kanyintjitja uwankara kuľu kurara wiyatjaku. Palu nyuntun palula tungungpungu munun kulintja wiyangku wantingu. Kanta pala palulanguru Mayatjalu nyanga alatji palyani. ¹⁹ Munu Pilitjiyanya ngurara tjuta mungawinki pika pitjanyangka nyuranya alpamilantja wiyaringkuku, kaya nyurampa pikaringkula pungkula nyurala waintariku Israelkunu uwankarangka, ka nyuntu munu nyuntumpa katja tjułta kuľu ilura ngayula tjunguringkuku miriku nyanga ngurangka.” Nyanga alatji Samuelsu Saulala kuruntu wangkangu munu wangkara wiyaringkulalta arkayiringu.

²⁰ Ka Saulalu tjukurpa nyangatja kulira yunpanguru mantangka punkanu pulkara nguluringkula. Panya paluru uparingu kalala mungangka kulu mai ngalkuntja wiyatú.

²¹ Ka minyma panya palulakutu ngalya-ilaringu munu nguluringkunyangka nyakula wangkangu, “Mayatja wiru, nyuntu panyanin wangkangu Samuelnga kurunpa pakaltjingantjaku. Kañanta kulinu wati kutjupangku-palku wangkanyangka, munu panyana mulapaňu pakaltjinganu palu walytjangkuñatju kulintja wiyatú ilunytjikitjangku. ²² Ala, kulilanı! Munu mai ngalkula kuŋpuriwa małaku nguraku ankunytjikitja.”

²³ Ka Saulalu wangkangu, “Wiya, wantinyina ngalkuntja wiyangku.” Kaya minymangka tjunguringu Saulaku panya wati kuranyitja tjułta kuľu, munuya rawangku palunya wituwituningi ngalkuntjaku. Ka Saulanya mantangka kuwaripatu rawa nguwanpa ngaringi upatu, munu kulira kulira mantanguru pakara ma-marara piitangka nyinakatingu.

²⁴ Ka minymangku panya puluka kuľunypa kanpi pulka kanyintjtajnungku mapalku ankula iluntara paunu mai tampa kuľu. ²⁵ Munu katira ungu Saulanya tjananya, kaya ngalkula paltjaringkula mungangkañu anu.

29

Pilitjiyanya Ngurara Tjutangku Davidanya Malakungku Witura Iyantja Ngura Tjika-lakalakutu

¹⁻² Kaya tawunu panya kutjara-mankurnguru Pilitjiyanya ngurara tjuta warmalarira uwankara ngaparku tjunguringu tawunu ini Apikala, kaya Israelkunu tjutangku ngura tjunu kapitjarangka itingka wimařungka ma-wirkara ngura ini Tjitjarilta. Kaya mayatja panya ngura kutjara-mankurnguru palumpa tjanampa tjaultjingka tjungu maatjaringi kapuṭu kutjupa kapuṭu kutjupa winki mulapa. Kaya Davidanya tjana palumpa tjaultji tjuta tjanala tjunguringkula maatjaringi Akitjaku warmala tjutangka munuya mala nguwanpa pitjalinangi.

³ Ka Pilitjiyaku tjaultji tjutakku mayatja tjutangku Israelkunu tjuta tjanala tjungu maatjarinyangka nyakula wangkangu, “Ai! Israelkunu tjutaya nyaratja tjunguringku Akitjala tjanala. Nyaakuya nyaranpa?”

Ka Akitjalu wangkangu, “Wiya, Davidanya ngañmanypa Saulaku tjaultji nyinangi munu mungatu nguwanpa Saulanya wantira ngananala tjunguringu palumpa tjaultji tjutatjara. Munuya kuvari yiya kutju ngananala nyinangi wiru mulapa kura kutjupa palyantja wiya.”

⁴ Palu Pilitjiyaku tjaultji tjutakku mayatja tjuta Akitjaku pulkaṛa mirpañaringu munuya palula wangkangu, “Wiya, Davidanya tjananya ngurakutu witura iyala tawunu panya nyuntu unggunyjtijakutu Saulaku piruku malparinkunytjaku-tawara. Tjinguru paluru kulintja kampa kutjuparira nganananya iluntankuku, ka kinga panya Saulanya palumpa pukulariku piruku. Palula-tawara uti paluru tjana maunṭalpa nyinama ngananala tjungu pika nyangangka tjarpanytja wiya. ⁵ Kulinin panyatja? Israelkunu panya minyma tjuta? Panya pukulpaya nyañpingi munuya inma inkara wangkangi, ‘Saulaku warmala tjutangku wiyanu 1,000 warmala palu Davidaku warmala tjutangkuya palula munkara mulapa iluntanu 10,000-pa pulka mulapa.’ Alatjiya mirawañira wangkangi.”

⁶ Ka Akitjalu Davidanya altingu munu palula maunṭalpa wangkangu, “Tjukarurungkuṇanta tjakultjunanyi Godala mirangka, panya nyuntu warmala tjutatjara rawa ngayula tjungu nyinangi malpa alatjitu, kañanku mukuringanyi nyura ngayula tjunguringkula Israelkunu tjutakku pikaringkunytjaku. Palu nyanga Pilitjiyaku tjaultjiku mayatja tjutaya puṭu mulamularinganyi nyurampa. ⁷ Kaya nguraku ara tjana nyurampa mirpañarinytjaku-tawara munuya pilunpa ma-nyinama.”

⁸ Palu Davidanya kulira tjituru-tjitururingu munu Akitjala wangkangu, “Ngayuluṇa kura palyantja wiyaṇu nyuntumpa. Panya kuwaripatjarala pitjala nyurala titutjara tjungu alatjitu nyinangi malpa mulapa. Kalanyan nganananya nyaaku markuni nyurala tjunguringkula pikaringkunytjaku?”

⁹ Ka Akitjalu wangkangu, “Wiya ngayulu nyurampa pulkaṛa pukularinyi, panya nyuntu ngayuku malpa mulapa, angelpa purunypa. Palu ngayuku tjaultji tjutakku mayatja tjutangku nyuranya wangkangi pika nyangangka tjunguringkunytjaku-tawara. ¹⁰ Pala palulanguruya mungawinki mulapa pakara malaku ara ngurakutu tawunu panya ngayulu nyuntunya unggunytjalakutu.”

¹¹ Kaya Davidanya tjana mulapatu wanganarangku kulira pakara parari tjinturingkunyangka anu ngura panya Pilitjiyanya ngurara tjutakku mantakutu, kaya Pilitjiyanya ngurara tjuta kutju warmalarira Tjitjariltakutu ma-tatinungi Saulala tjanalakutu pikakitja.

30

Davidalu Ama-likakunu Tjuta Iluntara Wiyantja

¹⁻³ Kaya Davidanya tjana tjintu kutjara anangi rawa munu tjintu mankuritja ngurangka ma-wirkanu tawunu panya Tjikalakala, munuya wirkara nyangu tjanampa wali uwankara tilira nyaruntja munuya putu nyangangi kuri tjutaku munu katja untalpa tjutaku kuлу. Panya tjana Akitjala tjungu ankunyangka Ama-likakunu wati warmala tjuta tawunu panya palula tjarpangu małangka munuya kungkawara, minyma, tjitji tjuta kuлу katingu munuya tjanampa ngura tilira nyarura wantikatingu.

⁴ Kaya Davidalu tjana pitjala nyakula pulkara ulangu munuya ulara uliringkula uparingu. ⁵ Warmala nyarantuya Davidaku kuri kutjara katingu, Aki-nuwamanya pulanya Apikailnga.

⁶ Munuya ulara wiyaringkula Davidaku panya tjaultji tjuta palumpa mirpanaringu katja untalpa tjutanguru, munuya ngukara puntura wangkangi atura iluntankunytjikitjangku. Ka Davidanya kulira wangkanyangka pulkara tjituru-tjitururingu. Palu paluru kulinu Godalu palunya unngu rapannyangka munu palumpa tjaultji tjutangka raparingkula wangkangu. ⁷⁻⁸ Munu wati tjukurtjarangka Apiyatjala wangkangu, "Puñuna kulini. Wanyu mantara panya milmilpa ngalyakati munu tjarpa, kali Godala tjapilku ngananaala utintjaku." Ka mulapatu mantara panya ngalya-katira tjarpangu, ka pula Godala tjapinu, "Wañalkula wati nyara warmala tjuta?"

Ka Godalu wangkangu Davidala, "Uwa, palya, wañalaya, panya nyura tjananya wañara witilku alatjitu munuya nyuranku waltytja panya tjuta malakungku wanka mantjilku."

⁹⁻¹⁰ Kaya Davidanya tjana wati nampa 600 ma-pakañu munuya ankula karu ini Pitjurta wirkanu, palu tjara kutjupaya nyara palula pakuringkula nyinakatingu wati 200, kaya Davidanya tjana kutju karungka ma-itipirira anu wati 400 kutju.

¹¹⁻¹² Munuya ma-wirkara urilta ma-pitjangi munuya wati kutju Itjipanya ngurara nyangu. Wati nyanga paluru tjintu mankurpa mai wiya, mina wiya nyinangi. Kaya wati palunya nyakula Davidalakutu katingu, munuya mina, mai ili, raitjinpa, kiripitji pilti kuлу ungu, ka wati panya paluru ngalkula paltjaringkula palyaringu.

¹³ Ka Davidalu palula tjapinu, "Ngura yaaltjingurun? Ngananyanku mayatja?"

Ka wati paluru Davidala wangkangu, "Ngayuluna wati Itjipanya ngurara, ka ngayuku mayatja wati Malakaikunu. Mungaunu paluru pikatjara wantikatingu tjintu mankurpa. ¹⁴ Panya paluru nganana warmalarira anu tawunu ulparira ngaranytja tjutakutu Kiritjikunu tjutaku panya ngurakutu munula tjarpa para pungkula uwankara tjanampa tjulyara katingu. Munula piruku Judah-nya ngurara tjutaku mantakutu ngapartji anu munula Calebakunu tjutaku ngura tjutangka tjarpa para palu purunypatu katingu. Munula palulanguru tawunu ini Tjikalakanya tilira nyaruñu."

¹⁵ Ka Davidalu wangkangu wati panya palula, "Yaaltjingkaya wati panya warmala tjuta kumpira nyinanyi? Katinji palula tjanalakutu. Panya paluru tjanaya kurañu tawunu Tjikalakanya."

Ka wati Itjipanya ngurarengku wangkangu, "Uwa ngayulu nyuntunya katiku wati palula tjanalakutu, palu ngayunyanji kalkula Godala mirangka iluntankunytja wiyakitjangku mununi wati nyara tjananya ungkunytja wiyangku wantima."

Ka Davidalu mulapaṭu kalkunu pungkunytja wiyangku wantinytjikitjangku.

¹⁶ Ka wati paluru Davidanya Malakaikunu warmala tjuṭaku ngurakutu katingu. Ka pula ngalya-ilaringkula nyakukatingi tjana mai pułka paranyinara arintara ngalkunnyangka. Panya paluru tjana kutjupa kutjupa uwankara tjanampa nguranguru tjulyara katinytjatjanungku pukularira mai ngalkuningi munuya waina kuļu tjikiningi. Palu paluru pula paṭunguru kumpira ngarala nyangangi munu pula nyakula malaku anu ngurakutu.

¹⁷ Ka mungawinki ngalya-tjiṇturingkunyangka Davidanya warmala tjuṭatjara anu ngura nyara palulakutu, wati panya Itjipanya ngurārangku nintintjatjangka. Munuya wirkara Malakaikunu tjuṭa pungangi kaļala waṛa. Pungulaya mungartjiringu munuya tjuṭa mulapa iluntanangi. Palu wati yangupala Malakaikunu tjuṭaya kamulangka nguļu tatiṛa wirtjapakanu, nampa nyangatja 400.

¹⁸⁻¹⁹ Ka pika pungkula wiyaringkunyangka Davidanya tjana malangka tjarpangu Ama-likakunu tjuṭaku ngurangka, munuya nyangu wanka nyinanyangka tjanampa kuripiti munu katja unṭalpa tjuṭa kulu, munu kutjupa kutjupa uwankara Malakaikunu tjuṭangku kutitjuṛa katinytja tjanampa tawunu panya Tjika-lakalanguru. Munuya uwankara mantjira malakungku katingu, kuka tjuṭa kulu. ²⁰ Panya tjana tjiipi puluka tjuṭa walytjatjara tjulyara katingu Malakaikunu tjuṭangku. Ka Davidaku tjaultji tjuṭangku kuka uwankara utulura katingi ngurakutu wangkara, “Tjiipi puluka nyanganpa uwankara Davidakuringu.”

²¹ Munuya ngurakutu malaku ankula ngururpa wirkanu karu Pitjurta, panya nyara palulaya wati tjara nampa 200 paṭara nyinangi pakuringkula. Munuya Davidanya tjananya pitjanyangka nyakula ngaparikatingu munuya uwankara pułkara pukularingu. ²² Palu wati kutjupatjara Malakaikunu tjuṭangka pikaringkunytjatjanu kura nyinangi, munuya Davidala alatji wangkangu, “Wati nyanganpa panyaya nganañala tjungu pikakitja ankunytja wiyaṭu. Palu palya tjana kuri munu tjiṭji tjuṭa kutju mantjira anama, kala nganañña tjiipi, puluka, ulytja, kutjupa kutjupa tjuṭa Malakaikunu tjuṭangku tjulyara katinytja tjarara mantjilku.”

²³ Ka Davidalu tjanala wangkangu wati panya kurakura tjuṭangka, “Walytja tjuṭa! Mayatja Godalulanya nyanganpa ungu uwankara, kala manyuringkunytja wiyangku tjarala. Mayatjalu nganañanya wirungku ngalkinu kala Malakaikunu tjuṭa pungkula wiyanu, panya nyara tjana nganampa ngura Tjikalakanya kurara pungu. ²⁴ Ka nyura manyuringkunyangka kutjupa tjuṭa pukularinytja wiya. Kulilaya! Nganañña anu pika pungkunytjikitja, kaya tjara kutjupangku nyinara ngura ulytja kutjupa kutjupa tjuṭa atunymanangi. Kala uti uwankarangku tjarara mantjinma.”

²⁵ Uwa, tjukurpa nyanga palunya Davidalu wangkangu anangu Israaelkunu uwankarangku kulintjaku, ka kuwari nyanga ngarangi alatjiṭu.

²⁶ Kaya Davidanya tjana uwankara tjunguringkula ankula ngurangka wirkanu tawunu panya Tjikalakala munu palulanguru kulinigi Malakaikunu tjuṭaku kuka tjuṭa ngura tjuṭakutu iyantjikitjangku tjarukutungku manta Judah-lakutu. Munu paluru palumpa malpa tjuṭangka wangkangu tawunuku panya mayatja kuranyitja tjuṭangka, “Nganañña Godaku mirpantju tjuṭa pungkula waintaringu Malakaikunu

tjuṭa, munula tjanampa tjiipi puluka tjuṭa katingu, kaṇa kuwari kuka palunya tjananya ma-iyanı nyurampa nyuranku kanyintjaku.”

²⁷⁻³¹ Munu Davidalu wati tjuṭangka wangkangu tjiipi puluka panya tjuṭa katira aŋangu tjuṭa ungkunytjaku, tawunu nyanga palula tjanalakutu:

Pitjiltakutu
Ramatja-nikipilakutu
Tjatirtakutu
Arawalakutu
Tjipamatjalakutu
Itjimawalakutu
Rakaltakutu
Uumalakutu
Puwatjantakutu
Atjakalakutu
Ipurantakutu

Munu piruku kutjupatjara iyanu aŋangu nyanganku Tjiramilkunu tjuṭaku munu Kiinkunu tjuṭaku. Uwa, paluru kuka tjuṭa iyanu ngura panya palula tjanala para-nyinanytjatjanungku.

31

Mayatja Saulanya Katja Mankurṭjara Ilunytja

¹⁻² Ka panyaya Pilitjiyanya ngurara tjuṭa warmalarira anu ngura panya Kilpawalakutu munuya wirkara puli paṇṭa warara Israelkunu tjuṭa pungangi tjuṭa mulapa. Ka tjara kutjupa nguļu wirtjapakanu Saulanya munu katja maŋkurpa kulu ini nyanganpa Jonathannga, Pinatapanya munu Maltji-tjuwanya. Ka tjananya ngulura ma-waṭaparara katja panya maŋkurpa iluntanu. ³⁻⁴ Ka Saulalu tjuṭa pungangi, palu paluru putu winaringangi, ka Pilitjiyanya ngurarangku punarangka palunya wakaṇu, ka paluru punkara ngaringi, munu tjaultji palumpa kutitji katipaingka wangkangu, “Kuwariṇiya wati nyara kulira wantipai tjuṭangku pitjala ngayunya anara kurara pungkula iluntananyi. Kanı wanyu warpungkula nyuntumpa pala tjulangka wakara iluntara.” Palu tjaultji paluru pulkara nguluringangi palumpa panya mayatja iluntankunytjikitja. Palu Saulalunku walytjangku tjula palumpa milpinypa marangku witira kanyintjatjanungku palulatu punkanu mununku walytjangku wakara iluntanu. ⁵ Ka tjaultji panya paluru nyangu mununku palu purunypaṭu palyanu munu tjulakutu panya punkanu munu ilungu. ⁶ Uwa, Saulanya munu palumpa katja maŋkurpa tjaultji palumpa kutitji katipainya munu tjaultji kutjupa tjuṭa kuļu tjungu uwankaratu ilungu tjintu nyara palulatu.

⁷ (Kaya Israelkunu kutjupa tjuṭa nyinangi ngura nyara palula itingka ngura ini Tjitjarilta kampa kutjupa, munuya karu Jordanta itipi kuļu. Munuya tjukurpa kulinu Saulanya munu katja maŋkurpa iluntankunytja, munu Saulaku tjaultji tjuṭa nguļu wirtjapakanja. Nyanga palunya kuliraya tawunu tjananku wantikatira ngulutu wirtjapakanu. Kaya tjaultji panya Pilitjiyanya ngurara tjuṭangku mala pitjala nyangu walı ultu, munuya tjarpara walytjaringkula nyinangi.)

⁸ Munuya mungawinki małaku anu ařakutu panya tjana pungunytjalakutu munuya tjula, kuļata, kutjupa kutjupa tjuṭa kuļu mantjiningi aŋangu miri tjuṭanguru. Munuya uwankara para-mantjira Saulanya kuļu miri ngarinyangka nyangu munu katja maŋkurpa kuļu. ⁹⁻¹⁰ Munuya Saulanya kata kaṭara palumpa mantara anga-kanyilpainya mantjira katira timpulangka tjunu, panya tjana walkulpaingka. Panya tjanampa goda

minyma ini Atjatainya. Munuya Saulanya puntu wallpangka wakara utitjunu, palumpa katja maŋkurpa kuļu, city wall-ta ngura ini Pitjatjanta. Munuya palulangurulta tjaultji panya tjutangku aŋangu kutjupa tjuṭa tjakulpa witura iyanu, kaya tawunu tjutangka wirkara para-tjakultjunangi Pilitjiyala manta winkingka timpulangka kuļu aŋangu uwankarangka. Alatjiya tjakultjunangi, "Mayatja panya Saulanya katja maŋkurtjara ilungu munu tjaultji tjuṭa kuļu ilungu."

¹¹ Kaya Israelkunu tjuṭa ngura ini Tjaipitjala nyinanytja tjutangku kulinu panya Pilitjiyanya ngurara tjutangkuya kunyu Saulanya wakara wallpangka utitjunu katja maŋkurpa kuļu tawunu ini Pitjatjanta. ¹² Kaya ngura nyara Tjaipitjala wati kutjupatjara kunpu nyinangi munuya tjunguringkula mungangka anu tawunu panya Pitjatjantakutu munuya miri Saulanya nyakula mantjira katingu katja maŋkurpa kuļu tjanampa tawunukutu. Munuya warungka tilinu puntu palunya tjananya. ¹³ Munuya warunguru tarka tjuṭa kutju mantjira tjunutjunu katja panya maŋkurpa kuļu puṇu ini Tamarikala itingka ngura ini Tjaipitjala manta ini Kiliyatala. Munuya palulanguru tjintu 7-pa nyinangi tjituru-tjituru pulka mai wantira.

Tjukurpa Niyamayanyatjara Nehemiah Nyangatja Nganmanytju Nyakula Wangkanytjaku

Nyangatja Godaku tjukurpa munu tjukurpa nyanga paluru tjakultjunnanyi wati ini Niyamayalu ngura Jerusalemala wali piruku palyantja. Panya nganmanytju mulatuya wati Jew wiya tjutangku ngura Papilantanguru warmala pitjala wali Jerusalemania uwankara piluntankula wiyanu munuya anangu Jew tjuta pungkula tjuta mulapa iluntanu munuya tjara kutjupa ngura pararikutu katingu palumpa tjanampa ngurakutu, Niyamayaku tjamu kulu.

Ka ngula mulapa yiya tjuta ngarala wiyaringkunyangka Niyamayanya iti ngaringu ngura nyara Papilanta munu paluru pulkaringkula Papilanku mayatja pulkaku warkaripai nyinangi. Munu paluru Godala rawangku tjapiningi palunya Jerusalemalakutu iyantjaku. Ka mulapa tu Papilanku mayatjangku palunya witura iyanu wali panya Jerusalemania piruku palyantjaku.

Wati panya paluru wiru mulapa munu ngura nyara Jerusalemala anangu tjuta mayatjarira nintingu kanyiningi munu paluru tjanala tjungu wiru warkaripai. Ka tiana ngarala walingka warkarinyangka tjanampa mirpantju tjuta tjanalakutu rawa pitjangi munuya tjananya rawangku pikaringkula kuraningi. Palu tjananya Godalu atunytju kanyiningi. Ka ngula paluru tiana wali palyara wiyaringkula Godanya pukularira pulka walkunu. Ka wati tjukurtjarangku Godaku tjukurpa tjanala nyakula wangkangi nyiringuru.

[Tjukurpa nyanga paluru mutumutuntja ngaranyi, uwankara wiya. Palu ngulaya tjukurpa winki palyalku.]

Tjukurpa nyanganpa ngarinyi:

- 1:1—2:10 Niyamayanya tiana Jerusalemalakutu ankunytja
- 2:11—7:3 Niyamayalu tiana wall-pa pulka Jerusalemala para-arintara ngarinytja piruku palyantja
- 7:4-73 Anangu nyanga tiana Papilaniyalanguru pitjanytja Israeltakutu
- 8:1—10:39 Tjukurtjara ini Itjuralu Godaku tjukurpa anangu tjutangka nyakula wangkanytja
- 11:1—13:31 Tjukurpa kutjupa kutjupa tjuta Niyamayalu walkatjunkunytja

1-2 *Uwa, ngayulu wati ini Niyamayanya mununa kuwari nyiri nyangangka tjakultjunanyi ngayulu palyantjatjanungku. Panya ngayulu nganmanyapa nyinangi ngura kutjupangka tawunu ini Tjuutjala, ka nyara palula-arangka wati ini Tjuukitjinya mayatja pulka nyinangi ngura winkiku Israelku kulu, panya paluru ngura tjuta mulapa tjungura mayatjangku kanyiningi ini Puutjanya. Ka ngayulu mayatja panya palumpa warkaripai nyinangi.*

Ka kutjupa-ara ngayulu ngura nyara Tjuutjala nyinanyangka ngayuku kuta Jerusalemalanguru malpa tjutatjara pitjangu. Kana palunya nyakula pulka pukularingu mununa tjanala tjapinu, "Ngurangkampaya uwankara palya nyinanyi? Ka wali panya Jerusalemania palya ngaranyi?"

³ *Kaya wangkangu, "Wiya, nganampa walytja tjutaya tjituru-tjituru pulka nyinanyi panya tjanampa turapula pulka rawa ngaranyi. Kaya nganananya*

ngura ititja tjutanguru kurara pungkupai. Ka wall-pa panya pulka Jerusale-mala katalyapaṭu ngaranyi munu kaita tjuta kuļu warungku kampanytja ngaranyi, ka uwankara palyantja wiyatū kuwaripaṭu ngaranyi.”

⁴ *Ka ngayulu nyangatja kulira pulkara ulangi tjituru-tjitururira. Mununa tjintu tjuta mai ngalkuviya nyinara Godala rawangku tjapiningi anangu Jew tjutaku. Alatjina tjapiningi,*

⁵⁻¹¹ *“Mayatja God ilkaritja! Nyuntu panyan mayatja pulka mulapa nyinanyi, kaya anangu uwankara nyuntumpa pulkara nguluringkupai. Ka panya anangu tjutangku nyuntumpa pulkara mukuringkula nyuntumpa tjukurpa wanganarangku kulinnyangka nyuntu tjanampa nganmanytju kalkuntjatjanungku palyalpai alatjitu wantinytja wiyangku. Katju kuvari ngalturingama, mununi nyuntula tjapinnnyangka kulinma. Panya nganana Jew uwankarangku nyuntula pulkara tungunpungkula tjukurpa panya nyuntu Mosenya ungkunytjtja kulira wantingu. Ka panyan Mosenya wangkara kalkunu alatji, ‘Anangu nyanga ngayuku walytja tjuta ngayula rawa tungunpungkunya tjananya ngura walytjanguru paira iyalku, kaya ankula wiyingkuku ngura malikitja tjutakutu.’ Palu panya nyuntun kutjupa kuļu kalkunu alatji, ‘Palu tjanatjingga ngura pararinguru piiwiyingkula ngayunya piruku kulira wanganararingkunya tjananya malakungku katiku ngura walytjakutu ngayunya piruku walkuntjaku.’ Alatji panyan Mosenya wangkara kalkunu. Kala kuvari nyanga nyuntula pulkara tjapini nganananya ngura walytjakutu malakungku katinytjaku. Ka wanyu ngayulu mayatja nyara Tjuukitjila kuvari warkarinyangkampa palunya kulintja kampa kutjupanama wanganararingkula ngayula kulintjaku.”*

Alatjina Godala tjapiningi.

2

¹ *Munuña palula malangka tjintu kutjupa mayatja panya Tjuukitjiku waina katingu paluru tjikintjaku, mununa palunya ungkula palula itingka nyinakatingu yunpa tjituru-tjituru alatjiitu.*

²⁻⁶ *Ka mayatjangku ngayunya nyakula tjapinu, “Nyaangurun yunpa nyanga alatji tjituru-tjituru nyinanyi?”*

Kana wangkangu, “Wiya, nyara ngayuku tjamuku nguranguruña pulkara tjituru-tjitururingu, panya warmala tjutangku iriti ankula ngura nyara palunya wali uwankara katantara kuranu, wall-pa pulka kuļu piluntanu. Ka kunyu palyantja wiya pilulypaṭu ngaranyi.”

Ka mayatja panya paluru wangkangu, “Kan ngayulu nyaantjaku mukuringanyi?”

Kana palula wangkangu, “Nyuntu ngayuku mukuringkulampani palyanmara, kana ankula palyala ngura nyara palunya.”

Kani mayatjangku kulira pukularingu mununi palyanmanu ankunytjaku.

⁷⁻⁸ *Palu ngayulu piruku palula wangkangu alatji, “Wanyuni lita tjuta nyiringka walkatjura uwa ngayulu mayatja kutjupa tjuta ngururpa nyakula ungkunytjaku. Kaya mantjira nyuntu walkatjunkunytja panya nyakula ngayunya atunyamankuku iwarangka tjanampa ngurawanu ankunytjaku. Mununi wanyu lita kutjupa kuļu walkatjura uwa wati panya nyuntumpa puṇu tjuta kanyilpairyā ungkunytjaku. Munu alatji palula tjakultjura litangka ngayunya puṇu panya pulka tjuta ungkunytjaku, kana ngayuku tjungutja tjuta wangkaku mantjira katinytjaku ngayuku tjamuku ngurakutu kaita panya tjuta warungku kampanytja uwankara piruku palyantjikitjangku.”*

Kaṇi mayatjangku mulapaṭu nyiringka walkatjura ungu katinytjaku. Munu wati tjuta kulu witunu nyanytju wikitjara ngayula tjungu ankunytjaku Jerusalemalakutu. Kala mulapaṭu anu.

9-10 *Palu Jerusalemala itingka wati kutjara nyinangi Tjanpalatanya pula Tapayanya. Paluru pula anangu Jew wiya nyinangi tjanala tjungutja wiya munu pula tjunguringkula wangkangi.*

Ka Tjanpalatalu wangkangi, "Wati, nyuntu kulinu?"

Ka paluru ngapartji wangkangu, "Nyaa? Walangkuni wanyu wangka."

Ka Tjanpalatalu wangkangu, "Wiya, wati kutjupa kunyu pitjanyi ngururpa anango nyanga Jew tjuta alpamilantjikitja."

Palu Tapayalu nyangatja kulira mirpanarira wangkangi, "Nyaaku paluru pitjanyi nyanga nganampa ngurakutumpa?" Munu paluru pula ngayulu pitjanytja kulira pulkara mirpanaringi.

11-16 *Kala ngula wirkanu Jerusalemala panya mayatjangku iyantja tjutatjara. Munula kuwaripa nyinara pakuwiyaringangi tjintu mankurpa. Kana palulanguru munga kultungka pakara anu wati malpa mankurjara, mununa para-ngarala wall-pa katalya nyangangi kaita kampanytja tjuta kulu.*

17-18 *Mununa palulanguru mungawinki wati tjukurtjara tjuta munu mayatja tjuta kulu altira wangkangu tjanala, "Kulilaya! Ngura nyanga Jerusalemanyia pilukatingu alatjitu wall-pa winki, ngalututjara. Panya kaita tjuta kampara wiyaringu, ka wali uwankara kulu minya-minyantja alatjitu ngarala wañinyi. Wanyula kuwari urira wall-pa nyanga piluntankunytja munu kaita warungku kampanytjitja palyala malakungku. Panya Godanya nganampa ngaltingingu mukulya pulkanya, kani palulanguru ngura panya Puutjaku mayatjangku wangkara iyanu nyuranya pitjala alpamilantjaku."*

Kaya mayatja tjutangku ngayulu wangkanyangka kulira palyanmanu munuya wangkangu, "Uwa, walangkula wanyu palyala kuvaritu."

19-20 *Kaya wati mankurtu Tjanpalatalu, Tapayalu, Kitjimalu tiana kutjupangku tjakultjunkunyangka tjukurpa nyangatja kulira pulkara ikaringangi munuya nganananya pitjala kurara pungangi alatji wangkara, "Nyaaku nyura nyanga alatji palyani? Nyura tjinguru Puutjaku mayatjangka tungunpungkulampa palyani paluru ngula pitjala pikangku pungkunytjaku-tawarampa."*

Kana tjanala wangkangu, "Wiya, nganana mayatja kurantja wiya. Godalulanya nyangatja alpamilani wall-pa nyangatja palyantjaku. Kala palula kulini munula kuwari palyalkatira alatjitu wiyalu. Palu nyura ngura nyangatja ngurara wiya, anangu malikitja tjuta nyinanyi. Ngura nyangatja nganampa nyurampa wiya."

3

1 *Munula palulanguru wall-pa panya palunya palyalkatingi.*

4

1-3 *Palu wati panya Tjanpalatanya mirpanaringu munu wangkangu, "Wiya, nyanganpa anangu Jew tjuta, ngurpa tjuta. Nyaaringanyiya nyanganpa? Tiana wall-pa palatja putu malakungku palyara wiyan."*

Ka Tapayalu kulu ikaringkula alatji wangkangi, "Uwa, kuwari-puta tuuka tjutangku pitjala tiana pala palyantitjangka tatira wararakatiku, ka-puta uwankara pilukatira wiyariwa."

4-9 *Palu nyangatja kulira ngayulu Godala tjapira wangkangu, "Mayatja, nganananya wirungku kulinma. Panya tiana nganananya anara*

wangkanyi munu tjana ikaringanyi nganampa. Wanyu tjananya ngapartji kura_{ra}t_u pungama." Alatj_ina tjapiningi.

Kaya Jew tjuta wall-pangka pukulpa alatjitu warkaringi, pulkara mulapa. Kaya palyalkatira wall-pa panya waranu nguwanpa, ka wati panya Tjanpalatalu pula Tapayalu nyakula piruku pulkara mirpanaringu munu pula wangkangu alatji, "Arali wati tjutatjara munula wangkara tjananya uulinama, kaya kaar-kaararira pika-pikariwa, kala tjananya uwankarat_u puwa."

Palu ngayulu tjananya kulira wantingu, munu Godala rawangku tjapiningi, mununa wati tjuta kulatatjara wall-pangka itingka ngaratjunu angangarala nyakunytjaku mungangka kalala ku_{lu}.

¹⁰ Kaya Jew kutjupa tjutangku pitjala ngayula wangkangu, "Kulila, nyangatja puli minya-minya winki mulapa mantangka ngarira waninyi, kala warka pulka palyalkatira nganana paku pulkaringu munula wawanyarira pu_{tu} kulini. Yaaltjingara wall-pa palyara wiylku."

¹¹ Kaya nganampa mirpan_{tu} tjutangku kunyu wangkangu, "Kuwarila Jew tjuta watarku warkarinyangka ma-panykara ilaringkuku munula urulyku tjananya pungkula wiyanma warka tjana palyara wiyltjaku-tawara." ¹² Kaya palula tjanala itingka Jew kutjupa tjuta nyinangi, munuya tjana wangkanyangka kulira pitjala ngayula tjakultjunangi tjuta-arangku. ¹³⁻¹⁴ Ka palulanguru ngayulu wati ku_{la}tatjara tjuta munu tjula waratjara tjuta ku_{lu} wall-pangka itingka para-ngaratjura wanunu tjana ngarala nyakula palunya tjananya warkarinyangka atunymankunytjaku. Mununa Jew tjutangka wangkangu alatji, "Nguluringkuwiaya ngarama. Munuya kulinma panya Mayatja Godanya kutju pulka mulapa nyinanyi, munulanya paluru kutjungku atunymananyi nganananya uwankara. Ka nyuranku walytja tjuta ku_{lu} atunytju kanyinma Mayatjanya kulira."

¹⁵⁻²³ Ka nyara palulanguru wati kutjupatjara warkarinyangka kutjupa tjuta ku_{la}tatjara punaratjara tjanala itingka anga-ngarangi warmala tjuta pitjanyangka patara tjananya wakantjikitja.

Ka tjintu kutjupa ngayulu wati tjutangka wangkangu alatji, "Kulilaya! Nyangatjala warka pulka mulapa palyani munula patupatu wall-pangka kumpira nguwanpa palyani munulanku pu_{tu} nyanganyi panya tjarangku tjarangkula palyara. Tjinguru warmala pitjanyangkampa wati kutjupangku ngayula itinguru ngarala turampata puura miratjingalku nyura kumpira ngaranytja tjutangku kulintjaku. Kaya kulira mapalku tjunguriwa manta nyara ngali ngarala miratjingantjala. Ka Godalu nganananya alpamilalku warmala tjuta tjananya pungkula wiyltjaku."

5

Niyamayalu Anangu Ngaltutjara Tjuta Alpamilantja

¹⁻⁵ Ka ngulalta anangu panya wall-pa palyalpai tjutangku wangkara kulinngi alatji, "Tjinguru nganananya nyangangka nyinarampa mai wiya nyinaku, panya nganananya wall-pa nyangatja palyantjikitjangku nganampa kaana tjuta wantikatingu, munu panyala mai ukiri tjuta pakaltjingantja wiya pitjangu. Palulangurula kuvari walytja tjutangka maniku ngatjilpai mai payamilara ngalkuntjikitjangku, munula walytja kutjupa tjutangka mani kutjupaku ngatjilpai Puutjaku panya mayatja unggunytjikitjangku panya palumpa warka tjutangku ngananala tax mani palumpa mantjilpai. Ka panya kutjupa tjutangkula nganampa katja untalpa tjuta anangu kutjupa tjutangka manikitjangku tjalamilanu kaya tjanampa unytju warkarinyi. Ka

nyara palula tjanalanguru nganana pulkara tjituru-tjitururinyi. Utilanku panyatja ngapartji-ngapartjingku alpamilanma. Palu wiya, kutjupa tjuṭaya mukuringanyi nganana titutjarangku tjananya kutju mani malakungku ungkunytjaku.” Nyanga alatjiya wangkara kulinigi.

⁶⁻⁸ Palu ngayulu tjukurpa nyangatja kulira pulkara mirpanaringu mununa mayatja tjuṭa altira tjanala wangkangu alatji, “Nyura panya kutjupa tjuṭangka mani unytjungku unganyi malakungku payamilalkatinytjaku. Palu nyaaku nyura munkararinyi pulka mulapa malakungku ungkunytjaku? Panya tjanapu ungtjungku katja unṭalpa anangu walytja kutjupa tjuṭangka tjalamilani tjanamanitjararingkula nyuranya malakungku payamilantjikitjangku. Nyangatja nyura ngunti palyantja.”

Kaya wati panya mayatja tjuṭangku pilunpangku nyinara kulinigi ngunti tjanapalyantjatjanungku.

⁹⁻¹¹ Kanā wangkangu, “Nyanganguruya ngunti palyantja wiyangku wantima! Munu kutjupangku nyuranya puṭu malakungku payamilan-nyangkampa mapalkungku ungkunytjaku pauntjingara wangkawiyangku wantima! Munu kulila tjanampa kaana panya, panya nyuranya puṭu malakungku payamilannyangka nyura tjanampa kaana tjuṭa mantjinu. Warpungkulaya tjananya malakungku uwa! Nyaaku nyura walytja tjuṭa tjituru-tjituru titutjarangku palyani? Utila uwankara tjungu pukuḍpa warkarima.” Alatji ngayulu mayatja tjuṭangka wangkangu.

¹² Kaya kulira palyanmanu munuya wangkangu, “Palya, nyuntu pala wangkanytjala nganana kulinu munula kuwari tjukarurungku palyani.”

Kanā palulanguru wati tjukurtjara tjuṭa altingu palula tjanala tjunguringkunytjaku. Kaya pitjanyangka mayatja panya tjuṭangku tjukurtjara tjuṭangka mirangka kalkunu ngayulu panya wangkanytjanya tjungungku palyantjikitjangku.

¹³ Kanā palula tjanala wangkangu, “Nyura kalkuntjatjanungku palyanma alatjiṭu, panya nyura kalkuntja nyangatja tjukarurungku palyalwiyangku wantinyangka Godalu uwankara nyuralanguru mantjilku nyura kanyintja uwankara, ka nyura maralpa alatjiṭu nyinaku.”

Kaya anangu uwankarangku kulira palyanmanu, “Uwa mulapa.”

6

¹⁻² Munuya pulkara warkarira wall-pa panya wiyanu. Palu kaita tjuṭa kutjulta ngarangi piruku palyantjaku.

Kaya wati panya Tjanpalatalu Tapayalu Kitjimalu tjanawa wangka iyanu ngayulakutu alatji wangkara, “Ngananałakutu pitja, kala nyinara wangkara kulila.” Alatjiya ngunti wangkara altiŋgi ngayunya iluntankunytjikitjangku.

³⁻⁷ Palu ngayulu kulinu mununa malakungku wangka tjanalakutu iyanu, “Wiya, nyangatjaña warka pulka palyani mununa puṭu ma-pitjanyi warka wantikatira.”

Kaya piruku kutjara kutjara-arangku ngayunya puṭu altiŋgu wangkanytjikitjangku. Munu palulanguru puṭu altira Tjanpalatalu lita nyiringka walkatjunu ngayulakutu iyantjikitjangku. Alatji paluru nyiringka walkatjunu,

Wati panya Kitjimalu kunyu kulinu nyuntu mayatja pulkaringkunytjikitjangku wangkanytja munu kunyu nyura nganananya pungkula wiyatjikitjangku kuļu kulinu. Palu lita palunya iyantjikitjangku paluru mulamulangku tjakatjura patintja wiyangku ala wantingu kutjupangku mukuringkula alara nyakunytjaku.

8-9 *Ka ngayulu lita palunya mantjira nyakula ngapartji lita kutjupa walkatjura iyanu palulakutu alatji wangkara, “Palatja nyuntu kutjungku kulintja tjukurpa ngunti, mulapa wiya.”*

Munuña piruku Godala tjapiningi alatji wangkara, “Wirungkuni kuñpunma Mayatja, kunpu ngaranytjaku titutjara.” **10-11** *Ka tjintu kutjupa wati kutjupangku ngayula wangkangu, “Utili ngura nyara milmilta timpula unngu ankula tuwa patira unngu nyinama pitjala iluntankunytjaku-tawara.”*

Kana palula wangkangu, “Wiya, ngayulu wirtjapakara kumpintja wiyangku wantinyi. Ngayuluna tjanampa nguluringkunytja wiya. Nyanga alatjingarala wanyu wankaringkuku ngulu kumpira? Wiya wantima, kana uti nyinama.”

15-16 *Palulanguruya warkarira wall-pa palyara wiyanu kaita tjuta kulu. Paluru tjana warpungkula nguwanpa wiyanu tjintu 52 kutju warkarira. Kaya ngura ititja tjutangka nganampa mirpantju tjutangku wall-pa palyara wiyanngangka kulinu munuya pulkara nguluringangi kulira, “Tjanampa god-mantu witulya pulkanya, panya paluru tjananya alpamilanu wall-pa mapalku palyara wiyanjaku.”*

7

4-73 *Kaya palulanguru anangu Jew panya nganmanytju katinytja tjuta malaku wirkankunytjaku ngarangi ngura walytjangka Jerusalemala. Munuya ngura malikitja tjutanguru tjuta mulapa pitjangu nampa panya 50,000 nguwanpa munuya ngura walytjangka walytjangka wirkara nyinangi.*

8

1-8 *Ka nyara palula araa anangu tjuta pitjanytjatjanu uwankara tjunguringu tjintu kutjungka. Ka wati tjukurtjara ini Itjuranya pakara ngarangu anangu tjutangka kuranyu munu tjukurpa Godalu Mose-nya ungkunytja mantjira alanu nyakula wangkanytjikitjangku. Kaya anangu uwankara alannyangka nyakula pakara ngarangu. Ka Itjuralu wangkangu, “Godanya walkunma katutja pulkanya.”*

Kaya anangu tjutangku mara katuñu munuya wangkangu, “Uwa mulapa.” Munuya tultjungarakatira Godanya walkunu.

Ka wati panya Itjuralu Godaku tjukurpa nyakula wangkangi mungawinkinguru alatjitu munu kalalarinyangka kutju wiyaringu. Kaya anangu uwankarangku purkarangku kulinigi. Ka Itjuralu Godaku tjukurpa nyakula wangkanyangka wati tjukurtjara kutjupa tjutangku anangu tjutangka ngapartji utira wangkangi.

9-11 *Kaya anangu tjutangku Godaku tjukurpa kulira tjituru-tjitururingu munuya pulkara ulangi tjukurpa palunya rawangku wantinytjatjanunungku. Ka Itjuralu ngali anangu tjutangka wangkangu, “Ulanytja wiyariwa munuya pukularira ankula mai wiru waina kulu ngalkula tjikila, munu mai kutjupa anangu ngaltutjara tjuta ungama tjana kulu ngalkula paltjaringkunytjaku. Nyangatja tjintu milmilpa Godaku, kaya tjituru-tjitururingnytja wiya nyinama ka paluru nyuranya pukulmankuku. Ka nyara palulanguru nyura palumpa pukularira kuñpuringkuku.” Alatji ngali tjanala wangkangi.*

12 *Kaya mulapatu ngurakutu pukulpa anu tjukurpa utingku kulintjatjanu munuya pukulku ngalkula tjikiningi, munuya ngaltutjara tjuta kulu wan-ganarangku ungangi.*

13-18 Munuya tjintu tjutangku inmangka tjunguringkula Godanya rawangku walkuningi pira kutju.

9

1-3 Munuya palulanguru pira kutju nguwanpa wiyingkula anangu Jew uwankara malikitja tjutanguru paturingu, munuya mai wantira mantara walyku-walykungka tarpangu munuya tjunguringkula tjituru-tjituru pulka ngarangi tjanampa panya kuranguru. Munuyanku kura tjuta tjana palyantjatjanungku piiwiyingkula Godala tjakultjunangi munuya wantinytjikitjangku kalkuningi. Munuya ngarala rawangku kuliningi Godaku tjukurpa tjanala nyakula wangkanyangka. Munuya palulanguru piruku ngarala Godanya rawangku wangkara walkuningi.

10

1-39 Munula Godanya kalkura nyiringka walkatjunu alatji, “Ngananya tjukurpa nyuntu Mosenya ungkunytjiti uwankara wanganarangku kulira palyalku titutjarangku.” Alatjila wangkara kalkunu munula nyiri panya palula ngananya ini tjuta walkatjura wañanu wati panya kuranyitja tjutangku kalkuntja panya palunya mulamulangku palyantjikitjangku.

11

1-36 Chapter nyanga palula Niyamayalu anangu Jerusalemala nyinanytja tjuta ini tjakultjunangi.

12

27-43 Munu palulangurula inma pulka palyanu wall-pa panya palyara wiyanjtanya milmilmankunytjikitjangku Godaku milmilpa ngaranytjaku. Munula kuka pungkula tiliwakara Godanya ungangi paluru nganampa pukularinytjaku, munula inma inkara palunya walkura pukularingi. Kaya anangu kutjupa tjutangku pararinguru kuliningi ngananya inma inkara pulkara pukularinyangka.

13

1-31 Chapter nyanga palula Niyamayalu tjukurpa kutjupa tjuta walkatjunu Israelkunu tjutaku ara tjuta.

Tjukurpa Esther-nyatjara Esther Nyangatja Nganmanytju Nyakula Wangkanytjaku

Nyangatja Godaku tjukurpa kungkawara Jew ini Esther-nyatjara. Palu paluru Israelta wiyangka manta kutjupangka nyinangi ini Papilaniyala, panya iritiya ngura nyara palunya nguraña tjuta warmala pitjangu manta Israeltakutu munuya Jew panya tjuta mulapa pungkula iluntanu, munuya tjara kutjupa Esther-ku tjamupiti kulu witira malakungku katingu tjanampa ngurakutu parari mulapa. Ka ngula Esther-nya ngura nyara palula iti ngaringu ngura malikitjangka tawunu ini Tjuutjala, palu paluru tjitji kulunypa tjularingu, ka palumpa kutangku wati ini Mutukailu palunya atunytju kanyira pulkanu palumpa ngurangka.

Ka paluru pulkaringkunyangka Puutjuku mayatja pulkangku palunya ngurkantara altingu munu palunya tjunu palula itingka mayatjatu nyinanytjaku. Ka ngula wati kurangku wituwituñu mayatja panya pulka Jew tjuta iluntankunyntjaku Esther-ku panya walytja tjuta. Ka Esther-lu rapangku mayatja panya palula anga-wangkangi palumpa walytja tjuta wankarunkunyntjaku, ka mulapañu tjananya wantingu kaya wankaringu.

Tjukurpa nyanga palulangurula kulini mulapa Godalu palumpa walytja tjuta atunymara kanyilpai.

[Tjukurpa nyanga paluru mutumutuntja ngaranyi, uwankara wiya. Palu ngulaya tjukurpa winki palyalku.]

Tjukurpa nyanganpa ngarinyi:

- 1:1—2:23 Puutjuku mayatja pulkangku mai pulka palyantja
- 3:1—5:14 Wati kurangku anangu Jew uwankara pungkula wiyanjikitja mukuringkunyntja
- 6:1—8:15 Esther-lu mayatja panya pulkangka anga-wangkara palumpa walytja tjuta wankarunu
- 8:16—10:3 Mayatja pulkangku Esther-ku pukularira mai pulka palyantja

1-22 Iriti wati ini Tjuukitjinya mayatja pulka mulapa nyinangi ngura tjuta mularku. Munu paluru tawunu ini Tjuutjala nyinara ngura palunya tjananya kanyiningi. Munu tjintu kutjupa paluru anangu winki altingu palumpa ngurakutu mai pulka pitjala ngalkuntjaku tjintu tjuta. Kaya anangu tjuta mulapa pitjangu munuya pulka ngalkula tjikiningi. Ka mayatja paluru palumpa kuri wangkangu mantara wirungka tjarparrpa palula tjungu pitjala ngaranytjaku anangu tjutangku nyakunyntjaku. Palu paluru pitjanytja wiyangku wantingi. Ka mayatja panya paluru palumpa kuriku pulkara mirpanaringu munu palunya painu munu kutjupa altingtjikitjangku nguriningi.

2

1-7 Munu paluru wati warka tjuta witunu kungkawara tjuta utulura palulakutu katintjaku tjanalanguru kungkawara kutju palumpa ngurkantankunyntjikitjangku.

Ka Esther-nya kungkawara nyara palula tjanala tjungu pitjangu. Ka Esther-ku kutangku wati ini Mutukailu palula nganmanytju wangkangu,

"Kulila, nyuntu panyan Jew mununku palula tjanala utintja wiyangku wantima." Ka paluru mulapa kutitjura wantingi utintja wiyangku.

⁸⁻²³ Ka mayatjaku panya warakaripai tjutangku kungkawara palunya tjananya rawangku kanyiningi wal Kutjupangka mayatjaku ngurangka itingka, munu tjintu kutjupa tjintu kutjupa tjananya rawangku miri wiruningi. Ka yiya kutju wiyaringkunyangka wati panya mayatjangku wangkangu palulakutu katintjaku kungkawara panya tjuta yunpa nyakula kungkawara kutju palumpa ngurkantankunytjikitjangku. Munu wati paluru tjananya uwankara kutju kutju nyangangi munu Esther-nya nyakula ngurkantanu, panya paluru wiru mulapa ngaranyangka.

3

¹⁻¹⁵ Ka mayatja panya pulkaku malpa nyinangi ini Aimingga. Ka mayatja paluru wati palunya mayatja tjunu palula itingka nyinanytjaku. Ka wati paluru mayatja pulkaku nguranguru ma-pakannyaangka anangu tjutangku palunya pupakatira walkulpai. Palu wati panya Mutukailu wantingi palunya walkuntja wiyangku panya paluru wati Jew munu kuliningi alatji, "Ngayulu Godanya kutju walkulpai." Munu paluru pupakintyja wiya ngarangi. Ka kutjupangku nyakula tjakultjunu wati panya Aimanta, "Wati nyara paluru Jew nyinara nyuntunya pupakatira walkuntja wiyangku wantipai." Ka Aimantu nyangatja kulira Mutukaiku pulkara mirpanaringu munu paluru kuliningi, "Uila Mutukainya pungkula iluntanama palumpa walytja tjuta ku lu anangu panya Jew uwankara ngura winkingka manta nyanga Papilaniyalawanu nyinanyangka muñkara ku lu."

Munu paluru ankula mayatja panya pulkangka wangkangu, "Kulila, anangu Jew winkiya nyangatja nyinanyi tawunu nyanga uwankarangka munuya wanganarangku kulintja wiya nyuntula. Wanyu tjakulpa tjuta iyala tawunu tjutakutu kaya nyuntumpa tjaultji tjutangka wangka Jew uwankara iluntankunytjaku."

Ka mayatjangku kulira wangkangu palula, "Uwa, palya nyangatja nyuntu nyanga wangkanytja. Ka tjukurpa palunya nyiringka walkatjura munu anangu tjutakutu iyala."

Ka Aimantu wati walkatjara tjutangka wangkangu nyiri tjutangka tjukurpa walkatjunkunytjaku wangka kutjupangka kutjupangka alatji,

"Jew uwankaraya tjintu kutjungka iluntanama wati, minyma, tjitji kulu, kutju wanka kanyintja wiyangku. Munuya tjana kanyintja uwankara mantjinma kutjupa kutjupa wiru tjuta."

Munu paluru tjintu ku lu walkatjunkunytjaku wangkangu panya tjaultji tjutangku tjananya iluntankunytjaku. Munuya walkatjura wiyaringkula mayatja panya pulkaku ini tjaru walkatjunu munuya mayatjaku ringi kitii purunytja tjalatjura nyiringka walka tjampamilañu anangu tjutangku nyakula mulamularingkunytjaku. Munuya wati tjakulpa tjuta ungu ngura uwankarakutu katira anangu tjutangka nintintjaku. Ka tjakulpa kutjungku ngura pala Tjuutjala tjukurpa panya palunya nyakula wangkangu anangu tjutangku kulintjaku.

4

¹⁻¹⁷ Ka Mutukailu lita panya mayatjangku walkatjunkunytja kulira pulkara tjituru-tjitururingu munu mantara palurunku katantara aranu mununku tjunpangka puntu winki nyitira mantara walyku-walykungka tjarpura iwarangka para-ngarala pulkara ulangi, panya tjakaya tjituru-tjituru ngarala alatjinkupai.

Ka kungkawara Esther-ku warkaripaingku nyangu wati palunya para ngarala ulanyangka munu ankula Esther-la tjakultjunu. Ka paluru kulira urulyarara pulkara nguluringu munu kungkawara kutju mantara ungu katira Mutukainya ungkunytjaku. Palu wati paluru ungkunyangka mantjintja wiyangku wantingi.

Ka Esther-lu piruku wati warka witunu Mutukaila tjapira kulintjaku nyaaku paluru alatjirinyi. Ka paluru ankula tjapinu.

Ka Mutukailu tjakultjunu tjukurpa uwankara munu lita panyatja kuļu ungu Esther-nya ungkunytjaku panya mayatjangku palyamankula unkul'iyantjanya, munu wati panya warka witunu, "Ankula Esther-la wangka, ka paluru ankula mayatja panya pulkangka anga-wangkara pulkara ngatjila nganampa ngalturingkunytjaku Jew panya tjutaku."

Ka wati panya warka paluru anu maļaku piruku Esther-lakutu munu wangkangu palula uwankara panya Mutukailu wangkanytja munu nintinu nyiri panya mayatjangku walkatjunkunytja. Ka Esther-lu nyiringuru nyakula wiyaringkula wangkangu, "Ankula alatji wangka Mutukaila, 'Ngayulu mayatjakutu puťu ananyi, panya paluru altinyangka kutju anangu kutjupa tjarpapai palunya nyakunytjikitja. Palu paluru altinytja wiyangka puťu tjarpayi walytjangku kulira. Nyangatja palumpa ara. Tjinguru ngayulu altinytja wiyangka watarku tjarparampa ka ngayunya iluntankuku. Panya paluru kutjungku kutjupa-ara palumpa tjukara purunypa gold-nguru palyantjtja witira katulpai, ka nyara paluru nintilpai anangungku nyakula ngurkantankunytjaku munu tjarpantjaku. Kulila, ngayulu panya palunya nyakunytja wiya alatjitu nyinangi pira kutju, panya paluru ni altinytja wiyatū. Kana puťu ananyi palulakutu.' Alatji Mutukaila ankula wangka."

Ka ankula wangkanyangka Mutukailu kulira piruku wangkara wati panya warka iyanu Esther-lakutu alatji wangkanytjaku, "Kulila! Nyuntu tjinguru kulini mayatjaku ngurangka pala nyinara wanka nyinanytjikitjangku-palku, palu wiya. Nyuntu panya Jew, kantaya nyuntunya kuļu iluntankuku nyuntu nganampa anga-wangkawiyangku wantinyangkampa. Palya kutjupangkuntilanya ngula ngalkilku, palu nyuntu nganana kuwari iluku ngalimpa walytjapiti uwankara. Palu kulila, Godalunta nyuntunya tjunu kuwari nyanga mayatja nyinara nganampa anga-wangkanytjaku alatjitu."

Ka Esther-lu nyangatja kulira wati panya warkaripai piruku iyanu Mutukailakutu nyanga alatji wangkanytjaku, "Anangu Jew tjuča ngura nyanga Tjuutjala nyinanyangka altira utulura munu tjananya wangka mai ngalkuwiya nyinanytjaku tjintu mankurpa tjana kulira ngayuku Godala tjapintjikitjangku. Ka ngayulu kuļu palu purunypa mai wiya nyinara Godala pulkara tjapilku. Mununa palulanguru mayatja panya pulkakutu ankuku. Kani tjinguru nyakuku, mutta tjinguru ni iluntankuku."

Ka Mutukailu mulapaťu palyaňu uwankara Esther-lu wangkanytja.

5

1-8 *Munu palulanguru Esther-nya tiritja wiru mulata tjarpangu, munu ankula mayatjaku ruumangka itingka uti ngarangi tuwa alangka paluru nyakula altinytjaku. Ka wati panya mayatjangku palunya nyakula pukularingu munu punu panya tjukara purunypa gold-nguru palyantjtja katuňu paluru tjarpantjaku. Ka Esther-lu nyakula ngalya-tjarpangu munu punu panya tjukara purunypa paluru katura kanyintjanya ankala pampunu.*

Ka mayatjangku panya palula tjapinu, "Nyaaringun? Nyaakun mukuringanyi? Nyuntu mukuringkunya nganana nyuntunya tjarara pulka mulapa ungkuku ngayulu kanyintjatjanungku."

Ka Esther-lu wangkangu, "Wanyu nyuntu pitjaku kuwari panya ngayulu mai pulka palyara wantingu nyuntu nganana ngalkuntjikitjangku. Ka wati panya Aimanna kulu ngalya-katima nyuntula tjungu."

Ka nyanga palunya kulira Mayatja panya pukularingu munu wati palumpa warkangka wangkangu, "Ankula Aimanna warpungkula alti, kali paluru ngali ara Esther-ku ngurakutu mai ngalkuntjikitja."

Ka mulapatu ankula altingu wati palunya. Ka pula tjunguringkula anu Esther-ku ngurakutu munu pula mai wiru ngalkuningi palula tjunguringkula. Ka Mayatja panya pulkangku Esther-la tjapinu, "Nyaakun mukuringanyi? Nyuntu mukuringkunya ngampampa ngayulu nyuntunya tjarara pulka mulapa ungkuku ngayulu kanyintjatjanungku."

Ka Esther-lu wangkangu, "Ngayulu mukuringanyi nyuntu ngayuku pukularinytjaku. Palu wanyu piruku pitja mungawinki mai kutjupaku Aimanna nyupalitu. Kananta nyara palulalta tjakultjunkuku ngayulu mukuringkunytja."

9-14 *Ka pula mai ngalkula wiyingkula anu ngurakutu. Ka Aimantu ngururpa nyangu wati panya Mutukainya nyinanyangka kaitangka ittingka. Ka wati paluru Aimanna pitjanyangka nyakula pakara pupakatira walkuntja wiyangku wantira alatjitu nyinangi. Ka paluru pulkara mirpañaringu Mutukaiku, palu wangkanytja wiyatutu katakutjara anu. Munu ngurangka wirkara altingu palumpa malpa tjuta munu minyma kuri kulu munu kanany-kananytju alatjitu tjanala tjakultjunangi panya mayatja pulkangku palunya mayatja nampa 2 nyinanytjaku tjunkunytja. Munu wangkangi, "Panya kuwari mayatjaku kuringku mai palyara ngayunya kutju altingu mayatjangka tjungu ankunytjaku. Kali tjintungka piruku ananyi maiku. Palu anangu kutjungkuni tjituru-tjituru palyaunu. Kana palumpa pulkara mirpañarinyi wati panya Jew ini Mutukaiku."*

Kaya palula wangkangu, "Uti nyuntu wati warka tjuta altima, kaya pitjala punu wara palyala ruupatjara anangu ruupangka liri karpira katunguru waraly-waralytjunkunytjaku. Munun mungawinki nyuntu mayatjangkalta wangka Mutukainya liringuru waraly-waralytjunkunytjaku. Munun pukulariralta ananyi maiku mayatjangka tjungu."

Ka Aimantu unngu kulinu, "Munta-uwa, nyangatja wiru nguwanpa." Munu wangkangu wati warkaripai tjuta, "Kuwariya punu wara palyala anangu liri karpira katunguru waraly-waralytjunkunytjaku."

6

1-14 *Ka munga nyara palula wati panya mayatja pulkanya putu nguwanpa kunkunaringi. Munu paluru altingu wati warkaripai kutju munu palula wangkangu, "Nyuntu panya nyiringka walkatjunkupai nganana kutjupa kutjupa tjuta wangkanyangka munu palyannyangka kulu. Wanyu nyiri panya palunya mantjila munu nyakula wangka kana kulila nyaaringanggiya ngura nyangangka."*

Ka paluru nyiri panya palunya mantjinu munu nyakula wangkangi tjukurpa tjuta munu tjukurpa nyangangka wirkara wangkangu alatji,

"Wati kutjarangku pula mayatja panya pulka iluntankunytjikitjangku kuliningi. Ka wati ini Mutukailu nyanga palunya kulira ankula palula wangkara ngulutjunu."

Alatji wati panya warkangku mayatja pulkangka wangkara utinu.

Ka mayatjangku wangkangu, “Munta-uwa panya wati nyanga paluruṇi wankakutunu. Kana nyaa palunya ngapartji ungu paluru ngayunya wankakutunyangka?”

Ka wati panya warkaripaingku wangkangu, “Wiya, nyuntu Mutukainya kutjupa kutjupa ngapartji ungkunytja wiyatū.”

Ka pula nyinara wangkanyangka Aimannga ngalya-tjarpangu mayatjaku wal̄ingka munu paṭara ngarangi, panya paluru pitjangu mayatjangka tjapintjikitja mungawinki Mutukainya waraly-waralytjunkunytjikitjangku. Ka wati warkaripaingku nyangu Aimannga munu wangkangu mayatjangka, “Aimannga nyangatja nyuntumpa patara ngaranyi.”

Ka wangkangu, “Palya, pitjanytjaku wangka.”

Munu palulanguru Aimannga pitjanyangka mayatjangku palula tjapinu, “Wati kutjuna pukułmankunytjikitja mukuringanyi mununa nyaalku?”

Ka Aimantu unngu alatji kuliningi, “Munta, Mayatjalu tjinguru ngayunya kulini pukułmankunytjikitjangku.” Munu wangkangu, “Uti nyuntu palunya tjarpatjunama nyuntumpa mantara wirungka munu nyuntumpa panya nyanytjungka tatitjura. Ka wati nyuntumpa warkaripaingku uti purala witira katima iwara tjutangka anangu tjutangku nyakunytjaku, munu uti paluru anangu tjutangka para-wangkama nyanga alatji, ‘Mayatja panya pulkanya wati nyanga palumpa pulkara pukularinyi munu paluru mukuringanyi nyura kuļu palumpa pukularira palunya mirawañinytjaku.’”

Ka mayatjangku kulira Aimannga witunu, “Warpungkula ngayuku mantara wiru kati munu Mutukainya tjarpatjura munu nyanytjungka tatitjura iwara tjutangka kati munu anangu tjutangka tjakultjunama panya nyuntu wangkanytjanya alatjitu.”

Ka Aimantu wanganarangku kulinu mayatjangku wangkanyangka palu unngu paluru pulkara kuntaringu. Munu wiyingkula paluru mapalku anu ngurakutu kata mantarangka tjutura panya paluru kuntaringu. Munu ankula warkaripai tjutangka palumpa kuringka kuļu tjakultjunangi. Ka nyinara wangkanyangka mayatjaku wati warkaripai kutju wirkanu munu wangkangu, “Wala pulka kunyu pitja maikutu, panya Esther-lu palyantja riti ngarinyi.”

7

¹⁻¹⁰ *Ka Aimannga kulira anu munu mayatja panya pulkangka tjunguringkula pula wirkanu Esther-ku ngurangka munu pula tjarpa mai ngalkuningi palula tjunguringkula. Palu mayatjangku panya piruku tjapinu Esther-la, “Nyaakun mukuringanyi? Tjinguru nyuntu mukuringkunyangka nanta tjarara pulka mulapa ungkuku ngayulu kanyintjatjanungku.”*

Ka Esther-lu wangkangu, “Wirungkuni wanyu wankarura wanka nyinanytjaku, ngayuku walytja tjuṭa kuļu. Panya ngayulu nyiringka nyangu ngayuku walytja tjuṭa iluntankunytjikitjangku wangkanytjaka. Palu wanyulanya wirungku atunyমা wanka kanyinma.”

Ka mayatjangku panya tjapinu, “Nganalu wanyu walkatjura iyanu nyuntumpa walytja tjuṭa iluntankunytjaku?”

Ka Esther-lu wangkangu, “Wati nyangangku. Nyanga paluru wati kura nganampa mirpantju.”

Ka Aimannga kulira pulkara nguluringu. Ka wati panya mayatja pulka palumpa pulkara mirpanaringu. Ka mayatjaku wati warkaripaingku wangkangu, “Nyaratja nyawa, punu nyara wara palyantja ngaranyi Aimanku wal̄ingka itingka. Nyara palulaya kunyu kuwari Mutukainya liri karpira katunguru waraly-waralytjunanyi.”

Ka mayatjangku wangkangu palumpa warkaripai tjutangka, “Wiya, wati nyanga palunya alatjitu ya utitjura nyara palula.” Kaya mulapaṭu wati panya Aimannaŋga katira liri karpira katunguru waraly-waralytjunu, ka ilungu.

8

1-17 *Ka Esther-lu mayatja panya pulkangka tjakultjunu wati panya Mutukainya kuṭa palumpa nyinanyangka. Ka mayatja paluru Mutukainya altingu palulakutu pitjanytjaku, munu pitjanyangka paluru ringi palumpa manyirkanguru araltjara Mutukainya ungu palumpa pukularira. Ka Esther-lu mayatjangka pulkara ngatjiningi tjukurpa panya Aimantu walkatjura iyantja wiyanmankunytjaku panya paluru nganmanytju ngura tjutakutu iyanu. Munu wangkangu, “Wanyu tjukurpa kutjupa walkatjura munu Aimanku tjukurpa wiyla. Ngayulu mukuringkunytja wiya ngayuku walytja tjuta ilunytjaku.”*

Ka mayatjangku kulira wangkangu, “Palya nyupali tjukurpa kutjupa walkatjura, munu walkatjura wiyaringkula tjaru ngayuku ini walkatjura. Munu ringi ngayuku kitu purunytja tjalatjura nyiringka walka tjampamilala, munu pula Jew tjutakutu iyala tjana nyakunytjaku. Kaya ngayuku ini walka nyakula kuliklu, ‘Munta-uwa, nyangatja tjukurpa mulapa mayatjangku panya iyantja, kala putu wantinyi.’”

Ka palulanguru Mutukailu mayatjaku panya warkaripai tjuta wangkangu tjukurpa nyiringka walkatjunkunytjaku wangka kutjupa wangka kutjupa. Kaya mulapaṭu kulira mayatjaku tjukurpa walkatjunu anangu uwankaraku Jew tjutakutu kulu alatji,

Panya Aimantu tjukurpa nganmanytju walkatjura iyanu anangu tjutakutu ngayuku initjara tjana kulira tjintu kutjungka Jew tjuta pungkula wiyanjtaku. Palu kuwarina Jew tjutangka wangkanyi alatji, “Tjintu nyara palula kutjupa tjuta nyuranya pungkunytjikitja pitjanyangka nyura uti tjananya wantinytja wiyangku pulkara pungama. Utu nyura tjunguringkula paṭanma kuļata winki munuya pitjanyangka nyakula tjananya uwankara pungkula alatjitu wiyanma munuya tjana kanyintja uwankara mantjira katima.” Alatjina nyuranya mulamulangku wangkanyi nyura wankaringkunytjaku.

Alatjiya walkatjara tjutangku mayatjaku tjukurpa walkatjunu Mutukailu tjakultjunkunyangka. Munuya walkatjura wiyaringkula mayatjaku ini tjaru walkatjunu munu palumpa walka kulu tjampamilanu palumpa ringingka. Munuya palulanguru mayatjaku warkaripai kutjupa tjuta nyiri palunya tjananya unkul'ianu, kaya nyanytjungka tatira warpungkula katingu tawunu winkikutu.

9

1-32 *Ka tjintu panyatja wirkanu panya Aimantu Jew tjuta pungkunytjaku wangkanytjita. Palu Jew tjuta tjunguringu tjanampa mirpanṭju tjuta pikangku pungkunytjikitja munuya pungkula uwankara wiyanu Jew tjutangku. Panya mirpanṭju tjuta kunpu wiya nguwanpa munuya nguluringangi tjanampa, panya mayatjaku warkaripai tjutangku tjananya angatjunkunytja wiyangku wantir'ianu, ka tjana tjuta mulapa pungu panya anangu nguratja tjuta.*

Ka palula maļangka Jew panya tjuta pulkara pukularingu munuya ngura winkingka mai pulka palyara tjunguringkula ngalkuningi. Munuyanku kutjupa kutjupa tjuta mantjira kutjungku kutjungku ngapartji-ngapartjingku ungangi pukularira.

Munuya palulanguru yiya kutjupa yiya kutjupa tjintu panya paluru wirkankunyangka mai pulka palyara ngalkupai ara panya palunya kulin-tjikitjangku.

10

¹⁻³ *Ka mayatja panya pulkangku Mutukainya mayatja tjunu palula itingka mayatja nyinanytjaku. Kaya Jew tju tangku pukularira Mutukainya wanganarangku kulilpai, panya Esther-lu pula kutararangku tjananya mayatjangka anga-wangkara wankakutunu.*

**Inma Psalm Tjuṭa
Psalms
Nyngatja Nganmanytju Nyakula
Wangkanytjaku**

Nyngatja Godaku tjukurpa inma tjuṭatjara munu Godala tjapintjatjara kulu. Ka uwankara tjunguringkula inma tjuṭa ngarinyi nampa nyangatja 150. Palu nyiri nyangangkala 13 kutju palyara tjunu. Kala uti Godanya wałkuntjikitjangku inma nyanga tjuṭa nyakula wangkama.

Wati panya Mayatja Davidalu inma tjuṭa mulapa walkatjunu. Paluru kutjupa tjuṭa walkatjunangi pukulpa nyinara Godanya wałkura mīrawaṇinytjikitja mukuringkula, munu kutjupa tjuṭa paluru walkatjunangi tjituru-tjituru palumpa wituwitu utiringkunyangka. Munu piṛuku paluru inma kutjupa tjuṭa walkatjunangi kura pulka palyantjatjanungku Godala miṛangka kunṭaringkula wangkanytjikitjangku.

Uwa, inma nyanga paluru tjana Godanya wangkanyi, panya paluru uwankara mulapa palunu, munu wiru mulapa witulya pulkanya nyinanyi mayatja pulka mulapa uwankarangka waintarintjatja.

Ka panyaya tjukurpa panya małatjangka Matthew-lu, Luke-alu, Paulalu tjana kulu inma nyanga tjuṭanguru tjukurpa walkatjunu. Panya Matthew-lu walkatjunu tjukurpa panya psalm 91-nguru tjukurpa palu purunypa, (nyawa Matthew-ku 4:6 munu Psalm 91:11-12). Ka panya Paulalu lita walkatjura iyanu ngura Rome-alakutu munu lita pala palula paluru Psalm 51-nguru tjukurpa palu purunypa walkatjunu, (nyawa Romans 3:4 munu Psalm 51:4).

Inma psalm nampa nyanganpa nyiri nyangangka ngarinyi:

1, 3, 6, 8, 13, 19, 20, 23, 40, 46, 51, 61, 63, 91, 121, 131, 133, 136, 146

1

¹ Godalu pukulmankupai palula wangaṇarangku kulilpai tjuṭa.

Nyara paluru tjana panya kulira wantipai aŋangu kurangku tjananya wituwitunyangka,
munuya iwara kurangka ankunytjaku altinyangka wantipai,
munuya Godanya kaṇany-kaṇanytju analpai tjuṭangka tjunguringku-pai wiya.

² Paluru tjana pukularipai Godaku tjukurku munuya wangaṇarangku kulilpai,
munuya nyakula wangkara tiṭutjarangku kulilpai kalala mungangka kulu.

³ Munuya tjana kunpu ngarapai, panya puṇu tjuṭa urungka itingka ngarala waṇalpai, palu purunypa.
Panya puṇu paluru tjana tiṭutjara maitjararingkupai munu nyalpi piltiringkupai wiya.
Palu purunypa nyanga tjana Godaku tjukurpa tiṭutjarangku mulamulangku kulilpai,
munuya palulanguru kunpu ngarapai, ka Godalu wiru tjuṭa tjanampa palyalpai.

⁴ Palu aŋangu kura palyalpai tjuṭa tjana purunypa wiya.
Panya paluru tjana unytjunytju purunypa nyinanyi,
panya kanira mai uninypa tjarara unytjunytju ma-unṭura wanipai,

- nyanga palu purunyapa tjananya Godalu wañiku tjarara.
- 5-6** Uwa, tjanampa kuranguru Godalu ngula tjananya ngurkantaña tjaralku palumpa walytja tjutanguru mañtalpa nyinanytjaku,
kaya ngura kurangka titutjara nyinaku.
- Ka Godalu palumpa walytja tjuta aṭunymara kanyilku palula wan-ganarangku kulilpai tjuta.

3

Inma nyangatja Davidalu walkatjunkunytja panya paluru palumpa katja Absalomalanguру ngulu wirtjapakantjatjanungku.

- 1** Mayatja, aŋangu panya tjuta mulapa ngayuku kuraringanyi,
munuňiya kuwari winkingku pikangku wataparanı.
- 2** Tjana kunyu anařa wangkapai ngayunyatjara alatji,
“Godalu palunya wankarunkunytja wiya alatjitu.”
- 3** Palu Mayatja, nyuntun ngayunya kutitji purunytpu anga-kanyilpai.
Munuňin ngayunya witulyankupai tjananya pungkula waintarintjaku,
munuňin rapa ngaranytjaku palyalpai.
- 4** Panya ngayulu nyuntula ulara tjapilpai wankarunkunytjaku,
ka nyuntu mulapaňu ngayunya puli milmiltanguru alpamilalpai ngura
pala Tjayantanguru.
- 5** Mayatja, nyuntu panyan ngayunya aṭunymara kanyilpai,
kanā mungangka wirura kunkunaripei
munuňa mungawinki wankaringkula pukulpa pakalpai.
- 6** Ngayuku mirpaňtu mungilyingkuňiya para-angatjura wañara pikangku
wataparanı.
Palu ngayulu tjanampa nguluringkunytja wiya rapa alatjitu ngaranyi.
- 7** Mayatja God, pitjalanitju wankarunama!
Munu ngayuku nyanga mirpaňtu tjuta katiti pungkula minya-minyanma.
- 8** Mayatja, nyuntu panyan nyuntumpa walytja tjuta wankaru kanyilpai.
Wanyu tjananya mukulyangku pukulmanama.

6

- 1** Mayatja, ngayuku pulkara mirpanariwiyangkuňi wantima,
Munuňi pulkara ngayunya pikantankunytja wiyangku kuļu wantima.
- 2** Panya ngayulu kuwari paku pulkaringu,
katju Mayatja, wanyu ngalturingama munuňitju kuñpunma.
- Panya ngayulu uparingkula nyanga kuwari paku pulkaringu,
3 munuňa puntu winki kuļu kuraringu.
- Palu Mayatja, nyaakun ngayunya rawangku nyakula wantinyi alpamilantja
wiyangku?
- 4** Wanyuňitju pitjala wankarura!
Munuňitju ngaltunytpu pulkangku aṭunymara kanyinma ilunytjaku-tawara.
- 5** Panya miriku ngurangka aŋangu ilunytjtja tjuta nyinara nyuntunya
kulintja wiyaringkupai, munuya nyuntunya walkuntja wiya alatjiitu.
- 6** Ka ngayulu kuwari paku pulkaringkula uliringkula nyuntula tjapini.
Panya ngayulu mungangka ngarira pulkara ulapai,
ka ilanypa pulka ngayula kurunguru mantarangka punkalpai.

- 7** Panya ngayuku mirpañtju tjutangkuya kuwari ngayunya rawangku nyiinyiipungkula ulatjingalpai.
Kaña nyangatja palulanguru kuwari rawa ulara ulara kuru utjur-ingkula pikaringu munuña putu nguwanpa palyanyku nyakupai.
- 8** Mayatja, nyuntu wirungku ngayunya ulanyangka kulinu.
Munu wanyu kura nyanga palyalpai tjuta paila ngayunya wantikatinytjaku!
- 9** Panya nyuntu kulilpai ngayulu nyuntula ngatjinnyangka.
- 10** Munun ngayuku mirpantju tjuta paira iyalku,
Kaya mulapa paluru tjana kuntingkula mapalku ngulu wirt-japakalku.

8

Davidalu inma nyangatja walkatjelu Inmaku Mayatjaku inma inkapai tjutangku kitangka tjungu inkanytjaku.

- 1** Mayatja God, anangu manta winkitjangkula nyuntunya kulini
nyuntu panyan mayatja witulya pulka nyinanyi wiru mulapa
munun ilkaringka pitalytji pulkangku uwankara alatjitu irnyañi.
- 2** Kaya tjitjingku itingku kulu nyakula inma inkara nyuntunya mi-rawañipai.
Ka nyuntumpa kuraringkupai tjutangku nyuntunya pu tu analpai
nyuntu witulya pulkangku markunyangka.
- 3** Panya mungangkana ilkarí ira-nyakupai nyuntu panya paluntja,
panya kinara, kilipi kulu nyuntu tjunkunyta.
- 4** Munuña nyakula kulilpai, "God, nyuntu panyan pulka mulapa, ka panya
nganaña anangu tjuta minga purunyapa.
Palu nyuntu nganañanya ngaltunyjtungku kulilpai,
Munulanyan atunymara kanyilpai.
- 5** Panya nyuntu nganañanya tjunu pulka mulapa nyinanytjaku nyuntula*
itingka pitalytji pulkatjara.
- 6** Munu panyan nganañanya tjunu nyuntu panya paluntjitja uwankara
mayatjarira kanyintjaku.
- 7** Panya nyuntu nganañanya tjunu uwankara atunymara kanyintjaku tjiipi
puluka inura tjuta kulu,
- 8** munu tjudpu ilkaringka para-ngarapai tjuta munu uru unngu para-
ngarapai tjuta kulu."
- 9** Mayatja God, anangu manta winkitjangkula nyuntunya kulini
nyuntu panyan mayatja witulya pulka nyinanyi wiru mulapa.

13

- 1** Mayatja, nyaakuñin rawangku ngayunya kulira wantinyi?
- 2** Nyangatjana rawa alatjitu tjituru-tjituru nyinanyi mungangka kalala.
Panya ngayuku mirpañtju tjutangkuñi kuwari rawangku nyiinyiipunganyi.
Kañi nyuntu yaalaña wankarunkuku?
- 3** Mayatja God, wanyunitju nyuntu kulinma rawangku wantintjya
wiyangku ngayulu nyuntula tjudpinnyangka.
Munu ngayunya wankaru kanyinma ngayulu ilunytjaku-tawara.

* **8:5** Nyangangkala ini panya lipuru Elohim translate-amilanu Godanya munula panya nyuntula tjunu Godanya kulintjaku. Palu kutjupara ini nyanga Elohim wangkanyi angelpa.

- 4** Panya ngayulu tjinguru iluku, kaya ngayuku mirpañtu tjuña ngayuku pulkara alatjitu ikaringkula pukulariku munuya wangkaku alatji, “Awa! Nganaña palya alatjiwu wiyanu!”
Kani pala palula-tawara ngayunya wankarunama tjana ngunti pukularinytjaku-tawara.
- 5** Ngayulu ninti panya nyuntu ngayuku pulkara mukuringanyi titutjara alatjitu, kaña nyanga palulanguru ngayulu rapa pulka nyuntula tjungu nyinanyi.
Munuña pulkara pukularinyi nyuntu ngayunya wankarunkunyangka.
- 6** Uwa, nyuntu panya ngayunya pulkara pukulmanu, kana pala palulanguru inma tjuña inkara nyuntunya pulkara walkulkku.

19

- 1** Godanya wiru mulapa,
panya nganaña ilkarí nyakula palunya kulini uti, panya mulapa nyanganpa Godalu paluntja uwankara.
- 2** Tjintu kutjupa tjintu kutjupa nganaña ilkarí nyakula Godanya mulapa kulini.
Ka mungangka palu purunypa ilkaríngku nganañala nintini Godalu witulya pulkangku palyantja.
- 3-4** Ilkaringku wangkapai wiya.
Palu ilkaríngku nintini nganañala Godanya kulira mirawañinytjaku. Nganaña ilkaríngku wangkanyangka kulintja wiyatú.
Palu manta winkingka anangu uwankarangku ilkarí nyakula Godanya kulira walkuntjaku ngaranyi.
- 5** Godalu ilkaríngka ngura tjintuku palyanu mungaringkunyangka tjarpara ngarinytjaku purunypa,
kala mungangka puñu nyakupai.
Ka mungawinki tjintu paluru wiru mulapa ngalya-pakalpai, panya wat-ingku kuwari kutju altinytja purunypa,
panya paluru kungkawara altira mungawinki pukulpa mulapa pakalpai, palu purunypa.
Uwa, tjintu ngalya-pakara wirura ankupai, wati wala pulka purunypa,
panya wati paluru wirtjapakantjikitja pulkara pukularipai, palu purunypa.
- 6** Tjintu paluru pakalpai ilkarí kampa kakarañanguru,
munu ilkaríngka kañakutjara ankula ma-tjarpapai ilkarí kampa wilurara.
Munu paluru manta winkingka kampapai wiltjangka nyinanytjaku.
Uwa, mulapa ilkaríngku tjintungku munu Godaku tjukurtu kuñu nganañala Godanya nintilpai.
- 7** Panya Godaku tjukurpa pulka mulapa,
munu nganaña uparingkunyangka tjukurpa paluru nganañanya piñuku kuñpulpai.
Godalu tjukarurungku wangkapai, kala uti palumpa tjukurku pulkara mulamularingama.
Panya palumpa tjukurtu anangu ngurpa nyinanyangka nintipukar-ingkunytjaku nintilpai.
- 8** Uwa, mulapa Mayatjaku tjukurpa tjukaruru mulapa.

- Ka panya aŋangungku tjukurpa nyara palunya kuliŋa pukularipai,
panya palumpa tjukurpa wiru mulapa.
- Ka tjukurpa nyara paluru nganaŋala utilpai Godaku iwara tjukarurungku
waŋantjaku.
- 9** Nyangatja wiru alatjiṭu ngaranyi nganaŋa Mayatja Godanya
walkuntjaku.
Kala rawangku palunya kutju walkunma, panya palumpa kulintja
tjukaruru alatjiṭu tiṭutjara ngaranyi.
- 10** Puli gold wirunya mani pulka mulapa,
palu Godaku tjukurpa wiru mulapa goldpangka muŋkara alatjiṭu.
Ka tjuratja panya mayu wiru,
palu Godaku tjukurpa wiru mulapa wantintytjaku wiya tjuratjangka
muŋkara mulapa.
- 11** Ngayulu Mayatjala wanganarangku kulilpai,
kaŋi palumpa tjukurtu tjukarurungku palyantjaku nintilpai.
- Ka ngayulu palumpa tjukurpa kulinnyangka Godalu ngapartji ngayunya
wiruŋa kanyini.
- 12** Nganaŋa uwankarangku waltyangku puṭu ngurkantananyi kura
uwankara nganaŋa palyantjatanungku.
Ka Mayatja, ngayuku kalyparingama ngayulu watarkungku kura
palyannyangka.
- 13** Munu ngayulu nintingku kura palyantjikitjangku kulinnyangkampa
ngayunya markunma kura kutju tiṭutjarangku palyalkatinytjaku-
tawara.
Kaŋa palulanguru kuŋta wiya palya nyinama.
- 14** Mayatja, nyuntu ngayunya kuŋpu pulkangku anga-kanyilpai
kurantjaku-tawara.
Kaŋa mukuringanyi nyuntu pukularinytjaku ngayulu nyanga
wangkanytja munu kulintja uwankaraku,
panya nyuntun ngayuku ngalkilpa nyinanyi.

20

- 1** Nganaŋa Mayatja Godala tjapini, Jacobaku panya Godangka,
paluru kura nyuntula utiringkunyangka,
nyuntunya kuliŋa anga-kanyintjaku
- 2** Palulala tjapini paluru ngura nyara Jerusalemalanguru* nyuntumpa alpa
iyantjaku ngura panya milmiltanguru.
- 3** Uwa, Godalala tjapini nyuntumpa pukularinytjaku nyuntu wiru tjuṭa
palunya ungkula walkunnyangka.
- 4** Nganaŋa Godala tjapini nyuntu mukuringkunyta uwankara palyantjaku,
munu nyuntumpa kulintja uwankara tjukaruru utiringkunytyaku.
- 5** Munula nyuntu pikaringkula waintarinyangka kuliŋa pukulpa mulapa
miraku.
Munula Godanya mirawaŋira kuļata kuṭitji tjuṭinypa wikitjara
pukularira para-ngaraku.
Uwa, nganaŋa mukuringanyi Godalu nyuntunya palula tjapinnyangka
kulintjaku.
- 6** Uwa, kuwari nyangala nintiringulta, “Munta-uwa! Mulapa May-
atja Godalu kinga nyanga palunya pikaringkula waintarinytjaku
palyaŋingi.

* **20:2** Jerusalemanyia ini kutjupa Zionga ngura milmilpa panya nyara palula Godaku timpula
ngaranyi.

- Mulapa Godalu kulilpai paluru tjapinnyangka.
 Munu paluru ilkar̄inguru kuŋpu pulkangku palunya wankarunanyi.”
- 7-8** Ngura kutjupitja tjutangku kulilpai alatji, “Nganaña wakina tjutatjara
 munu nyanytju tjutatjara. Palulangurula pikaringkula waintarinyi.”
 Palu wiya. Tjanaya punkalku puṭu waintarira.
- Ka nganaña tiutjara kuŋpu alatjitu ngaraku,
 panya nganaña Mayatja Godaku mulamularingkupai alatji kulira,
 “Nganampa God Mayatja witulya pulkanya.”
- 9** Uwa Mayatja, kinga nyanga palunya wankarunama,
 munulanya kulinma nyuntula tjapinnyangka.

23

- 1** Mayatja nyuntu panyañin atunymara wiruṛa kanyilpai.
 Panya wati tjapatangku tjiipi tjuta wiruṛa kanyilpai,
 palu purunytjunin nyuntu ngayunya atunymankupai.
- 2** Nyuntu ngayunya ngura wirungka kanyilpai, mai pulkatjarangka
 ngalkula pałtja nyinanytjaku.
 Munuñin ngayunya mina wirukutu katipai tjikirā nyantulpa nyinanyt-
 jaku.
- 3** Ka panya ngayulu kurunpa uparingkunyangka nyuntu ngayunya
 kuŋpulpai.
 Munun ngayunya katirinkupai iwara tjukarurungka ngañmanytu
 kalkuntjatjanungku.
- 4** Tjinguru ngayuku tjituru-tjituru pulka wirkankunyangka
 nguluringama ilunytjaku-tawara.
 Palu nyuntu ngayula tjungu nyinanyi,
 kana palulanguru ngulu wiya rapa ngaraku.
- Panya tjapatangku tjukaratjarangku tjiipi tjuta atunymankupai,
 palu purunytjun nyuntu ngayunya atunymara kanyini.
- 5** Nyuntu panya ngayuku pulkara mukuringkupai.
 Munun ngayuku mai pulka purunyapa palyalpai ngayuku mukuringkula.
 Munutjun palu purunytju ngayuku walpayatangka tjaalyn-
 garatjunkupai titutjara ngarinytjaku.
- Palu ngayuku mirpañtu tjutaku nyuntu alatji palyalwiyangku wantipai.
 Uwa, nyuntu pukultjungku ngayunya wiruṛa atunymankupai, kana
 pulkara pukularipai.
- 6** Mulapa ngayuku nyuntu titutjara pulkara mukuringanyi,
 munun wiru kutju alatjitu ngayuku palyani.
 Kana nyuntula tjunguringkula titutjara nyuntula kutju nyinaku man-
 tangka nyanga wanka nyinalalpi.

40

- 1** Mayatja God, ngayuluña purkara pałalpai nyuntu alpamilantjaku,
 Kanin nyuntu ulara tjapinnyangka kulilpai alatjiitu.
- 2** Ngayuluña tjudipirpangka karalukatingu ngati pulkangka mununa puṭu
 pakara nguwanpa ilungu,
 kani nyuntu mantjira apu wałungka tjunu wankaru rapa
 ngaranytjaku.
- 3** Munuñin nyuntu inma kuwaritja nintinu inkara nyuntunya wal kuntjaku.
 Kaya aŋangu tjutangku nyuntu palyantja nyakula kulikku, “Munta-
 uwa, mulapa Godanya witulya pulka nyinanyi.”
 Munuya palulanguru nyuntumpa mulamularingkuku.

- 4** Mayatja God, aŋangu panya nyuntumpa mulamularingkupai pukulpa mulapa nyinaku.
 Aŋangu nyanga palu purunypa panya kaŋany-kaŋanypa nyinapai tjutangka puṭu tjunguringkupai.
 Munu palumpa tjanampa god ngalypa-ngalypa tjuṭa tjunguringkula walkulpai wiya.
- 5** Mayatja God, nyuntu pulka mulapa nganampa palyaṇu kutjupa kutjupa wiru tjuṭa.
 Ka nyanga palu purunypa kutjupangku puṭu alatjiṭu palyalpai.
 Ka panyan piruku wiru tjuṭa palyantjikitjangku kalkunu.
 Uwa nyuntu palyantja winki mulapa ngaranyi,
 kana puṭu nguwanpa uwankara tjakultjunkuku nyuntu panya palyantjitia tjuṭa.
- 6** Tjinguruṇa puluka munu tjiipi ngalya-katira pungkula tiliwakara nyuntuna ungama ngayuku kalyparingkunytjaku,
 palu nyuntu mukuringkunytja wiya ngayulu nyanga alatji palyantjaku.
 Panya nyuntu ngayunya pina palyaṇu nyuntunya wanganarangku kulintjaku.
- 7** Kaŋa nyuntula wangkangu, “Nyngatjaŋa ngayulu pitjangu,
 panya iriti nyuntu nyiri milmiltä walkatjunu tjukurpa ngayunyatjara.
- 8** Uwa Mayatja God, ngayuluṇatju pulkaṛa pukularipai nyuntu mukuringkunytjtja tjuṭa palyantjikitja,
 panya ngayuluṇa nyuntumpa tjukurpa kurunpa winkingku titutjarangku kulilpai.”
- 9** Ka panya nyuntumpa walytja tjuṭa nyuntunya walkuntjikitja tjunguringangi,
 kaŋa tjanala tjakultjunangi panya nyuntu palyantja uwankara tjukaruru alatjiṭu.
 Nyuntu ninti Mayatja, panya ngayulu nyuntunyatjara rawangku wangkapai wantinytja wiyangku.
- 10** Ngayuluṇa aŋangu tjutangka tjakultjunangi panya nyuntu ngayunya mulapa alatjiṭu wankarunu.
 Alatjiṇa tjanala wangkangi, “Nganampa mayatjangku nganaŋanya ngaltuny়tjungku kanyilpai titutjarangku.
 Panya paluru kalkuntjatjanungku palyalpai alatjiṭu.”
- 11** Mayatja God, wanyutju titutjara ngaltuny়tju ngarama.
 Mununi wankaru kanyinma panya nyuntun titutjarangku mukulyangku atunymankupai,
 munu panyan kalkuntjatjanungku palyalpai alatjiṭu.
- 12** Kura winki mulapa nyangatja ngayula utiringanyi mununi puuntananyi.
 Kaŋa puṭu alatjiṭu kulini.
 Ngayuluṇa kura tjuṭa mulapa palyaṇu, munuṇa kuwari puṭu nyanganyi iwara palyangka ankunytjikitjangku.
 Kuwariṇa uparingkula rapa ngaranytja wiyaringu.
- 13** Mayatja God, wanyuṇitju warpungkula pitjala ngayunya alpamilala wankaru nyinanytjaku.
- 14** Aŋangu tjutangkuya ngayunya iluntankunytjikitjangku kulini,

ka mayatja, wanyu tjananya painma kaya kunṭaringkula anama alatjiṭu.

15 Paluru tjana panya ngayunya kurara pungangi munu ananingi.

Ka wanyu mayatja, tjananya pulkara painma, kaya kunṭaringkula wangkama, “Munta, kurangkula palunya kurara pungangi.”

16 Kuwariṇa nyuntula tjapini aŋangu panya nyuntunya walkulpai tjuṭaku, paluru tjana nyuntumpa pulkara pukularintjaku, panya nyuntun palunya tjananya wankarunkunytjanguru.

Wankarunkunytja nyara palulanguru tjana uti titutjarangku mirawaŋira alatji wangkama, “Mayatja Godanya pulka mulapa.”

17 Ngayulu ngaltutjara, munuŋa kurunpa uparingu.

Palu Mayatja God, wanyuŋitju titutjarangku kulinma, munuŋin wankarura atunymara mukulyangku kanyinma.

Wanyuŋitju warpungkula pitjala alpamilala!

46

1 Godanya nganampa ngalkilpa nyinanyi kunpu pulka.

Munu nganampa tjituru-tjituru kura pulka wirkankunyangka paluru ilatū ngarapai nganaŋanya kurunpa rapantjikitja.

2-3 Palulanguru nganaŋa ngulu wiya nyinapai,

panya Godalulanya atunytju kanyini manta urinyangka, munu puli murpu pulka tjuṭa katakatira urungka tjarpanyangka.

Munula uru wiṭatjara walpatjara kuļu pulkara rurkunyangka nganaŋa ngulu wiyatū nyinapai.

4 Palu ngura wirunya nyaratja ngaranyi Jerusalemany aŋangu tjuṭa pukulpa nyinanytjaku ngura karu uru wirutjarangka.

Ngura nyara palula panya Godanya nyinapai.

Paluru mayatja pulka mulapa uwankarangka waintarintjya.

5 Ka kutjupangku putu wiyanı ngura nyara palunya,

panya Godanya nyinanyi nyara palula, munu paluru titutjarangku atunymankupai palumpa walytja tjuta.

6 Ngura kutjupangka kutjupangka tjanayanku pikangku punganyi, munu aŋangu kutjupa tjuṭa ngulutjingani.

Palu Godalu mirara wangkanyangka manta katakatira minyaminyaringkuku.

7 Mayatjanya pulka mulapa nganaŋala tjungu nyinanyi.

Paluru nganampa tjamu Jacobaku mayatja, munulanya atunymara kanyilpai.

8 Pitjalaya nyawa Mayatja Godalu palyantja pulka mulapa manta winkingka.

9 Paluru ngura winkingka pikangku pungkunyangka pilunmankupai, munu kuļata tjuṭa kaṭantara wiyalpai, munu warungka kutjalpai kutitji tjuṭa.

10 Munu paluru wangkapai,

“Wiyariwaya munu pilunarira kulila ngayunya, panya ngayulu kutju God Mayatja Pulkanya uwankarangka waintarintjya manta winkingka.”

11 Uwa, God Mayatja Pulkanya nganaŋala tjungu nyinanyi.

Paluru nganampa tjamu Jacobaku mayatja,
munulanya atunymara kanyilpai.

51

- 1** Mayatja God, nyuntu panyan tiṭutjara ngayuku pulkaṛa mukuringkupai wiyaringkunytja wiya.
Nyanga palulanguruṇi ngaltunytjungku wiruṛa kanyinma.
Panya nyuntula kulira wantiraṇa kura pulka palyaṇu,
katju wanyu ngalturingkula ngayunya kalypangku wantima kura palyantjitjanguru pungkunytja wiyangku.
- 2** Panya kutjupa-araṇa walytjangku kulira kura mukuringkula palyalpai.
Munuṇa kutjupa-ara watarkungku palyalpai palya-palku kulira.
Kaṇi kura nyanga uwankaranguru ngayunya pungkunytja wiyangku wantima.
- 3** Uwa, ngayuluṇatju kura palyantjatjanungku kulira walytjangku ngurkantananyi,
munuṇa nyuntula kulira wantintjatjanungku rawangku kulipai munuṇa tjituru-tjitururupai.
- 4** Mayatja, ngayulu panya kura palyara nyuntunya pulkara kuraru,
panya painuṇin, kaṇa kulira wantira pampuṇu,
kan ngayunya tjukarurungku kuranmananyi, munuṇin palya wiyanı.
- 5** Uwa, ngayulu itinguru alatjiṇu kura nyinangi.
Panya kura alatjiṇu ngunytjungku tjuningka kanyiningi.
- 6** Ka nyuntu panya mukuringanyi ngayulu tjukarurungku unngu kulintjaku.
Palulanguruṇi wanyu ngayunya unngu nintila nyuntu kulintjtja tjuṭa,
kaṇa kulira nyuntu mukuringkunytja kutju wangaṇarangku palyalku.
- 7** Uwa, ngayulu kura palyantjitjanguruṇi kalypangku wantima mununi tjukarurunma.
Kaṇa pala palulanguru palya mulapa nyinama.
- 8** Wanyuṇi tjakultjura nyuntu ngayunya kalypangku wantintjatjanungku,
kaṇa kulira pukulari.
Pulkaraṇa kuntuṛingu, panya kura pulka mulapa nyuntu ngayula utinu.
Kaṇi wanyu piruku pukulmanama kura nyanga palula tjanalanguṛu nyuntu ngayunya kalyapangku wantintjatjanungku.
- 9** Uwa, nyuntu nintingku ngayunya nyangu kura palyannyangka.
Palu nyakunytjatjanungku wanyu ngayunya kalypangku wantima pungkunytja wiyangku,
munu kura nyanga uwankara ngayulu nyuntula tungunpungkula palyantjtjaku watarkurima rawangku kulintja wiya.
- 10** Mayatja God, wanyuṇi kulintja kampa kutjupara,
munuṇi tjukarurula nyuntula kutju wangaṇarangku kulintjaku.
- 11** Palu nyuntulanguṛuṇi paira iyantja wiyangku wantima.
Munu Kurunpa Milmilnga ngayulanguru mantjilwiyangku wantima,
panya paluru ngayunya wankaru kanyini.
- 12** Panya nganmanyapaṇa pukulpa mulapa nyinangi nyuntu ngayula tjungu nyinara alpamilannyangka.
Kaṇi wanyu malakungku pukulmanama panya nganmanyitja purunypa nyinanytjaku.
Munuṇi kuntuṛula, kaṇa nyuntula kutjungka wangaṇarangku kulinma.
- 13** Alatji nyuntu ngayunya pukulmankunyangkaṇa tjakultjunkuku anangu panya nyuntunya wantipai tjutangka.

- Kaya ngayulu purunypaṭu tjana kulira kunṭaringkuku munuya aruringkula pitjaku nyuntunya tjukarurungku wañantjikitja.
- 14** Mayatja God, nyuntu kutjungku ngayunya wankarunkuku.
Panya ngayulu kurangku iluntanu, katju ngalturiwa munuṇi kaly-pangku wantima pungkuwiyangku.
Kana anangu tjutangka tjakultjura katungku mirara wangkara nyuntu ngayunya wirungku tjukaruruntja.
- 15** Uwa Mayatja, ngayunya wangkanytjaku nintila, kana nyuntunya mirawaṇira walkunma.
- 16** Tjinguruṇa ngayuku kuranguru kuka tjiipi katima pitjilta pungkula paura mulurura ungpunytjikitjangku nyuntunya.
Palu ngayulu ninti panya nyuntu pukularinytja wiya kuka kutju pungkula ungpunyayangka.
- 17** Palu ngayulu kurunpa tjaruringkula piiwiyaringkunyangka kutju nyuntu ngayuku pukulariku.
Munuṇi paira iyantja wiyangku wantira kanyilkku.
- 18** Palu wanyu ngalturingkula alpamilala anangu nyanga Jerusalemala nyinanytja tjuta wall-pa para-ngarala wañantja piruku palyantjaku panya nganmanytju piluntankunytja.
- 19** Nyuntu tjinguru alatji alpamilannyangkaya nyuntumpa anangu tjuta tjukaruru nyinaku,
munuya mulamulangku kuranguru piiwiyaringkula kuka katiku pungkula paura mulurura ungpunytjikitjangku nyuntunya.
Ka nyuntu palumpa tjanampa pulkara pukulariku.

61

- 1** God, kulinmañitju! Kuruntunanta ulara tjapini.
Munuñitju wanyu kulira alpamilanma.
- 2** Ngura nyanga parari-nguruṇa nyuntula ulara ma-tjapini alpamilantjaku, panya ngayuluñatju kuvari kurunpa wawanyarira uparingu.
Nyuntu panyan puli pulka purunytpu angatjura kanyilpai, kani ngayunya wankaru anga-kanyinma.
- 3** Nyuntu panyanitjun mukulya wirungku mirpantju tjutangka-tawara anga-kanyilpai.
Panya wall-pa ngurangka para-arintara ngarapai kuṇpu alatjitu mirpantju tjuta tjarpanytjaku-tawara, palu purunytpuñin rawangku anga-kanyilpai.
- 4** Wanyunitju tjunama nyuntumpa Tinta Milmiltu unngu, kana nyara palula tiütjara mulapa rapa nyinaku nyuntu anga-tjutura kanyinnyangka,
panya tjulpu ngunytpungku nyalpingka anga-tjutura kanyilpai atunypa nyinanytjaku,
palu purunytpuñi atunymara kanyinma.
- 5** God, nyuntuin kulinu ngayulu nyuntunya kalkunyangka, munu panyanitjun wirungku kulintjatjanungku pukulmanu.
Panya nyuntu anangu nyuntunya walkulpai uwankara kulira pukulmankupai,
palu purunypañin nyuntu ngayunya ngapartji pukułmanu.
- 6** God, ngayulu nyuntula tjapini nganampa kinga wanka kanyintjaku, paluru wanka rawa nyinanytjaku.

- Munu palula małangka palumpa tjitji małatja małatja tjuṭa kułu kingarinyangka kanyilkatima tiṭutjarangku alatjiṭu.
- 7** Uwa Mayatja God, nganampa kingangka tiṭutjara tjungu ngarama paluru aŋangu tjuṭa mayatjangku atunymara wirura kanyintjaku.
- Munu palunya mukulyangku wankaru kanyinma tiṭutjarangku, panya mulapa nyuntu wantintjya wiyangku kanyilpai alatjiṭu.
- 8** Kañanta ngayulu tiṭutjarangku nyuntunya inma inkara walkura mirawañiku.
- Munuñanta nyuntunya kalkuntjatjanungku rawangku palyalku, tjintu kutjupa tjintu kutjupa.

63

- 1** Ngayulu nyuntunya kuvari walkuni, panya nyuntu ngayuku God.
Kaña ngayulu nyuntumpa pulkara mukuringanyi.
- Munuña kuvari nyuntunya-tjiratja kapi ilu purunytyu nyinara nyuntunya rawangku pulkara kulini.
- Panya ailuru pulkangka manta piltiringkupai mina wiyangka, palu purunypa ngayulu kurunpa winki uliringkupai nyuntula wiyangka, panya ngayulu nyuntumpa pulkara alatjiṭu mukuringanyi.
- 2** Panya ngayulu nyuntunya nyangangi wali milmila nyinanyangka, mununa nyangu nyuntunya witulya pulkangku palyannyangka munu pitalytji pulka alatjiṭu irnyannyangka.
- 3** Palu panya nyuntumpa mukulya pulka mulapa rawa alatjiṭu ngaranyi wanka nyanga mantatjangka waintara mulapa, kana palulanguru nyanga kuvari nyuntunya inkara walkuni.
- 4** Mununa nyanga alatji kulini, “Utiña wanka nyanga nyinaralpi nyuntunya tiṭutjarangku walkunma, mununa nyuntunya ini wangkara maṛa katuringkula walkura tjap-inma.
- 5** Mununa uti kurunpa winki pulkara pukularima, panya mai wiru ngalkuntjatjanuna paltjaringkula pukularipai, palu purunypa.
- Uwa, utiña inma tjuṭa pukultu inkara nyuntunya pulkara mirawañima.”
- 6** Panya ngayulaña mungangka ngarikatira nyuntunya rawangku kulilpai, munuñanta kulira alatjiṭu tjinturingkupai.
- 7** Panya nyuntu kutjungkun ngayunya tiṭutjarangku alpamilalpai, kaña palulanguru nyuntumpa inma tjuṭa pukultu inkara kulilpai, panya nyuntu ngayula tjungu alatjiṭu nyinanyangka.
- 8** Uwa, panya ngayulu nyuntumpa pulkara mukuringkula nyuntula tjungu alatjiṭu nyinaku wantintjya wiya, kañin nyuntu wirungku witulya pulkangku alatjiṭu atunytyu kanyini.
- 9-10** Panya kuwariniya tjana ngayunya ngurini iluntankunyitjikitjangku, kaña mukuringanyi nyuntu palunya tjananya wiyanjaku.
- Panya palunya tjananyaya kuvari pika pulkangka pungkula iluntankuku, ka inura tjuṭangku tjananya pitjala ngalkuku.
- Kaya paluru tjana miri tjuṭaku ngurangka tjarpara tiṭutjara alatjiṭu nyinaku.
- 11** Uwa, panya Godalu ngayunya mulapa Israelku mayatja witulyanu warmala tjuṭa pungkula waintarintjaku, kaña palulanguru palumpa pulkara pukularinyi.
- Kaya aŋangu tjuṭangku panya Godala mirangka wangkara kalkuntjatjanungku palunya pulkara mirawañiku.

Palu panya aŋangu ngunti wangkapai tjuta Godalu tja patilku.

91

- 1** Utu nyuntu Mayatja Godala tjungu nyinama Witulya Pulkangka,
kanta paluru nyuntunya tiutjarangku atunymara kanyilku.
- 2** Ka nyuntu nyanga palunya kulira nyanga alatji palula wangkaku,
“Wirungkuñin ngayunya atunymara kanyilpai munuñin kutitji
purunytyu angatjura kanyilpai, ngayuku ngalkiltu,
kaña ngayulu pulkaṛa mulamularingkula nyuntunya walkulpai.”
- 3** Ka paluru nyuntunya atunymankuku kutjupangku nyuntunya ngunti
kurantjaku-tawara,
munu paluru nyuntunya wankaru kanyilku pikatjararingkula
ilunytjaku-tawara.
- 4** Uwa, palurunta wirura kanyilku,
panya tjulpungku kułunypa tjuta nyalpingka unngu angatjura kany-
ilpai, palu purunytyunta angatjunkula kanyilku,
kan ngulu wiya rapa alatjitu nyinaku paluru atunymankunyangka.
- 5** Munun mungangka kura kutjupa kutjupa nyuntula utiringkunyangka
nyakula nguluringkunytja wiya nyinaku,
munun kałala kuļu kutjupangku kuļata wañinyangka nyakula nyuntu
nguluringkunytja wiyat, rapa alatjitu ngaraku.
- 6** Munun mamu panya kura mungangka para-ngarapai tjutaku
nguluringkunytja wiya rapa nyinaku,
munun kałala kuļu tjana iluntankunyangka nyakula nyuntu
nguluringkunytja wiyat ngaraku.
- 7** Ka nyuntula itingka aŋangu tjuta mulapa pikatjararingkula iluku,
palu Godalu nyuntunya atunymara kanyinnyangka nyuntu pikatjarar-
ingkunytja wiya palya alatjitu nyinaku.
- 8** Munu nyuntu kuřu alaringkula nyakuku Godalu aŋangu kura palyalpai
tjuta pungkunyangka.
- 9** Munu nyuntu rapangku kuliklu, “Mayatjaluni ngayunya atunymara
kanyini katutja pulkangku.”
- 10** Ka nyara palulanguru kura kutjupa kutjupa nyuntula wirkankunytja
wiya ngaraku.
- 11** Panya Godalu witulku palumpa angelpa tjuta nyuntunya atunymara
kanyintjaku kałala mungangka kuļu, munu nyinanyangka ankun-
yangka kuļu.
- 12** Munuya nyara paluru tjana nyuntunya marangku katura kanyilku
punkaṛa apungka tjina kałakatinytjaku-tawara.
- 13** Ka nyuntu lion pikati tjutangka liru tjutangka kuļu ngururpa rapa para-
ngaraku,
kaya nyuntunya patjantja wiyangku wantiku.
- 14** Panya Godalu wangkanyi nyanga alatji, “Nyuntu ngayuku pulkaṛa
mukuringkunyangkaña nyuntunya wankarunkuku,
munuñanta nyuntunya atunytyu kanyilku nyuntu ngayuku mulamu-
laringkunyangka.
- 15** Palu kura kutjupa kutjupa nyuntula utiringkunyangkampa ngayunya
alти,
kaña ngayulu kulira nyuntula tjunguringkula nyuntunya
wankarunkuku,
kaya aŋangu kutjupa tjutangku nyuntunya wankarunkunyangka
nyakula wangkaku, ‘Ai, wati nyangatja wiru mulapa.’

- 16** Uwa, nyuntu ngayula tjungu nyinanyangka_a ngayulu nyuntunya wankaru kanyilku,
ka nyuntu manta nyangangka rawa wanka nyinaku munun ngula tjilpiringkula kutju iluku.”

121

Inma nyangatjaya Jerusalemalakutu ankula inkakatipai.

- 1** Nganalunitju alpamilalku? Tjinguruña murpu nyara pulkanya iranyakula tjapilku, panya paluru tjana titutjara kuŋpu ngarala iritiringu. Tjinguruni paluru tjana ngayunya alpamilalku.
Palu wiyampal nyangatja. Wiya alatjiitu.
- 2** Panya Mayatja Godalunitju ngayunya alpamilalku, panya paluru kutjupa kutjupa uwankara palyanu murpu tjuṭa kuļu.
- 3-4** Uwa mulapa Mayatjalu uwankara rawangku kanyilpai pakuringkula kunkunarintja wiyangku.
Munulanya aṭunymankupai punkantjaku-tawara.
Uwa, paluru nganañanya Israelkunu tjuṭa kunkunpa wiyangku aṭunymankupai.
- 5-6** Mayatjalulanya anga-kanyilpai panya puṇu wiltja pulkuṇpa wiru ngarapai kalanya tjintungku puṭu kampapai, palu purunyṭju.
Munu paluru mungangka kuļu anga-kanyilpai kinara panya wiya ngaranyangka.
- 7** Ka Mayatja Godalulanya aṭunymara kanyini panya kutjupa kutjupa uwankarangku kurantjaku-tawara.
Uwa mulapa nyangatjalanya aṭunymananyi wankaru nyinanytjaku.
- 8** Panya palurulanya titutjarangku ilangku nyakula kanyini ngurangka nyinanyangka munu ngura parari ankunyangka kuļu.
Munulanya titutjarangku alatjiitu aṭunytju kanyira iritiriku.

131

- 1** Mayatja, ngayulu nyuntumpa kutjuku pulkara mulamularinganyi.
Munuñatju walytjangku ngayulu kañany-kañanytju pulkanmankupai wiya.
Nyuntu panya pulka mulapa palyalpai,
kaña puṭu kulilpai.
Tjinguruña arkarampa puṭu palyanma,
panya nyuntu kutjungku nyanga purunypa palyalpai nintingku.
- 2** Uwa, puṭuna kulilpai.
Palu palya, kurunpaṇi pukulpatu ngaranyi tjitji tjukutjuku purunypa,
panya ngunytjungku ampura kanyinnyangka pilunpa ngaripai, palu purunypa.
- 3** Ka nyura Israelkunu tjuṭa Mayatja Godaku kutjuku mulamularingama.
Munuya titutjarangku palunya kutju mulamulangku kulinma.

133

- 1** Añangu tjuṭa kutjuringkula tjungu pukulpa nyinanyangka nyakula nganaña kulilpai, “Awari, nyangatja wiru mulapa. Godalu-manti nganañanya añangu uwankara tjungura pukulmananyi.”
- 2** Panya Godalu palumpa añangu tjuṭa pukulmankunytjikitjangku wangkangu tjananya tjukurtjara pulka palumpa tjunkunytjaku Aaronnga panya.

Munu wangkangu tjananya, "Uwila wiru mulapa mīmilpa palula katangka tjukutjuku tjutila paluru tjukurtjara pulka kuranyitja nyinanytjaku."

Kaya mulapatu Aaronta katangka uwila tjutinu, palu pulka nguwan-paya tjutinu,
ka katanguru ukalingkula ngankurpawanu tjutingu piningka.

Alatji Godalu Aaronnga tjananya pulkara pukułmanu,
munu palu purunypał Godalu palumpa walytja uwankara pulkara pukulmankupai.

3 Uwa, anangu tjuła tjungu pukulpa nyinanyangkala kulini panya Godalu mulapa pukułmananyi palumpa walytja tjuła, minangku puyintja purunypa.

Panya mina pulkangku ngura ailurungka puyira puṇu ukiri wiru pakaltjingalpai,
palu purunypa Godalu pukułmankupai palumpa walytja uwankara.

Panya Mayatja Godalu wiru palyantjikitjangku wangkangu palumpa walytja Jerusalemala nyinanytja tjułaku,
kaya ngura nyara palula titutjara mulapa nyinaku.

136

1 Mayatja Godanyala wal kunma,
panya paluru wiru mulapa.

Panya palumpa mukulya pulka titutjara ngaraku.

2 Paluru kutju god pulka mulapa kutjupa uwankarangka waintara alatjitu.
Kala palunya kutju wal kunma.

Panya palumpa mukulya pulka titutjara ngaraku.

3 Paluru kutju mayatja pulka mulapa mayatja kutjupa uwankarangka waintara.
Kala palunya kutju wal kunma.

Panya palumpa mukulya pulka titutjara ngaraku.

4 Paluru kutjungku kutjupa pulka mulapa palyalpai witulya pulkangku.

Panya palumpa mukulya pulka titutjara ngaraku.

5 Paluru nintipuka mulapa munu palulanguru nintingku ilkarí palura kutjupa tjuła tjunu.

Panya palumpa mukulya pulka titutjara ngaraku.

6 Paluru manta lipira tjunu urungka katu.

Panya palumpa mukulya pulka titutjara ngaraku.

7-9 Paluru palunu tjintu munu pira,

munu tjintu tjunu kalala irnyantjaku,

munu pira kililpi tjunu mungangka irnyantjaku.

Panya palumpa mukulya pulka titutjara ngaraku.

10-12 Paluru Itjipanya ngurara tjułaku katja nganmanyitja tjuła iluntanu.
Munu paluru Israelkunu tjuła witulya pulkangku pakaltjingara katingu ngura Itjipalanguru.

Panya palumpa mukulya pulka titutjara ngaraku.

13-15 Paluru uřu ini Tjuna-tjunatjaranya tjarañu Israelkunu tjuła itipirintjaku, munu tjananya ngururwanungku katingu.

Munu paluru urungka iluntanu Piiranya tjananya warmala winki.

Panya palumpa mukulya pulka titutjara ngaraku.

16-22 Paluru katirinangi anangu tjuta ilytjiwanungku.

Munu paluru pungangi mayatja pulka tjuła.

Paluru iluntanu aŋangu Amurkunu tjuṭaku mayatja ini Tjiyannga.
 Munu piruku pungu aŋangu Patjanta nyinapai tjuṭaku mayatja ini Akanya.
 Munu tjanampa manta tjananya ungu palumpa walytja tjuṭa Israelkunu tjuṭa.

Panya palumpa mukulya pulka titutjara ngaraku.

²³⁻²⁴ Kutjupa-ara warmaŋangku nganaŋanya pauntjingara pungangi, kala pulkaṛa tjituṛu-tjituṛuringi.

Palu paluru nintingku nganaŋanya nyangangi watarkurinyta wiyangku,
 munulanya walatjunu mirpaṇtju tjuṭanguru.

Panya palumpa mukulya pulka titutjara ngaraku.

²⁵ Paluru kutjungku aŋangu tjuṭa, kuka mantatja urutja tjuṭa kuļu uwankara paltjalpai.

Panya palumpa mukulya pulka titutjara ngaraku.

²⁶ Wałkunmala pukułarira Mayatja Godanya ilkařingka nyinapainya.

Panya palumpa mukulya pulka titutjara ngaraku.

146

¹ Wałkunmala Mayatjanya kurunpa winkingku.

² Munula palunya kutju inkara mirawaŋima titutjarangku mantangka nyanga wanka nyinalipi.

³ Munula mayatja mantatja tjuṭaku mulamularingkuwiyangku wantima, panya tjana aŋangu tjuṭa puṭu tjukarurungku aṭunymara kanyilpai.

⁴ Mayatja panya paluru tjana unytju nyinanytjatjanu ilura małaku mantařinganyi.

Ka tjiṇtu nyara palula tjana palyantjikitjangku wangkara kulintja uwankara kuļu wiayingkuku palyantja wiyaṭu.

⁵ Mayatja Godanya nganampa tjamu tjuṭaku, mayatja Jacobaku tjanampa, munu nganampa kuļu.

Ka nganaŋa palunya kulira mulamularingkunyangka paluru nganaŋanya alpamilalku.

Nyara palulanguru kutju nganaŋa pukulpa nyinaku.

⁶ Panya paluru ilkaři manta uru kuļu paluňu munu mai kuka kutjupa kutjupa uwankara kuļu paluňu.

Munu paluru kalkuntjatjanungku palyalpai alatjiṭu.

⁷ Munu ngalṭutjara tjuṭa ngunti kurannyangka nyakula paluru tjukarurungku ngurkantankupai munu tjananya aṭunymankupai.

Paluru paltjatjiratja nyinanyangka tjananya paltjalpai.

Munu kuranguru pulkaṛa kulira tjituṛu-tjituṛurinyangka nyakula ngalṭunytičungku alpamilara unngu pukułmankupai.

Panya tjailangka nyinanyangka mayatjangku wangkara walatjunkupai, palu puřunypa Mayatja Godalu nyakula alpamilalpai.

⁸ Munu paluru kuru pati alalpai munu tjaruringkula punkannyangka piřuku pakaltjingara kuṇpulpai.

Mayatja Godanya tjukaruru nyinapai tjuṭaku mukuringanyi.

⁹ Godalu malikitja tjuṭa aṭunymankupai ngura kutjupanguru pitjala nganampa ngurangka nyinanyangka,

munu wanakała tjiṭula tjuṭa kuļu aṭunymankupai.

Palu aŋangu tjuṭangku titutjarangku kura kutju palyannyangka Godalu pařa iyalpai walytjangku kulira kuraringkula ilunytičaku.

10 Uwa, mulapa Israekunu tjuŋtaku God kutju mayatja pulka mulapa titutjara nyinaku. Kala palunya kutju walkunma Mayatja pulkanya.

Tjukurpa Muṭumuṭu Tjuṭa Kulira Nintiringkunytjaku Proverbs Nyangatja Ngañmanytju Nyakula Wangkanytjaku

Nyangatja Godaku tjukurpa, ka nyanga palula tjukurpa muṭumuṭu tjuṭa ngaranyi nganaña nyakula nintiringkula wiruṛa palyanyku nyinanytjaku. Panya Godanya miłmilpa palya mulapa munu ninti pulka alatjiṭu, kala uti piluntju nyinara palumpa tjukurpa purkarangku kulira nintiringama nganaña kuļu palu purunypa miłmilpa palya mulapa nyinanytjikitja mukuringkuļa. Uwa, wati maṇkurtu tjukurpa nyanga muṭumuṭu tjuṭa walkatjunu, panya mayatja Davidaku katjangku ini Tjalamantu tjara walkatjunu. Palu nyiri nyanga palula tjukurpa maṇkurpa mulapa ngarinyi, panya nganaña kuwaripaṭu tjukurpa uwankara palyantja wiyatū.

¹ Tjukurpa nyanganpa Israelku mayatjangku walkatjunu panya Davidaku katjangku wati ini Tjalamantu. ² Ka tjukurpa nyanga paluru tjana nyuranya nintini kulira ninti pulkaringkunytjaku, ka nyura nintiringkunytjatjanungku tjukurpa kumpilpa ngaranytja tjutalta uti kuliklu munu kulira wangañarangkulta palyalku. Munu palulanguru kutjupa tjuṭangku nyurala wangkara nintinnyangka nyura nintingku tjukarurungku kuliklu. ³ Munu nyura tjukurpa nyanga palumpa tjanampa nintiringkunytjatjanungku kuliklu palyanyku nyinanytjikitjangku. Munu nyura kuliklu aŋangu uwankaraku palu purunytruṭu tjukarurungku palyantjikitjangku kutjupa tjuṭaku kuļu.

⁴ Uwa, tjukurpa nyanga palula tjanalanguru aŋangu ngurpa-ngurpa tjuṭa nintiringkuku ninti pulka nyinanytjikitja. Ka wati yangupala kungkawara tjuṭa kuļu nintiringkuku, munuya palulanguru nintiringkunytjatjanungku kulira tjukarurungku ngurkantankuku palyanyku nyinanytjikitjangku. ⁵ Kaya uti aŋangu nintipuka tjuṭangku kuļu tjukurpa nyanganpa kulira nintiringama munuya nyara palulanguru ninti pulka mularariku. Panya tjana tjukarurungku palyantjikitja mukuringkuļa tjukurpa nyanganpa kulirampa tjukarurungku ngurkantankuku. ⁶ Munu aŋangu nintipukangku tjanala tjukurpa ara kutjupatjara wangkanyangka tjana uti kuliklu.

⁷ Palu kulilaya! Nyura ninti pulkaringkunytjikitja mukuringkuļa Mayatja Godanya-warara walkunma munuya palula wangañarangku kulinma. Nyara palulanguru kutju nyura ninti pulkaringkuku. Palu panya aŋangu kawakawa tjuṭa ninti pulkaringkunytjikitja mukuringkunytja wiya munuya kuraringkupai kutjupangku tjananya nintinnyangka.

3

¹¹ Kulila! Mayatja Godalu nyuntunya tjitji purunypa tjukarurulpai palulawanu nyinanytjaku, kan uti palula wangañarangku kulinma panya paluru nyuntunya ngunti palyannyangka pailpai. Utu nyuntu kuranguru painnyangka kulira tjituru-tjitururinytja wiyangku wantima. ¹² Panya

paluru pulkara mukuringkupai palumpa katja untalpa tjułaku, munu pala palulanguru tjananya tjukarurulpai munu kuraringkunyangka tjananya pungkupai tjana tjukaruru nyinanytja-tjiratjangku.

11

¹ Nyura anangu kutjupangka kutjupa kutjupa ngunti tjalamilan-nyangka Godanya pulkara mirpañaripai, palu paluru pukularipai nyura tjukarurungku tjalamilannyangka mani nampa ngunti katuntja wiyangku.

12

¹ Tjinguru kutjupangku nyuranya wangkara tjukarurunyangka kulint-jatjanu nyura ninti pulka nyinama, palu tjinguru nyura kulintja wiyangku wantirampa kawakawa alatjitu nyinaku.

19

¹⁸ Tjitji tjułaya kura palyannyangka nyakula wangkara tjukarurunma paluru tjana nintiringkula palya nyinanytjaku. Palu nyura tjukaruruntja wiyangku wantirampa nyura alatjitu tjananya wantir'iyani tjana pułu kuliṛa ma-kuraringkunytjaku munu ilunytjaku.

20

¹ Añangu wama tjikira tarangkarira kawakawaringkupai munu pulkara mirpañarira añangu tjuła kuralpai alatjitu. Kaya palula-tawara wama tjikira tarangkariwyangku wantima añangu kutjupa tjuła tjituru-tjitururinytjaku-tawara.

⁶ Anangu tjułangkuya wangkapai, “Ngayuku mulamulariwa panya ngayulu kalkuntjatjanungku palyalpai alatjitu.” Palu alatji wangkanyangkaya kuliṛa mapalku mulamularingkuwiyangku wantima, panya tjana unytjungku kutju wangkapai mulamulangku wiya, palu añangu mañkurtu kutju kalkuntjatjanungku tjukarurungku palyalpai.

¹³ Tjinguru nyura war̄ka wiya rawa kunkunpa ngarira pałtjatjiratjariku. Palu nyura kunkunpa wiyangku war̄ka kutjupa kutjupa tjuła palyarampa mani mantjira mai pulkatjara nyinaku pałtja alatjitu.

22

⁶ Tjitjiyanku kulunypalpi wirura nintinma palyanyku nyinanytjaku, ka paluru tjana ngula pulkaringkula kulilkupanya palunya tjananya nyura tjukutjukulpi nintintjtja munuya wiruralta nyinaku tiłutjara.

²⁴⁻²⁵ Utu nyura malpa mularku mukuringama munu anangu mir-pańtju malpa palyantja wiyangku wantima nyura palu purunyarinytjaku-tawara. Tjinguru nyura palula tjunguringkula palu purunyariku munu nyura anangu tjułaku pułu kalypa nyinaku, ka palulanguru kura tiłutjara nyurala ngarakatima.

23

4-5 Purkaṛangkuya kulinma, panya anangu kutjupa tjuṭa pulkara rawa warkaripai mani pulka mantjintjikitja. Palu nyura pina ałangku kulira alatji palyantja wiyangku wantima, panya nyura mani pulka mantjinnyangka mani pala paluru mapalku wiyaringkupai, panya waławuru mapalku parpakara ankupai, palu purunypa.

12 Purkaṛangkuya kulira nintiringama kutjupangku nyuranya wangkara nintinnyangka. **13** Watarkurinytja wiyangkuya tjitji nyurampa rawangku tjukarurunma tjana kurannyangkampa. Munuya tjananya pungkula nintinma panya paluru tjana pungkunyangka ilunytja wiya nintiringkuku kulira, “Munta-uwa, nganañanya tjukaruruṇi.”

22 Utiya nyurampa mama tjuṭangka wangañarangku kulinma. Tjinguru nyura tjanala wiyangkampa nyinanytja wiya ngarama. Munuyanku ngunytju tjuṭa kuļu pamparingkunyangka atunymara kanyinma wantinytja wiyangku.

Wati Wangkatjarangku Aitjayalu Walkatjunkunytja

Isaiah

Nyangatja Ngañmanytju Nyakula Wangkanytjaku

Nyangatja Godaku tjukurpa wati wangkatjara ini Aitjayalu walkatjunkunytja. Paluru Israelkunu tjuta wangkara wituwituningi Godalu wangkanytja wanganarangku kulira palyantjaku. Panya nyara palula-ařaya pukulpa nyinangi mai kuka kutjupa kutjupa pulkatjara. Palu Israelta kakarařa ngura kutjupa ngarangi ini Atjiriyanya kaya anangu nyara palunya ngurara tjuta pikati pulka tjuta, ka Aitjayalu Israelkunu tjutangka ngañmanytju tjakultjunangi wati panya pikati tjuta ngula pikakitja pitjanytjaku.

Panya paluru tjukurmanangi tjukurpa kutjupa kutjupa tjuta, munu tjukurpa nyara palula tjanalanguru kulinungi Godalu ngula nyaa palyalku munu paluru walkatjunangi nyiri nyanga palula. Panya paluru kulinu Godalu ngula warmala tjuta ngura nyara Atjiriyalanguru iyalku Israeltakutu kaya anangu ngura tjutatja pungkula wiyalku munuya anangu Israelkunu tjuta wililytjingara iyalku ngura kutjupa tjutakutu pararikutu.

Ka ngula mulapa Jesulu kulinu Aitjayaku tjukurpa munu paluru palumpa nintintja tjutangka kutjupa-ara tjakultjunangi tjukurpa kutjupa tjuta Aitjayalu walkatjunkunytja. (Nyawa Aitjayaku tjukurpa 6:9 munu Matthew-ku tjukurpa 13:14, munu piруku nyawa Aitjayaku tjukurpa 9:1-2 munu Matthew-ku tjukurpa 4:15-16). Ka panya ngula Jesunya ilkařikutu małaku ankunyangka wati Itjiyau-piyanya ngurangku Aitjayaku tjukurpa nyakula wangkangi palu paluru puťu kulinungi ka Jesulu iyantja kutju palula wirkanu wati panya Philipanya munu wati panya palula Aitjayaku tjukurpa utira wangkangi, ka panya paluru kulira Jesuku mulamularingu. (Nyawa Aitjayaku tjukurpa 53:7-8 munu tjukurpa panya Iyantja Tjutangku Palyantja 8:30-36) Uwa, Jesulu tjana palumpa iyantja tjutangku Aitjayaku tjukurpa tjuta-arangku kulira wangkapai.

Palu Aitjayalu tjukurpa wařa mulapa walkatjunu, kala nyiri nyangangka tjukurpa mañkurpa kutju walkatjunu.

Tjukurpa nyanganpa ngarinyi:

- 1:1-2:22 Godalu palumpa walytja tjuta kura palyannyangka ngurkantankuku
- 6:1-10 Godalu Aitjayanya ngurkantankunytja palumpa wangkatjara nyinanytjaku
- 9:1-11:10 Godalu Israelkunu tjutaku mayatja wiřu mulapa ngula tjunkuku
- 29:1-6 Godalu palumpa walytja tjuta kura palyannyangka ngurkantankuku
- 30:19-40:31 Godalu palumpa walytja tjuta atunymankunytjikitjangku kalkuntja
- 42:1-4 Wati wiřu Godalu ngurkantankunytjanya
- 52:13-53:13 Wati panya Godalu ngurkantankunytjanya pulkara pikatjararingkuku
- 55:1-13 Godalu palumpa walytja tjuta pulkara pukulmankuku

Godalu Palumpa Walytja Tjuṭa Kura Palyannyangka Ngurkantankuku

¹ Tjukurpa nyanganpa Mayatja Godalu palumpa wangkatjarangka nintinu wati ini Aitjayala, wati panya Amatjaku katjangka. Ka paluru nintinnyangka wankangku nyangangi ngula nyaaringkuku aŋangu panya manta Judah-la nyinanytja tjuṭa munu tawunu panya Jerusalemala nyinanytja tjuṭa kulu. Ka Godalu palula tjukurpa tjuṭa rawangku nintiningi wati ini Utjayanya Judah-ku mayatja pułka nyinanytjtja-arangka, munu ngula piruku nintiningi mayatja ini Tjatjamanya nyinanytjtja-arangka, munu palula malangka mayatja ini Ayatjanya nyinanytja-arangka nintiningi, munu palulanguru mayatja ini Itjakayanya nyinanytjtja-arangka kulu nintiningi tjukurpa tjuṭa.

²⁻³ Alatji Mayatja Godalu wangkangi, “Uwa, kulila ilkaringku munu mantangku kulu ngayulu tjakultjunkunyangka, panya ngayuluṇatju ngayuku tjitji tjuṭa pulkaṇu mununa tjananya nintiningi wirura palyanyku nyinanytjaku, palu tjana ngayula tungunpungkula ngayunya wantingu alatjiṭu. Kuka panya puluka tjuṭangkuyanku mayatja tjanampa ngurkantankupai nintingku, palu nyanga Israelkunu tjuṭa ngayuku ngurparingu tjanampa panya mayatjaku. Ka panya watingku tangkiyi mai ungkula paltjannyangka paluru nintingkuṇu ngurkantankupai, palu ngayuku nyanga walytja tjuṭangku puṭu kulini, ‘Ngananya wanyu nganampa mayatja?’ Tjana alatjiṭu ngayuku watarkuringu.” Alatji Godalu wangkangu.

⁴ Uwa, nyura Godala tungunpungkula titutjarangku kura palyalpai wantinytja wiyangku munuya nyara palulanguru kukanya ngaṛanyi. Godanya panya miłmilpa mulapa munu nyuranya wirungku kanyilpai nyurampa panya mayatjangku, ka nyura paturingu palulanguru munuya palunya wantingu alatjiṭu. ⁵⁻⁶ Utu nyura Godala rawangku tungunpungkuwiyangku wantima, ka paluru nyuranya ngapartji pikantankunytja wiyangku wantiku. Palu nyura tjinguru mukuringanyi Godalu nyuranya rawangku pikantankunytjaku. Wanyu nyurayanku walytjangku nyawa! Panya nyura ngañmanypa alatjiṭu pikatjara ngaṛangi kurunpa upa ka nyuranya kata, kultu, tjunta, tjina kulu puntu winki pungkunytja pungkunytja purunypa pikatjara ngaṛanyi pałkunpa tjuṭatjara, panya kura palyannyangka Godalu nyuranya rawangku pikantanangi ka nyura nyaaku Godalu nyuranya piruku pikantankunytjaku mukuringanyi?

⁷ Panya nyurampa mirpaṇṭju tjuṭangku nyurampa ngura tjuṭa kuraningi nyurala miṛangka, munuya nyurampa wali tjuṭa kaṭantara warungka tiliṛa wiyanu. Munuya nyurampa mai kutjupa kutjupa uwankara kulu mantjira wanira wiyanu. Uwa, malikitja tjuṭangkuya pitjala manta nyurampa kuraṇu alatjiṭu. ⁸ Ka nyura ngura pala Jerusalemala mungutja purunyaringu kutjupangku pitjala alpamilantja wiyatja. ⁹ Palu Mayatja Pułkalu nganaṇanya aŋangu maṅkurpa pika pala palulanunungku wankarūra kanyiningi. Tjinguru paluru wantinyangkampa nganaṇa uwankara ilura wiyaringama, aŋangu panya ngura Tjatamala pulala Kumarala ilunytjtja purunypa,* palu paluru nganaṇanya maṅkurpa wankarunu.

¹⁰ Kaya kulila aŋangu Jerusalemania nguraṛa tjuṭangku! Panya nyura kura pułka mulapa nyinanyi aŋangu panya Tjatamala pulala Kumarala nyinanytja tjuṭa purunypa. Ka nyurampa mayatja tjuṭa kulu kura nyinanyi ngura nyara palumpa pulampa mayatja tjuṭa purunypa. Kaya Godalu wangkanyangka kulira wangaṇarangku kulinma! ¹¹ Panya Godalu

* ^{1:9} Genesis 19:24

wangkangu alatji, "Nyura rawangku kuka katira pungkula warungka tiliwakalpai ngayunya unguⁿytjikitjangku. Palu uti nyura kura palyant-jatjanungku kulir^a kuntu^ringama munu palulanguru kutju kuka pungkula unguⁿama. Palu nyura ngayunya puluka tjiipi nanikuta kutju pungkula unguⁿupai kura nyurampa kulintja wiyangku, kaⁿa kuka kutju katira unguⁿyangka pukularinytja wiya. ¹² Panya ngayulu nyurala wangkanytja wiya palu puruny^tju kuka tju^ta ngayulakutu katira pungkula unguⁿytjaku. ¹³⁻¹⁴ Kaya ngayunya kuka pungkula tiliwakara unguⁿytjaka wiyangku wantima! Panya nyura ngunti kuka unganyi mulamula kuranguru kuntu^ringkuny^tja wiyangku. Kaⁿa ngayulu kuraringanyi nyura paⁿti wiru ngayuku tilinnyangka panya nyura unytjungku kutju tilipai. Mununa kuraringanyi nyura inmaku tjunguringkunyangka panya nyura Saturday tjunguringkupai munu kutjupa-a^ra nyura inma pu^lka kanyilpai pi^ra ma-ngarinyangka munu a^ra kutjupa tjutangka ku^lu, palu nyura unytju kutju tjunguringkupai ngayunya mulamulangku walkuntjikitjangku kulintja wiya. Kaⁿa nyura alatji rawangku palyannyangka pukularinytja wiya alatji^tu nyurampa mirpaⁿarinyi.

¹⁵ "Tjinguru nyura mara katuringkula ngayula ti^tutjarangku tjapilku, palu ngayulu nyurala kulintja wiyangku wantiku, panya nyura marangku miripungkupai nyinanyi. ¹⁶ Ngayuluⁿna nyuranya nyanganyi kura tju^ta rawangku palyannyangka, kaya kura wantima pi^ruku palyantja wiyangku! Panya nyuntu mara walytjangku paltjilpai wiru ngaranytjaku, palu purunypaya kura wantira wiru^ru nyinanytjikitjangku. ¹⁷ Munuya nin-tiriwa tjukaruru palyanyku nyinanytjikitja, munuya anangu uwankaraku mukulya ngaltuny^tju nyinama anangu kutjupa tju^taku ku^lu. Tjinguru nyura nyakuku anangu kutjupangku anangu ngaltutjara pauntjingara wangkanyangka, munu nyura uti anangu nyara palulanguru angawangkama nyakula wantinty^tja wiyangku munuya palunya pukulmanama paluru^ru kunpuringkuny^taku. Munuya tjitula tju^ta wanaka^la tju^ta ku^lu atunymara uwankara kanyinma mukulyangku." Alatji Mayatja Godalu wangkanyi.

¹⁸ Munu paluru^ru piruku wangkanyi nyurala nyanga alatji, "Pitjaya kala nyinakatira wangkara kulila tjukurpa nyanga palunya. Panya nyura kura winki nyinanyi, ka nyuranya wiyan^tjaku ngaranyi. Palu ngayulu kalypangku nyuranya wantinyi wiyan^tja wiyangku. ¹⁹ Panya nyura kura wantira ngayunya wanganarangku kulir^ampa kuka, mai wiru^ru tju^ta ku^lu ngalkuku nyurampa pala mantangka pu^lka pakannyangka. ²⁰ Palu nyura ngayunya kulir^a wantinyangkampa mirpaⁿtu tjutangku warmala pitjala nyuranya iluntankuku." Uwa tjukurpa nyangatja Mayatja Godalu nyurala wangkangi, ka nyura mulamulangku kulinma.

²¹ Ka nyura Jerusalemala nyinanytja tjutangku nganmany^tju Mayatjala wanganarangku kulilpai nyinangi, palu kuwari nyura mayatja kutjupa kutjupa tju^ta waⁿani Godanya wantira. Ngaⁿmanypa panya nyura tjukaruru nyinangi Godaku tjukurpa wanganarangku kulir^a, palu kuwari nyura palumpa tjukurpa uwankara tungunpungkupai munuya anangu tju^ta iluntankupailta nyinanyi. ²⁴ Nyara palulanguru Israelku God Mayatja Pulkangku wangkanyi alatji, "Ngayulu nyuranya pungkuku nyura kura tju^ta rawangku palyannyangka. Panya nyura ngayuku mirpaⁿtu tju^ta nyinanyi."

²⁵ Palu Mayatja Godalu Jerusalemanya ngurara tjutangku kura tju^ta palyannyangka tjananya uwankara tjukarurungku ngurkantankuku.

Munu paluru kura tjuṭa wantira palulakutu małaku aruringkunyangka tjananya wankarunkuku panya tjana palula wangañarangku kulin-nyangka. ²⁸ Palu aŋangu kura palyalpai tjuṭangku palula tunguntunguntu wantinyangka Mayatjalu tjananya kukanymankuku, panya tjana wankarunkunytykitja mukuringkunyangka wantingu, ka Godalu tjananya wiyaliku.

²⁹ Munu nyara palulanguru nyura kulira nintiringkuku munu nyura pulkara kuntasringkuku, panya nyura God mulapa wantira god ngalypangalypa tjuṭa pukultu walkuningi puṇu nyara milmilpa tjuṭangka rawa tjunguringkula, munu kaana milmilpa tjuṭangka kuļu. Nyara palulanguru kurakura tjuṭaku pukularira nyura pulkara kuntasringkuku. ³⁰ Puṇu nyara paluru tjana panya mina wiyangka nyalpi piltiringkula wiyarcingupai, kaana tjuṭa kuļu. Ka nyara palu purunypa nyura wiyarcingkuku. ³¹ Ka nyurampa mayatja pulka tjuṭa kuļu wiyarcingkuku alatjitu tjiwuru purunypa, panya tjiwuru warungku mapalku kampara wiyalpai, palu purunypa tjana mapalku wiyarcingkuku tjana palyantjtja tjuṭa kuļu. Ka kutjupangku tjananya pitjala puṭu alatjitu wankarunkuku, panya waru pułkangku puṭi mapalku kampara wiyalpai ka kutjupangku puṭu iluntankupai, palu purunypa.*

2

¹² Munu piruku Aitjayalu tjanala wangkangu Godaku tjukurpa nyanga alatji,

“Tjiṇtu ilaringu Mayatjalu aŋangu kaṇany-kaṇanypa nyinapai tjuṭa tjaruntjaku munu waltyjangku mirawanipai tjuṭa kuļu, kaya wi-yaringkuku alatjitu piruku rawa kaṇany-kaṇanyarintja wiya.

¹³ Ngura nyara Lipananta puṇu panya waṛa tjuṭa ngaranyi ngura Patjanta kuļu. Palu puṇu nyara palunya tjananya aŋangu tjuṭangku kaṭara punkatjingalpai alatjitu –

palu purunypa Mayatja Godalu aŋangu kananypa nyinapai tjuṭa tjarulku.

¹⁴ Tjana tjinguru puli murpu pulka tjuṭa purunypa kaṇany-kaṇanypa ngarapai,

palu Godalu tjananya tjarulku alatjitu, puli murpu tjarura wiyanṭja purunypa mantangka tjungu ngaranytjaku.

¹⁵ Uwa, aŋangu kutjupa tjuṭa tjinguru wali waṛa pulka purunypa kaṇany-kaṇanypa ngarapai, wallpa katu anga-ngaranytja purunypa.

Palu Godalu tjananya tjarulku alatjitu, wali waṛa tjuta piluntara wiyanṭja purunypa, wallpa pulka tjuṭa kuļu.

¹⁶ Ka aŋangu kutjupa tjuṭa pauta pulka tjuṭa purunypa uru pułkangka kaṇany-kaṇanypa para-ngarapai,

palu Godalu tjananya tjarura urungka tjarpatjunkuku.

¹⁷ Uwa, tjiṇtu nyara palula paluru kaṇany-kaṇanypa nyinapai tjuṭa uwankara tjaruringkula wiyarcingkuku,

kaya pulkara kuntasringkula manta walu-nyakuku katuringkula nyakunytywiyangku.

Tjiṇtu nyara palulaya aŋangu uwankarangku Mayatja Godanya kutju mirawanira walkulku.

¹⁸ Kaya god ngalypa-ngalypa tjuṭa wiyarcingkuku alatjitu piruku pakantja wiya.

* ^{1:31} Alatji Aitjayalu Godaku tjukurpa wangkangi aŋangu Judah-nya ngurara tjuṭangka munu tjanampa mayatja tjuṭangka kuļu.

¹⁹ Panya Mayatja Godalu pitjala manta pulkara uritjingalku,
kaya anangu tjuta ngulu wirtja-wirtjapakalku kulpi tjutakutu tjarpura
kumpintjikitja,
kaya kutjupa tjarangku manta tjawara piti tjutangka unngu kumpira
ngariku.

Panya tjana Godanya mirpantju kulira pulkara nguluringkula kumpilku,
panya Godanya witulya pulka mulapa nyinanyi.

²⁰⁻²¹ Anangu paluru tjana panya god ngalypa-ngalypa tjuta tjiilpanguru
gold-ngeru palyara walkulpai nyinangi,
palu Mayatjanya pitjanyangkaya pulkara kuntaringkula ngalypa-
ngalypa palunya tjananya waniku mingkiri tjutangka, pinytjantjara
tjutangka kulu nyinara waninnytjaku.

Munuya ngulu wirtjapakara kulpingka tjarpura kumpira ngariku,
munuya puli katu kulu tatira kumpira nyinaku.

²² Ala! Wanyuya anangu tjutaku mulamularingkunytja wiyangku wantima
nyuranya alpamilantjaku,
panya paluru tjanaya upa mulapa munuya iluku
munuya nyuranya pulu wankaru kanyilku.”

Alatji Aitjayalu tjanala wangkangu.

6

Godalu Aitjayanya Ngurkantankunytja Palumpa Wangkatjara Nyinanytjaku

¹ Mungatu panya Judah-ku mayatja ini Utjayanya ilunytjitja-arangka ngayulu Mayatja Godanya nyangu timpula unngu katu nyinanyangka mayatjaku tjiya wirungka. Ka palumpa mantara warangku timpula unngu manta uwankara tjutura kanyiningi. ² Ka palula para-ngarala arintanangi angelpa nyalpitjara tjuta. Ka paluru tjana kutjungku kutjungku kanyiningi nyalpi mankur-mankurpa, ka nyalpi kutjarangku yunpa tjutuningi, ka kutjara kutjupangku puntu munu tjina kutjara tjutuningi, kaya paluru tjana parpakaningi nyalpi kutjara kutjupatjara. ³ Munuyanku mirara ngaparku wangkangi alatji,

“Milmilpa wirunya Godanya Mayatja pulka mulapa,
panya paluru manta winki witulya pulkangku kanyini.”

⁴ Ka paluru tjana wangkanyangka timpula panya pulkara uringu munu puyu pulkaringku timpula palula unngu.

⁵ Kana ngayulu nyanganpa nyakula wangkangu alatji, “Awari! Ilukunatju, panya kuwarina nyanganyi Godanya Mayatja Pulkanya, kani nyaalku paluru ngayunya kura winki nyinanyangka nyakula? Panya ngayulu tjukurpa kura kutju wangkapai mununa anangu kura wangkapai tjutangka tjungu nyinanyi.”

⁶ Ka angelpa nyalpi tjutatjara kutjungku pitjilpaku ankula waru palula kampanyangka purku kutju mantjira ngayulakutu ngalya-parpakanu, ⁷ mununi ngayunya pampunu tjalinypa waru panya purkungka mununi wangkangu, “Mulapa nyuntu Mayatjala mirangka kura winki ngarala pulkara kuntaringanyi. Palu panya waru purkungkananta tjalinypa pampunyangka Mayatjalu nyuntunya kura tjuta palyantjitjanguru kalypangku wantiku wiyanja wiyangku. Panya kutjupangku nyuntunya ngalkinu, ka nyuntu palyalta ngaranyi.”

⁸ Kana nyara palula malangka kulinu Mayatjalu wangkanyangka alatji, “Ngananya*na* iyalku nganampa tjakulpa?”

Kaṇa wangkangu, “Nyngatjaṇa ngaranyi. Ngayunyaṇi iyala.”

⁹ Kanji wituṇu aṇangu tjutangka ankula wangkanytjaku tjukurpa nyanga alatji, “Nyura tjukurpa rawangku kulilkku, palu nyura kulira kulira puṭu nintiringkuku. Munu nyura rawangkuṇu nyakuku, palu nyura nyakula nyakula puṭu tjukarurungku ngurkantankuku.” ¹⁰ Munuṇi pirkulu wangkangu alatji, “Aṇangu nyanga palunya tjananya kurunpa wituwitu ngaranytjaku palyanma tjana uti kulintjaku-tawara, munu tjananya kuru patinma tjana tjukarurungku nyakunytjaku-tawara, munu pina patinma tjana kulintjaku-tawara. Tjinguru tjana kulirampa ngayulakutu aruringama, kaṇa tjananya palyarungunma.”

9

Godalu Israelkunu Tjutaku Mayatja Wiru Mulapa Ngula Tjunkuku

¹ Palu kulilaya! Panya manta nyara Galileela Tjipulanku pakali puliripiti munu Napataliku pakali puliripiti kuļu nyinanyi ngura tjutangka. Kaya Jew wiya tjuta kuļu ngura nyara Galileela nyinanyi palula tjanala tjungu. Kaya Jew kutjupa tjutangku ulpariranguru palunya tjananya kuranmankupai Jew wiya tjutangka tjungu nyinanyangka munuya tjanampa kuraringkupai. Palu ngula Godalu palumpa tjanampa wiru mulapa palyalku kaya kutjupa tjutangku tjananya nyakula pulkara mirawaṇiku. ² Alatjiya wangkaku, “Panya paluru tjana Godaku ngurparingkula mungawalurungka nyinangi, munuya ilunytjaku pulkara nguluringkupai. Palu Mayatja Godalu tjananya tili pulkangka irnyaṇu, kaya mungawalurungka nyinara palunya pitalytji pulka nyangu munuya pina alaringkula palunya wanganarangku kulinu.” ³ Uwa, Mayatja God, nyuntu pulka mulapa palyannyangka tjana nyakula pulkara pukulariku, panya aṇangu tjutangku mai kururingkunyangka nyakula urara pulkara pukularipai, palu purunypa, panya nyuntu palyannyangka tjana titutjara wankaru nyinaku.

⁶ Panya tjitji iti ngariku nganampa Mayatja Godalu nganaṇanya katja ungkunyangka, munu nyara paluru nganaṇanya mayatjarira tjukarurungku kanyilku. Kaya palunya inilku ini wiru tjuta ini nyanganpa, *Nintilpai Wirunya, God Witulya Pulkanya, Mama Titutjara Atunymankpainya* munu *Mayatja Pukulmara Kanyilpaina*. ⁷ Ka paluru mayatja pulkaringkunyangka palumpa walytja tjuta ma-lipiringkuku ngura winkingka munuya manta winkingka palunya wanganarangku kulilkku aṇangu tjuta mulatu, ka paluru mayatja wirungku tjananya tjukarurungku kanyilku titutjara kalypa pukulpa nyinanytjaku wi-yaringkunytja wiya. Paluru Davidaku arangka nyinaku, panya Godalu palunya nganmanytju Israelkunu tjutaku mayatja tjunu, palu purunypa paluru mayatja pulkaringkula aṇangu palumpa walytja tjuta wirura tjukarurungku kanyilku ngunti palyantja wiyangku tjana palyanyku tjukaruru kutju nyinanytjaku. Munu paluru mayatjarira tjananya titutjarangku kanyilku wiyingkunytja wiyangku. Panya Godanya witulya pulka mulapa munu nyanga palunya tjananya uwankara palyalku nganampa pulkara mukuringkula.

11

¹ Jesse-ku katja Davidanya panya Israelku mayatja pulka nganmanyupa nyinangi, ka paluru wiyingkunyangka palumpa katja ngapartji mayatja

nyinangi, ka palu puruny whole Davidaku walytjapiti wanapari wanapari mayatja tjuta nyinara wañanangi mañatja mañatja. Palu kuwariya Davidakunu tjuta mayatja nyinanyja wiaringu, panya puñu waña kañantja puruny whole. Palu ngula puñu panya waña kañantjanguru piruku pakalpai parka, ka palu puruny whole ngula Davidakunu kutjupa mañatja pakalku munu mayatja pulka nyinaku Davidanya puruny whole.² Ka Godaku kuruntu palunya ninti pulka palyalku nintingku unngu kulintjaku munu palumpa añañgu tjuta witulyangku atunymara kanyintjaku mayatja wiru mulatu. Munu paluru nintingku kulira palyalku Godanya pukulmankunytjikitjangku,³ panya paluru Godala wanganarangku pukultu alatjitu kulilkku.

Munu paluru añañgu tjuta warpungkula kuranmankunytja wiyangku wantipai. Panya nganana añañgu kutjupa nyakula warpungkula ngukalpai munula wangkanyangka kulira mapalkungku kuranmankupai unngu nyakunytja wiyangku. Palu nyara paluru unngu nyakula nintingku tjukarurungku ngurkantankuku.

⁴ Munu paluru ngaltutjara tjuta palula kuranyu kuutpangka ngaratjunkunyangka tjukarurungku ngurkantankuku, panya paluru añañgu uwankara palu purunypa tjukarurungku ngurkantankuku upa tjuta munu kuñpu tjuta kuña tjungu. Munu paluru kura palyalpai tjuta ngurkantara wangkaku pungkunytjaku kaya mulapa iluku.⁵ Panya paluru palumpa añañgu tjuta mayatjara tjukarurungku alatjitu kanyilku munu tjananya kalkuntjatjanungku palyalku alatjitu.

⁶ Ka nyara palula ara papa inura tjuta lamalama tjutangka tjungu pukulpa nyinaku tjananya patjantja wiya. Ka palu puruny whole ngaya pikati pulka tjuta nanikuta tjutangka tjunguringkula pukulpa ngariku ngura kutjungka tjanampa pikaringkunytja wiya alatjitu. Kaya puluka kuñuny whole tjutangku munu lion tjutangku kuña tjunguringkula pukultu tjungungku mai ngalkuku pikaringkunytja wiyangku. Kaya tjitji tjukutjuku tjutangku tjananya atunymara kanyilku.⁷ Ka puluka ngunytju tjutangku munu bear tjutangku kuña tjunguringkula mai ngalkuku pukultu. Ka palumpa tjanampa tjitji tjuta palu purunypa pukulpa tjunguringkula ngariku pikaringkunytja wiya. Ka lion tjutangku puluka tjuta purunytju mai ukiri ngalkuku tjanala tjungungku.⁸ Kaya tjitji tjuta liru tjutaku nguluringkunytja wiya tjanala itingka rapa alatjitu para-ngarala inkaku, ka tiana patjantja wiyangku wantiku.⁹ Panya Godaku ngura milmilta pikati nyanga paluru tiana tjamiringkula nyinaku munuya kuka kutjupa tjuta añañgu tjuta kuña patjara iluntankunytja wiyangku wantiku. Panya manta winkingkaya añañgu winki, kuka winki, kutjupa kutjupa uwankara Mayatja Godaku ninti pulka nyinaku munuya uwankarangku palunya wanganarangku kulilkku, panya uru pulka tjiwariwari ngaripai, palu puruny whole uwankara Godaku ninti nyinaku.

¹⁰ Uwa, tjintu nyara palula-arangka mayatja panya Davidakunu mañatja kuwaritja pakalku, panya puñu waña kañantjanguru parka piruku pakalpai, palu puruny whole paluru pakalku munu mayatja pulka nyinaku, kaya manta winkinguru añañgu tjuta mulapa palulakutu pitjaku paluru palumpa walytja tjuta wiru tjukarurungku kanyinnyangka nyakunytjikitja. Munuya nyakula palunya pulka walkura mirawañiku palumpa ngura kuña.

¹ Palu Mayatja Godalu wangkangu alatji, “Ngaltutjara ngura panya Jerusalemany Davidaku panya ngura! Nyara palula panya ngayuku timpula wiru ngaranyi, palu kuwari kura pulka mulapa ngura palula wirkananyi aŋangu panya palula nyinanytja tjutangka. Tjinguru nyura kuļi kutjupa kuļi kutjupa rawangku inma tjuṭa ngayuku palyanma.

² Palu ngayulu kutjupa kutjupa kura pulka mulapa utiringkunytjaku palyalku nyurampa ngurangka, ka nyura pikatjararingkula pulkara tjituru-tjitururiku munu iluku munu nyura uwankara pulkara ulara waŋiku. Panya nyura timpulakutu kuka katira pitjilpangka tjunkupai pungkula ngayunya ungkunytjikitja ka panya pungkunyangka milkali kukanguru pitjilpa kantilytja tjutipai, palu purunypa nyurampa ngurangka palyalku nyurampa milkali pulka tjutinytjaku. ³ Panya ngayulu warmala wantir'iyalku nyuralakutu tjaṭuringkula nyuranya pikaringkula pungkunytjaku. Kaya para-tjaṭutjunkuku ngura nyara palunya munuya tjarpala nyuranya pungkula pungkula wiyalku, ka nyurampa milkali pulka tjutiku munu ngura nyara palula ukalingkuku. ⁴ Uwa, nyura tjuṭa mulapa iluku munu nyura kurun-kurunpa para-ngařaku wangkanytja wiya.

⁵ “Palu nyara palulanguru nyurampa mirpantju tjuṭa wiyaringkuku, panya warmala paluru tjana kunpu ngaranytjatjanu mapalku uparingkuku munuya kupikupi purunypa ngarala wiyaringkuku. ⁶ Panya Mayatja Pulkangku uwankara kanyilpailu mapalku pitjala tjananya ngapartji wiyalku, panya paluru iyalku walpa pulka tuu winki munu mina pulka kuļu munu paluru kuļi waru pulka iyalku uwankara kampanytjaku munu paluru manta pulkara uritjingalku, kaya warmala paluru tjana uwankara wiyaringkuku, panya kupikupingku manta tjilkatjara kilinankupai, palu purunypa.”

30

Godalu Palumpa Walytja Tjuṭa Atunymankunytjikitjangku Kalkuntja

¹⁹ Ka nyura Jerusalemala nyinanytja tjuṭa piruku ulanytja wiyaringkuku, panya Mayatja Godalu ngaltunytju pulkangku nyura ulara tjaṭinnyangka kulilku, munu nyuranya wankarunkuku. ²⁰ Mayatja Godalu nyurampa wituwitu palyalku nyura tjituru-tjitururira putu kulintjaku, palu paluru nyuralanguru kumpintja wiyangku nyuranya nintilku iwara tjukarurungka ankunytjaku, ka nyura palula utingku kulilku. ²¹ Tjinguru nyura iwarangka ankula ngururpa wantikatira kitikitiringkuku, palu nyara palula ařa Mayatjanya nyurala tjunguringkuku munu nyuranya wangkaku alatji, “Nyangatja iwara! Pitjalaya waŋanma wantinytja wiyangku!”

35

¹⁻² Ka panya manta ngařmanypa kurakura ngaranytjanya Godalu piruku palyalku wiru ngaranytjaku, ka ilytjingka inuntji tjuṭa pakalku ka wiru mulapa ngaraku, panya puli ini Lipanannga pula Kaamulnga munu wimaru ini Tjarannga wiru mulapa ngarapai, palu purunypa. Kaya uwankarangku nyakula Mayatjanya kulilku, “Awari! Mayatjalu wiru mulapa palyanu.”

³⁻⁴ Ka nyura uti aŋangu kutjupa tjuṭa uparingkula nyinanyangka nyakula aṭunymanama. Tjinguruwa mara walpa-walparingkula muti tjititingkula paku pulkaringku munuya ngulu-ngulu nyinanyi putu kulira, ka nyura uti palunya tjananya wangkara kunpunma alatji wangkara,

“Nguluringkunytja wiyyaya rapa nyinama, panya Godanya kuwari pit-janyi nyuranya warmala tjutanguru wankarunkunytjikitja munu paluru tjananya ngapartji pungkuku.” Alatji tjananya wangkara kuṇpunma.⁵ Ka nyara palulanguru kurutjara tjutangku piruku nyakuku kaya pina pati tjutangku kulilku.⁶⁻⁷ Kaya nyumpu tjuta tarka kuṇpuringkula pakara para-wararakatiku pulkara pukularira. Kaya puṭu wangkapai tjuta wangkapairingkuku munuya pukultu mirara wangkaku.

Ka ilytjingka manta unnungunguru mina tjuta pakalku munu karu tjutangka uru pulka ukalingkula pilangka tjintjira pulka tjuta palyalku, panya nganmanypa pila kutju ngaringi kuli pulkangka ukiri wiya, ka anangu puṭu paltjulpai manta panya waru pulka ngaranyangka, ka papa inura tjuta kutju ngura nyara palula para-ngarapai. Palu kuwari manta nyara piltingka uru pulka rawa ukalingkula tjintjira tjutangka ngariku, ka ukiri pulka pakalku tjuna-tjuna tjuta kulu.

40

²⁷ Nyura panya ngalytjurmarā alatji wangkapai, “Godalu nganañanya mukulyangku kanyintja wiyangku wantinyi. Panya anangu kutjupa tjutangku nganañanya kurannyangka paluru kulira wantipai ngalkintja wiyangku.” Palu nyaanguru nyura tjukurpa nyanga palunya wangkapai?
²⁸ Nyura panya ninti alatji Mayatja Godaku, panya paluru nganmanypa alatji nyinangi kutjupa uwankara kuwaripangka munu panya manta winki palunu, munu paluru uwankara titutjarangku kanyini pakuringkunytja wiyangku. Ka anangu uwankara paluru kulintjitjaku ninti wiya, panya paluru ninti pulka mulapa uwankarangka waintara nyinanyi.
²⁹ Munu anangu kutjupa tjuta uparingkula pakuringkunyangka paluru alatji kuṇpulpai.³⁰ Panya tjitji tjuta rawa inkanytjatjanu pakuringkupai, palu purunypaṭu wati yangupala tjuta kulu pakuringkula punkalpai.
³¹ Palu anangu Mayatja Godaku mulamularingkunyangka kutju Godalu palunya piruku kuṇpulku, ka tjana kuṇpuringkula pakuringkuwiya para-ngaraku, panya waławuru ilkarīngka katuringkula nyalpi urinytja wiya para-ngarapai, palu purunypa. Munuya pakuringkunytja wiya wirtjapakalku, munuya titutjara para-ngaraku paku wiya alatji.

42

Wati Wīru Godalu Ngurkantankunytjanya

¹ Munu piruku Mayatja Godalu alatji wangkanyi, “Nyanga palunya ngurkantanu mununa palunya witulyanu ngayuku warka palyantjaku. Palumpaṇa pulkara pukularinyi, mununa ngayuku kurunpa palula unngu tjarpatjunkuku, ka paluru uwankara tjukarurulku anangu ngura winitjaka palya mulapa nyinanytjaku.² Munu paluru piluntju alatji nyinaku ankula iwarangka itingka ngarala mirara wangkanytja wiya.³ Munu paluru anangu ngaltutjara tjuta nguwanpa ilunyangka nyakula wantintjaka wiyangku tjananya ngalturingkula wankaṛa palyarungulku, panya waitingku waru tili kulunypa kampanyangka nyakula purkarangku puulpai tili pulkaringkunytjaku, palu purunypa. Uwa, mulapa paluru uwankara tjukarurulku anangu tjuta palya mulapa titutjara nyinanytjaku.⁴ Munu paluru ngururpa pakuringkula wantintjaka wiyangku titutjarangku warka ngayuku palyalku munu uwankara tjukarurura kutju pakuiyaringkuku. Ka anangu ngura pararitja tjuta ala-alā paṭara nyinaku paluru pitjala tjananya nintintjaku.” Alatji Mayatja Godalu wangkanyi.

43

¹ Kulilaya Israelkunu tjutangku! Panya Mayatja Godalu nyuranya paluṇu munu nyuranya tjunguṇu palumpa walytjapiti nyinanytjaku. Munu paluru nyurala alatji wangkanyi, “Nguluringkuwiyaya nyinama, panya ngayuluṇa nyuranya wankarunkuku munuṇa nyuranya ini wangkara altiku, panya nyura ngayuku alatjitu. ² Ka nyura uru ngati pulkangka itipirira ankunyangka ngayulu nyurala tjunguṭu ankuku, ka nyura karalukatinytja wiya wankaru alatjitu manta kampa kutjupangka mawirkankuku. Ka panya nyura waru pulkangka unnguwanu ankunyangka nyuranya warungku kampanyta wiya alatjitu ngaraku. Uwa, wituwitu nyurala wirkankunyangka nyura pika wiya alatjitu nyinaku. ³⁻⁴ Panya ngayulu-mantuna God Milmilpa nyurampa nyinanyi Israelkunu tjutakku, munuṇa ngayulu nyuranya Mayatja Pulkangku wankaru kanyilkku. Ngayuluṇa nyuranya wankaru kanyintja-tjiratjangku anangu ngura kutjupitja tjuṭa wantiku, panya ngayulu-mantu nyurampa pulkarra mukuringanyi munuṇa nyuranya pulkarra mirawaninyi. ^{5a} Kaya nguluringkunytja wiya nyinama, panya ngayulu nyurala tjungu titutjara nyinanyi.” Alatji Godalu nyurala wangkanyi.

52

Wati Panya Godalu Ngurkantankunytjanya Pulkara Pikatjararingkuku

¹³⁻¹⁴ Mayatja Godalu alatji wangkanyi, “Wanyuya nyawa wati panya ngayulu iyantjanya! Panya anangu tjutangku palunya nyakula puṭu nguwanpa kuliningi, panya paluru yunpa pungkunytja pungkunytja ngarangi, kaya nyakula palunya anangu yunpa puṭu alatjitu ngurkantanangi. Palu paluru ngayuku war̄ka uwankara tjukarurungku palyalku, kaya anangu tjutangku palunya mirawanira walkulkku. ¹⁵ Uwa, kuwariya ngura winkitjangku palunya nyakula pulkarra wirunmankuku, kaya mayatja pulka tjutangku palu purunypaṭu palunya nyakula puṭu kulikku, pulka mulapa ngaranyangka. Panya tjana ara nyanga palu purunypa nganmanytju nyakunytja wiya alatjitu, munuya watarku nyinanytjanungku nyakula pina alaringkula kulikku alatjitu.” Alatji Godalu wangkangu.

53

¹ Kulilaya! Ngayulu panya nyurala tjukurpa wangkanyangka nyura uwankarangku kulira mulamularingkunytja wiyangku wantingi. Munu panya nyura Godalu witulya pulkangku palyannyangka nyakunytja wiyangkuṭu wantingu. ²⁻³ Panya Godalu palunya iyanu palumpa war̄ka palyantjaku, ka paluru wirkara nyinangi munu pulkaringangi puṇu taṭana purunypa, panya manta piltingka puṇu taṭana purkarra pakalpai, palu purunypa. Munu paluru Godala wangaṇarangku kuliningi. Palu paluru mayatja pulka purunypa mantara wirutjara pitjala nyinanytja wiya, wali pulkangka kulu nyinanytja wiya, kala palunya papulanangi mayatja wiya-palku. Utila palula wangaṇarangku kulimma wantinytja wiyangku, palu nganaṇa palumpa kuraringu munula palunya kurara pungkula wiyanmanangi palumpa mukuringkunytja wiyangku. Munula palunya pikantankula tjituru-tjituru pulka palyaningi. Munula pika nyakula kunṭa wiya alatjitu ngarangi, munula palunya wantingi alatjitu.

⁴ Palu paluru pikatjararingu nganampa arangka, panya pika pala paluru nganampa ngarangi nganaṇa mantjintjaku. Palu paluru nganaṇanya

ngalkinu munu pika nyara palunya paluru mantjinu munulanya karalymara wankañu. Ka nganaña paluru pikatjararingkunyangka nyakula ngunti kulinu alatji, “Godalu tjinguru palunya pungu paluru kura palyannyangka.”⁵ Palu wiya, paluru pikatjararingu kura tjuña nganaña palyantjitjanguru. Palunyaya pungu nganampa kuranguru, kala wankaringkula palyaringu paluru nganampa arangka pikatjararingkunyangka.

⁶⁻⁷ Panya uwankarala kawankatingu kuka panya tjiipi tjuña purunypa, munula anu nganaña waltytjangku kulira Godala kulintja wiya alatjitu. Ka panya nganampa ngarangi ilunytjaku nganana kura tjuña palyantjitjanguru. Palu Godalu palunya iyanu nganañanya ngalkira wankantjaku, kaya palunya lamalama purunypa katingu iluntankunytjikitjangku ka paluru piluntu alatjitu pika pulka mantjinu ngaparpungkula tjukurpa wangkanyta wiyangku, panya watingku tjiipi inyukitjangku tjiiramilalpai ka pilunpa uriwiya ngaripai, nyara palu purunypa paluru miranytja wiya ngarangi.

⁸ Uwa, palunyaya witira anangura wangkara ngunti kuramanangi wati kura-palku munuya iluntankunytjikitjangku ma-katingu, ka kutjupa palumpa anga-wangkanyta wiya alatjitu. Ka nganalu wanyu tjukurpa palumpa tjitjtjara, pakalitjara ku lu wangkaku? Wiya alatjitu, panya paluru wati yangupala ilungu tjitji wiya alatjitu, panya paluru nganañanya anangu tjuña ngalkira ilungu Godalu nganañanya kura tjuña palyantjitjanguru kalypangku iluntankunytja wiyangku wantinytjaku.⁹ Kaya palunya ilunyangka wati mani pulkatjaraku kulpikutu katira ngaritjunu. Paluru panya kura palyantja wiya alatjitu nyinangi munu ngunti wangkanyta wiya alatjitu, palu palunyaya anangu purunypa tjunutjunu anangu kura tjuñangka tjungura.

¹⁰⁻¹¹ Palu Godalu wangkangu alatji, “Nyangatja ngayulu nganmanytu kulinu paluru lamalama purunypa pikatjararingkula anga-ilunytjaku. Panya paluru ilungu anangu tjuñaku ngalkilpa ngayulu tjananya kura palyantjtjikitjanguru iluntankunytjaku-tawara. Palu alatji pikatjararingkula ilunytjatjanu paluru piruku pukulpa mulapa nyinaku, panya paluru unytju ilunytja wiya, palu anangu tjuña ngalkira anga-ilungu tjanaka karalyarira wankaringkunytjaku munu ngayuku waltytjaringkunytjaku. Munu paluru ilunytjatjanu piruku wankaringkula pakara tjananya nyakula pulkara pukulariku.

¹² “Panya paluru mukuringangi anangu tjuñaku ngalkilpa anga-ilunytjikitja. Kaya anangu tjuñangku palunya nyakula kura-palku kulinigi munuya palunya pikatjarañu munuya iluntanu. Palu paluru kura palyantja wiyatü nyinangi, munu paluru wati kura-palku ilungu panya paluru anangu tjuñangku kura tjuña palyantjtjanganu pikatjararingkula anga-ilungu tjanampa ngalkilpa munu ngayula tjanampa kalypangku iluntankuwiyangku wantinytjaku. Kaña nyara palulanguru palunya mayatja pulka mulapa tjunanyi uwankara mayatjarira kanyintjaku, kaya palunya rawangku mirawañira walkulkku.” Alatji Mayatja Godalu wangkangu.

55

Godalu Palumpa Walytja Tjuña Pulkara Pukulmankuku

¹ Munu piruku Mayatja Godalu alatji wangkangu Israelkunu tjuñangka, “Nyura tjinguru kapi-tjiratja iluringkulampa ngayulakutu pitjama, munuya kapi ngayulu ungkunytjtja tjikila. Munu nyura tjinguru

mani wiya nyinarampa pitjala ngayula mantjila kutjupa kutjupa tjuṭa ngayulu kanyintja, mai, tjuratja, munu ipi kuļu. Munu nyura maningka payamilantja wiyangku waltyjangku alatjiṭu mantjilku ngayulanguru.² Nyaaku nyura kurakura tjuṭa payamilanji nyurampa maningka mai wiru ngayulanguru mantjintja wiyangku? Ngayunyaŋiya kulila munu nyura tjukurpa wiru mulapa mantjilku ngayulu nyurala wangkanytjija, munu nyura palulanguru paltjaringkuku alatjiṭu. Panya ngayuku tjukurpa kuka purunyapa wiru mulapa ngaranyi, ka nyura tjukurpa ngayuku kulira mulamularingkula nyura kunpu pulkaringkuku.³ Ngayulu altinyangka kuliraya ngayulakutu pitja, munuya ngayulu wangkanyangka purkarangku kulinma. Nyara palulanguru nyura purkarangku kulira mulamularingkunytjatanu wanka mulapa nyinaku.

“Panya ngayulu nyuranya kalkuṇi mukulyangku kanyintjikitjangku, panya ngayulu Davidanya ngañmanytju kalkuṇu palumpa rawa mukuringkunytjikitjangku, palu purunyapa ngayulu nyuranya kalkuṇi, ka kalkuntja nyanga paluru titutjara ngaraku wiyaringkunytja wiya alatjiṭu.⁴ Panya ngayulu Davidanya tjunu nyurampa mayatja pulka nyinanytjaku Israelkunu tjuṭaku, ka paluru nyuranya mayatjarira wiru kanyiningi, kaya ngura kutjupitja tjuṭangku palunya nyakula palulanguru ngayunya mirawaŋingi.⁵ Ka nyura kuļu Davidalu purunytju anangu malikitja tjuṭa altiku ngura panya kutjupitja tjuṭa, kaya mapalku nyuralakutu pitjaku nyuranya nyakunytjikitja. Alatji ngayulu nyurampa palyalku, panya ngayulu nyurampa God Mayatja Pulkanya nyinanyi. Ngayulu Israelkunu tjuṭaku God milmilpa mulapa, munuña ngayulu nyuranya palyanmankuku kutjupa tjuṭangku nyuranya nyakula mirawaŋinýtjaku.” Alatji Godalu nyuranya wangkanyi.

⁶ Ala! Kuwari nyangaya malaku aruriwa Mayatjalakutu paluru ila ngaranyangka munuya kura tjuṭa palyantjatanu palula mirangka kuṇtaringama.⁷ Uti nyura kura palyalpai tjuṭangku kura wantima munuya kura tjuṭa kulilwiyangku wantira malaku aruringama Mayatjalakutu, panya paluru mukulya pulka munu nyurampa ngalturingkuku. Utiya palulakutu kuṇta-kuṇta pitjama, ka paluru nyurampa pukularira nyuranya kalypangku pungkuwiyangku wantiku munu nyuranya wiru kanyilkku.

⁸ Munu Mayatja Godalu piruku wangkanyi nyurala nyanga alatji, “Ngayulu kulintjtja nyura kulintjtja purunyapa wiya. Munu nyurampa aṛa tjuṭa ngayuku purunyapa wiya.⁹ Ngura nyanga ilkaritjaya kulila, panya ngura nyanga paluru wiru mulapa ngaranyi ngura pala mantatjangka muṇkara alatjiṭu, ka palu purunyapa ngayulu palyantjtja tjuṭa wiru mulapa ngaranyi nyura palyantja tjuṭangka munkaratu.¹⁰ Ka panya tjukurpa ngayulu wangkanytja mina purunyapa, panya minangku ilkariguru puyilpai munu puyira ukiri mai mantangka pakaltjingalpai anangu tjuṭangku uraṛa ngalkula paltjaringkunytjaku,¹¹ palu purunyapa ngayulu wangkanytja ngaranyi, panya ngayulu tjukurpa wangkanyangka kutjupa kutjupa tjuṭa utiringkupai alatjiṭu ngayulu panya wangkanytjtja tjuṭa kutju. Panya ngayulu kutjupa kutjupa palyantjikitja mukuringkula ngayulu wangkapai, ka mulapatu wangkanyangka utiringkupai.

¹² “Kulilaya waltyja wiru tjuṭa! Nyura kuwari ngura nyara Papilannga pukultu wantikatira ankuku malaku ngura waltyjakutu. Ka panya Papilannga ngurara tjuṭangku nyuranya pukultu wantir'iyalku pikaringkula anga-ngaranytja wiyangku. Kaya puli tjuṭangku nyuranya ankunyangka

nyakula pukultu inma inkaku, munuya palu purunypa puṇu tjuṭangku kuļu nyurampa pukularira maṛa pungku-pungkuku.¹³ Ka manta pa-nya tjilka tjuṭa ngaṇmanypa pakantjitijangka puṇu wara tjuṭa pakalku pulkuṇpa tjuṭa. Kaya aŋangu tjuṭangku puṇu palunya tjananya nyakula ngayunya kulira mirawaṇiku munuya ruuru kulira wangkaku, ‘Puṇu nyanga palunya tjananya nyakula nganana Godanya kulini panya paluru iriti nganampa walytjapiti Papilantanguru małakungku katingu ngura nyanga walytjakutu Israeltakutu.’ ” Alatji Mayatja Godalu wangkangi.

Wati Wangkatjarangku Itjikiltu Walkatjunkunytja Ezekiel **Nyangatja Ngañmanytju Nyakula Wangkanytjaku**

Nyangatja Godaku tjukurpa wati panya wangkatjara ini Itjikiltu walkatjunkunytja. Panya paluru Godalu wangkanytja Israelkunu tjutangka tjakultjunangi paluru tjana ngura kutjupangka parari nyinanyangka ngura panya ini Papilaniyala. Panya wati nyara palunya ngurara tjutaya ngañmanypa warmala pitjangu munuya Israelkunu tjuta pungkula wiyanu munuya tjara kutjupa witira malakungku katingu tjanampa ngurakutu, kaya nyara palula nyinara pulkara tjiturutjitururingu kulira, "Yaalarala malaku ankuku ngura walytjakutu? Tjinguçula ngura nyanga malikitjangka rawa nyinara iluku." Ka nyara palulanguru Godalu Itjikilnga palumpa wangkatjara tjunu palumpa tjukurpa tjanala tjakultjunkunytjaku.

Palu Itjikiltu tjukurpa wařa mulapa walkatjunu, kala nyiri nyangangka tjukurpa mankurpa kutju walkatjunu. Panya chapter 34-nga tjukurpa ngaranyi Mayatja Godalu Israelkunu tjutangka wangkanytja. Panya paluru tjanampa pulkara mukuringkupai munu tjananya wirura atunymara kanyilpai, panya wati tjiipi atunymankupaingku tjiipi tjuta wirura kanyilpai, palu purunytju. Palu panya Israelkunu tjutaku wati atunymankupai tjutangku tjananya mulamulangku atunymankunytja wiyangku wantingi, ka Godalu tjanampa mirpañarira tjananya paira wangkangi aňangu tjuta tjukarurungku atunymara kanyintjaku.

Ka chapter 37-nta tjukurpa ngaranyi Godalu Itjikilta nintintja. Panya paluru nintinu tarka tjuta wankaringkula pakantja, ka nyara palulanguru Itjikilnga nintiringu panya ngula Godalu Israelkunu tjuta wankalku munu wati paluru tjanala tjakultjunu Israelkunu tjutangka tjana kulira pukularinytjaku.

Tjukurpa nyanganpa ngarinyi:

33:30-33 Godalu Tjukurku Ngunti Pukularipai Tjuťa Paintja
34:1-31 Godalu Wati Atunymankupai Tjuťa Puntura Wangkanytja
37:1-14 Godalu Aňangu Tjuťa Wankantjikitjangku Kalkuntja

33

Godalu Tjukurku Ngunti Pukularipai Tjuťa Paintja

³⁰ Ka Godalu alatji wangkangu wati ini Itjikilta, "Wati awa! Nyawa! Nyuntumpa walytja nyara tjutangku nyuntunya wangkanyi. Tjanaya kaputu kutjupa kaputu kutjupangku nyinara nyuntunya wangkapai alatji, 'Wanyula Itjikilta ankula kulinma! Tjinguru paluru tjukurpa kutjupa kulinu Mayatja Godalu palula wangkanyangka munu kuwari kulintjatjanungku tjakultjunanyi.' Alatjiya nyuntunya wangkapai.

³¹ "Munuya palulanguru paluru tjana pitjala nyinakatira kulilpai nyuntu tjukurpa wangkanyangka tjanala. Palu paluru tjana kulintjatjanungku nyuntu wangkanytjitja tjuta palyantja wiyangku wantipai alatji. Munuya alatji kutju wangkapai, 'Awa! Tjukurpa wirunya palangku wangkangu kuwari ngananala! Wiru mulapa!' Palu nyanga

palu purunypa wangkanyangka nyuntu kulira mulamularingkuwiyangku wantima, panya tjana unytjungku kutju wangkanyi, munuya tjukurpa panya palumpa mapalku watarkuripai kuruntu mantjintja wiya. Panya paluru tjana mukuringkunytja tjuتا kutju palyalpai nyuntu panya wangkanytja wantira. Munuya paluru tjana utitja tjuتا kutju rawangku kulilpai, panya mani, mai, munu kutjupa kutjupa wiru tjuتا manyungku mantjintjikitjangku. ³² Uwa, nyuntu tjananya wangkara wituwitun-nyangkaya kulira wantipai alatji. Utiya ngayuku tjukurpa nyuntu tjanala wangkanyangka kulira tjukarurungku palyanma. Palu tjana kulilpai kutju wanganarangku kulira palyantja wiyangku. Panya anangu tjuتا inma wiru kulintjikitja tjunguringkupai munu kulira pukularipai, palu purunypaya paluru tjana pitjala nyuntu wangkanyangka kulira unytju pukularipai, munuya małangka tjukurpa mapalku watarkuripai wanganarangku kulira palyantja wiyangku.” Alatji Godalu wangkangi Itjikilta.

Munu piruku wangkangu alatji, ³³ “Palu małangka ngula kutjupa kutjupa kura pulka ngayulu wangkanytja palula tjanala wirkankuku, kaya nyara palula arangka tjana mala kutju nyuntunya kulilku, ‘Munta-uwa! Wati panyatja mulapa panya Godaku wangkatjara nyinangi, munu panya ngananala tjukarurungku tjakultjunangi Godalu wangkanytjitja uwankara.’ Alatjiya kulilku.”

34

Godalu Wati Atunymankupai Tjuتا Puntura Wangkanytja

¹⁻² Ka Mayatja Godalu ngayula wangkangu Israelkunu tjuتا mayatja tjuتا wangkara paintjaku munu palumpa wangka tjanala tjakultjunkunyt-jaku nyanga alatji, “Ngayuluna Mayatja Godanya nyurampa pulكارا mir-paňarinyi. Panya anangu nyanga Israelkunu tjuتا tjiipi munu nanikuta tjuتا purunypa nyinanyi, ka nyura mayatja tjuتا angku tjananya tjapata purunytu atunymara kanyintjaku ngaranyi. Palu nyura panya tjananya mulapa wirura palyanyku kanyintja wiya, munu panya nyuranku kutju walytjangku alatji pukulmankupai. ³ Uti nyura tjapata mulatumpa tjiipi munu nanikuta nyanga tjuتا atunymanama. Palu nyura kurangku nanikutangru ipi tjikilpai munu nyura tjiipi inyunguru mantara walytja kutju palyara tjarpapai, munu nyura kuka tjiipi wiru mulapa ngurkantara pungkula ngalkupai. Palu nyura tjananya paltjantja wiyangku wantipai, munu nyura kutju walytja paltjaringkupai nyura kutju pukulpa nyinanytjikitja. ⁴ Munu nyura kutjupa tjuتا uparingkunyangka nyakula palunya tjananya kunپura kanyilpai wiya, munu kutjupa tjuتا pikatjarar-ingkunyangka nyakula nyura palyanyku kanyilpai wiya. Munu nyura kutjupa tjuتا puňungku wakannyangka nyakula paňtitjingka karpintja wiyangku wantipai, munu nyura kutjupa tjuتا pakuringkula wawan-yarinyangka nyakula ankula palunya tjananya pakaltjingara katinytja wiyangku wantipai, munu nyura kawankatinytja tjuta kuļu para-ngurira mantjira katira tjunguntja wiyangku kuļu wantir'iyalpai tjana kawalirinyt-jaku. Mulapa nyura palunya tjananya pauntjingara kanyilpai mukulya wiyangku. ⁵ Kaya paluru tjana ankula wiyaringu, ka tjananya tjiutja inurأ tjuتا angku patjanı, panya tjananya tjapata tjuتا angku atunymankunytja wiyangku wantinyangka. ⁶ Ka panya ngayuku tjiipi tjuتا ankula wiyaringkula kawankatingu apukutu munu putikutu kuļu ngura kutjupa

uwankarakutu, ka aŋangu kutjupangku palunya tjananya waŋara ngurira mantjira ngalya-katintyja wiya alatjitu. Ngaltutjara!

⁷ “Palu wanyuya ngalya-kulinma wati tjapata tjutangku! Ngayuluŋa Mayatja Godalu nyurala wangkanyi. ⁸ Ngayulu panya Godanya titutjara nyinapainya munuŋa ngayulu nyurala wangkanyi, kaŋiya kulinma! Panya ngayuku tjiipi tjuṭa inurangku patjara ngalkula wiyanu nyura tjananya atunymankunytja wiyangku wantinyangka. Palu tjana kawankatinyangka uti nyura palunya tjananya waŋara ngurira mantjinma, palu nyura wantinyi alatjitu ngayuku tjiipi tjuṭa atunymara kanyintja wiyangku. Munu nyuranku kutju walytjangku kulilpai, nyara tjiipi tjuṭa kulintja wiyangku. ⁹⁻¹⁰ Wanyuya tjapata tjutangku ngayunya pulkara kulinma! Panya ngayulu Mayatja Godanya nyurampa pulkara mirpanarinyi, mununa kuwari ngayuku tjiipi tjuṭa mantjilku nyuralanguru, munuŋa piruku malakungku nyuranya ungkunytja wiyangku wantiku nyura piruku tjananya kurantjaku-tawara. Panya nyura ngañmanytju palunya tjananya wirura atunymankuwiyangku wantira tjananya pungkula ngalkuningi. Palula-tawarana tjananya nyuralanguru mantjilku.

¹¹ “Uwa, ngayulu Mayatja Godalu nyurala mulamulangku wangkanyi, panya ngayuluŋatju tjiipi tjuṭa ngurira mantjira kanyilku. ¹² Panya tjapata palyangku tjiipi ankula wiyaringkunyangka waŋara ngurira mantjilpai wirura kanyintjikitjangku. Palu purunypa ngayuku aŋangu kawankatinyta tjuṭa ngurira mantjilku munuŋa malakungku ngalya-katira kanyilku. Panya mungaŋ kura pulka ngaranyangka paluru tjana ankula wiyaringu. Palu kuwari ngayulu tjapata palyangku tjananya ngurira mantjira ngayuluŋatju atunymara kanyilku. ¹⁵ Ngayuluŋa tjapata tjanampa ngaraku tjananya wirura atunymankunytjikitja, munuŋatju ngayulu tjanampa ngura wiru mulapa palyalku tjana pakuwiyaringkula pukulpa palyanyku nyinanytjaku.

¹⁶ “Nyangatjaŋa mulamulangku palyalku ngayulu Mayatja Godalu. Ngayuluŋatju kawankatinyta panya tjuṭa waŋara ngurira mantjira katira tjungulku, munuŋatju punkara katakatinyangka nyakula tjananya pantitjingka karpilku, munuŋa uparingkunyangka nyakula tjananya ngaltunytjungku kūnpulku. Palu panya kaŋpi pulka tjuṭa munu kūnpu tjuṭa kulu ngayulu wiyaliku, panya ngayuluŋatju tjapata wiru tjiipi tjuṭa tjukarurungku atunymara kanyilpai.

¹⁷ “Palu kuvariŋatju ngayuku tjiipi tjuṭa nyanganyi munuŋa ngayulu nyakula ngurkantananyi kutjupatjara palya, kutjupatjara kura. ¹⁸⁻¹⁹ Panya tjiipi kaŋpi pulka tjuṭangku uti tjiipi kutjupa tjuṭa atunymara kanyinma, palu tjana ukiri pulka nyakula tjana-warara pitjala ngalkupai munuya pałtjaringkunytjatjanungku ukiri kutjupa tjana wantinytja pirpuntara wantikatipai, kaya mała tjiipi kutjupa tjuṭangku pitjala nyakupai, ‘Munta! Nyangatja kaŋpi tjuṭangku ngañmanytju pitjala ngalkula pirpuntara wiyanu.’ Ka palu purunypa tjiipi panya kaŋpi pulka tjuṭa mina kaltara wirungka tjana-warara wirkankupai munuya tjkira tjalapungkula mina panya tjunpinpi palyalpai. Kaya małatja panya tjuṭangku tjkintjik-itjangku pitjala nyakupai mina tjunpinpi ngarinyangka kaltara wiya. Ngaltutjara! Panya paluru tjana malatjangku ukiri kurakura ngalkupai munuya mina kurakura tjkilpai tjunpinpi ngañmanyitja tjuṭangku kurara wantikatintyja.

²⁰ “Pala palulanguruŋa nyuranya kuwari wangkanyi, panya nyura kaŋpi pulka nyinanyi mai palya ngalkuntjatjanu munu mina palya

tjikintjatjanu. ²¹ Kaya panya tjana kuwari ngaltutjara upa nyinanyi panya nyura mai palya mina palyanguru maun̄tankunytja tjuta. ²²⁻²³ Kan̄a nyuranya kuwari ngayulu ngurkantananyi munun̄atju kuwari upa tjuta wankarunanyi nyura piruku kurantjaku-tawara. Ngayuluñatju kuwari ngurkantara tjaran̄i palya tjuta munu kura tjuta kuļu, mununa palu-languru tjapata palya tjunanyi nyuranya uwankara wirura kanyintjaku. Tjapata nyara paluru panya Davidalanguru palumpa walytja małatja, munu paluru Davidalu purunytju nyuranya wirura atunymankuku. ²⁴ Nyara paluru nyuranya kuranyurira kanyilku, kan̄a ngayulu nyurampa God nyinaku. Uwa, ngayuluna Mayatja Godalu nyurala wangkangu nyura ngayula kulintjaku.

²⁵ “Kuwarina ngayuku tjiipi tjuta kalkuni tjananya titutjarangku pukulpa wankaru kanyintjikitjangku. Mununa tjiutja inura tjuta tjanampa nguranguru wiyan̄i tjiipi paluru tjana ukiri wankarungku ngarala ngalkuntjaku munu puňu wiltjangka ngulu wiya ngarinnytjaku. ³⁰ Kan̄iya paluru tjana ngayunya mulapa kulilkul alatji, panya ngayulu tjanampa Godanya Mayatja pulka mulapa tjanala tjungutu nyinanyi. Kaya paluru tjana kulilkul alatji, ‘Mulapala nganana Godaku walytja tjuta nyinanyi an̄angu Israelkunu tjuta.’ ³¹ Nyura mulapa ngayuku tjiipi tjuta nyinanyi, ngayuku walytjapiti, kan̄a ngayulu God nyurampa nyinanyi.” Nyanga alatji Godalu Mayatja Pul̄kangku wangkangu.

37

Godalu An̄angu Tjuta Wankantjikitjangku Kalkuntja

¹ Kan̄i Mayatja Godalu panya witulya pul̄kangku ngayunya pampunu, ka palumpa kuruntu ngayunya katingu ngura kutjupakutu wimaru pulkakutu mununi nyara palula tjunu. Ka wimaru nyara palula tarka tjuta mulapa ngarira wan̄ingi. ² Kan̄i paluru para-katirinangi tarka tjutangka katuwanungku ngayulu uwankara nyakunytjaku. Kan̄a nyangu tarka panya winki mulapa ngarira wañinyangka. Ka tarka paluru tjana uwankara pilti alatjitu ngaringi.

³ Ka Mayatjalu ngayula wangkangu, “Wati awa! Kulilańi kańanta tjapila! Tarka nyanganpa wanyu mulapa wankaringkula nyinaku kuwari?”

Kan̄a wangkangu, “Nyuntu Mayatjanya panya pulka mulapa! Nyuntu kutjungku nintingku kulini. Ngayulu ngurpa.”

⁴ Kan̄i palulanguru wangkangu tarka palula tjanala wangkanytjaku alatji, “Tarka pilti tjuta! Mayatja Godaku tjukurpaya kulinma! ⁵ Panya paluru Mayatja pul̄kangku nyurala wangkanyi alatji, ‘Ngayulu nyuranya ngaalypa ungkuku nyura wankaringkunytjaku. ⁶ Mununa piruku nyurala pulyku iltjanpa kuļu tjungulku. Mununa palulanguru nyuranya miřingka tjutulku. Ka nyura ngaalypatjararingkula piruku wankaringkuku. Munu nyura palulanguru ngayunya kulilkul panya mulapa ngayulu Mayatja Godanya nyinanyi.’” Alatji Godalu ngayula wangkangu palumpa tjukurpa tarka tjutangka tjakultjunkunytjaku.

⁷ Kan̄a wangańarangku kulira tjanala tjakultjunu panya Mayatjalu ngayula wangkanytja. Mununa wangkara wangkara kulinu tirkily-mankunyangka. Mununa para-nyakula nyangu tarka paluru tjana tjungutjunguringkunyangka. Panya tjana ngañmanypa ilura tarka-kutjuringu munuya iltjanpa wiyaringkula mantangka ngarira wan̄ingi. Ka ngayulu tjanala Godaku tjukurpa wangkanyangka tarka panya paluru tjana malaku tjunguringu puntu walytjangka walytjangka. ⁸ Ka pulyku tjuta tarkangka

uwankara tjunguringu iltjanpa kulu, ka palulanguru miringku kulu tjananya tjutunu, palu tjana kuwaripatu ngaringi ngaalypa wiya.

⁹ Ka palulanguru Mayatjalu ngayula piruku wangkangu palumpa tjukurpa walpangka wangkanytjaku nyanga alatji, “Mayatja Pulkangku Godalu wangkanyi alatji, ‘Walpa ngana! Wala pitja kampa uwankaranguru, wiluraranguru kakararanguru ulpariranguru munu alinytjaranguru kulu. Munu ngalya-pitjala ilunytja nyanga tjutangka ngaalypa puura tjarpatjura tjana wankaringkunytjaku.’” Alatji Godalu ngayula wangkangu walpangka wangkanytjaku.

¹⁰ Kana mulapatu wangkangu Godalu panya wangkanytja. Ka walpa wirkara ilunytja panya tjutangka ngaalypa puura tjarpatjunu, kaya piruku wankaringu. Munuya paluru tjana uwankara pakara ngarangi mungiliy alatjitu.

¹¹ Ka Mayatja Godalu ngayunya wangkangu, “Nyuntu tarka nyanga palunya tjananya nyanganyi paluru tjana panya anangu Israelkunu tjuta. Panya paluru tjana wangkapai, ‘Nganaña pulkara tjituru-tjitururira putu kulini, ‘Yaaltjirikula?’’ Nganaña tarka pilti tjuta purunypa nyinanyi munula putu kulini wankaringkunytjikitjangku.’ Alatji tjana wangkapai.”

¹² Munu palulanguru Godalu ngayunya piruku wangkangu palula tjanala tjakultjunkunytjaku palumpa tjukurpa nyanga alatji,

“Walytja tjuta! Ngayulu Godalu Mayatja pulkangku kuvari kurulpa tjuta nyurampa alani mununa nyuranya pakaltjingara malakungku katiku ngura walytjakutu Israeltakutu. ¹³ Ka nyura ngayuku walytja tjuta kurulnguru pakantjatjanungku kulikku, ‘Munta mulapa paluru Mayatja pulka nyinanyi nganampa Godanya.’ ¹⁴ Kana ngayuku kurunpa nyurala unngu tjarpatjunkuku, ka nyura piruku ngaalytjararingkula wankaringkula nyinaku. Kana nyuranya malakungku katira tjunkuku ngura walytjangka manta panya Israelta. Ka nyura nyara palulanguru kulikku, ‘Mulapa Mayatja Godalu ngananala kalkuntjatjanungku palyanu munulanya paluru wankarunu.’ Alatji nyura ngayuku nintiringkula kulikku.”

Nyanga alatji Godalu ngayunya wangkangu palula tjanala wangkanytjaku Israelkunu tjutangka.

Wati Wangkatjarangku Danieltu Tjukurpa

Walkatjunkunytja

Daniel

Nyangatja Ngañmanytju Nyakula

Wangkanytjaku

Nyangatja Godaku tjukurpa wati ini Danielnga-tjara. Paluṟu wati Jew palu Israelta wiyangka manta kutjupangka nyinangi ngura ini Papilanta, panya iritiya ngura nyara palunya ngurara tjuṭa warmala pitjangu manta Israeltakutu munuya Jew tjuṭa mulapa pungkula iluntanu, munuya tjara kutjupa Danielnga tjananya kuļu witira małakungku katingu kakarara tjanampa ngurakutu parari mulapa.

Nyara palula arangka wati ini Nipaka-nitjanya ngura Papilanku mayatja pulka nyinangi. Munu paluřu Jew panya tjuṭa Papilantakutu katira kutjupatjara ngurkantanu palumpa ngurangka war̄karintjaku, Danielnga munu palumpa malpa mañkurpa kuļu.

Ka tjukurpa nyanga palulangurula kulini mulapa Godalu palumpa walytja tjuṭa aṭunymara kanyilpai.

Tjukurpa nyanganpa ngarinyi:

- 1:1-21 Danielnga munu palumpa malpa mañkurpa
- 2:1-49 Mayatja Nipaka-nitjalu tjukurmankunytja
- 3:1-30 Godalu Danielku malpa mañkurpa war̄ungka wankarunkunytja
- 4:1-37 Mayatja Nipaka-nitjalu piruku tjukurmankunytja
- 5:1-31 Godalu Danielta nintintja wall-ta walkatjunkunytja Mayatja Pilyt-jatjala utira wangkanytjaku
- 6:1-28 Godalu Danielnga wankarunkunytja lionpa tjuṭangka-tawara
- 7:1—12:13 Godalu Danielnga tjukurpa tjuṭa nintintja:
 - 7:1-28 Mamu kutjara kutjara
 - 8:1—9:27 Tjiipi rama munu nanikuta
 - 10:1—11:45 Āngeltu Danielta wangkara utintja
 - 12:1-13 Tjiṇtu malatja

Danielnga munu Palumpa Malpa Tjuṭa

1-2 Ngura Jerusalemala aŋangu Jew tjuṭa nyinangi, ka palumpa tjanampa mayatja pulka ngarangi wati ini Tjawakimanya. Ka ngula kuļi kutjara ngarala wiyingkunyangka wati kutjupa malikitja kakararanguru tjaultji tjuṭatjara pitjangu ngura ini Papilantanguru. Wati paluřu ini Nipaka-nitjanya ngura Papilanku mayatja pulka munuya warmala pitjala manta Judah-la wirkana munuya tawunu panya Jerusalemala para-tjatutjura wanara aŋangu Jew tjuṭa angatjunu alatjiṭu. Ka Godalu Jew tjuṭa alpamilantja wiyangku wantingu*, ka palulanguru Nipakanitjalu tjana Jerusalemala tjarpura Tjawakimanya tjananya Jew uwankara witiṇu munuya kutjupatjara ngurkantara katingu Papilantakutu. Ka Nipaka-nitjalu tjaultji tjuṭangka wangkangu Godaku timpulangka tjarpura wiru tjuṭa mantjintjaku panya piti, walpayata, pulita, kutjupa kutjupa

* **1:1-2** Jew tjuṭa panya Mayatja Godaku watarkuringu munuya god kutjupa tjuṭa walkuningi, god ngalypa-ngalypa tjuṭa. Ka Godalu wangkatjara tjuṭa iyaningi tjananya ngulutjunkunytjaku, kaya kuļira wantingi ka pala palulanguru Godalu tjananya alpamilantja wiyangku wantingi alatjiṭu.

milimilmarā wantintyta tjuṭa. Kaya mantjira katingu Papilantakutu, munuya ngura nyara palula wirkara palumpa tjanampa timpulangka tjunu panya paluru tjana god tjanampa walikulpaingka.

³⁻⁴ Ka Nipaka-nitjaku walingka wati ini Atjapa-natjalu anangu warkaripai tjuṭa kanyilpai Papilannga ngurara tjuṭa. Ka wati nyanga palula Nipaka-nitjalu wangkangu alatji, "Kulila! Kuwariṇa Jew tjuṭa Judah-languru ngalya-katingu, ka nyuntu palula tjanalanguru wati yangupala tjuṭa ngurkantara tjanampa mayatjaku walytjapitinguru. Palu ngurkantara wati yunpa wiru tjuṭa, kunpu pulka munu wirura kulilpai, nintipuka tjuṭa, pikatjara wiya. Munu tjananya nganampa wangka nintinma, kaya nganampa wangkanguru nyiri tjuṭa riitamilara nganampa tjukurpa tjuṭaku nintiringama. ⁵ Munu palunya tjananya mai, kuka munu waina kuļu ungama, panya ngayulu ngalkula tjikilpai purunypa. Munu tjananya yiya mañkurpa rawangku alatji nintilkatima, kaya palulangurulta yiya mañkurpa wiyingkunyangka tjananya ngayulakutu ngalya-kati, kaṇa nyakula kutjupatjara ngurkantara tjunkuku ngayuku warkarinytjaku." Alatji wati panya mayatja Nipaka-nitjalu palula wangkangu.

⁶ Ka mulapaṭu wati panya Atjapa-natjalu kulira ankula wati yangupala Jew tjuṭa para-nyakula ngurkantara tjananya mantjinu. Munu wati Judah-kunu małatja mañkurpa kuļu paluru mantjinu ini nyanganpa Danielnga, Ananayanya, Mitjayilnga munu Atjarayanya. (Panya ini nyanga paluru tjana Jew tjuṭaku ini.) ⁷ Ka paluru tjananya ini kutjupa kuwaritjalta wangkara tjunu ngura panya Papilanku wangkangku. Munu paluru Danielnga ini kutjupa tjunu Piltatjanya, munu Ananayanya Tjatarakanya tjunu, munu Mitjayilnga tjunu Mitjakanya, munu Atjarayanya tjunu Pinikaunya.

⁸ Ka Atjapa-natjalu kuka, mai, waina kuļu tjananya ungkunyangka Danieltu tjana wantingi alatji panya Godalu ngañmanytju Israelkunu tjuṭa painingi mai kuka nyanga purunypa ngalkuntja wiyangku wantintyjaku*, palulanguru Danieltu tjana mai kuka waina kuļu wantingi. Munu Danieltu wati panya palula alatji wangkangu, "Wati wiru! Tjingurula Mayatja Nipaka-nitjaku mai munu kuka kuļu ngalkuntja wiyangku wantima, palya? Munula mai nganampa kutju ngalkunma?"

⁹ Ka Godalu Atjapa-natjanya kurunpa pukułmanu wati panya Danielku ngalturingkunytjaku. ¹⁰ Ka wati paluru Danielta alatji wangkangu, "Palu panya mayatja Nipaka-nitjalu ni wangkangu nyura kunyu wantintyta wiyangku mai kuka nyanganpa kutju ngalkunma munu waina kuļu tjikinma. Tjinguruna nyuranya ngayulu palyanmanama nyura mai kuka ngalkuntja wiyangku wantintyjaku, palu ngayulu Nipaka-nitjanya waintara kulini mununa palumpa nguluringanyi. Tjinguru nyura mai kuka ngalkuntja wiyangku wantirampa nyura uparingkuku, ka yangupala panya kutjupa tjuṭa kutju kunpuringkuku, ka Nipaka-nitjalu nyuranya nyakuku mununi ngayunya iluntankuku. Nyangatjana paluru wangkanytjitja nyurala wangkanyi. Kaya mai munu kuka nyanganpa ngalkunma wantintyta wiyangku. Palya?" Alatji Atjapa-natjalu Danielta wangkangu.

¹¹⁻¹³ Munu wati tjaultji kutjupa tjunu Danielnga tjananya ngarala atunymankunytjaku. Ka Danieltu tjaultji panya palula wangkangu nyanga alatji, "Wati wiru, wanyulanyan mai ukiri kutju ungama ngalkuntjaku munu kapi kutju waina wantira. Palya? Munulanya rawangku

* ^{1:8} Papilannga ngurara tjuṭangku mai kuka Godalu paintitja ngalkupai alatji.

ungama tjintu kutjupa tjintu kutjupa, ka tjintu 10 ngarala wiyingkunyangkalta nyuntu nganañanya nyawa, tjingurula uparingu, munta tjingurula kūnpuringu. Munu nganañala itingka wati yangupala panya kutjupa tjuṭa kuļu nyawa panya Nipaka-nitjaku mai kuka ngalkuntja tjuta. Munun palulangurulta nyakunytjatjanungku ngurkantara wangkama mai nganaku nganaña rawangku ngalkuku. Palya?"

¹⁴ Ka wati panya paluru palya kulinu tjananya mai kutju ungkunytjikitjangku kuka wiyangku munu kapi kutju tjikintjaku. Munu paluru tjananya ungangi tjintu kutjupa tjintu kutjupa tjintu 10-kutu.

¹⁵ Kaya yangupala panya tjara kutjupangku Nipaka-nitjaku mai kuka pulka ngalkuningi. Ka tjintu panya 10 ngarala wiyingkunyangka wati panya Danielnga tjanapa pukulpa alatjitu nyinangi kūnpu pika wiya, panya palula tjanala waintara.

¹⁶ Panya Danieltu tjanaya tiṭutjarangku mai kutju ngalkuningi munuya kapi kutju rawangku tjikiningi wati panya tjaultjingku ungkunyangka. Paluru tjanaya Nipaka-nitjaku mai munu kuka ngalkuntja wiyangku wantingi alatjiṭu.

¹⁷ Ka Mayatja Godalu Danielnga tjananya palumpa malpa mañkurpa kuļu nintipuka mulapa palyaňu nyiri uwankara riitamilařa nintingku kulintjaku munu tjukurpa kutjupa kutjupa uwankaraku kuļu kuliřa nintiringkunytjaku. Munu Godalu Danielnga nintinu aňangungku tjukurmankula puťu kulinnyangka tjukarurungku utira tjakultjunkunytjaku. Munu piřuku nintinu aňangu kutjupangku kuru wankangku kutjupa kutjupa nyakula puťu kulinnyangka palu purunypaťu utira tjakultjunkunytjaku.

¹⁸ Ka ngulalta yiya mañkurpa ngarala wiyingkunyangka mayatja panya Atjapa-natjalu wati panya yangupala uwankaralta katingu mayatja pulkakutu wati panya Nipaka-nitjalakutu. ¹⁹ Ka paluru palula tjanala uwankarangka wangkara kulinngi kutjungka kutjungka munu Danielta tjanala palumpa malpa mañkurta kuļu wangkangi. Munu paluru kulinngi, "Ai! Mulapa wati nyanga mañkurpa Danielnga tjanapa palya mulapa, nintipuka alatjiṭu, wati nyanga kutjupa uwankarangka waintara nguwanpa." Munu paluru Danielnga tjananya palumpa malpa mañkurpa ngurkantara tjunu palumpa warkarinytjaku. ²⁰ Munu kutjupa-ara Nipaka-nitjalu puťu kuliřa tjanala altira tjapilpai, kaya palula kulisai munuya palula nintingku wangkara utilpai. Ka palulanguru paluru kulinngi alatji, "Ai! Danielnga nyanga tjanapa nintipuka alatjiṭu, wati nyanga ngangkarai nintipuka uwankarangka waintara."

²¹ Ka Danielnga panya yiya tjuṭa mulapa Papilanta wařkaringi wati panya mayatja Nipaka-nitjaku munu palulanguru palumpa katjaku, pakaliku, kuļu warkaringitu. Ka palulanguru wati kutjupalta mala mayatja nyinakatingu ini Tjairatjanya. Paluru panya manta ini Puutjaku mayatja pulka nyinanytjatjanu pitjala Papilaniyaku ngapartji mayatja nyinangi. Ka Danielnga palumpa kuļu warkaringi.

2

Mayatja Nipaka-nitjalu Tjukurmankunytja

¹ Nipaka-nitjanya panya mayatja pulka nyinangi yiya kutjara. Munu palulanguru paluru munga kutjupangka ngarira tjukurmanu kutjupa kutjupa munu wankaringkula nyinara puťu kulinngi, "Ai, nyaña panyatja nyangu?" Munu munga nyara palula paluru puťulta kunkunaringi.

² Munu wati panya Nipaka-nitjalu al_tingu wati ngangkari tju_ta, munu wati ayinayiningku palyalpai tju_ta, wati nintipuka tju_ta ku_lu palulakutu pitjala tjukurmankunytja panya palunya ut_ira wangkanytjaku. ³ Munu wati panya tju_ta pitjanyangka paluru tjanala wangkangu alatji, “Ngayulu_nta kutjupa kutjupa mulapa tjukurtjunu munu nyangan_a wankaringkula nyinara putu alatji_tu kulini. Wanyuniya ut_ira tjakultjura ngayulu nyanga tjukurmankunytja.”

⁴ Kaya wati panya paluru tjana mayatjangka panya wangkangu tjanampa wangkangku Ara-mayikangku. Nyanga alatjiya wangkangu, “Mayatjan wiru mulapa. Nyuntumpala mukuringanyi mayatja nganampa ti_tutjara nyinanytjaku. Palu wanyulanya nyuntu nyanga tjukurmankunytja warara tjakultjura, kala palulanguru nyuntula ut_ira wangkaku.”

⁵ Ka mayatjangku panya tjanala wangkangu, “Wiya, ngayulu mukuringanyi nyura kuwari ngayulu panya nyakunytjanya tjakultjunkunytjaku mununiya palulangurulta utira wangka. Wiyangkampa ngayuku tjaultji tju_tangku nyuranya ka_tara minya-minyara wiyalu_ku munu nyurampa ngura ku_lu piluntankuku. ⁶ Palu nyura ngayula tjukarurungku ut_ira tjakultjunkunyangkampa_nga ngayulu nyuranya wirunmankuku mununa nyuranya wiru tju_ta ungkula puku_lmankuku. Uwa, utingku_nya wangka, panya ngayulu tjukurmankunytja.”

⁷ Kaya wati panya ngangkari tju_tangku mayatjangka piruku wangkangu, “Mayatjan wiru! Wanyulanya tjakultjura nyuntu panya tjukurmankunytja, kala palulangurulta nyuntula ut_ira wangkaku. Nyaan wanyu tjukurmanu?”

⁸⁻⁹ Palu mayatjangku panya wangkangu tjanala, “Ngayulu nyurampa ninti, panya nyura ngurpa munu nyura nguluringanyi ngayulu nyuranya iluntankunytjaku-tawara. Pala palulanguru_ni nyura ngayunya rawangku wangkanyi ngayuku kulintja kampa kutjupankunytjikitjangku, palu wiya, ngayulu nyurala tjakultjunkunytja wiyangku wantinyi. Nyura alatjituniya tjakultjura ngayulu panya tjukurmankunytjanya. Ka_na palulanguru kulira mulamularingkuku nyura ut_ira wangkanyangka kutju.”

¹⁰ Kaya wati panya nintipuka tju_tangku mayatjangka wangkangu, “Wiya, panya nyuntu kutjun ninti nyuntu pala tjukurmankunytjitetjaku. Palu nyuntu ut_ira wangkanytja wiyangkampa nganana pu_tu kulini. Wirungku wanyu kulila, panya ngura manta winkingkayanku wati nintipuka uwankara palu purunypa_tu nyinanyi. Kaya ngura winkingka mayatja uwankarangku ngangkari tju_tangka nyanga palu purunypa tjapilpai wiya. ¹¹ Nganala uwankara ngurpa nyuntu panya tjukurpa nyakunytjitetjaku. Tjinguru nganampa god tju_tangku kutju nintingku nyuntula tjakultjunkuku, palu god paluru tjana panya nganala tjungu nyinanytja wiya.”

¹²⁻¹³ Ka mayatjangku panya nyangatja kulira tjanampa pulkara alatji_tu mirpanaringu, ngangkari tju_taku, nintipuka tju_taku munu palulanguru tjaultji tju_ta witura iyanu Papilanta ngura winkikutu para-arintara nintipuka uwankara pungkula iluntankunytjaku, Danielnga munu palumpa malpa ma_nkurpa ku_lu.

Godalu Danielta mayatjangku tjukurmankunytja utintja

¹⁴ Ka panya Nipaka-nitjaku tjaultji tju_ta ngarangi palunya atunymankunytjikitja, ka palumpa tjanampa mayatja nyinangi wati ini Ariyakanya. Ka Nipaka-nitjalu palula wangkangu tjaultji tju_tatjara

warmalarira ankula nintipuka tjuṭa munu ngangkari tjuṭa kuļu pungkula iluntankunytjaku.

Palu Danieltu ankula Ariyakala purkarangku tjapinu, wati panya tjaultji tjuṭaku mayatjangka alatji, ¹⁵ “Wiru ngana, tjakultjurani. Nyaanguru mayatja Nipaka-nitjalu nyuntunya wangkangu ngananganaya nintipuka uwankara iluntankunytjaku ngangkari tjuṭa kuļu? Nyangatja ara palya wiya, kura.”

Ka Ariyakalu Danielta tjakultjelu ara panya Nipaka-nitjalu nintipuka tjuṭangka wangkanyta. ¹⁶ Ka Danieltu kulintjatjanu mapalku anu mayatja panya Nipaka-nitjalakutu, munu wirkara palula wangkangu, “Tjaultji panya tjuṭa markula, kaña ankula tjukutjuku nyinara kulira maļaku pitjala nyuntulalta utira tjakultjunkuku nyuntu panya tjukurmankunytjita.” Ka mayatjangku panya palyanmanu munu tjaultji tjuṭa markunu.

¹⁷ Ka palulanguru Danieltu ngurakutu ankula ara panya uwankara tjakultjelu wati panya palumpa maļpa maňkurta Ananayala, Mitjayilta munu Atjarayala. ¹⁸ Munu paluru tjanala wangkangu, “Wanyula tjapila nganampa panya God ilkaritjangka nganampa ngalturingkunytjaku munu Nipaka-nitjalu tjukurmankunytja ngayula utintjaku, kaña Godala kulintjatjanungku ankula mayatjangka panya wangkara utila, kalanya pungkunytja wiyangku wantima wati panya nintipuka tjuṭa munu ngangkari tjuṭa kuļu, kala uwankara wankaru nyinaku.” Munuya mulapatu Godala tjapiningi.

¹⁹ Ka munga pala palula Godalu Danielnga nintinu, ka wankaringkula nyangu munu tjukurpa uti kulinungi wati panya Nipaka-nitjalu tjukurmankunytja. Munu nyara palulanguru nintinnyangka Danieltu God ilkaritjanya pukulṭu mirawanira walkunu nyanga alatji wangkara,

²⁰ “God, nyuntu panya nintipuka pulka mulapa munun witulya pulkatjara. Kala nyuntunya titutjarangku mirawaniku wantintjya wiyangku.

²¹ Panya nyuntu mayatjangku mantatja ilkaritja uwankara tjungura kanyini.

Nyuntu panya ngurkantara mayatja tjunkupai aŋangu tjuṭa atunymara kanyintjaku.

Munun kutjupa-ara wiyalpai mayatja wiyaringkunytjaku.

Nyuntu alatjitu aŋangu nintipuka pulka palyalpai.

²² “Panya aŋangungku kutjupa kutjupa puṭu kulinnyangka nyuntu nintingku utilpai, kumpilitja tjuṭa.

Nyuntu mungawalurungku uwankara nyakupai nintingku alatjitu, panya nyuntun tili pitalytji pułkangku titutjarangku irnyańi.

²³ God, ngayulu nyuntunya mirawanira walkuni, panya nyuntu ngayuku waltyjapiti irtilpi atunymara kanyiningi, munu panyańin ngayunya kuwari nintipuka palyańu munuńin witulyanu.

Uwa, nganana tjapinnyangka panya nyuntu ngayula utinu, munu panyan ngananganala nintinu mayatja panya paluru tjukurmankunytjita.”

Alatji Danieltu Godanya walkuningi.

Danieltu tjukurmankunytja panya utira wangkanyta

²⁴ Palulangurulta Danielnga anu tjaultji panya tjuṭaku mayatjakutu wati panya Ariyakalakutu munu palula wangkangu, “Kulila! Ngangkari munu nintipuka tjuṭa iluntankuwiyangku wantima. Wanyuńi ma-kati

mayatja Nipaka-nitjalakutu, kaña palula wangkara utilku paluru panya tjukurmankunytja.”

²⁵ Ka Ariyakalu Danielnga kuwaritu katingu mayatja Nipaka-nitjalakutu munu palula wangkangu, “Nyagatja wati panya nyuntu ngalya-katintjanya ngura panya Judah-languru. Nyanga palurunta wangkara utilku nyuntu panya tjukurmankunytja.”

²⁶ Ka Nipaka-nitjalu Danielta tjapinu*, “Mulapanin nyuntu ngayulu panya tjukurmankunytjanya tjakultjunkuku? Mununin palulanguru wangkara utilku?”

²⁷ Ka Danieltu wangkangu, “Wati panya nintipuka uwankarangku tjukurpa nyangatja nyuntula putu utira wangkangi, ngangkari tjutangku, kililpi nyakupai tjutangku kulu. ²⁸⁻²⁹ Palu ilkaringka nyinanyi God nintipuka pulka, panya kumpilitja tjuta utilpai. Pala paluru nyuntunya tjukurmankunyangka kutjupa kutjupa tjuta nintini panya ngula nyaaringkuku. Kaña kuvari God pala palula kulintjatjanungku nyuntula utini tjukurpa panya nyuntu ngarira nyakunytjanya. ³⁰ Palu nyuntu tjinguru ngayunya kuliku nintipuka-palku, palu wiya Godaluni ngayunya nintinu nyuntula wangkara utintjaku, nyuntu tjukarurungku kulintjaku.”

³¹ Munu palulanguru Danieltu Nipaka-nitjalu tjukurmankunytja tjakultjunu alatji wangkara, “Watin mayatja wiru mulapa! Nyuntu panya nyangu tjukurpa wati-wati palyantja pulka mulapa nyuntula kuranyu ngaranyangka, wara mulapa. Ka panya pitalytji pulka mulapa irnyara ngarangi, kan pulkara nguluringu. ³² Panya paluru kata kaulnguru palyantja, munu pilpirpa mina tjiilpanguru palyantja, munu tjuni karilpa tjunta kulu purantjinguru* palyantja. ³³ Munu tjalpa ayananguru* palyantja, munu tjina ayananguru tjulpirta tjungura palyantja.

³⁴ “Munu panyan nyangu puli murpu katu katakatinyangka, ka panya puli taanpa pulka ngalya-punkara wati-wati panya tjina atura pilkira minya-minyanu. Ka nyangatja anangungku palyantja wiya.

³⁵ Ka palulanguru wati-wati panya paluru uwankara katakatira minya-minyaringu, kata panya kaulnguru palyantja, pilpirpa mina tjiilpanguru palyantja, munu tjuni karilpa tjunta kulu purantjinguru palyantja, tjalpa ayananguru palyantja uwankara minya-minyaringkula ulpururingu. Ka walpangku ulpuru palunya uwankara waningu, panya anangungku uninypa kaninnyangka unytjunytju walpangku waningira wililytjingalpai, palu purunypa. Ka palula malangka puli panya taanpa paluru pulka mulararira puli murpuringu munu manta winkulta tjutunu.

³⁶ “Alatji panyan nyuntu tjukurmankula nyangu, kaña kuvari tjukurpa panya palunya nyuntula utira wangkanyi. ³⁷ Kan nyuntu mayatja pulka mulapa mayatja kutjupa tjutangka waintara. Panya Godalunta pulkara witulyanu munu kunpunu. ³⁸ Nyuntu anangu ngura wikitjaku mayatja nyinanyi, kuka tjutaku, munu tjulpu tjutaku kulu, uwankaraku. Munu panyan kuvari tjukurpa nyangu wati-wati kata kaulnguru palyantja – kata nyara paluru nyuntunya nintini mayatja pulka mulapa nyinanytja. Palu ngula nyuntu wiyingkula iluku. ³⁹ Panya nyangun pilpirpa munu mina tjiilpanguru palyantja – nyara paluru nintini mayatja kutjupa nyuntula arangka malangka nyinakatintjaku kunpu wiya nguwanpa. ⁴⁰ Munu panyan nyangu tjuni karilpa tjunta kulu purantjinguru palyantja – nyara paluru nintini mayatja kutjupa ngapartji nyinakatintjaku manta winkiku

* ^{2:26} Danielnga panya ini kutjupa Piltatjatjanya * ^{2:32} Purantji panya ini English bronze ayana purunypa * ^{2:33} Ayana panya ini English iron

mayatja. Munu panyan nyangu tjalpa ayananguru palyantja – nyara paluru nintini piruku mayatja kutjupa ngapartji nyinakatintjaku kuŋpu mulapa ayana puruny whole panya uwankara upirmankupai. Mayatja nyara paluru panya tjaultji tjutatjarangku mayatja nganmanyitja uwankara wiyalku.

41-42 “Munu panyan nyangu tjina ayananguru tjulpirta tjungura palyantja – nyara paluru nintini piruku mayatja kutjupa mankurpa nguwanpa ngapartji nyinakatintjaku tjungu nguwanpa. Palu panya mayatja kutjupatjara kuŋpu ngaraku ayana puruny whole, kaya mayatja tjara kutjupa upa ngaraku tjulpirpa puruny whole. **43** Ka nyuntu ninti panya ayana puṭu tjulpirpangka tjungu ngarapai, pala palu puruny whole mayatja paluru tjana puṭu tjungu ngaraku munuya maunṭalpa maunṭalpa nyinaku kuŋpu wiya.

44-45 “Munu panya nyuntu nyangu malatja puli murpu katunguru taanpa watiwatingka punkannyangka, ka panya minya-minyaringu, panya ayananguru, purantjinguru, tjulpipanguru, tjiilpanguru munu kaulpan-guru palyantja uwankara alatjiṭu wiyaringu. Ka panya puli taanpa paluru punkantjatjanu ngalya-pulkaringkula puli murpuringu munu manta winklela ngalya-tjutunu. Palu puli nyanga paluru nintini mayatja malatja nyinakatintjaku Goda Ilkaritjangku tjunkunytja. Panya nyara palula-arangka Godalu mayatja panya mankurpa puṭu tjungu nyinanytja tjuta wiyalku munu mayatja kutjupa malatjalta kuŋpu mulapa tjunkuku, titutjara nyinapainya, witulya pulka mulapa. Ka mayatja ngura kutjupitja tjutangku palunya arkara puṭu alatjiṭu wiyalku, ka mayatja malatja paluru munu palumpa walytjapiti titutjara wanka nyinaku.

“Uwa, mayatja wiru! God Ilkaritjalu panya nyuntunya nintinu nyaa ngula utiringkuku. Ka ngayulu nyuntula tjukarurungku tjakultjunanyi nyuntu panya nyakunytjanya, ka nyuntu kulila munu mulamulariwa ngayulu nyanga utira wangkanytjanya.” Alatji Danieltu mayatja panya Nipaka-nitjala wangkangu.

Nipaka-nitjalu Danielnga tjananya kamanta tjunkunytja

46 Ka Nipaka-nitjalu Danielta kulintjatjanungku palula kuranyu tultjun-garakatira palunya walkunu. Munu wangkangu palumpa wati warika tjutangka paṇti wiru, mai kuļu Danielnga katira ungkunytjaku. **47** Munu paluru Danielta wangkangu, “Mulapa nyuntumpa God pulka mulapa, god kutjupa uwankarangka waintarinjtja. Paluru manta winkitjaku mayatja nyinanyi, ka panya mayatja mantatja tjuta nyinanyi paluru kutjungku tjunkunytjtja. Paluru mulapa kumpilitja utilpai, panya palurunta nyuntunya nintinu ngayulu tjukurmankunytja, kaṇin wirungku ngayula utira tjakultjunu.”

48 Munu mayatja panya paluru Danielnga mayatja kuranyitja tjunu, munu wiru tjuta palunya ungu. Munu paluru wangkangu ngura manta Papilannga mayatjarira palyanyku palumpa kanyintjaku munu nintipuka tjuta, ngangkari tjuta kuļu mayatjarira kanyintjaku. **49** Ka Danieltu Nipaka-nitjala tjanampi palumpa malpa mankurku ini panya Tjataarakaku, Mitjakaku, Pinikauku tjanampa tjunguringkula palunya alpamilantjaku. Ka mulapaṭu tjananya mayatja tjunu Danielta itingka tjungu nyinara warkarinytjaku. Ka palulanguru Danielnga Nipaka-nitjaku walingka nyinangi munu palunya alpamilaningi anangu winki palyanyku kanyintjaku ngura nyanga Papilanta munu ngura ititja tjutangka kuļu.

3

Nipaka-nitjalu anangu uwankara wangkangu wati-wati pulka walkuntjaku

¹ Ka ngula mayatja Nipaka-nitjalu wati war̄ka tjutangka wangkangu wati-wati pulka mulapa kaulnguru palyantjaku, katu mulapa 30 miita munu lipi mulapa 3 miita. Paluru tjanala wangkangu urilta ngaratjunkunytjaku ngura ini Tuurala panya Papilanta itingka. ² Munu paluru mayatja tjuta altingu ngura uwankaranguru pitjala tjunguringkunytjaku munu inma pulka palyara wati-wati panya palunya walkuntjaku. Kaya mulapatu mayatja uwankara pitjangu manta panya Papilanta ngura winkinguru. Tjara kutjupaya nguraku mayatja, tjara kutjupaya nintipuka, tjara kutjupaya mani kanyilpai, kaya kutjupatjara kuutpangka ngurkantankupai, kutjupa tjaraya kamanta tjuṭa ngura tjutangka war̄karipai. ³ Mayatja nyanga paluru tjanaya uwankara pitjala tjunguringu wati-wati panya palula kuranyu. ⁴ Ka tjana wirkankunyangka Nipakanitjalu wati palumpa war̄kangka wangkangu tjanala mirara wangkanytjaku, ka mulapatu paluru tjanala alatji wangkangu, “Kulilaya anangu tjuṭa, panya nyura ngura winkinguru pitjangu, wangka kutjupa wangka kutjupa. ⁵ Kuwari wati tjutangku turampata, puluta munu kutjupa kutjupa tjuṭa puura wangkatjingalku mayu wiru, kaya kutjupa tjutangku kita, aapa munu kutjupa kutjupa tjuta kulu marangku wangkatjingga. Ka nyura kulira mapalku tultjungarakatira wati-wati nyangatja walkula, panya Mayatja Nipaka-nitjalu palyantja. ⁶ Palu tjinguru nyura walkulwiyangku wantinyangkampa palumpa tjaultji tjutangku nyuranya warungka waniku.”

⁷ Ka wangkatjingannyangka anangu ngura wikitja wangka kutjupa wangka kutjupa tultjungarakatingu munuya pupakatira walkuningi wati-wati panya palunya.

Danielku malpa mankurpa Nipaka-nitjala tungunpungkunytja

⁸ Kaya wati kutjupa tjutangku kililpi nyakupai tjutangku ankula Nipakanitjala wangkangu Jew tjutaku mirpañarira. ⁹ Alatjiya palula wangkangu, “Mayatjan wiru mulapa! Nyuntumpala mukuringanyi mayatja nganampa titutjara nyinanytjaku. ¹⁰ Nyuntu panyan wangkangu wangkatjingannyangka anangu uwankarangku tultjungarakatira walkuntjaku. ¹¹ Ka kutjupangku wantinyangkampa palulanguru nyuntumpa tjaultji tjutangku waru pulkangka tjarpatjunkuku. Alatji panya nyuntu wangkangu. ¹² Palu wanyu kulila, panya nyuntu wati mañkurpa ngurkantara tjunu Papilanta mayatja war̄karinytjaku ini panya Tjatarakanya, Mitjakanya munu Pinikaunya. Paluru tjanaya inma wangkatjingannyangka nyuntumpa god wantingi walkuntja wiyangku, munuya wati-wati nyuntu palyantja pupakatira walkuntja wiyangkuwantingi.”

¹³ Ka mayatja panya kulira pulkara alatjiṭu waruringkula mirpañaringu munu wangkangu, “Palunya tjananyaya ngalya-kati!” ¹⁴ Ka tjananya ngalya-katinyangka paluru tjapinu tjanala, “Mulapa nyura ngayuku god walkuntja wiyangku wantingi? Munu nyura ngayulu palyantja walkuntja wiyangkuwantingi? ¹⁵ Kulilaya! Kuwariya piruku wangkatjingani, ka nyura tultjungarakati, kaña nyuranya palya kulilkku. Palu wantinyangka ngayuku tjaultji tjutangku nyuranya waru pulkangka waniku. Panya ngayuluṇa witulya pulkanya, ka god kutjupangku nyuranya putu alatjiṭu wankalku.”

¹⁶ Kaya tjana ngapartji mayatja Nipaka-nitjala wangkangu, “Mayatja, tjin-gurula ngulungulungku nyuntula ngatjinma nganañanya ngalturingkula walatkunytjaku. Palu wiya. ¹⁷ Palya nganañanya warungka wanı. Panya nganaña God nganampa walkulpai, ka nyara paluru nganañanya wankarunkunytjaku ngaranyi alatjitu. Mulapa paluru nganañanya angatjutulku nyuntu iluntankunytjaku-tawara. ¹⁸ Palu mayatja, wanyu kulila! Tjinguru God nganampangku nganañanya wantinyangkampa nganaña palunya tungun-tunguntu alatjitu wañalku, munula nyuntumpa god tjuta walkuntja wiyangku wantiku, wati-wati pala kaulnguru palyantja kuwantiku.”

Danielku malpa mankurpa warungka waninyangka Godalu tjananya wankarunkunytja

¹⁹ Ka mayatja panya paluru tjanampa pulkara alatjitu waruringu wati panya Jew mankurku, munu yunpa kuraringkula mirpañarira wati panya waru kanyilpai tjutangka wangkangu, “Waru pala piruku pulkala, ka tili pulka mulapa kampa.” ²⁰ Kaya mulapatu tjunu waru tjuṭa ka tili pulka mulapa kampangi. Ka Nipaka-nitjalu tjaultji kuṇpu tjutangka wangkangu, “Wati nyanganpaya karpira waru pala unngu ma-wani!” ²¹⁻²³ Kaya mulapatu ulytja winki karpira warungka wañingu, palu ilaringkula waninyangka waru panya paluru ngalya-kampara tjaultji panya tjuṭa kampara iluntanu. Ka panya Tjatarakanya, Mitjakanya, Pinikaunya tjanana waru unngu punkanu karpintja winki.

²⁴ Ka mayatja panya pulkara urulyara wala pulka pakalkatingu munu palumpa tjungutja tjutangka tjapinu, “Karpirala mankurpa panyatja wañingu?”

Kaya wangkangu, “Uwa mayatja, nganaña panya wati mankurpa kutju wañingu.”

²⁵ Ka mayatjangku panya nyakula wangkangu, “Awa! Nyawaya! Wati panya mankurpala warungka karpira wañingu, kaya kuwari kutjara kutjara warungka para-ngaranyi karpintja wiya. Ai, warungku tjananya kampanytja wiya. Nyawalta! Tjanala tjunguringu wati kutjupa, god purunypa.”

²⁶ Ka mayatja panya ngalya-ilaringkula mirangu munu wangkangu, “Tjataraka! Mitjaka! Pinikau! Ngalya-pakalaya! Nyura panya god witulya katutja pulkangka kulilpai. Ngalya-pitjaya!” Kaya mulapatu waru unngunguru ngalya-pakanu.

²⁷ Kaya wati panya mayatja tjutangku, kamanta tjutangku kulu parangarala wañara nyangangi kampanytja nyakunytjikitjangku. Munuya nyangu mangka kampanytja wiya, mantara tjanampa kulu kampara puyu pantintja wiya alatjitu.

Nipaka-nitjalu wangkanytja Danielku tjanampa God kuralwiyangku wantinytjaku

²⁸ Ka mayatjangku panya wangkangu, “Godanyaala walkunma Tjatarakaku Mitjakaku Pinikauku God, panya paluru tjanana mulamularingkunyangka paluru angelpa iyanu tjananya waru unngu anga-kanyintjaku. Paluru tjanana panya ngayula kulintja wiya tungunpungu, munuya tjanampa god kutju kulinu ngayuku god wantira, munuya rapa alatjitu warungka tjarpangu. ²⁹ God kutjupa tjutangku alatji palyalpai wiya. Kaña kuwari tjukurpa pulka tjunanyi nyura uwankarangku ngayula kulira wanganarangku palyantjaku, nyanga alatji:

Kurantja wiyangkuya wantima God panya Tjatarakaku, Mitjakaku, Pinikauku. Ka anangu kutjupangku tjanampa God kurannyangkampa ngayuku tjaultji tjutangku palunya kaṭara minya-minyalku munu palumpa wali kulu wiyaliku.”

³⁰ Alatji mayatja Nipaka-nitjalu tjukurpa pulka wangkara tjunu. Munu palula malangka wati panya mankurpa tjunu palula itingka nyinara ngura panya Papilannga mayatjangku atunymara kanyintjaku.

4

Nipaka-nitjalu tjukurmankunytjatjanungku anangu winkikutu lita walkatjura iyantja

¹⁻³ Ka mayatja Nipaka-nitjalu lita walkatjunu munu anangu ngura winkikutu iyanu wangka kutjupa wangka kutjupakutu. Alatji paluru walkatjunu:

Uwa, nyura palya?

Kuwarina nyurala wangkanyi tjukurpa wiru tjuṭa God katutja pulkangku ngayunya nintintja. Panya palurutju witulya pulkangku wiru tjuṭa palyanangi pulka mulapa nyakula urulyarantjaku.

Paluru alatjiṭu anangu tjutaku mayatja pulka mulapa titutjara nyinaku wiyingkunytja wiya.

⁴ Nyangatja panya ngayuku tjukurpa, panya ngayulu pukulpa mulapa wali nyanga pulkangka nyinangi mai pulkangka. ⁵ Mununa munga kutjupa piitangka kunkunpa ngarira tjukurmara nyangu kutjupa kutjupa mulapa mununa pulkara nguluringu. ⁶ Mununa palulanguru wati war̄ka tjuṭa witunu Papilannga ngurara tjuṭa wati nintipuka uwankara ngayulakutu ngalya-katinytjaku tjana pitjala ngayula tjukurpa wangkara utintjaku panya ngayulu tjukurmankunytjanya. ⁷ Kaya mulapaṭu pitjangu wati nintipuka tjuṭa, ngangkarī tjuṭa, munu kililpi nyakupai tjuṭa, uwankaraya pitjangu. Kaṇa ngayulu tjakultjunu tjanala panya ngayulu nyakunytjtja, kaya tjana puṭu alatjiṭu ngayula utira wangkangi. ⁸ Ka maṭa wati panya Danielngalta wirkānu. (Palunya panyaṇa ini kutjupa ungu, Piltatjanya, ngayuku panya Godaku ini, ka god tjuṭa palula tjungu nyinanyi.) Kaṇa palula tjakultjunu ngayulu tjukurpa nyakunytja.

⁹ Mununa palula wangkangu, “Piltatjatja! Nyuntu nintipuka mulapa ngangkarī tjuṭangka muṇkara, ka ngayulu kulini panya god tjuṭa nyuntula tjungu nyinanyi, panya nyuntu kutjungku uwankara nintingku kulilpai. Wanyu kulila tjukurpa nyanga ngayulu nyakunytjanya mununi utira wangka.

¹⁰ Ngayuluṇa kunkunpa ngarira nyangu puṇu war̄a mulapa mantangka ngururpa pakara ngaranyangka. ¹¹ Puṇu paluru war̄a mulararira kuṇpu pulka ngarangi ilkari pampura, kaya anangu uwankarangku manta winkitjangku uti nyangangi tjanampa nguranguru. ¹² Ka puṇu nyara paluru nyalpi wiru munu mai pulkatjara ngarangi. Kaya anangu winkingku mai palunya ngalkuningi kukangku tjulpungku kuļu. Kaya inuṛa tjuṭa puṇu palula wiltjangka ngura palyara ngaringi, ka puṇu miṇangka tjulpu tjuṭangku maṇngu tjuṭa palyanangi.

¹³ Kaṇa ngarira nyangangi mununa ira-nyakula nyangu ilkaringuru angelpa ngalya-ukalingkunyangka. ¹⁴ Mununa kulinu mirara wangkanyangka nyanga alatji, ‘Puṇu pala kaṭara punkatjingala munu puṇu miṇa parka winkitjara kaṭala munu nyalpi tjuṭa kaṭara waṇi munu

mai uwankara ala lipingka wanira wiyla, kaya palanpa uwankara ankula wiyariwa, inura tjuta munu tjulpu pala tjuta kulu. ¹⁵⁻¹⁶ Palu wata iwiri kulu wantima ukiringka ngururpa ngaranytjaku munu wata pala palunya ayanangka munu purantjingka karpira wantima pilta kutjarangka purunypa. Ka wata nyanga paluru* ara kutjupa nintini panya wati ilytjingka nyinanytja, ka panya munga kutjupa munga kutjupa kulyarpangku wati palunya puntu winki urulpai. Wati paluru inura tjutangka tjungu para-ngaraku munu tjananya purunypa alatjitu nyinaku rawa yiya tjapan, kulintja anangu purunypa wiya inura tjuta purunypa.¹⁷ Nyangatja angelpa tjutangku wangkanytja Godalu wangkanyangka anangu manta winkitjangku kulira nintiringkunytjaku. Panya ngula tjukurpa nyangatja utiringkunyangka anangu manta winkitjangku kulilku, ‘Munta-uwa, paluru God katutja pulka mulapa nyinanyi manta uwankaraku mayatja. Nyara paluru kulira wati ngurkantara mayatja tjunkupai ngura atunymara kanyintjaku. Kutjupara paluru alatjitu mukuringkula wati kutjupa tjunkupai, tjinguru wati pilunytyu.’ Nyanga alatjina kulinu angeltu panya wangkanyangka.

¹⁸ “Uwa, Daniel, nyanga palunyana tjukurmankula nyangu, palu wati panya ngayuku nintipuka tjutangkuya putu alatjitu kuliningi ngayula utira wangkanytjikitjangku. Wanyuni wirungku wangkara utila, panya nyuntu god tjutaku kurunpa tjuta kanyini, munun kuruntu nintinnyangka utira wangkapai.”

Nipaka-nitjalu tjukurmankunytjitja Danieltu wangkara utintja

¹⁹ Ka Danielnga pulkara alatjitu ngulu-nguluringu nyanga tjukurmankunytjitja kulira, munu paluru pilunarira putu nguwanpa wangkangi. Ka Nipaka-nitjalu palula wangkangu, “Nguluringkunytja wiyangkuni tjakultjura tjukurpa nyanga palunya.”

Ka Danieltu wangkangu, “Mayatja wiru, tjukurpa nyanga nyuntu nyakunytja, nyaratja nyuntunyatjara alatjitu, nyuntumpa mirpantju tjutatjara wiya. Nyara palulanguruna nguluringanyi nyuntula utira wangkanytjaku. ²⁰ Nyuntu panya nyangu punu wara pulkangku ilkari pampuntja, ka panyaya anangu manta winkitjangku nyangangi pararintara ngura uwankaranguru. ²¹ Punu paluru panya nyalpi wiru mulapa munu mai pulkatjara ngarangi anangu winkiku munu kuka tjutaku kulu. Ka inura tjuta punu panya watangka wiltjangka nyinangi, ka punu mingka tjulpu tjutangku mangnu tjuta palyaningi.

²² “Uwa, Mayatja wiru, punu panya nyuntu tjukurmankunytjanya, palatja nyuntu. Panya nyuntun punu palu purunypa kungpuringkula pulka mulararingu, kaya kulinu ilkaringka mantangka kulu. Panya nyuntu mayatja katutja nyinanyi pulka mulapa manta winkiku. ²³ Munu panyan nyuntu nyangu angelpa ilkaringuru ukalingkunyangka munun kulinu wangkanyangka alatji, ‘Punu pala katara punkatjingara wiyla. Palu wata iwiri kulu wantima ukiringka ngururpa ngaranytjaku munu wata pala palunya ayanangka munu purantjingka karpira wanti. Ka ukiri nyanga palula nyinara paluru kulyarpangka wiita ngariku. Munu paluru ilytjingka kuka inura tjutangka tjungu rawa nyinaku yiya tjapan.’

²⁴ “Uwa, Mayatjan wiru! Tjukurpa nyangatjananta kuwari nyuntula utira wangkanyi, panya nyuntu nyakunytjanya. Panya God Katutja Pulkalu tjukurpa nyangatja nyuntula utinu ngula nyaa nyuntula

* ^{4:15-16} Kuwari nyangatja punu wata wangkanytja wiya wati panya mayatja wangkanyi, Nipaka-nitjanya.

wirkankuku. ²⁵ Kuwari nguwanpantaya aŋangu tjutangku nyuntunya ngulura parari waŋara wantiku, kan mungutja alatjitu ilytjingka nyinaku inura tjutangka tjungu, munun ukiri ngalkuku pulukangka tjungungku, kanta munga kutjupa munga kutjupa kulyarpangku nyuntunya puntu winki urulku. Nyanga alatjin rawa nyinaku yiya tjapan, munun palulangurulta yiya tjapan ngarala wiyaringkula nyuntu kulikku, 'Munta-uwa, mulapa nyangampal God Katutja Pulkanyampa nyinanyi mayatja pulka mulapa ngura winkiku munu manta uwankaraku. Nyanga paluru alatjitu panya kulira wati ngurkantara mayatja tjunkupai ngura atunymara kanyintjaku.' Alatjilta nyuntu pina alaringkula kulikku.

²⁶ "Palu nyuntu panyan tjukurpa nyangu waṭa munu iwiri kuļu mantangka ngaranyangka, ka nyanga palulangurulta kulinma panya nyuntu God Ilkaritjaku nintiringkula nyuntu piruku mayatjariku. ²⁷ Mayatja wiru ngana! Wanyuni kulila munu kura tjuta palyantjatjanungku wantira tjukarurungku kutju palyanma. Ngañmanypa panya nyuntu iwara kurangka ngarangi. Palu kuwari nyanga iwara wirunya nyakunytjatjanungku wañanma alatjitu munu ngaltutjara tjuta ngaltunytjungku kanyinma, ka tjinguru nyanganguru nyuntumpa wiru mulapalta ngaraku." Alatji Danieltu Nipaka-nitjala tjukurpa utira wangkangu.

²⁸ Ka mulapatu Danieltu panya wangkanytjitja uwankara Nipaka-nitjala wirkanu. ²⁹⁻³⁰ Panya yiya kutju ngarala wiyaringkunyangka Nipaka-nitjanya wali katu para-ngarangi palumpa panya walingka mununku mirawanira wangkangi kañany-kañanytju, "Nyawaya ngura nyanga Papilanga! Ngayuluña witulyangku palyanu pulka mulapa, ka panya ngura wiru mulapa ngaranyi, kaya aŋangu winkingku nyakula ngayunya mirawaninyi ngayulu pulka palyantja."

³¹ Ka nyangatja wangkanyangka Godalu ilkarìnguru palula wangkangu, "Mayatja Nipaka-nitja! Kulilañi ngayulu nyuntula wangkanyangka. Kuwari nyanga alatjitu nyuntu mayatja wiyaringanyi ngura nyangaku. ³² Kantaya aŋangu tjutangku nyuntunya ngulura waŋara ngura parari ma-wantiku, kan mungutja alatjitu ilytjingka nyinaku inura tjutangka tjungu, munun ukiri ngalkuku puluka tjuta purunytju. Alatjin rawa nyinaku yiya tjapan munun palulangurulta pina alaringkula kulikku ngayulu God Katutja Pulkanya, panya ngayuluña mayatja pulka mulapa mayatja kutjupa uwankarangka waintarintja. Kan kulikku panya ngayulu alatjitu kulira wati ngurkantara mayatja tjunkupai ngura atunymara kanyintjaku." Alatji palula ilkarìnguru wangkangu.

³³ Ka paluru wangkanytja mapalku utiringu Nipaka-nitjanya alatjirintjaku, kaya aŋangu tjutangku panya palunya nguranguru ngulura waṭaparara ma-wantir'iyanu ilytjikutu, ka paluru mayatja wiyaringkula ilytjingkalta nyinara ukiri kutjulta ngalkuningi puluka tjuta purunytju. Ka ilytjingka urilta ngarinyangka kulyarpangku palunya munga kutjupa munga kutjupa puntu winki uruningi. Alatji paluru rawa nyinangi, ka palumpa mangka wařaringu waławuru nyalpi purunypa, munu miltji kuļu wařaringu tjulpu tjutaku miltji purunypa.

Nipaka-nitjalu Godanya Mirawanira Walkuntja

³⁴ Ka palulanguru yiya tjapan ngarala wiyaringkunyangka Nipaka-nitjalu ilkarì ira-nyakula Mayatja Godaku mulamularingangi munu paluru kulintja tjukarururingu. Munu paluru God Katutja Pulkanya walkura mirawaningu panya Titutjara Nyinapainya. Alatji paluru wangkara walkuningi,

“God ilkaritja, nyuntun mayatja pulka mulapa titutjara nyinapainya. Nyuntun uwankara rawangku mayatjangku kanyilpai wiyingkunytja wiyangku.

³⁵ Panya nyuntu mayatja pulka nyinanyi, ka anangu mantatjangku puṭu nyuntunya wiyalu, panya nyuntu witulya pulka mulapa anangu uwankarangka waintarintya. Nyuntu alatjiṭu mukuringkula palyalpai angelpa ilkaritja tjutangka munu anangu mantatja tjutangka kuļu. Kutjupangku nyuntunya puṭu markuṇi, munu kutjupangku nyuntunya puṭu wangkanyi, ‘Nyaaku nyuntu nyangatja palyani?’ ”

³⁶ “Uwa, nyara palula arā ngayuku kulintja tjukarururingu, ka Godalu ngayunya małakungku anangu tjutangka tjungunu ngayuku mukuringkunytjaku, kaniya piruku mayatja wangkara wirunmanangi. Kaya wati kamanta pulka tjuta ngayulakutu pitjangu munuṇiya piruku tjunu Papilanku mayatjarintjaku. Ka panya anangu tjutangkuṇiya nganmanyiju mayatja pulka nyangangi, palu kuwariniiya nyanganyi mayatja kutjupa mulapa.

³⁷ “Uwa, kuwariṇa ngayulu Nipaka-nitjalu Mayatja Ilkaritjanya walkuṇi panya paluru kutju pulka mulapa. Palumpa iwara tjukaruru munu mulapa. Munu paluru anangu kañany-kañanyaripai tjuta tjarulpai.” Alatji Nipaka-nitjalu God Katutja mirawanira lita nyangatja walkatjunu munu anangu ngura winkikutu iyanu.

5

Mayatja Pilytjatjalu tjana mai pulka ngalkunnyangka marangku utiringkula wall-ta walkatjunkunytja

¹⁻² Ka ngula Papilanku mayatja pulka kutjupa nyinangi wati ini Pilytjatjanya* munu paluru tjintu kutjupa mai pulka palyanu mayatja kamanta tjutaku, kaya wati tjuta mulapa maiku tjunguringu nampa nyangatja, 1,000. Ka mayatja paluru tjanala tjungungku pukularira wama tjikiningi munu tarangkarira wati war̄karipai tjutangka wangkangu, “Kulilaya! Iriti panya ngayuku tjamu Nipaka-nitjalu Jerusalemaku timpulanguru kaapa tjuta ngalya-katingu, panya kaulnguru tjiilpanguru palyantja tjuta. Palunya tjananyaya ngalya-kati nganañalakutu, kala uwankarangku palula tjanala waina tjikinma munu ngayuku kuri tjutangku kuļu.”

³⁻⁴ Kaya mulapaṭu wati war̄ka tjutangku kaapa panya tjuta mantjira katingu. Kaya Pilytjatjalu tjana mayatja panya tjutangku kuļu kaapa panya palula tjanala waina tjikiningi munuya tjkira tjanampa god tjuta walkuningi, god panya kaulnguru, tjiilpanguru, purantjinguru*, ayananguru, puñunguru, pulinguru palyantja tjuta.

⁵⁻⁶ Ka nyara palula mapalku alatjiṭu watiku mara utiringu munu wallpangka walkatjunu kutjupa. Ka palula itingka lampa ngarangi munu tilingku irnyaningi, ka Pilytjatjalu walkatjunkunyangka nyakula pulkara alatjiṭu nguluringkula yunpa kutjuparingu, munu muti tjalpa pulkara tjititingkula wawanyaringu.

⁷ Munu paluru wati war̄ka tjuta witunu ngangkari tjuta, nintipuka tjuta, munu kilipai tjuta kuļu altira ngalya-katinytjaku. Ka tjana ngalya-wirkankunyangka paluru tjanala wangkangu, “Walka nyaa nyangatja ngaranyi? Walka nyanga palunyaniiya nyakula utira wangka. Ka kutjupangku tjukarurungku utira wangkanyangkampa ngayulu palunya

* 5:1-2 Wati nyanga Piltjatjanya panya Papilanku mayatjaringu Nipaka-nitjaku arangka. * 5:3-4 purantji panya ini English bronze ayana purunypa

mayatja nampa 3 tjunkuku ngayula itingka nyinara ngura nyanga Papi-lannga kanyintjaku, munuɳa palunya pukularira ngayuku mantara purple wirunya ungkuku munuɳa liritja tanpalku kaulnguru palyantja paluru mayatja nyinanytjaku.”

⁸ Kaya nintipuka uwankarangku walka panya nyakula puʈu alatjiʈu kulinini mayatja Pilytjatjala utira wangkanytjikitjangku. ⁹ Ka paluru pulkara mulapa nguluringkula yunpa kutjupa alatjiʈu ngarangi, ka mayatja kutjupa tjuʈangku kuɻu walka panya palunya nyakula puʈu alatjiʈu kulinini.

¹⁰ Ka Pilytjatjaku ngunytjungku ruuma kutjupanguru kulinu tjana nguluringkula wangkara waɳinyangka munu tjanalakutu ngalyatjarpala nyakula wangkangu, “Mayatjan wiru mulapa. Nyuntumpala mukuringanyi mayatja nganampa tiʈutjara nyinanytjaku! Wanyu kulila! Pulkara nguluringkunytja wiyangku wantima! ¹¹ Panya nyuntumpa tjamungku mayatja pulka nyinalralpi wati kutjupa ngurkantara tjunu ngangkari tjuta munu kililpi nyakupai tjuta kuɻu mayatjangku kanyintjaku. Ngayulu ninti palumpa, panya nganampa god tjuta wati nyara palula tjungu nyinanyi. Paluru nintipuka mulapa tjukarurungku kulilpai nganampa god tjuta purunyty. ¹² Wati nyara paluru ini Danielnga, palu nyuntumpa tjamungku palunya ini kutjupa tjunu Piltatjanya. Ka wati paluru nintipuka mulapa munu aŋangu kutjupangku tjukurmarra puʈu kulinnyangka tjukarurungku utira tjakultjunkupai munu kutjupa kutjupa wituwitu ngaranyangka paluru kuliɳa wangkara tjukarurulpai. Ka wanyu nyuntumpa warka tjuta witura iyala palunya altira ngalya-katinytjaku, ka paluru pitjala walka pala wallpangka ngaranytjanya nyakula nyuntula tjukarurungku utira tjakultjunkuku.”

Danieltu walka panya wall-ta ngaranytjitja utira wangkanytja

¹³ Kaya mulapatu ankula Danielnga mantjira ngalya-katingu. Ka wirkankunyangka mayatja panya Pilytjatjalu palula tjaipi, “Nyuntu mulapa Danielnga? Panya ngayuku tjamungku kunyu nyuntunya ngalya-katingu ngura nyara Judah-languru kutjupa tjuʈangka tjungu. Mulapa?

¹⁴ Ka panya kunyu nganampa god tjuta nyuntula tjungu nyinanyi, kan palu-languru nintipuka nyinanyi munun kutjupa kutjupa tjuta tjukarurungku utira wangkapai. Mulapan? ¹⁵ Panya ngayulu tjaipingi ngangkari tjuta walka nyangatja nyakula utira wangkanytjaku, kaya paluru tjana puʈu alatjiʈu kulinini. ¹⁶ Ka kunyu nyuntu kutjupangku puʈu kulinnyangka utira wangkapai. Wanyuni walka nyangatja riitamilara utira wangka, kaɳanta tjukarurungku wangkanyangkampa nyuntunya mantara puupulangka tjarpatjunkuku, munuɳanta liritja kaulnguru palyantja kuɻu liringka tanpalku, munu ngayulu nyuntunya nguraku mayatja nampa 3 tjunkuku ngayula itingka nyinanytjaku.”

¹⁷ Ka Danieltu wangkangu, “Mayatjan wiru! Palyana kuwari riitamilara walka nyangatja, munuɳanta utira wangkanyi. Palu nyuntu pala ngayunya ungkunytjikitjangku wangkara kalkunu, pala palunya wati kutjupa uwa.

¹⁸ “Wanyu kulila! God katutja pulkangku nyuntumpa tjamu Nipakanitjanya mayatja pulka tjunu ngura nyangaku munu palunya pulka mulapa palyanu, kaya aŋangu tjuta palumpa pukularingi. ¹⁹ Kulinin? Mayatja panya Nipaka-nitjanya pulka mulapa nyinangi, kaya aŋangu uwankara wangka kutjupa wangka kutjupa ngura kutjupitja ngura kutjupitja palumpa pulkara nguluringkupai. Munu paluru panya

mukuringkula anangu kutjupa iluntankupai munu paluru mukurungkula anangu kutjupa walatjunkupai. Paluru anangu tjara kutjupaku pukularipai, munu paluru tjara kutjupa kuraringkula paira iyalpai.

²⁰ “Palu paluru kañany-kañanyarira anangu tjuñangka kulintja wiyaringu, ka Godalu palunya painu mayatja wiyaringkunytjaku, ka anangu uwankara palumpa pukularinytja wiyaringu. ²¹ Ka paluru kuka tjuña purunyaringu, kaya anangu tjuñangku ilytjikutu palunya paira iyanu tangkiyi inura tjuñangka tjungu patu nyinanytjaku munu ukiri ngalkuntjaku pulukangka tjungungku, ka munga kutjupa munga kutjupa kulyarpangku palunya puntu winki urulpai. Ka palulanguru paluru pina alaringkula kulinu mulapa Godanya katutja pulka mulapa ngura uwankaraku mayatja munu paluru alatjitu mukuringkula anangu ngurkantara mayatja tjunkupai.

²²⁻²³ “Palu nyuntu ninti uwankaraku, panya nyuntu palumpa pakali alatjitu. Palu nyuntu kuwari kañany-kañanyarinyi munu nyangan Mayatja Ilkaritjala tungunpunganyi. Panya nyuntu wangkangu wati warika tjuña kaapa panya milmilpa tjuña timpulanguru katinytja nyuntunya katira ungkunytjaku. Munu nyangan nyuntu kaapa palula tjanala waina tjikinu, mayatja nyanga tjuñangku kuļu, nyurampa kuri tjuñangku kuļu. Munu nyura tjikira puňu tjuña godanyanmara walkuningi puňu panya tjiilpanguru, kaulpanguru, ayananguru, puňunguru, apunguru palyantitja tjuña. Palu puňu nyara paluru tjana puňu nyakupai, puňu kulilpai, ninti wiya. Godalu kutjungku nyuntunya wanka ungcupai, munu paluru kutjungku nyuntunya wanka kanyilpai nyuntu kutjupa kutjupa tjuña palyantjaku. Palu nyuntun palunya wantinyi palumpa pukularinytja wiyangku alatjitu.

²⁴ “Pala palulanguru nyanga nyuntu kuwari nyangu marangku utiringkula walkatjunkunyangka.

²⁵ “Ka nyanga ngaranyilta uti alatjitu wall-pangka:
MINAI, MINAI, TIKIL, PAATJIN.

²⁶ “Ka alatji ngaranyi ini nyanga paluru tjana:

MINAI wangkanyi alatji *RAWA WIYA* panya Godalu nyuntunya wangkanyi mayatjarira rawa nyinanytja wiya.

²⁷ Ka nyanga *TIKIL* wangkanyi alatji, *WAYAMILALPAI* panya Godalu nyuntunya wayamilaňu mununta nyangu nyuntu tjukaruru wiya.

²⁸ Munu *PAATJIN* wangkanyi alatji, *TJARALPAI* panya Godalu nyuntunya mayatja wiyanı munu nyuntumpa anangu uwankara tjarańi, ka tjara kutjupa wati kutju Miitanya-ngurarrangku pitjala mayatjarira kanyilkü, ka tjara kutjupa wati kutjupa Puutjanya-ngurarrangku pitjala mayatjarira kanyilkü.”

Alatji Danieltu mayatja panya Pilytjatjala utira wangkangu.

²⁹ Ka paluru wati warkaripai tjuña wangkangu Danielnga mantara pupulpangka tjarpatjunkunytjaku munu liritja kaulnguru palyantja palula liringka tanpantjaku, munu paluru Danielnga Papilanku mayatja nampa 3 tjunu.

³⁰ Ka munga nyara palulatu wati kutjupangku Pilytjatjanya iluntanu, Papilanku panya mayatja pulka. ³¹ Ka palumpa arangka wati ini Tariyatjanya mayatjaringu. Nyara paluru panya ngura ini Miitanya-ngurara munu paluru 62 years old nyinangi.

¹ Munu Tariyatjalu mayatjarira manta tjaranu ngura kutju kutju ngaranytjaku 120 panya tjuta mulapa, munu wati tjuta ngurkantara tjunu ngura panya palunya tjananya kutjungku kutjungku mayatjarira kanyintjaku. ² Munu wati mankurpa ku lu ngurkantara tjunu Danielnga tjananya paluru tjana mayatjangku nyakunytjaku wati 120 palunya tjananya, ka Danieltu tjana palunya tjananya nyangangi tjana ngura tjuta tjukarurungku atunymankunytjaku ngunti palyantjaktawara. ³ Ka Tariyatjalu wati panya Danielnga nyangangi war ka wiru palyalkatinyangka wati panya kutjupa kutjarangka munkara mulapa. Munu palulanguru paluru kuliningi palunya mayatja pul ka mulapa tjunkunytjikitjangku ngura nyanga uwankaraku.

⁴ Ka Tariyatjanya Danielku pukularinyangka wati panya kutjara nyararingkula pukulpa wiya alatji tu ngarangi kamanta kutjupa tjuta ku lu, munuya paluru tjana rawangku Danielnga kutjutu-kutjutu nyangangi. Alatjiya kuliningi, “Tjinguru paluru war ka ngunti palyalku, kala mayatja Tariyatjala mapalku tjakultjura, ka palunya mayatja wiyalal.” Munuya nyakula kuliningi, walangkuwi nyanga Danieltu ngunti-ngunti palyala. Palu tjana putu alatji tu nyangangi, panya paluru wati tjukaruru mulapa, tjukarurungku wangkapai munu war ka wiru palyalpai. ⁵ Munuyanku wangkara wan ingi, ka kutjungku wangkangu, “Wanyula wanti, panya paluru kura palyantja wiya tu.” Ka kutjupangku wangkangu, “Palu yaaltji-yaaltjila palyalku Tariyatjanya Danielku mirpañarinytjaku?” Ka piruku kutjupangkulpi wangkangu, “Wanyuya kulila! Wati nyara paluru panya titutjarangku palumpa God wa kulpai Jew tjutaku panya god. Utila kutjupa kutjupa palyanma, ka paluru God nyara palumpa wa lkunyangkampa Tariyatjanya palumpa mirpañariku.” Alatjiya wangkara kuliningi wati panya kamanta tjutangku.

⁶ Munuya palulanguru mayatja panya Tariyatjalakutu anu munuya wangkangu, “Mayatjan wiru mulapa. Nyuntumpala mukuringanyi mayatja nganampa titutjara nyinanytjaku! ⁷ Wanyulanya kulinma, panya nganana kamanta uwankarangku wangkara kuliningi, uti nyuntu tjukurpa law kuwaritja an angu uwankaraku palyanma tjana wanganarangku nyuntunya kulintjaku. Wanyu an angu uwankarangka wangka pira nyangangka nyuntunya kutju pupakatira wa lkuntjaku munuya god kutjupangka pupakatinyta wi yangku wantinytjaku. Palu tjinguru kutjupangku nyuntula tungunpungkula god kutjupangka tjapinnyangkampa tjaultji tjuta wangka palunya witira katira pitingka wan inytjaku lionku panya ngurangka.

⁸ “Nyanga alatji-pu ta law kuwaritja walkatjura mununku ini nyuntumpa walkatjura, ka pala palulanguru law paluru titutjara alatji tu ngaraku wi yaringkunytja wiya. Panya tjaka nganana Miitanya-ngurara tjutangku munu Puutjanya-ngurara tjutangku law nganampa tjunkupai titutjara alatji tu ngaranytjaku wi yaringkunytjaku wiya.” Alatjiya wangkara wituwituningi mayatja panya Tariyatjanya.

⁹ Ka mayatja panya paluru palyanmanu kuli ra, kaya law palunya walkatjura palunya ungu, kanku ini tjaru walkatjunu.

¹⁰ Ka Danieltu kulinu law tjana tjunkunytja munu paluru ngurakutu ankula ruuma katutjangka tatinu munu window-nga itingka tultjun garakatira Godala tjapiningi ala Jerusalemalakutu nyakula. Nyanga alatji panya paluru tjakangku ankula palumpa ruumangka tjapilpai tjintu kutjupa tjintu kutjupa mungawinki munu ka la la munu mungangka ku lu Godanya walkuntjikitjangku.

¹¹ Kaya wati panya kamanta tjuta tjunguringkula Danielku ngurakutu anu munuya palunya kumpira nyangangi Godala tjapinnyangka, panya paluru alpamilantjaku ngatjiningi. ¹² Munuya nyakula wantira anu mayatja Tariyatjalakutu munuya wangkangu, “Nyuntu panyan law palyanu anangu uwankaraku pira nyangangka nyuntunya kutju walkuntjaku munu god kutjupa walkulwiyangku wantintytjaku anangu kulu. Ka panya anangungku kuliwiyangku wantinyangka nyuntu wangkangu wati nyuntumpa tjaultji tjutangku anangu palunya witira lionpa tjutangka wanintytjaku.”

Ka mayatjangku wangkangu, “Uwa, mulapa ngayulu law pala palunya palyanu nganampa, ka law paluru titutjara alatjitu ngaraku wiaringkunytja wiya.”

¹³ Ka palulanguru wati panya kamanta tjutangku mayatjangka wangkangu, “Wati nyara Danielnga panya Judah-languru katintyta, nyara paluru nyuntula tungunpunganyi munu law panya nyuntu palyantja kulintja wiyangku wantira palumpa godangka rawangku tjapini tjintu kutjupa tjintu kutjupa mungawinki, kaala munu mungangka kulu. Ka alatji palyannyangka law panya paluru ngaranyitu lionpa tjutangka wanintytjaku.”

¹⁴ Ka mayatjangku nyangatja kulira pulkara tjituru-tjitururingu, panya paluru Danielku pulkara mukuringu. Munu paluru rawangku kulira mungartjiringu, “Yaaltjingaraña palunya wankarunkuku?”

¹⁵ Palu wati kamanta tjuta panya Danielku kuraringangi munuya mungartji tjunguringkula anu mayatjakutu munu wangkangu, “Mayatjan wiru! Nyuntu panyan law palatja palyanu anangu uwankaraku. Ka tjaka panya nganaña law palyara titutjarangku kanyilpai wantintytja wiyangku, kaya anangu uwankarangku uti titutjarangku wangañarangku kulinma wantintytja wiyangku, nyuntu kulu.”

Godalu Danielnga lionpa tjutangka wanintyangka wankarunkunytja

¹⁶ Ka palulanguru mayatjangku tjaultji tjuta witunu ankula Danielnga witira lionpa tjutaku ngurangka wanintytjaku pitj pulkangka unngu. Palu wanintytja kuwaripangka mayatjangku Danielta alatji wangkangu, “Nyuntu panya god nyuntumpangka wangañarangku alatjitu kulilpai, kanta tjinguru paluru nyuntunya wankarunkuku.”

¹⁷ Munuya Danielnga wanintytjatanungku malangka puli taanpa pulkanya angatjunu pitj panya alangka, ka mayatjangku puli panya palula kitj palumpangka kititjura wantingu anangu tjutangku nyakula wantintytjaku tjana alara Danielnga alpamilantjaku-tawara, kaya palu purunypatu wati kamanta tjutangku ngapartji tjanampa kititjura wantingu.

¹⁸ Ka mayatja panya ngurakutu anu munu mai ngalkuntja wiya nyinangi, munu paluru inma kutjupa kutjupa wantingi alatjitu kungkawaña tjuta nyantpinyangka uwankara wantingi alatjitu. Munu paluru mungangka Danielnga rawangku kulira putu alatjitu kunkunaringi.

¹⁹ Munu mungawinki mayatja panya pakara wala winki anu lionku panya pitikutu. ²⁰ Munu ilaringkula paluru mirara tjapinu, “Wai, Daniel! Nyuntu panyan God Wankanya wangañarangku kulilpai. Panya nyuntu palumpa wirura warkaripai, kanta wankaru kanyiningi lion tjutangku patjantjaku-tawara?”

²¹ Ka Danieltu wangkangu, “Mayatjan wiru mulapa. Nyuntumpa mukuringanyi mayatja titutjara nyinanytjaku! ²² God panya ngayulu

walkulpainya ngayuku ninti, panya ngayulu kura palyantja wiyat . Ka paluru angelpa iyanu lionpa tjuta tjaa patintjaku, ka i ya tjana ngayunya patjantja wiyangku wantingi. Palu mayatjan wiru, ngayulu panyan  nyuntunya kurantja wiyat .”

²³ Ka mayatja panya Tariyatjanya wangka kulira pulkara pukularingu munu palumpa warkaripai tjuta wangkangu Danielnga pitenguru ilara pakaltjingantjaku. Ka paluru pika pirintja wiya, patjantja wiya alatjitu pakanu, panya paluru Godaku mulamularingkupai, ka palulanguru palunya Godalu atunyntju kanyiningi.

²⁴ Ka Tariyatjalu palumpa tjaultji tjuta wangkangu wati kamanta panya Danielnga kuralpai tjuta witira ngalya-katinytjaku pitikutu munu kuri tjuta, tjitji winki kulu. Kaya mulapatu palunya tjananya katira piti panya palula wa ingu lionpa tjutangka, kaya lion tjutangku anangu panya palunya tjananya punkara ukalingkunyangka katut  patjanu munu tjananya uwankara ngalkula wiyan  tarka kulu.

Mayatja Tariyatjalu anangu winki wituntja Danielku God walkuntjaku

²⁵ Ka Mayatjangku panya wangka iyanu anangu ngura winkikutu wangka kutjupa kutjupakutu manta winkikutu nyanga alatji walkatjura:

“Ngayulu mukuringanyi nyura pukularinytjaku munu nyurampa uwankara wiru mulapa ngaranytjaku.

²⁶ Nyangatja ngayulu kuvari nyuranya wangkanyi nyura uwankarangku Danielku Godanya ngulungku kulintjaku munu palunya mirawa ira walkuntjaku.”

“Paluru panya wanka mulapa

munu panya ti utjara wanka nyinanyi.

Paluru mayatja pulka mulapa uwankarangka waintara alatjitu,
ka palunya kutjupangku pu u wiyalu,

Paluru mayatja ti utjara nyinaku wiyaringkunytja wiya alatjitu.

²⁷ Paluru panya anangu tjuta wankarunkupai

munu miracle tjuta palyalpai ilkar ingka munu mantangka kulu.

Paluru panya Danielnga wanka unu lionpa pulka tjutanguru.”

²⁸ Uwa, Tariyatjanya mayatja pulka nyinanyangka Danielnga palula rawa warkaringi mayatja ititja, munu piruku mayatja kutjupa ini Tjairatjanya nyinanyangka Danielnga mayatja u warkaringi palula itingka. Wati panya Tjairatjanya ngura ini Puutjanya-ngura a.

7

Danieltu mamu kutjara kutjara tjukurmara nyakunytja

¹⁻² Panya nganmanypa wati Piltjatjanya ngura Papilanku mayatja pulka nyinanyangka Danieltu tjukurmanu kunkunpa ngarira, munu nyakunytjatjanungku walkatjunu alatji, “Ngayulu ngarira nyangu walpa pulka mulapa wangkanyangka kakar anguru wiluraranguru alintjaranguru munu ulpariranguru munu paluru uru pulka uritjinganu pulkara mulapa.

³ Ka mamu kutjara kutjara pulka mulapa paka u uru ngatinguru, ka a nyakula ngulu-nkuluringu. Mamu paluru tjana kutjupa kutjupa mulapa.

⁴ “Ka mamu kutju lion pulka purunypa ngarangi walawuruku nyalpitjara. Ka ngayulu nyakunyangka kutjupangku palumpa tjananguru nyalpi winki ilara wa ingu, ka katuringkula wati purunypa paltjura ngarangi, munu paluru kulilpairingu anangungku kulintja purunypa.

⁵ “Munuña piruku mamu kutjupa ngapartji nyangu bear purunypa, ka paluru katuringkula ngalya-pupangi, munu paluru kuka kantilypa mañkurpa patjara katitingga kanyiningi. Ka kutjupangku bear palula wangkangu, ‘Pakara anangu tjuta mulapa ngalkula paltjariwa.’

⁶ “Palulanguruña piruku nyangu mamu kutjupa ngapartji leopard purunypa kata kutjara kutjaratjara, munu paluru tjulpuku nyalpi kutjara kutjara tjañangka kanyiningi. Ka kutjupangku mamu palunya tjunu anangu tjuta mayatjarira kanyintjaku.

⁷ “Munuña piruku kutju-aralta nyangu mamu malatja. Paluru kuŋpu pulka mulapa, panya tjanala waintara. Kanä nyakula pulkara alatjitu kurunpa unngu nguluringu. Panya paluru katiti ayanatjara pulka mulapa uwankara patjara minya-minyalpai munu tjinangku kantura katantankupai. Paluru yuruwilya 10-tjara kutjupa mulapa.

⁸ “Ka ngayulu yuruwilya 10 palunya tjananya nyakunyangka yuruwilya kułunypa ngalya-pakaningi ngururpa, ka kutjupangku yuruwilya panya mañkurpa warpura wañingu yuruwilya panya kułunypa pakantjaku. Ka yuruwilya kułunypa paluru kurutjara munu tjaatjara ngarangi anangu purunypa munu paluru kañany-kañanytju miral-miraltu wangkangi.”

Danieltu God Titutjara Wanka Nyinapainya tjukurmara nyakunytja

⁹ Munu Danieltu piruku wangkangu, “Palulanguruña nyangu kutjupangku mayatjaku tjiya wiru tjuta tjunkunyangka. Ka mayatja panya Titutjara Wanka Nyinapainya tjiya kutjungka nyinakatingu anangu tjuta ngurkantankunytjikitja. Palumpa panya mantara piranpa mulapa nyinnga purunypa munu mangka palu purunypaṭu piranpa mulapa. Ka palumpa tjiya wirunguru waru tili tiitiilarara wañanalingi, ka tjiya paluru wiilatjara, ka wiila palula tjanalanguru kuļu waru tili tiitiilarara wañanalingi. ¹⁰⁻¹¹ Ka waru uru purunypa palulanguru ukalingangi, Titutjara Wanka Nyinapailanguru. Ka angelpa mungili mulapa palula kuranyu ngarala wañara palumpa palyanalingi. Ka kuutpa tjaataringu anangu tjuta ngurkantankunytjaku, kaya nyiri tjuta aļaņu. Kanä uwankara nyakula waintara nyangu yuruwilya panya kułunypangku kañany-kañanytju wangkanyangka, ka ngayulu nyakunyangka mamu panya palunya kutjupangku iluntanu, panya anangu tjuta ngalkula wiyalpaynya, munu palunya warungka tjarpatjunu kampara piltira wiyan-tjaku ka mulapatu piltiringkula mulururingu. ¹² Kaya mamu panya kutjupa mañkurpa mayatja pulka nyinanytjatjanu tjukutjukuringu, panya kutjupangku tjananya tjarunu, palu tjananya iluntankunytja wiyangku wantingu tjukutjuku rawa nguwanpa nyinanytjaku.

¹³ “Kanä kuwaripangkuña nyangangi munuña kutjupa ngangkalingka pitjanyangka nyangu watiku katja purunypa. Kaya palunya Godalakutu ma-katingu Titutjara Wanka Nyinapailakutu. ¹⁴ Ka palunya pukultu mirawañira mayatja pulka mulapalta tjunu manta winkitjaku mayatja nyinanytjaku, anangu ngura winkitjangku palunya wanganarangku kulira walkuntjaku wangka kutjupa kutjupangku, miri kutjupa kutjupangku. Ka paluru titutjara alatjitu nyinaku mayatja pulka mulapa ka kutjupangku palunya puťu wiylaku. Alatjina tjukurpa nyangu.”

Angeltu Danielta tjukurpa utira wangkanytja

¹⁵ Munu Danieltu piruku wangkangu, “Uwa, ngayulu pulkara nguluringu munuña puťu kuliningi tjukurpa nyangatja nyakunytjatjanungku. ¹⁶ Mununa angelpa tjutakutu ma-ilaringkula kutjungka tjapinu, ‘Tjukurpa nyanga paluru nyaa wanyu nintini?’ Kanä angeltu utira

wangkangu nyanga alatji, ¹⁷ ‘Mamu panya kutjara kutjarangku nintini wati kutjara kutjarangku ma-kunpuringkula aŋangu tjuta mayatjarira kanyintjaku. ¹⁸ Palu mayatja panya paluru tjana ngarala ma-wiyaringkunyangka malangka God Katutja Pulkalu palumpa walytja tjuta mayatja tjunkuku tjana mayatjarira tiutjarangku atunymara kanyintjaku.’ Alatjini angeltu tjakultjunu.

¹⁹ “Kaŋa mukuringangi angeltu mamu panya malatja kuŋu utira wangkanytjaku. Panya mamu paluru kutjupa mulapa pulkara nguluringkunytjaku, mamu nyara maŋkurta waintara alatjitu. Panya paluru katiti ayanangku munu mara purantjingku* aŋangu tjuta warpura muŋun-muŋunmankupai munu ngalkupai munu tjara kutjupa tjinangku kantura pilkilpai. ²⁰ Mununa mukuringangi yuruwilya panya 10 kulu kulira nintiringkunytjikitja mamu panya palula katangka ngaranytjanya munu yuruwilya panya kuŋunyapa ngururpa pakantja kuŋu, panya kutjupangku yuruwilya panya maŋkurpa warpura waŋingu yuruwilya kuŋunyapa paluru pakantjaku. Kuŋunyapa paluru panya witulya pulka mulapa munu kuŋu aŋangu purunyapa paluru rawa kaŋany-kaŋanyapa wangkapai. ²¹ Kaŋa rawangku nyangangi yuruwilya panya kuŋunyapa paluru aŋangu Godaku walytja tjutaku pikaringkula waintarinyangka. ²² Palu Katutja Pulkalu, Tiutjara Wanka Nyinapailu, pitjala palumpa walytja tjuta nyakula tjukarurunmanu, munu tjananya mayatja tjuŋu tjana mayatjarira uwankara atunymara kanyintjaku.

²³ “Munu paluru ngayula alatji utira wangkangu, ‘Panya mamu nyara malatjangku nintini mayatja pulka ngula pakantjaku. Mayatja nyara paluru pakara aŋangu tjuta mayatjarira kunpungku kanyilku ngura tjuta mulapa, mayatja panya nganmanyitja maŋkurpa purunyapa wiya, panya paluru manta winkingka ngura munu aŋangu tjuta minya-minyaŋa kantura wiyaliku. ²⁴ Ka mayatja nyara palula malangka mayatja kutjupa tjuta pakalku 10-pa kutjupa ngapartji ngura panya tjuta kanyintjaku. Panya yuruwilya panya 10-pangku nyanga palunya nintini. Ka palula tjanalan-guru mayatja kutjupalpi pakalku munu paluru kuŋpu pulkaringkula mayatja nganmanyitja maŋkurpa wiyaliku. Nyanga palunya panya yuruwilya kuŋunypangku nintini, panya paluru ngururpa pakannyangka yuruwilya kutjupa maŋkurpa kaŋakatingu. Ka mayatja nyara paluru kutjupa nguwanpa nyinaku kura pulka mulapa, mayatja nganmanyitja tjuta purunyapa wiya. ²⁵ Munu mayatja nyara paluru God Katutja Pulkanya kurara pungkuku munu aŋangu panya Godaku walytja tjuta kuŋu kuralku munu pungkuku. Munu paluru kulikku Godaku tjukurpa tjuta kampa kutjupankunytjikitjangku, munu inma tjuta kuŋu panya Godalu tjananya ungkunytjtja. Ka Godalu mayatja palunya markuntja wiyangku wantiku, ka yiya kutjara kutjara nguwanpa nyara paluru Godaku walytja tjutalta mayatjarira kuralku. ²⁶ Palu kuutpa nyara ilkařingka Godalu mayatja panya palunya pulkara wangkara kuranmankuku, ka paluru mayatja ngaranytja wiyingkuku alatjitu. ²⁷ Ka palulangurulta God Katutja Pulkalu palumpa walytja tjutalta mayatja tjunkuku, ka tjana mayatjarira manta winki tiutjarangku atunymara kanyilku ngura uwankara. Ka mayatja kutjupa uwankarangku palunya walkalku munu palula kutjungka wanganarangku kulikku.’ Alatjini angeltu utira wangkangu.

²⁸ “Uwa, nyanga alatjina ngarira tjukurpa nyangu mununa pulkara alatjitu nguluringu mununa yunpa kutjuparingu, mununa kutjupangka

* ^{7:19} Purantji panya ini English bronze wituwitu ayana purunyapa

wangkawiyangku alatjiṭu wantingi munuṇa unngu kutju kuliningi.”

8

Danieltu tjipi rama munu nanikuta kuļu tjukurmara nyakunytja

¹ Uwa, mayatja panya paluruṇu nyinangi wati panya Piltjatjanya, kana palumpa panya war̄karingangi. Ka yiya kutjara ngarala wiyaringkunyangka ngayulu pirukutu tjukurpa nyangu. ² Munuṇa nyangu ngayulu ngaranytja manta ini lila mala ngura tawunu pulkangka ini Tjuutjala. Panya tawunu nyara palula wall waṛa pulka para-arintaṛa ngarangi anangu tjuṭa anga-kanyintjaku. Munuṇatju ngayulu walytjangku nyangu ngayulu ngaranytja karu ini Ulaila itingka tawunu nyara palula ngururpa. ³ Munuṇa nyangu tjipi panya rama yuruwilya waṛa kutjaratjara uru pala palula itingka ngaranyangka. Ka yuruwilya kutju waṛa nguwanpa ngarangi kutjupangka waintara. ⁴ Munuṇa nyangu rama paluru para-wirtjapakannyangka wilurara, alinytjara, ulparira. Rama paluru pikangku uwankara yuruwilyangka para-pungangi, ka palunya kutjupa tjuṭangku puṭu angatjunangi ngalkiltu, ka paluru tungunpungkula alatjiṭu pungkula pungkula kaṇany-kaṇanyaringu.

⁵ Kana ngayulu nyangatja nyakula ngarala kuliningi, ka nanikuta nyitayira wilurāranguru wati-wirtjapakaningi wala winki alatjiṭu katuwanu manta pampuntja wiya. Ka nyara palula yunpangka kuru kutjarrangka ngururpa yuruwilya kutju ngarangi wara pulkanya. ⁶⁻⁷ Munu paluru rama panya palulakutu wirtjapakaṇu mirpanpa alatjiṭu palunya pungkunytjikitja. Munu palunya piča pulka pungu munu palumpa yuruwilya kutjara katantanu. Munu palunya pungkula punkatjingara kantu-kantura ngarangi palula katu. Kaya kutjupa tjuṭangku rama palunya puṭu ngalkiningi panya nanikuta nyaratja kuṇpu pulka. ⁸ Munu palulanguru ma-kunpuringkula wituwitu pulka mulararingu munu kaṇany-kaṇanyaringu. Palu paluru kuṇpu pulkarinkunyangka palumpa panya yuruwilya katakatingu, ka kaṭakatinyangka palumpa arangka yuruwilya kutjara kutjara piruku pakanu munuya wilitjunangi wilurara, alinytjara, ulparira munu kakarara.

⁹ Uwa, panya yuruwilya kutjara kutjara ngarangi, ka piruku yuruwilya kutjunguru tjukutjuku kutjupa pakanu munu pulkarinkula paluru mayatja kuṇpu pulka mulararingu ngura winkiku ulpariratjaku kakararatjaku munu ngura panya wiru Israelku kuļu. ¹⁰ Munu rawa kuṇpu pulkarinkula ilkaritja tjuṭangka wirkanu kililpi panya tjuṭangka munu tjananya kutjupatjara mantjira mirpanṭu waṇingi mantakutu munu kantura ngarangi. ¹¹ Paluru ilkaritja tjuṭaku Mayatja pulkangka tungunpungu alatjiṭu munu palurunku walytjangku kutju mirawaṇingi. Munu paluru uwankara tjananya markunu kuka timpulakutu katira Godanya tiliwakara ungkunytja wiyangku wantintjaku, munu paluru timpula panya milmilta kutjupa kutjupa tjunkula kuraṇu. ¹² Kaya mulapatu anangu tjuṭangku timpulangka tjarpala Godanya ungkunytja wiyangku wantira kuraringu, ka kura kutju ngarangi. Uwa, yuruwilya panya paluru Godaku tjukurpa tjukaruru wantingu mununku walytjangku kuliṛa mukuringkula kura kutjupa kutjupa tjuta rawangku alatjiṭu palyaningu.

¹³ Kana tjukurpa nyanga palunya nyakunytjatjanungku kulinu angelpa kutjungku angelpa kutjupangka tjapinnyangka alatji, “Yaaltjiṭu aṛa kura nyanga tjuṭampa utiringkula ngaraku? Yaaltjiṭu arangkuya kuka panya timpulakutu katintjya wiyangku wantiku? Kura nyanga tjuṭangku

timpula nyangatja yaaltjitu arangku kurani munuya añangu tjuta paini walkuntjaku-tawara?"

¹⁴ Ka angelpa panya kutjupangku wangkangu, "Nyanga paluru ngaraku tjintu 2,300, ka palula mañangka añangu tjuñangku timpula nyaratja kilinara milmankuku Godanya piruku walkuntjikitjangku."

Angel Gabrielu Danieltu tjukurmankunytja utintja

¹⁵ Munu Danieltu piruku walkatjunu nyanga alatji,

Kana tjurkurpa nyangatja nyakunytjatjanungku ngayulu putu nguwanpa kuliningi, mununa palulanguru urulyarara nyangu wati purunypa ngayula itingka utiringkula ngaranyangka. ¹⁶ Mununa kulinu wangka watingku wangkanytja purunypa uru unngunguru karu panya Ulailanguru alatji mirara wangkanyangka, "Gabriel! Tjukurpa nyangatja Danielta utira wangka!"

¹⁷ Ka panya paluru ngayula itingka ngaranytjanya ilaringkula ngalyapitjangu ngayulakutu, kana pulkara nguluringkula mantangka yunpanguru punkanu kani paluru wangkangu, "Watiku katja! Kulila! Nyangatja panya tjintu mañatjaku tjukurpa panya ngula manta winki wiyingkuku."

¹⁸ Ka paluru ngayula ngarala wangkanyangka ngayulu kulira mapunkara ilunytja purunypa alatjitu ngaringi yunpangku manta pampura. Kani paluru pampura pakaltjingara ngaratjunu, ¹⁹ mununi wangkangu Gabrieltu alatji,

"Kulila wanyu, kañanta wangka nyaaringkuku ngula tjintu malatjangka, panya nyara palula arangka Godanya mirpanariku palunya wantipai tjuñaku. ²⁰ Panya yuruwilya kutjara tjiipi panya ramangka ngaranytjalu nintini mayatja pulka kutjara Miitanya-ngurara tjuñaku munu Puutjanya ngurara tjuñaku. ²¹ Ka panya nanikutangku nintini manta ini Greece-anja, ka yuruwilya warangku nintini Greece-aku mayatja kuranyitja. ²² Ka panya yuruwilya wara kañakatinyangka piruku yuruwilya kutjara kutjara pakanu, nyara paluru tjanaya nintini mayatja kutjara kutjara utiringkunytjaku, palu tjanaya nintini mayatja kutjara kutjara tjuñaku.

²³ Munu paluru tjanaya mayatja pulka rawa nyinanytjatanu makurakuraringkula kura mularariku, ka palumpa tjanampa witulya mawiyaringkuku. Ka wati kutjupa ngapartji mayatjariku pulka mulapalata kañany-kañanypa munu pala paluru unngu mirpanpa ngarala mukulyangku-palku añangu tjuta ngunti kuralku. ²⁴ Ka Godalu palunya kunpu pulkaringkunytjaku palyalku, ka paluru kura pulka mulapa palyalku munu ngura winitja pungkula uwankara nyarulku. Munu palulangurulta mayatja panya pulka tjuta wiyalku, Godaku walytja tjuta kulu. Uwa, paluru walytjangku kulira mukuringkula kura pulka tjuta rawangku palyalkatiku. ²⁵ Munu paluru palyangku-palku añangu tjuta ngunti kuralku munu palurunku walytjangku mirawañiku, 'Ngayulu pulka mulapa kutjupa uwankarangka waintara.' Kaya añangu tjuñangku kulilku, 'Munta-uwa-manti, tjinguru mayatja nyanga paluru nganañanya wirura kanyilkku.' Palu alatji wangkanyangka mayatja paluru tjananya pungkula wiyalku. Munu paluru God Mayatja Katutjanya kulu anara kurara pungkuku, ka palunya Godalu kutjungku wiyalku.

²⁶ Uwa Daniel, tjukurpa nyanga ngayulu nyuntunya tjakultjunkunytja mulapa utiringkuku, panya ngula añangu tjuñangku kuka timpulangka katira

Godanya ungkunytja wiya ngaraku tjintu 2,300*. Palu tjukurpa nyangatja kumpilpa kanyinma, panya nyanga paluru ngula kutju utiringkuku.” Alatji Gabrieltu ngayula wangkangu.

²⁷ Kaña nyanga palulanguru tjukurpa nyakula ngayulu paku pulkaringkula uparingu mununa tjintu mankurpa puṭu pakara ngaringi. Mununa palulanguru pakara mayatja panya Piltjatjaku ankula war̄karingi. Palu ngayulu tjukurpa nyanga palunya nyakunytyatjanungku kurunpa iniringkula puṭu kuliningi.

9

Danieltu Godala tjapiningi

1-2 Ka wati panya Tariyatjanya Papilanku mayatja nyinangi. Wati nyara paluru panya Miitanya-ngurara wati ini Tjukitjiku katja. Ka wati paluru mayatja yiya kutju nguwanpa nyinanyangka ngayulu nyiri Godaku tjukurpa nyakula riitamilaningi panya wangkatjara Jeremiah-lu alatji walkatjunkunytja, “Ngura nyara Jerusalemania yiya 70-kutu tiṭutjara katalypa ngaraku.”

³⁻⁴ Ka ngayulu nyangatja kulira pulkara tjituru-tjitururingu, mununa palulanguru ngayulu mantara yakutjitungka kurakurangka tjarpara tjunpangka nyitnu mununa mai ngalkuntja wiya rawa nyinangi mununa Mayatja Godala alatji tjapiningi,

“Mayatja God Pulkanya, nganana kurangku nyuntula kulintja wiya rawa tungunpungangi. Wanyulanya kalypangku wantima pungkunytja wiyangku. Panya nyuntu witulya* pulka mulapa nyinanyi nganana kurunpa winki nguluringkunytjaku. Nyuntu panyan ngananaanya kalkuntjatjanungku palyalpai alatjitu, munu panyalanyan rawangku mukulyangku atunymanupai nganana nyuntumpa mukuringkunyangka munu nyuntunya wanganarangku kulinnyangka.

⁵ Palu nganana tjukaruru nyinanytja wiyat, munula nyuntula tungunpungkula kura tiṭutjarangku palyalkatingi nyuntumpa ara tjuṭa kulira wantira alatjitu. ⁶ Munu panyala tjukurpa wangkatjara tjutangku wangkanytjtja kuļu kulira wantingi. Panya wangkatjara paluru tjana nganampa mayatja tjutangka wangkangu munu nganampa tjamu tjutangka kuļu, panya iritiya nyinangi, munu ngananaala uwankarangka kuļu wangkangi nguraratja tjutangka, palu nganana tjanala uwankarangka kulintja wiyangku wantingi.

⁷ Mayatja, nyuntu tiṭutjara tjukaruru nyinanyi. Palu nganana uwankara nyuntula tungunpungangi kulintja wiya alatjitu munula nyangatja kulira kuwari pulkara kunṭaringanyi. Nganana panya ngura kutjupa kutjupa tjutangka nyinara nyangatja kulini. Tjara kutjupala Jerusalemala nyinanyi, tjara kutjupala Judah-la nyinanyi, ka panya tjara kutjupa tungunpungkunyangka nyuntu Israeltanguru parari iyanu ngura kutjupa tjutakutu, kala ngura nyara palula tjanala kuļu nyinara kuwari nyuntula piiwiaringanyi. ⁸ Uwa Mayatja God, nganana munu nganampa walytjapiti nganmanyitja tjuṭa nyuntula tungunpungkunytjatjanulta kuwari pulkara kunṭaringanyi nganampa mayatja pulka tjuṭa kuļu. ⁹ Palu Mayatja God, nyuntu panya mukulya ngaltunytyu tiṭutjara nyinapai, munun nganana kurantjitungku ngapartji pungkuwiyangku wantipai. ¹⁰ Panya wangkatjara nyuntumpa tjutangkuya ngananaala tjakultjunangi nyuntumpa ara tjuṭa, kala kulira wantingi alatjitu.

* 8:26 Danielku 8:14 * 9:3-4 Witulya panya “powerful.”

11-12 Uwa, aŋangu Israelkunu uwankaraya nyuntula tungunpungku-pairingu munuya nyuntumpa tjukurpa kulira alatjitu wantingi. Ka panya nyuntu Moseku tjukurwanungku ngañmanyju wangkangu alatji, ‘Nyura ngayulu kulintja wiyangku wantinyangkampaña ngayulu nyuralakutu kura pulka iyalku.’ Munu panyan nyuntu mulapañu kalkuntjatanungku tjukarurungku palyaňu, ka mulapañu ngura nyara Jerusalemala kura pulka nganañala utiringu nganampa mayatja tjutangka kuľu. Uwa mulapa, kura pala palu purunypa ngañmanypa ngaranytja wiyatju, **13** panya Moselu nganañala wangkangu nyanga alatji, ‘Nyura Mayatja Godala kulilwiyangku wantinyangkampa paluru kura pulka mulapa iyalku.’ Alatji paluru wangkangu, ka mulapañu kuwari nyangalta nganañala kura utiringu. Palu kura panya nganañala utiringkunya nganañala nyuntula tjapilwiyangku wantingi nyuntu nganampa ngalturingkunytjaku. Munula kura wantinytja wiyangku tiťutjarangku palyalkatingi, munula watarkuringu panya nyuntu wangkara kalkuntjatanungku palyalpai alatjitu. **14** Uwa mayatja, panya nganañala nyuntumpa watarkurinyangka nyuntu nganañanya nyangangi alatjitu, munu panyan tjukarurungku kura nyangatjalta angatjunkuwiyangku wantir’iyanu nganañala kulira wantinyangka.

15-16 Mayatja God, mulapa panyan nyuntu iriti nganampa waltyjapiti Itjipalanguru wankarunu Moselawanungku, kaya uwankarangku nyuntunya kulinu nyuntu witulya pulkangku wankarunkunyangka. Kala kuwari nyanga nyuntunya palu purunypa Kulini panya nyuntun witulya pulka mulapa ngaranyi. Palu nganañala munu nganampa waltyjapiti tjutangku kura pulka mulapa palyalkatingi. Ka kuwari aŋangu panya ngura ititja tjutangku nganananya kurara alatjitu punganyi ngura milmilpa Jerusalemanya kuľu. Iriti panyan nyuntu nganampa waltyja tjuťa wankarunu, kalampa wanyu nganampa ngarpatji ngalturingama munulampa mirpanariwyangku wantima.

17 Mayatja God, wirungkunitju kulinma nyuntula ngatjinnyangka. Panya tjanaya nyuntumpa timpula Jerusalemala minya-minyaňu,* ka małakungku wanyu palyanma nyakula tjana nyuntunya Mayatja witulya pulka mirawaninytjaku.

18 Mulapa Mayatja, wirungkunitju kulinma. Ngura panya nyara Jerusalemala wali uwankaratu minya-minya ngaranyi, ka nyuntu wanyu małakungku wirungku palyala. Mulapa nganañala nyuntula tungunpungkula nyuntunya kuraningi munu nyangala kuwari kurangkuťu nyuntula tjapini, kalampa wanyu ngalturingama mayatja mukulya pukultju pulka. **19** Uwa Mayatja, kulinmalanya munulanya kaly pangku pungkuwyangku wantima. Nyangatja panya nyuntumpa ngura munu nyuntumpa waltyja tjuťa nyinanyi. Ka wanyu warpungkula małakungku palyala aŋangu tjutangku nyuntunya Mayatja pulka mulapa ngurkantara kulintjaku.” Nyanga palunyana Godala tjapiningi.

20 Mununa ngayulu piiwyaringkula piruku Godala tjakultjunangi panya nganañala Godaku waltyja tjutangku tungunpungkula kura palyantjitjangantru, mununa ngayulu rawangkuťu tjapilkatingi ngalturingkunytjaku ngura nyara milmilpa Jerusalemaku. **21** Mununa ngayulu tjapiro tjapiro mungartjiringu, ka angel Gabrielnga mapalku ngalya-wirkana watipanya

* **9:17** Panyatja kulinma panya Papilaniyanya ngurara tjutaya warmalarira anu Israeltakutu munuya Jerusalemala tjarpala aŋangu tjuťa pungkula tjanampa ngura katantara minya-minyaňu Godaku timpula kuľu.

tjukurtjara tjutangku Godanya kuka tiliwakara ungkunytja-arangka. (Angelpa nyanga palunya panyaña nganmanytju tjukurmarा nyangu.)

Angeltu Danieltu tjakultjunkunytja

²² Kanı paluru ngayula wangkangu, “Daniel, pitjanguña nyuntula tjukurpa Jeremiah-lu walkatjunkunytjtja pala wangkara utintjikitja.

²³ Panya nyuntu Godala tjapinnyangka palurunta nyuntunya kulirę palyanmanu munuńi nyuntulakutu wituńu, ka nyangaña pitjangu nyuntula tjakultjunkunytjtja, panya Godanya nyuntumpa pulkara mulapa pukularinyi. Ka tjukurpa panya nyuntu nyakunytjtja purkarangku atatjura kulinma nintiringkunytjikitjangku.

²⁴ “Panya Godalu mulapa nganmanytjulpi nyurampa kuliningi nyanga alatji, ‘Kuwari yiya panya tjuńa ma-ngeŕala wańalku 490-kutu, ka yiya pala palula tjanala ngayulu nyuranya kuranguru kalypangku wantir’iyalku, mununatju nyuranya wirunmara kanyilku nyura kura palyantja wiyaringkula tjukarururingkula palyanyku nyinanytjaku. Mununa nyurampa ngura kułu wirulku ngura panya Jerusalemania ngayuku timpula kułu. Uwa, tjukurpa panya wangkatjara Jeremiah-lu wangkanytja* munu panya nyuntu tjukurmarा nyakunytjanya kułu mulapatu utiringkuku. Kaya timpula panya palunya piruku małakungku milmilmara palyalku Godaku kutju alatjitu milmilpa mulapa ngaranytjaku.’

“Alatji ngayula angel Gabrieltu tjakultjunu Godalu panya kulintjtja. Mununi pirukuńu wangkangu alatji, ²⁵ ‘Kulinma nyangatja, panya Godalu Jerusalemania piruku palyantjaku wangkaku. Ka yiya 49 ngarala wiyaringkunyangka małangka wati panya Godalu milmilmara tjunkunytjanya* pitjaku. Kaya nyara palula arangka anangu panya tjutangkulta tjaatarira warķa palyalku, munuya Jerusalemania wali uwankara wiru mulapa palyalku iwara wirutjara, munuya wallpa kunpu pulka mulapalta palyalku para-arintara ngaranytjaku. Ka ngura nyara paluru tiutjara witu mulapa ngaraku yiya 434-kutu-wangkara. Palu yiya nyara palula tjanala kutjupa tjutangku Godaku walytja tjuńa rawangku arkara kuralkatiku. ²⁶ Ka yiya nyara 434 palula ngarala wiyaringkunyangka wati mayatja kutjupa witulya pulkatjarangku warmala iyalku, kaya wala winkingku tjarpata ngura nyara palunya minya-minyara wiyalku timpula kułu. Munuya wati panya Godalu milmilmara tjunkunytjanya iluntankuku, ka kutjupa palumpa arangka nyinakatinyta wiya alatjitu ngaraku. Kaya warmala winkingku uru pulkangku purunytju pikangku pungkukatiku rawangku munuya uwankara pungkula nyarulku. Uwa, nyanga paluru mulapa utiringkuku Godalu panya wangkara kalkuntjanya.

²⁷ “‘Ka wati nyara mayatjangku anangu tjutangka ngunti palyangkupalku kalkura wangkaku tjananya atunymara kanyintjikitjangku-palku yiya 7-kutu, palu yiya panya mańkurnguru munu pira panya 6-nguru paluru kulintja kampa kutjuparira anangu tjuńa markulku kuka timpulakutu katira Godanya ungkunytjaku-tawara. Munu mayatja paluru kutjupa kutjupa kura pulka mulapalta timpulangka katu tjunkuku, ka nyara palulalta ngaraku tiutjara munu ngulalta wiyaringkuku Godalu

* **9:24** Wangkatjara nyanga paluru panya Jeremiah-nya, panya Danieltu palumpa tjukurpa riitamilara puńu kuliningi, ka angel panya Gabrieltu pitjala palula utira tjakultjunangi. Nyawa 9:2. * **9:25** Iriti Godalu wati kutjupa ngurkantankupai Israekunu tjuńa mayatjarira kanyintjaku, kaya tjakangku wati palula uwila katangka tjutilpai Godalu panya milmilmara tjunkunytjanya.

mayatja panya palunya wiyannyangka kutju, panya Godalu ngañmanytju kalkuntjatjanungku palyalku alatjītu.’”

10

Danieltu piruku tjukurmara nyakunytja

¹ Ka ngulalta wati ini Tjairatjanya ngura Puutjaku mayatja nyinanytja arangka Godalu ngayula tjukurpa utinu. (Panya ngayulu ini Danielnga mununa ini kutjupa Piltatjatjanya.) Palu tjukurpa nyara paluru wituwitu mulapa ngayulu puṭu kulintjaku. Kañi palulanguru Godalu kutjupa kutjupa nintinu ngayulu nyakula tjukurpa panya palunya tjukarurungku kulintjaku.

²⁻³ Nyara palula aṛa ngayulu tjituru-tjituru pilunpa alatjītu nyinangi weeki mañkurpa kuka ngalkuntja wiya, wama kuļu tjikintja wiya, mununatju yunpa minangka paltjintja wiya nyinangi mangka kuļu wiruntja wiyatū.

⁴ Palulanguruṇa pira panya ngañmanyitjangka tjintu nampa 24-ngka ngayulu karu urutjarangka itingka ngarangi ini Taikiritjala. ⁵ Munuña ira-nyakula nyangu wati mantara piranpa wirutjara munu pilta kaulnguru palyantjitjatjara. ⁶ Ka palumpa puntu irnyanangi puli upala nguwanpa, ka yunpa palumpa pinpa-pinpangi wanangara purunypa, kuřu palumpa waru tili purunypa, miňa munu tjalpa irnyanangi ayana panya purantji purunypa*, munu wangka palumpa aňangu winkingku wangkanytja purunypa.

⁷ Uwa ngayulu kutjungkuṇa nyanga palunya nyangu, kaya aňangu panya ngayula tjungutja tjutangku nyakunytja wiyatū, palu tjana kutjupa kutjupa kuliřa pulkara nguluringkula wirtjapakara kumpinu. ⁸ Ka ngayulu kutjungku ngarala nyangangi kutjupa kutjupa wiru mulapa Godalu ngayula utinnyangka, munuña nyakula kurunpa uparingkula wawanyaringu. ⁹ Munuña paluru wangkanyangka kuliřa nguluringkula yunpanguru punkara ngaringi mantangka kunkunpa awu mulapa.

¹⁰ Kañi kutjupangku mařa kutjungku witira pakaltjinganigi, kaña muti tjunkula mařa kutjarangku manta pampura tultjungarangi munuña muti winki tjititingangi. ¹¹ Kañi angelpangku wangkangu, “Daniel, Godanya panya nyuntumpa pulkara pukularinyi, mununi ngayunya witunu nyuntulakutu, ka pakara ngara mununi atatjura purkarangku kulila kañanta ngayulu wangkaku.”

Kaña pakara ngarala kuwaripaṭu ngulu-ngulu tjititingangi.

¹² Kañi paluru wangkangu, “Daniel, nguluringkunytja wiya ngarama, panya mungaṭun kuwaripatjara nyuntu Godala purkarangku tjapiningi, ka panya palula-arangka nyuntunya kulinu. Nyuntu panya tjapiningi paluru nyuntula utintjaku, kañi palulanguru ngayunya witura iyanu nyuntula wangkanytjaku. ¹³ Kaña nyuntulakutu pitjangi, palu angelpa panya ngura Puutjanya kanyilpaingku ngayuku iwara angatjura kanyiningi rawa nguwantu tjintu 21-kutu-wangkara, kaña puṭuliringi ankunytjikitja. Ka palulanguru angelpa panya mayatja pulka Michaelnga pitjangu ngayuku iwara alantjikitja ngayulu ankunytjaku. ¹⁴ Ka nyangaña kuvari nyuntula wirkaru tjukurpa panyatja utintjikitja, kan utilta kuliku nyaaringkuku ngula nyuntumpa walytjapitiku.” Alatjini angelpa panya Gabrieltu wangkangi.

* **10:6** Ayana panya **purantji** ini English ngaranyi **bronze**.

15 Kaña paluru alatji wangkanyangka ngayulu kata tjäuringkula manta walu-nyangangi panya puñu kuliningi wangkanytjikitjangku.

16 Kanı kutjupangku wati purunytpu tjalinypa pampunu, kaña palula wangkangu, “Ngayulu tjukurpa nyangatja nyakula pulkara nguluringkula wawanyaringu. **17** Mununa nyuntula puñu wangkanyi, panya nyuntu witulya pulka mulapa, kaña ngayulu tjukutjuku upa alatjitu mununa puñu nguwanpa ngaalymananyi.”

18-19 Kanı piruku paluru pampunu mununi wangkara kunuñunu, “Nguluringkuwiya! Godanya nyuntumpa pulkara mukuringanyi, ka nyuntumpa uwankara palya wiru ngaraku. Ala, raparingkula kunuñu ngarama!”

Ka paluru ngayula wangkanyangka ngayulu raparingkula kunuñuringu mununa palula wangkangu, “Uwa palya, panya wirungkuñin nyuntu kunuñunu, kaña kuvariñu kulintjikitja mukuringanyi.”

20-21 Kanı angeltu wangkangu alatji, “Nyaakuña-puña pitjangu nyuntulakutu? Ngayulu pitjangu tjukurpa panya palunya nyuntula wangkara utintjikitja, tjukurpa panya Godalu nyiringka walkatjura wantinytjtja. Kuvariña nyanga palula malangka malaku ananyi, mununa angelpa panya Puutjanya ngurara tjuña kanyilpaiku pikaringkuku, ka ngayulu palunya pungkula waintarinyangka angelpa kutjupa ngapartji ngura Kiritjinya kanyilpainya ngayuku piruku pikaringkuku. Palu angelpa panya mayatja ini Michaeltuñi kutjungku ngayunya alpamilalpai. Nyara paluru panya Israelkunu tjuña atunymankupai.

11

1 Panya ngayuluña palula ngañmanypa tjunguringkula palunya alpamilanigi wati panya Tarìyatjanya añangu Miitanya-ngurara tjuñaku mayatjarinyangka.” Alatji angel Gabrieltu ngayunya wangkangi.

Angeltu Danielta wangkanytja

1) Tjiriyaku Mayatja Tjuña munu Itjipaku Mayatja Tjuña Pikaringkunytja

2 Munu pirukuñu angelpa panya paluru ngayula wangkangu alatji, “Kuvariña tjukarurungku nyuntula utira wangkanyi. Panya mayatja mañkurpa kutjupa manta nyara Puutjala ngapartji-ngapartji nyinara wanalku, ka palula malangka mayatja kutjupa nyinakatiku. Nyara paluru mani pulkatjara nyinaku mayatja panya ngañmanyitja tjuñangka waintara mulapa, munu mani nyara pulkanguru paluru witulya pulkaringkuku kunuñu pulka mulapa, munu paluru kutjupa uwankara wituwitulku añangu Kiritjinya ngurara tjuñaku pikaringkunytjaku. **3-4** Palu mayatja nyara paluru wiyaringkuku, ka palumpa arangka wati kutjupa ngapartji mayatjariku munu paluru palumpa kulintjtjawanungku kutju palyalku paluru mukuringkuntjtja kutju. Munu paluru ngura kutjupa tjuñaku mayatjarira mayatja pulka mulapalta nyinaku ngura winkiku, palu pulka mulapa nyinanytjatjanu mayatja paluru wiyaringkuku. Ka wati malikitja kutjara kutjarangku tjunguringkula kuliklu mayatja panya palumpa ngura uwankara tjara-tjarara mañtalpa-mañtalpangku mayatjarira kanyintjikitjangku kutjungku kutjungku. Palu mayatja nyara paluru tjanaya upa nguwanpa nyinaku kunuñu wiya, panya wati mayatja ngañmanyitja kunuñu pulka nyinangi, palu purunyapa wiya.

5 “Ka palulangurulta mayatja panya ulpariratja ma-kunuñuringkuku manta nyara Itjipala nyinara. Ka ngula palumpa tjaultji tjuñaku mayatja

kuŋpu pułkaringkuku munu palunya pungkula palumpa arangka paluru Iitjipaku mayatjariku. ⁶ Munu paluru ngula mayatja kutjupangka tjapilku ngura Tjiriyaku mayatjangka, munu paluru pula wangkara kalkulku piruku pikaringkunytjaku wiya. Munu kalypa nyinanytjikitjangku Iitjipaku mayatjangku palumpa untalpa ungkuku Tjiriyaku mayatjangku altintytjaku. Ka kungka paluru warkaripai tjutatjara Tjiriyalakutu ankula ma-tjunguringkuku wati kuringka*. Palu malangka Tjiriyaku panya mayatjangku kungka panya palunya wantiku. Ka kutjupa tjutangku kungka palunya iluntankuku palumpa kuri munu mama kuļu panya Iitjipaku mayatja, munuya kungka palumpa warkaripai tjuṭa kuļu pungkuku.

⁷ “Ka palula malangka wati kutjupa kungka panya palumpa walytja Iitjipaku mayatjariku, munu palulanguru wati tjuṭa mulapa altira tjungulku, kaya warmalarira ankula Tjiriyaku tjaultji tjutaku pikaringkula winaringkuku. ⁸ Munuya palulanguru Tjiriyala ngarinytja kutjupa kutjupa tjuṭa mantjira Itjipalakutu malakungku katiku, panya punu milmilpa tjuta tjana wal Kulpa, munu mani pułka gold, tjilpa kuļu. Palula malangkaya tjana Tjiriyanya ngurara tjutaku pikaringkunytja wiya nyinaku yiya tjuṭa nguwanpa. ⁹ Ka ngula Tjiriyaku mayatja tjaultji tjutatjara ulpariralku ankula Iitjipanya ngurara tjutaku piruku pikaringkuku, palu Iitjipanya ngurara tjutangku tjananya pungkula malakungku iyalku alintytjara.

¹⁰ “Ka ngula mayatja panya Tjiriyanya nguraraku katja tjutangku wati tjaultji tjuṭa mulapa altiku, munuya tjunguringkula warmalarira ankuku ulparira tjanampa pika Iitjipanya ngurara tjutaku. Munuya wala winkingku ngalya-nyarulku ngura uwankaratja, munuya Itjipala wirkankuku. ¹¹ Ka tjana wirkankunyangka mayatja panya Iitjipanya ngurara pułkara mulapa tjanampa mirpanariku munu tjaultji tjuṭa mulartjara ankula tjananya pungkula wiya winaringkuku. ¹² Munu mayatja panya paluru winaringkula pułkara kañany-kañanyariku tjuṭa mulapa pungkunytjatjanu.

“Palu paluru ngula uparingkuku rawa kuŋpu nyinanytja wiya. ¹³ Ka panya Tjiriyaku mayatjangku piruku tjaultji tjuṭa mulapa altira utulunkuku winki mulapa, munuya paluru tjana mungiliyi alatjitu pikakitja malaku ankuku Itjipalakutu.

¹⁴ “Ka Daniel, nyuntumpa walytja Jew kutjupatjara palula tjanala tjunguringkuku Tjiriyanya ngurara tjutangka, panya Jew paluru tjana pikati tjuṭa munuya walytjangku palyantjikitjangku kulilku Godanya mukuringkunytjtita-palku, munuya palulanguru warmalarira Tjiriyaku tjaultji tjutangka tjunguringkuku Iitjipaku mayatjaku pikaringkunytjikitja, palu puṭuya winaringkuku.

“Ka nyara palula-arangka aŋangu Iitjipanya ngurara kutjupa tjarangku palumpa tjanampa mayatjaku kuraringkula palula tungunpungkuku.

¹⁵ “Ka Tjiriyaku panya mayatja tjaultji panya mungilyitjara malaku ankuku ulparira tjina-arangka Itjipalakutu. Munuya ngura nyara palula tawunu wallpa pułkatjarangka wirkankuku, munuya tjarpara tjananya pungkula wiya ngura tjanampangka angara nyinakatiku, kaya Iitjipaku tjaultji tjutangku tjananya puṭu alatjitu pungkula wiyaliku. Uwa mulapa, Iitjipaku tjaultji kuŋpu pułka tjutangku kuļu tjananya puṭu pungkula winaringkuku.

* **11:6** Nyanga alatji palyara Iitjipaku mayatjangku palumpa untalpawanungku Tjiriyaku mayatja kalypangku wangkaku.

16 “Kaya Tjiriyaku tjaultji tjuṭangku palumpa tjanampa kulintjitjawanungku kutju palyalku paluru tana mukuringkunytjtja, ka aŋangu panya nguratja tjuṭangku puṭu alatjtū tjananya markulku panya tjaultji kuṇpu pulka tjuṭa. Ka Tjiriyaku panya mayatja paluru Israelku kulu mayatjariku, ngura panya wiṛuku. **17** Munu paluru mayatja kuṇpu pulkaringkula lipitjaku mayatjangka wangkaku piruku tjanampa pikaringkunytja wiyangku wantintjtaku munu kalypa nyinanytjaku. Munu watu paluru piruku pikaringkunytja wiyatjangku palumpa unṭalpa kalkura ma-ungkuku Iitjipaku mayatjangku altintjtaku. Alatji paluru wangkara palyalku, palu pika palumpa tjanampa rawa alatjtū ngarakatiku wiyarungkunytja wiya.

18 “Palula malangka Tjiriyaku mayatjangku Iitjipanya wantikatira ma-pakara ngura kutjupa tjuṭakutu ankuku uru pulkangka itingka nyinapai tjuṭaku pikaringkula tjanampa mayatjarinytjikitja. Munuya nguratja tjuṭa pungkula wiyaṛa winaringkuku. Palu mayatja ngura kutjupitja tjaultji tjuṭatjarangku wirkara Tjiriyaku mayatja kaṇanya-kaṇanya nyinanyangka pakaltjingalku tjanampa mayatja wiyarungkula ankunytjaku, ka mulapaṭu paluru warpungkula ngulu ma-pakalku pulkara kūntaringkula. **19** Munu paluru małaku ngulu ankuku ngura walytjakutu Tjiriyalakutu, palumpa panya tawunu wallpa waṛa pulkatjarakutu. Munu paluru panya palumpa ngurangka wirkara nyinaku, kaya ngulalta ngurarijtja kutjupa tjuṭangku warmalarira palunya iluntankuku.

20 “Ka malangka palumpa arangka watu kutjupa nyinakatiku ngura panya Tjiriyaku mayatjarira, munu watu paluru mani pulkatjararingkunytjikitjangku watu kutjupa Israeltakutu witura iyalku mani, gold, tjlpa munu kutjupa kutjupa wiṛu tjuṭa kulu mantjira ngalya-katira palunya ungkunytjaku. Palulanguru mayatja panya palunya kutjupangku kampangkaṭu pungkula iluntakuku, Tjiriyaku panya mayatja.”

Alatji angelpa Gabrieltu ngayula tjakultjunu.

2) *Tjiriyaku Mayatja Kutjupalta Kura Pulka Mulapa*

21 Mununi piruku ngayula wangkangu alatji, “Ka paluru ilunyangka watu kutjupa Tjiriyaku mayatjariku. Watu nyara paluru kura pułka mulatu angara ngunti nyinakatiku mayatja panya nganmanyitjaku katjaku arangka. Palu watu paluru aŋangu tjuṭa ngunti kurara mayatjariku. **22** Munu palulanguru paluru tjaultji tjuṭatjara pika ankuku munu ngura tjuṭangka wirkara pikaringkula tjaultji ngura kutjupitja tjuṭa pungkula winaringkuku. Munu paluru ngura nyara Israelta watu tjukurtjara pulka iluntankuku, Godalu panya ngurkantara tjunkunytjanya.

23 Palumpa tjaultji maṇkurpa nguwanpa ngaraku, palu paluru ngura kutjupa tjuṭatja wangkara ngunti pukulmankuku paluru tana Tjiriyaku kalyparingkula nyinanytjaku. Munu nyara palulanguru paluru mayatja kuṇpu pulkaringkuku. **24** Munu mayatja nyara paluru tjaultji tjuṭatjara ankula ngura kutjupa tjuṭangka wirkankuku Tjiriyala unngu, panya ngura nyara palula tjanalaya watu mani pulkatjara tjuṭa nyinapai. Ka paluru tjanalanguru mani pulka tJulyara tjarara malpa palumpa tjuṭa ungkuku. Nyanga alatji paluru kura pulka mulapa palyalku, panya mayatja nganmanyitja tjuṭangku purunytju wiya. Munu paluru kuliklu ngura kutjupitja tjuṭa kulu pungkula wiyatjikitjangku tawunu panya wallpa waratjara tjuṭangka. Palu watu nyanga paluru Tjiriyaku mayatja tjukutjuku nguwanpa nyinaku rawaringkunytja wiya.

²⁵⁻²⁷ “Munu palulanguru paluru wati tjuta mulapa altira tjungulku munuya warmalarira ankuku ulparira rapa mulararira Iitjipanya ngurara tjutangka pikaringkunytjikitja. Ka Iitjipaku mayatjangku palu purunypaṭu wati tjaultji mungilyi mulapalta altira kutjungkankuku munuya warmalarira tjanampa pika paṭalku Tjiriyanya ngurara tjutaku. Munu palulanguru mayatja panya paluru Tjiriyaku panya mayatjangka tjunguringkula mitinginkula wangkaku munu pulanku ngunti ngaparku wangkaku kalypangku-palku, panya paluru pula kurunpa unngu kura kutju kulilpai. Palu Godalu kutjungku alatjitu nganmanytju kulira ngurkantanu ngula pula nyaaringkuku mayatja panya kutjara, ka Godalu kulintjitja kutju utiringkuku. Ka paluru pulanku kulira wangkanytjitja uwankara wiya ngaraku. Ka palulanguruyanku tjaultji panya tjutangku pikangku pungkuku. Palu Iitjipaku mayatjaku malpa mankur-mankurtu mayatja tjanampa ngunti kurara iluntankuku, kaya tjaultji Tjiriyanya ngurara tjutangku Iitjipanya ngurara tjuta mulapa pungkula iluntankuku.

²⁸ “Ka palulanguru tjaultji Tjiriyanya ngurara tjutangku mani, gold munu tjlpa tjuta mulapa mantjira katiku Itjipalanguru alinytjaralku ngura panya walytjakutu. Munuya ankula ankula ngururpa wirkara Israelkunu tjuta nyakuku Godanya walkunnyangka, munu palunya tjananya nyakunytjatjanungku kurara alatjitu pungkuku. Munu Tjiriyaku mayatjangku palumpa kulintjtja-wanungku kutju palyalku paluru mukuringkunytjtja. Munu palulanguru paluru palyara wiyingkula tjaultji tjutatjara malaku ankuku ngura walytjakutu Tjiriyalakutu.

²⁹ “Ka ngula Godalu kulintjtjangka Tjiriyaku mayatja panya piruku tjaultji tjutatjara ankuku ulparira Itjipalakutu tjanampa pikaringkunytjikitja, palu nyara palula aṛa kutjupa kutjupa utiringkuku. ³⁰ Panya wiluraranguru tjaultji kutjupa tjuta pauta pulka tjutangka pitjaku munuya mantangka wirkara Tjiriyaku panya mayatja ngulutjingalku, ka paluru nyakula nguluringkula malaku ma-pakalku ngurakutu palumpa tjaultji tjutatjara. Munu mayatja paluru kurunpa mirpaṇpa alatjitu ankuku. Munu ankula ngururpa Israelkunu tjutangka wirkara tjana Godanya walkunnyangka pirukutu nyangu munu palu purunypaṭu tjananya kurara alatjitu pungkuku. Palu Israelkunu kutjupangku Godanya wantinyangka Tjiriyaku mayatjangku pungkunytja wiyangku wantira pukulmankuku. ³¹ Ka palumpa tjaultji tjutangku timpula Godaku kurara alatjitu pungkuku, munu tjukurtjara tjuta markulku kuka tiliwakara Godanya ungkunytjaku-tawara, munuya kutjupa kutjupa kura pulka mulapa timpulangka katu tjunkuku. ³² Munu mayatja paluru anangu panya Godanya wantipai tjuta ngunti pukulmankula mukumukulku palula tjunguringkunytjaku. Palu panya Godanya tungun-tunguntu wañalpai tjutangku mayatja palunya kulira alatjitu wantiku.

³³ “Ka wati panya Godaku tjukurku nintipuka tjutangku anangu tjutangka aṛa wiru tjuta nintilku tjana kulira palyantjaku. Palu wati nyanga nintipuka tjuta tjananya wati kura tjutangku alatjingalku – kutjupa tjuta tjananya tjulangka wakara iluntankuku, kutjupatjara warungka waniku, tjara kutjupa tjananya tjailangka witira tjarpatjunkuku munuya kutjupa tjutanguru mani munu ulytja kuļu kutitjunkuku. ³⁴ Ka nyanga alatji tjananya kurannyangka wati kutjupa tjutangku nguluringkula wantiku ngalkintja wiyangku, kaya tjara kutjupangku ngunti ngalkilku tjanampa walytjangku-palku. ³⁵ Ka mayatja panya paluru tjananya rawa nguwantu kuralku. Kaya wati nintipuka kutjupa tjaraya iluku, palu malaringkula nyinanytja tjuta Godalu kurunpa tiṭutjarangku

kunpukatiku. Ka ngulalta tjintu panya Godalu wangkanytjjangka mayatja panya paluru piruku tjanampa kura palyantja wiyangku wantir'iyalku.

³⁶ “Ka wati panya Tjiriyaku mayatjangku palumpa kulintjitja-wanungku kutju palyalku paluru mukuringkunyitjita. Munu kañany-kañanytju alatjitu palurunku walytjangku mirawañiku. Alatji paluru walytjangku wangkaku, ‘Ngayulu pulka alatjiitu, nganampa god tjutangka munkara mulapa.’ Munu palurunku mirawañira God panya Katutja kuļu pulkarra kuranmara analku. Uwa, rawangku palurunku kañany-kañanytju mirawañiku tungunpungkula, ka palunya kutjupangku puťu anga-wangkara pailku. Palu Mayatja Godanya panya ninti palumpa Tjiriyaku panya mayatjaku munu tjintu kutjupaku patalku mirpanpa palumpa palula utintjikitja. Uwa, nyara tjintu Godalu kulintjtjangka paluru pałyalku alatjiitu.

³⁷ Ka mayatja panya paluru palumpa tjamuku god tjuta wantiku, munu god panya minyma tjutangku walkulpai tjuta kuļu wantiku. Munu palurunku god tjutangka waintara walytjangku pulkanmankuku. ³⁸ Munu paluru god kutjupa ngurpatja walkulku panya palumpa tjamu tjutangku kulintja wiyatja. God nyara paluru-mantu tawunu wallpa pulkatjara angakanyilpai. Ka mayatja panya paluru god palunya titutjarangku mani pulka, gold, tjlpa, upula kuļu ungkula walkulku. ³⁹ Ka god nyanga paluru mayatja palunya kunpulku Tjiriyaku panya mayatja, ka paluru tawunu panya wallpa waratjara kutjupa tjuta pungkula tjananya aňangu ngurarijtja tjuta ngulutjingara tjanampa ngurangka anga-nyinakatiku. Ka paluru tjarpanyangka aňangu nguratja kutjupa tjarangku palunya mirawañira mayatjanmankuku, ka mirawañinyangka mayatja panya paluru kulira pukulariku munu tjananya ngapartji pulkanmankula mayatjarinytjaku tjunkuku munu tjananya manta kuļu ungkuku.”

3) *Tjukurpa Tjintu Malatjatjara*

⁴⁰ “Ka tjintu małatjangka Iitjipaku mayatja tjaultji tjutatjara warmalarira ankuku alinytjara Tjiriyanya ngurara tjutangka pikaringkunyjikitja. Palu wirkankunyta kuwaripangka Tjiriyaku mayatja tjaultji winkitjara ngalya-pakalku, kutjupa tjaraya nyanytjungka, kutjupa tjaraya wakinangka, kutjupa tjaraya pautangka tatira ankuku. Munuya paluru tjana ngura kutjupangka kutjupangka tjarpara wirkara pungkuku. ⁴¹ Munuya paluru tjana manta Isrelta kuļu wirkara ngura uwankarangka tjarpara aňangu mungilyi mulapa pungkula iluntankuku. Palu tjana manta ini Iitamala, Mawapala munu Aimanta wirkara aňangu ngurarijtja tjuta pungkuwiyangku wantiku.

⁴² “Uwa, Tjiriyaku mayatjangku tjaultji winkitjarangku ngura tjutangka tjarpara-wirkara aňangu winki pungkula winaringkuku Iitjipanya ngurara tjuta kuļukulu. ⁴³ Munu paluru tjana Iitjipala kutjupa kutjupa wiru tjuta ngarintjya mantjira katiku gold, tjlpa, upula kuļu Iitjipanya ngurara tjutangku kanyintjita. Munuya ankula manta ini Lipiyala pulala Iitjiuyipiyala tjarpara-wirkara aňangu palunya tjananya kuļu pungkula winaringkuku. ⁴⁴ Ka palula malangka kutjupangku pitjala mayatja panya palula tjakultjunkuku alatji, ‘Aňangu tjutangkuya nyara alinytjaranguru munu kakararanguru nyuntunya pikangku wangkanyi.’ Ka mayatja paluru kulira urulyaralku munu waruringkula mirpanpa pulkarinkula tjaultji winkitjara ngurakutu ma-pakalku. Munu paluru tjana iwarangka ankula ngururpa aňangu nguratja tjuta pungkula nyarulku mirpanpa pulkangku. ⁴⁵ Munuya palulanguru pitjala ngura tjunkuku Jerusalemala wilurara uru

ini Mititu-řaniyala pulala puli panya milmiltä Zionta ngururpa. Palu wati kutjupa tjutangkuya pitjala mayatja panya palunya iluntankuku, ka kutjupangku palunya ngalkintjaku wiya alatjiču ngaraku.”

Alatjini angelpa panya Gabrieltu tjakultjunu.

12

4) Miri tjuta wankaringkula pakantja

¹ Mununi piruku angelpa panya paluruču wangkangu alatji, “Nyara palula-arangka kura pulka wirkankuku tjituru-tjituru pulka mulapa. Panya tjituru-tjituru pulka kuwari munu ngañmanypa ngaranytjanya purunypa wiya, kutjupa mulapa pulka alatjiču kata paunarinjtjaku. Ka nyara palula arangka angelpa ini Michaelnga wirkankuku. Panya paluru kuŋpu pulka mulapa munu Israelkunu tjuta atunymara angakanyilpai nyuntumpa panya walytja tjuta. Ka panya nyiringka Godalu anangu Israelkunu tjuta ini walkatjelu. Ka nyara palula arangka tjituru-tjituru pulka ngaranyangka Godalu nyara palunya tjananya kutju initjara tjuta wankarunkuku. ² Ka panya anangu miri tjuta mantangka tjuŋutjunkunytja wankaringkula pakalku – kutjupatjara Godala tjunguringkula palula wanka titutjara nyinanytjaku pukulpa mulapa, kutjupatjara Godalanguru tjituru-tjituru pulka titutjara mauntpalpa nyinanytjaku kuŋta pulka. ³ Ka panya kililpi tjuta irnyalpai ilkaringga, pala palu purunypa anangu nintipuka tjuta pitalytji pułkatjara titutjara wirura irnyalku. Paluru tjana anangu tjuta nintilpai Godanya wanganarangku kulintjaku.” Nyanga palunya tjananyan angeltu utira tjakultjunangi.

⁴ Mununi palulanguru ngayunya wangkangu, “Daniel, nyiri pala ini tjutatjara kitingga tjakatjura patira wanti, ka kumpilpa titutjara alatjiču ngarima tjintu malatjangka kutju alara nyakunytjaku. Kaya anangu tjutangku rawangku puťu ngurilku tjukurpa nyanga palumpa nintirinkunytjikitjangku.”

Tjintu Malatja

⁵ Palulanguru ngayulu karu urutjarangka itingka ngarala waintara nyangu angelpa kutjara, kutju karu kantilytja ngarangi, ka kutjupa karungka munkara ngarangi. ⁶ Ka angelpa kutjungku angelpa panya ulytja pirantjarangka wangkangu Gabrielta, “Yaalara tjukurpa nyanga paluru utiringkuku?”

⁷ Ka angelpa panya ulytja pirantjarangku mara katuringkula wangkangu,

“Kuwarina God panya titutjara nyinapaila mirangka tjukarurungku wangkanyi – tjukurpa nyanga paluru mulapa utiringkuku ngula yiya maŋkurpa munu pira panya ⁶ ngarala wiyingkunyangka. Kaya warmala tjuta Godaku walytja Israelkunu tjutaku titutjara alatjiču pikaringkuku munuya Israelkunu tjuta uparingkula wawanyarinyangka kutju wiyingkuku.”

⁸ Palu alatji wangkanyangka Danieltu puťu nguwanpa kuliningi munu palula tjinpinu, “Wanyuni tjakultjura, yaaltji-yaaltji nyanganpa uwankara ngarala wiyingkuku?”

⁹ Kani angelpa panya paluru wangkangu,

“Wiya, kulintja wiyangku wantima, panya tjukurpa nyanga paluru kumpilpa rawa ngaraku munu utiringkuku tjintu malatjangka kutju.

¹⁰ Ka Godalu anangu tjuta kurunpa paltjira palyarungulku palula mirangka kuŋta wiya rapa ngaranytjaku, kaya tjukurpa panya ngayulu

wangkanytjanya utilta kulilku. Palu aŋangu kura tjutangku kura kutju rawangku palyalkatiku, munuya tjukurpa panya palunya puṭu alatjiṭu kulilku. ¹¹ Ara panyatja kulila, panya ngañmanytjuṇanta wangkangu* kutjupa kutjupa kura pułka mulapa timpulangka katu tjunkunytja munu aŋangu tjuta kuļu markuntja kuka panya timpulakutu katira Godanya ungkunytjaku-tawara. Ara nyanga paluru tjana ma-nagarakatiku tjintu tjuṭa 1,290-kutu-wangkara alatjiṭu. ¹² Munu piruku ngaraku tjintu 1,335-kutu, ka Godalu aŋangu kutjupa palumpa tiṭutjara mulamularingkunyangkampa pukulmankuku.

¹³ Ka Daniel, nyuntu rapa kunpu ngarama ilunytjakutu-wangkara ngururpaṭu wiyaringkunytja wiya. Panya nyuntu ngula ilura mantangka miri ngarinyangka Godalu nyuntunya wankara pakaltjingalku, mununta wiru mulapalta ungkuku paluru nyuntumpa kanyintjatjanungku.”

Nyanga palunyanı angeltu wangkangu.

* **12:11** Danielku 9:27; Markaku 13:14; Matthew-ku 24:15

Wati Wangkatjarangku Tjawiltu Walkatjunkunytja Joel

Nyangatja Ngañmanytju Nyakula Wangkanytjaku

Nyangatja Godaku tjukurpa wati wangkatjara ini Tjawiltu walkatjunkunytja. Panya wati nyanga palulawanungku Godalu wangkangu aŋangu panya Jew tjutangka palumpa panya walytja tjutangka. Munu tjananya wangkara ngulutjunu panya tjanampa mirpantju tjutangku tjananya pitjala pikangku pungkuku. Munu paluru tjanala tjukurpa tjintilykatjara wangkara aŋa kampa kutjupa utiningi, panya ngula kura pułka mulapa tjanampa utiringkuku. Panya paluru tjanampa wati warmała tjuta iyalku pitjala tjananya pikangku pungkunytjaku.

Palu Mayatja Godalu tjananya wangkara kalkunu panya paluru tjana palulakutu małaku aruringkunyangkampa paluru tjananya wiruřa aṭunymara kanyilku. Ka Tjawiltu wangkangi ngula Godaku kurunpa pitjala tjarpantjaku tjukurtjara munu wangkatjara tjutangka kutju wiya palu aŋangu uwankarangka tjarpaku wati yangupala tjutangka, munu tjlpi tjutangka, minyma pampa tjutangka munu kungkawara tjutangka kulu.

Munu paluru alatji kuļu wangkangi panya tjintu małatjangka Godalu aŋangu palumpa tjuta tjarkalku aŋangu kura tjutanguru munu tjananya pařa alatjiči iyalku ngura kurakutu kaya nyara palula tjituru-tjituru pułka nyinaku titutjara.

Ka ngula Jesunya ilkarikutu małaku ankunyangka Peterlu kulinu Tjawiltu panya walkatjunkunytja munu paluru Jerusalemala aŋangu tjutangka tjakultjunangi tjukurpa panya palunya. (Nyawa Tjawilku tjukurpa 2:28-32 munu tjukurpa panya Iyantja Tjutangku Palyantja 2:17-21.)

Uwa, nyangatja Tjawiltu tjukurpa walkatjunkunytja tjara kutju ngarinyi, panya nganana kuwaripangkuļu palyani, palu uwankarala walkatjura wiyanja wiyatū.

Tjukurpa nyanganpa ngarinyi:

- 1:1-20 Godalu aŋangu tjuta kura palyannyangka ngurkantařa wiyaliku
- 2:12-14 Godalu aŋangu tjuta paintja piiwiyingkula kura wantintjaku
- 2:18-32 Godalu palumpa walytja tjuta aṭunymankunytjikitjangku kalkuntja

Godalu Anangu Tjuta Kura Palyannyangka Ngurkantara Wiyalku

¹ Ngayuluña wati ini Tjawilnga panya wati Pitjuwilku katja, mununa tjukurpa nyangatja Mayatja Godalu nintinnyangka kulintjatjanungku nyurala tjakultjunanyi. ²⁻⁴ Munu ngayulu nyanga alatji wangkanyi, "Kulilaya aŋangu Judah-nya ngurara tjutangku, tjlpi tjutangku kulu! Panya kuwari kura pułka ngananaala wirkamu kura ngañmanyitja tjutangka waintara mulapa. Panya tjintilyka mungili mulapa wirkamu kapuťu winki munuya ukiri uwankara ngalkunu. Kaya palula tjanala małangka kapuťu kutjupa wirkamu munuya ukiri panya palunyatu ngalkunu. Ka paluru tjana ankunyangka małangka kutjupa tjuta ngapartji wirkamu kapuťu kutjupa munuya ngalkunu panya tjana ngañmanytju ngalkula wantintjitetja. Kaya

mała kapuṭu kutjupalta pitjangu munuya paluru tjana uwankara ngalkula wiyanu nyura mai wiya alatjitu nyinanytjaku. Ka nyura uti ara nyanga palunya watarkurintjaku-tawara nyurampa tjitji tjutangka tjakultjura, kaya paluru tjana ngapartji tjanampa tjitji tjutangka ngula tjakultjunkuku, kaya palu purunypaṭu ngula ngapartji tjakultjunkuku tjanampa tjitji tjutangka.

¹⁶ “Uwa, tjintilyka mungilyingkuya pitjala nganampa mai ngalkula wiyanu nganana ngarala nyakunyangka. Kala nyanga alatjirinyangka nyakula nganana uwankara timpulangka tjarpara Godanya walkuntjikitja puṭu alatjitu pukularinyi. ¹⁷ Panya nganana mai pulka kaana tjutangka pakaltjinganu, ka nyanga kuwari uwankara wiya ngaranyi, ka uninypa kutjupa tjuṭa manta unngu kutju ngarinyi pakantja wiya. Ka wiltja panya mai utulura tjunkupai tjuṭa ultu ngarala pilukatira mantangka ngarinyi.

¹⁸ “Kaya puluka tjuṭa waara para-pitjalira mai-tjiratja mirara waṇinyi ukiri puṭu ngurira. Kaya tjiipi munu nanikuta tjuṭa kulu paltjatjiratja wawanyarira ngarira waṇinyi. ¹⁹⁻²⁰ Kaṇa Mayatja kuwari nyuntula tjabini ngananaṇya alpamilantjaku. Panya kuli pulka ngaranyangka ailuru pulkaringu, ka ukiri punu kulu uwankara wiyaringkula piltiringu. Ka wanyu kuka putitja tjuṭa kulu alpamilala, panya tjanampa mina wala tjuṭa kulu piltiringkula waṇanu uwankara alatjitu.”

2

¹²⁻¹⁴ Ka Mayatja Godalu kuwari nyuranya wangkanyi alatji, “Kuwari nyanga alatjituuya piiwiyingkula ngayulakutu małaku aruriwa, munuya kura nyura palyantjitunguru pulkara tjituru-tjitururira ulara mai ngalkuwiyangku wantima.” Alatji Godalu wangkanyi.

Palu tjinguru nyura kutjupa tjutangku alatji kulilk, “Wanyulanku mantara nyanga anangitja tjinpirpuwa, kaya anangu tjutangku nyakula kulilk, ‘Munta-uwa, mulapa tjana Godala miṛangka piiwiyinganyi.’”

Palu nyangatja piiwiyingkunytja mulapa wiya tjinguru unytjungku kutju arkanı. Palya nyura mantara tjinpirpungama, palu uti nyura kurunpa tjaruringama munu mulamula pulkara tjituru-tjitururira ulara kūntaringama nyura panya naṇmanytju kura palyantjatjanungku kulira. Munuya małaku aruriwa Godalakutu Mayatja pulkakutu, panya paluru mukulya pukultju munu ngaltunytju alatjitu, panya paluru mapalku mirpaṇaripai wiya. Tjinguru kuwari paluru nyurampa pulkara ngalturingkuku munu nyuranya kalypangku pungkuwiyangku wantira pukulmara kanyilku. Ka nyara palulanguru nyura ngapartji palunya ungkunytjaku ngaranyi mai nyuma panya nyura pakaltjingantjalanguru munu waina kulu.”

[Kaya anangu tjutangku wanganarangku kulira palyanu Mayatja Godalu wangkanyangka.]

Godalu Palumpa Walytja Tjuta Atunymankunytjikitjangku Kalkuntja

¹⁸⁻¹⁹ Ka nyara palulanguru Mayatjanya ngura nyanga palunya-tjiratja palumpa walytja tjuṭaku pulkara ngalturingu. Munu paluru kuwari wangkanyi nyurala alatji, “Ngayulu nyurampa mai tjuṭa pakaltjingalku, mai wiita munu kiripitji kulu waina palyantjaku, munu punu panya alipa kulu uwila palyantjaku. Ka nyura mai pulkatjararingkuku. Panya naṇmanytju anangu ngura kutjupitja tjutangku nyuranya anara kurara pungangi ka nyura pulkara tjituru-tjitururingi. Palu ngayulu kuwari nyuranya atunymara kanyilku tjana nyuranya piruku anantjaku-tawara.”

28-29 “Nyanga palula małangkaṇa ngayulu pukultu ngayuku kurunpa tjarpatjunkuku ngayuku walytja uwankarangka. Ka palulan-guru nyurampa katja tjuṭangku munu unṭalpa tjuṭangku kuļu ngayulu wangkanyangka kulintjatjanungku aŋangu tjuṭangka tjakultjunkuku. Ka wati tjiłpi tjuṭangku tjukurmankuku ngayulu tjanala nintinnyangka. Kaya wati yangupala tjuṭangku kuļu kutjupa kutjupa tjuṭa nyakuku ngayulu tjanala utinnyangka.

“Kaṇa nyanga palula aṛa kurunpa ngayuku tjarpatjunkuku aŋangu ngayuku warkaripai tjuṭangka, wati tjuṭangka, munu minyma tjuṭangka kuļu. 30-31 Munuṇa ngayulu witulya pulkangku kutjupa kutjupa tjuṭa utilku ilkarīngka munu mantangka kuļu nyura nyakula kulintjaku. Ka tjinṭu maruringkuku. Ka kiṇara kuļu tjin-tjininarira milkali purunyariku. Ka puyu pułka mulapa wirkankuku. Ka nyara palula aṛa aŋangu uwankara pułkara alatjiṭu nguluringkuku munuya tjituru-tjituru alatjiṭu nyinaku. 32 Ka ngayuku mulamularingkupai tjuṭa ngayulu wankarunkuku. Kaya Jerusalemala wankaru nyinaku, panya ngayulu kalkunuṇu alatji wangkara, ‘Ngayuluṇa nyuranya wankarunkuku ngayulu ngurkantankunytja tjuṭa.’ ”

Wati Wangkatjarangku Aimatjalu Walkatjunkunytja **Amos** **Nyangatja Ngañmanytju Nyakula Wangkanytjaku**

Nyangatja Godaku tjukurpa wati wangkatjara ini Aimatjalu walkatjunkunytja. Panya wati nyara palulawanungku Godalu wangkangu añaŋgu panya palumpa wal̄ytja tjutangka panya Israelkunu tjutangka. Panya Aimatjanya tjiipi tjuta atunyankupai nyinangi munu kaanangka kuļu wařkaripai nyinangi. Ka Godalu palunya ngurkantanu wařka nyara palula nyinanyangka, munu palunya wařka kutjupa ungu palumpa tjukurpa Israelkunu tjutangka wangkanytjaku nyara alinytjara nyinapai tjutangka. Ka paluru tjananya wangkara painingi tjana añaŋgu ngaltutjara tjutaku ngalturingkuwiya nyinanyangka munu kutjupa tjuta kurara pungkunyangka.

Panya añaŋgu nyara paluru tjanaya inmaku tjunguringkupai, palu paluru tjanaya mulamulangku Godanya wařkuntja wiyangku wantipai munuya palumpa tjukurta wangaňarangku kulintja wiyangkuwan tipai. Ka nyara palulanguru Aimatjalu tjanala wangkangi alatji, "Nyura Godala kulilwiyangku wantinyangka paluru nyuranya pikantankuku. Palu nyura palula wangaňarangku kulinnyangkampa nyurampa pukuļpa pulka mulapa ngula wirkankuku." Alatji Aimatjalu tjananya wangkara ngulutjunangi. Palu tjana wantingi kulintja wiyangku ka nyara palula małangka wati malikitja tjuta warmala pitjangu Atjiriyanaya ngurara tjuta munuya tjananya pungkula wiyanu Israelnga ngurara tjuta munuya tjara kutjupa witira katingu tjanampa ngurakutu.

Uwa, tjukurpa nyangatja Aimatjalu walkatjunkunytja tjara kutju ngarinyi, panya nganana kuwaripangkuwan palyani, palu uwankarala walkatjura wiyanjya wiyanu.

Tjukurpa nyanganpa ngarinyi:

- 1:1—4:13 Godalu Israelkunu tjuta pungkuku tjana palula tungun-pungkunyangka
- 5:10-12 Israelkunu tjutangku kura tjuta palyantja
- 5:14-15 Palyanyku nyinanytja Godanya pukularintjaku
- 5:18-20 Ngula tjintu małatjangka Godalu kura palyalpai tjuta ngurkantařa pungkunytjaku
- 5:24 Palyanyku nyinanytja Godanya pukularintjaku
- 7:1—9:10 Tjana kura palyantjitunguru Godalu tjanampa pika pulka iyantjikitjangku kalkuntja
- 9:13-15 Godalu Israelkunu tjuta ngula wankarunkunytjikitjangku kalkuntja

Aimatjalu Ngañmanytja Wangkanytja

¹ Ngayuluña wati ini Aimatjanya. Panya ngayulu tjiipi nanikuta tjuta kanyilpai nyinangi ngura ini Tikuwala. Ka panya wati ini Utjayanya manta Judah-ku mayatja pulka nyinangi, ka wati ini Tjiirapamanya, Tjiyatjaku katja, manta Israelku mayatja pulka nyinangi. Ka nyara palula arangka Godalu ngayula tjukurpa tjuta nintiningi ngura panya Israelngatjara, ka

ngayulu walkatjelu tjukurpa nyanganpa. Ka tjukurpa utintitjangka malangka kuli kutjara ngarala wiyingkunyangka manta pulkara uringu Israelta.

² Kana Godalu ngayula nintinnyangka tjakultjunanyi alatji, “Mayat-jalu pulkara alatjitu wangkapai ngura Jerusalemalanguru, panya lion pulkara ngaurmankupai kaya kulira nguluringkupai, palu purunytyju paluru wangkapai ngura nyara palulanguru, apu ini Tjayantanguru. Ka paluru wangkanyangka ukiri uwankara piltiringkuku ngura tjulangka, ngura ukiri pulkatjarangka kulu panya puli murpu ini Kaamulta kulu, ka panya tjiipi tjulangku ngalkuntjaku wiyingkuku alatjitu uwankara piltiringkunyangka.”

2

Godalu Israelkunu Tjula Kuranmankunytja

⁶ Nyanga alatji paluru wangkanyi anangu Israelkunu tjulangka, “Nyura kura pulka tjula rawangku palyalkatinyi, kana nyara palulan-guru watarkuriwyangku nyuranya pungkuku. Panya nyura anangu ngaltutjara tjula kuralpai tjukaruru nyinapai tjula. Tjinguru anangu kutjupangku nyurala mani unytjungku mantjilpai ngula malakungku ungtunytjikitjangku. Palu pulu mapalkungku payamilannyangka nyura ngalturingkuwyangku palunya manikitjangku wati kutjupangka tjalamil-lalpai palumpa unytju rawa warkarinytjaku. Tjinguru paluru tjinatja payamilantjikitjangku mani tjukutjuku kutju unytjungku nyurala ngatjira mantjinu, ka nyura panya palumpa palantja wiyangku palunya mantjira tjalamilpai ngalturingkunytja wiyangku mani tjukutjukunguru alatjitu.

⁷ Tjinguru anangu kutjupa tjula mai ulytja tjukutjukutjara nyinanyi, ka nyura palunya tjananya palu purunypatu ngalturingkuwyangku kurara pungkupai tiutjarangku alpamilantja wiyangku. Panya nyura watarkungku mantangka tjinangku paltjura ankupai, palu purunypa nyura anangu ngaltutjara tjula wantipai tjananya ngaltunytjungku wirura kanyintja wiyangku. Ngaltutjara! Paluru tjana pikanguru munu tjiuru-tjiuru pulkanguru kulu pulkara uparingu, ka nyura palumpa tjanampa ngalturingkunytjaku ngaranyi. Palu nyura Israelkunu tjulangku palunya tjananya wantipai alatjitu munu tjananya ngunti kuranmankupai. Uwa, nyura kura pulka rawangku palyalpai. Panya mamangku katjararangku pula kungkawara kutju ngarilyira pula kuralpai munu pula alatji palyara Godanya kulu kuralpai.”

3

¹ Munu Mayatja Godalu piruku wangkanyi nyurala Israelkunu tjulangka alatji, “Wanyuya ngayunya kulila! Panya ngayulu nyuranya Itjipalanguru wankarura ngalya-katingu. Kaya ngayulu nyuranya anangura wangkanyangka kulinma! ² Panya manta winkingka anangu tjaa kutjupa kutjupa tjula mulapa nyinanyi ngura winkingka, palu ngayulu nyuranya kutju ngurkantanu ngayuku walytjapiti nyinanytjaku. Ka nyura nyaaku ngayula tungunpungkula kura tjula rawangku palyani? Tjinguru nyura kulin, ‘Nganana Godaku walytja tjula nyinanyi panya paluru nganananya Itjipalanguru wankarunu. Munu nyara palulanguru paluru nganananya pungkuwyangku wantiku.’ Palu wiya, nyura ngunti nyangatja kulin, panya nyura ngayuku walytjapiti nyinanyangkaa nyuranya kura palyan-nyangka pungkuku alatjitu.”

4

⁴⁻⁵ Alatji Godalu nyuranya wangkanyi Israelkunu tjutangka, “Nyura ngura panya Pitjulta pulala Kilkalta ngayunya walkuntjikitja mukuringku-pai ngura panya milmilpa kutjarangka. Palu nyura ngayula tungun-pungkula ngunti ngayunya walkulpai kura tjuṭa rawangku palyara. Nyura kuka tjuṭa katipai wati tjukurtjarangku pungkula tiliwakara ngayunya ungkunytjaku palu nyura kura tjuṭa palyalpaingku katipai ngayula tungun-pungkupaingku. Munu nyura kutjupa kutjupa tjuṭa mantjintjanungku tjarara tjukutjuku katipai ngayunya ungkunytjikitjangku, palu nyura kura palyalpaingku katipai ngayunya kulintja wiyangku wantipaingku. Munu nyura palu purunypaṭu ngayuku pukularira-palku mai nyuma katipai wati tjukurtjarangku mantjira tiliwakara ngayunya ungkunytjaku, palu nyura kura palyantjatanungku katipai kunṭa wiyangku. Munu nyura kutjupa kutjupa tjuṭa kuļu mukuringkula kañany-kañanytju katipai munuyanku katira anangu tjuṭangka mirangka walytjangku mirawanipai palyangku-palku. Alatji nyura kuraku mukuringkula ngayula rawangku tungunpungkupai munuya ngayunya ngunti walkulpai wirungku-palku.

⁶ “Panya ngayulu ailuru pulka palyaṇu nyurampa ngurangka nyura mai wiya paltjatjiratja nyinanytjaku. Palu nyura kuliṛa nintiringkula ngayulakutu malaku aruringkunytja wiyangku wantingu. ⁷ Panya nyurampa kaanangka ukiri maitjararingkunyangka ngayulu mina markunu puyintjaku-tawara, ka mina wiyangka mai uwankara putu kururingangi. Uwa, ngayulu mina iyanu ngura tawunu kutjukutu mununa tawunu kutjupakutu iyantja wiyangku wantingu. Ka kaana kutjupa tjarangka minangku puyinu, ka kaana kutjupa tjuṭa mina wiyangka piltiringu. ⁸ Uwa, ngura tawunu tjuṭa mina wiya ngarangi, ka nyura minaku iluringkula wawanyaringu munu nyura tawunu kutjupakutu minaku anu munu wirkara nyangu mina tjukutjuku kutju ngarinyangka uwankarangku tjikira palyaringkunytjaku wiya. Tjinguru nyara palula aṛa nyura ngayunya kulinma munu ngayulakutu malaku aruringama. Palu wiya, nyura wantingu alatjiṭu ngayunya kulintja wiyangku. ⁹ Panya ngayulu kuli pulka palyaṇu ka nyurampa kaana maitjara tjuṭa piltiringu puṇu kiripitji tjuṭa kuļu. Ka panya tjintilyka mungilyingku pitjala puṇu alipatjara tjuṭa munu puṇu ili tjuṭa kuļu ngalkula wiyanu. Ka nyura wanyu kuliṛa ngayulakutu malaku aruringku? Wiya alatjiṭu.

¹⁰ “Mununa ngayulu kura pulka tjuṭa nyurala utiringkunytjaku palyaṇu, panya ngayulu iriti ngura nyara Itjipala kura tjuṭa iyanu tjanampa Itjipanya ngurara tjutaku, palu purunypa nyurampa iyanu. Munu ngayulu warmala iyanu nyuranya pikaringkula pungkunytjaku kaya pitjala nyurampa nyanytju tjuṭa tulyara katingu munuya nyurampa wati yangupala tjuṭa pungkula wiyanu kaya tjuṭa mulapa ilura ngarira wanangi nyurampa ngurangka ka paṇti kura pulka ngaranyangka nyura paṇṭira ulkapatjunangi. Palu nyura ngayulakutu malaku aruringkunytja wiyangku wantingu alatjiṭu.

¹¹ “Uwa, panya ngayulu kutjupatjara wiyanu alatjiṭu, panya iritiṇa anangu Tjatamanya ngurara uwankara waru pulkangka wiyanu Kumoranya ngurara tjuṭa kuļu, palu purunypa ngayulu nyuranya kutjupatjara wiyanu, kaya tjara kutju nguwanpa ilura wankaringu. Panya wantingku puṇu warunguru tili winki mantjira mantangka tjarpara waru iluntankupai, palu purunypa ngayulu nyuranya waru pulkangka wankarunu nguwanpa ilunyangka. Palu nyura ngayunya wantingu alatjiṭu munuya panya ngayulakutu malaku aruringkunytja wiya. ¹² Palulanguruṇa

nyuranya Israelkunu tjuta pułkara punganyi. Ka nyura kulinma kuwari, munuya ngulu-ngulu nyinama panya ngayulu ma-pitjala nyuranya pungkunytjikitjangku ngurkantananyi.”

Alatji Godalu Israelkunu tjutangka wangkangu. ¹³ Panya paluru Mayatja pulka mulapa uwankarangka waintarintja. Paluru murpu pulka tjuta palunu munu walpa kułu. Munu paluru palumpa kulintja ngananala nintilpai nganana kułu nintiringkula kulintjaku. Munu panya paluru kałalarira mungartjirira mungaringkunytjaku palyalpai. Panya paluru mayatja pulkangku manta winki nyakula kanyini. Nyara paluru uwankaraku mayatja nyinanyi ilkaritja tjutaku mantatja tjutaku kułu.

5

Israelkunu Tjutangku Kura Tjuta Palyantja

¹⁰ Ka Godalu nyurala piruku wangkanyi alatji, “Nyura panya kura tjuta rawangku palyalpai. Munu nyura wati panya kuutpaku mayatjangku tjukarurungku ngurkantankunyangka palumpa pułkara kuraringkupai, munu nyura aŋangu kutjupa kuutpangka tjukarurungku wangkanyangka analpai. ¹¹ Munu nyura aŋangu ngaltutjara tjuta kurara pungkupai, munu nyura tjananya pauntjingara wangkapai nyuranya mai ungkunytjaku mani ngapartji ungkunytja wiyangku. Uwa, nyura wali wiru tjuta palyanu pukulpa nyinanytjikitjangku munu nyura mai kiripitji tjuta kaanangka pakaltjinganu tjuratja wiru palyara tjikintjikitjangku. Palu nyura ngaltutjara tjuta kurannyangka ngayulu nyuranya wali palula tjanalanguru pakaltjingalku, ka nyura tjuratja panya wiru tjikintja wi-yaringkuku alatjiu.

¹² “Panya ngayulu ninti nyura kura palyantja uwankaraku. Nyura tiṭutjarangku kura palyalkatipai. Nyura aŋangu tjuta tjukarurungku palyannyangka tjananya nguwanpa iluntankupai. Munu panya nyura tjanala mani tjulyantjikitjangku ngunti wangkara pauntjingalpai. Munu nyura ngaltutjara tjuta kuutpakutu katinyangka wantipai tjananya al-pamilara anga-wangkanytja wiyangku. Ka anga-wangkanytja wiyangka kuutpaku mayatjangku paluna tjananya ngunti ngurkantankupai munu tjananya wiyanguru alatjiu pungkunytjaku wituwitulpai.”

¹⁸ Ngula tjintu kutjupa Godanya pitjanyi aŋangu kura palyalpai tjuta ngurkantara pungkunytjikitja. Ka nyura tjintu nyara palumpa ngunti ala-ala paṭara nyinanyi Godalu kutjupa tjuta kutju ngurkantara pungkunytjaku-palku. Palu wiya, tjintu nyara palula nyura pukularintja wiya alatjiu, panya Godalu nyuranya kura ngurkantankuku munu pika kura pułka mulapa nyurampa utiringkunytjaku palyalku. ¹⁹ Kulilaya ara nyangatja! Tjinguru wati kutjupa liontu paluna wataparanngangka pułkara nguluringkula wirtjapakanı munu paluru wankakitja wirtjapakara wirtjapakara patjalpai kutjupa nyanganyi bear pułka palula kuranyu utiringkunyangka. Ka palulanguru tjinguru paluru wirtjapakara walingka pumpanu tjarpanyi munu tuwa patira wall-pangka mara tjunkula pakuwiyaringanyi, ka palulanguru pikati kutjupangku lirungku paluna mara patjara iluntananyi. Pala palu purunyapa ngula nyurampa ngaraku tjintu panya palula. ²⁰ Panya tjintu nyara palula Mayatja Godalu nyuranya Israelkunu uwankara ngurkantara tjarani kura tjuta palyantjitetjanguru, ka nyura tjituru-tjituru pułkaringkuku pukularintja wiya alatjiu.

²¹ Alatji Mayatja Godalu wangkanyi, “Nyura inmaku tjunguringkunya ngakulaña ngayulu pulkara kuraringanyi nyurampa pukularinytja wiya alatjiitu. Munuña kulira wantinyi alatjiitu nyura ngayunya walkuntjikitja tjunguringkunya ngakula. ²² Ka nyura kuka kutjupa kutjupa tjuta mai kuļu ngayunya ungkunytjikitjangku katira warungka tiliwakalpai ngayulu nyuranya nyakula kalypangku wiyanja wiyangku wantintjaku, palu nyura katinyangkaña ngayulu wantinyi alatjiitu. ²³ Nyaakuya inma tjuta mirara inkanyi ngayunya ngunti walkuntjikitjangku? Wantimaya inkanyta wiyangku! Munuya kita purunyapa inma wangkatjingantja wiyangku wantima!

Palyanyku Nyinanytja Godanya Pukularinytjaku

²⁴ “Palu uti nyura kura wantira tjukarurungku kutju palyanma munuya anangu ngaltutjara tjuta atunyamanama ngunti kurantja wiyangku, panya karu ini Jordanta uru titutjara ukalingkupai, nyara palu purunypaya rawa tjukaruru palyanyku nyinama wiyaringkunya wiya.” Alatji Mayatja Godalu nyuranya wangkanyi.

7

Tjana Kura Palyantjitjanguru Godalu Tjanampa Pika Iyantjikitjangku Kalkuntja

¹ Uwa, Mayatja Godalu ni nintinu tjukurpa, kaña nyangu paluru tjintilyka mungiliyi mulapa palyara iyannya ngakula kaputu alatjiitu. ² Ka tjintilyka paluru tjana pitjangu munuya mai ukiri mantangka pakaltjingantja uwankara ngalkula wiyanu. Kana nyara palunya nyakunytjatjanungku ngayulu Mayatja Godala pupakatira tjapiningi, “Mayatja God, wanyulampa kalyparingama munulampa kutjupa kutjupa iyantja wiyangku wantima! Tjinguru tjintilyka tjutangku uwankara ngalkula wiyanngakampa nganana mai-tjiratja uwankara iluku, panya nganana anangu Israelkunu mañkurpa nyinanyi munula uparingu alatjiitu.” ³ Ka mulapa Mayatjalu kulira ngalturingu nganampa munu wangkangu, “Uwa, nyanga palu purunypa palyantja wiyangku wantiku.”

⁴ Mununi paluru piruku nintinu tjukurpa kutjupa kuli pulkatjara. Kaña nyangu Godalu kuli pulka palyannya ngakula kaputu alatjiitu. Ka kuli nyara paluru ngaranyangka ailuru pulkaringu, ka manta winkingka ukiri puňu kulu uwankara wiyaringkula piltiringu, munu manta unngu mina ngaryntja kulu uwankara piltiringu. ⁵ Kaña nyangatja nyakula Godala pulkara ngatjinu wangkara, “Mayatja God, wirungkulanya wantima! Tjinguru nganana uwankara iluku kapi-tjiratja mai-tjiratja, panya nganana anangu Israelkunu mañkurpa nyinanyi, munula uparingu alatjiitu.” ⁶ Ka Mayatja Godalu kulinu munu paluru nganampa piruku ngalturingu munu wangkangu, “Uwa, nyanga palu purunypa palyantja wiyangku wantiku alatjiitu.”

8

¹ Ngula ngayulu piruku nyangu tjukurpa kutjupa Mayatja Godalu ngayunya nintinnyangka. Munuña nyangu piti maitjara. ² Kani Mayatjalu ngayunya tjapinu, “Wati awa! Nyaa nyangatja nyuntu nyanganyi?”

Kani wangkangu, “Wiya, palatja mai kuru tjuta pitingka ngaranyi ngalkuntjaku.”

Kani wangkangu, “Uwa, mai palatja kuru ngaranyi ngalkuntjaku, ka palu purunyapa tjintu wirkanu ngayuku nyanga walytja tjuta Israelkunu

tjuṭa pungkula wiyanjtaku. Ngayulu tjananya ngañmanytju kalypangku pungkuwiyangku wantingi tjana kura palyannyangka, palu kuwari nyanganā tjananya wiyanī alatjitu. ³ Tjintu pala palula añangu panya tjuṭa Israelku mayatjaku wali pulkangka inma wiru tjuṭa pukultu inkanytjanungku tituringkula tjituru-tjitururira pulkara ulara waniku, panya añangu winki ilura waniku munuya tjiwariwari ngariku puntu ilunytja tjuṭa ngura winkingka. Ka pilunpa mulapa ngaraku.” Alatji Godalu ngayunya wangkangu.

9

¹ Mununa nyangu Mayatja Godanya timpula unngu ngaranyangka pitjilta itingka. Ka paluru kutjupangka wangkangu alatji, “Timpula katutja pulkara pungama ka uwankara pulkara uri-urima, ka katunguru pilukatira punkanma añangu tjuṭangka katangka tjana unngu ngarala wankunnyangka, kaya uwankara iluku. Palu mañkurpa tjin-guru wankaringkula ngaranyangka ngayulu iyalku warmala palunya tjananya pungkula wiyanjtaku alatjitu, kaya uwankara iluku kutjupa wankaringkula wirtjapakantja wiya alatjitu. ² Tjinguru kutjupatjara ngayuku nguluringkula manta unngu tjawara tjaru mulapa tjarpaku miri tjuṭaku ngurakutu, kana tjananya uwankara wanara witira tjarunguru ilalku. Tjinguru kutjupatjara nguluringkula ilkariringka katu mularkutu tatilku, kana tjananya witira waniku mantakutu. Uwankaraya putu ngayulanguru wirtjapakara wankaringkuku. ³ Kutjupatjara tjinguru puli murpu ini Kaamulta katukutu tatira kumpira nyinaku, kana tjananya ngurira witilku. Kutjupatjara tjinguru uru pulkangka unngu tjarpara ngati pulkangka kumpira nyinaku ngayulu nyakunytjaku-tawara, palu ngayulu wanampi pulka palula tjanalakutu iyalku tjananya patjara iluntankunytjaku. ⁴ Tjinguruya warmalangku tjara kutjupa witira karpira katiku tjanampa ngurakutu, palu ngayulu warmala palunya tjananya wituwitulku tjananya pungkula iluntankunytjaku, kutju wankaringkunytjaku-tawara. Panya ngayulu tjananya atunymankuwiyangku uwankara wiyanjtikitjangku kulini.” Alatji Mayatja Godalu wangkangi.

⁸ Munu paluru wangkangu, “Ngayulu Mayatja Pulkangku nyuranya nyanganyi Israelkunu tjuṭangku kura rawangku palyannyangka mununa nyakula nyuranya pungkula wiyaliku. Palu ngayulu nyuranya uwankara wiyanjtja wiya mañkurpa wantinyi wankaringkula nyinanytjaku. ⁹ Panya ngayulu wangkaku nyurampa mirpañtju tjuta pitjala nyurampa pulkara pikaringkunytjaku, kaya nyuranya kura palyalpai tjuṭa wakaṛa pungkula wiyaliku munuya tjara kutju palya nyinapai tjuṭa wanka katiku tjanampa ngurakutu ngura malikitja tjuṭakutu. ¹⁰ Panya kura palyalpai tjuṭaya kanany-kananytju wangkapai alatji, ‘Nganana palya nyinanyi, kalanya Godalu wankaru kanyilkku.’ Palu tjananya uwankara warmalangku waṭaparaṛa wakaṛa iluntankuku.”

Godalu Israelkunu Tjuṭa Ngula Wankarunkunytjikitjangku Kalkuntja

¹³ Munu Mayatjalu piruku wangkangu, “Palu ngula ara kutjupa ngapartji utiringkuku, ka ukiri maitja ngura lipiwanu pakara pulkaringkuku munu titutjara mai pulkatjara ngaraku wiyaringkunytja wiya añangu tjuṭangku rawangku urantjaku. Ka palu purunypaṭu mai kiripitji pulka mulapa ngura lipiwanu pakalku, kaya añangu tjuṭangku mai titutjarangku mantjilku munuya wama pulka mulapa rawangku palyalku. ¹⁴ Kana palulanguru ngula añangu panya ngayuku walytja tjuṭa ngura panya

nyanganguru katinytja tjuta małakungku ngalya-katiku ngura walytjakutu ngura nyanga Israeltakutu. Kaya tjana piруku małaku tjunguringkula wali kutjupa tjuta palyalku, panya warmałangku palumpa tjanampa wali uwankara nganmanytju piluntara wiyanu. Munuya mai kiripitji tjuta piруku pakaltjingara wama walytjangku palyařa ngura walytjangka tjik-ilku. Munuya mai ukiri tjuta kulu tjanampa kaana tjutangka pakaltjingara kuřuringkunyangka mantjira ngalkula pukulpa mulapa titutjara nyinaku.

¹⁵ Uwa, ngayulu tjananya małakungku ngura walytjangka tjunkuku Israelta, ka kutjupa tjutangku tjananya piруku katinytja wiyaringkuku, panya ngayulu palunya tjananya ngura nyanga palunya ungu paluru tjanala rawa nyinanytjaku ngura walytjangka.” Alatji Mayatja Godalu tjanala wangkangu.

Tjukurpa Jonah-nyatjara Jonah **Nyangatja Nganmanytju Nyakula Wangkanytjaku**

Nyangatja Godaku tjukurpa munu tjukurpa nyanga paluru utini Godanya anangu uwankaraku mukuringkunytja munu tjananya mukulyangku atunymara kanyintja anangu Jew wiya tjuṭa kuļu. Panya Godalu anangu Jew tjuṭanguru wati Jonah-nya ngurkantanu ngura kutjupakutu ankunytjaku ini Ninipalakutu. Munu paluru palunya iyanu ankula ngura nyara palula anangu panya Jew wiya tjuṭa wangkara ngulutjunkunytjaku tjana kuranguru piiwiyingkula kura wantintjaku.

Palu nganmanytju Jonah-lu Godala kulilwiyangku wantingi munu paluru anu ngura kutjupakutu. Palu malangka tjintu mankurpa antipinaku tjuningka unngu ngarintjatjanu paluru nintiringu munu Godalu palula wangkanyangka paluru wanganarangku kulinu Ninipalakutu ankunytjikitjangku. Kaya anangu Ninipanya ngurara tjuṭangku mulapatu kulira mulamularingu paluru tjukurpa Godalu wangkanytjitja tjanala tjakultjunkunyangka munuya kuntaringkula kura uwankara wantingu alatjitu.

Ka ngula mulapa Jesulu ngapartji anangu Israelkunu tjuṭangka tjukurpa wangkangi munu panya Ninipanya ngurara tjuṭa tjanala tjakultjunangi. Alatji paluru wangkangi tjanala, “Tjintu Malatjangka anangu panya Ninipanya ngurara tjuṭangku nyuranya puntura wangkaku ngayuku tjukurpa kulira wantintjitetjanguru. Panya paluru tjana Jonah-lu Godaku tjukurpa wangkanyangka wanganarangku kulinu munuya piiwiyingkula kura tjuṭa wantingu. Palu kuvari nyanga kutjupa Jonah-la waintara pulka mulapa nyurala tjungu ngaranyi nyura nyakula wanganarangku kulintjaku. Palu nyura ngayunya ngurkantankunytja wiya alatjitu.” (Nyawa Luke-aku 11:32.)

Tjukurpa nyanganpa ngarinyi:

- 1:1-2 Godalu Jonah-nya altintytja
- 1:3-16 Jonah-nya Godala tungunpungkunytja
- 1:17—2:10 Jonah-nya antipina pulkangka tjuni unngu nyinanytja
- 3:1-4 Jonah-nya wanganararingkula Ninipalakutu ankunytja
- 3:5-10 Ninipanya ngurara tjuṭangku piiwiyingkula Godanya kulintja
- 4:1-11 Jonah-nya mirpanarintja munu Godanya ngalturingkunytja

Jonah-nya Godala Tungunpungkunytja

¹ Iriti mulapa wati ini Jonah-nya nyinangi, Amitaku katja. Munu paluru kulinu Godalu wangkanyangka nyanga alatji, ² “Jonah, pakara ara ngura tawunu ini Ninipalakutu. Ngura nyara palula panya anangu mungiliyi mulapa nyinanyi. Kaña kuvari tjananya nyanganyi kura pulka nyinanyi. Ka nyuntu tjanala ankula wirkara alatji wangka, ‘Nyuranya Godalu nyakula kuranmananyi munu nyuranya tjinguru iluntankuku.’”

³ Ka wati panya Jonah-lu Godalu wangkanyangka kulira wantira kampa kutjuparira anu ngura ini Tjapalakutu, Ninipalakutu ankunytja wiya. Palu ngura nyanga Tjapanya uru pulkangka itingka, ka pauta tjuṭa mulapa pitjala ngarala ankupai. Ka wati panya Jonah-lu wirkara nyangu pauta

urungka ankunytjikitja ngaranyangka ngura ini Paintakutu, munu paluru tikiti payamilanu tatira ankunytjikitjangku. Munu tatinu wati pauta katipai tjutangka tjunguringkula Paintakutu ankunytjikitja, panya paluru kulinungi Godalanguru kumpira ankunytjikitjangku.

4-5 Munuya ma-pakara urungka rawa ankula ankula, ka Jonah-nya pakuringu munu pauta unngu ukalingkula ngarikatingu. Ka Godalu walpa pulka iyanu, ka winmu-winmulyarara pauta panya pulkara uritjinganigi, ka nguwanpa katatakatingi. Kaya wati pauta katipai tjuta pulkara nguluringkula kawaru-kawaruringu, munuya tjanampa god tjutangka tjapiningi tjananya atunymara walpa pilunmankunytjaku. Munuya pautanguru luuta tjuta urungka wañingi pauta tjarpanytjaku-tawara, tjana kulu ilunyjtjaku-tawara.

6 Ka wati pautaku mayatjangku Jonah-nya para-nguriningi, “Yaaltjingka paluru nyinanyi?” Munu paluru nguriña nyangu, “Nyngatjampal kunkunaringu.” Munu wangkangu, “Jonah ngalya-pakala! Nyaakun kunkunpa ngarinyi? God nyuntumpangkalampa tjapila alpamilantjaku walpa nyangatja wiyatjaku. Palurulampa tjinguru ngalturingkuku, munulanya wankaru kanyilku.”

7 Kaya pauta katipai tjutangku kaputu-kaputurira nyinara wangkara kulinungi, “Nyaangurulanya nyangatja pulkara uritjingani. Wati kutjupamanti kurampa nganañala tjunguringkula pitjangu, ka nyanga walpa pulka pitjangu.”

Munuya wangkangu, “Puñu lalpirpa tjukutjuku tjutangkala wanyu ini uwankara walkatjura ngurkantankunytjikitjangku arkara.” Munuya walkatjunkula puñu initjara tjuta pitingka tjungura tjunu. Ka wati kutjungku kuru patiringkula piti palulanguru puñu kutju mantjinu munu kuru alaringkula nyangu ini Jonah-nya, munu tjanala nintira wangkangu, “Munta, wati nyangangkumpalanyal tatira ankula unnyunu.”

8-11 Munuya Jonah-nya altira tjapinu, “Nyuntu wanyu ngura yaaltjiwanutja? Tjaa nyaa wangkapain?”

Ka Jonah-lu tjanala wangkangu, “Ngayuluña wati Israelnga ngurara wangka panya Iipuru. Mununa ngayulu Mayatja God Ilkaritjanya walkulpai, panya uru manta uwankara tjunkunytjanya.”

Kaya palunya piruku tjapinu, “Nyuntu wanyu nyaanu? Nyuntulanguru-manti walpa nyangampa pulkaringu munu pauta nyangampa untura katantananyi.”

Ka tjanala Jonah-lu ngapartji wangkangu, “Wiya, Godaluñi Ninipalakutu wituningi, kana nyangatja Godala tungunpungkula nyuralawanu tatira pitjangu.”

Kaya paluru tjana Jonah-lu wangkanyangka kulira pulkara nguluringu. Munuya wangkangu, “Nyaakun nyuntumpa mayatjangka tungunpungkula anu? Utin wanganarangku kulira anama. Palu nyuntunyala kuwari nyaalku walpa atanarinytjaku?” Alatjiya palunya tjapiningi panya walpa pulka mulararinyangka.

12 Ka Jonah-lu wangkangu, “Nyurampa kuranguru wiya nyangatja, ngayulanguru. Kañiya urungka wani, ka walpa uru mapalku atanariku.”

13-14 Palu tjana Jonah-nya wañiwiyangku wantingu, munuya tjatutjatungku pauta panya puñu wara tjutangka arkara ilanigi mantangka wirkankunytjikitjangku. Palu putuya ilanigi panya walpa pulka mulararinyangka. Ka uru panya pulkara alatjitu pirnyalarara pautangka tjarpangi. Kaya palulanguru Mayatja Godala pulkara tjapiningi wangkara, “Mayatja, ngalturiwalampa! Nyanga kuwarin walpa pulka iyanu wati

nyanga Jonah-languru pauta uritjingara uringka tjarpatjunkunytjaku. Ka nganaña wati nyanga palunya uringka wañinyangkampa wanyu walpa atanmanama nganaña wankaringkunytjaku.” ¹⁵ Munuya tjapira wiyingkula Jonah-nya mantjira uringka wañingu, ka walpa uru mapalku atanaringu. ¹⁶ Kaya atanarinyangka nyakula tjana Mayatja Godaku pulkara nguluringu. Munuya kuka pungkula tiliwakara Godanya walkuntjikitjangku ungangi. Munu tjana kalkunu alatji wangkara, “Nyangangurula nyuntunya kutju kulilku Mayatja Godanya.”

¹⁷ Palu Jonah-nya uringka tjarpala ilunytja wiya panya Godalu antipina pulka iyanu, ka antipinangku Jonah-nya kuultjanu munu tjintu mañkurpa wanka kanyiningi tjuni unngu.

2

Jonah-lu Godala Pulkara Tjapintja

¹ Ka tjuni unngunguru Jonah-lu Godala nganmanytu tungunpungkunytjatjanungku piruku palunya kulinu munu alatji wangkangi palula, ²⁻⁹ “Mama, nyuntu panya walpa pulka iyanu ngayulu nyuntunya kulira wantinyangka,

kaniya nyangantu palya uringka wañingu.

Kana unngu mulapa kata wiyingkula karalukatingi, mununa putu pakara nguwanpa ilungi mulyangka uru tjarpanyangka.

Munuñatju ngayulu kulinu, ‘Tjingurunitju ngayunya Godalu wantiku.’

Palu ngayuluna piruku kuliningi,

‘Wiya, Godaluñi wanka kanyilku ngayulu palunya rawangku walkuntjaku.’

Palu ngayuluna wanka alatjitu karalukatira ukalingkula ngururpa putu ngaalymanangi.

Munuña ukalingkula puli pañtangka wirkanu, kaní ukiri unngutjangku kata karpiñu.

Kañatju nyakula kulinu, ‘Awari! Nyangatja aña wiya pati alatjitu ngayulu małaku pakantjaku wiya.

Yaaltjingarañatju małaku pakalku?’

Mama God, ngayulu nguwanpa ilura pulkara mirangu nyuntumpa ngayunya kulira alpamilantjaku.

Ka nyuntu mulapañtu ilkariringuru kulira ngayunya wankañunu uringka ilunytjaku-tawara.

Mama God, añañgu tjarangkuya nyuntunya wantira god puñunguru palyantja tjuña walkulpai.

Palu ngayuluna nyuntunya kutju rawangku kulira mirawaniku nyanga tjana purunypa wiyangku.

Munuña ngayulu nyuntunya kuka pungkula tiliwakara ungkuku nyuntu ngayuku kalyparingkunytjaku.

Mama God, ngayuluna nyuntunya kuwari kalkuntjatjanungku watarkuri-wiyanngku rawangku kulilku.

Nyuntu kutjungku añañgu tjukarurulpai aña kurawanu nyinanyangka, munun iwara tjukarurungka katirinkupai.”

Alatji Jonah-lu Godala wangkangi antipina tjuni unngunguru.

¹⁰ Ka palulanguru Godalu antipina panya palunya mantakutu witunu. Ka mulapañtu wirkara Jonah-nya mantangka ulkapatjunu pika wiya.

3

Jonah-nya Wanganararingkula Ninipalakutu Ankunytja

¹ Ka Godalu piruku Jonah-la wangkangu, ² “Pakara ara ngura Nini-palakutu ngura panya aŋangu mungilyitjarakutu. Munu tjukurpa panyatja tjanala wangka, panya nganmanytjuŋa ngayulu nyuntula wangkangu.” ³ Ka paluru mulapa pakara anu ngura Ninipaku munu ankula wirkanu. Palu Ninipanya ngura city pulka mulapa, wali mungilyitjara. Panya wiluraranguru kakaraŋakutu tjintu maŋkurpa rawa ankula kutju ma-pakalku uřilkutu.

⁴ Ka Jonah-nya ngura Ninipala tjarpala ankula ngururpa wirkara aŋangu tjutangka wangkangi Godalu wangkanytja alatji, “Tjin̄tu 40-ŋuru kunyu Godalu nyuranya uwankara mulapa wiyalu aŋangu, kuka, wali uwankara, kutjupa malaringkula ngaranytjaku wiya.”

⁵ Ka aŋangu tjutangku Godaku tjukurpa kulira ngulu-ŋguluringkula Jonah-la wangkangu, “Munta-uwa, panya nganaŋa kura mulapa Godanya kulilwiya nyinangi watarku alatjtū. Utu nganaŋa mulamularingkula kampa kutjuparira Godanya kutju kulinma.” Munuya mała kutju kulira pulkara mulapa tjituru-tjitururingu kura panya nganmanypa nyinanyt-jatjanu. Munuya kuntearingkula mai kuka ngalkuwiya nyinangi munuya mantara wiru tjuta wantira mantara walyku-walyku tjana palyantjitjangka tjarpala nyinara waŋingi tjituru-tjituru mulapa.*

⁶ Ka wati panya Ninipaku mayatjangku kulinu Jonah-ku wangka munu kulintjatjanu nguluringkula tjiyanguru pakara mantakutu ukalingu munu mantara wiru panya aŋangitja arara waŋira mantara walyku-walyku palyantjitjangka tjarpala nyinakatingu manta tjunpatjarangka pulkara kuntearingkula. ⁷ Munu paluru wati tjuta witura iyanu aŋangu tjutangka para-wangkanytjaku alatji, “Nyngatjala pitjangu Ninipaku mayatja tjutanguru nyurala wangkanytjikitja. Kaya wanganarangku kulira palyanma alatji kuka, mai, waina uwankara ngalkuwiyangku wantima munuya puluka, nanikuta, tjiipi kuļu ngalkuntjaku ungkuwiyangku wantima. ⁸⁻⁹ Munuya uwankara mantara walyku-walyku palyantjit-jangka tjarpala nyinama, munuya kuka tjuta kuļu mantara kurakurangka tjarpatjura. Munuya kura nyinanytjatjanu kampa kutjuparira palyanyku nyinara Godala tjiapinma nganampa ngalturingkula nganananya iluntankuwiyangku wantinytjaku. Ka tjinguru Godalu kampa kutjuparira nganananya kalypangku wantiku, kala wanka nyinaku.” Nyanga alatjiya aŋangu tjutangka para-tjakultjunangi panya wati mayatjangku wangkanytja.

¹⁰ Kaya aŋangu tjutangku wanganarangku kulira nganmanypa kura nyinanytjatjanu kampa kutjuparingu tjukaruru nyinanytjikitja. Ka Godalu tjananya nyakula kulira ngalturingku munu tjananya iluntankuwiyangku wantingku.

4

Jonah-nya Mirpanarintja Munu Godanya Ngalturingkunytja

¹ Ka palulanguru Jonah-nya tjituru-tjitururingu munu Godaku mir-paŋarira paluru wangkangu, ² “Nyaakun panyatja ngayunya iyanu ngura parari Ninipalakutu ankula aŋangu tjuta wangkanytjaku? Munun nyaaku

* ^{3:5} Tjakangkuya ara nyangatja alatjinganingu kura nyinanytjatjanungku kuntearingkula tjukarururingkunytjikitjangku.

tjananya mapalku iluntankuwiyangku wantingu? Utin tjananya kalyparingkuwiyangku iluntara wiyanma. Panya nyuntun ngayula ngañmanytju wangkangu tjananya iluntankunytjikitjangku. Kaña ngayulu kulinu, 'Wiya nyuntu tjinguru tjanampa ngalturingkuku.' Ka panyana alatji kulira ngayulu tjanalakutu ankunytja wiya wantira kampa kutjuparira anu ngura panya Paintakutu ankunytjikitja. God, ngayulu nyuntumpa ninti panya nyuntu anangu tjutaku mukulya, munun warpungkula mirpanaripai wiya, ngaltunytju mulapa. Nyuntu kutjupara anangu tjuta iluntankunytjikitjangku kulilpai munun tjana kampa kutjuparin yangka iluntankuwiyangku ngalturingkula wantipai. Mulapa nyuntu kurunpa ngaltunytju."

³ Munu palulanguru Jonah-lu wangkangu, "Mayatja God, nyuntu ngayuku wangka kulintja wiya. Ngayunyaní palya iluntara."

⁴ Ka Mayatja Godalu Jonah-nya ngapartji kulira wangkangu, "Wiya, nyaakun mirpañarinyi? Wantima!"

⁵ Ka Jonah-nya pakara anu kakarara parari wiya urulta nyinanytjikitja Ninipala itingka. Munu paluru wiltja kurakura palyara pañara nyinangi munu kulinigi, "Tjinguru Godalu iluntankuku anangu tjuta, tjinguru tjananya wantir'iyalku."

⁶ Ka Jonah-ku ngurangka Mayatja Godalu puñu puya pakaltjinganu Jonah-nya wiltjangka pukulpa nyinanytjaku. Ka puñu puya paluru mapalku pulkaringu pulkunpa wiru mulapa. Ka Jonah-nya wiltjangka pukulpa mulapa nyinangi. ⁷ Ka mungawinki Godalu maku katañi purunyapa iyanu puñu panya palunya ngalkula kurara wiyanjaku. ⁸ Munu tjintu pakannyangka Godalu walpa waru iyanu, ka Jonah-nya kulingku kampangu wiltja wiyangka. Ka paluru nyinara puñu warikitja ngarangi munu nguwanpa punkanigi. Munu paluru wiltja wiyangka ilunytjikitja mukuringangi, munu Godala wangkangu, "Palyani iluntara wanka kanyiliwyangku."

⁹ Ka Godalu wangkangu Jonah-nya, "Nyaakun mirpañarinyi puñunguru?"

Ka Jonah-lu ngapartji wangkangu, "Wiya, palyana ngayulu mirpañarinyi ilunytjikitja."

¹⁰⁻¹¹ Ka Godalu Jonah-nya piñuku wangkangu, "Puñu nyangatja munga kutju pakañu munu mungawinki piltiringu rawa ngaranytja wiya. Ka nyaaku nyuntu tjituru-tjituru nyinanyi? Nyuntun wanyu minangka kurpira puñu nyangatja pakaltjinganu? Wiya palatja ngayulu tjunkunytja. Palu nyuntun puñu wanka rawa ngaranytja-tjiratja ngalytjurmananyi. Wiya palatja puñu piltiringu, anangu wiya. Kan nyaaku anangu tjutaku ngalturingkuwiya puñuku nyinara ulanyi? Kulila, ngura pala Ninipala anangu tjuta mulapa nyinanyi nampa nyangatja 120,000 munu puluka, tjiipi kuñu pulka ngaranyi. Utiña ngayulu anangu Ninipanya ngurara tjutaku ngalturingama tjananya wirura kanyintjikitja, panya paluru tjana kuwari ngayunya kulipairingu." Alatji Godalu Jonah-la wangkangu.

Wati Wangkatjarangku Maikalu Walkatjunkunytja **Micah** **Nyangatja Ngañmanytju Nyakula Wangkanytjaku**

Nyangatja Godaku tjukurpa wati wangkatjara ini Maikalu walkatjunkunytja. Panya paluru Godaku tjukurpa wangkangu añaŋgu panya Tjamiriyanya ngurara tjutangka munu Jerusalemania ngurara tjutangka kuļu. Wati nyara paluru kuranyitja tjutangka munu tjukurtjara tjutangka munu wangkatjara tjutangka kuļu pułkařa wangkara painingi, panya tjana mulamulangku añaŋgu tjuta tjukarurura kanyintja wiyanguru. Panya tjana ngunti wangkapai munuya añaŋgu ngaltutjara tjuta ngunti kurara tjanampa kutjupa kutjupa tjuta tjulyalpai. Munuya paluru tjana Godanya mulamulangku wal Kulpa wiya winpinpingku kutju unytjungku wangkapai.

Ka Maikalu tjanala wangkangu, “Nyura alatji rawa nyinanyangkampa Godalu nyurampa kutjupa kutjupa kura pułka iyalku.” Uwa, Maikalu kuranyukutungku nyangangi munu kulinigi panya mayatja pułka wirkankuku ngura ini Bethlehemala munu paluru wirura atunymara kanyilku añaŋgu Godaku walytja tjuta. Nyanga alatji paluru Jesunya wangkangi, ka panya ngulalta Matthew-lu kulinu Maikalu walkatjunkunytja munu tjukurpa panya palunyatu walkatjunu. (Nyawa Maikalu walkatjunkunytja 2:6 munu Matthew-ku tjukurpa 5:2.)

Uwa, nyangatja Maikalu tjukurpa walkatjunkunytja tjara kutju ngarinyi, panya nganana kuwaripangkuļu palyani, palu uwankarala walkatjura wiyanjtja wiyatju.

Tjukurpa nyanganpa ngarinyi:

- 1:1-5 Godalu palumpa walytja tjuta ngurkantankunytjikitjangku kalkuntja
- 2:1-10 Israelkunu tjutangku kura tjuta palyantja
- 5:2-5 Godalu mayatja pułka tjanampa iyantjikitjangku kalkuntja
- 6:1-7 Israelkunu tjutangku kura tjuta palyantja
- 6:8 Palyanyku nyinanytja Godanya pułkalarinytjaku
- 7:18-20 Godalu tjananya kura palyantjitunguru kalypangku wantintjikitjangku kalkuntja

Godalu Palumpa Walytja Tjuta Ngurkantankunytjikitjangku Kalkuntja

¹ Ngayuluļa wati ini Maikanya ngura ini Mařatjatjanya ngurara. Ka wati ini nyanganpa Tjatjamanya, Aatjanya munu Itjakayanya tjana manta Judah-ku mayatja pułka nyinangi wanapari wanapari. Ka nyara paluru tjana nyinanytja-arangka Mayatja Godalu ngayunya tjukurpa pułka tjuta nintiningi añaŋgu Israelnga ngurara tjutatjara munu Judah-nya ngurara tjutatjara kuļu, ka nyanganpa ngayulu kulintjatjanungku walkatjunanyi.

² Kaya kuwari ngayula kulila añaŋgu uwankarangku manta winkinguru. Panya Godalu Mayatja Pułkangku nyuranya ilkareringuru kura palyanyangka nyakula wangkara kuranmananyi. ³ Paluru kuwari nguwanpa pitjanyi ngura nyara ilkareringuru munu paluru mayatja pułkangku puli murpu pułka tjuta wiylaku, ⁴ ka puli paluru tjana ururinguku, panya

wax warungku kampanyangka ururingkupai, palu purunypa. Munu puli paluru tjana ururingkula karu purunypa wala winki ukalingkuku wařarangka purunypa. ⁵ Palu nyaaku wanyu alatjiriku? Wiya, aňangu Israelkunu tjutangku munu Judah-nya ngurara tjutangku kuļu kura tjuṭa rawangku palyannyangka alatjiriku, panya paluru tjana Godala rawa tungunpungangi.

2

Israelkunu Tjuṭangku Kura Tjuṭa Palyantja

¹ Uwa, uti aňangu kura palyalpai tjuṭa Godaku pulkara nguluringama. Panya paluru tjana mungangka ngarira tjukurpa kura tjuṭa wangkara kulil-pai mungawinki palyantjikitjangku. Munuya mungawinki pakara palyal-pai alatjiṭu mungangkalpi wangkanytjatjanungku. Tjana alatjiṭuya walyt-jangku kuļira palyalpai, ka kutjupangku tjananya putu paini. ² Munuya paluru tjana aňangu kutjupaku mantaku mukuringkula tjanalanguru tjulyalpai alatjiṭu mai kuka puluka tjiipi winki. Munu tjana wali walytjatjaraku mukuringkula tjarpapai alatjiṭu. Munuya ngunti wangkara wati kutjupaku ulytja kuļu tjulyara walytjaringkupai.

³ Ka nyara palulanguru Mayatja Godalu aňangu nyara palunya tjananya alatji wangkanyi, “Ngayuluna nyuranya tjituru-tjiturū pulka palyantjikitjangku kulini. Ka nyuranku putu walytjangku wankarunkuku munu nyura piruku kaňany-kaňanypa para-ngaranytja wiyarinkuku kura pulka nyurala utiringkunyangka. ⁴ Ka nyara palula ařa aňangu kutjupa tjuṭangku nyuranya nyakula wangkara anařa ikaringkuku. Munuya nyuranyatjara inma kuwaritja palyara inkaku nyurala kura utiringkunytja kulintjikitjangku. Tjana nyuranya purunytru arkara inkaku alatji, ‘Nganaňalanku walytjangku alatjiṭu kuraňu.

Ka Mayatjalu nganaňalanguru ngura małakungku tjulyaňu,
Munu ngura palunya tjananya tjarara ungkula wiyanu nganampa mir-pańtu tjuṭa.’

Alatjiya nyuranya kuļira inkaku.”

⁶ Kulilaya aňangu Israelkunu tjuṭangku munu Judah-nya ngurara tjuṭangku kuļu! Panya nyurampa wangkatjara tjuṭangku ngayunya pain-ingi nyanga alatji wangkara, “Tjukurpa nyanga purunypa tjuṭa nganaňala wangkawayangku wantima munulanya kuramankunytja wiyangku wantima. Panya ngula kutjupa kutjupa nyanga nyuntu wangkanytja tjuṭa utiringkunytja wiya alatjiṭu ngaraku. ⁷ Mayatjanya wanyu nganampa mir-pańarinyi nganaňa palyantjikitjanguru? Munu paluru wanyu nganaňanya pungkunytjikitja mukuringanyi? Wiya, nganaňa wirura nyinapai tjuṭa, ka paluru nganaňala wiru kutju wangkapai.” ¹¹ Palu nyura wangkatjara ngunti tjuṭaku mukuringkupai nyurala tjukurpa ngunti tjuṭa wangkanyt-jaku. Tjinguru wangkatjara kutjupa ngunti wangkapai nyuralakutu pitjaku munu paluru tjukurpa Godaku-palku nyurala alatji ngunti wangkaku, “Kuwari Godalu nyurampa wama pulka palyani nyura tjikintjaku.” Ka nyura tjukurpa nyanga purunypa wangkanyangka kuļira pulkara pukulariku panya nyura ngunti tjuṭaku kutju pukularipai munu nyura tjukarurungku wangkanyangka kuļira wantipai.

5

Godalu Mayatja Pulka Tjanampa Iyantjikitjangku Kalkuntja

² Palu Mayatja Godalu alatji wangkanyi nyurala, “Kulilaya Bethlehemanya ngurara tjuta! Panya nyura manta pala Judeala nyinanyi ngura tjukutjukungka. Palu tjituru-tjitururintja wiyangkuya wantima, panya ngura nyara palula mayatja pulka wirkankuku Israelkunu tjuta atunymara kanyintjikitja, panya nyara palumpa tjamupiti manta panya Judah-ku mayatja pulka iritinguru alatjitu nyinakatingi wanapari wanapari rawa mulapa. ⁴ Munu ngayulu palunya witulyankunyangka paluru palumpa panya walytja tjuṭa wiruṛa atunytju kanyilku mayatja pulkangku, kaya tiṭutjara wankarū nyinaku. Kaya palulanguru anangu manta winkitjangku palunya kulira ngurkantankuku, ‘Mulapa paluru pulka mulapa nyinanyi.’ Ka nyara palulanguru palumpa walytja tjuṭa wankarū pukulpa nyinaku. ⁵ Munu paluru anangu tjuṭa kalypa nyinanytjaku palyalku.”

6

Israelkunu Tjuṭangku Kura Tjuṭa Palyantja

¹ Wanyuya kulila Mayatja Godalu nyuranya Israelkunu tjuṭa kuut pangka ngaratjunkula wangkara ngurkantankunyangka. Mayatja God, wanyu tjananya anangura wangka puli murpu tjuṭangka mirangka. ² Ka nyura murpu tjuṭangku kulila Mayatja Godalu palunya tjananya wangkanyangka. Panya nyura rawa pupangi iritinguru alatjitu Godalu tjananya nganmanytju wangkara kalkuntja-arangka kuļu. Ka kuwari paluru tjananya anangura wangkanyi paluru panya Israelku kalkuntjtja tjana wantinyangka.

³ Alatji Mayatjalu tjanala wangkanyi Israelkunu tjuṭangka, “Nyura panya ngayuku walytja tjuṭa, munu nyura nyaaku rawa ngalytjurmananyi? Ngayulu nyuranya nyaanu nyura tjituru-tjitururintjaku? Wituwitu nyaana nyurampa palyanu nyura pakuringkunytjaku? Wanyuni utingku wangka! Wiya, nyura puṭu wangkanyi. ⁴ Panyatjaya kulila, panya nyurampa walytjapiti iriti Ittipala nyinanyangka nyara palunya ngurara tjuṭangku tjananya pulkara warkamilara pakuningi. Ka ngayulu Mosenya, Aaronnga, Miriamanya tjananya iyanu tjananya wankantjaku nyurampa walytjapiti, kaya mulapatu tjananya manta nyara palulanguru ngalyapakaltjingaṇu ngayulu nintinnyangka. ⁵ Munuya aṛa kutjupa kuļu kulinma panya iriti wati ini Pailakanya ngura Mawapaku mayatja pulka nyinangi Israelta itingka munu paluru nyurampa walytjapitiku ngulungku wati wangkatjara ini Pailamanya wangkangu alatji, ‘Nyuntumpa Mayatja Godala tjapila Israelkunu tjuṭa kurantjaku.’ Ka panya Pailamalu wangkangu, ‘Wiya, Godalu tjananya pukulmankunytjikitja kutju mukuringanyi.’

“Munuya piṛuku kulinma aṛa kutjupa, panya nyurampa walytjapiti nganmanypa Ittipalanguru pitjala ngura ini Tjitimala wirkanu munuya nyara palulanguru manta nyanga Israelta tjarpanu karu Jordanta itipirira munuya Kilkalta wirkanu.*

“Uwa, nyura uti aṛa nyanganpa kulinma watarkurintja wiyangku munu nyura kulintjatjanungku kulilku, ‘Munta-uwa, mulapa Mayatjalu nganampa walytjapiti rawangku wankarunangi, kala nyara palulanguru nganana małatja tjuṭa wankaṭu nyinanyi.’” Alatji Godalu nyurala Israelkunu tjuṭangka wangkanyi.

* **6:5** Nyara palula aṛa panya Godalu witulya pulkangku uṛu pulka karungka ukalingkunyangka markuṇu, kaya anangu uwankara manta piltingka itipiringu, ka itipirira wiayingkunyangka kutju uṛu piṛuku ukalingu.

⁶ Ka nyura ara nyanganpa kulira tjinguru piiwiyingkula pulkara tjituru-tjitururiku munuya alatji wangkaku, "Munta-uwa, mulapa Mayatja Godanya pulkara tjituru-tjitururingu nganaña palula tungunpungkula kura tjuta palyannyangka. Kala nyaalku paluru nganampa kalyparingkunytkaku? Nyaala katiku palulakutu paluru nyakula nganañanya ngapartji pungkuwiyangku wantintytkaku? Tjingurula puluka yangupala wiru tjuta katira pitjilta katu tjunkuku munu pungkula warungka tiliwakalku palunya ungtunytkikitjangku. ⁷ Wiya, tjingurula tjiipi nyitayira tjuta mulapa katiku nampa nyangatja 1,000, munta tjingurula uwila mai alipanguru palyantja pulka mulapa katiku uru karutja purunypa. Wiya, wanyula nganampa katja nganmanyitja tjuta kati munula palunya tjananya pitjilta katu tjunkula warungka tiliwakala palunya ungtunytkikitjangku. Ka nyara palulanguru tjinguru paluru nganampa kalyparingkuku munulanya kura tjuta palyantjtanguru pungkuwiyangku wantiku." Alatji tjinguru nyura piiwiyingkula palyantjikitja mukuringkuku.

Palyanyku Nyinanytja Godanya Pukularinytjaku

⁸ Palu wiya, panya Mayatja Godalu nyuntunya nganañanya nganmanytju wangkangu nyaaa palyantjaku. Alatji paluru wangkangu, "Nyura tjukaruru palyanyku nyinama anangu tjuta ngunti kuralwiya. Munuya ngayuku titutjara pulkara mukuringama anangu tjutaku ku lu wantintyja wiya. Munuya ngayula tjungu nyinara ngayula wangañarangku kulinma tungunpungkuwiyangku."

Nyanga alatji Godanya mukuringanyi nyuntu nganaña nyinanytjaku.

7

Godalu Tjananya Kura Palyantjtanguru Kalypangku Wantintykitjangku Kalkuntja

¹⁸⁻²⁰ Uwa Mayatja God, nyuntu kutjun mayatja pulka mulapa nyinanyi kutjupa uwankarangka waintara alatjitu. Panya kura kutjupa kutjupa tjutanguru nyuntumpa walytja tjuta wiyingku, ka nyangala mañkurpa kutju małaringkula nyinanyi. Ka nyuntu panya nganampa kalyparingkula nganaña kurantjtanguru nganañanya pungkunyta wiyangku wantingu. Munu panya nyuntu rawa mirpanaripai wiya anangu tjutaku. Nyuntu nganampa rawa pulkara mukuringkupai munun nganampa pukularipai nyuntumpa walytjapitiku. Munu nyuntu pirukutu ngalturingkula nganampa wiru palyalku munu nganañanya kura nyakunyta wiyingkuku. Munun titutjara alatjitu mukulya pulka nganampa nyinaku anangu Israelkunu tjutaku, munun nganañanya ngaltunytkungku atunymara kanyilkku Aipuramaku nyanga walytjapiti munun tjukarurungku palyalku, panya iriti mulapan kalkunu nyuntumpa walytjapiti malatja malatja wiru ra kanyintjikitjangku.

Wati Wangkatjarangku Akailu Walkatjunkunytja Haggai

Nyangatja Ngañmanytju Nyakula Wangkanytjaku

Nyangatja Godaku tjukurpa wati wangkatjara ini Akailu walkatjunkunytja. Panya wati nyara palulawanungku Godalu Israelku mayatjangka wangkangu wati ini Tjirapapilta munu wati tjukurtjarangka kuḻu ini Tjatjuwala, panya nyara palula arangka aŋangu Israelkunu tjuṭa ngura panya Papilantanguru małaku pitjangu ngura walytjakutu munu pañyaya timpula panya piluntankunytja piruku palyaningi. Ka Aikalu Tjirapapilnga tjananya wangkara wituwituningi timpula panya palyara wiyatjaku ngururpa pakuringkula wantintyja wiyangku.

Munu paluru tjananya timpulanguru kulintjaku wangkangi, panya timpulangku nintini panya ngula wiru mulapa wirkankuku aŋangu Godaku walytja tjutangka. Munu paluru tjanala wangkangu panya kura kutjupa kutjupa wirkankunyangka tjana alatji kulintjaku, “Tjinguru nganana palunya wantira walytjangku kulira palyaningi ka palulanguru nganaŋala kura wirkana. Kala wanyu małaku aruriwa palulakutu, ka paluru nganampa wiru palyalku.”

Uwa, nyangatja Aikalu tjukurpa walkatjunkunytja mañkurpa kutju ngarinyi, panya nganana kuwaripangkuṭu palyani uwankara walkatjurā wiyatjaka wiyangku.

Godalu Wangkanytja Timpula Palumpa Piruku Palyantjaku

¹ Tjukurpa nyangatja Mayatja Godalu palumpa wangkatjarangka wangkangu wati ini Akaila paluru wangkanytjaku wati panya mayatja kutjarangka ini Tjirapapilta pulala Tjatjuwala. Panya Tjirapapilnga manta Judah-ku mayatja pulka nyinangi ka Tjatjuwanya panya tjanampa tjukurtjara pulka. Ka wati panya Akailu pulala ankula tjakultjunu. ² Alatji paluru wangkangu Mayatja Godalu wangkanytja, “Aŋangu tjuṭangkuya kuvari alatji wangkanyi,

‘Tjintu nyangatja kuwaripa nganana kuwaritu Godaku timpula piruku palyara wiyatjaku wiya.’”

³⁻⁴ Palu Godalu ngayulawanungku kuvari nyurala wangkanyi alatji, “Walytja tjuṭa! Wali ngayuku miłmilpa kałakatira minya-minyaringkunytja ngarinyi mantangka punkara, palu nyura wali wiru tjuṭangka nyinanyi walytja alatjiṭu. Nyaaku nyura watarkuringu wali nyara miłmilku?

⁵⁻⁶ “Uti nyura para-nyangama munuya nyakunytjatjanungku kulinma, ‘Nyaangurula pukulpa wiya nyinanyi?’ Panya nyura uñinypa winki mulapa mantangka tjunu mai pulka pakaltjingantjikitjangku, palu mañkurpa kutjuya pakara pułkaringkula maitjararingu. Ka nyura mai tjukutjuku kutju uraṛa kanyini ngalkuntjikitjangku, palu nyura mai palunya ngalkuntjatjanu pałtjaringkupai wiya. Munu nyura wama kuḻu tjukutjuku kanyini tjikintjikitjangku, palu nyura puṭu tařangkaripai tjikintjatjanu panya wama tjukutjuku alatjiṭu. Munu nyura mantarangka tjarpapai, palu nyuranya mantara paluru tjana unytjunmankupai wiya. Kaya wati

tjuṭa kuļu manikitja warkarinyi, palu paluru tjanaya mani tjukutjuku kutju mantjilpai munuya tjanampa walytja tjutangku kuļu ngalkula paltjaringkunytjaku mai pulka nguwanpa puṭu payamilpai. Uwa, mulapa nyura puṭu pukulpa nyinanyi.

⁷⁻⁸ “Uti nyura nyanga palula tjanalanguru kulinma munuya tjukarurungku ngayula kulinma. Panya nyura ngayuku watarkurira ngayuku timpula kuļu palyantja wiyangku wantingu. Palulanguru nyura pukulpa wiya nyinanyi. Palu kuwariya puli nyara murpu tjutakutu ankula puṇu wara tjuṭa kaṭara punkatjingara ngalya-kati, munuya palulanguru timpula palyala ngayuku. Ka nyara palulanguru nyura alatji palyannyangka ngayulu nyakula pukulariku, ka nyura kuļu ngayunya tjukarurungku walkulku.”

¹² Ka palulanguru Tjirrapapiltu pula Tjatjuwatu munu aŋangu tjutangku kuļu wanganarangku kulinu panya Godalu ngayulanunungku wangkanyangka, munuya kulira palunya walkuningi.

¹³ Kana ngayulu aŋangu panya tjutangka wangkangu, “Kulilaya, nyanga Mayatjalu wangkanytja alatji, ‘Ngayuluña nyurala tjungu nyinanyi.’”

¹⁴⁻¹⁵ Munu nyanga alatji wangkanyangka Mayatja Godalu Tjirrapapilnga pulanya Tjatjuwanya kurunpa rapaṇu aŋangu uwankara kuļu, kaya kulira raparingkula Godaku timpula palyantjikitja pulkara mukuringangi, munuya piṛa pala palulatu tjaata wanganarangku timpula palyaningi Mayatja panya Pulkaku.

2

¹⁻⁴ Ka tjana piṛa kutju palyannyangka malangka Mayatja Godalu ngayula piṛuku wangkangu Tjirrapapilta pulala Tjatjuwala wangkanytjaku munu aŋangu tjutangka kuļu. Alatjini wangkangi tjanala tjapira kulintjaku, “Kutjupangku wanyu kulini panya timpula nyanga paluru iriti ngaranytja? Panya wiru mulapa ngañmanyapa ngarangi. Munu kuvari wanyu nyura palyantjtja wiruṭu ngaranyi? Wiya, kuvari panya ngañmanyitja purunyapa ngaranytja wiya alatjtū. Kaya kulira tjituru-tjitururinytja wiyangku wantima, panya ngayulu nyurala tjungu titutjara nyinanyi mayatja pulka mulapa. Kaya rawa warkarima munuya tjungungku palyanma wantintja wiyangku.

⁵ “Iriti panya nyurampa walytjapiti Itjipalanguru ngalya-pakaṇu, ka panya ngayulu kalkunu palula tjanala tjungu titutjara nyinanytjikitjangku. Mununa kuvari nyurala kuļu tjunguṭu nyinanyi. Kaya nguluringkunytja wiya rapa nyinama.

⁶⁻⁷ “Panya kuvari nguwanpa ngayulu ilkarī manta uru kuļu pulkara uritjingalku, kaya aŋangu ngura winitjangku nyakula pulkara nguluringkula tjanampa kutjupa kutjupa wiru tjuṭa munu mani kuļu ngalya-katiku timpula nyanga palulakutu, panya ngayulu kutju uwankaraku mayatja nyinanyi manta winitjaku. ⁸ Panya manta uwankarangka wiru tjuṭa ngaranyi gold munu tjiilpa kuļu nyara paluru tjana kuļu ngayuku alatjtū.

⁹ “Ka nyura wiru nyara palunya tjananya katinyangka mantjira ngayuku nyanga timpulangka tjunkuku, ka nyanga paluru wiru mularariku, panya timpula ngañmanyitjangka waintara. Kana ngayulu ngayuku aŋangu tjuṭa pukulmara kanyilku ngayula tjungu.” Alatji wangkangu Mayatja Godalu, panya paluru kutju-maṇṭul Mayatja pulka.

¹⁷⁻¹⁹ Munu paluru piṛuku wangkangu, “Panya ngañmanyiju nyura kaanangka pulkara warkaringi mai tjuṭa pakaltjingantjikitja, ka panya

ngayulu mina pułka iyanu kunaña kułu, ka nyara palulanguru nyurampa mai uwankara kuraringu. Ka panya nyura nyara palunya nyakunytjatjanungku ngayulakutu małaku aruringkunytja wiyangku wantingi. Palu kuwari nyanga nyura kura wantira malaku pitjangu ngayulakutu munu nyanga nyura timpula palulalta palyańi. Kana ngayulu Mayatja pułkangku nyuranya kuwaringuru nyanga alatjińu pukulmara kanyilku.”

Uwa, alatji Mayatja Godalu tjanala wangkangu.

Wati Wangkatjarangku Malakailu Walkatjunkunytja Malachi **Nyangatja Ngañmanytju Nyakula Wangkanytjaku**

Nyangatja Godaku tjukurpa wati wangkatjarangku ini Malakailu walkatjunkunytja. Panya wati nyara palulawanungku Godalu wangkangu añaŋgu panya palumpa walytja tjutangka, panya palumpa tjanampa tjamu munu mama tjutangku ngañmanytju timpula panya pilukatinytja palyaŋa wiyanu, ka nyara palula malangka kuļi 80 ngarala wiyaringu.

Palu paluru tjanaya kulinngi tjinguru wati panya wangkatjara ngañmanyitja tjutangku wangkanytja tjukurpa ngunti nguwanpa, munuya palulanguru kulira tjituru-tjitururingi munuya kulinngi, “Yaalaŋa nyangatja palyaringkuku kala pukulpa mulapa nyinaku?” Ka panya tjanampa tjukurtjara tjutangku Godaku tjukurta kulilwiyangku wantingi munuya palunya tjukarurungku walkulwiyangku kulu wantingi. Kaya añaŋgu tjutangku kuka wiru munu mai wiru kuļu Godanya ungkunytjikitjangku katiwiyangku wantira kurakura tjuta kutju katingi.

Palu Malakailu tjananya wangkara mukumukuningi Godalakutu aruringkula palumpa tjukurpa wangaŋarangku kulintjaku, kaya palulanguru paluru tjana nyakuku Godalu tjananya mulapa atunyti kanyinnyangka munu wiru tjuta tjanampa palyannyangka.

Uwa, nyangatja Malakailu tjukurpa walkatjunkunytja maŋkurpa kutju ngarinyi, panya nganana kuwaripangkuļu palyani, palu uwankarala walkatjura wiyanja wiyatū.

Tjukurpa nyanganpa ngarinyi:

1:6—2:16 Tjukurtjara tjutangku ngunti palyantja

3:1-2 Godalu wati tjakulpa kuranyu iyantjikitjangku kalkuntja

3:5-7 Godalu añaŋgu kura tjuta ngurkantara tjarantjikitjangku kalkuntja

3:8-18 Godanya tjukarurungku ungkunytjaku

4:1-4 Tjintu malatja

Tjukurtjara Tjutangku Ngunti Palyantja

¹ Tjukurpa nyangatja Mayatja Godalu wati ini Malakaila wangkangu Israelkunu tjutangka tjakultjunkunytjaku.

⁶ Nyanga alatji paluru wangkangu wati tjukurtjara tjutangka, “Ngayuluŋa Mayatja wituļya pulkangku nyurala wangkanyi, kaya kulinma! Panya tjiti tjutangku mamangka wangaŋarangku kulilpai, ka wati warkaripai tjutangku kuļu mayatjangka wangaŋarangkuļu kulilpai. Ka panya ngayulu nyurampa Mama munu Mayatja nyinanyi. Ka nyura nyaaku ngayula wangaŋarangku kulintja wiyangku wantinyi? Panya nyura ngayunya ananingu, munu nyura ngayunya kulira wantingi. Palu nyura ngayula tjapilpai alatji, ‘Nyaala wanyu wangkara nyuntunya ananingu?’

⁷⁻⁸ “Wiya, nyura kuka tjiipi munu puluka pikatjara tjuta katira pungkula ngayunya ungkupai, kuřu pati tjuta, nyumpu tjuta kuļu. Palu nyanga purunykuļa ngayulu pukularipai wiya. Panya nyura nyanga alatji ngunti palyalpai. Ka ngayulu tjituru-tjitururingi nyura ngunti palyannyangka. Uti nyura ngayunya kuka wiru mulapa katira ungama. Palu nyura kuka

kurakura tjuta kutju katipai, ka nyara palulanguru ngayulu nyurampa ngalturingkunytja wiyangku wantinyi. Tjinguru nyura mayatja mantatja kuka nyanga puruny whole pukulariku? Wiya, paluru wantiku. Ka nyura nyaaku ngayunya mayatja ilkaritja ngunti kuranji? Uti nyura kuka palya kutju katima pungkula ngayunya ungkunytjikitjangku, panya ngayulu na mayatja pulka mulapa manta winkitjaku. Ka nyura uti ngayunya tjukarurungku pukulmanama.” Alatji Godalu wangkangu.⁹ Ka nyura tjukurtjara tju tangku Godala pulkara tjapila nganampa ngalturingkunytjaku. Palu paluru nyura tjapinnyangka kulira wantiku, panya nyura kuka kurakura tjuta ngunti katira ungkunyangka.

2

¹⁻² Kulilaya wanyu wati tjukurtjara tju tangku Mayatja Godalu nyurala wangkanytja nyanga alatji, “Tjukurpa nyangatjana ngayulu kuwari nyurala wangkanyi. Uti nyura ngayuku mukuringkulampa ngayunya wan gañarangku kulinma kurunpa winkingku. Palu nyura panya ngayunya kulilwiyangku wantinyangka na ngayulu kuwari nyuranya tjituru-tjituru palyanu. Panya nganmanytu na nyuranya pukulmara kanyiningi, palu nyura ngayunya rawangku wantinyangka na ngayulu nyuranya rawangku tu tjituru-tjituru palyalku.

⁷⁻⁸ “Uti nyura nintingkumpa wiru tjuta kutju nintinma anangu tju tangka nyurala kulira tjukaruru nintiringkunytjaku. Panya ngayulu witulya pulkangku nyuranya ngurkantara tjunu tjukurtjara tjuta nyinanytjaku, panya iritiña Levikunu tjuta tjukurtjara tjuta tjunu ngayuku wa rka palyantjaku, palu purunytju na nyuranya tjunu ngayuku wa rka tjukarurungku palyantjaku. Palu nyura ngayunya rawangku kulira wantinyi, munu nyura anangu tjuta ngunti palyantjaku nintini. Ka nyanga palulanguru tjana nyurala kulira ngunti tju taku nintiringkunytjatjanungku kura tjuta palyani.” Nyanga alatji Mayatja Godalu witulya pulkangku nyurala wangkanyi wati tjukurtjara tju tangka.

¹³⁻¹⁶ Kaya wanyu anangu tju tangku ngapartji kulila! Panya nyura kuwari pukulpa nyinanytja wiyaringu panya nyura kuka katira pungkula Godanya ungkunyangka paluru nyurampa pukularinytja wiyangku wantinyi. Ka nyura pulkara ulara ilanypa pulka tjutingi Mayatjaku pitjilpangka paluru nyurampa ngalturingkula pukularinytjaku. Palu nyaaku Mayatjalu nyuranya nyakula nyurampa pukularinytja wiya ngaranyi nyura ungkunytjitetjaku? Wiya, panya nyura palunya wan gañarangku kulintja wiyangku wantinyi. Palulanguru nyara paluru nyurampa pukularinytja wiyaringu. Panya nyura nganmanytu wati yangupalangkulpi kungka altira kalkunu kuringka titutjara tjungu nyinanytjikitjangku, palu nyura kalkuntja panya palunya wantingu. Ka Godalu nyuranya minyma kutjupa tju tangka ngunti ngarinyangka nyakula pukularinytja wiya alatjitu. Panya paluru nyupalinya kutjaritja kutjunu nyupali kutjuringkula kurirara pukulpa tjungu nyinanytjaku munu tjitjararingkula tjitingka nintintjaku yaaltjingara Godaku walytja wirura nyinanytjaku. Uwa, kulilaya wati tjuta! Munuya nyurampa kuri minyma kutjupakitjangku wantikatinytja wiyangku wantima, panya wantingku minyma kuri wantikatinnyangka Mayatja Godanya pukularipai wiya alatjitu. Ka nyura uti nyurampa kuri wantikatiwiyangku rawangku atunymara kanyinma mukulyangku.

3

Godalu Wati Tjakulpa Kuranyu Iyantjikitjangku Kalkuntja

¹ Munu Mayatja Godalu witulya pulkangku tjukurpa nyangatja kułu alatji wangkanyi nyurala, “Ngayuluṇatju tjakulpa iyalku ngayula kuranyu. Ka nyara paluru ankula kuranyungku ngayuku iwarankuku mayatja pulka pitjanytjaku. Ka nyara palula malangka mayatja paluru wirkankuku, panya nyura palunya nyakunytjikitja ala-alala paṭara nyinanyi. Ka paluru pitjala palumpa timpulangka nyinaku munu aŋangu tjuṭangka tjakultjunkuku ngayulu tjananya kalkuntja. ² Palu tjintu nyara palula aŋangu uwankara pulkara nguluringkula palula mirangka ngaraku. Panya paluru pitjanyi kura uwankara wiyanjtikitja, panya minymangku mantara raputji paltjilpai kilina wiru ngaranytjaku, palu purunupa Godalu kura uwankara wiyalu.

Godalu Anangu Kura Tjuta Ngurkantara Tjarantjikitjangku Kalkuntja

⁵ “Panya ngayuluṇa pitjaku nyuranya uwankara ngurkantara tjarantjikitja. Munuṇa ngayulu pulkara wangkaku aŋangu panya kura palyalpai tjuṭa, panya mamungka kulira iraṭingka kuralpai tjuṭa, munu kuri waltya wantikatira minyma kutjupangka ngaripai tjuṭa, munu kuutpangka ngunti wangkapai tjuṭa. Munuṇa mayatja kura tjuṭa kułu wangkaku, panya tjana war̄karipai tjuṭa kurara mani tjukutjuku ungpupai tjukarurungku ungpunytja wiyangku. Munu ngayulu tjananya pulkara wangkaku aŋangu panya wanakala tjuṭaku tjuṭula tjuṭaku ngalturingkuwiyangku wantipai tjuṭa, munuṇa tjananya pulkara wangkaku aŋangu malikitja tjuṭaku ngalturingkuwiyangku wantinyangka. Panya aŋangu nyara paluru tjana ngayula wangaṇarangku kulipai wiya, kaṇa tjananya uwankara puntura wangkaku munuṇa tjananya ngurkantara tjaralku. ⁶⁻⁷ Nyurampa panya waltyapiti iriti nyinanytjaya kulila, Jacobanya tjananya. Panya tjana iriti ngayula tungunpungkula kura palyanigi, kaṇa palunya tjananya tjara pungkula wiyanigi munuṇa tjara wanka kanyiningi. Ka kuwari nyura Jacobakunu małatja małatja tjuṭa palu purunypaṭu ngayula tungunpungkupai alatjiṇu ngayuku tjukurpa wangaṇarangku kulintja wiyangku. Ka ngayulu kuwari ngaṇmanypa purunytju nyuranya tjara pungkula wiyanu nyurampa panya waltya tjuṭa, munuṇa nyuranya nyanga maṇkurpa kutju wanka kanyini, panya ngayulu kampa kutjuparintja wiya alatjiṇu paluruṇu nyinapai. Ka palulanguru nyura uti ngayulakutu małaku aruringama, kaṇa nyuranya piruku waltyanmankuku.

Godanya Tjukarurungku Ungkunytjaku

“Palu nyura ngayula tjapilpai alatji, ‘Nyaalkula malaku aruringkunytjikitjangku nyuntulakutu?’ ⁸ Palu alatji ngayula tjapintja wiyangkuya wantima. Panya ngayuluṇa nyurala tjapini alatji, ‘Mulapa wanyu palya ngaranyi aŋangungku Godanya ngunti kurantjaku palyangku-palku munu kura waltyangku kutitjunkunytjaku?’ Wiya alatjiṇu. Panya nyura mulapa ngayunya ngunti kuralpai. Panya nyura kutjupa kutjupa wiru mantjintjatjanungku ngayunya tjarara ungpunytja wiyangku ngurtjungku uwankaraṭu kanyilpai. ⁹ Kaṇa ngayulu nyuranya pulkara wangkaku nyangatja ngurara uwankara, ka kura tjuṭa nyurala uwankarangka utiringkuku.

¹⁰ “Palu kulilaya! Ngayuluṇa ngaltunytju pulka mulapa nyinanyi. Kaya wanyu mukuringkulampa arkara tjukarurungku palyara kati ngayunya ungpunytjikitjangku munu nyura nyara palulangurulta nintiringkula

kulilku, ‘Munta, Godanya ngaltunytyju pulka nyinanyi munulanya muntyjangku ungkupai.’ Kaya palulangurulta nyura mantjintjatjanungku utulu tjara kutjupatjara kutjupa 10-pa tjura uwankara lipula, munuňya palulanguru 10-nguru tjarara kutju ngayunya uwa, munuya 9 malaringkula ngarintja nyuranku kanyinma. Munuya rawangku nyanga alatji palyalkatima kutjupa kutjupa mantjintjatjanungku. Kana ngayulu ngapartji nyurampa pulka mulapalta palyalku. Munuňa titutjarangku nyurampa wiru tjuta kutju iyalku nyura pukularinytjaku. ¹¹ Munuňa tjintilyka tjuta ukiri mai kuľu ngalkuntjaku-tawara wiylaku. Ka nyurampa puňu panya kiripitji tjuta mai pulkatjararingkuku. ¹² Kaya anangu tjutangku ngura malikitja tjutanguru nyakula kulilku alatji, ‘Munta, mulapa Godalu tjananya wirura alatjitu atunytyju kanyini. Ka tjanampa ngura wiru mulapa ngaranyi.’ Alatjiya nyakula kulilku.

¹³ “Palu nyura panya ngayunya rawangku ngunti wangkara kurranmanangi. Munu nyura ngayulu painnyangka ngayula ngunti tjapilpai, ‘Tjukurpa nyaangkala wanyu nyuntunya wangkara kurranmanangi?’ ¹⁴⁻¹⁵ Wiya, tjukurpa panya nyangatja nyura wangkangi, ‘Nyaakula titutjarangku Godanya wañarinama? Panya nganaňa paluru wangkanytjitja uwankara wanganarangku kulira palyaningi munula kura palyantjatjanu palula miřangka tjituru-tjitururira piiwyaringangi, ka paluru nganaňanya nyakula nganampa pukularinytja wiya alatjitu. Nyawa, anangu nyara kaňany-kaňanypa tjuta titutjara alatjitu pukulpa nyinapai. Kaya anangu kura palyalpai tjutaya wiru tjuta mantjira pukulpa nyinanyi, kala nganaňa kutjupa kutjupa wiru tjuta kanyintja wiya alatjitu nyinanyi. Nyara paluru tjanaya titutjarangku Godala miřangka kura palyalkatipai kunta wiyangku, ka Godalu tjananya pungkunytja wiyangku wantipai.’ Alatji nyura ngunti wangkapai.”

¹⁶ Ka nyara palulanguru anangu panya Mayatja Godanya wanganarangku kulilpai tjutangku wangkara tjungungku kuliningi ngapartjinngapartjingku. Ka Godalu tjananya kuliningi. Ka nyara palulanguru kutjupangku palumpa tjanampa ini nyiringka walkatjunu anangu małatja tjutangku ngula nyakula kulintjaku. ¹⁷ Munu palulanguru alatji wangkangu, “Nyanga paluru tjanaya ngayuku walytja mulapa nyinanyi. Kaňa ngayulu ngula mantakutu pitjaku anangu manta winkitja ngurkantařa tjarantjikitja munuňatju anangu nyanga palunya tjananya atunymařa wankaru kanyilkul ngaltunytyungku, panya mamangku tjitji atunytyju kanyilpai, palu purunypa. ¹⁸ Kaya nyara palula ara anangu winkingku nyakuku kura pulka mulapa utiringkunyangka ngayunya kulira wantipai tjutangka. Ka wiru mulapalta utiringkuku anangu panya ngayula wanganarangku kulilpai tjutangka.”

4

Tjintu Malatja

¹ “Panya tjintu malatja wirkankunyangkaňa wangkaku anangu panya kaňany-kaňanypa nyinapai tjuta munu tungunpungkula kura palyalpai tjuta waru pulkangka wanintjaku ka tjananya kampaku, panya tjanpi waru pulkangku kampara wiyalpai palu purunypa tjananya kampara wiylaku alatjitu. ² Palu panya ngayula wanganarangku kulilpai tjutangka nyurala wiru mulapa utiringkuku, panya tjirirpingku mungawinki ngalyapakara irnyara unytjunmankupai, palu purunypa Godalu nyurampa

wiru mulapa palyalku, ka nyura pukulpa mulapa nyinaku. Panya puluka kułunypa tjułaya minangku puyinnyangka pukularira wałarakatira inkara para-para-wirtjapakalpai, palu purunypa nyura tjintu nyara palula pukulpa mulapa nyinaku. ³⁻⁴ Panya tjintu nyara palula nyura anangu panya kulira wantipai tjułangka waintariku alatjitu, kaya paluru tjana tjaruringkula uparingkuku manta ulpuru purunypa.

“Kaya tjukurpa panya ngayulu Mosenya ungkunytja rawangku wanganarangku kulinma, panya ngayulu palunya ungu puli panya murpu Tjaniyala anangu Israelkunu tjułaku nyura uwankarangku wanganarangku kulira palyantjaku. Uwa, ngayulaña Mayatja Godalu witulya pułkangku nyurala wangkanyi.”

⁵ “Kulilaya! Ngula tjintu panya paluru wirkankuku pułka mulapa uwankara urulyarara nguluringkunytjaku. Palu tjintu panya palula kuwaripangkana ngayulu wangkatjara Ilaitjanya iyalku, ⁶ ka paluru wangkara nintilku mamangka ngunytjungka tjana tjitji walytjangku mukulyangku atunymankunytjaku. Munu paluru tjitji tjułangka ngapartji nintilku tjana kułu ngunytjungka mamangka wanganarangku mukulyangku kulintjaku. Ka tjinguru tjukurpa nyanga palunya nyura wanganarangku kulilwiyangku wantinyangkampa ngayulu pitjaku mununa nyurampa ngurangka tjituru-tjituru pułka palyalku.”

Tjukurpa Palya Matthew-lu Walkatjunkunytja Matthew Nyangatja Ngañmanytju Nyakula Wangkanytjaku

Nyangatja Godaku tjukurpa wati ini Matthew-lu walkatjunkunytja Jesunyatjara. Matthew-nya panya ngañmanyapa wati mani mantjilpai nyinangi munu paluru aŋangu Jew tjuṭanguru mani mantjilpai wati mayatja pułka Rome-anyā ngurāraku tjunkunytjikitjangku.

Palu ngula Jesulu palunya iwarangka itingka nyakula ngurkantanu palumpa nintintja nyinanytjaku, ka paluru warka panya palunya wantikatingu munu Jesula tjanala tjunguringkula para-pitjalinangi yiya mañkurpa munu palula tjukurpa tjuṭa kulira nintiringangi. Ka panya Jesunya ilunyjtatjanu wankaringkula pakannyangka małangka Matthew-lu kulu palunya nyangu wanka para-ngaranyangka.

Ka nyiri nyangangka Matthew-lu tjakultjunanyi Jesunya Wankarunkupainya, panya Godalu palunya ngañmanytju kalkunu Aipuramaku walytjapitinguru utiringkunytjaku, ka panya palunyaya wati wangkatjara tjuṭangku nyiringka iriti walkatjunangi. Munu Matthew-lu kulu alatji tjakultjunanyi panya Christanya Mayatja pulka nyinanyi aŋangu Godaku walytjapitiku munu paluru nganaŋanya wangkanyi panya Christalulanya nintinu tjukaruru palyanyku nyinanytjaku.

Tjukurpa nyanganpa ngarinyi:

- 1:1—2:23 Jesunya iti ngarinytja
- 3:1—4:11 Jesunya baptise-katinytja munu Satantu palunya kurantjikitjangku arkantja
- 4:12—18:35 Jesulu aŋangu tjuṭangka tjukurpa wangkara nintintja munu pikatjara tjuṭa palyarunguntja
- 19:1—20:34 Jesulu tjukurpa kutjupa tjuṭa wangkanytja munu miracle kutjupa tjuṭa palyantja
- 21:1—23:39 Jesunya Jerusalemalakutu tangkiyingka tatira ankunytja, munu timpulangka tjarpara tjukurpa tjuṭa wangkanytja
- 24:1—25:46 Jesulu palumpa nintintja tjuṭangka tjakultjunkunytja ngula nyaaringkuku
- 26:1—27:66 Jesunya witintja munu puṇu katifikatjarangka wakaṛa uitjunkunytja
- 28:1-20 Jesunya wankaringkula pakantja

Jesuku Walytjapiti (Luke-aku 3:23-38)

¹ Tjukurpa nyanganpa Jesunya Christanyatjara. Panya Aipuramalanguru Isaacanya utiringu ka nyara palulanguru malatja malatja utiringkula waŋara Davidanya utiringu. Ka Davidalanguru malatja malatja mangarala waŋara malatjala Jesunya utiringu. Uwa, Aipuramalanguru ini nyanga paluru tjana ma-ngařala waŋara Jesulalta wirkanu, ini nyanganpa

² Panya Aipuramaku katja ini Isaacanya, ka Isaacaku katja ini Jacobanya, ka Jacobaku katja tjuṭa wati ini Judah-nya tjana. ³ Ka Judah-lu minyma ini Taimanya altingu munu pula katja kutjara kanyinu ini Piritjinya

pulanya Tjiranya. Ka Piritjiku katja ini Itjurangga, ka Itjuranku katja ini Raamanya. ⁴ Ka Raamaku katja ini Amina-tapanya, ka Amina-tapaku katja ini Naatjannga, ka Naatjanku katja ini Tjalmannga. ⁵ Ka Tjalmantu kungkawara ini Rayapanya altingu munu pula katja ini Pawatjanya kanyinu, ka Pawatjalu kungkawara ini Ruthanya altingu munu pula katja ini Uupitanya kanyinu. Ka Uupitaku katja ini Jesse-nya. ⁶ Ka Jesse-ku katja ini Davidanya, panya Godalu wati nyanga palunya ngurkantara tjunu anangu Israelkunu tjuta mayatjarira kanyintjaku.

Ka Davidaku katja ini Tjalamanna. Palu Tjalamanku ngunyntju panya nganmanypa wati ini Yurayaku kuri nyinangi. ⁷ Ka Tjalamanku katja ini Raya-pawamanya, ka palumpa katja ini Apitjanya. Ka Apitjaku katja ini Atjanya, ⁸ Ka Atjaku katja ini Tjiya-tjapatanya, ka palumpa katja ini Tjawu-ramanya, ka Tjawu-ramaku katja ini Utjayanya. ⁹ Ka Utjayaku katja ini Tjatjamanya, ka palumpa katja ini Ayatjanya, ka Ayatjaku katja ini Itjakayanya. ¹⁰ Ka Itjakayaku katja ini Manatjanya, ka palumpa katja ini Aimanna, ka palumpa katja ini Tjutjayanya. ¹¹ Ka Tjutjayaku katja tjuta wati ini Tjikanayanya tjana. Ka nyara palula arangkaya Papilannga ngurara tjutangku warmalangku pitjala tjananya ma-katingu Papilantakutu.

¹² Ka panya Tjikanayaku katja ini Tjiyaltilnga, ka palumpa katja ini Tjirapapilnga. ¹³ Ka Tjirapapilku katja ini Apiyutanya, ka palumpa katja ini Iliya-kimanya, ka palumpa katja ini Aitjunya. ¹⁴ Ka Aitjuku katja ini Tjaitakanya, ka palumpa katja ini Akimanya, ka Akimaku katja ini Iliyutanya. ¹⁵ Ka Iliyutaku katja ini Iliyatjanya, ka palumpa katja ini Matjannga, ka palumpa katja ini Jacobanya. ¹⁶ Ka panya Jacobaku katja ini Josephanya Mary-ku panya kuri, ka panya Mary-lu kanyinu katja ini Jesunya ini kutjupa Christanya Godalu panya kalkuntjanya.

¹⁷ Uwa, walytjapiti nyanga tjanalanguru Jesunya iti ngaringu, panya Aipuramalanguru pakali malatja malatja 14 ma-nyinara wanara wi-yaringu, ka Davidalyalta tjanalanguru utiringu. Ka panya Davidalanguru piruku nampa palu purunypatu pakali malatja malatja ma-nyinara wanara wi-yaringu, kaya nyara palula ara tjananya warmalangku pitjala katingu ngura Papilantakutu. Ka nyara palulanguru piruku nampa palu purunypatu pakali malatja malatja 14 ma-nyinara wanara wi-yaringu, ka palula tjanalanguru Jesunyalta iti ngaringu.

Jesunya Iti Ngarinytja

(Luke-aku 2:1-7)

¹⁸ Nyanga alatjiringu Jesunya Christanya Godalu panya kalkuntjanya iti wirkankunytjaku. Panya kungkawara ini Mary-nya wati ini Josephalu kalkuntja paṭara nyinangi palumpa ngunyntjuku ngurangka munu pula kuwaripatu tjunguringkunytja wiya patupatu nyinangi ngula altintjikitja. Ka Mary-nya nganmanypa pakuringu Kurunpa Milmiltanguru, Josephalu altintjita kuwaripangka.* ¹⁹ Ka Josephalu Mary-nya nyakula kuliningi wati kutjupangku kampangkatu kurantja-palku

* ^{1:18} Tjakangku wati Jew-ngku kungkawaraku mukuringkula nganmanyntju kalkulpai palunya kutju ngula altintjikitjangku, ka kungkawara paluru palumparipai ka wati kutjupangku palunya puṭu altintjikit. Palu wati paluru kalkuntjatanu paṭu nyinapai palula tjunguringkunytja wiya munu ngula kutju altira tjunguringkupai walytja tjutangku palunya pulanya inma pulangka tjungunnyangka. Nyara palula arangka kutju pula tjunguringkupai munu wali kutjungka nyinapai. Palu nyara palula kuwaripangka anangu tjutangku nintingku kulilpai kungkawara panya paluru watiku panya kalkuntja nyinanyangka.

panya paluru Kurunpa Milmiltu palyantjitjaku ngurpa. Panya Josephanya wati palya mulapa munu paluru Mary-nya kunṭaringkunytjaku-tawara tjuta mirangka wangkanyta wiyangku wantingi. Tjinguru tjutangka mirangka wangkanyangka kulira anangu tjutangku kungkawara palunya wati kutjupangka kampangkaṭu ngarinyangka-palku kulinma munuya palunya apungka atura iluntanama. Palula-tawara Josephalu kulinu, "Palyantiña wantiku al̄tiwiyangku, kanti ngunytjungka ma-nyinama."

²⁰ Ka alatji Josephalu unngu kulinnyangka Mayatja Godaku angelpa palula utiringu mungangka paluru ngarira tjukurmankunyangka, munu wangkangu, "Joseph, Davidakun katja, kulilani! Kunṭaringkunytja wiyangku wantima Mary-nya al̄tira kanyintjikitjangku panya iti nyanga paluru Kurunpa Milmiltanguru, wati kutjupanguru wiya. ²¹ Ka paluru iti katja kanyilku, ka kanyinnyangka nyuntu palunya inila Jesunya panya ini nyanga paluru wangkanyi alatji, 'Paluru palumpa walytja tjuta wankarunkuku Godalu tjananya kura tjuta palyantjitjanguru pungkula wiyatjaku-tawara.' **

²²⁻²³ Panya tjukurpa nyanga palunya Mayatja Godalu nganmanytu wangkara kalkunu wati wangkatjara ini Aitjayala nyanga alatji, "Kungkawara nyitayi ititjararingku muu katja kanyilku, kaya palunya inilku 'Imanyuwalnga', panya ini nyanga paluru wangkanyi alatji,

'Godanya ngananala tjungu nyinanytja.' " *

Alatji angeltu Josephala wangkangi. Ka mulapatu Godalu panya iriti kalkuntjanya utiringu.

²⁴ Ka Josephanya kunkuntjanu wankaringu munu angeltu palula wangkanyta kulira palyanu munu Mary-nya al̄tira palumpa walingka kanyiningi. ²⁵ Palu pula tjungu ngarinytja wiyatū iti ngarinytjaku paṭara. Munu pula ngula iti wirkankunyangka palunya ininu Jesunya.

2

Wati Ninti Mañkurtu Jesunya Pitjala Nyakunytja

¹ Ka Jesunya iti ngaringu ngura ini Bethlehemala manta panya Judeala, ka nyara palula aṛa wati ini Iratanya Judeaku mayatja pulka nyinangi. Kaya Jesunya iti ngarinyangka malangka wati ninti mañkurpa kakararanguru pitjangu Jerusalemalakutu. Wati nyanga paluru tjana panya tiṭutjarangku kililpi tjuta nyinara nyakupai munuya nyara palulanguru aṛa tjuta kulipai nyakunytjatjanungku.

² Munuya paluru tjana Jerusalemala wirkara anangu nguratja tjutangka tjapinu, "Yaaltjingka iti panya paluru wirkanu, panya Jew tjutaku mayatja pulka? Panya ngananā ngura nyara kakarara nyinara nyangu kililpi pulka kuwari kutju utiringkula nyinanyangka munula kililpi nyara palunya nyakunytjatjanungku kulinu, 'Munta-uwa kunyu panyatja Jew tjutaku mayatja pulka iti wirkankunyangka alatjiriku.' Munula nyangatja kuwari pitjangu palunya walkuntjikitja."

³ Ka mayatja panya Iratalu kulinu wati panya paluru tjana iti mayatja pulkanmaṛa ngurinnyangka, munu paluru nyararingangi kulira, "Tjinggauru iti paluru pulkaringkula ngayula tungunpungkula ngayuku arangka mayatjariku." Ka Iratanya nyararingkunyangka anangu Jerusalemala nyinanytja uwankara palumpa nguluringangi. ⁴ Ka palulanguru Iratalu tjapira kulintjikitjangku wati tjukurtjara kuranyitja tjuta altingu Moseku

* ^{1:21} Psalm 130:8 * ^{1:22-23} Aitjayaku 7:14

tjukurpa nintilpai tjuṭa kuļu, munu tjanala tjapinu, “Yaaltjingka wanyu Christanya Godalu panya kalkuntjanya iti ngariku?”

⁵ Kaya wangkangu, “Ngura ini Bethlehemala paluru ngariku manta nyanga Judeala, panya wati wangkatjarangku iriti walkatjunu nyanga alatji,

⁶ ‘Kulilaya Bethlehemanya ngurara tjuṭa! Panya nyura manta pala Judeala nyinanyi ngura tjukutjukungka, kaya aŋangu ngura pulkangka nyinanytja tjuṭangku nyuranya wiya kulilpai. Palu tjiturutjiturinytja wiyangkuya wantima, panya ngura nyara palula mayatja pulka wirkankuku ngayuku walytja tjuta Israelkunu tjuṭa wati tjapata purunytju wiruṛa aṭunymaṛa kanyintjikitja, kaya ngura wikitjangku nyuranya kuliku munuya mirawaniku.’” *

Alatjiya tjakultjunu Mayatja panya Iratala.

⁷ Ka palula małangka paluru wati panya ninti mañkurpa kampangkaṭu altira tjanala tjapiningi, “Yaalaṛa kililpi panya paluru utiringu?” Kaya palula tjakultjunu. ⁸ Ka Iratalu wati panya palunya tjananya Bethlehemakutu wituṇu munu tjanala pulkara wangkangu, “Ankulaya pulkara ngurinma tjitji panya palunya munuya palunya nyakulampa pitjala ngayula wangka kaña ngayulu ngapartji ankula palunya walkula.”

⁹⁻¹⁰ Kaya mayatja palula kulintjatjanu anu wati panya ninti mañkurpa. Munuya kililpi panya palunyatu nyangu panya tjana kakaraṛa nyakunytyanya munuya nyakula pulkara alatjitu pukularingu. Ka kililpi panya tjanala ma-kuranyuringu munu wirkara ngarangu wali panya iti ngarintjitungka katu. ¹¹ Kaya walı unngu tjarpara nyangu tjitji panya tjukutjuku ngunytjungku ampura kanyinnyangka kungkawara panya Mary-lu. Munuya pupakatira tjitji palunya walkuṇu munuya palulanguru wiru tjuṭa alaṛa ungangi tjana katintjatjanungku, panya apu gold, munu tjau panti wirutjara kulu puṇu ini nyanga kutjaranguru *frankincenseguru* munu muunguru kulu.

¹² Palula małangkaya Iratalakutu małaku ankunytjikitjangku kuliningi, palu tjana mungangka kunkunarinyangka Godalu tjananya wangkangu Iratalakutu małaku ankuwiyangku wantintjaku. Kaya mungawinki ma-pakaṇu ngura walytjakutu iwara kutjupawanu Iratalakutu małaku ankunytja wiya.

Iti Jesunya Itjipalakutu Irataku Ngulungku Katintyta

¹³ Ka tjana ankunyangka małangka Mayatjaku angelpa Josephala mungangka utiringu paluru tjukurmankunyangka munu wangkangu alatji, “Pakara warpungkula kati tjitji pala tjukutjuku ngunytju kuļu manta nyara Itjipalakutu, panya Iratalu kuwari ngurini tjitji pala palunya iluntankunytjikitjangku. Ka ankula nyara palula rawa ma-nyinama piṛuku ngayulu altintjaku paṭara.”

¹⁴ Ka Josephanya munga pala palula mapalku pakaṇu munu palunya pulanya ngunytjurara warpungkula ma-katingu Itjipalakutu. ¹⁵ Munu pula rawangku iti panya palunya ma-kanyiningi ngura nyara palula Iratanya ilunytjaku paṭara. Panya Itjipala ankula nyinanytjaku Mayatja Godalu iriti wangkangu wati wangkatjarangka, ka panya nyiringka walkatjunu nyanga alatji Godalu wangkanytja,

“Ngayuku katja Itjipala ankula nyinaku,

kaña nyara palulanguru palunya altiku małaku pitjanytjaku.” *

* 2:6 Maikaku 5:2 * 2:15 Uutjiyaku 11:1

Iti Nyitayira Tjuta Iratalu Iluntankunytja.

¹⁶ Ka mayatja Iratalu wati panya ninti mañkurku puṭu paṭara kulinu, “Munta, paluru tjana-manti wantira kampangkaṭu anu małaku tjanampa ngurakutu.” Munu paluru pułkara alatjiṭu mirpañarira palumpa tjaultji tjuta witunu iti nyitayira uwankara iluntankunytjaku ngura nyara Beth-lehemala nyinanytja tjuta munu ngura palula itingka nyinanytja tjuta kułukulu. Munu paluru wangkangu iti pułka-pulka tjuta kułu pungkunytjaku panya kuli kutjara nyinanytja tjuta kułu. Panya paluru wati panya ninti mañkurta tjapintjatjanungku kuliningi, “Tjinguru paluru iti kulunypa, muta tjinguru tjitji pułka-pulka tjina ankupai.” Kaya palumpa tjaultji tjutangku mulapaṭu tjitji palunya tjananya uwankara pungkula wiyanu.

¹⁷⁻¹⁸ Palu ara nyanga tjitji tjuta pungkula wiyanja palunya Mayatja Godalu ngañmanytju wangkangu wati wangkatjarangka ini Jeremiah-la ka paluru nyiringka walkatjunu nyanga alatji, “Ngura ini Raamalaya kulini añaŋgu kutjupa pułkara ulanyangka.

Nyara paluru minyma panya Raitjilinga palumpa tjitji tjuta wi-yaringkunyangka pułkara tjituru-tjitururira ulanyi,
kaya palunya puṭu pilunmananyi tjitji uwankara wiyingkunyangka.”
*

Ka tjukurpa panya paluru mulapaṭu utiringu ngura Bethlehemala.

Josephalu Mary-nya Pulanya Malakungku Katinytja

¹⁹ Ka ngula Iratanya ilunyangka malangka Mayatjaku angelpa Josephala utiringu paluru tjukurmankunyangka ngura panya Itjipala. ²⁰ Munu wangkangu, “Ngura nyara Israelta panyaya wati kura tjutangku tjitji pala tjukutjuku iluntankunytjikitjangku kuliningi, munuya wati panya paluru tjana kuwari ilungu. Ka pakara pulanya ngunytjurara małakungku kati ngura panya Israeltakutu!”

²¹ Ka mulapaṭu Josephalu pakara pulanya małakungku katingu ngura Israeltakutu. ²² Palu paluru wirkara kulinu Akila-yatjanya mayatja pułka nyinanytja manta panya Judeaku, panya palumpa mama Iratanya ilunyangka paluru palumpa ařangka mayatjaringu. Ka nyara palunya kulira Josephanya nguluringangi manta nyara palula nyinanytjaku. Ka palulanguru angeltu piruku palunya tjukurmankunyangka wangkara witunu alinytjaralku ankula uru Galileela itingka nyinanytjaku. ²³ Ka paluru mulapaṭu anu munu wirkara nyinangi tawunu ini Nazarethala. Panya ara nyanga Nazarethala ankula nyinanytja Mayatja Godalu ngañmanytju wangkangu wati wangkatjara tjutangka, kaya walkatjunu nyanga alatji,

“Wati nyara Godalu kalkuntjanya ngura ini Nazarethala nyinaku, kaya añaŋgu tjutangka palunya wangkaku wati Nazarethanya nguraṛa.”

Ka Josephalu Jesunya Nazarethalakutu katinyangka tjukurpa nyanga paluru mulapaṭu utiringu.

3

John Baptistalu Tjukurpa Wangkanytja

(Markaku 1:1-8; Luke-aku 3:1-18; Johnku 1:19-28)

¹ Ka ngula kuli tjuta ngarala wiyingkunyangka wati ini John Baptistalu manta panya Judeala iłytingka añaŋgu tjutangka Godaku tjukurpa tjakultjunangi. ² Munu paluru tjanala alatji wangkangi, “Kunṭariwaya kura tjuta palyantjatjanu munuya kampa kutjuparira kura piruku palyantja

* ^{2:17-18} Jeremiah-ku 31:15

wiyangku wantima, panya kuwari ilaringu Godalu anangu tjuṭa walytjanmara mayatjangku kanyintjaku.”

³ Johnnga wati panyatja, panya wangkatjara ini Aitjayalu iriti palunyatjara tjakultjunu alatji,

“Kutjupangku ilytjingka anangu tjutangka mirara wangkanyi alatji,
‘Mayatjakuya nganmanypa ritiriwa paluru pitjala tjukurpa
wangkanyangka wangañarangku kulintjikitja.

Panya watingku iwara tjukarurulpai mayatja pulka malawanu pitjantjaku,

palu purunypa nyura tjukarururingkula pañanma Mayatjalu pitjala
wangkanyangka wangañarangku kulintjikitja.’” *

⁴ Ka wati nyara palumpa mantara kamulaku intunguru palyantja, ka paluru karilpa karpinu piltangka kukaku miringuru palyantjitjangka. Munu paluru tjintilyka tjuṭa munu tjuratja kuļu ngalkuningi. ⁵ Kaya anangu winki mulapa palulakutu pitjangu manta Judeala nyinanyta tjuṭa. Munu ngura Jerusalemalanguru, munu ngura ititja tjutanguru, karu Jordanta itinguru kuļukuluya pitjangu winki mulapa. ⁶ Munuya paluru wangkanyangka kulira kuntaringkula kura palyantjatjanungku walytjangku tjakultjunangi. Ka tjananya kura tjananku walytjangku tjakultjunkunyangka kulira karu Jordanta urungka tjarpatjura baptise-katingi.

⁷ Kaya Paratji tjuṭa munu Tjatjutji tjuṭa kuļu palulakutu pitjangu baptise-katinjtjaku. Ka Johntu tjananya nyakula wangkangu alatji, “Nyaaku nyura baptise-katinjtjaku pitjangu? Nyura wanyu mulapa kura wantira kampa kutjuparingu? Wiya, nyura uwankara liru tjuṭa anangu tjuṭa ngunti kuralpai! Nyura tjinguru ngunti kulini ngayulu nyuranya urungka tjarpatjunkunytjtanguru Godanya nyurampa kalyparingkunytja-palku. Palu wiya, Godanya nyurampa pulkara mirpañarinyi. ⁸ Nyura uti mulamulangku kura wantira kampa kutjuparima munuya palya nyinara wiru tjuṭa kutju palyanma, ka nyara palulanguru wiru tjuṭa palyannyangka nyakula Godanya nyurampa pukulariku. ⁹ Palu nyura tjinguru kulini alatji, ‘Nganañanya Godalu kura ngurkantankunytja wiyangku wantinyi panya nganañña Aipuramaku pakalipiti. Palulangurulanya pikantankuwiyangku wantiku.’ Palu wiya, nyura ngunti kulini. Palu puli tjuṭa nyanga nyawa! Tjinguru Godalu mukuringkula apu nyangannguru Aipuramaku pakali tjuṭa palyanma. ¹⁰ Kulilaya! Panya wati kaana kanyilpaingku puṇu tjuṭa maitjararingkunytjaku pakaltjingalpai, palu puṇu kutjupa tjuṭa kuraringkula titutjara mai wiya ngaranyangka nyakula paluru kaṭara wañipai warungka, ka palu purunypa Godalu anangu tjuṭa titutjara kura nyinanyangka nyakula tjananya paira iyalku warukutu. Ka pala palulatwara nyura uti Godalawanu tjukaruru palyanyku nyinama.

¹¹ “Ka ngayula mañangka wati kutjupa pitjanyi. Nyara paluru pulka mulapa ngayula waintara alatjitu. Kana ngayulu tjukutjuku alatjitu nyinanyi mununa palula mirangka ngarala pulkara kuntaringkupai. Ngayulu panya nyuranya kura wantira kampa kutjuparyangka urungka baptise-katingi. Palu wati nyara paluru nyuranya baptise-katiku Kururopa Milmilnga nyurala tjarpatjura, ka warungku purunytju nyuranya kampara tjukarurulku. ¹² Panya paluru kuwari riti ngaranyi anangu uwankara ngurkantara tjarantjikitja, panya minymangku mai kañira uninypa wiru mañtalpa tjunkupai munu unytjunytju ma-wañipai, palu

* 3:3 Aitjayaku 40:3

purunypa paluru pitjala aŋangu tjuta tjaralku munu palumpa walytja tjuta palumpa ngurangka tjunkuku munu aŋangu kuralpai tjuta waru pulkangka waŋiku waru nyara tiutjara kampapaingka.”

*Jesunya Johntu Baptise-katinytja
(Markaku 1:9-11; Luke-aku 3:21-22)*

¹³ Ka nyara palula ara Jesunya Galileelanguru pitjangu karu Jordantakutu munu Johnta tjinpinu palunya baptise-katinytjaku. ¹⁴ Palu Johntu puŋu nguwanpa kulinigi munu palula wangkangu, “Wiya, utin nyuntu ngayunya baptise-katima. Nyaakuŋa ngayulu nyuntunya baptise-katiku?”

¹⁵ Ka Jesulu palula wangkangu, “Wiya palya, nyuntu ngayunya urungka baptise-kati, panya Godanya mukuringanyi nyuntu ngayunya alatjingantjaku.”

Ka alatji wangkanyangka Johntu palya kulinu munu paluru Jesunya urungka tjarpatjura baptise-katingu. ¹⁶ Ka Jesunya urunguru ngalyapakannyaŋka ilkari alaringu, ka paluru ira-nyakula nyangu Godaku Kurunpa kuukuuku purunypa ukalingkula palula nyinakatinyangka. ¹⁷ Ka ilkaringuru Godalu wangkangu alatji, “Nyngatja ngayuku katja, kana palumpa pulkara mukuringanyi mununa palumpa pulkaratu pukularinyi.”

4

*Jesunya Satantu Kurantjikitjangku Arkantja
(Markaku 1:12-13; Luke-aku 4:1-13)*

¹ Ka nyara palula małangka Kurunpa Milmiltu Jesunya ma-katingu ilytjikutu Satantu palunya arkantjaku. ² Ka paluru rawa mai wiya nyinangi tjintu 40 munu palulanguru paluru paltjatjiratjaringu. ³ Ka Satannga palulakutu pitjangu palunya arkara Godalanguru maŋtankunytjikitja munu palunya alatji wangkara mukumukuningi, “Nyuntu wanyu paltjatjiratja? Uti nyuntu Godaku Katja mulapa nyinarampa puli nyanganpa wangkama mairingkunytjaku.”

⁴ Ka Jesulu wangkangu palula, “Wiya, panya nyiringka iriti walkatjunkunytja ngaranyi alatji,

‘Anangungku mai kutju rawangku ngalkula puŋu wanka tiutjara nyinaku Godala tjungu, palu tjukurpa Godalu wangkanytja uwankara wangaŋarangku kulira paluru wanka mulapa nyinaku.’ ”*

⁵ Ka palulanguru Satantu Jesunya katingu ngura milmilpa Jerusalemalakutu munu palunya ngaratjunu timpulangka katu mulapa. ⁶ Munu alatji wangkara wituwituningi, “Nyuntu Godaku Katja ngaralampa wali nyanga katunguru wararakati panya nyiringka alatji walkatjunkunytja ngaranyi,

‘Godalu palumpa angelpa tjuta witulku nyuntunya atunymankunytjaku, kaya nyuntunya marangku katura kanyilku punkannyangka apungku tjina katantankunytjaku-tawara.’ ”*

⁷ Ka Jesulu palula wangkangu, “Wiya, panya nyiringka iriti walkatjunkunytja alatji ngaranyi,

‘Nyura uti Mayatja Godala ngunti tjinpinja wiyangku wantima paluru witulya pulkangku palyannyangka unytjungku nyakunytjikitjangku.’ ”*

⁸ Ka piruku Satantu palunya katingu puli murpu pulkakutu katu mulapa munu katunguru manta winki para-nintinu ngura uwankara wiru mulapa

* 4:4 Deuteronomy 8:3 * 4:6 Psalm 91:11-12 * 4:7 Deuteronomy 6:16

ngaranyangka aŋangu winki kuļu. Munu paluru Jesula wangkangi,
 9 “Kulila! Nyuntu ngayunya pupakatira walkunyangkampa ngayulu
 ngura nyanganpa uwankara nyuntunya ungkuku.”

10 Ka Jesulu palunya paira wangkangu, “Ara ngayulanguru! Panya
 nyiringka iriti walkatjunkunytja ngaranyi alatji,

‘Mayatja Godanya kutjuya walkunma munuya palula kutju wan-
 ganarangku kulinma.’ ” *

11 Ka Satantu palunya wantikatingu, ka angelpa tjutangku pitjala palunya
 atunytyu kanyiningi.

*Jesulu Warka Palyantja Uru Galileela Itingka
 (Markaku 1:14-15; Luke-aku 4:14-15)*

12 Ka Jesulu ilytjinguru pitjala kulinu mayatja panya Iratalu Johnnga
 tjailangka tjarpatkunkunytja, munu paluru kulintjatjanu ngurakutu ma-
 pakantu Galileelakutu. 13 Munu paluru Nazarethala wirkara ngura pala
 palula nyinanytja wiya waintara anu ngura ini Kapunimalakutu munu
 ngura nyara palula walingka ngura tjunu uru panya Galileela kantilytja.
 Manta nyara Galileenya panya wati ini Tjipulanku pulampa Napataliku
 pakalipitiku ngura ngarangi.* 14 Panya ara nyanga Jesunya manta
 Galileela nyinanytja Godalu ngañmanytju wangkangu wangkatjara ini
 Aitjayala, ka panya paluru nyiringka walkatjunu nyanga alatji,
 15 “Kulilaya Tjipulanku pakali puliripitingku munu Napataliku pakali
 puliripitingku kuļu!

Panya iwara pulka ma-ngarinyi uru Galileela itiwanu, ka panya nyura
 iwara pala palula itingka nyinara waŋanı karu Jordanta wilurara.

Munuya Jew wiya tjutangku kuļu kulila, panya nyura kuļu manta pala
 Galileela nyinanyi Jew tjutangka tjungu.

16 Panya nyura Godaku ngurpa nyinara mungawalurungka nyinanyi,
 munu nyura ilunytjaku pulkaṛa nguluringkupai.

Palu ngula Godalu tili pulkangku nyuranya irnyara palurunku nintilku,
 ka nyura mungawalurungka nyinara palunya pitalytji pulka nyakuku,
 munu nyura nyakunytjatjanungku nintiringkuku munu palula wan-
 gañarangku kulilku.” *

Alatji Aitjayalu iriti walkatjunu, ka tjukurpa panya paluru mulapatu
 utiringu Jesunya Galileela wirkara nyinanyangka.

17 Uwa, ngañmanytju panya John Baptistalu Godaku tjukurpa aŋangu
 tjutangka tjakultjunangi, palu nyanga palulanguru Jesulu tjukurpa para-
 tjakultjunangi. Munu paluru wangkangi alatji, “Kura palyantjatjanuya pi-
 iwiyariwaya munuya kampa kutjuparira kura piruku palyantja wiyangku
 wantima, panya kuwari ilaringu Godalu aŋangu tjuṭa mayatjangku
 walytjanmara kanyintjaku.”

*Jesulu Wattu Antipina Witilpai Kutjara Kutjara Palunya Wanantjaku
 Altinytja
 (Markaku 1:16-20; Luke-aku 5:1-11)*

* 4:10 Deuteronomy 6:13 * 4:13 Tjipulannga pula Napatalinya Jacobaku panya katja kutjara
 iriti nyinangi. Panya Jacobanya ini kutjupa Israelnga munu paluru katja 12 utinu, ka palula
 tjanalanguru Israelkunu tjuṭa mulararingu. Ka panya ngula Israelkunu tjuṭa Itjipalanguru pakara
 pitjala manta Israelta tjarpala nyinangi, ka nyara palula arangka Godalu manta panya palunya
 tjarara ungu Israelkunu tjuṭa ngurangkarira nyinanytjaku. Munu paluru Tjipulanku pulampa
 Napataliku pakali puliripiti manta nyanga palunya ungu uru Galileela wilurara paluru tjana ngura
 tjuṭa palyara nyinanytjaku. * 4:16 Aitjayaku 9:1-2

¹⁸ Munu Jesunya uru Galileela kantilypa warara anangi munu paluru nyangu wati kutjara kutarara uru unngu ngaranyangka Simonnga, panya ini kutjupa Peternya, munu palumpa malanypa Andrew-nya. Panya nyanga paluru pula kuka antipina witilpai kutjara munu pula ngarala net urungka wañingi kuka tjuña witintjikitjangku. ¹⁹ Ka Jesulu palula pulala wangkangu, "Pitjala pula ngayula tjunguriwa, kana nyupalinya nintila warika kutjupa. Panya nyupali ninti kuka antipina witintjaku, palu kuwariña nyupalinya nintini anangu tjuña altira ngayula tjunguntjaku tjana kulu tjunguringkula ngayunya wanantjaku." ²⁰ Ka pula mapalkungku net tjunkula wantikatira palula tjunguringkula anu.

²¹ Munuya palulanguru tjukutjuku ma-pitjala nyangu kutarara kutjupa Jamesanya pulanya Johnnga wati panya Tjipitiku katja kutjara. Panya paluru pula pauta unngu nyinangi pulampa mamangka tjungu, munuya net palyarunguningi antipinaku ankunytjikitjangku. Ka palunya pulanya Jesulu altingu palula tjunguringkunytjaku. ²² Ka pula mapalku pakara palula tjunguringkula anu mama panya pautangka wantikatira.

*Jesulu Anangu Tjuña Nintintja Munu Pikatjara Tjuña Palyarunguntja
(Luke-aku 6:17-19)*

²³ Munu palulanguru Jesulu manta Galileela para-pitjalira ngura uwankarangka tawunu kutjupangka kutjupangka wali inmatja tjutangka tjarpala Godaku tjukurpa wangkangi anangu tjuñangka. Munu paluru tjanala Tjukurpa Palya tjakultjunangi panya Godalu anangu tjuña mayatjangku walytjanmara kanyintja. Munu ngura winkingka pikatjara tjuña kulu palyarunguningi pika kutjupa kutjupa tjuñatjara. ²⁴ Kaya ngura winkinguru kulinu Jesulu pikatjara tjuña palyarunguntja manta ini Tjiriyalanguru kulu.* Munuya kulintjatjanungku anangu tjuña mulatu pikatjara tjuña katingi palulakutu palyarunguntjaku pika kutjupa kutjupa tjuñatjara. Kutjupa tjaraya mamutjara, ka kutjupatjara tjitingkula witaly-witalyarira punkalpai, ka tjara kutjupa nyumpu puñu pakalpai. Ka Jesulu tjananya uwankara palyarungunu. ²⁵ Kaya anangu winkingku palunya rawangku wañaningi, panya paluru tjananya ngura tjutanguru kuliña pitjangu, ngura ilatja tjutanguru manta Galileelanguru, munu manta panya ngura tawunu 10-tjaranguru kulu. Munuya ngura pararitja tjuña kulu pitjangu manta panya Judealanguru, ngura Jerusalemalanguru, munu karu Jordanta kakararanguru kułukulu.

5

*Nyaanguruya Pukulpa Mulapa Nyinaku?
(Luke-aku 6:20-23)*

¹ Ka palulanguru Jesulu anangu tjuña mulapa nyakula puli pantangka ma-tatiña nyinakatingu, kaya palumpa nintintja tjuñangku wañara palula tjunguringu. ² Ka Jesulu palula tjanala tjukurpa wangkara nintiningi alatji,

³ "Kutjupa tjuñangkuya Godala mirangka ngarala walytjangku unngu kuliña kunteringkupai.

Palu nyanga palunya tjananya Godalu mayatja pulkangku walytjanmara kanyini, kaya palulanguru pukulpa mulapa nyinaku.

⁴ Kutjupa tjuñaya tjituru-tjituru pulka nyinanyi.

Palu nyanga palunya tjananya Godalu ampura pilunmankuku, kaya palulanguru pukulpa mulapa nyinaku.

* **4:24** Manta panya ini Tjiriyanya Galileela alinytjara.

- 5 Kutjupa tjutaya purkaranytju nyinanyi kañany-kañanypa wiya.
 Ka nyanga palunya tjananya Godalu wiru tjuta ungkuku kalkuntjatja-nungku, kaya palulanguru pukulpa mulapa nyinaku.
- 6 Kutjupa tjutaya Godala wanganarangku kulira tjukaruru nyinanytjikitja pulkara mukuringkupai kurunpa winki.
 Ka nyanga palunya tjananya Godalu alatjiitu palyalku wanganara alatjiitu nyinanytjaku, kaya palulanguru pukulpa mulapa nyinaku.
- 7 Kutjupa tjutaya ngaltunyntju pulka nyinanyi añañgu tjutaku kurunpa ngalturingkupai.
 Ka nyanga palumpa tjanampa ku lu Godanya pulkara ngalturingkuku, kaya palulanguru pukulpa mulapa nyinaku.
- 8 Kutjupa tjutaya kurunpa winki mukuringkupai Godanya kutju pukulmankunytjikitja.
 Munu nyanga paluru tjananya Godanya nyakuku, munuya palulanguru pukulpa mulapa nyinaku.
- 9 Kutjupa tjutangkuya pikaringkunyangka kalypara pilunmankupai munuya kanyilpai.
 Ka nyanga palunya tjananya Godalu waltyjanmankuku palumpa tjitji mulapa nyinanytjaku, kaya palulanguru pukulpa mulapa nyinaku.
- 10 Kutjupa tjutangkuya Godala wanganarangku kulira tjukaruru nyinapai, kaya mirpantju tjutangku tjananya tjukaruru nyinanyangka nyakula kuralpai munu pungkupai.
 Palu Godalu tjananya mayatja pulkangku waltyjanmara kanyini, kaya palulanguru pukulpa mulapa nyinaku.
- 11 “Panya nyura ngayuku waltyta nyinanyangka añañgu kutjupa tjutangku nyuranya warkira kuralku munu pungkuku munuya nyuranya ngunti kuranmankuku tjukurpa ngunti tjuta tjungura wangkara. Palu tjananya alatjingannyangka nyura wantima munu nyara palulanguru nyura pukulpa mulapa nyinaku. ¹² Uwa, pulkara pukularima Godanya kulira panya paluru nyurampa wiru mulapa ungkunytjikitjangku patara kanyini ngura nyara ilkařingka. Panya nyurala kuwaripangkaya iriti añañgu tjutangku palu purunypa tjananya watu panya wangkatjara ngañmanyitja tjuta, ka panyaya tungunpungkula wantingi.

*Tjaltu Mayu Wirutjara Purunypa Wanganara Nyinanytjaku
 (Markaku 9:50; Luke-aku 14:34-35)*

13 “Panya kutjupangku tjaltu tjunkupai kukangka mayu palya ngaranytjaku, kaya añañgu tjuta pulkara mukuringkupai. Ka palu purunypa nyura Godala wanganarangku kulira palyannyangkampa añañgu tjutangku nyuranya nyakula pulkara mukuringkuku tjananya ku lu Godaku waltyjaringkula wanganarangku kulira palyantjikitja. Palu tjinguru tjaltu kuraringkuku, ka kukangka tjunkunyangka mayu kura ngaranyi, ka mayu kura arkara wantinyi. Ka tjaltu palunya mantangka wañinyi añañgu tjutangku pałtjura tjinangku kantu ra kurantjaku. Ka palu purunypa nyura tungunpungkula Godalanguru paturingkunyangka añañgu tjutangku nyuranya nyakula Godanya wantiku palula tjunguringkunytjikitja mukuringkunytja wiyangku. Palulanguru nyura ngayuku war ka putu wirura palyalku.

Tili Purunypa Uti Palyanyku Nyinanytjaku

14 “Panya nyura tili purunypa nyinanyi aŋangu tjutaku. Panya mungangka tilingku iwara irnyara utilpai, kaya nyakula tjukaruru anku-pai, palu purunytpju nyura aŋangu manta winkitja iwara nintilpai Godalakutu wirkankunytjaku. Panya tawunu pulka apungka katu palyantja uti ngarala irnyalpai aŋangu tjutangku nyakunytjaku. **15** Ka palu purunypa aŋangungku wali unngu lampa tilira piti anga-pupatjunkupai wiya uti tjunkupai katu tili paluru irnyara utintjaku aŋangu tjutangku uti nyakunytjaku. **16** Ka palu purunypa nyura palyanyku nyinama tjukaruru munu mukulyangku wiru tjuta palyanma aŋangu tjutaku, ka palulan-gurulta aŋangu tjutangku nyuranya utingku palyannyangka nyakuku tili purunypa irnyannyangka, munuya nyurampa Mama Ilkaritjanya waintara kulira palunya mirawaŋira walkkulku.

Moseku Tjukurpa Tjukarurungku Kulintjaku

17 “Tjinguru nyura ngayunya alatji kulini, ‘Nyagatja-manti pitjangu tjukurpa panya Mosenya ungkunytja munu wati wangkatjara tjuta kuₗu ungkunytjanya wiyanjtikitjampa.’ Palu wiya, ngayulu tjukurpa palunya tjananya wiyanjtikitja pitjanytja wiya, palu panya tjana iriti wangkanytjitja palyantjikitjana pitjangu. **18** Mulamulangkuₙa nyurala wangkanyi, panya manta ilkar̄i ngaranyangka, tjukurpa paluru tjana uwankaraₗu titutjara ngaraku, nyura rawangku wanganarangku kulintjaku, tjukurpa pulka tjuta, munu tjukutjuku tjuta kuₗu. Palu tjukurpa panya paluru tjana wangkanytja uwankara utiringkunyangka kutju, tjukurpa paluru tjana wi-yaringkuku tjintu malatjangka. **19** Palulanguru tjukurpa palunya tjananya uwankara wanganarangku kulintjaku ngaranyi, ka tjinguru kutjupangku tjukurpa pulka tjuta, munu tjukutjuku tjuta kuₗu kulilwiyangku wantinyi, munu aŋangu kutjupa tjuta kuₗu nintini palu purunytpju wantinytjaku, ka palunya Godalu nyakula pukularinytja wiyangku tjaₗulku, Godaku waltyja uwankarangka malarku nyinanytjaku. Ka tjinguru kutjupangku tjukurpa nyanga palunya tjananya wanganarangku kulira palyani munu paluru aŋangu kutjupa tjuta nintini palu purunytpju palyantjaku, ka aŋangu nyara palunya Godalu nyakula pukularira palunya kuranyu tjunkuku Godaku waltyja kutjupa tjutangka waintara. **20** Palu kulilaya! Nyura Godaku waltyja nyinanytjikitja mukuringkulampa, wati nyara Moseku tjukurpa nintilpai tjuta, munu Paratji tjuta kuₗu arkantja wiyangku wantima. Panya paluru tjana Moseku tjukurpa kanyira kaŋany-kaŋanyaripai, tjukurpa nyara palulawanu kutju. Palu utiya kurunpa winki Godaku mukuringkula, palula wanganarangku kulira, tjukurpa nyara palunya tjananya palyanma, kaŋany-kaŋanyarinytja wiyangku. Ka nyura Godaku waltyja nyinanytjikitja mukuringkula palu purunypatū palyanma kurunpa winki Godaku mukuringkula ka nyara palulanguru kutju Godalu nyuranya waltyjanmankuku nyura palula tjunguringkula titutjara nyinanytjaku.

Mirpanariwiya Nyinanytjaku

21 “Panyatjaya kulila, panya Godalu nyurampa tjamu tjutangka iriti wangkanytja alatji,

‘Aŋangu kutjupa iluntankuwiyangku wantima, panya nyuntu aŋangu iluntankunyangkampa tjana nyuntunya kuutpangka katira ngaratjunkuku kura ngurkantankunytjaku.’

22 Palu kuwarina ngayulu nyurala wangkanyi alatji, nyuntu tjinguru malanypaku unngu kuraringkula mirpanarinyangka Godalu nyuntunya kura ngurkantankuku. Munu piruku tjinguru nyuntu malanypa ngunti

kuranmankunyangkampa nyuntunya kuutpa pulkakutu katiku Jewku kantjulpa tjutangku ngurkantankunytjaku. Munta nyuntu tjinguru małanypa anaṛa ngurpanmankunyangkampa Godalu palu purunypaṭu nyuntunya kura ngurkantankuku munu nyuntunya waru panya titutjara kampa-paingka wañiku. ²³⁻²⁴ Ka palula-tawara nyura uti walytja tjutaku kalypa nyinama. Tjinguru nyuntu timpula unngu paṭara ngaranyi Godanya kutjupa kutjupa ungkunytjikitja munu nyuntu tjinguru ngarala kulik, ‘Munta-uwa! Ngayulu panyaña ngayuku walytja kuraningi, ka tjinguru paluru ngayuku kuraringanyi. Wanyu kaña ankula palumpa-warara kalypariwa nyanga ungkunytja kuwaripangka.’ Alatji kulira nyuntu uti ankula palumpa kalyparingama munu palulangurulta małaku pitjala pitjilpangka tjunkula Godanya ungama.

²⁵ “Tjinguru nyuntu aŋangu kutjupa kurannyaṅka paluru nyuntunya mirpañarira kuutpakutu katiku. Ka katinyangka nyuntu uti palunya wiruṛa purkarangku wangkakatima palumpa kalyparingkunytjikitjangku kuutpangka wirkankunytja kuwaripangka, kanta paluru tjinguru kalypangku wantiku kuutpangka tjunkunytja wiyangku. Palu tjinguru nyuntu wangkara palumpa kalyparingkunytja wiyangku wantinyangkampa paluru nyuntunya katiku alatji wati ngurkantanku-paiktu, kanta paluru nyuntunya kura ngurkantara wangkaku maningka payamilantjaku munu paluru wati pulitjamunu altiku kanta pitjala nyuntunya witira katira tjailangka tjarpatjunkuku. ²⁶ Mununta nyara palula rawangku kanyilku nyuntu mani uwankara payamilaṛa wiyanjtaku paṭara. Nyangatjaña mulamulangku wangkanyi.

Kuri Walytjatjarangka Ngariwiyangku Wantinytjaku

²⁷ “Munuya nyangatja kułu kulila, panya Godalu nyurala iriti wangkangu nyanga alatji,

‘Nyura uti kutjupangka ngunti ngariwiyangku wantima munuya kuri walytjangka kutju ngarima.’ *

²⁸ Palu kuwariṇa ngayulu nyurala wangkanyi alatji, tjinguru wattingku kungkawara kutjupa nyakula unngu alatji kulini, ‘Kuwariṇatju kungkawara nyara wirungka ngarinyi.’ Ka nyura tjinguru kulini paluru kungkawara pala palula ngarinyangka kutju Godalu palunya kuranmankunytja-palku. Palu wiya, nyara paluru nyakula ngarinytjikitja unngu mukuringkunyangka kułu Godalu palunya kuranmankuku.

²⁹ “Uwa, uti nyura kura tjuta wantinytjikitjangku pulkara kulinma munu wantima alatji kura kuraku piruku mukuringkunytja wiyangku. Tjinguru nyuntu kurungku kutjupa nyakula kura palyalku. Palu uti nyuntu kuru warpura wañima kura rawangku palyantjaku-tawara munu palya kurutjara nyinama, panya nyuntu tjinguru kuru winkingku kura rawangku palyannyangkampa Godalu nyuntunya ngura kurangka wañiku waru pulkangka.

³⁰ “Munu palu purunypa tjinguru nyuntu maṛangku kura kutjupa kutjupa palyalku. Palu uti nyuntu mara kaṭara wañima kura rawangku palyantjaku-tawara, munu palya mara wiya nyinama, panya nyuntu tjinguru mara winkingku kura rawangku palyannyangka Godalu nyuntunya ngura kurangka wañiku waru pulkangka.

Kuri Wantikatiwiyangku Wantinytjaku

(Matthew-ku 19:9; Markaku 10:11-12; Luke-aku 16:18)

* ^{5:27} Exodus 20:14

³¹ “Munuya nyangatja kuļu kulila, panya nyiringka iriti walkatjunkunytja ngaranyi Godalu wangkanytja nyanga alatji,

‘Wati kuringku minyma kuri wantintjikitja mukuringkulampa uti nyiringka walkatjunama minyma paluru palunya wantintyta nyakula ninti nyinanytjaku.’ *

³² Uwa, nyura ninti tjukurpa nyara palumpa, palu kuwarina nyurala alatji wangkanyi tjinguru watingku minyma kuri nyiri unganyi wantintjikitjangku paluru mukuringkula, ka tjinguru minyma palunya wati kutjupangku ngula altinyi, ka nyara palulanguru wati panya kuri nganmanyitjangku minyma palunya wantira Godala tungunpungkunytjaku palyani, panya Godalu wangkangu kuri walytjangka kutju ngarintjaku. Ka wati panya kuri mala altintjanya kuļu Godala tungunpunganyi minyma panya palula tjunguringkula. Palulanguru nyura uti minyma kuri kanyinma alatjitu wantintyta wiyangku, palu wati kutjupangka kampangkaļu ngarinyangka nyakula kutju palya mukuringkula wantima.

Kalkuntjatjanungku Tjukarurungku Palyantjaku

³³ “Munuya nyangatja kuļu kulinma, panya Godalu nyurampa tjamu tjuṭangka iriti wangkangu nyanga alatji,

‘Nyura tjinguru Mayatja Godaku kutjupa kutjupa palyantjikitjangku kalkuntjatjanungku palyanma alatjitu mala wantintyta wiyangku.’

³⁴⁻³⁷ Ka nyura kalkuntjikitja mukuringkulampa kalkunma alatjitu ini kutjupa kutjupa-warara wangkara kalkuntja wiyangku. Panya nyura anangu kutjupa kalkuntjikitjangku ini kutjupa kutjupa-warara wangkapai tjinguru ini ilkaritja, tjinguru ini mantatja, tjinguru Jerusalemania, ka anangu nyara paluru ini palu purunypa wangkanyangka kuļira nyurampa mulamularingkupai. Palu kuwarina ngayulu nyurala wangkanyi alatji, nyura kalkuntjikitja mukuringkula tjukarurungku wangkama ini kutjupa kutjupa tjuṭa tzungura wangkanytja wiyangku. Panya nyangatja mamu Satantu wituwituni ini tjuṭawanungku kalkuntjaku. Kaya ilkaritjawanungku kalkuntja wiyangku wantima panya ngura nyara palulanguru Godalu uwankara mayatjangku kanyini. Munuya palu purunypatu mantawanungku kalkuntja wiyangku wantima panya manta nyangatja palumpa alatjitu. Munuya Jerusalemalawanungku kuļu kalkuntja wiyangku wantima panya ngura nyara paluru kuļu Godaku ngaranyi mayatja panya pułkaku. Palu nyura kalkuntjikitja mukuringkulampa kalkunma alatjitu ini kutjupa kutjupa wangkanytja wiyangku, munu kalkuntjatjanungku tjukarurungku alatjitu palyanma mala wantintyta wiyangku.

Ngapartji Pikaringkula Pungkunytja Wiyangku Wantintyjaku (Luke-aku 6:29-30)

³⁸ “Munuya nyangatja kuļu kulila! Panya Moselu iriti walkatjunu alatji, ‘Anangu kutjupangku nyuntunya kuřu pungkunyangkampa palunya ngapartji kuřu kutju pungama, munu tjinguru katiti pungkula kaṭantankunyangkampa palunya ngapartji katiti kutju pungkula kaṭantanama.’ *

³⁹ Palu kuwarina ngayulu nyurala alatji wangkanyi, anangu kutjupangku nyuntunya kurannyangkampa ngapartji kuralwiyangku wantima. Tjinguru kutjupangku nyuntunya mitamita kampa waku pungkunyangkampa mitamita kampa kutjupa nintinma piruku pungkunytjaku.

* 5:31 Deuteronomy 24:1 * 5:38 Exodus 21:24

40 Ka tjinguru aŋangu kutjupangku nyuntunya kuutpakutu katiku nyuntu palula ngañmanytju ngatjintjatjanungku palunya malakungku ungtjatjanungku wiyangka. Ka wati panya ngurkantankupaingku tjinguru nyuntunya wangkaku tjata araltjara aŋangu panya palunya ungtjatjanungku, ka nyuntu uti palunya tjata kutju ungtjatjanungku wiyangka nyuntumpa upukuta kuļu ungama panya mani pulkatja. **41** Ka tjinguru tjaultjingku nyuntunya pauntjingara wangkaku palumpa yakutja tjalira katira palula tjungu ankunytjatjanungku. Ka nyuntu uti wangañarangku tjalira katima munu ngula malakungku ungtjatjanungku wangkanyangka palula wangka, ‘Wiya, palyana piruku katinyi.’ Munu nyuntu munukara nguwanpa palula tjungu anama palumpa yakutja katira. **42** Ka tjinguru aŋangu kutjupangku nyuntunya kutjupa kutjupaku ngatjilku, ka palunya wantintjatjanungku wiyangka ngatjinnyangkampa ungama alatji.

*Anangu Uwankaraku Mukulya Nyinanytjaku
(Luke-aku 6:27-28,32-36)*

43 “Nyura ninti panya kutjupangku iriti wangkangu alatji,
‘Walytja tjutaku kutjuya mukulya nyinama munuya nyurampa mirpantju tjutaku kuraringama.’

44 Palu kuwariña ngayulu nyurala nintini tjukurpa kutjupa alatji,
‘Nyurampa mirpantju tjutakuya mukulya nyinama, munuya palumpa tjanampa Godala tjapinma nyuranya kuralpai tjutaku tjananya ngaltunytjungku atunymara kanyintjatjanungku.’

45 Ka nyura alatji palyannyangka Mama God ilkaritjangku nyuranya nyakula alatji kulilku, ‘Munta mulapa nyanganpa ngayuku walytja mulapa nyinanyi ngayunya arkara.’ Uwa, nyura mirpantju tjutaku Godala tjapinnyangka paluru tjananya ngaltunytjungku kulilku, panya paluru tjintu pakaltjingalpai aŋangu palya tjuta munu kura tjuta kuļu irnyantjatjanungku. Munu panya mina wiru iyalpai aŋangu wiru palyalpai tjutaku munu aŋangu ngunti palyalpai tjutaku kuļu. **46** Tjinguru nyura aŋangu kutjupaku mukulyangku wirura palyalku paluru nyurampa wirura palyannyangka kutju. Ka Godanya wanyu nyakula pulkara pukulariku nyurampa? Wiya, panya wati kamantaku mani mantjilpai tjuta palu purunypa nyinanyi munuya ngapartji wirura palyannyangka kutju aŋangu kutjupaku mukulyangku wirura palyalpai.* Ka nyura uti kutjaraku kuļu mukulya nyinama walytja tjutaku munu nyuranya kuralpai tjutaku kuļu. **47** Ka nyura walytja tjutangka kutju wirkara pukultu wangkanyangka nyakula wanyu Godanya nyurampa pukulariku? Wiya, aŋangu Godaku ngurpa tjutangka kuļuya walytja kutjupa tjutangka wirura wangkapai. Ka nyura uti kutjaraku nyakula pukularima walytja tjutaku munu walytja wiya tjutaku kuļu. **48** Uwa, nyura uti palya mulapa nyinama, panya nyurampa Mama Ilkaritjanya palya mulapa nyinanyi, palu purunypa.”

6

Ngaltutjara Tjuta Ngaltunytjungku Ungkunytjaku

1 “Nyura Godanya tjukarurungku walkuntjikitjangku kutjupa kutjupa tjuta palyalpai, panya nyura palula tjapilpai, munu ngaltutjara tjuta mani

* **5:46** Wati nyanga paluru tjana aŋangu Jew tjuta, palu tjana wati nyara Rome-aku mayatjaku warkaringi, munuya aŋangu Jew tjutangka tax mani mantjiningi mayatja panya palulakutu iyantjikitjangku. Kaya Jew tjuta palumpa tjanampa kuraringkupai warka nyanga palunya mayatja panya Jew wiyaku palyannyangka.

ungkupai, munu mai wantira nyinapai palunya kulintjikitja. Palu kutjupa tjutangku nyanga palunya tjananya palyalpai aŋangu tjutangka mirangka nyakula tjananya mirawaninnytjaku. Ka nyura tjutangka mirangka palyalwiyangku wantima, panya alatji palyannyangka nyurampa mama ilkaritjangku nyakula nyuranya ngapartji wiru ungkunytya wiyangku wantiku.

² “Kaya ngaltutjara tjuta ungkunytykitja mukuringkulampa aŋangu tjutangka mirangka ungkunytya wiyangku wantima. Panya wati ngunti palya-palku kanany-kananypa nyinapai tjutangku ungkupai wali inmatja tjutangka aŋangu tjutangka mirangka nyakula tjananya mukulya-palku mirawaninnytjaku.

“Munuya palu purunypaṭu iwarangka ankula anangu ngaltutjara tjuta nyakula ungkupai tjutangka mirangka kutju aŋangu tjutangku nyakula tjananya mukulya kulintjaku. Kaña nyurala tjukarurungku wangkanyi, panya palunya tjananya Godalu nyakula mirawaninnytja wiyangku wantiku, panya alatjituaya aŋangu tjutangku tjananya nyakula mirawaŋingi.

³ Ka nyura ngaltutjara tjuta ungkunytykitja mukuringkulampa tjananya kampangkaṭu ungama kutjupa uwankarangku nyakula kulintjaku-tawara.

⁴ Uwa, nyura ungkunytya uti kampangkaṭu alatjitu ngarama. Panya Mamanya kutju nyurampa ninti nyinanyi nyura panya kumpilpa ungkunytyitjaku, munu paluru nyakunytjatjanungku nyuranya ngapartji wiru ungkuku.

Godala Tjukarurungku Tjapintjaku (Luke-aku 11:2-4)

⁵ “Kaya Godala tjapirampa wati ngunti palya-palku kanany-kananypa nyinapai tjuta arkalwiyangku wantima panya paluru tjanaya mukuringkupai wali inmatja tjutangka ngarala Godala tjapintjikitja aŋangu tjutangku nyakula tjananya mirawaninnytjaku. Munuya palu purunytytu iwarangka itingka kuļu ngarala tjapilpai aŋangu tjutangka mirangka tjana nyakula tjananya wiru kulintjaku. Kaña nyurala tjukarurungku wangkanyi, panya palunya tjananya Godalu nyakula mirawaninnytja wiyangku wantiku, panya alatjituaya aŋangu tjutangku tjananya nyakula mirawaŋingi. ⁶ Ka nyura Mama Godala tjapintjikitja mukuringkulampa nyurampa ngura waltyangka tjarpala tuwa patira kutjungku kumpiltu nyinara palula tjapinma. Panya Mamanya kutju nyurampa ninti nyinanyi nyura panya kumpilpa tjapintjitetjaku munu paluru nyuranya nyakunytjatjanungku ngapartji wiru mulapa ungkuku.

⁷ “Uwa, nyura Godala tjapirampa aŋangu Godaku ngurpa tjuta purunytyu wangkanyta wiyangku wantima. Panya paluru tjana tjanampa god tjutangka tjapira tjukurpa palunyatu palunyatu rawangku wangkapai alatji kuliřa, ‘Tjukurpa palunyatu palunyatu rawangku wangkara tjapinnnyangka kutju nganampa godangku nganaŋanya kuliřa ungkupai.’

⁸ Ka nyura palunya tjananya arkalwiyangku wantima paluru tjana purunyta rawangku tjapintjaku-tawara, panya nyurampa Mama ninti nyinanyi nyura mukuringkunytyitjaku munu nintingku alatjitu nyuranya kulini nyura kutjupa kutjupaku mukuringkula palula tjapinnnyangka.

⁹ Palulanguru nyura palula tjapirampa uti alatjingara wangkama, ‘Mama God ilkaritja! Nyuntun pułka mulapa nyinanyi uwankarangka waintarinyytja.

¹⁰ Nintinmalanya nyuntunya tjukarurungku walkuntjaku anangu uwankarangku.

Munulanya nyuntu mayatjangku uwankara walytjanmara kanyinma nyuntumpa walytja mulapa nyinanytjaku.

Nintinmalanya nyuntula wangañarangku kulintjaku anangu uwankarangku, panya angelpa tjutangku nyuntula ilkariringka kulilpai, palu purunypa.

¹¹ Kuwarilanya ungama mai kuka kulu kuwariku nganaña ngalkula paltja nyinanytjaku.

¹² Palu nganaña nyuntunya kurannyangkampa nganañanya kalypangku wantima pungkunytja wiyangku.

Panya kutjupangku nganañanya kurannyangkampa nganaña palunya kalypangku wantipai, palu purunypa nganampa kalyparingama.

¹³ Anga-kanyinmalanya nganaña ngunti mukuringkula kura palyantjakutawara.

Munulanya palu purunypa mamungka-tawara atunymara kanyinma.'

Alatjiya tjapinma Mamala. ¹⁴ Tjinguru anangu kutjupangku nyuntunya kurannyangkampa nyuntu kalypangku kurantja wiyangku wantiku, ka palu purunyjtutu nyuntu Mama Ilkaritjanya kurannyangkampa paluru nyuntunya kalypangkuwantiku. ¹⁵ Palu nyuntu tjinguru anangu palumpa kalyparingkunytja wiyangku wantinyangkampa Mamalu palu purunyjtutu nyuntumpa kalyparingkunytja wiyangku wantiku.

Godanya Walkuntjikitjangku Mai Wantira Nyinanytja

¹⁶ "Ka tjinguru nyura kutjupa-ara mai wantira nyinaku Godanya walkuntjikitja. Palu alatji palyaraya wati panya ngunti palyapalku kañany-kañanya nyinapai tjuta arkantja wiyangku wantima. Panya paluru tjanaya mukuringkupai anangu tjutangku tjananya mai wantinyangka nyakula kulira mirawañintjaku. Munuyanku yunpa tjunpangka nyitira para-kurakuralpai munuya ngunti tjituru-ttituru pulka-palku para-ngarapai anangu tjutangku tjananya nyakula kulintjaku, 'Munta-uwa, mulapa nyangantu wiru tjutangku mai ngalkuwiyangku wantinyi Godanya walkuntjikitjangku.' Palu ngayulu nyurala tukarurungku wangkanyi, panya palunya tjananya Godalu nyakula mirawañintja wiyangku wantiku, panya alatjituaya anangu tjutangku tjananya nyakula mirawañingi. ¹⁷ Palu nyura mai wantira nyinanytjikitja mukuringkulampa nyuranku mangka wirunma munuya yunpa minangka paltjinma. ¹⁸ Kaya kutjupa tjutangku nyuranya nyakula puþu kuliklu nyura mai ngalkuwiya nyinanyangka. Palu Mamanya kutju nyurampa ninti nyinaku nyura panya kumpilpa palyantjitzaku munu paluru nyuranya nyakunytjatjanungku ngapartji wiru ungkuku.

Mani Munu Mantatja Kutjupa Kutjupa Tjuta Wantira Godanya Waintara Kulintjaku

(Luke-aku 12:33-34; 16:13)

¹⁹ "Tjinguru nyura mantangka nyanga nyinara kutjupa kutjupa wiru tjuta mantjira utulura kanyini pukulpa nyinanytjikitjangku. Palu wantima alatji manyungku mantjira kanyintja wiyangku, panya akulyungku puñu mantara kutjupa kutjupa tjuta ngalkula wiyalpai, ka ayana rawa ngarira ngarira arkalytjararingkula wiyareringkupai. Ka anangu kutitjunkupaingku pitjala wali katantara tjarpara kutjupa kutjupa wiru tjuta kutitjunkupai.

²⁰ Palu uti nyura mantangka nyanga nyinara waintara kulinma ngura panya ilkaritja, munuya Mayatja Godaku mulamularingkula palumpa warka titutjarangku palyanma, ka nyura rawangku palyalkatinyangka Godalu ngura nyara ilkaritjangka nyurampa kutjupa kutjupa wiru tjuta

tjunkula wantiku. Ka paluru tjana palya tiṭutjara ngaraku nyuntumpa paṭara, panya ngura nyara palula uwankara puṭu arkalytjararingkupai, ka akulyu tjuṭa ngaranytja wiya nyarangka tjananya ngalkula wiyan-tjikitja, ka wati kutitjunkupai kuļu nyinanytja wiya nyarangka tjarpala kutitjunkunytjikitja. ²¹ Uwa, uti nyura ilkaritja tjuṭaku kutju pulkara mukuringama. Tjinguru nyura mantatja tjuṭaku pulkara mukuringkulampa nyura paluna tjananya kutju rawangku kulilku Godanya wantira. Palu nyura ilkaritja tjuṭaku kurunpa winki mukuringkulampa nyura mantatja tjuṭa wantira waintara ilkaritja tjuṭa kutju rawangku kulilku munu Godala kutju wangaṇarangku kulintjikitja mukuringkuku.

²² “Panya nyura aŋangu tjuṭa tiṭutjarangku munytjangku ungkunyangkampa nyurala unngu waru tili puruny whole body) nyaraku, panya Godalu nyuranya tili puruny whole body) nintilku nyura tjukaruru palyanyku nyinanytjaku. ²³ Palu tjinguru nyura manyungku kanyira ngaltutjara tjuṭa munytjangku ungkunytja wiyangku wantirampa, ka nyurala unngu mungawaļurū puruny whole body) nyaranyi munu nyuranya puntu winki kuralku. Pala palulatwara nyura uti manyuringkuwiya munytja nyinama.

²⁴ “Panya aŋangu kutju mayatja kutjarangka puṭu warkaripai. Paluru tjinguru kutjungka wangaṇarangku kulilku munu kutjupangka kulintja wiyangku wantira tungunpungkuku. Munu tjinguru kutjuku pulkara mukuringkula kutjupaku puṭu mukuringkula palumpa kuraringkuku. Ka pala palu puruny whole body) nyura tjinguru maniku mukuringkulampa Godaku puṭu mukuringkuku. Panya nyura puṭu kutjara tjungura kulini Godanya munu mani kuļu. Palu uti nyura Godanya kutju pulkara kulinma munu mani wantima.

Iluru-ilururinytja Wiya Nyinanytjaku (Luke-aku 12:22-31)

²⁵ “Tjinguru nyura kutjupa-ara tjituru-tjitururipai alatji kulira, ‘Mailanku yaaltjinguru mantjilku ngalkula paltja nyinanytjikitjangku, munula mantara kuļu yaaltjinguru mantjilku tjarpala unytjunpa nyinanytjikitjangku?’ Palu ngayulu nyurala wangkanyi nyanga alatji kuliraya tjituru-tjitururinytja wiyangku wantima! Panya Godalulanya wanka nyinanytjaku palyanu mai kutju pulkara kulintjaku wiya, munulanya puntu wiru palyanu mantara kutju pulkara kulintjaku wiya, palu paluna waintara kulintjaku.

²⁶ “Wanyuya tjułpu tjuṭa nyawa munuya kulinma panya paluru tjanaya ukiri kaanangka pakaltjingalpai wiya munuya mai kururingkunyangka mantjira uṭulura walingka ngulaku tjunkupai wiya, panya Mama God Ilkaritjalu tjananya tiṭutjarangku paltjalpai tjintu winki. Kaya kulinma panya nyura tjułpu tjuṭa puruny whole body) wiya aŋangu pulka tjuṭa nyinanyi, ka panya Godanya nyurampa pulkara mulapa mukuringanyi tjułpu tjuṭangka munkara.

²⁷ “Palulanguruya maiku puṭu kulira tjituru-tjitururinytja wiyangku wantima, panya nyura tjituru-tjituru nyinarampa puṭu yiya tjuṭa ma-waṛanı mantangka nyanga rawa wanka nyinanytjikitjangku.

²⁸ “Munu nyura nyaaku mantara-tjiratja tjituru-tjitururinyi? Kulinmaya wanyu inuntji panya ilytjingka pakantja tjuṭa, panya paluru tjana wiru mulapa ngaranyi, palu tjananku warkarira mantara walytjangku palyara tjarpapai wiya alatjitu. ²⁹ Panya Tjalamannga mayatja pulka iriti nyinara mantara wiru tjuṭangka tjarpapai, palu palumpa wiru tjuṭangka munkara mulapa inuntji panya ilytjingka pakantja tjuṭa ngaranyi. ³⁰ Ka

nyura nyaaku mantara-tjiratja tjituru-tjitururinyi Godaku puṭu mulamularingkula? Panya Godalu alatjiṭu ukiri tjuṭa inuntjingka wirulpai, palu ukiri paluru tjana tjintu maŋkurpa nguwanpa ngarala piltiringkupai, ka tjananya warungku kampara wiyalpai. Kaya nyara palulanguru kulinma, panya Godalu ukiri tjuṭa rawangku inuntjingka wirulpai unytju ngarala wiyaringkunytjaku, munu paluru nyuranya wantintja wiyangku pulkara atunymankuku ukiringka muŋkara mulapa, panya nyura tiṭutjara nyinapai ukiri purunypa wiya. Nyara palulanguru paluru nyurampa watarkurinitya wiya, munu nyuranya mantara tjuṭa ungkuku tjarpantjaku.

³¹ “Ka palulanguru nyura alatji kulilwiyangku wantima, ‘Yaaltjin-gurula mantjira ngalkuku? Yaaltjingurula mantjira tjikilku? Yaaltjin-gurula mantara mantjira tjarpala unytjunariku?’ ³² Nyanga alatjiya Godaku ngurpa tjutangku rawangku kulipai mantjintjikitjangku. Palu Mama God Ilkaritjanya ninti nyinanyi nyura pala mukuringkunytjitja uwankaraku. ³³ Kaya kutjupa kutjupa tjuṭa-tjiratjangku tjituru-tjitururira puṭu kuli-kulintja wiyangku wantima, munuya palunya kutju rawangku kulinma paluru nyuranya mayatjangku kanyinnyangka pukulmankunytjikitjangku, munuya paluru wangkanytja uwankara wan-gaŋarangku kulira tjukarurungku palyanma. Ka paluru nyuranya ungkuku mai, mantara, munu kutjupa kutjupa tjuṭa kulukułu nyura mukuringkunyangka. ³⁴ Munuya mungawinki mantjintjikitjangku kuļu kulintja wiyangku wantima, ‘Yaaltjingurulanku mantjilku?’ Panya nyara palula-ařangkaṭu Godalu nyuranya ungkuku, ka nyura palulanguru tjintu munkaritjaku pulkara tjituru-tjitururira puṭu kuli-kulintja wiyangku wantima, munuya tjintu nyanga kuwari mantjintjikitjangku kutju kulinma.”

7

Anangu Kutjupa Kuranmankuwiyangku Wantintjtaku (Luke-aku 6:37-38,41-42)

¹ “Nyura uti anangu kutjupa tjuṭa wangkara kuranmankunytja wiyangku wantima nyuranya kuļu kuranmankunytjaku-tawara. ² Panya nyura anangu kutjupa tjuta wangkara kuranmankunyangkampa Godalu palu purunytjuṭu nyuranya kuranmankuku. Palu nyura anangu tjuṭa wangkara pukulmankunyangka Godalu palu purunytjuṭu nyuranya pukulmankuku.

³⁻⁵ “Palu nyaaku nyura anangu kutjupa tjuta wangkara kuranmankupai? Tjinguru nyura nyanganyi Godaku walytja kutjupaku kurungka puṇu tjlpirpa tjukutjuku ngarinyangka. Palu nyurampa kurungka tjinguru puṇu pulka ngarinyi. Ka nyura kuru palyangku-palku wangkaku palula alatji, ‘Wanyu kaṇanta puṇu pala tjlpirpa tjukutjuku mantjira waṇi.’ Palu wiya, nyura ngunti kuru palyangku-palku kaṇany-kaṇanytju watarku wangkanyi. Utu nyura nyurampa kurunguru-warara puṇu pala pulkanya mantjira waṇima munu palulanguru kuru palyaringkula utilta nyakuku anangu nyara kutjupaku kurunguru tjlpirpa tjukutjuku mantjira waṇintjikitjangku.” Alatji Jesulu tjanala wangkangi tjana kura walytjangku-warara tjukarurungku ngurkantankunytjaku munu palulanguru kutju anangu Godaku walytja kutjupa kura nyakula wangkanytjaku.

⁶ Munu piruku wangkangu, “Tjukurpa Palya Godaku wiru mulapa ngaranyi milmilpa alatjiṭu. Ka kutjupa-ara nyuntu tjukurpa nyanga palunya wangkanyangka anangu kutjupa tjuṭangku kulira wantipai. Kaya

wantinyangka piruku tjanala wangkanytja wiyangku wantima. Panya anangu nyara paluru tjana papa pikati tjuta purunypa munu tjinguru pikipiki tjuṭa purunypa. Panya nyura tjanala Tjukurpa Palya rawangku wangkanyangka tjana pina pati alatjitu nyinanyi kulintja wiya munuya nyurampa pikaringkuku, panya papa pikatingku anangu patjalpai, palu purunypa. Munuya tjukurpa nyura wangkanytja kurakuralku, panya pikipiki tjuṭangku mai ungkunyangka tjinangku kantuṛa tjulpirta tjarpatkunkupai, palu purunypa tjana tjukurpa kurakuralku. Palulanguru nyura uti tjanala Godaku tjukurpa wiru tjuṭa rawangku wangkanytja wiyangku wantima, panya tjukurpa paluru milmilpa.”

*Godala Rawangku Tjapintjaku Wantinytja Wiyangku
(Luke-aku 11:9-13)*

⁷⁻⁸ Munu palulanguru Jesulu tjananya Godala tjapintjaku wangkara nintiningi alatji, “Rawangkuya Godala ngatjinma nyura mukuringkunytjitjaku, ka nyuranya ungkuku. Munuya Godala rawangku tjapinma nyuranya tjukurpa palumpa nintintjaku, ka paluru nyuranya nintilku. Uwa, rawangkuya Godala tjapinma, panya anangungku tuwa pati ngaranyangka rawangku pungku-pungkupai pakara alpamilantjaku, palu purunypa. Ka Godalu nyuranya kulilku, panya anangungku wali ungu nyinara tuwa pungku-pungkunyangka kulira alara ungkupai, palu purunypa Godalu rawangku tjapinnyangka kulira ungkupai munu nintilpai munu alpamilalpai wantinytja wiyangku.

⁹ “Wati mamangku wanyu katjangku maiku ngatjinnyangka apu ungkupai? ¹⁰ Munu wanyu antipinaku ngatjinnyangka palunya liru ungkupai? ¹¹ Wiya, nyura panya kura tjuṭangku nintingku tjitji nyurampa wiru tjuṭa kutju ungkupai ngatjinnyangka. Kaya palulanguru wanyu Mama Ilkaritjanya kulinma, paluru nyaa purunypa nyinanyi? Panya paluru wiru mulapa nyurala waintara alatjitu, munu paluru intjanungku wiru mulapalta ungkupai nyura palula ngatjinnyangka.

¹² “Uwa, panya nyura mukuringanyi anangu kutjupa tjuṭangku nyurampa wirura palyantjaku. Ka uti nyura alatjitu tjanampa palu purunypaṭu mukulyangku wirura palyanma wantinytja wiyangku. Panya aña nyanga palunya Moselu tjana wangkatjara kutjupa tjuṭangku kuļu iriti wangkangi.

*Iwara Utju Ngurira Nyakula Wanantjaku
(Luke-aku 13:24)*

¹³⁻¹⁴ “Kulilaya! Iwara kutjara ngaranyi anangu tjuṭa ankunytjaku. Kutju lipi kaita lipitjara, ka kutjupa utju kaita utjutjara. Ka panya iwara lipi karalypa wiru ngaranyi, kaya nyara palulawanu anangu tjuṭa mulapa ankupai kaita lipiwanu tjarpura. Palu iwara nyara paluru mangarinyi ngura kurakutu Godalanguru maunṭalpa tjituru-tjituru titutjara nyinanytjaku. Ka iwara panya utju karalypa wiya wituwitu ngaranyi, kaya iwara palunya anangu mankurtu kutju ngurira nyakula wanalpai kaita utjuwanu tjarpura. Palu iwara nyara paluru ma-ngarinyi ngura wirukutu Godala tjunguringkula pukulpa titutjara nyinanytjaku. Ka nyura uti kaita utjuwanu ma-tjarpara iwara pala utjungka anama.

*Punu Maitjaranguru Ngurkantankunytja
(Luke-aku 6:43-45)*

¹⁵ “Ngulu nyangamayanku wangkatjara ngunti tjuṭa, panya paluru tjanaya ngunti wiru-palku para-ngarapai tjiipi tjuṭa purunypa. Palu

paluru tjana unngu mirpañtju alatjitu tjitutja inura purunypa, munuya Godaku walytja tjuتا kurantjikitjangku ngunti wangkapai. ¹⁶ Ka nyura palunya tjananya ngurkantankuku tjanampa warكanguru, tjana palyantjitjanguru, panya nyanga palu purunypa tjuتا anangu palya tjutangku palyalpai wiya, kura tjuتangku kutju palyalpai. Kulinmaya mai tjuتanguru, panya mai kiripitji tjuتا puنu tjilka-tjilkangka pakalpai wiya, ka mai ili tjuتا puنu tjilkalangka pakalpai wiya. Ka palu purunypa ngunti wangkapai tjutangku warكka wiru puنu palyani. ¹⁷⁻¹⁸ Panya puنu palyangka kutju mai wiru tjuتا pakara pulkaringkupai mayu palyatjara, palu puنu kurakurangka mai kura tjuتا kutju pakalpai mayu kurakura. Ka palu purunypa puنu palyangka mai kura tjuتا pakalpai wiya, ka puنu kurakurangka mai wiru tjuتا pakalpai wiya. Kaya ara nyanga palulanguru kulira nintiringama panya wangkatjara palya tjutangku tjukarurungku kutju wangkapai, ka wangkatjara ngunti tjutangku anangu tjuتا ngunti kuralpai. Ka palulanguru nyura wangkatjara kutjupa nyakula paluru wangkara palyantjitjanguru ngurkantankuku kura palumpa. ¹⁹ Panya watu kaana walytjangku puنu mai kuratjara ngaرanyangka nyakula kaشا warungka wanipai, palu purunypa Godalu wangkatjara ngunti tjuتا rawangku wangkara ngunti kurannya paira iyalku warukutu. ²⁰ Uwa, nyura wangkatjara kutjupangku ngunti wangkara palyannya paira nyakula palunya tjukarurungku ngurkantankuku kulira, ‘Nyagatja Godalu iyantja wiya.’

*TjinTu MaLatjangka Jesunya Anangu Kutjupatjaraku Ngurparingkunytja
(Luke-aku 13:25-27)*

²¹ “Kulilaya! Panya anangu tjutangkuniya mayatjanmankupai. Palu kutjupa tjarangkuniya unytjungku kutju mayatjanmankupai munuya Godalu wangkanytjtja uwankara tjana wangaنarangku kuliرا palyalpai wiya. Ka nyara palulanguru Godalu tjananya puنu walytjanmara mayatjangku kanyilku. Palu tjana Mama Ilkaritjanya mukuringkunytja tjuتا wangaنarangku kulinnyangka kutju paluru tjananya walytjanmara kanyilku. ²² Panya tjintu malatjangka anangu panya tjutangku ngayunya mayatjanmara alatji wangkaku, ‘Mayatja! NganaNa nyuntunya ini wangkara tjukurpa nyuntumpa tjakultjunkupai anangu tjutangka, munula palu purunypa نu anangu tjutanguru mamu tjuتا paira iyalpai nyuntunya ini wangkara, munula pirukutu nyuntunya ini wangkara miracle kutjupa kutjupa tjuتا witulyangku palyalpai.’ ²³ Alatjiya ngayula wangkaku kana tjanala ngapartji wangkaku, ‘Wiya, ngayulu nyurampa ngurpa alatjitu. Nyura panya rawangku kura tjuتا palyalkatipai Godala tungunpungkula. Araya ngayulanguru!’

*Tjukurpa Wali Palyalpai Kutjaratjara
(Luke-aku 6:47-49)*

²⁴ “Kulilaya! Anangungku ngayulu wangkanytjtja kulintjatjanungku wangaنarangku kuliرا palyarampa paluru watu panya walى puli walungka palyantjanya purunypa nyinanyi. Panya watu paluru nintingku walى palyantjikitjangku walى pulka ngurkantanu munu puli nyara palula purkarangku walى palyanu kunpu pulka ngaranytjaku. ²⁵ Ka ngula mina pulkangku pitjala puyiningi, ka karungka uru pulka ukalingkula lipiringu munu ilytjiwanu ukalingangi. Ka walپa pulkangku walى panya palunya pulkara untuningi, palu pilukatinytja wiya alatjitu ngarangi, panya walى nyanga palunya puli walungka palyanu, ka witu alatjitu ngarangi urinytja wiya. Ka palu purunypa nyura ngayuku tjukurpa

kulintjatjanungku wanganarangku kulira palyarampa punkantja wiya kunpu ngaraku tjituru-tjituru kutjupa kutjupa nyurala wirkankunyangka.

²⁶ “Palu aŋangungku ngayulu wangkanytjtja kulira wantirampa paluru wati panya walı palyalpai kutjupa purunypa nyinanyi, panya wati paluru kawakawangku walı palyantjikitjangku manta tjula ngurkantanu karungka itingka munu manta pala palula warpungkula walı palyanu tartjangka. ²⁷ Ka ngula mina pulkangku pitjala puyiningi, ka karungka uru pulka ukalingkula lipiringu munu ilytjiwanu ukalingangi. Ka walpa pulkangku walı panya palunya pulkara untuningi, ka mapalku punkara pilukatingu munu uwankara alatjtju wiyaringu. Ka palu purunypa nyura ngayuku tjukurpa kulintjatjanungku wanganarangku kulintja wiyangku wantirampa nyura puṭu kunpu ngaraku munu tjituru-tjituru kutjupa kutjupa nyurala wirkankunyangka nyura punkalku. Kaya ara nyanga palula pulalanguru kulinma munuya ngayuku tjukurpa wanganarangku kulira palyanma alatjtju ngula kutjupa kutjupa tjuṭa nyurala utiringkunyangka kuṇpu ngaranytjikitjangku.”

²⁸ Ka Jesulu tjukurpa nyanganpa wangkara wiyaringkunyangka aŋangu tjuṭangku kulira nguwankuringu munuya kuliningi, “Ai, wati nyangangku mun̄kara alatjtju wangkapai tjukurpa pulka mulapa.” ²⁹ Panya paluru Godalu nintinnyangka tjanala wangkangi nintingku alatjtju, wati panya Moseku tjukurpa nintilpai tjuṭangku purunypa wiya.

8

Jesulu Wati Pikatjara Palyarunguntja (Markaku 1:40-45; Luke-aku 5:12-16)

¹ Ka Jesulu apu paṇṭangka tjukurpa tjuṭa wangkara wiyaringkula ukalingu, kaya aŋangu tjuṭa mulatu palunya wanānu. ² Ka palulakutu wati kutju miri pikatjara pitjangu, panya pika nyara paluru kura pulka wiyaringkunytja wiya titutjara ngarapai. Munu paluru pitjala palula kuranyu tultjungarəkatira alatji wangkara ngatjinu, “Mayatja nyuntu mukuringkulampani pika nyangatja palyanma wirungku.” ³ Ka Jesulu maṛangku pampura wangkangu, “Uwa, ngayulu mukuringanyi nyuntu palyaringkunytjaku.” Munu palulanguru wangkangu, “Palyariwa!” Ka mapalku pika panya wiyaringkula miri winki palyaringu. ⁴ Ka Jesulu wangkangu palula, “Kulila, aŋangu kutjupa tjuṭangka wangkawiyangku wantima nyuntu nyanga palyaringkunytjatjanungku. Palu timpulakutu ankulanku nintila wati tjukurtjarangka, kanta paluru miri pala palyaringkunytja nyakula palyanmara. Ka palula malangka wati panya palunya tjułpu kutjara uwa Godanya ungkunytjaku, panya iriti Moseku wangkangu miri palyaringkunytjatjanungku alatjingantjaku. Kaya nyuntu ungkunyangka nyakula aŋangu tjuṭangku kulikku, ‘Munta-uwa, nyangangku mulapa palyaringkunytjatjanungku unganyi.’” Alatji Jesulu wati panya palunya wangkara witunu.

Jesulu Wati Tjaultjiku Warka Palyarunguntja. (Luke-aku 7:1-10; Johnku 4:43-54)

⁵ Ka Jesunya ngura panya Kapunimala tjarpanyangka wati tjaultji kuranyitja palulakutu pitjangu. Wati panya paluru Rome-anja ngurara munu paluru tjaultji panya Rome-anja ngurara kutjupa tjuṭa nampa 100 mayatjangku kanyilpai ngura nyara Kapunimala. Munu paluru Jesula alatji wangkara ngatjinu, ⁶ “Mayatja ngayuku wati war̄karipai pika pulka ngarinyi ngurangka urinytja wiya tiwilpa alatjtju puṭu pakara.”

⁷ Ka Jesulu palula wangkangu, “Uwa palya! Kuwari^{tuṇa} ma-pitjala palunya palyarungulku.”

⁸ Ka wati panya tjaultji tjuṭaku mayatjangku wangkangu, “Wiya Mayatja, nyuntu pułka kaña ngayulu wati tjukutjuku munuṇa wiya nguwanpa ngaranyi nyuntu ngayuku walingka pitjala tjarpanytjaku. Nyuntu uti nyanganguru wangkama, ka paluru palyaringama nyuntu mayatjangku nyanga paṭunguru wangkanyangka.” ⁹ Panya ngayulu ninti nyuntu Godaku war̄karipai munu panyan paluru witunyangka wanganarangku kulira palyalpai. Ka ngayulu palu purunypa Rome-aku mayatjangku witunyangka wanganarangku kulira palyalpai. Mununa ngayulu nga-partji mayatjangku tjuṭa wangkara witulpai, kaya ngayula wanganarangku kulilpai. Panya ngayulu tjananya altipai, kaya mapalku palyalpai wangka kutju kulira ngayulu witunyangka. Ka panya nyuntu palu purunypa mayatjatu nyinanyi, kaña kulini nyuntu nyanganguru wangkanyangka wati panya paluru palyaringkuku.”

¹⁰ Ka Jesulu nyangatja kulira nguankuringu munu aŋangu tjuṭangka wangkangi, “Tjukarurungkuṇa nyurala wangkanyi, panya wati nyanga tjaultji tjuṭaku mayatja Jew wiya, munu paluru ngayuku mulamularinganyi pułkara alatjiu aŋangu Jew tjuṭa purunypa wiya. Panya ngura nyanga Israelta ngayulu Jew kutjupa wati nyangatja purunypa pułkara mulamularingkunyangka nyakunyta wiyatū. ¹¹ Tjukarurungkuṇa nyurala wangkanyi, panya ngura uwankarangurya aŋangu Jew wiya tjuṭa pitjaku kakararanguru munu wiluraranguru kuļu. Munuya paluru tjanala pitjala Aipuramala, Isaacala, Jacobala tjanala tjunguringkula nyinaku Godaku waltya kutjupa tjuṭangka kuļu, munuya mai panya pułka pukultu alatjiu tjungungku ngalkuku Godalu palunya tjananya uwankara mayatjangku kanyinnyangka.” ¹² Palu panya aŋangu Jew kutjupatjara tjanala tjunguringkunyta wiya ngaraku. Panya Godalu tjananya iriti ngurkantanu palumpa waltya nyinanytjaku, palu tjanala wantinyangka paluru tjananya paira iyalku ngura kurakutu, kaya ngura nyara palula mungawaluru pułkangka pika pułkatjara nyinara tiṭutjara ulaku.”

¹³ Munu palulanguru Jesulu piřuku wati panya tjaultji tjuṭaku mayatjangka wangkangu, “Palya, ngurakutu ma-pitja! Panya nyuntu mulamularingu wati panya nyuntumpa war̄ka ngayulu palyarunguntjaku, kaña wati palunya kuvari palyanu.” Ka nyara palula ara alatjiu wati panya palumpa war̄ka mapalku palyaringu Jesulu paṭunguru wangkanyangka.

Jesulu Pikatjara Tjuṭa Palyarunguntja (Markaku 1:29-34; Luke-aku 4:38-41)

¹⁴ Ka Jesunya Peterku ngurakutu anu munu walingka tjarpara nyangu Peterku umari waruringkula pikatjara ngarinyangka. ¹⁵ Munu minyma palunya mara pampuṇu, ka mapalku alatjiu pika panya waru wiyingru. Munu minyma paluru palyaringkula pakaṇu munu mai palyara Jesunya tjananya ungu ngalkuntjaku.

¹⁶ Ka tjintu ma-tjarpanyangka aŋangu tjutangku Jesulakutu katingi aŋangu mamutjara tjuṭa pikatjara tjuṭa kuļu.* Ka paluru wangkara mamu tjuṭa painingi aŋangu panya tjutanguru munu pikatjara panya tjuṭa kuļu palyarunguningi. ¹⁷ Panya ara nyanga Jesulu aŋangu tjuṭa

* ^{8:16} Tjaka panya aŋangu Jew tjuṭa Saturday-ngka nyinara pakuwiayingrupai para-ngarapai wiya. Palu tjintu tjarpanyangka milmilpa wiyingrupai aŋangu tjuṭa para-ngaranytjaku.

palyarunguntja Godalu nganmanytu wangkangu wangkatjara ini Aitjayala, ka panya nyiringka iriti walkatjunu nyanga alatji, “Nyara paluru nganananya ngalkira nganampa pika tjuta mantjinu munulanya wankarunu.” *

*Wati Kutjarangku Jesunya Wanantjikitjangku Kulintja
(Luke-aku 9:57-62)*

¹⁸ Ka Jesulu aŋangu tjuta mulararinyangka nyakula palumpa nintintja tjutangka wangkangu, “Wanyula ḫrungka muŋkara pautangka tatirā ma-itipiri nyara manta kutjupakutu!”

¹⁹ Ka ankunytjikitjangku wangkanyangka wati Moseku tjukurpa nin-tilpaingku palula pitjala wangkangu, “Nintilpai! Ngayuluña nyuntula tjungu para-pitjalinkunytjikitja mukuringanyi nyuntu ngura tjutakutu ankunyangka.”

²⁰ Ka Jesulu palula wangkangu, “Panya tuuka tjutaku nyarkalpa tjuta ngarintjaku ngaranyi. Ka tjulpu tjutaku maŋngu tjuta ngaranyi tjana ngarintjaku, palu Watiku Katjaku ngura ngaranytja wiya ngarikatira pakuiyaringkunytjaku. Panya ngayulu ngura wiyatjara rawa para-pitjalinkupai.”

²¹ Ka Jesuku nintintja kutjupangku palula wangkangu, “Mayatja! Wanyuni unytjungku wantir’iyala, panya ngayuku mama tjlpi mulapa, kana ngula tjitularira pitjala nyuntula tjunguringkula nyuntunya waŋalku.”

²² Palu Jesulu palula wangkangu, “Wiya, ngayunya-warara kulinma mununi ngayula tjunguringkula waŋanma, kaya ngurpa tjutangku nyuntumpa mama wiyaringkunyangka tjunutjunkuku.”

*Jesulu Walpa Atanmankunytja
(Markaku 4:35-41; Luke-aku 8:22-25)*

²³ Munuya palulanguru pautangka tatinu Jesunya palumpa nintintja tjuta kułukulu munuya anu. ²⁴ Ka ḫrungka ngururpa ankunyangka walpa pułka mapalku pakaŋu rurku winki munu uru pułkara uritjinganangi, ka uru panya pulkara urirā pautangka tjarpangi munu pauta panya palunya nguwanpa tjarura tjarpatjunangi ḫrungka. Palu Jesunya pautangka kunkunpa ngaringi. ²⁵ Kaya palumpa nintintja tjutangku nguluringkula palunya wankara wangkangu, “Mayatja, pakaralanya nyawa! Kuwarila ilunyi.”

²⁶ Ka Jesulu pakara wangkangu tjanala, “Nyaaku nyura nguluringanyi? Rapa wiyatū nyura?” Munu paluru pakara walpa panya wangkara atanmanu munu uru kułu wangkangu tiwilarinytjaku, ka walpa panya atanaringu alatjitu munu uru kułu urintja wiyaringkula tiwilaringu.

²⁷ Kaya nintintja panya tjutangku nyakula uwankara nguwkuringu munuyanku wangkara kuliningi, “Wati nyaa nyangatja? Panya walpangku ḫrungku kułu palula wanganarangku kulipai.”

*Jesulu Wati Mamutjara Kutjara Palyarunguntja
(Markaku 5:1-20; Luke-aku 8:26-39)*

²⁸ Kaya nyara palula malangka ḫrungka itipirira mantangka mawirkanu kampa kutjupa tawunu ini Katarala itingka. Ka nyara palula itingka wati mamu tjutatjara kutjara nyinangi miri tjutaku kulpingka. Kaya aŋangu tjuta pulampa nguluringkula ngura nyara palulawunu ankupai wiya, panya paluru pula mirpaŋtju pułka mulapa munu pula

* ^{8:17} Aitjayaku 53:4

añangu tjuṭa pitjanyangka ngulura waṭaparalpai. Munu pula pauta wirkankunyangka nyakula Jesulakutu pitjangu. ²⁹ Munu pula mirara wangkangu, “Nyuntu ngalinya nyaantjikitja pitjangu? Ngali nyuntumpa ninti panya nyuntu Godaku Katja. Ngali nyuntunya kuliningi tjintu małatjangka pitjanytjaku-palku, palu pala mapalku pitjangun ngalinya ngura kurakutu paira iyantjikitja.”

³⁰ Ka nyara palula itingka paṭupatu nguwanpa pikipiki tjutangku ngarala ukiri ngalkuningi. ³¹ Kaya mamu panya tjuṭangku Jesula pułkara ngatjiningi alatji wangkara, “Wanyulanya pairampa witula nyara pikipiki tjuṭakutu kala palula tjanala tjarpa!”

³² Ka Jesulu tjananya wangkangu, “Palya, araya!” Kaya mulapaṭu mamu panya tjutangku wati panya kutjara wantikatira wirtjapakara tjarpangu pikipiki panya tjutangka. Kaya mamu tjuṭa tjarpanganyka pikipiki panya winki mulapa pułi wararangka tjarukutu wirtjapakara uru ngati pułkangka wala winki tjarpangu munuya uwankara wiyaringu. ³³ Kaya wati panya pikipiki kanyilpai tjutangku nyangatja nyakula tawunukutu wirtjapakaṇu munuya añangu tjutangka uwankara tjakultjunu wati panya mamutjara kutjara palyarungunnyangka tjana nyakunytjatjanungku. ³⁴ Kaya ngura nyara palunya ngurara uwankara anu Jesunya nyakunytjikitja munuya wirkara palunya nyakula ngulungku pułkara wangkangi tjanampa ngura wantikatinjtjaku.

9

Jesulu Wati Wawanypa Palyarunguntja (Markaku 2:1-12; Luke-aku 5:17-26)

¹ Ka palulanguru Jesunya pautangka tatira małaku anu ngura waltyjakutu Kapunimalakutu palumpa nintintja tjuṭa kuļu. ² Ka ngura nyara palula wati kutjara kutjarangku tjanampa malpa wati nyumpu wawanypa mantarangka ngaritjura tjaṭu-tjaṭungku katura katingu Jesulakutu. Ka Jesulu tjana ngalya-katinyangka nyakula kuliningi, “Nyanga tjana ngayuku mulamularinganyi ngayulu pikatjara nyanga palunya palyarunguntjaku.” Munu wati panya pikatjarangka wangkangu, “Wati ngana, nguluringkunytja wiya! Panya Godalu nyuntunya kura tjuta palyantjitjanguru kalypangku wantinyi pungkunytja wiyangku.”

³ Kaya wati Moseku tjukurpa nintilpai tjutangku paluru alatji wangkanyangka kulira unngu kuliningi, “Ai! Tjingurunku nyangangku waltyjangku Godanya-palku kulini.”

⁴ Ka Jesulu nintingki kuliningi tjana unngu kulinnyangka munu wangkangu, “Nyaaku nyura ngayunya unngu kura kulini? ⁵⁻⁶ Nyura kuwari nyangangi ngayulu wati nyanga palula wangkanyangka munu nyura kutjupa kutjupa nyakunytja wiya. Palulanguru nyura tjinguru kulini ngayunya ngurpa-palku, munu nyura ngayuku mulamularingkunytja wiyangku wantinyi. Palu kuwari nyangaña ngayulu wati nyanga nyumpu wawanypa wangkara palyarungunu. Ka nyanga nyura nyakuku kuwari pakannyangka munu nyura palulanguru mulamularingkuku ngayulu panya nganmanyiju wangkanytjitu, panya ngayulu Watiku Katjangku mantangka nyanga nyinara añangu kutjupa kura tjuṭa palyantjitjanguru kalypangku wantinytjaku ngaranyi alatjitu.” Munu palulanguru wati panya pikatjarangka piruku wangkangu, “Wati awa, pakaranku mantara pala mantjila munu ngurakutu ara!”

⁷ Ka mulapaṭu mapalku pakaṇu munu ngurakutu anu. ⁸ Kaya aŋangu winkingku ila ngaranytjatjanungku nyakula nguluringangi munuya Godanya mirawaṇira walkuningi kulira, “Ai! Wati nyangatja mulapa Godalu witulya ungu witulya pulkangku pikatjara palyarunguntjaku.”

*Jesulu Matthew-nya Altinytja
(Markaku 2:13-17; Luke-aku 5:27-32)*

⁹ Munu nyara palulanguru Jesulu ngura panya palunya wantikatira anu munu ankula nyangu wati kamantaku mani mantjilpai iwarangka itingka wal̄i tjukutjukungka nyinanyangka, panya paluru aŋangu tjuṭa iwara nyara palulawanu pitjanyangka nyakula tjanalanguru mani mantjilpai Rome-aku panya mayatjaku. Wati nyara paluru panya ini Matthew-nya, ka Jesulu wangkangu palula alatji, “Pitjalani ngayunya waŋala!” Ka Matthew-lu pakara paluna waŋanu nintintja tjutangka tjunguringkula.* ¹⁰ Munuya ankula palumpa wa lingka tjarpala mai ngalkuningi. Kaya mani mantjilpai kutjupa tjuṭa, munu wati kura palyalpai tjuṭa kulu palula tjanala tjunguringu munuya mai ngalkuningi, ¹¹ Kaya Paratji tjutangku paluna tjananya Jesula tjunguringkula ngalkunyangka nyakula nintintja tjutangka wangkangu, “Ai! Nyaaku wati pala nyurampa nintilpaingku wati pala mani mantjilpai tjutangka munu kura kutjupa tjutangka ku lu tjunguringkula mai ngalkuni? Uti paluru tjanala tjunguringkuwiyangku wantira wati palya tjutangka kutju tjunguringama.”

¹² Ka Jesulu tjanala kuraringkula wangkanyangka kulinu munu tjanala wangkangu, “Kulilaya! Aŋangu palya tjuṭa wanyu ngangkariku mukuringkupai? Wiya, pikatjara tjuṭa kutjuya mukuringkupai. ¹³ Wanyu kaṇa tjukurpa nyangatja nyurala tjakultjura, kaya kulira nintiriwa, panya nyiringka iriti walkatjunkunytja ngaranyi Godalu wangkanytja alatji,

‘Palya nyura tjinguru kuka pungkula tiliwakara ngayunya ungama, palu nyangaku kuluṇa pulkara mukuringanyi nyura aŋangu kutjupa tjutaku ngalturingkula tjananya rawangku alpamilantjaku. Nyanga alatji palyannyangka nyakulaṇa pulkara pukulariku.’* Alatji Godalu iriti wangkangu, kaṇa ngayulu nyanga paluna palyantjikitja mantakutu pitjangu aŋangu panya Moseku tjukurwanu nyinapai tjuṭa altintjikitja wiya, palu aŋangu nyanga nyura nyakula wantipai tjuṭa altintjikitjaṇa pitjangu tjanala ngayunya waŋara Godala tjunguringkunytjaku.’*

*Jesula Tjapira Kulintja Tjukurpa Panya Mai Wantintjatjara
(Markaku 2:18-22; Luke-aku 5:33-39)*

¹⁴ Kaya nyara palula aṛa Johnku* nintintja tjutangku pitjala Jesula wangkangu, “Nganana munu Paratji tjutangku kulu kutjupa-aṛa mai

* **9:9** Wati nyanga paluru wati Jew, palu paluru kamanta Rome-anya ngurakutu waṛkaripai, munu aŋangu Jew tjutangka tax mani mantjilpai Rome-alakutu iyantjikitjangku. Kaya Jew tjuṭa palumpa kuraringkupai aŋangu Jew wiya tjuṭaku waṛkarinyangka. * **9:13** Uutjiyaku 6:6 * **9:13** Wati panya Paratji tjuṭa Moseku tjukurwanu nyinapai munuyanku palulanguru ngunti kulipai tjanala palya mulapa nyinara-palku. Munuya paluru tjanala kutjupa tjuṭa kuranmankupai tjanala Moseku tjukurwanu nyinanytja wiyangku wantinyangka. Palu Jesunya pitjangu aŋangu paluna tjananya altintjikitja paluru tjanala Godala tjunguringkunytjaku, panya tjanala altintyanyangka kura nyinanytjatjanungku nintingu kulira piiwiyarungkupai munuya kura wantira paluna waŋalpai. Palu panya Paratji tjutangku altintyanyangka kulira wantipai piiwiyarungkunytja wiyangku, panya paluru tjanala kaṇany-kaṇanytju ngunti kulipai alatji, “Wiya, nganana palya nyinapai tjuṭa.”

* **9:14** Johnnga wati panyatja, panya aŋangu tjuṭa munu Jesunya kulu baptise-katingi, panya paluru.

ngalkuwiyangku wantipai Godanya walkuntjikitjangku. Kaya nyaaku nyuntumpa nintintja tjutangku titutjarangku mai ngalkunu kutjupa-ara wantintytja wiyangku?"

¹⁵ Ka Jesulu tjanala kampa kutjupara wangkangu alatji, "Wiya, nyura panya Moseku tjukurwanu nyinapai tjuta, palu ngayuku nintintja tjutaya ara kutjupawanu nyinanyi ara kuwaritjangka ngayulu nintintjtjangka, ka ara nyanga paluru pula titutitu ngaranyi tjungu wiya. Wanyuya kulila ara panya watingku kuri altinytja, panya nyara palula ara kuri altinyangka wati panya palumpa malpa tjuta palula tjunguringkula pulkara pukularipai, tjituru-tjitururinytja wiya alatjitu. Palu ngula wati panya palunya kutjupa tjutangku witira katinyangka malpa panya tjuta pulkara tjituru-tjitururiku munuya nyara palulanguru mai wantira nyinaku.*

¹⁶ "Munuya piruku ara kutjupa kuлу kulila mantaratjara ngapartji, panya anangungku mantara irititja alaringkunyangka ala angatjunkunyntjikitjangku mantara kuwaritjanguru tjukutjuku kaтара mantara irititjangka tjungуra wakantja wiyangku wantipai paltjinnyangka kaタkatininytjakutawara. Panya paltjinnyangka mantara panya tjungуra wakantjanya tjukutjukuringkupai munu mantara irititja ilara kaタtantankupai, ka ala puлkaringkupai.

¹⁷ "Munuya piruku ara kutjupa kuлу kulila palu purunypatu wainaku yakutjatjara. Panya watingku kukaku miringuru yakutja palyalpai waina kuwaritja tjutira kanyintjikitjangku. Palu paluru yakutja irititjangka waina kuwaritja tjutlpai wiya, panya waina kuwaritja tjutinnyangka wainaku panya wita yakutja unngu lipiringkupai, ka miri irititja pilti ngaranytjatjanu tjlpiraralpai, ka waina mantangka tjutira wiyaringkupai. Pala palula-tawara paluru waina kuwaritja yakutja miri kuwaritjangka tjutlpai tjulangka, ka wainaku wita lipiringkunyangka yakutja kuлу lipiringkupai tjlpirarantja wiya, ka yakutja munu waina kuлу palyalpa rawa ngarapai." Alatji Jesulu tjanala wangkangi tjana palumpa tjukurpa munu Moseku tjukurpa ngunti tjunguntjaku-tawara.

Jesulu Minyma Munu Tjitji Kungka Palyarunguntja. (Markaku 5:21-43; Luke-aku 8:40-56)

¹⁸ Ka Jesulu palula tjanala wangkanyangka wati kutjupa palula wirkanu wali inmatjaku mayatja. Munu paluru Jesula kuranyu tultjungaරakatira palula wangkangu, "Ngayuku untalpa kuvari wiyaringu. Wanyu pitjala nyawa, munu pampura palyarungula ka wankariwa." ¹⁹ Ka Jesulu pakara wanau wati panya palunya, palumpa nintintja tjutangku ku卢.

²⁰⁻²¹ Munuya wati panya palumpa ngurakutu anangi, ka ankunyangka minyma kutjupa pika milkalitjara pitjangitu tjanala tjungu anangu tjutangka ngurur-ngururpa. Panya minyma nyara paluru pika nyara palunyatjara rawa alatjitu nyinangi yiya 12 tjintu winki wiyaringkunytja wiya. Munu paluru Jesulakutu ilaringkula kuliningi, "Wanti kaنatju kam-pangka туjanawanungku palumpa mantara pampula mununa tjinguru palyaringkuku." Munu paluru mulapa ту pampuна mantara nyara tjarutja mulapa panya tapulara wakantjanya. ²² Ka Jesulu pinkurara nyangu palunya munu wangkangu palula, "Minyma ngana! Nyuntu ngayuku

* ^{9:15} Nyanga alatji Jesulu palurunku wangkangi panya ngulaya palumpa mirpanjtju tjutangku palunya witira katingu munuya pungu, kaya palumpa nintintja tjuta pulkara tjituru-tjitururingu munuya mai ngalkuwiya wantira nyinangi.

mulamularingkunytjatjanun kuwari palyaringu.” Ka mulapaṭu minyma paluru pika panya mapalku wiyaringkula palyaringu alatjitu.

²³ Ka palulanguru Jesunya anu wati panya palumpa ngurakutu munu wirkara nyangu anangu tjuta pulkara ulara wañinyangka munu kutjupa tjutangku puura wangkatjingara inma inkanyangka. ²⁴ Munu paluru tjananya wangkangu, “Pakaraya ara urilkutu! Tjitji nyangatja ilunytja wiya kunkunpa ngarinyi.” Kaya alatji wangkanyangka kuliṛa Jesunya anara ikaringangi ngunti wangkanyangka-palku. ²⁵ Ka wati panya tjitjiku mamangku tjananya uwankara urilkutu witunu, ka Jesunya tjarpangu tjitji panya ngarintjatjakutu munu palunya mara witiṇu, ka tjitji paluru mapalku wankaringkula pakanu. ²⁶ Kaya anangu tjutangku tjitji panya wankaringkunytja kulintjatjanungku ngura winkingka para-tjakultjunangi.

Wati Kuru Pati Kutjara Kuru Alantja

²⁷ Ka Jesulu ngura nyara palunya wantikatira ma-pakanu, ka iwarangka ankunyangka wati kuru pati kutjarangku palunya wañara rawangku mirara wangkangi alatji, “Davidakun katja! Ngalturiwalimpa!”* ²⁸ Ka Jesunya ngurangka wirkara walingka ma-tjarpangu, ka paluru pula maławanungku wañara tjarpangu, ka Jesulu pulala tjapinu, “Nyupali mulamularinganyi ngayulu kuru alantjaku nyupalinya?” Ka pula wangkangu, “Uwali.” ²⁹ Ka pulanya kuru pampunu munu wangkangu, “Palya, ngayuku mulamularingkunyangka nyupalinya kuwari kuru alani.” ³⁰ Ka pula mulapatu kuru alaringkula nyangangi. Ka Jesulu pulanya wangkara painu kutjupa tjutangka wangkawiyangku wantintjaku. ³¹ Palu pula kuliliwiyangku wantira ankula ngura tjutangka pukultu para-tjakultjunangi Jesulu panya pulanya palyarunguntya.

Wati Tja Pati Alantja

³² Ka pula ma-pakara ankunyangka kutjupangku Jesulakutu wirkakatingu wati mamutjara, mamungku tja patintja. ³³ Ka Jesulu mamu panya palunya painu, ka wati panya paluru tjaalaringkula wangkapairingu. Kaya anangu tjutangku nyakula nguwankuringu munuya wangkangu, “Ai! Ngurpangkula kuwari kutju nyanga purunypa nyanganyi, panya ngura nyanga Israelta nganaña ngañmanytju nyanga purunypa nyakunytja wiyatū.” ³⁴ Palu wati Paratji tjutangkuya wangkangu, “Wiya, mamu tjutaku mayatjangku palunya witulyankunyangka palangku mamu tjuta paini anangu tjutanguru.”

Jesunya Anangu Tjutaku Ngalturingkunytja

³⁵ Uwa, Jesunya ngura winkingka para-ngaranggi ngura tjukutjuku tjutangka munu pulka tjutangka kuļu, munu paluru wal inmatja tjutangka tjarpala anangu tjutangka wangkara nintiningi, munu tjukurpa palya tjakultjunangi panya Godalu anangu tjuta mayatjangku walijtanmara kanyintja. Munu ngura winkingka pikatjara tjuta kuļu palyarunguningi pika kutjupa kutjupa tjutatjara. ³⁶ Munu paluru anangu winki nyakula tjanampa pulkara ngalturingu, panya puṭuya kulinungi munuya tjiipi kawalirinytja tjuta purunypa watarku para-para-ngaranggi tjapatangku tjananya aṭunymankunytja wiya.

* ^{9:27} Nyangatja paluru Jesunya Davidaku katjanmanu panya paluru kulinungi Jesunya Godalu kalkuntjanya Davidaku tjamu małatja ngula pitjanytjaku.

³⁷ Ka Jesulu aŋangu tjuṭaku ngalturingkula palumpa nintintja tjuṭangka wangkangu, “Awa! Aŋangu mungilyi mulapa nyangatja watarku nyinara-waŋinyi Godaku waltyjaringkunytjikitja paṭara, palu aŋangu Godaku warkaripai maŋkurpa kutju ngaranyi palula tjanala ankula tjukurpa tjakultjunkunytjaku tjana kuļu kulira Godaku waltyjaringkunytjaku. ³⁸ Ka nyura Godala tjapila palumpa warkaripai kutjupa tjuta ngurkantara iyantjaku nyuranya alpamilara aŋangu ngura winkitjangka Tjukurpa Palya wangkanytjaku. Kaya kuliṛa Godaku mulamularingkula palumpa waltyjaringkuku.”

10

Jesulu Nintintja 12 Altira Witulyankunytja (Markaku 3:13-19; Luke-aku 6:12-16)

¹⁻⁴ Munu Jesulu nintintja panya 12 palunya tjananya altingu ini nyanganpa Simonnga ini kutjupa Peternya, munu palumpa malanypa Andrewnya, munu Jamesanya pula Johnnga Tjipitiku panya katja kutjara, munu Philipanya, munu Patjalamunya, munu Thomasanya munu Matthewnya wati panya kamantaku mani mantjilpaina, munu Jamesanya wati panya Alpi-yatjaku katja, munu Tjatiyatjanya, munu Simonnga panya paluru mayatja Rome-anja ngurara tjuṭaku pulkara kuraringkupai, munu Judas Kariyatanya panya paluru ngula Jesunya witintjaku nintinu Jewku mayatja tjuṭangka.

Nyanga palunya tjananya Jesulu altingu munu tjananya witulyanu mamu tjuṭa aŋangu tjuṭanguru paintjaku munu pikatjara tjuṭa kuļu palyarunguntjaku pika kutjupa kutjupa tjutatjara.

Jesulu Nintintja Tjuta Iyantja (Markaku 3:13-19; Luke-aku 6:12-16)

⁵ Munu paluru tjananya wituṇu aŋangu Israelkunu tjuṭakutu ankunytjaku munu wangkangu tjanala alatji, ‘Jew wiya tjuṭaku ngurakutu munu Tjamiriyanya ngurara tjuṭakutu kuļu ankuwiyangkuya wantima!

⁶ Palu nyurampa waltyja tjuṭakutu kutjuya ara aŋangu panya Israelkunu tjuṭakutu, panya paluru tjana tjiipi kawalirinytja tjuṭa purunypa nyinanyi kutjupangku atunymankunytja wiya. ⁷ Munuya tjanala ankula Godaku tjukurpa para-wangkama munuya tjanala tjakultjunama alatji, ‘Kuwari ilaringu Godalu nyuntunya nganaŋanya mayatjangku waltyjanmara kanyintjaku.’ ⁸ Munuya pikatjara tjuṭa kuļu pampura palyarungunma, munuya aŋangu kutjupa ilunytja nyakula wankara pakaltjinganma, munuya miri pikatjara tjuṭa kuļu palyarungunma, munuya mamu tjuṭa kuļu aŋangu tjuṭanguru painma. Munuya palyaringkunyangka palula tjanala maniku ngatjintja wiyangku wantima, panya ngayuluṇa nyuranya witulyanu aŋangu tjuṭa palyarunguntjaku, ka nyura ngapartji tjananya ngaltunytjungku palyanma manikitjangku wiya. ⁹⁻¹⁰ Munuya maralpa alatjitu anama mani kutjupa kutjupa tjuṭa katinytja wiya, munuya ulytja tjunkunytjikitjangku yakutja katinytja wiyangku wantima, munuya mantara kutjupa tjinatja kutjupa kuļu ngulaku katinytja wiyangku wantima, tjukara kuļu katinytja wiya maralpa alatjitu anama. Panya aŋangu kutjupa nyurampa warkarinyangka nyura palunya ungkupai, kaya palu purunypa nyura aŋangu tjuṭangka ngayuku warka palyannyangka paluru tjana uti ngapartji nyuranya pukularira ungamā.

¹¹ “Munuya tawunu kutjupangka wirkarampa aŋangu kutjupa nguriṛa nyawa nyuranya altira mukulyangku kanyintjaku palumpa ngurangka.

Munuya tawunu pala palula nyinara palumpa ngurangka kutju ngarima ngura kutjupangka kutjupangka para-ngarintja wiya.¹² Munuya palumpa walingka tjarpala wali pala palula nyinapai tjutangka alatji wangka, ‘Uwa, ngayulu Godala tjapini nyuranya kurunpa rapa kanyintjaku.’¹³ Ka paluru tjana nyuranya pukultu tjarpatjura kanyinnyangka Godalu tjananya mulapatu kurunpa rapa kanyilku, palu tjana tjinguru nyuranya tjunkuwiyangku wantinyangkampa Godalu tjananya kurunpa rapantja wiyangku wantiku.¹⁴ Kaya nyuranya altira tjunkuwiyangku wantinyangka munu nyurala tjukurpa ku lu kulilwiyangku wantinyangkampa nyura uti ngura nyara palunya wantikatima munuya wantikatintjikitjangku ulpu nyurampa tjinatjanguru patapatala, kaya nyara palulanguru patapatannyangka nyakula kulilku Godanya tjanampa mirpanarinyangka.¹⁵ Tjukarurungku na nyurala wangkanyi, panya ngula Tjintu Malatjangka Godalu anangu uwankara manta winkitja ngurkantara tjaralku. Munu paluru ngura panya Tjatamanya pulanya Kumaranya ngurara tjuta paira iyalku ngura kurakutu pika pulkatjara nyinanytjaku. Munu paluru anangu panya nyuranya wantintyta tjuta ku lu tjanala tjungu paira iyalku, palu ngura nyara palula tjana nyuranya wantintytatjanungku pika pulka mulapa mantjilku Tjatamanya pulanya Kumaranya ngurara tjutangka waintara.”*

*Jesulu Nintintja Tjuta Ngulutjunkunytja
(Markaku 13:9-13; Luke-aku 21:12-17)*

¹⁶ Munu Jesulu tjanala piruku wangkangu, “Uwa, ngayulu nyuranya ngura tjutakutu iyan ngayuku tjukurpa tjakultjunkunytjaku. Palu kulilaya, panya nyura tjami tjuta ananyi tjiipi tjuta purunypa, kaya ngura nyara palula tjanala anangu pikati tjuta nyinanyi papa inura tjuta purunypa, munuya paluru tjana nyurampa pikaringkula nyuranya kuralku. Ka nyara palulanguru nyuranku uti purkarangku kulira walytjangku atunyamanama munuya tjanampa ngapartji pikaringkuwiyangku wantira pilunpa nyinama.¹⁷ Uwa, ngu lu nyangamayanku, panya wati pikati tjutangku nyuranya witira katira kuutpangka tjunkuku ngayuku mulamularingkunyangka, munu nyuranya wali inmatjangka unngu wiipangka pulkara alkalku ngayuku tjukurpa wangkanyangka.¹⁸ Uwa, nyura ngayula wanga narangku kulinnyangka tjana nyuranya katira mayatja ngura kutjupitja tjutangka kuranyu ngaratjunkuku, ka nyura tjanala Tjukurpa Palya ngayunyatjara tjakultjunkuku alatjitu, Jew wiya kutjupa tjutangka kulukulu.¹⁹ Munu paluru tjana nyuranya kuutpakutu katintjikitjangku witinnyangkaya kulira nguluringkunytja wiya rapa ngarama. Tjinguru nyura mayatjangka wangkanytjikitjangku putu kulilku, ‘Tjukurpa nyaanatju wangkaku?’ Palu alatji pulkara kulilwiyangku wantima, panya kuutpangka wirkara nyura Mama Godalu nintinnyangka kuliklu wangkanytjikitjangku.²⁰ Panya palumpa kuruntu nyuranya unngu nintilku tjukarurungku wangkanytjaku. Ka nyura walytjangku kulira wangkanytja wiyangku paluru nintinnyangka kutju wangkaku.²¹⁻²² Uwa, anangu winki nyurampa kuraringkuku nyura ngayuku walytja nyinanyangka. Panya wati kutjupa ngayuku mulamularingkunyangka palumpa kutangku palunya

* **10:15** Tjatamanya pula Kumaranya panya tawunu pulka kutjara iriti ngarangi Israelta itingka, ka panya anangu nyara palula pulala nyinapai tjutangku kura pulka mulapa rawangku palyannyangka Godalu tjananya uwankara pungkula wiyanu. Nyawa Genesis 18:20.

ungkuku mayatja kura tjutangku palunya iluntankunytjaku. Ka mamangku tjinguru palu purunypaṭu palyalku palumpa tjitji tjuta. Ka tjitjingku tjinguru palu purunypaṭu mama ngunytju ngayuku walyta nyinanyangka wati mirpaṇtju tjutangka nintilku pulanya iluntankunytjaku. Palu nyura tiṭutjarangku ilunytjakutu-wangkara ngayunya tungun-tunguntu wanannyaṅgkampa Godalu nyuranya wankaru kanyilku palula tjungu tiṭutjara nyinanytjaku. ²³ Tjinguru nyura ngura kutjupangka wirkankunyangka aṅangu tjutangku nyuranya ngayuku mulamularingkunyangka nyakula pungkuku, ka nyura uti ngura kutjupakutu wirtjapakanma. Palu tjukarurungkuṇa nyurala wangkanyi, panya nyura kuwaripangkuṇu ngura nyanga Israeltawanungku tjukurpa ngayunyatjara para-tjakultjunkunyangka ngayulu Watiku Katjanya pitjaku mayatja pulka nyinanytjikitja.

²⁴ “Kulilaya, panya mirpaṇtju tjutangku ngayunya wangkara kuralpai, munuya paluru tjana ngayunya kurantjatanungku nyuranya kuļu ngayuku nintintja tjuta nyinanyangka pulka kuralku ngayula muṇkara. Wanyuya tjukurpa nyangatja kulila,

‘Panya wati nintiringkupai wati panya palunya nintilpaingka waintarinytja wiya, ka palu purunypa wati warkaripai palumpa mayatjangka waintarinytja wiyatū.’

²⁵ Ka nyara palulanguru nyura uti kulinma alatji, panya kutjupa tjutangku tjinguru wati nintilpaina paṛampa palu purunypaṭu palula nintiringkupai tjuta kuļu pailku. Munuya tjinguru mayatja kurāra pungkulampa palu purunypaṭu palumpa warkaripai tjuta kuļu kurāra pungkuku. Panya tjana ngayunya mirpaṇarira wangkangi, ‘Nyuntun mamu panya Piiltjipanya, panya mamu tjutaku mayatja.’ Munuya ngayunya alatji wangkara wanyu ngayuku walyta tjuta wantima kurantja wiyangku? Wiya, tjana nyuranya kura mulapalta wangkaku ngayula muṇkara.”

Mama Godakuya Nguluringama Anangu Tjutaku Wiya (Luke-aku 12:2-7)

²⁶ “Kaya aṅangu palumpa tjanampa nguluringkuwiya nyinama, panya aṅangu tjutangku kampangkaṇu palyantjtja uwankara ngula utiringkuku, paluru tjana unngu kuraringkula kulintjtja tjuta kuļu, panya kumpilitja uwankara mulapa utiringkuku, kaya uwankarangku kulilku. ²⁷ Kaya tjukurpa ngayulu nyurala mungangka kumpilpa wangkanytja kaļala utingku wangkama aṅangu tjutangka, munuya tjukurpa ngayulu nyurala tjaalytju wangkanytja urilta mirara wangkama aṅangu winkingku uti kulintjaku. ²⁸ Uwa, aṅangu tjutaku nguluringkunytja wiya nyinama paluru tjana nyurampa pikaringkunyangka, panya tjana nyuranya puntu kutju pungkula iluntankuku, palu tjana nyuranya kurunpa puṭu wiyanī. Panya Godalu kutjungku nyuranya puntu kurunpa winki wiyaliku ngura kurangka wañira, kaya nyara palula-tawara palumpa kutjuku nguluringama aṅangu tjutaku wiya. ²⁹ Panya Godalu nyuranya tiṭutjarangku mukulyangku kulini watarkurintja wiyangku. Wanyuya tjulpu panya nyii-nyii kulinma. Tjinguru nyura tjulpu palu purunypa kutjara payamilalku mani kuļunytja tjiilpa kutjungka. Palu Godanya tjulpu nyanga tjukutjuku tjutaku watarkuripai wiya. Nyara palunya tjananya paluru kutju kutju rawangku kulipai uwankara alatjiṇu munu tjulpu kutju ilunyangka paluru nintingku kulira tjituřu-tjitururipai. ³⁰⁻³¹ Munu palulanguru tjulpu tjukutjuku tjuta rawangku kulira paluru wanyu nyurampa pulka tjutaku watarkuriku? Wiya, paluru nyuranya rawangku

mukulya pułkangku kulilpai tjulpu tjuṭangka muñkara, kaya palulanguru nguluringkuwiya rapa nyinama. Panya paluru nyuranya uwankara kutju kutju nintingku kulilpai. Munu paluru nyurampa mangkaku ninti yaaltjiṭu nyurampa katangka ngaranyi. Kutjupangku puṭu kantamilanı, palu Godanya kutju ninti, munu nyurampa kutjupa kutjupa uwankaraku kułu paluru ninti nyinanyi. Pala palulanguru nyura uti nguluringkunytja wiya rapa nyinama.”

*Jesuku Walytja Nyinanytjatjanungku Rapangku Wangkanytjaku
(Luke-aku 12:8-9)*

³² “Tjinguru nyura anangu tjuṭangka miṛangka rapangku wangkaku ngayuku walytja nyinanytjatjanungku, kaña ngayulu ngapartji palu purunypaṭu nyuranya ngura ilkaritjangka wangkaku ngayuku mamangka miṛangka alatji, ‘Nyanga paluru tjana ngayuku walytja nyinanyi.’ ³³ Palu nyura tjinguru tjuṭangka miṛangka ngayuku ngurparingkunyangkampa ngayulu ngapartji nyurampa ngurparingkuku Mamala miṛangka ngura nyara ilkaritjangka.

*Jesuku Mulamularingkupai Tjuṭaku Kuraringkunytja
(Luke-aku 12:51-53; 14:26-27)*

³⁴ “Tjinguru nyura ngayunya kulini alatji, ‘Nyangatja-manti mantakutu pitjangu anangu tjuṭa kalypa nyinanytjaku palyantjikitjampa.’ Palu wiya, nyangatja nyura ngunti kulintja, panya ngayulu pitjanyangka anangu uwankara kalyparingkula tjungu nyinanytja wiya, palu kutjupa tjuṭa ngayuku mulamularingkuku, kaya kutjupa tjuṭa ngayuku mulamularingkuwiya nyinaku munuya paluru tjana anangu panya ngayuku mulamularingkupai tjuṭaku pikaringkuku. ³⁵ Panya wati kutjupa ngayuku mulamularingkunyangkampa wati nyara palumpa katja palumpa kuraringkuku, ka palu purunypaṭu minyma kutjupa ngayuku walytjaringkunyangkampa palumpa unṭalpa palumpa pikaringkuku. Ka palu purunypaṭu minyma kutjupa palumpa mingkayiku kuraringkuku ngayuku mulamularingkunyangka. ³⁶ Uwa, nyurampa walytjapiti nyurampa kuraringkuku nyura ngayunya wañannyangka. ³⁷ Tjinguru nyura walytja tjuṭaku pulkara mukuringanyi mamaku ngunytjuku tjitji tjuṭaku kułu, nyaratja palya. Palu nyura ngayunya wañantjikitja mukuringkulampa ngayuku pulkara mulapa mukuringama nyara palula tjanala muñkara. Nyara palulanguru ngayunya-warara kuliṛa kutju nyura ngayuku nintintja mulapa nyinaku.

³⁸ “Uwa, tjana tjinguru ngayunya puṇu kāṭakutjarangka wakara utitjunkuku, ka nyura ngayuku nintintja tjuṭa nyinanytjikitja mukuringkulampa uti nyura tiṭutjarangku ngayunya wañanma nyuranya palu purunypa iluntankunytja kuliṛa nguluringkunytja wiyangku. Palu nyura tjinguru puṇu kāṭakutjarangka wakara utitjunkunytja kuliṛa nguluringkulampa puṭu ngayuku nintintja mulapa nyinaku.

³⁹ “Uwa, anangu kutjupangku tjinguru alatji kuliklu, ‘Wanyu kañatju ngayulu walytjangku aṭunyamanama mantangka nyanga rawa wanka nyinanytjikitjangku.’ Palu alatji kuliṛa paluru ngayunya wantinyi, ka Godalu palunya ngula ilunyangka puṭu wankani palula tjunguringkula tiṭutjara nyinanytjaku. Ka anangu kutjupangku tjinguru alatji kuliklu, ‘Wanyu kaña nguluringkuwiyangku Jesunya tiṭutjarangku wañanma, kañi palya kutjupangku ngayunya iluntankuku palunya wañannyangka.’ Ka alatji kulinnyangka Godalu ngula ilunyangka palunya wankara pakaltjingalku palula tjungu tiṭutjara wanka nyinanytjaku.”

*Godalu Ngapartji Ungkupai
(Markaku 9:41; Luke-aku 10:16; Johnku 13:20)*

⁴⁰ “Ka tjinguru anangu kutjupangku nyuranya nyakula pukultu altira ngurangka tjunkula kanyilku, kaña nyara palumpa ngayulu pulkara pukulariku munu ngayunya panya iyantjanya kuļu. Panya anangu nyara paluru nyuranya pukultu altinyangkaña kulilku, ‘Munta-uwa, tjinguru ngayulu palula wirkankunyangka paluru ngayunya palu purunypaṭu pukultu altira tjunkuku ngayunya iyantjanya kuļu.’ ⁴¹⁻⁴² Ka tjinguru anangu kutjupangku wati Godaku wangkatjara nyakula pukultu altira palumpa ngurangka tjunkula kanyilku, ka Godalu nyakula palunya ngapartji wiru ungkuku, panya Godalu wangkatjara tjuṭa kutjupa kutjupa wiru ungkupai palumpa tjukurpa tjukarurungku wangkanyangka, palu purunypaṭu Godalu palunya wiru ungkuku. Ka tjinguru kutjupangku anangu tjukaruru nyinapainya nyakula pukultu altira palumpa ngurangka tjunkula kanyilku, ka Godalu nyakula palunya ngapartji wiru ungkuku, panya Godalu anangu tjukaruru nyinapai tjuṭa kutjupa kutjupa wiru ungkupai tjukaruru nyinanyangka, palu purunypaṭu Godalu anangu palunya wiru ungkuku. Uwa, mulapa kutjupangku wati wangkatjara tjuṭa munu tjukaruru nyinapai tjuṭa kuļu pukultu altinyangka Godalu palunya wiru ungkuku. Palu nyangatja nyura kulila, panya kutjupangku anangu tjukutjuku ngayuku walytja nyinanyangka nyakula palunya ngaltunytjungku alpamilannyangka Godalu palunya ngapartji wiru mulapalta ungkuku. Tjinguru anangu paluru mina wari kutju tjikintjaku ungkuku, ka Godalu nyakula wantintyta wiyangku palunya ungkuku alatjitu palumpa pukularira. Nyangatjana mulamulangku wangkanyi.” Alatji Jesulu tjananya iyantjikitjangku wangkara nintiningi palumpa panya nintintja 12.

11

*Jesulu Johngatjara wangkanytja
(Luke-aku 7:18-35)*

¹ Munu paluru wangkara wiyingkula manta Galileelawanu ngura ilatja tjuṭakutu anu anangu tjuṭangka Godaku tjukurpa para-wangkanytjikitja tjanā kuļu kulira nintiringkunytjaku.

² Ka wati panya Johntu* tjailanguru kulinu Christalu kutjupa kutjupa tjuṭa witulyangku palyannyangka munu palumpa nintintja tjuṭa witunu Jesula ankula tjapintjaku. ³ Kaya ankula wirkara palula tjapinu alatji, “Mulapan nyuntu panya paluru, panya Johntu tjakultjunangi ngula wankarunkupainya pitjanytjaku? Munta tjinguru nyuntu kutjupa, kantila kuwaripaṭu paṭanma.”

⁴ Ka Jesulu wangkangu, “Ankulaya Johnta tjakultjura nyura nyakunyt-jatjanungku munu kulintjatjanungku kuļu, ⁵ panya kurutjara tjuṭangku nyanganyi, nyumpu tjuṭaya pakanu, miri pikatjaraya palyaringu, pina pati tjuṭangkuya kulinī, munuya anangu iluny়ta tjuṭa kuļu wankarungkula pakanu. Kaya ngaltutjara tjuṭangku kuļu Tjukurpa Palya ngayulu tjakultjunkunyangka kulinu. ⁶ Uwa, ankulaya Johnta wangka ngayunya tjukarurungku kulintjaku, panya paluruṇa ngayulu. Panya anangumpa ngayuku pulkara mulamularingkunyangka Godalu palunya

* **11:2** Wati nyangatja panya John Baptista panya paluru nganmanytju anangu tjuṭa urungka tjarpatjura baptise-katingi tjanā kuranguru piiwiyingkunyangka.

pulkara pukulmankupai.” Alatji Jesulu tjananya wangkara malakungku iyanu Johntakutu.

⁷ Ka tjana ankunyangka Jesulu anangu tjuṭangka wangkangi tjukurpa Johnngatjara alatji, “Nyura panya mungaṭu ilytjikutu anu wati panya Johnnga nyakunytjikitja. Palu nyaaku nyura palunya nyakunytjikitja anu? Paluru wanyu wati upa, panya nyalpi walpangku uritjingannyangka uripai, palu purunypa? Wiya, wati paluru ngulunytju wiya rapangku alatjitu wangkapai. ⁸ Palu nyaaku nyura palunya nyakunytjikitja anu? Tjinguru nyura anu mantara wirutjara ngaranyangka nyakunytjikitja. Palu wiya, Johnnga palu purunypa wiya, panya wati mantara wirutjara mayatja pulkaku walingka kutju nyinapai ilytjingka wiya. ⁹ Tjakultjuraṇiya! Nyaaku nyura palunya nyakunytjikitja panyatja anu? Wiya, Godaku wangkatjarangku wangkanyangka kulintjikitja nyura anu, panya paluru Godaku wangkatjara pulka mulapa nyinanyi kutjupa uwankarangka mun̄kara. ¹⁰ Panya tjukurpa palunyatjaraya nyiringka iriti walkatjunu Godalu wangkanytja nyanga alatji,
‘Ngayuluṇatju tjakulpa witura iyalku nyuntula kuranyu.

Ka nyara paluru ankula kuranyungku nyuntumpa iwarankuku mayatja pulka pitjanytjaku.’”*

¹¹ Munu Jesulu piruku wangkangu tjanala, “Wati nyanga John Baptistanya pulka mulapa nyinangi, panya nyanga palu purunypa anangu kutjupa nganmanyapa nyinanytja wiyatū. Palu nyanga palulanguru kuwari aṛa kutjupa ngarakatinyi panya Godalu anangu tjuṭa walytjanmaṛa mayatjangku kanyini tjitji tjukutjuku tjuta kulu, kaya paluru tjana uwankara Johnta waintara pulka mulapa nyinanyi tjitji tjukutjuku tjuta kulu. ¹² Johntu anangu tjuṭangka tjakultjunangi tjukurpa panya Godalu anangu tjuṭa walytjanmaṛa mayatjangku kanyintjtja, kaṇa ngayulu kulu palu purunypatu tjakultjunangi. Palu anangu mirpantju tjuṭangku tjukurpa nyangatja kuliṛa wantingi munuya kampa kutjupa palyantjikitja mukuringanyi tjana waintara mayatjarintjikitja.

¹³ “Panya nganmanytju Godalu tjukurpa pulka Mosenya ungu munu panya wati wangkatjara tjuṭangka kulu tjukurpa kutjupa tjuṭa tjakultjunu, kaya Moselu tjana uwankara walkatjunu anangu tjuṭangku wan-ganarangku kuliṛa palyantjaku. Ka palulangurulta Johnnga maṛa pitjangu munu Godaku tjukurpa wangkangi. ¹⁴ Panya wangkatjara kutjupangku nganmanytju tjakultjunu ngula wati wangkatjara ini Ilaitjanya maṛaku pitjanytjaku Mayatja panya kalkuntjala kuranyu.* Ka nyura uti tjukurpa nyara palumpa mulamularingama alatjitu, panya Ilaitjanya purunypa wirkau wati panya Johnnga. ¹⁵ Uwa, nyura nintiringkunytjikitja mukuringkulampa purkarangku kulinma ngayulu panya kuwari nyurala wangkanytja.”

¹⁶ Munu palulanguru Jesulu piruku tjanala wangkangu alatji, “Palu nyura kutjupa tjuṭa wanyu nyaa purunypa nyinanyi? Wiya, nyura tjitji tjuta purunypa nyinanyi, panya tjitji tjuṭangku uṭulu kutjupa uṭulu kutjupa ngarala mirara ngaparku wangkapai alatji,

¹⁷ ‘Inma wirula inkara wangkatjinganigi,
ka nyura pitjala nyānpinytja wiyangku wantingi.
Kaya uṭulu kutjupangku ngapartji wangkapai,
‘Uwa, kala nganaṇa ngapartji ulara inma tjituru-tjiturungku inkangi,
ka panya nyura kuliṛa tjunguringkula ulanytja wiyangku wantingi.’

* **11:10** Malakaiku 3:1 * **11:14** Malakaiku 4:5

18-19 Uwa, tjitji pala uṭulu kutjarangku pika-pikangku tjananku ngaparku wangkangi, pala palu purunytpu nyura Johnnga ngalinya ngaparku pikaringkula wangkapai. Panya Johnnga pitjangu munu paluru waina tjikintja wiya nyinangi munu kutjupa-ara mai wantira Godala tjapilpai palumpa war̄ka palyantjikitjangku. Ka panya nyura palunya ayinayini-palku nyakula mamutjaranmara wantingi. Ka ngayulu Watiku Katjanya pitjangu mununa mai ngalkula waina kuļu tjikiningi Johnnga purunypa nyinanytja wiyangku, ka panya nyura ngayunya nyakula palu purunypatū kuranmanangi alatji wangkara, ‘Palatja wati maiku manyu wainaku kuļu, munu aŋangu kura tjutangka malparinkula tjungu nyinapai, panya wati kamantaku mani mantjilpai tjutangka munu aŋangu kura kutjupa tjutangka kuļu.’ Palu palya nyura alatji kañany-kañanytju wangkapai palyangku-palku. Palu nyangatjaya kulila, panya Godanya ninti pulka nyinanyi munu nintingku iwara tjukaruru palyanu aŋangu tjutangku wañantjaku, kaya iwara nyara palunya wañara kutju kulilpai, ‘Munta-uwa, nyangatja iwara Godalu kuliṛa palyantj aŋangungku wiya.’”

*Ngura Mankurnguru Añangu Tjutangku Jesunya Wantinytja
(Luke-aku 10:13-15)*

20 Ka panya Jesulu ngura tawunu ini Kuratjinta, Pitjaitala, Kapunimala tjanala para-pitjalira pikatjara tjuta palyarunguningi munu miracle kutjupa kutjupa tjuta kuļu tjanampa witulya pulkangku palyaningi. Kaya palunya ngurara tjutangku paluru witulyangku palyannyangka uti alatjiu nyangangi, palu tjana nyakula mulamularingkunytja wiyangku wantingi munuya paluru tjana kura tjuta palyantjatjanu kunṭaringkula Godalakutu aruringkunytja wiyangku wantingi. Ka Jesulu tjananya wantinyangka pulkarra painingi alatji wangkara, **21** “Nyurampa pika pulka mulapa ngaraku ngura Kuratjinta nyinanytja tjutaku munu Pitjaitala nyinanytja tjutaku kulu, panya ngayulu nyurampa ngurangka pikatjara tjuta palyarunguningi munu miracle kutjupa kutjupa tjuta kuļu witulya pulkangku palyaningi, ka nyura nyakunytjatjanungku kura tjuta wantinytja wiya alatjiu munu panya nyura Godalakutu aruringkunytja wiyangku wantingi. Tjinguru ngayulu ngura panya Tayala pulala Tjaitanta palu purunypa ngañmanytjulpi palyannyangka aŋangu ngura nyara palula pulala nyinapai tjuta tjinguru mapalku kuranguru piiwyaringama munuya mantara walyku-walykungka tjarpara tjunpangka yunpa nyitinma tjananku piiwyaringkula kura wantinytja nintintjikitjangku.* **22** Kulilaya! Ngula tjintu małatjangka Godalu aŋangu uwankara manta winitja ngurkantara tjaralku, munu paluru aŋangu panya Tayanya pulanya Tjaitannga ngurara tjuta paira iyalku ngura kurakutu pika pulka mantjintjaku. Munu paluru nyuranya kuļu tjanala tjungu paira iyalku, palu ngura nyara palula nyura pika kutjupa pulka mulapalta mantjilku aŋangu nyara palula tjanala muñkara. **23** Ka nyura Kapunimala nyinapai tjutangku yaaltji kulin? Godalu wanyu nyuranya ilkarikutu katira pulkanmara tjunkuku? Wiya, paluru nyuranya tjaru mulapa wañiku ngañti pulkakutu. Panya nyurala mirangkaña miracle kutjupa kutjupa tjuta witulya pulkangku palyaningi, ka nyura nyakula mulamularingkuwiyangku wantingi. Tjinguru ngayulu iriti ngura panya Tjatamala palu purunypa ngañmanytjulpi palyannyangkampa aŋangu

* **11:21** Panya ngura Tayala pulala Tjaitanta aŋangu Jew wiya tjuta nyinangi munuya kura tjuta rawangku palyaningi, kaya Israeltanguru Godaku wangkatjara tjutangku ngura palunya pulanya kuranmankupai.

nyara palula nyinapai tjutangku nyakula ngayuku mulamularingama munu kuranguru mapalku piiwiyaringama, ka Godalu tjananya kura wantinyangka nyakula pungkuwiyangku wantima, ka tjinguru ngura paluru kuwari ngarama warungku kampara wiyanja wiya.²⁴ Palu ngula tjintu małatjangka Godalu anangu uwankara ngurkantara tjaralku munu anangu Tjatamanya ngurara tjuta paira iyalku ngura kurakutu pika pulka mantjintjaku. Munu paluru nyuranya kuлу tjanala tjungu paira iyalku, palu ngura nyara palula nyura pika kutjupa pulka mulapalta mantjilku ngayunya panya wantintytatjanungku.” Alatji Jesulu tjanala wangkangi tjana wantintytitjanguru.

*Jesulu Mama Godanya Walkuntja
(Luke-aku 10:21-22)*

²⁵ Munu palulanguru Jesulu palumpa mamangka wangkangi alatji, “Uwa Mama, nyuntun mayatja pulka mulapa nyinanyi ilkariku mantaku anangu uwankaraku kuлу, munun ilkaritja uwankaraku kuлу mayatja pulka nyinanyi. Kaña nyuntunya kuwari mirawañira walkuni, panya nyuntun tjukurpa nyanga wiru utinu anangu ngurpa tjutangka munu panyan nintipuka tjutangka utintja wiyangku kumpilpa wantingu.²⁶ Uwa Mama, mulapa panyan nyanga alatji palyanu nyuntu mukuringkula.”

²⁷ Munu palulanguru Jesulu nintintja tjutangka wangkangi alatji, “Panya Mamaluňi uwankara alatjitu wangkara utinu. Ngayuluňa palumpa katja ka paluru kutju ngayuku ninti nyinanyi, ka palu purunypa ngayulu kutju palumpa ninti mulapa nyinanyi. Palu ngayulu anangu kutjupa tjuta ngurkantara nintilku, kaya paluru tjana kuлу Mamaku nintiringkula nyinaku ngayulu nintinnyangka kutju.

²⁸ “Uwa, nyura mantangka nyanga nyinara pulkara warkaripai munu titutjara pakuringkupai, panya wati Moseku tjukurpa nintilpai tjutangku nyuranya rawangku wangkara wituwitulpai arå kutjupa kutjupa tjuta palyantjaku, ka nyura uwankara tjukarurungku palyantjikitjangku putu kulilpai munu nyara palulanguru nyura pakuringkupai munu tjiturutjitururipai. Palu kulilaya, munuya paku pulka nyinarampa ngayulakutu pitja kaña ngayulu nyuranya pakuwiyala.²⁹ Wanyuya ngayuku tjukurku nintiringama munuya ngayulu wangkanyangka wanganarangku kulinma, panya ngayuluňa kurunpa ngaltunyju nyinanyi kañany-kañanypa wiya, ka nyura ngayula wanganarangku kulinnyangkampa ngayulu nyuranya pakuwiyalku pukulpa nyinanytjaku.³⁰ Panya nyura ngayuku tjukurpa wanganarangku kulintjikitja mukuringkulampa nyura uti alatjitu kulikku, munu ngayulu wangkanyangka nyura pukultu alatjitu palyalku wantintytja wiyangku.” Alatji Jesulu tjanala wangkangi tjananya rapantjikitjangku.

12

*Tjintu Milmiltä Warkarinytja
(Markaku 2:23-28; Luke-aku 6:1-5)*

¹ Munu nyara palulanguru ngula Jesunya tjana palumpa nintintja tjuta kuлу Saturday-ngka anangi tjintu panya pakuwiyaringkupaingka. Munuya paluru tjana mai panya wiita tjutangku ngururwanu anangi. Kaya nintintja tjutangku paltjatjiratjarira waarrangku mai wiita urara marangku unytjunyju kilinara uñinypa ngalkukatingi.

² Kaya Paratji tjutangku tjananya urannyangka nyakula Jesula wangkangu, “Ai, nyawa! Nyuntumpa nintintja tjutangku tjintu nyanga pakuwiyaringkupaingka kurangku mai mantjira unytjunyju kilinananyi,

panya alatji palyara tjana nganampa ara anara upani, panya Moseku tjukurta ngaranyi tjintu nyanga milmila warika nyanga palu purunyapa palyantja wiyangku wantintjaku.”

³⁻⁴ Ka Jesulu wangkangu tjanala, “Palu nyura wanyu nyiringka nyakunytja wiya tu panya iriti mayatja Davidalu paltjatjiratjarira Godaku tiinta milmila tjarpala mai panya milmilmara tjunkunytja ngalkunu munu palumpa tjungutja tju ta kulu ungu ngalkula paltjaringkunytjaku. Palu panya tjukurpa ara ngaranyi tjukurtjara tjutangku kutju mai nyara palunya ngalkuntjaku. Ka paluru tjana tjukurpa ara nyanga palunya kulira wantingu, palu kutjupa tjutangku tjananya paintja wiyangku wantingi paltjatjiratjarira ngalkunnya ngangka.

⁵ “Munuya wanyu tjukurpa kutjupa kulu kulinma nyura Moseku tjukurta nyakunytjatjanungku, panya tjintu pakuwiyaringkupaingka tjukurtjara tjutangku tiinta milmila tjarpala warika palyalpai alatjitu, ka Godalu tjananya war karinyangka nyakula paintja wiyangku wantipai. ⁶ Palu kuwarina nyurala tjukurpa kutjupa wangkanyi ara kuwaritja. Panya Godalu ngayunya iyanu tjukurpa pulka mulapa tjakultjunkunytjaku tjukurpa panya timpulatjarangka waintara. ⁷ Panya nyiringka iriti walkatjunkunytja ngaranyi Godalu wangkanytja nyanga alatji,

‘Palyaya tjinguru kuka pungkula tiliwakara ngayunya ungama, palu nyangaku kulu na pulkara mukuringanyi nyura anangu kutjupa tju ta ngalturingkula tjananya rawangku alpamilantjaku. Nyanga alatji nyura palyannyangka nyakula na pulkara pukulariku.’ *

Alatji nyiringka ngaranyi. Ka nyura uti tjukurpa nyanga palunya mulamulangku kulinma. Palu wiya, nyura wantingu munu pala palulanguru nyura ngayuku nyanga nintintja tju ta ngunti painingi kura palyannyangka-palku. ⁸ Uwa, nyura uti kulinma panya ngayulu Watiku Katjanya mayatja pulka mulapa nyinanyi, munu na ngayulu alatjitu wangkapai nyaa palyantjaku tjintu panya pakuwiyaringkupaingka.” Alatji Jesulu tjanala wangkangi Paratji panya tjutangka.

Jesulu Wati Mara Ngalturpa Palyantja Tjintu Milmila (Markaku 3:1-6; Luke-aku 6:6-11)

⁹ Munu palulanguru Jesunya tjana tawunungka ma-wirkanu munuya tjintu panya pakuwiyaringkupai ngaranyangka wal inmatjangka tjarpangu inmaku. ¹⁰ Ka nyara palula wati mara ngalturpa tjanala tjungu nyinangi anangu panya tjutangka. Kaya wati panya Paratji tjutangku Jesunya nyinara nyangangi paluru kutjupa kutjupa ngunti palyannyangka paintjikitjangku. Munuya wati panya mara ngalturpa nyinanyangka nyakula kulinngi, “Tjinguru kuvari palunya palyarungulku tjintu nyanga milmila munu Moseku tjukurpa kuralku.”* Munuya palulanguru palula ngunti tjinpinu alatji, “Yaaltji-yaaltji wanyu Moseku tjukurta ngaranyi? Palya tjintu nyanga pakuwiyaringkupaingka anangu pikatjara palyarunguntjaku, munta wiya?”

¹¹ Ka Jesulu wangkangu tjanala ngapartji, “Palu wanyu nyura kuka tjiipi tjirirpi pakuwiyaringkupaingka pitingka wirulyarara tjarpangkampa ngulaku wantipai ilara pakaltjingantja wiyangku? Wiya, nyura ilara walatjunkupai alatjitu mungawinkiku patara wantintjaka wiyangku. ¹² Ka

* **12:7** Uutjiyaku 6:6 * **12:10** Panya Moseku tjukurtu wangkanyi tjintu Saturday-nga warika wiya nyinara pakuwiyaringkunytjaku, ka paluru tjana kulilpai anangu palyarunguntja nyaratja warika, munuya palulanguru Jesulu anangu palyarunguntjaku patara nyangangi palunya paintjikitjangku.

wati nyanga ngaltutjara tjiipi purunypa wiya anangu alatjitu, ka panya Moseku tjukurta ngaranyi nganana kutjupa tjuta titutjarangku ngalturingkula alpamilantjaku tjintu nyara palula kulu.”

¹³ Munu Jesulu wati palunya wangkangu, “Maranku warala!” Ka mulapatu waranu, ka mara panya paluru palyaringu alatjitu mara panya kutjupa purunypa. ¹⁴ Kaya Paratji tjuta nyakunytjatjanu palumpa pulkara unngu mirpanaringi munuya ankula wangkara kuliningi Jesunya pungkunytjikitjangku.

Godalu Jesunya Ngurkantankunytja Palumpa Warka Palyantjaku

¹⁵ Ka Jesulu kulinu tjana palunya kukanymankunytja munu ngura nyara palunya wantikatira ngura kutjupakutu anu. Kaya anangu winkingku palunya wananu, ka Jesulu pikatjara tjuta uwankara pamphura palyarunguningi. ¹⁶ Munu tjananya painingi kutjupa tjutangka tjakultjunkuwiyangku wantinýtjaku. ¹⁷ Palu tjukurpa nyanga Jesulu pikatjara tjuta palyarunguntja Mayatja Godalu ngamanytju wangkangu wangkatjara ini Aitjayala, ka panya nyiringka iriti walkatjunu nyanga alatji Godalu wangkanytja,

¹⁸ “Nyanga palunyana ngurkantanu mununa palunya witulyanu ngayuku warka palyantjaku.

Palumpana pulkara pukularinyi, mununa ngayuku kurunpa palula unngu tjarpatjunkuku.

Ka paluru ankula anangu manta winitjangka tjakultjunkuku alatji,
‘Godalu nyurampa palyalku nyura palumpa walytjaringkula tjukaruru nyinanytjaku.’ Alatji paluru tjanala wangkaku.

¹⁹ Munu paluru piluntju alatjitu nyinaku ankula iwarangka itingka ngarala mirara wangkanytja wiya.

²⁰ Munu paluru anangu ngaltutjara tjuta nguwanpa ilunyangka nyakula wantinýtja wiyangku tjananya ngalturingkula wankara pakaltjinggaku,
panya watingku waru tili kulinypa kampanyangka nyakula purkarangku puulpai tili pulkaringkunytjaku,
palu purunypa paluru anangu tjuta wankaru kanyilku.

Munu paluru ngururpa pakuringkula wantinýtja wiyangku titutjarangku warka ngayuku palyalku
munu ngula anangu tjuta ngayulu tjanampa palyantjitetjaku mulamularingkunyangka kutju wantira pakuiyaringkuku.

²¹ Ka anangu ngura parari nyinanytja tjuta ala-ala patara nyinaku paluru pitjala tjananya nintintjaku.” *

Alatji Mayatja Godalu iriti wangkangu, ka nyanga kuwari utiringulta.

Jesunya Munu Piiltjipalnga

(Markaku 3:20-30; Luke-aku 11:14-23; 12:10)

²² Ka kutjupa tjutangku Jesulakutu wirkakatingu wati mamutjara, mamungku tjaa munu kuru kulu patintja. Ka Jesulu mamu palunya painu, ka wati paluru palyaringu munu kuru alaringkula nyangu munu tjaa kulu alaringkula wangkapairingu. ²³ Kaya anangu tjutangku nyakula nguwanteringku munuya wangkangi, “Wati nyangatja-manti Davidaku katjampa Godalu panya ngamanytju kalkuntjanyampa.”

* **12:21** Aitjayaku 42:1-4

24 Kaya Paratji tjutangku nyangatja wangkanyangka kulira tjanala wangkangu, “Wiya, mamu ini Piiltjipaltu wati nyanga palunya witulyankupai panya mamu tjutaku mayatja pulkangku, ka nyara palulanguru kutju paluru mamu tjuta pailpai anangu tjutanguru.”*

25 Ka Jesulu nintingku kulinngi tjana unngu kulintja munu kampa kutjupara wangkangu alatji, “Kulilaya! Panya anangu tjuta ngura kutjunguru walytjarara walytjararangku tjananku pikangku pungkula paturingkula tjungu uulu kutjungka nyinanytja wiyaringkupai. Ka palu purunypa anangu walytjarara walytjarara wali kutjungka nyinara rawa pikaringkula tjungu nyinanytja wiyaringkula maunthalparingkupai. **26** Ka nyara palu purunypatu tjinguru Satantu mamu palumpa walytja tjuta anangu tjutanguru painnyangkampa paluru tjana palumpa kuraringkula palula tjungu nyinanytja wiyaringkuku, ka paluru tjananya putu wituwitura uparingkuku munu tjanampa mayatja wiyaringkuku. **27** Ka panya nyura ngayunya wangkapai alatji, ‘Mamu ini Piiltjipaltu wati nyanga palunya witulyankupai mamu tjuta paintjaku anangu tjutanguru.’ Alatjini nyura wangkapai. Palu ngayulu tjinguru paluru witulyankunyangka mamu tjuta paini, ka nyuranya wanpalai tjuta wanyu nganalu witulyankupai mamu tjuta paintjaku? Mamu Satantu? Wiya, nyura alatji wangkanyangkaya nyuranya wanpalai tjuta nyurampa pikaringkuku, panya Godalu tjananya witulyankupai Satantu wiya. Ala palatja! Nyura ngayunya ngunti mamutjaranmananyi. **28** Palu Godaku Kuruntu ngayunya witulyankupai mamu tjuta paintjaku, ka nyara palulanguru nyura uti nyakunytjatjanungku kulinma, ‘Munta-uwa, mulapa Godanya pitjangu nganañanya walytjanmara mayatjangku kanyintjikitja.’”

29 Munu Jesulu araa kutjupa tjanala wangkangi nintintjikitjangku alatji, “Watingku wanyu wati kunpu pulkaku ngurangka tjarpara kutjupa kutjupa tjuta kutitjunkupai? Wiya alatjitu. Palumpa ngaranyi wati nyara kunpu palunya-warara karpintjaku munu palulangurulta palumpa kutjupa kutjupa tjuta kutitjunkunytjaku.

30 “Panya anangumpa ngayula tjungu nyinanytja wiya ngaralampa paluru Satanta tjungutja nyinanyi ngayuku mirpantju. Munu paluru anangu tjuta Godalakutu wirkakatinjtja wiyangku wantirampa paluru Satanku warkarinyi munu tjananya ngayulanguru wililytjingani. **31** Palu kulinmaya nyangatja, panya nyura kura kutjupa kutjupa tjutanguru piiwiyingkunyangka Godalu nyuranya kalypangku pungkuwiyangku wantiku. Munu nyura palunya anantjatanu piiwiyingkunyangka palu purunypatu nyurampa kalyparingkuku. Palu nyura tjinguru Kurunpa Milmilnga anara wangkanyangkampa Godalu nyurampa kalyparingkunytja wiyangku nyuranya kukanymankuku. **32** Uwa, ngayunya nyura Watiku Katjanya kurara wangkanytjatanu piiwiyingkunyangka Godalu nyuranya kalypangku pungkuwiyangku wantiku. Palu Kurunpa Milmilnga nyura kurara wangkanyangka Godalu nyuranya kukanymankuku nyurampa kalyparingkunytja wiyangku, ka nyura titutjara alatjitu kukanyipa nyinaku tjirirpi malatjakutu-wangkara.”*

Jesulu Mainguru Tjukurpa Kampa Kutjupara Wangkanytja (Luke-aku 6:43-45)

* **12:24** Piiltjipalnga panya mamu Satannga. * **12:32** Panya Paratji tjutangku Jesunya mamutjaranmara Kurunpa Milmilnga pulkara ananigi panya paluru mamu tjuta anangu tjutanguru pakaltjinganigi mamungku wiya.

³³ "Wanyu kaña tjukurpa ara kutjupatjara wangkama mai tjutatjara, panya puñu wirungka mai wiru tjuta pakalpai mayu palyatjara, palu puñu kurangka mai kura pakalpai mayu kurakura. Ka palu purunypa anangu wirungku wiru tjuta palyalpai, ka anangu kurangku kura tjuta palyalpai. Panya nyura anangu kutjupa ngurkantankuku paluru kutjupa kutjupa tjuta palyantjitjanguru. ³⁴ Palu nyura uwankara liru tjuta anangu tjuta ngunti kuralpai! Nyura wanyu kura tjutangku tjukurpa palya wangkapai? Wiya, panya anangungku tjaangku kutju wangkapai wiya, palu unngu kulintjtija uwankara wangkapai. ³⁵ Ka unngu wiru tjuta kulintjatjanungku paluru wiru tjuta kutju wangkapai, palu unngu kura tjuta kulintjatjanungku paluru kura kutju wangkapai.

³⁶ "Kaya kulinma nyangatja, panya ngula tjintu malatjangka Godalu anangu uwankara ngurkantara tjaralku munu paluru tjanala kutjungka kutjungka nintingku wangkaku, 'Nyaaku nyuntu tjukurpa kura palunya tjananya wangkangi mantangka panya nyinara?' ³⁷ Uwa, tjintu nyara palula paluru nyuranya ngurkantankuku nyura wangkanytjitjanguru. Munu nyura tjukurpa palya wangkanytjitjanguru paluru nyuranya tjukarurunmankuku, palu nyura tjukurpa ngunti wangkanytjitjanguru paluru nyuranya kuranmankula ngura kurakutu paira iyalku."

*Jesunya Wituwituntja Witulya Pulkangku Palyantjaku
(Markaku 8:11-12; Luke-aku 11:29-32)*

³⁸ Ka palulanguru Paratji tjutangku munu Moseku tjukurpa nintilpai tjutangku kuļu Jesunya wangkangu, "Nintilpai! Wanyu nganañala miřangka kutjupa kutjupa witulya pulkangku palyala nganaña nyakula nyuntumpa mulamularingkunytjaku."

³⁹ Palu Jesulu wantingu munu tjanala wangkangu, "Alatjitu nyura kura tjuta nyinanyi Godanya kuļira wantipai, panya nyura ngayuku puť mulamularingkula rawangku tjpini ngayulu miracle kutjupa kutjupa witulya pulkangku palyantjaku, panya ngayulu nyara palu purunypa palyannyangka nyakula kutju nyura kuļipai mulamularingkunytjikitjangku. Palu wiya, Godalu kutjupa kutjupa nyura nyakunytjaku palyantja wiyangku wantinyi, panya paluru ngañmanytu wati wangkatjara ini Jonah-nya iyanu, ka nyura uti ara nyara palunya kulintjatjanumpa nintiringama. ⁴⁰ Panya wati paluru antipina pulkangka tjuni unngu nyinangi tjintu mañkurpa munu panya palulanguru pakaňu, ka palu purunypa ngayulu Watiku Katjanya tjintu mañkurpa manta unngu ngariku mununa palulanguru pakalku. ⁴¹⁻⁴² Ka panya ngula tjintu malatjangka Godalu anangu uwankara ngurkantara tjaralku, ka nyara palula ara anangu Ninapanya ngurařa tjutangku nyuranya kuranmankuku ngayuku tjukurpa kuļira wantinytjitjanguru. Panya paluru tjana Jonah-lu Godaku tjukurpa wangkanyangka kulinu munuya piiwiyingkula kura tjuta wantingu. Ka kuwari kutjupa Jonah-la waintara pulka mulapa nyurala tjungu nyinanyi nyura nyakula wanganarangku kulintjaku. Ka tjintu panya palula minyma panya mayatja ulpariranguru pitjanytjalu palu purunypatu nyuranya kuranmankuku ngayuku tjukurpa kuļira wantinytjitjangka. Panya paluru ngura ulparira pararinguru pitjangu mayatja pulkangka Tjalamanta kulintjikitja paluru tjukurpa nintingku wangkanyangka.* Ka kuwari kutjupa Tjalamanta waintara pulka mulapa nyurala tjungu nyinanyi nyura tjukarurungku nyakula wanganarangku kulintjaku. Palu nyura ngayunya ngurkantankunytja wiya alatjiitu."

* 12:41-42 1 Kings 10:1

*Mamu Anangunguru Painnyangka Małaku Pitjala Tjarpanytja
(Luke-aku 11:24-26)*

⁴³ Ka Jesulu tjanala piruku wangkangu alatji, “Panya mamu anangunguru painnyangka pakara ankupai ngura piltikutu munu parangurilpai paluru nyinara pakuwiyaringkunytjikitjangku. ⁴⁴ Palu tjinguru mamu paluru ngura putu ngurira kulilpai, ‘Wiya, ngayulu małaku ankuku ngura panya ngayulu ngañmanypa nyinanytjikitjangku.’ Munu mamu panya paluru pitjala nyakupai ngura panya paluru wiru kilina alatjitu ngaranyangka. ⁴⁵ Munu palulanguru małaku ankula paluru mamu 7 kutjupa altira katipai kura mulapalta, munuya paluru tjana palula tjarpala ngura palyara titutjara nyinapai. Ka anangu panya paluru ngula małangka pulkara mulapa kuraringkupai mamu panya paluru tjana unngu nyinara titutjarangku kurannyaangka.” Alatji Jesulu tjanala wangkara nintiningi mamu tjuatjara.

*Ngananya Tjana Wanyu Jesuku Walytjapiti?
(Markaku 3:31-35; Luke-aku 8:19-21)*

⁴⁶ Ka paluru anangu tjuatangka tjukurpa kuwaripangkuṭu ngarala wangkannyaangka palumpa ngunyntju małanypa tjuṭa kuļu pitjangu, munuya walingka urilta ngarala wati kutjupa witunu Jesunya altintjaku pakara tjananya nyakunytjaku. ⁴⁷ Ka wati paluru ankula Jesula wangkangu, “Nyuntumpa ngunyntju munu małanypa tjuṭa kuļuya urilta paṭani nyuntula wangkannyaangka.” ⁴⁸ Ka Jesulu wangkangu, “Ngananya ngayuku ngunyntju? Ngananya tjana ngayuku małanypa tjuṭa?” ⁴⁹ Munu nintintja tjuṭa para-wilitjura wañara wangkangu, “Nyanga tjanaya ngayuku ngunyntju małanypa tjuṭa nyinanyi. ⁵⁰ Panya ngayuku mamaku tjukurpa wanganarangku kulira palyalpai tjuṭa, nyara paluru tjanaya ngayuku ngunyntju małanypa kuļu nyinanyi walytja mulapa.”

13

*Jesulu Tjukurpa Uninypatjara Wangkannyaangka
(Markaku 4:1-9; Luke-aku 8:4-8)*

¹ Munu tjintu panya palulaṭu Jesunya pakara anu walinguru munu ankula uru kantilytja nyinakatingu anangu tjuatangka tjukurpa wangkannyaangka. ² Ka anangu winki mulapa palula kulintjikitja pitjangu munuya palunya utjuningi. Ka utjunyangka paluru pauta uru tartjangka ngaranyangka nyakula tatira nyinakatingu katunguru tjukurpa wangkannyaangka. Kaya anangu tjuatangku uru kantilynguru wati-ngarala wañara kuliningi pautanguru tjukurpa wangkannyaangka. ³ Ka Jesulu tjukurpa tjuṭa tjanala wangkangi ara kutjupa kutjupa tjuatjara, munu paluru ngañmanyntju tjukurpa nyangatja wangkangu alatji, “Wati kutju mapitjangu uñinypa mantangka wañira wañantjikitja palumpa kaanangka. ⁴ Ka uñinypa wañira wañannyangka tjara iwarangka itingka punkaṇu, ka tjulpu tjuatangku pitjala ngalkula wiyanu. ⁵ Ka uñinypa kutjupatjara punkaṇu manta pulitjarangka munu manta tartjangka mapalku pakaṇu. ⁶ Ka tjintungku pakara kampangu, ka mapalku piltiringkula wiyaringu iwiri wiyatjara. ⁷ Ka uñinypa kutjupatjara punkaṇu manta tjilkatjarangka, ka tjilka tjuṭa pakara pulkaringu munu ukiri panya wañintjanya utjunu, ka putu pulkaringangi. ⁸ Ka uñinypa kutjupatjara punkaṇu manta palyangka munu pakara pulkaringu munu mai pulkatjararingu, tjara kutjupa 100-tjararingu, tjara kutjupa 60-tjararingu, ka tjara kutjupa 30-tjararingu.

9 “Uwa, nyura nintiringkunytjikitja mukuringkulampa purkarangku kulinma ngayulu nyanga kuwari nyurala wangkanytja.”

*Jesulu Ara Kutjupa Kutjupa Tjuṭanguru Nintintja
(Markaku 4:10-12; Luke-aku 8:9-10)*

10 Kaya nintintja tjuṭangku pitjala Jesula tjapiningi, “Nyaakun tjukurpa nyanga palu purunyapa tjuṭa aŋangu tjuṭangka wangkapai ařa kutjupa kutjupa tjuṭatjara?”

11 Ka Jesulu tjanala wangkangu, “Wiya, ngayulu nyurala kutju Godaku tjukurpa kumpilitja utira wangkanyi, tjukurpa panya Godalu aŋangu tjuṭa walytjanmara mayatjangku kanyintjatjara. Palu aŋangu kutjupa tjuṭangkaña wangkapai wiya. **12** Kulilaya! Tjinguru aŋangungku wanganarangku palula kulinnyangkampa, Godalu palunya pulka mulapalta nintilku paluru kulira ninti mulararintjaku. Palu tjinguru aŋangungku kulira wantinyangkampa, Godalu palunya kulintja kampa kutjupankuku palumpa watarkurintjaku. **13** Uwa, ngayulu aŋangu tjuṭangka tjukurpa tjuṭa wangkapai ařa kutjupa kutjupa tjuṭatjara, ka paluru tjana ngayulu wangkanyangka nyakula ngayunya puṭu ngurkantankupai munuya rawangku kulintjatjanungku puṭu tjukarurungku kulilpai. **14** Panya tjukurpa nyanga aŋangu tjuṭangku ngayunya puṭu ngurkantankunytja Godalu ngañmanyatju wangkangu wangkatjara ini Aitjayala, ka panya nyiringka iriti walkatjunu Godalu wangkanytja nyanga alatji, ‘Nyura tjukurpa wangkanyangka rawangku kulikku, palu nyura kulira kulira puṭu alatjitu tjukurku nintiringkuku.

Munu nyura piruku kurungku rawangku nyakula nyakula puṭu alatjitu tjukarurungku ngurkantankuku.

15 Panya aŋangu nyanga paluru tjanaya kurunpa ngañmanypa wituwituringu tjukurpa tjukaruru kulintjaku-tawara.

Munuya paluru tjana wangkanyangka puṭu kulilpai, munuya kurungku kuļu puṭu nyakupai kuru ngañmanypa patirringkunytjatjanungku.

Tjinguru tjana tjukarurungku kulirampa mulamularingama alatjitu kuru aļangku nyakunytjatjanu, munu pinangku kulintjatjanu kuļu.

Munu tjinguru paluru tjana kulintja palyangkumpa tjukurpa uwankara wangkanyangka tjukarurungku kulinma.

Munuya nyanga alatji tjukarurungku palyarampa, kampa kutjuparintjajnu tjinguru ngayulakutu małaku aruringama.

Kaňa palulanguru tjananya palyarungunma.’” *

16 Munu Jesulu palumpa nintintja tjuṭangka wangkangu, “Palu nyura panya ngayunya kuru walytjangku nyanganyi, munuňi ngayulu wangkanyangka pina walytjangku kulini. Pala palulanguru nyura pulkara pukularintjaku. **17** Panya wati wangkatjara tjuṭa munu tjukaruru nyinapai tjuṭa kuļuya pulkara mukuringangi nyura nyanga nyakunytjanya nyakunytjikitja, palu nyakunytja wiyatuya ngañmanypa wiyingingu. Munuya nyura purunytju kulintjikitja mukuringangi palu kulintja wiyatuya wiyingingu.”

*Jesulu Tjukurpa Panya Uninypatjara Wangkara Utintja
(Markaku 4:13-20; Luke-aku 8:11-15)*

18 Munu paluru tjanala wangkangu, “Kulinmaya, kaňa tjukurpa panya uninypatjara nyurala utira tjakultjura! **19** Aŋangu kutjupa tjaraya

* 13:15 Aitjayaku 6:9-10

nyinanyi uñinypa panya iwarangka punkantja purunypa. Nyara paluru tjana panya tjukurpa kulilpai Godalu mayatjangku kanyintjatjara palu puñuya kulini, panya mamu Satantu tjananya pina kuralpai tjukurpa kulintjaku-tawara. ²⁰ Kaya añangu kutjupatjara nyinanyi uñinypa panya manta pulitjarangka punkantja purunypa. Panya tjana tjukurpa kulilpai munuya pulkara pukularingu. ²¹ Palu tjana mulamulangku kuruntu tjukurpa mantjintja wiya unytju kutju mulamularingkupai. Panya kutjupa tjuñangku palunya tjananya ngayuku tjukurngru kurara pungkunyangkaya mapalku paturingkula Godaku watarkuripai. ²² Kaya añangu kutjupa tjuta nyinanyi uñinypa panya tjilkangka punkantja purunypa, panya tjana tjukurpa kulira mulamularingkupai. Munuya mantatja kutjupa kutjupa tjuta pulkara kulira wiru tjuña kanyintjikitja mukuringkupai munuya nyanga palula tjanalangrū Godaku tjukurku watarkuripai munuya wiru tjuña Godaku puñu palyalpai. ²³ Kaya añangu kutjupatjara nyinanyi uñinypa panya manta palyangka punkantja purunypa, panya tjana tjukurpa wangañarangku kulira pulkara mulamularingkupai. Munuya kulintjatjanungku wiru tjuña Godaku palyalpai tjarangku tjukutjuku nguwanpa palyalpai, ka tjara kutjupangku pulka nguwanpa palyalpai, ka tjara kutjupangku pulka mulapalta palyalpai Godanya pukularinytjaku.”

Godalu Añangu Tjuña Walytjanmara Mayatjangku Kanyintja Ara Nyanga Paluru Tjana Purunypa

Ukiri Palya Munu Ukiri Kura

²⁴ Munu Jesulu piruku tjukurpa aña kutjupatjara tjanala wangkangu nyanga alatji, “Godalu añangu tjuña mayatjangku walytjanmara kanyintja aña nyanga palu purunypa ngaranyi, panya wati kaana kanyilpaingku manta runyuntjatjanungku uninypa wiita tjuña para-wañira wañanu. ²⁵ Ka mungangka añangu tjuña kunkunpa ngarinyangka wati mirpañtu pitjangu munu manta panya palulañu kampangkañu uñinypa kura para-wañira wañanu. ²⁶ Ka ngula uñinypa panya wiita tjuña pakara maitjararingu, ka uñinypa panya kura palula tjunguñu pakara pulkaringu. ²⁷ Kaya warkaripai tjuñangku nyakula wangkangu tjanampa mayatjangka, ‘Mayatja! Yaaltjingrū ukiri nyanga kura pakanu? Nyuntu panyan uñinypa palya tjuña kutju wañingu.’

²⁸ “Ka wangkangu, ‘Wiya, tjingru wati ngayuku mirpañtjungku pitjala kampangkañu wañingu.’

“Kaya palula tjapiningi, ‘Warpurala wañiku?’

²⁹ Ka wangkangu, ‘Wiya, warpulwiyangkuya wantima! Tjingru nyura ukiri kurakura tjuña warpulwampa ukiri palya tjuña kuñu warpulku. ³⁰ Palula-tawaraya warpulwiyangku wantima tjungu pakara pulkaringkunyntjaku, ka ngula mai wiita kururingkunyangka ngayulu mai uralpai tjuña wangkaku uwankara tjungu kañara urantjaku munu ukiri kura tjuta utulura warungka tilintjaku munu mai wiita tjuta mantjira tjunkunyntjaku wali mai tjunkupaingka.’ Nyanga alatjiriku ngula tjintu małatjangka.” Alatji Jesulu tjanala wangkangi.

*Tjukurpa Uninypa Tjukutjukutjara
(Markaku 4:30-32; Luke-aku 13:18-19)*

³¹ Munu paluru piruku tjukurpa aña kutjupatjara tjanala wangkangu alatji, “Godalu añangu tjuta mayatjangku walytjanmara kanyintja aña nyanga palu purunypa ngaranyi, panya wati kaana kanyilpaingku

uṇinypa ini matjata* kutju katira mantangka tjunkula tјutuṇu. ³² Uṇinypa nyara paluru tjuku mulapa palu paluru pakara pulkaringkula pulkuṇpa mulapa ngarapai. Kaya puṇu palula tјulpu tјutangku pitjala maṇngu palyara nyinapai.”

*Tjukurpa Yiitjatjara
(Luke-aku 13:20-21)*

³³ Munu Jesulu pirukuṇu tjukurpa ara kutjupatjara tjanala wangkangu alatji, “Godalu aṇangu tјuta mayatjangku walytjanmara kanyintja ara nyanga palu purunypa ngaranyi, panya minymangku yiitja tjukutjuku mai ulungka tjungura uritjingalpai, ka panya yiitja tjuku mulatu mai tal̄tulpai warungka pauntjaku. Nyara palu purunypa Godaku walytja tјutaringkupai.”

*Jesulu Tjukurpa Tјuta Kampa Kutjupara Wangkanytja
(Markaku 4:33-34)*

³⁴ Uwa, Jesulu tjukurpa nyanganpa aṇangu tјutangka kampa kutjupara wangkangi utira wangkanytja wiyangku. ³⁵ Palu nyanga alatji tjukurpa tјuta ara kutjupa kutjupa tјutatjara wangkanytjaku Godalu nganmanytju tjakultjunu wati wangkatjara kutjupangka ka panya nyiringka iriti walkatjunu nyanga alatji,

“Ngayulu nyurala tjukurpa tјuta wangkaku ara kutjupa kutjupa tјutatjara utira wangkanytja wiyangku.

Munuṇa tjukurpa kumpilitja tјuta nyurala tjakultjunkuku, panya Godalu kuwaripatjaranguru alatjitu kumpilpa kanyiningi.” *

Tjukurpa Panya Uṇinypa Kuratjara Utintja

³⁶ Munu palulanguru Jesulu aṇangu tјuta wantikatira anu munu waṇingka tjarpangu. Kaya nintintja tјutangku pitjala wangkangu, “Wanyu tjukurpa panya uṇinypa kutjaratjara nganaṇala utira tjakultjura.”

³⁷ Ka Jesulu wangkangu, “Wati panya uṇinypa palya waṇira waṇalpainya, nyara paluru Watiku Katjanya. ³⁸ Ka palumpa panya kaanangku nintini ngura manta winkitja. Ka panya uṇinypa palya tјuta, nyara paluru tjana aṇangu Godaku walytjapiti. Ka panya uṇinypa kura tјuta, nyara paluru tjana aṇangu panya mamuku walytja tјuta. ³⁹⁻⁴⁰ Ka wati panya mirpantju uṇinypa panya kura tjunkupainya, nyara paluru mamu panya Satingga. Ka panya mai kururingkunyangka uralpai tјuta, nyara paluru tjana angelpa tјuta, panya paluru tjana ngula manta ilkar̄i wiyaringkunyangka aṇangu tјuta mantjilku. Munuya mamuku walytja tјuta ukiri panya kurakura tјuta purunypa utulura warungka waṇiku. ⁴¹ Panya nyara palula ara Watiku Katjangku palumpa angelpa tјuta witulku, kaya ankula aṇangu kura palyalpai tјuta mantjilku. Panya manta winkingka Godaku walytja tјuta nyinanyi, ka palula tjanala tjungu nyinanyi aṇangu kura tјuta kuļu panya tjana rawangku kura palyalpai munuya kutjupa tјuta kuļu wituwitulpai kura palyantjaku. Kaṇa palunya tjananya mantjintjaku ngayulu angelpa tјuta witulku. ⁴² Kaya mantjir̄a tjananya waru pulkangka waṇiku, kaya pikä pulkatjara nyinara titutjara ulaku. ⁴³ Ka palulanguru Mama Godalu palumpa walytja tјuta ngura wirungka kanyilku, kaya tjintu purunypa irnyara uti alatjitu ngaraku. Uwa, nyura nintiringkunytjikitja mukuringkulampa purkarangku kulinma ngayulu nyanga kuwari nyurala wangkanytja.”

* 13:31 mustard * 13:35 Psalm 78:2

Tjukurpa Mani Pulkatja Tjawara Kutitjunkunytjanya

⁴⁴ Ka Jesulu pi̱ruku tjukurpa ara kutjupatjara wangkangu alatji, “Godalu an̄angu tju̱ta mayatjangku walytjanmara kanyintja wiru mulapa ngaranyi ara nyanga palu purunypa, panya kutjupa kutjupa wiru tju̱ta mani pulkatja ngaringi manta unngu. Ka wati kutjupangku ngurpangku pitjala tjawara nyangu ngarinyangka, munu nyakunytjatjanungku pulkara pukularira tjutu̱ra wantikatingu munu palulanguru ankula paluru kanyintja uwankara manikitjangku tjalamila̱ra wiyara mani pulka mantjir̄a manta panya palunyalta payamila̱nu wiru panya tjutatjara.”*

Tjukurpa Upula Wirutjara

⁴⁵ Munu piruku tjukurpa kutjupa kampa kutjupara wangkangu alatji, “Godalu an̄angu tju̱ta mayatjangku walytjanmara kanyintja wiru mulapa ngaranyi ara nyanga palu purunypa, panya wati upula payamila̱paingku ngura winkingka upula wiru tju̱ta ankula para-nguriningi payamilan-tjikitjangku. ⁴⁶ Munu kutjupa-ara paluru upula wiru mulapa nyangu kutjupa tjutangka waintara mulapa. Munu paluru nyakula pukularira ankula paluru kanyintja uwankara manikitjangku tjalamila̱nu munu mani panya palula upala panyalta payamila̱nu munu mantjintjatjanu pulkara pukularingu.”

Tjukurpa Antipinatjara

⁴⁷ Munu paluru piruku tjukurpa kutjupa kampa kutjupara tjanala wangkangu alatji, “Godalu an̄angu tju̱ta mayatjangku walytjanmara kanyintja ara nyanga purunypa ngaranyi, panya wati tjutangku net uru ngati pulkangka wanira antipina kutjupa kutjupa tju̱ta witilpai. ⁴⁸ Munu tjana urunguru ilara katira uru kantilytja nyinakatira wiru tju̱ta tjarara tjunkupai pitingka munuya kurakura tju̱ta wanipai. ⁴⁹ Nyanga palu purunypa ngula ngaraku manta ilkar̄i wiyaringkunyangka, panya nyara palula ara angelpa tjutangku ankula an̄angu kura palyalpai tju̱ta mantjilku tjukaruru nyinapai tjutangka tjungu nyinanyangka. ⁵⁰ Munuya palunya tjananya waru pulkangka waniku panya waru ti̱tutjara kampapaingka, kaya nyara palula pi̱ka pulkatjara nyinara ti̱tutjara ulaku.”

Tjukurpa Kuwaritja Munu Irititja

⁵¹ Munu palulanguru Jesulu nintintja panya tjutangka tjapinu, “Nyura tjukurpa nyanga palunya tjananya tjukarurungku kulini?”

Kaya wangkangu, “Uwa, kulinila.”

⁵² Ka wangkangu, “Uwa, ngayulu nintinnyangka nyura tjukurpa Godalu an̄angu tju̱ta mayatjangku walytjanmara kanyintjtjaku tjukaruru nintiringangi. Munu nyura tjukurpa kutjaraku mukuringkupai, kuwaritjaku munu irititjaku kulu, panya ngayulu nyurala wangkanytjtjaku munu Godalu iriti Mosela tjanala wangkanytjtjaku kulu. Panya wati mani pulkatjarangku wiru tju̱ta pakutjangka kanyilpai palumpa walingka, irititja munu kuwaritja kulu tjungu. Munu paluru irititjaku munu kuwaritjaku kulu pulkara mukuringkupai. Ka nyanga palu purunypa̱tu nyura ngayula nintiringkunytjatjanu nyura tjukurpa kutjaraku̱tu mukuringkupai irititjaku munu kuwaritjaku kulu.”

* ^{13:44} Kutjupa kutjupa wiru tju̱ta manta unngu ngarinjtja, nyaratja Godanya. Ka wati kutjupangku pitjala nyangu, nyara paluru nintini an̄angu kutjupangku watarkitjangku Godaku Tjukurpa kulira nintiringkunytja. Munu paluru nintiringkunytjatjanu Godaku pulkara mukuringanyi munu palulanguru paluru kanyintja uwankara wantikatinyi Godanya wañantjikitjangku.

*Ngura Walytjangka Tjana Jesunya Wantintytja
(Markaku 6:1-6; Luke-aku 4:16-30)*

⁵³⁻⁵⁴ Munu Jesulu tjukurpa nyanganpa wangkara wiyingkula ngura palunya wantikatira anu ngura walytjakutu Nazarethalakutu. Munu nyara palula wirkara wali inmatjangka tjarpara ngura nyara palula aŋangu tjutangka tjukurpa wangkara nintiningi. Kaya kulira nguwankuringi, “Ai! Nganalu nyangatja nintinu tjukurpa nyanga wiru mulapa tjukarurungku wangkara utintjaku? Ka nyangangku yaaltjiwanutjangku witulya pulkangku miracle kutjupa kutjupa tjuta palyani?” ⁵⁵ Wiyampal panyatja, nyangatja wati wali palyalpaiku katja, ka panya ngunytju Mary-nya, ka malanypa tjuta ini nyanganpa Jamesanya, Josephanya, Simonnga, Judasanya tjana nyinanyi nyangangka. ⁵⁶ Kaya palumpa nyarumpa tjuta kuļu nyangatja nyinanyi.” ⁵⁷ Alatji wangkaraya palumpa kuraringangi munuya paluru wangkanyangka kulira wantingi.

Ka Jesulu kulira wangkangu, “Anangu tjutangku wati wangkatjara ngura kutjupitjangku wangkanyangka kutju wanganarangku kulipai, palu wangkatjara nguratitjangku wangkanyangkaya kulilwiyangku wantipai.” ⁵⁸ Munu ngura pala palula Jesulu miracle tjuta palyantja wiyangku wantingi tjana palumpa mulamularingkuwiyangku wantinyangka, palu mankurpa kutju palyanu.

14

*John Baptista Iluntankunytja
(Markaku 6:14-29; Luke-aku 9:7-9)*

¹ Nyara palula ara wati panya Iratalu manta Galileeku mayatja nyinangi munu paluru kulinu Jesulu ngura tjutangka para-pitjalira kutjupa kutjupa tjuta palyannyangka. ² Munu paluru kulintjatjanungku palumpa war̄karipai tjutangka wangkangu alatji, “Wiya, nyaratja wati panya John Baptista ilunytjatjanu wankaringkula pakanu, munu nyara palulanguru tjinguru paluru miracle kutjupa kutjupa tjuta witulyangku palyani.”

³⁻⁴ Panya ngañmanytu, Johnnga wanka nyinanyangkalpi, Iratalu palumpa malanypaku kuri altingu Philipaku panya ini Iratiyanya. Ka nyara palulanguru panya Johntu rawangku wangangi palula alatji, “Kurangkun minyma palatja tjulyanu.” Ka alatji wangkanyangka Iratalu tjaultji tjuta witunu Johnnga ankula witintjaku, kaya palunya ngalya-katira karpira tjailangka tjarpatjunu. ⁵ Ka Iratalu palunya iluntankunytjikitjangku kuliningi, palu paluru aŋangu tjutaku nguluringkula wantingi, panya paluru tjanaya kulipai Johnnga wati Godaku wangkatjara, munuya paluru wangkanyangka kulira mulamularingkupai. Ka nyara palulanguru Iratalu Johnnga iluntankuwiyangku wantingi.

⁶ Ka ngula Iratalu mai pulka palyanu munu palumpa malpa tjuta altingu tjunguringkula paluru iti ngarinytjitja kulira ngalkula pukularinytjaku. Ka nyara palula ara minyma Iratiyaku untalpa pakara nyappingi winkingka mirangka, ka wati panya Iratalu nyakula pulkara pukularingu. ⁷ Munu paluru palula wangkara kalkunu, “Nyuntu kutjupa kutjupaku mukuringkulampa ngayula tjapinma, ka ngayulu nyuntunya ungkuku alatjitu. Nyangatjananta tjukarurungku kalkuni Godala mirangka.”

⁸ Ka kungkawara panya palumpa ngunytjungku palula tjaalymara wangkangu alatji, “Arkara wanyu ngatjila John Baptista kata katara ungkunytjaku.” Ka kungkawara panya paluru Iratala wangkangu,

“Mukuringanyiña Johnnga kata kaṭara pulitangka tjunkula ngayunya ungkunytjaku.”

⁹⁻¹¹ Ka Iratalu nyangatja kulira unngu pulkara tjituru-tjtitururingu munu paluru kuliningi, “Tjinguru paluru ngatjinnyangkaña ungkuwiyangku wantima, palu ngayulu ngañmanytu winkingka miringka kalkuntjatjanungku putu wantinyi.” Munu paluru tjaultji tjuṭa witunu Johnnga kata kaṭara katira kungkawara panya palunya ungkunytjaku. Kaya tjailangka ankula kata kaṭara pulitangka tjunkula katira kungkawara panya palunya ungu, ka paluru katira ngunytu ma-ungu. ¹² Kaya panya Johnku nintintja tjutangku kulinu munuya pitjala Johnnga puntu mantjira katira tjuṇutjunu munuya ankula Jesula tjakultjunu.

*Jesulu Anangu Winki 5,000 Maingka Paltjantja
(Markaku 6:30-44; Luke-aku 9:10-17; Johnku 6:1-14)*

¹³ Ka Jesulu Johnnga ilunytja kulira pakara pautangka tatira anu kutju mañtalpa nyinanytjikitja. Palu anangu tjutangku ngura tjutanguru paluru ankunyangka kulinu munuya uru kantilytja warara palunya para-wanañu. ¹⁴ Ka Jesunya mantangka wirkara pautanguru ukalingu munu anangu palunya tjananya minga purunypa kuranyurira ngaranyangka nyakula tjanampa kurunpa pulkara ngalturingu, munu paluru pikatjara tjuṭa pampura palyarunguningi. ¹⁵ Kaya anangu paluru tjana kuwari-paṭu nyinara mungartjiringu ngurakutu ankunytja wiya, ka nintintja tjutangku pitjala wangkangu Jesula, “Ala, walangku tjananya wanyu witula, kaya ankula ngura nyara tjukutjuku tjutangka mai payamilara ngalkula paltjariwa! Alatjituña nyinara mungartjiringu. Ilytji nyangatja ngura parari mulapa.”

¹⁶ Ka Jesulu tjanala wangkangu, “Nyaakuña witura iyalku? Utu nyura tjananya mai ungama!”

¹⁷ Kaya wangkangu, “Wiya, mai tjukutjukula nyangatja kanyini, mai nyuma kutjara mañkurpa munu kuka antipina kutjara.”

¹⁸ Ka wangkangu, “Uwa, ngalya-katirani uwa!” Kaya mulapatu katira palunya ungu. ¹⁹ Ka paluru wangkangu anangu panya uwankara ukiringka nyinakatinytjaku, munu palulanguru mai panya kutjara mañkurpa, kuka kutjara kulu mantjinu munu ilkarí ira-nyakula maiku pukularira Godanya walkura wangkangu, “Wirungkulanyan mai kuka nyangatja ungu.” Munu paluru katantara nintintja tjuṭa ungu anangu tjuṭa para-ungkunytjaku. ²⁰ Kaya uwankarangku ngalkula paltjaringu. Kaya palula malangka nintintja tjutangku kuka mai lampi muṭun-muṭunpa tjuṭa tjana ngalkula wantinytja uwankara mantjira piti pulka 12-ngka tjaalyngaratjunu. ²¹ Uwa, ngura nyara palula wati 5,000-tu mai palunya ngalkunu winki mulatu. Ka minyma tjitji kulukulu nyinangitu ngura pala palula munuya uwankarangku ngalkula paltjaringu.

*Jesunya Uru Katu Paltjura Ankunytja
(Markaku 6:45-52; Johnku 6:15-21)*

²² Nyanga palula malangka Jesulu palumpa nintintja tjuṭa witunu palunya wantikatira pautangka tatira kuranyu ma-itipirinytjaku uru kampa kutjupakutu. Munu paluru anangu panya tjuta kulu witunu ngurakutu małaku ankunytjaku. ²³ Munu tjananya witura iyantjatjanu paluru kutjuringkula pulingka katu nguwanpa ma-tatira nyinakatingu Godala tjpintjikitja. Munu paluru nyinara tjpira mungaringu kutjungku. ²⁴ Kaya nintintja panya tjuṭa pautangka urungka ngururpa mulapalta

anangi, ka walpa pulka wangkangi munu pauta panya unṭura para-wanangi, kaya putuliringi ma-itipirira mantangka wirkankunytjikitja.

²⁵ Ka munga tjintukutu nguwanpa Jesulu uru panya pulkangka ngururpa tjananya tjinangku wañara wirkanu urungka katu paltjura.

²⁶ Kaya urungka katu paltjura pitjanyangka nyakula pulkara nguluringu munuya mirara wangkangu, “Mamu kurun-kurunpa palatja pitjanyi.”

²⁷ Ka Jesulu tjanala wangkangu, “Nguluringkunytja wiyyaya panya ngayuluña nyangatja, kaya raparingama!”

²⁸ Ka Peterlu wangkangu, “Mayatja! Mulapan wanyu nyuntu? Kani wanyu nyuntu mulapa ngaralampa alti kaña ukalingkula ma-pitja nyuntulakutu urungka nyanga katu paltjura.”

²⁹ Ka wangkangu, “Uwa palya, ngalya-pitja ukalingkula!”

Ka paluru pautanguru ukalingkula uru katu paltjura ma-pitjangi Jesulakutu. ³⁰ Munu paluru ankula nyangangi walpangku uru uritjingan-nyangka munu nguluringkula ngururpatu urungka karalukatingu munu mirara wangkangu, “Mayatja! Wankaruranı!”

³¹ Ka Jesulu mapalku miñara katunu urunguru munu palula wangkangu, “Ai! Nyaakun ngayuku mulamularingkunytja wiya pulkara nguluringanyi?” ³² Ka pula pautangka tatinnyangka walpa panya atanaringu. ³³ Kaya nintintja panya tjuṭangku pautangka nyinanytjatja-nungku pupakatira Jesunya walkuñu wangkara, “Mulapa nyuntu Godaku katja.”

Jesulu Pikatjara Tjuta Palyarunguntja Ngura Ini Kina-tjaratala (Markaku 6:53-56)

³⁴ Munuya urungka pitjalira tjinturingkula ma-wirkanu mantangka ngura ini Kina-tjaratala. ³⁵ Kaya ngura nyara palunya ngurara tjuṭangku Jesunya nyakula ngurkantanu, munuya añangu kutjupa tjuṭa tjakulpa witura iyanu ngura kutjupa tjuṭakutu. Kaya ngura winkingka tjakultjunkunyangka añangu tjuṭangku kulira añangu pikatjara winki mulapa Jesulakutu ngalya-katingu. ³⁶ Munu paluru tjana Jesula ngatjiningi pikatjara tjuṭangku palumpa mantara pampuntjaku tjana pampura palyaringkunytjaku, kaya mulapatu pikatjara uwankarangku pampuntjatjanu paluru tjana palyaringangi Jesulu tjananya palyarungunnyangka.

15

Jesulu Paratji Tjuta Munu Moseku Tjukurpa Nintilpai Tjuta Wangkara Paintja (Markaku 7:1-13)

¹ Kaya wati Paratji tjuta munu Moseku tjukurpa nintilpai tjuta kuļu Jerusalemalanguru pitjangu munuya Jesula tjapinu alatji, ² “Nyaakuya panyatja nyuntumpa nintintja tjuṭangku tjamuku tjanampa ara tjuta wanganarangku kulira palyantja wiyyangku wantinyi munuya mara paltjili-wiyyangku ngalkuni?”

³ Ka Jesulu wangkangu tjanala, “Ka nyura kuļu nyaaku wanyu Godalu wituntjtja tjuta kulira wantinyi? Panya nyura Godaku tjukurpa wantipai nyurampa tjamu tjuṭaku ara kutju kulira palyantjikitjangku. ⁴ Panya Godalu wangkangu alatji, ‘Mamangka ngunytjungka wanganarangku kulinma!*’ Munu piruku wangkangu alatji, ‘Añangu kutjupangku mama ngunytju warkinyangkampa palunya pungkula iluntankunytjaku

* **15:4** Exodus 20:12

ngaranyi!*⁵ Palu nyura tjukurpa nyanganpa kampa kutjupankupai. Tjinguru aŋangungku kutjupa kutjupa kanyini munu kanyintjatjanungku palumpa mama ngunytju ngaltutjara nyinanyangka nyakula unguṇytyjaku ngaranyi. Palu paluru tjinguru alatji wangkaku palula pulala, ‘Tjinguruṇa nyupalinya nyangatja ungama nyupali mantjira pukuɻarinptyjaku, palu puṭuna nyupalinya unganyi panya nganmanytjuṇa Godanya kalkunu nyangatja palumparintjaku.’ Uwa, nyanga alatji nyura ngunti wangkapai mama ngunytju unguṇiyangku wantintjikitjangku.⁶ Palu panya Godalu wangkangu mamangka ngunytjungka wangaṇarangku kulintjaku munu pulanya aṭunymara kanyintjaku, ka nyura tjukurpa palatja wiyanmananyi munu nyurampa tjukurpa kutju wangaṇarangku kulira palyantjaku wangkanyi.⁷ Uwa, nyura ngunti palya-palku kaṇany-kaṇanya nyinapai tjuta, panya wangkatjara Aitjayalu iriti nyiringka nyuranyatjara tjukarurungku walkatjunu alatji,

⁸ ‘Anangu nyangantuya ngayunya winpinpingku kutju wal̄kulpai,
panya tjana kurunpa winkingku ngayunya walkuntja wiya alatjitu.

⁹ Tjana ngayunya unytjungku kutju wal̄kulpai,
panya tjana aṛa tjuta walytjangku kutju kulira nintilpai tjukurpa
anangitja tjuta, ngayulanguru wiya.’”*

Alatji Jesulu tjanala wangkangi wati panya Paratji tjutangka munu Moseku tjukurpa nintilpai tjutangka kuļu.

Nyaangku Anangu Kuralpai? (Markaku 7:14-23)

¹⁰ Munu palulanguru Jesulu anangu tjuta altingu kaya ilaringu palula kulintjikitja. Ka paluru tjanala wangkangu alatji, “Ngayulaya kulira nintiriwa!¹¹ Panya paluru tjana kulipai aŋangungku mara paltjintja wiyangku mai mantjira ngalkuntjatjanu kuraringkupai munu nyara palulanguru kuraringkuntytatjanungku Godanya puṭu wal̄kulpai. Palu wiya, panya maingku kukangku anangu palunya puṭu kuralpai. Panya paluru unngu walytjangku kura kulira kutju kuraringkupai munu panya kura wangkapai. Nyara palulanguru paluru puṭu Godanya wal̄kulpai, kura unngu walytjangku kulira, panya nyara palula unnunguru pakara palunya kuralpai. Palu nyara maingku kukangku ma-tjarpara palunya puṭu kuralpai.”

¹² Kaya nintintja tjutangku palula wangkangu alatji, “Nyuntun wanyu kulinu Paratji nyanga tjuta miilarantja tjukurpa nyanga nyuntu wangkanytjitjanguru?”

¹³ Ka Jesulu wangkangu, “Kulilaya! Paluru tjana tjukurpa tjuta anangu tjutangku wangkara nintilpai, palu tjukurpa paluru tjana Godalanguru wiya tjana walytjangku kulira nintintja. Tjukurpa palumpa tjanampa puṇu kura tjuta purunypa, panya watingku palumpa kaanangka puṇu kura tjuta pakaltjingantja wiyangku puṇu palya tjuta kutju pakaltjingalpai munu kura tjuta pakannyangka nyakula palunya tjananya iwiri winki warpuṛa waṇipai. Ka palu purunypa Mama Ilkaritjalu Paratji tjutaku tjukurpa palula tjanala nintintja wiya, munu paluru tjukurpa palunya tjananya uwankara wiyaliku.¹⁴ Ka nyura tjananya kulira wantima panya tjanaya kuru pati purunypa tjutangku nyuranya ngunti katirinanyi, panya kuru patingku anangu kuru pati kutjupa witira katira paluru pulatu piṭi ngaṭingka punkalku.”

* 15:4 Exodus 21:17 * 15:9 Aitjayaku 29:13

¹⁵ Ka Peterlu wangkangu Jesula, “Palu wanyu tjukurpa nyanganpa ngananala wangkara utila kala kulila!”

¹⁶ Ka Jesulu wangkangu tjanala, “Nyura kuļu-manti puļu kulini aņangu kutjupa tjuča purunytju. ¹⁷ Kulilaya! Panya aņangungku mara raputjingku mai mantjira ngalkunnyangka mai paluru tjaawanu tjuningka tjarpara ngaripai munu nyara palulanguru kutjupawanu ma-pakalpai urilkutu. Mai nyara paluru panya tjaawanu tjarpara aņangu palunya kurunpa puļu kuralpai paluru kulira kura palyantjaku. ¹⁸ Palu wanyuya tjaanguru nyanga ngalya-pakantjanya kulila, panya kura wangkanytja! Panya aņangungku kura wangkapai mainguru wiya, palu paluru alatjiū unngu kura kulira kura wangkapai, munu nyara palulanguru kutju paluru Godanya puļu walkuni mara raputjingku mai mantjira ngalkun-tjatjanungku wiya. ¹⁹ Panya aņangungku unngu kura tjuča kulintjatjanungku kura tjuta palyalpai alatjiū, panya paluru kura palyantjikitjangku rawangku kulilpai, munu nyara palulanguru aņangu kutjupa iluntankupai, munu kuri waltytjatjarangka ngaripai munu tjučangka pirtjipai. Munu paluru kutjupa kutjupa waltytjatjara kutitjunkupai, munu ngunti wangkapai, munu tjaalymara ngukara wangkapai. ²⁰ Uwa, kura nyanga palunya tjananya aņangungku unngu kulilpai palyantjikitjangku munu nyara palulangurulta kuraringkula Godanya puļu walkulpai kura nyanganpa unngu kulira palyantjatjanungku. Palu mara paltjintja wiyangku mai mantjira ngalkunnyangka nyakula Godalu kuranmankupai wiya.” Alatji Jesulu tjanala wangkangi palumpa nintintja tjučangka.

*Minyma Ngura Kutjupitja Jesuku Mulamularingkunyta
(Markaku 7:24-30)*

²¹ Munu palulanguru Jesulu ngura palunya wantikatira alinytjara anu tawunu Tayala pulala Tjaitanta itingka unytju nyinanytjikitja. ²² Ka ngura nyara palula minyma Kainanga ngurara pitjangu Jesulakutu munu palula mirara wangkangu alatji, “Davidakun katja, ngalturiwatju! Ngayuku untalpa mamutjara pika pulka nyinanyi.”

²³ Ka Jesulu kulira wantingi paluru wangkanyangka ngapartji wangkanytja wiyangku. Ka minyma paluru rawangku tjananya mirara wañarinangi, kaya nintintja tjučangku Jesula wangkangu, “Paira iyala! Palangkulanya rawangku alatjiutu mirara wañarinanyi.”

²⁴ Ka Jesulu wangkangu, “Wiya, Godalu ngayunya aņangu Israelkunu tjučakutu kutju iyanu, panya paluru tjananya mirara wañarinangi, kaya nintintja tjučangku Jesula wangkangu, “Paira iyala! Palangkulanya rawangku alatjiutu mirara wañarinanyi.”

²⁵ Ka minyma paluru kulira pitjala Jesula tjinangka tultjungarakatira wangkangu, “Mayatja, ngalturingkulatju palyala!”

²⁶ Ka Jesulu wantira palula wangkangu, “Wiya, ngayulu aņangu Jew tjuča palyantja wiyat, mununa nyaaku ngura kutjupitja Jew wiya tjuča-warara palyalku? Wanyu minyma kulila, panya paluru tjitji palumpa tjuča-warara mai ungkula paltjalpai munu palulanguru tjanā paltjaringkunyangka kutju lampi tjuča papa tjuča ungkupai.”

²⁷ Ka minymangku wangkangu, “Uwa mulapa Mayatja, palu panya tjitji tjučangku ngalkunnyangka mai lampi tjuča taipulanguru punkapunkalpai, kaya papa tjučangku ngalkupai.”

²⁸ Ka Jesulu palula wangkangu, “Minyma ngana, wirun wangkangu! Mulapa nyuntu ngayuku pulkara mulamularinganyi, kana palulanguru nyuntu pala mukuringkunyta palyalku.” Ka mulapaṭu palumpa untalpa mapalku palyaringu nyara palula-aratu.

Jesulu Anangu Tjuṭa Palyarunguntja

²⁹ Ka ngula Jesulu ngura panya palunya wantikatira małaku anu uru Galileelakutu munu nyara palula uru kantilypa warara anangi munu paluru pułi murpungka tjukutjuku ma-tatira nyinakatingu. ³⁰ Ka anangu winki mulapa palulakutu pitjangi, munuya pikatjara tjuṭa kułukulu ngalya-katingi panya lurpalpai tjuṭa, kuru pati tjuṭa, nyumpu tjuṭa, tja pati tjuṭa, pina pati tjuṭa kułu munu pika kutjupa kutjupa tjuṭatjara kułu. Munuya ngalya-katira Jesula tjinangka itingka ngaritjunangi, ka tjananya uwankara palyarunguningi. ³¹ Kaya anangu tjuṭangku nyakula nguwankuringu tja patingku wangkanyangka munu lurpalpai tjuṭa palyaringkunyangka, nyumpu tjuṭa para-ngařanyangka, munu kuru patingku nyakunyangka. Munuya Godanya mirawanira walkuningi panya Israelku Godanya.

*Jesulu Piruku Anangu Winki 4,000 Maingka Paltjantja
(Markaku 8:1-10)*

³² Ka palulanguru Jesulu nintintja tjuṭa altira tjanala wangkangu, “Ngayulu ngalturinganyi anangu nyanga tjuṭaku, panya ngayula nyanganpa nyinangi tjintu mañkurpa ka kuwari mai wiya tjanampa ngalkuntjaku. Kaña pułu kulini tjana iwarangka paltjatjiratja ankunytjaku. Tjinguruya ngururpatu uparingkula punkalku.”

³³ Kaya nintintja tjuṭangku palula tjapinu, “Palu yaaltjingkala wanyu mai nyanga pulka mantjilku anangu winki paltjantjikitjangku? Nyangatja ilytji, ngura parari alatjitu.”

³⁴ Ka Jesulu tjanala tjapinu, “Palu mai tampa yaaltjitu nyura wanyu kanyini?”

Kaya wangkangu, “Mai 7 munu kuka antipina mañkurpa kułu.”

³⁵ Ka Jesulu wangkangu anangu tjuṭa mantangka nyinakatinjtaku. ³⁶ Munu mai panya 7 mantjinu kuka panya antipina kułu munu Godanya mainguru panya pukularira walkunu munu palulanguru mai kałantara nintintja tjuṭa ungu anangu tjuṭa para-ungkunytjaku. ³⁷ Kaya uwankarangku mantjira ngalkula paltjaringu, kaya palula małangka nintintja tjuṭangku mai lampi mułun-mułunpa tjuṭa tjana ngalkula wantintjira piți 7-ta tjaalyngarajunu. ³⁸ Uwa, ngura nyara palula wati 4,000-tu mai palunya ngalkunu, winki mulatu. Ka minyma tjitji kułukulu pala palula nyinangitu munuya uwankarangku ngalkula paltjaringu. ³⁹ Ka palula małangka Jesulu anangu uwankara ngurakutu witunu munu pautangka tatira anu ngura ini Makatantakutu.

16

*Anangu Tjuṭangku Jesunya Wituwituntja Miracle Palyantjaku
(Markaku 8:11-13; Luke-aku 12:54-56)*

¹ Kaya wati Paratji tjuṭa munu Tjatjutji tjuṭa kułu Jesulakutu pitjangu munuya palunya ngunti arkara wituwituningi alatji wangkara, “Nyuntunya kunyu Godalu ilkarìnguru witulyanu. Kalanya wanyu nintila munu kutjupa kutjupa witulya pułkangku palyala, kala nyakula kulilk, ‘Munta mulapa wati nyangatja Godalanguru pitjanytja.’”

² Ka Jesulu tjanala wangkangu, “Wiya, wanyuya kulila! Panya kutjupa-ara tjintu ma-tjarpanyangka ngangkali tjuṭa wirura irnyara tjitin-tjitinarpai, ka nyura nyakula wangkapai, ‘Nyawa nyara ngangkali tjitin-tjitinaringu. Tjinguru mungawinki ilkarì ngaraku minangku puyintja wiya.’ ³ Munu kutjupa-ara katjarungkannyangka tjintukutu ngangkali

tjuṭa palu puṛunypaṭu irnyara tjitin-tjitinaripai, ka nyura nyakula wangkapai, ‘Nyawa nyara ngangkali tjitin-tjitinaringu. Tjinguru minangku kuwari puyilkku.’ Uwa, mulapaṭu nyura nintingku wangkapai ilkari nyakula. Palu nyura miracle kutjupa kutjupa tjuṭa nyakula puṭu kulini Godalu kuwari palyannyangka. ⁴ Alatjiṭu nyura kura tjuṭa nyinanyi, Godanya kulira wantipai. Mununi nyura nyaaku rawangku wituwituni miracle kutjupa kutjupa tjuṭa witulyangku palyantjaku? Tjinguru nyura ngayuku nyakula mulamularingkunytjikitja mukuringanyi. Palu wiya, nyura ngayuku puṭu mulamularingkupai munu nyura ngunti arkara tjapini. Ka nyara palulanguru Godalu kutjupa kutjupa nyura nyakunytjaku witulyangku palyantja wiyangku wantinyi, panya paluru ngañmanytju wati wangkatjara ini Jonah-nya iyanu nyura kulira nintiringkunytjaku, ka nyura uti ara nyara palunya kulintatjanumpa nintiringama.”* Munu paluru alatji wangkanytjatjanungku tjananya wantikatingu.

*Paratji Munu Tjatjutji Tjuṭaku Yiitja
(Markaku 8:14-21)*

⁵ Munu paluru pautangka tatinu palumpa nintintja tjuṭangka tjungu munuya uru panya pulkangka ma-itipiringi. Munuya patunguru kutju kulinu nintintja tjuṭangku panya tjana mai katinytjaku watarkuringu. ⁶ Ka Jesulu tjananya wangkara ngulutjunangi alatji, “Purkarangkuya kulinma munuya Paratji, Tjatjutji tjuṭaku yiitja ngulu nyangama.”

⁷ Kaya nintintja tjuṭangku nyangatja kulira tjanankulta wangkara kuliningi, “Nya nyangangku wangkanyi? Tjinguru nganana mai wantiktinyangka paluru alatji wangkanyi.”

⁸ Ka Jesulu nintingku kuliningi panya tjana wangkanytja munu tjanala wangkangu, “Nyaaku nyuranku wangkanyi mai wiya pitjanyt-jatjanungku? Nyura tjinguru ngayuku mulamularingkunytja wiyangku wantinyi. ⁹ Wanyu nyura kuwaripaṭu ngurpa nyinanyi ngayunya kulin-tja wiya? Tjinguru nyura watarkuringu panya ngayulu wati 5,000 pałtjantjitetjaku mai panya nyuma kutjara mañkurta, ka panya tjana ngalkula pałtjaringkunyangka nyura piti tjuṭangka mai tjana wantinytja tjuṭa mantjira tjaalyngaratjunu. ¹⁰ Munu nyura watarkuringu panya ngayulu wati 4,000 pałtjantjitetjaku mai panya 7-ta, ka panya nyura piti tjuṭangkaṭu tjaalyngaratjunu? ¹¹ Ka yaaltji-yaaltji nyangatja nyanga nyura puṭu alatjiṭu kulini ngayulu wangkanyangka? Panya ngayulu nyurala mai wangkanytja wiya, palu panya nyuranya wangkangi Paratji munu Tjatjutji tjuṭaku yiitja purkarangku kulira ngulu nyakunytjaku.”

¹² Kaya palulanguru nintintja panya tjuṭangku kulinulta paluru wangkanyangka, panya nguntiya kuliningi Jesulu yiitja panya mai taltulpainya wangkanyangka-palku. Palu wiya, paluru Paratji munu Tjatjutji tjuṭangku tjukurpa ngunti nintintjaku-tawara tjananya wangkara ngulutjunangi.

*Peterlu Jesunya Godalu Kalkuntjtija Tjukarurungku Wangkanytja
(Markaku 8:27-30; Luke-aku 9:18-21)*

¹³ Ka palulanguru Jesunya tjana anu ngura kutjupakutu munuya tawunu ini Tjiitjariya-Pilipaila wirketu, ka Jesulu nintintja tjuṭangka tjapinu, “Wanyuṇiya tjakultjura! Panya ngayulu Watiku Katjanya, kaṇiya aŋangu tjuṭangku ngananya wangkanyi?”

* **16:4** Nyawa Jonah 1:15—2:6 munu Matthew-ku 12:40.

¹⁴ Kaya palula wangkangi, “Kutjupa tjutangku nyuntunya wangkapai ‘John Baptista’, kantaya tjara kutjupangku wangkapai ‘Ilaitjanya’, kaya tjara kutjupangku wangkapai ‘Jeremiah-nya’, munta tjinguru Godaku wangkatjara irititja kutjupa.”

¹⁵ Ka Jesulu tjanala wangkangu, “Ka nyura ngananya ngayunya wangkanyi?”

¹⁶ Ka Simon Peterlu wangkangu, “Nyuntun Christanya, panya Godalu kalkurā iyantjanya nganañanya wankařunkunytjaku. Nyuntun God tiutjara nyinapaiku katja.”

¹⁷ Ka Jesulu palula wangkangu, “Uwa mulapa Simon Jonah-kunu! Wirungkun wangkangu. Palu nyangatja wati kutjupangku nyuntula nintintja wiya, panya Mama ilkaritjangku nyuntunya nintinnyangka kutju nyuntu wangkangu. ¹⁸ Kulila! Ngayulu manta winkingka añangu tjuña ngayuku walytjaringkunytjaku palyalku, munuña nyuntunya ngurkantara tjunanyi tjananya atunymara kanyintjaku. Panya ini Peternya wangkanyi ‘Walunya.’ Panya walungkaya wali palyalpai kunpu ngaranytjaku, palu purunypa nyuntu añangu ngayuku walytja tjuña kunpungku atunymara kanyilku, kaya ilura miriku ngurakutu ankunytja wiya wankaringkula pakara ngayula tjungu titutjara nyinaku ngayuku walytja uwankara. ¹⁹ Ka Peter, ngayulu nyuntunya key purunypa ungguku, panya wati mayatjangku palumpa war̄karipai kutjupa tjunkupai palumpa wali atunymankunytjaku munu panya waliku key palunya unggupai añangu kutjupa pitjanyangka tuwa alaṛa tjarpatjunkunytjaku, palu purunypa ngayulu nyuntunya tjunanyi añangu kutjupa tjuña ngayulakutu wirkakatinytjaku ngayulu tjananya mayatjangku walytjamarā kanyintjaku. Ka nyuntu mantangka nyanga Godaku walytja tjuña pailku kutjupa kutjupa palyantja wiyangku wantintyntjaku, ka Godalu painnyangka nyakula ilkariringuru pailku. Ka nyuntu mantangka nyanga tjananya wituwitulku kutjupa kutjupa palyantjaku, ka Godalu wituwitunnyangka nyakula ilkariringuru palyanmankukutu.”

²⁰ Munu palulanguru Jesulu tjanala wangkangu alatji, “Kulilaya! Añangu kutjupa tjutangka ngayunya tjakultjunkuwiyangku wantima, panya ngayulu Christanya Godalu panya kalkuntjanya!”

Jesulu Ilunytjikitjangku Wangkanyta (Markaku 8:31—9:1; Luke-aku 9:22-27)

²¹ Nyanga palulanguru Jesulu palumpa nintintja tjutangka ngañmanyiju tjakultjunangi alatji wangkara, “Ngula ngayulu Jerusalemalakutu ankuku, kaya tjukurtjara kuranyitja tjuña, Moseku tjukurpa nintilpai tjuña munu wati tjilpi kutjupa tjuña kuļu ngayuku pulkaṛa kuraringkuku munuñiya witira ungguku wati kura tjuña ngayunya pikantankunytjaku munu pungkula iluntankunytjaku. Palu ngayulu ilunytjatjanu tjiñtu kutjara wi-yaringkunyangka piruku wankaringkula pakalku.” Alatji Jesulu palumpa nintintja tjutangka wangkangi.

²² Ka Peterlu kulintjatjanungku palunya maunṭalpa katira paira wangkangu, “Mayatja, wantima alatji wangkawiyangku! Godalu nyuntunya atunymara kanyilku iluntankunytjaku-tawara.”

²³ Ka Jesulu pinkurarara Peternya painu alatji wangkara, “Ngayulanguru ara! Nyuntun mamu, munun Satanta kulira wangkanyi. Nyuntun añañungku kulintjitja kutju kulini Godalu kulintjitja kulintja wiyangku.”

²⁴ Munu palulanguru Jesulu nintintja tjutangka wangkangu, “Kutjupangku ngayunya wanantjikitja mukuringkulampa uti paluru walytjangku kulira

palyantja wiyangku wantima, munu ngayunya kutju kulira wañanma. Tjinguruya nyuranya iluntankuku ngayunya wañannyangka, ka nyangatja palya, nyura uti ilunytja kulira nguluringkuwiyangku wantima munu ngayunya tungun-tunguntu wañanma titutjarangku. ²⁵ Panya anangumpa mantangka kutju rawa wanka nyinanytjikitja mukuringkulampa paluru ngula ilura wiayingkuku alatji Godala tjunguringkunytja wiya, panya paluru mantaku pulkara mukuringkula ngayunya wantipai munu ilunytjaku kulira nguluringkupai. Palu tjinguru anangumpa nguluringkuwiyangku ngayunya titutjarangku wañannyangkampa tjana palunya pungkula iluntankuku, ka nyara palulanguru paluru ilunyt-jatjanu wankaringkuku munu Godala tjunguringkula titutjara wanka mulapa nyinaku. ²⁶ Palu anangungku mantatja tjuñaku mukuringkula winki mulapa mantjira kanyirampa ngula paluru ilura nyaaringkuku? Wiya, paluru ilura kawankatiku, panya paluru mantatja wiru tjuñaku mukuringkula Godanya wantingi, ka mantatja tjuñangku palunya puñu wankarunanyi Godala tjunguringkula titutjara nyinanytjaku. Panya Godalu anangu kutjupa mantatja tjuña ungkunyangka puñu wankarunanyi wanka titutjara nyinanytjaku. Tjinguru pulka mulapa ungkunyangka Godalu puñu palunya wankarunanyi. ²⁷ Uwa, nyura ngayunya Watiku Katjanya titutjarangku wañanma mantatja kutjupa kutjupa tjuña wantira, panya ngula ngayulu malaku pitjaku angelpa tjuñatjara. Panya Mamalu ngayunya pulkara witulyankuku kana pitalyti pulkangka pitjala anangu uwankara ngurkantara tjaralku. Mununa wiru palyalpai tjuña wiru mu-lapa ungkuku mununa kura palyalpai tjuña paira iyalku ngura kurakutu. ²⁸ Tjukarurungkuña nyurala wangkanyi, panya nyura nyanga kuwari ngaranyi, munu nyura kutjupa tjarangku ngula ilunytja kuwaripangka wankangku nyakuku ngayulu Watiku Katjangku Godaku walytja tjuña mayatjangku kanyinnyangka.” Alatji Jesulu wangkara nintiningi palumpa nintintja tjuñangka kulira mulamularingkunytjaku.

17

Jesunya Puñi Murpu Katu Kutjuparinjtja (Markaku 9:2-13; Luke-aku 9:28-36)

¹ Munu palulanguru tjintu mañkur-mankurpa ngarala wiayingkunyangka Jesulu altingu Peternya munu wati panya kutarara Jamesanya pulanya Johnnga munu tjananya maunthalpa katingu puli murpu katu mulapa. ² Ka nyara palulalta tjanala mirangka Jesunya kutjuparingu. Kaya palunya nyangu yunpa tjintu purunypa pulkara irnyannyangka, ka mantara palumpa piranpa mulararingu munu pulkara irnyanangi. ³ Kaya wati panya mañkurtu nyangu Mosenya pulanya Ilaitjanya utiringkula Jesula tjungu ngarala wangkanyangka. ⁴ Ka Peterlu Jesula wangkangu, “Mayatja, nyanga kuwarila wirura nyangangka ngaranyi. Ka nyuntu mukuringkunyangkala tjinguru wiltja mankurpa palyalku, kutju nyuntumpa, kutju Moseku, munu kutju Ilaitjaku. Palya?”

⁵ Ka Peterlu ngarala Jesula wangkanyangka ngangkali piranpa mulatu ukalingkula tjananya uwankara tjuunu, kaya wangka kulinu ngangkali unngunguru alatji wangkanyangka Godalu, “Nyanganja ngayuku katja. Nyanga palumpana pulkara alatji pukularinyi. Kaya palula wanganarangku kulinma!” ⁶ Kaya nintintja panya mañkurtu wangka kulira pulkara urulyarañu munuya yunpa kutitjura mantangka watungarakatingu.

⁷ Ka Jesulu pitjala tjananya pampura wangkangu, “Pakalaya nguluringkuwiya!” ⁸ Kaya pakara nyangu Jesunya kutju alatjiṭu ngaranyangka kutjupa itingka ngaranytja wiya.

⁹ Munuya pulinguru ukalingangi mantakutu, ka Jesulu tjananya wangkara painu, “Kuwari panya nyura nyakunytjaya aŋangu kutjupa tjutangka tjakultjunkuwyangku wantima. Palu palyaya ngula tjakultjuna nama ngayulu Watiku Katjanya ilunytjatjanu pakannyangka małangka kutju.” ¹⁰ Kaya nintintja tjutangku palula tjapinu, “Nyaakuya panyatja Moseku tjukurpa nintilpai tjutangku wangkapai Ilaitjanya-warara pitjanytjaku?”

¹¹ Ka Jesulu wangkangu, “Uwa, Ilaitjanya mulapa pitjanyi ngañmanypa aŋangu tjutangka wangkanytjikitja kulil-kulilpa patara nyinanytjaku. ¹² Palu tjukarurungkuña nyurala wangkanyi, panya Ilaitjanya ngañmanypa pitjangu, kaya palunya papulara kurara pungangi tjananku pukułmankunytjikitjangku, munuya palu purunymankukuña Watiku Katjanya.”

¹³ Kaya palulanguru nintintja tjutangku kulinulta, “Munta-uwa, nyangangku wati panya John Baptista wangkanyi.”

Jesulu Tjitji Mamutjara Palyarunguntja

(Markaku 9:14-29; Luke-aku 9:37-43)

¹⁴⁻¹⁵ Munuya palulanguru pulinguru ukalingkula mantangka aŋangu tjutangka wirkana, ka wati kutjupa Jesulakutu pitjala tultjungarəkatira palula wangkangu, “Mayatja, ngaluringama wanyu ngayuku katjaku, panya paluru rawa nguwanpa tjinanpungkula witaly-witalyaripai munu kutjupa-ara warungka tjarpapai urungka kuļu.” ¹⁶ Kaña nyuntumpa nintintja tjutakutu katingu, palu puťuya palyaningi.”

¹⁷ Ka Jesulu kuliṛa tjituru-tjitururingu munu tjanala wangkangu, “Nyura mulapa uwankara puťu alatjiṭu mulamularinganyi munu tiṭutjarangku ngunti kulini. Kaña yaaltjiṭu-arangku nyuranya nyinara nintilku nyura kuliṛa mulamularingkunytjaku? Pakuringanyiña nyuranya rawangku nintira nintira. Tjitji palunya ngalya-kati ngayulakutu!” ¹⁸ Munu Jesulu mamu panya tjitjingka unngutja painu ka mapalku pakańu tjitjinguru panya, ka tjitji paluru nyara palulatu palyaringu.

¹⁹ Ka palula małangka palumpa nintintja tjutangku paluru tjana-kutjuringkula Jesula tjapiningi, “Nyaangurula panyatja nganańa mamu puťu painingi?”

²⁰⁻²¹ Ka Jesulu wangkangu, “Wiya, nyura Godaku puťu mulamularingkula rapa tjukutjuku ngaranyi. Palulanguru nyura puťu painingi. Palu wanyuya uňinypa tjukutjuku kulila. Panya mantangka tjunkunyangka uňinypa paluru pakara puńu pułkaringkupai, ka palu purunypa nyura Godaku tjukutjuku mulamularingkulampa nyura puńu nyanga pułkangka wangkaku iwiri winki pakara ankula uru pułkangka ngururpa ngaranytjaku. Ka mulapatu puńu paluru ankuku nyura witunnyangka, munu nyura kutjupa kutjupa tjuṭa mulapalta witulyangku palyalku.”*

Jesulu Ilunytjikitjangku Wangkanytja

(Markaku 9:30-32; Luke-aku 9:43-45)

²² Munuya nintintja uwankara ngura Galileela tjunguringu, ka Jesulu wangkangu tjanala, “Panya wati kutjupangku ngayunya Watiku Katjanya

* ^{17:20-21} Wati kutjupangku kunyu verse 21 walkatjunu munu mala tjungunu Matthew-ku tjukurta alatji: *Palu mamu nyanga palu purunypa nyura mai wantira Godala pułkara tjapira kutju paiklu.*

nintilku wati mirpantju tjutangka, kañiya witirā katira iluntankuku. ²³ Ka ilunytjatjanu wankaringkula pakalku tjintu kutjara wiyaringkula.”

Kaya nintintja tjuta alatji wangkanyangka kulira pulkara tjiturutjitururingu.

Timpulaku Mani Ungkunytjaku

²⁴ Ka Jesunya tjana Kapunimala wirkankunyangka wati timpulaku mani mantjilpai tjuta tjanalakutu pitjangu munu Peterla tjapinu alatji, “Nyurampa nintilpaingku wanyu mani timpulaku ungkupai? Panya ara ngaranyi anangu uwankarangku rawangku ungkunytjaku.”

²⁵ Ka Peterlu wangkangu, “Uwa panya!”

Munu palulanguru tjana ngurakutu anu ka wirkankunyangka Jesulu Peternya wangkangu, “Simon, nyuntu yaaltji kulin? Mantatja tjutaku mayatja tjutangku tax mani nganala tjanalanguru mantjilpai? Tjanampa katja tjutanguru munta anangu nguraritja tjutanguru?”

²⁶ Ka Peterlu wangkangu, “Wiya, anangu nguraritja tjutanguruuya mantjilpai.”

Ka Jesulu wangkangu, “Uwa, ka panya mayatja palumpa tjanampa katja tjutangku tjananya ungkupai wiya. Ka ngayulu kulu mayatja pulkaku katja nyinara tjananya ungkunytjaku wiyatū ngaranyi. ²⁷ Palu palya nyuntu ngali tjananya ungama ngalimpa mirpañarinytjaku-tawara. Ka nyuntu wanyu uru pala pulkakutu ara, munu mukulpa panya kuka antipina witlpainya wanī urungka, munu nyuntu kuka nganmanyitja witirā kuka nyara palula tjaangka unngu nyakuku mani tjiilpa ngarinyangka. Mani pala paluru nyuntumpa ngalimpa timpulaku ungkunytjaku, ka tjananya katira uwa timpulaku mani mantjilpai tjuta.”

18

Ngananya Kuranyitja Pulka Nyinaku?

(Markaku 9:33-37; Luke-aku 9:46-48)

¹ Ka nyara palula ara nintintja tjutangku Jesula pitjala tjapinu, “Godalu ngananya mayatjangku kanyira ngananya wanyu kulin kuranyitja pulka mulapa nyinanytjaku kutjupa tjutangka waintara alatjitu?”

² Ka Jesulu alatji tjapinnyangka kulira tjitji tjukutjuku altingu munu tjanala ngururpa ngaratjunu. ³ Munu wangkangu tjanala alatji, “Tjukarurungkuña nyurala wangkanyi, panya nyura kampa kutjuparira tjitji nyanga purunyarinyangka kutju Godalu nyuranya mayatjangku walytjanmara titutjarangku kanyilku. Palu nyura wantinyangka paluru nyuranya wantiku. ⁴ Ka panya nyura ngayula tjapiningi ngananya wanyu pulka mulapa nyinaku. Palu tjitji nyangaya nyawa munuya wanyu kulila, panya paluru kañany-kañanyarira walytjangku mirawanipai wiya nyinanyi, ka nyura tjitji nyanga purunyarira nyinanyangka kutju Godalu nyuranya pulkanmankuku. Panya tjitji nyangatja ngayuku kurunpa winki mulamularinganyi. ⁵ Ka tjinguru nyura ngayuku nintingku tjitji tjukutjuku nyanga purunypa mantjira pukultu walytjanmankulampa nyura ngayunya kulu walytjanmananyi.

Kura Mulamulangku Wantira Godanya Kutju Pulkara Kulintjaku

(Markaku 9:42-48; Luke-aku 17:1-2)

⁶ “Palu kulilaya! Tjinguru watingku anangu kutjupangka liringka puli pulka tjungura karpira palunya puli winki uru ngattingka waniku, ka alatji wiru wiya, kura alatjitu. Palu tjinguru tjitji ngayuku mulamularingkupai

nyinanyi, ka anangu kutjupangku palunya wituwitulku kura palyantjaku, ka alatji wiru wiya kura pulka mulapa nyara urungka wañintjitungka mun̄kara mulapa. Panya piña pulka mulapa utiringkuku anangu nyara palumpa paluru tjiti tjukutjuku nyanga purunypa kuraringkunytjaku palyannyangka. ⁷ Uwa, manta winkingka anangu kura tjuṭa nyinanyi munuya paluru tjana rawangku anangu kutjupa tjuta ngayulanguru mukumukura mañṭara katipai. Palu anangu nyara palunya tjananya Godalu pulkara alatjitu pungkuku anangu tjuṭa ngunti kurantjitunguru. ⁸ Ka nyura uti kura tjuṭa wantintjikitjangku pulkara kulinma munu wantima alatjitu kuraku piruku mukuringkunytja wiyangku. Tjinguru nyuntu marangku kura kutjupa kutjupa palyalku. Palu uti nyuntu mara kaṭara wañima kura rawangku palyantjaku-tawara, munu palyalta mara wiya nyinama, panya nyuntu mara winkingku kura rawangku palyannyangka Godalu nyuntunya ngura kurangka wañiku waru pulkangka. Munta tjinguru nyuntu tjinangku kura kutjupa kutjupa palyalku. Palu uti nyuntu tjina kaṭara wañima kura rawangku palyantjaku-tawara, munu palyalta tjina wiya nyinama, panya nyuntu tjina winkingku kura rawangku palyannyangka Godalu nyuntunya palu purunypaṭu ngura kurangka wañiku waru pulkangka titutjara kampanytjaku. ⁹ Munta tjinguru nyuntu kurungku kutjupa kutjupa nyakula kura palyalku. Palu uti nyuntu kuru warpura wañima kura rawangku palyantjaku-tawara munu palyalta kurutjara nyinama, panya nyuntu kuru winkingku kura rawangku palyannyangka Godalu nyuntunya ngura kurangka wañiku waru pulkangka.” Alatji Jesulu tjananya wangkara ngulutjunangi kura mulamulangku wantintjaku munu Godanya kutju pulkara kulintjaku.

Tjukurpa Tjiipi Kawankatinytja (Luke-aku 15:3-7)

10-11 Munu Jesulu piruku tjanala wangkangu, “Tjitji tjukutjuku nyanga purunypaya analwiyangku wantima, panya ngura ilkariningka nyanga palumpa tjanampa angelpa tjuṭa ngayuku mamangka tjungu titutjara nyinanyi.”*

12 Munu piruku tjukurpa kutjupa kampa kutjupara wangkangu alatji, “Nyaa nyura kulini? Panya watingku tjiipi 100 kanyini, ka tjinguru tjanalanguru kutju kawankatinyangka wanyu paluru wantiku? Wiya, paluru 99 panya ukiri ngalkunnyangka wantikatira ankula tjiipi panya palunya ngurilku. ¹³ Munu paluru ngurira nyakula mantjira pulkara alatjitu pukulariku. Panya paluru 99 ngurangka nyinanytja tjuṭaku pukularipai, palu tjanala mun̄kara mulapa paluru pukulariku tjiipi panya kutjuku panya paluru ngurira mantjintjitetjaku. ¹⁴ Ka tjitji nyanga tjuṭa tjiipi purunypa nyinanyi, ka nyara tjiipi atunymankupai purunypatu nyurampa mama ilkaritja tjitji nyanga palumpa tjanampa pulkara mukuringanyi, munu paluru kawalirinyangka wantintjaka wiyangku ngurira mantjira wankarunkunytjikitja mukuringkupai.

Godaku Walytja Kutjupangku Nyuntunya Kurannyangka Alatjinama (Luke-aku 17:3)

15 “Tjinguru Godaku walytja kutjupangku nyuntunya kuralku. Ka nyuntu uti palulakutu anama munu paluru nyupali mañṭalpa tjunguringkula

* **18:10-11** Watu kutjupangku kunyu verse 11 walkatjunu, munu mala tjungunu Matthew-ku tjukurta alatji Panya Watiku Katjanya anangu kawalirinytja tjuṭa ngurira mantjintjikitja pitjangu tjananya Godaku ngurpa nyinanyangka.

nyuntu palunya purkarangku wangkara nintinma panya paluru nyuntunya kurantjangu. Ka paluru tjinguru nyuntula kulira kuntasringkuku munu nyuntumpa malaku kalyparingkuku. ¹⁶ Palu tjinguru paluru kulilwiyangku wantinyangkampa nyuntumpa malpa kutju munta kutjara alti munuya tjungungku ankula anangu panya palula wangka. Panya nyiringka iriti walkatjunkunytja ngaranyi alatji,

‘Tjinguru nyuntu anangu kutjupa nyuntunya kurantjangu puntura wangkanytjikitja mukuringanyi. Munu uti nyuntu kutjungku ankula wangkanytja wiya, palu anangu kutju, munta kutjara nyuntunya kuran-nyangka nyakunytjtja kulu palulakutu ngalya-kati munuya mankurtu palunya wangkama.’

¹⁷ Ka rawangku kulira kuntasringkuwiyangku wantinyangkampa palunya Godaku waltyja tjutakutu katira tjutangka mirangka wangka. Ka palu purunypa tju tangka mirangka tungun-tungunpa ngaranyangkampa palya palunya kuranmara painma. Panya paluru anangu mantatja kulipai tju ta purunypa nyinanyi Godaku mulamularingkupai wiya, wati panya kamantaku mani mantjilpai tju ta purunypa.”

Mankurpa Tjunguringkunyangka Jesunya Tjanala Tjungutu Ngaranyi

¹⁸ Munu Jesulu piruku tjanala wangkangi palumpa nintintja tju tangka panya, “Kulinmaya! Tjukarurungku na nyurala wangkanyi tjukurpa nyangatja. Nyura tjinguru mantangka nyanga Godaku waltyja kutjupa pailku kutjupa palyantja wiyangku wantintjaku, ka Godalu ilkareringuru nyakula pailku. Ka tjinguru nyura mantangka nyanga tjananya wangkaku kutjupa palyantjaku, ka Godalu ilkareringuru nyakula palyanmankuku.

¹⁹ “Piruku na nyurala wangkanyi alatji, tjinguru anangu kutjarangku tjunguringkula wangkara kulira palyanmankula Mamala tjapilku, ka Mama Ilkaritjalu kulintja kutjuringkula tjapinnyangka kulira pulampa palyalku alatjitu. ²⁰ Panya anangu kutjara munta tjinguru mankurpa ngayuku mulamularingkula paluru tjana tjunguringkunyangka ngayulu tjanala tjunguringkula alatjitu ngaraku.”

Anangu Tju taku Ngalturingkunytjaku

²¹ Ka Peterlu ilaringkula Jesula tjapinu, “Mayatja, Godaku waltyja kutjupangku ngayunya rawangku kurannyangkampa ngayulu yaaltjitu-arangku palunya kalypangku wantiku pungkuwiyangku? 7-arangku na wantiku mununa ngula piruku kurannyangkampa nyaalku? Pungku.

²² Ka Jesulu wangkangu, “Wiya, 7-arangku wiya. Palu wantima alatjitu kalypangku ngula piruku pungkunytjikitjangku kulintja wiyangku.

²³ Panya Godalu anangu tju ta mayatjangku waltyjanmara kanyintja ara nyanga palu purunypa ngaranyi. Panya wati mayatja pulka nyinangi munu paluru wati kuranyitja tju ta mani unytjungku ungpupai ngula malakungku ungpunytjaku. Munu kutjupa-ara paluru kulinu, ‘Wanyu ka na kuwari nyiringka panya nyawa wati nganaluni panyatja ngapartji ungpunytjaku ngaranyi.’ ²⁴ Munu nyiri alara ini tju ta nyakula wanara ini kutju nyangu, panya ini paluru mani pulka mulapa palunya malakungku ungpunytjaku ngarangi. Ka mayatjangku palumpa warika kutjupa witunu ini panya palunya ankula ngalya-katintjaku. Ka ankula wati panya palunya altira ngalya-katingu. ²⁵ Ka wati panya paluru putu kulinu ngapartji ungpunytjikitjangku tjukutjuku kanyintjatjanungku. Ka mayatja panyangku wangkangu, ‘Wati nyanga palunya kuri tjitji winki munu

paluru kanyintja uwankara kuļu katira aŋangu kutjupangka tjalamilanma manikitjangku munuṇi mani mantjira ngayunya ngapartji uwa.’²⁶ Ka wati panya paluru mayatjangka tultjungarəkatira wangkangu, ‘Wanyu kuwaripa purkara paṭala, kaṇanta uwankara malakungku purkarəngku ungukukatima!’²⁷ Ka mayatja panya palumpa ngalturingu, munu kaly-pangku wantira iyanu ka anu.

²⁸ “Munu ma-pakaṛa wati war̄ka kutjupa nyangu munu kulinu, ‘Wati nyanga palunya panyaṇa mungaṭu mani tjukutjuku ungu, kanı ngapartji ungpunytja wiyatū.’ Munu wati panya palunya witirā lirintara wangkangu, ‘Walangkuṇi uwa ngapartji panya mungaṭuṇanta ungu!’²⁹ Ka wati panya war̄karipaingku palula tultjungarəkatira palula ngatjirā wangkangu, ‘Mayatja! Wanyu kuwaripa purkara paṭala, kaṇanta ngula uwa!’³⁰ Palu wati panyangku kulirā wantingu palumpa ngalturingkunytja wiyangku alatjiṭu, munu palunya tjalangka tjarpatjunu tjaila unngunguru payamilara wiyanṭjaku.³¹ Kaya war̄karipai kutjupa tjuṭangku alatjirinyangka nyakula mirpaṇaringu munuya ankula mayatja panya pulkangka uwankara tjakultjunu tjana nyakunytjatjanungku.³² Ka mayatjangku panya wituṇu wati palunya altinyytjaku, kaya altirā wirkakatingu. Ka mayatjangku panya palula wangkangu, ‘Nyuntun wati kura mulapa! Panya nyuntu ngayunya pulka mulapa malakungku ungpunytjaku ngaranyi, kaṇanta ngatjinniyangka kalypangku wantir’iyanu.³³ Kan uti nyuntu ngapartji wati panya war̄ka kutjupaku ngalturingamatu ngayulu purunypa.’³⁴ Munu mayatja panya paluru palumpa pulkara alatjiṭu mirpaṇaringu munu palumpa warkangka wangkangu, ‘Wati nyanga palunya tjaṭlakutu ma-kati, kaya tjaṭlji tjuṭangku palunya pulkara puwa. Ka nyara tjalangka nyinara paluru mani panya palunya uwankara ngayunya malakungku ungpunytja wantikulu pakalku.’”

³⁵ Munu Jesulu nyangatja wangkara wiyingkula tjanala wangkangu, ‘Ngayuku mama ilkaritja mayatja nyanga palu purunypa nyinanyi. Panya nyura ngaltunytjungku aŋangu tjuta kalypangku wantinyangka paluru ilkariringuru nyuranya kalypangkuwantiku, palu nyura tjanampa kalyparingkunytja wiya rawa kuraringkunyangkampa paluru nyurampa kalyparingkunytja wiyangkuwantiku.’”

19

Kuri Wantikatiwiyangku Wantima

(Markaku 10:1-12)

¹ Munu tjukurpa nyanganpa wangkara wiyingkula Jesunya ngura Galileena wantikatira ulpariralku anu manta panya Judealakutu munu nyara palulanguru pirkku kakaraṛa anu karu panya urutjara ini Jordantakutu munu itipirira ma-wirkanu karungka kampa kutjupa.² Ka aŋangu winki mulatu palunya waŋaningi, ka ngura nyara palula paluru pikatjara tjuṭa palulakutu katinyangka palyarunguningi.

³ Kaya wati Paratji tjuṭa palulakutu pitjangu munuya palunya ngunti arkara tjapiningi alatji wangkara, “Wanyulanya tjakultjura! Mulapa wanyu watingku minyma kuri wantinytjaku ngaranyi ara kutjupa kutjupanguru? Mulapa wanyu Moselu alatji wangkangu?”

⁴ Ka Jesulu tjanala wangkangu, “Nyiringka nyura wanyu nyakunytja wiyatū? Panya kuwaripatjara mulapa Godalu aŋangu paluṇu wati munu minyma.⁵ Ka nyanga palulanguru panya watingku mama ngunyutju wantikatira minyma kuri altirā pula kutjuringkupai.⁶ Uwa, panya kutjara

ngaranytjatjanu kutjuringkupai, ka pala palulanguru uti wati palumpa kuringuru tjararingkunytja wiya palula tjungu titutjara nyinama, panya Godalu wati palunya minyma kuringka tjungunu.”

⁷ Kaya Paratji tjutangku wangkangu, “Wiya, panya Moselu walkatjunu alatji, ‘Watingku kuri wantintjikitja mukuringkula uti nyiringka walkatjura ungama minyma panya palumpa kuri nyiri mantjira ankunytjaku.’ Nyaanguru paluru alatji walkatjunu?”

⁸ Ka Jesulu wangkangu, “Wiya, panya kuwaripatjara mulapa Godalu wati minyma palyanu tjungu titutjara nyinanytjaku wantikatinytja wiya. Palu nyura panya tungunpungkula wituwitu nyinanyangka Moselu tjukurpa nyangatja walkatjunu kuri wantikatinytjaku. ⁹ Palu ngayulu nyurala wangkanyi alatji tjinguru minyma kuri wati kutjupangka kampangkaṭu ngarinyangka wati panya palumpa kuringku palunya palya wantikatinyi. Palu minyma kuri palya nyinanyangka wati panya palumpa kuringku palunya wantikatira minyma kutjupa altira kura palyani Godalu wangkanytjjangka tungunpungkula.” Alatji Jesulu tjanala wangkangi Paratji panya tjutangka.

¹⁰ Ka palumpa nintintja tjutangku tjukurpa nyanga palunya kulintjatanungku ngulalta palula wangkangu, “Munta-uwa, minyma kuri wati kutjupangka kampangkaṭu ngarinyangka kutju wantikatinytjaku ngaranyi kutjupa kutjupa tjutanguru wiya, ka nyanga palulangurula kulini kampa kutjupa palyatu ngaranyi kuri altiwiya kutju nyinanytjaku.”

¹¹⁻¹² Ka Jesulu wangkangu, “Uwa, panya wati kutjupa tjuṭa kuri wiya nyinapai kutjupa kutjupa tjutanguru. Panya kutjupa tjarangku tjitji puṭu utilpai, ka tjinguru kutjupatjara tjitji utintjaku-tawara kutjupangku palyanu tjana kuri wiya alatji-alatjitu nyinanytjaku. Ka kutjupa tjarangku kuri altintjta wiyangku wantipai Godaku war̄ka kutju palyantjikitjangku. Ka tjinguru nyara palu purunyapa nyinanytjaku Godalu wati kutjupangka wangkanyangkampa uti wati paluru wangañarangku kuliṛa kuri altiwiya nyinama. Palu tjinguru wati kutjupa kuri altintjikitja mukuringkulampa uti paluru ngayulu panya wangkanytjitia wangañarangku kulinma munu minyma kuringka tjungu titutjara nyinama palunya wantikatinytja wiya.”

Jesulu Tjitji Tjuṭa Altintj (Markaku 10:13-16; Luke-aku 18:15-17)

¹³ Kaya anangu tjutangku tjitji tjuṭa ngalya-katingu Jesulakutu tjanala mara tjunkula wangkara tjananya pukulmanytjaku. Kaya nintintja tjutangku anangu palunya tjananya painu.

¹⁴ Ka Jesulu nintintja tjutangka wangkangu, “Tjitji tjukutjuku tjuṭa ngayulakutu pitjanyangka nyakulaya paintja wiyangku wantima! Panya anangu tjuṭa tjitji nyanga tjukutjuku tjuṭa purunyapa nyinanyangkampa Godalu tjananya mayatja pulkangku walytjanmara kanyilku.” ¹⁵ Munu alatji wangkara paluru tjitji palula tjanala mara tjunkula tjananya pukulmanu, munu palulanguru anu.

Wati Mani Ulytja Pulkatjara (Markaku 10:17-31; Luke-aku 18:18-30)

¹⁶ Ka tjin̄tu kutjupa wati yangupala kutju Jesulakutu pitjangu munu palula tjin̄pinu, “Nintilpai! Nyaan̄a wiru mulapa palyalku Godala tjunguringkula wanka titutjara nyinanytjikitjangku?”

¹⁷ Ka Jesulu palula ngapartji wangkangu, “Nyaakunin alatji tjin̄pin? Panya Godanya kutju palya mulapa nyinanyi. Ka panya nyuntu wanka

tiṭutjara nyinanytjikitja mukuringkulampa paluru wituntjtja tjuṭa wan-gaṇarangku kulira palyanma.”

¹⁸⁻¹⁹ Ka wati panya paluru piruku tjapinu, “Palu wanyuni tjakultjura, wituntjtja yaaltjiṇa tjukarurungku palyalku?”

Ka Jesulu palula wangkangu, “Miri pungkuwiyangku wantima, kuri waltyatjarangka ngariwiyangku wantima, waltyatjara kutitjunkunytja wiyangku wantima, aŋangu kutjupa ngunti ngukara wangkawiyangku wantima, mamangka ngunyntjungka wangaṇarangku kulinma, munu aŋangu kutjupa tjuṭaku pulkara mukuringama nyuntunku mukuringkun-ytja purunyapa.”

²⁰ Ka wati panya paluru kulira wangkangu, “Wiya, tjukurpa nyanga palunya tjananya uwankara ngayulu wangaṇarangku kulinngi. Mununa nyaa piruku palyalku wanka tiṭutjara nyinanytjikitjangku?”

²¹ Ka Jesulu palula wangkangu, “Nyuntu palya mulapa nyinanytjikitja mukuringkula uti ankula nyuntu panya kanyintja uwankara ma-ungama manikitjangku munu mani mantjira ngaltutjara tjuṭa para-ungama, mununi palulanguru pitjala ngayunyalta waṇanma. Munun nyuntu nyara palulanguru ngula ilkaringka wiru mulapalta mantjilku.”

²² Ka wati paluru tjukurpa nyangatja kulira pulkara ttituru-ttitururira anu, panya paluru mani ulytja kutjupa kutjupa pulkatjara alatjiṭu nyi-nangi, munu palunya tjananya waltyangku kanyintjikitja mukuringanggi.

²³ Ka wati paluru ankunyangka nyakula Jesulu nintintja tjuṭangka wangkangu, “Tjukarurungkuṇa nyurala wangkanyi, panya wituwitu mu-lapa ngaranyi aŋangu mani munu ulytja pulkatjara tjuṭaku, panya tjana mani ulytja kuļu pulkara kulira puṭu Godaku waltyjaringanyi paluru tjananya mayatjangku kanyintjaku. ²⁴ Kulilaya! Panya nyilangka aļa utju mulapa ngaranyi. Ka aļa nyara palulawanu wanyu kamula tjarpapai? Wiya alatjiṭu. Ka palu purunypaṭu aŋangu mani ulytja pulkatjara tjuṭa puṭu Godaku waltyjaringanyi paluru tjananya mayatjangku kanyintjaku.”

²⁵ Kaya nintintja tjuṭangku kulira kawaru-kawaruringu munuyanku ngaparku tjapiningi, “Palu Godalu aŋangu mani pulkatjara tjuṭa wantirampa tjinguru aŋangu kutjupa uwankara kuļu ngura kurakutu iyalku wankarunkunytja wiyangku.”

²⁶ Ka Jesulu tjananya tjukarurungku nyakula wangkangu, “Uwa, aŋangu puṭu waltya wankaringanyi, palu Godalu kutjungku wankalpai.”

²⁷ Ka Peterlu wangkangu, “Kulila, panya nganaṇa kutjupa kutjupa uwankara wantikatira pitjangu nyuntunya waṇantjikitja mukuringkula. Kalanya Godalu wanyu nyaa ungkuku?”

²⁸ Ka Jesulu wangkangu, “Ngula manta ilkarī nyangatja wiyaringkun-yangka Watiku Katjanya mayatja pulka tjiya wirungka nyinaku manta ilkarī kuwaritjangka. Ka nyura ngayuku nintintja panya 12 palu purunypaṭu tjiya wiru tjuṭangka kutju kutju nyinaku munu nyura aŋangu panya Israelkunu tjuṭa mayatjarira kanyilkku waltyjapiti kutju kutju wati panya Jacobaku katja 12-nguru. ²⁹ Ka panya ngayunya waṇantjikitjangku nyura tjinguru nyurampa walī, munu kuṭa, kangkuru tjuṭa, mama, ngunytyu, tjiṭi tjuṭa, kaana kutjupa kutjupa tjuṭa kuļu wantikatingu. Ka nyara palulanguru Godalu watarkuriwiyangku nyuranya pulka mulapalta ungkuku, ka nyura palula tjungu wanka tiṭutjara nyinaku. ³⁰ Ka panya kuwari aŋangu tjara kutjupa pulka nyinanyi, ka tjara kutjupa ngaltutjara nyinanyi. Palu ngula pulka nyinanytjatjanu tjana tjukutjukuringkuku, ka

panya tjana ngapartji ngaltutjara nyinanytjatjanu pulkaringkuku.” Alatji Jesulu wangkangi palumpa nintintja tjuṭangka.

20

Tjukurpa Panya Warka Tjuṭa Altintytjatjara

¹ Ka Jesulu wangkangu, “Wanyu, kaña tjukurpa kutjupa kampa kutjupara wangkama aña panya Godalu aŋangu tjuṭa mayatjangku walytjanmaṛa kanyintja utintjikitjangku alatji, panya wati kutjupangku kaana wiru mulapa kanyiningi mai kiripitji tjutatjara. Munu tjintu kutjupa paluru mungawinki mulapa anu tawunukutu wati tjuṭa ngurintjikitja palumpa kaanangka pitjala waṛkarinytjaku. ² Munu ankula nyangu wati tjuṭa warkaku paṭara ngaranyangka, munu tjananya altira wangkangu, ‘Pitjalaya ngayuku kaanangka waṛkari, kaña nyuranya waṛkarira mungartjirinyangka \$50 ungkuku.’ Kaya kulira palyanmanu. Ka tjananya witunu ankula waṛkarinytjaku. ³ Munu palulanguru tjirirpi katuringkunyangka piruku anu wati kutjupa tjuṭa ngurintjikitja, munu nyangu kutjupa tjuṭa waṛka wiya ngaranyangka. ⁴ Munu tjananya wangkangu, ‘Nyaaku nyura waṛka wiya ngaranyi? Ankulaya ngayuku kaanangka waṛkari, kaña nyuranya waṛkarira mungartjirinyangka tjukarurungku ungkuku.’ ⁵ Kaya mulapatu ankula warkaringi. Ka kalalarinyangka mayatja panya paluru piruku tawunukutu ankula wati kutjupa tjuṭa nyakula witunu ankula waṛkarinytjaku. Munu mungartjikutu kuļu piruku ankula palu puṛunypaṭu wati kutjupa tjuṭa witunu ankula palumpa kaanangka waṛkarinytjaku. ⁶ Munu wiltja wararingkunyangka pirukutu anu munu wati kutjupa tjuṭa nyangu waṛka wiya ngaranyangka. Munu tjanala wangkangu, ‘Nyaanguru nyura waṛka wiya ngarala mungartjiringu?’ ⁷ Kaya wangkangu, ‘Wiya, kutjupangkulanya altintyja wiyatū waṛkarinytjaku.’ Ka tjananya wangkangu, ‘Uwa, nyura kuļu ankula warkari ngayuku panya kaanangka.’ Kaya mulapatu ankula warkaringi. ⁸ Ka panya tjintu tjarpanyangka wati panya mayatjangku wati waṛka tjuṭa atunymankupai altingu munu palula wangkangu, ‘Waṛkaripai pala tjuṭa altira mani uwa. Munu mała pitjanytja tjuṭawarara uwa, munu ngururpa pitjanytja tjuṭa uwa munu palulangurulta mungawinki mulapa pitjanytja tjuṭa mała uwa.’

⁹ “Ka wati paluru mała pitjala tjukutjuku waṛkarinytja tjuṭa altingu munu tjananya kutju kutju ungu \$50. ¹⁰ Kaya mungawinki mulapa pitjanytja tjuṭangku ungkunyangka nyakula kulinigi, ‘Uwa, tjananya \$50 ungu, palu nganaŋanya kuvari pulka nguwanpa unganyi nganaŋa rawa waṛkarira mungartjirinytjitungka.’ Palu tjananya uwankara palu puṛunypaṭu kutju kutju ungu \$50. ¹¹⁻¹² Kaya mani mantjira mirpañaringi munuya wangkangi mayatja panya palula alatji, ‘Wati nyaranpa panya wiltja wararingkunyangka kutju pitjala tjukutjuku kutju warkaringi, kala nganaŋa mungawinkinguru alatjitu kuli pulkangka waṛkarira mungartjiringu, kantilanyan muŋkara nguwanpa ungama. Nyaakulanyan palu puṛunypaṭu uwankara ungu?’ ¹³ Ka mayatja panya paluru wati kutjungka wangkangu, ‘Kulila, ngayulu nyuntunya kurara ungkunytja wiyangku tjukarurungku ungu, panya ngañmanytjuŋanta wangkangu \$50 ungkunytjikitjangku tjintu kutju waṛkarinyangka, ka panyan kulira palyanmanu. ¹⁴ Mununku mani nyanga mantjira ngurakutulta ara! Ngayulu panya mukuringanyi wati nyanga mała pitjanytja tjuṭa \$50

ungkunytjikitja nyuntunya purunypa^{tu}. ¹⁵ Palya palana alatji^{tu} intjanungku ungu ngayulu mukuringkula, panya nyangatja ngayuku mani kana ngayulu mukuringkula ungkupai. Ka nyura nyaaku mirpañarinyi? Tjingu^{ru} nyura nyararinganyi ngayulu tjananya intjanungku ungkunyangka.’ Uwa, nyanga palu purunypa Godalu palumpa walytja uwankara palu purunypa^{tu} mukulya pulkangku kanyilpai.”

¹⁶ Munu Jesulu tjukurpa wangkara wiyingkula tjanala alatji wangkangu, “Uwa, mulapa kuvari anangu tjara kutjupa pulka nyinanyi, ka tjara kutjupa ngaltutjara nyinanyi. Palu ngula pulka nyinanytjatjanu tjana tjukutjukuringkuku, ka panya tjana ngapartji ngaltutjara nyinanytjatjanu ngula pulkaringkuku.”

*Jesulu Piruku Ilunytjikitjangku Wangkanytja
(Markaku 10:32-34; Luke-aku 18:31-34)*

¹⁷ Munuya piruku Jesunya tjana nintintja tju^{ta} ku^{lu}ku^{lu} anu Jerusalemalakutu munu tjanala-kutju wangkangi alatji ¹⁸⁻¹⁹ “Kulilaya! Nganana nyanga kuvari ananyi Jerusalemalakutu, ka nyara palula wati kutjungku malpangku ngayunya Watiku Katjanya nintilku tjukurtjara kuranyitja tjutangka munu Moseku tjukurpa nintilpai tjutangka kulu, kaniya witira katira kuutpangka ngaratjunkuku munuⁿⁱya kuranmara kukanyamankunytjatjanungku ngayunya wati Jew wiya tju^{ta} ma-ungkuku ngayunya iluntankunytjaku. Kaniya wati nyara paluru tjana ngayunya ana^{ra} wangkaku, munuⁿⁱya wiipangka pulkara alkalku, munuⁿⁱya palulan-gurulta ngayunya katira pu^{nu} katakutjarangka wakara utitjunkuku, kana iluku. Palu tjintu kutjara wiyingkula ngayulu ilunytjatjanu wankaringkula pakalku.”

*Tjipitiku Kuringku Jesula Tjapintja
(Markaku 10:35-45)*

²⁰ Ka Tjipitiku kuringku katja kutjara Jesulakutu katingu wati panya Jamesanya pulanya Johnnga, munu tultjungarakatira palula tjapinu alatji wangkara, “Nyuntula tjapintjikitja^{na} pitjangu.”

²¹ Ka Jesulu wangkangu, “Uwa, nyaa ngayula tjapintjikitjan mukuringanyi?”

Ka wangkangu, “Wiya, ngula panya nyuntu mayatjarira nyinara, ngayuku nyanga katja kutjara nyuntula itingka tjunkunytjakuna mukuringanyi, kutju wakungka, kutju tjampungka, paluru pula nyuntula itingka nyinara, anangu tju^{ta} mayatjangku kanyintjaku.”

²² Ka Jesulu pulala wangkangu, “Wiya nyupali ngurpangku tjapini nintingku-palku. Panya kuvari ngayulu pika pulka mantjini. Ka nyupali wanyu ngayula tjunguringkuku munu pika pulkatu mantjilku?”

Ka pulala wangkangu, “Uwali.”

²³ Ka Jesulu wangkangu, “Uwa, mulapa nyupali pika pulka mantjilku munu iluku ngayunya purunypa. Palu panya ngayula wakungka munu tjampungka mayatjarira nyinanytjaku ngayulu putu ngurkantananyi, panya ngayuku mamangku kutjungku nganmanyiju ngurkantanu ngayula itingka nyinanytjaku.”

²⁴ Kaya nintintja panya kutjupa tjutangku paluru pula Jesula ngatjinnyangka kulira palumpa pulampa mirpañaringu. ²⁵ Ka Jesulu tjananya uwankara^{tu} altira wangkangu, “Nyura ninti panya mayatja mantatja tjutaya anangu alatji^{tu} mayatjarira nyinanyi munuya anangu tju^{ta} wituwitura pauntjingalpai kutjupa kutjupa tju^{ta} tjanampa palyantjaku. ²⁶ Ka nyura palunya tjananya arkalwiyangku wantima. Munu

nyura tjinguru mayatja pulka nyinanytjikitja mukuringkulampa uti anangu warkaripai purunypa nyinama munu kutjupa tjuta alpamilara palumpa tjanampa palyanma. ²⁷ Uwa, nyura kuranyitja nyinanytjikitja mukuringkulampa uti kutjupa tjutaku warkarima palunya tjananya pukulmankunytjikitja. ²⁸ Tjinguru nyura kulini Watiku Katjanya-manti pitjangu mayatjarira anangu tjuta warkaku wituwituntjikitjampa. Palu wiya, ngayulu pitjangu anangu tjutaku waṛka pulka palyara tjanampa ngalkilpa ilunytjikitja tjana wankaringkunytjaku.” Alatji paluru wangkangi palumpa nintintja tjutangka.

*Jesulu Wati Kuru Pati Kutjara Kuru Alantja
(Markaku 10:46-52; Luke-aku 18:35-43)*

²⁹ Munu Jesunya tjana nintintja tjuta kulukulu ngura panya Jerichonya wantikatira ma-pakannyangka anangu tjuta mulatu tjananya wañaningi. ³⁰ Ka wati kuru pati kutjara iwara pala palula itingka nyinangi munu pula kulinu Jesunya iwarangka wati-pitjanyangka munu pula mirara wangkangu, “Davidakun katja! Ngalturiwalimpa!”

³¹ Kaya anangu tjutangku pulanya painu pilunarinytjaku. Palu wati paluru pula pulkaratu mirara wangkangi, “Davidakun katja! Ngalturiwalimpa!”

³² Ka Jesulu miranyangka kuliṛa ngarakatingu munu pulanya altira tjinpinu, “Ngayulu nyaantjaku nyupali mukuringanyi?”

³³ Ka pula wangkangu, “Mayatja! Ngali kuru alaringkula nyakunytjikitja mukuringanyi.”

³⁴ Ka Jesunya pulampa pulkara ngalturingu, munu pulanya kuru pampunu, ka pula mapalku kuru alaringkula nyangangi munu pula palunya wañanu.

21

*Jesunya Tangkiyingka Tatira Jerusalemalakutu Pitjanytja
(Markaku 11:1-11; Luke-aku 19:29-38; Johnku 12:12-19)*

¹⁻² Munuya Jesunya tjana nintintja tjuta kulu Jerusalemalakutu ma-ilaringkula puli ini Alipatjarala katukutu tatira ma-wirkanu ngura tjukutjukungka itingka ini Piitja-paitjala. Ka ngura nyara palulanguru Jesulu nintintja kutjara witura iyanu alatji wangkara, “Ara pula kuranyu ngura pala ilatjakutu munu wirkara nyupali nyakuku tangkiyi kulunykira karpintja ngaranyangka. Nyara palunya pulanya pula araltjara ngalyakati. ³ Ka tjinguru anangu kutjupangku nyupalinya nyakula tjapilku, ‘Nyaaku nyupali araltjananyi?’ Ka pula alatji wangka, ‘Wiya, Mayatjanya nyanga palumpa pulampa mukuringanyi.’ Ka paluru nyupalinya mapalkungku ungkul’iyalku.”

⁴ Uwa, ara nyanga tangkiyitjara Godalu ngañmanytju tjakultjunu wati wangkatjara kutjupangka, ka panya nyiringka iriti walkatjunu nyanga alatji,

⁵ “Tjanala wangka ngura Tjayanta nyinanytja tjutangka nyanga alatji, ‘Nyawaya! Nyurampa mayatja pulka kuwari nyurala wirkananyi. Paluru ngaltutjara purunyarira tangkiyingka tatira pitjanyi kañanya-kañanya wiya.

Uwa, paluru nyuralakutu pitjanyi tangkiyi kułunytja tatira.’ ” *

* **21:5** Tjakarayaku 9:9

⁶ Ka nintintja panya kutjarangku kulira anu munu pula Jesulu panya wangkanytjitja alatjitu palyanu. ⁷ Munu pula tangkiyi kułunykira mantjira wirkakatingu palulakutu. Kaya nintintja tjułangku upukuta tjananku arara tangkiyingka tjanangka piitatjunu ka Jesunya tatira nyinakatingu. ⁸ Ka paluru tatira pitjanyangka aŋangu tjułangku palumpa pulkara pukularira tjanampa upukuta tjuta araltjara iwarangka lipira tjunkula wañaningu palula kuranyu. Kaya tjara kutjupangku puŋu parka kaṭara palu purunypatu tjunkula wañaningu. ⁹ Kaya aŋangu winkingku kuranyunguru munu malanguru pukularira mirara wangkangi alatji, “Mirawañirala walkunma Davidaku katja!

Mayatja God, nyanga palunya pulkara pukulmanama, panya nyuntu palunya iyaŋu nganaŋanya mayatjarira kanyintjaku. *

Ala, Godanyala walkura mirawañima katutja pulkanya!”

¹⁰ Ka paluru Jerusalemala tjarpanyangka ngura nyara palunya ngurara uwankara pulkara alatjitu pukularingu, munuyanku ngaparku tjapiningi wangkara, “Ngananya wanyu nyangatja?”

¹¹ Kaya kutjupa tjarangku palumpa nintingku wangkangu, “Wiya, Jesunya panya palatja, Godaku panya wangkatjara, ngura panya Nazarethanya ngurara manta nyara Galileelanguru.”

Jesunya Timpulangka Tjarpanytja

(Markaku 11:15-19; Luke-aku 19:45-48; Johnku 2:13-22)

¹² Ka Jesunya timpulaku yaatangka tjarpangu munu nyangu aŋangu tjułangku kutjupa kutjupa tjuta tjalamillyangka aŋangu tjułangka. Munu paluru mirpañarira tjananya uwankara painu, munu taipula manitjara tjuta unṭura wañira kampa kutjupanu munu taipula tjułpu kuukuuku tjułatjara kułu unṭura wañingu. ¹³ Munu paluru wangkangu tjanala, “Panya nyiringka iriti walkatjunkunytja ngaranyi Godalu wangkanytjitja alatji,

‘Ngayuku timpula uti ngayuku alatjitu ngarama aŋangu winkingku ngayunya tjarpala walkuntjaku.’ *

Palu nyura maniku manyu tjułangku timpula nyanga milmiltä tjarpala aŋangu tjułangka mani mantjira ngura nyangatja kuranı munu watu kutitjunkupai tjułaku walı purunypa palyanı.”*

¹⁴ Kaya kuru pati tjuta nyumpu tjuta kułu palulakutu pitjangu timpulaku yaatangka nyinanyangka, ka palunya tjananya palyarungunu.

¹⁵ Kaya watu tjukurtjara kuranyitja tjułangku Moseku tjukurpa nintilpai tjułangku kułu nyangu Jesulu pikatjara tjuta witulya pulkangku palyarungunnyangka, munuya piruku kulinu tjitji tjułangku timpulangka mirara wangkanyangka, panya tjana alatji wangkangi, “Mirawañimala Davidaku katja!” Kaya watu panya paluru tjana alatji nyakunytjatjanu munu kulintjatjanu pulkara mirpañaringu. ¹⁶ Munuya Jesula wangkangu, “Nyuntun kulinu tjitji nyanga tjułangku wangkanyangka?”

Ka Jesulu wangkangu, “Uwa-mantu, kulinina. Palu nyura wanyu nyiringka nyakunytja wiyatı? Panya alatji ngaranyi,

‘Mama God, nyuntu tjitji tjuta iti tjuta kułu nintinu nyuntunya tjukarurungku mirawañira walkuntjaku.’ ” *

¹⁷ Munu alatji wangkara wiyaringkula Jesulu tjananya wantikatingu munu Jerusalemalanguru ma-pakara anu ngura panya Piitjanilakutu munu nyara palula ngaringi palumpa nintintja tjuta kułu.

* **21:9** Psalm 118:26 * **21:13** Aitjayaku 56:7 * **21:13** Jeremiah-ku 7:11 * **21:16** Psalm 8:3

*Punu Ili Piltiringkunytja
(Markaku 11:12-14,20-24)*

¹⁸ Munuya ngarira tjinturingkula malaku anu Jerusalemaku, ka Jesunya pinpatja wiya paltjatjiratja anangi. ¹⁹ Munu ankula nyangu punu ili iwarangka itingka ngaranyangka munu para-nyakula nyangu mai wiya nyalpi kutju alatjitu ngaranyangka munu punu panya ilingka wangkangu, “Punu ngana! Nyanganguru nyuntula mai pakantja wiya alatjitu ngaraku.” Ka mulapatu warpungkula alatjitu mapalku piltiringu.

²⁰ Kaya nintintja tjutangku nyakula nguwankuringu, munuya wangkangu, “Yaaltji-yaaltji puṇu nyangatja warpungkula alatjitu mapalku piltiringu?”

²¹ Ka Jesulu tjanala wangkangu, “Tjukarurungkuna nyurala wangkanyi, panya nyura Godaku mulamularingkula putu kulintja wiyangku palyalku alatjitu nyanga ngayulu punu ili wangkara piltintjanya purunypa munu nyura puli nyanga murpu pulkangka kuļu wangkaku pakara uru pulkangka tjarpantjaku, ka mulapatu pakara ankula tjarpaku.

²² Mulapa nyura Godaku mulamularingkula kutjupa kutjupaku palula tjinnyangkampa paluru nyurampa palyalku alatjitu.”

*Nganalu Jesunya Tjunu Mayatjangku Wangkanytjaku
(Markaku 11:27-33; Luke-aku 20:1-8)*

²³ Ka Jesunya timpulangka tjarpangu munu anangu tjutangka tjukurpa wangkara nintiningi. Kaya wati tjukurtjara kuranyitja tjutangku tjlpi tjutangku kuļukuļu pitjala palula wangkangi, “Nganalunta nyuntunya wangkangu anangu tjuṭa timpula nyanganguru paintjaku? Mununta nganalu iyaṇu tjukurpa nyangangka wangkara nintintjaku?”

²⁴ Ka Jesulu ngapartji tjanala wangkangu, “Wanyu kana nyurala-warara tjapila, mununa nyura wangkanyangka kutju ngayulu ngapartji nyurala wangkaku nganaluni witunu nyanganpa palyantjaku. ²⁵ Kaya kuwari ngayula utira tjukarurungku wangka, nganalu wanyu Johnnga witunu anangu tjuṭa baptise-katinytjaku Godalu mutta watingku?”

Kayanku kaputurira wangkangi, “Nyaala wangkaku? Tjingurula wangkaku, ‘Godalu palunya witunu.’ Ka alatji wangkanyangka tjinguru paluru wangkaku alatji, ‘Ka nyura nyaaku wanyu panyatja Johnku mulamularinguwiyangku wantingi?’ ²⁶ Palu tjinguru nganana wangkaku, ‘Wiya palunya watingku panya witunu.’ Ka alatji wangkanyangkampa tjinguru anangu nyanga tjuṭa kulira nganampa mirpanariku panya paluru tjana Johnnga Godaku wangkatjaranmankupai.” ²⁷ Munuya putu para-wangkara kulira Jesula wangkangu, “Wiya ngurpala.”

Ka Jesulu tjanala wangkangu, “Ka ngayulu ngapartji nyurala tjakultjunkunytja wiyangku wantinyi panya ngayunya wituntjanya.”

Tjukurpa Katja Kutjaratjara

²⁸ Munu Jesulu tjanala piruku wangkangu wati panya tjukurtjara kuranyitja tjutangka munu tjlpi tjutangka kuļu, “Wanyu kana tjukurpa kampa kutjupa nyurala wangka, kani nyura kulintjatjanungku tjakultjura nyaa nyura kulintja. Watingku katja kutjara kanyiningi. Munu kutjupa-arā paluru katja pulkangka tjapinu, ‘Katja, wanyu ankula nganampa panya kaanangka war̄kari mai kiripitjingka.’

²⁹ “Ka katjangku wangkangu, ‘Wiya, wantinyina.’ Munu palulanguru mala kulinu ankula war̄karinytjikitjangku, munu ankula kaanangka panya war̄karingi.

³⁰ “Ka mama panya anu katja małatjakutulpi munu palula ngapartji palu purunypaṭu wangkangu. Ka paluru palyanmanu, palu mała paluru ankula warkarintja wiyangku wantingi.”

³¹ Ka Jesulu tjukurpa nyangatja wangkara wiyingkula tjanala tjinpinu, “Katja yaaltjingku mamangka wanganarangku kulira ankula warkaringi?”

Kaya wangkangu, “Katja panya pulkangku.”

Ka tjanala wangkangu, “Uwa, tjukarurungkuṇa nyurala wangkanyi, panya wati kamantaku mani mantjilpai tjuṭa munu minyma watingka pirttipai tjuṭa-warara Godaku walytjaringkuku paluru tjananya mayatjangku kanyintjaku, ka nyura malaringkuku. ³² Panya Johntu nyurala nganmanytju tjakultjunu kura wantira tjukaruru Godalawanu nyinanytjaku, ka panya nyura kulira wantira palumpa mulamularingu wantingu. Ka panyaya mani mantjilpai tjuṭangku munu minyma watingka pirttipai tjuṭangku palula kulira palumpa mulamularingu munuya kura wantingu. Ka panya paluru tjana mulamularingu kampa kutjuparinyangka nyura nyangu, palu nyura wantingi alatjiṭu kulira kampa kutjuparintja wiyangku.” Alatji Jesulu tjanala wangkangi tjukurtjara kuranyitja tjuṭangka munu tjlpi tjuṭangka kuļu.

*Wati Kura Tjuṭangku Kaana Kiripitjitzara Mayatjaku Kanyintja
(Markaku 12:1-12; Luke-aku 20:9-19)*

³³ Munu piruku Jesulu panya palula tjanala wangkangu, “Wanyu kaña piruku tjukurpa kutjupa nyurala wangka ara kutjupatjara, kaya kulila! Wati kutjupa kaana pulkatjara nyinangi munu paluru puṇu kiripitji tjuṭa tjawara ngaratjura waṇanu munu apunguru yaata para-palyara arintara patinu munu piṭi tjawara wantingu ngula kiripitji kururingkunyaṅgka urara kantura tjulkura waina palyantjikitjangku munu wali wara palyanu katunguru nyakula atunymanangunytjikitjangku. Munu palulanguru wati paluru kaana kiripitjitzara wati maṇkurpa kutjupa unytjungku ungukatingu mani palumpa palyantjaku, munu wantikatira anu ngura parari manta kutjupakutu. Kaya paluru tjana kaana panya palunyu atunymanangi.

³⁴ “Ka ngula mai panya kiripitji kururingkunyaṅgka wati panya kaanaku walytjangku wati warkaripai maṇkurpa iyanu tjanalakutu ankula mai kiripitji tjarara mantjira palumpa katintjaku. ³⁵ Kaya wati kaana atunymanupai tjuṭangku wati panya iyantja maṇkurpa nyakula witinu munuya kutju pungu munu kutjupa iluntanu munu kutjupa apungka atunu. ³⁶ Ka piruku wati panya kaanaku walytjangku wati warkaripai kutjupa tjuṭa ngapartji iyanu, kaya tjananya palu purunymanutu. ³⁷ Ka wati panya paluru mała palumpa katjalta iyanu alatji kuliṛa, ‘Wanyu kaña ngayuku katja iyala, kaya palunya tjinguru wanganarangku kulilkku.’ ³⁸ Palu wati panya palumpa katja wirkankunyangka nyakula tjananku kaputurira wangkara kuliningi, ‘Ai, wati panya palumpa katjampal palatja pitjanyi! Warpungkulala iluntara, ka ngula mama palumpa tjlpiringkula ilunyangka kaana nyangatja nganampariku.’ ³⁹ Munuya wati panya katja witira kaananguru itarikatingu urilkutu munuya pungkula iluntanu.”

⁴⁰ Munu Jesulu tjukurpa nyangatja wangkara wiyingkula tjanala tjinpinu, “Nyura nyaa kulini? Wati panya kaanaku walytjangku tjananya ngapartji pitjala nyaalku kaana panya atunymanupai tjuṭa?”

⁴¹ Kaya wangkangu, “Wiya, paluru pitjala tjananya ngapartji pungkula iluntankuku, munu wati palya tjuta tjunkuku kaana atunymara kanyintjaku, kaya paluru tjanā kiripitji kururingkunyangka urara wati panya kaanaku waltytjaku tjukarurungku tjarara tjunkuku.”

⁴² Ka Jesulu tjanala wangkangu, “Nyura wanyu ninti tjukurpa panyaku? Panya iriti nyiringka walkatjunkunytja alatji ngaranyi, ‘Wali palyalpai tjutangkuya wali puli tjutanguru palyaningi, munuya puli kutju nyakula wañingu kura-palku kulira.

Palu nguntiya wañingu, panya puli nyara paluru kura wiya, wiru mulapa wali kuñpu kanyilpai.

Panya Mayatja Godalu puli pala palunya ngurkantanu puli kutjupa tjuta wiya,

kala paluru ngurkantankunytjitja pukularira wirunmananyi.’ *

⁴³ Nyara palulanguruña nyurala wangkanyi alatji, panya Godalu nyuranya mayatjangku waltytjanmara kanyintja wiyaringanyi munu panya anangu kutjupa tjuta ngapartji waltytjanmara mayatjangku kanyilkku palumpa tjukurpa wangañarangku kulira palyalpai tjuta. ⁴⁴ Ka kutjupangku puli nyara palunya wantirampa pika pulka mulapa mantjilku. Panya puli nyara palunya wantinyangka Godalu pungkula wiyalpai alatjitu.”*

⁴⁵ Kaya tjukurtjara kuranyitja tjutangku munu Paratji tjutangku kuliningi Jesulu tjukurpa nyanganpa wangkanyangka munuya kulira miilaranu. ⁴⁶ Munuya palulanguru palunya witintjikitjangku kuliningi, palu nguluringangiyi anangu winki ngaranyangka nyakula panya anangu tjutangku Jesunya Godaku wangkatjaranmankupai, kaya palulanguru palunya witilwiyangku wantingu.

22

Tjukurpa Mai Pulkaku Puťu Altinytja (Luke-aku 14:15-24)

¹ Munu Jesulu piruku tjukurpa arå kutjupatjara tjanala wangkangi alatji, ² “Godalu anangu tjuta mayatjangku waltytjanmara kanyintja arå nyanga purunypa ngaranyi panya wati ngura tjutaku mayatja pulka nyinangi ka wati nyara palumpa katjangku kuri kuwari kutju altinytjaku ngarangi. Ka wati panya mayatjangku pukularira palumpa warkaripai tjutangka wangkangu mai kuka pulka palyantjaku, munu palumpa malpa tjuta wangkangu katjangku kuri altinyangka pitjala tjunguringkula ngalkula pukularinytjaku. ³ Munu mai kuka riti ngarinyangka nyakula paluru wati panya warkaripai tjuta witunu ankula anangu panya nganmanytju wangkanytja tjuta para-altira ngalya-katinytjaku maiku pitjala tjunguringkunytjaku, kaya ankula altingi. Palu tjanā uwankarangku kulira pitjanytja wiyangku wantingi. ⁴ Ka paluru piruku warkaripai kutjupa tjuta witunu ankula anangu panya palunya tjananya piruku altinytjaku. Kaya ankula palula tjanala wangkangi, ‘Pitjaya! Nganampa mayatjangku mai kuka pulka nyurampa palyanu puluka pulkanya munu kulunypa kuлу kuka wiru mulapa, munu paúra riti wantingu nyura pitjala ngalkuntjaku. Kaya wanyu ngalkuntjikitja pitja, panya paluru mukuringanyi nyura uwankara pitjala tjunguringkula pukularinytjaku palumpa katjangku kuri altinyangka.’

* **21:42** Psalm 118:22-23 * **21:44** Tjukurpa nyanga pulitjara wangkara Jesulu palurunku wangkangi.

⁵ “Palu tjana kulira alatjitu wantingi munuya tjana mukuringkunytja tjuta kutju palyaningi, kutjupa tjuṭaya anu palumpa tjanampa kaana tjutakutu, kaya kutjupa tjuṭa anu warkarira mani pulkantjikitja. ⁶ Kaya kutjupa tjuṭangku wati panya mayatjangku witura iyantja tjuṭa witira pungkula iluntanangi.

⁷ “Ka mayatja panya paluru pungkunytja kulira pulkara mirpanaringu munu palulanguru tjaultji tjuṭa wituŋu, kaya anangu panya palunya tjananya ngapartji ankula iluntanu munuya tjanampa wali uwankara tilira wiyanu. ⁸ Munu palulanguru mayatja panya paluru palumpa warkaripai tjuta altira wangkangu, ‘Kulila! Nyangatja nyura mai kuka pulka palyara tjunu ngayuku katjaku pukularira ngalkuntjaku. Palu anangu panya ngayulu altintyntja tjuṭangku kulira alatjitu wantingi. ⁹ Palu araya tawunu tjutakutu munuya iwara tjuṭangka anangu tjuṭa parangaranyangka nyakula tjananya altira ngalya-kati mai nyanga pulkaku.’ ¹⁰ Kaya mulapaṭu ankula para-altira ngalya-katingu anangu uwankara tjana iwarangka nyakula panya kura tjuṭa munu palya tjuṭa kuļu, kaya pitjala wati panya mayatjaku walingka tjarpala angara alatjitu nyinangi.

¹¹ “Ka mayatja panya paluru anangu tjuṭa nyakunytjikitja tjarpang mu nu nyangu wati kutju mantara kutjupatjara nyinanyangka, panya watingku kuri altintyngkaya anangu tjuṭa mantara wirungka tjarpala inmakitja pitjapai. Ka wati panya paluru mantara wirungka tjarpalnyntja wiya pitjangu munu ngunti tjarpala nyinangi. ¹² Ka wati panya mayatjangku palula wangkangu, ‘Ai! Nyaakun nyuntu mantara wirutjara pitjanyntja wiya? Panya ngayuku katjangku kuwari kuri altinty, kan uti nyuntu mantara wirutjara pitjama.’ Ka wati panya paluru wangkanyntja wiya nyinangi. ¹³ Ka wati panya mayatjangku palumpa warkaripai tjuṭa altira wangkangu, ‘Pitjalaya wati nyangatja mara tjina kuļu karpila munuya urilta mungawalurungka waṇi, ka nyara palulalata pika pulkatjara nyinara titutjara ulaku.’ Kaya mulapaṭu palunya karpira katira urilta waṇingu.”

¹⁴ Ka Jesulu tjukurpa nyangatja wangkara wiyingkula tjanala wangkangu, “Panya Godalu anangu tjuṭa mulapa altipai palunya waṇantjaku, palu paluru mankurpa nguwanpa ngurkantankupai.” Alatji Jesulu tjanala wangkangi tjukurtjara kuranyitja tjuṭangka munu tjlpi kutjupa tjuṭangka munu Paratji tjuṭangka kuļu.

Rome-aku Mayatja Mani Tjarara Uŋkunytjaku, Munta Wiya?

(Markaku 12:13-17; Luke-aku 20:20-26)

¹⁵ Kaya Paratji tjuṭangku nyangatja kulira maunṭalpa tjana-kutjuringkula wangkara kuliningi Jesunya arkara ngunti tjapintjik-itjangku.* ¹⁶ Munuya wangkara wiyingkula tjanalanguru wati mankurpa nguwanpa Jesulakutu witura iyanu Iratakku malpa tjuṭa kuļu tjungura. Kaya ankula palula wangkangu alatji, “Nintilpai! Nganana ninti nyuntumpa, panya nyuntu wati tjukaruru palyanyku nyinapai. Munu panyan anangu tjuṭangka Godaku iwara tjukarurungku wangkara nintilpai utingku kutitjunkunytja wiyangku. Munu panyan anangu uwankara tjungura nyakupai munu tjanala uwankarangka tjukarurungku wangkapai tjukurpa panya palunyatu anangu kutjupa tjuṭaku nguluringkula kampa kutjuparinytja wiyangku. ¹⁷ Ka nyuntu

* **22:15** Panya paluru tjana alatji kuliningi, “Wanyula palula ngunti wangka, ka paluru tjunguru tjukurpa kutjupa ngunti ngananala wangkaku, kala ngunti wangkanyangka kuli rampa kuranmankukulta palunya.”

yaaltji kulini? Palyala wati panya Tjiitjanya mayatja pulka Rome-ala nyinapainya mani tjarara ungkuku, munta wiya? Mulapa wanyu alatjinkunytjaku ngaranyi Moseku tjukurta? Wanyulanya nyuntu tjakultjura!"

¹⁸ Ka Jesulu nintingku kulinigi tjana ngunti arkara tjapinnyangka munu wangkangu, "Wiya, nyura ngunti palya-palku kañany-kañanypa nyinapai tjuta munu nyura ngunti tjapini ngayunya kuramankunytjikitjangku kutju. ¹⁹ Ngalya-katiya mani pala tjiilpa panya nyura mayatja Rome-ala nyinapainya mani pala palunya ungkupai, kaña nyawa!" Kaya mulapatu katira palunya ungu. ²⁰ Ka nyakula tjanala tjapinu, "Nganaku yunpa munu ini kuļu wanyu nyangangka ngaranyi?"

²¹ Kaya wangkangu, "Mayatja pulka panya Tjiitjanya."

Ka tjananya wangkangu, "Uwa mulapa mani nyangatja mayatja Tjiitjaku, kaya palunya palya ungama paluru wangkanyangka, palu Godalu wangkanyangkampaya Godanya alatjituungama."

²² Kaya nyangatja kulira nguwankuringu munuya kulinu, "Ai, wati nyangangku muñkara alatjituungama." Munuya palulanguru palunya wantikatira anu.

*Tjukurpa Panya Ilura Pakantjanya Tjana Tjapintja
(Markaku 12:18-27; Luke-aku 20:27-40)*

²³ Kaya tjinqtu panya palulaču wati Tjatjutji mañkurpa pitjangu Jesulakutu, panya paluru tjanaya aŋangu ilunytjatjanu pakantjitzaku mulamularingkupai wiya. Munuya wati nyanga mañkurtu Jesula ngunti arkara tjapiningi alatji, ²⁴ "Nintilpai, panya Moselu tjukurpa nyangatja nganampa iriti walkatjunu alatji, 'Tjinguru wati kuča iluku tjitji wiyaču, ka minyma panya palumpa kuri wanka nyinanyangka wati panya tjitjururungku uti al̄ima minyma panya palunya. Munu tjinguru tjitji katja utintjatjanungku paluru kulilkü, "Nyangatja ngayuku wiya, ngayuku kutaku tjitji, panya ngayulu palumpa kuringka utinu." ' Alatji Moselu walkatjunu.

²⁵ "Palu tjukurpa nyangatja wanyu kulila. Panya wati 7 kutařara kutařara nyinangi. Ka kuča nganmanyitjangku kungkawara al̄ingu, munu paluru tjitji utintja wiyaču ilungu. Ka małanytju ngapartji minyma panya palunyatu al̄ingu munu tjitji wiyaču ilungu, ²⁶ ka palu purunypatū wati małanypa kutjupangku ngapartji al̄ira paluru kuļu tjitji wiyaču ilungu. Kaya palu purunypatū małanypa panya malatja tjuťangku minyma panya palunyatu al̄ira kanyira tjitji wiyaču ilungi uwankaraču wanapari wanapari. ²⁷ Ka ngula minyma panya paluru tjanampa panya kurilta ilungu.

²⁸ "Kalanya wanyu tjakultjura! Ngula ilunytjatjanu wankaringkula pakantjatjanu minyma panya paluru nganaku kuri nyinaku? Panya wati 7-tu palunya al̄ingu."

²⁹ Ka Jesulu tjanala wangkangu, "Wiya, nyura ngunti kulilpai tjuta. Nyura Godaku tjukurku ngurpa munu palumpa witulyaku kuļu ngurpa alatjitu. ³⁰ Panya miri tjuta ilunytjatjanu wankaringkula pakara kuri altintjya wiya, panya angelpa tjuta kuri wiya nyinanyi, nyara palu purunypa alatjitu aŋangu tjuta nyinaku. ³¹⁻³² Ka nyura uti mula-mularingama ilunytjatjanu pakantjitzaku. Wanyu tjukurpa panyatja kulila, panya nyiringka iriti walkatjunkunytja ngaranyi Godalu nyurala wangkanytja alatji,

‘Ngayuluṇa Aipuramaku, Isaacaku, Jacobaku God nyinanyi, kaṇiya paluru tjana ngayunya walkunu.’ *
Ala palatja. Aipuramanya, Isaacanya, Jacobanya tjana panya ngañmanypa ilungu, ka nyangatja nyaaku Godalu ilunyangka małangka wangkangi tjana palunya walkuntja? Wiya, paluru tjana panya ilunytjatjanu wankaringu munuya kuwari nyanga ilkaringga wanka nyinara Godanya walkunu.’

³³ Kaya aŋangu uwankarangku nyangatja wangkanyangka kulira nguwankuringu munuya kulinu, “Ai, wati nyangangku pulka mulapa wangkanyi.”

*Tjukurpa Nyaa Pulka Mulapa Godalu Wangkanytja
(Markaku 12:28-34; Luke-aku 10:25-28)*

³⁴ Uwa, panya Jesulu Tjatjutji tjutangka wangkanyangka tjana puṭu kulinu ngapartji wangkanytjikitjangku. Kaya Paratji tjutangku kulinu Jesulu tjananya wangkara pilunmankunytja, munuya kulintjatjanu Tjatjutji tjutangka tjunguringkula anu Jesulakutu. ³⁵⁻³⁶ Ka wati tjanala tjungutjangku Moseku tjukurpa nintilpaingku Jesunya ngunti arkara tjapiningi alatji wangkara, “Nintilpai! Tjukurpa nyaa wanyu pulka mulapa ngaranyi uwankarangka waintarinytja Godalu wangkanytja?”

³⁷ Ka Jesulu wangkangu, “Tjukurpa pulka mulapa nyangatja ngaranyi alatji,

‘Mama Godaku pulkara mukuringama kurunpa winki, munu palunya kutju pukułmankunytjikitjangku tiṭutjarangku kulinma.’ *

³⁸ Uwa, tjukurpa nyanga paluru kutju alatjiṭu pulka mulapa ngaranyi kutjupa uwankarangka waintara. ³⁹ Ka kutjupa kuļu palu purunypaṭu pulka ngaranyi nyanga alatji,

‘Anangu kutjupa tjutaku pulkara mukuringama nyuntunku mukuringkunytja purunypa.’ *

⁴⁰ Uwa, tjukurpa nyanga paluru pula pulka kutjara ngaranyi tjukurpa kutjupa uwankarangka waintara. Ka panya Moselu tjana Godaku wangkatjara kutjupa tjutangku kuļu tjukurpa walkatjunkunytja uwankara tjukurpa nyanga palula pulalanguru ngaranyi. Panya tjukurpa paluru pula wiya ngaranyangkampa tjinguru tjukurpa kutjupa uwankara kuļu wiya ngarama.’ Alatji Jesulu wangkangu wati panya Moseku tjukurpa nintilpaingka.

*Christanya Godalu Panya Kalkuntjanya
(Markaku 12:35-37; Luke-aku 20:41-44)*

⁴¹ Ka Paratji panya tjuta nyara palula tjunguringkula ngaranyangka Jesulu tjanala tjapinu, ⁴² “Yaaltji nyura kulin Christanya Wankarunkupainy panya Godalu kalkuntjanya? Walytjapiti nganalanguru wanyu paluru? Ngananya palumpa tjamu iriti nyinangi?”

Kaya wangkangu, “Wiya, paluru Davidaku walytjapiti malatjangu utiringkuku.”

⁴³ Ka tjanala wangkangu, “Ka nyaaku panyatja Davidalu Kurunpa Milmiltu nintinnyangka palunya mayatjanmanu? Panya nyiringka walkatjunkunytja ngaranyi Davidalu wangkanytja nyanga alatji,

⁴⁴ ‘Mayatja Godalu ngayuku Mayatjangka wangkangu,

“Ngayula nyanga itingka mayatja pulka nyinakati kampa nyanga wakungka.

* 22:31-32 Exodus 3:6 * 22:37 Deuteronomy 6:5 * 22:39 Leviticus 19:18

Kaṇa nyuntumpa mirpaṇtju tjuṭa tjarulku nyuntula wanganarangku kulintjaku,

kan tjananya nyuntu mayatjangku wituwitulku.” * *

⁴⁵ Ala palatja! Davidalu Christanya mayatjanmanangi alatjiṭu Godalu panya kalkuntjanya, ka Christanya yaaltji-yaaltji piruku palumpa pakali malatja nyinama? Wiya, paluru pakali kutju wiya palumpa mayatja kuļu nyinanyi.”

⁴⁶ Kaya palulanguru Jesula ngapartji wangkanytjikitjangku puṭu kulinungi, munuya tjintu pala palulanguru piruku palula ngunti arkara tjpintja wiyaringu.

23

*Jesulu Añangu Tjuṭa Ngulutjunkunytja Paratji Tjuṭangka-tawara Munu Moseku Tjukurpa Nintilpai Tjuṭangka-tawara
(Markaku 12:38-40; Luke-aku 11:37-52; 20:45-47)*

¹ Munu palulanguru Jesulu nintintja tjuṭangka munu añangu winkingka kuļu wangkangu, ² “Panya Moseku tjukurpa nintilpai tjuṭa munu Paratji tjuṭa kuļu Moseku tjukurku ninti pulka nyinanyi nyurala wangkara utintjikitja. ³ Ka tjanā wangkanyangka nyura uti wanganarangku kulira palyanma. Palu tjanā palyantjaya arkalwiyangku wantima, panya paluru tjanā tjukurpa palunya nintintjatjanungku mulamulangku wanganarangku kulira palyalpai wiya. ⁴ Panya paluru tjanā ara kutjupa kutjupa tjuṭa Godaku tjukurta tjungura palyalpai munuya añangu tjuṭa rawangku wituwitulpai wanganarangku kulira palyantjaku, kaya ara tjuṭa mulapa ngaranyangka puṭu kulira kaar-kaararira pakuringkupai. Panya mayatjangku palumpa wati warkariipaingka tjanangka kutjupa kutjupa tjuṭa mulapa katinytjaku tjunkupai munu mayatja paluru tjalira katira paku pulkaringkunyangka nyakula palunya alpamilara tjara palulanguru mantjira tjalira katinytja wiyangku wantipai. Nyara palu purunytjuya Moseku tjukurpa nintilpai tjuṭangku Paratji tjuṭangku kuļu añangu tjuṭa rawangku wituwitulpai kutjupa kutjupa tjuṭa mulapa palyantjaku, kaya pakuringkupai.

⁵ “Munuya paluru tjanā kutjupa kutjupa tjuṭa palyalpai añangu tjuṭangku nyakula palunya tjananya mirawañinytjaku, panya tjakangku wati tjuṭangku nyiri Moseku tjukurtjara rulumapi pakutja tjukutjukungka unngu tjarpatjunkupai munuya kutjupa-ara Godala tjpintjikitjangku kutju pakutja panya palunya miñangka munu ngalyangka kuļu tanpalpai tjukurpa panya palunyatjara, palu wati panya Moseku tjukurpa nintilpai tjuṭangku munu Paratji tjuṭangku kuļu pakutja pulka nguwanpa tanpara kañany-kañanytju kanyilpai rawangku nguwanpa munuya paluru tjanā mantara waṛa pulkangka tjarptra para-ngarapai kañany-kañanypa añangu tjuṭangku nyakula tjananya mirawañinytjaku.

⁶ “Munuya wali inmatjangka tjunguringkula tjiya wiru tjuṭa ngurkantankupai añangu tjuṭangka kuranyu uti nyinakatinjtjikitja mukuringkula. Munuya kutjupa-ara mai pulka ngalkuntjikitja tjunguringkula palu purunypaṭu kuranyu nyinanytjikitja mukuringkupai tjuṭangku tjananya nyakula mirawañinytjaku. ⁷ Munuya pulkarra pukularipai añangu tjuṭangku tjananya tawunungka para-ngaranyangka nyakula nintilpai wangkara wal kuntjaku.

* **22:44** Psalm 110:1

8 “Palu kulilaya! Tjinguru anangu kutjupangku nyuranya ninti pulkanmankunyangkampa nyura palunya markunma nyuranya walkuntjaku-tawara, panya nyura kuṭarara kuṭarara uwankara palu puruny whole nyinanyi nintilpai kutjutjara. **9** Munuya nintilpai kutjupa tjuta mamanmara walkuntja wiyangku wantima, panya nyurampa mama kutju nyinanyi ngura ilkaritjangka. **10** Munu tjinguru anangu kutjupangku nyuranya ‘nintilpinya’ walkunnyangkampa nyura palunya markunma nyuranya ngunti walkuntjaku-tawara, panya alatjiu nyurampa ‘nintilpai’ kutju nyinanyi Godalu panya kalkuntjanya. **11** Ka nyuralanguru tjinguru kutju kuranyurira mayatja nyinanytjikitja mukuringanyi munu uti paluru nyurampa pulkara war karima nyura witunnyangka wantinytja wiya. **12** Panya anangungku palurunku walytjangku mayatjarira mirawañinyangka nyakula Godalu palunya paira małarku tjunkuku. Ka anangu kutjupa mala nyinanyangka nyakula Godalu palunya mirawañira kuranyu tjunkuku mayatja pulka nyinanytjaku.”

*Jesulu Palunya Tjananya Ngunti Palya-palku Nyinanyangka Paintja
(Markaku 12:40; Luke-aku 11:39-42; 11:44,52; 20:47)*

13-14 Munu palulanguru Jesulu Moseku tjukurpa nintilpai tjuta munu Paratji tjuta kuļu pulkara ngulutjunangi alatji wangkara, “Nyura ngunti palya-palku kañany-kañanya nyinapai tjuta! Nyara palulanguru nyurampa pika pulka mulapa ngaraku! Panya nyura anangu tjutangka wangkara nintinnyangka kutju tjana kulilpai Godaku walytjaringkunytjikitjangku. Palu nyura Godala tungunpungkula palunya mulamulangku wanantja wiyangku wantipai, munu kutjupa tjuta palumpa walytjaringkunytjaku-tawara nyura titutjara anga-ngaranyi tjanala tjukarurungku nintintja wiya.*

15 “Uwa, nyura ngunti palya-palku kañany-kañanya nyinapai tjuta! Nyara palulanguru nyurampa pika pulka mulapa ngaraku! Panya nyura ngura tjutakutu parari ankupai uru pulkangka itipirira munu mantangka kuļu tjina ankula ngura kutjupangka ma-wirkara anangu kutjupa tjutangka tjukurpa wangkara tjananya wituwitulpai nyurampa ařa tjuta wangañarangku kulintjaku, ka paluru tjana tjinguru nyurala wangañarangku kulikku munu nyuranya purunyarira ngunti palya-palku kañany-kañanya nyinaku nyurala munkara kura mulapalta, ka nyara palulanguru ngula Godalu palunya nyuranya tjungura paira iyalku ngura kurakutu waru panya titutjara kampanytjalakutu.

16 “Uwa, nyura kuřu patingku ngurpangku anangu kutjupa tjuta ngunti katirinkupai nintingku-palku! Nyara palulanguru nyurampa pika pulka mulapa ngaraku! Panya nyura anangu kutjupangka kalkuntjikitjangku ini ‘timpula’ wangkara kalkulpai anangu nyara paluru ini wangkanyangka kulira nyurampa mulamularingkunytjaku. Munta tjinguru nyura ‘gold’ panya timpula unngu ngarinytja’ wangkara kalkulpai, munu nyara palulanguru ini ‘gold’ wangkara kalkuntjatjanungku nyura kalkuntja panya palunya kulilpai alatjiu wantinytja wiyangku. Palu nyura ini ‘timpula’ wangkara kalkuntjatjanungku nyura kampa kutjupa kulira kalkuntja

* **23:13-14** Wati kutjupangku kunyu verse 14 walkatjunu, munu mala tjungunu Matthew-ku tjukurta alatji: *Nyura ngunti palya-palku kañany-kañanya nyinapai tjuta! Nyara palulanguru nyurampa pika pulka mulapa ngaraku! Panya nyura minyma wanakala tjutanguru tjulyalpai tjanampa walı munu ulytja kutjupa kutjupa tjuta kuļu. Munu nyura Godala tjapira tjukurpa wara mulapa wangkapai anangu tjutangku kulira nyuranya mirawañinytjaku. Ka nyanga palula tjanalanguru Godalu nyuranya pulkara pungkuku.*

panya palunya mukuringkula wantipai ungkunytja wiyangku. ¹⁷ Palu alatji nyura ngunti kulilpai ngurpangku alatjitu munu nyura tjukurpa palunya anangu tjutangka ngunti nintilpai kuру patingku. Nyura kurangku gold ngunti milmilmankupai, panya timpula kutju milmilpa mulapa ngaranyi, ka panya gold timpula unngu ngarira kutju milmlarinyi.

¹⁸ “Munu panya nyura anangu kutjupangka kalkuntjikitjangku ini ‘timpulaku pitjilpa’ wangkara kalkulpai. Munta tjinguru nyura ‘kuka pitjilta Godaku tjunkunytja’ kutju wangkara kalkulpai. Ka nyura nyara palulanguru ini ‘kuka’ wangkara kalkuntjatjanungku nyura kalkuntja panya palunya kulilpai alatjitu wantinytja wiyangku. Palu nyura ini ‘pitjilpa’ kutju wangkara kalkuntjatjanungku nyura kampa kutjupa kulira kalkuntja panya palunya mukuringkula wantipai ungkunytja wiyangku. ¹⁹⁻²⁰ Palu alatji nyura ngunti kulilpai ngurpangku alatjitu munu nyura tjukurpa palunya anangu tjutangka ngunti nintilpai kuру patingku. Panya timpulaku pitjilpa milmilpa mulapa ngaranyi kuka munu kutjupa kutjupa tjuتا katu tjunkula Godanya ungkunytjaku, ka panya kuka pitjilpangu루 kutju milmlarinyi palula katu tjunkunyangka kutju. Ka nyura uti nintingku kulinma panya pitjilpa milmilpa pulka mulapa, ka kutjupangku ini nyanga ‘timpulaku pitjilpa’ wangkara kalkuni nyara paluru pitjilpa munu pitjilta katu tjunkunytja kulu winki tjungura wangkanyi. ²¹ Ka kutjupangku tjinguru ini ‘timpula’ wangkara kalkuni nyara paluru timpula munu timpulangka unngu nyinanytja kulu tjungura wangkanyi panya Godanya. ²² Ka tjinguru kutjupangku ini ‘ilkaritja’ wangkara kalkuni nyara paluru Godanya wangkanyi panya ngura nyara palula paluru mayatja pulkangku uwankara kanyini.” Alatji Jesulu tjananya wangkara ngurpanmanangi Moseku tjukurpa nintilpai tjuتا munu Paratji tjuتا kulu.

²³ Munu piruku palula tjanala wangkangi alatji, “Uwa, nyura ngunti palya-palku kañany-kañanypa nyinapai tjuتا! Nyara palulanguru nyurampa pika pulka mulapa ngaraku! Panya nyura ukiri panti wiru kutjupa kutjupa tjuتا ini nyanganpa miinpa, tilpa munu kam-inpa nyurampa kaananguru 100 mantjira tjarara 10 ungkupai Godanya. Palu nyangatja tjukutjuku nguwanpa Godalu nyakula pulkara pukularinytjaku wiya. Palya nyura alatjinganma, palu uti nyura waintara kulu kulinma munuya anangu tjutaku pulkara mukuringkula tjanampa ngaltunytjungku palyanma, munuya Godala wanganarangku kulira tjukaruru nyinama, panya nyanga alatji palyannyangka Godalu nyakula pulkara pukularipai. Ka nyura uti watarkurinýtja wiyangku rawangku palyanma. ²⁴ Uwa, nyura kuru pati purunytyu ngurpangku anangu kutjupa tjuتا ngunti katirinkupai nintingku-palku, panya nyura tjukutjuku tjuتا kutju rawangku palyalpai munu nyura tjukurpa nyanga pulka tjuتا wantipai.

²⁵ “Uwa, nyura ngunti palya-palku kañany-kañanypa nyinapai tjuتا! Nyara palulanguru nyurampa pika pulka mulapa ngaraku! Panya nyura kutjupa kutjupa tjuتا palyalpai anangu tjutangku nyuranya palya-palku nyakula mirawañinytjaku. Palu Godalu nyuranya unngu nyanganyi panya nyura manyungku kutju anangu tjuتا ngulutjingara kutjupa kutjupa tjuتا tjanampa tjulyalpai, munu panya nyura kura kutjupa kutjupa tjuتا kulu rawangku kampangkatu palyalpai. Uwa, nyura nyaa purunypa panya anangungku piti urilitja kutju paltjira wirulpai ka unngutja kit raputji winki ngarapai, nyara palu purunypa nyura palya-palku nyinanyi kura mulapa. ²⁶ Nyuranku wanyu putu nyanganyi? Utu nyura piti kilina wiru kanyintjikitja unngutja-warara paltjira kilinanama, ka nyara

palulangurulta piti paluru wiruringkula kilina wiru mularariku. Nyara palu purunypa nyura uti kuru alaringkula nyuranku unngutja nyangama munu kura kutjupa kutjupa uwankara wantima, munu nyura nyara palulangurulta wirura nyinaku.

²⁷⁻²⁸ “Uwa, nyura ngunti palya-palku kañany-kañanypa nyinapai tjuta! Nyara palulanguru nyurampa pika pulka mulapa ngaraku! Kaya wanyu kurulpa kulila, panya katutja wiru tjutatjara ngarapai anangu tjutangku nyakula wiru kulintjaku, palu unngu nyaa ngarinyi? Wiya, tarka tjuta kutju ngarinyi. Ka nyura nyara palu purunypa nyinanyi, panya nyura anangu tjutangka mirangka palya-palku nyinapai, palu nyurala unngu kura pulka mulapa ngaranyi.”

*Jesulu Pika Pulka Tjanala Utiringkunytjaku Wangkanytja
(Luke-aku 11:47-51)*

²⁹ Munu Jesulu piruku Moseku tjukurpa nintilpai tjutangka munu Paratji tjutangka wangkangu alatji, “Uwa, nyura ngunti palya-palku kañany-kañanypa nyinapai tjuta! Nyara palulanguru nyurampa pika pulka mulapa ngaraku! Panya nyura kurulpa tjuta wirulpai Godaku wati wangkatjara tjuta unngu miri ngarinyangka. Panya palunya tjananyaya wirura tjukaruru nyinanyangka iluntanu, ka panya nyura tjanampa kurrulta katu wiru tjuta tjunkupai. ³⁰ Munu nyura wangkapai alatji, ‘Tjinguru nganaña tjanala tjungu nyinarampa tjananya iluntankunytja wiyangku wantima, kaya wanka nyinama.’ ³¹ Ka nyura alatji wangkanyangka ngayulu kulilpai, ‘Munta, mulapa tjanampa panya tjamupitingku Godaku wangkatjara tjuta rawangku pungkukatingi.’ Palu nyura tjinguru iriti nyinarampa tjanala tjunguringkula wangkatjara tjuta iluntanamatu tjana purunytyu. ³² Ka palya nyura kuvari tjamu tjutaku arā wañanma, munu paluru tjana purunytyu wangkatjara kuvari nyinanytja tjuta iluntanama.

³³ “Uwa, nyura uwankara liru tjuta anangu tjuta ngunti kuralpai, ka Godalu wanyu nyuranya ngula wantiku? Wiya, nyuranya ngura kurangka wañiku waru pulkangka kampanytjaku. ³⁴ Kulilaya! Ngayulu nyurampa iyalku Godaku wangkatjara tjuta munu nintipuka tjuta munu nintilpai tjuta kuļu, ka nyura tjara kutjupa iluntankuku munu tjara kutjupa puňu katakutjarangka wakara utitjunkuku, munu tjara kutjupa wali inmatja tjutangka ngaratjunkula mantara kañantara nikitira wiipangka alkalku. Munu nyura tjananya paira wañara paira wañara iyalku ngura tawunu kutjupa tjutakutu. ³⁵ Ka nyuranya Godalu kukanymanu nyura wati palya tjuta wiyanguru pungkula iluntankunytjitjangka. Panya Abelnga wati palya mulapa iluntanu palumpa kutangku, kaya nyara palulanguru nyurampa tjamu irititja tjutangku wati palya tjuta rawangku iluntankukatingi munuya palulanguru iluntanu Pirakayaku katja ini Tjakarayanya paluru timpulangka unngu pitjilta itingka ngaranyangka.* ³⁶ Uwa, tjukarurungkuña nyurala wangkanyi panya Godalu nyuranya ngapartji iluntankuku wati nyanga palula tjanalanguru.” Alatji Jesulu tjanala utingku wangkangi Paratji tjutangka munu Moseku tjukurpa nintilpai tjutangka kuļu.

*Jesunya Ngura Jerusalemaku Ngalturingkunytja
(Luke-aku 13:34-35)*

³⁷ Munu palulanguru Jesulu Jerusalemala nyinanytja tjutaku pulkara ngalturingkula tjituru-tjitururira ulara wangkangi alatji, “Ngaltutjara!

* 23:35 Genesis 4:8; 2 Chronicles 24:20

Ngayulu nyurampa pulkara mukuringanyi nyanga Jerusalemala nyinanytja tjutaku. Palu iritinguru nyura Godaku wangkatjara tjuta rawangku iluntanangi munu panya nyura wati tjukurtjara tjuta kulu pulingka atura iluntanangi panya Godalu ngura nyanga palulakutu iyantja tjuta. Kaya rawa mulapa mukuringangi nyuranya utulura kanyintjikitja, panya tjulpu ngunytjungkunku kulunypa tjuta nyalpingka unngu utulura atunymara kanyilpai, palu purunytyu. Palu nyura ngayunya wantingi alatjitu.³⁸ Ka palulanguru kuwari Godalu nyurampa timpula wantikatinyi, ka panya ultu alatjitu titutjara ngaraku.³⁹ Ka kuwaringuru nyura ngayunya rawangku nyakunyta wiya. Palu ngula nyura ngayunya piruku nyakuku mununi nyara palula arangka nyura ngayunya walkura wangkaku alatji, ‘Awari! Wanyula Godanya mirawañira walkunma, panya nyanga palunya Mayatja Godalu iyantjatanungku pulkara pukulmanu.’” Alatji Jesulu Jerusalemanyang ngurara tjutanguru tjituru-tjitururira wangkangi.

24

Jesulu Timpulawanungku Wangkanyta (Markaku 13:1-2; Luke-aku 21:5-6)

¹ Ka Jesunya timpulanguru ma-pakara ankunyangka palumpa nintintja tjutangku wangkangu, “Wanyu malakukutura nyawa! Nganampa timpula wiru mulapa ngaranyi.” ² Ka Jesulu nyakula wangkangu, “Uwa, timpula kuwari wiru ngaranyi, palu ngula wati warmala tjutangku pitjala uwankara piluntankuku, ka kañakatira mantangka ma-ngarira wañalku.”

Nintintja Tjutangku Tjapintja (Markaku 13:3-13; Luke-aku 21:7-19)

³ Munuya Jerusalemanyang wantikatira anu puli panya Alipatjaralakutu munuya pulingka katu tatira nyinakatingu. Kaya nyanga palula mañtalpa nyinara palumpa nintintja tjutangku Jesula tjapinu, “Wanyulanya tjakultjura! Yaalaña nyanga alatjiriku panya nyuntu kuwari timpula pilukatinytja wangkangi? Ka nyaaringkuku ngula manta ilkari wiyingkunytyaku ilaringkunyangka nyuntu malaku pitjanytja kuwaripangka?”

⁴ Ka Jesulu wangkangu, “Ngulu nyangamaya kutjupa tjutangku nyuranya wangkara ngunti kurantjaku-tawara. ⁵ Panya aŋangu kutjupa tjutaya pitjaku ngayulu iyantja-palku munuya ngunti wangkaku, ‘Ngayuluña wati panyatja panya Christanya Godalu kalkuntjanya.’ Kaya aŋangu winki mulatu ngunti kurannyangka kulira mulamularingkuku. ⁶ Ka nyura tjinguru kulikku aŋangu tjutangku tjananku pikangku pungkunyangka ilatjangku munu pararitja tjutangku kulu. Palu pika nyanga palunya tjananya kuliraya nguluringkuwiya nyinama, panya nyanga paluru tjana utiringkunytyaku ngaranyi alatjitu, palu tjintu malatja kuwaripatu ngaranyi ilaringkunytya wiya. ⁷⁻⁸ Panya ngura kutjupa kutjupangka tjaultji tjutangku pikangku pungkuku nguraku mayatja tjutangku wituwitunyangka. Ka ngura kutjupangka kutjupangka manta uriku, ka ngura kutjupa tjutangka ailuru pulka ngaraku. Panya pika kura nyanga paluru tjana ngañmanypa utiringkunytyaku ngaranyi, ka nyura nyanganpa kulintjatjanungku uti purkarangku kulinma. Panya minyma ititjarangku paku nyinara urira pirinnyangka kulilpai, ‘Munta-uwa tjinguru nyangatja iti wirkankunytyaku urinyi.’ Palu purunypa kura nyanganpa utiringkunyangka nyura uti kulinma, ‘Munta, nyangatja

tjinguru tjintu małatjalta ilaringanyi, palu palula kuwaripangka pika kutjupa kutjupa tjuta piruku utiringkunytjaku ngaranyitu.'

⁹ "Kaya nyurampa mirpañtju tjutangku tjaultji tjuta wituwitulku nyuranya witira pungkula iluntankunytjaku. Uwa, ngura tjutanguruuya nyurampa pulkara kuraringkuku nyura ngayuku walytja nyinanyangka.

¹⁰ Kaya nyara palula ara ngayuku walytja kutjupa tjarangku ngayunya wanantjatjanungku wantiku munuya mulamularingkunytja wiyingkuku. Munuya ngayuku walytja kutjupa tjutaku mukulya wiyingkuku, munuya tjanampa kuraringkula tjaultji tjuta wituwitulku tjananya witira pungkunytjaku. ¹¹ Kaya wati wangkatjara ngunti tjuta ngura tjutangka tjutaringkuku munuya anangu tjuta ngunti wangkara kuralku Godaku tjukurpa-palku.

¹² "Uwa, ngura winkitjangkuya anangu tjutangku kuraringkula kura tjuta rawangku palyalku, ka kura nyanga paluru lipiringkunyangka anangu tjuta mukulya wiyingkuku munuya anangu ngaltutjara nyinanyangka nyakula ngulungku wantiku mukulyangku alpamilantja wiyangku. ¹³ Palu nyura titutjarangku ilunytjakutu-wangkara ngayunya tungun-tunguntu wanannyangkampa Godalu nyuranya wankaru kanyilku palula tjungu titutjara nyinanytjaku. ¹⁴ Palu tjintu malatja wirkankunytja kuwaripangka ngayuku walytja tjutangku Tjukurpa Palya ngayunyatjara anangu uwankarangka para-tjakultjunkuku manta winkingka, panya Godalu anangu tjuta mayatjangku walytjanmara kanyintjatjara. Ka anangu ngura winkitjangkuya kulinnyangka kutju manta ilkari wiyingkuku.

Jesulu Pika Pulka Mulapa Ngaranytjaku Wangkanytja

(Markaku 13:14-23; Luke-aku 21:20-24)

¹⁵ "Munu nyura ngula nyakuku timpula milmilda kutjupa kutjupa kura pulka mulapa ngunti ngaranyangka panya uwankara wiyalainya, panya nganmanytju Godaku wangkatjarangku tjakultjunu wati panya Danieltu." (Tjukurpa nyanga palunyaya purkarangku kulinma nintiringkunytjikitjangku.) ¹⁶ "Munu palulanguru kura panya paluru utiringkunyangka nyakula nyura uti Judeala nyinanytjatjanu ngulu wirtjapakanma puliketu. ¹⁷ Ka tjinguru nyara palula ara anangu kutjupa wali katu nyinanyi munu uti paluru ukalingkula wali unngu kutjupa kutjupa tjuta mantjintjikitja tjarpanytja wiyangku wantira mapalku puliketu wirtjapakanma wankakitja.

¹⁸ "Munta tjinguru kutjupa kaanangka war karinyi munu uti paluru upukuta ngurangka ngaranyangka ankula mantjilwiya puliketu mapalku wirtjapakanma. ¹⁹ Ka nyara palula ara panya kura pulka mulapa ngaraku minyma ititjara tjutaku munu iti tjukutjukutjara tjutaku kulu. Ngaltutjara! Panya tjana tjinguru wirtjapakara ngururpatu pakuringkula wiyingkuku.

²⁰ "Kaya Godala tjapinma kura nyanganpa nyinngangka utiringkunytjaku-tawara, panya nyinngangku anangu urilta nyinanyangka pungkula iluntankunytjaku-tawara. Munuya tjapinmatu tjintu pakuwiyingkupaingka kulu utiringkunytjaku-tawara, panya nyurampa ara ngaranyitu tjintu pala palula wirtjapakantjaku wiya.

²¹ "Uwa, kura nyanganpa utiringkuku pulka mulapa panya nganmanytju nyakunytja wiyatja alatjitu, ka kura nyanga palu purunypa piruku utiringkunytja wiylalta ngaraku. ²² Ka kura nyanganpa tjinguru rawa ngaranyangkampa anangu uwankara ilura wiyingama. Palu Godalu

tjiñtu nyara palunya tjananya mutulku anangu panya paluru ngurkantankunytja tjuta ilunytjaku-tawara pika paluru rawa ngaranyangka.

²³ “Ka tjinguru kutjupangku nyurala wangkaku, ‘Nyngatja pitjangu Christanya, Godalu panya kalkuntjanya.’ Ka kutjupangku tjinguru wangkaku, ‘Wiya, nyaratja Christanya, Godalu panya kalkuntjitja mulapa.’ Ka nyura alatji wangkanyangka kulira mulamularingkunytja wiyangku wantima. ²⁴ Panya nyara palula arangka anangu ngunti wangkapai tjuta Christanya-palku wirkankuku Godalu panya kalkuntjanya-palku, ka wangkatjara ngunti tjuta ku lu ngura tjutangka tjutaringkuku, munuya paluru tjana anangu winki arkara ngunti kurantjikitjangku miracle kutjupa kutjupa pulka tjuta witulyangku palyalku tjana nyakula urulyarara mulamularingkunytjaku, anangu Godalu ngurkantankunytja tjutangku ku lu, palu putuya palunya tjananya kuralku Godaku panya walytja tjuta.

²⁵ “Ala! Kulinmaya nyanga kuwarina nyurala ngañmanyju tjakultjunnanyi nyura kutjupa kutjupa tjuta utiringkunyangka nyakula nintingku kulintjaku. ²⁶ Tjinguru kutjupa tjutangku nyurala wangkaku, ‘Ai! Nyaratja putingka nyinanyi wati panya Godalu kalkuntjanya.’ Palu alatji wangkanyangkaya kulira wantima ankula ngurintja wiyangku. Ka tjinguru kutjupa tjarangku wangkaku, ‘Awa! Pitjalaya wanyu nyawa! Nyngatja wati panya Godalu kalkuntjanya kumpira nyinanyi.’ Palu nyura wantima alatjitu tjanala kulira mulamularingkunytja wiyangku. ²⁷ Panya ngayulu Watiku Katjanya ngula malaku pitjala anangu uwankarangka utiringkuku manta winkitjangku uti nyakunytjaku, panya wanangarangku pinpara utilpai manta winki, palu purunypa ngayulu utiringkuku manta winkitjangku nyakunytjaku. ²⁸ Wanyu tjulpu panya walawuru kulila! Panya kuka ilura ngarinyangka walawuru tjuta kaputuripai. Kala nyakula tjukarurungku kulilpai. Palu purunypa nyura ngayunya malaku pitjanyangka nyakula tjukarurungku ngurkantankuku.”

Jesulu Malaku Pitjanytjikitjangku Wangkanytja

(Markaku 13:24-27; Luke-aku 21:25-28)

²⁹ “Ka pika nyara paluru tjana ngarala wiyaringkunyangka tjiñtu maruringkuku ka pirangku ku lu irnyalwiya ngaraku. Ka kilippi tjuta ilkariringuru punkalku. Uwa, Godalu ilkaritja kutjupa kutjupa uwankara pulkara uritingara kampa kutjupankuku. ³⁰ Ka nyara palula-arangka anangu uwankarangku kutjupa kutjupa ilkariringka nyakuku, munuya nyakunytjatjanungku kulilku, ‘Munta-uwa, nyngatja kuwari Watiku Katjanya malaku pitjanytjaku utiringanyi.’ Kanä palulanguru ngayulu ngangkalingka pitjaku witulya pitalytji pulkanya, kaya uwankarangku ngayunya mayatja pulka mulapa pitjanyangka nyakula nguluringkula ulaku. ³¹ Ka ngayulu pitjanyangka kutjupangku turampata pulkara puura wangkatjingalku, kanä ngayulu angelpa tjuta witulku manta wifikutu ankunytjaku, kaya ankula kakarara ulparira alinytjara wiluraranguru anangu Godalu ngurkantankunytja tjuta utulura uwankara tjungulku, ngayuku walytja tjuta.”

Jesulu Puñu Kiripitjinguru Wangkanytja

(Markaku 13:28-31; Luke-aku 21:29-33)

³² Munu Jesulu piruku tjanala tjukurpa kampa kutjupa wangkangu puñu kiripitjitarra alatji, “Panya nyinngangka nyalpi puñu kiripitjinguru punkara wiyaringkupai munu ngula piruku nyalpi kuwaritja pakan-nyangka nyura nyakula kulilpai alatji, ‘Munta-uwa, nyngatja watapli

kuliringanyi.’³³ Ka nyanga palu purunypaṭu pika panya paluru tjana utiringkunyangka nyura nyakula kulinma alatji, ‘Munta-uwa tjintu małatja wałalpi ilaringu.’³⁴ Uwa, tjukarurungkuṇa nyurala wangkanyi, panya nyanganpa uwankara utiringkuku aŋangu nyanga kuwari nyinanytja tjuṭa wanka nyinanyangkaṭu.³⁵ Panya ngula manta ilkarí uwankara wi-yaringkuku, palu tjukurpa ngayulu wangkanytja titutjara alatjitu ngaraku wiyaringkunytja wiya.

*Anangu Uwankara Ninti Wiya Tjintu Malatjaku
(Markaku 13:32-37; Luke-aku 17:26-30,34-36)*

³⁶ “Palu uwankaraya tjintu nyara palumpa ngurpa. Angelpa ilkaritja tjuṭa ngurpa munu Katjanya kuļu ngurpa, palu Mamanya kutju ninti.³⁷ Panya ngula Watiku Katjanya pitjanyangka tjiripi panya Noah-nya tjana iriti nyinanytja purunypa ngaraku.³⁸ Panya nyara palula-arangka uru pulkangka kuwaripangka aŋangu tjuta watarku nyinangi, munuya mai kuka ngalkuningi, kapi waina kuļu tjikiningi, munuya wati tjutangku kungka tjuṭa ałtingi.³⁹ Nyanga alatjiya watarku alatjitu nyinangi, ka panya Noah-nya tjana walytjarara walytjarara kutju pautangka tjarpangu uru panya pulkangka-tawara, ka panya uru pulkangku pakara katur-ingkula aŋangu kutjupa uwankara iluntanu.* Ka nyara palu purunypa ngula aŋangu tjuṭa watarku alatjitu nyinaku ngayulu Watiku Katjanya witulya pulka pitjanyangka.⁴⁰ Panya nyara palula ara wati kutjara tjinguru kaanangka war̄karinyi, kaña kutju katiku, mununa kutju wantikatiku.⁴¹ Ka palu purunypa manta kutjupangka minyma kutjarangku tjinguru mai uninypa rungkanma, kaña kutju katiku mununa kutju wantikatiku.⁴² Ka nyura uti ala-alangku nyangama panya nyura tjintu nyara palumpa ngurpa ngayulu panya pitjanytjaku.⁴³ Wanyuya wati panya kutitjunkupainya kulila, panya paluru walingka tjarpala kutitjunkunytjikitjangku nganmanytju waliku mayatjangka tjakultjunkupai wiya, palu paluru kampangkatu tjarpapai. Tjinguru paluru nganmanytju tjakultjunkunyangkampa waliku mayatjangku kulira nintingku nyinara palumpa paṭanma munu ngura aṭunyamanama paluru tjarpanytjaku-tawara.⁴⁴ Ka pala palu purunypa nyura uti rawangku ala-alangku paṭara nyangama nyura watarku nyinanyangka ngayulu Watiku Katjanya pitjanytjaku-tawara. Panya nyura uwankara ngurpa yaalarə ngayulu małaku pitjanytjaku.” Alatji Jesulu palurunku wangkangi palumpa nintintja tjutangka.

*Tjukaruru Wanganara Warkarintjaku Mayatjaku
(Luke-aku 12:35-48)*

⁴⁵ Munu Jesulu tjanala piṛuku wangkangu, “Ngananya wanyu wati war̄ka nintipuka munu tjukaruru wanganara war̄karipai? Nyara palunya mayatjangku tjukaruru nyakula kutju tjunkuku palumpa war̄ka kutjupa tjuṭa tjukarurungku aṭunymara kanyintjaku munu tjananya mai ungkunytjaku.⁴⁶ Munu ngula mayatja panya paluru ankunytjatjanungku małaku pitjala nyakuku wati panya paluru war̄ka panya wiruṛa palyantja. Munu paluru palumpa pulkaṛa alatjitu pukulariku.⁴⁷ Kaña tjukarurungku nyurala wangkanyi, panya wati mayatjangku alatji wirungku war̄ka tjuṭa aṭunymara kanyinnyangka nyakula palunya mayatja pulka mulapa tjunkuku palumpa uwankara mayatjarira aṭunymara kanyintjaku.

* 24:39 Genesis 7:6

48 “Palu tjinguru wati paluru kampa kutjuparira unngu kulikku, ‘Munta, ngayuku mayatja tjinguru ti^tutjara anu munu tjinguru ngula kutju malaku pitjaku.’ 49 Munu palulangurulta pitjanytja wiya ngaranyangka paluru wati war^ka panya kutjupa tju^ta pikangku pungkuku munu mai pul^ka ku^lu ngalkula waina pul^kka tjikira tarangkariku. 50 Ka ngula mayatja panya paluru malaku pitjaku wati panya paluru watarku nyinanyangka. 51 Munu palunya kura nyinanyangka nyakula pul^kara alatji^tu pungkula paira iyalku ngura kurakutu pika pul^katjara nyinara titutjara ulanytjaku anangu panya ngunti palya-palku kaⁿany-kaⁿanya nyinapai tju^tangka tjunguringkula.”

25

Tjukurpa Kungkawara 10-tjara

1-4 Munu Jesulu piruku tjanala alatji wangkangu, “Uwa, ngula tji^ttu malatjangka ngayulu malaku pitjala ngayuku wal^tyta tju^ta mayatjangku kanyilku. Ka a^ra nyara paluru tjukurpa nyanga purunypa ngaranyi panya kungkawara tju^tatjara. Panya kungkawara 10 anu kungkawara kutjupaku ngurakutu palula tjunguringkula pa^tantjikitja wati panya palumpa kalkuntjitjaku.* Munuya paluru tjana kutjungku kutjungku lampa tilitjara katingi mungangka ankunytjikitjangku. Palu panya kungkawara 5 kawakawa munuya tjana karitjina lampaku tjukutjuku kutju kanyiningi munga warangka tilingaranytjaku wiya. Ka panya 5 kutjupangku nintingku kulipai munuya tjana karitjina pul^kka kanyiningi. 5 Munuya kungkawara paluru tjana uwankara rawa patara patara pilu piluringkula kunkunaringu. 6 Ka munga kulturingkunya kutjupangku mirara wangkangu, ‘Walaya pakala! Wati panya paluru ila pitjanyi, kala ngaparikatira nyawa!’ 7 Kaya paluru tjana uwankarangkulta kunkunjanungku pakara lampa tju^ta mantjira tili pul^kanu ankunytjikitjangku. 8 Kaya panya 5 kawakawangku tili tjukutjukuringkunya nyakula pu^tu kuliningi, ‘Utila panyatja karitjina pul^kka nguwanpa katima.’ Munuya pu^tu kulira kungkawara panya 5 kutjupangka ngatjinu wangkara, ‘Ungamalanya karitjina! Tililampa wiyaringu.’ 9 Kaya wangkangu, ‘Wiya, ngananya tjukutjuku kanyini nganampa kutju. Ankulayanku tjuwangka karitjina kutjupa payamilala!’ 10 Kaya mulapatu anu payamilantjikitja. Ka tjana ankunyangka wati panya paluru wirkanu palumpa kalkuntja altira katintjikitja. Kaya kungkawara panya kulipai tju^ta palula pulala tjunguringkula anu palumpa mamaku walikutu munuya wal^ki palula wirkara tjarpangu mai panya pul^kka pukularira ngalkuntjikitja, ka wati war^karipaingku tuwa patinu. 11 Kaya kungkawara panya 5 kutjupangku karitjina mantjira mala wanara wirkanu munuya urilta ngarala mirara wangangi, ‘Mayatja! Alalalampa!’ 12 Ka wangkangu, ‘Wiya, ngayulu nyurampa ngurpa.’” 13 Munu Jesulu tjukurpa nyangatja wangkara wiyaringkula tjanalalta wangkangu, “Ala! Kulinmaya kungkawara panya kulipai tju^ta purunypa munuya ala-alangku nyangama! Panya nyura ngurpa tji^ttu nyara ngayulu pitjanytjitjaku.”

Tjukurpa Wati Warkaripai Maⁿkurpatjara (Luke-aku 19:11-27)

* **25:1-4** Tjakaya kungkawaraku malpa tju^ta palula tjunguringkula pa^talpai wati panya palumpa kalkuntjitjangku pitjala palunya altira ma-katintjaku palumpa mamaku ngurakutu nyara palula malpa kutjupa tju^tangka tjunguringkula mai pul^kka pukularira ngalkuntjaku.

¹⁴ Munu Jesulu piruku tjanala wangkangu, “Uwa, ngayulu panya pitjanytja ara nyanga palu purunypatu ngaraku. Panya wati mayatjangku ngura kutjupakutu ankunytjikitjangku kuliningi munu panya palumpa warkaripai tjuta altira wangkangu palumpa walingka kutjupa kutjupa uwankara atunyman kunytjaku. ¹⁵ Munu paluru waṛka palunya tjananya kutju kutju ungkukatingu. Wati waṛka kutju nintipuka mulapa mani 5,000 ungu, munu wati kutjupa ninti tjuku nguwanpa 2,000 ungu, munu kutjupa ninti tjukutjuku 1,000 kutju ungu. Munu anulta ngura kutjupakutu. ¹⁶ Ka wati panya 5,000 mantjintjatjanungku nintingku kutjupa kutjupa tjuta payamilaṛa anangu tjutangka tjalamilaningi munu mani kutjupalpa pulka palyara tjungunu ka 10,000-aringu palumpa panya mayatjaku. ¹⁷ Ka panya 2,000 mantjintjatjanungku palu purunypatu palyanu palumpa mayatjaku, ka 4,000-aringu. ¹⁸ Ka panya 1,000 mantjintjatjanungku ngurpangku katira piṭi tjawara tjuṇutjunu ngula palumpa mayatja malaku pitjanyangka malakungku ungkunytjikitjangku nampa panya palunyatu.

¹⁹ “Ka ngula tjanampa panya mayatja ngura kutjupakutu ankunytjatjanu malakulta pitjangu munu waṛkaripai panya maṇkurpa altira tjapinu, ‘Mani panya ngayulu ungkunytjalanguru nyura yaaltjiṭu palyanu?’ ²⁰ Ka wati panya 5,000 mantjintjatjanungku pitjala 10,000 ungkula wangkangu, ‘Uwa, Mayatja panya nyuntu ngayunya 5,000 ungu, kana 5,000 kutjupa palyara tjungunu ka 10,000 nyuntumpa kuwari ngarinyi.’

²¹ “Ka mayatjangku panya wangkangu, ‘Wirungkun kulira nyanga palyanu, kaṇanta kuwari pulka mulapalta ungkuku ngayuku atunymara kanyintjaku. Ka ngalya-tjarpa, munu ngayula tjunguringkula pukularira nyinama.’ ²² Ka wati panya 2,000 mantjintjatjanungku pitjala 4,000 ungkula wangkangu, ‘Uwa, Mayatja panya nyuntuin 2,000 ungu, kana kutjara kutjupa palyara tjungunu ka 4,000 kuwari ngarinyi.’

²³ “Ka mayatjangku panya wangkangu, ‘Wirungkun kulira palyanu, kaṇanta kuwari pulka nguwanpalta ungkuku ngayuku atunymara kanyintjaku. Ka ngalya-tjarpa, munu ngayula tjunguringkula pukularira nyinama.’ ²⁴ Ka wati panya 1,000 mantjintjanyalta pitjangu munu wangkangu, ‘Wiya mayatja, ngayulu na nguluringangi nyuntumpa panya nyuntun wati wituwitu, munu nyuntu witulya pulkangku mantjilpai nyuntu tjunkunytja wiyatjangku munu panyan mai kaṭara uralpai nyuntu ngaṇmanytju uṇinypa tjuṭa tjunkunytja wiyatjangku. ²⁵ Kana nyuntumpa ngulungku mani panya nyuntu ngayunya ungkunytja katira piṭingka tjawara tjuṇutjunu. Ka mani paluru nyangatja.’

²⁶ “Ka wati panya mayatjangku kulira wangkangu, ‘Nyuntun wati kura mulapa waṛka palyantja wiya alatjiṭu nyinangi. Mulapa nyuntu ngayuku ninti panya ngayulu wati wituwitu mununa witulya pulkangku mantjilpai ngayulu tjunkunytja wiyatjangku, mununa mai kaṭara uralpai ngayulu ngaṇmanytju uṇinypa tjuṭa tjunkunytja wiyatjangku. ²⁷ Kan ngayuku nintingku nyaaku ngayuku mani tjawara tjuṇutjunu bankingka tjunkunytja wiyangku? Tjinguru nyuntu bankingka tjunkunyangka ngayulu malaku pitjala pulka nguwanpa mantjinma.’

²⁸ “Munu tjananya ila ngaranyangka wangkangu, ‘Mani panya palunyaya mantjira uwa wati pala 10,000 kanyintjanya!’ ²⁹ Munu mayatja panya paluru wangkangu, ‘Panya anangungku waṛka pulka palyanyangka ngayulu palunya piruku pulka mulapa ungkuku, palu panya warka palyantja wiyangka ngayulu palumpa uwankara mantjilku mununa maralpa alatjiṭu paira iyalku.’ ³⁰ Munu mayatja paluru tjanala wangkangu,

‘Wati nyanga kurakuraya witirā ma-katira ʉrl̩ta wan̩i ngura kurangka mungawalurungka pika pułkatjara nyinara tiłutjara ulanytjaku.’ ”

Tjintu Małatjangka Anangu Uwankara Ngurkantara Tjarantja

³¹ Munu palulanguru Jesulu tjanala piłuku wangkangu alatji, “Ngula Watiku Katjanya mayatja pułka pitjaku angelpa winkitjara munu mayatja pułkaku tjiya wirungka nyinakatiku. ³² Kaya angelpa tjutangku aŋangu uwankara manta winkitja para-mantjirā ngalya-katira ngayula kuranyu ngaratjunkuku utułu winki mulapa. Kan̩a tjananya ngayulu ngurkantara tjaralku, panya wati tjapatangku tjiipi tjuta munu nanikuta tjuta kułu tjungurā kanyilpai munu kutjupa-ara paluru tjiipi tjutanguru ngurkantara nanikuta tjuta tjaralpai, palu purunypa ngayulu aŋangu tjuta ngurkantara tjaralku. ³³ Mununa ngayuku walytja tjuta kampa wakungka ngaratjunkuku mununa ngayunya wantipai tjuta kampa tjampungka ngaratjunkuku. ³⁴ Mununa kampa panya wakungka ngaranytja tjutangka alatji wangkaku, ‘Uwa, panya Mamalu nyuranya pukulmara kanyiningi, kaya pitjala ngayula tjunguriwa ngura nyanga ilkaritjangka. Panya kuwaripatjara mulapa manta ilkar̩i paluntja kuwaripangka Mamalu nyurampa nganmanytu palyara wantingu ngula palula tjunguringkula nyinanytjaku. ³⁵ Panya pałtjatjiratja nyinanyangkańi nyura mai ungu, munu panyani nyura mina ilu nyinanyangka mina ungu, munu panyani nyura malikitja wirkankunyangka nyakula nyurampa ngurangka kanyiningi. ³⁶ Ka panyana nikiti nyinangi, kan̩i nyura nyakula mantarangka tjarpatjunu. Munu panyani nyura pikatjara ngarinyangka kułu wirura aṭunymanangi. Munu panya nyura ngayulu tjailangka nyinanyangka kułu ngayunya pitjala nyangangi munuńi nyura wangkara pukulmanangi.’ Alatjińa tjanala wangkaku wakungka panya ngaranytja tjutangka.

³⁷⁻³⁹ “Kaya ngapartji wangkaku, ‘Mayatja, pułula kulini. Panya nyuntunyala nyakunytja wiyatū pałtjatjiratja, mina ilu, malikitja, nikiti, pikatjara munu tjailangka nyinanytja.’

⁴⁰ “Kan̩a tjanala wangkaku, ‘Wiya, panya nyura aŋangu kutjupa tjuta pałtjatjiratja, mina ilu, malikitja, nikiti, pikatjara munu tjailangka nyinanyangka nyakula tjananya alpamilara ngayunya kułu alpamilaningi, panya ngayulu mukuringangi nyura ngaltutjara nyara palunya tjananya alpamilara kanyintjaku.’

⁴¹ “Mununa palulanguru tjampungka ngaranytja tjuta wangkaku alatji, ‘Araya ngayulanguru panya nyuranya Godalu nganmanytu kukanymanu waru panya tiłutjara kampanytjala wañinytjikitjangku, panya Godalu palyara wantingu Satanku munu mamu tjutaku kułu. ⁴² Panya nyakulanı nyura wantingi pałtjatjiratja nyinanyangka mai unguwiyangku, munu panyani nyura mina ilu nyinanyangka wantingi kapi unguwiyangku, ⁴³ munu panyani nyura malikitja pitjanyangka nyakula altira ngurangka tjunkuwiyangku wantingi, munu panyani nyura nikiti nyinanyangka nyakula wantingi mantarangka tjarpatjunkuwiyangku, munu panyani nyura pikatjara ngarinyangka aṭunymara kanyintja wiyangku wantingi, munu panyani nyura tjila unngu nyinanyangka tjarpara wangkara pukulmankuwiyangku wantingi.’

⁴⁴ “Kaniya wangkaku, ‘Mayatja, pułula kulini. Panya nyuntunyala nyakunytja wiyatū pałtjatjiratja, mina ilu, malikitja, nikiti, pikatjara munu tjailangka nyinanytja.’

45 “Kaṇa tjanala wangkaku, ‘Wiya, panya nyura aṇangu kutjupa tjuṭa pałtjatjiratja, mina ilu, malikitja, nikiti, pikatjara munu tjailangka nyinanyangka nyakula tjananya alpamilalwiyangku wantira ngayunya kuļu alpamilantja wiyangku wantingi, panya ngayulu mukuringangi nyura ngaltutjara nyara palunya tjananya alpamilara kanyintjaku.’ Alatjina tjanala wangkaku ngayula tjampungka ngaranytja tjutangka.

46 “Munuña palulanguru palunya tjananya uwankara paira iyalku ngura kurakutu nyara palula titutjara nyinanytjaku pika pulkatjara. Palu nyanga wakungka ngaranytja uwankara ngayula tjunguringkula wanka titutjara nyinaku.”

26

Jesunya Pungkunytjikitjangku Kulintja (Markaku 14:1-2; Luke-aku 22:1-2; Johnku 11:45-53)

1 Munu Jesulu tjukurpa nyanganpa wangkara wiyingkula palumpa nintintja tjutangka wangkangu, **2** “Nyura panya ninti panya nyanga palulanguru tjintu kutjara wiyingkula inma panya Katuwanu Ankunytjanya ngaranyi, ka inma nyara palula wati mirpantju tjutangku Watiku Katjanya witilku munuya ma-ungkuku puṇu kaṭakutjbarangka wakara utitjunkunytjaku.”*

3 Kaya wati tjukurtjara kuranyitja tjuṭa munu tjlpi kuranyitja tjuṭa kuļu tjunguringu wati panya tjukurtjara pułkaku ngurangka ini panya Kayapatjaku. **4** Munuya wangkara kuliningi kampangkaṭu Jesunya witintjikitjangku munu palula malangka iluntankunytjikitjangku. **5** Munuya wangkangu, “Wanyula kuwaripangku wantima, panya aṇangu tjuṭaya inmaku pitjangu kuvari, munulanya tjinguru tjanala miṛangka witinnyangka nyakula tjituru-tjitururira winkingku tjaturingkula pungkuku.”

Minymangku Jesula Panti Wiru Tjutintja (Markaku 14:3-9; Johnku 12:1-8)

6 Ka Jesunya panya ngura Piitjanila nyinangi wati ini Simonku ngurangka, panya wati nyara paluru ngaṇmanyapa miři pikatjara nyinangi.

7 Ka tjana nyinara mai ngalkunnyangka minyma kutjupa Jesulakutu pitjangu munu paluru katingi patalangka uwila wiru panṭipai mani pulkatja. Munu paluru alara Jesula katangka tjutinu. **8** Kaya nintintja tjutangku nyakula tjananku mirpañarira wangkangi, “Ai! Nyaaku nyangangku pupatjura wiyanu? Mani pulkatja alatjitu. **9** Utu nyangangku mani pułkakitjangku tjalamanma munu mani mantjira ngaltutjara tjuṭa ungama.”

10 Ka Jesulu kuliningi tjana wangkanyangka munu tjananya wangkangu, “Nyaaku nyura nyararingkula wangkanyi? Nyangangku wiru mulapa palyanu ngayuku. **11** Panya ngaltutjara tjuṭaya nyurala rawa alatjitu nyinanyi, palu ngayulu nyurala rawa nyinanytja wiya. **12** Kaṇi minyma nyanga paluru paṇti nyanga wirungka ngaṇmanyatju tjutinu ngula panya kurulta ngarinytjaku.* **13** Tjukarurungkuna nyurala wangkanyi, panya ngula Tjukurpa Palya ngayunyatjara ngura winkingka para-wangkaraya

* **26:2** Ara nyanga Katuwanu Ankunytja kulintjikitjangku nyawa Exodus-ala chapter 12 munu verse 21-nguru. * **26:12** Jew tjutangkuya tjakangku aṇangu ilunyangka malangka uwila wiru panṭipai puntungka tjutilpai wiruringkula ngarinytjaku. Ka Jesulu palurunku ilunytjikitjangku kuliṛa nyangatja ngaṇmanyatju wangkangi.

minyma nyanga palunyatjara ku_{lu} tjakultjunkuku paluru nyanga wiru palyantja ngayuku.”

*Judasalu Jesunya Tjanala Nintintjikitjangku Kalkuntja
(Markaku 14:10-11; Luke-aku 22:3-6)*

¹⁴ Ka nyara palulanguru nintintja panya 12-nguru kutju anu Judas Kariyatanya tjukurtjara kuranyitja tjutakutu. ¹⁵ Munu tjanala wangkangu, “Ngayulu nyurala Jesunya nintinnyangka nyura ngayunya mani yaaltjituungkuku?” Kaya wangkanyangka kulir_a mani tjarara 30 palunya ungu. ¹⁶ Ka nyara palulanguru Judasalu kuliningi, “Yaaltjingar_an_a tjanala nin-tilku Jesunya?” Munu paluru rawangku nyakukatingi Jesunya tjanala nintintjikitjangku.

*Mai Ngalkunytja Inma Panya Katuwanu Ankunytjanya Kulintjikitjangku
(Markaku 14:12-21; Luke-aku 22:7-13,21-23; Johnku 13:21-30)*

¹⁷ Ka tjintu panya paluru wirkanu mai pilytja ngalkula ara panya Katuwanu Ankunytjanya kulintjaku. Ka palumpa nintintja tjutangku Jesula tjinpinu, “Yaaltjingkala nyuntumpa nganampa mai kuka palyalku ngalkula ara panya Katuwanu Ankunytjanya kulintjikitjangku?”

¹⁸ Ka tjananya Jesulu witura iyara wangkangu, “Ankulaya Jerusale-mala wirkara nyawa wati ini nyangatja munuya palula wangka alatji, ‘Nintilpailulanya witu_{nu}, kala kunyu nyuntumpa walingka mai palumpa nganampa palyalku ara panya Katuwanu Ankunytjanya ngalkula kulintjikitjangku, panya palumpa ilaringu.’ Alatjiya wati panya palula wangka.”

¹⁹ Kaya mulapatu Jesulu panya wangkanytja uwankara ankula palyanu munuya mai pilytja kuka ku_{lu} pau_a tjunkula wantingu mungartji ngalkuntjikitjangku.

²⁰ Ka tjintu ma-tjarpanyangka Jesunya munu nintintja tjuta ku_{lu} wali panya palula tjarpangu munuya nyinakatingu mai ngalkuntjikitja. ²¹ Munuya antangku para-ngarira wanara mai ngalkuningi. Ka Jesulu tjanala wangkangu, “Tjukarurungku_a nyurala wangkanyi, panya kutjungku nyuralanguru ngayunya nintilku ngayuku mirpa_tju tjutangka tiana ngayunya witintjaku.”

²² Kaya nintintja panya tjutangku kulir_a unngu tjitur_u-tjitururingu, munuya kutjungku kutjungku palula wangkara tjinpingi, “Mayatja! Nyaa, ngayunyan wangkanyi?”

²³ Ka Jesulu wangkangu, “Wiya, nyanga kuwari ngayula tjungungku pitingka tjalatjura ngalkuni, nyanga paluru_u nintilku.* ²⁴ Uwa, mulapa Watiku Katjanya iluku, panya alatjirinytjaku nyiringka iriti walkatjunu. Palu ngaltutjara, wati panya ngayunya nintintjanya, panya palumpa pika pulka mulapa ngaraku. Wanyunti wati paluru iti wirkankunytja wiya ngarama.” Alatji Jesulu wangkangu.

²⁵ Ka wati panya Judasalu, palunya panya nintintjalu wangkangu, “Nintilpai! Nyaa? Ngayunyan wangkanyi?”

Ka wangkangu, “Uwa nyuntunyan_a wangkanyi.”

*Mayatjalu Tjana Mai Malatja Ngalkunytja
(Markaku 14:22-26; Luke-aku 22:14-20; 1 Karintjaku 11:23-25)*

²⁶ Ka tiana ngalkunnyangka Jesulu mai pilytja mantjinu munu maiku pukularira Godanya wal_kura wangkangu, “Wirungkulanyan mai nyangatja ungu.” Munu ka_lantara palumpa nintintja tjuta wangkara ungu, “Mantjiraya ngalkula. Nyangatja ngayulu puntu.”

* 26:23 Psalm 41:10

²⁷ Munu palulanguru walpayata wainatjara mantjinu munu wainaku pukularira Godanya walkura wangkangu, “Wirungkulanyan waina nyangatja ungu.” Munu tjananya ungu wangkara, “Mantjiraya tjikila. ²⁸ Nyangatja ngayulu milkali anangu tjutaku tjutinytja. Panya ngayulu ilura milkali tjutinyangka Godalu kalkunu anangu tjuṭaku kalyparingkunytjikitjangku munu tjananya kura tjuṭa palyantjitjanguru pungkuwiyangku wantinytjikitjangku. ²⁹ Kaya kulila, panya ngayulu waina piruku tjikintja wiya mantangka nyanga nyinara, palu ngula Mamalu mayatja pulkangku palumpa walytja uwankara utulura kanyilku, kana nyara palula arangka nyurala piruku tjikilku waina kuwaritja.” Alatji Jesulu tjanala wangkangi.

³⁰ Munuya palulanguru ngalkula tjikintjatjanungku inma kutju inkara wiyaringkula ma-pakara anu apu panya Alipatjaralakutu.

*Jesulu Peternya Ngurparingkunytjaku Wangkanytja
(Markaku 14:27-31; Luke-aku 22:31-34; Johnku 13:36-38)*

³¹ Ka Jesulu tjanala wangkangu, “Munga nyanga kuvari nyura uwankara ngayulanguru wililyaralku, panya nyiringka iriti walkatjunkunytja ngaranyi Godalu wangkanytja alatji, ‘Ngayuluña tjiipi tjuṭaku tjapata pungkula iluntankuku, kaya tjiipi tjuṭa wililyaralku.’ *

³² Palu ngayulu ilunytjatjanu wankaringkula pakara nyurala kuranyu ankuku Galileelakutu.”

³³ Ka Peterlu wangkangu, “Wiya, nyanga tjanantiya nyuntunya wantikatira wirtjapakalku palu ngayulu wiya.”

³⁴ Ka Jesulu palula wangkangu, “Wiya, tjukarurungkuña nyuntunya wangkanyi, panya tjiṇtu pakantja kuwaripangka tjuki wangkapai, ka munga nyanga kuvari tjuki paluru wangkanytja kuwaripangka nyuntu ngayuku mankurara ngurparingkuku.”

³⁵ Ka Peterlu pulkara alatji tungun-tunguntu wangkangi, “Wiya, ngayulu nyuntumpa ngurparingkunytja wiya alatji. Tjinguruli nyuntu ngalitu palya iluku.”

Kaya nintintja panya kutjupa tjuṭangku kuļu tjukurpa palu purunypaṭu wangkangu.

*Jesulu Godala Tjapintja Ngura Katjimanila
(Markaku 14:32-42; Luke-aku 22:39-46)*

³⁶ Munuya palulanguru apu panya Alipatjarala tatira ngura ini Katjimanila wirkanu, ka Jesulu wangkangu nintintja panya tjuṭangka, “Nyangangkaya nyinama patara kana nyarangka tjukutjuku ankula Mamala tjapila.” ³⁷ Munu paluru altira katingu nintintja mankurpa Peternya munu Tjipitiku katja kutjara Jamesanya pulanya Johnnga. Munu tjukutjuku patupaṭu ankula nyara palulalta paluru pulkara tjiturutjitururingu. ³⁸ Munu nintintja panya mankurta wangkangu, “Ngayulu pulkara tjiturutjitururingu kurunpa paku pulkaringkula nguwanpa iluni. Kaya wanyu nyangangka ngayula tjungu nyinara wankangku nyangama kunkunpa wiyangku, kana Mamala tjapila.” ³⁹ Munu paluru paṭupaṭu nguwanpa ilaṭu ankula mantangka waṭungarakatira Godala tjapiningi tjiturutjitururingu pulkangku alatji wangkara, “Uwa Mama, wanyu tjananya ngayuku panya mirpaṇtju tjuṭa markula ngayunya pungkunytjaku-tawara. Palu wiya, nyuntu mukuringkula palya tjananya wantir’iyala ngayunya

* **26:31** Tjakarayaku 13:7

pungkunytjaku, kaña palula tjanalanguru kumpintja wiya, panya ngayulu mukuringanyi nyuntu mukuringkunytjitja kutju palyantjikitja.”

⁴⁰ Munu panya tjanalakutu malaku pitjangu munu nyangu nintintja panya mañkurpa kunkunpa ngarinyangka. Munu wangkangu, “Peter, nyura puťu wankangku nyanganyi rawa nguwantu?” ⁴¹ Munu tjanala piřuku wangkangu, “Wankangkuya nyangama munuya Mamala tjapinma nyuranya anga-kanyintjaku mamungku nyuranya kurantjaku-tawara, panya nyura pulkara mukuringanyi wanka nyinanytjikitja, palu kuru nyura pilu-pilu ngaranyi.”

⁴² Munu tjanala wangkanytjatjanu małaku ankula Mamala piřuku tjapiningi, “Uwa Mama, wanyu tjananya ngayuku mirpańtu tjuta markula ngayunya pungkunytjaku-tawara. Palu wiya, nyuntu mukuringkula palya wantir’iyala ngayunya pungkunytjaku, kaña palula tjanalanguru kumpintja wiya, panya ngayulu mukuringanyi nyuntu mukuringkunytjitja kutju palyantjikitja.” ⁴³ Munu tjapira wiyaringkula piřuku malaku pitjala tjananya ngayunu kunkunpa ngarinyangka panya kuruya pilu-pilu mulapa ngarangi.

⁴⁴ Ka tjananya wantikatira małaku ankula piřuku Mamala tjapiningi tjukurpa panya palunyatū wangkara. ⁴⁵⁻⁴⁶ Munu tjapiřa wiyaringkula małakulta pitjangu munu tjanala wangkangu, “Kunkunpatu nyura ngarinyi? Alatjitu nyura kunkunarira pakuwiyingu. Nyawaltaya pakara! Pala wirkakatingu tjananya ngayuku panya mirpańtu tjuťa, mununi kuwari ngayunya Watiku Katjanya tjanala nintini wati pala kura tjuťangka, kaya ngayunya witira katiku. Walaya pakala kala palula tjanalakutu ara!”

Jesunya Witintja

(Markaku 14:43-50; Luke-aku 22:47-53; Johnku 18:3-12)

⁴⁷ Ka Jesunya kuwaripańtu tjanala ngarala wangkanyangka Judasanya palumpa panya nintintja wirkanu wati tjuťatjara, munuya paluru tjana tjuļa waratjara tjuťinypatjara kulukulu pitjangu, panya tjukurtjara kuranyitja tjuťangku munu tjlipi kutjupa tjuťangku kuļu tjananya witura iyanu Jesunya witintjaku. ⁴⁸ Ka wati panya palula tjanala Judasalu nganmanytju wangkangu tjana pitjanytja kuwaripangka alatji, “Ngayuluňawi mitamita kutjara nyunytjula wati palunya, kaya nyunytjunyangka nyakulampa witilalta.” ⁴⁹ Munu palulanguru Judasanya Jesulakutu pitjala wangkangu, “Awa! Nintilpai!” Munu palula ilaringkula palunya nguku kutjara nyunytjuňu.

⁵⁰ Ka Jesulu wangkangu, “Uwa małpa, walangku palyala nyuntu mukuringkunytja!” Kaya wati panya tjuťangku pitjala palunya witira kanyiningi. ⁵¹ Ka wati kutjungku Jesula tjungutjangku tjuļa wařa piltangka kanyintjatjanungku ilara wati tjukurtjara pulkaku war̄karipai pungkula pina kutju muťunu.

⁵² Ka Jesulu palula wangkangu, “Tjuļa pala małakungku tjarpatjura! Panya anangungku tjuļangka kunṭara iluntarampa palu purunypańtu iluku kutjupangku palunya ngapartji tjuļangka kunṭannyangka.” ⁵³ Nyuntu ngayuku ninti. Tjinguru ngayulu mukuringkulampa Mamala tjapinma ngayunya alpamilantjaku, ka paluru angelpa tjuťa mulapa witunma panya minga purunypa, kaniya warmalarira pitjala ngalkinma alatji. ⁵⁴ Palu tjinguru angelpa tjuťangku pitjala ngayunya ngalkinnyangkampa tjukurpa panya nyiringka iriti walkatkunkunytjanya utiringkunytja wiya ngaraku,

panya ngayunya iluntankunytjaku wangkanytjanya. Nyara palulanguruṇa angelpa tjutangku ngalkintjaku Mamala tjapintja wiyangku wantinyi.”

⁵⁵ Munu palulanguru Jesulu wati tjutangka wangkangu, “Nyaaku nyura tjuła waratjara tjutinypatjara kuļu pitjangu ngayunya wati pikati-palku kulira witintjikitja? Wanyuna ngayulu mirpaṇtju? Wiya, panya ngayulu tjintu kutjupa tjintu kutjupa timpula unngu nyinara nyurala nintilpai, ka panyani nyura witilwiyangku wantingi. ⁵⁶ Palu palya, panya nyanga alatjirinytjaku Godalu nganmanytju wangkangu wati wangkatjara tjutangka, kaya panya nyiringka iriti walkatjunu.”

Kaya palulangurulta nintintja tjutangku palunya wantikatira ngulu wirtjapakanu.

Jesunya Jewku Mayatja Tjutangka Kuranyu Ngaranytja

(Markaku 14:53-65; Luke-aku 22:54-55,63-71; Johnku 18:13-14,19-24)

⁵⁷ Munuya Jesunya witintjatjanungku ma-katingu tjukurtjara pulkakutu wati panya Kayapatjaku walikutu. Kaya tjukurtjara kuranyitja tjuṭa, Moseku tjukurpa nintilpai tjuṭa munu tjlpi kutjupa tjuṭa kułukuļu wali nyara palula unngu tjunguringu. ⁵⁸ Ka Peterlu Jesunya tjananya malawanungku kumpira wanāningi palula tjanala ilaringkunytja wiyangku munu wali panya palula wirkara ma-tjarpangu yaatangka unngu munu wati timpula atunymancupai tjutangka tjunguringkula ngarangi nyakunytjikitja. Panya paluru kuliningi, “Kuwari yaaltjiriku? Wanyu kaña nyanganguru ngarala nyangama.”

⁵⁹ Kaya tjukurtjara kuranyitja tjuṭa munu tjlpi kantjula uwankara tjunguringkula wali unngu nyinara wangkangi munuya anangu tjuṭa ngurira altira tjanala tjapiningi, “Wanyulanya tjakultjura Jesulu panya nganmanytju wangkanytja tjuṭa, kala kulira palunya ngurkantara.” Alatji tjana tjapiningi panya tjana mukuringangi anangu tjuṭangku Jesulu kura palyantja ngunti wangkanytjaku tjanala kulira palunya iluntankunytjikitja.

⁶⁰ Kaya anangu tjuṭangku kantjula tjuṭangku altinyangka pitjala tjukurpa Jesunyatjara wangkangi, palu ngunti-nguntiya wangkangi, ka tjukurpa tjana wangkanytja tjungu mulapa ngaranytja wiya kutjupa kutjupa ngarangi. Kaya puṭu nguriningi anangu kutjarangku pitjala tjukurpa kutju wangkanytjaku.

Ka palulanguru wati kutjara kutjupa tjanala wangkanytjikitja wirkanu, ⁶¹ munu pula wangkangu, “Wati nyangangku alatji mungaṭu wangkangu, ‘Ngayulu Godaku timpula nyanga piluntankuku, mununa ngayulu tjintu mankurarira piruku palyalku malakungku.’ Alatji wangkanyangkali ngali kulinu.”

⁶² Ka wati panya tjukurtjara pulka pakanu munu Jesula tjapinu, “Nyuntun kulini? Wati nyanga pula nyuntunya kulintjatjanungku wangkanyi. Mulapa nyangantu nyuntunya tjukarurungku wangkanyi?” ⁶³ Palu Jesunya wangkanytja wiya alatjitu pilunpa ngarangi. Ka wati panya tjukurtjara pulkangku piruku wangkangu, “Kuwariņa Godala mirangka nyuntula tjapini, kalanya tjukarurungku wangka! Palu mulapan wanyu Christianity Godalu kalkuntjanya panya nganampa Wankařunkupainya, Mayatja Godaku katja?”

⁶⁴ Ka wangkangu, “Pala nyuntun wangkanyi. Palu kulilaya! Panya nyanga palulanguru nyura uwankarangku ngayunya nyakuku Watiku Katjanya Godala witulya pulkangka itingka nyinanyangka mayatja pulka, mununi nyura nyakuku ilkariringuru ngangkalingka pitjanyangka.”

⁶⁵ Ka wati tjukurtjara pulkangku tjukurpa nyangatja kulira mirpañarira mantara palurunku tjilpirpungu munu wangkangu, “Ala palatja! Wati nyangatja Godala inkanyi. Wanyula wanti aŋangu kutjupa tjuta piroku altintytja wiyangku pitjala palunya kuranmankunytjaku. Panya kuwari nyangala nganaŋa alatjiultula kulinu palurunku walytjangku Godanyamankunyangka.* ⁶⁶ Ka nyura yaaltji kulini?”

Kaya wangkangu, “Wiya, wati nyangatja kura mulapa. Utila iluntankunytjaku iyanma.” ⁶⁷ Munuya Jesuku pulkara kuraringkula palunya yunpa witalytjunangi munuya pungangi munuya nguku kampa kutjara patjalku-pungkula ngalypa-ngalyparingkula wangkangi, ⁶⁸ “Tjukarurungku wangka, nganalunta panyatja pungu? Panya nyuntu kunyun wangkatjarangku nintingku kulipai Godalu panya kalkuntjanya.”

Peternya Jesuku Ngurparingkunytja

(Markaku 14:66-72; Luke-aku 22:56-62; Johnku 18:15-18,25-27)

⁶⁹ Ka Peternya wali panya palula yaatangka kuwaripaṭu nyinangi, ka kungkawara tjukurtjara pulkaku war̄karipai pitjangu munu palula wangkangu, “Nyuntu kuļu panyan Jesula para-ngaṛapai wati panya Galileenya ngurārangka tjungu.”

⁷⁰ Ka Peterlu winkingka miṛangka wiyanmara wangkangu, “Wiya, ngayulu ngurpa. Nyaan wangkanyi?” ⁷¹ Munu ma-pitjala kaitangka itingka ngarāngi. Ka kungkawara war̄ka kutjupangku ngapartji palunya nyakula wati tjutangka wangkangu, “Wati nyara paluru kuļu Jesula tjungu para-ngaṛapai wati panya Nazarethanya ngurārangka.”

⁷² Ka paluru piroku ngurparingu munu wangkangu, “Wati nyara palumpaṇa ngurpa alatjiṭu. Godala miṛangkaṇa tjukarurungku wangkanyi.”

⁷³ Ka wati tjutangku ngapartji kaputu ngaranytjatjanungku palulakutu pitjala wangkangu, “Wiya, mulapa nyuntu palula tjungutja. Pala wangkala nyuntunya ngurkantananyi. Palu purunypan wangkanyi Jesunya purunypa.”

⁷⁴ Ka wangkangu, “Wiya wati palumpaṇa ngurpa. Mulapaṇa nyurala wangkanyi. Tjinguruṇa ngunti wangkanyangkampa Godalu ngayunya iluntakuku.”

Ka palulanguru paluru wangkara wiyaringkunyangka tjulpu panya tjuki wangkangu.

⁷⁵ Ka Peterlu kulinu Jesulu panya nganmanytu wangkanytja alatji, “Nyuntu ngayuku mankurara ngurparingkunytjatjanungku kulikku tjuki wangkanyangka.” Ka nyangatja kulira paluru tjituru-tjitururira ankula urilta pulkara ulangi.

27

Jesunya Pilate-alakutu Katinytja

(Markaku 15:1; Luke-aku 23:1-2; Johnku 18:28-32)

¹⁻² Munuya mungawinki mulapa wati tjukurtjara kuranyitja tjutangku munu tjilpi kutjupa tjutangku kuļu wangkara kulira tjukurpa palyaŋ mayatja panya pulka ini Pilate-anja wangkara wituwituntjikitjangku

* ^{26:65} Moseku tjukurtu pulkara pailpai aŋangungku walytjangku Godanyamankunytja wiyangku wantintjaku. Nyawa Exodus 20:2-7.

Jesunya iluntankunytjaku.* Munuya wati timpula aṭunymankupai tjuṭa wangkangu palunya tjiinangka karpira katintjaku Pilate-alakutu. Wati nyara palunya panya Rome-aku mayatja pulkangku tjunu manta Judeanya mayatjarira kanyintjaku.

*Judasanya Ilunytja
(Acts 1:18-19)*

³ Ka Judasalu, wati panya Jesunya witintjaku nintintjalu kulinu tjilpi tjuṭangku Jesunya Pilate-anja iluntankunytjaku ungkunytja. Munu

paluru kulintjatjanungku mani panya 30 palunya ungkunytjanya malakungku katingu timpulakutu tjukurtjara kuranyitja tjuṭa munu tjilpi tjuṭa kuļu małakungku ungkunytjikitjangku munu tjanala wangkangu,

⁴ “Kurangkuṇa nyurala nintinu wati tjukaruru iluntankunytjaku.”

Kaya palula wangkangu, “Wiya, wampa. Nyuntultanku walytjangkulta kulila! Nganana panya ngurpa. Nyangatja panya nyuntu kulintja!”

⁵ Ka Judasalu mani panya tjilpa 30 wañingu tjanala itingka munu pakara anu mununku walytjangku liri ruupangka karpira puñungka tatira warāly-warālyngarangi munu ilungu.

⁶ Kaya tjukurtjara panya kuranyitja tjuṭangku mani panya 30 mantjira wangkangu, “Mani nyangatja milkalitja, ka panya Moseku tjukurta ngaranyi mani nyanga palu purunyapa mani timpulitjangka tjungura tjunkunytja wiyangku wantintjaku.” ⁷ Munuya wangkara kulira manta tjukutjuku payamilañu malikitja tjuṭa ilunyangka nyara palula tjuñutjunkunytjaku. Manta panya palunyaya payamilañu wati panya tjulpirnguru piti tjuta palyalpaingka. ⁸ Kaya nyara palulanguru anangu tjuṭangku ngura nyara palunya ini wangkapai, *Manta milkalitjanya* munuya kuwari wangkanyitu.

⁹ Ara nyanga palunya panya wangkatjara ini Jeremiah-lu iriti nyiringka walkatjunu alatji,

“Anangu Israelkunu kutjupa tjarangku ngayunya mani 30 kutju ungu ngayulu tjanampa palyannyangka. ¹⁰ Kaya mani panya palunya mantjira manta payamilañu wati panya tjulpirnguru piti tjuṭa palyalpaingka, panya Mayatja Godaluñi wangkangu alatji palyantjaku.”

Ka tjukurtjara kuranyitja tjuṭangku manta panyatja payamilannyangka tjukurpa nyangatjalta ngalya-utiringu.

*Pilate-alu Jesunya Tjapira Kulintja
(Markaku 15:2-5; Luke-aku 23:3-5; Johnku 18:33-38)*

¹¹ Kaya Jesunya katira Pilate-ala kuranyu ngaratjunu, ka Pilate-alu palula tjapiningi alatji wangkara, “Nyuntu wanyu mulapa Jew tjuṭaku mayatja pułka?”

Ka Jesulu wangkangu, “Uwa, pala wangkanyin.” ¹² Kaya tjukurtjara kuranyitja tjuṭangku tjilpi tjuṭangku kuļu Jesunya Pilate-ala mirangka puntura wangkangi. Ka tjana wangkanyangka Jesulu kulira wantira pilunpa alatjitu ngarangi.

¹³ Ka Pilate-alu palula wangkangu, “Nyuntu kulini tjana wangkanyangka? Nyuntu kunyun kutjupa kutjupa kura tjuṭa palyaningi, pala wangkanyintaya.”

* **27:1-2** Tjinguruya Jew tjuṭangku Jesunya walytjangku iluntanama, palu tjanampa ngaranytja wiya anangu kutjupa iluntankunytjaku, panya mayatja Rome-anya ngurarangku kutju ngurkantara wangkapai anangu kutjupa iluntankunytjaku.

¹⁴ Palu Jesunya wangkanytja wiya alatjitu pilunpa ngarangi, ka mayatja panya Pilate-alu nyakula nguwankuringi munu kuliningi, “Ai! Nyaaku nyangatja wangkara aluntja wiya ngaranyi?”

*Jesunya Iluntankunytjikitjangku Wangkanytja
(Markaku 15:6-15; Luke-aku 23:13-25; Johnku 18:39—19:16)*

¹⁵ Ka panya yiya kutjupa yiya kutjupa inma panya Katuwanu Ankunytjanya ngaranyangka mayatja Pilate-alu tjakangku tjailanguru wati kutju walatjunkupai aŋangu tjuṭa mukuringkunyangka. ¹⁶ Ka nyara palula aṛa wati ini Parapatjanya tjailangka nyinangi, kaya aŋangu Judeala nyinanytja tjuṭa ninti wati palumpa.* ¹⁷ Ka tjintu nyara palula aŋangu tjuṭa mulapa palumpa ngurangka urilta tjunguringkunyangka Pilate-alu tjanala tjapinu, “Wati yaaltjiṇa nyurampa walatjunkuku Parapatjanya, munta Jesunya panya nyura kutjupa tjuṭangku palunya Godalu kalkuntyanya kulilpai?” ¹⁸ Nyangatja paluru nintingku tjapiningi alatji kulira, “Wati nyanga tjukurtjara kuranyitja tjuṭangkuya Jesunya nyararingkula ngayulakutu katingi.”

¹⁹ Munu mayatja paluru palumpa tjiya pulkangka nyinangi, panya tjiya nyara palula nyinara paluru anangu kutjupa palulakutu katinyangka ngurkantankupai. Ka paluru tjiya nyara palulanguru tjanala wangkanyangka palumpa kuringku wati kutjupa wituṇu Pilate-ala tjakultjunkunytjaku alatji, “Wati palatja tjukaruru mulapa, panya ngayulu palunya mungangka tjukurmanu munuṇa pulkara nguluringkula tjititinggangi. Ka palunya wantima iluntankunytjaku wangkanytja wiyangku.”

²⁰ Kaya tjukurtjara kuranyitja tjuṭangku, tjlpi tjuṭangku kuļu aŋangu tjuṭa wituwituṇu mayatja Pilate-ala wangkanytjaku wati panya Parapatjanya tjailanguru walatjunkunytjaku munu Jesunya palumpa aṛangka iluntankunytjaku. ²¹ Ka Pilate-alu tjanala tjapinu, “Wati yaaltjiku nyura mukuringanyi nyanga kutjaranguru ngayulu walatjunkunytjaku?”

Kaya wangkangu, “Parapatjanya!”

²² Ka Pilate-alu wangkangu, “Kaṇa wanyu nyaalku wati nyanga Jesunya Christanya?”

Kaya uwankarangku wangkangu, “Wiya, palunya puṇu kaṭakutjarangka wakaṛa utitjura!”

²³ Ka Pilate-alu piruku tjanala wangkangu, “Palu kura nyaa wanyu nyanga paluru palyaṇu?”

Kaya alatji wangkanyangka kulira pulkara mirara wangkangu, “Puṇu kaṭakutjarangka wakaṛa utitjura!”

²⁴ Ka palulanguru tjana tungun-tunguntu wangkanyangka nyakula Pilate-alu wantira kulinu, “Tjinguruwa winki mirpaṇarira pulkara pikaringkuku.” Munu paluru mina mantjinu mununku mara paltjiṇu aŋangu winkingka mirangka munu tjanala wangkangu, “Nyawan̄iya! Ngayulu wati nyangatja nyurala tjunguringkula iluntankunytja wiyangku wantinyi. Nyangatja nyura iluntankunytjikitja mukuringanyi ngayulu wiya. Palu nyura rawangku wituwitunyangka kutjuṇa tjaultji tjuṭangka wangkanyi iluntankunytjaku.”

²⁵ Kaya aŋangu winkingku palula wangkangu, “Wiya, palya, nyangatja nganana mukuringkunytja, ka nyuntu nganana mukuringkunyangka iluntankunytjaku wangkanyi. Ka tjinguru nganana ngunti alatji palyan̄yangka Godalu nganānanya pungama munu nganampa tjitji tjuṭa munu walytjapiti małatja małatja tjuṭa kuļu nyuntunya wiya.”

* ^{27:16} Parapatjanya kunyu ini kutjupa Jesunya.

²⁶ Ka Pilate-alu wati panya Parapatjanya tjailanguru walatjunu munu palumpa tjaultji tjuṭa wangkangu Jesunya wiipangka alkantjaku. Munu palula małangka tjana pungkula wiyaringkunyangka tjanala wangkangu katira puṇu kaṭakutjarangka wakaṛa utitjunkunytjaku.

*Tjaultji Tjuṭangku Jesunya Kurara Pungkunytja
(Markaku 15:16-20; Johnku 19:2-3)*

²⁷ Kaya Pilate-aku tjaultji tjuṭangku Jesunya katira mayatja pułkaku walingka tjarpatjunu munuya tjaultji kutjupa tjuṭa altira uwankara tjunguringkula palula para-ngarala arintanangi. ²⁸ Munuya mantara panya palumpa araltjanu munuya mantara kutjupangka rituwanangka tjarpatjunu. ²⁹ Munuya mayatja pułkangku katangka kanyilpai purunypa palyanu tjilka-tjilkanguru iri pulkatjara munuya palula katangka puruntara tjunu. Munuya puṇu tjukara palunya ungu mara wakungku witira kanyintjaku mayatja pułka purunytju, munuya palulangurulta palula kuranyu tultjungarakatira palunya anara ngalypa-ngalyparingkula ngunti walkura wangkangi alatji, “Awari! Mulapa nyuntu Jewku mayatja pułkanya.” ³⁰ Munuya palunya witalytjunkula puṇu panya tjukarangka mantjira kata pungangi. ³¹ Munuya anara wiyaringkula mantara panya rituwana araltjara palumpa panya mantarangka małakungku tjarpatjunu. Munuya palulangurulta palunya ma-katingu iluntankunytjikitjangku.

*Jesunya Puṇu Kataκutjarangka Wakara Utitjunkunytja
(Markaku 15:21-32; Luke-aku 23:26-43; Johnku 19:17-27)*

³² Munuya Jesunya ngura Jerusalemalanguru urilkutu ma-pakaltjinganu, ka paluru puṇu tjalira anangi. Kaya urilkutu ma-pakara nyangu wati kutjupa ini Simonnga ngura ini Tjairininya ngurara ngalyatjarpanyangka munuya tjaultji panya tjuṭangku palunya pauntjingara wangkangu puṇu panya Jesuku tjalira katintjaku. ³³ Munuya ankula wirkana ngura ini Kaulkatjala panya wangka tjanampangkuya puli nyara palunya wangkapai, *Kata Tarkatjaranya*. ³⁴ Munuya ngura pala palula wirkara palunya wainangka kutjupa tjaū purunypa tjungura ungangi pika kaarngaranyangka manarmankunytjaku,* palu Jesulu arkara wantingi tjikintja wiyangku.

³⁵ Kaya palulangurulta tjaultji panya tjuṭangku palunya puṇu kaṭakutjarangka wakaṛa utitjunu, munuya palula małangka palumpa mantaraku puṇu nampatjara katu wañira inkangi kutjungku kutjungku winamilara mantjintjikitjangku. ³⁶ Munuya palula małangka ngarala atunyamanangi palunya kutjupangku pitjala mantjintjaku-tawara. ³⁷ Munuya walka palula katangka katu walkatjura utitjunu, ka walka paluru alatji ngarangi,

Nyangatja Jesunya Jew Tjutaku Mayatja Pulka
Panya palumpa mirpaṇtju tjuṭangku palunya alatji wangkanyangka kuranmanu, kaya nyara palulanguru walka panya palunya katu utitjunu.

³⁸ Munuya palula tjungu wati kutitjunkupai kura kutjara puṇu kutjupa kutjarangka wakaṛa utitjunu nganytjarta kutjara, kutju kampa wakungka kutju kampa tjampungka.

³⁹ Ka palula itingka iwara pułka wati-ngaringi, kaya aŋangu tjuṭangku iwara pala palula ankula Jesunya ira-nyakukatingi munuya palunya anara wangkangi, ⁴⁰ “Ala! Walangkunku palyala, panya nyuntu wangkangi

* ^{27:34} Nyanga alatjiya kunyu ungupai wakara utitjunkunytja kuwaripangka pika pulkatjara ngaranyangka manarmankunytjaku.

timpula piluntara tjintu mañkurarira piruku palyara wiyanjikitjangku. Wala wanyu ngalya-wararakati puñunguru pala, mununku walytjangku wankala. Wanyumpa kunyun Godaku katjampa!"

⁴¹ Kaya tjukurtjara kuranyitja tjuñangku munu Moseku tjukurpa nin-tilpai tjuñangku munu tjiłpi kutjupa tjuñangku kułukulu tjukurpa palu purunypa wangangi Jesula munuya palunya anaña ikaringangi alatji wangkara, ⁴² "Kutjupa tjuña nyangangku wankaningi, palu walytjangkunku puñu wankani. Nyanga paluru panya kunyu Israelku mayatja pulka. Tjinguru paluru kuwari puñunguru ukalingkunyangkampa nganaña nyakula palumpa mulamularingkuku. ⁴³ Paluru kunyu mulamularinganyi Godaku palunya wankaru kanyintjaku mununku Godaku katjanmankupai. Kala wanyu nyangama ka tjinguru Godalu kuwari palunya wankarunkuku."

⁴⁴ Ka panya palula itingka wakara utitjunkunytja kutjarangku palu purunypa palunya anaña wangangi.

Jesunya Ilunytja

(Markaku 15:33-41; Luke-aku 23:44-49; Johnku 19:28-30)

⁴⁵ Ka palulanguru tjintu panya katuringkula katu ngaranyangka ngura uwankarangka maruringu munu munga purunypa ngarala mungartji-mungartji kutju tjintungku piruku irnyaningi. ⁴⁶ Ka nyara palula arä piruku tjintungku irnyannyangka Jesulu mirara wangkangu, "Ilay! Ilay! Lama tjapatjani?" Alatji paluru wangangi, "Mama God, Mama God! Nyaakuñin wantikatingu?"

⁴⁷ Kaya añañgu kutjupa tjuñangku ila ngaranytjatjanungku paluru wangkanyangka kulinu munuya wangkangu, "Paluru Ilaitjanya altinyi pitjala alpamilantjaku." ⁴⁸ Ka wati kutjungku ngalya-wirtjapakara pantja puñu warangka karpi-karpira waina kurakurangka tjalatjura katuru Jesunya ungangi tjkintjaku.

⁴⁹ Kaya tjara kutjupangku wangkangu, "Wanyula nyangama, ka Ilaitjalu pitjala palunya wankala."

⁵⁰ Ka palulanguru Jesunya pulkara mirangu munu ngaalypa wi-yaringkula ilungu.

⁵¹ Ka paluru ilunyangka mantara panya timpulangka waraly-waralyngaranytjanya katunguru tjarukutu tjiłpirarara kutjararira alaringu ngura panya milmilpa mulapa utiringkunytjaku. Ka manta pulkara uringu, ka puli tjuña kułu kałakatira tjiłpirarañu. ⁵²⁻⁵⁴ Kaya tjaultji panya tjuñangku Jesunya ilangku ngarala nyakunytjatjanungku nyangu manta urinyangka, puli tjuña tjiłpirarannyangka munu kutjupa kutjupa uwankara kułu, munuya nyara palulanguru pulkara nguluringkula wangkangu, "Ai! Wati nyangatja mulapa Godaku katja."

Ka kulpi panya kurulpa irititja tjuña alaringu, ka mungawinki kutjupa Jesunya ilunytjatjanu wankaringkula pakannyangka Godaku walytja ngañmanypa ilunytja tjuña wankaringkula pakara kulpi panya palula tjanalanguru anu munuya ankula ngura panya Jerusalemala tjarpala para-nigarangi, kaya añañgu tjuñangku nyangangi.

⁵⁵⁻⁵⁶ Kaya minyma tjuña nyara palula ngarangitu Jesunya panya puñu kałakutjarangka utitjunkunytjala munuya pałunguru ngarala nyangangi, panya Mary Magdalene-alu munu Mary-lu Jamesaku Josephaku pulampa ngunytjungku, munu minyma panya Tjipitiku kuringku munu minyma kutjupa tjuñangku kułukulu. Panya minyma nyanga paluru tjana Jesula tjuñangku pitjalinangi Galileelanguru munuya palunya alpamilaningi kutjupa kutjupa tjuña ungkula.

*Jesunya Puntu Kulpingka Tjunkunytja
(Markaku 15:42-47; Luke-aku 23:50-56; Johnku 19:38-42)*

⁵⁷ Ka mungartjirinyangka Jesuku nintintja kutjupa pitjangu wati ini Josephanya ngura Arima-tjiyanya ngurara wati mani pulkatjara. ⁵⁸ Munu paluru ankula Pilate-ala ngatjinu Jesunya puntu mantjira katira kulpingka tjunkunytjikitjangku. Ka Pilate-alu kulis palyanmanu munu tjaultji tjuṭaku mayatjangka wangkangu Jesunya puntu ungkunytjaku Josephanya.

⁵⁹ Ka paluru ankula puṇu kaṭakutjaranguru puntu mantjinu munu mantara pirarpa wiru mulata karpinu. ⁶⁰ Munu katira kulpi palumpangka tjarpala ngaritjunu, panya kulpi nyara palunyaya kuwari kutju nyarkara wantingu. Munu tjunkunytjatjanungku puli taanpa pulkanya unṭura wanara angatjunu kulpi tjaangka, munu wantikatira anu.

⁶¹ Ka Mary Magdalene-alu pula Mary panya kutjupangku nyinara kulpi panya nyangangi paluru tjarpajunkunyangka.

Tjaultji Tjuta Wituntja Kulpi Atunymankunytjaku

⁶²⁻⁶³ Ka panya mungawinki Saturday tjintu panya pakuwiyarungkunytjaku, kaya tjukurtjara kuranyitja tjuṭangku munu Paratji tjuṭangku kuļu ankula Pilate-ala wirkara wangkangu, “Uwa mayatja wirungkulanya wanyu kulila! Panya Jesulu wati panya ngunti wangkapaiingku ngañmanyitju wangkangi paluru ilura tjintu kutjaranguru wankaringkula pakantjikitjangku. ⁶⁴ Ka nyuntu uti wangkama nyuntumpa tjaultji tjuṭangku ankula kulpi nyaratja tjintu kutjarangku ngarala atunymankunytjaku, palumpa nintintja tjuṭangku tjarpala kutitjunkunytjatjanungku wankaringkula pakantja ngunti para-wangkanytjaku-tawara. Panya wati paluru wanka nyinaralpi ngunti wangkangi aŋangu tjuṭangka alatji, ‘Ngayuluna Godalu panya kalkuntjtja nyurampa Wankarunkupainya.’ Ka palatja kurangku ngunti wangkangi, ka tjinguru palumpa nintintja tjuṭangku ngapartji wankaringkula pakantja nguntitu wangkaku, ka palatja kura mulapalta. Ka nyanga palula-tawaraya uti tjaultji tjuṭangku ngarala atunyamanama.” Alatjiya Pilate-ala wangkara tjaopingi.

⁶⁵ Ka paluru tjanala wangkangu, “Uwa palya! Tjaultji mankurpaya altira ma-kati munuya palunya tjananya wangka kaya kulpi palunya ngarala atunyamanama.”

⁶⁶ Ka tjananya mulapaṭu katingu munuya ankula kulpi tjaangka puli taanpa pulkangka kititjura wantingu kutjupangku kampangkaṭu pitjala unṭunnyangka nyakunytjikitjangku, munuya tjaultji panya tjuṭa ngarala atunymankunytjaku wangkara wantikatingu.

28

*Jesunya Wankaringkula Pakantja
(Markaku 16:1-8; Luke-aku 24:1-12; Johnku 20:1-10)*

¹ Ka Sunday-ngka tjintu panya pakuwiyarungkupaiingka malangka Mary Magdalene-anja pula Mary panya kutjuparara anu tjintu pakantja kuwari-pangka kulpikuti nyakunytjikitja. ² Ka pula ngururpa pitjanyangka manta pulkara uringu, ka Mayatja Godaku angelpa ilkariringuru ukalingkula puli panya taanpa kulpi tjaanguru unṭura wanara kitikitnu munu puli palula katu nyinakatingu. ³⁻⁴ Kaya tjaultji panya tjuṭa pulkara nguluringkula punkara nguwanpa ilungu munuya ilunytja purunypa ngaringi. Ka minyma panya paluru pula wirkara nyangu angelpa taanpangka nyinara pitalytji pulka mulapa irnyannyangka wanangara

purunypa. Ka mantara palumpa piranpa mulapa pitalytji ngarangi. Ka pula nyakula pulkara nguluringangi.⁵ Ka angelpa paluru minyma panya kutjarangka wangkangu, “Nyupali nguluringkunytja wiya ngarama! Ngayulu ninti panya nyupali Jesunya ngurini, panya wakaraya puu kaṭakutjarangka utitjunu.⁶ Ka paluru nyangangka ngarinytja wiya, panya paluru nganmanytju nyurala wangkangu ilunyjtatjanu wankaringkula pakantjikitjangku, munu mulapa paluru wankaringku. Wanyu pula pitjala nyawa panya paluru ngarinytjitja.” Ka pula mulapatu tjarpa nyangu, “Awari! Mulapa wiya ngaranyi.”⁷ Ka angeltu pulala piruku wangkangu, “Warpungkula pula ankula tjakultjura palumpa nintintja tjuṭangka alatji, ‘Panya paluru wankaringkula pakanu, munu paluru kuwari nyurala kuranyuriku Galileelakutu, ka nyura nyara palula palunya nyakuku.’ Alatji pula tjanala ankula wangka! Ala! Nyanga wangkanyina nyupalinya, ka pula kulinma watarkurinytja wiyangku.”

⁸ Ka pula kulpi wantikatira mapalku wirtjapakanu ngulu-ngulu pukulpa mulapa nintintja tjuṭangka wangkanytjikitja.

⁹ Munu pula ngururpa nyangu Jesunya ngapari-ngapari ngalyatjanyangka. Ka paluru pulala wangkangu, “Awari! Minyma kutjara!” Ka pula ilaringkula palula kuranyu tultjungarakatira palunya tjina witira walkuningi.¹⁰ Ka Jesulu pulala wangkangu, “Ngulu wiya pula rapariwa, munu pula ankula wangka ngayuku panya malpa tjutangka Galileelakutu ankunytjaku, kaniyawi paluru tjana nyawa nyara palula.”

Tjaultji Mankurtu Kulpi Atunymankunytjatjanungku Wangkanytja

¹¹ Ka minyma panya paluru pula ankunyangka tjaultji panya kulpi atunymankupai mankurpa pakara anutu Jerusalemalakutu munuya tjukurtjara kuranyitja tjuṭangka tjakultjunu uwankara tjana nyakunytjatjanungku.¹² Kaya mayatja paluru tjana tjlpi kutjupa tjuta altingu tjunguringkunytjaku munuya wangkara kulira tjukurpa palyanu, munuya tjaultji tjuta mani pulka ungu tjana tjukurpa Jesunya wankaringkula pakantja para-tjakultjunkunytja wiyangku wantinýtjaku.¹³ Munuya tjananya wangkangu alatji, “Nyiiku! Mani nyangatja mantjira kanyinma, ka kutjupangku nyurala Jesunya tjapinnyangkampa alatji wangka, ‘Wiya, nganana kunkunpa ngarinyangkanti palumpa nintintja tjuṭangku munga kultungka pitjala palunya puntu kutitjura katingu.’ Alatji kutjuya wangka, palya!¹⁴ Ka tjinguru nyurampa mayatjangku Pilate-alu tjukurpa nyangatja kunkunpa ngarinytja kulira nyurampa pulkara mirpañariku, palu palya, panya nganana palula nganmanytju wangkaku, ka paluru kulira nyuranya wantiku mirpañarira pungkunytja wiyangku, palya! Kaya ngulu wiya nyinama!” Alatjiya tjanala wangkangi.

¹⁵ Kaya tjaultji panya tjuṭangku mani mantjira anu munuya parapitjala tjukurpa panya palunya anangu tjuṭangka para-wangkangi, panya nintintja tjuṭangku Jesunya puntu kutitjura katinytja. Ka tjukurpa paluru lipiringu ngura winkingka, kaya kuwari kulu Jew tjuṭangku tjukurpa nyanga palunya wangkapai.

Jesunya Nintintja Tjuṭangka Utiringkunytja

(Markaku 16:14-18; Luke-aku 24:36-49; Johnku 20:19-23; Acts 1:6-8)

¹⁶ Kaya nintintja panya 11 Galileelakutu anu munuya puli murpu panya palula wirkanu, panya Jesulu tjanala nganmanytju wangkangu nyara palula tjunguringkunytjikitjangku.¹⁷ Munuya nyara palulalta

Jesunya nyakula walkunu. Kaya kutjupatjara puṭu nguwanpa palumpa mulamularingangi kulira, "Mulapa nyangatja wanyu Jesunya?"

¹⁸ Ka Jesulu tjanala wangkangu alatji, "Godaluṇi wangkara tjunu uwankara mayatjangku kanyintjaku ilkar̄ingka mantangka kuļu. ¹⁹ Kaya nyuralpi ara ngura winkikutu munuya aŋangu tjutangka ngapartji nintila tjana ngayuku walytjaringkula ngayunya waŋantjaku, munuya tjananya baptise-katima ini Mamala, Katjala, Kurunpa Milmilta. ²⁰ Munuya tjananya nintila ngayulu wangkanytitja uwankara tjana wanganarangku kulira palyantjaku. Munuya rapa alatji nyinama panya ngayulu nyurala tjungu titutjara ngaraku manta ilkari wiyaringkunytja-kutu."

Tjukurpa Palya Markalu Walkatjunkunytja

Mark

Nyangatja Nganmanytju Nyakula

Wangkanytjaku

Nyangatja Godaku tjukurpa wati ini Markalu walkatjunkunytja ini kutjupa Johnnga. Paluru-warara walkatjunu tjukurpa Jesunyatjara Matthew-lu, Luke-alu, Johntu walkatjunkunytja kuwaripangka. Palu Markanya tjinguru mala Jesuku walytjaringu Jesunya ilkarikutu malaku ankunyangka malangka. Munu paluru Paulala pulala Paanapatjala-warara para-ngarangi ngura tjutangka tjukurpa wangkanytjikitja (nyawa Iyantja Tjuṭangku Palyantja 12:25). Munu paluru Peterla kuļu tjunguringkula warkaringi munu palula kulira nintiringu tjukurpa tjuṭa Jesunyatjaraku (nyawa Lita Nampa 1 Peterku 5:13). Munu nintiringkunytjatjanungku walkatjunu nyiri nyangangka nganaña malatja tjuṭangku kuļu kulintjaku munu kulira Mayatja Jesuku mulamularingkunytjaku.

Nyiri nyangangka paluru ngañmanytju walkatjunangi Johntu Jesunya baptise-katinytja munu piřuku walkatjunangi wiru tjuṭa Jesulu palyantja witulya pułkangku, munu paluru para-pitjalinkunytja ngura tjuṭangka, munu puňu katakutjarangka ilunytja, munu ilunytjatjanu wankaringkula pakantja. Uwa, paluru tjakultjunangi panya Jesunya rawa alatjitu warkaripai anangu kutjupa kutjupa tjuṭaku munu panya tjananya mukulyangku atunymankupai.

Tjukurpa nyanganpa ngarinyi:

- 1:1-13 Jesunya baptise-katinytja
- 1:14—9:50 Jesulu tjukurpa tjuṭa wangkanytja munu anangu tjuṭa palyarunguntja
- 10:1-52 Jesulu anangu tjuṭangka wangkara nintintja
- 11:1 —15:47 Jesunya Jerusalemala nyinanytja munu puňu katakutjarangka ilunytja
- 16:1-20 Jesunya ilunytjatjanu wankaringkula pakantja

John Baptistalu Jesuku Iwarankunytja

(Matthew-ku 3:1-12; Luke-aku 3:1-9,15-17; Johnku 1:19-28)

- ¹ Nyangatja Tjukurpa Palya panya Godaku Katja Jesunya Christanyatjara.
- ² Palu wati kutjupa ngañmanypa wirkanu munu tjukurpa palunyatjara wangkangi palula kuranyu. Panya wati wangkatjarangku Aitjayalu iriti walkatjunu Godalu wangkanytja alatji,
“Ngayuluṇa wati kutjupa wangkatjara ngañmanytju witura iyalku palula kuranyu. Panya anangu tjuṭangku mayatja pułka pitjanytja kuwari-pangka ngura-warara wirulpai, palu purunypa wati paluru anangu tjuṭa nganmanytju wangkara tjukarurulku.”
- ³ Wati nyara paluru iłytingka mirara wangkaku anangu tjuṭangka alatji, ‘Mayatjakuya ngañmanypa ritiriwa paluru pitjala tjukurpa wangkanyangka nyura wangañarangku kulintjikitja.
Panya watingku iwara tjukarurulpai mayatja pułka maławanu pitjanytjaku, palu purunypa nyuranku tjukarururingkula paṭanma Mayatjanya pitjanyangka nyura wangañarangku kulintjikitja.’ ” *

* 1:3 Aitjayaku 40:3

⁴ Ka mulapaṭu wati panya paluru pitjangu, Johnnga panya, munu paluru ilytjingka nyinara Godaku tjukurpa aŋangu tjuṭangka alatji tjakultjunangi, “Kura palyantjatjanuya kūntariwa munuya wantima piруku kura palyantja wiyangku, ka Godalu nyuranya kalypangku pungkuwiyangku wantiku, kaŋa nyuranya ṻungka baptise-katiku.” Munu alatji wangkanytjatjanungku Johntu tjananya baptise-katingi tjana kuranguru kūntaringkula kura wantinyangka.

⁵ Kaya Jerusalemalanguru aŋangu winki mulapa palulakutu anu munu ngura ititja uwankaranguru kuļu manta pala Judealanguru. Munuya paluru wangkanyangka kulira piiwiyingangi munuyanku walijtjangku kura palyantjatjanungku tjakultjunangi. Ka tjananya alatji wangkanyangka Johntu karu Jordanta ṻungka tjarpatjura baptise-katingi.

⁶ Ka Johnku panya mantara kamulaku intunguru palyantja, ka paluru karilpa karpinu piltangka kukaku miringuru palyantjitungka. Munu ilytjingka nyinara paluru tjin̄ilyka tjuṭa ngalkupai tjuratja kuļu.

⁷ Munu paluru aŋangu tjuṭangka alatji wangkangi, “Ngayula malangka wati kutjupa pitjanyi. Nyara paluru mayatja pulka mulapa nyinanyi ngayula waintara alatji. Tjinguru mayatja mantatja purunyap nyinanyangka palumpa warkaripai nyinara palumpa tjinatja pupakatira araltjanama. Palu wiya, nyara paluru mayatja pulka mulapa, kaŋa ngayulu palya wiya munuña palula mirangka ngarala pulka kūntaringanyi. Ka ngayulu palumpa tjinatja pupakatira araltjankunytjaku wiya ngaranyi. ⁸ Ngayuluña nyuranya ṻungka tjarpatjura baptise-katinyi, palu wati nyara paluru nyuranya baptise-katiku Kurunpa Milmilnga nyurala tjarpatjura.”

*Jesunya Baptise-katinytja Munu Mamungku Arkantja
(Matthew-ku 3:13—4:11; Luke-aku 3:21-22; 4:1-13)*

⁹ Ka nyara palula arangka Jesunya tjarukutu anu Nazarethalanguru uru panya Galileela itinguru, munu karu Jordanta wirkanu, ka Johntu palunya ṻungka tjarpatjura baptise-katingu. ¹⁰ Ka ṻunguru pakara ilkari ira-nyangu alaringkunyangka, ka Kurunpa Milmilnga tjudpu kuukuuku purunyap palulakutu ukalingu. ¹¹ Ka ilkaringuru wangkangu alatji, “Nyuntu ngayuku katja, kaŋa nyuntumpa pulka mukuringanyi munuña nyuntumpa pulka pukularinyitu.”

¹² Ka nyara palula Kurunpa Milmiltu palunya unngu wangkangu ilytjikutu ankunytjaku. ¹³ Ka paluru tjin̄tu 40 nyinangi ilytjingka. Ka nyara palula Satantu palunya arkaningi paluru kuraringkunytjaku. Ka ngura nyara palula papa inura tjuṭa munu kuka pikati kutjupa kutjupa tjuṭa kuļu para-ngarangi Jesula itingka. Ka angelpa tjuṭangku palunya atunytju kanyiningi.

*Jesulu Wati Mankurpa Altintytja Palula Tjunguringkunytjaku
(Matthew-ku 4:12-17; Luke-aku 4:14-15)*

¹⁴ Ka panya Jewku mayatja kutjupa tjuṭangku Johnnga witira tjailangka tjarpatjunu. Ka palula malangka Jesunya anu Galileelakutu munu Godaku Tjukurpa Palya tjanala tjakultjunkulinangi aŋangu tjuṭangka.

¹⁵ Munu paluru wangkangi alatji, “Nyangatja tjin̄tu panya paluru wirkanu Godalu mayatjangku aŋangu tjuṭa walijtanmara kanyintjaku. Ka nyura kuwari kura nyinanytjatjanu piiwiyingangi kula aruriwa Godalakutu munuya tjukurpa nyanga palyaku nintiringkula mulamulariwa.”

¹⁶ Ka nyara palula malangka Jesunya uru Galileela kantilytja warara anangi munu nyangu wati antipina-putju kutjara ini Simonnga pulanya

Andrew-nya. Panya paluru pula kutararangku ngarala net urungka wañingi antipina tjuta witintjikitjangku. ¹⁷ Ka Jesulu wangkangu pulala, “Pitjalani pula ngayula tjunguriwa, kana nyupalinya nintila warika kutjupa. Panya nyupali ninti antipina witintjaku, palu kuwarirna nyupalinya nintini añañgu tjuta ngayulakutu ngalya-katinytjaku tjana ngayunya wanantjaku.” ¹⁸ Ka pula kuwaritu net wantikatira mapalku palula tjunguringkula anu.

¹⁹ Munuya palulanguru tjukutjuku ankula ma-nyangu kutarara kutjupa Jamesanya pulanya Johnnga wati panya Tjipitiku katja kutjara. Panya pula pauta unngu nyinara net palyarunguningi antipinaku ankunytjikitjangku. ²⁰ Ka Jesulu palunya pulanya nyakula altingu. Ka pula kuwaritu pakara palula tjunguringkula anu pulampa mama wantikatira palumpa wati warkaripai tjuta kulu.

Wati Mamutjara

(Luke-aku 4:31-37)

²¹⁻²² Munuya Jesunya tjana nintintja tjuta kulu wirkanu ngura kutjupangka tawunu ini Kapaniyamala munuya nyara palula nyinangi tjintu tjuta. Munu palulanguru tjintu panya milmilta Saturday-ngka Jesunya wali inmaku tjunguringkupai-kutu anu munu Godaku tjukurpa añañgu tjutangka wangkara nintiningi. Kaya kulira nguwankuringu paluru wangkanyangka, munuya kuliningi, “Ai, wati nyangangku munukara alatjitu wangkapai tjukurpa pulka mulapa.” Panya paluru Godalu nintinnyangka tjanala wangkangi nintingku alatjitu, wati panya Moseku tjukurpa nintilpai tjuta purunyapa wiyangku.

²³ Ka wali inmatja nyara palula wati mamutjara ngalya-tjarpanju munu mirara wangkangu palula alatji, ²⁴ “Jesu Nazarethanya ngurara, nyuntu nganananya nyaantjikitja pitjangu? Nganananya iluntankunytjikitjan pitjangu? Ngayulu nyuntumpa ninti. Nyuntun wangkatjara Godalanguru pitjanytja milmilpa alatjitu.”

²⁵ Ka Jesulu palula ngapartji wangkangu mamu panya watingka unngu nyinanytjala, “Pilunarira ma-pakala watinguru pala.” ²⁶ Ka mamu paluru wati panya palunya pulkara uri-uritjingara mirara pakara anu. ²⁷ Kaya añañgu tjutangku nyakula urulyaraña wangkara wañingi alatji, “Ai, wati nyangatja kutjupa mulapa. Nyangangku mamu wituni, ka wanganarangku palula kulini. Tjinguru nyanga paluru tjukurpa pulka kuwaritja nintingku wangkanyi.” ²⁸ Ka tjukurpa nyanga palunya Jesunyatjara mapalku lipiringu kuwaritu ngura tjutangka nyara uru Galileela itingka.

Jesulu Palyarunguntja Añañgu Tjuta

(Matthew-ku 8:14-17; Luke-aku 4:38-41)

²⁹ Munuya palulanguru Jesunya, Jamesanya Johnnga tjana wali inmatjanguru pakara anu Simonku pulampa Andrew-ku ngurakutu. ³⁰ Munuya wirkara kulinu Simonku umari pikatjara ngarinyangka waruringkula. ³¹ Ka Jesulu palulakutu ankula palunya mara witira pakaltjingañu. Ka mapalku alatjitu kuwaritu pika panya waru wiyingku. Ka paluru tjananya mai palyara ungu ngalkuntjaku.

³² Ka tjintu ma-tjarpanyangka añañgu tjuta Jesulakutu pitjangi munuya katingi pikatjara tjuta, mamutjara kułukulu.* ³³ Munuya pitjala wali

* ^{1:32} Tjaka panya añañgu Jew tjuta Saturday-ngka nyinara pakuwiyingkupai para-ngarapai wiya. Palu tjintu tjarpanyangka milmilpa wiyingkupai añañgu tjuta para-ngaranytjaku.

tjaangka ʉ̑rl̑ta tjunguringu tjȗta mulapa. ³⁴ Ka Jesulu pikatjara tjȗta palyarunguningi tjana pika kutjupa kutjupa tjȗtatjara pitjanyangka, munu paluru mamu tjȗta painingi aŋangu tjȗtanguru pakantjaku. Kaya mamu panya tjȗta mapalku pakaningi tjanalanguru munu tjananya wantikatingi. Palu mamu paluru tjana palumpa ninti, ka Jesulu palunya wangkara tjakultjunkunyjakutawara mamu panya tjȗta pilunmanu wangka wiya pilunpa pakantjaku.

*Jesulu Godala Tjapintja Ngura Pilunta
(Luke-aku 4:42-44)*

³⁵ Munu Jesunya mungawinki mulapa manta marungka pakara anu walinguru ʉ̑rl̑kutu maŋtalpa kutjungku ngura pilunta nyinara Mamangka tjapintjikitja. ³⁶ Palu Simontu tjana panya palumpa nintintja kutjupa tjȗtangku kȗlu mȃla kunkuntjanu pakara palunya nguriningi. ³⁷ Munuya ngurira nyakula wangkangu palula alatji, “Aŋangu winkingkuntaya ngurini. Kan nyaaku kumpira nyinanyi?”

³⁸ Palu Jesulu wangkangu tjanala, “Nganaŋa uti ngura kutjupa tjȗtakutu kȗlu anama munu nyara palula tjanala kȗlu para-ngarala tjukurpa wangkama, panya nyara palumpa tjanampa kȗluŋa pitjangu.” ³⁹ Munu palulanguru paluru uru nyara Galileela itingka ngura uwankarakutu anu munu tawunu kutjupangka kutjupangka wal̑i inmatja tjȗtangka tjarpara Godaku tjukurpa wangkangi aŋangu tjȗtangka, munu mamu tjȗta painingi aŋangu tjȗtanguru.

*Jesulu Wati Palyarunguntja
(Matthew-ku 8:1-4; Luke-aku 5:12-16)*

⁴⁰ Ka nyara palula arangka wati miri pikatjara kutjupa pitjangu Jesulakutu, panya pika nyara paluru kura pulka titutjara ngarapai wiyaringkupai wiya. Munu paluru pitjala Jesula tultjungarakatira alatji wangkara ngatjinu, “Mayatja nyuntu mukuringkulampaŋi pika nyangatja palyanma wirungku.”

⁴¹ Ka Jesulu nyakula ngalturingu wati panya palumpa munu marangku pampura wangkangu, “Uwa, ngayulu mukuringanyi nyuntu palyaringkunyjakutawara.” ⁴² Ka mapalku pika panya wiyaringkula miri winki palyaringu. ⁴³⁻⁴⁴ Ka Jesulu palunya wangkara painu, “Aŋangu kutjupa tjȗtangka wangkawayangku wantima nyuntu nyanga palyaringkunyjatjanungku. Palu timpulakutu ankulanku nintila wati tjukurtjarangka, kanta nyawa miri pala palyaringkunyta mununta palyanmara. Ka palula malangka wati panya palunya tjȗlpu kutjara uwa Godanya ungkunyjakutawara. Kaya nyuntu ungkunyangka nyakula aŋangu tjȗtangku kulikku, ‘Munta-uwa, nyangangku mulapa palyaringkunyjatjanungku unganyi.’” Alatji Jesulu wati panya palula wangkangu munu palunya witura iyanu ankula palyantjaku.

⁴⁵ Palu wati panya paluru Jesulu panya wangkanyta kulintja wiyangku wantingi munu ankula aŋangu tjȗtangka para-tjakultjunangi Jesulu palunya palyantja. Ka tjukurpa paluru lipiringu ngura nyara palula, kaya aŋangu tjȗta mulapa Jesunya nyakunytjikitja mukuringangi. Ka nyara palulanguru Jesulu putu kuliningi tawunungka kumpira tjarpara nyinanytjikitjangku munu wantira ma-nyinangi ilytjingka aŋangu tjȗtangku palunya pitjala pakuntjaku-tawara. Palu aŋangu tjaraya palulakutu pitjangi ngura kutjupa kutjupa tjȗtanguru.

2

*Jesulu Wati Wawanypa Palyarunguntja
(Matthew-ku 9:1-8; Luke-aku 5:17-26)*

¹⁻³ Ka palulanguru tjintu mañkurpa ngarala wiyaringkunyangka Jesunya małaku anu ngura Kapaniyamalakutu. Kaya aŋangu tjuṭangku kulinu paluru ngurangka wirkankunyangka munuya kulira winki pitjangu palulakutu walı panya paluru nyinanytjitjakutu. Munuya walı palunya aŋanu aŋangu winkingku panya walı tjaangka kulu angara tjuta mulapa ngarangi. Ka Jesulu tjanala tjukurpa wangkanyangka wati kutjara kutjarangku wati nyumpu wawanypa mantara lipira ngaritjura katingi Jesulakutu. ⁴ Munuya aŋangu tjuta anga-ngaranyangka nyakula putuliringi wati panya nyumpu katira palunya Jesula nintintjikitjangku. Nyara palulanguruya kulinu walı katu tatira katutja alara wati panya palunya Jesulakutu ukalilyintjikitjangku. Munuya mulapatu walı katukutu kantukantura tatinu munuya katutja alara wati panya palunya mantarangka katunguru ukalilyinu Jesulakutu.

⁵ Ka Jesulu ukalilyinnyangka nyakula kulinu, "Mulapa wati nyanganpa ngayuku mulamularinganyi panya ngayulu pikatjara nyanga palunya palyarunguntjaku." Munu palulanguru wangkangu wati panya wawanypangka, "Wati ngana, Godalu nyuntunya kura tjuta palyantjtanguru kalypangku wantinyi pungkunytja wiyangku."

⁶⁻⁷ Kaya wati Moseku tjukurpa nintilpai tjuta nyara palula tjanala tjungutu ngarangi munuya paluru wangkanyangka kuliřa kulinigi, "Nyaa nyangangku wangkanyi? Tjingurunku nyangangku walytjangku Godanya-palku kulinu munu kura palyantjtanguru kalyparingkunytjikitjangku wangkanyi. Wati kurangku nyangangku ngunti wangkanyi. Panyatjampal Godalu kutjungkumpa kura palyannyangkampa wangkapai kalypangku pungkuwiyangku wantintjikitjangku."

⁸ Ka Jesulu mapalku nintiringu tjana unngu kulintjtjaku munu wangkangu tjanala, "Nyaaku nyura unngu alatji kulin? ⁹⁻¹⁰ Nyura kuwari nyangangi ngayulu wati nyanga palula wangkanyangka munu nyura kutjupa kutjupa nyakunytja wiya. Palulanguru nyura tjinguru kulinu ngayunya ngurpa-palku, munu nyura ngayuku mulamularingkunytja wiyangku wantinyi. Palu kuwari nyangaña wati nyanga wawanypa wangkara palyarunguni. Ka nyanga nyura nyakuku kuwari pakan-nyangka munu nyura palulanguru mulamularingkuku ngayulu panya nganmanytju wangkanytjtjaku, panya ngayulu Watiku Katjangku mantangka nyanga nyinara aŋangu kutjupa kura tjuta palyantjtanguru kalypangku wantintjaku ngaranyi alatjitu." ¹¹ Munu palulanguru piruku wangkangu wati panya pikatjarrangka, "Wati awa, pakaranku mantara mantjira ngurakutu ara."

¹² Ka aŋangu winkingka mirangka wati panya pakaňu munu mantara mantjira ngurakutu anu. Kaya uwankarangku nyakula urulyaraňu munuya pukularira Godanya walkura wangkangu, "Awari! Ngurpangkula kuwari kutju nyanga purunypa nyanganyi panya nganana nganmanytju nyanga purunypa nyakunytja wiyatū."

*Jesulu Levinya Ngurkantankunytja Palula Tjunguringkunytjaku
(Matthew-ku 9:9-13; Luke-aku 5:27-32)*

¹³ Ka Jesunya piruku anu uřu Galileela tjartjarpakutu. Kaya aŋangu tjuta mulapa palulakutu pitjangu, ka tjanala tjukurpa tjuta wangkara nintiningi.

¹⁴ Munu palulanguru uřu tjartjarpa wařara malaku anu tawunukutu

munu nyangu wati kamantaku mani mantjilpai iwarangka itingka wali tjukutjukungka nyinara mani mantjinnyangka. Wati nyara paluru ini Levinya wati ini Alpi-yatjaku katja munu paluru anangu tjuṭa iwarangka wati-pitjanyangka nyakula tjanala mani mantjilpai alatjitu kamantaku. Ka Jesulu wangkangu palula alatji, “Pitjalani ngayunya waŋala!” Ka mulapaṭu Levilu pakara palunya waŋanu nintintja tjutangka tjunguringkula.

¹⁵ Kaya Jesulu tjanala palumpa nintintja tjutangku kuļu Leviku walingka tjunguringkula mai ngalkuningi. Kaya mani mantjilpai tjutangku, kura palyalpai kutjupa tjutangku kuļu palula tjanala mai tjunguringkula ngalkuningi, panya anangu nyanga purunyapa tjuṭa Jesula tjungu paraŋgarapai. ¹⁶ Kaya wati Paratji kutjupa tjutangku Moseku tjukurpa nintilpai nyara palula nyinangi, munuya paluru tjanala nyangu Jesulu wati kura palyalpai tjutangka tjungungku nyinara ngalkunyangka. Munuya nintintja panya tjutangka wangkangu, “Nyaaku nyarangku wati mani mantjilpai tjutangka, kura kutjupa tjutangka kuļu tjunguringkula mai ngalkupai? Uti paluru tjanala tjunguringkuwyangku wantira wati palya tjutangka kutju tjunguringama.”

¹⁷ Ka Jesulu tjananya kuraringkula wangkanyangka kulinu munu tjanala wangkangu alatji, “Kulila, anangu palya tjuṭa wanyu ngangkariku mukuringkupai? Wiya, palu pikatjara tjuṭa kutjuya mukuringkupai. Panya ngayulu pitjangu Moseku tjukurwanu nyinapai tjuṭa altintjikitja wiya, palu anangu nyanga nyura nyakula wantipai tjutakuna pitjangu tjananya altira ngayula tjunguntjikitja.”

Mai Wantinytja

(Matthew-ku 9:14-17; Luke-aku 5:33-39)

¹⁸ Ka panya kutjupa-ara Johnku nintintja tjutangku munu Paratji tjutangku kuļu mai rawa nguwanpa wantira nyinangi Godanya walkuntjikitjangku. Kaya anangu kutjupa tjutangku tjananya nyakula Jesulu tjananya alatji, “Nyaakuya nintintja nyara tjanala kutju mai wantinyi, ka nyuntumpa nintintja tjutangku tiṭutjarangku mai ngalkuni tjintu winkingku?”

¹⁹ Ka Jesulu wangkangu, “Wiya, nyura panya Moseku tjukurwanu nyinapai tjuṭa, palu ngayuku nintintja tjutaya ara kutjupawanu nyinanyi ara kuwaritjangka ngayulu nintintjtjangka, ka ara nyanga paluru pula tititiṭu ngaranyi tjungu wiya. Wanyuya kulila ara panya watingku kuri altintjytja, panya nyara palula ara kuri altintjyangka wati panya palumpa malpa tjutangku palula tjunguringkula pukultu mai pulka ngalkupai wantintjya wiyangku. ²⁰ Palu ngula wati panya palunya kutjupa tjutangku witira katinyangka malpa panya tjuṭa pulkara tjituru-tjitururiku, munuya nyara palulanguru mai wantira nyinaku.*

²¹ “Munuya piruku ara kutjupa kuļu kulila mantaratjara, panya anangungku mantara irititja alaringkunyangka ala patintjikitjangku mantara kuwaritjanguru tjukutjuku kaṭara mantara irititjangka tjungura wakantja wiyangku wantipai paltjinnyangka kaṭakatintjyjakutawara. Panya paltjinnyangka mantara panya tjungura wakantjanya tjukutjukuringkupai munu mantara irititja ilara kaṭantankupai, ka ala pulkaringkupai.

* ^{2:20} Nyanga alatji Jesulu palurunku wangkangi panya ngulaya palumpa mirpanṭju tjutangku palunya witira katingu munuya pungu, kaya palumpa nintintja tjuṭa pulkara tjituru-tjitururingu munuya mai ngalkuwiya wantira nyinangi.

²² “Munuya píruku aña kutjupa kułu kulila palu purunypatu wainaku yakutjatjara. Panya watingku kukaku miringuru yakutja palyalpai waina kuwaritja tjutira kanyintjikitjangku. Palu paluru yakutja irititjangka waina kuwaritja tjutilpai wiya, panya waina kuwaritja tjutinnyangka wainaku panya wiła yakutja unngu lipiringkupai, ka miři irititja pil̄ti ngaranytjatjanu tjlpiraralpai, ka waina mantangka tjutira wiyaringkupai. Pala palula-tawara paluru waina kuwaritja yakutja miři kuwaritjangka tjutilpai tjlolangka, ka wainaku wiła lipiringkunyangka yakutja kułu lipiringkupai tjlpirarantja wiya.” Alatji Jesulu tjanala wangkangi tjana palumpa tjukurpa munu Moseku tjukurpa ngunti tjunguntjaku-tawara.

*Jesulu Tjintu Panya Pakuwiyingkupai Utintja
(Matthew-ku 12:1-8; Luke-aku 6:1-5)*

²³ Ka Saturday kutjupangka tjintu panya pakuwiyingkupaingka Jesunya tjana palumpa nintintja tjuña kułu mai panya wiita tjułangka ngururwanu anangi. Kaya nintintja tjułangku waarrangku ankula mai uninypa urařa ngalkukatingi. ²⁴ Kaya Paratji tjułangku nyakula wangkangu Jesula, “Nyawa, wati nyanga nyuntumpa nintintja tjułangku nganampa tjukurpa Moseku kurani, panya nyangatja Saturday tjintu pakuwiyingkunytjaku, mai urantjaku wiya.”

²⁵⁻²⁶ Ka Jesulu tjanala wangkangu, “Palu nyura wanyu nyiringka nyakunytja wiyařu panya iriti Apiyatjanya tjukurtjara pulka nyinanyangka mayatja Davidalu paltjatjiratjarira Godaku tiinta mil̄milta tjarpala mai panya mil̄milmarā tjunkunytja ngalkuňu munu palumpa tjungutja tjuña kułu ungu ngalkula paltjaringkunytjaku. Palu panya tjukurpa aña ngaranyi tjukurtjara tjułangku kutju mai nyara palunya ngalkuntjaku. Ka paluru tjana tjukurpa aña nyanga palunya kulira wantingu, palu kutjupa tjułangku tjananya paintja wiyangku wantingi paltjatjiratjarira ngalkunyangka.”

²⁷ Munu Jesulu píruku wangkangu tjanala, “Kulila, Godalu aňangu tjułangka warara palyanu munu palulanguru kutju tjintu pakuwiyingkunytjaku tjuňu paluru tjana pakuwiyingkula pukulpa nyinanytjaku. ²⁸ Ka nyanga palulanguru nyura uti kulinma panya ngayulu Watiku Katjanya mayatja pulka mulapa nyinanyi, mununa ngayulu alatjitu wangkapai nyaa palyantjaku tjintu panya pakuwiyingkupaingka.”

3

*Jesulu Wati Mara Ngalturpa Palyantja Tjintu Mil̄milta
(Matthew-ku 12:9-14; Luke-aku 6:6-11)*

¹ Munu kutjupa-ara Jesunya wali inmatjangka píruku tjarpangu Saturday-ngka tjintu panya pakuwiyingkupaingka. Ka nyara palula wati mara ngalturpa tjanala tjengu nyinangi aňangu tjułangka. ² Kaya Paratji tjułangku nyinara Jesunya nyangangi munuya pařara nyinangi wati panya palunya palyarungunyangka nyakula kuramankunytjikitjangku, panya nyangatja tjiripri Saturday pakuwiyingkunytjaku warķa palyantjaku wiya.

³ Ka Jesulu wati panya mara ngalturpangka wangkangu aňangu tjułangka ngurur-ngururpa pakara ngaranytjaku. Ka wati panya mulapatu pakara ngarangu. ⁴ Ka Jesulu aňangu tjułangka wangkangu, “Godalu ngananala nyaa palyantjaku wangkangu tjintu panya pakuwiyingkupaingka? Paluru wangkangu palya palyantjaku munta

kura? Palu Godanya wanyu mukuringanyi nganaña aŋangu kutjupa wankarunkunytjaku munta pungkula iluntankunytjaku?”

Palu tjana pilunpa alatjitu nyinangi wangkanytja wiya. ⁵ Ka Jesulu tjananya mirpaŋ-mirpaŋtu para-nyakula waŋara tjanampa mapalku ngalturingu panya aŋangu nyanga tjana kurunpa wituwitu pulka nyinangi. Ka Jesulu wati panya mara ngalturpangka wangkangu, “Mara pala warariwa.” Ka mara panya wararingu, ka kuvaritu palyaringu, wiru mulapa.

⁶ Kaya Paratji tjuta nyakula mirpaŋaringu munuya mapalku anu Irataku malpa tjutakutu.* Munuya tjanala tjunguringkula wangkara kuliningi Jesunya iluntankunytjikitjangku.

Winki Mulapa Jesulakutu Pitjanytja

⁷⁻⁸ Munu Jesunya nintintja tjutatjara anu uru Galileelakutu, kaya ngura uru nyara palula ititja tjutanguru aŋangu tjuta mulapa tjunguringkula palunya wanau. Ka aŋangu kutjupa tjuta kulu kulira palulakutu pitjangu ngura kutjupa kutjupa tjutanguru winki mulapa ngura Jerusalemalanguru, Judealanguru, Itumiyalanguru, munu karu Jordanta kakararanguru kulukulu. Munuya ngura Tayala Tjaitanta pulangan-guru kulu pitjangu munuya uwankara uru Galileela Jesula tjunguringu kakararanguru, alinytjaranguru, ulpariranguru, munu wiluŋaranganguru kulu, aŋangu winki mulapa. Panya aŋangu nyara paluru tjanaya kulinu Jesulu kunyu pikatjara tjuta palyantja munu tjukurpa wiru tjuta kulu wangkanytja, munuya palulanguru pitjangu palunya nyakunytjikitja. ⁹ Ka Jesulu palumpa nintintja tjutangka wangkangu, “Pauta palaya ma-unṭula munuya urungka tjura ngaŋmanypa ngayuku paṭara ngaranytjaku aŋangu nyanga winkingku ngayunya utjuntjaku-tawara.”

¹⁰ Panya nyara palula Jesulu aŋangu pikatjara winki mulapa palyarunguningi. Kaya pikatjara kutjupa tjutangku kuwaripangku tu unṭu-unṭura ila-ilaringangi Jesunya pampura palyaringkunytjikitja.

¹¹ Kaya aŋangu mamutjara tjutangku palunya nyakula Jesula kuranyu pupakatingi, kaya mamu tjutangku mirara wangkangi alatji, “Nyuntun Godaku Katja.” ¹² Ka Jesulu mamu palunya tjananya painingi aŋangu tjutanguru wantikatinytjaku munu mamu tjutangka wangkangu, “Ngayunya tjakultjunkuwiyangku wantima.”

Jesulu Ngurkantankunytja Wati 12 (Matthew-ku 10:1-4; Luke-aku 6:12-16)

¹³ Munu Jesulu puli katu tatira aŋangu kutjupatjara tjanampa mukuringkula altingu palulakutu pitjanytjaku, kaya ma-pitjala palula tjunguringu. ¹⁴⁻¹⁵ Ka paluru tjanalanguru ngurkantanu wati panya 12. Munu palunya tjananya wangkangu, “Nyura ngayulu panya iyantja tjuta. Panya ngayuluŋa nyuranya ngurkantanu ngayula tjungu nyinanytjaku, munuŋa nyuranya witura iyalku aŋangu tjutangka tjukurpa palya paratjakultjunkunytjaku munuŋa nyuranya witulyankuku mamu tjuta aŋangu tjutanguru paintjaku.” ¹⁶ Ka wati paluru tjana ini nyanganpa,

Simonnga, ka Jesulu palunya ini kutjupa tjunu Peternya.

¹⁷ Munu Tjipitiku katja kutjara Jamesanya pula Johnnga. Ka Jesulu pulanya ininu *Paunatjanya kutjara*, panya ini nyanga paluru wangkanyi, *Tuuntja Kutjara* panya paluru pula pulkara wangkapai kutjara.

* ^{3:6} Iratanya panya manta Galileeku mayatja nyinangi munu mayatja pulka Rome-anyanguraraŋku malpa nyinangi.

18 Munu Andrew-nya, Philipanya, Patjalamunya, Matthew-nya, Thomasanya, Jamesanya wati panya Alpi-yatjaku katja, munu Tjatiyat-janya, munu Simonnga panya ngura Israelku pulkara mukuringkupai.
19-20 Munu panya Judas Kariyatanya, panya paluru ngula Jesunyu pungkunytjaku nintinu Jewku mayatja tjutangka.
Nyanga palunya tjananya Jesulu ngurkantanu palumpa nintintja tjuta nyinanytjaku.

*Jesunyu Munu Piiltjipalnga
(Matthew-ku 12:22-32; Luke-aku 11:14-23; 12:10)*

Munuya palulanguru Jesunyu tiana malaku anu ngurakutu nyinara paku wiyaringkunytjikitja. Palu anangu tjuta mulapa piruku tjanala wirkara tjunguringu, kaya putuliringi nyinara mai ngalkuntjikitja. **21** Kaya Jesuku ngunytjungku munu malanypa tjutangku kulu kulinu anangu tjuta palula rawa tjunguringkunyangka, munuya pitjangu palunya mantjintjikitja. Panya anangu tjutangku wangkangi paluru kata kuraringkunytja, kaya palunya mantjira atunymankunytjikitja mukuringangi.

22 Ka wati Moseku tjukurpa nintilpai tjuta Jerusalemalanguru pitjangu munuya wangkangi alatji, “Wati nyanga palula unngu mamu pulka* nyinanyi, ini Piiltjipalnga, mamu uwankaraku mayatja pulka.* Munu nyara paluru wati nyanga palunya witulyananyi mamu tjuta paintjaku anangu tjutanguru.” Alatjiya ngunti kuliningi paluru tiana.

23 Ka Jesulu nyangatja kulira tjananya altingu munu tjanala tjukurpa ara kutjupatjara wangkangi alatji, “Satantu wanyu palurunku pailpai anangu tjutanguru? Wiya alatjitu. **24** Kulilaya, panya anangu tjuta ngura kutjunguru walytjarara walytjararangku tjananku pikangku pungkula patingkula tjungu utulu kutju nyinanytja wiyaringkupai. **25** Ka palu purunypa anangu walytjarara walytjarara wali kutjunguru nyinara rawa pikaringkula tjungu nyinanytja wiyaringkula mauntalparingkupai. **26** Ka nyara palu purunypa tjinguru Satannga mamu palumpa walytja tjutaku pikaringkunyangkampa paluru tiana palumpa kuraringkula palula tjungu nyinanytja wiyaringkuku, ka paluru tjananya putu wituwitura uparingkuku munu tjanampa mayatja wiyaringkuku.”

27 Munu piruku Jesulu tjukurpa kutjupa wangkangu alatji, “Watingku wanyu wati kunpu pulkaku ngurangka tjarpara kutjupa kutjupa tjuta kutitjunkupai? Wiya alatjitu. Paluru wati nyara kunpu karpintjaku-warara ngaranyi palumpa kutjupa kutjupa tjuta mantjintjikitja mukuringkula.” (Nyanga alatji Jesulu wangkangi palurunku mamu tjuta anangu tjutanguru paira iyantja.)

28 Munu paluru piruku wangkangu alatji, “Palu kulinmaya nyangatja, panya nyura kura kutjupa kutjupa tjutanguru piiwiyingkunyangka Godalu nyuranya kalypangku pungkuwiyangku wantiku. Munu nyura palunya anantjatjanu piiwiyingkunyangka palu purunypa nyurampa kalyparingkuku. **29** Palu nyura tjinguru Kurunpa Milmilnga anara wangkanyangkampa Godalu nyurampa kalyparingkunytja wiyangku nyuranya kukanyamankuku, kukanya titutjara nyinanytjaku.”

30 Jesulu nyanga palunya wangkangi anangu tjutangku palunya mamut-jaranmankunyangka.

31 Kaya wirkanu palumpa ngunytju, malanypa tjuta munuya walingka urilta palumpa patara ngarangi munuya anangu kutjupa witunu palunya altinytjaku. **32** Panya anangu winki mulatuya angara para-nyinara

* **3:22** Piiltjipalnga panya mamu Satannga.

arintanangi, ka paluru ngururpa nyinangi. Kaya kutjupa tjutangku kulintjatjanungku wangkangu Jesula, “Nyuntumpa ngunytju malanypa tjutaya paṭara ngaranyi urilta nyuntunya nyakunytjikitja.”

³³ Ka Jesulu kulira wangkangu, “Ngananya ngayuku ngunytju munu malanypa tjuta?” ³⁴ Munu paluru para-nyakula wañanu anangu winki nyinanyangka munu wangkangu, “Nyanga tjana ngayuku walytja ngunytju malanypa tjuta kuļu. ³⁵ Kulila, anangu panya Godanya mukuringkunytjitja kulira palyalpai tjuta, nyara paluru tjana ngayuku ngunytju malanypa kuļu nyinanyi walytja mulapa.”

4

Tjukurpa Uninypa Tjunkula Wanantja (Matthew-ku 13:1-9; Luke-aku 8:4-8)

¹ Munu ngula Jesulu tjanala piřuku nintiningi uru panya Galileela itingka. Ka anangu winki mulapa palulakutu pitjangu. Munuya palunya utjuningi, ka paluru pautangka tatinu uru kantilytja tartjangka nyinanyangka tjukurpa katunguru wangkanytjikitja. Kaya anangu tjutangku uru kantilynguru ngarala kuliningi pautanguru wangkanyangka. ² Ka Jesulu tjukurpa tjuta tjanala wangkara nintiningi ara kutjupa kutjupa tjutatjara. Munu paluru tjukurpa nyangatja kuļu wangkangi alatji,

³ “Kulilaya! Wati kutju ma-pitjangu uninypa mantangka wanira wanantjikitja palumpa kaanangka. ⁴ Ka uninypa wanira wanannyangka tjara iwarangka punkaňu, kaya tjulpu tjutangku pitjala uwankara ngalkula wiyanu. ⁵ Ka uninypa tjara kutjupa manta pulitjarangka punkaňu munuya mapalku pakaňu manta tjukutjukungka. ⁶ Palu tjintungku pakara kampangu, ka manta tjukutjukungka ngaranytjatjanu mapalku piltiringu iwiri kuļu panya iwiri paluru aputjarangka puťu waintara tjarpangi. ⁷ Ka uninypa kutjupatjara waningi, ka manta tjilka tjutangku utjunu, kaya puťu pulkaringkula maitjararingkunytja wiya ngarangi. ⁸ Ka uninypa kutjupatjara waninyangka manta palyangka punkaňu munu mapalku pakara pulkaringkula maitjararingu, tjara kutjupa 30-tjararingu, tjara kutjupa 60-tjararingu, ka tjara kutjupa 100-tjararingu.”

⁹ Munu Jesulu tjukurpa wangkara wiyaringkula piřuku wangkangu tjanala alatji, “Uwa, nyura pina alangku kulirampa ngalya-kulinma tjukurpa nyanga ngayulu kuwari nyurala wangkanytja.”

Tjukurpa Uninytjaranguru Utintja (Matthew-ku 13:10-17; Luke-aku 8:9-10)

¹⁰ Ka anangu tjuta ngurakutu ankunyangka nintintja tjutangku munu anangu tjara kutjupangku Jesula tjapiningi tjukurpa panya palunya uti mulapa tjakultjunkunytjaku palula tjanala.

¹¹ Ka paluru tjanala wangkangi, “Uwa, ngayulu nyurala kutju Godaku tjukurpa kumpilitja utira wangkanyi, tjukurpa panya Godalu anangu tjuta mayatjangku walytjanmara kanyintjatjara. Palu anangu kutjupa tjutangkaña tjukurpa ara kutjupa kutjupa tjutatjara wangkapai kitiki nguwanpa.

¹² Panya paluru tjana rawangku nyakula puťu nyanganyi munuya rawangku kulira puťu alatjitu nintiringanyi. Palu utiya tjana kulira mulamularingama munuya Godalakutu malaku aruringama,

ka Godanya tjanampa kalyparingama.

Palu paluru tjana mulamularingkunytja wiya alatjitu nyinangi.” *

¹³ Munu Jesulu tjanala wangkangu alatji, “Nyaanguru nyura putu kulini tjukurpa nyanga uninypatjara? Tjinguru nyura tjukurpa nyangatja putu kulirampa tjukurpa kutjupa tjuta kulu putu kulini.” Munu palulanguru Jesulu tjukurpa palunya tjanala utira tjakultjunu alatji, ¹⁴ “Wati kaana kanyilpaingku uninypa waninyi, ka palu purunypa wati tjukurtjarangku Godaku tjukurpa tjakultjunkupai anangu tjutangku kulintjaku. ¹⁵ Ka uninypa panya iwarangka punkara ngarinytja alatji, panya wati tjukurtjarangku Godaku tjukurpa wangkanyangka anangu tjutangku kulini, ka mamu Satantu pitjala tjulyani tjanalanguru, kaya mapalku watarkurinyi. ¹⁶ Ka anangu tjara kutjupa nyinanyi panya manta pulitjarangka punkantja purunypa panya tjana tjukurpa kulira mulamularingkula pukularipai. ¹⁷ Palu tjinguru kutjupa tjutangku tjananya mulamularingkunyangka analku munu pungkuku, kaya paluru tjana mapalku Godalanguru paturingkula watarkuriku. ¹⁸ Ka anangu tjara kutjupa panya uninypa manta tjilkatjarangka punkantja purunypa nyinanyi, panya paluru tjana tjukurpa kulipai. ¹⁹ Palu mantatja kutjupa kutjupa tjuta pulkara kulira wiru tjuta kanyintjikitja mukuringkupai mani pulka kulu munuya nyanga palula tjanalanguru Godaku tjukurku watarkurinyi munuya wiru tjuta Godaku putu palyani. ²⁰ Palu anangu kutjupa tjuta panya uninypa manta palyangka punkantja purunypa nyinanyi. Nyara paluru tjana tjukurpa wanganarangku kulira pulkara mulamularingkupai munuya wiru tjuta Godaku palyalpai tjarangku Godaku wiru mankurpa nguwanpa palyalpai, ka tjarangku tjuta nguwanpa palyalpai, ka tjarangku wiru tjuta mulapa palyalpai Godanya pukularinytjaku.” Alatji Jesulu uti mulapa tjanala tjakultjunu.

Tjukurpa Tilitjara (Luke-aku 8:16-18)

²¹ Munu piruku tjukurpa kutjupa tjanala wangkangi alatji, “Anangungku wanyu lampa tili winki katira piti unngu tjunkupai munta pangkangka unngu? Wiya, anangungku lampa tili winki uti tjunkupai anangu tjutangku irnyannyangka nyakunytjaku. ²² Palu kulilaya, panya kumpilpa kanyintja tjuta Godalu wangkara utilku munu kutitjura kanyintja tjuta Godalu utilkutu uwankarangku nyakunytjaku. ²³ Uwa, nyura pina alangku kulirampa ngalya-kulinma tjukurpa nyanga ngayulu nyurala wangkanytja.”

²⁴ Munu piruku Jesulu wangkangu, “Nyura Godala tjukutjuku kutju wanganarangku kulinnyangkampa, paluru palu purunypatu nyuranya tjukutjuku kulira tjukutjuku kutju pukulmankuku. Palu nyura Godala pulkara mulapa wanganarangku kulinnyangkampa, paluru nyuranya pulkara mulapa pukulmankuku. ²⁵ Tjinguru nyura wanganarangku palula kulinnyangkampa, nyuranya Godalu pulka mulapla nintliku nyura kulira ninti mulararinytjaku. Palu tjinguru nyura kulira wantinyangkampa, Godalu nyuranya kulintja kampa kutjupankuku palumpa watarkurinytjaku.”

Tjukurpa Uninypa Pakantja

* ^{4:12} Aitjayaku 6:9-10

²⁶ Munu Jesulu píruku aŋangu tjutangka wangkangi tjukurpa kutjupa nyanga alatji, “Panya Godalu aŋangu tjuta walytjanmara mayatjangku kanyintja ařa nyanga palu purunypa ngaranyi, panya watingku manta runyura wañantjatjanungku uñinypa para-wañira wañalpai.

²⁷ Ka uñinypa panya paluru tjunkunytja uwankara tuulpakara ukiri pulkaringkupai mungangka kalala kulu. Munu wati paluru mungangka kunkunarinyangka munu kalala pakara para-ngaranyangka ukiri paluru rawa pakara pulkaringkupai. Ka wati paluru pakannyangka nyakula putu kulilpai, ‘Yaaltji-yaaltji nyanganpa walytja pakalaran?’ ²⁸ Palu uñinypa paluru tjana walytja alatjitu pakalaran manta wirunguru, munu kutju puňu pulkaringkula maitjararinganyi, watingku palyantjtjanguru wiya. Nganmanypa panya tuulpakan-warara munu palulanguru pakara puňu nyalpitjararinganyi munu maitjararinganyilta, munu mai kururinganyi.

²⁹ Ka kururingkunyangka wati paluru urara wañanilta. Uwa, nyanga palu purunypa aŋangu tjuta Godaku walytjaringkula wiruringkupai Godalu palyannyangka, watingku palyantjtjanguru wiya.”

*Tjukurpa Uninypa Tjukutjukutjara
(Matthew-ku 13:31-32; Luke-aku 13:18-19)*

³⁰ Palulanguru píruku Jesulu wangkangu, “Uwa, Godalu aŋangu tjuta mayatjangku walytjanmara kanyintja ařa nyaa purunypa ngaranyi? Tjukurpa ařa nyaatjaran̄a nyurala wangkaku uti kulintjaku?

³¹⁻³² Wanyuña tjukurpa uñinypatjara wangka. Panya uñinypa ini matjata tjuku mulapa, ka aŋangungku kaanangka tjunkunyangka paluru pakara puňu pulkaringkupai kutjupa tjutangka waintara munu miňa tjutatjararingkula lipiringkupai munu pulkuňpa pulkaringkupai. Kaya tjulpu tjutangku pitjala maňgu tjuta palyara nyinapai wiltjangka, panya puňu paluru pulka mulapa, uñinypa tjukutjukunguru pakantja. Nyanga palu purunypa aŋangu tjuta Godaku walytja tjutaringkupai paluru tjananya mayatjangku kanyintjaku.”

³³⁻³⁴ Uwa, Jesulu aŋangu tjutangka tjukurpa uñinypatjara wangkara kampa kutjupara wangkara tjanala nintiningi Godalu aŋangu tjuta mayatjangku walytjanmara kanyintja. Munu palu purunytjuť tjukurpa kutjupa tjuta kulu ara kampa kutjupawanungku nintiningi tjanala. Palu paluru tjana kutjuringkula nintintja tjutatjara kutju nyinara paluru tjukurpa tjuta wangkara utingku nintiningi ařa kampa kutjupara wangkawiyangku, tjana uti kulintjaku.

*Jesulu Walpa Atanmankunytja
(Matthew-ku 8:23-27; Luke-aku 8:22-25)*

³⁵ Ka nyara palula malangka tjintu tjaruringkunyangka mungartjikutu Jesulu wangkangu palumpa nintintja tjutangka, “Wanyula ma-itipiri nyara urungka munkara.” ³⁶ Munuya aŋangu tjuta wantikatira Jesunya pauta panya palulaňtu katingu nintintja panya tjutangku, kaya pauta kutjupa tjuta kulu tjanala tjungu anangi uru nyara palula. ³⁷ Ka tjana urungka ngururpa ankunyangka walpa pulka mulapa wangkangu, ka uru pulka pauta unngu tjarpangu munu pauta nguwanpa tjarura urungka tjarpatjunu. ³⁸ Palu Jesunya pautangka małarku kunkunpa pulka ngaringi katapi tjunkula. Ka nintintja tjutangku palunya mirara wankanigi wangkara, “Nintilpai! Ilunytjakulanyan wantinyi? Kuwarila uwankara iluni nyangangka.” ³⁹ Ka Jesunya pakanu munu walpangka wangkangu alatji, “Atanari!” Munu urungka wangkangu, “Uriwiya ngarima!” Ka walpa panya atanaringu munu uru kulu uriwiyaringkula tiwilaringu. ⁴⁰ Munu Jesulu nintintja

tjułangka wangkangu, “Nyaanguru nyura nguluringu? Nyura wanyu ngayuku kuwaripatu puł mulamularinganyi?” ⁴¹ Panya tjana nyakula pulkara nguluringangi munuyanku wangkara kuliningi, “Wati nyaa nyangatja? Panya wal pangku urungku kułu palula wangañarangku kulipai.”

5

Jesulu Wati Mamu Tjutatjara Palyarunguntja (Matthew-ku 8:28-34; Luke-aku 8:26-39)

¹ Kaya nyara palula malangka mantangka ma-wirkanu kampa kutjupa kakarara ngura pulkangka ini Karatjala. ² Ka Jesunya pautanguru ukalingkula ngaranyangka wati mamu tjutatjara palulakutu ngalyawirtjapakañu kulpinguru. ³⁻⁴ Panya ngura nyara palula kulpi tjuta ngarangi miri tjuta tjunkupai. Ka wati nyara paluru ngura pala palula nyinapai kulpingka. Panya palunyaya anangu tjutangku ngañmanytju witira tjiinangka karpilpai palumpa nguluringkula. Tjuta-arangkuya tjina mara kułu karpiningi, ka paluru kañantanangi alatjitu munu ayana tjina karpintja panya kañantara araltjanangi alatjitu. Wati paluru panya kułnu pulka mulapa, kaya palunyu pułu witira karpiningi munuya pułu palyaringkunytjaku palyaningi. ⁵ Ka paluru kalala mungangka titutjara kulpi tjutangka para-ngarapai puli katu kułukulu munu paluru mirara palurunku walytjangku pułlingka atura miri wilypanpungkupai.

⁶ Munu wati nyara paluru pararinguru nyangu Jesunya pautanguru wararakatira ngaranyangka munu palulakutu wirtjapakaña tultjun-garakatingu. ⁷⁻⁸ Ka Jesulu mamu panya palula unngu nyinanytjanya painu watinguru panya pakantjaku. Ka wati unngunguru pulkara mirara wangkangu, “Jesu, nyuntu God Katutja pulkaku katja. Ngayunya nyaantjikitjan pitjangu? Palu wanyuni pikantankuwiyangku wantima mununi Godala miñangka kalkula wantinytjikitjangku.”

⁹ Ka Jesulu palula tjapinu, “Palu nyuntu wanyu ini ngananya?” Ka wangkangu, “Ngayulu ini Tjutanya panya nganana mamu tjuta mulapa wati nyanga palula nyinanyi.” ¹⁰ Munu paluru tjana tjuta-arangku Jesula ngatjinini ngura nyara palulanguru paira iyalwiyangku wantinytjaku.

¹¹ Ka ngura nyara palula itingka pikipiki winki mulatu 2,000-tu ngarala ukiri para-ngalkuningi puli pañtangka. ¹² Ka mamu tjutangku Jesula ngatjinu alatji wangkara, “Wanyulanya witula pikipiki nyara tjutakutu, kala nyara palula tjanala tjarpa.” ¹³ Ka tjananya palyanmanu. Kaya watin-guru panya pakara pikipiki tjutangka tjarpangu, kaya mamu tjuta tjarpa-nyangka pikipiki panya winki mulapa puli wañarangka tjarukutu wirtjapakaña urungka wala winki tjarpangu munuya karalukatira uwankara wiyingru.

¹⁴ Kaya wati panya pikipiki kanyilpai tjutangku nyangatja nyakula wirtjapakañu tawunukutu ngura kutjupa tjutakutu kułu munuya anangu tjutangka para-wangkangi. Kaya kulira pitjangu nyakunytjikitja.

¹⁵ Munuya pitjala nyangu Jesunya munu wati panya ngañmanypa mamutjara nyinanytjanya palula tjungu nyinanyangka mantaratjara, panya wati paluru kata palyaringkula nyinangi pilunpa. Kaya nyakula pulkara nguluringu Jesuku. ¹⁶ Kaya pikipiki kanyilpai tjutangku wati panya mamutjara palyaringkunytja nyakunytjatjanungku tjanala tjakultjunangi, pikipiki tjuta ilura wiyingkunytja kułu. ¹⁷ Kaya palulanguru anangu

tjuṭangku wangkangi Jesula paluru ngura tjanampa wantikatira ankunytjaku.

¹⁸ Ka Jesunya pautangka tatinnyangka wati panya paluru ngatjiningi palula, “Nyuntulaṇa tjungu ankuku?”

¹⁹ Ka Jesulu palunya markunu munu wangkangu, “Ngurakutu malaku ara munu nyuntumpa walytja tjuṭangka tjakultjura Mayatjalu nyuntumpa pulkara ngalturingkula nyuntunya palyarunguntja.” ²⁰ Ka mulapaṭu paluru ankula para-ngarangi manta panya ngura tawunu 10-tjarangka munu Jesulu palunya palyantja aŋangu tjuṭangka para-tjakultjunangi, kaya kulira puṭu nguwanpa kuliningi, “Mulapa nyangatja?”

Tjairatjaku Untalpa Munu Minymangku Jesunya Pampuntja
(Matthew-ku 9:18-26; Luke-aku 8:40-56)

²¹ Nyara palulanguru Jesunya tjana malaku ma-itipiringu pautangka urungka kampa wiluraralku. Ka uṛu nyara palula tjartjarpa kampa kutjupa aŋangu winki mulapa palula tjunguringu. ²²⁻²³ Ka nyara palula wati tjukurtjara ini Tjairatjanya wirkanu. Wati nyara paluru panya wali inmatjaku mayatja nyinangi ngura nyara palula, munu paluru Jesunya nyakula palula tjinangka itingka tultjungarakatira kurunpa winkingku ngatjiningi wangkara, “Ngayuku untalpa kungkawara tjukutjuku pika pulka ngarinyi munu nguwanpa ilunyi. Wanyu pitjala marangku pampula ka palyaringkula wankariwa.” ²⁴ Ka Jesulu kulira palula tjunguringkula anu.

Kaya aŋangu winki mulatu palunya waŋaningi munuya ila-ila ankula palunya utjuningi. ²⁵ Ka nyara palula aŋangu tjutangka ngururngururpa minyma kutjupa pika milkalitjara ngarangi. Minyma nyara paluru pika rawa ngarangi 12 yiyangka tjintu winki. ²⁶ Munu paluru ngangkari kutjupa kutjupa arkara mani pulkangka payamilaningi palunya palyarunguntjaku, palu putuya palyaningi, ka mani palumpa wiyaringu. Ka pika panya paluru tjukutjukuringkunytja wiya pulkaringu. ²⁷⁻²⁸ Ka minyma panya paluru Jesunya pitjanyangka kulinu munu aŋangu tjuṭangka ngururpa pitjala palula tjaŋawanu ilarinkula kuliningi, “Wanyunatju mantara palumpa pampula mununatju palyariwa.” Munu paluru pampunu. ²⁹ Ka mantara pampunyangka pika panya paluru kuwaritu mapalku wiyaringu. Ka paluru unngu walytjangku kuliningi, “Ai, pika ngayuku wiyaringu.”

³⁰ Palu Jesulu unngu kulinu palumpa mantara pampunyangka, panya witulya palumpa palulanguru pakaṇu. Ka pinkuraraṛa aŋangu tjuṭangka tjapinu, “Nganalu ngayuku mantara pampuṇu?” ³¹ Ka palumpa nintintja tjuṭangku wangkangu, “Palu aŋangu nyanga tjuṭan nyanganyi utjunnyangka? Nyaakun kutju ankula-palku para-tjapini kutjupangku pampuntja?”

³² Palu Jesulu wantintjya wiyangku para-nyangangi alatjiṭu nyakunytjikitjangku, “Nganaluni panyatja pampuṇu?” ³³ Ka minymangku panya palurunku palyaringkunytjatjanungku kulira utiringu Jesula munu pulkara nguluringkula tjitingkula palula tjinangka tultjungarakatingu munu uwankara palula utingku tjakultjunu. ³⁴ Ka Jesulu wangkangu palula, “Wiya palya, nyuntu ngayuku mulamularingkula palyaringu. Ara kurunpa pukularira, munu tiṭutjara pika wiya palya nyinama.”

³⁵ Ka Jesulu tjanala kuwaripangkuṭu ngarala wangkanyangka wati maŋkurpa wirkanu Tjairatjaku nguranguru munuya wangkangu

Tjai^{ratjala}, “Alatji^{tu} wanti nintilpaina^{ya} ngunti katinytjaku-tawara. Alatji^{tu}n purkutjararingu.”

³⁶ Ka Jesulu tjana wangkanyangka kulira wantingu munu wati panya Tjai^{ratjala} wangkangu, “Pulkara^a kulilwiyangku wantima munu mula-mulariwa kutju.” ³⁷ Munu paluru a^ñangu kutjupa tju^{ta} markunu nyinanytjaku munu Peternya, Jamesanya Johnnga tjananya kutju katingu.

³⁸ Munuya ankula Tjai^{ratjaku} wa^{ling}ka urulta wirkana^{nu} munuya nyangu a^ñangu tju^{ta} pulkara^a ulara mirawakara^a wa^ñinyangka. ³⁹⁻⁴⁰ Ka Jesulu yaatangka ma-tjarpara tjanala wangkangu, “Nyaanguru nyura mirawakara^a pulkara^a ulanyi? Tjitji nyangatja ilunyntja wiya, kunkunpa ngarinyi.” Kaya alatji^a kulira^a Jesunya anara^a ikaringangi ngunti wangkanyangka-palku.

Ka tjananya uwankara urilkutu pakaltjinganu munu tjitjiku mama ngunytju munu nintintja panya mankurpa kutju katingu munuya palumpa ruumangka tjarpangu tjitji panya ngarinytjalakutu. ⁴¹ Munu Jesulu tjitji panya mara witira wangkangu, “Tjitji awa, wangkanyinanta, pakala.”

⁴² Ka mapalku pakara para-ngarangi. (Tjitji paluru panya kungkawara tjukutjuku 12 yiya kutju.) Kaya panya Jesula tjungu tjarpanytjatjanungku tjitji panya wankaringkula para-ngaranyangka nyakula urulyaraningi, “Awari, mulapa nyangatja ilunyntjatjanu wankaringu!” ⁴³ Ka Jesulu tjitjiku panya mamangka ngunytjungka wangkangu, “Kulila pula! Nyupali nyangatja nyakunytjatjanungku a^ñangu tju^{ta}ngka tjakultjunkunytja wiyangku wantima. Palya? Palu kuwari pula mai uwa tjitji nyanga palunya.”

6

Nguratja Tju^{ta}ngku Jesunya Wantinytja (Matthew-ku 13:53-58; Luke-aku 4:16-30)

¹ Palula malangka Jesulu wantikatingu ngura panyatja, munu ngura waltyjakutu anu Nazarethalakutu palumpa nintintja tju^{ta} ku^{lu}. ² Ka Saturday tji^{ntu} panya pakuwiyaringkupai wirkankunyangka a^ñangu tju^{ta} wali inmatjangka tjunguringu, Jesunya tjana ku^{lu}. Ka paluru tjanala tjukurpa wangkara nintiningi. Kaya a^ñangu tju^{ta}ngku wangkanyangka kulira^a nguankuringu, “Ai mulapa?”

Munuya wangkangi, “Yaaltjingka wati nyanga paluru tjukurpa nyangganku nintiringu? Paluru nintipukangku alatji^{tu} wangkapai, munu panya nyangangku miracle kutjupa kutjupa tju^{ta} ku^{lu} palyalpai. Nganalu palunya nintinu munu witulya ungu? ³ Wiyampal panyatja wali palyal-painyampa, Maryku panya katjampa. Ka panya palumpa ma^ñanypa tju^{ta} nyangatja nyinanyi Jamesanya, Josephanya, Judasanya, Simonnga tjana, kaya palumpa nyarumpa tju^{ta} ku^{lu} ngura nyangangka nyinanyi.” Alatji wangkaraya palumpa kuraringangi munuya palula kulintja wiyangku wantingi.

⁴ Ka Jesulu kulira wangkangu, “A^ñangu tju^{ta}ngku wati wangkatjara ngura kutjupitjangku wangkanyangka kutjuya wanganarangku kulilpai, palu wangkatjara nguraritjangku wangkanyangkaya kulilwiyangku wantipai.” ⁵ Palulanguru^a Jesulu miracle kutjupa kutjupa wiru tju^{ta} pu^{tu} palyaningu^a ngura nyara palula, pikatjara ma^ñkur-ma^ñkurpa kutju ma^ñangku pampura palyarungunu. ⁶ Munu paluru pu^{tu} kuliningi tjana palumpa mulamularingkuwiyangku wantinyangka.

Jesulu Nintintja 12 Iyantja (Matthew-ku 10:5-15; Luke-aku 9:1-6)

Jesulu tawunu tjukutjuku tjuṭangka para-ngarala tjukurpa nintiningi anangu tjuṭangka.⁷ Munu palulanguru nintintja panya 12 altira tjungunu munu tjananya kutjara kutjara wituṛa iyanu ngura tjuṭakutu munu tjananya witulyanu mamu tjuta paira iyantjaku anangu tjuṭanguru.

⁸⁻⁹ Munu tjananya wituṛu alatji wangkara, “Iwarangka ankulaya kutjupa kutjupa katintya wiyangku wantima, mai wiya, yakutja wiya, mani wiya munu mantara kutjupa tjinatja kutjupa kuļu katintya wiyangku wantima. Palu tjukara kutjuya katima.”¹⁰ Munu tjanala piruku wangkangu, “Nyura tawunu kutjupangka wirkankunyangka tjinguru anangu kutjupangku nyuranya altira tjunkuku palumpa waļingka. Ka nyura tawunu nyara palula nyinara wali nyara palula kutjungka ngarima.”¹¹ Palu nyura ngura tawunu kutjupangka wirkankunyangka tjinguru anangungku nyuranya ngurangka altira tjunkuwiyangku wantiku munu nyurala tjukurpa kuļu kulilwiyangku wantiku. Ka palulanguru nyura uti ngura pala palunya wantikatima munuya wantikatintjikitjangku ulpuru nyurampa puutan-guru patapatala, kaya nyara palulanguru patapatannyangka nyakula kulilku Godanya tjanampa mirpaṇarinyangka.” Alatji Jesulu tjanala wangkangi.

¹² Kaya ma-pakaṇu munuya ngura tjuṭangka tjukurpa tjakultjunangi anangu tjuṭangka, munuya wangkangi, “Uti nyuranku kura kuliṛa pi-iwiyaringama munu kura tjuṭa wantima piruku palyantja wiyangku.”

¹³ Munuya mamu tjuta painingi anangu tjuṭanguru, munuya pikatjara tjuṭa uwilangka nyitira palyarunguningi, kaya palyaringangi.

John Baptistaṇa Kata Muṭura Iluntankunytja (Matthew-ku 14:1-12; Luke-aku 9:7-9)

¹⁴ Ka Mayatja Iratalu nyanganpa kulinu, panya ini Jesunyaya ngura winkitjangku para-wangkangi. Kutjupa tjuṭangku alatji wangkangi, “Nyaratja panya John Baptistaṇa panya ilunytjatjanu wankaringu munu nyara palulanguru paluru miracle kutjupa kutjupa tjuṭa witulya pulkangku palyaṇi.”

¹⁵ Kaya tjarangku wangkangi, “Wiya palatja Godaku wangkatjara panya Ilaitjanya.”* Kaya tjara kutjupangku wangkangi, “Wiya, nyaratja Godaku wangkatjara pulka irititja tjuṭa purunypa.”

¹⁶ Ka Iratalu anangu tjuṭangku wangkanyangka kuliṛa wangkangu, “Wiya tjinguru nyaratja mulapa Johnnga, panya ngayulu kata mutuntjanya. Mulapa paluru ilunytjatjanu małaku wankaringu.”

¹⁷⁻¹⁹ Ngaṇmanytju panya Johnnga wanka nyinanyangkalpi Iratalu palumpa małanypaku Philipaku kuri tjulyaṇu ini panya Iratiyanya. Ka panya Johntu rawangku wangkangi palula alatji, “Kurangkun tjulyaṇu nyuntumpa malanypaku kuri. Alatji palya wiya.” Ka minyma panya paluru Johnku pulkara kuraringangi munu paluru mukuringangi palunya iluntankunytjikitja. Ka nyara palula-tawara wati panya Iratalu tjaultji maṇkurpa wangkangu Johnnga witira tjalangka tjarpatjunkunytjaku.

²⁰ Panya Iratanya ninti Johnku, panya paluru wati wiṛu mulapa kura wiya, ka nyara palunya kuliṛa Iratalu nguluringkula wanka kanyiningi. Munu paluru rawa mukuringkupai Johntu wangkanyangka kulintjikitja, palu kuliṛa paluru puṭu nguwanpa kulilpai munu tjni tjułypilya nyinapai.

* **6:15** Ilaitjanya panya Godaku wangkatjara iriti nyinanytja. Ka panya tjiłpiringkunyangka Godaku palunya ilkarikutu katingu wanka winki. Palulanguruya tjinguru kulinigi Jesunyaya Ilaitjanya małaku pitjanytja.

²¹ Ngula Iratalu mai pulka palyanu munu palumpa malpa tjuta altingu tjunguringkula paluru iti ngarinytjita kulira ngalkula pukularintjaku. Paluru wati kuranyitja tjuta altingu, munu palumpa tjaultji tjutaku mayatja tjuta kulu altingu, munu panya wati pulka tjuta Galileelanguru kulu altingu. Ka minyma panya palumpa kuringku kulinu Iratiyalu, "Muntawua, kuwarina wati tjutangka mirangka Iratala ngatjilku Johnnga iluntankunytjaku, kanji paluru putu wianmankuku." ²² Ka tjana maingka tjunguringkunya minyma panya palumpa untalpa pitjala nyapingi nyara palula tjana nyakunytjaku. Kaya nyakula pulkara pukularingu Iratanya tjana. Munu Iratalu kungkawara palula pukularira tjapinu, "Nyuntu kutjupa kutjupaku mukuringkulampa wangka, kaña nyuntunya ungkuku." ²³ Munu pulkara alatjitu kalkunu wangkara, "Mulamulangkuña wangkanyi. Nyuntu ngatjinnyangkananta unganyi alatjitu. Panya ngayulu mayatjangku ngura tjuta kanyini kutjupa kutjupa tjuta kulu. Mununa nyanga ngayulu kanyintja uwankara nyuntunya tjarara tjara kutjupa ungkuku nyuntu mukuringkunya."

²⁴ Ka kungka panya paluru nyangatja kulira anu palumpa ngunytjukutu munu palula tjapinu alatji, "Ngunytju, nyaa ungkunytjakuña Iratala wangkaku?" Ka ngunytjungku panya wangkangu, "Wiya, ankula Johnnga kata mutura ungkunytjaku tjapila."

²⁵ Ka kungkawara panya malaku warpungkula anu mayatja Iratala ngatjintjikitja munu wangkangu, "Mukuringanyina Johnnga kata mutura ngayunya ungkunytjaku pulitangka tjunkula."

²⁶ Ka nyanga alatji wangkanyangka Iratanya unngu pulkara tjiturutjitururingu, munu kulinigi, "Tjinguru paluru ngatjinnyangkaña ungkuwiyangku wantima, palu ngayulu ngañmanyiju winkingka mirangka kalkuntjatjanungku mała putu wianmananyi." ²⁷⁻²⁸ Munu paluru wati panya tjaultji mapalku wituňu ankula Johnnga kata mutura ngalya-katinytjaku. Ka wati tjaultji anu tjailakutu munu Johnnga kata mutura ngalya-katingu pulitangka tjunkula, munu kungkawara panya ungu. Ka paluru katira palumpa ngunytju ungu.

²⁹ Kaya Johnku nintintja tjutangku nyangatja kulira pitjangu munuya palunya puntu mantjira katira kulpingka ngaritjunu.

*Jesulu Anangu Winki Mulapa Maingka Paltjantja
(Matthew-ku 14:13-21; Luke-aku 9:10-17; Johnku 6:1-14)*

³⁰ Ka ngula Jesulu panya iyantja tjuta malaku aruringu munuya Jesula tjunguringkula uwankara tjakultjunangi tjana palyantjatjanungku munu nintintjatjanungku. ³¹ Ka panya anangu tjuta mulapa Jesula tjanalakutu rawa pitjangi munuya nyinara anangi, ka tjara kutjupa ngapartji pitjala nyinara anangi. Kaya alatji rawa iwarakatinyangka Jesulu tjana palumpa nintintja tjutangku putu nguwanpa kulinigi mai ngalkuntjikitjangku munu paluru wangkangu tjanala, "Wanyula ara maunthalpa ngura pilunta nyinara pakuwiyaringkunytjikitja." ³² Munuya pautangka tatira anu maunthalpa ngura pilunta nyinanytjikitja. ³³ Palu anangu tjutangku tjananya nyangu pautangka ma-pakannyangka munuya ngura nintingku kulira tawunu tjutanguru mantangka wirtjapakara nganmanypa wirkara nyinangi ngura panya palula, panya Jesunya tjana nyara palulakutu anangi. ³⁴ Ka Jesulu mantangka wirkara pautanguru ukalingu munu anangu winki mulapa ngaranyangka nyakula tjanampa kurunpa pulkara ngalturingu, panya tjana tjiipi tjuta purunypa para-ngarangi tjapatangku

atunymankunytja wiya. Ka palulanguru Jesulu tjanala tjukurpa tjuṭa wangkara nintiningi.

³⁵ Ka paluru tjukurpa rawangku wangkanyangka tjintu tjaruringu kaya palumpa nintintja tjuṭangku palula wangkangu, “Ngura parari nguwanpa nyangatja, ka tjintu nyanga nguwanpa tjaruringu.” ³⁶ Wanyu aŋangu nyanganpa witula kaya ankula ngura ilatjangka mai payamilara ngalkula paltjariwa.”

³⁷ Ka Jesulu nintintja tjuṭangka wangkangu, “Wiya, mai nyura tjananya uwa.”

Kaya wangkangu, “Wiya, nganaŋa mani pulka kanyintja wiya mai pulka payamilantjikitjangku aŋangu nyanga winkingku ngalkula paltjaringkunytjaku. Panya nganaŋa tjinguru pira 8 waṛkarira kutju mani pulka mantjilku nyanga tjanampa mai payamilantjikitjangku.”

³⁸ Ka Jesulu wangkangu tjanala, “Ankulaya nyawa mai yaaltjiṭu tjana kanyini.”

Kaya ankula nyangu munuya pitjala wangkangu, “Mai tampa maŋkurpa kutjara nyangatja, munu kuka antipina kutjara kuļu.”

³⁹ Ka Jesulu palumpa nintintja tjuṭangka wangkangu, “Aŋangu tjuṭa wangka kaputu kutjupa kaputu kutjupa ukiringka nyinakatinytjaku.”

⁴⁰ Kaya palyanu paluru panya wangkanytja. Munuya aŋangu tjuṭa tjarara tjarara tjunu 50 kutjupa 50 kutjupa, 100 kutjupa, 100 kutjupa.

⁴¹⁻⁴² Ka Jesulu mai munu kuka kuļu mantjira ilkari ira-nyakula Godanya walikura wangkangu, “Wirungkulanyan mai kuka nyangatja ungu.” Munu kaṭantara nintintja tjuṭa tjarara ungu aŋangu tjuṭa para-ungkunytjaku, kaya uwankarangku mai kuka antipina kuļukuļu ngalkula paltjaringu.

⁴³ Kaya palula malangka nintintja tjuṭangku kuka mai lampi muṭun-muṭunpa tjuṭa mantjira piti pulka 12-ngka tjaalyngaratjunu. ⁴⁴ Uwa, ngura nyara palula wati winki mulatu nyinara ngalkuningi nampa nyangantu 5,000-tu. Ka minyma tjitji kuļukuļu nyinangiṭu pala palula munuya ngalkula paltjaringu.

Jesunya Uru Katu Paltjura Ankunytja (Matthew-ku 14:22-33; Johnku 6:15-21)

⁴⁵ Nyanga palula malangka Jesulu palumpa nintintja tjuṭa witunu palunya wantikatira pautangka tatira kuranyu ma-itipirinytjaku uru kampa kutjupa ngura ini Pitjaitalakutu. Munu paluru aŋangu panya tjuṭa kuļu witunu ngurakutu malaku ankunytjaku. ⁴⁶ Munu tjananya wantir'iyaṛa paluru pulikutu ankula puli paṇṭangka tatinu Godala tjaḍintjikitja.

⁴⁷ Ka ngalya-mungartjirinyangka nintintja panya tjuṭa urungka ngururpatu pitjalinangi pautangka, ka Jesunya kutju nyinangi puli katu nyara malaku. ⁴⁸ Munu paluru nyangu tjana puṭu pauta panya walawalannyangka, panya walpangku uṇtuningi malakukutungku, kaya puṭu anangi. Ka munga kultungka tjintukutu-tjintukutu Jesunya urungka katu paltjura tjanalakutu pitjangi. Munu nguwanpa tjanala waintaringu.

⁴⁹⁻⁵⁰ Kaya nintintja panya tjuṭangku nyangu palunya kurun-kurunpa-palku uru katu paltjuṛa ankunyangka munuya pulkaṛa nguluringkula mirangi.

Ka Jesulu tjanala wangkangu, “Nguluringkunytja wiyyaya panya ngayuluṇa nyangatja, kaya raparingama!” ⁵¹ Munu pautangka tatinu tjanala. Ka walpa panya atanaringu.

Kaya nintintja panya tjuṭangku puṭu kuliningi, “Ai, yaaltji-yaaltji nyangatja?” ⁵² Panya tjana kurungku nyangangi paluru aŋangu winki mulapa

maingka paltjannyangka palu nyakunytjatjanungkuya kuwaripangku^{tu}
pu^{tu} kuliningi paluru alatjirinyangka, munuya pina pati nyinangi.

*Jesulu Pikatjara Tjuta Palyarunguntja Ngura Kina-tjaratala
(Matthew-ku 14:34-36)*

⁵³⁻⁵⁴ Munuya ʉrungka itipirira tjinturingkunyangka ma-wirkanu mantakutu ngura ini Kina-tjaratala. Munuya ukalingkula pauta karpira wantikatira anu. Kaya aŋangu tjuṭangku Jesunya mapalku ngurkantanu. ⁵⁵ Munuya manta nyara palula ngura tjuṭakutu para-wirtjapakalyira pikatjara tjuṭa mantjira mantarangka tjunkula palulakutu ngalya-katingi ngura kutjupa kutjupangka paluru pitjala nyinanyangka. ⁵⁶ Panya paluru ngura tjuṭakutu anangi, tjukutjuku tjuṭakutu, pulka tjuṭakutu, munu ʉrulkutu kulukulu, kaya wirkankunyangka aŋangu tjuṭangku pikatjara tjuṭa katira ngaritjunangi aŋangu tjuṭa pitjala tjunguringkupaingka. Kaya pikatjara tjuṭangku Jesula ngatjiningi palumpa mantara pampuntjikitjangku, munuya uwankarangku^{tu} pampuntjatjanu palyaringangi.

7

Jesulu Paratji Tjuta Munu Moseku Tjukurpa Nintilpai Tjuta Wangkara Paintja

(Matthew-ku 15:1-9)

¹ Ka ngula wati Paratji tjuṭa munu Moseku tjukurpa nintilpai kutjupa tjuṭa ku^{lu} Jerusalemalanguru Jesunya nyakunytjikitja pitjangu, munuya palula para-nga^{ra}la arinta^{ra} waŋanu. ² Munuya nyangangi Jesuku nintintja tjuṭangku mai ngalkunnyangka. Palu paluru tjana tjamutja-a^{ra}rangka mara paltjintja wiyangku ngalkuningi. ³ (Tjaka panya Paratji tjuṭangku munu Jew kutjupa uwankarangku ku^{lu} mai ngalkuntjikitjangku ngaŋmanytju mara paltjilpai tjamutja-a^{ra}rangka. ⁴ Munu tjana tjuwangka mai tjuṭa payamilara ngurakutu katira mai palunya tjananya ku^{lu} pałtjilpai-warara ara palu purunypa^{tu} munuya palulanguru kutju ngalkupai. Nyanga alatji tjana tjamutja ara tjukarurungku palyalpai, munuya ara kutjupa tjuṭa ku^{lu} tjukarurungku palyantjikitjangku walpayata, piti, wayatjara kulukulu uwankara paltjilpai kilina ngaranytjaku. Munuya rawangku kulilpai ara nyanga palu purunypa tjuṭa palyantjikitjangku.)

⁵ Kaya Paratji panya tjuṭangku munu wati Moseku tjukurpa nintilpai tjuṭangku ku^{lu} Jesula wangkangu alatji, “Nyaakuya nyuntumpa nintintja tjuṭangku tjamuku tjanampa ara tjuṭa wanganarangku kulira palyantja wiyangku wantinyi munuya mara paltjilwiyangku ngalkuni?”

⁶ Ka Jesulu wangkangu tjanala, “Nyura kata kampa kutjara. Panya iriti Godaku wangkatjarangku Aitjayalu tjukarurungku walkatjunu nyuranyatjara Godalu wangkanytja alatji,

‘Aŋangu nyangantuya ngayunya winpinpingku kutju walkulpai,
panya tjana kurunpa winkingku ngayunya walkuntja wiya alatjitu.

⁷ Tjana ngayunya unytjungku kutju walkulpai.

Panya tjana ara tjuṭa walytjangku kulira nintilpai tjukurpa aŋangitja tjuṭa, ngayulanguru wiya.’ ” *

⁸ Munu wangkangu, “Kulilaya. Nyura Godaku tjukurpa kulira wantinyi, munu nyura tjamupitingku wangkanytja kutju kulira palyani. ⁹ Nyuranku walytjangku ninti pułkangku-palku kulira Godalu wituntjtja tjuṭa kulira wantipai nyurampa tjamupitingku wangkanytjtja kutju palyantjikitjangku. ¹⁰ Panya Godaku tjukurpa Moselu wangkanytja ngaranyi alatji,

* 7:7 Aitjayaku 29:13

‘Nyura mamangka ngunytjungka wanganarangku kulinma.* Munu pīruku paluru wangkangu alatji, ‘Añangu kutjupangku mama ngunytju warkinyangkampa palunya pungkula iluntanama.’* ¹¹⁻¹² Palu nyura tjukurpa nyanganpa kampa kutjupankupai. Tjinguru añangungku palumpa mamangka ngunytjungka wangkaku alatji, ‘Nyangatjana kutjupa kutjupa kanyini nyupalinya ungkula pukulmankunytjikitjangku, palu wiya, pūtuña nyupalinya unganyi panya ngañmanytjuña Godanya kalkuñu palumparintjaku.’ Ka alatji wangkanyangka nyura palyanmankupai, ka añangu paluru pūtu unganyi mama ngunytju wirūra kanyintjikitjangku. ¹³ Palu panya Godalu wangkangu mamangka ngunytjungka wanganarangku kulintjaku, ka nyura tjukurpa palatja wiyanmananyi munu nyurampa tjukurpa kutju wanganarangku kulira palyantjaku wangkanyi. Uwa, nyura añangu tjūta rawangku Godalu wituntjitja tjūta kulira wantintyntjaku wituwitulpai tjukurpa tjamupitingku wangkanytjitja kutju kulintjaku.” Alatji Jesulu tjanala wangangi wati panya Paratji tjūtangka munu Moseku tjukurpa nintilpai tjūtangka kuļu.

Nyaangku Añangu Kuralpai?
(Matthew-ku 15:10-20)

¹⁴ Munu Jesulu pīruku añangu tjūta altingu, kaya ilaringu palula kulin-tjikitja. Ka paluru tjanala wangangi alatji, “Ngayulaya kulila munuya nintiriwa! ¹⁵⁻¹⁶ Panya maingku kukangku ngalkunnyangka nyuranya pūtu kurañi kura palyantjaku. Panya nyura unngu walytjangku kura kulira kutju kuraringkupai munu panya kura wangkapai. Nyara palulanguru nyura pūtu Godanya wal̄kulpai, kura unngu walytjangku kulira, panya nyara palula unngunguru pakara nyuranya kuralpai. Palu nyara maingku kukangku ma-tjarpara nyuranya pūtu kuralpai.”*

¹⁷ Munu palulanguru añangu tjūtangka wangkara wiyingkula Jesunya wal̄ingka tjarpanu. Kaya palumpa nintintja tjūtangku palula tjapiningi tjukurpa panya palunya tjanala utintjaku. ¹⁸ Ka Jesulu wangkangu tjanala, “Nyura kuļu wanyu pūtu kulini nyangatja? Panya kutjupa kutjupa tjūtangku añangu tjuningka tjarpara pūtu palunya kurañi kuraringkunytjaku. ¹⁹ Panya mai ngalkunnyangka kurunta wirkankunytja wiya tjuningka kutju tjarpara ngaripai mañtalpa munu palulanguru kutjupawanu ma-pakara wiyingkupai urilta.” (Tjukurpa nyangatja wangkara paluru palyanmanu mai kuka kutjupa kutjupa uwankara ngalkuntjaku kutjupatjara kuranmankula wantintyntjaku wiya.)

²⁰ Munu palulanguru wangkangu, “Palu añangungku walytjangku kura palyantjikitjangku kulira kutju kura palyalpai. ²¹ Panya añangungku kura tjūta unngu kulintjatjanungku kura tjūta palyalpai, panya paluru kura palyantjikitjangku rawangku kulipai, munu pala palulanguru tjūtangka pirtjipai, munu walytjatjara kutitjunkupai, añangu iluntankupai, munu kuri walytjatjarangka ngaripai. ²² Uwa, paluru kura rawangku kulintjatjanungku manyuringkupai, munu kura kutjupa kutjupa tjūta rawangku palyalpai. Paluru añangu kutjupa ngunti kuralpai, munu kutjupa kutjupa tjūta kuñta wiyangku palyalpai munu nyařaringkupai munu tjaaly-mara añangu kutjupa ngukara wangkapai, kañany-kañanytju wangkapai, munu kawakawa alatji nyinapai. ²³ Uwa, kura nyanga palunya tjananya

* **7:10** Exodus 20:12 * **7:10** Exodus 21:17 * **7:15-16** Wati kutjupangku kunyu verse 16 walkatjunu, munu mala tjungunu Markaku tjukurta alatji *Kaya nyanga palunya kulintjatjanungku purkarangku kulinma.*

añangungku unngu kulipai kura palyantjikitjangku munu nyara palulangurulta kuraringkula Godanya puṭu walkulpai kura nyanganpa unngu kulira palyantjatjanungku.” Alatji Jesulu tjanala wangkangi palumpa nintintja tjutangka kutju.

*Minyma Ngura Kutjupitja Jesuku Mulamularingkunytja
(Matthew-ku 15:21-28)*

²⁴ Munu palula malangka Jesunya anu ngura ini Tayala itingka nyinara pakuwiyaringkunytjikitja munu wirkara walingka tjarpangu añangu tjutangku palunya nyakula palulakutu pitjanytjaku-tawara. Palu tjanaya ngañmanytju nyangu. ²⁵ Ka minyma kutjupangku paluru pitjanyangka kulira mapalku palulakutu pitjangu munu palula tjinangka tultjungarakanatira palula ngatjelu, panya palumpa unṭalpa mamutjara nyinangi. ²⁶ Minyma nyara paluru Jew wiya ngura ini Panitjiyalanguru. Munu minyma paluru Jesula pulkara ngatjiningi palumpa unṭalpanguru mamu paintjaku.

²⁷ Palu Jesulu wangkangu palula, “Wiya ngayulu Jew tjutaku palyantja wiyat, munuña nyaaku ngura kutjupitja Jew wiya tjutaku-warara palyalku? Panya ngunytjungku tjitji tjutaku mai tjanalanguru mantjira papa tjuta ungkunytja wiya tjana-warara ngalkula pałtjaringkunytjaku.” Nyanga alatji paluru wangkangu arkara minyma panya palula paluru ngapartji wangkanyangka kulintjikitjangku.

²⁸ Ka minymangku ngapartji wangkangu, “Uwa mulapa mayatja, palu panya papa tjutangku taipula unngu nyinara tjitji tjutaku mai tjukutjuku tjuta punkara ngarinyangka ngalkupai.”

²⁹ Ka Jesulu wangkangu minyma panya palula, “Nyuntu wiṛu mulapa wangkangu ngayula. Palya malaku ara munu nyawa, panya mamungku nyuntumpa unṭalpa wantikatingu.”

³⁰ Ka palula malangka minyma panya malaku anu ngurakutu munu nyangu palumpa unṭalpa palyaringkula piitangka ngarinyangka mamungku wantikatira ankunyangka.

Jesulu Pina Pati Alantja

³¹ Palulanguru Jesulu ngura Tayanya wantikatingu munu alintjaralku anu ngura Tjaitantakutu munu nyara palulanguru kakarara anu munu ulpariralku piruku anu ngura ngururitja tjutawanu munu wirkanu uru Galileela ulparira-pitinya panya manta nyara palula ngura tawunu 10-pa ngarangi. ³² Ka nyara palula añangu kutjupa tjutangku palulakutu katingu wati kutju pina pati, tjaa kuļu pati. Munuya Jesunya pulkara ngatjiningi palula mara tjunkula palyarunguntjaku.

³³ Ka Jesulu wati palunya maunṭalpa katingu añangu tjutanguru munu mara palula pina unngu tjunu, munu paluru marangka witalytjura wati palunya tjalinya pampuṇu. ³⁴ Munu ilkari ira-nyakula pulkara ngaaly mara wangkangu, “Pina alariwa.” ³⁵ Ka wati panya mapalku alatjitu pina panya alaringu munu kulira wangkapairingu, munu uti alatjitu wangkangi wati panya paluru.

³⁶ Ka Jesulu añangu tjuta wangkara painingi kutjupa tjutangka tjakultjunkunytja wiyangku wantinytjaku. Panya paluru rawangku tjananya painingi, palu tjana rawangku tjakultjunangi añangu kutjupa tjutangka. ³⁷ Kaya añangu tjutangku paluru palyannyangka nyakula pulkara urulyaraningi, “Awari, mulapa nyangatja.” Munuya wangkangi, “Nyangangku kutjupa uwankara wiṛu mulapa palyalpai, panya

paluru pina pati kulintjaku palyalpai munu tjaa pati wangkanytjaku palyalpaſtu.”

8

Jesulu Piruku Anangu Winki Maingka Paltjantja (Matthew-ku 15:32-39)

¹ Ka Jesuna ngura nyara palula para-ngaranyangka anangu tjuṭa mulapa pitjala palula piruku tjunguringu. Palu tjana mai kanyintja wiya ngalkuntjikitjangku. Ka Jesulu nyangatja nyakula palumpa nintintja tjuṭa altingu munu tjanala wangkangu, ² “Ngayulu ngalturinganyi anangu nyanga tjuṭaku panya ngayulaya tjungu nyinangi tjintu mankurpa munuya kuwari nyanga mai kanyintja wiya alatjiṭu. ³ Tjinguruṇa tjananya paltjatjiratja witura iyalku, kaya iwarangka ankula ngururpaṭu mai wiya uparingkula punkalku panya kutjupa tjaraya ngura pararinguru pitjangu.”

⁴ Kaya nintintja tjuṭangku palula wangkangu, “Wiya nyangatja parari, kala yaaltjingka mai pulka mantjilku anangu nyanga tjuṭa paltjantjikitjangku?”

⁵ Ka Jesulu tjanala tjapinu, “Palu mai tampa yaaltjiṭu nyura wanyu kanyini?”

Kaya wangkangu, “7-pa.”

⁶ Ka Jesulu anangu tjuṭa wangkangu mantangka nyinanytjaku. Munu palulanguru tampa panya 7 mantjira Godanya walkura wangkangu, “Wirungkulanyan mai nyangatja ungu.” Munu katantara nintintja tjuṭa ungu anangu tjuṭa para-ungkunytjaku. Kaya mantjira anangu tjuṭa para-ungangi. ⁷ Munuya kuka antipina mankurpa kuļu kanyiningi. Ka Jesulu kukanguru kuļu pukularira Godanya walakuṇu munu nintintja tjuṭa ungu para-ungkunytjaku. ⁸⁻⁹ Kaya anangu uwankarangku ngalkula paltjaringu, panya anangu 4,000 nyinangi nyara palula. Kaya palula małangka nintintja tjuṭangku mai panya malarinkula ngarinytja tjuṭa para-urara piti 7-ta tjunangi, ka piti uwankarangka tjaalyngarangu alatjiṭu. Ka Jesulu anangu panya tjuṭa ngurakutu witura iyanu. ¹⁰ Munu pautangka tatinu nintintja tjuṭangka tjungu, munuya ngura ini Talma-nutjalakutu urungka ma-itipiringu.

Paratji Tjuṭangku Miracle Palyantjaku Jesunya Untu-untuntja (Matthew-ku 12:38-42; 16:1-4)

¹¹ Kaya Paratji tjuṭa pitjangu Jesulakutu munuya pitjala palula tjapira pika-pikaringangi. Munuya wangkangu, “Wanyu ngananaļala mirangka miracle kutjupa kutjupa witulya pulkangku palyala nganana nyakula nyuntunya mulapa kulintjaku alatji, ‘Munta, mulapa nyangatja Godalu iyantjanya.’” ¹² Ka Jesulu nyangatja kulira unngu tjituru-tjitururira ngaalyaraļu munu wangkangu, “Nyaakuňiya anangu nyangantu rawangku untuńi miracle witulyangku palyantjaku nyakula ngayuku mulamularingkunytjikitjangku? Kulila! Mulamulangkuna nyurala wangkanyi, ngayulu nyurampa palyalwiyangku wantinyi alatjiṭu.” ¹³ Munu palulanguru tjananya wantikatira pautangka tatinu palumpa nintintja tjuṭa kuļu munuya urungka ma-itipiringi.

Paratji Tjuṭaku Munu Irataku Yiitja (Matthew-ku 16:5-12)

¹⁴ Ka nintintja tjuṭa watarkuringu mai panya pautangka tjunkunytjikitjangku munuya tampa kutju kanyiningi ngañmanytju tjunkunytja.

¹⁵ Ka pautangka ankula Jesulu tjananya kulintjaku alatji wangkara ngulutjunangi, “Purkarangkuya kulinma munuya kulira wantima Paratji tjutaku yiitja munu wati panya Irataku kulu.”

¹⁶ Kaya nintintja tjutangku nyangatja kulira tjanankulta wangkara kuliningi, “Nyaa nyangangku wangkanyi? Tjinguru nganaña mai wiya nyinanyangka paluru alatji wangkanyi.”

¹⁷ Ka Jesulu nintingku kuliningi tjana nyanga wangkanyta munu tjanala tjapinu, “Nyaaku nyuranku wangkanyi mai wiya pitjanytjatjanungku? Nyura wanyu kuwaripatu ngurpa nyinanyi ngayunya kulintja wiya? Nyura wanyu ngukunypa pati? ¹⁸ Kulilaya, nyura ngayunya palyannyangka nyanganyi, palu putulta nyura nyakula kulini. Munu nyura ngayulu wangkanyangka kulini, palu pina patingkulta nyura putu kulini. Nyura wanyu panyaku watarkuringu? ¹⁹ Panya mai kutjara mankurpana kałantanu aŋangu 5,000-ku. Ka nyura piti yaaltjtungka panyatja mai mantangka malaringkula ngarinytja urara tjaalyngaratjunu?”

Kaya wangkangu, “Piti 12-pangkala urara tjaalyngaratjunu.”

²⁰ Ka Jesulu wangkangu, “Ka ngayulu mai panya 7 aŋangu 4,000-ku kałantankunyangka piti yaaltjtungka nyura panyatja urara tjaalyngaratjunu?”

Kaya wangkangu, “7-ta panyala tjaalyngaratjunu.”

²¹ Ka Jesulu wangkangu tjanala, “Ka nyura nyaanguru kuwaripangkutu puťu kulini ngayulu Godalanguru pitjanytjitzaku?”

Jesulu Wati Kuru Pati Alantja

²² Munuya pautangka panya ankula ngura ini Pitjaitala wirkanu mantangka, kaya ngura nyara palula aŋangu kutjupa tjutangku wati kuru pati Jesulakutu wirkakatingu munuya palula ngatjinu wati palunya kuru kutjara pampura alantjaku. ²³ Ka Jesulu wati panya palunya mara witira ırılkutu katingu tawununguru nganytjarpa. Munu palulanguru witalytjunu wati palunya kuru munu palula mara tjunu munu palula tjapinu, “Nyuntu nyanganyi kutjupa kutjupa?”

²⁴ Ka watingku panya ira-nyakula wangkangu, “Uwa ngayulu nyanganyi aŋangu tjuta paulypa, panya tjana puňu purunypa ngarala waŋinyi.”

²⁵ Ka Jesulu piruku mara tjunu kurungka, ka palulanguru kuru panya alaringu mulapa, ka paluru uti mulapalta nyangangi. ²⁶ Ka Jesulu palunya ngurakutu witura wangkangu, “Tawunukutu malaku ankuwiyangku wantima.”

Peterlu Jesunya Wangkanyta

(Matthew-ku 16:13-20; Luke-aku 9:18-21)

²⁷ Munuya Jesunya nintintja tjuta kulukulu anangi ngura ini Tjiitjariyapilipailakutu. Munu iwarangka ankula Jesulu tjanala tjapiningi alatji, “Wanyuniya tjakultjura. Aŋangu tjutangkuniya ngananya wangkanyi?”

²⁸ Kaya wangkangu, “Tjarangkuntaya wangkapai John Baptista, kantaya tjara kutjupangku wangkapai Ilaitjanya, kaya tjara kutjupangku wangkapai nyuntu Godaku wangkatjara irititja kutjupa.”

²⁹ Ka wangkangu, “Palu nyura ngananya ngayunya wangkanyi?”

Ka Peterlu wangkangu, “Nyuntun Christanya, panya Godalu kalkurā iyantjanya nganañanya wankařunkunytjaku.”

³⁰ Ka Jesulu tjananya wangkangu aŋangu kutjupa tjutangka tjakultjunkuwiyangku wantintjaku.

*Jesulu Ilunytjikitjangku Wangkanyta
(Matthew-ku 16:21-28; Luke-aku 9:22-27)*

³¹ Munu Jesulu palumpa nintintja tjutangka nintiningi munu wangkangu, “Panya ngula wati kura tjutangka ngayunya Watiku Katjanya pulkara pikantankuku. Panya tjukurtjara kuranyitja tjuṭa, Moseku tjukurpa nintilpai tjuta munu wati tjilpi kutjupa tjuta kuļu ngayuku pulkara kuraringkuku munuṇiya ma-ungkuku ngayunya pungkula iluntankunytjaku. Palu ngayulu ilunytjatjanu tjintu kutjara ngaṛala wiyaringkunyangka piruku wankaringkula pakalku.” ³² Alatji paluru utingku tjanala wangkangi, ka Peterlu palunya katingu maunṭalpa munu palula alatji wangkara painingi, “Wanti! Nyaakuntaya unytjungku alatjitu iluntankuku?”

³³ Ka Jesulu pinkurarara* palumpa nintintja tjutangka mirangka Petersnya painu munu wangkangu, “Ngayulanguru ara! Nyuntun mamu, munun Satanta kulira wangkanyi. Nyuntun aŋangungku kulintjitja kutju kulini, Godalu kulintjitja kulintja wiyangku.”

³⁴ Munu palulanguru Jesulu aŋangu tjuṭa altingu nintintja tjutangka tjunguringkunytjaku munu tjanala uwankarangka wangkangu, “Kutjupangku ngayunya waŋantjikitja mukuringkulampa uti paluru walytjangku kulira palyantja wiyangku wantima, munu ngayunya kutju kulira waŋanma. Tjinguruwa nyuranya iluntankuku ngayunya waŋannyangka, palu nyangatja palya, nyura uti ilunytja kulira nguluringkuwiyangku wantima munu ngayunya tungun-tunguntu waŋanma titutjarangku.

³⁵ Aŋangu kutjupangku tjinguru alatji kulilku, ‘Wanyu kaŋatju ngayulu walytjangku atunyamanama mantangka nyanga rawa wanka nyinanytjik-itjangku.’ Palu alatji kulira paluru ngayunya wantinyi, ka Godalu palunya ngula ilunyangka puṭu wankani palula tjunguringkula titutjara nyinanytjaku. Ka aŋangu kutjupangku tjinguru alatji kulilku, ‘Wanyu kaŋa nguluringkuwiyangku Godanya titutjarangku waŋanma, kaŋi palya kutjupangku ngayunya iluntankuku palunya waŋara Tjukurpa Palya aŋangu tjutangka wangkanyangka.’ Ka alatji kulinnyangka Godalu ngula ilunyangka palunya wankara pakaltjingalku palula tjungu titutjara wanka nyinanytjaku.

³⁶ Palu aŋangungku mantatja tjuṭaku mukuringkula winki mulapa mantjira kanyirampa ngula paluru ilura nyaaringkuku? Wiya, paluru ilura kawankatiku, panya paluru mantatja wiru tjutaku mukuringkula Godanya wantingi, ka mantatja tjutangku palunya puṭu wankarunanyi Godala tjunguringkula titutjara nyinanytjaku. ³⁷ Panya Godalu aŋangu kutjupa mantatja tjuṭa ungkunyangka puṭu wankarunanyi wanka titutjara nyinanytjaku. Tjinguru pułka mulapa ungkunyangka Godalu puṭu palunya wankarunanyi. ³⁸ Panya kuwariya aŋangu tjuṭa kura pulka nyinanyi munuya ngayunya wantinyi alatjitu. Ka tjinguru aŋangu kutjupa ngayuku tjukurpa kulira ngayuku mulamularingkunytjik-itja kuntaringanyi aŋangu tjutangka mirangka munu ngayunya wantinyi, ka palu purunypaṭu ngula ngayulu Watiku Katjangku pitjala palunya ngapartji wantiku ngayuku kuntaringkunyangka. Panya nyara palula ařa ngayulu Mamalanguru pitjaku pitalytji witulya pułka, angelpa wiru tjutangka tjungu mununa ngayulu ngapartji ngayuku kuntaringkupai tjuṭa wantiku.”

9

¹ Munu tjanala wangkangu, “Tjukarurungkuna nyurala wangkanyi,

* 8:33 pinkurarara panya małakukutura

panya nyura nyanga tjuṭa kuwari ngaranyi, munu nyura kutjupa tjarangku ngula ilunytja kuwaripangka wankangku nyakuku Godalu mayatja pulkangku aŋangu tjuṭa mulapa palumpa walytjaringkunytjaku palyannyangka.” Alatji Jesulu wangkara nintiningi aŋangu tjuṭangka kulira mulamularingkunytjaku.

*Jesunya Pulı Katu Kutjuparinyta
(Matthew-ku 17:1-13; Luke-aku 9:28-36)*

² Munu palulanguru tjintu mankur-mankurpa ngarala wiyaringkunyangka Jesulu maŋtalpa katingu Peternya, Jamesanya munu Johnnga kuļu pulı katu mulapa. Ka nyara palulalta tjanala mirangka Jesunya kutjuparingu. ³ Ka mantara palumpa piřanpa mulararingu munu pulkara irnya-irnyaningi, panya aŋangungku piřanpa nyanga palu puruny whole alatji palyalpai. ⁴ Kaya nyangu Ilaitjanya pulanya Mosenya utiringkula Jesula tjungu ngarala wangkanyangka.

⁵ Ka Peterlu wangkangu Jesula, “Nintilpai, nyanga kuwarila wirura nyanggangka nyinanyi. Wanyula wiltja maŋkurpa palyala, kutju nyuntumpa, kutju Moseku, munu kutju Ilaitjaku!” ⁶ (Alatji Peterlu kurunpa wapakatira mapalkungku wangkangu, panya nyara palunya tjananya nyakula paluru pulkara nguluringangi, Jamesanya pula Johnnga kuļu.)

⁷ Ka ngangkalingku ukalingkula tjutunu tjananya, kaya wangka kulinu ngangkali unngunguru alatji wangkanyangka Godalu, “Nyngatja ngayuku katja. Nyanga palumpa pulkara mukuringanyi, kaya palula wan-gaňarangku kulinma!”

⁸ Kaya nyngatja kulintjatjanungku para-nyangu wati maŋkurpa nyakunytjikitjangku munuya nyangu Jesunya kutjuringkula ngaranyangka.

⁹ Munu tjana pulinguru ukalingangi mantakutu, ka Jesulu tjanala wangkara painingi, “Kuwari panya nyura nyakunytjaya aŋangu kutjupa tjuṭangka tjakultjunkuwyangku wantima. Palu palyaya ngula tjakultjuna nama ngayulu Watiku Katjanya ilunytjatjanu pakannyangka małangka kutju.” ¹⁰ Kaya paluru panya wangkanyta wanganarangku kulinu munuya tjakultjunkunytja wiyangku wantingi, palu tjana-kutjuringkulaya wangkara kulinigi, “Nyaa panyatja wangkangi ilunytjatjanu pakantja?”

¹¹ Munuya Jesula tjapinu, “Panya Moseku tjukurpa nintilpai tjuṭangku wangkapai alatji, ‘Ilaitjanya-warara kunyu pitjaku Wankařunkupaila kuranyu?’ Nyaanguruya wangkapai alatji?”

¹² Ka Jesulu tjanala wangkangu, “Uwa, Ilaitjanya mulapa pitjanyi ngaňmanyatju wangkara uwankara tjukaruru palyantjikitja. Panya nyiringka iriti walkatjunkunytja alatji ngaranyi, ‘Watiku Katjanya pulkara pikatjaralku munuya palunya wantiku mukuringkunytja wiyangku.’ Palu nyaanguruya alatji walkatjunu? ¹³ Wiya, mulamulangkuŋa wangkanyi Ilaitjanya panya ngaňmanypa pitjangu, ka panyaya tjana mukuringkula tjailangka tjarpatjunu munuya iluntanu, panya tjukurpa pala palunya wangkatjarangku iriti nyiringka walkatjunu.”*

*Jesulu Tjitji Nyiṭayira Mamutjara Palyantja
(Matthew-ku 17:14-20; Luke-aku 9:37-43a)*

¹⁴ Munuya palulanguru ukalingkula mantangka wirkanu munuya anu nintintja kutjupa tjuṭakutu. Munuya ma-ilaringkula nyangu aŋangu tjuṭa

* ^{9:13} Jesulu ara Ilaitjanyatjara wangkara John Baptista wangkangi. Panya iriti Israelku mayatjangku Ilaitjanya palu purunypatu kuraningi. Nyawa 1 Kings 19:1-10.

mulapa palula tjanala para-ngarala arintankunyangka. Kaya wati panya Moseku tjukurpa nintilpai tjutangku tjananya pika-pikangku wangkangi Jesuku nintintja tjuṭa. ¹⁵ Palu aŋangu tjutangkuya Jesunya pitjanyangka nyakula pulkara pukularingu munuya ngapari-ngapari wirtjapakara palunya pukułarira walkuningi.

¹⁶ Ka Jesulu tjanala tjapinu, “Nyaanguru nyuranku pika-pikangku wangkanyi?”

¹⁷ Ka wati kutjupangku aŋangu tjutangka ngururnguru Jesula wangkangu, “Nintilpai, ngayulu ngayuku katja ngalya-katingu nyuntulakutu panya paluru mamutjara, puṭu wangkapai. ¹⁸ Panya mamungku palunya mantangka aŋta-wanipai, ka tjaangka wiṭa pułka pakalpai, munu katiti tirkilytjingalpai ka puntu winki tiwilaripai. Kana nyuntumpa nintintja tjuṭa tjapinu mamu paintjaku, palu puṭuya painingi.”

¹⁹ Ka Jesulu kulira tjituru-tjitururingu munu tjanala wangkangu, “Nyura mulapa uwankara puṭu alatjiṭu mulamularinganyi. Kana yaaltjiṭu arangku nyuranya nyinara nintliku nyura kulira mulamularingkunytjaku? Tjitji palunya ngalya-kati ngayulakutu!”

²⁰ Kaya ngalya-katingu Jesulakutu. Ka mamungku panya tjitjingka unngunguru nyangu Jesunya munu mapalku tjitji panya palunya uri-uritjingara mantangka aŋta-waningu ka kutin-kutinkatira wiṭaly-wiṭalyaringu.

²¹ Ka Jesulu tjapinu mamangka, “Yaalarā paluru alatjiringu?”

Ka wangkangu, “Tjitji tjukutjukulpi nyangatja alatjiringi. ²² Rawangku alatjiṭu mamungku palunya alatjinkupai iluntankunytjikitjangku, munu kutjupa-ara palunya warungka aŋta-wanipai munu urungka kulu. Wanyutju ngalturingkula alpamilala, nyuntu ninti ngaralampa.”

²³ Ka Jesulu wangkangu, “Nyaakun alatji wangkanyi, ‘Ninti ngaralampa palyala?’ Utu nyuntu Godaku mulamularingama, panya paluru mulamularingkunyangka palyalpai alatjiṭu.”

²⁴ Ka mamangku panya mapalku wangkangu, “Ngayulu mulamularinganyi, palu tjuku nguwanpa, kanı wanyu alpamilala pulkara mulamularingkunytjaku.”

²⁵ Ka Jesulu nyangu aŋangu tjuṭa ngalya-kaputurinyangka munu mamu panya wangkara painu, “Mamun pina patilpai, munun tjaā kuļu patilpai. Ngayulu nyuntunya paini, tjitjinguru pala ngalya-pakala munu piruku tjarpanytja wiyangku wantima.”

²⁶ Ka mamungku tjitji panya mirara pulkara uritjingara aŋta-wanira pakara anu, ka tiwilarira ngaringi ilunytja purunypa. Kaya aŋangu tjutangku nyakula wangkangi, “Wiya, tjitji palatja alatjiṭu ilungu.” ²⁷ Palu Jesulu tjitji panya palunya mara witira katuļu, ka wankaringkula pakara paltjura ngarangi.

²⁸ Ka palula maļangka Jesunya tjana palumpa nintintja tjuṭa kuļu wali unngu tjarpara nyinakatingu. Kaya palula tjapiningi alatji wangkara, “Nyaanguru panyatja nganana mamu putu painingi?”

²⁹ Ka Jesulu wangkangu, “Wiya, mamu nyara palu purunypa panya nyura Godala tjapiṛa kutju pailku.”

Jesulu Piruku Ilunytjikitjangku Wangkanytja (Matthew-ku 17:22-23; Luke-aku 9:43b-45)

³⁰⁻³¹ Ka Jesulu tjana ngura palunya wantikatira anangi ngura tjutawantu uru panya Galileela itingka. Palu paluru mukuringkunytja wiya anangu tjutangku palunya nguriṛa nyakunytjaku, panya paluru nintintja tjuṭa

kutju wangkara nintintjikitja mukuringangi. Munu paluru iwarangka ankula tjanala wangkangi nyanga alatji, “Panya wati kutjupangku ngayunya Watiku Katjanya nintilku wati mirpañtju tjutangka, kan̄iya witira katira iluntankuku. Ka ngayulu ilunytjatjanu tjintu man̄kuritja wankaringkula pakalku.”

³² Palu putuya kulinigi paluru wangkanyangka, “Nyaa nyangangku wangkanyi?” Palu palula utingku tjpintjakuya nguluringangi munuya wantingi tjapilwiyangku.

Ngananya Kuranyitja Pulka Nyinaku?

(Matthew-ku 18:1-5; Luke-aku 9:46-48)

³³ Munuya ankula ankula ngura Kapaniyamala wirkanu munuya ngurangka tjarpangu. Ka Jesulu palumpa nintintja tjutangka tjpainu, “Nyaa nyura panyatja ngaparku wangkangi iwarangka panya pitjala?” ³⁴ Palu tjana kuntaringkula ngapartji wangkanytja wiyangku wantingi palula, panya tjana iwarangka ankula wangkarinangi alatji, “Mayatjalu wanyu ngananya kuranyitja pulka nyinanytjaku kulini nyanga nganañalanguru?”

³⁵ Ka Jesulu nyinakatira nintintja panya tjutangka wangkangu alatji, “Kulilaya. Ngananya wanyu kuranyitja pulka nyinanytjikitja mukuringanyi? Uti paluru tjukutjukuringama munu wati warkaripai purunyapa nyinara anangu uwankaraku wiru tjuta palyanma.” ³⁶ Munu paluru tjitji tjukutjuku ila ngaranyangka minara tjanala ngururpa ngaratjunu munu palulanguru tjitji palunya ngalikitikitira tjanala wangkangu alatji, ³⁷ “Tjinguru anangu kutjupangku ngayuku nintingku tjitji tjukutjuku nyanga purunyapa mantjira pukultu walytjanmankulampa, nyara paluru ngayunya walytjanmananyi munu ngayunya iyantjanya kuļu walytjanmananyi.”

³⁸ Ka Johntu wangkangu palula, “Nintilpai, nganaña nyangu wati kutjupangku anangu tjutanguru mamu tjuṭa painnyangka nyuntu witunnyangka-palku, panya paluru painingi nyuntunya ini wangkara. Kala palunya painu, panya paluru nganañala tjungutja wiya.”

³⁹ Ka Jesulu tjanala wangkangu, “Pailwiyangkuya wantima, panya kutjupangku ngayunya ini wangkara witulyatjarangku kutjupa kutjupa tjuṭa palyaṛa ngayunya puṭu kuraṇi. ⁴⁰ Panya anangu kutjupa nganampa kuraringkunytja wiya nyinarampa nyara paluru nganampa walytjaṭu nyinanyi. ⁴¹ Kaṇa tjukarurungku nyurala wangkanyi, panya kutjupangku nyuranya ngayuku walytja nyinanyangka nyakula ngalunyjtungku al-pamilannyangka, Godalu palunya ngapartji wiru mulapalta ungkuku. Tjinguru anangu paluru mina wari kutju nyuranya tjkintjaku ungkuku, ka Godalu nyakula wantinytja wiyangku palunya ngapartji ungkuku alatjitu palumpa pukularira.”

Kuraringkunytjaku Wituwituntja

(Matthew-ku 18:6-9; Luke-aku 17:1-2)

⁴² Munu Jesulu piruku wangkangi nyanga alatji, “Tjinguru watingku anangu kutjupangka liringka puli pulka tjungura karpira uru ngatingka wan̄iku, ka palatja wiru wiya kura. Palu tjinguru tjitji ngayuku mulamularingkupai nyinanyi, ka anangu kutjupangku palunya wituwitulku kura palyantjaku, ka palatja wiru wiya kura pulka mulapa. Panya pika pulka mulapa utiringkuku anangu nyanga palumpa paluru tjitji tjukutjuku nyanga purunyapa kuraringkunytjaku palyannyangka.

⁴³⁻⁴⁴ “Uwa, uti nyura kura tjuṭa wantinytjikitjangku pulkara kulinma munu wantima alatjitu kuraku piruku mukuringkunytja wiyangku. Ka

nyuntu tjinguru mara kutjungku kura kutjupa kutjupa palyalku. Palu uti nyuntu mara pala palunya kaṭara wañima kura rawangku palyantjaku-tawara, munun palyalta mara kutjutjara Godala tjunguringkula wanka tiṭutjara nyinaku, panya nyuntu mara winkingku kura rawangku palyanyangka Godalu nyuntunya ngura kurangka wañiku waru pułkangka tiṭutjara kampanytjaku.*

45-46 “Munun palu purunypaṭu tjinguru tjina kutjungku kura kutjupa kutjupa palyalku. Palu wiya, uti nyuntu tjina pala palunya kaṭara wañima kura rawangku palyantjaku-tawara, munun palyalta tjina kutjutjara Godala tjunguringkula wanka tiṭutjara nyinaku, panya nyuntu tjina winkingku kura rawangku palyannyangka Godalu nyuntunya palu purunypaṭu ngura kurangka wañiku.”*

47 “Munu palu purunypaṭu tjinguru nyuntu kurungku kutjupa kutjupa nyakula kura palyalku. Palu uti nyuntu kuru warpura wañima kura rawangku palyantjaku-tawara, munun palyalta kurutjara Godala tjunguringkula wanka tiṭutjara nyinaku, panya nyuntu kuru winkingku kura rawangku palyannyangka Godalu nyuntunya ngura kurangka wañiku. **48** Panya ngura nyara palula katilyka tjuṭangku tiṭutjarangku ngalkupai ilunytja wiyangku wankangku alatjitu, ka waru nyara paluru panya tiṭutjara kampapai wiyaringkunytja wiya.

49 “Kulilaya, panya urtjanpa warungka witalpai tjularingkunyangka kulaṭa tjukaruruntjikitjangku. Palu purunypa Godalu palumpa walytja tjuṭa warungka purunytja pikangka tjunkupai tjananya nintira tjukaruruntjikitjangku.

50 “Ka tjaltu wiru, palu mayu wiyaringkula nyamparingkupai ka tjaltu palunya piruku mayutjararingkunytjaku puṭu palyalpai. Ka palu purunypa nyura Godaku walytja tjuṭa uti Godala tjungu tiṭutjara nyinama wantinytja wiya, munuyanku wirura kalypa palyanyku nyinama, panya nyura wantira Godalanguru paṭuringkulampa wiru tjuṭa puṭu palyalku añangu watarkitja tjuṭaku.”

Alatji Jesulu palumpa nintintja tjuṭangka wangangi ngura panya Kapaniyamala.

10

Kuri Wantikatinytja Wiyangku Wantinytjaku (Matthew-ku 19:1-12; Luke-aku 16:18)

1 Munu Jesulu ngura palunya wantikatira ulpariralku anu manta Judealakutu munu nyara palulanguru kakarara ankula karu urutjara ini Jordanta itipiringu. Kaya añangu winki mulapa piruku palulakutu pitjangi, ka tjanala piruku tjukurpa wangkara nintiningi, panya paluru tjakangku nintilpai. **2** Kaya wati Paratji tjuṭa palulakutu pitjangu munuya palunya ngunti arkara tjapiningi alatji wangkara, “Wanyulanya tjakultjura! Palya watingku minyma kuri wantinytjaku ara kutjupa kutjupanguru? Mulapa wanyu Moselu palu purunypa wangkangu?”

3 Ka Jesulu wangkangu, “Palu Moselu nyuranya nyaa wangkangu?”

* **9:43-44** Wati kutjupangku kunyu verse 44 walkatjunu, munu mala tjungunu Markaku tjukurta alatji *Ka ngura nyara palula katilyka tjuṭangku tjananya rawangku ngalkuku wiyaringkunytja wiyangku, ka waru panya pulka tiṭutjara kampapai wiyaringkunytja wiya alatjitu.* * **9:45-46**

Wati kutjupangku kunyu verse 46 walkatjunu, munu mala tjungunu Markaku tjukurta alatji *Ka ngura nyara palula katilyka tjuṭangku tjananya rawangku ngalkuku wiyaringkunytja wiyangku, ka waru panya pulka tiṭutjara kampapai wiyaringkunytja wiya alatjitu.*

⁴ Kaya wangkangu, “Wiya, Moselu wangkangu alatji, watingku kuri wantintytjikitja mukuringkula uti nyiringka walkatjura ungama minyma panya paluru nyiri mantjira ankunytiaku.”

⁵ Ka Jesulu wangkangu, “Wiya kulila! Moselu nyangatja nyurampa walkatjunu panya nyura tungunpungkula wituwitu nyinanyangka.

⁶ Palu kuwaripatjara mulapa panya Godalu anangu palunu wati munu minyma. ⁷⁻⁹ Ka nyanga palulanguru panya watingku mama ngunyti wantikatira kungka kuri altira pula kutjuringkupai. Uwa, panya kutjara ngaranytjatjanu kutjuringkupai, ka pala palulanguru uti wati palumpa kuringuru tjararingkunyta wiya palula tjungu titutjara nyinama, panya Godalu wati palunya kungka kuringka tjungunu.” Alatji Jesulu Paratji tjutangka wangkangi.

¹⁰ Munuya palula malangka Jesunya tjana malaku anu ngurakutu. Kaya nintintja tjutangku Jesula tjapiningi tjukurpa panya palunya tjanala utintjaku. ¹¹ Ka paluru wangkangi, “Watingku kuri wantintytjatjanungku minyma kutjupa altira palumpa panya kuri ngañmanyitja kurani munu Godalu wangkanytjjangka tungunpunganyi. ¹² Ka minymangku palu purunypaṭu wati kuri wantikatintytjatjanungku, wati kutjupa altira palumpa panya kuri ngañmanyitja kurani, munu palu purunypaṭu Godalu wangkanytjjangka tungunpunganyi.”

Jesulu Tjitji Tjuta Pukulmankunyta (Matthew-ku 19:13-15; Luke-aku 18:15-17)

¹³ Kaya anangu tjutangku tjitji tjuta Jesulakutu ngalya-katingi mara tjunkula wangkara pukulmanytjaku, palu nintintja tjutangku tjananya painingi. ¹⁴ Ka Jesulu nyangu tjananya painnyangka munu mirpañarira wangkangu nintintja panya tjutangka, “Tjitji tjukutjuku tjuta ngayulakutu pitjanyangka nyakulaya paintja wiyangku wantima! Panya anangu tjuta tjitji nyanga tjukutjuku tjuta purunypa nyinanyangkampa, Godalu tjananya mayatja pulkangku walytjanmara kanyilku. ¹⁵ Kanā tjukarurungku nyurala wangkanyi, panya nyura tjitji nyanga purunyti Godanya wanganarangku kulinnyangka kutju, Godalu nyuranya mayatjangku walytjanmara titutjarangku kanyilku. Palu nyura wantinyangka paluru nyuranya wantiku.”

¹⁶ Munu wangkara wiyingkula tjitji panya tjuta ampuṇu munu tjanala mara tjunkula tjananya uwankara wangkara pukulmanu kutju kutju.

Wati Mani Pulkatjara (Matthew-ku 19:16-30; Luke-aku 18:18-30)

¹⁷ Ka palulanguru Jesunya ngura kutjupakutu ma-pakannyangka wati kutjupa palulakutu anga-wirtjapakaṇu, munu palula kuranyu tultjun-garakatira palula tjapinu, “Nintilpai, nyuntun wiru mulapa! Wanyuni tjakultjura, nyaalkuṇa Godala tjunguringkula wanka titutjara nyinanytjik-itjangku?”

¹⁸ Ka Jesulu palula wangkangu, “Nyaakuṇin wirunmananyi? Kutjupa wiru mulapa nyinanytja wiya, Godanya kutju wiru mulapa. ¹⁹ Palu nyuntu panya ninti Godalu wituntjtja tjutaku. Panya paluru alatji wangkangu, miri pungkuwiyangku wantima, kuri walytjatjarangka ngarintyta wiyangku wantima, walytjatjara kutitjunkuwiyangku wantima, anangu kutjupa ngunti ngukara wangkawiyangku wantima, ngunti kuralwiyangku wantima, munu ngunytiungka mamangka wanganarangku kulinma.”

²⁰ Ka wati panyangku wangkangu, “Nintilpai, ngayulu tjitjingkulpi tjukurpa nyanga palunya tjananya uwankara wanganarangku kuliningi.”

²¹ Ka Jesuna nyakula mukuringu wati panya palumpa munu tjukarurungku palunya wangkangu, “Palu nyuntu kutjuku watarkuringu, nyuntu panya kanyintja uwankaraku. Uti nyuntu palunya tjananya manikitjangku tjalamilanma, munu mani mantjira ngaltutjara tjuta mangama, mununi palulanguru pitjala ngayunyalta wan'anma. Munun nyuntu nyara palulanguru ngula ilkaringga wi'ru mulapalta mantjilku.”

²² Ka wati panyangku nyangatja kulira yunpa tjituru-tjitururira anu, panya paluru-maŋtu mani ulytja kutjupa pulkatjara alatji'u nyinangi, munu palunya tjananya walytjangku kanyintjikitja mukuringangi.

²³ Ka Jesulu pinkurarara nintintja tjutangka wangkangu, “Nyangatja wituwitu mulapa ngaranyi anangu mani munu ulytja pulkatjara tjuṭaku, panya tiana mani ulytja kuļu pulkara kulira puťu Godaku walytjaringanyi paluru tjananya mayatjangku kanyintjaku.”

²⁴ Kaya nintintja tjuṭangku tjukurpa nyanga palunya kuli'ra wangkangu, “Ai! Nyangatja mulapa wituwitu.”

Ka Jesulu piruku tjanala wangkangu, “Walytja tjuṭa, mulapa wituwitu ngaranyi anangu tjuṭa Godaku walytjaringkunytjaku. ²⁵ Kulilaya! Panya nyilangka aļa utju mulapa ngaranyi. Ka aļa pala palulawanu wanyu kamula tjarpapai? Wiya alatji'u. Ka palu purunypa anangu mani ulytja pulkatjara tjuta puťu Godaku walytjaringanyi, paluru tjananya mayatjangku kanyintjaku.”

²⁶ Kaya nyangatja kuli'ra nintintja tjutangku piruku pulkara mulapa kulinigi munuyanku ngaparku tjapiningi, “Palu Godalu anangu mani pulkatjara tjuṭa wantirampa tjinguru anangu kutjupa uwankara kuļu ngura kurakutu iyalku wankarunkunytja wiyangku.”

²⁷ Ka Jesulu tjananya tjukarurungku nyakula wangkangu, “Panya anangu puťu walytja wankaringanyi, palu Godalu kutjungku wankalpai.”

²⁸ Ka Peterlu wangkangu, “Kulila, panya nganaña kutjupa kutjupa uwankara wantikatingu nyuntunya waŋantjikitjangku.”

²⁹ Ka Jesulu wangkangu tjanala, “Uwa, kaņa nyurala tjukarurungku wangkanyi, panya ngayunya waŋantjikitjangku nyura tjinguru nyurampa ngura, munu kuṭa, kangkuru tjuṭa, ngunytju, mama, tjiti tjuṭa, kaana kutjupa kutjupa tjuṭa kuļu wantikatingu Tjukurpa Palya ngayunyatjara anangu tjutangka tjakultjunkunytjikitjangku. ³⁰ Nyara palulanguru Godalu watarkuriwyangku nyuranya pulka mulapalta ungkuku, panya wali tjuṭa mulapa munu mama tjuṭa, ngunytju tjuṭa, tjiti winki munu kaana tjuṭa kuļu, palu ngañmanyitja purunypa wiya, waintara mulapa. Ka nyura ngayunya waŋannyangka nyakula anangu tjuṭangku nyuranya analku munu pungkuku. Palu ngula nyura ilunytjatjanu wankaringkula pakara wanka tiṭutjara nyinaku Godala tjungu pukulpa mulapa. ³¹ Ka panya kuwari anangu kutjupa tjuṭa pulka nyinanyi, palu ngula paluru tiana ngaltutjararingkuku, ka panya kutjupa tjuta kuwari ngaltutjara nyinanyi, palu ngula paluru tiana pulkaringkuku.” Alatji Jesulu wangkangi palumpa nintintja tjutangka.

Jesulu Piruku Ilunytjikitjangku Wangkanytja (Matthew-ku 20:17-19; Luke-aku 18:31-34)

³² Munuya Jesuna tiana nintintja tjuṭa kułukulu iwarangka anangi Jerusalemalakutu. Ka Jesuna tjanala kuranyu anangi, kaya anangu panya kutjupa tjutangku malawanungku palunya waŋaningi munuya pulkara

nguluringangi palula tjungu ankula. Ka nintintja panya 12-ngku putu kuliningi, “Nyaakitjala nyangatja ananyi Jerusalemalakutu?”

Ka Jesulu palunya tjananya mantalpa katingu munu tjanala tjakultju-nangi panya palumpa Jerusalemala utiringkunytjaku.³³ Munu tjanala wangkangu alatji, “Kulilaya, nganana nyanga kuwari ananyi Jerusalemalakutu, ka nyara palula wati kutjungku malpangku Watiku Katjanya nintilku tjukurtjara kuranyitja tjutangka munu Moseku tjukurpa nin-tilpai tjutangka kulu, kan*ya* wit*ira* katira kuotpangka ngaratjunkuku, munu*ni*ya kuranmara kukanymankuku. Palulanguru*ni*ya ngayunya wati Jew wiya tjuta ma-ungkuku tjana ngayunya iluntankunytjaku.³⁴ Kaya wati nyara paluru tjana ngayunya anara wangkaku, munu*ni*ya anara kurara pungkula witalytjunkuku munu*ni*ya wiipangka pulkara alkalku, munuya palulanguru ngayunya katiralta iluntankuku. Palu tjintu kutjara wiyingkula ngayulu ilunytjatjanu wankaringkula pakalku.” Alatji Jesulu tjanala tjakultjunangi paluru tjana ngamanytju kulintjaku.

Jamesalu Pula Johntu Jesula Tjapintja

(Matthew-ku 20:20-28)

³⁵ Ka Jamesanya pula Johnnga wati panya Tjipitiku katja kutjara Jesu-lakutu pitjangu munu wangkangu, “Nintilpai, ngali nyuntula ngatjintjikitja mukuringanyi nyuntu kutjupa kutjupa ngalimpa palyantjaku. Palya?”

³⁶ Ka Jesulu wangkangu, “Uwa, nyana palyalku nyupalimpa?”

³⁷ Ka pula wangkangu, “Ngula nyuntu mayatja pulkaringkula tjiya wirungka nyinarampa ngalinya kulu nyuntula itingka nyinatjunama, kutju wakungka kutju tjampungka mayatjarira nyinanytjaku.”

³⁸ Ka Jesulu wangkangu, “Wiya nyupali ngurpangku tjapini nintingku-palku. Kuwari ngayulu pika pulka mantjini. Ka nyupali wanyu ngayula tjunguringkula pika pulkatu mantjilku?”

³⁹ Ka pula wangkangu, “Uwa, ngali nyuntu purunypa pika pulka mantjilku.”

Ka Jesulu wangkangu, “Uwa, mulapa nyupali pika pulkka mantjilku munu iluku ngayunya purunypa.⁴⁰ Palu panya ngayula wakungka munu tjampungka mayatjarira nyinanytjaku ngayulu putu ngurkantananyi, panya Godalu kutjungku ngamanytju ngurkantanu ngayula itingka nyinanytjaku.”

⁴¹ Kaya nintintja panya kutjupa tjutangku paluru pula Jesula ngatjin-nyangka kulira palumpa pulampa mirpanaringku. ⁴² Ka Jesulu tjananya uwankaratu altira wangkangu, “Nyura ninti panya mayatja mantatja tjutaya anangu alatjitu mayatjarira nyinanyi, munuya anangu tjuta wituwitura warkamilara pakulpai kutjupa kutjupa tjuta tjanampa palyantjaku.⁴³ Ka nyura tjananya arkalwiyangku wantima. Munu nyura tjinguru mayatja pulkka nyinanytjikitja mukuringkulampa, uti anangu warkaripai purunypa nyinama, munu anangu kutjupa tjuta alpamilara palumpa tjanampa palyanma.⁴⁴ Uwa, nyura kuranyitja nyinanytjikitja mukuringkulampa uti anangu kutjupa tjutaku warkarima paluru tjana pukularinytjaku.⁴⁵ Tjinguru nyura kulini ngayunya Watiku Katjanya-manti pitjangu mayatjarira anangu tjuta warkaku wituwituntjikitja. Palu wiya, ngayulu pitjangu anangu tjutaku warka pulkka palyara tjanampa ngalkilpa ilunytjikitja, tjana wankaringkunytjaku.” Alatji paluru wangkangi palumpa nintintja tjutangka.

Wati Ini Patimayatjanya Kuru Alaringkunytja

(Matthew-ku 20:29-34; Luke-aku 18:35-43)

⁴⁶ Munuya palulanguru paluru tjana ankula wirkana ngura ini Jerichola munuya waaratu anangi. Kaya ngura nyara palula nyinapai tjuta ku lu tjanala tjunguringu munuya wanangingi winki mulatu. Ka iwara nyara palula itingka wati kuru patingku nyinara anangu tjutangka maniku ngatjiningi. Wati nyara paluru ini Patimayatjanya wati ini Timayatjaku katja. ⁴⁷ Ka kutjupangku palula tjakultjunu panya Jesunya Nazarethanya ngurara wati-pitjanyangka, ka paluru kulira mirara wangkangu, “Jesu, Davidakun tjamu, ngalturiwatju.”

⁴⁸ Kaya anangu tjutangku wati palunya painu pilunarintjaku. Palu wati palurunku pulkara mulapalta mirangu, “Davidakun tjamu, ngalturiwatju.”

⁴⁹ Ka Jesulu miranyangka kulira ngarakatingu munu wangkangu, “Ma-altiya!” Kaya anangu tjutangku palunya altira wangkangu, “Ala, pukularira pakala. Altinyinta.” ⁵⁰ Ka upukuta panya araltjara wanira mapalku pakara Jesulakutu pitjangu.

⁵¹ Ka Jesulu tjinpinu palula, “Nyuntun ngayulu nyaantjaku mukuringanyi?”

Ka wati panya kuru patingku wangkangu, “Nintipai, ngayulu nyakunytjikitja mukuringanyi.”

⁵² Ka Jesulu wangkangu, “Palya ara. Panya nyuntu ngayuku mulamularingkunytjatjanu kuru palyaringu.” Ka wati panya paluru mapalku kuru alaringkula nyangangi munu palulangurulta Jesunya wanangingi iwarangka ankunyangka.

11

Jesunya Tangkiyingka Tatira Pitjanytja Jerusalemalakutu (Matthew-ku 21:1-11; Luke-aku 19:29-38; Johnku 12:12-19)

¹⁻² Munuya Jesunya tjana nintintja tjuta ku lu Jerusalemalakutu ma ilaringkula puli ini Alipatjarala katukutu tatira ma-wirkana ngura tjukutjuku kutjarangka itingka ini Piitjanila pulala Piitja-paitjala. Ka Jesulu nintintja kutjara kuranyu witura iyanu pulala alatji wangkara, “Ara pula kuranyu ngura pala ilatjakutu munu wirkara nyupali nyakuku tangkiyi kulunypa karpintja ngaranyangka nganmanypa tatintja wiyatja. Nyara palunya pula araltjara ngalya-kati. ³ Ka tjinguru anangu kutjupangku nyupalinya nyakula tjapilku alatji, ‘Nyaaku nyupali aran?’ Ka pula alatji wangka, ‘Wiya, Mayatjanya nyanga palumpa mukuringanyi. Munu paluru malakungku mapalkungku iyalku rawaringkula kanyintja wiyangku.’ Alatji pula wangka.”

⁴ Ka pula ankula nyangu tangkiyi panya palunya wali tjaangka urilta karpira wantintjya ngaranyangka munu pula araningi. ⁵ Kaya ila ngaranytjatjanungku nyakula pulanya wangkangu, “Nyaaku nyupali araltjananyi tangkiyi pala ku lunypa?” ⁶⁻⁷ Ka pula tjanala wangkangu panya Jesulu wangkanytjitja. Kaya mulapatu kulira wantir’iyanu, ka pula tangkiyi panya palunya katingu Jesulakutu. Kaya nintintja tjutangku tangkiyi tjanangka mantara tjunu ka Jesunya tatinu. ⁸ Ka paluru tatira pitjanyangka anangu tjutangku palumpa pulkara pukularira tjanampa upukuta tjuta araltjara iwarangka lipira tjunkula wanangingi palula kuranyu. Kaya tjarangku pu nu parka ka tantara palu purunypatu tjunkula wanangingi. ⁹ Kaya anangu winkingku kuranyunguru munu malanguru pukularira mirara wangkangi,

“Godanyala walkura mirawanima!

Mayatja God, nyanga palunya pulkara pukulmanama, panya nyuntu palunya iyañu nganañanya mayatjarira kanyintjaku. *

10 Kala pukularima panya nyanga paluru nganañanya mayatjangku kanyilku tjamu Davidaku arangka wiru mulatu.

Ala, Godanyala wal̄kura mirawañima katutja pulkanya!"

Alatjiya añañgu tjutangku pukularira palunya mirawañingi.

11 Ka Jesunyu Jerusalemala wirkara ankula timpulangka tjarpangu munu uwankara para-nyangangi. Palu wañalpi mungartjirinyangka paluru Jerusalemalanguru pakara malaku anu nintintja tjutatjara ngura Piitjanilakutu.

Jesulu Punu Ili Wangkanytja

(Matthew-ku 21:18-19)

12 Munuya ngarira tjinturingkula malaku pitjangi ngura panya Piitjanilanguru, ka Jesunyu pinpatja wiya paltjatjiratja anangi. **13** Munu pararinguru nyangu puñu ili ngaranyangka pulkuñpa mulapa. Munu paluru anu mai nyakula mantjintjikitja munu ma-ilaringkula nyangu nyalpi kutju ngaranyangka, palu puñu paluru kuwaripa ngarangi mai ngula pakantjikitja. **14** Ka Jesulu wangkangu puñu panya ilingka, "Añañgu kutjupangku nyuntulanguru piruku mai mantjira ngalkuntja wiya alatjiñu ngaraku." Kaya nintintja tjutangku kulinu paluru wangkanyangka.

Jesulu Añañgu Tjuña Timpulanguru Paintja

(Matthew-ku 21:12-17; Luke-aku 19:45-48; Johnku 2:13-22)

15 Munuya palulanguru Jerusalemala wirkanu, ka Jesunyu timpulaku yaatangka tjarpangu munu nyangu añañgu tjutangku kutjupa kutjupa tjuña tjalamillyangka. Munu paluru mirpañarira tjananya uwankara painu, munu taipula manitjara tjuña unṭura wanira kampa kutjupanu munu taipula tjułpu kuukuuku tjutatjara kuļu unṭura waningu. **16** Munu añañgu uwankara painu timpulaku yaatanguru kutjupa kutjupa tjuña tjalamiltjikitjangku piruku katiwiyangku wantintjaku. **17** Munu palulanguru añañgu tjutangka nintiningi alatji wangkara, "Panya nyiringka iriti walkatjunu Godalu wangkanytjtja nyanga alatji,

'Ngayuku timpula uti ngayuku alatjiñu ngarama añañgu manta winkit-jangku ngayunya tjarpara wal̄kuntjaku.' *

Palu nyura kampa kutjupara palyanu maniku manyu tjutangku añañgu tjuña ngunti kurara tjanalanguru mani mantjintjaku." *

18 Kaya tjukurtjara kuranyitja tjutangku Moseku tjukurpa nintil-pai tjutangku kuļu ilangku kuliningi paluru alatji wangkanyangka, munuya tjaalymara wangkara kuliningi, "Yaaltji-yaaltjingkula palunya iluntankuku?" Palu putuya kuliningi añañgu tjutaku nguluringkula, panya Jesulu tjukurpa wangkanyangkaya paluru tjana kulira nguwankurira wangkapai, "Awari, tjukurpa wirunya alatjiñu nyangangku wangkapai." Kaya kuliningi, "Tjingurula palunya witinnyangkaya añañgu tjuña nganampa kuraringkuku."

19 Ka mungartjirinyangka Jesulu tjana ngura Jerusalemany wantikatira malaku anu Piitjanilakutu ngurakutu.

Piruku Ilinguru Wangkanytja

(Matthew-ku 21:20-22)

* **11:9** Psalm 118:25 * **11:17** Aitjayaku 56:7 * **11:17** Jeremiah-ku 7:11

²⁰ Munuya mungawinki pakara malaku anu Jerusalemalakutu munuya iwarangka ankula nyangu puṇu panya ili palunya pilti ngaranyangka, waṭa munu iwiri kuļu. ²¹ Ka Peterlu mungartitja panya kulinu munu Jesula wangkangu, “Nintilpai, nyawa puṇu panya nyuntu wangkanytjanya piltiringu.”

²² Ka Jesulu wangkangu, “Godakuya mulamulariwa. ²³ Tjinguru kutjupangku palumpa pulkaṛa mulamularingkulampa puli murpu nyangatja wangkara witulku pakara ankula uru nyara pulkangka tjarpanytjaku, ka mulapatu Godalu alatjirinytjaku palyalku anangu nyara paluru kurunpa winkingku mulamularingkula wangkanyangka. ²⁴ Kaṇa nyanga palulanguru nyurala wangkanyi nyura Godala kutjupa kutjupaku tjapirampa pulkara mulamularingama, ka paluru nyurampa palyalku alatjitu. ²⁵⁻²⁶ Palu tjinguru nyura unngu mirpaṇpa kanyini anangu kutjupaku pikaringkunytjatjanungku. Munu nyura tjinguru Godala tjapintjikitjangku kulirampa uti ngañmanypa kalyparingama anangu panya palumpawarara, ka nyara palulanguru nyurampa Mama Ilkaritjanya nyurampa kalyparingkuku munu nyuranya kura palyantjtjanguru pungkuwiyangku wantiku.”*

*Jew Tjutangku Jesula Ngunti Tjapintja
(Matthew-ku 21:23-27; Luke-aku 20:1-8)*

²⁷ Munuya ankula ma-wirkanu Jerusalemala munuya timpulaku yaatangka tjarpanju. Ka Jesunya timpula unngu para-ngaṛanyangka tjukurtjara kuranyitja tjuṭa, Moseku tjukurpa nintilpai tjuṭa munu wati tjiłpi tjuṭa kuļukuļu palulakutu pitjangu. ²⁸ Munuya wangkangu palula, “Nganalunta nyuntunya wangkangu anangu tjuṭa timpula nyanganguru paintjaku? Mununta nganalu iyanu tjukurpa nyangangka wangkara nintintjaku?”

²⁹ Ka Jesulu ngapartji tjanala wangkangu, “Wanyu kaṇa nyurala-warara tjapila, mununa nyura wangkanyangka kutju ngayulu ngapartji nyurala wangkaku nganaluni iyanu nyanganpa palyantjaku. ³⁰ Kaya kuwari ngayula utingku wangka, nganalu wanyu Johnnga iyanu anangu tjuṭa baptise-katintjaku Godalu munta watingku?”

³¹ Kayanku kapuṭurira wangkangi, “Nyaala wangkaku? Tjingurula wangkaku, ‘Godalu palunya iyanu.’ Ka alatji wangkanyangka tjinguru paluru wangkaku alatji, ‘Ka nyura nyaaku wanyu Johnku mulamularingkuwiyangku wantingi?’ ³² Palu tjinguru nganaṇa wangkaku, ‘Watingku palunya iyanu.’ Ka alatji wangkanyangkampa anangu nyanga tjuṭangku kulira nganampa mirpaṇariku panya paluru tjana Johnnga Godaku wangkatjaranmankupai. Kala wanti munula ngurpariwa.” ³³ Munuya palulanguru Jesula wangkangu, “Wiya, ngurpala.”

Ka Jesulu tjanala wangkangu, “Ka ngayulu ngapartji nyurala tjakultjunkunytja wiyangkuwantinyi panya ngayunya iyantjanya.”

12

*Jesulu Tjukurpa Wangkara Jewku Mayatja Tjuṭa Miiltjingantja
(Matthew-ku 21:33-46; Luke-aku 20:9-19)*

* **11:25-26** Matthew-lu tjinguru verse 26 walkatjumu, ka wati kutjupangku mala tjungunu Markaku tjukurta nyanga alatji *Palu nyuntu tjinguru anangu palumpa kalyparingkunytja wiyangku wantinyangkampa Mama Ilkaritjalu palu purunytjatu nyuntumpa kalyparingkunytja wiyangku wantiku.*

¹ Munu palulanguru Jesulu tjanala tjukurpa ara kutjupatjara wangkangi alatji, "Wati kutjupangku puñu kiripitji tjuta kaana pulkangka tjawara ngaratjura wañanu, munu apunguru yaata para-palyara arintara patinu, munu piñi tjawara wantingu ngula kiripitji kururingkunyangka urara kantura tjulkura waina palyantjaku, munu walì wara palyanu katunguru nyakula atunymanunytjaku. Munu palulanguru wati panya paluru kaana panya palunya wati mañkurpa kutjupa unytjungku unggukatingu mani palumpa palyantjaku, munu wantikatira anu parari manta kutjupakutu. ² Ka mai panya kururingkunyangka wati panya kaanaku walytjangku wati warkaripai kutju iyanu tjanalakutu, ankula mai kiripitji tjarara mantjira palumpa katinytjaku. ³ Kaya wati panya atunymanupai tjutangku wati panya iyantjanya nyakula witira pungkula maralpa paira iyanu mai wiya. ⁴ Ka piruku wati panya kaanaku walytjangku wati warkaripai kutjupa iyanu, kaya palunya ngapartji patara kata pungkula kunta wiyangku paira iyanu maralpatu. ⁵ Ka panya piruku warkaripai kutjupa iyanu, kaya wati panya palunya pungkula iluntanu. Ka rawangku wati panya warkaripai kutjupa tjuta, kaya kutjupatjara iluntanangi munuya tjara kutjupa pungkula paira iyaningi.

⁶ "Ka kutjulta nyinangi wati panya tjanalakutu iyantjaku, wati panya palumpa katja. Ka katja panya palumpa paluru pulkara mukuringkupai munu paluru kulinu, 'Wanyunatju ngayuku katja iyala, kaya palunya wanganarangku kulilku.'

⁷ "Palu wati panya palumpa katja wirkankunyangka nyakula tjananku kaputurira wangkara kuliningi, 'Ai, wati panya palumpa katjampal palatja pitjanyi! Warpungkulala iluntara, ka ngula mama palumpa tjilpiringkula ilunyangka kaana nyangatja nganampariku.' ⁸ Munuya wati panya palunya witira iluntara kaananguru urilkutu itarikatira wañingu."

Munu Jesulu tjukurpa wangkara wiyingkula tjanalalta tjapinu,

⁹ "Ka wati panya kaanaku walytjangku wanyu nyaalku tjananya ngapartji? Wiya, paluru pitjala wati panya tjuta iluntankuku munu kaana kiripitjitjara panya ungguku añañgu kutjupa tjuta. ¹⁰ Nyura ninti tjukurpa panyaku, panya iriti nyiringka walkatjunkunytja alatji ngaranyi, 'Walì palyalpai tjutangkuya walì puli tjutanguru palyaningi,

munuya puli kutju nyakula wañingu kura-palku kulira.

Palu nguntiya wañingu, panya puli nyara paluru kura wiya, wiru mulapa walì kunpu kanyilpai.

¹¹ Panya Mayatja Godalu puli pala palunya ngurkantanu puli kutjupa tjuta wiya,

kala paluru ngurkantankunytjtja pukularira wiñunmananyi.' "

¹² Kaya Jewku mayatja tjutangku tjukurpa nyangatja wangkanyangka kulira miilarara wangkangu, "Nyanganngku wali palyalpai tjuta nganananya wangkanyi." Munuya palunya witintjikitjangku kuliningi. Palu nguluringangiyia añañgu winki ngaranyangka nyakula munuya palunya witilwiyangku wantira anu.

Rome-aku Mayatja Mani Tjarara Ungkunytjaku, Munta Wiya?
(Matthew-ku 22:15-22; Luke-aku 20:20-26)

¹³ Kaya Paratji tjuta Irataku tjungutja tjutangka tjunguringu munuya wangkara tamalmaña witura iyanu wati mañkurpa ankula Jesula ngunti tjapintjaku. Panya tjana mukuringangyi Jesulu wangkanyangka kulira kuranmankunytjikitja. ¹⁴ Kaya wirkara palula wangkangi, "Nintilpai,

* **12:11** Psalm 118:22-23

ngananya ninti nyuntumpa, panya nyuntu wati tjukaruru palyanyku nyinapai. Munu nyuntu anangu uwankara tjungura nyakupai munu tjanala uwankarangka tjukarurungku wangkapai tjukurpa panya palunyatu anangu kutjupa tjutaku nguluringkula kampa kutjuparinnytja wiyangku. Munu nyuntu Godaku iwara tjukarurungku wangkara nintilpai kuttitjunkunytya wiyangku. Kalanya wanyu tjakultjura, palyala wati panya Tjiitjanya mayatja pulka Rome-ala nyinapainya mani tjarara ungkuku, monta wiya?”

¹⁵ Palu Jesulu nintingku kuliningi tjana ngunti arkara tjapinnyangka munu tjanala wangkangu, “Nyaakuṇi nyura ngunti arkanı ngayunya kuranmankunytykitjangku? Mani pala tjiilpaniya uwa nyakunytyaku.”

¹⁶ Kaya mulapatu ungu tjiilpa kutju. Ka wangkangu tjanala, “Nyawaya, nganaku yunpa nyangatja ngaranyi munu nganaku ini kulu ngaranyi?”

Kaya wangkangu, “Mayatja pulka panya Tjiitjanya.”

¹⁷ Ka Jesulu wangkangu tjanala, “Uwa mulapa mani nyangatja panya mayatja Tjiitjaku, kaya palunya palya ungama paluru wangkanyangka, palu Godalu wangkanyangkampaya Godanya alatjitu ungama.” Kaya nyangatja kulira nguwankuringu, “Ai, nyangangku mun̄kara alatjitu wangkapai.”

Tjukurpa Panya Ilura Pakantjanya Tjana Tjapintja (Matthew-ku 22:23-33; Luke-aku 20:27-40)

¹⁸⁻¹⁹ Ka ngula wati Tjatjutji mankurpa pitjangu Jesulakutu, panya tjanaya anangu tjuṭa ilunytjatjanu pakantjityaku mulamularingkupai wiya. Munuya wati nyanga mankurtu Jesula ngunti arkara tjapinu alatji, “Nintilpai, panya Moselu tjukurpa nyangatja nganampa iriti walkatjunu alatji, ‘Tjinguru wati kuṭa kurnitjara iluku tjitji wiyat, ka minyma panya palumpa kuri wanka nyinanyangka wati panya miriku małanytju uti alṭima minyma panya palunya. Palu malanytju paluru tjinguru tjitji katja utintjatjanungku uti kulinma, “Nyangatja ngayuku wiya, ngayuku kuṭaku tjitji, panya ngayulu palumpa kuringka utinu.”’ Alatji Moselu walkatjunu.

²⁰ “Palu tjukurpa nyangatja wanyu kulila. Panya wati 7 kutarara kuṭarara nyinangi. Ka kuṭa nganmanyitjangku kungkawara alṭingu, munu paluru tjitji utilwiyatū ilungu. ²¹ Ka malanytju ngapartji minyma panya palunyatu alṭingu munu tjitji wiyatū ilungu, ka palu purunypaṭu wati malanypa kutjupangku ngapartji alṭira paluru kulu tjitji wiyatū ilungu. ²² Kaya palu purunypaṭu malanypa panya malatja tjuṭangku minyma panya palunyatu alṭira kanyira tjitji wiyatū ilungu uwankaratu wanapari wanapari. Ka ngula minyma panya paluru tjanampa panya kurilta ilungu.

²³ “Kalanya wanyu tjakultjura ngula ilunytjatjanu wankaringkula pakantjatjanu minyma panya paluru nganaku kuri nyinaku? Panya wati 7-tu palunya alṭingu.”

²⁴ Ka Jesulu wangkangu tjanala, “Wiya, nyura ngunti kulilpai tjuta. Nyura Godaku tjukurku ngurpa palumpa witulyaku kulu ngurpa alatjitu.

²⁵ Panya miri tjuṭa ilunytjatjanu wankaringkula pakara kuri alṭinytja wiya nyinaku, panya angelpa tjuṭa kuri wiya nyinanyi, palu purunypa. ²⁶ Ka nyura uti mulamularingama ilunytjatjanu pakantjityaku. Wanyu tjukurpa panyatja kulila panya Moseku tjukurta ngaranyi, panya Godalu punu kampanytjalanguru Mosela wangkangu alatji,

‘Ngayuluṇa Aipuramaku, Isaacaku, Jacobaku God nyinanyi, kaṇiya paluru tjana ngayunya walkunu.’ *

²⁷ Ala palatja. Aipuramanya, Isaacanya, Jacobanya tjana panya ngañmanypa ilungu, ka nyangatja nyaaku Godalu ilunyangka małangka wangkangi tjana palunya walkuntja? Wiya, paluru tjana panya ilunytjatjanu wankaringu munuya kuwari nyanga ilkarīngka wanka nyinara Godanya walkunu. Ka nyura ilunytjatjanu wankaringkula pakantjtja wiyanmananyi ngurpangku.”

*Tjukurpa Nyaa Pulka Mulapa Godalu Wangkanytja
(Matthew-ku 22:34-40; Luke-aku 10:25-28)*

²⁸ Ka Jesulu tjananku ngarala ngaparku wangkanyangka wati kutju pitjala tjanala tjunguringu, Moseku tjukurpa nintilpai. Munu paluru kulinigi Jesulu tjanala wiruṛa wangkanyangka munu paluru tjapinu palula alatji, “Tjukurpa nyaa wanyu pulka mulapa ngaranyi uwankarangka waintarinytja Godalu panya wangkanytja?”

²⁹ Ka Jesulu wangkangu, “Tjukurpa pulka mulapa alatji ngaranyi, ‘Kulilaya Israelkunu tjuta, nganampa Mayatja Godanya kutju alatjitu nyinanyi, ka god kutjupa nyinanytja wiya alatjitu. ³⁰ Ka nyura uti Mayatja Godaku pulkara mukuringama kurunpa winki, munu palunya kutju pukułmankunytjikitjangku kulira titutjarangku wiru palyanma.’ *

³¹ Ka palu purunypa tjukurpa pulka kutjupa ngaranyi alatji, ‘Anangu kutjupa tjutaku pulkara mukuringama nyuntunku mukuringkunytja puṛunypa.’ *

Uwa, tjukurpa Godalu wangkanytja uwankara pulka ngaranyi, palu tjukurpa nyanga pula kutju pulka mulapa ngaranyi tjukurpa kutjupa tjutangka waintara.”

³² Ka wati panya Moseku tjukurpa nintilpaingku wangkangu Jesula, “Nintilpai, tjukarurungkun wiru mulapa wangkanyi, panya mulapa Godanya kutju nganampa mayatja nyinanyi, ka god kutjupa tjuta ngaranytja wiya alatjitu. ³³ Kala uti palumpa pulkara mukuringama kurunpa winki. Munula uti palu purunypaṭu anangu kutjupa tjutaku pulkara mukuringama panya nganānanku mukuringkupai, palu puṛunypa. Panya tjukurpa nyanga pula Godalu wangkanytja kutjara pulka mulapa ngaranyi tjukurpa kutjupa tjutangka waintara. Ka panya tjukurpa kutjupa ngaranyi nganana kuka katira pungkula tiliwakara Godanya ungkunytjaku paluru nyakula nganampa kalyparingkunytjaku. Palu tjukurpa nyara paluru tjukutjuku nguwanpa panya tjukurpa Godaku mukuringkunytjijta munu anangu tjutaku kuļu mukuringkunytjijta pulka kutjara tjukurpa panya kuka ungkunytjijtangka munkara.”

³⁴ Ka alatji wangkanyangka Jesulu kulinu, “Wati nyanga paluru nintingku tjukarurungku wangkanyi.” Munu wangkangu palula, “Nyuntun nguwanpa Godaku walytjaringanyi paluru nyuntunya mayatjangku kanyintjaku.” Kaya palula malangka piruku Jesunya tjapintja wiyangku wantingi.

*Davidanya Pula Christanya
(Matthew-ku 22:41-46; Luke-aku 20:41-44)*

³⁵ Munu kutjupa-ara Jesulu timpulaku yaatangka anangu tjutangka wangkara nintiningi munu tjanala tjapinu alatji, “Wati panya

* 12:26 Exodus 3:6 * 12:30 Deuteronomy 6:4-5 * 12:31 Leviticus 19:18

Moseku tjukurpa nintilpai tjuṭangku wangkapai alatji, ‘Christanya Wankarunkupainya Godalu panya kalkuntjanya Davidaku waltyjapiti malatja małatjanguru utiringkuku.’ Palu nyangatjaya wanyu tjukarurungku wangkanyi? Wiya kulila. ³⁶ Panya Kurunpa Milmiltu Davidala iriti nintiningi, ka nyiringka walkatjunu alatji, ‘Mayatja Godalu ngayuku Mayatjangka wangkangu,

“Ngayula itingka mayatjarira nyinakati kampa nyanga wakungka. Kan̄a nyuntumpa mirpantju tjuṭa tjaṛulku nyuntula wanganarangku kulintjaku,

kan tjananya nyuntu mayatjangku wituwitulku.” *³⁷

³⁷ Nyangatja Davidalu Christanya mayatjanmanangi, ka Christanya yaaltjiyaaltji piruku palumpa pakali malatja nyinama? Wiya, paluru pakali kutju wiya palumpa mayatja kuļu nyinanyi.”

Kaya aŋangu panya tjuṭa mulatu palula pukulṭu kuliningi tjukurpa wiru wangkanyangka.

Jesulu Anangu Tjuta Ngulutjunkunytja Moseku Tjukurpa Nintilpai Tjutangka-tawara

(Matthew-ku 23:1-36; Luke-aku 20:45-47)

³⁸ Ka paluru tjanala nintira alatji wangkangu, “Nguļu nyangamaya Moseku tjukurpa nintilpai tjuta. Nyara tana panya mantara waratjara kañany-kañanya para-ngarapai aŋangu tjuṭangku nyakula tjananya mirawañinytjaku mukuringkula. ³⁹ Munuya wali inmatjangka tjunguringkula tjiya wiru tjuṭa ngurkantankupai, aŋangu tjuṭangka kuranyu uti nyinakatinjtjikitja mukuringkula. Munuya kutjupa-ara mai pulka ngalkuntjikitja tjunguringkula, palu purunypa kuranyu nyinanytjikitja mukuringkupai, aŋangu tjuṭangku tjananya nyakula mirawañinytjaku. ⁴⁰ Munuya minyma wanakaļa tjuṭa wituwitulpai tjananya ngunti kalkun-tjaku alatji wangkara, ‘Nyuntu ngananañanya kalkunma ngula nyuntu ilunyangka nyuntumpa wali nganamparintjaku.’ Munuya paluru tjanala tjapiṛa tjukurpa waṛa mulapa wangkapai aŋangu tjuṭangku kulira tjananya mirawañinytjaku mukuringkula. Ka nyanga palula tjanalanguru Godalu tjananya pulkaṛa pungkuku.”

Wanakalangku Ungkunytja

(Luke-aku 21:1-4)

⁴¹ Ka palulanguru Jesunya nyinakatingu munu nyangangi aŋangu tjuṭangku mani pitingka Godaku wañinyangka. Kaya wati mani pulkatjara tjuṭangkuya pulka mulapa wañingu. ⁴² Ka minyma wanakaļa ngalṭutjara pitjangu, munu tjiilpa kuļunypa kutjara wañingu mani tjukutjuku mulapa.

⁴³ Ka Jesulu altingu palumpa nintintja tjuṭa munu wangkangu, “Kulilaya, ngayulu nyangangi kuwari tjuṭangku pulka wañinyangka, palu wanakaļa nyanga ngalṭutjarangku tjanala muṇkara nguwanpa wañingu.

⁴⁴ Panya kutjupa tjuṭangkuya pulka kanyintjatjanungku tjarara tjara kutju wañingu, ka paluru uwankara alatjitu wañingu paluru kanyintjatjanungku, munu nyanga wiyalta nyinanyi. Tjukarurungku na nyurala wangkanyi, minyma nyanga wanakalangku pulka mulapa Godanya ungu mani pulkatjara tjuṭangka muṇkara.”

* ^{12:36} Psalm 110:1

13

*Jesulu Timpula Pilukatintja Wangkanytja
(Matthew-ku 24:1-2; Luke-aku 21:5-6)*

¹ Ka Jesunya timpulaku yaatanguru pakannyangka palumpa nintintja kutjungku palula wangkangu, “Nintilpai, nyawa! Timpula nyanga wiru mulapa ngaranyi puli pulkanguru palyantja.”

² Ka Jesulu wangkangu, “Nyura kuwari nyanganyi timpula wiru mulapa puli nyanga pulkanguru palyara tatintja. Palu ngula wali nyanga paluru pilukatira minya-minyaringkuku. Ka puli kutjupa małaringkula ngarawiya uwankara alatjitu punkara minya-minya ngarira wañalku.”

*Jesulu Nganmanytju Wangkanytja Pika Munu Tjukurtjara Ngunti Tjuta
(Matthew-ku 24:3-14; Luke-aku 21:7-19)*

³⁻⁴ Munuya Jerusalemania wantikatira anu puli panya Alipatjaralakutu munuya puli katu tatira nyinakatira walunyangangi timpula panya palunya. Ka Peterlu Jamesalu, Johntu, Andrew-lu tjana palula kam-pangkatu tjapinu, “Wanyulanya tjakultjura! Yaalara nyanga alatjiriku panya nyuntu kuwari timpula pilukatintja wangkangi? Ka nyaa nganmanyapa utiringkuku nganana nganmanytju nyakula kulintjaku?”

⁵ Ka Jesulu wangkangu tjanala, “Ngulu nyangamaya kutjupangku nyuranya wangkara ngunti kurantjaku-tawara. ⁶ Panya anangu tjuta pitjaku ngayulu iyantja-palku wangkara munuya ngunti wangkaku, ‘Ngayuluña panya paluru, Jesunya Christanya.’ Kaya anangu winki mulapa ngunti kurannyaangka tjanampa kulira mulamularingkuku.

⁷ “Ka nyura tjinguru kulilku anangu tjutangku tjananku pikangku pungkunyangka ilatjangku munu pararitja tjutangku kulu. Palu pika nyanga palunya tjananya kuliraya nguluringkuwiya nyinama, panya nyanga paluru tjana utiringkunytjaku ngaranyi, palu tjintu małatja kuwaripaṭu ngaranyi ilarinkunytja wiya. ⁸ Panya ngura kutjupa kutjupangka tjaultji tjutangku pikangku pungkuku nguraku mayatja tjutangku wituwitunyangka. Ka ngura kutjupangka kutjupangka manta uriku, ka ngura kutjupa tjutangka ailuru pulka ngaraku. Panya pika kura nyanga paluru tjana nganmanyapa utiringkunytjaku ngaranyi, ka nyura uti purkarangku kulinma, ‘Munta-uwa, nyanga palula tjanala malangka kunyu panyatja pika kura pulka mulapa utiringkuku tjintu małatja wirkankunytja kuwaripangka.’

⁹ “Kayanku ngulu nyangama, panya nyuranyaaya witira kuutpangka ngaratjunkuku ngayuku mulamularingkunyangka, munuya nyuranya wali panya inmatjangka unngu wiipangka pulkara alkalku ngayuku tjukurpa wangkanyangka. Uwa, nyura ngayula wanganarangku kulinnyangkaya mayatja pulka tjutangku nyuranya palula tjanala kuranyu ngaratjunkuku, ka nyura Tjukurpa Palya ngayunyatjara tjanala tjakultjunkuku. ¹⁰ Palu tjintu małatja wirkankunytja kuwaripangka ngayuku walyta tjutangku uti Tjukurpa Palya ngayunyatjara anangu uwankarangka tjakultjunama manta winkingka. ¹¹ Ka nyuranya witira kuutpakutu katinyangka kulira nguluringkunytja wiya rapa ngarama. Tjinguru nyura kuutpangka wangkanytjikitjangku puṭu kulilku, ‘Tjukurpa nyaanatju wangkaku?’ Palu alatji pulkara kulilwiyangku wantima, panya kuutpangka wirkankunyangka nyuranya Kurunpa Milmiltu nintilku wangkanytjaku. Ka nyura paluru nintinnyangka kutju wangkaku tjukurpa palumpa.

12-13 “Uwa, aŋangu winki nyurampa kuraringkuku nyura ngayuku walytja nyinanyangka. Panya kutangku palumpa malanypa ngayuku mulamularingkunyangka ma-ungkuku mayatja kura tjutangku palunya iluntankunytjaku. Ka mamangku palu purunypa talyalku palumpa tjiti tjuta. Ka tjitjingku tjinguru palu purunypa mama ngunytju ngayuku walytja nyinanyangka, wati mirpaŋtju tjutangka nintilku pulanya iluntankunytjaku. Palu nyura ilunytjakutu-wangkara ngayunya tunguntunguntu titutjarangku waŋannyangkampa, Godalu nyuranya wankaru kanyilku palula tjungu titutjara nyinanytjaku.

14 “Ka ngula nyura nyakuku kutjupa kutjupa kura pułka mulapa ngura milmiltä ngunti ngaranyangka panya uwankara wiyalpainya.” (Tjukurpa nyanga palunyaya purkarangku kulinma nintiringkunytjik-itjangku.) “Munu palulanguru kutjupa kutjupa kura panya paluru utiringkunyangka nyakula nyura uti Judeala nyinanytjatanu ngulu wirtjapakanma pulikutu. **15** Tjinguru nyara palula ara aŋangu kutjupa wali katu nyinanyi, munu uti paluru ukalingkula wali unngu kutjupa kutjupa tjuta mantjintjikitja, tjarpanytja wiyangku wantira mapalku pulikutu wirtjapakanma wankakitja. **16** Munta tjinguru kutjupa urilta kaanangka war̄karinyi munu uti paluru mantara mantjintjikitja walikutu malaku ankuwiyangku wantima. **17** Ka nyara palula ara panya kura pułka mulapa ngaraku minyma itjtjara tjutaku munu iti tjukutjukutjara tjutaku kulu. Ngaltutjara! Panya tjana tjinguru wirtjapakara ngururpaṭu pakuringkula wiyingkuku. **18** Kaya Godala tjinpinma kura nyanganpa nyiñngangka utiringkunytjaku-tawara, panya nyiñngangka manarpa ngarira wiyingkupai. **19** Uwa, kura nyanganpa utiringkuku pułka mulapa panya ngañmanytju nyakunytja wiyatja alatjitu, ka kura nyanga palu purunypa malangka piřuku utiringkunytja wiylata ngaraku. **20** Ka kura nyanganpa tjinguru rawa ngaranyangkampa aŋangu uwankara ilura wiyingama. Palu Godalu tjintu nyaranpa muṭulku, aŋangu panya paluru ngurkantankunytja tjuta ilunytjaku-tawara, pika paluru rawa ngaranyangka.

21 “Ka tjinguru kutjupangku nyurala wangkaku, ‘Ai nyangatja pitjangu Christianity, Godalu panya kalkuntjtja.’ Ka kutjupangku wangkaku, ‘Wiya, nyaratja Christianity, Godalu panya kalkuntjtja mulapa.’ Kaya alatji wangkanyangka kulira wantima alatjitu mulamularingkuwiyangku. **22** Panya nyara palula ara aŋangu ngunti wangkapai tjuta Christianity purunypa pakalku, wangkatjara ngunti tjuta kulukulu, munuya paluru tjana aŋangu Godalu ngurkantankunytja tjuta arkara ngunti kurantjikitjangku, kutjupa kutjupa pułka tjuta witulyangku talyalku, tjana nyakula mulamularingkunytjaku, palu putuya tjananya kuralku. **23** Ka nyuranku ngulu nyangama. Nyanga kuwariña nyurala ngañmanytju tjakultjunanyi nyura kulintjatjanungku ngulu nyakunytjaku.

24 “Ka kura nyara paluru tjana ngarala wiyingkunyangka tjintu maruringkuku munu kinara kuļu irnyalwiya ngaraku. **25** Ka kililpi tjuta mantakutu punkalku, ka ilkaritja kutjupa kutjupa uwankara pułkara urira kampa kutjuparira ngunti-ngunti ngaraku. **26** Ka nyara palula arangka aŋangu tjutangku ngayunya nyakuku Watiku Katjanya ngangkalingka witulya pitalytji pułka pitjanyangka. **27** Ka ngayulu angelpa tjuta iyalku manta winkikutu Godaku walytja tjuta uṭulunkunytjaku ngura manta winkitja.”

*Jesulu Puñunguru Wangkanytja
(Matthew-ku 24:32-35; Luke-aku 21:29-33)*

²⁸ Munu Jesulu piruku wangkangi tjanala punu kiripitjinguru alatji, ‘Punu kiripitji nyalpi punkannyangka nyura kulilpai alatji, ‘Munta-uwa, kuwari wariringanyi.’ Ka nyalpi kuwaritja pakannyangka nyura nyakula kulilpai, ‘Munta-uwa, kuwari kuliringanyi.’ ²⁹ Ka nyanga palu purunypatu pika panya paluru tjana utiringkunya nyura nyakula kulinma alatji, ‘Munta-uwa tjinguru tjintu malatja wałalpi ilaringu.’ ³⁰ Tjukarurungkuṇa nyurala wangkanyi, panya nyanganpa uwankara utiringkuku anangu nyanga kuwari nyinanytja tjuṭa wanka nyinanyangkaṭu. ³¹ Panya ngula manta ilkarī uwankara wiyaringkuku, palu tjukurpa ngayulu wangkanytja tiṭutjara alatjiṭu ngaraku wiyaringkunytja wiya.

*Jesulu Kulil-kulilpa Paṭantjaku Wangkanytja
(Matthew-ku 24:36-44)*

³² “Palu uwankaraya tjintu nyara palumpa ngurpa. Angelpa ilkaritja tjuṭa ngurpa munu ngayulu Katjanya kuļu ngurpa, palu Mamanya kutju ninti. ³³ Ka nyuranku uti nguļu nyangama munuya tiṭutjarangku kulil-kulilpa paṭanma, panya nyura ngurpa tjintu nyara ngayulu pitjanytjitzaku. ³⁴ Panya ngayulu pitjanytja ara nyaa purunypa, panya tjinguru wati mayatjangku ngura kutjupakutu ankunytjikitjangku kulini munu palumpa warkaripai tjuṭa warka kutju kutju unggukatinyi munu wati kutju wali tjaangka ngaratjunkula wantinyi tiṭutjarangku ngarala ala-alangku nyakunytjaku. ³⁵ Kaña palu purunytpu nyurala wangkanyi ala-alangku paṭara nyakunytjaku panya nyura ngurpa tjintu panya ngayulu pitjanytjitzaku. Tjinguruna pitjaku tjintu tjarpanyangka, tjinguruna munga kultungka pitjaku, tjinguruna tjintukutu pitjaku. Ngayulu ngurpa. ³⁶ Tiṭutjarangkuya nyangama ala-alangku kunkunta wirkankunytjaku-tawara. ³⁷ Uwa, ngayulu nyurala munu ngayuku walytja uwankarangka kuļu wangkanyi, ‘Ala-alangkuya nyangama.’” Alatji Jesulu wangkara utiningi palumpa nintintja tjuṭangku kulintjaku.

14

*Jesunyaya Iluntankunytjikitjangku Kulintja
(Matthew-ku 26:1-5; Luke-aku 22:1-2; Johnku 11:45-53)*

¹ Ka inma panya Katuwanu Ankunytjanya wałalpi ilaringu tjintu kutjaranguru ngaranytjaku, panya mai pilytja ngalkula ara panya irititja kulintjikitjangku.* Kaya tjukurtjara kuranyitja tjuṭangku munu Moseku tjukurpa nintilpai tjuṭangku kuļu wangkara kulinigi kampangkaṭu Jesunya witira iluntankunytjikitjangku. Palu puṭuya kulinigi, “Yaaltjin-garala witilku?” ² Munuya wangkangi, “Munta wanyula paṭala, ka inma nyangatja wiyariwa. Panya anangu winki mulapaya inmaku pitjangu munuya tjinguru nganampa mirpañarira pikaringkuku nganana Jesunya tjanala miṛangka witinnyangka.”

*Minymangku Jesunya nyitintja Ngura Piitjanila
(Matthew-ku 26:6-13; Johnku 12:1-8)*

³ Ka Jesunya nyinangi ngura Piitjanila wati ini Simonku walingka. Wati nyara paluru panya ngañmanypa nyinangi miři pika pulkatjara. Ka

* **14:1** Panya iritiya Israelkunu tjuṭangku Itjipanya warpungkula wantikatira ankunytjikitjangku mai pilytja palyanu, panya taimi wiya mai talṭu palyantjaku. Kaya ara nyanga palunya kulintjikitjangku yiya kutjupa yiya kutjupa inma palyalpai munuya mai pilytja palyara ngalkupai.

Jesunya wati nyara palumpa ngurangka nyinanyangka minyma kutjupa pitjangu patala uwila pantı wirutjara mani pulkangka payamilantja. Munu minyma paluru patala panya alara uwila panya palunya Jesula katangka tjutinu. ⁴ Kaya anangu kutjupa tjutangku walı pala palula nyinanytjanungku nyangu paluru alatjinkunyangka munuyanku mirpan-mirpanṭu wangkara waningi, “Unytjungku alatjitu nyangangku mani pulkatja wiyanu. ⁵ Utı palangku tjalamilanma munu mani mantjira ngaltutjara tjuta ungama. Panya anangu kutjupangku uwila nyanga palunya payamilantjikitjangku mani pulka mulapa ungkuku.” Alatjiya wangkangi munuya minyma panya palunya pulkara wangkara painingi.

⁶ Ka Jesulu wangkangu, “Wantiya. Nyaaku nyura minyma nyangatja kuranmananyi? Nyanga paluru wiru mulapa palyanu ngayuku. ⁷⁻⁸ Ka ngaltutjara tjuta panya titutjara nyinanyi nyura tjananya ungkunytjaku. Palu ngayulu nyurala titutjara nyinanytja wiya. Ka minyma nyanga paluru ngayula tjukarurungku wiru paṇtipai tjutinu ngaṇmanytju ngula panya kurulta ngarintjaku.* ⁹ Kaṇa nyangatja nyurala tjukarurungku wangkanyi, ngula anangu tjutangku ngura winkingka anangu tjutangka Tjukurpa Palya ngayunyatjara tjakultjunkuku, munuya tjukurpa palunya wangkara minyma nyanga palunyatjara kuļu wangkaku, kaya manta wikitjangku kulilku.”

Judasalu Kulintja Jesunya Palumpa Mirpantju Tjutangka Nintintjikitjangku

(Matthew-ku 26:14-16; Luke-aku 22:3-6)

¹⁰ Ka nintintja kutju Judas Kariyatanya anu tjukurtjara kuranyitja tjutakutu munu tjanala wangkangi, “Ngayulu Jesunya nyurala witintjaku nintilku.” ¹¹ Kaya pukularingu paluru wangkanyangka kulira munuya palunya maniku kalkunu. Ka palulanguru Judasanya anu munu kuliningi, “Yaaltjingarana nintilku?” Munu paluru rawangku nyakukatingi Jesunya tjanala nintintjikitjangku.

Jesulu Tjana Mai Katuwanu Ankunytjanya Ngalkunytja

(Matthew-ku 26:17-25; Luke-aku 22:7-14,21-23; Johnku 13:21-30)

¹² Ka tjintu panya paluru wirkaranu inma panya Katuwanu Ankunytjanya palyara kuka lamalama pungkula paura ngalkuntjaku. Ka palumpa nintintja tjutangku Jesula tjinpinu, “Yaaltjingkala nyuntumpa mai kuka ngaṇmanytju palyalku ngalkula arę panya Katuwanu Ankunytjanya kulin-tjaku?”

¹³ Ka Jesulu nintintja kutjara iyaṇu wangkara, “Ankula pula tawunungka wirkara nyawa watingku piti minatjara tjaliṛa katinyangka, munu pula palunya waṇala. ¹⁴ Munu paluru walingka tjarpanyangka nyupali waṇara tjarpa, munu pula wati waliku waltytjangka wangka alatji, ‘Nintilpainya mukuringanyi nyuntu ngalila nintintjaku ruuma yaaltjingkala mai panya Katuwanu Ankunytjanya ngalkuku.’ ¹⁵ Ka wati nyara paluru nyupalila nintilku ruuma katutja taipula kutjupa kutjupa tjutatjara nganampa palyara wantintjatjanungku. Ka pula nyara palula nganampa mai ngaṇmanytju palyala.”

¹⁶ Ka pula kulintjatjanu anu munu pula walingka wirkara nyangu panya Jesulu wangkanytjanya alatjitu. Munu pula mai kuka uwankara

* **14:7-8** Jew tjutangkuya tjakangku anangu ilunyangka malangka uwila wiru paṇtipai puntungka tjutilpai wiruringkula ngarintjaku. Ka Jesulu palurunku ilunytikitjangku kulira nyangatja ngaṇmanytju wangkangi.

ngañmanytju palyaṇu ara panya Katuwanu Ankunytjanya ngalkula kulin-tjikitjangku. ¹⁷ Ka mungartjirinyangka Jesuna tjana pitjangu nintintja panya 12 kuļu wali panya palulakutu munuya tatira ruumangka tjarpangu. ¹⁸ Munuya taipulangka antangku para-ngarira arintaṛa ngalkuningi. Ka Jesulu wangkangu, “Tjukarurungkuṇa nyurala wangkanyi panya nyuralanguru kutjungku ngayunya tjanala nintilku ngayuku mirpantju tjutangka. Wati nyanga paluru kuwari ngayula tjungungku ngalkuni.”

¹⁹ Kaya nintintja tjutangku kulira tjituru-tjitururingu, munuya kutjungku kutjungku Jesula tlapiningi alatji wangkara, “Nyaa, ngayunyanin wangkanyi?”

²⁰ Ka Jesulu wangkangu, “Nyura ngayuku nintintja 12 nyanga antanggarinyi munuya ngayula tjungungku mai pitingka nyanga tjalatjura ngalkuni, palu nyuralanguru wati kutjungku ngayunya tjanala nintilku ngayuku mirpantju tjutangka. ²¹ Uwa, mulapa ngayulu Watiku Katjanya iluku panya alatjirinytjaku nyiringka iriti walkatjunu. Palu ngaltutjara, wati panya ngayunya tjanala nintintjtjanya, panya palumpa piča pulka mulapa utiringkuku. Wanyunti wati paluru iti wirkankunytja wiya ngarama.” Alatji Jesulu wangkangu.

²² Ka tjana ngalkunnyangka Jesulu mai pilytja mantjinu munu pukularira Godanya walkura wangkangu, “Wirungkulanyan mai nyangatja ungu.” Munu kaṭantara palumpa nintintja tjuṭa ungu wangkara, “Mantjiraya ngalkula. Nyangatja ngayulu puntu.” ²³ Munu palulan-guru walpayata wainatjara mantjinu munu pukularira Godanya walkura wangkangu, “Wirungkulanyan waina nyangatja ungu.” Munu tjananya ungu, kaya kutju-kutjungku uwankarangku tjikiningi paluru kulu. ²⁴ Ka Jesulu wangkangu, “Nyangatja ngayulu milkali aŋangu tjuṭaku tjutintjta, panya nyanga paluru nintini kalkuntja kuwaritja Godalu aŋangu tjuṭaku palyantja. ²⁵ Kaña nyurala tjukarurungku wangkanyi, panya ngayulu waina piruku tjikintja wiya mantangka nyanga nyinara, palu ngula kutjuṇa tjikilku waina kuwaritja, Mama Godalu mayatjangku palumpa walytja uwankara tjungura kanyinnyangka.” Alatji Jesulu tjanala wangkangi.

²⁶ Munuya palulanguru ngalkula tjikintjatjanungku inma kutju inkara wiyaringkula ma-pakara anu apu panya Alipatjaralakutu.

Jesulu Peternya Ngurparingkunytjaku Wangkanytja (Matthew-ku 26:31-35; Luke-aku 22:31-34; Johnku 13:36-38)

²⁷ Munuya apu Alipatjarala wirkanu, ka Jesulu wangkangu tjanala, “Nyura uwankara ngayulanguru ankula wiyaringkuku, panya nyiringka iriti walkatjunkunytja ngaranyi alatji,
‘Ngayuluṇa tjiipi tjuṭaku tjapata pungkula iluntankuku, kaya tjiipi tjuṭa ankula wiyaringkuku.’*

²⁸ Palu ngayulu ilunytjatjanu wankaringkula pakara nyurala kuranyu ankuku Galileelakutu.”

²⁹ Ka Peterlu wangkangu, “Wiya, tjanantiya nyuntunya wantikatiku, palu ngayulu nyuntunya wantikatinytja wiya alatjitu.”

³⁰ Ka Jesulu wangkangu Peterla, “Wiya, tjukarurungkuṇa nyuntunya wangkanyi, panya munga nyanga kuwari tjintu pakantja kuwaripangka nyuntu ngayuku mankurara ngurparingkuku, munun palulanguru kulilku tjuki kutjara-ara wangkanyangka.”

³¹ Ka Peterlu pulkara alatjitu tungun-tunguntu wangkangi, “Wiya, ngayulu nyuntumpa ngurparingkunytja wiya. Tjinguruli nyuntu ngalitū

* ^{14:27} Tjakarayaku 13:7

iluku. Palatja palya.” Kaya nintintja panya kutjupa tjutangku tjukurpa palu purunypaṭu wangkangu.

*Jesulu Godala Tjapintja Ngura Katjimanila
(Matthew-ku 26:36-46; Luke-aku 22:39-46)*

³² Munuya apu Alipatjarala tatira ngura ini Katjimanila wirkanu, ka Jesulu wangkangu palumpa nintintja tjutangka, “Nyangangkaya nyinama paṭara kana nyarangka tjukutjuku ankula Godala tjapila.”

³³ Munu paluru katingu wati mankurpa Peternya Jamesanya Johnnga. Munu nyara palulalta paluru pulkara tjituru-tjitururira tjunı tjulypilyaringu. ³⁴ Munu wangkangu tjanala, “Tjunına tjulypilyaringu mununi kurunpa paku pulkaringkula nguwanpa ilunyi. Kaya wanyu nyangangka nyinara wankangku nyangama kunkunpa wiyangku, kana Mamala tjapila.” ³⁵⁻³⁶ Munu paluru paṭupatu nguwanpa ilaṭu ankula mantangka watungarakatira Godala tjapiningi tjituru-tjituru pulkangku alatji wangkara, “Uwa Mama, nyuntu panya kutjupa kutjupa uwankara palyalpai nyinanyi. Wanyu tjananya ngayuku mirpaṇtju panya tjuṭa markula ngayunya pungkunytjaku-tawara. Palu wiya, nyuntu mukuringkula palya wantir’iyala ngayunya pungkunytjaku, kana palula tjanalanguru kumpintja wiya, panya ngayulu mukuringanyi nyuntu mukuringkunyitjita kutju palyantjikitja.”

³⁷ Munu tjapiṛa wiyingkula małaku pitjala nyangu nintintja panya mañkurpa kunkunpa ngarinyangka munu wangkangu Simon Peterla, “Simon, kunkunpan ngarinyi? Puṭun wankangku nyanganyi rawa nguwantu?” ³⁸ Munu tjananya piruku wangkangu, “Wankangkuya nyangama munuya Mamala tjapinma nyuranya anga-kanyintjaku mamungku nyuranya kurantjaku-tawara, panya nyura pulkara mukuringanyi wanka nyinanytjikitja, palu kuru nyura pilu-pilu ngaranyi.” ³⁹ Munu tjanala wangkanytjatjanu piruku małaku anu munu Godala piruku tjapiningi tjukurpa panya palu purunypaṭu wangkara. ⁴⁰ Munu tjapiṛa wiyingkula małaku pitjangu panya tjanalakutu munu tjananya nyangu piruku kunkunpa ngarinyangka panya kuruuya pilu-pilu mulapa ngarangi. Munuya paluru pitjanyangka wankaringkula nyakula kunṭaringu palula wangkanytjaku. ⁴¹⁻⁴² Ka piruku anu arakutu panya, munu tjapiṛa wiyingkula małaku pitjangu munu wangkangu tjanala, “Kunkunpaṭu nyura ngarinyi? Alatjitu nyura kunkunarira pakuwiyaringu. Nyawaltaya pakara. Pala wirkakatinguya ngayuku panya mirpaṇtju tjuṭa, ngayunya tjanala nintintjikitjangku Watiku panya Katjanya. Walaya pakala kala ara. Wati panya paluru pitjangu ngayunya nintintjikitja wati kura tjutangku witintjaku.”

*Jesunya Witintja
(Matthew-ku 26:47-56; Luke-aku 22:47-53; Johnku 18:3-12)*

⁴³ Ka Jesunya kuwaripaṭu tjanala ngarala wangkanyangka Judasanya palumpa panya nintintja wirkanu wati tjutatjara, munuya paluru tjana tjula waratjara tjutinypatjara kułukulu pitjangu, panya tjukurtjara kuranyitja tjutangku munu Moseku tjukurpa nintilpai tjutangku, tjlpi kutjupa tjutangku kułu tjananya witura iyanu Jesunya witintjaku.

⁴⁴ Ka wati panya palula tjanala Judasalu nganmanytju wangkangu tjana ngalya-pitjanytja kuwaripangka alatji, “Ngayuluṇawi mitamita kutjara nyunytjula wati palunya, kaya nyunytjunnyangka nyakulampa witilalta munuya katira uwa mayatja tjuṭa.” ⁴⁵ Munu palulanguru Judasanya Jesula tjanala wirkara palulakutu pitjangu munu wangkangu, “Awa, Nintilpai.”

Munu palula ilaringkula palunya nguku kutjara nyunytjuṇu. ⁴⁶ Kaya wati panya paluru tjana nyunytjunyangka nyakula Jesunya mapalku witira wayarurunu.

⁴⁷ Ka kutjupangku ila ngaranytjatjanungku Jesunya ngalkintjikitjangku tjuła waṛa ilaṇu munu wati tjukurtjara pułkaku waṛkaripai pungkula pina katanu, ka punkaṇu mantangka. ⁴⁸ Ka Jesulu tjanala wangkangu alatji, “Nyaaku nyura pitjangu tjułatjara tjutinypatjara ngayunya wati pikati-palku kulira witintjikitja? ⁴⁹ Rawa panyaṇa nyurala tjungu nyinangi timpulangka, kanı nyura nyakula wantingi. Palu tjukurpa panyatjalta nyangatja utiringu, panya nyiringka iriti walkatjunkunytja ngaranyi ngayunya witintjaku ka nyanga kuwari utiringu.”

⁵⁰ Kaya palulangurulta nintintja tjutangku palunya wantikatira ngulu wirtjapakaṇu. ⁵¹⁻⁵² Palu wati kutjupangku mantara pirantjarangku palunya itiwanungku wanarinangi. Kaya palunya kuļu witintjikitjangku mantara kutju witiṇu, ka araltjara wantikatira nikiti alatjitu ngulu wirtjapakaṇu.

*Jesunya Jewku Mayatja Tjutangka Kuranyu Ngaranytja
(Matthew-ku 26:57-68; Luke-aku 22:54-55,63-71; Johnku 18:13-14,19-24)*

⁵³ Munuya Jesunya witira ma-katingu tjukurtjara pułkaku wałikutu. Kaya tjukurtjara kuranyitja tjuṭa, Moseku tjukurpa nintilpai tjuṭa munu tjiłpi kutjupa tjuta kulukulu wali nyara palula unngu tjunguringu. ⁵⁴ Ka Peterlu Jesunya tjananya maławanungku kumpira wanangingi palula tjanala ilaringkunytja wiyangku munu wali panya palula wirkara ma-tjarpangu yaatangka munu wati timpula anga-kanyilpai tjutangka tjunguringkula ngarala waru nganytjiningi.

⁵⁵⁻⁵⁶ Kaya tjukurtjara kuranyitja tjuṭa munu tjiłpi kantulpa uwankara tjunguringkula wali unngu nyinara wangkangi munuya aŋangu tjuṭa ngurira altira tjanala tjapiningi, “Wanyulanya tjakultjura Jesulu panya nganmanytju wangkanytja tjuta, kala kulira palunya ngurkantara.” Alatji tjanatjapiningi panya tjanata mukuringangi aŋangu tjutangku Jesulu kura palyantja ngunti wangkanytjaku tjanala kulira palunya iluntankunytjikitja. Kaya aŋangu tjutangku kantulpa tjutangku altinyangka pitjala tjukurpa Jesunyatjara wangkangi, palu ngunti-nguntiya wangkangi, ka tjukurpa tjanata wangkanytja tjungu mulapa ngaranytja wiya kutjupa kutjupa ngarangi. Kaya puṭu nguriningi aŋangu kutjarangku pitjala tjukurpa kutju wangkanytjaku.

⁵⁷ Ka palulanguru wati maṇkurtu pakara ngunti wangkangi Jesunya kurantjikitjangku. ⁵⁸ Alatjiya wangkangi, “Nganana kulinu wati nyanga paluru mungaṇu wangkanyangka alatji, ‘Ngayulu timpula nyanga pułkanya wati tjutangku palyantjitja piluntankuku, mununa ngayulu tjiṇtu maṇkurarira palyalku timpula kutjupa watingku palyantjitja wiya.’ Alatji wangkanyangkala kuliningi.” ⁵⁹ Palu palumpa tjanampa tjukurpa kuļu tjungu palu purunyapa ngaranytja wiya.

⁶⁰ Ka wati panya tjukurtjara pułka pakanu munu aŋangu tjutangka kuranyunguru tjapinu Jesula, “Nyuntun kulini? Wati nyanga tjutangkuntaya wangkanyi kulintjatjanungku. Mulapa nyangantu nyuntunya tjukarurungku wangkanyi? Wanyulanya tjakultjura.”

⁶¹ Palu Jesunya wangkawiya alatjitu ngarangi. Ka wati panya tjukurtjara pułkangku piruku wangkangu, “Mulapan wanyu Christanya panya Godalu kalkuntjanya nganampa Wankarunkupainya panya Mayatja Godaku katja?”

62 Ka wangkangu, “Uwaṇa. Ka panya nyura ngula uwankarangku ngayunya nyakuku, Watiku Katjanya Godala witulya pul̄kangka itingka nyinanyangka mayatja pul̄ka, munuṇi nyura nyakuku ilkaringuṇu ngangkalingka pitjanyangka.”

63-64 Ka wati tjukurtjara pul̄kangku tjukurpa nyangatja kulira mirpanarira mantara palurunku tjlpirpungu munu wangkangu, “Ala palatja! Wanyula wanti kutjupa tjuta altintyta wiyangku piruku pitjala palunya wangkara kuranmankunytjaku. Panya kuwari nyangala nganaṇa alatjiṭulta kulinu palurunku walytjangku Godanyanmankunyangka.* Ka nyura yaaltji kulini?”

Kaya uwankarangku wangkara palyanmanu, “Wiya, wati nyangatja kura mulapa. Utila iluntankunytjaku iyanma.”

65 Kaya kutjupa tjutangku palunya witalytjunangi munuya kuru raikingka karpira palunya mara kaputurira pungangi kutjupangku kutjupangku munuya palunya ngalypa-ngalyparingkula wangkangi, “Nyuntu wati wangkatjarangku nintingku wangka, nganalunta panyatja pungu?” Ka wati panya timpula anga-kanyilpai tjutangku ngapartji Jesunya pul̄kara marangku pungangi.

Peternya Jesuku Ngurparingkunytja

(Matthew-ku 26:69-75; Luke-aku 22:56-62; Johnku 18:15-18,25-27)

66 Ka panya Peterlu nyara palulatu ngarala waru nganytjiningi yaatangka urilta, ka wati tjukurtjara pul̄kaku warkaripai kungkawara palula itiwanu wati-pitjangu. **67** Munu Peternya nyakula ngarakatingu munu papulara kulinigi, “Ai, ngananya nyangatja?” Munu palunya wangkangu, “Munta-uwa, nyuntu panya Jesula tjungutja wati panya Nazarethanya ngurārangka.”

68 Ka Peterlu ngurparingkula wangkangu, “Wampa, putuna kulini. Ngayulu ngurpa palumpa. Nyaakun ngayula tjapini?” Munu palulanguru ma-pakara kaita tjaangka ngarangi.

69 Ka małangka kungkawara panya paluru Peternya kaita tjaangka ngaranyangka nyakula piruku wangkangu kutjupa tjutangka alatji, “Mulapa wati nyaratja Jesula tjungu para-ngarapai.” **70** Palu Peternya piruku ngurparingu.

Ka palulanguru anangu tjutangku palula itingka ngaranytjatjanungku palunya piruku wangkangu alatji, “Wiya nguntin ngurparinganyi. Nyuntun Galilenya ngurara alatjiṭu munun Jesula tjungu para-ngarapai.”

71 Ka Peterlu mirpañarira wangkangu, “Wiya, ngayulu ngurpa alatjiṭu wati nyara palumpa. Tjukarurungkuṇa nyurala wangkanyi. Tjinguruna ngunti wangkarampa, kaṇi palya Godalu pungkuku.”

72 Ka paluru wangkanyangka tjuki wangkangu, ka Peterlu kulinu Jesulu panya ngañmanytju wangkanytja alatji, “Panya tjulpu kutjara-ara wangkanyangka kuwaripangka, nyuntu ngayunya mañkurañangku ngurpanmankuku.” Munu nyangatja kulira paluru pul̄kara tjituru-tjitururira ulangu.

15

Jesunya Pilate-alakutu Katinytja

(Matthew-ku 27:1-2,11-14; Luke-aku 23:1-5; Johnku 18:28-38)

* **14:63-64** Moseku tjukurtu pul̄kara pailpai anangungku walytjangku Godanyanmankunytja wiyangku wantintyjaku. Nyawa Exodus 20:2-7.

¹ Kaya ngalya-katjarungkannyangka piruku tjunguringu tjukurtjara kuranyitja tjuta, Moseku tjukurpa nintilpai tjuta munu Jewku mayatja uwankara, tjlpi tjuta kulukulu. Munuya wangkara kulira tjukurpa palyanu Pilate-anja wangkara wituwituntjikitjangku Jesunya iluntankunytjaku. Munuya palulanguru wati timpula anga-kanyilpai tjutangka wangkangu Jesunya tjiinangka karpira katinytjaku Pilate-alakutu munuya paluru tjana uwankarangku Jesunya Pilate-alakutu katingu munuya palula wirkakatingu.

² Ka Pilate-alu palula tjapinu, “Nyuntu wanyu mulapa Jew tjutaku mayatja pulka?”

Ka Jesulu palula wangkangu, “Uwa, pala wangkanyin.”

³ Kaya tjukurtjara kuranyitja tjutangku Pilate-ala mirangka Jesunya rawangku araa kutjupa kutjupa tjuta wangkara palunya kuranmanangi.

⁴ Ka Pilate-alu piruku palula wangkangu alatji, “Nyaaku nyuntu wangkanytja wiya ngaranyi? Nyanga tjana kutjupa kutjupa tjuta wangkara nyuntunya kuranmananyi.”

⁵ Palu Jesunya wangkanytja wiya alatjiu pilunpa ngarangi, ka Pilate-alu puu kuliningi, “Ai! Nyaaku nyangatja wangkara aluntja wiya ngaranyi?”

Jesunya Iluntankunytjikitjangku Wangkanytja

(Matthew-ku 27:15-26; Luke-aku 23:13-25; Johnku 18:39—19:16)

⁶ Ka panya yiya kutjupa yiya kutjupa inma panya Katuwanu Ankunytjanya ngaranyangka Pilate-alu tjakangku tjailanguru wati kutju walatjunkupai anangu tjuta mukuringkunyangka. ⁷ Ka tjintu nyara palula wati kamantaku kuraringkupai tjuta tjailangka nyinangi. Panya paluru tjana munga kamantaku pikaringangi Rome-aku tjaultji tjutaku munuya wati kutju iluntanu, kaya nyara palulanguru tjananya witira tjailangka tjarpatjunu tjanampa mayatja wati ini Parapatjanya kulu. ⁸ Kaya anangu tjuta mulapa tjunguringu Pilate-aku ngurangka urulta munuya palula ngatjiningi wati kutju tjanampa walatjunkunytjaku panya tjana nintingku kuliningi tjintu nyanga palula wati kutju tjailanguru walatjunkunytjaku.

⁹ Ka Pilate-alu tjanala tjapinu, “Nyura wanyu mukuringanyi ngayulu nyurampa nyanga mayatja pulka walatjunkunytjaku?” ¹⁰ Nyangatja paluru nintingku tjanapingi alatji kulira, “Tjukurtjara nyanga kuranyitja tjutangkuya Jesunya nyararingkula ngayunya katira ungu.”

¹¹ Palu tjukurtjara kuranyitja tjutangkuya anangu tjuta pulkara wituwituningi Parapatjaku Pilate-ala ngatjintjaku tjanampa walatjunkunytjaku.

¹² Ka piruku Pilate-alu tjapinu anangu tjutangka, “Kaña wanyu nyaalku wati nyangatja? Panya nyura palunya walkura wangkapai nyurampa mayatja pulka.”

¹³ Kaya mirara wangkangu, “Wiya, palunya puu kañakutjarangka wakara utitjura!”

¹⁴ Ka Pilate-alu wangkangu, “Nyaanguru? Kura nyaa nyangangku wanyu palyanu?”

Kaya tungunpungkula pulkara alatjiu mirara wangkangu, “Puñu kañakutjarangka wakara utitjura.”

¹⁵ Ka Pilate-alu anangu tjuta pukulmankunytjikitjangku mukuringkula Parapatjanya walatjunu tjanampa, munu tjaultji tjuta wangkangu Jesunya wiipangka alkantjaku. Munu palulanguru tjanala wangkangu katira puñu kañakutjarangka wakara utitjunkunytjaku.

*Tjaultji Tjuṭangku Jesunya Anantja
(Matthew-ku 27:27-31; Johnku 19:2-3)*

¹⁶ Kaya tjaultji tjuṭangku Jesunya katira mayatja pulkaku wali unngu tjarpatjunu munuya tjaultji kutjupa tjuṭa altingu uwankara tjunguringkunytjaku. ¹⁷ Munuya Jesunya mayatja pulkaku mantarangka ngunti tjarpatjunu kala panya purple-ta, munuya mayatja pulkangku katangka kanyilpai purunypa palyanu tjilka-tjilkanguru iri pulkatjara munuya palula katangka tjunu. ¹⁸ Munuya palunya anaṛa ngalypa-ngalyparingkula ngunti walkura wangkangi, “Awari, mulapa nyuntu Jewku mayatja pulkanya.” ¹⁹ Munuya puṇu tjukarangka palunya rawangku kata pun-gangi, munuya palunya wiṭalytjunangi, munuya palula kuranyu tultjungararakatira ikaritjarangku anara ngunti walkuningi. ²⁰ Munuya palunya kurara pungkunytatjanungku małangka mantara panya purple araltjara mantara palumpangka malakungku tjarpatjunu, munuya pakaltjingara ma-katingu puṇungka wakaṛa utitjunkunytjikitjangku.

*Jesunya Puṇu Kaṭakutjarangka Wakara Utitjunkunytja
(Matthew-ku 27:32-44; Luke-aku 23:26-43; Johnku 19:17-27)*

²¹ Munuya Jesunya ngura Jerusalemalanguru urilkutu mapakaltjingaṇu, ka paluru panya puṇu tjalira anangi. Kaya tjaultji tjuṭangku wati kutjupa ini Simonnga nyakula pauntjingara wangkangu puṇu panya Jesuku tjalira katintjaku. Wati nyara paluru panya kuwari kutju ngalya-wirkanu ilytjinguru. Palu paluru ngura ini Tjairininya ngurara munu wati ini Aлиka-tjantaku pulampa Rupatjaku mama. ²² Munuya Jesunya katingu ngura ini Kaulkatjalakutu. (Kaulkatjanya panya wangkanyi *Kata Tarkatjaranya*.) ²³ Munuya ngura palula wirkara palunya arkara wainangka kutjupa kutjupa tjaū purunypa tjungura ungangi pika kaarngaranyangka manarmankunytjaku,* palu Jesulu wantingi tjikintja wiyangku. ²⁴ Kaya tjaultji tjuṭangku palunya puṇu kaṭakutjarangka wakaṛa utitjunu, munuya palulanguru palumpa mantaraku puṇu panya nampatjarangka katu wanira inkangi kutjungku kutjungku winamilara mantintjikitjangku.

²⁵ Nyangatjaya panya mungawinki palunya utitjunu panya tjintu pakara tjukutjuku katuringkunyangka, 9 o'clock. ²⁶ Ka puṇungka panya walka ngarangi Jesula katu alatji,

Jew Tjuṭaku Mayatja Pulka.

Panya palumpa mirpaṇṭju tjuṭangku palunya alatji wangkanyangka kuranmanu, ka nyara palulangurya walka panya palunya utitjunu. ²⁷⁻²⁸ Munuya palula tjungu wati kutitjunkupai kutjara puṇu kutjupa kutjarangka wakaṛa utitjunu nganytjarta kutjara, kutju kampa wakungka kutju kampa tjampungka.*

²⁹ Kaya aṇangu tjuṭangku Jesula itiwanu iwarangka ankula ira-nyakula kata uri-urira palunya anaṛa wangkangi, “Ala, walangkunku palyala, panya nyuntu wangkangi timpula piluntara tjintu maṇkurarira piṛuku palyaṛa wiyatjikitjangku. ³⁰ Wala wanyu ngalya-wararakati puṇunguru pala, mununku walytjangku wankala.”

* **15:23** Nyanga alatjiya kunyu ungupai utitjunkunytja kuwaripangka pika kaarngaranyangka manarmankunytjaku. Tjaū nyara paluru ini myrrh. * **15:27-28** Wati kutjupangku kunyu verse 28 walkatjunu munu maṛa tjungunu Markaku tjukurta alatji *Ka panya nyiringka iriti walkatjunkunytja nyangatja utiringu, panya alatji walkatjunu*, “Palunyaya wati kura-palku iluntanu kura tjuṭangka tjungu.” (Aitjayaku 53:12)

³¹ Kaya tjukurtjara kuranyitja tjutangku munu Moseku tjukurpa nin-tilpai tjutangku tjukurpa palu purunypatū Jesula wangkangi munuya palunya anara ikaringangi alatji wangkara, “Kutjupa tjuṭa palangku wankanigi, palu waltytjangku palanku puṭu wankani.” ³² Wanyula arkara nyangama Christanya wankarunkupai Godalu kalkuntjitja Israelku mayatja pulkanya, pala puṇunguruwi ngalya-ukaliwa. Kala nyakulampa mulamulariwalta.”

Ka panya palula itingka wakara utitjunkunytja kutjarangku palu purunypatū palunya anara wangkangi.

Jesunya Ilunytja

(Matthew-ku 27:45-56; Luke-aku 23:44-49; Johnku 19:28-30)

³³ Ka palulanguru tjintu panya katuringkula katu ngaranyangka ngura uwankarangka maruringu munu munga purunypa ngarala mungartji-mungartji kutju tjintungku piruku irnyaningi. ³⁴ Ka nyara palula arā tjintungku piruku irnyannyangka Jesulu pulkara mirara wangkangu, “Ilayi, Ilayi, lama tjapatjani.” Alatji paluru wangkangi, “Mama God, Mama God! Nyaakuṇin wantikatingu?”

³⁵ Kaya anangu kutjupa tjutangku ilangku ngaranytjatjanungku paluru wangkanyangka kulinu munuya wangkangu, “Kulila, paluru Ilaitjanya altinyi pitjala alpamilantjaku.” ³⁶ Ka wati kutjungku ngalya-wirtjapakara pantja puṇu warangka karpi-karpira waina kurakurangka tjalatjura katura Jesunya tjikintjaku ungangi munu anara wangkangu, “Wanyula nyangama, ka Ilaitjalu pitjala palunya walatjura nyanga puṇunguru.”

³⁷ Ka Jesunya pulkara mirara ngaalypa wiyingkula ilungu.

³⁸ Ka paluru ilunyangka mantara panya timpulangka waraly-waralyngaranytja katunguru tjarukutu tjlpirarara kutjararingu ngura panya milmilpa mulapa utiringkunytjaku. ³⁹ Ka tjaultji tjuṭaku mayatjangku ngarala nyangangi Jesunya mirara ilunyangka munu wangkangu, “Ai, wati nyangatja mulapa Godaku katja.”

⁴⁰ Kaya minyma tjuṭa nyara palula ngarangitu munuya patunguru nyangangi, panya Mary Magdalene-alu munu Mary-lu panya Jamesaku Josephaku pulampa ngunyjtungku, munu Tjalumilu, munu minyma kutjupa tjutangku kuļu. ⁴¹ Nyanga paluru tjana panya Jesula tjungu para-pitjalinkupai uru Galileela itingka para-ngaranyangka munuya palunya atunymara kanyira mai mantara kuļu ungkupai. Kaya minyma kutjupa tjuṭa kuļu palula tjungu Jerusalemaku pitjanytjatjanu palula tjanala tjungutu ngarala nyangangi.

Jesunya Kulpingka Ngaritjunkunytja

(Matthew-ku 27:57-61; Luke-aku 23:50-56; Johnku 19:38-42)

⁴²⁻⁴³ Ka tjintu nyanga paluru Friday Jesunya ilunytja, ka panyaya Jew tjutangku tjintu nyanga palula kutjupa kutjupa tjuṭa nganmanytju palyara wantipai mungawinkiku tjintu tjarpanyangka pilunarira warika wiya nyinanytjikitjangku. Panya tjintu tjarpanyangka milmilpa ngarapai munu ngarala tjinturingkula mungartjirira tjintu piruku tjarpanyangka kutju milmilpa ngaranytja wiyingkupai.

Ka wati panya Josephanya ngura ini Arima-tjiyanya ngurara nyinangi. Nyara paluru panya wati kantjula nyinangi munu Jewku kantjula kutjupa tjutangka mitingiku tjunguringkupai. Munu paluru rawa patanangi Godalu anangu tjuṭa waltyjanmara mayatjangku kanyintjaku.

Munu paluru Jesunya ilunyangka nyakula kuliningi munu mungartjirinytjaku-tawara mapalku anu Pilate-alakutu munu palula

rapangku ngatjinu Jesunya puntu pununguru mantjintjikitjangku. ⁴⁴ Ka Pilate-alu Jesunya ilunytja kulira wangkangu, “Ai, mapalku alatjitu ilungu?” Munu paluru tjaultji tjutaku mayatja altira tjapinu, “Mulapa Jesunya ilungu?” Ka wangkangu, “Uwa, ngañmanypa ilungu.” ⁴⁵ Ka nyangatja kulira paluru Josephanya palyanmanu Jesunya puntu pununguru mantjira katinytjaku. ⁴⁶ Ka Josephalu ankula mantara piranpa wiru mulapa payamilaña anu Jesulakutu munu palunya pununguru ukalilyira mantara panya piranta karpinu munu katira kulpi unngu ngaritjunu. Munu ngaritjunkula puli pulkanya tjaangka untura wanara angatjunu. Kulpi nyara paluru panya ngañmanytju pulingka nyarkara wantintyta ngarangi.

⁴⁷ Ka Mary Magdalene-alu pula Mary-lu, Josephaku panya ngunytjungku, ngarala nyangangi Jesunya puntu kulpi unngu ngaritjunkunyangka pulala mirangka.

16

Jesunya Ilunytjatjanu Wankaringkula Pakantja (Matthew-ku 28:1-8; Luke-aku 24:1-12; Johnku 20:1-10)

¹⁻² Ka Saturday tjintu panya pakuwiyaringkupai ngarala wiyingku, ka tjintu tjarpanyangka minyma panya mañkurtu Mary Magdalene-alu munu Mary-lu Jamesaku ngunytjungku, munu Tjalumilu tjana ankula nyitilpai wiru payamilaña mungawinki ankula Jesunya puntu nyitintjikitjangku. Munuya mungawinki mulapa tjintu ngalya-pakannyangka kulpikutu anu. ³ Munuya iwarangka ankula alatji wangkarinangi, “Ai, nganalulampa puli panya pulka tjaangka panya anga-ngaranytjanya untura kitikitilku? Panyakatja pulka mulapa.” ⁴ Munuya wirkara nyakula wangkangu, “Ai, nyaratja nyawa, nyara ala ngaranyi. Ngañmanytju untuntja ngaranyi.” Pul nyara paluru panya pulka mulapa minyma tjuñangku untura kitikitintjaku wiya. ⁵ Munuya kulpinku tjarpara nyangu wati yangupala mantara pirantjara nyinanyangka kampa wakungka munuya nyakula nguluringu. ⁶ Ka tjanala wangkangu, “Nguluringkuwiaya ngarama. Nyura wanyu ngurini Jesunya Nazarethanya ngurara panya puñungkaya wakara utitjunu? Paluru nyangangka wiya. Paluru wankaringkula pakanu. Nyawayu nyanga paluru ngarintjtja, panya nyangangka ngaritjunu ka nyanga mantara kutju ngarinyi. ⁷ Wanyuya ankula ma-tjakultjura Peterla tjanala palumpa panya nintintja tjuñangka alatji, ‘Paluru kuwari nyurala kuranyu ananyi Galileelakutu, ka nyura nyara palula palunya nyakuku panya alatji paluru nyurala ngañmanytju wangkangu.’” Nyanga palunya wati panya mantara pirantjarangku minyma panya mañkurtu wangkangu.

⁸ Kaya alatji wangkanyangka kulira puñu kuliningi munuya wala pulka kulpinguру pakara ma-wirtjapakanu. Munuya ngururpa ngarala kutjupangka wangkanytja wiya, panya tjana nguluringu nyakunytjatjanu.

*Tjukurpa Malatja Jesunya Utiringkunytja Mary Magdalene-ala** (Matthew-ku 28:9-10; Johnku 20:11-18)

⁹ Jesunya panya ilunytjatjanu wankaringkula pakanu Sunday mungawinki mulapa munu Mary Magdalene-ala-warara utiringu, panya minyma nyara palulanguru Jesulu mamu 7 ngañmanytju painu. ¹⁰ Ka nyara paluru nyakunytjatjanungku ankula Jesuku malpa panya tjuñangka

* **16:8** Verses nyanganpa wati kutjupangku walkatjunu munu Markaku tjukurta mala tjungunu.

tjakultjunu, panya tjanaya ngurangka tjituru-tjituru nyinara ulara wañingi. ¹¹ Munu paluru wangkangu, “Ai! Ngayulu Jesunya nyangu. Paluru wanka.” Kaya wangkanyangka kulira puþu mulamularingangi.

*Jesunya Utiringkunytja Wati Nintintja Kutjarangka
(Luke-aku 24:13-35)*

¹² Nyangangka malangka Jesunya kutjuparira utiringu wati palumpa malpa kutjarangka iwarangka ilytingka ankunyangka. ¹³ Munu pula nyakunytjatjanu malaku anu malpa panya kutjupa tjutakutu munu pula tjakultjunu pulala utiringkunytja. Palu kuliraya puþu mulamularingangi.

Jesunya Nintintja 11-ta Utiringkunytja

(Matthew-ku 28:16-20; Luke-aku 24:36-49; Johnku 20:19-23; Acts 1:6-8)

¹⁴ Ka ngulalta Jesunya utiringu nintintja panya 11-ta tjanaya mai nyinara ngalkunnyangka. Munu tjanaya wangkara painingi palumpa puþu mulamularingkunytjanguru, panya putuya kuliningi kutjupa tjutangku palunya nyakunytjatjanungku tjakultjunkunyangka. ¹⁵⁻¹⁶ Munu paluru tjanala wangkangu alatji, “Araya ngura winkikutu munuya anangu winkingka Tjukurpa Palya ngayunyatjara tjakultjunama. Kaya kulira mulamularingkulampa minangka baptise-aringkuku, ka Godalu tjanaya wankarunkuku. Palu mulamularingkuwiyangku wantinyangkampa Godalu tjanaya paira iyalku ngura kurakutu. ¹⁷ Ka ngayuku mulamularingkunyangka Godalu palunya tjanaya witulyankuku, kutjupa kutjupa pulka tjuþa witulyatjarangku palyantjaku. Kaya ngayunya ini wangkara mamu tjuþa anangunguru pailku, munuya wangka kutjupa kuwaritja wangkaku. ¹⁸ Munuya liru marangku witira pikatjararingkuwiya nyinaku, munuya kapi kura patjinatjara tjkira palu purunypaþu pikatjararingkunytja wiya alatjitu nyinaku. Munuya anangu pikatjara tjutangka mara tjkunkuku, kaya mapalku alatjitu palyaringkuku.”

*Jesunya Ilkarikutu Katinytja
(Luke-aku 24:50-53; Acts 1:9-11)*

¹⁹ Ka tjanala wangkara wiyaringkunyangka Jesunya Mama Godalu ilkarikutu katingu, ka nyara palulalta mayatja pulka mulapa nyinakatingu Mamala wakungka. ²⁰ Kaya nintintja panya tjuþa anu ngura winkikutu munuya tjukurpa Jesunyatjara para-wangkangi anangu winkingka. Ka Mayatjalu tjanaya witulyanangi kutjupa kutjupa pulka tjuþa witulyatjarangku palyantjaku. Kaya anangu tjutangku nyakula mulamularingangi, “Mulapa nyangantu tjkarakurungku tjakultjunanyi.”

*Tjukurpa Malatja Kutjupa**

²¹⁽⁹⁾ Munuya minyma paluru tjanala Peterla tjanalakutu anu munu tjanala tjakultjunu uwankara wati panya mantara pirantjarangku wangkanytja.

²²⁽¹⁰⁾ Ka nyanga palula maþangka Jesulu nintintja tjuþa witura iyanu Tjukurpa Palya para-tjakultjunkunytjaku ngura winkingka. Panya tjukurpa nyara paluru milmilpa titutjara ngarapai anangu tjutangku kulira wankaringkula titutjara nyinanytjaku.

* **16:20** Verses nyanganpa wati kutjupangku walkatjunu munu maþa tjungunu Markaku tjukurta.

Tjukurpa Palya Luke-alu Walkatjunkunytja

**Luke
Nyangatja Nganmanytju Nyakula
Wangkanytjaku**

Nyangatja Godaku tjukurpa wati ini Luke-alu walkatjunkunytja Jesunyatjara. Panya paluru wati nintipuka munu Jew wiya. Munu paluru nyiri nyangatja walkatjunu palumpa malpaku wati panya ini Tjiyapilatjaku. Munu paluru tjakultjunangi panya Jesunya wati palya mulapa kura wiya alatji, munu panya ilungu aŋangu ngura winkitja wankarunkunytjikitja Jew tjuṭa kutju wiya, panya Godanya aŋangu uwankaraku pułkara mukuringkupai. Munu Luke-alu tjukurpa kutjupa kutjupa tjuṭa walkatjunu Jesulu wangkanytja munu palyantja. Munu paluru nintiningi Godala tjukarurungku tjapintjaku munu tjukurpa Godaku kurunpatjara kuļu wangkangi.

Uwa, Luke-anja panya Paulala tjunguringkula ngura tjuṭangka parapitjalinangi. Munu ngula paluru nyiri kutjupa kuļu walkatjunu panya yaaltji-yaaltji ngarangi Jesunya ilkarikutu ankunyangka małangka. Ka nyiri pala paluru panya ini Jesulu Iyantja Tjuṭangku Palyantja.

Tjukurpa nyanganpa ngarinyi:

- 1:1—2:52 John Baptista nyiŋi ngarinytja munu Jesunya iti ngarinytja
- 3:1-20 Johntu aŋangu tjuṭangka tjukurpa wangkara tjananya baptise-katinytja
- 3:21—4:13 Johntu Jesunya baptise-katinytja, ka Satantu Jesunya arkantja
- 4:14—9:50 Jesulu aŋangu tjuṭangka wangkara nintintja munu pikatjara tjuṭa palyarunguntja
- 9:51—19:27 Jesulu tjukurpa tjuṭa tjakultjunkunytja
- 19:28—21:4 Jesunya Jerusalemalakutu tangkiyingka tatira ankunytja, munu timpulangka tjarpura tjukurpa tjuṭa wangkanytja
- 21:5-38 Jesulu palumpa nintintja tjuṭangka tjakultjunkunytja ngula nyaaringkuku
- 22:1—22:46 Jesulu tjanma mai małatja tjunguringkula ngalkuntja
- 22:47—23:56 Jesunya witintja munu puṇu kałakutjarangka wakara utitjunkunytja
- 24:1-53 Jesunya ilunytjatjanu wankaringkula pakantja

Nganmanytju Tjakultjunkunytja

1-2 Małpa wiřu Tjiyapilatja, lita nyangatja nyuntumpa walkatjunanyi nyuntu Jesunya mantangka nyinanytja tjukarurungku kulintjaku. Panya nganmanytjuya tjuṭangku palula tjungu nyinalalpi palunya nyangangi paluru palyannyangka. Munuya paluru tjananya nyakunytjatjanungku munu kulintjatjanungku kuļu aŋangu tjuṭangka tjakultjunangi nganaŋala kuļu. Kaya kutjupa tjarangku nyiringka walkatjunangi tjukurpa palunyatjaratu. 3-4 Kaňa tjukurpa nyanga palunya tjananya nyakula, kutjupa tjuṭangka kuļu tjapira kulira purkara nintiringangi tjukurpa uwankaraku. Mununa kuwari uti mulapa tjukurpa uwankara tjukarurungku walkatjunkunytjikitja mukuringanyi. Panya nyuntu tjukurpa tjuṭa nganmanytjulpi kuliningi, palu lita nyanga palulanguru nyuntu uwankara tjukarurungku nyakula kulira nintiringkuku.

Ka tjukurpa nyanga paluru nyiri nyangangka ngaranyi.

Angeltu Tjakarayala Tjakultjunkunyta

⁵ Nyara palula arangka, panya wati Iratanya manta Judeaku winkiku mayatja pulka nyinanyangka, wati ini Tjakarayanya tjukurtjara nyinangi. Wati nyara paluru panya Apitjanya tjamutjara nyinangi.* ⁶ Ka palumpa kuri ku lu nyinangi minyma ini Elizabethanya. Minyma nyara paluru panya wati Aaronta tjanalanguru.* ⁷ Munu nyanga paluru pula tjukaruru mulapa nyinangi Godala mirangka munu pula Godaku tjukurpa uwankara wanganarangku kulilpai. ⁸ Palu paluru pula kutjara alatji tu rawa nyinangi tjitji wiya munu pula tjilpiringkula pamparingu.

⁸ Ka tjintu kutjupa timpulangka Apitjakunu tjutangku ngapartji war ka palyantjaku ngarangi, ka wati panya Tjakarayanya tjukurtjara tjanala tjungu war karlingi Godala mirangka. ⁹ Kaya wati nyanga palunya ngurkantanu timpulangka unngu tjarpara pitjilta nyalpi wiru tjunkula tilira puyu pa nt wiru palyantjaku. Nyanga paluru tjana alatjinkupai tjanampa arangka, munuya wati kutju ngurkantankupai tjukurtjarangku puyu pa nt wiru tilintjaku. ¹⁰ Ka tjintu wirkanu puyu pa nt wiru tilintjaku, kaya anangu tju ta mulapa tu timpulangka urilta ngarala Godala tjapiningi.

¹¹ Ka wati panya paluru timpula unngu puyu pa nt wiru tilinnyangka Mayatjaku angelpa utiringu palula munu ngarangi pitjilpangka kampa wakungka wiru pa ntipaingka itingka. ¹² Ka Tjakarayalu angelpa nyakula urulyaranu munu pulkara nguluringu. ¹³ Ka angeltu palula wangkangu, “Tjakaraya, nguluringkunyta wiya. Godalunta kulinu nyuntu palula tjapinnyangka mununi witunu nyuntula tjakultjunkunyta panya nyuntumpa kuri Elizabethanya pakuringkuku, ka nyupali katjatjararingkuku. Ka iti wirkankunyangka nyuntu palunya inila Johnnga. ¹⁴ Munu nyupali pulkara pukulariku, kaya anangu kutjupa tju ta ku luku lu nyakula pukulariku. ¹⁵ Panya paluru ngula pulkaringkula Godala mirangka wati pulka alatji tu nyinaku Godaku tjukurtjara pulka mulapa. Munu paluru wama tjkintja wiya nyinaku. Ka paluru iti wirkankunyangka alatji tu Kurunpa Mil mil nga tarpaku munu palula tjungu ti tutjara nyinaku. ¹⁶ Ka wati nyara paluru Israelkunu tjutangka tjukurpa wangkara malakungku tjananya altira Godala tjungulku piruku palumpa walytja nyinanytjaku. ¹⁷ Munu paluru kuranyurira rapangku ngulu wi yangku wangkaku Godaku tjukurpa, panya wati panya Ilaitjalu iriti Godaku tjukurtjara pulkangku Godaku tjukurpa wangkangi, palu purunyntju. Kaya mama tjutangku palunya ku lira kampa kutjuparira tjananku tjitji tju ta tjukarurungku mukulyangku atunyankuku. Munuya anangu kutjupa tjutangku ku lu Godala tungunpungkunytjanungku paluru wangkanyangka ku luku munuya aruringkula Godala tjukarurungku ku luku. Uwa, wati nyara paluru anangu tju ta alatjirinytjaku palyalku tjana ku lira Mayatjaku ala ala patara nyinanytjaku.” Nyanga palunya angeltu wangkangu wati panya Tjakarayala.

* ^{1:5} Apitjanya tjukurtjara pulka iriti nyinangi Davidanya nyinanytja ara. Panya nyara palula ar a Davidalu tjukurtjara tju ta tjarara tjunu tjana ngapartji-ngapartji timpulangka war karinytjaku, munu paluru Apitjanya tjunu mayatja tjara kutjupaku. (Nyawa 1 Chronicles 24:1-19.) Kaya wati Apitjakunu tju ta tjukurtjara tju ta nyinangi malatja malatja tju ta ku lu. Ka wati panya Tjakarayanya Apitjakunu malatja mulapa munu panya tjukurtjara nyinangi. * ^{1:5} Aarongga panya wati tjukurtjara nganmanypa mulapa nyinangi Godalu tjunkunyta. Paluru iriti mulapa nyinangi Moseku panya ku ta.

18 Ka paluru angelta kulira putu mulamularingkula palula ngapartji wangkangu, "Wiya, ngali tjilpiringu munu pamparingu kulu. Yaaltjin-garali tjitji kanyilku? Wanyuni kutjupa kutjupa nintila kana nyakula mulamulariwa nyuntu panya wangkanytja tjukaruru ngaranytjaku."

19 Ka angeltu wangkangu palula, "Ngayuluna ini Gabrielnga panya Godala mirangka ngarapainnya. Kani Godalu witunu tjukurpa nyanga palunya nyuntula tjakultjunkunytjaku. **20** Palu kulila, ngayulu nyanga nyuntula wangkanytjitzaku nyuntu putu mulamularingkulampa nyuntu tjaa patiringkuku munun putu wangkaku. Ka tjukurpa nyanga ngayulu wangkanytjanya nyuntula utiringkuku alatjitu, kan nyakuku tjintu nyara palula, munun iti wirkankunyangka kutju ngula tjaa alaringkuku munun wangkaku." Alatji angeltu palula wangkangu.

21 Kaya anangu tjuta urilta ngarala pataningi wati panya Tjakarayaku munuya ngarala putu kuliningi wangkara, "Nyaaku paluru timpulangka unngu tjarpura rawaringu?" **22** Ka Tjakarayanya timpulanguru ngalya-pakanu munu putu wangkangi. Kaya mara kutju urinyangka nyakula kuliningi, "Munta, tjinguru kutjupa kutjupa palula utiringu timpula unngu, ka nyanga palulanguru tjaa patiringu."

23 Ka tjintu mañkurnguru Tjakarayalu timpulangka warka wiyara ngurakutu anu. **24** Ka nyara palula mañlangka palumpa kuri Elizabethanya pakuringu munu urilkutu pakantja wiya wali unngu kutju nyinangi titutjara pira mañkurpa kutjara. **25** Munu paluru pukularira alatji wangkangu, "Ngangari, wiru mulapa nyangatja. Ngula-ngulanitju mulapatu Mayatjalu pukulmanu. Panya nganmanytjunjtuya anangu tjutangku kurara pungkupai tjitji wiya nyinanyangka, kana kuntaringkupai. Palu kuwari nyanga Mayatjalu ngayuku kunta wiyanu alatjitu, kaya putulta ngayunya piruku nyanga purunyapa wangkanyi."

Angeltu Mary-la Tjakultjunkunytja

26-27 Ka pira mañkur-mañkurpa wiyaringkunyangka Elizabethanya tjuni pulkaringu. Ka Godalu iyanu angelpa ini Gabrielnga kungkawara nyitayikutu ini Mary-lakutu. Kungkawara nyanga paluru ngura ini Nazarethala nyinangi uru Galileela wilurara munu paluru wati ini Josephalu nganmanytju kalkuntja nyinangi altintytja wiyatu. Wati nyanga paluru mayatja Davidaku walijapitinguru utiringkula nyinangi. Palu nyanga pula altintytja wiyatu kuwaripa nyinangi patara. **28** Ka angelpa panya paluru wirkanu Mary-la munu pukultu tjakultjunu palula alatji, "Awa, Mayatjanyanku pulkara pukularinyi, mununta ilangku kanyira nyuntumpa wiru mulapa palyalku."

29 Ka Mary-lu wangkanyangka kulira pulkara urulyaranu munu kuliningi, "Nyaani nyangangku wangkangu?" **30** Ka angeltu palula wangkangu, "Mary, nguluringkunytja wiya! Mayatjanya nyuntumpa pulkara pukularinyi mununta paluru nyuntunya ngurkantanu. **31** Kulila, nyuntu kuwari ititjararingkuku, munun katja kanyilku munun palunya inilku Jesunya. **32** Ka paluru pulka mulapa nyinaku Mayatja Katutja Pulkaku katja. Ka Godalu palunya tjunkuku Mayatja pulka nyinanytjaku wati panya palumpa tjamu Davidaku arangka. **33** Ka paluru mayatja pulka mulapa rawa nyinaku Israelkunu tjutaku anangu kutjupa tjutaku kulu titutjara alatjitu wiyaringkunytja wiya." Nyanga palunya angeltu Mary-la wangkangu.

³⁴ Ka Mary-lu palula ngapartji wangkangu, “Palu nganalanguruṇa iti nyanga palunya kanyilku? Panya ngayulu watiku ngurpa munuṇa wati kutjupangka nyinanytja wiyatū.”

³⁵ Ka angeltu palula wangkangu, “Kulila, Kurunpa Milmilnga nyuntula tjarpaku munu Godaku witulya pulkatjarangku nyuntunya ititjararingkunytjaku palyalku. Ka nyara palulanguru nyuntu iti milmilpa kanyilku ‘Godaku Katja.’ ³⁶ Munu wanyu piruku kulila, nyuntumpa panya waltyja Elizabethanya, Tjakarayaku panya kuri. Paluru pampa mulapa nyinanyi. Palu kuwari nyanga paluru ititjara nyinanyi. Munu panya pira maŋkur-maŋkurnguru tjitji kanyilku pampa panya mulatu. ³⁷ Ka nyangatja kulinma panya Godalu kutjupa kutjupa uwankara alatjitu paluru nintingku palyalpai.”

³⁸ Ka Mary-lu nyangatja kulira wangkangu, “Uwa palya, ngayuluṇatju mulapa Mayatjaku waltyja nyinanyi paluru wangkanytja wangaṇarangku kulira palyantjikitja. Ka nyanga nyuntu wangkanytja palya ngayula utiringkuku.” Ka nyanga palulanguru angeltu palunya wantikatira anu.

Mary-nya Elizabethalakutu Ankunytja

³⁹ Ka palula malangka Mary-lu mapalku ulytja karpira ma-pakanu ulparira palumpa waltyja Elizabethanya nyakunytjikitja. Panya paluru pula kurirara nyinangi Jerusalemala ulparira tawunu tjukutjukungka apu murpu tjuṭangka ngururpa. ⁴⁰ Palu Mary-nya wala pulka nguwanpa ankula ankula tjintu maŋkurnguru ngura panya palula wirkanu munu pulampa walingka tjarpala Elizabethanya nyakula wangkara ampura pukularingu. ⁴¹ Ka Mary-lu wangkanyangka Elizabethaluu kulinu palula tjuningka unngu iti pulkara urinyangka. Ka nyara palula arangka Kurunpa Milmilnga Elizabethala tjarpangu munu tjukarurungku nintinu wangkanytjaku, ⁴² ka pulkara pukularira mirara wangkangu alatji, “Mama God, wirungkun minyma nyanga Mary-nya ngurkantanu munun pukulmanu minyma kutjupa uwankarangka waintara, munun iti panya Mary-lu ngula kanyintjanya nyuntu pukulmara kanyilku. ⁴³ Ngayuluṇa minyma pulka wiya, tjukutjuku nyinanyi, ka nyangatja nyaaku Mayatjaku ngunyjtju ngayulakutu pitjangu pulkakutu-palku? Palu palya, pulkaraṇa pukularinyi palumpa. ⁴⁴ Ka nyuntu panya kuwari wirkara wangkanyangka ngayulu kulinu ngayula unngu iti pukularira urinyangka. ⁴⁵ Ka palan nyuntu kuļu pukulpa ngaranyi panya nyuntu Mayatjalu wangkanyangka kulira mulamularingu munu palan paṭanı paluru wangkanytja utiringkunytjaku.” Alatji Elizabethaluu Mary-la wangkara pukularingu.

Mary-lu Godanya Mirawaninytja

⁴⁶ Ka Mary-lu alatji wangkangu, “Ngayuluṇa kuwari pulkara alatjitu mirawaṇinyi Mayatjanya, ⁴⁷ Munuṇatju palumpa pulkara pukularinyi, nganampa God panya Wankarunkupaiku.

⁴⁸ Panya paluruṇitju ngurkantanu tjukutjuku nyinanyangka munuṇi nyanga nyakunytjatjanungku pukulmanu. Kaya nyanganguru aŋangu tjuṭangku ngayunya rawangku kulilkul wangkara alatji, ‘Mulapa minyma nyanga palunya Godalu pulkara pukulmanu.’

⁴⁹ Panya Godalu witulya pulkangku ngayuku pulka mulapa palyaṇu. Nyara paluru wiru mulapa.

- 50 Munu aŋangu tjutangku palunya rawangku kulinnyangka paluru titutjarangku alatjitu ngaltunytjungku kanyilpai aŋangu uwankara, munu aŋangu kutjupa palula tjanala małatja tjuṭa kułukulu.
- 51 Munu paluru kañany-kañanyaripai tjuṭa wililytjingalpai witulya pułkangku tjananku walytjangku kulira palyannyangka.
- 52 Munu paluru alatjitu mayatja pułka tjuṭa pauntjingara tjarulpai, munu tjukutjuku tjuṭa katulpai pułka katu nyinanytjaku.
- 53 Munu paluru paltjatjiratja tjuṭa paltjalpai wiru tjuṭa ungkula, munu mani pułkatjara tjuṭa paira iyalpai maralpa ankunytjaku.
- 54-55 Paluru panya ngañmanytu kalkunu nganampa tjamu tjuṭa Aipuramanya tjananya, ngaltunytjungku kanyintjikitjangku munu panyalanya titutjarangku mukulyangku kanyini nganananya, Aipuramaku walytjapiti małatja uwankara kułukulu.
Uwa, mulapa paluru nganananya Israelkunu tjuṭa palumpa walytjapiti ngaltunytjungku aṭunymara titutjarangku kanyilpai.”
- Alatji Mary-lu Godanya walkura wangkangi.

56 Munu paluru palumpa walytjangka Elizabethala piṛa mañkurpa nyinangi, munu nyinara wiyaringkula palulanguru małakulta anu alinytjara ngura walytjakutu.

Johnnga Iti Wirkankunytja

57-58 Ka małangka Elizabethalu iti kanyintjaku ilaringu, ka paluru katja kanyinu. Munu paluru pułkara pukularingu Godalu palunya wirungku ungkunyangka. Kaya malpa tjuṭa walytja tjuṭa kułukulu nyangatja kulira palula tjunguringkula pukularingu uwankara.

59 Munuya palulanguru tjintu 7 ngarala wiyaringkunyangka małangka aŋangu tjuṭa piṛku tjunguringu wati tjukurtjarangku iti palunya watintjaku*. Munuya palunya kulinngi mamangka iningka tjunkunytjikitjangku, Tjakarayala. 60 Palu palumpa ngunytjungku wangkangu, “Wiya alatjitu, tjitji nyanga paluru ini Johnnga.”

61 Kaya aŋangu tjutangku wangkangu palula, “Palu nyuntumpa walytja kutjupa ini nyanga paluru nyinanytja wiyaṭu.” 62 Munuya palumpa mamangka mařangku tjapiningi, “Tjitji nyangatjan ini ngananya tjunkuku? Tjakultjuralanya kala kulila.”

63 Ka Tjakarayalu marangku wangkangu nyiri ungkunytjaku. Kaya mantjira palunya ungu. Ka paluru walkatjunu nyiri nyara palula alatji, “Paluru ini Johnnga.” Kaya uwankarangku nyakula urulyaraṇu. 64 Ka palulanguru Tjakarayanya tjaā mapalku alaringu munu wangkapairingu, munu paluru Godanya pułkara mirawańingi. 65 Kaya palumpa malpa tjuṭangku palunya nyakula urulyaraṇu. Ka tjukurpa nyanga paluru manta Judeala ngura winkingka lipiringu. 66 Kaya ngura uwankarangka aŋangu tjutangku tjukurpa nyanga palunya kulinu munuya rawangku kulinngi, “Mulapa Godalu tjitji nyara palunya marangku kanyini. Ka yaaltji-yaaltji paluru nyinaku ngula pułkaringkula?” Alatji tjana wangkara kulinngi.

Tjakarayalu Godanya Walkuntja

67 Ka Kurunpa Milmilngā tjarpangu wati panya Tjakarayala, iti panya Johnku mamangka munu palunya kuranyukutungku nintinu, ka paluru pułkularira wangkangu alatji,

68 “Walkunmala Godanya, Israelkunu tjuṭa kanyilpaina, panya paluru pitjangu palumpa walytja tjuṭa wankarunkunytjikitja.

* 1:59 Panya tjakangkuya alatji palyalpai tjanampa arangka.

- 69** Godalulampa iyañu wankarunkupainya witulya pulkatjara.
 Ka wankarunkupainya nyanga paluru wati panya Davidaku walytjapitinguru utiringu. Panya iriti mulapa nyinangi Davidanya Godaku warkaripai.
- 70-71** Panya Godalu iriti kalkunu nganañanya wankarunkunytjikitjangku mirpantju tjutangku pungkunytjaku-tawara,
 ka panyaya palumpa wangkatjara tjutangku palula kulira nyiringka walkatjunu paluru kalkuntjitja nganaña kulintjaku.
- 72** Munu panya wangkangu nganampa tjamu irititja tjutangka Aipuramala tjanala palunya tjananya ngaltunytyungku kanyintjikitjangku munu paluru kalkuntjatjanungku palyañu alatjiu munu kanyiningi tjananya.
- 73-75** Panya paluru iriti mulapa Aipuramala tjanala kalkunu alatji wangkara,
 ‘Nyurampa mirpantju tjutangku nyuranya pungkunytjikitjangku kulinnyangkaña nyuranya ngalkilku nyura wankaru nyinanytjaku munu ngayunya rapangku wal kuntjaku tjanampa nguluringkunytja wiyangku.
 Nyara palulanguru nyura ngayula mirangka palyanyku nyinaku tiutjara.’”
- 76** Munu Tjakarayalu piruku katjaku tjukurpa ngapartji wangkangu alatji,
 “Nyuntu God Katutja Pulkaku wangkatjara nyinaku,
 munun Mayatjanya pitjanytjaku patara kuranyurira nganmanytju tamalmara wantiku anangu tjutangku kulira palumpa ala-ala patara nyinanytjaku.
- 77** Nyuntu tjanala nganmanytju tjakultjunkuku alatji, ‘Godalu nyuranya kura tjuta palyantjitjanguru pungkuwiyangku kalypangku wantiku munu palulanguru nyuranya wankarunkuku.’
- 78** Uwa, mulapa Godanya nganampa ngaltunytyungku mukulya pulka mulapa nyinanyi.
 Panya tjirirpingku mungawinki pakara manta uwankara utilpai,
 palu purunytyungku ilkareringuru pitjanytjalu nganañanya kurunpa unngu utilku.
- 79** Panya nganaña mungawalurungka nyinanyi munula iwara palyangka ankunytjikitjangku putu kulira ilunytykitja kutju ngaranyi.
 Palu panya Godalu ilkareringuru tili pulka iyalku, ka nganañanya utilku iwara palyangka Godala tjungu pilunpa pukulpa ankunytjaku.”
- Nyanga palunya Tjakarayalu Kurunpa Milmiltu nintinnyangka wangkangi.
- 80** Ka palumpa katja Johnnga tjitji pulkaringu, munu Godanya kurunpa winkingku kuliningi. Munu paluru ngula pulkaringkula anu ilytjikutu munu ilytjingka nyinangi kumpilpa, munu ngula utiringu Godaku tjukurpa wangkanytjikitja Israekunu tjutangka.

2

Jesunya Iti Ngarinytja (Matthew-ku 1:18-25)

¹ Ka nyara palula arangka wati ini Tjiitja Ukatjanya mayatja pulka nyinangi ngura panya ini Rome-ala munu ngura winki mulapa mayatjangku tjungura kanyiningi Israeltja kulu. Wati nyanga paluru mayatja uwankarangka wangkapai, kaya wanganarangku kulipai palula. Ka Johnnga iti nyinanyangka mayatja nyara paluru anangu winki kanamilantjikitja mukuringangi, munu tjananya uwankara wituningi ngura

uwankaranguru ankula ngura walytjangka walytjangka ini nyiringka walkatjunkunytjaku. ² Ka nyara palula arangka wati panya ini Kuriniyatjanya ngura Tjiriyaku mayatja nyinangi. ³ Kaya ngura uwankaranguru anangu winki ngura walytjakutu walytjakutu anangi tjanampa tjamuku ngurakutu ini tjanampa nyiringka walkatjunkunytjikitja.

⁴ Ka Josephanya ngura Nazarethala nyinangi munu ulparira ma-pakanu tawunu walytjakutu ngura ini Bethlehemalakutu, panya ngañmanypa mulapa palumpa tjamu Davidanya iti ngaringu ngura nyara palula, ka palulakutu paluru anu ini walkatjunkunytjikitja. ⁵ Munu katingu Marynya panya palunya kalkuntjatjanungku. Ka Mary-nya paku pulka nyinangi munu ngañmanypa tjuni pulkaringu.

⁶ Munu paluru pula Bethlehemala wirkanu, ka Mary-ku iti wirkankunytjaku ilaringu. ⁷ Ka paluru iti katja kuvari kutju ngurpangku kanyinu, munu mantarangka karpiña pantja-pantjangka ngaritjunu piti ngattingka. Piti nyara paluru panya puluka tjutaku munu tjiipi tjutaku mai tjunkupai ngalkuntjaku. Tjinguru pula walingga payamilařa tjarpanyangka iti wirkanama, palu anangu winkingku ngañmanypa tjarpara wali uwankara anangu, ka palulanguru pulampa ngura wiya ngarangi wali unngu ngarintjaku, ka pula tjulypintja ngaringu pulukaku ngurangka.

Tjiipi Kanyilpai Tjutangka Angeltu Wangkanytja

⁸ Ka ngura nyara palula itingka tawunungka urilta wati tjapata tjutangku tjiipi tjuta atunymara kanyiningi mungangka. ⁹ Ka Mayatjaku angelpa utiringu tjanala munu pitalyti pulka mulatu tjananya irnyara kanyiningi. Kaya urulyarara pulkara nguluringu. ¹⁰ Palu angeltu palula tjanala wangkangu, “Nguluringkunytja wiyangkuya kulinma. Ngayuluña pitjangu nyurala tjukurpa wiru mulapa tjakultjunkunytjikitja anangu uwankaraku, kaya kulira uwankara pulkara pukulariku. ¹¹ Kuvari nyanga Mayatja Davidaku ngurangka iti wirkanu nyuranya wankarunkunytjikitja panya Christanya Mayatjanya.* ¹² Ka nyura ankula ngurila munu nyawa iti nyara palunya mantarangka karpintja puluka tjutaku mai ngaripaingka ngarinyangka. Alatji ngarinyangka nyakula nyura kuliklu, ‘Munta, nyangatja iti panya paluru.’”

¹³ Ka angelpa paluru wangkara wiyingkunyangka malangka angelpa kutjupa tjuta mungiliyi mulapa ilkarininguru ukalingkula palula tjunguringkula tjungungku inma inkara Godanya walikingi alatji wangkara,

¹⁴ “Godanya wiru mulapa nyara ilkariningka nyinanytja panya.

Kayanku mantangka nyanga anangu Godala kulilpai uwankara krunpa pukulpa nyinama.”

¹⁵ Munuya angelpa tjuta inkara wiyingkula malaku anu ilkarikutu, kayanku wati panya tjapata tjutangku wangkangu, “Ala, walala ara Bethlehemalakutu munula nyawa nyanga palunya, panya Mayatjaku angeltulanya kuvari tjakultjunyu.”

¹⁶ Munuya pakara warpungkula anu walikutu munuya walingga mawirkara nguriña nyangu Mary-nya pulanya Josephanya pulukaku ngurangka nyinanyangka munuya iti kuļu pantja-pantjangka ngarinyangka nyangu pitingka pulukaku mai ngaripaingka. ¹⁷⁻¹⁸ Munuya wati panya tjapata tjutangku iti palunya nyakula Josephala pulala tjakultjunyu tjukurpa panya angeltu tjanala tjakultjunkunytja iti nyanga palunyatjara, munuya iti nyakunytjatjanungku anangu tjutangkalta tjakultjunangi. Kaya kulira

* ^{2:11} Ini Christanya wangkanyi Wankarunkupainya Godalu panya kalkuntjanya.

urulyaraṇu tjiipi kanyilpai tjutangku tjanala wangkanyangka. ¹⁹ Ka Mary-lu tjukurpa nyanganpa rawangku unngu kuliningi. ²⁰ Kaya palulanguru wati panya tjapata tjutangku Mary-nya pulanya wantikatira malaku anu munuya iwarangka ankula inma inkara Godanya pulkara wal̄kura pukularingi wiru kulintjatjanungku munu nyakunytjatjanungku kulu. Munuya wangkangi, “Mulapa angeltu nganañala tjukarurungku tjakultjunu.”

²¹ Ka tjintu 7 ngarala wiaringkunyangka mungawinki iti panya palumpa tjintu wirkanu palunya watintjaku wati tjukurtjarangku.* Ka pula palunya ininu Jesunya, panya ini nyanga palunya nganmanytju wangkangu angeltu Mary-la.

Jesunya Timpulakutu Katinytja

²²⁻²³ Ka ara panya irititja ngaranyi Godalu Mosela nganmanytju wangkanytja nyanga alatji, “Utiya katja nganmanyitja uwankara ngayunya ungama ngayukurintjaku.” Ka Josephalu pula ara panya palunya kulinu munu pira kutju wiaringkunyangka iti Jesunya Jerusalemalakutu katingu Godanya ungkunytjikitjangku. ²⁴ Munu pula tjulpu kutjara kulu katingu. Panya Godalu Mosela ara kutjupa minyma ngunyitju tjutaku nganmanytju wangkangu nyanga alatji, “Minyma ngunyitjungku iti kanyintjatjanungku uti pira kutju wiaringkula tjulpu kutjara katira wati tjukurtjara ungama tjinguru kuukuuku kutjara munta aralapalpalpa kulunypa kutjara, ka tjukurtjarangku tjulpu panya kutjara pungkula Godanya ungkuku, ka palulanguru minyma paluru palyaringkuku munu para-ngaramalta.”* Ka pula ara nyanga kutjara kulinu munu pula Jesunya katingu timpulakutu tjulpu kutjara kulu.

²⁵⁻²⁶ Ka nyara palula arangka wati tjilpi kutju nyinangi Jerusalemala, wati ini Tjimiyanna. Nyanga paluru wiru mulapa tjukaruru nyinangi Kurunpa Milmilngatjara. Munu paluru Godaku mulamularingkula rawatu pañaningi munu kuliningi panya ngula Godalu Israelkunu tjuta wankarunkuku. Panya nganmanytju Kurunpa Milmiltu tjilpi panya palula wangkangu alatji, “Panya Mayatja Godalu nganmanytju iriti mulapa kalkunu Wankarunkupainya nyuralakutu iyantjikitjangku. Kan nyuntu nyara palunya nyakunytjikitja wanka nyinaku munun nyakula kutju iluku.” Ka Tjimiyantu nyangatja kulira pañaningi rawa alatjitu ala-ala panya paluru Wankarunkupainya pitjanytjaku.

²⁷ Ka tjintu panya palula Jesunya ungkunytjikitjangku katinyangka Kurunpa Milmiltu wati panya palunya nintinu timpulakutu ankunytjaku. Ka paluru ankula tjarpara nyinangi timpula unngu munu mulapatu nyangu Mary-lu pula Josephalu iti Jesunya Godanya ungkunytjikitjangku ngalya-katinyangka. ²⁸ Munu paluru iti panya palunya nyakula ampura pulkara pukularingu, munu Godanya wal̄kuningi wangkara,

²⁹⁻³¹ “Uwa Mayatja God, kuwariñatju ngayulu pukularingu alatjitu, panya nyuntu mulapa kuwari ngayula wirkakatingu Wankarunkupainya, panya nyanga palunyan nganmanytju kalkunu.

Kaña kuwari nyanga palunya nyangu kurungku nyuntu panya kalkuntjanya,

* ^{2:21} Alatjiya tjakangku ara irititjanguru palyalpai iti tjukutjuku wati tjukurtjara katira ungkula, panya alatji Godalu wangkangu tjana alatjingantjaku. * ^{2:24} Iriti minymangku iti kanyintjatjanu pira kutju wali unngu kutju nyinapai. Munu palula malangka tjulpu kutjara timpulakutu katira Godanya ungkula kutju palya urulta pakara para-ngarapai.

panya nyuntu aŋangu uwankara wankarunkunytjaku iyantjanya.
Kaŋa palya ilunyi nyuntu panya kalkuntjtjangka.

³² Nyanga paluru tili pulka mulapa nyinaku aŋangu Jew wiya tjuṭaku tjana manta winkingka Godanya uti nyakunytjaku.

Kaya paluru tjana tili palunya nyakula mulamularingkula Israelkunu tjuṭa pulkara mirawaniku nyuntumpa panya waltyjapiti.”

Alatji Tjimiyantu Godanya wangkara walkuningi munu pukularingi.

³³ Ka tjlipi panya paluru alatji wangkanyangka iti panya palumpa mamangku ngunytjungku kulira urulyaraṇu. ³⁴ Ka Tjimiyantu pulala ngapartji wangkangu alatji, “Godalu nyupalinya pukulmanama munu iti nyanga palunya kuļu.” Munu paluru piruku wangkangi minyma panya ngunytjungka alatji, “Tjitji nyanga palunya Godalu iyanu Israelkunu tjuṭangka tjukurpa wangkanytjaku. Ka tjarangku kulira wankaringkuku, palu tjara kutjupangku kulira wantiku munu ilura kawankatiku. ³⁵ Panya paluru utilku aŋangungku unngu kulintja uwankara. Ka Mary, nyuntu nyakula tjituru-tjitururiku munun tjuni kaṭakatiku.” Alatji Tjimiyantu Mary-la wangkangu.

³⁶⁻³⁷ Ka minyma wanakala kutju ini Annanya nyinangi nyara palula munu timpulangka unngutu ngarangi. Panya palumpa mama ini Panuwalnga nyinangi ngañmanypa, ka palumpa waltyja tjuṭa wati ini Atjalanguru nyinangi panya iriti mulapa Atjanya wati Jacobaku katja nyinangi, pala palumpa. Ka minyma panya palumpa kuri ngañmanypa yiya 7 kutju palula tjungu nyinanytjatjanu ilungu. Ka nyara palulanguru minyma panya paluru rawa mulapa nyinangi munu pamparingkula yiya 84-ringu. Munu minyma panya paluru wangkatjara Godaku tjukurpa tjakultjunkupai nyinangi munu paluru timpulangka rawa nyinapai wantikatinjtja wiya munu Godala tjapilpai mungangka kalala kuļu, munu paluru kutjupa-aṛa mai wantipai Godala pulkara tjapintjikitjangku.

³⁸ Ka nyara palula arangka Mary-nya pula timpulangka ngaranyangka minyma panya paluru wirkana pulala munu iti Jesunya nyakula pukularira Godanya walkuningi. Panya aŋangu kutjupatjara rawa paṭanangi Israelkunu tjuṭa wankarunkunytjikitja pitjanyangka nyakunytjikitja. Ka minyma panya paluru aŋangu nyanga palula tjanala wangkangi alatji, “Nganana panya rawa mulapa paṭanangi Wankarunkupainya pitjanytjaku ngura nyanga Jerusalemalakutu. Kaŋa nyurala kuwari tjakultjunanyi panya paluru pitjangu alatjiu Mary-ku pulampa katja.” Alatji Annalu aŋangu tjuṭangka tjakultjunu paluru nyakunytjatjanungku.

Nazarethalakutu Malaku Ankunytja

³⁹ Ka nyara palulanguru Josephalu pula Mary-lu uwankara palyara wiyanu Moseku tjukurta ngaranytjitetja. Munu pula palula malangka timpulangka warķa wiyaṛa anu małaku ngura Nazarethalakutu. ⁴⁰ Ka tjetji panya paluru pulkaringkula kuṇpuringu munu ninti pulka mulararingu. Ka Godalu tiṭutjarangku palunya pulkara mulapa pukulmanangi.

Jesunya Timpulangka Nyinanytja

⁴¹ Ka yiya kutjupa yiya kutjupa Jesuku ngunytju pula Josephanya rawa ankupai Jerusalemalakutu inma panya Katuwanu Ankunytja kulintjikitja.* ⁴² Ka Jesunya panya nguwanpa pulkaringu munu yiya 12-aringu, munuya paluru tjana kuļu inma nyara palulakutu anu Jerusalemalakutu.

* ^{2:41} Ara nyanga Katuwanu Ankunytja kulintjikitjangku nyawa Exodus-ala chapter 12 munu verse 21-nguru.

⁴³ Munuya inmangka nyinara wiyingkula ma-pakañu ngura walytjakutu. Palu tjitji panya Jesunya Jerusalemala nyinangi ngunytjungka tjungu ankunyta wiya. Ka Josephanya pula watarku anu. ⁴⁴ Panya pula alatji kuliningi, “Tjinguru malpa kutjupa tjutangka anu.” Munu pula pitjalira mungartjirira ngura tjunu ngarintjikitjangku munu pula puñu nyangangi. Munu pula walytja tjutangka malpangka kulu tjapiningi. ⁴⁵ Palu puñu alatjiñu pula nguriningi munu pula ngarira tjinturingkula malaku anu Jerusalemalakutu Jesunya ngurintjikitja. ⁴⁶ Munu pula palulanguru piruku munga kutju ngaringu Jerusalemala wirkara, munu mungawinki pakara Jesunya piruku para-nguriningi munu pula nyangu timpula unngu nyinara wangkanyangka wati tjilpi nintipuka tjutangka. Ka Jesulu tiana tjukurpa wangkanyangka kuliningi munu kulira tjanala tjapiningi. ⁴⁷ Kaya paluru wangkanyangka pulkara urulyaraningi, “Ai, tjitji nyangatja nintipuka mulapa, munulanya nintingku nganañala tjapini.” ⁴⁸ Ka palumpa ngunytjungku nyakula urulyaranu munu wangkangu, “Katja, nyaakun kumpira nyinangi? Nyanga ngali nyuntunya puñu nguriña nguriña pulkara tjituru-tjitururingu.”

⁴⁹ Ka Jesulu nyangatja kulira urulyaraningi munu wangkangu, “Palu nyaaku nyupali wanyu ngayuku nguriningi? Nyupali kulintja wiyat panya ngayulu Mamaku walingka nyinanyangka?” ⁵⁰ Ka pula puñu kulinu alatji wangkanyangka.

⁵¹ Ka palulanguru Jesunya pulala tjunguringkula anu Nazarethalakutu munu paluru pula wangkanyangka wanganarangku kulipai. Ka palumpa ngunytjungku unngu kuliningi kuruntu tjukurpa uwankara, paluru panya wangkanyta tjuta kulu. ⁵² Ka Jesunya rawa ngurangka nyinangi munu wati pulkaringkula nintipuka mulararingu. Ka Godanya palumpa pulkara pukularingu munu anangu tjuta kuñu palumpa pukularingu.

3

Johntu Wangkanytja Anangu Tjutangka (Matthew-ku 3:1-12; Markaku 1:1-8; Johnku 1:19-28)

¹ Ka nyara palulanguru wati ini Tjiitja Tapiriyanya Rome-aku mayat-jaringu munu yiya tjuta nguwanpa mayatja nyinangi nampa 15. Munu palu purunypañu anangu ngura winitja mayatja pulkangku kanyiningi Israelkunu tjuta kuñukulu. Ka ngura tjutangka mayatja tjukutjuku tjuta kuñu nyinangi anangu nguratja tjuta tjukarurungku kanyintjikitja Rome-aku panya mayatja pulkaku. Panya wati ini Pontius Pilate-anu mayatja tjukutjuku nyinangi manta ini Judeaku. Ka wati ini Iratanya mayatja tjukutjuku nyinangi manta ini Galileeku. Ka palumpa kuta Philipanya manta kutjara kutjupaku mayatja tjukutjuku nyinangi manta ini Ituriyaku munu Turakanaitaku. Ka wati ini Latja-niyatjanya mayatja tjukutjuku nyinangi manta ini Apiliniku. ² Ka wati kutjara ini Anatjanya pula Kayapatjanya anangu Jew tjutaku tjukurtjara pulka nyinangi manta panya Judeala.

Ka nyara palula arangka wati Johnnga, Tjakarayaku panya katja, ilytjingka nyinangi, ka Godanya palula wirkana munu palunya witunu anangu tjutangka palumpa tjukurpa wangkanytjaku. ³ Ka Johntu Godalu wangkanyangka kulira anu munu karu urutjarangka ini Jordanta itingka ngura tjukutjuku tjutangka Godaku tjukurpa para-wangkangi, munu tjanala wangkangi alatji, “Piiwiwaya kura nyinanytjatjanu munuya kampa kutjuparira kura piruku palyantja wiyangku wantima, kaña

nyuranya ḫṛungka tjarpatjura baptise-katiku, ka Godalu nyuranya kura palyantjitjanguru kalypangku pungkuwiyangku wantiku.”

⁴⁻⁵ Panya iriti wangkatjara Aitjayalu nyiringka walkatjunu alatji, “Kutjupangku ilytjingka aŋangu tjuṭangka mirara wangkanyi alatji, ‘Mayatjakuya ngañmanypa ritiriwa paluru pitjala tjukurpa wangkanyangka wangañarangku kulintjikitja. Panya watingku iwara tjukarurulpai mayatja pulka maławanu pitjanyak, palu purunypa nyura tjukarururingkula patanma Mayatjalu pitjala wangkanyangka wangañarangku kulintjikitja.

⁶ Kaya aŋangu uwankarangku nyakuku Godalu palyantja aŋangu tjuṭa wankarunkunytjikitjangku.’” *

⁷ Kaya aŋangu winki mulapa pitjangu Johntakutu minangka baptise-katintjaku. Ka paluru tjanala wangkangu alatji, “Nyaaku nyura baptise-katintjaku pitjangu? Nyura wanyu mulapa kura wantira kampa kutjuparingu? Wiya, nyura uwankara liru tjuṭa aŋangu tjuṭa ngunti kuralpai! Nyura tjinguru ngunti kulini ngayulu nyuranya ḫṛungka tjarpatkunkunytjitjanguru Godanya nyurampa kalyparingkunytja-palku. Palu wiya, Godanya nyurampa pulkara mirpanarinyi. ⁸ Nyura uti mulamulangku kura wantira kampa kutjuparima munuya palyanyku nyinara wiru tjuṭa kutju palyanma, ka nyara palulanguru wiru tjuṭa palyannyangka nyakula Godanya nyurampa pukulariku. Palu nyura tjinguru kulini alatji, ‘Nganañanya Godalu kura ngurkantankunytja wiyangku wantinyi panya nganana Aipuramaku pakalipiti. Palulangurulanya pikantankuwiyangku wantiku.’ Palu wiya, nyura ngunti kulini. Palu puli tjuṭa nyanga nyawa! Tjinguru Godalu mukuringkula apu nyangannguru Aipuramaku pakali tjuṭa palyanma. ⁹ Kulilaya! Panya wati kaana kanyilpaingku puṇu tjuṭa maitjararingkunytjaku pakaltjingalpai, palu puṇu kutjupa tjuṭa kuraringkula tiṭutjara mai wiya ngaranyangka nyakula paluru kaṭara waṇipai warungka, ka palu purunypa Godalu aŋangu tjuṭa tiṭutjara kura nyinanyangka nyakula tjananya paira iyalku warukutu. Ka pala palulatwara nyura uti Godalawaru tjukaruru palyanyku nyinama.” Alatji Johntu aŋangu tjuṭangka wangkangi.

¹⁰ Kaya tjukurpa nyanga palunya kulintjatjanungku ngapartji palula tjapinu, “Kala wanyu nyaalku?”

¹¹ Ka paluru wangkangu tjanala, “Nyura mantara kutjara kanyiṛampa uti kutju ungama aŋangu kutjupa panya mantara wiyatjaranya. Munu nyura mai pulka kanyiṛampa uti munytjangku ungama aŋangu kutjupa tjuṭa kuļu panya mai wiyatjara tjuṭa.”

¹² Kaya wati mani mantjilpai tjuṭangku kuļu pitjala palula kulinigi,* panya tjana kuļu mukuringangi baptise-katintjaku. Munuya tjukurpa nyangatja kulira palula tjapinu, “Nintilpai, kala nganañampa nyaalku?”

¹³ Ka tjanala wangkangu, “Nyura piṛuku tjanalanguru ngunti mani pulka waintara mantjilwiyangku wantima, munuya mayatjangku wituntjtja kutju palyanma.”

¹⁴ Kaya wati tjaultji tjuṭangku ngapartji palula tjapinu, “Ka nganaña ngapartji nyaa palyalku?”

* ^{3:6} Aitjayaku 40:3-5 * ^{3:12} Wati mani mantjilpai tjuṭa Rome-aku mayatjaku waṛkaripai munuya palumpa aŋangu tjuṭangka tax mani mantjilpai. Kaya aŋangu tjuṭa tjanampa mukuringkupai wiya alatji.

Ka tjanala wangkangu, “Anangu kutjupangka ngunti pauntjingara mani mantjilwiyangku wantima munu ngunti kuranmankuwiyangku wantima munu war̄kanguru mani ungkunyangka pukul̄tu mantjinma, pulka-tjiratjangku waintara wangkanytja wiyangku.”

¹⁵ Nyanga alatji wangkanyangkaya anangu tjutangku kulinu palunya alatji, “Awa, nyanga paluru-manti wati panya kalkuntjitja palurumpa wirkanu Christanya panyampa, panya paluru pitjanytjaku ngarangi.”

¹⁶ Palu Johntu tjakultjunangi anangu uwankarangka alatji, “Ngayuluña nyuranya urungka baptise-katinyi palu kutjupa pitjanyi ngayula malangka. Nyara paluru pulka mulapa ngayula munkara waintara mulapa. Panya wati war̄kangku palumpa mayatjaku tjinatja araltjankupai, palu nyangatja mayatja pulka mulapa pitjanyi, kaña ngayulu kura nyinara pulkara kunṭaringanyi palumpa tjinatja pupakatira araltjankunytjaku. Nyara paluru nyuranya baptise-katiku Kurunpa Milmilnga nyurala tjarpatjura ka war̄ungku purunytpu nyuranya kampara tjukarurulku.

¹⁷ Panya paluru kuwari ila ngaranyi anangu uwankara tjarantjikitja, panya minymangku mai kañira maun̄talpa tjunkupai munu unytjunytpu ma-wanipai, palu purunypa paluru pitjala tjaralku munu palumpa walytja tjuṭa palumpa ngurangka tjunkuku munu kuralpai tjuṭa waru pulkangka wañiku waru tiṭutjara kampapaingka.”

¹⁸ Alatji Johntu tjukurpa wangkara utiningi tjana kulira piiwiyarungunytjaku. Munu tjukurpa kutjupa kutjupa tjutawanungku paluru tjanala rawangku wangkangi tjana kulintjaku, munu tjukurpa palya kuļu tjakultjunangi panya Godanya pañani anangu tjuṭa wankarunkunytjikitja. ¹⁹ Munu paluru kutjupa-ara mayatja pulka Iratanya anangura tjukarurungku wangkangu alatji wangkara, “Nyuntu kurangku nyuntumpa inkañi altingu nyuntumpa kutaku kuri Iratiyanya.” Munu paluru kura kutjupa kutjupa tjuṭa kuļu utira wangkangu Iratalu palyantja tjuṭa. ²⁰ Ka palulanguru Iratanya miilaranu munu piruku kura pulka mulapa palyanu munu Johnnga tjailangka witira tjarpatjunu.

Johntu Jesunya Baptise-katinytja (Matthew-ku 3:13-17; Markaku 1:9-11)

²¹ Munu Johntu anangu tjuṭa urungka baptise-katira Jesunya kuļu baptise-katingu. Ka paluru Godala mamangka tjapinnyangka ilkari alaringu, ²² ka Kurunpa Milmilnga palulakutu ukalingu tjulpu kuukuuku purunypa. Ka ilkaringuru wangkangu alatji, “Nyuntu ngayuku katja wiru mulapa. Kaña nyuntumpa pukulpa mulapa nyinanyi.”

Jesuku Walytjapiti Nganmanyitja Tjuṭa (Matthew-ku 1:1-17)

²³ Ka nyara palula arangka Jesunya yiya 30-ringu munu war̄kalta mapalyanu munu tjukurpa para-wangkangi anangu tjutangka. Kaya anangu uwankarangku kuliningi palunya Josephaku katja-palku nyinanyangka.

Palu Josephanya panya wati ini Iiliku katja, ²⁴ ka panya Iilinya wati ini Matjataku katja, ka panya Matjatanya Leviku katja, ka Levinya Milkaiku katja, ka Milkainya Tjanaiku katja, ka Tjanainya Josephaku katja, ²⁵ ka Josephanya Matatjayaku katja, ka Matatjayanya Aimatjaku katja, ka Aimatjanya Nayamaku katja, ka Nayamanya Itjiliku katja, ka Itjilinya Nakaiku katja, ²⁶ ka Nakainya Maatjaku katja, ka Maatjanya Matatjaiku katja, ka Matatjainya Tjiminku katja, ka Tjiminnga Tjatjikaku katja, ka Tjatjikanya Tjautaku katja, ²⁷ ka Tjautanya Tjuwananku katja, ka Tjuwanannga Ritjaku katja, ka Ritjanya Tjirapapilku katja, ka Tjirapapilnga Tjiiltiilaku katja,

ka Tjiiltiilanya Neřiku katja, ²⁸ ka Neřinya Milkaiku katja, ka Milkainya Atiku katja, ka Atinya Katjamku katja, ka Katjamnga Ilmatamaku katja, ka Ilmatamanya Uurku katja, ²⁹ ka Uurnga Tjatjuwaku katja, ka Tjatjuwanya Iliyatjaku katja, ka Iliyatjanya Tjarimku katja, ka Tjarimnga Matjataku katja, ka Matjatanya Leviku katja, ³⁰ ka Levinya Tjimiyanku katja, ka Tjimiyannga Judah-ku katja, ka Judah-nya Josephaku katja, ka Josephanya Tjaunamaku katja, ka Tjaunamanya Iliya-kimaku katja, ³¹ ka Iliya-kimanya Miliyaku katja, ka Miliyanya Miinaku katja, ka Miinanya Matatjaku katja, ka Matatjanya Nathanku katja, ka Nathannga Davidaku katja, ³² ka Davidanya Jesse-ku katja, ka Jesse-nya Uupitaku katja, ka Uupitanya Pawatjaku katja, ka Pawatjanya Tjamanku katja, ka Tjamanna Naatjanku katja, ³³ ka Naatjannga Amina-tapaku katja, ka Amina-tapanya Adminku katja, ka Adminnga Arniku katja, ka Arninya Iitjiranku katja, ka Iitjarannga Piritjiku katja, ka Piritjinya Judah-ku katja, ³⁴ ka Judah-nya panya wati ini Jacobaku katja, ka Jacobanya panya Isaacaku katja, ka panya Isaacanya Aipuramaku katja, ka Aipuramanya Tairaku katja, ka Tairanya Nayaku katja, ³⁵ ka Nayanya Tjirakaku katja, ka Tjirakanya Ruuku katja, ka Ruunya Pilikaku katja, ka Pilikanya Iipaku katja, ka Iipanya Tjiilaku katja, ³⁶ ka Tjiilanya Kainanku katja, ka Kainannga Apakataku katja, ka Apakatanya Tjimaku katja, ka Tjimanya panya wati ini Noah-ku katja, ka panya Noah-nya Lamikaku katja, ³⁷ ka Lamikanya Mitjutjilaku katja, ka Mitjutjilanya Inakaku katja, ka Inakanya Tjaritaku katja, ka Tjaritanya Maalalilku katja, ka Maalalilnga Kinanku katja, ³⁸ ka Kinannga Inatjaku katja, ka Inatjanya wati ini Tjiitjiku katja, ka Tjiitjinya wati panya Adamaku katja, ka Adamanya panya Godaku katja nyinangi. Nyanga paluru tjana Josephaku walytjapiti iritinguru nyinakatintja wanapari wanapari ngarangi.

4

Jesunya Mamu Satantu Arkantja (Matthew-ku 4:1-11; Markaku 1:12-13)

¹ Ka Jesunya baptise-katinyangka malangka karu Jordantanguru malaku anu Kurunpa Milmilngatjara, ka Kurunpa Milmiltu palunya katingu ilytjikutu. ² Ka ilytingka nyinanyangka palunya mamungku arkaningi kurantjikitjangku tjintu 40. Ka paluru mai ngalkuwiya alatjitu nyinangi tjintu nyara palula tjanala munu malangkalta paltjatjiratjaringu.

³ Ka Satantu palula wangkangu alatji, “Mulapa nyuntu Godaku katja nyinanyi? Wanyu puli nyangangka wangka mairingkunytjaku.”

⁴ Palu Jesulu wangkangu, “Wiya, panya nyiringka walkatjunkunytja ngaranyi alatji,

‘Anangungku mai kutju rawangku ngalkula puṭu wanka tiṭutjara nyinaku Godala tjungu.’” *

⁵ Ka piṛuku Satantu palunya ngura katutja kutjupakutu katingu munu katunguru warpungkula nintinu ngura uwankara manta winkitja. ⁶ Munu wangkangu palula, “Nyuntu ngayunya pupakatira walkunyangkampa, ngayulu nyuntunya tjunkuku ngura nyanga uwankara mayatjarira kanyintjaku. Panya nyanganpa uwankara ngayuku, kaṇa ngayulu mukuringkula ngurkantara tjunkupai kutjupangku mayatjangku kanyintjaku. ⁷ Wanyuni ngayunya pupakatira walkunma, kaṇa ngura nyanganpa uwankara nyuntunya ungguku.”

* **4:4** Deuteronomy 8:3

⁸ Ka Jesulu wangkangu, “Wiya, panya nyiringka walkatjunkunytja ngaranyi alatji,

‘Mayatja Godanya kutjuya walkunma munuya palula kutju wan-ganarrangku kulinma.’ ” *

⁹⁻¹¹ Ka Satantu piruku palunya katingu Jerusalemalakutu, munu ngaratjunu timpula katu mulapa munu wangkangu alatji, “Mulapa nyuntu Godaku katja nyinanyi? Wanyu wararakati nyanganguru, panya nyiringka walkatjunkunytja alatji ngaranyi,

‘Godalu palumpa angelpa tjuta witulku nyuntunya atunymara kanyint-jaku,

kaya nyuntunya marangku katura kanyilku punkannyangka apungku tjina katantankunytjaku-tawara.’ ” *

Alatji mamungku palunya wangkangu arkantjikitjangku.

¹² Palu Jesulu wangkangu, “Wiya, panya nyiringka walkatjunkunytja ngaranyi alatji,

‘Nyura uti Mayatja Godala ngunti tjpintja wiyangku wantima paluru witulya pulkangku palyannyangka unytjungku nyakunytjikitjangku.’ ” *

¹³ Ka Satantu palunya kutjupa kutjupa tjutawanungku arkara wi-yaringkula unytjungku wantikatira anu ngula malaku pitjala piruku arkantjikitjangku.

Jesulu Tjukurpa Wangkanytja Ngura Galileela

(Matthew-ku 4:12-17; Markaku 1:14-15)

¹⁴ Nyara palula malangka Jesunya malaku anu Galileelakutu, ka Kuru-runpa Milmilnga palula tjungutu ngarangi munu witulyanangi palunya tjukurpa wangkanytjaku munu pikatjara palyarunguntjaku kuлу. Kaya ngura winitjangku kuliningi palunyatjara tjakultjunkunyangka. ¹⁵ Panya paluru ngura tjutangka wali inmatjangka tjarpala anangu tjutangka tjukurpa nintilpai. Kaya anangu uwankarangku pulkara pukularira palunya mirawaningi.

Ngura Walytjangka Jesunya Wantinytja

(Matthew-ku 13:53-58; Markaku 6:1-6)

¹⁶ Ka Jesunya Nazarethala malaku wirkanu ngura panya walytjangka. Paluru panya ngura nyara palula pulkaringku, munu paluru Saturday-nga, tjintu panya pakuiyaringkupaingka, wali inmatjangka tjarpala nyinapai, anangu tjutangka tjungu. Munu Saturday kutjupangka paluru tjarpala nyinakatingu, ka kutjupangku palunya altingu, nyiringuru tjukurpa nyakula wangkanytjaku. Ka paluru pakara ngarangu wangkanytjikitja. ¹⁷ Ka palunya nyiri ungu tjukurpa panya wangkatjara Aitjayalu iriti walkatjunkunytja, ka paluru alara tjukarurungku nguriра nyakula wangkangu alatji,

¹⁸ “Mayatjaku kurunpa ngayula tjungu alatji nyinanyi, panya paluruни ngurkantanu tjukurpa wiru wangkanytjaku ngaltutjara tjutangka.

Mununi iyanu karpintja tjutangka wangkanytjaku kuлу tjana palumpa tjukurpa kulira araltjarinytjaku.

Mununi kuru pati tjutakutu kuлу iyanu tjana kuлу kuru alaringkula nyakunytjaku.” *

* **4:8** Deuteronomy 6:13 * **4:9-11** Psalm 91:11-12 * **4:12** Deuteronomy 6:16 * **4:18** Aitjayaku 61:1

Nyara paluruṇi iyanu kurangka nyinanytja tjuṭa kuļu walatjunkunytjaku aŋangu kura tjuṭangku mayatjarira kanyiṛa kurannyaŋka. *

19 Mununi iyanu nyanga alatji kuļu tjakultjunkunytjaku panya tjiṇtu nyangatja alatjitu wirkanu Mayatjalu palumpa aŋangu tjuṭa pukulmara wankaru kanyintjaku.” *

20 Munu Jesulu wangkara wiyingkula nyiri panya palunya malakungku ungu wati panya palunya munu nyinakatingu. Kaya aŋangu uwankarangku pulka mulapa palunya nyangangi. **21** Ka paluru wangkangu tjanala, “Tjukurpa nyangatja alatjitu kuwari utiringu, panya kuwariṇa wangkangi, ka nyura kulinu.”

22 Kayanku aŋangu tjuṭangku tjukurpa nyangatja kulira urulyaranu munuya pukularingu, palu wangkaraya kuliningi, “Yaaltji-yaaltjingku nyangangku tjukurpa nyanga pulka wangkanyi? Nganaṇa ninti, nyanga paluru wati alatji Josephaku katja.”

23 Ka Jesulu piruku wangkangu, “Nintinguṇa nyuranya kulini panya nyura ngayunya wangkanytjikitja mukuringkunyangka nyanga alatji, ‘Wanyunkuwi nyangangku walytjangku-warara palyala.’ Munu nyura piruku mukuringanyi ngayulu ngura walytjangka palyannyangka nyakuntjikitja, panya ngayulu ngura Kapunimala palyantja purunypaṭu.

24 Kaṇa nyurala tjukarurungku wangkanyi panya aŋangu tjuṭangku wati wangkatjara ngura kutjupitjangku wangkanyangka wangaṇarangku kulilpai, palu wangkatjara nguraritjangku wangkanyangkaya kulilwiyangku wantipai. **25** Palu wanyuya kulila, panya iriti wanaka-la tjuṭa nyinangi wangkatjara ini Ilaitjanya nyinanytja arangka. Ka panya minangku puyintja wiya ngarangi yiya maŋkurpa nguwanpa. Kaya ailurungka mai wiya nyinangi manta winkingka. **26** Ka Godalu Ilaitjanya wanaka-la walytjakutu iyantja wiyangku wantingu munu wanaka-la malikitjakutu iyanu ngura kutjupakutu ini Tjarapatjalakutu ngura pulka ini Tjaitanta itingka.

27 Kaya ngura nyanga Isrelta aŋangu tjuṭa mulapa miri pikatjara nyinangi Elishanya nyinanytja arangka. Pika nyara paluru kura mulapa ngarangi miringka lipiringkupai, palu Eishalu tjananya palyarunguntja wiyat ngarangi, munu wati malikitja ngura kutjupanguru pitjanyangka kutju palyarungunu wati ini Naimannga. Wati nyara paluru panya Tjiriyanya ngurara nyinangi, panya ngura kutjungurya aŋangu walytja tjuṭa wangkatjaraku mukuringkupai wiya ngura walytjangka nyinanyangka walytja tjuṭangka. Nyanganpa panya uwankara Godalu malikitja tjuṭa palyarunguningi.”

28 Ka nyara palulanguru inmangka panya nyinanytja tjuṭangku nyangatja kulira pulka mulapa mirpanaringu palumpa. **29** Munuya pakara Jesunya inmanguru witira katingu urilkutu puli waṛaranguru unṭura waninytjikitjangku, panya tjanampa ngura apu katu ngarangi. **30** Palu Jesunya tjanala ngururwanu małaku anu, kaya aŋangu tjuṭangku puṭu witiningi.

Jesulu Mamu Paintja (Markaku 1:21-28)

31 Palula małangka Jesunya anu ngura Kapuniyamalakutu uṛu Galileela wilurara munu nyara palula tjiṇtu pakuwiyingkupaingka wali inmatjangka tjarpangu munu aŋangu tjuṭangka nintiningi. **32** Munu paluru tjukurpa pulka tjuṭa nintinguṇa rapangku alatjitu wangkangi, kaya aŋangu

* **4:18** Aitjayaku 58:6 * **4:19** Aitjayaku 61:2

tjuṭangku kulira urulyaraṇu. ³³ Ka wali nyara palula unngu wati kutjupa mamutjara nyinangi munu pulkara alatjiṭu mirara wangkangu Jesula, ³⁴ “Wati awa, nganānanya nyaantjikitjan mukuringanyi. Nyuntun pitjangu nganānanya wiyanṭjikitja? Wantimalanya. Ngayulu nyuntumpa ninti. Nyuntu panyan miłmilpa alatjiṭu Godalanguru pitjanytja.”

³⁵ Ka Jesulu mamu panya paira wangkangu, “Pilunari! Wati pala palunya wantikati!” Ka mamungku wati panya palunya mantangka anṭa-waṇingu anāngu tjuṭangka ngurur-ngururpa munu pikantankunytja wiyangku wati panya palunya wantikatingu.

³⁶ Kaya anāngu tjuṭangku nyakula urulyarara wangkangu, “Wati wangka nyaa nyanga paluru? Panya paluru witulya pulkatjarangku mamu tjuṭa witulpai, kaya palula kulira mapalku wantikatipai.” ³⁷ Ka tjukurpa Jesunyatjara lipiringu ngura winkingka.

*Jesulu Pikitjara Tjuta Palyarunguntja
(Matthew-ku 8:14-17; Markaku 1:29-34)*

³⁸ Munu Jesulu tjananya wantikatingu munu anu Simonku walikutu. Kaya paluru wirkankunyangka paṭara tjakultjunu Simonku umari pikatjara waruringkula ngarinyangka. ³⁹ Ka Jesunya ankula minyma panya palula itingka ngarangu munu pika panya palunya painu wantikatintjaku. Ka mapalku alatjiṭu pika panya waru wiyingkula minyma panya paluru tjananya pakara mai ngalkuntjaku palyara ungu.

⁴⁰ Ka tjintu tjarpangka tjintu panya miłmilpa wiyingku, kaya malpa tjuṭangku pikatjara tjuṭa ngalya-katingu Jesulakutu. Ka paluru tjanala mara tjunkula uwankara palyarungunu. ⁴¹ Kaya mamu tjuṭa anāngu tjuṭanguru ngulu mirara pakaningi wangkara, “Nyuntun mulapa Godaku katja!” Ka Jesulu tjananya painu piruku wangkawiyangku wantintjaku panya alatjituuya palumpa ninti nyinanyi panya paluru Christanya Wankarunkupainya.

⁴² Munu mungawinki mulapa Jesulu tawunu wantikatira anu kutju maunṭalpa pilunta nyinanytjikitja. Kaya anāngu tjuṭangku nguriningi munuya nyakula palunya markuningi piruku tjananya wantikatira ankunytjaku-tawara. ⁴³ Palu paluru tjanala wangkangu, “Wiya, utina Godaku tjukurpa wiru para-wangkama ngura kutjupa tjuṭangka kulu mununa tjakultjunama Godalu anāngu tjuṭa mayatjangku walytjanmara kanyintja. Panya alatjinkunytjaku ni Godalu iyanu.” ⁴⁴ Munu paluru wali inmatja tjuṭangka para-wangkarinangi ngura winkingka manta Judealawanu.

5

*Jesulu Małpa Mañkurpa Altintjja
(Matthew-ku 4:18-22; Markaku 1:16-20)*

¹ Tjintu kutjupa Jesunya urungka itingka ngarangi uru ini Kintjaratala. Munu tjukurpa wangkangi anāngu tjuṭangka. Kaya tjuṭa mulatu utjura utjura ngarangi Godaku tjukurpa kulintjikitja. ² Ka Jesulu nyangu pauta kutjara urungka itingka ngaranyangka panya antipina witilpai tjuṭangkuya wantikatira ankula net tjuṭa paltjiningi. ³ Ka Jesunya tatinu pauta kutjungka panya Simonkungka munu palula wangkangu tjukutjuku ma-unṭuntjaku urukutu munu Jesulu pauta katunguru nyinara wangkangi anāngu tjuṭangka.

⁴ Munu wangkara wiyingkula Simonta wangkangu, “Pauta nyangat-jaya ma-unṭula ngatikutu nguwanpa munuya net pala wañira kuka tjuta witila.”

⁵ Ka Simontu wangkangu, “Mayatja, puṭulirala tjinturingu munga warangka palu nyuntu wangkanyangkala palya arkara wañinyi.”

⁶ Munuya ma-pitjala urungka net waningu munuya winki mulapa witinu munuya net panya puṭu ngalya-ilara pautangka tjarpatjunangi. Ka net nguwanpa alatjiṭu katakatingi. ⁷ Kaya Simontu tjana malpa panya pauta kutjupitja altingu alpamilara ilantjaku. Kaya mulapatu pitjangu munuya tjarara pauta panya kutjupanguru tjanampa pautangka tjunangi. Ka tjaalyngaranyangka pauta panya kutjara nguwanpa urungka tjarpangi.

⁸ Ka Simontu ini kutjupa Peterlu nyangatja nyakula urulyaraṛa kuntaringu, munu palula kuranyu tultjungarakanira wangkangu, “Mayatja! Nyuntun palya mulapa. Wantikatinī panya ngayulu palya wiya mununa kura kutju palyalpai.”

⁹ Munuya paluru tjana pulkara urulyaranu kuka pulka witintjatjanu.

¹⁰ Ka pula Simonku malpa kutjara panya Jamesanya Johnnga pula pulkaratu urulyaranu Tjipitiku panya katja kutjara. Ka Jesulu wangkangu Simonta, “Nguluringkunytja wiya. Nyanga palulanguru nyuntu antipina wiyangku anangu tjuta witilku altira ngayuku walytjaringkunytjaku.”

¹¹ Munuya pauta panya kutjara urunguru ma-ilara urnalta tjunkula uwankara wantikatira Jesula tjunguringkula anu.

Jesulu Wati Pikatjara Palyarunguntja

(Matthew-ku 8:1-4; Markaku 1:40-45)

¹² Kutjupa ara Jesunya tawunu kutjupangka nyinangi, ka ngura nyara palula wati kutju miri pika pulkatjara nyinangi.* Munu wati paluru Jesunya nyakula palula kuranyu punkara pulkara ngatjinu alatji wangkara, “Mayatja nyuntu mukuringkulampani palyala pika nyangatja wiyingkunytjaku.”

¹³ Ka Jesulu marakatira palunya pampunu munu wangkangu, “Ngayulu mukuringanyi, ka palyariwa.” Ka mapalku alatjiṭu pika panya paluru wiyingingu wati panya palula puntungka. ¹⁴ Ka Jesulu wati panya palunya wangkangu kutjupangka nintintja wiyangku wantintjaku. Munu palunya wangkangu, “Ankulanku wati tjukurtjarangka-warara nintila nyuntu nyanga palyaringkunytjatjanungku. Munu kuka katira uwa wati palunya pungkula Godanya ungkunytjaku. Panya ara nyangatja Moselu wangkangu pika palyaringkula alatjingantjaku. Kaya wati tjukurtjarangku, anangu tjutangku kuļu nyakula mulamularingkuku nyuntu palyaringkunyangka.” Alatji Jesulu wangkangu wati panya palula.

¹⁵ Ka tjukurpa panya paluru lipiringu ngura winkingka. Kaya anangu winki mulapa palulakutu pitjangi tjukurpa kulintjikitja paluru wangkanyangka. Kaya pikatjara tjuta kuļu rawa pitjangi palyarunguntjaku. ¹⁶ Ka tjuta ara paluru wangkara wiyingkula ankupai maunṭalpa ngura pilunta Godala tjapintjikitja.

Jesulu Wati Wawanypa Palyarunguntja

(Matthew-ku 9:1-8; Markaku 2:1-12)

¹⁷ Tjintu kutjupa Jesulu anangu tjutangka nintiningi wali unngu, kaya wati Paratji munu Moseku tjukurku ninti tjuta nyara palula tjungutu nyinangi. Wati nyanga paluru tjana ngura tjukutjuku tjutanguru pitjangu

* ^{5:12} Anangu kutjupa pika nyanga palunyatjara nyuntu pampurampa pika nyanga palunya mantjilku. Nyawa chapter 4 munu verse 27.

panya uru Galileela itingka ngura tjuta ngarala wañaningu. Kaya kutjupa tjuta ulpariranguru pitjangu Jerusalemalanguru munu ngura ititja tjutanguru kułukulu.

Ka panya Godaku witulya Jesula ngarangi alatjiu pikatjara tjuta palyarunguntjaku. ¹⁸ Kaya wati kutjupa tjutangku pikatjara wawanypa mantarangka ngaritjunkula katuṛa katingu Jesulakutu. Munuya walingka wirkara kuliningi tjarpara Jesula kuranyu ngaritjunkunytjikitjangku. ¹⁹ Palu aŋangu tjuta mulapa ałangka anga-ngaranyangka tjana puṭu tjarpangi. Munuya walı para-nyakula wañara kuliningi, "Yaaltjingarala tjarpaku?" Munuya palulanguru walı katukutu tatira walı katutja ałanu munuya wati panya pikatjara mantarangka ngarintja walatjunkula Jesula tjinangka itingka tjunu. ²⁰ Ka Jesulu nyakula kulinu, "Mulapa nyanganpa ngayuku raparingkula mulamularingu wati nyangatja ngayulu palyarunguntjaku." Munu wangkangu wati panya palula, "Wati ngana, Godalu nyuntunya kura tjuta palyantjitjanguru kalypangku wantinyi pungkunytja wiyangku."

²¹ Kayanku wati panya Moseku tjukurpa nintilpai tjutangku munu Paratji tjutangku kułu alatji unngu kuliningi, "Ai! Wati yaalitja nyangatja? Tjingurunku nyangangku walytjangku Godanya-palku kulinu munu kura palyantjitjanguru kalyparingkunytjikitjangku wangkanyi. Wati kurangku nyangangku ngunti wangkanyi. Panyatjampal Godalu kutjungkumpa kura palyannyangkampal wangkapai kalypangku pungkuwiyangku wantintjikitjangku."

²²⁻²⁴ Ka Jesulu tjana unngu kulintja nintingku kulinu munu wangkangu, "Nyaaku nyura alatji unngu kulinu? Nyura kuwari nyangangi ngayulu wati nyanga palula wangkanyangka munu nyura kutjupa kutjupa nyakunytja wiya. Palulanguru nyura tjinguru kulinu ngayunya ngurpa-palku, munu nyura ngayuku mulamularingu kuwiyangku wantinyi. Palu kuwari nyangaña wati nyanga wawanypa wangkara palyarungunu. Ka nyanga nyura nyakuku kuwari pakannyangka, munu nyura palulanguru mulamularingu kuku, ngayulu panya nganmanyiju wangkanytjitu, panya ngayulu Watiku Katjangku mantangka nyanga nyinara, aŋangu kutjupa kura tjuta palyantjitjanguru kalypangku wantintjitu ngaranyi alatjiu." Munu palulanguru piruku wangkangu wati panya pikatjarangka, "Wati awa, pakaranku mantara mantjira ngurakutu ara."

²⁵ Ka mulapatu wati panya paluru pakara mantara mantjinu aŋangu winkingka miṛangka, munu ngurakutu ankula iwarangka Godanya pulkara walkurinangi. ²⁶ Kaya aŋangu tjutangku nyakula pulkara urulyarara wangkangi, "Ai, wiṛu mulapala kuwari kutju ngurpangku nyangu witulya pulkangku palyannyangka." Munuya tjana kułu Godanya pukularira walkuningi.

Jesulu Wati Levinya Altintyja (Matthew-ku 9:9-13; Markaku 2:13-17)

²⁷ Nyanga palula małangka Jesunya walinguru pakara anu munu nyangu wati ini Levinya wati panya aŋangu tjutangka kamantaku mani mantjilpai. Munu paluru nyinangi wiltjangka iwarangka itingka. Ka Jesulu palunya wangkara altingu, "Pitjalani ngayunya wañala!" ²⁸ Ka Levilu pakara uwankara wantikatingu munu palunya wañanu nintintja tjutangka tjunguringkula.

²⁹ Munu Levilu palumpa ngurangka mai pułka palyara mani mantjil-pai tjuta, aŋangu kutjupa tjuta kulu, altingu tjunguringkula ngalkun-tjaku, aŋangu winki mulapa. ³⁰ Kaya Paratji tjutangku munu watı Moseku tjukurku ninti tjutangku nyakula Jesuku nintintja tjutangka wangkangi, “Nyaaku nyura mani mantjilpai tjutangka watı kura kutjupa tjutangka kulu tjunguringkula mai ngalkuni? Uti nyura tjanala tjunguringkuwiyangku wantira watı palya tjutangka kutju tjunguringama.”

³¹⁻³² Ka Jesulu wangkangu tjanala, “Aŋangu palya tjuta ngangkariku mukuringkupai wiya, palu pikatjara tjuta kutjuya mukuringanyi. Ka ngayulu pitjangu aŋangu Moseku tjukurwanu nyinapai tjuta altintytjikitja wiya, palu aŋangu nyanga nyura nyakula wantipai tjuta altintytjikitjaŋa pitjangu tjana piiwiyarungkula kura wantira kampa kutjuparintyjaku.”

*Paratji Tjutangku Jesunya Tjapintja
(Matthew-ku 9:14-17; Markaku 2:18-22)*

³³ Kaya aŋangu panya paluru tjana pirodu Jesula wangkangu, “Kulila, panya Johnku nintintja tjutangku munu Paratji tjutaku nintintja tjutangku kułukuluya ilatı-ilatı mai wantipai Godala tjapintjikitjangku, palu nyuntumpa nintintja tjutangkuya kutjupa-ara Godala tjapintjikitjangku mai wantintyta wiyangku tiłutjarangku ngalkuni.”

³⁴⁻³⁵ Ka Jesulu wangkangu, “Wiya, nyura panya Moseku tjukurwanu nyinapai tjuta, palu ngayuku nintintja tjutaya ara kutjupawanu nyinanyi ara kuwaritjangka ngayulu nintintjtjangka, ka ara nyanga paluru pula tiłutińa ngaranyi tjungu wiya. Wanyuya kulila ara panya watingku kuri altintytja, panya nyara palula ara kuri altintyangka watı panya palumpa malpa tjutangku tjunguringkula pukularira mai ngalkupai wantintyta wiyangku. Palu ngula watı panya palunya kutjupa tjutangku witıra katinyangka malpa tjutangku palumpa tjiturı-tjitururiku munuya nyara palulanguru kutju mai wantira nyinaku.”*

³⁶ Munu Jesulu tjanala tjukurpa ara kutjupatjara wangkangi nyanga alatji, “Kulilaya ara mantaratjara! Panya aŋangungku palumpa upukuta irititja alaringkunyangka, ala angatjunkunytjikitjangku upukuta kuwaritjanguru, mantara tjukutjuku kaṭara, upukuta panya irititjangka tjungura wakantja wiyangku wantipai, paltjinnyangka kaṭakatinytjaktawara. Panya upukuta palunya paltjinnyangka mantara panya tjungura wakantjanya tjukutjukuringkupai, munu upukuta panya irititja ilara kaṭantankupai, ka ala pulkaringkupai. Ka paluru panya upukuta kuwaritjangka kulu putu tjarpanyi, panya paluru mantara tjukutjuku palulanguru kaṭara mantjinu, ka upukuta paluru kulu kuraringkupai.

³⁷ “Munuya pirodu ara kutjupa kulu kulila palu purunypaṭu wainaku yakutjatjara. Panya watingku kukaku miringuru yakutja palyalpai waina kuwaritja tjutıra kanyintjikitjangku. Palu paluru yakutja irititjangka waina kuwaritja tjutilpai wiya, panya waina kuwaritja tjutinnyangka wainaku panya wiṭa yakutja unngu lipiringkupai, ka kukaku miri irititja pilṭi ngaranytjatjanu tjlpiralaralpai, ka waina mantangka tjutira wiyingkupai. ³⁸ Pala palula-tawara paluru waina kuwaritja yakutja miri kuwaritjangka tjutilpai tjlolangka, ka wainaku wiṭa lipiringkunyangka yakutja kulu lipiringkupai tjlpirarantja wiya.

* ^{5:34-35} Nyanga alatji Jesulu palurunku wangkangi panya ngulaya palumpa mirpantju tjutangku palunya witıra katingu munuya pungu, kaya palumpa nintintja tjuta pulkara tjiturı-tjitururingu munuya mai ngalkuwiya wantira nyinangi.

³⁹ “Ka aŋangu waina irititja tjikilpai tjuṭaya waina kuwaritjaku puṭu mukuringkupai, panya tjana wangkapai, ‘Waina nyanga irititja mayu wiṛu mulapa, ka kuwaritja mayu wiya, nyampa nguwanpa.’ ” Alatji Jesulu tjanala wangkangi tjana palumpa tjukurpa munu Moseku tjukurpa ngunti tjunguntjaku-tawara.

6

Tjintu Milmiltä Wangkanytja (Matthew-ku 12:1-8; Markaku 2:23-28)

¹ Kutjupa-ara Saturday-ngka tjintu panya pakuwiyingkupaingka Jesunyu tjana kaanawanu anangi mai wiita tjutangka unnguwanu. Kaya palumpa nintintja tjuṭangku uṇinypa maṛangku mantjira runyura ngalkukatingi. ² Palu Paratji tjuṭangku tjananya nyakula wangkangu alatji, “Nyura nyaaku tjintu nyanga pakuwiyingkupaingka mai uṇinypa uraṇi? Panya alatji palyara nyura war karinyi munuya nganampa ara kuranji, panya tjukurpa ngaranyi tjintu nyanga milmiltä war karinyytja wiyangku wantintjaku.”

³⁻⁴ Ka Jesulu wangkangu tjanala, “Palu nyura wanyu nyiringka nyakunytja wiyatū panya iriti mayatja Davidalu paltjatjiratjarira Godaku tiinta milmiltä tjarpala mai panya milmilmara tjunkunyytja ngalkunu munu palumpa tjungutja tjuṭa kuļu ungu ngalkula paltjaringkunyytjaku. Palu panya tjukurpa ara ngaranyi tjukurtjara tjuṭangku kutju mai nyara palunya ngalkuntjaku. Ka paluru tjana tjukurpa ara nyanga palunya kulira wantingu munuya mai ngalkunu, palu kutjupa tjutangku tjananya paintja wiyangku wantingi paltjatjiratjarira ngalkunyyangka.”

⁵ Munu Jesulu piruku wangkangu alatji, “Uwa, nyura uti kulinma panya ngayulu Watiku Katjanya mayatja pulka mulapa nyinanyi, mununa ngayulu alatjitu wangkapai kutjupa kutjupa tjuṭa tjintu panya pakuwiyingkupaingka palyantjaku.”

Wati Mara Wawanya Palyantja (Matthew-ku 12:9-14; Markaku 3:1-6)

⁶ Munu Saturday kutjupangka tjintu panya pakuwiyingkupaingka Jesulu wali inmatjangka tjarpala aŋangu tjuṭangka nintiningi. Ka wati kutju nyara palula nyinangi miña waku nyuti-nyuti tiwilpa. ⁷ Kaya wati Moseku tjukurpa nintipai tjuṭangku Paratji tjuṭangku kuļu ilangku nyangangi tjintu panya pakuwiyingkupaingka pikatjara palyarungunyyangka nyakula palunya kuranmankunyytjikitjangku. Munuya kulinngi, “Tjinguru kuvari wati nyanga paluru wati nyanga miña tiwilpa palyarungulku tjintu nyanga pakuwiyingkupaingka.”

⁸ Ka Jesulu nintingku kulinngi tjana unngu kulinnyangka munu wangkangu wati panya pikatjarangka, “Pakala munu pitjala nyangangka ngururpa ngara.” Ka wati panya paluru mulapatu pakanu munu pitjala ngarangu tjanala ngururpa. ⁹⁻¹⁰ Ka Jesulu tjapinu tjanala, “Nyaalkula wanyu tjintu pakuwiyingkupaingka? Palyaringkunyytjakula palyalku munta kuraringkunyytjakula wantiku? Aŋangula alpamilalku munta iluntankukula?” Munu alatji wangkara tjananya para-nyakula wañara wati panya miña tiwilpangka wangkangu, “Miña pala warariwa!” Ka mulapatu ngalya-wararingu munu miña panya paluru palyaringu alatjitu.

11 Kaya Paratji tjutangku Moseku tjukurpa nintilpai tjutangku ku₅ nyakula pulkara mirpañaringu munuyanku wangkara kulinigi, “Yaaltjin-galkula wati nyanga palunya? Panya nyanga paluru kutjupa kutjupa tjuta tjintu pakuwiyingkupaingka palyara Moseku tjukurpa kura₅.”

*Jesulu Nintintja 12 Ngurkantankunytja
(Matthew-ku 10:1-4; Markaku 3:13-19)*

12 Tjintu kutjupa Jesunya anu pulikutu Godala tjapintjikitja munu tjapira tjinturingu. **13** Munu tjinturingkula palumpa panya malpa tjuta altingu munu tjanalanguru wati 12 ngurkantanu palumpa nintintja tjuta nyinanytjaku munu tjananya ininu *Iyantja Tjuta*. **14-16** Paluru ngurkantanu Simonnga, munu palunya ini kutjupa tjunu Peternya,* munu palumpa malanypa ku₅ ngurkantanu Andrew-nya. Munu palulanguru ini nyanga palunya tjananya ku₅ ngurkantanu Jamesanya, Johnnga, Philipanya, Patjalamunya, Matthew-nya, Thomasanya, munu James kutjupa panya Alpi-yatjaku katja, munu Simon kutjupa ku₅ ngurkantanu, panya paluru Rome-anyanya ngurara tjuta Israeltanguru paira iyantjikitja pulkara mukuringkupai. Munu Jesulu ngurkantanu Jude-ananya Jamesaku katja, munu panya pungkunytjaku nintlpainya ku₅ ngurkantanu wati Judasanya ini kutjupa Kariyatanya.

*Jesulu Wangkanytja Munu Palyarunguntja
(Matthew-ku 4:23-25)*

17 Munu palulanguru Jesunya pulinguru ukalingu palumpa iyantja tjuta ku₅ munuya mantangka wirkara ngarangi. Kaya aŋangu winki mulapa palunya wanalpai kutjupa tjuta ku₅ Jesula tjanala tjunguringu ngura tjutanguru Jerusalemalanguru munu Tayala Tjaitanta tjanalanguru ku₅. **18** Nyara paluru tjanaya pitjangu Jesulu tjukurpa wangkanyangka kulintjikitja kaya tjanala tjungu pitjangu pikatjara tjuta munu mamutjara tjuta ku₅ paluru palyarunguntjaku. Ka paluru tjananya pikatjara uwankara palyarungunu munu mamu tjuta ku₅ tjanalanguru painu. **19** Uwa, Jesulu witulya pulkangku tjananya pampura palyarunguningi pikatjara uwankara. Kaya aŋangu winkingku mara katuningi palunya pampura palyaringkunytjikitjangku.

*Pukulmankunytja Munu Ngulutjunkunytja
(Matthew-ku 5:1-12)*

20 Ka Jesulu palumpa nintintja tjuta nyakula tjanala wangkangi alatji, “Nyura kutjupa tjuta ngalutjara nyinanyi ulytja tjuta kanyintja wiya. Palu nyuranya Godalu mayatja pulkangku walytjanmara kanyini, ka palulanguru nyura pukulpa nyinaku.

21 Nyura kutjupa tjuta paltjatjiratja nyinanyi mai wiya. Palu nyuranya Godalu alatjitu paltjalku pukulpa nyinanytjaku, ka palulanguru nyura pukulpa nyinaku.

Nyura kutjupa tjuta tjituru-tjituru nyinara ulanyi. Palu nyuranya Godalu ikaringkunytjaku palyalku, ka palulanguru nyura pukulpa nyinaku.

22-23 “Ngayulu panya Watiku Katjanya Godalu panya iyantja, ka nyura ngayunya wanannyangka aŋangu kutjupa tjuta tjinguru nyurampa kuraringkuku munuya nyuranya paira iyalku. Tjinguruuya nyuranya warkira kurara pungkuku munuya nyuranya ngunti kuranmankuku tjukurpa ngunti tjuta tjungura wangkara. Palu tjana alatjingannyangka nyura

* **6:14-16** Ini nyanga Peternya wangkanyi “apu wa₅.”

wantima munu nyara palulanguru nyura pukulpa nyinaku. Panya iriti tjanampa walytjapitingku palu purunytytu Godaku wangkatjara tjuta kuraningi. Ka tjana kuwari nyuranya palu purunytyu kurannyangka nyura uti Godaku pulkara pukularira wararakatima, panya paluru nyurampa wiru mulapa ungkunytykitjangku patara kanyini ngura nyara ilkaringga." Alatji Jesulu tjanala wangangi palumpa nintintja tjutangka.

²⁴ Munu palulanguru paluru anangu kutjupa tjutangka wangangi alatji, "Kulilaya mani ulytja pulkatjara tjuta! Panya nyurampa tjituru-tjituru pulka ngula ngaraku.

Panya nyura mantangka nyanga pulkatjara pukulpa nyinanytjatjanu ngula pika pulkangka nyinaku tjituru-tjituru.

²⁵ Kaya paltja nyinanytja tjuta kulu kulila! Panya nyurampa tjituru-tjituru pulka ngula ngaraku.

Panya nyura mantangka nyanga paltja nyinanytjatjanu ngula paltjatjiratja pulka nyinaku.

Kaya ikaringkupai tjuta ngapartji kulila! Panya nyurampa tjituru-tjituru pulka ngula ngaraku.

Panya nyura mantangka nyanga ikaringkula pukulpa nyinanytjatjanu ngula tjituru-tjituru pulka nyinara ulaku.

²⁶ "Uwa, nyura pukularipai anangu uwankarangku nyuranya mirrawaŋira walkunyangka. Palu nyurampa tjituru-tjituru pulka ngula ngaraku. Panya iritiya nyurampa walytjapiti tjutangku palu purunytytu wati wangkatjara ngunti tjuta mirawaŋingi tjukurpa ngunti wangkanyangka."

Alatji Jesulu anangu kutjupa tjutangka wangangi.

Nyurampa Mirpantju Tjutaku Mukuringkunytyaku (Matthew-ku 5:38-48; 7:12)

²⁷⁻³⁰ "Palu nyuralaŋa wangkanyi ngayula kulipai tjutangka nyanga alatji nyurampa mirpantju tjutaku pulkara mukuringama munuya wiru palyanma nyurampa kuraringkupai tjutaku kulu. Pukulmanamaya nyuranya kurannyangka munuya tjanampa Godala tjinpinma nyuranya kurara pungkunyangka. Tjinguru kutjupangku nyuntunya anaŋa mita-mita pungkunyangkampa mita-mita kampa kutjupa nintila piruku pungkunytyaku. Tjinguru kutjupangku nyuntumpa upukuta pauntjingara nyuntulan-guru tjulyannyangkampa mantara nyuntu kanyintja kutjupa kulu ungama palunya. Munu anangungku ngatjinnyangka ngalturingkula ungama munu kutjupangku nyuntumpa kutjupa kutjupa katinyangkampa wantima waŋara małakungku tjulyalwiyangku.

³¹ "Uwa, panya nyura mukuringanyi anangu kutjupa tjutangku nyurampa wiru palyantjaku. Palu wanyu nyura alatji tu tjanampa mukulyangku wiru palyanma wantintja wiyangku.

³²⁻³³ "Tjinguru nyura anangu kutjupaku mukuringanyi paluru nyurampa mukuringkunyangka kutju. Ka Godalu nyakula nyurampa pulkara pukulariku? Wiya, panya anangu kura tjuta palu purunypatu nyinanyi munuya ngapartji mukuringkunyangka kutju mukuringkupai. Palu nyura uti nyurampa kuraringkupai tjutaku mukuringama alatji tu munu tjanampa wiru palyanma.

³⁴ "Tjinguru nyura anangu kutjupa wiru kutju ungkupai kulira paluru ngula ngapartji wirungku ungkunytyaku. Ka Godalu nyakula nyurampa pulkara pukularipai? Wiya, panya anangu kura tjutangku kulu palu purunytyu ungkupai ngapartji ngula ungkunytyaku. ³⁵ Palu wanyu

Godanya kulinma panya paluru mukuringanyi nyura mirpañtu tjuñtaku mukulya pulka nyinanytjaku munu tjanampa wiru palyantjaku, munu intjanungku ungkunytjaku ngapartji kulintja wiyatjangku. Ka nyura palulanguru ngula pulka mulapalta mantjilku Godalu ungkunyangka munu nyura God Katutja Pulkaku katja uñtalpa mulapa nyinaku, panya paluru anangu kuralpai tjuñtaku mukuringkupai alatjitu munu kulira wantipai tjuñtaku kuñu.³⁶ Uwa, ngaltnunytjuya nyinama Mama Godanya purunypa panya paluru uwankaraku ngaltnunytju nyinanyi.”

*Nyakula Kuranmankuwiyangku Wantinytjaku
(Matthew-ku 7:1-5)*

³⁷ Munu Jesulu piruku wangkangi alatji, “Anangu kutjupaya nyakula ngurkantara kuranmankuwiyangku wantima. Panya nyura nyanga alatjingannyangka Godalu nyuranya kuñu ngula palu purunypañtu ngurkantara kuranmankuku. Munuya palu purunytiñtu anangu kutjupa nyakula ngukantja wiyangku wantima. Panya nyura nyanga alatjingannyangka Godalu nyuranya kuñu ngula palu purunypañtu kuranmankuku. Munuya anangu kutjupangku nyuranya kurannyangkampa palunya kalypangku kuralwiyangku wantima, ka Godalu nyuranya palu purunypañtu kura palyannyangka nyakula kalypangkuñtu wantiku. ³⁸ Munuya ngaltnuringkula munytjangku ungama, ka Godalu palu purunypañtu nyuranya ngapartji ngaltnuringkula pulka mulapalta ungkuku nyura ungkunytjitetjangka waintara mulapa. Palu nyura kutjupa tjuñta tjukutjuku ungkunyangka paluru palu purunypañtu nyuranya ngapartji tjukutjukuñtu ungkuku.”

³⁹ Munu paluru piruku tjukurpa ara kutjupatjara tjanala wangkangi alatji, “Kulilaya! Wati kuru patingku wanyu wati kuru pati kutjupa katirinkupai? Wiya. Paluru pula kutjaratu piti ngatingka punkalku.

⁴⁰ Munu wanyu piruku kulinma. Anangu nintiringkupai wanyu palumpa nintilpaingka waintaripai? Wiya. Paluru pulkara nintiringkunytjatjanu kutju palumpa nintilpaingka tjungu ngaraku.

⁴¹⁻⁴² “Palu nyaaku nyura anangu kutjupa tjuñta wangkara kuranmankupai? Tjinguru nyura nyanganyi Godaku walytja kutjupangka kurungka puñu tjlpirpa tjukutjuku ngarinyangka. Palu nyurampa kurungka tjinguru puñu pulka ngarinyi. Ka nyura kuru palyangku-palku wangkaku palula alatji, ‘Wanyu kañanta puñu pala tjlpirpa tjukutjuku mantjira wani.’ Palu wiya, nyura ngunti kuru palyangku-palku kañany-kañanytju watarku wangkanyi. Utu nyura nyurampa kurunguru-warara puñu pala pulkanya mantjira wanima, munu palulanguru kuru palyaringkula utilta nyakuku, anangu nyara kutjupaku kurunguru tjlpirpa tjukutjuku mantjira waninytjikitjangku.” Alatji Jesulu tjanala wangkangi tjana kura walytjangku-warara tjukarurungku ngurkantankunytjaku munu palulanguru kutju anangu Godaku walytja kutjupa kura nyakula wangkanytjaku.

*Pununguru Anangu Wangkanytja
(Matthew-ku 7:15-20; 12:33-35)*

⁴³ Munu piruku Jesulu wangkangu tjukurpa kutjupa alatji, “Panya puñu wirungka mai kura pakalpai wiya. Ka palu purunypañtu puñu kurakurangka mai wiru pakalpai wiyañtu. ⁴⁴ Panya mai uwankara pakalpai puñu walytjangka kutju. Nyura puñu ili mantjilpai puñu tjilkatjaranguru munu nyura puñu kiripitji mantjilpai puñu wakalpukanguru. ⁴⁵ Ka palu purunypa anangu palyangku palya tjuñta palyalpai, kurunpa palya ngarala. Ka anangu kurangku kura tjuñta kutju palyalpai, kurunpa kura ngarala. Panya tjaangku wangkapai unnungunguru. Ka kurunpa

wiru ngaranyangka, tjaangku wiru kutju wangkapai, palu kurunpa kura ngaranyangka, tjaangku kura kutju wangkapai.”

*Wali Kutjaranguru Tjukurpa Wangkanytja
(Matthew-ku 7:24-27)*

⁴⁶ Munu piruku Jesulu tjukurpa kutjupa wangkangu nyanga alatji, “Nyaakuṇi nyura ngayunya mayatjanmananyi munu nyura kulira wantinyi ngayulu wangkanytjitja uwankara? ⁴⁷ Kulilaya, aŋangu ngayulakutu pitjala munu ngayulu wangkanytjitja wangaŋarangku kulira palyannyaŋkampaŋa nyuranya nintiku yaaltji-yaaltji paluru nyinanytja. ⁴⁸ Alatji paluru nyinanyi wati nyanga purunypa, panya paluru wali palyantjikitjangku piti-warara tjawara arintanangi, munu apu tjiwa pulka tjuta unngu tjunkula waŋanu, munu wituwitu palula tjanala purkarangku wali palyaningi, kunpu ngaranytjaku. Ka ngula mina pulkangku pitjala puyinu. Ka uru pulkaringkula katuringu, munu wali panya putu unṭuningi. Ka witu alatjitu ngarangi urintyja wiya. ⁴⁹ Palu aŋangungku ngayuku tjukurpa kulira wantirampa paluru panya wati nyanga purunypa nyinanyi. Panya paluru wali mantangka warpungkula palyanu, apu tjiwa pulka tjuta-warara tjunkunytja wiyangku munu mapalku palyara wiyanu. Ka ngula mina pulkangku pitjala puyinu munu uru pulkaringkula katuringu munu wali panya unṭunu. Ka mapalku alatjitu pilukatingu.”

7

*Wati Rome-any Ngurara Mulamularingkunytja
(Matthew-ku 8:5-13; Johnku 4:43-54)*

¹ Munu Jesulu tjanala tjukurpa wangkara wiyaringkula anu ngura Kapanimalakutu. ² Ka ngura nyara palula wati Rome-any ngurara nyinangi. Wati paluru tjaultji tjuṭaku mayatja. Ka wati nyara palumpa war̄ka palyalpai pika pulka ngaringi ilunytjikitja. Ka wati nyanga paluru wati nyara pikatjaraku pulkara mulapa mukuringkupai. ³ Munu paluru kulinu Jesunya ila nyinanytja munu wati Jew tjutaku mayatja maŋkurpa altira witunu Jesunya ankula altintyjtaku pitjala palumpa panya warkaripai pika palyarunguntjaku. ⁴ Kaya mulapatu ankula Jesula wirkara pulkara tjapiningi palula wangkara, “Nyuntula wangkanytjikitjala pitjangu. Wati nyaratjanku nyuntumpa mukuringanyi nyuntu pitjala alpamilantjaku. ⁵ Wati nyara paluru nganampa Jew uwankarakuṭu pulkara mukuringku-pai munulanya paluru nganaŋanya mani ungu mungatu nganaŋa wali inmatja palyantjaku. Wati wirunya mulapa nyaratja.”

⁶ Ka Jesunya tjanala tjunguringkula anu wati nyara palunya nyakunytjikitja, kaya aŋangu tjuṭangku kuļu tjunguringkula waŋanu palunya. Ka tjana nguwanpa ngurangka ilaringkunyangka wati mayatjangku piruku kulinu munu malpa kutjupa maŋkurpa witunu ngaparikatira Jesula wangkanytjaku. Kaya mulapatu ngaparikatira wangkangu palula alatji, “Awa, wanyu kulila! Wati nyara mayatjangkulanya witunu nyuntumpa, panya nyuntu mayatja pulka, ka paluru kuntaringanyi nyuntu palumpa walingka pitjala tjarpanytjaku. ⁷ Munu paluru kuntaringanyitu nyuntulakutu pakara pitjanytjaku, panya paluru mayatja tjukutjuku, ka nyuntu mayatja pulka mulapa nyinanyi. Kalanya witunu paluru nyuntula wangkanytjaku, ka kunyu palya nyuntu nyanganguru wangka, ka wati panya pikatjara palyariwa nyuntu nyanga paṭunguru mayatjangku wangkanyangka. ⁸ Paluru kunyu ninti nyuntu Godaku war̄karipai munu panyan paluru witunnyangka wangaŋarangku kulira palyalpai. Ka

nganampa panya malpa palu purunypa¹ Rome-aku mayatjangku witunyangka wanganarangku kulira palyalpai. Munu paluru ngapartji mayatjangku² tjaultji tju³ wangkara witulpai, kaya palula wanganarangku kulilpai. Ka panya paluru tjananya altipai, kaya mapalku pitjapai. Munu tjananya wangkapai palyantjaku, kaya mapalku palyalpai paluru witunyangka. Ka paluru kulini panya nyuntu palu purunypa mayatjatu nyinanyi munun panya nyanganguru wangkaku, ka paluru palyaringkuku wati panya palumpa war⁴ka nyuntu nyanga pa⁵tunguru wangkanyangka.” Alatjiya tjakultjunu Jesula tjanampa mayatjangku wangkanytja.

⁹ Ka Jesulu nyangatja kulira pulkara urulyaranu munu malakukutura wangkangu anangu tju⁶angka, “Kuwarina nyurala tjukarurungku wangkanyi, panya wati nyanga tjaultji tju⁷aku mayatja wati Jew wiya, munu paluru ngayuku mulamularinganyi pulkara alatjitu anangu Jew tju⁸angka waintara. Panya ngura nyanga Israelta ngayulu anangu Jew kutjupa wati nyangatja purunypa pulkara mulamularingkunyangka nyakunyta wiyat⁹u.”

¹⁰ Ka wati panya tjakulpa ngaparikatinjtja ma¹⁰kurpa malaku anu tjanampa malpaku walikutu munuya nyangu wati panya pikatjara ngarintjatjanu pakara palyaringkula nyinanyangka.

Jesulu Wanaka¹¹aku Katja Wankantja

¹¹ Munu nyanga palula malangka tjukutjuku nyinara, Jesunya anu tawunu ini Naintakutu palumpa nintintja tju¹²atjara. Kaya anangu kutjupa tju¹³ta ku¹⁴lu palula tjunguringkula anu. ¹² Munuya nguwanpa tawunu panya Nainta kaitangka ma-ilaringkula nyangu, anangu nguratja tju¹⁵angku wati ilunytja pu¹⁶u pakutjangka tjunkula tjalira ngalya-pakaltjingannyangka, urilkutu tju¹⁷utjunkunytjikitjangku. Ka wati nyara ilunytjanya panya minyma wanaka¹⁸aku katja kutju alatjitu. Kaya anangu tju¹⁹ta minyma palula tjungutu ngalya-ulara pakanu urilkutu.

¹³ Ka Mayatjalu minyma palunya nyakula pulkara ngalturingu panya paluru kurunpa winki tjituru-tjitururira kat²⁰akatingu palumpa katja kutjutjiratja. Ka wangkangu palula, “Ulanytja wiya.” ¹⁴ Munu ankula wati panya ilunytja pampu²¹u. Kaya wati panya tju²²ta palunya tjalira katintjatjanu ngarakatingu. Ka wangkangu, “Wati awa! Wangkanyinanta, pakala!”

¹⁵ Ka wati panya ilunytja mapalku pakanu munu nyinara wangkangi. Ka Jesulu mi²³ra katira palumpa ngunytju ungu. ¹⁶ Kaya anangu tju²⁴angku nyangatja nyakula nguluringu munuya Godanya walkuningi. Munuya alatji wangkangi, “Awari! Wangkatjara pulka mulapa Godalanguru ngana²⁵ala wirk²⁶anu. Tjinguru Godanya nyangatja pitjangu ngana²⁷anya wankarunkunytjikitja.” ¹⁷ Ka tjukurpa nyanga Jesunyatjara lipiringu ngura winkingka.

Johntu Wituntja Jesula Tjapintjaku

(Matthew-ku 11:1-19)

¹⁸ Kaya Johnku nintintja tju²⁸angku ankula Johnta tjakultjunu tjailangka nyinanyangka tjana uwankara nyakunytjatjanungku munu kulintjatjanungku Jesulu palyantja munu wangkanytja. ¹⁹ Ka paluru wati kutjara witu²⁹u ankula Jesula tjapintjaku alatji wangkara, “Mulapan nyuntu panya paluru, panya Johntu tjakultjunangi ngula wankarunkupainya pitjantjaku? Munta tjinguru nyuntu kutjupa, kantila kuwaripa³⁰tu patanma.”

²⁰ Kaya mulapa³¹u ankula Jesula wirk³²anu munuya wangkangu, “Johntu panya baptise-katipaingkulanya witu³³u nyuntula tjapintjaku alatji, ‘Mulapan nyuntu panya paluru, panya Johntu tjakultjunangi ngula

wankarunkupainya pitjanytjaku? Munta tjinguru nyuntu kutjupa, kantila kuwaripatu paṭanma.”

²¹ Ka tjintu nyara palula Jesulu pikatjara tjuta palyarunguningi pika kutjupa kutjupa tjutatjara munu mamu tjuta kuļu painingi aŋangu tjutanguru, ka wati panya kutjarangku nyangangi. ²²⁻²³ Ka palulanguru wangkangu pulala, “Ankula pula Johnta tjakultjura kuwari nyanga kulira nyakunytjatjanungku, panya kurutjara tjutangku nyanganyi, nyumpu tjuta pakanu, miri pikatjara tjuta palyaringu, pina pati tjutangku kulini, munu aŋangu ilunytja tjuta kuļu wankaringkula pakanu. Kaya ngaltutjara tjutangku kuļu Tjukurpa Palya ngayulu tjakultjunkunyangka kulini. Uwa, ankula pula Johnta wangka ngayunya tjukarurungku kulintjaku, panya paluruña ngayulu. Panya aŋangumpa ngayuku pulkara mulamularingkunyangka Godalu palunya pukułmankupai.”

²⁴ Ka wati panya kutjara Johntakutu małaku ankunyangka Jesulu aŋangu tjutangka wangkangi tjukurpa Johnngatjara alatji, “Nyura panya mungatu ilytjikutu anu wati panya Johnnga nyakunytjikitja. Palu nyaaku nyura palunya nyakunytjikitja anu? Paluru wanyu wati upa, panya nyalpi walpangku uritjingannyangka uripai, palu purunypa? Wiya, wati paluru ngulunytju wiya rapangku alatjitu wangkapai. ²⁵ Palu nyaaku nyura palunya nyakunytjikitja anu? Tjinguru nyura anu mantara wirutjara ngaranyangka nyakunytjikitja. Palu wiya, Johnnga palu purunypa wiya, panya wati mantara wirutjara mayatja pulkaku walingka kutju nyinapai ilytjingka wiya. ²⁶ Tjakultjuranja! Nyaaku nyura palunya nyakunytjikitja panyatja anu? Wiya, Godaku wangkatjarangku wangkanyangka kulintjikitja nyura anu, panya paluru Godaku wangkatjara pulka mulapa nyinanyi kutjupa uwankarangka munkara. ²⁷ Panya tjukurpa palunyatjaraya nyiringka iriti walkatjunu Godalu wangkanytja nyanga alatji, ‘Ngayuluṇatju tjakulpa witura iyalku nyuntula kuranyu.

Ka nyara paluru ankula kuranyungku nyuntumpa iwarankuku mayatja pulka pitjanytjaku.” *

²⁸ Munu Jesulu piruku wangkangu tjanala, “Wati nyanga Johnnga pulka mulapa nyinangi, ka nyanga palu purunypa aŋangu kutjupa nganmanypa nyinanytja wiya alatjitu. Palu nyanga palulanguru kuwari aṛa kutjupa ngarakatinyi, panya Godalu aŋangu tjuta waltyjanmara mayatjangku kanyini tjitji tjukutjuku tjuta kuļukulu, kaya paluru tjana uwankara Johnta waintara pulka mulapa nyinanyi tjitji tjukutjuku tjuta kuļu.” Alatji Jesulu tjanala wangkangi Johnngatjara.

²⁹ Panya aŋangu nyanga paluru tjana uwankarangku nganmanytju kulinigi Johntu wangkanyangka ilytjingka, wati kamantaku mani mantilpai tjutangku kuļu panya nyara paluru tjana kulira mulamularingu, “Munta mulapa Godaku tjukurpa tjukaruru alatjitu.” Munuya wanganara mukuringu Johntu baptise-katinytjaku kuranguru piiwiyareringkula.

³⁰ Palu Paratji tjutangku munu Moseku tjukurku ninti tjutangku kuļuya paluru wangkanyangka kulira wantingi, munuya wantingi alatjitu piiwiyareringkula mukuringkunytja wiyangku Johntu үitungka baptise-katinytjaku.

³¹ Munu Jesulu piruku wangkangu tjanala, “Palu nyura kutjupa tjuta wanyu nyaa purunypa nyinanyi? ³² Wiya, nyura tjitji tjuta purunypa kulira wantipai, panya tjitji utulu kutju nyinara mirara ngaparku wangkapai alatji, ‘Inma wirula inkara wangkatjinganigi, ka panya

* ^{7:27} Malakaiku 3:1

nyura pitjala nyañpinytja wiyangku wantingi.' Kaya uṭulu kutjupangku ngapartji wangkapai, 'Uwa, ka panya nganaña ngapartji ulara inma tjituru-tjituru inkangi, ka nyura kulira tjunguringkula ulanytja wiyangku wantingi.' ³³ Nyanga palu puruny whole panya nyura Johnnga ngalinya kulira wantingi. Panya Johnnga pitjangu munu paluru mai waina kulu tjikintja wiyangku wantingi Godaku warka palyantjikitjangku. Ka panya nyura palunya alatji nyinanyangka nyakula mamutjaranmanangi. ³⁴ Ka ngayulu Watiku Katjanya pitjangu mununa mai pulka nguwanpa ngalkula waina kuļu tjikiningi Johnnga puruny whole nyinanytja wiyangku, ka nyura ngayunya nyakula palu purunypatu kuranmanangi alatji wangkara, 'Palatja wati maiku manyu, wainaku kuļu, munu aŋangu kura tjuṭangka malparingkula tjungu nyinapai, panya wati mani mantjilpai tjuṭangka munu aŋangu kura kutjupa tjuṭangka kuļu.'

³⁵ "Palya nyura alatji kañany-kañanytju wangkapai palya-palku nyinara. Palu nyangatjaya kulila, panya Godanya ninti pulka nyinanyi munu iwara tjukaruru palyanu aŋangu tjuṭangku wañantjaku, ka iwara nyara palunya wañalpai tjuṭangku kulilpai, 'Munta-uwa, iwara nyangatja Godalu kulira palyanu, aŋangungku wiya.' "

Minyma Jesulakutu Pitjanytja

³⁶ Ka wati Paratjingku ini Simontu Jesunya altingu palumpa ngurangka mai ngalkuntjaku munuya tjunguringkula ngalkuningi palumpa walingka.

³⁷ Ka tawunu nyara palula nyinangi minyma kura mulapa munu paluru kulinu Jesunya Simonku walingka nyinanyangka munu uwila wiru pantipai mantjira pitjangu Jesulakutu. ³⁸ Munu wirkara nyangu tjana taipulangka antangku para-ngarira arintara mai ngalkunyangka, munu tjarpura Jesula malarku ngarala ulangi. Ka ilanypa palula tjinangka punkanangi, ka pupakatira mangkangka munira tjina nyunytjuningi munu uwila panya wiru pantipai tjuṭiningi palula tjinangka.

³⁹ Ka wati panya Simontu nyangatja nyakula unngu kulinangi alatji, "Ai! Wati wangkatjara-palkuña nyangatja kulinu. Utu nyangangku wangkatjarangkumpa ngurkantanama minyma nyanga kurangku pampunyangka. Palu nyaaku nyangangku pailwiyangku wantinyi."

⁴⁰ Ka Jesulu Simonta wangkangu, "Ngayulu nyuntula wangkanytjikitja mukuringanyi."

Ka wangkangu, "Palya nintilpai, wangkanı kaña kulila."

⁴¹ Ka Jesulu wangkangu, "Wati kutjara nyinangi munu pula ngatjinu wati mani kanyilpaingka. Kutjungku ngatjinu \$25,000-ku, ka kutjungku ngatjinu \$2,500-ku, ka pulanya tjarara ungu ngula ngapartji malakungku ungkunytjaku. ⁴² Palu wati panya kutjarangku puṭu kulinangi malakungku ungkunytjikitjangku. Ka pulanya wati panya mani kanyilpaingku kalyangka palyanmanu munu pulanya wantir'iyanu." Munu wangkara wiyingkula tjinapu Simonta ngapartji, "Ala, wangkanı! Yaaltji pulkarra mukuringu wati mani kanyilpaiku?"

⁴³ Ka paluru wangkangu, "Wati panya pulka mantjintjanya."

Ka Jesulu wangkangu, "Tjukarurungkun wangkangu." ⁴⁴ Munu Jesulu minyma panya nyakula Simonta wangkangu, "Nyuntu wanyu minyma nyangatja nyanganyi? Ngayulu nyuntumpa ngurakutu pitjangu, kan ngayunya mina ungkunytja wiyangku wantingi tjina paltjintjaku, palu nyanga paluruṇi paltjini palumpa ilanypangka mununi mangkangka muṇinu. ⁴⁵ Nyuntu ngayunya nguku kutjara nyunytjura pukułmankunytja wiyangku wantingi, palu nyanga paluruṇi tjina rawangku nyunytjuningi

wantintyta wiyangku. ⁴⁶ Ka nyuntu ngayula katangka uwila tjutintja wiyangku wantingi, palu minyma nyanga paluru kutju ngayula tjinangka tjutinu wiru pantipai. ⁴⁷ Kulinin Simon? Panya Godalu minyma nyanga palunya kura tjuṭa palyantjitjanguru kalypangku wantingu, ka nyara palulanguru paluru ngayuku pulkara mukuringanyi munu paluru ngayuku kuwari palyaningi. Panya anangungku kura pulka tjuṭa palyantjatjanu piiwiyingkunyangka Godanya palumpa kalyparinganyi munu kalypangku pungkuwiyangku wantinyi, ka pala palulanguru paluru Godaku pulkara mukuringanyi. Ka anangu kutjupangku kura tjukutjuku palyantjatjanu piiwiyingkunyangkampa Godanya palumpa kalyparinganyitu, ka pala palulanguru anangu nyara paluru Godaku tjukutjuku mukuringanyi kura tjukutjukunguru palumpa kalyparingkunyangka.”

⁴⁸ Munu Jesulu wangkangu minyma panya palula, “Godalu nyuntunya kura tjuṭa palyantjitjanguru kalypangku wantinyi.”

⁴⁹ Kaya anangu kutjupa tjutangku tjungu nyinanytjatjanungku unngu nyararingkula kuliningi alatji, “Nyaa nyangangku wangkanyi? Panya Godalu kutjungku wangkapai kura palyantjitjanguru kalypangku pungkuwiyangku wantintjikitjangku?”

⁵⁰ Palu Jesulu pirkku wangkangu minyma panya palula, “Nyuntu ngayuku mulamularingkunyangka Godalu nyuntunya kuranguru wankarunu. Ka ankula pukulpa nyinama!”

8

Minyma Jesunya Alpamilalpai Tjuṭa

¹ Nyangangka malangka Jesunya pakara anu ngura pulka tjuṭakutu munu tjukutjuku tjuṭakutu kuļu munu tjukurpa palya para-wangkangi anangu tjuṭangku. Munu tjakultjunangi Godalu anangu tjuṭa mayatjangku waltyjanmara kanyintja. Kaya nintintja panya 12 munu minyma tjuṭa kuļu palula tjunguṭu para-ngarangi. ² Minyma nyara paluru tjana panya ngañmanypa mamujara nyinangi munu pika kutjupa kutjupa tjuṭatjara kuļu nyinangi. Ka tjananya Jesulu uwankara palyarungunu, kaya pukularira palunya wañarinangi. Ka panya minyma kutju ini Mary Magdalene-anaya* ngañmanypa mamu 7-tjara nyinangi, ka Jesulu uwankara painu. ³ Ka kutjupa Tjuwananya panya Tjutjaku kuri. Wati nyara paluru mayatja pulka Irataku wařingka wařkaripai. Ka minyma kutjupa ini Tjutjananya munu minyma kutjupa tjuṭa kuļukulu. Minyma nyanga paluru tjanaya Jesunya tjananya alpamilaningi mai kuka tjananya paúra ungkula munuya kutjupa kutjupa tjuṭa kuļu palumpa tjanampa palyaningi palumpa tjanampa maninguru.

Tjukurpa Uninypa Wanira Wanantja

(Matthew-ku 13:1-9; Markaku 4:1-9)

⁴ Kaya anangu tjuṭangku Jesunya pitjanyangka kuliřa ngura kutjupitja tjuṭa kuļu pitjangi nyakunytjikitja munu kulintjikitja kuļu. Ka Jesulu tjanala tjukurpa ařa kutjupatjara wangkangi alatji, ⁵ “Wati kutju ma-pitjangu uñinypa mantangka wañira wañantjikitja palumpa kaanangka munu wañira wañaningi. Ka uñinypa wañira wañinyangka tjara iwarangka punkanu. Ka anangu tjuṭangku iwarangka paltjura ankula tjinangku kurañu, ka tjulpu tjuṭangku kuļu pitjala ngalkula wiyanu. ⁶ Ka uñinypa kutjupatjara punkanu manta pulitjarangka, munu

* 8:2 Magdalene-anaya panya Makata-linanya

pakara mapalku piltiringu mina wiyangka. ⁷ Ka uñinypa kutjupat-jara punkanu manta tjilkatjarangka, ka pakannyangka tjilka tjuta kuñu pakara pulkaringu munu ukiri panya wañintjanya utjuñu, ka puñu pulkaringangi. ⁸ Ka tjara kutjupa manta palyangka punkanu munu mapalku pakara pulkaringu munu mai 100-tjararingu.”

Munu Jesulu ara nyanga palunya wangkara wiyingkula tjanala wangkangu alatji, “Uwa, nyura pina ałangku kulirampa ngalya-kulinma tjukurpa nyanga ngayulu kuwari nyurala wangkanytja.”

*Tjukurpa Panya Uninypatjara Utira Wangkanytja
(Matthew-ku 13:10-23; Markaku 4:10-20)*

⁹ Kaya ngula palumpa nintintja tjutangku palula tjapiningi wangkara, “Wanyulanya tjukurpa nyanga palunya utira tjakultjura. Nyaa nyanggangku nintini?”

¹⁰ Ka paluru tjanala wangkangu, “Uwa, ngayulu nyurala kutju Godaku tjukurpa kumpilitja utira wangkanyi, tjukurpa panya Godalu añangu tjuta mayatjangku waltyjanmara kanyintjatjara. Palu añangu kutjupa tjutangkaña ara mantatja tjuta wangkara kampa kutjupara wangkapai, kaya tjukurpa wangkanyangka kulilpai palu puñuya kulira nintiringkupai.”

¹¹ Munu paluru tjanala wangkangu, “Kulilaya, kana tjukurpa panya palunya nyurala utira tjakultjura! Panya wati kaana kanyil-paingku uñinypa wañinyi, ka palu purunypa wati tjukurtjarangku Godaku tjukurpa tjakultjunkupai añangu tjutangku kulintjaku. ¹² Ka añangu kutjupa tjaraya nyinanyi uñinypa panya iwarangka punkantja purunypa. Nyara paluru tjana panya tjukurpa kulilpai, palu mamu Satantu pitjala tjananya pina kuralpai tjana tjukurku mulamularingkula wankaringkunytjaku-tawara.

¹³ “Kaya añangu kutjupatjara nyinanyi uñinypa panya manta pulitjarangka punkantja purunypa. Panya tjana tjukurpa kulira pulkara pukularipai, palu tjana mulamulangku kuruntu tjukurpa mantjintja wiya unytju kutju mulamularingkupai. Munu ngula palumpa tjanampa tjituru-tjituru wirkankunyangka tjana mapalku paturingkula Godaku watarkuripai.

¹⁴ “Kaya añangu kutjupa tjuta nyinanyi uñinypa panya tjilkangka punkantja purunypa, panya tjana tjukurpa kulira mulamularingkupai, palu tjana mantatja kutjupa kutjupa tjuta pulkara kulira, wiru tjuta kanyintjikitja mukuringkupai munuya kutjupa kutjupa wiru tjutaku ngunti pukularipai. Munuya nyanga palula tjanalanguru Godaku tjukurku watarkuripai munuya wiru tjuta Godaku puñu palyalpai.

¹⁵ “Kaya añangu kutjupatjara nyinanyi uñinypa panya manta palyangka punkantja purunypa, panya tjana tjukurpa wangañarangku kulira pulkara mulamularingkupai. Munuya rawangku kulira wiru tjuta kutju Godaku palyalpai, tjanampa tjituru-tjituru wirkankunyangka kulintja wiyangku.”

*Lampa Tilira Uti Tjunkunyta
(Markaku 4:21-25)*

¹⁶ Munu piruku tjanala wangkangi, “Añangungku wali unngu lampa tilira pitingka anga-tjunkupai wiya, munu piitangka unngu tjaru kuñu tjunkula kutitjunkupai wiya. Palu uti tjunkupai, katu, tili paluru irnyara utintjaku añangu tjutangku walingka tjarpala nyakunytjaku.

¹⁷ “Ka Godaku tjukurpa palu purunypa, panya ngayulu kuwari añangu tjutangka kitikiti wangkanyi ara tjuta kutju wangkara, kaya puñu

nguwanpa kulini. Palu ngula tjukurpa nyanganpa uwankara utiringkuku anangu winkingku kulintjaku. Panya Godalu tjukurpa kumpilpa kanyintjatjanungku utilku, kaya winkingku kulilku.¹⁸ Ka nyura palulanguru purkarangku kulinma ngayulu wangkanyangka. Panya nyura wangañarangku kulinnyangkampa nyuranya Godalu pulka mulapa nintilku nyura uti kulintjaku. Palu nyura tjinguru kulira wantinyangkampa Godalu nyuranya kulintja kampa kutjupankuku palumpa watarkurinytjaku.” Alatji Jesulu tjanala wangkangi.

Jesuku Ngunytju Munu Małanypa Tjuta
(Matthew-ku 12:46-50; Markaku 3:31-35)

¹⁹ Ka Jesuku ngunytju munu małanypa tjutaya palulakutu pitjangu, palu anangu tjuta mulapa anga-ngařanyangkaya puťu palulakutu ilaringangi.
²⁰ Ka anangu kutjupangku Jesula wangkangu, “Nyaratja nyuntumpa ngunytju małanypa tjuta kuļu urilta ngaranyi nyuntumpa paṭara munuya mukuringanyi nyuntunya nyakunytjikitja.”

²¹ Ka Jesulu wangkangu alatji, “Wiya, panya Godaku tjukurpa wangañarangku kulira palyalpai tjuta, nyara paluru tjanaya ngayuku ngunytju małanypa kuļu nyinanyi waltyja mulapa.”

Jesulu Walpa Pulka Atanmankunytja
(Matthew-ku 8:23-27; Markaku 4:35-41)

²² Tjiṇtu kutjupa Jesunya palumpa nintintja tjutatjara pautangka tatinu uru panya Galileela munu wangkangu tjanala, “Wanyula manta nyara kutjupakutu urungka munkara ma-itipiri.”²³ Munuya mulapatu ma-pitjangu pautangka panya munuya urungka ngururpa pitjalinangi. Ka Jesunya pilu-piluringkula kunkunaringu. Ka palulanguru walpa pulka mulapa mapalku rurku winki pakańu uru palula ngururpaťu pitjalinkunyangka. Ka uru pulkara urira pautangka tjarpangi munu pauta panya palunya nguwanpa tjära tjäpatjunangi urungka unngu. Kaya uwankara pulkara nguluringu.²⁴ Munuya Jesunya wankara wangkangu, “Mayatja, kuwarila ilunyi!” Ka Jesulu pakara walpa panya wangkara atanmanu munu uru kuļu wangkangu tiwilarinytjaku, ka walpa panya atanaringu munu uru kuļu urinytja wiyaringkula tiwilaringu.²⁵ Munu palulanguru Jesulu wangkangu palumpa nintintja tjutangka, “Nyaanguru nyura puťu mulamularinganyi?”

Palu tjana wangkanytjaku puťu kulinu panya tjana nyakula uwankara urulyarara nguluringu. Munuyanku wangkara kuliningi alatji, “Wati nyaa nyangatja? Panya wal pangku urungku kuļu palula wangañarangku kulilpai.”

Jesulu Wati Mamutjara Palyarunguntja
(Matthew-ku 8:28-34; Markaku 5:1-20)

²⁶ Munuya palulanguru ma-wirkanu urungka itipi mantangka ngura ini Karatjala itingka.²⁷⁻²⁹ Ka Jesunya pautanguru ukalingkula ngarangi urungka itingka, ka wati mamutjara ngura nyara palunya ngurara palulakutu ngalya-wirkanu. Wati nyanga paluru rawa mulapa nikiti parangarapai munu wali wantira miriku kulpingka kutju nyinapai. Panya ngañmanytju tjaultji tjutangku tjuta-arangku palunya tjina mara kuļu tjiina pulkangka karpira kanyiningi, palu mamungku palunya tjarpara pulkara kuṇpulpai, ka paluru tjiina katantara ilytjikutu wirtjapakalpai mamungku katinyangka.

Ka Jesulu wati palunya nyakula mamu panya painu palulanguru pakan-tjaku. Ka wati panya paluru pulkara mirara palula kuranyu tjinangka itingka punkanu munu wangkangu, “Jesu, God Katutja Pulkaku Katja! Ngayunya nyaantjikitjan mukuringanyi?” Munu paluru pulkara ngatjira wangkangu, “Wantimaṇi iluntankunytja wiyangku!”

³⁰ Ka Jesulu wangkangu palula, “Palu nyuntu wanyu ini ngananya?”

Ka wangkangu, “Nganaṇa ini ‘Tjuṭanya.’” Panya mamu tjuṭa mulapa wati palula unngu nyinangi. ³¹ Munuya Jesula tjuṭa-arangku ngatjira wangkangi, “Wantimalanya piṭi marukutu wituntja wiyangku. ³² Palu witulalanya nyara pikipiki tjuṭakutu, nyara pulingkaya ngarala ukiri ngalkuni, palula tjanalakutulanya witula.”

³³ Ka tjananya mulapaṭu witunu, kaya watinguru panya pakara tjukaruru wirtjapakara pikipiki tjuṭangka tjarpangu. Kaya pikipiki panya tjuṭa mamu tjuṭa tjarpanganya puli waṛarangka tjarukutu wirtjapakara ukalingkula ḫrungka uwankara tjarpara ilungu.

³⁴ Ka wati panya pikipiki tjuṭa kanyilpai tjuṭangku nyakula wirtjapakanu tawunukutu, munuya tjakultjunu aŋangu uwankarangka ngura ititja tjuṭangka kulu.

³⁵ Kaya nyangatja kulira aŋangu tjuṭa anu nyakunytjikitja munuya wirkara nyangu wati panya palunya Jesula itingka nyinara tjukurpa kulin-nyangka mantarangka tjarpara. Wati panya paluru kata palyaringkula nyinangi pilunpa, kaya nyakula pulkara nguluringu Jesuku.

³⁶ Munuya aŋangu kutjupa tjuṭangka para-tjakultjunangi wati panyatja palyaringkunyangka nyakunytjatjanungku.

³⁷ Kaya ngura palunya ngurara tjuṭangku Jesuna pulkara tjapinu ngura tjanampa rawa nyinawiyangku wantikatintjaku panya pulkaraya palumpa nguluringu.

Ka Jesuna pautangka tatinu ankunytjikitja. ³⁸ Ka wati panya palyaringkunytjalu pulkara ngatjinu palula tjungu ankunytjikitjangku. ³⁹ Ka Jesulu wangkangu, “Wiya, ara malaku nyuntumpa walytja tjuṭaku ngurakutu munu aŋangu tjuṭangka tjakultjura Godalu nyuntunya palyantja.” Ka mulapaṭu anu munu ngura nyara palula tjanala para-tjakultjunangi aŋangu uwankarangka Jesulu palunya palyantja.

Tjairatjaku Untalpa Munu Minymangku Mantara Pampuntja (Matthew-ku 9:18-26; Markaku 5:21-43)

⁴⁰ Kaya palulanguru Jesuna tjana ḫrungka muṇkara malaku ma-itipiringu manta panya palulakutu. Ka wirkankunyangka aŋangu tjuṭa Jesuku pukularingu ala-alā paṭantjatjanu. ⁴¹⁻⁴² Ka wati ini Tjairatjanya wirkana palula tjanala. Wati nyara paluru walī inmatjaku mayatja nyinangi ngura nyara palula, ka palumpa unṭalpa kungkawara tjukutjuku ngurangka wat̄alpi ilunytjikitja ngaringi. Ka wati paluru pulkara tjiturutjituririra Jesula tjinangka itingka tultjungarākatira ngatjiningi palumpa ngurakutu pitjantjaku. Ka mulapaṭu Jesulu palunya waṇaṇu. Kaya aŋangu winkingku tjunguringkula waṇaṛa palunya utjuningi. ⁴³ Ka nyara palula arangka tjanala utu-utu pitjangi minyma kutjupa. Minyma nyara paluru rawa milkali tjutipai nyinangi yiya 12 munu paluru rawaṭu ngangkari tjutakutu anangi, munu mani pulka tjuṭa tjananya rawangku ungangi palunya palyarunguntjaku. Palu palyaringkunytja wiyaṭu rawa paluruṭu ngarangi.

⁴⁴ Ka minyma paluru kulinu Jesunya munu tjutangka unnguwanu pitjangu palulakutu, munu tjanawunungku palumpa mantara wara tjinawanungku kanyintjanya ankala kumpiltu pampunu. Munu mapalku milkali panya palumpa piltiringkula wiyaringu munu palyaringu.

⁴⁵ Ka Jesulu kulira tjanala tjapinu, “Nganaluni panyatja pampunu?”

Kaya uwankara ngurparingu. Ka Peterlu wangkangu, “Wiya Mayatja, anangu nyanga tjutangkuya utjura utjura ngaranyi.”

⁴⁶ Palu Jesulu wangkangu, “Wiya, kutjupangku ni pampunu, kaña kulinu ngayulanguru pakannyangka witulya ngayuku.”

⁴⁷ Ka minymangku panya nyakula kulinu alatji, “Munta, kampangka tu-palkunatju pampunu kañi nintingku alatjitu para-tjapini.” Munu minyma paluru pulkara nguluringkula tjititingu munu tultjungarakatingu palula tjinangka winkingka mirangka munu tjakultjunu paluru pampuntja munu mapalku palyaringkunytja.

⁴⁸ Ka Jesulu wangkangu palula, “Minyma wiru, nyuntun mulapa ngayuku mulamularingu, munun palulanguru palyaringu. Pukulpa mapitja.”

⁴⁹ Ka Jesunya minymangka kuwaripa tu ngarala wangkanyangka wati kutju tjakulpa wirkamu Tjairatjaku nguranguru munu wangkangu Tjairatjala, “Wiya, alatjitu purkutjararingu. Wanti Mayatjanya unytjungku altiwiyangku.”

⁵⁰ Ka Jesulu kulinu watingku alatji wangkanyangka munu Tjairatjala wangkangu, “Nguluringkuwia ngayuku mulamulariwa, ka tjitji nyara paluru palyaringkuku.”

⁵¹⁻⁵³ Munuya Tjairatjaku walingka wirkamu ngura panya palula. Kaya anangu winki urulta nyinara pulkara ulangi tjitji panya palumpa. Ka Jesulu wangkangu tjanala, “Ulanytja wiyaya nyinama. Tjitji nyangatja ilunytja wiya, kunkunpa ngarinyi.” Kaya kulira palumpa ikaringkula kurara pungangi alatji kulira, “Wiya tjitji palatja ilungu alatjitu.”

Ka Jesulu anangu tjuta marku nu urulta nyinanytjaku munu Peternya, Johnnga, Jamesanya munu tjitjiku mama ngunytju kutju altira tjarpatjunu ruumangka wali unngu tjitji panya ngarintjjangka. ⁵⁴ Munu paluru tjitji panya mara witi nu, munu wangkangu, “Tjitji awa, pakala!”

⁵⁵⁻⁵⁶ Ka tjitji panya malaku wankaringu munu mapalku paka nu. Ka tjitji palumpa mama ngunytju pulkara urulyaranu wankaringkunyangka nyakula. Ka Jesulu wangkangu tjitji palunya mai ungkunytjaku, munu pulanya wangkangu, “Nyangatja nyakunytjatjanungku kutjupa tjutangka tjakultjunkuwiyangku wantima. Palya?”

9

Jesulu Nintintja 12 Wangkara Iyantja (Matthew-ku 10:5-15; Markaku 6:7-13)

¹ Munu palula malangka Jesulu nintintja panya 12 altira tjungunu munu tjananya witulyanu mamu tjuta anangu tjutanguru paintjaku munu pikatjara tjuta ku lu palyarunguntjaku. ² Munu tjananya witu nu Godaku tjukurpa anangu tjutangka para-wangkanytjaku tjukurpa panya Godalu anangu tjuta walytjanmara mayatjangku kanyintjatjara. Munu pikatjara tjuta ku lu palyarunguntjaku tjananya witu nu.

³ Munu tjanala wangkangu, “Kutjupa kutjupa tjuta katintja wiyangkuya wantima, tjukara wiya, yakutja wiya, mai, mani munu mantara tjuta wiya.

⁴ Munuya tawunu kutjupangka wirkara anangungku altira walingka

tjunkunyangka, wali pala palula alatjiṭu ngarima, munuya pala palulanguru para-ngarala warkarima, munu ngula panya ankunytjikitjangku kutju ngura palunya wantikatima. ⁵ Palu tawunu kutjupangka wirkara anangungku altira ngurangka tjunkuwiyangku wantinyangka, nyura uti ngura palunya wantikatima, mununku ulpu puutanguru patapatala piruku tjananya nyakunytja wiyatjangku. Kaya nyakula kulilku Godanya tjanampa mirpañarinyangka.” Alatji Jesulu tjananya wangkara wituṇu.

⁶ Kaya nintintja panya tjuta ma-pakaṇu. Munuya ngura tjukutjuku tjutangka para-pitjalira Tjukurpa Palya wangkangi munu pikatjara tjuta palyarunguningi.

*Iratalu Putu Kulintja
(Matthew-ku 14:1-12; Markaku 6:14-29)*

⁷ Ka mayatja Iratalu panya Galileeku mayatjangku Jesulu palyantja uwankara kulinu munu puṭu kulinungi, “Wati ngananya nyangatja?” Panya anangu kutjupa tjutangkuya wangkangi Johnnga ilunytjatjanu wankaringkunytja. ⁸ Kaya kutjupa tjarangku wangkangi Ilaitjanya malaku pitjanytja, kaya tjara kutjupangku wangkangi wangkatjara irititja kutjupa malaku wankaringkula pakantja. ⁹ Ka Iratalu wangkangu, “Johnnga panyaṇa nganmanytju kata kaṭantjaku wangkangu. Palu watu nganalu nyangangku palyarinanyi?” Munu paluru Jesunya nyakunytjikitja mukuringangi.

*Jesulu Paltjantja Wati 5,000
(Matthew-ku 14:13-21; Markaku 6:30-44; Johnku 6:1-14)*

¹⁰ Kaya iyantja panya tjuta ankunytjatjanu ngula malaku pitjangu munuya Jesula tjakultjenu uwankara tjana palyantjatjanungku. Ka tjananya Jesulu altira katingu ngura ini Pitjaitalakutu paluru tjana anangu tjuta wantikatira mauntalpa nyinanytjikitjangku. ¹¹ Kaya anangu tjutangku kulinu tjana ankunytja munuya malawanungku waṇara ngururpaṭu tjanala tjunguringu. Ka Jesulu tjananya pitjanyangka nyakula pukultu altingu munu tjanala tjakultjunangi tjukurpa panya Godalu anangu tjuta walytjanmara mayatjangku kanyintja. Munu paluru pikatjara tjuta kuļu palyarunguningi.

¹² Ka mungartjirira tjintu nguwanpa ma-tjarpanyangka nintintja tjutangku palula wangkangu, “Nyangatjala ilytjingka nyinanyi mai wiyangka. Wanyu anangu nyanga tjuta witula, kaya ara ngura nyanga ilatja tjutakutu munuya mai mantjira ngalkula paltjaringkula ma-ngari ngura unytjunta.”

¹³ Palu Jesulu wangkangu tjanala, “Wiya, nyura alatjiṭuya tjananya uwa mai ngalkuntjaku wituntja wiyangku.”

Kaya wangkangu, “Wiya, nyangatjala mai tjukutjuku kutjara mankurpa kanyini munu kuka antipina kutjara kuļu. Kan mukuringanyi nganaṇa ankula pulka payamilantjaku anangu nyanga winkiku?” ¹⁴ (Panya ngura nyara palula kunyu wati 5,000 nyinangi winki mulapa, ka tjinguru minyma tjitji winkiṭu nyinangi pala palula.)

Ka Jesulu wangkangu nintintja tjutangka, “Uwa palya, anangu pala tjuta wanyu tjarara nyinatjura waṇala 50 kutjupa, 50 kutjupa.” ¹⁵ Kaya nintintja tjutangku mulapaṭu nyinatjura waṇanu paluru wangkanyangka.

¹⁶ Ka palulanguru Jesulu mai panya kutjara mankurpa antipina kutjara kuļu mantjinu munu ilkarī ira-nyakula Godanya walcura wangkangu, “Wirungkulanyan mai kuka nyangatja ungu.” Munu paluru kaṭantara

nintintja tjuta ungangi. Kaya nintintja tjutangku anangu tjuta paraungangi. Ka mai panya tjuta mulararira waintarira ngaringi.

¹⁷ Kaya uwankarangku ngalkula paltjaringkula wantingu waintarira ngarinyangka. Ka ngalkula wiyaringkunyangka nintintja tjutangku tjana paltjaringkula wantinytja tjuta mantjira piti pulka 12-ngka tjaalyn-garatjunu.

*Peterlu Tjukarurungku Wangkanytja Jesunya
(Matthew-ku 16:13-19; Markaku 8:27-29)*

¹⁸ Ka kutjupa-arra Jesulu kutjungku ankula maunthalpangku nyinara Godala tjapiningi. Kaya palumpa nintintja tjutangku wañara wirkanu. Ka Jesulu tjanala tjapinu, “Nyura ninti? Ngananyaña wangkanyi anangu tjutangku?”

¹⁹ Kaya wangkangu, “Wiya tjarangkuntaya wangkapai ‘John Baptista.’ Kaya tjara kutjupangku wangkapai ‘Ilaitjanya.’ Kaya kutjupa tjutangku wangkapai nyuntu Godaku wangkatjara kutjupa irititja malaku wankaringkunytja.”

²⁰ Ka Jesulu wangkangu tjanala, “Kañi nyura ngananya wangkanyi?” Ka Peterlu wangkangu, “Nyuntun Christanya, panya Godalu kalkura iyantjanya nganañanya wankařunkunytjaku.”

²¹ Ka Jesulu tjananya wangkara markuningi, “Tjukurpa nyanga palun-yaya kutjupa tjutangka tjakultjunkuwiyangku wantima.”

*Jesulu Ngula Ilunytjikitjangku Wangkanytja
(Matthew-ku 16:20-28; Markaku 8:30—9:1)*

²² Munu palulanguru alatji wangkangu, “Ngula wati kura tjutangku ngayunya Watiku Katjanya pulkara pikantankuku. Panya tjukurtjara kuranyitja tjuta, Moseku tjukurpa nintilpai tjuta, munu wati tjiipi kutjupa tjuta kuļu ngayuku pulkara kuraringkuku, munuñiya ma-ungkuku ngayunya pungkula iluntankunytjaku. Palu ngayulu ilunytjatjanu tjintu kutjara ngarala wiyaringkunyangka piruku wankaringkula pakalku.” Tjukurpa nyanga palunya paluru nintintja tjutangka kutju wangkara tjakultjunangi.

²³ Munu palulanguru anangu tjutangka tjukurpa kutjupa wangkangi alatji, “Kutjupangku ngayunya wañantjikitja mukuringkulampa uti paluru walytjangku kulira palyantja wiyangku wantima, munu tjintu kutjupa tjintu kutjupa ngayunya kutju kulira wañanma. Tjinguruuya nyuranya iluntanama ngayunya wañannyangka, palu palya, nyura uti ilunytja kulira nguluringkuwiyangku ngayunya tungun-tunguntu wañanma tiütjbarangku. ²⁴ Anangu kutjupangku tjinguru alatji kulikku, ‘Wanyu kañatju ngayulu walytjangku aṭunyamanama mantangka nyanga rawa wanka nyinanytjikitjangku.’ Palu alatji kulira paluru ngayunya wantinyi, ka Godalu palunya ngula ilunyangka puṭu wankañi palula tjunguringkula tiütjara nyinanytjaku. Ka anangu kutjupangku tjinguru alatji kulikku, ‘Wanyu kaña nguluringkuwiyangku Jesunya titutjbarangku wañanma, kañi palya kutjupangku ngayunya iluntankuku palunya wañannyangka.’ Ka alatji kulinnyangka Godalu ngula ilunyangka palunya wankara pakaltjingalku palula tjungu tiütjara wanka nyinanytjaku. ²⁵ Palu anangungku mantatja tjutaku mukuringkula winki mulapa mantjira kanyirampa ngula paluru ilura nyaaringkuku? Wiya, paluru ilura kawankatiku, panya paluru mantatja wiru tjutaku mukuringkula Godanya wantingi, ka mantatja tjutangku palunya puṭu wankarunanyi Godala tjunguringkula tiütjara nyinanytjaku.

²⁶ “Ka tjinguru anangu kutjupa ngayuku tjukurpa kulira ngayuku mulamularingkulampa kuntingkuku anangu tju tangka mi rangka, munu ngayunya wantiku ngayuku tjukurpa ku lu, ka palu purunypa tu ngayulu ngula Watiku Katjangku pitjala palunya ngapartji wantiku ngayuku kuntingkunytjanguru. Panya nyara palula ara ngayulu Mamalanguru pitjaku pitalyti jitu witylula pulka, angelpa wiru tju tangka tjungu, mununa ngayulu ngapartji ngayuku kuntingkupai tju ta wantiku. ²⁷ Kanja tjukarurungku nyurala wangkanyi, panya nyura nyanga kutjupa kutjupa tju ta kuwari ngaranyi, munu nyura kutjupa tjarangku ngula ilunytja kuwaripangka wankangku nyakuku, Godalu mayatja pulkangku anangu tju ta mulapa palumpa walytjaringkunytjaku palyannyangka.” Alatji Jesulu wangkara nintiningi palumpa nintintja tju tangka kulira mulamularingkunytjaku.

Jesunya Apu Katu Irnyantja

(Matthew-ku 17:1-8; Markaku 9:2-8)

²⁸ Nyara palula malangka tjintu 8 ngarala wiyingkunyangka Jesulu nintintja mankurpa al tingu Peternya, Johnnga munu Jamesanya ku lu, munu paluru tjananya puli murpukutu katingu puli katu Godala tjapintjikitja. ²⁹ Munu nyara palula Godala tjapi ra paluru yunpa kutjuparira irnyaningi, ka mantara ku lu pi ranaringu munu wanangara purunypa irnya-irnyara rawa ngarangi. ³⁰ Ka paluru ngarala tjapinnyangka wati Mosenya pula Ilaitjanya utiringkula palula tjungu ngarala wangkangi. ³¹ Panya pula pitalyti pulkatjara utiringu munu pula Jesula wangkangi nganmanytu panya ngula nyaaringkuku Jerusalemala paluru ngura ilkaritjakutu malaku ankunytjaku.

³² Kaya Peternya tjana nganmanypa pilu-piluringkula kunkunaringu munuya wankaringkula nyangu Jesunya pitalyti pulkatjara ngaranyangka munuya wati panya kutjupa kutjara ku lu nyangu.

³³ Ka palulanguru wati panya kutjarangku Jesunya wantikatira ankunytjikitjangku kuliningi, ka Peterlu wangkangu, “Mayatja, nyanga kuwarila wirura nyangangka ngaranyi. Wanyula wiltja mankurpa palyala kutju nyuntumpa, kutju Moseku, munu kutju Ilaitjaku!” Alatji paluru ngur pangku wangkangi ngunti kulira pula mantangka tjukutjuku nyinanytjikitja pitjanyangka-palku.

³⁴ Ka ngarala wangkanyangka ngangkali pitjangu munu Jesunya Mosenya Ilaitjanya tjananya tju tu mu nu wati panya nintintja mankurpa ku lu tju tu, kaya pulkara nguluringu. ³⁵ Ka wangka kutju utiringu ngangkali unngunguru munu tjanala wangkangu, “Nyangatja ngayuku katja, panya ngayulu palunya iyantjikitjangku ngurkantanu. Nyanga palulaya kulinma!”

³⁶ Ka wangkara wiyingkunyangka ngangkali panya katuringu, kaya nintintja panya mankurtu nyangu Jesunya kutju malaringkula ngaranyangka. Uwa, tjana wiru mulapa nyangangi nintintja panya mankurtu, palu tjana nyakunytjatjanungku kutjupa tju tangka wangkawiyangku wantingi unngu kutju kulira. Munuya ngula kutju tjakultjunu.

Jesulu Palyarunguntja Tjitji Mamutjara

(Matthew-ku 17:14-18; Markaku 9:14-27)

³⁷ Munuya mungawinki Jesunya tjana nintintja panya mankurpa ku lu pulinguru ukalingu, kaya anangu tju ta mulatu paluru pitjanyangka nyakula palulakutu ngaparikatingu. ³⁸ Ka wati kutjupa anangu tju tangka

ngurur-ngururpa mirangu munu Jesula pulkara ngatjira wangkangu, “Nintilpai! Wanyutju nyawa katja nyanga! Panya nyanga paluru ngayuku katja kutju. ³⁹ Katju mamungku nyangatja miratjingalpai rawangku munu uritjingara anta-wanipai mantangka, ka witaly-witalyaripai. Munu rawangku alatjingara unytju kutju pakara ankula mapalku pitjala piruku tjarpapai. Ka urira urira pakuringkula nguwanpa ilupai. ⁴⁰ Kanä nyuntumpa nintintja tjutangka nganmanytju ngatjinu mamu nyanga palunya paintjaku, kaya putu painingi.”

⁴¹ Ka Jesulu kulira tjituru-tjitururingu munu tjanala wangkangu, “Nyura mulapa uwankara putu mulamularinganyi munu titutjarangku ngunti kulini. Kanä yaaltji arangku nyuranya nyinara nintilku nyura kulira mulamularingkunyjtaku? Pakuringganya nyuranya rawangku nintira nintira.” Munu palulanguru watingka panya wangkangu, “Katjanku ngalya-kati ngayulakutu!”

⁴² Ka tjitji panya ngalya-katinyangka mamungku piruku uritjinga. Ka mantangka punkara ngarira tjinanpungangi. Ka Jesulu mamu panya painu munu tjitji panya palyarungunu munu palumpa mama ungu.

⁴³ Kaya anangu tjuña pulkara urulyarañu Godalu Jesulawanungku witulya pulkangku palyannyangka nyakula.

*Jesulu Piruku Wangkanytja Ilunytjikitjangku
(Matthew-ku 17:22-23; Markaku 9:30-32)*

Ka anangu tjuña ngarala urulyarannyaangka Jesulu palumpa nintintja tjutangka wangkangu alatji, ⁴⁴ “Kuwariya watarkuriwiyangku kulinma ngayulu nyanga wangkanytja. Panya wati kutjupangku ngayunya Watiku Katjanya nintilku wati mirpañtu tjutangka, kanä wiñra katira iluntankuku.” ⁴⁵ Palu nintintja tjutangkuya putu kulinngi paluru alatji wangkanyangka, panya Godalu tjananya putu kulintjaku palya. Kaya putu nguwanpa tjukarurungku kulinngi munuya nguluringangi palula tjpintjaku.

*Ngananya Pulka Nyinaku?
(Matthew-ku 18:1-5; Markaku 9:33-37)*

⁴⁶ Palulanguru nintintja panya tjutangkuyanku anga-angangku ngaparku wangkangi alatji, “Ngananya wanyu pulka nguwanpa nyinanyi?”

⁴⁷ Ka tjana wangkanyangka Jesulu kulintja wiya, palu paluru nintingku ngurkantanu tjana kulintjita munu tjitji tjukutjuku altira palula itingka ngaratjunu. ⁴⁸ Munu wangkangu tjanala, “Tjinguru nyura ngayuku nintingku tjitji tjukutjuku nyanga purunypa mantjira pukultu walytjanmankulampa nyura ngayunya kulu walytjanmananyi, munu ngayunya iyantjanya kulu walytjanmananyi. Panya nyura walytjangku kulira tjukutjukuringkulampa kutju Godala mirangka pulka mulapa nyinaku.” Alatji Jesulu tjanala wangkangi.

*Wati Kutjupangku Mamu Tjuña Paintja
(Markaku 9:38-40)*

⁴⁹ Ka Johntu Jesula wangkangu, “Mayatja, ngananya nyangu wati kutjupangku anangu tjutanguru mamu tjuña painnyangka nyuntu witunnyangka-palku, panya paluru painingi nyuntunya ini wangkara. Kala palunya painu, panya paluru ngananyaala tjungutja wiya.”

⁵⁰ Ka Jesulu wangkangu tjanala, “Wantimaya paintja wiyangku! Panya anangu kutjupa nganampa kuraringkunyta wiya nyinarampa nyara paluru nganampa walytjatu nyinanyi.”

Tjamiriyanya Ngurara Mankurtu Jesunya Wantintytja

⁵¹ Ka tjintu panya paluru ilaringangi Godalu Jesunya ilkarikutu mantintjaku, ka paluru ngulu wiyangku kulinu Jerusalemalakutu ankunyti jik-itjangku. ⁵² Munu wati maŋkurpa kuranyungku iyaŋu ankula ngura ngurintjaku manta Tjamiriyalakutu. Kaya Tjamiriyalawanu ankula ngura tjukutjukungka wirkanu ngura tjanampa palyantjikitja. ⁵³ Palu aŋangu nyara palunya ngurara tjutangku Jesunya tjananya wantingi tjanampa ngurangka tjunkunytja wiyangku, panya paluru tjana wati Jew tjuta Jerusalemalakutu anangi. Nyara palulanguruya palunya tjananya wantingi Jew tjuta nyakula.*

⁵⁴ Ka palumpa panya nintintja kutjarangku Jamesalu pula Johntu nyakula wangkangu Jesula, “Mayatja, nyuntu mukuringkulampa uti nganana Godala tjapinma paluru waru ilkariringuru iyantjaku, ka aŋangu nyanganpa uwankara kampara wiyalu.”

⁵⁵ Palu Jesulu małakukutuṛa palunya pulanya painu.* ⁵⁶ Munuya ngura palunya wantikatira ma-pakaŋu ngura kutjupakutu ngapartji.

Jesunya Wanantjikitjangku Wangkanytja (Matthew-ku 8:19-22)

⁵⁷ Munuya iwarangka anangi, ka wati kutjupangku palula wangkangu, “Ngayuluŋa nyuntula tjungu para-pitjalinkunytjikitja mukuringanyi nyuntu ngura tjutakutu ankunyangka.”

⁵⁸ Ka Jesulu palula wangkangu, “Panya tuuka tjutaku nyarkalpa tjuta ngarintjaku ngaranyi. Ka tjulpu tjutaku maŋngu tjuta ngaranyi tjana ngarintjaku, palu Watiku Katjaku ngura ngaranytja wiya ngarikatira pakuiyaringkunytjaku. Panya ngayulu ngura wiyatjara rawa para-pitjalinkupai.”

⁵⁹ Munu paluru wati kutjupangka wangkangu, “Ngayula tjunguriwa mununi waŋanma!”

Ka wati panya paluru Jesula wangkangu, “Munta Mayatja! Wanyuni unytjungku wantir’iyala, panya ngayuku mama tjilpi mulapa, kaŋa ngula tjitularira pitjala nyuntula tjunguringkula nyuntunya waŋalku.”

⁶⁰ Ka Jesulu palula wangkangu, “Wiya, ngayunya-warara kulinma, kaya ngurpa tjutangku nyuntumpa mama wiyingkunyangka tjunutjunkuku. Palu nyuntu ankula ngura tjutangka para-tjakultjunama tjukurpa panya Godalu aŋangu tjuta waltyjanmara mayatjangku kanyintjatjara.”

⁶¹ Ka kutjupangku ngapartji palula wangkangu, “Mayatja, ngayulu nyuntula tjungu ankunyti jikitja mukuringanyi. Palu wanyuni wantir’iyala-warara, kaŋa ankula ngayuku waltyja tjuta-wararangku tjakurira pitjala nyuntula tjunguringkuku.”

⁶² Ka Jesulu wangkangu, “Wiya, aŋangungku Godaku warika palyantjikitja mukuringkula uti tiṭutjarangku palyanma małakukutuṛa kulintja wiyangku. Panya paluru piruku małakukutuṛa kulirampa warika Godalu wituntjtja putu tjukarurungku palyani.”

* 9:53 Tjakaya aŋangu Tjamiriyanya ngurara tjuta Jew tjutaku pułkara kuraringkupai. * 9:55 Nyiri irititja kutjupa tjarangka tjukurpa nyangatja kulu ngarinyi alatji munu wangkangu palula, “Wiya kulila, nyura kurunpa palyatjara Godaku kuruntjara. Panya ngayulu Watiku Katjanya aŋangu tjuta wiyanjtjikitja pitjanytja wiya. Ngayulu aŋangu tjuta wankarunkunytjikitja pitjangu.” Palu nyangatja kunyu wati kutjupangku mała walkatjunu munu Luke-aku tjukurta tjungunu.

10

Nintintja 72 Iyantja

¹ Ka nyanga palula małangka Mayatja Jesulu ngurkantanu wati 72 kutjupa, munu tjananya kutjara kutjara iyanu ngura uwankarakutu palula kuranyu ankunytjaku panya paluru nganmanytju kulinu ngula ankunytjikitjangku. ² Munu paluru tjananya alatji wangkara iyanu, “Panya anangu mungili mulapa nyangatja watarku nyinara-waṇinyi Godaku walytjaringkunytjikitja paṭara, palu anangu Godaku warkaripai maṇkurpa kutju ngaranyi palula tjanala ankula tjukurpa tjakultjunkunytjaku tjana kuļu kulira Godaku walytjaringkunytjaku. Kaya Godala tjapila palumpa warkaripai kutjupa tjuta ngurkantara iyantjaku nyuranya alpamilara anangu ngura wikitjangka Tjukurpa Palya wangkanytjaku. Kaya kulira Godaku mulamularingkula palumpa walytjaringkuku.

³ “Ala, araya palya. Palu wanyuya kulila panya ngayulu nyuranya iyanı tjiipi tjuta purunypa inura tjutangka ngurur-ngururpa.

⁴ Wantimaya yakutja katiwiyangku munu mani munu tjinatja kuļu, munuya anangu kutjupa tjuta iwarangka nyakulampa tjanala ngarala wangkanytja wiyangku wantima.

⁵ “Munuya tawunu kutjupangka wirkara walingka tjarpantjikitjangku anangu walı pala palula nyinapai tjutangka alatji wangkama, ‘Uwa, Godalu nyuranya kurunpa rapa kanyinma.’ ⁶ Ka tjinguru waliku mayatja wati mirpanṭju nyinanyangkampa Godalu palunya munu palumpa walytja tjuta kuļu kurunpa rapara kanyintja wiyangku wantiku, kaya paluru tu alatji tu nyinaku pukulpa wiya. Palu tjinguru waliku mayatja wati pukultju nyinanyangkampa Godalu palunya kurunpa rapara kanyilku palumpa walytja tjuta kuļu. ⁷ Ka nyura walı nyara palula tjarpara palula tjanala tjungu nyinama munuya mai kuka kuļu ngalkula tjikinma paluru tjana nyuranya ungtunyangka. Panya anangu kutjupa nyurampa warkarinyangka nyura palunya ungtupai, kaya palu purunypa nyura anangu tjutangka ngayuku warka palyannyangka paluru tjana uti ngapartji nyuranya pukularira ungtama. Palya! Kaya tawunu pala palula nyinara, walı kutju pala palula ngura tjunkula nyinama walı kutjupa tjutakutu ankunytja wiya.

⁸ “Ka nyura tawunu kutjupangka wirkankunyangka tjinguru anangu nguratja tjutangku pukularira mantjilku, ka tjana nyuranya mai kuka kuļu ungtunyangkampa pukularira ngalkunma wantintja wiyangku.

⁹ Munuya ngura pala palula pikatjara tjuta nyakula palyarungunma munuya tjanala tjakultjunama alatji, ‘Panya watalpi ilaringanyi Godalu anangu tjuta mayatjangku walytjanma kanyintjaku.’ ¹⁰ Palu tjinguru nyura tawunu kutjupangka ma-wirkara ka anangu nguratjangku nyuranya papulankunyangkampa nyura iwarakutu ara tawunungka ngururpa munu tjanala alatji wangka, ¹¹ ‘Nyura nganaṇanya wantintyangkala ulpuru nyanga tjinatja nyurampa nguranguru patapataṇi nyuranya ngulutjunkunytjikitjangku.* Palu kulinmaya panya watalpi ilaringanyi Godalu anangu tjuta mayatjangku walytjanma kanyintjaku. Paļu nyura wantinyi palunya.’ Alatji tjanala wangka nyurala kulilwiyangku wantintyangka.

¹² “Panya ngula Tjintu Małatjangka Godalu anangu Tjatamanya ngurara tjuta paira iyalku ngura kurakutu pika pulkatjara nyinanytjaku. Munu

* **10:11** Nyanga alatjiya kunyu ulpuru tjinatja patapatalpai nyaa nintintjikitjangku, panya nintintjikitjangku puṭu wangkanytjatjanungku tjananya wantintja, kaya kunyu nyakula nguluringkupai.

paluru anangu panya nyuranya wantintytja tjuṭa kuļu tjanala tjungu paira iyalku, palu ngura nyara palula tjana nyuranya wantintytjatjanungku * pika pulka mulapa mantjilku Tjatamanya ngurara tjuṭangka waintara.* Nyangatjaña mulamulangku nyurala wangkanyi.”

*Jesulu Ngulutjunkunytja Anangu Kulira Wantipai Tjuta
(Matthew-ku 11:20-24)*

¹³ Ka anangu Kuratjinta nyinanytja tjuṭangku munu Pitjaitala nyinanytja tjuṭangku kuļu Jesunya wantingi palumpa mulamularingkunytja wiyangku. Ka Jesulu tjananya wantinyangka pulkara painingi alatji wangkara, “Nyurampa pika pulka mulapa ngaraku ngura Kuratjinta nyinanytja tjuṭaku munu Pitjaitala nyinanytja tjuṭaku kuļu, panya ngayulu nyurampa ngurangka pikatjara tjuṭa palyarunguningi munu miracle kutjupa kutjupa tjuṭa kuļu witulya pułkangku palyaningu, ka nyura nyakunytjatjanungku kura tjuṭa wantintytja wiya alatjitu munu panya nyura Godalakutu aruringkunytja wiyangku wantingi. Tjinggařu ngayulu ngura panya Tayala pulala Tjaitanta palu purunypa ngañmanytjulpi palyannyangka, anangu ngura nyara palula pulala nyinapai tjuṭa tjinguru mapalku kuranguru piiwiyingama, munuya mantara walyku-walykungka tjarpara tjuṇpangka yunpa nyitinma, tjananku piiwiyingkula kura wantintytja nintintjikitjangku.* ¹⁴ Kulilaya! Ngula tjintu malatjangka Godalu anangu uwankara manta winkitja ngurkantara tjaralku, munu paluru anangu panya ngura Tayanya pulanya Tjaitannga ngurara tjuṭa paira iyalku ngura kurakutu pika pulka mantjintjaku. Munu paluru nyuranya kuļu tjanala tjungu paira iyalku, palu ngura nyara palula nyura pika kutjupa pulka mulapalta mantjilku anangu nyara palula tjanala muñkara.”

¹⁵ Ka Kapunimanya ngurara tjuṭangku kuļu paluna wantingi, ka Jesulu tjananya palu purunypatu wangkangi alatji, “Ka nyura Kapunimala nyinapai tjuṭangku yaaltji kulini? Godalu wanyu nyuranya ilkarikutu katira pulkanmara tjunkuku? Wiya, paluru alatjitu nyuranya tjařu mulapa wañiku ngaři pulkakutu.”

¹⁶ Munu Jesulu palumpa nintintja tjuṭangka wangkangu, “Kutjupangku nyurala kulirampa ngayula kuļu kulini, ka kutjupangku nyuranya wantirampa ngayunya kuļu wantinyi munu paluru ngayunya wantira ngayunya panya iyantjanya kuļu wantinyi.” Alatji Jesulu tjanala wangkangu munu tjananya witura iyanu. Kaya anu ngura uwankarakutu.

Nintintja Panya 72 Malaku Pitjanytja

¹⁷ Ka ngula wati panya 72 paluru ngurkantara iyantja tjuṭa malaku pitjangu pukulpa alatjitu munuya tjakultjunu palula alatji wangkara, “Mayatja! Mamu tjutangkulanya nganananya wanganarangku kulilpai nganana nyuntunya ini wangkara tjananya painnyangka.”

¹⁸ Ka Jesulu tjanala wangkangu, “Ngayulu nyangu Satanna ilkariringuru punkannyangka, panya paluru anangu tjuṭa mayatjangku kanyintjatjanungku kuwari tjananya kanyintja wiyaringu. ¹⁹ Panya ngayulu nyuranya pulkara witulyanu, ka kutjupangku nyuranya puṭu alatjitu

* **10:12** Tjatamanya panya tawunu pulka iriti ngarangi Israelta itingka, ka panya anangu nyara palula nyinapai tjuṭangku kura pulka mulapa rawangku palyannyangka Godalu tjananya uwankara pungkula wiyanu. Nyawa Genesis 18:20. * **10:13** Panya ngura Tayala pulala Tjaitanta anangu Jew wiya tjuṭa nyinangi munuya kura tjuṭa rawangku palyaningu, kaya Israeltanguru Godaku wangkatjara tjuṭangku ngura paluna kuranmankupai.

kuralku. Panya nyura liru tjuṭa munu pitikatali tjuṭa kuļu kantura puuntankunyangkaya nyuranya patjara pikatjarantja wiya. Ka mamu Satantu nyuranya arkara witulyangku kurannyangka nyura kuŋpu pulka ngaraku, ka paluru nyuranya putu alatji kuļu kuralku ngayulu nyuranya witulyankunyangka. ²⁰ Palu nyura uti mamu tjuṭangku nyurala wanganarangku kulinnyangka pukularintja wiyangku wantima, palu uti nyura pukularima panya ngura ilkarungka nyurampa ini tjuṭa nyiringka walkatjunkunytja ngaranyangka.”

*Jesulu Pukularira Mamala Wangkanytja
(Matthew-ku 11:25-27; 13:16-17)*

²¹ Munu palulanguru Jesulu Kurunpa Milmilngatjarangku pulkara pukularira palumpa mamangka wangkangu alatji, “Uwa Mama, nyuntun Mayatja pulka mulapa nyinanyi ilkariku mantaku aŋangu uwankaraku munu ilkaritja uwankaraku kuļu. Kaña nyuntunya kuwari mirrawanira walkuni, panya nyuntun tjukurpa nyanga wiru utinu aŋangu ngurpa tjuṭangka munun nintipuka tjuṭangka utintja wiyangku kutitjurā wantingu. Uwa Mama, mulapa panyan nyanga palunya alatji palyanu nyuntu mukuringkula.”

²² Munu palulanguru Jesulu aŋangu tjuṭangka wangkangu alatji, “Panya Mamaluni uwankara alatji wangkara utinu. Ngayuluña palumpa katja ka paluru kutju ngayuku ninti nyinanyi, ka palu purunyapa ngayulu kutju palumpa ninti mulapa nyinanyi. Palu ngayulu aŋangu kutjupa tjuṭa ngurkantara nintilku, kaya paluru tjana kuļu Mamaku nintiringkula nyinaku ngayulu nintinnyangka kutju.”

²³ Munu palulanguru Jesulu małakukutura palumpa nintintja tjuṭangka kutju wangkangu alatji, “Nyura panya ngayunya kuřu waltyjangku nyanganyi. Pala palulanguru nyura pulkara pukularinyi.

²⁴ Panya wangkatjara tjuṭa munu mayatja pulka tjuṭa kuļuya pulkara mukuringangi nyura nyanga nyakunytjanya nyakunytjikitja, palu nyakunytja wiyatuya ngañmanypa wiyaringu. Munuya nyura purunytpu kulintjikitja mukuringangi palu kulintja wiyatuya ngañmanypa wiyaringu.”

Wati Palya Tjamiriyanya Ngurara

²⁵ Ka wati kutjungku Moseku tjukurpa nintilpaingku pakara Jesunya ngunti arkara tjapiningi alatji wangkara, “Nintilpai, nyaalkuña wanka titutjara nyinanytjikitjangku?”

²⁶ Ka Jesulu ngapartji palula wangkangu, “Nyaa nyiringka walkatjunkunytja ngaranyi? Nyara palunyan nyakula wangkara yaaltji-yaaltji kulilpai?”

²⁷ Ka wati panya paluru wangkangu, “Alatji ngaranyi, ‘Mayatja Godaku pulkara mukuringama kurunpa winki, munu palunya kutju pukulmankunytjikitjangku kuliřa tiṭutjarangku wiru palyanma.’” *

Ka kutjupa kuļu ngaranyi alatji,

‘Aŋangu kutjupa tjuṭaku pulkara mukuringama nyuntunku mukuringkunytja purunyapa.’” *

²⁸ Ka Jesulu palula wangkangu, “Tjukarurungkun wangkanyi. Alatjinama munun wanka titutjara nyinaku.”

* **10:27** Deuteronomy 6:5 * **10:27** Leviticus 19:18

²⁹ Ka wati paluru Jesulu palunya palyanmankunytjaku mukuringkula piruku tjapinu palula, “Palu aŋangu nganaku tjanampaŋa wanyu mukulya pulka nyinama?”

³⁰ Ka Jesulu ngapartji palula tjukurpa wangkangu aŋa utintjikitjangku nyanga alatji, “Wati kutju iwarangka anangi Jerusalemalanguru Jericholakutu. Kaya wati tjulyalpai tjutangku palunya ngururpa nyangu munuya mantara araltjara palunya pungkula nguwanpa iluntanu munuya iwarangka itingka uti wantikatingu ilunytjaku, ka paluru ngaringi. ³¹ Ka palula malangka wati tjukurtjara iwara panya palula pitjangi munu wati panya pikatjara ngarinyangka nyakula wantikatira kaṭakutjara anu kampa kutjupawanu. ³² Ka palula malangka wati kutjupa timpulangka warkaripai pitjangu wati Levikunu, munu palu purunypaŋu nyakukatira anu kampa kutjupawanu.

³³ “Ka wati Tjamiriyanya ngurara iwara panya palulaŋu pitjangi tangkiyitjara,* munu nyangu wati panya pikatjara ngarinyangka munu palumpa pulkara ngalturingu. ³⁴ Munu palulakutu ankula palunya mantjira pika tjuta uwilangka nyititu wainangka kuļu munu pantitjingka karpinu. Munu palulanguru wati panya pikatjara palunya tangkiyingka utitjunkula katingu walı ruuma tjutatjarakutu munu palunya ruuma kutjungka piitangka ngaritjunkula wirura kanyiningi.

³⁵ “Munu tjintungka wati panya Tjamiriyanya ngurarangku mani ungu wati panya waliku mayatja. Munu palula wangkangu, ‘Nyanganjananta unganyi nyuntu wati nyangatja wirura kanyintjaku. Ka tjinguru mani nyanga palunya wiayingkunyangkampa rawangkuṭu kanyinma wantintyta wiyangku, panya ngayuluŋanta ngula malaku pitjala nyuntunya piruku mani kutjupa ungkuku nyuntu rawangku kanyinnyangka.’”

³⁶ Munu Jesulu aŋa nyanga palunya wangkara wiayingkula wati panya Moseku tjukurpa nintilpaingka tjapira wangkangu, “Yaaltjin kulini wati nyanga maŋkurnguru? Nyuntu ngurkantara, ngananya wanyu wati panya pikatjaraku pulkara mukuringu?”

³⁷ Ka paluru ngapartji palula wangkangu, “Panya paluru, panya pikatjara ngarinyangka nyakula ngalturingu munu alpamilanu.”

Ka Jesulu wangkangu palula, “Ka nyuntu kuļu wati panya paluru palyantja purunypa ankula palyanma, munu aŋangu kutjupa tjuta ngalturingkula alpamilanma.”

Jesunya Mary-la Marthalala Pulala Nyinanytja

³⁸ Ka ngula Jesunya munu palumpa nintintja tjuta kuļu iwarangka ankula ngururpa wirkanu ngura tjukutjukungka. Ka minyma kutjupangku ini Marthalu Jesunya nyakula altingu pitjala palumpa walingka unytju nyinara mai ngalkula pakuwiayingkunytjaku. ³⁹ Ka Jesunya walingka tjapara nyinakatinyangka Marthaku malanypa minyma ini Mary-nya palula itingka nyinakatingu munu paluru nyinara kuliningi Jesulu palula tjukurpa wangkanyangka. ⁴⁰ Ka Marthanya maingka pulkara warkaringi munu pakuringkula palumpa malanypaku unngu mirpanaringi nguwanpa munu pitjala Jesula wangkangu, “Mayatja, ngayuku malanytjuni wantikatingu kutju warkarinytjaku. Ka nyuntu wanyu kulintja wiya ngayulu kutju pulkara warkarinyangka? Wanyu wangka palunya kali tjungungku mai palyala.”

* ^{10:33} Jew tjuta tjaka aŋangu Tjamiriyanya ngurara tjutaku kuraringkupai.

⁴¹ Palu Jesulu palunya wangkangu, “Martha, Martha! Nyangatja nyuntu kutjupa kutjupa tjuta rawangku kulira tjituru-tjitururinyi. ⁴² Palu kutju ngaranyi nyuntu pulkara kulintjaku. Ka nyangatja Mary-lu tjukarurungku ngurkantanu munu panya ngayulu tjukurpa wangkanyangka nyinara kulini, ka kutjupangku palunya putu altinyi.”

11

Jesulu Palumpa Nintintja Tjuta Godala Tjapintjaku Nintintja (Matthew-ku 6:9-13; 7:7-11)

¹ Ka ngula tjintu kutjupa Jesulu Godala tjapiningi. Ka paluru tjapira wiyingkunyangka palumpa nintintja kutjupangku palula wangkangu, “Mayatja, nganananya wanyu nintila Godala tjukarurungku tjapintjaku. Panya Johntu palumpa nintintja tjutu nintinu, palu purunyapa.”

² Ka Jesulu tjanala wangkangu, “Nyura Godala tjapirampa alatji palula wangkama,
‘Mama God, nyuntun pulka mulapa nyinanyi uwankarangka wain-tarinytja.

Nintinmalanya nyuntunya tjukarurungku walkuntjaku añangu uwankarangku.

Munu nyuntu mayatjangku pitjala nganananya uwankara walytjanmara kanyinma nyuntumpa walytja mulapa nyinanytjaku.

³ Kuwarilanya ungama mai kuka kuwariku nganaña ngalkula paltja nyinanytjaku.

⁴ Munu nganaña nyuntunya kurannyangkampa nganananya kalypangku wantima pungkunytja wiyangku.

Panya kutjupangku nganananya kurannyangkampa nganaña palunya kalypangku wantipai.

Anga-kanyinmalanya nganaña ngunti mukuringkula kura palyantjaku-tawara.’

Alatjiya Mamala tjapinma.”

⁵⁻⁶ Munu palulanguru Jesulu tjanala wangkangu, “Tjinguru nyuntu nyuntumpa malpaku walikutu ankuku munga kultungka munun palula wangkaku, ‘Wati wiru! Ngayuku malpa kuwari pariringuru pitjangu ngayunya nyakunytjikitja. Palu ngayulu mai kanyintja wiya palunya ungkunytjikitjangku. Wanyuni wirungku ungama mai mankurpa.’

⁷ “Ka tjinguru nyuntumpa malpangku wali unngunguru ngapartji wangkaku, ‘Pakulwiyangkuni wanti! Nyawa, tuwa pati ngaranyi. Katju tjtiti tjutu munu ngayulu kulu ngañmanypa ngarikatingu kunkunarintjikitja, munuña putu pakani nyuntunya mai ungkunytjikitja.’ Alatji paluru wangkaku. ⁸ Palu ngayulu nyurala wangkanyi, panya paluru nyuntunya malpa kulira pakara ungkunytja wiyangku wantiku, palu nyuntu kunta wiyangku rawangku tjapinnyangka kutju nyuntunya pakara ungkuku nyuntu mukuringkunytja.

⁹⁻¹⁰ “Kaña palulanguru nyurala wangkanyi alatji rawangkuya Godala ngatjinma nyura mukuringkunytjikitja, ka nyuranya ungkuku. Munuya Godala rawangku tjapinma nyuranya tjukurpa palumpa nintintjaku, ka paluru nyuranya nintilku. Uwa, rawangkuya Godala tjapinma, panya añangungku tuwa pati ngaranyangka pungku-pungkupai pakara alpamilantjaku, palu purunyapa. Ka Godalu nyuranya kulikku, panya añangungku wali unngu nyinara tuwa pungku-pungkunyangka kulira alra ungkupai, ka nyara palu purunyapa Godalu rawangku tjapinnyangka kulira ungkupai

munu nintilpai munu alpamilalpai wantinytja wiyangku. ¹¹ Wanyu wati mamangku katja kuka antipinaku ngatjinnyangka liru ungkupai? Wiya! ¹² Munu wanyu ngampuku ngatjinnyangka palunya pititjalili ungkupai? ¹³ Wiya, nyura panya kura tjutangku nintingku tjitji nyurampa wiru tjuta kutju ungkupai ngatjinnyangka. Kaya palulanguru wanyu Mama Ilkaritjanya kulinma, paluru nyaa puruny whole nyinanyi? Panya paluru wiru mulapa nyurala waintara alatji mu munu paluru intjanungku Kurunpa Milmilnga ungkupai nyura palula ngatjinnyangka.” Alatji Jesulu nintintja tjutangka wangkangi.

Jesuku Witulya Godalanguru

(Matthew-ku 12:22-30; Markaku 3:20-27)

¹⁴ Ka wati mamutjara tjaa pati nyinangi putu wangkapai mamungku tjaa patinnyangka. Ka Jesulu mamu palunya paira iyanu, ka wati panya palulanguru ngalya-pakara palunya wantikatingu. Ka wati paluru piruku wangkapairingu, kaya anangu tjutangku palunya kulira pulkara urulyaranu. ¹⁵ Palu kutjupa tjutangkuya wangkangu, “Wiya, mamu ini Piiltjipaltu wati nyanga palunya witulyankupai panya mamu tjutaku mayatja pulkangku, ka nyara palulanguru paluru mamu tjuta pailpai anangu tjutanguru.”*

¹⁶ Kaya kutjupa tjutangku Jesunya ngunti arkara wituwituningi alatji wangkara, “Nyuntunya kunyu Godalu ilkarunguru witulyanu. Kalanya wanyu nintila munu kutjupa kutjupa witulya pulkangku palyala, kala nyakula kuliklu, ‘Munta, mulapa wati nyangatja Godalanguru pitjanytja.’”

¹⁷ Palu Jesunya nintiringu tjana unngu kulintjitjaku, panya tjana kulinigi mamu Piiltjipaltu palunya witulyankunyangka-palku. Ka nyangatja kulira paluru tjanala nyanga alatji wangkangu, “Kulilaya! Panya anangu tjuta ngura kutjunguru, walytjarara walytjararangku tjananku pikangku pungkula pauringkula, tjungu utulu kutjungka nyinanytja wiyingkupai. Ka palu puruny whole anangu walytjarara walytjarara wali kutjungka nyinara, rawa pikaringkula tjungu nyinanytja wiyingkula maunthalparingkupai. ¹⁸ Ka palu puruny whole tjinguru Satannga mamu palumpa walytja tjutaku pikaringkunyangkampa, paluru tjana palumpa kuraringkula palula tjungu nyinanytja wiyingkuku, ka paluru tjananya putu wituwitura uparingkuku, munu tjanampa mayatja wiyingkuku. Ka panya nyura ngayunya wangkapai alatji, ‘Mamu ini Piiltjipaltu wati nyanga palunya witulyankupai mamu tjuta paintjaku anangu tjutanguru.’ Alatjini nyura wangkapai. ¹⁹ Palu ngayulu tjinguru palumpa witulyatjarangku mamu tjuta painnyangkampa, nganalu wanyu nyuranya wanpalpai tjuta witulyankupai mamu tjuta paintjaku? Mamungku? Wiya, nyura alatji wangkanyangkaya nyuranya wanpalpai tjuta nyurampa pikaringkuku, panya Godalu tjananya witulyankupai mamu paintjaku Satantu wiyangku. Ala palatja! Nyura ngayunya ngunti mamutjaranmananyi. ²⁰ Palu wiya, Godalu ngayunya witulyankupai mamu tjuta paintjaku, ka nyara palulanguru nyura uti nyakunytjatjanungku kuliklu, ‘Munta-uwa, mulapa Godanya pitjangu nganananya mayatjangku walytjanmara kanyintjikitja.’

²¹ “Panya wati kunpungku kula ta munu tjula waratjarangku wali angakanyilpai, ka walingka unngu palumpa ulytja uwankara palya ngaripai paluru atuny whole nyunyangka. ²² Palu tjinguru wati kunpu pulka mulapa pitjaku munu palunya pungkula waintariku. Munu palulanguru paluru wati panya palumpa kula ta, kutjupa kutjupa tjuta ku lu mantjira katiku

* ^{11:15} Piiltjipalnga panya mamu Satannga.

ulytja uwankara kulu, munu katira palumpa walytja tjuta tjarara ungkuku. Ka palu purunypa ngayulu witulya pulka mulapa nyinanyi Satanta tjanala waintara alatjitu.

²³ “Panya anangumpa ngayula tjungu nyinanytja wiya ngaralampa paluru Satanta tjungutja nyinanyi ngayuku mirpañtju. Munu paluru anangu tjuta Godalakutu wirkakatinytja wiyangku wantirampa paluru Satanku warkarinyi munu tjananya ngayulanguru wililytjingani.

*Mamu Anangunguru Painnyangka Małaku Pitjala Tjarpanytja
(Matthew-ku 12:43-45)*

²⁴ “Ka mamu anangunguru painnyangka pakara ankupai ngura piltikutu munu para-ngurilpai paluru nyinara pakuiyaringkunytjikitjangku. Palu tjinguru mamu paluru ngura putu ngurira kulilpai, ‘Wiya, ngayulu małaku ankuku ngura panya ngayulu ngañmanyapa nyinanytjjitjakutu.’ ²⁵ Munu mamu panya paluru pitjala nyakupai ngura panya paluru wiru kilina alatjitu ngaranyangka. ²⁶ Munu palulanguru małaku ankula paluru mamu 7 kutjupa altira katipai kura mulapalta, munuya paluru tjana palula tjarpara ngura palyara titutjara nyinapai. Ka anangu panya paluru ngula małangka pulka mulapa kuraringkupai mamu panya paluru tjana unngu nyinara titutjarangku kurannyangka.” Alatji Jesulu tjanala wangkara nintiningi mamu tjuta tjaratjara.

Ngananya Tjana Pukulpa Mulapa Nyinanyi?

²⁷ Ka Jesulu tjukurpa nyanganpa wangkanyangka minyma kutjungku mirara wangkangu, “Minyma panya nyuntumpa ngunytju pukulpa mulapa nyinanyi, panya paluru nyuntunya iti kanyinu mununta ampungka pulkanu.”

²⁸ Palu Jesulu wangkangu palula, “Wiya, panya tjana kutjupa tjuta pukulpa mulapa nyinanyi, panya Godaku tjukurpa wangañarangku kulira palyalpai tjuta.”

*Jesulu Jonah-nyatjara Wangkanytja
(Matthew-ku 12:38-42; Markaku 8:12)*

²⁹ Munu anangu tjuta mulapa tjunguringkunyangka paluru tjanala wangkangu, “Alatjitu nyura kura tjuta nyinanyi, panya nyura ngayuku putu mulamularingkula rawangku tjapini ngayulu miracle kutjupa kutjupa witulya pulkangku palyantjaku, panya ngayulu nyara palu purunypa palyannyangka nyakula kutju nyura kulilpai mulamularingkunytjikitjangku. Palu wiya, Godalu kutjupa kutjupa nyura nyakunytjaku witulyangku palyantja wiyangku wantinyi, panya paluru ngañmanytju wati kutju ini panya Jonah-nya iyanu, ka nyura uti ara nyara palunya kulintjatjanumpa nintiringama. ³⁰ Panya wati nyara palunya Godalu iyanu anangu Ninapanya ngurara tjuta wangkara ngulutjunkunytjaku, tjana kuranguru piiwiyaringkula Godalakutu aruringkunytjaku.* Ka palu purunypa Godalu ngayunya Watiku Katjanya iyanu, kaña anangu nyanga kuwari nyinanytja tjuta wangkara ngulutjunkunytjaku, palu purunypatu wangkanyi kuranguru piiwiyaringkula Godalakutu małaku aruringkunytjaku.

³¹ “Ka panya ngula tjintu małatjangka Godalu anangu uwankara ngurkantara tjaralku, ka nyara palula ara minyma panya mayatja ulpariranguru pitjanytjalu nyuranya puntura wangkara kuranmankuku ngayuku tjukurpa kulira wantintjtangka. Panya paluru ngura ulparira

* **11:30** Anangu Ninapanya ngurara tjuta malikitja tjuta Jew wiya tjuta, munuya ngañmanyapa kura pulka nyinangi. Nyawa Jonah 1:1.

pararinguru pitjangu mayatja pulkangka Tjalamanta kulintjikitja paluru tjukurpa nintingku wangkanyangka. Ka kuvari kutjupa Tjalamanta waintara pulka mulapa nyurala tjungu nyinanyi nyura nyakula wan-ganarangku kulintjaku. Palu nyura ngayunya ngurkantankunytja wiya alatjiṭu.

³² “Ka tjintu panya palulatu aŋangu Ninapanya ngurara tjutangku kuļu nyuranya puntura wangkaku ngayuku tjukurpa kuliřa wantintjijtjangu. Panya paluru tjana Jonah-lu Godaku tjukurpa wangkanyangka kulinu munuya piiwiyaringkula kura tjuta wantingu. Ka kuvari kutjupa Jonah-la waintara pulka mulapa nyurala tjungu nyinanyi nyura nyakula wan-ganarangku kulintjaku. Palu nyura ngayunya ngurkantankunytja wiya alatjiṭu.

Ananguku Tili

(Matthew-ku 5:15; 6:22-23)

³³ “Kaya wanyu kulinma nyangatja. Aŋangungku wali unngu lampa tiliřa wanyu kutitjunkupai kumpilpa ngaranytjaku? Wiya, paluru uti tjunkupai, katu, tili paluru irnyara utintjaku aŋangu tjutangku walingka tjarpara uti nyakunytjaku. ³⁴ Ka palu purunypa nyura kurungku tili nyakupai munu kutjupa kutjupa tili paluru irnyannyangka kuļu.

“Munu nyura kuřu palyangku uwankara uti nyanganyi. Palu nyura tjinguru kuřu kurangku puřu nyanganyi munu mungawalurungka nyinanyi. ³⁵ Kayanku palula-tawara purkarangku kulinma tili mulata kutju nyinanytjikitjangku Godaku panya tilingka. Tjinguru nyuntu tili nguntingka nyinanyi mungawalurungka. ³⁶ Palu nyura kurunpa winki Godaku pulkařa nintiringkunytjikitja mukuringkulampa tili mulata nyinanyi mungawalurungka wiya alatjiṭu, ka Godalu tili pulkalu nyurala uwankara tjukarurungku nintilku nyura palumpa ninti pulkaringkula tili pulkangka nyinanytjaku.”*

Jesulu Paratji Tjuta Munu Moseku Tjukurpa Nintilpai Tjuta Kuļu Kurankunytja

(Matthew-ku 23:1-36; Markaku 12:38-40; Luke-aku 20:45-47)

³⁷ Ka Jesulu tjukurpa wangkara wiyaringkunyangka wati Paratji kutjungku palunya altingu palula ankula mai ngalkuntjaku palumpa walingka. Ka mulapařu Jesunya anu palula tjungu munu walingka

* **11:36** Nyangatja Jesulu tjukurpa kuřu munu tilitjara wangkangi nyuntu nganařa kampa kutjupara tjukurpa kutjupa kulintjaku, panya nganařa unngu nyaa kulin. Panya nganařa kurungku kutju tili nyakupai munula kutjupa kutjupa tilingku irnyannyangka kuļu uti nyakupai. Palu purunypa nganařa unngu kutju kuliřa ngurkantankupai nyaa tjukaruru ngaranyi tjukurpa Godanyatjara. Munula panya kuřu palya nyinarampa uwankara wiřuřa tjukarurungku nyanganyi. Palu purunypala kulintja palya nyinarampa nganařa Jesulu panya wangkanytjita uwankaraku mulamularingkuku, panya nganana unngu Godaku pulkařa nintiringkunytjikitja mukuringanyi. Palu tjingurula kuřu pika nyinarampa nganařa puřu nguwanpa tjukarurungku nyakuku, munula tjinguru kurutjararingkula puřu alatjiṭu nyakuku. Palu purunypala Godanya unngu wantirampa nganařa Jesulu wangkanytjaku mulamularingkunytja wiyangku wantiku, panya nganařa Godaku pulkařa nintiringkunytjikitja mukuringkunytja wiya munula palulanguru ngurpa alatjiṭu nyinaku. Pala palula-tawarala uti purkarangku kulinma tjukarurungku unngu kulintjikitjangku. Tjinguru kutjupangku kulin, “Wiya, ngayulu nganmanypa nintiringu Godaku. Nyaakuřa piřku tjukurpa kutjupa nyanga Jesulu wangkanytjaku nintiringama?” Palu alatji kulirampa palurunku ngurparinganyi panya paluru Jesunya wantira Godanya kuļu wantinyi. Palu ngananařa kurunpa winki Godaku pulkařa nintiringkunytjikitja mukuringkunyangkampa paluru nganařala uwankara tjukarurungku nintilku nganařa palumpa ninti pulka nyinanytjaku.

tjarpara anta-ngarikatingu taipulangka itingka.* ³⁸ Ka wati panya Paratjingku Jesunya nyakula pulkara urulyarara kuliningi, “Ai, nyan-gangku aña nganampangka ngañmanytju manyirka paltjintja wiyatú mai ngalkuntjikitjangku.”

³⁹ Ka paluru urulyarara kulinnyangka Jesulu nyakula palula wangkangu, “Panya nyura Paratji tjutangku kutjupa kutjupa wiru tjuتا palyalpai uti, añañgu tjutangku nyuranya nyakula palya-palku kulintjaku. Palu Godalu nyuranya unngu nyanganyi, panya nyura manyungku añañgu tjuتا ngulutjingara kutjupa kutjupa tjuتا tjanampa tJulyalpai, munu panya nyura kura kutjupa kutjupa tjuتا kuļu rawangku kampangkatu palyalpai. Uwa, nyura nyaa puřunypa, panya añañgungku piti үilitja kutju paltjira wirulpai, ka unngutja kiči raputji winki ngarapai, nyara palu puřunypa nyura palya-palku nyinanyi kura mulapa. ⁴⁰⁻⁴¹ Nyura kawakawa tjuتا! Godalu wanyu nyuranya puntu kutju palyanu kurunpa wiya? Wiya, paluru alatjitu nyuranya kurunpa winki palyanu, үilitja munu unngutja kuļu. Ka nyura uti tjukarurungku kulinma munuya añañgu ngaltutjara tjutaku kurunpa winki ngalturingkula tjanampa mulamulangku palyanma wiru tjuتا kutju, ka nyara palulanguru Godalu nyuranya kurunpa winkingku mulamulangku palyannyangka nyakula nyurampa pulkara pukulariku.

⁴² “Palu nyurampa Paratji tjutaku pika pulka mulapa ngaraku! Panya nyura ukiri pañti wiru ini miinpa, munu ruuwa, munu ini kutjupa kutjupa tjuتا kuļu nyurampa kaananguru 100 mantjira tjarara 10 Godanya ungkupai, Moseku panya tjukurta kulintjatjanungku. Palu nyura Moseku tjukurpa pulka tjuتا kuļira wantipai, panya nyura añañgu tjuتا ngunti kuralpai tjanampa tjukarurungku palyantja wiyangku, munu nyura Godaku pulkara mukuringkuntya wiyangku wantipai. Palya nyura ukiri panya tjuتا Godanya unganyi, palu nyura uti waintara kulinma munuya añañgu tjutaku tjukarurungku palyanma.

⁴³ “Uwa, mulapa nyurampa pika pulka ngaraku ngula, panya nyura walı inmatjangka tjunguringkula tjiya wiru tjuتا ngurkantankupai añañgu tjutangka kuranyu uti nyinakatintjikitja mukuringkula. Munu nyura tawunungka kañany-kañanya para-ngarapai añañgu tjutangku nyuranya nyakula mirawaninytjaku mukuringkula. ⁴⁴ Palu nyurampa pika pulka mulapa ngaraku, panya nyura kurulpa irititja tjuتا puřunypa nyinanyi. Panya añañgu tjuتا kurulpa irititjawanu watarku ankupai manta palyangka-palku, palu puřunypa nyuranya añañgu tjutangku nyakula palya-palku kulilpai, palu wiya nyurala unngu kura pulka mulapa ngaranyi.” Alatji Jesulu wangkangi tjanala Paratji tjutangka.

⁴⁵ Ka wati kutjupangku Moseku tjukurpa nintilpaingku palula wangkangu, “Nintilpai, nyuntu tjukurpa nyanga palunya wangkara nganananya kuļu paini.”

⁴⁶ Ka Jesulu palula ngapartji wangkara wangkangu, “Nyurampa kuļu pika pulka ngaraku Moseku panya tjukurpa nintilpai tjutaku, panya nyura añañgu tjuتا rawangku wituwitulpai tjukurpa kutjupa kutjupa tjuتا wanganarangku kuļira palyantjaku, kaya aña tjuتا mulapa ngaranyangka puťu kuļira kaar-kaararira kurunpa pakuringkupai. Panya mayatjangku palumpa wati warkaripaingka tjanangka kutjupa kutjupa pulka mulapa katintyjaku tjalitjunkupai munu mayatja paluru tjalira katira paku pulkaringkunyangka nyakula, palunya alpamilara tjara palulanguru mantjira tjalira katintyja wiyangku wantipai. Nyara palu puřunytju

* ^{11:37} Jew tjutangku tjakangku mai taipula muṭumuṭungka itinguru antangku ngarira ngalkupai.

nyura aŋangu tjuṭa rawangku wituwitulpai kutjupa kutjupa tjuṭa mulapa palyantjaku, kaya pakuringkupai.

⁴⁷ “Uwa, mulapa nyurampa pika pulka utiringkuku, panya nyura kulpi tjuṭa rawangku wirulpai nyara Godaku wati wangkatjara tjuṭa unngu miri ngarinyangka. Palu miri nyara palunya tjananya panya nyurampa tjamupitingku iriti iluntanangi. ⁴⁸ Kaṇa nyuranya kulpi tjuṭa wirura kanyinnyangka nyakula kulilpai, ‘Munta, nyanga paluru tjana tjinguru palya kulini tjanampa tjamupitingku iriti wangkatjara tjuṭa iluntankunytja.’

⁴⁹ “Palu nyanga palunya Godalu nintingku kuliningi munu panya wangkangu, ‘Ngayulu wangkatjara tjuṭa iyalku, tjakulpa tjuṭa kuļu aŋangu tjuṭa wangkara tjukaruruntjaku. Kaya tjara iluntankuku munuya tjara kutjupa kuralku.’ ⁵⁰ Uwa, nyurampa tjamupitingkuya wangkatjara tjuṭa kuwaripatjara mulapa iluntanangi, munuya rawangku iluntankukatingi. Ka nyara palulanguru Godalu nyuranya nyanga kuvari nyinanytja tjuṭa kukanymanu, panya nyura munu nyurampa tjamupitingku wati wangkatjara tjuṭa pungkula iluntankunytjjangka. ⁵¹ Panya nyura Abelnga-warara iluntanu, munuya nyara palulanguru Godaku wangkatjara tjuṭa rawangku iluntara wanangingi, munuya palulanguru wati malatja Tjakarayanya kuļu iluntanu, paluru timpula unngu pitjilpa pulkangka itingka ngaranyangka, Godala mirangka. Uwa, panya palula tjanalanguru kuvari nyura kukanya ngaranyi, panya nyurampa tjamupitingku tjananya rawangku pungkukatinjtjjangka.

⁵² “Uwa mulapa pika pułka mulapa nyurampa ngaraku Moseku tjukurpa nintilpai tjuṭaku. Panya nyura aŋangu tjuṭangka wangkara nintinnyangka kutju tjana kuliṛa Godaku iwaraku nintiringkupai, palu nyura Godala tungunpungkula iwara pala palunya waŋantja wiyangku wantipai, munu kutjupa tjuṭangku kuļu iwara pala palunya wanantjaku-tawara nyura titutjara anga-ngařanyi, tjanala tjukarurungku nintintja wiya.” Alatji Jesulu tjananya wangkangu.

⁵³ Ka Jesunya ankunytjikitja ritiringkunyangka wati tjukurpa nintilpai tjuṭangku munu Paratji tjuṭangku kuļu palunya markunu munuya palula mirpañ-mirpañtu rawangku tjapiningi paluru tjukurpa tjuṭa piṛuku wangkanyangka kulintjikitjangku. ⁵⁴ Panya paluru tjanaya ngunti arkara palula tjapiningi ngunti wangkanyangka palunya kuutpaku katira wangkanytjikitjangku.

12

Paratji Tjuṭa Purunypa Ngunti Palya-palku Nyinanytja Wiya

¹ Ka nyara palula-arangka aŋangu mungilyi mulapa tjunguringu munuyanku ngarala pułkara utjuningi. Ka Jesulu palumpa nintintja tjuṭangka-warara wangkangu nyanga alatji, “Ngulu nyangamayanku nyura Paratji tjuṭa purunyarintjaku-tawara panya paluru tjana ngunti palya-palku nyinapai. ² Panya aŋangungku kampangkaṭu palyantjitia uwankara ngula utiringkuku, paluru unngu kuraringkula kulin-tjitia tjuṭa kuļu, panya kumpilitja uwankara mulapa utiringkuku, kaya uwankarangku kulilku. ³ Panya tjukurpa nyura mungangka kumpira wangkanytja kutjupangku kalala utingku wangkaku, kaya uwankarangku kulilku. Munu tjukurpa nyura wali unngu tjaalytju wangkanytja kutjupangku urilta mirara tjakultjunkuku wali katunguru aŋangu winkingku

uti kulintjaku. Uwa nyurayanku paluru tjana purunyarinytjaku-tawara pulkara atunyamanama.”

*Godaku Kutjuku Nguluringama
(Matthew-ku 10:28-31)*

⁴ “Kana walytja wiru tjutangka nyurala wangkanyi, anangu tjutakuya nguluringkuwiya nyinama paluru tjana nyurampa pikaringkunyangka, panya tjana nyuranya puntu kutju pungkula iluntankuku, munu palulangurulta nyuranya kurunpa pu tu wiyanji. ⁵ Wiya, nyura uti Godaku pulkara nguluringama panya paluru kutju witulya pulkangku nyuranya puntu iluntankunytjatjanungku kurunpa waniku ngura kurangka waru pulkangka kampanytjaku. Uwa, nyara palula-tawara nyura uti palumpa kutjuku nguluringama anangu tjutaku wiya.

⁶ “Panya Godalu nyuranya titutjarangku mukulyangku kulini watarkurinytja wiyangku. Wanyuya tjulpu panya nyii-nyii kulinma. Tjinguru nyura tjulpu palu purunypa kutjara mankurpa payamilalku mani ku lunytja kalka kutjarangka. Palu Godalu tjulpu nyanga tjukutjuku tjutaku watarkurinytja wiyangku tjananya kutju kutju rawangku kulilpai.

⁷ Munu palulanguru tjulpu tjukutjuku tjuta rawangku kulira paluru wanyu nyurampa pulka tjutaku watarkuriku? Wiya, paluru nyuranya rawangku mukulya pulkangku kulilpai tjulpu tjutangka munukara, kaya palulanguru nguluringkuwiya rapa nyinama. Panya paluru nyuranya uwankara kutju kutju nintingku kulilpai. Munu paluru nyurampa mangkaku ninti yaaltjiyu nyurampa katangka ngaranyi. Kutjupangku pu tu kantamila ni, palu Godanya kutju ninti, munu nyurampa kutjupa kutjupa uwankaraku ku lu paluru ninti nyinanyi. Pala palulanguru nyura uti nguluringkunytja wiya rapa nyinama.

*Jesuku Walytjangku Utingku Wangkanytja
(Matthew-ku 10:32-33; 12:32; 10:19-20)*

⁸ “Kulilaya! Tjinguru nyura anangu tjutangka mirangka rapangku wangkaku ngayuku walytja nyinanytjatjanungku, ka ngayulu Watiku Katjangku ngapartji palu purunypatu nyuranya wangkaku Godaku angelpa tjutangka mirangka alatji, ‘Nyanga paluru tjana ngayuku walytja nyinanyi.’ ⁹ Palu nyura tjinguru tjutangka mirangka ngayuku ngurparingkunyangkampa ngayulu nyurampa ngapartji ngurparingkuku tu angelpa tjutangka mirangka. ¹⁰ Uwa, ngayunya nyura Watiku Katjanya kurara wangkanytjatjanu piiwiyingkunyangka Godalu nyuranya kalypangku pungkuwiyangku wantiku. Palu Kurunpa Milmilnga nyura kurara wangkanyangka Godalu nyuranya kukanymankuku nyurampa kalyparingkunytja wiyangku.

¹¹⁻¹² “Kaya tjinguru ngayunya wanannyangka nyuranya wali inmatjakutu witira katiku Jewku mayatja tjutakutu nyuranya kulira ngurkanta ra paintjaku. Ka nyura tjinguru mayatjangka wangkanytjikitjangku pu tu kuliklu, ‘Tjukurpa nyaanatju wangkaku?’ Palu alatji pulkara kulilwiyangku wantima, panya nyara palula arangka tjanala kuranyu ngarala nyura Kurunpa Milmiltu nintinnyangka kuliklu tjukarurungku wangkanytjikitjangku.” Alatji Jesulu wangkangi tjanala.

Tjukurpa Wati Mani Pulkatjara

¹³ Ka wati kutjungku tjanalanguru wangkangu Jesula, “Nintilpai, ngali kutarara tjitula nyinanyi. Katju kuta wanyu wangka, kani mamaku ulytja tjarara uwa.”

¹⁴ Ka Jesulu palula wangkangu, “Wiya, nganalunu wangkangu ngayulu mayatjarira nyupalinya tjarara ungkunyitjaku? Palatja nyupalimpa, ngayuku wiya.” ¹⁵ Munu palulanguru Jesulu aŋangu uwankarangka wangkangu, “Nyura uti ulytja munu mani pulka mantjintjikitja mukuringkunyitja wiyangku wantima! Godalu wanyu nyuranya wankaru kanyilku nyura pulka mulapa kanyinnyangka? Wiya alatji.”

¹⁶ Munu palulanguru paluru tjanala tjukurpa ara kutjupatjara tjakultjunnangi alatji wangkara, “Wati mani pułkatjarangku manta pułka kanyiningi munu mai ukiri pulka paamangka pakaltjinganu. ¹⁷ Munu paluru kutjungku kuliningi, ‘Wal nyangatja mai pulka utulura tjunkunyitjaku tjukutjuku utju mulapa, kaña nyaalku? ¹⁸ Munta, nyanga alatjintina palyalku. Kuwariña wali nyanga tjukutjuku piluntankuku mununa kutjupa pulka mulapa palyalku mununatju nyara palula mai munu ngayuku kutjupa kutjupa uwankara utulura tjunkuku. ¹⁹ Mununatju pukularira wangkaku, “Ngayuku mai pulka munu kutjupa kutjupa uwankara winki ngarinyi kuvari yiya tjuṭaku alatji, kaña rawangku ngalkula tjikira pukulariku mununatju pakuwiya nyinaku.”’

²⁰ “Palu Godalu wati panya palunya wangkangu, ‘Nyuntun kawakawa! Munga nyanga kuvari nyuntu iluku, munun panya nyuntu utulura tjunkunyitja uwankara wantikatiku kutjupangku mantjintjaku.’”

²¹ Munu Jesulu ara nyanga palunya wangkara wiyarinkula tjananya wangkangu, “Nyanga palu purunyariku aŋangu panya palurunku waltyjangku kulira wiru tjuṭa utulura tjunkupai, panya paluru Godanya pulkara pukulmankunyitjikjangku kulintja wiyatū.”

Iluru-ilururinytja Wiya Nyinanytjaku (Matthew-ku 6:25-34)

²² Munu palulanguru Jesulu wangkangu palumpa nintintja tjuṭangka, “Tjinguru nyura kutjupa-ara tjituṛu-tjitururipai alatji kulira, ‘Mailanku yaaltjinguru mantjilku ngalkula paltja nyinanytjikitjangku, munula mantara kulu yaaltjinguru mantjilku tjarpara unytjunpa nyinanytjikitjangku?’ Palu ngayulu nyurala wangkanyi nyanga alatji kuliraya tjituṛu-tjitururinytja wiyangku wantima! ²³ Panya Godalulanya wanka nyinanytjaku palyanu mai kutju pulkara kulintjaku wiya, munulanya puntu wiru palyanu mantara kutju pulkara kulintjaku wiya, palu palunya waintara kulintjaku.

²⁴ “Wanyuya tjułpu tjuṭa nyawa munuya kulinma panya paluru tjanaya ukiri kaanangka pakaltjingalpai wiya munuya mai kururingkunyangka mantjira utulura walingka ngulaku tjunkupai wiyatū, panya Godalu tjananya titutjarangku paltjalpai tjiṇtu winki. Kaya kulinma panya nyura tjułpu tjuṭa purunypa wiya aŋangu pulka tjuṭa nyinanyi, ka panya Godanya nyurampa pulkara mulapa mukuringanyi tjułpu tjuṭangka muñkara. ²⁵⁻²⁶ Palulangurya maiku kutjupa kutjupa tjuṭaku puṭu kulira tjituṛu-tjitururinytja wiyangku wantima, panya nyura tjituṛu-tjituṛu nyinarampa puṭu yiya tjuṭa ma-warani mantangka nyanga rawa wanka nyinanytjikitjangku. Palulangurya kutjupa kutjupa tjuṭaku puṭu kulirampa tjituṛu-tjitururinytja wiyangku wantima.

²⁷ “Kulinmaya wanyu inuntji panya ilytjingka pakantja tjuṭa, panya paluru tjana wiru mulapa ngaranyi, palu tjananku warkarira mantara waltyjangku palyara nganana purunytpai tjarpapai wiya alatji. Panya Tjalamannga mayatja pulka iriti nyinara mantara wiru tjuṭangka

tjarpapai, palu palumpa wiru tjutangka mun̄kara mulapa inuntji panya ilytjingka pakantja tjuta ngaranyi.

²⁸ “Ka nyura nyaaku mantara-tjiratja tjituru-tjitururinyi Godaku pūtu mulamularingkula? Panya Godalu alatji tukirri tjuta inuntjingka wirulpai, palu ukiri paluru tjana tjintu mañkurpa nguwanpa ngarala piltiringkupai, ka tjananya warungku kampara wiyalpai. Kaya nyara palulan-guru kulinma, panya Godalu ukiri tjuta kulira rawangku inuntjingka wirulpai unytju ngarala wiyareringkunytjaku, munu palulanguru nyuranya wantintyta wiyangku pulkara kulilku ukiringka mun̄kara mulapa panya nyura titutjara nyinapai ukiri purunypa wiya. Nyara palulanguru paluru nyurampa watarkurintja wiya, munu nyuranya mantara tjuta ungkuku tjarpantjaku.

²⁹ “Ka palulanguru nyura alatji kulilwiyangku wantima, ‘Yaaltjingurula mantjira ngalkuku? Munula yaaltjingurul mantjira tjikilk?’ Palu kutjupa kutjupaku pūtu kulira tjituru-tjitururintja wiyangku wantima.

³⁰ Nyanga alatjiya Godaku ngurpa tjutangku rawangku kulilpai mantjintjikitjangku. Palu Mama Godanya ninti nyinanyi nyura pala mukuringkunytjita uwankaraku. ³¹ Kaya kutjupa kutjupa tjuta-tjiratjangku tjituru-tjitururira pūtu kuli-kulintja wiyangku wantima, munuya palunya kutju rawangku kulinma paluru nyuranya mayatjangku kanyinnyangka pukulmankunytjikitjangku, ka paluru nyuranya ungkuku mai, mantara, munu kutjupa kutjupa tjuta kūlu nyura mukuringkunyangka.

Ngura Ilkaritjaku Mukuringama

(Matthew-ku 6:19-21)

³² “Uwa, nyura ngayuku walytja wiru mañkur-mañkurpa nyinanyi, munuya nguluringkuwiya nyinama. Panya nyurampa mamangku Mayatja Godalu nyuranya rawangku atunytju kanyintjikitja mukuringanyi walytja uwankara. ³³ Kaya nyurampa ulytja kutjupa kutjupa tjuta tjalamilara mani mantjirampa aŋangu ngaltutjara tjuta ma-ungama. Panya nyura alatji palyannyangka Godalu nyurampa ilkariningka tjunkuku wiru mulapa. Palulangurya rawangku mani mantangka nyanga pulkantjikitjangku kulintja wiyangku wantira ma-ungama Godalu nyakula nyurampa ilkariningka rawangku tjunkukatintjaku wiru tjuta mulapa. Panya ngura nyara palula nyurampa Godalu tjunkunyangka titutjara ngaraku wiyareringkunytja wiya. Panya nyara palula wati kutitjunkupai nyinanyta wiya tjarpara kutitjunkunytjikitja, ka kantaya tjuta kūlu ngaranyta wiya nyarangka mantara ngalkula kurantjikitja.

³⁴ “Uwa, uti nyura ilkaritja tjutaku kutju pulkara mukuringama. Tjin-guru nyura mantatja tjutaku pulkara mukuringkulampa nyura palunya tjananya kutju rawangku kulilku Godanya wantira. Palu nyura ilkaritja tjutaku kurunpa winki mukuringkulampa nyura mantatja tjuta wantira waintara ilkaritja tjuta kutju rawangku kulilku munu Godala kutju wanganarangku kulintjikitja mukuringkuku.”

Mayatjaku Ala-alangku Paṭara Warka Wiru Palyalkatima

(Matthew-ku 24:45-51)

³⁵⁻³⁶ Munu Jesulu tjananya wangkangu, “Ngayukuya titutjara riti ala-alalpa patara ngarama, nyaa purunypa, panya wati warka tjuta tjanampa mayatjaku tili winki paṭantja purunypa. Panya tjanampa mayatja tjinguru nganmanypa anu wati palumpa malpangku kungkawara altinyangka nyakunytjikitja munu pulampa pukularira mai pulka aŋangu malpa tjutangka tjunguringkula ngalkuni. Kaya wati mayatjaku warka tjuta

ngurangka nyinara lampu tilitjara palumpa pañani małaku pitjanytjaku. Munu tjanampa mayatjangku pitjala tuwa pungku-pungkunyangkaya paluru tjana pakara tuwa mapalku alańi. ³⁷ Ka wati panya mayatjangku tjananya pitjala riti pañara ngaranyangka nyakula palunya tjananya pulkara pukulmananyi, munu panya upukuta araltjara tjunkula tjananya taipulangka nyinatjunanyi mai katira ungkunytjikitjangku. ³⁸ Panya mayatja paluru tjinguru munga kultungka pitjama muta tjinguru tjintukutu pitjama, palu palumpa warķa tjuťa kunkunpa wiya palumpa rawa riti ala-alala pañani munuya pitjanyangka nyakula pulkara pukularinyi. Ka nyura palu purunypa ngayuku riti ala-alala nyinama kunkunpa wiya ngayulu pitjanytjaku pañara.”

³⁹ Munu Jesulu tjukurpa kutjupa palu purunypa tjanala piruku wangkangi alatji, “Wati panya kutitjunkupainya kulila, panya paluru walingka tjarpa kutitjunkunytjikitjangku nganmanytu waliku mayatjangka taimi tjakultjunkunytja wiya paluru urulyku wirkankupai. Tjinguru paluru nganmanytu tjakultjunama, ka waliku mayatjangku nintingku nyinara ngura anga-nyangama pitjala tjarpantjaku-tawara. ⁴⁰ Ka palu purunypa nyura uti rawangku riti nguwantu ala-alangku pañara nyangama ngayulu Watiku Katjanya watarku nyinanyangka pitjanytjaku-tawara. Panya nyura uwankara ngurpa yaalara ngayulu małaku pitjanytjaku.” Alatji Jesulu palurunku wangkangi palumpa nintintja tjuťangka.

Tjukurpa Wati Warkatjara

⁴¹ Ka palulanguru Peterlu palula tjapinu, “Mayatja, nyuntu wanyu tjukurpa nyangatja nganańala wangkanyi nganampa kutju, muta aňangu uwankaraku?”

⁴² Ka Jesulu palula wangkangu, “Ngananya wanyu wati warķa nintipuka munu tjukaruru wanganara warķaripai? Nyara palunya mayatjangku tjukaruru nyakula kutju tjunkuku palumpa warķaripai kutjupa tjuťa tjukarurungku atunymara kanyintjaku munu tjananya mai ungkunytjaku.

⁴³ Munu ngula mayatja panya paluru ankunytjatjanungku małaku pitjala nyakuku wati panya paluru warķa panya wirura palyantja. Munu paluru palumpa pulkara alatjitu pukulariku. ⁴⁴ Kańa tjukarurungku nyurala wangkanyi, panya wati mayatjangku alatji wirungku warķa tjuťa atunymara kanyinnyangka nyakula palunya mayatja pulka mulapa tjunkuku palumpa uwankara mayatjarira atunymara kanyintjaku.

⁴⁵ “Palu tjinguru wati paluru kampa kutjuparira unngu kulilk, ‘Mutu ngayuku mayatja tjinguru titutjara anu munu tjinguru ngula kutju malaku pitjaku.’ Munu palulangurulta pitjantja wiya ngaranyangka paluru warķaripai kutjupa tjuťa pikangku pungama, wati tjuťa munu minyma tjuťa kuļu. Munu paluru mai pulka ngalkula waina tjkira tarangkariku.

⁴⁶ Ka ngula mayatja panya paluru małaku pitjaku wati panya paluru watarku nyinanyangka. Munu palunya kura nyinanyangka nyakula pulkara alatjitu pungkula paira iyalku ngura kurakutu panya Godala tungunpungkupai tjuťangka tjunguringkula nyinanytjaku.

⁴⁷ “Ka nyura kulini? Tjinguru wati warķaripaingku nintingku kulini mayatjangku palunya warķaku wangkanyangka munu paluru palyantja wiyangku wantinyi. Ka mayatjangku warķa wantinyangka palunya pulkara mulapa pungkuku. ⁴⁸ Palu wati warķaripaingku tjinguru mayatja mukuringkunytjtja palyantja wiyangku wantinyi ninti wiyangku munu kutjupa ngunti palyani paluru kulintja. Ka palunya mayatjangku watarkitja-mantu pika tjukutjuku pungkuku.

“Kulini nyura? Godalu tjinguru aŋangu kutjupa warka pulka unganyi palyantjaku, munu paluru mukuringanyi warka panya ungkunytjtja tjukarurungku palyantjaku. Munu tjinguru piruku aŋangu kutjupa warka pulka mulapa unganyi warka panya ngañmanytju ungkunytjtjangka mun̄kara, munu paluru piruku mukuringanyi warka panya ungkunytjtja tjukarurungku palyantjaku.”

Walytjapiti Tjuṭangkuyanku Tjararingkula Tjananku Kuraringkuku Je-sulanguru

(Matthew-ku 10:34-36)

⁴⁹ Munu Jesulu rawangku wangkangi, “Panya ngayulu pitjangu mantakutu Godaku tjukurpa waru purunypa wangkara lipintankunytjikitja. Ka tjarangku kulira mulamularingkuku, ka tjarangku kulira wantiku. Kaya nyara palulanguru maŋtalpa maŋtalpa ngaraku wařungku kampanyangka purunypa. Kaña ngayulu mukuringanyi warpungkula waru purunypa lipiringkunytjaku. ⁵⁰ Palu panya ngayuku ngaranyi ngañmanypa pika pulkaringkula pulkara uliringkunytjaku, kaña ngayulu kulil-kulilpa nyinanyi pika panya palumpa paṭara.

⁵¹ “Ka nyura tjinguru ngayunya kulini alatji, ‘Nyangatja tjinguru mantakutu pitjangu aŋangu tjuṭa kalypa nyinanytjaku palyantjikitjampa.’ Palu wiya, nyangatja nyura ngunti kulintja, panya ngayulu pitjanyangka aŋangu uwankara kalyparingkula tjungu nyinanytja wiya, palu kutjupa tjuṭa ngayuku mulamularingkuku, kaya kutjupa tjuṭa ngayuku mulamularingkuwiya nyinaku munuya paluru tjana aŋangu panya ngayuku mulamularingkupai tjuṭaku pikaringkuku. ⁵² Panya kuwaringuru tjinguru aŋangu 5 walytjapiti tjungu nyinanytjatjanu kutjara mulamularingkuku, ka maŋkurpa kulilwiya watarku nyinaku, munuya puṭu tjungu pukulpa nyinaku ngura kutjungka.

⁵³ “Ka wati mama palumpa katjaku kuraringkuku ngayuku mulamularingkunyangka. Ka palu purunypaṭu wati katjangku palumpa ma-mangka tungunpungkuku paluru ngayuku mulamularingkunyangka. Ka minyma ngunytju palumpa uŋtalpaku pikaringkuku ngayuku walytjaringkunyangka. Ka palu purunypaṭu kungkawarangku palumpa ngunytjungka tungunpungkuku paluru ngayuku mulamularingkunyangka. Ka minyma kutjupa palu purunypaṭu palumpa mingkayiku kuraringkuku, ka kungkawaṛa kutjupangku minyma mingkayingka tungunpungkuku.”

Jesulu Paintja Ngunti Pinatjararingkunyangka

(Matthew-ku 16:2-3; 5:25-26)

⁵⁴ Munu palulanguru Jesulu tjanala wangkangu, “Panya nyura wilurara nyakupai ngangkali ngaranyangka munu nyura wangkapai, ‘Kuwarintilanya minangku puyilku.’ Ka mulapaṭu minangku puyilpai. ⁵⁵ Ka palu purunypa nyura piriya wangkanyangka kulira wangkapai, ‘Kuwarinti kuli pulka ngaraku.’ Uwa, mulapaṭu nyura tjukarurungku wangkapai ilkarī nyakunytjatjanungku munu piriya wangkanyangka kulintjatjanungku. ⁵⁶ Palu nyaaku nyura kutjupa kutjupa tjuṭa nyakula puṭu kulini Godalu palyannyangka? Wiya, nyura palya-palku nyinapai tjuṭangku puṭu Godanya tjukarurungku kulilpai.

⁵⁷ “Nyaaku nyura rawangku puṭu kulini tjukarurungku palyantjikitjangku? ⁵⁸ Tjinguru nyuntu aŋangu kutjupa kurannyangka paluru nyuntunya mirpanarira kuutpakutu katiku. Ka katinyangka nyuntu uti palunya wirura purkarangku wangkakatima palumpa kalyparingkunytjikitjangku

kuutpangka wirkankunytja kuwaripangka, kanta paluru tjinguru kaly-pangku wantiku kuutpangka ngaratjunkunytja wiyangku.

“Palu tjinguru nyuntu wangkara palumpa kalyparingkunytja wiyangku wantinyangkampa paluru nyuntunya katiku alatjiu munu wati ngurkantankupaingka kuranyu ngaratjunkuku, kanta paluru nyuntunya kura ngurkantara wangkaku maningka payamilantjaku munu paluru pulitjamunu altiku kanta pitjala nyuntunya witira katira tjailangka tjarpatjunkuku.⁵⁹ Mununta nyara palula rawangku kanyilku nyuntu mani uwankara payamilara wiyatjaku paṭara. Nyangatjaña mulamulangku nyurala wangkanyi.”

Alatji Jesulu wangkangi anangu tjutangka Godanya tjukarurungku kulintjaku.

13

Godalakutu Malaku Aruriwa Kura Tjuta Wantira

¹ Ka nyara palula-arangka anangu kutjupa mankurpa wirkanu ngura nyara palula munuya pitjala Jesula tjakultjunu, “Tjukurpa panyatjan kulinu? Panya anangu Galileenya ngurara mankurpa wal̄i inmatjangka tjarpanu Godanya wal̄kuntjikitja. Munu panyaya kuka pungkula pitjilta tjunkula tiliningi Godanya ungkunyjikitjangku. Ka panya alatji palyan-nyangka Pilate-aku tjaultji tjuta urulyku wirkanu munu panya tjananya tjarpara pungkula iluntanu, ngaltutjara.”

² Ka Jesulu kulira tjanala wangkangu, “Palu nyura nyaa kulini? Tjinguru nyura kulini tjanana kura pulka palyantjatjanu ilungu, ka panya Galileenya ngurara kutjupa tjuta palu purunypa wiya anangu palya tjuta.³ Palu wiya, nyangatja nyura ngunti kulini. Utu nyura kułuyanku kulinma, munuya kura tjuta palyantjatjanu piiwiyingkula Godalakutu aruringama! Panya nyura wantinyangkaya nyuranya palu purunypa iluntankuku.

⁴ “Wanyuya ara panyatja kulila panya wati 18 mungaṭu Jerusale-mala ilunytja. Panya ngura nyara Tjailumala tjananya wal̄i waṛangku pilukatira iluntanu. Ka nyura tjinguru palu purunypa kulini tjanana kura pulka palyantjatjanu ilungu, ka panya anangu Jerusalemania ngurara kutjupa tjuta palu purunypa wiya anangu palya tjuta.⁵ Palu wiya, nyangatja nyura ngunti kulini. Utu nyura kułuyanku kulinma, munuya kuranguru piiwiyingkula Godalakutu aruringama! Panya nyura wantirampa palu purunypa iluku.”

Jesulu Israelnga Utintja Punu Ili Mai Wiya Ngaranytja

⁶ Munu palulanguru Jesulu tjukurpa ara kutjupatjara tjanala wangkangu alatji, “Wati kutjungku palumpa kaanangka puṇu ili pakaltjinguṇu, munu ngula puṇu panya paluru pulkaringkunyangka wati paluru anu mai nyakula mantjintjikitja. Palu ankula puṭu nyangu puṇungka panya mai wiya ngaranyangka.⁷ Munu wangkangu wati panya kaana kanyilpaingka, ‘Nyawa, ngayuluṇa rawa yiya mankurpa pitjangi puṇu nyanga palulakutu mai ili nyakula mantjintjikitja mununa mai puṇu nyangangka nyakunytja wiya alatjiu. Ka wanyu kaṭara punkatjingala, munu puṇu kutjupa tjura palumpa arangka.’

⁸ “Palu wati panya warkaripaingku ngapartji wangkangu, ‘Mayatja, wanyu yiya kutju piṛuku wantima, kaṇa para-tjawara arintara tjiipiku kuna tjunkuku puṇu panya paluru palyaringkula maitjararingkunytjaku.

⁹ Ka tjinguru ngula yiya kutjupa mai pakalku. Palu tjinguru mai pakalwiya ngaranyangkampaña kaṭara waniku.’” Alatji Jesulu wangkangi tjanala.

Minyma Pupatu-pupatu Palyarunguntja Tjintu Milmiltia

¹⁰ Ka ngula Saturday-nga tjin̄tu panya pakuwiyaringkupaingka Jesulu wali panya inmatjangka tjarp̄ara an̄angu tjutangka wangkara nintiningi. ¹¹ Ka minyma kutjupa nyara palula nyinangi wītapi pupatu-pupatu mamungku kurantja, munu paluru rawa mulapa yiya 18 wītapi pupatu-pupatu ankupai tjukaruru wiya. ¹² Ka Jesulu minyma panya palunya nyakula altingu munu wangkangu palula, “Minyma ngana, tjukarururiwa!” ¹³ Munu paluru palula mara tjunu, ka minyma panya paluru mapalku tjukarururingu munu pulkara pukularira Godanya wal̄kuningi.

¹⁴ Ka wali inmatjaku mayatja pulkara Jesuku mirpanaringu minyma panya palunya tjintu pakuwiyaringkupaingka palyarungunyangka, munu paluru an̄angu tjutangka wangkangu, “Panya tjintu 6 kutjupa ngaranyi war̄karinytjaku, kaya tjintu nyara palula tjanala palyarunguntjaku pitjama, palu tjirirpi nyanga milmilpa Saturday ngaranyangkaya uti wantima palyarunguntjaku pitjanytja wiyangku.”

¹⁵ Ka Jesulu palula tjanala wangkangu, “Nyura ngunti palya-palku nyinapai tjūta. Panya nyura tjirirpi kutjupa tjirirpi kutjupa nyurampa puluka munu tangkiyi kūlu araltjara katipai mina tjikintjaku tjirirpi nyanga pakuwiyaringkupaingka kūlu. ¹⁶ Palu nyura paini minyma nyanga nyurampa waltya Aipuramalanguru nyinanytja. Kun̄tangka! Nyanga palunya panya Satantu ngura iritilpi kurañu, ka wītapi rawa pupatu-pupatu ngarangi yiya 18. Ka nyura nyaaku paini pitjanytja wiyangku wantinytjaku wītapi ngayulu palyarunguntjaku? Wiya, utiña minyma nyanga palunya Satantu rawangku kurantja palyanma alatjitu tjintu nyanga pakuwiyaringkupaingka.”

¹⁷ Ka Jesulu alatji wangkanyangka palumpa kuraringkupai tjutangku kulira pulkara kun̄taringu, palu an̄angu kutjupa tjūta Jesuku pulkara pukularingu paluru wiru mulapa palyannyangka nyakula.

Tjukurpa Uninypatjara Munu Yiitjatjara Wangkanytja (Matthew-ku 13:31-33; Markaku 4:30-32)

¹⁸ Munu Jesulu tjanala tjapinu wangkara, “Godalu an̄angu tjūta mayatjangku waltyjanmara kanyintja ara nyaa purunypa ngaranyi? Tjukurpa nyaawanungkuña nyurala wangkara utilku? ¹⁹ Wanyuña tjukurpa un̄inypatjara wangka. Panya watı̄ kutjupangku un̄inypa ini matjata tjuku mulapa mantangka tjunu, ka un̄inypa panya paluru tjuku mularnguru pakara puñu pulkalta ngarangi, kaya tjulpu tjutangku pitjala puñu pala palula mañngu palyara nyinangi. Nyara palu purunypa Godaku waltya tjutaringkupai paluru tjananya mayatjangku kanyintjaku.”

²⁰ Munu Jesulu piruku wangkangu tjanala, “Uwa, Godalu an̄angu tjūta mayatjangku waltyjanmara kanyintja ara nyaa purunypa ngaranyi? Wanyuña tjukurpa kutjupa wangka nyuranya nintintjikitjangku. ²¹ Panya minymangku yiitja tjukutjuku mai ulungka tjungura uritjingalpai, ka panya yiitja tjuku mulatu mai tał̄tulpai pulkaringkunyangka warungka pauntjaku. Nyara palu purunypa Godaku waltya tjutaringkupai.” Alatji Jesulu tjanala wangkara utiningi.

Ala Utju (Matthew-ku 7:13-14,21-23)

²² Ka Jesulu Jerusalemalakutu ankula ngururpa ngura tjukutjuku tjutangka munu pulka tjutangka kūlu an̄angu tjutangka Godaku tjukurpa

wangkara nintiningi. ²³ Ka kutjupangku palula tjapinu, “Mayatja, palu Godalu wanyu anangu mañkurpa kutju wankarunkuku?”

²⁴ Ka Jesulu wangkangu, “Godaku ngura walı pulka purunypa ngaranyi, ka ala utju ngaranyi anangu tjuṭa tjarpanytjaku. Kaya anangu tjuṭa mulapa ala pala palulakutu pitjaku arkara tjarpanytjikitja. Palu anangu kura palyalpai tjuṭa pitjanyangka Godalu wantiku tjarpatjunkunytja wiyangku. Kaya mañkurpa kutju pitjala ala pala utjuwanu tjarpanku Godala tjungu titutjara nyinanytjikitja. Palulanguru nyura uti titutjara tjukaruru nyinama ala pala utjuwanu tjarpara Godala nyinanytjikitja. ²⁵ Ka watı waliku mayatjangku pakara tuwa patinnyangka nyura urilta ngarala tuwa pungku-pungkula walkura wangkaku, ‘Mayatja, alalalampa tuwa!’ Palu watı waliku mayatjangku nyurala wangkaku, ‘Ngayulu nyurampa ngurpa. Yaaltjinguru nyura pitjangu?’ ²⁶ Ka nyura wangkaku, ‘Panya nganana nyuntula mirangka nyuntula tjungungku ngalkula tjikilpai, ka nyuntu kuļu nganampa tawunungka tjarpara tjukurpa nintilpai.’ ²⁷ Palu paluru alatji wangkaku nyurala, ‘Wiya alatjitu, ngayulu nyurampa ngurpa. Araya ngayulanguru. Nyura kuralpai tjuṭa.’

²⁸ “Ka palulanguru nyuranya paira iyannyangka nyura urilta ngarala Aipuramanya, Isaacanya, Jacobanya tjananya Godala tjungu nyinanyangka nyakuku munu wati panya wangkatjara kutjupa tjuṭa kuļu. Munu nyura Godalu tjananya mayatjangku kanyinnyangka nyakula pulkara tjituru-tjitururira ulaku panya nyura tjanala tjunguringkunytja wiyanguru. ²⁹ Kaya ngura uwankaranguru anangu Jew wiya tjuṭa mulapa pitjaku kakararanguru wilurarranguru alinytjaranguru munu ulpariranguru kuļu, munuya paluru tjana pitjala Godaku waltyja kutjupa tjuṭangka tjunguringkula nyinakatiku mai panya pulka pukulpa mulatu ngalkuntjikitja Godalu tjananya uwankara mayatjangku kanyinnyangka. ³⁰ Ka kutjupa tjuṭa panya kuwari maļa nyinanytja tjuṭa kuranyuriku, ka kuranyitja tjuṭa malarinkuku.”

Jesulu Iratanya Anantja

³¹ Ka tjiṇtu kutjupa Paratji tjuṭa Jesulakutu pitjangu munuya wangkangu palula, “Nyuntu uti anama ngura nyangangka nyinanytja wiya, panya Iratalu nyuntunya ngurini iluntankunytjikitjangku.”

³² Ka Jesulu tjanala wangkangu, “Wiya panya Iratanya wati tuuka alatjitu. Kaya ankula palula wangka panya ngayulu tjiṇtu nyanga kuwari mamu tjuṭa anangu tjuṭanguru paini, mununa anangu pikatjara tjuṭa kuļu palyarungunu muņu mungawinki kuļu, mununa palulanguru tjiṇtu mañkurnguru palyara wiyalu warka uwankara.

³³ “Palu ngayulu warka nyanga palunya palyani alatjitu kuwari nyanga, mununa mungawinki kuļu, munu tjiṇtu kutjupa kuļu ngura nyanga palula. Panya ngura nyanga Jerusalemalaya Godaku wangkatjara tjuṭa nganmanytju iluntanangi, munuya palu purunypaṭu ngayunya ngapartji iluntankuku ngura nyanga palulaṭu.”

Jesunya Jerusalemalanguru Tjituru-tjitururinytja

(Matthew-ku 23:37-39)

³⁴ Muņu palulanguru Jesulu Jerusalemalala nyinanytja tjuṭaku pulkara ngalturingkula tjituru-tjitururira ulara wangangi alatji, “Ngaltutjara! Ngayulu nyurampa pulkara mukuringanyi nyanga Jerusalemalala nyinanytja tjuṭaku. Palu iritinguru nyura Godaku wangkatjara tjuṭa rawangku iluntanangi muņu panyaya wati tjukurtjara tjuṭa kuļu pulingka atura iluntanangi panya Godalu ngura nyanga palulakutu iyantja tjuṭa.

Kaṇa rawa mulapa mukuringangi nyuranya uṭulura kanyintjikitja, panya tjulpu ngunytjungkunku kułuny whole tjuṭa nyalpingka unngu uṭulura aṭunymara kanyilpai, palu purunytju. Palu nyura ngayunya wantingi alatjitu.

³⁵ “Ka palulanguru kuwari Godalu nyurampa timpula wantikatinyi, ka panya ulṭu alatjitu titutjara ngaraku. Ka kuwaringuru nyura ngayunya rawangku nyakunytja wiya. Palu ngula nyura ngayunya piṛuku nyakuku mununi nyara palula arangka nyura ngayunya walkura wangkaku alatji, ‘Awari! Wanyula Godanya mirawañira walkunma, panya nyanga palunya Mayatja Godalu iyantjatjanungku pulkara pukulmanu.’” Alatji Jesulu Jerusalemania ngurara tjutanguru tjituru-tjitururira wangkangi.

14

Jesulu Wati Pikatjara Palyarunguntja Tjirirpi Milmila

¹ Ka Saturday kutjupangka tjintu panya pakuwiyaringkupaingka Jesunya anu mai ngalkuntjikitja wati Paratji pulkaku walikutu. Kaya Paratji kutjupa tjutangku munu wati Moseku tjukurpa nintilpai tjutangku kuļu walı pala palula tjunguringkula ngalkuningi, munuya Jesunya ilangku aruṛa nyangangi. ² Panya wati kutju tjunta kutjara munu miṇa kutjara raa-raa pulkatjara Jesula kuranyu nyinangi.

³ Ka Jesulu palunya nyakula Paratji tjutangka munu wati Moseku tjukurpa nintilpai tjutangka kuļu tjaipi wangkara, “Nganampa palya ngaranyi Saturday-ngka pikatjara palyarunguntjaku tjintu panya pakuwiyaringkupaingka, munta wantikula tjirirpi kutjupaku?” ⁴ Kaya uwankara alatjitu pilunpa nyinangi wangkanytja wiya.

Ka Jesulu pikatjara panya witiṇu munu palunya pika palyarungunu munu wituṛa iyanu ngurakutu ankunytjaku. ⁵ Munu małangka Jesulu wangkangu aṇangu tjutangka, “Tjinguru nyuntumpa katja munta tjin-guru puluka tjirirpi pakuwiyaringkupaingka wellangka punkara tjarpanyangkampa nyuntu palunya ilaṛa walatjunkupai mungawinkiku paṭara wantintjatja wiyangku.”

⁶ Kaya nyangatja kuliṛa unngu kuliningi, “Uwa pala.” Munuya ngapartji wangkanytjikitjangku puṭu kuliningi, munuya wangka wiya alatjitu ngarangi.

Walytjangkunku Pulka Palyalwiyangku Wantima

⁷ Ka walı pala palula Jesulu nyangu aṇangu tjutangku tjarpara tjiya wiru nyinakatinjtikitjangku walytjangku ngurkantankunyangka munu paluru tjanala tjukurpa aṛa kutjupatjara wangkangi alatji, ⁸ “Tjinguru kutjupangku nyuntunya mai pulkaku altinyangkampa pitjala tjiya wirungka ngurkantara kuranyu nyinakatiwyangku wantima. Tjinguru aṇangu kutjupa ngaṇmanytju altingu mai pala palumpaṭu. Ka paluru tjinguru wati mayatja purunypa nyuntula waintara nguwanpa.” ⁹ Ka panya nyuntunya maiku altinytjalu tjinguru pitjala nyuntula wangkaku, ‘Nyuntu pala nyinanytjatjangka wati nyangatja nyinatjura kuranyu munu nyuntu nyangangka nyinakati maṛa nguwanpa.’ Ka nyuntu paluru alatjingan-nyangka pulkara kūntaringkuku munun pakara małarku nyinakatiku.

¹⁰ “Palu utin kutjupangku nyuntunya maiku altinyangkampa ngaṇmanypa alatjitu ankula tjiya kutjupangka maṛa nyinama, kanta paluru nyuntunya maiku panya altinytjalu pitjala nyakula wangkaku, ‘Walytja wiru, pakara pitja munu tjiya nyanga wirungka kuranyu nyinakati!’ Kan kutjupa tjutangka kuranyulta nyinaku.

11 “Palu nyuntunku walytjangku pulkanmankunyangkampanta mala tjunkuku, palu nyuntu walytjangku tjukutjuku kulinnyangkampanta kuranyu tjunkuku. Alatji Godalu palyalpai.”

12 Munu Jesulu wangkangu wati panya palunya maiku altintytjanya panya, “Nyuntu mai pulka palyarampa altiwiyangku wantima, nyuntumpa kuṭa malanypa malpa tjuṭa, munu wati mani pulkatjara kuļu, munu nyuntula itingka nyinanytja tjuṭa kuļukulu, panya nyuntu altintyngkampa, tjana kuļu ngula mai pulka palyantjatjanungku, nyuntunya ngapartji palu purunypatū altiku. **13** Palu mai pulka palyarampa aŋangu ngaltutjara tjuṭa, nyumpu tjuṭa munu lurpalpai tjuṭa kuļu alti, munu kuru pati tjuṭa kuļu. **14** Panya paluru tjana nyuntunya ngapartji puṭu ungkupai, kanta ngula Godalu nyuntunya ngapartji ungkula pukulmankuku tjirirpi malatjangka panya aŋangu Godaku walytja tjuṭa ngula ilunytjatjanu pakantjijangka.”

*Mai Pulkaku Altintytja
(Matthew-ku 22:1-10)*

15 Ka Jesulu wangkara wiyarungunyangka wati kutjupangku palula itingka nyinara wangkangu, “Ngula Godaku walytja tjuṭa palula tjun-guringkula mai pulka ngalkuku Godalu tjananya mayatjangku kanyin-nyangka, kaya palulanguru pukulpa mulapa nyinaku.”

16 Ka Jesulu palula ngapartji wangkangu tjukurpa ara kutjupatjara nyanga alatji, “Wati pulkangku aŋangu malpa tjuṭaku mai pulka palyantjikitja mukuringangi munu paluru tjanala ngañmanytju tjakultjunu ngula pitjanytjaku. **17** Ka mai panya ritiringunyangka paluru wati palumpa warkaripai iyanu ankula nyara palunya tjananya altintytjaku wangkara, ‘Pitjaya! Mai uwankara palyara tjunkunytja riti ngarinyi.’

18 “Kaya uwankarangku kutjungku kutjungku wantintjikitjangku wangkangi. Kutjungku alatji wangkangu, ‘Ngayulu kuwari manta payamilaňu, munuňa ankula nyakunytjikitja mukuringanyi. Ka-puṭa nyuntumpa mayatjangka ma-wangka ngayulu puṭu pitjanytja.’

19 “Ka kutjupangku ngapartji wangkangu palula, ‘Ngayulu puluka kutjara maňkurpa payamilaňu malparara malparara munuňa tjananya arkara wařkamilantjikitja mukuringanyi. Ka-puṭa nyuntumpa mayatjangka ma-wangka ngayulu puṭu pitjanytja.’

20 “Ka kutjupangku ngapartji wangkangu, ‘Ngayulu kuwari kutju kungkawara altingu munuňa kuringka nyinanytjikitja mukuringanyi. Ka nyuntumpa panya mayatjangka ma-tjakultjura ngayulu puṭu pitjanytja.’

21 “Ka wati panya wařkangku małaku ankula tjana wangkanytjtja uwankara mayatjangka tjakultjunu. Ka paluru pulkara mirpanarira wangkangu palula, ‘Wala pulka ara tawunukutu munu aŋangu ngaltutjara tjuṭa iwara pulka tjutangka munu tjukutjuku tjuṭangka kuļu nyakulampa tjananya altira ngalya-kati, nyumpu tjuṭa, kuru pati tjuṭa kuļukulu munu lurpalpai tjuṭa kuļu.’

22 “Ka paluru mulapatū ankula altira ngalya-katingu aŋangu ngaltutjara tjuṭa, munu palulanguru wangkangu, ‘Mayatja, panya nyuntu wangkanytjtjangkaya pitjangu, palu ruuma angantja wiyatū ngaranyi.’

23 “Ka mayatjangku panya piřuku wangkangu wati panya wařkangka, ‘Ara ilytjikutu munu iwara kutjupa tjutanguru altira ngalya-kati ngayuku wali angantjaku. **24** Ka aŋangu panya ngayulu ngañmanytju altintytjtja tjuṭangkuya puṭu mai ngalkuku ngayula tjungungku.’” Alatji Jesulu

tjukurpa tjanala wangkangi nintintjikitjangku panya paluru anangu tjutaku pulkara mukuringanyi palulakutu pitjala tjunguringkunytjaku.

Palumpa Nintintja Nyinanytjaku

(Matthew-ku 10:37-38)

²⁵ Kaya anangu tjuta mulapa Jesula tjungu anangi, ka paluru malakukutura tjanala wangkangu, ²⁶ “Kutjupa tjinguru ngayuku nintintja nyinanytjikitja mukuringkulampa uti ngayuku pulkara mukuringama munu palumpa mamaku, ngunyjtuku, kuriku, tjitjiku, nyarumpaku, kuṭaku munu palurunku kuļu tjuku nguwanpa mukuringama. Panya paluru ngayuku waintara tjanampa pulkara mukuringkulampa putu ngayuku nintintja nyinaku. ²⁷ Úwa, nyura ngayuku nintintja nyinanytjikitja mukuringkulampa uti titutjarangku ngayunya wañanma pakuringkuwiyangku ilunytjakutu-wangkara. Palu nyura tjinguru puṇu katakutjarangka ilunytjikitja kulira nguluringkulampa nyura putu ngayuku nintintja nyinaku.

²⁸ “Panya kutjupangku tjinguru wali wara palyantjikitja mukuringkulampa uti paluru ngañmanyju nyinakatira mani-warara kantamilanma nyakunytjikitjangku tjinguru mani pulka ngarinyi wali palunya palyara wiyanjtaku. ²⁹ Palu tjinguru paluru mani kantamilalwiyangku watarkungku wata-warara palyara tjunkulampa tjinguru paluru putu uwankara palyara wiyaliku mani wiyarungkunyangka. Ka ngatalpatu palyara wiyanjtja wiyaṭu wiyarungkuku, ka anangu tjutangku palunya nyakula ikaringkuku. ³⁰ Munuya wangkaku, ‘Wati nyangangku panya wali palyaningi, palu palyara wiyanjtja wiyaṭu, nyangatja kuwaripatu ngaranyi.’

³¹ “Munu tjukurpa pala palu purunypa kutjupa nintiringkunytjikitjangku kulila. Panya Mayatja pulkangku wati tjaultji tjuta pika pungkunytjaku katingi nampa nyangatja 10,000. Ka ankunyangka kutjupangku tjinguru pitjala wangkangu palula, ‘Kulila, nyaratja mayatja kutjupangku nyuranya ngapartji pika pungkunytjikitjangku ngalya-katinyi tjaultji tjuta mulapa nampa nyangatja 20,000 nyuntumpa tjaultjingka mun̄kara mulapa.’

“Ka nyangatja kulira mayatja panya paluru nyinakatingu munu kuliningi alatji, ‘Tjinguru nganaña tjananya pungkula wiyaliku, munta tjinguru wiya. Panya paluru tjana tjuta mulatu nganañanya pungkula wiyanjtaku alatjiṭu.’ ³² Munu paluru tjananya pika pungkula wiyanjtikitjangku putu kulirampa wati kutjupa mankurpa tjakulpa iyanu ankula tjananya ngaparikatira kalypangku wangkara markuntjaku tjaultji panya kutjupa tjuta parari kuwaripatu pitjanyangka.

³³ “Ka palu purunypa ngaranyi nyurampa, panya nyura ngayuku nintintja tjuta nyinanytjikitja mukuringkulampa nyura uti pulkara kulinma. Panya nyura kutjupa kutjupa uwankara wantira ngayuku pulkara mukuringkula kutju ngayuku nintintja nyinaku.” Alatji Jesulu tjananya wangkangi.

Tjaltu Mayu Wiyaringkunytja

(Matthew-ku 5:13; Markaku 9:50)

³⁴ Munu piruku wangkangi tjukurpa kutjupa nintintjikitjangku alatji, “Panya tjaltu wiru mulapa ngaranyi, palu tjinguru tjaltu paluru mayu wiyarungkunyangkampa yaaltjingara piruku tjaltu paluru palyaringkupai mayu wiruringkunytjaku? ³⁵ Wiya tjaltu paluru mayu wiyarungkupai alatjiṭu, ka nyamparingkunyangka wañipai. Ka nyura pina

alangku kulirampa ngalya-kulinma tjukurpa nyanga ngayulu nyurala wangkanytja.”

15

Tjiipi Kawalirinytja Ngurira Malakungku Mantjintja (Matthew-ku 18:12-14)

¹ Ka wati kamantaku mani mantjilpai tjuṭa munu wati kura kutjupa tjuṭa kuļu ilaringu Jesulu tjukurpa wangkanyangka kulintjikitja. ² Kaya Paratji tjuṭangku munu wati Moseku tjukurpa nintilpai tjuṭangku kuļu nyakunytjatjanungku mirpan-mirpanṭu wangkangi, “Wati nyangatja wati kura tjuṭa pitjanyangka tjanampa pukularipai, munu mai kuļu tjanala tjungungku ngalkupai.”

³ Ka Jesulu tjanala tjukurpa ara kutjupatjara wangkangu alatji, ⁴ “Tjinguru wati kutjungku tjiipi tjuṭa kanyini 100, ka tjinguru kutju tjanalanguru kawankatiku. Ka wati paluru yaaltjiriku? Paluru wanyu wantiku? Wiya, paluru 99 panya ukiri ngalkunnyangka wantikatira ankula tjiipi panya palunya ngurilku. ⁵⁻⁶ Munu palunya ngurira nyakulampa paluru pulkara pukularira piningga tjunkula katiku ngurakutu. Munu paluru malpa tjuṭangka munu ila nyinanytja tjuṭangka kuļu wangkaku, ‘Tjunguringkulala pulkara pukulari! Panya ngayulu kutju kawankatinytja ngurira mantjinu.’ Alatji paluru pulkara pukulariku.

⁷ “Ka pala palu purunypa ngaranyi ngura nyara ilkaritjangka. Panya angelpa tjuṭa aŋangu palya tjuṭaku pukularipai, palu panya aŋangu kutjungku kura palyantjatjanu piiwiyingkula aruringkunyangkaya pulkara alatji pukularipai.”

Mani Pulka Kutju Kawalirinytja Ngurira Mantjintja

⁸ Munu palu purunypa piruku Jesulu tjukurpa kutjupa wangkangu alatji, “Tjinguru minymangku mani pulka tjuṭa 10-pa kanyintjatjanungku kutju walingka unngu kawalinkuku, munu paluru lampa tiliṛa tilitjarangku wali unngu puluwangka purkara mulatu ngurira ngurira mantjilku. ⁹ Munu paluru mantjira pulkara pukularira palumpa malpa tjuṭangka palula itingka nyinanytja tjuṭangka kuļu wangkaku, ‘Tjunguringkulala pukularima, panya ngayulu mani kutju kawalinkunytjatjanungku kuwari ngurira mantjinu.’ Alatji paluru pukulariku.

¹⁰ “Ka palu purunypa Godaku angelpa tjuṭa pulkara pukularipai wati kutjungku kura palyantjatjanu piiwiyingkula Godalakutu malaku aruringkunyangkaya.”

Mama Kutju Katja Kutjaraku Mukuringkunytja

¹¹ Munu Jesulu piruku tjukurpa kutjupa tjanala wangkangu alatji, “Wati kutjungku katja kutjara kanyiningi. ¹² Ka katja malatjangku wangkangu mamangka, ‘Mama wanyuni ungama manta panya nyuntu kalkuntja palunya.’ Ka mulapatu mamangku panya manta tjaraṇu pulanya ungkunytjikitjangku munu kutju ungu katja panya malatja.

¹³ “Ka palula maļangka tjiṇtu maŋkurpa wiayingkunyangka katja panya malatjangku palumpa manta tjalamilaṇu munu mani mantjira palumpa ngura wantikatira anu ngura kutjupakutu parari mulapa nyinanytjikitja. Munu ngura nyara palula paluru mani uwankara wiyanu ngunti pukularira. ¹⁴ Paluru panya pulka kanyintjatjanungku uwankara alatji wiyānu. Ka ngula ngura nyara palula ailuru pulkaringu ngura

kutjupa uwankarangka kulu. Ka paluru kutjupa kutjupa ngalkuntjikitjangku kanyintja wiya alatjitu nyinangi maralpa alatjitu.

¹⁵ “Munu paluru ngura nyara palula warka nguriningi mani mantjintjikitjangku, ka wati kutjungku pikipiki tjuta kanyilpaingku palunya mantjira iyanu kuka pikipiki tjutakutu tjananya mai ungkula atunymara kanyintjaku. ¹⁶ Ka paluru pulkara paltjatjiratjarira pikipiki tjutaku mai kurakura nguwanpa ngalkuningi. Ka kutjupangku palunya mai ungkunytja wiya alatjitu.

¹⁷ “Ka paluru ngula kata palyaringkula kulinu, ‘Mulapa ngayulu ngunti palyaningi mununa kuvari paltjatjiratjaringu. Ka panya ngayuku mamaku warka tjutangku uwankarangku mai pulka ngalkula paltja alatjitu nyinapai, palu ngayulu nyanga kuvari paltjatjiratjaringu mununa nguwanpa iluni. ¹⁸ Utina ngura nyangatja wantikatima munu Mamalakutu malaku anama mununa palula wirkara wangkama alatji, “Mama, ngayulu mulapa kuraringkula Godanya kuranu munu nyuntunya kulu kuranu. ¹⁹ Kani kura pulka nyinanyangka katjanmankunytja wiyangku wantima. Palu nyuntuni wangka nyuntumpa wati warkaripai purunyapa nyinanytjaku.” Alatjina ankula Mamala arkara wangkaku.’

²⁰ “Munu alatji kulintjatjanungku mulapatu paluru ngura panya palunya wantikatira pakara anu palumpa mamaku ngurakutu. Ka panya palumpa mama rawa ala-ala nyinangi malaku pitjanytjaku patara. Munu paluru kuwaripatu parari pitjanyangka nyakula ngurkantanu munu ngaparinapari palulakutu wirtjapakanu pulkara ngalturingkula munu palunya ampura mitamita kutjara nyunytjunu palumpa pukularira.

²¹ “Ka palumpa katjangku palula wangkangu, ‘Mama, ngayulu kuraringkula mulapa Godanya kuranu nyuntunya kulu. Kani katjanmankunytja wiyangku wantima.’

²² “Palu alatji wangkanyangka palumpa mamangku palunya kulintja wiyangku wantingi munu palumpa warkaripai tjutangka wangkangu, ‘Warpungkulaya mantara wiru mantjira ngalya-kati, munuya palunya tjarpatjura munuya palula marangka ringi tjura munu tjinatjangka kulu tjarpatjura. ²³ Munuya kuka puluka kulunypa kulu kanpi pulka nganampa iluntara, kala tjunguringkula mai pulka ngalkula pulkara pukulari. ²⁴ Panya ngayuku katja ilungu munu ilunytjatjanu malaku piruku wankaringu, panya paluru kawaliringu, palu paluru kawalirinytjatjanu malaku aruringu.’ Munuya palulanguru uwankara tjunguringkula pulkara pukularingi.

²⁵ “Ka palumpa panya katja ngamanyitja watarku alatjitu kaanangka ngarala warkaringi patu nguwanpa, munu paluru walikutu ilaringkula kutju kulinu tjana wangkatjingara tantjirinyangka. ²⁶ Munu paluru wati warkaripai kutjupa altingu munu palula tjapinu, ‘Nyaaringanyiya pala unngu?’

²⁷ “Ka wati panya warkangku palula wangkangu, ‘Nyuntumpa malanypa malaku aruringu, ka nyuntumpa mamangku puluka kulunypa kanpi pulka iluntankunytjaku wangkangu nganana pukularira ngalkuntjikitjangku, panya nyuntumpa malanypa malaku pitjangu ngurakutu wankaru alatjitu.’ ²⁸ Ka katja panya ngamanyitjangku kulira palumpa malanyku pulkara kuraringkula mulyararingu munu wantingu wali unngu tjarpantytja wiyangku.

“Ka palumpa mama pakanu urilkutu munu palunya nyakula palula kalypantara purkarangku wangangi paluru kulu tjarpanta-

pukularinytjaku. ²⁹ Palu katjangku ngapartji palula wangkangu, ‘Wiya, panya ngayulu rawangku alatjtū nyuntula wangañarangku kulilpai nyuntu wangkanyangka munuña yiya tjuta mulapa nyuntumpa warkaringi, palu nyuntu ngayuku puluka kulunypa kañpi pulka iluntankunytjaku wangkanyta wiyangku wantingi ngayulu ngalkula pukularinytjaku malpa tjutatjarangku. ³⁰ Palu nyuntumpa katjangku manta nyuntu ungkunytjita mapalkungku tjalamilara mani mantjirā ankula wanira wiyanu kungkawara kura tjutangka munu ngula kutju malaku pitjangu nyuntulakutu. Ka nyuntu palumpa kutjuku puluka kañpi pulka iluntara pauntjaku wangkangu palumpa pukularira.’

³¹ “Ka mamangku katjangka wangkangu, ‘Katja, nyuntu panyan titutjara mulapa ngayula tjengu nyinapai, ka ngayulu kanyintja uwankara nyuntumpa ngaranyi. ³² Palyala pukularira kuka mai pulka ngalkunma panya nyuntumpa malanypa ilunytjatjanu malaku wankaringu, panya paluru kawankatinytjatjanu malaku aruringu.’” Alatji Jesulu wangkara wiyaringu.

16

Wati Mayatja Ngunti Kurantja

¹ Munu Jesulu piruku wangkangu palumpa nintintja tjutangka, “Wati kutjupa mani pulkatjara nyinangi, munu paluru wati kutjupa mayatja tjukutjuku tjunu palumpa uwankara atunymara kanyintjaku. Palu ngula wati panya mani pulkatjarangku kulinu tjana wangkanyangka munu nintiringu wati panya paluru tjunkunytjalu ngunti kurannyaangka. ² Munu palunya altira wangkangu palula, ‘Ngayulu kulinu nyuntu ngayunya kam-pangkañ kurannyaangka. Wanyuni nyuntu walkatjunkunytja uwankara nintila nyaanun ngayuku panya mani, panya nyuntu nyanga alatji palyara ngayuku warkarinjtja wiyaringkuku.’

³ “Ka wati panya mayatja tjukutjukungku palurunku kulinigi waltyangku, ‘Yaaltjingalkuna? Panya ngayuku mayatjangkuñ kuwari pailku warkanguru, kaña warka wiyangku paljtatjiratjarira upangku manta puñtjajawalku mununatju kutjupangka ngatjintjaku kunтарinganyi.

⁴ Palu tjinguruña nganmanytu kutjupa kutjupa palyalku, kantini palya warkanguru paira iyalku. Kanika anangu kutjupa tjutangku ngayunya altiku munuñiya tjanampa walingka kanyilku.’

⁵ “Munu wati panya mayatja tjukutjukungku altingu wati mankurpa, panya paluru tjana nganmanytu unytjungku kutjupa kutjupa mantjinu mayatja pulkanguru munuya palunya ngapartji malakungku ungkunytjaku ngarangi. Ka wati panya paluru tjananya altira kutju kutju tjarpatjura wangkangi. Munu paluru wati kutjungka tjapinu, ‘Nyuntu ngayuku mayatja nyaa ngapartji ungkunytjaku ngaranyi?’

⁶ “Ka paluru wangkangu, ‘Ngayulu palunya piti pulka tjuta uwilatjara 18 ungkunytjaku ngaranyi.’

“Ka wati panya mayatja tjukutjukungku palula wangkangu, ‘Wiya palya tjarula, munu nyiringka walkatjura piti pulka 9 kutju malakungku ungkunytjikitjangku.’

⁷ “Munu paluru piruku wati kutjupangka tjapinu, ‘Nyuntu ngayuku mayatja nyaa ngapartji ungkunytjaku ngaranyi?’

“Ka wati panya paluru wangkangu palula, ‘Ngayulu palunya yakutja mai uninypatjara 1,000 ungkunytjaku ngaranyi.’

“Ka wati panya mayatja tjukutjukungku palula wangkangu, ‘Wiya palya tjarula, munu nyiringka walkatjura yakutja 800 kutju malakungku ungkunytjikitjangku.’

⁸ “Ka ngula wati panya mani pulkatjarangku kulinu wati panya paluru alatji palyannyangka, munu palunya mirawañingu kulira, ‘Munta, wati nyangangku ayinayiningku palyanu anangu tjutangku palunya ngapartji ngula altintytjaku munu tjanampa ngurangka palunya kanyintjaku.’”

Ka Jesulu tjukurpa nyanga palunya wangkara wiyaringkula palumpa nintintja tjutangka utinu alatji wangkara, “Uwa, mulapa panya anangu mantatja kulilpai tjutangkuyanku ayinayiningku palyalpai mantangka nyanga pukulpa nyinanytjikitjangku, palu Godaku walytja tjuṭa palu purunypa wiya, panya tjana ngura nyara ilkaritjangka pukulpa nyinanytjikitjangku kutju kulilpai munkaritja waintara.”

⁹ Munu palulanguru tjananya wangkangu, “Palu ngayulu nyurala alatji wangkanyi. Utu nyura mani munu ulytja kutjupa kutjupa tjuṭa nyura kanyintjatjanungku munytjangku ma-ungama anangu kutjupa tjuṭa tjana pukularinytjaku munu nyurampa malparingkunytjaku. Ka palulan-guru nyura munu nyura kanyintja uwankara wiyaringkunyangka Godalu nyuranya mantjira ngura ilkaritjangka pukultu tjunkuku palula tjungu tiṭutjara nyinanytjaku.

¹⁰ “Ka nyura tjukutjuku tjuṭa-waraṭa tjukarurungku kanyintjatjanungku pulka tjuṭa kuļu tjukarurungku kanyilkku, kaya nyurampa nyakula pukulariku alatjiṭu. Palu nyura tjukutjuku tjuṭa wiruṛa kanyintja wiyangku wantirampa pulka tjuṭa kuļu puṭu wiruṛa kanyilkku. ¹¹ Ka nyura mantatja kutjupa kutjupa tjuṭa putu tjukarurungku kanyirampa Godalu wanyu nyuranya wiru tjuṭa palyanyku kanyintjaku ungkuku? Wiya alatjiṭu. ¹² Tjinguru kutjupangku nyuranya wangkara wantikatinyi palumpa kutjupa kutjupa nyura atunymara kanyintjaku, ka nyura puṭu tjukarurungku wiruṛa kanyinnnyangkampa paluru wanyu nyuranya ungkuku walytjangku kanyintjaku? Wiya alatjiṭu.

Tjukurpa Kutjupa Tjuṭa Jesulu Wangkanytja

¹³ “Panya anangu kutju mayatja kutjarangka puṭu warkaripai. Paluru tjinguru kutjungka wangañarangku kulilku munu kutjupangka kulintja wiyangku wantira tungunpungkuku. Munu tjinguru kutjuku pulkara pukularira kutjupaku puṭu pukularira palumpa kuraringkuku. Ka pala palu purunypa nyura tjinguru maniku pukularirampa Godaku puṭu pukulariku. Panya nyura puṭu kutjara tjunguṛa kulin Godanya munu mani kuļu. Palu uti nyura Godanya kutju pulkara kulinma munu mani wantima.”

Jesulu Tjukurpa Kutjupa Piruku Wangkanytja (Matthew-ku 11:12-13; 5:31-32; Markaku 10:11-12)

¹⁴ Kaya wati Paratji tjuṭangku tjukurpa nyanganpa wangkanyangka ilangku kulinigi munuya Jesunya anaṛa palumpa ikaringangi panya tjanaya maniku kutju pulkara pukularipai. ¹⁵ Palu Jesulu tjanala wangkangu, “Nyuranku walytjangku kutju wiru kulilpai anangu kutjupa tjuṭangka mirangka. Palu Godanya nyurampa ninti pala nyura unngu kulintjtjaku. Anangu tjuṭangku nyuranya nyakula mirawañipai, palu Godalu nyuranya unngu nyakula nyurampa pukularinytja wiya alatjiṭu.

¹⁶ “Tjukurpa panya Godalu Mosenya ungkunytjitja munu wangkat-jara tjuṭangku kuļu walkatjunkunytjitja rawa mulapa ngarangi anangu tjuṭangku wangañarangku kulintjaku. Palu panya mungaṭu Johnnga

pitjangu munu aŋangu tjuṭangka tjakultjunangi tjukurpa panya Godalu aŋangu tjuṭa walytjanmara mayatjangku kanyintjitja, kaŋa ngayulu kuļu palu purunypaṭu tjakultjunangi. Kaya kuwari aŋangu uwankara pulkara arkanı Godala tjunguringkunytjikitjangku paluru tjananya walytjanmara mayatjangku kanyintjaku. ¹⁷ Palu kulilaya, panya manta ilkari ngaranyangkampa tjukurpa uwankara Godalu Mosenya tjananya ungkunytja tjuṭa tiṭutjara alatjiṭu ngaraku nyura rawangku wanganarangku kulira palyantjaku, tjukurpa pulka tjuṭa munu tjukutjuku tjuta kuļu.

¹⁸ “Palu kulila nyangatja! Watingku tjinguru kuri wantira minyma kutjupa altirampa kura pulka palyani. Ka palu purunypaṭu tjinguru wati kutjupangku minyma panya kuringku wantintjanya altirampa paluru kuļu kura pulka palyani.”

Wati Mani Pulkatjara Munu Wati Ngaltutjara

¹⁹ Ka Jesulu wangkangu, “Wati kutjupa nyinangi mani pulkatjara munu paluru rawa alatjiṭu mantara wiru tjuṭangka tjarpapai munu wali wirungka nyinara mai pulka ngalkupai tjirirpi winkingka. ²⁰ Ka wati kutjupa ngaltutjara nyinangi pika purtju winkitjara ini Lazarusanya. Kaya palunya katira tjunkupai wati panya mani pulkatjaraku kaitangka itingka nyinara ngatjintjaku. ²¹ Munu paluru mukuringangi wati panya mani pulkatjaraku taipulanguru mai lampi punkannyangka ngalkula paltjaringkunytjikitja. Kaya tjiṭutja tjuṭangku pitjala wati panya palunya pika tjuṭa anytjulpai. ²² Ka ngula Lazarusanya ilungu. Kaya angelpa tjuṭangku palunya katira Aipuramala itingka tjunu palula tjungu nyinanytjaku.

“Ka wati panya mani pulkatjara kuļu ilungu. Kaya palumpa malpa tjuṭangku palunya tjuṇutjunu. ²³ Ka paluru ngura kurakutu anu, munu nyara palula warungka tiṭutjara kampangi pika pulka mulapa. Munu paluru ira-nyakula nyangu Aipuramanya parari mulapa nyinanyangka munu Lazarusanya kuļu nyangu palula itingka nyinanyangka. ²⁴ Munu paluru mirara wangkangu, ‘Mama Aipurama! Ngalturiwatju munutju Lazarusanya ngalya-iyala paluru ngayulakutu pitjala minangka mara tjalatjunkula ngayunya tjalinypa pampura purkantjaku. Pikaŋa pulkaringu warungka nyanga nyinara nyinara.’

²⁵ “Palu Aipuramalu palula ngapartji wangkangu, ‘Katja, nyuntun kulini? Panya nyuntu mantangka nyinaran wiru tjuṭatjara nyinangi. Ka wati nyanga Lazarusanya ngaltutjara nyinangi kura tjuṭatjara kutju. Palu paluru kuwari pukulpa mulapa nyinanyi ngura nyangangka. Kan kuwari nyuntu ngapartji pika pulkatjara nyinanyi. ²⁶ Palu kulila ngati pulka mulapa ngaranyi nyuntula ngalila nyanga ngururpa. Ka nyanganguru kutjupa putu ma-itipiriku nyuntunya alpamilantjikitja. Ka palangka nyinapai tjuṭa putu ngalya-itipiriku nganaŋalakutu pitjanytjikitja.’

²⁷ “Ka wati panya mani pulkatjarangku wangkangu palula, ‘Palu wirungku wanyu Lazarusanya wati-iyala ngayuku mamaku walikutu panya mantangka nyinanytja tjuṭakutu. ²⁸ Panya ngayuku malanypa 5 nyinanyi nyara palula paluruwi tjananya wangkara ngulutjingala ngura nyanga kurakutu pitjanytjaku-tawara.’

²⁹ “Palu Aipuramalu wangkangu palula ngapartji, ‘Tjana panya tjukurpa pulka tjuṭa Mosenya ungkunytjitetja kanyini munuya wangkatjara tjutangku walkatjunkunytja kuļu kanyini. Utu tjana nyakula wangkara ngañmanypa nintiringama munu nintingkulta kulira nguluringama.’

³⁰ “Ka paluru wangkangu, ‘Wiya mama Aipurama, tjana Moseku tjanampa tjukurku puṭu nguwanpa mulamularingkupai. Palu tjinguru wati kutjupangku, tjinguru Lazarusalu, ilunytjatjanu pakantjatjanungku tjanala ankula wangkaku, kaya palunya nyakula paluru wangkanyangka kulira mulamularingama munuya kura palyantjatjanu piiwiyareringkula Godalakutu malaku aruringama.’

³¹ “Palu Aipuramalu wangkangu palula, ‘Wiya, panya nyuntumpa malanypa tjutangkuya Moseku tjanampa tjukurpa tjuta kulira wantirrampa palu purunytru kutjupangku ilunytjatjanungku pakara tjanala wangkanyangka kulira mulamularingkunytja wiyangkuṭu wantiku.’” Alatji Jesulu tjanala wangkangi.

17

Jesuku Walytja Tjuṭa Kurantja Wiyangku Wantinytjaku (Matthew-ku 18:6-7,21,22; Markaku 9:42)

¹⁻² Ka Jesulu wangkangu palumpa nintintja tjutangka, “Uwa, mantangka nyanga nyinara aŋangu tjutangku Godala tungunpungkula kura tjuta palyalpai. Ka kutjupa tjutangku Godala tungunpungkula aŋangu kutjupa tjuta wituwitulpai tjana purunytru kura palyantjaku. Palu aŋangu nyara palumpa tjanampa pika pulka mulapa ngaraku ngunti wituwitunnyangka. Kulilaya! Tjinguru watingku aŋangu kutjupangka liringka puli pulka tjungura karpira palunya puli winki uru ngatingka waniku, ka alatji wiru wiya, kura alatjitu. Palu tjinguru tjitji ngayuku mulamularingkupai nyinanyi, ka aŋangu kutjupangku palunya wituwitulku kura palyantjaku, ka alatji wiru wiya kura pulka mulapa nyara urungka waninytjjangka muñkara mulapa. Panya pika pulka mulapa utiringkuku aŋangu nyara palumpa paluru tjitji tjukutjuku nyanga purunypa ngayula tungunpungkunytjaku palyannyangka. ³ Kayanku nyura pulkara atunymanama.

“Palu tjinguru nyuntumpa kuṭangku nyuntunya kurannyangkampa palula utira tjakultjunama panya paluru nyuntunya kurantja. Ka tjinguru paluru kura palyantjatjanu piiwiyarinkunyangkampa nyuntu palumpa kalyparingama. ⁴ Palu tjinguru nyuntumpa kuṭangku tjintu kutju kałala wara nyuntunya tjuta-ařangku kuralku munu kurantjatjanu paluru tjuta-ařatu małaku pitjaku kuntearingkula nyuntula wangkara kalyparingkunytjikitja, ka nyuntu uti tjuta-ařangkuṭu palunya kalypangku kulira wantima.”

Rapa Mulararinytjaku

⁵ Kaya Jesulu iyantja tjutangku palula wangkangu, “Mayatja, nintinmalanya Godaku rapa mulararinytjaku.”

⁶ Ka Jesulu wangkangu, “Wiya, nyura tjinguru kulini Godaku rapa pulkaringkula kutju nyura pulka palyantjikitjangku. Palu wanyuya uñinypa tjukutjuku kulila. Panya mantangka tjunkunyangka uñinypa paluru pakara puṇu pulkaringkupai, ka palu purunypa nyura Godaku tjukutjuku mulamularingkulampa nyura puṇu nyanga pulkangka wangkaku milku winki pakara ankula uru pulkangka ngururpa ngaranytjaku. Ka mulapaṭu puṇu paluru ankuku nyura witunnyangka.”

Kanany-kananyarinjtja Wiya Mayatjaku Warkarima

⁷ Ka Jesulu piruku tjanala tjukurpa kutjupa wangkangi wati warkatjara alatji, “Tjinguru wati kutjupangku wati warkaripai kanyini. Ka tjinguru paluru urilta warkaripai munu manta runyulpai munta tjinguru paluru tjiipi tjuta atunymanupai, munu paluru tjinguru warkatjanu

wiyaringkula ngalya-tjarpaku. Ka tjarpangka palumpa mayatjangku palula nyaa wangkaku? Tjinguru alatji wangkaku, ‘Pitjala nyinakatira mai ngalkula.’⁸ Wiya, wati pala palula paluru alatji wangkaku, ‘Kukatju paula mai ku lu munu mantara kutjupangka tjarpala mai mina ku lu ngalya-kati ngayulu ngalkula tjikintjaku. Munun ma langka ngayulu ngalkula wiyingkunya ngapartji mai walytjangku ngalkula.’⁹ Ka wati panya war karipaingku uwankara wanga arangku kulira palyan-nyangka mayatjangku wanyu palunya wirunmankuku? Wiya, panya palumpa ngaranyi alatji mayatjangku witunyangka palyantjaku.

¹⁰ “Ka palu purunytju nyura ku lu uti Godalu wangkanytja uwankara palyara wiyarampa palula alatji wangkama, ‘Ngana na nyuntumpa warkaripai tjuta kutju, ka palya nyuntu nganananya wangkara wirunmankunytja wiyangku wantinyi, panya ngana na nyuntu wituntjtita tjuta kutju palyaningi.’” Alatji Jesulu wangkangi palumpa nintintja tjutangka tjana Godalu wituntjtita tjuta wanga arangku kulira palyantjaku.

Jesulu Wati Miri Pikitjara Tjuta Palyarunguntja

¹¹ Ka Jesunya tjana Jerusalemalakutu ma-paka nu munuya Galileela pulala Tjamiriyala ngururwanu anangi. ¹² Munuya wirkanu ngura tawunu kutjupangka tjukutjukungka. Kaya wati 10 miri pika pulkatjara tjuta nyinangi nyara palula wal tjutangka maunthalpa. Munuya Jesunya pit-janyangka nyakula ngaparikatingu palulakutu. Palu tjana pu tu ilaringangi palulakutu, panya tjaka anangu miri pikatjara pu tu tjunguringkupai anangu palya tjutangka. ¹³ Munuya pa tunguru mirara palula wangkangu, “Mayatja Jesu! Ngalturiwalampa!”

¹⁴ Ka Jesulu tjananya nyakula wangkangu, “Ma-pitjaya walikutu munuyanku ankula nintila wati tjukurtjara tjutangka nyuranya miri nyakunytjaku.” Kaya mulapatu anu munuya ngururpa palyaringu.

¹⁵ Ka kutjungku palurunku palyaringkunytja nyakula malaku aruringu Jesulakutu munu wangka katungku mirara Godanya wal ku nu. ¹⁶ Munu pulka pukularira Jesula tjinangka itingka kuranyu wa lungarakatira palunya wal ku nu. Wati nyanga paluru malikitja Tjamiriyanya ngurara, Jew wiya.

¹⁷ Ka Jesulu tjapinu palula, “Panya wati 10 kuwari palyaringu, ka yaaltji 9 kutjupa?” ¹⁸ Munu palulanguru palumpa nintintja tjutangka wangkangu, “Nyangatja wati Tjamiriyanya ngurara kutju malaku aruringu wati malikitja Godanya pukularira walkuntjikitja.” ¹⁹ Munu Jesulu piruku palula wangkangu, “Palya, pakara pukularira ara! Panya nyuntu ngayuku mulamularingkunytjatanu palyaringu alatji.”

Godanya Mayatja Pulka Ngananala Ngaranyi

(Matthew-ku 24:23-28,37-41)

²⁰ Kaya Paratji tjutangku Jesula tjapinu, “Yaalarra Godalu pitjala man-tangka nyanga anangu tjuta walytjanmara mayatjangku kanyilku?”

Ka Jesulu tjanala wangkangu, “Wiya, pu tu nyura uti nyanganji Godalu anangu tjuta walytjanmara mayatjangku kanyintja, panya paluru mayatja mantatja purunypa pitjala palyantja wiya. ²¹ Anangungku pu tu wangkaku, ‘Nyawa! Nyangatja kuwari Godalu pitjala mayatjangku kanyini anangu nyanganpa.’ Munta tjinguru wangkaku, ‘Nyaratjampal!’ Palu wiya, panya Godanya nganmanypa pitjala mayatja pulka nyurala ngurur-ngrururpa ngaranyi nyurala unngu.”

²² Munu Jesulu píruku wangkangu palumpa nintintja tjutangka, “Ngula, pika kutjupa kutjupa tjuṭa utiringkunyangka nyura Watiku Katjaku pulkara mukuringkuku ngayulu warpungkula pitjala wankantjaku, palu putu nyura palunya nyakuku. ²³ Ka nyara palula arangka anangu kutjupa tjutangku nyurala wangkaku, ‘Nyawa Mayatjanya nyaratjampal!’ Ka kutjupa tjutangku wangkaku, ‘Wiya, nyangatjampal!’ Palu alatji wangkanyangkaya kulira wantima, munuya ngayuku ngurintjikitjangku tjanala tjunguringkunytja wiyangku wantima. ²⁴ Panya ngayulu Watiku Katjanya ngula malaku pitjala mapalku utiringkuku anangu uwankarangka manta winkitjangku uti nyakunytjaku. Panya wanangarangku pinpara utilpai manta winki, palu purunyapa ngayulu utiringkuku. ²⁵ Palu ngayulu nganmanypa pikatjararingkuku, kaya anangu mantatja tjutangku ngayunya kurara pungkuku. ²⁶ Panya ngayulu pitjanytja-arangka tjirirpi panya Noah-nya tjana iriti nyinanytjitja purunyapa ngaraku. ²⁷ Panya nyara palula arangka uru pulkangka kuwaripangka anangu tjuṭa watarku nyinangi, munuya mai kuka ngalkuningi, kapi waina kuļu tjikiningi, munuya wati tjutangku kungka tjuṭa altingi. Alatji-alatjituuya nyinangi watarku, ka panya Noah-nya tjana palumpa walytja tjuṭa kuļu uru pulkangka-tawara pautangka tarpangu, ka panya uru pulkangku pakara katuringkula anangu kutjupa uwankara iluntanu.*

²⁸ “Ka palu purunyapa ngula ngaraku ngayulu malaku pitjanyangka. Panya Lotanya tjana iriti nyinanytja-ara purunyapa ngura panya Tjatamala. Panya nyara palula arangka anangu Tjatamanya ngurara tjuṭa watarku alatjitu nyinangi munuya ngalkula tjikiningi, munuya kutjupa kutjupa tjuṭa tjalamilaningi, munuya mai tjuṭa kuļu pakaltjinganingi, munuya wali tjuṭa kuļu palyaningi. ²⁹ Ka panya tjintu kutjupa Lotalu tjana palumpa walytja tjutangku ngura pala Tjatamanya wantikatingu, ka tjana ankula mapaturingkunyangka Godalu waru pulka ilkarénguru iyanu Tjatamalakutu, ka anangu uwankara ilungu malaringkula nyinanytja tjuṭa. ³⁰ Ka nyara palu purunyapa ngula anangu tjuṭa watarku alatjitu nyinaku ngayulu Watiku Katjanya witulya pulka pitjanyangka. ³¹ Nyara palula arangka tjinguru wati wali katu nyinanyi munu uti paluru ukalingkula wali unngu palumpa ulytja mantjintjikitja tjarpanytja wiya mapalku wirtjapakanma. Ka palu purunyapa wati kutjupa tjinguru urilta kaanangka warkarinyi munu uti paluru malaku ngurakutu ulytjikitja ankunytja wiya mapalkutu wirtjapakanma. ³² Minyma panyatjaya kulinma, Lotaku panya kuri, palu purunyapa wiyaringkunytjaku-tawara.* ³³ Anangu kutjupangku tjinguru alatji kulilku, ‘Wanyu kañatju ngayulu walytjangku atunyamanama mantangka nyanga rawa wanka nyinanytjikitjangku.’ Palu alatji kulira paluru Godanya wantinyi, ka Godalu palunya ngula ilunyangka putu wankani palula tjunguringkula titutjara nyinanytjaku. Ka anangu kutjupangku tjinguru alatji kulilku, ‘Wanyuna nguluringkuwiyangku Godanya titutjarangku wañanma, kañi palya kutjupangku ngayunya iluntankuku.’ Ka alatji kulinnyangka Godalu ngula ilunyangka palunya wankara pakaltjingalku palula tjungu titutjara wanka nyinanytjaku.

³⁴ “Ka ngula ngayulu mantakutu malaku pitjanyangka munga pala palula anangu kutjara tjinguru piita kutjungka kunkunpa ngarinyi, kaña

* **17:27** Genesis 7:6 * **17:32** Lotaku kuri panya Tjatamalanguru ma-pitjala Godala tungungpu munu pinkurarara nyangu waru pulka punkannyangka munu palulanguru purkaringkula tjalturingu alatjitu. Nyawa Genesis 19:26.

kutju mantjilku munuña kutju wantikatiku. ³⁵⁻³⁶ Ka palu purunypa ngura kutjupangka minyma kutjarangku tjinguru mai ukiringuru uñinypa rungkani, kana tjinguru kutju mantjilku munuña kutju wantikatiku.”* Alatji Jesulu tjanala wangkangi palumpa nintintja tjutangka.

³⁷ Kaya tjapinu Jesula, “Mayatja, palu ngura yaaltjingka nyanga paluru tjana alatjiriku?”

Ka Jesulu tjanala wangkangu, “Wanyu tjulpu panya waławuru kulila! Panya kuka ilura ngarinyangka waławuru tjuta kaputuripai. Kala nyakula tjukarurungku kulilpai. Palu purunypa nyura ngayunya malaku pitjanyangka nyakula tjukarurungku ngurkantankuku.”

18

Minyma Wanakała Munu Wati Ngurkantankupai

¹ Munu Jesulu tjukurpa ara kutjupatjara tjanala wangkangi paluru tjana kulira rawangku Godala tjapintjaku pakuringkunytja wiyangku. ² Alatji paluru wangkangu, “Tawunu kutjupangka wati mayatja kutjupa nyinangi ngurkantankupai. Munu nyara paluru Godaku munu aŋangu tjutaku kuļu nguluringkupai wiya tjana palunya kuranmankunytjaku. ³ Ka tawunu nyara kutju palulatu minyma wanakała nyinangi, ka aŋangu kutjupangku palumpa kutjupa kutitjura kanyiningi. Ka minyma paluru rawa pitjapai wati panya ngurkantankupailakutu munu palula wangkapai, ‘Wanyuṇi alpamilala, munu aŋangu panya palunya wangka ngayunya malakungku ungvunytjaku!’

⁴ “Ka wati paluru rawangku alpamilantja wiyangku wantingi, munu rawa mulatu kuliřa wantinytjatjanungku paluru ngula kulinu kutjungku alatji, ‘Ngayulu Godaku nguluringkupai wiya, munuña aŋangu tjutangku wangkanytja kuļu kuliřa wantipai. ⁵ Palu minyma nyanga wanakalangkuṇi rawangku ngayunya pitjala tjapilpai. Kana palya palunya kuwari alpamilalku panya ngayulu wantinyangkampa tjinguru paluru rawa alatjitu ngayulakutu pitjama munuṇi rawangkuu uulinama mununi pakunma.’ Alatji wati panya ngurkantankupaingku kuliningi.”

⁶ Munu palulanguru Jesulu tjanala wangkangu, “Wati panya palunyaya kulinma! Panya paluru minyma palunya rawangku wantingi mapalkungku alpamilantja wiyangku. Munu palulanguru nyaa wangkangu?

⁷ Ka Godanya wanyu palu purunypa nyinanyi? Panya Godaku walytja tjutangku palula rawangku ulara tjapilpai mungangka kalala kuļu paluru tjananya alpamilantjaku. Ka paluru wanyu tjananya kuliřa wantipai rawangku alpamilantja wiyangku? ⁸ Wiya, Godalu palunya tjananya kuliřa mapalkungku alatjitu alpamilalpai palumpa aŋangu tjuta. Ka ngula ngayulu Watiku Katjangku malaku pitjala aŋangu tjuta yaaltji-yaaltji nyinanyangka nyakuku mantangka nyanga? Wanyu ngayulu aŋangu tjuta ngayuku mulamularingkunytjatjanu rapa mulapa nyinanyangka nyakuku?”

Godala Tjukaruru Nyinanytja

⁹ Munu Jesulu piruku tjanala tjukurpa ara kutjupatjara tjakultjunangi, panya aŋangu kutjupa tjutangkuyanku walytjangku mirawañira palyanmankupai munuya kutjupa tjuta kuranmankupai. Ka Jesulu tjukurpa nyangatja tjanala wangkangu alatji, ¹⁰ “Tjin̄tu kutjupa wati kutjara anu

* ^{17:35-36} Wati kutjupangku kunyu verse 36 walkatjumu munu mala tzunguṇu Luke-aku tjukurta alatji *Ka ngura kutjupangka wati kutjara tjinguru urilta war karinyi, kana tjinguru kutju mantjilku munuña kutju wantikatiku.*

timpulakutu Godala tjapintjikitja, kutju Paratji, ka kutjupa kamantaku mani mantjilpai.¹¹ Ka wati panya Paratji patu ngarangi, wati panya mani mantjilpaingka ila wiya, munu paluru Godala kañany-kañanytju mara katuringkula tjapiña alatji wangkangu,

‘Mama God, ngayulu nyuntumpa pukularinyi nyuntu ngayunya wirura kanyinnyangka, panya ngayulu manyu wiya anangu nyanga kutjupa tjuta purunypa wiya. Munuña wati kutjupa tjuta purunytyku titjurra ngunti kuralpai wiya, munuña kuri walytjatjarangka kutju ngari-pai kampangkatu ngarintyja wiya. Munuña nyuntumpa pukularinyi, panya nyuntu ngayunya tjukaruru nyinanytjaku palyanu wati nyanga mani mantjilpai purunypa wiya.¹² Panya ngayulu tjintu mañkurpa mai kuka kuļu ngalkupai mununa tjintu kutjupa wantipai mai kuka kuļu ngalkuntja wiyangku. Munu panya wařkarintyjatjanungku mani mantjira tjukutjuku tjarara nyuntunya rawangku ungkupai Moselu wangkanytjjangka.’

¹³ Ka wati panya mani mantjilpaingku kunṭaringkula paṭunguru ngarala palurunku kurunpa tjituru-tjitururira mara pilpirta tjunkula wangkangu,

‘God, ngal̄turiwatju panya ngayulu kura rawangku palyaningi.’

Alatji paluru piiwiyingkula Godala tjapinu.”

¹⁴ Munu palulanguru Jesulu tjanala wangkangu, “Wati panya kutjara tjapiña wiyingkula ngurakutu anu. Palu Godalu wati kutju palyanmanu palumpa pukularira wati panya mani mantjilpainya, munu wati panya Paratjiku pukularintyja wiya alatjitu. Ka tjukurpa nyanga palulanguru nyura uti kulinma walytjangku mirawañintyja wiyangku wantintyjik-jangku. Panya anangungku walytjangku mirawaninyangkampa Godalu palunya tjukutjukulkku. Palu tjinguru paluru walytjangku tjukutjukun-mankunyangkampa Godalu palunya mirawañira pulkanmankuku kutjupa tjutangka waintara.”

Jesulu Tjitji Tjukutjuku Purunyarintyjaku Wangkanytja

(Matthew-ku 19:13-15; Markaku 10:13-16)

¹⁵ Kaya anangu kutjupa tjutangku tjitji tjukutjuku tjuta Jesulakutu ngalya-katingi mara tjunkula wangkara pukulmanytjaku. Kaya palumpa nintintja tjutangku katinyangka nyakula tjananya painingi.¹⁶ Palu Jesulu tjitji panya tjukutjuku tjuta altingu palulakutu pitjanytjaku, munu wangkangu palumpa nintintja tjutangka, “Tjitji tjukutjuku tjuta ngayulakutu pitjanyangka nyakulaya paintja wiyangku wantima! Panya anangu tjuta tjitji nyanga tjukutjuku tjuta purunypa nyinanyangkampa Godalu tjananya mayatja pulkangku walytjanmara kanyilkku.¹⁷ Kanā tjukarurungku nyurala wangkanyi, panya nyura tjitji nyanga purunytyku Godanya wanganarangku kulinniyangka kutju Godalu nyuranya mayat-jangku walytjanmara titutjarangku kanyilkku. Palu nyura wantinyangka paluru nyuranya wantiku.”

Wati Mayatja Kutjupa Ulytja Pulkatjara

(Matthew-ku 19:16-30; Markaku 10:17-31)

¹⁸ Ka wati wal̄i inmatjaku mayatjangku palula tjapinu, “Nintilpai, nyuntun wiru mulapa! Wanyuṇi tjakultjura, nyaalkuña Godala tjunguringkula wanka titutjara nyinanytjikitjangku?”¹⁹ Ka Jesulu palula wangkangu, “Nyaakuṇin wirunmananyi? Kutjupa wiru mulapa nyinanytjya wiya, Godanya kutju wiru mulapa.²⁰ Palu nyuntu panya ninti Godalu wituntjtja tjutaku. Panya paluru alatji wangkangu kuri walytjatjarangka ngarintyja wiyangku wantima, mīri pungkuwiyangku

wantima, walytjatjara kutitjunkuwiyangku wantima, aŋangu kutjupa ngunti ngukara wangkawiyangku wantima, munu ngunyjtungka mamangka wanganarangku kulinma.”

²¹ Ka wati paluru wangkangu, “Uwa ngayulu tjitjingkulpi tjukurpa nyanga palunya tjananya uwankara wanganarangku kulinngi.”

²² Ka alatji wangkanyangka Jesulu kulinu munu palula wangkangu, “Palu nyuntu kutjuku watarkuringu, nyuntu panya kanyintja uwankaraku. Uti nyuntu palunya tjananya manikitjangku tjalamilanma munu mani mantjira ngaltutjara tjuta para-ungama mununi palulanguru pitjala ngayunyalta waŋanma. Munun nyuntu nyara palulanguru ngula ilkařingka wiru mulapalta mantjilku.”

²³ Palu wati paluru alatji wangkanyangka kulira pulkara tjiturutjitururingu, panya paluru mani ulytja kutjupa kutjupa pulkatjara alatjitu nyinangi, munu palunya tjananya walytjangku kanyintjikitja mukuringangi.

²⁴ Ka Jesulu palunya tjituru-tjitururinyangka nyangu munu palulanguru wangkangu, “Nyangatja wituwitu mulapa ngaranyi aŋangu mani munu ulytja pulkatjara tjutaku, panya tjana mani ulytja kuļu pulkara kulira puļu Godaku walytjaringanyi paluru tjananya mayatjangku kanyintjaku.

²⁵ Kulilaya! Panya nyilangka ala utju mulapa ngaranyi. Ka ala pala palulawanu wanyu kamula tjarpapai? Wiya alatjitu. Ka palu purunypaṭu aŋangu mani ulytja pulkatjara tjuta puļu Godaku walytjaringanyi paluru tjananya mayatjangku kanyintjaku.”

²⁶ Kaya aŋangu tjutangku nyanganpa kulinu munuya puļu kulira palula tjanala, “Palu Godalu aŋangu mani pulkatjara tjuta wantirampa tjinguru aŋangu kutjupa uwankara kuļu ngura kurakutu iyalku wankařunkunytja wiyangku.”

²⁷ Ka Jesulu piruku wangkangu tjanala, “Uwa, aŋangu puļu walytja wankaringanyi, palu Godalu kutjungku wankalpai.”

²⁸ Ka Peterlu wangkangu, “Kulila, panya nganaŋa kutjupa kutjupa uwankara wantikatingu nyuntunya waŋantjikitjangku.”

²⁹⁻³⁰ Ka Jesulu tjanala wangkangu, “Uwa mulapa. Kaŋa nyurala tjukarurungku wangkanyi, panya nyura tjinguru nyurampa ngura, munu kuri, kuṭa, kangkuřu tjuta, ngunyti, mama munu tjitji tjuta kuļu wantikatingu Godalu nyuranya munu aŋangu kutjupa tjuta kuļu walytjanmara mayatjangku kanyintjaku. Ka nyara palulanguru Godalu watarkuri-wiyangku nyuranya waintara ungkuku walytja tjuta mulapalta manta nyanga palula nyinanyangka, ka ngula nyura ilunytjatjanu wankaringkula pakara wanka tiṭutjara nyinaku Godala tjungu pukulpa mulapa.”

Jesulu Palurunku Ilunytjikitjangku Wangkanyta

(Matthew-ku 20:17-19; Markaku 10:32-34)

³¹ Munu palulanguru Jesulu wati panya palumpa nintintja 12 maunṭalpa katingu munu tjanala wangkangu, “Kulilaya! Kuwarila Jerusalemalakutu ananyi. Ka uwankara panya wangkatjara tjutangku iriti Watiku Katjatjara walkatjunkunytja utiringkuku. ³² Panya ngayuku mirpaṇtju tjutangkuṇiya witira wati Jew wiya tjuta ungkuku, kaniya ngayunya anara kurara pungkuku mununiya wiṭalytjunkuku. ³³ Mununiya wiipangka kuļu pulkara alkalku munuya palulanguru ngayunya iluntankuku. Palu ngayulu ilunytjatjanu tjintu kutjara wiyaringkula wankaringkula pakalku. Alatji panya nyiringka iriti walkatjunkunytja utiringkuku.”

³⁴ Palu palumpa nintintja tjutangkuya puṭu nguwanpa kulinigi paluru ngula pikatjararingkunytja wangkanyangka, panya mulapa Godalu tjukurpa nyanga palunya kumpilpa kanyiningi tjanala utintja wiyangku tjana nintiringkula uti kulintjaku-tawara.

*Jesulu Wati Kuru Pati Ngatjilpai Palyarunguntja
(Matthew-ku 20:29-34; Markaku 10:46-52)*

³⁵ Ka Jesunya tjana watalpi Jerichola wirkanu, ka ngura nyara palula wati kuru pati nyinangi iwarangka itingka, munu paluru maniku nyinara ngatjilpai. ³⁶ Munu paluru kulinu aŋangu tjuta mulapa kinkinpa winki itiwanu wati-pitjanyangka munu tjapinu tjanala, “Nyaaringanyi nyanganpa?”

³⁷ Kaya palula wangkangu, “Wiya, Jesunya wati-pitjanyi panya Nazarethanya ngurara.”

³⁸ Ka wati panya kurutjarangku nyangatja kuliṛa Jesula mirara wangkangu, “Jesu! Davidakun katja! Ngalturiwatju!”

³⁹ Kaya aŋangu tjutangku Jesula tjungu ankunytjatjanungku palunya kulinu paluru Jesula wangkanyangka munuya palunya painu pilunarira wangkawiya nyinanytjaku. Palu paluru pirukutu pulkara mirara tjapinigi alatji wangkara, “Davidakun katja! Ngalturiwatju!”

⁴⁰ Ka Jesulu miranyangka kuliṛa ngarakatingu munu wangkangu wati palunya ngalya-katinytjaku. ⁴¹ Munu palunya tjapinu, “Palu ngayulu nyaa palyantjakun nyuntu mukuringanyi?”

Ka paluru wangkangu, “Mayatja, ngayulu nyakunytjikitja mukuringanyi.”

⁴² Ka Jesulu wangkangu palula, “Kuru alaringkula nyawa! Panya nyuntun mulapa ngayuku mulamularingkula kuwari kuru alaringu.” ⁴³ Ka mulapatu paluru mapalku kuru alaringkula nyangangi, munu pulkara pukularira Jesunya waṇaṛa Godanya walikuningi. Kaya aŋangu tjutangku palunya nyakula urulyaraningi, munuya tjanan kulu pukularira Godanya walikuningi.

19

Tjakiyatjalu Jesunya Nyakunytja

¹ Ka Jesunya tjana tawunu panya Jerichola tjarpala iwarangka waaratu anangi. ² Ka ngura nyara palula wati mani pulkatjara ini Tjakiyatjanya nyinangi mani mantjilpai tjutaku mayatja, panya palumpa warķa tjutangku aŋangu tjutanguru kamantaku mani mantjilpai. ³ Ka Jesunya tjana ankunyangka aŋangu winki iwarangka ngarala wañaningu palunya nyakunytjikitja.

Ka Tjakiyatjanya kulu palunya nyakunytjikitja pulkara mukuringangi. Palu puṭu nyangangi aŋangu tjuta anga-ngaṛanyangka, panya paluru wati muṭumuṭu mulapa. ⁴ Munu paluru kuranyu wirtjapakanu punu miñatjarangka tatira Jesunya katunguru nyakunytjikitja panya paluru kulinigi, “Tjinguru Jesunya nyanga palulawanu pitjaku.” ⁵ Ka Jesunya mulapatu nyara palulawanu anangi munu puṇu pala palula wirkara iranyakula nyangu Tjakiyatjanya puṇu katu nyinanyangka munu wangkangu, “Tjakiyatja! Ngalya-ukaliwa! Ngayulu kuwari nyuntula akatjari nyinanytjikitja mukuringanyi nyuntumpa walikingka.”

⁶ Ka Tjakiyatjanya mapalku ukalingu puṇunguru, munu pukularira Jesunya katingu palumpa walikutu. ⁷ Kaya aŋangu tjutangku Jesunya

katinyangka nyakula mirpañarira wangkara waningi alatji, “Ai! Wati nyaratja kura mulapa. Ka Jesunya nyaaku palumpa ngurakutu ananyi?”

⁸ Ka nyara palumpa ngurangka Tjakiyatjalu pakara winkingka mirangka Mayatja Jesula wangkangu alatji, “Mayatja, ngayulu kuwari ulytja kutjupa kutjupa uwankara tjarañi kutjarankunytjikitjangku mununatju tjara kutju ngaltutjara tjuña ungguku. Mununa ngayulu aŋangu kutjupa tjutangka mani ngunti waintara mantjintjatjanungku palunya tjananya malakungku ungguku kutjara-arangku.”

⁹ Ka Jesulu nyangatja kulira wangkangu palula, “Kuwari nyanga alatjitu nyuntunya munu nyuntumpa walytjapiti kuļu Godalu wankařunu walı nyangangka nyinanytja tjuña. Panya kuwari nyuntu Aipuramanya puruny়া Godaku mulamularingu. Nyara palulanguru nyuntu Aipuramaku walytja mulapa nyinanyi. ¹⁰ Panya ngayulu Watiku Katjanya pitjangu aŋangu kawalirinytja tjuña ngurira mantjintjikitja munu Godala malakungku tjungura wankaru kanyintjikitja.”

Tjukurpa Wati Warkaripai Tjuṭatjara

(Matthew-ku 25:14-30)

¹¹⁻¹² Ka ngura Jerichonya Jerusalemala itingka ngarangi, kaya aŋangu tjutangku kulinungi Jesulu tjukurpa wangkanyangka. Munuya ngunti alatji kulinungi, “Tjinguru kuwari Godalu nganañala utiringkula nganañanya mayatjangku kanyilku ngura nyanga Jerusalemala.”

Ka Jesulu nintingku kulinungi tjana unngu kulintjitja, munu tjanala tjukurpa ara kutjupatjara wangkangi alatji, “Wati pulka nyinangi ngura kutjupangka warķa tjuṭatjara. Kaya kutjupa-ara palunya ngura kutjupanguru altingu mayatja pulka tjunkunytjikitjangku ngura tjuṭaku palumpa nguraku kuļu. ¹³ Ka wati paluru ankunytja kuwaripangka aŋangu palumpa warķa tjuña altingu wati 10-pala munu tjananya mani yakutjangka kutju kutju unggula wangkangu, ‘Warkaya palyanma mani nyanga palunyatjarangku ngayulu malaku pitjanytjaku paṭara munuya mani pulkaringkunytjaku piřuku palyanma.’ Alatji paluru wangkara tjananya wantikatingu munu anu parari ngura kutjupakutu mayatjarinytjikitja.

¹⁴ “Palu palumpa ngurangka aŋangu tjuña palumpa kuraringkupai, munuya ankunyangka malangka wati tjakulpa tjuña malawanungku iyanu tjana ankula alatji wangkanytjaku, ‘Wiya, wati nyanga palumpala nganana mukuringkunytja wiya nganampa mayatja pulka nyinanytjaku nganampa ngurangka.’ ¹⁵ Palu ngura nyara parariya palunya tjananya kulira wantingu munuya wati panya palunya tjunu alatjitu mayatja pulka nyinanytjaku ngura uwankaraku. Ka palulanguru malaku pitjangu wati panya paluru munu wirkara warķa panya tjuña altingu munu tjananya wangkangu, ‘Ngayulu panya nyuranya mani unggukatingu. Ka nyura yaaltjitu piřuku palyanu ngayulu ankunyangka malangka mani panya palula tjanalanguru?’

¹⁶ “Ka wati warķa kutju kuranyu pitjangu munu palula wangkangu, ‘Uwa mayatja, panya yakutja manitjara kutjuñin ungu. ¹⁷ Kaña ngayulu piřuku palyanu mani pulka mulapa nampa nyangatja panya yakutja 10-pa.’

“Ka palunya mayatjangku panya wangkangu, ‘Nyuntun wiru mulapa palyanu. Ka nyuntu tjukutjuku wirungku atunymankunytjitetjanguru ngayulu nyuntunya mayatja tjunanyi ngura pulka 10-pa atunymara kanyintjaku.’

¹⁸ “Ka palulanguru wati warķa kutjupa palulakutu pitjangu munu wangkangu, ‘Mayatja, panya nyuntuñin yakutja manitjara kutju ungu,

kana ngayulu piruku palyanu mani pulka nampa nyangatja panya yakutja 5-pala.'

¹⁹ "Ka mayatjangku palula wangkangu, 'Uwa palya. Ngayulu nyuntunya mayatja tjunkuku ngura pulka 5-pala atunymara kanyintjaku.'

²⁰ "Ka piruku wati warika kutjupa pitjangu munu paluru mayatjangka wangkangu, 'Mayatja, nyangatja mani panya nyuntu ngayunya ungtunytja. Ngayulu nyanga palunya raikingka karpira kumpilpa ngarintjaku tjunu. ²¹ Panya ngayulu na nguluringangi nyuntumpa panya nyuntu wati wituwitu, munu nyuntu witulya pulkangku mantjilpai nyuntu tjunkunytja wiyatjangku munu panyan mai kaṭara uralpai nyuntu nganmanytju uninypa tjuṭa tjunkunytja wiyatjangku.'

²² "Ka mayatjangku panya wangkangu palunya, 'Nyuntun wati kura, munun warika ngayuku palyantja wiya alatjitu. Kuwariṇa tjukurpa panya nyuntu ngayunya wangkanyitjjanguru nyuntunya paini. Panya nyuntu ninti ngayuku panya ngayulu wati wituwitu mununa witulya pulkangku mantjilpai ngayulu tjunkunytja wiyatjangku, mununa mai kaṭara uralpai ngayulu nganmanytju uninypa tjuṭa tjunkunytja wiyatjangku. ²³ Kan nyaaku ngayuku mani raikingka kutju karpira kanyiningi bankingka tjunkunytja wiyangku? Tjinguru nyuntu bankingka tjunkunyangkampa ngayulu pulka nguwanpa bankinguru mantjinma malaku pitjala.' ²⁴ Munu tjanala wangkangu palula itingka ngaranyangka, 'Mani palatjaya mantjira uwa wati panya pulka palyantjanya.'

²⁵ "Palu anangu tjutangkuya wangkangu palula, 'Wiya, paluru panya pulka kanyini yakutja tjutangka 10-pangka.'

²⁶ "Ka mayatja panya paluru wangkangu, 'Wiya, panya pulka palyantjalu piruku mantjilku, palu panya warika palyantja wiyanguru ngayulu palumpa uwankara mantjilku maralpa ngaranytjaku. ²⁷ Kana kuwari nyurala tjanpi, "Ngananya tjanpi panyatja ngayulu mayatjarintjaku mukuringkunytja wiya? Ngalya-katiya palunya tjananya munuya nyanga kuranyu iluntara ngayula mirangka!"' Alatji mayatja panya paluru wangkangu."

²⁸ Munu Jesunya nyanganpa wangkara wiyaringkula ma-pakanu Jerusalemalakutu.

Jesunya Jerusalemala Tjarpantja

(Matthew-ku 21:1-11; Markaku 11:1-11; Johnku 12:12-19)

²⁹⁻³⁰ Munu paluru wirkanu ngura Piitja-paitjala pulala Piitjanila itingka apu panya ini Alipatjarangka munu paluru nintintja kutjara kuranyu witura iyanu pulala alatji wangkara, "Ara pula tawunu nyara ilatjakutu munu nyupali ma-wirkara nyakuku tangkiyi kułunypa karpintja ngaranyangka nganmanypa tatintja wiyatja. Nyara palunya pula araltjara ngalya-kati! ³¹ Ka tjinguru wati kutjupangku nyupalinya nyakula tjanpi alatji wangkara, 'Nyaaku nyupali palatja araltjananyi?' Ka pula alatji wangka, 'Wiya, Mayatjanya nyanga palumpa mukuringanyi.' Alatji pula wati palula wangka."

³² Ka pula mulapatu ankula nyangu paluru panya wangkanyitjita. ³³ Ka pula tangkiyi panya kułunypa araltjankunyangka wati panya tangkiyiku walytjangku pulanya nyakula tjanpi wangkara, "Nyaaku nyupali araltjananyi?"

³⁴ Ka pula wangkangu, "Wiya, Mayatjanya nyanga palumpa mukuringanyi." Ka pulanya palyanmanu araltjara katintjaku. ³⁵ Ka pula mulapatu katingu Jesulakutu, kaya nintintja tjutangku mantara

upukuta wara maŋkurpa tjunu tangkiyi panya kułunytja tjañangka munuya Jesunya tatitjelu. ³⁶ Ka paluru tatira pitjanyangka aŋangu tjutangku palumpa pułkara pukularira upukuta tjananku araltjara lipira tjunkula wañaningi iwarangka palula kuranyu.

³⁷ Ka paluru apu Alipatjaralawanu ankula ma-ukalingangi wimarungka itipirira piruku Jerusalemalakutu ma-tatintjikitja. Ka ma-ukalingkunyangkaya aŋangu palunya wañalpai tjuṭa palumpa pułkara alatjitu pukularingi, munuya pukultu mirara Godanya walkuningi, panya paluru miracle wiru tjuṭa palyantitjanguru, panya tjanaya rawangku nyangangi paluru palyannyangka. ³⁸ Munuya Godanya mirawañingi alatji wangkara,

“Mayatja God, nyanga palunya pulkara pukulmanama,
panya nyuntu palunya iyanu nganañanya mayatjarira kanyintjaku.
Kuwari nganampa God Ilkaritjanya aŋangu tjuṭaku kalyparingu.

Kala palunya walkura mirawañima katutja pułkanya!”

³⁹ Kaya Paratji tjutangku aŋangu tjutangka ngurur-ngururpa ankunytjat-janungku Jesula wangkangu, “Nintilpai, nyanga nyuntunya wañalpai tjuṭa wanyu paila pilunarintjaku!”

⁴⁰ Ka Jesulu tjanala wangkangu, “Wiya, nyanga tjana tjinguru pilunaryangkampa apu nyangantu ngapartji mirara Godanya walkulku.”

Jesunya Jerusalemaķi Ulanjtja

⁴¹ Munu palulanguru Jerusalemalakutu ngalya-ilaringkula Jesulu wali palunya nyangangi munu paluru nyakula ulangi aŋangu tjuṭaku munu wangkangu, ⁴² “Ngayulu mukuringanyi nyura nintingku kulintjaku yaaltjingara Godala kalypa tjungu nyinanytjikitjangku. Palu wiya, nyura ngurpangku puṭu nyanganyi munu nyura pututu kulini. Ngaltutjara!

⁴³ Panya ngula nyurampa mirpantju tjutangku pitjala nyuranya pikangku tjetutjura angatjunkuku kampa uwankaranguru. ⁴⁴ Munuya nyurampa wali uwankara piłuntara minya-minyalku alatjitu kutjupa małaringkula ngaranytjaku wiya, munuya nyuranya unngu nyinanytja tjuṭa uwankara alatjitu iluntara wiyalku tjiti tjuṭa kułukulu. Panya Godanya pitjangu nyuranya wankarunkunytjikitja, ka panya nyura palunya ngurkantankunytja wiyangku wantingi.” Alatji Jesulu tjituru-tjitururira wangangi Jerusalemanyia nyakula.

Jesulu Paintja Timpula Kurannyangka

(Matthew-ku 21:12-17; Markaku 11:15-19; Johnku 2:13-22)

⁴⁵ Munu palulanguru walingka ma-wirkara ankula timpulangka tjarpangu. Ka timpulaku yaatangka panya aŋangu tjutangku ngarala kutjupa kutjupa tjuṭa tjalamilaningu.

Ka Jesulu nyakula tjananya mirpanarira painu. ⁴⁶ Munu tjanala wangangi, “Panya nyiringka iriti walkatjunkunytja ngaranyi Godalu wangkanytjita alatji,

‘Ngayuku timpula uti ngayuku alatjitu ngarama aŋangu winkingku ngayunya tjarpala walkuntjaku.’ *

Palu nyura maniku manyu tjutangku timpula nyanga miłmiłta tjarpala aŋangu tjutangka mani mantjira ngura nyangatja kurani munu nyura wati kutitjunkupai tjuṭaku wali purunypa palyani.” *

Alatji Jesulu tjanala wangkangu.

* 19:46 Aitjayaku 56:7 * 19:46 Jeremiah-ku 7:11

⁴⁷ Munu tjintu kutjupa tjintu kutjupa Jesulu timpulangka pitjala tjukurpa wangkapai. Kaya wati tjukurtjara kuranyitja tjuṭangku, munu wati Moseku tjukurpa nintilpai tjuṭangku, munu Jewku mayatja tjuṭangku kułukulu Jesunya kukanyamanangi iluntankunytjikitjangku.

⁴⁸ Palu putuliringiya panya anangu tjuṭangkuya rawangku palula tjukurpa kulintjikitja pulkara mukuringangi munuya puṭu wantingi.

20

Jesunyaya Puṭu Tjapira Kulintja (Matthew-ku 21:23-27; Markaku 11:27-33)

¹ Ka tjintu kutjupa Jesulu timpulangka tjukurpa wiru tjanala nintiningi. Kaya wati tjukurtjara kuranyitja tjuṭa munu wati Moseku tjukurpa nintilpai tjuṭa kuļu palulakutu pitjangu. ² Munuya wangkangu palula, “Nganalunta nyuntunya wangkangu anangu tjuṭa limpula nyanganguru paintjaku? Mununta nganalu iyanu tjukurpa nyangangka wangkara nintintjaku?”

³ Ka Jesulu tjanala ngapartji wangkangu, “Wiya, wanyu kaña ngayulu-warara nyurala tjapila. ⁴ Nganalu wanyu Johnnga witunu anangu tjuṭa baptise-katinytjaku Godalu mutta watingku?”

⁵ Kaya tjananku kaputurira wangkangi, “Nyaala wangkaku palula? Tjinguru nganana alatji wangkaku, ‘Godalu witunu’, ka paluru tjinguru ngananala wangkaku, ‘ka nyura nyaaku Johnku mulamula-ringkuwiyangku wantingi?’ ⁶ Palu nganana tjinguru alatji wangkaku, ‘Wantingku witunu’, kaya alatji wangkanyangkampa anangu nyanga tjuṭangku kuļira mirpañarira ngananya apungka atura iluntankuku, panya paluru tjana Johnnga Godaku wangkatjaranmankupai. Kala nyaaa wangkaku?”

⁷ Munuya palulanguru puṭu kuļira Jesula wangkangu, “Wiya, nganana ngurpa nganalu Johnnga witunu baptise-katinytjaku.”

⁸ Ka Jesulu tjanala wangkangu, “Ka ngayulu ngapartji nyurala tjakultjunkunytja wiyangku wantinyi panya ngayunya iyantjanya.”

Wati Warka Kura Tjuṭangku Kiripitji Kanyintja (Matthew-ku 21:33-46; Markaku 12:1-12)

⁹ Munu Jesulu piruku tjanala tjukurpa aṛa kutjupatjara wangkangi alatji, “Wati kutjupangku kaana pulkangka punu kiripitji tjuṭa tjawara ngaratjura waṇanu, munu palulanguru wati mankurpa tjunkukatingu punu pakannyangka aṭunymara kanyintjaku munu parari anu ngura kutjupakutu rawa nguwanpa ma-nyinanytjikitja. ¹⁰ Ka ngula mai panya kiripitji kururingkunyangka wati panya kaanaku walytjangku wati warkaripai kutju iyanu wati panya kaana aṭunymankupai tjuṭakutu ankula mai kiripitji tjarara mantjira palumpa ngalya-katinytjaku. Palu pitjanyangka nyakulaya palunya pungkula maralpa paira iyanu malakungku. ¹¹ Ka maralpa wirkankunyangka wati panya paluru piruku iyanu wati kutjupa ngapartji. Kaya palunya kuļu wirkankunyangka nyakula pungkula pikatjarara maralpa malakungku paira iyanu.

¹² “Ka malaku pitjanyangka piruku kutjupa ngapartji iyanu, kaya palunya pungkula pikatjarara urilta waningu. ¹³ Ka paluru kutjungku kuļira wangkangu wati panya kaanaku walytjangku, ‘Nyaalkuṇa wanyu? Mutta wanyunatju ngayuku katja iyalku, panya nyanga palumpaṇa pulkara mulapa mukuringkupai, kaya tjinguru palunya wanganarangku kulikku.’ ¹⁴ Palu wati panya palumpa katja wirkankunyangka nyakulaya

tjananku kaputurira wangkara kuliningi, ‘Ai! Wati panya palumpa katjampal palatja pitjanyi. Wanyula palunya iluntara, ka ngula mama palumpa tjilpiringkula ilunyangka kaana nyangatja nganampariku.’¹⁵ Munuya dati panya palunya witira kaananguru itarikatingu urilkutu munuya pungkula iluntanu.”

Munu Jesulu tjukurpa nyangatja wangkara wiyingkula tjanala wangkangu, “Ka dati panya kaanaku walytjangku nyaalku tjananya ngapartji? ¹⁶ Wiya paluru pitjala dati panyarpa iluntankuku munu kaana kiripitjitaro anangu kutjupa tjuṭa ungkuku.”

Kaya anangu tjuṭangku nyangatja kuliṛa putu nguwanpa mulamularingangi, “Mulapaya katja pungkula iluntanama? Wiya, alatji wangkanytja wiyangku wantima!”

¹⁷ Ka Jesulu palunya tjananya nyangangi munu wangkangu, “Kulilaya tjukurpa panyatja, panya nyiringka iriti walkatjunkunytja nyanga alatji, ‘Wali palyalpai tjuṭangkuya wali puli tjuṭanguru palyaningi, munuya puli kutjupa nyakula wañingu kura-palku kuliṛa.

Palu nguntiya wañingu, panya puli nyara paluru kura wiya, wiru mulapa wali kunpu kanyilpai.’

¹⁸ Palu kutjupangku puli nyara palunya wantirampa pika pulka mulapa mantjilku. Panya puli nyara palunya wantinyangka Godalu pungkula wiyalpai alatjitu.”*

*Rome-aku Mayatja Mani Ungkunytjaku
(Matthew-ku 22:15-22; Markaku 12:13-17)*

¹⁹ Kaya dati panya Moseku tjukurpa nintilpai tjuṭangku munu tjukurtjara kuranyitja tjuṭangku kuļu tjukurpa nyangatja wangkanyangka kuliṛa miilarara wangkangu, “Nyanganngku nganañanya wangkanyi.” Munuya palunya witintjikitjangku kuliningi. Palu nguluringgangiya anangu winki ngaranyangka nyakula. ²⁰ Munuya paṭaniningi Jesunya ngula witintjikitjangku. Munuya dati kutjupa tjuṭa iyanu palya tjuta-palku palula tjunguringkula wañarira kulintjaku paluru wangkanyangka. Panya tjana kuliningi Jesulu tjukurpa kutjupa ngunti wangkanyangka palunya witira dati mayatja pulka ungkunytjikitjangku palunya ngurkantankunytjaku.

²¹ Kaya dati panya paluru tjana ankula Jesunya ngunti tjapintjikitjangku palula wangkangu, “Nintilpai, nganaña ninti tjukurpa pala nyuntu wangkanyitjaku, panya tjukurpa pala paluru tjukaruru alatjiitu. Munu nyuntu anangu uwankara tjungura nyakupai munu tjanala uwankarangka tjukarurungku wangkapai tjukurpa panya palunyu anangu kutjupa tjuṭaku nguluringkula kampa kutjuparintja wiyangku. Munu nyuntu Godaku iwara tjukarurungku wangkara nintilpai kutitjunkunytja wiyangku.

²² Kalanya wanyu tjakultjura, palyala dati panya Tjiitjanya mayatja pulka Rome-ala nyinapainya mani tjarara ungkuku, munta wiya?”

²³ Palu Jesulu nintingku kuliningi tjana ngunti arkara tjapinnyangka munu tjanala wangkangu, ²⁴ “Wanyuṇiya nintila mani panya tjiilpa kutju.” Kaya tjiilpa kutju mantjira palunya nintinu. Ka paluru nyakula tjanala tjapinu, “Nganaku ini walkatjunkunytja nyangatja ngaranyi? Munu nganaku yunpa kuļu ngaranyi?”

Kaya wangkangu, “Mayatja pulka panya Tjiitjanya.”

* ^{20:18} Tjukurpa nyanga pulitjara wangkara Jesulu palurunku wangkangi.

²⁵ Ka Jesulu tjanala wangkangu, “Uwa mulapa mani nyangatja mayatja Tjiitjaku, kaya palunya palya ungama paluru wangkanyangka, palu Godalu wangkanyangkampaya Godanya alatjitu ungama.”

²⁶ Palu paluru alatji wangkanyangkaya nguwankuringu, “Ai, nyan-gangku muñkara alatjitu wangkapai.” Munuya pilunpa ngarangi wangka wiya alatjitu, panya paluru tjukurpa tjukaruru alatjitu wangkapai putu kuranmankunytjaku, kaya putu palunya anangu tjutangka mirangka witintjikitjangku kuliningi.

*Anangu Ilunytjatjanu Pakantjitja
(Matthew-ku 22:23-33; Markaku 12:18-27)*

²⁷ Kaya ngula wati Tjatjutji mañkurpa pitjangu Jesulakutu, panya paluru tjanaya anangu tjuta ilunytjatjanu pakantjitjaku mulamularingkupai wiya. Munuya wati nyanga mankurtu Jesula ngunti arkara tjapinu alatji,

²⁸ “Nintilpai, panya Moselu tjukurpa nyangatja nganampa iriti walkatjunu alatji, ‘Tjinguru wati kuta iluku tjitji wiyatu, ka minyma panya palumpa kuri wanka nyinanyangka wati panya tjitjururungku uti alrema minyma panya palunya. Munu tjinguru tjitji katja utintjatjanungku paluru kuliklu, “Nyngatja ngayuku wiya, ngayuku kutaku tjitji, panya ngayulu palumpa kuringka utinu.” ’ Alatji Moselu walkatjunu.

²⁹ “Palu tjukurpa nyangatja wanyu kulila. Panya wati 7 kutarara kutarara nyinangi. Ka kuta nganmanyitjangku kungkawara altingu, munu paluru tjitji utilwiyatu ilungu. ³⁰⁻³¹ Ka malanytju ngapartji minyma panya palunyutu altingu munu tjitji wiyatu ilungu, ka palu purunypatu wati malanypa kutjupangku ngapartji altira paluru kulu tjitji wiyatu ilungu. Kaya palu purunypatu malanypa panya malatja tjutangka minyma panya palunyutu altira kanyira tjitji wiyatu ilungu uwankaratu wanapari wanapari. ³² Ka ngula minyma panya paluru tjanampa panya kurilta ilungu. ³³ Kalanya wanyu tjakultjura ngula ilunytjatjanu wankaringkula pakantjatjanu minyma panya paluru nganaku kuri nyinaku? Panya wati 7-tu palunya altingu.”

³⁴ Ka Jesulu wati panya Tjatjutji tjutangka wangkangu, “Mantangka nyanga nyinara watingku kungkawara altipai munu pula tjunguringkula kurirara nyinapai. ³⁵ Palu ngula Godaku walytja tjuta ilunytjatjanu pakara ngura nyara ilkaritjangka kuri altinytja wiya nyinaku. ³⁶ Munuya angelpa tjuta purunypa titutjara nyinaku piruku ilunytja wiya, panya tjana ilunytjatjanu pakara Godaku tjitji tjuta nyinaku. ³⁷ Panya Moselu utingku alatjitu tjakultjunu anangu tjuta ilunytjatjanu pakantjaku. Panya paluru punu kampanyangka nyakunytjatjanungku walkatjunu alatji Godalu panya wangkanytja, ‘Ngayulu Aipuramaku, Isaacaku munu Jacobaku God nyinanyi.’ ³⁸ Kala nyanga palulanguru kulini panya Mayatjanya anangu wanka nyinapai tjutaku God nyinanyi, miri tjutaku wiya, panya Godalu anangu uwankara wanka tjuta nyakupai.”

³⁹ Kaya kutjupa tjutangka wati panya Moseku tjukurpa nintilpai tjutangka palula wangkangu, “Nintilpai, nyuntun tjukurpa wiru mulapa wangkangu.” ⁴⁰ Munuya palula malangka piruku Jesunya tjpintja wiyangku wantingi.

*Christanya Davidaku Katja
(Matthew-ku 22:41-46; Markaku 12:35-37)*

⁴¹ Ka Jesulu wangkangu tjanala, “Nyaakuya panyatja anangu tjutangka wangkapai Christanya Davidaku katja nyinanytja? ⁴² Panya nyiri Psalmangka ngaranyi Davidalu wangkanytja alatji,

‘Mayatja Godalu ngayuku Mayatjangka wangkangu,

“Ngayula itingka mayatja pulka nyinakati kampa nyanga wakungka.

43 Kana nyuntumpa mirpañtju tjuta tjarulku nyuntula wanganarangku kulintjaku,

kan tjananya nyuntu mayatjangku wituwitulku.” , *

44 Ala palatja! Davidalu Christanya mayatjanmanangi alatjitu Godalu panya kalkuntjanya, ka Christanya yaaltji-yaaltji piruku palumpa pakali małatja nyinama? Wiya, paluru pakali kutju wiya palumpa mayatja kułu nyinanyi.”

Jesulu Anangu Tjuta Ngulutjunkunytja Moseku Tjukurpa Nintilpai Tjutangka-tawara

(Matthew-ku 23:1-36; Markaku 12:38-40; Luke-aku 11:37-54)

45 Munu aŋangu tjutangku ngarala kulinnyangka Jesulu palumpa nintintja tjutangka wangkangu alatji, **46** “Ngulu nyangamaya Moseku tjukurpa nintilpai tjuta. Nyara tjana panya mantara waratjara kañany-kañanypa para-ngarapai aŋangu tjutangku nyakula tjananya mirawañinytjaku mukuringkula. Munuya walı inmatjangka tjunguringkula tjiya wiru tjuta ngurkantankupai aŋangu tjutangka kuranyu uti nyinakatinjtikitja mukuringkula. Munuya kutjupa-ara mai pulka ngalkuntjikitja tjunguringkula palu purunypatı kuranyu nyinanytjikitja mukuringkupai aŋangu tjutangku tjananya nyakula mirawañinytjaku. **47** Munuya minyma wanakala tjuta wituwitulpai tjananya ngunti kalkuntjaku alatji wangkara, ‘Nyuntu nganananya kalkunma ngula nyuntu ilunyangka nyuntumpa walı nganamparinytjaku.’ Munuya paluru tjana Godala tjapira tjukurpa wara mulapa wangkapai aŋangu tjutangku tjananya kulira mirawañinytjaku mukuringkula. Ka nyanga alatji kañany-kañanypa nyinanyangka Godalu tjananya pulkarra pungkuku.”

21

Minyma Wanakañangku Ungkunytja
(Markaku 12:41-44)

1 Munu Jesulu tjukurpa wangkara wiyarinkula waintara nyangu aŋangu mani pulkatjara tjutangku mani pitingka wañinyangka timpuñlangka, panya mani palunya tjananya paluru tjana Godanya ungangi.

2-3 Munu paluru nyangu minyma wanakañangku mani tjuku mulapa wañinyangka kalka kutjara kutju munu tjanala wangkangu, “Kulilaya, ngayulu nyangangi kuwari aŋangu tjutangku pulka wañinyangka, palu wanakala nyanga ngaltutjarangku tjanala muñkara nguwanpa wañingu.

4 Panya kutjupa tjutangkuya pulka kanyintjatjanungku tjarara tjara kutju wañingi, ka paluru uwankara alatjitu wañingu paluru kanyintjatjanungku, munu nyanga wiyalta nyinanyi. Tjukarurungkuña nyurala wangkanyi, minyma nyanga wanakañangku pulka mulapa Godanya ungu mani pulkatjara tjutangka muñkara.”

Timpula Pilukatinytja Tjanala Wangkanytja
(Matthew-ku 24:1-2; Markaku 13:1-2)

5 Kaya palumpa nintintja kutjupa tjarangku timpula panya nyakula wangkangi wiru mulapa ngaranyangka. Panya timpula paluru puli wiruly-wirulyipa wiru mulapatjara. Panya iritiya nyara palula wiru tjuta katira Godanya ungangi timpula tjanampa wiru mulapa palyantjaku. **6** Ka

* 20:43 Psalm 110:1

Jesulu kulira tjanala wangkangu, “Nyura kuwari nyanganyi timpula wiru mulapa puli nyanga pulkanguru palyara tatintja. Palu ngula wal nyanga paluru pilukatira minya-minyaringkuku. Ka puli kutjupa malaringkula ngarawiya uwankara alatjiu punkara minya-minya ngarira waniku.”

*Jesulu Pikangka-tawara Ngulutjunkunytja
(Matthew-ku 24:3-14; Markaku 13:3-13)*

⁷ Kaya kutjupa tjutangku palula tjapinu, “Nintilpai, wanyulanya tjakultjura! Yaalara nyanga alatjiriku panya nyuntu kuwari timpula pilukatinytja wangkangi? Ka nyaa nganmanypa utiringkuku nganaña nganmanytju nyakula kulintjaku?”

⁸ Ka Jesulu wangkangu, “Nguu nyangamaya kutjupangku nyuranya wangkara ngunti kurantjaku-tawara. Panya anangu tjuta pitjaku ngayulu iyantja-palku wangkara munuya ngunti wangkaku, ‘Ngayuluu panya paluru, Jesunya Christanya!’ Munta tjinguru kutjupangku wangkaku alatji, ‘Tjintu panya wirkanu, anangu tjuta wankarunkunytjaku.’ Palu kuliraya wantima palunya tjananya wanalwiyangku ngunti kurannyangka. ⁹ Munu nyura tjinguru kulikku anangu tjutangku tjananku pikangku pungkunyangka ilatjangku munu pararitja tjutangku kulu. Palu pika nyanga palunya tjananya kuliraya nguluringkuwiya nyinama, panya nyanga paluru tjana utiringkunytjaku ngaranyi alatjiu, palu tjintu malatja kuwaripatu ngaranyi ilaringkunytja wiya.”

¹⁰ Munu Jesulu tjanala piruku wangkangu, “Panya ngura kutjupa kutjupangka tjaultji tjutangku pikangku pungkuku nguraku mayatja tjutangku wituwitunnyangka. ¹¹ Ka ngura tjutangka manta pulkara uriku. Ka ailuru pulka ngaraku, ka mai wiyingkunyangka anangu winki paltjatjiratja nyinaku, ka pika kutjupa kutjupa tjuta utiringkula anangu tjuta pikatjararingkunytjaku palyalku. Ka piruku ilkaringka kutjupa kutjupa pulka tjuta utiringkuku anangu tjutangku nyakula pulkara nguluringkunytjaku.

¹² “Palu nyanganpa utiringkunytja kuwaripangka anangu mirpantju tjutangku nyuranya witliku ngayunya wanannyangka. Munuya nyuranya anara kuraa pungkuku munuya nyuranya katira wal inmatjangka ngaratjunkuku kuutpangka wangkanytjaku, ka mayatja tjutangku nyuranya ngurkantara tjailekutu iyalku, nyura ngayuku mukuringkunyangka. Munuya nyuranya wati mayatja pulka tjutangka kuranyu ngaratjunkuku tjanala mirangka nyuranya kuranmankunytjikitjangku. ¹³ Palu nyara palula araa nyura uti tjukurpa ngayunyatjara tjanala tjakultjunama.

¹⁴ “Munuya nyuranya kuutpaku katinyangka alatji kulilwiyangku wantima, ‘Nyaanatju wangkaku ngayunya tjinpinnyangka?’ ¹⁵ Panya ngayulu alatjiu nyuranya wangkanytjaku unngu nintilku. Kaya nyurampa mirpantju tjutangku putu kulikku nyuranya ngapartji wangkanytjikitjangku.

¹⁶ Ka nyurampa malpa tjutangku nyuranya wati mirpantju tjutangka nintilku witira katinytjaku, tjinguru nyurampa mamangku ngunytjungku, tjinguru kutangku tjinguru walytja kutjupangku nyuranya tjanala nintilku, kaya nyuranya witira katiku munuya nyuranya kutjupatjara iluntankuku.

¹⁷ “Uwa, anangu winki nyurampa kuraringkuku nyura ngayunya wanannyangka. ¹⁸ Palu pika nyanga palu purunytju nyuranya putu Godalanguru mauntankuku. ¹⁹ Palu nyura titutjarangku ilunytjakutu-wangkara ngayunya tungun-tunguntu wanannyangkampa Godalu nyuranya wankaru kanyilkku palula tjungu titutjara nyinanytjaku.

*Jesulu Wangkanytja Jerusalemania Ngula Wiyantjaku
(Matthew-ku 24:15-21; Markaku 13:14-19)*

²⁰ “Ka nyura wati warmala winki mulapa Jerusalemala para-arintara ngaranyangka nyakulampa kulinma panya tjanaya pitjangu ngura palunya wiyanjtikitja alatji. ²¹ Ka nyura manta Judeala nyinanytjatjanu uti ngulu wirtjapakanma pulikutu. Ka palu purunypaṭu uti nyura Jerusalemala nyinanytjatjanu pakara wirtjapakanma ngura kutjupakutu. Ka nyura ngura tjukutjuku tjutangka nyinanytjatjanungku Jerusalemalakutu ankunytja wiyangku wantima. ²² Panya nyiringka iriti walkatjunkunytja ngaranyi pika nyanga palu purunypa ngula Judeala utiringkunytjaku.

²³ “Ka nyara palula aña panya kura pulka mulapa ngaraku minyma ititjara tjutaku munu iti tjukutjukutjara tjutaku kuļu. Ngaltutjara! Panya tjana tjinguru wirtjapakara ngururpatu pakuringkula wiyingkuku. Panya mulapa ngura nyanga Israelta winkingka pika pulka mulapa ngaraku aŋangu tjutaku, panya mulapa Godanya palumpa tjanampa pulkara mirpañariku Israelkunu tjutaku. ²⁴ Kaya kutjupa tjuta warmala pitjaku ngura kutjupa kutjupa tjutanguru munuya tjara kutjupa tjula pulkangka wakara iluntankuku munuya tjara kutjupa witira katiku ngura kutjupa tjutakutu. Munuya Jerusalemanyā piluntara wiyalu aŋangu ngura kutjupitja tjutangku. Munuya ngura palunya rawangku kanyilku malikitja tjutangku ngura kutjupa kutjupa tjutanguru pitjala. Munuya tjintu malatja watalpi ilaringkunyangka kutju wantikatiku Jew tjutangku piruku ngura walytjangku kanyintjaku.

Jesunya Malaku Pitjanytja

(Matthew-ku 24:29-31; Markaku 13:24-27)

²⁵ “Ka tjintu munu pira kulu kutjupa kutjuparikuku, ka kilippi tjuta punkalku. Ka manta winkingka uru pułkara urira rurkalku. Kaya aŋangu tjutangku nyakula nguluringkuku munuya pułku kulikku kutjupa kutjupa palyantjikitjangku. ²⁶ Panya Godalu ilkařingka ngaranytja tjuta pulkara uritjingalku. Kaya aŋangu winki nyakula pulkara nguluringkula tjitingkuku munuya pułku kulikku, ‘Nyaaringanyi kuwari?’ ²⁷ Munuya palulanguru ngayunya nyakuku Watiku Katjanya ngangkalingka pitjanyangka witulya pitalyiji pulka alatji. ²⁸ Ka nyanga uwankara alatjirinyangkampa nyura uti nguluringkunytja wiya ngarama munuya raparingkula kulinma, ‘Munta nganananya wankarunkunytjikitja pala pitjangu.’”

Jesuku Tjukurpa Titutjara Ngaraku

(Matthew-ku 24:32-35; Markaku 13:28-31)

²⁹ Munu Jesulu tjukurpa aña kutjupatjara tjanala piruku wangkangi alatji, “Kulinmaya pułu panya nyalpi punkara wiyingkupai wariringkunyangka. ³⁰ Munu panya pułu nyara palula piriyyakutu nyalpi kuwaritja piruku pakalpai, ka pakannyangka nyakula nyura nintingku kulipai, ‘Munta-uwa, kuļi watalpi ilaringanyi.’ ³¹ Ka nyanga palu purunypaṭu pika panya paluru tjana utiringkunyangka nyakula nyura kulinma panya tjintu watalpi ilaringanyi Godalu palumpa walytjapiti uwankara mayatjangku kanyintjaku.

³² “Uwa, tjukařurungkuña nyurala wangkanyi, panya nyanganpa uwankara utiringkuku aŋangu nyanga kuwari nyinanytja tjuta wanka nyinanyangka. ³³ Panya ngula manta ilkari uwankara wiyingkuku, palu tjukurpa ngayulu wangkanytja titutjara alatji ngaraku wiyingkunytja wiya.

Titutjaraya Ala-alá Patanma

³⁴⁻³⁵ “Uwa, nyura uti rawa kulil-kulilpa nyinama watarkurintja wiya. Munuya mai pulka ngalkula waina pulka kulu tjikira pukularintjikitjangku kulintja wiyangku wantima munuya mantatja kutjupa kutjupa tjutaku pulkara mukuringkula kulintja wiyangkutu wantima. Panya nyura rawa alatjirinyangkampa tjintu panya paluru mapalku wirkankuku, ka nyura pulkara urulyaralku watarku nyinanytjatjanu. Panya watingku kuka witintjikitjangku pit*i* tjawara tjutura wantipai. Ka kuka kutjupa watarku pitjala karalukatipai pit*i* panya palula, ka iluntankupai. Palu purunyapa anangu kutjupa watarku nyinara putu wankaringkuku tjintu malatjangka. Panya tjintu nyara paluru wirkankunyangka anangu uwankarangku nyakuku manta winkingka. ³⁶ Ka uti nyura rawa ala-alu nyinama munuya rawangkutu Godala tjapilkatima nyuranya ngalkintjaku pika nyanga kutjupa kutjupa tjutanguru. Munuya palula tjapinma nyuranya kunpuntjaku, ka nyura tiutjarangku ngayunya tjukarurungku wañanma ngayulu Watiku Katjanya nyurampa pukularintjaku tjintu malatjangka.”

³⁷ Jesulu tjukurpa nyanga palunya tjananya timpulangka wangkangi anangu tjutangka tjintu kutjupa tjintu kutjupa, munu wangkara wi-yaringkula paluru mungartji ankupai ngura panya puli Alipatjaralakutu munu nyara palula ngaripai. ³⁸ Kaya anangu tjuta mungawinki kutjupa mungawinki kutjupa ali pakara pitjapai timpulakutu paluru tjukurpa wangkanyangka kulintjikitja.

22

Jewku Mayatja Tjutangku Jesunya Kukanymankunytja (Matthew-ku 26:1-5,14,16; Markaku 14:1-2,10-11; Johnku 11:45-53)

¹ Ka tjintu watalpi ilaringu tjintu pala palula mai panya pilytja ngalkula ara panya irititja kulintjaku ini panya Katuwanu Ankunytjanya.

² Kaya wati tjukurtjara kuranyitja tjuta munu Moseku tjukurpa nintilpai tjuta kulu Jesunya iluntankunytjikitja mukuringangi, palu tjana anangu tjutaku nguluringangi kulira, “Tjinguru tjanala mirangka witinnyangkaya nyakula palunya ngalkilku. Kala yaaltjingara palunya kampangkatu witilku?” ³ Ka tjintu nyara palula mamu Satannga Jesuku nintintja kutjungka tjarpangu ini panya Judas Kariyatala. ⁴ Ka Judasalu ankula kampangkatu wangkangi wati panya tjukurtjara kuranyitja tjutangka munu wati timpula atunymankupai tjutangka kulu. Alatji paluru wangkangi, “Yaaltji nyura kulini? Ngayuluña nyuranya alpamilalku Jesunya witintjaku?”

⁵ Kaya paluru wangkanyangka kulira pukularingu munuya palunya kalkunu Jesunya tjanala nintinnyangka mani ungkunytjikitjangku. ⁶ Ka tjana wangkanyangka Judasalu palyanmanu munu palulanguru kuliningi, “Wanyuyawi anangu uwankara ngurangkari, kana tjanala kampangkatu nintila Jesunya witintjaku.”

Tjapa Malatja Ngalkunytjaku Palyantja (Matthew-ku 26:17-25; Markaku 14:12-21; Johnku 13:21-30)

⁷ Ka tjintu panya paluru wirkanu mai panya palunya ngalkuntjaku munu lamalama kulu iluntankula paura ngalkuntjaku. ⁸ Ka Jesulu wangkangu Peterla pulala Johnta, “Ankula pula mai kuka riti palyala nganana ngalkuntjaku.”

⁹ Ka pula tjapinu Jesula, “Yaaltjingka riti palyantjakun mukuringanyi?”

¹⁰ Ka Jesulu pulanya Jerusalemalakutu wangkara iyanu, “Nyupali walingka ma-wirkara nyakuku wati war̄karipaingku piti minatjara tjalira katinyangka. Nyara palunya pula wañara nyawa walingka tjarpanyangka.

¹¹ Munu pula nyakula wali pala palulañu ma-tjarpara wati waliku walyt-jangka wangka alatji, ‘Nintlpainya mukuringanyi nyuntu ngalila nintint-jaku ruuma yaaltjingkala mai panya Katuwanu Ankunytjanya ngalkuku.’

¹² Ka wati nyara paluru nyupalila nintilku ruuma katutja taipula kutjupa kutjupa tjuñatjara. Ka pula nyara palula nganampa mai nganmanytju palyala.”

¹³ Ka Peternya pula Johnnga anu tjananya wantikatira munu pula mulapañu nyangu Jesulu panya wangkanytjitja uwankara. Munu pula mai kuka uwankara riti palyañu ara panya Katuwanu Ankunytjanya ngalkula kulintjikitjangku.

Tjapa Małatja Ngalkunytja

(Matthew-ku 26:26-30; Markaku 14:22-26; 1 Karintjaku 11:23-25)

¹⁴ Munuya mungartjirinyangka pitjala taipulangka para-ngarira arin-tanangi Jesunya munu palumpa iyantja tjuña kuñu mai ngalkuntjikitja.

¹⁵ Ka paluru tjanala wangkangu, “Ngayulu pul̄kañra mukuringanyi nyurala tjungungku mai nyanga katuwanutja ngalkuntjikitja ngayuku pika ngaranytja kuwaripangka. ¹⁶ Panya ngayulu mantangka nyurala nyinara mai nyanga katuwanutja piñuku ngalkuntja wiya, palu ngula kutjuña nyurala tjunguringkula ngalkuku tjiñtu panya małatjangka Godalu palumpa walytjapiti uwankara mantjira mayatjangku kanyinnyangka.”

¹⁷ Munu Jesulu walpayata wainatjara mantjinu munu Godala wangkara wal̄kuñu, “Wirungkulanyan waina nyangatja ungu.” Munu tjanala wangkangu, “Mantjilaya walpayata nyanga wainatjara munuya uwankarangku tjikila. ¹⁸ Panya ngayulu mantangka nyurala nyinara piñuku waina nyanga palunya tjikintja wiya, palu ngula kutjuña nyurala tjunguringkula tjikilkü tjiñtu panya małatjangka Godalu palumpa walytjapiti uwankara mantjira mayatjangku kanyinnyangka.”

¹⁹ Munu Jesulu mai pilytja mantjinu munu maiku pukularira Godala wangkangu, “Wirungkulanyan mai nyangatja ungu.”

Munu palulanguru tjananya katantara palumpa nintintja tjuña ungu munu wangkangu, “Nyangatja ngayulu puntu nyurampa pikatjararingkun-ytja. Mantjiraya ngalkula, munuya ara nyanga palunya rawangku palyanma ngayunya kulintjikitjangku.”

²⁰ Munu ngula maingka malangka piñuku walpayata mantjinu wainatjara munu palu purunypañu Godanya wal̄kuñra tjanala wangkangu alatji, “Nyangatja ngayulu milkali nyurampa tjutintjtja, panya nyanga paluru nintini kalkuntja kuwaritja Godalu añañgu tjuñaku palyantja.

²¹ “Palu kulilaya! Kuwari nyanga nyura ngayula tjungu nyinanyi ngayuku malpa uwankara taipulangka nyanga. Palu nyuralanguru wati kutjungku ngayunya mirpañtu tjuñangka nintilku tjana ngayunya witintjaku. ²² Uwa, ngayulu Watiku Katjanya mulapa iluku panya alatjirinytjaku nganmanytju alatjitu wangkangu. Palu pika pul̄ka mulapa ngaraku wati panya palumpa, panya ngayunya tjanala nintintjtjaku.”

²³ Kaya palumpa nintintja tjuñangku alatji kulira tjananku ngaparku tjpiningi wangkara, “Nganalu wanyu alatji palyalku nyanga palumpa?”

Nintintja Tjuñangkuyanku Ngaparku Tjapintja Pul̄ka Nyinanytja-tjiratja

²⁴ Munuyanku mirpañ-mirpañtu ngaparku wangkangi alatji, “Ngayulu uti kuranyu nyinama nyurala waintara.”

²⁵ Ka Jesulu tjananya paira wangkangu, “Kulilaya! Panya anangu tjuñaku mayatja tjutangkuya tjananya tungun-tunguntu kanyira pauntjingara wituwitulpai, munuya walytjangku tjananku mirawañira wangkapai alatji, ‘Nyawa, nganana malpa wirungku anangu uwankara wirura kanyilpai.’ Alatjiya wangkapai wati mantatja tjutangku. ²⁶ Palu tjananya kulira arkalwiyangkuya wantima. Nyuntu tjinguru pulka nyinarampa utin walytjangku kulira kuntaringama, munta tjinguru nyuntu mayatja kuranyitja nyinarampa utin tjaruringkula wati warika purunyarima. ²⁷ Palu anangu tjutangku ara nyanga palu purunypa kulilpai wiya, panya tjana uwankara mayatja pulka nyinanytjikitja mukuringkupai, munuya anangu kutjupa tjuña tjanampa warika palyantjaku mukuringkupai tjananya witura. Palu nyura uti kampa kutjupa kulinma munu ngayunya purunypa arkara nyinama, panya ngayulu nyurampa mayatja pulka nyinara nyurampa rawa pulkara warikaringi.

²⁸ “Uwa, nyura panya ngayula tjungu titutjara nyinangi munuya mirpantju tjutangku ngayunya kurara pungkunyangkan wantikatinjtja wiya alatjiyu. ²⁹ Kaña palulanguru kuvari nyuranyalpi tjunani ngula anangu tjuña mayatjarira kanyintjaku, panya Mamalu ngayunya mayatja tjunu anangu uwankaraku mayatjarintjaku, nyara palu purunypa. ³⁰ Ka ngula nyura ngayuku ngurangka ngayula tjunguringkula ngalkula tjikilku. Munu nyura mayatja tjuña tjiya wirungka kutju kutju nyinaku anangu panya Israelkunu tjuña mayatjarira kanyintjikitja.”

Jesulu Nganmanytju Wangkanytja Peternya Palumpa Ngurparingkunytjaku

(Matthew-ku 26:31-35; Markaku 14:27-31; Johnku 13:36-38)

³¹ Munu palulanguru Jesulu Simon Peterla wangkangu alatji, “Simon, Simon, kulilan! Panya Satantu tjinipu nyuranya uwankara kutju kutju arkantjikitjangku panya mai kañilpai purunytpu, panya anangungku uninypa kañira mai wiru mantilpai munu kura tjuña tjarara wanipai, palu purunytpu Satantu nyuranya arkara nyakunytjikitja mukuringanyi. ³² Palu Simon, ngayulu nyuntumpa Godala tjinipu nyuntunya arkannyangka anga-kanyintjaku nyuntu ngayuku ngurparingkunytjatjanu ngayunya wantintjaku-tawara. Ka ngula nyuntu małaku ngayula tjunguringkula tjananya ngapartji künpunma ngayuku walytja tjuña.”

³³ Ka Peterlu wangkangu, “Wiya, Mayatja, tjinguruya nyuntunya witira tjailangka tjarpatjunkunyangka ngayulu kuļu nyuntula tjunguringkula tjailakutu ankuku. Tjinguruya nyuntunya iluntankuku, kaña ngayulu nyuntula tjungu iluku.”

³⁴ Ka Jesulu wangkangu, “Peter, nganmanytjuñanta wangkanyi, panya tjinu pakantja kuwaripangka tjułpu panya tjuki wangkapai, ka munga nyanga kuvari tjułpu paluřu wangkanytja kuwaripangka nyuntu ngayuku mankurara ngurparingkuku.”

³⁵ Munu Jesulu tjananya tjinipu, “Panya ngayuluña nyuranya mungatu maralpa iyanu yakutja wiya, mani katintjja wiya ankunytjaku munu tjinatja kuļu wiya, ka nyura wanyu ankula kutjupa kutjupa tjuñaku mukuringangi nyara palula ara panya?”

Kaya wangkangu, “Wiya alatjiyu. Nganana palya pukulpa anangi.”

³⁶ Ka Jesulu tjanala wangkangu, “Palu kuvari kutjupa ngaranyi, ka nyura uti yakutja manitjara kanyirampa katima, munuya yakutja kutjupa

mantaratjara kanyirampa katima, munuya tjula pulka kanyintja wiya ngarala nyurampa ulytja tjara kutjupa tjalamilala munuya mani mantjira tjula pulka payamilala.³⁷ Panya nyiringka iriti walkatjunkunytja ngaranyi nyanga alatji,

‘Palunyaya wati kuralpai-palku kulikku.’ *

Uwa, tjukurpa nyangangku ngayunyatjara tjakultjunangi, ka tjukurpa nyanga paluru mulapa kuwari utiringanyi.”

³⁸ Kaya palumpa nintintja tjuṭangku wangkangu, “Mayatja, nyangatjala tjula pulka kutjara kanyini.”

Ka Jesulu nyakula wangkangu, “Wiya, palya wanti!”

*Jesulu Mamangka Tjapintja Ngura Apu Alipatjarala
(Matthew-ku 26:36-46; Markaku 14:32-42)*

³⁹ Munu palulanguru Jesunya pakara anu ngura panya apu Alipatjaralakutu panya ngura nyara palulakutu paluru rawa ankupai, kaya palumpa nintintja tjuta palula tjunguringkula anu.⁴⁰ Munu nyara palula wirkara Jesulu tjanala wangkangu, “Godalaya tjapinma nyuranya angakanyintjaku mamungku nyuranya kurantjaku-tawara.”⁴¹⁻⁴² Munu paluru tjukutjuku patu nguwanpa anu munu tultjungarakatira Godala tjapiningi alatji wangkara, “Mama, wanyu tjananya mirpantju panya tjuta markula ngayunya pungkunytjaku-tawara. Palu wiya, nyuntu mukuringkula palya tjananya wantir’iyala ngayunya pungkunytjaku, kaña palula tjanalanguru kumpintja wiya, panya ngayulu mukuringanyi nyuntu mukuringkunytja kutju palyantjikitja.”

⁴³ (Ka mapalku angelpa ilkariringuru palula utiringu paluna kunpuntjikitja. ⁴⁴ Palu Jesunya kurunpa uliringkula akuri-akuriringu pulkara alatjitu Mamala tjapiṛa tjapiṛa, ka milkali akuringka tjunguringkula mantangka punkaningi.)

⁴⁵ Munu paluru tjapiṛa wiyarinkula pakara malaku anu palumpa nintintja tjuṭakutu. Munu tjananya nyangu kunkunpa alatjitu ngarinyangka panya tjituru-tjituru pulkaringkulaya pakuringu.⁴⁶ Ka Jesulu tjanala wangkangu, “Nyaaku nyura kunkunpa ngarinyi? Pakaraya tjapinma nyuranya anga-kanyintjaku mamungku nyuranya kurantjaku-tawara.”

Jesunya Witintja

(Matthew-ku 26:47-56; Markaku 14:43-50; Johnku 18:3-11)

⁴⁷ Ka Jesunya tjanala ngarala wangkanyangka aŋangu tjuṭa pitjangu, panya nintintja kutjungku tjananya ngalya-katingu, Judasalu. Munu paluru ilarinkula Jesunya mitamita kutjara nyunytjuṇu.

⁴⁸ Palu Jesulu wangkangu, “Judas, nyaakun mal pangku-palku ngayunya Watiku Katjanya nyunytjura nintini witintjaku?”

⁴⁹ Kaya palumpa nintintja tjuṭangku nyangatja kulira kuliningi, “Kuwariya witini Jesunya.” Munuya palula wangkangu, “Mayatja, pungkukula tjananya tjula nyanga pulka kutjarangka?”⁵⁰ Ka mulapatu nintintja kutjungku wati tjukurtjara pulkaku war̄karipa tjuṭa waṛangka pungkula pina waku kaṭara punkatjingaṇu.

⁵¹ Ka Jesulu wangkangu, “Wantima alatjingantja wiyangku!” Munu paluru wati panya war̄karipaiku pina pampunu, ka mapalku palyaringu.

⁵² Munu Jesulu wangkangu wati tjukurtjara kuranyitja tjuṭangka munu wati timpula atunymankupai tjuṭangka munu Jewku mayatja kuranyitja

* 22:37 Aitjayaku 53:12

tjuṭangka kuļu, “Nyaaku nyura tjulatjara tjutinypatjara kuļu pitjangu ngayunya wati kura-palku kulira witintjikitja? ⁵³ Panya ngayulu nyurala tjungu alatjiu nyinangi timpulangka rawa mulapa, ka nyura panyatja nyaaku ngañmanytju nyara palula aratū witiwiyangku wantingi? Wiya, nyura kaļala wantipai munu nyura mungangka kutju kumpilpa nyanga palu puruny whole=palyalpai mamungku wituwitunnyangka. Nyangatja nyurampa ara.”

Peternya Jesuku Ngurparingkunytja
(Matthew-ku 26:57-58,69-75; Markaku 14:53-54,66-72; Johnku 18:12-18,25-27)

⁵⁴⁻⁵⁵ Kaya Jesunya witira ma-katingu tjukurtjara pulkaku walikutu. Ka Peterlu palunya malawanungku wañarinangi palula tjanala ilaringkunytja wiyangku. Kaya wirkara wali unngu ma-tjarpangu Jesunya katira. Kaya kutjupa tjutangku urulta yaatangka ngarala waru tlinu munuya nyinara ngantjiningi. Ka Peternya wirkara tjanala tjunguringkula nyinangi. ⁵⁶ Ka kungkawara warkariпаingku palunya waru tilingka yunpa rawangku nyangangi munu wangkangu, “Wati nyanga paluru kuļu palula tjungutja.”

⁵⁷ Ka Peterlu wangkangu, “Wiya, ngayulu ngurpa wati nyara palumpa!”

⁵⁸ Ka ngula aŋangu kutjupangku ngapartji nyangu Peternya munu wangkangu, “Mulapan panyatja, nyuntu kuļu palula tjungutja.”

Ka Peterlu wangkangu, “Wiyatuna! Ngurpaña!”

⁵⁹ Ka piruku ngula palula małangka kutjupangku ngapartji nyangu palunyatu munu wangkangu, “Mulapa wati nyanga paluru palula tjungutja, panya paluru wati Galileenya ngurara wangka Jesunya pula tjungu.”

⁶⁰ Ka Peterlu wangkangu, “Wiya, ngayulu ngurpa wati palumpa! Putuna kulini nyuntu wangkanyangka.” Ka Peterlu wangkanyangka tjulpu panya tjuki mirangu.

⁶¹ Ka Mayatja Jesulu malakukutura Peternya nyangu. Ka Peterlu kulini Mayatjalu panya wangkanytja alatji, “Tjulpu wangkanytja kuwari-pangkatjun nyuntu mañkurara ngurparingkuku.” ⁶² Ka Peternya urilkutu ankula pulkara alatjiu tjituru-tjitururira ulangi.

⁶³ Ka wali panya unngu wati timpula atunymankupai tjutangku Jesunya witira kanyiningi munuya palunya anara wangkara pulkara pungangi, ⁶⁴ munuya ngalypa-ngalyparingkula palunya kuřu patinu raikingka karpira munuya palunya pungkula ngunti tjapiningi wangkara, “Tjukarurungku wangka, nganalunta panyatja pungu? Panya nyuntu kunyun wangkatjarangku nintingku kulilpai.” ⁶⁵ Munuya palunya rawangku kurara pungangi kura tjuṭa wangkara.

Jewku Mayatja Tjutangku Jesunya Tjapira Ngurintja
(Matthew-ku 26:59-66; Markaku 14:55-64; Johnku 18:19-24)

⁶⁶ Ka tjintru pakannyangka wati tjukurtjara kuranyitja tjuṭa munu Moseku tjukurpa nintlpai tjuṭa kuļu mitingiku tjunguringu, kaya timpula atunymankupai tjutangku Jesunya katira tjanala kuranyu ngaratjunu.

⁶⁷ Kaya palula tjapiningi, “Nyuntu mulapa Christanya Wankarunkupainy whole=panya Godalu kalkuntjanya? Wanyulanya tjakultjura.”

Ka Jesulu tjanala wangkangu, “Tjinguru ngayulu nyurala tjakultjunkuku ka nyura ngayuku mulamularingkunytja wiyangku wantiku.” ⁶⁸ Munu

ngayulu nyurala tjapinnyangka nyura ngapartji wangkawiyangku wantiku. ⁶⁹ Palu kuwaringuru ngayulu Watiku Katjanya Godala witulya pulkangka itingka mayatja pulka nyinaku.”

⁷⁰ Kaya piruku uwankarangku tjungungku Jesula tjapinu, “Palu wanyu nyuntu mulapa Godaku katja?”

Ka Jesulu tjanala wangkangu, “Tjukarurungku pala nyura wangkangu.”

⁷¹ Kaya wangkangu, “Ala palatja! Wanyula wanti kutjupa tjuṭa altintytja wiyangku pitjala palunya wangkara kuranmankunytjaku. Panya kuwari nyangala nganana alatjīulta kulinu palurunku walytjangku Godaku katjanmankunyangka.* Utila iluntankunytjaku katima.”

23

Mayatja Pilate-alu Jesunya Tjapintja

(Matthew-ku 27:1-2,11-14; Markaku 15:1-5; Johnku 18:28-38)

¹ Munuya palulanguru paluru tjana uwankarangku pakara Jesunya makatingku Pilate-alakutu.

² Munuya palunya Pilate-ala mīrangka kuranmankula wangkangi nyanga alatji, “Nganana nyangu wati nyanga palunya anangu tjuta kurara katinyangka. Panya paluru tjananya wituwituningi nyuntunya munu nyuntumpa mayatja nyara Rome-ala nyinanytjanya wantintytjaku. Munu paluru alatji wangkangi, ‘Uti nganana Rome-aku mayatja mani ungkuwiyangku wantima paluru ngatjinnyangka.’ Mununku nyangangku walytjangku wangkangi paluru kunyu Christanya Wankaṛunkupainya Godalanguru nganampa mayatja pulka.”*

³ Ka Pilate-alu tjapinu Jesunya, “Nyuntu wanyu mulapa Jew tjuṭaku mayatja pulka?”

Ka Jesulu wangkangu, “Uwa, pala wangkanyin.”

⁴ Ka Pilate-alu wangkangu wati panya tjukurtjara kuranyitja tjuṭangka munu anangu tjuṭangka kuļu, “Ngayulu wati nyanga palunya puṭu kura ngurkantananyi pungkunytjikitjangku.”

⁵ Kaya pirukutu wangkangi, “Palu wati nyanga paluru anangu tjuṭa rawangku wangkara kuraningi munu paluru para-wangkarinangi ngura tjuṭangka Judeala munu ngura uwankarangka. Paluru ngura nyara Galileela rawangku para-ngarala wangkangi munu kuwari nyanga ngura nyangangka ngapartjilta kuraṇi.”

⁶ Ka Pilate-alu kulinu tjana alatji wangkanyangka munu tjapinu, “Wati nyanga paluru wanyu mulapa Galileenya ngurara?” ⁷ Kaya uwanmanu. Ka paluru kulinigi, “Utiṇa palunya Iratalakutu iyanma ngura Galileeku mayatjakutu panya paluru kuwari nyanga nyinanyi Jerusalemala.” Munu paluru mulapatu ma-iyanu Jesunya Iratalakutu.

⁸ Ka Iratalu Jesunya nyakula pulkara pukularingu, panya paluru Jesunya kutjupangku tjakultjunkunyangka kutju kulipai nyakunytja wiyangku munu rawa mukuringangi palunya nyakunytjikitja. Munu paluru mukuringangi Jesulu palula mīrangka kutjupa kutjupa witulya pulkangku palyannyangka nyakunytjikitja. ⁹ Munu Iratalu Jesunya rawangku tjapiningi tjukurpa kutjupa tjuṭa, palu Jesunya wangka

* 22:71 Moseku tjukurtu pulkara pailpai anangungku walytjangku Godanyamankunytja wiyangku wantintytjaku. Nyawa Exodus 20:2-7. * 23:2 Alatji tjana wangkangi Pilate-ala panya tjana ninti palumpa mayatjaku ini Tjiitjaku. Nyara paluru mukuringangi anangu uwankarangku palunya kutju pulkara walkuntjaku mayatja pulka Godanya purunypa. Munu kunyu paluru pulkara nyararingupai anangu tjuṭangku mayatja kutjupa walkunnyangka.

wiya alatjitu ngarangi. ¹⁰ Kaya wati tjukurtjara kuranyitja tjuta munu wati Moseku tjukurpa nintilpai tjuta tjungu ngaranytjatjanu pulkara mirpanaringi munuya Jesunya puntura wangkara kuranmanangi. ¹¹ Ka Iratalu munu palumpa tjaultji tjuta wangkangi munuya mayatja pulkaku tiritja purunytja wara pulkangka tjarpatjunkula malakungku palunya iyanu Pilate-alakutu. ¹² Palu panya nganmanypa Pilate-anja pula Iratanya pikaringkupai, palu tjintu nyara palula ara pula kalyparingu munu pula malparingu.

Pilate-alu Palyanmankunytja Jesunya Punu Katakutjarangka Utitjunkunytjaku

(Matthew-ku 27:15-26; Markaku 15:6-15; Johnku 18:39—19:16)

¹³ Ka Pilate-alu altingu anangu panya tjuta tjunguringkunytjaku wati panya tjukurtjara kuranyitja tjuta wangkangu tjanala, “Panya wati nyanga palunya nyura ngalya-katingu ngayulakutu munu nyura wangkangu alatji, ‘Wati nyanga paluru anangu tjuta wituwituningi nyuntunya munu nyuntumpa mayatja Rome-ala nyara nyinanytja wantinytjaku.’ Palu ngayulu panya palunya tjapinu kuwari nyanga nyurala mirangka, mununa palumpa kura putu ngurkantananyi nyura panya wangkanytjjangka. ¹⁴ Ka Iratalu kulu palunya putu kura ngurkantara malakungku iyanu ngayulakutu. Nyawa, paluru kura kutjupa kutjupa palyantja wiyatu kala nyaaku palunya iluntankuku. ¹⁶ Palu palyana tjaultji tjuta wangkanyi palunya wiipangka pulkara alkantjaku mununa palulangurumpa malalta wantir’iyalku. Palya?”

¹⁷⁻¹⁸ Palu anangu uwankarangkuya mirara wangkangi, “Wiya, wati nyanga palunya iluntara munu Parapatjanya walatjura.”* ¹⁹ (Wati nyanga paluru kunyu nganmanytju wati kutjupa tjuta tjunguringkula kamantaku pikaringangi Rome-aku tjaultji tjuta munu panya wati kutju iluntanu, kaya palunya witira tjailangka tjarpatjunu.)

²⁰ Ka Pilate-anja mukuringangi Jesunya walatjunkunytjikitja munu piruku tjanala tjapiningi. ²¹ Kaya anangu tjuta rawangku mirara wangkangi, “Wiya, punu katakutjarangka wakara utitjura! Punu katakutjarangka wakara utitjura!”

²² Ka Pilate-alu tjanala piruku tjapinu, “Palu nyaanguru? Kura nyaaa wanyu paluru palyanu? Palunyana kura putu ngurkantananyi iluntankunytjikitjangku. Palyantina tjaultji tjuta wangkaku palunya wiipangka alkara wantir’iyantjaku.”

²³⁻²⁴ Palu pulkararaya mirara palunya wituwituningi Jesunya punu katakutjarangka wakara utitjunkunytjaku. Ka Pilate-alu putu wangkara palyanmanu paluru tjana mukuringkunytja. ²⁵ Panya tjana mukuringangi Parapatjanya walatjunkunytjaku. Ka wati panya miriputju palunya Pilate-alu wanganarangku tjailanguru walatjunu, munu Jesunya wakara utitjunkunytjaku palyanmanu anangu tjuta mukuringkunyangka.

Jesunya Punu Katakutjarangka Utitjunkunytja

(Matthew-ku 27:31-44; Markaku 15:21-32; Johnku 19:17-27)

* ^{23:17-18} Wati kutjupangku kunyu verse 17 walkatjunu munu mala tjungunu Luke-aku tjukurta alatji *Tjaka kunyu inma nyanga Katuwanu Ankunytjala Pilate-alu wati kutju tjailanguru walatjunkunytjaku ngarangi*.

²⁶ Ka tjaultji tjuṭangku Jesunya witirā katingu. Ka nyara palula arangka wati kutjupa ini Simonnga kuwari kutju ngalya-tjarpangi walikutu ilytjin-guru. Wati paluru ngura ini Tjairininya ngurara. Kaya tjaultji tjuṭangku wati nyanga palunya witinu munuya puṇu kaṭakutjara palula piningga tjunkula wangkangu tjalira katira Jesunya maławanungku wanantjaku. ²⁷ Kaya anangu tjuṭa mulatu palunya wananningi minyma tjuṭangku kuļu munuya pułkara tjituru-tjitururira ulangi.

²⁸ Palu Jesulu malakukutura nyangu munu wangkangu, “Minyma Jerusalemany ngurara, wantima ngayuku ulawiyangku munuyanku nyura waltyja ulama munu nyurampa tjitji tjuṭaku kuļu. ²⁹ Panya ngula nyurampa tjituru-tjituru pułka mulapa ngaraku.* Ka nyara palula arangka nyura tjituru-tjitururira pułkara ulaku munuya alatji wangkaku, ‘Pukulpayanku nyinanyi tjitji wiyatjara tjuṭa munuyanku pukulpa nyinanyi iti ampura kanyilwiya.’ ³⁰ Munu nyara palula arangka nyura wangkaku apu murpu pułka tjuṭangka, ‘Punkala ngananala katu munulanya puruntara.’ Munu nyura piruku apu tjukutjuku tjuṭangka kuļu alatji wangkaku, ‘Punkaralanya tjuṭula.’ ³¹ Panya nyanga kuwariniya ngayunya tjukaruru nyinanyangka iluntananyi. Palu nyura ngayunya puruny়া palya mulapa wiya, kaya nyuranya wanyu wantiku? Wiya, ngula tjituru-tjituru pułka mulapa nyurala utiringkuku waintara mulapa. Ka nyura uti waltyja ulama, ngayuku wiya.” Alatji Jesulu minyma tjuṭangka wangkangu.

³² Kaya nyara palula ara tjaultji tjuṭangku wati kutjara kutjupa kuļu Jesula tjungu katingu iluntankunytjikitjangku, panya kura kutjara. ³³ Munuya ngura ini Kata Tarkala wirkara Jesunya puṇu kaṭakutjarangka wakara utitjunu munuya wati panya kura kutjara kuļu puṇu kutjupa kutjarangka wakara utitjunu palula tjungu, kutju kampa wakungka munu kutju kampa tjampungka.

³⁴ Ka Jesulu tjaultji tjuṭa walunyakula kulinu munu palumpa Mamangka wangkangu, “Mama, nyanga tjanampa ngalturingkula tjananya kaly-pangku wantima, panya tjana ninti wiya mununiya ngurpangku nyanga alatjinggaṇi.”

Kaya tjaultji tjuṭa palumpa mantaraku puṇu nampatjara katu waṇira inkangi kutjungku kutjungku winamilaṛa mantjintjikitjangku.

³⁵ Kaya anangu tjuṭangku ngarala nyangangi Jesunya, kaya Jewku mayatja tjuṭangku palumpa ikaringkula anara wangkangu, “Nyara paluru panya kutjupa tjuṭa ilunyangka wankaṇu. Nyangamala wanyu kanku palurunku wankala, panya paluru kunyu Christanya Wankarunkupainya Godalu ngurkantankunytja.” ³⁶ Kaya tjaultji tjuṭangku kuļu palunya anara ikaringangi munuya wama kurakura tja patja-patjalpai mantjirā katurā palula nintira wangkangu, “Nyuntu wama nyangatja tjikintjikitja mukuringanyi?” ³⁷ Munuya palulanguru piruku wangkangi, “Nyuntu Jew tjuṭaku mayatja pułka nyinarampa nyuntunku waltyjangku wankala!”

³⁸ Ka walkatjura utitjunkunytja palula katangka katu ngarangi alatji,
Nyangatja Jew Tjuṭaku Mayatja Pulka.

* ^{23:29} Nyangatja Jesulu ngaṇmanytu wangkangi ka ngula panya Jesunya ilkarikutu malaku ankunyangka małangka yiya tjuṭa nampa 50 ngarangi, ka nyara palulanguru warmala Rome-anyा ngurara tjuṭa mulapa Judealakutu pitjangu munuya Israelkunu tjuṭaku pułkara pikaringkula tjananya pungkula wiyanu alatjitu munuya wali tjuṭa kułukuļu minya-minyanu.

39 Ka panya palula itingka wakara utitjunkunytja kutjungku palu purunypaṭu Jesunya anara wangkangi alatji, “Nyuntu panyan Christanya Wankarunkupainya? Utinkun walytjangku wankanma ngalinya kuļu.”

40 Palu wati kutjupangku puṇu kaṭakutjara kutjupanguru palunya painu munu wangkangu, “Wantima! Nyuntu uti Godaku nguluringama panya nyuntunya nganaqanya wakara utitjunu ilunytjaku. **41** Ngalinyaya kura palyannyangka utitjunu, palu wati nyangangku kura palyantja wiya alatjitu, kaya ngunti palunya iluntananyi.”

42 Munu wati panya paluru wangkangu Jesula, “Jesu, ngula ngura ilkaritjangka ngayunya mayatja pulkangku ngaltunytjungku kulinma.”

43 Ka Jesulu palula wangkangu, “Wiya, kuvari nyanga alatjitu nyuntu ngayula tjunguringkula nyinaku ngura nyara wirungka.”

Jesunya Ilunytja

(Matthew-ku 27:45-56; Markaku 15:33-41; Johnku 19:28-30)

44-45 Ka palulanguru tjintu panya katuringkula katu ngaranyangka ngura uwankarangka maruringu munu munga purunypa ngarala mungartji-mungartji kutju tjintungku piṛuku irnyaningi. Ka maru ngaranyangka mantara panya timpula unngu waraly-waralyngaranytjanya tjilpirarara kutjararingu.* **46** Ka Jesulu pulkara mirara wangkangu, “Mama, kurunpaṇi mantjila.” Munu nyanga alatji wangkara ngaalypa wiyaringkula ilungu.

47 Ka wati tjaultji tjuṭaku mayatjangku nyanga alatjirinyangka nyakula Godanya wałkuṇu munu wangkangu, “Wati nyanga paluru palya mulapa kura palyantja wiya alatjitu.” **48** Ka anangu panya tjuṭa mulapa nyara palula ngañmanypa tjunguringu Jesunya ilunyangka nyakunytjikitja. Munuya uwankarangku ilunyangka nyakula ulatjarangku tjananku pilpirpa punga-pungangi tjituru-tjituru pulkangku, munuya palula malangka ngurakutu anu.* **49** Palu palumpa panya malpa tjutangku nyara palulaṭu ngarala nyangangi paṭunguru, munu minyma tjuṭangku kuļu panya palula tjunguya pitjangu Galileelanguru.

Jesunya Puntu Kulpingka Ngaritjunkunytja

(Matthew-ku 27:57-61; Markaku 15:42-47; Johnku 19:38-42)

50-51 Ka wati kutjupa nyara palula ngarangi wati ini Josephanya ngura Arima-tjiyanya ngurara. (Arima-tjiyanya panya tawunu tjukutjuku Jerusalemala itingka.) Wati nyanga paluru wiruṛa nyinapai tjukaruru mulapa. Munu paluru rawa paṭanangi Godalu anangu tjuṭa walytjanmara mayatjangku kanyintjaku. Paluru panya wati kantjula nyinangi munu Jewku kantjula kutjupa tjutangka mitingiku tjunguringkupai. Palu paluru tjanala tjungungku palyanmankunytja wiyaṭu tjana Jesunya iluntankunytjikitjangku wangkanyangka. **52** Munu wati panya paluru anu Pilate-alakutu munu palula ngatjinu Jesunya puntu mantjintjikitjangku. **53** Munu palyanmankunyangka paluru ankula Jesunya puntu puṇunguru mantjira ukalilyinu, munu karpinu mantara piṛanta munu kułpi kuvari nyarkara wantintjitetjangka palunya katira tjuṇutjunu, panya anangu kutjupaya nyara palula ngañmanytju tjunkunytja wiyaṭu. **54** Ka tjintu nyanga paluru panya Friday Jesunya ilunytja-ara. Ka panya tjirirpi ma-tjarpanyangka Saturday-ringu tjintu panya pakuwiyaringkunytjaku.

* **23:44-45** Mantara nyanga paluru panya timpulangka waraly-waralyngarala anga-kanyiningi ngura ruuma milmilpa mulapa, kaya ngura pala palula anangu tjuṭa tjarpapai wiya. Nyawa Iipuru Tjuṭaku Lita chapter 9. * **23:48** Tjakangkuyanku tjituru-tjituru pulkaringkula pilpirpa pungku-pungkupai.

⁵⁵ Kaya minyma panya Galileelanguru Jesula tjungu pitjanytja tjuṭangku Josephanya waṇanu Jesunya puntu kulpikutu katinyangka. Munuya kulpingka wirkara nyangangi Jesunya puntu ngaritjunkunyangka kulpunngu. ⁵⁶ Munuya nyakula wiyaringkula małaku anu ngurakutu panti wiru nyitilpai nganmanytju mantjira riti palyara tjunkunytjikitja.* Munuya tjintu tjarpantasyangka nyinara pakuwiyaringangi tjintu panya Saturday wirkankunyangka, panya Moseku tjukurtu alatji pakuwiyaringkunytjaku wangkapai.

24

Jesunya Ilunytjatjanu Wankaringkula Pakantja (Matthew-ku 28:1-10; Markaku 16:1-8; Johnku 20:1-10)

¹ Ka Sunday mungawinki mulapa minyma panya tjuta pakara kulpikutu anu nyitilpai wiru tjuṭatjara. ² Munuya ma-wirkara nyangu apu panya pulka kulpunngu tjaanguru untura-wanara waninytja. ³ Munuya unngu tjarparya Jesunya puṭu nyangu. ⁴ Munuya ngarala puṭu kuliningi, “Yaaltjiringu?” Ka mapalku wati kutjara tjanala utiringu mantara piranpatjara munu wanangara purunypa irnyaningi. ⁵ Kaya pulkarra nguluringkula pupakatira yunpangku pampuningi manta. Ka tjanala wangkangu, “Nyaaku nyura anangu wanka ngurini nyanga miriku ngurangka? ⁶ Nyura ninti panya paluru nyurala nganmanytju wangkangu Galileela panya nyinralpi. ⁷ Alatji paluru wangkangu, ‘Mirpaṇtju tjuṭangkuya Watiku Katjanya unguku wati kura tjuta, kaya palunya puṭu kaṭakutjarangka wakara utitjunkuku. Ka paluru ilunytjatjanu tjintu kutjara wiyaringkunyangka piruku wankaringkula pakalku.’ Alatji panya palurunku wangkangi nyurala.” ⁸ Kaya minyma panya tjuṭangku mulapatu kulinu paluru panya nganmanytju wangkanytjitja munuya anu ngurakutu.

⁹ Munuya ngurangka wirkara nintintja panya 11-ta munu kutjupa tjuṭangka kuļu tjakultjunu uwankara panya tjanala angeltu wangkanyangka kulintjatjanungku. ¹⁰ Minyma paluru tjana panya ini nyanganpa, Mary Magdalene-anya, Tjawananya, munu Mary-nya Jamesaku ngunytju munu minyma kutjupa tjuta kuļu. ¹¹ Uwa, minyma nyanga paluru tjanaya iyantja panya tjuṭangka tjakultjunu, kaya puṭu mulamularingangi tjana ngunti wangkanyangka-palku. Munuya tjananya kuliningi kawakawaringkunyangka-palku. ¹² Palu Peternya pakara wirtjapakaļu kulpikutu, munu paluru kulpingka wirkara nyirkira nyangu mantara kutju ngarinyangka Jesunya panya karpintjtja. Munu paluru puṭu nyakula ngurakutu ankula iwarangka kulirinangi, “Nyaaku nyangatja alatjiringu?”

Nintintja Kutjara Ngura Imayatjalakutu Ankunytja (Markaku 16:12-13)

¹³ Ka tjintu pala palula Jesunya waṇalpai kutjara Jerusalemalanguru pakara anu ngura ini Imayatjalakutu, panya ngura nyara paluru tjukutjuku patu nguwanpa ngarangi, tinanguru ankula mungartji tjarpantasytjaku. ¹⁴ Ka wati panya paluru pula iwarangka ankula wangkarinangi pula uwankara utiringkunyangka nyakunytjatjanungku. ¹⁵ Ka pula wangkakatinyangka Jesunya pulala waṇara tjunguringu munu pulala

* 23:56 Wiru pantipai tjuṭaya miritjina purunypa miringka nyitilpai uñaringkunytjaku-tawara.

tjungu anangi. ¹⁶ Palu pula wati kutjupa-palku kuliningi, panya Godalu pulanya kuru kampa kutjupanu puṭu palunya ngurkantankunytjaku.

¹⁷ Ka Jesulu pulala tjapinu, “Nyaa nyupali wangkarinanyi?”

Ka paluru pula tjapinnyangka ngarakatingu yunpa tjituru-tjitururira.

¹⁸ Ka wati kutjungku ini panya Kuliya-patjalu wangkangu, “Palu nyuntu kutjun ngurpa nyinanyi? Ngura panya Jerusalemalan wanyu kuwari panya nyakunytja wiyatū?”

¹⁹ Ka Jesulu pulala tjapinu, “Nyaa nyupali wangkanyi?”

Ka pula wangkangu, “Panya Jesunya Nazarethanya ngurarali wangkanyi wati panya wangkatjara Godalanguru pitjanytja. Panya anangu uwankarangku kulilpai paluru kutjungku tjukurpa wiru mulapa wangkanyangka munuya nyakupai kutjupa kutjupa tjuṭa kuļu witulya pulkangku palyannyangka. ²⁰ Ka panyaya nganampa nyanga mayatja tjutangku wati tjukurtjara kuranyitja tjutangku kuļu Jesunya iluntankunytjaku wangkangu munuya palunya ma-ungu puṇu kaṭakutjarangka wakara utitjunkunytjaku. ²¹ Palu nganana paṭaningi Jesulu ngananañanya Israekunu tjuṭa ngalkintjaku. Palu kuwari nyanga wiyingulta, panya palunyaya iluntanu, ka nyangatja tjintu maŋkuraringu.

²² “Palu minyma tjutangku ngananaala wiru tjakultjunu panya paluru tjana mungawinki mulapa kulpikutu ankunytjatjanungku. ²³ Munuya kunyu miri panya ngarinytjitja puṭu nyangu munuya pitjala ngananaala tjakultjunu alatji panya tjana kunyu angelpa maŋkurpa nyangu, kaya kunyu tjanala tjakultjunu alatji, ‘Jesunya wankaringkula pakanu.’ ²⁴ Kaya kutjupa tjuṭa ngananałanguru ngapartji anu kulpikutu munuya palu purunypatū puṭu nyangu panya minyma tjutangku wangkanytja purunypa.” Alatji pula wangkangu.

²⁵ Ka palulanguru Jesulu pulala wangkangu, “Nyupali ngurpa munu nyupali puṭu mulamularinganyi uwankara panya ngañmanytju wangkatjara tjutangku wangkanytjitjaku. ²⁶ Panya tjukurpa iriti nyiringka walkatjunkunytja ngaranyi, panya Godalu Christanya Wankarunkupainya pikatjararingkula ilunytjaku iyalku, ka nyara palulanguru kutju paluru ilunytjatjanu wankaringkula pakalku Godala tjunguringkula mayatja pulka mulapa tiṭutjara nyinanytjikitja. Alatjiya wangkatjara tjutangku iriti walkatjunu.”

²⁷ Munu palulanguru Jesulu pulala utira wangkangu uwankara panya iriti wangkatjara tjutangku tjukurpa palunyatjara walkatjunkunytja, panya Moselu tjana wangkatjara małatja małatja tjuṭangku kuļukuļu.

²⁸ Munuya ilaringu ngura panya Imayatjalakutu, ka Jesunya nguwanpa ma-waintaringu. ²⁹ Ka pula palunya markuṇu wangkara, “Wanyu ngalila nyina. Mungartjiringu nyangatja ka tjintu waṭalpi tjarpanyi.” Ka paluru mulapatū wantira nyinangu munu pulala tjungu tjarpangu walingka nyinanytjikitja.

³⁰ Munu Jesunya pulala maiku tjunguringu taipulangka munu mai mantjira Godala wangkangu, “Wirungkulanyan mai nyangatja ungu.” Munu palulanguru pulanya mai kaṭantara ungu. ³¹ Ka Godalu pulanya kuru alaṇu ka pula nyakula ngula kutju kulira ngurkantanu, “Mulapa nyangatja Jesunya alatjiṭu.” Palu pula ngurkantankunyangka Jesunya mapalku arkayiringu. ³² Ka pulanku wangkangu, “Panya Jesulu ngalila iwarangka pitjala wangkanyangka ngali kurunpa unytjunaringu, panya paluru mulapa ngalila Godaku tjukurpa tjuṭa utira wangkangi.”

³³ Munu pula mapalku pakara małaku anu Jerusalemalakutu munu pula ma-wirkara nyangu Jesuku panya nintintja 11 munu aŋangu panya kutjupa tjuṭa kuļu tjunguringkula nyinanyangka. ³⁴ Kaya tjanala wangkangi, “Mulapa Jesunya ilunytjatjanu wankaringkula pakanu. Paluru utiringu Simonta.” ³⁵ Ka wati panya kutjarangku ngapartji pitjalā tjanala tjakultjunu Jesunya palula pulala iwarangka utiringkunytja munu paluru pulanya mai nyuma kaṭantaṛa ungkunytja. Munu pula palunya mała kutju ngurkantankunytjatjanungku tjakultjunangi tjanala.

Jesunya Nintintja Tjuṭangka Utiringkunytja

(Matthew-ku 28:16-20; Markaku 16:14-18; Johnku 20:19-23; Acts 1:6-8)

³⁶ Ka paluru pula kuwaripangku ngarala tjakultjunkunyangka Jesunya tjanala ngurur-ngururpa utiringu munu tjanala wangkangu, “Pukularimaya!” ³⁷ Palu tjanala urulyarara pulkara nguluringu munuya ngunti kulinu kurun-kurunpa-palku.

³⁸ Ka Jesulu tjanala wangkangu, “Nyaaku nyura urulyaraṇi? Nyaaku nyura puṭu mulamularinganyi? ³⁹ Nyawaniya mara munu tjina kuļu, panya ngayulu alatjiṭuṇa. Pampulanija munuya mulamulariwa. Ngayulu panyana. Nyanga aŋangu alatjiṭuṇa ngaranyi, panya kurun-kurunpa puntu nyanga ngayulu purunypa wiya.” ⁴⁰ Munu wangkanytjatjanungku tjanala nintinu palumpa mara munu tjina kuļu.

⁴¹ Kaya palumpa panya nintintja tjuṭa pulkara alatjiṭu urulyaraṇu munuya pukularingu kulira, “Munta mulapampal nyangatja wankaringkula ngaranyi?”

Ka Jesulu tjanala tjanalinu, “Kuka nyura kanyini?” ⁴² Kaya palunya kuka antipina warutja ungu. ⁴³ Ka paluru tjanala miṛangka antipina panya mantjira ngalkuningi.

⁴⁴ Munu tjanala wangkangu, “Panyatja nyura kulini, panya ngayulu ngañmanyatju nyurala nyinara wangkanytja? Panya Moselu tjanala wangkatjara kutjupa tjuṭangku tjukurpa ngayunyatjara walkatjunu, munu Psalm tjuṭangka kuļu Davidalu tjanala ngayunyatjara walkatjunu. Ka panyana nyurala ngañmanyatju wangkangu tjukurpa nyanga paluru tjanala uwankara ngula utiringkuku.”

⁴⁵ Munu palulanguru Jesulu nyiringuru tjanala wangkara utiningi tjanala tjukurpa tjukarurungku kulintjaku. ⁴⁶ Munu paluru tjanala wangkangu alatji, “Ngayulu panya Christianity Wankařunkupainya, ka panya nyiringka iriti walkatjunu tjukurpa ngayunyatjara alatji, ‘Ngula Godalu Wankařunkupainya iyalku ka paluru pikatjararingkula ilunytjatjanu tjintu maŋkurarira wankaringkula pakalku.’ ⁴⁷ Kaya palunya waŋalpai tjuṭangku aŋangu tjuṭangka tjakultjunkuku ngayunyatjara tjanala kuranguru piiwiaringkula kampa kutjuparinytjaku, ka Godanya tjanampa kalyparingkuku munu tjananya kura palyantitjanguru kaly-pangku pungkuwiyangku wantiku. Paluru tjanala tjukurpa nyangatja Jerusalemala-warara wangkaku munuya palulanguru ngura winkikutu ankula tjakultjunkuku.”

“Uwa alatji nyiringka iriti walkatjunkunytja ngaranyi. ⁴⁸ Ka nyura panya nyangu ngayulu ilunyangka munu ilunytjatjanu wankaringkula pakananyangka kuļu. Kaña nyara palulanguru nyuranya iyanı aŋangu tjuṭangka ankula tjakultjunkunytjaku uwankara nyura nyakunytjatjanungku. ⁴⁹ Palu kulilaya munuya ngura nyanga Jerusalemala nyinara paṭanma Godalu nyuranya ilkariringuru witulyankunytjaku. Panya ngayuku Mamangku

nyurampa iriti kalkunu, kaña kuwari kalkuntjitja panya palunya nyuralakutu iyalku."

*Jesunya Ilkarikutu Katinytja
(Markaku 16:19-20; Acts 1:9-11)*

⁵⁰ Munu palulanguru Jesulu palumpa nintintja tjuṭa ma-katingu Piitjanilakutu, munu ngura nyara palula itingka wirkara ngarangu, munu mara katura tjananya wangkara pukulmanu. ⁵¹ Ka paluru wangkara pukulmankunyangka Godalu palunya katura katingu ilkarikutu. ⁵² Kaya palunya pukultu walkuningi munuya wiyaringkula malaku anu Jerusalemalakutu pukulpa mulapa. ⁵³ Munuya palulanguru tjintu kutjupa tjintu kutjupa timpulangka tjarpara Godanya rawangku mirawañira walkuningi.

Tjukurpa Palya Johntu Walkatjunkunytja

John

Nyangatja Nganmanytju Nyakula

Wangkanytjaku

Nyangatja Godaku tjukurpa wati ini Johntu walkatjunkunytja Jesunyatjara. Johnnga panya wati kutjupa John Baptista wiya. Paluru wati antipina witilpai nyinangi, ka Jesulu palunya nyakula ngurkantanu palumpa nintintja nyinanytjaku palumpa kuṭangka tjungu wati panya Jamesala. Ka panya ngula Jesunya ilkarikutu ankunyangka malangka wati nyanga Johntu Jesuku panya ngunyntju aṭunymara kanyiningi.

Uwa, ka nyiri nyanga palula Johntu kutjupa kutjupa tjuta Jesunyatjara walkatjunu, panya paluru Godaku katja, munu panya *Tjukurunga*, panya palulawanungku Godalu uwankara palunu. Munu paluru walkatjunu Jesulu witulya pulkangku palyantja tjuta kuļu, panya aŋangu tjutangku palunya nyakula pulka kulintjaku munu palulanguru palumpa nintirringkunytjaku, panya paluru Godaku katja. (Nyawa chapters 2, 4, 5, 6, 9 munu 11). Nyanga alatji paluru walkatjunu nganaņa kulira Jesuku mulamularingkula wankaringkunytjaku munu wanka titutjara nyinanytjaku.

Munu Johntu tjukurpa tjuta tjakultjunu Jesulu palurunku walytjangku wangkanytja alatji,

- “Ngayuluna mai kurunpa wankalpaina, ka aŋangu ngayulakutu pitjalampa pukulpa mulapa nyinaku.” (6:35)
- “Ngayuluna tili aŋangu tjutaku, ka kutjupangku ngayula tjungu ngaralampa tili wankařunkupaina mantjilku.” (8:12)
- “Ngayuluna kaita panya tjiipi tjutaku, ka kutjupa ngayulawanu tjarpampa wankaringkuku.” (10:9)
- “Ngayuluna tjapata palyanya, munuña tjiipi tjutaku ngalkilpa ilunytjikitja mukuringanyi.” (10:11)
- “Ngayuluna ilunyangka wankařa pakaltjingalpaina, ka aŋangu ngayuku mulamularingkulampa ilunytjatjanu wankaringkula wanka mulapa nyinaku.” (11:25)
- “Ngayuluna iwaranya, panya nyura ngayulawanungku kutju uwankara tjukarurungku kulilkmu munu nyura ngayula kutju kulira wankař Godala wirkankuku.” (14:6)
- “Ngayuluna puňu panya kiripitji purunypa, ka ngayuku Mama wati panya puňu kiripitji kanyilpai purunypa.” (15:1)

Alatji Jesulu palurunku walytjangku wangangi.

Tjukurpa nyanganpa ngarinyi:

1:1-18 Tjukurpa Godanyatjara

1:19—12:50 Jesulu aŋangu tjutangka tjukurpa tjuta wangkara nintintja munu pikatjara tjuta palyarunguntja

13:1—16:33 Jesulu palumpa nintintja tjutangka wangkara nintintja

17:1-26 Jesulu Godala tjpintja

18:1—19:42 Jesunya witintja munu puňu katakutjarangka wakara utitjunkunytja

20:1—21:14 Jesunya ilunytjatjanu wankaringkula pakantja munu palumpa nintintja tjutangka utiringkunytja

21:15-25 Jesulu Peterla wangkanytja

Jesunya Tjukurnga Munu Godanya Ngananala Nintini

¹ Kuwaripatjara mulapa uwankara wiyangka Godanya nyinangi, ka palula tjungu kutjupa nyinangi ini Tjukurnga. Panya paluru Godanya alatjiitu. ² Nyara paluru manta kuwaripangka nyinangi Godala tjungu. ³ Munu pula tjungungku uwankara palunu. Mamalu kutjungku paluntja wiya, tjungungku alatjiitu pula kutjupa kutjupa uwankara palunu. ⁴ Kaya Tjukurnguru kutju anangu tjuta wanka nyinanyi, panya paluru wanka alatjiitu munu paluru uwankara wanka kanyini. Panya Tjukurtu tili wirkakatingu anangu tjuta irnyantjaku tjana nyakula tjukarurungku kulintjaku Godanya. ⁵ Tili nyara paluru mungawaluru irnyaara wiyalpai alatjiitu, ka mungawalurungku tili nyara palunya putu wiyanı. Tili paluru ngaranyi alatjiitu wiyaringkunytja wiya.

⁶ Palu Godalu wati kutju iyanu ini Johnnga.* ⁷ Ka paluru pitjangu tili nyanga palunya tjakultjunkunytjikitja anangu winkingku kulira mulamularingkunytjaku. ⁸ Wati nyara paluru tili wiya palu paluru tili palunya ngañmanytju tjakultjunkunytjikitja pitjangu. ⁹ Tili nyara paluru tjukaruru mulapa anangu winki irnyalpai. Nyara paluru mantangka wirkara utiringu.

¹⁰ Mama Godalu Tjukurwanungku manta palunu. Ka Tjukurnga mantangka wirkara nyinangi, palu anangu tjutangku palunya putu ngurkantanangi. ¹¹ Paluru manta paluntjatjanu anangu walytja tjutakutu pitjangu, kaya walytja tjutangku palumpa pukularinytja wiyangku wantingi. ¹²⁻¹³ Palu anangu kutjupa tjaraya palumpa pukularingu munuya palumpa mulamularingu. Ka nyara palulanguru paluru tjananya Godaku walytjaringkunytjaku palyanu. Paluru wangkanyangka tjana Mama Godaku katjaringu munu uñtalaringu palumpa tjurwanu. Watinguru munu minymanguru wiya, palu panya Godanya mukuringkunytjanguru kutju.

¹⁴ Ka Tjukurnga mantakutu pitjala itiringkula ananguringu, munu ngananala tjungu nyinangi ngaltunytju pukultju pulka, munu paluru ngananala Mama Godanya tjukarurungku alatjiitu nintiningi. Kala nganana nyangu palunya wiru mulapa witulya pulka alatjiitu, panya Mama Godalu palunya alatjirinytjaku iyanu palumpa katja kutjukurutja.

¹⁵ Ka John Baptistalu palunya nyakula anangu tjutangka tjakultjuniangi alatji katuwanungku wangkara, “Nyanga palunya panyaña ngayulu ngañmanytjulpi nyurala wangkangi alatji, ‘Ngayula małangka kutjupa pitjanyi. Nyara paluru pulka mulapa ngayula waintarinytja. Paluru panya kuwaripatjara nyinanytja.’ Alatji panyaña nyurala ngañmanytju wangkangu.”

¹⁶ Ka Tjukurnga panya ngaltunytju pukultju pulka munu paluru nganananya pukultjungku titutjarangku kanyini wantinýtja wiyangku.

¹⁷ Godalu tjukurpa pulka ungu Mosenya anangu tjutaku, palu Jesulu Christalu pukultjungku tjukarurungku utinu mukulya pulka mulapalta.

¹⁸ Anangu kutjupangku Godanya yunpa nyakunytja wiya. Palu palumpa katja palula tjungu nyinapai munu paluru ngananala utinu palumpa Mama, panya paluru Godanya alatjiitu.

*Johnnga Wati Tjukurtjara Tjutangku Tjapintja
(Matthew-ku 3:1-12; Markaku 1:1-8; Luke-aku 3:15-17)*

* ^{1:6} Wati nyanga paluru panya John Baptista.

¹⁹ Ka panya Johntu anangu tjuta baptise-katingi ngura ini Piitjanila uru panya ini Jordanta kakarara. Ka Jewku mayatja tjutangku Jerusalemalanguru witura iyanu wati tjukurtjara tjuta, munu wati timpulangka warakaripai tjuta kulu ankula Johnnga tjapintjaku alatji, “Nyuntu ngananya? Tjukarurungkulanya tjakultjura.”* ²⁰ Kanku Johntu ngapartji tjukarurungku tjanala wangkangu utingku, “Wiya, ngayuluña Christanya wiya. Ngayulu Wankarunkupai Godalu panya kalkuntjitjanya wiya.”

²¹ Kaya piruku tjapinu, “Palu ngananyan wanyu, Ilaitjanyan?”

Ka wangkangu, “Wiyana.”

Kaya tjapira wangkangu, “Palu Godaku wangkatjaran wanyu?”*

Ka wangkangu, “Wiyana.”

²² Kaya piruku wangkangu, “Palu ngananyan wanyu? Tjakultjuralanya kala ankula tjanala wangka, panya nyara tjana nyuntunya kulintjikitja mukuringanyi. Nyaan wanyu nyuntunku wangkanyi?”

²³ Ka Johntu wangkangu, “Ngayuluña panya paluru, panya Aitjayalu iriti walkatjunu nyanga alatji,

‘Wangka kutju mirapai ilytjingka nyanga alatji,

“Iwaraya tjukarurula Mayatjanya pitjanytjaku.”

Alatji Aitjayalu ngayunyatjara iriti wangkangi.”

²⁴ Ka palulanguru Paratji tjutangku ngapartji Johnta tjapiningi, panya palunya tjananya kuлу Jewku mayatja tjutangku Jerusalemalanguru witura iyanu Johnta tjapintjaku. ²⁵ Munuya alatji palula tjapinu, “Kan nyaaku wanyu baptise-katinyi panya Wankarunkupainya Godalu kalkuntjtjityanya wiyangkumpa, Ilaitjanya wiyangkumpa, wangkatjara wiyangkumpa?”

²⁶ Ka Johntu ngapartji tjanala wangkangu, “Ngayuluña minangka baptise-katipai, palu kutjupa nyurala ngurpatja ngaranyi. ²⁷ Wati paluru ngayula malangka pitjanyi. Panya paluru pulka mulapa ngayula waintara alatjitu. Kana yaaltji-yaaltjingku kurangku palumpa waraka palyalku? Wiya alatjitu panya paluru pulka mulapa.” Nyanga alatji Johntu tjanala wangkangi wati Moseku tjukurtjara tjutangka.

²⁸ Nyanga alatjiringu Johntu baptise-katinyangka ngura ini Piitjanila uru panya ini Jordanta kakara.

Johnku Godaku Lamalama Nintintja

²⁹ Ka tjintungka Johntu Jesunya nyangu palulakutu ngalya-pitjanyangka, munu nyakula paluru anangu tjutangka wangkangu, “Ala, nyawaya! Nyangatja panya paluru Godaku panya lamalama, panya nyanga paluru anangu uwankaraku ngalkilpa iluku Godalu tjananya kura palyantjitan-guru kalypangku pungkuwiyangku wantintyjaku.* ³⁰ Nyanga palunya panyana nyurala nganmanytu tjakultjunangi alatji, ‘Ngayula malangka wati kutjupa pitjanyi ngayula waintarintja pulka mulapa, panya paluru nganmanyapa ngayula wiyangka nyinanytja.’ ³¹ Ngayuluña palumpa ngurpa nyinangi, palu nyanga palumpa nganmanytu pitjala nintiningi urungka baptise-katira paluru Israelkunu tjutangka utiringkunytjaku.”

* **1:19** Wati tjukurtjarangku timpulangka inma kanyilpai munu kuka pungkupai Godanya ungkunytjikitjangku. Nyanga paluru panya Priest. Ka wati timpulangka warakaripai tjutangku tjukurtjara tjuta alpamilalpai. Nyanga paluru tjana panya wati ini Levikunu tjuta, panya Levinya Jacobaku katja. * **1:21** Godaku Wangkatjarangku panya Godalu wangkanyangka kuliṛa tjakultjunkupai anangu tjutangka. Nyanga paluru panya Prophet. * **1:29** Nyangatja Johntu Jesunya Godaku lamalama wangkangi inma Katuwani Ankunytjanya kuliṛa. Nyawa Exodus 12:43.

³² Munu piruku Johntu nyakunytjatjanungku tjakultjunu nyanga alatji, “Ngayulu nyangu Kurunnga ilkar̄inguру tjułpu kuukuuku purunypa ukalingkula palula nyinakatinyangka.” ³³ Ngayuluна palumpa ngurpa nyinangi, palu panya Godaluñi ngayunya anangu tjuña minangka baptise-katintjaku iyanı, munuñi nyanga alatji wangkangu, ‘Panya nyuntu nyakuku Kurunnga ukalingkula watingka nyinakatinyangka, nyara paluru anangu tjuña baptise-katiku Kurunpa Milmiltा.’ ³⁴ Kaña ngayulu mulapa nyangu munu nyangaña tjakultjunanyilta alatji, ‘Nyanga paluru Godaku katja.’” Alatji Johntu tjanala wangkangu Jesunya.

Nintintja Mankurpa Jesula Tjunguringkunyta

³⁵ Ka tjintungka piruku Johnnga nintintja kutjaratjara ngarangi ngura panya palulatu. ³⁶ Munu mungartji paluru Jesunya wati-pitjanyangka nyakula wangkangu alatji, “Ma-nyawa pula, Godaku lamalama pala wati-pitjanyi.” ³⁷ Ka pula nintintja kutjarangku kulinu nyangatja wangkanyangka munu pula Jesunya wañanu. ³⁸ Ka Jesulu pinkurara nyangu pula ngalya-wañannyangka munu pulala wangkangu, “Nyaaku nyupali ngayunya wañani?”

Ka pula wangkangu, “Rabbi, nguranku yaaltji?” (Pula *Rabbi* wangkangi tjanampa wangkangku *Nintilpai*.)

³⁹ Ka pulala wangkangu, “Pitjala pula nyawa!”

Ka pula Jesula tjunguringkula anu munu pula ngura nyangu munuya nyara palulalta nyinara mungaringu. ⁴⁰⁻⁴¹ Palulanguru pula anu, ka kutju ini Andrew-lu Simon Peterku małanytju mapalku ankula nyangu tjukarurungku palumpa kuta munu palula tjakultjunu alatji, “Nyanguна panya Messiah-nya Godalu panya Kalkuntjanya!” (Messiah-nya panya wangka Iipuru, ka wangka kutjupa Kuriki panya Christanya wangkanyi, panya Wankarunkupainya Godalu panya Kalkuntjanya.) ⁴² Munu katingu palunya Jesulakutu. Ka Jesulu nyakula palunya wangkangu, “Nyuntu ini Simonnga wati Johnku katja. Palu ngayuluñanta inilku Tjiipatjanya.” (Palu Kuriki tjuñangku ini nyanga palunya wangkapai Peternya panya walу, panya kuñpu witulya tiñutjara ngarapai.)

⁴³ Tjirirpingka Jesulu kulinu alinytjara ankunytjikitjangku uru ini Galileelakutu. Munu paluru wati ini Philipanya ngurira nyakula wangkangu, “Ngayunyanı wañala!” ⁴⁴ (Philipanya panya tawunu ini Pitjaitala nyinapai uru Galileela itingka. Ka Andrew-nya pula Peternya kulu ngura pala palunya ngurara.)

⁴⁵ Ka Philipalu ngurira nyangu wati panya ini Natjanyulngu munu wangkangu palula, “Nyangula wati panyatja, panya Moselu iriti nyiringka walkatjunu wangkatjara tjuñangku kulu. Nyara paluru Jesunya panya Josephaku katja ngura panya Nazarethanya ngurara.”

⁴⁶ Ka Natjanyultu nyangatja kulira pułu mulamularingkula wangkangu, “Wiya Nazarethanya panya ngura kurakura, ka palunya ngurara kutju palya nyinanytja wiya?”

Ka Philipalu wangkangu, “Wiya, wanyu-puła pitjala nyawa ilangku.” Munu pula anu nyakunytjikitja.

⁴⁷ Ka Jesulu nyangu pula pitjanyangka, munu ilaringkunyangka wangkangu, “Wati nyanga paluru Israelkunu palya mulapa, ngunti wangkapai wiya.”

⁴⁸ Ka Natjanyultu palula wangkangu, “Yaaltji-yaaltjin ngayuku nin-tiringu?”

Ka Jesulu wangkangu, “Nyanguṇanta nganmanytu Philipalu nyuntunya altintytja kuwaripangka, puṇu panya ili wiltjangka nyinanyangka.”

⁴⁹ Ka Natjanyultu wangkangu, “Nintilpai, mulapa nyuntu Godaku Katja, mayatja pulka Israelkunu tjuṭaku.”

⁵⁰ Ka Jesulu palula wangkangu, “Mulapa panya palulangurun ngayuku mulamularingu? Panya nyuntu puṇu ili wiltjangka nyinanyangkaṇanta nyakula wangkangu, kan nyara palulanguru wanyu ngayuku mulamularinganyi? Palu wanyu kulila. Nyanga paluru pulka wiya, palu nyuntu ngula pulka mulapa nyakuku ngayulu palyannyangka. Nyara palulanguru nyuntu ngayuku pulkara mulamularingkuku.”

⁵¹ Munu piruku wangkangu tjanala, “Tjukarurungkuna nyurala wangkanyi nyura nyakuku ilkarī alaringkunyangka munu Godaku angelpa tjuṭa ukalingkula tatinnyangka Watiku Katjangka.”

2

Jesulu Minanguru Waina Palyantja

¹ Ka palulanguru tjintu kutjara wiayingkunyangka anangu tjuṭa tjunguringu ngalkula pukularinytjikitja tawunu ini Kainala uru panya Galileela wilurara watingku kuri altintytjanyangka. Ka nyara palula Jesuku ngunytyu kuļu tjunguringu tjanala. ² Munuya Jesunya altingu palumpa nintintja tjuta kuļu, kaya pitjala tjanala tjunguringkula mai ngalkuningi. ³ Palu anangu tjuṭangku tjikinnyangka waina tjanampa wiayingku. Ka Jesuku ngunytyungku palula pitjala wangkangu, “Waina tjanampa wiayingku.”

⁴ Ka Jesulu wangkangu, “Wampa. Tjanampanti, nyuntumpa ngalimpa wiya. Panya ngayulu pulka utintjaku ngayuku riti wiya kuwaripa ngaranyi.”

⁵ Ka palulanguru palumpa ngunytyungku palula kuliṛa ma-pitjala war̄karipai tjuṭangku wangkangu, “Nyuranya Jesulu wangkanyangkaya wanganarangku kuliṛa palyanma.” ⁶ Ka pala palula piti pulka maṇkur-maṇkurpa ngarangi minatja ultu tjuṭa. Piti nyanga palunya tjananyaya minatjara kanyilpai ara tjanampangka mara paltjintjikitjangku. Piti paluru tjana apunguru palyantja pulka mulapa mina pulka kanyilpai 100 litres. ⁷ Ka Jesulu tjanala wangkangu war̄karipai tjuṭangku, “Minaya tjuṭira kati munuya tjaalyngaratjura piti pala ultu tjuṭangku.” Kaya mulapatu tjaalyngaratjuru piti uwankarangka. ⁸ Ka Jesulu wangkangu, “Ala, tjuṭiraya ma-katira uwa nyurampa mayatja.” Kaya mulapatu tjuṭira katira palunya ungu. ⁹ Ka paluru tjikira arkaṇu waina kuwaritja minanguru panya palyantja, palu wati paluru ngurpangku puṭu kuliningi yaaltjinguruya mantjinu. Palu wati war̄karipai tjuṭangkuya nintingku kuliningi palyannyangka nyakunytyatjanungku. Ka arkantyatjanungku wati panya mayatjangku altingu wati panya kuwari kuri altintytjanya. ¹⁰ Munu wangkangu, “Ai, nyuntu waina wiru mulapa nyangatja kuwari unganyi, panya tjakangkuya waina wiru nganmanytu ungkupai munuya malangka pulkara tjikinnyangka kurakura ungkupai. Palu nyuntu kuwari waina wiru mulapalta malangka unganyi.”

¹¹ Miracle nyanga palunya-wararangku Jesulu utintjikitjangku palyantu ngura ini Kainala uru Galileela wilurara. Palurunku witulya nintinu, kaya nintintja tjuṭangku nyakula palumpa mulamularingu.

¹² Nyanga palula małangkaya ma-pakaṇu ngura panya Kapunimalakutu palumpa ngunytju, małanypa tjuta, munu nintintja tjuta kuļu, munuya ma-wirkara ngura pala palula nyinangi tjirirpi mañkurpa.

*Jesulu Godaku Walinguru Anga-wangkara Paintja
(Matthew-ku 21:12-13; Markaku 11:15-17; Luke-aku 19:45-46)*

¹³ Ka Jesulu kulinu Jewku inma panya Katuwanu Ankunytjanya* ilaringkunyangka, munu Jerusalemalakutu pakara ma-pitjangu palumpa nintintja tjuta kuļu. ¹⁴ Munuya wirkara nyangu timpulaku yaatangka unngu watingku tjalamilannyangka tjiipi, puluka, tjulpu kuukuuku tjuta kuļu. Ka wati mani ngaparku ungkupai tjuta taipulangka nyinangi.*

¹⁵ Ka Jesulu ruupanguru karpi-karpira wiipa purunypa palyanu munu tjananya uwankara unṭura wañara үrluktu pakaltjinganu tjiipi, puluka tjuta kułukulu. Munu paluru mani ngaparku ungkupai tjutaku taipula unṭura wañingu tjiilpa uwankara ma-wililytjinganu. ¹⁶ Munu kuukuuku tjalamilalpai tjutangka wangkangu, “Katiya tjulpu nyanganpa. Nyangatja Mamaku yiwala. Nyaaku nyura tjuwangka-palku alatji palyani?” ¹⁷ Kaya nintintja tjutangku panyatja kulinu, panya iriti walkatjunkunytja ngaranyi alatji, “Nyuntumpa yiwałakuña pułkařa mukuringkula kurunpa kakulyarańi.”

¹⁸ Kaya Jewku mayatja tjutangku nyakula wangkangu, “Godalunta wanyu wangkangu nyanga alatjingantjaku? Palu wanyu-puṭa miracle kutjupa kutjupa pulka palyala, kala nyakula kulila, ‘Munta, mulapa nyangatja Godalu iyantja.’” ¹⁹ Ka Jesulu tjanala wangkangu, “Piluntaraya wiyla nyanga Godaku yiwala, kaña ngayulu tjirirpi mañkurnguru piруku palyara wiylaku.” ²⁰ Ka Jewku mayatja tjutangku wangkangu, “Ai, nyuntun tjirirpi mañkurnguru mapalku pakaltjingalku? Timpula nyangatjaya kuļi 46-ngku palyaningi rawa mulatu, ka nyuntu tjintu mañkurtu puṭu mapalku palyalku.” ²¹ Palu Jesulunku palurunku puntu wangkangi ngula ilunytjatjanu tjintu mañkurnguru pakantjikitjangku. ²² Kaya ngula paluru ilunytjatjanu pakannyangka nintintja tjutangku nyangatja kulinu paluru wangkanytja munuya palulanguru mulamularingu Godaku Tjukurku iriti panya walkatjunkunytjitu, munu Jesulu wangkanytjangu kuļu.

Jesunya Anangu Uwankaraku Ninti Nyinanytja

²³ Munu paluru ngura pala Jerusalemala nyinangi inma Katuwanutjangka, kaya tjuta mulapa palumpa mulamularingu miracle pulka tjuta palyannyangka nyakula. ²⁴ Palu Jesulu tjana mulamularingkunytja nyakula kulinigi, “Wiya, tjana unytju kutju mulamularinganyi.” Munu paluru nintingku tjananya unngu nyangangi munu kulinigi alatji, “Tjana kuwari nguwanpa ngayunya wantikatiku.” Nyara palulanguru paluru puṭu mulamularingu tjanampa. ²⁵ Anangu kutjupangku palula tjakultjunkunytja wiya, palu paluru alatjitu nintingku unngu nyaku-paingku ngurkantanangi.

* ^{2:13} Inma Katuwanu Ankunytjanya kulintjikitjangku tjukurpa nyangatja nyawa Exodus 12:43.

* ^{2:14} Anangu kutjupa tjutangku mani kutjupa katipai timpulakutu Godanya ungkunytjikitjangku. Palu timpulaku mayatja tjuta mani timpulitja kutju ungkunytjaku mukuringangi. Ka palulanguru wati mani ngaparku ungkupai tjuta nyinangi timpulaku yaatangka anangu tjutangku mani kutjupatjara pitjala tjananya ungkula mani timpulitja ngaparku mantjintjaku. Kaya mani palunyu kutju katira ungkupai Godanya.

3

Jesunya Munu Nicodemusanya

¹ Wati kutjupa nyinangi ini Nicodemusanya wati Paratji, munu paluru wati Jew kuranyitja tjutangka tjungutja. ² Munu wati nyara paluru anu Jesulakutu mungangka munu wangkangi palula, “Nintilpai, nganaña ninti panya Godalu nyuntunya witunu nganañanya nintintjaku. Panya watingku miracle nyanganpa nyuntu palyantjitja puþu palyani Godala wiyangka, palu panya Godalu nintinnyangka kutju palyalpai.”

³ Palu Jesulu palula wangkangu, “Tjukarurungkuñanta wangkanyi, panya nyuntu piruku itiringkunyangka kutju Godalu nyuntunya walytjanmara mayatjangku kanyilkku.”

⁴ Ka Nicodemusalu wangkangu, “Yaaltjingara wanyu wati tjlpi malaku itiringkuku? Piruku wanyu ngunytjungka tjuningkariku munu piruku itiringkuku?”

⁵ Ka Jesulu wangkangu, “Wiya, tjukarurungkuñanta wangkanyi, panya nyuntu nganmanypa ngunytjuwanu itiringu, munun palulanguru piruku itiringanyi Kurunpa Milmiltu nyuntunya unngu kampa kutjupankunyangka, ka nyara palulanguru kutju Godalu nyuntunya walytjanmara mayatjangku kanyilkku. ⁶ Panya nganaña mamanguru ngunytjunguru itiringkula mantangka wanka nyinapai, palu Kurunpa Milmiltu unngu kampa kutjupankunyangka kutjula wanka ilkaritjawanu nyinaku, Godaku walytja. ⁷ Mulapa ngayulu wangkangu nyuntunya piruku itiringkunytiaku, palu alatji wangkanyangka nyuntu uti urulyaral-wiyangku kulinma. ⁸ Panya walpa walytja wangkapai, palu nyuntu ninti wiya yaaltjinguru walpa pakaní munu yaaltjingka wiyinganyi. Ka nyanga palu purunypa Kurunpa Milmilnga nganaña nyakunyti wiya, panya paluru walytjangku kulira tjarpanyi aŋangungka walpa purunypa munu Godaku walytjaringkunytiaku kampa kutjupananyi.”

⁹ Ka Nicodemusalu piruku tjapinu, “Yaaltji-yaaltji nyangatja? Putuna kulin.”

¹⁰ Ka Jesulu wangkangu, “Nyuntu panyan Israelkunu tjutangka pulkara nintilpai munun nyaaku tjukurpa nyanganpa puþu kulin?”

¹¹ Tjukarurungkuñanta wangkanyi, panya nganaña nyurala nintingku wangkanyi munula nyakunytiatjanungku tjakultjunanyi, ka panya nyura tjakultjunkunyangka nganañanya kulira wantinyi. ¹² Ngayulu nyangana tjukurpa mantatja nyurala wangkangi, ka nyura mulamularingkuwiyangku wantinyi. Munu nyura wanyu yaaltjingara tjukarurungku kulira mulamularingkuku tjukurpa ilkaritja tjakultjunkunyangka? ¹³ Aŋangu mantanguru ilkarikutu tatintja wiya, palu Watiku Katja kutju ninti nyinanyi palulanguru pitjanytjatanu.

¹⁴ “Panya Israelkunu tjuþa iriti ilytjingka para-ngaranyangka Moselu liru purunypa palyara utitjunu puñungka,* palu purunypaya ngayunya Watiku Katjanya katura utitjunkuku. ¹⁵ Kaya aŋangu tjuþa palumpa mulamularingkulampa wanka titutjara nyinaku palula tjungu. ¹⁶ Panya Godalunku aŋangu uwankaraku pulkara mukuringkula katja kutjukurutja mantakutu iyanu, ka aŋangu uwankara palumpa mulamularingkulampa ilu wiya wanka titutjara nyinaku Godala tjungu. ¹⁷ Panya Godalunku katja

* ^{3:14} Panya Israelkunu tjuta iriti ilytjingka para-ngarala kuraringangi, ka Godalu liru tjuþa iyanu tjananya patjantjaku. Munu Mosenya wangkangu liru purunypa ayananguru palyara puñungka utitjunkunytiaku. Ka aŋangungku lirungku patjannyangka liru panya palunya ira-nyakula wankaringkupai.

mantakutu iyanu anangu tjuṭa ngurkantara kuranmankunytjaku wiya, palu tjananya wankarunkunytjaku. ¹⁸ Ka panya anangu palumpa katjaku mulamularingkunyangkampa Godalu kuranmankuwiyangku kanyilku, palu palumpa katjaku mulamularingkunytja wiyangku wantinyangkampa Godalu palunya ngurkantara kuranmankuku alatjiṭu. ¹⁹ Palu tili Godalanguru mantangka wirkara nyinanyi Godanya tjukarurungku nintintjikitja. Kaya anangu tjuṭangku tili pala palunya wantipai mungawaļuruku mukuringkula tjana rawangku kurantjatjanungku. Nyara palulanguru Godalu tjananya ngurkantara wantir'iyanjtaku ngaranyi. ²⁰ Panya anangu kura palyalpai tiliku kuraringkupai, munu tilikutu putu pitjapai kura palumpa tilingku utintjaku-tawara. ²¹ Palu anangungku iwara tjukaruru mulapa wañarampa tilikutu ngulu wiya pitjaku, ka tili paluru irnyara utilku anangu palunya panya paluru tjukarurungku palyaningi Godalawanungku.”

Jesunya Munu Johnnga

²² Nyanga palula malangkaya Jesunya tjana nintintja tjuṭa kuļu Jerusalemanyia wantikatira ngura ititja tjuṭangka tjungu para-pitjalinangi manta nyanga palulatu Judeala. Munuya baptise-katingi anangu tjuṭa ngura nyara palunya ngurara tjuṭa. ²³ Ka Johntu ngapartji baptise-katingitu ngura kutjupangka ini Ainanta ngura ini Salimala itingka, panya uru pulka ngaringi ngura nyara palula. Kaya anangu tjuṭa nyara palulakutu pitjangi urukutu baptise-katinytjaku. ²⁴ (Nyanganatja nganmanypa panya palunya tjailangka tjarpatkunkunytja kuwaripangka.)

²⁵ Kaya Johnku nintintja tjuṭangku wati Jew kutjuku pika-pikaringkula ngaparku wangkangi ara panya tjanampa tjukarurungku palyantjatjiratjangku minangka panya paltjira.* ²⁶ Munuya palula maļangka Johntakutu ankula wangkangu, “Nintilpai, wati panyatja panya mungatu nyuntula wirkana karu panya Jordanta kakarara, kan panya nganañala tjakultjunangi. Panya paluru kuwari palumpa malpa tjuṭatjarangku anangu tjuṭa baptise-katinyi. Kaya winki mulapa palulakutu ananyi.”

²⁷ Ka Johntu wangkangu tjanala nyanga alatji, “Wiya, watingku warķa nyanga palu purunypa palyalpai Godalu witunyangka kutju. ²⁸ Panya nganmanytuña nyurala wangkangu alatji, ‘Ngayuluña Christanya wiya panya Wankarunkupainya Godalu panya kalkuntjita wiya. Palu panya Godaluñi kuranyu iyanu palumpa iwarankunytjaku.’ Ka panya nyura kulinu. ²⁹ Panya watingku kuri altipai ka palumparipai alatjiṭu. Ka panya watiku malpa ila ngarala palumpa pukularipai. Palu purunypa kuwari ngayulu pulkara pukularinyi palumpa. ³⁰ Ka nyura palunya pulkanmanama panya nyara paluru ngayula waintarara pulka mulapa, ka ngayulu pulka wiya.” Nyanga alatji Johntu palumpa nintintja tjuṭangka wangkangi.

³¹ Munu piruku wangkangi, “Panya ilkarīnguru pitjanytja nyara paluru pulka mulapa nyinanyi uwankarangka waintarinytja. Ka wati mantangka nyinapai, paluru panya mantatja alatjiṭu munu tjukurpa mantatja tjuṭa kutju wangkapai. Palu ilkarīnguru pitjanytja mulapa uwankarangka waintarinytja alatjiṭu nyinanyi. ³² Munu paluru tjakultjunkupai ilkarīngka nyakunytyatjanungku kulintjatjanungku, palu mantangka nyanga anangu uwankarangku palunya kulilwiyangku wantinyi.

* ^{3:25} Jew tjuṭangkuyanku tjakangku inmaku ritiringkunytjikitjangku minangka paltjilpai.

33 “Palu aŋangungku palunya kulira mulamularingkulampa paluru kulilpai mulapa Godalu tjukarurungku wangkapai. ³⁴ Panya Godalu iyantjalu Godaku tjukurpa kutju wangkapai, panya Godalu palula Kurunpa Milmilnga tjarpatjunu alatjitu palunya pulkara witulyankunytjaku. Ka nyara palulanguru paluru Godaku tjukurpa wangkapai. ³⁵ Kulilaya! Panya Mama Godanya katjaku pulkara mukuringanyi munu palulanguru palunya tjunu uwankara mayatjarira witulyangku kanyintjaku. ³⁶ Ka aŋangumpa palumpa katjaku mulamularingkulampa wanka tiṭutjara nyinaku Godala tjungu, palu katjangka tungunpungkula wantirampa paluru tjungu wiya mauntalpa alatjitu nyinaku, ka Godanya palumpa tiṭutjara mirpanpa nyinaku.”

4

Jesulu Minyma Tjamiriyan Ngurarangka Minaku Ngatjintja

¹⁻³ Kaya Paratji tjutangku kulinu Jesunya waŋalpai tjutaringkunyangka munu tjananya baptise-katinyangka. Panya Jesunya waŋalpai matjuta mulararingi ka Johnnga waŋalpai ma-maŋkuraringu. (Palu Jesulu tjananya baptise-katinyta wiya panya nintintja tjutangku kutjuya tjananya baptise-katingi.) Ka Jesulu kulinu Paratji tjutangku wangkanyta munu palulanguru Judeanya wantikatira Galileelakutu malaku anu palumpa nintintja tjutatjara. ⁴ Ka iwara kutju Tjamiriyalawanu mangaringi Galileelakutu. ⁵ Ka paluru tjana Tjamiriyalawanu ankula ngura ngururitjangka wirkanu tawunu ini Tjikala. Ngura nyanga palula itingka panya manta kutjupa ngarangi panya Jacobalu katja Josephanya iriti ungkunytja. ⁶ Ka Jacobaku well ngarangi ngura nyara palula.

Ka Jesunya iwarangka ankula kalalarintjatjanu pakuringkula wellangka itingka nyinakatingu. ⁷⁻⁸ Kaya nintintja tjuta kuranyu anu walikutu mai payamilantjikitja.

Palu minyma Tjamiriyan ngurara walinguru pitjangu mina tjutintjikitja. Ka Jesulu palula ngatjini, “Ungamanı mina tjikintjaku!”

⁹ Ka minyma panya paluru urulyarara wangkangu, “Nyaakuñin ngayula minaku ngatjini? Nyuntu Jew, ka ngayulu Tjamiriyalanguru.” (Alatji minyma paluru wangkangu panya Jew tjuta Tjamiriyan ngurara tjutangka tjunguringkupai wiya, waru kutjungka tjikilpai wiya.)

¹⁰ Ka Jesulu wangkangu, “Nyuntu ngurpa Mama Godalu nyuntunya ungkunytjitetjaku munun puṭu kulini, nganalunta wanyu ngatjini minaku. Palu nyuntu ninti ngaralampa ngayula ngatjila, kaṇanta mina kutjupa ungkuku kurunpa wankalpai.”

¹¹ Ka minymangku wangkangu, “Palu pakitanku yaaltji mina tjutintjaku? Piṭi nyangatja ngaṭi pulka, parari mulapa. Yaaltjingurun mina wanka palunya nyuntu pala wangkanytjanya tjutilku? ¹² Nganampa tjamungku Jacobalu piṭi nyangatja tjawaṇu palumpa katjapitiku tjamupitiku kuka tjutaku kuļu, kaya tjikiningi mina nyanga palunya. Nyara palurulampa pulkangku tjawara wantingu piṭi nyangatja, kantin nyuntulta pulka mulapalta pitjangu maławanulta.”

¹³ Ka Jesulu wangkangu, “Mina piṭi nyanganguru tjikintjatjanun piruku ngula iluringkuku. ¹⁴ Palu ngayulu ungkunytja tjikirampen piruku iluringkunytja wiya nyinaku. Panya mina paluru tiṭutjara ngariku anangungka, ka anangu mina palunyatjara nyinara wanka tiṭutjara nyinaku Godala tjungu.”

¹⁵ Ka minyma panya paluru wangkangu, “Ala, mina nyara palunyanı wanyu uwa, kaña piruku iluringkula iwarakatinytja wiya ma-nyinama.”

¹⁶ Ka Jesulu wangkangu, “Ankulanku wati kuri altira ngalya-kati!”

¹⁷⁻¹⁸ Ka minymangku wangkangu, “Ngayulu kuri wiya.”

Ka Jesulu wangkangu, “Uwa palya nyuntu kuri wiya, palu ngayulu ninti nyuntu panyan wati kutjupaku mukuringkula palula ngaripai alatjitu. Mununa ninti panya nyuntunya nganmanytju wati kuri 5-ngku kanyiningi. Ka panyan kuwari wati panya palulatu kampangkatu ngarinyi, nyuntumpa kuri mulapa wiyangka.”

¹⁹ Ka minymangku kulira wangkangu, “Munta-uwa, nyuntu alatjitu-manti Godaku wangkatjarampa nyinanyi. ²⁰ Nganampa tjamupitingkuya puli nyangangka Godanya walkulpai, ka nyura Jew tjutangku wangkapai, ‘Wiya, utila Jerusalemala kutjungka Godanya walkunma.’”

²¹⁻²⁴ Ka Jesulu wangkangu, “Minyma, tjukarurungkunanta wangkanyi, ka kulinma nyanganpa ngayulu wangkanyangka. Kuwari nguwanpa anangu tjutangku Mama Godanya walkulku apu murpu nyangangka wiya Jerusalemala kuļu wiya, palu tjukarurungkuya palunya walkulku Kurunpa Milmiltu witulyangku nintinnyangka kutju, ngura winkingka. Nyanga alatjiku Godanya mukuringanyi Kurunpa Milmilngatjararingkula tjukarurungku palunya walkuntjaku. Panya Godanya kurunpa alatjitu nyinanyi. Ka anangungku waltyangku kulira puļu tjukarurungku palunya walkuni, palu Kurunpa Milmiltu witulyangku nintinnyangka kutju paluru tjukarurungku palunya walkulku. Nyura Tjamiriyanya ngurařa tjutangku Godaku ngurpangku ngunti watarku walkulpai, ka nganana Jew tjutangku Godaku nintingku walkulpai, panya Godalu Jew tjutawanungku anangu tjuta wankarunkuku manta winkingka.” Nyanga alatji Jesulu minymangka wangkangu.

²⁵ Ka minyma panya paluru wangkangu alatji, “Ngayulu kulinu panya Wankarunkupainya kunyu pitjaku Godalu panya iriti kalkuntjanya. (Nganana panya palunya wangkapai Christanya). Munu kunyu nyara paluru pitjala ngananala uwankara tjakultjunkuku.”

²⁶ Ka Jesulu wangkangu, “Pala paluru ngayulu, pala nyuntun wangkanyi, Godalu panya kalkuntjanya.”

²⁷ Ka Jesulu nyinara minymangka wangkanyangka palumpa nintintja tjuta malaku wirkanu, munuya nyakula urulyaranu minymangka wangkanyangka.* Munuya minyma nyanga palula tjapintjikitjangku kulinigi alatji, “Nyaakun Jesula wangkangi?” Munuya palu purunypaṭu kulinigi Jesula tjapintjikitjangku alatji, “Nyaakun minyma Tjamiriyanya ngurarangka wangkangi?” Palu wantinguya unngu kutju kulira.

²⁸ Kanku minymangku mina panya tjutira katinytja wiyaṭu piti wantikatira tawunukutu malaku anu munu anangu nguratja tjutangka matjakultjunu, ²⁹ “Pitjalaya wanyu nyawa! Wati nyarangku ngayulu iritinguru kuwari kuļu kurantja uwankara tjukarurungku wangkangi. Tjinguru nyara paluru Christanya, panya Wankarunkupai Godalu kalkuntjanya.”

³⁰ Kaya nyanga palunya kulira tawununguru uwankara anu Jesunya nyakunytjikitja.

³¹ Ka minyma panya paluru walikutu tjakultjunkunytjikitja ankunyangka maļangka palumpa nintintja tjutangku Jesunya wituwituningi mai ngalkuntjaku. ³² Ka Jesulu tjanala wangkangu, “Ngayulu mai kanyini ngalkuntjikitjangku, palu mai nyara palumpa nyura ngurpa.”

* ^{4:27} Jew tjutangku tjakangku anangu Tjamiriyanya ngurařa tjutangka wangkapai wiya.

³³ Kayanku nintintja tjutangku wangkangi, "Kutjupangku-manti mai katira ungu, kampangkaṭumpa."

³⁴ Ka Jesulu wangkangu, "Panya ngayunya iyantjalu wangkanyangka wanganarangku palyaraṇa paṭtjaringanyi, palumpa war̄ka palyara wiyyara. Nyara paluru ngayuku mai, panya Mamala wanganarangku kulira palyantja." ³⁵ Nyura panya mai uṇinypa kaanangka tjunkula waṇantjatjanungku wangkapai, 'Uwa, kuwarila pira kutjara kutjara paṭalku mai kururingkunytjaku munula palulangurulta uralku.' Palu ngayuluna nyurala wangkanyi ngura tjutangka para-nyakula wanantjaku, panya anangu tjuta mulapa paṭanı kutjupa tjutaku pitjala tjanala Tjukurpa Palya tjakultjunkunytjaku, ka nganalu tjana ankula palula tjanala Tjukurpa Palya tjakultjunkuku? ³⁶ Panya wati kutjupangku tjukurpa ngaṇmanytju tjanala tjakultjunu, ka ngula wati kutjupangku pitjala wangkanyangkaya tjuta mulapa Godaku mulamularingkuku wanka tiṭutjara nyinanytjikitja. Ka pula kutjaraṭu mulamularingkunyangka nyakula pulkara pukulariku wati nyara ngaṇmanytju tjakultjunkunytjanya pula maļawanu pitjala wangkanytjanya kuļu.

³⁷ "Tjurkultuya anangu wangkapai alatji, 'Watingku uninypa tjunkula wanalpai, ka kutjupangku ngula mai kururingkunyangka urara wanalpai.' ³⁸ Ka ngayulu nyuranya iyanı ngura kutjupa tjutakutu mai kururingkunyangka nyakula urantjaku. Palu nyura mai pala palunya tjawara tjunkula waṇantja wiyyatu, kutjupa tjutangkuya tjunkula waṇara wantingu. Ka nyura tjana pakaltjingantja tjuta kururingkunyangka mantjira pukulariku." Alatji Jesulu wangkangi palumpa nintintja tjutangka.

³⁹ Ka panya ngura nyara palula Tjamiriyanya ngurara tjuta Jesuku mulamularingu minyma panyangku tjakultjunkunyangka alatji, "Wati nyara paluru ngayulu kurantja uwankara tjukarurungku wangkara utinu." ⁴⁰ Kaya kulira pitjangu Jesulakutu munuya palunya markuningi tjanala rawa nguwanpa nyinanytjaku. Ka Jesunya mulapaṭu tjanala nyinangi tjirirpi kutjara munu tjanala tjukurpa wangkangi. ⁴¹ Anangu tjuta panya palumpa ngaṇmanypa mulamularingu minyma panyangku wangkanyangka, palu Jesulu piruku wangkanyangka kuliraya winki mulapa mulamularingu. ⁴² Munuya wangkangu minyma panya palula, "Ngaṇmanypala Jesuku mulamularingu nyuntu wangkanyangka kulira, palu kuwarila pulkara mulamularinganyi palunya nyakula waltyjangku kulintjatjanu, munula kulini mulapa nyangatja Wankařunkupainya anangu manta winkitjaku."

Jesulu Mayatjaku Katja Palyarunguntja

⁴³ Ka tjirirpi kutjara wiyyaringkula Jesulu palumpa nintintja tjutatjarangku ngura palunya wantikatira ma-pakaṇu ngura waltyjakutu, Galileelakutu. ⁴⁴ (Munu Jesulu ngaṇmanytju wangkangu tjanala, "Nyangatja ngayuku ngura, palu tjakangkuya ngurariṭja tjutangku Godaku wangkatjara kulira wantipai.") ⁴⁵ Munuya palulanguru ngura panya palula wirkanu, kaya Galileenya ngurara tjuta Jesuku pukularingu, panya tjana palunya Jerusalemala mungatu nyangu paluru witulya pulkangku palyannyangka, inma panya Katuwanu Ankunytjala tjunguringkula, munuya nyara palulanguru ngurangka wirkankunyangka nyakula pukularingu.

⁴⁶ Kaya Jesunya tjana anu tawunu panya Kainalakutu uru Galileela wilurara. Ngura nyara palula panya Jesulu minanguru waina palyaṇu.

Ka wati kutjupa nyinangi ngura ini Kapunimala Kainala kakara. Paluru mayatja pulka munu kamantaku war̄karipai. Ka wati nyara palumpa katja pika pulka mulapa ngaringi ngurangka.⁴⁷ Ka wati panya paluru Jesunya Judealanguru pitjanyangka kulira anu Jesula wangkanytjikitja palumpa katja pitjala palyarunguntjaku. Munu tjapinu palula, “Ngalturiwatju! Ngayuku katja pika pulka ngarinyi munu nguwanpa ilunyi. Wanyun Kapunimalakutu pitjala palunya palyarungulku?”

⁴⁸ Ka Jesulu wangkangu palula, “Nyura panya kulira mulamularingkuwiyangku wantipai munu miracle witulya pulkangku palyanyangka nyakula kutju nyura mulamularingkupai.”

⁴⁹ Ka wangkangu, “Uwa Mayatja, palu pitjalatju nyawa ilunytjaku-tawara.”

⁵⁰ Ka Jesulu wangkangu, “Palya ngurakutu ma-pitja. Nyuntumpa katja wankaringkuku.” Ka wati panya paluru mulamularingu Jesulu wangkanyangka munu ngurakutu malaku anu.

⁵¹ Ka mungawinki paluru ngurakutu ma-ilaringkunyangka palumpa war̄karipai tjuṭa ngalya-ngaparikatingu, munuya palula tjakultjunu, “Nyuntumpa katja palyaringu.”

⁵² Ka tjanala tjapinu, “Yaalara nguwanpa palyaringu?”

Kaya wangkangu, “Mungartji wiltja muṭungka pika waru panya wi-yaringu.”

⁵³ Ka wati panya paluru kulinu, “Munta-uwa, panya palula arangkani Jesulu wangkangu, ‘Nyuntumpa katja wankaringkuku.’” Munu paluru, munu palumpa walytja tjuṭa, munu war̄karipai tjuṭa kuļu Jesuku mulamularingu.

⁵⁴ Uwa, nyangatja Jesulu kutjara-arangku miracle palyanu Judealanguru Galileelakutu pitjanytjatjanungku.*

5

Jesulu Watu Urungka Itingka Palyarunguntja

¹ Ka ngula Jesunya Galileela nyinanytjatjanu Jerusalemalakutu anu inma pulkaku, panya Jew tjuṭangku tjakangkuya kutjupa-ara inma pulka palyalpai. ² Ka ngura pala Jerusalemala uru ngaringi ngaṭingka kaita kutjupangka itingka panya kaita nyara palulanungkuya tjiipi tjuṭa ngalyakatira tjarpatjunkupai urilnguru. Uru paluru ini Pitjitzanya wangka Iipurungku ini tjunkunytja. Ka uru ngaṭingka itingka wiltja tjulypinypa 5 para-ngaṛala wañaningi. ³⁻⁴ Kaya pikatjara tjuṭa wiltja nyara palula tjanala nyinara wañaningi kurutjara tjuṭa, nyumpu tjuṭa, wawanypa tjuṭa kuļu. Nyara paluru tjana nyinara paṭalpai uru urintjaku.* ⁵ Ka wati kutju ngaringi iriti mulapa pikatjararingkula wawanyarinytja kuļi 38.

⁶ Ka Jesulu uru pala palula wirkara nyangu wati panya palunya munu ngurkantanu paluru iritilpi wawanypa ngarinytja. Munu palunya tjapinu, “Nyuntu mukuringanyi palyaringkunytjikitja?”

⁷ Ka wati panya pikatjarangku wangkangu, “Uwa, palyaringkunytjikitja mukuringanyi, palu uru urinyangka wati kutjupa ila ngaranytja wiya

* ^{4:54} Jesulu nganmanytju waina minanguru palyanu Judealanguru pitjanytjatjanungku, munu palulanguru piruku anu Judealakutu munu ngula malaku pitjanytjatjanungku wati panya kamantaku katja palyarungunu. * ^{5:3-4} Wati kutjupangku kunyu verse 4 walkatjunu munu malā tjungunu Johnku tjukurta alatji *Panya kutjupa-ara angeltu ukalingkula uritjingalpai uru nyara palunya, kaya pika pulka nyinanytjatjanu uru uritjingannyangka mapalku tjarpapai pika wiyingkunytjikitja. Palu anangu nganmanyypa mapalku tjarpantjatjanu kutju pika wiyingkupai.*

ngayunya miñara tjarpatkunkunytjikitja. Kaya tjana-warara tjarpapai, ka ngayulu rawa malaringkupai.”

⁸ Ka Jesulu wangkangu palula, “Pakala! Mununku mantara pala mantjira pałtjura para-ngara.” ⁹ Ka mapalku palyaringu mununku pakara mantara mantjira para-ngarangi.

Ka tjintu nyara paluru Saturday panya anangu tjuña pakuwiyaringkuntjaku. ¹⁰ Ka Jewku mayatja tjuñangku wati panya paluru mantara katinyangka nyakula wangkangu, “Wati awa! Nyaakun mantara pala katinyi? Tjintu nyangatja Saturday pakuwiyaringkuntjaku kutjupa kutjupa para-katinytjaku wiya. Kan nyaaku tjintu milmilpa kurani?”

¹¹ Ka wangkangu tjanala, “Wiya, wati nyara ngayunya palyantjalunu wangkangu mantara mantjira ankunytjaku.”

¹² Kaya piruku tjapinu, “Wati nganalunta wangkangu mantara mantjira ankunytjaku?” ¹³ Ka wati panya pika palyaringkunytjalu ngurpangku Jesunya yunpa putu para-ngurkantanangi tjanala nintintjikitjangku. Panya anangu tjuña mulapa ngarangi ngura pala palula, ka Jesunya tjanala unnguwanu kumpira mapalku anu.

¹⁴ Ka ngula Jesulu wati panya palunya piruku nyangu timpulangka ngaranyangka munu palunya wangkangu, “Kulila! Kuwari nyuntu palyaringu. Palu piruku kuralwiya nyinama nyuntula piruku pika pulka mulapa wirkankunytjaku-tawara.”

¹⁵ Ka wati panya paluru anu munu pitjala Jewku mayatja tjuñangka tjakultjunu munu wangkangu, “Wati paluru ini Jesunya, ngayunya panya palyarunguntjanya.”

¹⁶ Kaya palulanguru ini kulira Jesuku kuraringu, panya paluru nyanga alatji Saturday-ngka palyannyangka tjintu panya pakuwiyaringkupaingka. Munuya palunya wangkara kuranmanangi munuya palunya iluntankunytjikitjangku kuliningi.

¹⁷ Ka Jesulu tjanala wangkangu, “Ngayuku Mama titutjara warkaripai ngururpa pakuringkula wantintjya wiya. Kaña ngayulu palu purunypať titutjara warkarinyi.”

¹⁸ Ka nyanga palulanguru Jewku mayatja tjuñangku palunya iluntankunytjikitjangku pulkara alatjitu wangkara kuliningi. Panya tjana alatji kuliningi, “Wati nyanga paluru kura mulapa, panya paluru tjintu milmilpa Saturday kuranmu munu palulanguru piruku Godanya mamanmanu. Alatji wangkara palurunku waltyjangku Godanmananyi mununku Godala tjun-guni.”

¹⁹ Ka Jesulu tjanala wangkangu, “Tjukarurungkuña nyurala wangkanyi. Panya ngayulu Godaku katjangku waltyjangku palyantja wiya, palu Mamalu palyannyangka nyakula kutjuña palu purunypať palyalpai. Panya paluru uwankara palyannyangka nyakula ngayulu palu purunypať palyalpai. ²⁰ Ka panya Mamanya ngayuku pulkara mukuringanyi mununi paluru palyara ngayunya kuļu nintilpai uwankara ngayulu ngapartji palyantjaku. Mununi pulka mulapalta piruku nintilku ngayulu witulya pulkangku palyantjaku, wati nyanga kuwari palyantjanya purunypa wiya, waintara pulka mulapa, nyura nyakula pulkara urulyarantjaku.

²¹ Panya Mamalu anangu kutjupa ilunyangka wankara pakaltjingalpai, ka ngayulu palu purunytytu anangu kutjupa ilunyangka mukuringkula wankalpai. ²² Mamalu anangu tjuña kura ngurkantankupai wiya. Palu paluru ngayunya tjunu uwankara waltyjangku ngurkantankunytjaku, kura munu palya. ²³ Alatji paluru palyanu anangu uwankarangku

ngayunya ngurkantara walkuntjaku, panya Mamanya nyura walkulpai, palu purunytjatu nyura ngayunya walkuntjaku. Palu nyura ngayunya ana rampa nyura Mamanya ku lu ana ni panya nyara paluru ni ngayunya iyanu.”

²⁴ Munu piruku paluru tjanala wangkangi, “Tjukarurungku na nyurala wangkanyi alatji kutjupangku ngayuku tjukurpa wanganarangku kulira munu ngayunya iyantjitjaku mulamularingkula nyara paluru wanka titutjara nyinaku Godala tjungu wiyaringkunytja wiya. Ka anangu palunya Godalu piruku ngurkantara ngura kurakutu paira iyantja wiya, panya paluru wankakutu ananyi ilunytjikitja wiya. ²⁵ Tjukarurungku na nyurala wangkanyi panya tjintu ilaringu munu kuwari nyanga alatjitu ngaranyi anangu Godanya wantipai tjutangku Godaku Katjangku wangkanyangka kulintjaku, kaya wanganarangku kulintjatjanu wankaringkukulta. ²⁶ Panya Mamalu witulya pulkangku wankalpai, munu palu purunypatu ngayunya ku lu witulyanu anangu tju ta wankantjaku. ²⁷ Ngayulu panya Watiku Katjanya.* Ka ni palulanguru Mamalu ngayunya tjunu mayatja pulkangku anangu tju ta ngurkantara tjarantjaku. ²⁸⁻²⁹ Kaya tjukurpa nyangatja kulira urulyaralwiya nyinama. Tjirirpi panyatja ilaringanyi, panya miri tjunutjunkunytja tjutangku ngayulu wangkanyangka kulintjaku, kaya kulira kurulnguru pakalku. Panya tjara kutjupa wiru palyantjatjanu pakalku Godala tjungu wanka titutjara nyinanytjikitja, ka tjara kutjupa kura palyantjatjanu pakalku Godalu ngura kurakutu paira iyantjaku.” Alatji Jesulu wangkangi tjanala Jewku mayatja tju tangka.

Jesunyatjaraya Nganmanytju Tjakultjunkunytja

³⁰ Munu piruku Jesulu tjanala wangkangi, “Ngayulunatju kutjungku putu palyani. Palu Mama Godalu wangkanyangka kutju na kulin-tjatjanungku anangu tju ta ngurkantankupai. Pala palulanguru na tjukarurungku ngurkantankupai. Panya ngayulu kutjungku putu palyani, palu ngayunya iyantjala kulira kutju na wanganarangku kulira palyani.

³¹ “Ngayulu waltyangku wangkanyangkampa nyura tjinguru kulira mulamularingkuwiyangku wantima. ³² Palu panya kutjupangku ngayunya tjukarurungku tjakultjunkupai nyinanyi, ka nyara palulanguru nyura ngayuku mulamularingkunytjaku ngaranyi. Ngayulu ninti palumpa, panya paluru ngayunya tjukarurungku tjakultjunkupai.

³³ “Ka panya nyura wati mankurpa witura iyanu Johnta tjapintjaku, ka wati paluru tjanala ngayunya tjukarurungku wangkangu. ³⁴ Watingku ngayunya tjukarurungku tjakultjunkunytjaku wiya ngaranyi, palu nyangatjan Johntu wangkanytja nyurala wangkanyi nyura kulira ngayuku mulamularingkunytjaku, ka palulanguru Godalu nyuranya wankarunkuku.

³⁵ “Panya Johntu tjukurpa wiru wangkara tili purunytju nyuranya irnyaningi, ka nyura unytju pukularingi paluru wangkanyangka kulira munu nyura wiyaringu. ³⁶ Ka panya Johntu ngayunyatjara nyurala wangkara tjakultjunangi nyura mulamularingkunytjaku. Palu kutjupa pulka mulapa ngaranyi nyura nyakula mulamularingkunytjaku, panya Mamaluni warika pulka tju ta ungu witulyangku palyantjaku. Ka nyanga palunya tjananya palyannyangka nyakula nyura kulilkul alatji, ‘Nyangatja mulapa Godalu iyantja.’ ³⁷ Ka ni Mamalu ngayunya iyantjatjanungku

* ^{5:27} Jesulunku tjakangku palurunku wangkapai *Watiku Katja*. Alatji paluru wangkapai panya paluru Godalanguru pitjala anangurira mantangka nyinangi wati purunypa alatjitu.

ngayunyaṭu tjakultjunkupai. Palu nyura palumpa wangkaku ngurpa, munu nyura palunya yunpa nyakunytja wiyaṭu. ³⁸ Munu panya nyura nyara palumpa iyantjijtjaku mulamularingkuwiyangku wantira palumpa tjukurpa kuļu wantinyi. ³⁹ Nyura nyiri irititjangka Godaku tjukurpa pulkaṛa ngurilpai nyakula wanka tiṭutjara nyinanytjikitjangku. Palu tjukurpa nyara paluru tjana ngayunyatjara wangkanyi. ⁴⁰ Palu nyura wanyu ngayulakutu pitjanyi wankaringkunytjikitja? Wiya, nyura wantinyi alatjiṭu.

⁴¹ “Ngayuluna anangu tjutangku ngayunya mirawañinytjaku mukuringkunytja wiya. ⁴² Palu ngayulu nyuranya nintingu nyanganyi, panya nyura Godaku mukuringkunytja wiya alatjiṭu. ⁴³ Ngayulu Mamalu iyannyaṅka kutju pitjangu, ka nyura ngayunya wantingi. Palu wati kutjupangku walytjangku palurunku mayatjanmara pitjanyangka nyura wati nyara palumpa pukularipai. ⁴⁴ Uwa, nyura pukularipai anangu tjutangku nyuranya mirawañira palyanmankunyangka. Palu nyura mukuringkunytja wiya Godalu nyuranya palyanmankunytjaku. Palulanguru nyura puṭu mulamularinganyi ngayulu wangkanyangka. ⁴⁵ Palu kulila, ngayulu nyuranya Mamala mirangka puntura wangkanytja wiya. Palu panya Moseku tjukurtu alatjiṭu nyuranya puntura wangkaku. Panya nyura Moseku tjukurku ngunti mulamularinganyi nyuranya wankaṛunkunytjaku. Palu wiya, Moseku tjukurtu nyuranya puṭu wankani. ⁴⁶ Moselu panya tjukurpa ngayunyatjara walkatjunu, ka nyura tjinguru palumpa tjukurku mulamularingkulampa ngayuku kuļu mulamularingama. ⁴⁷ Palu nyura palumpa tjukurku mulamularingkuwiyangku wantira yaaltjingara ngayulu wangkanytjijtjaku mulamularingkuku? Wiya alatjiṭu, nyura puṭu kulikku.” Alatji Jesulu tjanala wangkangi Jewku mayatja tjutangka ngura panya Jerusalemala.

6

Jesulu Anangu Winki Maingka Paltjantja (Matthew-ku 14:13-21; Markaku 6:30-44; Luke-aku 9:10-17)

¹ Munu ngula Jesunya palumpa nintintja tjutatjara uru Galileela paутangka tatira ma-itipiringu manta kutjupakutu. (Uru nyanga paluru panya ini kutjaratjara, ini kutjupa Tapiriyanya, ka ini kutjupa Galileenya).

² Kaya anangu tjuta mulatu palunya wañaningi uru kantilypa warara panya tjana pikatjara tjuta palyarungunnyangka nyakunytjatjanungku nintingu wañaningi. ³ Ka Jesunya munu palumpa nintintja tjuta kuļu manta kampa kutjupa ma-wirkara pautanguru ukalingkula puļi murpu tjukutjukungka tatira ngururpa nyinakatingu. ⁴ (Ka nyara palula aṛa Jew tjutaku inma pulka ilaringu tjukurpa panya Katuwanu Ankunytjanya.)

⁵ Ka Jesulu walunyangangi anangu winki mulapa uru kantilytja ngalyapitjanyangka, munu nyakunytjatjanungku pinkuraraṛa wangkangu nintintja kutjungka ini Philipala, “Yaaltjingkala mai payamilalku nyangantu ngalkuntjaku?” ⁶ (Nyangatja paluru Philipala ngunti arkara tjapiningi, nintingu mała palyantjikitjangku.)

⁷ Ka Philipalu wangkangu, “Tjingurula mani pulka kanyirampa mai pulka payamilanma, kaya tjukutjuku tjukutjukulta ngalkunma. Palu mani pulkala kanyintja wiya.”

⁸ Ka nintintja kutjupa ilatu ngarangi wati panya Andrew-nya, Simon Peterku malanypa. Munu paluru wangkangu, ⁹ “Munta, nyangatja

tjitjingku kanyini mai pilytja kutjara mankurpa munu antipina tjukutjuku kutjara kulu. Palu aŋangu nyangalta mungiliy mulapa.”

¹⁰ Ka ngura nyara paluru ukiri wirutjara. Ka Jesulu nintintja tjuṭangka wangkangu, “Aŋangu pala tjuṭaya wanyu nyinatjura.” Ka tjananya mulapatu uwankara nyinatjunu ukiringka aŋangu mungiliy mulapa, wati 5,000 nguwanpa munu minyma tjitji winki kulu. ¹¹ Ka Jesulu tjitji panyangka mai munu kuka kulu mantjira Godanya walkura wangkangu, “Wirungkulanyan mai kuka nyangatja ungu.” Munu paluru katantara nintintja tjuṭa ungu aŋangu tjuṭa para-ungkunytjaku. Kaya aŋangu uwankarangku ngalkula paltjaringkula tjara wantingu, ka waintarira alatjiṭu ngaringi. ¹² Ka Jesulu wangkangu nintintja tjuṭangka, “Uraraya ngulaku tjura mai pala tjana paltjaringkula wantinytja tjuṭa.” ¹³ Kaya mulapatu para-urara pitingka tjunangi munuya tjunkula pitii 12-nga tjaalyngaratjunu mai panya kutjara mankuritjanguru ngalkula paltjaringkula wantinytja tjuṭa.

¹⁴ Kaya aŋangu tjuṭangku Jesulu miracle nyangatja witulya pulkangku palyannyangka nyakula wangkangi, “Nyanga paluru alatjiṭ-manti Godaku wangkatjarampa, panya Moselu iriti wangkangi mantakutu pitjanytjaku.”

¹⁵ Palu Jesulu tjananya nintingku kuliningi alatji, “Kuwarinijuya witira tjunkuku tjanampa mayatja nyinanytjaku.” Munu palulanguru witira tjunkunytjaku-tawara kutjuringkula mapalku anu pulikutu.

Jesunya Uru Katu Paltjura Ankunytja (Matthew-ku 14:22-33; Markaku 6:45-52)

¹⁶⁻¹⁷ Ka mungartirinyangka nintintja tjuṭa ukalingkula urukutu anu munuya pautangka tjarpala ma-pitjangu wilurara Kapuni-malakutu. Ka mungaringku urungka ngururpa ankunyangka, ka Jesunya tjanala wirkankunytja wiyatu ngarangi puli katu nyinara. ¹⁸ Ka walpa pulkangku rurkura uru pulkara uritjinganigi. ¹⁹ Kaya nintintja tjuṭangku urungka puṭu tjarpatjura ilara uritjingalkatingi pauta panya, munuya rawa nguwanpa ankula ankula nyangu Jesunya urungka katu paltjura ngalya-pitjanyangka tjanalakutu. Munuya nyakula pulkara nguluringkula kurunpa tjititingangi.

²⁰ Ka Jesulu tjanala wangkangu, “Ngayuluna nyangatja! Nguluringkunytja wiyaya!” ²¹ Kaya palunya wangka ngurkantara pukularira pautangka tatitjunu palunya. Ka paluru tjarpangka pauta paluru mapalku mantangka wirkanu ngura nyara Kapunimala itingka.

²²⁻²³ Kaya aŋangu tjara kutjupa uru kantilytja kampa kutjupa kakaraṛa patara ngaringi Jesulu panya tjananya mai ungkunytjala itingka. Munuya nyangu nintintja tjuṭa kutju pautangka tatira ankunyangka, ka Jesunya tjanala tjungu ankunytja wiyatu. Munuya tjintungka Jesunya putu nyakula kuliningi, “Wiya pauta kutjumpal panyatja. Nyaratjaya tjana kutju anu, Jesunya wiya.” Ka palulanguru pauta kutjupa tjuṭa ngura Tapiriyalanguru pitjala wirkana manta panya palula panya Mayatjalu tjananya maingka paltjantjitala. ²⁴ Kaya aŋangu tjuṭangku Jesunya tjananya nintintja tjuṭa kulu puṭu nyakula pauta panya palula tjanala tatira waŋanu malawanungku Kapunimalakutu Jesunya ngurintjikitjangku.

Mai Kurunitja Wankalpai

²⁵ Munuya kampa wilurara ma-wirkara ngurira nyangu Jesunya wali inmatjangka ngaranyangka munuya palula tjinpinu, “Nintilpai! Yaalara nguwanpan wirkana ngura nyangangka?”

²⁶ Ka Jesulu tjanala wangkangu, “Nyura wanyu ngayunya nguriningi witulya pulkangku palyannyangka? Wiya, tjukarurungkuṇa nyurala wangkanyi, nyura mai panyatja ngalkula paltjaringkunytjatjanungku kutju ngayunya nguriningi. ²⁷ Palu mai nyara paluru mantatja, tjukutjuku ngarira mapalku uñaringkupai, ka nyura uti palulanguru mai mantatja ngurilwiyangku wantima. Palu ngurinmaya mai kurunitjaku titutjara wanka nyinanytjikitjangku Godala tjungu. Panya mai nyanga palunya ngayulu Watiku Katjangku nyuranya ungkuku, panya Mama Godanya ngayuku pulkara pukularipai mununi ngayunya alatjitu iyanu palumpa witulyatjara.”

²⁸ Kaya wangkangu Jesula, “Palu Godanya mukuringanyi nganaṇa nyaa palyantjaku?”

²⁹ Ka wangkangu, “Wiya, paluru mukuringanyi nyura ngayuku mulamularingkunytjaku, panya paluru ngayunya iyanu nyura nyakula mulamularingkunytjaku.”

³⁰ Kaya wangkangu palula, “Kan nyaa utintjikitjangku palyalku nganaṇa nyakula mulamularingkunytjaku? Utin kutjupa kutjupa witulya pulkangku palyanma nyakunytjaku. ³¹ Panya nganampa tjamu tjutangku iriti mai panya manna ilytingka ngalkuningi. Panya nyiringka iriti walkatjunkunytja ngarinyi nyanga alatji,

‘Paluru ilkariringuru tjananya mai ngalkuntjaku ungu.’ ” *

³² Ka Jesulu tjanala wangkangu, “Wiya, nyura tjinguru kulini Moselu-manti tjananya mai ilkaritja ungu. Palu wiya, ngayuku Mamangku tjananya iriti ungangi, munu paluru kuvari kulu nyuranya mai mulapa ilkariringuru ungkupai mai kurunitja. ³³ Panya mai nyanga palunya Godalu ilkariringuru iyanu, ka mantakutu pitjangu anangu tjuṭa wankarunkunytjikitja.”

³⁴ Kaya wangkangu palula, “Utilanyan titutjarangku mai nyanga palunya ungama.”

³⁵ Ka Jesulu tjanala wangkangu, “Ngayuluṇa mai kurunpa wankalainya. Ka anangu ngayulakutu pitjala ngayuku mulamularingkulampa, nyara paluru pukulpa mulapa nyinaku maingka minangka paltjaringkunytja purunypa. Munu paluru kurunpa pukulpa titutjara nyinaku.

³⁶ “Nganmanytju panyana nyurala wangkangu, panya ngayunya nyakunytjatjanu nyura kuwaripatu ngayuku puṭu mulamularinganyi.

³⁷ Palu anangu uwankara Mamalu ngayunya ungkunytja tjutaya ngayulakutu pitjaku, kaṇa ngayulu tjananya wantir’iyalwiyangku alatjitu kanyilkku.

³⁸ “Panya ngayulu ilkariringuru pitjangu Mamanya mukuringkunytja uwankara palyantjikitja. Paluru ngayunya iyanu, kaṇa walijangku kulira palyantja wiya paluru wangkanyangka kutjuna wanganarangku kulira palyani. ³⁹ Mamalu panya anangu tjuṭa ngayula marangka tjunu munu paluru mukuringanyi ngayulu palunya tjananya kawalinkunytja wiyangku atunymara kanyintjaku tjirirpi malatjangka wankara pakaltjingantjikitjangku. ⁴⁰ Panya Mamanya mukuringanyi palumpa katjaku mulamularingkupai uwankara palula tjungu wanka titutjara nyinanytjaku. Kaṇa ngula tjananya pakaltjingalku tjirirpi malatjangka.”

⁴¹ Kaya anangu tjutangku nyangatja kulira mirpanarira wangkangi, palurunku mai ilkaritja wangkara mirawaninyangka. ⁴² Alatjiya wangkangi, “Wiya, nyangatja wati panya Jesunya Josephaku panya katja. Nganaṇa palumpa mamaku ngunytjuku ninti. Kanku nyaaku nyangangku

* ^{6:31} Exodus 16:4

ngananaŋala ngurpangka-palku wangkanyi ilkar̄inguru pitjanytja? Ngananaŋa ninti palumpa.”

⁴³ Ka Jesulu tjananya wangkangu, “Wantimaya nyarareringkula wangkanytja wiyangku! ⁴⁴ Anangungku puṭu walytjangku kulira ngayulakutu pitjanyi, palu Godalu unngu nintinnyangka kutju mukuringkula pitjapai. Ka ngayulu palunya pakaltjingalku tjirirpi malatjangka. ⁴⁵ Panya iriti Godaku wangkatjara kutjungku walkatjunu alatji, ‘Godalu nintilku anangu uwankara.’ Ka palulanguru anangungku Mama Godala kulira nintiringkulampa nyara paluru ngayulakutu pitjaku. ⁴⁶ Palu kulila! Anangu uwankarangku Mamanya nyakunytja wiya, palu ngayulu kutju palumpa ninti, palulanguru pitjanytjatjanu. ⁴⁷ Tjukarurungkuna nyurala wangkanyi, anangu uwankara ngayuku mulamularingkulampa wanka titutjara nyinaku Godala tjungu.

⁴⁸ “Ngayuluŋa mai wankalpaina. ⁴⁹ Iriti panyaya ilytjingka nyurampa tjamu tjutangku mai panya manna ngalkuningi. Munuya wanyu ngalkula wanka titutjara nyinangi? Wiya panya uwankaraya ilungu. ⁵⁰ Palu mai panya ilkar̄inguru pitjanytja mai kurunitja, panya anangungku nyanga palunya ngalkulampa wiyaringkunytja wiya wanka titutjara nyinaku Godala tjungu. ⁵¹ Kaŋa ngayulu mai kurunitja panya paluru, panya wankalpaina ilkar̄inguru pitjanytja. Ka anangungku mai nyanga palunya ngalkula wanka titutjara nyinaku Godala tjungu. Mai nyanga paluru ngayulu iltjanpa. Kaŋatju iltjanpa winki intjanungku ungkuku anangu tjuta manta winkingka wankaringkunytjaku.” Alatji Jesulu wangkangi.

⁵² Kaya nyanga alatji wangkanyangka kulira anangu tjuta pulkara mirpanaringi munuyanku ngaparku wangkara kuliningi, “Yaaltjingara wati nyanga paluru iltjanpa palurunku ngananaŋanya ngalkuntjaku ungkuku?”

⁵³⁻⁵⁴ Ka Jesulu tjanala wangkangu, “Tjukarurungkuna nyurala wangkanyi. Nyura uti wanka mulapa nyinanytjikitja mukuringkulampa ngayunya Watiku Katjanya iltjanpa ngalkunma munu ngayuku milkali kuļu tjikinma. Panya nyura ngayunya ngalkuwiyangku tjikilwiyangku wantirampa puṭu wanka mulapa nyinaku. Palu ngalkula tjikira nyura wanka titutjara nyinaku, kaŋa ngayulu tjintu malatjangka nyuranya pakaltjingalku Godala tjungu titutjara nyinanytjaku. ⁵⁵ Panya ngayuku iltjanpa mai mulapa kurunitja, ka ngayuku milkali kapi mulapa kurunitjatu ngalkula tjikira kurunpa wankaringkunytjaku. ⁵⁶ Ka anangungku ngayunya iltjanpa ngalkulampa munu milkali tjikirampa ngayula tjungu mulapa nyinaku, ka ngayulu palula tjungu nyinaku.

⁵⁷ “Mamalu ngayunya iyaŋu uwankara wankaru kanyipailu, kaŋa palulanguru wanka nyinanyi. Munuŋa palu purunypatū anangungku ngayunya ngalkunnyangkampa ngayulu palunya wankarunkuku.

⁵⁸ Ngayuluŋa mai ilkar̄inguru pitjanytja mai panya nyurampa tjamu tjutangku iriti ngalkula ilunytjanya purunypa wiya, palu kutjupa nguwanpa, panya anangungku mai nyanga palunya ngalkulampa titutjara wanka nyinaku Godala tjungu.”

⁵⁹ Tjukurpa nyanga palunya tjananya Jesulu anangu Jew tjutangka wangkara nintiningi ngura Kapunimala wal̄i inmatjangka unngu.

Tjukurpa Wanka Titutjara Nyinanytjaku

⁶⁰ Kaya waŋalpai kutjupa tjarangku tjukurpa nyanga palunya kulira wangkangi, “Tjukurpa wituwitu palangku wangkanyi. Kala yaaltjiyaaltjingku kulira mulamularingkuku?”

⁶¹ Ka Jesulu unngu kuliningi nintingku tjana alatji puṭu kulira wangkanyangka. Munu tjanala wangkangu, “Palu nyura yaaltji kulini ngayulu wangkanyangka? Tjinguru nyura kulini ngayunya wantintjik-itjangku.” ⁶² Palu nyura yaaltjiriku ngayulu Watiku Katjanya ngura walytjakutu ilkaritjakutu małaku ankunyangka? Nyura nyakula nyaa kulilku? ⁶³ Kulila, panya Godaku Kuruntu kutju wankarunkupai, Kurunpa Milmiltu. Panya aŋangu puṭu walytja wanka nyinanyi palu Kurunpa Milmiltu kutju wanka kanyilpai. Palu ngayuku tjukurta nyura wan-ganarangku kulinnyangka Kurunpa Milmiltu palyalpai nyuranya kurunpa wanka nyinanytjaku. ⁶⁴ Palu nyura kutjupatjara mulamularingkuwiya nyinanyi.”

(Alatji Jesulu tjanala wangkangi panya paluru kuwaripatjaranguru ninti nyinangi tjanampa munu nintingku kuliningi ngananya tjana palumpa mulamularingkuwiya nyinaku, munu nintingkuṭu kuliningi nganalu ngula Jewku mayatja tjutangka nintilku palunya witintjaku.) ⁶⁵ Munu tjanala piṛuku wangkangu, “Mulapa nyura kutjupatjara unytju ngayula tjunguringanyi ngayuku mulamularingkunyta wiya. Nyanga palulanguru panyana nyurala ngañmanytu wangkangu alatji, ‘Aŋangu walytja puṭu ngayula tjunguringanyi, palu Mamalu unngu nintinnyangka kutju ngayula tjunguringkuku.’” Alatji Jesulu tjanala wangkangi.

⁶⁶ Kaya nyangatja kulira Jesunya wañalpai kutjupa tjarangku palunya wantikatira anu munu palunya piṛuku wañantja wiyaringu. ⁶⁷ Ka Jesulu nintintja panya 12-ŋka tjapinu, “Ka nyura kuļu ngayunya wantikatiku?”

⁶⁸ Ka Simon Peterlu wangkangu, “Mayatja, nganalakutula ankuku? Panya nyuntu kutjungkulanyan tjukurpa wiru tjakultjunanyi wankaru tiṭutjara nyinanytjaku. ⁶⁹ Kala tjukurpa nyangaku mulamularinganyi munula nintingku kulini panya nyuntu kutjun milmilpa Godalanguru pitjanytja nyinanyi.”

⁷⁰ Ka Jesulu wangkangu, “Panya ngayulu nyuranya ngañmanytu ngurkantanu wati panya 12, palu nyuralanguru kutjungku ngayunya mamungku urakanyini.” ⁷¹ (Paluru panya Judasanya wangkangi Simon Karīyataku katja. Nyara paluru panya Jesuku nintintja nyinangi, palu paluru ngula Jewku mayatja tjutangka Jesunya nintiningi palunya witintjaku.)

7

Jesuku Małanypa Tjuṭa Mulamularingkunyta Wiya

¹ Nyanga palulanguru Jesulu Judeanya wantikatingu, munu Galilee-lakutu małaku ankula nyara palula kutju para-ngařangi ngura tjutangka. Panya ngura nyara Judeala wati panya Jewku mayatja tjuṭa palunya pungkunykitja mukuringangi. Palulanguru paluru Galileela kutju para-ngařangi.

² Ka panya Jew tjutaku inma kutjupa ilaringu ini Wiltjanya.* ³ Kaya Jesuku małanypa tjutangku wangkangu palunya, “Ngura nyangatja wantikatira ara ulparira Judealakutu, kantaya nyuntunya pala wañalpai tjutangku nyawa nyuntu miracle tjuṭa witulya pułkangku palyannyangka.

* ^{7:2} Inma nyanga palunyaya kanyilpai mai uwankara kaananguru urantjatjanungku munuya mainguru Godanya pulkara walkulpai paluru tjanampa mai pulka kaanangka pakaltjingan-nyangka. Munuya nyara palula ařa walı uwankara wantikatira tjintu 7 ırıltı nyinapai wiltjangka munu tjulypinpangka. Alatjiya nyinapai ařa irititja kulintjikitjangku panya Israelkunu tjuṭa ngura Itjipalanguru pakara ilytjingka walı wiya para-ngařanytja. Nyawa Exodus 23:16-17.

⁴ Tjinguru aŋangu kutjupa mukuringanyi aŋangu tjutangku palunya mirawaŋinytjaku, munu palulanguru paluru kutjupa kutjupa tjuta utingku palyalpai tjutangka miřangka, kampangkaṭu palyantja wiyangku. Ka nyuntu uti palu purunypatū palyanma utingku aŋangu tjutangku nyakula nintiringkunytjaku manta winkitjangku.” Alatjiya Jesuku małanypa tjutangku palula wangkangi. ⁵ (Palu paluru tjana kułuya palumpa mulamularingkuwiyangku wantingi.)

⁶ Ka Jesulu wangkangu tjanala, “Nyurampa ankunytjaku ngaranyangkaya nyura anama alatjiṭu, palu ngayuku kuwaripa ngaranyi. ⁷ Panya aŋangu tjuta nyurampa kuraringkunytja wiya alatjiṭu, palu ngayuku kutjukuya kuraringanyi. Panya ngayulu tjanampa kura tjuta rawangku utini. ⁸ Palya, nyura inmaku ankunytjaku ngaranyi. Palu ngayulu nyurala tjungu ankunytja wiya, panya ngayuku kuwaripa ngaranyi.” ⁹ Munu wangkanytjatanu Jesunya małaringkula wantira nyinangi Galileela. Kaya malanypa panya tjuta kutju anu.

¹⁰ Palu ngula Jesunya maławanu anu Jerusalemalakutu kampangkaṭu aŋangu tjutangku nyakunytjaku-tawara. ¹¹ Kaya inma nyara palula Jewku mayatja tjutangku palunya nguriningi witintjikitjangku munuya wangkangi, “Yaaltjiringu watı panya paluru?”

¹²⁻¹³ Kaya aŋangu tjutangku tjukurpa palunyatjara kampangkaṭu kutju wangkara kuliningi mayatja paluru tjana kulintjaku-tawara. Kutjupa tjarangkuya tjaalymara anga-wangkangi alatji, “Wati palya nyaratja.” Kaya kutjupa tjarangku wangkangi, “Wiya, paluru ngunti wangkara aŋangu tjuta ngunti kurara katirinanyi.” Palu tjana Jewku mayatja tjutangka miřangka wangkanytja wiyaṭu palumpa tjanampa nguluringkula.

¹⁴ Ka inma nyanga paluru tjintu 7 ngarangi. Palu ngururpa tjintu maŋkurpa wiyaringkula Jesulu timpulangka tjarpara aŋangu tjutangka tjukurpa wangkara nintiningi. ¹⁵ Kaya Jewku mayatja tjutangku palunya kulira urulyaraningi munuya wangkangu, “Wati nyangatjampa yaaltji-yaaltji pulkara nintiringu? Panya kutjupangku palunya nintintja wiyaṭu.”

¹⁶ Ka Jesulu wangkangu tjanala, “Tjukurpa nyangatjana wangkanyi ngayuku wiya, palu Godaluni nintinu nyara ngayunya iyantjalu. ¹⁷ Kanı nganalu nintingku kulira ngurkantankuku ngayulu nyanga wangkanyangka? Tjinguruṇa kutjungku kulira wangkanyi, munta tjinguruṇa Mamalu nintinnyangka wangkanyi. Palu mulapa Mamala wan-gaŋarangku kulilpai tjutangku kutjuya kulira tjukarurungku ngurkantankuku ngayulu wangkanyangka. ¹⁸ Tjinguru ngayulu walijangku kulira wangkama kutjupa tjutangku ngayunya mirawaŋinytjaku. Palu wiya, ngayulu mukuringanyi Mamanya mirawaŋinytjaku nyara ngayunya iyantjanya. Nyara palulanguruṇa tjukarurungku wangkanyi ngunti wangkanytja wiyangku. ¹⁹ Panyatja nyura kulini? Panya Moselu nyuranya ungu Godaku tjukurpa. Palu nyura mantjintjatjanungku uwankarangku kulira wantipai, munu nyura nyaanguru ngayunya pungkunytjikitja mukuringanyi?”

²⁰ Kaya aŋangu tjutangku wangkangu palula, “Nyuntun mamutjara. Nganalunta pungkunytjikitjangku kukanymanu?”

²¹ Ka Jesulu tjanala wangkangu, “Kutju-aṛa panyaṇa miracle palyanu mungaṭu Saturday-ngka tjintu panya pakuwiyaringkupaingka, ka panya nyura uwankarangku nyakula urulyaraṇu. ²²⁻²³ Palu kutjupa-aṛa nyura kuļu tjintu pala palula kutjupa palyalpai. Panya Moselu nyuranya

wangkangu iti katja wirkankunyangka tjintu 8 wiayingkula palunya wat-intjaku. (Palu tjukurpa nyanga paluru Moselanguru wiya Aipuramala Jacobala tjanalanguru ngamanypa alatjitu ngaranytja.) Ka panya kutjupara iti katja tjinguru tjirirpi Friday wirkankupai, ka palulanguru tjintu 8 wiayingkula palunya katira watintjaku ngarapai Saturday-ngka tjirirpi panya pakuwiayingkupaingka. Ka nyura nyanga palumpa miilarantja wiyatú Saturday-ngka palyannyangka. Munu nyura nyaanguru ngayuku kutju miilarani ngayulu tjirirpi pakuwiayingkupaingka wati pikatjara puntu winki palyarungunnyangka?

²⁴ “Kulila, uti nyura nyakula mapalku ngurkantara kurankankuwiyangku wantima, palu nyakula purkarangku kulira tjukarurungku ngurkantanama.”

Jesunya Witintjikitjangku Kulira Wantintyta

²⁵ Kaya Jerusalemanya ngurara kutjupa tjarangku pu tu kulira ngaparku tjanalingi wangkara, “Wati nyangatjaya panyatja pungkunytjikitjangku rawangku ngurini mayatja tjutangku. ²⁶ Nyawa! Nyanga paluru kuwari tjanala mirangka ngaranyi munu nyanga utingku alatjitu wangkanyi, ka nyangaya pailwiyangku wantinyi! Tjinguruya kulini nyangatja mulapa Christanya Wankarunkupainya panya Godalu kalkuntjanya. ²⁷ Palu mulapa Christanya pitjanyangka nganana pu tu kulikku yaaltjinguru paluru pitjangu, panya nganana uwankara ngurpa. Palu wati nyangaku nganana ninti, panya paluru Nazarethanya ngurara. Palulangurula palumpa pu tu mulamularinganyi.” Alatjiya wangkara wa ningi anangu Jerusalemanya ngurara tjutangku.

²⁸ Ka Jesulu timpulaku yaatangka tjukurpa wangkangi munu mirara wangkangu alatji, “Mulapa nyura wanyu ngayuku ninti? Yaaltjinguruna pitjangu? Wiya, nyura ngurpa. Kulilaya! Ngayulu na walitjangku kulira pitjanytja wiya. Panya ngayuku Mamangku ni iyanu. Nyara paluru tjukaruru alatjitu nyinanyi, ka nyura nyara palumpa ngurpa. ²⁹ Palu ngayulu kutju palumpa ninti, panya paluruni iyanu nyanga mantakutu, ka nyanga na nyinanyilta palulanguru pitjanytjatjanu.” Alatji Jesulu katungku wangkangi.

³⁰ Kaya kutjupa tjutangku nyangatja kulira palunya witintjikitjangku wangkangi, palu wantingiya witintja wiyangku, palumpa tjintu kuwaripa tu ngaranyangka. ³¹ Palu anangu kutjupa tjutaya palumpa mulamularingu munuya wangkangu, “Nyangatja alatjitu Christanya Wankarunkupainya panya Godalu kalkuntjampa, panya paluru miracle tjuta witulya pulkangku palyani. Ka kutjupangku pu tu palula waintariku. Nyanga paluru alatjitu kalkuntjanya panya.”

Jew Tjutangku Jesunya Witintjikitjangku Wangkanyta

³² Kaya Paratji tjutangku kulinu anangu tjutangku Jesunyatjara tjaaly-mara wangkanyangka. Munuya kulira tjukurtjara kuranyitja tjutangka tjunguringkula wangkangi munuya wati timpula atunymankupai tjuta witura iyanu Jesunya witintjaku. ³³ Ka tjana pitjanyangka nyakula Jesulu tjukurpa nyangatja wangkangi, “Kuwaripa tu na nyurala tjukutjuku rawa nguwanpa nyinaku, mununa palulanguru malaku ankuku panya ngayunya iyantjalakutu. ³⁴ Ka nyura ngayunya nguri ra pu tu nyakuku munu nyura pu tu ngayula wa na ra wirkankuku.”

³⁵ Kayanku Jewku mayatja tjutangku anara nguwantu wangkara kuliningi, “Wati nyangangku yaaltjikutu ankunytjikitjangku wangkanyi

nganana palunya puṭu ngurintjaku? Tjinguru paluru kulini nganampa walytja kutjupa tjutakutu ankunytjikitjangku ngura malikitja tjutakutu. Munu nyara palula tjinguru Jew wiya tjutangka ngapartji tjukurpa wangkara nintilku. ³⁶ Nganana puṭu kulini wati nyangangku wangkanyangka, panya paluru ngananaŋnya wangkangu, ‘Nyura ngayunya ngurira puṭu nyakuku munu nyura puṭu ngayula wanara wirkankuku.’” Alatjiyanku Jewku mayatja tjutangku Jesulu wangkanytja puṭu kulintjatjanungku wangkara kuliningi.

Jesulu Kalkuntja Kurunpa Milmilku

³⁷ Ka inma panya paluru tjintu panya 7 ngarala wiyaringu, ka mungawinki inma małatjalta pulka mulapa ngarangi wiyarinkunytjikitja. Ka tjintu nyanga palula Jesunya pakara ngarangu munu wangka katungku mirara wangkangu, “Anangu mina ilu ngaralampa uti ngayulakutu pitjama munu tjikira ipilyarima. ³⁸ Panya nyiringka iriti walkatjunkunytja nyanga alatji ngaranyi, ‘Nyuntu ngayuku mulamularingkunyangka nyuntula unnunguru mina kurunitja wała purunypa titutjara ukalingkuku.’” ³⁹ Nyanga alatji Jesulu Kurunpa Milmilnga wangkangi panya ngula tjanala tjarpanyangka mina wala purunypa titutjara ukalingkunytjaku. Palu nyara palula arangka Kurunpa Milmilnga tjanala tjarpanytja wiya kuwaripaṭu ngarangi, panya Jesunya ilunytjatjanu pakara Godalakutu małaku ankunytja wiyaṭu kuwaripa nyinangi mantangka.

Anangu Tjuta Tjararingkunytja

⁴⁰ Kaya kutjupa tjutangku tjukurpa wangkanyangka kuliṛa wangkangu, “Munta, nyangatja-manti Godaku wangkatjarampa, panya nyanga palumpala paṭanangi.” ⁴¹ Kaya kutjupa tjutangku wangkangu, “Wiya, nyangatja Christanya panya Wankarunkupainya Godalu panya kalkuntjanya.” Kaya kutjupa tjarangku wangkangu, “Palu wati nyanga paluru Galileenya ngurara. Wanyu Godalu kalkunu Christanya Galileelanguru pitjanytjaku?” ⁴² Wiya, panya nyiringka iriti walkatjunkunytja ngaranyi nyanga alatji, ‘Christanya Wankarunkupainya Mayatja Davidaku walytjapitinguru nyinaku munu iti ngariku ngura ini Bethlehemala nyara Davidaku ngurangka.’”

⁴³ Alatjiya tjarangku tjarangku wangkara tjararingu Jesunya puṭu tjukarurungku ngurkantara. ⁴⁴ Kaya kutjupa tjarangku palunya witintjik-itjangku kuliningi, palu wantingiya witintja wiyangku.

Jew Tjuta Jesuku Mulamularingkunytja Wiya

⁴⁵ Kaya wati panya timpula atunymankupai tjutangku witintja wiyaṭu małaku anu tjukurtjara kuranyitja tjutakutu munu Paratji tjutakutu. Ka tjananya paṭara tjapinu, “Nyaaku nyura witira katinytja wiyangku wantingu?”

⁴⁶ Kaya timpula atunymankupai tjutangku wangkangu, “Wiya, wati nyarangku tjukurpa wiru mulapa wangkangi, wati panya kutjupa tjutangku purunypa wiya, palya mulapa.”

⁴⁷ Kaya Paratji tjutangku wangkangu tjanala, “Munta, nyuranya kulu kawantjinganu?” ⁴⁸ Kulila, nganana wanyu Jewku mayatja tjuta Jesuku mulamularinganyi? Wiya alatjiṭu. ⁴⁹ Palu anangu nyanga kutjupa tjuta Moseku tjukurku ngurpa alatjiṭu, ka panya tjananya Godalu wiyalku.”

⁵⁰ Ka Paratji kutju tjanala tjungu ngarangi, panya ngañmanypa Jesulakutu mungangka ankunytjanya, Nicodemusanya panya. Munu nyara

paluru tjanala wangkangu Jewku panya mayatja tjutangka, ⁵¹ “Nganampa tjukurtu panya alatji wangkanyi, ‘Utiya anangu kutjupa mapalku ngurkanta rara kuranmankuwiyangku wantima, munu paluru palyantjatjanungku wangkanyangka kulira kutju tjukarurungku ngurkantanama palumpa nintiringkula.’”

⁵² Kaya Nicodemusanya anaṛa wangkangu, “Ka nyuntu kuṛu wanyu Galileenya ngurara, wati nyara palula tjungutja? Wanyu tjukurpa pala iriti walkatjunkunytja nyawa Godaku wangkatjara tjutaku nintiringkunytjikitja, panya wangkatjara kutjupa Galileelanguru pitjanytja wiya alatji.”

⁵³ Nyara palulanguruuya uwankara ngurakutu anu.

8

Jesunya Arkantjikitjangkuya Minyma Kura Katinytja

¹ Ka Jesunya kutju anu puli ini Alipatjaralakutu. ² Munu ngarira tjinturingkula mungawinki mulapa małaku anu timpulakutu. Ka anangu winki palulakutu pitjangu, ka Jesulu nyinakatira tjanala tjukurpa wangkara nintiningi. ³ Ka paluru tjanala wangkanyangka wati kutjupa tjutangku Moseku tjukurpa nintilpai tjutangku, Paratji tjutangku kuṛu minyma kutju ngalya-katingu. Minyma nyara paluru kunyu wati kutjupangka kampangkaṭu ngaringi kuri walytjatjarangka. Kaya katira palunya ngururpa ngaratjunu. ⁴ Munuya wangkangu Jesula, “Nintilpai, minyma nyangatjaya nyangu wati kutjupangka kampangkaṭu ngarinyangka kuri walytjatjarangka. ⁵ Ka panya Moselu walkatjunu minyma nyanga purunypa apungka atura iluntankunytjaku wati kutjupangka kampangkaṭu ngarinyangka kuri walytjatjarangka. Kan yaaltji kulini? Iluntankukula?” ⁶ Palu tjana Jesula ngunti arkara tjapiningi, panya tjana kuliningi, “Tjinguru paluru ngunti wangkanyangkala palunya kuutpangka katira wangkaku.” Palu Jesulu pupakatira mantangka walkatjunangi manyirkangku.

⁷ Kaya rawa nguwantu ngarala tjapiningi, ka Jesulu pakara wangkangu tjanala, “Ngananya wanyu palya mulapa nyinanyi kura palyantja wiya alatji?” Uti nyara paluru-warara apu mantjira minyma nyangatja atunma.” ⁸ Munu paluru piruku pupakatira walkatjunangi mantangka.

⁹ Kaya wati panya tjutangku kulira kutju kutju ankula wiyaringu tjlpi tjuṭa-warara, ka małatja tjuṭa ngapartji maławanu anu. Ka Jesulu kutjuringkula pupara walkatjunangi.

¹⁰ Munu wiyaringkula pakara nyangu minyma panya paluru kutju ngaranyangka. Munu paluru wangkangu, “Yaaltjiringuya wati panya tjuṭa? Kutju ngaranytja wiya nyangatja nyuntunya kuranmara atura iluntankunytjikitja?”

¹¹ Ka minyma panya paluru wangkangu, “Uwa, uwankaraya ankula wiyaringu.”

Ka Jesulu palula wangkangu, “Ka ngayulu kuṛu nyuntunya kuranmara atuntja wiya. Palya ara nguraku, munu piruku kura palyantja wiya palyanyku kutju nyinama.”

Jesunya Tili Anangu Uwankaraku

¹² Munu ngula Jesulu anangu tjuṭangka piruku wangkangi nyanga alatji, “Ngayuluña tili anangu manta winkitjaku. Ka kutjupangku ngayunya wanarampa tili wankanya mantjilku, munu tili palunyatjara paluru putu mungawalurungka ngaraku.”

¹³ Kaya Paratji tjutangku palula wangkangu, “Nyuntunkun walytjangku wangkanyi, kala nyuntumpa puṭu mulamularinganyi.”

¹⁴ Ka Jesulu wangkangu, “Uwa, mulapa ngayulu walytjangku wangkanyi, palu ngayulu tjukarurungku wangkanyi ngunti wangkanytja wiyangku, panya ngayulu ninti ngayuku nguraku. Ngura nyara palulanguruṇa pitjangu munuṇa ngula malaku ananyi nyara palulakutu. Ka nyura ngurpa ngura nyara ngayulu ankunytjtjaku. ¹⁵ Nyura anangu kutjupa tjuta nyakula walytjangku ngurkantara kuranmankupai. Palu ngayuluṇa anangu kutjupa tjuta wangkapai wiya.

¹⁶ “Palu tjinguru ngayulu anangu kutjupa nyakula ngurkantankunytjik-itja mukuringkula ngayulu tjukarurungku ngurkantara wangkaku. Panya ngayulu kutjungku ngurkantankupai wiya. Palu Mamanya ngayunya panya iyantjanya ngayula tjungu nyinanyi kali tjungungku ngurkantankupai. ¹⁷ Panya tjukurpa irititja nyurampa alatji walkatjunu, ‘Tjinguru wati kutjarangku kutjupa kutjupa nyakunytjatjanungku pitjala nyurala tjakultjunkuku, ka paluru pula tjukurpa palunyatu wangkanyangka nyura kuliṛa mulamularingkupai. Palu puḷa pitjala tjukurpa titutitu tjakultjunkunyangka nyura kuliṛa puṭu mulamularingkupai.’ ¹⁸ Ka palu puṛunypaṭu ngali kutjarangku tjakultjunkupai tjukurpa palunyatu, ka pala palulanguru nyura uti mulamularingama. Panya ngayuluṇatju walytjangku tjakultjunkupai, ka Mamalu kuḷu tjukurpa palunyatu tjakultjunkupai ngayunya panya iyantjatjanungku.”

¹⁹ Kaya palula tjapinu, “Nyuntumpa mama wanyu yaaltji?”

Ka Jesulu wangkangu, “Nyura ngayuku Mamaku ngurpa munu nyura ngayuku kuḷu ngurpa. Tjinguru nyura ngayunya tjukarurungku ngurkantara rampa ngayuku Mama kuḷu tjukarurungkuṭu ngurkantanama ngayuku nintingkumpa.” ²⁰ Alatji Jesulu tjanala wangkangi timpulangka nyinara, panya nyara palula itingka piti tjuta ngarangi anangu tjutangku pitjala mani Godaku tjunkunytjaku. Palu Jewku mayatja tjutangkuya palunya nyakula witintja wiyangku wantingi, panya palumpa kuwaripaṭu ngaranyangka.

²¹ Ka piṛuku Jesulu tjanala wangkangu, “Ngayuluṇa ananyi, kaṇi nyura puṭu ngurilku munu nyura puṭu nguriṛa kura winkiṭu iluku. Munu nyura ngayulu nyara ankunytjtjakutu puṭu ma-wirkankuku.”

²² Kaya Jewku mayatja tjutangku alatji wangkanyangka kuliṛa wangkangu, “Munta-uwa, wati nyangangku wangkanyi nganana kunyu puṭu waṇalku paluru nyara ankunytjtjakutu. Tjingurunku paluru walytjangku iluntankunytjikitjangku wangkanyi.”

²³ Ka Jesulu piṛuku wangkangu tjanala, “Nyura nyanga mantanguru, kaṇa ngayulu ilkarิงuru pitjanytja. Panya nyurampa ngura nyangatja, ka ngayulu mantanguru wiya ilkaringenuru pitjanytja. ²⁴ Ngayulu panya nyurala wangkangu nyura kura winkiṭu iluku. Panya ngayulu panya paluru, panya Godalu iriti kalkuntjanya, ka nyura ngayuku puṭu mulamularingkulampa mulapaṭu kura winki alatjitu iluku.”

²⁵ Kaya tjapinu, “Palu ngananya wanyu nyuntu?”

Ka wangkangu, “Panya paluru ngayulu, panya kuwaripatjaraṇa nyurala wangkangu. ²⁶ Ngayulu nyuranya ngurkantara kuranmankunytjaku ngaranyi alatjitu, nyura kura tjuta palyantjtanguru. Palu ngayunya iyantjalu witunnyangka kutjuṇa wangkanyi. Panya ngayunya iyantjanya tjukaruru alatjitu. Kaṇa palula kulintjatjanungku anangu uwankarangka tjukarurungku tjakultjunanyi.”

²⁷ Kaya putu kuliningi Jesulu palumpa Mama ilkaritja wangkanyangka panya palunya iyantjanya. ²⁸ Ka Jesulu tjanala wangkangu, “Nyura ngayunya Watiku Katjanya ngula utitjunkuku munu utitjunkunytjatjanungku nyura ngayuku nintiringkula kulilk, ‘Munta-uwa, wati nyaratja panya paluru, Godalu panya kalkuntjanya, panya alatji paluru ngananala nganmanytju wangkangi.’ Munu piruku nyura kulilk, ‘Munta-uwa, mulapa nyara paluru walytjangku palyalpai wiya, munu palumpa Mamangku nintinnyangka kutju wangkapai munu palyalpai.’ Alatji nyura nintiringkula kulilk ngayunya utitjunkunytjatjanungku. ²⁹ Panya ngayunya iyantjanya ngayula tjungu titutjara nyinanyi, kana paluru pukularinytjaku rawangku palyani, kani palulanguru ngayunya wantikatinytja wiya.”

³⁰ Kaya paluru alatji wangkanyangka tjuta mulapa palumpa mulamularingu.

Jesuku Nintintja Mulapa Nyinanytjaku

³¹ Ka Jesulu wangkangu anangu panya palumpa mulamularingkupai tjutangka, “Nyura ngayuku tjukurpa mulamulangku kulira rawangku wanarampa ngayuku nintintja mulapa nyinaku. ³² Munu nyura nyara palulanguru tjukurpa Godanyatjara tjukarurungku kulilk, ka paluru nyuranya iwara kuranguru mantjintjatjanungku iwara palyangka tjunkuku nyura karalyarira ankunytjaku.”

³³ Kaya Jewku mayatja tjutangku wangkangu, “Wiya, nganana anangu Aipuramaku walytjapiti. Nganalu wanyu nganananya iwara kurangka katirinanyi? Wiya, kutjupangku nganananya mayatjarira iwara kurangka katirinkunytja wiya alatjitu. Kan nyaaku ngunti wangkanyi Godalu nganananya iwara kuranguru mantjira iwara palyangka tjunkunytjaku?”

³⁴ Ka Jesulu tjanala wangkangu, “Tjukarurungku na nyurala wangkanyi. Anangungkumpa rawangku kura palyarampa iwara kurangka titutjara ananyi munu kura palunya putu wantikatinyi. ³⁵ Kulila wati munu palumpa katja. Panya katja paluru mamaku tjitji titutjara nyinanyi. Ka anangu kutjupa malikitja warkaku pitjala, paluru unytju kutju tjukutjuku nyinapai wati panya palula. Palu watiku katja kutju titutjara nyinapai palumpa mamangka tjungu. ³⁶ Ka Godaku katjangku tjinguru nyuranya iwara kuranguru mantjira iwara palyangka tjunkunyangka nyura karalyarira iwara pala palula pukulpa mulapa ankuku.”

³⁷ “Palu ngayulu nyurampa ninti panya mulapa nyura Aipuramaku tjamupiti malatja malatja. Palu nyura ngayuku tjukurpa kulira wantinyi. Nyara palulanguru nyura ngayunya pungkunytjikitjangku kulini. ³⁸ Ngayulu na Mamalu nintinnyangka kutju wangkara tjakultjunkupai, ka nyura palu purunytjutu wanganarangku nyurampa mamangka kulira palyalpai.”

³⁹ Kaya wangkangu palula, “Wiya, nganampa mama Aipuramanya kutju.”

Ka Jesulu wangkangu, “Nyura Aipuramaku katja wiya. Tjinguru nyura Aipuramaku katja nyinarampa palu purunytjutu palyanma panya paluru palyantja purunyapa. ⁴⁰ Ngayulu panya nyurala Godaku tjukurpa tjukarurungku wangkangi palula kulintjatjanungku. Ka nyara palulanguru nyura ngayunya iluntankunytjikitja mukuringanyi. Palu Aipuramalu Godaku wangkatjara tjuta iluntankunytjikitjangku kulintja wiya alatjitu.

⁴¹ Palu nyura nyurampa mamangka wanganarangku kulira palyani.”

Kaya wangkangu, “Palu mama kutjupa-palkulanyan kulini? Wiya, ngananala mama Godanya kutjutjara nyinanyi.”

⁴² Ka Jesulu tjanala wangkangu, “Wiya, Godanya nyurampa mama wiya. Tjinguru Godanya nyurampa mama nyinanyangkampa nyura ngayuku pukularima, panya ngayulu Mama Godalanguru pitjangu, mununa kuwari nyanga nyurala wangkanyi. Panya ngayulu natju walytjangku kulira pitjanytja wiya, ngayuku mamangku ni ngayunya iyanu. ⁴³ Palu nyaanguru ni nyura putu kulini ngayulu wangkanyangka? Wiya, panya nyura ngayuku tjukurpa kulira wantinyi, pala palulanguru nyura putu kulini. ⁴⁴ Nyurampa mama panya mamu Satannga, ka nyura palula wanganarangku kulira palyalpai. Palu Satannga panya kuwaripatjar-alpi miriputju nyinangi munu tjuta alatji tu luntanangi. Munu paluru tjukaruru wiya titutjarangku ngunti kuralpai. Paluru tjakangku ngunti kuralpai tjukurpa nguntitjara nyinara. Munu paluru ngunti wangkapai tjuatku mama.

⁴⁵ “Ka ngayulu nyurala tjukurpa Godanyatjara tjukarurungku wangkangi, palu nyura kulira ngayuku mulamularingkuwiyangku wantinyi alatji tu. ⁴⁶ Nyura wanyu ngayunya kura ngurkantananyi? Wiya, ngayulu kura wiya alatji tu. Palu ngayulu tjukarurungku kutju wangkanyi. Ka nyura ngayuku mulamularingkunytja wiyangku wantinyi ngayulu tjukarurungku wangkanyangka. ⁴⁷ Panya Godaku walytja tju tangku Godaku tjukurpa wanganarangku kulilpai. Palu nyura Godaku walytja wiya, munu nyura nyara palulanguru Godalu wangkanytjitja kulira wantipai.”

Jesunyaya Mamutjara Wangkanytja

⁴⁸ Kaya Jewku mayatja tju tangku wangkangu Jesunya, “Ala palatja, nganana tjukarurungku nyuntunya wangkangi. Nyuntun Jew mulapa wiya wati Tjamiriyanya ngurara munun mamutjara.”

⁴⁹ Ka Jesulu wangkangu, “Mamutjara wiyan. Panya ngayulu Mamala wanganarangku kulini. Ka nyura ngayunya wanganarangku kulintja wiya. ⁵⁰ Palu ngayulu mukuringkunytja wiya ngayunya tju tangku mirawañinytjaku. Palu kutjupa nyinanyi munu paluru mukuringanyi tju tangku ngayunya mirawañinytjaku. Nyara paluru kutjungku uwankara tjukarurungku ngurkantankupai. ⁵¹ Kan tjukarurungku nyurala wangkanyi, ‘Anangungku ngayuku tjukurpa wanganarangku kulirampa ilunytja wiya wanka titutjara nyinaku.’”

⁵² Kaya palula wangkangu, “Ala palatja, pala palulangurula nyuntunya kulini mamutjara alatji tu. Aipuramanya panya ngañmanypa ilungu, wati Godaku wangkatjara tju ta kulu. Kan yaaltji-yaaltjingku wangkanyi alatji, ‘Anangungku ngayuku tjukurpa wanganarangku kulirampa ilu wiya wanka titutjara nyinaku.’ ⁵³ Palu nganampa tjamu Aipuramanya ngañmanypa ilungu Godaku wangkatjara tju ta kulu, kan nyuntu wanyu Aipuramala tjanala waintarinyi? Wiya, nyuntun wati tjukutjuku alatji tu.”

⁵⁴ Ka Jesulu wangkangu, “Tjinguru na walytjangku mirawañinyangkampa nyura ngayunya ananma. Palu kutjungku ngayunya mirawañinyi ngayuku Mamangku. Nyara palunya panya nyura Godanyamananyi. ⁵⁵ Palu nyura palumpa ngurpa, ka ngayulu palumpa ninti. Tjinguru ngayulu ngunti ngurparingkula ngunti wangkama nyura purunytju, palu ngayulu palumpa nintingku wangkanyi mununa palumpa tjukurpa wanganarangku kulilpai. ⁵⁶ Nyurampa tjamu Aipuramalu ngañmanytju kulinu ngayulu ngula ilkaringu mantakutu pitjanytja, munu pulkara pukularingu. Munu ngula ngayulu ankunyangka nyakula paluru pulkara tu pukularingu.”

⁵⁷ Kaya Jewku mayatja tjutangku palula wangkangu, “Nyuntun Aipuramanya nyangu? Wiya nyuntun tjilpi wiya, nyuntu wati tjukutjuku. Aipuramanya iriti mulapa nyinangi nyuntula wiyangka.”

⁵⁸ Ka Jesulu wangkangu tjanala, “Tjukarurungkuña nyurala wangkanyi, Aipuramanya iti ngarintyta kuwaripangkaña ngayulu-warara nyinangi Mamala tjungu, panya ngayuluña Titutjara Nyinapainya.”

⁵⁹ Kaya nyangatja kulira apu mantjinu palunya atuntjikitjangku. Palu Jesunya tjanala kumpira ngururwanu ma-pakara anu timpulanguru urilkutu.

9

Jesulu Wati Kurutjara Palyarunguntja

¹ Munu Jesulu nyanga palulanguru ma-pitjala nyangu wati kurutjara nyinanyangka. Wati nyara paluru itilpi kurutjara ngarintyta alatjiitu.

²⁻³ Kaya palumpa nintintja tjutangku Jesula tjapinu alatji, “Nyaanguru wati nyanga paluru kurutjara nyinanyi? Walytjangkunku nyangangku kuranu?”

Ka Jesulu wangkangu, “Wiya.”

Kaya piruku tjapinu, “Munta, tjinguru ngunytjungku mamangku kura palyanu, ka nyara palula pulalanguru iti kuru pati wirkanu?”

Ka Jesulu piruku wianmara wangkangu, “Wiya, wati nyanga paluru kurutjara iti ngaringu anangu tjutangku nyakunytjaku Godalu witulya pulkangku palunya palyannyangka. ⁴ Ka nyanga kuwari tjintu kalala ngaranyi, ka nganana uti Godaku warka palyanma ngayunya panya iyantjitzaku. Panya kuwari mungaringanyi, ka nganana mungangka putu warkarinyi. ⁵ Kaña mantangka nyanga nyinara tili purunytju irnyara utini anangu tjutangku Godanya uti kulintjaku.”

⁶ Munu tjukurpa nyanga palunya wangkanytjatjanungku Jesulu manta mantjira witalytjunu munu tjulpirpa palyanu. Munu wati panya kuru patingka kurungka tjulpirpa tjunu. ⁷ Munu wangkangu, “Ma-pitjalanku kuru paltjila uru nyara ini Tjailumala.” (Ini nyanga paluru wangkanyi tjanampa wangkangu, *Iyantjanya*.)

Ka wati panya paluru uru pala palulakutu ankula kuru paltjira mapalku kuru kutjaratu alaringu munu malaku pitjala para-nyangangi.

⁸ Kaya kutjupa tjuta palumpa ninti panya paluru tjana nyakupai wati nyanga palunya maniku nyinara ngatjinnyangka. Munuyanku ngaparku tjapiningi, “Wati panyatja nyangatja? Panya nyinara maniku ngatjil-painya?” Kaya palu purunytjutu wangkangi palumpa ngurangka itingka nyinapai tjutangku. ⁹ Tjarangkuya wangkangi, “Wati panya paluru alatjiitu palatja.” Kaya kutjupa tjutangku wangkangi, “Wiya, wati kutjupa palatja, yunpa palu purunypa.”

Ka wati panya paluru wangkangu, “Ngayulu panya paluru, panya kuru patina nyinangi.”

¹⁰ Kaya palula tjapinu, “Kanta nganalu kuru alaunu?”

¹¹ Ka wangkangu, “Wati ini Jesuluñi tjulpirpa palyara kuru nyitinu mununi wangkangu ankula uru Tjailumala paltjintjaku. Kaña ankula paltjira mapalku kuru alaringu.”

¹² Kaya wangkangu, “Wati paluru yaaltji?”

Ka paluru wangkangu, “Wampa, ngurpana.”

¹³ Munuya palulanguru katingu Paratji tjutakutu wati panya palunya kuru panya pati alaringkunytjanya. ¹⁴ (Ka tjintu nyara Jesulu wati panya

kuru pati alantjanya Saturday tjintu panya pakuwiyaringkupai.) ¹⁵ Kaya Paratji tjutangku wati panya palunya palu purunypa^{tu} tjinu, “Yaaltji-yaaltjin kuru alaringu?”

Ka paluru tjanala tjakultjunu, “Wati nyara paluruⁿⁱ tjumpirpa tjunu kurungka, kana paltjira mapalku kuru alaringu.”

¹⁶ Kaya Paratji tjarangku wangkangu, “Wiya, wati nyara paluru Godalanguru wiya. Tjintu milmilpa nyangatja, war^karinytjaku wiya. Wati nyarangku kurutjara palyara tjintu nyanga milmilpa kuraⁿi.” Kaya tjara kutjupangku wangkangi, “Wiya, wati kurangku putu nyanga palu purunypa palyalpai.” Munuyanku wangkara kulira tjarangku tjarangku tjukurpa kutjupa wangkangi.

¹⁷ Kaya piruku wati panyangka Paratji tjutangku wangkangu, “Nyuntunya kunyu kuru alaⁿu wati nyara paluru, kan nyaa wangkanyi palunya?”

Ka wangkangu, “Nyara paluru wati Godaku wangkatjara alatjitu.”

¹⁸ Kaya Jewku mayatja tju^ta putu mulamularingangi wati nyanga kurutjara kuru alaringkunyangka. Munuya altingu palumpa mama ngunyntju pitjala tjakultjunkunytjaku. ¹⁹ Munuya palula pulala tjinu, “Nyangatja mulapa nyupalimpa panya katja? Panya kuru pati iti wirkankunytja? Ka nyupali ninti yaaltji-yaaltjingku nyangangku kuwari nyanganyi?”

²⁰ Ka pula wangkangu, “Uwa, nyangatja mulapa ngalimpa katja, panya kuru pati iti wirkankunytja. ²¹ Palu ngali ngurpa. Nyakunytja wiya^tuli paluru kuru alaringkunyangka. Munuli ngurpa wati nganalu kuru alaⁿu. Pala palunyaya tjpila. Wati pulka palatja, kanku walytjangku wangka.”

²² Paluru pula alatji wangkangu Jewku mayatja tju^taku nguluringkula pulanya paintjaku-tawara. Panya kutjupa tjutangkuya wangkapai, “Jesunya mulapa Godalu panya kalkuntjanya, Christanya panya.” Kaya Jewku mayatja tju^tangku nyangatja kulira wangkangi, “Nyanga palu purunypaya wangkawiyangku wantima nganana wali inmatjanguru nyuranya paira iyantjaku-tawara.” ²³ Ka pula palulanguru mamangku ngunyjtungku nguluringkula tjukutjuku kutju wangkangi alatji, “Pala palunyaya tjpila! Wati pulka palatja.”

²⁴ Kaya piruku altingu wati panya kuru pati iti ngarinytjanya, munuya wangkangu, “Kuwari nyuntu tjukarurungku wangka Godala mirangka! Panya nganana ninti wati nyara nyuntunya kuru alantjitjaku. Paluru wati kura.”

²⁵ Ka paluru wangkangu, “Uwa, ngurpana palumpa. Tjinguru mulapa paluru kura, munta tjinguru wiru. Palu kutju nyanganguru^{na} ngayulu kulini, panya nganmanypa^{na} kuru pati nyinangi mununa kuwari kuru alangku nyanganyi.”

²⁶ Kaya piruku wangkangu, “Palu nyaanunta wanyu wati nyara paluru? Yaaltji-yaaltjingkunta kuru alaⁿu?”

²⁷ Ka paluru tjanala piruku wangkangu, “Nganmanytju panya^{na} nyurala wangkangu, ka nyura ngayunya kulilwiyangku wantingi. Nyaaku nyura piruku kulintjikitja mukuringanyi? Nyura ku^lu wanyu palumpa nintintja nyinanytjikitja mukuringanyi?”

²⁸ Kaya mirpaⁿarira palunya warkira wangkangu, “Nyuntun palumpa nintintja. Palu nganana Moseku nintintja tju^ta, palumpa wiya. ²⁹ Nganana ninti Godalu Mosela wangkangu, palu wati nyanga palumpa nganana ngurpa. Yaaltjinguru nyangatja pitjangu?”

³⁰ Ka wati paluru urulyaraṛa wangkangu, “Ai! Nyura ngurpa wati nyara palumpa? Nyara palurunu kuru alaṇu, ka nyura nyaaku puṭu kulinu nintipuka tjutangku? ³¹ Nganaṇa ninti Godalu kura palyalpai tjutangka kulilwiyangku wantipai. Palu wangaṇarangku kuliṛa wałkunyangka kutju paluru kulilpai. ³² Iritinguru mulapa wati kutjupangku kuru alantja wiyatū, kuwari kutju nyanga alatjiṭu kuru pati iti ngarinytja alaṇu. ³³ Wati nyanga paluru Godalanguru pitjanytja wiyatjangku tjinguru puṭu kuru alaṇma. Palu mulapa wati nyanga paluru Godalanguru pitjanytja alatjiṭu, panya paluru kutjungkuni kuru alaṇu.”

³⁴ Kaya mirpañarira wangkangu palula, “Nyuntun itinguru alatjiṭu kura winki wirkanu munun kura alatjiṭu pulkaringu, munun palulanguru nganananya puṭu alatjiṭu nintini.” Munuya palunya painu wali inmatjangka piṛuku tjarpawiyangku wantinytjaku.

³⁵ Ka Jesulu kulinu wati panya palunaya kunyu wali inmatjanguru painu munu palunya nguriṛa nyakula wangkangu, “Nyuntu mulamularinganyi Watiku Katjaku?”

³⁶ Ka wangkangu, “Palu ngananya wanyu paluru? Wangkanı, kana palumpa mulamulariwa.”

³⁷ Ka Jesulu wangkangu, “Nyangu panyan nganmanytju. Ka nyangananta kuwari paluru wangkanyi.”

³⁸ Ka wati panya paluru wangkangu, “Ngayulu nyuntumpa pulkara mulapa mulamularinganyi.” Munu paluru Jesula tjinangka tultjungarakatira palunya wałkuṇu.

³⁹ Ka Jesulu wangkangu, “Ngayuluṇa mantakutu pitjangu aṇangu tjuta tjarantjikitja, kaya tjarangku kutju nganmanypa kuru pati purunypa nyinanytjatjanungku kuru alaringkula nyakula ngayuku mulamularingkuku, kaya tjara kutjupa kuru ala purunypa nyinanytjatjanu kuru pati mularariku ngayuku puṭu mulamularingkula.”

⁴⁰ Kaya Paratji kutjupa tjarangku ila ngaranytjatjanungku kulinu Jesulu alatji wangkanyangka, munuya palula tjapinu, “Munta nganaṇanya kuļun wangkanyi nganaṇa kuru pati purunypa? Wiya, nganaṇa kuru ala.”

⁴¹ Ka Jesulu wangkangu, “Tjinguru nyura kuru pati purunypa nyinara kura watarkungku palyanma, kulintja wiyatjangku, ka Godanya nyurampa ngaltingama munu nyuranya kura ngurkantara wangkanytja wiya. Palu ngunti nyuranku walytjangku kuru alaṇmananyi Godanya pulkara kulintjatjanungku-palku. Ka nyara palulanguru nyuranya Godalu kura ngurkantankunytjaku ngaranyi alatjiṭu.”

10

Tjukurpa Tjiipi Aṭunymankupaitjara

¹ Ka Jesulu wangkangu, “Tjukarurungkuṇa nyurala wangkanyi, panya wati tjiipiṇu yaatangka kaitawanu wiya kultukata tatira waṛarakatipai, nyara paluru wati tjulyara kuitjunkupai. ² Palu panya kaitawanu tjarpantyta, nyara paluru tjiipi tjutaku tjapata. ³ Ka wati kutjungku mungangka kanyilpaingku tjananya yaatangka unngu aṭunymara tjinturingkupai, munu mungawinki tjapata pitjanyangka nyakula kaita alalpai. Ka wati panya tjapatangku palumpa tjiipi tjuta ini wangkara altipai kutju kutju. ⁴ Mununku tjiipi walytja tjuta altira pakaltjingara kuranyuripai munu tjananya katipai. Kaya palunya ngurkantara waṇalpai palumpa wangkaku nintingku. ⁵ Palu wati malikitja kuliṛa tjana waṇalwiyangku wantira wirtjapakalku wangka palumpa puṭu ngurkantara.” ⁶ Alatji Jesulu

tjanala tjukurpa ara tjiipitjara wangkangi nintintjikitjangku, palu puṭuya kuliningi.

Jesulu Wangkangu, “Ngayulu Tjapata Palyanya.”

⁷ Ka Jesulu piruku tjanala wangkangu, “Tjukarurungkuṇa nyurala wangkanyi. Panya ngayuluṇa tjiipiku kaita, kaya tjiipi tjuta ngayulawanan kutju tjarpaku. ⁸ Panya kutjupa tjutaya ngayula kuwaripangka pitjangu, nyara paluru tjana tjulyara kutitjunkupai tjuta, ka panya tjananya tjiipi tjutangku kulilwiyangku wantingi. ⁹ Ngayuluṇa kaita panya tjiipiku, ka kutjupa ngayulawanan tjarpampa wankaringkuku. Kaṇa palunya atunymara kanyilkku kurangka-tawara. Ka pukulpa alatjitu para-ngaraku wankaru munu paltja titutjara nyinaku. ¹⁰ Palu wati panya kutitjunkupai tjutaya unytju kutju pitjapai tjulyara pungkula wiyanjtjikitja kutju. Palu ngayuluṇa pitjangu nyuranya wankarunkunyjtjikitja nyura pukulpa mułapa titutjara nyinanytjaku ngayula tjungu.

¹¹ “Ngayuluṇa tjapata palyanya, munuṇa tjiipiku ngalkilpa ilunytjikitja mukuringanyi. ¹² Palu wati panya kutjupa manikitja unytju warkaripai tjapata wiya, tjiipiku waltya wiya. Paluru inuṛa pitjanyangka nyakula ngulu wirtjapakalpai tjiipi wantikatira, ka tjananya inuṛangku patjara wililytjingalpai. ¹³ Wati panya paluru manikitja kutju warkaripai munu tjiipi tjutaku pułkarə mukuringkupai wiya munu ngalturingkupai wiyat̄u. Nyara palulanguru paluru ngulu wirtjapakalpai inuṛa nyakula.

¹⁴⁻¹⁵ “Palu ngayuluṇa tjapata palyanya. Panya Mamanya ngayuku ninti, ka ngayulu Mamaku ninti. Palu purunypaṇa ngayulu ngayuku tjiipi tjutaku ninti, katjuya tjiipi tjuta ngayuku ninti. Kaṇa ngayulu palumpa tjanampa ngalkilpa ilunytjikitja mukuringanyi. ¹⁶ Katjuya tjiipi kutjupa tjuta kułu nyinanyi nyangatja ngurara wiya, palu ngura kutjupitja. Kaṇa palunya tjananya kułu altira katiku ngura kutjupa kutjupa tjutanguru, kaṇiya ngayunya wangka kulilkku munuya pitjala tjunguringkuku ngura nyangatja ngurara tjutangka. Kaṇa ngayulu kutjungku tjananya uwankara tjungura kanyilkku utuļu kutju.

¹⁷ “Panya ngayulu kutju alatjituṇa ngalkilpa ilunytjikitja mukuringanyi, ka pala palulanguru Mamanya ngayuku pukularinyi. Palu ngayulu titutjara ilura miri ngarintjikitja wiya, małaku wankaringkunyjtjikitja iluni. ¹⁸ Kutjupa tjutangkuṇiya wanka puṭu wiyan̄i, palu ngayulu alatjituṇatju intjanurinyi aŋangu tjutaku ngalkilpa. Ngayulu alatjitu mukuringkula iluni, munuṇa ngayulu alatjitu mukuringkula małaku wankaringanyi, panya Mamaluṇi wituṇu aŋangu tjutaku ngalkilpa ilunytjaku.”

¹⁹ Ka Jesulu tjukurpa nyangatja wangkanyangkaya aŋangu tjutangku kulira tjararingkula ngaparku wangkangi. ²⁰ Kutjupa tjarangkuya wangkangi, “Nyangangku mamutjarangku ngunti wangkanyi, kawakawangku. Ka nyura nyaaku palula kulini?”

²¹ Kaya tjara kutjupangku wangkangi, “Wati mamutjarangku wanyu tjukurpa nyanga purunypa wangkapai, munu kuru pati kułu alalpai? Wiya, mamutjarangku nyanga palu purunypa palyalpai wiya.”

²² Nyanga palula małangka nyiñga ngarinyangka, anangu Jew tjuṭa inma pułkaku tjunguringu ngura panya Jerusalemala timpulangka.* ²³ Ka timpulangka kantilytja wiltja wara para-ngarala arintanangi. Nyanga paluru ini Tjalamanku wiltja. Ka nyara palulawanu Jesunya anangi. ²⁴ Kaya Jewku mayatja tjutangku Jesunya nyakula kapuṭu-kaputuringu munuya palula wangkangu nyanga alatji, “Rawangkun nyuntunku kutitjunnanyi. Yaalaran nyuntunku utingku tjakultjunkuku? Nyuntun mulapa wanyu Christanya panya iriti Godalu kalkuntjanya?”

²⁵ Ka Jesulu tjanala wangkangu, “Panya ngayulu nyurala ngañmanyju wangkangu, ka nyura ngayuku mulamularingkuwiyangku wantingi. Ngayulu panya witulya pułkangku kutjupa kutjupa tjuṭa palyaningu Mamalu ngayunya nintinnyangka, ka nyura nyakula kulira mulamularingkunytjaku ngaranyi. ²⁶ Palu nyura wantingi, panya nyura ngayuku tjiipi tjuṭa wiya. ²⁷ Palu ngayuku tjiipi tjutangku ngayunya wangka kulilpai. Nyara palumpa tjanampaña ninti. Nyara tjananiya kulira wañalpai nintingku. ²⁸ Kañña tjananya wankarunkuku Godala tjungu titutjara nyinanytjaku, kaya wiyaringkuwiya alatjitu nyinaku. Ka kutjupangku tjananya puṭu ngayulanguru tjulyara katiku. ²⁹ Panya Mamaluni palunya tjananya ngayunya ungu. Paluru panya pułka mulapa uwankarangka waintarira nyinanyi, ka kutjupangku tjananya Mamalanguru puṭu tjulyani. ³⁰ Panya Mamanya ngali kutjuṭu nyinanyi.”

³¹ Kaya Jewku mayatja tjutangku nyangatja kulira piruku miilarara apu mantjinu Jesunya atuntjikitjangku. ³² Ka paluru tjanala wangkangu, “Ngayulu tjuta-ařangku Mamalu nintinnyangka wiru tjuṭa palyaningu nyura nyakula nintiringkunytjaku. Kañña nyura nyaa palyannyangka miilarara atuntjikitjangku kulini?”

³³ Kaya Jewku mayatja tjutangku wangkangu, “Wiya, nganana nyuntunya wiru tjuṭa palyannyangka atuntja wiya, palu nyuntunku walytjangku Godanmankunyangkala nyuntunya atulku. Nyuntun Godanya wiya, wati mantatja alatjiitu.”

³⁴ Ka Jesulu wangkangu, “Wiya kulila! Panya nyurampa tjukurta alatji ngaranyi Godalu iriti wangkanytja,

‘Nyura panya mayatja tjuṭa nyinanyi ngayunya purunypa.’ *

³⁵ Nyangatja paluru iriti wangkangu anangu tjutangka, kala mulamularinganyi tjukurpa nyanga palumpa nyiri milmilta ngarinyangka, panya Godaku tjukurpa tjukaruru alatjiitu. ³⁶ Kañña ngayunya Mamalu ngurkantara mantakutu iyanu. Kañña nyura nyaaku tjapira ngurini Godanya kuramankunyangka-palku? Wiya, ngayulu natju tjukarurungku Godaku katjanmananyi. ³⁷ Tjinguru ngayulu walytjangku kulira palyannyangkampa nyura palya mulamularingkuwiyangku wantima. ³⁸ Palu Mamalu wangkanyangkana ngayulu kulira wiru tjuṭa palyani, ka nyura uti palyannyangka nyakula ngayuku mulamularingama. Palya ngayulu wangkanyangka nyura puṭu mulamularinganyi, palu miracle tjuta witulya pułkangku palyannyangka nyakula nyura uti mulamularingama. Panya nyura mulamularingkulampa uti mulapa kuliklu Mamanya ngali kutjuṭu nyinanytja. Panya Mamanya ngayula tjungu nyinanyi, ka ngayulu Mamala tjungutu nyinanyi.”

* **10:22** Panya iriti ngura kutjupitja tjutangku timpula nyanga palunya tjulyara anga-tjirkara kanyiningi yiya mañkurtu. Kaya palulanguru yiya mañkurpa wiyaringkunyangka małakungku mantjira tjana pukularingu munuya nyara palulanguru inma pułka palyalkatingi nyiñga kutjupa nyiñga kutjupa-ara nyanga palunya kulintjikitjangku. * **10:34** Psalm 82:6

³⁹ Kaya nyangatja kulira Jewku mayatja tjuta piruku Jesunya witintjikitja ilaringu. Palu paluru anangu tjutangka unnguwanu kumpira anu, kaya putu witiñu.

⁴⁰ Palulanguru Jesunya uru Jordanta itipirira malaku wirkanu ngura panya nganmanytju Johntu anangu tjuta baptise-katintjala, munu nyinangilta nyara palula. ⁴¹ Kaya anangu tjuta pitjangu palulakutu kulintjikitja. Munuya kulira wangkangi, “Johntu panya miracle tjuta palyantja wiyangku wantingi munu wati nyanga palunya wangkara pulkanmanangi. Kala kulini panya paluru nganmanytju wati nyanga palunya tjakultjunkunytja tukaruru mulapa.” ⁴² Kaya palulanguru tjuta mulatu kulira palumpa mulamularingu ngura nyara palulalata.

11

Lazarusanya Ilunytja

¹⁻² Ka wati ini Lazarusanya munu palumpa malanypa kutjara Mary-nya pula Marthanya kulu ngura ini Piitjanila nyinangi. (Mary-nya minyma panyatja, panya paluru Jesunya pañti wirungka tjina nyititu munu mangkangka muñinu.) Ka Lazarusanya pikatjararingu munu ngaringi ngurangka. ³ Ka pula kangkururangku witura iyanu wati kutjupa Jesula ankula ma-tjakultjunkunytjaku. Ka ankula ngura panya Jordanta muñkara Jesunya nyakula wangkangu, “Mayatja, nyuntumpa panya malpa wiru pika pulka ngarinyi.”

⁴ Ka paluru alatji wangkanyangka kulira wangkangu palumpa nintintja tjutangka, “Wiya, pika nyara palulanguru paluru ilunytja wiya. Palu nyangatja ngaranyi anangu tjutangku nyakula Godanya mirawañinytjaku witulya pulkanya munu ngayunya kulu walkuntjaku palumpa katja.”

⁵ Panya Jesunya Marthaku pulampa Mary-ku pulkara mukuringkupai palumpa pulampa kutaku kulu, ⁶ palu pikatjara ngarinyangka kulira paluru wantira ma-nyinangi ngura palulatu tjintu kutjara. ⁷ Munu palulanguru tjintu kutjara wiyaringkula wangkangu palumpa nintintja tjutangka, “Palya, kuwarila malaku ara manta panya Judealakutu.”

⁸ Kaya nintintja tjutangku wangkangu, “Wiya, Nintilpai wanyu kulila, panya kuwarintaya Jewku mayatja tjutangku nguriningi atuntjikitjangku, kan nyaaku piruku malaku ananyi?”

⁹ Ka Jesulu wangkangu, “Wiya, wanyuya kulila, panya tjinturingkunyangka kañala waña ngarapai. Ka nyura kañala parañgarapai punkantja wiya, panya kañalangku irnyannyangka nyura uti nyanganyi. ¹⁰ Palu mungangka para-ngañala nyura tili wiyangka punkalku.” ¹¹ Alatji Jesulu tjanala wangkara piruku wangkangu, “Nganampa panya malpa Lazarusanya kunkunaringu, kaña kuwari ankula palunya wankalku.”

¹² Kaya nintintja tjutangku wangkangu, “Wiya Mayatja, tjinguru paluru kunkunarisampa palyaringama paluru kutju.”

¹³ Palu panya Jesulu kunkunaryntja wangkara Lazarusanya ilunytja wangkangi, kaya nintintja tjutangku kuliningi kunkunpa mulapa-palku.

¹⁴ Ka Jesulu utingku tjanala wangkangu, “Wiya, Lazarusanya kunkunpa wiya ilungu alatjiñu. ¹⁵ Palu palyanya tjintu kutjara pañara nyinangi palulakutu ankunytja wiya, panya nyanga palulanguru nyura nintiringkula ngayuku mulamularingu. Panya nyura nintiringkunytjakuña rawa nguwanpa pañara nyinangi. Palu kuwarila ara nyara palulakutu.”

¹⁶ Ka nintintja kutju ini Thomasanya nyinangi tjanala tjungu. Paluru ini kutjupa Titimatjanya. Nyanga paluru wangkangu nintintja kutjupa tjutangka, “Palyala ankula nganampa nintilpaingka tjungu uwankara iluma.”

Jesulu Lazarusanya Wankara Pakaltjingantja

¹⁷ Kaya palulanguru Jesunya tjana ma-pitjangu Piitjanilakutu, munuya wirkara kulinu Lazarusanya miri ngañmanytju kulpingka tjarpatjunkunytja. Ka wati paluru miri ngaringi tjintu kutjara kutjara kulpingka.

¹⁸ Ka ngura nyanga Piitjaninya panya Jerusalemala itingka, ¹⁹ kaya nyara palulanguru Judeanya ngurara tjuta pitjangu Marthanya pula Mary-nya pinkuringkula tjituru-tjituru nyinanyangka pukulkankunytjikitja.

²⁰ Ka Marthanya Jesunya ngalya-ilaringkunyangka kulira pakara anu palumpa ngaparikatinytjikitja, ka Mary-nya walingka nyinangi ankunytja wiya. ²¹ Ka Marthalu Jesula ngaparikatira wangkangu, “Mayatja, nyuntu tjinguru ngura nyangangka nyinanyangkampa Kutanya ilunytja wiya wanka nyinama. ²² Palu ngayulu kuvari nyanga nyuntula kulira mulamularinganyi nyuntu Godala tjapinnyangka, ka paluru kuvari witulya pulkangku kutjupa kutjupa palyalku nyuntumpa.”

²³ Ka Jesulu wangkangu, “Nyuntumpa kuña piruku ilunytjatjanu wankaringkula pakalku.”

²⁴ Ka Marthalu wangkangu, “Uwa, mulapa paluru ilunytjatjanu ngula pakalku tjintu małatjangka miri tjuta pakannyangka.”

²⁵ Ka Jesulu wangkangu, “Ngayuluña ilunyangka wankara pakaltjingal-painya, ka anangu ngayuku mulamularingkulampa ilunytjatjanu wankaringkula wanka mulapa nyinaku. ²⁶ Munu anangu wanka nyinara ngayuku mulamularingkulampa ilunytja wiya Godala tjungu wanka titutjara nyinaku ngayulu purunypa. Kan tjukurpa nyangatja kulira mulamularinganyi?”

²⁷ Ka wangkangu, “Uwa Mayatja, kulinina. Ngayulu mulamularinganyi nyuntumpa panya nyuntu Christanya Godaku katja, panya paluru iriti kalkunu nyuntu mantakutu pitjala anangu tjuta wankarunkunytjaku.”

²⁸ Mununku nyangatja wangkara ankula altingu palumpa malanypa Mary-nya munu palula kutju purkarangku tjakultjunu, “Awa! Nintilpainya panya pitjangu mununku nyuntumpa ngurini wangkanytjikitjangku.” ²⁹ Ka Mary-nya nyangatja wangkanyangka kulira pakara warpungkula anu Jesunya nyakunytjikitja. ³⁰ Ka Jesunya panya palulatu kuwaripa ngarangi panya Marthalu palunya ngaparikatira nyakunytjala. ³¹ Kaya anangu tjutangku walingka tjungu nyinanytjatjanungku nyango Mary-nya mapalku pakara ankunyangka munuya pakara wañanu kulira, “Kulpikutumanti ananyi ulanytjikitjampa.”

³² Ka Mary-nya Jesula ma-wirkanu munu tjinangka wañungařakatira ulara wangkangu, “Mayatja, nyuntu tjinguru ngura nyangangka nyinanyangkampa Kutanya ilunytja wiya wanka nyinama.”

³³ Ka Jesunya Mary-nya tjana palumpa malpa tjuta ulara wañinyangka nyakula kurunpa tjituru-tjitururingu. ³⁴ Munu wangkangu, “Yaaltjingka nyura tjunutjunu?”

Kaya wangkangu, “Mayatja, pitjala nyawa.”

³⁵ Ka Jesunya ulangu. ³⁶ Kaya anangu tjutangku ulanyangka nyakula wangkangu, “Nyawayu, paluru palumpa malpaku pulkara mukuringanyi.”

³⁷ Palu tjarangkuya wangkangu, “Nyanga paluru panya wati kuru pati alalpai. Uti nyangangku nganmanytjulpi panya pitjala pampurā palyarungunma ilunytjaku-tawara.”

³⁸ Ka alatji wangkanyangka Jesunya piṟuku pułkara tjiturū-tjitururingu, munu kułpikutu ilaringkula nyangu tjaangka apu tjiwa pułka angatjunkuntyja. ³⁹ Munu paluru wangkangu, “Apu palaya kitikitila.”

Ka Marthalu piñkungku panya wangkangu, “Wiya Mayatja, wanti. Kuwari uña pułka ngalya-paṇtīnyi. Nyanga paluru panya tjintu kutjara kutjara ngaringi kułpi nyangangka.”

⁴⁰ Ka Jesulu wangkangu, “Wiya, panya wangkanguanta, nyuntu mulamularingkula nyakuku Godalu witulya pułkangku palyannyangka.”

⁴¹ Kaya mulapatu apu panya tjaangka angatjunkuntyja kitikitinu. Ka Jesulu ira-nyakula wangkangu, “Mama, wirungkun ngayulu wangkanyangka tiṭutjarangku kulilpai. ⁴² Ngayulu ninti panya nyuntuñin tiṭutjarangku kulilpai. Palu nyanga tjapiniñanta anangu nyanga tjungu ngaranytjalu tjana kułira mulamularingkuntyjaku nyuntu panya ngayunya iyantjtjaku.”

⁴³ Munu nyangatja wangkara pułkara mirangu, “Lazarus! Ngalyapakala!”

⁴⁴ Ka wati panya miri paluru ngalya-pakañu maṛa tjina kuļu mantarangka karpintja, yunpa kuļu patintja mantarangka. Ka Jesulu tjanala wangkangu, “Araltjaraya mantara pala munu walatjura.”

Jesunyaya Pungkunytjikitjangku Wangkanytja

(Matthew-ku 26:1-5; Markaku 14:1-2; Luke-aku 22:1-2)

⁴⁵ Kaya anangu panya Judealanguru Mary-la pitjala nyinanytja tjuṭangku nyangu Jesulu palyannyangka munuya palumpa mulamularingu. ⁴⁶ Palu tjarangkuya mulamularinguwiyangku wantingi munuya Paratji tjuṭakutu małaku ankula tjanala ma-tjakultjunu panya Jesulu Lazarusanya pakaltjingantja. ⁴⁷ Kaya Paratji tjuṭangku tjukurtjara kuranyitja tjuṭangku kuļu tjlpi tjuṭa altingu Jewku mayatja tjuṭa, munuya wangkara kuliningi, “Yaaltjingalkula wati nyangatja? Paluru panya miracle tjuṭa witulya pułkangku palyani, kaya tjuṭa palumpa mulamularinganyi. ⁴⁸ Ka tjinguru nganaña palunya paintja wiyangku wantinyangkampa anangu winki palumpa mulamularingkuku, ka Rome-aku mayatja tjuṭangku kułira warmała iyalku, kaya pitjala nganampa timpula piłuntara wiyaliku, munu nganañanya kuļu iluntankuku.”

⁴⁹ Ka wati Kayapatjanya tjukurtjara tjuṭaku mayatja pułka tjanala tjungu nyinangi munu alatji tjanala wangkangu, “Nyura ngurpa alatjitu.

⁵⁰ Nyaaku nyura rawangku putu kulini? Uti nyura nyanga alatji kulinma panya wati kutju palya iluniyi nganampa ngalkilpa anangu Jew uwankaraku, nganaña uwankara wiyaringkuntyjaku-tawara.”

⁵¹ Nyanga alatji palurunku walytjangku kułira wangkanytja wiya. Palu Godalu palula nintinnyangka kutju paluru tjukurtjara pułkangku tjukarurungku tjakultjunu panya Jesunya ngalkilpa anga-ilunytjaku anangu Jew tjuṭaku.* ⁵² Palu tjanampa kutju wiya Godaku walytja uwankaraku anangu manta winkitjaku Jesunya anga-iluku, paluru tjana uwankara kutjuringkula walytjarara nyinanytjaku.

* **11:51** Tjukurpa nyanga palunya wati tjukurtjara pułkangku watarkungku wangkangi, panya paluru kampa kutjupa kuliningi Rome-anya ngurara tjutangka-tawara Jesunya iluntankuntyjikitjangku.

⁵³ Kaya tjintu nyara palulanguru Jewku mayatja pulka tjuṭangku tjanā kutjuringkula kukanymānangi Jesunya iluntankunytjikitjangku. ⁵⁴ Ka nyangatja kulira Jesunya ngura Jerusalemala tjanala ngura ititja tjuṭangka piruku uti para-ngaranytja wiya panya tjanā nyakunytjaku-tawara. Munu ngura nyara palunya tjananya wantikatira anu tawunu panya ini Ipuraimalakutu ilytjingka tjangaṭi,* munu ngura nyara palulalta nyinangi palumpa nintintja tjuṭangka tjungu.

⁵⁵ Ka Jew tjuṭaku inma Katuwanu Ankunytjanya ngaranytjaku ilaringu, kaya anangu tjuṭa ngura winkinguru Jerusalemalakutu ma-pitjangu inma kuwaripangka puntu munu mantara kuļu paltjira inmaku ritiringkunytjikitja. ⁵⁶ Kaya nyara palula arā Jewku mayatja tjuṭangku Jesunya nguriningi munuya timpulangka tjunguringkula Jesunya puṭu nyakula tjananku ngaparku wangkangi, “Yaaltji nyura kulini? Paluru tjinguru inmaku pitjanytja wiya ma-nyinanyi.” ⁵⁷ Palu panya tjukurtjara kuranyitja tjuṭangku Paratji tjuṭangku kulukuluya anangu tjuṭangka wangkangi, “Jesunya nyakulampaya nganañala pitjala tjakultjura.” Alatji tjanā wangkangi kutjupangku Jesunya nyakula tjakultjunkunyangka ankula palunya witintjikitjangku.

12

Jesunya Mary-lu Panti Wirungka Tjina Nyitintja (Matthew-ku 26:6-13; Markaku 14:3-9)

¹ Ka inma panya Katuwanu Ankunytjanya ilaringangi. Ka tjirirpi mañkur-mañkurpa kuwaripangka Jesunya anu ngura Piitjanilakutu. (Nyara palula panya Jesulu Lazarusanya nganmanytju ilunyangka pakaltjingaṇu.) ² Kaya Jesunya nyakula palumpa malpa tjuṭa palumpa pulkara pukularingu munuya mungartjirinyangka mai pulka palyanu palula tjunguringkula ngalkuntjikitjangku. Ka Marthalu tjananya mai para-ungangi, ka Lazarusanya tjanā uwankaratu para-nyinara wañanu Jesula tjungu. ³ Ka nyanga palula małangka Mary-lu pakara uwila wiru pañtipai mantjira ngalya-katingu patala warangka. Uwila nyanga paluru mani pulkangka payamilantja. Ka Mary-lu patala alara uwila panya palunya Jesula tjinangka tjinangka tjuṭangku munu mangka araltjara tjina muñinu mangkangka. Ka wali nyara palula ruuma uwankarangka wiru mulapa pañtingu.

⁴⁻⁵ Ka nintintja kutjupa Judas Kariyatanya tjanala tjungu nyinangi. (Nyanga paluru panya ngula Jewku mayatja tjuṭa Jesunya witintjaku nintinu.) Munu paluru wangkangi Mary-nya, “Ai! Uwila palatja mani pulkatja. Utin tjalamilanma pupatjura wiyantra wiyantra. Tjingurun tjalamilara mani pulka mantjinma munun ngaltutjara tjuṭa ungama.” ⁶ Palu Judasanya ngaltutjara tjuṭaku ngalturingkupai wiya, munu tjukurpa nyanga palunya ngunti wangkangi mani tjanampa kutitjunkupaingku. Panya paluru nintintja tjuṭaku yakutja manitjara kanyilpai munu nyara palulanguru kutjupa-arā kutitjunkupai.

⁷⁻⁸ Ka Jesulu wangkangi, “Wanti minyma nyanga palunya pailwiyangku. Panya paluru tjintu nyanga kuwariku uwila wiru pañtipai kanyiningi

* **11:54** Ngura Ipuraimanya panya tawunu nganytjar-nganytjarpa mulapa ngarangi, ka tawunu kutjupa muñkara ngaranytja wiya manta ilytji kutjulta ma-ngarangi.

ngayula ngañmanytju tjutintjikitjangku ngula panya kurulta ngarintjaku.* Ka panya ngaltutjara tjuṭa nyurala tiṭutjara nyinanyi, palu ngayulu nyurala rawa nyinanytja wiya.”

Lazarusanya Pulanya Pungkunytjikitjangku Wangkanytja

⁹ Kaya nyara palula ara anangu winkingku kulinu Jesunya ngura Piitjanila nyinanytja. Munuya palunya nyakunytjikitja anu, palunya kutju wiya palu Lazarusanya kuļu. Panya Jesulu ngañmanytjulpi ilunytjitja pakaltjingantja kulintjatjanuya nyakunytjikitja mukuringangi. ¹⁰ Kaya palulanguru tjukurtjara kuranyitja tjutangku tjunguringkula wangkara kuliningi Lazarusanya pulanyaṭu iluntankunytjikitjangku. ¹¹ Panya Lazarusanya miri pakaltjingannyangkaya anangu winki Jesuku mulamularingu munuya Jewku mayatja tjuṭa kulilwiyangku wantingi. Kaya palulanguru kukanymanu pungkunytjikitjangku.

Jesunya Jerusalemalakutu Tangkiyingka Tatira Ankunytja (Matthew-ku 21:1-11; Markaku 11:1-11; Luke-aku 19:28-40)

¹²⁻¹³ Ka tjiṇtungka Jesunya pakara ma-pitjangi Jerusalemaku. Kaya anangu tjuṭa mulapa Jerusalemala nyinangi inma panya Katuwanutjaku. Munuya Jesunya ngalya-pitjanyangka kulira uwankara ngaparikatingu parkatjara, nyalpi lipi tjuṭa katara katara palunya pukularira walkuntjikitja. Munuya pukularira mirara wangkangi, “Godanyala walkura mirawanima!

Ka Mayatja God, nyanga palunya pulkara pukułmanama,
panya nyuntu palunya iyanu nganañanya mayatjarira kanyintjaku,
Israelku mayatja pulka nyinanytjaku.”

¹⁴ Ka Jesulu tangkiyi kuļunypa ngaranyangka nyakula tatira ma-pitjangu, panya nyiringka iriti walkatjunkunytja ngaranyi nyanga alatji,

¹⁵ “Jerusalemania ngurara tjuṭaya nguluringkunytja wiya raparingama! Nyawaya nyara nyurampa Mayatja Pulka pitjanyi tangkiyi kuļunypangka tatira.” *

Ka Jesunya ara nyanga iriti walkatjunkunytjitanwanu tangkiyingka tatira ma-pitjangi. ¹⁶ Kaya ngañmanytju palumpa nintintja tjutangku nyanga alatjirinyangka nyakula puṭu kuliningi, “Nyaakuya nyangatja alatjingani anangu winkingku pulkara mirawanira tangkiyingka pitjanyangka?” Palu ngula Mamalu palunya ilkarikutu katinyangka kutjuya kulira nintiringu, “Munta-uwa panya, panya iriti walkatjunu wangkatjarangku ara nyanga palunya, ka panyaya tjukarurungku anangu winkingku mirawaningi palunya tangkiyingka tatira ankunyangka.”

¹⁷⁻¹⁸ Uwa, anangu winkiya tjunguringkula ngaparikatingu Jesunya nyakunytjikitja. Panya tjana kulinu Jesulu kunyu Lazarusanya miri kuļpinguru pakaltjinganu. Kaya kutjupa tjutangku nyara palula ila ngaranytjatjanungku nyangu Lazarusanya pakannyangka munuya anangu tjutangka rawangku tjakultjunangi nyakunytjatjanungku. Kaya tjukurpa palunya kulintjatjanu Jesulakutu ngaparikatingu anangu winki mulapa. ¹⁹ Kaya Paratji tjutangku tjananya ankunyangka nyakula wangkangi, “Nyawaltaya wanyu! Nyara anangu winki mulatuya palunya wañani. Kala nyuntu nganaña puṭu tjananya markuni.”

Jesulu Palurunku Ilunytjikitjangku Wangkanytja

* **12:7-8** Jew tjutangkuya tjakangku anangu ilunyangka malangka uwila wiru paṇtipai puntungka tjutilpai wiruringkula ngarinnytjaku. Ka Jesulu palurunku ilunytjikitjangku kulira nyangatja ngañmanytju wangkangi. * **12:15** Tjakarayaku 9:9

²⁰ Kaya tjara kutjupa Jew wiya tjuṭa pitjangu Jerusalemalakutu inma Katuwanutjaku Godanya walkuntjikitja. ²¹ Munuya Jerusalemala nyinara Jesunya nyakunytjikitja mukuringangi. Munuya ankula nintintja kutjungka Philipala wangkangu, “Wati wiru, nganaṇa Jesunya nyakunytjikitja mukuringanyi.” (Wati nyanga Philipanya panya tawunu ini Pitjaitalanguru uru panya Galileela itingka.) ²² Ka Philipalu ankula Andrew-la wangkangu, munu pula ankula Jesula tjakultjunu.

²³ Ka Jesulu nyanga alatji wangkangu, “Panyatja ilaringu panya ngayunya Watiku Katjanya pulkara mirawañinytjaku. ²⁴ Mulamulangkuṇa nyurala wangkanyi, panya uṇinypa mantangka tjunkuwiyangku wantinyangka uṇinypa paluru rawa ngarira kuraringanyi munu puṭu pakara maitjararinganyi. Palu panya uṇinypa mantangka tjunkunyangka mīri panya ngañmanyitja wiyarinkupai, ka kutjupa unngutja kuwaritja pakara pulkaringkula maitjararingkupai. ²⁵ Ka anangu kutjupangku tjinguru alatji kulilk, ‘Ngayulunatju pulkara pukularinyi mantangka nyanga nyinara. Wanyu kañatju ngayulu walytjangku aṭunyamanama.’ Palu alatji kulira paluru ngayunya wantinyi, ka Godalu palunya ngula ilunyangka puṭu wankani palula tjunguringkula tiṭutjara nyinanytjaku. Ka anangu kutjupangku tjinguru alatji kulilk, ‘Nyangatjaṇa mantangka unytju kutju nyinanyi. Wanyu kaṇa Jesunya tiṭutjarangku wañanma, kaṇi palya kutjupangku ngayunya iluntankuku.’ Ka alatji kulinnyangka Godalu ngula ilunyangka palunya wankara pakaltjingalku palula tjungu tiṭutjara wanka nyinanytjaku. ²⁶ Uwa, anangumpa ngayuku war̄karinytjikitja mukuringkula uti paluru ngayunya wangañarangku kulira wañanma. Nyara palulanguru paluru ngayula tjungu tiṭutjara nyinaku. Katju Mamalu palunya nyakula palyanmankuku ngayuku wiruṛa wangañara war̄karinyangka.

²⁷ “Kuwarina kurunpa tjituru-tjitururira puṭu kulini, ‘Nyaana wangkaku?’ Tjinguruṇa wangkaku nyanga alatji, ‘Mama, aṭunymaranı kanyinma ilunytjaku-tawara.’ Palu wiya, nyanga palunyakitja panya alatjiṭuna pitjangu mantakutu. ²⁸ Mama, nyuntunku tjanala nintila panya nyuntun pulka mulapa uwankarangka waintarintja.”

Ka palulanguru ilkaringuru wangkangu, “Uwa, ngañmanytjuṇa tjanala nintinu mununa piriku nintilku ngula uwankarangku nyakunytjaku.”

²⁹ Kaya anangu tjuṭangku palula ila ngaranytjatjanungku kulinu ilkaringuru wangkanyangka, munuya tjarangku wangkangu, “Tjinguru palatja mina tuuṇi!” Kaya kutjupa tjarangku wangkangu, “Wiya, tjinguru angeltu palula wangkanyi.”

³⁰ Ka Jesulu tjanala wangkangu, “Wiya, nyara ilkařinguṛu wangkangu ngayulu kulintjaku wiya, palu nyura kulira mulamularingkunytjaku.

³¹ Panya kuvari Godalu anangu uwankara manta winkingka ngurkantara tjarantjaku ngaranyi. Munu paluru manta winkiku mayatja Satannga ma-waṇiku. ³² Panya ngayunyanija katura utitjunkuku, kaṇa nyara palula ara ngayulu anangu uwankara kampa kutjupankuku kulira ngayulakutu pitjanytjaku.” ³³ Nyanga alatji Jesulu tjanala utingku tjakultjunangi ngula palunya puṇu kaṭakutjarangka wakara utitjunkunytja.

³⁴ Kaya anangu tjuṭangku tjukurpa nyanga palunya kulira wangkangu alatji, “Panya iriti walkatjunkunytja nyiringka ngarinyi alatji panya Christanya kunyu Godalu panya kalkuntjanya ilu wiya alatjitu wanka tiṭutjara nyinaku. Kan nyaaku wangkanyi Watiku Katja puṇungka utitjunkunytjaku? Ngananya wanyu Watiku Katja paluru?”

35-36 Ka palulanguru Jesulu tjanala wangkangu alatji, “Ngayulu tili purunytju irnyara nyuranya nintini Godaku nintiringkunytjaku. Palu tili nyanga paluru kuwari nguwanpa irnyara wiyaringanyi, ka nyura uti tili ngaranyangka Godalawanu tjukaruru nyinama tilingka purunypa. Panya tili wiyaringkunyangka mungawalururinyi, ka panya anangu mungawalurungka ngarala puṭu kulini, ‘Yaaltjikutuña ankuku?’ Ka pala palula-tawara nyura uti ngayuku mulamularingama tili panya Godaku ngayulu nyurala nyinanyangka, munu nyara palulanguru mulamularingkula nyura ngayula tjunguringkula nyinaku tilingka purunypa ngayuku walytja tjuṭa.” Munu tjukurpa nyanga palunya wangkara wiyaringkula Jesunya kumpira anu kutjuringkula.

Jew Tjuta Jesuku Rawa Puṭu Mulamularingkunytja

37 Uwa, Jesulu tjuta-arangku witulya pulkangku miracle tjuta palyanangi anangu tjutangka mirangka. Kaya uti nyakula palumpa mulamularingama, palu tjana kulira mulamularingkunytja wiyangku wantingi.

38 Palu wantintytja nyanga palunya Godaku wangkatjarangku Aitjayalu iriti walkatjunu nyanga alatji,

“Kulilaya! Ngayulu panya nyurala tjukurpa wangkanyangka nyura uwankarangku kulira mulamularingkunytja wiyangku wantingi.

Munu panya nyura Godalu witulya pulkangku palyannyangka nyakunytja wiyangkuwantingu.” *

39 Nyanga palulangurya puṭu mulamularingangi panya Aitjayalu ngañmanytju Godala kulintjatjanungku walkatjunu. Munu panya paluru piṛuku walkatjunu nyanga alatji,

40 “Godalu tjananya kuru patinu nyakunytjaku-tawara.

Munu tjananya pina patinu pina ałangku kulintjaku-tawara.

Alatji Godalu wangkangu,

‘Paluru tjana ngayulakutu małaku ařuringkunytja wiya ngayulu tjananya palyarunguntjaku.’ ” *

41 Nyangatja Aitjayalu ngañmanytju walkatjunu Godalu palunya nintingku tjakultjunkunyangka ngula Jesuya witulya pulka utiringkunytjaku. Palulanguru Aitjayalu tjukurpa nyanga Jesunyatjara ngañmanytju kulintjatjanungku walkatjunu.

42 Palu tjutaya Jesuku mulamularingu, Jewku mayatja kutjupatjara kulukulu. Palu paluru tjana mulamularingkunytjatjanungku kutjupa tjutangka para-tjakultjunkunytja wiya, panya paluru tjana Paratji tjutaku nguluringangi palunya tjananya wali inmatjanguru paira iyantjaku-tawara. 43 Utiya tjakultjunama alatjitu unngu kutju kulintja wiyangku, Godanya tjanampa pukularinityjaku. Palu tjana wantingi Paratji tjuta kutju tjanampa pukularinityjaku kulira.

Jesuku Tjukurpa Wantinyangka Godalu Ngurkantankupai

44 Ka Jesulu pulkara katuwanungku wangkangu, “Nyura ngayuku mulamularingkulampa ngayuku kutjuku mulamularingkunytja wiya, palu panya ngayunya iyantjikitja kułu mulamularinganyi. 45 Panya nyura ngayunya nyakula nyara ngayunya iyantjanya kułu nyanganyi.

46 Ngayuluña mantakutu pitjangu tili irnyantjikitja, anangu tjuṭa mungawalurungka nyinanytjaku-tawara. Panya tjana ngayuku mulamularingkula tilingka nyinaku. 47 Palu anangungku ngayuku tjukurpa

* 12:38 Aitjayaku 53:1 * 12:40 Aitjayaku 6:10

kulira wantinyangka ngayulu pala palunya ngurkantara kuranmankunytja wiya. Panya ngayulu anangu tjuta wankarunkunytjikitja pitjangu ngurkantara tjarantjikitja wiya. ⁴⁸ Palu tjinguru anangungku ngayuku mulamularingkuwiyangku wantinyi munu tjukurpa ngayuku anañi, ka kutjupa palumpa pañara nyinanyi palunya ngula tjintu mañatjangka ngurkantankunytjikitja. Panya nyara palula arangka Godalu palunya kura ngurkantara pailku ngayuku tjukurpa kulira wantintjtjanguru. ⁴⁹ Palu ngayuluña kutjungku kulira wangkanytja wiya, panya Mamalu ngayunya iyanu palumpa tjukurpa kutju wangkanytjaku kaña tjukurpa palunya kutju tjakultjunanyi palula kulintjatjanungku. ⁵⁰ Ngayulu ninti panya palumpa tjukurtu anangu tjuta wankaru kanyilpai. Ka nyura tjukurpa palumpa mulamularingkulampa wanka titutjara nyinaku palula tjungu. Palulanguruña Mamalu ngayula wangkanyangka kutju tjukarurungku wangkapai.”

13

Jesulu Palumpa Nintintja Tjuta Tjina Paltjintja

¹ Ka panya inma Katuwanu Ankunytjanya ilaringu. Ka Jesulu unngu kuliningi, “Kuwari ilaringu ngayulu manta nyangatja wantikatira Mamalakutu ankunytjaku.” Munu paluru palumpa panya malpa tjuta unngu kuliningi, panya paluru tjanampa rawa pulkara mukuringangi ilunytjakutu alatjiitu.

² Ka munga pala palula Jesulu tjana palumpa nintintja tjutangku kuļu tjunguringkula mai ngalkuningi. Ka mamu Satantu panya nganmanytju Judasanya wituwituňu Jesunya manikitjangku Jewku mayatja tjuta nintintjaku. (Judasanya panya Simon Kariyataku katja.) ³ Ka Jesunya ninti panya palumpa Mamangku palunya mayatja pulka tjunu uwankarangka waintarira witulya pulka nyinanytjaku. Munu palurunku nintingku kuliningi panya paluru Godalanguru pitjanytjatjanungku Godalakutu malaku ankunytjikitjangku. ⁴⁻⁵ Munu palulanguru paluru pakara mantara katutja araltjanu, munu taula mantjira palurunku karilpa karpinu munu pitingka mina tjutinu. Munu palulanguru tjananya kutju kutju tjina paltjiningi, palumpa nintintja tjuta, munu tjananya taulangka tjina muñiningi. ⁶ Munu para-paltjira wañara Simon Peterla wirkana, ka Peterlu wangkangu palula, “Nyaa Mayatja, ngayunya kuļun tjina paltjini?”

⁷ Ka Jesulu wangkangu, “Kuwarin putu kulini ngayulu nyanga tjina nyuranya paltjinnyangka. Palu ngulan kulini nyanga palunya.”

⁸ Ka Peterlu wangkangu, “Wiya, paltjintja wiyangkuñi wantima!”

Ka Jesulu ngapartji wangkangu, “Palu ngayulu nyuntunya paltjintja wiyangku wantinyangkampa nyuntu ngayuku walytja wiya alatjiitu.”

⁹ Ka palulanguru Simon Peterlu wangkangu, “Uwa Mayatja, ngayunyanji tjina kutju paltjintja wiyangku, mara, kata kuļu uwankara paltjila.”

¹⁰ Ka Jesulu wangkangu, “Tjinguru anangungku walytjangku puntu winki nganmanytju paltjintjatjanungku piruku paltjintja wiya, panya alatjiitu paluru kilina wiru nyinanyi. Palu tjina kutju palya paltjini iwarangka pitjanytjatjanungku. Ka nyura uwankara kilina nyinanyi, palu nyuralanguru kutju kilina wiya.” ¹¹ (Panya Jesulu nintingku kuliningi nganalu kuvari Jewku mayatja tjutangka palunya witintjaku nintilku. Palulanguru paluru wangkangu, “Panya nyuralanguru kutju kilina wiya nyinanyi.”)

¹² Munu Jesulu tjananya tjina paltjira wiyingkula mantarangka malaku tjarpangu munu arangkatu nyinakatingu. Munu tjanala wangkangu, “Nyura wanyu nyangatja tjukarurungku kulini ngayulu nyanga nyuranya tjina paltjintja?” ¹³⁻¹⁴ Kulilaya! Panya ngayunya nyura mayatjanmankupai, munu panyañi nyura wangkapai ‘Nintilpai.’ Nyangatja nyura tjukarurungku wangkapai, panya mulapa ngayulu nyurampa mayatja, munu panyaña nyuranya nintilpai. Palu kuwari nyangaña nyurampa war̄karipai purunytpu nyuranya tjina paltjinu, ka nyuranku uti palu purunypaÑu tjina paltjinma. ¹⁵ Alatjituña nyurampa utira wantingu nyura nyakunytjatjanungku ngayunya arkara palu purunypaÑu nyura palyantjaku mayatja-mayatjangku wiya panya war̄ka purunytpu. ¹⁶ Tjukarurungkuña nyurala wangkanyi panya wati war̄karipai palumpa mayatjangka waintarinytja wiya. Ka palu purunypaÑu wati panya tjakulpa iyantjanya pulka wiya, palu wati panya witura iyalpaina pulka mulapa palula waintara. ¹⁷ Uwa, kuwari nyanga nyura nintiringu tjukurpa nyangaku, panya ngayulu mayatjangku nyuranya tjina paltjira nintinu nyura palu purunypaÑu palyantjaku. Ka nyura nintiringkunytjatjanungku ngayunya arkara palyannyangka Godalu nyuranya pukulmankuku.

¹⁸ “Ka panya ngayulu nyuranya wangkangu nyura uwankara kilina ngaranytja. Palu uwankara wiya, panya kutju nyuralanguru kura ngaranyi. Ngayulu ninti nyurampa ngayuku nintintja tjuñaku, panya ngayulu nganmanytpu nyuranya ngurkantanu. Palu panya tjukurpa nyiringka iriti walkatjunkunytja ngaranyi nyanga alatji, ‘Wati malpangku ngayula tjungungku mai ngalkupai, nyara paluru kampa kutjuparira ngayuku kuraringu.’ Ka tjukurpa nyanga paluru mulapa kuwari nguwanpa utiringanyi. ¹⁹ Kanä nyangatja nyurala nganmanytpu tjakultjunnanyi tjukurpa nyara paluru utiringkunytja kuwaripangka. Ka nyura malangka kulira ngayuku mulamularingkuku, panya ngayulu panya paluru, Godalu panya kalkuntjanya. ²⁰ Tjukarurungkuña nyurala wangkanyi. Ngayuluña tjakulpa tjuñta witura iyalpai ngayuku tjukurpa tjakultjunkunytjaku. Ka kutjupangku añangu nyara palunya tjananya pukularira altirampa ngayunya kuñu pukultu altinyi. Munu paluru ngayunya altirampa ngayuku Mama kuñu pukultu altinyi panya ngayunya iyantjanya.”

*Jesulu Judasanya Kuraringkunytja Nganmanytpu Wangkanyta
(Matthew-ku 26:20-25; Markaku 14:17-21; Luke-aku 22:21-23)*

²¹ Munu nyanga palunya wangkara wiyingkula Jesunya kurunpa pulkara tjituru-tjitururingu munu tjanala wangkangu, “Tjukarurungkuña nyurala wangkanyi. Kutjungku nyanga nganañalanguru Jewku mayatja tjuñangka nintilku ngayunya witintjaku.”

²² Kayanku nintintja tjuñangku nyanga palunya kulira yunpa kutjupa kutjuparira ngapar-ngaparku nyangangi puñu kulira, “Ngananya nyangangku wangkanyi?” ²³ Ka nintintja kutju Jesula itingka anta-ngaringi palumpa panya malpa mulapa. ²⁴ Ka wati nyara palula Simon Peterlu marangku tjapira wangkangu, “Wati-tjapila! Ngananya palangku wangkanyi?”

²⁵ Ka wati paluru itingka anta-ngarinytjatjanungku ma-ilaringkula palula tjaalymaÑa tjapinu, “Mayatja, wati paluru ngananya?”

²⁶ Ka Jesulu wangkangu, “Nyangananä. Kuwariña mai mantjira tjalatjura unganyi wati panya palunya. Nyara paluruni witintjaku nintilku.” Munu mulapaÑu mai mantjira tjalatjura ungu Judasanya, Simon

Kariyataku katja. ²⁷ Ka paluru marakatira mai mantjinnyangka nyara palula ara Satanna wati nyanga palula tjarpangu. Ka Jesulu wangkangu palula, “Mapalku ankula palyala panya nyuntu palyantjikitjangku kulint-jatjanungku.”

²⁸ Kaya uwankarangku tjungu nyinanytjatjanungku tjukurpa nyanga palunya puṭu kuliningi Jesulu Judasala wangkanyangka. ²⁹ Kutjupa tjarangku kuliningi, “Tjinguru nyangangku Judasanya wituni ankula nganampa mai mantjintjaku, panya paluru yakutja manitjara nganampa kanyilpai.” Kaya kutjupa tjarangku kuliningi, “Tjinguru palunya wituni ankula aŋangu ngaltutjara tjuṭa mani ma-ungkunytjaku.” ³⁰ Ka Judasalu mai lampi Jesulu panya ungkunyangka mantjira ngalkunu munu pakara mapalku anu ʉrirkutu. Ka manta maruringkula munga ngarangi.

Jesulu Tjananku Mukuringkunytjaku Wangkanytja

³¹ Ka Judasanya ankunyangka malangka Jesulu wangkangu palumpa nintintja tjutangka, “Kuwarina Watiku Katjangku wiru mulapa palyalku, kaṇi Godalu pulkara mirawaṇiku. Ka wiru mulapa ngayulu palyanyangka aŋangu tjutangka Godanya palu purunypaṭu pulkara mirawaṇiku. ³² Uwa, tjana ngayulanguru Godanya pulkara mirawaṇiku, ka nyara palula malangka Godalu ngayunya ngapartji mirawaṇiku aŋangu tjutangka mirangka, munu paluru rawangku paṭantja wiyangku mapalkungku palyalku kuwariṭu.”

³³ Munu tjanala piruku wangkangu, “Walytja tjuṭa! Ngayulu kuwari tjukutjuku nyurala nyinanytjatjanu ananyi. Ka nyura ngayunya nguriklu, munu nyura nguriṛa puṭu nyakuku, panya ngayulu ngañmanytu wangkangu Jewku mayatja tjutangka nyanga alatji, ‘Ngayulu nyara ankunytjitatjaku nyura puṭu ngayunya ma-waŋalku.’ Alatjiṇa tjanala wangkangu, kaṇa kuwari tjukurpa pala palunya nyurala kuļu wangkanyi alatji, ‘Nyura ngayunya puṭu waŋalku ngayulu ankunytjitatjaku.’”

³⁴ “Palu kuwariṇa tjukurpa kuwaritja nyurala wangkanyi. Utu nyuranku mukulya pulka nyinama. Panya ngayulu mukulyangku nyuranya atunymara kanyini, palu purunypaṭu nyuranku uti mukulyangku kanyinma. ³⁵ Panya nyuranku alatji ngaltunytju pulka mukuringkunyangka nyakula aŋangu winkingku nintiringkula kulilklu nyura ngayuku nintintja tjuṭa nyinanyangka.”

Jesulu Wangkanytja Peternya Ngula Palumpa Ngurparingkunytjaku (Matthew-ku 26:31-35; Markaku 14:27-31; Luke-aku 22:31-34)

³⁶ Ka Simon Peterlu tjapinu, “Mayatja, yaaltjikutun ananyi?”

Ka Jesulu wangkangu, “Wiya, nyuntu kuwari ngayunya puṭu ma-waŋalku nyanga ngayulu ankunyangka. Palu ngulaṇin waŋalku.”

³⁷ Ka Peterlu wangkangu, “Mayatja, nyaakuṇanta waŋalwiyangku wantir’iyalku kutju ankunytjaku? Ngayulu mukuringanyi nyuntunya waŋantjikitja, mununa palya nyuntunya waŋara nyuntumpa ngalkilpa iluku.”

³⁸ Ka Jesulu wangkangu Peterla, “Palu mulamulangkun wanyu wangkanyi ngayuku ngalkilpa ilunytjikitjangku? Kulila, nyuntulana kuwari tjukarurungku wangkanyi, panya tjintu pakantja kuwaripangka tjulpu panya tjuki wangkapai, ka munga nyanga kuwari tjulpu paluru wangkanytja kuwaripangka nyuntu ngayuku maŋkurara ngurparingkuku.”

14

Jesunya Iwaranya Mamalakutu

¹ Munu piruku Jesulu nintintja tjutangka wangkangu, "Kurunpa iluru-ilururinytja wiyyaya nyinama. Godakuya mulamulariwa, ngayuku kulu.

² Ngayuku Mamaku ngurangka ngura tjuta mulapa ngaranyi, kaña nyara palulakutu ankula ngura tjuta nganmanytju palyalku nyurampa. Nyangatjaña nyurala tjukarurungku wangkanyi, panya mulapa ngura tjuta nyara palula ngaranyi. Ngayuluña nyurala ngunti wangkanytja wiya. ³ Mununa ankula ngura nyurampa-warara palyantjatjanu malakulta pitjaku, mununa nyuranya mantjira katiku ngura nyara palulakutu nyura ngayula tjunguringkula nyinanytjaku. ⁴ Panya nyura ninti iwara panya ngayulu ankunytjtjaku."

⁵ Ka Thomasalu wangkangu, "Mayatja, nganana ngurpa ngura nyara palumpa nyuntu pala ankunytjtjaku. Munula iwaraku kulu ngurpa. Yaaltjingarala nintiringkuku iwara nyara palumpa?"

⁶ Ka Jesulu palula wangkangu, "Ngayuluña iwaranya, panya nyura ngayulawanungku kutju uwankara tjukarurungku kulilkmu nyura ngayula kutju kulira wankaru Godala wirkankuku. Panya ngayulu kutjungku nyuranya wirkakatiku Mamalakutu, kutjupangku wiya."

⁷ Munu piruku tjanala wangkangu nyanga alatji, "Nyura tjinguru ngayuku ninti pulkka nyinarampa ngayuku Mamaku kulu ninti nyinama. Palu nyanganguru nyura Mamaku ninti nyinanyi, munu nyura palunya nyangu."

⁸ Ka Philipalu alatji wangkangu, "Mayatja, wanyulanya Mama palunya nintinma, kala nyakula pukularima."

⁹ Ka Jesulu wangkangu, "Philip, palu wanyu nyuntu ngayunya nyakunytja wiyyatu? Panya ngayulu nyurala tjungu titutjara para-ngarangi, kan ngurpa titutjara nyinanyi? Kulila, kutjupangku ngayunya nyakula Mamanya nyurala nintintjaku? ¹⁰ Palu putun kulini? Mamanya ngali kutjutu tjungu nyinanytja. Panya ngayulu nyurala aratja ma-tjakultjunkupai Mamala kulintjatjanungku. Panya paluru ngayula unngu nyinanyi mununi paluru ngayunya witulyankupai warka palumpa palyantjaku.

¹¹ "Ala, uti nyura mulamularingama ngayulu wangkanyangka, panya Mamanya ngali kutjutu nyinanyi. Palu tjinguru wangkanyangka putu mulamularingkula nyura uti miracle panya tjuta kulinma ngayulu witulya pulkangku palyantja, munu palunya tjananya nyakunytjatjanu mulamularingama ngayulu nyanga wangkanytjtjaku. ¹² Tjukarurungkuña nyurala wangkanyi, anangumpa ngayuku mulamularingkulampa paluru ngayulu puruny^{tu} miracle tjuta witulyangku palyalku. Munu nyanga ngayulu palyantjanya puruny^{tu} kutju wiya kutjupa pulka mulapalta palyalku witulya pulkangku ngayula waintara, panya ngayulu Mamalakutu malaku ananyi. ¹³ Ka nyura ngayuku walytja nyinara ngayula tjinpinnyangka ngayulu kulira nyurampa palyalku. Kaya anangu tjutangku ngayulu palyannyangka nyakula Mamanya pulkara mirawaniku witulya pulkanya. ¹⁴ Uwa, nyura ngayuku walytja tjutangku kutjupa kutjupa tjutaku ngayula tjinpinnyangka ngayulu nyurampa palyalku alatjitu."

Jesulu Kurunpa Milmilku Kalkuntja

¹⁵ Munu piruku Jesulu tjanala wangkangi palumpa nintintja tjutangka, "Nyura ngayuku mukuringkulampa uti wanganarangku kulira palyanma ngayulu wangkanyangka. ¹⁶ Kaña ngayulu Mamala tjalilku, ka nyuranya

unguku Kurunpa Milmilnga nyuranya alpamilantjaku munu nyurala tjungu titutjara nyinanytjaku. ¹⁷ Ka Kurunpa nyanga paluru nyuranya tjukurpa tjukaruru nintilku. Palu anangu panya watarku nyinapai tjuṭa Kurunpa nyanga palumpa puṭu mulamularingkupai. Panya paluru tjana palunya puṭu nyanganyi munuya palumpa ngurpa nyinanyi. Kurunpa nyanga paluru mulapa nyurala tjungu titutjara nyinanyi. Nyara palulanguru nyura palumpa ninti nyinanyi. ¹⁸ Ngayulu nyuranya urtjunu titutjarangku wantikatinytja wiya. Ngayulu ankunytjatjanu malaku pitjaku. ¹⁹ Kuwari nguwanpana ananyi. Kan̄iya watarku nyinapai tjuṭangku piṛuku nyakunytja wiya. Palu nyura ngayunya wanalpai tjutangku piṛuku nyakuku. Panya ngayulu Mamala tjungu titutjara nyinanyangka nyura kulu palula tjungu titutjara nyinaku. ²⁰ Ka nyara palula ar̄a nyura nintingku nyakula kulilkupanya Mamanya ngali kutjuṭu nyinanytja, munu palu purunypaṭu nyura kulilkupanya nyuntu nganaṇa tjunguringkula kutjuṭu nyinanytja.

²¹ “Ngananya tjana wanyu ngayuku pulkara mukuringanyi? Wiya panya ngayuku tjukurpa wangaṇarangku kulira palyalpai tjuta, nyara paluru tjana ngayuku pulkara mukuringanyi. Ka Mamanya kulu palumpa tjanampa pulkara mukuringanyi tjana ngayuku mukuringkunyangka. Kan̄a ngayulu kulu palumpa tjanampa pulkara mukuringkuku munuṇatju tjanala waltyjangku nintilku.”

²² Ka wati panya Judas kutjupangku, Kar̄iyatanya wiyangku, palula wangkangu, “Mayatja, nyaakun nganaṇala kutju utiringkunytjikitjangku wangkanyi? Ka anangu kutjupa tjuṭampaya wanyu watarku alatjitu nyinama, nyuntunya nyakuwiya alatjitu?”

²³ Ka Jesulu wangkangu alatji, “Kutjupa ngayuku pulkara mukuringkulampa paluru tjukurpa ngayuku wangaṇarangku kulira palyalku. Ka palumpa Mamanya mukuringkuku, kali ngali palula titutjara ngurararira nyinaku. ²⁴ Ka anangu kutjupa ngayuku mukuringkuwiya nyinarampa ngayuku tjukurpa paluru puṭu tjukarurungku palyalku. Palu tjukurpa nyangatjaṇa nyurala wangkanyi aratja ngayuku wiya, panya Mamalu ngayunya iyantjalu ngayunya nintinnyangka. ²⁵ Nyanga uwankaraṇa kuwari tjakultjunanyi nyurala nyanga tjungu nyinalralpi. ²⁶ Palu Kurunpa Milmiltu pitjala nyuranya alpamilalku, panya Mamalu palunya iyalku ngayuku arangka nyurala tjungu nyinanytjaku. Ka paluru pitjala nyuranya nintilku ngayulu panya nyurala nganmanytju wangkanytja uwankara nyura watarkuriwiyangku kulintjaku.

²⁷ “Uwa, ngayulu nyuranya wantikatinyi palu nyuranyaṇa kurunpa pukulpa nyinanytjaku palyani. Panya ngayulu kurunpa rapa pukulpa nyinanyi, palu purunypa ngayulu nyuranya kurunpa rapa pukulpa nyinanytjaku palyalku. Nyara anangu watarkitja tjuṭa mukuringanyi pukulpa nyinanytjikitja. Palu wiya, tjanampa pukulpa unytju kutju ngarapai. Ka ngayulu kutjungku pukulpa titutjara nyinanytjaku palyalpai. Ka nyura kulira kurunpa tjituru-tjitururira nguluringkuwiya nyinama.

²⁸ “Nyura panya nganmanytju kulinu ngayulu wangkanyangka alatji, ‘Nyuranyaṇa wantikatira ananyi, mununa nyuralakutu malaku pitjanyi.’ Palu nyaaku nyura nyangatja kulira tjituru-tjitururinyi? Tjinguru nyura ngayuku pulkara mukuringkunytja wiya. Panya nyura ngayuku pulkara mukuringkulampa uti tjukurpa nyangaku pukularima ngayulu Mamalakutu ankunyangka kulira. Panya Mamanya pulka mulapa ngayula waintara nyinanyi. ²⁹ Nyangatjaṇa nganmanytju nyurala tjakultjunanyi.

Ka ngula tjukurpa nyanga paluru utiringkunyangka nyura nintingku kulilku ngañmanytju panya ngayulu wangkanytja. Munu nyura kulintjatjanu ngayuku mulamularingkuku. ³⁰ Palu ngayulu piruku rawangku nyurala wangkanytja wiya, panya manta nyangaku mayatja Satannga kuwari pitjanyi. Palu nyara paluru puṭu ngayunya mayatjarira kanyilku.

³¹ “Panya ngayulu Mamala wangañarangku kulilpai mununa paluru ngayunya wangkanytja uwankara kulintjatjanungku palyalpai, kaya nyara palulanguru anangu manta wikitjangku kulilku ngayulu palumpa pulkara mukuringkunyangka.”

Alatji Jesulu wangkangi palumpa nintintja tjutangka munu palulanguru wangkangu, “Uwa alatjitulo. Walangkula ngura nyangatja wantikatira ara.”

15

Jesunya Puṇu Kiripitji Purunypa

¹ Jesulu palumpa nintintja tjutangka wangkangi nyanga alatji, “Ngayuluṇa puṇu panya kiripitji purunypa, ka ngayuku Mama wati panya kaana kanyilpai purunypa. ² Uwa, ngayulu kiripitji kultu purunypa, ka nyura miṇa tjuta purunypa. Ka wati panya kaana kanyilpailu ngayuku Mamangku pitjala miṇa mai wiya ngaranyangka nyakula mutura waṇiku munu miṇa palya maitjara nyakula tjukutjuku mutura wirulku ngula pakara mai pulkatjararingkunytjaku. ³ Ka nyura alatjitu ngañmanypa wiruringu, panya ngayulu tjukurpa tjuta nyurala wangkangi, ka nyura kulira ma-wangañararingu. ⁴ Palulangurya ngayula tjungu ngarama, kaṇa ngayulu nyurala tjungu ngaraku. Panya puṇu miṇa ngañmanytju mutura waṇinytjitja piltiringkula puṭu pakara maitjararingkupai, palu panya puṇu kultungka tjungu ngarala nyara palulanguru kutju pakara maitjararinganyi. Ka nyura palu purunypaṭu ngayula tjungu ngarala kutju Godanya mukuringkunytja uwankara rawangku palyalku munu tjukaruru wirura nyinaku. Palu nyura ngayula tjungu ngarawiyangku wantirampa Godanya mukuringkunytja puṭu alatjitu palyalku.

⁵ “Ngayuluṇa puṇu kiripitji wata purunypa, ka nyura miṇa tjuta purunypa pakara ngaranyi ngayula tjungu. Munu nyura alatji rawa ngayula tjungu ngaralampa nyura Godanya mukuringkunytja rawangku palyalku. Palu ngayula wiyangka nyura puṭu palumpa palyalku paluru mukuringkunyangka. ⁶ Panya anangumpa ngayula tjungu wiya patu ngaralampa paluru miṇa mutura waṇinytja purunypa. Panya miṇa mutura waṇinyangka piltiringkupai, nyara palu purunypa nyura ngayulanguru paturingkula wiyaringkuku. Panya miṇa piltiringkunytja tjutaya uraṛa warungka waṇipai kampara wiyaringkunytjaku. Ka palu purunypaṭu nyura wiyaringkuku ngayulanguru paturingkula.

⁷ “Ka nyara palula-tawara nyura uti ngayula tjungu titutjara ngarama munu tjukurpa ngayuku wangañarangku kulinma. Ka nyara palulanguru nyura Mamala kutjupa kutjupa tjutaku ngatjinnyangka paluru nyuranya ngapartji wangañarangku Kulira ungguku. ⁸ Uwa, panya Godanya mukuringanyi nyura titutjarangku palumpa palyalkatinytjaku paluru mukuringkunytja uwankara. Ka nyara palulangurulta anangu tjutangku nyuranya wirura palyannyangka nyakula kulilku, ‘Munta-uwa, mulapa anangu nyanganpa Jesuku walijta tjuta nyinanyi.’ Munuya nyuranya nyakunytjatjanungku Godanyalta pulkara mirawaniku.

⁹ “Mamanya panya ngayuku pulkara mukuringanyi, ka palu purunypaṭu ngayulu nyurampa pulkara mukuringanyi. Kaya nyanga palunya rawangku kulinma, munuya ngayula titutjara tjungu ngarama ngayulu nyuranya rawangku mukulyangku kanyintjaku. ¹⁰ Panya nyura ngayuku tjukurpa wanganarangku kulinnyangkampa, ngayulu ngapartji nyuranya mukulyangku atunymara kanyilku titutjarangku. Panya ngayunya Mamalu mukulyangku kanyini palumpa wangka ngayulu wanganarangku kulira palyannyangka, palu purunypa ngayulu nyuranya rawangku kanyilku nyura ngayuku tjukurpa wanganarangku kulinnyangka. ¹¹ Uwa, nyanga nyuralana tjakultjunu nyura pukulpa mulapa nyinanytjaku. Panya ngayulu pukulpa mulapa nyinanyi, mununa mukuringanyi nyura kuļu palu purunypaṭu ngayula tjunguringkula pukulpa nyinanytjaku tjiturutituru wiya.

¹² “Uwa, ngayulu nyuranya wangkara wituṇi nyuranku mukulya pulka nyinanytjaku. Panya ngayulu mukulyangku nyuranya atunymara kanyini, palu purunypaṭu nyuranku uti mukulyangku kanyinma. ¹³ Añangu kutjupa tjinguru palumpa malpaku ngalkilpa iluku nguluringkunytja wiya. Kala alatjirinyangka nyakula kulilpai, ‘Mulapa paluru palumpa malpaku pulkara mulapa mukuringu waintara alatjitu.’ ¹⁴ Ka nyura ngayulu wangkanyangka wanganarangku kulira palyarampa ngayuku malpa mulapa nyinanyi. ¹⁵ Tjinguruṇa nyuranya rawangku kulinma ngayuku war̄karipai tjuta. Palu wiya, nyanganguruṇa nyuranya waltyjanmananyi. Wati panya war̄karipai mayatjangku wangkara witulpai kutju, kutjupa kutjupa utira tjakultjunkunytja wiyangku. Ka paluru ninti wiyangku war̄ka kutju palyalpai mayatjangku witunnyangka. Palu nyuranya ngayulu kuwari waltyjanmananyi, panya ngayulu nyurala waltyjangka uwankara utingku tjakultjunu Mamala kulintjatjanungku. ¹⁶ Tjinguru nyura kulini nyura ngayunya ngurkantankunytjatjanungkupalku. Palu wiya ngayuluṇa nyuranya ngurkantanu mununa nyuranya wituṇu Godanya mukuringkunytja uwankara palyalkatinytjaku titutjarangku. Ka pala palulanguru nyura ngayuku walytjaringkunytjatjanungku Mamala tjapinnyangka paluru nyuranya unguku.

¹⁷ “Uwa, ngayulu nyuranya wangkara wituṇi nyuranku mukulya pulka nyinanytjaku ngaltunytju pulka.”

Mantatja Tjuṭa Kuraringkunytja

¹⁸ “Kaya añangu panya mantatja kutju kulilpai tjutaya nyurampa kuraringkunyangkampa nyura uti alatji kulinma, panya tjanaya ngayuku-warara kuraringu. ¹⁹ Tjinguru nyura palula tjanala tjungungku mantatja kutju kulinnyangkampa paluru tjana nyurampa pulkara mukuringama. Palu ngayulu panya nyuranya mantangka nyanga watarku nyinanyangka ngurkantara mantjinu, ka nyura mantatja panya tjuta kulintjaku wi-yaringu, panya nyura kuwari kulintja kutjupatjara nyinanyi. Kaya nyara palulanguru nyurampa kuraringanyi nyara mantatja kutju kulilpai tjuta.

²⁰ “Tjukurpa panyatjaya kulinma, panya ngayulu nyurala wangkangu alatji, ‘Panya wati war̄karipai tjukutjuku, ka panya palumpa mayatja pulka palula munkara.’ Ka panya mirpaṇtju tjutangku ngayunya anara kurarampa palu purunypaṭu nyuranya ngapartji anara kuralku nyura ngayuku war̄ka palyannyangka. Palu kutjupa tjutangku ngayuku tjukurpa wanganarangku kulirampa palu purunypaṭu nyurala ngapartji wan-ganarangku kulilkku. ²¹ Uwa, nyanga alatjiya nyuranya ngapartji kuralku

panya nyura ngayuku walytjaringkunyangka. Panya tjana Mamaku ngurpa nyinanyi ngayunya panya iyantjitjaku.

²² “Tjinguru ngayulu pitjala wangkanyta wiyangku wantinyangkampa tjana watarku alatjitu nyinama kura kulintja wiya. Palu ngayulu alatjiitu tjukurpa pitjala tjanala wangkangu, kaya kulira wantingi. Pala palulan-

²³ Palu ngayuku kuraringkulampa ngayuku Mamaku ku lu kuraringganyi.

²⁴ Tjinguru na pitjala tjanala kutjupa kutjupa wiru tju ta palyalwiya nyinanyangkampa tjana ngurpatu nyinama kura tjana palyantjatjanungku kulintja wiya. Palu ngayulu alatjiitu pitjala tjanala wiru tju ta palyanangi panya kutjupangku nganmanytu nyanga purunypa palyantja wiyat u. Kaya kuwari kutju nyakula mulamularingkuwiya Mamaku ngalimpa kuraringganyi. ²⁵ Ka tjukurpa nyanga palu purunypa nyiringka iriti walkatjunkunytja ngarinyi alatji,

‘Ngayukuya unytju alatji tu wiyangru kuraringu.’ *

Ka tjukurpa nyanga paluru kuwari utiringu. ²⁶ Palu Nintilpainya pitjaku Mamalanguru Kurunpa Mil milnga, panya paluru Godanya tjukarurungku utilpai. Panya ngayulu kuwari Mamalakutu ankula palunya nyuralakutu witulku nyurala tjunguringkula nyinanytjaku munu tjukarurungku ngayunyatjara tjakultjunkunytjaku. ²⁷ Ka nyura ku lu ngayunyatjara tjakultjunama, panya nyura ngayula tjungu rawa mulapa para-ngarangi.”

16

¹ “Uwa, nyangatjana nyurala nganmanytu utira tjakultjunanyi nyura ngayunya wantikatintjaku-tawara. ² Panya Jewku mayatja tju tangku nyuranya pailku wali inmatjanguru palula tjanala inmangka tjunguringkunytjaku-tawara. Munuya ngula nyuranya iluntankuku nyanga alatji ngunti kulira, ‘Godanya nganampa pukularinyi nganana tjananya iluntankunyangka nyakula.’ Palu wiya. ³ Panya tjana nyanga alatji palyalku Mamaku ngurpangku munu ngayuku ku lu ngurpangku.

⁴ Ka na nyangatja nyuranya nganmanytu wangkara ngulutjunanyi nyura ngula nintingku kulintjaku ngayulu panya wangkanyta utiringkunyangka nyura nyakula tjanampa nguluringkula ngayunya wantikatintjaku-tawara.”

Kurunpa Mil miltu Tjukarurungku Nintintjaku

Munu palulanguru Jesulu pi ruku tjanala wangkangu, “Ngayulu panya nyuranya nganmanytu ngurkantanu mununa nyara palulanguru nyurala rawa tjungu nyinangi. Pala palulanguru na tjukurpa nyanganpa nyurala nganmanytu wangkanyta wiya. ⁵ Palu kuwari nyanga na ngayulu ananyi ngayunya iyantjitjakutu. Ka nyura kulira ngayula tlapintja wiya, ‘Yaaltjikutun ananyi?’ ⁶ Panya nyura tjukurpa nyanga ngulutjunkunytja kulira kurunpa pulkara tjituru-tjitururinyi.

⁷ “Palu nyangatjana nyurala tjukarurungku wangkanyi. Palyana ananyi, panya ngayulu ankunyangka malangka nyura wiru mulapa mantjilku, panya ngayulu ankunytjatjanungku nyurampa iyalku Nintilpai kutjupa nyuranya rapara wiru ka nyintjaku, Kurunpa Mil milnga. Palu tjinguru ngayulu ankunytja wiya nyinanyangkampa paluru nyuralakutu pitjanyta wiyat u ngaraku. ⁸ Kurunpa paluru pitjala anangu manta wikitjangku ngunti kulinnyangka utilku. Panya tjana kura ngunti ngurkantankupai

* ^{15:25} Psalm 35:19; 69:4

palya-palku kulira. Munuya paluru tjana ngayunya ngunti analpai tjukurpa ngunti wangkanyangka-palku kulira. Munuya ngunti kulis-pai Godalu tjananya ngurkantara tjarantja wiyangku wantiku. Palu tjana ngunti kulinnyangka Kurunpa Milmiltu utilku alatjitu. ⁹ Panya tjana kura ngunti ngurkantankupai ngayuku mulamularingkuwiyangku wantira. ¹⁰ Munu panyaya ngayunya ngunti analpai tjukurpa ngunti wangkanyangka-palku kulira. Palu wiya, panya ngayulu Mamalakutu ananyi, kani nyura piruku nyakunytja wiyaringkuku. ¹¹ Ka panyaya ngunti kulis-pai Godalu tjananya ngurkantara tjarantja wiyangku wantiku. Palu panya Godalu nganmanytju Satannga ngurkantara wañingu nyara mantatja kulis-pai tjuñaku mayatja. Nyara palulanguru Godalu alatjitu tjananya kulu ngurkantankuku kura tjuña palyantitjanguru. Uwa, nyanga alatjiya mantatja kulis-pai tjuñangku ngunti-ngunti kulis-pai, ka panya Kurunpa Milmiltu pitjala tjana ngunti kulintja utilku.

¹² “Uwa, ngayulu tjukurpa kutjupa tjuta mulapa nyurala tjakultjunkun-tykitjangku kulini, palu nyura tjinguru tjuña wangkanyangka puñu kulis-pai. ¹³ Palu ngula Kurunpa Milmilngga pitjaku. Nyara paluru tjukurpa Godanyatjara tjukarurungku utilpai. Munu nyara paluru nyuranya tjukurpa uwankara tjukarurungku nintilku. Kurunpa nyara paluru panya waltyangku kulira nintilpai wiya, Mamala kulintjatjanungku kutju paluru nyurala tjukarurungku tjakultjunkuku. Munu paluru nyurala wangkaku panya ngula utiringkunytjaku. ¹⁴ Nyara paluru tjukurpa ngayulu wangkanyangka kulintjatjanungku nyurala nintilku, ka nyura kulira ngayunya mirawañiku. ¹⁵ Panya uwankara Mamalu kanyintja ngayulu kulu kanyini. Nyanga palulanguru panya nyurala wangkangu alatji, ‘Kurunpa Milmiltu ngayula kulintjatjanungku nyurala nintilku ngayuku tjukurpa.’”

Nintintja Tjuña Tjituru-tjitururinytja Munu Palula Mañangka Pukularinytja

¹⁶ Munu palulanguru Jesulu wangkangu, “Kuwari nguwanpa nyura ngayunya nyakuwiya nyinaku. Munu palulanguru nyura tjukutjuku nyinara piruku ngayunya nyakuku.” Alatji paluru wangkangi palumpa nintintja tjuñangka.

¹⁷ Ka nyanga alatji wangkanyangka nintintja kutjupa tjuñangku puñu kulis-pai ngaparku wangkangi, “Nyaa nyangangku wangkanyi panya kuwari nguwanpala kunyu palunya nyakuwiya nyinaku, munula kunyu palulanguru tjukutjuku nyinara piruku nyakuku? Nyaaku paluru wangkanyi Mamalakutu ankunytjikitjangku?” ¹⁸ Munu paluru nyaa wangkangi, ‘kuwari nguwanpa?’ Putula kulini paluru wangkanyangka.”

¹⁹ Ka Jesulu nintingku kulinngi paluru tjana tjapintjikitjangku kulinnyangka. Munu nyanga alatji wangkangu tjanala, “Wangkangu panya nyurala alatji, ‘Kuwari nguwanpa nyura ngayunya nyakuwiya nyinaku. Munu palulanguru nyura tjukutjuku nyinara piruku ngayunya nyakuku.’ Ka nyura wanyu araa nyanga palunya wangkara kulini tjukarurungku kulintjikitjangku?” ²⁰ Wiya, nyangatjana tjukarurungku nyurala wangkanyi. Panya mulapa nyura kurunpa tjituru-tjitururira uparingkula ulaku. Ka anangu panya mantatja kulis-pai tjuña pulkara pukulariku. Uwa, nyura mulapa pulkara tjituru-tjitururiku, palu mañangka nyura tjituru-tjitururinytjanu piruku pukulariku. ²¹ Nyaa

purunypa, panya minyma ititjara iti kuwaripangka tjituru-tjituru nyinapai iti kanyintjikitja. Palu iti wirkankunyangka nyakula paluru pulkara pukularipai munu pika panyatja kulintja wiyaringkupai.

²² “Ka nyara palu purunypa nyura tjituru-tjituru nyinaku ngayulu ankunyangka. Palu ngayulu nyuranya piruku nyakuku, ka nyura ngayunya nyakula pulkara pukulariku kurunpa winki. Ka kutjupa tjuṭangku nyuranya puṭu piruku tjituru-tjiturunkuku.

²³ “Uwa, tjintu nyara palulanguru nyura ngayula piruku tjapintja wiyaringkuku kutjupa kutjupaku nintiringkunytjikjangku, panya Kurunpa Milmiltu nyurala uwankara nintilku. Tjukarurungkuṇa nyurala wangkanyi, panya nyura ngayuku walytja nyinarampa Mamala kutjupa kutjupaku tjapinnyangka paluru nyuranya ungkuku alatjitu. ²⁴ Panya ngañmanypa nyura ngayunya wañara Mamala ngatjintja wiya ngarangi. Palu kuwari nyanga nyura uti palula ngatjinma, ka nyuranya ungkuku, ka nyura nyara palulangurulta pukulpa pulka mulapa nyinaku.

²⁵ “Uwa, ngañmanytuṇa nyurala tjukurpa tjuṭa wangkangi ara tjuṭatjara nyura kampa kutjupawanungku kulira nintiringkunytjaku. Palu ngulana ara nyanga palu purunypa tjuṭa kampa kutjupawanungku wangkanyta wiyangku tjukarurungku wangkaku tjukurpa Mamanyatjara nyura utingku kulintjaku. ²⁶ Ka tjintu nyara palulanguru nyura ngayuku walytja nyinarampa Mamala walytjangku tjukarurungku tjapilku, ka ngayulu nyurampa palula tjapintja wiyaringanyi. ²⁷ Panya Mamanya paluru alatjiṭu nyurampa pulkara mukuringanyi, panya nyura ngayuku mukuringu munu panya nyura mulamularingu ngayulu Mama Godalanguru pitjanytjijaku. Nyara palulanguru Mamanya nyurampa pulkara mukuringanyi. ²⁸ Uwa, ngayuluṇa mulapa Mamalanguru pitjangu nyanga mantakutu. Mununa kuwari manta nyangatja wantikatira małaku Mamalakutu ananyi.”

²⁹ Kaya nintintja tjuṭangku kulira wangkangu, “Munta-uwa, kuwari nyanga nyuntu utingku wangkanyi ara kutjupatjara kampa kutjupawanungku wangkanyta wiyangku. ³⁰ Kala nyanga kuwarilta kulini nyuntun mulapa uwankaraku ninti. Panya nyuntu ngañmanytu nintingku kulilpai kutjupangku nyuntula tjapintjikitjangku kulinnyangka. Nyanga palulangurula mulamularingu panya nyuntun mulapa Godalanguru pitjanytja.”

³¹ Ka Jesulu wangkangu tjanala, “Nyura wanyu mulapa ngayuku mulamularingu? ³² Palu kulila, kuwari nguwanpa nyura wililyaraṇa ankuku ngura walytjakutu walytjakutu munu nyura ngayunya kutju wantikatiku. Palu ngayulu kutju mulapa wiya panya Mamanya ngali nyinanyi.

³³ “Uwa, nyangatjaṇa nyurala wangkangi nyura kurunpa rapa nyinanytjaku. Panya nyura ngayunya wañara raparingkula nyinaku. Palu mantatja kulilpai tjuṭangku nyuranya titutjarangku kuralku. Palu palya, panya ngayulu mantatja uwankarangka waintarira ngayulu-kutjuringu. Nyara palulanguru nyura uti pukulpa mulapa nyinama kurunpa raparingkula.” Alatji Jesulu wangkangu palumpa nintintja tjuṭangka.

17

Jesulu Mamala Tjapintja

¹ Munu Jesulu tjanala wangkara wiyaringkula ira-nyangu ilkarikutu munu Mamala wangkara tjapiningi alatji, “Mama, tjintu panyatja wirkanu. Kaṇi nyuntu ngayunya nyanga aŋangu tjuṭangka nintila ngayunya

tjukarurungku ngurkantankunytjaku panya ngayulu witulya pulka mulapa nyuntumpa katja. Ka ngayulu ngapartji palu purunypatū tjanala nin tilku nyuntunya kuļu tjukarurungku witulya pulka ngurkantankunytjaku. ² Panya nyuntunin tjunu aŋangu winki kuranyurira kanyintjaku munuŋin kutjupatjara ngayunya ungu ngayukurinytjaku, kaṇa palunya tjananya uwankara wankarunkuku titutjara nyuntula tjungu nyinanytjaku. ³ Palu ngananya tjanaya wanyu wanka titutjara nyinaku? Wiya, panya paluru tjana nyuntumpa ngalimpa ninti mulapa nyinanytjatjanu kutjuya titutjara wanka nyinaku. Panya nyuntu kutju God mulapa nyinanyi, ka ngayulu panya nyuntu iyantjitjanya, Jesunya Christanya. ⁴ Nyuntunin warķa palyantjaku witura iyanu mantakutu, kaṇa uwankara palyara wiyara nyuntumpa witulya pulka utinu aŋangu tjutangka. ⁵ Mama, panya nyuntu ngali manta kuwaripangka kutjuṭu nyinangi witulya pulka. Kanī kuwari panya purunypatū ngayunya pulkanmanama witulya pulka mulapa nyinanytjaku nyuntula tjungu.

⁶ “Nyanga mantangkaṇa tjanala nyuntunya nintinu aŋangu panya nyuntu ngayunya ungpunytjtja tjuṭa, kaya nintiringkula nyuntunya tjukarurungku kulini. Panya palunya tjananya nyuntu ngurkantara kanyiningi, munu panyanin ngayunya ungu. Kaya paluru tjana nyuntumpa wangka wangaṇarangku kuļira palyanu. ⁷ Kuwariya nintingku kulini panya uwankara ngayulu palyantja nyuntu ngayunya nintinu. ⁸ Ka panya ngayulu tjananya nintinu tjukurpa panyatja, panya nyuntu ngayunya nintintja, kaya wangaṇarangku kulinu. Munuya kulini mulapa ngayulu nyuntulangru mantakutu pitjangu nyuntu iyannyangka.

⁹ “Uwa Mama, nyanga palumpa tjanampaṇa nyuntula tjpini, palu panya mantatja kulilpai tjuṭakuṇa tjpintja wiya. Nyangatjaṇa tjanampa kutju nyuntula ngatjini panya nyuntu ngayunya ungpunytja tjuṭaku, panya paluru tjana nyuntumpa walytja nyinanyi. ¹⁰ Paluru tjana nyuntumpa ngalimpaṭu nyinanyi. Kaya aŋangu tjuṭangku palunya tjananya ngayunya waŋannyangka nyakula ngayunya mirawaŋira pulkanmananyi. ¹¹ Kuwari nguwanpana manta nyangatja wantikatira ma-pitjanyi nyuntulakutu. Palu nyanga tjanaya mantangka rawa nyinanyi, ngayunya waŋalpai tjuṭa. Mama, nyuntun wiru mulapa nyinanyi witulya pulkanya, munu panyan ngayunya witulyanu palu purunypatū witulya pulka nyinanytjaku. Wanyu nyanga tjananya witulya pulkangku aṭunymara kanyinma uwankara tjungu nyinanytjaku, panya nyuntu ngali tjungu nyinanytja purunypa.

¹² “Uwa, nyuntu panyanin tjunu witulya pulka nyinanytjaku, kaṇa mulapa tjanala tjungu nyinara witulya pulkangku tjananya aṭunyti kanyiningi kutjupa kawalinkunytja wiyangku. Palu panya Judasanya kutju kawankatingu, panya ngañmanytji nyiringka iriti walkatjunu paluru kawankatinytjaku, ka panya mulapa alatjiringu.

¹³ “Kaṇa kuwari ngayulu nyuntulakutu ma-pitjanyi. Palu mantangka nyanga nyinaraṇa tjukurpa nyanganpa tjanala wangkanyi kuwari-pangku tjana kuļira pulkara pukularinytjaku kurunpa winki, nyanga ngayulu pukulpa nyinanytja purunypa. ¹⁴ Nyuntumpa tjukurpaṇa tjanala wangkara utinu ngayunya waŋalpai tjuṭangka. Kaya anangu tjukurpa mantatja kulilpai tjuṭa tjanampa kuraringu, panya paluru tjana ngayunya nyanga waŋalpai tjuṭangku tjukurpa mantatja kuļira waŋalpai wiya, ngayulu purunypa. ¹⁵ Ka nyanga mantangru nyuntu tjananya mantjintjakuṇa tjpintja wiya. Palu mamungku kurantjaku-tawaraṇa

tjanampa tjapini nyuntu tjananya aṭunymara kanyintjaku. ¹⁶ Panya ngayulu tjukurpa mantatja kulilpai wiya, kaya palu purunypatu tjana tjukurpa mantatja kulilpai wiya. ¹⁷ Nyuntumpa panya tjukurpa tjukaruru alatjiṭu, ka tjukurpa palunya tjananya wanyu nintinma tjana nintiringkula nyuntumparinytjaku alatjiṭu. ¹⁸ Panya nyuntuṇin ngayunya mantakutu witunu, kaṇa palu purunypa tjananya wituṇi ngura uwankarakutu. ¹⁹ Uwa, ngayuluṇatju nyuntunya unganyi alatjiṭu munuṇa tjananya nintini tjukurpa tjukaruru nyuntunyatjara tjana kulu kulira nyuntumparinytjaku.

²⁰⁻²¹ “Palu Mama, nyanga tjanampa kutjuna nyuntula tjapintja wiya, palu kutjupa tjuṭaku kuļuṇa tjapini. Panya ngula nyanga tjananya ngayuku tjukurpa aŋangu kutjupa tjuṭangka tjakultjunkunyangkaya kulira ngayuku mulamularingkuku. Kana nyara palumpa tjanampa kuļu nyuntula tjapini tjananya kutjuringkula nyuntula tjungu nyinanytjaku. Panya nyuntu ngali tjungu kutjuṭu nyinanyi, palu purunypa palunya tjananya kuļu tjungunma. Kaya aŋangu panya tjukurpa mantatja kulilpai tjuṭangku tjananya tjungu kutjuṭu nyinanyangka nyakula kuliklu nyuntu ngayunya mantakutu iyantja. ²² Uwa, nyuntu ngayunya tjunu witulya pulka mulapa, kaṇa palu purunypatu nyanga tjananya witulyanu ngayulu purunypa witulya pulka nyinanytjaku munu tjunguringkula kutjuṭu nyinanytjaku nyuntu ngali purunypa. ²³ Nyanga ngayuluṇa tjanala tjungu nyinanyi, ka nyuntu ngayula tjungu nyinanyi, kaya palulanguru tjananya ngapartji uwankaratju tjunguringkula kutjuṭu nyinaku. Kaya aŋangu panya tjukurpa mantatja kulilpai tjuṭangku tjananya tjungu nyinanyangka nyakula kuliklu mulapa nyangatja Godalu iyantja munu mulapa paluru tjanampa pulkara mukuringanyi, panya ngayuku purunypa.

²⁴ “Mama, nyuntu panya aŋangu tjuṭa ngayunya ungu ngayunya waṇantjaku. Kaṇa mukuringanyi ngula tjanala ngayula tjunguringkula nyinanytjaku ngura ilkaritjangka. Kan̄ya paluru tjanala pulka mulapa nyakuku, panya nyuntu ngayunya ungu witulya pulka mulapa ngayuku ngamanypa mulapa pulkara mukuringkula manta wiyangkalpi.

²⁵ Mama, nyuntu panyan tjukaruru mulapa. Ka aŋangu panya tjukurpa mantatja kulilpai tjuṭa nyuntumpa ngurpa nyinanyi. Palu ngayulu nyuntumpa ninti, kaya nyanga tjananya nyakula nintiringu panya nyuntu ngayunya iyantjtjaku. ²⁶ Kaṇa ngayulu nyuntunya tjanala utiṛa nintinu, munuṇa rawangkuṭu tjanala nintilkatiku. Kaya nyuntumpa mukulyaku nintiringkula aŋangu kutjupa tjuṭa mukulyangku kanyilku, panya nyuntuṇin ngayunya mukulyangku kanyini, palu purunypa. Kaṇa ngayulu kuļu tjanala tjungu nyinaku.”

Alatji Jesulu Mamala tjapiningi.

18

Jesunya Witintja

(Matthew-ku 26:47-56; Markaku 14:43-50; Luke-aku 22:47-53)

¹ Munu tjapiṛa wiyaringkula Jesunya ma-pakaṇu palumpa nintintja tjuṭa kuļu. Munuya wimaruwanu karu ini Kitaranta ma-itipirira kaana pulkangka ma-wirkānu munuya nyinangi. ² Ka Judasanya, wati panya Jesunya witintjaku nintintjanya tjanala tjungu wiya. Palu wati nyara paluru ngura nyara palumpa ninti panya Jesunya Judasanya tjanaya tjuṭa aṛa tjunguringkula nyinapai ngura nyara palula. ³ Kaya ngura nyara Jerusalemala tjukurtjara kuranyitja tjuṭangku, Paratji tjuṭangku kuļu wati timpula aṭunymankupai tjuṭa witunu Judasala tjunguringkula

ankunytjaku, ka tjananya katingu nintingku kaana nyara palulakutu wati Rome-anyा ngurara tjaultji tjuṭa kuļu. Kaya ma-pitjala wirkanu ngura nyara palula kuļaṭa tjlira, waru tili tjaatjara kuļu. ⁴ Ka Jesulu unngu nintingku kuliningi nyanga alatjirinytjaku, munu tjana ngalyawirkankunyangka ma-ngaparikatira tjapinu, “Ngananya nyura ngurini?”

⁵ Kaya wangkangu, “Jesunya Nazarethanya ngurara la ngurini.”

Ka Jesulu wangkangu tjanala, “Uwa, ngayuluṇa ini nyanga paluru.”

Ka Judasanya panya tjaultji tjuṭangka tjungu ngarangi Jesunya tjanala witintjaku nintintjikitjangku. ⁶ Ka Jesulu alatji wangkanyangka panya tjana uwankara ma-tjutukatira tjananguru punkaṇu mantangka. ⁷ Ka Jesulu piṛuku tjanala tjapinu, “Ngananya nyura ngurini?”

Kaya piṛuku wangkangu, “Panya Jesunya Nazarethanya ngurara la ngurini.”

⁸ Ka Jesulu wangkangu, “Wangkangu panyana nyurala alatjitu. Ngayuluṇa ini nyanga paluru. Ka nyura ngayuku pitjangu, palu nyanga tjananyaya wantiriyala kaya ara.” ⁹ (Jesulu nyanga alatji wangkanyangka tjukurpa panya paluru ngañmanytu wangkanytja utiringu, paluru Mamala ngañmanytu tjapira alatji wangkanytja, “Mama, wati nyanga tjuṭa panya nyuntu ngayunya ungkunytjaṇa kawalinkunytja wiyatū.”)

¹⁰ Ka Simon Peterlu tjula wara kanyintjatjanungku ilara wati kutju pina waku kaṭaṇu, ka pina punkaṇu mantangka. Wati nyanga paluru panya wati tjukurtjara pulkaku warkaripai ini Malkanya. ¹¹ Ka Jesulu wangkangu Peterla, “Wanti! Tjula pala małakungku tjarpatjura. Panya Mamaluṇi wituṇu pika pulkatjararingkunytjaku, kaṇa palula wanganarangku kulira nyanga alatjirinytjaku mukuringanyi alatjitu wantinytja wiya.”

Mayatja Ini Anatjalakutu Katinytja

¹²⁻¹³ Ka wati panya tjaultji tjuṭaku mayatjangku tjananya wangkangu Jesunya witintjaku, kaya mulapaṇu witiṇu tjaultji tjuṭangku munu timpula atunyamankupai tjuṭangku kuļu. Munuya mara karpira ma-katingu wati ini Anatjalakutu panya Kayapatjaku waputjukutu. Anatjanya panya ngañmanypa nyinangi Jew tjuṭaku Tjukurtjara Pulka, palu nyara palula arā Kayapatjanya ngapartji Tjukurtjara Pulka nyinangi. ¹⁴ Wati nyara paluru panya Jewku mayatja tjuṭangka ngañmanytu wangkangu alatji, “Wati kutju palya ilunyi aŋangu uwankaraku ngalkilpa.”

Peternya Jesuku Ngurparingkunytja

(Matthew-ku 26:69-70; Markaku 14:66-68; Luke-aku 22:55-57)

¹⁵ Ka tjaultji tjuṭangku Jesunya witira Tjukurtjara Pulkaku ngurakutu ma-katinyangka Simon Peterlu pula nintintja panya kutjupararangku Jesunya tjananya maławanungku waŋaningi. Ka ngura nyara palula wirkankunyangka nintintja panya kutjupangku Peternya urilta wantikatira waintara Jesunya tjananya waŋara tjarpangu waliku yaatangka. Panya nintintja paluru wati nyara Tjukurtjara Pulkaku ninti. ¹⁶ Ka Peternya urilta ngarangi tuwangka itingka panya palumpaya ngurpa. Ka nintintja panya paluru malaku pakaṇu munu kungkawara tuwa kanyilpaingka tjapinu Peternya yaatangka tjarpatkunkunytjaku, ka mulapaṇu tjarpatjunu kungkawara panya paluru. ¹⁷ Munu palunya ngurkantanu Peternya munu tjapinu, “Nyuntu kuļu wanyu Jesula tjungutja?”

Ka Peterlu wangkangu, “Wiya! Ngayulu palumpa tjungutja wiya.”

¹⁸ Ka munga nyara palula wari pulka ngarangi, kaya warkaripai tjuṭangku timpula atunyamankupai tjuṭangku kuļu waru tiliṛa ngarala

unyjunaringi. Ka Peternya waringku puyinnyangka pitjangu tjanalakutu munu tjunguringkula ngarala waru nganytjiningi.

Tjukurtjara Pulkangku Jesunya Tjapira Kulintja

(Matthew-ku 26:59-66; Markaku 14:55-64; Luke-aku 22:66-71)

¹⁹ Ka wali unngu Tjukurtjara Pulkangku Anatjalu Jesunya tjapira nguriningi, “Wati yaaltjtungkunta wañalpai? Nganalu tjana? Nyaan palunya tjananya nintilpai?”

²⁰ Ka Jesulu wangkangu, “Utingkuña tjanala wangkangi tjukurpa anangu winkingka, wali inmatja tjutangka ngura kutjupangka kutjupangka mununa Jerusalemala timpulangka kuļu rawangku nintiningi anangu tjuta tjunguringkunya kampangka wiya. ²¹ Kan nyaaku ngayunya tjapini? Utin tjanala tjapinma panya nyara paluru tjana ngayulu wangkanyangka kulinungi, munuya paluru tjana nintingku kulintjatjanungku nyuntula tjakultjunkuku.”

²² Ka alatji wangkanyangka wati timpula atunymankupai kutjungku ila ngaranytjatjanungku Jesunya nguku pungu, munu wangkangu, “Ai, alatji wangkanytja wiyangku wantima! Palatja wati Tjukurtjara Pulkanya.”

²³ Ka Jesulu wangkangu, “Ngayulu ngunti wangkanyangkampaniya utingku wangkama nyanga anangu tjutangka mirangka. Palu ngayulu tjukarurungku wangkangi, kañin nyaaku pungu?” Ka wati timpula atunymankupai piruku wangkanytja wiya ngarangi.

²⁴ Ka palula maļangka Anatjalu palunya karpintjatu ma-iyanu Tjukurtjara Pulkakutu panya palumpa waputju Kayapatjalakutu.

Peternya Piruku Ngurparingkunytja

(Matthew-ku 26:71-75; Markaku 14:69-72; Luke-aku 22:58-62)

²⁵ Ka Peterlu urilta waru ngarala nganytjiningi. Kaya kutjupa tjutangku palula wangkangu, “Nyuntu kuļu wanyu wati palula tjungutja?” Ka Peterlu pulkara alatjitu wiyanmanu, “Wiya! Ngayulu palumpa tjungutja wiya.”

²⁶ Ka waru nyara palula wati Tjukurtjara Pulkaku warkaripai ngarangi. Wati nyanga paluru panya Peterlu pina kañantjitjaku walytja. Munu paluru nyakula Peternya ngurkantara wangkangu, “Munta, nyuntunya panyatja nyangu, Jesula tjungu ngaranyangka, panya nyara kaanangka. Mulapa?”

²⁷ Ka Peterlu piruku wiyanmanu. Ka paluru wiyanmankunyangka tjulpu panya mungawinki mulapa wangkapainya wangkangu.

Pilate-alu Jesunya Tjapira Kulintja

(Matthew-ku 27:1-2,11-14; Markaku 15:1-5; Luke-aku 23:1-5)

²⁸ Ka mungawinki mulapa Jewku mayatja tjutangku timpula atunymankupai tjutangku kuļu Jesunya Kayapatjaku nguranguru katingu mayatja ini Pilate-aku ngurakutu.* Munuya wirkara urilta yaatangka patara ngarangi, panya tjana tjinguru wati Jew wiyaku ngurangka tjarparsampa kuraringkuku munuya palulanguru inma Katuwanu Ankunytjanya ngaranyangka puļu mai kuka ngalkuku. Nyangatja tjanampa tjaka Jew tjutaku, kaya palula-tawara Jesunyatjara urilta patara ngarangi Jewku mayatja tjuta munu wati timpula atunymankupai tjuta kuļu. ²⁹ Ka Pilate-anja urilkutu pakanu munu tjanala tjapinu, “Wati nyangatja nyura nyaanguru ngalya-katingu, nyaa palyannyangka?”

* **18:28** Panya Rome-aku mayatja pulkangku Pilate-anja nganmanytju iyanu Jerusalemalakutu anangu Jew tjuta manta nyara Judeala nyinanyangka mayatjarira kanyintjaku palumpa.

³⁰ Kaya wangkangu, “Wiya, tjinguru paluru kura palyantja wiyangka nganana katinytja wiyangku wantima, palu kura palyannyangkala palunya ngalya-katingu.”

³¹ Ka Pilate-alu wangkangu tjanala, “Wiya, nyurayanku ma-katira waltyjangku tjapira ngurira palunya ngurkantanama nyurampa tjukurnguru.”

Kaya wangkangu, “Wiya, panya nyuntun ngananya angapainu wati kura pungkula iluntankunytja wiyangku wantinytjaku. Palu panya nyuntu wangkanyangka kutjula iluntankupai.” ³² (Nyanga alatji tjana wangkanyangka Jesulu nganmanytju panya wangkanytja utiringu, panya nganmanytju paluru utingku wangkangu nyanga alatji ilunytjikitjangku.)*

³³ Ka Pilate-alu palumpa walingka malaku tjarpa Jesunya ngalyakatinytjaku wangkangu. Munu palulanguru palula tjapinu, “Nyuntun mulapa Jew tjuṭaku mayatja pulka?”

³⁴ Ka Jesulu palula wangkangu, “Nyuntu wanyu waltyjangku kulira ngayunya tjapini? Munta kutjupa tjuṭangkunta ngayunya tjakultjunu?”

³⁵ Ka Pilate-alu wangkangu, “Nyuntu wanyu ngayunya kulini nyuntumpa waltyja? Wiya, ngayulu Jew wiya. Nyanga nyuntumpa waltyja tjuṭangkuntaya ngalya-katingu ngayulakutu pala tjukurtjara kuranyitja tjuṭangku. Palu nyaan wanyu palyaṇu kantaya nyuntunya ngalyakatingu?”

³⁶ Ka Jesulu wangkangu, “Ngayulu panya mayatja mantatja tjuṭa purunypa wiya. Tjinguruya ngayulu mayatja mantatja nyinanyangkampa ngayunya wanalpai tjuṭangku ngayulanguru anga-pikaringkula ngalkinma ngayunya Jewku mayatja tjuṭangku witintjaku-tawara. Palu ngayulu mayatja mantatja tjuṭa purunypa wiya.”

³⁷ Ka Pilate-alu wangkangu, “Palu nyuntun wanyu mayatja pulka?”

Ka Jesulu wangkangu, “Tjukarurungku palan wangkanyi. Panya ngayulu mantakutu pitjala iti ngaringu tjukurpa tjukaruru kutju wangkanytjikitja. Nyanga palunyakitjana pitjangu. Ka aŋangu kutjupangku tjukurpa tjukaruruku mukuringkula ngayulu wangkanyangka wanganarangku kulilpai.”

³⁸ Ka Pilate-alu wangkangu, “Nyaa wanyu tjukurpa tjukaruru paluru?”

Pilate-alu Jesunya Iluntankunytjaku Palyanmankunytja (Matthew-ku 27:15-31; Markaku 15:6-20; Luke-aku 23:13-25)

Munu nyangatja wangkara Pilate-anja malaku pakaṇu үrilkutu, munu panya tjanala wangkangu, “Wati nyanga palunyana kura puṭu ngurkantananyi iluntankunytjikitjangku.” ³⁹ Panyatjaya kulila panya ngaranyi ngayulu nyurampa wati kutju tjailangka nyinanytja walatjunkunytjaku inma nyanga Katuwanu Ankunytjanya panya ngaranyangka. Palu nyura wanyu mukuringanyi ngayulu nyurampa nyanga mayatja pulka walatjunkunytjaku?”

⁴⁰ Kaya Jew paluru tjana uwankarangku pulkara mirara wangkangu, “Wiya, Jesunyala wantinyi. Ngananya mukuringanyi wati pala Parapatjanya walatjunkunytjaku.” (Parapatjanya panya wati pikati Rome-anja ngurara tjuṭa pikangku pungkupai.)

* ^{18:32} Jesulu panya nganmanytju wangkangu, “Ngayunyanja katura utitjunkuku.” Alatji wangkara paluru puṇu kaṭakutjarangka utitjunkunytja kuliningi. Panya Rome-anja ngurara tjuṭangku wati kura tjuṭa alatji iluntankupai puṇungka wakara utitjunkula. Palu Jew tjuṭangku alatji iluntankunytjaku wiya ngarangi Rome-aku mayatjangku painnyangka.

19

¹ Ka Pilate-alu palumpa tjaultji tjuṭangka wangkangu, “Jesunyaya katira wiipangka pułkara puwa!” Kaya mulapatu palunya wiipangka pułkara alkanu. ² Munuya tjilka iri pułkatjara manguri purunypa karpi-karpipa tjunu palula katangka. Munuya palunya mantara purple mayatja pułkangku kanyilpaingka tjarpatjunu. ³ Munuya palumpa ikaringkula palunya anara wangkangi alatji, “Awa, Wanyumpa kunyun Jew tjutaku mayatja pułkampa.” Munuya marangku palunya yunpa pungangi.

⁴ Ka Pilate-anja piruku pakanu urilkutu munu Jewku mayatja tjuṭangka wangkangu, “Ngayuluña kuwari wati nyanga palunya nyuralakutu mapakaltjingani, panya ngayulu puť palumpa kura ngurkantananyi palunya iluntankunytjikitjangku.”

⁵ Ka Jesunyta tjanalakutu ma-pakańu manguri tjilkatjara katangka tjunkunytja munu mantara panya mayatjangku kanyilpaintyatjara. Ka Pilate-alu tjanala wangkangu, “Nyawaya! Nyangatja wati panya paluru, ngaltutjara.”

⁶ Kaya tjukurtjara kuranyitja tjuṭangku munu wati panya timpula atunymankupai tjuṭangku kuļu Jesunyta nyakula ngalturingkunytja wiyangku alatjitu mirara wangkangu, “Puňu katakutjarangka wakara utitjura! Puňu katakutjarangka wakara utitjura!”

Ka Pilate-alu miranyangka kulira wangkangu alatji, “Wiya, wati nyanga palunya ngayulu puť kura ngurkantananyi iluntankunytjikitjangku. Palu nyurayanku ma-katira puňungka wakara utitjura.”

⁷ Kaya Jewku mayatja tjuṭangku palula wangkangu, “Wiya, wati nyanga palurunku Godaku katjanmanangi. Ka panya nganampa tjukurpa ngaranyi alatji, ‘Anangu kutjupangku walytjangku Godanyanmankunyangka palunya iluntanama.’”

⁸ Ka tjana nyanga alatji wangkanyangka Pilate-alu kulira pułkara nguluringu. ⁹ Munu piruku walingka tjarpara tjapinu Jesula, “Nyuntu ngura yaaltjinguru pitjangu?” Palu Jesulu palula wangkanytja wiyangku alatjitu wantingi.

¹⁰ Ka Pilate-alu wangkangu, “Nyaakun ngayula tjukurpa utingku tjakultjunkunytja wiyangku wantinyi? Panya ngayuluña mayatja pułka nyinanyi mununa ngayulu mukuringkula nyuntunya wantir’iyalku ankunytjaku, munta tjinguruña mukuringkula nyuntunya puňu katakutjarangka wakantjaku palyanmankuku.”

¹¹ Ka Jesulu wangkangu, “Wiya, panya ilkaringuru Godanya mukuringkunyangka kutju nyuntu ngayuku palyantjaku ngaranyi. Palu wati nyara ngayunya katira nyuntunya ungkunytja tjuṭa kura pułka mulapa ngaranyi nyuntula waintara, panya paluru tjana ngayunya iluntankunytjikitja mukuringanyi.”

¹² Ka nyangatja kulira Pilate-alu palunya walatjunkunytjikitjangku kuliningi munu piruku urilkutu pakara tjanala ngapartji tjapiningi Jew panya tjuṭangka. Ka paluru tjana piruku mirara wangkangi, “Munta, nyuntun malpa wiya Rome-aku mayatjaku? Nyaakun wati nyanga palunya walatjunkunytjikitjangku wangkanyi? Panya palurunku mayatja pułkanmanangi. Ka nyuntumpa mayatja Rome-ala nyinanytjanya tjinguru nyangatja kulira nyuntumpa mirpanariku nyuntu palunya walatjunkunyangkampa.”

¹³ Ka Pilate-alu nyangatja kulira Jesunyta urilkutu pakaltjingantjaku wangkangu. Kaya katira ngaratjunu urilpa panya ngurkantankupaingka. (Ngura nyara paluru panya ini *Urilpa Walu Tjiwanguru Palyantjitjanya*,

kaya wangka Iipurungku ngura palunya wangkapai, *Kapatjanya.*) Ka nyara palula Pilate-anja nyinakatingu tjiya pulkangka, panya wati mayatja nyinakatipai tjiya nyanga palula kura palyalpai tjuta tjukarurungku ngurkantankunytjikitja. ¹⁴ Ka tjintu nyara palula panya Jew tjutangku ritiringkula kutjupa kutjupa tjuta palyaningi nganmanytju inma Katuwanu Ankunytjanya mungawinki palyantjikitjangku.* Ka nyara palula arakalalarinyangka Pilate-alu wangkangu tjanala, “Nyawaya! Nyangatja nyurampa panya mayatja pulka.”

¹⁵ Kaya piruku mirara wangkangu kutjupangku kutjupangku, “Iluntarala! Iluntarala! Puṇu kaṭakutjarangkala wakara utitjura.”

Ka Pilate-alu tjapinu tjanala, “Mulapaṇa nyurampa nyanga mayatja puṇu kaṭakutjarangka wakara utitjunkuku?”

Kaya tjukurtjara kuranyitja tjutangku wangkangu, “Wiya, nyanga paluru nganampa mayatja wiya, panya mayatja pulka nyara Rome-ala nyinanytjanya kutju nganampa mayatja pulka nyinanyi.”

¹⁶ Ka palulanguru Pilate-alu Jesunya wantir'iyanu katira puṇu kaṭakutjarangka wakara utitjunkunytjaku. Kaya tjaultji tjutangku palunya witira ma-katingu.

*Jesunyaya Puṇu Kaṭakutjarangka Wakara Utitjunkunytja
(Matthew-ku 27:32-44; Markaku 15:21-32; Luke-aku 23:26-43)*

¹⁷ Ka paluru puṇu kaṭakutjara walytjangku tjalira ma-katingu ngura ini Kata Tarkatjaralakutu. (Panya Iipuru tjutangku ngura nyanga palunya ini wangkapai, *Kaulkatjanya.*)

Kaya ngura nyara palula tjaultji panya tjutangku palunya puṇu kaṭakutjarangka wakara utitjunu. ¹⁸ Munuya palulanguru wati kutjupa kutjara palu purunypaṭu wakara utitjunu kutjupa mara wakungka, kutjupa mara tjampungka. Ka Jesunya ngururpa utingaringi. ¹⁹ Ka Pilate-alu nganmanytju kutjupangka wangkangu puṇu tjlpirta ini walkatjura Jesula katu puṇungka tjungura wakantjaku nyanga alatji,

Jesunyaya Nazarethanya Ngurara
Jew Tjutaku Mayatja Pulka

²⁰ Ka wati kutjupangku tjukurpa palunya puṇungka walkatjunu wangka panya mankurpa Iipuru munu Latin munu Kuriki, ka tjaultjingku puṇungka katu wakara wantingu. Kaya Jew tjutangku ini nyara palunya nyangangi, panya ngura nyara Jesunya wakara utitjunkunytjanya panya walingka itingka nguwanpa, kaya walinguru pakara ma-nyangangi uti ngaranyangka. ²¹ Kaya tjukurtjara kuranyitja tjutangku walka panya nyakula ankula wangkangu Pilate-ala, “Nyaakun alatji walkatjunkunytjaku wangkangu. Utin nyanga alatji palyanma, ‘Nyanga palurunku walytjangku Jew tjutaku mayatjanmanangi.’”

²² Ka Pilate-alu wangkangu, “Wiya, alatjituṇa wangkangu. Ka nyara paluru ngaranyi alatjitu.”

²³ Kaya tjaultji kutjara kutjarangku Jesunya wakara utitjura mantara palumpa mantjira kutjungku kutjungku katingu. Munuya kutju panya tiritja purunypa paluru unngu tjarpara kanyilpai maunṭalpa tjunu. Mantara pala paluru panya alatji-alatjitu palyantja wakara tjunguntja wiya. ²⁴ Kayanku wangkangi tjaultji tjutangku, “Wanyula kaṭantankunytja wiyangku wantima munula puṇu nyanga nampatjara

* **19:14** Paluru tjana tjintu tjarpanytja kuwaripangka palyara ritiringangi panya tjintu tjarpanyangka munga nyara paluru munu mungawinki kuļu milmilpa ngarapai warkarintjaku wiya Godanya tjunguringkula wałkuntjaku.

arkara wañira nyawa, ‘Nganalu nampa pułka wañiku?’ Ka nyara paluru nampa tjukarurungku wañinytjatjanungku mantara palunya mantjilku.” Ka mulapa kutjupangku nampa tjukarurungku wañingu munu paluru mantjinu mantara panya palunya. Panya nganmanytju nyiringka iriti walkatjunkunytja ngaranyi nyanga alatji, “Ngayuku mantaraya kutjungku kutjungku katingu.

Munuya mantara panya ngayulu unngu kanyintjtjaku inkangi,
ka kutjupangku nampa tjukarurungku wañingu paluru mantjintjikitjangku.” *

Kaya wati tjaultji tjutangku mulapañu alatjinganu tjukurpa iriti walkatjunkunytja ngaranytjaku alatji.

²⁵ Kaya minyma panya tjuña ila ngarangi Jesunya utitjunkunytjala itingka panya palumpa ngunytju, munu ngunytju małatja, munu minyma kutjupa ini Mary-nya Kulapatjaku kuri, munu Mary Magdalene-anya kułu.

²⁶ Ka nintintja kutju Jesuku ngunytjungka tjungu ngarangi, panya nyanga paluru Jesuku malpa mulapa. Ka Jesulu pulanya walunyakula ngunytjungka wangkangu, “Ngunytju, palatjanku nyuntumpa katja.” ²⁷ Munu piłuku wangkangu palumpa panya malpangka, “Ka nyuntunku ngunytju nyanga palunya ałunymanama.”* Ka nyara palulanguru nintintja panya paluru Jesuku ngunytju katingu palumpa ngurakutu munu palumpa ngurangka ałunymara kanyiningi.

Jesunya Ilunytja

(Matthew-ku 27:45-56; Markaku 15:33-41; Luke-aku 23:44-49)

²⁸ Ka Jesulu nintingku kulinu, “Uwa, Mamalu wangkanytjaña uwankara palyara wiyanu.” Munu palulanguru paluru wangkangu, “Mina iluña.” Ka alatji paluru wangkanyangka iriti nyiringka walkatjunkunytja mulapa utiringu.

²⁹ Ka piti waina kurakuratjara ngarangi, kaya tjaultji tjutangku pantja purunytja wainangka tjalatjura puñu warangka tjunkula katura Jesula tjaangka kanyiningi tjikintjaku. ³⁰ Ka Jesulu waina tjikira wiyaringkula wangkangu, “Uwa, uwankaraña palyara wiyanu.” Munu palulangurulta kata tjaruringkula kurunpa wiyaringkula ilungu.

Jesunya Kultu Kułatangka Wakantja

³¹ Ka palulanguru Jewku mayatja tjutangku Pilate-ala ankula tjapinu, “Palyaya wati nyara puñungka utingarintja małkurpa tjalpa katantankuku mapalku ilunytjaku? Panya nganaña mukuringanyi palunya tjananya miri mantjintjikitja.” Alatjiya tjapinu tjana miri puñungka rawa ngaranytjaku-tawara. Panya mungawinki Saturdayngka tjanampa tjintu milmilpa mulapa ngarangi Jew tjutaku, kaya tjana mukuringkunytja wiya miri puñungka rawa utingarintjaku tjintu tjarpanyangka małangka.

³² Ka Pilate-alu palyanmanu tjananya tjalpa katantankunytjaku munu wangka iyanu tjaultji panya tjutakutu. Kaya kulira wati panya Jesula nganytjarta kutjara ngaranytja-warara tjalpa katantanu. ³³ Palu Jesulakutu ngapartji wirkaraya nyangu nganmanyapa ilunytja munuya ilunytja nyakula tjalpa katantankuwyangku wantingu. ³⁴ Ka tjaultji kutjungku Jesunya kultu wakanu kułatangka, ka milkali mina kułu ngalyatjutingu. ³⁵ Ka nyangatja wati kutjungku nyakunytjatjanungku ngula

* ^{19:24} Psalm 22:18 * ^{19:27} Alatji Jesulu wangkangu palumpa malpangka ngunytju palumpa paluru ankunyangka katjaringkula ałunymara kanyintjaku, palu katja mulapa wiya.

tjakultjunu. Wati paluru nintingku tjukarurungku wangkapai nyura ku_{lu} kulira mulamularingkunytjaku.* ³⁶ Kaya tjaultji tju_{tan}gku Jesunya tjalpa ka_{tan}tankunytja wiyangku wantinyangka tjukurpa panya iriti nyiringka walkatjunkunytja utiringu panya alatji ngaranyi nyiringka,
“Palunyaya tarka ka_{tan}tankunytja wiyangku wantiku.” *
³⁷ Ka tjukurpa kutjupa ku_{lu} nyiringka ngarangi nyanga alatji,
“Anangu tju_{tan}gkuya nyakuku paluna wakannyangka.” *

Jesunya Miri Kulpingka Tjunutjunkunytja

(Matthew-ku 27:57-61; Markaku 15:42-47; Luke-aku 23:50-56)

³⁸⁻³⁹ Ka wati kutjupa nyinangi ini Josephanya Arima-tjiyanya ngurara. (Wati nyara paluru Jesunya wa_ñalpai, palu paluru utingku wa_ñantja wiya, kumpiltu wa_ñaningu, Jewku mayatja tjutaku nguluringkula.) Munu paluru Pilate-alakutu anu Jesunya miri ngatjintjikitja. Ka Pilate-alu palunya palyanmanu katinytjaku. Ka wati kutjupa Josephala tjunguringu ini Nicodemusanya. (Wati nyanga paluru panya Jesulakutu nganmanypa anu mungangka.) Munu pula ankula Jesunya puntu pu_ñunguru ar-altjara ukalilyinu munu mantjira katingu. Ka Nicodemusalu wiru pantipai tju_{ta} katingu Jesula miringka tjutintjikitjangku. Panya paluru yakutjangka pulka mulapa katingu, nampa nyangatja 30 kilograms.
⁴⁰ Munu pula Jesunya puntu winki wiru pantipaingka tjutira karpinu mantara warangka. Panya tjakangkuya Jew tju_{tan}gku alatji palyalpai tjunutjunkunytjikitjangku, ka pula Jesunya anangu palu purunypat_u palya_ñ. ⁴¹⁻⁴² Ka ngura nyara palula itingka kaana pulka ngarangi, panya Jesunya pu_ñu ka_{tan}kutjarangka utitjunkunytjitetjangka tjaru. Ka nyara palula kulpi ngarangi kuwari kutju tjawara wantintytja. Ka tjin_{tu} panya pakuiyaringkupai ilaringkunyangka pula kulpi nyanga ilatjangka Jesunya miri mapalku tjarpatjura wantingu, panya pula mungawinkiku riti palyantjikitja mukuringangi tjin_{tu} tjarpanytja kuwaripangka.

20

Kulpi Ultu Ngaranyangkaya Nyangu

(Matthew-ku 28:1-8; Markaku 16:1-8; Luke-aku 24:1-12)

¹ Ka Sunday tjin_{tu}kutu manta ma_ñungka mulapa Mary Magdalene-anya pakara anu kulpikutu, munu wirkara nyangu apu panya tjaangka angatjunkunytja wati-un_ñtura wa_ñara wantintytja. ² Munu nyakula wirt-japakanu nintintja kutjarangka tjakultjunkunytjikitja Simon Peterla munu Jesuku panya malpa mulata. Munu pulala wangkangu, “Pitjala pula wanyu nyawa. Mayatjanyaala pu_ñu nyangu. Kulpi ala ngaranyi. Kutjupangkunti mantjira katira wampa kutitjunu.”

³⁻⁴ Ka pula alatji wangkanyangka kulira pakara mapalku wirtjapakanu kulpikutu. Ka nintintja panya kutjupa Peterla waintaringu munu paluru-warara kulpingka wirkatu. ⁵ Munu pupakatira nyirkira nyangu mantara panya palunya karpira tjunkunytja kutju ngarinyangka. Munu tjarpanytja wiyangku urilnguru kutju ma-nyangu. ⁶ Ka Simon Peterlu wa_ñara malawanungku wirkatu kulpingka munu paluru-warara tjarpanu kulpununggu. Munu ilangku nyangu mantara kutju ngarinyangka. ⁷ Ka raiki panya kata karpira wantintjanya ma_ñtalpa ngaringi tapulara tjunkunytja. ⁸ Ka nintintja panya kutjupa, panya paluru-warara kulpingka

* **19:35** Nyanga alatji wangkara Johntu palurunku wangkangi. * **19:36** Psalm 34:20 * **19:37** Tjakarayaku 12:10

wirkankunytjanya, paluru kulu tjarpangu, munu nyangu, "Mulapa nyan-gatja mantara kutju ngarinyi." Munu paluru mulamularingu Jesunya ilun-ytjatjanu wankaringkula pakantjitjaku.⁹ (Panya Mary-lu pulanya Jesunya puntu wiya ngaranytja tjakultjunkunyangka pula Jesunya wankaringkun-ytjitjaku mulamularingkunytja wiyatu. Panya kuwaripangkutu pula putu kuliningi panya nyiringka iriti walkatjunkunytja ngaranyi alatjitu Jesunya ilunytjatjanu wankaringkula pakantjaku.)¹⁰ Munu pula kulp*i* unngu nyakunytjatjanu małaku anu ngurakutu.

Jesunya Mary Magdalene-ala Utiringkunytja

(Matthew-ku 28:9-10; Markaku 16:9-11)

¹¹⁻¹² Ka Mary-lu panya pulanya kulpikutu maławanungku wañanu munu wirkara ngarala ulangi ırulta kulp*i* tjaangka munu ulara ulara pu-pakatira kulp*i* unngu nyirkira nyangu angelpa kutjara mantara pirantjara nyinanyangka. Panya pula Jesunya ngarinytjtjangka nyinangi kutjupa tjinatjangka, kutjupa katalku.¹³ Munu pula Mary-nya nyakula tjapinu, "Minyma awa, nyaakun ngarala ulanyi?"

Ka wangkangu pulala, "Wiya, panya ngayuku Mayatjantiya wampa katingu, kaña putu kulini, 'Yaaltjingkaya katira tjunu?'"

¹⁴ Munu alatji wangkara pinkurarara nyangu Jesunya ngaranyangka, munu paluru putu ngurkantanangi wati kutjupa-palku.¹⁵ Ka Jesulu tjapinu palunya, "Minyma awa, nyaakun ngarala ulanyi? Ngananyan putu ngurini?"

Ka paluru wati kaanangka warkaripai-palku kulira tjapinu, "Munta, nyuntu ma-katintytjatjanungkumpani tjakultjura, 'Yaaltjingkan tjunu?' Kaña ankula mantjila."

¹⁶ Ka Jesulu wangkangu palula, "Mary!"

Ka ini wangkanyangka kulira paluru pinkurarara nyangu munu wangkangu, "Rabboni!" (Ini nyanga *Rabboni* wangka Ara-mayiki munu panya wangkanyi *Nintilpai*.)

¹⁷ Ka Jesulu wangkangu palula, "Pampulwiyangkuni wantima panya kuwaripana Mamalakutu ankunytja wiyatu. Palu ankula tjanala wangka nintintja panya tjutangka, 'Ngayulu Mamalakutu małaku ananyi, panya nyuntumpa nganampa Mamakutu. Panya nyuntu nganana God nyara palunya walkulpai, nyara palulakutuna ananyi.' Alatji tjanala ankula wangka."

¹⁸ Ka Mary-lu kulira ankula nintintja tjutangka wangkangu, "Awa, kulilaya wanyu! Ngayuluna nyangu Mayatjanya ngayula utiringkun-yangka." Munu paluru tjanala tjakultjunu Jesulu palula wangkanytja uwankara.

Jesunya Palumpa Nintintja Tjutangka Utiringkunytja

(Matthew-ku 28:16-20; Markaku 16:14-18; Luke-aku 24:36-49)

¹⁹ Ka tjintu panya palulatu nintintja tjuta mungangka tjunguringu wali kutjungka munuya nyinangi tuwa patira Jewku mayatja tjutaku ngulu. Ka Jesunya tuwa patingka utiringkula ngarangu tjanala ngururpa munu wangkangu tjananya, "Raparingkulaya pukulpa nyinama!"²⁰ Munu nyangatja wangkara tjanala nintinu mara kultu kulu, kaya nyakula pulkara pukularingu palumpa.²¹ Ka piruku Jesulu tjananya wangkangu, "Ra-pariringkulaya pukulpa nyinama. Panya ngayunyan*i* mantakutu Mamalu witura iyanu palumpa warka palyantjaku, kaña ngayulu palu purunypatu nyuranya ngapartji witura iyan*i* warka ngayuku palyantjaku."

²² Munu palulanguru tjananya puuṇu munu wangkangu, “Kuwariṇa nyurala Kurunpa Milmilnga tjarpatjunanyi, kaya mantjila nyurala tjunguringkula nyinanytjaku. ²³ Ka tjinguru nyura kutjupangka wangkaku alatji, ‘Mama Godanya nyuntumpa kalyparingu munu nyuntu kura palyantjitjanguru kalypangku wantinyi.’ Ka mulapaṭu Mamanya palumpa kalyparingkuku. Palu tjinguru kutjupangka nyura wangkaku alatji, ‘Mama Godanya nyuntumpa kalyparingkunytja wiya.’ Ka mulapaṭu Godalu palumpa kalyparingkunytja wiyangku wantiku.”

Jesunya Thomasala Utiringkunytja

²⁴ Ka munga nyara palula Jesunya tjanala utiringkunytjjangka nintintja kutju wiya ngarangi wati ini Thomasanya. (Nyara paluru ini kutjupa panya Titimatjanya.) ²⁵ Kaya nintintja panya kutjupa tjutangku Thomasanya ngula pitjanyangka nyakula tjakultjunu alatji, “Mayatjanyaala nyangu.”

Ka Thomasalu wangkangu, “Wiya, puṭuna mulamularinganyi ngayulu. Tjinguruna palunya mara panya nailangka wakantja nyakula pampura kutju mulamularingkuku, munuṇa kultu panya wakantja pampura kuļu mulamularingkuku.”

²⁶ Ka nyanga palulanguru tjirirpi 7 ngarala wiyaringkunyangka nintintja tjuta piruku tjunguringkula walı unngu nyinangi tuwa patingka. Ka Thomasanya kuļu tjanala tjungu nyinangi. Ka Jesunya tuwa patingka piruku utiringu munu tjanala ngururpa ngarangu munu panya palu purunypaṭu wangkangu, “Raparingkulaya pukulpa nyinama!” ²⁷ Munu paluru Thomasala wangkangu, “Ala, nyawaltanı kurungku mara nyanga mununi pampula, mununi piruku miña wararingkula kultungka nyanga mara tjura pika nyanga alangka. Panya ngañmanyapan puṭu mulamularingangi tjana tjakultjunkunyangka. Palu kuwari nyangaltatju mulamulariwa.”

²⁸ Ka Thomasalu nyakula mulamularingu munu wangkangu palula, “Mulapan nyuntu ngayuku Mayatja Godanya!”

²⁹ Ka Jesulu palula wangkangu, “Ngayunya nyakula kutjun ngayuku mulamularingu. Palu kutjupa tjutaya ngayuku nyakunytja wiya mulamularingkupai, nyara paluru tjana pukulpa mulapa nyinaku.”

Tjukurpa Nyangatja Mulamularingkunytjaku Walkatjunu

³⁰⁻³¹ Ka Jesulu miracle kutjupa kutjupa tjuta mulapa palyaningi palumpa nintintja tjutangka mirangka tjana nyakula mulamularingkunytjaku. Palu nyiri nyangangkaṇa Jesulu palyantja uwankara walkatjunkunytja wiya mununa tjukurpa mankurpa kutju walkatjunu nyura nyakula kulira mulamularingkunytjaku panya Jesunya mulapa Christanya Godaku katja, panya Wankarunkupai Godalu kalkuntjanya. Ka nyura tjukurpa nyangatja kulira mulamularingkula wankaru tiṭutjara nyinaku palula tjungu.

21

Jesunya Nintintja Tjutangka Utiringkunytja Urungka Itingka

¹⁻² Ka ngula Jesunya piruku utiringu palumpa nintintja kutjupa tjarangka uru ini Tapiriyala itingka (ini kutjupa Galileela). Panya nyanga alatji ngarangi nintintja 7 tjunguringkula nyinangi ngura nyara palula panya Simon Peternya, Thomasanya (ini kutjupa Titimatjanya), munu Natjanyulunga panya Kainanya ngurara, munu Tjipitiku katja kutjara munu nintintja panya kutjupa kutjara kuļu. ³ Ka Simon Peterlu mungartjirinyangka wangkangu tjanala, “Antipinakuṇa ananyi.”

Kaya wangkangu, “Uwa palya, nganana kulu nyuntula tjungu ma-pitjanyi.” Munuya uwankaratu pautangka tatira ma-pitjangu uru ngatikutu. Palu munga nyara palulaya rawangku kuka putu alatjitu witiningi.

⁴ Ka ngalya-tjinturingkunyangka Jesunya uru kantilytja ngarangi, ka nintintja tjuta pararitu nyinangi urungka ngururpa pautangka munuya palunya putu ngurkantanangi. ⁵ Ka Jesulu tjananya mirara tjapinu, “Walytja tjuta! Kuka nyura witinu?”

Kaya wangkangu, “Wiya alatjitula.”

⁶ Ka tjanala wangkangu, “Net palaya wani pauta kampa wakungka munu nyura kuka pulka witilku.” Kaya mulapatu waningu kampa wakungka, munuya winki mulapa witinu munuya pautangka tjunkunytjikitjangku net putu ilaningu antipina mungiliy mulartjara.

⁷ Ka nintintja panya Jesuku malpa mulatu wangkangu, “Mayatjanya palatja.” Ka Peterlu nyangatja kulira mantara nganmanytu araltjara tjunkunytjatjanu tjarpangu malaku munu urungka ma-walarakatingu Jesulakutu ankunytjikitja. ⁸ Kaya nintintja kutjupa tjuta pautangka pitjangi mantakutu munuya net panya kuka tjutatjara ilara katingi, panya manta ila ngarangi 100 metre nguwanpa. ⁹ Kaya mantangka wirkara nyangu waru purku kampanyangka, ka nyara palula antipina mankurpa para wantintjya ngaringi, ka mai tampa kulu warungka itingka tangka ngaringi.

¹⁰ Ka Jesulu tjanala wangkangu, “Kuka tjaraya ngalya-kati.”

¹¹ Ka Simon Peterlu pautangka tjarpara net panya antipina pulkka tjulatjara witira ngalya-ilanu mantakutu. Munuya kantamilara nyangu nampa nyanga alatji 153, tjuta mulapa. Palu net panya palyatu ngarangi katakatintjya wiya alatjitu.

¹² Ka Jesulu tjanala wangkangu, “Pitjalaya pinpatja ngalkula!”

Kaya pitjala nyinakatira unngu kutju kuliningi alatji, “Ngananya nyangatja?” Palu utingku tjapilwiyangkuya wantingi, panya palunya alatjituya ngurkantanu Mayatja Jesunya. ¹³ Ka Jesulu mai tampa mantjira tjananya ungu kuka antipina kulukulu, kaya ngalkuningi.

¹⁴ Nyangatja panya Jesunya ilunytjatjanu pakara ara mankurara nintintja tjulangka utiringkunytja.*

Jesulu Peterla Wangkanyta

¹⁵ Kaya kuka mai ngalkula wiyingkunyangka Jesulu Simon Peterla wangkangu, “Simon Johnkunu, nyanga tiana ngayuku pulkara mukuringkupai. Ka nyuntu tjanala waintara mulapa ngayuku mukuringanyi?”

Ka wangkangu, “Uwa Mayatja, nyuntu ninti ngayulu nyuntumpa pulkara alatjitu mukuringkupai.”

Ka wangkangu, “Uwa, lamalama tjulatju paltjanma.”

¹⁶ Munu piruku tjapinu Simonta, “Simon Johnkunu, nyuntu mulapa ngayuku pulkara mukuringanyi?”

Ka wangkangu, “Uwa Mayatja, nyuntu ninti ngayulu nyuntumpa pulkara alatjitu mukuringkupai.”

Ka wangkangu, “Uwa, tjiipi tjulatju atunymara kanyinma.” ¹⁷ Munu piruku Simonta tjapinu, “Simon Johnkunu, nyuntu ngayuku pulkara mulapa mukuringanyi?”

* ^{21:14} Panya nganmanypa tjanala utiringu wal unngu tuwa patingka nyinanyangka. Munu piruku utiringu tjanala wal panya palulatu. Munu palulanguru uru nyanga kantilytjalta piruku utiringu.

Ka Peternya tjituru-tjitururingu maŋkurarangku tjapinnyangka. Munu paluru wangkangu Jesula, "Mayatja, nyuntu uwankaraku ninti. Nyuntu ninti alatjitu panya ngayulu nyuntumpa pulkara mulapa mukuringanyi."

Ka Jesulu palula wangkangu, "Tjiipi tjutatju paltjanma.
¹⁸ Tjukarurungkuñanta wangkanyi, nganmanypa panya nyuntu wati yangupalalpi nyinara pakara mantarangka tjarpala walytjangku kulira ankupai. Palu ngulan tjlpiringkula mara katuringkuku, kanta kutjupa tjutangku nyuntunya mara karpira witira ma-katirinkuku nyuntu mukuringkunyitja wiyakutu."
¹⁹ (Alatji Jesulu wangkara utinu panya ngula mirpanjtju tjutangku Peternya witira mara karpira ma-katiku pungkula iluntankunyitjikitjangku. Panya paluru rapa alatji iluku Godaku pulkara mulamularingkula, kaya anangu tjutangku palunya rapa ilunyangka nyakula Godanya pulkara mirawañira walkulkku.)

Ka palulanguru Jesulu wangkangu Peterla, "Ngayunyanı wañanma."

²⁰ Ka Peterlu pinkurarara nyangu nintintja panya Jesuku malpa mulapa palunya pulanya wañannyangka. (Nintintja nyanga paluru panya mungañu mai ngalkunnyangka Jesula itingka ngarikatira tjapinu alatji, "Nganalunta witintjaku nintilku?")
²¹ Ka Peterlu palunya nyakula Jesula tjapinu, "Mayatja, wati nyangatjampa? Nyanga paluru ngula yaaltjiriku?"

²² Ka Jesulu wangkangu, "Tjinguruña ngayulu mukuringkulampa wati nyanga palunya wanka kanyinma ngula panya ngayulu małaku pitjanyangka ngayunya nyakunyitjaku. Palu nyuntu palunya nyakula kulin-tja wiyangku wantima, munuñi nyuntu walytjangku kulira ngayunya wanamna."

²³ Kaya Jesunya wañalpai tjutangku tjukurpa nyangatja kulira ara kampa kutjupa ngunti kulinu munuya wangkara lipinu uwankarangka nyanga alatji, "Jesulu panya wangkangi wati nyanga nintintja palumpa malpa mulapa ilunytja wiya rawa nyinanytjaku." Palu Jesulu nyanga alatji wangkanytja wiya wati paluru ilunytja wiya nyinanytjaku. Alatji kutju paluru wangkangu, "Tjinguru ngayulu mukuringkulampa palunya wanka kanyinma ngula panya ngayulu małaku pitjanyangka ngayunya nyakunyitjaku. Palu nyuntu nyanga palunya nyakula kulin-tja wiyangku wantima."

²⁴ Ka tjukurpa nyanganpa nintintja panya paluru tjakultjunanyi munu paluru nintingku walkatjunanyi kulintjatjanungku. Kala nganana kulini panya paluru nintingku tjukarurungku tjakultjunkunyangka.
²⁵ Ka panya Jesulu kutjupa kutjupa tjuṭa mulapa palyaningi mantangka nyinar-alpi. Kaña tjinguru tjukurpa palunyatjara uwankarañu nyiri tjutangka walkatjura wiyanma, ka nyiri paluru tjana manta winki anganma. Palu wiya, kutjupatjara kutjuña walkatjunu.

Uwa alatjiuna wiyaringu.

Jesulu Iyantja Tjutangku Palyantja

Acts

Nyangatja Nganmanytju Nyakula Wangkanytjaku

Nyangatja Godaku tjukurpa wati ini Luke-alu walkatjunkunyta Jesuku nintintja tjutatjara, panya Jesunya ilkarikutu malaku ankunyangkaya wiru tjuta palyaningi. Ka Luke-alu lita nyangatja walkatjunu wati panya palumpa malpaku ini Tjiyapilatjaku paluru nyakula wangkara nintiringkunyntjaku tjukurpa uwankaraku panya Peterlu Paulalu tjana Jesuku panya nintintja tjutangku palyantjitjaku.

Tjukurpa nyanga palula Luke-alu tjakultjunu Godalu Kurunpa Milmilnga iyantja palumpa walytja tjutakutu panya Jew tjutakutu kutju wiya palu Jew wiya tjutakutu kulu. Panya Jew tjutangku kulira nintiringkunyntjaku ngarangi panya Godaku Kurunpa anangu Jesuku mulamularingkupai uwankaraku Jew tjutaku kutju wiya. Palu Jew kutjupa tjuta putu mulamularingangi munuya paluru tjana kuraringangi anangu Jesuku walytja tjutaku. Palu tjana putu kurara angatjunangi, kaya tjukurpa panya Jesunyatjara ngura winkingka katira lipintanu anangu manta wikitjangku kulintjaku. Panya Kurunpa Milmilnga Jesuku walytja tjutangka tjungu nyinangi munu palunya tjananya pulkara witulyanangi warika wiru palyantjaku munu pika kura tjanampa ngaranyangka paluru alatjitu tjananya anga-kanyiningi, kaya tungun-tunguntu Godaku tjukurpa lipintanangi anangu manta wikitjangka, ka anangu tjuta Jesuku walytjaringangi ngura kutjupa kutjupangka munu manta kutjupangka kutjupangka.

Tjukurpa nyanganpa ngarinyi:

- 1:1—8:1 Anangu tjuta Jesuku walytjaringkunyta ngura Jerusalemala
- 8:1—9:31 Jesuku walytja tjutaringkunyta ngura Israelta
- 9:32—12:25 Anangu Jew wiya tjuta Jesuku walytjaringkunyta
- 13:1—14:28 Paulanya pula Paanapatjanya ngura kutjupa tjutakutu ankunyta Tjukurpa Jesunyatjara wangkara lipintankunyntjikitja
- 15:1-35 Jesulu iyantja tjutangku Jerusalemala tjunguringkula wangkara kulintja
- 15:36—18:23 Paulanya pula Tjaalatjanya ngura tjutakutu ankunyta Jesuku tjukurpa para-wangkanytjikitja munu palumpa walytja tjuta wangkara kunpuntjikitja
- 18:24—21:16 Paulanya piruku ankunyta ngura kutjupa tjutakutu Jesuku walytja tjuta wangkara kunpuntjikitja
- 21:17—26:32 Paulanyaya witintja munuya kuutpangka katira tjunkunyta wangkara ngurkantankunyntjaku
- 27:1—28:31 Paulanyaya Rome-alakutu katintyta

Luke-alu Palumpa Malpa Wati Ini Tjiyapilala Nganmanytju Wangkanytja

1-2 Uwa Tjiyapilatja, panya nyiri ngañmanyitjangkaña tjukurpa Jesunyatjara walkatjunu nyuntu nyakula uti kulintjaku,* panya paluru ngañmanypa mantangkalpi nyinara warika palyantja munu anangu tjutangka nintintja kulu. Uwa, paluru mantangka nyanga nyinara

* **1:1-2** Nyiri ngañmanyitja panya Tjukurpa Palya Luke-alu Walkatjunkunyta.

palyantja uwankaraṇa nyiringka panya walkatjunu palunya ilkarikutu mantjintja kuļu, munu panyāna walkatjura nyuntulakutu iyaṇu.

Palu ilkarikutu mantjintja kuwaripangka Jesulu Kurunpa Milmilngatjarangku palumpa nintintja tjutangka tjukurpa tjuṭa wangkangi munu tjananya wituningi war̄ka palumpa palyantjaku. Panya paluru tjananya nganmanytju ngurkantanu munu tjananya witura iyanu palumpa tjukurpa anangu tjutangka tjakultjunkunytjaku. Palulanguru paluru wati palunya tjananya ini tjunu, *Iyantja Tjuta*.³ Ka panya Jesunya ilunytjatjanu pakara palula tjanala utiringangi tjuṭa ara alatjiṭu, kaya nyara palulanguru palunya nyakunytjatjanungku kulinigi, “Mulapa paluru kuwari wanka nyinanyi.” Panya paluru tjintu 40-arangka tjanala rawa utiringangi, munu tjanala tjakultjunangi Godalu anangu tjuṭa waltyjanmaṛa mayatjangku kanyintja.

⁴ Kutjupa-ara paluru tjanala tjunguringkula mai ngalkuningi, munu tjananya wangkangu alatji, “Jerusalemaya paṭara nyinama ankunytja wiya, panya Mamalu nyuranya nganmanytju kalkuṇu unggunytjikit-jangku. Kaya nyangangka paṭanma, ka nyuranya ungguku kalkuntja panya palunya, panya ngayulu nyurala nganmanytju wangkangu palunya.⁵ Kulilaya! Ngaṇmanytju panya Johntu anangu tjuṭa kuranguru kūntaringkunyangka urungka tjarpatjura baptise-katingi, palu kuwari nguwanpa Mamalu nyuranya baptise-katiku Kurunpa Milmilnga iyara nyurala unngu tjarpara nyinanytjaku.” Alatji Jesulu tjanala wangkangu.

Jesunya Ilkarikutu Mantjintja

⁶ Munuya tjintu kutjupangka puli ini Alipatjarala tjunguringkula ngarangi Jesunya munu palumpa iyantja tjuṭa kuļu, kaya palula tjanala alatji, “Mayatja! Nyuntu wanyu kuwari ngura nyanga Israelku mayatjariku? Munulanya nyuntu Israelkunu uwankara mayatjarira aṭunymara kanyilku?”

⁷ Ka Jesulu wangkangu tjanala, “Wiya, Mamalu kutjungku tjintu nyara palunya ngurkantanu ngayulu Israelku mayatjarinytjaku. Munu paluru nyurala tjakultjunkunytja wiya nyura ninti nyinanytjaku.⁸ Palu wanyuya kulila! Kurunpa Milmiltu pitjala nyurala unngu tjarpara nyuranya witulyankuku nyura kutjupa kutjupa tjuṭa witulyangku palyantjaku. Ka nyura tjukurpa ngayunyatjara rapangku wangkaku ngura nyanga Jerusalemala, munu ngura ititja tjutangka kuļu manta nyanga Judeala winkingka, munu palulanguru nyura manta nyara Tjamiriyalawanungku ngayunyatjara para-wangkaku anangu tjutangka, munu palulanguru nyura manta winkingka ankula ngayunyatjara para-pitjalira tjakultjunkuku anangu winkingka urungka muṇkara kuļu.” Alatji Jesulu tjanala wangkangu.⁹ Ka wangkara wiyaringkunyangka małangka Godalu palunya katuṇu ilkarikutu, kaya malpa panya tjutangku ngarala palunya ilkarikutu katuringkunyangka ira-nyangangi, ka palulanguru ngangkalingku palunya angatjunu.

¹⁰ Ka paluru tjana ngarala ira-nyakunyangka wati kutjara tjanala itingka utiringkula ngarangi mantara pirantjara. ¹¹ Munu pula wangkangu palula tjanala, “Wati Galileenya ngurara tjuṭa! Nyaaku nyura ngarala ilkarikutu ira-nyanganyi? Nyara paluru panya palu purunypaṭu małaku pitjaku, panya nyura nyangu ilkarikutu ankunyangka, palu purunypaṭu paluru ngula pitjaku.” Alatji pula wangkangu tjanala munu wangkara wiyaringkula palula tjanalanguru arkayiringu.

Judasaku Arangka Nyinanytjaku Wati Kutjupa Ngurkantankunytja

¹² Kaya palula małangka iyantja panya tjuta małaku anu Jerusalemalakutu puli panya palulanguru. (Puli panya paluru Jerusalemala itingka ngarangi.) ¹³ Munuya Jerusalemala wirkara ngurakutu anu munuya walingka tjarpa tatira ruuma katutjangka nyinangi wati nyanga tjana panya ini nyanganpa Peternya, Johnnga, Jamesanya, Andrew-nya, Philipanya, Thomasanya, Patjalamunya, Matthew-nya, Simonnga, Jamesanya, Judasanya tjana. (Jamesanya panya Alpi-yatjaku katja, ka Judasanya panya James kutjupaku katja.) ¹⁴ Munuya wati nyanga paluru tjana Godala tjapintjikitja rawa tjunguringkupai, kaya minyma panya Jesunya wanalpai tjuta kułu palula tjanala tjunguringkupai, munu Mary-nya Jesuku panya ngunyntju munu małanypa tjuta kułu.

¹⁵ Ka tjintu kutjupangka paluru tjana piruku tjunguringu anangu Jesuku mulamularingkupai tjuta nampa nyangatja 120 nguwanpa, ka Peterlu pakara tjanala wangkangi alatji,

¹⁶⁻¹⁷ "Walytja wiru tjuta, kulilaya! Panya nyiringka ngaranyi alatji tu jukurpa Judasanyatjara Kurunpa Milmiltu iriti Davidala nintintja. Ka tjukurpa panya paluru utiringu panya Judasalu nintinu Jesunya witintjaku. Palu panya Jesulu ngurkantanu Judasanya nganañala tjungu para-ngaranytjaku, ka paluru mulapa nganañala tjungu Godaku warékaringi."

Alatji Peterlu wangkangi. ¹⁸ (Ka Judasalu panya Jesunya kurangku tjanala witintjaku nintintjatjanungku mani mantjira anu manta payamilantjikitja munu manta payamilara palulalta katanguru punkanu munu tjuni tjlpirarara unnunguru uwankara pakanu munu ilungu. ¹⁹ Kaya Jerusalemala nyinanytja tjutangku kulinu Judasanya ilunytja munuya manta panya palunya ininu palumpa tjanampa wangkangku, *Akil-tamanya*, panya ini paluru alatji wangkanyi, "Manta nyanga palula panya anangu ilura milkali jtutingu.")

²⁰ Ka Peterlu piruku wangkangu, "Panya Davidalu iriti tjukurpa Judasanyatjara walкатjunu Psalmangka alatji,
'Wanyuwi palumpa nguraya wantikatira ara, ka kutjupa nyinanytja wiya alatji tu ngarama.'*

Ka piruku ngaranyi Psalm kutjupangka kułu alatji,

'Ka paluru wiayingkunyangka uti kutjupa palumpa arangka nyinama.'*

²¹⁻²² Ka nyara palulanguru uli kutjupa ngapartji ngurkantanama ngananala tjunguringkula Godaku warka palyantjaku wati panya palumpa arangka. Utila wati panya Jesula tjungutja ngurkantanama panya kuwari-patjara Jesula ngananala tjungu para-ngaranytjanya, munu panya paluru nganañala tjungungku Johntu үрungka baptise-katinyangka nyakunytjanya munu Jesunya ilkarikutu ankunyangka tjungungku nyakunytja kułu, wati tjungutja mulapa kutjupa wiya, panya paluru Jesunya ilura wankaringkula pakantja nyakunytjatjanungku aña nintingku tjakultjunkunytjaku ngananala tjungungku."

²³ Kaya palulanguru wati kutjara ini walkatjelu Josephanya ini kutjupa kutjara Paatjapatjanya munu Tjatjanya, ka wati panya kutjupa ini Matjaiyatjanya. ²⁴ Kaya nyara palulanguru ini kutjara walkatjunkunytjatjanungku tjungungku Godala tjapiningi wangkara, "Mayatja, nyuntu ninti nganampa uwankaraku panya nganaña unngu kulintjtjaku. Wanyulanya nyuntu nintila wati nyanga kutjaranguru nyuntu ngurkantankunytja ngananala tjunguringkula nyuntumpa warékarinjtjaku Jesulu iyantja. ²⁵ Panya

* ^{1:20} Psalm 69:25 * ^{1:20} Psalm 109:8

Judasalu warka nyangatja wantingu munu kura pulka palyantjatjanu anu ngura kurakutu. Kalanya Mayatja wirungku nyuntu nintila palumpa arangka kutjupa ngurkantara tjunkunytjaku.” ²⁶ Munuya tjapira wi-yaringkula ini panya kutjara nganmanytju walkatjunkunytjatjanungku ngururpa waningu, ka Matjaiyatjaku ini utiringu. Kaya palunya tjungunu wati panya Jesulu iyantja tjutangka, kaya 11 ngaranytjatjanu 12-aringulta paluru tjanala tjunguringkunyangka.

2

Kurunpa Milmilnga Pitjanytja

¹ Ka tjintu panya Pintikatja* ngaranyangka Jesuku mulamularingkupai tjuta tjunguringkula nyinangi wali kutjungka.

² Ka rurku winki ukalingu ilkarlinguru walpa pulka purunypa, munu tjarpangu yiwała tjana nyinanytjitjangka. Kaya uwankarangku kulinu.

³ Munuya nyangu waru tili purunypa tjanala katu utiringkunyangka, ka waru tili paluru tii-tiilarara kutjungka kutjungka katangka nyinakatingu.

⁴ Ka Kurunpa Milmilnga tjanala uwankarangka tjarpangu. Kaya ngurpangku kuwari kutju alatji mapalku wangkangu wangka kutjupa kutjupangku Kurunpa Milmiltu nintinnyangka.

⁵ Ka Jew ngura kutjupitja kutjupitja tjuta kulu ngura nyara Jerusalemala pitjala nyinangi Godanya timpulangka walkuntjikitja. ⁶ Munuya pulkara rurkunyangka kulira ilaringkula ngarala nyangangi munuya kulinu Peterlu tjana wangkanyangka wangka tjanampangku, panya kutjungku kutjungkuya wangka kutjupa kutjupa wangkangi, kaya anangu tjutangku wangka waltyangku uti wangkanyangka kulinigi. ⁷ Munuya putu kulinigi, “Nyaaringuya nyanga tjana?” Munuya wangkangi, “Wati nyanganpa panya Galileenya ngurara tjuta. ⁸ Munu nyangantu yaaltji-yaaltji nganampa nyanga wangka wangkanyi? ⁹ Panya mulapa nganaña ngura kutjupa kutjupa tjutanguru pitjala tjunguringkula nyinanyi Jerusalemala, ngura ini nyangannguru Patjiyalanguru, Miitiyalanguru munu Ilamalanguru, Mitjupu-taimiyalanguru, Judealanguru munu Kapatu-tjiyalanguru, Pantatjalanguru munu Aitjalanguru, ¹⁰ Purikiyalanguru munu Pampiliyalanguru munu Itjipalanguru munu ngura tjuta Tjairinila itinguru panya manta nyara Lipiyalanguru, munu tjara kutjupa Rome-alanguru. ¹¹ Nganaña kutjupatjara Jew tjuta, kaya kutjupatjara Jew wiya tjuta panya paluru tjana Godaku mulamularingkula nganañala Jew tjutangka tjunguringu. Kaya kutjupa tjuta pitjangu manta nyara Kuritalanguru, ka tjara kutjupa manta Araipiyalanguru. Uwankarala ngura nyanga palula tjanalanguru pitjala nyinanyi munu nyangala uwankarangku kulin anangu nyanga paluru tjana kuwari nganampa wangkangku wangkanyangka. Panya tjana wangkara Godanya pulkara wirunmananyi paluru wiru tjuta palyannyangka, kala uti kulin nganampa wangkangku wangkanyangka.” Alatjiya wangkangi anangu tjutangku.

¹² Munuya putu nguwanpa kulira tjananku wangkangi alatji, “Nyaaringu nyanganpa munuya nganampa wangka tjuta kutjungku kutjungku

* **2:1** Tjintru Pintikatja ngaranyangkaya Jew tjutangku inma pulka palyalpai munuya Godalu tjananya wiru tjuta ungkunytjitjanguru pukularira mai pulka ngalkupai, munuya mai tjuta pakaltjingantjatjanungkuya tjarara tjukutjuku Godanya ungzupai palunya walkuntjikitjangku. Munuya palunya mirawañipai tjukurpa pulka Mosenya ungzunytjitjanguru. Palu inma Katuwunu Ankunytjanya nganmanyapa ngarapai, ka palula malangka tjintu 50 ngarala wi-yaringkunyangka inma nyanga Pintikatjanya ngarapai.

wangkanyi?” ¹³ Kaya tjara kutjupangku tjana wangkanyangka puṭu mulamularingkula tjananya anaṛa wangkangi alatji, “Wiya, palantuya tarangkangku wangkanyi wama pulka kuwari tjikintjatjanungku.”

Peterlu Anangu Tjuṭangka Wangkanytja

¹⁴ Kaya Peternya tjana panya nintintja tjuṭa walinguru ngalya-pakanu urilkutu ka Peterlu aŋangu panya palula tjanala wangkangu alatji, “Jew tjuṭa munu Jerusalemala nyinapai tjuṭa! Kulilaṇiya kaṇa nyurala tjukarurungku kulintjaku wangka!” ¹⁵ Nyura ngunti wama tjikintjapalku kulini. Munga-munga nyangatja. Nganaṇa wama tjikintja wiyaṭu. ¹⁶⁻¹⁸ Nyangatja tjukurpa panyatja utiringu, panya wati Godaku wangkatjarangku Tjawiltu iriti walkatjunkunytja nyiringka Godalu wangkanytja alatji,

‘Panya ilkarī manta wiyaringkunytja kuwaripangka ngayulu kurunpa ngayuku iyalku aŋangu uwankarangka tjarpantjaku, watingka minymangka kulu panya ngayuku war̄ka palyalpai tjuṭangka,

kaya tjukurpa ngayuku aŋangu tjuṭangka tjakultjunkuku.

Kaya nyurampa katja unṭal pangku kulu tjakultjunkuku ngayulu tjananya nintinnyangka.

Kaya wati tawaritja tjuṭangku kutjupa kutjupa tjuṭa nyakuku ngayulu tjanala nintinnyangka.

Kaya t̄jilpi tjuṭangku palu purunypaṭu tjukurmankula nyakuku ngayulu nintinnyangka.

¹⁹⁻²⁰ Kaṇa pulka tjuṭa ilkarīngka utilku tjana nyakula urulyarantjaku, panya tjintu maruringkuku, ka pira t̄jitin-t̄jitaririra milkali purunyariku.

Munuṇa palu purunypaṭu pulka tjuṭa mantangka kulu utilku kaya milkali, waru puyu pulkanya kulu nyakula nguluringkuku.

Ka nyanga palula tjanala malangka tjintu panya palurulta wirkankuku, ka Mayatjanya pitalytji witulya pulka utiringkuku aŋangu tjuṭangka.

²¹ Ka aŋangungku palula mirara t̄japinnyangkampa Godalu palunya wankarunkuku ngura kurakutu iyantja wiyangku.” *

Alatji Peterlu tjukurpa Tjawiltu iriti nyiringka walkatjunkunytjitja aŋangu tjuṭangka tjakultjunangi.

²² Munu wangkangu, “Aŋangu tjuṭa, kulilaṇiya! Panya Jesunya Nazarethanya ngurara wati Godalu iyantja, panya paluru kutjupa kutjupa pulka tjuṭa witulyangku palyaningi nyurala mirangka, ka panya nyura palyanyyangka nyakula kulinigi, ‘Awari! Wiru mulapa nyangangku palyani.’ Nyara palulanguru nyura uti kulinma wati nyanga paluru panya Godalanguru pitjanytja. ²³ Panya Godalu ngaṇmanytju nintingku kulinu ngula wati kutjungku Jesunya wati kura tjuṭangka tjunguringkula munu panya nyura puṇu katakutjarangka wakaṛa utitjunu. ²⁴ Ka paluru ilura titutjara ngarinytja wiya. Palu Godalu palunya wankara pakaltjingaṇu. ²⁵⁻²⁶ Panya iriti Davidalu nyiringka walkatjunu Jesulu ngaṇmanytju wangkanytja nyanga alatji,

‘Ngayuluna nyangu Mayatja Godanya ila ngaranyangka.

Paluru ngayula titutjara tjungu nyinanyi,

kana nguluringkunytja wiya titutjara rapa ngaranyi,
munuṇa kurunpa winki pukularira rawangku pukultu inkapai

* ^{2:21} Tjawilku 2:28-32

- munuña waintara kulira palumpa pulkara mulamularinganyi.
- ²⁷ Panya ngulaña ilura wankaringkula pakalku,
panya paluruни wantintyta wiyangku mantjilku miri tjuṭaku ngu-
rangka tiṭutjara ngarintjaku wiya.
- Panya palulana tiṭutjarangku wangañarangku kulipai,
kani ngayuku puntu wantintyta wiya kulpingka ngarira
piltiringkunytjaku.
- ²⁸ Panya paluru ngayunya rawangku nintlpai iwara wankakutu palula
tjunguringkula pukulpa mulapa nyinanytjaku.’’ *
- Alatji Peterlu aŋangu tjuṭangka tjakultjunangi tjukurpa panya Davidalu
iriti Jesuku wangka nyiringka walkatjunkunytja.
- ²⁹ Munu piruku wangkangi tjanala, ‘‘Walytja wiru tjuṭa kulilaya!
Panya tjamu Davidanya ilunyangka tjana puntu kulpingka tjunu, ka
kulpi paluru manta nyangangka ngaranyitu kuwari. ³⁰ Panya Davi-
danya Godaku wangkatjara nyinangi munu kuliningi Godalu panya
palunya wangkara kalkuntja alatji, ‘‘Ngula nyuntumpa pakali malatja
mayatjarira nyinaku nyuntumpa arangka nyuntu purunypa.’’ ³¹ Ka
Davidalu nyara palunya ngañmanytu kulintjatjanungku nyanga alatji
wangkangu, ‘‘Wati nyara palunyaya puntu kulpingka tjunu, palu Godalu
palunya mapalku pakaltjingalku wantintyta wiyangku rawa ngarira puntu
piltiringkunytjaku-tawara.’’ Alatji Davidalu ngañmanytu wangkangi
ilunytjatjanu pakantjaku.
- ³² ‘‘Ka wati nyara paluru panya Jesunya, panya Godalu wankara
pakaltjingantja, ka nganaña mulapa palunya nyakunytjatjanungku nyu-
rala tjakultjunanyi. ³³ Panya palunya Godalu ilkarikutu mantjinu, ka
paluru kuwari palula tjungu nyinanyi mayatja pulka mulapa. Panya
palumpa Mamangku palunya Kurunpa Milmilnga ungu paluru panya
ngañmanytu kalkuntjatjanungku. Ka paluru kuwari Kurunpa Milmilnga
nganañalakutulta iyanu. Ka nyanga nyura kuwari nyakula kulini nganaña
nyurampa wangkangu wangkanyangka, panya nyangatjalanya Kurunpa
Milmiltu ngananala unngu nyinara nintini. ³⁴ Panya Godalu Davidanya
ilkarikutu mantjintja wiyat, palu Davidalu Jesunyatjara iriti walkatjunu
alatji, ‘‘Godalu ngayuku mayatjangka wangkangu alatji,
‘‘Pitja munu ngayula tjunguringkula mayatjari,
³⁵ kaña nyuntumpa mirpantju tjuṭa tjarulku,
ka nyuntu tjanala waintarira mayatja pulka mulapa nyinaku.’’ *
- ³⁶ Ka nyura Jew tjuṭangku tjukarurungku kulintjaku ngaranyi, panya
nyangatjana Jesunyatjara wangkanyi, panya puṇu katakutjarangka nyura
wakara utitjunu. Ka nyara palunya Godalu ngurkantanu mayatja pulka
nyinanytjaku munu aŋangu tjuṭa kuļu wankarunkunytjaku.’’ Alatji
Peterlu tjanala wangkangi.
- ³⁷ Kaya kulira pulkara alatjitu kunṭaringu munuya Peterla tjanala
tjapiningi alatji wangkara, ‘‘Kala nyaaringkuku?’’
- ³⁸ Ka Peterlu wangkangu, ‘‘Nyura uti uwankarangku kura wantima
munuya kampa kutjuparira małaku Godalakutu pitja, kala nyuranya
Jesuku Christaku mulamularingkunyangka urungka baptise-katiku. Ka
Godalu kalypangku nyuranya kura palyantjitunguru pungkuwiyangku
wantiku, munu nyurala Kurunpa Milmilnga tjarpatjunkuku nyurala
unngu nyinanytjaku. ³⁹ Panya Mayatja Godalu kalkunu nyuranya munu
nyurampa tjitji tjuṭa, munu malatja malatja tjuṭa kuļu, munu paluru

* ^{2:28} Psalm 16:8-11 * ^{2:35} Psalm 110:1

pararitja tjuṭa kuļu kalkunu ngura winkitja. Panya paluru anangu tjuṭa ngura winkingka ngurkantankuku palumpa walytjaringkunytjaku munu paluru Kurunpa Milmilnga tjanala tjarpatjunkuku.”

⁴⁰ Munu piřuku Peterlu tjanala tjukurpa kutjupa tjuṭa wangkangi tjananya ngulutjunkunytjikitjangku munu alatji wangkangu, “Kulilaya! Kura pulka mulapa ngula ngaraku anangu kura tjuṭaku, panya Godalu tjananya paira iyalku ngura kurakutu. Kaya palula-tawara kuwari Godalakutu aruriwa paluru nyuranya wankarunkunytjaku.”

⁴¹ Kaya tjuṭa mulapa Peterlu tjukurpa wangkanyangka kulira kuntaringkula mulamularingu, kaya palunya tjananya urungka baptise-katingu Jesuku walytjaringkunyangka. Panya kalala nyara palulaya anangu tjuṭa mulapa mulamularingu nampa panya 3,000 alatji.

⁴² Munuya anangu nyara paluru tjana Peterla tjanala tjunguringkula nyinara Godaku tjukurpa kulira nintiringangi iyantja panya tjutangku nintinnyangka. Munuya pukultu mai tjungungku ngalkuningi munuya kutjupa-ara nyuma waina kuļu ngalkula tjkiningi Jesunya ilunytja kulin-tikitjangku, munuya Godala rawangku tjapiningi.

Mulamularingkupai Tjutangku Ngapartji-ngapartjingku Munytjangku Ungkupai

⁴³ Kaya wati panya Jesulu iyantja tjutangku Godalu witulyankunyangka kutjupa kutjupa pulka tjuṭa rawangku palyaningi, kaya anangu tjutangku nyakula pulkara kuliningi, “Awa! Mulapa Godanya nganañala ngaranyi.” ⁴⁴ Munuya paluru tjana tiṭutjara tjunguringkupai munuyanku ngapartji-ngapartjingku ungkupai munytja nyinara. ⁴⁵ Munuya tjana kanyintjatjanungku manikitjangku tjalamilara mani mantjiningi munuya ngaltutjara tjuta ungangi mai munu kutjupa kutjupa tjuṭa kuļu payamilantjaku. ⁴⁶ Munuya tjintu kutjupa tjintu kutjupa timpulangka tjunguringkupai munuya ngura tjutangka kuļu tjarpara pukultu tjunguringkula mai ngalkupai, munuya mai nyuma katantara ngalkula waina kuļu tjikilpai Mayatja Jesunya ilunytja kulintjikitjangku. ⁴⁷ Paluru tjana kurunpa pukultu alatji Godanya mirawanira walkuningi. Kaya anangu kutjupa uwankarangku kuļu tjananya nyakula wirunmanangi paluru tjana rawangku alatji palyannyangka.

Ka tjintu kutjupa tjintu kutjupa Mayatja Godalu piřuku anangu kutjupa tjuṭa kuļu tjanala tjunguningi panya Jesuku walytja tjutangka, kaya nyara palulanguru winki mulararingu.

3

Peterlu Pula Johntu Wati Nyumpu Palyarunguntja

¹ Ka tjintu kutjupa mungartjirinyangka Peternya pula Johnnga timpulakutu anu panya anangu tjutaya tjaka rawa ankupai mungartji tiṭutjara Godala tjapintjikitja. ² Palu mungartji nyara palula pula timpulakutu ilaringkula nyangu wati nyumpu nyinanyangka. Wati nyara paluru panya itilpi nyumpu ngarinytja, kaya palunya walytja tjutangku katira tjunkupai timpulaku kaita panya ini Wirula iwarangka itingka, ka paluru nyinara maniku ngatjilpai anangu tjuṭa timpulangka tjarpanyangka nyakula.

³ Munu wati panya paluru nyangu Peternya pulanya Johnnga nguwanpa ma-waintarinyangka munu pulala mapalku maniku ngatjinu. ⁴ Ka Peterlu pula Johntu nyakula palula wangkangu, “Nyawalinya!” ⁵ Ka paluru pulanya pulkara ira-nyangu alatji ngunti kulira, “Mani ungkunytjikitjangku mantini pula wangkanyi.”

⁶ Palu Peterlu palula wangkangu, “Ngayulu mani wiya, palu kutju-paananku palyalku. Panya Jesulu Nazarethanya ngurarangku ngayunya witulyanu, kaña wangkanyi nyuntunya, ‘Pakala munu paltjura para-ngara.’” ⁷ Munu wangkara mara waku witira pakaltjinggañu, ka tjina kutjarañu palyaringkula tarì kūnpuringu. ⁸ Munu mapalku pakara para-ngarala arkara Peternya pulanya timpulangka tjarpanyangka wanara tjarpangu munu wararakatira paltjura Godanya walkuningi.

⁹ Kaya winkingku nyangangi wati panya palunya para-ngarala Godanya walkunyangka. ¹⁰ Munuya wangkangu, “Ai! Wati panya paluru palatja! Kaita panya ini ‘Wirula’ nyinara ngatjilpaina!” Munuya puñu nguwanpa kuliningi wati nyumpu nyinanytjatjanungku palyaringkula para-ngarala Godanya walkunyangka nyakula.

Peterlu Anangu Tjuñangka Timpulangka Wangkanytja

¹¹ Ka timpulangka kantilytja wiltja wara para-ngarala arintanangi. Kaya anangu tjuñangka timpulangka tjiarpapai kampa kakarañanguru. Nyanga paluru ini *Tjalamaniku Wiltja*. Ka nyanga palula wati panya nyumpu palyaringkunytjalu pukuñalarira Peternya pulanya Johnnga witira ngarangi. Kaya anangu tjuñangku palunya nyakula puñu kuliningi, munuya uwankara wati panya palula tjanalakutu ngalya-ngalya-wirtjapakara ngarala tjananya nyangangi. ¹² Ka Peterlu tjananya para-nyakula wanara wangkangi, “Wati Israelkunu tjuñatja! Kulilaya! Nyura nyaaku puñu kulini wati nyangatja nyakula munu ngalinya pulkara nyanganyi? Tjinguru nyura kulini ngali Godalawanu tjukaruru nyinara wati nyanga nyumpu witulyangku palyarungunu. ¹³⁻¹⁴ Palu wanyuya kulila! Godanya panya nganampa tjamupitiku mayatja pulka nyinanyi Aipuramaku Isaacaku Jacobaku tjanampa, munu panya Jesunya ilunyangka wankara pakaltjinggañu munu ilkaringka tjunu mayatja pulka mulapa nyinanytjaku. Panya paluru Godaku warika mantangka nyanga nyinara wanganarangku kulira palyaningi, ka panya nyura palunya ma-ungu palumpa mirpanjtju tjuñangku palunya iluntankunytjaku. Munu panya nyura piruku Pilate-alu walatjunkunytjikitjangku wangkanyangka tungun-tunguntu wangkangi palunya iluntankunytjaku alatjitu. Uwa, nyura panya palunya wantingu alatjitu wati palya mulapa. ¹⁵ Munu panya nyura wati miriputjuku mukuringu palumpa arangka walatjunkunytjaku. Palu nyura alatjitu iluntanu wati panya wankarunkupainya, palu Godalu palunya ilunytjitja wankara pakaltjinggañu, kali nyakunytjatjanungku kuwari nyurala tjukarurungku tjakultjunanyi.

¹⁶ “Ka nyura uwankara ninti wati nyanga palumpa, panya itilpi nyumpu ngarinytjitzaku. Wati nyanga palunya panya Godalu palyarungunu Jesuku mulamularingkunyangka, ka nyanga nyura kuwari uwankarangku palyaringkunyangka nyanganyi. Uwa, Jesuku mulamularingkunyangka wati nyanga palunya Godalu pakaltjinggañu.

¹⁷ “Ka walytja tjuñatja! Ngayulu ninti panya nyura nyurampa mayatja tjuñangka tjunguringkula ngurpangku Jesunya iluntanu Wankarunkupainya Godalu kalkuntja, Godalu iyantja kulilwiyangku. ¹⁸ Panya ngañmanytjuya Godaku wangkatjara tjuñangku Jesunya pikatjararingkunytjaku nyiringka walkatjunu, ka mulapa tjana panya ngañmanytju walkatjura wantinytja alatjitu utiringu. ¹⁹ Ka wanyuya kulila, munuya kura wantira malaku aruriwa Godalakutu, ka paluru nyuranya kalypangku pungkuwiyangku wantiku. ²⁰ Munu nyuranya kurunpa palyarungura ipilymara kanyilku munu Jesunya ngula iyalku

nyuralakutu, panya paluru ngañmanytu palunya iyantjikitjangku kalkunu nyuranya wankarunkunytjaku. ²¹ Panya Godaku wangkatjara tjutangku ngañmanytjulpi nyiringka walkatjunkunytja ngaranyi Godalu wangkara kalkuntja alatji, ‘Ngayulu panya ngañmanytu uwankara wiru mulapa palyanu, ka panya uwankara kuraringu, palu ngulaña piruku małakungku wirulku.’ Palu Jesunya kuwaripatu ilkaringka nyinanyi tjintu nyara palumpa paṭara. Munu nyara palula ara kutju pitjaku.

²² “Ka nyura uti kura palyantjitungku piiwiyingkula kampa kutjuparima panya Moselu wangkangu alatji,

‘Mayatja Godalu wati wangkatjara nyuralakutu iyalku anangu nyurampa waltytjangu, ka paluru ngayulu purunytju nyurala wangkaku. Ka nyura uti palula wanganarangku kulinma paluru wangkanyangka.

²³ Palu nyura tjinguru palula kulilwiyangku wantinyangkampa Godalu nyuranya wantir’iyalku alatji nyurampa waltyta tjutanguru mañtalpa nyinanytjaku munu palumpa waltyta wiyingkunytjaku kulu.’*

²⁴ Kaya Samueltu tjana wangkatjara kutjupa tjutangku kuļu uwankarangku ngañmanytu wangkara nyiringka walkatjunu ngula utiringkunytjaku. ²⁵ Panya Godalu Aipuramala kalkunu alatji, ‘Nyuntumpa waltyjapiti malatjangu runa ngayulu anangu manta winkitja pukulmankuku.’ Ka kalkuntja nyara paluru nyurampa kuļu ngaranyi.

²⁶ Ka Godalu palulanguru Jesunya ngurkantara iyanu nyuralakutu-warara nyura ngañmanytu kulintja kampa kutjuparira kura wantira pukulpa nyinanytjaku, ka nyara palula malangka kutjupa tjutangku kuļu palunya kulira kura wantira kampa kutjuparira pukulpa nyinaku.” Alatji Peterlu tjanala wangkangi Jew tjutangka.

4

Peternya Pulanya Johnnga Witintja

¹ Ka Peterlu pula Johntu ngarala kuwaripangkuļu wangkangi anangu tjutangka, kaya Moseku tjukurtjara kuranyitja tjuta munu wati Tjatjutji tjuta munu wati timpula atunymankupai tjutaku mayatja kuļu pitjangu palula pulalakutu. ² Munuya pulampa pulkara mirpanaringu pula ilunytjatjanu pakantja wangkanyangka. Panya pula alatji wangkangi, “Jesunya ilunytjatjanu pakantjitungku anangu miri kutjupa tjuta kuļukulu wankaringkula pakalku.” ³ Kaya palulanguru pulanya wangkanytjikitjangku witinu munuya tjirirpi ngañmanypa tjarpanyangka pulanya tjailangka tjarpatjunu mungawinki wangkanytjikitjangku. ⁴ Palu anangu kutjupa tjutaya paluru pula wangkanytjitungku kulira mulamularingu alatji winki mulapa, munuya Jesuku waltyta kutjupa tjutangka tjunguringkula tjutaringu munuya 5,000 nguwanpa nyinangi tjuta mulapa.

⁵ Ka pula tjaila unngu nyinara tjinturingu. Kaya ngura Jerusalemala mayatja tjuta tjunguringu Jew tjutaku mayatja kuranyitja tjuta, munu tjlipi tjuta kuļu, munu Moseku tjukurpa nintilpai tjuta kuļukulu. ⁶ Ka wati tjukurtjara pulka kuļu tjanala tjunguringu wati ini Anatjanya munu palumpa waputju ini Kayapatjanya. Ka palumpa waltyta kutjupa kutjara kuļu ini Johnnga pula Alika-tjantanya nyara palula tjanala tjungu nyinangi.

⁷ Munuya witunu wati timpula atunymankupai mañkurpa Peternya pulanya Johnnga tjailanguru pakaltjingara ngalya-katintyjaku, munuya ngalya-katinyangka pulanya kuranyu ngaratjunkula pulala tjpiningi

* ^{3:23} Deuteronomy 18:15,18-19

alatji wangkara, “Nganalu nyupalinya witulyanu wati nyanga nyumpu palyarunguntjaku? Ini nganalu nyupalinya wituŋu wangkara palunya pakaltjingantjaku?”

⁸ Ka Peterlu Kurunpa Milmilngatjarangku rapangku alatjitu wangkangu, “Mayatja tjuta munu tjilpi tjuta kuļu! Kulilaňia! ⁹ Ngali wati nyanga nyumpuku nyakula ngalturingu, ka nyura wanyu ngalinya tjapira kulini paluru palyaringkunytja kulintjikitjangku? ¹⁰ Palya, kana kuwari nyurala tjukarurungku tjakultjunanyi anangu Israelkunu uwankarangka kuļu. Panya nyura Jesunya Christiana Nazarethanya ngurara punu katakutjarangka wakara utitjunu ilunytjaku, palu palunya Godalu ilunyangka wankara pakaltjinganu. Ka ini panya paluru ngalinya nintinu Jesulu wati nyanga palunya palyarunguntjaku. ¹¹ Panya nyiringka iriti walkatjunkunytja nyanga alatji ngaranyi, ‘Panya puli kutju ngarinyi wali palyalpai tjutangku kura-palku nyakula wañinytja.

Palu puli panya paluru wiru mulapa puli kutjupa uwankarangka wain-tara.’*

Kala uti puli nyanga palulanguru Jesunya kulinma. ¹² Panya Jesulu kutjungku anangu tjuta wankarunkupai kutjupangku wankantja wiya. Panya Godalu palunya kutju iyanu anangu tjuta wankarunkunytjaku, ka kutjupa palu puruny whole mangka nyanga nyinanytja wiya alatjitu anangu tjuta wankarunkunytjikitja.” Alatji Peterlu Jewku mayatja tjutangka wangkangi.

¹³ Kaya Peterlu pula rapangku wangkanyangka nyakula pulkara kulinigi, “Ai! Nyanga pula ngurpa kutjara nyinanyi kuulitja wiya kutjara, munu paluru puļa yaaltji-yaaltjingku nintingku wangkanyi?” Munuya piruku kulinu, “Munta-uwa! Nyanga pula panya Jesula tjungu rawa para-ngarapai.” ¹⁴ Munuya nyangu wati panya nyumpu nyinanytja pulala itingka ngaranyangka, munuya wangkanytjikitjangku puļu kulinigi munuya pilunpa alatjitu nyinangi. ¹⁵ Munuya pulanya urilkutu witunu munuya tjana kutjulta wangkara kulinigi pula urilta paṭara ngaranyangka. ¹⁶ Alatjiya wangkangi, “Nyaalkula wati nyanga kutjara? Panya anangu nyanga Jerusalemala nyinanytja tjutaya ninti wati nyanga palumpa pulampa panya pula kuwari nyanga witulyangku puļka palyantitja, kala puļu wiyanmananyi. ¹⁷ Palu utila kuwari painma piruku Jesunyatjara wangkanytja wiyangku wantintjaku kutjupa tjutangku kulira mulamularingkula tjutaringkunytjaku-tawara.” ¹⁸ Munuya pulanya malakungku altira tjarpatjunu munuya pulala wangkangu, “Nyupali piruku Jesunyatjara wangkanytja wiyangku wantima! Munu pula tjukurpa palunyatjara anangu tjutangka nintintja wiyangku kuļu wantima!”

¹⁹ Palu Peterlu pula kulira tjanala ngapartji wangkangu, “Yaaltji tjukaruru ngaranyi? Nyura wangkanyangkali kulira palyanma? Wiya, ngali Godalu wangkanyangka kutju wanganarangku kulira palyani. ²⁰ Panya ngali nyangatja kuwari puļu wantinyi. Utili nyakunytjatjanungku munu kulintjatjanungku wangkama alatjitu.”

²¹ Kaya Jewku mayatja tjutangku piruku pulanya painu wangkawiyangku wantintjaku munu pulanya walatjunu ankunytjaku ngurakutu. Panya tjana pulanya pungkula nintintjikitjangku kulinigi, palu anangu tjutakuya nguluringkula wantingi, panya anangu winkingkuya paluru pula wirungku palyantitjanguru Godanya

* ^{4:11} Psalm 118:22

walkuningi, munuya Peternya pulanya pungkunyangkampa tjinguru palunya tjananya ngapartji pungama. Palula-tawaraya kulira wantingu. ²² Palu wati panya itilpi nyumpu nyinanytjanya kunyu kuli 40 nyinanytja iritinguru alatjitu.

Mulamularingkupai Tju tangku Godala Tjapintja

²³ Palulanguruya Peternya pulanya Johnnga walatjunu, ka pula ankula tjunguringu Jesuku walytja tju tangka munu pula tjanala tjakultjunu uwankara Jewku mayatja tju tangku pulanya wangkanytja. ²⁴ Kaya paluru pula wangkanyangka kulira Godala tjapiningi alatji wangkara, "Uwa Mayatja, nyuntu panyan pulka mulatu ilkarri manta uru kulu palunu munu panyan ilkaritja mantatja urutja tju ta kulu palunu. ²⁵ Nganampa tjamu Davidanya panya wati nyuntumpa war karipai nyinangi. Munu panya paluru Kurunpa Milmiltu nintinnyangka alatji wangkangu, 'Nyaakuya anangu Jew wiya tju ta ngura winkitja pulka mirpanarinyi?

Munuya panyatja nyaaku nintingku-palku ngunti wangkara tamalmankupai?

²⁶ Uwa, wati panya mayatja manta winkitjangkuya tjunguringkula wangkara tamalmankupai Mayatjanya pikangku pungkunytjikitjangku, Godalu panya kalkura iyantjanya.' *

²⁷ "Uwa Mama God ilkaritja! Davidalu panya iriti wangkangu wati tju tangku wangkara tamalmankunyta, ka panya palu purunyapa kuwari Jewku mayatja tju tangku ngura nyanga Jerusalemala tjunguringkula wangkara kuliningi Mayatja Jesunya pungkunytjikitjangku, munuya mayatja Iratala pulala Pontius Pilate-ala tjunguringu munu wati panya Jew wiya tju tangka kulu munuya uwankarangku tjunguringkula mirpa ntu alatjitu wangkara kuliningi palunya iluntankunytykitjangku. Panya palunya nyuntu ngurkantara iyanu nyuntumpa war ka wanganarangku kulira palyantjaku nyuntu mukuringkunyta. ²⁸ Munu panyan nganmanytju alatjitu nintingku kuliningi nyanga alatjirinytjaku. ²⁹ Uwa Mama, kulinma tjananya wangkara waqinyangka, panya tjana nganananya ngulutjingantjikitjangku alatji wangkanyi. Kalanya Mayatja, kurunpa rapanma nyuntumpa tjukurpa tjanala ngulu wi yangku rapangku wangkanytjaku. ³⁰ Munulanya nganananya witulyanama anangu pikatjara tju ta palyarunguntjaku, panya nyuntu Jesunya witulyanu nyuntumpa war ka palyantjaku, palu purunyapa. Munu kutjupa kutjupa pulka tju ta utinma tjana nyakula nyuntunya walkura pulkanmankunytytjaku."

³¹ Ka tjana Godala tjapira wi yaringkunyangka wali panya tjana nyinanytjanya uringu, ka nyara palula ara Kurunpa Milmiltu tjananya piruku pulka witulyanangi, ka nyara palulanguruya Godaku tjukurpa rapangku alatjitu wangkangi anangu tju tangka.

Mulamularingkupai Tju tangkuyanku Wirura Atunymankunytya

³² Munuyanku Jesuku panya walytja tju tangku wangkara kulira wangka kutju palya nu. Munuyanku tjungungku ngurtjuringkuwi yangku ngapartji-jngapartjingku intjanungku ungangi tjana kanyintja uwankara. ³³ Kaya wati panya Jesulu iyantja tju tangku ngulu wi yangku rapangku alatjitu wangkangi tjukurpa panya Jesunya ilunytjatjanu pakantja. Ka Godalu palunya tjananya pulka mulapalta pukulmanu, Jesuku walytja uwankara. ³⁴ Ka nyara palula anangu kutjupa ngalututjara nyinanytja wi yaringu. Uwankaraya pukulpa alatjitu nyinangi mai ulytja pulkatjara.

* ^{4:26} Psalm 2:1-2

Kaya kutjupa-ara walitjara tjuṭangku munu kaanatjara tjuṭangku wali munu kaana tjalamilpai manikitjangku. ³⁵ Munuya mani mantjīra katira ungangi wati panya Jesulu iyantja tjuṭa, kaya paluru tjana tjarara ungangi aŋangu kutjupa tjuṭa maralpa nyinanyangka. ³⁶ Ka wati kutju ini Josephanya nyara palula nyinangi wati Levikunu ngura Tjaipuritjanya ngurara, panya paluru kulu Jesuku walytja nyinangi. Kaya iyantja tjuṭangku palunya ini kutjupa tjunu Paanapatjanya. Ini nyanga palunyaya kunyu tjanampa wangkangku wangkapai alatji, *Wangkara Rapalpaina*. ³⁷ Ka wati nyanga paluru kaana maitjara kanyiningi, munu manikitjangku manta winki tjalamilara mani mantjīra katira iyantja tjuṭa ungu.

5

Ana-nayatjanya Pula Tjapairanya

¹ Ka wati ini Ana-nayatjanya pula kurirara ini Tjapairanya nyinangi ngura nyara palula munu paluru pula kulu pulanku kaana tjalamilañ manikitjangku. ² Munu wati panya paluru mani mantjīra tjarara pulanku tjunu pulampa ngurangka munu kutjupatjara katira ungu wati panya Jesulu iyantja tjuṭa alatji wangkara, “Nyngatjali kaana tjalamilara mani uwankara mantjīra unganyi nyuranya.” Palu minyma panya palumpa kuri kutju ninti nyinangi mani panya palumpa pulampa tjarara tjunkunytjittaku.

³ Ka Ana-nayatjalu winki-palku katira ungkunyangka Peterlu wangkangu, “Nyuntun kurangku mamungka wanganarangku kulira Kurunpa Milmilnga ngunti kurañu. Panya nyuntu kaana tjalamilantjatjanungku mani mantjīra katira tjara kutjupa tjunu nyupalimpa ngurangka munun tjara kutjupa ngalya-katingu uwankara-palku, kala ngunti kulinu nyuntuntin uwankara nganañanya ungu.

⁴ Panya kaana nyara paluru tjalamilantja kuwaripangka nyuntumpa alatji ngarangi. Ka palulanguru nyuntu tjalamilantjatjanungku mani mantjinu, ka mani pala paluru nyuntumpa alatji ngarangi. Kan nyaaku kuwari winki katira ungkunytjatjanungku-palku ngunti kurañi? Kulila! Nyuntun nganañanya ngunti kurantja wiya, palu nyuntu Godanya ngunti kurañi.”

⁵⁻⁶ Ka Ana-nayatjanya alatji wangkanyangka kulira punkara ilungu, kaya wati tjuṭangku mantarangka karpira ursilkutu katira palunya tjuṇutjunu. Kaya aŋangu tjuṭangku ara nyanga palunya kulira pulkara nguluringu.

⁷ Ka nyara palula malangka palumpa kuri watarku pitjangu, panya paluru kulintja wiya palumpa kuri ilunytja. ⁸ Ka ngalya-tjarpanyangka Peterlu palula tjapinu, “Uwa, wanyuni tjakultjura utingku. Nyupali mani nyanga alatji-alatji mantjinu kaana tjalamilara?”

Ka minyma panya paluru wangkangu, “Uwa, mani pala palunya alatji tuli mantjinu.”

⁹ Ka Peterlu wangkangu, “Nyaaku nyupali Kurunpa Milmiltia ngalyapangalyaparingkula palunya ngunti kurañi? Kulila! Nyuntumpa kuri katira tjuṇutjunkunytjatjanu nyangaya wati tjuṭa kuvari pitjalalta ngaranyi nyuntunya ngapartji katira tjuṇutjunkunytjikitja.” ¹⁰ Ka Tjapairalu alatji wangkanyangka kulira mapalku punkara ilungu, kaya wati panya tjuṭangku nyangu ilura ngarinyangka munuya palunya ngapartji mantjīra katira kuringka itingka tjuṇutjunu. ¹¹ Kaya Jesuku panya walytja uwankarangku munu aŋangu kutjupa tjuṭangku kulu nyangatja kulira pulkara nguluringu.

Pikatjara Tjuṭa Palyarunguntja

¹² Kaya Peterlu tjana wati panya Jesulu iyantja tjutangku kutjupa kutjupa pulka tjuṭa witulyangku palyaningi anangu tjutangku nyakula Godanya pulka kulintjaku. Munuya paluru tjana Jesuku walytja kutjupa uwankara kuļu tjunguringkupai timpulangka, Tjalamanku panya wiltjangka. ¹³ Kaya anangu Jesuku walytja wiya tjutangku tjananya nyakula wirunmankupai kutju, palu palula tjanalaya tjunguringkunytja wiyangku nguluringkula wantipai. ¹⁴ Palu anangu tjara kutjupaya anangu nyara palula tjanalanguru Mayatja Jesuku mulamularingkula tjanala tjunguringgangi, ka Jesuku walytjapiti piruku tjuṭa mulararingu. ¹⁵ Kaya anangu tjuṭangku Peterlu tjana kutjupa kutjupa tjuṭa witulyangku palyannyangka nyakunytjanungku pikatjara tjuta katira iwarangka itingka mantara piitatjura ngaritjura wañaningi paluru tjana pitjala palyarunguntjaku. Panya tjananya mukuringkula alatji kulinungi, “Tjinguru Peternya tjanalawanu ankunyangka palumpa wiltjangku tjananya tjutulku kaya palyaringkuku.” ¹⁶ Kaya kutjupa tjuṭangku ngura Jerusalemala itingka nyinanytja tjutangku kuļu kulira pikatjara tjuṭa katira tjunangi munu mamutjara kuļukulu, ka tjananya uwankaraṭu palyarungunu.

Angeltu Wati Jesulu Iyantja Tjuta Tjailanguru Pakaltjingantja

¹⁷⁻¹⁸ Kaya wati panya tjukurtjara pulka munu palumpa malpa tjuṭa panya Tjatjutji tjuṭa kuļu Peterku tjanampa wati panya Jesulu iyantja tjutaku pulkara nyararinggangi. Munuya palunya tjananya witira tjailangka tjarpatjunu. ¹⁹⁻²⁰ Ka munga nyara palula Godaku angelpa tjailakutu pitjangu munu tuwa kuṇpu pulka key wiyangku alaṇu munu tjananya altira katira urilta wirkara wangkangu, “Araya timpulakutu munuya anangu tjutangka tjakultjura iwara nyanga kuwaritja panya Jesuku mulamularingkula palunya wañantjaku.”

²¹ Kaya mulapaṭu mungawinki mulapa pakara anu timpulakutu munuya timpulaku yaatangka tjarpara ngarala anangu tjutangka wangkangi Godaku tjukurpa. Ka tjukurtjara panya pulka malpa tjutatjara kampa kutjupawanu wirkanu Peternya tjananya nyakunytja wiya, munuya rumangka tjarpara altingu wati panya tjiłpi kuranyitja tjuṭa mitingiku. Munuya wati timpula atunymankupai mankurpa witunu tjailakutu ankula wati panya iyantja tjuṭa pakaltjingara ngalya-katinytjaku.

²² Palu wati panya paluru tjanaya tjailakutu ankula puṭu nyangu munuya malaku pitjangu mayatja panya tjutakutu. ²³ Munuya wangkangu, “Ankulala tjailangka wirkara tuwa pati ngaranyangka nyangu, kaya atunymankupai tjuṭa kuļu anga-ngarangi tjanunngu nyinanyangkapalku. Palu tjarparala wati panya palunya tjananya puṭu nyangangi.”

²⁴ Ka wati panya timpula atunymankupai tjuṭaku mayatjangku nyangatja wangkanyangka kulira puṭu kulinu, “Yaaltjiringuya?” Kaya tjanaku puṭu kulinungi tjukurtjara panya kuranyitja tjutangku.

²⁵ Ka palulanguru wati kutju ngalya-tjarpangu munu tjanala tjakultjunu, “Kulilaya! Wati panya nyura witira tjailangka tjarpatjunkunytja tjutangkuya timpulaku yaatangka ngarala tjukurpa wangkanyi anangu tjutangka.” ²⁶ Ka wati panya timpula atunymankupai tjuṭaku mayatja anu wati tjutatjara munuya Jesulu iyantja tjuṭa altira ngalya-katingu witintja wiyangku, panya tjananya nguluringgangi anangu tjutangku witinnyangka nyakula palunya tjananya apungka atuntjaku-tawara.

²⁷⁻²⁸ Munuya katira tjanala kuranyu ngaratjunu tjiłpi panya tjutangku tjananya tjapiṛa kulira ngurkantankunytjaku. Ka wati tjukurtjara

pulkangku tjanala alatji wangkangu, "Kulilaya! Nganaña panya nyuranya painu Jesunyatjara piruku wangkawiyangku wantintytjaku aŋangu nyanga tjutangka, ka nyura tungun-tunguntu tjanala tjakultjunangi aŋangu winkingka ngura nyanga Jerusalemala. Munu nyura nganañanya rawangku ngukara wangkapai Jesunya pungkunytja."

²⁹ Ka Peterlu tjana alatji wangkangu, "Uila aŋangungka kulintja wiyangku Godala kulinma palula kutjungka. ³⁰ Panya nyura wituwitunyangkaya Jesunya puṇu kaṭakutjarangka wakara utitjunu. Palu Godalu palunya ilunyangka wankara pakaltjinganu. Panya nyuntumpa nganampa tjamu tjutangkuya iriti God nyanga palunyatu walkulpai. ³¹ Ka paluru Jesunya mayatja pulka tjunu aŋangu tjuṭa wankarunkunytjaku. Ka palu-languru nyura Israelkunu tjutangku kura wantira kampa kutjuparinytjaku ngaranyi Godalu nyuranya kalypangku pungkuwiyangku wantintytjaku. ³² Tjukurpa nyangatjala nintingku wangkanyi nyakunytjatjanungku, ka Kurunpa Milmiltu kuļu nyangu munu nganañanya unngu nintinu. Panya Kurunpa Milmilnga nyanga palunya Godalu iyanu palula wanganarangku kulilpai tjutakutu."

³³ Kaya tjlipi panya kuranyitja tjutangku alatji wangkanyangka kulira pulkara mirpanaringu munuya palunya tjananya iluntankunytjikitjangku kulinigi. ³⁴ Palu wati Paratji kutju ini Kamaliyalnga pakara ngarangu tjanala wangkanytjikitja, panya nyanga paluru Moseku tjukurpa nintilpai nyinangi kaya aŋangu tjutangku palula kuļu wanganarangku kulilpai. Ka paluru Peternya tjananya witunu urilkutu ankula tjukutjuku paṭantjaku, kaya palunya tjananya urilkutu katingu. ³⁵ Ka malangka Kamaliyalu wangkangu, "Wati Israelkunu tjuṭa! Wanyuya kulila! Warpungkula kukanymankunytja wiyangkuya wantima! ³⁶ Wanyuya kulila wati panya ini Tjiyatjanya! Panya mungaṭu palurunku walijangku mirawañingi palurunku pulka kulira, ka panya aŋangu tjuṭa palula tjunguringu nampa 400 tjuṭa mulapa, munu panyaya palunya wañaningi. Ka ngula kutjupangku palunya pungkula iluntanu, ka palumpa panya malpa tjuṭa wililyaranu munuya piruku tjunguringkunytja wiyaringu. ³⁷ Ka wati kutjupa palu purunypaṭu ini Judasanya Galileenya ngurara mungaṭu nyinangi, panya aŋangu tjutangku kamantaku nyiringka ini walkatjunkunytja-arangka. Munu paluru wati tjuṭa altira tjungunu wati kamanta tjutaku pikaringkunytjaku. Kaya palu purunypaṭu palunya iluntanu, ka malpa panya tjuṭa wililyara kutju kutju ankula wiyaringu. ³⁸ Ka wati nyanga palula pulalanguru nyuntu nganaña kulintjaku ngaranyi. Uti nganaña wati nyanga palunya tjananya wantima munula kuralwiyangku wantir'iyla ankunytjaku. Tjinguru tjana walijangku tjana kulintjtja palyannyangkampa malpa tjutangku tjananya ngula wantikatiku. ³⁹ Palu tjinguru tjana nyanga alatji palyani Godalu nintinnyangka, ka nganaña palunya tjananya puṭu paikku, panya nganaña tjanampa pikaringkula Godaku kuļu pikaringkuku."

Kaya tjlipi panya tjutangku Kamaliyalu wangkanyangka kulira mulamularingu. ⁴⁰ Munuya Peternya tjananya iyantja tjuṭa malakungku altingu munuya timpula atunymanupai tjuta wangkangu tjananya wiipangka alkantjaku. Munuya pungkula wiaringkunyangka malangka tjananya wangkangu alatji, "Pirukuya Jesunyatjara wangkanytja wiyangku wantima." Munuya palulanguru tjananya wantir'iyanu ankunytjaku.

⁴¹ Kaya pukulpa alatji anu pungkunytjtjanguru tjituru-tjitururinytja wiya, panya tjana alatji kuliningi, "Godanya ninti panya nganañanya

pungkunyangkala Jesunya wantinytja wiyangku tiṭutjarangku kulira wañani añaŋgu tjutangka tjukurpa palumpa wangkanytjikitjangku.”

⁴² Munuya tjintu kutjupa tjintu kutjupa timpulaku yaatangka unngu tjarpala Tjukurpa Palya Jesunyatjara wangkangi añaŋgu tjutangka, munuya nyara palulanguru Jesuku walytja kutjupa tjuṭaku wal̄ingka kuļu tjarpala palu purunypaṭu nintiningi tjukurpa Jesunyatjara panya Godalu kalkuntjatjanungku iyantjanya.

6

Wati 7 Ngurkantankunytja

¹ Kaya nyara palula añaŋgu kutjupa tjuṭa ngapartji Jesuku mulamularingangi munuya winki mulararingu Jesuku walytja tjuṭa, kutjupatjara wangka panya Kuriki wangkapai nyinangi, kutjupatjara wangka panya Ara-mayiki wangkapai nyinangi. Kaya Kuriki wangkapai tjuṭangku Ara-mayiki wangkapai tjuṭa kuranmanangi, munuya pitjala Peterla tjanala tjakultjunangi, “Kulila! Panya nyura tjintu kutjupa tjintu kutjupa wanakała ngaltutjara tjuṭa mai ungkupai. Palu nyura Ara-mayiki wangkapai tjuṭa kutju ungkupai munu nganampa wanakała tjuṭa ungkunytja wiyangku wantipai.” ² Kaya Peterlu tjanala iyantja panya 12-ŋku Jesuku panya walytja uwankara altira tjanala wangkangu, “Tjingurula nganaña mai ulytja nyuranya tjukarurungku para-ungama. Palu nganampa war̄ka kutjupa ngaranyi Godaku tjukurpa wangkanytjaku. ³ Palu uti nyura wati nintipuka 7 nyuralanguru ngurkantanama panya Kurunpa Milmilta wangañarangku kulilpai tjuṭa. Munu tjananya ngurkantaṛa tjunama war̄ka nyanga palula tjukarurungku war̄karira mai para-ungkunytjaku. ⁴ Ka nganaña war̄ka nyanganta war̄karinyi munula Godala tjapini munu tjukurpa kuļu nintini añaŋgu tjuṭangka.”

⁵ Kaya Jesuku walytja uwankarangku alatji wangkanyangka kulira pukularingu munuya ngurkantanu Stephennga. Wati nyanga paluru panya Kurunpa Milmilta wangañarangku kulilpai nyinangi munu paluru Jesuku pulkara mulamularingkupai. Kaya piruku ngurkantanu wati ini nyanganpa Philipanya, Purakuratjanya, Nikananya, Timunnga, Paminatjanya munu Nikalaitjanya, panya wati nyanga paluru ngura Antiyakanya ngurara nyinangi munu panya god kutjupa nganmanypa walkulpai nyinangi, palu Godaku mulamularingkula paluru Jew tjuṭangka tjunguringkula tjananya purunytpu Godanya walkuningi munu palulangurulta paluru mała kulira Jesuku walytjaringu. ⁶ Uwa, wati nyanga palunya tjananyaya ngurkantanu munuya Iyantja Tjuṭangka kuranyu ngaratjunu, kaya paluru tjanala katangka mara tjunkula tjanampa Godala tjanapingi tjananya kūnpuntjaku.

⁷ Ka Peterlu tjanala Godaku tjukurpa wangkanyangka añaŋgu winkingku kuliningi. Munuya tjuṭa mulapa mulamularingu, ka ngura nyara Jerusalemalesa Jesuku walytja tjuṭa mulararingu, kaya wati Moseku tjukurtjara tjuṭa kuļu Jesuku mulamularingu munuya tjanala tjunguringu.

Stephennga Witintja

⁸ Ka wati panya Stephennga Godalu pukultjungku kanyiningi, munu palunya pulkara witulyanangi miracle tjuṭa palyantjaku. Ka paluru palyannyangka añaŋgu tjuṭangku nyakula kuliningi, “Awari! Nyangatja wiru mulapa!” Munuya palulangurulta Jesunya pulkara walkuningi.

⁹ Kaya Jew ngura kutjupitja tjuṭangku nyakula mirpañaringi palumpa. Wati nyanga paluru tjanala ngura nyangannguru Tjairinilanguru munu

Alika-tjantu-riyalanguru, Tjilitjiyalanguru munu Aitjalanguru. Nyanga paluru tjanaya Stephenku pikaringkula ngaparku wangkangi. ¹⁰ Palu Stephentu wati nintingku tjanala wangkangi, panya Kurunpa Milmiltu palunya nintiningi tungun-tunguntu tjukarurungku tjanala wangkanytjaku, kaya putu palula waintarira wangkangi. ¹¹ Munuya palulanguru wati mañkurpa kutjupa altira tjungunu munu tjananya wituwitunu ankula tjukurpa Stephenngatjara anangu tjutangka ngunti wangkanytjaku. Kaya mulapatu ankula wangkangi anangu tjutangka alatji, “Ai! Nganaña kulinu wati panya Stephenntu Mosenya pulanya Godanya kuranmankunyangka.”

¹² Kaya anangu tjutangku kulira mulamularingu munuya Moseku panya tjukurpa nintilpai tjutangka ankula tjakultjunu, tjlpi panya kuranyitja tjutangka kułu. Kaya paluru tjana Stephennga witiñu munuya Jewku kantjula kutjupa tjuta altira palunya katingu tjanampa ruumakutu munuya palula tjanala kuranyu ngaratjunu palunya ngurkantankunytjikitjangku tjapira kulira. ¹³⁻¹⁴ Munuya wati panya ngunti wangkapai mañkurpa altingu pitjala wangkanytjaku. Kaya paluru tjana pitjala ngunti wangkangi alatji, “Mulapa nyangangku nganampa timpula milmilpa rawangku kuranmananyi. Nyanga paluru alatji wangkanyi, Jesulu kunyu Nazarethanya ngurarrangku timpula nyangatja piluntankuku. Munu nyangangku Moseku tjukurpa kułu kurara wangkangi, panya paluru nyanga alatji wangkangi, Jesulu kunyu Moseku tjukurpa kampa kutjupankuku.” Alatjiya Stephennga wangkara kuranmanangi.

¹⁵ Kaya wati tjutangku ruuma nyara palula unngu nyinara Stephennga pulkara nyangangi munuya nyangu yunpa palumpa angelpa purunyarinyangka.

7

Stephentu Tjukurpa Wangkanytja

¹ Ka wati tjukurtjara pulkangku Stephennga tjinapu, “Mulapantaya nyangantu tjukarurungku wangkanyi?”

² Ka Stephentu tjanala wangkangu Jewku kantjula tjutangka, “Walytja tjuta kulilaya! Panya nyuntumpa nganampa tjamu Aipuramanya ngura Aaranku ankunytja kuwaripangka ngura panya Mitjupu-taimiyala nyinangi. Ka nyara palula Godanya pitalytji witulya pulka mulapa palula utiringu. ³ Munu wangkangu palula, ‘Nyuntumpa nyanga ngura wantikati walytja tjuta kułu, munu pakara ara kañanta ngayulu ngura kutjupa nintilku nyuntu nyinanytjaku.’*

⁴ “Ka mulapatu paluru palumpa ngura wantikatira anu Papilaniyalanguru, munu parari mulapa ankula ngururpañu nyinangi ngura panya Aaranta wirkara. Ka palumpa mama ilunyangka Godalu palunya piruku witunu ngura nyanga kuwari nganaña nyinanytjalakutu. Ka mulapatu paluru anu. ⁵ Palu Godalu palunya wirkankunyangka manta ungkunytja wiyat u ngura walytjangku tjunkula nyinanytjaku, ka paluru tjanampa ngurangka unytju nyinangi. Palu Godalu palunya kalkunu ngura walytja ngula ungkunytjikitjangku palurunku walytjangku palyara nyinanytjaku. Munu palumpa walytjapiti malatja malatja kułu nyinanytjaku kalkunu ngura nyara palula. Palu nyara palula aña panya Godalu kalkuntja-arangka Aipuramanya tjitji wiya nyinangi.

⁶ “Ka Godalu palula alatji wangkangu, ‘Ngula nyuntumpa walytjapiti malatja malatjaya ngura malikitjakutu ankula nyinaku rawa mulapa kułi

* ^{7:3} Genesis 12:1

tjuṭa. Kaya ngura nyara palunya ngurara tjuṭangku tjananya pauntjingara pulkara warkamilalku unytjungku kutju. Munuya tjananya rawangku kanyira warkamilalku kuļi tjuṭa mulapa nampa nyangatja 400. ⁷ Palu ngayulu ngura nyara palunya ngurara tjuṭangka kura kutjupa kutjupa pulka tjuṭa utilku, kaya paluru tjana nyuntumpa walytjapiti malatja malatja wantir'iyalku, kaya pitjala ngura nyangangka wirkara ngayunya pupakatira wal'kulku.' Alatji Godalu Aipuramala tjakultjunangi ngula panya utiringkunytja.

⁸ "Munu palulanguru paluru Aipuramala wangkara kalkunu alatji, 'Ngayuku tjukurpa kulinma munu tjukurpa nyanga palulawanungku nyuntumpa katjapiti watiringkunytjaku palyanma. Munu tiṭutjarangku palyanma aŋangu kutjupa tjuṭangku nyuranya kulintjaku alatji, "Mulapa nyanga paluru tjana Godaku walytjapiti nyinanyi." ' Ka ngula Aipuramalu palumpa katja Isaacanya iti ngarinyangka mulapaṭu mapalku watiringkunytjaku palyanu, ka ngula Isaacalu ngapartji palumpa katja Jacobanya palu purunymanuṭu iti ngarinyangka, ka ngula Jacobalu ngapartji palumpa katja panya 12 palu purunyapaṭu palyanu uwankaraṭu iti ngarinyangka.

⁹ "Ka panya Jacobaku katja tjuṭa kuraringu tjanampa malanypa malatjaku Josephaku, panya Jacobanya palumpa kutju pulkaṛa mukuringkunyangka. Munuya unkul'iyanu wati malikitja tjuṭa ngura Itjipalakutu parari katintjaku. Palu Godanya palula tjungu alatjiṭu nyinangi.

¹⁰ Munu palunya wankaru alatjiṭu kanyiningi aŋangu kutjupa tjuṭangku palunya kurannyangka. Munu palunya nintiningi nintipuka nyinara tjukarurungku ngurkantara wangkanytjaku. Munu panya Itjipaku mayatja pulkaku malparingkunytjaku kulu palyanu, wati panya Piiraku. Ka mayatja paluru panya Josephanya mayatja tjunu palula itingka nyinara ngura pulka Itjipanya atunymara kanyintjaku, palumpa wali kulu.

¹¹ "Ka panya ngula ailuru pulkaringu ngura nyara palula, kaya ngura winkingka aŋangu tjuṭa paltjatjiratja nyinangi ngura panya Kainanta kuļu. Ka tjamu Jacobaku tjanampa kuļu mai wiyaringu. ¹² Ka tjlipi paluru kulinu mai pulka kunyu ngura Itjipala ngarinyi, munu palumpa katja tjuṭa witunu paluru tjana ankula mai mantjira ngalya-katintjaku. Kaya paluru tjana ankula mai pulka mantjira ngalya-katingu. ¹³ Munuya ngula mai paluru wiyarinkunyangka piruku anu, ka nyara palula-aralata Josephalu palurunku papulangka wangkara utinu palumpa panya kuṭa tjuṭangka. Ka mayatja panya Piiralu kuļu kulinu Josephaku panya walytja tjuṭa pitjanyangka.

¹⁴⁻¹⁵ "Ka palula małangka Josephalu tjananya witunu ankula palumpa tjanampa walytja uwankara altira ngalya-katintjaku Itjipalakutu palumpa mama Jacobanya kuļu. Kaya Jacobanya tjana uwankara tjunguringkula anu Itjipalakutu aŋangu panya nampa alatjiṭu 75. Ka tjlipi panya paluru ngura nyara palula rawa mulapa nyinangi munu ngulalta ilungu, ka ngula palumpa walytjapiti malatja tjuṭa kuļu ilungu ngura nyara palula nganampa panya tjamupiti. ¹⁶ Kaya Jacobanya pulanya Josephanya puntu małakungku katingu ngura walytjakutu Tjikimalakutu munuya pulanya kulpi panya aratjangka tjunu, panya ngañmanyjtju Aipuramalu payamilara wantingu wati Aimurkunu tjuṭangka.

¹⁷ "Ka ngula mulapa tjintu ilaringu Godalu panya Aipuramanya ngañmanyjtju kalkuntjatjanungku unkulintjaku manta panya Kainannga. Kaya ngura nyara Itjipala rawa mulapa nyinara tjuṭa mulararingu, nganampa panya walytjapiti. ¹⁸ Ka ngula mulapalta ngura Itjipaku mayatja

kutjupa nyinakatingu panya paluru Josephaku ngurpa munu iriti mulapa nyinanytjitja kulintja wiyat . ¹⁹ Munu paluru nganampa walytjapiti ngunti kuraningi munu tjananya pauntjing ra pulk ra pakuningi. Munu panya palumpa tjaultji tju ta wituningi ankula tjanampa iti tju ta tjulyara tjanalang ru wa ninytjaku urilta ngarira ilunytjaku.

²⁰ “Ka panya nyara palula arangka Mosenya iti ngaringu tjitji wiru mulapa, ka ngunytjungku palunya ngurangka kanyiningi p ra man kurtu. ²¹ Munu palulang ru karukutu katira urungka katu tjunu pitingka tjuna-tjuna tjatangka, ka panya mayatja Piiraku untaltu pitjala nyakula mantjinu urungka ngarinyangka munu paluru ngunytjuringkula kanyira pulkanu. ²² Ka paluru pulkaringkula Itjipanya ngurara tju taku ar aku nintiringkula palunya tjananya purunypa nyinangi. Munu paluru watirringkula wir ra rapangku wangkapairingu, munu paluru pakuringkunytja wiyangku wiru tju ta rawangku palyalpai.

²³ “Munu palulang ru wati pulkaringkula yiya nampa nyangatja 40-ringu, munu paluru kuliningi palumpa walytjapiti ankula nyakunytjik-itjangku a ngangu panya Israelkunu tju ta. ²⁴ Munu ankula nyangu palumpa walytja kutju wati Itjipanya ngurarangku pungkunyangka munu walytja-tjiratjangku pungkula iluntanu wati panya Itjipanya ngurara. ²⁵ Munu paluru kuliningi, ‘Tjinguruya nyanga palulang ru ngayuku walytja tjutangku kuliklu panya Godalu kuvari ngayulawanungku tjananya wankarunanyi.’ Palu wiya, tjana watarku nyinara pu tu kuliningi.

²⁶ “Ka mungawinki Mosenya p r ku anu munu nyangu Israelkunu kutjarangku pulanku pikangku pungkunyangka. Munu palula pulala ngururpa ngarala kitikit ra angatjunkula wangkangi, ‘Nyaaku nyupalinku walytjararangkumpa punganyi? Pika wiyariwa pula!’

²⁷ “Ka wati kutjungku pikaringkunytjatjanungku Mosenya un tu u munu wangkangu, ‘Nganalunta tjunu ngalinya mayatjangku paintjaku? ²⁸ Panya mungartjin wati Itjipanya ngurara pungkula iluntanu, munun kuvari ngayunyalpi iluntankunytjikitja mukuringanyi?’ ²⁹ Ka Moselu kulinu, ‘Munta-uwa, tjinguruya uwankarangku ngayunya kulinu.’ Munu nyara palulang ru paluru ngulu kumpira anu manta kutjupakutu ngura ini Mitiyantakutu munu ngura nyara palula nyinara minyma kuri alt ra manyinangi, munu katja kutjaratjararingu.

³⁰ “Munu panya ngura nyara palula yiya 40 kutjupa nyinangi rawa alatji u. Ka palulang ru angelpa palula utiringu ilytjingka puli murpu panya Tjaniyala itingka, ka paluru nyangu pu u wanka kampanyangka.

³¹ Munu nyakula kulinu, ‘Awari! Nyaa nyangatja pu u nyanga wanka tilingaranyi.’ Munu paluru ilangku nyakunytjikitja ma-ilaringkula wangka kulinu Mayatja Godalu pu u kampanytjangu ru wangkanyangka. ³² Panya paluru alatji wangkangi, ‘Ngayulu a nyuntumpa tjamu tju taku God, Aipur amaku Isaacaku Jacobaku tjanampa.’ Ka Moselu kuli ra pulk ra nguluringkula tjititingangi mununku yunpa tjutu u ngulungku nyakunytja wiyakitjangku.

³³ “Ka panya Mayatja Godalu palula alatji wangkangu, ‘Tjinatja palanku araltjara! Nyangatja manta milmilpa nyanga nyuntu kuvari ngaranytjanya. ³⁴ Kulila! Ngayulu a nyangu ngayuku panya walytja tju ta kur ra pungkunyangka ngura panya Itjipala, munu a ulanyangka ku u kuli ra pitjangu tjananya wankarunkunytjikitja. Munu a kuvari nyanga nyuntunya witu i Itjipalakutu ankula tjananya pakaltjingantjaku.’ Alatji Godalu wangkangu.

³⁵ “Nyangatja wati panya palurutu Mosenya panya, panya nganmanytu Israelkunu kutjarangku papulara wangkangi alatji, ‘Nganalunta tjunu nganañanya mayatjangku paintjaku?’ Palu wati panya palunya Godalu angeltawanungku puñunguru wangkara witura iyanu tjananya mayatjarira pakaltjingara katintjaku Israelkunu tjuta. ³⁶ Ka paluru witulya pulkangku kutjupa kutjupa pulka tjuta palyaningi ngura panya Itjipala tjana nyakula kulira nintiringkunytjaku. Munu panya paluru palumpa walytjapiti pakaltjingara katingu Itjipalanguru. Munu tjananya katira uru panya Tjitin-tjitinta wirkakatira pulka mulapalta palyanu, kaya itipirira wankaringu. Munu piruku pulka tjuta palyarinangi ilytjingka panya rawa para-pitjalira kuli panya 40.

³⁷ “Nyangatja wati panya palurutu wangkangu Moselu Israelkunu tjuangka alatji, ‘Mayatja Godalu wati wangkatjara nyuralakutu iyalku anangu nyurampa walytjanguru, ka paluru ngayulu purunytju nyurala wangkaku.’* ³⁸ Palu Mosenya panya Israelkunu tjuangka tjungu alatjitu ilytjingka para-pitjalinangi nganampa panya walytjapitingka. Ka panya palunya angeltu puli panya Tjaniyala wangkangu, ka palula kulira paluru tjukurpa wiru mulapa mantjinu munu nganañala tjakultjunu kulira wankaru nyinanytjaku.

³⁹ “Palu panya nganampa tjamu tjuangkuya Mosenya kulira wantingi alatjitu munuya mukuringangi malaku ankunytjikitja ngura panya Itjipaku. ⁴⁰ Munuya Mosenya puli panya Tjaniyala tatira ma-nyinanyangkaya palumpa panya kutangka tjapinu wati panya Aaronta, ‘Nyuntumpa panya malanypampa yaaltjiringu? Panya paluru nganañanya ngura Itjipalanguru pakaltjingara ngalya-katingu ngura nyangakutu. Kala putu kulini yaaltjiringu paluru. Wanyulampa nyuntu god tjuta palyala nganañanya kuranyurira katirkunytjaku.’* ⁴¹ Munuya nyara palula ara paluru tjana puluka kulunypa purunypa palyanu tjanampa god. Munuya palulanguru palyantjatjanungku pukularira palulakutu mai kuka kulu ngalya-katingu palunya ungkula walkuntjikitjangku.

⁴² “Palu Godalu tjananya nyakula wantingu paluru tjana walytjangku kililpi pira tjintu kulu pupakatira walkuntjaku. Ka tjukurpa panya wangkatjara tjuangka iriti walkatjura wantingtjanya panya utiringu, panya alatjiya nganmanytu nyiringka walkatjunu Godalu wangkanytja, ‘Anangu Israelkunu tjuta, kulilaya! Nyura panya ilytjingka yiya 40-ara para-ngarala kuka pungkula tiliwakantja wiyatu ngayulu nyakula pukularinytjaku.

⁴³ Palu nyura panya god ngalypa-ngalypa ini Malikaku tiinta milmilpa katirinangi palunya walkuntjikitjangku. Munu panya nyura puli kililpi purunypa palyantja kanyiningi god ngalypa-ngalypa ini Ripannga walkuntjikitjangku. Kaña nyanga palulanguru nyuranya ngura walytjanguru ma-iyalku ngura kutjupa tjutakutu parari mulapa ngura panya Papilanta munkarakutu.*

⁴⁴ “Ka panyaya nganampa tjamu tjuangka iriti Godaku tiinta milmilpa ilytjingka katirinangi. Panya tiinta pala palunya Godalu Mosenya nintinu palyantjaku, kaya Moselu tjana tjukarurungku palyanu Godalu panya nintintjtja alatjitu. Munuya tiinta pala palula tjarpala Godanya walkulpai munuya kulilpai, ‘Mulapa Godanya nganañala tjungu nyinanyi.’ ⁴⁵ Ka

* 7:37 Deuteronomy 18:15 * 7:40 Exodus 32:1 * 7:43 Aimatjaku 5:25-27

ngula Mosenya tjana ilunyangka palumpa tjanampa katjapitingku ngapartji tiinta panya palunya kanyiningi Tjatjuwalu tjana panya nganampa tjamu nganmanyitja tjutangku. Munuya paluru tjana tiinta panya palunya winkilta wirkana ngura panya kalkuntjtjangka. Ka panya Godalu nguraritja tjuta ngura nyara palulanguru pakaltjinganu ka Tjatjuwanya tjana ngapartji nyara palula nguradaringu anangu panya Israelkunu tjuta. Kaya tiinta panya palunya ngura palula tjunkula kanyiningi, ka tiinta panya paluru nyara palula titutjara ngarangi wati panya Davidanya tjanampa mayatjarira nyinanytjistikaku alatji. ⁴⁶ Ka Godanya panya Davidaku pulka pukularipai. Ka paluru Godala tjapinu alatji, 'Jacobaku God! Wanyuni wangka, kana nyuntumpa waliru palyanma anangu tjutangku nyuntunya tjarpala walkuntjaku.' ⁴⁷ Palu Davidalu putu tjapiningi, ka panya palumpa katjangku Tjalamanu waliru panya palumpa palyanu Godaku.

⁴⁸ "Palu kulilaya! Godanya panya mayatja pulka mulapa uwankarangka waintarintja munu paluru waliru watingku palyantjtjangka nyinapai wiya. Panya wangkatjarangku nyiringka iriti walkatjumu Mayatja Godalu wangkanytja nyanga alatji,

⁴⁹⁻⁵⁰ 'Ngayuluña ilkariringka mayatja pulka mulapa nyinanyi, mununa uwankara kanyini, ilkaritja mantatja kułukulu.

Ka nyura waliru ngayulu tjarpala nguradarira nyinanytjaku putu alatji palyalku.

Panya ngayulu uwankara mulapa palyanu.

Ka ngura ngayulu nyinara pakuiyaringkunytjaku mantangka ngaranytja wiya alatji.' * *

Alatji Stephentu tjanala wangkangi Jew tjutaku kantjula tjutangka.

⁵¹ Munu alatji piruku tjanala wangkangi, "Nyura Godala tungungupkupai tjuta nyinanyi palumpa tjukurku mulamularingkupai wiya nyurampa panya waltyapiti nganmanyitja tjuta purunypa. Panya tjana Kurunpa Milmiltu tungunpungangi munu panyaya kulira wantingi, palu purunypa nyura ngapartji tungun-tungunpatu nyinanyi palula kulintja wiya. ⁵² Panya iriti nyurampa tjamu tjutangku Godaku wangkatjara uwankara kurara pungangi munu panyaya iluntanangi tjananya. Panya wangkatjara paluru tjanaya nganmanytju tjakultjunangi ngula kutjupa pitjanytjaku wati tjukaruru mulapa. Ka panya paluru pitjanyangka nyura ngapartji palumpa mirpanarira palunya iluntankunytjaku intjanungku ma-ungu. Munu panya nyura kułu palula tjanala tjunguringkula miripungkupai tjuta nyinanyi. ⁵³ Uwa, Godalu panya tjukurpa pulka mulapa nyurampa tjamupiti ungu, panya paluru angelpa iyanu Mosela nintintjaku, ka panya paluru kulintjatjanungku tjanala tjakultjumu. Ka nyura kuwari tjukurpa panya palunya kanyini nyiringka, munu nyura kulira wantinyi wanganarangku kulira palyantja wiyangku." Alatji Stephentu tjanala wangkangi.

Stephennga Atuntja

⁵⁴ Kaya wati panya Jew tjutaku kantjula tjutangku paluru alatji wangkanyangka kulira pulka alatji palumpa mirpanarira tjalinypa patjanu. ⁵⁵ Palu wati nyara palunya Kurunpa Milmiltu kanyira witulyanangi ka paluru ilkarikutu ira-nyakula nyangu Godanya pitalytji witulya pulka nyinanyangka, munu Jesunya kułu nyangu palula kampa wakungka mayatja pulka nyinanyangka. ⁵⁶ Munu paluru nyakula

* ^{7:49-50} Aitjayaku 66:1-2

wangkangu, "Awari! Nyawaya! Kuwariṇa ngayulu nyanganyi ilkari alaringkunyangka, ka nyara Godala wakungka Watiku Katjanya mayatja pulka nyinanyi."

⁵⁷ Kaya wati panya kantjula tjutangku nyangatja kuliṛa pulkara alatjiṭu mirara mara tjananku angatjunu pinangka paluru wangkanyangka kulin-tja wiyakitjangku, munuya palulakutu wala pulka ngalya-pakara palunya witinu. ⁵⁸ Munuya ursiktu ilara itarikatira aŋta-waŋingu ngura Jerusale-mala ursilta, munuya mirpantjarangku mantara tjananku katutja araltjara mantangka waŋingu wati yangupala ini Saulala itingka. Munuya puli tjuta mantjira Stephennga rawangku pulkara atuningi iluntankunytjikitjangku. Ka Saulalu tjanampa mantara tjuta ngarala atunyamanangi. ⁵⁹ Ka tjana atunnyangka Stephentu Godala tjapiningi alatji wangkara, "Mayatja Jesu, Kurunpaŋi mantjila!" ⁶⁰ Munu paluru tultjungarəkakatira mirara wangkangu, "Mayatja! Nyanga tjananya ngayunya iluntankunyangka ngapartji pungkunytja wiyangku wantima!" Munu alatji wangkanytjatjanu ilungu.

8

¹ Ka wati panya Saulanya nyara palula ngarangi munu tjana iluntankunyangka nyakula pukularingi panya paluru kuļu tjanala tjungutja.

Saulalu Jesuku Walytja Tjuta Kurantja

Kaya nyara palula ařangka ngura Jerusalemala Jesunya wantipai tjuta Jesuku walytja tjutaku pulkara kuraringu munuya tjananya ngulura waṭaparaṛa pungangi. Ka nyara palulanguruya Jerusalemanyā wantikatira ngulu wililyarara ankula waŋingu ngura tjukutjuku tjutakutu manta panya Judeala pulala Tjamiriyala kumpira nyinanytjikitja. Kaya wati panya Jesulu iyantja tjuta kutju Jerusalemala malaringkula nyinangi.

² Kaya Stephennga ilunyangka wati Godaku mukuringkupai tjuta pulkara tjituru-tjitururira ulara waŋingu munuya palunya mantjira katira kulpingka tjututjunu. ³ Palu Saulanya mukuringangi Jesuku walytja tjutangku Jesunya waŋantja wiyangku wantinytjaku, munu paluru kutjupa tjuta witinu tjananya ngulura waṭaparantjaku, kaya tjanampa walingka para-tjarpangi munuya wati minyma kuļu witira itarikatira tjailangka tjarpatjunangi Jesuku walytja tjuta.

Tjamiriyanya Ngurara Tjuta Tjukurpa Palyaku Mulamularingkunytja

⁴ Kaya Jesuku walytja tjutangku ngulu panya wililyarara ankunytjatjanungku Tjukurpa Palya Jesunyatjara tjakultjunangi aŋangu tjutangka ngura kutjupangka kutjupangka. ⁵ Ka Philipanya manta pala Tjamiriyalakutu ankula ngururpa tawunu pulkangka ini Tjapatjila wirkanu munu Tjukurpa Palya aŋangu tjutangka tjakultjunangi Jesunyatjara, panya Godalu palunya iyanu aŋangu tjuta wankarunkunytjaku. ⁶ Munu paluru kutjupa kutjupa pulka tjuta witulyangku palyanangi, kaya aŋangu tjutangku palyannyangka nyakula palula tjukurpa wangkanyangka rawangku purkarangku kulinigi wantinytja wiyangku. ⁷ Ka Philipalu Godaku witulyatjarangku painnyangka mamu tjuta mirara pakaningi aŋangu tjutanguru. Ka nyumpu tjuta, wawanypa tjuta, tiwilpa ngarinytja tjuta kuļu palyaringangi Philipalu wangkara pakaltjingannyangka. ⁸ Kaya ngura pala palula aŋangu uwankara pulkara pukularingu.

Wati Ngangkari Ini Simonnga

⁹ Ka ngura pala palula wati ngangkari puruny whole nyinangi ini Simonnga panya paluru kutjupa kutjupa pulka tjuṭa ayinayinirira palyalpai, kaya Tjamiriyanya ngurara uwankarangku nyakula wangkapai, “Ai! Nyan-gangku ayinayiningku palyalpai!” Kanku paluru walytjangku mirawanipai alatji wangkara, “Ngayuluña mayatja pulka mulapa nyinanyi.” ¹⁰ Kaya anangu winkingku nyakula palumpa pulkara mulamularingangi, anangu pulka tjuṭangku munu tjukutjuku tjuṭangku kuļu. Munuya palunya mirawanira wangkapai alatji, “Wati nyanga paluru-manti mulapampa ilkareringuru pitjangu, munu nyanga Godalu purunytju witulyangku pulka tjuṭa palyani.” ¹¹ Munuya mirawaningi alatjitu palunya, panya rawangku paluru kutjupa kutjupa pulka tjuṭa ayinayinirira palyaningi, kaya nyakula kulinigi, “Awari! Nyangatja pulka mulapa.” Munuya palunya mi-rawaningi munuya paluru wangkanyangka kuliṛa palumpa mulamula-ringangi munuya palunya wañanangi.

¹² Palu Philipalu pitjala Tjukurpa Palya Jesunyatjara wangkangi panya Godalu anangu tjuṭa palumpa mulamularingkunyangka walytjanmara mayatjangku kanyintja. Kaya anangu tjuṭangku kuliṛa mulamularingu paluru wangkanyangka, ka tjananya urungka baptise-katingu. ¹³ Ka wati panya Simonnga kuļu Jesuku mulamularingu, ka palunya urungka baptise-katingu. Ka palula maļangka paluru Philipala tjunguringkula palula tjungu para-ngarangi, munu Philipalu kutjupa kutjupa pulka tjuṭa Godaku witulyatjarangku palyannyangka nyakula kulinigi, “Awari! Nyangatja wiru mulapa.”

¹⁴ Kaya wati panya Jesulu iyantja tjuṭangku Jerusalemalanguru kulinu anangu Tjamiriyanya ngurara tjuṭa Godaku Tjukurku kuliṛa mulamularingkunytja munuya palulanguru Peternya pulanya Johnnga iyanu palula tjanalakutu. ¹⁵ Ka pula ngura pala palula wirkara mulamularingkupai tjuṭaku Godala tjapiningi paluru Kurunpa Milmilnga tjanala tjarpatjunkunytjaku. ¹⁶ Panya Kurunpa Milmilnga tjanala kuwaripa tjarpanytja wiyat, palu tjana urungka tjarpara kutju baptise-aringu ini Jesula kutjungka, ka Kurunpa Milmilnga tjanala kuwaripatu tjarpanytja wiyat. ¹⁷ Ka Peterlu pula Johntu tjanala katangka mara tjunkula Godala tjapinnyangka nyara palula ara Kurunpa Milmilnga tjanala unngu tjarpan.

¹⁸⁻¹⁹ Ka wati panya Simontu nyangu Kurunpa Milmilnga tjanala unngu tjarpanyangka Jesulu iyantja kutjarangku tjanala katangka mara tjunkunyangka. Munu paluru mukuringangi paluru pula purunytju anangu tjuṭangka mara tjunkunytjikitja munu Peternya pulanya Johnnga mani ungkula ngatjiningi alatji wangkara, “Wati wiru kutjara! Ngayunyanı pula nintila, witulyangku palyantjaku, kana nyupali purunytju anangu kutjupa tjuṭangka mara tjunkula alatjinama, ka Kurunpa Milmilnga tjanala kuļu tjarpanama.”

²⁰ Ka Peterlu mani ungkunytjikitjangku wangkanyangka kulinu munu palunya paira wangkangu alatji, “Wiya, mani palatjanku ma-kati munu pula manirara ngula ngura kurangka tjarpa! Panya nyuntun ngunti kulini Godaku Kurunpa maningka payamilantjikitjangku. ²¹ Nyuntun ngalila tjungutja wiya, kanta Godalu nyuntunya nintintja wiya warka nyanga puruny whole palyantjaku, panya paluru nintingku nyanganyi nyuntu ngunti unngu mukuringkunyangka. ²² Nyuntun kurangku ngunti kulini maningka payamilantjikitjangku! Palu kuntearingkula wantima mununku kampa kutjuparira Godala tjapila nyuntumpa kalyparingkula nyuntunya

pungkuwiyangku wantinytjaku. ²³ Ngayulu kulini nyuntun ngalimpa pulkara nyararinganyi ngali purunytju palyantja-tjiratja, munu nyuntu kuraringkula rawa alatjitu kurangka nyinanyi putu wantira.” Alatji Peterlu palula wangkangu.

²⁴ Ka Simonnga nyangatja kulira nguluringu munu palula pulala wangkangu, “Wanyutju pula tjapila Godala ngalinya manirara ngura kurangka wanintyjtaku-tawara.” Ka pula mulapatu Godala tjapinu palumpa.

²⁵ Munu pula ngura nyara palula anangu tjutangka rawangku tjakultjunnangi tjukurpa Jesunyatjara. Palulanguru pula wangkara wiyingkula ma-pakanu malaku ngura Jerusalemalakutu. Munu pula manta panya Tjamiriyalawanu ngapari malaku pitjala ngura tjukutjuku tjutangka kulu Tjukurpa Palya tjanala ngapartji piruku tjakultjunangi anangu kutjupa tjutangka.

Philipalu Wati Itjiyau-piyanya Ngurarrangka Wangkanytja

²⁶⁻²⁸ Ka Israelta ulparira manta kutjupangka ngura ini Itjiyau-piyala wati kutju nyinangi. Ka ngura nyara palumpa mayatja pulka minyma nyinangi munu paluru wati panya palunya kamanta tjunu Itjiyau-piyaku mani atunyamankunytjaku. Palu wati nyara paluru Godanya kulipai munu kutjupa-ara paluru wakina wiila kutjaratjarangka tatira alinytjaralku anu parari Jerusalemalakutu munu wirkara timpula pulkangka tjarpala Godanya walkuningi. Munu paluru walkura wiyingkula malaku anangi ngurakutu munu wakinangka ankula paluru nyiri Aitjayalu iriti walkatjunkunytja nyakula wangkarinangi.

Ka nyara palula-arangka Philipanya manta panya Tjamiriyala nyinangi Jerusalemala alinytjara, ka nyara palula nyinanyangka Mayatja Godaku angeltu Philipala utiringkula wangkangu alatji, “Ara Jerusalemalakutu munu Jerusalemalanguru munukara ma-pitja ulparira, panya iwara pulka nyara Kaatjalakutu ma-ngarinyi, iwara nyara palulawanu ma-pitja ilytjiwanu.” Alatji angeltu wangkangu Philipala. Ka paluru angelta kulira wanganara ma-pakanu munu ankula ankula ngura tjuta wantikatira ngulalta manyangu wati panya Itjiyau-piyanya ngurara wakinangka ma-pitjanyangka.

²⁹ Ka Kurunpa Milmiltu Philipala wangkangu, “Ma-ilariwa wakinakutu nyara munu ilangku wananma.”

³⁰ Ka Philipalu wakinakutu ma-ilaringkula kulinu wati panyangku tjukurpa Aitjayalanguru nyakula wangkanyangka, munu tjapinu wati palula, “Nyuntu wanyu tjukarurungku kulini pala nyuntu nyakula wangkanytjanya?”

³¹ Ka watingku panya wangkangu, “Wiya, putuna kulini. Kutjupangku nintingku wangkara nintinnyangkana tjinguru kulilku. Wanyu nyuntu wakinangka nyanga ngalya-tatila mununi wangkara nintinma.” Ka Philipanya tatira palula itingka nyinakatingu.

³² Ka tjukurpa panya paluru Aitjayalanguru nyakula wangkanytjanya nyanga alatji ngarangi,

“Wati palunyaya tjiipi purunypa katingu iluntankunytjaku,

ka paluru piluntu alatjitu pika pulka mantjinu ngaparpungkula tjukurpa wangkanytja wiyingkulu.

Panya lamalama pilunpa uriwiya ngaripai watingku inyukitjangku tjiramilannyangka,

palu purunypa paluru wangkanytja wiya alatjitu ngarangi.

³³ Uwa, palunyaya witira anangura wangkara ngunti kuramanangani wati kura-palku munuya iluntankunytjaku ma-katingu,

ka kutjupa palumpa anga-wangkanytja wiya alatjitu.
 Ka nganalu wanyu tjukurpa palumpa tjitjtjara, pakalitjara wangkaku?
 Wiya alatjitu, panya paluru wati yangupala ilungu tjtji wiya alatjitu.”*

³⁴ Ka wati panya Itjiyau-piyanya ngurarangku Philipala tjapinu alatji, “Wanyuni tjakultjura wati nyanga wangkatjarangku ngananya wangkanyi? Palurunku walytjangku wangkanyi? Munta kutjupa wangkanyi?” ³⁵ Ka Philipalu tjukurpa pala palulanguru wati panya palula utira tjakultjunangi Tjukurpa Palya Jesunyatjara. ³⁶⁻³⁷ Munu pula ankula ankula karu urutjara nyangu, ka wati panyangku Jesuku mulamularingkula wangkangu, “Karungka nyanga uru ngarinyi. Wanyuni nyanga palula urungka tjarpatjura baptise-kati.”*

³⁸ Munu wati panya paluru palumpa wakina ngaratjunu. Munu pula ukalingkula urungka ankula tjarpangu. Ka Philipalu palunya urungka tjarpatjura baptise-katingu. ³⁹ Ka pula urunguru ngalya-pakannyangka Kurunpa Milmiltu Philipanya katingu, ka wati panya Itjiyau-piyanya ngurarangku palunya piruku nyakunytja wiya, palu paluru pukulpa mulapa anu ngurakutu.

⁴⁰ Ka Philipalu nyangu, “Ai! Ngura kutjupangkampanal nyangatja nyinanyi ngura ini Atjatatjala.” Munu paluru ma-pakanu alintjara munu ankula ngura ngururitja tjungangka Tjukurpa Palya Jesunyatjara anangu tjungangka tjakultjunangi munu ngura ini Tjiitjariyalalta wirkanu.

9

Saulanya Jesuku Walytjaringkunytja (Acts 22:6-16; 26:12-18)

¹⁻² Ka ngura Jerusalemala wati panya Saulanya Mayatja Jesuku walytja tjungaku rawatu pikaringangi munu tjananya iluntankunytjikitjangku wangkara ngulutjinganigi. Munu paluru piruku kuliningi ngura Tamatjakalakutu ankula ngura nyara palula ngapartji Jesuku walytja kutjupa tjunga kurantjikitjangku. Munu paluru wati panya Jewku tjukurtjara pulkangka ankula tjapinu wangkara, “Wanyuni nyiri walkatjura uwa, kana Tamatjakalakutu kati mununa wirkara wali inmaku tjunguringku-paingka tjarpa wati kuranyitja tjungangka nintila, kaya nyakula kuliklu, ‘Munta, tjukurtjara nyara pulkangku wati nyangatja iyanu wati minyma kulukulu Jesunya walalpai tjunga nyakula witira Jerusalemalakutu katinytjaku.’ Alatjini walkatjura ungkul’iyala, kana ankula Jesuku walytja tjunga witira ngalya-katiku nyuralakutu.” Ka mulapatu walkatjura ungkul’iyanu.

³ Ka paluru nyiritjara ma-pakanu Tamatjakalakutu wati malpa tjungatjara munuya ankula ankula ngura palulakutu ilaringu, ka ilkariringuru tili pulkangku irnyanu. ⁴ Ka wati panya Saulanya punkanu mantangka munu kulinu ilkariringuru wangkanyangka alatji, “Saul! Saul! Nyaakunin tiutjarangku kuranj?”

⁵ Ka Saulalu wangkangu, “Palu ngananyan wanyu?”
 Ka wangkangu, “Ngayuluna Jesunya, panya nyuntunin rawangku kuranj. ⁶ Palu kuwari pakara ara pala Tamatjakalakutu, kanta kutjupangku wangkaku nyuntu nyaa palyantjaku.”

* ^{8:33} Aitjayaku 53:7-8 * ^{8:36-37} Wati kutjupangku kunyu verse 37 walkatjunu munu mala tjungunu Luke-aku tjukurta alatji – Ka Philipalu wangkangu palula, “Nyuntu Jesuku kurunpa winki mulamularingkunyangkampa nyuntunya palya baptise-katiku.” Ka wangkangu, “Uwa, ngayulu Jesuku Christaku mulamularinganyi panya paluru Godaku katja.”

⁷ Kaya wati panya tjuṭa palula tjungu ankunytjatjanu wangkanytja wiya ngarangi, panya wangkaya kulinu palu aŋanguya puṭu nyangangi. ⁸ Ka Saulanya mantanguru pakaṇu, palu puṭu nyangangi, kaya māra witirā katingu walikutu. ⁹ Ka paluru tjintu maŋkurpa kuru pati nyinangi nyakunytja wiya alatjiṭu munu mai kuļu ngalkuntja wiya munu kapi tjikintja wiyatū.

¹⁰ Ka tawunu nyara palula wati Jesuku walytja kutjupa nyinangi ini Ananayatjanya. Ka Mayatja Jesulu palula utiringkula ini wangkangu, “Ananayatja!”

Ka paluru kuru unngutjangku nyangangi munu palula wangkangu, “Uwa, kulininanta Mayatja.”

¹¹ Ka wangkangu, “Pakara ara iwara ini ‘Tjukarurulakutu’ munu wati panya Judasaku ngurangka wirkara tjapila wati ini Saulaku ngura panya Taatjatjanya nguraraku, panya paluru kuwari ngayula nyinara tjapini.

¹² Panya ngayulu palunya nintinu ka paluru kuruntu nyanganyi nyuntu pitjala palula māra katangka tjunkunyangka palunya kuru alantjaku. Ka nyuntu ara palulakutu!”

¹³ Ka Ana-nayatjalu wangkangu, “Wiya Mayatja, aŋangu tjuṭangkuya palunyatjara wangkangi, panya wati nyanga paluru kunyu Jerusalemala nyuntumpa walytja tjuṭaku pikaringkula tjananya pułkara kuralpai. ¹⁴ Ka kunyu kuwari Jewku tjukurtjara pułka tjuṭangku wati nyanga palunya witunu ngura nyangaku pitjala nganananya ngapartji nyuntumpa walytja tjuṭa witintjaku.” Alatji Ana-nayatjalu nguluringkula wangkangi.

¹⁵ Ka Mayatjalu palula wangkangu, “Wiya, ara palulakutu! Panya wati nyanga palunyana ngayulu ngurkantanu ngayuku warka palyantjaku munu tjukurpa ngayunyatjara wangkanytjaku aŋangu Jew wiya tjuṭangka, tjanampa mayatja tjuṭangka, munu aŋangu Israelkunu tjuṭangka kulukulu. ¹⁶ Kana palunya nintilku panya paluru ngayuku warkarinyangka kutjupa tjuṭangku palunya pułkara pikantankuku.” Alatji Mayatjalu Ana-nayatjala wangkangi.

¹⁷ Ka paluru anu wali panya Saulanya nyinanytjitjakutu munu tjarpara nyangu palunya. Munu palula māra katangka tjunkula wangkangu, “Saul, walytja wiru! Mayatja Jesulu ni nyuntulakutu witunu, panya iwarangka ngalya-pitjanyangka paluru nyuntula utiringu. Panya paluru ni kuwari nyuntulakutu iyanu nyuntu piruku kuru alaringkula nyakunytjaku, ka Kurunpa Milmiltu kuļu nyuntula unngu tjarpara nyuntunya kanyilku.”

¹⁸ Ka mapalku kutjupa kutjupa tjukutjuku mulapa palumpa kurunguru punkaṇu, ka paluru kuru alaringkula nyangangi. Munu palulanguru paluru pakaṇu, ka palunya urungka baptise-katingu. ¹⁹ Palulanguru paluru uparingkunytjatjanungku mai ngalkuṇu munu malaku ipilyarira kunpuringu.

Saulalu Tamatjakala Tjukurpa Wangkanytja

Palulanguru Saulanya Jesuku walytja tjuṭangka tjungu nyinangi tjintu maŋkurpa ngura pala Tamatjakala. ²⁰ Munu paluru Jew tjuṭaku wali inmatja tjuṭangka tjarpara tjukurpa Jesunyatjara wangkangi aŋangu tjuṭangka. Munu paluru tjakultjunangi tjanala panya Jesunya Godaku katja. ²¹ Kaya paluru wangkanyangka kulira putu nguwanpa kuliningi, “Wati panyatja nyangatja, panya Jerusalemala tjananya ini nyanga Jesunya walkunnyangka iluntanangi. Munu panya kunyu nyangatja pitjangu Jesuku walytja tjuṭa witirā malakungku katinytjikitja Jewku tjukurtjara kuranyitja tjuṭakutu.”

²² Palu Saulalu tjukurpa Jesunyatjara kurunpa rapangku tjanala wangkangi munu tjananya wangkara mukumukuningi. Panya paluru alatji utira wangkangi, "Iriti panya Godalu kalkunu Wankarunkupainy iyantjikitjangku, ka kuwarilta wirkanu wankarunkupai panya paluru, Jesunya Christanya." Kaya tjukurpa nyanga alatji wangkanyangka wati Jew nyara palunya ngurara tjutangku putu kuliningi palunya ngapartji anantjikitjangku.

²³ Munuya ngula tjintu tjuṭa ngarala wiaringkunyangka paluru tjana mitingkingka tjunguringu munuya wangkara kuliningi palunya iluntankunytjikitjangku. ²⁴ Palu kutjupangku kulintjatjanungku Saulala tjakultjelu. Ka panya tjana mungangka kaala kulu tawunu pala Tamatjakaku kaita pulkangka kumpira patara nyinangi paluru ngalya-pakannyangka pungkula iluntankunytjikitja. ²⁵ Ka palulanguru munga kutjupa Saulaku malpa tjutangku palunya kampangka katingu munuya wall-pa katunguru palunya piti pulkangka ruupangka karpira ukalilyinu urilkutu, ka Tamatjakalanguru ngulu kumpira wirtjapakañu Jerusalemalakutu.

Saulanya Jerusalemala Nyinanytja

²⁶ Munu paluru Jerusalemala wirkara Jesuku walytja tjutangka tjunguringkunytjikitja mukuringangi, palu putuya kuliningi, panya paluru tjanaya palumpa putu mulamularingkula nguluringangi kulira, "Panya nyanga paluru Jesuku walytja wiya." ²⁷ Ka wati panya Paanapatjalu palunya ngaltunytjungku pitjala altira katingu wati panya Jesulu iyantja tjutakutu. Munu paluru tjanala ara uwankara tjakultjelu panya Saulanya iwarangka ankula Jesunya nyakunytja, munu Jesulu palunya wangkanytja, munu paluru rapangku tjukurpa Jesunyatjara ngura panya Tamatjakala wangkanytja kulu tjanala tjakultjelu. Alatji Paanapatjalu tjanala ara uwankara tjakultjelu, kaya kulira mulamularingu.

²⁸ Ka palulanguru Saulanya Jesuku walytja tjutangka tjunguringu munu paluru tjanala tjungu para-ngaranggi ngura Jerusalemala. Munu paluru tjukurpa Jesunyatjara rapangku alatjitu anangu tjutangka para-tjakultjunangi. ²⁹ Munu paluru Jew panya Kuriki wangkapai tjutangka wangkangi, panya paluru tjana Kurikiku ara tjuta kulira wanpalpai, munuyanku Saulalu tjananku rawangku ngaparku wangkangi. Panya tjana palumpa mulamularingkunytja wiya mirpanaringi munuya palunya iluntankunytjikitja mukuringangi. ³⁰ Kaya Jesuku walytja kutjupa tjutangku nyanga palunya kulira Saulanya iluntankunytjaku-tawara makatingu Tjiitjariyalakutu munuya pautangka ma-iyanu ngura walytjakutu Taatjatjalakutu.

³¹ Kaya palulanguru Jesuku walytja tjuṭa ngura winkingka manta Judeala, Galileela munu Tjamiriyala kulu pukulpa nyinangi panya mirpantju tjuṭa tjanampa pikaringkunytja wiyaringu. Ka panya Kurunpa Milmiltu tjananya kunpunungi munu kurunpa rapanangi Jesunya tunguntunguntu wanantjaku. Kaya kutjupa tjuṭa mulapa Jesuku mulamularingkula palumpa walytjaringangi munuya pukulpa nyinangi Mayatja Jesunya rawangku walkura.

Wati Ini Aini-yatjanya Palyaringkunytja

³² Ka Peternya panya ngura tjutangka para-pitjalinangi, munu paluru ngura ini Litala wirkana munu Jesuku walytja tjutakutu ankula palula tjanala tjunguringu. ³³ Munu nyara palula nyangu wati pikatjara ini Ainiyatjanya tjanala tjungu nyinanyangka. Wati paluru wawanypa munu

piitangka rawa ngaringi ku^li 8 pakantja wiya alatji^tu. ³⁴ Ka Peterlu palula wangkangu, "Aini-yatja! Jesulu Christalunta kuwari palyarungunuⁱ, ka pakala mununku mantara karpila." Ka paluru mapalku pakara ngarangu. ³⁵ Kaya ngura nyara palula nyinapai winkingku nyangu palyaringkula ngaranyangka, manta panya Tjaranta nyinapai tjutangku ku^lu. Munuya nyakunytjatjanu Mayatja Jesuku mulamularingkula palumpa walytjaringu winki mulapa.

Minyma Ini Tapitjanya Ilunyangka Pakaltjingantja

³⁶ Palu tawunu ini Tjapala minyma kutjupa Jesuku walytja nyinangi ini Tapitjanya. Kaya wangka Kuriki wangkapai tjutangku palunya ini wangkapai alatji Tuukatjanya. Panya paluru rawangku wiru tjuta palyalpai anangu tjutaku munu anangu ngaltutjara tjuta atunyankupai. ³⁷ Ka Peternya ngura nyara Litala nyinanyangka minyma panya paluru pika pulkaringkula ilungu. Kaya ilunyangka palunya puntu minangka paltjinu munuya katira ruuma katutjangka tjunkula wantingu. ³⁸ Ka Tjapanya panya ngura Litala itingka, kaya ngura pala Tjapala Jesuku walytja tjutangku kulinu Peternya ila ngura Litala nyinanyangka. Munuya palulanguru wati kutjara witura iyanu Peterlakutu. Ka pula Peterla wirkara wangkangu, "Wiru ngana, ngali nyuntunya altinytjikitja pitjangu. Wanyu warpungkula pitja!"

³⁹ Ka Peternya pulala tjunguringkula mapalku anu. Ka paluru ngura nyara palula wirkankunyangka tjana palunya patara mantjinu munuya ruuma katutjakutu katingu. Kaya wanaka^la kutjupa tjuta Peterla itingka ngarala ulara waⁿgingi, munuya palula nintinu ulytja kutjupa kutjupa tjuta minyma panya paluru palyantja ngaⁿmanytju wanka nyinaralpi. ⁴⁰ Ka Peterlu nyakunytjatjanungku tjananya uwankara ruumanguru urilkutu iyanu. Munu paluru tultjungarakanira Godala tjapinu, munu palulanguru minyma panya ilunytja nyakula wangkangu, "Tapitja! Pakala!" Ka paluru ku^lu alaringu munu Peternya ngalya-nyakula pakaⁿ muⁿu nyinangi piitangka. ⁴¹ Ka Peterlu palunya mara witira pakaltjinganu paltjura ngaranytjaku, munu paluru Jesuku walytja tjuta altingu minyma panya wanaka^la tjuta ku^lu. Munu tjananya nintinu minyma panya ilunytjatjanu wankaringkula ngaranyangka. ⁴² Kaya ngura nyara palula anangu winkingku kulinu minyma panya ilunytjanya wankaringkunytja, munuya tjuta mulapa Mayatja Jesuku mulamularingu. ⁴³ Ka Peternya ngura nyara Tjapala nyinangi tjintu tjuta mulapa wati ini Simonku ngurangka. Wati nyara paluru panya kukaku miringuru latja tjuta palyalpai.

10

Peternya Munu Kuniliyatjanya

¹ Ka ngura panya Tjiitjariyala wati kutjupa nyinangi ini Kuniliyatjanya. Wati nyanga paluru tjaultji tjutaku mayatja nyinangi munu paluru tjaultji 100 kanyilpai. Ka tjaultji nyara paluru tjana panya Italinya ngura^ra tjuta. ² Ka Kuniliyatjanya wati Jew wiya, munu paluru, munu palumpa walytjapitingku ku^lu Godanya wanganarangku kulilpai munuya palunya kutju walkulpai. Munu wati nyara paluru anangu ngaltutjara tjuta munytjangku ungkupai munu Godala titutjarangku tjapilpai.

³ Ka tjintu kutjupa ka^la kakarara-wiltja paluru Godala nyinara tjapiningi, munu paluru kuruntu nyangu panya Godaku angelpa palula utiringkunyangka. Ka paluru ngalya-ilaringkula palunya ini wangkangu, "Kuniliyatja!"

⁴ Ka paluru urulyarara nguluringu munu angelpa panya palunyu pulkara nyangangi, munu wangkangu, “Uwa mayatja! Nyaakun mukuringanyi?”

Ka angeltu palula wangkangu, “Godanya nyuntumpa pulkara pukularinyi nyuntu palula rawangku tjapinnyangka munu panya ngaltutjara tjuṭa munytjangku ungkunyangka. Munu paluru nyuntunya kulintjatjanungku ngayunya wituṇu nyuntula wangkanytjaku.” ⁵ Ka wanyu kulila! Wati mañkurpa witura iyala tawunu nyara Tjapalakutu, kaya ankula wati ini Simon Peternya ngurira altira ngalya-kati. ⁶ Panya wati nyara paluru Simon kutjupaku walingka unytju nyinanyi urungka itingka. Simon nyara paluru panya kuka miringuru latja tjuṭa palyalpai. Kaya ngura nyara palulanguru Peternya altira ngalya-katintytjaku wangka!” Alatji angeltu Kuniliyatjala wangkangu.

⁷ Ka angelpa paluru wangkara ankunyangka Kuniliyatjalu wati mañkurpa altingu, kutju tjaultji palula tjungu warkaripai wati panya Godaku mulamularingkupai, munu wati walingka warkaripai kutjara kuļu. ⁸ Munu paluru tjananya altira wangkangu panya angeltu palula wangkanytja munu tjananya witura iyanu ngura Tjapalakutu. ⁹ Kaya ma-pitjala munga kutju ngururpa ngaringu ngura kutjupangka, munuya mungawinki pakara anu munuya ankula tjiṇtu katuringkunyangka ngura Tjapalakutu ngalya-ilaringu.

Ka tjana kuwaripatu ila pitjanyangka wati nyara Simonku walingka Peternya wali katu tatinu Godala tjapintjikitja. ¹⁰⁻¹¹ Munu paluru tjapira pulkara paltjatjiratjaringu mai kuwaripangku palyannyangka munu maiku patara paluru nyinara kuruntu nyangangi ilkari alaringkunyangka. Ka ilkaringuru ngalya-ukalingangi pulangkita puruny whole lipi pulkanya kuuna kutjara kutjaranguru witira kanyira palulakutu tjarunyangka. ¹² Ka mantara palula unngu kutjupa kutjupa tjuṭa wanka ngarangi mantangka para-ngarapai tjuṭa, panya tjinatjara tjuṭa, tjuninguru ankupai tjuṭa, tjułpu tjuṭa kuļukuļu, palu uwankara kuka wiya. ¹³ Ka ilkaringuru palula wangkangu, “Peter! Pakala mununku nyanganpa pungkula ngalkula!”

¹⁴ Ka Peterlu wangkangu, “Wiya Mayatja, nyanganpa kuka wiya! Panya Moselulanya painu nyanga palu puruny whole tjuṭa ngalkuwiyangku wantintytjaku. Panya nyanga palu purunypa naŋmanytju ngalkuntja wiyatua, kuka tjuṭa kutjuña ngalkupai.”*

¹⁵ Ka piruku ilkaringuru palula wangkangu, “Wiya, nyangatja kuka alatjiu Godalu palyanmankunytja, ka wantintyta wiyangku ngalkula paluru palyanmankunyangka.” ¹⁶ Munu nyanga palu puruny whole kutjara-ara wangkanytjatjanungku piruku kutju-aralta wangkangu. Ka palulanguru mantara panya kuka winki malakungku ma-katuňu ilkarikutu.

¹⁷ Ka Peterlu nyakunytjatjanungku nyinara kulinigi, “Nyaana panyatja nyangu? Godanya ngayulu nyaaringkunytjaku mukuringanyi?” Ka paluru nyinara puṭu kulinnyangka wati panya Jew wiya mañkurpa pitjala ursilta ngarangi Kuniliyatjalu iyantja mañkurpa, panya tjana Simonku ngurira nyangu munuya paṭara ngarangi. ¹⁸ Munuya ursilnguru tjapiningi, “Wati ini Simon Peternya nyangangka nyinanyi?”

¹⁹ Ka Peterlu panya wali katu kuwaripangkuña nyinara puṭu kulinigi, ka Kurunpa Milmiltu palula wangkangu, “Kulila! Wati Jew wiya mañkurtunta ngurini. ²⁰ Ka pakala munu ukalingkula tjananya wanganarangku

* ^{10:14} Leviticus 11

kulira wañala wantintytja wiyangku, panya ngayuluña tjananya iyanu nyuntulakutu.” ²¹ Ka Peterlu tjananya ukalingkula nyangu ngaranyangka munu wangkangu, “Uwa, ngayuluña wati panya paluru panya nyura ngayuku nguriningi. Palu nyaaku nyura wanyu pitjangu?”

²² Kaya palula wangkangu, “Wati ini Kuniliyatjalulanya witunu panya tjaultji tjutaku mayatjangku. Panya paluru wati palya Godanya wangañarangku kulipai munu palunya kutju walkulpai. Kaya Jew tjuta palumpa mukuringkupai. Palu Godaku angeltu palula wangkangu nyuntunya altintytjaku nyuntu palumpa ngurangka ankula Tjukurpa Palya wangkanytjaku.” ²³ Ka Peterlu tjana wangkanyangka kulira tjananya altira tjunu walingka, kaya munga kutju ngaringu.*

Munuya mungawinki Peternya tjana tjungu ma-pakanu Tjiitjariyalakutu, ka Jesuku walytja kutjupa tjuta kuļu palula tjungu anu ngura nyara Tjapalanguru. ²⁴ Munuya ngururpa ngarira mungawinkilta wirkanu Tjiitjariyala. Palu tjana kuwaripatu ila pitjanyangka Kuniliyatjalu palumpa walytja tjuta, malpa tjuta kuļu altingu palumpa ngurakutu pitjanytjaku, kaya pitjala wati panya palula tjunguringkula Peterku ala-alal nyinara pañaningi. ²⁵ Ka Peternya palumpa walingka wirkankunyangka Kuniliyatjanya ngaparikatira palula kuranyu tultjungarakatingu munu palunya walkuningi. ²⁶ Ka Peterlu miñara pakaltjingara wangkangu, “Wati ngana! Kulila! Ngayunya walkulwiyangku wantima, panya ngayuluña wati alatjitu nyuntunya purunypa.”

²⁷ Munu pula tjukutjuku ngarala wangkara palulanguru walingka tjarpangu, ka Peterlu nyangu anangu Jew wiya tjuta mulapa tjunguringkula pañara nyinanyangka wali unngu. ²⁸ Munu paluru tjanala wangkangu, “Nyura panya ninti Jew tjutaku, panya nganaña tjaka Jew wiya tjutangka tjunguringkupai wiya, panya nganañala Moseku aña kulipai tjuta. Palu Godalu ngayunya wangkangu anangu kutjupa tjutangka wiyanmankuwiyangku wantintytjaku. ²⁹ Kaña nyura altintytjaka wantintytja wiya wangañara pitjangu. Palu nyaakuñi nyura wanyu altingu?”

³⁰ Ka Kuniliyatjalu palula wangkangu, “Uwa, mungatu ngayulu ngurangka nyinangi kakarara-wiltja, mununa Godala tjapiningi, mununa nyangu wati mantara piranpatjara utiringkula ngaranyangka ngayula kuranyu. ³¹ Kañi ini wangkara alatji wangkangu, ‘Wati wiru! Godalu kuliningi nyuntu palula tjapinnyangka mununta nyangangi ngalututjara tjuta kuļu munytjangku ungkunyangka. ³² Ka nyuntu wati mankurpa witura iyala ngura Tjapalakutu, kaya ankula wati ini Simon Peternya ngurira altira ngalya-kati. Panya wati nyara paluru Simon kutjupaku walingka unytju nyinanyi urungka itingka. Simon nyara paluru panya kuka miringuru latja tjuta palyalpai. Kaya ngura nyara palulanguru Peternya altira ngalya-katintytjaku wangka!’ Alatjini wangkangu angeltu. ³³ Kaña mapalku witunu wati mankurpa nyuntunya altintytjaku, ka palan wiru alatjitu pitjangu. Godalu panya nyuntunya wangkara nintinu tjukurpa wiru palumpa nganañala wangkanytjaku, kala nyangatja Mayatja Godala mirangka nyinanyi nyuntu wangkanyangka kulintjikitja.”

Peterlu Kuniliyatjala Tjanala Tjukurpa Wangkanytja

* ^{10:23} Panya Godalu Peternya ilkaringuру mantarangka nintinu kutjupa kutjupa tjuta palya ngalkuntjaku, ka palulanguru paluru nintiringkunytjatjanungku palya kulinu Jew wiya tjutangka tjunguringkunytjikitjangku.

³⁴ Ka Peterlu wangkangu tjanala alatji, “Uwa, kuwariṇa nintiringu panya Godalu aŋangu uwankara tjungu lipula nyakupai, panya paluru ngayunya ngañmanyju nintinu ngayulu Jew wiya tjutangka palya tjunguringkunytjaku. Panya paluru nyuranya Jew wiya tjuta kutjupa nguwanpa nyakunyta wiya, palu purunypaṭu nyanganyi nganañanya purunypa, munu panya aŋangu uwankaraku palu purunypaṭu tjungu mukuringkupai Jew tjutaku munu Jew wiya tjutaku kuļu. ³⁵ Panya paluru pukularipai aŋangu tjutangku palunya ngurkantara walkunnyangka, Jew tjutangku munu Jew wiya tjutangku kuļu. Paluru uwankaraku pukularipai palunya wangañarangku kulira tjukaruru nyinanyangka nyakula. ³⁶ Panya Godalu Tjukurpa Palya nganañala utinu aŋangu Israelkunu tjutangka.* Ka tjukurpa paluru alatji ngaranyi panya Jesunya Christanya aŋangu uwankaraku ngalkilpa ilungu, panya paluru mayatja pulka uwankaraku nyinanyi, ka nyara palulanguru aŋangu uwankara wankaringkula Godala kalypa nyinanytjaku ngaranyi. Ka nyura ninti tjukurpa nyangaku.

³⁷⁻³⁸ “Munu nyura ninti panya wiru mulapa utiringangi ngura winkingka manta Judealawanu, panya ngañmanyju Johntu aŋangu tjutangka wangkangi kura palyantjatanu kunṭaringkula piruku palyantja wiyareringkunytjaku munu urungka baptise-arintjaku. Ka nyara palularaṭu panya Godalu ngurkantanu Jesunya Nazarethanya ngurara war̄ka palumpa palyantjaku munu palula Kurunpa Milmilnga tjarpatjunu ka paluru Kurunpa Milmilngatjarangku kutjupa pulka tjuta witulyangku palyaningi. Munu paluru uru panya Galileela itingka parangarala wiru tjuta palyaningi aŋangu tjutaku munu paluru pikatjara tjuta kuļu palyarunguningi mamu panya Satantu kurara kanyintja tjuta. Munu palu purunypaṭu manta Judealawanungku witulya pulkangku parpitjalira palyaningi ngura tjutangka, panya Godanya palula tjungu alatjitu nyinangi.

³⁹ “Ka nganaña panya nyangangi uwankara paluru manta Israelta palyantja ngura Jerusalemala tjanalawanungku munula kuliningi paluru tjukurpa wangkanyangka. Ka panyaya aŋangu palumpa mirpaṇtju tjutangku palunya puṇungka wakara uititjunu, ka ilungu. ⁴⁰ Palu tjintu kutjara ngarala wiyareringkunyangka Godalu palunya wankara pakaltjin-ganu, munu palunya aŋangu tjutangka utinu tjana palunya pakara wanka nyinanytja nyakunytjaku. ⁴¹ Aŋangu uwankarangku palunya nyakunytja wiyatū, palu nganaña Godalu panya ngurkantankunytja tjutangku kutju palunya nyangu, munula palula tjungungku ngalkula tjikiningi paluru ilunytjatanu pakannyangka małangka. ⁴² Kalanya Jesulu wangkangu alatji, ‘Tjukurpa Palya ngayunyatjaraya aŋangu tjutangka para-tjakultjunama, munuya tjanala wangkama panya mulapa ngayunya Godalu ngurkantara tjunu ngula aŋangu winki wanka tjuta munu miri tjuta kuļu kuranyu ngaratjunkula ngurkantara tjarantjaku.’ Alatji Jesulu nganañala wangkangu. ⁴³ Ka panyaya Godaku wangkatjara tjutangku ngañmanytju tjukurpa nyanga palunya wangkangi panya Jesunyatjara. Alatji panyaya wangkangi, ‘Aŋangungku kura palyannyangka Godalu palunya pungkunytjaku ngaranyi. Palu aŋangu paluru Godalu kalkuntjtijtjaku mulamularingkunyangka Godalu palunya pungkuwiyangku kaly-pangku wantiku.’” Alatji Peterlu tjanala wangkangi aŋangu panya Jew

* **10:36** Aŋangu Jew tjuta panya Israelkunu tjuta, panya watu ini Israelnga palumpa tjanampa tjamu ngañmanyitja iriti nyinangi.

wiya tjuṭangka.

⁴⁴ Ka tjana tjukurpa nyinara kulinnyangka Kurunpa Milmilnga tjanala uwankarangka unngu tjarpangu. ⁴⁵ Kaya tjarpanyangka nyakula wati panya Jew tjuṭa Peterla panya tjungu pitjanytja tjuṭa pulkaṛa kulira wangkangi, “Awari! Godalu Kurunpa Milmilnga tjanala kuļu tjarpatjelu Jew wiya tjuṭangka ngananala purunypa.” ⁴⁶⁻⁴⁷ Panya Kurunpa Milmilnga tjanala tjarpanyangka Kuniliyatjanya tjana wangka kutjuparira wangkangi Peterla tjanala miṛangka munuya Godanya mirawaṇira walkuningi.

Ka Peterlu wangkangu palumpa malpa tjuṭangka, “Kurunpa Milmilnga kuwari aŋangu nyanganta tjarpangu alatjiṭu, panya ngananala nganmanypa tjarpangu, palu purunypa. Ka wanyu nganalu nganananya pailku tjananya ṉungka tjarpatjura baptise-katinytjaku-tawara? Wiya alatjiṭu. Wanyula tjananya baptise-kati!” ⁴⁸ Munu Peterlu palumpa malpa tjuṭa wituṇu tjananya katira ṉungka baptise-katinytjaku. Kaya mulapaṭu tjananya ini Jesula Christala baptise-katingu. Kaya palula malangka Kuniliyatjalu tjana Peternya markunu tjanala nyinanytjaku piruku tjiṇtu maṇkurpa.

11

Peterlu Ara Tjakultjunkunytja Jerusalemania Ngurara Tjutangka

¹ Kaya wati panya Jesulu iyantja tjuṭangku kulinu Jew wiya tjuṭangku Godaku tjukurpa wangaṇarangku kulira palumpa mulamularingkunytja. Kaya Jesuku walytja kutjupa tjuṭangku kuļu palu purunypa kulinu ngura winkingka manta Judeala. ² Ka Peternya Jerusalemala malaku wirkankunyangka Jesuku walytja kutjupa tjuṭangku Jew panya tjuṭangku palumpa paṭara pika-pikaringkula ngalytjurmarā wangkangi alatji, ³ “Kulila! Moseku ara panya ngaranyi nganana Jew wiya tjuṭangka tjunguringkunytja wiyangku wantinytjaku. Ka nyuntu kura Jew wiya tjuṭaku wa lingka tjarpangu munun tjanala tjunguringkula mai ngalkula tjikiningi.”

⁴ Ka Peterlu uwankara tjanala tjakultjenu panya paluru Jew wiya tjuṭangka tjunguringkunytja. Alatji paluru wangkangu, ⁵ “Ngayulu tawunu panya Tjapala nyinangi walı kutjupangka mununa walı katu tatira Godala nyinara tjinapiningi mununa ngalya alaringkula nyangu ilkari alaringkunyangka. Ka ilkaringuru mantara pulangkita purunypa lipi pulkanya kuuna kutjara kutjaranguru witira kanyira ngayulakutu walatjunnangi. ⁶ Kaṇa nyangu mantarangka ngarinyangka ini kutjupa kutjupa tjuṭa inura tjuṭa munu liru, tinka, tjulpu tjuṭa kuļukulu. ⁷ Kaṇi ilkaringuru wangkangu, ‘Peter! Pakala mununku kuka nyanganpa pungkula ngalkula!’ ⁸ Kaṇa wangkangu, ‘Wiya Mayatja! Moselu panyalanya painu nyanga palu purunypa tjuṭa ngalkuwiyangku wantinytjaku. Kaṇa ngurpa nyanga palu purunypa nganmanytju ngalkuntja wiya alatjiṭu.’ ⁹ Ka piruku ilkaringuru ngayula wangkangu, ‘Wiya nyangatja kuka wirunya Godalu palyamankunytja, ka wantinytja wiyangku ngalkula paluru wangkanyangka.’ ¹⁰ Munu nyanga palu purunypa kutjara-ara wangkanytjatjanungku piruku kutju-ara wangkangu, ngayulu Jew wiya tjuṭangka tjunguringkunytjik-itjangku palya kulintjaku. Ka palulanguru mantara panya kuka winki malakungku ma-katuṇu ilkarikutu.

¹¹ “Ka nyara palula ařangka wati Jew wiya maṇkurpa pitjala ngarangi urilta walı nyara ngayulu nyinanytjala, panya wati nyara palunya tjananya

ngura Tjiitjariyalanguru ngayulakutu iyanu. ¹² Kañi Kurunpa Milmiltu wangkangu, ‘Palula tjanala tjunguringkula ara wantintyta wiyangku!’ Kaña mulapañu tjanala tjunguringkula anu. Kaya Tjapalanguru Jesuku walytja kutjupa tjuta kuļu ngayula tjunguringkula anu wati nyanga mañkur-mañkurpa. Munula wirkana ngura panya palula munula wati ini Kuniliyatjaku walingka tjarpangu. ¹³ Ka wati paluru ngananala tjakultjunu angelpa palula utiringkunytja palumpa walingka unngu. Ka kunyu angeltu palula wangkangu alatji, ‘Wati mañkurpa witura iyala Tjapalakutu Simon Peternya altira ngalya-katinytjaku. ¹⁴ Ka paluru pitjala tjukurpa nyurala wangka. Ka nyura tjukurpa nyara palumpa mulamularingkunyangka Godalu nyuranya wankarunkuku nyurampa walytjapiti kuļukulu.’ Alatji kunyu angeltu wati panya Kuniliyatjala wangkangu.

¹⁵ “Ka panya ngayulu Kuniliyatjala tjanala tjukurpa wangkangi, ka wangkanyangka Kurunpa Milmilnga tjanala tjarpangu, panya ngananala ngañmanypa tjarpangu, palu purunypañu tjanala unngu tjarpangu.

¹⁶ Kaña kulinu panya Mayatja Jesulu wangkanytjtja panya alatji wangkangu, ‘Johntu aŋangu tjuta uringka baptise-katingu, palu Godalu nyuranya baptise-katiku Kurunpa Milmilnga nyurala unngu tjarpatjura.’ Alatji panya Jesulu wangkangu. ¹⁷ Uwa, Godalu Kurunpa Milmilnga ngananala tjarpatjunu ngananña Jesuku Christaku mulamularingkunyangka, munu palu purunypañu Jew wiya tjutangka kuļu tjarpatjunu. Kaña nyakula kulinu, ‘Yaaltji-yaaltjingkuna Godanya markulkku tjanala tjarpatjunkuwiyangku wantintyjaku, panya paluru Godanya alatjitu aŋangungku markuntjaku wiya.’” Alatji Peterlu tjanala wangkara tjakultjunu Jew panya tjutangka.

¹⁸ Kaya tjukurpa nyanga palunya wangkanyangka kulira pilunaringu Peterla piřuku ngalytjurmarä wangkanytja wiya. Munuya wangkangu, “Munta-uwa! Godanya palumpa tjanampa kuļu mukuringanyi Jew wiya tjutaku tjana kuļu kura wantira palula tjunguringkula wanka tiṭutjara nyinanytjaku.” Munuya palulangurulta pukularira Godanya walkura pulkara mirawañingi.

Jesuku Walytja Tjutaringkunytja Ngura Antiyakala

¹⁹ Ka panya Stephennga atura iluntankunyangka małangkaya Jesuku walytja tjuta Jerusalemalanguru ngulu ankula wiyaringu ngura kutjupa kutjupa tjutakutu, panya nyara palunya tjananya kuļuya kurantjikitja mukuringangi Jesuku mirpantju tjutangku. Kaya kutjupa tjuta alintjara anu manta ini Panitjiyalakutu, munu munikara kuļu tawunu ini Antiyakalakutu, kaya kutjupatjara pautangka tatira uringka anu manta tjukutjuku ini Tjaipuritjalakutu. Munuya ngura nyara palula tjanala Jew tjutangka kutju Tjukurpa Palya Jesunyatjara tjakultjunangi. ²⁰ Kaya Jesuku walytja kutjupatjara anu manta Tjaipuritjalanguru munu ngura ini Tjaariniñanguru tawunu panya Antiyakalakutu, munuya Tjukurpa Palya Mayatja Jesunyatjara wangkangi Jew wiya tjutangka kuļu. ²¹ Ka Godalu tjananya pulkara witulyanu tjana kutjupa kutjupa pulka tjuta palyantjaku munu rapangku wangkanytjaku, kaya aŋangu tjuta mulatu tjananya nyakula kulira Mayatja Jesuku mulamularingu munuya palumpa walytjaringu.

²² Kaya Jesuku walytja tjutangku Jerusalemala nyinanytjatjanungku kulinu Antiyakala nyinanytja tjuta Jesuku walytjaringkunytja, munuya wati panya Paanapatjanya witura iyanu ankula tjananya wangkara kuṇpuntjaku. ²³ Ka ankula wirkara nyangu Godalu tjananya

pukultjungku wirura kanyinnyangka. Munu paluru pukularira tjananya rapaningi wangkara, "Godanyaya wantintja wiyangku kurunpa winkingku titutjarangku wañanma." ²⁴ Uwa, Paanapatjanya wati palya mulapa Godaku pulkara mulamularingkupai, munu paluru Kurunpa Milmiltu nintinnyangka wanganarangku kulira palyalpai. Ka pala palulanguru anangu tjuta mulapa Jesuku mulamularingkula palumpa walytjaringu.

²⁵ Ka palulanguru Paanapatjanya anu ngura ini Taatjatjaku wati panya Saulanya ngurintjikitja. ²⁶ Munu ma-wirkara ngurira nyangu munu palunya altira malakungku katingu ngura panya Antiyakaku. Munu pula ngura nyara palula rawa nyinangi kuli kutjara munu pula Jesuku walytja tjutangka Godaku tjukurpa nintiningi titutjarangku, kaya tjuta mulapa nintiringangi. Ka panya ngura nyara Antiyakalaya anangu tjutangku Jesuku mulamularingkupai tjuta ininu *Jesuku walytja tjuta*.

²⁷ Ka nyara palula ara wati Godaku wangkatjara mankurpa Jerusalemalanguru pitjangu ngura Antiyakaku munuya Jesuku walytja tjutangka tjunguringu. ²⁸ Ka wangkatjara kutju ini Aka-patjalu tjanala ngururpa pakara ngarala wangkangu Kurunpa Milmiltu nintinnyangka. Alatji paluru wangkangu, "Kulilaya! Panya ailuru manta winkingka ngaraku, ka mai pulka ngaranytja wiyingkuku anangu tjutangku ngalkula pałtjaringkunytjaku." (Ka mulapatu ngula ailuru pulka ngarangu wati Rome-anyangka ini Kulutiyatjanya ngura winkiku mayatja pulka nyinanytja arangka.) ²⁹ Kaya ngura nyara Antiyakala Jesuku walytja tjutangku kulintjatjanungku wangkangu mani pulka nguwanpa ungkunytjikitjangku Jesuku walytja tjuta nyara Judeala nyinanytja tjuta. Munuya kutjungku kutjungku mani tjarara tjunangi tjananya ungkunytjikitjangku. ³⁰ Munuya Paanapatjanya pulanya Saulanya unkul'iyau, ka pula Jerusalemalakutu katira ungu wati panya Jesuku walytjapiti atunyankupai tjuta.

12

Iratalu Jamesanya Iluntara Peternya Tjailangka Tjarpatjunkunytja

¹ Ka nyara palula ara ngura Jerusalemala mayatja Iratalu Jamesanya Jesuku walytja tjutaku pulkara kuraringangi munu palumpa tjaultji tjuta witunu tjananya ngurira witira tjailangka tjarpatjunkunytjaku, panya paluru tjananya tjituru-tjituru pulka palyantjikitja mukuringangi. Kaya mulapatu Jesuku walytja kutjupatjara witira tjailangka tjarpatjunu. ² Munu paluru Johnku kuña Jamesanya iluntankunytjaku wangkangu tjaultji tjuta, kaya palunya witira tjula wañangka wakara iluntanu. ³ Kaya Jew panya kutjupa tjuta Jamesanya iluntankunyangka nyakula pukularingu. Ka Iratalu pukularinyangka kulira tjananya piruku pukulmankunytjikitjangku kulinu munu Peternya kuña witintjaku wangkangu. Kaya tjaultji panya tjutangku palunya kuña ankula witiñu. Nyara palula ara panya Jew tjutangku mai pilytja ngalkuningi tjanampa ara panya *Katuwanu Ankunytjanya* kulintjikitjangku, kaya nyara palula-aralta Peternya witiñu tjaultji panya tjutangku. ⁴ Ka Iratalu tjananya wangkangu tjailangka wañinytjaku ruuma unngutja mulata munu paluru tjaultji tjutangka 16-ta wangkangu palunya ngapartji-ngapartjingku anga-kanyintjaku. Kaya tjana kutjara kutjarangku kanyiningi ngapartji-ngapartjingku mungangka kalala. Panya Iratalu alatji kulinigi, "Kana inma nyanga 'Katuwanu Ankunytjanya' wiyingkunyangka palunya kuutpangka ngaratjunkuku anangu tjutangka

mirangka palunya wangkara kuranmankunytjaku.” ⁵ Kaya tjaultji panya tjutangku Peternya tjaila unngu anga-kanyiningi kuutku patara. Kaya Peternya tjaila unngu nyinanyangka Jesuku walytja tjutangku Godala pulkara rawangku tjapiningi palunya walatjunkunytjaku.

Angeltu Peternya Tjailanguru Walatjunkunytja

⁶ Ka munga pala palula inma panya *Katuwanu Ankunytjanya* wi-yaringkunyangka Iratalu kulinungi alatji, “Kuwarina mungawinki pakara wati panya palunya kuutpangka ngaratjunkuku.” Ka Peternya panya munga pala palula tjaila unngu ngaringi tjaultji kutjarangka ngururpa, panya tjaultji nyara paluru pula Peterku miña kutjara tjungura palumpa pulampa miñangka tjiinangka karpira ngaringi, ka tjaultji kutjara kutjupa tuwangka anga-ngarangi. ⁷ Ka angelpa Mayatja Godalu iyannyangka tjaila unngu utiringu Peterla itingka, ka tili pulkangku irnyanu. Ka angeltu Peternya kunkunpa ngarinyangka kultu pampura wankanu munu wangkangu, “Wała pulka pakala!” Ka tjiina panya miñanguru walytja araltjaringu. ⁸ Ka angeltu wangkangu palula, “Mantarangka tjarpa tjinatjangka kułu!”

Ka paluru pakara mantarangka tjarpara tjinatjangka kułu tjarpangu. Ka piruku wangkangu, “Upukutangka pala tjarpa munuṇi ngayunya waṇala!”

⁹ Ka Peterlu angelpa panya palunya waṇanu, palu paluru puṭu kuliningi, “Mulapanā nyangatja tjailanguru ma-pakanı? Tjukur-tjukurtu-mantiñatju waṇanı.” ¹⁰ Munu pula tjaultji panya tuwangka anga-ngarapai kutjarangka ma-waintaringu, munu piruku tjaultji kutjupa tjuṭa ngururpa anga-ngaranyangka ma-wantikatingu, munu pula kaita panya urilitjakutulta ngalya-wirkanu. Ka kaita panya paluru walytja alatjitu alaringu, ka pula tjailanguru ma-pakanu iwarakutu, munu pula iwarangka tjukutjuku ma-pitjala, ka angelpa panya palulanguru arkayiringu.

¹¹ Ka Peterlu kulinu, “Ai! Mulapanitju nyangatja angeltu ngayunya pakaltjinganu Mayatja Godalu witura iyannyangka? Mulapa Godalu ngayunya wankanu Iratalu tjana Jewku mayatja tjutangku kułu ngayunya iluntankunytjaku-tawara.”

¹² Munu alatji kulintjatjanu paluru ankula Mary-ku walingka wirkanu. Minyma nyanga paluru panya wati ini John Markaku ngunytju, panya wali nyara palulaya Jesuku walytja tjuṭa ngamanypa tjunguringkula nyinangi munuya Godala tjapiningi Peterku.

¹³ Ka Peterlu urilta ngarala tuwa urilitja punga-pungangi, ka kungkawara warkaripai ini Ruutanya kulira ngalya-pakanu tuwa alantjikitja. ¹⁴ Munu Peterku wangka ngurkantanu urilta ngarala wangkanyangka munu pulkara alatjitu pukularingu. Munu tuwa alantja wiyatū malaku wirtjapakara pukultu wangkangu anangu panya tjutangka, “Kulilaya! Nyaratja Peternya urilta ngaranyi.”

¹⁵ Kaya wangkangu, “Wiya, nguntin wangkanyi.”

Ka paluru tungunpungkula alatjitu wangkangi, “Wiya, mulapanā wangkanyi. Nyara urilta ngaranyi.”

Kaya wangkangu, “Wiya, tjinguru palumpa angelpa pitjala ngaranyi.”

¹⁶ Ka Peterlu rawangku ngarala tuwa punga-pungangi, kaya pitjala tuwa alanu munuya palunya nyakula puṭu kuliningi, “Awari! Yaaltji-yaaltji nyangatja tjailanguru pakanu?” ¹⁷ Ka tjananya marangku paira pilunmanu munu tjanala tjakultjunu Godalu palunya tjailanguru pakaltjingga katinytja. Munu wangkara wiyingkula wangkangu, “Ankulaya

tjukurpa nyanga palunya Jamesala tjanala tjakultjura!" Munu Peternya nyara palulanguru tu anu tjananya wantikatira ngura kutjupakutu.

¹⁸ Kaya nyara tjailangka tjaultji panya tjutangku mungawinki pakara pu tu nyakula kawa ru-kawa ruringu, munuya pu tu kuliningi, "Wati panyatja nyanganguru yaaltjiringu?"

¹⁹ Ka Iratalu tjanala wangkangu, "Wati panya palunyaya ngurira piruku mantjila!" Palu putuya nguriningi. Ka paluru piruku tjaultji panya tjailangka ngarala atunymankupai tju ta al tira tjapiningi, palu pu tu yaya kuliningi. Ka pu tu tjapira tjananya iluntankunytjaku wangkangu. Ka Iratanya manta Judealanguru anu munu ankula ngura Tjiitjar iyal a nyinangi.

Iratanya Ilunyta

²⁰ Ka Mayatja Iratanya panya mirpañaringi a nangu nyara ngura Tayala nyinanyta tjutaku munu Tjitanta nyinanyta tjutaku ku lu. Palu panya a nangu Tayala pulala Tjitanta nyinanyta tjutangku tjanampa mai Irataku mantanguru payamilalpai. Munuya palulanguru Iratalu tjananya mai ungkuwi yangku wantinytjaku-tawara palulakutu anu palunya wangkara kalypantjikitja. Palu panya nganmanytjuya wangkangu wati ini Pulatjala, panya wati nyanga paluru Irataku wali atunymankupai. Munuya palunya tjapinu tjananya alpamila ra Iratanya tjanampa kalypantjaku. Ka wati panya paluru tjanala kulinu munu mitingi palyanu tjintu kutjupangka tjana Iratala tjunguringkula kalypangku wangkanytjaku.

²¹ Ka tjintu panya paluru wirkankunyangka Iratanya mantara wiru mulata tjarpangu panya mayatja pulkangku kanyilpaingka, munu mayatjaku panya tjiya wirungka nyinakatingu munu a nangu tjutangka tjukurpa wangkangi. ²² Kaya palula kuliningi munuya palulanguru mirara walkuningi wangkara, "Wiya, nyuntu wati purunypa wiya, ilkaritja purunypa wangkanyi, Godanya purunypa alatjitu."

²³ Ka mapalku Godaku angeltu Iratanya pikatjara nu, ka tjuningka unngu kuyi tjutangku patjara patjara iluntanu. Ka paluru ilura wi yaringu alatjitu, panya paluru a nangu tjutaku puku laringu palunya walkunnyangka munu kanany-kananytju tjananya paintja wi yangku wantingi. Uti paluru tjananya painma Godanya kutju mirawa ninytjaku, munu palunya walkuntja wi yangku wantinytjaku. Nyara palulanguru paluru ilungu.

²⁴ Palu Godaku tjukurpa ngura winkingka lipiringangi, kaya a nangu winki mulapa kulira mulamularingangi.

²⁵ Ka Paanapatjalu pula Saulalu mani panya Jesuku waltyta tjutangku Antiyakalanguru unkul'iyantjanya Jerusalemalakutu katingu munu pula ungu a nangu panya Jesuku waltyta tjuta. Munu palulanguru ungkunytjatjanu paluru pula malaku anu Antiyakalakutu munu pula wati ini Johnnga ini kutjupa Markanya al tingu palula pulala tjungu ankunytjaku.

13

Paanapatjanya Pulanya Saulanya Ngurkantara Iyantja

¹ Ka ngura nyara Antiyakala Jesuku waltyta tjutangka tjungu wangkatar jara ma nkurpa munu nintlpai man kurpa ku lu nyinangi ini nyanganpa wati panya Paanapatjanya, munu Tjimiannga ini kutjupa Marunya, munu wati ini Lutjiyanya ngura Tjaarininya ngurara, munu wati kutjupa ini Manayinnga mayatja panya Irataku ngalungku, munu wati

panya Saulanyalta. ² Wati nyanga paluru tjanaya tjunguringkula Godanya walkura tjapiningi mai wantira, ka Kurunpa Milmiltu tjanala wangkangu, “Ngayulu Paanapatjanya pulanya Saulanya ngurkantanu ngayuku warkarintjaku, ka nyura nyanga palunya pulanya tjura warika nyanga palunya palyantjaku.”

³ Kaya palulanguru kuwaripangku nyinara Godala tjapiningi mai wantira, munuya tjapira wiyaringkula pulala katangka mara tjunkula pulampa ngapartji tjapinu munu pulanya rapara iyanu ankula warika panya palunya palyantjaku.

Paulanya Pula Manta Ini Tjaipuritjala Nyinanytja

⁴ Ka Kurunpa Milmiltu witunyangka Paanapatjanya pula Saulanya anu ngura ini Tjalutjiyalakutu, panya pauta tjuta pitjala ngarapai ngura nyara palula uru puulkangka kantilytja. Ka pula ngura nyara palulan-gurulta pautangka tatira ma-pakanu urungka munu pula ankula manta tjukutjukungka wirkanu manta ini Tjaipuritjala. ⁵ Munu pula tawunu ngura ini Tjalamitjala wirkara pautanguru ukalingkula nyinangi munuya ngura nyara palula Jew tjutaku walı inmatja tjutangka tjarpara Godaku tjukurpa wangkangi anangu tjutangka. Ka wati panya John Markanya pulala tjungutu pitjalinangi pulanya alpamilantjikitja.

⁶⁻⁸ Munuya wangkara wiyaringkula ngura panya palunya wantikatira ngururwanu ma-pitjala uru kantilypa kampa kutjupa ma-wirkanu ngura ini Paipatjala. Ka ngura nyara palula wati Jew ini Paatjitjanya nyinangi. Wati nyanga palunyaya anangu Kuriki wangkapai tjutangku ini kutjupa wangkapai Ilimatjanya, panya ini nyanga paluru wangkanyi, *ngangkari*. Wati paluru kutjupa kutjupa ayinayimirira palyalpai ngangkari purunytju, mununku ngunti walytjangku Godaku wangkatjaranmanangi. Wati nyanga paluru manta Tjaipuritjaku mayatja puulkaku malpa nyinangi. Mayatja paluru panya wati nintipuka ini Tjutjiya Puulatjanya munu paluru Godaku tjukurpa tjukarurungku wangkanyangka kulintjikitja mukuringkula Saulanya pulanya altingu. Palu wati panya Paatjitjalu pulanya rawangku angatjunangi palumpa panya malpangku Godaku tjukurpa kulira mulamularingkunytjaku-tawara.

⁹ Ka Saulalu, ini kutjupa Paulalu, Kurunpa Milmiltu witulyankunyangka wati panya palunya tjukarurungku kuru nyakula wangkangu, ¹⁰ “Nyuntun mamuku walytjangku tjukurpa kuranı! Nyuntun anangu tjukaruru tjutaku mirpañtu munun anangu tjutangka Godaku tjukurpa kampa kutjupara kurara wangkapai tjukurpa palya-palku. Yaalaran kampa kutjupariku munun wantiku Godaku tjukurpa kuralwiyangku? ¹¹ Nyuntu rawa alatjirinyangkanta nyuntunya ngapartji Godalu kuvari mirpañarira kuru patini, kan puñu alatjiu nyakuku munun ngula kutju alaringkula nyakuku.”

Ka mulapañu wati panya paluru kuru patiringu munu paluru puñu parapampuningi kutjupangku palunya miñara katintjaku. ¹² Ka mayatja panyangku wati panya palumpa malpa kuru patiringkunyangka nyakula Godaku puulkara mulamularingu. Panya paluru tjukurpa Godaku nintin-nyangka kulintjatjanungku kulinu, “Awari! Tjukurpa wiruñatju kuvari kutju kulinu.”

Paulalu Tjana Tjukurpa Wangkanytja Ngura Antiyaka Kutjupangka Manta Ini Pitjitiyala.

¹³ Munuya palulanguru Paulanya tjana pautangka tatira urungka ma-pakanu ngura Paipatjanya wantikatira, munuya ankula ngura ini Puukala

wirkanu manta pulkangka ini Pampiliyala. Ka nyara palula John Markalu tjananya wantikatira małaku anu Jerusalemalakutu. ¹⁴ Ka Paulanya pula ngura Puukalanguru tjina anu munu pula ankula ngura Antiyaka kutjupangka wirkanu manta panya Pitjitiyala ngururpa. Munu pula Saturday-ngka tjintu panya pakuwiyaringkupaingka aŋangu tjutangka tjunguringkula wali inmatjangka tjarpara nyinangi. ¹⁵ Ka kutjupangku nyiringuru nyakula wangkangi tjukurpa panya Moseku munu wangkatjara tjutaku ara kulu. Ka nyakula wangkara wiyaringkunyangka wali inmat-jaku mayatja tjutangku wati kutju witunu Paulala pulala tjapintjaku, ka ankula wangkangu, "Walytja wiru kutjara! Tjinguru nyupali tjukurpa wiru kanyini nganañanya wangkara kuŋpuntjikitjangku. Ka nyangatja kuwari nyupali wangkanytjaku ngaranyi."

¹⁶ Ka Paulalu pakara marangku tjananya pilunmanu munu wangkangu alatji, "Uwa, aŋangu Israelkunu tjuta munu Jew wiya tjuta kulu, nyura uwankarangku Godanya walkulpai. Wanyuniya kulila kaña nyurala wangkaku! ¹⁷ Godalu panya Israelkunu tjuta kanyilpaingku nganampa panya tjamupiti iriti ngurkantanu munu tjananya pukułmanu walytjapiti tjutatjararingkunytjaku ngura panya malikitjangka nyinanyangka manta Ittipala. Munu panya tjananya ngura nyara palulanguru pakaltjingara katingu witulya pulkangku. ¹⁸ Munu paluru tjananya rawangkuṭu katirinangi ilytjingka kuli 40. ¹⁹ Munu tjananya witulyanangi anangu ngura 7-itja pungkula wiyanjtjaku manta panya Kainanta nyinanytja tjuta. Munu tjanampa manta palumpa walytja tjuta ungu nguraritjaringkula nyinanytjaku. ²⁰ Kaya pala palula rawa nyinangi kuli 450.

"Ka Godalu palumpa wangkatjara tjuta ngurkantara tjunkukatingi wanapari wanapari tjananya rawangku wirura atunymara kanyintjaku Israelkunu tjuta. Munu ngula mulapa paluru piruku wangkatjara kutjupa ngurkantara tjunu wati panya Samuelnga. ²¹ Kaya nyara palula ara aŋangu tjutangku tjapiningi Godala tjanampa mayatja mulapa ngurkantara tjunkunytjaku, ka Godalu mulapaṭu ngurkantanu wati panya ini Saulanya tjanampa mayatja pulka nyinanytjaku. Wati panya paluru tjamu Pintjimantanguru palumpa pakali malatja mulapa wati ini Kiitjaku katja. Munu wati panya Saulanya Israelkunu tjutaku mayatjarira nyinangi kuli 40. ²² Ka nyara palula malangka Godalu palunya mayatja wiyanu munu Davidanya ngapartji ngurkantara tjunu Israelkunu tjutaku mayatja nyinanytjaku. Nyanga alatji Godalu wangkangu, 'Ngayuluña Davidanya ngurkantanu wati ini Tjiitjiku katja, panya nyara palumpa pulkara pukularinyi. Nyara paluru ngayuku warķa wangañarangku kulira palyalku.'

²³ "Munu Godalu ngañmanytju kalkuntjatjanungku Davidaku walytjapiti malatjanguru Jesunyalta iyanu aŋangu Israelkunu tjuta wankarunkunytjaku. ²⁴ Ka panya Jesunya pitjanytja kuwaripangka Johntu palunyatjara tjanala tjakultjunangi aŋangu panya Israelkunu tjutangka paluru tjana kulira kuranguru kunṭaringkula Godalakutu aruringkunytjaku munu urungka baptise-arinytjaku. ²⁵ Munu paluru Godaku warķa palyara wiyanjtjikitjangku wangkangu alatji, 'Tjinguru nyura ngayunya kulini wati panya Godalu kalkuntjanya-palku. Palu wiya, wati nyara paluru ngayula małangka pitjanyi. Nyara paluru mayatja pulka mulapa nyinaku ngayula waintara alatjitu, kaña palula mirangka ngarala pulkara kunṭaringanyi.' " Alatji Johntu wangkara palurunku tjukutjukunmanangi munu Jesunya pulkanmanangi.

26 “Walytja wiru tjuta! Kulilaniya Aipuramaku walytjapiti malatja malatjangku! Mununiya Jew wiya tjutangku ku lu kulila nyura Godanya walkulpai nyinara! Panya Godalu tjukurpa wankarunkupainya ngananaala utinu nyuntu nganana kulira wankaringkunytjaku. **27** Ka panya Jew tjuta nyara Jerusalemala nyinapai tjutangku munu tjanampa mayatja tjutangku ku lu Jesunya ngurkantankuwiyangku wantingi nganampa panya wankarunkupainya Godalu kalkuntjtja. Munuya paluru tjana tjukurpa panya wangkatjara tjutangku iriti walkatjunkunytja putu kulira nintiringangi. Panya tjukurpa nyara palunya tjananyaya rawangku nyakula wangkapai inmangka tjunguringkula Saturday kutjupa Saturday kutjupa. Palu tjana tjukurpa palumpa mulamularingkuwiyangku wantira Jesunya pulkara anara kuranmanangi, panya alatjirinytjakuya wangkatjara tjutangku iriti nyiringka walkatjunu. **28-29** Ka panya nyiringka nganmanytju walkatjunkunytja uwankara alatjitu utiringangi. Panya palunya kura putu ngurkantara wantintytja wiyangku Pilate-alakutu katira ngunti wangkara wituwitunu palunya iluntankunytjaku, kaya mulapatu punungka wakara utitjunu. Ka panyaya paluru ilunyangka pununguru mantjira katira kulpingka tjunu. **30** Palu Godalu palunya wankara pakaltjinganu. **31** Ka nyara palula malangka anangu panya Jesula tjungu para-ngarapai tjutangku Jesunya nyangangi tjuta-ara tjanala utiringkunyangka. Anangu nyara paluru tjana panya nganmanypa Galileelanguru Jerusalemaku Jesula tjungu anangi. Munuya paluru tjana kuwari tjukurpa palunyatjara tjakultjunanyi anangu Israelkunu tjutangka.

32-33 “Ka ngali pitjangu nyurala Tjukurpa Palya tjakultjunkunytjikitja panya Godalu iriti nganampa tjamu tjutangka wangkara kalkuntja. Ka panya Godalu iriti kalkuntjatjanungku ngananaalalta utinu tjitji malatja tjutangkalta, munu panya Jesunya ilunyangka wankara pakaltjinganu. Panya iriti nyiringka walkatjunkunytja ngaranyi Psalm 2-nga nyanga alatji,

‘Nyuntun ngayuku katja,

kanā nyanganguru nyuntunya titutjarangku katjanmankuku.’ *

34 “Godalu alatjitu panya Jesunya ilunyangka wankara pakaltjinganu, ka paluru putu ananyi malaku kulpingku piruku ngarira mantaringkunytjikitja. Panya Godalu katjangka wangkanytja alatji ngaranyi,

‘Panya ngayulu Mayatja Davidala nganmanytju wangkara kalkunu palumpakununguru wanka titutjara nyinanytjaku.

Kana kuwari kalkuntjatjanungku nyuntunya palyani wiru mulapa titutjara nyinanytjaku.’ *

35 “Palu nyiri kutjupangka Davidalu Godala wangkanytja ngaranyi nyanga alatji,

‘Nyuntunku palunya wantintytja wiyangku pakaltjingalku rawa ngarira piltiringkunytjaku-tawara.’ *

36 Panya Davidalu Godaku warka palyara wiyanjtjanu ilungu, kaya katira palumpa mamaku kulpingka tjunu, ka ngarira piltiringkula mantaringku.

37 Palu wati panya Godalu wankara pakaltjingantjanya piltiringkunytja wiyatju.

38-39 “Walytja tjuta! Tjukurpa nyanga palunyaya pulkara kulinma! Panya Jesunya nyura kurantjijanguru ngalkilpa ilungu, ka pala palulanguru Godalu nyuranya pungkuwiyangku kalypangku wantinyi nyura

* 13:32-33 Psalm 2:7 * 13:34 Aitjayaku 55:3 * 13:35 Psalm 16:10

Jesuku mulamularingkunya. Panya nyura Moseku tjukurwanu nyinanyangka Godalu nyuranya puṭu tjukarurunmankula walytjanmananyi. Palu nyura Jesuku mulamularingkunya kutju Godalu alatji palyanı.

⁴⁰ Wanyuya kulila, panya Godaku wangkatjara tjutangku nyiringka iriti walkatjunu Godalu Israelkunu tjutangka wangkanytja alatji,

⁴¹ ‘Nyura tjukarurungku wangkanyangka ngayunya anara kurara pungkupai.

Kaṇa kuwari kutjupa kutjupa kura pulka mulapa nyurampa palyalku.

Tjinguru nyurala kutjupangku kura nyanga pulka nganmanytju wangkara tjakultjunkunyangkampa nyura kulira wantima.

Palulanguruwa wangaṇarangku kulinma ilunytjaku-tawara.’ *

Alatji Godalu iriti wangkangu. Ka nyura tjukurpa nyanga palunya pulkara kulinma Godalu nyuranya palu purunyamankunytjaku-tawara.” Alatji Paulalu tjananya wangkangi.

⁴² Munu palulanguru wangkara wiyingkula Paulanya pula Paanapat-janya walı inmatjanguru pakantjikitja tuwakutu ma-pitjangi, kaya anangu tjutangku pulanya wangkangi ngula piruku pitjala tjanala tjukurpa tjakultjunkunytjaku tjintu Saturday kutjupangka. ⁴³ Ka inma wiyingkunyangka anangu tjuta pakaṇu munuya tjarangku pulanya waṇau anangu Jew tjutangku munu Jew wiya tjutangku kulu, panya Jew wiya tjuta nganmanyapa kampa kutjuparingu munuya Jew tjuta purunytju Godanya walkulpai nyinangi. Ka Paulalu pula Paanapatjalu tjanala tjukurpa rawangku wangkangi munu tjanala alatji wangkangi, “Panya Godalu nganananya pukultju pulkangku kanyini, kaya watarkurintja wiyangku rawangku kulinma.”

⁴⁴ Ka ngula Saturday kutjupangka tjintu panya pakuwiyaringku-paingka anangu winki mulapa ngura nyara palunya ngurara tjuta tjunguringu Tjukurpa Palya Mayatja Jesunyatjara kulintjikitja. ⁴⁵ Kaya wati Jew kuranyitja tjutangku nyangu anangu mungilyi mulapa kaputurira ngaranyangka, munuya nyakula nyararingangi munuya Paulalu wangkanyangka anara palunya kuranmanangi. ⁴⁶ Palu pula kurunpa rapangku alatji tjanala wangkangi Jew panya kuranyitja tjutangka. Alatji pula wangkangi, “Panya Godalu ngalinya wituṇu palumpa tjukurpa Jesunyatjara nyurala-warara wangkanytjaku. Palu nyura tjukurpa nyanga palunya kulira wantingu rawa wanka nyinanytjikitja mukuringkunytja wiyangku. Ka ngali nyura wantinyangka Jew wiya tjutakutu ankuku tjukurpa nyanga palunyatu tjanala wangkanytjikitja. ⁴⁷ Ngali kulini Godalu panya wangkanytja alatji,

‘Ngayulu nyuntunya tili purunyapa iyanı Jew wiya tjutakutu,
panya tilingku irnyara kalalankupai, palu purunytju nyuntu tjanala
Tjukurpa Palya wangkaku,
kaya kulira mulamularingkula wankaringkuku, anangu nyanga
manta winkitja.’ ” *

⁴⁸ Kaya Jew wiya tjutangku Paulalu alatji wangkanyangka kulira pukularingu munuya mirawaṇira wangkangi, “Mayatja God! Nyuntumpa tjukurpa Jesunyatjara wiru mulapa ngaranyi. Kala nyuntunya pulkara alatji mirawaṇira wal Kunı.” Kaya anangu panya Godalu ngurkantankunytja tjuta Jesuku mulamularingu, panya tjananya ngurkantanu palula tjungu wanka tiṭutjara nyinanytjaku. ⁴⁹ Ka tjukurpa Jesunyatjara lipiringu ngura winkingka manta nyara palula.

* 13:41 Apakukaku 1:5 * 13:47 Aitjayaku 49:6

⁵⁰ Palu ngura nyara Antiyaka kutjupangkaya Jew kuranyitja tjutangku Paulaku pulampa Paanapatjaku kuraringkula mayatja ngura nyara palunya ngurara tjuta wituwituningi, minyma kuranyitja tjuta kulu, tjanala tjunguringkula Paulanya pulanya pikaringkula paira iyantjaku. (Minyma nyara paluru tjanaya Jew wiya tjuta munuya Jew tjuta purunypa Godanya walkulpai nyinangi.) Kaya mulapatu pulampa kuraringkula pulanya paira iyanu palumpa tjanampa mantanguru ngura kutjupakutu. ⁵¹ Ka pula tjinatja araltjara ulpu patapatara tjanala wangkangu, “Nyanga alatjili palyani nyura tjukurpa nyanga Jesunyatjara wantinyangka nyura nyakula kulintjaku, panya nyura Godaku ngurpa tjutangku purunyntju ngalinya paira iyanu.” Munu pula tjinatjangka tjarpara anu ngura kutjupakutu ngura ini Akani-yamalakutu. ⁵² Palu ngura nyara Antiyakalaya Jesuku waltyta tjuta pukulpa alatjitu nyinangi munuya Kurunpa Milmiltu nintinnyangka wanganarangku kulilpai.

14

Paulanya Pula Paanapatjanya Akani-yamala Nyinanytja

¹ Ka Paulalu pula Paanapatjalu tjukurpa panya palu purunypatu wangkangi ngura ini Akani-yamala. Paluru pula Jew tjutaku wali inmatjangka tjarpangu, kaya paluru pula tjukurpa uti wiru mulapa wangkanyangka kulira anangu winki mulamularingu Jew tjuta munu Jew wiya tjuta kulu. ² Palu Jew kutjupa tjutangkuya mulamularingkunytja wiyangku wantingi, munuya paluru tjana Jew wiya tjuta wituwituningi Paulaku pulampa munu Jesuku waltyta kutjupa tjutaku kulu kuraringkula tjananya wangkara kurantjaku. ³ Palu Paulanya pula ngura nyara palula rawa nguwanpa nyinangi, munu pula rapangku alatjitu Mayatja Jesuku tjukurpa wangkangi anangu tjutangka, tjukurpa panya Godalu anangu uwankaraku pukultju pulkangku palyantja Jesulawanungku. Ka pula tjukurpa wangkanyangka Godalu pulanya witulyanu kutjupa kutjupa pulka tjuta paluru witulyankunyangka palyantjaku. Kaya anangu tjutangka tjukurpa pula wangkanyangka mulamularingu alatji kulira, “Awari! Godanya pulka mulapa nyinanyi, munulampa pukultju pulkangku palyanu Jesulawanungku.”

⁴ Ka nyara palulanguru ngura nyara palula anangu tjuta tjararingu, kaya tjara kutjupa wati panya Paulaku pulampa mulamularingu Jesulu panya iyantja kutjaraku munuya pulala tjunguringu. Kaya tjara kutjupangku mulamularingkuwiyangku wantira Jew kuranyitja tjutangka tjunguringu.

⁵ Munuya kampangkatu wangkara kuliningi Paulanya pulanya pulingka atura iluntankunytjikitjangku. Paluru tjana panyaya Jew tjutangku munu Jew wiya tjutangku munu tjanampa mayatja kuranyitja tjutangku kulu kampangkatu wangkangi pulanya pungkunytjikitjangku. ⁶⁻⁷ Palu pula ngañmanypa nintiringu munu pula mapalku alatjitu warpungkula anu tjina manta kutjupakutu ini Lakaniyalakutu. Munu pula manta nyara palula wirkara ngura tawunu ini Tuupila pulala Litjurala anangu tjutangka Tjukurpa Palya Jesunyatjara para-tjakultjunangi munu pula ngura tjukutjuku tjutangka kulu para-ngarala tjukurpa wangkangi.

Paulanya Pula Litjurala Nyinanytja

⁸ Ka ngura nyara Litjurala wati nyumpu nyinangi, panya paluru tjina para-ngaranytja wiyatu nyumpu alatjitu nyinara pulkaringu. ⁹ Munu wati paluru nyinara kuliningi Paulalu tjukurpa wangkanyangka. Ka paluru wati panya palunya tjukarurungku nyangangi nyinara kulinnyangka

munu kulinu, "Wati nyanga paluru mulapa mulamularinganyi Jesuku palunya palyarunguntjaku." ¹⁰ Munu paluru nyakula wangkangu, "Wati ngana! Pakara ngara tjinangku paltjura!" Ka wati panya nyumpu mulapatu mapalku pakañu munu para-ngarangi.

¹¹ Kaya anangu tjutangku Paulalu palyannyangka nyakula puþu kuliningi munuya wangka walytjangku Lakaniyaku wangkangku mirara wangkangu, "Awari! Nganampa god kutjaraya kuwari ananguringu munu pula ngananganalakutu pitjangu." (Panya manta nyara palunya ngurara tjutangku tjanampa god ini Umitjanya pulanya Tjuutjinya wal^kulpai.) ¹² Munuya palulanguru Paanapatjanya nyakula wangkangu, "Nyangatja nganampa god ini Tjuutjinya." Munuya palu purunypat^u Paulanya tjukurpa rawangku wangkanyangka kulira wangkangu, "Nyangatja nganampa panya god kutjupa ini Umitjanya." ¹³ Ka ngura nyara palula itingka timpula ngarangi tjana Tjuutjinya wal^kulpai. Ka wati tjanampa tjukurtjara kuþu nyinangi nyara palula munu paluru puluka nyitayira tjuþa munu ukiri inuntji wiþu tjuþa kuþu ngalya-katingu tawunuku kaita pulkakutu, panya anangu nyara palunya ngurara tjutaya mukuringangi kuka pungkula tiliwakara palunya pulanya wal^kuntjikitja tjanampa god kutjara-palku kulira.

¹⁴ Ka wati panya Paulalu pula kulinu tjana alatjingantjikitjangku wangkanyangka munu pula tjituru-tjitururira mantara pulanku tjlpirpungkula ma-wirtjapakanu anangu tjutakutu munu pula mirara wangkangu, ¹⁵ "Anangu tjuþa! Nyaaku nyura nyanga alatjinanyi? Panya ngali anangu alatjiþu nyuranya purunypa, munuli pitjangu Tjukurpa Palya Jesunyatjara nyurala tjakultjunkunytjikitja. Wanyuya ngunti kulilwiyangku wantima munuya God panya wankaku mukuringama, panya paluru ilkarri, manta, uru kuþu palunu munu ilkaritja, mantatja, urutja uwankara kuþu. ¹⁶ Munu panya paluru iriti anangu tjuþa palumpa watarkurinyangka wantir'iyanu tjananku walytjangku kulira palyantjaku. ¹⁷ Palu anangu tjuþa iritinguru alatjiþu palumpa ninti nyinangi panya tjana nyangangi paluru rawangku tjanampa wiþu tjuþa palyalkatinyangka, panya paluru wirungku mina iyalpai ilkariringuru puyira mai pakaltjingantjaku, ka mai paluru pulkaringkula kururingkunyangka nyura mantjira ngalkula paltjaringkula kurunpa pukulpa mulapa nyinapai." Alatji pula wangkangi.

¹⁸ Palu paluru pula tjukurpa nyanga palunya wangkara puþu markuningi anangu panya tjuþa, kaya paluru tjana tungunpungangi kuka pungkula tiliwakara pulanya wal^kuntjikitja alatjiþu. ¹⁹ Kaya anangu Jew kutjupa tjuþa pitjangu Antiyaka panya kutjupanguru munu Akani-yamalanguru kuþu munuya paluru tjana anangu panya tjuþa wituwituþu Paulaku kuraringkula pikaringkunytjaku munu palunya pulingka atura iluntankunytjaku. Kaya mulapatu Paulanya pulingka atura atura ma-itarakatira urulta waningu ngunti ilunyangka-palku kulira. ²⁰ Palu anangu panya Jesuku walytja tjutaya palulakutu pitjala katuku para-ngarala wanalingi, ka Paulanya pakañu munu palulanguru walikutu malaku anu palumpa ngurakutu. Munu tjintungka Paulanya pula Paanapatjanya tjunguringkula anu malaku ngura panya Tuupilakutu.

Paulanya Pula Paanapatjanya Antiyakalakutu Malaku Ankunytja

²¹ Munu pula ngura pala palula Tjukurpa Palya Jesunyatjara tjanala tjakultjunangi, kaya tjuþa mulapa Mayatja Jesuku walytjaringu. Ka pula

nyara palulanguru małaku anu ngura panya Litjuralakutu munu Akaniyamalakutu munu Antiyaka kutjupakutu panya ngura paluru manta Pitjitiyala ngarangi. ²² Munu ngura nyara palula tjanala, paluru pula aŋangu panya Jesuku walytjaringkunytja tjuta piruku wangkara rapaningi, tjana mulamularingkunytjatjanungku rawangku tungun-tunguntu Jesunya wanantjaku. Munu pula wangkara nintiningi alatji, “Nganana mantangka nyanga wanka nyinanyangka Jesunya wantipai tjutangku nganananya rawangku kuralku Jesuku mulamularingkunyangka, kala uti tunguntungunpa ngarama Jesunya wantintjya wiya Godalu nganananya ngula rawangku kanyintjaku ngura ilkaritjangka.”

²³ Munu pula ngura kutjupangka kutjupangka para-pitjalira, Jesuku walytja tjutanguru wati mankurpa ngurkantara tjunangi, Jesuku walytja tjuta ngura nyara palunya ngurara tjuta atunymara kanyintjaku. Munu pula ngura nyara palula tjanala, wati atunymankupai mankurpa ngurkantankunytjatjanungku mai wantira, Godala tjanampa pulkara tjapiningi, “Mayatja! Nyanga paluru tjana nyuntumpa pulkara mulamularinganyi, ka tjananya witulyanama nyuntumpa walytja tjuta tjukarurungku atunymara kanyintjaku.”

²⁴ Munu pula palulanguru anu manta Pitjitiyala ngururwanu manta Pampiliyalakutu. ²⁵ Munu pula manta nyara palula ngura tawunu ini Puukala wirkara Tjukurpa Palya Jesunyatjara tjakultjunangi aŋangu tjutangka. Munu pula palula malangka tjarukutu ukalingu ngura ini Ataliyalakutu. ²⁶ Munu pula palulanguru pautangka tatira uringka matitipiringu malaku manta Tjiriyalakutu munu pula mantangka wirkara ukalingkula tjina anu tawunu panya Antiyakalakutu. Panya ngura nyara palulanguruya palunya pulanya nganmanytju Godala tjapira iyanu, palunya pulanya wankaru katirinkunytjaku, pula kuŋpungku warka ngura tjutangka palyantjaku. Ka pula warka panya palunya palyara wiyanjtjanu małaku wirkanulta ngurakutu. ²⁷ Munu pula Antiyakala wirkara Jesuku walytja tjuta altingu tjunguringkunytjaku munu pula tjanala tjakultjunangi Godalu palula pulalawanungku palyantja uwankara. Munu pula wangkangi alatji, “Panya Godalu aŋangu Jew wiya tjuta kułu altingu tjana kułu kulira mulamularingkula Jesuku walytjaringkunytjaku.” ²⁸ Munu pula palulanguru ngura nyara palula rawa alatjitu nyinangi tjanala tjungu, Jesuku panya walytja tjutangka.

15

Jerusalemalaya Tjunguringkula Wangkara Kulintja

¹ Kaya Jesuku walytja wati Jew kutjupatjara Judealanguru pitjangu Antiyakalakutu, munuya wangkara wituwituningi wati panya Jesuku walytjaringkunytja tjuta. Alatjiya wangkangi, “Uti nyura tjukurpa panya Mosenya ungkunytjitjawanu watiringama, ka nyara palulangurulta Godalu nyuranya wankarunkuku nyura Moseku arawanu watiringkunyangka kutju.” ² Ka Paulalu pula Paanapatjalu alatji wangkanyangka kulira tjituru-tjitururira mirpañaringu, munu pula wati panya palula tjanala tjunguringkula tjananku ngaparku wangkara pika-pikaringu. Kaya Jesuku walytja ngura nyara palunya ngurara tjutangku, tjananku ngaparku wangkanyangka nyakula puťu kuliningi, munuya wangkangu alatji, “Wanyula ngananalanguru wati mankurpa iyala wati nyanga Paulala pulala tjungu ankunytjaku Jerusalemalakutu, kaya ankula wati panya Jesulu iyantja tjutangka munu Jesuku walytjapiti atunymankupai tjutangka kułu

tjapila alatji, ‘Mulapalanya Godalu Moseku arawanu watiringkunyangka kutju wankarunkuku?’ Alatji tjapintjakula iyala.”³ Munuya mulapaṭu wati maŋkurpa ulparira iyanu Jerusalemalakutu Paulala pulala tjungu.

Kaya manta Panitjiyalawanu ankula anangu tjutangka ara tjakultjunangi, ara panya Jew wiya tjuta Jesuku mulamularingkunytja. Munuya piruku ankula manta Tjamiriyala wirkara palu purunypaṭu anangu tjutangka tjakultjunangi.⁴ Munuya palulanguru ankula ma-wirkantu ngura panya Jerusalemala, kaya Jesuku walytja uwankara tjananya nyakula pulkara pukularingu, Jesulu iyantja tjuta munu aṭunymankupai tjuta kulukulu. Ka Paulalu pula Paanapatjalu tjanala tjakultjunangi Godalu palula pulalawanungku kutjupa wiru tjuta palyantja.

⁵ Kaya wati Paratji kutjupatjara Jesuku walytjaringkunytjatjanu nyinangi tjanala tjungu, munuya paluru tjana pakara wangkangu, “Kulilaya! Palyaya Jew wiya tjuta Jesuku mulamularingu, mununtiya Moseku arawanu kuļu watiringama munuya palulangurulta Moseku tjukurpa uwankara wanganarangku kulira palyanma.”

⁶ Kaya Jesulu iyantja tjuta munu aṭunymankupai tjuta tjana-kutjuringkula mauntalparingu panya tjana wangkanytja wangkara kulin-tjikitja. ⁷ Munuya rawangku alatji ngapartji-ngapartjingku wangkara kuliningi. Ka Peterlulta pakara wangkangu, “Uwa, wanyuya kulila walytja tjuta! Nyura panya ninti panya ngañmanyajulpi Godalu ngayunya ngurkantanu Tjukurpa Palya anangu Jew wiya tjutangka kuļu tjakultjunkunytjaku tjana kuļu kulira Mayatja Jesuku mulamularingkunytjaku. ⁸ Ka tjananya Godalu unngu kulinnyangka nintingku nyangu paluru tjana palumpa mulamularingkunyangka munu tjananya Kurunpa Milmilnga ungu nganananya purunypaṭu, panya nganananya ngañmanyaju ungu, palu purunypaṭu tjananya kuļu ungu. ⁹ Panya paluru Jew wiya tjuta mauntara wantinytja wiyangku tjananya kuļu kura palyannyangka kalypangku pungkuwiyangku wantingu mulamularingkunyangka nyakula. Panya paluru palunya tjananya munu nganananya kuļu tjungura nyanganyi. ¹⁰ Nyura ninti panya iriti nganampa tjamupiti puṭuliringi Moseku arawanu Godala tjunguringkunytjikitja, ka kuwari nganana kuļu palu purunypaṭu puṭulirinyi. Ka nyura uti Jew wiya tjuta ngunti wituwituntja wiyangku wantima panya tjukurpa nyara palulawanu puṭu Godala tjunguringkupai. Ka nyura tjananya ngunti wituwitura Godanya mirpanpa palyani. ¹¹ Panya Godalulanya mukulya pulkangku wankarunu Mayatja Jesulawanungku nganana palumpa mulamularingkunyangka munu tjananya kuļu palu purunytytu wankarunu palumpa mulamularingkunyangka.” Alatji Peterlu tjanala wangkangi.

¹² Ka Paanapatjalu pula Paulalu tjukurpa panya palunya tjanala tjakultjunu, panya Godalu kutjupa kutjupa pulka tjuta palula pulalawanungku palyantja Jew wiya tjutangka, tjana nyakunytjatjanungku kulira Godaku mulamularingkunytjaku. Ka pula wangkanyangkaya uwankarangku pilunarira kuliningi. ¹³ Ka pula wangkara wiyingkunyangka Jamesalu pakara wangkangu, “Uwa, walytja wiru tjuta, kulilañiya!

¹⁴ Simon Peterlu panya kuwari ngananaala tjakultjunu panya Godalu Jew wiya tjutaku ngalturingkula tjaru ngurkantanu tjana kuļu palumpa walytjaringkula nyinanytjaku. ¹⁵ Panya Godaku wangkatjara tjutangku tjukurpa nyanga palunya iriti walkatjunu nyanga alatji,

¹⁶ ‘Mayatja Godalu wangkangu, “Ngayulu ngula małaku pitjanyi mununa Mayatja Davidakunu tjuta piruku malakungku tjungulku tjana

- Davidanya purunytju anangu tjuta mayatjarira kanyintjaku. Panya tjana wali purunypa katakatira minya-minyaringkunytja mantangka ngarinyi, ka kutjupangku piruku pakaltjingara ngaratjunkuku.
- ¹⁷ Kaya nyara palulanguru anangu kutjupa tjuta ku lu ngura uwankaranguru ngayulakutu malaku aruringku, panya Jew wiya tjuta ku luna ngayulu altingu paluru tjana ku lu ngayuku walytjaringkunytjaku.” *
- ¹⁸ Tjukurpa nyanga palunya panya Mayatja Godalu tjanala iriti wangkangi. Panya paluru alatji kalkuntjatjanungku palyalpai alatjitu.”
- ¹⁹ Munu Jamesalu piruku wangkangu, “Ngayulu nyanga alatji kulini. Utila Jew wiya tjuta Godaku walytjaringkunyangka tjananya Jew tjutaku arawanu kutju rawa nyinanytjaku wituwituntja wiyangku wantima.
- ²⁰ Palu utila ara mañkurpa kutju litangka walkatjura tjanala tjakultjunama panya kuka god ngalypa-ngalypa ungkunytjtja ngalkuwiyangku wantintjaku, munu anangu kutjupangka ngunti ngariwiyangku wantintjaku, munu kuka milkalitjara ngalkuwiyangku wantintjaku, munu milkali ku lu tjikintja wiyangku wantintjaku. ²¹ Panya Saturday kutjupa Saturday kutjupa Jewku tjukurtjara tjutangku rawangku wali inmatjangka tjarpara Moseku tjukurpa nyiringuru nyakula wangkapai, ka panyaya tjukurpa nyanga palunyat u ngura winkingka wangkakatingi iritinguru alatjitu.” Alatji Jamesalu tjanala wangkangu.

Jew Wiya Tjutakutu Lita Walkatjura Iyantja

²² Kaya Jesulu iyantja tjutangku, atunymankupai tjutangku ku lu, munu Jesuku walytja uwankarangku wangkara kulira ngurkantanu wati kutjara Paulala pulala Paanapatjala tjunguringkula ankunytjaku Antiyakalakutu. Munuya ngurkantanu wati ini Tjaalatjanya pulanya Judasanya ini kutjupa Paatjapatjanya. Panya nyanga paluru pula atunymankupai wiru kutjara.

²³ Munuya pulanya unkul'iyantjikitjangku lita walkatjunu nyanga alatji,

Walytja wiru tjuta ngura pala Antiyakala nyinanytja tjuta, munu manta pala Tjiriyala pulala Tjilitiyala nyinanytja tjuta ku lu! Kuwarila Jerusalemalanguru nyurampa lita nyangatja walkatjunanyi Jesulu iyantja tjutangku, atunymankupai tjutangku ku lu, munu Jesuku walytja uwankarangku.

²⁴ Panya nganaña kulinu wati kutjupatjara, nyanga nganañalanguru nyuralakutu ma-pitjanytja, munu nyurala tjukurpa kutjupa wangkara nyuranya tjituru-tjiturunkunytja. Palu nganaña tjananya iyan-tja wiyat u nyuralakutu. Palu tjanantiya walytjangku kulira nyu-ralakutu ma-pitjangu nyurala ngunti wangkanytjikitja. ²⁵ Kala kuwari tjunguringkula wangkara kulira ngurkantanu, wati kutjara nganañalanguru Paulala pulala Paanapatjala tjunguringkula ma-pitjala nyurala wangkanytjaku. ²⁶ Panya wati nyanga Paulalu pula Mayatja Jesuku Christaku warka palyannyangkaya wati Jesuku mirpañtu tjutangku nguwanpa iluntankupai. ²⁷ Kala Judasanya pulanya Tjaalatjanya lita nyangatja walkatjura unkul'iyani nyu-ralakutu, ka nyura mantjira nyakula wangkaku, ka pula nyurala utira tjakultjunkuku tjukurpa nyanga palunya. ²⁸ Panya Kurunpa Milmiltu munu nganaña ku lu tjungungku nyurala wangkanytja wiya Moseku arawanu kutju rawa nyinanytjaku. Palu ara nyanga mañkurpa kutjula nyurala wangkanyi, nyura wanganarangku kulintjaku. ²⁹ Utu nyura

* ^{15:17} Aimatjaku 9:11-12

kuka god ngalypa-ngalypa ungu nyuntjita ngalkuwiyangku wantima, munu milkali tjikintja wiyangku wantima, munu kuka milkalitjara kuļu ngalkuwiyangku wantima, munu aŋangu kutjupangka ngunti ngariwiyangku wantima kuri walytjangka kutju ngarima. Uwa, tjukurpa nyanganpa wangaŋarangku kulira palyarampa nyura palyanyku nyinaku.

Uwa, alatjiṭula wiyaringu. Palya!

³⁰ Alatjiya lita tjanampa walkatjunu munuya ungu l'yanu wati panyanpa Antiyakalakutu. Kaya ngura pala palula ma-wirkara Jesuku walytja uwankara altingu munuya tjunguringkunyangka lita panya tjana katintjatjanungku tjananya ungu. ³¹ Kaya lita mantjira nyakula wangkara kulira pulkara pukularingu kurunpa unngu. ³² Ka Judasalu pula Tjaalatjalu tjananya rawangku wangkara rapanigi tjana kunpuringkula tunguntunguntu Jesunya wanantjaku, panya wati nyanga paluru pula Godaku wangkatjara kutjara nyinangi.

³³⁻³⁴ Munu palulanguru pula ngura nyara palula Jesuku walytja tjuṭangka rawa nguwanpa nyinangi, kaya ngula palunya pulanya ngura walytjakutu malaku ankunytjaku pukultu alatjiṭu wangkara iyanu.* ³⁵ Ka Paulanya pula Paanapatjanya rawatu nyinangi ngura nyara palula munu pula tjukurpa Mayatja Jesunyatjara aŋangu tjuṭangka rawangkuṭu tjakultjunangi munu tjanala utira wangkangi. Kaya kutjupa tjuṭangku kuļu palula pulala tjunguringkula aŋangu tjuṭangka nintiningi.

Paulanya Pula Paanapatjanya Tjararingkunytja.

³⁶ Ka ngula tjiṇtu kutjupa Paulalu wangkangu Paanapatjala, "Utili piṛuku anama ngura panya ngali para-ngaṛala tjukurpa wangkanytja tjuṭakutu, munuli aŋangu panya Jesuku walytjaringkunytja tjuṭa nyangama yaaltji-yaaltji paluru tjana kuwari nyinanyi." ³⁷ Ka Paanapatjanya mukuringangi Johnnga ini kutjupa Markanya katintjikitja palula pulala tjungu ankunytjaku. ³⁸ Palu paluru ngañmanytju wantikatintjitetjangu Paulalu puṭu nguwanpa kuliningi, munu palyamankunytja wiyangku wantingi palunya katintjikitjangku. Panya paluru mungaṭu manta panya Pampiliyalala pulanya wantikatingu, pulala tjungungku war̄kariwiyangku wantira. ³⁹ Ka palulanguru Paanapatjalu pulanku Paulalu pulkara mirpanarira ngaparku wangkara kuliningi, munu palulanguru pula tjararingu. Ka Paanapatjalu wati panya Markanya katingu, munu pula pautangka tatira anu ngura Tjaipuritjalakutu. ⁴⁰ Ka Paulanya mukuringu wati panya Tjaalatjanya katintjikitja. Ka Jesuku walytja tjuṭangku pulampa Mayatja Jesula tjaipingini pulanya atunytju katirinkunytjaku. ⁴¹ Ka paluru pula anu manta Tjiriyalawanu munu Tjilitjiyalawanu kuļu, munu pula aŋangu panya Jesuku walytja tjuṭa para-nyangangi, munu tjananya wangkara kunpunungi Jesunya titutjarangku wañantjaku, wantinytja wiyangku.

16

Timitjinya Paulala Pulala Tjaalatjala Ankunytja.

¹ Munu nyara palulanguru Paulanya pula Tjaalatjanya anu malaku ngura panya Tuupilakutu munu pula pala palulanguru Litjuralakutu anu. Ka wati ini Timitjinya ngura nyara palula nyinangi. Nyara paluru

* ^{15:33-34} Wati kutjupangku kunyu verse 34 walkatjunu munu mala tjungunu Luke-aku tjukurta alatji – Palu Tjaalatjanya ankunytja wiya ngura nyara Antiyakala ma-nyinangi.

panya Jesuku walytja nyinangi, ka palumpa ngunytju minyma Jew munu paluru ku lu Jesuku walytja nyinangi. Palu palumpa mama wati Jew wiya manta ini Kuritjanya ngurara munu nyara paluru wangka Kuriki wangkapai. ² Kaya ngura nyara Litjurala pulala Akani-yamala Jesuku walytja tju tangku Timitjinya pukularira wirunmankupai. ³ Ka Paulanya wati nyara palunya katinytjikitja mukuringangi, palu Jew nyara palunya ngurara tju taya palumpa mamaku ninti panya paluru Jew wiya wati Kuriki munu panya palumpa katja Timitjinya iti ngarinyangkalpi Moseku arawanungku watintja wiyat u. Ka Paulalu tjukurpa nyanga palunya kulintjatjanungku Timitjinya watiringkunytjaku palyanu, panya Jew tju ta pukularipai wiya wati wiya tju taku, palu panya watiringkula kutjuya Jew tju tangka tjunguringkupai. Ka palulangurulta watiringkunytjatjanu paluru Paulala tjanala tjunguringu. ⁴ Munuya palulanguru ma-pakanu ngura tju takutu munu ngura pala palula tjanala wirkara Jesuku walytja tju tangka tjukurpa panyatja tjakultjunangi, tjukurpa panya Jerusalemala wati Jesulu iyantja tju tangku munu atunyankupai tju tangku ku lu litangka walkatjunkunytja Jew wiya tju taku. ⁵ Kaya Jew wiya tju ta Jesuku walytjaringkunytja tju tangku tjukurpa nyangatja kulira pukularira kunpuringangi Jesunya rawangku tungun-tunguntu waqantjikitja, ka tji ntu kutjupa tji ntu kutjupa anangu kutjupa tju ta ku lu Jesuku walyt jaringangi tju ta mulapa.

Paulalu Tjukurmankunytja Ngura Ini Turuwatjala

⁶ Ka Paulalu tjana manta ini Purikiyala pulala Kalaitjiyalawanungku para-ngarala tjukurpa wangkangi. Tjinguruya manta Aitjala ku lu wirkara tjukurpa wangkama anangu tju tangka, palu Kurunpa Milmiltu palunya tjananya markunu manta nyara palula tjukurpa wangkanytja wiyangku wantintytjaku. ⁷ Kaya manta pala palula itiwanu waintara ankula ngura kutjupangka wirkanu manta ini Matjiyala munuya palulanguru mukuringangi manta ini Patjiniyala wirkankunytjikitja, palu Kurunpa Milmiltu tjananya piruku unngu nintiningi manta nyara palulakutu tjarpanyta wiyangku wantintytjaku. ⁸ Kaya waintara anu Matjiyala itiwanu munuya wirkanu ngura ini Turuwatjala uru pulkangka kantilytja. ⁹ Ka ngura nyara palula mungangka kunkunarira Paulalu tjukurmanu wati Matja-tuniyanya ngurarrangku ngarala palula tjapinnyangka. Alatji paluru wangkangi, “Pitja ngura nyanga Matja-tuniyalakutu munulanya alpamilala!” ¹⁰ Ka nyara palula malangka Paulalu tjukurmankunytjit janguru nganana mapalku ritiringu ngura nyara palumpa ankunytjikitja, panya nganana kulira wangkangu, “Mulapa nyangatja kuwari Godalu nintinu ankula ngura nyara palula tjukurpa tjakultjunkunytjaku anangu tju tangka.”*

Minyma Litiyanya Jesuku Walytjaringkunytja Ngura Pilipaila.

¹¹ Kala Turuwatjalanguru pautangka tatira anu urungka manta tjukutjuku ini Tjamatja-raitjalakutu, munula nyara palula ngarira mungawinki piruku tati ra ma-pakanu munula ngura nyara Niya-palitjala wirkanu. ¹² Munula nyara palulanguru piruku anu ngura Pilipailakutu. Ka ngura Pilipainya panya manta pulkangka Matja-tuniyala unngu ngarangi. Ngura nyanga palunya panya Rome-anyanya ngurara tju tangku nga manytju

* **16:10** Verse 10 wangkanyi nganana panya nyanga palula-arangka wati panya Luke-anyanya Paulala tjanala tjunguringu munu palula tjanala para-ngarangi.

pitjala ngura palyanu. Kala ngura nyara palula tjintu mañkurpa nguwanpa nyinangi.

¹³ Munula Saturday-ngka tjintu panya pakuwiyaringkupaingka nganaña nguranguru unytju anu karu urutjarakutu panya ngura nyara palulaya Jew tjuta tjaka Saturday-ngka pitjala tjunguringkupai Godala tjapintjikitja. Kala wirkara nyangu minyma tjuta nyinara wañinyangka munula palula tjanala tjunguringkula nyinakatingu munula tjanala wangkangi Godaku tjukurpa.

¹⁴ Ka minyma kutjupa ngura ini Tjayatiranya ngurara nyinangi nyara palula minyma ini Litiyanya. Minyma nyara paluru mantara purple tjuta payamilalpai munu anangu tjutangka tjalamilalpai. Munu paluru Godanya kulira wal Kulpa. Ka Paulalu tjukurpa wangkanyangka Mayatja Jesulu minyma palunya kurunpa pampunu paluru tjukarurungku kulintjaku, ka paluru kulira mulamularingu Paulalu wangkanyangka.

¹⁵ Ka palulanguru palunya urungka tjarpatjura baptise-katingu palumpa waltyja tjuta kułukulu, panya paluru tjana kułu mulamularingu paluru wangkanyangka. Ka minyma panya paluru nganananya altingu nganaña ankula palumpa wałingka nyinanytjaku. Alatji paluru wangkangi, "Nyura panya kuwari nyangu ngayunya Jesuku mulamularingu nyangka munu palumpa waltyjaringkunyangka. Kaya kuwari pitja ngayuku ngurakutu munuya nyara palula nyinama ngayuku wałingka." Alatji nyanga paluru nganananya wangkara altingi, kala mulapatu anu palumpa walikutu munula nyara palula nyinangi.

Paulanya Pulanya Tjailangka Tjarpatjunkunytja Ngura Pilipaila.

¹⁶ Kala karu panya palulakutu rawa anangi Godala tjapintjikitja. Ka tjintu kutjupa kungkawara kutjupa ngalya-ngaparikatingu nganañalakutu panya paluru wati mayatja mañkurku unytju warkaripai. Kungkawara nyara paluru mamutjara nyinangi, ka mamu nyara paluru palunya kuranyukutungku nyakula wangkanytjaku nintilpai. Kaya anangu tjuta alatji wangkanyangka kulira nintiringkunytjikitja mukuringangi munuya kungkawara palunya mani ungupai paluru kuranyukutungku nyakula tjanala tjakultjunkunytjaku. Ka palumpa mayatja tjutangku mani panya palunya mantjilpai. Munuya mani pulkatjararingu kungkawara nyanga palulanguru. ¹⁷ Ka kungkawara nyanga paluru Paulanya nganananya wañanu munu mirara wangkangi, "Wati nyanganpaya Mayatja God Pułkaku waltyja tjuta munu paluru tjana nyuranya tjakultjunnanyi Godalu nyuranya wankarunkunytjaku." ¹⁸ Munu paluru tjintu tjutangka rawangku alatji wangkakatingi. Ka Paulanya kungkawara panya paluru rawangku wangkanyangka kulira kulirakaar-kaararingu munu malakukutura mamu panya palunya wangkara painu, "Jesulu ngayunya witulyankunyangkañanta nyuntunya wituñi kungkawara pala palulanguru ngalya-pakala munu palunya wantikati!" Ka mapalku mamu paluru kungkawara panya palulanguru pakanu munu palunya wantikatira anu.

¹⁹ Ka kungkawara panya palumpa mayatja tjutangku palunya nyakula alatji kulinu, "Ai! Nganampa mani palyantjaku wiyingingu." Munuya palulanguru Paulanya pulanya Tjaalatjanya witira katingu ngura nyara palumpa mayatja tjutakutu tawunungka ngururpa. Panya ngururpa nyara palula anangu tjutangku kutjupa kutjupa tjuta tjalamilalpai ngarangi, kaya palunya pulanya nyara palulakutu katingu mayatja tjutangku ngurkantara paintjaku. ²⁰ Munuya mayatja tjutangka wirkara

wangkangu, "Wati wiru tjuta! Wati nyanga pula Jew kutjara munu pula anangu ngura nyangatja nguraṛa tjuta kuraṇi. ²¹ Panya nganampa mayatja Tjiitjanya nyara Rome-ala nyinapainya, kala nganampa tjamupitiku arangka rawa nyinanytjikitja mukuringanyi. Ka nyanga pula nganañanya wituwituṇi nganampa aṛa tjuta wantira paluru pula purunyṭju palyantjaku."

²² Kaya palulanguru anangu winki mulapa tjunguringkula palumpa pulampa pikaringkula ngalytjurmarwa waṇingi. Ka tawunu nyara palumpa mayatja tjutangku tjaultji tjuta witunu, palumpa pulampa mantara anangitja tjlpirpungkula wanira pulanya katira pulkara pungkunyṭjaku, munu palula małangka tjalangka tjarpatjunkunyṭjaku. ²³ Kaya mulapaṭu palunya pulanya puṇu urtjanpa purunyṭja pulkara alatjitu alkanu milkali pakantjaku. Munuya palulanguru palunya pulanya katira tjalangka tjarpatjunu munuya wati tjaila kanyilpai piruku wangkangu pulanya ilangku anga-ngarala aṭunymankunyṭjaku. ²⁴ Ka mulapaṭu wati panya tjaila kanyilpaingku wangaṇarangku kulinu tjana wangkanyangka munu Paulanya pulanya Tjaalatjanya ruuma unngutjangka tjarpatjunu, munu pulanya puṇu pulkangka alatjarangka tjina tjarpatjura tjungura tjiinangka karpinu pakantjaku-tawara.

²⁵ Ka munga kultungka Paulalu pula Tjaalatjalu Godala tjapiningi munu pula inma inkara Godanya wal̄kuningi pukulṭu alatjitu, kaya pulala itingka nyinanytja tjutangku kulinigi pula inma inkanyangka. ²⁶ Ka nyara palula aṛa manta pulkara uringu munu wali panya tjaila pulkara uritjingaṇu, ka mapalku tuwa uwankara alaringu. Ka tjiina uwankara anangu tjutanguru mapalku araltjarira punkaṇu. ²⁷ Ka wati panya tjaila kanyilpai kunkuntjanu wankaringu munu nyangu tuwa uwankara ala ngaranyangka munu ngunti kulinu karpintja panya uwankara kumpira ma-wirtjapakannyangka-palku mununku tjula wara mantjira palurunku walytjangku iluntankunyṭjikitjangku wakuṇu.* ²⁸ Ka Paulalu nyangu paluru alatjirinyangka, munu mirara palunya painu, "Wantimanku walytjangku ngunti iluntankunyṭja wiyangku! Nyangatjala uwankaraṭu nyinanyi."

²⁹ Ka wati panya tjaila kanyilpaingku wati kutjupangka mirara wangkangu warpungkula tili ngalya-katinyṭjaku. Munu katira ungkunyangka paluru tilitjara ruuma ungu tjarpanu munu pulkara nguluringkula puntu winki tjititingkula Paulala pulala tjinangka itingka punkara waṭungarākatingu. ³⁰ Munu pakara palunya pulanya urilkutu katira tjapinu, "Wati wiru kutjara! Nyaaringkukuna Godalu ngayunya wankarunkunyṭjaku?"

³¹ Ka pula wangkangu, "Mayatja Jesuku Christaku mulamulariwa, kanta Godalu wankarunkuku nyuntumpa walytja tjuta kułukulu." ³² Munu palulanguru Paulalu pula Tjukurpa Palya Jesunyatjara palula tjakultjunangi palumpa walytja tjutangka kułu. ³³ Ka wati panya paluru pulanya katira pika panya pungkunyṭjita uwankara minangka paltjira kilinanu. Ka nyara palula małangka Paulalu pula palunya munu palumpa walytja uwankara kułu urungka baptise-katingu. ³⁴ Ka palulanguru wati panya tjaila kanyilpaingku pulanya altira katingu palumpa walikutu munu pulanya

* ^{16:27} Alatji wati palurunku iluntankunyṭjikitjangku tjula wakuṇu panya Rome-aku tjukurpa ngaranyi alatji nyuntumpa tjalanguru puritjina tjuta wirtjapakannyangka Rome-aku tjaultjingku nyuntunya iluntankuku. Ka pala palula-tawara wati paluru walytjangku iluntankunyṭjikitjangku kulinigi.

mai ungu ngalkuntjaku. Munuya paluru tjana uwankara pulkara alatjitu pukularingu Godaku mulamularingkunytjatjanu.

³⁵ Ka mungawinki tawunu nyara palumpa mayatja tjutangku tjaultji tjuta iyanu wati panya tjaila kanyilpaikutu, kaya wirkara palula wangkangu wati panya kutjara palya walatjunkunytjaku. ³⁶ Ka wati panya paluru kulira mulapatu Paulala pulala Tjaalatjala wangkangu, “Wati panya mayatja tjutangku nyupalinya wangkangu walatjunkunytjaku. Ka pula palyalta ara ngurakutu.”

³⁷ Palu Paulalu wangkangu wati panya tjaultji tjutangka, “Ngali wati miriputju wiya, ka panya tjana ngalinya tjuta mirangka pungangi kuut-pakutu katira ngurkantankunytja wiyangku, munu panyalinya tjailangka tjarpatjunu. Munuya kuvari mukuringanyi ngalinya kampangkatu pakaltjingara iyantjikitja. Palu wiya, panya ngalimpa mayatja Tjiitjanya nyara Rome-ala nyinapainya, kaya nyaaku mukuringanyi ngalinya kam-pangkatu iyantjikitja wati malikitja-palku? Wiya, utiya wati panya mayatja tjuta nyangakutu pitjama munuya paluru tjana ngalinya anangu tjutangka mirangka wangkara walatjunama.”

³⁸ Ka wati panya tjaultji tjutangku ankula wati panya mayatja tjutangka tjakultjunu Paulalu panya wangkanytja. Kaya Paulalu pula Tjiitjanya mayatjanmankunyangka kulira pulkara nguluringu. ³⁹ Kaya mulapatu paluru tjana pitjala palula pulala kuntingkula wangkangu, “Kurangkula nyupalinya pungkula tjailangka tjarpatjunu.” Munuya palunya pulanya tjailanguru pakaltjingara walatjunu munu pulala wangkangu, “Palya pula ara nganampa ngura wantikatira.” ⁴⁰ Ka Paulanya pula Tjaalat-janya tjailanguru pakara Litiyaku walikutu anu, munu pula wali nyara palula tjarpara anangu Jesuku walytja tjutangka tjunguringu munu pula palunya tjananya wangkara kunpunungi Jesunya rawangku tungun-tunguntu wañantjaku. Munu pula nyara palulanguru anu.

17

Anangu Tjuta Paulaku Pulampa Kuraringkunytja Ngura Tjitja-lanikala.

¹ Munu palulanguru Paulanya pula ngura Ampi-palitjala pulala Apalaniyalawanu anu ngura ini Tjitja-lanikalakutu. Ka ngura nyara palula Jew tjutaku wali inmatja ngarangi. ² Ka Paulanya ankula tjarpangu wali panya palula Godanya walkuntjikitja. Panya paluru tjakangku alatji palyalpai ngura kutjupangka wirkara. Munu paluru wiki mankurpa nyinara tjintu Saturday-ngka rawa anangi wali panya palulakutu anangu tjutangka nyiringuru Godaku tjukurpa utira wangkanytjikitja. ³ Munu wangkangi tjana nintiringkunytjaku alatji, “Panya Godaku tjukurtu alatji wangkanyi Godalu panya kalkuntjanya ngula pitjala pikatjararingkula iluku, ka ilunyangka Godalu palunya wankara pakaltjingalku. Kaña kuvari nyurala tjakultjunanyi panya Godalu kalkuntjanya mungaçu pitjangu ini panya Jesunya nganananya wankarunkunytjikitja.”

⁴ Kaya Jew kutjupa tjarangku tjukurpa nyanga palunya kulintjatjanu mulamularingu munuya Paulala pulala Tjaalatjala tjunguringu. Kaya wangka Kuriki wangkapai tjuta kulu kulira mulamularingu, panya paluru tjanaya nganmanypa Godanya walkulpai nyinangi munuya Paulalu tjukurpa Jesunyatjara wangkanyangka kulira Jesuku mulamularingu. Kaya minyma kuranyitja tjuta kulu mulamularingu.

⁵ Palu wati Jew kutjupa tjutaya tjukurpa kulintjatjanu mulamularinguwantingi munuya nyararingangi Paulaku pulampa.

Munuya palulanguru wati kura iwarangka para-ngarapai tjuṭa altira uṭuluṇu munu tjanala wangkangu, “Araya munuya aŋangu kutjupa tjuṭa nyakula para-altira tjungura tjuṭa ngalya-kati Paulaku tjanampa pikaringkunytjaku.” Kaya mulapatu anu munuya tjuṭa altira uṭulura pika pitjangu wati ini Jasonku walikutu Paulanya pulanya Tjaalatjanya ngurintjikitja. ⁶ Munuya puṭu ngurintjatjanungku Jasonnga tjananya Jesuku waltyja kutjupa tjuṭa kuļu witira itarikatingu walinguru munuya tjananya katingu tawunu nyara palumpa mayatja tjuṭakutu munuya mirara wangkangi, “Kulilaya! Paulalu pula Tjaalatjalu kunyu aŋangu ngura winkitja kuraningi munu pula kuvari pitjangu nganampa ngura ngapartji kurantjikitja. ⁷ Ka wati nyanga JASONTU palunya pulanya mantjiria palumpa walingka kanyiningi. Munuya paluru tjana uwankarangku tzunguringkula mayatja Tjiitjalu panya wangkanytjjangka tungunpungkula alatji wangkapai, ‘Mayatja pułka kutjupa nyinanyi ini Jesunya.’”

⁸ Kaya aŋangu tjuṭangku munu tawunu nyara palumpa mayatja tjuṭangku kuļu alatji wangkanyangka kulira pułkara alatjitu palumpa tjanampa mirpañaringu Jesuku panya waltyja tjuṭaku. ⁹ Kaya mayatja tjuṭangku Jasonnga tjananya wangkangu alatji, “Nyura nganaŋala maningka payamilannyangka kutjula nyuranya walatjunkuku. Walangkulanya uwa!” Kaya mulapatu paluru tjana payamilaṇu, ka tjananya walatjunu.

Ngura Pariyanya Ngurara Tjuṭa Jesuku Mulamularingkunytja.

¹⁰ Ka munga nyara palulatu Jesuku panya waltyja tjuṭangku Paulanya pulanya Tjaalatjanya tjakuriṛa ma-iyanu ka pula wilurara anu ngura ini Pariyalakutu. Munu pula ngura nyara palula wirkara Jew tjuṭaku wali inmatjakutu anu munu tjanala tzunguringu. ¹¹ Kaya ngura nyara palunya ngurara tjuṭa aŋangu wiru tjuṭa nyinangi panya Tjitja-lanikala nyinanytja tjuṭa purunypa wiya. Panya paluru tjanaya pukultu alatjitu tjukurpa wangkanyangka wanganarangku kuliningi. Munuya tjintu kutjupa tjintu kutjupa nyiri Godaku tjukurpa alara tjukurpa Paulalu wangkanytjjangka nguriningi paluru tjukaruru wangkanyangka ngurkantankunytjikitjangku munuya kuliningi, “Mulapa nyangangku tjukarurungku tjakultjunanyi nyanga nyiringuru alatjitu.” ¹² Kaya tjuṭa mulapa nyara palulanguru Jesuku mulamularingu, Jew tjuṭa munu Jew wiya tjuṭa panya minyma Kuriki kuranyitja tjuṭa munu wati Kuriki tjuṭa kuļu.

¹³ Kaya ngura panya Tjitja-lanikalanguru wati panya Jew tjuṭangku kuliningi, “Ai! Paulalu pula kunyu ngura nyara Pariyala Godaku tjukurpa tjakultjunanyi piruku aŋangu tjuṭangka.” Munuya kulintjatjanu pitjangu Pariyalakutu, munuya panya palu purunypaṭu aŋangu panya nguratja tjuṭa wangkara wituwituningi, tjana tzunguringkula Paulaku tjanampa pikaringkunytjaku. Kaya mulapatu aŋangu tjuṭa uṭulu kutjuringkula tjuṭaringu, munuya Paulaku tjanampa mirpañarira pikaringanggi. ¹⁴ Kaya Pariyanya ngurara tjuṭa Jesuku waltyjaringkunytjatjanungku Paulanya tjananya palumpa malpa tjuṭa kuļu mapalku witura iyanu uru pułkakutu, warpungkula pautangka tatira ankunytjaku. Palu Tjaalatjanya pula Timitjinya ngura panya palulatu nyinangi, Paulala tjungu ankunytja wiya. ¹⁵ Ka Paulaku malpa tjuṭangku palunya katingu ulparirakutu ngura ini Atjantjalakutu. Munuya ngura nyara palula wirkara Paulalu palunya tjananya wangkara witunu alatji, “Małaku ankulampaya Timitjinya pulanya Tjaalatjanya witula ngayulakutu warpungkula pitjanytjaku.” Kaya mulapatu malaku anu wati panya Paulaku malpa tjuṭa.

Paulanya Ngura Atjantjala Nyinanytja.

¹⁶ Ka Paulanya ngura nyara Atjantjala Timitjiku pulampa Tjaalatjaku patara nyinangi munu paluru para-ngarala nyangangi god ngalypa ngalypa watingku palyantja tjuṭa ngarala wañinyangka munu paluru pulkara alatjitu tjitururuŋgu. ¹⁷ Munu paluru anu Jew tjutaku wali inmatjakutu munu tjanala tjunguringu anangu Kuriki panya Godanya walkulpai tjutangka kulu munu paluru Tjukurpa Palya Jesunyatjara tjanala tjakultjunangi kaya ngaparku wangkara kuliningi. Ka paluru tjintu kutjupa tjintu kutjupa ankupai anangu panya tjutangku tjunguringkula tjalamilpaikutu munu nyara palula ngarala anangu tjutangka palu purunypaṭu wangkapai.

¹⁸ Kaya wati kutjupa tjuṭa ngura nyara palula nyinangi wati ini Ipi-kuratjanya kulilpai tjuṭa panya tana tjakangku palumpa ara kulira palunya mirawanipai. Kaya palu purunypaṭu wati ini Tjiinanya kulilpai tjuṭangku palunya ngapartji mirawanipai. Munuya wati nyanga paluru tana Paulalu wangkanyangka kulintjatjanu palumpa pikaringangi munuya alatji wangkangi, “Nyaa nyangangku wangkanyi, wati nyanga ngunti nintingku-palku wangkapaingku?” Palu Paulalu tjakultjunangi alatji tujukurpa Jesunyatjara paluru ilunytjatjanu wankaringkula pakan-tja. Kaya kutjupa tjutangku wangkangi, “Palurulanya tjinguru wituwituni god kutjupa walkuntjaku ngura kutjupitja nganampa wantira.”

¹⁹ Munuya paluru tana Paulanya katingu puli panya ini Ari-yapakalakutu. Panya puli nyara palulaya anangu nintipuka tjuṭa tjunguringkupai tjukurpa tjuṭa wangkara kulintjikitja. Munuya puli nyara palula wirkara Paulala wangkangu, “Nganana mukuringanyi tjukurpa panya nyuntu kuwari wangkanytja ngananaala uwankarangka utira wangkanytjaku. Tjukurpa nyaan panyatja wangkangi? ²⁰ Panya tjukurpa nyuntu wangkanytjanya nganana kuwari kutju kuliu munula puṭu nguwanpa nintiringanyi. Wanyu ngananaala utinma nganana kulira nintiringkunyjtaku.” ²¹ (Atjantjala panya nyinanytja tjuṭaya rawa mukuringkupai tjukurpa kuwaritja tjuṭa nyinara wangkara kulintjikitja, kaya malikitja tjuṭa pitjapai ngura kutjupa tjutanguru munuya tjanala tjunguringkula tjukurpa palunya tjananya wangkara kulilpai.)

²² Ka puli nyara Ari-yapakala anangu tjuṭa tjunguringkunyangka Paulanya pakanu tjanala wangkanytjikitja munu wangkangu, “Wati Atjantjanya ngurara tjuṭa! Ngayulu nyuranya nyakula kuwari kuliningi, ‘Nyanga tana mulapa kutjupa kutjupa walkuntjikitja mukuringanyi alatjitu.’

²³ Panya ngayulu nyurampa nyanga tawunungka para-ngarala nyangangi kutjupa kutjupa nyura panya walkuntja tjuṭa ngarala wañinyangka tjuwa tjutangka munu urilta kulu. Mununa pitjilpa kulu nyangu, ka nyara palula walka ngarangi alatji, ‘God ngananaala ngurpatja walkuntjaku.’ Mununa palunya nyakula ngayulu kuliningi, ‘Mulapaya nyangantu palunya ngurpangku pupakatira walkulpai.’ Kana ngayulu kuwari God pala palunya nyurala tjakultjunkunyjtjikitja mukuringanyi.

²⁴ “Panya God nyanga paluru manta winki munu mantangka nyinanytja uwankara kulu palunu. Munu paluru uwankaraku Mayatja pulka nyinanyi mantaku ilkariku kulu. Munu paluru wali anangungku marangku palyantjitungka nyinapai wiya timpula mantatjangka. ²⁵ Paluru nyinara paṭalpai wiya anangu tjutangku palunya alpamilantjaku, panya paluru alatji anangu uwankara ngaalypa ungupai wanka nyinanytjaku munu kutjupa kutjupa uwankara kulu anangu tjuṭaku palyalpai. ²⁶ God nyanga paluru panya wati kutju kuranyitja kuwaripatjara palyanu, munu

wati kutju nyara palulanguru anangu tjutaringkunytjaku palunu manta winkingka tjiwariwari nyinanytjaku. Wangka kutjupa kutjupa miri kutjupa kutjupa paluru palyanu. Munu paluru alatjitu nganmanytu ngurkantanu anangu uwankara miri kutjupa kutjupa manta waltytjangka waltytjangka nyinanytjaku munu paluru ngurkantanu kuли yaaltjitu-ara mantangka nyanga paluru tjana nyinanytjaku. ²⁷ Panya nyanganpa uwankara Godalu kulira palyanu tjana ngapartji mukuringkula palunya tjukarurungku ngurkantara walkuntjaku. Panya paluru parari wiya ngananala alatjiitu titutjara ila ngaranyi. ²⁸ Panya kutjupangku iriti nyiringka walkatjunkunytja alatji ngaranyi,
 ‘Nyara paluru nganañanya palyara witulyankunyangka kutju nganaña wanka nyinanyi munu para-ngaranyi.’

Ka panya nyurampa wangkatjara tjutangku kuли alatji walkatjunu,
 ‘Panya nganaña uwankara palumpa tjitji tjuta.’

²⁹ “Uwa, mulapa anangu uwankara manta winkingka Godalanguru nyinanyi Godalu palyantja. Ka nyara palulangurula uti ngunti kulil-wiyangku wantima, panya Godanya wati nintipukangku gold-nguru tjiipanguru apunguru palyantja wiyat, Godanya alatjiitu. ³⁰ Panya kuwari-patjaranguru anangu tjuña Godaku ngurpa nyinangi palunya kulilwiya alatjiitu, ka Godalu tjananya ngurkantara pungkunytja wiyangku wantingi. Palu kuwari nyanga Godalu anangu uwankara wangkara wituwituni kura wantira piiwiyingkula kampa kutjuparinytjaku. ³¹ Panya paluru tjintu kutju ngurkantanu munu wati kutju ngurkantara tjunu tjintu pala palula anangu uwankara tjukarurungku ngurkantara tjarantjaku. Munu paluru wati nyanga palunya ilunyangka pakaltjinganu anangu tjutangku kulintjaku, ‘Munta-uwa! Wati nyanga paluru waintaringu anangu uwankara ngurkantara tjarantjikitja.’”

³² Kaya Paulalu tjukurpa nyanga anangu ilunytjtja pakantja wangkanyangka kutjupa tjutangku kulira palunya wiyanmanangi. Kaya kutjupa tjarangku wangkangi, “Uwa palya! Nganaña piruku ngula kulintjikitja mukuringanyi tjukurpa nyanga nyuntu kuwari wangkanytja.”

³³ Ka nyara palulanguru Paulalu tjukurpa tjanala wangkara wiyingkula tjananya wantikatira anu. ³⁴ Kaya anangu kutjupatjara mulamularingu tjukurpa wangkanyangka kulintjatjanu munuya palula tjunguringu. Ka wati ini Tayani-tjiyatjanya kuли Jesuku mulamularingu munu minyma ini Tamaritjanya munu kutjupa tjuña kulukulu mulamularingu munuya anangu nyanga paluru tjana Paulala tjunguringu. Palu wati nyanga Tayani-tjiyatjanya wati nintipuka nyinangi munu panya puli nyara Ari-yapakala mitingi ngaranyangka paluru tjanala tjunguringkula wangkara kulilpai.

18

Paulanya Karintjala Nyinanytja

¹ Ka nyara palulanguru Paulanya Atjantjalanguru wilurara anu ngura Karintjalakutu. ² Ka ngura nyara palula wati ini Akuwilanya pula kurirara nyinangi Puritjilanya, panya Akuwilanya wati Jew manta Pantatjanya ngurara, palu paluru pula ngura panya Rome-ala ankula nyinangi manta Italila. Ka ngula mayatja pulka ini Kulutiyatjalu anangu Jew uwankara paira iyanu ngura nyara Rome-languru, ka pula pitjala ngura pala palulalta nyinangi ngura panya Karintjala. Ka Paulanya wirkanu ngura pala palula munu pulanya ngura pala palula nyangu. ³ Munu

palula pulala tjunguringkula nyinara warkaringi, panya paluru pula kulu Paulalu purunytju tiinta wakara palyalpai. ⁴ Ka Paulanya tjintu Saturday kutjupa Saturday kutjupa rawa ankupai Jew tjutaku wali inmatjakutu tjunguringkunytjikitja munu paluru anangu Jew tjutangka munu Jew wiya tjutangka kulu Godaku tjukurpa wangkangi tjana tjukurpa kulira kampa kutjuparira Jesuku mulamularingkunytjaku.

⁵ Ka nyara palula-arangka Tjaalatjanya pula Timitjinya wirkanu manta nyara Matja-tuniyalanguru. Ka paluru pula wirkankunyangka, Paulalu tjintu uwankarangka tjukurpa Jesunyatjara rawangku wangkangi anangu Jew tjutangka, munu paluru alatji wangkangu, "Panya Godalu kalkuntjtijitjanya pitjangu anangu tjuta wankarunkunytjikitja. Nyanga paluru ini Jesunya." ⁶ Ka paluru alatji wangkanyangkaya Jew tjutangku kulira tungunpungkula palunya workingi. Ka Paulalu Jew tjutangku palunya alatjingannyangka palumpa mantaranguru ulpuru patapatara tjanala wangkangu, "Ngulaya ngayunya ngukalwiyangku wantima nyuranya Godalu paira iyannya yangka. Panya nyura kulilwiyangku wantingi ngayulu wangkanyangka. Kana kuwari nyuranya wantikatira ananyi anangu Jew wiya tjutakutu tjukurpa Jesunyatjara tjanala wangkanytjikitja." Alatji Paulalu tjanala utingku wangkangi.

⁷ Munu palulanguru paluru wali inmatjanguru pakara ilatu wati-tjarpangu, wati ini Titiyatja Tjatjaku walingka, panya wati nyara paluru Godanya walkulpai nyinangi, munu paluru Jew tjutaku wali inmatjangka itingka nyinangi. Ka Paulanya palulakutu anu, munu paluru nyinangi wati panya palumpa walingka. ⁸ Ka wati ini Kuritjipanya wali inmatjaku mayatja nyinangi munu paluru tjukurpa Paulalu wangkanyangka kulira Mayatja Jesuku mulamularingu. Kaya palumpa walytja tjuta kulu tjunguringkula Jesuku mulamularingu. Kaya anangu kutjupa tjutangku kulu tjukurpa Jesunyatjara kulintjatjanu palumpa mulamularingu, ka tjananya urungka baptise-katingu.

⁹ Ka munga kutjupa paluru ngurangka ngarinyangka Mayatja Jesulu Paulala utiringkula wangkangu alatji, "Nguluringkula wantintyta wiyangku rawangku tjukurpa wangkama. ¹⁰ Panya ngayulu nyuntula tjungu titutjara nyinanyi mununa nyuntunya atunyamananyi, ka anangu kutjupangku nyuntunya putu pikaringkula pungkuku, panya ngura nyanga palulaya anangu tjuta nyinanyi ngayuku walytja tjuta." ¹¹ Ka Paulanya mulapatu palula kulintjatjanu raparingu munu pira 18 ngura pala palula nyinangi munu anangu tjutangka Godaku tjukurpa rawangku alatjitu wangkara tjanala nintiningi.

¹² Ka wati ini Kaliyanya manta ini Akayaku mayatjarinyangka Jew tjuta Paulaku pulkara mirpanaringu munuya palunya witira katingu kuut-pakutu mayatja panya Kaliyalu kura ngurkantankunytjaku. ¹³ Munuya palula wangkangu, "Wati nyangangku tjukurpa kutjupawanungku anangu tjuta wituwituni Godanya walkuntjaku Moseku ara wantira."

¹⁴⁻¹⁵ Ka Paulanya ritiringangi wangkanytjikitja ka mayatja panya Kaliyalu wangkangu, "Wati Jew tjuta, kulilaya! Ngayulu tjukurpa nyanga palu purunypa kulintjikitja mukuringkunytja wiya. Tjinguru wati nyanga paluru anangu kutjupa iluntankunyangka mutta tjinguru walyt-jatjara kutitjunkunyangka kutjuna palunya kura kulira ngurkantankuku. Palu nyura wati nyanga palunya kura palu purunypa palyannyangka nyakunytja wiyatu munu nyura ngunti ngalya-katingu palunya nyurampa tjukurnguru miilarara. Paluru tjukurpa ara tjuta wangkanyangka kutju

nyura palumpa mirpañarinyi nyurampa tjukurpa wangkanytja-tjiratja, kayanku nyuranku ngurkantara! Ngayulu nyanganpa wantinyi ngurkan-tankuwiyangku.” ¹⁶ Munu tjananya paira iyanu kuutpanguru urilkutu ankunytjaku. ¹⁷ Kaya ma-pakaṛa urilta nyangu wati ini Tjatjanitjanya panya paluru wali inmatjakutu mayatja nyinangi. Kaya palunya witira pulkara alatjitu pungangi wali panya kuutpa wangkapaingka urilta, ka mayatja Kaliyalu nyakula alatjiṭu wantingi pailwiyangku.

Paulanya Antiyakalakutu Malaku Ankunytja.

¹⁸ Ka Paulanya ngura panya Karintjala rawa nyinangi Jesuku walytja tjuṭangka. Munu palulanguru paluru tjananya wangkara wantikatira anu ngura Tjintjuriyalakutu, ka Akuwilanya pula Puritjilanya kulu palula tjungu anu. Ka ngura nyara Tjintjuriyala Paulalu kutjupa kutjupa palyantjikitjangku kalkunu Godala mununku mangka winki kaṭara wiyanu, panya tjakangkuya alatji palyalpai Godala wangkara kalkuntjatjanungku. Ka palulanguru paluru tjana pautangka tatiṛa anu kakarara manta Tjiriyaku. ¹⁹ Munuya ngura ngururitjangka wirkanu ngura ini Ipitjala munuya pau-tanguru ukalingu. Ka Paulanya anu Jew tjuṭaku wali inmatjakutu munu Jew tjuṭangka tjunguringkula tjukurpa Jesunyatjara tjanala wangkangi tjana kuliṛa Jesuku mulamularingkunytjaku. ²⁰ Kaya paluru tjana palunya markuningi tjanala rawa nyinanytjaku, palu paluru wantingu. ²¹ Munu ankunytjikitjangku paluru tjananya wangkangu, “Ngula Godalu ngayunya witunnyangkampaña tjinguru nyuralakutu małaku pitjaku.” ²² Munu paluru Akuwilanya pulanya Puritjilanya nyara palula wantikatira pau-tangka piruku tatiṛa anu kakarara ulparira ngura nyara Tjiitjariyalakutu.

Munu paluru uru pulkangka rawa ankula ankula wirkanu Tjiitjariyala manta panya Isrelta, munu nyara palula pautanguru ukalingkula tjina anu Jerusalemalakutu. Munu ngura nyara palula paluru Jesuku walytja tjuṭa nyakula wangkara pukulmanangi. Munu palulanguru mapalku anu alinytjara ngura Antiyakalakutu. ²³ Munu wirkara ngura nyara palula tjukutjuku rawa nguwanpa nyinara piruku anu manta Kalaitjiyala pulala Purikiyalakutu. Munu paluru ngura tjuṭangka aṇangu panya Jesuku ngañmanypa walytjaringkunytja tjuṭa para-nyangangi, munu tjananya tjukurpa wangkara kunpunungi Jesunya rawangku tungun-tunguntu wañantjaku.

Apalatjanya Ngura Ipitjala Nyinanytja.

²⁴ Ka wati Jew kutjupa ini Apalatjanya nyinangi Godaku tjukurku ninti pulka. Panya wati nyanga paluru ngura Alika-tjantu-riyala iti ngaringu manta panya Ittipala munu paluru Ipitjalakutu pitjangu nyinanytjikitja.

²⁵ Ka kutjupangku palunya nintinu Mayatja Jesulawaru nyinanytjaku, ka paluru tjukurpa Jesunyatjara kurunpa winkingku pukultu wangkapai tjukarurungku alatjitu. Palu baptise-katintjya ngañmanyitja kutju kulil-pai, panya John Baptista kuranguru kunṭaringkunyangka kutju baptise-katipai – pala palumpa kutju paluru ninti. ²⁶ Munu ngura nyara Ipitjala wati panya paluru Jew tjuṭaku wali inmatjangka tjarpara tjanala rapangku alatjitu tjukurpa wangkangi. Ka Akuwilalu pula Puritjilalu kulinu paluru tjukurpa wangkanyangka munu pula wangkanyangka małangka palunya altira katingu pulampa walikutu munu pula palula utira tjakultjunangi tjukurpa Jesunyatjara paluru kulira pulkara nintiringkula uwankara tjukarurungku kulintjaku.

²⁷ Ka nyara palulanguru Apalatjanya mukuringu manta nyara Akay-alakutu ankunytjikitja. Kaya Jesuku walytja tjutangku kulira pukularingu, munuya lita palunyatjara walkatjura ungkul'iyau, Jesuku walytja kutjupa tjutangku ngura nyara palula wirkankunyangka nyakula, wati panya palunya paṭara pukultu mantjintjaku. Ka mulapaṭu Apalatjanya ngura nyara palulakutu pautangka tatira anu, munu wirkara paluru anangu Jesuku ngañmanypa walytjaringkunytja tjutangka Jesuku tjukurpa wangkangi, palunya tjananya kunpuntjikitjangku, panya paluru tjana ngañmanypa mulamularingu Godalu tjananya pukultjungku kurunpa pampunyangka. ²⁸ Munu paluru Jew tjutangka tjukurpa Jesunyatjara wangkangi, kaya puṭu nguwanpa mulamularingangi munuya Apalatjala ngaparku wangkangi. Ka paluru Godaku tjukurnguru tjanala utira wangkangi alatji, "Panya Godalu kalkuntjtjanya pitjangu anangu tjuṭa wankarunkunytjikitja. Nyanga paluru ini Jesunya." Kaya anangu tjutangku paluru utingku wangkanyangka kuliningi, "Munta-uwa, mulapa Jesunya nganampa kalkuntjtja wirkanu Godalu iyantja."

19

Paulanya Ipitjala Nyinanytja

¹ Ka wati panya Apalatjanya ngura Karintjala nyinanyangka Paulanya anu ngura nyara Ipitjalakutu munu wirkara ngura nyara palula nyangu Jesuku walytja tjuṭa wati 12 munu minyma tjuṭa kulu munu paluru tjanala tjapinu, ² "Nyura wanyu Kurunpa Milmilnga mantjinu Jesuku walytjaringkunytjatjanungku?"

Kaya wangkangu, "Wiya, nganaña Kurunpa Milmilnga kulintja wiyatū. Wiyangka-palkula watarku nyinangi."

³ Ka Paulalu tjanala wangkangu, "Palu kutjupangku nyuranya wanyu nyaa wangkara ʉrungka tjarpatjura baptise-katingu?"

Kaya wangkangu, "Panya John Baptista nganmanytju tjukurpa wangkara anangu tjuṭa baptise-katingi, nyara palu purunytruṭu kutjupangku nganananya baptise-katingi tjukurpa panya palunyatu wangkara."

⁴ Ka Paulalu wangkangu, "Uwa, Johntu tjananya baptise-katingi tjana kuranguru kuntaringkula Godalakutu malaku aruringkunyangka kutju. Palu paluru kutjupa kulu tjanala tjakultjunu alatji, 'Ngayula malangka wati kutjupa pitjanyi, ka nyura uti nyara palumpa mulamularingama.' Alatji Johntu wangkangu. Ka wati nyara paluru panya Jesunya."

⁵ Kaya Paulalu alatji wangkanyangka kulira mulamularingu, ka tjananya ʉrungka baptise-katingu ini Mayatja Jesula. ⁶⁻⁷ Munu palulanguru Paulalu tjanala katangka mara tjunkula Godala tjapinu, ka Kurunpa Milmilnga tjanala unngu tjarpangu, kaya wangka kutjuparira wangka kutjupa kutjupa wangkangi munuya tjukurpa Godalanguru kulintjatjanungku kulu nintingku utira tjakultjunangi wati panya 12-ngku.

⁸ Ka Paulanya ngura nyara palula piṛa mankurpa nyinangi, munu paluru rawa ankupai Jew tjutaku walī inmatjakutu, munu paluru rapangku alatjiṭu Tjukurpa Palya Godaku tjakultjunkupai anangu Jew tjutangka, paluru tjana kulira Jesuku walytjaringkunytjaku. ⁹ Kaya anangu tjara mulamularingu, palu tjara kutjupangkuya kulira alatjiṭu wantingu mulamularingkunytja wiyangku munuya anangu tjutangka mirangka tungunpungkula Mayatja Jesuku tjukurpa tjanala tjakultjunkunyangka tjananya wiyanmanangi. Ka Paulalu tjananya wantikatira Jesuku panya walytjaringkunytja tjuṭa katingu munuya ankula kuulangka tjarpangu

panya kuula nyara palula wati ini Tařanatjalu nintilpai. Ka nyara palulalta Paulalu Godaku tjukurpa tjanala tjakultjunangi tjintu kutjupa tjintu kutjupa. ¹⁰ Munu paluru kuļi kutjara ngura nyara Ipitjala nyinara wali pulka nyara palula aňangu tjutangka Godaku tjukurpa rawangku utira wangkangi. Kaya Jew tjutangku, munu Jew wiya tjutangku kuļu, manta Aitjala nyinanytja uwankarangku kulinu Mayatja Jesuku tjukurpa Paulalu wangkanytja.

Kiipaku Katja Tjuṭa

¹¹ Ka Godalu Paulalawanungku kutjupa kutjupa pułka tjuṭa witulyangku palyaningi. ¹² Panya aňangu tjutangku angkitji munu mantara kutjupa tjuṭa kuļu Paulalu pampuntitja pikatjara tjutakutu katingi, kaya mantara pampura pika wiyaringkula uwankara palyaringangi, kaya palu purunypaṭu mamutjara tjuṭa kuļu palyaringangi mamungku tjananya wantikatinyangka.

¹³ Palu wati Jew kutjupa tjutangku ngura tjutangka para-pitjalira mamu tjuṭa aňangu tjutanguru pakaltjingalpai ngangkarı purunytju. Munuya paluru tjana Paulalu mamu tjuṭa painnyangka kulintjatjanungku palu purunypaṭu Jesuku ini wangkara arkara mamu aňangu tjutanguru painingi alatji wangkara, “Ngalya-pakala! Nganaña Jesunya ini wangkara nyuntunya paini panya nganaña Paulalu alatji wangkanyangka kulinu munula palu purunytjutu paini.” ¹⁴ Panya wati 7-tuya nyanga alatjinggañgi wati panya Kiipaku katja tjutangku. Kiipanya panya wati tjukurtjara kuranyitja. ¹⁵ Ka kunyu mamungku paluru tjana painnyangka kuliřa ngapartji alatji tjanala wangkangu, “Ngayulu ninti Jesuku pulampa Paulaku, palu nyura wanyu yaalitja tjuṭa?” ¹⁶ Ka wati panya mamutjara paluru tjanalakutu ngalya-wararakatingu munu tjananya kuňpu pulkaringkula pułkara alatjitu pungkula pungkula tjanampa mantara kuļu kaťantara minya-minyaňu, kaya wati panya Kiipaku katja tjuṭa mantara kaťalytjara walinguru pakara wirtjapakaňu pika tjutatjara.

¹⁷ Kaya ngura nyara Ipitjala nyinanytja tjutangku nyangatja kulira pułkara alatjitu nguluringu Jew tjuṭa munu Jew wiya tjuṭa kuļu. Munuya palulangurulta Mayatja Jesunya pułkara walkuningi. ¹⁸ Munuya aňangu tjutangku Jesuku mulamularingkunytjatjanungku tjutangka mirangka pakara tjananku tjakultjunangi panya paluru tjana kuļu kura kutjupa kutjupa tjuṭa palyantjatjanungku. ¹⁹ Ka panya Jesuku walytja kutjupa tjarangku ngaňmanytju mamungku witulyankunyangka aňangu tjuṭa initjunkupai. Panya paluru tjana nyiri rulamapi tjuṭa kanyiningi tjukurpa initjunkupaitjara. Munuya nyiri palunya tjananya uwankara ngalyakatira uťulunu urilta warungka kutjantjikitjangku. Panya nyanga alatjiya palyaningi piřuku initjunkunytja wiyangku wantinytjikitjangku. Munuya nyiri uwankara uťulura kantamilara mani nampa nyakula wangkangu, “Nyangatja mani pułkangka payamilantja, mani panya \$50,000-ta.” Munuya paluru tjana aňangu tjutangka mirangka tlinu ka waru pułkangka kampara wiyaringu. ²⁰ Ka nyara palulanguru Mayatja Jesuku tjukurpa ngura uwankarangka lipiringu alatjitu, panya aňangu ngura winitjjangkuya kulinu munuya tjuṭa mulapa Jesuku walytjaringu.

²¹ Ka nyanganpa alatjirinyangka Paulalu kulinigi Jerusalemalakutu ankunytjikitjangku manta ini Matja-tuniyala pulala Akayalawaru. Munu paluru malpa tjuṭangka alatji wangkangu, “Ngayulu Jerusalemalakutu ankula nyara palulanguru ankuku ngura Rome-lakutu Jesuku walytja tjuṭa nyakunytjikitja.” ²² Munu paluru wati kutjara wilurara iyanu Timitjinya

pulanya Iratjatjanya manta nyara Matja-tuniyalakutu, panya watu nyanga paluru pula palunya wirura alpamilalpai. Ka Paulanya pīruku unytju nyinangu ngura pala Ipitjala.

Ipitjala Anangu Tjūta Pikaringkunyta

²³ Kaya nyara palula-arangka anangu tjūta ngura panya Ipitjala pulkara alatjītu pikaringangi Jesuku walytja tjutaku tjana Jesuku ara wañannyangka. ²⁴ Ka ngura nyara palula palumpa tjanampa timpula pulka ngarangi, ka palula unngu apu pulka ngarangi ini Atimatjanya anangu tjūtangku pitjala pupakatira palunya walkuntjaku. Ka watu kutjupa nyinangi ini Tumitu-ritjanya, munu paluru timpula nyara pulka purunypa timpula kułuny-kulunypa tjūta tjiilpanguru palyalpai. Kaya watu kutjupa tjūta kułu palula tjungu war karira timpula kułunypa tjūta palyalpai. Kaya anangu tjūtangku tjana palyantja tjūta payamilara wali walytjangka walytjangka katira unngu tjunkupai palunya tjananya pupakatira walkuntjikitjangku. Kaya Tumitu-ritjalu tjana tjanalanguru mani pulka mantjilpai.

²⁵ Munu paluru tjin̄tu kutjupa palumpa war̄ka tjūta alt̄ingu munu watu panya tjiilpanguru palyalpai kutjupa tjūta kułu alt̄ira tjungunu. Munu tjanala wangkangu, “Kulilaya! Nyura panya ninti nganana panya war̄ka nyanganguru mani pulka mantjilpai. ²⁶ Palu kuvari nyanga Paulalu pitjala anangu tjūtangka tjakultjura kurañu alatji wangkara, ‘Nyanganpa panya watingku palyantja god ngalypa-ngalypa mulamula wiya.’ Alatji wangkara paluru anangu ngura winkitja kurañu ngura nyanga Ipitjala nyinanytja tjūta kutju wiya, palu ala lipitja manta Aitjala nyinanytja tjūta kułukulu. Kaya alatji wangkanyangka kulintjatjanungku kuvari Tayananya walkulwiyangku wantingi. Ka nyura nyakunytjatjanungku nintingku kulini. ²⁷ Ka tjinguru kuvari anangu tjutangku nganana nyanga palyantja tjūta wantiku payamantja wiyangku, kala palulanguru mani pułu palyalku, munula yaaltjiriku mani nganampa wiyingkunyangka? Panya manta winkitjangkuya Tayananya mirawañira walkulpai god pulka kulira. Kaya kuvari palunya uwankarangku anara wantiku Paulalu wangkanyangka kulintjatjanungku. Kala nyaalku paluru tjana Tayananya wantinytjaku-tawara munu timpulakutu kułu pitjawiyangku wantinytjaku-tawara?”

²⁸ Kaya watu panya tjiilpanguru palyalpai tjūtangku paluru wituwitura wangkanyangka kulira pulkara mirpañaringu munuya pulkara alatjītu mirara wangkangi, “Tayananya kutju witulya pulka mulapa nganampa nyinanyi ngura nyanga Ipitjanya ngurara tjūtaku!” ²⁹ Kaya nyara palulanguru Ipitjanya ngurara uwankara pulkara alatjītu pikaringangi munuya watu kutjara witin̄u ini Kayatjanya pulanya Ari-tjakatjanya, panya watu nyanga paluru pula Paulala tjungu pitjangu ngura panya Matja-tuniyalanguru. Kaya palulanguru pulanya witira wala pulkangku katingu wali panya anangu tjūta tjunguringkupaikutu tawunungka panya ngururpa. ³⁰ Ka Paulanya mukuringangi anangu panya palula tjanala ankula wangkanytjikitja, palu Jesuku walytja kutjupa tjūtangkuya palunya markuningi. ³¹ Kaya mayatja kutjupa tjūta palumpa malpa tjūta nyinangi ngura nyara palunya ngurara tjūta munuya paluru tjana anangu kutjupa witura iyanu ankula Paulanya wangkara ngulutjunkunytyaku wali panya palulakutu ankunytjaku-tawara.

³² Kaya wali nyara palula anangu tjūtangku pułu kulira mirara wangkara wañingi. Tjarangku tjarangkuya wangkangi ara kutjupa

kutjupa, munuya putu tjukarurungku kulira alatji wangkangi, “Nyaakula nyangatja tjunguringu winki mulapa?”³³ Kaya anangu Jew tjutangku wati kutjupa ini Alika-tjantanya wangkara wituwitunu kuranyunguru ngarala anangu tjutangka wangkanytjaku. Ka paluru mulapa manyirka katuringu tjanala wangkanytjikitja.³⁴ Palu tjana nintingku palunya ngurkantanu paluru kulu panya wati Jew. Kaya nyakula wantira rawangku alatjitu pulkara mirara wangkangi tjungungku, “Tayananya kutju witulya pulka mulapa nganampa nyinanyi ngura nyanga Ipitjanya ngurara tjutanku!”

³⁵ Ka paluru tjana rawatu miranyangka wati ngura nyara palumpa mayatja pulkangku tjananya paira pilunmanu munu wangkangu, “Ipitjanya ngurara tjuta kulilaya! Manta winkingkaya anangu winki ninti alatjitu nyinanyi panya Tayananya god witulya pulka nyinanyi ngura nyanga Ipitjala. Panya paluru ilkaringuru punkanu ngura nyangangka ka panyala palunya munu palumpa timpula pulka atunymankupai.

³⁶ Ka kutjupangku ara nyanga palunya putu wiyanmananyi. Panya mulapa paluru nyangangka kuwari nyinanyi. Ka nyura uti palulanguru pilunarima munuya anangu kutjupa mapalku pikaringkula pungkula iluntankunytjikitjangku kulintja wiyangku wantima.³⁷ Palu nyaaku nyura wati nyanga palunya pulanya ngalya-katingu nyangakutu, panya paluru pula nganampa god Tayananya anara kuranmankunytja wiyatu, munu pula palumpa timpulanguru kutjupa kutjupa kutitjunkunytja wiyatu.

³⁸ Palu uti Tumitu-ritjalu tjana wati nyanga pulanya wangkanytjikitja mukuringkulampa kuutpakutu katima, munu nyara palulalata wati mayatja tjutangka tjakultjunama palunya pulanya kura ngurkantankunytjaku, ka paluru tjanalta purkarangku nyakula kulira ngurkantanama.³⁹ Munu tjinguru nyura tjukurpa kutjupa utingku wangkanytjikitja mukuringkulampa nguraku mayatja tjutanakutu kati paluru tjana tjunguringkula purkarangku wangkara kulintjaku.⁴⁰ Panya nyura kuwari wiyanguru alatjitu pikaringkula mirara waningi. Kala nganana uwankarangku ngurpangku putu kulini. Ka tjinguru mayatja pulka Tjiitjalu nyara Rome-ala nyinapaingku nyangatja kulintjatjanungku ngayulu tjapilku. Kana nyaa palula wangkaku? Wiya, ngayulu kulu putu kulikku palula utingku tjakultjunkunytjikitjangku, panya nyura wiyanguru alatjitu ngunti pikaringkula mirara waningi.⁴¹ Munu wangkara wiyingkula anangu uwankara witunu ngurakutu ankunytjaku.

20

Paulanya Matja-tuniyala Pulala Kuritjalakutu Ankunytja

¹ Ka pika panya paluru wiyingkunyangka Paulalu altingu Jesuku walytja tjuta pitjala tjunguringkunytjaku. Munu tjananya wangkara kunpuningi Jesunya rawangku tungun-tunguntu wanantjaku munu wangkara wiyingkula tjananya tjakurira wantikatira ma-pakanu alinyt-jara wilurara manta Matja-tuniyalakutu. ² Munu manta nyara palula wirkara, paluru ngura tjutangka para-pitjalira anangu panya Jesuku nganmanypa walytjaringkunytja tjuta, palu purunyntjutu nyakula wangkara kunpuningi. Munu palulanguru ngulalata ulparira ankula manta ini Kuritjala wirkana. ³ Munu paluru ngura nyara palula pira mankurpa nyinangi. Munu paluru kulinu manta panya Tjiriyalakutu pautangka malaku ankunytjikitjangku. Palu Jew tjutangkuya kam-pangkatu wangkara kuliningi palunya iluntankunytjikitjangku. Ka paluru kulinu kutjupangku palula tjakultjunkunyangka munu palulanguru kulinu

arawanutu malaku ankunytjikitjangku manta panya Matja-tuniyalawanu. ⁴ Kaya wati nyanganpa palula tjungu anu, wati ini Tjapatanya Pairetjaku katja ngura ini Parⁱyanya ngurara, munu wati Tjitja-lanikanya ngurara kutjara kulu ini Ari-tjakatjanya pula Tjikan-tatjanya munu wati kutju Tuupilanguru ini Kaiyatjanya munu wati kutjara Aitjalanguru ini Titjikatjanya pula Turu-pimatjanya munu wati Timitjinyalta. ⁵ Nyanga paluru tjanaya kuranyu anu munuya nyinara nganampa pataningi ngura nyara Turuwatjala wirkara.* ⁶ Kala nganana ngura Pilipaila nyinangi Jewku panya inma ini Mai Piltjanya wiyaringkunytjaku patara. Munula palulanguru pautangka tatira kakarara ma-pakanu Turuwatjalakutu munula tjintu 5-nguru ngura palula ma-wirkara panya tjanala tjunguringu, munula tjirirpi 7 nyinangi ngura nyara palula.

Wati Ini Yuti-katjanya Ilunyangka Wankara Pakaltjingantja Ngura Turuwatjala

⁷⁻⁸ Munula Saturday tjintu tjarpanyangka wali warangka tatira ruuma katutjangka inmaku tjunguringu mai kulu ngalkula Jesunya kulintjikitja. Ka Paulalu nyara palula tjukurpa wangkangi anangu tjutangka munu mungawinki ankunytjikitjangku paluru rawangku alatjitu tjanala tjukurpa tjakultjunangi, ka munga kulturingu. Ka ruuma nyara katutja palula tili tjuta kampangi. ⁹ Ka wati kutjupangku ini Yuti-katjalu winta alangka nyinara tjukurpa wangkanyangka kulira kulira nyuurukatingu munu kunkunpa pulkaringkula paluru katunguru alatjitu mantangka punkanu. Kaya anangu tjuta palunya mantjintjikitja wali katunguru warpungkula ukalingu, munuya wirkara palunya mantjira nyangu, “Ilunytjampal nyangatja!”

¹⁰ Palu Paulanya kulu katunguru ukalingu munu wati panya palula katuku watungarakatira palunya ampura tjanala wangkangu, “Tjituru-tjitururinytja wiyaya nyinama! Paluru ilunytja wiyatu. Wanka nyangatja.” ¹¹ Munu palula malangka Paulanya tjana malaku tatinu ruuma panya palulakutu, munuya mai tjungungku ngalkunu. Munu palulanguru Paulalu piruku tjukurpa tjanala wangkangi rawangku alatjitu, ka tjintu ngalya-pakanu. Ka palulanguru Paulanya anu. ¹² Kaya wati panya punkara ilunytjanya ngurakutu wanka katingu munuya uwankara pukulpa mulapa nyinangi.

Turuwatjalanguru Pautangka Ankunytja Ngura Malitatjalakutu

¹³ Ka Paulanya tjina anu ulparira ngura ini Aitjatjalakutu. Kala nganana pautangka tatira kuranyu anu munula wirkara palumpa pataningi ngura nyara palula. Panya Paulalu nganananya ngamanytju wangkangu ngura nyara palula wirkara palunya patara mantjintjaku. ¹⁴ Munu paluru ngula wirkara ngananala tjunguringu. Kala nyara palulanguru tjungu anu pautangka tatira ngura ini Mitilintakutu. ¹⁵ Munula palulanguru mungawinki pautangka piruku anu ulparira, munula ankula mungartjirira manta tjukutjukungka ini Kiyatjala wirkanu munula nyara palula ngaringi. Munula mungawinki piruku pautangka tatira ma-pakanu ulparira munula Ipitjala itiwanu ankula mungartji wirkanu manta tjukutjukungka ini Tjaimatjala. Munula nyara palulanguru mungawinki anu kakarara manta pulkakutu munula mungartjilta wirkanu ngura ini Malitatjala Ipitjalakutu

* ^{20:5} Verse 5 wangkanyi *nganana* panya nyanga palula-arangka wati panya Luke-anⁱa Paulala piruku tjunguringu munu palula tjanala para-ngarangi.

ankunytja wiyaṭu, munula pautanguru ukalingu. ¹⁶ Tjingurula Ipitjalakutu anama palu Paulanya Jerusalemalakutu warpungkula ankunytjikitja mukuringangi, panya ngura nyara palula tjintu ilaringangi inma pulka Pintikatja ngaranytjaku. Ka nyara palulanguru paluru mukuringkunytja wiya manta nyara Aitjala rawa nyinanytjikitja.

Paulalu Wati Ipitjanya Ngurara Atunymankupai Tjuṭa Tjakurinkunytja

¹⁷ Munu Paulalu ngura nyara Malitatjalanguru wangka iyanu ngura Ipitjalakutu alatji wangkara, “Jesuku walytjapiti atunymankupai tjuṭa! Uti nyura pitjala ngayula unytju tjunguringama ngura nyangangka.” ¹⁸ Kaya aŋangu panya paluru tjana mulapatu pitjangu. Ka Paulalu tjanala wirkankunyangka wangkangi, “Kulilaya! Nyura panya uwankaraku ninti, panya ngayulu nyurala ngañmanypa wirkanu ngura nyanga palula Aitjala, munu panya nyura ngayunya nyangangi ngayulu nyurala tjungu rawa nyinara warkarinyangka. ¹⁹⁻²⁰ Ka panyaniya Jew kutjupa tjarangku ngayunya anara kurara pungangi, ka ngayulu tjituru-tjitururira ulangi. Panya ngayulu purkaranytju alatjitu tjituru-tjituruwanu Mayatja Jesuku rawa warkaringi wantintyta wiya alatjitu. Ngayulu tjukurpa wangkangi urilta aŋangu tjutangka mununa nyurampa walingka unngu kuļu wangkangi aŋangu maŋkurta. Munu ngayulu nguļu wiyangku Godaku tjukurpa uwankara nyurala nintiningi tjara kutjupa kutitjura kanyintja wiyangku nyura uwankara kulira kunpuringkunytjaku. ²¹ Mununa aŋangu uwankarangka rawangku wangkapai Jew tjutangka munu Jew wiya tjutangka kuļu tjana kura palyantjatjanungku wantira kunṭaringkula Godalakutu pitjanytjaku munu Jesuku Christaku mulamularingkunytjaku. Uwa, nyura ninti nyanga palumpa tjanampa.

²² “Ka ngayulu kuwari ananyi Jerusalemalakutu Kurunpa Milmiltu witunnyangka, palu ngayulu ninti wiya nyaaringkuku ngayulu ngura nyara palula wirkankula. ²³ Panya ngayulu ngura uwankarangka para-pitjalinkunyangka Kurunpa Milmiltu ngayunya nintira ngulutjunkupai tjana ngayunya ngula mantjira tjailangka tjarpatkunkunytjaku ngura nyara Jerusalemala. ²⁴ Palu ngayulu pulkara nguluringkunytja wiya. Ngayulu mukuringanyi warka nyanga Godalu ngayunya ungkunytjtja warkarira wiyanjtikitja kutju. Panya paluru ngayunya witunu aŋangu tjutangka Tjukurpa Palya Jesunyatjara tjakultjunkunytjaku, panya palurulanya nganananya mukulyangku wankarunu.

²⁵ “Uwa, panya ngayulu rawa para-pitjalinangi ngura tjutangka mununa aŋangu uwankarangka Godaku tjukurpa tjakultjunangi, tjukurpa panya Godalu aŋangu tjuṭa walytjanmara kanyintjtja. Palu kuwari panya ngayulu ananyi, kanī nyura piruku yunpa nyakunytja wiyingkuku.

²⁶ Ka nyanganā kuwari nyurala pulkara wangkanyi. Tjinguru kutjupa tjutangku Godaku tjukurpa kuliṛa Jesuku mulamularingkunytja wiyangku wantiku munuya palulanguru tjintu malatjangka Godaku ngurangka puṭu tjarpaku. Munuya tjinguru ngayunya wangkaku, ‘Nyangangkulanya ngañmanytju wangkanytja wiyangku wantingi.’ ²⁷ Palu wiya, ngayulu panya nyurala wangkangi alatjitu Godalu wangkanytja uwankara nyura kuliṛa palula wanganarangku kulintjaku. ²⁸ Kayanku walytjangku walytjangku pulkara atunymanama ngunti kuliṛa kuraringkunytjaku-tawara munuya Jesuku walytja kutjupa tjuṭa kuļu wiṛuṛa atunymanama, panya Kurunpa Milmiltu nyuranya tjuṇu palunya tjananya atunymara kanyintjaku. Panya Jesunya Godaku katja puṇu kaṭakutjarangka ilura milkaļi tjutingu palumpa tjanampa ngalkilpa, ka nyara palulanguru panya

Godalu tjananya walytjanmanu. Kaya palulanguru tjananya wirura atunymanama. ²⁹ Panya ngayulu nintingku kulini ngayulu ankunyangka malangka aŋangu panya kutjupa tjutangku papa pikati tjuta puŋunytju pitjala Jesuku walytja tjuta kurakurara katiku tjana ngunti kulira iwara kutjupa waŋantjaku. ³⁰ Panya ngula nyuralanguru kutjupa tjarangku Jesuku walytja tjuta tjukurpa ngunti wangkara mukumukulku palunya tjananya waŋantjaku, kaya palunya tjana waŋalku. ³¹ Kayanku pulkara atunymanama munuya panyatja kulinma watarkuriwiyangku, panya ngayulu nyurala mungangka kalala kuļu tiutjarangku tjakultjunangi kurunpa ulara, panya ngayulu nyurala tjungu kuļi maŋkurpa nyinangi rawa alatjiu.

³² “Palu ngayulu nyanga kuwari nyuranya wantikatintjikitjangku Godala tjapini, ka paluru nyuranya rawangku atunymara kanyilku. Ka nyura tjukurpa panya Jesunya nganampa ngalkilpa ilura pakantjitja kulira witulyarira kuŋpu nyinaku. Ka ngula Godalu nyuranya tjukurpa nyanga palumpa mulamularingkunyangka mantjira palumpa walytja kutjupa uwankarangka tjungura tiutjarangku kanyilku ngura ilkaritjangka.”

³³ “Ngayuluna aŋangu kutjupangku mani munu mantara wiru tjuta kanyinnyangka nyakula mantintjikitjangku kulipai wiya. ³⁴⁻³⁵ Panya nyura ninti, ngayulu walytjangku mařangku kutjupa kutjupa tjuta palyaningi manikitjangku ngayuku maiku munu mantaraku. Waintara nguwanpana mani palyaningi ngayuku malpa tjutaku kuļu. Munu panyana alatji palyara nyuranya nintiningi nyura ngapartji pulkara warkarintjaku munu mani mantjira nyuranku kutju kulintja wiyangku ngaltutjara tjuta kuļu ungkunytjaku. Munuya kulinma panya Mayatja Jesulu wangkanyitja, panya alatji paluru wangkangu, ‘Kutjupangku nyuranya ungkunyangkampa nyura unytju tjukutjuku kutju pukulariku, palu nyura aŋangu kutjupa ungkulampa nyura pulkara mulapa pukulariku.’”

³⁶ Ka Paulalu tjanala wangkara wiyingkunyangka paluru tjana uwankarangku tultjungarakatira Godala tjapiningi. ³⁷⁻³⁸ Munuya tjapiro wiyingkula palunya tjakurira tjituru-tjitururira ampura nguku kutjara nyunytjura ulangi. Panya paluru tjanala alatji wangkangu, “Nyanganguru nyura ngayunya piruku nyakunytja wiyingkuku.” Kaya nyara palunya kulintjatjanu pulkara alatjiu tjituru-tjitururingu. Kala palulanguru Paulanya nganaŋa pautakutu ma-pitjangu. Kaya paluru tjana nganaŋanya waŋanu pautangka tatinnyangka tjakurira iyantjikitjangku.

21

Paulanya Jerusalemalakutu Ankunytja

¹ Munula tjananya tjakurinkula wiyingkula pautangka tatira tjukaruru anu ulparira manta tjukutjuku ini Kaatjalakutu. Munula ngarira mungawinki kakarara anu manta tjukutjuku kutjupa ini Ruutilakutu, munula nyara palulanguru anu Patarakulta manta panya pulkakutu.

² Munula ngura nyara palula nyinara pauta kutjupa nyangu manta ini Panitjiyalakutu ankunytjikitja ngaranyangka. Kala pauta panya palula tatira ma-pakanu manta panya Panitjiyalakutu. ³ Munula ankula ankula manta ini Tjaipuritjala ulparirawanu anangi palula wirkankunytja wiyatū. Munula palulanguru manta panya Tjiriyalakutu anu munula mantangka wirkara ukalingu ngura ini Tayala. Panya ngura nyara palulaya pautanguru katinyangka kutjupa kutjupa tjuta mantjira mantangka tjunkupai tjuwa tjutangka tjunkunytjaku.

⁴ Kala tjana kutjupa kutjupa tjuṭa pautanguru mantjira tjunkunyangka paṭara ankula nyangu Jesuku walytja tjuta, kalanya paluru tjana wirungku mantjira palumpa tjanampa ngurangka tjintu 7 kanyiningi. Munuya paluru tjana Kurunpa Milmiltu nintinnyangka Paulanya markunu Jerusalemalakutu ankunytja wiyaku. ⁵ Palu pauta panya ritiringkunya nganana ngura nyara palunya wantikatira anu uru pulkakutu pautangka tatintjikitja, kalanya Jesuku walytja winkingku waṇaṇu tjitjingku minymangku kuļu. Kala nyara palula wirkara nganana uwankara mantangka tultjungararakatingu uru pulkangka itingka munula Godala tjapiningi. ⁶ Munula palulanguru palunya tjananya tjakuriṛa wiyaringkula tatinu pautangka, kaya tjana ngurakutu małaku anu.

⁷ Munula nyara palulanguru Tayanya wantikatira ulparira anu munula ngura ini Talamaitjala wirkanu. Munula ngura nyara palula pautanguru ukalingkula piruku Jesuku walytja tjuṭa nyakula wangkara pukulmanangi munula tjanala tjunguringkula nyinangi tjintu kutju. ⁸ Munula mungawinki piruku tatiṛa ma-pakaṇu ulparira ngura ini Tjiitjariyiyalakutu, munula nyara palula wirkara mantangka ukalingu munula wati ini Philipaku walikutu ankula palula nyinangi. Panya wati nyanga paluru Tjukurpa Palya Jesunyatjara para-pitjalira tjakultjunkupai aŋangu ngurpatja tjuṭangka. Panya palunyaya nganmanytju ngurkantanu Jerusalema wati panya 6 kutjupangka tjungu Godaku war̄ka palyantjaku. ⁹ Ka paluru uŋtalpa kutjara kutjaratjara panya tjananya watingku al̄tinytja wiyat. Ka paluru tjana Godaku wangkatjara tjuṭa, panya Kurunpa Milmiltu nintinnyangkaya Godaku tjukurpa tjukarurungku wangkapai.

¹⁰ Kala ngura nyara palula tjintu mankurpa nyinanyangka wati wangkatjara kutjupa pitjangu ini Aka-patjanya manta Judealanguru. ¹¹ Munu paluru ngananalakutu pitjala Paulaku pilta mantjinu mununku walytjangku tjina munu mara kuļu karpira ngananaala wangkara nintiningi alatji, “Kurunpa Milmiltuni kuwari wangkangu panya Jerusalema wati Jewku mayatja tjuṭangkuya kunyu wati pilta nyangaku walytja witira karpilku munuya palunya ungguku wati panya Jew wiya tjuṭa pungkunytjaku.”

¹² Ka nganana nyanga palunya kulira Paulanya pulkara wangkara markuningi Jerusalemalakutu ankuwiyangku wantira nyinanytjaku. Kaya Jesuku walytja ngura nyara palunya ngurara tjuṭangku kuļu palu puřunypaṭu palunya markuningi. ¹³ Munuya uwankara palumpa ulangi. Ka Paulalu wangkangu, “Wiya, wantimaya ngayuku ulanytja wiyangku, panya nyura ngayuku ularampa ngayunya kurunpa pulkara tjiturū-tjiturūnanyi. Palyantiṇiya ngayunya Mayatja Jesuku tjukurpa wangkanyangka tjailangka karpira tjarpatjunama, palu ngayulu rapa alatjiṇu ngaranyi. Tjingurūṇiya ngayunya palumpa war̄ka palyannyangka pungkula iluntanama, palu ngayulu nguluringkunytja wiya alatjiṇu ngura nyara Jerusalema ankula ilunytjikitja.”

¹⁴ Kala Paulanya puṭu markuntjatjanungku wantingu, munula wangkangu palula alatji, “Wiya palya, Mayatja Jesulu palurunku kulintjatjanungku palyani.”

¹⁵ Munula nyara palulanguru nganana ritiringkula Jerusalemaku mapakaṇu. ¹⁶ Kaya Jesuku walytja kutjupa tjuṭa ngananaala tjunguringkula anu, panya Tjiitjariyanya ngurara tjuṭa, munuya ngananya katingu wati ini Nathanku walikutu nyara palula nyinanytjaku. Panya wati nyara

paluru ngura Tjaipuritjanya ngurara munu panya ngañmanypa mulapa Jesuku walytjaringu.

Paulanya Jamesalakutu Ankunytja

¹⁷ Ka nganaña Jerusalemala wirkankunyangka Jesuku walytja tjutangku nganananya nyakula pukularira paṭara mantjinu. ¹⁸ Ka mungawinki Paulanya nganañala tjungu anu Jamesanya nyakunytjikitja,* kaya wati panya atunymancupai tjuta kuļu palula tjungu nyinangi. ¹⁹ Ka Paulalu kuwari wirkankunytjatjanungku tjanala tjakultjunangi uwankara Godalu palulawanungku Jew wiya tjutangka palyantja, panya paluru ngura tjutangka para-pitjalira tjukurpa Jesunyatjara wangkangi, munu kutjupa kutjupa pulka tjuta tjanala palyanangi, kaya Jew wiya tjuta Jesuku walytjaringangi.

²⁰ Kaya Jamesalu tjana nyanga palunya kulira Godanya mirawañingu munuya Paulala ngapartji wangkangu alatji, “Uwa, walytja wiru! Nyuntu ninti panya aŋangu Jew tjuta mulapaya Jesuku walytjaringu ngañmanypa munuya paluru tjana uwankara tjukurpa panya Godalu Mosenya ungkunytjitungka wanganarangku kulintjikitja pulkara mukuringcupai. ²¹ Ka panya nyuntu ngura kutjupa tjutakutu anu para-pitjalira Godaku tjukurpa tjakultjunkunytjikitja manta nyanga Judealawanungku wiya manta kutjupa tjutawanungku. Munu panyan mulapa aŋangu uwankarangka tjakultjunangi Jew tjutangka munu kutjupa tjutangka kuļukulu. Ka panya ngura nyanga Jerusalemala aŋangu Jew panya Jesuku walytjaringkunytja tjutangku kulinu nyuntu kunyu ngura nyara palula tjanala Jew tjutangka alatji wangkangi, ‘Moseku tjukur-paya kulira wantima munuya nyurampa tjitji nyitayira tjuta watintja wiyangku wantima. Munuya Jew tjutaku arawanu nyinanytja wiariwa.’ Alatjila tjana ngunti tjakultjunkunyangka kulinu panya nyuntu Jew wiya tjutangka wangkanytja-palku, munuya palulanguru kuwari nyuntumpa kuraringanyi. ²² Munuya kulinu nyuntu kuwari pitjanytja munuya tjin-guru nyuntunya pungkunytjikitja mukuringkuku. Kala nganaña nyaalku nyuntunya wankarunkunytjikitja? ²³ Palu wanyu kulila, munu nyanga alatji palyala! Panya nyangatjaya wati Jesuku walytja kutjara kutjara ngaranyi, panya paluru tjana Godala wangkara kalkunu, ka tjananku kalkuntjatjanungku minangka kurpintjaku ngaranyi Moseku panya tjukurwanungku. ²⁴ Ka nyuntu tjanala tjunguringkula ara timpulakutu munu paluru tjana purunytju tjungungku palyanma Moseku arawanungku. Munu nyuntu maningka payamilanma wati tjukurtjarangku nyuranya mangka kaṭara wiyanjtaku. Ka nyara palulanguru Jew panya Jesuku walyt-jaringkunytja tjutangku nyuntu alatji palyannyangka nyakula pukulariku munuya nyuntunya kulilku, ‘Munta-uwa! Nguntilanyaya tjakultjunu Paulalu Moseku tjukurpa wiyanmankunyangka-palku. Panya nyangatja paluru Moseku tjukurpa wanganarangku kulini wantinytja wiyangku.’ Paluru tjana alatji nyuntunya kulilku munuya nyuntumpa pukulariku.

²⁵ “Ka panya aŋangu Jew wiya tjuta Jesuku mulamularingkunyangka nganaña ngañmanytu tjanampa lita walkatjura iyanu munu panyala litangka ara maŋkurpa kutju walkatjura tjananya painu nyanga alatji, kuka panya god ngalypa-ngalypa ungkunytjitetja ngalkuwiyangku wantinytjaku, munu milkali tjikintja wiyangku wantinytjaku, munu kuka

* **21:18** Jamesanya panya Jesuku malanypa, munu paluru lita walkatjunu Jesuku walytja tjutaku tjananya nyakula kuliřa kuŋpuringkunytjaku. Ka lita paluru kuwari ngaranyi nganampa Bible-ta.

milka^{lit}jara ku^{lu} ngalkuwiyangku wantinytjaku, munu aⁿangu kutjupangka ngunti ngariwiyangku wantinytjaku. Alatjila tjanala nga^manytju wangkangu litangka walkatjura.”

²⁶ Ka alatji wangkanyangka Paulalu wangaⁿarangku kulinu munu mungawinki pak^ara wati panya kutjara kutjarangka tjunguringkula anu ara panya palunya palyantjikitja Moseku panya tjukurwanungku. Munu paluru tjana palyantjatjanungku timpulangka tjarpala wati tjukurtjarangka tjakultjunu panya tjintu 7-nguru tjananku kuka katinytjikitjangku pungkula tiliwakara Godanya ungkunytjaku.

Paulanya Timpulangka Witintja

²⁷ Ka tjintu panya 7 ngarala nguwanpa wiaringkunyangka wati Jew manta Aitjanya ngurara tjutangku Paulanya nyangu timpulangka unngu ngaranyangka. Munuya aⁿangu tjutangka para-wangkara tjananya altira wituwituningi tjunguringkula Paulaku pikaringkunytjaku, munuya mulapatu palunya witi^{nu}. ²⁸ Munuya mirara alti^{ngi} kutjupa tjuta ku^{lu} alatji wangkara, “Wati Israelkunu tju^{ta}! Pitjalalanya alpamilala! Wati panya paluru nyangatja, panya aⁿangu ngura winitja wituwitulpai nganampa Israelkunu tju^{ta} kuraringkunytjaku, munu Moseku tjukurpa ku^{lu} kuranmankunytjaku munu timpula nyangaku ku^{lu} kuraringkunytjaku. Munu nyanga kuwari wati Jew wiya maⁿkurpa ngalya-tjarpaljunu timpulaku yaata unngutjangka, kala ngananya nyakula miilaranu nyanga alatji paluru palyannyangka.” ²⁹ (Nyanga palunyaya wangkangu panya Paulalu wati Jew wiya Ipitjanya ngurara ini Turu-pimatjanya ngalyakatingu ngura Jerusalemalakutu, kaya paluru tjana ngunti kuliningi paluru timpulaku yaata unngutjangka tjarpaljunkunyangka-palku, panya Jew wiya tju^{ta} nyara palula unngu tjarpaljaku wiya ngarangi.)

³⁰ Kaya ngura nyara Jerusalemanyangka ngurara tju^{ta} mulapa kulira pulkara mirpaⁿaringu Paulaku munuya uwankarangku ngalya-wirtjapakara palunya witira timpulangru urilkutu itarikatingu, ka tjanala ma^langka kaita panya mapalku patiringu. ³¹ Kaya aⁿangu panya tju^{ta}ngku Paulanya pungkula nguwanpa iluntanangi, ka tjaultji tju^{ta}ngku mayatjangku kulinu aⁿangu winki pikaringkunyangka. ³² Munu paluru mapalku wangkangu wati tjaultji tju^{ta}ngku mayatja maⁿkurta tjanampa tjaultji tju^{ta} mantjira mapalku katinytjaku aⁿangu tju^{ta}ngku munu paluru ku^{lu} tjanala tjunguringkula anu. Munuya mapalku wirtjapakara nyangu aⁿangu tju^{ta}ngku mulatu kaputungku ngarala Paulanya pikangku pungkunyangka. Ka aⁿangu panya tju^{ta}ngku tjaultji tju^{ta} pitjanyangka nyakula palunya wantingu pungkunytja wiyangku.

³³ Ka tjaultjiku mayatjangku ilaringkula wangkangu palumpa tjaultji kutjarangka palunya witira tjiina kutjarangka karpintjaku. Munu paluru aⁿangu tju^{ta}ngku tjinpinu, “Wati ngananya nyangatja? Nyaa wanyu paluru palyanu, ka nyura palunya pungangi?”

³⁴ Kaya tjarrangku ngalya-mirara wangkangi tjukurpa kutju, kaya kutjupa tju^{ta}ngku ngapartji mirara tjukurpa kutjupatu wangkangi. Ka paluru tjana pulkara miranyangka tjaultjiku panya mayatjangku pu^tu alatjitu kuliningi, munu paluru palumpa tjaultji tju^{ta}ngku wangkangu Paulanya tjanampa walikutu katinytjaku. Tjanampa wali-mantu ilia ngarangi. ³⁵ Kaya katira wali panya katukutu tatilpaingka wirkanu,

kaya anangu panya winkingku ngalya-ilaringkula paluru katukutu matatinnyangka nyakula palumpa pulkara mirpanaringu palunya pungkunytjikitja munuya wati panya tjaultji tjuṭa ngalya-utjuningi, kaya ngalya-utjunnyangka paluru tjana Paulanya tjalira katura katingi.³⁶ Kaya anangu panya tjuṭangku mira winkingku wañaningi alatji wangkara, “Iluntara! Wati palatja iluntara!”

Paulalu Anangu Tjutangka Wangkanytja

³⁷ Kaya tjaultji tjuṭangku Paulanya walı unngu nguwanpa matjarpajunkunyangka paluru tjaultjiku mayatjangka tjapinu, “Wanyuna nyuntula wangkaku?”

Ka wati panya mayatjangku ngapartji palula wangkangu, “Palu nyuntu wanyu wangka Kuriki wangkapai?³⁸ Munta nyuntu-mantin wati panyatja Itjipanya nguraṛa, panya nyuntun panyatja anangu tjuṭa mulapampa 4,000 nguwanpa mungaṭu katingu manta nyara Itjipalanguru ngura panya ilytjikutumpa nganampa pikaringkunytjikitjangku mayatja Tjiitjaku panya tjaultji tjuṭaku.”

³⁹ Ka Paulalu ngapartji wangkangu, “Wiya, ngayuluṇa wati Jew, ngura ini Tatjatjanya ngurara. Ngura nyara paluru panya pulka mulapa manta ini Tjilitjiyalal ngururpa ngaranyi. Wanyuni wirungku walatjura, kaṇa anangu nyanga tjuṭangka wangka!”

⁴⁰ Ka wati panya mayatjangku palyanmanu paluru wangkanytjaku anangu tjuṭangka. Ka Paulanya tatilpaingka katu ngarangi tjanala kuranyu munu mara katuṇu tjana nyakula pilunarinytjaku munu palula kulintjaku. Munu paluru uwankara pilunarinyangka tjanala wangkangu wangka Ara-mayikangku tjanampa panya wangka waltyangku.

22

¹ “Walytja tjuṭa! Wanyuniya kulila tjlpi tjuṭangku kułukułu, kaṇa nyurala utingku tjakultjura ngayuluṇatju walytjangku tjukurpa ngayunyatjara.”

² Kaya anangu tjuṭa pilunaringu Paulalu wangka Ara-mayikangku wangkanyangka kulira. Ka paluru wangkangu alatji,³ “Ngayuluṇa mulapa wati Jew nyinanyi, panya ngayuluṇa iti ngaringu ngura panya Tatjatjala manta panya ini Tjilitjiyalal, munuṇa nyara palulanguru pitjala ngura nyanga Jerusalemala nyinara pulkaringu. Kaṇi wati ini Kamaliyaltu kuulangka nintiningi. Wati nyara paluruṇi rawangku wiruṛa nintilpai nganampa panya tjamu tjutaku ara Moseku panya tjanampa, kana palulanguru pulkara alatjitu Godaku mukuringanyi kurunpa winki, panya nyura kuwari palumpa pulkara mukuringanyi, palu purunypa.⁴ Palu nganmanytju panyaṇa mulapa anangu tjuṭa Jesunya wañannyangka kurara pungangi munuṇa tjara iluntanangi munuṇa kutjupa tjuṭa witira katira tjailangka tjarpajunangi wati tjuṭa munu minyma tjuṭa kułukułu.

⁵ Ka wati panya tjukurtjara pulka ngayuku ninti nyinangi Jewku kantjula tjuṭa kułu. Panya ngayulu palula tjanala tjapinu lita walkatjura ngayunya unkul'iyantjaku ngura panya Tamatjakalakutu tjanampa malpa tjuṭakutu nyara paluru tjana nyakula palyanmankunytjaku ngayulu Jesuku walytja tjuṭa witira tjailakutu ngalya-katinytjaku. Munuṇa palulanguru anu ngura Tamatjakalakutu nyara palunya tjananya witira tjailakutu ngalya-katinytjikitja.

⁶ “Munuṇa ankula ngura nyara palula nguwanpa ma-wirkanu, kaṇi ilkaringuṛu tili pitalytji pulkangku pulkara irnyaṇu. Nyangatja alatjiringu

tjintu katu kalala alatji. ⁷ Kaña punkanu mantangka mununa kulinu kutjupangku ngayunya ini wangkanyangka alatji, ‘Saul! Saul! Nyaakuñin tiütjarangku kurañi?’

⁸ “Kaña ngapartji wangkangu palula, ‘Palu ngananyan wanyu?’

“Ka paluru ngayula wangkangu, ‘Ngayuluña Jesunyā panya Nazarethanya ngurara panya nyuntunin tiütjarangku kuraningi.’ ⁹ Kaya wati panya tjutangku ngayula panya tjungu ankunytja tjutangku tili kutju nyangangi, palu tjana wangka kulintja wiya paluru ngayula wangkanyangka.

¹⁰ “Kaña palula wangkangu, ‘Mayatja, palu nyaaña palyalku?’

“Kañi paluru wangkangu, ‘Pakara ara Tamatjakalakutu, ka ngura nyara palula wirkankunyangka wati kutjupangku nyuntula tjakultjunkuku panya ngayulu mukuringkunytja nyuntu palyantjaku.’

¹¹ “Kaña puťu nyangangi panya tili pulkangkuni kuru irnyara kurañu. Kañiya wati panya ngayula tjungu ankunytja tjutangku ngayunya mara witira katuñu mununuña miñara katingu ngura panya Tamatjakalakutu.

¹² “Ka ngura nyara palula wati kutjupa nyinangi ini Ana-nayatjanya, panya wati nyanga paluru Moseku tjukurta wangañarangku kulilpai, kaya Jew tjuta ngura nyara palunya ngurara tjuta palumpa pulkara mukuringkupai. ¹³ Munu wati nyara paluru pitjala ngayula itingka ngarangu mununi wangkangu, ‘Walytja wiru! Kuru alariwa mununi nyawa!’ Kaña mulapaťu mapalku kuru alaringkula palunya nyangangi.

¹⁴ “Kañi nyara palulalta Ana-nayatjalu tjakultjunangi alatji, ‘Panya Godalu nganampa tjamu tjuta iriti kanyiningi, panya paluru nyuntunya kuwari ngurkantanu nyuntu paluru mukuringkunytjtjaku nintiringkunytjtjaku. Panya palurunta ngurkantanu Jesunyā panya Tjukaruru Nyinapainya nyakunytjtjaku, munu paluru wangkanyangka kulintjtjaku. ¹⁵ Ka nyuntu kuwari nyanga nyakunytjtjanungku munu kulintjtjanungku para-pitjalira aŋangu ngura wikitjangka tjakultjunkuku. ¹⁶ Ka nyuntu kuwari rawa patantja wiya pakala munu Jesula tjapila, kanta kutjupangku urungka tjarpatjura baptise-kati. Kanta Godalu nyuntu panya kurantjtjanganru kalypangku pungkuwiyangku wantiku.’ Alatji Ana-nayatjalu ngayula wangkangi.

¹⁷ “Kaña nyara palulanguru małaku pitjangu Jerusalemalakutu. Mununa tjintu kutjupa timpulangka tjarpa Godala tjapiningi, mununa nyangu Mayatjanya ngayula utiringkunyangka. ¹⁸ Kañi paluru wangkangu alatji, ‘Wala pulka pakala munu Jerusalemanyā wantikatira ara kuwaritu! Panya aŋangu nyangantuya tjukurpa tjukaruru nyuntu ngayunyatjara tjakultjunkunyangka kulilwiyangku wantiku.’

¹⁹ “Kaña palula wangkangu, ‘Mayatja! Wati nyanga paluru tjana ngayuku ninti panya ngayulu wali inmatja uwankarangka tjarpa aŋangu nyuntumpa mulamularingkupai tjuta pungkula witira katira tjailangka tjarpatjunangi. Kañiya panya nintingku nyangu. ²⁰ Munuya nyangaku kuļu ninti, panya wati tjutangku Stephennga pulingka atunnyangka ngayulu ngarala nyangangi mununa palumpa tjanampa mantara araltjara tjunkunytja ngayulu atunyamanangi. Panya ngayulu kulu mukuringangi wati palunya iluntankunytjtjaku.’ Alatjiña Mayatjala wangkangi.

²¹ “Kañi Mayatjalu wangkangu, ‘Kuwaritu ara panya ngayuluñanta iyanı ngura parari mulapa malikitja tjutakutu aŋangu panya Jew wiya tjutakutu.’”

²² Kaya tjukurpa nyanga palunya Paulalu wangkanyangka kulira tjana pulkara alatjiitu mirara wangkangu, “Iluntaraya! Nyaaku nyura palunya wanka kanyini?” Alatjiya palunya pulkara mirpanarira mirara wangkangi paluru Jew wiya tjutatjara wangkanyangka, panya paluru tjana Jew wiya tjuṭaku mukuringkupai wiya.

²³ Munuya palulanguru upukuta tjananku kanyintjatjanungku araltjara waningu munuya mantatjunangi ka ulpuru pulka alatjiitu pakaningi.

²⁴ Ka wati mayatjangku tjaultji tjutangka wangkangu Paulanya palumpa tjanampa walingka unngu tjarpatkunkunytjaku munu wiipangka alkantjaku, panya paluru puṭu kulinigi, “Nyaanguru nyanganpa palumpa pulkara alatjiitu kuraringanyi munuya palumpa mirpanarira mirara wangkara waninyi?” Munu paluru mukuringangi tjukurpa tjukaruru kulira nintiringkunkunytjikitja. ²⁵ Kaya tjaultji tjutangku Paulanya wali panya unngu karpiningi alkantjikitjangku, ka Paulalu tjaultjiku mayatjangka wangkangu, “Kulilan! Ngayulu Rome-aku mayatja Tjiitjanya mayatjanmankupai. Ka nyurampa wanyu ara alatji ngaranyi Tjiitjaku anangu tjuṭa kuutpangka ngurkantankunkunytja wiyangku watarku pungkunkunytjaku? Wiya, nyurampa tjukurpa ngaranyi ara-warara tjapiṭa kulira mala ngurkantankunkunytjaku munu nyara palulanguru kura ngurkantaṛa kutjulta palunya pungkunkunytjaku.”

²⁶ Ka wati panya paluru kulinu Paulalu alatji wangkanyangka munu anu palumpa tjanampa mayatjangka wangkanytjikitja munu palula tjapinu, “Nyuntu wanyu ninti wati nyanga palumpa? Munun nintingku nyanga palunya alatjinanyi? Kulila, wati nyanga paluru kunyu Tjiitjanya mayatjanmankupai, kala palunya pungkunkunytjaku wiya ngaranyi.”

²⁷ Ka wati panya mayatjangku nyangatja kulira Paulalakutu pitjangu munu tjapinu palula, “Mulapa nyuntu Tjiitjanya mayatjanmankupai?”

Ka Paulalu wangkangu, “Uwaṇa.”

²⁸ Ka wati panya mayatjangku Paulala wangkangu, “Palu ngayulu Tjiitjanya mani pulkangka payamilaṇu paluru ngayunya walytjanmankunkunytjaku.”

Ka Paulalu wangkangu, “Palu ngayuku mamangku Tjiitjanya mayatjanmankupai, ka ngayulu mamanguru palunya mayatjanmanangi itinguru alatjiitu.”

²⁹ Kaya tjaultji uwankarangku Paulalu alatji wangkanyangka kulira nguluringu munuya nguwanpa palunya pungkunkunytjatanu paṭupaturingu. Ka wati panya mayatja kuļu pulkara ngulu-nguluringu, panya paluru nganmanytu tjananya wangkangu Paulanya karpintjaku, palumpa mayatja-warara tjapiṭa kulira ngurkantankunkunytja wiyangkuṭu.

Paulalu Jewku Kantjula Tjutangka Wangkanytja

³⁰ Ka tjintungka wati panya mayatja paluru kulinigi nintiringkunkitjangku, “Ara nyaanguruya wati nyanga Jew tjuṭa Paulaku pulkara mirpanarinyi?” Munu paluru wati tjukurtjara kuranyitja tjuṭa, munu Jewku kantjula tjuṭa kuļu tjunguringkunkunytjaku altingu, panya paluru tjana tjungungku wangkara kulintjikitjangku. Munu paluru tjaultji tjuṭa wangkangu Paulanya tjailanguru pakaltjingara ngalya-katinytjaku, kaya mantjira ngalya-katira tjanala kuranyu ngaratjunu.

23

¹ Ka Paulalu wati panya Jewku kantjula tjuṭa tjukarurungku nyangangi munu tjanala rapangku wangkangi alatji, “Walytja tjuṭa! Ngayuluṇa titutjarangku alatjiṭu Godala wangaṇarangku kulilkatingi kura kutjupa kutjupa tjuṭa palyantja wiyangku.” ² Ka nyanga alatji wangkanyangka kulira tjukurtjara pulkangku ini Ana-nayatjalu wati kutjupangka wangkangu Paulanya tjaa pungkunytjaku. ³ Ka Paulalu kulira małakukutuṛa wati panya tjukurtjara palunya nyakula wangkangu, “Wiya, nyuntun ngunti palya-palku nyinanyi! Nyaakuṇin pungkunytjaku wangkanyi? Panya Moseku tjukurtu wangkanyi nyanga palu purunyapa pungkunytja wiyangku wantinytjaku. Ka palan nyinara ngayunya ngurkantananyi Moseku arawanungku, munun ngayunya pungkunytjaku wangkara nyuntu alatjiṭu palumpa tjukurpa kuraṇi. Pała palulanguru Godalu nyuntunya ngapartji pungkuku.”

⁴ Ka wati kutjupa tjutangku Paulala itingka ngaranytjatjanungku palula wangkangu, “Nyaakun alatji wangkanyi? Panya wati nyangatja Godaku tjukurtjara pulka nyinanyi.”

⁵ Ka Paulalu palula tjanala wangkangu, “Munta! Ngurpangkuna watarkungku wangkangu wati tjukurtjara pulka kulintja wiyangku. Panya mulapa Moseku tjukurta ngaranyi aŋangu tjutangku mayatja tjanampa kuranmankunytja wiyangku wantinytjaku.”

⁶ Munu Paulalu para-nyakula waṇaṛa tjananya ngurkantanu panya wati kutjupa tjaraya Tjatjutji kaya kutjupatjara Paratji.* Ka paluru tjanala wangkangu, “Walytja tjuṭa, ngayuluṇa mamaku ařangka nyinanyi wati Paratji. Munuṇa mulamularingkupai Godalu aŋangu tjuṭa ilunyangka wankara pakaltjingantjitjaku. Ka nyara palulanguru nyura kuwari ngayunya ngalya-katira ngaratjunu, ngayulu ilunytjatjanu wankaringkunytja wangkanyangka.”

⁷ Ka Paulalu nyanga alatji wangkanyangkaya wati panya Tjatjutji tjutangku palumpa pulkara mirpaṇarira palunya wiyanmanangi, kaya Paratji tjutangku anga-wangkangi munuya palulanguru Tjatjutji tjuṭa munu Paratji tjuṭa tjungu nyinanytjatjanu tjananku ngaparku wangkara tjara-tjararingu. ⁸ Panya Tjatjutji tjutaya puṭu mulamularingkupai aŋangu tjuṭa ilunytjatjanu pakantjitjaku munuya angelpa tjuṭa wiyanmankupai, kurunpa tjuṭa kuļu. Palu Paratji tjutaya ilunytjatjanu pakantjitjaku mulamularingkupai munuya kulipai angelpa tjuṭa mulapa nyinanyi kurunpa tjuṭa kuļu.

⁹ Munuya nyara palulanguru wati panya tjuṭa pulkara alatjiṭu mirara kinkinmara waṇingi. Ka wati kutjupa tjarangku Moseku tjukurpa nintilpai tjutangku pakara pulkara wangkangu, “Nganaṇa wati nyanga palumpa kura puṭu ngurkantananyi. Tjinguru palula angeltu wangkangu munta tjinguru kurunpa kutjupangku wangkangi.” ¹⁰ Munuya rawangku wangkara wangkara pika-pikaringu munuya pulkara ngalytjurmarwa waṇingi. Ka Paulanya pungkula iluntankunytjaku-tawara wati mayatjangku tjaultji tjutangka wangkangu palunya mantjira katira unngu tjarpatjunkunytjaku palumpa tjanampa yiwaṅangka.

¹¹ Ka mungaringkunyangka Mayatja Jesunya utiringkula palula itingka ngarangi munu alatji wangkangu, “Wati wiřu! Nguluringkunytja wiya nyinama panya rapangkun ngayunyatjara tjakultjunangi aŋangu tjutangka

* **23:6** Panya paluru tjanaya Jew tjuṭa palu ini kutjupa kutjupa.

ngura panya Jerusalemala, munun palu purunyntju^u Rome-alakutu ankula tjanala ngapartji rapangku tjakultjunkuku nguluringkunytja wiyangku.”

Paulanyaya Iluntankunytjikitjangku Wangkara Kulintja

¹²⁻¹³ Ka palulanguru tjinturingkunyangka wati Jew kutjupatjara nampa 40 kampangkatu tjunguringu munuya Paulanya iluntankunytjikitjangku wangkara kulinigi, munuya kalkunu kuka mai ngalkuwiyangku wantira palunya-warara iluntara, ngula malangka piruku ngalkuntjikitjangku.

¹⁴ Munuya paluru tjana ankula wati tjukurtjara kuranyitja tjutangka munu wati tjiipi kuranyitja pulka tjutangka ku^lu wangkangi alatji, “Nganaⁿa wangkara kalkunu Paulanya iluntara kutju kuka mai ku^lu ma^la ngalkuntjikitjangku. ¹⁵ Kala mukuringanyi nyura munu Jewku kantjula tjutangku ku^lu wati kutju tjakulpa iyantjaku wati panya tjaultji tjutaku mayatjakutu, ka wati paluru ankula ngunti wangka alatji, ‘Jew tjutaku mayatja tjutaya Paulala tjukurpa kutjupa tjuta piruku tjapira kulintjikitja mukuringanyi. Wanyu kunyu palunya pakaltjingara kati tjanalakutu.’ Ka mayatja nyara paluru tjinguru palunya pakaltjingara ngalya-iyannyangkampa nganaⁿa ngururpa ankula patalku palunya iluntankunytjikitja.”

¹⁶ Palu Paulaku ukaringku kulinu tjana panya kampangkatu wangkanytja uwankara munu paluru kulintjatjanu Paulala tjakultjunkunytjikitja anu tjaultji tjutaku yiwalakutu munu paluru tjarpura Paulala wirkara tjakultjunu tjukurpa panya palunya.

¹⁷ Ka kulintjatjanungku Paulalu wati tjaultji kutju altingu munu palula wangkangu, “Wati nyangatja wanyu nyurampa mayatjakutu ma-kati! Paluru kunyu mukuringanyi kutjupa kutjupa palula tjakultjunkunytjikitja.”

¹⁸ Ka mulapa^{tu} wati panya tjaultjingku Paulaku panya ukari altira katingu tjanampa panya mayatjakutu munu palula wangkangu, “Wati panya Paulaluni tjapinu wati nyangatja nyuntulakutu ngalya-katinytjaku. Paluru kunyu nyuntula kutjupa wangkanytjikitja mukuringanyi.”

¹⁹ Ka wati panya mayatjangku Paulaku panya ukari miⁿara maun^{tal}pa katingu paluru pula pilunta nyinara wangkanytjikitjangku. Ka mayatjangku panya palula tjapinu, “Nyaa wangkanytjikitjan mukuringanyi? Walangkuni tjakultjura!”

²⁰ Ka wati panya Paulaku ukaringku palula wangkangu, “Jew kutjupa tjarangkuya kunyu wangkara kulinigi nyuntula mungawinki tjapintjikitjangku nyuntu Paulanya tjanalakutu katinytjaku kantjula tjutakutu. Tjana kunyu nyanga alatji ngunti palyalku Paulala tjukurpa kutjupa tjuta piruku tjapira kulintjikitjangku-palku, palu paluru tjana kunyu alatji ngunti wangkaku nyuntu tjanala kulira wantir’iyantjaku. ²¹ Ka nyuntu palumpa tjanampa mulamularingkuwiyangku wantima! Panya nyara palula arangkaya kunyu wati 40 nguwanpa kumpira nyinaku iwarangka itingka munuya pitjanyangka nyakula Paulanya pungkula iluntankuku. Panya paluru tjana ngaⁿmanytju wangkara kalkunu mai wantintjikitjangku munuya kunyu Paulanya iluntara kutju paluru tjana piruku mai ngalkuku. Munuya paluru tjana kuwari nyanga pa^tara nyinanyi nyuntu kulira mulamularingkunytjatjanungku palunya katinytjaku. Palu wantima tjanala kulintja wiyangku!”

²² Ka wati panya mayatjangku Paulaku panya ukari wangkara witu^u, munu alatji wangkangu, “Kutjupangka tjakultjunkunytja wiyangku wantima panya nyuntu kuwari ngayula tjakultjunkunytja. Palya!”

Paulanya Iyantja Ngura Tjiitjariyalakutu

²³ Munu wati panya mayatja paluru wati tjaultji kuranyitja kutjara altingu munu pulala wangkangu, “Ankula pula wati tjaultji tjuṭa 200 altira riti palyala munga nyanga kuwari ngura nyanganguru Tjiitjariyalakutu ankunytjaku. Munu tjaultji kutjupa tjuṭa kuļu altira tjungula wati nyanytjutjara 70 nguwanpa munu piruku wati kuļatjara tjuṭa kuļu altira tjungula nampa 200. Munu pula tjaultji palula tjanala uwankarangka wangka ritiringkula paṭantjaku munga nyanga kuwari 9-ta ngura nyangatja nyura wantikatinjtjikitjangku. ²⁴ Munuya nyanytju kutjupa tjuṭa kuļu mantjira riti kanyinma munuya nyanytju kutju uwa Paulanya paluru tatintjaku palunya nyura wankaru katintjikitjangku wati panya mayatja pulkakutu Pilikitjilakutu.” ²⁵ Munu paluru lita walkatjunu tjananya ungkul’iyantjikitjangku nyanga alatji,

²⁶ Uwa, mayatja pułka Pilikitji! Nyangatjaña ngayulu Kulutiyatja Litjiyatjalu nyuntumpa lita walkatjunanyi nyuntumpa pulkara pukularira. ²⁷ Wanyu kulila! Jew tjutangku wati nyangatja witira palunya nguwanpa iluntanangi. Palu ngayulu kulinu panya wati nyanga paluru Tjiitjanya mayatjanmankupai, kaṇa nyangatja kulintjatjanungku ngayuku tjaultji tjutatjarangku ankula mantjira katira palunya wankarunu. ²⁸ Mununa mukuringangi tjanalanguru kulintjikitja, “Nyaanguru nyanganpa wati nyanga palumpa pulkara kuraringanyi?” Kaṇa Jewku kantjula tjutakutu katira tjanala tjapinu ara kulintjikitjangku. ²⁹ Kaya paluru tjana wangkangu, “Wiya, wati palangku ara nganampa kuranı.” Kaṇa ngayulu kulini, “Tjinguru paluru ara tjanampa kuranı, tjinguru wiya.” Palu ngayulu paluru kura palyantja palula putu tjapira kulinigi mununa kulinu, “Nguntiya nyangantu tjanampa aranguru kutju palunya witira nguwanpa iluntanangi.” Kaṇa ngayulu tjana wangkanyangka ngunti kulintjatjanungku palunya witira tjailangka tjarpatjunu. Palu paluru wati kura wiya, kaṇa palunya puṭu tjailangka rawangku kanyini. ³⁰ Palu tjintu kutjupa tjiṭji kutjupangku pitjala ngayunya tjakultjunu panya Jew kutjupa tjarangku kunyu kampangkatu wangkangi Paulanya iluntankunytjikitjangku. Kaṇa palulanguru wati nyanga palunya kuwari mapalkungku nyuntulakutu ma-iyanı. Mununa wati panya Jew tjutangka wangkangu tjana kuļu ankula nyuntula wirkara utingku ara tjakultjunkunytjaku nyaanguru paluru tjana palunya kuranmanangi. Alatji paluru nyiringka walkatjura tjananya ungkul’iyanu.

³¹ Kaya tjaultji tjutangku wangaṇarangku kulira palyaṇu munuya Paulanya katingu munga panya palulatu, munuya ankula ngura ngururitjangka ma-wirkanu munga kultungka ngura ini Anti-patu-ritjala.

³² Kaya mungawinki nyanytjutjara tjutangku ngapartji wati panya Paulanya katingu Tjiitjariyalakutu. Kaya wati panya tjaultji kutjupa tjuṭa malaku pitjangu ngurakutu Jerusalemalakutu. ³³ Kaya wati panya nyanytjutjara tjutangku Tjiitjariyala ma-wirkara lita panya palunya katira ma-ungu wati panya mayatja pułka Pilikitjinya, munuya Paulanya palula kuranyu ngaratjunu.

³⁴ Ka mayatja panya paluru lita mantjira nyakula wangkangu munu palulanguru tjanala tjapinu, “Wati nyangatja ngura ngananya nguraṛa?”

Kaya wangkangu, “Manta ini Tjilitjiyalanguru.”

³⁵ Ka nyangatja kulira mayatja panya paluru Paulala alatji wangkangu, “Palya! Ngulana nyuntu wangkanyangka kulikku, nyuntumpa kuraringkupai tjutangku kuļu pitjala wangkanyangka. Mununa nyara palu-

langurulta kulira nintiringkuku." Munu mayatja panya paluru palumpa tjaultji tju tangka wangkangu Paulanya mayatja Irataku walikutu katira nyara palula unngu kanyira pulkara atunymankunytjaku. Wal paluru kuutpa puruny whole ngarangi panya Iratalu palulakutu pitjala anangu tju ngurkantankupai.

24

Jew Tjutangku Paulanya Kuranmankunytja

¹ Ka tjintu 5 ngarala wiyingkunyangka wati panya tjukurtjara pulka Ana-nayatjanya anu ngura nyara Tjiitjariyalakutu. Kaya palula tjungu anu wati kuranyitja tjilpi pulka tju ta munu wati lawyer ini Tuatalatjanya ku lu.* Nyanga paluru tjanaya pitjangu mayatja panya Pilikitjilakutu Paulanya kuutpangka anangura wangkanytjikitja. ² Ka Pilikitjilu Paulanya ngalya-katinytjaku wangkangu, kaya tjaultji tju tangku palunya tjarpajura wati tjutangka kuranyu ngaratjunu. Ka wati panya Tuatalatjalu Paulanya anangura wangkanytjikitjangku alatji wangkangu mayatja panya Pilikitjila, "Wati wiru! Nyuntu panya mayatja wiru mulapa nganampa uwankaraku nyinanyi munu panyalanyan nintingku tjukarurungku kanyilpai, kala rawa pilunpa wirura nyinapai. Munu panyan palyalpai kutjupa kutjupa wiru tju ta ngura nyanga palula nganana pukulpa nyinanytjaku. ³ Kala ngura uwankarangka wirura pukulpa nyinapai munula nyanga palulanguru nyuntunya pulkara mirawanipai. ⁴ Palu nyuntu pakuringkunytjaku-tawara na tjinguru rawangku wangkanytja wiyangku wantiku, ka wanyu wirungku nganampa tjukurpa kulinma. ⁵ Panya wati nyangangku nganananya anangu Jew tju ta ngura winkitja tjituru-tjitururingkula pikaringkunytjaku palyalpai, kala palulanguru mirpanarira pulkara ngalytjurmarra mirapai. Panya anangu kutjupa tju tangkuya wati Nazarethanya ngurara wanarinkupai Jesunya panya, ka panya wati nyanga paluru palumpa tjanampa mayatja nyinanyi. ⁶⁻⁸ Munu paluru Jerusalemala nganampa timpulangka tjarpala arkara kuraningi, kala nyakula palunya witira tjaillangka tjarpajunu.* Wanyu nyuntu palula tjapila, kanta paluru tjakultjura. Kan nyuntu mulapa kulikku nganana tjukarurungku wangkanytja." Alatji Tuatalatjalu wangkangi mayatja panya Pilikitjila. ⁹ Kaya Jew kutjupa tju tangku ku lu Tuatalatjala tjunguringkula mayatja panya palula wangkangi, "Uwa, mulapa nyangangku tjukarurungku wangkanyi."

Paulalu Palurunku Ara Tjakultjunkunytja Mayatja Pilikitjila

¹⁰ Ka wati panya mayatjangku Paulanya mra urira wangkangu paluru ngapartji wangkanytjaku. Ka Paulalu wangkangu alatji, "Uwa, ngayulu ninti nyuntumpa, panya nyuntun nganampa nyanga ngura rawangku kanyiningi mayatjangku munu panyalanyan Jew tju ta kuutpangka tjapira kulira ngurkantankupai. Palulanguru nyuntu nganampa ninti nyinanyi, ka na pukularira nyuntula rapangku utira wangkanyi ngayulu

* **24:1** Tuatalatjanya wati Jew palu paluru Kuriki wangkapai tju ta puruny whole nyinapai. * **24:6-8** Wati kutjupangku kunyu verse nyanga palula ngururpa tjukurpa kutjupa walkatjunu munu mala tjungunu Luke-aku tjukurta alatji – Panya nganana mukuringangi palunya kuutpangka ngaratjunkula nganampa arawanungku ngurkantankunytjikitja. Palu Mayatja Tjiitjaku tjaultji pulkangku ini Litjiyatjalu tjaultji tjuatjarangku pitjala nganananya untu-untra pauntjingara wangkangi munuya Paulanya tjulyara katingu. Munu wati paluru nganananya wangkangu pitjala nyuntula tjakultjunkunytjaku wati nyanga palunya anangura wangkanytjatjanungku.

palyantja nyuntu tjukarurungku kulintjaku. ¹¹ Nyangatjana nyuntula tjukarurungku wangkanyi. Palu nyuntu mukuringkulampa aŋangu kutjupa tjutangka tjapira kulila, kaya tjukurpa palunyaŋu nyuntula wangkaku. Panya tjintu 12 mungaŋu ngayulu anu Jerusalemalakutu Godanya timpulangka walkuntjikitja. ¹² Munuŋa timpula nyara unngu ngarala ngayulu aŋangu kutjupaku pikaringkunytja wiyat, munuŋa palu purunypaŋu wali inmatja kutjupa tjutangka kuļu ngayulu ngalytjurmarə wangkara pikaringkunytja wiyat. Palu ngayulu Jerusalemala wirura para-ngarangi aŋangu tjuṭaku pikaringkunytja wiya alatji. ¹³ Kani nyangantu ngunti ngayunya kuranmananyi munu nyangaya tjukurpa puṭu kulini ngayunyatjara tjukarurungku wangkanytjikitjangku.

¹⁴ “Palu ngayulu nyanga nyuntula kuwari tjakultjunanyi tjukurpa tjukaruru nyuntu kulintjaku. Panya ngayulu nganampa tjamupitiku God walkulpai Aipuramaku Isaacaku tjanampa God. Palu ngayulu Jesuku mulamularingkula palunya wanalpai munuŋa palulawanungku Godanya walkulpai. Palu Jew kutjupa tjutangkuya Jesunya analpai munuya palumpa iwara kuranmankupai. Palu ngayulu paluru tjana purunypa pulkara mulamularinganyi tjukurpa panya Godalu Mosenya ungkunytjt-jaku munu tjukurpa panya wangkatjara tjutangku kuļu walkatjunkunytjt-jaku. ¹⁵ Munuŋa tjana purunytjuṭu ala-alangku paṭara kulini, ‘Mulapa Godalu ngula aŋangu uwankara ilunyjtjtja pakaltjingalku aŋangu palya tjuṭa munu kura tjuṭa kuļukulu.’ ¹⁶ Uwa, ngayulu pulkara mulamularinganyi panya Godalu ngayunya ngula ilunyangka wankara pakaltjin-galku, munuŋa palulanguru arkara Godala miřangka rawa palyanyku nyinanyi aŋangu tjutangka miřangka kuļu ngayunya kuranmankunytjaku-tawara.

¹⁷ “Panya ngayulu ngañmanypa anu Jerusalemalanguru munuŋa rawa kuli tjuṭa nguwanpa ngura tjutangka para-ngaranytjtjanu ngula ngura nyara palulakutu malaku anu munuŋa aŋangu ngaltutjara tjuṭaku mani katingu palunya tjananya ungkunytjikitjangku. Munuŋa palulanguru kuka katingu timpulakutu Godanya ungkula walkuntjikitjangku. ¹⁸ Kanji nyara palula nyangu timpula unngu ngarala palyannyangka. Panya ngayulu ngañmanytju Moseku ařawanungku palyantjtjanungku kuka ungangi. Kaya aŋangu tjuṭa kuļu ngayula ila para-ngarala arintankunytja wiyat. ¹⁹ Palu mulapaya aŋangu panya Jew maŋkur-maŋkurpa kutju nyara palula ngarangi manta panya Aitjanya ngurara tjuṭa kutju. Munuya uti paluru tjana pitjama nyuntula miřangka ngayunya wangkanytjikitja panya nyara paluru tjana kutjuṇiya ngayunya nyangu. ²⁰ Munta, tjlpi nyanga palula tjanala wanyu tjapila. Panya paluru tjanaṇiya Jerusalemala Jew tjuṭaku kantjula tjutangka kuranyu ngaratjunu munuṇiya puṭu tjapira kuliningi ngayulu kura palyantja kulintjikitjangku. ²¹ Palu mulapa tjinguru tjana kutjunguru ngayunya kuranmanangi panya ngayulu alatji tjanala wangkangu, ‘Nyura ngayunya kuutpangka nyanga ngaratjunu ngayulu miri tjuṭa panya ilunytjtjanu pakantjtjtja kuļira mulamularingkunyangka.’ Nyanga palunya wangkanyangka tjana tjinguru ngayunya kuranmananyi, ka nyanganā kuwari nyuntula kuranyu ngaranyi nyuntu ngayunya kuļira ngurkantankunytjaku.” Alatji Paulalu wangkangi.

²² Ka Pilikitjilu wati panya Tuatalatjalu pula Paulalu wangkanyangka kuļira tjanala wangkangu Jew panya tjutangka alatji, “Wiya, palyala wanti ngulaku wati panya tjaultji tjuṭaku mayatja Litjiyanya pitjanytjaku paṭara. Kanā nyara palula-ařangka nyurala piruku kuļira nintiringkuku munuŋa

Paulanya kulira ngurkantankukulta tjinguru palya, tjinguru kura." Panya Pilikitjinya ngañmanypa nintiringu tjukurpa nyanga Jesunyatjaraku kutjupa tjuñangku palula wangkanyangka kulintjatjanu. ²³ Munu paluru tjaultji kuranyitjangka wangkangu alatji, "Paulanya katira ałunymanama palu karpintja wiyangku kanyinma munu paluru urira tjukutjuku parangaranytjaku wantir'yanma. Munu palumpa malpa tjuñangku mai, kuka mantara kułu palunya katira ungkunyangka paintja wiyangku wantima. Palya!"

Paulalu Pilikitjila Pulala Wangkanytja

²⁴ Ka tjintu mañkurpa nguwanpa ngarala wiaringkunyangka Pilikitjinya pula kurirara minyma panya ini Turatjilanya pitjangu Paulanya nyakunytjikitja. Minyma nyanga paluru kułu panya Jew. Ka Pilikitjilu tjaultjingka wangkangu Paulanya pakaltjingara pulalakutu ngalyakatinytjaku. Munu paluru pula nyinara kuliningi Paulalu tjukurpa Jesunyatjara tjakultjunkunyangka aña panya Jesuku mulamularingkula Godaku waltyjaringkunytjatjara. ²⁵ Munu Paulalu piłuku tjukurpa kutjupa tjuña kułu palula pulala tjakultjunangi, panya Godanya mukuringanyi anangu tjuña palyanyku nyinanytjaku munu purkarangku kulintjaku kura palyantjaku-tawara. Munu paluru tjakultjunangi tjintu panya małatja, panya nyara palula arangka Godalu anangu uwankara manta winkitja ngurkantara tjaralku. Palu alatji wangkanyangka wati panya Pilikitjinya kulira ngulu-nguluringu munu wangkangu, "Uwa palya! Alatjiwantu, kaña ngula piłuku mukuringkula nyuntunya ałtiku ngayula pitjala piłuku wangkanytjaku." ²⁶ Munu paluru unngu kuliningi, "Tjinguru Paulalu ngayunya mani ungkunyangka kutju ngayulu palunya walatjunkuku." Munu nyara palulanguru paluru rawangku Paulanya ałtipai palula pitjala nyinanytjaku, munu paluru pula nyinara wangkapai.

²⁷ Ka Paulanya rawa nyinangi ngura nyara palula tjailangka purunypa. Ka yiya kutjara ngarala wiaringkunyangka mayatja panya Pilikitjinya anu, ka palumpa arangka wati kutjupa ini Putjiyatja Pitjitjanya Judeaku mayatjaringu munu paluru Jew tjuña pukulmankunytjikitjangku Paulanya tjailangka nyinanytjaku wantingu ngura nyara Tjiitjariyala.

25

Paulalu Tjapintja Rome-aku Mayatja Tjiitjanya Nyakunytjikitjangku

¹ Uwa, wati panya mayatja Pitjitjanya Tjiitjariyalakutu pitjala manta panya Judeaku mayatjaringu munu tjintu mankurpa nyinara paluru ngura Tjiitjariyalanguru ulparira unytju anu Jerusalemalakutu. ² Kaya ngura nyara palula wati tjukurtjara kuranyitja tjuñangku munu Jew tjutaku mayatja tjuñangku kułu mayatja panya Pitjitala pitjala tjukurpa Paulanyatjara tjakultjunangi panya paluru kura tjuña palyantjtja. ³ Munuya palula pulkara tjapiningi alatji wangkara, "Wanyu nganaña pukularinytjaku wati pala Paulanya malakungku iyala nyanga Jerusalemalakutu." Alatjiya ngunti tjapiningi panya ngañmanytjuya wangkara kuliningi Paulanya malakungku iyannyangka wanara ngururpa iluntankunytjikitjangku. ⁴ Palu Pitjitalu tjanala wangkangu, "Wiya! Ngayuku tjaultji tjuñangku Paulanya kanyini ngura nyara Tjiitjariyala, ka ngayulu tjukutjuku nyinara małaku ananyi. ⁵ Ka nyura uti mukuringkulampa wati kuranyitja mañkurpa ngayula tjungu iyanma. Kaya paluru tjana ngura nyara palula palunya nyakula ngayula tjakultjunkuku aña palunyatjara. Tjinguru paluru mulapa kura palyanu, mutta tjinguru wiya."

⁶ Munu wati panya mayatja Pitjitjanya tjintu tjuṭa piruku tjanala nyinangi Jerusalemala tjinguru tjintu 8, tjinguru 10. Munu palulangurulta paluru małaku anu Tjiitjariyalakutu. Ka wati panya Jew kuranyitja tjuṭa kuļu palula tjungu anu munuya ma-wirkanu. Ka mungawinki mayatja panya paluru ruuma panya kuutpa wangkapaikutu anu munu tjarpala mayatjaku panya tjiyangka nyinakatingu. Munu paluru tjaultji tjuṭangka wangkangu Paulanya altira ngalya-katira palula kuranyu ngaratjunkunytjaku palula tjapira palunya ngurkantankunytjikitjangku.

⁷ Ka tjana Paulanya wirkakatinyangka wati panya Jew kuranyitja tjuṭa palula para-ngarala arintanu. Munuya paluru tjana pulkara alatjitu ngunti palunya kuranmanangi tjukarurungku wangkara-palku panya tjukurpa palunya tjananyaya mulamulangku wangkanytja wiya tjana ngunti wangkangi tjana mirpañarira.

⁸ Ka Paulalu wangkangu palurunku walytjangku kulira, “Ngayulu kura kutjupa kutjupa palyantja wiyat anangu nyanga Jew tjutaku, mununa timpula kuļu kurantja wiyat, mununa mayatja pulka Tjiitjanya kuļu kurantja wiyat.”

⁹ Palu Pitjitjanya mukuringangi Jew tjuta pukulmankunytjikitja munu paluru Paulala wangkangu, “Nyuntu Jerusalemalakutu ankunytjikitja mukuringkunyangkampa ngura nyara palula nyuntunya kuutpangka tjunkuku, mununa nyuntumpa mirpañtu tjuṭangku nyuntunya wangkanyangka kulira ngurkantankuku.”

¹⁰ Palu Paulalu wangkangu, “Wiya! Ngayulu nyangangka alatjitu ngaranyi wali nyanga kuutpa wangkapaingka unngu nyuntu mayatja Tjiitjalawanungku ngayunya ngurkantankunytjaku. Kanı nyaaku Jerusalemalakutu iyanma? Panya ngayulu kura kutjupa kutjupa palumpa tjanampa palyantja wiyat wati nyanga Jew tjutaku. Ka panyan nyuntu kuļu ninti tjukurpa nyanga palumpa. ¹¹ Tjinguruni nyura mulapa kura pulka palyannyangkampa iluntanama, kaña palya iluma. Palu nyangan-tuniya wiyangru alatjitu kuranmananyi tjukarurungku-palku, ka nyuntu ngapartji ngayunya puṭu unganyi paluru tjana iluntankunytjaku. Palu ngayulu mukuringanyi Rome-aku mayatjangku Tjiitjalu ngayuku tjukurpa kulira ngurkantankunytjaku ngayulu wangkanytjitungru.”

¹² Ka palulanguru wati panya mayatja Pitjitjalu palumpa malpa tjuṭangka tjunguringkula tjana kaputungku tjaalytju wangkara kuliningi. Munu palulanguru Pitjitjalu Paulala wangkangu, “Nyuntu panyan wangkangu Tjiitjanya nyakunytjikitjangku, kaña palya kulini nyuntunya palulakutu iyantjikitjangku ngura nyara Rome-alakutu.”

Paulanya Katinytja Mayatja Akuripalakutu

¹³ Ka tjintu małkurpa nguwanpa ngarala wiyaringkunyangka, wati mayatja kutjupa ini Akuripanya pula małanykira pitjangu, minyma ini Punitjanya, ngura Tjiitjariyalakutu mayatja pulka Pitjitjanya nyakunytjikitja. ¹⁴ Munu paluru pula rawa nguwanpa nyinangi ngura nyara palula tjintu tjuṭa nguwanpa, ka Pitjitjalu tjukurpa panya Paulanyatjara tjakultjunnangi wati panya Akuripala, munu alatji wangkangu, “Ngura nyangangka wati kutjupa nyinanyi tjailangka wati panya Pilikitjilu wantikatinytja.

¹⁵ Ka ngayulu mungatu Jerusalemala nyinanyangka Jew tjutaku tjukurtjara kuranyitja tjuṭangku munu wati tjlpi pulka tjuṭangku kuļu wati palunya kuranmanangi munuya palunya puntura wangkangi. Munuya paluru tjana ngayula wangkangi wati panya palunya kura ngurkantara iluntankunytjaku.

16 “Palu ngayulu tjanala wangkangu alatji, ‘Panya nganana Tjiitjanya mayatjanmankupai tjutangku wati kutjupangku kura palyan-nyangka mapalku iluntankupai wiya, palu kuutpangka-wararala tjunkupai kuranmankupai tjutangka mirangka palurunku ara walytjangku tjukarurungku wangkanytjaku. Munula uwankara kulira kura ngurkantankunytjatjanungku kutju palunya iluntankupai.’ Alatjiña tjanala wangkangu. **17** Kaya wati paluru tjana ngura nyanga Tjiitjariyalakutu pitjangu kuutpangka palunya wangkara kuranmankunytjikitja. Kaña ngayulu mungawinki ankula nyinakatingu mayatjaku panya tjiyangka mununa wati kutjupa witunu Paulanya *altira* ngalya-katinytjaku. **18-19** Kaya palumpa panya kuraringkupai tjutangku Paulanya ngalya-wirkakatinyangka nyakula uwankara pakara ngarangu munuya palunya kuranmanangi. Kaña ngayulu kuliningi tjinguru nyanganpa palumpa kuraringanyi kura pulka palyantjitjanguru, palu wiya tjanampa aranguru kutjuya palunya alatjinangi. Palu paluru tjana nyanga ngayulu kulintjtja puruny pa mulamulangku palunya kuranmankunytja wiyat. Panya anangu nyanga paluru tjanaya ngunti palumpa mirpañaringi tjukurpa wati ini Jesunyatjara wangkanyangka, panya Jesunya kunyu ilungu palu Paulalu kunyu wangkangi Jesunya ilunytjatjanu pakantja munu kuwari wanka nyinanytja.

20 “Palu ara ngurpangkuna putu kuliningi palula tjapira kulintjikitjangku. Mununa palulanguru Paulanya tjinapinu, ‘Nyuntun mukuringanyi Jerusalemalakutu małaku ankunytjikitja ngura nyara palula kuutpangka kulira ngurkantankunytjaku?’ **21** Ka paluru wangkangu, ‘Wiya! Ngayulu mukuringanyi Rome-aku mayatja pulkangku Tjiitjalu ngayulu wangkanyangka kulira ngurkantankunytjaku.’ Mununi paluru tjinapinu ngura nyanga Tjiitjariyala paṭara kanyintjaku. Kaña palyanmanu ngura nyangangka palunya tjaultji tjutangku patara kanyintjaku ngula iyantjikitjangku mayatja panya Tjiitjalakutu.” Alatji Pitjitetjalu wati panya Akuripala tjakultjunu.

22 Ka paluru kulira wiyaringkula paluru ngapartji wangkangu, “Ngayulu mukuringanyi paluru wangkanyangka kulintjikitja.”

Ka Pitjitetjalu wangkangu, “Palya, mungawinkin kulikku paluru wangkanyangka.”

23 Ka tjinitungka Akuripanya pula Punitjanya mantara wirungka tjarpangu panya mayatjangku kanyilpaingka wiru mulata, munu paluru pula pitjangu wali pulkakutu panya kuutpa wangkapaikutu. Kaya ngura nyanga Tjiitjariyaku mayatja tjuṭa palula pulala tjunguringu wati tjaultji kuranyitja tjuṭa kułukulu. Munuya uwankara tjungu ruuma panya palula tjarpala nyinakatingu. Ka mayatja Pitjitetjalu tjaultjingka wangkangu Paulanya mantjira ngalya-katinytjaku. **24** Ka Paulanya ngalya-wirkakatinyangka mayatja panya paluru wangkangu anangu tjutangka, “Uwa, mayatja Akuripa munu anangu uwankara, kułikaya! Wati nyanga palunyatjaraña kuwari nyurala tjakultjunanyi. Panya wati Jew winkingkuya nyanga palumpa kuraringkula ngayula tjakultjunnangi Jerusalemania ngurara tjutangku munu ngura nyangatja ngurara tjutangku kułukulu. Munuya paluru tjana uwankarangku ngayula mirara wangkangi alatji, ‘Wati palatja iluntara rawangku wanka kanyintja wiyangku!’ **25** Palu ngayulu paluru tjana kuranmara wangkanytjaka kulinu mununa wati nyanga paluru kulu palumpa ara walytjangku tjakultjunkunytja kulinu. Mununa ara uwankara kulintjatjanungku

puṭulta kuliningi, ‘Kura nyaa palyannyangkaya palunya iluntankunytjik-itja mukuringanyi?’ Kanı paluru panya tjapinu mayatja Tjiitjalu palunya nyakula ngurkantankunytjaku, kaṇa palya kulini palunya Tjiitjalakutu iyantjikitjangku ngura nyara Rome-alakutu. ²⁶ Palu ngayulu puṭu kulini tjukurpa nyaana nyiringka paluru kurantja walkatjunkunytjikitjangku mayatja panya Tjiitjalu nyakula nintiringkunytjaku? Wati nyangangku kura nyaa palyanu, kaṇa walkatjura? Palu puṭuna kulini. Munu nyanganā kuwari palunya nyuralakutu ngalya-katingu munu nyuntulakutu kulu. Wanyu Mayatja Akuripa, nyuntu palula tjapila palula kulira nintiringkunytjikitjangku munu paluru wangkanyangka kulintjatjanungku ngayulalta tjakultjura, kaṇa nyiringka walkatjura. ²⁷ Tjinguru paluru kura kutjupa kutjupa palyannyangkaṇa nyiringka walkatjunama. Palu wiyangkaṇa puṭu palunya watarku iyanı mayatja Tjiitjalakutu tjukurpa nyiringka walkatjunkunytja wiyangka. Panya Tjiitjanya kulintjikitja mukuringkuku nyaanguruya palumpa kuraringanyi munuya anangurra wangkanyi.’ Alatji Pitjitjalu mayatja Akuripala wangkangi.

26

Paulalu Palurunku Tjakultjunkunytja (Acts 9:1-19; 22:6-16)

¹ Ka wati panya Akuripalu Paulala wangkangu, “Uwa palya, nyuntunku kuwari waltytjangku tjakultjura!”

Ka palulanguru Paulalu maṛangku uwanmanu palurunku waltytjangku wangkanytjikitjangku, munu alatji wangkangu, ² “Mayatja Akuripa! Ngayulu kuwari pułkara pukularinyi ngayuku ara nyuntula tjakultjunkunytjikitja, panya Jew tjuṭangkuṇiya ngayunya kuranmanangi munuṇiya puntura wangkangi. Kanı kuwari nyanga nyuntula mirangka ngarala tjana ngunti wangkanytjitja uwankara wiyanmananyi alatjiṭu munuṇatju ngayuku tjukurpa nyuntula tjukarurungku tjakultjunanyi. ³ Panya nyuntun nganampa Jew tjuṭaku tjukurku ninti alatjiṭu nganampa ara tjuṭaku kulu. Palulanguruṇa nyuntumpa pułkara pukularinyi kuwari nyuntula wangkanytjikitja. Panya ara nyanga palula tjanalanguruṇiya ngayunya anangurra wangkapai. Kanı wanyu wirungku purkarangku kulinma ngayulu wangkanyangka.

⁴ “Panya wati nyanga Jew tjuṭaya uwankara ngayuku ninti alatjiṭu panya ngayulu ngura nyara Jerusalemala tjitjinguru alatjiṭu nyinara pułkaringu ngura waltytjangka. ⁵ Ka tjana iritinguru alatjiṭu ngayuku ninti nyinangi. Tjinguru paluru tjana mukuringkulampa ngayunya nyuntula tjukarurungku tjakultjunama panya ngayulu wati Paratji alatjiṭu nyinangi. Panya Paratji tjuṭangku Jew tjuṭaku ara wanganarangku alatjiṭu kulilpai tungunpungkunytja wiyangku panya Jew kutjupa tjuṭangka waintara. ⁶ Ka nyanganā kuwari palumpa tjanampa kukanyaringu, panya Godalu nganampa waltytja tjuṭa iriti kalkunu ilunyangka wankara pakaltjingantjikitjangku kaṇa kalkuntja nyara palumpa mulamularinganyi alatjiṭu, kaṇiya palulanguru ngayunya kuranmankupai. ⁷ Palu kalkuntja panya paluru utiringkunytjaku paṭara nganaṇa Jew tjuṭangku Godanya rawangku alatjiṭu walkulpai mungangka kalala kulu. Ka wati wiru, wanyu kulila! Nyanga alatji palyannyangkaya wati nyanga Jew tjuṭangku ngayunya kukanyamanu wiyanguru alatjiṭu. ⁸ Ka nyura nyaaku wanyu puṭu mulamularinganyi Godalu ilunytjitja wankara pakaltjingantja wangkanyangka?

9 “Palu mulapa ngayulu kuļuṇa ngañmanytju tjana purunytju kulinungi Jesuku waltyta tjuṭa kurantjikitjangku wiyanguru alatjitu. **10** Munuṇa ngayulu ngañmanytju alatji palyaningi Jerusalemala, munuṇa tjananya witira tjailangka tjarpatjunangi wati tjukurtjara kuranyitja tjuṭangku ngayunya wangkara palyanmankunyangka. Munuṇa tjana Jesuku waltyta tjuṭa iluntankunyangka ngayulu pukulariratu palyanmanangi. **11** Munuṇa walī inmatja tjuṭangka tjarpara rawangku alatjitu palunya tjananya kurara wililytjinganigi Jesuku panya waltyta tjuṭa, munuṇa tjananya wituwituningi Jesunya wiyanmankunytjaku. Munuṇa tjanampa pulkara mirpanarira ngura parari ankupai malikitja tjuṭaku ngurakutu munuṇa Jesuku waltyta kutjupa tjuṭa ngura nyara palula tjanala nyinanytja tjuṭa kuļu kuralpai.

12 “Munuṇa kutjupa-aralta anangi ngura nyara Tamatjakalakutu. Panya ngayunya tjukurtjara kuranyitja tjuṭangku wangkara wituṇu ngura nyara palula ankula Jesuku waltyta tjuṭaku pikaringkunytjaku. **13** Ka wati wiru, wanyu kulila! Kaļala nyara palulaņa tjiņtu katu ngaranyangka iwarangka anangi, munuṇa nyangu tili pitalytji pulka ilkarunguru irnyanyangka. Ka tili nyara paluru tjirirpi purunypa wiya pulka mulapa ngayula irnyaningi munu ngayula panya tjungutja tjuṭangka kuļu. **14** Kala uwankara mantangka punkaņu. Kaņa wangka kulinu ngayula alatji wangkanyangka wangka panya Iipurungku, ‘Saul! Saul! Nyaakuņin tiutjarangku kuraņi? Panya nyuntu rawa tungun-tungunarira nyuntunku waltytjjangkumpa kuraņi.’

15 “Kaņa ngayulu wangkangu, ‘Palu ngananyan wanyu?’

“Ka Mayatjalu wangkangu, ‘Ngayuluṇa Jesunya, panya nyuntuņin tiutjarangku kuraņi. **16** Palu pakala kuwari panya ngayulu nyuntunya ngurkantanu ngayuku warkarinytjaku, panya ngayulu kuwari nyuntunya witira iyanī ngayunya nyanga nyakunytjatjanungku anangu tjuṭangka tjakultjunkunytjaku. Munuṇa nyuntula ngula piruku utiringkuku, kan pirukutu ngayunya nyakunytjatjanungku tjanala tjakultjunkuku. **17-18** Kaņa nyuntunya atunyti wankaru kanyilku anangu Jew tjuṭanguru munu Jew wiya tjuṭanguru kuļu. Panya kuvariņanta iyanī nyara palula tjanalakutu, ka nyuntu tjanala wirkara tjukurpa tjukařuru wangkara nintilku tjana kuliřa nintiringkunytjaku, panya paluru tjana mungawalurungka purunypa watarku alatjitu nyinanyi. Ka tjananya nin-tila Satanta kulilwiyangku wantira kampa kutjuparira Godala kutjungka kulintjaku. Ka tjananya kura palyantjtjangu Godalu kalypangku pungkuwiyangku wantiku ngayuku mulamularingkunyangka nyakula. Ka palulanguru paluru tjana ngayuku panya waltyta kutjupa tjuṭangka tjun-guringkula pukulpa nyinaku.’ Alatji Mayatja Jesulu ngayula wangkangu.

19 “Uwa, wati wiru! Ngayuluṇa mulapa ilkarunguru ngayula utir-ingkunyangka nyakunytjatjanu mulamularingu. **20** Munuṇa nyara palulanguru paluru wangkanyangka wangaņarangku kulinu munuṇa anangu tjuṭangka ngura nyara Tamatjakala Tjukurpa Palya wangkangi. Munuṇa piruku anangu Jerusalemanya ngurara tjuṭangka ngapartji wangkangi tjukurpa panya palunyatū, munuṇa palulanguru Jew tjuṭaku ngura uwankarangka kuļu para-pitjalira wangkangi ngura pulka tjuṭangka munu tjukutjuku tjuṭangka kuļu. Munuṇa anangu Jew wiya tjuṭangka kuļu wangkangi paluru tjana kuļu kulintjatjanungku kura wantira Godalakutu pitjanytjaku, munu kura uwankara wantira palyanyku nyinanyt-jaku. Kaya kutjupa tjuṭangku palunya tjananya nyakula kuliklu, ‘Mulapa

paluru tjana Godaku walytjaringu.²¹ Kaya Jew panya kuranyitja tjutangku ngayulu tjukurpa nyanga palunya timpulangka wangkanyangka ngayunya witiñu mununiya pulkara pungangi iluntankunytjikitjangku.²² Palu Godaluni ngayunya wankarunu nyara palula-arangka munuñi rawangkuñu wankaru kanyiningi tjintu nyanga kuwarikutu-wangkara. Ka nyanganña kuwari ngarala nyuralalta tjakultjunanyi anangu tjukutjuku tjutangka munu pulka tjutangka kuļu. Palu ngayuluña tjukurpa kuwaritja wangkanytja wiyanा, tjukurpa panya palunyatuna tjakultjunanyi, panya Moselu tjana wati panya Godaku wangkatjara kutjupa tjutangku kuļu iriti wangkangi ngula nyanga alatjirinytjaku.²³ Uwa, mulapa paluru tjana alatji wangkangi panya Christanya Godalu kalkuntjanya ngula pikatjararingkula iluku munu paluru-warara ilunytjatjanu wankaringkula pakalku munu tjukurpa tjukaruru anangu uwankarangka tjakultjunkuku tjana kulira palumpa mulamularingkula wankaringkunytjaku Jew tjuña munu Jew wiya tjuña kuļukulu. Alatjiya wangkatjara tjutangku iriti wangkangi.”

²⁴ Ka Paulalu kuwaripangkuñu ngarala wangkanyangka wati panya Pitjitjalu puťu mulamularingkula pakara painu munu wangkangu, “Tjukurpa nyaan wangkanyi? Tjingurun kata kawakawaringu tjukurpa tjutaku pulkara nintiringkunytjatjanu.”

²⁵ Ka Paulalu ngapartji palula wangkangu, “Wati wiru! Ngayuluna kawakawa wiya, munuña tjukurpa tjukaruru nyangatja wangkanyi kata palyangku.²⁶ Panya uwankara nyanga ngayulu nyuntula wangkanytja uti alatjitu ngaranyi, kaya tjutangku nyangangi. Ka wati nyanga mayatja Akuripanya kuļu ninti nyinanyi. Ka nyanganña palula mirangka utingku wangkanyi palumpa nguluringkunytja wiyangku.²⁷ Ka wati wiru Akuripa! Nyuntu wanyu mulamularinganyi wati panya wangkatjara nganmanyitja tjutaku? Uwa, ngayulu ninti. Nyuntu mulapa tjanampa mulamularinganyi tjana panya wangkanytjajaku.”

²⁸ Ka alatji wangkanyangka mayatja panya paluru wangkangu Paulala, “Wiya, nyuntu ngayunya puťu mapalku wituwituni ngayulu Jesuku kuvariñu mulamularingkula palumpa walytjaringkunytjaku.”

²⁹ Ka Paulalu wangkangu, “Tjinguru kuwari munta tjinguru ngula, palu ngayulu nyurampa Godala tjapini nyanga nyura kuwari nyinara kulintjtja uwankaraku, nyura kuļu kulira ngayunya purunyarira Jesuku walytjaringkunytjaku, palu nyanga purunypa nyinanytjaku wiya nyanga tjiinangka karpintjana kuwari ngaranyi, palu purunypa wiya.”

³⁰ Ka mayatja panya Akuripanya pula nyarumpara pakanu munu mayatja Pitjitjanya kulu munu tjanala tjungu nyinanytja tjuña kulu.

³¹ Munuya ruuma panya palunya wantikatira urilkutu ma-wangkara pakanu alatji, “Nyaakuya wati nyanga palunya iluntankunytjikitjangku kuliningi munuya tjaialangka tjarpatjura wantingu kura palyannyangkapalku?”

³² Ka wati panya mayatja Akuripalu mayatja panya pulkangka Pitjitjala wangkangu, “Wati nyanga palunya nyuntu tjinguru walatjunama ankunytjaku, palu paluru panya nganmanytju tjapinu mayatja Tjiitjalakutu iyantjaku nyara paluru kulira palunya ngurkantankunytjaku. Ka alatji tjapinnyangka nyuntu puťulta walatjunanyi, palu kuwari nyuntumpa ngaranyi mayatja Tjiitjalakutu iyantjaku.”

27

Paulanya Pautangka Katinytja Rome-alakutu

¹ Ka palulanguru Pitjitjalu Paulanya Rome-alakutu iyantjikitjangku kulinungi. Panya ngura nyara paluru manta ini Italila ngururpa ngaranyi. Munu kulintjatjanungku wati tjaultji kuranyitja ini Tjuliyatjala wangkangu wati panya Paulanya pautangka katinytjaku wati puritjina kutjupa tjuta kułukulu. Panya Tjuliyatjalu tjaultji tjuta kanyiningi nampa nyangatja 100, munuya paluru tiana utułu kutju ngarangi ini nyanga alatji, *Mayatja Tjiitjaku tjaultji tjuta*. Ka nganana kułu Paulala tjunguringu palula tjanala tjungu ankunytjikitja.* ² Munula uwankara pauta ngura panya Atura-mitiyama-nya ngurarangka tatinu tjaultji panya tjuta kułukulu, panya pauta nyara paluru manta panya Aitjala itiwanu ankunytjikitja riti ngarangi ngura kutjupa tjutakutu. Munula palulanguru uру pulkawanu ma-pakanu alinytjara. Ka wati ini Ari-tjakatjanya kułu ngananała tjungu pauta palula anangi. Wati nyanga paluru panya manta ini Matjatuniyalanguru panya palumpa ngura tawunu ini Tjitja-lanikanya.

³ Kala pautangka ankula ankula mungaringu munula rawatu ankula ankula tjintungka kutju ma-wirkanu ngura ini Tjaitanta. Ka tjaultji tjutaku mayatjangku Tjuliyatjalu Paulaku ngalturingkula wangkangu, “Palya nyuntu unytju pautanguru ukalingkula ankula nyawa nyuntumpa malpa tjuta ngura nyanga palula nyinanytja tjuta. Kantaya nyakula mai ulytja kutjupa tjuta kułu uwa katinytjaku.” Kala mulapału anu Paulaku malpa tjutakutu nyakunytjikitja.

⁴ Palulangurula pautangka piruku tatinu munula ma-pakanu alinytjara. Munula ankula ankula manta tjukutjuku ini Tjaipuritjala walpa tjukutjukuwanu wati-pitjangi, panya walpa pulkangkulanya pulkara unłuningi, kala pułu nguwanpa anangi walparakutu. ⁵ Munula nyara palulanguru piruku wilurara wati-pitjangi munula uру pulkangka ngururpa anangi manta kutjarangka tjaruwani manta ini Tjilitjiyalu pulala Pampiliyalu. Munula palulanguru manta ini Laitjiyalu wirkanu ngura ini Mairala. ⁶ Ka ngura nyara palula wati tjaultjiku mayatjangku nguriña nyangu pauta kutjupa Italilakutu ankunytjikitja riti ngaranyangka munulanya nyara palulalta tatitjunu. Pauta paluru kunyu ngura ini Aliktjantu-riyalanguru pitjangu ulpariranguru manta ini Itjipalanguru.

⁷ Kala pauta palula tatira wilurara ma-pakanu munula walparakutu anangi purkara alatjitu tjintu tjuta nguwanpa munula ngula kutju ma-ilaringu ngura ini Kanaitatjalakutu. Palu nyara palulangurula putu piruku wilurara anangi, panya walpa pulkangku alinytjara wiluraranguru nganampa pauta pulkara unłuningi małakukutungku. Ka palulanguru wati panya pauta katipaingku wilurara putu ankula kulinu ulparira ankunytjikitjangku. Kala mulapału kałakutjara anu ulparira munula manta tjukutjuku ini Kuritala ilaringkula ngura ini Tjalmunila itingka wirkanu kampa kakarara. ⁸ Munula nyara palulanguru manta palula kampa ulparira walpa tjukutjukuwanu anangi wilurara. Purkara alatjituła anangi, munula ankula ankula manta nyara palula ngururpa wirkanu uру patipatingka ngura ini Pilunpa Wirula. Ka pala palula itingka ngura tawunu ini Latjiyanya ngarangi. Kala uру patipatingka tjarpara ngarakatingu mantangka itingka uřungka.

* **27:1** Verse 1 wangkanyi *nganana* panya nyanga palula-arangka Luke-anya piruku Paulala tjunguringu.

9-10 Munula ngura nyara palula nyinara kuliningi, “Ai! Nganaña purkara pitjanyangkatu nguwanpa nyiñngaringu, kala nyangatja malaringu nguwanpa piñku wiluñara ankunytjaku, panya Jewku inma pulka nganmanypa ngarala wiyaringu.”* Panya wariringkunyangka pauta tjuta puñu ankupai uru pulkangka ngururpa, panya tjaka nyiñngangka walpa pulkangku uñtura uru wñatjara katulpai, ka tjinguru pauta uringka ngururpa ankunyangkampa uru katuringkula pautangka tjarpaku, ka pauta panya uringka karalukatiku. Ka nyara palulanguru Paulalu wati panya pauta katipai tjuta wangkara ngulutjunangi alatji, “Wati tjuta! Kulilaya! Utila piñku ankunytja wiya nyinama! Panya ngayulu kulini tjinguru nganaña pautangka piñku tungunpungkula ankunyangkampa nganañala kutjupa kutjupa utiringkuku walpa nyanga pulkangka. Tjinguru uru pulka pautangka tjarpaku, kala tjinguru pauta winki karalukatiku munula uwankara iluku mantangka wirkankunytja wiyatú.” Alatji Paulalu tjananya wangkara ngulutjunangi.

11 Palu wati panya pauta palumpa walytja munu wati pauta katipai kuñu puñu mulamularingangi Paulalu wangkanyangka, ka tjaultji tjutaku mayatjangku kuñu paluru wangkanyangka kulintja wiyangku wantingi, munu wati panya palumpa pulampa kutju mulamularingangi paluru pula wangkanyangka. **12** Panya wari ngaranyangka uru nyara patipati palula, pauta tjuta tjunkula wantira nyinanytjaku, wiru wiya nguwanpa. Kaya palulanguru wangkara kuliningi ankunytjikitjangku. Munuya kulinu, “Palyantila wiluñara tjukutjuku uringka ankuku manta nyanga Kuritala itiwanu munula wirkankuku ngura nyara tawunu ini Piinikala, mununtila nyara palula pauta tjunkula wantira nyinama wari wiyaringkunytjaku pañara. Panya ngura nyara palula uru patipati wiru mulapa ngaranyi yuu wiru pauta tjuta waringka ngaranytjaku, panya kampa wiluñara kutju ala ngaranyi, ka panya walpa ulpariranguru munu alinytjaranguru kuñu wangkanyangka pauta tjuta kuñpi-kulpingka kumpira ngarapai palya alatjiñu.”

Walpa Pulka Pakantja

13 Ka nyara palula ara walpa tjukutjuku wiruñra wangkangi ulpariranguru. Kaya wati tjutangku kuliningi, “Ai! Walpa nyangatjamanti wirumpa wangkanyi nganaña ankunytjakumpa!” Munuya pauta panya karpira wantintytjatjanungku araltjanu walpangku uñtuntjaku. Munula manta panya Kuritala itiwanu uringka ma-pakanu alinytjara wiluñara. **14** Palu nyara palulanguru walpa kutjupa pulka mulapa manta panya Kuritalanguru pakanu ini *Alinytjara Kakararatjanya* munu pulkara alatjiñu rurkuningi. **15** Munu walpa panya pulka paluru pauta panya pulkara alatjiñu uñtuningi ngura wiyakutu, ka katipai tjutangku puñu arkara tjukaruruningi mantakutu ankunytjikitjangku, munuya pakuringkula wantingu, ka walpangku nganañanya mantanguru uñtura ma-katingi ulparira wiluñara. **16** Kala ankula manta tjukutjuku mulata ini Kuutala ilaringkula palula walpa tjukutjukuwanu anangi, ka walpa uru kuñu tjukutjukuringu nguwanpa. Ka panya pauta pulkangku pauta tjukutjuku ruupangka karpintja itarikatingi. Kaya ngura nyara palulawanu ankula wati pauta pulka katipai tjutangku pauta panya tjukutjuku ilara ilara paku pulkaringkula nguwanpa wantir’yanu

* **27:9-10** Inma pulka nyara palula Jew tjuta wiltjanyinaringkunyangka tjunguringkupai munuya kuka pungkula Godanya ungkupai paluru nyakula tiana kura palyantijitjanguru kalypangku pungkuwiyangku wantintytjaku.

¹⁷ Palu pulkaraya ilara katura utitjunu pauta panya pulkangka katu, munuya ruupangka karpinu. Munuya nyara palula małangka ruupa kutjupa tjuṭa mantjinu, munuya pauta pulkangka unnguwanungku para-karpira arintanu, pauta pulka paluru witu ngaranytjaku uru pulkangku unṭura kaṭantankunytjaku-tawara. Munuya paluru tjana alatji kulira nguluringangi, "Kuwarintilanya walpa nyanga pulkangku manta kutjupakutu unṭura katinyi ulparira ngura panya ini Tjaititjalakutu. Ngura nyara palula itingka panya uru ma-tartjaringu ngati mulapa wiya, ka tjinguru pauta nyangangku uru unngu manta pampulkku ka mantangku witira kanyilku, ka tjinguru uru wiṭatjara pulkangku pauta pungkula kaṭantara minya-minyara wiyaliku." Alatjiya kulira nguluringangi, munuya palulanguru tiinta panya pulka katu ngarapainya tjarura karpira tjunu, walpangku manta tartjakutu unṭura katinytjaku-tawara. Ka palulanguru walpangku pauta panya purkaṛangku unṭura katirinangi.

¹⁸ Palu walpa paluru rawa mulapa pulkara rurkuningi mungangka kuļ muņu pauta panya pulkara alatjiṭu unṭuningi. Ka mungawinki wati panya tjuṭangku luuta pulka tjuṭa panya pauta unngu ngarinytja tjuṭa mantjira urenungka waṇingi pauta panya uparingkunytjaku. ¹⁹ Munuya rawa ankula ankula piruku tjintu kutjupangka kutjupa tjuṭa ngapartji urenungka waṇingi ruupa tjuṭa, tiinta pulka tjuṭa, puṇu kutjupa kutjupa tjuṭa kuļu. ²⁰ Ka walpa paluru rawangku pauta panya nganaṇanyatjara pulkara unṭura uritjinganangi. Kanti wampa tjintu tjuṭa ngarala wiyarcingangi ngangkalingku tjutura kanyinnyangka, panya nganaṇa tjiripi nyakunytja wiya alatjiṭu, kililpi tjuṭa kuļu. Munula palulanguru pulkara nguluringkula kulinangi, "Kuwarintila uwankara alatjiṭu iluku anangu kutjupa małaringkula wanka nyinanytja wiya."

²¹ Munuya wati panya paluru tjana mai ngalkuntja wiya pulkara alatjiṭu warkaringi. Ka palulanguru Paulanya tjanala kuranyu pakara ngarangu muņu tjanala wangkangi alatji, "Wati tjuṭa! Ut nyura panyatja nganmanytju ngayulu wangkanyangka kulinma, munula manta nyara Kuritalatu ma-nyinama luuta nyanga pulka tjuṭa urenka waninýtjaku-tawara. Tjinguru nganaṇa ngura nyara palula nyinanyangkampa walpangku puṭu kaṭantanama pauta nyanga palunya. ²² Palu kuwariṇa nyuranya wangkanyi nguluringkunytja wiya kurunpa raparingkunytjaku, panya pauta nyangatja katakatira minya-minyaringkuku, palu nyuntu nganaṇa uwankara ilunytja wiya wankaringkuku. ²³ Kulilaya! Ngayulu panya Godanya walkulpai, muṇu ngayulu palumpa walytja nyinanyi. Ka mungangka Godalu palumpa angelpa iyanu ngayulakutu. ²⁴ Ka paluru alatji ngayula wangkangu, 'Paul! Nguluringkunytja wiya ngarama! Panya kuwari Godalu nyuntunya wankarunkuku muňu paluru wati nyanga nyuntula tjungu pautangka nyinanytja uwankara kuļu ngaltunytjungku wankarunkuku panya nyuntu tjanampa tjapinnyangka paluru kulinu. Munu paluru nyuntunya mayatja Tjiitjala wankaru wirkakatiku, ka nyuntu nyara palula mirangka ngaraku paluru nyuntunya kulira ngurkantankunytjaku.' Alatji angeltu wangkangu ngayula. ²⁵ Ka wati wiřu tjuṭa! Ut nyura raparingama panya ngayulu Godalu wangkanyangka kuliṛa mulamularinganyi alatjiṭu, ka panya angeltu wangkanytja mulapa alatjiṭu alatjiriku. ²⁶ Palu walpa nyanga pulkangku pauta nyanga unṭura katirinkuku manta tjukutjukukutu, ka mantakutu ilaringkunyangka mantangku pauta nyangatja witira kanyilku." Alatji Paulalu wangkangi tjanala.

²⁷ Ka panya walpangku nganaṇanya rawangku munga 14 unṭura

katirinangi uru pułkangka ini panya Aturi-yatikala. Ka munga pala palula wati panya pauta katipai tjutangku kulinu, "Mantakutu-mantila nguwanpampa ilaringu." ²⁸ Munuya ayana tjukutjuku ruupa wařangka karpira uringka wañingu uru unngu manta pampura mitjuramilara ngati nyakunytjikitjangku. Munuya pampuntjatjanungku nyangu panya uru paluru nampa 120 ngarangi tjaru nguwanpa ngati pulka mulapa wiya. Kaya piruku ngula tjukutjuku rawa nguwanpa ankula piruku tu ayana panya palunya wañingu ruupangka panya karpintjitja. Munuya manta unngu pampuntjatjanungku nyangu, "Munta mulapa uru nyangatja tjukutjuku ma-tartjaringu nampa 90 kutju." ²⁹ Ka wati panya pauta katipainya ngulu-nguluringu alatji kulira, "Kuwarintilampa pulingku uru unnunguru atura alalku pauta nyangatja." Munuya nyara palulanguru ayana panya ini aingka kutjara kutjara ruupangka karpintja tjuṭa uringka unngu wañingu ukalingkula manta unngutjangka tjarpara pauta palunya witira kanyintjaku puliktu ilaringkunytjaku-tawara. Munuya nyara palulanguru tjanampa god ngalypa-ngalypa tjuṭangka tjapiningi mapalku tjinturingkunytjaku mukuringkula. ³⁰ Ka wati pauta katipai kutjupatjara mukuringangi kampangkatu ankunytjikitja pauta panya pulka wantikatira. Munuya paluru tiana pauta tjukutjuku kampangkatu araltjara tjarunu urukutu wati panya pauta pułkangka nyinanytja tjuṭangku ngunti kulintjaku alatji, "Munta, aingka panya kutjupaya tjinguru kuranyunguru wañingu." Palu wiya. ³¹ Ka Paulalu tjananya pauta kuluny whole urukutu tjarunyangka nyakula wati tjaultji tjuṭaku mayatjangka wangkangu tjaultji tjuṭangka kuļu alatji, "Wati nyanga pauta katipai tjuṭa uti nyinama pauta nintingku katinytjikitja. Palu tjinguru tiana wantikatinyangkampa nyura pauta nyanga palunya puťu mantangka wirkakatiku munu nyura urungkatu iluku." ³² Kaya palulanguru wati panya paluru tiana pauta tjukutjuku tjarunyangka tjaultji tjuṭangku ruupa ngururpa kaṭanu, ka pauta paluru punkara uringka tjarpara wiyarlingu.

³³ Ka ngalya-tjinturingkunyangka Paulalu tjananya pułkara wangkara wituwituningi mai ngalkuntjaku. Munu wangkangu, "Kulilaya! Kuwari nyanga tjiṇtu 14-aringu panya nyura ngulungku mai wantira ngalkuwiya rawa nyinanyangka. ³⁴ Kana nyuranya kuwari wangkanyi mai ngalkula paltjaringkula kunpuringkunytjaku, munu wanka nyinanytjaku. Rapariwaya panya nyura kuwari pika wiya alatjitu wankaru mantangka wirkankuku." ³⁵ Munu alatji wangkara wiyarlingkula Paulalu mai mantjira palula tjanala mirangka Godanya walkura wangkangu, "Wirungkulanyan mai nyangatja ungu!" Munu palulanguru paluru mai kaṭantara ngalkuningi. ³⁶ Kaya uwankarangku palunya ngalkunyangka nyakula raparingu munuya tiana kuļu mai mantjira ngalkuningi uwankarangku. ³⁷ Panya wati paluru tjanaya nampa nyanga alatjitu pauta nyangangka nyinangi, 276, tjuṭa mulapa. ³⁸ Munuya uwankarangku mai tiana mukuringkunytja ngalkula paltjaringu. Ka luuta kutjupa tjuṭa pauta unngu ngaringi mai panya wiita tjuṭa yakutja pulka tjuṭangka, panya mai palunyaya katingi Italilakutu. Kaya wati nyanga tjuṭangku pauta uparingkunytjaku yakutja maitjara palunya tjananya uwankara mantjira pautanguru wañingu uringka.

Pauta Katakatira Minya-minyaringkunytja

³⁹ Ka tjiṇtu pakannyangka wati pauta katipai tjutangku manta ngaranyangka nyakula puťu ngurkantanangi, "Ngura yaalitja nyangatja?" Palu nyanguya uru patipati ngaranyangka manta palyatjara puli wiyatjara

munuya kulinu, “Utile pauta nyara palulakutu katima munu manta pala palyangka nyinatjunama.”⁴⁰ Munuya palulanguru ruupa panya aingkatjara tjuta katantara aingka panya tjuta wantir’iyanu urungka. Ka panya pautangka małarku puṇu waṛa tjarukutu ngarangi watingku uritjingara pauta tjukarurura katirinkupai. Kaya nganmanytu puṇu palunya ruupangka tjungura karpinu uru panya pulkangku uritjinggaṛa katantankunytjaku-tawara. Munuya palulanguru ruupa panya palunya araltjanu puṇu panya palunya uritjingara pauta tjukarurura katirinkunytjikitjangku. Munuya tiinta kutju katu lipira utitjura karpinu pautangka kuranyu pauta palunya wal pangku unṭura katinytjaku manta palyakutu.⁴¹ Palu pauta mulya mantangku witiṇu. Ka uru wiṭatjara pulkangku pitjala malarkunguru pauta panya palunya pulkara pungkula katantaningi.

⁴² Kaya tjaultji tjuta mukuringangi wati panya puritjina tjuta iluntankunytjikitja urungka tjarpara kumpira ankunytjaku-tawara. ⁴³ Palu wati panya tjanampa mayatjangku Tjuliyatjalu painu Paulanya tjananya iluntankuwiyangku wantinytjaku. Munu tjananya wangkangu, “Urungka tjarpapai tjuta! Urungkaya wararakati, munuya ankula mantangka wirkara!⁴⁴ Ka nyura ngapartji urungka putu tjarpapai tjuta! Puṇu pala pautanguru katakatintja tjuta mantjila munuya tatira mantakutu ara!” Kala mulapaṭu nyanga palunya palyara uwankara wankaṛu wirkanu mantangka, ka pauta panya paluru katakatira minya-minyaringu alatjitu urungka ngururpa.

28

Paulanya Nganana Ngura Ini Maltala Nyinanytja

¹ Uwa, mantangkala wankaṛu wirkanu munula nintiringu panya manta nyanga paluru uru pulkangka ngururpa ngaranyi manta ini Maltanya.

² Ka nyara palula ngananya minangku puyiningi, ka wari pulkaringu. Kaya anangku panya Maltanya ngurara tjutangku ngananya nyakula nganampa ngalturingu munulampa waru tlinu munulanya wirura atunyamanangi ngura nyara palula nyinanyangka.³ Ka waru tjukutjukuringkunyangka Paulalu ankula waru tjiwuru tjuta uraṛa ngalya-katingu. Munu paluru warungka tjunkunytjikitja ilaringu warukutu, ka warungku kampanyangka liru puṇunguru ngulu ngalya-pakaṇu munu Paulanya manyirka patjara tjakatjura waraly-waralyngarangi.⁴ Kaya anangku panya Maltanya ngurara tjutangku nyangangi lirungku patjara waraly-waralyngaranyangka. Munuya wangkangu, “Awari! Wati nyanga paluru-manti miriputju alatjitungku, ka nganampa god ini ‘Ngapartji Pungkupainya’ tjinguru mukuringanyi paluru ilunytjaku. Panya paluru urungka tjarpara ilunytja wiyatū wanka wirkanu, palu nyanga lirungku palunya patjanu, ka kuwari nyangalta paluru ilunyi.”

⁵ Palu Paulalu manyirka warungka itingka uri-uritjinganu, ka liru panya paluru punkaṇu warungka ka kampangu. Ka Paulalu lirungku patjannyangka malangka wankangku ngarala waru nganytjiningi pikatjararingkunytja wiyangku.⁶ Kaya anangku tjutangku pulkara nyakula kulinigi, “Kuwarinti paluru manyirka raa-raaringkuku mununti punkara iluku.” Munuya rawangku alatjitu palunya nyangangi, palu kutjupa kutjuparintja wiya alatjitu ngarangi. Kaya ilunytja wiya rawa wanka ngaranyangka nyakula kampa kutjupa kulinu munuya wangkangu, “Ai! Nyanga paluru alatjitu-manti god kutjupampa nyinanyi.”

⁷ Ka ngura nyara Maltala tjanampa mayatja nyinangi ini Papiliyatjanya. Ka wati nyara palumpa ngura ila ngarangi. Ka paluru nganañanya wirungku altingu palumpa ngurangka ankula ngarinytjaku. Kala ngura nyara palula tjintu mankurpa nyinangi kalanya paluru pukultu alatjitu kanyiningi. ⁸ Ka wati panya palumpa mama ngamanypa pikatjara tjuritja waruringkula ngaringi. Ka Paulalu kulinu paluru pikatjara ngarinyangka munu palumpa ruumangka tjarpala palumpa Godala tjapiningi. Munu palula manyirka tjunkula palunya palyarungunu. ⁹ Kaya nyara palulanguru anangu pikatjara kutjupa tjutangku kulinu munuya tjana kulu ngalya-pitjangu Paulalakutu. Ka tjanampa kuļu Paulalu Godala tjapira tjananya uwankara palyarungunu. ¹⁰ Ka anangu ngura nyara palunya ngurara tjutangkulanya wirunmanangi munulanya wiru tjuta ungangi. Munuya nganaña ankunytjikitja ritiringkunyangka paluru tjana mai kuka pulka, kutjupa tjuta kuļu nganañanya unkul'iyanu katintjaku.

Paulanya Rome-lakutu Ankunytja

¹¹ Kala ngura nyara Maltala piřa mankurpa nyinanytjatjanu pauta kutjupangka tatinu piřuku ankunytjikitja Rome-alakutu. Pauta nyanga paluru panya ngura Alika-tjantu-riyalanguru ngamanypa pitjangu Maltalakutu munu wari panya pulka ngarala wiyingkunytjaku paṭara ngarangi ngura panya manta tjukutjuku palula. Ka pauta nyanga palula kuranyu watiwati kutjara puñunguru palyantja ngarangi, panya palumpa tjanampa god ini nyanga pula Kaatjanya munu Palatjanya pula kuṭarara. ¹² Kala pauta palula tatira ma-pakaňu alintjara munula ankula manta kutjupangka wirkanu ngura ini Tjaira-kuutjala, munula nyara palula nyinangi tjintu mankurpa. ¹³ Munula ngura nyara palulanguru piřuku ma-pakaňu alintjara munula ankula manta kutjupangka wirkanu manta pulkangka ini Italila munula ngura tawunu ini Rikiyamala wirkara ngaringu munga kutju. Ka mungawinki walpa pulka wangkangi ulpariranguru, munulanya wala pulkangku uñtuningi alintjara ankunyangka kala nyara palulanguru tjintu kutju wiyingkula wirkanu ngura ini Putiyalila. ¹⁴ Munula ngura nyara palula pautanguru ukalingkula anangu Jesuku waltya kutjupa tjuta nguriřa nyangu, kalanya paluru tjana tjapinu palula tjanala tjirirpi 7 nyinanytjaku. Kala tjirirpi 7 ngarala wiyingkula nyara palulangurulta tjina anu Rome-lakutu. ¹⁵ Kaya Jesuku waltya Rome-ala nyinapai tjutangku kulinu nganaña ngururpa pitjanytja munuya ngaparikatira nganampa ngururpa pataningi tjara kutjupa ngura ini Apiyatjala tjuwa tjutangka itingka, ka tjara kutjupa paṭaningi ngura ini *Ngaripai Mankurtjarala*. Kaya paluru tjana nganampa ngaparikatira paṭannyangka Paulalu nyakula pulkara pukularingu munu Godanya pukularira walkuningi.

Paulanya Rome-la Wirkankunytja

¹⁶ Munula nyara palulanguru Rome-lalta wirkanu. Ka tjaultjiku mayatjangku Paulanya tjailangka tjarpatjunkuwiyangku wantingu munu wali kutjupangka maunṭalpa tjunu kutju nyinanytjaku, ka tjaultji kutju palula tjungu nyinangi munu palunya atunymanangi kampangkaṭu ankunytjaku-tawara.

¹⁷ Ka ngura nyara palula tjintu mankurpa nyinanytjatjanungku Paulalu wati kutju wituřa iyanu ankula Jew nyara palunya ngurara tjutaku mayatja tjuta alintyntjaku wati panya kuranyitja tjuta. Kaya pitjala palula tjunguringkula nyinakatingi. Ka tjanala wangkangu Paulalu alatjji, “Waltya tjuta! Ngayulu kura kutjupa palyantja wiyaṭu ngayuku

walytja tjuṭa kurantjikitjangku. Mununa nganampa tjamu tjuṭaku kuļu ara tjuṭa kuralwiyatū. Palu ngayunyanīya Jerusalemala witiṇu tjukurtjara kuranyitja tjuṭangku munuṇiya tjaultji tjuṭa ungu tjailangka tjunkunytjaku.

¹⁸ “Ka paluru tjana ngayunya pulkara tjapira nguriningi munuṇiya puṭu kuliningi, ‘Nyaangurula wati nyangatja iluntankuku? Panya nyanga paluru kura palyantja wiyatū.’ Munuya kuliningi ngayunya walatjunkunytjikitjangku. ¹⁹ Palu Jew tjuṭa ngura nyara palunya ngurara tjuṭaya mukuringkunytja wiyatū ngayunya walatjunkunytjaku. Kanā palulanguru tjaultjiku mayatjangka tjapinu ngura nyanga Rome-lakutu ngayunya iyantjaku, panya ngayulu mukuringangi mayatja panya Tjiitjalu ngayuku ara ngayulu wangkanyangka kulira ngurkantankunytjaku. Palu ngayulu ngayuku walytja tjuṭa kuranmankunytjikitja pitjanytja wiyatū. ²⁰ Kanā nyanga palunya tjakultjunkunytjikitjangku kuwari nyuranya altingu. Panya nganaṇa Jew tjuṭangku rawangku paṭaningi Godalu kalkuntjitetjaku nganaṇalakutu wankarunkupainya iyantjaku. Kanā paluru panya pitjanytjetjaku mulamularinganyi alatjiṭu, kanīya tjukurpa nyanga palulanguru ngayunya tjiinangka karpintjaku ungu.”

²¹ Kaya Jew tjuṭangku wangkangu, “Nganaṇa Jerusalemalanguru lita mantjintja wiyatū tjukurpa nyuntunyatjara. Ka nganampa walytja kutjupa ngura nyara palulanguru pitjala nyuntunyatjara wangkara kuranmankunytja wiyatū. ²² Palu nganaṇa kulinu tjukurpa nyangatja kutju panya aŋangu tjuṭangkuya kunyu ngura winkitjangku Jesuku walytja tjuṭa kuranmankupai nyinanyi. Palulangurula mukuringanyi nyuntu wangkanyangka kulintjikitja.”

²³ Munuya Paulalu tjana tjiṇtu ngurkantanu piruku tjunguringkula wangkanytjikitjangku. Munuya tjiṇtu panya palula wati panya Jew kuranyitja winki tjunguringkula anu wali panya Paulanya nyinanytjetjakutu. Ka Paulalu tjanala kalala wara wangkara mungartjiringu. Munu tjanala nyanga alatji wangkangi, panya Godalu aŋangu tjuta palumpa mulamularingkunyangka kutju walytjanmara mayatjarira kanyilpai. Munu palunya tjananya Jesuku pulkara mulamularingkunytjaku wangkangi tjukurpa nyangatja, “Panya Godalu iriti wankarunkupainya iyantjikitjangku kalkunu. Ka kalkuntja panya paluru wirkanu. Paluru panya ini Jesunya. Panya kalkuntjita nyanga palunya Moselu tjana wangkatjara tjuṭangku iriti nyiringka walkatjunu, ka nganampa kulira mulamularingkunytjaku ngaranyi.” Alatji Paulalu tjananya wangkangi tjana walytjangku kulira mulamularingkunytjaku Jesuku.

²⁴ Kaya tjara mulamularingu paluru wangkanyangka, palu kutjupa tjuṭangkuya mulamularingkunytja wiyangku wantingi. ²⁵ Munuya palulanguru wangkara pika-pikaringkula tjara-tjararingu munuya pakara ankunytjikitjangku kuliningi. Palu Paulalu piruku tjukurpa kutju tjanala alatji wangkangu, “Panya Kurunpa Milmiltu wati wangkatjara Aitjay-alawanungku nyuntumpa nganampa panya tjamupitingka tjukarurungku wangkangi. Alatji paluru Aitjayala wangkangu,

²⁶ ‘Ankula wangka aŋangu nyanga tjuṭangka nyanga alatji,
“Nyura tjukurpa wangkanyangka rawangku kulilku, palu nyura kulira kulira puṭu alatjiṭu tjukurku nintiringkuku.

Munu nyura piruku kurungku rawangku nyakula nyakula puṭu alatjiṭu ngurkantankuku.

²⁷ Panya aŋangu nyanga paluru tjanaya kurunpa wituwituringu tjukurpa tjukaruru kulintjaku-tawara.

Paluru tjanaya pinangku putu kulilpai,
 munuya kurungku kulu putu nyakupai kuru patiringkunytjatja-nungku.
 Tjinguru tjana tjukarurungku kulirampa mulamularingama alatjitu kuru alangku nyakunytjatjanungku,
 munu pinangku kulintjatjanungku kulu.
 Munu tjinguru paluru tjana kulintja palyangkumpa tjukurpa uwankara wangkanyangka tjukarurungku kulinma.
 Munuya nyanga alatji palyarampa, kampa kutjuparintjatjanu ngayulakutu malaku aruringama.
 Kana palulanguru tjananya palyarungunma.”,*
²⁸⁻²⁹ Ka panya nyurampa ngaranyi kuwari nyanga alatjitu nintiringkunytjaku munu kulintjaku panya Godalu wankarunkupainya iyanu añangu Jew wiya tjutaku kulu nyurampa kutjuku wiya. Ka nyara paluru tjana wanganarangku kulikku.”*

³⁰ Ka Paulanya wali panya palula rawa alatjitu nyinangi yiya kutjara, munu payamilalkatingi wali nyara palula nyinanytjikitjangku. Munu añangu tjuta palunya nyakunytjikitja pitjanyangka paluru wali nyara palula tjananya tjarpatjunkupai. ³¹ Munu paluru Godaku tjukurpa tjakultjura añangu tjutangka Jesunyatjara wangkapai. Munu tjanala alatji tjakultjunkupai panya Godalu añangu tjuta Jesuku mulamularingkunyangka walytjanmankupai munu palunya tjananya mayatjarira kanyilpai. Uwa, paluru ngulu wiyangku rapangku alatjitu tjukurpa nyanga palunya wangkapai. Kaya añangu kutjupa tjutangku palunya pailwiyangku wantipai paluru tjukurpa wangkanyangka.

* **28:27** Aitjayaku 6:9-10 * **28:28-29** Wati kutjupangku kunyu verse 29 walkatjunu munu mala tjungunu Luke-aku tjukurta nyanga alatji – *Ka Paulalu tjukurpa nyanga palunya wangkanyangka wati panya Jew tjuta pakara uwankara anu munuya paluru tjananku mirpanarira ngaparku wangkangi.*

Lita Paulalu Walkatjura Iyantja Ngura

Rome-alakutu

Romans

Nyangatja Ngañmanytju Nyakula

Wangkanytjaku

Nyangatja Godaku tjukurpa Paulalu walkatjura iyantja Jesuku walytja tjuṭakutu ngura nyara Rome-ala nyinanytja tjuṭakutu. Lita nyangatja Paulalu walkatjunu ngura ini Karintjala nyinara tjinguru yiya nampa nyangangka AD 57-ta.

Nyangatja lita pulka Paulalu walkatjunu tjukurpa pulka Jesunyatjara, kala uti purkarangku nyakula wangkama munu pulkara kulinma panya tjukurpa wiru mulapa Godalu palula utira nintintja. Lita nyangangka Paulalu tjakultjunanyi alatji, panya aŋangu uwankara alatjitu kura nyinanyi munuya Godalanguru mauntalparingu, ka Jesunya kutju palya mulapa nyinanyi kura wiya alatjitu. Kala uti Jesuku mulamularingama panya paluru nganampa pulkara mukuringkupai munu panya nganaŋanya kura palyantjitjanguru nganampa ngalkilpa ilungu Godalu nganananya palumpa mulamularingkunyangka kalypangku wantintjaku munu nganaŋanya walytjanmankunytjaku. Alatji Paulalu walkatjura utiningi Jesuku walytja tjuṭangku tjukarurungku kulintjaku ngunti kulira Godalanguru paṭuringkunytjaku-tawara.

Tjukurpa nyanganpa ngarinyi:

- 1:1-17 Paulalu tjukurpa ngañmanyitja wangkanytja
- 1:18—3:20 Aŋangu uwankara kura palyalpai
- 3:21—8:39 Godalu nganaŋanya kura palyantjitjanguru kalypangku wan-tipai
- 9:1—11:36 Aŋangu Jew tjuṭaku Godalu palyantja
- 12:1—15:13 Jesuku walytja tjuṭa wiru tjukaruru nyinanytjaku
- 15:14—16:27 Paulalu tjukurpa małatja wangkanytja munu małpa tjuṭangka wangkanytja

Paulalu Ngañmanytju Wangkanytja

¹ Jesuku walytja tjuṭa! Ngayuluña Paulalu lita nyangatja walkatjunanyi nyurampa ngura pala Rome-ala nyinanytja tjuṭaku. Panya ngayulu Jesuku Christaku wangaŋara waṛkaripai. Panya Godaluṇi ngayunya ngurkantaṛa tjunu palumpa tjukurtjara waṛkarintjaku munuṇi witura iyanu Tjukurpa Palya ngura winkingka ankula tjakultjunkunytjaku. ² Panya paluru tjukurpa nyanga palunya iritilpi kalkuṇu, ka panyaya palumpa wangkatjara tjuṭangku kulira walkatjunangi nyiri panya miłmilt̄a. Kana tjukurpa nyanga palunya kuwari wangkanyi. ³⁻⁴ Tjukurpa nyangangku wangkanyi Godaku katja Jesunya Christanya panya nganampa mayatja. Panya paluru aŋangu nganaŋanya purunypa mantangka nyinangi Davidaku panya walytjapitinguru itiringkula. Ka ngula paluru ilunyangka Kurunpa Miłmilt̄u palunya witulya pulkangku wankara pakaltjingaṇu, kala nyanga pakaltjingantjitjanguru nganaŋa mulamularingkula kulilpai, “Mulapa paluru Godaku katja nyinanyi.” ⁵ Nyara paluruṇi mukulyangku ngurkantara iyanu, Jesulu panya, Tjukurpa Palya palumpa ankula

tjakultjunkunytjaku ngura winkingka anangu tjuṭangku kulira Jesuku mulamularingkunytjaku munu Godala wangaṇarangku kulintjaku. ⁶ Munu panya nyuranya kuļu Jesulu ngurkantara tjunu Rome-ala nyinanytja tjuṭa kuļu palumpa walytjaringkunytjaku, kaña ngayulu mukuringanyi nyurala ma-pitjala tjukurpa tjakultjunkunytjikitja.

⁷ Munuña lita nyangatja nyurampa walkatjunanyi, panya Godanya nyurampa pulkara mukuringanyi, munu panya nyuranya ngurkantara tjunu palumpa walytja mulapa nyinanytjaku.

Uwa, ka Mama Godalu Mayatja Jesulu Christalu kuļu nyuranya pukultju pulkangku kanyinma munu nyuranya kurunpa rapara pukulmanama.

Paulanya Tjanalakutu Ankunytjikitja Mukuringkunytja

⁸ Uwa nganmanytjuña nyangatja wangkanyi panya anangu ngura winkitjangku nyuranya kulinu nyura Jesuku pulkara mulamularingkunytja. Kaña ngayulu palulanguru nyurampa pukularira Godanya wal Kunyi Jesunya Christianity kuļu. ⁹⁻¹⁰ Panya ngayulu Godala nyurampa rawangku tjapilpai watarkurintja wiyangku. Nyangatja tjukarurungku wangkanyi panya Godanya ngayuku ninti. Kaña Godala kutjungka wangaṇarangku kulira palyalpai kurunpa winkingku munuña Tjukurpa Palya tjakultjunkupai palumpa katja Jesunyatjara ngura winkingka. Palu ngayulu rawangku Godala tjapini paluru mukuringkula ngayunya nyuralakutu iyantjaku, kaña tjinguru kuwari nguwanpa ma-pitjala nyurala tjunguringkuku paluru kulira ngayunya iyannyangka. ¹¹ Panya ngayulu pulkara mukuringanyi nyuranya nyakunytjikitja munu nyuranya kurunpa pukulmara kunpuntjikitja Kurunpa Milmiltu ngayunya nintinnyangka. ¹² Palu nyura kutju wiya, ngayulu kuļu nyuralanguru kunpuringkunytjikitja mukuringanyitu. Panya ngayulu Godaku mulamularingkunyangka nyura ngapartji nyakula mulamularingkula kunpuringkuku, ka ngayulu kuļu nyura mulamularingkunyangka nyakula kunpuringkuku.

¹³ Walytja wiru tjuṭa, kulilaya! Ngayuluña rawangku kulinigi nyuralakutu ma-pitjanytjikitjangku palu putulirinyiña, panya kutjupa kutjupangkuñi rawangku angatjunanyi. Panya ngayuluña mukuringanyi nyurampa ngurangka wirkara anangu kutjupa tjuṭangka Tjukurpa Palya Jesunyatjara wangkanytjikitja tjana kuļu Jesuku walytjaringkunytjaku. Panya ngayulu ngura winkingka tjukurpa panya palunyatu tjakultjunnangi, kaya kulira Jesuku mulamularingangi, nyara palu purunypa palyantjikitja mukuringanyi nyurampa ngurangka. ¹⁴ Panya Godalu ngayunya warika nyangatja ungu, ka ngayuku ngaranyi alatjitu anangu kutjupa uwankarangka Tjukurpa Palya tjakultjunkunytjaku ngura pulka tjuṭangka, munu ilytjingka nyinapai tjuṭangka, nintipuka tjuṭangka munu ngurpa tjuṭangka kułukulu. ¹⁵ Uwa, ngayuku mulapa ngaranyi anangu uwankarangka wangkanytjaku, munuña nyurala Rome-ala nyinanytja tjuṭangka kuļu Tjukurpa Palya tjakultjunkunytjikitja mukuringanyi.

Godalu Jesuku Mulamularingkunyangka Kutju Tjukarurunmankula Walytjanmankupai

¹⁶ Uwa, tjukurpa nyanga paluru pulka mulapa ngaranyi wankarunkupainyatjara. Kaña kunṭaringkuwiyangku rapangku wangkapai anangu tjuṭangka, panya tjana tjukurpa nyanga palumpa mulamularingkunyangka Godalu tjananya uwankara wankařunkuku, Jew

tjuṭa munu palulanguru anangu kutjupa tjuṭa kuļu panya Jew wiya tjuṭa.*
¹⁷ Panya tjukurpa nyanga palulawanungku Godalu nintilpai nyanga alatji anangu Jesuku Christaku mulamularingkunyangka kutju Godalu palunya tjukarurunmankula walytjanmankupai. Uwa mulapa, palumpa mulamularingkula rapa ngaranyangka kutju Godalu tjukarurunmankupai palumpa walytjaringkunytjaku. Panya nyiringka iriti walkatjunkunytja alatji ngaranyi,

“Anangu Godaku mulamularingkunyangkampa Godalu palunya tjukarurunmankuku, ka paluru wanka titutjara nyinaku palula tjungu.”*

Anangu Uwankara Kuratjara Nyinanyi

¹⁸ Panya Godanya mirpanaripai anangu tjutangku palunya kulira wantinyangka munu kura kutjupa kutjupa tjuṭa rawangku palyannyangka. Panya paluru tjana kura palyantjatjanungku tjukurpa tjukaruru wantipai munuya palyanyku nyinanytjikitjangku kulintja wiyangku wantipai. Ka tjana nyanga alatji rawangku palyannyangka Godanya tjanampa pulkara mirpanarinyi. ¹⁹ Panya Godalu manta, ilkari kutjupa kutjupa uwankara palunu nganana nyanga palunya nyakula nintiringkula kulintjaku, “Munta-uwa, mulapa nyangatja Godalu paluntja uwankara.” Palu tjana alatjitu ya nyakula kulira wantinyi. ²⁰ Anangu tjutangku Godanya witulya pulkanya putu nyanganyi kurungku, palu palya, panya nganmanyanguru alatjitu Godalu paluntja uwankara uti ngarangi anangu tjutangku kurungku nyakunytjaku, munu nyakula kulira nintiringkunytjaku panya Godanya witulya pulka nyinanyi uwankarangka waintarinytja. Uwa, anangungku putu Godanya wiyanmananyi panya Godalu paluntja uwankara uti ngaranyi nyakula kulintjaku.

²¹ Panya paluru tjana Godaku ninti nyinangi, palu nyara palunyaya pulkanmankunytja wiyangku wantingi, munuya palumpa pukularira palunya walkuntja wiyangkuwantingi. Munuya palulanguru tjukarurungku kulintja wiyaringu munuya pina pati alatjitu nyinangi.

²² Paluru tjanayanku walytjangku wangkapai, “Nganana ninti pulka mulapa nyinanyi, uwankaraku ninti.” Palu wiya, tjana ngunti wangkapai panya tjana ninti wiya ngurpa alatjitu nyinanyi. ²³ Utiya Godanya kutju walkunma panya paluru kutju wanka titutjara nyinanyi pulka mulapa wiru alatjitu uwankarangka waintarinytja. Palu tjana pununguru apunguru kutjupa kutjupa tjuṭa palyalpai wati purunypa, tjułpu purunypa, kuka purunypa, munu liru, tjati, ngintaka tjuṭa purunypa kułukulu, munuya palunya tjananya walkulpai. Palu nyanga paluru tjana mantangka unytju kutju ngarapai munu wiyarungupai.

²⁴ Kulila! Anangu nyanga paluru tjana kura titutjarangku palyalpai, ka Godalu putu tjananya painingi kura pulka nyinanyangka munu putu paintjatjanungku tjananya wantir'iyau tjananku kurunpa mukuringkunytjatjanungku palyantjaku kura tjuṭa kutju, kaya mulapa kura pulka nyinanyi kutjupangka ngunti ngaripai. ²⁵ Panya tjana tjukurpa tjukaruru Godanyatjara wantingu munuya tjukurpa nguntiku mukuringu. Panya Godalu uwankara palunu mantangka ilkaringga, palu tjana God palulpainya wantira mantatja tjuṭa ngunti walkuningi, Godalu paluntja

* ^{1:16} Lita nyangangka Paulalu kutjupa-ara wangkanyi Jew tjutangka munu kutjupa-ara wangkanyi Jew wiya tjutangka, munu piruku kutjupa-ara wangkanyi anangu uwankarangka. Ka nganana Pitjantjatjara tjuṭa kuļu Jew wiya tjuṭa panya ini kutjupa Gentile tjuṭa. * ^{1:17} Apakukaku 2:4

tjuṭa. Palu utila Godanya kutju walkunma tiṭutjarangku munula Godalu paluntjitja tjuṭa walkuntja wiyangku wantima. Uwa mulapa.²⁶ Palu tjana kurangka kutju tiṭutjara anangi, ka Godalu tjananya wantir'yaningi tjana kura tjuṭaku pulkara mukuringkunyangka, kaya rawangku kura nyanga palunya tjananya kutju palyaningi. Panya minymangku wati wantira minymaku pulkara mukuringkupai munu pulanku ngunti tjunguringkupai.²⁷ Ka palu purunypa watingku minyma wantira watiku pulkara mukuringkupai, munu pulanku palu purunypaṭu ngunti tjunguringkupai kunṭa wiya alatjiṭu. Munuyanku nyanga palulanguru tjananku walytjangku alatjiṭu puntu kuralpai kura nyanga palu purunypa tjuṭa palyara.

²⁸ Uwa mulapa tjana Godanya tjukarurungku kulintja wiyarungu munuya palumpa tjukurpa tjukaruru wantingu, ka palulanguru tjananya Godalu wantir'yanu tjananku walytjangku kulintjaku. Kaya kura tjuṭa kutju kulilkatinyi rawangku. Utiya wantima kura nyanga palunya tjananya, palu tjana palyalkatingi alatjiṭu.²⁹⁻³¹ Panya tjana kura kutjupa kutjupa tjuṭaku rawa mukuringkupai kura nyanga tjanampa:

- Tjana manyu nyinapai,
- nyararingkupai,
- miripungkupai,
- pikaringkupai,
- ngunti kuralpai,
- ngunti ngukara wangkapai,
- tjukurpa kurakura tjuṭa tjaalymara para-wangkapai,
- Godaku kuraringkupai,
- mirpanṭu warkira wangkapai,
- walytjangku mirawanira kanany-kananypa nyinapai,
- kurungku nyakula kulilpai rawangku kura kutjupa kutjupa tjuṭa palyantjikitjangku,
- mamangka ngunytjungka kulilwiyangku wantira tungunpungkupai,
- kunṭa wiyangku kura pulka palyalpai,
- mulamulangku kalkuntja wiyangku ngunti kuralpai,
- pina pati, kawakawa alatjiṭu nyinapai,
- walytja tjuṭaku mukulya wiya,
- aŋangu kutjupaku ngalturingkupai wiya alatjiṭu.

Uwa paluru tjana kura nyanga palu purunypa tjuṭaku pulkara mukuringkupai.

³² Palu tjana ngañmanytu kulinu Godalu tjukurpa nyangatja wangkanyangka panya, "Kura nyanga palu purunypa tjuṭa palyarampan mulapa iluku." Palu tjana kura nyanga palu purunypa tjuṭa tunguntunguntu palyalkatipai, munuya kutjupa tjuṭa wituwitulpai kura nyanga palu purunypa tjuṭa palyantjaku.

2

Godalu Aŋangu Uwankara Ngurkantara Tjaralku

¹ Kulila! Nyuntu kutjupa tjuṭa nyakula kuranmankupai. Palu nyuntunku uti walytjangku kulinmaṭu, panya nyuntu kuļu palu purunypaṭu kura palyalpai tjana nyanga palyantja purunypa. Munun tjananya kuranmankula nyuntunku kuļu walytjangku kuranmananyi tjananya kutju wiya.

² Nganaŋa ninti panya Godalu aŋangu tjuṭa tjukarurungku ngurkantara pungkupai tjana kura nyanga purunypa tjuṭa palyannyangka.³ Ka nyuntu yaaltji kulini? Nyuntu panya aŋangu kutjupa kuranmankupai, munu

nyuntu ngapartji palu purunypa⁴ palyalpai panya paluru kura palyantja purunypa. Ka Godalu wanyu nyuntunya nyakula palyanmankuku munu palunya kutju kuranmara pungkuku? Wiya Godalu nyupalinyat⁵ kuranmara pungkuku.

⁴ Munta tjinguru nyuntu alatji kulini, “Palyanti⁶ ngayulu kura tju⁷a palyanma panya Godanya nganampa ngalturinganyi munulanya ti⁸tutjarangku mukulyangku kanyini iluntankunytja wiyangku.” Uwa mulapa Godanya ngaltunyntju ti⁸tutjara nyinanyi, panya paluru rawa mulatu nyuntumpa pa⁹tan¹⁰ kura wantira palulakutu malaku aruringkunytjaku.

⁵ Palu nyuntu kulira wantinyi munu kurunpa wituwitu nyinanyi munun rawa Godala tungunpunganyi. Ka palulanguru tjintu malatjangka Godalu nyuntunya pulkara mirpanarira pailku, panya tjintu nyara palula anangu uwankara Godalu kutju kutju ngurkantara tjukarurungku tjaralku. ⁶ Panya Godalu anangu uwankara nintingu kutju kutju ngurkantara tjaralku munu kura palyalpai tju⁷a ngapartji kurakura ungkuku munu wiru palyalpai tju⁷a ngapartji wi¹¹ru mulapa ungkuku.

⁷ Kutjupa tjutangku panya wirura rawangku palyalkatinyi, Godanya kutju waintara kulira, munuya mukuringanyi Godalu tjananya pukularira palyanmankunytjaku, munuya mukuringanyi¹² tjananya wanka ti⁸tutjarangku kanyintjaku. Ka mulapa Godalu tjananya wanka ungkuku, palula tjungu ti⁸tutjara nyinanytjaku.

⁸⁻⁹ Ka kutjupa tjutangku walytjangku kulilpai ka¹³nany-ka¹³anyak¹⁴, munuya paluru tjana tjukurpa tjukaruru wantira iwara kurangka ananyi ti⁸tutjara. Ka Godalu tjanampa mirpanarira pika pulka palyalku tjana kurangka ti⁸tutjara ankunyangka. Panya kura palyalpai uwankara Godalu pika pulka ungkuku, Jew tju⁷a-warara munu anangu kutjupa tju⁷a ku¹⁵lu, panya Jew wiya tju⁷a. ¹⁰ Palu kutjupa tjutangku wirura palyannyangka Godalu tjananya pukularira palyanmankuku, munu tjananya kurunpa pukulpa rapa nyinanytjaku palyalku. Uwa, anangu wi¹⁶ru palyalpai uwankara Godalu alatjingalku, Jew tju⁷a-warara munu anangu kutjupa tju⁷a ku¹⁵lu. ¹¹ Panya Godanya nganampa kutju pukularinytja wiya, wirura palyannyangka, anangu Jew wiya tju⁷aku ku¹⁵lu paluru pukularipai, tjana ku¹⁵lu wirura palyannyangka.

¹² Panya anangu kutjupa tju⁷a Moseku tjukurku ngurpa. Palu nyara paluru tjana kura palyannyangka Godalu tjananya ngurkantara pungkuku ngurpanmara ngalturingkunytja wiyangku. Ka panya Jew tju⁷a ninti nyinanyi tjukurpa nyanga palumpa. Palu tjana ku¹⁵lu kura palyannyangka Godalu palunya tjananya ku¹⁵lu uwankara ngurkantara pungkuku, panya Moseku tjukurta alatji ngaranyi kura palyannyangka pungkunytjaku. ¹³ Panya Moseku tjukurku ninti nyinanyangka kutju Godalu tjukarurunmankula walytjanmankunytja wiya. Palu wanganarangku kulira palyannyangka kutju Godalu nyakula tjukarurunmankula walytjanmankupai. ¹⁴ (Kaya anangu kutjupa tju⁷a ngurpa nyinanyi Moseku tjukurku. Palu kutjupa-ara tjana watarku nyinara walytjangku kulilpai tjukaruru nyinanytjikitjangku. Palu tjana Godaku tjukurku ninti wiya munuya unngu kulilpai yaaltji-yaaltji palyanyku nyinanytjikitjangku. ¹⁵ Panya Moseku tjukurtu wangkanyi yaaltji-yaaltji tjukaruru nyinanytjaku. Kaya tjukurku ngurpa tjutangku yaaltji-yaaltjingku kulini tjukaruru nyinanytjikitjangku? Wiya, Godalu panya nganmanytju tjanala unngu nintinu. Ka tjana tjukurpa unngu kanyira kulilpai yaaltji palya, yaaltji kura. Munuya nyara palulanguru kura nyinara nintingu kulilpai, “Munta,

nyangatjaña tjinguru kura palyaŋi.” Munuya piruku tjukaruru nyinara kulilpai, “Munta, tjinguruŋa palya nyinanyi.”)

¹⁶ Ka ngula tjintu panya malatjangka Godalu Jesunya Christanya tjunkuku aŋangu uwankara tjukarurungku ngurkantara tjarantjaku. Ka aŋangu tjutangku waltyangku unngu kulinnyangka paluru nintingku ngurkantankuku munu tjaralku. Godanya mukuringanyi tjukurpa nyangatja kuļu aŋangu tjutangku kulintjaku, ka panyaŋa palunyatjara tjakultjunkupai.

Jew Tjuta Munu Tjukurpa Mosenya Ungkunytja

¹⁷ Palu kuwariŋa nyurala wangkanyi, Jew tjutangka. Nyuranku waltyangku mirawaŋipai alatji, “Jew tjuta nganaŋa nyinanyi, Godaku waltyja mulapa. Panya Godalu palumpa tjukurpa nganampa waltyja Mosenya ungu, kala nganaŋa kanyini.” ¹⁸ Uwa tjinguru nyura mulapa ninti Godaku iwaraku, panya nyura Moseku tjukurku nintiringkula nintingku kulini yaaltji-yaaltji palyanyku nyinanytjikitjangku. ¹⁹ Munu nyura kaŋany-kaŋanypa nyinara aŋangu kutjupa tjuta nintilpai. Nyura alatji kulilpai, “Nganaŋa mulapa watarkitja tjuta nintilpai Godanya tjukarurungku waŋantjaku. Panya tilingku mungangka irnyara iwara utilpai, palu purunytjula ngurpa tjutangka utira nintilpai Godaku iwara.” Alatji nyura kulilpai ngunti. ²⁰ Munu nyura kawakawa tjuta tjukaruruntjikitjangku kulilpai, munu tjukurku ngurpa tjuta kuļu nintintjikitja mukuringkupai. Panya nyura kulilpai, “Nganaŋa Moseku tjukurpa kanyini munula palu languru Godaku tjukurpa uwankaraku ninti nyinanyi.”

Uwa, mulapa nyura Moseku tjukurpa kanyini munu nyura uwankaraku ninti nyinanyi, palu nyura wanyu wangaŋarangku kulilpai tjukurpa pala palula? Wiya. ²¹ Nyura tjananya kutju nintilpai tjukaruru nyinanytjaku, palu tjananya nintira nyura tjukaruru nyinapai wiya. Munu nyura kutjupa tjuta pailpai kutitjunkuwiyangku wantintyjaku, munu tjananya paintjatjanungku nyura kuļu kutitjunkupai. ²² Ka panya palu purunypa nyura tjananya pailpai kuri waltyatjarangka ngariwiyangku wantintyjaku, palu tjananya paira nyura kuļu kampangkatu waltyatjarangka ngaripai. Munu piruku nyura wangkapai alatji, “Ngayulu tjanampa walı milmiltä tjarpala tjanampa god tjuta pupakatira walkulpai wiya. Ngayulu tjanampa kuraringanyi.” Alatji nyura wangkapai, palu nyura walı pala palula tjarpala tjanampa kutjupa kutjupa tjuta kutitjura katipai kurangku. ²³ Munu nyuranku mirawaŋipai tjukurpa panya Godalu Mosenya ungkunytjitja kanyira. Palu nyura wanyu tjukurpa palunya wangaŋarangku kulilpai? Wiya, nyura kuliŋa wantira nyuranku waltyangku mirawaŋipai. Ka nyara palulanguru aŋangu kutjupa tjutangku nyuranya nyakula Godanya analpai. ²⁴ Panya nyiringka tjukurpa iriti wangkatjarangku walkatjunkunytja ngaranyi panya Jew tjutangka wangkanytja nyanga alatji, “Nyuralanguru aŋangu Jew wiya tjutangku nyuranya nyakula Godanya analpai.” *

²⁵ Uwa Jew tjuta, nyuralaŋa wangkanyi, panya nyura Aipuŋamaku arangka itinguru watiringu,* munu nyura palulanguru kulilpai, “Nganaŋa Godaku waltyja tjuta nyinanyi.” Alatji nyura kulilpai, palu nyura tjinguru

* ^{2:24} Aitjayaku 52:5 * ^{2:25} Nyawa Genesis 17:9, panya Godalu Aipuŋamanya kalkuntjatjanungku wangkangu watirinkunytjaku munu iti nyitayira tjuta uwankara kuļu wirkara tjintu 8-ŋguru watintjaku.

Godalu wangkanytjitja kulira wantira ara nyanga itinguru watiringkunytja upani, panya nyura Godala tungunpunganyi munu palumpa walytja mulapa nyinanytja wiya. Palu nyura Godaku tjukurta wangañarangku kulirampa ara nyanga itinguru watiringkunytja kuñpu kanyini.

²⁶ Kaya kulila aŋangu kutjupa, panya Jew wiya. Nyara paluru Aipuramaku arangka watiringkunytja wiya nyinanyi. Palu tjin-guru paluru tjukaruru palyanyku nyinanyangka Godalu nyakula alatji wangkara walytjanmankuku, “Nyngatja ngayuku walytja nyinanyi. Palya paluru watiringkunytja wiya, panya tjukaruru nyinanyangka ngayulu palunya walytjanmananyi wati Jew purunypa.” Alatji Godalu palunya kulilku.

²⁷ Ka nyura watiringkunytja tjutangku Godaku tjukurpa kanyintjatjanungku uti wangañarangku kulinma, palu nyura tungunpungkupai. Ka nyara palulanguru aŋangu kutjupa tjutangku tjukaruru nyinanytjatjanungku nyuranya kuranmankuku. Panya nyura Aipuramaku arangka itinguru watiringu munu panya nyura Godaku tjukurpa nyiringka kanyini wangañarangku kulintjikitjangku. Palu aŋangu kutjupa tjutaya tjukaruru nyinanyi itinguru watiringkunytja wiyatja, munuya paluru tjana nyuranya tungunpungkunyangka nyakula analku.

²⁸ Palu ngananya Jew mulapa nyinanyi? Ngananya wanyu Godaku walytja mulapa? Nyara Aipuramaku arangka itinguru watiringkunytja tjuta kutju? Paluru tjana wanyu Jew mulapa? Wiya, nyara paluru tjana watiringkunytjatjanu Jew mulapa nyinanytja wiya. ²⁹ Palu panya Kurunpa Milmiłtu ungu palyantjitetjanguru kutjuya Jew mulapa nyinanyi, watiringkunytjjanguru wiya. Ka Jew pala palu purunypa panya Godaku walytja nyinanyi munu paluru tjukaruru nyinapai Godanya nyakula palumpa pukularintjaku aŋangu tjuta wiya.

3

¹ Ka nyura tjinguru nyara palulanguru kulini, “Nyaakula nyanga alatji Jew tjuta nyinanyi? Nganaña wanyu nyaa? Unytju kutjula itinguru watiringu?” ² Wiya, ara nganampa wiru mulapa ngaranyi. Panya Godalu palumpa tjukurpa ngananya ungu ngananya tjukarurungku kanyintjaku.

³ Palu Jew kutjupa tjutangku Godala wangañarangku kulintja wiyangku wantingi. Ka tjana kulilwiyangku wantinyangka Godalu kalkuntjatjanungku wanyu palyantja wiyangku wantipai? ⁴ Wiya, Godanya tjukaruru alatji nyinanyi, ngunti kuralpai wiya. Panya aŋangula ngunti wangkapai nyinanyi, palu Godalu kalkuntjatjanungku tjukarurungku palyalpai alatji. Panya iriti nyiringka walkatjunkunytja ngarinyi tjukurpa nyanga alatji Davidalu Godala wangkanytja,

“Nyuntu wangkanyangkaya aŋangu uwankarangku kulilpai, ‘Mulapa Godalu wangkanytjatanungku tjukarurungku palyalpai.’

Nyuntu aŋangu tjuta kuutpangka wangkanytjaku ngaratjunkula tjukarurungku ngurkantankupai.” *

⁵ Nyanga palulanguruya aŋangu kutjupa tjutangku tjinguru kulilku tjukurpa ngunti nyanga alatji, “Palyala kura rawangku palyanma. Panya ngananya kura nyinanyangka aŋangu kutjupa tjutangku ngananya kura nyakula waintara Godanya kulilku panya paluru kutju tjukaruru nyinanyi ngananya purunypa wiya. Ka nyara palulanguru Godanya tjinguru nganampa pukularima munulanya kuraringkunyangka pungkunytja wiyangku wantima, panya aŋangu tjutangkuya palunya walkuni

* ^{3:4} Psalm 51:4

nganaṇa kura nyinanyangka nyakula.” Alatjiya aŋangu kutjupa tjutangku tjinguru kulilpai.⁶ Palu wiya, nyangatja ngunti kulintja tjukaruru wiya. Panya Godanya kura palyannyangka pukularipai wiya alatjiṭu. Paluru tjukarurungku kutju ngurkantankuku aŋangu ngura winkitja, munu nganaṇanya kuļu.

⁷ Kaya tjinguru kutjupa tjutangku kulilpai alatji, “Palyala ngunti kuranma, panya nganaṇa ngunti kurannyangka kutjupa tjutangku nganaṇanya nyakula waintara kulilku Godanya kutju tjukaruru nyinanytja, munuya nyara palulangurulta palunya pulkara walkulku. Ka uti nyara palulanguru Godanya nganampa kalyparingama kukanymankunyta wiya, munulampa pukularima ngunti kurannyangka.” Alatjiya tjinguru kulilpai.⁸ Palu wiya, tjana nyanga alatji ngunti kulini. Tjana ngayulu wangkanytja kulira kampa kutjupara wangkanyi nyanga alatji, “Wanyula kura tjuta kutju palyalkatima aŋangu tjutangku nganaṇanya kura nyakula waintara Godanya kutju mirawanqinytjaku.” Palu wiya, ngayulu nyanga alatji wangkanytja wiya. Ka Godalu tjananya ngunti kurannyangka mirpanarira kukanymananyi alatjiṭu.

Anangu Kutjupa Tjukaruru Mulapa Nyinanytja Wiya

⁹ Kala nganaṇa Jew tjutangku yaaltji-yaaltji kulilku? Godanya wanyu nganampa kutju pulkara pukularinyi munu aŋangu kutjupa tjutaku mukuringkunyta wiya? Wiya alatjiṭu. Panya nganmanytju na nyurala wangkangu nyanga alatji, “Aŋangu Jew tjuta munu Jew wiya tjuta kuļu uwankara kura nyinanyi, munuya iwara kurangka tiṭutjara ankula puṭu palyaringanyi.” Alatji na nyurala wangkangu ngaṇmanytju,¹⁰ panya tjukurpa paluruṭu nyiringka iriti walkatjunkunyta ngarinyi alatji, “Aŋangu uwankaraya kura nyinanyi, aŋangu kutjupa tjukaruru nyinanytja wiya.

¹¹ Panya aŋangu uwankarangku puṭu kulini Godalawanu tjukaruru nyinanytjikitjangku.

Ka kutjupangku Godaku nintiringkunytkitjangku kulintja wiya alatjiṭu, uwankarangkuya wantinyi.

¹² Panya aŋangu winkingkuya Godanya wantingu, munuya waltytjangku kutju kulira uwankara tjunguringkula makuraringu.

Kutjupa tjukaruru nyinanytja wiya alatjiṭu, uwankarangkuya kura tjuta kutju palyani.*

¹³ Tjanampa wangka kura mulapa, panya tjana tjukurpa kura kutju wangkapai, munuya ngunti kuralpai tjukarurungku wangkanytja wiyangku.

Ka tjana wangkanyangka kura tjuta kutju utiringkupai.*

Panya lirungku aŋangu patjara iluntankupai, nyara palu purunytjuya tjana tjukurpa ngunti wangkara pikantankupai.*

¹⁴ Uwa mulapa, tjana warkilangku rawangku warkipai.*

¹⁵ Munuya mapalku pikaringkupai munu pungkula iluntankupai.

¹⁶ Munuya para-pitjalira ngura kutjupangka kutjupangka kura palyara aŋangu tjuta tiṭutjarangku tjuni kuralpai.

¹⁷ Panya tjana puṭu kulilpai kalypa nyinanytjikitjangku.*

* **3:12** Psalm 14:1-3; 53:1-3 * **3:13** Psalm 5:9 * **3:13** Psalm 140:3 * **3:14** Psalm 10:7 * **3:17** Aitjayaku 59:7-8

18 Munuya Godanya kulira nguluringkunytja wiyangku analpai alatjiitu.” *

Uwa, tjukurpa nyanganpa panya nyiringka iriti walkatjunkunytja ngarinyi.

19 Palu Godaku tjukurpa wanyu nganaku tjanampa ngarinyi? Wiya, panya Jew tjutalanya ungu, ka nganaña wangañarangku kulintjaku ngaranyi. Ka nganaña palumpa tjukurta tungunpungkunyangka Godalu nganañanya tjukarurungku ngurkantankuku, kala puťu ngurparingkuku kura tjuťa ngañmanytu palyantjatjanu. Panya Godalu aňangu uwankara tjungura ngurkantananyi Jew tjuťa munu Jew wiya tjuťa kuľu. **20** Palu ngananya wanyu Moseku tjukurta wangañarangku kulin-tjatjanu tjukaruru ngaranyi Godala miřangka? Wiya alatjiitu, panya aňangu kutjupa Moseku tjukurta kulira tjukarururingkunytja wiya Godala miřangka. Tjukurpa nyara paluru panya nganañanya puťu tjukaruruṇi, palu panya tjukurpa paluru nganañanya nintini nganampa kura uwankara.

Yaaltjingara Godalu Anangu Tjuta Walytjanmankupai?

21 Palu yaaltjingarala wanyu Godala miřangka tjukaruru ngaraku paluru nganañanya walytjanmankunytjaku? Wiya kulila, kuvari paluru utinu iwara kutjupa nganaña palula ilaringkula tjukaruru ngaranytjaku. Iwara nyanga palunya panya Moselu tjana wangkatjara kutjupa tjuťangku kuľu ngañmanytu tjakultjunangi. **22** Ka iwara nyanga paluru alatji ngaranyi panya nganaña Jesuku Christaku mulamularingkunyangka kutju Godalu nganañanya tjukarurunmankula walytjanmankupai. Nyanga alatji paluru palyalpai Jesuku mulamularingkupai uwankara, **23** panya aňangu uwankara alatjiitu kura nyimara mauntalparingu munuya Godala puťu ilaringanyi panya paluru wiřu mulapa uwankarangka waintarintja. **24** Munu panya paluru nganampa ngal̄tunyntju pulka nyinanyi, munu iyanu Jesunya Christianity nganampa ngalkilpa ilunyntjaku, ka nyara palulanguru paluru nganañanya tjukarurunmankula walytjanmankupai kala karalyaripai. **25-26** Panya Godalu palumpa katja iyanu nganampa ařangka ilunyntjaku nganaña kurantjitjanguru. Ka panya Jesunya nganampa angailura milkali tjutingu nganaña palumpa mulamularingkunyangka Godalu nganañanya pungkuwiyangku kalypangku wantinytjaku. Kala nyanga palulanguru kulipai mulapa Godalu tjukarurungku ngurkantankupai. Panya ngañmanytu aňangu tjuťangku kura tjuťa palyannyangka Godalu tjananya pikantankuwiyangku wantingi. Palu tjukarurungku paluru wantingi ngula Jesunya iyantjikitjangku kura uwankaranguru anga-ilunyntjaku. Kala nyanga palulanguru kulini panya aňangungku kura palyannyangka Godanya puťu pukulripai, panya kuvari paluru tjukarurungku aňangu tjuťa pungkuwiyangku kalypangku wantipai Jesunya tjanampa ngalkilpa ilunyntjitunguru, munu palulanguru Jesuku mulamularingkupai uwankara tjukarurunmankula walytjanmananyi.

27 Kalanku wanyu nyaanguru walytjangku mirawańima? Nganaña wanyu Godaku walytjaringu tjukaruru nyinanytjatjanu? Wiya putulanku walytjangku mirawańinyi, panya Godalu tjukaruru nyinanyangka nyakula walytjanmankunytja wiya, palu nganaña Jesuku mulamularingkunyangka kutju Godalu nganañanya tjukarurunmankula walytjanmananyi. Ka nganaña walytjangku mirawańinytjaku wiya ngaranyi. **28** Panya Jesuku mulamularingkunyangka kutju Godalu nganañanya tjukarurunmankula walytjanmankupai. Palu Moseku tjukurwanungku Godalu nganañanya

* **3:18** Psalm 36:1

puṭu walytjanmankupai. ²⁹ Munta tjinguru nyura alatji kulini, “Godanya tjinguru Jew tjutaku kutju mayatja nyinanyi.” Palu wiya, nyura ngunti kulini, panya Godanya aŋangu uwankaraku mayatja nyinanyi, Jew tjutaku kutju wiya, palu aŋangu kutjupa tjutaku kuļu ngura wikitjaku. ³⁰ Panya Godanya kutju alatji nyinanyi kutjara wiya. Munu paluru Jew tjuta Jesuku mulamularingkunyangka kutju tjukarurunmankula walytjanmankupai, munu palu purunypaṭu aŋangu kutjupa tjuta kuļu Jesuku mulamularingkunyangka kutju tjukarurunmankula walytjanmankupai. ³¹ Kala wanyu Jesuku mulamularingkula Moseku tjukurpa wantira wiyanmankuku? Wiya, Jesuku mulamularingkula nganana nyanga alatji kulilpai, “Moseku tjukurpa tjukaruru ngaranyi nganana kulira tjukaruru nyinanytjaku, kala uti tjukurpa nyanga palunya wanganarangku kulinma wantintytja wiyangku.”*

4

Aipuramanya Purunypala Mulamulariwa Godaku

¹ Uwa, nganana Jew tjuta tjamu Aipuramalanguru tjutaringkunytja małatja małatja. Kala wanyu palunya kulinma. ²⁻³ Panya paluru Godaku walytjaringkula tjukaruru alatji ngarangi Godala mirangka. Palu paluru wanyu war̄ka wiru palyantjatjanu Godaku walytjaringu munu palula tjukaruru ngarangi? Wiya, paluru Godaku mulamularingkunyangka kutju palunya Godalu tjukarurunmankula walytjanmanu. Ka nyara palulanguru palurunku walytjangku puṭu mirawaningga, panya paluru palyantjitjanguru Godalu palunya tjukarurunmankunytja wiya. Panya nyiringka iriti walkatjunkunytja nyanga alatji ngarinyi,

“Aipuramanya mulamularingu Godaku. Ka nyara palulanguru Godalu palunya mulamularingkunyangka nyakula tjukarurunmankula walytjanmanu.”*

⁴ Ka wati panya war̄karipai wanyu kulinma, panya paluru war̄ka palyantjatjanungku mani mantilpai mayatjangka, munu paluru kulilpai, “Mani nyangatjani unytjungku ungkunytja wiya, palu war̄ka palyannyangka kutjuṇi nyangatja ungu.” ⁵ Ka tjinguru nyura aṛa nyanga palulanguru kulini nyanga alatji, “Munta Godalu ngayunya walytjanmankuku ngayulu palumpa wirura war̄karinyangka kutju.” Palu wiya, Godalu nyanga alatji walytjanmankupai wiya. Panya paluru aŋangu kura tjuta walytjanmankupai palumpa mulamularingkunyangka kutju, kutjupa kutjupa wiru tjuta palyantjanguru wiya. Palu mulamularingkunyangka kutju wangkapai alatji, “Nyuntun kuwari ngayula mirangka tjukaruru ngaranyi, kura wiya.” ⁶ Ka Davidalu kuļu wangkangu tjukurpa nyanga palu purunypa. Panya Godalu aŋangu tjukarurunmankupai paluru kutjupa kutjupa wiru tjuta palyantjanguru wiya, palu palumpa mulamularingkunyangka kutju paluru tjukarurunmankula walytjanmankupai. Ka nyanga palulangurulta paluru pukulpa mulapa nyinapai Godaku walytjaringkunytjatjanu. Panya nyiringka iriti walkatjunkunytja ngarinyi nyanga alatji,

⁷⁻⁸ “Aŋangu tjutaya pukularinyi Godalu tjananya kura palyantjitjanguru pungkuwiyangku kalypangku wantinyangka.

Uwa, tjana pukulpa mulapa nyinanyi,

* ^{3:31} Palu panya kuka pungkula Godanya ungkunytjaku wiyaringu, panya Jesunya alatjiutjangu munulampa ngalkilpa ilungu nganana kura palyantjitjanguru. * ^{4:2-3} Genesis 15:6

panya Godanya tjanampa kalyparingkula tjana kura palyantjitjaku watarkuringu alatjiitu piruku kulintja wiya.” *

⁹ Ka aña nyangatja wanyu Davidalu Jew tjutaku kutju wangkangu panya Aipuramaku arangka watiringkunytja tjutaku kutju? Wiya, paluru wangkangu Jew tjutaku kutju wiya, palu panya añañgu kutjupa uwankaraku kuļu. Panya ngañmanytjuña Godaku tjukurnguru nyurala tjakultjunu alatji, “Panya Godalu Aipuramanya palumpa mulamularingkunyangka nyakula tjukarurunmankula walytjanmanu.” ¹⁰ Palu tjinguru nyura kulini Aipuramanya watiringkunyangka kutju Godalu palunya tjukarurunmanu. Palu wiya, Godalu palunya tjitjilpi ngañmanytju alatjiitu tjukarurunmanu. ¹¹ Panya Godalu palunya tjukarurunmanu palumpa mulamularingkunyangka, ka nyara palula malangka ngula Aipuramanya wati Jew-ringkulalta nyinangi. Palu nyaanguru Aipuramanya watiringu? Wiya, paluru watiringu alatji nintintjikitja panya mulamularingkunyangka kutju Godalu palunya tjukarurunmanu. Kaya Aipuramanya purunyapa Godaku mulamularingkupai tjuta kuwari nyinanyi, panya tjananya kuļu Godalu palumpa mulamularingkunyangka tjukarurunmanu Aipuramanya purunyapa. Nyanga palulanguru Aipuramanya nganampa tjamu pułka nyinanyi Godaku mulamularingkupai uwankaraku. Panya añañgu Jew wiya tjuta nyinanyi Godaku mulamularingkupai tjuta, nyara paluru tjanaku kuļu Aipuramaku walytja nyinanyi. ¹² Ka palu purunyapatu nganaña Jew tjuta Godaku mulamularingkulampa nganaña kuļu Aipuramaku walytja nyinanyi watiringkunytjanguru wiya, palu Godaku mulamularingkula kutju, Aipuramanya purunyapa, panya wati nyara paluru ngañmanypa Godaku mulamularingu watiringkunytja kuwaripangka.

Mulamularingkunyangka Godalu Kalkuntja Panya Ungkupai

¹³ Ka panya Godalu Aipuramanya ngañmanytju kalkunu alatji wangkara, “Nyuntu munu nyuntumpa walytjapiti malatja malatjangkuya manta winki mantjilku munuya ala lipiwanu nyinaku manta winkingka.” Palu Godalu wanyu alatji Aipuramanya kalkunu paluru Moseku tjukurta wangañarangku kulinnyangka? Wiya, Aipuramanya tjukurpa panya Mosenya ungkunytjijangka kuwaripangka Godaku mulamularingu, ka pala palulanguru Godalu palunya tjukarurunmanu nyara palula aña alatjiitu. Munu palulanguru Godalu palunya kalkunu palumpa walytjapiti malatja malatja kuļu manta winki ungkunytjikitjangku tjanaku manta winkingka lipiwanu tjutaringkula nyinanytjaku. ¹⁴ Uwa, tjanaku mulamularingkula kutju mantjinu Godalu panya kalkuntja. Tjinguru Aipuramalu tjanaku Moseku tjukurpa wangañarangku kulira palyantjatjanungku mantjinnyangkala tjinguru ngunti mulamularingama kulira, “Tjukurwanungku-mantiya kalkuntja panyatja mantjinu, kala nyaaku mulamularingama?” Palu wiya, Aipuramalu mulamularingkula mantjinu, kala palunya arkara tjukaruru mulamularinganyi. ¹⁵ Panya Moseku tjukurtu nintilpai tjukaruru nyinanytjaku, ka tjukurpa pala palula tungunpungkunyangka Godalu mirpanarira iluntankupai. Palu tjinguru añañgu kutjupa tjukurpa nyanga palumpa ngurpa nyinarampa paluru puļu tungunpunganyi watarkitja alatjiitu, panya kutjupangku palunya ngañmanytju tjakultjunkunytja wiyatū.

¹⁶ Palu panya Aipuramanya mulamularingu Godaku, ka palulanguru palunya Godalu kalkunu. Kala palulanguru nintingku kulini panya Godalu

* 4:7-8 Psalm 32:1-2

mulapa ngaltunytjungku kalkuntjatjanungku ungkupai palumpa mulamularingkunyangka. Nyangatja panya paluru mukuringkula kutjukampa ungkunytja Aipuramaku walytjapiti uwankara, Moseku tjukurpa kanyilpai tjuta kutju wiya, palu Godaku mulamularingkupai uwankara ku lu paluru kalkuntjatjanungku ungu. Panya Aipuramanya nganampa uwankaraku tjamu ngañmanyitja mulapa nyinanyi, anangu mulamularingkupai uwankaraku.¹⁷ Panya nyiringka iriti walkatjunkunytja ngarinyi Godalu Aipuramanya kalkuntja nyanga alatji wangkara,

“Ngayulu na nyuntunya ngurkantanu anangu ngura wikitjaku tjamurungkunytjaku, kaya ngura winkinguru nyuntunya tjamu ngañmanyitja pulka kulira walkulkku.” *

Uwa mulapa Godalu palunya tjunu nganampa mama ngañmanyitja nyinanytjaku, panya paluru mulamularingu Godaku. Godanya panya miri ilunytjtja wankalpai munu kutjupa kutjupa tjuta palulpai wiyan-guru alatjtatu. ¹⁸ Ka Aipuramanya tjitji wiya alatjtatu nyinangi munu wiylatu tjilpiringu, palu paluru mulamularingangi alatjtatu Godaku, munu watarkurintja wiyangku tiutjarangku kulinigi ngula Godalu tjitji ungkunytjaku. Ka paluru tiutjara mulamularingkunyangka mulapatu walytjapiti tjutaringu palumpa katjanguru munuya ma-tjutaringkula malatja malatja mungilyi mulapa nyinangi wangka kutjupa kutjupa. Panya Godalu palula wangkangu Aipuramala nyanga alatji, “Nyuntumpa walytjapiti tjutaringkula mungilyi mulapa nyinaku malatja malatja.”*

¹⁹⁻²⁰ Ka Aipuramanya panya rawa mulapa nyinangi kuli tjuta mulapa yiya 100 nguwanpa, munu palurunku kulinigi, “Panya ngayulu kuwari tjlpi mulararingu mununa watalpi ilunytjikitjalta nyinanyi. Ka ngayuku kuri Tjiiranya tjitji wiya alatjtatu pamparingu panya ngali rawa mulapa nyinangi.” Palu nyanga alatji kulira paluru tiutjara Godaku mulamularingangi watarkurintja wiya. Munu palumpa mulamularingkula kurunpa kungpuringu munu Godanya rawangkuu mirawañingi. ²¹ Panya paluru raparingkula watarkurintja wiyangku kulinigi, “Mulapa Godalu kalkuntjatjanungku palyalku.” ²² Nyara palulanguru mulamularingkunyangka Godalu Aipuramanya tjukarurunmankula walytjanmanu. ²³⁻²⁴ Palu tjukurpa nyanga paluru wanyu Aipuramaku kutjuku? Wiya, tjukurpa paluru nganampa ku lu ngaranyi. Panya nganana mulamularinganyi Godalu Mayatja Jesunya ilunyangka wankara pakaltjingantjikaju. Ka nyara palulanguru Godalu nganananya tjukarurunmananyi. ²⁵ Panya Mayatja Godalulampa Jesunya iyanu nganampa kuranguru anga-ilunytjaku, munu ilunyangka palunya wankara pakaltjinganu Godalu nganananya walytjanmankunytjikitjangku Jesula tjungu tjukaruru Godala mirangka ngaranytjaku.

5

Godalulanya Walytjanmanu Palula Pukulpa Nyinanytjaku

¹⁻² Uwa, panya Jesuku mulamularingkunyangka Godalu nganananya tjukarurunmanu. Ka nyara palulanguru ngananana Godala tjunguringkula pukulpa nyinanyi Mayatja Jesula Christalanguru. Panya paluru-mantu Godanya kalypaunu munulanya palula tjungunu mukulya pulkangka. Kala kuwari palula kalypa pukuipa mulapa ala-ala patara nyinanyi munula kulini, “Mulapa Godalu nganananya katiku palumpa ngura wiru mulata kanyintjikitjangku palula tjungu.” ³ Munu ngananana pukularinyitu kutjupa

* **4:17** Genesis 17:5 * **4:18** Nyawa Genesis 15:5

tjuṭangku nganañanya miilarara kurannyangka. Panya kura nyanga palu puruny whole tjuṭa nganañala wirkankunyangka nganaña uti waintara kulinma nyanga alatji, "Wiya palyalanya nyura Jesunya wañannyangka kuranı, panya nganañanya pikangku wataparannyangkala kulira raparinganyi Jesunya tungun-tunguntu wañantjikitja." ⁴ Nyara palulan-gurula tungun-tunguntu titutjarangku wanara nganaña kunpuringanyi punkantja wiya, kalampa Godanya nyakula pukularinyi. Kala kurunpa raparingkula nyinara patalku ala-alangku Godalu ngula nganañanya pitjala katintjaku. ⁵ Palu Godalu tjinguru nganañanya wantiku ngura wirukutu katintjaka wiyangku, kala tjituru-tjitururiku. Wiya, Godalulanya katiku alatjitu ngura wiru mulata kanyintjikitjangku. Panya paluru mukulya pulkangku Kurunpa Milmilnga nganañala tjarpatjunu unngu nyinara Godaku mukulya nintintjaku. Kala mulapa pukultu ala-alangku nyinara pañani Godala tjungu titutjara nyinanytjikitjangku.

⁶ Kulini nyura? Panya nganaña uwankara kura nyinangi munula puṭu waltyja palyaringangi, ka nganaña kura winki nyinanyangka Christanya nganampa ngalkilpa ilungu tjirirpi panya palula alatjitu, panya Godalu nganmanytju kulintjitjangka. ⁷ Palu wati ngananya wanyu mukuringanyi ngalkilpa ilunytjikitja anangu panya tjukaruru nyinapaiku? Tjinguru wiya alatjitu. Tjinguru palya mulapa nyinanyangka kutju kutjupangku kuliklu pala palumpa ngalkilpa ilunytjikitjangku. Palu anangu tjuṭa mukuringkunyti wiya ngalkilarira ilunytjikitja. ⁸ Palu Jesunya Christanya kutju mukuringkula nganampa ngalkilpa ilungu nganaña kura winki nyinanyangka. Kala pala palulanguru kulini, "Mulapa Godanya nganampa pulkara alatjitu mukuringanyi." ⁹ Uwa, Christanya nganampa ngalkilpa ilunyangka Godalu nganañanya kura tjuṭa palyantjitunguru kalypangku pungkuwiyangku wantingu munu nganañanya tjukarurunmanu. Ka pala palulanguru nganaña tjintu małatjangka rapalta ngaraku. Panya tjirirpi nyara palula nganañanya Godalu ngurkantara paira iyantja wiya, panya Christalu nganañanya nyara palula wankarutu kanyilkku nganmanyapa nganampa kuranguru ngalkilpa ilunytjatjanungku. ¹⁰ Panya nganampa Godanya mirpanpa nyinangi, ka Jesulu palunya kalypaŋ nganampa kuranguru anga-ilura. Ka kuwari Godanya nganampa kalypa nyinanyangka nganaña kulini mulapa Jesulu nganañanya titutjarangku wankarutu kanyilkku panya paluru wankatu nyinanyi nganampa malpa wiru. ¹¹ Kala palumpa pulkara alatjitu pukularinyi Godaku Mayatja Jesula Christalanguru, panya paluru Godanya kalypaŋ nganaña palula tjungu waltyja titutjara nyinanytjaku.

Ara Kutjara Ngaranyi Adamanya Munu Jesunya Christanya

¹² Nyaanguru anangu uwankara ilupai? Wiya panya wati nganmanyitjangku Adamalu kura palyaŋ munu palulanguru ilungu titutjara nyinanytja wiya. Ka nyara palulanguru anangu winki Adamanya puruny whole kura palyalpairingu, munu palulangurulta uwankara ilupairingu. ¹³ Uwa, iritinguru alatjitu anangu uwankara kura nyinangi. Palu Mosela kuwaripangka tjukurpa panya wiya ngarangi tjananya paira tjukaruruntjaku, ka nyara palulanguru nyura tjinguru kulini Godalu Mosenya tjukurpa ungkunyangka kutju-manti kurampa wirkanu. Palu wiya, nganmanytju alatjitu kura palyaningi, panya Adamalanguru. ¹⁴ Ka nyara palulanguru panya anangu ngura winkitja rawa ilukatingi Adamalanguru panya Mosenya tjukurpa ungkunytjitatjaku-wangkara. Uwa, Adamalu Godala tungunpungu munu mai panya paintjitia ngalkunu.

Kaya kutjupa tjutangku mai nyara palu purunypa ngalkuntja wiya, palu tjana palu purunypatū Godala tungunpungkula kura kutjupa kutjupa tjuta palyaningi munuya palu purunypatū ilungi.

Palu wati kutjupa Adamanya purunypa ngula wirkankunytjaku ngarangi.¹⁵ Palu nyanga paluru pula tjungu wiya. Panya Adamalu kutjungku tungunpungkula ilunytjaku palyanu, kaya anangu uwankara ilupairingu. Ka Jesulu kampa kutjupa pulka mulapalta palyanu anangu tjuta wankaringkunytjaku, panya Godalu mukulya pulkangku palunya intjanurinytjaku iyanu.¹⁶ Palu Adamaku kuranguru nganana uwankara kuraringu anangu winki, kalanya Godalu ngurkantara wiyanjtaku ngaranyi kura nyara palulanguru. Palu anangu uwankarangku titutjarangku kura palyannyangka Godalu nganampa ngalturingkula nganana Jésunyia intjanungku iyanu anangu tjutaku ngalkilpa ilunytjaku, ka paluru kura uwankaranguru ilunyangka Godalu palumpa mulamularingkupai tjuta tjukarurunmankula walytjanmanu.¹⁷ Uwa, wati kutjungku Adamalu anangu uwankara ilunytjaku palyanu. Ka wati kutjupangku Jesulu Christalu kampa kutjupa pulka mulapalta palyanu palumpa mulamularingkupai tjutaku. Panya paluru palyantitjanguru Godalu anangu nyara palunya tjananya mukulya pulkangku tjukarurunmanu. Kala pala palulanguru nganana Jesula tjunguringkula titutjara wanka mulapa nyinanyi munula ilunytja kulira nguluringkunytja wiya, rapa alatjiu nyinanyi.

¹⁸ Uwa, wati kutjungku Adamalu Godala tungunpungu munu anangu uwankara kuraringkunytjaku palyanu, ka panya Godalu tjananya kuraringkunyangka nyakula wiyanjtaku ngarangi. Palu wati kutjungku Jesulu Godala wanganarangku kulinu munu ilungu, ka nyara palulan-guru anangu uwankaraku ala ngaranyi Godaku walytjaringkula palula tjukaruru ngaranytjaku munu palula tjungu wanka titutjara nyinanytjaku.¹⁹ Panya anangu uwankara kuraringu wati kutjungku Adamalu Godala tungunpungkula kulira wantinyangka. Palu wati kutjungku Jesulu Godala wanganarangku kulinnyangka Godalu anangu tjuta tjukarurunmanu palumpa walytjaringkunytjaku.

²⁰ Uwa, anangu tjutangkuya kura palyalkatingi, ka Godalu tjukurpa pulka Mosenya tjananya ungu kulira kura tjananku walytjangku ngurkantankunytjaku panya tjana palyantatjanungku. Palu Moseku tjukurpa kulira tjana puu kura wantingi munuya rawangku kura tunguntunguntu palyalkatingi. Uwa, tjukurpa ungkunyangka kura pulkaringu mulapa manta winkingka. Palu kura pulkaringkunyangka Godaku mukulya ngarangi alatjiu pulka mulapa, panya paluru ngaltunytjungku rawangku kulinngi anangu tjuta wankarunkunytjikitjangku.²¹ Uwa, anangu tjutangku iwara kurangka ankula puu wantingi munuya palulan-guru rawa ilungi. Palu kuwari nyanga Jésunyia nganampa anga-ilunyangka Godalu nganana mukulyangku tjukarurunmanu munulanya walytjan-mara kanyini. Nyara palulanguru nganana wanka titutjara nyinaku Jesula Christala tjungu nganampa mayatjangka.

6

Jesula Tjungu Nyinara Kura Wantinytjaku Ngaranyi

¹ Uwa, nganana rawangku kura tjuta palyaningi, ka Godalu nganana mukulyangku tjukarurunmanu munulanya walytjan-mara kanyini. Nyara palulanguru nganana wanka titutjara nyinaku Jesula Christala tjungu nganampa mayatjangka.

alatjitu mukuringkupai, munu paluru Mayatja Jesunya nganampa anga-ilunytjijanguru nganañanya pungkuwiyangku kalypangku wantinyi. Kala nyanga palulanguru yaaltji kulilk? Rawangkula kura palyalkatima? Kalampa Godanya rawatu mukuringama munulanya kalypangku wantima? ² Palu wiya, nyangatja ngunti kulintja. Uti nganaña Godaku walytjaringkulampa kura rawangku palyantja wiyangku wantima. Panya Jesuku mulamularingkunyangka Godalu nganañanya iwara kuranguru mantjinu munulanya iwara palyangka tjunu palunya wañantjaku. Kala palunya wañara wanyu kura rawangku palyanma? Wiya alatjiitu. Panya anangu ilura kura palyantja wiyaringkupai, nyara palu purunypa uti nganaña kura palyantjikitja mukuringkunytja wiyangku wantima. ³⁻⁴ Nyura ninti panya nganaña Jesula Christala baptise-arinyangka Godalu nganañanya Christala tjungunu. Ka baptise-arinytja nyanga paluru nintilpai nyanga alatji panya nganaña uringka tjarpara Christala tjungu purunypa ilungu, kalanya palula tjungutu tjunutjunu. Ka panya Godalu witulya pulkangku Jesunya wankara pakaltjingaňu, nyara palu purunypa nganaña uru unngunguru pakara palula tjungu pakaňu kampa kutjuparira iwara palyangka ankula tjukaruru nyinanytjikitja.

⁵ Uwa Jesunya puňu kaňakutjarangka ilunyangka nganaña ilunytjaku wiyaringu panya paluru alatjiitu ilungu nganampa ngalkilpa. Ka panya Jesunya wankaringkula pakannyangka, nganaña kuľu palu purunypatú wankaringkula pakalku palula tjungu wanka kuwaritjatjara. ⁶ Munula piřuku nintingku kulini, panya nganmanypala nganaña kulintja kura nyinangi munula kura kutju kulira palyalpai. Palu kulintja kurala ilungu Christala tjungu puňu kaňakutjarangka. Nyara palulanguru kulintja panya paluru wiyaringu kura panya tjuťa pampuntjaku. ⁷ Panya anangungku ilura kura tjuťa piřuku pampuntja wiyaringanyi. Palu purunypa nganaña Jesula Christala tjungu ilura kura tjuťa pampuntjaku wiyaringu.

⁸ Uwa, nganaña Christala tjungu ilungu, munula pala palulanguru kulini, "Mulapala palula tjungu ilunytjatjanu palula tjungutu wankaringkula pakalku munula palula tjungutu wanka titutjara nyinaku." ⁹ Panya mulapa Godalu Christianity wankara pakaltjingaňu piřuku ilunytjaku wiya. Ka kuvari paluru wanka titutjara nyinanyi mayatja pulka mulapa piřuku ilunytja wiya alatjiitu. ¹⁰ Panya paluru anga-ilungu nganampa kuranguru kutju-ara alatjiitu, munu kuvari wanka titutjara nyinanyi Godala tjungu munu palula wangaňarangku kulini. ¹¹ Ka nyura palu purunytjutu kulinma, panya Christala tjungu ilura nyura kura palyantjaku wiyaringu, munu nyura Christala tjungu wankaringkula kuvari palula tjungu nyinanyi Godala wangaňarangku kulintjikitja.

¹² Pala palulangurya kura palyantja wiyangku wantima mantangka nyanga nyinaralpi. Panya nyura unytju kutju nyinanyi manta nyangangka, ka kura nyanga palu purunypa utiringkunyangka kulira wantima pulkara kulintja wiyangku. ¹³ Munu nyurampa tjina kurangka paltjuntja wiya, nyurampa marangku kura pampuntja wiya, nyurampa tjaangku kura wangkanytja wiya, nyurampa kurungku kura nyakunytja wiya, nyurampa pinangku kura kulintja wiya. Nyurampa uwankarangku uti kura palyantjikitja mukuringkunytja wiyangku wantima, palu Godaku kutju mukuringama palumpa warķa palyantjikitja. Panya nyura Christala tjungu ilungu, munuya wanyu kulila panya miri ilunytjijangku kura puťu palyalpai, ka nyura uti nyara palu purunytju kura palyantja wiyangku

wantima. Nyura panya Christala tjungu wankaringkula pakalku. Pala palulanguru nyura uti Godaku mukuringama palumpa war̄ka wiru palyantjikitja. ¹⁴ Uwa, Godalu nyuranya ngaltunyjtungku Jesulawanungku man-tjira kanyinnyangka nyura kura palyantjaku wiyaringu. Nganmanytu panya nyura Moseku tjukurwanu nyinara kura pūtu wantingi. Palu kuwari Jesulawantu nyinara nyura kura wantintjaku ngaranyi alatjitu. Pala palulanguru nyura uti kura palyantja wiyangku wantima.

Tjukarurula Nyinama Godaku Warkaripai Tjūta

¹⁵ Uwa, Godalu nganañanya ngaltunyjtungku kanyini mar̄angku Jesula tjungura, kala Moseku tjukurwanu palula wirkankunytjikitjangku kulintja wiyangku wantingi. Palu nyara palulanguru yaaltji kulinma? Godanya nganampa ngaltunyjtju nyinanyangkala wanyu tītutjarangku kura palyalkatima? Wiya alatjitu. ¹⁶ Panya nyura ninti wati panya warkaripaiku. Panya nyuntu mayatjangka warkarira palula kutjungka wangañarangku kulira palyalpai. Ka palu purunyapa nyura kura tjūta palyantjikitja mukuringkula kurangka kutju wangañarangku kulikku, ka kura nyara paluru nyuranya mayatjarira kawantjingalku ilunyjtjaku. Palu nyura Godala wangañarangku kulintjikitja mukuringkunyangkampa paluru mayatjangku nyuranya tjukarurunmankula walytjanmankuku.

¹⁷ Palu kuwarina Godanya pulkara mirawaninyi, panya nyura nganmanytjulpi kura kutju mukuringkula palyaningi munu nyura pūtu palya nyinangi. Palu kutjupa tjūtangku Tjukurpa Palya Jesunyatjara nyurala wangkanyangka nyura kampa kutjuparira kurunpa winkingku wangañarangku kulinu. Nyara palulanguru Godanya pulkara mi-rawañinyi. ¹⁸ Ka Godalu nyuranya iwara kurangka ngaranyangka mantjinu munu nyuranya palumpa warkarinyjtjaku tjunu iwara palyangka wiru tjūta kutju palyantjaku. ¹⁹ (Ara nyangatjana nyurala wangkanyi utingku nyura tjukarurungku kulintjaku, panya nyura mantangka nyanga nyinara pūtu nguwanpa mapalku nintiringanyi Godaku araku.) Panya nganmanypalpi nyura iwara kurangka anangi munu nyura kura tjūta kutju palyaningi kurunpa winkingku, palu uti nyura kuwari iwara palyangka ankula kurunpa winkingku Godala wangañarangku kulira palyanma munu tjukaruru kutju nyinama.

²⁰ Uwa nganmanytju panya nyura iwara kura wanangingi munu kura kutju kulīra palyaningi. Munu nyura tjukarurungku palyantjikitjangku kulintja wiyangku wantingi panya nyura-māntu Godala kulintja wiya. ²¹ Munu nyura wanyu kura palyantjatjanu pulkara pukularingu? Wiya, nyura kuwari kuntaringanyi kura nganmanytju palyantjatjanungku kulīra. Panya anangungku kura rawangku palyara kurunpa winki iluni. ²² Palu kuwari nyura kuraku mukuringkunytja wiyangku wantingi, panya Godalu nyuranya iwara kurangka nyinanyangka mantjira palumpa iwarangka tjunu palumpa titutjara warkarinyjtjaku. Nyanga palulanguru Godalu nyuranya palyani tjukaruru nyinanytjaku. Ka nyura nyara palulanguru wanka titutjara nyinaku.

²³ Kulini nyura? Panya anangu iwara kurangka ngarala kura mantjilku munu ilura Godalanguru kawankatiku. Palu Godaku iwara kutjupa alatjitu ngaranyi panya iwara pala palula ngaranyangka paluru kutjukampa nganananya wankarunanyi Jesunya nganampa ngalkilpa ilunyjtjjanguru, kala palula tjungu titutjara nyinaku.

7

Moseku Tjukurtu Putu Wankarunkupai

¹ Walytja tjuta! Nyura tjukurpa Mosenya ungkunytjitjaku ninti nyinara nyangatja kulila, panya tjukurpa palunyala puṭu palyalku ilura wi-yaringkunytjatjanungku, palu nganana wanka nyinaralpi kutju palyalpai. Panya paint jitja tjuta ngaranyi anangu tjutangku wanganarangku kulira tjukaruru nyinanytjaku. Palu panya anangu ilunyangkampa tjukurpa nyanga paint jitja tjutangku palunya wituwituntja wiyaringu piruku kulira palyantjaku. ²⁻⁴ Ka palu purunypatū kuvari ngaranyi nyurampa Christanya ilunyangka.* Panya nganmanytju nyura tjukurpa panya Mosenya ungkunytjitjangka kulira palyaningi Godalu nyuranya kaly-pangku pungkuwiyangku wantinytjaku. Palu nyura iwara nyanga palunya wañara ngatalaringu Moseku tjukurpa uwankara puṭu tjukarurungku palyara. Palu kuvari nyanga nyura Christala tjunguringkula iwara nyara palunya wantingu, panya nyura ilungu purunypa Christanya ilunyangka. Munu nyura kuvari Christaku iwarangka ananyi, panya Godalu palunya ilunyangka wankara pakaltjingaṇu, kala kuvari palumpa walytjapiti nyinanyi Godala wanganarangku kulira war karintjikitja.

⁵ Panya nganmanytjula walytjangku kulira kura tjuta palyalkatingi. Nganana ninti nyinangi tjukurpa Mosenya Godalu ungkunytjitjaku, panya tjukurpa nyara palurulanya painingi tjukaruru kutju nyinanytjaku. Palu iwara nyanga Moseku wañara nganana puṭu tjukurpa paint jitja tjuta tjukarurungku arkara palyaningi wiru nyinanytjikitjangku munula kura tjutaku pulkara mukuringangi munula puṭu wantingi. Ka nyanga palulanguru nganampa ngarangi Godalu ngananya paira iyantjaku ngura kurakutu. ⁶ Uwa mulapa panyala Moseku tjukurpa kutju kulira puṭu Godala tjunguringangi. Palu kuwarila iwara panya palunya wantikatingu panya Godalulanya mantjira tjunu iwara kuwaritjangka Christanya nganampa ilunytjitjanguru. Panya iwara nganmanyitjangka ankunyangka tjukurpa Mosenya ungkunytjitjangku ngananya puṭu tjukaruruningi Godanya tjukarurungku wañantjaku. Panya tjukurpa nyiringka walkatjunkunytjitjanguru nganana puṭu wanganarangku kulira palyaningi. Palu kuvari nganana iwara kuwaritjangka ankunyangka Jesulu ngananya mayatjangku kanyini, ka Kurunpa Milmiltu ngananya nintini Godanya tjukarurungku wañantjaku.

Moseku Tjukurtu Palya Munu Kura Utilpai

⁷ Kala nyanga palulanguru yaaltji kulilkul tjukurpa Godalu Mosenya ungkunytjitja? Nyara paluru wanyu kura? Wiya, nyaratja kura wiya. Moseku tjukurpa palya alatjitu ngaranyi, panya tjukurpa paluru ngayunya pailpai kaṇa kulilpai, "Munta-uwa, Godalu nyanga palunya pailpai." Wanyuna unytjungku tjukurpa nyangatja wangkama utintjikitjangku. Panya Moseku tjukurta Godalu wangkara paintja nyanga alatji ngaranyi,

* **7:2-4** Tjukurpa nyangatja utintjikitjangku Paulalu ara kutjupa minyma kuri jara kampa kutjupara wangkangu alatji – Wanyuna ara kutjupa minyma kuri jara wangka nyura kampa kutjupara kulira nintiringkunytjaku. (2) Panya Moseku tjukurtu wangkapai minyma kuri jara uti palumpa kuringka wanka nyinanyangkalpi titutjara tjungu nyinama wantikatinytja wiya. Palu wati paluru ilunyangka minyma paluru wati kutjupa palya altinyi, panya tjukurpa paluru paini kuri jara nyinanyangka kutju. (3) Ka tjinguru wati kuri wanka nyinanyangka minyma paluru wati kutjupangka ngarirampa paluru kura palyani, munu paint jitja panyatja kuranji. Palu palumpa kuri ilunyangka minyma paluru wati kutjupa palya altinyi, panya tjukurpa paluru paini kuri jara nyinanyangka kutju, ka paluru wati kutjupa altirampa kura palyantja wiya.

“Nyuntu aŋangu kutjupangku kutjupa kutjupa walytjangku kanyinnyangka nyakula mukuringkunytja wiyangku wantima!”

Ka tjinguru ngayulu tjukurpa nyanga palumpa ngurpa ngaralampa walytjatjaraku nyakula mukuringama, paintjitja panya kulintja wiyatja. Palu ngayulu tjukurpa nyangatja kulintjatjanungku nintingku kulilkul, “Muntauwa, kurangkuna walytjatjaraku nyakula mukuringanyi.” Uwa, nganana tjukurku nintiringkula kutju kulilpai nganana kura nyinanytjatjanungku. ⁸ Palu panya ngañmanypa ngayulu tjukurku ngurpa nyinangi palya-palku, ka kura nyara paluru ngarangi alatjitu ngayula unngu. Kaña palulanguru tjukurpa panya palunya kulinu, munuña painnyangka kulira ngayulu kura panya palunya puťu wantingi, panya kulintja ngayuku ngarangi alatjitu walytjatjaraku mukuringkunytjaku. Palu tjinguruña tjukurpa kulintja wiya ngurpa nyinarampa ngayuluŋatju kura kulintja wiya ngurpa alatjitu nyinama. ⁹⁻¹⁰ Uwa, ngañmanypa Moseku tjukurku ngurpa nyinangi maunṭalpa palya-palku. Munuña palulanguru tjukurpa panya paintjitja kulinu, palu ngayuku kulintja kuratu ngarangi munu puťu wiyareringangi. Munuña tjituru-tjtitururira kulinu, “Munta nyanga kura tjtampanganal palyaningi. Kantiñi Godalu palya ngayunya iluntankuku.” Panya Moseku tjukurtu alatji wangkanyi, “Wanka mulapa nyinanytjikitjangku wiřu kutju palyanma, kura wantira.” Palu ngayulu kura puťu wantingi kaňi tjukurpa nyara palulanguru Godalu ngayunya ngurkantanu ilunytjaku. ¹¹ Panya ngayulu kuliningi alatji, “Moseku tjukurpa ngaranyi ngayulu kulira tjukaruru nyinanytjaku.” Palu wiya, ngayulu kuliřa puťu tjukaruru nyinangi, panya tjukurpa nyara paluru ngayulu kura tjuťa palyantja kutju utinu, ka nyara palulanguru Godalu ngayunya ngurkantankunytjaku ngarangi alatjitu. Palu ngayulu tjukurku nintiringkula alatji kuliningi, “Wanyu kaňatju tjukurpa nyangatja wanganarangku kulinma wanka mulapa nyinanytjikitjangku.” Alatjiña kuliningi ngunti panya ngayulu puťu wanganarangku kuliningi munuña kura palyara tjukurpa palunya kuraningi, ka ngayunya iluntankunytjaku ngarangi.

¹² Panya tjukurpa Godalu Mosenya ungkunytjitja pulka mulapa ngaranyi wiřu alatjitu, munulanya nintini tjukaruru wiřura nyinanytjaku. ¹³ Ka tjukurpa nyanga wirunguru wanyu ngayunya iluntankunytjaku ngaranyi? Wiya, ngayulu kura palyantjitetjanguru kutju ngayunya iluntankunytjaku ngaranyi, tjukurnguru wiya. Panya tjukurpa nyanga wirungku nintini ngayulu kura palyantja uwankara, kaña nintingku kulinu, “Mulapa ngayulu kura palyara Godala tungunpunganyi, kaňi ngayunya iluntankunytjaku ngaranyi alatjitu ngayulu kura palyantjitetjanguru.”

Kura Munu Palya Ngananala Unngu Nyinanyi

¹⁴ Nganana ninti panya Moseku tjukurpa wiřu mulapa panya Godalu wangkanytja. Palu ngayulu aŋangu mantatja munuña iwara kurangka titutjara ananyi munuña puťu palunya wantikatinyi.

¹⁵ Palu yaaltjirikuña? Putuña kulinu, panya ngayulu wiřu palyantjikitja mukuringanyi, palu putuña palyani. Munuña kura tjuťa wantintykitjangku kulini, palu pirukuna kura nyara palunya tjananya palyani alatjitu.

¹⁶ Panya ngayulu tjituru-tjtitururipai kura palyara munuña pala palulanguru kulilpai, “Mulapa Godaku tjukurpa tjukaruru ngaranyi, kaña ngayulu tungunpungkunytjatjanu uti tjituru-tjtitururima.” ¹⁷ Palulanguruña kulinu, “Ngayulu panya wiřu palyantjikitja mukuringanyi, palu ngayula unngu kura ngaranyi, nyara paluruňi kura palyantjaku wituni.” ¹⁸ Ngayulu ninti panya ngayula unngu palya ngaranytja wiya. Panya ngayulu

mukuringanyi wiru palyantjikitja, palu kurangkuṇi angatjunanyi, kaṇa puṭu nguwanpa palyani. ¹⁹ Ngayulu wiru palyantjikitja mukuringkula puṭu alatjiṭu palyani, munuṇa kura tjuṭa wantintyjikitja mukuringanyi, palu palyani alatjiṭuna puṭu wantira.

²⁰ Uwa, puṭu nguwanpaṇa kulini palyanyku nyinanytjikitjangku. Palu panya ngayula unngu kura ngaranyi, nyara palurunu kura palyantjaku rawangku wituwituni.

²¹ Uwa, nyanga alatji ngayula tiṭutjara ngaranyi. Ngayulu wiru palyantjikitja mukuringanyi, palu kura kutju alatjiṭuna rawangku palyani. ²² Ngayulu kurunpa winki Godaku tjukurku pułkara pukularinyi. ²³ Palu tjukurpa palunyaṇa puṭu tjukarurungku palyani. Panya ngayula unngu kura ngaranyi munuṇi nyara paluru wiru palyantjikitja mukuringkunyangka kuralpai. Panya kura munu palya, paluru pula ngayula unngu ngaranyi tiṭutjara munuṇi nyara paluru pula wituwitulpai, kaṇa wiru palyantjikitja mukuringkula puṭu palyani, panya kurangkuṇi wituwitulpai kura kutju palyantjaku. Kaṇa puṭu nguwanpa wantipai.

²⁴⁻²⁵ Uwa, ngaltutjaraṇatju mulapa iwara kurangka ananyi ilunytjikitja. Ngayulu unngu kulilpai Godaku tjukurpa palyantjikitjangku. Palu panya ngayula unngu kura kuļu ngaranyi, munuṇi nyara paluru kura palyantjaku wituwitulpai, kaṇa puṭu waltyjangku kuliṛa wantinyi. Kanitju nganalu wankarunkuku ilunytjaku-tawara? Wiya ngayulu kuwari Godanya kutjulta pułkara mirawaninyi, panya paluru ngayunya Mayatja Jesula Christalawanungku wankarūra iwara palyangka tjunu.

8

Kurunpa Milmiltu Nintilpai Tjukaruru Nyinanytjaku

¹ Uwa, Godalu nganaṇanya Jesula Christala tjunguringkula nyinanyangka iluntankunytja wiyangku wantinyi. ² Panya nganmanypala kura tjuṭa palyara iwara kurangka anangi ilunytjikitja. Palu Jesula Christala tjunguringkunyangka Kurunpa Milmiltu nganaṇanya iwara kuranguru wankarunu munulanya iwara palyangka tjunu tiṭutjara palula tjungu ankunytjaku. Ka nganaṇa iwara panya kura piṛuku waṇantja wiyarungulta.

³ Panya tjukurpa Godalu Mosenya ungkunytjitungku nganaṇanya puṭu tjukaruruningi, panya nganaṇa aṇangu kurunpa upa munula tjukurpa palunya kuliṛa puṭu nguwanpa palyaningi tjukaruru nyinanytjikitjangku. Nyara palulanguru tjukurtu nganananya puṭu tjukaruruningi kura pam-pulwiyangku wantintyjaku. Palu Godalu palumpa katja iyanu paluru aṇangurira puntu nganaṇanya purunypa nyinanytjaku, ka nganampa kuranguru anga-ilungu nganampa ngalkilpa. Ka nyara palulanguru Godalu kuwari nganaṇanya tjukarurulpai kura pam-pulwiyangku wantintyjaku.

⁴ Nyanga alatji paluru palyanu nganaṇa tjukurpa panya Godalu Mosenya ungkunytjitungku wanganarangku kuliṛa palyantjaku. Panya kuwari Kurunpa Milmilinga nganaṇala unngu tjarpatjunu, kalanya paluru nintini nganaṇa tjukarurungku kuliṛa palyantjaku. Panya nganmanytjula kura kutjupa kutjupa tjuṭaku mukuringkula palyaningi munula puṭu wantingi. Palu kuwarila Kurunpa Milmiltu kuliṛa palyalpai.

⁵ Ka kutjupa tjuṭangku panya kura kutjupa kutjupa tjuṭaku mukuringkula palyalpai, nyara paluru tjana Godala kulintja wiyangku tjananku mukuringkunytjitungku kutju kulini. Palu kutjupa tjuṭangku Kurunpa Milmiltu wanganarangku kulilpai, nyara paluru tjana Kurunpa Milmiltu

wangkanyangka palyalpai munu kurangku wituwitunyangka wantinyi.
⁶ Panya nganaña kura tjuta kulira mukuringkunytjitja palyarampa iwara kura wañani munula ilunyi. Palu nganaña Kurunpa Milmiltu wangkanyangka wangañarangku kulira palyarampa iwara palya wañani, munula wanka alatjitu nyinanyi kurunpa pukulpa.

⁷ Ka anangu kutjupangku kura kutjupa kutjupa tjuta kulira mukuringkunytjitja palyalpai, nyara paluru Godaku malpa wiya, palumpa mirpañtu nyinanyi. Panya paluru Godaku tjukurpa kulira palyalpai wiya. Paluru puñu wangañarangku kulilpai,⁸ munu nyara paluru puñu Godanya pukulmananyi paluru mukuringkunytja kutju walytjangku palyara.

⁹ Palu nyura panya kutjupa nguwanpa, panya Kurunpa Milmilnga nyurala unngu nyinanyangka kurangku nyuranya wituwitunyangka nyura wantipai kulira palyantja wiyangku, munu nyura Kurunpa Milmiltu kutju kulilpai. Palu tjinguru nyurala unngu Kurunpa Milmilnga nyinanytja wiya ngaranyangkampa nyura Jesuku walytja wiya. ¹⁰ Palu Christanya nyurala tjungu nyinanyangkampa Kurunpa Milmiltu nyuranya wanka kanyini, panya Godalu nyuranya Christalanguru tjukarurunmara walytjanmanu. Mulapa nyura puntu iluku kura palyantjatjanu, palu kurunpa nyura Christalanguru wanka titutjara nyinaku. ¹¹ Panya Godalu Jesunya ilunyangka wankara pakaltjinganu Kurunpa Milmiltawanungku, ka Kurunpa nyara paluru nyurala unngu nyinara nyuranya kuļu palu purunypatu ilunyangka wankara pakaltjingalku.

¹² Uwa walytja tjuta, kulinmaya! Utila tjukaruru palyanyku nyinanytjik-itjangku kulinma munula kura kutjupa kutjupa tjuta nganaña kulira mukuringkunytjitja palyantja wiyangku wantima. ¹³ Panya nganaña kura kutjupa kutjupa tjuta kulira mukuringkunytjitja rawangku palyalkatira palyalkatira ilura wiyingkuku. Nyara palula-tawarala uti tjukaruru nyinama. Palu Kurunpa Milmiltu nganananya nintinnyangka nganana kura kutjupa kutjupa tjuta kulira mukuringkuwiyangku wantirampa Godala tjungu wanka titutjara nyinaku. ¹⁴ Panya Kurunpa Milmiltu kulilpai tjuta, nyara paluru tjana Godaku tjitji mulapa nyinanyi.

¹⁵ Nganmanypa panyala nganaña Godaku nguluringkupai nyinangi. Palu kuwarila ngulu wiya, panya Godalu nganañala unngu Kurunpa Milmilnga tjarpatjunu, ka nyara paluru nganananya mayatjarira wirura kanyini pauntjingantja wiyangku. Panya palurulanya Godaku katja untalpa mulapa nyinanytjaku palyani, munulanya rapani Godanya rawangku Mamanmara walkuntjaku. Kala mulapañu rapangku Godanya mama walkulpai. ¹⁶ Panya Kurunpa Milmiltu nganañala unngu nintinnyangka nganaña nintingku kulini, “Mulapala nganaña Godaku tjitji nyinanyi.” ¹⁷ Kala Godaku tjitji nyinanytjatjanungku ngula Christala tjungungku wiru mulapa mantjilku Godalu panya kalkuntjtja. Palu nyanga mantangka nyinanyangka pika kura kutjupa kutjupa tjuta kuvari nganañala utiringanyi panya Christala nganmanypa utiringangi, nyara palu purunypa. Palu palya, panya Godalulanya ngula wirura kanyilkku palumpa ngura wiru mulata Christala tjungura.

Ngula Wiru Mulapa Utiringkuku

¹⁸ Uwa mulapa kuvari nganañala pika kura kutjupa kutjupa tjuta utiringanyi nganañanya tjituru-tjiturunkunytjikitja. Palu nganaña munkaritja waintara kulini, panya ngulala Godala tjunguringkula ngura wiru mulata nyinaku, munula kura panya tjutaku mantangkalpi ngaranytjitja uwankaraku watarkuriku alatjitu. ¹⁹ Panya kutjupa kutjupa

Godalu paluntjitja uwankara manta winkitja Godaku ala-alal paṭara ngaranyi paluru palumpa walytja tjuṭa tjanala miṛangka utintjaku.²⁰⁻²¹ Panya Adamalu pula kurantjanguru, Godalu wangkangu paluru paluntjitja uwankara kuraringkunytjaku munu ma-ailururingkunytjaku titutjara. Palu nyanga paluntjitja uwankaraku Godanya watarkurinýtja wiya, panya paluru kalkunu ngula piruku uwankara wiru mulapa malakungku palyantjikitjangku piruku kuraringkunytjaku wiya. Ka uwankara Godalu paluntja kutjuparira wiru mularariku Godaku walytja tjuṭangka tjungu.²² Panya nganaṇa nintingku kulini Godalu paluntjtja uwankara titutjara aŋkuni pikatjara purunypa kuwaripatjaranguru alatjiṭu. Panya minyma iti kanyintjikitja ngarira aŋkulpai, nyara palu purunypa Godalu paluntja uwankara aŋkuni panya ngula piruku wiruntjaku.

²³ Ka palu purunypa nganaṇa kuļu Godaku walytja tjuṭa kurunpa watjil-watjilpa ulanyi mantangka nyanga nyinara, munula ala-alangku paṭara nyinara nyanganyi Godalu nganaṇanya puntu winki kampa kutjupara wiru mularmankunytjaku. Panya Godalu ngañmanytju Kurunpa Milmilngā nganaṇala unngu tjarpatjunu, kala titutjara kulil-kulilpa nyinanyi, munula kulini, "Yaalaralanya puntu winki wiru mularmankuku palumpa katja uŋtalpa mulararinytjaku."²⁴⁻²⁵ Panya nganaṇanya mulapa Godalu ngañmanytju wankarunu, palu wanka mulapa ngula ngaranyi wanka titutjara Godala tjungu nyinanytjaku ngura wirungka. Kala nyara palumpa ala-alangku paṭara nyinara nyanganyi ngula Godalu nganaṇanya ngura wirukutu katinytjaku. Tjingurula ngañmanytju katinyangkampa nganana palumpa ala-alangku paṭantja wiya watarku nyinama. Palu kuwaripaṭula paṭara nyinanyi palumpa munula uti kaar-kaararinytja wiyangku purkarangku nyinara paṭanma alatji kulira, "Panya mulapa paluru nganaṇanya ngula puntu winki wiru mularmankuku."

²⁶ Nyanga alatji kuļu ngaranyi, panya nganaṇa upa munula putu kulilpai. Palu panya Kurunpa Milmilngā nganaṇala ngaranyi nganaṇanya nintintjikitja nganaṇa kulira palumpa raparingkunytjaku. Panya kutjupara nganaṇa Godala wangkanytja-tjiratja tjituru-tjitururupai putu kulira, "Yaaltjingarala Godala tjapilku?" Palu alatji tjituru-tjitururinyangka Kurunpa Milmiltu nganaṇala unngu nyinara pułkaṛa Godala tjapilpai nganampa.²⁷ Ka Godalu tjukarurungku kulilpai. Panya paluru nintingku kulilpai aŋangungku unngu kulinnyangka, munu palulanguru nintingku kulini Kurunpa Milmiltu Godaku walytja tjuṭaku tjapinnyangka, panya paluru pula tjungungku kulilpai.

²⁸ Ka nganaṇa ninti panya Godalu wirura kanyilpai palumpa mukuringkupai tjuṭa. Panya mantangka nyanga nyinanyangka nganaṇala kutjupa kutjupa tjuṭa utiringkupai, kutjupa tjuṭa palya nganaṇa pukularinytjaku, kutjupa tjuṭa kura nganaṇa tjituru-tjitururinytjaku. Palu nganaṇa palumpa walytja nyinanyangka Godalu pukulpangru munu tjituru-tjiturunguruṭu nganaṇanya palyalpai kūnpuringkula palunya tjukarurungku waŋantjaku. Panya paluru alatjiṭu mukuringkula nganananya ngurkantara tjunu palumpa walytja mulapa nyinanytjaku.

²⁹ Panya Godalu palumpa walytja tjuṭa nganmanytju ngurkantanu kuwaripatjara mulapa uwankara wiyangka, munu nganmanytju kulinu tjana palumpa katja uŋtalpa nyinanytjaku tjukaruru mulapa palumpa katja Jesunya purunypa. Panya palunya Godalu nganampa kutjukuta ngañmanyitja tjunu, ka nganaṇa palumpa malanypiti malatja malatja nyinanyi.³⁰ Panya Godalu palumpa walytja tjuṭa nganmanytju

ngurkantankunytjatjanungku altingu, ka nganaña palunya kulinnyangka Godalulanya tjukarurunmanu. Munulanya nyara palulanguru ngura wirukutu katiku wiru mulapa nyinanytjaku palula tjunguringkula.

Godanya Nganampa Pulkara Mukuringkupai

³¹ Ka nyanga palulanguru nganaña uti alatji kulinma mulapa panya Godanya nganampa ngalkilpa anga-wangkapai nyinanyi, kalanya nganalu kuralku paluru atunymara kanyinnyangka? Wiya, kutjupangku nganañanya puťu kuranı paluru kanyinnyangka. ³² Panya Godalu katja palumpa ngurtjuringkunytja wiyangku intjanungku iyanu nganampa anga-ilunytjaku. Kala pala palulanguru kulini, panya palurunku ngamanytu katja iyantjatjanungku kutjupa kutjupa tjuťa kulu nganañanya intjanungku ungguku ngurtjuringkunytja wiyangku. ³³ Ka anangu kutjupangku nganañanya Godalu ngurkantara tjunkunytja tjuťa puťu puntura wangkanyi, panya Godalulanya tjukarurunmanu. ³⁴ Kalanya nganalu Godala miringka mirpañarira kukanyankuku Godaku walytja tjuťa? Wiya kutjupangku nganañanya puťu kukanyamananyi, panya Christanya nganampa ngalkilpa ilunytjanguru, ka panya Godalu palunya wankara pakaltjinganu, kalampa nyara paluru Godala itingka nyinara anga-wangkanyi mayatja pulkangku. ³⁵ Paluru panya nganampa pulkara mulapa mukuringanyi. Ka kutjupa kutjupa tjuťangku nganañanya puťu mauntananyi Jesulanguru. Panya kura kutjupa kutjupa tjuťa tjinguru nganañala utiringkuku, tjinguru anantjaku, tjinguru pikantankunytjaku, tjinguru kurunpa tjituru-tjitururingkunytjaku, tjinguru mai wiya ulytja wiya nyinanytjaku, mutta tjinguru mirikutra iluntankunytjaku. Palu kura nyanga uwankarangku nganañanya puťu mauntananyi Jesulanguru panya palurulanya titutjarangku mukulyangku kanyini. ³⁶ Panya nyiringka iriti walkatjunkunytja ngarinyi tjana Godala wangkanytja alatji, “Nganaña nyuntumpa walytja tjuťa nyinanyangka tjana nganañanya rawangku kukanyamananyi.

Munulanya tjiipi purunypa iluntankunytjikitjangku rawangku nyakukatinyi.

Panya tjiipi tjuťa kaputura kanyilpai pungkula ngalkuntjikitjangku, palu purunypa.” *

³⁷ Uwa, kura kutjupa kutjupa tjuťa nganañala utiringkuku, palu nganana nguluringkunytja wiya rapa alatji tu nyinanyi Jesulanguru, panya palurulampa pulkara mukuringanyi, ka panya kura nyanga paluru tjana nganañanya puťu Godalanguru mauntananyi. ³⁸⁻³⁹ Uwa, Godanya panya nganampa pulkara mulapa mukuringanyi, kaña ngayulu nintingku kulini kutjupangku nganañanya puťu mauntananyi Godalanguru paluru nganampa mukuringkunyangka. Tjinguru nganaña iluku mutta tjingurula wanka nyinaku, palu Godanya nganampa mukuringanyi alatji tu. Ka panya angelpa tjuťa munu mamu tjuťa kulu, nyara paluru tjana tjinguru nganañanya kuranma, palu putulanya tjana Godalanguru mauntananyi paluru nganañanya mukulyangku kanyinnyangka. Ka kuwari kutjupa kutjupa tjuťa nganañala utiringu, mutta tjinguru ngula nganañala utiringkuku, palu palya, panya Godalu nganañanya mukulyangku alatji tu kanyini titutjarangku. Tjinguru ilkariringka kutjupa kutjupa utiringkuku nyakula nguluringkunytjaku mutta tjinguru manta

* ^{8:36} Psalm 44:22

unnunguru pakalku,* palu puṭulanya ngulutjingara maunṭananyi Godalanguru. Tjinguru Godalu paluntjitja uwankarangku nganañanya kuralku palu puṭulanya maunṭankuku Godalanguru paluru nganampa mukuringkunyangka. Panya paluru Jesula Christalawanu nganampa titutjara mukulya pulka alatji nyinanyi.

9

Godanya Munu Palumpa Walytja Tjuta

¹⁻² Kulilaya! Ngayulu kurunpa pulkara tjituru-tjitururinyi ngayuku walytja tjuṭaku, Israelkunu tjuṭaku, panya tjana Jesunya tjanampa wankarunkupainya wantinyangka. Munuña tjanampa rawa alatji unngu ulapai. Nyangatjana nyurala tjukarurungku wangkanyi Christala miṛangka ngunti wangkanytja wiyangku. Panya Kurunpa Milmiltu ngayula unngu nintinnyangkaṇa tjukarurungku wangkanyi. ³ Uwa, ngayulu tjituru-tjituru mulapa nyinanyi nyara palumpa tjanampa ngayuku walytja tjuṭaku, munuña palulanguru ngalturingkula unngu kulilpai, “Yaaltjingarana tjananya alpamilalku Jesuku walytjaringkunytjaku?” Munuña pulkara tjituru-tjitururira kulilpai, “Tjinguruña alatji Godala wangkama, ‘God, ngayunyanı wanyu paila maunṭalpa nyinanytjaku Christalanguru, kaya paluru tjana ngapartji nyuntumpari Christaku mulamularingkula.’” Alatjiña tjituru-tjitururira wangkanytjikitjangku kulilpai tjanampa mukuringkula, panya tjana ngayuku walytja tjuṭa, Israelkunu tjuṭa.

⁴ Panya palunya tjananya Godalu ngurkantaṛa tjunu palumpa katja unṭalpa nyinanytjaku. Munu palurunku tjananya nintinu witulya pulka nyinara, munu wiru tjuṭa tjanampa palyantjikitjangku kalkuningi tjana ngapartji palula wangañarangku kulintjaku, munu panya tjananya ungu tjukurpa pulka tjuta Moselawanungku. Munu tjananya nintinu tzunguringkula palunya tjukarurungku walkuntjaku. Munu tjananya wiru tjuṭa ungkunytjikitjangku kalkuṇu. ⁵ Ka tjanampa panya tjamupiti iriti nyinangi Aipuramanya, Isaacanya, Jacobanya tjana. Ka panya walytjapiti nyanga palula tjanalanguru Christanya kulu anangurira nyinangi palumpa tjanampa walytja alatji.

Uwa, Christanya Godanya alatji mayatja pulka mulapa nyinanyi uwankarangka waintarintja, kala palunya walkunma titutjarangku. Uwa mulapa.

⁶ Mulapa ngayuku walytja tjuṭangku Christanya wantingu, Israelkunu tjuṭangku. Kala pala palulanguru nyaa kuliklu? Godalu wanyu ngunti kalkuṇu Israelkunu tjuṭa? Wiya, Godalu tjukarurungku kalkuṇu, panya paluru ngunti wangkapai wiya. Mulapa wati panya Israelku walytja tjuṭa mulararingu malatja malatja,* palu kutjupatjara kutjuya Godaku walytjapiti nyinanyi, uwankara wiya. Nyara paluru tjana kutju Israelkunu mulapa nyinanyi Godaku walytjapiti. ⁷ Palu wanyu Aipuramaku pakalipiti malatja malatja Godaku walytjapiti nyinanyi? Wiya, kutjupatjara kutjuya Godaku walytjapiti nyinanyi. Panya Godalu Aipuramanya kalkuṇu nyanga alatji wangkara, “Isaacalanguru kutjuya nyuntumpa walytjapiti

* **8:38-39** Alatji Paulalu wangkangu tjanala Rome-anja ngurara tjuṭangka panya paluru tjana ngañmanyjulpi kuliningi alatji, “Nganampa god tjuṭa ilkaringga nyinapai, ka panya mamu tjuṭa manta unngu nyinapai.” Alatjiya ngañmanytju kuliningi, ka Paulalu tjananya wangkangi nyanga palumpa tjanampa nguluringkuwiya nyinanytjaku. * **9:6** Godalu wati panya Jacobanya ininu Israelnga, Aipuramaku pakali panya. Palulangurula palumpa walytja malatja malatja wangkapai Israelkunu tjuṭa.

tjuṭaringkula ma-nyinara wañalku małatja małatja, ngayulu panya kalkuntjanguru kutju.”* ⁸ Ka panya Aipurāmalu walytja mukuringkula minyma kutjupangka katja kutjupa utinu ini panya Itjumailnga, kaya nyanga palumpa pakalipiti małatja małatja Godaku walytjapiti wiya nyinanyi, panya palunya tjananya Godalu kalkuntja wiyatū. Palu panya Aipurāmaku kuri Tjiirālanguru aŋangu tjuṭa utiringu Godalu ngañmanytju kalkuntjtjanguru, nyara paluru tjana kutju Aipurāmaku pakalipiti mulapa nyinanyi, Godaku walytjapiti. ⁹ Panya Godalu kalkunu Aipurāmanya nyanga alatji,

“Ngula tjirirpi nyara ngayulu kalkuntjtjangka ngayulu małaku pitjaku witulya pulkanya, ka nyuntumpa kuringku Tjiirālu tjitji katja kanyilku.”*

¹⁰ Ka ara kutjupa kuļu ngaranyi nyura kulira nintiringkunytjaku, panya Ripikalu iti katja kutjara kanyinu mama kutjutja Isaacalan-guru. ¹¹⁻¹² Palu pula iti wirkankunytja kuwaripangka Godalu Ripikala wangkangu, “Nyuntun kuwari iti katja kutjara kanyilku, ka małatja mayatjariku munu kutangka waintariku.”* Alatji Godalu Ripikanya kalkunu ngañmanytju. Tjinguru paluru alatji wangkama pulanya nyakula kutju. Palu wiya, Godalu kura nyinanyangka palya nyinanyangka nyakunytja wiyangku ngañmanytju ngurkantanu pula iti wirkankunytja kuwaripangka małanypa mayatjarinytjaku. Panya Godalu alatjitu wal-ytjangku kulilpai munu paluru alatjitu mukuringkula ngurkantankupai, palya nyinanyangka kutju nyakula tjunkunytja wiyangku. ¹³ Panya iriti nyiringka walkatjunkunytja alatji ngarinyi,

“Ngayuluña Jacobanya ngurkantanu mununa Iitjunya wantingu.”*

¹⁴ Palu nyura yaaltji kulini? Tjinguru nyura kulini Godanya tjukaruru wiya panya paluru Iitjunya wantinyangka. Palu wiya, Godanya tjukaruru alatjitu nyinanyi ngunti palyalpai wiya. ¹⁵ Panya iriti paluru wangkangu Mosela alatji,

“Ngayulu alatjituwa wal-ytjangku kulira aŋangu ngalturingkuku. Mununa ngayulu alatjitu mukuringkula aŋangu ngaltunytjungku kanyilku.”*

¹⁶ Kulini nyura? Godanya wal-ytja alatjitu mukuringkula aŋangu tjutaku ngalturingkupai. Panya aŋangungku wal-ytjangku kulira mukuringkula ngatjinnyangka kutju paluru ngalturingkupai wiya. Munu palu purunyapatu aŋangu kutjupa wirura tjukaruru nyinanyangka ngalturingkunytjikitjangku kulintja wiya. Panya paluru alatjitu mukuringkula ngalturingkupai. ¹⁷ Panya iriti nyiringka walkatjunkunytja ngarinyi nyanga alatji Godalu Piirala wangkanytja,

“Ngayuluña nyuntunya Itjipaku mayatja pulka tjunu ngayuku witulya pulka nyuntulawanu utiringkunytjaku munu aŋangu ngura winkit-jangku ngayunya kulira mirawañinytjaku.”*

¹⁸ Pala palulangurula kulini panya Godalu wal-ytjangku alatjitu mukuringkula aŋangu kutjupa ngurkantara ngaltunytjungku kanyilpai, munu piruk paluru alatjitu aŋangu kutjupa wantinytjikitjangku mukuringkula wantipai alatjitu wituwitu titutjara nyinanytjaku.

¹⁹ Ka nyanga palunya kulirañi tjinguru kutjupangku tjapilku alatji, “Godalu alatjitu-manti ngurkantankupai paluru mukuringkulampa. Munu

* ^{9:7} Genesis 21:12 * ^{9:9} Genesis 18:10,14 * ^{9:11-12} Genesis 25:23 * ^{9:13} Malakaiku 1:2-3

* ^{9:15} Exodus 33:19 * ^{9:17} Exodus 9:16

nyaaku nganampa mirpañarinyi kura palyannyangka? Utı paluru wantima nganañanya kuranmankunytja wiyangku, panya paluru kulintjitja nganaña puñu kampa kutjupananyi.” Alatjini tjinguru kutjupangku tjapilku. ²⁰ Kaña palunya wangkaku, “Wiya, nyuntun añangu munun nyaaku nyanga alatji wangkanyi, panya Godalu nyuntunya palyañu, ka nyuntu utı Godala ngaparpungkula wangkanytja wiyangku wantima. Panya watingku piti palyantitjangku wanyu ngaparpungkula wangkapai, ‘Nyaakuñin alatji palyañu?’ Wiya, piti palyantitjangku alatji wangkapai wiya.

²¹ “Kulila, panya minymangku puñu kutjunguru piti kutjupa kutjupa tjuña palyalpai. Nyara paluru mukuringkula palyalpai. Tjinguru paluru kutju palyañi maiku minaku munu kutjupa palyañi manta tjawantjikitjangku. Nyangatja paluru mukuringkula waltytjangku kulira palyantja puñu panya kutju palulanguru.”

²² Ka Godalu palu purunypa mukuringkula waltytjangku kulira palyalpai añangu tjuñangka. Kala nganaña ngapartji puñu Godala wangkanyi, panya paluru tjinguru mukuringangi añangu tjuñangka nintintjikitja nyanga alatji, panya paluru kuranguru pulkara mirpañaripai munu witulya pulkangku tjukarurulpai. Panya añangu kuralpai tjuña iluntankunytjaku ngaranyi alatjitu. Palu panya Godalu tjananya nyakula kuwaripangkuwantingi pañara mapalku wiyatja wiyangku. ²³ Munu paluru mukuringangtu nganañanya, palumpa waltyta tjuña, wirura mulatu kanyintjikitja. Panya paluru alatjitu nganañanya ngaltnuytjungku ngurkantanu nganmanytu, nganaña palula tjungu titutjara wirura nyinanytjaku. ²⁴ Panya paluru nganañanya Jew tjuñanguru munu Jew wiya tjuñanguru kuļu ngurkantanu palumpa waltyta tjuña nyinanytjaku. ²⁵ Panya wati wangkatjarangku iriti Godaku wangka walkatjunu wati panya ini Utjiyalu nyanga alatji,

“Kutjupa tjutaya ngayuku waltyjapiti nyinanytja wiya.

Nyara palunya tjananya wangkaku alatji, ‘Nyura kuvari ngayuku waltyjaringu!’

Panya nganmanypana tjanampa mukuringkunytja wiya nyinangi, palu kuvariña tjananya wangkaku alatji, ‘Nyurampaña pulkara mukuringanyi.’” *

Alatji Utjiyalu iriti walkatjunu. Munu piruku nyangatja kuļu walkatjunu.

²⁶ “Panya Godalu nganmanytu ngura kutjupangka tjananya wangkangu nyanga alatji, ‘Nyura ngayuku waltyta nyinanytja wiya.’

Alatji paluru nganmanytu wangkangu.

Palu kuvari Godalu ngura nyara palulalta tjananya waltyjanmankuku, kaya palumpa katja untalpa nyinaku God panya wankaku.” *

²⁷ Ka wati panya Aitjayalu iriti wangkangu alatji,

“Añangu Israelkunu tjuña mulararira, minga tjuña purunypa nyinaku, winki mulapa.

Palu Godalu kutjupatjara kutju wankarunkuku.

²⁸ Panya paluru rawaringkunytja wiyangku añangu watarku nyinapai uwankara manta winkingka ngurkantara tjaralku munu wiylaku.” *

²⁹ Panya Aitjayalu nganmanytu tjukarurungku tjakultjunu alatji,

“Godanya panya witulya pulka mulapa, munulanya tjinguru paluru mukuringkula nganañanya Israelkunu tjuña uwankara wiyanma,

* 9:25 Uutjiyaku 2:1; 2:23 * 9:26 Uutjiyaku 1:10 * 9:28 Aitjayaku 10:22-23

panya paluru aŋangu uwankara tawunu panya kutjarangka wiyanu
 Tjatamala pulala Kumarala, nyara palu purunyapa.
 Palu wiya, Godalu nganananya uwankara wiyantja wiyangku kutjupatjara
 wantingu wankaru nyinanytjaku.” *

Israelkunu Tjuṭa Munu Tjukurpa Palya

³⁰ Uwa, nyangatjala utingku wangkanyi. Panya aŋangu Jew wiya tjutaya ngaŋmanypa mukuringkunytja wiya Godaku iwaraku tjukaruru nyinanytjikitja. Palu Godalu tjananya Jesuku mulamularingkunyangka tjukarurunmankula walytjanmanu. ³¹ Ka Jew tjutangku Moseku tjukurwanungku kulira arkara palyaningi Godala tjukaruru nyinanytjikitjangku, palu wiya tjana ngatalaringu. ³² Ka nyaanguru tjana ngatalaringu? Wiya, panya paluru tjana walytjangku arkara palyalkatingi Godala miřangka tjukaruru nyinanytjikitjangku, munuya kuliningi, “Godalu nganananya walytjanmananyi wirura tjukaruru nyinanyangka nyakula.” Palu tjana ngunti kuliningi. Utiya Godaku mulamularingama paluru tjananya kura palyantitjanguru wankarunkunytjaku, ka paluru mulamularingkunyangka nyakula tjananya tjukarurura walytjanmanama. Palu tjana wantinyangka Jesunya puli purunyapa tjanampa iwarangka angaripai munu tjananya tjina tarpipungkula punkatjingalpai, panya tjana walytjangku kutju kulira palunya puṭu tjukarurungku ngurkantankupai.

³³ Panya nyiringka iriti walkatjunkunytja alatji ngarinyi,
 “Nyawa, watinja tjunkuku Jerusalemala apu purunytju iwarangka nyinara
 tarpipungkunytjaku.

Kaya aŋangu tjuṭa tarpipungkunyangka punkalku palumpa puṭu
 mulamularingkupai tjuṭa.

Palu aŋangumpa palumpa mulamularingkula Godala miřangka kuṇṭa
 wiya ngaraku pukulpa alatjitu.” *

10

¹ Uwa, Jesuku walytja tjuṭa! Ngayulu pulkara mukuringanyi kurunpa winki ngayuku walytja tjuṭaku panya Jew tjuṭaku, tjana Jesuku mulamularingkula wankaringkunytjaku. Panya tjanampa tiṭutjarangku tjapilpai Godala. ² Kaŋa nyangatja palunya tjananyatjara wangkanyi, panya tjana pulkara arkanı Godaku iwara tjukarurungku wanantjikitjangku, Godanya tjanampa pukularinytjaku. Palu paluru tjana nintiringkunytja wiyatı Godaku iwaraku. ³⁻⁴ Panya Godalu kutjungku aŋangu tjuṭa tjukarurunmankupai. Palu palunyaya kulira wantingi munuya walytjangku arkara palyaningi Moseku tjukurwanungku tjana walytja Godala miřangka tjukaruru ngaranytjikitjangku. Palu tjana ngunti kuliningi Moseku tjukurwanungku Godala miřangka tjukaruru ngaranytjikitjangku. Panya kulintja nyanga palunya Christalu pitjala wiyanu, munu panyalampa iwara kuwaritja alaŋu Godalu palumpa mulamularingkupai uwankara tjukarurunmankunytjaku.

⁵ Kulila Mosenya, panya paluru iriti walkatjunangi Godaku tjukurwanu palula miřangka tjukaruru ngaranytjaku nyanga alatji,

“Aŋangungku tjukurpa nyangatja wangaŋarangku kulira palyarampa Godala tjunguringkula wanka tiṭutjara nyinaku.” *

* 9:29 Aitjayaku 1:9 * 9:33 Aitjayaku 8:14; 28:16 * 10:5 Leviticus 18:5

⁶ Palu tjukurpa kutjupa nyiringka ngarinyi panya an^anangu Godaku mulamularingkula kutju palula tjunguringkula tjukaruru ngaraku. Kala mulamularingkupai tjutangku alatji wangkawiyangku wantipai, “Ngananya wanyu ilkarikutu tatilku munu Christanya altira ngalya-katiku mantakutu nganananya iwara tjukaruru nintintjaku?” Wiya alatji⁷. ⁷ Munula palu purunypatu alatji wangkawiyangku wantipai, “Ngananya wanyu manta unngu tjarpaku munu Christanya miriku ngurangka ngarinyangka wankara pakaltjingalku nganananya iwara tjukaruru nintintjaku?” Wiya alatji⁸. Panya ngana^a mulamularingkupai tjutangku alatji kulipai,

“Wiya, Godaku tjukurpa ngana^aala unngu ngaranyi alatji⁹, ka ngana^a tjalinpangku wangkanytjaku ngaranyi alatji¹⁰.” *

Ka^ana tjukurpa panya palunyatu rawangku nyurala wangkanyi kulira mulamularingkunytjaku. ⁹ Alatji^a wangkanyi, “Tjinguru nyuntu tja^a alaringkula utingku Jesunya mayatjanmankuku munun kurunpa winki Jesunya ilunytja Godalu pakaltjingantjtjaku mulamularingkuku, ka nyara palulanguru Godalu nyuntunya wankarunkuku palula tjungu nyinanytjaku.”

¹⁰ Panya ngana^a kurunpa winki mulamularingkunyangka Godalu nganananya tjukarurunmankupai. Munu ngana^a Jesunya wangkara utingku mayatjanmankunyangka Godalu ngana^aanya wankarunkupai palula tjungu titutjara ngaranytjaku. ¹¹ Panya iriti nyiringka walkatjunkunytja ngarinyi nyanga alatji, “An^anangu Mayatja Godaku mulamularingkulampa tjituru-tjitururinytja wiya,

panya Godalu mulapa palunya wankarunkuku.” *

¹² Palu tjukurpa nyangatja uwankaraku Jew tjutaku munu Jew wiya tjutaku ku^alu. Panya Godanya mayatja uwankaraku^a nyinanyi, ka an^anangu kutjupa uwankarangku palula tjapinnyangkampa paluru wirura kalkuntjatjanungku munytjangku ungkula pukulmankupai. ¹³ Panya nyiringka iriti walkatjunkunytja ngarinyi nyanga alatji, “An^angungku Mayatja Godala alpamilantjaku tjapinnyangkampa palunya wankarunkuku alatji¹⁴.” *

¹⁴ Palu yaaltji-yaaltjingkuya tjapilku tjana palumpa pu^at mulamularingkula? Munuya yaaltji-yaaltji mulamularingkuku tjukurpa Jesunyatjara kulintja wiyatja? Munuya yaaltji-yaaltjingku kulilkku tjukurpa panya palunya kutjupa tjutangku tjakultjunkunytja wiyanguru? ¹⁵ Kaya yaaltji-yaaltjingku tjukurpa palunya wangkaku Godalu tjananya wituntja wiyanguru? Panya nyiringka iriti walkatjunkunytja ngarinyi nyanga alatji, “Panya nyakulaya pulka^ara pukularipai tjukurpa palyatjara wirkankunyangka.” *

¹⁶ Palu Jew kutjupa tjarangkuya Tjukurpa Palya kulis^a mulamularingkunytja wiyangku wantingi. Panya iriti an^anangu tjutangku wantinyangka Aitjayalu wangkangu Godala nyanga alatji, “Mayatja, ngananya tjana wanyu mulamularingu tjukurpa ngana^a tjakultjunkunyangka kulira?”

¹⁷ Uwa, an^anangu tjuta Jesuku mulamularingkuku Tjukurpa Palya palunyatjara wangkanyangka kulis^a kutju.

¹⁸ Palu wanyuna nyurala tjapilku, “Mulapaya panyatja Jew tjutangku tjukurpa nyangatja kulintja wiya?” Wiya panya tjana kulinu alatji¹⁹. Panya nyiringka iriti walkatjunkunytja ngarinyi nyanga alatji,

* ^{10:8} Deuteronomy 30:14 * ^{10:11} Aitjayaku 28:16 * ^{10:13} Tjawilku 2:32 * ^{10:15} Aitjayaku

“Manta winitjangkuya tjukurpa palya kulinu
panya tjakultjunangga ngura uwankarangka.” *

19 Pirukuṇa wanyu nyurala tjapilku? Mulapaya panyatja Israelkunu tjutangku tjukurpa nyangatja puṭu kulinigi? Wiya, panya tjana uti alatjiṭu kulinu, panya Moselu iriti tjanala wangkangu Godalu wangkanytja nyanga alatji,

“Nyura panya kulipai ngura kutjupitja tjuta-manti ngurpampa nyinanyi. Palu nyura kuwari tjananya nyakula nyararingkuku panya palunya tjananya ngayulu ngurkantara altiku ngayuku waltyta tjuta nyinanytjaku. Uwa, nyura panya palunya tjananya ngurpa-palku kulin. Palu nyura kuwari tjanampa nyakula mirpañariku nyuranya kutju kanyintjatjiratja.” *

20 Ka ngula palu purunypaṭu Aitjayalu Israelkunu tjutangka tjukarurungku wangkangu nyanga alatji,

“Godalu panya anangu Jew wiya tjuta alatji wangkangu,
‘Anangu nyara paluru tjana panya ngayunya ngurintja wiya watarku nyinangi,

kanā ngayulu tjanala wirkanu.

Uwa nyara paluru tjanaya ngayunya tjapintja wiya watarku nyinangi,
kanā ngayulu tjanala utiringu.” ” *

21 Ka panya Israelkunu tjutangku nganmanytju kulinu tjukurpa palunya munuya kulintjatjanungku nintingku kulinigi. Palu tjana mulamularingkuwiyangku kuliṛa wantingi. Kala tjukurpa nyangaku ninti panya Godalu nganmanytju Israelkunu tjutangka wangkangu alatji,
“Titutjaraṇa ngayuku anangu tjutaku puṭu marakatingi ngayulakutu pitjanytjaku.

Palu tjana rawangku tungunpungkula wantingi,

munuya ngayuku wangka tjana wanganarangku kulintja wiyangku wantingi.” *

11

Godalu Israelkunu tjuta Ngaltunytjungku Kulintja

1 Munta tjinguru nyura kulin ngayulu nyanga alatji wangkanyangkapalku Godalu Israelkunu tjuta nganmanytjulpi ngurkantankunytjatjanungku tjananya wantir'iyānu. Palu wiya, ngayulu alatji wangkanytja wiya! Panya ngayulu kuļu wati Israelkunu nyinanyi, Aipurāmalanguru. Panya ngayuku tjamu ngururitja Pintjimannga Jacobaku panya katja malatja.* **2** Panya Godalu tjananya Israelkunu tjuta nganmanytju mulapa ngurkantanu iti wirkankunytja kuwaripangka palumpa waltyjapiti nyinanytjaku munu tjananya wantir'iyantja wiyangku alatjiṭu kanyiningi. Panya nyura tjukurpa nyangaku ninti panya nyiringka iriti walkatjunkunytja ngarinyi Ilaitjalu Godala pulkara ngatjintja Israelkunu tjutanguru alatji wangkara, **3** “Mayatja, Israelkunu tjutangkuya nyuntumpa pitjilpa tjuta minya-minyaṇu,* munuya nyuntumpa wangkatjara tjuta iluntanu. Kanā ngayulu kutju alatjiṭulta nyinanyi, kanīya ngayunya kuļu iluntankunytjikitjangku kulini. Wanyuni aṭunytju kanyinma.” Nyanga alatji wangkara paluru Godala pulkara tjapiningi. **4** Ka Godalu kuliṛa nyaa

* **10:18** Psalm 19:4 * **10:19** Deuteronomy 32:21 * **10:20** Aitjayaku 65:1-2 * **10:21** Aitjayaku 65:2 * **11:1** Jacobanya panya ini kutjupa Israelngga. * **11:3** Tjakangkuya Jew tjutangku Godanya walkuntjikitjangku pitjilpa tjunkupai.

wangkangu palula? Wiya, nyanga alatji wangkangu, "Nyuntu kutju mulapa wiya! Panya ngayulu tjananya kutjupa tjuṭa kanyini ngayuku walytja mulapa wati panya 7,000. Nyara paluru tjananya god ngalypangalypa ini Paalnga pupakatira walkulpai wiya." Alatji Godalu ngapartji wangkangu Ilaitjala.⁵ Ka kuwari palu puruny wholegaranyi, panya Godalu ngaltunytjungku mankur-mankurpa ngurkantara kanyini.⁶ Palu wanyu Godalu tjananya wiru palyannyangka ngurkantanu? Wiya paluru tjananya ngaltunytjungku ngurkantanu, paluru mukuringkula. Panya paluru palya nyinanyangka nyakula ngurkantankupai wiya. Paluru alatji ngalturingkula walytjangku kulira ngurkantankupai ngaltunytjungku.

⁷ Ka panyaya Israelkunu tjuṭangku iwara puṭu nguriningi Godalakutu ilaringkunytjikitjangku. Palu mankur-mankurtu kutjuya iwara palunya ngurkantanu Godalu ngurkantankunytja tjuṭangku kutju. Kaya tjuta mulapa pina patiringkula titutjara watarku nyinangi Godalu altinyangka kulintja wiya.⁸ Panya nyiringka iriti walkatjunkunytja alatji ngarinyi,

"Godalu tjananya kulintja kampa kutjupanu puṭu kulintjaku, kaya kuru patingku puṭu nyanganyi munuya pina patingku puṭu kulini munu panyaya kuwari kulu puṭu kulipai titutjara nyinanyi." *

⁹ Ka panya Davidalu iriti wangkanytja ngarinyi nyanga alatji,

"Ka God, nyuntu tjananya ngapartji pulkara pikantanama,

munu tjanampa maingka kanpa tjura tjanapitjala watarkungku ngalkula ilunytjaku.

¹⁰ Munu tjananya kuru patinma puṭu nyakunytjaku.

Munu tjananya tjituru-tjituru pulka rawangku palyanma iwara kurangka ankunyangka." *

¹¹ Tjinguru nyura ngayulu nyanga alatji wangkanytja-palku kulini panya Jew tjuṭangkuya Godanya wantira titutjara paṭuringu. Palu wiya, alatji wangkanytja wiya! Panya Jew tjuṭa paṭuringkunyangka Godalu anangu kutjupa tjuṭangka tjukurpa Jesunyatjara utinu Jew wiya tjuṭangka tjananya kulira mulamularingkula wankaringkunytjaku, kaya nyara palulanguru Jew tjuṭangku nyakula urulyarakulik, "Ai, Mama Godalu nganañanya wantira nyara tjananya wankarunu Jew wiya tjuṭa." Munuya alatji kulira kuntasringkuku alatji wangkara, "Munta-uwa mulapa nganañanya alatji Godanya wantingu. Utilanku malaku palulakutu aruringama, kalanya nganañanya kulu wankarunkuku." ¹² Uwa, Jew tjuṭa watarkurira paṭuringu, ka nyara paṭuringkunytjangu Godalu anangu kutjupa tjuṭa manta winkitja pulkara pukulmanu. Palu kulila, ngula Jew tjuṭa malaku aruringkula Jesuku mulamularingkunyangka Godanya nyakula pulkara alatji pukulariku. Munu palulangurulta nganañanya kulu tjungura uwankara mulapa pulkara pukulmankuku, Jew tjuṭa munu Jew wiya tjuṭa kulu.

Godalu Anangu Kutjupa Tjuṭa Kulu Wankarunkunytja

¹³ Uwa, kuwariña nyangatja wangkanyi nyurala Jew wiya tjuṭangka. Panya Godaluni nyuralakutu witura iyanu palumpa tjukurpa nyurala tjakultjunkunytjaku, kaña kuwari nyurala pukultu warika nyanga palunya palyani.¹⁴ Ka ngayulu nyurala Jew wiya tjuṭangka tjukurpa tjakultjunkunyangka ngayuku walytja tjuta tjinguru nyararingkuku, Jew panya tjuta, munuya palulanguru tjinguru tjara Jesuku mulamularingkuku, ka Godalu tjananya wankarunkuku. Kaña nyanga alatjirinyangka pulkara alatji pukulariku.¹⁵ Panya Jew tjuṭa Godalanguru paṭuringkunyangka

* **11:8** Deuteronomy 29:4 * **11:10** Psalm 69:22-23

Godalu tjananya wantingu munu aŋangu kutjupa tjuṭa manta wikitja walytjanmanu. Ka nyaaringkuku ngula Godalu Jew tjuṭa malakungku mantjinnyangka? Wiya, pukulpa pulka mulapa ngula ngaraku panya Jew tjuṭaya paturingkula ilungu purunypa munuya ngula malaku ařuringkula ilunytjatjanu purunypa wankaringkuku.

¹⁶ Kulilaya wanyu ara nyanga nganampa. Panya nganaña mai nyuma kaṭantara Godanya-warara ungkupai, ka mai panya winki palumparinyi.* Ka palu purunypa puṇu aturu Godaku ngaranyangka miṇa nyalpi winki kulu palumparinyi.* ¹⁷ Kulilaya ara nyangatja, nintiringkunytjikitjangku. Wati kaana kanyilpaingku nyanga purunypa palyalpai. Puṇu wiru ngaranyangka paluru tjinguru miṇa kutjupatjara kaṭara waniku munu palulanguru ankuku putikutu puṇu miṇa kaṭara ngalya-katinytjikitja. Munu palulanguru puṇu miṇa putitja katira puṇu panya kaanangka pakaltjingantjitjangka kultungka tjungura karpilku.* Ka palulanguru puṇu miṇa putitja panya paluru wanka iwiringuru mantjira pulkaringkuku. Ka Jew tjuṭa puṇu nyara palu purunypa ngaranyi Godaku walytjapiti, panya paluru Jew kutjupatjara wantingu puṇu miṇa kaṭara wanintyta purunypa, munu aŋangu kutjupa tjuṭa puṇu miṇa putitja purunypa mantjira katira palumpa walytjapitingka tjungunu. Kaya palulanguru Godaku walytjaringkula wanka mantjira pulkaringganyi. ¹⁸ Ka nyura Jew wiya tjuṭa nyaaku kanany-kananyarira Jew tjuṭa kuranmananyi tjana panya puṇu miṇa kaṭara wanintyta purunypa nyinanyangka? Wiya, nyura uti kanany-kananyarintja wiya nyinama, panya nyura kulu puṇu miṇa purunypa. Ka puṇu miṇangku wanyu wanka kanyilpai? Wiya, iwiringku kutju puṇu wanka kanyilpai.

¹⁹ Palu nyura tjinguru wangkaku, "Wiya, Jew tjuṭa panya puṇu miṇa purunypa Godalu kaṭara waningu nganañanya puṇu miṇa putitja purunypa mantjira tjunguntjikitjangku palumpa walytjapitingka. Panya Jew kutjupatjara paluru kitikitinu nganaña palula tjunguringkunytjaku."

²⁰ Uwa mulapa nyangatja tjukurpa tjukaruru. Palu wanyu nyangatja kulila, panya Godalu tjananya wantingu mulamularingkunytja wiyangku wantinyangka. Munu nyuranya mantjira tjungura kanyini mulamularingkunyangka, nyara palulanguru kutju. Kaya kanany-kananyarintja wiya nyinama, munuya ngulu-ngulu nyinama panya Godanya pulka mulapa nyinanyi. ²¹ Jew tjuṭa panya puṇu miṇa purunypa, panya puṇu walytja alatjitu pakara pulkaringkula miṇa tjuṭatjararingkupai, palu purunypa. Palu tjana mulamularingkunytja wiyangku wantinyangka Godalu tjananya ngalturingkunytja wiyangku puṇu miṇa purunypa kaṭara waningu. Ka nyura nyaa kulini? Godalu wanyu nyuranya kutju ngalturingkula rawangku kanyilkku nyura mulamularingkunytja wiyangku wantinyangka? Wiya, nyuranya kulu puṇu miṇa purunypa kaṭara waniku palunya wantinyangka.

* **11:16** Panya mai kutju kaṭantara ungkunytja Aipuramanya purunypa Godaku walytja, ka mai kutjupatjara Jew malatja malatja tjuta purunypa, kala pala palulanguru kulini tjana kulu Godaku walytja. * **11:16** Ka nyanga palu purunypa Godalu Jew tjuṭaku tjamu Aipuramanya palumpa walytja kanyintjatjanungku palunya tjananya kulu kanyilkku tiṭutjarangku. *

11:17 Panya tjakangkuya kaanangka warkaripai tjutangku alatji palyalpai. Tjana puṇu putitja kaṭara ngalya-katira puṇu panya kaanangka ngaranytjanya ankala katara ngururpa tjlpirpungkupai munuya puṇu panya putitja ala panya palula ngururpa tjarpatjunkupai munuya utjura karpilpai, ka puṇu panya paluru puṇu panya kaanangka ngaranytjitungku mina tijkira pakalpai palula tjungu.

²² Uwa kulinma nyangatja. Godanya ngaltunytju kutju wiya palu paluru wituwitu kulu. Paluru mirpañaripai tjanampa palula tungunpungkula wantinyangka. Munu paluru ngaltunytjungku nyuranya kanyilpai palumpa mulamularingkula titutjarangku wañannyangka. Palu nyura palunya wañalwiyangku wantinyangka nyuranya puñu miña purunypa katara wañiku. ²³ Ka tjinguru Jew tjuta piruku Godaku mulamularingkunya ngka paluru tjananya małakungku mantjilku, munu panya paluru nganmanytju kanyintja purunytju tjananya kanyilku.

²⁴ Panya nyura Jew wiya tjuta nganmanyypa Godaku walytja wiya nyinangi. Panya nyura puñu miña putitja purunypa ngarangi, palu mulamularingkunya ngka nyuranya Godalu mantjira tjungunu palumpa walytjapitingka puñu panya kaanangka ngaranytjitjangka purunypa. Kaya Jew tjuta nganmanyypa Godaku walytjapiti nyinangi, puñu miña tjuta purunypa panya puñu kaanangka pakaltjingantja purunypa. Ka Godalu tjananya puñu miña purunypa katara wañingu. Ka nyura Jew wiya tjuta, puñu panya miña puñiguru katara ngalya-katira tjunguntja purunypa, puñu panya kaanangka ngaranytjitjangka. Ka tjinguru ngula Jew tjuta piruku mulamularingkunya ngka Godalu tjananya mapalkungku alatjitu puñu miña tjuta purunypa małakungku tjungulku palumpa walytjapitingka.

Godalu Uwankaratu Ngaltunytjungku Kanyintja

²⁵ Walytja tjuta! Tjinguru nyura kulini Godalu Jew tjuta titutjarangku wantinytja-palku. Palu nyura alatji kulira kañany-kañanyarinjtjakutawaraña tjukurpa nyanga kumpilitja nyurala kuwari wangkara utini. Tjukurpa nyanga paluru alatji, panya Israelkunu kutjupa tjaraya tunguntungunpa alatji nyinanyi Jesuku mulamularingkunytja wiya. Munu paluru tjana rawa alatji tungun-tungunpa nyinaku, panya Godanya pañani Jew wiya tjutaku palumpa mulamularingkula tjuta mulararinytjaku, nampa panya paluru nganmanytju kulira ngurkantankunytja tjutaku. Ka nampa panya paluru uwankaratu palumpa mulamularingkunya ngka kutjuya Israelkunu tjuta Godalakutu małaku aruringkula pitjaku titutjara tungun-tungunpa nyinanytja wiya. ²⁶ Ka Godalu tjananya uwankara wankarunkuku. Panya nyiringka iriti walkatjunkunytja ngarinyi nyanga alatji,

“Wati Wankarunkupainya wirkankuku ngura ini Tjayanta.*

Munu paluru añangu Jacobakunu tjuta kura rawangku palyannyangka kampa kutjupankuku Godanya tjukarurungku kulintjaku.*

²⁷ Panya paluru nganmanytjulpi kalkunu tjananya kura tjuta palyantjitunguru pungkuwiyangku kalypangku wantinytjikitjangku.

Ka mulapa alatjiriku.

Kaya uwankara Godala kalypa nyinaku.” *

²⁸ Panya añangu Jew tjutangku Tjukurpa Palya Christanyatjara wantira Godalanguru paturingu munuya kuwari watarku alatjitu nyinanyi palumpa małpa wiya. Uwa, Godalu tjananya wantir'iyanu nyurampa, Jew wiya tjutaku, iwara alantjikitjangku nyura palulakutu wirkankunytjaku. Palu panya Godalu tjananya Jew tjuta nganmanytjulpi ngurkantanu Aipuramanya, Isaacanya, Jacobanya tjananya, munu panya palumpa

* **11:26** *Tjayingga* panya ini kutjupa *Jerusalemania*, Jew tjutaku ngura pulka. * **11:26**
Jacobanya panya ini kutjupa *Israelnga*, kaya Israelkunu tjuta panya Jacobalanguru malatja malatja tjutaringkula nyinanyi. * **11:27** Aitjayaku 59:20-21; 27:9

tjanampa paluru rawatu mukuringanyi małatja małatjaku kułu. Panya Godalu nyara palunya tjananya kalkunu Aipuramanya, Isaacanya tjananya.²⁹ Munu tjananya ngurkantankunytjatjanungku pułu wantinyi munu paluru ungkunytjatjanungku małakungku mantjilpai wiya. Paluru kampa kutjuparipai wiya alatjitu.³⁰ Panya nyura Jew wiya tjutangku ngañmanytju Godanya wantingi. Palu kuwari nyanga Israelkunu tjutangku Godanya wantingu, ka Godalu nyuranya ngaltunytjungku mantjinu Israelkunu tjutangku palula tungunpungkunytjitungku.³¹ Uwa, Godanya nyurampa ngalturingkunyangka, aŋangu panya Jew tjuta kuwaripatu tungun-tungunpa nyinanyi. Palu ngula Godalu tjananya kułu ngaltunytjungku altira tjungura kanyilku, nyanga kuwari nyuranya ngaltunytjungku mantjira kanyini, palu purunytju.³² Uwa, aŋangu uwankara Jew tjuta munu Jew wiya tjuta kułu Godala tungunpungkupai nyinanyi munuya iwara kurangka titutjara ananyi. Ka alatjirintjaku tjananya wantir'yanu Godalu tjana walytjangku kulira kura palyantjatjanungku ngurkantankunytjaku munu kuntearingkunytjaku. Ka nyara palulanguru Godanya tjanampa uwankaraku ngalturingkuku munu tjananya wankaru kanyilku.

Godanyala Mirawanima

³³ Uwa, Godanyala mirawanima panya paluru ngaltunytju mukulya pulka mulapa nyinanyi. Paluru kutju alatjitu ninti pulka mulapa nyinanyi munu paluru kutjungku tjukarurungku kulilpai. Panya nganana pułu kulini paluru kulira palyantjitja uwankara, munula palumpa kulintja uwankara nganana pułtu kulilpai.³⁴ Panya nyiringka iriti walkatjunkunytja nyanga alatji ngarinyi,

“Ngananya ninti Godalu kulintjitjaku?

Wiya, uwankarangkula pułu kulilpai.

Ka nganalu Godanya nintilpai paluru kulira tjukarurungku palyantjaku?

Wiya alatjitu, uwankarala ngurpa.” *

³⁵ “Ka nganalu kutjupa kutjupa ungu Godanya paluru ngapartji ungkunytjaku?

Wiya, paluru alatjiłulanya kutjukampa ungkupai.” *

³⁶ Panya Godalu uwankara palunu. Munu paluru uwankara witulyangku tjukaruru kanyini. Ka uwankara alatjitu palumpa ngaranyi titutjara. Kala rawangkułu palunya mirawanima panya paluru wiru mulapa nganampa nyinanyi. Uwa mulapa.

12

Godakula Palyanma

¹ Walytja tjuta, Godalu ngananya ngaltunytju pulkangku kanyinnyangkaña nyangatja kurunpa winkingku pulkara mukuringkula nyuranya wituwituńi. Utu nyuranku kurunpa winkingku Godala kulinma paluru wangkanyangka wangañarangku kulira palyantjikitjangku, paluru nyakula pukularintjaku. Nyanga alatji palyarala kurunpa winkingku Godanya walkuni munula palunya tjukarurungku wañani.² Palu aŋangu mantatja kulilpai tjutangkaya arkara palyalwiyangku wantima munuya Godala kutjungka wangañarangku kulinma. Ka nyuranya paluru kulintja kampa kutjupankuku nyura tjukarurungku palunya kulintjaku. Ka

* 11:34 Aitjayaku 40:13 * 11:35 Tjuupaku 41:11

nyara palulangurulta nyura nintingku kulilku Godaku tjukarurungku palyantjikitjangku palya tjuta kutju, paluru nyakula pukularinytjaku.

³ Panya Godaluñi mukulyangku ngurkantara witulyanu Tjukurpa Palya tjakultjunkunytjaku. Pala palulanguruña nyurala uwankarangka wangkanyi nyanga alatji nyura uti kutjungku kutjungku walytjangku pulka kulilwiyangku wantima, munuyanku purkarangku tjukarurungku kulinma, "Godalu ngayunya nyaa palyantjaku witulyanu?" Panya Godalu nyuranya kutju kutju witulyanu nyura kutjungku kutjungku Godalu witulyankunyangka mulamularingkula tjukarurungku palyantjaku. ⁴ Panya ngayulu puntu kutju ngaranyi, munuña kutjupa kutjupa tjutatjara. Panya marangku pampura palyantjaku, tjinangku pałtjura para-ngaranytjaku, kurungku nyakunytjaku, pinangku kulintjaku. Nyanga paluru tjana uwankarangku walytjangku palyalpai kutjupa kutjupa tjuta puntu kutjunguru, ka puntu winki palyalpa ngarapai. ⁵ Ka nyanga palu puruny whole Jesuku walytja tjuta nyinanyi, panya nganana Christala tjunguringkula puntu kutjuñi nyinanyi palu war̄ka kutjupa kutjupa tjutala walytjangku walytjangku palyalpai. ⁶ Panya Godalu ngananañanya mukulyangku kutju kutju nintinu nganana kutjungku kutjungku paluru nintintjita witulyangku palyantjaku. Kala uti wanganarangku kulira palyanma paluru nintinnyangka war̄ka walytjangku walytjangku. Tjinguru nyuntunya Godalu nintinu wangkatjara nyinanytjaku palumpa tjukurpa witulyangku tjakultjunkunytjaku, ka nyuntu uti mulamularingkula tjukurpa tjakultjunañama alatjitu wantintjya wiyangku. ⁷ Munta tjingurunta nyuntunya nintinu wirura alpamilara palyantjaku aŋangu tjutaku, ka nyuntu uti alpamilanma alatjitu. Munta tjinguru nyuntunya nintinu aŋangu tjuta Godaku tjukurpa tjukarurungku nintintjaku, ka nyuntu uti nintinma alatjitu. ⁸ Munta tjinguru nyuntunya nintinu aŋangu tjuta wangkara rapantjaku, ka nyuntu uti tjananya wangkara alatjitu kunpunma. Munta tjinguru nyuntunya nintinu ngaltutjara tjuta munytjangku ungkunytjaku, ka nyuntu uti ungama alatjitu wantintjya wiyangku. Munta tjingurunta nintinu aŋangu tjuta kuranyurira tjukarurungku kanyintjaku, ka nyuntu uti pakuiyangku tjananya mulamulangku atunyamanama. Munta tjinjurunta nintinu ngal̄tunytju pulka nyinanytjaku, ka nyuntu uti aŋangu tjuta pukultjungku alpamilanma.

⁹ Ngunti wangka-kutju wangkawiya mulamula ngalturingama. Munu kura kutjupa kutjupa uwankara wantima, munu palya tjuta kutju rawangku palyantjikitja mukuringama. ¹⁰ Munuyanku mukulya nyinama panya nyura walytjarara walytjarara nyinanyi Christalanguru. Munuyanku analwiyangku mukulyangku kalypangku pukul̄tu wangkama, munuyanku walytjangku walytjangku pulkanmankunytja wiyangku wantima. ¹¹ Pul̄karaya Mayatja Jesuku war̄karima pakuringkuwiya. Munuya kurunpa winki mukuringkula tītutjarangku palunya wañanma. ¹² Pukularimaya panya nyura ninti Godalu nyuranya ngura wirukutu katiku. Ka nyurala tjituru-tjituru kutjupa kutjupa tjuta wirkankunyangkampa nyura uti tjuni kuraringkunytja wiya rapa nyinama. Munuya rawangku Godala tjapinma wantintjya wiyangku. ¹³ Munuya aŋangu Jesuku walytjangku kutjupa kutjupa kanyintja wiya nyinanyangkampa nyakula palunya alpamilara ungama, munuya palu purunyapañi mañlikitja pitjanyangka nyakula altira ngurangka tjunama papulankunytja wiyangku.

¹⁴ Ka kutjupangku nyuranya kurannyangkampa nyura uti tjanampa

Godala tjapinma tjananya pukułmankunytjaku. Munuya Godalu tjananya kurantjaku tjapilwiyangku wantima, palu tjananya pukułmankunytjaku kutju tjapinma. Nyanga alatji palya. ¹⁵ Ka kutjupa tjuła pukularinyangka nyura uti tjanala tjunguringkulału pukularima. Munu tjituru-tjituru ulanyangka nyura uti tjanala tjunguringkulału ulama. ¹⁶ Munuya aŋangu uwankaraku kalypa mukulya nyinama unngu nyararingkunytja wiya. Munu nyuranku kañany-kañanyarira warka pulka tjuła kutju palyantjikitja mukuringkunytja wiyangku wantima, palu warka tjukutjuku tjuła kuluya pukultu palyanma. Munuyanku walytjangku nintipuka mirawaninytja wiyangku wantima.

¹⁷ Tjinguru kutjupangku nyuranya kurannyangkampa nyura ngapartji kurantjikitjangku kulilwiyangku wantima. Palu purkarangkuya kulinma tjukaruru palyanyku nyinanytjikitjangku, ka aŋangu uwankarangku nyuranya nyakula kulilku tjukaruru mulapa nyinanyangka. ¹⁸ Uti nyura rawangku arkanma aŋangu uwankaraku kalypa nyinanytjikitjangku.

¹⁹ Walytja tjuła! Kutjupangku nyuranya kurannyangkampa palunya ngapartji pungkunytjikitjangku kulintja wiyangku wantima, Godalu kutjungku paintjaku. Panya nyiringka iriti walkatjunkunytja ngarinyi Godalu wangkanytja nyanga alatji,

“Ngayulu kutjungku aŋangungku kurannyangka ngapartji palu purunymanuku,

Ngayulu kutjungku paira pungkunytjaku ngaranyi.”

²⁰ Palu tjukurpa kutjupa alatji ngarinyi,

“Aŋangu nyuntumpa mirpańtu tjinguru paltjatjiratja nyinanyi,

Ka nyuntu uti palunya mai ungkula paltjanma.

Munta tjinguru paluru ilu nyinanyi kapi-tjiratja,

Ka nyuntu uti palunya kapi tjikintjaku ungama.

Panya nyuntu alatji kalypangku ungkunyangka paluru walytjangku kulira kuṇtaringkuku.” *

²¹ Kulini nyura? Nyura uti ngapartji kura palyalwiyangku wantima. Panya nyura ngapartji kura palyarampa aŋangu nyara palu purunyapa nyinanyi, kura palyalpaitu. Palu nyura wiru palyannyangka tjana nyakula kuṇtaringkula tjana ngapartji nyura purunypatu wiru palyalku. Nyara palulanguru wiru kutju palyanma, munu kura wantima.

13

Mayatja Tjutangka Wangnarangku Kulintjaku

¹ Utı nyura uwankarangku kamanta mayatja tjutangka wangnarangku kulinma. Panya Godalu ařa nyanga palunya palyanu mayatjarira aŋangu tjuła kanyintjaku, ka panya palulanguru kuvari aŋangu tjuła mayatja nyinanyi Godalu tjunkunytjitetjangka. ² Ka tjinguru aŋangu kutjupa mayatjangka tungunpungkulampa, nyara paluru Godala tungunpunganyi, panya Godalu alatji tjananya mayatja tjunu. Ka aŋangu nyara paluru mayatjangka tungunpungkunyangkaya palunya ngapartji pungkuku. ³ Panya wiru palyalpai tjuła mayatjaku nguluringkupai wiya, palu panya kura palyalpai tjuła kutju mayatjaku nguluringkupai. Ka nyura tjinguru mayatjaku nguluringkunytja wiya nyinanytjikitja mukuringkulampa wiru tjuła kutju palyanma, ka paluru tjana nyurampa pukularira nyuranya palyanmankuku. ⁴ Panya Godalu mayatja palunya tjananya tjunu mayatjarira nyuranya tjukarurungku wiru kanyintjaku.

* **12:20** Proverbs 25:21-22

Palu nyura tjinguru tjukarurungku palyantja wiya kura palyarampa palumpa tjanampa nguluringama, panya mayatja paluru tjana mulapa nyuranya pungkuku kura palyannyangka. Panya Godanya kuranguru pulkara mirpañaripai, ka nyara palulanguru nyuranya mayatjangku kuranguru pungkunyangka nyura nintiringkula kuliklu panya mulapa Godanya kuranguru mirpañaripai. ⁵ Uwa, pala palula-tawara nyura uti mayatjangka wanganarangku kulinma, nyuranya tungunpungkunyangka pungkunytjaku-tawara. Panya nyura ninti tjukaruru nyinanytjaku, pala palulanguru kuļu nyura uti tjanala wanganarangku kulinma.

⁶ Nyara palulanguru panya nyura mayatja tjuṭa tax mani ma-ungkupai kutjupa kutjupa tjuṭa nyurampa palyantjaku, panya mayatja paluru tjana Godaku warkarinyi munuya nyuranya tjukarurungku wiru kanyintjikitjangku kulini. ⁷ Ka palulanguru mayatjangku tax maniku tjapinnyangka nyura uti tjukarurungku ma-ungama. Uwa mayatja kutjupangku tjapinnyangkaya ungama alatjitu wiyanmankunytja wiyangku. Munuya analwiyangku wantira tjanala wanganarangku kulinma kunṭakunṭa nguwantu panya tjana mayatja alatjitu nyinanyi. ⁸ Uwa ngapartji malakungku ungkunytjaku ngaranyangkampa nyura uti mapalkungku ungkula wiyanma.

Ngaltunytjungkuyanku Kulira Palyanma

Palu uti nyuranku titutjara ngaltunytju nyinama wiyaringkunytja wiya. Panya nyanga alatji nyinarampa nyura tjukurpa Godalu Mosenya ungtjtjtja tjukarurungku palyani. ⁹ Ka panya tjukurpa paluru tjana nyanga alatji ngaranyi Godalu paintja,

“Kuri waltytjatjarangka ngariwiyangku wantima. Anangu iluntankuwiyangku wantima. Waltytjatjara kutitjunkuwiyangku wantima. Munu kutjupangku kutjupa kutjupa wiru kanyinnyangka nyakulampa unngu kulira mukuringkuwiyangku wantima.” *

Ka tjukurpa nyanga paluru tjana, munu tjukurpa kutjupa tjuṭa kuļu Godalu wangkunytja uwankara tjukurpa nyanga kutju palulanguru utiringanyi,

“Nyuntu anangu kutjupaku mukulyangku palyanma. Panya nyuntunkun waltytjangku mukulyangku palyalpai, palu purunytju palumpa ngapartji mukulyangku palyanma.” *

¹⁰ Panya nyuntu anangu kutjupaku pulkara mukuringkulampa palunya puṭu kuraṇi. Uwa, alatji nyuntu mukulya nyinara tjukurpa panya Mosenya Godalu ungtjtjtja uwankara tjukarurungku kanyini.

¹¹ Kaya nyanga alatji mukulya titutjara nyinama, panya ilaringu Mayatja Jesulu malaku pitjala ngananaṇya wankaru katinytjaku. Panya nganmanypalpi ngananaṇa mulamularingangi, ka Jesunya pitjanytjaku paṭu kuwaripa ngarangi. ¹² Palu kuwari nyanga ilaringu, panya ngananaṇa mungangka kunkunpa ngarira ngarira kulilpai puyipuyinnyangka munula wankaringkuļa nyakupai, “Munta mulapa ngalya-utiringanyi tjintukutu.” Palu purunypa kuwari tjirirpi waṭalpi ilaringu Jesunya pitjanytjaku. Kala uti ngananaṇa mungawalurungka nyinapai tjuṭa arkaliwiyangku wantima. Palu utila kura tjuṭa wantira kaļala purunypa ala-alangku ngarala nyangama, panya tjaultji tjuṭangkuya tjirirpikutu pakara, pikakitja mantarangka tjarpara, uwankaratjarangku ala-alangku ngarala nyakupai, palu purunypala uti ala-alangku ngarala nyangama kura tjuṭangka tungunpungkunytjikitjangku. ¹³ Panya

* 13:9 Exodus 20:13-15,17 * 13:9 Leviticus 19:18

kutjupa tjuṭangkuya mungawalurungka nyinapai tjuṭangku kura tjuṭa kutju palyalpai, kala uti palu puruny whole nyinawiya tjukaruru nyinama kałalangka. Munula uti wama pulkara tjikira tarangkarira pikangku pungkuwiyangku wantima, munu kampangkaṭu ngariwiyangku wantima, munu nyararingkula pikaringkuwiyangku wantima. ¹⁴ Utile Mayatja Jesula Christala tjungu alatjiṭu nyinama, munula kura tjuṭa wantima. Panya kutjupa-aṛa nganaṇa unngu kulilpai kura palyantjikitjangku, palu utila Jesula tjungu nyinara kulintja nyanga palu puruny whole utiringkunyangka kulira wantima alatjiṭu.

14

Jesuku Walytja Tjuṭaya Kuranmankuwiyangku Wantima

¹ Ka panya Jesuku walytja kutjupa tjarangku kuwaripangkuṭu puṭu kulini tjukaruru nyinanytjikitjangku. Ka uti nyura palunya tjananya walytjanmaṛa alatjiṭu tjungunma, munu pika-pikaringkula tjananya ngurpanmankunytja wiyangku wantima. ² Panya anangu kutjupangku kulilpai mai kuka kutjupa kutjupa tjuṭa uwankara palya ngalkuntjikitjangku. Ka wati panya puṭu nguwanpa kulilpaingku kulilpai, “Ngayuku ngaranyi mai kutju ngalkuntjaku.” ³ Ka uti wati panya mai kuka uwankara ngalkupaingku wati panya mai kutju ngalkupainya ngurpanmankunytja wiyangku wantima, ka palu purunypaṭu wati panya mai kutju ngalkupaingku uti wati panya mai kuka ngalkupainya uulira wangkawiyangku wantima, panya Godalu palunya pulanyaṭu walytjanmanu munu pulanya kanyintjikitja mukuringanyi. ⁴ Nyara paluru panya Godaku warkaripai nyinanyi, ka Godanya palumpa mayatja nyuntu wiya. Kan nyaaku palunya ngunti mayatjarira kuranmananyi? Nyangatja palya wiya. Wantima palumpa mayatjangku kutjungku ngurkantaṛa paintjaku kura palyannyangka, munta tjinguru tjukarurungku palyannyangka palyanmankunytjaku. Panya nyara palunya Mayatja Godalu maṛangku kanyini, ka paluru punkantja wiya ngaraku. Panya Godalu palunya nintilkatinyi tjukarururingkula kunpu ngaranytjaku.

⁵ Ka panya kutjupangku kulilpai, “Tjintu ini nyangatja kutju milmilpa mulapa ngaranyi nganaṇa Godanya walkuntjaku.” Ka kutjupangku kulilpai, “Wiya, tjiripi winki milmilpa ngaranyi nganaṇa wirura Godanya walkuntjaku.” Palu utila uwankarangku walytjangku walytjangku unngu Godala kulira ngurkantanama, munu kutjupa tjuṭa arkalwiyangku wantima. ⁶ Panya kutjupangku kulira tjintu kutjupa milmilmankupai Mayatja Jesunya walkuntjikitjangku palumpa pukularira. Ka panya kutjupangku kulilpai, “Godalu nganaṇanya mai kuka uwankara ngalkuntjaku ungu, kala palya ngalkuṇi Mayatja Jesunya walkuntjikitjangku.” Munu paluru pukularira Godanya wirunmankupai mai kuka kuļu ungkunyangka. Palu kutjupangku kulilpai, “Ngayulu kuka wantinyi Mayatja Jesunya kutju walkuntjikitjangku.” Munu pukularira palu purunypaṭu Godanya wirunmankupai. ⁷⁻⁸ Palu nganaṇa uti palunya kutju waṇanma walytjangku kulira palyantja wiyangku. Nganaṇa uti wanka nyinaralpi palula wangaṇarangku kulinma munu wiru tjuṭa kutju palyanma Godalu nyakula pukularinytjaku. Munu ngula nganaṇa ilura palu purunypaṭu palula wangaṇarangku kulilkul paluru nganampa pukularinytjaku. Uwa, nganaṇa palumpa walytja alatjiṭu nyinanyi ilunytjakutu-wangkara munula ilunytjatjanu pakara palumpa walytjatu nyinaku titutjara. ⁹ Palu nyaanganuru? Wiya, panya Christianity ilunytjatjanu wankaringkula pakanu

nganampa mayatja pulka nyinanytjikitja wanka tjutaku munu miri tjutaku kulu. Nyara palulanguru paluru nganampa mayatja titutjara nyinanyi.

¹⁰ Ka nyaaku nyura rapangku-palku tjananya kuranmankupai? Utu nyura ngurkantankunytja wiyangku wantima. Ka nyura ngapartji nyaaku tjananya nintingku-palku panyatja ngurpanmankupai tjana kuwaripa^{tu} nintiringkunyangka? Utu nyura alatji kulira wangkawiyangku wantima. Panya Godalu kutjungku nganaⁿanya wangkanytjaku ngaranyi. Panya ngula nganana uwankara Godala kuranyu ngaraku paluru nganaⁿanya ngurkantankunytjaku. ¹¹ Panya iriti nyiringka walkatjunkunytja ngarinyi nyanga alatji Godalu wangkanytja,

“Nyangatjana mulamulangku wangkanyi, panya ngula anangu uwankara ngayula kuranyu tultjungararakatiku. Mununiya ngayunya alatji wangkaku, ‘Mulapan nyuntu uwankaraku God Mayatja pulka nyinanyi.’” *

¹² Ka palulanguru nganaⁿanya walytjangku Godala tjakultjunkunytjaku ngaranyi uwankara panya nganaⁿanya palyantjatjanungku mantangka nyanga nyinara, kura munu palya tjuta. Panya Godalu ngula nganaⁿanya uwankara kutju kutju kuranyu ngaratjura tjalipku, “Nyaakun nyanga alatji palyanigi?”

Kutjupa Tjutaya Taripungkuwiyangku Wantima

¹³ Nyangangurulanku nintingku-palku nyakula ngurkantankuwiyangku wantima. Palu nyangatjaya kulinma! Utu nyura kutjupa kutjupa palyalwiyangku wantima Jesuku walytja kutjupa tjutangku nyakula kuraringkula paturingkunytjaku-tawara. ¹⁴ Panya ngayulu Mayatja Jesula tjungu nyinara nintingku kulini mai kuka kutjupa kutjupa uwankara palya alatji^{tu} ngaranyi ngalkuntjaku. Palu kutjupangku tjinguru unngu kulini, “Kuka nyangatja milmilpa kana putu ngalkuni.”

¹⁵ Ka tjinguru nyuntu palula mi^rangka kuka ngalkuku, ka paluru nyakula urulyara^{ra} kulilku, “Nyaaku nyangangku ngalkuni? Panya paluru Jesuku walytja.” Alatji paluru kulilku munu kuka panya palunya tjinguru arkara ngalkuku, munu ma^langka kun^taringkula kulilku, “Mulapan kurangku ngalkunu. Utina panyatja wantima.” Munu alatji kulira Godalanguru paturingkuku panya nyuntu palula mi^rangka kuka ngalkun-nyangka. Ka nyuntu uti palunya ngaltunytjungku kulinma munu palula mi^rangka kuka ngalkuwiyangku wantima, ngunti kulira Jesulanguru paturingkunytjaku-tawara, panya Christanya palumpa kulu anga-ilungu.

¹⁶ Palya nyuntu kulini kuka ngalkuntjikitjangku, palu tjinguru kutjupangku nyuntunya nyakula Jesulanguru paturingkunyangka anangu tjutangku Christanya analku panya nyuntu ngalkuntjanguru. Ka pala palula-tawara Christanya anantjaku-tawara nyuntu uti ngalkuwiyangku wantima. ¹⁷ Panya nganaⁿanya Godaku walytjapiti nyinanyi kalanya paluru nganaⁿanya mayatjarira kanyini. Kala uti ngalkuntja tjikintja nyara palunya tjananya rawangku kulintja wiyangku wantima. Panya Godanya pukularintja wiya nganaⁿanya nyanga alatji rawangku kulinnyangka. Palu utila nyanga alatji kulinma, panya Godalu nganananya tjukarurunmanu Jesulanguru, ka nyara palulanguru nganaⁿanya pukultju wirura kalypa nyinanytjaku ngaranyi. Nyanga alatjila uti titutjarangku kulinma, panya Kurunpa Milmiltu nyanga palu purunypa nyinanytjaku nganaⁿala nintilpai. ¹⁸ Ka alatji nganaⁿanya Christanya titutjarangku waⁿannyangka

* ^{14:11} Aitjayaku 45:23

Godalu nyakula pukularipai, kalanya aŋangu tjutangku ku₅ lu nyakula palyanmankuku.

¹⁹ Palulangurula uti tiṭutjarangku w̄iru tjuṭa kutju kulinma nganaŋa tjungu kalypa nyinanytjikitjangku Jesuku waltyta uwankara, munulanku uti alpamilaṛa kuṇpunma.

²⁰ Utila Godaku waltyta kutjupa tjuṭa palumpa mulamularingkunyangka kurantja wiyangku wantima tjanala miṛangka kuka ngalkula. Mulapa mai kuka uwankara palya ngaranyi nganaŋa ngalkuntjaku. Palu tjinguru Godaku waltyta kutjupangku ngurpangku nyuntunya kuka ngalkunyangka nyakula puṭu nguwanpa kulilku munu tjinguru puṭu kulira Jesulanguru paṭuringkuku. Ka nyuntu uti palula-tawara wantima, panya Godalu palunya ku₅ lu ngurkantara waltyjanmanu.

²¹ Uwa, palya nganaŋa kuka ngalkuwiyangku wantintyjakmu waina tjikilwiyangku wantintyjakmu, Godaku waltyta kutjupangku nyakula urulyarara puṭu kulintjaku-tawara. Panya nyanga alatji nganaŋa kuka, waina wantirampa palumpa ngalturingkula wantinyi. Ka palulangurul paluru paṭuringkuntya wiya tjungu ngarala ma-raparingkuku.

²² Palu tjinguru nyuntu Godaku mulamularingkula kulilpai alatji, “Kuka mai uwankara ngalkuntjaku palya ngayulu kulini.” Palu alatji kulira para-tjakultjunkuntya wiyangku wantima, munu unngu kutju kulinma, Godalu kutjungku nintingku nyakuntyjakmu. Ka nyuntu tjukarurungku ngalkula kurunpa unngu ngulu wiya nyinanyangkampa paluru nyuntumpa pukulariku.

²³ Palu tjinguru nyuntu puṭu kulini, “Tjinguruna palya ngalkuku, munta tjinguruna wantiku.” Munun palulangurul kulini, “Wanti kana palya ngalkula.” Ka nyara palulangurul Godanya nyuntumpa pukularintyja wiya panya nyuntu kulira wantira mukuringkula ngalkunyangka. Panya alatji ngalkula nyuntu kura palyani kampa kutjara kulira. Utu nyuntu kulintja kampa kutjara nyinarampa ngalkuwiyangku wantima munu ngula kulintja kutjuringkula kutju ngalkunma tjukarurungku.

15

Jesuku Waltyta Tjuṭa Alpamilanma

¹⁻² Tjinguru nyuntu kuṇpu ngaralampa utin Jesuku waltyta kutjupa tjuṭa upa ngaranyangka alpamilanma anaṛa wangkanytja wiyangku, panya tjana kuwaripaṭu kuṇpuringkuntya wiya. Utilanku waltytjangku pukulmankuntya wiyangku wantima. Panya Christalunku waltytjangku pukulmankuntya wiyatū, munu paluru Mamanya kutju pukulmanangi munu paluru kulintja wiya aŋangu kutjupa tjutangku palunya kuramankunyangka. Kala uti Jesunya purunyapa Godaku waltyta kutjupa tjuṭa pukulmanama tjana ma-kuṇpuringkula Jesunya tungun-tunguntu waṇantjaku. ³ Panya iriti nyiringka walkatjunkuntya ngarinyi nyanga alatji,

“Mama, kutjupa tjutangku nyuntunya warkira ngayunya ku₅ lu warkinyi.” *

⁴ Panya tjukurpa iriti nyiringka walkatjunkuntya w̄iru mulapa ngarinyi nganaŋa nyakula wangkara nintiringkuntyjakmu. Panya tjukurpa paluru tjana nganaŋanya nintilpai kuṇpu nyinanytjaku munu tungun-tunguntu palunya waṇantjaku wantintyja wiyangku. Kala nyara palulangurul unngu raparingkula kulini, “Mulapa Godalu nganaŋanya w̄irura kanyilku

* 15:3 Psalm 69:9

tiṭutjarangku.” ⁵ Panya Godalu puntu winki rapalpai tungun-tunguntu tiṭutjarangku palunya wañantjaku. Kaña palula nyurampa tjapilpai paluru nyuranya tiṭutjarangku nintintjaku nyura uwankarangku Christanya wañara kulintja kutjuringkula palula kalypa nyinanytjaku. ⁶ Ka nyara palulanguru nyura uwankarangku tjungungku wangka kutjuringkula mirawanima Godanya, Mayatja Jesuku Mama nyinanytjanya.

Jesunya Pitjangu Anangu Uwankaraku

⁷ Jesuku walytja tjuṭa! Christalu panya nyuranya walytjanmara palula tjungunu, ka nyuranku uti palu puṛunytytu Jesuku walytja kutjupa tjuṭa pukultu walytjanmara tjungunma wantinytja wiyangku. Ka alatji nyura mukulya nyinanyangka aŋangu kutjupa tjuṭangku nyakula kuliklu, “Munta, mulapa Godanya mukulya wiru mulapa.” ⁸ Panya Christanya pitjangu nganampa Jew tjuṭaku waṛkarinytjikitja munu nganaŋanya nintintjikitja panya Godanya mulapa tjukaruru nyinanyi kalkuntjatjanungku palyalpai alatjitu. Panya Christanya pitjangu Godalu nganmanytju Aipuramanya tjananya kalkuntja utintjikitja. ⁹ Munu panya Christanya pitjangu aŋangu kutjupa tjuṭaku kuļu, Jew wiya tjuṭaku, tjana kuļu Godaku mulamularingkula palunya mirawaninytjaku alatji, “Nyuntun ngaltunytytu pulka mulapa nyinanyi.” Panya nyiringka iriti walkatjunkunytja ngarinyi nyanga alatji, “Kaña aŋangu kutjupa tjuṭawanu nyinanytjanungku nyuntunya mirawaniku.

Munuña inma kuļu inkara nyuntunya walkulku.” *

¹⁰ Ka tjukurpa kutjupa piṛuku ngarinyi Jew wiya tjuṭangka wangkanytja nyanga alatji,

“Pitjalaya Godaku aŋangu tjuṭangka tjunguringkula pulkara pukularima.” *

¹¹ Ka piṛuku tjukurpa kutjupa nyanga alatji ngarinyi, “Aŋangu tjuṭa, Godanya mirawanima!

Munuya inma inkara palunya wal kunma, manta winkitjangku.” *

¹² Ka panya piṛuku tjukurpa kutjupa ngarinyi wati panya Aitjayalu Jesunyatjara iriti walkatjunkunytja nyanga alatji, “Wati kutju utiringkuku Jesse-kunu malatja mularku.

Munu nyara paluru mayatjarira kanyilkku aŋangu kutjupa tjuṭa ngura uwankaratja.

Kaya wati nyara palumpa mulamularingkula rapa mulapa nyinaku.” *

¹³ Uwa, mulapa panya Godalu nganaŋanya palyaŋu palumpa rapa aла-ала paṭara nyinanytjaku. Kaña nyurampa palula tjapilpai nyanga alatji,

“Mama God, nyara tjananya pukulpa mulapa kurunpa rapa nyinanytjaku palyanma tjana nyuntumpa mulamularingkunyangka. Ka nyara palulanguru, Kurunpa Milmiltu witulyankunyangka, tjana rapa mularirira aла-ала paṭara nyinaku ngura wirukitja.”

Paulalu Aŋangu Kutjupa Tjuṭangka Para-wangkanytja

¹⁴ Uwa walytja tjuṭa, ngayulu ninti panya nyura wiruṛa palyanyku nyinapai. Munu nyura Godaku tjukurku munu palumpa iwaraku kuļu ninti pulka nyinanyi. Munu nyuranku kunyu ngapartji-ngapartjingku wangkara tjukarurungku nintilpai wirungku. ¹⁵⁻¹⁶ Palu lita nyanga

* ^{15:9} Psalm 18:49 * ^{15:10} Deuteronomy 32:43 * ^{15:11} Psalm 117:1 * ^{15:12} Aitjayaku 11:10

palulana ara kutjupatjara nyurampa tjukarurungku walkatjunangi nguluringkunytja wiyangku nyura píruku kulintjaku. Panya Godaluni ngaltunytjungku ngurkantara tjunu aŋangu Jew wiya tjutawanu tjukurtjara warkarinytjaku Jesuku Christaku, war̄ka panya pulka mulapa. Kaña Tjukurpa Palya Godalanguru para-tjakultjunanyi aŋangu Jew wiya tjutangka paluru tjana kulira kampa kutjuparira Jesunya wanantjaku. Nyanga alatji ngayulu nintini aŋangu nyanga palunya tjananya Godala wirkakatinytjikitjangku paluru tjananya mantjira pukularinytjaku, panya Kurunpa Milmiltu tjananya palyanu tjana Godala mirangka tjukaruru ngaranytjaku. Nyara palulanguruna nyuranya tjukarurungku wangkanyi lita nyanga palula nyura kulira tjukarururingkunytjaku.

¹⁷ Uwa, ngayulu pulkara pukularinyi war̄ka nyanga Godaku palyara, panya Jesunya Christianity ngayula tjungu ngaranyangka kutjuṇa tjukarurungku palyani. ¹⁸⁻¹⁹ Palu ngayulu walytjangku palyantjatjanungku mirawaṇinytja wiya, panya Christalu ngayulawanungku palyantjijanguru kutjuṇa mirawaṇinyi. Nyara paluru panya tjananya kampa kutjupanu Godala wangaṇarangku kulintjaku. Nyangatja paluru palyanu ngayulawanungku panya ngayulu tjukurpa wangkanytjita-wanungku munu ngayulu kutjupa kutjupa tjuta palyantjita-nguru kuļu. Panya Kurunpa Milmiltuṇi witulyangku nintiningi miracle kutjupa kutjupa tjuta palyantjaku, kaya aŋangu tjutangku nyakula Godaku mulamularingangi, Kurunpa Milmiltu tjananya unngu nintinnyangka. Uwa, ngayulu ngura winkingka Tjukurpa Palya Jesunyatjara para-tjakultjunangi Jerusalemalanguru ngura panya Iliri-kamalakutu. Ngura parariwanungkuṇa wangkarinangi, ngura ngururitja tjutangka kuļu. ²⁰ Panya ngayulu rawa mukuringkupai Jesuku ngurpa tjutangka tjakultjunkunytjikitja palumpa tjukurpa. Munuṇa tjukurtjara kutjupa ngaṇmanyapa ankunytjijangka píruku ařangkaṭu ankunytjikitjangku kulintja wiya, panya paluru tjana ngaṇmanytju kulinu. ²¹ Panya nyiringka iriti walkatjunkunytja ngarinyi nyanga alatji,
“Tjutangku panya tjukurpa palunyatjara ngaṇmanytju kulintja wiya, palu nyara paluru tjana kulinu.”

Uwa tjana watarku nyinanytjatjanungku kulira pina ałaringkuku.” *

Paulalu Rome-alakutu Ankunytjikitjangku Wangkanytja

²² Uwa, aŋangu panya watarkitja tjutangkanā tjukurpa para-wangkangi munuṇa puṭu kulinigi nyuralakutu ma-pitjanytjikitjangku. ²³ Palu kuwarina war̄ka nyanga palunya wiyanu ngura nyanganta, ka ngayuku kuvari ałalta ngaranyi nyuralakutu ma-pitjanytjaku, panya ngayulu titutjarangku kulinigi yiya kutjupa yiya kutjupa nyuralakutu ma-pitjanytjikitjangku. ²⁴ Ngayulu kuvari ngura Paintakutu ananyi munuṇa nyara palulakutu ma-pitjala ngururpa Rome-ala-warara wirkara nyurala tjunguringkuku. Munuṇa nyurala tjukutjuku rawa nguwanpa wirurā nyinara pakuwiyaringkuku, ka nyara palulangurulta nyura tjinguru ngayunya iyalku ngura Paintakutu ankunytjaku. ²⁵ Palu kuvari nyanga ngayuku Jerusalemalakutu-warara ngaṇmanyapa ankunytjaku ngaranyi, panya ngayulu mani tjanampa ma-katinyi munuṇa tjananya ungkuku Godaku walytjapiti ngura nyara palula. ²⁶ Panya Godaku walytja tjutaya uṭuḷu kutjupa kutjupa nyinanyi ngura nyanga Matja-tuniyala munu Akayala. Munuya paluru tjana walytjangku kulinu mani urara tjungura ngaltutjara tjuta ungkunytjikitjangku nyara Jerusalema nyinanytja tjuta.

* **15:21** Aitjayaku 52:15

Panya nyara palulaya Godaku walytja kutjupa tjuṭa nyinanyi ngaltutjara tjuṭa, kaṇa palula tjanalakutu kuwari katinyi. ²⁷ Panya tjanaya walytja alatjiṭu mukuringu mani uraṇa ungkunytjikitja aṇangu Jew ngaltutjara tjuṭa. Ka nyangatja tjukarurungku ungkunytja ngapartji, panya Tjukurpa Palya Jesunyatjara Jew tjuṭanguru-warara wirkanu aṇangu kutjupa tjuṭangka kaya mulamularingkula pukularingu, ka nyara palulanguru tjananya ngapartji alpamilantjaku ngaranyi alatjiṭu. ²⁸ Kaṇa kuwari Jerusalemalakutu mani nyanga palunya ma-katinyi mununa tjananya ungkunytjatjanu wati-pakalku ngura nyara Paintakutu, mununa nyuranya ngururpa nyakuku. ²⁹ Mununa alatji kulini, “Ngayulu nyurala ma-wirkara tjunguringkunyangka Christalulanya nganananya uwankara tjungu pulkara pukulmankuku.”

³⁰ Walytja tjuṭa, ngayulunatju tjapilpai Godala ngayunya alpamilantjaku, ka wanyu nyura kuļu pulkara Godala ngayuku tjapinma kurunpa winkingku. Panya nyuntu nganana mulamularingkupai Mayatja Jesuku Christaku. Ka panya Kurunpa Milmiltu nyuntunya nganananya mukulya nyinanytjaku palyalpai. Kaṇa nyara palulanguru nyurala wangkanyi nyura ngayuku Godala pulkara tjapintjaku. ³¹ Alatjiya ngayuku tjapinma Godalu ngayunya atunymara kanyintjaku ngura nyara Judeala wirkankunyangka. Tjingurutjuya puṭu mulamularingkupai tjuṭa nyakula pikaringkuku, palula-tawaratjuya ngayuku tjapinma. Munuya tjanampa kuļu tjapinma Godaku walytja tjuṭaku nyara Jerusalemala nyinanytja tjuṭaku, kaya mani nyangatja ngayulu katira ungkunyangka mantjira pukulariku. ³² Kaṇa nyara palulanguru pukulpa mulapa ma-pitjala nyurala tjunguringkuku ngayunya Godalu iyannyangka. Mununa nyurala tjungu nyinara nyuntu nganana uwankaraṭu pukulariku. ³³ Uwa, ka Godanya nyurala uwankarangka tjungu titutjara nyinama, panya paluru nganananya kurunpa rapa pukulpa kanyilpai. Uwa mulapa.

16

Paulalu Malpa Tjutangka Wangkanytja

¹ Kulilaya, nganampa walytja minyma panya ini Piipinya kuwari nyuralakutu ma-pitjanyi. Panya nyara paluru wirungku Godaku walytja tjuṭa rawangku alpamilalpai ngura pala Tjantjuriyala. ² Ka paluru nyurala ma-wirkankunyangkampa nyura palunya pukultu mantjira kanyinma panya paluru Mayatja Jesuku walytja. Ka nyura panya Godaku walytja nyinarampa alatji palyantjaku ngaranyi. Ka paluru kutjupa kutjupaku mukuringkunyangkampa palunya alpamilara ungama. Panya minyma nyara paluru rawangku Jesuku walytja tjuṭa alpamilaningi munu ngayunya kuļu. Palulanguru nyura uti palunya pulkara atunyamanama.

³ Palu minyma ini Puritjilanya pulanya Akuwilanya kurirara nyakulampaya wangka panya ngayulu pulanya rawangku kulilpai. Panya paluru pula ngayula tjungu rawa warkaringi Jesuku Christaku. ⁴ Kaṇa palumpa pulampa pulkara pukularinyi panya pula ilunytjikitja kulira nguluringkunytja wiya raparingkula pula ngayunya alpamiliningi. Ka aṇangu panya tjuṭa Godaku walytjaringu ngura winkingka, nyara paluru tjana kuluya pulkara pukularinyi palumpa pulampa. ⁵ Kaya-puta Puritjilaku pulampa walingka inmaku tjunguringkupai tjutangka kuļu wangka, panya ngayulu tjananya titutjarangku kulini.

Kaya wati Ipanaitjanya kuļu wangka panya ngayulu palunya titutjarangku kulini. Nyara paluru panya ngayuku malpa wiru mulapa.

Panya paluru-warara Jesuku mulamularingu nganmanypa manta nyara Aitjala, ka panyaya aŋangu kutjupa tjuṭa palula małangka Jesuku mulamularingu manta nyara palula.

⁶ Munuya Mary-nya kuļu wangka panya ngayulu palunya rawangku kulini, panya minyma nyara paluru nyurampa pulkara war̄karingi.

⁷ Munuya ngayuku walytja kutjara Antuṛa-naikanya pulanya Tjuniyanya kuļu wangka panya ngayulu rawangku pulanya kulini. Panya paluru nganana tjungu tjailangka nyinangi. Ka nyara palunya pulanya panya aŋangu tjuṭangku nyakula kulilpai tjukurtjara wiru kutjara Godalu iantja. Panya paluru pula-warara Jesuku walytjaringu, ka ngayulu małangka Jesuku walytjaringu.

⁸ Munuya wati ini Ampa-liyatanya kuļu wangka panya ngayulu palunya rawangku kulini. Nyara palumpa ngayulu pulkara mukuringkupai, Mayatja Jesuku walytjaku.

⁹ Munuya Upa-natjanya kuļu wangka panya palunya kuļuna rawangku kulini. Nyara paluru panya nganana tjuṭangku war̄karipai Jesuku Christaku.

Munuya Tjakitjinya kuļutu wangka panya ngayulu palunya rawangku kulini. Nyara paluru kuļu ngayuku malpa wiru mulapa.

¹⁰ Munuya Apalitjanya kuļu wangka panya ngayulu palunya rawangku kulini. Wati nyara paluru panya tungun-tunguntu Christanya rawangku wañalpai.

Munuya wati ini Ar̄itja-pulaku walytjapitingka kuļu wangka panya ngayulu tjananya titutjarangku kulini.

¹¹ Munuya ngayuku walytja Yara-tyiyanā kuļu wangka panya rawangkuṇa palunya kulini.

Kaṇa Natjitjanya tjananya kuļu kulini panya paluru munu palumpa walytja kutjupa tjuṭa kuļu Jesuku walytja nyinanyi. Kaya wanyu palula tjanala kuļu ma-tjakultjura panya ngayulu tjananya titutjarangku kulini.

¹² Munuya piruku wangka Tur̄apinanya pulanya Tur̄aputjanya panya ngayulu pulanya titutjarangku kulini. Panya minyma nyara paluru pula kuļu Mayatja Jesuku titutjara war̄karipai.

Munuya minyma panya Putjitjala kuļu wangka panya ngayulu palunya rawangku kulini. Nyara paluru panya malpa wiru mulapa munu panya pulkara alatjitu war̄karingi Mayatja Jesuku.

¹³ Munuya Ruputjanya kuļu wangka panya ngayulu palunya titutjarangku kulini. Nyara paluru panya wirungku tungun-tunguntu wañalpai Mayatja Jesunya. Munu palumpa ngunytyju kuļu palu purunypatū wangka, panya nyara paluru ngayunya wirura alpamilalpai ngunytyjungku purunytyju.

¹⁴ Munuya ini nyanga tjananya kuļu wangka panya ngayulu tjananya titutjarangku kulini, Atjin-kuritjanya, Pilikanya, Umitjinya, Patupanya, Umatjanya, munu Jesuku walytja kutjupa tjuṭangka kuļu wangka panya tjanala tjunguringkupai tjuṭangka.

¹⁵ Munu piruku palu purunypatū wangka Pailalukanya pulanya kurirara Tjuliyanā, munu Niriyanya pulanya nyarumpara, munu Ulimpanya kuļu munu Jesuku walytja kutjupa tjuṭangka kuļu wangka, panya palula tjanala tjunguringkupai tjuṭangka. Nyara palunya tjananya rawangku kuļilpai.

16 Ka nyura uti aŋangu kutjupa Jesuku walytja nyakulampa palumpa pukularira mara witinma.*

Kaya Jesuku walytja tjutangku ngura nyanga tjutanguru nyuranya kulini nyurampa pukularira.

Lita Nyangatja Wiyantjikitjangku Wangkanytja

17 Walytja tjuṭa, nyura panya ngañmanypa tjukaruruku nintiringu iwara panya palyaku Jesunya wanantjikitja. Palu kutjupa tjutangku tjin-guru nyuranya nintingku-palku ngunti wangkara tjaralku tjukarurungka ngaranyangka munu nyuranya kurara upalku Jesunya wañannyangka. Kaña palula-tawara nyuranya pulkara ngulutjunanyi nyuranku ngulu nyakunytjaku. Ka kutjupa tjutangku alatji ngunti wangkanyangka nyura uti kulira wantira mañtalpa nyinama palula tjanala tjunguringkunytja wiya. **18** Panya aŋangu nyanga palu purunypa tjuṭa Mayatja Jesuku war̄karipai wiya. Palu tjana walytjangku kutju kulira tjana mukuringkunytja kutju palyalpai. Munuya mukulyangku-palku wangkara ngunti wituwitura aŋangu ngurpa tjuṭa kuralpai. Palula-tawara na nyuranya ngulutjunanyi ngunti wangkapai tjutangku nyuranya kurantjakutawara. **19** Panya ngura winkingkaya kulinu nyura Tjukurpa Palya Jesuku wanganarangku kulinnyangka, kaña nyara palulanguru nyurampa pukularinyi. Palu ngayulu mukuringanyi nyura titutjara wanganara nyinara palya kutju palyantjaku, munu kuraku mukuringkuwiya nyinanytjaku. **20** Ka Godalu panya kurunpa rapa pukulpa nyinanytjaku palyalpai munu paluru kuwari Satannga puruntara wantinyi nyuranya kurantjakutawara. Kaña Mayatja Jesula nyurampa tjpini nyuranya ngaltunytjungku kanyintjaku.

21 Ka wati panya Timitjinya ngayula tjungu nyinara war̄karinyi. Munu paluru nyuranya kulinu nyurampa pukularira. Ka wati nyanga Lutjiyat-jalu, Jasontu, Tjatjipatalu tjana kulu nyuranya palu purunypatu kulinu. Nyanga paluru tjana kulu panya ngayuku walytja tjuṭa.

22 Ka ngayulu ini Tutiyatjalu nyiringka nyanga walkatjunanyi Paulalu wangkanyangka. Mununa Jesuku walytja nyinara nyurala palu purunypatu wangkanyi alatji, “Ngayulu nyuranya rawangku kulilpai Jesuku walytja tjuṭa.”

23-24 Ka wati ini Kayatjalu kulu nyuranya titutjarangku kulilpai nyurampa pukularira. Panya ngayulu palumpa ngurangka nyinanyi. Kaya Jesuku walytja tjuṭa ngura nyanga palula pitjala tjunguringkupai.

Ka piruku Iratjatjalu kulu nyuranya titutjarangku kulilpai. Nyanga paluru panya mani atunymara kanyilpai tawunu nyanga palumpa.* Ka nganampa malpa Kuwatatjalu kulu nyuranya titutjarangku kulilpai.*

Godanya Titutjarangku Mirawaninytjaku

25 Utila nyanganguru titutjarangku Godanya mirawañima. Panya paluru mulapa nyuranya kunpura kanyilku nyura Jesunya Christanya titutjarangku wanantjaku wantintjya wiyangku. Panya nyanga palunyanra wangkangi Tjukurpa Palya Jesunyatjara wangkara utira. Tjukurpa

* **16:16** Paulalu ngura nyara paluna ngurara tjutangka wangkangu nguku kutjara nyunyntjajku, panya tjakangkuya alatji palyalpai aŋangu kutjupa nyakula pukularira. Ka nganana tjinguru Jesuku walytja kutjupa nyakula mara witira pukularipai. * **16:23-24** Tawunu nyanga paluru panya ini Karintjanya. *

16:23-24 Wati kutjupangku kunyu verse 24 walkatjelu munu mała tjungunu Paulaku tjukurta alatji – *Kaña Mayatja Jesula Christala nyurampa tjpini nyuranya ngaltunytjungku kanyintjaku. Uwa, mulapa.*

nyanga palunya panya Godalu ngañmanytju kumpilpa kanyiningi rawa mulatu,²⁶ palu palumpa wangkatjara tjutangku iriti nyiringka walkatjunu. Ka kuwari nyangalta utinu Godalu panya titutjara nyinapailu, munu wangkangu tjukurpa nyangatja para-tjakultjunkunytjaku aŋangu manta winkitjangka tjana kulira Godaku mulamularingkula palula wan-ganarangku kulintjaku.

²⁷ Uwa, pulkařala mirawanima Godanya kutju, panya paluru mulapa nintipuka pulka uwankarangka waintarinytja. Uwa Jesulu Christalu nganananya kanyinnyangkala Mamanya titutjarangku mirawanima. Uwa mulapa.

Lita Nampa 1 Paulalu Walkatjura Iyantja Ngura Karintjalakutu 1 Corinthians Nyangatja Nganmanytju Nyakula Wangkanytjaku

Nyangatja Godaku tjukurpa Paulalu walkatjura iyantja Jesuku walytja tjutakutu ngura nyara Karintjala nyinanytja tjutakutu. Paluru ngura panya Ipitjala nyinara lita nyangatja walkatjunu.

Kaya anangu ngura nyara Karintjala nyinapai tjuتا pulkara alatjitu kañany-kañanyaripai tjananku walytjangku ninti pulka kuliقا. Munuya paluru tjana mani pulkatjara, palu paluru tjanaya kura pulka mulapa, panya wati tjutaya tjikira tarangkarira minyma kutjupa tjutangka ngunti ngaripai kunتا wiya alatjitu. Ka ngura nyara palula timpula pulka mulapa ngarangi god ngalypa-ngalypa tjarpara walkuntjaku Godanya panya Jesuku mama walkuntjaku wiya.

Ka tjukurpa Karintjanyatjara Luke-alu walkatjunu nyiri panya *Jesulu Iyantja Tjutangku Palyantjilangka* chapter 18-ta, panya Paulalu anangu tjutangka Tjukurpa Palya Jesunyatjara nganmanytju tjakultjunkunytja, ka panyaya kulira mulamularingu paluru wangkanyangka munuya Jesuku walytjaringu anangu tjuتا mulapa.

Palu ngula Paulalu ngura panya palunya wantikatinyangka paluru tjana małangka kuraringu munuyanku pikangku ngalytjurmaرا ngaparku wangkangi munuya puٽu tjungungku kulinungi. Ka kutjupangku lita walkatjura iyanu Paulalakutu munu tjakultjunu tjana panya pikaringkunytja. Ka anangu kutjupa tjuتا kuٽu pitjangu Karintjalanguru palula wangkanytjikitja munu tjukurpa kutjupa tjuتا utintjaku tjapintjikitja kuٽu. Ka paluru lita nyanga palunya walkatjura tjanala wiru tjuتا tjakultjunangi munu tjananya wituwituningi wirura palyanyku nyinanytjaku Godaku walytja mulapa.

Tjukurpa nyanganpa ngarinyi:

1:1-9 Paulalu tjukurpa nganmanyitja wangkanytja

1:10—4:21 Ngaparku pikaringkunytja wiyangku wantintjaku

5:1—7:40 Wiruraya tjukaruru nyinanytjaku Godala wanganarangku kulira

8:1—11:1 Kutjupa kutjupa tjuتا nyaa palyantjaku Jesuku walytja nyinara 11:2—14:40 Inmangka tjunguringkula tjukaٽurungku palyantjaku

15:1-58 Tjukurpa Palya Jesunyatjaraku mulamularingu nyinanytjaku munu ilunytjatjanu wankaringkula pakantja

16:1-24 Paulalu tjukurpa malatja wangkanytja munu malpa tjutangka tjakultjunkunytja

Paulalu Nganmanytju Wangkanytja

1-2 Uwa, Jesuku walytja tjuتا, ngayuluنا Paulalu nyurampa lita nyangatja walkatjunanyi ngura pala Karintjala nyinanytja tjutaku. Panya ngayulu tjukurtjara Jesulu Christalu iyantja, panya Godaluni ngurkantanu palumpa tjukurpa anangu tjutangka tjakultjunkunytjaku. Kali ngali malpararangku kuvari tjunguringkula nyuralakutu lita nyangatja malyani wati ini Tjatjaniyalu ngali.

Panya Godalu nyuranya ngurkantanu aŋangu kutjupa tjutanguru nyura Jesula Christala tjunguringkula palumpa walytja nyinanytjaku. Munu panya palu puruny whole ngura kutjupa tjutangka tjananya kuļu Godalu ngurkantanu palumpa walytjaringkunytjaku, panya tjananu kuļu tjukurpa Jesunyatjara kulintjatjanu mulamularingu. Kaya Jesunya Christanya mayatjanmara walkuni, panya paluru-maŋtul tjanampa mayatja nyinanyi munu nganampa kuļu. Kali lita nyangatja tjanalakutu kuļu ma-iyanı paluru tjananu kuļu nyakula kulintjaku.

³ Ka Mama Godalu, Mayatja Jesulu Christalu kuļu nyuranya pukultju pulkangku kanyinma munu nyuranya kurunpa rapara pukulmanama.

Paulanya Tjanampa Pukularinytja

⁴ Ngayulu rawangku nyuranya kulira pukularira Godanya walkulpai, panya paluru nyuranya Jesula Christala tjungura nyurala kutjupa kutjupa tjuta mukulyangku nintiningi nyura palumpa warka wirura palyantjaku.

⁵ Ka mulapa nyura Christala tjungu nyinara ninti pulkaringu munu panya raparingkula palumpa tjukurpa tjukarurungku wangkapai. ⁶ Palulanguru nyura nintiringkula kulini panya tjukurpa Christanyatjara ngayulu nyurala tjakultjunkunytja ngunti wiya, palatja tjukaruru mulapa. ⁷ Uwa, nyuranya panya Kurunpa Milmiltu kutjupa kutjupa uwankara nintinu, ka nyura ninti nyinanyi Mayatja Jesunya malaku pitjanytjaku paṭara. ⁸ Ka Tjintu Małatjaku paṭannyangka Godalu nyuranya kuŋpu kanyilku. Ka nyara palulanguru tjintu nyara palula Jesunya pitjanyangka, kutjupangku nyuranya putu kuranmankuku. ⁹ Uwa mulapa Godalu nyuranya kuŋpu kanyilku wantinytja wiyangku, panya alatji paluru kalkunu munu paluru kalkuntjatjanungku palyalku alatjitu wantinytja wiyangku. Paluru panya nyuranya ngurkantara tjungunu palumpa katjangka Jesula Christala nganampa panya mayatjangka, ka nyura palula tjungu pukulpa nyinaku.

Jesuku Walytja Tjuta Uti Tjungu Nyinama

¹⁰ Palu kulilaya walytja wiru tjuta. Ngayulu Jesuku wařkarira nyuranya pulkara wangkara wituwituni tjungu kalypa nyinanytjaku. Pikaringkula ngapartji-ngapartjingku wangkawiyangkuyanku wantima, munuyanku mauntpa mauntpa palyalwiyangku kuļu wantima. Palu tjunguringkulaya wangkara kulinma munuya tjungungku palyanmankula kutju palyanma. ¹¹ Alatjina kuwari nyurala wangkanyi mununa nyuranya paini panya Jesuku walytja maŋkurtuŋiya minyma ini Kalawiku nguranguru pitjala tjakultjunu nyuranku pikangku ngaparku wangkanyangka nyakunytjatjanungku. ¹² Alatjina kulinu tjananu wangkanyangka, kutjupa tjarangkuya kunyu wangkapai, "Nganaŋa Paulala tjungutja." Kaya kunyu kutjupa tjarangku wangkapai, "Wiya, nganaŋa wati Apalatjala tjungutja." Kaya kunyu kutjupa tjarangku wangkapai, "Wiya, nganaŋa Peterla tjungutja."* Ka tjara kutjupangku wangkapai, "Wiya, nganaŋa Christala tjungutja." ¹³ Ka nyangatja tjukaruru wiya. Christanya kutju alatjitu, tjuta wiya, ka uti nyuntu nganaŋa uwankarangku palunya kutju waŋanma. Panya ngayulu nyurampa puňu katakutjarangka ilunytja wiyatı, paluru kutju nyurampa anga-ilungu. Ka panya nyura ngayula iningka baptise-arinytja wiyatı, palula iningka kutju nyura baptise-aringu, Jesula iningka. ¹⁴ Ngayulu nyuralanguru kutjara kutju baptise-katingu wati ini nyanga pulanya Kuritjipanya munu Kayatjanya. Tjutana baptise-katinytja wiyatı mununa nyanga palulanguru pukularinyi. ¹⁵ Tjinguru ngayulu nyuranya

* ^{1:12} Peternya ini kutjupa *Tjiipatjanya*.

tjuṭa baptise-katinyangka nyura alatji wangkaku, “Ngayunya Paulalu baptise-katingu palula iningka, ka ngayulu pala palula tjungutja.” Alatji wangkanytjakunा pukularintja wiya. ¹⁶ (Munta wanyu kaṇa kulila, mułapaṇa wati panya Tjipanatjanya, munu palumpa ngurangka nyinanytja tjuṭa kuļu baptise-katingu. Palu ngayulu puṭu kulini kutjupa tjuṭa baptise-katinytjatjanungku. Mununa pukularinyi panya tjuṭa wiya, mankurpa kutjuṇa baptise-katingu, ngunti kulintjaku-tawara.) ¹⁷ Panya Christaluṇi ngayunya iyanu anangu tjuṭa baptise-katinytjaku wiya, palu tjukurpa palya palunyatjara para-tjakultjunkunytjakuni iyanu. Paluruni iyantja wiyatū anangu tjuṭa kaṇany-kaṇanytju wangkara wituwituntjaku. Palu tjukurpa Christanya puṇu katakutjarangka ilunytja tjakultjunkunytjakuni witunu anangu tjuṭangku uti kulintjaku munu tjukurpa kulira mulamularingkunytjaku. ¹⁸ Ka panya anangu watarku nyinapai tjuṭangku tjukurpa nyangatja wangkanyangka kulira analpai alatjitu alatji wangkara, “Wiya, kata kawakawangkuya ngunti wangkanyi.” Palu panya nganaṇanya Godalu wankarunu Jesunya puṇu katakutjarangka ilunytjitetjangu. Kala palulanguru tjukurpa palunya kulini pułka mulapa panya ara palulawanungku Godalu witulya pułkangku wankarunkupai. ¹⁹ Panya nyiringka iriti walkatjunkunytja ngaranyi Godalu wangkanytja nyanga alatji,

“Kutjupa tjuṭangkuya ninti pułkangku-palku wangkara kulilpai.

Palu wiya, ngayulu tjananya nintilku panya tjana nintipuka wiya, ninti tjukutjuku nyinanytja.

Munuya piṛuku kulilpai, ‘Nganaṇa uwankaraku ninti pułka.’

Palu wiya, ngayulu tjanampa tjukurpa kulilwiyangku wantiku alatjitu.” *

²⁰ Kala uti tjananya mirawaṇinytja wiyangku wantima wati panya nintipuka tjuṭa, munu tjukurku ninti pułka tjuṭa kuļu, panya tjana tjukurpa pułka tjuṭa ngaparpungkula wangkapai nintingku-palku. Uwa, utila tjananya kulira wantima, panya Godalu tjananya nyakula ngurpanmankupai alatjitu. ²¹ Panya anangu mantatja kulilpai tjuṭangkuya walytjangku nintipuka kulira Godaku puṭu nintiringanyi. Palu tjukurpa Christanya puṇu katakutjarangka ilunytjitetjaka kulira kutju anangu Godaku nintiringkuku. Panya tjukurpa nyanga palumpa kulira mulamularingkunyangka kutju Godalu anangu tjuṭa wankarunkupai Christalawanungku. Kaya anangu kutjupa tjuṭangku nyangatja kulira analpai munuya wantipai, palu kutjupa tjarangku kulira mulamularingkunyangka Godalu tjananya wankarunkupai. ²² Kaya Jew tjuṭangku tjapilpai alatji wangkara, “Nintilalanya wanyu kutjupa kutjupa witulya pułkangku palyara, kala palulangurulta nyakula tjukurpa palumpa mulamulariwa.” Kaya Jew wiya tjuṭangku ara kutjupa wangkapai alatji, “Nganaṇa tjukurpa ninti pułkangku wangkanyangka kulintjikitja mukuringanyi, munula pala palulangurulta kulira mulamularingkuku.” ²³ Palu wiya, nganaṇa panya tjukurpa Jesunya puṇu katakutjarangka ilunytjitetjaka kutju tjakultjunkupai. Palu Jew kutjupa tjuṭangku nyangatja kulira wantipai. Kaya anangu kutjupa tjuṭangku kulilpai, “Tjurkurpa nyangatja wiya nguwanpa, ngalypa-ngalypa nguwanpa.” ²⁴ Palu panya Godalu anangu kutjupatjara ngurkantanu palumpa walytja nyinanytjaku Jew tjuṭa munu Jew wiya tjuṭa kuļu. Panya nganaṇa tjukurpa Christanya ilunytjitetjaku mulamularingkunyangka Godalu nganaṇanya wankarunu.

* ^{1:19} Aitjayaku 29:14

Uwa, mulapa Godalu witulya pułkangku nyanga alatji palyaṇu ninti pułkangku. ²⁵ Panya watarkitja tjutangku tjukurpa Jesunya ilunytjitja kulira anara wangkapai, “Godanya-manti upampa munu puṭu palyal-paimpa nyinanyi. Tjinguru paluru ngurpa.” Palu wiya, Jesunya ilunyangka Godalu nintingku witulya pułkangku wankara pakaltjingaṇu, munulanya palulanguru nganananya kulu wankarunkuku. Kala nyanga palulanguru kulini Godanya mulapa witulya pulka nyinanyi, munu paluru nintipuka pulka mulapa aŋangungku kulintjitjangka muṇkara alatji.

²⁶ Walytja tjuṭa, wanyuya kulila ngaṇmanyitja panya, panya ngaṇmanypa nyura Godaku ngurpa nyinangi, ka panya paluru nyuranya palumparintjaku ngurkantanu. Palu panya nyura uwankara ngaṇmanypa ninti pulka nyinanytja wiya, maṇkurpa kutjuya ninti nyinangi. Munu nyura uwankaraṇu ngaṇmanypa aŋangu tjuṭaku mayatja pulka nyinanytja wiya, maṇkurpa kutjuya mayatja nyinangi. Munu panya nyura uwankaraṇu wati minyma pulka wiya, maṇkurpa kutjuya pulka nyinangi. ²⁷ Panya Godalu nyuranya ngurpa tjuṭa ngurkantanu ninti pulka tjutangku nyakula tjananku walytjangku kulira kuṇtaringkunytjaku. Paluru nyuranya tjukutjuku tjuṭa ngurkantanu pulka tjutangku nyakula kulira kuṇtaringkunytjaku.

²⁸ Uwa, nyuranya panya ninti pulka tjutangku nyakula wantipai alatji kulira, “Wiya palatja ngurpa kurakura tjuta, nganananya purunypa wiya.” Palu Godalu alatji tjuṭa ngurkantanu nintipuka panya tjutangku nyakula tjananku walytjangku kulira kuṇtaringkunytjaku.

²⁹ Nyanga alatji Godalu ngurkantanu nyura walytjangku mirawaṇinytjaku-tawara. ³⁰ Panya paluru kutjungku nyuranya palyanu palumpa walytjaringkunytjaku Jesula Christalanguru. Panya Jesunya nyuntumpa nganampa ngalkilpa anga-ilungu Godalu nganananya kura palyantjitjanguru kaly-pangku wantinytjaku ngananā karalyarira palula tjunguringkula nyinanytjaku. Alatji Godalu nganananya tjukarurunmankula walytjanmanu, ka ngananā palunya kutju mirawaṇinytjaku ngaranyi. ³¹ Pala palulanguru nyiringka iriti walkatjunkunytja ngaranyi alatji,

“Utile mirawaṇinytjikitja mukuringkulampa Mayatja Godanya kutju mirawaṇima nganananku mirawaṇinytja wiyangku.” *

2

¹ Walytja tjuṭa, wanyuna ngayunyatjara nyurala tjakultjura nyura kulintjaku. Panya ngayuluṇa pitjangu nyuralakutu Tjukurpa Palya Godaku kumpilitja utira wangkanytjikitja. Tjukurpa nyara palunya ngayulu wangkara kaṇany-kaṇanyaripai wiya. Munuṇa tjukurpa wara tiṭutjarangku wangkapai wiya. ² Palu ngaṇmanytuṇa unngu kulinu alatji, “Utiṇa tjukurpa Jesunyatjara kutju wangkama, panya paluru puṇu kaṭakutjarangka nganampa ilungu nganananya wankarunkunytjikitja. Tjukurpa kutjupa wangkanytjaku-maṇtu wiya ngaranyi.” ³ Kaṇa nyurala wirkara upa alatji tjuṭa ngarangi munuṇa nguluringkula tjititingangi nyurala panya miṛangka ngarala. ⁴ Munuṇa tjukurpa nyurala tjakultjura kaṇany-kaṇanytju wangkara wituwituntja wiyatū. Panya ngayulu wangkara wituwituntjatjanungku nyuranya puṭu mulamularingkunytjaku palyaningi. Palu nyura panya mulamularingu Kurunpa Milmiltu nyuranya witulya pułkangku unngu nintinnyangka kutju. ⁵ Panya ngayulu mukuringangi nyura tjukurpa kulira mulamularingkunytjaku ngayulu

* 1:31 Jeremiah-ku 9:24

wangkanytjitjanguru wiya, palu Godalu witulya pułkangku nyuranya unngu nintinnyangka. Nyara palulanguruna tjukurpa kañany-kañanytju wangkara wituwituntja wiyangku wantingi, Godalu kutjungku nyuranya unngu nintintjaku.

⁶ Palu Jesuku walytja kutjupa tjuṭangkuya palunya mulamulangku titutjarangku wañarinkupai wantinytja wiyangku. Kana nyara palula tjanala ngayulu tjukurpa pułka mulapa wangkara utilpai. Palu tjukurpa ngayulu wangkanytja wiru mulapa ngaranyi, tjukurpa mantatja tjuṭa puruny whole wiya. Panya mayatja mantatja tjuṭangkuya tjukurpa pułka-palku kañany-kañanytju wangkapai. Palu mayatja nyara palunya tjananya Godalu wiyaringkunytjaku palyalku. ⁷ Palu tjukurpa nyanga ngayulu wangkanytja Godaku, panya tjukurpa Godalu ngañmanytju kumpilpa kanyiningi. Panya manta paluntja kuwaripangka Godalu kuliningi tjukurpa palunya utintjikitjangku ngananya Godala tjunguringkula wiru mulapa nyinanytjaku. ⁸ Panya mayatja mantatja tjuṭaya ngurpa nyinangi tjukurpa palunya kulintja wiyaṭu, munu panyaya pungkula utitjunu puṇu kaṭakutjarangka, Mayatja panya Ilkaritjanya. Tjinguruya tjukurpa palumpa nintingkumpa palunya pungkuwiyangku wantima. ⁹ Palu tjana ngurpa nyinangi, panya iriti nyiringka walkatjunkunytja alatji ngaranyi, "Godalu wiru mulapa palyantjikitjangku kulinu palumpa mukuringkupai tjuṭaku,

palu paluru kulintjtja aŋangu kutjupangku kulintja wiya alatjtū.
Panya Godalu nintingku palyaṇu kutjupa alatjtū aŋangungku kulintja wiyatja.

Kaya uwankara watarku nyinangi, Godalu kutjungku kulinu." *

¹⁰ Palu kuwari Godalu tjukurpa panya palunya ngananyaala utinu Kurunpa Milmiltawanungku. Panya Kurunpa Milmilnga Godaku kurunpa munu paluru uwankaraku ninti, Godalu unngu kulintja uwankaraku kuļu.

¹¹ Palu ngananya wanyu aŋangu kutjupangku kulintjtjaku ninti? Wiya, aŋangu nyara palurunku kutju walytja alatjtū ninti paluru kulintjtjaku. Ka palu puṛuny whole Godaku Kurunpa kutju ninti Godalu unngu kulintjtjaku.

¹² Munu panya Godalu ngananyaala ungu kurunpa palumpa ngananyaala unngu nyinara nintintjaku, kala palulanguru nintingku kulini Godalu nganampa wirungku ngalkilarira palyantja. Kurunpa nyara paluru panya ilkaritja, mantatja wiya, kala palulanguru mantatja tjuṭa pułkara kulilpai wiya.

¹³ Uwa, mulapa ngananya aŋangu nintipuka tjuṭangku nintintjtanguru kuliřa wangkanytja wiya, palu Kurunpa Milmiltu nintinnyangka kutjula kuliřa wangkapai. Nyara palurulanya nintilpai kala palula kulintjtajnungku tjukarurungku utiřa wangkapai. ¹⁴ Ka aŋangungku Kurunpa Godaku mantjilwiyangku wantirampa Godanya puṭu tjukarurungku kulini, munu kutjupangku tjukurpa palunyatjara wangkanyangka kuliřa analpai, "Wiya, nyaratja kawakawa." Panya aŋangu Kurunpa Milmilngatjarangku kutju Godalu palyantja tjukarurungku ngurkantankupai, ka aŋangungku Kurunpa Milmilnga kanyintja wiyangku puṭu ngurkantankupai. ¹⁵ Panya aŋangu Kurunpa Milmilngatjarangku kutjupa kutjupa uwankara nintingku kulilpai Kurunpa Milmiltu nintinnyangka. Palu aŋangu kutjupangku Kurunpa Milmilnga wantintjtajnungku aŋangu panya palunya Godalawanu nyinanyangka puṭu kulilpai. ¹⁶ Panya nyiringka iriti walkatjunkunytja ngaranyi alatji,

* 2:9 Aitjayaku 64:4

“Nganana uwankarangku puṭu kulini Godalu unngu kulintjitja.

Munula uwankarangku palunya puṭu wangkara tjukaruruṇi.” *

Uwa mulapa nganana ngurpa nyinangi, palu kuwarila Kurunpa Milmilngatjara nyinanyi munula palulanguru Godanya tjukarurungku kulini, panya Christalu palunya kulilpai, palu purunytyju.

3

Anangu Wanalwiyangku Christanya Kutju Wananma

¹⁻² Walytja wīru tjuṭa. Ngayulu aŋangu Kurunpa Milmilngatjara tjutangka tjukurpa pulka tjuṭa nintilpai. Ka mungatū ngayulu nyurala nyinara tjukurpa palu purunypa tjuṭa nyurala wangkangi, palu nyura puṭu kulinigi. Kana palulanguru nyurala aŋangu mantatja kulilpai tjuṭa purunytyja wangkangi tjukurpa ngañmanyitja tjuṭa. Panya nyura Jesuku kuvari walytjaringkunytjatjanu iti purunypa nyinangi pulkaringkunytja wiya, kana nyurala puṭu tjukurpa pulka wangkangi iti purunypa nyinanyangka, panya iti ipi kutju ungkupai kuka wiyangku, nyara palu purunypa nyura nyinangi. Munu panya kuvari kuļu nyura palu purunypa nyinanyi munu tjukurpa pulka puṭu kulini. ³ Panya nyura titutjarangku walytjangku kulini mantatja kulilpai tjuṭa purunytyju. Palulanguru nyura kutjupa tjuṭa nyakula nyāraringkupai kutjupa kutjupa tjuṭa palyantja-tjiratja. Munu nyuranku ngaparku wangkara pika-pikaringkupai walytjangku kutju kulira palyantjikitja mukuringkula aŋangu Godaku walytja wiya tjuṭa purunytyju, palunya tjananya arkara. ⁴ Panya nyuranku kunyu pika-pikaringkula wangkapai, “Ngayulu Paulala tjungutja.” Ka kunyu kutjupangku wangkapai, “Wiya, ngayuluña Apalatjala tjungutja.” Palu nyara palu purunypa wangkara nyura aŋangu panya mantatja kulilpai tjuṭa purunypa nyinanyi.

⁵ Palu uti nyura Jesula Christala kutjungka tjungu ngarama munu palunya kutju kulinma, Apalatjanya ngalinya kulintja wiyangku. Panya ngali aŋangu alatjiṭu wati Godaku waṛkaripai kutjara palumpa tjukurpa wangkapai kutju, ka panya nyura nyara palulanguru mulamularingu Christaku. Panya Godalulinya waṛka kutjupa kutjupa ungu palumpa palyantjaku. ⁶ Ka panya ngayulu-warara nyurala Godaku tjukurpa tjakultjunu, panya watingku uṇinypa mantangka tjunkula waŋalpai mai pakantjaku, nyara palu purunypa. Ka panya Apalatjalu ngapartji maławanungku nyurala tjukurpa piruku nintiningi nyura kulira kuṇpuringkunytjaku. Nyara paluru wati minangka kurpilpai purunypa, panya watingku uṇinypa ngañmanytyju tjunkunytyitja minangka kurpira waŋalpai piłtiringkunytjaku-tawara, palu purunypa Apalatjalu ngayula małangka nyuranya nintiningi. Palu panya Godalu nyuranya witulyanangi palumpa walytjaringkula rawangku palunya wanantjaku. Panya paluru kutjungku uṇinypa mantangka tjunkunyangka pakaltjingalpai wati wiyangku, palu purunypa paluru nyuranya kuṇpuringkunytjaku palyalpai. Panya ngali putu nyuranya wituwituni Godaku mulamularingkunytjaku, palu paluru kutjungku nyuranya unngu nintilpai.

⁷ Ka wati panya tjukurpa ngañmanytyju tjakultjunkupainya pulka wiya, munu wati panya maławanungku nintilpainya kuļu pulka wiyatū. Palu Godanya kutju pulka mulapa panya paluru kutjungku unngu nintilpai palumpa walytjaringkula ma-kuṇpuringkunytjaku. ⁸ Panya wati uṇinypa tjunkupainya munu minangka kurpilpaina pula tjungu

* 2:16 Aitjayaku 40:13

warkaripai, ka kutju mayatjarintja wiya. Munu pula kutjarangku^u warkarinytjatjanungku mani mantjilpai. Nyara palu purunypa wati tjukurpa nganmanytju tjakultjunkupainya munu malawanungku pitjala nintilpainya pula tjungu warkarinyi, ka kutju waintarintja wiya. Ka nyara palulanguru Godalu warkarinyangka nyakula pukularira kutju kutju wiru ungkuku.⁹ Uwa, Godanya kutju pulka nyinanyi, ka Apalat-jalu ngali warka palumpa kutju palyani ngalimpa wiya. Ka nyura palumpa anangu tjuṭa nyinanyi ngalimpa wiya, ka paluru nyuranya kunpuringkunytjaku rawangku palyani nyura palunya tungun-tunguntu waṇantjaku.

Nyura Wali Pulka Purunypa

Munu nyura palu purunypaṭu wali pulka purunypa nyinanyi Godalu palurunku palyantja.¹⁰ Ka panya Godalu ngayunya-warara wituṇu nyurala ankula Tjukurpa Palya nganmanytju tjakultjunkunytjaku. Panya wati nintingku tjuminta urura tjutira waliku puluwa witu palyalpai tjukaruru mulapa ngaranytjaku, palu purunypa ngayulu nganmanytju Jesuku tjukurpa nyurala tjukarurungku tjakultjunangi. Ka puluwa panya palula katu kutjupangku wali palyalpai, palu purunypa kutjupangku ngayula malangka pitjala nyurala tjukurpa kutjupa tjuṭa nintilpai nyura kulira kunpuringkunytjaku. Palu utiya Godaku warkaripai uwankarangku purkarangku kulinma Godaku warka tjukarurungku palyantjikitjangku, panya watingku purkarangku kulipai wali tjukarurungku palyantjikitjangku, palu purunypa.¹¹ Panya puluwa wirunya kutjupangku nganmanytju tjukarurungku palyara wantipai, ka mala kutjupangku puluwa panya palula tjungura wali wiru tjukarurungku palyalpai. Palu purunypa Godalu Jesunya Christanya puluwa wiru purunypa nganmanytju nganampa tjunu, ka uti kutjupangku malawanungku pitjala anangu tjuṭangka tjukarurungku wangkara nintinma tjana Christala kutjungka tjunguringkula pulkaringkunytjaku. Panya kutjupawanu puṭu Godaku walytja nyinanyi.

¹² Panya kutjupa tjuṭangkuya puluwa wirungka wali kunpu palyalpai witu mulapa rawa ngaranytjaku, panya puli gold-nguru, kutjupa tjiilpanguru, kutjupa upulanguru. Ka kutjupa tjuṭangku puluwangka palyalpai wali upa nguwanpa tjinguru puṇunguru, tjinguru parkanguru, tjinguru tjanpinguru, ka mapalku warungku kampara wiyalpai. Ka ara nyanga paluru nintini Godaku warkaripai tjuṭa, panya kutjupa tjuṭangkuya tjukurpa tjukaruru nintilpai rawangku waṇantjaku Christianity, palu kutjupa tjuṭaya kura munuya tjukurpa kalikalil nintilpai.¹³ Ka tjiṇtu malatjangka Godalu warka uwankara utilku kura munu palya palyantja tjuṭa, panya nganana mantangkalpi nyanga nyinara palumpa warkarinytja. Panya tjiṇtu nyara palula waru pulkangku kampaku munu nganana kurakura palyantja kampara tjunpalku. Palu warka wituwitu wiru mulapa nganana palyantja warungku puṭu kampaku, ka titutjara ngaraku. Uwa, palumpa warungku kampara warka nganana palyantja uwankara utilku.¹⁴ Tjinguru Jesuku walytjangku warka wiru tjukarurungku palyannyangka nyakula Godalu pukularira palunya palyanmara wiru ungkuku.¹⁵ Palu panya Jesuku walytja kutjupangku warka wiru tjukarurungku palyantja wiyangku wantinyangka nyakula Godalu palunya puṭu palyanmankuku. Wati paluru wankaringkuku, palu Godalu palunya wiru ungkunytja wiyangku wantiku.

¹⁶ Nyangatjaya kulinma, panya nyura Godaku walytja nyinara palumpa timpula purunypa nyinanyi milmilpa, ka palumpa kurunpa nyurala unngu nyinanyi. ¹⁷ Ka kutjupangku nyuranya Godaku timpula purunypa kurannyangkampa, Godalu palunya ngapartji palu purunymankuku. Panya Godaku timpula milmilpa ngaranyi wiru mulapa, ka nyura wali nyara palu purunypa nyinanyi milmilpa, Godaku walytja tjuta.

¹⁸ Kulilaya! Nyura tjinguru kulini, “Nganaña nintipuka pulkanya mantatja kulilpai tjuta purunypa.” Palu wiya, nyura alatji kulira walytja ngunti kañany-kañanyarinyi. Palu uti nyura wantima alatji kulintja wiyangku, kaya palya mantatja kulilpai tjutangku nyuranya ananma. Uti nyura tjananya kulira wantima munu tjukurpa Godaku kutju kulinma. Palulanguru kutju nyura ninti pulkaringkuku, Godalawanu. ¹⁹ Panya anangu kutjupa tjutangku tjinguru walytjangku kulini ninti pulkangkupalku, palu Godalu palunya tjananya uwankara ngurpa pulka nyanganyi. Panya nyiringka iriti walkatjunkunytja alatji ngaranyi,

“Panya anangu nintipuka tjutangku palyantjikitjangku kulinnyangka Godalu nyakula kulilpai, ‘Wiya, tjana kulintja kawakawa.’”

²⁰ Ka panya piruku ngaranyi nyiringka iriti walkatjunkunytja alatji, “Panya anangu nintipuka tjutangku kulinnyangka nyakula Godalu kulilpai, ‘Wiya, nyura kulintja ngatalpa alatjitu.’”

²¹ Ka palulanguru nyura uti anangu mirawanintja wiyangku wantima. Panya Godalu kutjungku nyurampa pulka mulapa nganmanytu palyanu, ka anangungku putu palula waintarira nyurampa piruku palyani.

²² Panya ngayunya Godalu nyuralakutu iyanu alpamilantjaku, Apalatjanya, Peternya munu kutjupa tjuta kulu. Munu panya paluru nyuranya kutjupa kutjupa wiru tjuta ku lu ungu wanka pukulpa nyinanytjaku. Munu paluru nyuranya ilunyangka wanka kanyilku. Panya kuwari nyuranya kanyini munu ngula nyuranya rawangkutu kanyilku wiyaringkunytja wiyangku. Mulapa paluru nyurampa pulka mulapa palyanu. ²³ Panya nyura Christaku nyinanyi, ka Christanya Godaku nyinanyi.

4

Jesuku Tjukurtjara

¹ Ka nyura uti nganananya tjukurtjara tjuta mayatja-palku kulin-tja wiyangku wantima, panya nganaña Christaku war karipai tjuta kutju nyinanyi. Panya palurulanya war ka ungu palumpa tjukurpa kumpilitja tjuta utira tjukarurungku tjakultjunkunytjaku. ² Ka anangu nyara war karipaingku uti palumpa mayatjangka wangañarangku kulira tjukarurungku palyanma. ³ Palu nyura kutjupa tjutangku ngayunya nyakula tjinguru alatji kulini, “Nyangatja ngunti-ngunti war karinyi.” Ka nyura alatji ngayunya nyakula ngurkantara wangkanyangka ngayulu kulira wantinyi. Mununa kutjupangku palu purunypa wangkanyangka wantinyi alatjitu. Panya ngayulu natju walytjangku ngurkantankunytja wiyangku wantipai. ⁴ Ngayulu putu kulini ngayulu kura palyantjatjanungku, palu tjinguru ngayuku ngaranyi alatjitu, ka Mayatjalu kutjungku ngayunya tjukarurungku ngurkantankupai ngayulu kurara war karinytja mutta palyanyku war karinytja. ⁵ Palulanguruuya anangu kutjupa nyakula kura wangkawiyangku wantima, palu pa tanmaya tjiripi ma latjaku Mayatja Jesulu kutjungku pitjala tjukarurungku ngurkantankunytjaku anangu uwankara, munu nganananya kulu. Panya tjintu nyara palula paluru utilku unngu kulintja uwankara munu kumpilpa mukuringkunytja

tjuṭa kuļu. Nyara palula arangka Godalu aŋangu tjuṭa tjukarurungku palyannyangka nyakula pukularira mirawaŋiku.

⁶ Uwa waltytja tjuṭa, nyanganpaña wangkangi Apalatjanya ngalinyatjara nyuranya alpamilantjikitjangku, nyura ngalinya nyakula munu kulira tjukurpa nyangaku tjukaruru nintiringkunytjaku panya alatji ngaranyi, “Godaku tjukurpa kutjuya wanganarangku kulinma.” Munuya wati tjukurtjara kutjupa nyakula ngunti mirawaŋiwiyangku wantima munu palu purunypaṭu wati kutjupa nyakula kuranmankuwiyangku wantima.

⁷ Panya nyura mayatja pulka wiya, aŋangu kutjupa tjuṭa ngurkantankunytjikitja. Kulilaya, Godalu kutjungku nyuntunya nganaŋanya palyanu, kalanku uti mirawaŋiwiyangku wantima munula Godanya kutju mirawaŋima.

⁸ Nyura nyanga alatji kaŋany-kaŋanytju waltytjangku kulilpai, “Nganaŋa Godaku tjukurku ninti pulka, panya Kurunpa Milmiltu nganaŋala pulka mulapa nintinu. Kala nganaŋa mayatja pulka tjuṭa nyinanyi kutjupa kutjupa pulkatjara, Paulanya munu nintintja panya tjuṭa purunypa wiya.” Palu alatji nyura ngunti kulini mayatja pulkangku-palku. Tjingurula nyura mayatja pulka tjuṭa nyinanyangkampa nyurala tjunguringkula mayatjarira nyinama, palu nyura mayatja wiya alatjiṭu. ⁹ Ngayulu kulini panya Godalu nganaŋanya iyantja panya tjuṭa tjunu mungutja purunypa nyinanytjaku tjukutjuku mulapa. Panya aŋangu tjuṭangku nganaŋanya kulilpai, “Wiya kurakura tjuṭa palanpa. Palyantiya iluku.” Munuya paluru tjana nganaŋanya anara ikaringkupai. Uwa, winkingkulanya nyanganyi angelpa ilkaritja tjuṭangku munu aŋangu tjuṭangku kuļu.

¹⁰ Ka nyuranku kulilpai, “Nganaŋa Christalawanu nyinara ninti pulka nyinanyi.” Munu nyura nganaŋanya anara ngurpanmankupai Christaku war̄karinyangka. Munu nyuranku waltytjangku kuŋpu kulilpai munu nyura nganaŋanya upanmankupai. Munu panya nyura mukuringkupai kutjupa tjuṭangku nyuranya mirawaŋinityjaku, munu nyura mukuringkupai kutjupa tjuṭangku nyurala tjunguringkula nganaŋanya anantjaku. ¹¹ Palu nganaŋa rawa alatjiṭu paltjatjiratja munu mina ilu nyinanyi. Munula mantara kataly-katalypa kanyilpai. Kalanya kutjupa tjuṭangku pungkupai. Kala ngura wiya para-pitjalinkupai. ¹² Munulanku pulka war̄karipai, panya nganaŋanya kutjupangku alpamilalpai wiya.

Ka kutjupa tjuṭangku unytjungku nganaŋanya warkinyangka nganaŋa ngapartji tjanampa Godala tjapilpai tjananya pukulmankunytjaku. Ka kutjupa tjuṭangku nganaŋanya anara kurara pungkunyangka nganaŋa ngapartji tjananya kuliřa alatjiṭu wantipai. ¹³ Ka kutjupa tjuṭangku nganaŋanya kuranmankunyangka nganaŋa ngapartji kaly pangku alatjiṭu wangkapai. Uwa mulapa, aŋangu tjuṭangku nganaŋanya rawangku kulilpai raputji pulka purunypa. Panya kuka uŋaringkunyangkaya wanipai, palu purunypa tjana nganaŋanya kulilpai rawangku.

¹⁴ Tjinguru nyura kulini ngayulu nyangatja walkatjunanyi nyuranya kuŋta palyantjikitjangku. Palu wiya, nyura ngayuku tjitji tjuṭa purunypa, kaŋa nyangatja walkatjunanyi nyuranya tjukaruruntjikitjangku. ¹⁵ Panya nyuranya tjinguru aŋangu tjuṭa mulatu nintilkatima iwara palyaku, palu panya ngayulu kutjuna nyurampa mama purunyaringu Jesuku tjukurpa nyurala nganmanytju alatjiṭu tjakultjunkunytjatjanu. ¹⁶ Mununa nyara palulanguru nyuranya kurunpa winkingku wangkara wituwituni rawangku ngayunya arkantjaku munu ngayulu puruny়tju Jesunya waŋantjaku.

¹⁷ Kaña kuwari Timitjinya nyuralakutu ma-iyanı, ka paluru nyuranya ma-pitjala nintilku ngayulu purunytpu nyura ngapartji Jesunya arkara wañantjaku. Panya Timitjinya ngayuku katja purunypa wiru mulapa, munu paluru wangañarangku Mayatja Jesunya kulira palumpa warika palyalpai. Nyara paluru nyurala tjakultjunkuku iwara panya palunya, panya ngayulu ngura winkingka Jesuku waltytja tjutangka nintiningi Jesunya Christanya tjukarurungku wañantjaku.

¹⁸ Ka panya kutjupa tjuña nyura kañany-kañanyaringu nyuranku waltytjangku pulka kuliřa, munu nyura tjinguru alatji kulini, "Wiya, Paulalu nganañalakutu pitjala piřuku nintintja wiyaringu." ¹⁹ Palu wiya, kuwari nguwanpana nyuralakutu ma-pitjala nyurala tjunguringkuku, Mayatja Jesulu witunnyangka. Mununa nyara palulangurulta wati panya kañany-kañanypa nyinapai tjutangka wangkanyangka kulikku mununa tjanampa nintiringkuku tjinguru tjananya Godalu witulyananyi palumpa warika palyantjaku, mutta tjinguru wiya. ²⁰ Panya aňangungku Mayatja Godala wangañarangku kulintjatjanungku wangkangku kutju wangkappai wiya. Paluru wangañarangku kuliřa Godanya mukuringkunytjtja palyalpai Godalu palunya witulyankunyangka kutju. ²¹ Ka nyura nyaaku mukuringanyi? Kulatatjarangkuña ma-pitjala nyuranya wakařa nintilku? Mutta ma-pitjalana nyuranya purkarangku wangkara tjukarurulku, mukulyangku?

5

Jesuku Waltytja Kuri Kutjupangka Ngariwyangku Wantinytjaku

¹ Kutjupangkuñi tjakultjunu panya wati nyurala tjungutjangku kunyu kurangku palumpa mamaku kuri altira kanyini, palumpa ngunytpu nyuyulpa. Ka nyangatja kura pulka mulapa. Nyara paluru Jesuku waltytja wiya tjutangka waintaringu panya paluru tjana kura nyanga palu purunypa palyalpai wiya. ² Ka nyura nyaaku kañany-kañanypa nyinanyi Jesuku waltytjangku kura nyanga palu purunypa palyannyangka? Uti nyura pulkařa kunteřingama munu wati nyara palunya painma inmangka nyurala tjunguringkuwiya nyinanytjaku. ³ Ngayuluña pulkařa kunteřinganyi wati nyara palunya kuliřa, mununa patunguru nyanga kulintjatjanungku nyurala wangkanyi wati panya palunya ilanguru paintjaku. Ngayulu ngura pala Karintjala nyurala tjungu nyinanytja wiya, palu palya ngayulu kurunpa kutju nyurala tjungu ngaranyi mununa nyangatja pařunguru litangka kutju wati panya palunya wangkara paini. ⁴⁻⁵ Ka nyura Mayatja Jesulu miřangka inmangka tjunguringkula kulila lita nyangatja kutjupangku nyakula wangkanyangka, ka ngayulu nyurala kurunpa kutju tjunguringanyi. Ka Mayatja Jesulu nyuranya witulyankunyangka nyura wati palunya Satannga uwa palumpa puntu kurantjaku, ka nyara palulangurulta tjinguru paluru waltytjangku kulikku ilunytja kuwaripangka kura wantinytjikitjangku, ka kampa kutjuparira wantinyangkampa Godalu palunya kurunpa wankalku Tjintu Mařatjangka.

⁶ Ka wati kutju nyurala tjungu kura nyinanyangka nyura nyaaku kañany-kañanypa nyinanyi? Tjinguru nyura kulu aañarira kuraringkuku. Panya yiitja tjukutjuku tjunkupai mai ulungka munu minangka urulpai ka mai talturingkula pulkaringkupai, palu purunypa nyura wati kura nyurala tjungu kanyinnyangka kura pulkaringkula lipiringkuku, ka nyura kulu kuraringkuku. ⁷ Kaya palula-tawara wati pala kura palunya paira iyala.

Panya Jew tjutangku inma Katuwanu Ankunytjala* ngalkula ruuru kulin-tjikitjangku yiitja uwankara nguranguru mantjira wanipai munuya mai pilytja kutju ngalkupai, ka nyura palu puruny whole panya kura palunya nyuralanguru paira iyala munuya palyanyku nyinama kuraringkunytjaku-tawara.

Uwa, Jew tjutangku yiitja wanira mai pilytja kutju ngalkuningi, munuya palulanguru lamalama iluntara milkali mantjira wali tuwa nyitihu angelpa iluntankupailu nyakula tjanampa katja ngañmanyitja wali pala palula unngu nyinanyangka wantinytjaku munu wali palula katuwanu ankunytjaku wali kutjupakutu. Ka tjanampa panya katja uwankara lamalama milkalinguru wankaringu. Ka palu puruny whole Christanya nganampa lamalama, panya paluru nganampa ngalkilpa anga-ilungu Godalu nganananya kura palyantjtanguru kalypangku pungkuwiyangku wantinytjaku.⁸ Ka palulangurula uti palunya ruuru kulinma, munu kura wantira ngunti wangkawiyangku tjukarurungku Jesunya wañanma. Panya Jew tjutangku yiitja wantipai munuya mai pilytja kutju ngalkula ruuru kulilpai, palu puruny whole uti kura wantima munula Jesunya ruuru kulira tjukarurungku wañanma.

⁹ Panya lita kutjupangkaña ngayulu nyurala wangkangu nyanga alatji, “Anangu pirttipai tjutaya malpa palyantja wiyangku wantima.”¹⁰⁻¹¹ Palu panya ngura winkingkaya anangu mantatja kutju kulilpai tjuta nyinanyi Godaku waltyta wiya tjuta, panya kampangkatu ngaripai tjuta, manyu pulka tjuta, kutitjunkupai tjuta, munu god ngalypa-ngalypa walkulpai tjuta. Palu ngayulu nyuranya nyanga palula tjanalanguru paintja wiya. Tjinguru nyura tjanalanguru mauntpalpa nyinanytjikitja mukuringkula putu kuliklu ngura kutjupakutu ankunytjikitjangku, panya ngura winkingkaya kura nyanga puruny whole palyalpai tjuta nyinanyi. Palu ngayulu Jesuku waltyta kutjupa tjutanguru kutju nyuranya paini. Uti nyura Jesuku waltyta kura nyinanyangka nyakula kitikitiringama palula tjunguringkunytja wiya, tjinguru kampangkatu ngarinyangka, munta tjinguru manyu pulka nyinanyangka, munta god ngalypa-ngalypa walkunnyangka, ngunti kuranmankunyangka, tjikira tarangkarinyangka, munta tjinguru kutitjunkunyangka. Munuya maiku ku lu palula tjunguringkuwiyangku wantima alatji.

¹²⁻¹³ Uwa, ngayulu nyuranya mantatja kulilpai tjutanguru paintja wiya, panya nganampa warka wiya palunya tjananya kura palyannyangka nyakula pungkunytjikitjangku ngurkantankunytjaku. Panya Godalu kutjungku tjananya nyakula ngurkantankuku. Palu nganampa ngaranyi Jesuku waltyta tjuta kutju kura palyannyangka nyakula ngurkantara paintjaku. Panya iriti nyiringka walkatjunkunytja alatji ngaranyi,

“Paira iyala wati kura palyalpaina nyurala tjungu nyinanytjaku-tawara.”^{*}
Ka nyura uti tjukurpa nyanga palunya kulintjatjanungku wanganarangku kuli ra palyanma.

6

Jesuku Waltyta Tjutangku Kutjuyanku Tjukarurunma

¹ Kulilaya wanyu nyangatja, Jesuku waltyta tjuta. Panya kutjupara kunyu anangu Jesuku waltyta kutjupa nyuntumpa pikaringanyi

* 5:7 Exodus 12:1-42 * 5:12-13 Deuteronomy 17:7

kutjupa kutjupa-tjiratja. Ka nyuntu kunyu ankupai aŋangu Jesuku walytja wiyangka tjapintjikitja nyupalinya ngurkantara wangkara tjukaruruntjaku. Palu palatja palya wiya. Uti nyuntu Jesuku walytjangka kutju ankula tjapinma nyupalinya wangkara tjukaruruntjaku. ²⁻³ Palu nyura wanyu kulintja wiyat? Panya ngula Godaku walytja tjuṭangku aŋangu manta wikitja nyakula ngurkantara tjaralku, angelpa tjuta kuļu. Warka pulka mulapa nyangatja, ka nyura nyaaku tjukutjuku nyanga alatjitu puťu ngurkantara tjukaruruntjikitjangku kulini? Wiya nyurampa ngaranyi alatjitu mantangka nyanga nyinara nyuranku kura kutjupa kutjupa tjuṭa ngurkantara tjukaruruntjaku. ⁴ Palulanguru tjin-guru aŋangu kutju nyuralanguru kutjupaku pikaringkunyangka nyura uti aŋangu Jesuku walytja kutju tjunama palunya pulanya ngurkantara tjukaruruntjaku. Munuya ankula tjapintja wiyangku wantima aŋangu Jesuku walytja wiyangku pulanya wangkara tjukaruruntjaku. ⁵ Nyaratja kunteangka. Panya nintipuka tjuṭa-maṇtu nyurala tjungutja nyinanyi munuya uti kutjara pikaringkunyangka paluru tjana wangkara tjukarurunma. ⁶ Palu kutjupa nyuntumpa pikaringkunyangka nyuntu kurangku palunya katipai aŋangu Jesuku walytja wiyakutu nyupalinya ngurkantankunytjaku aŋangu panya watarku nyinapai tjuṭangka miṛangka? Palatja palya wiya.

⁷ Uwa, nyura Jesuku walytja kutjupa nyurampa pikaringkunyangka katipai kuutpakutu wati Jesuku walytja wiyangku nyupalinya ngurkantankunytjaku. Kaṇa nyanga palulanguru kulini mulapa nyura kuraringu mukulya wiyarungkula. Utin kutjupangku nyuntunya kurannyangkampa wantima munun tjinguru nyuntumpa walingka tjarpara kutitjunkunyangka wantimatu palunya ngapartji kurantjikitjangku kulintja wiyangku. ⁸ Palu nyuntu wantinytja wiyangku katipai alatjitu tjuṭa miṛangka ngarajunkula tjapintjaku munun palunya ngalturingkuwiyangku kuraṇi. Uti nyuntu wantima alatji ngunti kulilwiyangku panya paluru nyupalitu Jesuku walytja kutjara.

⁹ Nyura ninti panya kura palyalpai tjuṭa Godalu puťu walytjanmankupai, panya aŋangu pirtjipai tjuṭa, kuri walytjatjarangka ngaripai tjuṭa, munu god ngalypa-ngalypa wal Kulpa tjuṭa, munu wati nyiṭayirangka ngaripai tjuṭa, munu kungka kungkangka ngaripai tjuṭa, ¹⁰ munu kutitjunkupai tjuṭa, manyu tjuṭa, waina tjikira tarangkaripai tjuṭa, ngunti kuramankupai tjuṭa, munu ngunti kuralpai tjuṭa, nyanga palunya tjananya uwankara Godalu puťu walytjanmankupai. ¹¹ Kulilaya, panya kutjupa tjuṭa nyura nganmanypa palunya tjananya purunypa nyinangi. Ka panya Godalu nyuranya ngaltunyjtungku ngalkinu Mayatja Jesula Christalanguru, ka Kurunpa Milmiltu nyuranya paltjira wirunu palya mulapa nyinanytjaku. Ka nyara palulanguru nyura tjukaruru nyinanyi Godala mirangka.

Godalu Nganananya Palura Tjunu Kampangkaṭu Ngarinytjaku Wiya.

¹² Kutjupangku tjinguru alatji wangkaku, “Ngayulu walytjangku mukuringkula palyantjaku ngaranyi alatji, kutjupa kutjupa uwankara.” Palu uwankara pala paluru tjana palya wiya. Tjinguruṇa ngayulu uwankara mukuringkula palyantjikitjangku wangkama, palu ngayulu wantinyi kurangka kutju tjakaringkunytjaku-tawara. ¹³ Kutjupangku tjinguru wangkaku, “Godalu kuka mai palyanu nganampa tjuniku, munu paluru tjuni nganananya palyanu kukaku maiku kuļu.” Uwa mulapa, palu ngula tjintu małatjangka Godalu kuka mai tjuni uwankara wiylku. Palu Godalu nganananya puntu palura tjunu nganana palumpa alatji mantangka

nyanga nyinanytjaku, palya mulapa. Paluru nganañanya puntu palura tjunu kampangkatu kutjupa kutjupangka ngarinytjaku wiya. Panya nganañanya paluru mayatjangku wiruña kanyini.¹⁴ Panya Godalu Mayatja Jesunya ilunyangka pakaltjinganu, palu purunyapa paluru nganañanya ngula ilunyangka wankara pakaltjingalku witulya pułkangku.

¹⁵ Kulila, panya nyura ninti nganaña panya Jesuku walytjaringkula kurunpa kutjuringu palula. Kala pala palulanguru uti piruku minyma panya wati tjutangka ngaripaingka kampangka tu ngarinytja wiyangku wantima. Panya alatji ngarirala Christanya kurani.¹⁶ Panya watingku minyma altinyi munu pula tjunguringkula kutjuringanyi. Panya nyiringka iriti walkatjunkunyta uti ngaranyi alatji,

“Panya anangu kutjaritja pula altira kutjuringanyi.” *

¹⁷ Ka palu purunyapa ngaranyi nganaña Mayatja Jesula tjunguringkula kurunpa kutjuringkunyta palula.

¹⁸ Uwa, nyara palulanguru ya kuri walytjangka kutju nyinama munuya minyma kutjupaku nyakula mukuringkuwiyangku wantima. Ka minyma kutjupa nyuntumpa mukuringkunyangka kitikitiriwa walytja kuraringkunyta-tawara. Panya kura kutjupa tjuta palyara nyuntu anangu kutjupa tjuta kurani, palu panya minyma kutjupangka kampangka tu ngarira nyuntunku walytjangku pułkara kurani.¹⁹ Nyura ninti panya Kurunpa Milmilnga nyurala unngu nyinanyi. Panya Godalu Kurunpa Milmilnga nyurala unngu tjarpatjunu paluru nyurala kutjungka kutjungka ngurarañinytjaku. Ka kuwari nyuranku walytja nyinanytja wiya, Godalu nyuranya mayatjarira kanyini.²⁰ Tjinguru nyura kulini paluru nyuranya kulira kutju wankarunu. Palu wiya paluru Jesunya Christanya intjanungku iyanu nyurampa ngalkilpa ilunyangka nyura wankaringkula palumparinytjaku. Pala palulanguru nyura uti palyanyku nyinama anangu tjutangku nyuranya nyakula Godanya walkuntjaku.

7

¹ Ka panya nyura mungañu lita ngayuku walkatjunu munu panya nyura ngayula tjapiningi nyurala wangkara utintjaku, kaña kuwari nyurala tjukurpa panya palunya utira tjakultjunanyi.

Kuri Altinytja

Panya nyura nganmanytju tjapiningi alatji, “Palya Jesuku walytjangku kuri altima, munta altiwiya nyinama?” Palu ngayulu nyurala nyangatja wangkanyi palya wati altinytja wiya nyinanytjaku ngaranyi.² Palu kuraringkula kampangka tu ngarinytjaku-tawara uti wati uwankarangku altima munu kuri walytja walytja kanyinma. Ka palu purunypatu uti kungkawara uwankarangku kuri altima munu kuri walytjangka walytjangka nyinama.³ Ka wati uti kuringka titutjara tjungu ngarima wantintyta wiya palumpa kuri mukuringkunyangka. Ka palu purunypatu minymangku uti palumpa kuringka titutjara tjungu ngarima wantintyta wiya. Utu pulanku rawa mukuringama wantintyta wiya alatjiitu.⁴ Panya minyma kuri puñu tjirkanı walytja nyinanytjikitja. Panya palumpa puntu wati palumpa kuriku. Ka palu purunypatu wati kuri puñu tjirkanı walytja nyinanytjikitja. Panya palumpa puntu palumpa wiya minyma kuriku.⁵ Ka wati mukuringkunyangka minyma kuringku uti kulinma alatjiitu wantintyta wiyangku, ka palu purunypatu minyma mukuringkunyangka uti wati kuringku kulinma wantintyta wiyangku. Palu tjinguru pulanku

* **6:16** Genesis 2:24

ngañmanytju wangkara kulini unytjungku wantira tjungungku Godala tjapintjikitjangku, nyara paluru palya. Palu rawaringkunytja wiya uti pula tjunguringama panya pula tjinguru rawaringkula kutju kutju ngarira Satanta kulilkul arkannyaŋka munu pula kuraringkuku kutjupaku mukuringkula. Pala palula-tawara pula uti rawaringkunytja wiya mapalku tjunguringama.

⁶ Uwa, tjukurpa nyanga palunya wangkaran̄a nyuranya pulkara wituwituntja wiyangku wantinyi, palu ngayulu walytjangku kulintjatjanungku wangkanyi nyura mukuringkula kulintjaku. ⁷ Panya ngayulu nyangaku pulkara mukuringanyi, nyura uwankara ngayunya purunypa altintyntja wiya nyinanytjaku kunpu mulapa. Palu palya, panya Godalu nyuranya kutju kutju tjunu kutjupa tjuṭa kuri altintyntja wiya nyinanytjaku, kutjupa tjuṭa kuri tjarra nyinanytjaku.

⁸ Kana nyangatja wangkanyi wati kuri wiya tjutangka munu minyma wanakala tjutangka kuļu. Nyangatja nyura wiru kuri altiwiya nyinanyi ngayulu purunypa. ⁹ Palu nyura tjinguru puṭu kutju nyinara palya kuri al̄tima pulkara kuliṛa kuraringkunytjaku-tawara.

¹⁰ Kana nyangatja wangkanyi kuri tjarra tjutangka ngapartji Mayatja Jesulu wangkanytja, “Uti minyma kuringku palumpa kuri wantikatintyntja wiyangku wantima. ¹¹ Palu tjinguru wantikatirampa uti paluru kutju nyinama wati kutjupa altintyntja wiya, munta tjinguru paluru mukuringkulampa malaku tjunguringama kuringka. Ka watingku ngapartji uti palumpa kuri wantintyntja wiyangku kanyinma.” Uwa, nyangatjan̄a Mayatjalu wangkanytja nyurala wangkanyi, ngayulu walytjangku kuliṛa wangkanytja wiya.

¹² Palu kuwariṇa kuri tjarra tjutangka wangkanytjikitja mukuringanyi ngayulu kulintja. Panya nyangatja ngayulu walytjangku kuliṛa wangkanytja, Jesulu wangkanytja wiya. Tjinguru wati Jesuku walytja nyinanyi minyma kuri tjarra, ka minyma palumpa kuri tjinguru Jesuku mulamularingkupai wiya, munu tjinguru paluru mukuringanyi wati kuringka rawa tjungu nyinanytjikitja. Ka wati paluru uti wantir'iyantja wiyangku palunya kanyinma palumpa mukuringkunyangka. ¹³⁻¹⁴ Panya minyma paluru kuringka tjungu nyinanyangka Godalu pulanyatū tjungura kanyini. Munta tjinguru minyma kutjupa Jesuku walytja kuri tjarra nyinanyi, ka wati palumpa kuri tjinguru Jesuku mulamularingkupai wiya, ka uti minymangku palunya wantikatintyntja wiyangku wantima wati paluru palumpa mukuringkunyangka. Panya wati paluru kuringka tjungu nyinanyangka Godalu pulanyatū tjungura kanyini. Uwa, Godalu pulanyatū tjungura kanyini, kutju Jesuku walytja nyinanyangka tjinguru wati, munta tjinguru minyma. Munu tjananya uwankaraṭu tjungura atunymara kanyini tjtji kuļukulu.

¹⁵ Palu tjinguru anangu puṭu mulamularingkupaingku palumpa kuri Jesuku walytja wantikatira ankunytjikitja mukuringanyi, ka palya wantir'iyala markuntja wiyangku munu kutju nyinama. Panya Godanya mukuringanyi pilunpa kalypa nyinanytjaku. ¹⁶ Panya minyma kuri Jesuku walytja pilunpa kalypa nyinanyangka wati palumpa kuri tjinguru kampa kutjupariku munu Jesuku mulamularingkuku. Ka palu purunypaṭu wati kuri Jesuku walytja pilunpa kalypa nyinanyangka minyma palumpa kuri tjinguru kampa kutjupariku munu Jesuku mulamularingkuku. Palu nyura ngurpa nyaaringkuku palula malangka. Tjinguru Jesuku mulamularingkuku munta tjinguru wiya. Ka nyura uti kuri Jesuku walytja wiya kanyirampa nyangatja kulinma munu pilunpa kalypa nyinama.

¹⁷ Uwa, Godalu nyuranya ngurkantara walytjanmankunyangka nyura yaaltji-yaaltji nyinangi? Wiya, nyura kutjupatjara kuritjara nyinangi, kutjupatjara kuri wiya nyinangi. Ka nyura kutjupatjara anangu Jew nyinangi, kutjupatjara Jew wiya nyinangi Gentile tjuta wangka kutjupa kutjupa. Ka nyura kutjupatjara wati mayatjaku warkaripai nyinangi manikitja wiya, ka kutjupa tjuta walytja warkaripai munu warkanguru mani mantjilpai nyinangi. Nyangatja Mayatja Jesulu nyuranya kutju kutju tjunu alatji-alatjitu nyinanytjaku. Ka palulanguru nyura uti Jesuku walytjaringkunytjatjanu ara pala palula^t nyinama, panya nyura nganmanypa nyinangi, palu purunypa. Nyanga alatjina Jesuku walytja tjutangka wangkapai ngura winkingka, kañi nyura uti wangañarangku kulinma.

¹⁸ Tjinguru nyura wati Jew tjuta nyinangi nganmanypa itinguru watiringkunytjatjanu, ka Godalu nyuranya ngurkantanu palumpa walytjaringkunytjaku. Ka nyura uti paluru^t nyinama kumpintja wiya. Munta tjinguru kampa kutjupa nyura Jew wiya nyinangi watiringkunytja wiya, ka Godalu nyuranya ngurkantanu palumpa walytjaringkunytjaku. Ka uti nyura paluru^t nyinama watiringkunytjikjangku kulintja wiya. ¹⁹ Panya watiringkunytja nyangatja tjukurpa pulka mulapa wiya, ka panya wati wiya nyinanytja pulka wiya^t. Palu nyangatja ngaran^y pulka mulapa nganaña kulintjaku, panya Godalu wangkanyangka wangañarangku kulintja.

²⁰ Uwa, nyura panya nganmanypa warka kutjupangka kutjupangka warkaringi, ka panya Godalu nyuranya ngurkantanu palumparinytjaku, ka nyura uti warka panya palula^t warkarima. ²¹ Tjinguru nyura manikitja wiya unytju maikitja warkaripai nganmanypa nyinangi, ka Godalu nyuranya ngurkantanu palumpa walytjaringkunytjaku. Ka nyura uti palula^t warkarima, munu mayatjangku wangkara wantir'iyannyangka kutju anama. ²² Panya anangu unytju warkaripai tjuta Jesuku walytjaringkunyangka Godalu tjananya kampa kutjupananyi, ka tjananya kampa kutjuparira warka panya palula^t pukulpa mulapa warkarinyi. Ka tjinguru kutjupa tjutangku walytjangku kulira palyalpai nganmanypa nyinangi ka panya Jesuku walytjaringkunyangka Godalu palu purunypa^t tjananya kampa kutjupananyi, ka paluru tjananya kampa kutjuparira walytjangku kulira palyantja wiyaringanyilta munu Mayatja Godala kutjungkalta kulira warkarinyi. ²³ Panya Mayatja Jesulu nganampa ngalkilpa ilura nganañanya maningka purunypa payamilaⁿ palumpa milkalingka. Ka nyara palulanguru nyuranya watingku mayatjarira kanyintjaku wiyaringulta, ka Godanya kutju nyurampa mayatjaringu.

²⁴ Uwa walytja tjuta, nyura panya nganmanypa warka kutjupangka kutjupangka warkaringi. Ka Godalu nyuranya kutju kutju ngurkantanu palumpa walytjaringkunytjaku. Kaya warka panya palunya tjananyatu palyanma panya nyura nganmanypa warkaringi, panya palunya.

Kuri Altinytjaku Wangkanytja

²⁵ Panya nyura ngayula tjapiningi alatji wangkara, “Anangu kuri wiya nyinara Jesuku walytjaringkula palya altinyi?” Kañi nyangatja kuwari nyurala wangkanyi. Panya nyangatja Mayatjalu wangkanytja wiya, ngayulu walytjangku kulira wangkanytja. Ka nyura palya ngayuku mulamularingama, panya Godalu ngayunya ngaltunytjungku kanyini kañi tjukarurungku wangkanyi. ²⁶ Ngayulu kulini uti anangu kuri wiya nyinara alatji-alatjitu nyinama Jesuku walytjaringkula. Panya kuwari tjintu kura

pulkā ngarakatinyi. ²⁷ Tjinguru nyuntu kiritjara nyinarampa alatji-alatji^{tu} nyinama wantikatintja wiya. Munta tjinguru nyuntu kuri wiya nyinarampa kuriku para-ngurilwiyangku wantima munu alatji-alatji^{tu} nyinama. ²⁸ Palu tjinguru nyuntu kungka altiku, ka palatja palya, kura wiya. Ka palu purunypa^{tu} tjinguru kungka nyitayingku *wati altiku, ka palatja kura wiya, palya. Palu kulilaya, nyura kurirara nyinanyangkampa nyurampa turapula kutjupa kutjupa tjuta ngaraku. Kana nyara palulatwara kulini kampa kutjupa kuri wiya nyinanytjaku palya ngaranyi.

²⁹ Walytja tjuta, nyura wanyu uti kulini ngayulu wangkanyangka? Panya tjirirpi watalpi ilaringanyi Jesunya malaku pitjanytjaku, ka kuwaringuru nyanga alatji^{tu} uti nyura kiritjara nyinarampa kuri palunya kutju kulintja wiyangku waintara Mayatja Jesunya pulkara kulinma. ³⁰ Munu nyura tjinguru kurunpa tjituru-tjituru nyinarampa tjituru-tjituru panya palunya kulintja wiyangku waintara Jesunya kulinma. Munu nyura tjinguru pukulpa nyinarampa pukulpa panya palunya kulintja wiyangku waintara Jesunya kulinma. Munu nyura kutjupa kutjupa wiru tjuta payamilarampa palunya tjananya kulintja wiyangku waintara Mayatja Jesunya pulkara kulinma. ³¹ Munu nyura tjinguru mani pulka munu kutjupa kutjupa wiru tjuta kanyirampa palunya tjananya pulkara kulilwiyangku waintara Mayatja Jesunya kulinma. Panya kuwarila manta nyanganyi, ka manta nyanga paluru kuvari nguwanpa wiyinganyi.

³² Uwa, ngayulu^{na} mukuringanyi nyura kutjupa kutjupa tjutanguru tjituru-tjitururira pulkara kulilwiya nyinanytjaku. Panya wati kuri wiya nyinara paluru Mayatja Jesunya kulilpai palunya pukulmankunytjikitjangku.

³³ Palu wati kiritjarangku palumpa kuri rawangku pukulmankunytjikitja mukuringkupai munu nyara palulanguru paluru kutjupa kutjupa tjuta palumpa rawangku palyalpai paluru pukularinytjaku. ³⁴ Palu paluru kampa kutjara kulini kuri pukulmankunytjikitjangku munu Mayatja Jesunya pukulmankunytjikitjangku. Ka minyma kuri wiyangku munta tjinguru kungka nyitayingku Mayatja Jesunya pukulmankunytjikitjangku kutju kulilpai. Panya paluru Mayatja Jesunya pukulmankunytjikitja mukuringanyi kurunpa winki. Palu panya minyma kiritjarangku wati palumpa kuri pukulmankunytjikitja pulkara mukuringanyi munu nyara palulanguru kutjupa kutjupa tjuta rawangku palumpa palyalpai paluru pukularinytjaku. ³⁵ Nyangatja ngayulu nyuranya alpamilantjikitjangku kutju wangkanyi, angapaintjikitjangku wiya, panya ngayulu mukuringanyi nyura tjukaruru nyinanytjaku, munu Mayatja Jesunya rawa pukulmankunytjaku kurunpa winkingku.

³⁶ Tjinguru watingku kungka kalkuntja nyinanyi. Ka wati nyara paluru Mayatja Jesunya pukulmankunytjikitja mukuringanyi munu pu^{tu} kulini kungkawara palunya altintjikitjangku. Tjinguru paluru kutju nyinanytjikitjangku kulini, munta tjinguru paluru unngu mukuringanyitu palunya altintjikitja. Utu paluru mukuringkula altima alatji^{tu}. Palatja kura wiya. ³⁷ Palu wati kutjupangku tjinguru walytjangku kulini palumpa kungka panya pikatja altiwiyangku wantintjikitjangku, panya paluru tjinguru pu^{tu} nguwanpa kuri altintjikitja mukuringanyi. Ka palatja palya paluru kutju nyinanytjikitja mukuringkunyta. ³⁸ Uwa, watingku kungka kalkuntja palya altintyi. Palu kungka altiwiyangku wantintjaka, nyara paluru palya mulapa.

* ^{7:28} kungka nyitayingku panya kungkawara watiku ngurpa.

³⁹ Ka minyma wati kuringka rawa nyinanytjaku ngaranyi paluru wanka nyinanyangka. Palu wati kuri ilunyangka kutju palumpa ngaranyi wati kutjupa mukuringkula altinytjaku Jesuku walytja mulapa kutju. ⁴⁰ Palu ngayulu alatji kulini, minyma paluru kutjuringkula uti pukulpa nyinama pirkuru wati kuri kutjupa altinytjikitjangku ngurintja wiya. Nyangatja ngayulu kulintja, palu ngayulu Godaku Kuruntjara munuli paluru ngali tjungungku nyanga alatji kulini.

8

Mai, Kuka Ungkunytja God Ngalypa-ngalypa

¹ Ka panya nyura lita ngayuku walkatjura ngayula tjapiningi nyanga alatji, “Panya anangu tju tangku kuka katira ungkupai god ngalypa-ngalypa pu linguru palyantja. Kala nyuntula tjapini, nyuntun yaaltji kulini? Jesuku walytja tju tangku kuka palunya ngalkuntjaku palya ngaranyi?” Alatji nyura ngayula tjapiningi.

Palu panya nyura kutjupa tjarangku wangkapai alatji, “Nganana nintingku kulini panya Godanya kutju nganampa nyinanyi, ka apunguru palyantja tju ta ngalypa-ngalypa tju ta ngaranyi god mulapa wiya. Kala palulanguru palya ngalkuni kuka panya tjananya ungkunytjitja.” Uwa, nyangatja nyura tjukarurungku wangkanyi. Nyara paluru tjana mulapa god ngalypa-ngalypa, god mulapa wiya. Palu nyura nyanga alatji tjukarurungku kulintjatjanungku nyuranku nintipukan-mananyi munu nyara palulanguru kañany-kañanyarinyi. Palu nyura uti mukulya ngaralampa Godaku walytja kutjupa tju ta kulinma tjananya kuñpuntjikitjangku tjana kulu Jesunya wañantjaku titutjarangku. ² Kulila, anangu kutjupangku tjinguru kulini palurunku ninti pulkangku-palku, palu paluru ngurpa kuwaripa tu uwankaraku nintiringkunytja wiya. ³ Palu anangumpa Godaku pulka ra mukuringkunyangkampa Godanya palumpa ninti nyinanyi munu palumpa nyakula pukularinyi.

⁴ Ka nyara palulanguru nyura uti yaaltjiriku? Panya watarkitja tju tangku kuka katira ungkupai god ngalypa-ngalypa pu linguru palyantja. Kaya Jesuku walytja tju tangku wanyu kuka panya palunya ngalkuntjaku palya ngaranyi? Wiya kulila, nyuntu nganana ninti panya apunguru palyantja tju ta god mulapa wiya ngalypa-ngalypa tju ta, palu panya Godanya kutju alatjitu nyinanyi, ka god kutjupa palula itingka nyinanytja wiya alatjitu. ⁵ Kutjupa tju tangku wangkapai, “Nganampa god tju ta nyinanyi ilkarungka munu mantangka kulu.” Uwa mulapa tjana kutjupa kutjupa tju taku mulamularingkupai munu tjananya wangkara godanyamarra ngunti mayatjanmankupai. ⁶ Palu panya Godanya kutju nyinanyi nganampa uwankaraku Mama. Panya paluru uwankara alatjitu palunu, kala palumpa uwankara nyinanyi. Munu nganana ninti panya Mayatja kutju uwankaraku nyinanyi Jesunya Christanya. Panya palulawanungku Godalu uwankara palunu, munu panya palulawanungku nganana nanya wankaru kanyini.

⁷ Uwa, nyura kutjupa tju ta ninti Godanya kutju nyinanyi, palu anangu kutjupatjara Jesuku walytjaringkula ngurpa tu nyinanyi kuwaripa tu nintiringkunytja wiya. Panya tjana iriti tjakaringu pu linguru palyantja tju ta wañkuntjikitja, munuya kuvari kutju Jesuku walytjaringkuntjatjanungku palunya wañani, palu tjana pu linguru panya palyantjitetjaku nguluringkupai tu mulapa-palku kuli ra. Panya watarkitja tju tangku kuka katira ungkupai god ngalypa-ngalypa. Kaya paluru tjana kuka panya

palunya watarkungku ngalkula malangka kulira kuntuaringkupai munuya kulilpai, "Kurangkula kuka nyangatja ngalkunu panya nganaña Jesuku walytja. Utla ngalkuwiyangku wantima."

⁸ Palu kulila, kukangku nganañanya puťu Godala tjunguringkunytjaku palyanji. Panya paluru nganañanya kuka ngalkuwiyangku wantinyangka paintjikitjangku kulintja wiya, munu ngalkunnyangka palyanmankunytjik-itjangku kulintja wiyatu. ⁹⁻¹⁰ Uwa, mulapa nyura tjukarurungku kulini, "Kuka nyangatja palya alatjitu ngaranyi ngalkuntjaku." Palu atatjuraya kulinma Godaku walytja kutjupa tjuta punkantjaku-tawara, panya kutjupa tjuta ninti pulka wiya kuwaripatu ngaranyi, munuya tjinguru nyuranya malpa tjuṭangka god ngalypa-ngalypa tjuṭaku timpulangka tjapara unngu ngalkunnyangka nyakula nyurala aañariku munuya palulanguru ngalkuntjatjanungku kulira tjituru-tjitururiku, "Kurangkuña kuka nyangatja ngalkunu panya ngayulu Jesuku walytjaringu." ¹¹ Munu nyara palulanguru paluru ngañmanyaju ngalkuntjatjanungku kulira kuntuaringkula ma-paturingkuku Godalanguru nyurala arkara ngalkuntjatjanu mununku walytjangku tjinguru kuliklu, "Ngayulu-manti Godaku walytja wiyaringu." Panya nyura nintingku kulini kañany-kañanyaju, "Kuka nyangatja palya nganaña ngalkuntjaku." Palu nyara paluru tjana kuwaripatu nintiringkunytja wiya nyinanyi. Ka nyura wanyu nyaaku tjanala mirangka kuka panya palunya ngalkuni? Tjinguru paluru tjana nyuranya ngalkunnyangka nyakunytjatjanu aañarira ma-paturingkuku Godalanguru. Panya nyara palumpa tjanampa kuļu Christanya anga-ilungu. ¹² Ka nyura alatji palyara kurañi Christaku walytjapiti kuraringkunytjaku munu nyura Christanya kuļu kurañi. ¹³ Kala uti palula-tawara kuka panyatja ngalkuwiyangku wantima Jesuku walytjapitingku arkara ngalkuntjatjanu kuntuaringkula Godalanguru paturingkunytjaku-tawara.

9

Godaku Tjukurtjara Tjuṭa

¹ Kulilaya! Mayatja kutjupakuña warkarinjtja wiya. Panya ngayulu mulapa nyangu Mayatja Jesunya ngayula utiringkunyangka, kañi paluru ngayunya witura iyanu tjukurpa palumpa para-tjakultjunkunytjaku anangu uwankarangka. Ka panya ngayulu nyurala tjakultjunkunyangka nyura kulira mulamularingu Mayatja Jesuku. ² Ka tjinguru kutjupa tjuṭangku alatji kulilpai ngayunya, "Nyangatja Jesulu iyantja wiyatu palumpa tjukurpa para-tjakultjunkunytjaku." Palu uti nyura alatji kulintja wiya ngayuku mulamularingama, panya ngayulu tjakultjunkunyangka nyura kulira Jesuku walytjaringu. Kaya tjuṭangku nyuranya Jesuku walytjaringkunyangka nyakula ngayunya kulilpai, "Mulapa wati nyanga paluru tjukurtjara Jesulu iyantja."

³ Uwa, anangu kutjupa tjuṭangku ngayunya anařa wangkapai alatji, "Nyangatja Jesulu wituntja wiyatu." Palu wiya, paluru alatjitu ngayunya witura iyanu. ⁴ Nyara palulanguru ngayulu tjukurpa nyurala tjakultjunkunyangka nyura uti ngayunya mai kapi kuļu ungama. ⁵ Ka ngayulu tjinguru minyma Jesuku walytja altira katirinama ngayula tjungu pitjalinkunytjaku, panya Jesulu iyantja kutjupa tjuṭangkuya kuri katirinkupai Peterlu panya tjana Jesuku malanypa tjuṭangku kuļu, palu purunypa. Palu ngayulu wantinyi. ⁶ Ka panya tjukurtjara kutjupa tjuta nyura mai ungkupai tjukurpa Jesunyatjara tjakultjunkunyangka. Palu Paanapatjanya ngalinya nyura ungkuwiyangku wantipai. Ka ngali warka

kutjupangka warkaripai maikitja, munuli tjukurpa kulu tjakultjunkupai. ⁷ Nyaaku ngali warka nyanga kutjarangka warkarinyi? Utili warka kutjungka warkarima tjukurpa Jesunyatjara kutju tjakultjunkunytjikitja, munuli palulangurulta mai nyurala mantjinma. Panya wati tjaultji tjulangkuya mayatjaku warkarira walytjangku mai mantjilpai wiya, mayatjangku ungkunyangka kutju mantjilpai. Ka palu purunyapa wati kiripitji pakaltjingalpaingku mai kiripitji mantjira ngalkupai palumpa pununguru. Ka palu pununypatu wati tjiipi nanikuta kanyilpaingku nanikuta ipi tjulkura mantjilpai tjikintjikitjangku. Ka nyanga paluru tjana pununytpu uti ngali mai nyuralanguru mantjinma nyurala tjukurpa tjakultjunkunytjatjanungku.

⁸⁻⁹ Uwa, ngayulu unytjungku wangkanytja wiya. Mulamulangkuna wangkanyi panya Moseku tjukurtu kulu nyanga palu pununyapa wangkanyi alatji,

“Panya pulukangku ukiri uninypatjara kantura pirpuntankupai mantangka uninypa punka-punkantjaku. Ka puluka tjaa karpilwiyangku wantima uninypangka warkarira ukiri ngalkukatintjaku.” *
Palu wanyu Godalu pulukaku kutju ngalturingkula wangkangi? ¹⁰ Wiya, nganananya kulu paluru wangkangi. Panya wati kutjara warkarinyi, kutjungku manta tjawara walalpai uninypa tjunkunytjikitjangku, ka kutjupangku ngapartji ngula mai kururingkunyangka uralpai, munu pula kutjarangkutu warkanguru mai kururingkunyangka mantjilpai. Ka palu pununytpu nyura uti Godaku tjukurtjara payamilanma paluru tjukurpa nyurala tjakultjunkunyangka. ¹¹⁻¹² Ka uti ngali ngapartji nyuralanguru mantjinma mai kuka kutjupa kutjupa tjuta mantangka nyanga paltja nyinanytjikitjangku. Panya kutjupa tjuta nyura wirura ungangi tjana Godaku tjukurpa wangkanyangka. Ka panya ngali kulu nganmanytpu alatjitu Jesuku tjukurpa nyurala tjakultjunangi, ka nyura uti ngalinya kulu ungama.

Palu ngali nyurala ngatjintja wiyangku wantingi ngunti kulintjakutawara alatji, “Tjinguru nyanga pula manikitjangku tjukurpa Jesunyatjara para-tjakultjunanyi.” Pala palula-tawarali wantingi nyurala ngatjintja wiyangku nyura ngunti kulira Jesuku tjukurpa wantintjaku-tawara. Munuli piluntu alatjitu ngatjilwiyangku nyinara tjukurpa kutju wangkangi nyura tjukarurungku kulira Jesuku mulamularingkunytjaku. ¹³ Panya nyura ninti timpulangka warkaripai tjutaku. Panya anangu tjulangku mai kuka timpulakutu katipai Godanya ungkunytjikitjangku, kaya tjara pitjilta tiliwakara ungkupai Godanya munuya tjara tjananku kanyilpai ngalkuntjikitjangku, timpulangka warkaripai tjulangku. ¹⁴ Ka nyura palu pununyapa kulinma, panya Jesulu wangkangu palumpa tjukurtjara tjuta mai kuka kulu ungkunytjaku palumpa tjukurpa para-tjakultjunkunyangka.

¹⁵ Nyangatjana walkatjura nyurala ngatjintja wiya nyura ngayunya ungkunytjaku. Ngayulu mukuringanyi mani wiyangku rawangku tjukurpa wangkanytjikitja. Panya ngayulu pulkara pukularinyi mani wiyangku tjukurpa wangkara. Palu tjinguruni nyura ngatjinnyangka mani ungguku, kana nyara palulanguru ngayulu putu pukulariku. Palu palyana tjinguru paltjatjiratjarira iluku nyurala ngatjintja wiya. ¹⁶ Kanatju nyaaku walytjangku mirawanima tjukurpa Jesunyatjara wangkanytjatjanungku? Panya Mayatja Jesulu ni witunu tjukurpa palunyatjara kutju tjakultjunkunytjaku. Tjinguru ngayulu wangkawayangku wantinyangkampa ngayunya Mayatjalu ngurkantara kuranmankuku mununu tjituru-tjituru pulka palyalku.

* 9:8-9 Deuteronomy 25:4

¹⁷ Palu tjinguruṇa walytjangku kulira warkarinytjatjanungku mani mantjintjikitjangku kulinma. Palu palyaṇa Mayatjaku warkarinyi panya paluru warka nyanga palunya ngayunya ungu kaṇa puṭu wantinyi. ¹⁸ Palu nyaana mantjini warkarinytjatjanungku? Wiya, ngayulu mantjini pukulpa mulapa Tjukurpa Palya Jesunyatjara kutju para-tjakultjura. Ngayulu tjinguru ngatjinma kukaku maiku maniku, palu wiya, wantinyinā tjukurpa kutju wangkanytjikitjangku.

Paulanya Mukuringkunytja Anangu Winki Wankaringkunytjaku

¹⁹ Kutjupangku ngayunya palumpa warkarinytjaku puṭu wituwituṇu. Panya ngayulu walytjangku kulira palyalpai. Palu ngayulu aṇangu uwankaraku pukulpa warkarinyi, panya ngayulu mukuringanyi tjuta mulapa Jesuku walytjaringkunytjaku. ²⁰ Panya ngayulu tjukurpa Jesunyatjara Jew tjutangka wangkara ngayulu Jew tjuta purunypa nyinapai tjana kulu kulira Jesuku walytjaringkunytjaku. Ngayulu Jesuku walytjaringkula Moseku ara wanantjaku wiyaringu, palu ara pala palunya ngayulu waṇalpai Jew tjutangka tjungu ngarala paluru tjana kulu tjukurpa Jesunyatjara wangkanyangka kulira mulamularingkunytjaku. ²¹ Mununa palu purunypaṭu Jew wiya tjutangka tjukurpa wangkara ngayulu tjananya purunypaṭu nyinapai paluru tjana kulu Jesunyatjara kulira palumpa walytjaringkunytjaku. Palu ngayulu tjananya purunypa nyinara Godalu wituntjtja uwankara wantintyja wiya, panya ngayulu Christalu wangkanytjitja wanganarangku kulira palyalpai. ²² Ka Jesuku walytja kutjupa tjuta tjinguru palumpa kuntaringkupai, kaṇa ngayulu palula tjanala tjunguringkula ngalṭunytyu nyinapai tjananya wangkara kunpuntjikitja tjana Jesuku raparingkunytjaku.

Uwa ngayulu aṇangu kutjupa kutjupangka tjunguringkula palunya tjananya purunypa nyinapai paluru tjana Jesulakutu malaku aruringkula palumpa walytjaringkunytjaku. ²³ Nyanga alatjiṇa nyinapai aṇangu tjutangku ngayunya nyakunytjatjanungku Tjukurpa Palya Jesunyatjara kulira wankaringkunytjaku, kaya wirura pukulpa nyinama Jesulu tjananya pukulmara kanyinnyangka.

²⁴ Kulilaya tjukurpa nyanga wirtjapakantjatjara. Panya nyura ninti wati wirtjapakalpai tjutaku, panya kutju wirtjapakara waintaripai munu kutjupa kutjupa wiru mantjilpai pakuwiya pulkara wirtjapakara waintarintjatjanungku. Nyara palu purunytyu Jesunya waṇanma pakuringkula wantintyja wiyangku, kanta Mamalu wirunmankula mirawaṇiku. ²⁵ Panya wati wirtjapakalpaingku rawangku tjintu kutjupa tjintu kutjupa arkalpai waintarintjikitjangku, ka panya waintarinyangka mayatjangku katangka wiru tjunkupai nyalpitjara. Palu katatja nyalpitjara nyara paluru unytyu kutju ngarala piltiringkupai. Palu nganaṇa Jesuku walytja tjuta wirtjapakanī purunypa wiru mulapa mantjintjikitja piltiringkupai wiyangku, titutjara ngarapaiku. ²⁶ Palulanguruṇa Godalakutu tjukaruru alatjiṭu wirtjapakanī purunypa malakukutura nyakunytja wiya. Panya wati kutjarangku pulanku inkara marangku pungkupai waintarintjikitjangku ka kutjungku tjukarurungku pungkupai kitikiti pungkunytja wiyangku, palu purunypaṇa tjukarurungku Jesunya waṇani. ²⁷ Panya ngayuku puntu ngayuku kutju wiya Godaku kulu. Kaṇa ngayulu kulini Jesunya kutju pukulmankunytjikitjangku. Mununa ngayulu walytjangku kulira kutjupa kutjupa palyantja wiyangku wantinyi, Mayatja Jesuku kutjuku palyantjikitjangku. Panya ngayulu aṇangu tjuta wangkapai

tjukaruru nyinanytjaku. Munuña uti ngayulu kuļu tjukaruru nyinama Godalu paintjaku-tawara.

10

Godanya Tungun-tunguntu Wañantjaku

¹ Walytja tjuṭa, ara panyatjaya kulinma, panya nganampa tjamupitingku iriti Mosenya wañaningi Ittipalanguřu pakara. Panya tjananya Godalu ngangkalingka katirinangi. Ka panyaya uru pulkawanu wanka anu itipirira. ² Alatjiya ngangkali wañara uringka itipirira baptise-aringu nguwanpa, munu panyaya Mosela tjunguringu.

³ Kaya paluru tjana uwankarangkuṭu mai ilkaringuru ngalkuningi. ⁴ Munuya uwankarangkuṭu mina tjikiningi Godalu apunguru tjutinytjaku palyannyangka. Palu apu nyara paluru panya Christanya alatjiṭu, panya paluru alatjiṭu tjananya mina ungangi munu tjanala tjungu pitjalinangi munu tjananya atunymanangi. ⁵ Palu tjuṭa mulatuya wanganarangku kulintja wiyangku wantingi, ka tjanampa Godanya nyakula pukularinytja wiyaringu. Kaya palulanguru tjuṭa mulapa ilukatingi, ka tjanampa tarka pilangka ma-ngarira wañaningi.

⁶ Kala uti nyara palunya tjananya kuliṛa nintiringama munula tjananya purunyarinytjaku-tawara kuraku mukuringkuwiyangku wantima. ⁷ Munula paluru tjana purunytju god pulinguru palyantja tjuṭa pupakatira walkuntja wiyangku wantima, panya kutjupa tjarangku iriti alatjinangi. Panya nyiringka iriti walkatjunkunytja ngaranyi nyanga alatji, “Anangu tjuṭa nyinakatingu mai kuka pulka ngalkula tjkintjikitja, munuya mai wiayingkula pakara ngalypa-ngalyparingkula kungka kutjupa kutjupangka ngaringi pukularinytjikitja.” *

⁸ Nyanga alatji palyaraya tjuṭa mulapa ilungu nampa 23,000 tjintu nyara palulatu. Kala uti kura nyanga palu purunypa palyalwiyangku wantima. ⁹ Panya tjana kutjupa tjuṭangku kura palyanangi kulira, “Palya, Godalu iluntankunytja wiyangku wantipai.” Palu alatji kulira tjana Godanya ananigi, ka panya tjanalakutu liru tjuta iyanu tjananya patjara iluntankunytjaku. Kala uti tjana purunytju Godanya analwiyangku wantima. ¹⁰ Kaya tjara kutjupa panya mirpañaringi Godaku, ka paluru iyanu angelpa iluntankupainya, ka tjananya iluntanu. Kala uti tjana purunytju mirpañarira Godanya wangkawiyangku wantima. ¹¹ Uwa, alatji kuraringkunyangka nyakula Godalu tjananya iluntanangi, ka nganaña uti nyangatja kuliṛa nintiringama. Panya Godalu tjanala wangkangu tjukurpa nyanga palunya tjananya nyiringka walkatjunkunytjaku nganañanya ngulutjunkunytjikitjangku nganaña titutjarangku kulilkatinjtaku. Panya tjintu małatja waṭalpi ilaringanyi, kala palulanguru uti wirura palyanyku nyinama.

¹² Tjinguru anangu kutjupangku kulini, “Wiya ngayulu Jesunya wirura wañani kuṇpungku punkantja wiyangku.” Palu wiya, uti paluru kañany-kañanyarinytja wiyangku purkarangku kulinma punkantjaku-tawara.

¹³ Ka tjinguru kutjupangku kulini, “Wiya ngayunya kutju mamungku rawangku alatjiṭu kuraringkunytjaku wituwitunuṇi.” Palu wiya, uwankar-alanya paluru rawangku wituwitulpai kura kutjupa kutjupa tjuta palyantjaku. Palu Godalulanya mulapa kuṇpulku nyuntu nganaña tunguntunguntu palunya kutju wañantjaku mamungka kulilwiyangku wantira. Panya mamungku nganañanya wituwitunnyangka Godalu nganañanya

* **10:7** Exodus 32:6

nintilku ałangkatjura wirtjapakantjaku. Kala palulanguru nganaña punkantja wiyangku tungun-tunguntu wañalku.

God Ngalypa-ngalypa Tjuta Walkulwiyangku Wantinytjaku

¹⁴ Walytja tjuta, puñunguru apunguru palyantja tjutaya pupakatira walkulwiyangku wantima munuya apu puñu walkulpai tjutangka tjunguringkuwiyangku wantima munuya mañtalpa nyinama tjanalanguru.

¹⁵ Nyangatjaña nyurala kulilpai tjutangka wangkanyi, kayanku walytjangku kulinma ngayulu nyanga wangkanytja, tjinguru tjukaruru, munta tjinguru wiya. ¹⁶ Kulilaya, panya Christanya nganampa milkali tjutira ilunytja kulintjikitjangku nganaña waina walpayata kutjunguru tjikilpai munula palu purunytjuñu mai nyuma kutju kañantara ngalkupai Christanya nganampa puntu pikatjararingkuntya kulintjikitjangku. Munula nyanga alatji palyara nganaña kulilpai, "Panya nganaña Jesuku walytjapiti nyinanyi palula tjungu." ¹⁷ Panya nganaña tjunguringkula mai nyuma kutjunguru kañantara ngalkupai. Munula nyanga palulanguru kulilpai alatji, "Panya nganaña añangu tjuta, palu nganaña kutjuringanyi Jesula Christala kutjungka."

¹⁸ Wanyuya kulinma panya Israekunu tjuta, panya tjana Godanya walkuntjikitjangku kuka katira tjara pitjilta tjunkula tiliwakara Godanya ungkulampu munuya tjara kutjupa paluru tjana ngalkupai. Nyanga alatji ngalkulaya tjananku kulilpai, "Panya nganaña Godala tjungu nyinapai." ¹⁹ Palu ngayulu wanyu nyuranya wituwituni apunguru puñunguru palyantja tjuta mulapa kulintjaku? Wiya, apu puñu uritjara wiya, ngaalytjara wiya, wanka wiya. Nyara paluru tjana wanyu nyura kuka ungkunyangka nyurampa wiřu palyalku? Wiya alatjiitu. ²⁰ Palu nyangatjaña wangkanyi, tjinguru kutjupangku apunguru palyantja kuka ungkulampa mamu unganyi munu palunya alatjiitu mirawañinyi Godanya wiya. Kaña nyuranya paini mamu tjutangka tjunguringkuwiyangku wantinytjaku. ²¹ Panya nganaña Mayatja Jesuku walpayatangka tjikintjatjanungku puñu piruku mamuku walpayatangka kuļu tjikini. Munula Mayatja Jesuku mai ngalkuntjatjanungku puñu piruku mamuku mai kuļu ngalkuni. ²² Nyura mamungka piruku tjunguringkula Mayatjanya nyararingkuntytjaku palyani. Kaya nyanga palu purunyapa palyalwiyangku wantima. Panya Mayatja Jesunya kutju pulka mulapa nyinanyi, kala nganaña tjukutjuku.

Godanya Kutju Pukułmankuntytjikitjangku Kulinma

²³ Jesuku walytja kutjupa tjutangku wangkapai alatji, "Nganaña kutjupa kutjupa uwankara mukuringkula palyantjaku ngaranyi." Palu palya wiya palatja, panya Jesuku walytja kutjupa tjutangku tjinguru nganaña kutjupa kutjupa tjuta palyannyangka nyakula aañariku munuya tjinguru ma-kuraringkuku. ²⁴ Utila walytjangku kulira palyalwiyangku wantima munula Jesuku walytja kutjupa tjuta waintara kulinma tjana nganañanya nyakula aañarira kuraringkuntytjaku-tawara.

²⁵⁻²⁶ Panyatjaya kulila, panya nyiringka iriti walkatjunkuntya alatji ngaranyi, "Manta munu mantatja kutjupa kutjupa uwankara Godaku alatjiitu ngaranyi." Ka nyara palulanguru nyura kuka tjuwangka payamilantjikitja mukuringkulampa tjpintja wiya alatji, "Kuka nyangatja wanyu god ngalypa-ngalypa ngañmanytju ungkuntytjita munta wiya?" Palu watarkungku payamilanma tjpipa kulintja wiyangku, munuya watarkungku ngalkunma, panya kuka palunya Godalu palura tjunu.

²⁷ Ka tjinguru kutjupangku Godaku walyta wiyangku nyuntunya altiku palumpa ngurangka mai ngalkuntjaku, ka nyuntu tjinguru mukuringkuku palula tjungungku ngalkuntjikitja. Palulanguru nyuntu uti ankula ngalkunma paluru mai kuka kulukulu unggunyangka munu tjapira kulilwiyangku wantima alatji, "Kuka yaaltjinguru nyangatja?" ²⁸ Palu wati kutjupangku tjinguru Jesuku walyta kutjupangku nyupalila tjungu nyinara nyuntunya wangkaku, "Kuka nyangatja panyatja, panya god ngalypa-ngalypa unggunyitjitja." Ka wantima ngalkuwiyangku. Tjinguru nyuntu ngalkunyangka wati paluru nyuntula aanarira ngalkuku. Munu palulanguru tjinguru ngalkuntjatjanungku kulilkku, "Kuntangkanā kurangku ngalkuṇu." Munu tjinguru kūntaringkula Godalanguru mapaturingkuku. Ka nyuntu palula-tawara wantima ngalkuntja wiyangku.

²⁹⁻³⁰ Palu tjinguru kutjupangku kulilkku, "Wiya palyaṇa kuka palunya ngalkuni. Panya ngayulu Godanya kulini alatji kuka nyanga ngalkula. Kanī nyaaku kutjupangku paini ngalkuwiyangku wantinytjaku." Uwa, palatja palya paluru kulintja. Palu uti palurunku kutju kulintja wiyangku waintara aŋangu kutjupa tjuṭa kulinmaṭu. Munu kutjupangku kūntaringkula wantinyangka nyakulampa uti paluru wantimaṭu ngalkunta wiyangku.

³¹ Uwa, tjinguru nyura ngalkuku munta tjinguru wiya, tjinguru nyura tjikilku munta tjinguru wiya, tjinguru nyura kutjupa kutjupa tjuṭa palyalku munta tjinguru wiya. Palu nyura uti nyuranku walytjangku kutju kulintja wiyangku waintara kulinma Godanya palunya pukułmankunyitjikitjangku. Ka paluru nyuranya nintilku tjukarurungku kulira palyantjaku anangu tjuṭangku nyakula Godanya mirawaṇinytjaku. ³² Wiruraya nyinama kutjupa tjuṭa kuraringkunyitjaku-tawara, panya Jew tjuṭa, Jew wiya tjuṭa munu Jesuku walyta tjuṭa kułukulu. ³³ Ngayunya purunypaya nyinama panya ngayulu aŋangu uwankara pukułmankupai walyta pukularintjikitjangku kulintja wiyangku. Uwankarakuna kuliṛa wiru palyaṇi tjananya Jesulu wankarunkunyitjaku.

11

¹ Ka nyura ngayunya arkanma ngayunya purunypa nyinanytjikitjangku, panya ngayulu Christalu purunytpu kuliṛa palyaṇi.

Inmangka Tjunguringkula Tjukaruru Nyinanytjaku

² Uwa, wirungkuṇi nyura rawangku kulini ngayunya purunypa nyinanytjikitjangku. Munu nyura tjukurpa ngayulu nyurala nganmanytju wangkanyitja rawangku wanganarangku kulini. ³ Palu nyangatjaya wanyu kulinma, panya Christianity watiku mayatja nyinanyi, ka panya wati minyma kuriku mayatja nyinanyi. Ka panya Godanya Christaku mayatja nyinanyi. ⁴ Ka inmangka tjunguringkula nyinara uti watingku kata tjutulwiyangku Godala tjapinma, munu kata tjutulwiyangku Godaku tjukurpa tjakultjunama. Panya watingku tjinguru kata tjutura Godala tjapiṛampa munu kata tjutura Godaku tjukurpa tjakultjurampa, ka Christianity palunya nyakula palumpa kūntaringama. ⁵ Ka minymangku uti kata tjutura Godala tjapinma, munu kata tjutura Godaku tjukurpa tjakultjunama. Panya minymangku tjinguru kata tjutuntja wiyangku Godala tjapiṛampa, munu kata tjutuntja wiyangku Godaku tjukurpa tjakultjurampa, ka palumpa kuringku palunya nyakula kūntaringkuku. ⁶ Ka minyma tungun-tunguntu kata tjutuntja wiya nyinapaingku uti mangka katarā wiyanma. Nyara palulangurulta paluru kūntaringkula

kata tjutulku. ⁷ Palu palya uti wati kata tjutuntja wiya nyinama, panya Godalu palurunku puruny whole wati paluṇu, kaya wati nyakula Godanya mirawaṇinyi. Palu minyma nyakula tjana wati alatjiṇu mirawaṇinyi, panya paluru-maṇtu watinguru utiringkunytja. ⁸ Panya Godalu minymanguru wati palyantja wiyaṭu, minyma palyanu watinguru. ⁹ Munu Godalu wati minymaku palyantja wiyaṭu, minyma palyanu watiku. ¹⁰ Palulanguru uti minymangku inmangka kata tjutura nyinama panya alatji nyinara paluru nintini paluru watingka maṭatja. Kaya angelpa tjuṭangku nyakula pukulariku.

¹¹ Palu nganaṇa Jesuku waltya nyinara minyma tjuṭa watiku alatjiṇu nyinanyi, ka wati tjuṭa ngapartji minymaku alatjiṇu nyinanyi. Panya tjana maṇtalpa maṇtalpa putu nyinanyi. ¹² Nyangatja tjukaruru panya Godalu minyma nganmanyitja watinguru palyanu, palu nyara palulanguru kuwarikutu ngarakatinyi tiṭutjara panya wati iti wirkananyi minymanguru. Panya Godalu uwankara mulapa paluṇu wati minyma kulu.

¹³ Waltyjangkunku kulila! Utu minymangku inmangka tjunguringkula Godala tjapintjikitjangku kata tjutuntja wiyangku wantima. ¹⁴ Panya nganampa alatji ngaranyi watingku mangka katapai muṭumuṇu kanyintjikitjangku. Panya wati mangka waratjara nyakulaya wangkapai, “Kungka puruny whole nyaratja.” ¹⁵ Kaya minyma mangka waratjara nyakula wangkapai, “Mangka wirunya nyaratja.” Panya Godalu palyanu minyma mangka waratjara nyinanytjaku, panya mangkangku-maṇtu tjutura puruny whole kanyini. ¹⁶ Tjinguruni nyura kutjupa tjuṭangku ngayunya rawangku ngaparpungkula wangkanytjikitja mukuringanyi. Palu wiya, alatjiṇu wangkanyi. Palu puruny whole palyalpai, kaya Jesuku waltya tjuṭangku ngura kutjupangka kutjupangka paluny whole palyalpai.

Mayatjaku Tjapaya Watarku-watarkungku Ngalkunytja

¹⁷ Kaṇa kuwari nyurala wangkanyi tjukurpa kutjupa. Palu nyuranya mirawaṇinytja wiyangku wantinyi, panya nyura kunyu inmangka tjunguringkula wanganarangku kuliṛa palyalpai wiya. ¹⁸ Nyanga paluny whole nganmanytju kulinu kutjupa tjuṭangku tjakultjunkunyangka. Panya nyura kunyu inmaku pitjala pukularira tjungu nyinanytja wiya maṇtalpa maṇtalpa nyinapai. Kaṇa kulini, “Nyangatja tjinguru mulapa.” ¹⁹ Munuṇa kulini palya tjinguru nyura mukuringkula nyura kulintjitetja alatji palyanma. Palu Godalu nyuranya uti alatjiṇu nyanganyi maṇtalpa maṇtalpa nyinanyangka munu paluru nintingku nyanganyi aṇangu yaaltjiṭungku paluny whole tjukarurungku waṇaṇi. ²⁰ Panya nyura Mayatjaku Tjapa ngalkuntjikitja tjunguringkula ngunti-ngunti palyalpai, Mayatjanya mulamulangku kulintjikitjangku wiya. ²¹ Panya nyura kunyu tjungungku ngalkuntja wiyangku, manyu-manyungku nganmanytju tjikirā ngalkula paltjaringkupai kutjupa tjuṭa ungkunytja wiyangku. Kaya paltjatjiratjangku puṭu kulipai. Ka panya kutjupa tjuṭangku waina pulka tjikirā taṛangkaripai kutjupa tjuṭa ungkunytja wiyangku. ²² Nyaaku nyura panyatja ngura waltyjangka nganmanytju ngalkuwiyangku wantipai munu pitjapai ngura wiyatjara-palku? Nyaaku nyura pitjala tjanala tjunguringkula pulkara ngalkula tjikilpai? Tjinguru nyura mukuringanyi Godaku waltya tjuṭa anantjikitja, munu ngaltutjara tjuṭa kuļu kurantjikitja. Kaṇa nyanga alatji palyannyangka wanyu nyuranya mirawaṇiku? Wiya, puṭuna nyuranya mirawaṇinyi kura nyanga puruny whole palyananyangka.

Mayatja Jesuku Tjapa

(*Matthew-ku 26:26-29; Markaku 14:22-25; Luke-aku 22:14-20*)

²³ Uwa, nganmanytu panyaña nyurala nintiningi tjukarurungku, panya Mayatja Jesuluñi nintinu. Ka paluru wangkanytja alatji, munga panya palula panya Judasalu Jesunya Jew tjuñaku mayatja tjutangka nintintja kuwaripangka Mayatja Jesulu mai nyuma mantjinu. ²⁴ Munu Godanya wałkura mai panya palunya kałantara tjarañu, munu wangkangu, “Nyan-gatja ngayulu puntu nyurampa pikatjararingkunytja. Mantjiraya ngalkula, munuya ara nyanga palunya rawangku palyanma ngayunya kulintjik-itjangku.” ²⁵ Munu palulanguru tjapangka malangka Jesulu walpayata mantjiraya wangkangu, “Nyawaya walpayata nyanga wainatjara, munuya kulinma panya Godalu kuvari kalkuntjatjanungku ara kuwaritja palyani, ka ara paluru tiñutjara ngaraku ngayulu ilura milkali tjutinytjanguru. Nyanga palunyaya tjikinma ngayunya kulintjikitjangku.” ²⁶ Panya mai palunya ngalkula munu waina walpayatanguru tjikira nyaratja alatji utini, panya Mayatja Jesunya nganampa ilunytja. Kaya tiñutjarangku nyangatja palyanma. Munu nyura palulanguru nyakuku ngula Mayatja Jesunya malaku pitjanyangka.

²⁷ Palulanguruuya tjukarurungku Mayatjaku tjapa ngalkunma, palunya mulamulangku kulintjikitjangku. Tjinguru anangu kutjupangku watarkitjangku Mayatjaku mai ngalkunyangka munu walpayatanguru waina tjikinnyangka Jesulu nyakula kulilku, “Wiya, nyangangku ngayunya puntu munu milkali kuļu kurañi.” ²⁸ Ka nyanga palula-tawara uti nyuranku aṭunyamanama munu kura palyantjatjanungku waltytjangku unngu kulinma munu nganmanypa tjukarururingama Godala mirangka. Munuya nyara palulanguru kutjulta mai ngalkula walpayatanguru waina tjikinma. ²⁹ Tjinguru watarkitjangku Mayatja Jesunya ngalkilpa ilunytja kulintja wiyangku mai ngalkula, walpayatanguru waina tjikira, nyara palulanguru paluru waltytjangku pika pulkanı. ³⁰ Nyara palulanguru panya nyura kutjupa tjuña kuvari pikatjara nyinanyi, ka kutjupa tjuña nyurkaringu, ka kutjupa tjuña wiyaringu. ³¹ Kalanku uti waltytjangku nganmanytu kulinma munu kura kulirampa nganmanypa tjukarururingama palya nyinanytjikitja, kalanya Godalu kuranmara pungkunytja wiyangku wantiku. ³² Palu panya Godalu nganañanya pailpai nganaña nintiringkula kulira tjukarururingkunytjaku, nganañanya Godalu ngula mulamularingkupai wiya tjuñangka tjungura warungka waninytjaku-tawara.

³³ Uwa waltyja tjuña, nyura Mayatjaku Tjapa ngalkuntjikitja tjunguringkula warpungkula ngalkuwiyangku pañanma anangu kutjupa tjuñaku nyura tjungungku ngalkuntjikitja. ³⁴ Uti nyura paltjatjiratja ngaralampa ngurangka nganmanytu ngalkunma munu paltjaringkula pitjala tjunguringama tjukarurungku ngalkuntjikitja, ka Godalu nyuranya nyakula pikatjarantja wiyangku wantiku.

Uwa, panya litangkañi nyura kutjupa kutjupa tjuña tjapiningi, kaña ngula tjukurpa panya palunya tjananya ma-pitjala nyurala wangkara tjukarurulku.

12

Kurunpa Milmiltu Nintilpai

¹ Uwa waltyja tjuña, nyura panya lita walkatjura ngayula tjapiningi nyurala Kurunpa Milmilngatjara tjakultjunkunytjaku, panya Kurunpa

Milmiltulanya nintilpai munu witulyankupai Godaku war̄ka kutjupa kutjupa tjuta palyantjaku. Kaña kuwari nyurala utira wangkanyi nyura tjukurpa nyanga palunya tjukarurungku kulintjaku.

² Nyura nintingku kulini panya ngañmanypa nyura Godaku ngurpa nyinanyangka mamu tjutangku nyuranya kampa kutjupangka katirinangi god pununguru apunguru palyantja tjuta tiwilpa tjuta pupakatira walkuntjaku.

³ Kaña palulanguru nyura Godaku waltyjaringkunyangka mukuringanyi nyura nyangatja tjukarurungku kulintjaku. Panya anangungku Kurunpa Milmiltu nintinnyangka puṭu Jesuna anara kuranmananyi. Palu anangu Kurunpa Milmilngatjara nyinara unytjungku wangkanytja wiyangku mulamulangku Jesuna mayatjanmananyi.

⁴ Panya Kurunpa Milmiltu nganañanya Jesuku waltyja tjuta war̄ka kutjupa kutjupa tjuta ungu Godaku palyantjaku. Munu Kurunpa panya kutju paluruṭu nganañanya kutju kutju ungu war̄ka kutjupa kutjupa.

⁵ Panya war̄ka kutjupa kutjupa tjuta ngaranyi nganañña Godaku palyantjaku, palu nganañña Mayatja kutjuku wangañarangku kulira palyalpai, Mayatja Jesuku. ⁶ Uwa, nganañña panya kutju-kutjungku war̄ka kutjupa kutjupa palyalpai, palu Godalu kutjungku nganañanya kutju kutju nintilpai munu witulyankupai war̄ka kutjupa kutjupa tjuta palumpa palyantjaku.

⁷ Panya Kurunpa Milmiltu nganañanya kutju kutju war̄ka kutjupa kutjupa nintilpai Godaku palyantjaku, munu witulyankupai nganañña anangu kutjupa tjuta alpamilantjaku. ⁸ Panya Kurunpa Milmiltu anangu kutjupangka nintilpai paluru nintingku unngu kulintjaku, munu piruku paluru anangu kutjupangka nintilpai paluru ninti pulkaringkunytjaku.

⁹ Munu Kurunpa paluruṭu piruku anangu kutjupa rapalpai pulkara mulamularingkunytjaku, munu piruku anangu kutjupangka nintilpai pikatjara palyarunguntjaku. ¹⁰ Munu Kurunpa paluruṭu piruku anangu kutjupa ngapartji witulyankupai kutjupa kutjupa witulyatjarangku palyantjaku anangu tjutangku nyakula nguwankurinytjaku. Munu piruku anangu kutjupa nintilpai Godaku tjukurpa tjakultjunkunytjaku. Munu anangu kutjupangka paluru nintilpai nintingku ngurkantankunytjaku nganalu Kurunpa Milmilngatjarangku wangkanyi, munu nganalu mamutjarangku wangkanyi. Munu piruku anangu kutjupangka nintilpai wangka kutjupa wangkanytjaku. Munu anangu kutjupangka piruku nintilpai wangka kutjupa wangkanyangka kulira utira ma-tjakultjunkunytjaku. ¹¹ Palu kutjupa kutjupa uwankara nyanganpa Kurunpa Milmiltu kutjunguru, panya Kurunpa paluru kutjungku mukuringkula nintilpai munu witulyankupai anangu kutju kutju.

Puntu Kutjunguru Kutjutu Warkarinytja

¹² Ka wanyu nyangatja kulila, panya anangu puntu kutju, palu kutjupa kutjupa wikitjara manyirka, kuru, pina, tjina, kutjupa kutjupa tjutatjara. Munu nganañña Jesuku waltyja tjuta nyinanyi, palu nganañña tjunguringkula puntu kutju purunyarinyi, panya Christanya puntu purunyapa.

¹³ Ka panya Kurunpa Milmilngā paluru kutjuṭu nganañala kutjungka kutjungka tjunguringkula nyinanyi, kala uwankara kutjuṭu nyinanyi puntu kutju purunyapa, Jew tjuta, munu Jew wiya tjuta, wati mayatjaku mani wiya war̄karipai tjuta, munu waltyja war̄karipai tjuta. Panya nganañña uwankara baptise-arira Kurunpa palunyatjaraṭu nyinanyi, panya Godalu nganañala kutju kutjungka Kurunpa kutju palunyatu tjarpatjunu.

¹⁴ Palu kulilaya, panya nganampa puntu kutjutjara wiya palu kutjupa kutjupa tjutatjara, panya nganaña manyirka, tjina, kuru, pina, munu kutjupa kutjupa tjutatjara ngaranyi. ¹⁵ Ka tjinguru tjinangku wangkaku, “Ngayulu manyirka purunypa ngaranytjikitja mukuringanyi. Palu ngaltutjara ngayulu tjina. Utina paturingkuku puntungka tjungu ngaranytja wiya.” Palu wiya, paluru puṭu alatji wangkanyi panya paluru tjina alatjiṭu munu puntungka tjungu alatjiṭu ngaranyi. ¹⁶ Ka tjinguru pinangku wangkaku, “Ngayulu kuru purunypa nyinanytjikitja mukuringanyi. Palu ngaltutjara ngayulu pina. Utina paturingkuku puntungka tjungu ngaranytja wiya.” Palu wiya paluru puṭu alatjirinyi panya paluru pina alatjiṭu munu puntungka tjungu alatjiṭu ngaranyi. ¹⁷ Kulilaya, tjinguru anangumpa kuru kutju ngaranyi kutjupa kutjupa tjuta wiyatjara, munu yaaltjingara paluru kulikku pina wiyangku? Munta tjinguru paluru pina kutju ngaranyi, munu yaaltjingara paluru walpa paṇtinma mulya wiyangku? ¹⁸ Palu wiya, Godalu nganañanya alatji nyinanytjaku palyantja wiya. Paluru nintingku alatjiṭu nganañanya kutjupa kutjupa tjutatjara palyanu paluru mukuringkula. ¹⁹ Tjinguru anangumpa kuru kutju ngarama, palu palatja puntu mulapa wiya. ²⁰ Uwa, anangumpa kutjupa kutjupa tjutatjara ngaranyi, manyirka, tjina, kuru, pina, palu uwankara kutjuringkula puntu kutju ngaranyi.

²¹ Ka kurungku puṭu manyirkangka wangkapai, “Nyaakun ngayula tjungu ngaranyi? Ara, ngayula tjungu ngaranytja wiya.” Ka piruku katangku puṭu tjinangka wangkapai, “Nyaakun ngayula tjungu ngaranyi? Ara, ngayula tjungu ngaranytja wiya.” Panya puntu kutju ngaranyi, kutjupa kutjupa tjutatjara. ²² Ka panya nganaña kulilpai puntungka unngu kutjupa kutjupa upa tjuta ngaranyi kuṇpu wiya panya tjuni, kirikiri, alu, kapulpa, munu ngukunypa kuļu. Nyanga paluru tjana tjina purunypa war̄ka pulka palyalpai wiya, palu tjana uwankarat̄u war̄ka wiru palyalpai puntu winki pukulpa ngaranytjaku. ²³ Ka panya maṇa munu tjunta munu kutjupa tjuta kuļu nganaña kulilpai kumpilpa kanyintjikitjangku munula mantarangka tjutura kanyilpai. ²⁴ Munula nganaña nyiku, manyirka, tjina, yunpa kutjupa tjuta kuļu uti wantipai tjutangku nyakunytjaku. Palu nyanga paluru tjana uwankarangku war̄ka wiru palyalpai puntu winki pukulpa ngaranytjaku. Ka nganaña panya utitja tjuta wirura kanyilpai, yunpa, kuru, mangka, tjina, manyirka palunya tjananya, palu unngutja tjuta wirura war̄karinyangka kutju nganaña wanka pukulpa nyinapai, panya kutuṭu, kirikiri, alu, kapulpa tjana wiyaringkunyangka nganaña ilupai. ²⁵ Uwa, paluru panya nganañanya puntu wiru palyanu kutjupa kutjupa tjutatjara nganaña palunya tjananya wirura atunymara kanyintjaku. Kala uti palu purunytyu Jesuku walytja tjutangku tjungungku nyinara wangkara kulinma, munulanku mukulyangku atunyamanama. ²⁶ Tjinguru anangu kutjupa kata pikatjararingkuku munu paluru tjiturutjitururiku. Ka tjinguru anangu kutjupa yunpa wiru ngaranyangka nyakulaya palunya wirunmankuku, ka paluru ipilyarira pukulariku. Palu purunyjulanku uti Jesuku walytja tjutangku tjungungku nyinara kulinma.

²⁷ Ka palu purunypa nyura tjungu ngarala Christanya puntu purunypa nyinanyi. Panya anangu kutju manyirka purunypa nyinanyi, ka kutjupa tjina purunypa nyinanyi, kutjupa kuru purunypa nyinanyi. Panya uwankarala kutjupa kutjupa, palu tjunguringkulala Christanya puntu purunypa nyinanyi. ²⁸ Ka panya Godalu palumpa walytja tjuta ngurkanṭara tjunu war̄ka kutjupa kutjupa palumpa palyantjaku, nyanga alatji

ngañmanytju paluru wati kutjupatjara ngurkantara tjunu paluru panya iyantja tjuta munu tjananya witura iyanu tjukurpa palumpa para-wangkanytjaku. Munu palulanguru paluru añaŋgu kutjupa tjuta ngapartji palu purunypa tjuta ngurkantara tjunu palumpa wangkatjara tjuta, munu palula mañangka kutjupa tjuta ngapartji ngurkantara tjunu tjukurpa nintilpai tjuta. Munu palulanguru kutjupa tjuta ngapartji ngurkantara witulyanu war̄ka kutjupa kutjupa tjuta palyantjaku. Munu paluru kutjupa tjuta ngurkantara tjunu miracle tjuta witulyangku palyantjaku, munu kutjupa tjuta ngurkantara tjunu pikatjara tjuta palyarunguntjaku, munu piřuku kutjupa tjuta tjunu Jesuku walytja tjuta alpamilantjaku, munu kutjupa tjuta tjunu tjananya tjukarurungku atunymankunytjaku, munu kutjupa tjuta tjunu wangka kutjupa wangkanytjaku. ²⁹ Ka nganaña uwankarañu Jesulu iyantja tjuta nyinanytja wiya, palu kutjupatjara kutju Godalu ngurkantanu iyantja tjuta nyinanytjaku. Munula uwankarañu wangkatjara nyinanytja wiya, palu kutjupatjara kutju paluru ngurkantanu wangkatjara nyinanytjaku. Munula uwankarañu tjukurpa nintilpai nyinanytja wiya, palu kutjupatjara kutju paluru ngurkantanu palumpa tjukurpa wangkara nintintjaku. Munula uwankarañu miracle tjuta palyalpai nyinanytja wiya, kutjupa tjarangku kutju palyalpai. ³⁰ Munula uwankarañu pikatjara palyarungulpai nyinanytja wiya, palu kutjupa tjarangku kutju palyarungulpai. Munula uwankarañu wangka kutjupa wangkapai nyinanytja wiya, palu kutjupa tjarangku kutju wangka kutjupa wangkapai. Munula uwankarañu wangka kutjupa wangkanyangka kulira utira wangkapai nyinanytja wiya, palu kutjupa tjarangku kutju utira wangkapai. Panya Godalulanya tjunu nganaña kutjungku kutjungku kutju palyantjaku war̄ka kutjupa kutjupa.

³¹ Uwa, pułkaraya mukuringama Kurunpa Milmiltu nyuranya pułkara mulatu nintintjaku munu witulyankunytjaku Godaku war̄ka pułka mulapa palyantjaku.

Yaaltji-yaaltji Mukulya Nyinanytja?

Palu kuwariña nyuranya ara kutjupa wiru mulapa tjakultjunanyi nyura wanganarangku kulira palyantjaku.

13

¹ Utila mukulya mulapa nyinama. Panya ngayulu tjinguru wangka kutjupangku wangkapai nyinanyi, tjinguru angelpa tjutaku wangka purunypa. Palu mukulya wiyangku wangkanyangkaniya alatji kulikku, “Wiya, palangku tjukurpa mulapa wangkanytja wiya, panya ilting-iltingarinyangkala unytjungku kutju kulipai, palu purunypa palumpa wangka ngaranyi tjukurpa mulapa wiya.” ² Munta, tjinguru ngayulu Godaku tjukurpa tjakultjunkupai nyinanyi Kurunpa Milmiltu nintinnyangka. Mununa tjinguru ngayulu ninti pułka nyinanyi, mununa Godaku tjukurpa kumpilitja uwankara kulini. Mununa tjinguru ngayulu Godaku pułkara mulamularingkupai nyinanyi mununa rapangku wangkaku murpu pułka kitikitiringkunytjaku, ka mulapa urira kitikitiringkuku. Palu tjinguru war̄ka nyanga palunya tjananya ngayulu mukulya wiyangku palyarampa ngayulu unytju kutju war̄karinyi. ³ Tjinguruña ngayulu kanyintja uwankara tjalamilara mani mantjira uwankara ma-ungkuku ngaltutjara tjuta tjana paltja nyinanytjaku. Palu tjinguru ngayulu mukulya wiyangku ungkulampa ngayulu unytjungku kutju unganyi. Munta tjinguruñi kutjupa tjutangku ngayunya Jesunya wanannyangka warungka

wañintjikitjangku witini, kana ngulu wiya rapa ngaranyi. Palu tjinguru ngayulu mukulya wiya ngaralampa ngayulu unytju kutju raparinganyi.

⁴ Panya mukulya mulapa nyinapainya nyanga alatji, atatjura kulira wangkapai mirpañarinytja wiyangku, munu añañgu tjutaku ngalturingkupai, kutjupa kutjupa-tjiratja nyararingkupai wiya, walytjangku wangkara mirawanipai wiya, munu kañany-kañanyaripai wiya.

⁵ Munu mukulya nyinapailu pika-pikangku wangkapai wiya purkarangku wangkapai, munu palurunku kutju walytjangku atunyankupai wiya kutjupa tjuta kulu atunyankupai, munu paluru mapalku waruringkupai wiya. Uwa, mukulya nyinapailu rawangku kulilpai wiya kutjupangku palunya kurantjxitjanguru. ⁶ Munu mukulya nyinapailu kura palyannyangka nyakula tjituru-tjitururipai pukularinytja wiya, palu tjukarurungku palyannyangka kutju paluru nyakula pukularipai. ⁷ Mukulya nyinapainya añañgu kutjupaku titutjara pulkara mukuringkupai wantintjya wiya. Munu tjinguru kura palyannyangka nyakula palumpa rawangku pañalpai paluru małaku palyaringkunytjaku, munu palunya wantintjya wiyangku mulamulangku kulilpai, "Wiya kuvari paluru palyaringanyi."

⁸ Añañgu mukulya nyinapainya titutjara mukulya nyinapai wiyaringkuwiya. Panya kuvari Kurunpa Milmiltu kutjupa tjutangka nintilpai Godaku tjukurpa añañgu tjutangka wangkanytjaku, palu ngula paluru piruku tjanala alatji nintintja wiyaringkuku. Kuvari paluru kutjupa tjutangka nintilpai wangka kutjupa wangkanytjaku, palu ngula paluru piruku tjanala alatji nintintja wiyaringkuku. Kuvari paluru kutjupa tjutangka nintilpai paluru tjana ninti pulkaringkunytjaku, palu ngula paluru tjanala alatji piruku nintintja wiyaringkuku. Palu nyangatja paluru tjananya rawangku nintilku panya mukulya pulka titutjara nyinanytjaku. ⁹ Panya kuvari Kurunpa Milmiltu ngananaala tjukutjuku nguwanpa utini ngananaa kulintjaku. Munu tjukurpa tjukutjuku nguwanpa ngananaala utini kutjupa tjutangka tjakultjunkunytjaku. ¹⁰ Palu ngula uwankara wiruringkunyangka ngananaa putu kulintja wiyaringkuku, munula uwankaraku ninti nyinaku. ¹¹ Panya ngañmanypala tjitji nyinralpi tjitji purunyti wangkapai munu kulilpai, munula tjitji purunyta mukuringkupai. Palu añañgu pulkaringkulala tjitji purunyta nyinanytja wiyaringkupai. ¹² Panya kuwarila Godanya putu uti nyanganyi kalawatja ruwangka purunyta. Palu ngulala palunya ilangku uti nyakuku. Kuwarila Godanya putu nguwanpa kulini, palu ngulala palunya ilangku nyakula ninti mularariku. Panya Godanya nganampa ninti pulka nyinanyi, palu purunyta ngananaa ngula palumpa ninti mularariku munula ninti pulka nyinaku.

¹³ Uwa, tjukurpa pulka mañkurpa ngaranyi nyanganpa: utila Godaku mulamularingama, munula uti palumpa pukultu kulil-kuliltu nyinara pañanma, munula uti añañgu tjutaku mukulya pulka nyinama. Palu tjukurpa nyanga małatja pulka mulapa kutjupa nyanga kutjarangka waintarintjya, panya añañgu tjutaku mukulya nyinanytjaku.

14

Kurunpa Milmiltu Nintinnyangka Nyanga Alatji Palyantjaku

¹ Uwa, rawangkuya kulinma mukulya nyinanytjikitjangku. Munuya Kurunpa Milmiltu mukuringamañ paluru nyuranya kutjupa kutjupa tjuta nintintjaku, ka nintinnyangka nyura witulyangku palyalku. Munuya

pulkara mukuringama Kurunpa Milmiltu nyuranya tjunkunytjaku Godaku wangkatjara nyinanytjaku, ka nyura palumpa tjukurpa anangu tjuṭangka tjakultjunkuku Kurunpa Milmiltu nintinnyangka. ² Panya kutjupangku wangka kutjupa wangkara anangu tjuṭangka wangkanytja wiya, Godala kutju wangkanyi. Ka anangu tjuṭangka putu kulini panya paluru tjukurpa kumpilitja wangkanyi Kurunpa Milmiltu nintinnyangka palunya kutju. ³ Palu wati panya wangkatjarangku anangu tjuṭangka Godaku tjukurpa uti wangkapai, munu tjananya uwankara wangkara kurunpa rapalpai Jesunya tungun-tunguntu waṇantjaku, munu tjinguru upa nyinanyangka kunpulpai, munu tjituru-tjituru nyinanyangka pukulmankupai. ⁴ Panya kutjupangku wangka kutjupa wangkara palurunku kurunpa rapani Jesunya tungun-tunguntu waṇantjikitjangku. Palu panya wangkatjarangku Jesuku walytja tjuṭangka Godaku tjukurpa wangkara palunya tjananya uwankaratu kurunpa rapani Jesunya tungun-tunguntu waṇantjaku.

⁵ Uwa, ngayulu mukuringanyi nyura uwankarangku wangka kutjupa wangkanytjaku. Palu pulkarana mukuringanyi nyura Godaku wangkatjara tjuṭa nyinanytjaku, palumpa tjukurpa anangu tjuṭangka tjakultjunkunytjaku. Wangka kutjupa wangkanytjaku palya ngaranyi, palu Godaku tjukurpa tjakultjunkunytjaku warika wiru mulapa ngaranyi wangka kutjupa wangkanytjitungka munikara mulapa. Palu kulila, anangu panya utira wangkapainya nyurala nyinanyangka kutju wangka kutjupa wangkama. Panya anangu nyara paluru nyinanyi nyura wangka kutjupa wangkanyangka utira wangkanytjikitja, Jesuku walytja uwankarangku kuliṛa raparingkula palunya tungun-tunguntu waṇantjaku. ⁶ Uwa walytja tjuṭa, tjinguru ngayulu ma-pitjala nyurala wangka kutjupa wangkaku, ka nyura wanyu kuliṛa kurunpa raparingkuku? Wiya, nyura putu kulilku ngayulu alatji wangkanyangka. Palu panya Godaku tjukurpa ngayulu uti wangkanyangka kutju nyura kuliṛa kurunpa pukulariku. Tjinguruña Godalu tjukurpa ngayula utinnyangka nyurala tjakultjunkuku, munta tjinguruña Godaku tjukurnguru nyakula utira wangkaku. Ka nyura tjukurpa uti kuliṛa raparingkuku palunya tungun-tunguntu waṇantjikitja.

⁷ Tjinguru kutjupangku kita wangkatjingalku ngurpangku, kaya kutjupa tjuṭangku putu mayu kulilku inma tjukarurungku inkanytjikitjangku. ⁸ Munuya palu purunypaṭu ara nyangatja kuļu kulinma. Panya wati tjaultji kutjungku turampata mayu tjukarurungku puura wangkatjinggañnyangka tjaultji kutjupa tjuṭangku kulipai pika ankunytjikitjangku munuya kuliṛa pitjapai munuya tjunguringkupai. Palu tjinguru turampata mayu kutjupa nguwanpa wangkatjingannyangkaya putu kuliṛa watarku nyinaku. ⁹ Ka palu purunypaṭu ngaranyi alatji, tjinguru ngayulu wangka kutjupa wangkanyangka kutjupa tjuṭangku putu kulilku munuya alatji wangkaku, “Tjukurpa nyaa nyangangku wangkanyi?” ¹⁰ Panya manta winkingkala wangka kutjupa kutjupa nyinanyi, munula wangka nganampa wangkanyangka kutju uti kulipai. ¹¹ Kaṇa tjinguru anangu malikitjangku wangka kutjupangku wangkanyangka ngayulu putu kulilku, mununa alatji wangkaku, “Nyaa nyangangku wangkanyi?” Kaṇi paluru ngapartji putu kulilku ngayulu wangka walytjangku wangkanyangka, panya paluru ngali malikitja kutjara munuli wangka kutjupa kutjupa wangkapai. ¹² Ka nyura panya pulkarra mukuringkupai Kurunpa Milmiltu nyuranya nintintjaku kutjupa kutjupa tjuṭa nyura witulyatjarangku palyantjikitja. Palulanguruya kurunpa winkingku kulinma Jesuku walytja

tjuṭa rapantjikitjangku tjana palunya tungun-tunguntu waṇantjaku.

¹³ Tjinguru nyuntu Kurunpa Milmiłtu nintinnyangka wangka kutjupa wangkapai. Uti nyuntu palula tjapinma nyuntula utintjaku aŋangu tjuṭangka utira tjakultjunkunyjtikitjangku. ¹⁴ Panya ngayulu wangka kutjupa wangkara Godala kuruntu wangkanyi, kaṇi paluru kulini. Palu ngayulu walytjangku puṭu kulini pinangku, panya ngayuku wangka wiya palatja. ¹⁵ Kaṇa nyaalku puṭu kulintjatjanungku? Kuruntu kutjuṇa wanyu tjapilku wangka kutjupa wangkara? Wiya, ngayulu kutjupa-ara pinangku kulu kulira tjapilku wangka walytjangku. Munuṇa wanyu kuruntu kutju inma inkama wangka kutjupangku inkara? Wiya ngayulu kutjupa-ara pinangku kulu kulira inkaku wangka walytjangku. ¹⁶ Ka tjinguru nyuntu inmangka nyinara wangka kutjupa wangkara kuruntu kutju Godanya walkuni. Ka nyuntula ititjangku wanyu nyuntunya kulira palu purunypaṭu Godanya mirawanipai? Wiya, paluru putu kulini, panya nyuntu wangka kutjupa wangkara walkuni, ka Godalu kutjungku nyuntunya kulini. ¹⁷ Uwa, palya nyuntu Godanya walkuni wangka kutjupa wangkara, palu aŋangu kutjupangku puṭu kulini munu nyuntunya kulintjatjanu puṭu raparinganyi Jesunya tungun-tunguntu waṇantjikitja.

¹⁸ Uwa, ngayulu Godanya walkuni, panya paluruni pulkara nintinu wangka kutjupa wangkanytjaku nyurala waintara nguwanpa. ¹⁹ Palu inmangka tjunguringkulana aŋangu tjuṭangka wangka kutjupa wangkanytja wiya, wangka utingkuṇa wangkapai. Panya ngayulu wangka utingku tjukutjuku wangkanyangkaya mapalku kulikku, palu ngayulu wangka kutjupa rawa mulatu wangkanyangkaya kulintja wiya alatjiṭu. Palula-tawarana wangka uti wangkapai tjananya nintintjikitja, tjana uti kulintjaku.

²⁰ Uwa walytja tjuṭa, uti nyura iti purunypa nyinama panya iti tjuṭa kura palyalpai wiya nyinanyi, palu purunypa nyura kura wiya nyinama. Munuya tjitji tjuṭa kulu kulinma panya paluru tjana ngurpa, uwankaraku ninti wiya, ka nyura paluru tjana purunypa nyinanytja wiya, munuya nintiriwa nintipuka nyinanytjikitja kulintja tjukaruru mulapa. ²¹ Panya nyiringka iriti walkatjunkunyta alatji ngaranyi Godalu wangkanytja, “Ngayulu aŋangu malikitja tjuṭa wangka kutjupa wangkapai tjuṭa witulku ngayuku tjukurpa tjanala wangkanytjaku ngayuku aŋangu tjuṭangka, kaya tjanala ankula tjakultjunkuku.” *

Palu paluru tjana kulintja wiyangku alatjiṭu wantiku.” *

²² Uwa, nyura wangka kutjupa wangkanytja ngunti pulkara mirawanipai. Tjinguru aŋangu kutjupangku pitjala Jesuku walytjangku wangka kutjupa wangkanyangka kulira aŋangu nyara paluru puṭu tjukarurungku kulikku, munu puṭu Godaku mulamularingkuku. Palu Jesuku walytjangku Godaku tjukurpa uti tjakultjunkunyangka kutju paluru uti kulintjatjanu mulamularingkuku munu Godanya mirawanipai.

²³ Tjinguru nyura Jesuku walytja tjuṭa inmangka tjunguringkula wangka kutjupangku wangkaku, ka aŋangu kutjupa tjuṭangku tjarpara kulikku munuya wangkaku, “Nyaaringanyi ya nyanganpa? Kawakawaringuya.”

²⁴ Palu tjinguru nyura tjunguringkula Kurunpa Milmiłtu nintinnyangka Godaku tjukurpa uti tjakultjunkuku, ka aŋangu mankurpa kutjupa watarkitja tjarpara nyinakatiku munu Godaku tjukurpa uti wangkanyangka kulintjatjanu kuṇtaringkuku paluru tjana kura palyantjatjanu. ²⁵ Panya paluru tjana unngu kumpilpa kulintja uwankara wangkara utinnyangkaya

* 14:21 Aitjayaku 28:11-12

paluru tjana kulira kuntaringkuku munuya Godanya walkulkku wangkara, "Mulapa Godanya nyanga tjanala ngaranyi."

Inmangka Tjunguringkula Tjukarurungku Palyantjaku

²⁶ Uwa waltyja tjuṭa, nyura Godanya walkuntjikitjangku tjunguringkula uti nyanga alatji palyanma. Utı kutjungku inma inkama. Ka kutjupangku Godaku tjukurpa utira nintinma. Ka kutjupangku tjakultjunama tjukurpa Godalu palula utinnyangka. Ka kutjupangku wangka kutjupa wangkama, ka kutjupangku wangka palunya kulira utira anangu tjutangka tjakultjunama. Nyanga palu purunypaya ngapartji-ngapartjingku palyanma Jesuku waltyja uwankarangku kulira kurunpa raparingkula Jesunya tunguntunguntu wañantjaku. Nyanga alatjiya rawangku palyanma.

²⁷ Ka kutjupa tjuṭa tjinguru mukuringanyi wangka kutjupangku wangkanytjikitja. Palu uti tjutangku wangkawiyangku mañkurtu kutju wangkama ngapartji-ngapartjingku. Ka uti kutjupangku paluru tjana wangkanyangka kulira anangu tjutangka utira tjakultjunama Kurunpa Milmiltu palula unngu utira nintinnyangka. ²⁸ Palu tjinguru kulira utira tjakultjunkupainya nyinanytja wiya ngaranyangkampa uti wangka kutjupa wangkapainya inmangka pilunpa nyinama pakara wangkanytja wiya, munu waltyjangku kutju tjaalymara wangkama, ka Godalu kutjungku palunya kulinma.

²⁹ Ka uti Godaku wangkatjara kutjarangku muta mankurtu Godalu wangkanyangka kulintjatjanungku palumpa tjukurpa tjakultjunama, kaya kutjupa tjutangku uti purkarangku kulinma tjana wangkanyangka alatji ngurkantankunytjikitjangku tjinguruya tjukarurungku wangkanyi muta tjinguruya ngunti wangkanyi. ³⁰ Ka tjinguru wangkatjarangku Godaku tjukurpa ngarala wangkanyi, ka paluru wangkanyangka Kurunpa Milmiltu tjinguru anangu kutjupangka nintilku tjukurpa kutjupa. Ka uti nganmanytju nyara wangkanytjalu nyinakatira kulinma, ka kutjupangku ngapartji pakara Godaku tjukurpa nintinnyangka tjakultjunama.

³¹ Uwa, nyura wangkatjara tjutangku Godaku tjukurpa ngapartji-ngapartjingku tjakultjunama, kaputu winkingku pakara wangkanytja wiyangku. Kaya anangu winkingku tjukurpa uti kulilkututungku kutjungku wangkanyangka, munuya kulira nintiringkula kurunpa raparingkula pukulariku. ³² Panya Kurunpa Milmiltu wangkatjara tjutangka utilpai Godaku tjukurpa tjakultjunkunytjaku, kaya paluru tjana waltyjangku kulilpai wangkanytjikitjangku, tjinguru kuwaritu wangkanytjikitjangku, muta tjinguru ngula. ³³ Godanya wanyu mukuringanyi nyura uwankarangku kinkinmara wangkanytjaku? Wiya, Godanya mukuringanyi nyura ngapartji-ngapartjingku purkarangku wangkanytjaku inma wiru mulapa ngaranytjaku. Panya Jesuku waltyja tjutangkuya ngura winkingka inmangka tjunguringkula alatji palyalpai.

³⁴ Uwa, inmangka tjunguringkula nyinanyangkaya minyma tjuṭa markunma kinkinmankunytja wiyangku pilunarira kulintjaku, panya Moseku tjukurta alatji ngaranyi kaya uti wanganarangku kulinma.

³⁵ Munuya uti paluru tjana kutjupa kutjupa puṭu kulirampa ngula ngurangka tjapinma tjanampa kuringka, ka tjanala utira tjakultjunkuku. Panya minyma tjutangku inmangka nyinara kinkinmara wangkara inma kuralpai.

³⁶ Tjinguru nyura kutjupa tjarangku alatji kulini, "Godaku tjukurpa ngananaala-warara nganmanyapa wirkanu." Mutu tjinguru nyura alatji kulini, "Godaku tjukurpa ngananaala kutju wirkanu kutjupa tjutangka

wirkankunytja wiya.”³⁷ Ka tjinguru kutjupa tjarangku kulini, “Nganana Godaku wangkatjara tjuta, panya paluru wangkanyangkala kulira tjakultjunkupai.” Munta tjinguru paluru tjana alatji kulini, “Kurunpa Milmiltulanya nganananya nintinu kutjupa kutjupa tjuṭa palyantjaku.” Palu uti paluru tjana kulinma panya nyangatja ngayulu walkatjunanyi Godalu ngayunya utira wangkanyangka.³⁸ Palu paluru tjana tjukurpa nyanganpa kulilwiyangku wantinyangkampa nyura ngapartji palula tjanala kulintja wiyangkuwantima.

³⁹ Uwa walytja tjuṭa, kurunpa winkiya mukuringama Godalu wangkanyangka kulira tjakultjunkunytjikitja. Munu wangka kutjupa wangkanyangkaya paintja wiyangku wantima.⁴⁰ Uwa, inma wiru mulapa kanyintjikitjangkuya kutjupa kutjupa uwankara ngapartji-ngapartjingku palyanma, panya ngayulu kuvari nyurala wangkanytja. Utu kutjungku inma inkama. Ka kutjupangku Godaku tjukurpa utira nintinma. Ka kutjupangku tjakultjunama tjukurpa Godalu palula utinnyangka. Ka kutjupangku wangka kutjupa wangkama, ka kutjupangku wangka palunya kulira utira anangu tjuṭangka tjakultjunama.

15

Tjukurpa Palya Jesunyatjara

¹ Uwa walytja tjuṭa, ngayulu mukuringanyi nyura rawangkuṭu Tjukurpa Palya kulintjaku panya ngayulu ngañmanytju nyurala tjakultjunangi tjukurpa panya Jesunyatjara, ka panya nyura pukultu kulinigi munu panya nyura titutjarangku wañanigi palunya.² Ka nyura tjukurpa nyara palumpa mulamularingkunyangka Godalu nyuranya wankarunu. Palu uti nyura tungun-tunguntu wañanma wantintja wiyangku, ka nyuranya titutjarangku kanyilku. Palu tjinguru nyura tjukurpa ngayulu wangkanytja wantira tjukurpa ngunti kulirampa unytju kutju mulamularingangi.

³ Palu tjukurpa nyangatja ngalypa-ngalypa wiya mulamula ngaranyi, panya Mayatjalu ngayula wangkanytjitja kutjuña nyurala ngañmanytju tjakultjunu. Ka tjukurpa nyanganpa pulka mulapa ngaranyi alatji, Panya Jesunya nganampa ngalkilpa anga-ilungu nganana kura tjuṭa palyantjitetjangu,

panya alatji nyiringka iriti walkatjunkunytja ngaranyi.

⁴ Ka panyaya ilunyangka palunya kulpingka tjunu,
ka Godalu palunya wankara pakaltjinganu munga kutjara wi-yaringkula,
panya alatjirintjaku wangkatjara tjuṭangku nyiringka iriti walkatjunu.

⁵ Ka Jesunya ilunytjatjanu pakaṛa Peterla utiringu munu nintintja panya kutjupa tjuṭangka kuļu.

⁶ Palulanguru tjanala piruku utiringu palumpa mulamularingkupai kutjupa tjuṭangka kuļu anangu winkingka 500-ngka,
kaya utulungku nyangu.

Ka anangu nyara paluru tjana kuvari wankatu nyinanyi,
ka mañkurpa kutju ilungu.

⁷ Ka Jamesalu kuļu nyangu palula utiringkunyangka.
Kaya palulanguru iyantja kutjupa tjuṭangku kuļu utulungku nyangu uwankarangku.

8 Ka palula małangka paluru ngayulalpi mała utiringu. Panya kutjupa-ara minymangku iti mała kutju kanyilpai, palu purunypa ngayulu mała kutju Jesuku walytjaringu.

9 Uwa, ngayulu Jesulu iyantja nyinanyi, palu iyantja panya kutjupa tjuta Peternya tjana tjukurtjara pulka nyinanyi ngayula muñkara. Ka ngayulu tjukutjuku mulapa nyinanyi, panya ngayulu ngañmanytu pikangku wañaparalpai Godaku walytja tjuta. **10** Kanı Godalu ngaltunyntju pulkangku kampa kutjupanu kaña kampa kutjuparira palunya wañaningi. Mununa palulanguru kampa kutjuparinytjatjanungku palumpa warka pulka mulapa palyaningi tjukurtjara kutjupa tjutangka muñkara. Palu ngayulu walytjangku kulira palyantja wiya. Godalu ngaltunyntju pulkangku ngayunya kampa kutjupanu, kaña palumpa warka pulkara palyaningi. **11** Uwa, tjinguru nyura tjukurpa ngayulu wangkanytjitja kulinu, munta tjinguru kutjupa tjutangku nyurala tjakultjunu, ka nyura kulinu. Palu palya, panya uwankarangkutula tjukurpa palunyatú wangkapai. Ka nyura tjukurpa pala palunya kulintjatjanu mulamularingu.

Miri Wanka Pakantja

12 Uwa, nganaña panya tjakultjunkupai Mamalu Christanya ilunytja pakaltjingantja. Ka nyura kutjupa tjarangku panyatja nyaaku wiyanmankupai anangu ilunytjtja pakantja wangkanyangka? **13** Tjinguru mulapa anangu ilunytjtjanu pakantja wiya ngaranyangkampa, Christanya kuļu ilunytjtjanu pakantja wiya ngarama. Palu panya Christanya ilunytjtjanu pakańu alatjińu, ka anangu tjuta kuļu ilunytjtjanu pakalku. **14** Palu tjinguru Christanya ilunytjtjanu pakantja wiya ngaranyangkampa nganaña tjukurpa palunyatjara tjakultjunkunytjaku wiyatú ngarama, ka nyura unytjulta mulamularingama. **15** Panya nganaña nyurala tjukurpa tjakultjunkula wangkapai Mamalu Christanya ilunyangka pakaltjingantja, ka nyura tjinguru kulipai nganaña ngunti wangkanyangka-palku. Palu tjinguru Godalu anangu ilunytjtja tjuta pakaltjingantja wiya ngaralampa paluru nganmanytu Christanya pakaltjingantja wiyatú. **16** Tjinguru anangu ilunytjtjanu pakantja wiyangka, Christanya kuļu pakantja wiyatú ngarima. **17** Ka tjinguru Christanya pakantja wiya miri kutju ngarinyangkampa nyura palumpa unytjulta mulamularingama nyuranya wankarunkunytjaku-palku, ka panya nyurampa kuranguru Godalu nyuranya pungkunytjaku alatjińu ngarama. **18** Ka tjinguru Christanya pakantja wiya miri kutju ngarinyangkampa palumpa walytja tjuta ngañmanypa ilunytjtjanu titutjara ilura ngarima pakantja wiya alatjińu. **19** Uwa, tjinguru nyura alatji kulipai, “Christalu nganańanya nyanga mantangka kutju wanka atunymara kanyini, munulanya ilunyangka wankara pakaltjingantja wiya.” Palu wiya, tjinguru nyuntu nganaña alatji ngunti kulirampa ngaltutjara mulapa nyinaku.

20 Palu mulapa Christanya ilunytjtjanu pakańu. Godalu palunyawarańa pakaltjingańu, kala palulanguru kulini mulapa paluru Jesuku walytja ilunytjtja tjuta kuļu pakaltjingalku. **21** Panya watı kutjungurula uwankara ilupairingu, munula palu purunypańu watı kutjunguru ilunytjtjanu pakalku. **22** Panya watı Adamalu Godala tungunpungkula kura palyańu munu ilungu, ka panyala nganaña ngapartji Adamalanguru uwankarańu ilupairingu. Palu panya Christalu Godala wanganarangku kuliningi munu paluru ilunytjtjanuńu wankaringkula pakańu, kala nganaña ngapartji Christalanguru ilunytjtjanu pakalku.

²³ Panya Christianity-warara puntu winki ilunytjatjanu pakañu, kala palumpa walytja tjuta ngapartji ngula puntu winkiñu pakalku Jesunya małaku pitjanyangka. ²⁴ Ka nyara palula małangka manta ilkari wi-yaringkuku, ka palulanguru Christalu mayatja witulyatjara uwankara wiyaliku, munu mayatja mantatja tjuta, ilkaringka para-ngarapai tjuta, mamu tjuta kulu pungkula alatjiñu wiyaliku, Godaku panya mirpantju tjuta. Munu palulanguru uwankara wiyanjtjanungku paluru palumpa walytja tjuta Mama Godanya ungkuku, ka paluru uwankaralta mayatjangku atunymara kanyilku. ²⁵ Panya Christianity nganampa mayatja pulka rawa nyinakatinyi Godalu palumpa mirpantju tjuta wiyanjtjaku pañra tjintu panya małatjangka.

²⁶ Ka nyara palula-arangka Godalu nganañanya ilunytjaku-tawara wankarunanyi. Panya nganaña nganampa mirpantju tjutaku nguluringkupai, palu purunypa nganaña ilunytja kulira nguluringkupaitu. Ka panya Godalu nganampa mirpantju tjuta uwankara wiyaní, palu purunypa paluru nganañanya ilunytjaku-tawara wankarunkuku titutjara wanka nyinanytjaku wiyingkunytja wiya alatjiñu. ²⁷ Panya nyiringka iriti walkatjunkunytja ngaranyi alatji, “Godalu uwankara tjunu Christala tjinangka paluru tjananya mayatja pulkangku kanyintjaku.” *

Uwa, mulapa Godalu uwankara tjunu Christalu palunya tjananya mayatjangku kanyintjaku, palu paluru palunya mayatja tjunkunytjatjanu tjaruringkunytja wiya Christalu palunya kulu tjungura mayatjarira kanyintjaku. Wiya, mulapa Godalu pulka mulapa nyinara uwankara palula tjunu paluru tjananya mayatjangku kanyintjaku. ²⁸ Ka palulanguru uwankara mayatjarira kanyintjatjanungku paluru katjangku Mama Godanya pupakatira wałkuńi. Panya Godanya mulapa uwankaraku mayatja pulka nyinaku titutjara.

²⁹ Palu ngura palangka kunyu Jesuku walytja kutjupa tjuta baptise-katintyta wiya nyinara iluniyi, ka kunyu nyura tjananya puñu nganmanytju baptise-katintjatjanungku añangu kutjupa tjuta baptise-katinyi miri pala palumpa tjanampa arangka. Palu tjinguru añangu tjuta ilunytjatjanu wankaringkula pakantja wiya ngaranyangkampa nyura unytjungku kutju tjananya baptise-katinyi miri tjutaku arangka.

³⁰ Ka panya Godaku mirpantju tjutangku nganañanya iluntankunytjikitjangku rawangku kukanyamananyi Jesuku tjukurpa wangkanyangka. Kala nyangatja nyaaku rawangku tjukurpa tungun-tunguntu wangkarinanyi? Panya ilurala kunyu pakantja wiya ngaraku, panya nyura alatji wangkapai. Palu wiya, nganaña ninti panya nganaña ngula ilunytjatjanu pakalku alatjiñu, kala nyara palunya kulira nganaña ngulu wiyangku rapangku tjukurpa wangkarinkupai.

³¹ Palu walytja tjuta, ngayulu mulamulangku nyangatja wangkanyi tjukarurungku, panya tjintu tjutangkuniya ngayunya nguwanpa iluntanangi tjukurpa Christianityatjara tjakultjunkunyangka. Palu panya ngayulu tjukurpa nyurala tjakultjunkunyangka nyura uwankara Mayatja Jesuku Christaku walytjaringu. Nyara palulanguruña pulkara pukularinyi mununa rapangku tjukurpa tungun-tunguntu wangkarinkupai ilunytja kulira nguluringkunytja wiyangku.

* **15:27** Psalm 8:6

³² Palu ngura nyanga Ipitjalaniya ngayunya pauntjingalpai papa pikati tjuṭa purunytju. Kaṇa ngayulu tungun-tunguntu alatjiṭu tjukurpa Jesunyatjara wangkapai panya ngayulu munkaritja rawangku kulilpai ilunytjatjanu pakantja. Palu tjinguru anangu ilunytjatjanu pakantja wiya ngaranyangkampa ngayulu unytjulta warkarima, munuṇa tjinguru tjukurpa wangkawiyangku wantima. Panya anangu tjutangku alatji wangkapai, “Wanyula tjikira ngalkula walytja pukularinytjikitjangku kutju kulinma, panya mungawinkila tjinguru ilura wiyaringkuku.” Tjinguruna nyanga alatji kulirampa nyurala tjukurpa tjakultjunkunyta wiyangku wantima.

³³ Palu nyangatja tjukurpa tjukaruru wiya. Panya anangu tjutangku alatji wangkapai, “Anangumpa kura palyalpai tjutangka tjunguringkulampa tjananya purunyariku.” Palulanguru nyura uti ngunti wangkapai tjutangka kulira wantima nyuranya ngunti kurantjaku-tawara.

³⁴ Kaya palula-tawara atatjura kulinma munuya kura palyantja wiyangku wantima alatjiṭu. Utı nyura ngunti kulintjatjanu kuntaringama munu tjukarurungku kulinma, panya nyurala tjungu kutjupatjara nyinanyi Godaku ngurpa.

Puntu Nyaala Mantjilku Ilunytjatjanu Pakara

³⁵ Tjinguru kutjupangku tjapilku, “Yaaltji-yaaltjingku Godalu anangu ilunytja tjuta pakaltjingalku? Kaya anangu paluru tjana puntu nyaa purunytjara pakalku?” ³⁶ Wiya wanyuya kūlila, panya anangungku uṇinypa mantangka unngu tjarpatjunkupai, ka uṇinypa paluru wanyu tiṭutjara paluruṭu ngaripai? Wiya, paluru ilunytja purunypa ngaripai munu palulanguru ngula miri wantikatira uṇinypa panya palulanguru kutjupa kuwaritja pakara nyalpitjararingkupai. ³⁷ Panya uṇinypa kutju tjarpatjunkupai tjinguru wiita mutna tjinguru uṇinypa kutjupa kutjupa, palu manta unngu nyalpi tjarpatjunkupai wiya, uṇinypa kutju tjarpatjunkupai, ka ngula ukiri pakalpai uṇinypa panya palulanguru munu nyalpitjararingkupai. ³⁸ Panya Godalu ngaṇmanytju kulira uṇinypa kutjupa kutjupa tjuṭa palyanu palula tjanalanguru puṇu walytja walytja pakantjaku.

³⁹ Ka palu purunypa ngaranyi iltjanpa kutjupa kutjupa. Panya Godalu palyanu anangu iltjanpatjara, munu kuka tjuṭa maunṭalpa palyanu iltjanpa kutjupa kutjupa, munu tjuṭpu tjuṭa kulu maunṭalpa palyanu iltjanpa walytjatja-tjara, munu antipina kulu. Nyanga palunya tjananya uwankara Godalu maunṭalpa maunṭalpa palura tjunu iltjanpa walytjatjara nyinanytjaku.

⁴⁰ Kaya angelpa tjuṭa ilkaringka nyinanyi puntu ilkariṭjatjara, ka nganaṇa mantangka nyinanyi puntu mantatja-tjara. Panya Godalu angelpa tjuṭa tjunu puntu wirutjara ilkariṭingka nyinanytjaku, munu nganaṇanya tjunu puntu wirutjaraṭu nyanga mantangka nyinanytjaku ilkariṭingka wiya.

⁴¹ Ka panya tjirirpi, pira, kililpi tjuṭa uwankara irnyalpai wiru ngaranyi, palu paluru tjana maunṭalpa maunṭalpa irnyalpai. Panya tjirirpingku walytjangku kalala irnyalpai, ka pira ngapartji kutjupa nguwanpa munu mungangka irnyalpai wirura. Ka kililpi tjuṭa tjukutjuku munu tjana kutjupa nguwanpa, palu paluru tjana kulu wirura irnyalpai mungangka.

⁴² Panya uṇinypa mantangka tjunkunyangka kutjupa kuwaritja palulanguru pakalpai, ka palu purunypa anangu Jesuku walytja ilunytja tjuṭa kutjuparira pakalku kuwaritja. Panya anangu ilunyangka mantangka tjuṇutjunkupai, ka ngarira mantaringkupai. Ka Godalu palunya

puntu kutjupa wiru mulapa pakaltjingalku wanka titutjara nyinanytjaku. ⁴³ Panya kuwari nganañanya ilunyangka pitingka tjuñutjunanyi puntu kuraringkunya, palu ngula Godalu nganañanya pakaltjingannyangka nganaña puntu wirutjara pakalku munula kuñpu mulapa nyinaku. ⁴⁴ Panya kuwarila añangu puntu mantangurutja nyinanyi, palu ngula nganana ilunyangka Godalu nganañanya wankara pakaltjingalku puntu ilkaritjatjara palula tjungu nyinanytjaku.

Panya nganaña puntu mantatja-tjara kuwari nyinanyi, munula ngula nganana puntu ilkaritjatjara nyinaku. ⁴⁵ Panya nyiringka iriti walkatjunkunytja ngaranyi alatji, "Godalu nganmanytju wati Adamanya palunu añangurira mantangka wanka nyinanytjaku." Ka wati kutjupa *Adam malatja* pitjangu ini Christanya. Ka Godalu palunya ilunyangka wankara pakaltjinganu paluru ngapartji nganañanya Kurunpa Milmiltawanungku wankara pakaltjingantjaku palula tjungu titutjara nyinanytjaku. ⁴⁶ Panya kuwari nyanga nganaña mantangka nyinanyi puntu mantatja, palu ngulala ilkariningka nyinaku puntu ilkaritjatjara. ⁴⁷ Panya wati nganmanyitja Adamanya mantanguru palyantja. Ka mala wirkana *Adam malatja* ini Christanya mantatja wiya, ilkaritja.

⁴⁸ Uwa, añangu mantatja tjuña Adamanya purunypa nyinanyi, mantanguru palyantja. Ka panya Christanya ilkarininguru pitjangu, kala palumpa mulamularingkula palunya purunyarinyi. ⁴⁹ Uwa, nganmanypala wati mantatja Adamanya purunypa nyinangi puntu mantatjanguru. Palu ngula nganaña wati ilkaritja Christanya purunypa nyinaku puntu ilkaritjatjara.

⁵⁰ Uwa waltyta tjuña, nyura kulini? Panya nganaña ngula Godaku ngurakutu puntu nyanga nganaña kuwari nyinanytjanya ankunytja wiya. Panya puntu nyanga paluru ilura mantaringkupai. Palulangurula puntu winki puñu ngura ilkaritjangka tjarpaku wanka titutjara nyinanytjikitja.

⁵¹⁻⁵² Palu kulilaya, tjukurpa nyanga kumpilitjana kuwari nyurala utini. Ngula nganaña Jesuku waltyta uwankaratu kutjupariku. Kutjupa tjuña wanka nyinanytjatanu ilunytja wiya wanka winkitu mapalku kutjupariku. Ka kutjupa tjuña nganmanyapa ilunytjatanu pakalku kutjuparira. Panya ngula tjintu malatjangka angeltu turampata puura miratjingannyangkala mapalku kutjupariku, panya añangungku kurungku nyakula warpungkula pinpapai, palu purunypala mapalku kutjupariku. Ka turampata pulkara miratjingannyangka Godalu ilunytja tjuña wankara pakaltjingalku wanka titutjara nyinanytjaku, munu panya wanka nyinanytja tjuña kuñu kutjupankuku.

⁵³ Uwa, puntu nyanga nganaña ngaranytjanya ilura wiyaringkuku munu kutjupariku. Panya Godalu nganañanya kutjupankuku palula tjungu wanka titutjara nyinanytjaku. ⁵⁴ Uwa, ngulala kutjupariku wanka titutjara nyinanytjikitja. Ka nyara palula-arangka tjukurpa panya nyiringka iriti walkatjunkunytja utiringkuku. Panya tjukurpa paluru alatji ngaranyi, "Godalu añangu tjuña palyalpai titutjara wanka nyinanytjaku piruku ilunytjaku wiya.

Kala ilunytjaku piruku nguluringkunytja wiya alatjitu." *

⁵⁵ "Awa. Nyaakula nguluringkuku, panya nganaña ilura wiyaringkunytja wiya alatjitu."

Nganaña titutjara wanka nyinaku pukulpa mulapa ilunytja wiya alatjitu." *

* **15:54** Aitjayaku 25:8 * **15:55** Uutjiyaku 13:14

⁵⁶ Ngañmanypala ngulu-ngulu nyinapai ilunytja kulira. Panya nganana tjukurpa Godalu Mosenya unggunytjjangka tungunpungkula kura palyaningi. Nyara palulanguru nguluringangi pungkula iluntankunytjaku-tawara. ⁵⁷ Palu kuwari nganana nguluringkunytja wiyaringu panya Mayatja Jesulu Christalulanya ngalkinu munulanya wankaru kanyini, kala ngula ilunytjatjanu wankaringkula pakalku. Kala uti nyanga palulanguru nguluringkuwiya nyinama munula Godanya mirawañira walkunma.

⁵⁸ Uwa, waltyja wiru tjuṭa, Mayatja Jesunyaya titutjarangku wañanma ngunti kulira iwara kutjupangka ankunytjaku-tawara. Munuya war̄ka panya Mayatja Jesulu nyuranya unggunytja titutjarangku palyanma wantinytja wiyangku, panya nyura unytju war̄karinytja wiya. Palulan-guruya titutjarangku palyanma wantinytja wiyangku.

16

Jesuku Walytja Tjutangku Jerusalemala Nyinanytja Tjuṭa Mani Ungkun-ytja

¹ Munta-uwa, panya mungañuni nyura lita walkatjura ngayula tjapinu alatji, "Yaaltji-yaaltjingkula mani tjunkuku Jesuku Walytja tjuṭa manta nyara Judeala nyinanytja tjutaku? Panya paluru tjana ngal̄tutjara maṛalpa nyinanyi." Alatji nyura ngayula tjapinu. Palu uti nyura Kalaitjiyanya ngurara tjuṭa purunytju palyanma, panya tjanalanā mungañu wangkangu mani tjunkukatinytjaku Jesuku walytja kutjupa tjutaku. ² Ka nyura paluru tjana purunytju Sunday kutjupa Sunday kutjupa mani nyurampanguru tjarara tjunkukatima kutjungku kutjungku. Ka mani pulkatjarangku uti pulka nguwanpa tjarara tjunama, ka mani tjukutjukutjarangku uti tjukutjuku nguwanpa tjarara tjunama. Alatjiya ngañmanytju mani tjunkukatima ngula ngayulu ma-wirkara mani wiya nyakula nyuranya wangkanytjaku-tawara mani urantjaku. ³ Munuya wati mañkurpa ngurkantara tjura mani palunya Jerusalemalakutu katinytjaku. Kan̄a ngula nyurala wirkara lita kuļu walkatjura tjananya unggul'iyalku Jerusalemania ngurara tjutangku paṭara nyakula tjananya ngurkan-tankunytjaku. ⁴ Munta, tjinguruña kulira tjanala tjungu ankuku.

Ngañmanytju Kulintja Ankula Tjanala Tjunguringkunytjikitjangku

⁵ Uwa, ngayulu nyuralakutu ma-pitjanyi, palu tjangañi manta pala Matja-tuniyala ngayulu ngura ngururitja tjutangka wirkara palula tjanala tjukutjuku nyinaku. ⁶ Mununa ngula Karintjala ma-wirkara nyurala rawa nguwanpa nyinaku. Mununa tjinguru ma-unytjunarinyangka kutju nyuranya wantikatira ankuku. Kan̄iya tjinguru iwaraku ungguku ngura kutjupa tjutakutu ngapartji ankunytjaku. ⁷ Panya ngayulu nyurala munga kutju ngarira waaratu ankunytjikitja mukuringkunytja wiya. Palu ngayulu rawa nguwanpa nyurala nyinanytjikitja mukuringganyi Mayatjanya mukuringkunyangka. ⁸ Palu kuwariña ngura nyanga Ipitjala nyinanyi panya tjirirpi Pintikatjaku paṭara. ⁹ Panya kuwari aŋangu tjuṭa tjukurku pulkara mukuringganyi, katju war̄ka pulka mulapa ngaranyi tjanala tjukurpa tjakultjunkunytjaku. Palu kutjupa tjuṭa tjukurpa Jesunyatjara tjanala tjakultjunkunyangka kuraringkupai. Palu kutjupa tjaraya pulkara mukuringganyi Jesunyatjara kulintjikitja munuya pukul̄tu kulini ngayulu wangkanyangka.

¹⁰ Palu tjinguru wati panya Timitjinya nyurala wirkankunyangkampa nyura palunya altira pukul̄tu kanyinma, panya paluru kuļu Mayatjaku

warkaripai nyinanyi ngayulu purunypaṭu. ¹¹ Munuya palunya wantintyta wiyangku atunyamanama munu iwaraku ungama paluru tjukutjuku nyurala nyinara pukulpatu aruringkunytjaku ngayulkakutu. Panya ngayulu palumpa paṭara nyinara nyanganyi paluru ngayula malaku wirkankunytjaku Jesuku walytja panya kutjupa tjuṭangka tjunguringkula.

¹² Kanā wanyu nyurala tjakultjura wati panya Apalatjanyatjara, panya paluru kuļu Jesuku walytja nyinanyi. Ngayulu palunya wangkara mukumukulpai nyuralakutu ma-pitjanytjaku walytja kutjupa tjuṭangka tjungu. Palu wati panya paluru putu nguwanpa kulilpai kuwaritu ankunytjikitjangku. Kuvari palumpa wiya ngaranyi ankunytjaku palu ngula tjinguru palumpa ankunytjaku ngaranyangka paluru nyuralakutu ma-pitjaku.

Tjururpa Malatja

¹³ Uwa, kulil-kulilpaya nyinama ngunti kulira iwara kutjupangka ankunytjaku-tawara. Munuya rawangku kulira Jesuku pulkara mulamularingama. Munuya palunya kulira rapa kunpu tiṭutjara ngarama.

¹⁴ Munuya warka uwankara palyanma palumpa mukulyatjarangku, anangu tjuṭaku kurunpa winki pulkara ngalturingkula.

¹⁵ Nyura tjinguru kulinu wati panya ini Tjipananya munu palumpa walytja tjuṭa kuļu, panya paluru tjana-warara Jesuku walytjaringu manta nyara Akayala. Munuya paluru tjana Godaku walytja kutjupa tjuṭa rawangku atunymankupai pakuringkula wantintyta wiyangku. ¹⁶ Kanā pulkara mukuringanyi nyura palula tjanala wangañarangku kulintjaku. Panya uti nyura anangu atunymankupai paluru tjana purunyti wangkanyangka wangañarangku kulira palyanma. Ka kutjupa tjuṭa kuļu palula tjanala tjunguringkula Godaku warka palyannyangka nyura palula tjanala kuļu wangañarangku kulinma.

¹⁷⁻¹⁸ Uwa, ngayulu rawangku kulilpai, "Yaalaranä nyuranya nyakuku." Palu kuwariṇa pulkara pukularingu wati nyanga mankurpa nyuralanguru pitjanyangka nyakula Tjipananya, Putjunatanya, Akaikanya tjananya. Paluru tjana panya wirkara ngayunya kurunpa pukulmanu panya paluru tjana nyuranya-warara pukulmaṛa wantikatingu. Ka nyura uti wati nyanga palu purunypa tjuṭangka wangañarangku kulinma.

¹⁹ Kaya Jesuku walytja tjuṭa mulapa manta nyanga Aitjala winkingka nyinara waṇinyi munuya paluru tjana nyuranya kulini nyurampa pukularira. Ka wati Akuwilalu munu palumpa kuringku Puritjilalu kuļu palu purunypaṭu nyuranya kulini, munu pulampa ngurangka inmaku tjunguringkupai tjuṭangku kuļu. ²⁰ Kaya palu purunypaṭu ngayuku nyanga malpa tjuṭangku kuļu nyuranya kulini.

Ka nyura uti anangu kutjupa Jesuku walytja nyakulampa palumpa pukularira maṛa witinma.

²¹ Lita nyangatja ngayuku malpangku walkatjunanyi ngayulu wangkanyangka kulira. Palu kuvari nyanganä ngayulu walytjangku mutumuṭu walkatjunanyi nyanga alatji, "Ngayulu Paulalu nyuranya kulini nyurampa pulkara pukularira."

²² Palu tjinguru kutjupa Mayatja Jesuku mukuringkunytja wiya nyinanyangkampa Godanya pala palumpa pulkara mirpañariku.

Palu wanyu kanā Jesula wangka nyanga alatji, "Mayatja Jesu, ngalyapitja."

²³ Uwa alatjituṇa walkatjunanyi. Ka Mayatja Jesulu nyuranya pukultju pulkangku kanyinma.

²⁴ Ngayulu nyurampa uwankaraku pulkara mukuringanyi Jesula Christa-languru. Uwa mulapa.

Lita Nampa 2 Paulalu Walkatjura Iyantja Ngura Karintjalakutu 2 Corinthians Nyangatja Ngañmanytju Nyakula Wangkanytjaku

Nyangatja Godaku tjukurpa kutjupa Paulalu walkatjura iyantja ngura ini Karintjalakutu. Panya ngura nyara palulaya Jesuku walytja kutjupa tjarangku kampangkaṭu Paulanya wangkangi munuya palunya kuranmanangi. Ka Paulalu nyara palumpa tjanampa uwankaraku pulkara mukuringkula tjanala kalypangku wangkangi, ka kunyu paluru tjana kuļu palumpa kalyparingu, ka paluru pulkara pukularingi tjana kalyparingkunyangka.

Ngañmanytju panya tjana palunya kuranmankunyangka Paulalu lita walkatjura palunya tjananya wangkara painingi, kaya kunyu Paulanya kuranmankunytjatjanungku lita mantjira nyakula pulkara kuntaringu munuya palumpa kalyparingu. Ka paluru kalyparingkunyangka kulira pulkara pukularingu tjanampa.

Munu palulanguru paluru tjanala wangkangi panya mulapa paluru Jesulu ngurkantara iyantja palumpa warika palyantjaku. Panya kutjupa tjarangku Karintjala nyinara palunyatjara wangkangi alatji, "Wiya, Paulanya Jesulu iyantja wiyatū. Nganañanya kutju Jesulu iyanu, kala nganana mayatja pulka nyinanyi Jesuku walytja tjutaku." Alatji paluru tjana ngunti wangkangi, ka lita nyanga palula Paulalu tjananya wangkara markuningi tjana ngunti wangkawiyangku wantintytjaku.

Munu paluru lita nyangangka tjanala maniku ngatjiningi tjana ngalturingkula ungkunytjaku Jesuku walytja kutjupa tjuta ngura nyara Jerusalemala ngaltutjara mani wiya nyinanyangka.

Tjukurpa nyanganpa ngarinyi:

- 1:1-11 Paulalu ngañmanytju wangkanytja
- 1:12—7:16 Paulalu tjanala tjukurpa tjuta wangkara nintintja
- 8:1—9:15 Jesuku walytja tjutangku uti ngaltutjara tjuta mani ungama
- 10:1—13:10 Paulalu tjananya paintja palunya anařa wangkanyangka
- 13:11-14 Paulalu tjukurpa mařatja wangkanytja tjana kulira kuňpu ngaranytjaku

Paulalu Ngañmanytju Wangkanytja

¹ Uwa, Jesuku walytja tjuta! Ngayuluña Paulalu lita nyangatja nyurampa walkatjunanyi ngura pala Karintjala nyinanytja tjutaku. Panya ngayuluña tjukurtjara Jesulu Christalu iyantja, panya Godaluňi ngurkantanu palumpa tjukurpa aňangu tjutangka tjakultjunkunytjaku. Kali Timitjilu ngali kuvari malpararangku tjunguringkula nyuralakutu lita nyangatja mařiana, munu Jesuku walytja kutjupa tjutakutu kuļu, panya manta pala Akayala nyinanytja tjutakutu kuļu.

² Ka Mama Godalu, Mayatja Jesulu Christalu kuļu nyuranya pukultju pulkangku atunymara kanyinma munu nyuranya kurunpa rapara pukulmanama.

³ Uwa, kala wanyu Godanya mirawanima Mayatja Jesuku Christaku Mama, panya paluru nganañanya ngaltunytju pulkangku kanyilpai

munulanya titutjarangku kunpulpai kurunpa rapa ngaranytjaku. ⁴ Panya pika munu kutjupa kutjupa tjuṭa kuļu ngananala wirkankunyangka paluru nganananya kurunpa rapalpai nganana ngapartji aŋangu kutjupa tjuṭa kuļu wangkara kunpuntjaku pika tjuṭa munu kutjupa kutjupa tjuṭa tjanala kuļu wirkankunyangka.* ⁵ Uwa, panya mirpantju tjutangkuya ngañmanytju Jesunya ananigi munu panyaya palunya pungangi, kaya kuwari nganananya palumpa walytja tjuṭa ngapartji palu purunypatū anaŋi munu punganyi. Palu panya Mama Godalu Jesunya kurunpa rapanu munu palunya kunpuntjatjanungku nganananya kuļu palu purunymananyi.

⁶ Tjinguru tjana ngalinya ananma munu pungama alatjiṭu Godaku warka nyurala palyannyangka. Palu palya, panya tjana ngalimpa pikaringkunyangka ngali kulira wantira alatjiṭu nyurala rawa warkarinyi nyura kurunpa raparingkula wankaringkunytjaku. Panya tjana ngalinya nyanga alatjingannyangka Mamalu ngalinya kurunpa kunpulpai nyuranya ngapartji kurunpa wangkara kunpuntjaku munu rapantjaku. Ka nyara palulanguru pika palu purunypa tjuṭa nyurala wirkankunyangka nyura kuļu ngali purunytju kuŋpu ngarala titutjarangku Jesunya waŋalku nguluringkula wantinytja wiyangku. ⁷ Palu nintingkuli nyuranya kulini nyura kuŋpu nyinanyangka. Panya pika tjuṭa ngalila wirkananyi, pala palu purunypa nyurala kuļu wirkananyi. Ka panya Godalu ngalinya kurunpa kunpuntjatjanungku nyuranya kuļutu kurunpa kuŋpuni ngalinya purunypatū.

⁸ Uwa, walytja tjuṭa! Wanyu kali nyurala tjakultjura ngali manta nyanga Aitjala ngura tjuṭangka para-ngaranytjatjanungku. Panya mirpantju tjuṭangku ngalinya rawangku kuraningi ngali Tjukurpa Palya Jesunyatjara aŋangu tjuṭangka tjakultjunkunyangka. Panya ngalinyaya tjana ananigi munu painingi munulinya pulkara pungangi. Kali puṭu nguwanpa kulinungi rawangku kurannyangka, munuli kurunpa paku pulkaringkula alatji kulinungi, "Ngali tjinguru iluku. ⁹ Nyangatja mulapa ngali ilunytjakutu ngaranyi." Alatjili kulinungi panya Godalu tjinguru ngalinya kurantjaku-tawara anga-kanyinma, palu paluru ngalinya wantingu pikawanu palumpa warkarira pulkara raparingkunytjaku. Palu mulapa nyanga alatjiringu ngalinku walytjangku pulkara kulira kaŋany-kaŋanyarintjaku-tawara, panya Godanya ngalimpa mukuringu palulawanu kutju ngali rapa ngaranytjaku, panya paluru kutjungku miri ilunytja wankara pakaltjingalpai. ¹⁰ Palu mulapalinya Godalu wankařunu ngalimpa mirpantju tjutangku ngalinya nguwanpa iluntankunyangka. Munulinya titutjarangku wankaru kanyilku. Ka ngali palumpa pulkara alatjiṭu mulamularinganyi paluru ngalinya titutjarangku tjintu kutjupa tjintu kutjupa wankaru kanyilkatinytjaku. ¹¹ Kaya wanyu nyura ngalinya alpamilanma munu ngalimpa Godala rawangku tjapinma. Ka paluru nyurala kulilku munulinya pukultjungku kanyilku. Ka aŋangu tjuṭangku palunyalta mirawaŋira walkulku paluru ngalinya wankaru wirura kanyinnyangka nyakula.

Paulalu Ankunytjikitjangku Kulira Wantinytja

¹² Uwa, Godalulinya pukultjungku kanyini kali palulanguru warka palumpa tjukarurungku palyani. Ngali mantangka nyanga nyinara aŋangu mantatja kulipai tjuṭangka tjunguringkula palyalpai wiya, panya tjana nintipukangku-palku walytjangku kulira palyalpai. Palu ngali

Godalu nintinnyangka kutju kulira tjukarurungku palyalpai palumpa mukuringkula kurunpa winkingku, munuli palulanguru pukularinyi. Ka tjinguru nyura kutjupa tjarangku kulini ngali nyuranya ngunti kurannya-palku. Palu wiya, ngali panya mungatu Karintjala nyinara nyurala tjukaruru alatji nyinangi Godalu kutjungku ngalinya kunpunyangka. ¹³⁻¹⁴ Kali lita nyangatja nyurampa walkatjunanyi nyura ngalinya tjukarurungku kulintjaku ngunti kulira wantintytjaktawara. Kuwari nyanga nyura tjukurpa tjara kutju uti kulinu ngali wangkanyangka. Palu nyura ngula tjukurpa uwankara uti kulikku munu nyura Mayatja Jesunya malaku pitjanytja-arangka ngalimpa pulkara pukulariku, kali ngali ngapartji nyurampa pulkaratu pukulariku nyura Tjukurpa Palya kulira mulamularingkunytjtja-nguru.

¹⁵⁻¹⁶ Uwa, mulapa nyura ngalimpa ngula pukulariku. Kana palulanguru kuliningi nyuranya kutjara-arangku ma-pitjala nyakunytjikitjangku munu nyuranya kunpura pukulmankunytjikitjangku. Panya ngayulu Karintjala munikara waintara ankunytjikitjangku kuliningi manta nyara Matjatuniyalakutu mununa nyurala-warara wirkara tjunguringkunytjikitja mukuringangi nganmanypa mununa palulanguru Matja-tuniyalanguru aruringkula piruku nyurala wirkankunytjikitja mukuringanyi. Kani nyuralta ngayunya Judealakutu alpamilara ma-iyalku. Alatjina kuliningi nyuranya kutjara-arangku ankula nyakunytjikitjangku, palu putuna kuliningi. ¹⁷ Ka tjinguru nyura kutjupa tjarangku kulini ngayulu ngunti wangkanyangka-palku munu nyura alatji tjinguru ngayunya kulini ngayulu kampa kutjara wangkanyangka-palku mantatja kulilpai tjuṭa purunypa. Palu mulapaña nyuranya kutjara-arangku nyakunytjikitja mukuringangi. ¹⁸ Panya ngayulu kampa kutjara wangkapai wiya, panya Mama Godalu tjukarurungku wangkapai, palu purunytu ngayulu tjukarurungku nyurala wangkanyi. ¹⁹ Panya Jesulu Christalu Godaku katjangku kalkuntjatjanungku tjukarurungku palyalpai mala wiyanmankunytja wiyangku. Nyura ninti palumpa, panya Tjaalatjalu Timitjilu nganana tjukurpa palunyatjara nyurala nganmanytu wangkangi. ²⁰ Panya Mama Godalu tjuṭa-arangku ngananaanya kalkuningi kutjupa kutjupa tjuṭaku. Palu panya Jesulu Christalu mantakutu pitjala Godalu panya kalkuntja uwankara nganampa palyaṇu. Kala nyara palulanguru Jesulu palyanngangka Godanya mirawanira walkura wangkapai alatji, "Mulapa Mamalu tjukarurungku kalkunu." ²¹ Ka nyuntunya ngananaanya Mama Godalu tjungura tjunu Jesula kutjungka tjungu titutjara nyinanytjaku. Panya palurulanya ngurkantanu munulanya maunṭalpa tjunu Christala tjungu kunpu nyinanytjaku. ²² Munu panya paluru Kurunpa Milmilnga ngananaala kutjungka kutjungka unngu tjarpatjunu aŋangu tjutangku ngananaanya nyakula kulintjaku, alatji, "Mulapa nyanganpa kuwari Jesuku walytja tjuṭa nyinanyi." Panya watingku pulukangka purantatjunkupai palumpa alatji ngaranytjaku, palu purunypa Godalu ngananaala Kurunpa Milmilnga tjarpatjunu palumpa ngaranytjaku. Kala nyara palulanguru nintingku kulini, "Mulapa Godalu ngananaanya ngula wiru tjuṭa kalkuntjatjanungku ungguku."

²³ Uwa, Mama Godanya ngayuku ninti panya ngayulu tjukarurungku wangkanyi. Tjinguru ngayulu Matja-tuniyalakutu ankunytjikitja nyurampa ngurangka-warara wirkankuku mununa nyuranya wangkara markulku ngunti-ngunti panya palyantjtja tjuṭanguru, ka nyura tjinguru kulira tjiṭuru-tjiṭururiku. Palu pala palula-tawaraṇa wantingu ngura pala Karintjalakutu ma-pitjanytja wiyangku ngayulu nyuranya painnyangka

nyura tjituru-tjitururinytjaku-tawara. ²⁴ Palu ngali panya mayatjarira wangkara nyuranya mulamularingkunytjaku uñtuntja wiyangku wantingi. Panya nyura ngañmanypa alatjiú Jesuku mulamularingu munu nyura kùnpungku palunya tiütjarangku wañani. Nyara palulanguruli nyurala tjungu war̄karinytjikitja mukuringanyi nyura pukulpa nyinanytjaku.

2

¹ Uwa, ngayulu nyuralakutu ma-pitjanytjikitjangku kulira wantingu nyura ngayulu wangkanyangka kulira tjituru-tjitururinytjaku-tawara. ² Panya ngayulu alatji kuliningi, “Tjinguruaya ngayulu tjanala ma-wirkara wangkara painnyangka paluru tjana tjituru-tjitururiku, ka nyara palulanguru tjana ngapartji ngayunya pukulmankunytja wiyangku wantiku tjituru-tjitururinytjatjanungku.” Alatjina kuliningi. ³ Mununa palulanguru wantira litangka kutju walkatjura nyuranya painingi munu panyana nyuralakutu ma-iyanu lita panya palunya.* Tjinguruña ma-pitjalampa nyuranya wangkara pailku ka nyura ngayuku kuraringkuku kaña tjituru-tjitururiku, palu ngayulu mukuringangi nyuranya nyakula pukularinytjikitja. Palulanguruña wantira lita kutju walkatjura ma-iyanu ngayulu nyurampa pukularinyangka nyura kuļu pukulpa nyinanytjaku. ⁴ Panya ngayulu kurunpa winki ulara lita panyangka walkatjura nyuranya painingi nyura tjukaruru nyinanytja-tjiratjangku. Ka nyura tjinguru ngunti kuliningi ngayulu nyuranya tjituru-tjituru palyantjikitjangku lita nyurampa walkatjunkunyangka-palku. Palu wiya, ngayulu walkatjunu nyura nyakula kulintjaku alatji, “Munta-uwa, mulapa paluru nganampa pulkara mukuringkula lita nyangatja nganampa iyanu.”

Kurannyangka Kalyparingkunytja

⁵ Panya añangu kutjungku kunyu nyurala tjungutjangku kura palyaňu, kaña kulira tjituru-tjitururingu. Nyangatja ngayunya kutju tjituru-tjturu palyantja wiya, palu nyuranya kuļu tjituru-tjturu palyaňu uwankaratu, mutta tjinguru tjara kutju. (Tjinguruña uwankara wangkara tjukurpa nyangatja ngunti pulkalku.) ⁶ Panya nyura palunya paira ngañmanytju tjukaruruňu. Kaña nyuranya kuwari wangkanyi, “Palyaltaya wantima! Alatjiú nyura painu.”

⁷ Utu nyura wati palunya kalypangku wantima munuya palunya pukultu kanyinma pulkara tjituru-tjtiturira Godalanguru paṭuringkunytjaku-tawara. ⁸ Kaña nyuranya wangkara wituwituni palunya malakungku mantjira mukulyangku kanyintjaku.

⁹ Panya lita ngañmanyitjaña walkatjura ma-iyanu nyurampa kulira nintiringkunytjikitjangku, tjinguru nyura wanganarangku kulira palyalku mutta tjinguru nyura wantiku. ¹⁰⁻¹¹ Tjinguru nyura wati palaku nyuranya pala kuralpaiku kalyparingu palunya ngapartji kurantja wiyangku wantira, kaña ngayulu kuļu palumpa kalyparinganyitu. Tjinguru paluru ngayunya kuramanu, tjinguru wiya. Palu ngayulu nyurampa mukuringkula wati palunya kurantja wiyangku wantinyi mununa Christala miřangka palumpa kalyparinganyi Satantu uwankara nganañanyaňu kurantjaku-tawara, panya nyuntu nganaña ninti mamuku araku, panya

* ^{2:3} Paulalu lita mankurpa walkatjura iyanu Karintjala nyinanytja tjułakutu. Ka lita ngururitja tjana mantjira riitamilaningi, ka palula malangka lita paluru kawaliringu, ka kuwari nyiri nyanga Bible-ta wiya ngaranyi kutjara kutju ngaranyi. Ka verse 3 Paulalu wangkanyi lita panya ngururitja.

paluru tiṭutjarangku nganananya kulini munu nyanganyi kurantjikitjangku.

Paulanya Ngura Taruwatjala Tjituru-tjitururintja

¹² Uwa, ngura nyara Taruwatjalakutuña anu Tjukurpa Palya Jesunya Christanyatjara wangkanytjikitja munuña ngura pala palula wirkara nyangu aŋangu wangaŋara tjuta nyinanyangka, panya Mayatja Jesulu tjanala ngañmanytu kurunta wangkangu palumpa tjukurpa wan- gañarangku kulintjaku. ¹³ Palu putuña nyangangi wati panya ngayuku malpa Taitatjanya. Munuña palulanguru tjituru-tjitururira aŋangu tjuta tjakuriña wantikatira anu manta nyanga Matja-tuniyalakutu.

Jesunya Christanya Nganampa Kuranyitja

¹⁴ Uwa, wanyula Godaku pukularira palunya mirawanima, panya paluru Christalawanungku nganananya rawangku witulyankupai palumpa Tjukurpa Palya aŋangu tjutangka para-tjakultjunkunytjaku, kaya palumpa mirpantju tjutangku nganananya putu alatjitu kuralpai Godalu nganananya witulyankunyangka. Kaya ngura winkingka aŋangu tjutangku tjukurpa palunya kulira Jesuku Christaku nintiringkupai. Tjukurpa paluru panya panti wiru purunypa ngura tjutangku lipiringkupai. Panya panti wiru pantinyangka aŋangu tjutangku pantilpai, palu purunypa nganaña tjukurpa Jesunyatjara para-wangkanyangka aŋangu ngura winkitjangku kulira nintiringkupai palumpa. ¹⁵⁻¹⁶ Uwa, nganaña Jesulu iyantja tjutangku tjukurpa palunyatjara aŋangu uwankarangka tjakultjunkupai, kaya Godalu wankarunkunytja tjutangku kulira pukularipai munuya paluru tjana wankaringanyi nganaña Godaku tjukurpa wangkanyangka kulintjatjanu. Panya aŋangungku panti wiru pantira pukularipai, palu purunypaya Godaku tjukurpa kulira pukularipai. Palu Godanya wantipai tjutangkuya kulira alatjitu wantipai munuya palulanguru ngula iluku alatjitu. Panya aŋangungku kuka uña pantira wantipai, palu purunypa paluru tjana nganananya wangkanyangka kulira wantipai.

Uwa, war̄ka pulka mulapa nyangatja Tjukurpa Palya Jesunyatjara para-wangkanytjaku, ka nganalu wanyu tjukarurungku palyalku? Wiya, kutjupangku waltyangku putu tjukarurungku palyalpai. ¹⁷ Panya tjara kutjupangkuya manikitjangku tjukurpa para-wangkapai, palu nganaña tjananya purunypa wiya, panya Godalu witunnyangkala palula mirangka tjukarurungku palumpa tjukurpa wangkapai Jesula wanganarangku kulira.

3

Kalkuntja Kuwaritja Wiru Mulapa

¹ Tjinguru tjukurpa nyangatja wangkanyangka nyura kulini nganananya kulira waltyangku mirawanintja-palku wati panya paluru tjana purunypa. Palu wiya, waltyangku mirawanintja wiyla. Palu wati panya paluru tjana ngura tjutakutu ankunytjikitja mukuringkula wati tjukurtjarangka tjapilpai nyiringka walkatjura tjananya ungkunytjaku, ka walkatjunkupai tjanampa alatji, “Wati wiru tjuta nyanganpa, Godaku war̄ka tjukarurungku palyalpai tjuta.” Kaya lita palunya katira nintilpai ngura kutjupangka kutjupangka, kaya nyakula tjananya palyanmankupai tjukurpa wangkanytjaku. Palu ngali lita pala palu purunypa nyurala katira nintintja wiya nyura nyakula ngalinya palyanmankunytjaku. Munuli

piruku lita nyura walkatjunkunytja kulu katira anangu kutjupa tjutangka ngapartji nintilpai wiya ngura kutjupangka ngalinya nyakula tjana palyan-mankunytjaku. ² Panya nyura lita purunypa ngalimpa kurunta ngaranyi, panya anangu kutjupa tjutangku nyuranya Jesuku waltyjaringkula wirura nyinanyangka nyakula kulilpai, “Munta-uwa, wati panya paluru pula tjanala tjukurpa mulapa wangkangu, kaya tjukaruru mulamularingu.” Alatjiya nyakula kulilpai. ³ Panya Christalu nyuranya kurunpa wankarunu ngali nyurala tjukurpa palunyatjara tjakultjunkunyangka, ka nyara palu-languru kutjupa tjutangku nyuranya nyakula ngalinya palyanmananyi alatji wangkara, “Munta mulapa Christalu wati nyanga palunya pulanya iyanu tjanalakutu.” Panya Godalu Kurunpa Milmiltu nyiringka munu tjiwangka kulu walkatjunkunytja wiyangku nyurala kurunta walkatjunu munu nyuranya kampa kutjupanu palumpa waltyjaringkunytjaku.

⁴ Nyangatjali Godaku pulkara mulamularingu kula wangkanyi panya Christalu rapara kanyinnyangka. ⁵ Ngali warka nyangatja waltyjangku kulira palyantja wiya. Pululi kulilpai waltyjangku palyantjikitjangku, palu Godalu nintinnyangka kutjuli palyalpai. ⁶ Nyara paluru nintinnyangka kutjuli tjukurpa kuwaritja paluru panya kalkuntjtja anangu tjutangka tjakultjunkupai. Tjukurpa nganmanyitja panya Mosenya walkatjura ungu nganana wanganarangku kulira kulintjaku munu tjukaruru nyinanytjaku, ka nganana tjukurpa palula wanganarangku kulintja wiyangku wantinyangka Godalu nganananya pungkunytjaku ngaranyi. Palu ngali tjukurpa pala nganmanyitju walkatjunkunytja nyurala wangkanytja wiyangku wantinyi munuli tjukurpa nyanga kuwaritja nyurala tjakultjunnanyi Kurunpa Milmiltu nintinnyangka, ka tjukurpa nyara palulawannungku Kurunpa Milmiltu nyuntunya nganananya wankaru kanyini pungkunytja wiyangku.

⁷ Panya Godalu nganmanyitju tjukurpa pulka puli tjiwangka walkatjura Mosenya ungu, ka panya tili Godaku pitalytji pulka palula irnyaningi ka paluru yunpa pitalytjiringu. Kaya anangu tjutangku putu palunya tjukarurungku nyangangi panya kuruya paulyaringu pitalytji pulkangku irnyannyangka. Tili nyara paluru Moseku panya yunpangka matjukutjukuringangi palu anangu tjutangku putu alatjitu nyangangi palumpa yunpa. Palu tjukurpa pulka nyara palulanguru anangu tjuta putu wankaru nyinangi, panya paluru tjana tjukurpa palula rawa tungunpungangi ka Godalu tjananya pungkunytjaku ngarangi. ⁸ Uwa, Godalu tjukurpa palunya pitalytji winkingku Mosenya ungu, palu kuvari tjukurpa panya kutjupalta wirkana panya Kurunpa Milmilngatjara wiru mulapa nyara Mosenya ungkunytjtangka munkara mulapa, panya Kurunpa Milmiltu ngananala unngu nintira wiru mulapalta palyanu.

⁹ Uwa, Godalu pitalytji pulkangku Mosenya tjananya tjukurpa ungu, palu tjukurpa nyara palulanguru Godalu tjananya kuranmanangi tjana tungun-pungkula wantinyangka. Ka kuvari tjukurpa kutjupalta wiru mulapa ngaranyi Kurunpa Milmiltu nganananya wankarunkunytjaku. Nyanga palunya Godalu wiru mulapa palyanu panya Mosenya ungkunytjtangka munkara mulapa. ¹⁰⁻¹¹ Panya tjukurpa nganmanyitja paluru wiru mulapa ngarangi pitalytji pulkatjara. Palu kuvari tjukurpa kutjupa pitalytji pulka mulapalta utiringu tjukurpa nyara nganmanyitjangka munkara mulapa, munu paluru wiyingkunytja wiya titutjara alatjitu ngaraku.

¹² Kali tjukurpa nyanga palunya kurunpa winkingku kulira kurunpa raparinganyi munula rapangku wangkapai. ¹³ Panya ngali Mosenya

purunypa wiya, panya Moselunku yunpa tjutunu mantarangka palumpa yunpa irnyantja panya ma-wiyaringkunyangka nyakunytjaku-tawara Israekunu tjutangku. ¹⁴⁻¹⁵ Palu paluru tjana tjukurpa Godalu Mosenya ungkunytjtja tjanala wangkanyangka kulira pina patiringu. Munuya kuwari kulu pina patitu nyinanyi. Palu panya Jesuku Christaku mulamularingkula kutju pina alaringkupai. Palu kuwari nyanga Moseku tjukurpa tjanala wangkanyangkaya pina pati mantarangka tjutuntja purunypa nyinanyi kulintja wiya alatjitu. ¹⁶ Palu tjana Mayatjalakutu malaku aruringkunyangkampa paluru tjananya pina alalku tjukurpa tjukarurungku kulintjaku. ¹⁷ Panya Mayatja paluru Godaku Kurunpa, ka Kurunpa nyara paluru ngananaala nyinanyangka nganana Godala tjunguringkula nyinanytjaku ngaranyi alatjitu. ¹⁸ Moselunku yunpa palurunku mantarangka tjutunu, kaya Israelkunu tjutangku yunpa palumpa irnyannyangka putu nyangangi. Ka panya nganana palunya tjananya purunypa wiya, panya nganana uti alatjitu nyanganyi Jesunya pitalytji pulka irnyannyangka mayatja pulka mulapa. Ka Mayatja Godalu Kurunpa Milmiltu ngananaanya titutjarangku palu purunypa palyalkatinyi wiru mulapa nyinanytjaku pitalytji wiru palunya purunypa.

4

Godalu Ngalinya Piti Kurakura Purunypa Mantjintja

¹ Uwa, Godalulinya ngaltunytju pulkangku warika nyanga wiru ungu tjukurpa palumpa wangkanytjaku, kali palulanguru pukultu palyani pakuringkula wantintja wiyangku. ² Munuli kampangkatu kura kutjupa kutjupa tjuتا palyantja wiyangku wantipai alatjitu, munuli anangu kutjupa ngunti wangkara kuralpai wiya, munuli Godaku tjukurnguru kampa kutjupara ngunti wangkapai wiya. Panya Godanya ninti ngalimpa ngali tjukarurungku kutju anangu tjutangka wangkanytja paluru tjana ngalinya tjukarurungku wangkanyangka ngurkantara kulin-tjaku. ³ Anangu kutjupa tjarangku Godanya kulilwiyangku wantipai munuya iwara kurangka titutjara ananyi mirikutu. Munuya paluru tjana Tjukurpa Palya ngali wangkanyangka kulira putu kulilpai. ⁴ Panya manta nyangaku mayatjangku Satantu tjananya pina patira kanyini Tjukurpa Palya Jesunyatjara kulira mulamularingkunytjaku-tawara. Palu Tjukurpa Palya nyara paluru tili purunypa wiru ngaranyi, panya tili irnyalpai anangu tjutangku uti nyakunytjaku, palu purunypa Tjukurpa Palya nyara paluru ngaranyi, ka anangu tjutangku tjukurpa palunya kulira nintiringkupai Jesuku wankarunkupai wiruku, panya paluru Godanya purunypa alatjitu nyinanyi. ⁵ Panya ngali ngura tjutangka tjukurpa ngalinyatjara wangkanytja wiya, palu tjukurpa nyangatja kutjuli tjakultjunkupai panya Jesunya Christanya anangu uwankaraku mayatja nyinanyi. Kali warika nyangatja nyurampa palyani paluru ngalila wangkanyangka. Alatji kutjuli wangkapai. ⁶ Panya Godalu kuwaripat-jara mungawaluru pulka ngaranyangka wangkangu kalalarintjaku ka kalalaringu, munu God panya paluru nyuntunya ngananaanya palu purunytjutu mungawalurungka nyinanyangka irnyara kaalaanu nganana pina alaringkula mulamulangku kulintjaku panya Godalu ngananaanya Christalawanungku wankarunu.

⁷ Palu kulilaya! Tjinguru kutjupangku piti kurakura tjulpirnguru palyantja mantjini munu kutjupa kutjupa wiru mulapa tjunanyi piti palula. Ka palu purunytjutu Godalu ngalinya piti kurakura kutjara purunypa mantjinu,

munu ngalila unngu wiru mulapa tjunu Tjukurpa Palya Jesunyatjara ngali anangu tjutangka wangkara utintjaku. Panya ngali ngaltutjara kurakura kutjara ka nyura kulinma tjukurpa nyangatja ngalilanguru wiya, Godalanguru. Panya ngali Tjukurpa Palya wangkanyangka nyara paluru kutjungku anangu tjuta kulira wangañararingkunytjaku palyalpai.

⁸ Panya ngali Tjukurpa Palya anangu tjutangka wangkanyangka kutjupa tjarangku ngalinya rawangku wiyanmankupai munuya ngalinya pailpai wangkanytja wiyangku wantinytjaku. Palu ngali wantinytja wiyangku tungun-tunguntu alatjitu wangkapai. Kutjupa-arali putuliripai Godaku warika kulira palyantjikitja, palu ngali palumpa rawa alatjitu mulamularingkupai wantinytja wiya. ⁹ Kalinya kutjupa-aña anangu mirpañtju tjutangku kuraringkula pailpai tjukurpa wangkanytjaku-tawara, palu Godalu ngalinya wantir'iyantja wiyangku rawangku alatjitu atunyntju kanyilpai. Kutjupa-araya ngalinya pungkula anta-wanipai mantangka, palu tjana ngalinya puñu iluntankupai.

¹⁰⁻¹¹ Uwa, tjana rawangku ngalinya iluntankunytjikitjangku pikangku wañarinkupai, panya nganmanytjuya Jesunya iluntanu, palu purunytjuya kuwari ngalinya ngapartji iluntankunytjikitjangku nyanganyi. Uwa, ngali warika nyanga Jesuku rawangku palyannyangka tjana titutjarangku ngalinya iluntankunytjikitjangku wañarinkupai. Palu palya, panya ngali Jesuku warkarira nguwanpa ilunyangka nyura ngapartji Jesunya kulini munu palumpa mulamularingkula wankaringanyi. ¹² Kulini nyura? Panya tjukurpa nyanga palunya wangkanyangka tjana ngalinya punganyi, kali nguwanpa ilunyi, palu nyura tjukurpa ngali wangkanytjitunguru kulira wankaringanyi.

¹³ Panya nganmanytju nyiringka walkatjunkunytja ngaranyi alatji, "Ngayulu Godaku mulamularingkunytjatjanungku anangu tjutangka tjakultjunangi tjukurpa palunyatjara." *

Ka ngali palu purunypatu Godaku mulamularingkunytjatjanungku tjukurpa palunyatjara wangkanyi. ¹⁴ Panya ngali nintingku kulini panya Mama Godalu Mayatja Jesunya wankara pakaltjingañu munu palu purunypatu ngalinya wankara pakaltjingalku nyuranya kulu tjungura munulanya uwankara katiku Jesula tjunguringkula nyinanytjaku. ¹⁵ Panya tjana ngalinya iluntankunytjikitjangku wañarinkupai nyurala Tjukurpa Palya Jesunyatjara wangkanyangka. Palu palya, ngali pikawanungku nyurampa palyani nyura kulira Jesuku mulamularingkunytjaku. Ka ngura tjutangka ngali pikawanungku Tjukurpa Palya tjakultjunkunyangka Godalu anangu tjuta ngaltunyntju pulkangku palyani palumpa walyt-jaringkunytjaku, kaya nyara palulanguru paluru tjana tjuta mulararira palunya mirawañira pulkara walikulku.

Rawangku Kurannyangka Godaku Mulamularingkunytjaku

¹⁶ Ka ngali pakuringkula wantir'iyantja wiyangku titutjarangku alatjitu Jesunya wañani. Ngali panya ma-tjilpiringkula puntu ma-uparinganyi, palu Godalu ngalinya kurunpa rawangku kunpulkatinyi tjintu kutjupa tjintu kutjupa. ¹⁷ Uwa, mantangka nyanga nyinanyangka pika kutjupa kutjupa tjuta ngalila rawa utiringkupai. Palu pika nyanga paluru tjana unytju ngarapai, rawa ngaranytja wiya, palu ngula ngalimpa wiru mulapa utiringkuku titutjara Godala tjungu pukulpa nyinanytjaku. ¹⁸ Panya pika paluru tjana utitja tjuta munuya unytju ngarala wiyingkuku, palu panya Godaku ngura wiru arkayitja titutjara ngarapai wiyingkunytja wiya

* ^{4:13} Psalm 116:10

alatjitu. Palulanguruli utitja nyanga tjuṭa rawangku kulintja wiyangku wantinyi, munuli arkayitja tjuṭa waintara kulilpai.

5

¹ Panya mantangka nyanga nyinara nganaṇa kurunpa puntu winki nyinapai, panya nganaṇa wiltjangka tjarpala nyinapai, palu purunypa nganaṇala kurunpa puntungka unngu nyinanyi. Palu ngula nganaṇa ilunyangka Godalu puntu kuwaritjangka nganaṇanya tjarpatjunkuku paluru palyantjitjangka, kala puntu palunyatjara palumpa ngurangka titutjara wanka nyinaku. ² Panya mantangka nyanga nyinara nganaṇa puntu uparingkupai, munula puntu ilkaritja-tjiratjangku waintara pulkara kulilpai ngula Godalu nganananya puntu ilkaritja ungkunyjtaku. Panya nyangatjala puntu mantatja mantara kurakura purunypatjara nyinanyi, palu ngula nganaṇa puntu ilkaritja mantjilku munula mantara wiru purunypatjara nyinaku. ³ Panya nganaṇa ngula ilunyangka Godalu nganananya ungkuku puntu kuwaritja nganaṇa puntu pala palula tjarpala pukulpa nyinanyjtaku.

⁴ Panya nganampa puntu nyanga mantatja wiltja purunypa pupanyi, panya wiltja rawa pupanytja wiya unytju kutju ngarala wiyingkupai, palu purunypa. Panya puntu nganampa pikatjararingkula kaarngarapai munu uparingkupai munu ilupai, kala ngula puntu palunya mantara kurakura purunypa wantikatinyi puntu kuwaritja-kitjangku. Panya puntu nyangatja wiyingkunyangka Godalu nganampa puntu wiru kuwaritja palyalku nganaṇa puntu palula tjarpala wanka titutjara nyinanyjtaku ilunytja wiya alatjitu.

⁵ Uwa, Godalulanya nganmanytju kalkunu puntu kutjupa ungkunyjikitjangku ilkaritja wiru. Panya paluru Kurunpa Milmilnga-warara nganaṇala unngu tjarpatjunu nganmanytju. Kala kurunpa palunyatjarangku nintingkulta kulini, “Mulapa paluru ngula nganaṇanya puntu kuwaritja ungkuku.” ⁶ Palulangurula pukulpa rapa nyinanyi ilunytja kulira nguluringkunyta wiya.

Panya nganaṇa ninti puntu nyanga mantatjara nyinara nganaṇa mantangka nyinanyi, ngura ilkaritjangka Mayatja Jesula tjungu nyinanytja wiya. ⁷ Palu palya, panya nganaṇa Godalu kalkuntjtaku mulamularingkula munkaritjaku ala-alā paṭani. Palu kuwarila nyakunyta wiya, munula mulamularingkula kutju nganaṇa rapa paṭani palumpa. ⁸ Uwa, mulapa nganaṇa rapa nyinanyi ilunytja kulira nguluringkunyta wiya. Panya nganaṇa mukuringanyi ilura puntu nyangatja wantikatinytjikitja munu puntu kuwaritjangka tjarpala Mayatja Jesula tjunguringkula palumpa ngurangka nyinanytjikitja. ⁹ Palu nganaṇa kutjuku pulkara mukuringanyi panya Mayatja Jesunya pukulmankunyjtikitja. Tjingurula mantangka nyanga nyinara palunya pukulmankuku, munta tjingurula ngura nyara ilkariringka nyinara palunya pukulmankuku.

¹⁰ Panya nganaṇa uwankaraṭu ngula Christala kuranyu ngaraku paluru nganaṇanya ngurkantara tjaratjaku, kalanya kutju kutju paluru ngurkantara wangkaku nganaṇa mantangka nyanga nyinara palyantjtja-nguru. Munu paluru wiru nyinanytja ngurkantara palyanmankuku munu kura nyinanytja ngurkantara kuranmaṛa pailku.

Godaku Malparingkunyjtaku Jesula Christalanguru

¹¹ Uwa, Mayatja Jesunya pulka mulapa nyinanyi, kali wanganarangku palula kulilpai kurunpa winkingku. Munuli palulanguru anangu kutjupa

tjuṭa kuļu wangkara wituwitulpai paluru tjana kuļu kulira palunya wañantjaku. Panya Godanya ngalimpa ninti nyinanyi panya ngali palumpa tjukaruru warkaripai, munuli unngu kulilpai alatji, "Wanyuwi anangu nyanga Karintjala nyinanytja tjutangku ngali wangkanyangka tjukarurungku kulinma!"¹² Panya ngali nyurala tjukurpa wangkara ngalinku walytjangku mirawaninytja wiyangku wantinyi. Munuli mukuringkunytja wiya nyura ngalinya kulira pułkanmankunytjaku. Palu ngali mukuringanyi nyura ngalimpa pukularinytjaku kutju warka nyanga palunya palyannyangka. Ka tjinguru kutjupa tjutangku ngalinya wangkara kurannyangka kulira nyura ngalimpa mukuringkula tjananya wangkara painma wangkawiyangku wantinytjaku. Panya anangu nyara paluru tjana anangu kutjupa nyakula palunya yunpa munu mantara wirutjara ngaranyangka kutju nyakula wirunmankupai, munuya unngu kulintjtja nyakunytja wiya alatji.

¹³ Tjinguru kutjupa tjarangku ngali wangkanyangka kulira ngalinya kata kawakawanmananyi ngunti wangkanyangka-palku. Palu palya, ngali wantira Godanya pukulmankunytjikitjangku kutju kawakawa puřunytju tjukurpa wangkanyi. Ka tjinguru kutjupa tjutangku ngali wangkanyangka kulira palyanmananyi, ka ngali kulira kañany-kañanyarinytja wiyangku wantinyi panya ngali nyuranya kuṇpuntjikitjangku kutju tjukurpa wangkanyi.

¹⁴⁻¹⁵ Panya Christalu mukulya pulkangku kanyinnyangka ngali palula wanganarangku kulira palyalpai. Munuli tjukurpa nyangaku ninti panya wati kutju ilungu anangu uwankaraku ngalkilpa. Panya Godalu nyuntunya nganañanya kura tjuṭa palyantjitjanguru uwankara pungkula wiyanjtjaku ngarangi. Palu Jesunya nyuntumpa nganampa anga-ilungu anangu uwankaraku ngalkilpa nganaña wankaringkula palula kutju wanganarangku kulintjaku. Panya paluru ilunytjatjanu wankaringkula pakañu nganaña palunya kutju wañara pukulmankunytjaku, walytjangku pukulmankunytjaku wiya.

¹⁶ Nganmanytjuli anangu tjuṭa nyangangi anangu mantatja kulilpai tjuṭa puřunytju. Panya nyara paluru tjana anangu kutjupa nyakula utitja tjuṭa kutju nyakupai yunpa munu mantara munu anangu paluru wangkanyangka kuļu kulilpai munuya utitja nyanga palula tjanalanguru kutju anangu palunya wirunmankupai, munta tjinguru palunya kuramankupai. Ka panya ngali palu purunytju Christianity nganmanytju nyangangi. Palu kuwarili nintiringkula palunya tjukarurungku kulini, munuli anangu tjuṭa kulu tjukarurungku kulini utitja tjuta kutju nyakunytja wiyangku. ¹⁷ Panya anangu kutjupa Jesuku walytjaringkunyangka Godalu mulapa kampa kutjupankupai kuwaritjaringkunytjaku. Panya nganmanypa paluru iwara kurangka anangi, palu paluru Jesuku walytjaringkunyangka Godalu palunya iwara palyangka tjunu, ka paluru kura wantira kampa kutjuparingu munu kulintja kuwaritjaringu.

¹⁸ Uwa, Godalulanya kampa kutjupanu, panya paluru Jesunya Christianity iyañu nganampa ngalkilpa ilunytjaku, ka nyara palulanguru nganaña wankaringu ka Godanya nganampa kalyparingu. Munu paluru nganañanya witunu anangu kutjupa tjutangka para-tjakultjunkunytjaku Tjukurpa Palya Jesunyatjara tjana kulira mulamularingkunyangka Godanya tjanampa kuļu kalyparingkunytjaku. ¹⁹ Panya Godanya Jesula Christalanguru anangu uwankaraku kalyparingu paluru nganampa ngalkilpa ilunyangka munu paluru nganañanya pungkunytjaku wiyaringu. Munulanya paluru witunu tjukurpa nyanga wiru palunya anangu

tjuṭangka para-wangkanytjaku tjana kulira mulamularingkunyangka Godanya tjanampa kulu kalyparingkunytjaku.

²⁰ Uwa, ngali Godaku tjakulpa para-ngaṛanyi, panya paluru ngalilawanungku wangkanyi tjukurpa Jesunya Christanyatjara aŋangu tjutangku kulira palumpa mulamularingkunytjaku. Palulanguruli nyurala kurunpa winkingku wangkanyi Godanya nyurampa kalyparingkunyangka nyura wangaṇarangku kulintjaku, panya Christanya nyanga palumpa mukuringanyi. ²¹ Panya paluru palya mulapa kura palyantja wiyatja alatji, ka nganana aŋangu mantatja kura palyalpai tjuṭa, ka Godalu nganananya pungkunytjaku ngarangi. Palu paluru Christanya tjunu nganana kura palyantjitjanguru nganampa ngalkilpa anga-ilunytjaku. Ka nyara palulanguru Christanya nganampa ngalkilarinyangka nganana wankaringu Godalu nganananya tjukarurunmara walytjanmankunytjaku.

6

¹ Uwa, ngali Godala tjunguringkula warkarinyi nyuranya wangkara kunpuntjikitja. Panya Godalu nyurampa pukultju pulkangku palyaṇu, kali nyuranya wangkara pulkaṛa wituwituni nyura mulamulangku kulira palunya rawangku waṇantjaku wantintyja wiyangku. ² Panya Godalu iriti wangkanytja alatji ngaṛanyi nyiringka,
“Ngayulu nganmanytju kulinu ngula nyuranya wankarunkunytjikitjangku. Mununa tjintu panya paluru wirkankunyangka nyuranya tjukarurungku wankarunu.” *

Alatji Godalu wangkangu tjukurpa nyanga palunya. Ka mulapa kuwari ngaṛanyi Godalu nyuranya pukultju pulkangku wankarunkunytja. Kaya kulira rawangku palunya waṇanma wantintyja wiyangku.

³ Uwa, ngali Godaku warka tjukarurungku kulira palyaṇi nyura nyakula tjukarurungku kulintjaku palunya. Tjinguru ngali ngunti-ngunti palyanyangka nyakula nyura ngalinya wiyanmanama munu Godanya kulu wantima. Palula-tawarali tjukarurungku palyalpai. ⁴ Panya aŋangu winkingku nyanganyi ngali Godaku warka palyannyangka, kali mukuringanyi tjana ngalinya rawa tjukaruru warkarinyangka nyakunytjaku. Munu palulanguru pika kutjupa kutjupa tjuṭa ngalila wirkankunyangka ngali wantintyja wiyangku Godaku warka tungun-tunguntu tiṭutjarangku palyani.

⁵ Panya kutjupa-araya Jesunya wantipai tjutangku ngalinya pulkaṛa pungkupai, kutjupa-araya ngalinya tjailangka tjarpatjunkupai, kutjupa-araya aŋangu kutjupa tjuṭa tjunguringkula kaputurira wangkara ngalimpa pikaringkupai. Ka ngali pulkaṛa warkaripai mungangka kalala, munuli kutjupa-ara paltjatjiratja nyinapai munuli kunkunpa wiya nyinapai. Palu ngali pulkaṛa kulira ttituru-ttitururintja wiyangku Godaku warka rawangku palyalpai wantintyja wiyangku. ⁶ Munuli tjukaruru palyanyku nyinapai munuli Godaku tjukurpa nintingku kulilpai, munuli purkarangku kulilpai mirpanarintja wiyangku, munuli aŋangu tjuṭaku ngaltunytju pukultju nyinapai. Ka panya Kurunpa Milmilnga ngalila tjungu nyinanyi, kali aŋangu tjuṭaku pulkaṛa mukuringkupai kurunpa winki. Kaya aŋangu tjutangku ngalinya alatji palyannyangka nyakula kulilpai, “Mulapa nyanga pula Godaku warka tjukarurungku palyani.”

⁷ Uwa, ngali panya tjukurpa tjukaruru aŋangu tjutangka wangkapai, munuli Godalu witulya pulkangku nintinnyangka palumpa warka tjukarurungku palyalpai. Ka aŋangu tjutangku ngalinya kurannyangka

* **6:2** Aitjayaku 49:8

ngali kuraringkunytja wiya tjukaruru alatjitu nyinapai, kalinya tjana putu kurara nyakupai tjukaruru nyinanyangka. Panya wati kulatatjara kutitjitetjara ngaranyangka warmalangku putu wakalpai, palu purunypaya ngalinya tjukaruru Godalawanu nyinanyangka putu kuralpai pikaringkunyangka nyakunytjikitjangku.

⁸ Kaya anangu kutjupa tjutangku ngalinya wangkara walytjanmara walkulpai. Kaya tjara kutjupangku ngalinya analpai. Kaya tjara kutjupangku ngalila wanganarangku kulilpai. Kalinya tjara kutjupangku warkipai, kaya tjara kutjupangku ngalinya nguntinmankupai, palu ngali Godaku warkarira tjukarurungku kutju wangkapai ngunti wangkanytja wiyangku. ⁹ Panya anangu winkiya ngalimpa ninti nyinanyi, palu kutjupa tjaraya ngalimpa ngunti ngurparingkupai. Kutjupa-arali nguwanpa ilungi, palu wiya, wankatuli nyangatja nyinanyi ilunytja wiya. Kalinya kutjupa tjutangku kura palyannyangka-palku pulkara pungangi, palu ngali ilu wiya alatjitu nyinara Godaku warkka tungun-tunguntu palyani.

¹⁰ Uwa, rawangkuya ngalinya kuralpai tjituru-tjituru palyantjikitjangku, palu ngali kurunpa pukularipai alatjitu. Kutjupa-arali maralpa nyinapai mani munu mantara wiya. Palu palya, panya ngali maraltu anangu tjutangka Godaku tjukurpa wangkapai, kaya kulira pulkara pukularipai kurunitja pulka mantjintjatjanungku. Uwa, kuwarili maralpa nyinanyi kutjupa kutjupa tjuta kanyintja wiya, palu palya panya ngali Jesuku walytja nyinara uwankara kanyini Godalanguru.

¹¹ Palu walytja wiru tjuta, ngura pala Karintjala nyinanytja tjuta! Nyangatjali utingku nyurala wangkanyi kumpilpa wiyangku, panya ngali nyurampa pulkara mukuringkula nyurala wangkanyi. ¹² Uwa, ngali rawa nyurampa mukuringangi kurunpa winki, nyuranyali watarkurira wantintyti wiya alatjitu. Palu tjinguru nyura ngalimpa ngamanypa kurunpa winki mukuringkunytjatjanungku nyura kuwari ngalinya wantinyi nguwanpa. ¹³ Palu kulilaya! Ngali nyurampa pulkara mukuringanyi, panya wati palumpa tjiti tjutaku pulkara mukuringkupai, palu purunypa ngali nyurampa pulkara mukuringanyi mama purunypa. Ka uti nyura ngapartji kurunpa winkitu ngalimpa mukuringama.

Godanya Wantipai Tjuta Munu Godaku Walytja Tjuta Putu Tjungu Nyinapai

¹⁴ Walytja wiru tjuta! Tjunguringkuwiyangkuya wantima Jesuku mulamularingkupai wiya tjutangka! Wanyu tangkiyingku munu pulukangku tjungungku wakina ilara katipai? Wiya. Nyara palu purunypa Jesuku walytja tjuta munu anangu mulamularingkupai wiya tjuta putu tjungu ngaranyi. Panya anangu Godala wanganarangku kulilpaingku munu anangu Godala tungunpungkupaingku tjungungku putu wirura palyalpai. Panya kalala munu munga tjungu ngaranytja wiya, palu purunypatu.

¹⁵ Ka wanyu Christalu pula Satantu tjukurpa tjungungku wangkara kulira palyalpai? Wiya alatjitu. Ka palu purunypa Jesuku walytjangku munu Jesuku walytja wiyangku putu tjungungku kulira palyalpai. ¹⁶ Kaya Godaku walytja tjutangku wanyu Godaku timpulangka god ngalypa ngalypa pununguru palyantja tjuta tjunkula walkulpai? Wiya. Palu kulilaya! Nyuntu nganana Godaku timpula purunypa ngaranyi, panya paluru nganana la unngu nyinanyi. Panya Godalu iriti wangkanytja nyiringka ngaranyi alatji,

“Ngayuluna tjanala ngurararira nyinaku,
munuña tjanala tjungu para-pitjalinkuku.

Ngayuluṇa tjanampa God pułka nyinaku,
kaya aŋangu nyanga paluru tjana ngayuku walytjapiti mulapa nyinaku.” *

¹⁷ Munu palulanguru Godalu piruku alatji wangkangu,
“Ngayuku mirpaṇtju tjutangkaya tjunguringkuwiya maunṭalpa nyinama.
Munuya kutjupa kutjupa kura ngaranyangka pampulwiyangku wantima.

Kaṇa nyuranya pukulṭu altira kanyilku.

¹⁸ Munuṇa nyurampa Mama alatjiṭu nyinaku.
Ka nyura ngayuku katjapiti uṇṭalpiti nyinaku.”

Alatji Godalu mayatja witulya pulkangku wangkangu. *

7

¹ Uwa, walytja wiṛu tjuta! Tjukurpa nyanga palunya tjananya Godalu nganananya wangkara kalkunu. Kala palulanguru uti kura kutjupa kutjupa uwankara wantima pampuntja wiyangku kuraringkula Godalan-guru paṭuringkunytjaku-tawara. Utila Godaku nguluringkula palula wanganarangku kulira tjukaruru mulapa nyinama munula palunya kutju walkunma.

Paulanya Pukularinytja

² Palu uti nyura ngalimpa mukulya nyinama wantintyja wiya. Panya ngali nyuranya kurantja wiya, munuli nyuranya wituwituntja wiyaṭu kura palyantjaku, munuli nyuranya ngunti kurantja wiyaṭu kutjupa kutjupa mantjintjikitjangku. Alatji nyura kutjupa tjutangku ngalinya ngukara wangkara wantipai kulintja wiyangku. ³ Kaṇa lita nyangangka nyuranya aŋangura wangkanytja wiyaṭu, panya ngayulu nyurampa pułkara mukuringanyi, panya alatjiṇa nyurala ngañmanytu wangkangu, munuṇa rawangkuṇu nyuranya mukulyangku kulini. Tjinguru ngayulu iluku, tjinguruṇa wankaṭu nyinaku, palu titutjarangkuṇa nyuranya kulini watarkurintja wiyangku. ⁴ Uwa, ngayulu nyurampa mulamularinganyi alatjiṭu. Munuṇa aŋangu tjutangka nyuranyatjara wangkara mirawaṇipai munuṇa nyuranya kulira pułkara pukularipai kurunpa winki. Panya pika kutjupa kutjupa tjuta ngayula wirkankupai ngayunya tjituru-tjituru palyantjikitja, palu nyuranya kulirana pułkara alatjiṭu pukularinyi.

⁵ Mungaṭu ngali manta nyanga Matja-tuniyala wirkanu, kali kuliningi nyinara pakuwiyaringkunytjikitjangku. Palu wiya, panya aŋangu tjuta ngalimpa pikaringangi munulinya rawangku kuraningi, kali nguluringangi. ⁶⁻⁷ Palu Godalu panya tjituru-tjitururinyangka pułkumankupai munu wati panya Taitatjanya ngalilakutu wirkakatingu. Kali nyakula pułkara pukularingu, munuli tjukurpa nyuranyatjara wangkanyangka kulira pułkara pukularingu, panya nyura kunyu palunya pułkumara kanyiningi palangka. Ka paluru ngayula wangangi alatji, “Nyara paluru tjana panya nyuntunya ngañmanytu kurantjatjanu kuvari nyuntumpa pułkara ngalturinganyi munuya kalyparingkula pułkara mukuringanyi nyuntunya piṛuku nyakunytjikitja.” Alatji Taitatjalu ngayula tjakultjunu kaṇa kulira pułkara pukularingu.

⁸ Uwa, lita ngañmanyitja panyaṇa walkatjura ma-iyanu nyurampa. Ka nyura tjinguru lita nyara palunya nyakunytjatjanu tjituru-tjitururira ngayuku kuraringu. Kaṇa kuliningi, “Utiṇa panyatja wantima lita

* **6:16** Itjikilku 37:27 * **6:18** 2 Samuelku 7:14

walkatjura iyantja wiyangku.” Munuña palulanguru píruku kuliningi, “Wiya palya, tjana rawa tjituru-tjituru nyinanytja wiya.”⁹ Munuña kuwari pulkaṛa pukularingu tjukurpa nyuranyatjara kulira, panya mulapa nyura lita ngayuku mantjira unytju kutju ngayuku kuraringkula tjituru-tjitururingu munu nyara palulanguru nyura kulinu, “Munta-uwa, mulapa nganana kura palyaningi.” Munu nyura kuntaringkula kura wantingu. Nyara palulanguru kutjuña nyurampa pulkaṛa pukularinyi nyura kura wantinytjtjanguru, tjituru-tjitururinytja-nguru wiya. Panya nyura ngayuku lita nyakula tjituru-tjitururinyangka Godalu nyuranya nintinu, ka nyura kulira kuntaringkula kura wantingu munu nyura kampa kutjuparingu palunya tjukarurungku waṇantjikitja.

¹⁰ Uwa, panya ngali Godaku tjukurnguru nyuranya wangkara tjukaruruningi ka nyura kulira mirpañarira tjituru-tjitururingu. Palu tjituru-tjitururinytja nyangatja palya, panya Godalu tjituru-tjitururinyangka nyuranya kampa kutjupanu kura wantira wankaringkunytjaku. Palu tjinguru ngali tjukurpa mantatjanguru nyuranya wangkara painnyangka nyura kulira mirpañarira tjituru-tjtitururiku munu palulanguru kurunpa wituwituringkuku alatjitu Godalakutu aruringkunytja wiya munu nyura ngula ilura ngura kurakutu ankuku. ¹¹ Palu nyura panya Godaku tjukurpa kulira mirpañarira tjituru-tjtitururinyangka Godalu nyuranya wiru mulapa palyanu. Panya wati kutjungku nyuralanguru ngayunya kuranmanangi, ka nyura palula kutjunguru ngayuku kuraringu. Ka pala palulanguru Godalu nyuranya uwankara kuntaringkunytjaku palyanu lita panya ngayulu iyantjtjanguru. Ka nyura tjituru-tjtitururira kampa kutjuparingu munu nyura wati panya palumpa mirpañarira palunya pungkula nintintjikitja mukuringangi paluru rawangku kurantjaku-tawara. Uwa, Godalu nyuranya tjituru-tjturu palyannyangka nyura kulira tjukarururingu munu nyura kuwari wiru tjukarurungku palyani. Kaṇa kulini, “Mulapa paluru tjana ngayunya kurantjatjanu piiwiyaringu munuya kuwari ngayuku pulkaṛa mukuringanyi.”

¹² Ka panyaña lita palatja nyurampa walkatjunu wati panyangku ngayunya kurantjtjanguru wiya. Palu ngayulu lita palatja walkatjunu nyura Godanya kulira pina alaringkula kulintjaku alatji, “Munta, kurangkula Paulanya ngunti kuraningi, panya nganana palumpa pulkara mukuringanyi.” ¹³⁻¹⁴ Ka wati Taitatjalu kuwari pitjala ngalila tjakultjunu nyura ngalimpa pulkara mukuringkunytja. Kali palulanguru kulira pulkara pukularingu nyurampa

Munuli wati nyanga Taitatjanya nyurampa pukularinyangka nyakula ngali kuļu pukularingi. Panya ngayulu lita panyatja wati palunya unkul'iyanu nyuralakutu alatji wangkara, “Taitatja! Nyuntu tjanala wirkara ngayulu tjukurpa wangkanytjtja tjakultjura, kaya nyuntula wanganarangku kulilk.” Alatjina wati panya palunya wangkara iyanu nyuralakutu. Munuña lita panya palula nyurala tjukarurungku wangkangi, panya ngayulu tiṭutjarangku nyurala tjukurpa tjukaruru kutju wangkapai.

Palu Taitatjalu ma-pakara unngu kuliningi, “Tjinguruṇiya wantiku ngayulu Paulaku tjukurpa tjanala wangkanyangka.” Munu paluru nguluringangi nguwanpa lita panya palunya nyurala nintintjaku. Palu nyurala nintinnyangka nyura wanganarangku alatjitu kulinu Taitatjala, munu nyura ngayulu tjukarurungku wangkanytja kulinu. Ka nyara palulanguru Taitatjanya pulkaṛa pukularingu, munu paluru malaku wirkara

ngayula tjakultjunu nyura panya palumpa ngalimpa pukularinytja. Kanā ngayulu ngapartji nyurampa pulkara pukularingi.

¹⁵ Uwa, Taitatjalu nyuranya rawangku kulini nyurampa pulkara mukuringkula, panya nyura paluru ma-pitjanyangka kulira tjuni kura tjulpilypa nguwanpa palumpa patanedingi. Munu panya nyura paluru wirkankunyangka pukultu altira tjarpatjunu nyurampa ngurangka munu wirura kanyiningi. Munu panya nyura palula wangañarangku kuliningi paluru wangkanyangka. Nyara palulanguru paluru kuwari nyuranya rawangku mukulyangku kulini. ¹⁶ Kanā ngayulu kuļu nyuranya pukultu kulini nyura rawangku Godanya wangañarangku wañannyangka munu ngayulu mulamularinganyi nyura rawangkuļu wañantjaku wantintyja wiyangku.

8

Matja-tuniyanya Ngurara Tjutangku Intjanungku Ungkunytja

¹ Palu waltyja wiru tjuta! Tjukurpa nyangatjaya kulinma! Panya manta nyanga Matja-tuniyalaya Jesuku waltyja tjuta ngura tjutangka tjunguringkupai uṭulu kutjupa uṭulu kutjupa. Munu Godalu tjananya pukultju pulkangku kanyinnyangka tjana anangu Jesuku waltyja kutjupa tjuta ngaltutjara nyinanyangka nyakula intjanungku ungkupai. ² Munuya anangu mirpantju tjutangku tjananya rawangku kurannyangka tjana wituwituwanu alatjitu pukulpa nyinapai, munuya mani tjukutjuku kanyintjatjanungku paluru tjana ngaltutjara kutjupa tjuta paltjatjiratja nyinanyangka kulira intjanungku mani ma-iyaningi ngura nyara Jerusalemala nyinanytja tjutakutu. ³ Mulapaya tjukutjuku kanyintjatjanungku tjana pulka mulapa ungangi kurunpa ngaltunytjungku, kanā ngayulu nyangu palunya tjananya, panya tjana mani ungkunytjatjanungku tjara kutjupa kanyintja wiya. ⁴ Ngayulu panya tjanala ngatjintja wiyatū anangu nyara Jesuku waltyja tjutaku mani iyantjaku Jerusalemalakutu, panya paluru tjana alatjitu kurunpa winki mukuringkula ngayula tjinapinu mani palumpa tjanampa ngayunya ungkul'iyantjikitjangku. Panya tjana ungkunytjikitja pulkara alatjitu mukuringangi. ⁵ Ka ngali kuliningi, "Tjinguuya mani tjukutjuku kanyintjatjanungku mani tjukutjuku ungkuku." Palu wiya, tjana intjanungku alatjitu pulka mulapa ungu. Panya tjana ngañmanypa Mayatja Jesuku waltyjaringkunytjatjanungku palula wangañarangku kulira palyantjikitja mukuringu. Munuya nyara palulanguru Godalu tjanala wangkanyangka ngalila wangañarangku kulintjikitja mukuringangi.

⁶ Kali wati panya Taitatjanya wituļu nyuralakutu malaku ma-pitjanytjaku, panya paluru ngañmanytju nyurala wangkangu mani tjunkukatintjaku anangu nyara Jerusalemala nyinanytja tjutaku. Munu kuwari paluru nyurala ma-pitjala piruku wangkaku nyura rawangku tjunkukatira pulkantjaku. Panya ngañmanytjuli nyurala wangkangu intjanungku ungkunytjaku ngaltutjara tjuta. ⁷ Ka panya nyura mulapa kutjupa kutjupa tjuta wirura palyalpai anangu kutjupa tjutangka wain-tara nguwanpa, panya nyura Godaku pulkara mulamularingkupai, munu nyura tjukurpa wirura wangkapai, munu nyura tjukurpa tjutaku ninti pulka mulapa nyinanyi, munu nyura pukultu Godaku warka palyalpai pakuringkuwiyangku, munu panya nyura ngalimpa kuļu pulkara mukuringkupai. Uwa, mulapa panya nyura kutjupa kutjupa uwankara wirura palyalpai. Palulanguru nyura uti Jerusalemala nyinanytja tjuta wantintyja wiyangku intjanungku ungama.

⁸ Palu ngayulu nyuranya mani pułka ungkunytjaku wituwituntja wiya, palu nyuralaṇa tjakultjunanyi kutju alatji panya ngura nyara Matjatuniyalaya aŋangu munytja tjuṭa nyinanyi intjanungku ungkupai. Ka tjinguru nyura kuļu kulira tjana purunyṭju intjanungku ungama, kaṇa nyakula kuliklu, “Munta-uwa! Mulapa nyanganpa ngaltutjara tjuṭaku pułkara ngalturinganyi.” ⁹ Nyura ninti Mayatja Jesuku Christaku panya paluru nganampa mukulya pukultju pułkanya nyinanyi. Paluru panya mantakutu pitjanytja kuwaripangka ngura ilkaringga Mama Godala tjungu wirura nyinangi kutjupa kutjupa winkitjara alatjitu. Palu paluru nganampa mukuringkula palumpa mama munu kutjupa kutjupa uwankara wantikatira pitjala mantangka itiringkula nganaŋanya purunyṭpa alatjitu nyinangi. Paluru Mamanya wantikatira maralpa pitjangu nganaŋalakutu munu panya ngaltutjara nyinangi, ka nyara palulanguru nganana palulawanu wankaringu Mamala tjunguringkula pułkula nyinanytjikitja.

¹⁰ Panya ngaŋmanytju yiya kutjupa nyura-warara Jesuku walytja tjuṭaku kulira ngalturingu nyara Jerusalemala paltjatjiratja nyinanyangka. Munu panya nyura ngaltunytjungku mani tjunkukatingi pułkaringkunyangka tjanampa iyantjikitjangku. Palu nyura tjara kutju palyara tjuṇu munuya kuwaripangku iyantja wiya. Kaṇa kuvari nyurala wangkanyi nyura panya tjunkunytjitetjangka piruku pułka nguwanpa tjunkula iyantjaku.

¹¹ Ala! Wanyuya nyura kanyintjatjanungku mapalkungku tjunkula pułkultu iyala, panya nyura ngaŋmanytju pułka iyantjikitjangku kulinigi tjanampa ngalturingkula. Palulangurya kulira mani mapalku iyala. ¹² Panya nyura pułkultu munytjangku ungkunytjikitja mukuringkunyangka Godanya nyurampa pułkulariku. Kutjungku tjinguru mani pułka kanyintjatjanungku uti intjanungku pułka nguwanpa ungama. Ka kutjupangku tjinguru tjukutjuku kanyintjatjanungku uti palu purunypatū intjanungku ungama tjukutjuku nguwanpa, ka Godanya kutjaraku nyakula pułkularinyi intjanungku ungkunyangka, panya paluru nintingku nyanganyi.

¹³ Palu ngayulu mani pułka ungkunytjaku nyuranya wituwituntja wiya. Tjinguru nyura winki ungułampa paltjatjiratjarira pułku kuliklu, kaya aŋangu nyara Jerusalemala nyinanytja tjuṭa mai pułka ngalkula paltja nyinaku. ¹⁴ Palu nyura kuvari pułka nguwanpa kanyintjatjanungku tjananya ungama, panya tjana paltjatjiratjangku kuvari pułku kulini. Ka tjinguru tjana ngapartji ngula pułka kanyintjatjanungku nyuranya ngapartji alpamilalku nyura paltjatjiratja nyinanyangka. ¹⁵ Panya nyiringka iriti walkatjunkunytja ngaranyi Israelkunu tjuṭangku palyantja nyanga alatji,

“Panya tjana mai ini ‘manna’ ilytjingka uranigi kutjupa tjuṭangku pułka nguwanpa, kutjupa tjuṭangku tjukutjuku nguwanpa. Palu uwankaraṇuya paltja pułkula nyinangi.” *

Paulalu Taitatjanya Tjananya Karintjalakutu Iyantja Mani Urantjaku

¹⁶ Uwa, ngali nyurampa pułkara mukuringanyi, ka Godalu wati nyanga Taitatjanya kuļu palu purunypatū palyanu nyurampa pułkara mukuringkunytjaku. Kali pala palulanguru Mama Godanya walkuni.

¹⁷ Panya wati paluru pułkara mukuringu nyuralakutu ankunytjikitja, kali palula tjapinu paluru ankunytjaku, ka kulira pułkultu uwamanu. ¹⁸ Ka wati kutjupa kuļu ngali nyuralakutu ma-iyanı Taitatjala tjungu. Panya wati nyara palunyaya Jesuku walytja tjuṭangku

* ^{8:15} Exodus 16:18

ngura winkinguru mirawañipai, panya paluru Tjukurpa Palya Jesunyatjara wirura titutjarangku wangkanyangka.¹⁹ Nyara palunyaya Jesuku waltyja tjutangku ngurkantanu ngalila tjunguringkula ankunytjaku munu nganaña tjungungku mani panyatja mantjira ma-katinytjaku Jerusalemalakutu. Panya nyara palulaya ngaltutjara tjutangku Godanya pulkara mirawañiku nganaña mani katira ungkunyangka munuya kulikru, “Munta-uwa, mulapa nyanganpa nganañanya alpamilantjikitja pulkara mukuringanyi.”

²⁰ Ka ngali mani nyanga pulkanya atunymara tjukarurungku kanyini kutjupangku ngalinya ngunti ngukantjaku-tawara. ²¹ Panya ngali Godala mirangka titutjarangku tjukarurungku palyantjikitja mukuringanyi munu anangu tjutangka mirangka kuļu.

²² Munuli wati Jesuku waltyja kutjupa kuļu Taitatjala pulala tjungu mayani. Panya wati nyanga palunyali warķa kutjupa rawangku ungangi, ka paluru warķa uwankara wanganarangku kulira palyaningu pakuringkuwiyangku. Munu paluru nyurampa pulkara mulamularingu nyura Jerusalemala nyinanytja tjuṭa mani ungkunytjikitja mukuringkunyangka kulira, munu kuwari pulkara pukularira nyuralakutu ma-pitjala nyuranya alpamilantjikitja mukuringanyi. ²³ Ka Taitatjanya panya ngayula tjungu warķaripai malpa wiřu nyuranya alpamilantjikitja. Ka wati panya kutjupa kutjara Jesuku waltyja tjutangku ngura nyanga Matjatuniyalanguru ngurkantanu Taitatjala tjunguringkula nyuralakutu ankunytjaku. Ka paluru pula nyurampa pulkara warķarinyangka nyakula nyura Christanyalta mirawañira walkulku.

²⁴ Uwa, paluru tjana nyurala ma-wirkankunyangkampaya ngaltunytjungku tjananya atunymara kanyinma. Ka nyura alatji palyannyangka Jesuku waltyja tjutangku manta nyanga Matjatuniyalawanu nyinanytja tjutangku kulira nintiringkuku nyura mukulya pulka nyinanyangka, panya ngali tjanala ngañmanytju tjakultjunangi nyuranya mirawañira.

9

Wanganarangku Alpamilantjaku

¹ Palu nyaakuña nyuranya piruku wangkara wituwitunma mani tjunkunytjaku Jesuku waltyja tjutaku nyara Jerusalemala ngaltutjara nyinanyangka? ² Alatjitu nyura kurunpa winki kulira mukuringu tjananya ungkunytjikitja. Kaña ngura nyanga Matja-tuniyala Jesuku waltyja tjutangka wangkara nyuranya mirawañingi panya nyura mani rawangku tjunkukatintja. Kaya kuwari tjana kuļu nyuranya kulira nyura purunytru ungkunytjikitja mukuringanyi anangu nyara Jerusalemania ngurara tjuṭa. ³⁻⁴ Kaña kuranyungku wati nyanga mañkurpa Taitatjanya tjananya nyuralakutu ma-iyanı ngañmanytju nyurala wangkanytjaku. Kaña ngayulu ngula ma-pitjala mani riti ngarinyangka nyakuku. Panya ngayulu nyanga Matja-tuniyanya ngurařa tjutangka nyuranya mirawañingi, kaya tjinguru kuwari kutjupatjara ngayula tjungu nyuralakutu ma-pitjaku nyuranya nyakunytjikitja. Kaña kuliningi, “Munta tjinguruya anangu nyangantu ma-pitjala mani puṭu nyakulampa ngayunya analku, kaña kuntaringkuku nyuranya ngunti mirawañintjatjanu, ka nyura kuļu palulanguru kuntaringkuku.” ⁵ Pala palula-tawaraña Taitatjanya tjananya kuranyungku ma-iyanı. Ka paluru tjana ma-wirkara nyurala wangkaku mani panya nyura ngañmanytju kalkuntjatjanungku utulura

tjunkunytjaku. Kanawi ngula ma-pitjala nyawa uwankaraṭu uṭuḷu ngarinyangka ngayulu Jerusalemalakutu katinytjaku. Munuṇa kulilkulta, “Munta, mulapaya nyangantu mani munytjangku alatjiṭu unganyi tjana walytjangku kulira mukuringkula.”

⁶ Uwa, mani ungkunytjikitjangkuya wanyu tjukurpa kampa kutjupa kulila tjukurpa nyangatja! Tjinguru ngayulu uninypa mankurpa mantangka tjunkuku munuṇa ngula mai kururingkunyangka mankurpaṭu mantjilku. Palu ngayulu uninypa tjuṭa tjunkunytjatjanungku mai kururingkunyangka tjuṭa mulapalta mantjilku. ⁷ Panya anangungku intjanungku ungkunyangka Godanya pulkara pukularipai. Ka nyura uti pukultu ungama tjituru-tjitururinytja wiyangku, panya kutjupangku nyuranya ungkunytjaku pulkara wituwituntja wiyatū. Palu nyura uti kutjungku kutjungku walytjangku kulinma mani yaaltjiṭu tjananya ungkunytjikitjangku munuya nyura kulintjatjanungku pukultu alatjiṭu ungama, tjinguru tjukutjuku, tjinguru pulka. Ka Godanya nyurampa pukulariku nyura intjanungku ungkunyangka.

⁸ Panya paluru nyuranya pukultju pulkangku kanyilpai nyura pukulpa palya alatjiṭu nyinanytjaku munu paluru nyuranya intjanungku ungcupai pulka mulapa nyura anangu kutjupa tjuṭa kuļu ngaltutjara nyinanyangka nyakula ngapartji intjanungku ungkunytjaku. ⁹ Panya nyiringka iriti walkatjunkunytja ngaranyi alatji,

“Wati nyara paluru ngaltutjara tjuṭa rawangku intjanungku ungcupai.

Ka Godalu palumpa watarkurinytja wiyangku rawangku kulilpai paluru intjanungku ungkunytjitia.” *

¹⁰⁻¹¹ Panya Godalu nyuranya uninypa tjuṭa ungcupai mantangka tjunkula mai pakaltjingantjaku munu mai kururingkunyangka ngalkuntjaku. Uwa, paluru nyuranya ungcupai pałtja nyinanytjaku. Munu paluru nyuranya pulka mulapalta ungkuku nyura anangu kutjupa tjuṭa ngapartji rawangku intjanungku ungkunytjaku. Ka nyura ungkunyangka nganaṇa ngapartji tjananya katira ungkuku nyara Jerusalemala nyinanytja tjuṭa, kaya nyura nyanga ungkunytjanguru Godanyalta pulkara pukularira mirawaṇira walkulkku.

¹² Uwa, nyura mani ungkunyangkaya Jesuku walytja tjuṭangku mai kuka mantara kuļu mantjira pulkara pukulariku, munuya Godanya titutjarangku pukultu mirawaniku nyura ungkunytjitetjanguru. ¹³ Panya nyura nyanga alatji intjanungku ungkunyangka anangu tjuṭangku pukularira Godanya mirawaṇira walkulkku munuya kuliklu alatji, “Mulapaya Tjukurpa Palya Jesunyatjara kulilpai, panya paluru tjana wan-gaṇarangku kulira ngaltutjara tjuṭa intjanungku ungcupai, nyara Jerusalemala nyinanytja tjuṭa munu ngura kutjupitja tjuṭa kuļu.” Alatjiya nyuranya kuliklu. ¹⁴ Munuya nyara palulanguru nyurampa pulkara mukuringkula kurunpa winkingku Godala nyurampa tjapilku paluru nyuranya pukultju mukulya pulkangku kanyinnyangka. ¹⁵ Uwa, utila Godanya mirawaṇima panya nganaṇanya paluru pulka mulapa ungu Jesunya Christiana wiru mulapa kutjupa uwankarangka waintara.

10

Paulalu Tjananya Paintja Kampangkata Wangkanyangka

¹⁻² Palu nyura kutjupa tjuṭangku ngayunya alatji wangkapai, “Paulanya ngura nyangangka wirkara nganaṇala tjungu nyinara paluru kalypangku

* ^{9:9} Psalm 112:9

purkarangku alatjitu wangkapai, palu ngura kutjupangka paṭu nyinara paluru lita walkatjura nganananya pailpai rapangku alatjitu.” Palu wiya, nyangatja nyura ngunti kulintja. Wanyuya Jesunya kulila! Panya paluru kalypa munu kañany-kañanya nyinapai wiya. Ka ngayulu mukuringanyi nyurala ma-wirkara palu purunyti nyuranya purkarangku kalypangku wangkanytjikitja nyura ngayunya wangañarangku kulintjaku. Palu kutjupa tjarangkuṇi wangkapai ngayulu mantatja kutju kulilpai anangu tjutangku nyakula ngayunya mirawaninytjaku. Palu nyangatjaya tjana ngunti kulini, ka ngayuku ngaranyi nyurala mirangka palunya tjananya rapangku anangura tjukarurungku wangkara paintjaku.

³⁻⁴ Mulapa nganana mantangka nyinanyi anangu mantatja kulilpai tjutangka tjungu, palu nganana palunya tjananya purunyta wiya. Panya tjana mantangka nyanga nyinara kułata tjiliratjara pikaringkupai anangu utitja tjutaku. Palu nganana kułata kutjupatjara pikaringanyi arkayitja kurunitja tjutaku. Panya nganana mamu arkayitja tjutangka pikaringkunyangka Godalu nganananya witulyankupai tjanampa pikaringkula tjananya upa palyantjaku.

⁵ Panya mantatja kulilpai tjutangku tjukurpa ngunti tjuta kañany-kañanytju wangkara anangu tjuta Godalanguru mauntankupai paluru tjana palumpa nintiringkunytjaku-tawara. Palu alatji ngunti wangkanyangka nganana tjukarurungku wangkara nintilpai anangu tjutangku tjukurpa tjukaruru kulira kampa kutjuparira Jesuku nintiringkunytjaku munu palumpa walytjaringkula palula wangañarangku kulintjaku. ⁶ Uwa, nyura kulini? Panya ngayulu nyuranya tjukurpa tjukaruru nintiningi, ka panya nyura kulira Jesuku nintiringu munu palula wangañarangku kuliningi. Kaña mukuringanyi nyura rawangku palula wangañarangku kulira palyantjaku. Palu tjinguru nyura palula rawa tungunpungama, ka ngayulu nyuranya pailku alatjitu.

⁷ Palu nyura utitja tjuta kutju nyakula ngunti kulilpai. Tjinguru kutjupangku kulini, “Mulapa ngayulu Jesuku Christaku walytja nyinanyi.” Uwa palya-mantu palatja, palu uti paluru piruku kulinma panya ngayulu kułu palu purunyta Jesuku walytjatu nyinanyi. ⁸ Panya Mayatja Jesuluni ngurkantara witunu tjukurpa palumpa wangkara nyuranya kuñpuntjaku. Ka warķa nyanga palunya rapangku palya ngayulu kuñta wiya ngaranyi. Ka nyura tjinguru ngayunya kulilpai kañany-kañanytju wangkanyangka-palku, munu nyura tjinguru kulini, “Mayatja Jesulu tjinguru palunya iyanu nganananya upantjaku.” Palu wiya, paluru ngayunya witunu nyuranya kurunpa rapantjaku nyura palunya tiutjarangku wañantjaku.

⁹ Kutjupa tjutangkuṇi wangkapai, “Nyarangku lita walkatjura nganananya ngułutjingani.” Palu wiya, ngayulu ngułutjingantjikitjangku lita nyurampa walkatjunkunytja wiya. ¹⁰ Palu kutjupa tjarangkuya ngunti wangkapai alatji, “Paluru nganananya litangka paṭunguru mirpañarira pailpai, palu ngananala wirkara paluru kalypangku kitikiti nguwanpa wangkapai nganampa nguluringkula nguwanpa.” Alatjiniya kutjupa tjutangku wangkapai. ¹¹ Palu utiya paluru tjana kulinma! Panya ngayulu tjananya litangka pulkara painu munuña palu purunyti tjutangku ma-pitjala utingku tjananya wangkara pailku, panya ngayulu litangka walkatjunkunytjtja purunytpaṭu.

¹² Panya kutjupa tjarangkuya walytjangku kulira tjananku wirunmankupai, palu ngayulu paluru tjana purunyta wiya. Panya paluru tjananya walytjangku kulira tjukurpa tjananku walytjangku kutju palyalpai

munuya tjukurpa palunya tjananya kutju kulira mirawanipai. Palu tjananya ngurpangku waltyjangku wirunmankupai munuya nyara palulanguru kata kawakawaringkupai.

¹³ Ka ngayulu nyanga purunyapa mirawanira wangkapai wiya, panya Godaluñi witunu ngura tjuñakutu ankula Tjukurpa Palya Jesunyatjara kutju tjakultjunkunytjaku nyurala kuñu. Kanä warka nyanga palunya kutju ngayulu mirawanipai. ¹⁴ Kaya kulinma, panya Godalu ngayunya witunnyangkaña ngayulu Tjukurpa Palya Jesunyatjara nyurala tjakultjunu, mununa nyara palulanguru kutju waltyjangku mirawaninyi.

¹⁵ Palu anangu kutjupangku warka wiru palyantjitjaku ngayulu nyakula kañany-kañanyarira waltyjangku mirawanipai wiya. Palatja tjanampa warka Godalu tjananya ungkunytja. Palu mulapa ngayulu lita nyangatja nyuralakutu iyaní nyura nyakula kulira kunpuringkula rawangku Jesunya wañantjaku pakuringkuwiyangku. Kaní tjinguru ngula Godalu ngayunya piruku nyuralakutu iyalku nyurala munu kutjupa tjuñangka kuñu pulkara warkarinytjaku, kaya anangu tjuña mulapa piruku Jesuku mulamularingkuku. ¹⁶ Munuña palulanguru nyurala waintara kuñu wilurara ma-pitjala ngura kutjupa tjuñangka Tjukurpa Palya tjakultjunkuku anangu watarkitja tjuñangka. Panya wati kutjupangku ngañmanytju wangkanytjitjangka ngayulu mañawanungku ankula wangkapai wiya ngayulu palyantjatanungku-palku waltyjangku ngunti mirawaninytjaku-tawara.

¹⁷ Panya nyiringka iriti walkatjunkunytja ngaranyi nyanga alatji, “Nyuntu mirawaninytjikitja mukuringkulampa Mayatja Godanya kutju mirawanima paluru palyantjitja tjuñanguru.” *

¹⁸ Ka tjinguru anangungku kutjupa kutjupa wiru palyantjatanungku waltyjangku mirawaniku, ka nyura tjinguru kuliklu Godanya anangu nyara palumpa pulkara pukularinytja-palku. Palu wiya! Nyaratja paluru waltyjangku kulira mirawaninytja, kaya kulira mulamularingkuwiyangku wantima. Palu tjinguru Godalu anangu palunya palyanmankunyangka kulira kutju uti nyura anangu palunya palya kulinma.

11

Paulalu Ngunti Kuralpai Tjuña Paintja

¹ Uwa, nyura tjinguru mulamularingkuwiyangku wantinyi Jesulu ngayunya iyantjitjaku, kaníya mirpanarinytja wiyangku kulinma ngayulu kawakawa purunytpu nyurala wangkanyangka, panya ngayuluña piruku tjukutjuku wangkanytjikitja mukuringanyi. ² Panya Godalu nyuranya atunymara kanyini, palu purunyapa ngayulu nyuranya atunymankunytjikitja mukuringanyi, panya wati kulypal pangku kungka ukari atunymara kanyilpai wati panya pikatjangku altinytjaku pañara kutjupangku kurantjaku-tawara, palu purunyapaña nyuranya atunymankunytjikitja mukuringanyi nyura Christanya kutju wañantjaku.

³ Palu ngayulu nyuranya rawangku kulini tjinguru kutjupangku nyuranya kurannyangka nyura Christaku watarkurira iwara kutjupa wañalku, panya kungkawara Eve-anja iriti mulamularingu lirungku ngunti kurannyangka, nyara palu purunyarinytjaku-tawarana nyuranya kulini nyura Christaku pulkara mukuringkunytjaku. ⁴ Panya nganana tjukarurungku nyurala tjakultjunangi Tjukurpa Palya Jesunyatjara, ka panya nyura wangañarangku kulira Kurunpa Milmilngatjararingu.

* **10:17** Jeremiah-ku 9:24

Palu panya kutjupa tjuṭangku pitjala tjukurpa Jesunyatjara-palku ngunti wangkara mukumukunyangka nyura palumpa tjanampa mulamularingangi, munu kurunpa kutjupa ungkunytjikitjangku wangkanyangka nyura kurunpa palunya mantjintjikitja mukuringangi Kurunpa Milmilnga wantira.

⁵ Panya nyara paluru tjananku kanany-kananytju wangkapai, "Nganana Jesulu iyantja tjuṭa, kutjupa tjuṭangka waintara." Palu tjana ngunti wangkapai, panya paluru tjana ngayula waintara nyinanytja wiya. ⁶ Uwa, tjana tjinguru kunṭa wiyangku anangu tjuṭangka wangkapai rapangku, ka ngayulu tjana puruny whole body wiya panya ngayulu kanany-kananypa wiyangku kunṭa-kunṭangku wangkapai. Palu ngayulu Godaku tjukurku ninti pulka nyinanyi, munu panya nyurala tjuṭa-arangku tjakultjunangi, ka panya nyura kulirę ngayunya alatji kuliningi, "Mulapa wati nyangatja nintipuka nyinanyi. Tjinguru Godalu palunya nintiningi."

⁷ Munu panya ngayulu Godaku Tjukurpa Palya nyurala tjakultjunkunytjatjanungku maniku ngatjintja wiyangku wantingu, kanı nyara palulanguru ngunti wangkapai tjuṭangku ngayunya ngunti kuranmanangi, "Nyuntu-manti tjukurtjara pulka wiya, wati kurakura nguwanpa." Alatjiniya wangkangi, panya paluru tjana tjukurpa wangkara nintintjatjanungku kanany-kananytju nyurala maniku ngatjilpai walytjangku tjukurtjara pulkanmara, ka panya nyura kulintjatjanungku tjananya mirawanira wanganarangku ungpupai. Palu ngayulu wantingu nyurala tjukurpa Godaku wangkanytjatjanungku kanany-kananyarira nyurala ngatjintja wiyangku. Munu panyaniya ngayunya anara tjukutjukunmankunyangkaña tjituru-tjitururintja wiya nyinangi, panya ngayulu nyurampa pukularinyi nyura Jesuku mulamularingkula pulka nyinanytjaku.

⁸ Ka panya Jesuku walytja ngura kutjupitja tjuṭangku tjunguringkula ngayuku mani tjunangi munuṇiya ungangi nyurala ankula warkarinytjaku. Nyangatja panya ngayulu tjanala mantjinu mununa nyurala wirkara ngatjintja wiyatū Tjukurpa Palya nyurala tjakultjunkunytjikitjangku. ⁹ Mununa mani panya tjana ungkunytja wiyarungkunyangka ngayulu nyurala ngapartji ngatjintja wiyangku wantingi. Palu Jesuku walytja kutjupa tjuṭangkuṇiya manta panya Matja-tuniyalanguru ngayunya mani katira ungu. Uwa, nyura kaar-kaararinytjaku-tawara panya nyurala ngatjintja wiya alatjiṭu rawa nyinangi, mununa ngula kuļu nyurala ngatjintja wiyangku wantiku.

¹⁰ Uwa, ngura tjuṭangka panya nyangatja tjakultjunkupai, ka panya nyura manta pala Akayala nyinanytja tjuṭangku ngayunya puṭu markulkku. Panya ngayulu tjukurpa Christanyatjara tiṭutjarangku tjukarurungku para-wangkapai, palu purunypana para-wangkanyi tjukurpa panya nyurala maniku ngatjilwiyangku wantintjanyatjara. ¹¹ Ka nyangatja para-wangkanyangka nyura tjinguru kulini ngayulu nyurampa kuraringkunyangka-palku. Palu wiya, Godanya ninti ngayuku, panya ngayulu nyurampa pulka mukuringanyi mununa rawangku nyuranya kulilpai.

¹² Uwa, anangu tjuṭangka Tjukurpa Palya wangkanytjatjanungkuṇa maniku ngatjintja wiya alatjiṭu. Tjinguru ngayulu mani tjanalanguru mantjinnyangkampa anangu ngunti panya wangkapai tjuṭangku alatji wangkaku, "Mulapa Paulalu tjanala mani mantjiningi. Kala palya nganana ngapartji palu purunytjuṭu mani mantjini." Alatjingaraya tjinguru paluru tjana ngunti wangkara walytjangku tjananku mirawaniku, ka nyanga

palula-tawara ngayulu aŋangu tjutangka ngatjintja wiyangku wantipai. ¹³ Panya nyara paluru tjanaya wangkatjara ngunti tjuta kuwari nyinanyi, panya tjana aŋangu tjuta ngunti kurantjikitja mukuringkupai tjukurpa tjukarurungku wangkara-palku Jesulu Christalu ngurkantara iyantjitjangku-palku. Palu Jesulu tjananya iyantja wiyatu. ¹⁴ Ka ngayulu alatji wangkanyangka nyura tjinguru kulira urulyaralku. Palu wiya, kulila! Panya mamu Satannga ayinayiniripai munu kutjuparira angelpa purunypa ngarapai tili pitalytji pulkatjara nganana nyakula mulamularingkula kulintjaku alatji, "Nyangatja mulapa Godalanguru." ¹⁵ Kaya Satanku walytja tjuta kuwari palu purunypa nyinanyi munuya tjukarurungku-palku ayinayinirira Godaku waṛka-palku palyalpai. Palu ngula Godalu tjananya ngura kurakutu paira iyalku kuralpai panya palunya tjananya.

Paulalu Palurunku Wangkanytja

¹⁶ Uwa, nyangatjaña nyurala piruku wangkara mirawaninyi. Ka nyura tjinguru kulilku ngayulu kawakawaringkula wangkanyangka-palku, palu wiya. Kaya ngayuku mirpañarintja wiyangku wantima, kaña piruku mirawanira wangkama kawakawangku purunyti. ¹⁷ Palu Mayatja Jesuluni nyanga palu purunypa wangkanytjaku wituntja wiyatu. Palu langurunatju ngayulu walytjangku mirawaninyi kawakawa purunyti. ¹⁸⁻¹⁹ Panya kutjupa tjutangkuya kutjupa kutjupa tjuta palyantjatjanungku walytjangku mirawanipai, kaña ngayulu ngapartji palu purunyti tjuta walytjangku mirawaninyi nyura ngapartji ngayula kulintjaku. Wanyumpa kunyu nyura nintipukampa! Panya wati kawakawa tjutangku nyurala ngunti wangkanyangka nyura pukultu kulilpai, palu tjana panya ngunti kuralpai tjuta. ²⁰ Ka paluru tjana nyuranya mayatjarira pauntjingara wituwitunnyangka nyura mirpañaripai wiya, munu panya nyura ngunti kuraṛa maniku ngatjinnnyangka wangaṇarangku alatjitu ungpai. Munu paluru tjana nyuranya ngunti wangkara kaṇany-kaṇanyti warkira kurannyangka nyura kulilpai mirpañarintja wiyangku alatjitu. Nyaaku nyura tjanala kulilpai? ²¹ Palu ngayulu paluru tjana purunyti palyantja wiya alatjitu, ka panyani nyura palulanguru upa nyinanyangka-palku kulini. Palu wiya, ngayulu paluru tjana purunyti nyuranya pauntjingara wituwituntjikitjangku kulintja wiya.

Nyara paluru tjanayanku walytjangku mirawaninyangka ngayulu ngapartji walytjangku mirawaninyi. Palu nyangatjaña kawakawa purunyti wangkanyi unytjungku. ²² Palyaya paluru tjana wati Iipuru tjuta nyinanyi, kaña ngayulu kuļu wati Iipuru. Kaya palya paluru tjana Israelku pakalipiti nyinanyi, ka ngayulu kuļu palumpa pakali nyinanyi. Palyatuya Aipuramalanguru nyinanyi, kaña ngayulu palulanguru nyinanyi. ²³ Palyatuya Christaku waṛkaripai nyinanyi, palu ngayulu pulka mulapa palumpa palyalpai palula tjanala muṇkara nguwanpa. (Nyangatjanatju kata kurangku purunyti mirawaninyi unytjungku.) Panya ngura kutjupangka kutjupangka tjukurpa wangkanyangkaṇiya mirpañtju tjutangku rawangku tjailangka tjarpatjunangi nyara tjananya purunypa wiya. Munuṇiya tjuta-arangku wiipangka pulkara alkaningi, kaña tjutara arangku nguwanpa ilungu, panya ngayulu-mantu nyara tjananya purunypa wiya. ²⁴ Ka panyaniya Jewku mayatja tjutangku pika pulka mulapa alkaningi wiipangka 39-arangku, munuṇiya piruku ngula tjintu kutjupa palu purunypa pungangi 39-arangku. Munuṇiya palu purunypa pungangi 39-arangku. ²⁵ Kanı

mayatja Rome-anyा nguraṛa tjutangku maŋkurārangku puṇungka pungu, kaṇiya kutjupa tjarangku kutjupa-ara pulingka atura nguwanpa iluntanu. Kaṇa maŋkurāra pautangka ṿṛungka ankula ngururpa kātakatira minya-minyaringkunyangka nguwanpa ilura wankaringu. Munuṇa kutju-ara pauta kātakatira tjarpangkunyangka ngayulu puṇu kutju witira ṿṛungka ngarira tjinturingkula ngarira mungaringu. Tjinguruṇa nyara palula ara iluma.

²⁶ Uwa, ngayulu panya ngura tjutangka tjukurtjara rawa para-ngaṛangi, kaṇi kutjupa-ara uru pulkangku karungka ukalingkula nguwanpa iluntanu. Ka kutjupa-ara ngayulu iwarangka ankunyangka wati kutitjunkupai tjutangku ngayunya nguwanpa iluntanu. Ka panya kutjupa-ara Jew tjutangku ngayunya iluntankunytjikitja mukuringangitu, kutjupa-ara malikitja tjutangku ngayunya nguwanpa iluntanangi. Uwa, ngayulu pikawanu nguwanpa ilungi tawunu pulka tjutangka, munu ilytjingka, uru pulkangka kułukulu. Ka kutjupa tjutangku kułu Jesuku ngunti walytjaringkula ngayunya nguwanpa iluntanangi.

²⁷ Kaṇa nguwanpa ilunytjatjanungku warka nyanga paluna wan-tir'iyantja wiyangku pulka mulapa palyalpai titutjarangku. Kutjupa-arana mungangka kułu warkaripai kunkunpa wiya alatjitu. Munuṇa kutjupa-ara mai mina kułu wantira warkaripai kutju. Munuṇa kutjupa-ara paltjatjiratja nyinapai, munuṇa wari pulkangka mantara unytjunpa kanyintja wiya tjititingkupai puyinnyangka walpa waringka. ²⁸ Ka nyanga palu puruny whole tjuṭa wirkankunyangka ngayulu Jesuku walytja tjuṭa ngura tjutatja rawangku pulkara kulilpai tjana Jesunya rawangku waṇantja-tjiratjangku. ²⁹ Tjinguru Jesuku walytja kutjupa puṇu nguwanpa rapa nyinanyi, ka ngayulu palumpa pulkara ngalturingkupai munuṇa paluna rapantjikitja mukuringkupai. Ka kutjupangku tjinguru Jesuku walytja ngunti kuraṇi kura palyantjaku, kaṇa ngayulu kulira mirpaṇaripai.

³⁰ Uwa, panya kutjupa tjutangkuyanku walytjangku mirawaṇipai pulka nyinara-palku, palu ngayuluṇatju upa nyinanytjatjanungku wangkanyi, panya ngayulu upa nyinanyangka ngayunya Godalu witulyankupai palumpa warka kuṇpungku palyantjaku, kaṇatju ngayulu nyara palu-languru kutju mirawanipai. ³¹ Kaṇa nyangatja tjukarurungku nyurala wangkanyi, Godanya panya Jesuku Mama ngayuku ninti nyinanyi, panya ngayulu tjukarurungku wangkapai. Kala wanyu nyuntu nganana Godanya titutjarangku walkunma. ³² Panya ngura nyara Tamatjakala nyinanyangkanı nguraku mayatjangku wangkangu tjaultji tjutangka kaita panya pulkangka ngarala nyakunytjaku, ngayulu kampangkaṇu pakara ankunytjaku-tawara. Munu paluru tjanala wangkangu pakara ankunyangka nyakula ngayunya witintjaku. ³³ Kanı ngayuku malpa tjutangku wall-pa alawanungku katunguru pitingka ukalilyinu ruupangka karpira, kaṇa mantangka wirkara kumpira wirtjapakaṇu, kaṇi mayatja paluru puṇu nguriningi.

12

Mayatjalu Paulanya Kurunpa Ilkarikutu Katira Nintintja

¹ Utina wantima walytjangku mirawaninytja wiyangku, panya walytjangku mirawaṇinyangka nyura kulira kuṇpuringkunytja wiya Jesunya waṇantjikitja. Palu wanyuna nyurala tjakultjunama ngayulu nyakunytjatjanungku, panya Mayatja Jesulu ngayunya nintinu. ² Panya Godalu mungatu ngayunya katingu ilkarikutu. Tjinguruṇi kurunpa katingu,

munta tjinguruṇi puntu winki katingu. Ngayulu ngurpa, palu Godanya kutju ninti. Panya ngayulu anu munuṇa małaku pitjanytjatjanu kuļi 14 nyinangi. ³ Ngayulu mulapa anu Godaku ngurakutu. Tjinguruṇa kurunpa kutju anu, tjinguruṇa puntu winki anu. Ngayulu ngurpa. Godanya kutju ninti. ⁴ Ka ngayulu ngura nyara palula tjukurpa kumpilitja tjuṭa kulinu Godalu nintinnyangka. Tjukurpa nyanga paluru tjana milmilpa ngayulu kulintjatjanungku puṭu tjakultjunanyi.

⁵ Uwa, mulapa ngayulu Godala ilkarīngka nyinara pukulṭu kuliningi, palu ngayulunatju ilkarīngka nyinanytjatjanungku walytjangku mirawaṇinytja wiya. Nyangatja kutjuṇa wangkanyi alatji, “Ngayulu watı upa, kuṇpu wiya.” ⁶ Munuṇa nyurala rawangku wangkanytja wiya ilkarikutu ankunytjatjanungku nyura ngayunya mirawanira ngunti pulkanmankunytjaku-tawara. Palya nyura ngayulu mantangka nyanga palyantja munu wangkanytja kuļu kulini munu nyura nyara palula tjanalanguru ngayunya palya mirawaṇinyi, palu nyara ilkarīngka nyakunytjanguru ngayunya mirawaṇinytja wiyangku wantima. Tjinguruṇa ngayulu nyurala tjakultjunama nyakunytjatjanungku, ka nyura kulira ngayunya kawakawangku ngunti wangkanyangka-palku kulilkı. Palu wiya, ngayulu mulapa anu ngura ilkarītjakutu.

⁷ Ka ngura nyara palula Godalu ngayunya wiru tjuṭa nintiningi, kana tjinguru palunya tjananya nyakunytjatjanungku kaṇany-kaṇanyarira walytjangku mirawaṇima. Ka nyara palulanguru Godalu Satanga markuntja wiyangku wantingu ngayunya rawangku pikantakunytjaku, ngayulu walytjangku mirawaṇinytjaku-tawara. ⁸ Kana Mayatja Jesula maṇkurārangku tjapiningi pika nyanga palunya wiyatjaku. ⁹ Kaṇi maṇkurārangku wiyanmanu Jesulu alatji wangkara, “Wiya, alatjiṭuṇanta ngayulu pukulṭu pulkangku kanyini, panya nyuntu puṭu kulinnyangka ngayulu nyuntunya witulyananyi, kan ngayulanguru kutju kuṇpuringkuku.” Alatji paluru ngayunya wangkangi, kana pukularira kuliningi, “Palyaṇatju pika winkingku puṭu kulini, palu Christaluni witulyankuku.” ¹⁰ Ngayulu Jesuku Christaku rawa warkarinyangkaniya anara nyii-nyipungkupai munuṇiya paira pungkula wataparalpai kana ngayulu puṭu nguwanpa kulilpai. Palu puṭu kulira ngayulu pukularinyi panya puṭu kulinnyangka Godalu kutjungku ngayunya witulyankupai, kana palulanguru kuṇpuringkupai. Uwa, wituwitu tjuṭa ngayula utirinkupai kana puṭu nguwanpa kulilpai. Palu palya, panya ngayulu puṭu kulinnyangkanı Godalu witulyankupai.

Paulalu Tjananya Karintjanya Ngurara Tjuṭa Pulkara Kulintja

¹¹ Palu nyura tjananya tjukurtjara ngunti wangkapai tjuṭa mirawaṇingi munu panya nyura ngayunya ananingi, kana nyangatja palulanguru lita nyangangka walkatjunanyi munuṇatju ngayulu walytjangku mirawaṇinyi kawakawa purunyti. Utina wantima walytjangku mirawaṇinytja wiyangku panya ngayulu tjukutjuku alatjiṭu pulka wiya. Palu uti nyura tjananya kutju mirawaṇinytja wiyangku ngayunya kuļu mirawaṇima, panya ngayulu tjukurtjara mulapa Jesulu iyantja, ka panya tjukurtjara kutjupa tjuṭa ngayula waintara pulka mulapa nyinanytja wiya. ¹² Panya ngayulu nyurala mungaṭu nyinara warkarinyangka Godalu ngayunya witulyanu, kana kutjupa kutjupa pulka tjuṭa nyurampa rawangku witulyangku palyaningi, kaṇi nyura nyakunytjatjanungku kulinu, “Mulapa watı nyangatja Jesulu iyantja.”

¹³ Palu nyura tjinguru watarkuringu ngayuku munu panya nyura ngayunya kulilpai alatji, "Nyara paluru ngura kutjupitja tjutaku kutju mukulya nyinapai." Palu wiya, ngayulu nyuranya kuļu mukulyangku kulilpai. Palu nyuralaṇa wanyu maniku munu maiku kuļu ngatjiningi? Wiya, panyaṇa nyinangi kaniya nyara paluru tjana kutju ngayunya ungangi ngura kutjupitja tjutangku kutju, ka panyaṇi nyura ungkunytja wiyatū. Nyanga palulanguru nyura tjinguru ngayunya kuranmananyi. Wanyu kaṇa piiwiyariwa nyura ngayuku kalyparingkunytjaku! Palu wiya, nyura uti piiwiyaringama.

¹⁴ Uwa, kutjara-ara panyaṇa nyurala ma-pitjala nyinangi, mununa kuwari kulini piruku ma-pitjala nyinanytjikitjangku. Palu wirkankulaṇa nyurala maiku maniku ngatjintja wiya, panya ngayulu nyura kanyintjitjaku mukuringkunytja wiya, nyurampaṇa mukuringanyi. Panya nyura ngayuku tjitji tjuṭa purunypa nyinanyi, ka wanyu tjitji tjuṭangku mama ngunytju maingka paltjara kanyilpai? Wiya, ngunytjungku mamangku kutju tjitji tjuṭa maingka paltjara kanyilpai. ¹⁵ Ka ngayulu mani kanyira nyuranya pukultu alatjitu ungguku, panya ngayulu nyuranya mukulyangku aṭunymankunytjikitja mukuringanyi mununa pakuringkunytja wiya nyurampa pulkara warkarinytjikitjangku kulini. Uwa, ngayulu nyurampa pulkara mukuringanyi. Ka nyura wanyu ngayuku ngapartji tjukutjuku nguwanpa mukuringkuku?

¹⁶ Uwa, nyura ninti panya ngayulu nyurala nyinara maniku ngatjilpai wiya. Palu kutjupa tjutangku tjukurpa ngayunyatjara ngunti para-wangkapai alatji, "Wati nyara paluru ayinayiningku nganaṇanya wangkara ngunti mukumukuningi manikitjangku." Palu wiya, tjana alatji ngunti wangkapai. ¹⁷ Ka panya wati kutjara ngayulu witura nyuralakutu ma-iyanu, paluru pula kuļu wanyu nyuranya ngunti kuraningi manikitjangku? Wiya alatjitu. ¹⁸ Panya wati ini Taitatjanyana ngayulu witura maiyanu nyuralakutu munu wati Jesuku waltyja kutjupa kuļu palula tjungu. Ka Taitatjalu wanyu nyurala ngunti wangkara mani mantjiningi? Wiya. Nyara paluru ngali kulintja kutjutjara tjungu alatjitu munu paluru ngayulu purunypa alatjitu ngunti manikitjangku kuralpai wiya.

¹⁹ Tjinguru nyura rawangku ngayunya kulini alatji, "Paulalu lita nyangangka nganaṇanya pulkara anangura wangkanyi nganaṇa palunya wangkanyangka-palku." Palu wiya, ngayulu Godala mirangka wangkanyi Jesuku Christaku mulamularingkula. Waltyja wiru tjuṭa! Nyanga uwankaraṇa nyurala wangkangi nyuranya kuṇpuntjikitjangku.

²⁰ Palu ngayulu nyuranya pulkara kulini, mununa kulini, "Tjinguruna tjanala kuwari ma-wirkara tjananya nyakula tjituru-tjitururiku, ka tjana ngapartji ngayunya nyakula pukularinytja wiyangku wantiku." Alatjina kulini, panya ngayulu tjinguru ma-pitjala nyuranya nyakuku nyuranku pikaringkunyangka, muta tjinguru nyararingkunyangka munu mirpanpa nyinanyangka. Tjinguruna nyuranya manyu nyinanyangka nyakuku munytjangku ungkunytja wiya. Tjinguruna kampangkaṭu tjaalymara wangkanyangka nyakuku, tjinguruna warkinyangka kulilkku, tjinguruna kanany-kananypa nyinanyangka nyakuku, tjinguruna utulurira pulkara miranyangka nyakuku. Uwa, alatji tjinguru nyura kuraringu, kaṇa ma-pitjala nyuranya nyakula pulkara tjituru-tjitururiku.

²¹ Panya ngayulu nganmanypa nyuralakutu ankunyangka nyura kutjupa tjarangku kura tjuta palyaningi titutjarangku, munuya kuri kutjupangka kutjupangka kampangkaṭu ngunti tjunguringangi tjukaruru nyinanytja wiya. Kaṇa nyakula pulkara tjituru-tjitururingu mununa wangkangi

nyura piiwiyaringkula kura nyara palunya tjananya wantira Godanya mulamulangku wañantjaku. Palu tjinguru ngayulu kuwari nyuralakutu píruku ma-pitjaku munuña tjinguru nyuranya palu purunypaṭu nyinanyangka nyakula pulkara kūntaringkuku Godala mirangka munuña pulkara ulaku. Palula-tawaraya kura uwankara wantima ngayulu nyurampa tjituru-tjitururira ulanytjaku-tawara.

13

Paulalu Tjananya Ngulutjunkunytja

¹ Uwa, panya kutjara-arana nyurala nyinangi munuña kuwari píruku kulini nyurala ma-pitjala nyinanytjikitjangku. Kaya wanyu kulinma, panya nyiringka iriti walkatjunkunytja ngaranyi alatji,

“Tjinguru aŋangungku kura palyani. Ka aŋangu kutjupangku palunya nyakunytjatjanungku tjinguru kutjupa tjutangka tjakultjunkuku. Palu kutjungku nyakunytjatjanungku wangkanyangkaya palumpa mapalku mulamularingkunytja wiyangku wantima, palu tjinguru kutjarangku, mutta maŋkurtu nyakunytjatjanungku wangkanyangka nyara palulan-guru kutjuya mulamularingama.” *

² Panya ngañmanytuña nyurala wangkangu kura palyalpai tjutangka munu nyangaña píruku wangkanyi lita nyangangka walkatjura alatji. Panya ngayulu ma-pitjala nyurala wirkara wantintyta wiyangku nyuranya nyanganyi tjinguru nyura palyaringkula tjukaruru nyinanyi, tjinguru nyura kura panya palu purunypaṭu palyani. Kaña nyura kura tjuta palyannyangka nyakulampa pulkaralta mirpañariku nyurampa. ³⁻⁴ Ka nyara palulanguru nyura nintingu kulikku panya mulapa Christalu ngayulawanungku nyurala wangkanyi. Panya Christanya nyurampa ngułuringkunytja wiya, paluru nyurala rapangku alatjitu wangkapai. Panya palunyaya upa ngaranyangka puñu katakutjarangka wakara uitjunu munu iluntanu. Palu kuwari paluru wanka nyinanyi panya Godalu palunya witulya pulkangku wankara pakaltjingaṇu. Uwa, Christanya puñu katakutjarangka upa ngarangi, ka palu purunypa ngayulu kuļu upa nyinanyi. Ka panya Godalu Christanya witulyanu, palu purunypaṭu paluru ngayunya kuļu witulyananyi. Kaña palulanguru nyuralakutu ankula kurunpa rapangku nyuranya wangkara tjukarurulku.

⁵ Uwa, walijangkuyanku atatjura tjapira kulinma nyanga alatji, “Mulapa ngayulu Jesunya kutju tjukarurungku wañani?” Alatjiyanku tjapinma, panya nyura nintingu kulini Jesunya nyurala unngu nyinanyangka. Munu panya nyura nintingu kulini Jesunya nyurala nyinanytja wiyangka. ⁶ Munu nyura uti ngayunya kuļu atatjura kulinma, munu nyura nyara palulangurulta kulira ngayunya ngurkantankuku alatji, “Mutta, wati nyangatja mulapa Jesulu wituntja.”

⁷ Palu tjinguru nyura kutjupa tjutangku ngayunya kulira wiyanmankuku, kaña palunya tjananya kulira wantira ngayulu rawangku Godala nyurampa uwankaraku tjapilpai nyura kura wantira tjukarururingkunytjaku. Palu tjinguru nyura kulini, “Wiya, paluru nganampa tjapilpai aŋangu tjutangku palunya mirawaninytjaku.” Palu wiya, ngayulu nyurampa mukuringkula tjapini nyura tjukarururingkunytjaku. ⁸ Panya ngali tjukurpa tjukaruru kutju wangkapai kampa kutjupara ngunti wangkanytja wiyangku.

* **13:1** Deuteronomy 17:6

⁹ Tjinguru ngayulu upa nyinanyi puṭu nguwanpa kulipai. Palu ngayulu ma-pitjala nyurampa pukulariku nyura Jesunya kunpungku wañannyangka nyakula. Panya ngayulu nyurampa Godala rawangku tjapilpai nyura palyaringkula rawangku palunya tjukarurungku wañantjaku. ¹⁰ Panya Mayatja Jesuluṇi wituṇu aŋangu tjuṭa wangkara kunpuntjaku, paira maunṭankunytjaku wiya. Palulanguruṇa lita nyangatja nganmanytu walkatjunanyi ngayulu nyurala wirkankunytja kuwaripangka nyura kura wantinytjaku. Kaya nganmanytu kunṭaringkula kura wantima Jesunya mulamulangku wanantjikitjangku. Palulanguruṇa nyuranya ngula ma-wirkara nyakula nyurampa pukulariku, munuṇa nyuranya nyakula paintja wiyangku wantiku.

Tjukurpa Malatja

¹¹ Uwa, waltytja tjuṭa! Alatjiṭuṇa nyangatja nyurampa walkatjunanyi. Kaya ngayulu nyurala wangkanytja uwankara wangaṇarangku kulinma munuya Jesunya purunypa tjukaruru nyinama. Munuyanku ngaparku ngalytjurmarā pikangku wangkanytja wiyangku wantima kulintja kutjuringkunytjikitjangku. Munuyanku kalypa nyinama pikaringkunytja wiya. Ka Godanya panya mukulya pulka nyurala titutjara nyinaku munu nyuranya kurunpa rapa kanyilku.

¹² Ka nyura uti aŋangu kutjupa Jesuku waltytja nyakulampa palumpa pukularira mara witinma.

¹³ Kaya Jesuku waltytja tjuṭangku ngura nyangangka nyinapai tjuṭangku nyuranya kulini nyurampa pukularira.

¹⁴ Uwa alatjiṭuṇa walkatjunanyi. Ka Mayatja Jesulu nyuranya rawangku pukultju pulkangku kanyinma. Ka Mama Godalu nyuranya mukulya pulkangku aṭunymanama. Ka Kurunpa Milmilnga nyurala uwankarangka tjungu titutjara nyinama.

Lita Paulalu Walkatjura Iyantja Manta ini Kalaitjiyalakutu

Galatians

Nyangatja Ngañmanytju Nyakula Wangkanytjaku

Nyangatja Godaku tjukurpa Paulalu Jesuku walytja tjutakutu walkatjura iyantja tjana tawunu ini Akani-yamala, Litjurala, Tuupila, Antiyakala tjanala nyinanyangka. Ngura nyara paluru tjana panya manta ini Kalaitjiyalala ngarangi Israelta alinytjara munu kakarara. Panya Paulanya ngañmanypa anu ngura nyara palula tjanalakutu munu Tjukurpa Palya Jesunyatjara tjanala tjakultjunangi. Kaya tjuta mulapa kulira mulamularingkula Jesuku walytjaringangi, kutjupa tjuta Jew tjuta, kutjupa tjuta Jew wiya tjuta Moseku tjukurpa kulilpai wiya kulu.

Ka Jew wiya tjuta Jesuku walytjaringkunyangka Jew kutjupa tjarangku Jesuku walytjangku tjananya ngunti wangkara wituwituningi tjana Moseku tjukurpa wañantjaku munu tjananya purunypa arkara nyinanytjaku. Munuya paluru tjana Paulaku kulu kuraringangi panya tjana kuliningi Jesulu palunya ngurkantara iyantja wiya palumpa tjukurpa para-wangkanytjaku.

Palulanguru Paulalu lita nyangatja walkatjenu Jesuku walytja tjutaku manta nyara Kalaitjiyalala nyinanytja tjutaku. Munu palurunku wangkangi panya tjukurpa paluru wangkanytja Jesulu kutjungku palula nintinu añañgungku palula wangkara nintintja wiyatu. Munu paluru Jew wiya tjutangka wangkangi alatji, “Jew tjutangku nyurala ngunti wangkanyangkaya kulilwiyangku wantima. Munuya mulamularingama Jesuku Christaku kutjuku. Panya tjana nyurala ngunti wangkanyi alatji, ‘Godalu nyuranya palumpa walytjaringkunytjaku palyanmankuku nyura Jesuku mulamularingkunyangka kutju wiya, palu Moseku tjukurpa kulu wanganarangku kulinnyangka.’ Palu nyangatjaya ngunti wangkanyi. Panya Jesunya nyura kura palyantjitjanguru anga-ilungu nyurampa ngalkilpa ka nyara palulanguru Godalu nyuranya kalypangku wantinyi pungkuwiyangku. Ka nyura Jesunya ilura wankaringkula pakantjitjaku mulamularingkunyangka kutju Godalu nyuranya palumpa walytjamanankuku. Palulanguruya Jesunya wañanma munuya Kurunpa Milmilta wanganarangku kulira Jesunya purunypa wirura palyanyku nyinama.” Alatji Paulalu tjanala wangkangi lita nyangangka.

Tjukurpa nyanganpa ngarinyi:

1:1-10 Paulalu ngañmanytju wangkanytja

1:11 — 2:21 Paulalu palurunku wangkanytja panya Jesulu palunya ngurkantara iyantja

3:1 — 4:31 Paulalu tjananya wituwituntja Jesuku kutjuku mulamularingkunytjaku

5:1 — 6:10 Jesuku walytja tjuta uti palyanyku nyinama nyanga alatji

6:11-18 Utila Mayatja Jesunya kutju mirawañima panya nganampa punu kañakutjarangka anga-ilunytja

¹ Uwa, Jesuku walytja tjuṭa, ngayuluṇa Paulalu nyurampa lita nyangatja walkatjunanyi manta pala Kalaitjiyala nyinanytja tjuṭaku. Panya ngayuluṇa tjukurtjara Jesulu Christalu iyantja. Añangungkuni ngurkantara wituntja wiyatū, palu Jesulu Christaluṇi witunu Mama Godalu kuļu palumpa tjukurpa tjakultjunkunytjaku. Panya Godalu Jesunya ilunyangka wankara pakaltjinganu, nyara paluruṇi witunu war̄ka nyanga palunya palumpa palyantjaku. ² Kala nganaṇa ngura nyanganguru Jesuku walytja tjuṭangku nyuranya pukularira kulini manta pala Kalaitjiyala nyinanytja tjuṭa, panya nyura manta pala palula ngura kutjupangka kutjupangka Jesuku walytja tjuṭa nyinanyi.

³ Ka Mama Godalu, Mayatja Jesulu Christalu kuļu nyuranya pukultju pulkangku kanyinma munu nyuranya kurunpa rapara pukulmanama.

⁴ Panya Mama Godalu iyannyaŋka Jesunya wangaṇara pitjangu munu nganampa kuranguru anga-ilungu nganaṇa kura wantinytjaku. Panya manta winkingkaya aŋangu uwankarangku kura palyaṇi, ka palu puřunypa rawa nyinanytjaku-tawara Jesunya nganampa ngalkilpa ilungu nganaṇa karalyarira Godala tjungu nyinanytjaku. ⁵ Kala uti Godanya tiṭutjarangku mirawaṇira wałkunma wantinytja wiyangku. Uwa mulapa.

Tjukurpa Palya Kutju Ngaranyi Aŋangu Tjuṭa Wankaringkunytjaku

⁶ Uwa, nyuranya kuliraṇa pulkara tjituru-tjitururingu panya mapalku alatjiṭu nyura Godanya wantira paturingu tjukurpa ngunti tjuṭa kulintjatjanu. Panya paluru alatjiṭu pukultju pulkangku nyuranya ngurkantara walytjanmanu Jesunya Christianity nyurampa ngalkilpa ilunyangka. Ka panya nyura wantingu tjukurpa kutjupa palya-palku kulintjatjanungku.

⁷ Palu tjukurpa pala paluru palya wiya. Panya aŋangu kutjupa tjuṭangku Tjukurpa Palya Jesunyatjara kampa kutjupara tjukurpa kutjupa wangkara nyuranya ngunti kuraṇi palunya tjananya kulira waŋantjaku. Kaya palunya tjananya kulira wantima. ⁸⁻⁹ Panya tjukurpa palya kutjupa ngaranytja wiya alatjiṭu kulira wankaringkunytjaku. Tjukurpa nyanga palunya kutjula nyurala wangkangu Jesunyatjara, ka panya nyura kulira kurunpa winki mulamularingu. Palu tjinguru watı kutjupangku nyurala tjukurpa kutjupa wangkaku, ka uti Godalu palunya paira iyanma ngura kurakutu. Tjinguru nganaṇa tjukurtjara Jesulu iyantja tjuṭangku nyurala ngunti wangkaku, ka palu puřunypa Godalu uti nganaṇanya kuļu ngura kurakutu paira iyanma. Tjinguru angeltu ilkaringuru pitjala tjukurpa kutjupa nyurala wangkaku ka nyara palunya kuļu uti Godalu paira iyanma ngura kurakutu. Panya ngaṇmanytjuna nyurala wangkangu munuṇa kuwari pirukuṭu nyurala wangkanyi alatji aŋangungku Tjukurpa Palya Jesunyatjara wantira tjukurpa kutjupa nyurala wangkanyangkampa uti Godalu palunya ngura kurakutu paira iyanma alatjiṭu.

¹⁰ Kulilaya, tjinguru ngayulu tjukurpa ngunti wangkama aŋangu tjuṭa pukułmankunytjikitjangku tjana kulira ngayuku pukularinytjaku. Palu wiya, ngayulu aŋangu tjuṭa kulintja wiyangku Godaku tjukurpa tjukarurungku kutju wangkapai paluru nyakula pukularinytjaku. Tjinguruṇa palyanma aŋangu tjuṭangku nyakula ngayuku pukularinytjaku. Palu alatji palyaṇa Jesuku war̄ka mulamulangku palyantja wiya.

Godalu Paulanya Ngurkantanu Tjukurpa Palumpa Wangkanytjaku

¹¹ Walytja tjuṭa kulilaya! Tjukurpa Palya Jesunyatjara ngayulu wangkanyitja Godalanguru alatjiṭu aŋanguku tjukurpa wiya. ¹² Panya aŋangungkuni wangkara nintintja wiyatū palu Jesulu Christalu kutjungkuni nintinu. ¹³ Nyura panya ngayuku ninti panya ngayulu

wati Jew munuña nganmanyapa Jew tjutaku ara kutju kulira wañalpai, munu panyaña ngayulu Jesuku walytja tjuta ngalturingkunytja wiyangku wañaparara pungangi tjana Jesunya wañalwiyangku wantintytjaku. ¹⁴ Panya ngayulu mulapa Jew tjutaku tjukurku ninti pulka nyinangi ngayuku ngalungku tjutangka waintara, munu ngayulu tjamuku tjanampa araku pulkara alatjitu mukuringangi. ¹⁵ Palu Mama Godaluñi ngayunya pukultju pulkangku ngurkantanu iti wirkankunytja kuwaripangka palumpa warka palyantjaku. ¹⁶ Munu palumpa katja ngayula nintinu ngayulu mulamularingkula ankula malikitja tjutangka Tjukurpa Palya palunyatjara tjakultjunkunytjaku, panya Jew wiya tjutangka. Kanä paluru ngurkantara tjunkunyangka ngayulu wati kutjupangka tjapintja wiyat ngayunya wangkara nintintjaku. ¹⁷ Munuña Jerusalemalakutu ankunytja wiyat Peternya tjananya nyakunytjikitja panya Jesulu iyantja tjuta, panya tjananya-warara ngurkantara tjunu ngayula kuwaripangka. Palu anuña manta ini Arapiyalakutu munuña nyara palula kuli tjuta nyinanytjatanu ngula mulapa malaku anu ngura Tamatjakalakutu. ¹⁸ Palulanguruña kuli mañkurpa wiyingkula Jerusalemalakutu malaku anu Peterla tjunguringkula paluru ngali wangkanytjikitja munuña nyara palulalta wirkara rawa nguwanpa nyinangi tjirirpi 15. ¹⁹ Palu nyara palula nyinaraña ngayulu Jesulu iyantja kutjupa tjuta nyakunytja wiyat, palu Jamesanya kutjuña nyangu Mayatja Jesuku panya malanypa. Munuña palulangurulta anu malaku Tamatjakalakutu. ²⁰ Palu kulilaya, nyanga palunyaña walkatjunanyi Mama Godala miñangka munuña ngunti wangkanytja wiyangku tjukarurungku kutju nyurala tjakultjunanyi.

²¹ Nyara palulanguruna ankula tjukurpa para-wangkarinangi anangu tjutangka manta Tjiriyala pulala Tjilitjiyalawanungku. ²² Katjuya Jesuku walytja kutjupa tjuta manta nyara Judeala nyinanytja tjuta ngayuku ngurpatu nyinangi panya paluru tjana ngayunya nyakunytja wiyat. ²³ Palu kutjupa tjutangku tjakultjunkunyangka kutjuya kunyu kulinu, "Wati panya paluru kunyu kampa kutjuparingu, panya paluru nganmanytju nganananya wañaparara pungangi munu panya tjukurpa Jesunyatjara wiyatjikitja mukuringangi. Palu kuwari kunyu wati panya paluru tjukurpa panya palunyalta wangkarinanyi." Alatjiya kunyu kuliningi ngayunyatjara kutjupangku wangkanyangka. ²⁴ Munuya palulanguru Godanyalta mirawañingi ngayulanguru.

2

Peterlu Tjana Paulanya Pukultu Palyanmankunytja

¹ Munuña kuli 14 wiyingkula piruku anu Jerusalemalakutu. Munuña wati kutjara katingu Paanapatjanya pulanya Taitatjanya. ² Panya Mamaluñi unngu nintinu Jerusalemalakutu ankunytjaku, kanä ankula Jesuku walytja atunymankupai tjutangka tjunguringkula wangkangi. Munuña tjanala tjakultjunangi ngayulu Jew wiya tjutangka Tjukurpa Palya Jesunyatjara wangkanytjatanungku. Uwa, ngayulu tjanala tjakultjunangi ngayuku warka tjana ngunti kulira ngayunya anara wianmankunytjaku-tawara. Panya tjinguru alatji tjana ngayuku warka anannyangka anangu tjutangku Tjukurpa Palya kulira wantiku. Palulatwaranya ngayulu warkarinytjatanungku tjanala tjakultjunangi kulira tjana palyanmankunytjaku.

³ Munuya ngayuku malpa Taitatjanya wituwituntja wiyat Jewku arawanu watiringkunytjaku, panya paluru wati Jew wiya nyinangi.

⁴ Kaya Jew kutjupa tjuṭa mukuringangi wati panya paluru Jew tjuṭa purunyarintjaku. Panya Jew paluru tjana ngananaala ngunti tjunguringkula Jesuku walytja purunypa nyinangi ngananaanya nyakula wangkanytjikitja nyanga alatji wangkara, “Nyara tjana Jesuku walytja tjuṭa palu tjana Moseku ara wantipai.” Tjukurpa nyanga palunyaya wangkangi panya paluru tjana mukuringangi nganana Jew tjuṭaku arawanu nyinanytjaku munuya nyara palulanguru Taitatjanya wituwituningi Jew tjuṭaku arawanu watiringkunytjaku. Palu wiya, nganana Jesuku Christaku mulamularingkula putu malaku ara panya ngañmanyitjawanu nyinanyi. ⁵ Munula tjanala tungunpungkula tjananya kulira alatjiwantingu nyura ngunti kulintjaku-tawara. Tjinguru tjana Taitatjanya Moseku arawanu watinnyangkampa nyura kulilk, “Munta-uwa, mulapa nganana uti Moseku arawanu nyinama Godalu ngananaanya wankarunkunytjaku.” Alatji ngunti kulintjaku-tawarala wati panya palula tjanala tungunpungu nyura Tjukurpa Palya Jesunyatjaraku kutju mulamularingkunytjaku.

⁶ Kutjupa tjuṭangkuya tjinguru alatji kulin Jamesanya, Peternya, Johnnga tjana pulka nyinanyangka-palku Jesuku walytja kutjupa tjuṭangka waintarira. Tjinguru mulapa, tjinguru wiya, palu Godalu utitja nyakula ngurkantankunytja wiyangku unngutja nyakula ngurkantankupai. Ka ngayulu Tjukurpa Palya Jesunyatjara Jew wiya tjuṭangka wangkanytjanungku pitjala tjanala tjakultjunkunyangkaya palya kulinu, mununiya wituwituntja wiyat tjukurpa kutjupa wangkanytjaku. ⁷ Palu paluru tjana kulira nintiringu panya Godaluni ungu war̄ka nyangatja tjukurpa Jew wiya tjuṭangka wangkanytjaku, panya paluru ngañmanyitju Peternya witunu Jew tjuṭangka wangkanytjaku, palu purunypa. ⁸ Panya Godalu Peternya tjukurtjara witura iyanu Jew tjuṭakutu munu palunya nintiningi munu witulyanangi palula tjanala war̄karintjaku. Munu palu purunypaṭu ngayunya tjukurtjara ngurkantara witura iyanu Jew wiya tjuṭakutu mununi ngayunya nintiningi munu witulyanangi palula tjanala war̄karintjaku.

⁹ Uwa, panya Jamesanya, Peternya, Johnnga tjana Jesuku walytja tjuṭa atunyamankupai nyinanyi. Munuya ngayunya ngurkantara kulin alatji, “Mulapa war̄ka nyangatja Godalu palunya ungu.” Munulinya paluru tjana mara witiṇ Paanapatjanya ngalinya, munuya wangkangu, “Nyuntu nganana tjukurpa kutju palunyatu wangkanyi. Panya nyupali Jew wiya tjuṭangka tjukurpa wangkanyi, ka nganana palu purunypaṭu Jew tjuṭangka wangkanyi.” Alatjiya ngalinya pukultu wangkangi. ¹⁰ Munulinya paluru tjana piruku alatji wangkangu, “Palu kulinma pula Jesuku walytja kutjupa tjuṭa nyanga Jerusalemala nyinanytja tjuṭa ungkunytjikitjangku panya paluru tjana ngaltutjara maralpa nyinanyi.” Palu ngayulu nyangatja rawangku kuliningi panya ngura kutjupa tjuṭangka mani mantjira katira tjananya ungkunytjikitjangku.

Paulalu Peternya Tjukaruruntja

¹¹⁻¹² Palulanguruli ngulalta Paanapatjanya ngali Antiyakalakutu anu munuli tjunguringkula nyinangi Jesuku walytja kutjupa tjuṭangka panya Jew wiya tjuṭangka. Ka palula malangka Peternya wirkanu Antiyakala munu ngananaala tjunguringkula nyinangi Jew wiya tjuṭangka kuļu. Munu paluru Jew tjuṭaku ara wantira ngananaala tjungungku mai ngalkuningi maunalpa nyinara ngalkuntja wiyangku. Ka ngura nyara Jerusalemala wati ini Jamesanya tjana Jesuku walytja tjuṭa atunyamankupai nyinangi, ka Jamesanya panya wati kuranyitja tjanampa

mayatja. Palu ngura nyara Jerusalemala panya Jesuku walytja kutjupatjara Jew tjuta nyinangi, munuya kutjupa tjarangku alatji kulilpai, "Utiya Jew wiya tjuta Jesuku walytjaringkunytjikitja mukuringkulampa Moseku arawanu watiringama nganañanya purunypa." Ka anangu nyanga palula tjanalanguru Jamesalu wati mañkur-mañkurpa ngurkantara iyanu Antiyakalakutu. Ka tjana ngura nyara palula wirkankunyangka Peterlu tjananya nyakula kunṭaringu, panya paluru alatji walytjangku kuliningi, "Tjinguru tjana ngayunya Jew wiya tjutangka nyinanyangka nyakula ankula tjakultjunkuku Jerusalemala nyinanytja tjutangka." Alatji Peterlu kuliningi munu palulanguru Jew wiya tjutanguru paṭuringu munu tjanala piṛuku mai ngalkuntjikitja tjunguringkunytja wiya maunṭalpa nyinangi.

¹³ Ka ngura nyara Antiyakala Jesuku walytja kutjupatjara Jew tjuta nyinangi. Munuya paluru tjana Peternya Jew wiya tjutanguru paṭuringkunyangka nyakula palu purunypa tjana kuļu paṭuringu munuya tjanala piṛuku tjunguringkula mai ngalkuntja wiyaringu. Ka wati panya Paanapatjalu kuļu Peternya arkaṇu munu tjanalanguru paṭuringu.

¹⁴ Kaṇa alatji palyannyangka nyakula kuliningi, "Nyangatjaya ngunti kulini Peterlu tjana." Panya nyanga alatji palyaraya Tjukurpa Palya Jesunyatjara puṭu tjukarurungku kulini. Ka Jesuku walytja Antiyakanya ngurara uwankara tjunguringkunyangka ngayulu Peternya wangkara tjukarurunu tjanala miṛangka. Alatjina palunya wangkara tjukaruruningi, "Kulinin Peter? Panya nyuntun wati Jew, munu panyan ngañmanytju Moseku aṛa kuliṛa wañaningi. Nyaratja palya. Palu panyatja kulila, panya nyuntu Antiyakalakutu pitjala Jew wiya tjutangka tjunguringkula nyinara mai ngalkuningi. Munun tjinguru walytjangku unngu kuliningi, 'Wiya, palya ngalkuni Jew wiya tjutangka.' Palu wati panya Jew mañkur-mañkurpa Jerusalemalanguru pitjanyangka nyakula nyuntu kunṭaringu munu panyan Jew wiya tjutanguru paṭuringu. Munu nyuntu tjananya wangkara wituwituningi Jew tjuta purunypa nyinanytjaku. Nyangatja ngunti tjukaruru wiya.

¹⁵ "Peter kulila, nyuntu ngali Jew alatji iṭi ngaringu. Ka Jew wiya tjutangku Moseku aṛa wañantja wiya nyinapai. Palu nyuntu ngali anangu Jew kutjara nyinanyi ngalimpa walytjapitingka tjungu. ¹⁶ Nyuntu ngali ninti Godaku munuli nintingku kulini panya anangu Moseku aṛawanu nyinanyangka Godalu palunya tjukarurunmankula walytjanmankunytja wiya. Palu paluru Jesuku Christaku mulamularingkunytjatjanu kutju karalyarinyi munu Godaku walytjaringanyi. Kala nyara palulanguru Moseku aṛa wantikatingu, panya nganañña Jesuku Christaku kutju mulamularinganyi, kalanya nyara palulanguru Godalu walytjanmananyi Moseku aṛawanungku wiya."

¹⁷ Palulanguruṇa tjukurpa nyangatja Peterla wangkangu, "Kulila, Jew wiya tjutangkuya tjukurpa Mosenya Godalu ungkunytjtja kuliṛa wañantja wiyatū ngurpa nyinanyi. Kaya nyara palulanguru Jew tjutangku tjananya kuranmankupai. Ka panya nyuntu ngali ngañmanypa Jesuku walytjaringkula Moseku aṛaku wiyarinkula Jew wiya tjuta purunyaringu, ka panyalinya kuranmanangi Jew tjutangku. Palu palya. Tjinguru Jew kutjupangku ngalinya wangkaku alatji, 'Jesulu-manti nyupalinyampa wituwituni Godanya wantira Jew wiya tjuta purunyarira kurangka nyinanytjaku. Uti nyupali Moseku aṛawanu kutju nyinama nganañanya purunypa.' Alatji tjinguru tjana ngalila wangkaku. Palu wiya, paluru tjana ngunti wangkanyi, kali kuliṛa wantima. Panya Jesulu wituwituntja wiya nganañña Godanya wantintjaku.

¹⁸ “Panya ngañmanytuña Moseku ara arkara wañaningu Godala tjunguringkunytjikitjangku, palu ngayulu Jesuku mulamularingkula kuwari Godala tjunguringu alatjitu, munuña palulanguru Moseku arawanu Godala tjunguringkunytjikitjangku kulintja wiyangku wantinyi. Palu ngayulu tjinguru piruku Moseku arawanu Godala tjunguringkunytjikitjangku kulirampa palula tungunpungkuku, panya ara nyara palulawantu nyinanyangka Godalu ngayunya nyakula tjukarurunmankula walytjanmankunytja wiya. ¹⁹ Kaña Moseku arawanu Godala tjunguringkunytjikitjangku kulintja wiyaringu, munuña Jesuku mulamularingkula kutju Godala tjunguringu palulawantu kutju tjukaruru nyinanytjikitja.

²⁰ “Uwa, ngayulu panya Jesula tjunguringkula palunya tungun-tunguntu wanani ilunytja kulira nguluringkuwiyangku. Munuña kuwari walytja nyinanytja wiya, panya Christanya Godaku katja ngayula unngu nyinanyi. Paluru panya ngayuku pulkara mukuringkula anga-ilungu ngayuku ngalkilpa. Ka ngayulu palumpa mulamularingkunyangka paluru kuwari ngayula tjunguringkula nyinanyi. ²¹ Tjingurula Moseku arawanu nyinanyangka Godalu nganananya tjukarurunmankula walytjanmanama, ka Jesunya nganampa ngalkilpa ilunytjaku wiya ngarama, kala kulinma, ‘Munta, paluru tjinguru unytju ilungu.’ Palu wiya, panya Moseku arawanu nyinanyangka Godalu nganananya walytjanmankunytja wiya. Palu ngananaya Jesuku Christaku mulamularingkunytjatjanu kutju karalyarinyi kalanya Godalu tjukarurunmankula walytjanmananyi, panya paluru pukultju pulkangku nganampa palyanu. Ka nganampa wantintjaku wiyalta ngarama.” Alatji ngayulu Peterla wangkangi.

3

Jesunya Kutjula Kulinma

¹ Palu Kalaitjiyanya ngurara tjuta, nyura nyaanguru kata kuraringkula palunya wantingu? Nganalu nyuranya kulintja kampa kutjupanu? Panya nyuralana ngañmanytu utingku wangkangi Jesunya puñu katakutjarangka wakara utitjunkunytja, ka panya nyura kulintjatjanu palumpa mulamularingu. Nyara palulanguru panya Godalu nyuranya tjukarurunmankula walytjanmanu. Ka nyura nyaanguru wantira Moseku arawanu Godala tjunguringkunytjikitjangku kulini? Nganalu nyuranya tja kurañu?

² Palu wanyuna nyurala tjapilku. Nyaanguru wanyu Kurunpa Milmilnga panyatja nyurala tjarpangu? Moseku ara wanganarangku kulira palyannyangka? Wiya, nyura panya Tjukurpa Palya Jesunyatjara kulira mulamularingkunyangka Kurunpa Milmilnga nyurala tjarpangu.

³ Ka nyura nyaanguru kata kuraringu? Panya nganmanypa nyura Jesuku walytjaringu Godalu palyannyangka. Palu kuwari nyura kulini, “Nganana Moseku arawanu nyinara kunpuringkuku Jesunya mulamulangku wañantjikitja.” Palu wiya, nyura ara nyara palunya wañara puñu kunpuringanyi, panya Godalu ngañmanytu walytjanmankunytjatjanungku nyuranya rawangku kunpulpai palunya wañantjaku. Palu nyaaku nyuranku wanyu piruku kulini walytja kunpuringkunytjikitjangku ara panya palulawantu?

⁴ Panya nyura ngañmanytu Jesunya tungun-tunguntu wañaningu palumpa mirpantju tjutangku nyuranya pulkara kurannyangka kulintja

wiyangku. Palu kuwari nyanga nyura Moseku arawanu piruku nyinanytjikitja mukuringanyi, kaña alatji kulini, “Ai, nyaanguuya nyanganpa alatjirinyi? Panya tjana ngañmanytju Jesunya tungun-tunguntu wañaningu, munuya kuwari wantinyi. Unytjungku-mantiya panyatja ngañmanytjumpa wañaningu.”⁵ Kulilaya, Godalu Kurunpa Milmilnga nyurala unngu tjarpatjunu paluru nyuranya witulyankunytjaku nyura kutjupa kutjupa pulka tjuṭa witulyatjarangku palyantjaku. Panya Godalu nyuranya Moseku ara wangañarangku kulira palyannyangka Kurunpa Milmilnga nyurala tjarpatkunkunytja wiya. Palu nyura Tjukurpa Palya Jesunyatjara kulira mulamularingkunyangka kutju paluru nyurala tjarpatjunu. Ka nyura wanyu puṭu nintiringangi?

⁶ Panyatjaya kulinma wati panya Aipuramanya, panya nyiringka iriti walkatjunkunytja ngaranyi alatji,

“Aipuramanya mulamularingu Godaku. Ka nyara palulanguru Godalu palunya mulamularingkunyangka nyakula tjukarurunmankula walytjanmanu.”*

⁷ Kulini nyura? Ngananya tjana wanyu Aipuramanya puṛunypa nyinanyi? Wiya, panya paluru tjana, panya Godaku mulamularingkupai tjuṭa.

⁸ Panya nyiringka iriti walkatjunkunytja tjukurpa paluru ngaranyi Godalu panya kalkuntja, panya paluru wangkangu anangu manta winkitja palumpa mulamularingkunyangka tjukarurunmankula walytjanmankunytjikitjangku. Nyangatja tjukurpa palya mulapa ngañmanytju Godalu Aipuramala tjakultjunkunytja. Alatji paluru wangkangu, “Ngayulu anangu manta winkitja pukulmankuku nyuntulanguru.”*⁹ Ka panya Aipuramanya mulapa Godaku mulamularingu. Ka nyara palulanguru palunya atunymara kanyiningi. Ka anangu kutjupa tjuṭa Aipuramanya puṛunypa mulamularingkunyangka Godalu palunya tjananya kuļu atunymara kanyilku.

¹⁰ Panya Godaku tjukurpa iriti Moselu nyiringka walkatjunkunytja ngaranyi alatji,

“Utiya tjukurpa Godalu ngayunya ungkunytjitja uwankara, wangañarangku kulira palyanma, tjukurpa uwankarangka tungunpungkuwyangku. Tjinguru nyura tjukurpa kutjungka tungunpungkunyangka, Godalu nyuranya kukanyamananyi, ngula pungkunytjikitjangku.”*

Alatji ngaranyi nyiringka. Ka tjinguru anangu kutjupa Godanya pukulmankunytjikitja mukuringkula tjukurpa Godalu Mosenya ungkunytjitja uwankara wangañarangku kulinma. Palu paluru tjinguru tjukurpa kutjungka tungunpungkula ngatalarinyi alatjitu, ka Godalu palunya pungkunytjaku alatjitu ngaranyi.¹¹ Ka nganalu tjana wanyu tjukurpa uwankara wangañarangku kulira palyalpai nyinanyi kutjungka tungunpungkunytja wiyangku? Wiya alatjitu. Kala pala palulanguru kulini anangu tjuṭa Moseku tjukurwanu puṭu tjukaruru ngaranyi Godalu nyakula pukularinytjaku. Panya nyiringka iriti walkatjunkunytja ngaranyi alatji,

“Anangu mulamularingkunyangka kutju, Godalu palunya walytjanmankuku. Ka paluru Godala tjunguringkula wanka titutjara nyinaku, panya mulamularingkunytjangu.”*

* **3:6** Genesis 15:6 * **3:8** Genesis 12:3; 18:18; 22:18 * **3:10** Deuteronomy 27:26 * **3:11** Apakukaku 2:4

¹² Palu tjukurpa Godalu Mosenya ungkunytjitja nyanga purunypa wiya, ara maunṭalpa ngaranyi munu alatji wangkanyi,

“Anangungku tjukurpa nyanganpa uwankara wangañarangku kulira palyara kutju Godala tjunguringkula wanka tiṭutjara nyinaku.” *

¹³ Uwa, nganana tjukurpa Godalu Mosenya ungkunytjitja uwankara puṭu wangañarangku kulira palyalpai munula nyara palulanguru kukan-yaringu. Palu Jesunya Christanyalampa ngalkilpa anga-ilungu puṇungka, panya nyiringka iriti walkatjunkunytja tjukurpa ngaranyi nyanga alatji,

“Panya anangu pungkula puṇungka utitjunkunytjanya, nyara paluru kukanypa.” *

¹⁴ Alatji Jesunya kukanyaringu munu panya nganampa ngalkilpa ilungu, Jew wiya tjuṭaku kuļu. Panya Godalu Aipuramanya mulamularingkunyangka kalkuṇu palunya pukułmankunytjikitjangku, palu purunypa paluru Jew wiya tjuṭa kuļu kuwari pukułmananyi Aipuramanya purunypa Godaku mulamularingkunyangka. Munu panya Godalu nganmanytju kalkuntjatjanungku ngananaļala uwankarangka Kurunpa Milmilnga tjarpatjunu nganana Jesuku mulamularingkunyangka.

Godalu Kalkuntja munu Moseku Tjukurpa

¹⁵ Uwa waltyta tjuṭa, kuwariṇa ara kutjupa nyurala wangkanyi nyura uti kulintjaku. Tjinguru anangu kutjarangku wangkara kulilpai kutjupa kutjupa palyantjikitjangku munu pulanku wangkara kalkulpai. Ka nyara pula ngañmanytju wangkara kalkuntja kutjupangku małangka puṭu wiyanı munu puṭu kampa kutjupa palyani. ¹⁶ Ka tjukurpa nyanga palu purunypa nyiringka iriti walkatjunkunytja ngaranyi Godalu kalkuntja Aipuramanya. Panya paluru palunya kalkuṇu munu palumpa tjitji kuļu kalkuṇu. Palu panya nyiringka tjukurpa nyangatja ngaranyi *tjitji kutju*, tjuṭa wiya. Kala nyanga palulanguru kulini panya tjitji kutju paluru ini Jesunya Christianitya.

¹⁷ Nyaana wanyu wangkaku nyura uti kulintjaku? Wiya, nyangatjaya kulila. Panya nganmanytju alatjitu Godalu Aipuramanya kalkuṇu, munu palulanguru yiya 430 ngarala wiyaringkunyangka małangka kutju tjukurpa pułka Mosenya ungu. Palu tjukurpa panya mała ungkunytjalu puṭu kampa kutjupa palyaningi tjukurpa panya nganmanytju kalkuntjanya. Panya kalkuntja paluru waintara alatjitu ngaraku tiṭutjara.

¹⁸ Panya nganana Moseku arawanu nyinanyangka Godalu nganananya kalkuntjatjanungku puṭu unganyi. Palu paluru nganananya ungkupai paluru kalkuntjatjanungku kutju. Panya Aipuramalu wanka nyinaralpi Moseku ara kanyintja wiya ngurpa nyinangi. Ka Godalu pukultju pułkangku palunya ungu paluru kalkuntjatjanungku.

¹⁹ Ka nyaaku wanyu Godalu tjukurpa pułka tjuṭa ungu Mosenya? Wiya, tjukurpa palunya ungu anangu tjuṭangku kura palyantjatjanungku nintingku kulintjaku. Palu tjukurpa nyanga paluru ngarangi Aipuramaku tjamu małatja małatjanguṇu utiringkunytjaku paṭara Godalu panya kalkuntjitja. Ka tjukurpa panya palunya Godalu palumpa angelpa wituṇu Mosenya ungkunytjaku, ka paluru anangu tjuṭangka wangkara nintinu.

²⁰ Palu Godalu kutjupawanungku Aipuramanya kalkuntja wiyatū palunya alatjitu kalkuṇu. Panya Godanya kutju alatjitu munu kutju paluruṭu Mosenya tjukurpa ungu munu Aipuramanya kutju paluruṭu kalkuṇu.

* 3:12 Leviticus 8:5 * 3:13 Deuteronomy 21:23

²¹ Palu kutjupa tjutangku tjinguru kulini alatji, "Godalu tjinguru Mosenya tjukurpa panya pulka tjuta ungkula Aipuramanya panya kalkuntjtatjanungku wantingu." Palu wiya, Godalu Mosenya ungkula kalkuntjtitja panyatja wantinytja wiyangku kulinigi alatjtitu, panya kalkuntjtitja nyara palulanguru kutju paluru nganañanya tjukarurunmankula walytjanmankupai. Tjinguru nganaña Moseku arawanu tjukaruru mulapa nyinanyangkampa Godalu nganañanya tjukarurunmankula wankarunama palula tjungu titutjara nyinanytjaku. Palu wiya, tjukurpa nyara palulawanula puťu alatjtitu tjukaruru nyinapai. ²² Panya tjukurpa iriti nyiringka walkatjunkunytja alatji ngarinyi, "Manta winkingkaya anangu uwankarangku kura rawangku palyani munuya puťu wantinyi." Uwa mulapa nganaña puťu kura wantinyi, palu nganaña Jesuku Christaku mulamularingkunyangka kutju Godalu kalkuntjtatjanungku nganañanya tjukarurunmankula walytjanmankuku. ²³ Panya ngañmanypa nganaña Moseku tjukurwanu nyinangi Godalu nganañanya tjukaruru nyinanyangka nyakula tjukarurunmankunytjaku, palu wiya, puťula kura wantira tjukaruru nyinangi, kalanya paluru puťutu tjukarurunmanangi. Panya pulitjumunungku anangu tjuta tjailangka kanyilpai, kaya puťu pakalpai, palu purunypa nganaña ngañmanypa Moseku tjukurwanu nyinara puťu tjukarururingangi Godalu nganañanya nyakula tjukarurunmankula walytjanmankunytjaku. Panya Jesunya pitjanytja kuwaripangka nganaña puťu kulinigi palumpa mulamularingkunytjikitjangku munula kuwari kutju kulira mulamularingu paluru pitjala nintinnyangka.

²⁴ Uwa, Godalu nganañanya Jew tjuta tjukurpa pulka ungu Moselawannungku nganaña wanganarangku kulira palyantjaku. Tjukurpa nyanga palurulanya kutangku purunytju tjukaruruningi Jesuku Christaku patara. Panya paluru pitjangu nyuntu nganaña palumpa mulamularingkunyangka Godalu nganañanya tjukarurunmankula walytjanmankunytjaku. ²⁵ Uwa, ngañmanytjulanya Moseku tjukurtu nganañanya tjukaruruningi palulawanu tjukaruru nyinanytjaku, palu kuwarila Jesuku mulamularingkula palulawanu wankaru nyinanyi.

²⁶ Ka panya nyura Jesuku Christaku mulamularingkunytjatjanu Godaku katja unṭalpa nyinanyi, Moseku arawanu wiya. ²⁷ Panya nyura minangka baptise-aringkula kuwari Christala tjungu nyinanyi. ²⁸ Panya nyura kutjupa tjuta Jew tjuta nyinanyi, ka kutjupatjara Jew wiya tjuta, ka panya kutjupa tjuta wati mayatjaku unytju warkaripai, ka tjara kutjupangku walytjangku kulira warkaripai. Ka panya kutjupa tjuta wati, ka kutjupa tjuta minyma. Nyangatja palya, palu nyura uwankara kutjuringu Jesula Christala kutjungka palumpa walytjaringkula. ²⁹ Uwa, nyura Christaku mulamularingkula palumpa walytjapiti nyinanyi. Nyara palulanguru nyura Aipuramanya purunypa nyinanyi. Ka Godalu nyuranya kalkuntjtatjanungku ungkuku alatjtitu, panya iriti Godalu Aipuramanya wangkara kalkunu anangu tjuta palulawanungku puku|mankunytjikitjangku.

4

¹⁻² Palu walytja tjuta, wanyuña ara kutjupa nyurala wangkama panya Moseku aratjara nyura tjukaruru mulatu kulintjaku tjukurpa nyanga alatji, panya watingku kalkulpai tjilpiringkula katja ungkunytjikitjangku paluru kanyintja uwankara. Palu katja paluru kuwaripa tjukutjukutu nyinanyi mantjintja wiya munu kalkuntja kutju kulini. Munu paluru warkaripai tjuta purunypa nyinanyi kutjupa mantjintja wiyatú,

panya paluru ngula kutju pulkaringkulalta mantjira kanyilku tjintu panya mamangku ungkunytjikitjangku wangkanytjitungku kutju. Paluru tjukutjuku nyinanyangka aŋangu kutjupangku palunya atunymara kanyilpai munu kalkuntja tjuṭa kulu atunytju kanyilpai paluru ngula mantjin-tjaku.³ Ka Jesuku walytja tjuṭa palu purunypa nyinangi. Panya Jesuku mulamularingkunytja kuwaripangka nganana mamu arkayitja tjutangka wanganarangku kuliningi munula palunya tjananya puṭu wantingi. Panya wati warkaripaingku palumpa mayatjangka wanganarangku kulilpai, palu purunypa nganana ara palula tjanala kutju wanganarangku kuliningi.⁴ Palu tjirirpi panya palula panya Godalu kulintjtjungku alatjitu palumpa katja mantakutu witura iyanu. Ka minyma Jew-ngku palunya iti kanyinu Moseku tjukurwanu nyinara.⁵ Paluru pitjangu ngananaanya Moseku ara waŋalpai tjuṭa wankarunkunytjikitja nganana palumpa walytjaringkula Godaku katja unṭalpa mulapa nyinanytjaku. Kala nyara palulanguru kuwari Jesunya waŋani munula alatji kulini, “Godalu ngananaanya Moseku arawanu nyinanyangka nyakula tjukarurunmankula walytjanmankunytja wiya.”⁶ Ka nyuntu nganana Godaku katja unṭalpa nyinanyangka paluru ngananaala palumpa katjaku kurunpa tjarpatjunu ngananaala unngu nyinanytjaku. Kurunpa nyara paluru panya Kurunpa Milmilnga, ka nganana kurunpa nyara palunyatjarangku Godanya walkura wangkapai, “Abba.” Panya alatji wangkanyi, “Mama.”

⁷ Uwa, nyura ngamanypa wati warkaripai tjuṭa purunypa nyinangi nyurampa mayatjangka mantjintjikitja wiya, palu kuwari nyanga nyura Godaku katja unṭalpa nyinanyi. Ka nyara palulanguru Godalu nyuranya kalkuntjatjanungku ungkula pulkara pukulmankuku.

Paulanya Tjanampa Kulira Tjituru-tjitururinytja

⁸ Panya ngamanypa nyura Godaku ngurpa nyinara mamu arkayitja tjutangka kulira waŋaningi. Panya wati warkaripaingku palumpa mayatjangka wanganarangku kulilpai, palu purunypa nyura mamu palula tjanala wanganarangku kuliningi. Palu mamu nyara paluru tjana kurakura tjuṭa god mulapa wiya.⁹ Ka kuwari nyanga nyura Godaku nintiringu, panya Godalu nyuranya palumpa nintiringkunytjaku palyaṇu. Ka nyura nyaaku piṛuku mukuringanyi mamu palula tjanala kulintjikitja? Nyara paluru tjana palya wiya kurakura tjuṭa, ka nyura tjananya kulira kurunpa kūnpuringkula pukularinytja wiya alatjitu. Kaya wantima mamu palula tjanala piṛuku mayatja purunytja kulintja wiyangku.¹⁰ Nyura panya Jew wiya tjuṭa, munu nyura nyaaku Jew tjuṭa purunypa Moseku arawanu nyinanytjikitja mukuringanyi? Panya kuwari nyura kutjupa tjarangku Jew tjuṭaku ara titutjarangku kulilpai munu Saturday kutjupa Saturday kutjupa tjanala inmangka tjunguringkupai. Munu nyura piṛuku tjintu milmilpa kutjupa tjanampa ngaranyangka tjanala tjunguringkupai, tjinguru pira kutjupangka kutjupangka, tjinguru piriyakutu, tjinguru kulingka, tjinguru nyinngangka kulu.¹¹ Tjinguru nyura kulini Godalu-manti alatji palyannyangka nyakula nyuranya tjukarurunmankula walytjanmankuku. Palu wiya. Panyaku nyura watarkuringu? Panya ngayulu nyurala rawangku tjakultjunangi Tjukurpa Palya Jesunyatjaraku mulamularingkunyangka Godalu nyuranya tjukarurunmankula walytjanmankunytjaku. Palu tjinguruṇa unytjungku panyatja nyurala tjakultjunangi nyura malaku ařuringkunytjaku-palku.

¹² Uwa walytja tjuṭa, uti nyura ngayunya arkanma, munuya kulinma panya Moseku tjukurtu ngananaanya puṭu tjukaruruṇi Godala tjunguringkula

nyinanytjaku, palu panya Jesuku mulamularingkunyangka kutju Godalu nganananya tjukarurunmankula walytjanmankupai. Panya mungaṭu ngayulu nyurala tjungu nyinara nyuranya purunypa nyinangi Jew wiya purunypa munu panyaṇa nyuranya Moseku arawanu nyinanytjaku wituwituntja wiyat̄u. Ka nyura nyaaku aṛa pala palulawanu nyinanytjikitja mukuringanyi?

Panya ngayulu mungaṭu nyurala tjungu nyinanyangka nyura ngayunya kurantja wiyangku wirūra kanyiningi. ¹³ Nyura ninti panya nyara palula aṛa ngayulu pikatjarangku nyurala Tjukurpa Palya Jesunyatjara tjakultjunangi. ¹⁴ Ka panya ngayulu pikatjara nyinanyangka nyura kuraringkula tungunpungkunytja wiyangku ngayunya alt̄ira nyurampa ngurangka pukultu kanyiningi angelpa ilkaritja purunypa munta Jesunya purunypa. ¹⁵ Panya nyura ngayuku pulkara pukularingi munu nyura nyaaringku kuwari? Ngayulu ninti panya wiruranı nyura pukultu kanyiningi. Tjinguruṇa nyurala kutjupa kutjupaku ngatjinnyangka nyura ngayunya ungama alatjitu. Uwa, nyura panya ngayuku nganmanypa pulkara mukuringkupai nyinangi, munu panyaṇi nyura wirūra pukultu ungkupai ngaltunytjungku. ¹⁶ Palu kuwari nyanga nyura ngayuku kuraringu. Nyaanguru nyura alatjiringu? Tjinguru ngayulu nyuranya tjukarurungku wangkanyangka nyura ngayuku kuraringu.

¹⁷ Uwa, anangu nyara paluru tjana nyuranya rawangku pulkara wituwituni Moseku arawanu nyinanytjaku munu ngayuku kuraringkula palula tjanala kutju kulintjaku. Tjinguru nyura ngunti kulini tjana nyurampa mukuringkunyangka-palku, palu wiya tjana mukuringanyi nyura Jesunya wantira tjanala kutju kulintjaku. ¹⁸ Nganmanypa panyaṇa nyurala nyinara tjukurpa tjukaruru wangkangi, palu kuwarina ngura kutjupangka nyinanyi. Ka palya nyura tjinguru anangu kutjupangku Tjukurpa Palya tjukarurungku wangkanyangka kulira palumpa mukuringama. Nyaratja palya, palu kutjupangku nyuranya mukumukura ngunti kurannyaṅgkaya tjananya kulira wantima. ¹⁹ Uwa walytja wiru tjuta, nyura ngayuku tjitji tjuta purunypa, panya ngayulu tjukurpa Jesunyatjara nyurala wangkanyangka nyura palumpa mulamularingu. Palu nyura Moseku arawanu piruku nyinanytjikitja mukuringkunyangkaṇa pulkara tjituṛu-tjituṛurira nyuranya rawangku kulini panya nyura kuwaripatu tjukarurungku kulintja wiya. ²⁰ Nyaalkuna nyuranya? Ngayulu puṭu kulini nyuranya tjukaruruntjikitjangku nyanga paṭu nyinara. Nyan-gatjana lita kutju walkatjura nyuranya pulkara wangkanyi. Palu mukuringanyina ma-pitjala nyuranya ilangku purkarangku wangkanytjikitja. Palu puṭuna kulini.

Tjukurpa Aikanya Pula Tjiiranya

²¹ Kulilaya, panya nyura kutjupa tjutangku Moseku aṛa kutju kulira wanani kuwaripangkuṭu. Munu nyura palulanguru puṭu tjukarurungku kulini. Wanyu kaṇa nyurala tjapila, “Nyura kulini panya Moseku tjukurtu nganāqala wangkanytja?” ²² Panya nyiringka iriti walkatjunkunytja alatji ngaranyi Aipuramalu katja kutjara utinu minyma kutjarangka ini panya Itjumailnga pulanya Isaacanya. Ka panya Itjumailku ngunytju ini Aikanya munu paluru Aipuramaku kuriku warkaripai Tjiiraku, ka panya Tjiiranya Isaacaku ngunytju panya paluru walytja warkaripai. ²³ Palu Tjiiranya panya tjitji wiyat̄u pampa mulararingu munu panya palumpa kuri Aipuramanya wituwitunu palumpa warkaripaingka Aikala ngarinytjaku, ka panya nyara palulanguru paluru katja kanyinu ini

Itjumailnga. Ka palula małangka Godalu Aipuramanya kalkunu alatji wangkara, "Nyuntumpa kuri Tjiiranya kuwari nguwanpa pakuringkuku munu katja kanyilku." Ka ngulalta Godalu panya kalkuntja wirkanu katja ini Isaacanya. ²⁴ Ka minyma nyanga kutjaranguru nganaña tjukurpa kampa kutjupa kulini. Panya minyma kutjaranguru nganaña ara kutjara kulini Godalu ungkunytja. Munula minyma Aikalanguru kulini tjukurpa Godalu Mosenya ungkunytja puli panya ini Tjaniyala. Ka aŋangumpa nyanga Moseku arawanu nyinara minyma Aikanya purunypa nyinanyi, Tjiiraku warkaripai purunypa walytja warkaripai wiya.

²⁵ Minyma nyara Aikanya kulira nganaña kulini puli panya Tjaniyanya manta nyara Araipiyala ngururpa. Ka panya palumpa katja Itjumailnga ngunyntju purunypa walytja warkaripai wiya ka palumpakunu malatja malatja kuļu palu purunypa nyinanyi. Munula Aikanya kulira nganaña Jerusalemanyia kuļu kulilpai panya Jew tjuṭaku ngura pulka. Uwa, Aikanya kulira nganaña Jew tjuṭa kulilpai tjana Moseku arawanu nyinanyangka, panya tjana alatji kulilpai, "Godalu nganañanya ara nyanga palulawanu nyinanyangka nyakula tjukarurunmankula walytjanmankuku."

²⁶ Ka minyma panya Tjiiranya kulirala nganaña kulini paluru kutjupaku warka unytjungku palyalpai wiya, Aikalu purunytju. Nyara palunya kulira nganaña Jerusalema kutjupa kulini panya ngura ilkaritja. Panya ngura nyara paluru ngaranyi Jesuku mulamularingkupai tjuṭaku, Godalu tjananya tjukarurunmankula walytjanmara kanyintjaku. ²⁷ Panya tjukurpa Tjiiranyatjara nyiringka iriti walkatjunkunytja ngaranyi alatji, "Nyuntu pukularima minyma tjitji wiya nyinara, mulyararinytja wiya.

Nyuntu iti kanyintja wiya, palu kuwari pukulpa mirama.

Nyuntunya panya kuringku wantingu tjitji wiya.

Palu kuwari nyuntu tjitji tjuṭatjararingkuku.

Ka nyura minyma kuritjara tjuṭangku rawa nyinara tjitji maŋkurpa kutju kanyilku." *

Alatji panya Aitjayalu iriti walkatjunu nyiringka.

²⁸ Uwa walytja tjuṭa, nyura panya Godaku katja uŋtalpa nyinanyi Isaacanya purunypa, panya Tjiiralu nyinara rawangku paṭanangi Isaacaku munu Godalu kalkunnyangka kutju katja mantjinu, palu purunypa nyuranya Godalu katja uŋtalpa kanyini kalkuntjatjanungku. ²⁹ Ka panya Itjumailngu iti wirkanu Aipuramanya pula Aikanya tjunguringkula ngarinyangka. Palu Isaacanya iti ngaringu Godalu Aipuramanya kalkuntjtjangu. Nyara palulanguru kutju Isaacanya wirkanu Kurunpa Milmiltu palyannyangka. Palu tjitji paluru pula tjungu pulkaringgangi, ka Itjumailtu Isaacanya rawangku uulinkupai. Ka palu purunypa kuwari ngaranyi panya Jew tjuṭaya Jew wiya tjuṭaku pulkara kuraringkupai, panya tjana nintingku kulilpai alatji, "Godalu nganañanya Jesuku mulamularingkunyangka kutju tjukarurunmankula walytjanmanu." Kaya nyara palulanguru Jew tjuṭa tjanampa kuraringkupai. ³⁰ Panyatja kulinma panya nyiringka iriti walkatjunkunytja ngaranyi alatji Godalu Aipuramanya wangkanytja,

"Nyuntu ilunyangka Aikaku katjangku Itjumailtu nyuntulanguru kutjupa kutjupa mantjintja wiya alatji. Palu Isaacalu kutjungku nyuntumpa uwankara mantjilku. Nyara palulanguru Aikanya pulanya Itjumailngu ngura kutjupakutu paira iyalá panya paluru pula walytja warkaripai wiya mayatjangku wangkanyangka kutju palyalpai." *

* **4:27** Aitjayaku 54:1 * **4:30** Genesis 21:10

Alatji Godalu Aipuramala wangkangu.

³¹ Uwa waltyta tjuṭa, tjukurpa nyanga palulangurula nyaa kulini? Wiya, nganaṇa kulini Jesuku Christaku mulamularingkupai tjuṭa Aikaku katja purunypa wiya, panya minyma paluru mayatjangku wituwitunyangka war̄karipai. Palu nganaṇa panya Tjiiraku tjitji purunypa nyinanyi, panya paluru Aipuramaku kuri mulapa nyinangi waltyta war̄karipai.

5

Paulalu Wangkanytja Kutju Wanantjaku

¹ Palu kulilaya, Jesunya nganampa ngalkilpa ilunyangka nganaṇa karalyaringu. Panya nganaṇa Moseku arawanu arkara nyinanyangka Godalu nganaṇanya nyakula tjukarurunmankula waltyjanmankunytja wiya. Panya paluru nganaṇanya pungkunytjaku ngaranyi puṭu tjukaruru nyinanyangka. Palu Christalu panya nganaṇanya ngalkinu karalyarira palulawunu nyinanytjaku. Ka nyanga palulanguru kutjupa tjuṭangku nyuranya Moseku arawanu Godaku waltyjaringkunytjaku wituwitunyangkaya tjananya kulira wantima, panya tjana nyuranya ngunti kuraṇi.

² Kulilaya, ngayulu Paulalu nyurala wangkanyi, panya tjana mukuringanyi nyura Moseku arawanu tjana purunypa watiringkula nyinanytjaku. Palu nyura tjanala wangaṇarangku kulira watiringkunyangkampa Jesulu nyuranya puṭu ngalkini nyura palula karalyarira nyinanytjaku, panya nyura palumpa mulamularingkunytja wiyangku wantinyi. ³ Wanyu wanti kana piruku nyurala utira wangka. Panya nyura Jew tjuṭa purunypa watiringkunytjikitja mukuringkula nyura uti Moseku tjukurpa uwankara kulira palyanma watiringkula kutju nyinanytja wiyangku, panya uwankara palyalwiyangku wantinyangkampa Godalu nyuranya puṭu tjukarurunmankula waltyjanmananyi.

⁴ Tjinguru nyura Moseku arawanu nyinanytjikitja mukuringkula alatji kulini, “Nganaṇa ara nyanga palunya waṇannyangka Godalu nganaṇanya tjukarurunmankula waltyjanmananyi.” Palu nyangatja tjukaruru wiya. Munu nyura tjinguru alatji rawangku kulirampa nyura Jesuku mulamularingkunytja wiyingkuku munu palunya wantiku, ka palulanguru Godalu nyuranya puṭu waltyjanmananyi.

⁵ Palu Kurunpa Milmiltu nganananya Jesuku Christaku mulamularingkunyangka unngu nintilpai, kala kulil-kulilpa patara nyinanyi Godalu nganaṇanya Christaku mulamularingkupai tjuṭa tjukarurunmankula waltyjanmara kanyintjaku.

⁶ Panya tjintu maṭatjangka Godalu nganaṇanya nyaa tjapilku? Paluru wanyu alatji tjapilku, “Nyura Moseku arangka watiringu, mutta wiya?” Palu wiya, Godalu nyanga alatji tjapintja wiya. Nyanga alatji paluru nganananya kutju kutju tjapilku, “Nyuntu mulapa Jesuku Christaku mulamularingu? Munun palunya waṇara aṇangu kutjupa tjuṭa mukulyangku atunymara kanyiningi?” Nyanga palunya paluru tjapilku watiringkunytja kulintja wiyangku.

⁷ Nganmanytju panya nyura Tjukurpa Palya Jesunyatjara tjukarurungku kuliningi munu palunya waṇaninge. Ka nyuranya nganalu kuraṇi tjukurpa tjukaruru wantinytjaku? ⁸ Godalu nyuranya kurantja wiyatū. Paluru panya nyuranya ngurkantanu palunya waṇantjaku. ⁹ Ara nyangatja kulila, panya yiitja tjukutjukungku mai winki taltulpai, palu purunypa wati mankurtu tjukurpa ngunti wangkara nintirampa nyuranya uwankara kuraṇi.

¹⁰ Palu nyura mulapa Mayatja Jesuku walytja nyinanyi kaña palulanguru nyuranya nintingku kulini alatji, "Mulapa tjana lita nyangatja mantjira nyakula wangkara nintiringkuku munu ngayula wangañarangkulta kulilku, munuya kutjupa tjuta ngunti wangkanyangka kulira wantiku." Alatjiña nyuranya kulini. Ka panya Godanya ninti wati panya nyuranya kuralpai tjuṭaku munu palunya tjananya ngurkantara pungkuku.

¹¹ Palu walytja tjuṭa, kutjupa tjuṭangkuya kunyu ngayunya ngunti wangkapai alatji, "Tjinguru Paulalu Jew wiya tjuṭangka wangkanyi Jesuku walytjaringkunyangka tjana Moseku arawanu watiringkunytjaku." Palu wiya, tjana ngunti kulini. Tjinguru ngayulu alatji wangkanyangkaya Jew tjuṭa ngayuku pukularima. Palu wiya, tjana rawangku ngayunya kuralpai munuya ngayunya rawangku pailpai tjukurpa Jesunya puṇu kaṭakutjarangka ngalkilpa ilunytjtja anangu Jew wiya tjuṭangka wangkanytja wiyangku wantinytjaku. Tjinguruna Jew wiya tjuṭa watiringkunytjaku wangkanyangkaya ngayunya wantima paintja wiyangku. Palu tjana rawangku ngayunya mirpaṇtu wantipai. ¹² Uti wati panya nyuranya kuralpai tjuṭangkuyanku watiringkunytjikitja mukuringkula uwankara alatjiwu wiyanma!

¹³ Uwa walytja tjuṭa, Jesulu nyurampa ngalkilpa ilura nyuranya karalyarinytjaku palyanu, nyura palulawanu pukulpa nyinanytjaku. Ka tjinguru nyura kulini alatji, "Uwa, panya nganana Moseku arawanu nyinara Godaku walytjaringkunytja wiya. Palulanguru nganampa ngaranyi walytjangku kulira palyantjaku kura tjuṭa kułukulu." Palu alatji kulintja wiyangkuya wantima. Uti nyuranku pułkara mukuringama munu nyuranku mukulyangku ngapartji-ngapartjingku alpamilanma. ¹⁴ Panya alatji Moselu iriti nyiringka walkatjunu tjukurpa tjuṭa mulapa palu purunypa. Panya nyuntunku walytja pułkara mukuringkunytja purunypa anangu kutjupa tjuṭaku pułkara mukuringama. ¹⁵ Palu nyura kuwari nyanga purunypa nyinanytja wiya. Nyura papa inura purunypa pikati nyinanyi, panya papa kutjarangku pulanku ngapartji-ngapartjingku pułkara patjalpai, palu purunypa. Kaña kuwari nyuranya pułkara wangkanyi alatji, uti nyuranku aṭunyamanama kuraringkula Godalanguru paturingkunytjaku-tawara.

Kurunpa Milmilngatjara Nyinanyi

¹⁶ Uwa, kaña nyuranya wangkanyi alatji Kurunpa Milmiltu nintinnyangkaya wangañarangku kulira palyanma, munu nyura palulanguru putu mukuringkuku kura palyantjikitja. ¹⁷ Panya nganana walytjangku kulirampa kura kutju palyantjikitja mukuringkupai. Palu Kurunpa Milmiltu nganana nintilpai wiru tjuṭaku kutju mukuringkunytjaku. Ka nganana tjinguru walytjangku kulira kutjupa kutjupa kura tjuṭa kutju palyalku. Palu nganana Kurunpa Milmiltu wangañarangku kulirampa wiru tjuṭa kutju palyalku, panya paluru nganana unngu markulpai walytjangku kulira kura palyantjaku-tawara. ¹⁸ Ka panya nyura Kurunpa Milmilngatjara nyinanyi, ka palulanguru paluru nintinnyangka nyura wangañarangku kulira tjukaruru nyinanytjaku alatjiwu ngaranyi, panya nyura kuwari kulini alatji, "Munta-uwa, mulapa Godalu nganana Moseku arawanu nyinanyangka nyakula puṭu tjukarurunmankula walytjanmananyi."

¹⁹ Uwa, anangungku Kurunpa Milmiltu kulira wantira palurunku mukuringkunytja kutju kulira palyalpai. Munu paluru kuri walytjatjarangka ngaripai, munu kawakawangku kulilpai kurakura tjuṭa

kungka kutjupangka kutjupangka palyantjikitjangku kunṭa wiyangku papangku purunypa. Panya aŋangu nyanga palu purunypa inurā alatjiṭu nyinapai. ²⁰ Munu paluru puli puṇu pupakatira walkulpai, munu aŋangu tjuṭa initjunkupai, kutjupa tjuṭaku kuraringkupai, kalypa nyinapai wiya, nyararingkupai, munu mapalku waruringkula pulkara mirpanaripai. Paluru panya palurunku mukuringkunytjija kutju kulira palyalpai, munu paluru ngalytjurmankupai munu aŋangu tjuṭa pikangku wangkara maunṭankupai kayanku ngaparku pikaringkula wangkapai. ²¹ Uwa, aŋangu nyanga palu purunytju tjinguru kutjupangku wiru kanyinnyangka nyakula pulkara mukuringkupai, munu paluru waina tjikira tarangkaripai, munu kutjupa tjuṭangka tjunguringkula manyu pulkangku mai ngalkula wiyalpai munu kura kutjupa kutjupa tjuṭa tjanala tjunguringkula palyalpai. Panya aŋangu nyanga palu purunypa tjuṭana ngañmanytju nyurala wangkangu mununa piṛuku nyanga wangkanyi palunyaṭu panya Godalu aŋangu nyanga palu purunypa nyinapai tjuṭa ngurkantankunytja wiya alatjiṭu palumpa walytjaringkunytjaku.

²² Palu aŋangungku Kurunpa Milmiltä wangañarangku kulinnyangka paluru palunya nintiku nyanga purunypa nyinanytjaku, panya mukulya pukulpa mulapa nyinanytjaku kurunpa rapa, munu purkarangku kulintjaku mapalku waruringkunytja wiyangku, munu kutjupa tjuṭa ngaltunytjungku aṭunymara kanyintjaku munu palyanyku nyinanytjaku, munu kalkuntjatjanungku tjukarurungku palyantjaku. ²³ Munu aŋangu kutjupa purkarangku wangkanytjaku pauntjingara wituwitunta wiyangku, munu purkarangku kuliratjara-kuliratjarangku palyantjaku warpungkula palyantja wiyangku munu kutjupangku arkannyangka tungun-tunguntu kura wantintjaku alatjiṭu. Uwa, Moseku tjukurtu nganañanya paintja wiyaṭu nyanga purunypa tjuṭa palyantjaku.

²⁴ Nganmanytjula walytjangku kulira kura kutju palyantjikitja mukuringkupai, palu panya Jesuku Christaku walytjaringkunytjatjanungkula wantingu alatjiṭu piṛuku kulintja wiyangku. ²⁵ Ka panya Kurunpa Milmilngga nganañala tjarpara nyinanyangka nganaña uti palula kutju wangañarangku kulira titutjarangku palyanma. ²⁶ Munula uti kañanya-kañanyariwiya nyinama ngunti palyangku-palku mirawañinytjaku-tawara. Munula uti kutjupangku wiru kanyinnyangka nyakulampa pulkara mukuringkunytja wiyangku wantima.

6

Nyuranku Aṭunymankunytjaku

¹ Uwa walytja tjuṭa, tjinguru Jesuku walytja kutjupangku kura palyalku, ka nyura uti Kurunpa Milmilngatjarangku aŋangu palunya wangkara tjukarurunma. Palu purkarangku wangkama, munuyanku walytjangku kulinmaṭu nyura kuļu kuraringkunytjaku-tawara. ² Alpamilanmayanku, panya yakutja kuṇpu pulka tjalira katintjatjanu pakuringkupai ka kutjupangku alpamilara katipai, nyanga palu purunytjuyanku aṭunymamanama. Panya nyura alatji palyarampa tjukurpa panya Jesulu nganmanytju wangkanytja wangañarangku kuliklu.

³ Ka tjinguru kutjupangku walytjangku kulini, “Ngayuluṇa mulapa pulka nyinanyi kutjupa tjuṭangka muṇkara.” Palu paluru alatji ngunti kulini. ⁴⁻⁵ Panya Godalu nganañanya waṛka kutju kutju ungu walytjangku walytjangku palyantjaku palumpa. Palulangurula uti waṛka palyara aŋangu

kutjupa tjuṭa tjana warkarinyangka nyakula wangkanytja wiyangku wantima. Tjinguru kutjupangku alatji wangkanyi, “Ngayulu warka wiru mulapa palyanṭi Godaku, palu nyarangku warka kurakura tjuṭa palyanṭi.” Palu utila nyanga palu purunypa nyakula wangkanytja wiyangku wantima. Utilanku warka nganāna palyantja walytjangku walytjangku kulinma, tjinguru nyangatja palya ngaranyi, munta tjinguru kurakura ngaranyi. Ka tjinguru kutjupangku Godaku warka tjukarurungku palyantjatjanungku palurunku palyanmananyi, nyaratja palya.

⁶ Ka aŋangu kutjupangku Jesuku tjukurpa nyurala nintinnyangkampa nyura ngapartji palunya ungama kutjupa kutjupa wiru tjuṭa, panya paluru Tjukurpa Palya nyurala tjakultjunangi.

⁷ Ka tjinguru aŋangu kutjupangku kulilku, “Godalu ngayunya kura palyannyangka nyakunytja wiya.” Palu wiya, nyangatja paluru ngunti kulintja. Panya wati kaana kanyilpaingku uŋinypa tjunkupai mantangka, ka ngula pakara maitjararingkupai, ka mai palunyatū alatjitu uralpai uŋinypa panya paluru nganmanytju tjunkunytjatjanungku. Ka palu purunypa aŋangungku kura tjuṭa palyannyangka kura palula ngapartji wirkankuku paluru tjituru-tjitururintjaku, munu wiru tjuṭa palyannyangka palula wiru tjuṭa wirkankuku paluru pukularintjaku.

⁸ Panya aŋangungku tjinguru walytjangku palurunku mukuringkunytjtita kutju kuliṛa palyalpai, nyara paluru ngula ilura Godalanguru titutjara mauntalpa nyinaku ngura kurangka. Palu tjinguru aŋangungku Kurunpa Milmiltā wangaŋarangku kuliṛa palyarampa paluru Godala tjungu wanka titutjara nyinaku.

⁹ Kala uti titutjarangku wiru tjuṭa kutju palyanma pakuringkula wantinytja wiyangku, panya nganāna pakuwiyangku titutjarangku palyantjatjanungku ngula wiru mulapa mantjilku palulanguru, panya wati kaanangka warkaripaingku paku wiya warkarinytjatjanungku mai kuřuringkunyangka uralpai, palu purunypa. ¹⁰ Ka kuwari nganampa ngaranyi wiru tjuṭa palyantjaku aŋangu uwankaraku. Munula uti Jesuku walytja tjuṭaku wiru mulapa palyanma tjanampa pulkaṛa mukuringkula.

Jesunya Kutjuya Kulinma

¹¹ Nyawaya nyanga walka pulka ngayulu mara walytjangku walkatjunnanyi alatji, “Nyangatja ngayulu walkatjunanyi, Paulalu.”

¹² Uwa, aŋangu panya kutjupa tjuṭangkuya nyuranya mayatjarira wituwituni Jew tjuṭaku arawanu watiringkula nyinanytjaku tjananya purunypa, aŋangu Jew kutjupa tjuṭangkuya tjananya nyakula pukularintjaku. Panya tjanan Wangkanytja wiyatū Jesunya punu kaṭakutjarangka utitjunkunytja. Tjinguruya tjukurpa palunyatjara wangkanyangkampa Jew kutjupa tjuṭa tjanampa pulkaṛa mirpañariku. Kaya palumpa tjanampa ngulungku Jew wiya tjuṭa wituwitulpai nyanga alatji wangkara, “Kulilaya, nganāna nyuranya Jesuku walytjaringkunyangka palyanṭi Moseku arawanu watiringkunytjaku.” Alatjiya ngulungku wangkapai. ¹³ Palu Jew paluru tjananya Moseku tjukurpa uwankara tjukarurungku kuliṛa palyantja wiyangku wantipai. Munuya nyaa kutju kulilpai nyura palunya tjananya purunyarinyangka mirawaninytjikitjangku, munuya alatji wangkapai, “Wirungkula mulapa tjananya nganānanya purunymanu.”

¹⁴ Palu ngayulu natju walytjangku mirawaninytjikitjangku kulintja wiya, Mayatja Jesunya Christanya kutjuna mirawaninyi nganampa punu kaṭakutjarangka anga-ilunytja. Munuṇa nyara palulangurulta mantatja

tjuṭa mukuringkula palyantjaku wiyaringu alatjiṭu. ¹⁵ Panya Godalu alatji kulintja wiya aŋangu tjuṭa, “Nyara tjana Moseku arangka watiringu, ka nyanga tjana Moseku aṛa kulintja wiya nyinanyi.” Alatji kutju paluru nyakula kulilpai, “Nyara tjana kuwari aṛa kuwaritjangka nyinanyi.”

¹⁶ Ka nyura palu purunypaṭu kulinma, kaṇa alatji nyura tjukarurungku kulinnyangka nyurampa Godala tjapini nyuranya ngaltunytjungku kurunpa rapaṛa pukułmankunytjaku, aŋangu Godaku walytja uwankara kulu.

¹⁷ Ka panya nyura kutjupa tjarangku ngayunya kurara pungkupai. Palu kulila, ngayulu Jesuku war̄ka palyannyangkaṇiya palumpa mirpaṇṭju tjuṭangku ngayunya pungangi ka nyanganā pika palkuntjara nyinanyi tjana pungkunytja, ka pika nyanganpa kuliṛa nyura uti nintingku kulinma alatji, “Munta-uwa, wati nyanga paluru mulamulangku Jesunya waŋani unytjungku wiya.” Nyara palulanguruṇi nyura uti ngayunya piruku kurara pungkunytja wiyangku wantima.

¹⁸ Uwa walytja tjuṭa, alatjiṭuṇa walkatjunanyi. Ka Mayatja Jesulu Christalu nyuranya pukultju pulkangku kurunpa pukułmara kanyinma. Uwa mulapa.

Lita Paulalu Walkatjura Iyantja Ngura

Ipitjalakutu

Ephesians

Nyangatja Ngamanytju Nyakula

Wangkanytjaku

Nyangatja Godaku tjukurpa Paulalu walkatjunkunytja tjailangka unngu nyinara, munu paluru Jesuku walytja tjutakutu iyanu ngura nyara Ipitjala nyinanytja tjutakutu. Ka tjukurpa Ipitjanyatjara Luke-alu walkatjunu nyiri panya *Jesulu Iyantja Tjutangku Palyantjtjangka chapter 19* munu 20-nga, panya Paulalu ngura nyara palula tjukurpa Jesunyatjara ngamanytju wangkanytja.

Ka lita nyangangka Paulalu tjananya wangkara nintini panya Jesuku walytja tjuta ngura uwankaranguru walytjapiti kutjutu nyinanytja, ka panya Christanya palumpa walytjapiti uwankaraku Mayatja nyinanyi. Munu Paulalu alatji kulu wangkangi lita nyangangka, panya Godalu aŋangu palumpa walytja tjuta witulyankunyangka mamu panya kural-pailu tjananya putu kurara mantankupai Jesulanguru.

Tjukurpa nyanganpa ngarinyi:

1:1-2 Paulalu ngamanytju wangkanytja

1:3—3:21 Jesuku walytjapiti uwankara palula tjungu kutjutu nyinanyi

4:1—6:9 Jesuku walytja tjuta uti wirura palyanyku nyinama nyanga alatji

6:10-20 Godalu Jesuku walytja tjuta kunpulpai mamungku kurantjaku-tawara

6:21-24 Paulalu tjukurpa malatja wangkanytja

Paulalu Ngamanytju Wangkanytja

¹ Uwa, Jesuku walytja tjuta, ngayuluna Paulalu nyurampa lita nyangatja walkatjunanyi ngura nyara Ipitjala nyinanytja tjutaku nyura Jesunya Christanya mulamulangku wanannyangka. Panya Godaluni ngurkantara tjunu Jesuku Christaku tjukurtjara warkarinjtjaku mununi witura iyanu palumpa tjukurpa aŋangu tjutangka tjakultjunkunytjaku.

² Ka Mama Godalu Mayatja Jesulu Christalu kulu nyuranya pukultju pulkangku kanyinma munu nyuranya kurunpa rapara pukulmanama.

Godalu Nganananya Pukulmankunytja Christalanguru

³ Godanya Mayatja Jesuku Christaku mama nyinanyi, panya nyara paluru palumpa God. Kala wanyu palunya pulkara walkunma, panya palurulanya Christalawanungku kurunpa winki pukulmanu, panya ngura ilkaritjangka tjananya pukulpa mulapa kanyini, palu purunypa.

⁴ Palulangurula uti palunya walkunma panya kuwaripatjara mulapa uwankara wiyangka paluru nganananya ngurkantanu palumpa walytja nyinanytjaku munu Christala tjunguringkula palula milangka palya alatjitu nyinanytjaku. Kalanya kutjupangku nyakula putu kuranmananyi Christala tjungu ngaranyangka.

⁵ Panya Godalu mukulya pulkangku nganananya ngurkantanu palumpa katja untalpa nyinanytjaku, Jesula Christalanguru. Paluru alatjitu nganampa mukuringu munulanya paluru kutjungku kulira ngurkantanu.

⁶ Kala uti palunya pulkara walkunma paluru nganampa pulkara mukuringkunytjtanguru, panya paluru palumpa katjaku pulkara mukuringku-pai munu paluru pukultju pulkangku nganampa palyanu katja palumpa intjanungku mantakutu iyara. ⁷ Ka nyara paluru pu_nu ka_takutjarangka ilura milkali tjutira ngana_nanya ngalkinu, kalanya Godalu mukulya pulkangku ngana_na kura palyantjtanguru kalypangku pungkuwiyangku wantinyi. ⁸⁻⁹ Kala pulkara alatji_tu pukularingu Godalu alatji nganampa pukultjungku palyannyangka.

Uwa panya Godalu ninti pulkangku nganmanytu kuliningi palumpa katja mantakutu iyantjikitjangku ngana_nanya wankarunkunytjaku, munu alatji kulira palyanu alatji_tu. Nyanga palunya paluru kutjungku kuliningi nganmanytu munu kuwari utinu ngana_na tjukarurungku kulintjaku kulintjtja panya palunya. ¹⁰ Munu ngula Tjintu Malatjangka Godalu nganmanytu kulintja uwankara palyalku, ka Christalu uwankara kutjuringkunytjaku palyalku Godalu panya palyantjtja uwankara ilkaringuru munu mantanguru, munu paluru uwankara mayatjangku kanyilkku.

¹¹ Panya Godalu kulira uwankara palyantjikitjangku paluru palyalpai alatji_tu. Munu nganmanytu paluru kulintjatjanungku ngana_nanya ngurkantanu palumpa waltyta nyinanytjaku Christala tjungu. Nyangatja paluru kuwaripatjaranguru alatji_tu ngurkantankunytjikitjangku kulinu. ¹² Kala ngana_na Jew tju_ta-warara Christaku mulamularingkula pukulpa pa_tara nyinanyi. Palulangurula uti ngana_na-warara Godanya pulkara mirawa_nima wiru mulapa witulya pulkanya. ¹³ Ka panya nyura ku_lu tjukurpa tjukaruru palya mulapa kulinu munu palumpa mulamularingu, tjukurpa panya wankarunkupaitjara kulira. Ka panya nyura mulamularingkunyangka Godalu nyurala walka purunyapa tjunu nyura palumpa waltyta nyinanytjaku, panya watingku pulukangka walka tjunkupai kutjupa tjutangku ngurkantankunytjaku, palu purunytu Godalu Kurunpa Milmilnga nyuranya ungu kutjupa tjutangku ngurkantankunytjaku, panya nyura palumpa waltyjaringkunyangka paluru Kurunpa Milmilnga nyuranya ungkunytjikitjangku kalkunu. ¹⁴ Kala nyara palulanguru nganana mulapa alatji kulin, “Panya Godalu ngana_nanya wiru mulapa ungkuku paluru panya kalkuntja.” Panya Godalu ngana_nanya nganmanytu Kurunpa Milmilnga ungu munulanya piruku ngula unganyitu ilkaringka wiru mulapa. Uwa, Mayatja Godanya palya mulapa witulya pulkanya, kala wanyu palunya walkura mirawa_nima.

Paulalu Godala Tjapintja Tjanampa

¹⁵ Ngayulu kulinu nyura Mayatja Jesuku pulkara raparingkunyangka munu Godaku waltyta tju_taku pulkara mukuringkunyangka. ¹⁶ Mununa nyara palulanguru ngayulu kulira pukularira Godanya rawangku mirawa_ninyi nyuralanguru wantintyta wiyangku. ¹⁷ Godanya panya Mayatja Jesuku Christaku mama nyinanyi, panya nyara paluru palumpa God nyinanyi palya mulapa witulya pulkanya. Ka_n_a palula rawangku nyurampa tjapilpai nyuranya Kurunpa Milmilnga ungkunytjaku. Ka paluru nyurala unngu nyinara pulkara nintilku nyura Godaku ninti mulararintyjaku. ¹⁸ Uwa, rawangku_n_a nyurampa tjapilpai paluru nyurampa kulintja tjukaruruntjaku. Ka nyura nintiringkula uti kulikku panya paluru nyuranya ngurkantanu nyura ngula ilunytjatjanu pakara wanka ti_tutjara nyinanytjaku palula tjungu, palumpa mulamularingkunytjatjanu. Munu nyara palulanguru nyura nintiringkula kulikku, “Mulapa Godalu

kalkuntjatjanungku palyalpai alatjitu munu palumpa walytjapiti pulkara pukulmankupai witulya pulkangku.”

¹⁹⁻²⁰ Uwa ngayulu tjapilpai nyurampa paluru nyurala unngu nintintjaku nyura alatji kulintjaku, “Mulapa Godaku witulya pulka alatjitu nganañala ngaranyi palumpa mulamularingkupai tjutangka.” Panya Godalu witulya pulkangku Jesunya ilunyangka pakaltjinganu munu ngura ilkaritjangka tjunu palula kampa wakungka nyinanytjaku mayatja pulka. Ka witulya nyara paluru panya nganañala ngaranyi munulanya kunpulpai. ²¹ Uwa, Godalu panya Christanya pulka mulapa tjunu uwankaraku mayatja pulka nyinanytjaku ilkaritja tjutaku, munu mayatja mantatja uwankaraku kulu. Christanya panya pulka mulapa angelpa tjutangka muñkara, munu mamu tjutangka muñkara munu mayatja kutjupa tjutangka muñkara pulka alatjitu nyinanyi munu tiutjara mayatja pulka nyinara mayatjangku uwankara kanyilkku.

²² Uwa, Godalu palunya Mayatja pulka tjunu, ka uwankara palula tjaru ngaranyi, ka paluru uwankara mayatjangku kanyini. Munu palulanguru uwankara mayatjangku kanyira paluru palumpa walytjapiti mauntalpa wirura atunymara kanyini. ²³ Panya Christalu nganañanya palumpa walytjapiti palurunku alatjitu kanyini. Panya puntu kata winkitjara anangu wanka ngarapai, palu puruny whole Christanya nganampa kata ngaranyi, ka nganañanya palumpa puntu ngaranyi, munula palula tjungu ngarala kutju wanka nyinanyi.

2

Ilunytjatjanu Wankaringkunyta

¹ Panya ngamanypa nyura Godanya kulintja wiya nyinangi kura kutju palyalpai, Godanya wiyangka-palku. ² Munu nyura iwara kurangka anangi ngunti tjutaku mukuringkula munu nyura mamu arkayitjangka wanganarangku kulinungi. Mamu nyara paluru panya mamu kurunitja tjuta mayatjangku kanyini munu anangu Godala tungunpungkupai tjuta kulu kanyini mayatjangku.

³ Panya ngamanypa nganaña palu puruny whole nyinangi munula walytja pulkara mukuringkula kura tjuta kutju palyalpai Godanya kulilwiyangku. Nyara palulangurula Godanya nganampa mirpañarintjaku palyaningi, ka nganañanya uwankara ngurkantara pungkuny whole ngarangi. ⁴ Palu Godanya ngaltuny whole pulkanya munu paluru nganampa pulkara mukuringkupai. ⁵ Panya nganaña kura kutju palyalkatingi Godanya wiypalku kulira munula palula rawa mulapa tungunpungkula watarku alatjitu nyinangi iluny whole puruny whole. Palu Godalu nganañanya ngaltuny whole pulkangku wankarunu Christala tjungura. Tjinguru paluru nganañanya wantima, palu paluru nganampa pulkara mukuringkula nganañanya mukulyangku wankarunu.

⁶ Nganaña kurunpa watarku nyinangi iluny whole puruny whole, ka paluru Christalanguru nganañanya wankarunu kurunpa wanka palula tjunguringkula mayatjarira nyinanytjaku ngura ilkaritjangka. ⁷ Paluru nyanga alatji palyanu nganampa ngaltuny whole mukulya pulka nyinara, panya paluru nganampa pulkara mukuringkula Jesunya Christanya iyanu mantakutu nganampa ngalkilpa iluny whole. Kala nyanga palulanguru palumpa mukulya pulka nintingku kulini, tiutjarrangku watarkuriwiyangku.

⁸ Panya nyura kurunpa watarku ilunytja purunypa nyinanyangka Godalu nyuranya mukulyangku wankarunu, nyura palumpa raparingkunyangka kutju. Nyura walytja kurunpa wankaringkunytja wiyat, palu Godalu ngaltunytju pulkangku nyuranya kurunpa wankarunu, nyurampa pulkara mukuringkula. ⁹ Ka nyara palulanguru nyuranku uti walytjangku ngunti kañany-kañanytju mirawaninytja wiyangku wantima, panya nyura kutjupa kutjupa palyantja wiya alatji Godalu nyuranya nyakula kurunpa wankarkunkunytjaku, panya nyura palumpa mulamularingkunytjaku kutju ngaranyi. ¹⁰ Ka Godanya nganampa mukuringanyi wirura palyanyku nyinanytjaku palula kulira. Palulanguru paluru Jesunya Christanya nganampa iyanu nganañanya kurunpa wankarkunkunytjaku. Kala palulanguru kutju wirura nyinanyi Christalu nganañanya kurunpa palyannyangka.

Christala Kutjuringkunytja

¹¹ Kaya wanyu kulila panya nyura nganmanypa nyinanytja. Panya nyura anangu Gentile tjuta nyinangi Jew wiya, panya Godalu Aipuramala iriti wangkanytja nyura kuliра palyantja wiyat. (Ka panya wati Jew tjutangku nyuranya analpai tjananya purunypa watiringkula nyinanytja wiyangka.) ¹² Nyara palula arangka nyura maunyalpa nyinangi Christala tjungu wiya, munu nyura Israekunu tjutaku walytja wiyat nyinangi. Munu nyura Godalu tjananya kalkuntjitjaku ngurpatu watarku nyinangi. Munu nyura munkaritja Godalu ngula wiru nyurampa palyantjaku kulintja wiya alatji watarku nyinangi, Godanya wiyangka-palku.

¹³ Mulapa panya nyura maunyalpa nyinangi, ka panya Jesunya Christanya nyurampa anga-ilungu munu milkali tjutira nyuranya Godala tjungunu palumpa walytjaringkunytjaku. ¹⁴ Panya paluru alatji nganañanya uwankara maunyalpa nyinanyangka kalypara tjungunu Jew tjuta munu Jew wiya tjuta kułukulu. Panya nganmanypa nyuntu nganana patupatu nyinangi mirpantju tjuta wall-pa pulka purunypa ngururpa ngaranyangka. Palu Christalu palurunku puntu walytjangku iluntankunytjaku ungkula mirpanpa panya palunya wiyanu munu nyuntunya nganañanya kalypańu. ¹⁵ Panya nganańa Jew tjutangku tjukurpa pulka tjuta nganañanku kanyiningi kunpu mulapa, palu Christalu ilura tjukurpa pulka tjuta palunya tjananya wiyaringkunytjaku palyanu. Munu paluru nganañanya Jew tjuta munu nyuranya Jew wiya tjuta palula tjunguringkunytjaku palyanu nyuntu nganańa kalyparingkula kutjuringkunytjaku.

¹⁶ Panya nyuntu nganańa nganmanypa maunyalpa maunyalpa nyinangi mirpantju tjuta. Palu Christalu puńu katakutjarangka ilura nganampa mirpantju panya palunya wiyanu alatji. Palurunku anangu kutjara ngaranytja kutjunu palula, panya paluru mukuringangi anangu panya palunya tjananya małakungku Godala tjunguntjikitja. Nyanga alatji paluru palyanu puńu katakutjarangka ilura. ¹⁷ Panya paluru pitjangu munu Tjukurpa Palya wangkangi nyurala anangu Jew wiya tjutangka Godalanguru pańu nyinanyangka nyura kalyparingkunytjaku. Munu paluru palu purunytju Tjukurpa Palya wangkangi nganańala anangu Jew tjutangka kulu Godala ila nyinanyangka nganańa kulu kalyparingkunytjaku.

¹⁸ Uwa, mulapa Christalanguru nyuntu nganańa uwankara Jew munu Jew wiya tjuta Mamala tjunguringkula kutjuringkupai Kurunpa Milmilngatjararingkula. ¹⁹ Ka nyanga palulanguru nyura Jew wiya tjuta

kuwari malikitja purunypa wiya, palu nyura Godaku walytjapitingka tjunguringu munu nyura kuwari Godaku walytja alatjitu nyinanyi. ²⁰ Panya nyura mulamularingkupai tjuṭa Godaku alatjitu nyinanyi. Ka paluru nyuranya walytjanmara kanyini. Panya nintintja tjutangku munu wangkatjara kuwaritja tjutangku kuļu nyurala Godaku tjukurpa tjakultjunangi. Ka nyura kuliṛa Christaku mulamularingu munu palumpa walytjaringkula kuṇpu ngaranyi palula tjungu. Panya paluru alatjitu-mantul witulya pulka nyuntumpa nganampa nyinanyi. ²¹ Munu paluru alatjitu nyuntunya nganañanya tjungura kanyini witulya pulkangku nganana palunya tjukarurungku walkuntjaku. ²² Ka panya Christalu nyuranya kuļu altira tjungunu munu aŋangu kutjupa tjuṭa kuļu palula tjunguringkunytjaku palyanu. Ka Godaku kurunpa nyuntula nganañala uwankarangka nyinanyi, palumpa walytja tjutangka.

3

Paulalu Jew Wiya Tjutangka Warkarinyta

¹ Palu ngayulu kuwari tjailangka nyinanyi, panya Jesulu Christalu ngayunya nyuralakutu iyanu nyurala Jew wiya tjutangka Tjukurpa Palya tjakultjunkunytjaku. Kaṇiya mirpantju tjutangku nyurala tjakultjunkunyangka witira nyangangka tjunu. ² Ka panya nyura ninti ngayuku, panya Godalu ngayunya ngaltunytju pulkangku ngurkantara tjunu warķa nyanga palunya palyantjaku munu nyuranya alpamilara kuṇpuntjaku. ³ Mununi paluru tjukurpa kumpilitja uwankara nintinu, kaṇa nyangatja tjukutjuku nguwanpa nyurampa walkatjunanyi. ⁴ Ka nyura tjukurpa nyanga kumpilitja ngayulu utira walkatjunkunytja nyakula wangkarampa kuliklu, “Mulapa paluru nintiringu tjukurpa Christaku panya kumpilitja tjuṭaku.”

⁵ Panya nganmanyitja tjuṭaya tjukurpa nyanga kumpilitjaku ngurpa nyinangi, panya kutjupangku tjanala tjakultjunkunytja wiya. Palu kuwari nyanga Kurunpa Milmiltawanungku Godalu tjukurpa panya palunya utinu, wati panya Jesulu iyantja tjutangka, munu panya wangkatjara kuwaritja tjutangka kuļu tjanā tjukarurungku tjakultjunkunytjaku. ⁶ Ka tjukurpa panya kumpilitja paluru nyangatja panya Godalu iriti kalkuṇu Jew tjuṭa walytjanmara wirūra kanyintjikitjangku. Palu kuwari Jesulan-guru paluru kalkuṇu kutjupa tjuṭa kuļu walytjanmara kanyintjikitjangku Jew tjuṭa kutju wiya. Kala nyara palulanguru Jesula Christalawanu tjukurpa palyaku mulamularingkula tjunguringkuku Godaku walytjapiti, Jew tjuṭa munu kutjupa tjuṭa kuļu.

⁷ Panya Godalu ni ngaltunytjungku ngurkantara witulyanu palumpa warķarinytjaku mununi tjukturtjara tjunu witulya pulkangku. ⁸ Palu ngayulu na tjanala pulka wiya alatjitu tjukutjuku mulapa ngaranyi, Godaku walytja kutjupa uwankarangka waintarinytja wiya. Palu Godalu ni ngurkantara witulyanu kutjupa tjutangka Tjukurpa Palya Jesunyatjara tjakultjunkunytjaku, panya tjukurpa nyanga paluru pulka mulapa uwankarangka waintarinytja. ⁹ Panya paluru alatjitu ni ngurkantara witulyanu aŋangu winkingka tjukurpa nyanga kumpilitja palunya utira tjakultjunkunytjaku tjanā kulintjaku alatji, “Munta-uwa, nyanga alatjingara Godalu aŋangu tjuṭa wankarunkupai.” Panya tjukurpa nyara palunya Godalu uwankara paluntjatjanungku kumpilpa kanyiningi kuwaripatjaranguru alatjitu ngula Jesuku walytja tjutawantu utiringkunytjaku. ¹⁰ Kaya ilkariringka angelpa tjutangku mayatja ilkaritja kutjupa

tjuŋangku kuŋu Jesuku walytja tjuta nyakula kuliku, "Munta-uwa, Godanya mulapa ninti puŋka nyinanyi munu kutjupa kutjupa uwankara witulyangku palyalpai."

¹¹ Ka mulapa Godalu nyangatja nganmanytu kulinu nyanga alatji palyantjikitjangku munu panya Mayatja Jesunya Christanya mantakutu iyanu nganampa ngalkilpa ilunytjaku. Munu palulanguru Jesulu palyan-nyangka Godalu nganaŋanya wankarunu. ¹² Kala Christaku mulamularingkula palula tjungu nyinara nganana ngulu wiya rapa ngaraku Godala mirangka. ¹³ Kaŋa nyuranya wangkanyi kurunpa tjituru-tjitururintja wiyyaya nyinama ngayulanguru, panya nyangatjaniya ngayunya tjailangka tjarpatjunu, ngayulu nyurala Jesuku tjukurpa tjakultjunkunyangka. Kaya pukulpa nyinama panya ngayulu tjukurpa tjakultjunkunyangka nyura Jesuku mulamularingu munu Godaku walytjaringu, kaniya nyanga palulanguru tjailangka tjunu.

Christanya Nganampa Mukuringkunytja

¹⁴ Uwa, Mama Godalulanya Jew tjuta munu kutjupa tjuta kuŋu tjungura kanyini. Kaŋa nyanga palulanguru tultjungarakatira Mamala tjapini.

¹⁵ Panya paluru kutjungku paluntja uwankara wankarunu ilkaritja tjuta munu mantatja tjuta kuŋu. ¹⁶ Kaŋa palula tjapini paluru witulya puŋkangku nyuranya witulyankunytjaku, Kurunpa Milmiltawanungku, nyura kurunpa kunpu ngaranytjaku. ¹⁷ Ka nyara palulanguru Christanya nyurala unngu nyinaku nyura palumpa rapa ngaranyangka. Kaŋa piŋku palula tjapini nyura kurunpa mukulyatjarangku kutjupa kutjupa uwankara rapangku palyantjaku. ¹⁸ Ka nyanga palulanguru nyuntu nganana Godaku walytja uwankarangku kuliku panya Christanya nganampa mukulya puŋka mulapa ngaranyi uwankarangka waintarintja. ¹⁹ Uwa, Jesunya Christanya nganampa puŋkara alatjiŋ mukuringkupai ngaltunytju puŋka mulapa, kaŋa mukuringanyi nyura kuŋu mukulya nyanga puŋka palula ngaranytjaku, ka nyura mukulya nyanga palula ngarala palya mularariku Godanya purunypa.

²⁰ Uwa, Godanyala mirawaŋima. Panya paluru witulya puŋkangku ngananala unngu nyinara puŋka mulapa palyalpai. Panya nganana Godala tjapilpai ka paluru kulira nganana mukuringkunytjitungka waintara puŋka mulapa palyalpai. Tjingurula kutjupa kutjupaku mukuringkula tjapintjikitjangku kuliku, ka paluru kulinnyangka nyakula palyalku puŋka mulapa waintara alatjiŋ. ²¹ Kala wanyu Jesuku Christaku walytja uwankarangku tjungungku Godanya titutjarangku walkuŋa mirawaŋima wiru mulapa witulya puŋka nyinanyangka. Uwa, mulapa.

4

Christalu Nganananya Warka Kutju kutju Ungkunytja

¹ Uwa ngayuluŋa kuwari tjailangkaŋu nyinanyi panya Mayatja Jesuku warkarinyangkaniya witiŋa tjarpatjunu. Kaŋa lita nyangangka nyuranya wangkara wituwituŋi nyura Godaku walytja nyinara wiruŋa palyanyku nyinanytjaku. Panya Godalu nyuranya ngurkantanu palumpa walytjaringkula tjukaruru nyinanytjaku.

² Munuyanku titutjara kanany-kananypa wiya purkara nyinama munuya purkarangku wangkama mapalku mirpaŋarintja wiyyangku, munuya anangu kutjupa tjutaku mukulya puŋka nyinama. ³ Panya Kurunpa Milmiltu nyuranya kurunpa kunpuŋa kanyini tjungu kutjutu nyinanytjaku. Kaya palulanguru kalypa nyinama rawa tjungu nyinanytjikitja.

⁴ Panya nganaña Jesuku walytja uwankara kutjuringkula nyinanyi. Ka Kurunpa Milmiltu kutjungku nganananya wirura kanyini. Ka nganaña kutjuku paṭara nyinanyi kulil-kulilpa, panya Godalu nganañanya ngurkantanu ngula ilunytjatjanu pakara wanka titutjara nyinanytjaku, kala nyanga palumpa paṭara nyinanyi. ⁵ Panya nganampa Mayatja kutju nyinanyi, Jesunya Christanya. Ka nganaña tjukurpa kutjuku mulamularingkupai, tjukurpa panya Jesunyatjaraku. Munula baptise-katinytja kutju kulilpai. ⁶ Ka panya Godanya Mamanya kutju alatjitu nyinanyi nganampa uwankaraku. Nyara paluru uwankaraku mayatja, munu ngananalawanungku palyani paluru mukuringkula, munu nganañala uwankarangka unngu nyinanyi.

⁷ Panya Christalu pukultjungku nganañanya kutju kutju nintinu war̄ka palumpa nganaña kutjungku kutjungku witulyangku palyantjaku. ⁸ Panya nyiringka iriti walkatjunkunytja ngaranyi alatji,

“Paluru katu mulapa tatira anangu karpintja mungilyi katingu,
munu paluru anangu tjuta mukulyangku nintinu witulyangku palyantjaku.” *

⁹ Ka nyanga katu ankunytja wangkara alatji nintini panya paluru nganmanypa katunguru tjaṛu mulapa ukalingu manta unngutjakutu.

¹⁰ Munu ukalingkunytjatjanu panya paluru tu piruku malaku katu mulapa tatinu ilkarīngka waintara pulka mulapa nyinanytjikitja uwankarangku palunya nyakula mayatjanmaṛa walkuntjaku manta winkitjangku.

¹¹ Nyanga paluru panya nganañanya kuļu nintinu palumpa war̄ka kutjupa kutjupa witulyangku palyantjaku, munu panya kutjupatjara ngurkantara tjunu palumpa iyantja tjuta, munu kutjupatjara tjunu wangkatjara tjuta Godalu wangkanyangka anangu tjutangka tjakultjunkunytjaku, munu kutjupatjara tjukurtjara tjuta tjunu Tjukurpa Palya Jesunyatjara ngura tjutangka para-tjakultjunkunytjaku anangu tjuta Jesuku walytjaringkunytjaku, munu kutjupatjara tjunu atunymankupai tjuta Jesuku walytja tjuta atunymaṛa kanyintjaku, munu kutjupatjara tjunu nintilpai tjuta Godaku walytja tjutangka wangkara nintintjaku.

¹² Nyanga alatji Jesulu nganañanya tjunu war̄ka kutjupa kutjupa tjuta palumpa palyantjaku nganaña Jesuku walytja uwankara palula tjungu kūnpuringkunytjaku. ¹³ Kala war̄ka nyanga palunya tjananya rawangku palyara nganaña uwankara tjunguringkula Godaku katjaku tjukaruru mulamularingkuku palumpa pulka nintiringkula. Munula piruku tjitji purunyapa rawa nyinanytja wiya anangu pulkaringkula Christanya purunyarira palyanyku nyinaku. ¹⁴ Munula palulanguru kutjupangku ngunti wangkanyangka kulira wantiku. Panya wati ngunti palya-palku nyinapai tjutangkuya tjukurpa kura tjuta wangkapai anangu tjuta kawantjingantjikitjangku. Palu nganaña Christanya purunyarira palunya tjananya ngunti wangkanyangka nintingku ngurkantankuku munula tjananya kulira wantiku ngunti kurantjaku-tawara.

¹⁵ Kala uti tjukarurungku wangkama Godaku mukulyatjarangku munula nyara palulanguru pulkaringkuku munu Christanya purunyariku panya paluru nganampa Mayatja pulka nyinanyi, Jesuku walytja uwankaraku.

¹⁶ Munu paluru nganañanya uwankara tjungura kanyini kutjuringkula wanka nyinanytjaku. Munulanya paluru wanka kanyira nintilpai urira war̄ka palumpa kutjupa kutjupa tjuta palyantjaku. Kala nganaña

* ^{4:8} Psalm 68:18

wärka walytjangku walytjangku paluru nintinnyangka palyara makunpuringkula mukulya pulkaringkupai.

Wanka Kuwaritja Christalanguru

¹⁷ Kulilaya! Ngayuluña Mayatjanya wañarira kulilpaingku nyuranya wangkara paini nyura añañgu watarkitja tjuta purunyapa nyinanytja wiyangku wantintytjaku, panya paluru tjana Godaku ngurpangku tjukurpa kurakura tjuta kutju kulilpai. ¹⁸ Panya tjanampa kulintja mungawałuru maunthalpa alatjitu ngaranyi wankakitjangku kulintja wiya. Godalu tjananya wankarunkunytjaku ngaranyi alatjitu, palu wiya, tjana kurunpa wituwituringkula kulira wantinyi munuya tungun-tungunpa alatjitu nyinanyi. ¹⁹ Munuya kunta wiyangku kura kutju alatjitu palyalkatipai kura pulka mulapa, munuya tjukaruru wantira kuraku manyu nyinapai.

²⁰ Wanyu Christanya nyanga tjana purunyapa nyinapai? Wiya alatjitu. ²¹ Ngayulu nyurampa ninti, panya nyura tjukurpa tjukaruru Jesunyatjara ngañmanytju kulinu. Kutjupa tjutangku panya nyurala tjukarurungku nintiningi tjukurpa panya palunya. ²²⁻²³ Nyara palulanguru nyura palumpa nintiringkunytjatjanungku uti kura tjuta wantima rawangku palyantja wiyangku. Panya ngañmanytju nyura kura tjutaku mukuringkula nyanga palu purunyapa tjuta palyaningi, munu nyura kuraringkula kura kutju palyalkatingi ilunytjakutu-wangkara alatjitu. ²⁴ Palu kulilaya munuya mukuriwa palyanyku nyinanytjikitja kurunpa winki kampa kutjuparira. Panya Godalu nyuranya kurunpa kuwaritja palyanu paluna purunyapa nyinanytjaku, ka nyara palulanguru nyura uti tjukaruru palyanyku nyinama paluru nyakula pukularinytjaku.

Kurunpa Kuwaritjatjara Nyinanytja

²⁵ Munu nyura uti ngunti wangkanytja wiyaringama munu kutjupangka wangkarampa tjukarurungku kutju wangkama, panya nganaña uwankara Godaku walytjapiti munula Christala kutjungka tjungu nyinanyi. Nyara palulangurula uti tjukarurungku kutju wangkama ngunti wangkanytja wiyangku. ²⁶⁻²⁷ Palu tjinguru nyura mirpañarirampa pikaringkuwiyangku wantima. Munuya kalala waña titutjara mirpañpa nyinawiya mapalku kalyparingama mamungku nyuranya rawa mirpañpa ngaranyangka wituwitura kurantjaku-tawara. ²⁸ Tjinguru añañgu kutjupa kutitjunkupai nyinara, uti paluru kutitjunkunytjikitjangku kulintja wiyaringama munu tjukarururingkula wärkarima palumpa maiku munu añañgu ngaltutjara tjuta kulu ungkunytjikitja. ²⁹ Munu nyura uti añañgu kutjupangka wangkarampa tjukurpa kura wangkawiyangku wantima. Munuya tjukurpa palya kutju wangkama añañgu tjutangku kulira pukularinytjaku.

³⁰ Munuya Kurunpa Milmilnga tjituru-tjiturunkunytja wiyangku wantima, panya paluru nyurala unngu nyinara nintilpai nyura Godaku walytja nyinanyangka. Panya Godalu Kurunpa Milmilnga nyurala unngu tjarpatjunu paluru nyurala nyinara nintintjaku alatji, “Mulapa Godalu nganañanya ngula Tjintu Małatjangka kuranguru wankarunkuku.” ³¹ Ka nyura mirpañpa rawangku kanyilwiyangku wantima, munu añañgu kutjupaku pikaringkula mirpañ-mirpantru wangkanytja wiyangku wantima, munu ngalytjurmaña warkintytja wiyangkuwantima, munuya añañgu kutjupaku kuraringkuwiyangku wantima alatjitu. ³² Palu ngaltunytjuya nyinama, munuya añañgu kutjupa tjutaku kulu pulkara mukuringama. Munu kutjupangku nyuranya kurannyangkampa nyura

uti palunya kalypangku kulira wantima. Panya Godalu nyuranya kura palyantjitjanguru kalypangku wantingu Jesula Christalawanungku, palu puruny whole nyura uti kalypangku wantima.

5

¹ Panya Godalu nyuranya mukulyangku walytjanmara kanyini, ka nyura palumpa tjitji tjuṭa nyinanyi. Kaya nyanga palulanguru pulkara arkanma Godalu purunytju palyantjikitjangku. ² Panya Christanya nganampa pulkara mukuringkula ngalkilpa ilungu ka Godanya palumpa pulkara pukularingu. Ka nyura kuļu uti palu puruny whole anangu kutjupa tjuṭaku pulkara mukuringama.

³ Nyura panya Godaku walytja tjuṭa, ka palulanguru nyura uti kuri walytjatjarangka kampangkaṭu ngariwiyangku wantima, munuya ngunti ngunti tjunguringkuwiyangku wantima, munuya walytjatjaraku nyakula manyuringkula mukuringkuwiyangku wantima. ⁴ Munu nyura Godaku walytja nyinarampa uti tjaangku warkintytjatjara wangkanytja wiyangku wantira wiru tjuṭa kutju wangkama. Munu Godanya kutju wal kunma nyuranya wirura kanyinnyangka. ⁵ Kulila, panya anangu tjuṭangku kura nyanga palunya tjananya palyantjatjanu puṭu Christala tjunguringkula Godaku walytjaringanyi, ka paluru puṭu tjanampa mayatja nyinaku. Panya paluru tjananya kura nyanga palunya tjananya palyara Godanya wantira god ngalypa-ngalypa tjuṭaku pulkara mukuringanyi.

Tilingka Uti Nyinanytjaku

⁶ Uwa, anangu kutjupangku nyuranya ngunti wangkara kurannyangka nyura uti palula tjanala kulira mulamularingkuwiyangku wantima, panya Godanya mirpanaripai ngunti wangkapai tjuṭaku, panya paluru tjananya palula tungunpungkupai. ⁷ Ka nyura palulanguru tjanala tjunguringkuwiyangku wantima, munuya tjananya arkalwiyangku wantimaṭu. ⁸ Panya nganmanypa nyurampa kulintja mungawaluru nguwanpa ngarangi ka nyura kura tjuṭa kutju palyalpai. Palu kuwari nyanga nyura Christaku walytjaringkula kulintja utiringu munu nyura tilingka puruny whole nyinanyi. Palu tilingka nyinapai tjuṭa tjukaruru nyinapai, ka nyura tjananya puruny whole nyinama tilingka. ⁹ Panya nyura tilingka uti nyinara nyura wiru tjuṭa kutju palyalku munu palyanyku nyinara tjukarurungku kutju wangkaku.

¹⁰ Munuya Mayatja Godala tjanapinma, ka nyuranya nintliku wiru tjuṭa kutju tjukarurungku palyantjaku. ¹¹ Munuya anangu panya mungawalurungka nyinapai tjuṭa arkalwiyangku wantima, panya paluru tjananya kurakura tjuṭa kutju palyalpai. Palu panya nyura wiru tjuṭa kutju palyanma anangu panya paluru tjananya ngunti palyantjatjanungku nyuranya nyakula kulira kūntaringkuny whole. ¹² (Panya tjananya kampangkaṭu palyantjanya kura pulka mulapa, ka kutjupangku tjinguru kulira kūntaringkula unngu kutju kulini, "Wanti, ka ngarama kampangkaṭu.") ¹³ Palu uwankara mungawalurungka palyantja tjuṭa tilingku utilku uti nyakuny whole. ¹⁴ Panya tilingku irnyara utilpai, ka uwankara utiringkupai, palu puruny whole kurakura tjuṭa utiringkuku. Panya iriti nyiringka walkatjunkuny whole ngaranyi alatji,

"Kunkuntjanuya wankariwa munuya iluny whole pakanma.

Ka Christalu nyuranya irnyara utilku."

¹⁵ Kaya wanyu anangu ngurpa tjuṭa puruny whole nyinawiyangku wantima munuya palyanyku nyinara tjukarurungku ngurkantanama. ¹⁶ Nyangatja

panya kuwari tjintu kura, munu nyanga palulanguru tjintu kura tjuṭa ma-ngarala wanani, panya mamu tjutangku nyuranya ilangku nyanganyi kawantjingantjikitjangku. Kayanku nyara palula-tawara purkarangku nyakukatima palyanyku nyinanytjikitjangku. ¹⁷ Munuya ngunti kawakawaringkunytja wiyangku nyangama, munuya Godala tjap-inma paluru mukuringkunytjita nyurala nintintjaku.

¹⁸ Munuya wama pulka tjikintja wiyangku wantima puntu nyuranku kurantjaku-tawara, palu pulkara mukuringama Kurunpa Milmiltu nyurala unngu nyinara titutjarangku mayatjarira kanyintjaku.

¹⁹ Munuya nyuranku tjunguringkula inma wiru tjuṭa inkama irititja munu kuwaritja, psalm tjuṭa kułukułu, munuya pukularira Mayatja Jesunya kurunpa winkingku inkara walkunma. ²⁰ Munu nyura uti Mama Godalu nyuranya wirura kanyinnyangka palunya pukultu titutjarangku walkunma Mayatja Jesula Christalanguru.

Wati Minyma Kurirara Nyinanytjaku

²¹ Nyura panya Christanya walkuni. Palulanguru nyuranku uti ngapartji-ngapartjingku wanganarangku kulinma.

²² Kulilaya! Minyma kuringku uti palumpa kuringka wanganarangku kulinma, panya paluru Mayatja Jesula wanganarangku kulilpai, nyara palu purunypa. ²³ Christalu panya palurunku Godaku walytja tjuṭa wankarunkupai, munu panya tjananya uwankara mayatja wirungku atunymara kanyilpai, ka palu purunytytu Godalu wati tjunu palurunku kuri atunymara kanyintjaku. ²⁴ Ka panya Godaku walytja uwankarangku Jesula wanganarangku kulilpai, palu purunytytu uti minyma kuri tjuṭangku wati kuringka wanganarangku kulinma.

²⁵⁻²⁶ Ka wati kurtjara tjuṭa, kulinmaya! Nyura uti nyurampa kuriku pulkara mukuringama, panya Christanya palumpa walytja tjuṭaku pulkara mukuringkula tjananya wirura kanyilpai, palu purunypa nyura uti nyurampa kuriku pulkara mukuringama munu wirura kanyinma. Panya Christanya palumpa walytja tjuṭaku ngalkilpa ilungu munu tjananya palumpa walytjaringkunyangka mantjira Godala tjungunu, panya paluru tjananya wiruntjikitjangku minangka paltjinu Tjukurpa Palya tjanala wangkara. ²⁷ Panya Christalu alatji palyanu palumpa anangu tjuṭa wiru mulapa palyara puntu winki irnyara ngaranytjaku pałkunpatjara wiya, kura kutjupa kutjupatjara wiya.

²⁸ Uwa, alatji Christanya palumpa walytja tjuṭaku pulkara mukuringanyi, ka palu purunypa wati kurtjara uti palumpa kuriku pulkara mukuringama palurunku walytja mukuringkunytja purunypa, panya paluru minyma kuriku pulkara mukuringkula palurunku mukuringkunytja nintini. ²⁹ Panya anangu kutjupangku puntu palurunku walytjangku nyakula kuranmankupai wiya, palu walytjangku palurunku pulkara atunymankupai munu paltjalpai. Ka palu purunytytu Christalu palumpa walytja tjuṭa palumpa puntu purunypa nyakupai munu pulkara atunymara paltjalpai. ³⁰ Panya nganaña-mańtu uwankara palula tjungu ngaranyi kutjutu, palumpa puntu purunypa. ³¹ Ka panya iriti nyiringka walkatjunkunytja ngaranyi alatji,

“Watingku mama ngunytytu wantikatira kungka kuri altira paluru pula tjunguringanyi, munu pula kutjara wiyingkula kutjuringanyi alatji.”
*

* 5:31 Genesis 2:24

³² Uwa, wati minyma tjunguringkula kutjuringcupai, ka palu purunypa Christanya munu palumpa walytjapiti uwankara tjunguringkula kutjuringcupai. Ka tjukurpa nyanga paluru pulka mulapa ngaranyi putu nguwanpa kulintjaku. ³³ Ka wati kuri uti minyma kuriku pulkara mukuringama munu palunya wirura atunymara kanyinma, panya palurunku walytjangku atunymara kanyintja purunypa. Ka minyma kuringku ngapartji uti wati kuringka wanganarangku kulinma.

6

Tjitji Tjuta Munu Ngunyntju Mama

¹ Tjitji tjuṭa, kulinmaya! Utı nyura Jesuku walytja nyinara ngunytjungka mamangka wanganarangku kulinma, panya Mayatjanya pulkara mukuringanyi nyura palula tjanala wanganarangku kulintjaku. ²⁻³ Panya iriti Godalu tjukurpa pulka tjuṭa Mosela wangkangu, munu tjukurpa kutju paluru alatji wangkangu, “Uti nyura ngunytjungka mamangka wanganarangku kulinma.” Munu paluru nyangatja wangkanytjatjanungku kalkunu alatji, “Nyura ngunytjungka mamangka wanganarangku kulirampa rawa nguwanpa wanka pukulpa nyinaku manta nyangangka.”*

⁴ Kaya mamangku ngunytjungku ngapartji kulila! Utı nyuranku nyurampa tjitji tjuṭa palyanyku kanyinma pauntjingara wangkanytja wiyangku tjana mirpañarinjtjaku-tawara. Palu wirura tjananya mukulyangku pulkara nintinma Mayatjaku nintiringkula palula wanganarangku kulintjaku.

Wati Warkaripai Tjuta Munu Mayatja

⁵ Kaya anangu warkaripai tjutangku ngapartji kulila! Utı nyura mayatja mantatja tjutangka wanganarangku kulinma munu tjanampa ngulu-ngulu tjukaruru warkarima ngunti palyantja wiyangku, panya nyura Christala kulintja purunypa. ⁶ Uwa, mayatjangku wangkanyangka tjukarurungku palyanma paluru nyakula pukularinytjaku. Munu tjin-guru paluru warkarinytjaku wangkara wantikatinyangka nyura uti palu purunytyuṭu warka rawangku palyanma ankunyangka wantinytja wiyangku. Panya nyura Jesuku Christaku warkarinyi palumpa walytja nyinara. Ka paluru mukuringanyi nyura palulawanu tjukaruru nyinanytjaku. Ka palulanguru nyura uti Jesula wanganarangku kuliṛa mayatja mantatja tjutaku wirura tjukaruru warkarima kurunpa winki. ⁷ Panya nyura warka palyara Mayatja Jesuku kuļu warkarinyi mayatja mantatjaku kutju wiya. Pala palulanguru mayatja paluru nyuranya warkaku wituwitunyangka nyura uti pukultu palyanma wanganarangku. ⁸ Munuya kulinma panya Mayatja Jesulu nyuranya ngula ungkuku nyura wirura tjukaruru warkarinyangka. Tjinguru anangu kutjupa tjuṭa mani wiya unytju warkaripai, palu ngula Godalu tjananya wirura warkarinyangka ungkuku. Tjinguru kutjupa tjuṭa manikitja warkaripai, ka Godalu palunya tjananya kuļu ungkuku wirura warkarinyangka.

⁹ Kaya mayatja tjutangku ngapartji kulila! Wati panya warkaripai tjutaya wirungku mukulyangku kulinma munu tjananya pauntjingantja wiyangku wantima, panya nyurampa Mayatja pulka nyinanyi nyara ilkariringka, munu tjanampa kuļu. Panya Mayatja nyara paluru uwankaraku mukuringcupai munu paluru palu purunypaṭu palyalpai anangu uwankaraku.

* **6:2-3** Exodus 20:12

Godalu Nyuranya Kunpulpai Mamungku Kurantjaku-tawara

¹⁰ Ala, Mayatjalu nyuranya witulyankunyangkaya kuŋpu ngarama wantintyta wiya. ¹¹ Panya Godalu nyuranya kutjupa kutjupa tjutangka kuŋpulpai mamungku kurantjaku-tawara, kaya nyanga palula tjanala kuŋpuringama Satantu ngunti kurannyangka tungunpungkula ngaranytjikitja. ¹² Tjinguru nyura kulini nganana mantangka nyanga nyinanyangka aŋangu mirpantju tjutangku kutju ngananaŋanya rawangku Godalanguru arkara mauntananyi. Palu wiya, uti nyura aŋangu tjuta pulkara kulintja wiyangku wantima munuya waintara kulinma mamu tjuta. Panya paluru tjana pulkara war̄karinyi ngananaŋanya Godalanguru mauntankunytjikitja, panya katutja witulya tjutangku munu mungawaluruku mayatja tjutangku munu kura kurunitja ilkaritja winkingku kuļu ngananaŋanya rawangku arkalpai. ¹³ Ka Godalu nyuranya witulyankunyangkaya wantintyta wiya kuwariṭu kuŋpuringama. Ka tjintu kutjupa Satantu tjana nyuranya kurantjikitjangku arkannyangka nyura punkantja wiya ngaraku kuŋpu. Munu rawangku arkannyangka nyura kuŋpu alatjiṭu ngaraku.

¹⁴ Kaya riti ngarama Godalu nyuranya witulyankunyangka. Tjukurpa tjukarurukuya pulkara nintiriwa munuya watarkuriwyangku kulinma, panya tjaultjingku piltangka karilpa karpilpai araltjarinytjaku-tawara, palu purunypaya tjukurpa tjukaruru rawangku kulinma tarilarantjaku-tawara. Munuya tjukaruru palyanyku nyinama, panya tjaultjingku pilpira anga-tjutulpai warmaļangku wakantjaku-tawara, palu purunypaya tjukaruru mulapa palyanyku nyinama, ka Satantu nyuranya puṭu kuralku. ¹⁵ Munuya riti ngarama Godaku Tjukurpa Palya aŋangu tjutangka tjakultjunkunytjikitja. Panya tjaultjingku tjinatjangka tjarpara riti ngarapai ankunytjikitja, palu purunypaya riti ngarama Tjukurpa Palya wangkanytjikitja. ¹⁶ Munuya titutjara Godaku mulamularingama munu nyura pala palulanguru rapa ngaraku kura kutjupa kutjupa tjuta wirkankunyangka. Panya tjaultjingku kutitji kanyilpai angatjunkunytjikitjangku warmaļangku kulatangka wakantjaku-tawara, palu purunypa nyura pulkara mulamularingkunyangka mamungku nyuranya puṭu ngunti wangkara kuralku. ¹⁷ Munuya Godalu nyuranya wankarunkunyangka titutjara kulira mulamularingama. Panya tjaultjingku mukaṭa wituwitu katangka kanyilpai kata wakantjaku-tawara, palu purunypa nyura wankarunkunytja kulira mulamularingkunyangka Satantu nyuranya kulintja puṭu kuraṇi. Munuya Godaku tjukurpa wangaṇarangku kulinma Kurunpa Milmiltu nintinnyangka. Panya tjaultjingku tjuṭa waṛa kanyilpai warmala wakantjikitjangku, palu purunypaya Godaku tjukurpa kanyinma Satantu ngunti wangkanyangka tjukurpa tjukaruru wangkanytjikitjangku.

¹⁸ Munuya watarkuriwyangku titutjarangku Godala tjapinma nyuranya alpamilantjaku. Palu Kurunpa Milmiltu paluru nintinnyangka kutju tjapinma. Munuya wankangku ala-alangku titutjarangku nyangama kampangkaṭu pitjala kurantjaku-tawara. Munuya aŋangu Godaku walaytja uwankarakuṭu palula rawangku tjapinma. ¹⁹ Munuya ngayuku kulu Godala tjapinma ngayunya paluru tjukurpa kumpilitja Jesunyatjara utintjaku. Kaṇa palulanguru aŋangu uwankarangka tjukurpa palunya rapangku utira tjakultjunkuku tjana uti kulintjaku. ²⁰ Nyanga palumpa panyani paluru ngurkantara tjunu war̄ka nyanga palunya palyantjaku. Kaṇa kuwari nyanga tjailangka nyinanyi. Kaya ngayuku Godala tjap-

inma ngayulu ngulu wiyangku rapangku Tjukurpa Palya Jesunyatjara wangkanytjaku.

Tjukurpa Malatja

²¹ Palu kuwariṇa wati Titjikatjanya nyuralakutu ma-iyanı nganampa panya malpa wiru. Wati nyanga palumpa panya nganaṇa pulkar̄a mukuringkupai. Nyanga paluru Mayatjaku war̄ka wangaṇarangku kulir̄a palyalpai palumpa mulamularingkula, munu raparingkula. Ka paluru nyurala wirkara tjukurpa ngayunyatjara uwankara tjakultjunkuku. Ka nyura kulilku yaaltji-yaaltji ngayulu nyinanytja, munu war̄ka nyaā ngayulu palyantja. ²² Uwa, palulanguruṇa palunya ma-iyanı nyuralakutu nyuranya kurunpa rapantjaku tjukurpa wangkara.

²³ Uwa, alatjituṇa walkatjunanyi. Ka Mama Godalu munu Mayatja Jesulu Christalu nyuranya Jesuku walytja uwankara kurunpa rapara pukulmanama, munu nyuranya mukulya pulka nyinanytjaku palyanma palumpa pulkar̄a mulamularingkula. ²⁴ Uwa, Godalu nyuranya pukultju pulkangku kanyinma nyura Jesuku Christaku rawa alatjitu pulkar̄a mukuringkunyangka.

Lita Paulalu Walkatjura Iyantja Ngura Pilipailakutu Philippians

Nyangatja Ngañmanytju Nyakula Wangkanytjaku

Nyangatja Godaku tjukurpa Paulalu walkatjunkunytja tjaila unnungunguru anangu Jesuku walytja tjutaku tawunu nyara ini Pilipaila nyinanytja tjutaku. Panya nyara paluru tjana palumpa mani iyalpai tjailangka nyinanyangka. Ka paluru lita nyangatja tjanampa pukularira walkatjura tjanalakutu iyanu palunya tjananya wirunmankunytjikitjangku, panya paluru tjananya rawangku kuliningi watarkurinytja wiyangku.

Palu Paulanya tjaila unngu nyinara tjituru-tjitururinytja wiya, panya paluru alatji wangkangu, “Ngayunyaŋiya tjailangka tjarpatjunu kaña kuwari nyanga unngu nyinara ngayulu titutjara alatjitu pukulpa nyinanyi. Panya nyura ngayuku rawangku Godala tjapini, kañi Jesulu Kurunpa Milmiltu ngayunya atunytju kanyini. Kaña nyara palulanguru kulini, ‘Mulapa Godalu ngayunya wankaŋunkuku.’ Kaña pukulpa nyinaku tjituru-tjitururinytja wiya alatjitu.” (Nyawa 1:19.)

Ka Pilipainya panya tawunu pulka manta ini Matja-tuniyala kampa alinytjara. Ka panya Paulanya ngañmanypa manta nyara palula parangarangi ngura tjutangka munu panya Pilipaila-warara wirkanu. Munu ngura nyara palula anangu tjutangka Tjukurpa Palya Jesunyatjara tjakultjunangi, kaya tjarangku kulira Jesuku mulamularingu. Munuya palulanguru immangka rawa tjunguringkupai ngura nyara palula.

Ka lita nyangangka Paulalu tjanala wangkangi alatji, “Tjinguruya anangu tjutangku nyuranya pikantankuku panya ngañmanytjuya Jesunya pikantanu, palu purunypa. Munu panyaya ngayunya kuļu rawangku pikantanangi, palu purunypa.” Alatji paluru wangkangi tjaila unnungunguru munu tjanala piřku wangkangi Jesunya rawangku kulintjaku wantintytja wiyangku munu anangu uwankaraku pukultju kalypa nyinanytjaku pikarinkunytja wiya, munu palunya arkara tjukaruru titutjara nyinanytjaku Jesunya purunypa.

Tjukurpa nyanganpa ngarinyi:

- 1:1-11 Paulalu ngañmanytju wangkanytja
- 1:12-30 Paulalu palurunku tjailangka nyinanytjatjanungku tjakultjunkunytja
- 2:1-18 Jesunya purunypa nyinanytjaku
- 2:19-30 Paulalu Timitjinya pulanya Papa-tayatjanya tjanalakutu iyantja
- 3:1—4:9 Paulalu tjukurpa kutjupa tjuṭa tjanala wangkara nintintja
- 4:10-20 Paulalu tjananya wirunmankunytja palunya alpamilannyangka
- 4:21-23 Paulalu tjukurpa malatja wangkanytja

Paulalu Ngañmanytju Wangkanytja

¹ Uwa Jesuku walytja tjuṭa, ngayuluŋa nyurampa Paulalu lita nyangatja walkatjunanyi ngura pala Pilipaila nyinanytja tjutaku. Panya nyura

Godaku nganmanypa walytjaringu Jesuku Christaku mulamularingkunytjatjanu. Kali Timitjilu ngali Jesuku war^karipai kutjarangku lita nyangatja nyuralakutu ma-iyani nyura uwankarangku kulintjaku. Ka panya nyuranya atunymara kanyilpai tjutangku ku^lu uti lita nyangatja nyakula wangkama, munu an^angu panya nyuranya alpamilalpai tjutangku ku^lu.

² Ka Mama Godalu pula Mayatja Jesulu Christalu nyuranya pukultju pulkangku kanyinma munu nyuranya kurunpa rapara pukulmanama.

Paulalu Tjanampa Godala Tjapintja

³ Uwa, ngayulu nyuranya rawangku kulilpai munu^{na} nyuranya kulira pukularira Godala wangkapai alatji, “Ngura nyara Pilipaila nyuntumpa walytja tju^{ta} wir^ura nyinanyi.” ⁴⁻⁵ Munu^{na} palulanguru nyurampa uwankaraku pukultu rawangku tjapilpai, panya nyura ngayunya rawangku alpamilalpai Tjukurpa Palya Jesunyatjara an^angu tjutangka tjakultjunkunytjaku. Nyara palulanguru^{na} nyurampa pulkara pukularira nyurampa Godala tjapilpai. Panya nyura nganmanypa Jesuku walytjaringkunytjatjanungku ngayunya alpamilaningi munu nyura kuwari ku^lu alpamilalpai nyinanyi ngururpa wantintyta wiyangku. ⁶ Panya nyura Jesuku mulamularingkunyangka Godalu nyuranya kampa kutjupanu palumpa palyanyku war^karinnytjaku. Ka ngayulu ninti panya Godalu mulapa nyuranya rawangku wir^ulkatinyi titutjarangku, Mayatja Jesunya Christanya malaku pitjanytjakutu-wangkara. Munu nyara palula aralta nyuranya palyara wir^u mularmankukulta palula tjunguringkula titutjara nyinanytjaku.

⁷ Ka^{na} nyurampa pulkara mukuringanyi kurunpa winki. Palulanguru^{na} nyuranya rawangku kulilpai. Panya Godaluⁿⁱ wirungku war^kka nyanga palunya ungu Tjukurpa Palya Jesunyatjara an^angu tjutangka tjakultjunkunytjaku. Ka panya nyura ku^lu ngayunya alpamilala^ra Tjukurpa Palya para-tjakultjunangi. Ka^{na} nyuranya rawangku pukultu kulilpai, panya nyura ngayunya titutjarangku kulilpai wantintyta wiyangku munu panya nyura ngayuku mani iyalpai. Ka^{na} palulanguru Tjukurpa Palya tjakultjunkupai an^angu tjutangka, munu^{na} mirpantju tjutangku ngayunya katira kuutpangka wangkanyangka ngayulu Tjukurpa Palya tjanala ku^lu rapangku wangkapai tjana tjukarurungku kulintjaku. Munu^{na} kuwari nyanga tjailangka nyinara rawangku^{tu} tjukurpa palunya^{tu} tjakultjunanyi an^angu nyanga kutjupa tjutangka ku^lu. Ka panya nyura wirungku ngayunya rawangku kulira alpamilalpai war^kka nyangatja palyantjaku. ⁸ Uwa, Godanya ninti panya ngayulu nyurampa pulkara alatji^{tu} mukuringkupai kurunpa winki, panya Jesunya nyurampa mukuringkupai, palu purunyapa.

⁹ Uwa, ngayulu ninti panya nyura kurunpa mukulya nyinanyi, palu ngayulu nyurampa Mamala tjapini nyuranya mukulya pulka rawangku nintintjaku, ka nyura palumpa titutjara pulkara mukuringkuku munu nyuranku ku^lu rawangku mukulyangku atunymankuku. Munu^{na} nyurampa piruku Mamala tjapini tjukurpa pulka nyurala nintintjaku, ka nyura palunya nintingku kulikku munu tjukarurungku ngurkantankuku kura munu palya. ¹⁰⁻¹¹ Ka nyara palulanguru nyura Godaku pulkara nintiringkula uwankara tjukarurungku kulikku. Munu kutjupa kutjupa tju^{ta} utiringkunyangka nyura nintingku kulikku tjukarurungku palyantjik-itjangku. Munu nyura Godalawanu titutjara palyanyku nyinaku tjukaruru alatji^{tu} Christanya malaku pitjanytjakutu-wangkara. Panya ngayulu Jesula Christala tjapini nyuranya nintintjaku, ka nyura palula tjungu nyinara

rapangku wîru tjuṭa kutju palyalku. Ka nyara palulanguru aŋangu kutjupa tjuṭangku nyuranya wîruṛa nyinanyangka nyakula Godanya walkura mirawaṇiku.

Christalu Paulanya Tjailangka Nyinanyangka Rapara Kanyintja

12-14 Uwa, walytja tjuṭa, kulilaya! Nyanga kuwariṇa tjailangka nyinanyi, ka nyura tjinguru kulini ngayulu nyangangka nyinara Tjukurpa Palya Jesunyatjara aŋangu tjuṭangka putu wangkanyangka-palku. Palu wiya, ngayulu tjaila unngu kulu nyinara wangkanyi tjaultji tjuṭangka munu kutjupa tjuṭangka kuļu. Kaya kuwari tjaultji uwankarangku nintiringkula kulinu, “Munta-uwa, wati nyanga palunyaya tjailangka tjarpatjunu paluru tjukurpa Jesunyatjara aŋangu tjuṭangka tjakultjunkunyangka.” Ka panya Jesuku walytja kutjupa tjuṭaya nguluringangi Godaku tjukurpa para-wangkanytjaku tjanala aŋangu panya ngura nyangangka nyinanytja tjuṭangka. Panya tjana alatji kuliningi, “Tjingurulanya tjaultji tjuṭangku witira tjailangka tjarpatjunkuku.” Munuya palulanguru nguluringangi. Palu ngayulu nyanga tjailangka unngu nyinanyangkaya paluru tjana nyangangi Mayatjalu ngayunya pulkara aṭunymankunyangka, munuya nyara palulanguru tjana nguluringkunytja wiyaringu, munuya kuwari rapangku wangkanyi aŋangu tjuṭangka, kaya tjuṭangku kuwari kulini Tjukurpa Palya Jesunyatjara ngayulu nyanga tjailangka nyinanytjtjanguru.

15-16 Palu panya Jesuku walytja kutjupa tjuṭa ngayuku nyararingkupai tjukurpa Jesunyatjara tjakultjunkunyangka. Panya paluru tjana mukuringkupai aŋangu tjuṭa palula tjanalanguru kutju Jesuku walytjaringkunytjaku, tjukurpa paluru tjana tjakultjunkunyangka kutju kulira. Palu Jesuku walytja kutjupa tjuṭangkuya ngayuku mukuringkula ngayunya alpamilalpai munuya tjukurpa Jesunyatjara para-tjakultjunkupai. Paluru tjanaya nintingku kulini panya Godalu ngayunya ngurkantara tjunu nyanga tjailangka ungu nyinara palumpa anga-wangkara Tjukurpa Palya Jesunyatjara tjukařurungku wangkanytjaku.

17 Ka panyaya aŋangu ngayuku nyararingkupai tjuṭangku kaŋany-kaŋanytju Jesuku tjukurpa wangkapai, panya paluru tjana nyanga alatji kulilpai, “Utiya aŋangu tjuṭa ngananalawanu Jesuku walytjaringama tjuṭa mulapa, ka Paulalawanu mankurpa kutju.” Tjanaya alatji ngunti kulilpai, panya paluru tjana ngayuku nyararinganyi ngayunya kurantjikitja mukuringkula nyanga tjailangka nyinanyangka. Munuya tjinguru kulini ngayulu palumpa tjanampa kuraringkunyangka-palku.

18 Palu wiya, ngayulu palumpa tjanampa pukularinyi tjana tjukurpa Jesunyatjara aŋangu tjuṭangka tjakultjunkunyangka kulira. Panya tjana unngu nyararingkula tjukurpa wangkanyi, palu aŋangu tjuṭangku tjukurpa Jesunyatjara kulini alatji tjana wangkanyangka, kaṇa nyara palulanguru pulkara pukularinyi aŋangu tjuṭangku tjukurpa Jesunyatjara kulinnyangka. Ka panyaya ngayuku mukuringkupai tjuṭangku wîruṛa wangkapai Godanya kutju pukulmankunytjikitjangku, kaya aŋangu tjuṭangku kulilpai paluru tjana wangkanyangka. Kaṇa palumpa tjanampa kulu uwankarakuṭu pukularinyi tjukurpa Jesunyatjara tjakultjunkunyangka.

19 Nyangatjaniya tjailangka tjarpatjunu, palu palya, ngayulu tiṭutjara pukulpa nyinanyi. Panya nyura ngayuku rawangku Godala tjapini, kani Jesulu Kurunpa Milmiltu ngayunya aṭunytju kanyini nyanga tjailangka unngu. Kaṇa nyara palulanguru kulini, “Mulapa Godalu ngayunya

wankarunkuku.” Kana pukulpa kutju nyinaku tjituru-tjitururintja wiya alatjiitu.

²⁰ Palu tjinguruṇiya kuwari kuutpangka wangkanytjaku tjunkuku, ka ngayulu kulini mulapa Godaluṇi nintilku tjukarurungku wangkanytjaku. Panya ngayulu pulkara mukuringanyi kuutpangka tjuṭa miṛangka kuranyu ngarala rapangku wangkanytjikitja nguluringkunytja wiyangku, panya puṛunytjuṭu, panya ngayulu rawangku ngulu wiyangku Godaku tjukurpa wangkapai. Kan̄iya tjinguru iluntankuku, muta tjinguruṇiya walatjunkuku. Palu pulkarana mukuringanyi panya anangu tjutangku ngayula kulira Jesuna Christanya waintara nyakunytjaku munu palunya kutju walkuntjaku.

²¹ Alatjiṇa kulini. Tjinguruṇa wanka nyinarampa Jesula kutjungka wanganarangku kulinma panya paluru kutjungku ngayunya wankaru kanyilpai. Palu tjinguruṇa ilurampa ngayulu ngura panya wiru mulata wirkara Jesula tzunguringkula tiṭutjara nyinaku.

²² Palu puṭuna kulini. Yaaltjirikuṇa? Tjinguru ngayulu wanka nyinarampa Godaku war̄ka rawangku palyalkatima anangu tjuṭa palumpa waltyjaringkunytjaku. Mutu tjinguruṇa ilurampa ngayulu Christala tzunguringkula pulkara pukulariku ngura nyara ilkar̄ingka nyinara. ²³ Kampa kutjaraṇa kulini, tjinguruṇa wanka nyinaku, mutu tjinguruṇa iluku. Putuna waltyjangku ngurkantananyi. Panya ngayulu pulkara kulini ilura ngura ilkar̄ingka wirkara Jesula tzunguringkula nyinanytjikitjangku.

²⁴ Munuṇa piṛuku alatji kulini, “Wiya, utiṇa wanka nyinama panya tjana ngayuku mukuringanyi tjananya alpamilantjaku.” ²⁵ Kana nyara palulanguru kulini, “Mutu-uwa, mulapa Godalu ngayunya wankaru kanyilku tjana ngayuku mukuringkunyangka.” Kana wankaru alatjiitu tjailanguru pakara nyuralakutu ma-pitjaku munuṇa nyurala wirkara piṛuku Godaku tjukurpa nintilku nyura kulira pulkara mulamularingkula pukulpa mulapa nyinanytjaku. ²⁶ Ka nyura ngayuku pukularira Jesunyu Christanya pulkara mirawaniku paluru ngayunya nyuralakutu malakungku wirkakatinyangka nyakula.

Christala Wanganarangku Kulintjaku

²⁷ Uwa, waltyja tjuṭa! Utu nyura Tjukurpa Palya Jesunyatjara kulintjatjnungku wanganarangku palula kulira palyanma Jesuku waltyja mulapa tjukaruru nyinanytjikitjangku. Kana tjinguru tjailanguru pakara ma-pitjala nyuranya nyakuku, mutu tjinguruṇa nyanga palulatu nyinama pakantja wiyatū. Palu nyura tjukaruru nyinanyangka kulirampāna pukularira nyanga alatji kulikku, “Mutu-uwa mulapaya paluru tjana wirura tjungu alatji nyinanyi munuya tjungungku Godaku war̄ka palyani anangu kutjupa tjutangku Tjukurpa Palya kulira mulamularingkunytjaku.”

²⁸ Palu tjinguru ngura nyara Pilipaila anangu kutjupa tjuṭa nyurampa kuraringanyi nyura Tjukurpa Palya wangkanyangka. Kaya palumpa tjanampa nyakula nguluringkuwiyangku wantima. Panya nyura tjanampa nguluringkuwiya ngaranyangkampa tjana nyakula kulikku nyanga alatji, “Mutu-uwa, mulapa tjinguru Godalu nganaqanya iluntara wiyaliku.” Ka nyura nguluringkuwiya rapa ngarala kampa kutjupa kulikku alatji, “Mutu, mulapa Godalu nganaqanya wankarunkuku.” Ka Godalu kutjungku nyuranya ngulu wiya rapa ngaranytjaku palyalku.

29 Uwa, Godalu panya mukulyangku nyuranya ngurkantanu Jesuku Christaku mulamularingkunytjaku kutju wiya palu pikatjararingkunytjaku kulu aŋangu Jesuku mirpaŋtju tjutangku pungkunyangka.

30 Panya nyura nyangangi ngura panya Pilipaila tjana ngayunya pungkunyangka ngayulu panya Jesuku Tjukurpa Palya tjanala wangkanyangka. Ka nyura ninti panya tjukurpa nyanga palulanguruŋi ya miilarara kuvari tjailangka tjunu. Ka kuvari nyurampa palu purunypaṭu ngařanyi nyuranya kurara pungkunytjaku Tjukurpa Palyanguru. Ka nyura uti wantinytja wiyangku tjukurpa palunya wangkama alatjiṭu.

2

Jesunya Mayatja Pul̄kanya

1 Kulilaya waltyta wiru tjuta! Nyura panya Christala tjungu nyinanyi, ka pala palulanguru nyura kuŋpu nyinanyi paluru nyuranya rapannyangka. Munu nyura pukulpa kulu nyinanyi paluru nyuranya mukulyangku kanyinnyangka. Ka panya Kurunpa Milmilnga nyurala tjungu nyinanyi malpa wiru. Ka nyara palulanguru nyuranku mukulya ngaltunyntju nyinanyi. **2** Uwa, mulapa nyura wirura nyinanyi, palu wanyuya piruku ngayula kulinma munuya kulintja kutjuringkula tjungu pukulpa nyinama nyararingkunytja wiya, munuyanku ngaltunyntju mukulya pulka nyinama kurunpa kutjuringkula. Ka nyura alatji wirura tjungu nyinanyangka na kulira nyurampa pulka alatjiṭu pukulariku.

3 Uwa, uti nyura kutjupa kutjupa wiru palyaṛa kaŋany-kaŋanyarinytja wiyangku wantima aŋangu kutjupa tjutangku nyuranya nyakula mিrawaŋinýtjaku-tawara. Palu nyura uti kurunpa ngaltunyntju nyinara Jesuku waltyta uwankarangka tjungu nyinama kutju nyakula wantinytja wiya. **4** Uti nyuranku waltytjangku kulira nyurampa kutju palyantja wiyangku aŋangu kutjupa tjutaku kułukuļu palyanma tjana mukuringkunyangka, munuya tjananya kulu nyakula aṭunymanama.

5 Munuya tjukarurungku kulinma, panya Jesulu Christalu tjukarurungku kulipai, palu purunypa.

6 Panya Jesunya kuwaripatjara mulapa Godanya alatjiṭu nyinangi witulya pulka mulapa.

Munu panya Mama Godalu palunya mantakutu iyantjikitjangku wangkanyangka paluru wangaŋarangku alatjiṭu kulinu wantinytja wiyangku.

7 Panya paluru pulka nyinanytjatanu tjukutjukuringkula mantakutu pitjangu,

munu itiringkula nganananya purunypa aŋanguringu.

Panya paluru mayatja pulka mulapa nyinanytjatanu mantakutu pitjangu munu wati unytju war̄karipai purunypa nyinangi.

8 Munu paluru kaŋany-kaŋanypa nyinanytja wiyangku palumpa Mamangka wangaŋarangku kulira palyaningi,

munu paluru wangaŋara alatjiṭu nyinara paṭaningi puṇu kaṭakutjarrangka ilunytjikitja.

Panya palunyaya wati kura tjutangku puṇungka wakara utitjunu wati kura-palku kulira.

9 Ka panya Godalu palunya tjukutjukuringkula ilunyangka wankara pakaltjinganu munu ngura wirungka tjunu mayatja pulka mulapa nyinanytjaku.

Ka paluru kuvari mayatja kutjupa uwankarangka waintara nyinanyi pulka mulapa.

¹⁰ Uwa, Godalu alatji tjunu uwankarangku Jesunya kutju mirawañira walkuntjaku aŋangu mantangka nyinapai tjutangku, munu miri tjutangku kuļu, munu angelpa ilkaritja tjutangku kuļu uwankarangku tjungungku tultjungarakatira palunya walkuntjaku panya paluru pulka mulapa nyinanyi.

¹¹ Uwa, aŋangu winkingkula Jesunya Christanya walkura pukultu wangkaku,

“Nyuntun uwankaraku Mayatja pulka mulapa nyinanyi.”

Munula palulanguru aŋangu uwankarangku Mama Godanya pulkara mirawanira walkulkku.

Kililpi Purunypaya Mungawalurungka Irnyanma

¹² Uwa, Jesulu panya palumpa Mamangka wangañarangku kulinu. Nyara palulanguru panya Godalu nyuranya kuranguru wankarunu iwara tjukarurungka kutju ankunytjaku. Ka walytja wiru tjuta, nyura uti wankarunkunyangka kulintjatjanu iwara pala palula titutjara anama munuya iwara kutjupangka ankunytja wiyangku wantima. Panya nyura ngañmanytu Godala wangañarangku kulira iwara palyangka kutju anangi ngayulu panya nyurala tjungu nyinanyangka. Palu kuvari nyanga ngayulu patu nyinanyangka nyura uti iwara pala palula kutjungkatu titutjara anama kutjupangka ngunti ankula kawankatinytjaku-tawara.

¹³ Panya Godalu Kurunpa Milmiltu nyurala unngu nyinara nyuranya rawangku nintikatinyi nyura wangañararingkula palula kulintjaku, panya nyuranya witulyananyi nyura Godanya mukuringkunytjtja tjukarurungku palyantjaku.

¹⁴ Kaya iwara pala palula ankula mulyarariwyangku pukultu wañanma munuya ngaparku pikaringkula ngalytjurmarra wangkawiya kalypa nyinama tjungu pukulpa. ¹⁵ Panya nyura alatji wirura nyinanyangka nyakulaya kutjupa tjutangku nyuranya puťu kuranmankuku. Panya tjukurpa kurakura kulipai tjutangkuya iwara kurangka ankula kura kutju palyalkatipai. Nyara paluru tjana panya mungawalurungka titutjara ngaranyi. Palu nyura Godaku katja unṭalpa tjuta nyinarampa kililpi tjuta purunypa irnyani palula tjanala ngurur-ngururpa munu nyura uti wiru tjuta kutju palyara iwara palya tjananya nintinma. Panya paluru tjana nyuranya nyanganyi wirura palyanyku nyinanyangka. ¹⁶ Ka nyura uti Tjukurpa Palya Wankarunkupainyatjara tjanala rawangku tjakultjunama, ka paluru tjana kulira mulamularingkunyangka Godalu tjananya kuļu wankarunkuku palula tjungu titutjara wanka nyinanytjaku.

Uwa, nyura uti rawangku Godala wangañarangku kulira tjukaruru nyinama ngula Christanya malaku pitjanyangka ngayulu palula mirangka nyuranya palyanmankunytjaku. Panya ngayulu palula pukultu wangkanytjikitja mukuringanyi alatji, “Uwa Mayatja, ngayulu Pilipaila nyinanytja tjutangka pulkara alatjitu warkaringi, kaya mulapatu wangañararingkula nyuntula kulira titutjara wirura palya nyinangi.” Alatjina tjintu małatjangka Godala wangkanytjikitja mukuringanyi.

¹⁷ Kaya kulinma panya nyura Jesuku mulamularingkunytjatjanu palumpa walytjaringu, munu nyura Godaku iwarangka ankula palula wangañarangku kulira palyaningi. Ka panya kutjupa tjutangku kuvari nyuranya kurakurani munu nyuranya tjituru-tjitururinytjaku palyani nyura iwara palyangka tungun-tungunpa ankunyangka. Palu Godalu

nyuranya nyakula pukularinyi nyura wantintyja wiyangku palunya kutju titutjarangku kulinnyangka. Kaya tjinguru ngayunya iluntankuku ngayulu tjukurpa Jesunyatjara rawangku wangkanyangka. Palu palyantiniya iluntankuku, panya Godalu ngayunya nyakula pulka pukularinyi ngayulu palunya kutju titutjarangku wañannyangka. Palu ngayulu pukularinyi alatjitu, mununa nyuranya kuļu kulira pukularinyi. ¹⁸ Ka nyura uti palu purunypaṭu pulka pukularima, panya nyuntu nganana tjungungku Godanya kulipai nyinanyi munula palumpa iwarangka titutjara ananyi.

Timitjinya Pula Papa-tayatjanya

¹⁹ Uwa, ngayulu mukuringanyi wati panya Timitjinya nyuralakutu iyantjikitja, ka paluru ma-pitjala nyurala wirkara tjunguringkula ngayunyatjara tjakultjunkuku, ka nyura kulira pukulariku. Munu ngula paluru ngapartji malaku pitjala nyuranyatjara ngayula tjakultjunkuku, kana ngayulu kuļu palu purunypaṭu kurunpa pukulariku nyuranya kulira. Palu ngayulu kuwaripangkuṭu palunya iyantja wiyangku Mayatja Jesulawararangku tlapini. Mununa paluru palyanmankunyangka kutju palunya nyuralakutu ma-iyalku. ²⁰ Tjinguruṇa wati kutjupa iyanma palumpa arangka, palu wati kutjupa Timitjinya purunypa nyinanytja wiya ngura nyangangka. Palu wati nyanga paluru nyurampa pulka mukuringkupai munu nyuranya rawangku kulipai. ²¹ Palu kutjupa tjuṭangkuya nyuranya kulipai wiya, munuya Jesuku warka palyantjikitjangku kuļu kulintja wiyangku wantira tjana mukuringkunytja kutju palyantjikitjangku kulipai.

²² Palu nyura ninti wati nyanga Timitjiku, panya paluru Jesuku warka rawangku palyalpai. Munu nyanga paluruni pulka alpamilalpai munuli kuṭararangku purunytju Tjukurpa Palya para-wangkapai ngura tjuṭangka. ²³ Palu kuwari nyangaṇa tjailangkaṭu nyinanyi mununa kulini, “Yaaltjingalkuniya? Tjinguruṇiwalatjunkuku, munta tjinguruṇi iluntankuku.” Palu tjana kulira ngayunya ngurkantara wangkanyangkaṇa Timitjinya nyuralakutu mapalku ma-iyalku. ²⁴ Palu ngayulu mulamularingkula kulini panya Mayatja Jesulu kuwari nguwanpa ngayunya nyangangru pakaltjingalku nyuralakutu ma-pitjanytjaku.

²⁵ Palu kuwariṇa nyuntumpa nganampa malpa kutjupa nyuralakutu malakungku iyantjikitjangku kulini, wati panya Papa-tayatjanya. Panya paluru ngananaala tjunguringkula Godaku warka wiru palyalpai. Ka kutjupa tjuṭangku Godaku tjukurpa ananyangka paluru tungun-tunguntu wangkara tjukarurulpai ngulu wiyangku. Palu panya nyura paṭu nyinara puṭu kuliningi ngayunya tjailangka nyinanyangka alpamilantjikitjangku. Nyara palulanguṛu panya nyura wati nyanga palunya ngayulakutu iyanu ngayunya alpamilantjaku munu ngayula tjunguringkula warkarinyytjaku. ²⁶ Palu kuwariṇa malakungku ma-iyani, panya paluru watjilarinyi nyuralakutu malaku ma-pitjanytjikitja. Munu paluru nyuranyatjara wangkara pulka kulipai alatji, “Tjinguruya ngayulu pika pulka rawa ngarinyangka-palku kulira tjituru-tjituririnyi.” Palulanguṛu paluru nyuralakutu warpungkula ma-pitjanytjikitja mukuringanyi nyura nyakula pukularinytjaku.

²⁷ Uwa, mulapa paluru pika pulkaringkula nguwanpa ilungu. Palu Godalu ngalturingkula palunya palyarungunu, panya paluru palumpa kutju ngalturingkunytja wiya, ngayuku kuļu ngalturingu ngayuku malpa

ilunyangka ngayulu tjituru-tjitururinytjaku-tawara. ²⁸ Kaña palulan-guru pulkara mukuringanyi palunya mapalkungku nyuralakutu ma-iyantjikitja. Ka paluru nyurala ma-wirkankunyangka nyura nyakula pulkara pukulariku. Kaña ngayulu kulu pukulariku panya paluru nyangangka nyinara pikatjararingkunyangkaña pulkara tjituru-tjitururingu.

²⁹⁻³⁰ Uwa, paluru nyurala ma-wirkankunyangkaya nyakula pukultu ampunma, panya paluru nyurampa kutja Jesulanguru. Nyura pala paṭu nyinara ngayulakutu puṭu pitjangi munu panya nyura wati nyanga palunya ngayulakutu iyanu ngayunya alpamilantjaku. Ka panya paluru wanganara pitjangu munuli tjunguringkula pulkara warkaringi Jesuku Christaku. Ka paluru warkarinytjatjanu pikatjararingkula nguwanpa ilungu. Ka nyura nyangatja kulinma munuya palunya wirunmanama munuya aŋangu kutjupa tjuta kulu palu purunypaṭu tungun-tungunpa Jesuku warkarinyangka nyakula wirunmanamaṭu.

3

Godalu Jesuku Mulamularingkunyangka Kutju Nganaŋanya Tjukarurunmankupai

¹ Uwa, walytja wīru tjuta, kulilaya! Utı nyura Mayatja Jesuku walytja nyinara palumpa pulkara pukularima. Ka panya ngayulu ngañmanytju nyurala wangkara ngulutjunangi wati ngunti wangkapai tjuta kulira wañantjaku-tawara. Panya palunyaña piruku nyurala wangkanytjikitja mukuringanyi, panya ngayulu rawangku wangkanyangka nyura pulkara kuliklu munu nyara palulanguru nyura nintiringkula tjananya kulira wantiku ngunti wangkapai tjuta tjana nyurala wangkanyangka.

² Uwa, wati panya palunya tjananyaya ngulu nyangama nyuranya ngunti kurantjaku-tawara panya tjana wangkapai alatji, “Utiya wati Jesuku walytja tjutangku Moseku tjukurpa kulu kulinma munuya Jewku arawanu watiringama. Nyara palulanguru kutju tjana Godaku walytja mulapa nyinaku.” Palu wiya, alatji tjana ngunti wangkanyi. ³ Paluru tjana wangkapai, “Nganaŋa Godaku walytja alatjiṭu.” Palu wiya, nganaŋa Godaku walytja mulapa nyinanyi, panya nganaŋa Godanya walkulpai Kurunpa Milmiłtu nganaŋala unngu nyinara nintinnyangka. Kala pukularinyi Jesulu Christalu nganampa wīru palyantjtjanguru, panya paluru kutjungkulanya wankarunu. Palu nganaŋa Jewku aṛa tjutanguru pukularinytja wiya, panya aṛa nyara palula tjanalawanu nyinara nganaŋa puṭu wankaringanyi.

⁴⁻⁶ Panya kutjupa tjutangkuya ngunti kulilpai Moseku tjukurpa tjukarurungku wañara-manti wankaringanyi. Palu wiya. Panya ngayulu ngañmanypa palu purunypaṭu kulilpai nyinangi, panya ngayulu wati alatjiṭu paluru tjana purunypa Jewku arawanu itinguru watiringkunytja. Ka ngayuku tjamu ngañmanyitja wati panya Pintjimanna panya wati Israelku katja małatja. Nyara palula tjanalanguruṇa ngayulu wati Iipuru alatjiṭu nyinanyi. Munu panyaña Paratji nyinara-alpi Jewku aṛa tjuta tjukarurungku wañaningi. Munu panyaña aṛa nyanga palunya tjananya kutju wañantja-tjiratjangku Jesuku walytja tjuta wañara pungangi ngura tjutangka. Uwa, ngayulu Jewku aṛa tjuta rawangku wanganarangku kuliningi pakuringkula wantinytja wiyangku. Mununa palulanguru kañany-kañanyarira kuliningi alatji, “Godanyatju ngayuku nyakula pukularinyi alatjiṭu aṛa nyanga Moseku tjukarurungku wañannyangka.”

⁷ Uwa, alatjiña ngañmanytju kuliningi, palu Christalu panyanı kampa kutjupanu palula kutju tjukarurungku kulintjaku, kaña kuwari nyanga alatji kulini, “Ngañmanytju panyañatju ara panya palunya tjananya ngunti wañaningu Godalu ngayunya nyakula tjukarurunmankunytjaku-palku.” Palu ngayulu Christanya kulira ara panya palumpa watarkuringu alatjitu mununa Christanya kutju wanantjikitja mukuringanyi. ⁸ Mununatju małakukutura kulinu, “Nyaakuñatju panyatja rawangku alatji palyaningu Godalu ngayunya nyakula tjukarurunmankunytjaku-palku?” Panya ara nyara palula tjanalanguru ngayulu puťu tjukarururingangi Godaku walytja mulapa nyinanytjikitja. Palu kuwari ngayulu Jesuku Christaku nintiringu, panya paluru kutjungku kampa kutjupankupai Godaku walytjaringkula tjukaruru nyinanytjaku. Ka ara nyanga paluru pulka mulapa kutjupa uwankarangka waintara alatjitu ngaranyi.

Uwa, ngayulu panya ngañmanytju Jewku ara tjuṭa ngunti wañaningu ara wiru tjuṭa-palku. Palu kuwarina Jesunya kutju wanantjikitjangku kulira ara nyara palunya tjananya piruku wanantja wiyaringu, panya ara nyara palunya tjananya wañannyangkañi Godalu ngayunya puťu wankarunkuku. ⁹ Palu Christalawanu nyinanyangka kutjuni Godalu ngayunya tjukarurunmanu palumpa walytjaringkunytjaku, panya ngayulu mulamularinganyi Christanya ngayuku ngalkilpa ilunyjtjajku. Kañi nyara palulanguru kutju ngayunya Godalu tjukarurunmanu. Ngañmanytju panyaña mulapa Jewku ara tjuṭa wanganarangku kulira palyaningu, palu nyanga alatji palyannyangka nyakula Godalu ngayunya tjukarurunmankunytja wiya, palu paluru Jesuku mulamularingkunyangka kutju ngayunya tjukarurunmanu. ¹⁰ Panya ngayulu mukuringanyi Jesuku Christaku ninti mulararinytjikitja. Mununa piruku mukuringanyi Godaku witulyatjara rawa nyinanytjikitja. Panya paluru Christanya ilunyangka palunya witulya pulkangku wankara pakaltjinganu, kaña witulya palunyatjara nyinanytjikitja mukuringanyi paluru ngayunya witulyankunyangka.

Uwa, ngayulu Jesuku nintiringkula palu purunypa nyinanytjikitja mukuringanyi. Panya palunyaya kuraṛa pungangi munu pikatjaranu munu iluntanu, kañiya palya ngayunya palu purunypa kuraṛa pungama munu pikatjaranma panya ngayulu Jesunya purunypa nyinanyi palunya wanara. Mununiya palya ngayunya Jesunya purunypa pungkula iluntanama, panya ngayulu palula tjungutja mulapa nyinanyi. ¹¹ Uwa, ara nyanga palumpa tjanampaña mukuringanyi, kani palulanguru Godalu ngayunya ngula ilunyangka wankara pakaltjingalku palula tjungu wanka titutjara nyinanytjaku.

Christaku Nintiringkula Palunya Purunypa Nyinanytjaku

¹² Palu ngayulu kuwaripatu Christanya purunyarinytja wiya mununa kuwaripatu palyaringkunytja wiyat. Palu Christalunu ngurkantara mantjinu palumpa nintiringkunytjaku, kaña palulanguru titutjarangku pulkara arkanı palumpa nintiringkula palya mulararinytjikitjangku.

¹³⁻¹⁴ Uwa, walytja wiṛu tjuṭa. Ngayulu Christanya purunyarinytja wiyat. Palumpaña kuwaripatu nintiringanyi. Palu ngañmanytju panya palyantja tjutana kulira wantinyi mununa kuranyukutungku kutju kulira tungun-tungunpa Christaku pulkara nintiringanyi palunya purunyarinytjikitja. Panya watingku wala winki wirtjapakara waarrangku pinkuraraña nyakukatipai wiya kuranyukutungku kutju nyakula wala pulka wirtjapakalpai waintarira wiṛu mulapa mantjintjikitja, palu

purunypa ngayulu Christanya purunyarintjikitjangku pułkara arkanı pakuringkunytja wiyangku ngula wiru mulapa mantjintjikitjangku. Ka nyara palulanguru Godalu ngayunya katiku palula tjunguringkula tiṭutjara nyinanytjaku ngura ilkaritjangka, panya Jesunya ngayuku ngalkilpa ilunytjtjanguru.

¹⁵ Ka panya nyura kutjupatjara Jesuku walytjaringkunytjatjanu rawa nguwanpa nyinara palumpa pułkara nintiringu. Nyara palulanguru nyura uti ngayulu nyanga wangkanytjitjaku kulira mulamularingama. Munula palulangurulta uwankarangku tjungungku kulilku. Ka nyura tjinguru kutjupa tjarangku kampa kutjupa kulini munu nyura tjukurpa kutjupa ngayulu nyanga wangkanytjitjaku puṭu mulamularinganyi. Palu palya, panya ngula Godalu nyurala utilku, ka nyara palula ara utiringkunyangka nyura tjukurpa panya palumpa mulamularingkuku. ¹⁶ Palu kulilaya, panya nganana kutju kutju Godaku tjukurku ngañmanypa nintiringu, panya kutjupa tjuṭala pułkara nintiringu, ka kutjupatjara tjukutjuku kutju nintiringu kuwaripaṭu ninti pułkaringkunytja wiyaṭu. Palu utila uwankarangku kutjungku kutjungku kulira wangañarangkuṭu palyanma Godalu nganananya kutju kutju nintintjtjanguru.

¹⁷ Munu walytja wiru tjuṭa, nyura uti uwankarangku arkanma ngayunya purunypa nyinanytjikitjangku. Panya nganana ngañmanypa nyurala nyinangi, ka panya kutjupa tjarangku nganananya nyakula arkaningi wirura nyinanytjikitjangku. Ka nyura kulu uti palunya tjananya nyangama tjananya purunypaṭu wirura nyinanytjikitjangku. ¹⁸ Uwa, arkaraya ngayunya purunypa nyinama, munuya ngulu nyangama wati panya kura tjuṭa kulu, panya nganmanytjuna nyuranya wangkara ngulutjunangi palunya tjananya, munuña nyangatja piruku kurunpa ttituru-ttitururira ulatjarangku nyurala wangkanyi tjananya kulira wantintyjaku. Panya tjava ngunti Jesuku walytja-palku nyinapai munuya kura kutju kulipai. Palu tjava alatji kura nyinara Jesunya puṇu katakutjarangka ilunytjtja pułkara ananı. ¹⁹ Ka nyara palulanguru tjintu małatjangka Godalu tjananya warungka waniku. Panya tjava Godanya wantira tjava mukuringkunytjtja kutju pułkara kulipai. Munuya kuntu wiyangku kañanyakanytju kura rawangku palyalpai. Utiya kuntasaringama, panya tjava mantatja tjuṭa kutju kulipai Godanya wantira.

²⁰ Ka nyara palulanguru nyura uti palunya tjananya arkantja wiyangku wantira nganananya arkanma nganananya purunypa nyinanytjikitjangku, panya nganana mantatja tjuṭa pułkara kulipai wiya, waintarala kulini ngura ilkaritja. Nyara paluru panya nganampa ngura mulapa. Kala ala-alangku patani ngura nyara palulanguru Wankarunkupainya malaku pitjanytjaku panya Mayatja Jesunya Christanya. ²¹ Panya paluru witulya pułkangku uwankara kanyini mantatja, ilkaritja uwankara tjungura, munu paluru ilkaringgaṛu pitjala nganananya puntu nyanga mantatja witulya pułkangku kampa kutjupankuku munulanya puntu palunya purunypa alatjtju palyalku wiru mulapa. Panya paluru ilunyangka Godalu palunya wankaṛa pakaltjinggaṇu munu panya palunya puntu kampa kutjupara wiru mularmanu, palu purunypa Jesulu pitjala ngapartji nganananya puntu wiru mularmankuku.

4

¹ Uwa walytja wiru tjuṭa, ngayulu nyurampa pułkara mukuringanyi kurunpa winki, munuña nyuranya kulira watjilaripai munuña mukuringku-pai nyurala tjunguringkunytjikitja. Palu nyuranya kulirana pułkaratu

pukularinyi nyura Godanya wirura rawangku wañannyangka. Kaya ngayulu panya kuwari wangkanytja nyura wangañarangku kuliṛa Mayatjanya tungun-tunguntu wañanma wantintytja wiyangku palumpa pulkara mulamularingkula.

Wirura Kalypa Nyinanytjaku

² Kaña kuwari minyma pala Utiwala pulala Tjintikala wangkanyi alatji, “Panya nyupalinku kunyu kutjupa kutjupanguru rawangku pikapikangku wangkapai. Kaña mukuringanyi nyupali tjunguringkula kalypa nyinanytjaku kulintja kutjuringkula, panya nyupalitu Jesuku Christaku walytja nyinanyi.” Nyanga palunyaña nyupalila wangkanyi.

³ Palu malpa wiru, kuwarina nyuntula tjapini nyuntu minyma pala kutjara wangkara kalypantjaku. Panya minyma pala paluru pula kuļu ngayula tjungu ngañmanypa warkaringi aŋangu tjutangku Tjukurpa Palya Jesunyatjara kulintjaku. Kaya kutjupa tjuta kuļu nganañala tjungu warkaringi nyara palula arangka, wati panya Kilimannga tjana. Ka panya Godalu aŋangu nyanga palunya tjananya kuļu ini ngañmanytju walkatjunu palumpa nyiringka minyma pala palunya pulanya kuļu. Panya nyiri pala palula Godalu aŋangu tjuta mulapa ini walkatjunu, ka paluru tjana uwankara palula tjungu wanka titutjara nyinaku.

⁴ Palu walytja tjuta, nyura uti Mayatja Jesuku walytja nyinara pulkara pukularima. Kaña pirukutu nyurala wangkanyi, “Titutjaraya pukulpa nyinama!” ⁵ Munuya aŋangu uwankaraku ngaltunytyu nyinama, kaya paluru tjana ngapartji kuliṛa nyurampa pukularikuļu. Munuya watarkuriwiyangku kulinma panya Mayatja Jesunya kuwari nguwanpa małaku pitjanyi. ⁶ Kaya kutjupa kutjupa tjuta nyurala wirkankunyangka kuliṛa tjituru-tjitururinytja wiya nyinama, munuya Godala tjapinma nyuranya atunyamankunytyaku munuya palunya mirawanira walkunma nyuranya paluru wirura kanyinnyangka. ⁷ Ka nyura Jesuku walytja nyinanyangka Mama Godalu nyuranya kurunpa rapa pukulpa nyinanytjaku palyalku. Kaya kutjupa tjutangku nyuranya nyakula puťu nguwanpa kuliklu munuya wangkaku, “Awari! Yaaltji-yaaltji nyanganpa rapa pukulpa mulapa nyinanyi tjituru-tjituru pulka tjanala wirkankunyangkampa?”

⁸ Uwa walytja tjuta, kulilaya! Pirukuna nyurala wangkanyi. Uti nyura kulintja wirutjara nyinama. Munuya ařa kura tjuta ruukulintja wiyangku wantira ařa wiru tjuta kutju titutjarangku kulinma. Munuya titutjarangku kulinma aŋangu wiru tjutangku palyantja tjuta munu tjukurpa tjana wangkanytja tjuta kuļu. Munuya tjukurpa tjukaruru tjuta kutju kulinma, ngunti tjuta kulintja wiyangku wantira. Munuya kutjupa kutjupa wiru tjuta utiringkunyangka nyakula pukularima. Munu kura palyannyangka nyakula pukularinytja wiyangku wantima munuya wiru palyannyangka kutju nyakula pukularima. Uwa, kutjupa kutjupa wiru tjuta nyakunytjatjanungkuya titutjarangku ruukulinma. ⁹ Ka panyaña ngayulu nyuranya ngañmanytju nintiningi tjukurpa wiru tjuta ka panya nyura mulamularingu, panya palunya tjananyaya rawangku kulinma watarkuriwiyangku. Munuya ngañmanytju panya ngayulu palyannyangka nyakunytjatjanungku palyanma alatjitu titutjarangku ngayulu purunytyu. Ka Mama Godanya nyurala titutjara tjungu nyinaku munu nyuranya kurunpa rapa pukulpa nyinanytjaku palyalku.

¹⁰ Panya nyura ngañmanytu ngayuku kutjupa kutjupa iyaningi ngayunya alpamilantjikitjangku munu palulanguru nyura piruku iyan-tja wiyaringu. Palu nyura panya ngayunya titutjarangku kuliningi watarkurintja wiyangku munu nyura kuwari nyanga piruku ngayuku iyanu wirungku. Kana pulkara alatjitu nyurampa pukularira Mayatja Jesunyu mirawaninyi nyura ngayuku iyantitjanguru.

¹¹ Nyangatjana manikitjangku wangkanyta wiya mani piruku iyantjaku, panya ngayulu alatjitu mani tjukutjukutjara pukulpa nyinapai. ¹² Kutjupa-ara ngayulu maralpa nyinapai pukulpa alatjitu, mununa kutjupa-ara mai ulytja pulkatjara nyinapai pukulpatu, panya araa nyanga palumpa-na nintiringu alatji titutjara pukulpa nyinanytjikitja. Ngayulu kutjupa-ara mai ngalkula paltjaringkula pukularipai. Mununa kutjupa-ara mai wiya nyinara paltjatjiratja pukulpatu nyinapai. ¹³ Uwa, kutjupa kutjupa ngayula utiringkunyangkaña ngayulu kurunpa rapa pukulpa nyinapai, panya Jesulu ngayunya kungulpai. ¹⁴ Palu panya nyura wirungku ngayuku kutjupa kutjupa iyanu nyanga tjaila unngu nyinara puu kulinnyangka.

¹⁵ Palu panyatjaya kulinma, panya mungaunu nyurala Tjukurpa Palya Jesunyatjara tjakultjunu, ka panya nyura kuliña mulamularingu. Palulan-guruña manta pala Matja-tuniyanya wantikatira ngura kutjupa tjuṭakutu anu. Ka panya nyura kutju ngayunya alpamilaningi ngayuku mani iyara, ngayulu aŋangu tjuṭangka Tjukurpa Palya tjakultjunkunytjaku. Ka panya Jesuku waltya kutjupa tjuṭangku ngura kutjupa tjuṭanguru ngayunya alpamilantja wiyangku wantingi, nyura kutju panya ngayunya alpamilaningi. ¹⁶ Ka panya ngayulu piruku ngura Tjitja-lanikala mani wiya nyinanyangka nyura wirungku piruku iyanu kutjara-arangku. ¹⁷ Kana nyangatja manikitjangku wangkanyta wiya, palu mukuringanyina Godalu nyuranya pukulmankunytjaku nyura ngayunya wirungku alpamilantjitunguru.

¹⁸ Nyangatjana nyurampa walkatjunanyi kurunpa winki pukularira nyura ngayunya wiru tjuṭa ungkunytjitunguru, panya kuwariña alatjitu kanyini nyura panya ungkul'iyantja wati nyanga Papataitjanya. Ka Godanya nyurampa pulkara pukularingu nyanga palunya palyannyangka. Nyangatja panya nyaa purunypa ngaranyi, panya aŋangungku paṇti wiru tililpai Godanya pukularintjaku, palu purunypa nyangatja wiru mulapa.

¹⁹ Ka panya Jesunya Christanya nyurampa ngalkilpa ilunytjitunguru Godalu nyurampa pulka mulapa kanyini nyuranya ungkunytjikitjangku. Munu panya nyura kutjupa kutjupaku mukuringkula ngatjinnyangka paluru nyuranya ungkuku.

²⁰ Uwa, nganampa panya Mama wiru mulapa nyinanyi. Kala uti titutjarangku palunya walikura mirawanima. Uwa mulapa.

Tjukurpa Malatja

²¹ Uwa waltya wiru tjuṭa, ngayulu nyuranya rawangku kulilpai Jesuku Christaku waltya uwankara. Ka panya Jesuku waltya kutjupa tjuṭa nyanga ngayula kuwari tjungu nyinanyi, paluru tjana kulu nyuranya kulini nyurampa pukularira. ²² Uwa, Jesuku waltya ngura nyangatja ngurara uwankarangku nyuranya kulini. Ka Jesuku waltya kutjupa tjuṭa mayatja panya Rome-anja nguraraku warkaripai tjuṭa nyinanyi, paluru tjana kulu palu purunypatu nyuranya kulini.

²³ Uwa, alatjituña walkatjunanyi. Ka Mayatja Jesulu Christalu nyuranya kurunpa pukulmara kanyinma pukultju pulkangku. Uwa mulapa.

Lita Paulalu Walkatjura Iyantja Ngura Kalatjilakutu Colossians Nyangatja Nganmanytju Nyakula Wangkanytjaku

Nyangatja Godaku tjukurpa Paulalu walkatjunkunytja tjaila unngunguru aŋangu Jesuku walytja tjutaku tawunu ini Kalatjila nyinanytja tjutaku. Panya Kalatjinya ngura tjukutjuku manta ini Aitjala ngururpa nganangi ngura panya Ipitjala kakarara. Ka Paulanya ngurpa Kalatjiku, panya paluru ankunytja wiyatu nganmanypa. Paluru Ipitjalakutu kutju anu Jesuku tjukurpa wangkanytjikitja. Ka tjinguru kutjupa tjukurpa kulintjatjanu ngura nyara palulanguru anu Kalatjilakutu munu Jesuku tjukurpa aŋangu tjutangka tjakultjunangi tjana kulu kulira Jesuku walytjaringkunytjaku. Ka Paulalu kulinu Kalatjila nyinanytja tjuta Jesuku walytjaringkunytja, munu paluru tjanampa rawangku Godala tjapiningi. Ka ngula Paulaku malpangku ini Paparatjalu palula tjakultjunu tjukurpa tjuta Kalatjilanguru, tjukurpa kutjupa tjuta palya, ka kutjupa tjeta palya wiya. Ka paluru kulira lita nyangatja walkatjunu tjanampa pukularira tjananya wangkara kungpuntjikitjangku. Munu paluru unkul'iyanu wati ini Titjikatjanya katira tjananya ungkunytjaku.

Panya ngura nyara Kalatjila kunyu aŋangu ngunti wangkapai mankurpa nyinangi Jesuku walytja tjutangka tjungu. Munuya kunyu paluru tjana wangkangi nyanga alatji, "Nyura Godala mulapa tjunguringkunytjikitja mukuringkulampa uti nyura tjukurpa milmilpa tjuta pulkara kulinma munu mulamulangku wananma. Munu nyura uti tjukurpa irititja tjuta kulu wanganarangku kulira palyanma wantinytja wiyangku." Alatjiya kunyu ngunti wangkara wituwituningi Jesuku walytja tjuta.

Ka Paulalu nyangatja kulinu Paparatjalu tjakultjunkunyangka munu lita nyangatja walkatjura iyanu Jesuku walytja tjuta ngulutjunkunytjikitjangku, tjana ngunti wangkapai tjutangka kuliswiyangku wantinytjaku Godalanguru paturingkunytjaku-tawara. Munu paluru tjananya wangkangi Jesunya kutju kulintjaku panya paluru kutjungku aŋangu tjuta wankarunkupai Godala tjunguringkunytjaku. Uwa, Paulalu wangkangi tjanala Godanya tjukarurungku kulintjaku palumpa katja Jesunya kulu. Munu paluru tjananya wituwituningi tjukaruru palyanyku nyinanytjaku Godaku walytja mulapa.

Tjukurpa nyanganpa ngarinyi:

- 1:1-2 Paulalu nganmanytju wangkanytja
- 1:3-14 Paulalu tjanampa Godala tjapintja
- 1:15—2:5 Christanya tjukarurungku kulintjaku
- 2:6-23 Paulalu tjananya ngulutjunkunytja ngunti wangkapai tjutangka-tawara
- 3:1—4:6 Yaaltji-yaaltji Godalawanu tjukaruru wirura nyinanytjaku
- 4:7-18 Paulalu tjukurpa malatja wangkanytja munu malpa tjutaku tjukurpa iyantja

1-2 Uwa, Jesuku walytja tjuṭa! Ngayuluṇa Paulalu lita nyangatja nyurampa walkatjunanyi ngura pala Kalatjila nyinanytja tjuṭaku. Panya Godaluṇi ngurkantara tjunu Jesuku Christaku tjukurtjara war̄karinytjaku munuṇi witura iyanu palumpa tjukurpa aŋangu tjuṭangka tjakultjunkunytyaku. Katju malpa ngayula tjungu nyinanyi kuvari Timitjinya nyuntumpa nganampa panya walytja Jesulanguru. Munuli nyanga paluru ngali tjunguringkula lita nyangatja nyuralakutu ma-iyanı, Godaku walytja tjuṭakutu. Nyura panya ngalimpa walytja Christalanguru munu palula tjungu nyinara palunya mulamulangku wañani.

Ka Mama Godalu nyuranya pukultju pulkangku kanyinma munu nyuranya kurunpa rapara pukulmanama.

Paulalu Tjanampa Godala Tjapintja

3-4 Panya Timitjilu ngali nyurampa Godala tjapilpai, Mayatja Jesuku Christaku Mamangka, munuli tjapira nyuralanguru palunya rawangku walkulpai panya ngali kulinu nyura Jesuku pulkara mulamularingkunytya, munu Godaku walytja uwankaraku pulkara mukuringkunytya. Nyara palulanguruli nyurampa pukularira Godanya walkulpai. **5** Panya nganmanytjulpi nyura kulinu tjukurpa wiru nyurala tjakultjunkunyangka, tjukurpa panya mulapa Jesunyatjara. Nyura panya nganmanytju kulinu Godalu nyuranya ngura ilkaritjangka wirkakatinytjikitjangku kalkunyangka. Munu kalkuntja nyanga palunya kulira nyura raparingu munu panya pala palulanguru nyura rawa Jesuku mulamularingangi munu panya nyura Godaku walytja tjuṭaku kuļu pulkara mukuringkupai.

6 Palu tjukurpa wiru nyanga palunyaya ngura winkingka wangkara lip-intanangi, kaya kulira mulamularingangi aŋangu winkingku, munuya mulamularingkula ma-tjukarururingangi. Ka nyura kuļu palu purunyaringu tjukurpa wiru kulira, panya nyura mulapa nintiringu Godanya nyurampa ngaltunytyu pukultju nyinanytja kulira. **7** Tjukurpa nyangatja wati panya Paparatjalu nyurala tjakultjunu watarku nyinanyangka. Paluru ngalimpa malpa wiru panya paluru nganaña Christaku war̄ka wanganarangku kulira palyalpai. Munu ngali palunya nyuralakutu iyannyangka paluru nyurala tjukaruru war̄kareringi nyura Godaku walytjaringkunytyaku. **8** Nyara paluru ngalila tjakultjunangi nyura Godaku walytja tjuṭaku wanganara mukuringkunytya Kurunpa Milmiltu nyuranya mukulyankunyangka.

9 Kali nyangatja kulintjatjanungku nyurampa rawangku Godala tjapilpai wantintyta wiyangku. Ngali tjapilpai Kurunpa Milmiltu nyurala rawangku nintintjaku nyura tjukarurungku kulintjaku uwankara Godalu panya wangkanytjitja. **10** Alatjili tjapilpai nyura nintiringkula Mayatja Godalawanu tjukaruru nyinanytjaku, paluru nyakula pukularinytjaku. Panya ngali mukuringanyi nyura rawangku tjukarurungku palyantjaku mukulyangku, munuli piruku mukuringanyi nyura Godaku rawa nintiringkunytyaku. Uwa, rawangkuli Godala tjapilpai paluru nyuranya alati palyantjaku. **11** Godanya panya witulya pitalytji pulkanya nyinanyi, kali palula nyurampa tjapilpai nyuranya pulkara witulyankunytyaku nyura kurunpa raparingkula palunya rawangku kulikatintytyaku wantintyta wiyangku. Munuli piruku nyurampa tjapilpai kutjupangku nyuranya kurannyaangka mutta tjinguru anannyaangka nyura kulira kuraringkuwiya pukulpa nyinanytjaku Godaku witulyatjara. **12** Munuli nyurampa tjapilpai nyura Mama Godanya pukultu walkura wirunmankunytyaku panya paluru nyuranya kuranguru wankarunu nyura ilkaritjangka

wirkara pitalytji pulkangka nyinanytjaku. Panya paluru kalkunu palumpa walytja uwankara palula tjunguringkula wanka titutjara nyinanytjaku.

¹³ Panya Satantu anangu tjuta mungawalurungka katirinkupai iwara kurangka. Kalanya Godalu iwara kuranguru mantjira palumpa katjangka tjungunu paluru nganañanya iwara palyangka katirinkunytyaku. Katja nyara palumpa panya Godanya pulkara mukuringkupai. ¹⁴ Munu pala palulawanungku panya Godalu nganañanya Satantanguru wankarunu Jesunya nganampa kuranguru ngalkilpa anga-ilunyangka, munulanya pala palulanguru Godalu nganañanya kura palyantjitjanguru kalypangku pungkuwiyangku wantinyi.

Christanya Pulka Mulapa Uwankarangka Waintarintya

¹⁵ Godanya panya arkayi nyinanyi. Nganana palunya nyakunytya wiya, palu nganañanya palumpa katja Jesulanguru kutju Godanya kulini. Panya Jesunya pulka mulapa nyinanyi Godalu paluntjtja uwankarangka waintarira. ¹⁶ Panya palulawanungku Godalu uwankara mulapa palura tjunu mantatja tjuta, ilkaritja tjuta kulukulu, panya uti ngaranytjtja tjuta munu arkayitja tjuta kulu, angelpa tjuta, munu mayatja ilkaritja kutjupa kutjupa tjuta kulu paluru Jesulawanungku tjunu. Nyara palulanguru Jesunya pulka mulapa nyinanyi uwankarangka waintarintya. Ka panya uwankara Godalu palyantja ngaranyi Jesuku palumpa kutjuku alatjtatu.

¹⁷ Nyara paluru panya kuwaripatjara mulapa uwankara wiyangka nyinangi Jesunya, munu palulanguru mantatja ilkaritja uwankara palyantjtjanungku paluru rawangku kanyiningi palyantja uwankara, munu kuvari kulu uwankara kanyini tjungu ngaranytjaku.

¹⁸ Uwa, Jesunya panya mayatja katutja pulka mulapa nyinanyi, panya paluru Godaku walytja uwankara kanyini mayatja pulkangku. Paluru nganañanya kurunpa wankaru kanyilpai palumpa walytjapiti, panya paluru-warara ilunytjtjanu wankaringu mayatja pulka mulapa nyinanytjikitja uwankarangka waintarintya. ¹⁹ Panya Godalu kulinu palumpa katja palunya purunyapa alatjtatu nyinanytjaku, kala palulanguru Godanya uti kulini Christalanguru, panya paluru Godanya alatjtatu.

²⁰ Godalu panya nganañanya palumpa katjangka tjungunu, paluru nganañanya mayatjangku kanyintjaku. Paluru alatjinggañu panya paluru mukuringangi palumpa katjawanungku mantatja ilkaritja uwankara wiruntjikitjangku. Paluru mukuringangi uwankara palula piruku tjunguringkunytyaku, munu palulanguru palumpa katja mantakutu iyanu puñu katatakutjarangka ilura milkali tjutintjaku anangu tjutaku ngalkilpa.

²¹ Ka panya nyura ngañmanypa Godalanguru watarku mauntalpa nyinangi, panya nyura palumpa kuraringkula kura tjuta palyaningi. ²² Palu kuvari palumpa katja puntu winki ilunytjtjanguru Godalu nyuranya ngalkinu palula kalypa nyinanytjaku, nyura palulakutu palya mulapa wirkankunytyaku kura wiya alatjtatu. ²³ Palu nyuranya wantikatinintjaku-tawara tjukurpa wiruku rawa mulamularingama wantintyta wiya. Munuya Jesunya kutju titutjarangku wañanma wantintyta wiyangku. Munu panya Godalu nyuranya ngura ilkaritjangka wirkakatinintjikitjangku kalkunnyangkaya rawangku kulira raparingama palumpa. Kalkuntja nyanga palumpa panya nyura ngañmanytu kulira mulamularingu tjukurpa wiru Jesuku nyurala tjakultjunkunyangka. Tjukurpa nyanga palunya panyaya manta winkingka ankula tjakultjunangi anangu uwankarangka. Kana ngayulu ku lu tjukurpa nyanga palunya wangkapai nyinanyi.

Godalu Paulanya Wituntja Tjukurpa Para-wangkanytjaku

²⁴ Ka Jesunya wantipai tjutangku ngayunya ngukalpai ngayulu tjukurpa Jesunyatjara anangu tjutangka para-wangkanyangka. Palu ngayulu natju pukulpa alatji nyinanyi, panya ngayulanguru anangu tjuṭa mulapa Jesuku mulamularingu. Kanjiya Jesunya wantipai tjutangku ngayunya kuranmananyi, mununiya atuni munu punganyi munu tjaialangka tjarpatjunnanyi. Palu ngayulu nyanga pikawanu pukulpa nyinanyi Godaku walytja tjutaringkunytjaku, panya Jesulu alatji wangkangu, “Panya ngayunya purunypatuya kutjupa tjutangku nyuranya pikantankuku ngayuku war̄ka palyannyangka.” ²⁵ Ka ngayulu Jesuku walytja tjutangka tjakultjunkupai panya Godaluni war̄ka nyangatja ungu tjukurpa palumpa winki nyurala utira wangkanytjaku. ²⁶ Panya tjukurpa nyanga palunya Godalu iritinguru rawangku kumpilpa kanyiningi. Palu kuwari nyanga paluru utira nintinu palumpa walytja tjutangka. ²⁷ Paluru mukuringangi tjana uti kulintjaku tjukurpa nyanga kumpilitja. Tjukurpa nyanga paluru panya Jew tjutaku kutju wiya, palu anangu ngura uwankaranguru kulira pukularinytjaku panya Godalu tjananya kuļu wankarunkunytjaku ngaranyi.

Tjukurpa paluru alatji wangkanyi,

“Christanya panya nyurala nyinanyi, ka pala palulanguru nyura kuruṇpa rapangku paṭanı Christalu nyuranya ngula Godaku ngurangka wirkakatintjaku pitalytji pułkangka.”

²⁸ Palulangurula anangu uwankarangka tjukurpa Christanyatjara para-wangkanyi. Nganaña tjananya purkarangku nintilpai Godaku tjukurpa uti kulintjaku munula tjananya markulpai iwara palyangka kutju ankunytjaku. Panya nganaña mukuringanyi Christaku walytja uwankara Godala tjukarurungku wirkakatintjikitja tjana palula mirangka palya mulapa ngaranytjaku. ²⁹ Nyanga palunyakitjaña Jesuku walytja tjutangka rawa pułkara war̄karinyi pakuringkuwiya, Jesulu ngayunya witulyangku kuṇpunnyangka.

2

¹ Ka panya nyura munu Layata-tjiyanya ngurara tjutangku kuļu ngayunya nyakunytja wiya. Ka palu purunypa ngura kutjupitja tjutangku kuļu ngayunya nyakunytja wiyatū. Palu ngayulu palunya tjananya munu nyuranya kuļu pułkara alpamilantjikitja mukuringanyi nyura uwankara Godanya tjukarurungku wanantjaku mununa rawangku nyurampa Mamala tjapilpai. ² Panya ngayulu mukuringanyi nyuranku tjungu mukulya nyinanytjaku panya nyanga alatji nyinara nyura kurunpa raparingkuku. Mununa mukuringanyi nyura tjukurpa Christanyatjara kulira pułkara nintiringkula uti kulintjaku. Tjukurpa nyangatja panya Godalu kumpilpa kanyiningi palu kuwari nyanga paluru utinu katja palumpa iyara. ³ Panya Christalu kutjungku tjukurpa kumpilpa ngaranytja uwankara utira nintilpai. Ka nyura Christanya kutju kulirampa ninti mularariku Godaku tjukurpa uwankaraku.

⁴ Ka kutjupa tjutangku tjinguru nyuranya ngunti kuralku wirupalku wangkara, kaña nyurala tjukurpa nyangatja wangkanyi nyura tjukarurungku kulira tjanala kulilwiyangku wantintjaku panya ngunti wangkapai tjutangka. ⁵ Panya ngayulu nyuranya rawangku kulini nyura ngunti kulintjaku-tawara. Ngayulu paṭu nyinanyi nyuralanguru palu nyuranya kulinnyangka ngayuku kurunpa nyurala tjungu nyinanyi. Munu ngayulu nyurampa pułkara pukularinyi panya nyura tjungu ngarala Jesuku Christaku titutjara mulamularingkunyangka.

Christala Titutjara Tjungu Nyinanytjaku

⁶⁻⁷ Uwa, nyura panya tjukurpa wiru kulira Jesuku Christaku mulamularingu nganampa Mayatjaku. Palulanguru tjukurpa pala palulawanu Jesula tjungu nyinama maunyalparingkunytja wiya. Titutjarangkuya Jesuku tjukurpa wanganarangku kulinma wantintyta wiyangku, munuya tjukaruru palulawanu kutju rapa mulapa nyinama tjukurpa ngunti kulintja wiya. Munuya Godaku pulkara pukularira palunya rawangku walkunma panya nyuranya wirura kanyinnnyangka.

⁸ Kulilaya! Tjinguru nyuranya anangu kutjupa tjutangku wituwitulku Godaku iwara wantira tjananya wañantjaku. Palu kuliraya wantima tjananya wañantja wiyangku, panya paluru tjana ninti pulkangku-palku tjukurpa wiru-palku wangkapai. Palu palumpa tjanampa tjukurpa ngunti alatjitu ngaranyi tjukaruru wiya, panya tjana ananguku tjukurpa tjuña kulilpai irititja tjuña, munuya tjukurpa mantatja tjuña kutju kulintjatjanungku wangkapai. Palu tjukurpa nyanga paluru tjana kura Christalan-guru wiya.

⁹ Ka nyura tjananya kulilwiyangku wantima, panya tjana Christianity ngunti-palku kulilpai. Palu Christianity panya Godanya alatjiitu. Mulapa paluru ananguringu nganananya purunypa, palu kurunpa paluru Godanya alatjiitu nyinangi, munu kuwari paluru alatjiitu nyinanyi. ¹⁰ Paluru tjana tjukurpa kutjupa tjuña nyuranya nintintjikitja mukuringanyi, palu tjananya kulintja wiyangku wantima, panya nyura Christala kutjuringkula palumpa iwarangka ananyi munu palulanguru nyura yaaltji-yaaltji iwara kutjupaku mukuringkuku? Wiya nganaña palumpa iwarangka ankula iwara kutjupa tjutaku mukuringkunytja wiyarlungu, panya Christaku iwara wiru mulapa kutjupa tjutangka waintara alatjiitu ngaranyi titutjara. Paluru mayatja pulka mulapa nyinanyi mayatja kutjupa uwankarangka waintarira, mayatja arkayitja ilkaritja tjutangka munu mantatja tjutangka kulu waintarira nyinanyi. Nyara paluru nyurala tjungu nyinanyi. Kaya palulanguru ngunti wangkapai tjuña wañantja wiyangku wantima.

¹¹ Nganmanypa panya nyura watarku nyinara kura kutju palyantjikitja mukuringkupai. Palu kuwari nyura Christala tjunguringkunyangka paluru nyuranya kulintja kampa kutjupanu nyura kuraku mukuringkuwiyangku wantintjaku. Nyangatja Christalu kutjungku nyuranya kampa kutjupanu, panya anangu putu walytja kampa kutjuparira palyaringkupai. ¹² Ka panya nyuranya urungka baptise-katintyta kulinma! Panya urungka unngu tjarpanytja nyara paluru nintini ilunytja, panya Christianity nyurampa anga-ilungu. Munu urunguru ngalya-pakantja nyara paluru nintini wankaringkula pakantja, panya Christianity nyurampa ngalkilpa angailunytjatjanu wankaringkula pakanu. Panya Godalu witulya pulkangku Christianity ilunyangka wankara pakaltjinganu, munu nyuranya kulu ara nyanga palunya kuliira mulamularingkunyangka palu purunypatu wankara pakaltjinganu palumpa walytjaringkula iwara tjukarurungka ankunytjaku.

¹³ Nyura nganmanypa miri purunypa nyinangi Godanya kulintja wiyangku wantira, panya nyura kura rawangku palyalkatingi munu nyura putu wantingi, munu panya nyura Moseku tjukurku ngurpa nyinangi munu nyura walytjangku kutju kulilpai. Uwa nyura miri purunypa nyinangi kura kutju kuliira, palu Godalu nyuranya miri purunypa nyinanyangka nyakula Christalawanungku wankarunu palumpa walytjaringkunytjaku. Godalu panya nganananya kura uwankara palyantjitunguru kalypangku pungkuwiyangku wantingu. ¹⁴ Panya nganampa

kura uwankara nyiringka purunyapa ngaringi nganaña panya palyantja tjuta munu Godala tungunpungkunytja uwankara. Ka kura nyanga palula tjanalanguru Godalu nganañanya wiyanjtaku ngarangi. Palu panya Christanya nganampa ngalkilpa ilungu puñu katakutjarangka. Ka Godalu puñungka ngaranyangka nyakula wangkangu, “Nyangatja ngayuku katja nyurampa ngalkilpa anga-ilunyi nyura ilunytjaku-tawara. Kaña palulanguru nyurampa kura uwankaranguru nyuranya kalypangku wantinyi alatjitu pungkunytjikitjangku kulintja wiyangku.” Alatji paluru wangkara nganampa kura uwankara wiyanu Christanya nganampa ngalkilpa ilunyangka. ¹⁵ Munu paluru Christanya ilunytjitetjanguru mayatja mamu kurunitja tjuta katu ngaranyangka tjarunu uparingkunytjaku. Paluru tjananya witira itarikatingu tjuta mirangka nyakula kulintjaku, “Mulapa Godalu tjananya upa mulapa palyañu Christalawanungku.”

Ngunti Wituwitunyangka Kulilwiyangku Wantinytjaku

¹⁶ Kulilaya! Panya kutjupa tjutangku nyuranya kuranmankupai kutjupa kutjupa tjuta ngalkula tjikinnyangka. Panya tjana nyanga alatji kulilpai, “Uila mai, kuka ini nyanganpa ngalkuwiyangku wantima munula tjuratja ini nyanganpa kuļu tjikilwiyangku wantima.” Palu alatjiya ngunti kulilpai munuya ngalkula tjikinnyangka nyakula nyuranya ngunti anangura wangkanyi. Palu nyura tjananya kuliřa wantima.

Munu panya nyuranya inmanguru kuļu anangura wangkapai. Ka nyura tjananya kuliřa wantima panya tjana alatji kulilpai ngunti, “Uila inma irititja tjuta kuļu palyalkatima panya Godalu Mosela wangkanytjitetjangka inma palyantjaku ngarapai kuļi kutjupa kuļi kutjupa munu nyinnga kutjupa nyinnga kutjupa, kala uti wantintjatja wiyangku palyanmatu. Munula uti inma panyatja kuļu piřa ma-ngarinyangka palyanma, munula panya Saturday titutjarangku inma kanyinma.” Palu nyanga alatjiya ngunti kulilpai munuya inma palunya tjananya wantinyangka nyakula nyuranya anangura wangkapai. Palu nyura tjananya kuliřa wantima panya tjanaya nyuranya ngunti kuranmananyi nintingku-palku. ¹⁷ Panya tjana ara nyanga irititja tjuta ngunti pulkantjikitjangku wangkara wituwitulpai tjananya wañantjaku. Palu ara nyanga paluru tjana anangu wiltja purunyapa. Panya nganaña anangu wiltja wirkankunyangka nyakula kulilpai, “Munta, anangu pitjanyi.” Munula anangu panya paluru wirkankunyangka palula wangkapai wiltjangka wiya. Pala palu purunypala ara irititja tjuta nyakula kulilpai Christanya pitjanytjaku. Palu panya Christanya pitjangu alatjitu, kala uti ara irititja tjuta wantira palunya kutju waintara kulinma.

¹⁸ Uwa, ngunti wituwitulpai tjutangkaya kulilwiyangku wantima! Panya paluru tjanaya kañany-kañanytju alatji ngunti wangkapai, “Nganañanya purunytjuya Godanya walkunma kurunpa tjaruringkula, munuya angelpa tjuta kuļu walkunma!” Palu alatjiya ngunti wituwitulpai, munuya kuliřa wantinyangka nyuranya anangura wangkapai. Ka uti nyura tjananya kulilwiyangku wantima, panya tjana tjukurmara nyakunytjatjanungku tjukarurungku-palku wangkapai. Tjana kañany-kañanytju wangkapai nintingku-palku, palu tjana walytjangku kuliřa wangkapai Godalanguru wiya.

¹⁹ Uwa, nyanga tjananyaya kuliřa wantima, panya tjana Christala mayatja pulkangka tjungu ngaranytja wiyaringu. Panya Godalu Christanya tjunu palumpa walytjapitiku mayatja pulka nyinanytjaku, ka

paluru nganañanya uwankara tjungura kanyini kutjuₖ wanka nyinanatyjaku. Alatji Godalu palyaₖ nganaña Christala tjungu ngarala kuₖpu pulkaringkunytjaku. Panya pulyku munu tarka tjungu ngarapai nganana paltjura kuₖpu ngaranytjaku, pala palu puruny whole Godalulanya Christalawanungku kanyini kuₖpu.

²⁰⁻²¹ Christanya panya nyurampa kuranguru ngalkilpa anga-ilungu munu nyuranya kampa kutjupanu palunya kutju kulintjaku ara manatja tjuₖ wantira. Palu nyaaku nyura tjukurpa nyanga mantatja tjuₖ rawangku kulipai? Munu nyura nyaaku kutjupangku nyuranya painnyangka mai kutjupatjara ngalkuwiyangku wantipai, munu kutjupa kutjupa tjuₖ pampulwiyangku wantipai? ²² Panya ara nyanganpa anangungku kulintja uwankara, kaya mulamularingkuwiyangku wantima. Panya ara nyanga paluru tjana unytju ngaranytjatjanu wiyaringkuku. ²³ Kaya anangu kutjupa tjuₖtangku ara nyanga palunya tjananya kulira angelpa tjuₖ pupakatira walkulpai, munuya kuₖtanytjupalku nyinapai, munuyanku walytjangku puntu pikantankupai. Palu wiya, ara nyanga palunya tjananya palyaraya puₖ kampa kutjuparira palyaringkupai. Palu anangu Christaku mulamularingkula kutju palyaringkupai.

3

Godalu Kulintjitja Tjuta Titutjarangku Kulintjaku

¹ Godalu panya Christanya ilunyangka wankara pakaltjinganu munu pala palulanguru nyuranya kuₖ kurunpa wankara Christala tjungunu. Kaya palulanguru Godaku ara tjuₖ rawangku kulinma. Panya ngura nyara ilkaritjangka Christanya mayatja pulka nyinanyi Mama Godala tjungu.

² Kaya Godalu kulintjitja tjuₖ titutjarangku kulinma watarkuriwiyangku, munuya mantatja kurakura tjuₖ kulintja wiyangku wantima. ³ Panya nganmanypa nyura kura nyinangi watarku alatjitu Godanya kulintja wiya, munu panya nyura palulanguru Godanya kulinu munu kura uwankara wantingu, panya anangu wiyaringkupai ka nganaña palumpa watarkuripai, nyara palu puruny whole nyura Godaku walytjaringkula kuraku watarkuringu. Munu nyura kuvari kampa kutjuparira Jesula Christala tjungu wanka nyinanyi Godala mirangka. Palu nyangatjaya watarkitja tjuₖtangku puₖ kulini. ⁴ Uwa nyura Christaku mulamularingkula palula tjungu wanka nyinanyi. Ka paluru ngula malaku pitjala anangu tjuₖtangka mirangka ngaraku, ka nyura kuₖ palula tjunguringkula ngaraku palya mulapa pitalytji pulkangka.

Godalulanya Kulintja Wirulpai Palyanyku Kulira Nyinanytjaku

⁵ Palu nyura kura kulilwiyangku wantima. Munu anangu kuritjaraku nyakula mukuringkuwiyangku wantima, munu kuri walytjaku kutju mukuringama. Ka nyitayirangku uti kungkawara kutjupangka kutjupangka ngariwiyangku wantima munu kuri walytjaku kutju patara nyinama. Uwa kura kutjupa kutjupa tjuₖ nyanga palu puruny whole uwankaraku mukuringkuwiyangku wantima munu palyaku kutju mukuringama. Munuya manyuringkunytja wiyangku wantima, panya anangu kutjupa kutjupa uititjaku manyuringkula Godalanguru paturingganyi munu uititja tjuₖ kutju titutjarangku wañarinanyi.

⁶ Uwa kura nyanga palu purunypa tjutaya kulilwiyangku wantima panya aŋangungku kura nyanga purunypa tjuta palyara Godala tungunpunganyi, ka Godanya palumpa mirpaŋaripai. ⁷ Nyura kuļu panya ngañmanytu Godala tungunpungkula kura nyanga palunya tjananya palyaningi. ⁸ Palu kuwari nyura kura nyanga uwankara wantintytjaku ngaranyi. Mapalku waruringkula mirpañariwiyangku wantima, munu aŋangu kutjupa ngukara wangkawiyangku wantima, munu aŋangu kutjupa uulira ngunti wangkawiyangku wantima, ngalytjurmarä wangkawiyangku wantima, munu warkiwiyangku wiru kutju wangkama, ⁹⁻¹⁰ munu ngunti-ngunti wangkawiyangku wantima tjukarurungku kutjuya wangkama.

Uwa, alatjingantja wiyangkuya wantima alatjitu, panya nyura kuwari kulintja kampa kutjuparingu munu kuraku mukuringkunytja wiayingu. Ngañmanytu panya nyura kura nyinara kura kutju palyalpai nyinangi. Palu kuwari nyanga nyura kampa kutjuparingu munu nyura palyanyku kulilpairingu, munu panya nyura kura tjuta palyantja wiayingu. Godalu nyuranya kulintja wiruňu nyura palyanyku kulira nyinanytjaku, munu paluru rawangkuňu nyuranya wirulkatinyi nyura wiru mulararira palunya purunyarinytjaku. Ka nyura palumpa ninti mularariku. ¹¹ Nyara palulanguru nyura kulintja wiruringkula Godaku walytja uwankarangka tjunguringkula kutjutu nyinanyi maunṭalpa maunṭalpa wiya. Panya Godaku walytja kutjupa tjuta aŋangu Jew tjuta, ka kutjupatjara Jew wiya tjuta, palu tjana uwankara kutjuringu. Ka kutjupa tjuta wati, ka kutjupa tjuta tjiči, palu kutjuňuya. Ka kutjupa tjuta ngura kutjupitja, ka kutjupa tjuta putitja waliku ngurpa, kutjupa tjuta mayatjangka warkaripai, kutjupa tjuta walytja mukuringkula warkaripai, palu nyanga paluru tjana uwankara kutjutu nyinanyi Godaku walytjapiti. Panya Christanya Godaku walytja uwankarangka kutjungka kutjungka tjunguringkula nyinanyi, kala palulanguru kutjutu nyinanyi munula palunya kutju kulini uwankarangka waintarinytja.

¹² Nyuranya panya Godalu ngurkantanu palumpa walytjaringkunytjaku. Munu paluru nyurampa pulkara mukuringanyi. Palulanguru nyura uti mukulya pulka Christaku walytja mulapa nyinama. Tjinguřu nyuralanguru kutjupa ngalṭutjara nyinanyangkampa nyura nyakula ngaltunytjungku atunymara kanyinma wantintytja wiyangku. Munuyanku mukulya pukultju nyinama kurunpa tjaruringkula kañany-kañanypa nyinanytja wiya. Palu purkarangkuya wangkama mirpaŋarinytja wiyangku, munuyanku ngapartji-ngapartjingku alpamilanma. ¹³ Ka kutjupangku nyuranya kurannyangkampa uti nyura mapalku mirpañariwiyangku palunya kalypangku kulira wantima, panya nyura kura palyannyangka Mayatja Jesulu nyuranya kalypangku wantingu, ka palu purunypa uti nyuranku mukulya ngarala kalypangku kulira wantima. ¹⁴ Uwa nyuranku uwankarangku nyangama kurunpa winki mukulya ngarala, panya mukulya wiya ngarala putu nyura pukulpa nyinaku. Palu nyuranku mukulya winki ngaralampa kurunpa kutjutu nyura tjungu nyinaku.

¹⁵ Christalu panya nyuranya palyarungunu nyuranku kalypa kutjutu nyinanytjaku. Palulanguruya kalypa tiṭutjara nyinama piřuku kuraringkunytja wiya. Godalu panya nyuranya mukuringkula walytjanmanu munu paluru mukuringanyi nyura tjungu nyinara pukulpa nyinanytjaku kutjutu ngalytjurmankunytja wiya. ¹⁶ Munuya tjukurpa Jesuna Christanyatjara rawangku kulinma kurunpa winkingku. Munuyanku tjukurpa palunya nintingu kulintjatjanungku ngapartji-ngapartjingku wangkara nintinma,

munuyanku tjukarurungku kutju kulintjaku wangkara markunma. Munuya Godaku pulkara pukularira kurunpa winkingku inma tjuṭa rawangku inkama irititja tjuṭa munu kuwaritja tjuṭa, munu psalm tjuṭa kulu.

¹⁷ Palu kulilaya! Nyura panya kuwari Mayatja Jesuku walytja tjuṭa nyinanyi. Palulanguruya paluru nintinnyangka kutju kulira palyanma walytjangku kulira palyantja wiyangku. Munuya tjukarurungku kutju wangkama. Munuya Mama Godaku pukularira palunya rawangku walkunma Jesula Christalawanungku.

Titutjara Kalypa Palyanyku Nyinanytjaku

¹⁸ Minyma tjuṭa, kungkawara tjuṭa wanyuya kulinma tjukurpa nyangatja! Utu nyura wati kuringka wangaṇarangku kulinma nyura Jesuku walytja nyinara.

¹⁹ Kaya wati tjuṭangku ngapartji kulila! Utu nyura minyma kuriku pulkara mukuringama munu palunya wiruṛa atunymara kanyinma ku-raringkula wangkanytja wiyangku.

²⁰ Kaya tjitji tjuṭangku ngapartji kulila! Utu nyura Jesuku walytja nyinara mamangka ngunytjungka titutjarangku wangaṇarangku kulinma wantintja wiyangku. Panya nyura mamangka ngunytjungka wangaṇarangku kulinnyangka Godanya nyurampa pulkara pukularinyi.

²¹ Kaya mamangku ngunytjungku ngapartji kulila! Utiya nyurampa tjitji tjuṭa palyanyku kanyinma pauntjingara wangkanytja wiyangku. Tjinguру tjitji nyurampa pulkara nguluringkula tjituru-tjitururiku rawangku painnyangka munu kuraringkuku.

²² Kaya war̄karipai tjuṭangku ngapartji kulila! Utu nyura mayatja mantatja tjuṭangka wangaṇarangku kulinma titutjarangku. Tjinguru mayatjangku nyuranya wangkanyangkaya tjukarurungku palyanma paluru nyakula pukularinytjaku. Munu tjinguru paluru war̄kaku wangkara wantikatinyangka nyura uti palu purunytjuṭu war̄ka rawangku palyalkatima ankunyangka wantintja wiyangku. Panya nyura Mayatja Jesuku walytja nyinanyi. Palulanguru nyura uti Jesula wangaṇarangku kulira mayatja mantatja tjuṭaku wiruṛa tjukaruru war̄karima.

²³ Uwa, war̄ka kutjupa kutjupa uwankara wiruṛa palyanma krunpa winkingku. Palya nyura anangungka kulira war̄karima, palu war̄ka palyara waintara kulinma Mayatja Jesunya munu paluru nyakula pukularinytjaku anangu mayatjaku wiruṛa palyanma, panya Jesunya nyurampa mayatja pulka nyinanyi, anangungka waintara.

²⁴ Panyatjaya kulinma, panya Mayatja Jesulu nyuranya kalkunu ngura nyara ilkaritjangka tjukarurungku ungkunytjikitjangku nyura mantangka nyanga palyanyku war̄karinytjitetjangka. Panya nyura Mayatja Christaku war̄karinyi munu nyura mulapa mantjilku kalkuntja panyatja. Palunyakit-jaya kurunpa winki wangaṇara war̄karima mayatja panya mantatjangka.

²⁵ Palu anangungku rawangku kura palyalkatinyangka Godalu nyakula ngurkantankuku munu palunya tjituru-tjituru palyalku. Panya Godalu nintingku tjukarurungku kutju ngurkantankupai ngunti-ngunti palyan-mankupai wiya.

4

¹ Kaya mayatja tjuṭangku ngapartji kulila! Nyura uti nyurampa war̄karipai tjuṭa palyanyku kanyinma kuralwiyangku, panya nyura ngapartji nyurampa Mayatja Ilkaritjanya kulintjaku ngaranyi.

Godala Tītutjarangku Tjapintjaku

² Kaṇa kuwari nyurala uwankarangkalta nyangatja pīruku wangkanyi. Uti nyura Godala tjapinma tītutjarangku pakuringkuwiyangku. Tjanyałtuya tjapinma, munuya Godaku pukularira wangkama palula, "Wirungkuñin kanyini!" ³⁻⁴ Munuya ngayuku kuļu Godala tjapinma, panya ngayulu mukuringanyi aŋangu tjutangka tjukurpa kumpilitja Jesunya Christanyatjara utīra wangkanytjikitja. Nyanga palulanguruñiya tjailangka tjarpatjunu, tjukurpa Jesunyatjara wangkanyangka. Palu nyura aŋangu tjuṭaku kuļu tjapinma tjana kuļu wanganararingkula kulintjaku tjukurpa nyanga Christanyatjara. Munuya ngayuku kuļu Godala tjapinma ngayulu tjukarurungku Godaku tjukurpa utīra wangkanytjaku tjanala, panya Godaluni tjunu nyanga palumpa, kana putu wantir'iyanı tjukurpa nyanga palunya.

Wiruraya Nyinama Nyuranya Anantjaku-tawara

⁵ Palu Jesuku walytja wiya tjutangkaya tjunguringkula palyanyku nyinama tjana nyuranya anantjaku-tawara. Munuya kutjupa kutjupa wiru tjanampa palyantjikitjangku kulirampa mapalkungku tjananya ungama ngulaku paṭantja wiyangku, tjana nyuranya Jesuku walytja kulira ngurkantankunytjaku. ⁶ Munuya tjanala wirura palyanyku wangkama. Panya alatji nyura tjanala wangkanyangkaya tjinguru nyurala tjapilku pīruku wangkara utintjaku, ka palulanguru nyura uti kulinma paluru tjapinnyangka tjukarurungku wangkanytjikitjangku tjana kulira nintir-ingkunytjaku.

Uwa alatjituña nyurala wangkanyi nyura kulintjaku.

Paulalu Malpa Tjuṭaku Tjukurpa Iyantja

⁷ Palu wati nyanga ini Titjikatjalu lita nyangatja nyuralakutu ma-katinyi ngura Kalatjilakutu, munu paluru nyurala tjakultjunkuku ngananañanya, munu nganampa warķa uwankara nganana palyantja tjuṭa kuļu. Wati nyanga Titjikatjanya nganampa malpa wiru mulapa, kala palumpa pulkara mukuringanyi. Paluru ngayunya rawangku alpamilalpai wantintyta wiyangku, panya paluru ngali tjungu warķaripai Mayatja Jesuku. ⁸ Kaṇa wati nyanga palunya ma-iyanı nyuralakutu, ka paluru nyurala wirkara tjakultjunkuku nganana palya nyinanyta, munu paluru nyuranya wangkara kuṇpulku. ⁹ Ka wati kutjupa kuļu nyurampa nguranguru panya pitjanyta palula tjungu ma-pitjanyi wati panya Anitjimanya. Nyanga paluru kuļu nganampa malpa wiru, kala palumpa pulkara mukuringanyi. Ka paluru pula ma-wirkara nyurala tjakultjunkuku tjukurpa uwankara ngura nyangatjatjara.

¹⁰ Ka wati ini Ari-tjakatjanya ngayula tjungu nyinanyi tjailangka, munu paluru kuļu nyuranya kulini nyurampa pukularira. Ka palu purunyту nyuranya kulini wati ini Markalu Paanapatjaku małanytju. Wati nyanga palunya panya naŋmanytu nyurala tjakultjunu panya paluru nyurala ma-wirkankunyangka nyakulaya pukultu mantjinma. ¹¹ Ka wati panya ini Tjatjuwalu kuļu nyuranya kulini. Wati nyanga paluru panya ini kutjupa Tjatjanya. Palu wati nyanga paluru tjana, Ari-tjakatjanya, Markanya, Tjatjuwanya tjana panya Jew mankurpa ngayula tjungu Godaku warķaripai, Jew kutjupa tjuṭa wiya. Nyanga paluru tjana panya ngayula tjungu pulkara warķaripai aŋangu tjutangka tjana Jesuku mulamularingkula palunya mayatjanmankunytjaku. Munuya paluru tjana ngayulu tjituru-tjitururinyangka pukulmankupai ngayunya.

¹² Ka wati panya nyurampa nguranguru pitjangu ini Paparatjanya, paluru kulu nyuranya kulini. Paluru panya pulkara Jesuku Christaku war^karipai munu nyurampa rawangku Godala tjapini nyuranya pulkara kulira. Paluru tjapilpai nyura Godaku tjukurpa rawangku kulintjaku wantintyta wiyangku, panya paluru mukuringanyi nyura Godalu wituntjtja uwankara kulira mulamularingkunytjaku munu wanganarangku kulira palyantjaku. ¹³ Ngayulu ninti wati nyanga palumpa panya nyanga paluru nyuranya pulkara anga-kulira rawangku Godala tjapilpai munu palu purunytju tjapilpai Godaku waltytja tjutaku ngura pala ini Layatiyala pulala Ara-palitjala nyinanyta tjutaku kulu.

¹⁴ Ka wati wiru kutjupa Luke-anja nganampa panya ngangkari, paluru kulu nyuranya kulini nyurampa pukularira. Ka palu purunytju wati ini Timatjalu nyuranya kulini.

¹⁵ Kaya ma-tjakultjura Jesuku waltytja tjutangka ngura nyara Layatiyala nyinanyta tjutangka panya ngayulu palunya tjananya rawangku kulini. Munu palu purunytju ma-tjakultjura minyma ini Nimpala tjanala kulu panya nyara palumpa walingkaya inmaku tjunguringkupai. ¹⁶ Nyura lita nyangatja tjunguringkula nyakula kulintjatanungku wati-iyala Jesuku waltytja kutjupa tjutakutu ngura nyara Layatiyalakutu paluru tjana ngapartji tjunguringkula nyakula kulintjaku. Kaya lita panya ngayulu nganmanytu tjanampa iyantjanya tjana ngapartji nyuralakutu wati-iyalku. Kaya lita nyara palunya mantjirampa tjunguringkula nyakula wangkara kulinma!

¹⁷ Palu wanyu wangka wati panya ini Atjiputjanya rawa war^karira uwankara wiyanjtaku ngalalpalu wantintyta wiyangku, panya Mayatja Jesulu palunya ngurkantanu palumpa war^karinytjaku.

¹⁸ Uwa, alatjituna wangkanyi nyurala lita nyangangka. Wati kutjupangku ngayulu tjakultjunkunyangka lita nyangatja walkatjunu nyurampa, palu kuwari nyangana marangku ngayulu alatjiulta walkatjuni nyangatja alatji, "**Ngayulu ini Paulanya mununa nyuranya rawangku kulipai.**" Ka walka nyanga palulanguru nyura kulikku, "Mulapa nyangatja Paulalanguru."

Palu ngayunyan*nya* kulinma nyanga tjailangka nyinanyangka munutjuya ngayuku Godala tjapinma.

Uwa, alatjituna walkatjunu. Ka Godalu nyuranya rawangku pukultjungku kanyinma.

Lita Nampa 1 Paulalu Walkatjura Iyantja Ngura Tjitja-lanikalakutu 1 Thessalonians **Nyangatja Ngañmanytju Nyakula Wangkanytjaku**

Nyangatja Godaku tjukurpa Paulalu walkatjunkunytja Jesuku walytja tjutaku ngura nyara Tjitja-lanikala nyinanytja tjutaku. Ka panya nyiri kutjupa ngaranyi ini *Jesulu Iyantja Tjutangku Palyantja* wati panya Luke-alu walkatjunkunytja, ka panya nyiri pala palula Luke-alu tjakultjunu chapter 17-ta Paulanya Timitjinya Tjaalatjanya tjana ankula nyinanytja ngura nyara Tjitja-lanikala. Panya paluru tjana tjintu 21 nyinangi ngura nyara palula munuya Tjukurpa Jesunyatjara tjakultjunangi anangu nyara palula nyinanytja tjutangka. Kaya Jew tjuṭa mulamularingu munu Jew wiya tjuṭa kułukułu. Palu Jew kutjupa tjutangku mulamularingu kuwiyangku wantingi munuya mulamularingkupai tjuṭa kurara pungangi munuya Paulanya painu tjanampa ngura wantikatinjtjaku.

Ka ngula Paulalu Timitjinya małakungku witura iyanu ngura nyara Tjitja-lanikalakutu ankula anangu panya Jesuku walytja tjuṭa nyakunytjaku munu palunya tjananya wangkara kuṇpuntjaku. (Nyawa 3:5.) Ka Timitjilu ngura nyara palula wirkara tjananya nyakula pulkara pukularingu panya paluru tjana watarkurinytja wiyangku rawangku Jesunya wañannyangka.

Palu kutjupa tjutangkuya kulinu Jesunya ilkařinguru małaku mapalku pitjanytja-palku munuya palulanguru warka wantira paṭara nyinangi Jesuku. Ka lita nyangangka Paulalu tjananya wangkara painingi pakara warkarinjtjaku.

Kaya kutjupa tjuṭa pulkara tjituru-tjitururingi panya tjanampa walytja tjutaya nganmanypa ilungu Jesunya pitjanytja kuwaripangka. Ka Paulalu lita nyangangka walkatjura tjananya wangkara tjukaruruningi ngunti kulilwiyangku tjukarurungku kulintjaku Jesunya małaku pitjanytja.

Tjukurpa nyanganpa ngarinyi:

- 1:1 Paulalu ngañmanytju wangkanytja
- 1:2—3:13 Paulanya tjanampa pukularinytja
- 4:1-12 Paulalu tjananya wituwituntja Godalawanu tjukaruru palyanyku nyinanytjaku
- 4:13—5:11 Paulalu Jesunya małaku pitjanytja tjakultjunkunytja
- 5:12-28 Paulalu tjukurpa małatja wangkanytja

Paulalu Ngañmanytju Wangkanytja

¹ Uwa, Jesuku walytja tjuṭa, ngayuluña Paulalu lita nyangatja nyurampa walkatjunanyi ngura pala Tjitja-lanikala nyinanytja tjutaku. Panya nyura Mama Godaku walytja mulapa nyinanyi Mayatja Jesuku Christaku kułu. Kala nyangatja Tjaalatjalu Timitjilu nganaña mañkurtu lita nyangatja nyuralakutu ma-iyanı nyurampa pukularira.

Ka Mama Godalu nyuranya pukultju pułkangku kanyinma munu nyuranya kurunpa rapara pukulmanama.

Wiruraya Palyanyku Nyinama

²⁻³ Uwa, nganaña nyuranya kulira pulkara pukularipai. Panya nyura Jesuku pulkara mulamularingkupai munu nyara palulanguru nyura Godaku wirura warkaripai. Munu panya nyura mukulya pulka nyinapai munu nyara palulanguru nyura wiru tjuta palyalpai anangu tjutaku. Munu nyura ala-alá patara nyinapai Mayatja Jesulu Christalu nyuranya malakungku pitjala mantjintjaku. Nyara palulanguru nyura ala-alá patara raparingkula Godaku iwarangka tungun-tungunpa ananyi wantintytja wiya alatji. Ka nyura nyanga alatji wirura nyinanyangka nganaña pulkara pukularipai munula Godala tjapira alatji wangkapai, "Ngura nyara Tjitja-lanikala nyuntumpa walytja tjuta wirura nyinanyi."

⁴ Uwa walytja tjuta, nganaña nintingku kulini panya Godalu nyuranya pulkara mukuringkula ngurkantanu nyura palumpa walytja nyinanytjaku. Nyara palulanguru kulula Godanya wal'kulpai paluru nyuranya ngurkantankunytjitetjanguru. ⁵ Palu nyura wanyu Jesuku mulamularingu ngayulu Tjukurpa Palya tjakultjunkunyangka kuli. Wiya, ngayulu tjakultjunkunyangka Godalu witulya pulkangku nyurala unngu nintiningi. Nyara palulanguru nyura Jesuku mulamularingu Kurunpa Mil'miltu nyuranya unngu nintinnyangka. Panya nyura nyangangi nganaña Godaku raparingkula Tjukurpa Palya mulamulangku wangkanyangka, munu panya nyura nyakula kuliningi alatji, "Awari, mulapa nyangantu Godaku mulamularingkula tjukurpa pulka rapangku wangkanyi." Alatji nyura kuliningi.

Ka panya mungañu nganaña nyurala tjungu nyinangi munu panyala nyurampa wiru mulapa palyaningi. Ka nyura nyara palulanguru nintiringkula kuliningi, "Ai, nyanga tjanaya tjukurpa mulapa wangkanyi, panya tjana tjukurpa palunyatjara alatji nyinanyi munuya wiru tjuta kutju palyani." Alatji nyura nyakula kuliningi. ⁶ Munu nyura nyara palulanguru nganañanya purunypa arkara nyinangi panya Mayatja Jesunya purunyarira wirura nyinanytjikitja. Kala nyara palulanguru kulu kulini panya mulapa Godalu nyuranya ngurkantanu palumpa walytjaringkula nyinanytjaku. Ka panya anangu watarkitja tjutangku nyuranya kuraningi nyura Tjukurpa Palya kuli. Jesuku mulamularingkunyangka. Palu nyura panya tjananya kulira wantingi munu Godaku tjukurpa kutju kulira pulkara pukularingi, Kurunpa Mil'miltu nyuranya pukulmankunyangka.

⁷ Uwa, nyuranya panyaya anara kuraningi, ka panya nyura palula tjanala kulintja wiyangku wantira Godalawanu kutju nyinangi. Ka panya anangu Jesuku walytja kutjupa tjutangku ngura kutjupa tjutanguru nyuranya nyangangi munu kuliningi Godalawanu wirura nyinanyangka, munuya palulanguru tjana kulu nyuranya purunypa Godalawanu wirura nyinanytjikitja mukuringanyi. Anangu paluru tjana panya manta nyara ini Matja-tuniyala nyinanyi, munu kutjupa tjuta nyurala ulparira nyinanyi manta panya ini Akayala. ⁸ Panya ngura winkitjangkuya anangu tjutangku nyuranya kulinu Godaku pulkara mulamularingkunytja, munuya nyara palulanguru nintiringu Mayatja tjukurku.

Uwa, mulapa nyuralanguru Mayatjaku tjukurpa lipiringu munu ngura winkikutu anu Matja-tuniyala pulala Akayala kutju wiya palu ngura uwankarakutu. Ka nyara palulanguru manta winkitjangku nyuranya nganmanytju kulinu nganaña tjanala tjakultjunkunytja kuwaripangka. ⁹ Panya nganaña ngura kutjupangka wirkankunyangka anangu nyara palunya ngurara tjutangku tjukurpa nyuranyatjara patara nganañala tjakultjunangi munuya alatji wangkangi, "Nyara Tjitja-lanikala nyinanytja tjuta kunyu nyurampa pulkara pukularingi nyura Godaku tjukurpa

tjanala wangkanyangka. Munuya kunyu god pulinguru puñunguru palyantja tjuta wantira God wankaku mulamularingu palula kutjungka wanganarangku kulira warkarintjikitja.” Alatjiya ngura kutjupangka kutjupangka nganañala tjukurpa nyuranyatjara pukultu tjakultjunkupai.

¹⁰ Munuya alatji kuļu wangkangi, “Nyara paluru tjanaya kunyu ala-alangku pañani Godaku katja malaku pitjanytjaku ngura ilkariringuru.” Alatjiya ngayula tjakultjunangi. Ka panya mulapa Jesunya ilunyangka Godalu wankara pakaltjingañu. Ka paluru tjintu malatjangka nganañanya pitjala wankarunkuku, panya tjintu nyara palula Godalu añañu palunya wantipai tjuta tjarara ngura kurangka waniku. Uwa, nyuranyaya ngura winitjangku kulinu nyura Mayatja Jesuku pulkara mulamularingkunyangka.

2

Paulanya Tjitja-lanikala Nganmanypa Nyinara Warkarintjja

¹ Palu waltytja tjuta, panya nganaña mungañu nyurala wirkara tjukurpa wangkanyangka nyura kulira Jesuku mulamularingu, kala palulanguru pulkara pukularingu. ² Palu panya nganaña ngañmanypa ngura nyara Pilipaila nyinanyangka añañu tjutangku nganañanya anara warkira painingi munulanya pungangi. Palu Godalulanya kurunpa rapanu Tjitjalankalakutu ma-pitjala palumpa Tjukurpa Palya Jesunyatjara nyurala tjakultjunkunytjaku. Ka panyaya nyurampa pala ngurangka tjara kutjupa palu purunypañu nyinangi munulanyaya mirpañarira pulkara painingi. Palu tjana wangkanyangka nganaña kulilwiyangku tungun-tunguntu alatjitu nyurala wangkangi Tjukurpa Palya Jesunyatjara.

³ Uwa, nganaña panya tjukurpa palunya nyurala tjakultjunangi nyura kulira mulamularingkula Jesunya wañantjaku. Panya nganaña nyurampa mukuringkula tjukurpa tjukaruru wangkangi ngunti wangkanytja wiyangku. Munula nyuranya ngunti kurantjikitjangku kulintja wiyangku tjukurpa mulapa kutju wangkangi nyuranya pukulmankunytjikitjangku.

⁴ Palu kutjupa tjutangku nganañanya anara wangkapai, “Nyara tjana nyuranya ngunti kuranji, kaya tjananya kulintja wiyangku wantima.” Alatjiya nganañanya wangkapai. Palu tjana ngunti alatji wangkanyi nintingku-palku. Panya Godanya ninti nganaña unngu kulintjijtjaku, munulanya paluru alatjitu nintingku witura iyanu Tjukurpa Palya Jesunyatjara para-tjakultjunkunytjaku. Kala tjukurpa nyanga palunya añañu tjutangku wangkapai Godalu nyakula pukularintjaku, añañu tjutangku nganañanya nyakula mirawañinytjaku wiya.

⁵ Palu añañu kutjupa tjutangku tjinguru nyurala tjukurpa wangkapai nyuranya ngunti pukulmankunytjikitjangku nyura tjanampa mukuringkunytjaku. Palu nyura ninti nganampa panya nganaña tjananya purunypa wiya, munula nyurala Godaku tjukurpa kutju tjukarurungku wangkapai. Palu tjinguruya kutjupa tjutangku nganañanya nyanga alatji kulini, “Tjinguruya manikitjangku nyangantu tjukurpa wangkanyi nganaña kulira pukularira tjananya mani pulka ungkunytjaku.” Palu wiya alatjitu. Godanya ninti nganampa panya nganaña nyurala tjukarurungku tjakultjunangi manikitjangku wiya. ⁶ Panya Jesulu iyannyangka nganaña nyurampa ngurangka Godaku warkaringi nyura kulira Godanya kutju mirawañinytjaku nganañanya wiya. Munula palu purunypañu ngura kutjupa uwankarangka Godaku warkaripai añañu tjutangku Godanya kutju mirawañinytjaku.

⁷⁻⁸ Nganañanya panya Jesulu Christalu ngurkantara witura iyanu tjukurpa palumpa para-tjakultjunkunytjaku. Kala palulanguru Jesulu nganañanya witura iyannyangka nganaña uti nyurala ngatjinma ungkunytjaku. Palu wiya, nganaña panya nyurala ngatjintja wiyangku wantingi munula nyurala pukulpa nyinangi, panya ngunytjungku tjitji mukulyangku atunymara kanyilpai, palu purunypa nganaña nyurampa pulkara mukuringangi kurunpa winki. Munula palulanguru nyurala pukultu wangkangi Godaku Tjukurpa Palya. Munu panyala nyurala tjungu nyinara nyuranya mukulyangku alpamilaningi tjukurpa kutju wangkanytja wiyangku. Panya nganañanku walytjangku pukulmankunytjikitjangku kulintja wiyangku nganaña nyuranya kutju pukulmankunytjikitjangku kuliningi nyurampa pulkara mukuringkula.

⁹ Uwa walytja tjuta, nyura panya ninti nganaña panya nyurala nyinara Godaku tjukurta kutju war̄karinytja wiya, palu panya kutjupa-arala war̄ka kutjupa manikitjangku palyaningi kalala mungangka kuļu. Munula war̄ka pala palulanguru mani mantjira mai walytjangku payamilařa ngalkuningi nyurala ngatjintja wiyangku.

¹⁰ Ka panya nyura ninti panya nganaña nyurala nyinaralpi tjukaruru nyinangi palya mulapa, munula kura palyantja wiya nyinangi, ka anangu kutjupangku nganañanya nyakula wirunmanangi kuranmankunytja wiyangku. Panya Godalu nganañanya nintingku nyangangi nyurala wirura nyinanyangka. ¹¹⁻¹² Panya nyura ninti nganaña panya nyuranya mama purunytju wangkara kurunpa rapaningi, panya mamangku tjitjingka wirura wangkapai munu tjukarurulpai, palu purunytjula kurunpa pulkara mukuringkula nyuranya wangkara tjukaruruningi wirura palyanyku nyinanytjaku Godanya nyakula nyurampa pukularinytjaku. Panya paluru nyuranya ngurkantanu palumpa walytjaringkula tjukaruru nyinanytjaku, munu paluru Mayatja wirungku nyuranya tičutjarangku kanyilkku witulya pulkangku.

¹³ Uwa, nganaña nyurampa pulkara pukularira Godanya rawangku walkulpai, panya mungatu nganaña Godaku tjukurpa nyurala tjakultjunkunyangka nyura kulira pulkara mulamularingu munu nyura alatji kulinu, "Nyanga paluru tjana mulapa Godaku tjukurpa wangkanyi, walytjangku kulira wangkanytja wiyangku." Nyara palulanguru Godanya walkulpai nyura tjukarurungku kulinnyangka. Ka panya nyura mulamularingkunyangka Godalu kuwari nyurala unngu tjukurpa panya palunya utini nyura kulira palulawanu tjukaruru wirura nyinanytjaku.

¹⁴ Ka panya kuwari nyurampa ngurangka anangu kutjupa tjutangku nyuranya anañi munu punganyi nyura Godaku tjukurpa mulamulangku kulinnyangka. Palu kulilaya, nyanga palu purunypa ngaranyi ngura nyara Isrelta, panya nyara palulaya anangu Jew kutjupa tjutangku Jesuku walytja tjutaku kuraringkula tjananya analpai munuya pungkupai nyuranya purunypa. ¹⁵ Panya Jew nyara paluru tjanaya nganmanytju Mayatja Jesunya-warara pungkula iluntanu munu panyaya iriti Godaku wangkatjara tjuta kuļu pungkula iluntara wiyanu. Munuya kuwari nganampa ngapartji kuraringanyi munulanya paini ngura tjutanguru. Palu alatji palyannyangka Godanya tjanampa pukularinytja wiya alatjitu paluru tjana anangu uwankaraku kuraringkunyangka.

¹⁶ Munuya nganaña anangu malikitja tjutangka tjukurpa wangkanyangka nganañanya paini wangkawiyangku wantintjaku, tjana kulira mulamularingkula wankaringkunytjaku-tawara. Utiya mukuringama Godalu anangu uwankara wankarunkunytjaku, palu tjana

nganananya pairampa anangu ngura winkitja angatjunanyi Tjukurpa Palya kuli^{ra} mulamularingkunytjaku-tawara munuya palulanguru tjanampa pulkara kuraringanyi nganampa kutju wiya. Ka nyara palulanguru paluru tjana kura nyanga palu puruny whole rawangku palyannyangka Godanya tjanampa ngalturingkunytja wiyaringu. Munu paluru kuwari tjanampa pulkara mirpañarira tjanampa ngapartji tjiturutjururu pulka mulapa palyalku ngula.

Paulanya Tjananya Piruku Ankula Nyakunytjikitja Mukuringkunytja

¹⁷ Palu waltyta tju^{ta}, munga^{tu} panyala nyurala wi^{ru} nyinangi, ka panyaya kutjupa tju^{ta} nganampa pikaringangi munulanya nyuralanguru paira iyanu. Ka panyala anu munula nyuralakutu pu^{tu} ma^{laku} ma-pitjangi. Palu ngananya patu nyinara nyuranya ti^{tutjarangku} kuliningi watarkurintja wiyangku, munula nyurampa pulkara mukuringkula rawangku kuliningi alatji, "Yaala^{la} tjananya piruku nyakuku?" ¹⁸ Panya ngananya nyuralakutu ma^{laku} ankunytjikitja mukuringangi. Ngayulu panya rawangku kuliningi nyuralakutu ma-pitjanytjikitjangku. Palu putuliringila, panya mamu Satantulanya rawangku angatjunangi.

¹⁹ Uwa, ngananya nyuranya piruku nyakunytjikitja pulkara mukuringanyi, panya ngananya kulini mulapa nyura Jesuku waltytjaringkula palunya tungun-tunguntu waⁿalpai wantintytja wiyangku. Palulangurula nyurampa pulkara pukularinyi. Panya ngula Mayatja Jesunya ma^{laku} pitjanyangka nyura palula mi^rangka kun^taringkuwiya rapa ngaraku palunya rawangku waⁿantjatjanu. Kala nyara palula ar^a ngananya nyurampa pulkara pukulariku rapa ngaranyangka nyakula. ²⁰ Panya ngananya nyurala nintinnyangka nyura Godaku pulkara mulamularingkula palula wangaⁿarangku kuliningi. Kala palulanguru nyurampa pulkara pukulariku.

3

¹⁻² Ka panya ngananya nyuranya nyakunytjikitja mukuringkula kurunpa tjiturutjururira pulkara kuliningi, panya ngayulu nyuralakutu pu^{tu} ma-pitjangi. Mununa palulanguru piruku kulinu, "Uti^{na} Timitjinya iyanma tjanalakutu, munuli palya Tjaalatjanya ngali ngura nyanga Atjantjala nyinama. Panya Timitjinya wati wi^{ru} ngalimpa waltyta Jesulanguru, munu paluru Godala warkarira Tjukurpa Palya Jesunyatjara para-tjakultjunkupai anangu tjutangka." Munuli alatji kuli^{ra} palunya witu^{ra} ma-iyanu nyuralakutu ma-wirkara nyuranya wangkara kunpuntjaku nyura mulamulangku Jesunya kuli^{ra} ti^{tutjarangku} waⁿantjaku. ³ Panya nyura Jesunya waⁿannyangkaya anangu kutjupa tjutangku nyuranya ana^a kura^a punganyi nyuranya tjiturutjururira wantintytjaku-tawara wati nyanga Timitjilu nyuranya ma-wirkara wangkara kunpulku nyura kuli^{ra} tunguntunguntu waⁿantjaku wantintytja wiyangku. Panya nyura ninti, mulapa panya Jesuku mirpañtju tjutangku nyuntunya nganananya rawangku kuralpai tjiturutjururira palyantjikitjangku ngananya palunya waⁿannyangka. ⁴ Panya ngananya munga^{tu} nyurala nyinaralpi tjukurpa nyanga palunya rawangku wangkangi panya anangu tjutangku nganananya rawangku analpai Jesunya waⁿannyangka. Ka panyaya mulapatu kuwari ku^{lu} nyuranya anani tjiturutjururira palyantjikitjangku.

⁵ Kana nyara palulanguru nyuranyatjara kulintjikitjangku Timitjinya nyuralakutu ma-iyanu nyuranya nyakula kulintjaku alatji, "Tjinguruya

rawangku Jesunya wañani, mutta tjinguruya wantingu mamungku tjananya kurannyangka?" Alatji kulintjikitja mukuringkulaña Timitjinya ma-wituñu ankula nyuranya nyakula nintiringkula malakungku pitjala ngalila tjakultjunkunytjaku. Panya ngayulu kuliningi, "Tjinguruya watarkuringu mamungku arkannyangka, munuya puñu tungunpungkula wantingu Jesuku mulamularingkunytja wiyangku. Kala panyatja unytju alatjiñu war̄karingi." Nyanga alatji kuliraña Timitjinya nyuralakutu mayanu.

⁶ Palu kuwari nyanga paluru malaku pitjangu nyuralanguru munu paluru tjukurpa wiru tuta ngalila tjakultjunangi, kali kulira pulkara alatjiñu pukularingi. Panya nyura kunyu Jesunya tiñutjarangku kulira wañani ngururpa wantinytja wiyangku, munu Jesuku pulkara mukuringanyi palumpa walytja kutjupa tjuñaku kuñu. Munu kunyu nyura ngalinya rawangku kulira pukularipai munu nyura kunyu ngalinya nyakunytjikitja pulkara mukuringanyi, panya ngali nyuranya nyakunytjikitja pulkara mukuringanyi, palu purunypañu.

⁷ Uwa walytja tjuñu, nyurampa tjukurpa kulirali kurunpa pulkara pukularingu. Palu ngura nyangangkaya Jesunya wantipai tjuñangku nganañanya tñituru-tñituru palyantjikitjangku anaña paini munulanya kuñanu Jesuku tjukurpa tjakultjunkunyangka. Palu kuwari ngali kulinu panya nyura kunyu Jesunya rawangku alatjiñu wañani wantinytja wiyangku, kali pulkara alatjiñu pukularingu. ⁸ Nganmanytju panyala nyuranya pulkara kuliningi, "Tjinguruya Jesunya rawangku wañani, mutta tjinguruya wantingu." Palu mulapa nyura Mayatja Jesunya tiñutjarangku wañani, kala pulkara alatjiñu pukularingu. ⁹ Munula Godala wangkara palunya pukultu alatjiñu walkura mirawañinyi, panya nyura nganañanya pulkara pukulmanu Jesunya tungun-tunguntu wañara.

¹⁰ Ka nganañanya rawangku Godala tjapilpai mungangka kalala paluru nganañanya wituntjaku nyuralakutu nganañña ma-pitjala nyuranya piruku nyakunytjaku, munu tjukurpa kutjupa tjuñu nyurala piruku nintintjaku. Panya nyura ninti mulapa wiya kuwaripatu nintiringanyi Jesuku pulkara mulamularingkunytjikitja.

¹¹ Uwa, mulapa nganañña tjapini Mama Godala pulala Mayatja Jesula nganananya nyuralakutu wantir'iyantjaku nganañña tjukaruru ankula nyurala wirkankunytjaku. ¹² Munula piruku tjapini Mayatja Jesula paluru nyuranya mukulya ngaltunytju pulka palyantjaku nyura anangu kutjupa uwankaraku kuñu pulkara mukuringkunytjaku, panya nganañña nyurampa kurunpa winki mukuringanyi, palu purunypala tjapini Mayatjala nyuranya mukulya pulka palyantjaku. ¹³ Munula piruku tjapini paluru nyuranya kuñpuntjaku. Ka nyara palulanguru nyura wiru tjukaruru nyinaku palya mulapa. Ka ngula Mayatja Jesunya palumpa walytjapiti wikitjara malaku pitjanyangka kutjupangku nyuranya Mama Godala miñangka puñu kuranmankuku nyura mantangka nyanga palya mulapa nyinanytjitetjanguru.

4

Palyanyku Nyinama Godanya Nyakula Pukularinýtjaku

¹ Palu wanyuya kulila walytja wiru tjuñu, kala piruku nyurala wangkama Mayatja Jesulu panya nganañala wangkanytja. Panya nganmanytjula nyurala tjungu nyinralpi tjukurpa wiru wangkara nintiningi nyura palyanyku nyinanytjaku Godanya nyurampa nyakula pukularinýtjaku. Ka

nyura mulapa wanganarangku kulira kuwari palyanyku nyinara Godanya pukulmananyi. Palu uti nyura pakuringkuwiya rawa wirura palyanyku nyinama, ka Godanya nyurampa rawaṭu pukulariku. ² Nyangatjanā nyurala ninti tjutangka wangkanyi, panya nyura nganmanytju kulira nintiringu nganaŋa Mayatja Jesuku tjukurpa nyurala tjakultjunkunyangka, munu nyura kuwari ningtingku kulini palyanyku nyinara Godanya pukulmankunytjikitjangku.

³ Panya Godanya mukuringanyi nyura palya mulapa nyinanytjaku kura uwankara wantira. Munu paluru mukuringanyi nyura kuri walytjangka kutju ngarinytjaku, anangu kutjupaku nyakula mukuringkunytja wiya. ⁴ Uti watingku kungka kutjupa nyakula wantima munu kuri walytjaku kutju mukuringama Godala mirangka palya mulapa nyinanytjikitja paluru nyakula pukularinytjaku. ⁵ Palu panya wati Godaku ngurpa tjutangku kungka kutjupa tjuṭa nyakula palula tjanala ngarinytjikitja kutju pulka mukuringkupai, kuri mulapa altira wirura kanyintjikitjangku kulintja wiyangku. Ka nyura uti palu purunypa nyinanytja wiyangku wantima, munu kuri walytjaku kutju mukuringkula palula kutjungka nyinama.

⁶ Munu nyura uti wati Jesuku walytja kutjupaku kuriku nyakula mukuringkuwiyangku wantima, panya nyura alatji palyara wati palunya kurani palumpa kuriku mukuringkula. Ka panya Mayatja Jesulu pika pulka mulapa ungkuku kura nyanga palu purunypa palyannyangka. Tjukurpa nyanga palunya panyala nyurala nganmanytju wangkara ngulutjunu, kaya wanganarangku kulira kuri walytjangka kutju tjukaruru nyinama.

⁷ Panya Godalulanya ngurkantanu nganaŋa kuri walytjangka tjukaruru palyanyku nyinanytjaku, kuri kutjupa tjuṭaku nyakula mukuringkunytja wiya. ⁸ Ka nyura tjukurpa nyanga palunya kulintja wiyangku wantirampa Godanya anani munu palula tungunpunganyi. Panya tjukurpa nyanga ngayulu nyurala wangkanytja Godaku tjukurpa, ngayuku wiya. Ka panya Godalu nyuranya Kurunpa Milmilnga ungu nyuranya tjukarurungku nintintjaku.

⁹ Palu walytja tjuṭa, nganaŋa nyurampa piruku nyiringka walkatjunkunytja wiya nyura mukulya nyinanytjaku, panya alatji nyuranya Godalu nintinu Jesuku walytja tjuṭaku mukulya nyinanytjaku. ¹⁰ Ka panya nyura mukulya alatji nyinanyi Jesuku walytja uwankaraku ngura pala nyurala itingka nyinanytja tjuṭaku munu manta nyara Matja-tuniyala nyinanytja tjuṭaku kulu.

Palu walytja tjuṭa, pirukula nyuranya wangkara wituwituni nyura Jesuku walytja tjuṭaku pulka alatji mukuringkunytjaku wantintytja wiya. ¹¹ Uti nyura rawangku kulinma kalypa pilunpa nyinanytjikitjangku pikaringkula warkintytja wiya. Munuya anangu kutjupa tjuṭa ningtingku-palku wituwituntja wiyangku wantima paluru tjana walytjangku kulira palyantjaku. Munuya walytja walytja warkarima mani walytjangku mantjintjikitja kutjupa tjuṭangka ngatjintjaku-tawara. Panya nyuralala nganmanytju tjakultjunangi, kaya watarkurintytja wiyangku wanganarangku kulira palyanma. ¹² Munu nyura alatji nyinara palyanyku warkarira mani mantjira palṭja alatji pukulpa mulapa nyinaku kutjupa tjuṭangka ngatjintja wiya. Kaya tjinguru Jesunya wantipai tjuṭangku nyuranya nyakula alatji kulilku, “Nyanga tjana mulapa wirura alatji palyanyku nyinanyi.”

¹³ Palu walytja tjuṭa wanyuya kulila, panya nyura kunyu aŋangu Jesuku walytja ngañmanypa ilunytja tjuṭa pulkara kulilpai. Kala nyangatja nyurala wangkanyi nyura tjukarurungku kulintjaku. Panya Jesunya wan-tipai tjutangkuya alatji kulilpai aŋangu tjuṭa ilura wiyaringkupai alatjitu píruku wankaringkunytja wiya. Munuya walytja tjanampa ilunyangka pulkara tjituru-tjitururira ulapai munkaritja waintara kulintja wiya. Kala mukuringanyi nyura tjananya arkantja wiyangku tjukarurungku kulintjaku munuya Jesuku walytja kutjupa ilunyangkampa pulkara tjituru-tjitururinytja wiyangku wantima.

¹⁴ Panya nganaña mulamularinganyi Jesunya panya ilura wankaringkula pakantjitzaku. Munula palulanguru kulini mulapa aŋangu panya Jesuku walytja tjuṭa ngañmanypa panya ilunytjatjanu tjintu malatjangka wankaringkula pakalku. Panya nyara palula-arangka Jesunya mantakutu malaku pitjaku, ka panya Godalu tjananya miri panya tjuṭa pakaltjingara Jesula tjungulku palula wanka tiṭutjara nyinanytjaku.

¹⁵⁻¹⁶ Panya nyangatja Mayatja Jesulu nganañala wangkangu, kala kuwari nyurala tjakultjunanyi tjukurpa nyanga palunyat. Panya tjintu nyara palula Mayatja Jesunya pitjanyangka miri tjuṭa-warara, wankaringkula pakara palula tjunguringkuku, ka nganaña wanka nyinarampa mala tjunguringkuku. Panya Mayatjalu ngura ilkariringuru ukalingkula mi-rara wangkaku, kala kulikku angelpa kuranyitjangku wangkara Godaku turampata puura wangkatjingannyangka. Kaya Jesuku panya walytja tjuṭa ngañmanypa panya ilunytjitzu tjuṭa-warara wankaringkula pakalku.

¹⁷ Kalanya palula małangka Godalu nganañanya wanka nyinanytja tjuṭa miri tjutangka tjungulku, panya ngañmanypa ilunytjatjanu pakantja tjutangka, munulanya uwankara tjungura katiku ilkarikutu. Panya Mayatja Jesunya ngananalakutu ngaparikatiku ngangkaliningka, munulanya uwankara katiku palula tjunguringkula wanka tiṭutjara nyinanytjaku.

¹⁸ Uwa, tjukurpa nyanga palunyaya rawangku ngapartji-ngapartjingku wangkara kulinma watarkurinytja wiyangku munuya wangkara pukularima, panya Godanya wantipai tjuṭa pulkara tjituru-tjitururipai, kaya palunya tjananya arkantja wiyangku wantima.

5

Mayatja Jesukula Ala-alangku Patantjaku

¹ Palu walytja tjuṭa kulilaya, panya Mayatja Jesunya malaku pitjaku tjintu malatjangka. Palu nyuntu nganana ngurpa tjintu nyara palumpa yaalara paluru wirkankuku. Panya nyanga palunyala nyurala ngañmanytu tjakultjunangi nyura kuliṛa ninti nyinanytjaku. ² Ka panya nyura ngañmanytu kulintjatjanu ninti nyinanyi panya Mayatja Jesunya urulyku wirkankuku tjintu malatjangka aŋangu winki watarku nyinanyangka. ³ Panya nyara palula kuwaripangka aŋangu mantatja kulilpai tjutangku watarku nyinara pukularira alatji wangkaku, “Ai, nyangatjala kuwari manta winkingka pikaringkunytja wiya pilunpa kalypa wirura alatjitu nyinanyi, panya nganaña kutjupa tjutaku nguluringkunytja wi-yaringu.” Palu paluru tjana alatji wangkara ngunti pukularinyangka pika panya kura pulka mulapa tjanala mapalku wirkankuku. Kaya kumpira wirtjapakalku wankakitja-palku.

⁴ Nyara paluru tjana panya kura tjuṭa mungawalurungka nyinapai. Munuya tjintu malatjangka Jesunya malaku pitjanyangka nyakula pulkara urulyaralku watarku nyinanytjatjanu. Palu nyura panya Jesuku

mulamularingkunytjatjanu kura wantira mungawalurungka nyinanytja wiyaringu, munu palulanguru nyura tjintu malatjangka urulyarantja wiya rapa ngaraku Jesunya malaku pitjanyangka.⁵ Panya nyura tilitjara nyinara wiru tjuṭa kutju palyalpai, munu nyura tjintu nyara palula Jesunya pitjanyangka nyakula pulkara pukulariku. Nyuntu nganaña pananya nganmanypa mungawalurungka nyinanytjatjanu wiyaringu, munula anangu kura tjutangka tjunguringkula kura palyantjaku wiyaringu.⁶ Palulangurula uti watarku nyinanytja wiyangku ala-alangku patanma munula kulil-kulilpa nyinama Godalawanu kutju titutjara tjukaruru nyinanytjikitja mukuringkulampa. Palyantiya mantatja kulilpai tjuṭa watarku nyinama kunkunpa purunypa, palu nganaña uti wankangku nyangama.⁷ Panya mungaringkunyangka anangu tjuṭa kunkunarintjikitja mukuringkula kunkunaripai. Kaya kutjupa tjutangku tjkira tarangkaripai.⁸ Palu nganaña kuvari mungangka nyinanytja wiya kalala nyinanyi Godaku walytja tjuṭa. Munula uti palulanguru kulil-kulilpa Godalawanu kutju tjukaruru palyanyku nyinama.

Utila titutjara Jesuku mulamularingama munula palumpa pulkara mukuringama Jesuku walytja kutjupa tjutaku kulu. Panya tjaultjingku pilpirta anga-tjutulpai warmalangku wakantjaku-tawara, palu purunypa nganaña mulamularingkula mukulya pulka nyinanyangka kutjupangku nganañanya puṭu kuralku. Kala uti mulamulangku kulira ala-alangku patanma panya ngula tjintu malatjangka Jesulu malaku pitjala nganañanya wankarunkuku palula tjunguringkula wanka titutjara nyinanytjaku. Panya tjaultjingku mukata wituwitu kanyilpai kata wakantjaku-tawara, palu purunypa nganaña wankarunkunytja kulira ala-alangku paṭannyangka kutjupangku nganañanya puṭu kuralku.⁹ Panya nganañanya Godalu ngurkantankunytja wiyatū kuranmara warungka waṇinytjikitjangku. Palurulanya ngurkantanu Mayatja Jesulu nganananya wankarunkunytjaku. Palulangurula uti rawa mulamularingkula mukulya nyinama Jesunya pitjanytjaku paṭara.

¹⁰ Paluru panya nganampa anga-ilungu nganaña palula tjunguringkula titutjara tjingu nyinanytjaku. Munu paluru ngula malaku pitjala nganañanya uwankara palula tjungulku nganmanypa ilunytja tjuṭa munu wanka nyinanytja tjuṭa kulu. ¹¹ Ka nyura uti palulanguru tjukurpa nyanganpa kulira ngapartji-ngapartjingku nyuranku wangkara rapanma Jesunya titutjarangku tungun-tunguntu waṇantjikitjangku. Panya kuvari nyuranku wangkara kunpunī, palu purunytjuyanku rawangku wangkara kunpunma wantintjaka wiyangku.

Wiruraya Nyinama Godalu Nyakula Pukularintjaku

¹² Palu walytja tjuṭa, wanyuya kulila. Panya anangu maŋkurtu nyuranya Jesuku walytja tjuṭa atunymara kanyini Godalawanu tjukaruru nyinanytjaku. Ka nyura uti atunymankupai palula tjanala wanganarangku kulinma. Panya paluru tjana nyurala pulkara warkarinyi munu panyaya nyuranya kuraringkunytjaku-tawara wangkara tjukarurulpai nyura Mayatja Jesunya tjukarurungku waṇantjaku. ¹³ Ka nyura uti palula tjanala wirura kulinma munuya tjanampa pulkara mukuringama, panya tjana warka wiru mulapa nyurampa palyani. Palulanguru nyura uti tjanala wanganarangku kulinma. Munuyanku pikaringkuwiya kalypa pilunpa nyinama.

¹⁴ Walytja tjuṭa, pirukula nyurala wangkanyi. Utu nyura Jesuku walytja kutjupa warka wiya nyinanyangka nyakula palunya warkarinjtjaku

wangkara wituwitunma. Munuya kutjupangku nguluringkula putu nguwanpa kulinnyangka nyakula palunya wangkara rapanma munu palunya alpamilanma wantintyta wiyangku. Uwa, uti nyura anangu uwankarangka purkarangku mukulyangku wangkama mirpanarira miranytja wiyangku. ¹⁵ Ka tjinguru kutjupangku nyuranya kurannyangka nyura uti palunya ngapartji kurantjikitjangku kulintja wiyangku wantima. Munu nyura Jesuku walytja tjutangku uti ngapartji-ngapartjingku mukulyangku pukultjungku alpamilanma munuya anangu kutjupa tjuta kulu mukulyangku kanyinma.

¹⁶ Palu pukulpa titutjaraya nyinama. ¹⁷ Munuya Godala rawangku tjapinma. ¹⁸ Munuya Godaku pukularira palunya titutjarangku mirawanima kutjupa kutjupa wiru tjuta utiringkunyangka nyakula, munuya tjituru-tjituru tjuta kulu utiringkunyangka nyakula palu purunytjutu mirawanima wantintyta wiyangku. Uwa, alatji Godanya mukuringanyi nyura wiru titutjara pukulpa nyinanytjaku Jesula Christala tjungu.

¹⁹ Munu Kurunpa Milmiltu nyurala nintinnyangka nyura uti wanganarangku kulinma wantintyta wiyangku. ²⁰ Ka tjinguru Jesuku walytja kutjupangku wangkaku, "Kurunpa Milmiltuni kuwari tjukurpa nintinu. Kana wanyu nyurala tjakultjunkuku?" Kaya alatji wangkanyangka purkarangku kulinma palunya mapalkungku anantja wiyangku. ²¹ Munuya paluru tjakultjunkunyangka kulira ngurkantanama alatji kulira, "Mulapa tjukurpa nyangatja Godalanguru, munta tjinguru wiya?" Munuya tjukurpa Godalanguru wangkanyangka kutju kulinma. Palu wiyangkampa kulintja wiyangku wantima. ²² Munuya kura uwankarangka tjunguringkuwiyangku wantima.

Tjukurpa Malatja

²³ Palu panya Godalu kutjungku nganananya kurunpa pukulpa rapa nyinanytjaku palyalpai. Kana palula nyurampa tjapini nyuranya tjukaruruntjaku nyura palula mirangka kura wantintjatjanu palyanyku nyinanytjaku. Mununa piruku tjapini paluru nyuranya anga-kanyintjaku kurangka-tawara, nyura kurunpa winki palya mulapa tjukaruru titutjara nyinanytjaku, ka tjintu maletjangka kutjupangku nyuranya putu kuramankuku Mayatja Jesunya malaku pitjanyangka. ²⁴ Panya Godalu nyuranya ngurkantankunytjatjanungku mulapa alatjitu nintilku palunya kutju tjukarurungku wanara palyanyku nyinanytjaku, panya paluru nyuranya atunymankunytjikitjangku kalkunu munu paluru kalkuntjatjanungku palyalku alatjitu.

²⁵ Uwa walytja wiru tjuta, nganampa kuluya rawangku Godala tjapinma.

²⁶ Munuya pala Jesuku walytja kutjupa tjuta pukularira mara witira wangkama alatji, "Paulalu tjana nyuranya rawangku kulini."

²⁷ Uwa, lita nyanga palunyaya mantjira pala Jesuku walytja uwankarangka nyakula tjakultjunama, panya Mayatja Jesunya tjukurpa nyanga palunya anangu palumpa walytja uwankarangku kulintjaku mukuringanyi.

²⁸ Uwa, alatjituna walkatjunanyi. Ka Mayatja Jesulu Christalu nyuranya pukultjungku wirura kanyinma.

Lita Nampa 2 Paulalu Walkatjura Iyantja Ngura Tjitja-lanikalakutu 2 Thessalonians **Nyangatja Ngañmanytju Nyakula Wangkanytjaku**

Nyangatja lita kutjupa Godaku tjukurpa Paulalu walkatjunkunytja Jesuku walytja tjuṭaku ngura panya Tjitja-lanikala nyinanytja tjuṭaku. Paluru ngañmanytju lita tjanampa walkatjura iyanu, ka nyangatja lita nampa 2 paluru tjanampa walkatjura iyantja.

Ka ngura nyara palula Jesuku walytja tjuṭa Godalawanu tjukaruru nyinangi. Palu aŋangu kutjupa tjutangku kunyu tjananya Jesunya wañannyangka ananigi munu kuraningi. Palu Jesuku walytja tjutangku kunyu tjananya kulira wantingi munuya Godanya tungun-tunguntu wañanigi munuya titutjara mukulya pułka nyinangi.

Palu paluru tjana Jesunya małaku pitjanytja putu nguwanpa kuliningi, panya aŋangu kutjupa tjutangku tjanala ngunti wangkangi Jesunya ngañmanypa pitjanytja. Kaya palulanguru tjituru-tjitururingi, ka Paulalu nyanga palunya kulira lita nyangatja tjanampa walkatjunu tjananya tjukaruruntjikitjangku. Munu paluru tjananya painu tjukurpa kutjupa tjuṭa kulilwiyangku wantintjaku, panya Jesunya kuwaripatu nyinanyi małaku pitjanytja wiyaṭu. Munu paluru tjanala tjakultjunangi nyaaringkuku ngula Jesunya małaku pitjanytja kuwaripangka. Paluru wangkangu alatji, "Jesunya pitjanytja kuwaripangka aŋangu tjuṭa mulapa Godala tungunpungkuku munuya palunya wantiku. Ka nyara palula małangka Wati Kuralpaina pakalku munu aŋangu winki ngunti kurara tjananya wituwitulku palunya kutju walkuntjaku Godanya wantira. Ka palulanguru kutju Jesunya małaku pitjaku munu paluru Wati panya Kuralpaina wiyaliku alatjitu." Alatji Paulalu tjananya wangkara tjukaruruningi.

Munu lita nyanga palula Paulalu tjukurpa kutjupa tjanala wangkangi panya rawa manikitja war̄karinytjaku maiku. Panya kutjupa tjarangku warka wantira nyinangi Jesunya malaku pitjanytjaku patara. Ka Paulalu tjananya painu munu tjananya wituwitunu rawa war̄karinytjaku.

Tjukurpa nyanganpa ngarinyi:

- 1:1-2 Paulalu ngañmanytju wangkanytja
- 1:3-12 Paulanya tjanampa pukularinytja munu tjanampa Godala tjapintjaka
- 2:1-17 Paulalu Tjintu Małatja tjakultjunkunytja panya Jesunya pitjanytja kuwaripangka
- 3:1-5 Paulanya mukuringkunytja tjana palumpa Godala tjapintjaku
- 3:6-18 Paulalu tjananya maiku war̄karinytjaku wituwituntja munu tjukurpa małatja wangkanytja

Paulalu Ngañmanytju Wangkanytja

¹ Uwa, Jesuku walytja tjuṭa, ngayuluna Paulalu lita nyangatja nyurampa walkatjunanyi ngura pala Tjitja-lanikala nyinanytja tjuṭaku. Panya nyura Mama Godaku walytja mulapa nyinanyi Mayatja Jesuku Christaku kulu. Kala Tjaalatjalu Timitjilu nganaña mañkurtu lita nyangatja nyuralakutu ma-iyani nyurampa pukularira.

² Ka Mama Godalu Mayatja Jesulu Christalu kulu nyuranya pukultju pulkangku kanyinma munu nyuranya kurunpa rapara pukulmanama.

Jesunya Malaku Pitjanytja

³ Uwa walytja tjuta, nyura kunyu Mayatja Jesuku pulkara mulamularingkula palunya titutjarangku wañalpai wantintyta wiyangku, munu kunyu nyuranku rawangku mukulyangku ngapartji-ngapartjingku alpamilalpai. Kala tjukurpa nyuranyatjara kulira pulkara pukularinyi munula rawangku Godanya walkuni nyura palunya wirura wañannnyangka. Nyangatjala Godanya tjukarurungku walkuni nyuralanguru panya paluru nyuranya nintini palunya wirura wañantjaku ka nyurampa mukulya palulanguru pulkaringanyi. ⁴ Ka nyura palunya rawangku tunguntunguntu wañannnyangka nganaña ngura kutjupa tjutangka para-ngarala nyuranyatjara tjakultjunkupai Jesuku walytja kutjupa tjutangka. Panya anangu kura tjutangku nyuranya Jesunya wañannnyangka ananigi munu nyurampa pikaringkula nyuranya pungangi. Ka panya nyura tjananya kulira wantingi alatjitu munu panya nyura rapangku titutjarangku Jesunya wañanigi wantingi wantintyta wiyangku. Kala alatji tjanala tjakultjunkupai nyuranyatjara Jesuku walytja kutjupa tjutangka.

⁵ Uwa, panya anangu kutjupa tjutangku nyurampa tjituru-tjituru palyantjikitja mukuringkupai, ka panya nyura tjananya kulira wantira Jesunya tungun-tunguntu alatjitu wanani. Palu ngula Godalu anangu uwankara palula kuranyu ngaratjunkula kutju kutju ngurkantara tjaralku, kaya nyara palula arangka uwankarangku nyakula kulilku alatji, "Munta mulapa Godalu alatjitu tjukarurungku ngurkantankupai." Ka nyuranya Godalu wangkaku alatji, "Nyuranya panyaya anara pikangku pungangi nyura ngayunya wañannnyangka. Nyara palulangurya nyuranya kuranigi ngayuku walytja nyinanyangka. Ka nyura ngayunya tunguntunguntu titutjarangku wañannnyangka ngayulu nyurampa pulkara pukularinyi mununa nyuranya walytjanmara titutjarangku kanyilku ngayuku alatjitu nyinanytjaku." Alatji Godalu nyurampa pukularira nyurala wangkaku. ⁶ Panya Godalu tjukarurungku alatjitu ngurkantankupai. Munu paluru nyuranya anara kurara pungkunyangka nyakula anangu panya nyuranya kuralpai tjuta palu purunypatu palunya tjananya nyakula ngapartji pailku. ⁷ Munu paluru nyuranya pukulmara wirura kanyilku nganananya kulu nyurala tjungura, ka nyuntunya nganañanya putu piruku pikatjaralku.

Panya Godalu nganananya alatjinkuku ngula tjintu malatjangka Mayatja Jesunya ilkaringuru pitjanyangka. Panya nyara palula ara paluru witulya pulka mulapa pitjaku angelpa mungilyitjara waru winkitjara pulkara nguluringkunytjaku. ⁸ Munu paluru pitjala tjananya ngapartji pungkuku anangu panya Godanya wantipai tjuta, panya tjana Tjukurpa Palya Jesunyatjara kulira wantira kura tjuta titutjarangku palyaningi. ⁹ Ka palulanguru Godalu tjananya paira iyalku titutjara patu nyinanytjaku Godala tjungu wiya. Kaya paluru tjana Godala pitalytji pulkangka nyinanytja wiya mungawalurungka nyinara putu palyakitja ngaraku, munuya palunya witulya pulka mulapa nyinanyangka nyakunytja wiya alatjitu nyinaku.

¹⁰ Uwa, Jesunya pitjanyangka mulapa nyanga alatjiriku. Kala tjintu nyara palula anangu panya palumpa walytja tjutangku palunya nyakula kurunpa winki pukularira wangkaku, "Ai, nganampa wiru mulapa wirkanu." Munula palumpa pulkara pukularira palunya walkura mirawañiku. Ka

nyura ku_{lu} nganañala tjunguringkula palunya nyakula mirawañiku_{tu}, panya nyura palumpa mulamularingu ngañmanypa nganaña nyurala tjukurpa palunyatjara tjakultjunkunyangka.

¹¹ Uwa, munula nyanga palunya kulira nganaña Godala nyurampa rawangku tjapilpai nyura tjukarurungku palunya rawangku wañantjaku. Panya Godalu nyuranya ngurkantanu tjukaruru palumpa walytja mulapa nyinanytjaku. Ka nyura panya Jesuku m_ulamularingkula rawa mukuringanyi kutjupa kutjupa wiru tjuta Godaku palyantjikitja, kala palulanguru Godala rawangku tjapilpai nyurampa paluru nyuranya witulyangku nintintjaku nyura wiru tjuta uwankara_{tu} tjungungku tjukarurungku palyantjaku. ¹² Nyanga palumpala tjapilpai a_nangu tjutangku nyuranya wirura palyannyangka nyakula Mayatja Jesunya Christanya pulkara walkura palunya mirawañinytjaku, ka nyara palulanguru paluru nyuranya nyakula palyanmankuku. Palu nyanga alatjiriku Godalu munu Mayatja Jesulu Christalu nyuranya pukultju pulkangku witulyankunyangka kutju.

2

Wati Kura Utiringkunyta Jesunya Pitjanyta Kuwaripangka

¹ Uwa walytja tjuta, panya Mayatja Jesunya ngula ma_laku pitjanyi nganañanya uwankara palula tjunguntjikitja. Kala tjukurpa nyanga palunya nyurala tjukutjuku wangkanytjikitja mukuringanyi nyura tjukaruru mulatu kulintjaku. ² Panya kutjupa tjutangku kunyu nyurala tjakultjunu alatji, "Jesunya alatji_{tu} pitjangu." Ka nyura kunyu kulira tjituru-tjitururingu. Palu wantima tjituru-tjitururingtya wiyangku panya paluru ma_laku pitjanytja wiya kuwaripa. Tjinguru paluru tjana ngunti kulinu nganaña tjukurpa palatja litangka walkatjunkunyta-palku, palu ngananala Jesunya ngañmanypa pitjanytja walkatjunkunyta wiya. Munta tjinguru kutjupangku tjanala ngunti wangkangu alatji, "Tjukurpa palatja Kurunpa Milmiltu Paulala tjanala tjakultjunu." Palu wiya Kurunpa Milmiltu nganañala tjakultjunkunyta wiya Jesunya ngañmanypa ma_laku pitjanytja. Munta tjinguru kutjupangku tjanala tjakultjunu nganaña tjukurpa nyanga palunya wangkanytja-palku. Palu wiya, nganañala wangkanytja wiyat_u. Ka nyura uti tjanala kulintja wiyangku wantima tjituru-tjitururingtyaku-tawara. ³⁻⁴ Panya tjana nyuranya arkara ngunti kuran_i nyura tjanampa mulamularingkunyta_{jaku}, kaya tjananya kulira wantima.

Panya Mayatja Jesunya pitjanytja kuwaripangka a_nangu winkingku Godala kuli_{ra} wantiku munu palula tungunpungkula palumpa mulamularingkunyta wiyingkuku. Ka nyara palula ma_langka wati kuralpai tjutaku mayatja pulka mulapa utiringkuku Godanya panya wantipainya. Wati nyara paluru panya Godala pulkara tungunpungkuku, munu paluru a_nangu tjutangku god kutjupa kutjupa tjuta walkunnyangka munu tjukuritja kutjupa kutjupa tjuta kulinnyangka ku_{lu} tjananya pailku palunya kutju walkuntja-tjiratjangku. Mununku paluru wangkaku, "Ngayulu kutju pulka mulapa uwankarangka waintarinitya, kañiya ngayunya kutju walkunma." Munu paluru Jerusalemala Godaku timpulangka unngu tjarpara nyinaku Godaku arangka mununku walytjangku Godanyamankuku.

Uwa, wati nyara paluru Godala pulkara tungunpungkuku, palu panya tjintu ma_latjangka palumpa kura pulka mulapa ngaraku waru pulkangka palunya wañinityjaku.

⁵ Tjukurpa nyanga palunya panya ngayulu nyurala mungatu tjungu nyinaralpi tjakultjunangi, ka nyura wanyu kulini panyatja?

⁶ Palu walytja tjuta, nyura ninti panya kutjupangku kuvari wati panya kuralpai tjutaku mayatja pulka angatjunanyi aŋangu tjutangka utiringkunytjaku-tawara. Ka ngula Godalu kulira palyanmankunyangka kutju wati nyara paluru utiringkuku.

⁷ Palu kuvari nyanga mamu panya Satantu aŋangu tjuta kampangkatu wituwituni Godala tungunpungkunytjaku, kaya tjutangku palula kulira kura rawangku palyani. Palu panya kutjupangku kuwaripangkutu markura kanyini wati panya kuralpai tjutaku mayatja pulka. Munu ngula Godalu palyanmankunyangka kutju wati panya palunya markura kany-intjatjanungku wantir'iyalku, ⁸ ka paluru aŋangu tjutangka utiringkula nyinaku munu Godala rawa tungunpungkuku. Palu Mayatja Jesulu witulya pulkangku pitjala wati panya palula wirkara wangkaku, ka uparingkula wiyaringkuku alatjiitu.

⁹ Uwa, mamu Satantu wati nyara kuralpai tjutaku mayatja pulka iyalku witulya pulka ungkula. Ka paluru pitjala kutjupa kutjupa pulka tjuta witulyangku palyalku Satantu nintinnyangka. Kaya aŋangu tjutangku paluru ayinayiningku palyannyangka nyakula palunya ngunti mirawaŋiku Godanya-palku kulira. ¹⁰ Panya paluru kura kutjupa kutjupa tjuta palyara tjananya ngunti kuralku, panya paluru tjana iwara kurangka ankula puṭu tjukaruru nyinanytjikitjangku kulilpai. Tjinguruya tjukurpa tjukaruru Jesunyatjara kulira mulamularingama, ka Godalu tjananya wankarunama.

Palu tjana tjukurpa palunya kulira alatjiitu wantingi, ka palulanguru Godalu tjananya paira iyalku ngura kurakutu ankunytjaku pika pulkatjara titutjara nyinanytjaku.

¹¹ Uwa, paluru tjana tjukurpa tjukaruru Jesunyatjara kulira wantinyangka Godalu tjananya wantir'iyalku munu tjananya kulintja kampa kutjupankuku tjukurpa nguntiku mulamularingkunytjaku, ka palulanguru wati panya kuralpai tjutaku mayatja pulkangku ngunti wangkanyangka tjana tjukurpa mulapa-palku kulilku tjukarurungkupalku. ¹² Ka palulanguru tjukurpa tjukaruruku mulamularingkuwiyangku wantintjitetjanguru Godalu tjananya ngurkantara paira iyalku ngura kurakutu ankunytjaku, panya tjana kuŋta wiyangku titutjarangku kura kutju pukultu palyaningi.

Jesunya Titutjarangku Kulira Wanana

¹³ Palu walytja tjuta, Mayatja Jesunya nyurampa pulkara mukuringanyi. Panya ngañmanytu mulapa Godalu uwankara paluntja kuwaripangka nyuranya ngurkantanu kuranguru wankaŋuru kanyintjikitjangku. Munu paluru Kurunpa Milmilngu nyurala unngu tjarpatjunu nyuranya tjukaruruntjaku, nyura Godala rawangku wanganarangku kulintjaku. Panya nyura Jesuku tjukurku mulamularingkunyangka paluru nyuranya wankarunu, ka panya Kurunpa Milmiltu nyuranya rawangku nintilkatinyi wirura palyanyku nyinanytjaku. Ka nyanga palulanguru ngula tjintu malatjangka Godalu nyuranya wankaŋunkuku. Ka nyara palulanguru nganana pulkara pukularinyi munula Godanya rawangku walkulpai paluru nyuranya wirura kanyinnyangka. ¹⁴ Panya paluru nyuranya wankaru kanyintjikitjangku altingu nyura Mayatja Jesula Christala tjunguringkula titutjara nyinanytjaku witulya pulkangka. Palulanguru Godalu nganananya iyanu nyurala Tjukurpa Palya tjakultjunkunytjaku

Jesunyatjara. Ka panya palulanguru paluru nyuranya altinyangka nyura kulira palumpa walytjaringu.

¹⁵ Ka walytja tjuṭa, pala palulanguru nyura uti kuṇpu ngarala Jesunya titutjarangku waṇanma. Munuya tjukurpa panya nganaṇa nyurala nganmanytju wangkanytja rawangku kulinma watarkurintjya wiyangku. Panya tjukurpa nyara palunya nganaṇa Mayatja Jesula kulintjatjanungku nyurala tjakultjunu munula nyiringka kuļu walkatjunu munula nyuralakutu iyanu.

¹⁶⁻¹⁷ Uwa mulapa Mayatja Jesunya munu Mama Godanya nganampa pulkara mukuringu munulanya pukultjungku nganananya rawangku rapalpai palula tjungu pukulpa nyinanytjaku. Panya Godalu mukulyangku nganananya kalkuṇu ilunyangka wankara pakaltjingantjikitjangku palula tjungu tiṭutjara nyinanytjaku. Kala nyara palulanguru mulamulangku kulira kurunpa rapa pukulpa nyinanyi palumpa ala-alangku paṭara. Ka Mama Godalu Mayatja Jesulu Christalu kuļu nyuranya kurunpa kuṇpunma nyura wiru tjuṭa rawangku mukulyangku palyantjaku munu tjukurpa wiru tjuṭa kuļu wangkanytjaku.

3

Paulaku Tjanampa Godala Tjapintjaku

¹ Palu walytja tjuṭa, wanyuya wirungku nganampa Godala tjapinma. Munuya palula tjapinma aŋangu ngura winkitjangku Tjukurpa Palya Jesunyatjara kulintjaku ngura tjutangka. Munuya palula tjapinma tjananya unngu nintintjaku, kaya ngura winkingka tjukurpa palya kulintjatjanu mulamularingkuku, nyura purunypa, panya nyura kulira mapalku mulamularingu, palu purunypa. ² Munuya Godala rawangku tjapinma paluru nganananya wankaru kanyintjaku wati kura tjutangku mirpañarira pungkunytjaku-tawara, panya aŋangu kutjupa tjutangku Godaku tjukurpa kulira wantipai mulamularingkuwiyangku.

³ Palu walytja tjuṭa, kulilaya. Mayatja Jesunya nyuntula nganaṇala titutjara nyinanyi wantikatinytja wiya, munu panya paluru nyuranya kalkuntjatjanungku mulapa kurunpa rapa nyinanytjaku palyalku munu nyuranya mamungka-tawara atunytju wankaru kanyilku. ⁴ Uwa, nganaṇa Mayatja Jesuku pulkara mulamularinganyi munula palulanguru kulin alatji, “Mulapa Tjitja-lanikala nyinanytja tjutangku kuwari wiru tjuṭa palyani nganaṇa panya tjanala nganmanytju wangkanytja tjuṭa.” Munula piruku kulini alatji, “Mulapa tjana tiṭutjarangku palyalku wantintjya wiyangku.”

⁵ Kala Mayatja Jesula nyurampa tjapilpai nyuranya Godaku mukulya nintintjaku, ka nyura nintiringkula kuliku panya Godanya nyurampa pulkara mukuringanyi. Munula piruku tjapini paluru nyuranya kurunpa rapantjaku, nyura Jesulu purunytju Godanya tungun-tunguntu waṇantjaku pakuringkunytja wiyangku.

Jesuku Walytja Tjuṭa Uti Warkarima

⁶ Palu walytja tjuṭa kulilaya, Mayatja Jesulu Christalu panya nganaṇanya wangkangu maikitja pulkara warkarintjaku pakuringkunytja wiya. Kaya kulila, panya nyurampa ngurangka kunyu Jesuku walytja kutjupa tjarangku warķa wantira nyinanyi. Ka tjana warķa wantintjya nyura uti palula tjanala tjunguringkuwiyangku wantima, panya paluru tjana kulira wantinyi nganaṇa warķaku tjananya wituwitunnyangka.

⁷ Nyura panya ninti nganampa, panya nganaṇa nyurala nyinaralpi

pakuwiya warkaringi nyurala mirangka nyura nganañanya nyakula nyura kulu arkara warka wirura palyantjaku. ⁸ Munu panya kutjupangku nganañanya maingka paltjara kanyinnyangkala nganaña palunya mani ngapartji ungangi. Munu panyala kalala mungangka kulu pulkara warkaringi mani palyara mai waltyjangku mantjintjikitja nyurala ngatjintjaku-tawara. ⁹ Tjingurula tjukurpa wangkarampa nyurala maiku ngatjinma, panya Jesulu nganañanya witura iyanu tjukurpa nyurala tjakultjunkunytjaku. Palu wiya, nganaña panya nyurala ngatjintja wiyangku wantira pulkara warkarira mani palyara mai waltyjangku mantjiningi nyura kulu nyakula nintiringkula warkarira mani maiku palyantjaku. ¹⁰ Panya nganaña nganmanytju nyurala nyinaralpi nyuranya alatji wangkara painu, “Anangungku warka wantira nyinanyangkaya mai unkunytja wiyangku wantima.”

¹¹ Alatjila wangkanyi panya kutjupangku kuwari nganañala tjakultjunu panya nyuralanguru kunyu Jesuku waltyja kutjupa tjarangku warka wantira nyinanyi, munuya kunyu warka wantira para-ngarala aŋangu warkaripai tjutangka unytju tjunguringkula kuralpai tjanampa warka. ¹² Kala palunya tjananya pulkara wituwituni manikitja warkarinjtjaku, mai waltyjangku payamilara ngalkuntjaku. Nyangatjala Mayatja Jesulu wangkanyta wangkanyi nganaña kuliṛa waltyjangku wangkanyta wiya, kaya uti tjana wangañarangku kulinma munuya manikitja pulkara warkarima mai waltyjangku mantjintjikitja.

¹³ Palu waltyja wiru tjuta, rawangkuya wiru tjuta kutju palyanma pakuringkunytja wiyangku.

¹⁴ Uwa, nyangatjala tjukurpa tjuta walkatjunu nyura tjukarurungku kuliṛa palyantjaku. Ka nyura tjinguru Jesuku waltyja kutjupa kuliṛa wantinyangka nyakula uti palunya tjutangka mirangka painma munuya palula tjunguringkuwyangku wantima. Ka aŋangu paluru kuliṛa kuṇtaringkuku munu tjinguru kampa kutjuparira palyaringkuku. ¹⁵ Palu nyura uti palumpa mirpañarinjtja wiyangku purkaṛangku kalypangku wangkara palunya tjukarurunma, panya paluru Jesuku waltyatju nyinanyi munu nyurampa kulu.

Tjukurpa Malatja

¹⁶ Uwa Mayatja Jesulu kutjungku nganañanya kurunpa rapa pukulpa nyinanytjaku palyalpai. Kala palula nyurampa tjpini nyuranya kulu tjintu kutjupa tjintu kutjupa kurunpa rapantjaku, ka kutjupa kutjupa tjuta nyurala utiringkunyangka nyura titutjara pukulpa rapa ngaraku. Kala tjpini Mayatja Jesula paluru nyurala tjungu titutjara nyinanytjaku.

¹⁷ Uwa, alatjituña wangkanyi nyurala lita nyangangka. Palu wati ngayuku malpangku ngayulu wangkanyangka kulintjatjanungku lita nyangatja walkatjunanyi nyurampa, palu kuwari nyanganä ngayulu alatjituña walkatjunanyi nyanga alatji, “Ngayulu ini Paulanya mununa nyuranya rawangku kulilpai.” Nyanga alatji panya tjukurpa malatja walkatjunkupai lita uwankarangka aŋangu uwankarangku walka ngayuku ngurkantara kulintjaku, “Mulapa nyangatja Paulaku lita.”

¹⁸ Uwa, alatjituña walkatjunanyi. Ka Mayatja Jesulu Christalu nyuranya pukultjungku wirura kanyinma.

Lita Nampa 1 Paulalu Walkatjura Iyantja Wati Ini Timitjilakutu 1 Timothy

Nyangatja Nganmanytju Nyakula Wangkanytjaku

Nyangatja Godaku tjukurpa Paulalu walkatjunkunytja wati yangupala ini Timitjiku. Panya paluru Paulaku katja purunypa munu pula ngura tjuṭakutu ankula tjungungku alatjitu Godaku tjukurpa para-pitjalira wangkapai anangu tjuṭangka. Ka ngula Timitjinya kutju anu ngura ini nyanga tjanalakutu Pariyala, Tjitja-lanikala, Karintjala tjanalakutu munu ngura nyara palula tjanala paluru Jesuku walytja tjuṭa nyangangi.

Munu palula małangka paluru anu tawunu pułka ngura ini Ipitjalakutu nyara palula nyinara Jesuku walytja tjuṭa aṭunymankunytjikitja. Ka lita nyangatja Paulalu palumpa walkatjura iyanu ngura nyara palula paluru Jesuku walytja tjuta aṭunymara kanyinnyangka. Munu paluru Timitjila tjakultjunangi tjukurpa kutjupa kutjupa tjuta paluru kulira Jesuku walytja tjuṭa tjukarurungku aṭunymankunytjaku. Munu paluru wangkangu palula, “Anangu palya mulapa kutju ngurkantara tjura Jesuku walytja tjuṭa aṭunymankunytjaku.”

Ka ngura nyara Ipitjala wati kutjupa tjuṭangku tjukurpa ngunti tjuṭa tjakultjunangi anangu panya Jesuku walytja tjuṭangka. Ka palulanguru Paulalu Timitjila lita nyangangka wangkangu tjukurpa palunya tjananya wiyanjtjaku munu tjukurpa tjukaruru kutju wangkara nintintjaku Jesuku walytja tjuṭangka tjana kulintjatjanu tjukarururingkunytjaku. Munu piṛuku Timitjinya wangkangu wirura tjukaruru palyanyku nyinanytjaku tjukurpa paluru wangkanytjitu kutju kulira.

Tjukurpa nyanganpa ngarinyi:

- 1:1-2 Paulalu nganmanytju wangkanytja
- 1:3—2:15 Paulalu wangkanytja Jesuku walytja tjuṭa yaaltji-yaaltji nyinanytjaku
- 3:1-16 Jesuku walytja tjuṭa aṭunymankunytjakuya wati palya ngurkantanama
- 4:1—6:21 Paulalu Timitjila wangkanytja war̄ka kutjupa kutjupa tjuṭa palyantjaku Jesuku walytja tjuṭaku

Paulalu Nganmanytju Wangkanytja

1-2 Uwa, Timitji, ngayuluña Paulalu lita nyangatja nyuntumpa walkatjuni. Panya Mama Godalu pula Jesulu Christalunyi witura iyanu Jesuku tjukurtjara warkarintjaku. Panya Godalulanya wankarunkupai, kala Jesuku Christaku ala-alangku paṭanı paluru małaku pitjanytjaku. Ka Timitji nyuntu panya ngayuku katja mulapa purunypa, panya Tjukurpa Palya Jesunyatjara kulira mulamularingkunytjatjanu.

Ka Mama Godalu Mayatja Jesulu Christalu kuļu nyuntunya pukultju pułkangku kanyinma munu nyuntunya kurunpa rapara pukulmanama ngalṭunytju pułkangku.

Ngunti Wangkawiyangku Wantintjaku.

³ Uwa Timitji, mungaṭu panyaña nyuntunya ngura pala Ipitjala markura wantikatingu ngayulu ngura Matja-tuniyalakutu ankunyitjikitjangku. Ka nyuntu rawaṭu nyinama panya ngura pala Ipitjala wati kutjupa tjarangku tjukurpa kurakura tjuta ngunti wangkapai. Ka nyuntu uti tjananya painma alatjiṭu ngunti wangkawiyangku wantintytjaku. ⁴ Panya tjanaya kunyu wangkara kulilpai miri ini tjuta munuya irititja tjutanguru wangkara wañalpai miri kuwaritja tjutakutu, munuyanku tjukurpa ngunti tjuta palunya tjananyatjara wangkara wanipai. Ka tjananya paila ngunti kulilwiyangku wantintytjaku panya kutjupa tjutangku tjanala kuliṛa ngaparku wangkara mirpanaripai. Munu panyaya palulanguru, tjukurpa nyanga kurakura tjuta kuliṛa Godalu aŋangu tjuta wankarunkunyitjatjara puṭu kulilpai. Palu panya Jesuku Christaku mulamularingkula kutju tjana Godalu wankarunkunyangka kulilkku.

⁵ Uwa, wangka tjananya Godala wangaṇarangku kuliṛa mukulya ngalṭunyntju pułka nyinanytjaku. Panya tjana wiru kutju kulintjatjanu munu tjukaruru nyinanytjatjanu Godala mirangka kunta wiya nyinaku kurunpa rapa munuya palulanguru kutju mukulya mulapa nyinaku Jesuku pułkarra mulamularingkula. Nyanga palulanguruṇa nyuntunya wangkanyi tjananya wangkara paintjaku, panya tjana kuliṛa mukulya mulararinytjaku. ⁶ Palu kuvariya kutjupatjara palu purunyapa nyinanytja wiya. Munuya palya wantira tjukurpa ngunti ngaparku wangkanytjatjanu kawankatingu. ⁷ Paluru tjana tjukurpa panya Godalu Mosenya ungkunyta aŋangu tjuta nintintjikitja mukuringanyi. Palu tjanaya ninti mulatu-palku tjukurpa kutjupa kutjupa watarkungku wangkapai. Paluru tjana ngurpa alatjiṭu Godaku tjukurku.

⁸ Ka nganana panya kulini tjukurpa nyanga Mosenya ungkunyjtanya palya ngaranyi aŋangu tjuta kuliṛa tjukaruru nyinanytjaku. ⁹ Munula kulini tjukurpa nyanga paluru ngaranyi aŋangu kurakura tjutakutu tjana nyakula nintiringkula kura wantira palyanyku nyinanytjaku. Tjukurpa paluru palyanyku nyinapai tjutakutu wiya, palu panya kuralpai tjutakutu kutju, panya Godala tungunpungkupai tjutakutu, kura pampulpai tjutakutu, Godaku kuraringkupai tjutakutu, analpai tjutakutu kulu, munu mama ngunyntju miripungkupai tjutakutu munu miriputju tjutakutu kulu tjukurpa nyangatja ngaranyi. ¹⁰ Tjukurpa nyanga Godalu Mosenya ungkunyta mulapa ngaranyi aŋangu kura tjutakutu, panya kampangkaṭu ngaripai tjutakutu, munu wati panya watingka kampangkaṭu ngaripai tjutakutu, munu aŋangu ngulutjingara witira katipai tjutakutu, munu ngunti wangkapai tjutakutu, munu kutjupa kutjupa palyalpai tjutakutu kulu. Panya paluru tjanaya Godaku tjukurpa mulapa wangkanyangka kuliṛa wantipai. ¹¹ Palu Mama Godalu panya ngañmanyntju Mosela tjukurpa pułka wangkangu mununi kuvari malangka tjukurpa nyanga wiru Jesunyatjara wangkara witunu aŋangu tjutangka tjakultjunkunyitjaku. Palu tjukurpa nyanga paluru pula panya Moseku munu Jesuku maunṭalpa ngaranytja wiya tjungu alatjiṭu ngaranyi kutjutu. Mulapa Godanya wiru mulapa pitalytji pułkanya miral-miralpa alatjiṭu. Panya paluru tjukurpa wiru mulapa palyanu nganana kuliṛa pukularinytjaku.

Paulanya Godaku Pukularinytja

¹² Kana ngayulu mulapa nganampa Mayatja Jesunya Christianity mirawaṇinyi. Panya paluru-maṇṭunu kurunpa rapara kanyini palumpa pułkara warkarinytjaku. Kana palunya ngayulu pułkara mirawaṇinyi ngayunya ngurkantankunyitjitungka. Panya paluruṇi ngayunya nyakula

kulinu, "Wati nyangangkutju ngayuku war̄ka wanganarangku kulira palyalku." ¹³ Palu nganmanytjuna palunya kuranmanangi mununa ananini, mununa palumpa waltyta tjuṭa kuļu kurara pungangi. Katju Godanya ngayuku nyakula ngalturingu, panya watarkungkuña kura palyaningi palumpa mulamularingkuwiyangku. ¹⁴ Ka panya Mayatja Jesulu ngaltunytju pulkangku ngayula wirkara nintinu palumpa pulkara mulamularingkunytjaku. Mununi nintinu mukulya pułka nyinanytjaku, panya paluru mukulya pukultju pulka nyinanyi, palu purunyapa.

¹⁵ Ka kulila wangka nyangatja,

"Jesunya Christanya mantakutu pitjangu aŋangu tjuṭa kura palyantjitunguru wankarunkunytjikitja."

Wangka nyanga paluru mulapa alatjiṭu, nganana wanganarangku kulira mulamularingkunytjaku. Palu ngayulu panya kura pułka mulapa palyaningi uwankarangka waintara. ¹⁶ Kaṇi panyatja nyaaku Godalu nganmanytju ngaltunytjungku kanyiningi kura mulapa rawangku palyanyangka? Wiya, paluru panyani kura pułkatjara purkarangku kanyiningi aŋangu kutjupa tjutangku ngayunya nyakula mulapa kulintjaku, munu tjana ngapartji Jesuku mulamularingkunytjaku. Panya tjana tjinguru ngayunya nyakula kulipai, "Munta, nyangatja panya nganmanypa kura mulapa nyinangi. Ka Jesulu Christalu palunya purkarangku nyakukatingi munu panya palunya mulapatu kampa kutjupara wankarunu kura pułka palyantjitunguru." Alatjiya tjinguru tjana nyakula kulikku munuya palulanguru tjana ngapartji kulira Jesuku mulamularingkula palumpa waltyjaringkuku munuya wankaru rawa mulapa nyinaku. ¹⁷ Wanyula palunya mirawanima panya iritinguru alatjiṭu Mayatja pulka nyinanytjanya. Paluru panya Mayatja nyinara wiyaringkunytja wiya tiṭutjara alatjiṭu wanka nyinaku. Ka panyala nyuntu nganana palunya puṭu nyanganyi arkayi nyinanyangka. Palu paluru kutju Mayatja pulka, kutjupa palu purunyapa nyinanytja wiya alatjiṭu. Kala wanyu palunya kutjukutjura rawangku walkunma pitalytji pulkanya. Uwa mulapa!

¹⁸ Palu Timitji, nyuntu ngayuku katja purunyapa nyinanyi. Kaṇa tjukurpa nyangatja nyuntula wangkanyi nyuntu wanganarangku kulintjaku. Panya tjukurpa nyanga palunya Godaku wangkatjara tjutangku nyuntula nganmanytju wangkangu. Kaṇa nyuntunya wituwituni tjukurpa panya paluru tjana wangkanytjita watarkuriwiyangku kulintjaku. Panya nyuntu tjukurpa nyanga palunya wanganarangku kulira palyarampa Godaku war̄ka wirura rapangku palyalku, munun aŋangu panya ngunti wangkapai tjutaku nguluringkuwiyangku tungun-tunguntu pailku.

¹⁹ Uwa, rawa Jesuku Christaku kulira mulamularingama paluru nyuntumpa anga-ilunytjtjaku, munu palulanguru rawa kuṇṭa wiya nyinama wirura palyanyku nyinara. Panya kutjupa tjutangkuya kura palyantjatanungku kuṇṭaku ngurparingu munuya kuṇṭatjaramunungku kura palyalkatinyi rawangku. Palulanguruya Godaku tjukurku watarkurira kutjupa kutjupa tjuṭa kutju kulini, Jesuku Christaku tjukaruru mulamularingkuwiyangku. ²⁰ Panya wati Aimanatjinya pula Alika-tjantanya palu purunyaringu. Kaṇa pulanya wantira Satanta kurakutu ma-walatjunu panya pula pina alaringkula Godanya kuranmankunytja wiyaringkunytjaku.

¹ Kulila! Ngañmanytjuña nyangatja wangkanyi. Utila Godala pulkara tjapinma aŋangu uwankaraku, tjanampa pulkara pukularira. ² Munula uti nguraku mayatja pulka tjutaku, munu mayatja kutjupa tjutaku kuļu tjapinmatu. Kalanya tjana tjinguru wirungku kanyinma nguluringkunytja wiya rapa pukulpa nyinanytjaku, nganaña Godala mīrangka tjukaruru nyinanytjaku. ³ Panya nganaña alatji rawangku palula tjapinnyangka Godanyalampa kulira pukularinyi, wankarunkupainya panya. ⁴ Panya paluru pulkara mukuringanyi aŋangu uwankara wankarunkunytjikitja nganaña tjukurpa mularku nintiringkunytjaku. ⁵ Panya mulapa Godanya kutju nyinanyi. Kutjupa palu puruny whole nyinanytja wiya alatjitu. Ka aŋangu uwankara kura nyinara palula ilaringkunytja wiya. Palu panya wati kutjungku nganananya Godala tjungulpai palula kalypa nyinanytjaku, wati panya Jesulu Christalu. ⁶ Panya aŋangu uwankarangku kura tjuta palyantjitjanguru paluru ngalkilarira anga-ilungu nganananya karalyarira wankaringkunytjaku. Panya nyara palula arangka Godalunku nganmanytju kulintjatjanungku witunu palumpa katja kutjukurutja, ka mulapa paluru pitjala nganampa ngalkilpa anga-ilungu aŋangu uwankara wankarunkunytjikitja. ⁷ Palu nyara palulanguruni Godalu witura iyanu ma-pitjala aŋangu uwankarangka wangkara tjakultjunkunytjaku. Palu ngayulu ngunti wangkanytja wiya, mulapanā wangkanyi, panya mulapa Godaluñi wangkangu tjukurpa mulapa nyangatja tjanala nintintjaku tjana kulira Jesuku Christaku mulamularingkunytjaku.

⁸ Uwa, kaña mukuringanyi aŋangu tjuta nyanga puruny whole inmaku tjunguringkula palyantjaku utiya wati wirungku mara katuringkula Godala tjapinma. Munuya uti tjananku pikangku ngaparku wangkanytja wiyangku piluntu Godala tjapinma mirpanarinytja wiyangku. ⁹⁻¹⁰ Kaya minyma tjuta uti kañany-kañanypa nyinanytja wiya. Panya kutjupa tjarangkuya mani pulkangka ulytja wiru tjuta payamilařa tjarpapai aŋangu tjutangku nyakula wirunmankunytjaku. Munuyanku mangka kutjupankupai, munuyanku apu gold munu upula puruny whole wiru tjuta mantjira liringka marangka kuļu tanpalpai tjutangku nyakunytjaku. Palu utiya minyma Godaku waltya tjutangku palu puruny whole kulintja wiyangku wantira palyanyku nyinara war karima munuya aŋangu tjuta wirura alpamilanma. Panya palu puruny whole palyannyangka Godalu nyakula pukularipai munu kulisai tjana palyanyku war karinytja wiru mulapa.

¹¹ Palu uti minyma inmangka nyinarampa pilunpa nintiringama palurunku mirawañinytja wiya. ¹² Panya ngayulu minyma pailpai paluru wati tjutangka Godaku tjukurpa nintinnyangka nyakula. Utiya minyma tjutangku wati tjutaku mayatjarinytja wiyangku wantira pilunpa nyinama. ¹³⁻¹⁴ Panya Godalu wati Adamanya ngañmanytju palyanu munu malangkalta minyma palyanu, Eve-anja panya. Ka panya minyma palunya lirungku ngunti kurañu, ka panya kulira mulamularingu titura munu Godala tungunpungu. Ka wati panya Adamanya lirungka mulamularingkunytja wiya. Pala palulanguruna minyma tjuta pailpai wati tjutangka nintintjaku wiya, tjana wati tjutaku mayatjarinytjaku-tawara. ¹⁵ Palu Godalu minyma wankarunkuku paluru iti kanyinnyangka, munu paluru Jesuku Christaku titutjara mulamularingkunyangka, munu aŋangu tjutaku mukulyangku palyannyangka, munu tjukaruru nyinanyangka piluny whole wirura nyinanyangka kuļu palunya wankarunkuku.

Jesuku Walytja Tjuta Atunymara Kanyintjaku

¹ Palu nyangatja war̄ka wir̄u mulapa panya Jesuku walytja tjuta atunymara kanyintja. Ka watingkumpa war̄ka nyanga palunya palyantjikitjangku kulira war̄ka wir̄u mularku mukuringanyi. Uwa, tjukurpa nyangatja mulapa. ² Palu utiya Jesuku walytja tjuta atunymankunytjaku ngurkantara tjunama wati palya mulapa kura palyalpai wiya. Uti paluru kuri kutjutjara nyinama. Munu uti paluru mirpañarirampa purkarangku kutju wangkama war̄uringkunytja wiyangku, munu pina wir̄ungku kulira palyanma, munu palyanyku nyinama. Munu uti paluru malikitja pitjanyangka nyakula pukularira altira palumpa ngurangka tjunama. Munu uti paluru Godaku tjukurpa tjukarurungku nintilpai nyinama. ³ Uti paluru tarangkaripai wiya, pika pungkupai wiya kalypa nyinama pilunpa, mirpañ-mirpañpa wangkanyta wiya. Paluru uti maniku pulkara mukuringkuwiyangku wantima. ⁴ Mununku uti kuri, tjitji kuļu atunymara wirura kanyinma, munu tjitji palumpa tungunpungkunytjaku-tawara wiruratu kanyinma, tjitji paluru tjana wanganarangku mama walkuntjaku. ⁵ Panya wati paluru kuri, tjitji kuļu puťu palyanyku kanyirampa palu purunypaťu puťu Jesuku walytja tjuta palyanyku kanyilkku.

⁶ Palu utiya wati panya ngañmanypa Godaku walytjaringkunytja tjuta kutju tjunama Godaku walytja tjuta atunymara kanyintjaku. Munu wati kuvari kutju Godaku walytjaringkunytja tjunkuwiyangku wantima, panya paluru anangu tjuta kuvari kutju kanyira tjinguru kañany-kañanyarira walytjangku mirawañiku palurunku. Ka Godalu palunya nyakula kuramankuku munu wantiku alatjitu palunya. Panya nyanga palu purunypa iriti Godalu mamu Satannga ilkaringuru wañingu palurunku ngarala kañany-kañanytju mirawañinyangka.

⁷ Ka panya anangu watarkitja tjutangku tjinguru wati Jesuku walytja kutjupa nyakula ngurkantanama wir̄u nyinanytja. Kaya Jesuku walytja tjutangku uti wati pala palu purunypa ngurkantara tjunama tjananya wirura atunymara kanyintjaku. Panya wati wir̄u nyanga purunypa tjunkunyangkaya watarkitja tjutangku nyakula palunya puťu kura ngurkantara wantiku wati palya mulapa nyakula. Kayanku Jesuku walytja tjuta palumpa kuňta wiya pukulpa alatjitu nyinama. Ka mamungku panya palunya puťu mukumukura puťu tariltjingara wantiku. Pala palula-tawaraya Jesuku walytja tjutangku uti wati palya mulapa ngurkantara tjunama atunymankunytjaku.

Jesuku Walytja Tjuta Alpamilantjaku

⁸ Palu kulila! Utiya palu purunypaťu wati palya mulapa ngurkantara tjunama Jesuku walytja tjuta alpamilantjaku. Wati panya ngunti-wangka tjunkuwiyangku wantira Godaku mukulyatjara kutju tjunama. Palu uti wati paluru waina pulkara tjkilwiyangku wantima munu maniku manyuringkunytja wiya nyinama. ⁹ Munu uti paluru unngu tjukarurungku kulinma yaaltji palya, yaaltji kura, munu Tjukurpa Palya Godalu nganañala utintjitia kanyinma alatjitu kulira wantintjija wiyangku. ¹⁰ Palu utiya wati alpamilalpai tjunkunytjikitjangku arkanma-warara munu palya mulapa kutju nyinanyangka nyakula ngurkantara tjunama tjukarurungku, ngunti-ngunti warpungkula tjunkunytja wiyangku.

¹¹ Ka wati alpamilalpaiku kuri kuļu uti palyanyku nyinama kutjupa kutjupa tjuta kulintja wiya, munu anangu kutjupa tjutangka tjukurpa kura para-tjakultjunkuwiyangku wantima. Uti paluru wirura nyinama munu tjukarurungku kutju wangkama anangu tjutangku palunya

nyakula ngukara kuranmankunytjaku-tawara. ¹² Ka wati alpamilalpai uti kuri kutjutjara nyinama mununku kuri, tjiti kulu tjukarurungku aṭunymara kanyinma. ¹³ Ka wati panya alpamilalpainya wiru palyanyku warkarinyangka nyakulaya Jesuku waltytja tjutangku palunya mirawañiku. Ka palulanguru alpamilalpai panya paluru Jesuku Christaku mulamularingkunytjatjanungku tjukurpa Jesunyatjara anangu tjutangka kunta wiyangku rapangku tjakultjunkuku.

Tjukurpa Kumpilitja Utiringkunytja

¹⁴⁻¹⁵ Uwa, ngayulu mukuringanyi kuwari ma-pitjala nyuntunya nyakunytjikitja. Palu rawaringkunytjaku-tawaraña lita nyangatja walkatjunanyi nyuntumpa. Kan lita nyangatja mantjira nyakula kulilkupanya nganana Godaku waltytja tjuṭa uti yaaltji-yaaltji palyanyku nyinama. Panya nganana God panya wankaku waltyjaringkula uwankara kutjuringu, munu panyala tjukurpa Jesunyatjara tjukarurungku kanyini kulira tjukarurungku wangkanytjikitjangku. ¹⁶ Nganampa tjukurpa kumpilitja, palu wiru mulapa panya kutjupangku nguntinmankunytjaku wiya. Nyangatja panya tjukurpa kumpilitja paluru,

Panya Godanya anangurira tjanala nyinangi anangu tjutangka.

Ka Kurunpa Milmiltu utinu tjananya, “Nyangatja mulapa.”

Ka angelpa tjutangku nyangu palunya mantangka nyinanyangka.

Kaya anangu tjutangku tjukurpa palunyatjara para-wangkangi ngura kutjupangka kutjupangka manta winkingka.

Kaya manta lipiwanungku kulira palumpa mulamularingu.

Ka palumpa mamangku palunya mantjira katingu ngura ilkaritjakutu.

4

Ngunti Wangkapai Tjuṭa

¹ Palu kulila! Kurunpa Milmiltu utingku wangkangu panya ngula kunyu anangu kutjupatjara Jesuku Christaku mulamularingkunytja wi-yaringkuku nganmanytju panya kulintjatjanu. Munuya kunyu mamu ngunti wangkapai tjutangka kulilkupanya wangarangku palumpa tjanampa tjukurpa tjuṭaku kutju mulamularingkula. ² Palu tjukurpa pala mamu tjuṭaku wati ngunti-wangka tjutangku para-tjakultjunkupai anangu tjutangka. Nyanga paluru tjana panya mamutjarangku alatjiṭu rapangku wangkapai kunta wiyangku. ³ Panya tjanaya kunyu wangkapai watingku kuri altinytja wiyangku wantinytjaku, munuya piruku wangkapai mai kuka tjara kutjupa ngalkuwiyangku wantinytjaku. Palu utila nyanga tjanaya kulilwiyangku wantima, panya Godalu mai kuka palunya tjanaya ngalkuntjaku mantangka tjunu. Munu panya paluru mukuringanyi Jesuku waltyjapitingku mai kuka palunya tjanaya ngalkuntjikitjangku palunya-warara walkuntjaku panya maiku kukaku pukularira. Godalu panya mai kuka ngalkuntjaku tjunu palumpa waltyjapitiku, panya paluru tjana tjukurpa mularku waltyjaringu. ⁴ Panyatjamantul tjuṭa mulapa Godalu palura wantingu, ka uwankara wiru mulapa ngaranyi. Kala uti wantiwiyangku pukultu mantjinma Godanya-warara walkura. ⁵ Mai kuka uwankara paluru palura palyanmanu nganana ngalkuntjaku. Munu paluru pukularipai nganana ngalkuntjikitjangku palunya-warara walkunnyangka munu nganampa nyakula mirpanarinnytja wiya.

Tjukurpa Tjukarurungku Wangkanytjaku

⁶ Timitji, nyuntu tjukurpa nyanganpa Jesuku walytja tjutangka tjakultjura tjananya tjukarurunma. Ka palulanguru nyuntu nyanga alatjingannyangka Jesuna Christanya nyuntumpa pulkara pukulariku mununta nyuntunya kulikku palumpa wiru mulapa palyantja. Panya nyuntu Godaku tjukurpa mulapa tjitjingkulpi kulilkatira maingka puruny whole=paljaringkukatingi. Panya nyuntunya Tjukurpa Palya nintinnyangkan wangañarangku kulinngi. ⁷ Palu panya kutjupa tjutangkuya ngunti wangkapai tjukurpa kutjupa kutjupa tjuña kulira. Palu tjukurpa nyanga paluru tjana Godaku wiya, ka nyuntu tjananya kulira wantima. Uti nyuntu Godala kutju wangañarangku kulinma munu arkara rawa palyanyku nyinama ma-palya mulararintjikitja Godalu nyakula nyuntumpa pukularintjaku. ⁸ Panya wati kunpuringkunyntjikitja arkara wirtjapakalpai. Arkantja nyanga paluru palya, palu uti nyuntu waintara munkaritja kulinma panya Godanya munu palumpa tjukurwanungku rawangku arkara kulilkatima palya mulararintjikitjangku. Panya nyuntu alatji arkantjatjanu kurunpa palya mulararira wanka mulapa titutjara nyinaku kuvari nyanga mantangka nyinara munu ngula ku lu Godaku ngurangka. ⁹⁻¹⁰ Nyanga palulanguru nganana Godaku tunguntungunpa pulkara alatjitu warkarinyi. Panya palumpa nganana pukulpa mulapa mulamularingkupai God wankaku, panya paluru uwankara wankarunkupainya. Paluru panya mulapa anangu palumpa mulamularingkunyangka wankalpai. Nyangatja mulapa alatjitu, uwankarangku kulira pulkara mulamularingkunyntjaku alatjitu.

¹¹ Uwa, tjukurpa nyanganpa tjanala wangkara nintinma tjana kulin-tjatjanu tjukarururingkunyntjaku. ¹² Palu nyuntu panya wati yan-gupala nyinanyangkaya tjara kutjupangku tjinguru nyuntunya ngunti kulira tjukutjukunmanama. Ka nyuntu alatji wangkanyangka tjananya kulira wantima munu rawa tjukaruru alatjitu nyinama. Ka nyuntu alatji nyinanyangka Jesuku walytja tjutangku tjinguru nyakula nyuntunya purunyarira arkara palya alatjitu nyinaku. Panya nyuntu wirura palyanyku wangkanyangka, munu panya tjukaruru nyinanyangka, anangu tjutaku mukulyangku alpamilanyangka, munu panya Jesuku mulamularingkula rapa nyinanyangka, munu ngunti kuralwiya palya alatjitu nyinanyangka tjana nyakula kulikku munu palu purunypa arkara nyinaku.

¹³ Ka nyuntu ngayulu malaku pitjanytjaku paṭara tjanala inmaku pitjala nyinanyangka Godaku tjukurpa nyakula wangkama munu tjananya titutjarangku utira wangkama tjana kulintjaku munu tjananya pulkara nintinma ninti mulararintjaku. ¹⁴ Ara panyatja watarkuriwiyangku kulinma panya nganmanyunta tjukurtjara tjutangku nyuntunya kata witira wangkanytja. Ka panya wangkatjarangku tjukurpa nyuntula tjakultjunu Godalu nganmanyantu palunya wangkanytjita. Ka panya palula arangka Kurunpa Milmiłtu nyuntunya ungu witulyanu nyuntu rapa mulararira palumpa tjukurpa nintintjaku. Ka nyuntunya alatji witulyankunyangka tungun-tunguntu nintinma wantintjija wiyangku witulya palunyatjarangku.

¹⁵ Uwa, Godaku tjukurpa tjanala wangkara pulkara nintinma. Munu uwankara ngayulu nyuntunya wangkara wantintjija wangañarangku kulira palyanma rawangku pakuringkunyntja wiyangku. Kantaya tjutangku nyakuku nyuntu alatji tjukarurungku palyannyangka, munuya kulikku, "Mulapa nyangatja ma-nintipukaringkula wiru mulararinyi." ¹⁶ Palu nyuntunku kulira atunyamanama tarilarantjaku-tawara, tjukaruru

nyinanytjikitjangku. Munun aŋangu tjutangka tjukarurungku nintintjikitjangku atatjura kulinma tarilarara ngunti wangkanytjaku-tawara. Ala Timitji, titutjara alatjitu tjukaruru nyinama ngatalpa pakuringkunytja wiya munu palu purunytytu titutjarangku tjanala tjukurpa nintinma tjukaruru mulatu. Panya nyanga purunymankunytjatjanungkun nyuntunku wankarunkuku nyuntu panya nintilpai tjuta kulu.

5

Jesuku Walytja Tjuta Tjukaruru Nyinanytjaku

¹ Ka wati tjlpingku tjinguru kura palyannyangka nyuntu uti palunya pulkara paintja wiyangku purkarangku kalypangku wangkama panya mamangka purunypa. Munu nyuntu uti wati yangupala tjutangka wangkama kutangka purunypa pauntjingalwiyangku. ² Munu panya minyma pampa tjutangka wangkama ngunyjtungka purunypa, purkarangku. Munu kungkawara tjutangka wangkama kangkurungka purunypa atatjura. Munu palula tjanala tjukaruru kunta-kunta nyinama wirura.

Minyma Wanakala Tjuta Wirura Kanyintjaku

³ Palu Timitji, nyuntu munu Godaku walytja tjutangku uti minyma panya wanakala kutju mulapa nyinanyangka wirura kanyinma walytja panya wiyatjara. ⁴ Palu panya wankala katja untalpatjara munta pakali puliritjara nyinanyangka, uti paluru tjananku kanyinma walytjangku. Panya minyma paluru tjananya tjitjilpi atunymara kanyiningi, kaya uti tjana ngapartji palu purunypatu atunymara kanyinma wanakalarinyangka. Ka panya alatjingannyaangka Godalu nyakula pulkara pukularinyi. ⁵ Ka minyma wanakala walytja wiya kutju nyinaranku Godanya kuliřa pukularipai munu mungawinki mungangka kuļu Godala tjapilpai palunya atunymara kanyintjaku. ⁶ Palu wanakala panya pirtjiwara nyinanytja ngaltutjara, kurunpa wiya purunypa nyinanyi watarku, wankakitja wiya. ⁷ Ka nyuntu uti tjanala wangka Godaku panya walytja tjutangka wanakala tjuta atunymara kanyintjaku. Ka tjana wanganarangku atunymara kanyinnyangkampa kutjupa tjutangku kuranmankunytjikitjangku kulintjatjanungku wantiku nyakula, "Munta, wirura nyangantu kanyini." ⁸ Palu Godaku walytjangkumpa tjinguru palumpa walytja tjuta atunymankunytja wiyangku wantirampa, nyara paluru Godanya kuļu wantinyi palumpa mulamularingkunytja wiyangku. Munu paluru watarkitja tjutangka waintara kura mulapa nyinanyi Godaku walytja wiya purunypa.

⁹ Palu kulila! Panya nyura Jesuku walytja tjutangku minyma wanakala ini tjuta walkatjunkupai tjananya atunymara kanyintjikitjangku munu wanakala paluru tjana Jesuku war̄karinytjaku. Palu utiya pampa tjuta kutju tjunama panya yiya 60 nyinanytjita tjuta kutju, munu yiya 60-ngka tjangaři nyinanytja tjuta tjunkunytja wiyangku, nampa panya palula munkaritja nyinanytja tjuta kutju tjunama. Munu wanakala paluru tjana nganmanypa kuri walytjangka kutju tjukaruru nyinanyangka ini walkatjunama. ¹⁰ Munu wiru palyannyangka kutju ini walkatjunama panya tjutangku nyakula mirawaninytjanya. Panya minyma nyanga purunytyu tjitjinku wirura ungkalyira kanyilpai, munu malikitja nyakula ngura palumpangka wirura tjarpattjura kanyilpai, munu Jesuku walytja tjutaku war̄ka kurakura mukulyangku wirura palyalpai, munu ngaltutjara tjuta alpamilara atunymara kanyilpai, munu wiru tjuta kutju palyalpai.

Uwa, minyma wanaka^{la} nyanga palu purunypa kutju ini tjunama, palyanyku nyinanytja panya.

¹¹ Palu uti nyura minyma wanaka^{la} tjukutjuku tju^{ta} ini walkatjunkunyta wiyangku wantima. Panya paluru tjana tjinguru ngula kuriku mukuringkula palulanguru Jesuku war^{ka} kulira palyantja wiyangku wantiku. ¹² Kaya kutjupa tjutangku nyakula ngukara wangkaku, "Wiya, nyura ngunti wangkapai!" Ka Jesunya ku^{lu} nyakula tjanampa pukularintja wiya. Panya tjana nganmanytju ngunti kalkunu Jesuku war^{karinytjikitjangku}, munu wiyingkula wantingu. ¹³ Panya wanaka^{la} paluru tjanaya war^{ka} wiya para-ngarala akatjari kutju paranyinapai munuyanku tjapira kulilpai tjukurpa palumpa tjananku kutju wangkanytjikitjangku. Munuya pakara ma-pitjala kutjupa tjutangka ngapartji nyinara tjukurpa kurakura tju^{ta} utira para-wangkapai. Utiya tjukurpa kurakura tju^{ta} para-wangkanytja wiyangku wantima.

¹⁴⁻¹⁵ Pala palula-tawara ngayulu kulini utiya wanaka^{la} tjukutjuku nyinapai tju^{ta} kuriyaralingama munu tjitjaralingkula ngura tjananku wir^ura kanyinma. Palu panya watarkitja tjutangku nganaⁿanya Jesuku waltyja tju^{ta} ma^{la} kuranmankunykitjangku arkara nyanganyi mirpa^{ntu}. Alatji kuliraya tjinguru nyanganyi, panya wanaka^{la} kutjupa tjutangku Jesunya wantira Satanta tzunguringu, kaya panya palulanguru tjinguru nganaⁿanya kuranmananyi mirpa^{ntu} panya tjutangku. Palu panya wanaka^{la} tjutaya wir^ura nyinanyangkampa mirpa^{ntu} panya tjutangku nganaⁿanya kuranmankunykitjangku kulira wantiku.

¹⁶ Palu wanyu piruku kulila wanaka^{la} panya tju^{ta} kanyintjikitjangku. Panya minyma Godaku waltyjangku uti palumpa waltyja wanaka^{la} nyinanyangka palunya wir^ura a^{tu}nymara kanyinma Jesuku waltyja kutjupa tjutangku ma-kanyintjaku-tawara. Panya paluru tjana uti wanaka^{la} waltyja wiya ma^{nt}alpa nyinanytja tju^{ta} kutju kanyinma.

Tjukurtjara Tju^{ta}

¹⁷ Ka panya ilta kutjupa tjutangku Jesuku waltyja tju^{ta} wir^ura atunytju kanyilpai, munuya kutjupa tjutangku Godaku tjukurpa tjanala tjakultjunkupai munuya tjanala nintilpai tjukarurungku kulintjaku. Kaya uti ilta palunya tjananya ngapartji pulkara mirawanima munu tjananya maningka payamilanma tjanala wir^ura palyanyku war^{karinyangka}.

¹⁸ Panya nyiringka iriti walkatjunkunyta ngaranyi nyanga alatji, "Nyuntu tjinguru puluka ukiri uninytjarangka warkamilaⁿⁱ kantura pirkuntakunytkaku uninypa tju^{ta} kutju mantjintjikitjangku. Palu alatji warkamilara puluka palunya tja^a karpintja wiyangku wantima, ka war^{karira} mai tjukutjuku palya ngalkukatima." *

Munu panya wangka kutjupa palu purunypa ngaranyitu nyanga alatji,

"Mayatjangku uti anangu kutjupa palumpa war^{karinyangka} mani ungama war^{kanguru}."

Kaya uti Jesuku waltyja tjutangku tjukurpa nyangatja kulinma, munuya tjukurtjara tju^{ta}, ilta tju^{ta} ku^{lu} palu purunypatu mani ungama tjanampa wir^ura war^{karinyangka}. ¹⁹ Ka tjinguru anangu kutjupangku nyuntula pitjala ngukara wangkaku, "Wati tjukurtjara nyaratja kura mulapa." Nyanga alatji kutjungku ngukara wangkanyangka kulilwiyangku wantima. Palu tjinguru ma^{nk}kurtu pitjala tjukarurungku ngukara wangkanyangka kutju kulira mulamularingama. ²⁰ Munu panyan wati tjukurtjarangku, tjinguru iltangku, rawangku kura palyanyangka nyakula Jesuku waltyja

* **5:18** Deuteronomy 25:4

tjuṭangka mirangka palunya wangkara painma. Kaya tjukurtjara kutjupa tjuṭangku, iltu tjuṭangku kuļu painnyangka nyakula kura palyantjaku nguluringkuku munuya palyanyku nyinanytjikitjangku kulilku.

²¹ Uwa, ngayulu nyanga nyuntunya uwankara wangkara wituwituṇi. Ka nyuntu wirungku kulinma uwankara palyantjikitjangku. Panya ngayulu nyangaṇa nyuntunya wangkanyi Godala mirangka, munu Jesula angelpa tjuṭangka mirangka kuļu. Ka nyuntu nyangatja kuliṛa aŋangu Godaku waltyja uwankara wangkara tjukarurunma maunṭara tjarangka kutju wangkanyta wiyangku, uwankarangkaṭu wangkama.

Tjinguru kutjupangku kura palyaṇi, ka nyuntu wangkara tjukarurunma munun tjinguru piṛuku tjukurtjarangku, tjinguru iltangku kura palyan-nyangka nyakula palu purunytjutu wangkara tjukarurunma, tjukurtjara munu iltu nyinanyangka wantintyta wiyangku. Munu kutjupara unytjungku paintja wiyangku wantima wirūra nyinanyangka. Palu uwankara palu purunytju wangkara tjukarurunma uwankarangku tjukarurungku kulintjaku.

²² Munu wati kutjupa Godaku war̄karinytjaku warpungkula ngunti tjunkuwiyangku wantima. Panya nyuntu warpungkula ngurkantara tjunkunyangka tjinguru maṛla kuraringkuku, ka nyuntu kuļu kura pala palula tjunguringkuku panya nyuntu warpungkula ngurkantara tjunu. Pala palula-tawara nyuntu uti tjukarurungku kulinma munu purkaṛangku ngurkantanama wati palya kutju, munu palulanguru kutju wati palula mara tjunkula miłmilmanama Godaku war̄ka palyantjaku.

²³ Uwa Timitji, nyuntu panya tjuni ilaṭu-ilaṭu pikatjararinganyi. Pala palula-tawara nyuntu uti mina kutju tjikintja wiyangku waina tjukutjuku kuļu tjikinma tjuni palyaringkunytjaku.

²⁴ Ka panya wati minyma kutjupa tjarangkuya tjuṭa mirangka utingku kura palyaṇi. Ka Godalu tjananya ngula ngaratjura kuṛu wangkaku. Palu kutjupa tjarangkuya kampangkaṭu kura palyalpai, palu panya ngula nyara tjana utiringkuku kura palyantjatjanu. ²⁵ Ka palu purunypaya kutjupa tjarangku tjuṭangka mirangka utingku wirū palyalpai. Ka palu purunypaṭu kutjupa tjarangku kumpira nguwanpa wirū palyalpai. Palu kumpilitja paluru utiringkuku panya wirū palyantja, kaya tjuṭangku kulilku.

6

Warkaripai Tjuta Tjukaruru Warkarinytjaku

¹ Jesuku waltyja kutjupa tjuṭa panya mayatjangka unytju war̄karipai manikitja wiya. Ka Timitji, nyuntu uti tjanala wangka mayatja tjanampa warkira kuranmankunytja wiyangku wantintyjtaku, munu mayatjangku tjananya wituwitunyangka pukultu wangaṇarangku kuliṛa palyantjaku. Panya tjinguruyanku tjanampa mayatja kuranmankuku, kaya aŋangu kutjupa tjuṭangku kuranmankunyangka kuliṛa Godanya wiyanmankuku wangkara, “Ai! Nyara tjana Godaku waltyja tjuṭangku warkipai watarkitja tjuṭa purunytju. Tjinguru Godanya mulapa wiya.” Alatjiya tjinguru nyakula kulilku munuya tjukurpa nganana wangkara nintintja kuranmankuku. Ka pala palula-tawara nyuntu uti warkaripai tjuṭangka wangka mayatjangka wangaṇara war̄karinytjaku kutjupa tjuṭangku nyakula Go-danya wirūnmanunytjaku palumpa tjukurpa kuļu.

² Palu mayatja kutjupa tjuṭa panya Godaku waltyatju nyinanyi. Kaya tjananya warkaripai tjuṭangku tjinguru alatji kulilku, “Nyara ngayuku

mayatja Godaku walytja nyinanyi. Wanyu kaña tjukutjuku nguwanpa war̄karima pulkara war̄karinytja wiya panya paluru ngayuku walytja Jesulanguru.” Alatjiya tjinguru kulikku war̄karipai tjutangku. Ka Timitji, nyuntu uti tjanala wangka nyanga palu puruny whole kulintja wiyangku wantintjaku munu mayatjangka kulira wirura pulkara war̄karinytjaku. Panya mayatja paluru Godaku walytja tjanampa kulu walytja, munu paluru tjanampa pulkara pukularinyi palumpa wirura war̄karinyangka.

Mani Kulintja Wiya Nyinanytjaku

³ Uwa Timitji, nyuntu uti anangu tjutangka tjukurpa nyanga palunya tjananya wangkara nintinma. Palu tjinguru wati kutjupangku tjukurpa kutjupa kutjupa nintilku mayatja Jesuku Christaku tjukurpa wiya, nyuntu nganana nintintja puruny whole wiya. ⁴⁻⁵ Munu wati pala paluru kañanya-kañanya nyinanyi ninti-palku, palu paluru ngurpa alatji. Paluru panya ngunti-ngunti ngaparku wangkara nyinara kulintjikitja kutju mukuringkupai. Munu palulanguru paluru mirpañ-mirpañt wangkapai pikangku. Munu paluru anangu kutjupa tjuta analpai munu kuranmankupai. Panya paluru tjukurpa mulapa kulira wantira pina kuraringkula pikangku rawangku wangkapai. Munu wati paluru ngunti kulipai alatji, “Ngayulu tjinguru Jesuku walytja nyinarampa mani pulka mantjilku.” Palu wiya, wati pala paluru ngunti kulipai.

⁶ Palu panya Godaku walytjangku mantatja kutjupa kutjupa tjuta waintara kulilwiyangku wantirampa Godaku iwara kutju wañarampa paluru pukulpa mulapa nyinaku. ⁷ Kulila, nganana wanyu nyaatjara iti ngaringu? Panya nganana kutjupa kutjupa tjuta wiya iti ngaringu nikiti alatji. Munula ngula ilura nyaa katiku ilkarikutu? Wiya nganana kutjupa kutjupa tjuta katintjya wiya maralpa ananyi. ⁸ Ala, pala palunyalu uti kulinma munula mai, mantara kutju kanyirampa pukulpa mulapa nyinama munula kutjupa kutjupa tjutaku waintara pulkara mukuringkunytja wiyangku wantima. ⁹ Palu panya kutjupa tjutangkuya maniku pulkara mukuringkunytjatjanungku mamuku wangka kulipai ngunti arkara wangkanyangka. Munuya palulanguru ngunti kulira rawangku kura palyalpai mani kutju kulira kura kutjupa kutjupa tjuta kulu kulira. Nyara palulangurya kura mulararira ma-wiyaringkula ilura kawankatipai. ¹⁰ Panya maniku manyungku-mantu kura kutjupa kutjupa tjuta palyalpai. Panya kutjupa tjutangkuya manitjiratjangku tjukurpa mulapa Jesuku mulamularingkunytjatjanungku kulira wantir'iana munuyanku walytjangku tjuni kurani, unngu kura nyinara.

Timitjinya Wirura Nyinanytjaku

¹¹ Palu Timitji kulila! Palunya tjananya purunyarinytja wiyangku wantima panya nyuntu Godaku wati. Rawangku kulinma Godalawanu tjukaruru palyanyku nyinanytjikitjangku paluru nyakula pukularinytjaku. Munu Jesuku Christaku rawa mulamularingama panya paluru nganampa ngalkilpa ilunytjitetjaku. Munu mukulya pukultju pulka nyinara anangu tjutangka purkarangku wirura wangkama. Munu rawangku Godanya tungun-tunguntu wañanma pakuringkunytja wiyangku. ¹² Palu tjukurpa mulapa rawangku palyanyku kulintja panya pulkara wirtjapakantja puruny whole. Panya anangu tjuta waintarinytjikitja pulkara wirtjapakalpai winatja wiru mantjintjikitja. Panya tjana purkara wirtjapakantja wiya munu ngururpa tultjarukatinjtja wiya panya tjana waintarinytjikitja mukuringkula pulkara alatji wirtjapakalpai. Ka Timitji, nyuntu palu

purunytju tungun-tunguntu Godanya wañanma palumpa tjukurpa kulin-tjatjanungku munun palulanguru winatja wiru mulapa mantjilku panya nyuntu wanka mulapa nyinaku Godala tjungu. Panya nganmanytjun tjutangka mirangka wangkangu Jesunya Christanya wañantjikitjangku tjukurpa mulapa kulintjatjanungku. Nyara palula aranta Godalu altingu palulakutu pitjala wanka titutjara rawa nyinanytjaku.

¹³⁻¹⁴ Uwa, Godalu panya uwankarañu wankaru kanyilpai. Kaña palula mirangka nyuntula wangkara nyuntunya wituwituni Jesula Christala mirangka kuñu. Panya paluru Pontius Pilate-ala ngarala tjukurpa wiru wangkangu mungañu. Uwa, palula pulala mirangkananta wangkanyi alatji, nyuntu ngayulu wangkara wituwituntja uwankara wanganarangku kulira palyanma rawangku Mayatja Jesunya Christanya mañaku pitjanytjakutu-wangkara. ¹⁵ Palu Godalu kutjungku kalkuntjatjanungku kulini yaalaña Jesunya mañakungku iyantjikitjangku nganañalakutu. Paluru kutju ninti ara nyara palumpa. Ka mulapa nyara palula arangka Jesunya pitjala utiringkuku nganañala paluru iyannyañgka. Panya Godanya Mayatja pulka mulapa wiru alatjitu, mayatja kutjupa uwankarangka waintara alatjitu nyinanyi. ¹⁶ Panya paluru kutju ilunytja wiya titutjara wanka nyinanyi. Paluru panya tili pulkangka nyinanyi pitalytji pulka mulapa, kala palulakutu puñu ilaringanyi. Panya anangu kutjupangku palunya nyakuwiya alatjitu. Paluru kutju Mayatja witulya pulka mulapa anangu tjutangku pulkanmankula mirawaninytjaku rawa mulatu.

¹⁷⁻¹⁸ Ka Timitji, nyuntu uti mani pulkatjara tjutangka wangka kañanyañypa wiya nyinanytjaku. Utiya paluru tjana mani mantjirampa tjunkukatira pulkantja wiyangku wantima, panya alatji rawangku tjunkula tjana Godaku watarkurira maniku kutju mulamularinganyi. Ka nyuntu tjananya wangka Godanya pulkara kulintjaku kutjupa kutjupa tjuña wiyangku. Panya Godalu kutjungkulanya uwankara ungpai nganaña pukulpa nyinanytjaku. Ka nyuntu manitjara tjutangka wangka anangu kutjupa tjuñaku wiru tjuña palyantjaku, munu tjananya intjanungku ungpai nyinanytjaku. ¹⁹ Panya mantangka nyinara intjanungku ma-ungkulaya tjana Godanya pukulmananyi, maniku mulamularingkuwyangku wantira. Ka Godalu tjananya ngapartji ngula ngura ilkaritjangka wiru mulapalta ungpai nyinanytjaku. Alatji tjana mantangka palyantjatjanu ngula ngura ilkaritjangka wanka mulapa titutjara nyinaku Godala tjungu.

²⁰ Palu Timitji kulila! Panya Godalu nyuntunya tjukurpa ungpai nyinanytjanya tjukarurungku kanyira wangkama. Munu kutjupa tjutangku tjukurpa kurakura ngunti wangkanyangka kulintja wiyangku wantima. Panya tjukurpa palunyaya nyinara ngunti arapungkupai nintingu-palku. ²¹ Panya tjarangkuya tjukurpa palumpa tjanampa mulamularingkula pala palulanguru Jesuku Christaku mulamularingkunyta wiyaringu ngunti panya kulintjatjanu.

Uwa alatjituña wangkanyi. Ka Godalu nyuntunya pukultju pulkangku wiruña kanyinma.

Lita Nampa 2 Paulalu Walkatjura Iyantja Wati Ini Timitjilakutu 2 Timothy

Nyangatja Nganmanytju Nyakula Wangkanytjaku

Nyangatja lita kutjupa Godaku tjukurpa Paulalu walkatjunkunytja Timitjiku. Paluru panya ngura ini Rome-alanguru walkatjunu tjailangka nyinara, ka Timitjinya panya ngura ini Ipitjala nyinangi. Ka Paulalu lita nyangatja palulakutu iyanu Timitjilu mantjira nyakunytjaku munu nyakunytjatjanungku Jesuku walytja tjutangka wangkanytjaku.

Palu Paulanya panya Timitjiku pulkara mukuringangi munu palunya rawangku kulilpai panya paluru Ipitjala nyinara anangu Jesuku walytja tjuta kanyira atunymankupai. Ka ngura nyara palula anangu kutjupa tjuta Jesuku walytja purunypa nyinapai, palu panya Satantu tjananya ngunti kuranningi, kaya mulamulangku Jesunya wañantja wiyat. Panya watu mañkurtu tjanala tjukurpa ngunti wangkara nintiningi tjukaruru-palku. Ka lita nyangangka Paulalu Timitjila wangkangu Tjukurpa Palya mulapa Jesunyatjara kutju mulamulangku kulintjaku munu Jesuku walytja tjutangka tjukurpa palunya kutju wangkara nintintjaku tjukurpa tjukaruru kutju. Panya paluru mukuringangi Timitjinya tjana Godalawanu kutju nyinanytjaku tjukurpa mulata tjukarurungka.

Tjukurpa nyanganpa ngarinyi:

1:1-2 Paulalu nganmanytju wangkanytja

1:3 — 2:13 Paulalu Timitjinya wangkara rapantja Jesunya rawangku wañantjaku

2:14 — 4:8 Paulalu Timitjila wangkanytja Godaku pulkara war karinytjaku munu Godaku tjukurpa tjukarurungku nintintjaku

4:9-22 Paulalu tjukurpa malatja wangkanytja

Paulalu Timitjila Nganmanytju Wangkanytja

¹ Uwa Timitji, ngayuluña Paulalu lita nyangatja nyuntumpa walkatjunnanyi. Panya Godaluñi ngurkantaña tjunu Jesuku Christaku tjukurtjara war karinytjaku mununi witura iyanu tjukurpa paluru kalkuntjtija anangu tjutangka tjakultjunkunytjaku, panya paluru nganmanytju kalkunu anangu tjuta Jesula Christala tjunguringkunyangka tjananya wankara titutjarangku kanyintjikitjangku. ² Uwa, nyuntu ngayuku katja purunypa, kana nyuntumpa pulkara mukuringkula lita nyangatja nyuntulakutu iyanu.

Ka Mama Godalu Mayatja Jesulu Christalu kuļu nyuntunya pukultju pulkangku kanyinma munu nyuntunya kurunpa rapara pukulmanama ngaltunytju pulkangku.

Paulalu Timitjilanguru Godanya Walkuntja

³ Palu ngayulu nyuntulanguru rawangku Godanya walkulpai nyuntu palunya wirura wañannyangka. Iriti panya ngayuku tjamu tjutangku Godanya wañantjikitjangku nyanga alatji kuliningi, “Nyangatja iwara tjukaruru. Nyanga palulawanula anama.” Kana ngayulu palu purunytjutu Godanya purkarangku wañantjikitjangku alatji kulilpai, “Nyangatja iwara

tjukaruru. Nyanga palulawanuña anama.” Munuña Godala tiṭutjarangku tjapilpai kałala mungangka, munuña palula tjapira nyuntunya kulilpai watarkurintja wiyangku.⁴ Munuña nyuntunya kulira ngayulu panyatja kulilpai, panya nyuntu mungaṭu ngayuku ulanytja, munuña palulanguru pulkara mukuringanyi nyuntunya piruku nyakunytjikitja munu nyakula pulkara pukularintjikitja.⁵ Munuña nyuntunya kulira ngayulu pukultu kulilpai alatji, “Wati paluru kurunpa winki Jesuku mulamularingkupai palumpa tjukurpa tjukarurungku kulira.” Alatjina kulilpai. Munuña piruku kulilpai nyuntumpa kami Lawatjanya munu nyuntumpa ngunyту kulu Yunitjanya panya paluru pula nganmanypa Jesuku pulkara mulamularingu. Munuña kulilpai, mulapa nyuntu paluru pula purunypa pulkara mulamularingkupai kurunpa winki.

Paulalu Timitjinya Wangkara Rapantja

⁶⁻⁷ Uwa, mulapa nyuntu Jesuna tjukarurungku wañani, kaña nyara palulanguru nyuntunya piruku wangkanyi ngulu wiya rapa ngaranytjaku kunṭaringkuntya wiya. Kulini panyatja? Panya mungaṭuña nyuntula katangka maṛa tjunu, kanta Godalu Kurunpa Milmiltawanungku nyuntunya witulyanu palumpa warka rapangku palyantjaku. Ka palulanguru nyuntu uti Godaku warka nguluringkuwiyangku palyanma, panya Godalu Kurunpa Milmiltu nyuntunya nganañanya witulyankupai Jesuku walytja uwankara, nganaña ngulu wiyangku rapangku palumpa warka palyantjaku munu anangu tjutaku kulu pulkara mukuringkuntytjaku. Kurunpa nyara paluru panya nganañanya witulyankupai kuraku wituwitunnyangka wiyanmankunytjaku.⁸ Paluru nganañanya kunpulpai, ka palulanguru nyuntu uti rapangku wangkama tjukurpa Jesunyatjara kunṭaringkuwiyangku. Munu ngayuku kulu kulira kunṭaringkuwiyangku wantima nyanga tjailangka nyinanyangka. Panya Mayatja Jesuku tjukurpa wangkanyangkanya tjarpatjunu nyangatja. Munuya tjinguru palangka nyuntunya kulu tjarpatjunkuku nyuntu palu purunytytu tjukurpa wangkanyangka. Palu palya, Godalu nyuntunya kulu witulyankuku nguluringkuwiyangku palumpa tjukurpa rapangku wangkanytjaku. Ka palulanguru ngayulu purunytytu tungun-tunguntu palumpa tjukurpa wangkama rapangku munu kutjupa tjutangku nyuntunya anara kurannyangka kulira wantima.

⁹ Panya Godalulanya ngurkantanu munulanya wankarunu palumpa katja unṭalpa palya mulapa nyinanytjaku. Palu tjingurula kulini nyanga alatji, “Godalu-mantilanya ngurkantanu palya nyinara wiřu tjuta palyannyangkampa.” Palu wiya, paluru alatjitu walytja mukuringkula kulira nganañanya ngurkantanu ngalṭunytytu pułkangku. Panya kuwari-patjara manta paluntja kuwaripangkalpi paluru kulinu nganañanya ngalṭunytyjungku kanyintjikitjangku. Nyara palula ara alatjitu kuwari-patjara paluru kulinu palumpa katja ngula iyantjikitjangku nganampa ngalkilpa ilunytjaku.¹⁰ Ka panya paluru mantakutu pitjangu Jesuna Christanya panya, munu nganampa ngalṭunytytu pułka mulapa ngalkilpa anga-ilungu nganañanya-tjiratja, munulanya kuranguru wankarunu illura ngura kurakutu ankunytjaku-tawara. Nyara paluru panya ilunyt-jatjanu wankaringkula pakau munu nganañala Tjukurpa Palya utira tjakultjunu, kala nganaña kulu palumpa mulamularingkula ilunytjatjanu wankaringkula pakalku munula Godala tjunguringkula wanka tiṭutjara nyinaku. Nyara palulangurula kulini panya Mayatja Godanya nganampa ngalṭunytytu mukulya pułka mulapa nyinanyi, kala ilunytjikitjangku kulira

nguluringkunytja wiya rapa ngarama, panya nganaña palumpa mulamularingkula ilunytjatjanu wankaringkula pakalku Godala tjunguringkula titutjara nyinanytjikitja.

¹¹ Ka panyani Godalu mulapa ngurkantara tjunu Jesuku Christaku tjukurtjara war karinytjaku, mununi witura iyanu Tjukurpa Palya Jesunyatjara anangu tjutangka wangkara nintintjaku. ¹² Ka panyaniya tjukurpa nyanga palulanguru ngayunya kuralpai mununiya kuwari nyanga witira tjailangka tjarpatjunu. Palu ngayulu nyangangka nyinara kuntingkunytja wiya rapa nyinanyi, panya ngayulu Jesuku mulamularingkula palumpa ninti pulka nyinanyi. Panya paluruni war ka ungu palumpa Tjukurpa Palya anangu tjutangka wangkanytjaku, munu tjukurpa palunya paluru rawangku tukaruru kanyilkku, tjintu malatjakutu-wangkara kutjupangku ngunti kampa kutjupankunytjaku-tawara.

¹³ Ka Timitji, ngayulu panya nyuntula tukarurungku tjakultjunu Tjukurpa Palya Jesunyatjara. Ka nyuntu nintiringkunytjatjanungku tjanala ngapartji tukarurungku wangkara nintinma tjukurpa panya palunyatu. Munu alatji war karira Jesuku rawa mulamularingama wantintyta wiya munu anangu tjutaku pulka mukuringama Jesulu nyuntunya witulyankunyangka. ¹⁴ Panya Godalu nyuntunya Tjukurpa Palya ungu mununta nintinu tukarurungku wangkanytjaku anangu tjutangka. Ka nyuntu tjukurpa palunya tukaruru mulatu wangkara utinma, munu anangu kutjupangku tjukurpa palunya ngunti kalikali wangkanyangkampa kulira palunya tukarurunma. Munu kulinma panya Kurunpa Mil milnga nganañala uwankarangka unngu nyinanyi mununta nyara paluru alpamilani tjukurpa palunya rawangku tukarurungku wangkara nintintjaku.

¹⁵ Uwa Timitji, nyuntu ninti panya Jesuku waltyta tjutangku niya ngura nyara Aitjala nyinapai tjutangku wantingu alatjitu tjailangka tjarpatjunkunyangka alpamilantja wiyangku. Mununi wati panya Pikilat-jalu pula Amatjanilu kulu palu purunypatu wantingu alatjitu alpamilantja wiyangku. ¹⁶⁻¹⁷ Palu wati kutjungku ini Anitji-puraku ngayunya pitjala nyangangi. Paluru kunyu ngura nyanga Rome-ala wirkara wali kutjupangka kutjupangka ngayuku para-nguriningi munu tjailangka nyinanytja kulira wantintyta wiya pitjala ngayula tukaruru wirkanu mununi kurunpa pulka pukuimanu. Kaña nyara palulanguru Mayatja Jesula tlapini wati panya palumpa waltyta tjutaku ngaltunytjungku wirura kanyintjaku. ¹⁸ Mununa palumpa kulu Godala tlapini alatji wangkara, "Mayatja Jesu, ngula tjintu malatjangka nyuntu anangu tjuta ngurkantara tjaralku nyuntumpa waltyjapiti munu nyuntunya wantipai tjuta. Tjintru nyara palula Anitji-puraku ngalturingama munu palunya kulu ngurkantanama nyuntumpa waltyta nyinanytjaku." Alatjina palumpa tlapini. Ka Timitji, nyuntu ninti wati nyanga palumpa, panya paluru kutjungku ngayunya wirura alpamilaningi ngura nyara Ipitjala. Panya nyara palula nyuntu ngayula tjungu nyinara palunya nyangangi ngayuku wirura rawangku palyannyangka.

2

Jesunya Rawangku Wanama

¹ Palu wati wiru kulila, nyuntu ngayuku katja purunypa, kaña nyuntunya wangkanyi Jesula Christala tjungu titutjara ngaranytjaku, ka paluru nyuntunya kumpulku. Panya nganaña palula tjungu ngaranyangka

paluru nganananya mukulyangku atunymara kanyilpai.² Nyuntu panya kuliningi ngayulu anangu tjutangka mirangka Godaku tjukurpa Jesunyatjara wangkara nintinnyangka. Ka nyuntu tjukurpa nyanga palunya anangu wanganara tjutangka wangkara nintinma. Ka tjana ngapartji anangu tjutangkalta ma-tjakultjunkuku.

³ Palu kulila, nyuntu anangu tjutangka Jesuku tjukurpa wangkanyangkaya kutjupa tjutangku panya ngayuku purunypa nyuntumpa ngapartji mirpañarira pikaringkuku. Ka nyuntu nguluringkuwiyangku tungun-tunguntu Jesuku warika palyanma, panya wati tjaultji purunytpu, panya paluru pikaringkunyangka ngulu wiya alatjitu rapa ngarapai, palu purunypa nyuntu Jesuku warkarira rapa ngarama.⁴ Palu wanyu kulila, kananta ara mankurpa tjakultjura nyuntu kulira nintiringkunytjaku. Ngañmanytjuña tjakultjunanyi wati tjaultji tjutaku ara. Panya tjaultji tjutaya palumpa tjanampa mayatjaku kutju wanganara warkaripai palunya kutju pukulmankunytjikitja munuya kutjupa tjutaku warkaripai wiya alatjitu. Ka nyuntu palu purunypa Jesuku Christaku kutju pulkara warkarima paluna pukulmankunytjikitja.

⁵ Munuña piruku ara kutjupa tjakultjunanyi wati wirtjapakantjatjara. Panya anangu tjutangka mirangka wati pulkara wirtjapakalpai kuranyu alatjiwu wiru mantjintjikitja. Palu tjinguru paluru ngururpa wirtjapakara angatjunkunyangka anangu tjutangku palunya mirawanira wiru ungtunytja wiyangku wantiku. Paluru tjinguru pulkara wirtjapakanma, palu wiya. Ka Timitji nyuntu pala palu purunypa arkalwiyangku wantima munu tjukarurungku Jesunya wañanma, kanta paluru nyakula mirawanira wiru ungtunytja.

⁶ Munuña ara kutjupa malatja tjakultjunanyi nyuntu kulira nintiringkunytjaku wati panya kaana kanyilpaitjara. Wati paluru panya mantangka pulkara warkaripai pakuringkunytja wiya munu mai pulka pakaltjingalpai munu ngula mai kururingkunyangka paluru katara uralpai munu paluru-warara pulkara warkarinytjatjanungku mai ngañmanytju mantjilpai palurunku, kaya kutjupa tjutangku mala mantjilpai. Ka Timitji, nyuntu palu purunypa Jesuku pulkara warkarima pakuringkuwiya, kanta paluru nyuntunya atunytju kanyilku.⁷ Uwa, ara nyanga mankurnguru kulinma purkarangku nintiringkunytjikitjangku, kanta Mayatja Jesulu nyuntunya tjukarurungku kulintjaku nintilku.

⁸ Uwa, Jesunya Christanya tungun-tunguntu wañantjikitjangku palunya titutjarangku kulinma watarkuriwiyangku, panya paluru Mayatja Davidaku pakali malatja mulapa, ka panya Godalu palunya ilunyangka wankara pakaltjinganu. Kana tjukurpa nyanga wiru palunya anangu tjutangka tjakultjunkupai.⁹ Kananya tjukurpa nyanga palunya wangkanyangka tjailangka witira tjarpatjunu mununiya tjiinangka karpira kanyini wati kuralpai-palku. Palu palyaya ngayunya karpira kanyini, palu tjana Godaku tjukurpa putu wiyan. Panya Tjukurpa Palya Jesunyatjara ngura winkingka lipiringanyi, kaya anangu winkingku kulini.¹⁰ Nyara palulanguruna rawa warkarinyi kutjupa tjutangku ngayunya kurannyangka kulira tjituru-tjitururinytja wiya. Panya Godalu anangu kutjupa tjuta kulu ngurkantanu Jesulawanungku wankarunkunytjikitjangku, kaya palumpa walytjaringkula palula tjungu titutjara nyinaku pukulpa mulapa. Nyara palulanguruna palula tjanala

ku_{lu} Tjukurpa Palya tjakultjunanyi paluru tjana ku_{lu} kulira wankaringkunytjaku, mununa mirpa_ntju tju_langku ngayunya markunnyangka kulira wantipai ilunytja kulira nguluringkunytja wiyangku.

¹¹ Uwa, utila Jesunya Christanya tungun-tunguntu wa_nanma, panya tjukurpa wiru nyanga alatji ngaranyi tjukaruru mulapa,
“Ngana_{na} kura wantirampa Jesula tjunguringkula palula tjungu wanka ti_lutjara nyinaku.

¹² Ngana_{na} palunya ti_lutjarangku wa_narampa ngula palula tjungu may- atjarira nyinaku.

Palu tjinguru ngana_{na} Jesuku ngurparingkunyangkampa, paluru ngapartji nganampa ngurparingkuku_{lu}.

¹³ Ngana_{na} kutjupa-ara kalkuntjatjanungku palyalpai wiya.
Palu Godalu kalkuntjatjanungku palyalpai alatji_{tu}, tjukarurungku.
Panya paluru wangkanytjatjanungku walytjangku anantja wiya alatji_{tu}.”

Godaku Warka Wanganarangku Palyanma

¹⁴ Uwa Timitji, tjukurpa nyanga palunya tjananya Jesuku walytja tju_langka rawangku wangkara nintinma watarkurinytjaku-tawara. Munu Godala mirangka tjananya markunma tjukurpanguru ngaparku wangkawiya nyinanytjaku. Panya paluru tjana alatji rawangku wangkara kuraringanyi Jesula kunpuringkunytja wiya. Kaya tjinguru kutjupa tju_langka tjanala ngaparku wangkanyangka kulira kuraringkuku_{lu} munuya palulanguru tjinguru Jesulanguru paturingkuku. ¹⁵ Ka Timitji, nyuntu Godaku pulkara wa_rkarima pakuringkuwiya paluru nyakula pukularinytjaku. Munu tjanala Godaku tjukurpa tjukarurungku nintinma purkarangku, ngunti wangkara kun_laringkunytjaku-tawara.

¹⁶ Panya anangu kutjupa tju_langkuya tjukurpa ara tjukutjuku tju_{ta} un- ytjungku wangkapai, tjukurpa mantatja tju_{ta}. Ka nyuntu palunya tjananya kulira wantima munu maun_lalpa nyinama, panya alatji rawangku wangkaraya paluru tjana Godalanguru ma-paturinganyi munuya ma- paturingkula palumpa watarkurinyi. ¹⁷ Panya tjukurpa tjanampa lipiringkupai, nyaa purunypa panya pika kunma_{lu} purunypa, panya pika paluru miringka nyinakatira miritjina wiyangka pulkaringkupai munu puntu winki kuralpai, palu purunypa tjanampa tjukurpa anangu tju_langka lipiringkupai, kaya uwankara ma-kuraringkula Godalanguru paturingkupai.

Panya wati Yama-nitjalu pula Palitalu tjukurpa kurakura nyanga purunypa tju_{ta} anangu tju_langka ngunti nintiningi. ¹⁸ Panya paluru pula Godaku tjukurpa tjukaruru wantingu munu pula kuvari tjukurpa kutjupa kulira ngunti wangkara nintini Jesuku walytja tju_langka. Munu pula ngunti wangkapai nyanga alatji, “Tjin_ltu panya paluru nga_nmanypa ngarala wiyaringu panya Godalu anangu ilunytjtja tju_{ta} wankara pakaltjingantja.” Alatji pula nintilpai ngunti. Kaya anangu kutjupa tjarangku kulira palumpa pulampa mulamularingu munuya palulanguru ngunti kulira Godalanguru ma-paturingu, palumpa pulampa tjukurpa kulintjatjanu. ¹⁹ Palu kulila, Godalu panya palumpa walytjapiti ngurkan- tanu munu tjananya atunymara kanyini palula tjungu kunpu nyinanyt- jaku, ka kutjupangku tjananya pu_{lu} kura_{ni}. Ka nyanga palumpa tjanampa ara kutjara ngaranyi. Kutju ngaranyi alatji,

“Panya Godanya ninti palumpa walytja tju_laku.”
Ka kutjupa nyanga alatji ngaranyi,

"Nyuntu Jesunya mayatjanmaraampa kura uwankara wantima munu palyanyku nyinama."

²⁰ Palu kuwariña tjukurpa ara kutjupa tjakultjunanyi nyuntu kulira nintiringkunytjaku alatji, panya anangu mani pulkatjara wali wirungka nyinapai munu paluru pulita, panikina, piti kutjupa kutjupa tjuتا kulu walingka kanyilpai. Ka piti kutjupatjara puli gold-nguru munu tjiilpanguru palyantja wiru mulapa ngaripai. Ka piti kutjupa tjuتا pununguru tjulpirnguru palyantja kurakura tjuتا ngaripai. Ka watu paluru mai ngalkuntjikitjangku pulita piti kurakura mantilpai pununguru tjulpirnguru palyantja. Palu tjinguru paluru mai pulka palyara altiku mayatja kutjupa tjuتا palumpa ngurangka tjunguringkula ngalkuntjaku. Munu paluru pulita panikina piti wiru tjuتا ngurkantara taipulangka tjunkuku gold-nguru tjiilpanguru palyantjitja, kaya pitjala piți wiru tjuتangka ngalkula tjikilku.

²¹ Ka nyanga palu purunyapa ngaranyi Jesuku walytja tjuتaku. Panya kutjupangku kura wantira tjukaruru palyanyku nyinanytjikitja mukuringkunyangka Godalu palunya ngurkantankuku warка wiru palumpa palyantjaku. Panya anangu nyara paluru Mayatja Jesula wanganarangku kulilpai palumpa warка kutju palyantjikitja mukuringkula. Ka Mayatjalu palumpa pukularira warка wiru tjuتا palunya ungkuku paluru wanganarangku kulira palyantjaku.

²² Ka Timitji, nyuntu Godaku warка wiru palyantjikitja mukuringkula nyanganpa kulila. Panya yangupala tjuتا kura kutjupa kutjupa tjuتا palyantjikitja mukuringkupai, palu nyuntu palunya tjananya arkan-tja wiyangku wantira palyanyku nyinama. Panya Jesuku walytja kutjupa tjuتangku kura wantintjtjanungku Godanya tjukarurungku waنantjikitja mukuringanyi, ka nyuntu tjanala tjunguringama munu tana purunytju rawangku kulinma Godalawanu tjukaruru palyanyku nyinanytjikitjangku munu palumpa pulkara mulamularingama, munu anangu tjuتangka mukulya pukultju nyinama tjanala tjungu.

²³ Ka anangu kutjupa tjuتangku tjukurpa tjukutjuku tjuتا kulira rawangku ngaparku wangkapai. Ka Timitji, nyuntu tjanala tjunguringkuwiya mauntalpa nyinama, panya tana pina pati munuya unytjungku rawangku ngaparku wangkapai wiyanguru alatji. ²⁴ Palu Mayatja Godaku warکaripai tjuتا uti ngaparku wangkanyta wiya nyinama munuya uti anangu kutjupangku pikaringkula wangkanyangka ngapartji wangkanyta wiyangku wantima. Uti Godaku warکaripai tjuتا ngaltunytju mukulya pulka nyinama, munu anangu tjuتangka purkarangku wangkara nintinma mirpaنariwyangku. ²⁵ Munuya uti kutjupa tjuتangku tungunpungkula wangkanyangka palunya tjananya purkarangku wangkara tjukarurunma. Ka Godalu tjinguru palunya tjananya malakungku arurilyilku Tjukurpa Palyaku mulamularingkunytjaku. ²⁶ Panya mamu Satantu tjananya ngunti kuranu palula wanganarangku kulintjaku munu tjananya karpira kanyini. Palu Godalu nintinnyangkaya tjinguru kulira Godalakutu malaku aruringkuku.

3

Tjintu Małatja Ilaringkunyangka Anangu Tjuta Kuraringkunytja

¹ Palu wanyu kulila, panya tjintu malatja ilaringkunyangka kura kutjupa kutjupa tjuتا wirkankunyangka wituwitu pulka ngaraku Jesuku walytja tjuتaku. ² Panya nyara palula ara anangu tjuتangku tjananku kutju

kulira palyalku, kutjupa tjutaku ngalturingkunytja wiyangku. Ka kutjupa tjutangku mani kutju pulkara kulilku, munuya kanany-kananypa ngarala tjananku mirawañiku. Ka kutjupa tjuta tjaa kuraringkuku munuya ngunti tjuta kutju wangkaku, munuya mamangka ngunyntjungka pulkara tungunpungkuku, munuya wiru tjuta ungkunyangka pukularinytja wiyangku wantiku, munuya rawa alatjiu Godala tungunpungkuku.³ Kaya kutjupa tjutangku anangu kutjupa tjutaku nyakula ngalturingkunytja wiyangku alatjiu wantiku. Ka anangu kutjupangku kutjupa tjutaku kuraringkula malangka kuntuaringkula palumpa tjanampa kalyparingkunytja wiyangku alatjiu wantiku. Kaya kutjupa tjutangku anangu tjuta ngunti ngukara kuranmankuku. Kaya kutjupa tjutangku anangu kutjupa tjutaku mapalku pikaringkula tjananya pungkuku ngalturingkunytja wiyangku, panya tjana putu kulilkul purkarangku kulira tjukaruruntjikitjangku. Munuya paluru tjana anangu kutjupa tjuta wirura nyinanyangka nyakula tjananya kurara pungkuku, panya tjintu nyara paluru ilaringkunyangka tjana kura tjutaku kutju pulkara mukuringkuku.

⁴ Uwa, ka kutjupa tjutangku malpa tjuta ngunti kuralku panya tjanampa ngañmanypa mukulya nyinanytjatjanungku tjananya wantiku. Kaya kutjupa tjutangku purkarangku kulira palyantja wiyaringkuku munuya warpungkula kutju palyalku atatjura kulintja wiyangku. Munuyanku kanany-kananytju waltyangku kutju mirawañiku, munuya Godaku mukuringkunytja wiyaringkula tjana mukuringkunytjtja kutju palyantjikitja mukuringkuku tjananku waltyangku pukulmankunytjikitjangku.

⁵ Kaya kutjupa tjuta Jesuku waltya-palku nyinaku, palu tjana unngu palumpa mulamularingkunytja wiyaringkuku. Ka nyuntu tjananya nyakuku rawangku tjana Godala tungunpungkula kura kutju palyan-nyangka munun nintingku kulilkul, “Munta, nyanga tjana Jesuku waltya wiya.” Munu palulanguru tjanala tjunguringkuwiyangku wantima alatjitu.

⁶⁻⁷ Palu anangu nyanga kuralpai tjutangkuya minyma kutjupatjara ngunti wangkara wituwitulku tjanala wangañarangku kulintjaku. Panya minyma nyara paluru tjanaya kawakawa ngunti kulilpai, munuya iwara kurangka kutju titutjara ngarapai. Kutjupa-araya kura palyantjatjanu kuntuaringkupai, palu mañangkaya piruku kura panya palunyatu palyantjikitjangku kulilpai munuya titutjara Godala mirangka kuntuaringkupai. Munuya paluru tjana tjukurpa kutjupa kutjupa tjuta kutju rawangku kulilpai munuya putu kulilpai, “Yaaltji tjukurpa tjukaruru mulapa?” Palulanguruya anangu panya kuralpai tjutangku minyma panya palumpa tjanampa ngurangka tjarpara tjukurpa wiru-palku tjanala wangkapai, kaya kulira mapalku mulamularingkupai.

⁸⁻⁹ Uwa Timitji, nyuntu anangu panya ngunti kuralpai tjuta tjananya wantima alatjiu, panya paluru tjana wati ini Tjanitjanya pula Tjam-purinya purunypa nyinanyi. Panya iriti pula Mosela tungunpungangi paluru Godaku tjukurpa wangkanyangka. Ka panyaya anangu uwankara palumpa pulampa nintiringku kura nyinanyangka, ka panya Godalu pulanya painu palumpa tjukurpa wantinyangka. Palu purunytpa Godalu anangu nyanga ngunti kuralpai tjuta kuļu pulkara pailku tjana palumpa Tjukurpa Palya Jesunyatjara ngunti wangkara kurannyangka. Kaya palu purunytpa anangu tjutangku tjanampa nintiringkula ngurkantankuku tjana kura nyinanyangka, kaya paluru tjana pulkara kuntuaringkuku munuya anangu mankur-mankurpa kutju Godalanguru kurara mauntara katiku tjukurpa ngunti wangkara.

Godaku Tjukurta Wanganarangku Kulinma

¹⁰ Palu Timitji nyuntun tjananya purunyapa wiya. Panya nyuntu purkarangku kulinigi ngayulu anangu tjutangka Tjukurpa Palya Jesunyatjara wangkara nintinnyangka. Munu panyanin nyangangi ngayunya Godalawanu tjukaruru nyinara palumpa warika rawangku palyannyangka wantintytja wiyangku. Nyara palulanguru nyuntu nintingku kulini panya ngayulu Godanya kutju kuilpai palunya pukuilmankunytjikitjangku. Nyuntu ninti panya ngayulu Jesula Christalawanu raparinganyi. Nyuntu panyanin nyangangi, munun nintiringu panya ngayulu Jesuku walytja tjutaku pulkara mukuringkupai mununa palunya tjananya purkarangku wangkara nintilpai mirpañarinytja wiyangku. ¹¹ Munu panyanin nyangangi anangu tjutangku anara pikaringkunyangka ngura panya Antiyakala, Akani-yamala, Litjurala tjanala. Panya ngura nyara palula tjanalaninya painingi Godaku tjukurpa wangkawiyangku wantintytjaku. Palu ngayuluña tungun-tunguntu wangkangi kañiya pika pulka mulapa pungangi. Palu Mayatja Jesuluñi rawangku wankarura kanyiningi.

¹² Palu nyangatja tjaka panya anangu tjuta Jesuku Christaku walytja nyinanyangka nyakulaya anangu kuralpai tjutangku palunya tjananya kurara pungkupai Jesunya wanalwiyangku wantintytjaku. ¹³ Panya manta winkingkaya anangu kuralpai tjuta nyinanyi. Paluru tiana wangkapai, "Nganaña Jesuku walytja nyinanyi." Palu wiya tiana kura kutju rawangku palyantjikitja mukuringkupai munuya palulanguru kura rawangku palyantjatanu pulkara mulapalta ma-kuraringkupai. Panya palunya tjananya mamungku ngunti kuralpai, kaya palu purunyjtutu anangu kutjupa tjuta ngunti kuralpai.

¹⁴ Palu Timitji, nyuntu panya paluru tiana purunyapa wiya. Panya nyuntunyaya ngañmanyaju nintinu tjukurpa tjukaruruku Jesuku panya walytja kutjupa tjutangku, ka panyan nintiringkunytjatjanu Jesuku Christaku mulamularingu alatjitu. Kaña kuwari nyuntula wangkanyi tjukurpa tjukaruru palunya titutjarangku wangañarangku kulintjaku uparingkula wantintytja wiyangku. Nyuntu panya ninti tjanampa nyara nyuntunya nintilpai tjutaku, panya paluru tiana nyuntula tjukarurungku wangkara nintiningi. ¹⁵ Palu nyuntu panya tjitjilpi nintiringangi Godaku tjukurku panya nyiri milmilta ngarinjytjitetjaku. Munu panyan nyara palulan-gurulta nyuntu pulkaringkula tjukurpa palunya rawangkuñi kuliningi watarkurinytja wiyangku. Munu panyan tjukurpa palumpa nintiringkunytjatjanungku kuliningi Jesuku Christaku mulamularinguñytjikitjangku, ka panya nyuntunya wankarunu.

¹⁶ Panya tjukurpa nyanga nyiri milmilpa Godaku alatjitu, panya Kurunpa Milmiltu nintinnyangkaya Godaku wangkatjara tjutangku iriti nyiringka walkatjenu. Ka tjukurpa paluru palya mulapa ngaranyi anangu tjutangku kuliña nintiringkunytjaku. Ka panyala tjukurpa nyanga palunya kulintjatjanungku anangu kutjupa iwara kurangka ankunyangka nyakula pailpai. Munula palu purunypatu anangu kutjupangku ngunti palyannyangka nyakula tjukurpa nyanga palulanguru wangkara palunya tjukarurulpai paluru kuliña Godalawanu tjukaruru nyinanytjaku. ¹⁷ Uwa, tjukurpa nyanga paluru wiru mulapa ngaranyi nganaña Godaku walytja tjutangku kuliña nintiringkunytjaku. Nyanga palulanguru kutjula pulkara nintiringkunytjatjanungku nganaña wiru tjuta kutju palyalku.

uwankara ngurkantara tjaralku ngañmanypa ilunytja tjuta munu wanka nyinanytja tjuta kulu. Kaña nyara palulanguru nyuntunya kuwari wangkanyi Godaku tjukurpa añañgu tjutangka tjakultjunkunytjaku pakuringkuwiyangku. Nyangatjaña Godala munu Jesula Christala mirangka nyuntunya wangkanyi, ka mulamulangku kulira wangkama. Kaya tjinguru kulira pukulariku, munta tjinguruya kulira wantiku. Palu nyuntu tjanala wangkama alatjitu wantinytja wiyangku. Munu tjananya kura palyannyangka nyakula painma kura wantinytjaku, munu tjananya wangkara kuļu tjukarurunma Godalawanu tjukaruru palyanyku nyinanytjaku. Palu tjananya purkarangku wangkara nintinma mukulyangku mirpañarinytja wiyangku tjana kulira wangañararingkula Jesunya tjukarurungku wañantjaku.

³ Kuwariya añañgu tjutangku nyuntula wangañarangku kulini Godaku Tjukurpa Palya wangkanyangka. Palu ngula tjana tjukurpa tjukaruru wangkanyangka kulintja wiyaringkuku munuya tjukurpa kutjupa tjutaku mukuringkuku tjukurpa panya tjana mukuringkunytjitu kutju, munuya añañgu nintilpai kutjupa tjuta altiku tjukurpa palunya tjananya kutju tjanala wangkanytjaku. Munuya kulira pukulariku tjana ngunti wangkanyangka. ⁴ Panya paluru tjana tjukurpa tjukaruru ngañmanytu kulintjatjanu tjukurpa palumpa watarkuriku munuya wantiku, munuya tjukurpa mantatja tjuta kutju kulira titutjarangku wañarinkuku.

⁵ Palu Timitji, nyuntu purkarangku kulira palyanma tjiturutjitururinytja wiyangku. Tjinguruya nyuntunya anara kuranma, tjinguruya nyuntunya pungama munu paira iyanma. Palu nyuntu tungun-tungunpa alatjitu ngarama pika kulintja wiya, munu Jesunya tjukarurungku wañanma tjukurpa ngunti tjanampa kulintja wiyangku. Munu Tjukurpa Palya Jesunyatjara rawangku para-wangkama añañgu uwankarangka munu ngururpaṭu pakuringkula wantinytja wiyangku Godaku warķa wangañarangku alatjitu palyanma.

⁶ Panya alatjitu tjintu ilaringu ngayulu manta nyangatja wantikatira ankunytjaku. Kañatju kuwari puntu winki Godanya unganyi, panya Moseku tjukurtjarangku kuka pungkula Godanya ungpupai nyakula pukularinytjaku, palu purunytju ngayulu kuwari puntu winki Godanya unganyi. ⁷ Panya ngayulu Godaku pulkara warķaringi pakuringkuwiya mununa ngatalpa wantinytja wiyangku warķa uwankara wiyanu. Panya añañgu waintarinytjikitja pulkara wirtjapakalpai munu ngururpa ngarakatinytja wiya rawa wirtjapakara waintarira mulyangka wirkankupai, palu puruny whole ngayulu kuwari wirkanu, tjukurpa Godaku añañgu tjutangka rawangku tjukarurungku nintintjatjanu. ⁸ Katju Godalu ngayuku pukularira wiřu mulapa kanyini ngayunya ngula ungpunytjikitjangku. Panya Tjintu Malatjangka Mayatja Jesulu añañgu uwankara tjukarurungku ngurkantara tjaralku. Mununi nyara palula-aralta ngayunya ungpuku, kaña palula tjunguringkula titutjara nyinaku. Palu paluru ngayunya kutju ungpunytja wiya palumpa walytja uwankara kuļu ungpuku palula tjunguringkula titutjara nyinanytjaku. Panya nganaña uwankara ala-alā pañani paluru małaku pitjanytjaku.

Tjukurpa Malatja

⁹⁻¹¹ Palu mařpa wiřu, wanyu warķa nyuntumpa mapalku palyara wiyla munu ngayulakutu warpungkula pitja. Munu wanyu wati panya Markanya kuļu altira ngalya-kati ngayunya pitjala alpamilantjaku, panya paluru wiřura warķarpai.

Uwa, nyangatjali Luke-anja ngali kutjara nyinanyi panya malpa kutjupa tjutaya anu. Panya wati Timatjalu mantatja tjutaku mukuringkula ngayunya wantikatira anu ngura Tjitja-lanikalakutu, ka wati panya Karitjannga ku lu anu manta nyara Kalaitjiyalakutu. Ka Taitatjanya anu ngura ini Talumai-tjiyaku. ¹² Kan a Titjikatjanya iyanu ngura nyara Ipitjalakutu. ¹³ Ka Timitji, nyuntu ngura pala Taruwatjalawunu pitjalampa wanyu mantjira ngalya-kati ngayuku panya mantara, panya wati Kaapaku ngurangka na watarkurira wantikatingu. Munu ngayuku panya nyiri rulumapi tjuta ku lu mantjira ngalya-kati, panya tjuna-tju anguru palyantja tjuta munu nanikuta miringuru palyantja tjuta. Palu nyara miringuru palyantja tjutaku na pulka mukuringanyi, ka palunya tjananya watarkurinytja wiyangku ngalya-kati.

¹⁴ Palu Timitji, nyuntu panya ninti wati panya Alike-tjantaku. Panya paluru kutjupa kutjupa tjuta ayananguru palyalpai. Wati nyara paluru panyani pulka kura nu. Ka palunya ngapartji Godalu pika pulka ungguku. ¹⁵ Panya paluru tjukurpa wangkanyangka ngayunya pulka wiyanmara ananangi. Ka nyuntu palunya ngulu nyangamatu nyuntunya ku lu kurantjaku-tawara.

¹⁶ Panya kuwaripatjaran i mayatja pulkangku ngayunya witi ra ku utpangka wangkanytjaku tjunu, ka kutjupangku pakara ngayulan-guru alpamila ra anga-wangkanytja wiya alatji tu. Panya malpa uwankarangkuni ya wantikatira anu. Palu palya, ngayulu Godala tjanampa tlapini pungkunytja wiya tjanampa kalyparingkunytjaku. ¹⁷ Palu ngayulu kuutpangka ngaranyangka Mayatja Jesunya ngayula tjungu ngarangi, mununi rapara witulyanu palumpa tjukurpa winki utira tjakultjunkunyt-jaku anangu nyanga Jew wiya uwankarangka. Munu ni wankarunu, panya tjana ngayunya iluntankunytjikitja mukuringangi. ¹⁸ Uwa, Mayatjalun i tiutjarangku atunyamananyi kura tjutangka-tawara, munu ni wankara katiku ngura ilkaritjakutu palula tjungu tiutjara nyinanytjaku. Kala wanyu palunya tiutjarangku walkura mirawa nima witulya pulkanya. Uwa mulapa.

¹⁹ Uwa Timitji, ankula minyma panya Puritjilala munu palumpa kur ingka Akuwilala ku lu wangka panya ngayulu pulanya rawangku kulini. Munu wati Anitji-puraku walingka nyinanytja tjuta ku lu palu purunypa tu wangka.

²⁰ Ka wati panya Iratjatjanya pitjanytja wiya ngura nyara Karintjala ma-nyinanyi. Kan a wati ini Tu ru-pimatjanya wantikatingu ngura nyara Mailitatjala, panya paluru pikatjararingu.

²¹ Palu Timitji, wanyu mapalku pitja wari kuwaripangka.

Kaya kuwari anangu nyangantu nyuntunya kulini ini Upu-latjalu, Putantu, Lainatjalu, Kulutiyalu tjana. Nyanga paluru tjana uwankarangku nyuntunya kulini nyuntumpa pukularira. Kaya Jesuku walytja kutjupa tjutangku ku lu palu purunytju ngayunya wangkangu nyuntula wangkanytjaku.

²² Uwa Timitji, alatji tu na walkatjunanyi. Ka Mayatja Jesulu nyuntula tjungu nyinara nyuntunya rapara pukulmanama, munu nyuranya uwankara pukultju pulkangku kanyinma.

Lita Paulalu Walkatjura Iyantja Wati Ini Taitatjalakutu Titus **Nyangatja Ngañmanytju Nyakula Wangkanytjaku**

Nyangatja lita Godaku tjukurpa Paulalu walkatjura iyantja wati ini Taitatjalakutu. Wati nyanga paluru ngañmanyapa Paulala tjungu warkaringi munu Tjukurpa Palya wangkangi. Munu pula tjungu anu manta tjukutjuku ini Kuritalakutu uringka ngururpa, munu pula manta nyara palula ngura tjutangka para-ngañala Tjukurpa Palya Jesunyatjara añaŋgu tjutangka tjakultjunangi. Palulanguru Paulanya małaku anu manta pulkakutu munu Taitatjanya wantikatingu añaŋgu Jesuku kuwari kutju walytjaringkunytja tjutangka wangkara nintintjaku.

Ka lita nyangatja Paulalu palulakutu iyanu manta nyara Kuritala nyinanyangka. Munu paluru Taitatjala wangkangu wati nyara palunya ngurara mañkurpa ngurkantankunytjaku tjana Jesuku walytja tjuta atunymara kanyintjaku. Munu paluru piруku wangkangi alatji, "Tjanala nintinma wirura palyanyku nyinanytjaku pikaringkuwiya munu Jesunya tjukarurungku wañantjaku. Panya Jesunya mantakutu pitjangu añaŋgu tjuta wankarunkunytjikitja tjana palumpa mulamularingkula Kurunpa Milmilngatjararingkula Godaku walytjaringkula wirura nyinanytjaku." Alatji Paulalu walkatjura iyanu Taitatjalakutu paluru Kuritanya ngurara tjutangka nintintjaku.

Tjukurpa nyanganpa ngaranyi:

- 1:1-4 Paulalu ngañmanytju wangkanytja
- 1:5-16 Añunymankupai tjuta ngurkantankunytjaku munu ngunti wangkapai tjuta paintjaku
- 2:1-15 Godaku walytja tjuta wangkara tjukaruruntjaku
- 3:1-11 Godalawanu tjukaruru palyanyku nyinanytjaku munu tjukurpa kurakura tjuta kulira wantintjaku
- 3:12-15 Paulalu tjukurpa malatja wangkanytja

Paulalu Ngañmanytju Wangkanytja

¹ Uwa Taitatja, ngayuluña Paulalu lita nyangatja nyuntumpa walkatjuni. Ngayulu panya Mayatja Godaku warkaripai, mununa tjukurtjara Jesulu Christalu iyantja panya. Godalu añaŋgu tjuta ngurkantanu palunya wañantjaku munu panya ngayunya witura iyanu palula tjanala tjukurpa tjukaruru tjakultjunkunytjaku. Kaña palunya tjananya wangkara nintilpai Christaku tjukaruru mulamularingkunytjaku. Mununa tjanala wangkapai tjukurpa Jesulu wangkanytja uwankaraku tjana nintiringkula tjukarurungku uti kulintjaku. Panya tjukurpa nyanga tjukaruru nintiringkulaya tjana kuliklu tjukaruru nyinanytjikitjangku Godalu nyakula pukularinytjaku.

²⁻³ Uwa, nganana Jesuku mulamularingkunytjatjanungku ala-alangku pañani ngula Godalu ngananya wankara pakaltjingara palula tjungura titutjarangku kanyintjaku. Panya Godalu ngañmanytju mulapa uwankara paluntja kuwaripangka kalkunu palumpa walytja tjuta wankaru titutjarangku kanyintjikitjangku. Munu mulapatu tjintu panya

paluru kalkuntjatjanungku Godalu palumpa tjukurpa wiru Jesunyatjara anangu tjutangka utinu tjintu panya palula alatjitu, panya paluru ngunti wangkapai wiya. Munu paluru ngayunya witura iyanu tjukurpa nyanga palunya Jesunyatjara tjanala tjakultjunkunytjaku, kana mulapatu tjanala para-tjakultjunangi Godalu nganampa wankarunkupailu witunnyangka.

⁴ Uwa Taitatja, lita nyangatjana nyuntumpa walkatjunanyi, panya ngayulu tjukurpa Jesunyatjara nyuntula ngañmanytju wangkangu ka panyan kulira mulamularingu, kana nyara palulanguru nyuntunya katanmananyi. Ka Mama Godalu Jesulu Christalu ku lu nyuntunya pukultju pulkangku kanyinma munu nyuntunya kurunpa rapara pukułmanama.

Atunymankupai Tjuṭa Ngurkantankunytjaku

⁵ Uwa Taitatja, nyuntu panya ngali manta nyara Kuritala nyinaralpi Jesuku walytja tjutangka warkaringi. Palu panya ngayulu ngatalnguru anu malaku manta pulkakutu munu panyana nyuntunya wantikatingu manta nyara palula Godaku war̄ka rawangku palyantjaku. Panya nyuntunya wangkangu Jesuku walytja tjuṭa nintintjaku ngura kutjupangka kutjupangka manta nyara Kuritala munu tjananya tjukaruruntjaku. Munu panyananta piruku wangkangu wati atunymankupai mankurpa ngurkantara tjunkunytjaku ngura panya palula tjanala Jesuku walytja tjuṭa atunymankunytjaku.

⁶ Ka uti wati nyara paluru tjana tjukaruru nyinama kura palyantja wiya kutjupa tjutangku palunya tjananya nyakuła kuranmankunytjaku-tawara. Munuya uti paluru tjana kuri walytjangka kutju nyinama kutjupaku nyakula mukuringkunytja wiya. Ka uti palumpa tjanampa tjitji tjuṭa ku lu palu purunypatu nyinama Jesuku walytja mulapa, munuya ngunyjtungka mamangka tungunpungkunytja wiyangku wan gañarangku kulira palyanyku nyinama, kutjupa tjutangku tjananya nyakula kuranmankunytjaku-tawara.

⁷ Panya Godalu wati atunymankupai tjuta ngurkantankupai palumpa walytja tjuṭa atunymara kanyintjaku, kaya uti palya mulapa tjukaruru nyinama anangu kutjupa tjutangku nyakula anantjaku-tawara. Munuya uti walytjangku tjananku mirawañinytja wiyangku wantima munuya anangu tjuṭa kutju alpamilantjikitjangku kulinma kanany-kananytju wituwituntja wiyangku. Munuya uti mirpanarira mapalku waruringkunytja wiyangku wantima, munuya wama pulka tjikira tarangkarinytja wiyangku wantima.

Uwa, utiya atunymankupai paluru tjana anangu kutjupa tjuṭa pikangku pungkuwiyangku wantima, munuya uti anangu kutjupa ngunti kuranjtja wiyangku wantima mani pulka mantjintjikitjangku. ⁸ Munuya uti wirura nyinama, munuya ngura kutjupanguru pitjala nyinanyangka papulara wantintyta wiyangku altira tjanampa walingka mukulyangku kanyinma. Munuya uti paluru tjana wiru tjuṭa kutju pukultu palyantjikitja mukuringama anangu tjutaku. Munuya uti wala winkingku palyantja wiyangku atatjura kulira palyanma ngunti kura palyantjaku-tawara. Munuya uti Godala tjukaruru palyanyku nyinama munu palula kutju kulinma.

⁹ Uwa, utiya atunymankupai paluru tjana Tjukurpa Palya Jesunyatjaraku pulkara mulamularingama, panya tjukurpa paluru tjukaruru alatjitu kampa kutjuparipai wiya. Tjukurpa palunya panyali ngañmanytju tjanala wangkara nintinu tjukarurungku kulintjaku, kaya uti tjukurpa palunya kulira titutjarangku tjukarurungku kulilkatima wantintyta wiyangku. Munu palulanguru paluru tjana Jesuku walytja tjutangka tjukurpa

palunya nintingku tjukarurungku nintilku, kaya kulira raparingkuku munu kuŋpuringkuku. Ka tjinguru anangu kutjupangku tjukurpa palunya wiyanmara wantiku, ka uti wati panya atunymankupaingku palunya nintingku wangkara tjukarurunma.

Ngunti Wangkapai Tjuṭa Paintjaku

¹⁰ Panya ngura nyara palula anangu tjutangku Tjukurpa Palya wangkanyangka tjana wiyanmara wantipai munuya kampa kutjupara tjukurpa ngunti wangkapai anangu kutjupa tjuṭa ngunti kurantjikitjangku. Kutjupa tjutangkuya ngunti wangkapai alatji, “Utiya malikitja tjutangku Jesuku mulamularingkula Jew tjutaku ara kulira wañanma.” Alatjiya Jesuku walytja tjuṭa ngunti wituwitulpai. ¹¹ Ka Taitatja, nyuntu munu wati atunymankupai kutjupa tjutangku kulu uti Jew palunya tjananya wangkara markunma ngunti nintintja wiyangku wantintjaku, panya alatji wangkara tjana anangu kutjupa tjuṭa ngunti kurara kawantjingani manikitjangku ngunytju mama tjiṭi kulukulu. Ka nyura nyanga palulan-guru uti tjananya markunma.

¹² Panya wati wangkatjara kutjungku ngura pala Kuritanya ngurarrangku tjukarurungku wangkangu alatji, “Kuritanya ngurara tjutangkuya ngunti wangkapai. Paluru tjana kura pulka palyalpai munuya paluru tjana inura purunypa pikati alatjitu. Munuya pakuringkula warika palyantja wiya wantira nyinapai munuya rawangku manyungku mai kuka pulka ngalkupai.” ¹³⁻¹⁴ Alatji wati panya wangkatjarangku nintingku tjukarurungku wangkangu. Ka nyuntu tjananya Jesuku walytja tjuṭa pulkara painma tjukurpa kampa kutjupara wangkawiyangku wantintjaku. Munu tjananya wangkara tjukarurunma Tjukurpa Palya Jesunyatjara tjukarurungku kulintjaku. Panya Jew kutjupa tjutangku ara ngunti tjuṭa walytjangku kulintjita wangkapai. Tjana panya tjukurpa tjukaruru Jesunyatjara wantingu munuya tjukurpa ngunti tjuṭa tjana walytjangku kulintja wangkanyi munuya anangu Jesuku walytja tjuṭa ngunti wangkara wituwitulpai palula tjanala kutju kulintjaku. Ka nyuntu tjanala wangkama tjukurpa palumpa tjanampa kulilwiyangku wantintjaku munu tjukurpa tjukaruru Jesunyatjara kutju kulintjaku.

¹⁵ Panya anangu palyanyku nyinapai tjutangku mai kutjupa kutjupa uwankara ngalkupai palya kulira. Palu anangu ngunti kulilpai tjutangku Jesunya wantira mai kutjupa kutjupa uwankara kanpanmankupai. Panya nyara paluru tjana kulintja kawakawa kura mulapa, munuya putu tjukarurungku ngurkantankupai kura munu palya, munuya putu tjukaruru nyinapai.

¹⁶ Uwa, paluru tjana wangkapai alatji, “Nganana Godaku ninti pulka munula palunya tjukarurungku wañalpai.” Palu wiya, tjana kura kutju rawangku palyalpai, kala nyara palulanguru tjananya palyannyangka nyakula mapalku ngurkantankupai munula alatji kulilpai, “Wiya, nyanganpa Godaku ninti wiya ngurpa, munuya palunya wiyanmankupai alatjitu.” Uwa, tjana Godala tungunpungkupai munuya putu alatjitu kulilpai wirura palyanyku nyinanytjikitjangku. Nyara palulangurula tjananya ngurkantankupai tjana Godaku ngurpa nyinanyangka.

2

Godaku Walytja Tjuṭa Wangkara Tjukaruruntjaku

¹ Uwa Taitatja, nyuntu panya Tjukurpa Palya Jesunyatjara tjukarurungku kulilpai, munu nyuntu uti tjukurpa nyanga palunyatu

tjanala wangkara nintinma tjana kulu kulira wiru palyanyku nyinanytjaku tjukurpa pala palulawanu kutju. ² Munu wati pulka tjutangka wangkama alatji, “Wati tjuta kulilaya! Munuya purkarangku kulinma mirpanarinytja wiyangku munuya pukulpa wiru nyinama anangu tjutangku nyuranya nyakula pukularinytjaku. Munu nyura uti Godaku mulamularingkula palumpa tjukurpa titutjarangku kulinma wantintyta wiyangku. Munuya anangu kutjupa tjutanku pulka mukuringkula palyanma wiru tjuta kutju. Munuya kutjupa tjutangku nyuranya anara kurannyangka wantintyta wiyangku titutjarangku tungun-tunguntu Jesunya wanananma.” Alatji-puta tjanala wangkama wati panya pulka tjutangka.

³ Munu minyma pulka tjutangka kulu alatji wangka, “Kulilaya! Nyura uti Godaku mulamularingkunytjatjanu palulawanu wiru palyanyku nyinama. Munuya kampangkatu wangkanytja wiyangku wantima, munu wama pulka tjikira tarangkarinytja wiya wiru nyinama. Munuya wiru tjuta kutju nintinma, kaya minyma malatja tjutangku nyurala kulira nintiringkuku wiru tjuta kutju palyantjikitja nyuranya nyakunytjatjanungku. ⁴ Panya nyura alatji wiru nyinara nintinnyangkaya minyma tjukutjuku paluru tjana tjukarurungku kulilk u wati kuri tjiti tjuta kulu mukulyangku wiru kanyintjikitjangku.” Alatji tjanala wangkama minyma pulka tjutangka.

⁵ Munu minyma tjukutjuku tjutangka kulu alatji wangka, “Kulilaya! Purkarangkuya kulinma mirpanarinytja wiyangku, munuya pukulpa wiru nyinama wati kutjupangka ngarinytja wiya kuri walytjangka kutjuya nyinama. Munuyanku ngura walytjangku wiru atunymara kanyinma, munuya anangu kutjupa tjutanku kulu mukuringkula wiru tjuta kutju tjanampa palyanma. Munuya wati kuringku wangkanyangka wanganarangku kulira palyanma.” Uwa alatji tjanala wangkara nintinma minyma tjukutjuku tjutangka. Panya paluru tjana alatji wiru nyinanyangkaya anangu kutjupa tjutangku tjananya nyakula Godaku tjukurpa putu wiyanmankuku.

⁶ Munu wati tjukutjuku tjutangka palu purunypatu wangka nyanga alatji, “Purkarangkuya kulinma mirpanarinytja wiyangku, munuya titutjara pukulpa wiru nyinama.” ⁷ Alatji tjanala wangka munu nyuntu kulu wiru palyanma tjana nyakula nyuntu purunytju arkara palyantjaku. Munu tjanala Godaku tjukurpa mulamulangku tjukarurungku tjakultjunama tjana tjukarurungku Godanya kulintjaku, nyuntunya mirrawaninytjaku wiya. ⁸ Munu tjananya wiru palyanyku wangkara nintinma tjukurpa tjukaruru kutju alatjitu. Panya nyura tjukurpa tjukaruru kutju wangkanyangka anangu kutjupa tjutangku kulira nyuranya putu kuranmankuku. Kaya nyuntumpa mirpantju tjutangku nyakula kulira kuntaringkuku munuya putu kulilk u nyuntunya ngalinya kurara pungkunytikitjangku.

⁹ Munu piruku wangka wati unytju warkaripai tjutangka nyanga alatji, “Kulilaya, nyurampa mayatjangku warkaku witunnyangkaya wanganarangku kulira palyanma kuraringkuwiyangku. Munuya wiru warkarima nyurampa mayatjangku nyakula pukularinytjaku. ¹⁰ Munuya nyurampa mayatjaku mantara munu kutjupa kutjupa tjuta kulu nyakula kutitjunkunytja wiyangku wantima. Wiruraya wanganara warkarima nyurampa mayatjangku nyakula nyuranya wiru kulintjaku alatji, ‘Munta wati nyanganpa wiru mulapa, tjukarurungku kutju palyalpai.’” Alatji tjanala wangka wati panya unytju warkaripai tjutangka, ka paluru

tjana nyuntula kulira wirura warkariku, kaya anangu kutjupa tjutangku tjananya nyakula kulilk, "Munta, mulapa Godaku tjukurpa pulka alatji, kalanku uti kulira nintiringama tjukurpa nyanga wankarunkupai."

¹¹ Uwa, Jesuku walytja tjutangka nintinma tjukaruru palyanyku nyinanytjaku, panya Godanya anangu uwankaraku pulkara mukuringu munu panya pukultju pulkangku anangu tjuta wankarunkunytjikitjangku katja palumpa iyanu nganampa ngalkilpa ilunytjaku. ¹² Munu panya Godalu nganañanya rawangku nintini palunya tjukarurungku wanantjaku kura kutjupa kutjupa tjuta wantira. Panya paluru mukuringanyi nganana purkarangku kulintjaku mirpañarinjtja wiyangku, munu tjukaruru wirura palulawanu nyinanytjaku.

¹³ Uwa, Mamanya mukuringanyi nganana alatji titutjara nyinanytjaku Mayatja Jesunya Wankarunkupainya malaku pitjanytjaku patara. Panya nyara palula arangka nganana palunya nyakuku pitalytji pulka pitjanyangka witulya alatji. ¹⁴ Nyara paluru panya nganampa ngalkilpa ilungu Godalu nganañanya kura palyantjitjanguru kaly-pangku pungkuwiyangku wantinytjaku. Paluru ilungu nganañanya wankarunkunytjikitja nganana karalyarira kura wantira palula tjunguringkula palumpa walytja mulapa nyinanytjaku tjukaruru mulapa. Kala nyara palulanguru uti palula wanganarangku kulira kutjupa kutjupa wiru tjuta ipilytju palyanma.

¹⁵ Uwa, tjukurpa nyanga palunya tjananya rawangku tjanala nintinma manta pala Kuritala nyinanytja tjutangka. Panya Godalu nyuntunya ngurkantara tjunu palumpa warika rapangku palyantjaku ngura nyara palula, ka nyuntu tjanala rapangku wangkama nyuntunya anan-nyangka kulira tjituru-tjitururinytja wiyangku. Munu tjananya wangkara kunpunma rawangku Jesunya wanantjaku. Munu kutjupa tjutangku kura palyannyangka nyakula tjananya ngulu wiyangku wangkara tjukarurunma.

3

Wiru Tjuta Kutju Palyantjaku

¹ Uwa Taitatja, anangu Jesuku walytja tjutangka wangka tjana mayatja tjutangka wanganarangku kulintjaku wati kamanta pulka tjutangka ku. Wangka tjananya wirura palyanyku nyinanytjaku munu anangu kutjupa tjutaku ku rawangku wirura pukultu palyantjaku. ² Munu tjanala wangka anangu kutjupa tjuta nyakula wangkawiyangku wantinytjaku munu pikaringkuwiya kalypa nyinanytjaku uwankaraku mukulya. Uti tjananku mirawañiwyangku wantira anangu tjutangka pilunpa pukulpa nyinama.

Godalu Ngaltunytju Pulkangku Nganañanya Kuranguru Wankarunu

³ Panya ngamanypa nyuntu nganana watarku nyinangi Godaku ngurpa, munula palula tungunpungkula palumpa tjukurpa wanganarangku kulira palyalpai wiya. Kaya kutjupa tjutangku nganañanya ngunti kuraña wituwitulpai tjanala tjunguringkula kura palyantjaku. Kala iwara kuraku pulkara mukuringkula kura putu wantingi munula walytjangku kulira kura kutju palyaningi munula anangu kutjupa tjutangku kutjupa kutjupa wiru tjananku walytjangku kanyinnyangka nyakula nyararingkupai. Kaya kutjupa tjuta nganampa pulkara kuraringkupai, ka nganana ngapartji kuraringkupai tjutangku.

4-5 Uwa, nganaṇa kura mulapa nyinangi Godanya kulintja wiya alatjiṭu, kalanya uti pungkula iluntanama. Palu Godanya nganampa pulkaṛa mukuringu ngaltunytju pulka munu panya palumpa katja iyanu mantakutu nganampa ngalkilpa anga-ilunytjaku. Nyara palulanguru, nganampa ilunyangka Godalu nganaṇanya kura tjuṭa palyantjitjanguru kalypangku wantinyi pungkuwiyangku. Tjinguru nyura kulini paluru nganaṇanya wiru tjuṭa palyantjitjanguru wankarunu. Palu wiya, paluru nganampa pulkaṛa ngalturingkula nganaṇanya wankarunu palula tjungu titutjara nyinanytjaku. Paluru Kurunpa Milmilnga nganaṇala unngu tjarpatjunu, ka paluru nganaṇanya kurunpa kampa kutjupanu nganaṇa kura palyantja wiyaringkunytjaku. Kala nyara palulanguru wankarū nyinanyi wanka kuwaritjatjara.

6-7 Uwa, Godalu intjanungku Kurunpa Milmilnga nganaṇala unngu tjarpatjunu Jesunya Christianity nganampa ngalkilpa ilunyangka. Alatji paluru nganampa pulkaṛa mukuringkula palyaṇu ngaltunytjungku kutjukampa alatjiṭu, munulanya alatji wangkangu, “Ngayulu kuwari nyuranya kura tjuṭa palyantjitjanguru pungkunytjaku wiyaringku, panya Jesunya nyurampa ngalkilpa ilunyangka.” Ka nyara palulanguru nganaṇa mulamularingkula ala-alā paṭara nyinanyi paluru nganaṇanya kalkuntjatjanungku ngura wirukutu katinytjaku, panya ngura nyara palulala nganaṇa palula tjungu wanka titutjara nyinaku.

8 Uwa Taitatja, tjukurpa nyanganpa ngayulu nyanga nyuntula wangkanytja uwankara tjukaruru mulapa ngaranyi. Ka nyuntu Jesuku waltyta tjutangka rapangku wangkara nintinma mulamulangku, kaya nyuntula kulira wiru tjuṭa kutju titutjarangku palyantjikitjangku kuliklu anangu tjuta alpamilantjikitjangku. Panya tjukurpa nyanga ngayulu nyuntula wangkanytja tjuṭa wiru mulapa ngaranyi, kaya anangu tjutangku wanganarangku kulirampa Godanya tjukarurungku waṇantjikitja nintiringkuku.

Tjukurpa Kurakura Tjuṭa Kulira Wantinytjaku

9 Palu anangu kutjupa tjutangkuya tjukurpa ara tjukutjuku tjuṭa unytjungku rawangku ngaparku wangkapai. Ka nyuntu palunya tjananya kulira wantima, panya tjana tjukurpa miri tjutatjara rawangku ngaparku wangkapai tjamu tjutaku ara tjuṭa kułukulu unytjungku alatjiṭu, munuya tjukurpa nyara palunya tjananya kutju kulipai. Munuya paluru tjana Moseku tjukurnguru kułu wangkara pika-pikaringkupai. Palu tjana tjukurpa nyanga palu purunyapa tjuṭa ngaparku wangkara Jesuku waltyta tjuṭa puṭu wangkara kuṇpuṇi pukulpa rapa nyinanytjaku, ka nyuntu tjananya kulira wantima tjana wangkanyangka munu tjanala tjunguringkunytja wiyangku wantima. **10** Palu tjinguru anangu kutjupa tjutangku tjukurpa nyanga purunyapa Jesuku waltyta tjutangka rawangku wangkama, kaya kulira kulira pika-pikaringkula tjararingkula maunṭalpa maunṭalpa nyinaku. Nyara palula-tawara anangu palunya tjananya rawangku painma wantinytjaku. Ka tjinguru paluru tjana wantinytja wiyangku rawangku ngaparku wangkanyangka nyuntu uti palunya tjananya paira iyanma nyurala piṛuku tjunguringkula kurantjaku-tawara.

11 Kulinin Taitatja? Panya anangu nyanga palu purunyapa tjuṭa kura nyinanyi kulintja kawakawa. Kaya anangu tjutangku palunya tjananya Godala tungunpungkunyangka nyakula nintingku kulipai, “Mulapa paluru tjana tjukurpa kurakura ngunti wangkapai.” Ka nyuntu Jesuku

walytja tjutangka wangka aŋangu nyanga palu purunypa tjuṭa kulira wantintytjaku.

Tjukurpa Malatja

¹² Palu Taitatja, wanyu kulila. Ngayulu kulini wariringkunyangka ngura ini Nika-palitjala ankula nyinanytjikitjangku piriakuturingkunytjaku paṭara. Palu ngayulu ankunytja kuwaripangkaṇa wati kutju nyuntulakutu ma-iyalku tjinguru Atimatjanya munta tjinguru Titjikatjanya. Ka wati kutju nyuntula ma-wirkankunyangka nyakulampa nyuntu ngalyapakala ngayulakutu munu ngaparikatira wirkara ngura panya Nikipala kananta nyara palula nyakuku.

¹³ Ka nyangatja wati kutjara Apalatjanya pula Tjinatjanya kuwari nyanganguru ma-pakanı ngura tjutakutu ankunytjikitja. Tjinatjanya panya lawyer, tjukurpa aṛa tjuṭaku ninti. Ka pula ma-wirkankunyangkampa palunya pulanya nyakula alpamilanma munu mai, mani, kutjupa kutjupa tjuṭa kulu ungama ngura kutjupa tjutakutu ankunytjaku. Palya?

¹⁴ Uwa Taitatja, ngura nyara palula Jesuku walytja tjutangka rawangku wangkara nintinma tjana titutjarangku wiru tjuṭa kutju palyantjaku aŋangu ngaltutjara tjuṭa atunymankunytjikitjangku. Utiya wiruṛa pakuringkuwiya warkarima, munuya palulanguru pukulpa nyinaku Godala mirangka.

¹⁵ Uwa, alatjiṭuṇanta wangkanyi. Ka nyanga ngayula tjungu nyinanytja tjutangku nyuntunya kulini nyuntumpa pukułarira. Ka ngura nyara palula panya Jesuku walytja tjuṭa nganampa mukuringanyi, ka-puta palula tjanala wangka panya ngananya tjananya rawangkuṭu kulini.

Uwa, ka Godalu nyuranya uwankara pukultjungku wiruṛa kanyinma.

Lita Paulalu Walkatjura Iyantja Wati Ini Paalimantakutu Philemon Nyangatja Ngañmanytju Nyakula Wangkanytjaku

Wati panya Paalimannga Paulaku malpa mulapa nyinangi. Ka Paulalu lita nyangatja palumpa walkatjunu ngura panya Rome-ala nyinara munu palulakutu iyanu ngura ini Kalatjilakutu. Munu paluru tjakultjunangi lita nyangangka wati panya Anitjimanya-tjara, panya ngañmanytju Paalimantu wati nyanga palunya maningka payamilañu palumpa war̄karintjaku. Ka paluru tjukutjuku rawa nguwanpa war̄karirra kumpira wirtjapakanu ngura kutjupakutu parari mulapa, munu wirkanu ngura panya Rome-ala. Ka Paulanya ngura nyara palula nyinangi munu paluru wati panya Anitjimala tjakultjunangi tjukurpa Jesunyatjara, ka paluru kulira Jesuku mulamularingkula palumpa wal̄ytjaringu. Ka lita nyangangka Paulalu Anitjimaku anga-wangkangi wati panya Paalimannga palumpa kalyparingkunytjaku munu wirkankunyangka nyakula pañara pukul̄tu mantjintjaku munu kanyintjaku palumpa ngurangka.

Tjukurpa nyanganpa ngaranyi:

- 1-3 Paulalu ngañmanytju wangkanytja
- 4-7 Paulalu Godala tjapintja Paalimanku
- 8-21 Paulalu wati Anitjimaku anga-wangkanytja
- 22-25 Paulalu tjukurpa mañatja wangkanytja

Paulalu Ngañmanytju Wangkanytja

¹ Walytja wiru! Ngayulu Paulalu kuvari nyuntumpa lita walkatjunanyi, panya nyuntu nganana uwankara Jesuku war̄karipai tjuña nyinanyi. Kan̄a ngayulu kuvari tjailangka unngu nyinanyi panya Jesuku tjukurpa para-wangkanyangkaṇiya witira tjarpatjunu. Ka Timitjinya kuļu ngayula tjungu nyinanyi kuvari, munuli nyanga paluru ngali tjunguringkula lita nyangatja nyuntulakutu walkatjura ma-iyanı. Nyanga paluru panya nyuntumpa ngalimpa walytja nyinanyi Jesulanguru. ² Uwa, munu lita nyanga palunya nyuntumpa kuri Apiyala kuļu nintila, panya nyara paluru kuļu nganampa kangkuru nyinanyi Jesulanguru. Munu piřuku nintila wati ini Akipala kuļu paluru kuļu nyakula wangkanytjaku, panya wati nyara paluru kuļu Jesunya tungun-tunguntu wanalpai nganana purunytyju. Munu anangu kutjupa tjuñangka kuļu nintila panya nyuntumpa ngurangkaya tjunguringkula Godanya walkulpai nyinanyi, nyara palula tjanala kuļu lita nyangatja nyakula wangka tjana kuļu kulintjaku.

³ Ka Mama Godalu Mayatja Jesulu Christalu kuļu nyuranya pukul̄tu pul̄kangku kanyinma munu nyuranya kurunpa rapara pukul̄manama.

Paulalu Godala Tjapintja Paalimanku

⁴⁻⁵ Ka ngayulu Godala tjapiña nyuntunya kuļu rawangku kulilpai mununa nyuntulanguru Godanya titutjarangku walkulpai, panya ngayulu kulinu nyuntu Godaku walytja tjuñaku pul̄kara mukuringkunyangka, munu Mayatja Jesuku pul̄kara mulamularingkunyangka. ⁶ Panya

nyuntu kuwari tjanala Jesuku walytja tjuṭangka tjunguringkula wangkara kulilpai nyinanyi. Kana palulanguru Godala nyuntumpa tjapini, nyuntu tjanala tjunguringkula wiru tjuṭaku nintiringkunytjaku, panya nganana kutjupa kutjupa wiru tjuta palyantjaku ngaranyi Christanya pukulmankunytjikitjangku.⁷ Uwa mulapa nyuntu mukulyangku tjananya pukulmanangi Godaku walytja tjuta, kana nyangatja kuliṛa kurunpa raparingu mununa pulkara pukularingu.

Paulalu Wati Anitjimaku Anga-wangkanytja

⁸⁻⁹ Palu kulila wanyu! Tjukurpa kutjuṇa nyuntula wangkanytjikitjangku kuliningi, panya nyuntu Jesuku walytja tjuṭaku mukuringkupai. Kana nyuntula purkarangku tjapini tjukurpa kutjupa kulintjaku munu palyantjaku.

Tjinguruṇa nyuntunya tjukarurungku wangkama, panya ngayulu Christaku walytja, ka nyuntu kulu palumpa walytja nyinanyi munu palula wanganarangku kulilpai palumpa tjukurpa kuļu. Palu ngayulu nyuntunya purkarangku tjapini ka nyuntu walytjangku kulila. Panya ngayulu kuwari wati tjilpiringu, mununa puritjina nyinanyi tjaila unngu panya tjananıya tjailangka tjarpatjunu Jesunya waŋannyangka. Kana nyuntula purkarangku tjapintjikitjangku kuliningi.¹⁰ Kan yaaltji kulini? Wati panyakuṇa tjapini panya nyuntumpa ngañmanypa warkaringi, wati panya Anitjimaku. Nyanga palunyaṇa tjailangka nyanga unngu nyinara nyangu, mununa alpamilanu palunya, ka paluru Jesuku mulamularingu, ka ngayulu kuwari palunya katjanmananyi paluru Jesuku walytjaringkunyangka. Wati nyanga palumpaṇa nyuntula tjapini nyanga palunya kulintjaku.¹¹ Ngañmanypa panya nyanga paluru nyuntula kulilpai wiya nyinangi, palu kuwari nyanga paluru kampa kutjuparingu munu wanganararingu. Munu paluru kuwari ngayula kulilpai nyinanyi munu nyuntula kuļu kulilkku wanganarangku.

¹²⁻¹⁴ Kana kuliningi wati nyanga palunya kanyintjikitjangku nyangangka. Panya ngayulu pulkara mukuringanyi wati nyanga palumpa. Tjin-guru paluru ngayula tjungu nyinara ngayunya alpamilanma nyuntumpa arangka nyinara, panya nyuntu kuwari ngura parari nyinanyi. Palu kuwarina palunya nyuntulakutu małakungku ma-iyanı. Panya ngayulu nyuntula-wararangku tjapintjikitjangku kuliningi, panya wati nyanga paluru nyuntumpa alatjiṭu kuwari nyinanyi ngayuku wiya. Ka paluru nyuntula małaku wirkankunyangkampa nyuntu mukuringkula palula wangkama munu walytjangku ngurkantankula palunya małakungku iyala ngayulakutu paluru nyuntumpa arangka nyinakatinjtaku nyangangka munu ngayunya alpamilantjaku. Uwa, ngayulu nyuntula anga-angara pauntjingara mayatja-mayatjangku wangkanytja wiya. Palu tjukurpa kutju nyanga palunyaṇa nyuntula tjunanyi, ka nyuntu walytjangku kulila munu ngurkantara.

¹⁵⁻¹⁶ Paluru panya nyuntunya wantikatingu munu nyuntulanguru anu. Palu palya, panya nyangangka wirkara paluru kulinu tjukurpa Jesunyat-jara munu kuliṛa palumpa mulamularingu. Nyanga paluru nyuntumpa warkaripai panya nyinangi munu nyuntunya wantikatingu, palu kuwari paluru Jesuku walytjaringu munu nyuntulakutu małaku wirkankuku nyuntumpa warkaripai kutju wiya palu Jesuku walytjaringkula paluru nyuntumpa kuļu walytjaringu. Panya paluru kampangkaṭu kumpira wirtjapakaṇu munu nyuntulanguru paṭu nyinanyi, palu kuwari paluru

malaku nyuntulakutu ma-pitjanyi munu ti_tutjara nyuntula tjungu nyinaku mantangka munu ngula ngura ilkaritjangka ku_{lu}. Wati nyanga palumpa_{na} kuwari pulkara pukularinyi, ka nyuntu ku_{lu} palumpa pulkara mulapa pukulariku panya paluru kuwari nyuntumpa walytja mulararingu Jesulanguru.

¹⁷ Ka nyuntu ngayunya malpa wiru mulapa kulini. Palulanguru nyuntu uti wati nyangatja pukultu mantjinma nyuntula wirkankunyangka munu palunya kanyinma. Ngayulu tjinguru nyuntula wirkankunyangkampa nyuntu ngayunya pukularira mantjilku, palu purunytju wati nyanga palunya mantjila munu kanyinma nyuntumpa ngurangka. ¹⁸ Mulapa panya nyuntun palunya mani pulkangka payamila_{nu}, ka paluru panya nyuntunya wantikatira tjituru-tjituru palyanu. Tjinguru paluru kutjupa kutjupa kutitjura katingu nyuntumpa, kan tjinguru palulanguru nyuntunya malakungku payamilantjaku mukuringanyi. Palu wati palula nyuntunya malakungku payamilantjaku wangkanytja wiyangku ngayula ngatjila, ka_nanta ngayulu nyuntunya uwankara ungguku, ngayuku maninguru. ¹⁹ Nyawa, ngayulu_{na} Paulalu kuwari mara walytjangku walkatjura kalkuni alatji, “*Mulapa_{na} nyuntunya mani panya nampa palunyu_{tu} ungguku.*” Palu ngayulu nyuntula ngatjintja wiya panyanguru, panya ngayulu_{na}nta Jesunya nyuntula tjakultjunu, kan palulanguru palumpa walytjaringu. ²⁰ Palu ngayulu nyuntunya tjapini nyuntu wati nyanga palumpa kalyparingkula palunya pukultu malakungku mantjintjaku, panya nyuntu Mayatja Jesunya kulilpai kuwari nyinanyi. Ka_na palulanguru kulira pulkara pukulariku nyuntu palunya malakungku mantjira kanyinnyangka. ²¹ Palu ngayulu lita nyangatja walkatjura kulini panya mulapa nyuntu palyalku ngayulu nyanga nyuntula tjapintjanya munun tjinguru piruku mu_nkara palyalku pulka mulapalta.

²² Wanyu kulila! Nguratju nga_nmanytju palyara wanti ngayulu nyuntumpa ngurangka ma-pitjala ngarintjaku, panya nyura Godala tjapiningi ngayuku, ka_na tjinguru kuwari nguwanpa tjaillanguru pakalku mununa nyuralakutu ma-pitjaku.

Paulalu Tjukurpa Malatja Wangkanytja

²³ Ka wati nyanga Paparatjanya ngali kuwari nyinanyi nyanga tjaila unngu. Wati nyanga palunya ku_{lu}ya Jesuku tjukurpa tjakultjunkunyangka tjaillangka witira tjarpatjunu. Ka paluru ngayula wangkangu nyuntula ma-tjakultjunkunytjaku panya paluru nyuntunya kulini nyuntumpa pukularira.

²⁴ Ka wati nyanganpa ku_{lu} kuwari nyinanyi ngura nyangangka Jesuku tjukurtjara tju_ta wati panya Markanya, Ari-tjakatjanya, Timatjanya, Lukeanya tjana ku_{lu}. Munuya nyanga paluru tjana palu purunyapu_{tu} ngayula wangkangu nyuntula ma-tjakultjunkunytjaku panya tjana nyuntunya kulilpai.

²⁵ Uwa alatjitu_{na} wangkanyi. Ka Mayatja Jesulu Christalu nyuranya pukultju pulkangku kanyinma.

Lita Iipuru Tjuṭakutu Iyantja Hebrews Nyngatja Nganmanytju Nyakula Wangkanytjaku

Puṭula kulini nganalu walkatjunu tjukurpa nyangatja, panya ini kuranyu ngaranytja wiya Paulaku lita tjuṭa purunypa. Palu nintipuka tjuṭangku kulilpai tjinguru Paanapatjalu walkatjunu, munta tjinguru Apalatjalu, munta tjinguru Tjaalatjalu walkatjunu.

Panya Jesuna malaku ilkaṛikutu ankunyangka palumpa nintintja tjuṭangku Tjukurpa Palya Jesuku para-tjakultjunangi aŋangu Israelkunu Jew tjuṭangka. Kaya tjara mulamularingu Jesuku munuya palumpa walytjaringu. Kaya palunya tjananya wangkapai alatji, *Jesuku walytja Iipuru tjuṭa*, panya tjanampa wangka Iipuru. Kaya Jew kutjupa tjuṭangku mulamularingkunytja wiyangku wantingi panya paluru tjana Moseku tjukurpa kutju pulkara kulilpai Jesuna wantinga.

Munuya paluru tjana Jesuku walytja Iipuru tjuṭa pułkara kuraningi Jesuna waŋannyangka, munuya pułkara mukumukuningi tjananya malaku pitjanytjaku tjanalakutu. Kaya Iipuru kutjupa tjuṭangku tjin-guru kuliningi tjanala munuya nguwanpa malaku anangi ara panya nganmanyitjangka piṛuku nyinanytjikitja.

Ka pala palulanguru tjukurpa nyangatja wati kutjupangku kulira walkatjunu tjanampa tjananya kuṇpuntjikitjangku Jesuna wantinytja wiyangku tungun-tunguntu waŋantjaku. Paluru alatji tjanala wangkangi lita nyangangka,

“Ara nganmanyitja panya Godalu Mosenya ungkunytja, nyara paluru unytju ngarangi munu puṭu aŋangu tjuṭa palyaningi tjana Godala mirangka tjukaruru ngaranytjaku. Palu Jesuna pitjangu munu puṇu kaṭakutjarangka ilura palumpa milkali tjutira ara kutjupa palyanu kuwaritja, ara panya nganmanyitjangka waintarinytja alatjiṭu. Ka ara nyanga palunya waŋannyangka kutju Godalu nganaŋanya palyalku palula mirangka tjukaruru ngaranytjaku, nganaŋa Jesuku mulamula-ringkunyangka.”

Ka lita nyangangka ngaranyi tjukurpa nganaŋa kuļu kulintjaku panya Jesuna pulka mulapa uwankarangka waintarinytja, ka iwara panya paluru alantja nganaŋa Godala wirkankunytjaku wiřu mulapa ngaranyi iwara kutjupa tjuṭangka waintarinytja.

Tjukurpa nyanganpa ngarinyi:

1:1—2:18 Angelpa tjuṭa palya, palu Godaku katja pulka mulapa tjanala waintara.

3:1—4:13 Mosenya palya, palu Godaku katja pulka mulapa palula waintara.

4:14—7:28 Jesuna tjukurtjara pulka nganampa nyinanyi kutjupa tjuṭangka waintara alatjiṭu.

8:1—9:22 Godalu Jesulawanungku kalkuntja pulka mulapa ngaranyi Moselawanungku kalkuntja purunypa wiya.

9:23—10:18 Christanya nganampa ngalkilpa ilura milkali tjutinyangka kutju Godalu nganaŋanya kura tjuṭa palyantjitetjanguru kalypangku wantipai

- 10:19-39 Palulangurula uti raparingkula Godala ilaringkula palula titutjara tjungu nyinama
 11:1-40 Nganmanyitja tjuṭangku nganananya nintintja Godaku rawa mulamularingkunytjaku wantintyta wiya alatjitu
 12:1-13 Godanya nganampa mama nyinanyi munu nganananya tjukarurulpai.
 12:14-29 Godanya kulira wantintyjaku-tawara
 13:1-8 Anangu kutjupa tjuṭa mukulyangku wiruṭa kanyintjaku
 13:9-19 Tjukurpa kurakura tjuṭa ngunti wangkara nintinnyangka kulira wantintyjaku
 13:20-25 Tjukurpa malatja

Godalu Ngananala Wangkangu Palumpa Katjawanungku

¹ Uwa, nganmanyitju Godalu wangkatjara tjuṭawanungku wangkangi tjamula tjanala. Paluru tjuṭa-arangku wangkangi wangkatjara kutjupa kutjupangka, tjukurpa kutjupa kutjupa tjuṭa. ² Palu kuwari nyanga tjintu malatja ilaringkunyangka Godalu ngananala wangkangu palumpa katjawanungku. Panya palumpa katja kuwaripatjara mulapa nyinangi palula tjungu munu pula tjungungku uwankara palunu ilkari, manta kulu. Ka katja palunya Godalu wangkara tjunu uwankara mulapa mayatjangku kanyintjaku. ³ Godanya panya wiru mulapa nyinanyi pitalytji pulkanya, ka paluru pitalytji nyanga palunya ngananala nintini panya paluru Mama purunyapa alatjitu nyinanyi, wiru mulapa. Munu paluru manta ilkari uwankara tjukarurungku kanyini witulya pulkangku. Munu paluru nganampa ngalkilpa ilungu Godalu nganananya kura tjeta palyantjtjatjangu kalypangku pungkuwiyangku wantintyjaku. Munu panya palula małangka paluru ilkariikutu ankula Godala witulya pulkangka tjunguringkula mayatja pulkaṭu nyinanyi.

⁴ Uwa, paluru angelpa tjuṭa purunyapa wiya. Panya Godalu palunya angelpa tjuṭangka waintara tjunu pulka mulapa. Munu angelpa tjuṭa pulkanmankunytja wiyangku palunya kutju katjanmankula tjunu mayatja pulka. ⁵ Panya nyiringka iriti walkatjunkunytja ngaranyi Godalu wangkanytja nyanga alatji,
 “Nyuntun ngayuku katja, kana nyanganguru nyuntunya tiṭutjarangku katjanmankuku.” *

Ka nyangatja wanyu Godalu angelta wangkangu? Wiya, Godalu angelta nyanga alatji wangkanytja wiya. Palu palurunku palumpa katja kutju tjakultjunangi Jesunya. Godalu Davidala iriti wangkangi nyanga alatji,
 “Palatja ngayuku katja, ka ngayulu palumpa Mama.” *

Ka nyangatja wanyu Godalu angelpa tjakultjunangi Davidala? Wiya, paluru angelpa wangkanytja wiya, palurunku palumpa katja wangkangi.

⁶ Panya palumpa katja kutjukurutja mantakutu iyantjikitjangku kulira Godalu wangkangu alatji,
 “Angelpa uwankarangkuya kulinma munuya nyanga palunya walkunma.” *

⁷ Palu nyaa wanyu Godalu angelpa tjuṭa wangkangi? Wiya, iriti panya paluru wangkanytja nyiringka ngaranyi tjukurpa nyanga angelpatjara alatji,

“Panya Godalu angelpa tjuṭa witulpai kutjupa kutjuparira palumpa war karinytjaku,

* **1:5** Psalm 2:7 * **1:5** 2 Samuelku 7:14 * **1:6** Psalm 97:7

panya walpa purunyarira munu waru tili purunyarira.” *

8 Palu tjukurpa kutjupa ngaranyi Godalu palumpa katja wangkanytja nyanga alatji,
“Nyuntun mayatja pulka mulapa munun nyuntumpa anangu tjuta tiutjarangku kanyilku wiyingkunyta wiyangku.
Nyuntu tjananya tjukarurungku kanyilku kurara kanyintja wiyangku.

9 Munu tjana tjukarurungku palyannyangka kutju nyuntu pukularipai palu kura palyannyangka nyuntu putu pukularipai.
Ka panya nyara palulanguru nyuntu tjukarurungku kulinnyangka Godalu nyuntunya nganmanytu mayatja pulka mulapa tjunu panya nyuntumpa malpa tjutangka waintarintjaku,
kan pulkara pukularinyi.” *

10 Ka tjukurpa kutjupa ngaranyitu nyanga alatji Godalu wangkanytja,
“Mayatja, nyuntun kuwaripatjara mulapa uwankara wiyangka manta ilkari palunu,

11-12 Ka panya ngula manta ilkari wiyingkuku, palu nyuntu wiyingkunytja wiya titutjara alatjitu nyinaku.
Wanyu kulila panya mantara anangitja anangungku rawangku kanyinnyangka kałakatipai ka araljara wanipai munu kuwaritjangka tjarpapai.
Palu purunypa manta ilkari ngula wiyingkunyangka nyuntu ilkari kuwaritja manta kuwaritja tjunkuku.
Palu nyuntu kampa kutjuparintja wiya panya paluru tu alatjitu rawa nyinaku wiyingkunytja wiya.” *

Alatji nyiringka iriti walkatjunkunytja ngaranyi Godalu tjukurpa Jesunyatjara wangkanytja. **13-14** Uwa, mulapa Godalu angelta wangkanytja wiya mayatjarintjaku, palu palumpa katjangka kutju wangkangu nyanga alatji,
“Pitja munu ngayula tjunguringkula mayatjari,
kanā nyuntumpa mirpañtu tjuta tjarulku,
ka nyuntu tjanala waintarira mayatja pulka mulapa nyinaku.” *

Uwa, nyangatja Godalu palumpa katjangka wangkangu. Ka angelpa tjuta wanyu nyaa? Wiya, tjananya kurunpa tjuta nyinanyi munuya Godanya kulira wal Kulpai, ka panya tjananya Godalu witura iyalpai anangu palumpa walytja tjuta atunyamankunytjaku. Panya anangu palunya tjananya Godalu ngula wankarunkuku.

2

Tjukurpa Nganampa Wankakutu Mulapa

1 Uwa, Jesuna pulka mulapa angelpa tjutangka waintara, kala uti Jesuku tjukurpa nganana nganmanytu kulintjatjanungku purkarangku kulinma watarkurintja wiyangku. Panya nganana tjukurpa nyanga palumpa watarkurirampa Jesulanguru paturingkuku. **2** Panya iriti puli panya ini Tjaniyala angelpa tjutangku Mosenya ungu Godaku tjukurpa. Ka tjukurpa nyara paluru panya tjukaruru mulapa, panya anangungku tungunpungkula tjukurpa palunya kulira wantinyangka palumpa kura ngapartji utiringu.

3 Ka tjukurpa nyanga pulka Jesuku nganana kulira wantinyangka nganampa kura pulka palu purunypatu ngaraku, panya tjukurpa nyanga paluru pulka mulapa kulira mulamularingkula wankaringkunytjaku.

* 1:7 Psalm 104:4 * 1:9 Psalm 45:6-7 * 1:11-12 Psalm 102:25-27 * 1:13-14 Psalm 110:1

Palu nganana kulira wantirampa putu wankaringanyi. Panya tjukurpa wanka nyanga palunya Mayatja Jesulu-wararangku tjanala tjakultjunu, ka tjana ngapartji kulintjatjanungku ngananaala utingku ngalya-tjakultjunu kulira mulamularingkunytjaku. ⁴ Ka tjana tjukurpa nyanga palunya ngananaala wangkanyangka Godalu miracle kutjupa kutjupa tjuta nintipukangku palyaningi witulya pulkangku, nganana nyakula tjukurpa nyanga palumpa mulamularingkunytjaku. Munu Godalu Kurunpa Milmilnga ngananaala unngu tjarpatjunu, ka nganananya witulyananyi Kurunpa Milmiltu kutjupa kutjupa tjuta witulya pulkangku palyantjaku paluru nintinnyangka. Kala nyanga alatji witulyatjararingkula tjukurpa panya palumpa pulkarata mulamularinganyi. Kala wanyu tjukurpa pulka nyanga palunya kulira wantima? Wiya, utilanku kulira wantinytja wiyangku wantima wankakitjangku.

Jesunya Anangurira Nganananya Purunyaringu

- ⁵ Ka panya Godalu angelpa tjuta tjunkunytja wiyata mayatjarira uwankara kanyintjaku ngula manta ilkari kuwaritja utiringkunyangka.
- ⁶ Palu Godalu anangu tjuta tjunu mayatjarira kanyintjaku, panya nyiringka iriti walkatjunkunytja alatji ngaranyi wati kutjupangku wangkanytja, "God, nyuntu panyan pulka mulapa, ka panya anangu tjuta minga purunypa.

Palu nyuntu tjananya ngaltunytjungku kulipai,
Munun tjananya atunymara kanyilpai.

- ⁷ Panya nyuntu anangu palyanu pulka mulapa nyinanytjaku angelpa tjutangka itingka, pitalytji pulkatjara.
- ⁸ Munu panyan nyuntu anangu tjunu mayatjarira nyuntu panya paluntja uwankara kanyintjaku." *

Panya alatji ngaranyi iriti walkatjunkunytja, kala nyanga palulanguru kulini mulapa Godalu anangu tjunu uwankara mulapa atunymara kanyintjaku.

Palu kuwarila putu nyanganyi anangu kutjupangku uwankara tjukarurungku kanyinnyangka. Wiya alatjitu. ⁹ Palu nganana Jesunya kutju nyanganyi. Paluru kutju mayatja pulka nyinara uwankara kanyini. Nyara palunya panya Godalu angelpa tjutanguru unytjungku tjarunu pula tjungu nyinanytjatjanungku paluru anangurira ngalkilpa ilunytjaku anangu uwankaraku. Godalu panya mukulya pulkangku iyanu anangu tjuta ngalkintjaku, ka panya paluru pikatjararingkula angailungu nganana kura tjeta palyantjtjanguru. Nyara palulanguru paluru ilunytjtjanguru Godalu palunya pulka mulapa tjunu uwankarangku palunya walkuntjaku.

¹⁰ Nyangatja Godalu tjukarurungku palyanu nganananya palumpa tjitji tjuta wankaru malakungku wirkakatinytjikitjangku. Panya paluru kutjungku uwankara paluntjatjanungku wirura kanyilpaingku kulira Jesunya iyanu anangu tjutaku iwarankunytjaku Godalakutu, tjana palumpa walytjaringkula wirkankunytjaku palumpa pitalytjingka. Panya Jesunya iyanu pikatjararingkula ilunytjaku, ka nyara palulanguru kutju paluru nganananya wankaru wirkakatinyi Godalakutu. ¹¹ Panya Jesunya nganana walytjarara walytjarara Mama kutjutjara nyinanyi palumpa walytja kutjupa tjuta kulukulu. Nyara paluru nganananya wankarunu kura nganampa paltjira wiyyara, munulanya palulangurulta kunta wiyangku

* ^{2:8} Psalm 8:4-6

pukultu małanypanmananyi. 12 Panya Jesulu iriti Mama Godala wangkangu nyanga alatji,

“Ngayuluña ngayuku małanya tjutangka nyuntunya tjakultjunkuku. Mununa tjana tjunguringkunyangka tjanala ngurur-ngururpa ngarala nyuntunya inkara walkkulku.” *

13 Munu alatji píruku wangkangu,

“Ngayuluña mulamularingkuku Godaku.” *

Munu nyangatja kuļu wangkangu alatji,

“Nyanga ngaranyina Godaku tjitji tjutangka tjungu,

panya paluruṇi wituṇu tjananya aṭunytju kanyintjaku.” *

14 Godaku tjitji tjuṭa panya aŋangu nyinanyi iltjanpa milkalitjara. Palulanguru Jesunya nganananya purunypaṭu aŋanguringu munu iltjanpaṭu milkalitjararingu. Alatji paluru aŋanguringu nganampa angailura mamu Satannga wiyanjtikitja, panya paluru nganananya ilunytjaku kuralpai. 15 Uwa, Jesunya pitjangu nganananya ngalkintjikitja Satantanguru munu paluru nganananya raparingkunytjaku palyaṇu. Panya ngañmanytjula mamungka kulira nganaṇa tiṭutjara nguluringkupai ilunytjaku-tawara. 16 Palu Jesunya angelpa tjuṭa ngalkintjikitja pitjangu wiya. Paluru nganananya wankarunkunytjikitja pitjangu Aipuramaku tjamupiti małatja malatja.

17 Nyanga palunyakitja panya paluru mantakutu pitjala aŋanguringu munu mantangka nyanga nyinangi aŋangu alatjiṭu nganananya purunypa. Munu panya Godaku war̄karira nganampa tjukurtjara pulka nyinangi ngaltunytju pulkanya munu paluru tjukarurungku palyaṇu nganampa ngalkiltu Godalu nganananya kura palyantitjanguru punkunytjaku-tawara nganaṇa karalyarira Godalakutu malaku aruringkunytjaku. 18 Panya mamu tjutangku munu aŋangu tjutangku kuļu Jesunya kuraringkunytjaku rawangku arkaningi, palu paluru tungunpungkula alatjiṭu wantingi. Nyanga palulanguru paluru nganananya nintini nganaṇa palu purunypaṭu kura palyalwiya tunguntungunpa nyinanytjaku.

3

Jesunya Pulka Mulapa Mosela Munkara

1-2 Walytja wiru tjuṭa, nyangangurula uti Jesunya pulka kulinma, panya Godalu nganananya altingu palula tjunguringkula nyinanytjaku. Kala uti palunya rawangku kulinma, panya palunya Godalu tjukurtjara pulka ngurkantara iyanu nganampa ngalkilpa pulka nyinanytjaku. Ka paluru wanganarangku Godala kulira palumpa war̄ka palyaṇu wantintyja wiyangku Moselu purunytju, panya paluru Godala wanganarangku kulinigi Godaku walytjapiti tjukarurungku kanyira.

3 Palu Jesunya Mosela waintara nyinanyi mayatja pulka mulapa, panya Mosenya Godaku walytja tjutangka tjungu nyinanyi aŋangu alatjiṭu, ka Jesunya panya palula tjanala waintara nyinanyi panya paluru aŋangu tjuṭa Godaku walytjaringkunytjaku palyaṇu. 4 Panya aŋangu watarku nyinara puṭu Godaku walytjaringanyi, palu Jesulu palyannyangka kutju palumpa walytjaringanyi. Uwa, Godalu uwankara mulapa palyaṇu.

5 Ka Mosenya panya Godaku war̄karipai nyinangi munu palula wanganarangku kulira war̄karingi Godaku walytja tjutangka. Munu panya

* 2:12 Psalm 22:22 * 2:13 Aitjayaku 8:17 * 2:13 Aitjayaku 8:18

tjanala tjakultjunangi alatji, "Ngula Godalu kutjupa kutjupa tjuṭa wangkara utilku." ⁶ Ka panya Christanya palu purunypaṭu Godala wangaṇarangku kulira warkaripai Godaku walytjapiti aṭunyti kanyira. Palu panya paluru Godaku katja, ka Mosenya Godaku katja wiya wati warkaripai kutju aṅangu tjuṭa purunypa. Ka panya nganana Godaku walytjapiti nyinanyi. Munula pakuwiyangku Jesunya rawangku wanarampa titutjaralta palumpa walytja nyinaku. Utla rawa pukulpa ala-alā paṭara nyinama palumpa, panya palurulanya ngula ngura wirukutu katinyi. Uwa-maṇtu nganana palumpa walytjapiti titutjara nyinaku nyanga palunya rapangku kulirampa.

Ngura Kalkuntjitjangka Wirkara Pakuwiyarungkunytjaku

⁷⁻⁸ Kaya nyangatja kulinma Kurunpa Milmilku tjukurpa panya nyiringka iriti walkatjunkunytja ngaranyi nyanga alatji,

"Nyura kuwari Godalu wangkanyangka kulira tungunpungkunytja wiyangku wantima.

Panya iriti pilangka nyurampa walytjapitingku Godala tungunpungkula kulintja wiyangku wantingi.

Ka nyura palunya tjananya arkalwiyangku wantima."

⁹ Godalu panya wangkangu alatji,

"Panya tjana iriti pilangka rawa para-ngarangi kuli 40, kaṇa kutjupa kutjupa wiru tjuṭa tjanampa palyaningi nyakula mulamularingkunytjaku.

Palu paluru tjana nyakula mulamularingkuwiyangku wantingi, munuya ngayunya rawangku wituwituningi piṛuku palyannyangka nyakunykitjangku.

¹⁰ Kaṇa palulanguru tjanampa pułkarā mirpaṇaringi mununa kuliningi alatji, 'Nyaakuya ngayunya titutjarangku wantira kampa kutjupa kulini munu ngayulu wangkanyangka wanġanarangku kulintja wiyangku wantinyi?'

¹¹ Mununa palulanguru tjanampa mirpaṇarira mulamulangku tjananya kalkunu nyanga alatji,

'Paluru tjana ngura panya ngayulu kalkuntjitjangka wirkankunytja wiya alatjiṭu ngaraku ngayula tjungu nyinara pakuwiyaringkunytjikitja.' *

¹² Walytja wiru tjuṭa, pułkarayanku nyangama munuyanku aṭunymanama. Tjinguru kutjupangku nyuralanguru kuraringkula kutjupangka ngunti kulira Godalanguru paṭuringkuku, ka nyuranku palula-tawara pułkarā aṭunymanama, panya Godanya wanka alatjiṭu nyinanyi. ¹³ Uti nyuranku ngapartji-ngapartjingku wangkara kūnpunma kura ngunti kulira tarilarantjaku-tawara, panya kurangku nganana nyangama ngunti kuralpai Godala tungunpungkunytjaku. Palu rawangkuyanku kūnpunma tjintu kutjupa tjintu kutjupa ngulaku paṭantja wiyangku, panya nyura ngulaku paṭarampa tjinguru ngururpaṭu iluku tjukurta kūnpuringkunytja wiyatū. ¹⁴ Uwa, pułkarayanku aṭunymanama, panya nganana uwankara Christala tjunguringu munula titutjarangku tunguntunguntu palunya wanarampa nganana rawa palula tjungu nyinaku. Panya nganana nganmanyti palumpa pułkarā mulamularingkula palunya wanāningi, palu purunyti jula uti wanānma ilunytjitatjukutuwangkara, munula mulapa palula tjungu nyinaku.

¹⁵ Panya nyiringka iriti walkatjunkunytja ngaranyi alatji,

* **3:11** Psalm 95:7-11

“Nyura kuwari Godalu wangkanyangka kulira tungunpungkuwiyangku wantima.

Panya iritiya nyurampa walytjapitingku Godala tungunpungangi, ka nyura palunya tjananya arkalwiyangku wantima.” *

¹⁶ Ka nganalu tjana wanyu panyatja Godala kulintja wiyangku wantira tungunpungangi? Wiya panya paluru tjana, panya Moselu tjananya Itjipalanguru katingu. ¹⁷ Palu nganaku tjanampa Godanya rawa mirpañaringi kuli 40? Wiya panya palumpa tjanampa, panya pilangkaya tungunpungkula kura palyaningi, munu panyaya nyara palula arangka pilangka ilungi. ¹⁸ Godalu panya mirpañarira kalkunu alatji, “Paluru tjana ngura panya ngayulu kalkuntjitjangka wirkankunytja wiyañu ngayula nyinara pakuwiyingkunytjikitja.” Palu ngananya tjananya wanyu paluru alatji wangkangu? Wiya panya palula tjanalatu, panya palula tungunpungkupai tjutangka. ¹⁹ Kala kulini panya tjana Godaku mulamularingkuwiyangku wantira ngura panya pakuwiyingkupaingka puñ wirkanangi.

4

¹ Palu ngura panya paluru ala alatji ngaranyi nganaña Godala wirkara nyinara pakuwiyingkunytjaku. Kala uti purkarangku kulinma, ngunti kulira ngura panya palula ngatalarinytjaku-tawara. ² Panya nganaña kulinu Tjukurpa Palya, panya Godalulanya altinyi palula tjunguringkula pakuwiyingkunytjaku. Ka palu purunytpa anangu Israelkunu tjutangku iriti kulinu Godalu palula tjanala tjukurpa palu purunytpa wangkanyangka. Palu paluru tjana panyaya kulira wantingi munuya wantintjtjanu puñ wirkana ngura panya Kainanta, panya tjana Godaku mulamularingkunytja wiyangku wantingi paluru kalkunyangka. ³ Palu nganaña palumpa tjukurpa wiruku tjukaruru mulamularingkula palula tjungu ngaranyi pakuwiyingkunytjikitja. Panya Godalu kuwaripatjaranguru alatjiuwankara palura wiayingkunytjatjanungku rawangkuñu altingi anangu tjuña palula tjunguringkula pakuwiyingkunytjaku. Kaya uti iriti miri panya tjuña mulamularingama, palu tjana kulira wantingi. Ka palulanguru Godalu tjananya painu panya nyiringka alatji ngaranyi Godalu wangkara kalkuntja,

“Ngayuluña tjanampa mirpañarira mulamulangku tjananya kalkunu nyanga alatji,

‘Paluru tjana ngura panya ngayulu kalkuntjitjangka wirkankunytja wiya alatji ngaraku ngayula tjungu nyinara pakuwiyingkunytjikitja.’” *

⁴ Panya iriti walkatjunkunytja nyiringka ngaranyi nyanga alatji, “Tjintu 6 uwankara palura wiya Godanya pakuwiyingingu tjintu panya 7-ta.” *

⁵ Munu piruku Godalu wangkanytja nyiringka ngaranyi nyanga alatji, “Paluru tjana ngura panya ngayulu kalkuntjitjangka wirkankunytja wiya alatji ngaraku ngayula tjungu nyinara pakuwiyingkunytjikitja.” *

⁶ Panya nganmanyitja tjuñangku Tjukurpa Palya kulira wantingi munuya palulanguru ngura panya palula wirkankunytja wiya. Palu ngura paluru kuwari ala alatji ngaranyi kutjupa tjuña wirkara pakuwiyingkunytjaku. ⁷ Nyanga palunyala kulini panya ngula kuli tjuña mulapa ngarala

* 3:15 Psalm 95:7-8 * 4:3 Psalm 95:11 * 4:4 Genesis 2:2 * 4:5 Psalm 95:11

wiyaringkunyangka Godalu panya palunyatu pírku kalkunu Davidala, ka paluru anangu tjutangku kulintjaku walkatjelu nyiringka alatji, “Nyura kuwari Godalu wangkanyangka kulira tungunpungkunytja wiyangku wangañarangku kulinma.” *

⁸ Uwa, ngura panya pakuwiyingkupainya kuwaritu ala ngaranyi, panya Tjatjuwalu tjanaya Kainanta wirkakatinyangka Godalu małangka rawangku wangkangi, “Tjintu kutjupa ngaranyitu anangu tjuta wirkara pakuwiyingkunytjaku panya ngayulu kalkuntjtjangka.” Kala nyanga palulanguru kulini alatji, “Munta-uwa, Tjatjuwalu tjanaya Kainanta wirkakatinyangkaya mulamula pakuwiyingkunytja wiyatú nyinangi.”*

⁹⁻¹⁰ Munula kulini mulapa ala ngaranyi kuwaripatu nganaña Godaku walytja tjuta palula tjunguringkula pakuwiyingkunytjaku, panya Godanya purunypa, panya paluru tjintu 7-itja pakuwiyingru, palu purunypa. Panya Godanya tjintu 6 pulkara warékaringi munu waréka wiyangkula pukulpa alatjitu nyinara pakuwiyingru. Ka nyara palu purunypa nganaña Godalu kalkuntjtjangka wirkara nyinara pakuwiyingkuku, waréka nganampa palyantjatjanu. ¹¹ Kala palulanguru uti kurunpa winkingku Godaku iwara tungun-tunguntu arkara wañanma Godalu kalkuntjtjangka wirkara pakuwiyingkunytjikitjangku. Panya tjanaya iriti mulamularingkuwiyangku wantingi munuya Godala tungunpungkula paturingu. Kala uti pala palula-tawara tjukaruru mulamularingama munu Godala titutjarangku wangañarangku kulinma.

¹² Panya Godaku tjukurpa wankakutu alatjitu anangungku wangkanytja purunypa wiya, panya Godalu wangkanytja uwankara mulapa alatjitu utiringkupai. Palumpa wangka tjula iri kampa kutjaratjara, pulka mulapa. Panya tjula iri pulkangku anangu wakařa tarka unngutja miiltjingalpai munu katara ala lipilpai, palu purunytju Godaku tjukurtu nganañanya unngu kulintja uwankara tjukarurungku miiltjingalpai. ¹³ Panya Godanya uwankaraku ninti, ka nganaña putu palula kumpini. Paluru uwankara nintingku nyakula kulini nganaña unngu kulintja kuļu, kala putu kutitjura kanyini. Munu ngula paluru kutjungku nganañanya unngu nyakula puntura wangkaku, ka nganaña putu palula wiyanmankuku.

Pala palulangurula uti Godaku iwara tungun-tunguntu wañanma paluru kalkuntjtjangka wirkara pakuwiyingkunytjikitjangku.

Jesunya Tjukurtjara Pulka

¹⁴ Uwa, nganaña panya Jesuku mulamularinganyi. Panya paluru nganampa tjukurtjara pulka Godaku katja munu paluru ankula Godala tjunguringkula nganampa ngalkilpa nyinanyi. Kala pala palulanguru nganaña uti palumpa mulamularingkula wantinýtja wiyangku palunya tungun-tunguntu wañanma. ¹⁵ Panya anangu tjutangku mamu tjutangku kuļu nganañanya rawangku arkalpai kuraringkunytjaku. Palu nganampa ngalkilpa pulkangku nyanganpa nintingku kulini panya nganmanytjulpiya mantangka nyinanyangka palu purunytju palunya mukumukura arkaningi kuraringkunytjaku. Palu paluru kulira wantingi kura palyantja wiyangku. Munu paluru nganampa ngalturinganyi panya nganaña putu kulira wantipai kutjupangku mukumukunyangka. ¹⁶ Kala uti palulanguru raparingkula Godala ilaringama nguluringkunytja wiya. Panya paluru ngaltunytju mukulya mulapa nganampa nyinanyi munu nganaña kura palyantjatjanu piiwiyingkunyangka nganampa

* ^{4:7} Psalm 95:7-8 * ^{4:8} Tjatjuwalu panya Moseku arangka mayatjarira Israelkunu tjuta katirinangi Mosenya ilunyangka małangka.

kalyparingkupai. Kala uti kurantjikitjangku arkannyaangka palula tjap-inma nganañanya anga-kanyintjaku kuraringkunytjaku-tawara, kalanya mulapa paluru ngaltunytjungku anga-kanyilkku.

5

¹ Godalu panya wati tjukurtjara pulka anangu tjutanguru ngurkantara tjunkupai palumpa tjanampa ngalkilpa nyinara war karinytjaku.* Ka tjukurtjara pulka nyara paluru inmangka kuka pungkula tiliwakara Godanya ungkupai mai kulu, paluru nyakula anangu tjuta kalypangku pungkuwiyangku wantinytjaku tjana kura palyantjitjanguru. ² Ka anangu tjutangku tjinguru watarkungku kura palyannyangka tjukurtjara paluru ngaltunytjungku tjananya purkarankupai, panya paluru kulu upa kunpu wiya tjana purunypa. ³ Pala palulanguru tjukurtjara paluru kuka pungkula tiliwakara Godanya ungkupai palumpa kuranguru kulu anangu tjutaku kuranguru kutju wiya, ka Godalu palunya kulu kalypangku wantipai paluru kura palyantjitjanguru anangu kutjupa tjuta purunypa.

⁴ Palu anangu nyara palurunku walytjangku pulkanmankupai wiya tjukurtjara pulka nyinanytjikitjangku, palu paluru Godalu ngurkantankunyangka kutju tjukurtjararingkupai, Aaronnga purunypa, panya palunya Godalu ngurkantara tjunu tjukurtjara pulka nyinanytjaku. ⁵ Ka nyara palu purunytjutu Christalu palurunku walytjangku pulkanmankunytja wiya tjukurtjara pulka nyinanytjikitjangku. Palu Godalu palunya ngurkantara tjunu alatji wangkara,

“Nyuntun ngayuku katja, kaña nyanganguru nyuntunya titutjarangku katjanmankuku.” *

Wangka nyangatja nyiringka walkatjunkunytja ngaranyi. ⁶ Ka nyiri palulatu tjukurpa kutjupa ngaranyi Godalu wangkanytja nyanga alatji,

“Nyuntun tjukurtjara pulka titutjara nyinaku milmilpa mulapa, wati Milkitja-tikanya purunypa,

panya paluru tjukurtjara pulka mulapa iriti nyinangi, palu purunypa.”**

⁷ Ka Godalu panya Jesunya ilunytjaku-tawara wankarunkunytjaku ngarangi alatji. Ka panya Jesulu mantangka nyinaralpi Godala pulkara mirara tjapiro ulangi palunya rapantjaku ngulu wiya ilunytjikitjangku. Palu paluru Godala titutjarangku wanganarangku kuliningi palurunku pulkanmankunytja wiyangku, ka nyara palulanguru Godalu palunya ngapartji kulinu paluru ulara tjapinnyangka, munu palunya rapanu ngulu wiya ilunytjaku. ⁸ Ka nyura tjinguru kulini palunya pikantankunytja wiya nyinanytjaku-palku. Palu palunyaya pungu alatji, ka pikatjararingkula ilungu. Panya paluru Godala wanganarangku kuliningi ka pika palumpa wirkanu. Munu paluru nintiringkula kulinu panya anangungku Godala wanganarangku kulinnyangka pika palumpa utiringkupai. ⁹ Panya Godalu Jesunya witunu ankula mantangka kutjupa kutjupa tjuta palyantjaku. Ka paluru wanganarangku kulira palyanu munu panya ilungu, ka nyara palulanguru anangu tjuta kuvari wankaringkunytjaku tjanampa ngaranyi alatji, tjana palula wanganarangku kulirampa. Nyara palulanguruuya anangu tjuta Godala tjungu titutjara nyinaku. ¹⁰ Palu Godalu Jesunya

* ^{5:1} Panya Aarontanguruuya wati tjukurtjara pulka tjuta nyinakatingi wanapari wanapari Godalu wati tjutanguru ngurkantara tjunkunytja. * ^{5:5} Psalm 2:7 * ^{5:6} Tjukurpa Milkitja-tikanya-tjara ngaranyi nyiri ini Genesis-ala 14:17-20. * ^{5:6} Psalm 110:4

tjunu tjukurtjara pulka mulapa tiutjara nyinanytjaku, panya watu Milkitja-tikanya tjukurtjara pulka nyinangi, palu purunyapa.

¹¹ Tjinguruña piruku nyurala tjakultjunama tjukurpa nyangatja panya Jesunya Christanya Milkitja-tikanya purunyapa nyinanytja. Palu putuña nyurala utingku wangkanyi panya nyura tjukurpa pulka puñu nguwanpa kulilpai. ¹² Nyura nganmanyapa Godaku walytjaringu munu kuwari nyura tjinguru palumpa tjukurku ninti pulka nyinama munu nyura tjinguru anangu kutjupa tjuña ngapartji nintinma kuwari kutju Jesuku walytjaringkunytja tjuña. Palu wiya, nyura nintiringkunytja wiyat nyinangi munu nyura tjukurpa nganmanyitjaku watarkuringu, ka nyuranya nganaña piruku nintintjaku ngaranyi, nyura iti purunytpu kuwaripangku ipi tjikinnyangka. Panya iti tjutangku mai kuka puñu ngalkupai munuya paluru tjana ipi kutju tjikilpai, palu purunyapa nyura tjukurpa pulka tjuña puñu kulilpai, munu nyura tjukurpa panya nganmanyitja uitja tjuña kutju tiutjarangku kulilpai. ¹³ Panya iti tjutangku puñu ngurkantankupai tjukarurungku palyantjikitjangku. Ka nyura nyara palu purunytpu puñu ngurkantankupai tjukarurungku palyantjikitjangku. ¹⁴ Palu uti nyura anangu pulka tjutampa tjukurpa pulka tjuñaku nintiringama. Munu nyura nyara palulanguru nintingku kulikku palya tjukaruru nyinanytjikitjangku munu kura kulu wantinytjikitjangku.

6

¹⁻² Palu nyaaku nyura tjukurpa nganmanyitja tjuña Christanyatjara rawangku wangkara kulintjikitja mukuringanyi? Wanyuya tjukurpa nganmanyitja tjuñaku nintiringkunytjatjanungku waintara kulinma tjukurpa kutjupa tjuñaku nintiringkunytjikitjangku. Panya anangu tjuña Jesuku walytjaringkunyangka nganaña palula tjanala nganmanytpu nintilpai iwara kurangka ankunytjatjanu kampa kutjuparinytjaku ilunytjaku-tawara, munu Godaku mulamularingkula palumpa iwarangka ankunytjaku. Munula tjanala nintilpai minangka baptise-katinitya, munu katangka mara tjunkunytja kulu panya Godalu witulyankunytjaku. Munula tjanala nintilpai panya ngula Godalu nganañanya ilunyangka wankara pakaltjingantja, munu paluru anangu uwankara ngurkantara tjarantja, munu kura tjuña paira iyantja ngura kurakutu tiutjara nyinanytjaku. Alatji-alatjila tjanala nintilpai kuwari kutju Jesuku walytjaringkunytja tjuña. Ka nyura nyaaku tjukurpa nyanga palumpa tjanampañu piruku nintiringkunytjikitja mukuringanyi? Uti nyura Godanya wanarampa tjukurpa kutjupa tjuñaku kulu rawatu nintiringkukatima munkaritja tjuñaku kulu. ³ Uwa, wanyula tjukurpa kutjupa tjuñaku kulu rawa nintiringama Godalu nintintjikitja mukuringkunyangka.

⁴⁻⁶ Kulilaya! Tjinguru anangu kutjupa Jesuku walytjaringanyi. Ka panya Godalu palula utini palumpa tjukurpa, ka kulilpairinganyi munu palula tjunguringkula kurunpa pukularinyi panya palunya wankarunu Godalu. Ka panya Kurunpa Milmilnga palula pitjala unngu tjarpara nyinakatinyi. Ka paluru unngu kulini panya Godalu kalkuntjtja mulapa tjukaruru ngaranyi. Munu kulini, "Mulapa Kurunpa Milmilnga witulya pulkanya ngayula unngu warkarinyi." Palu tjinguru paluru nyanganpa uwankara kulintjatjanungku Jesunya wantiku munu ala kutjupangka ankuku, kala yaaltjingara palunya Godalakutu malakungku katiku kampa kutjuparira palunya wanantjaku? Wiya alatji, panya paluru nganmanyapa Jesuku mulamularingu munu palulanguru ngulalta palunya ngunti kurara

wantingu. Ka nyangatja panya Jesunya pīruku puṇu kaṭakutjarangka utitjunkunytja purunypa. Panya anangu tjutangku Godaku katja wantira mirara wangangi puṇu kaṭakutjarangka utitjunkunytjaku, palu purunypa paluru palyani Jesunya wantikatira, kaya anangu tjutangku palunya nyakula Jesunya anaṇi.

⁷⁻⁸ Tjukurpa nyangatjaya kulila! Wati kaanangka warkaripaingku uninypa tjunkupai mantangka mai pakaltjingantjikitjangku. Ka minangku puyira manta tulykulpai ka mai pulka pakalpai. Ka Godalu manta nyara palunya nyakula palyanmankupai. Ka manta nyanga paluru anangu kulilpai tjuṭa purunypa. Palu manta kutjupa kuļu ngaranyi, ka nyara palunya kuļu minangku puyilpai palu kutjupa kutjupa tjuṭa pakalpai manta nyara palula tjilka, ukiri kurakura tjuṭa kuļukuļu. Ka manta nyanga palunya tjinguru Godalu nyakula kuranmankuku. Ka ngula warungku kampara wiyaliku manta nyanga palunya. Palu manta nyanga paluru anangu kuliṛa wantipai tjuṭa purunypa, panya ngañmanypaya Jesuku mulamularingu munuya maļangka palunya wantikatira kurangka anu.

⁹ Palu nyanganpaṇa nyurala ngañmanytju tjakultjunanyi nyura Godanya wantintjaku-tawara. Ka walytja wiru tjuṭa, ngayulu nyuranya kulini panya nyura iwara palyangka kutju ananyi wantintjya wiya. ¹⁰ Ka panya Godanya palya mulapa tjukaruru ngaranyi, munu nyuranya nyanganyi palumpa wirura warkarinyangka munu paluru nyurampa pukularinyi. Paluru nyanganyi nyuranya palumpa mukuringkunyangka, panya nyura palumpa walytja tjuṭaku mukuringkupai munu tjananya alpamilalpai. Munu nyura kuwari nyanga alatjiṭu nyinanyi. ¹¹⁻¹² Palu ngayulu mukuringanyi nyura uwankarangku rapangku warka wiru palyalkatinty-jaku kurunpa winkingku ilunytjakutu-wangkara. Panya Godalu nyuranya wirura kalkunu, ka nyura pukulpa patanı palumpa pakuringkunytja wiya. Nyara palulanguru nyura uti rapangku titutjarangku Jesunya wañanma munu nyura wiru mulapa mantjilku Godalanguru. Uwa, ngañmanyitja tjuṭa purunytjuya wañanma pakuringkuwiyangku, panya tjana iriti Godaku titutjara mulamularingangi pakuringkunytja wiya munuya nyara palulangurulta kuwari mantjini kalkuntja panya palunya.

¹³⁻¹⁴ Panya iriti mulapa Godalu Aipuramanya kalkunu alatji wangkara, “Ngayulu nyuntunya kalkuni pukulmankunytjikitjangku. Ka nyuntulan-guru malatja malatja ma-tjuṭaringkuku.” Munu paluru Aipuramanya palumpa mulamularingkunytjaku ini palurunku wangkara kalkunu. Tjin-guru ini kutjupa pulka mulapa ngaranyangkampa paluru ini palunya wangkara kalkunma. Palu wiya, ini kutjupa pulka mulapa palula waintara ngaranytja wiya alatjiṭu. Ka nyara palulanguru Godalu palurunku ini wangkara kalkunu. ¹⁵ Ka Aipuramanya rawa alatjiṭu Godaku mulamularingangi ngururpa watarkurintja wiya alatjiṭu. Ka Godalu palunya mulapatu ungu panya paluru kalkuntjatjanungku. ¹⁶ Kaya panyatja kulinma, panya kutjupangku kalkunyangka anangu kutjupa tjinguru puṭu mulamularingkupai, ka anangu nyara paluru mulamularingkunytjaku wati pulkaku ini wangkapai, ka anangu pulka ini wangkanyangka kuliṛa mulamularingkupai. ¹⁷ Ka palu purunyapatu Godalu tjananya ini pulka mulapa wangkara kalkunu ini palurunku tjana palumpa mulamularingkunytjaku. Panya paluru mukuringangi tjana nintingku kulin-tjaku paluru panya kalkuntja kutjuparintja wiya ngaranytjaku. Munu palurunku ini wangkangu kalkuntjatjanungku tjana mulapa kulintjaku.

¹⁸ Uwa, panya Godalu mulapa tjukarurungku kalkulpai ngunti wangkanytja wiyangku, munu paluru kalkura palurunku ini wangkany-

jatjanungku kampa kutjuparintja wiyangku ungkupai. Kala nyanga palulanguru nganaña pulkara raparingkula pukultu ala-alangku pañanı paluru nganañanya kalkuntjatjanungku ungkunyjaku, panya nganaña Godala tjunguringu palula wankaru nyinanytjikitja. ¹⁹⁻²⁰ Palu nganaña panya Godalu kalkuntja titutjarangku kulira mulamularingkula kutju kunpu tungun-tungunpa nyinaku Jesuku pañara. Panya paluru Mamaku ngurakutu nganmanyapa anu ilkarikutu nganampa ngalkilpa ilunytjatjanu. Panya wati tjukurtjara pulka tiinta milmilta tjarpara waintara matjarpapai ngura milmilpa mulata, nyara palu purunyapa Jesunya waintara tjarpangu ngura panya ilkaritjangka munu nganampa alaŋu ngalkilarinyt-jatjanungku, nganaña ngapartji maławanu tjarpara nyinanytjaku palula tjungu. Panya paluru tjukurtjara pulkaringkula titutjara nyinanyi wati panya Milkitja-tikanya purunyapa.

7

Tjukurtjara Milkitja-tikanya

¹⁻³ Panya Milkitja-tikanya ngura ini Salemaku mayatja nyinangi munu paluru wati tjukurtjara pulka nyinangi God Katutjaku. Ka ini panya Milkitja-tikanya tjaa Iipuru ngaranyi munu ini paluru wangkanyi alatji, *Iwara tjukaruruku mayatja*. Ka ngura ini Salemanya wangkanyi alatji, *Kalypa nyinanytjanya*. Kala palulanguru Milkitja-tikanya kulilpai nyanga alatji, “Paluru-maŋtu mayatja pulkangku aŋangu tjuṭa kalypa nyinanyt-jaku palyalpai.” Palu ngananya wanyu palumpa mama ngunytru, tjamu kami kuļu? Ngurpala nyara palumpa. Palu wanyu ngura yaaltjingka iti paluru wirkanu? Munu ngura yaaltjingka paluru ilungu? Nganaña ngurupa. Panya tjanaya nganmanytu nyiringka walkatjunkunyta wiyat̄u. Palu nganaña kulini panya paluru wati tjukurtjara pulka titutjara nyinapai, Godaku katja purunyapa.

Panya nganaña ninti Milkitja-tikaku pulampa Aipuramaku, panya iriti Aipuramalu tjana palumpa malpa tjuṭangku kuļu pikangku pungkula wiyanu mayatja kutjara kutjara tjanampa tjaultji tjuṭa kuļukulu. Munuya tjanampa kutjupa kutjupa tjuṭa mantjira katingu ngurakutu. Ka panya ngururpa wati Milkitja-tikanya ngalya-ngaparikatingu Aipuramanya wati-pitjanyangka nyakula munu palunya pukulmanu alatji wangkara, “Godalu nyuntunya wirura kanyinma mařangku.”*

Ka palulanguru Aipuramalu kutjupa kutjupa tjuṭa tjana mantjira katintya tjarara tjukutjuku ungu Milkitja-tikanya mayatja pulka kulira.* ⁴ Panya Milkitja-tikanya-maŋtu mayatja pulka mulapa kutjupa tjuṭangka waintarinytja, ka Aipuramalu Israelkunu tjutaku tjamu nganmanyitjangku palunya ungu tjarara warmaļanguru tjulyara katinty-jatjanungku. Tjinguru Aipuramanya palu purunyapa pulka mulapa nyinanyangkampa Milkitja-tikalu tjarara ungama palunya. Palu wiya, Aipuramalu palunya tjarara ungu mayatja pulka kulira.

⁵ Ka panya nganaña Israelkunu tjutangku wati tjukurtjara tjuṭa ngurkan-tankupai aŋangu Levikunu tjuṭanguru.* Munula Moseku tjukurpa kulira nganaña kutjupa kutjupa tjuṭa kanyintjatjanungku tjarara tjukutjuku

* **7:1-3** Genesis 14:17-20 * **7:1-3** Alatji Aipuramalu tjarara ungu kutjupa kutjupa uwankara paluru tjana katintya utulu lipula tjuṇu utulu kutjupa utulu kutjupa 10-pa, munu palulanguru palunya utulu kutjutja ungu 10-nguru Milkitja-tikanya, munu utulu 9 palurunku kanyinu. * **7:5** Levinya panya Aipuramaku pakaliku katja, panya Jacobaku, iriti mulapa nyinanytja.

ungkupai palunya tjananya tjukurtjara tjuta.* Uwa, tjana walytjanguru mantjilpai, panya paluru nganana uwankara Aipuramalanguru. ⁶⁻⁷ Palu wati tjukurtjara nyanga Milkitja-tikanya Aipuramaku walytja wiya, wati malikitja, Levilanguru wiya. Munu paluru mantjinu Aipuramalu tjarara ungkunyangka, munu palunya wangkara pukulmanu. Palu panya Godalu Aipuramanya nganmanyitju kalkunu pulka nyinanytjaku, kala tjinguru kulini paluru mayatja pulka mulapa Milkitja-tikala waintarinytja. Palu wiya, nyangatja Milkitja-tikaluu palunya wangkara pukulmanu nganmanypa pulka mulapa nyinanytjatjanungku. Panya nganana ninti wati malatjangku wati pulkanya alatji wangkara pukulmankupai wiya, palu wati pulkangku kutju pukulmankupai wati malatja. ⁸ Kulini nyura? Panya Milkitja-tikanya Aipuramala waintara pulka mulapa nyinangi, wati tjukurtjara tjutangka kulu. Panya paluru tjana mantjilpai Israelkunu tjutangku tjarara ungkunyangka palu tjukurtjara paluru tjana ilura wiyaringkupai. Ka Milkitja-tikalu Aipuramala mantjinu kutju-ara paluru tjarara ungkunyangka, munu palulanguru paluru yaaltjiringu? Wiya nyiringku tjakultjunanyi paluru wanka nyinanytja, ilunytja wiyatu.*

⁹⁻¹⁰ Uwa, nganana rawangku tjarara ungkupai wati tjukurtjara tjuta. Palumpa tjanampa tjamu nganmanyitja ini panya Levinya, panya Aipuramaku pakaliku katja. Ka panyaya tjukurtjara tjuta nyinakatingi malatja malatja Aipuramalanguru. Ka panya Aipuramalu Milkitja-tikanya tjarara ungu Levila kuwaripangka paluru tjana nyinanytja wiyangka. Paluru kutjungku ungu Milkitja-tikanya, palu tjanampa kulu ungu nganmanyitju watarku-watarkungku, panya Leviku tjanampa palumpa walytjapiti malatja malatjaku kulu.

Jesunya Tjukurtjara Nyinanyi Milkitja-tikanya Purunypa

¹¹ Ka Moselu nintiningi tjukurpa panya Godalu palunya ungkunytja, munu paluru wangkangi warka wati tjukurtjara tjutaku kulu. Ka palumpa kuta Aaronnga tjukurtjara nganmanyitja nyinangi. Wati panya paluru Levilanguru. Ka ngulalta palula malangka palumpa walytjapiti malatja malatja tjukurtjara tjutaringangi. Nyanga paluru tjana panya uwankara Leviku tjamupiti malatja malatja wanapari wanapari. Palu Israelkunu tjutangku tjukurpa panya Godalu Mosenya ungkunytjanguru nintiringu yaaltji-yaaltji tjukaruru nyinanytjikitja, munuya nintiringu kura palyantjatjanungku kuka katira ungkunytjikitja wati tjukurtjarangku pungkula Godanya ungkunytjaku paluru tjananya kura palyantjitjanguru kalypangku pungkuwiyangku wantintyjaku. Palu nyanga alatji palyaraya Godala mirangka tjukaruru ngaranytja wiya. Panya ara nyanga nganmanyitja wanaraya putu nguwanpa palyaringangi tjukaruru ngaranytjikitja Godala mirangka.

Ka nyara palulanguru Godalu tjukurtjara kutjupa iyanu ini Jesunya, panya tjukurtjara nganmanyitja tjutangku anangu tjuta putu palyaningi Godala mirangka tjukaruru ngaranytjaku. Palu Jesunya tjukurtjara kutjupa mulapa, Aaronnga tjana purunypa wiya, palu Milkitja-tikanya purunypa. ¹² Panya Godalu Jesunya tjukurtjara iyara ara panya nganmanyitja kampa kutjupanu. Munu paluru wati tjukurtjara tjutaku warka wiyanu munu kampa kutjupanu. Ka nganana kuwari ara kutjupangka nyinanyi ara kuwaritjangka. ¹³⁻¹⁴ Panya ara nganmanyitjangkaya Levilanguru kutju

* ^{7:5} Tjukurpa panya Godalu Mosenya ungkunytjitungku alatji wangkanyi, “Kutjupa kutjupa uwankara nyura kanyintjatjanungku tjarara tjukutjuku ungama wati tjukurtjara tjuta.” * ^{7:8} Genesis 14:17-20

tjukurtjara nyinapai, palu Jesunya tjukurtjara kutjupa Leviku walytjapitinguru wiya, palu Judah-ku walytjapitinguru. Panya Judah-nya tjana walytjaara walytjaara tjukurtjara nyinanytja wiyat, panya Moselu tjananya wangkanytja wiya kuka pungkula Godanya ungkunytjaku paluru anangu tjutaku kalyparingkunytjaku. Wiya, paluru Levikunu tjuta kutju wangkangu. Kala nyanga palulanguru kulini ara panya nganmanyitja wiyaringu, kala ara kuwaritjangkalta nyinanyi.

¹⁵ Uwa, mulapa Godalu ara nganmanyitja kampa kutjupanu, panya paluru tjukurtjara kutjupa mulapa ngurkantanu Milkitjatikanya puruny whole, Aaronnga tjana puruny whole wiya. ¹⁶ Panya ara nganmanyitjangkaya tjukurtjara tjuta ngurkantara tjunkupai Leviku walytjapitinguru. Palu tjukurtjara nyangatja Levikunu wiya. Paluru panya wanka titutjara nyinanyi wiyaringkunytja wiya alatji, ka nyara palulanguru Godalu palunya ngurkantara tjunu tjukurtjara nganampa nyinanytjaku. ¹⁷ Panya iriti nyiringka walkatjunkunytja nyanga alatji ngaranyi,

“Nyuntun tjukurtjara pulka titutjara nyinaku Milkitja-tikanya puruny whole ilunytja wiya.” *

Alatji Godalu Jesunya wangkangu.

¹⁸⁻¹⁹ Uwa, ara nganmanyitja wiyaringu, panya ara nyara paluru kuŋpu wiya kurakura ngarangi, panya ara nyara palulawanu nyinara anangu tjuta putu tjukaruru nyinangi. Ka nyara palulanguru Godalu ara panya palunya kampa kutjupanu munu ara kuwaritja wiru mulapa palyanu nganana mulamularingkula palula tjunguringkunytjaku.

²⁰⁻²¹ Pirukula wanyu nyangatja kulinma! Panya Jesunya tjukurtjarar- ingkunyangka Godalu palunya wangkangu alatji,
“Ngayuluña nyuntunya mulamulangku kalkuṇi

munuña ngayulu piruku walytjangku kulira kampa kutjuparinytja wiya.
Panya nyuntun tjukurtjara pulka titutjara nyinaku wiyaringkunytja wiya.” *

Palu panya tjukurtjara nganmanyitja tjuta kalkuntja wiyat tjana titutjara tjukurtjara nyinanytjaku. Wiya, paluru Jesunya kutju kalkuṇu. ²² Ka nyara palulanguru Jesulu ara kuwaritja titutjara ngaranytjaku kanyini. Ara nyara paluru panya Mosenya ungkunytja puruny whole wiya, ara kutjupa wiru mulapa.

²³⁻²⁴ Kaya nyangatja kulu kulila kutjupa ngapartji. Panya tjukurtjara tjuta mulapaya nyinakatingi, munuya tjukutjuku war karira tjlpiringkula ilungi, kaya kutjupa tjuta ngapartji war kariringi. Palu Jesunya kulinma paluru titutjara nyinaku ilunytja wiya alatji. Nyara palulanguru panya paluru kutju tjukurtjara pulka titutjara nyinaku wiyaringkunytja wiya.

²⁵ Ka pala palulanguru anangu uwankara palumpa mulamularingkula Godalakutu pitjanyangka paluru tjananya mulapa wankarunkuku Godala tjungu pukulpa nyinanytjaku. Panya paluru wanka titutjara nyinanyi munu tjanampa rawangku Mamala tjapini wiyaringkunytja wiyangku.

²⁶ Panya ara nyanga kuwaritjangka Jesunya kutju nganampa tjukurtjara pulka nyinanyi munu nganampa kutjupa kutjupa uwankara tjukarurungku palyalpai. Paluru nganmanyitja tjuta puruny whole wiya. Paluru panya tjukaruru mulapa nyinanyi munu kuralpai wiya alatji. Paluru kuraku ngurpa anangu tjuta puruny whole wiya. Paluru

* ^{7:17} Psalm 110:4 * ^{7:20-21} Psalm 110:4

kutjupa alatjitu, palya mulapa. Munu paluru mayatja pulka mulapa uwankarangka waintara nyinanyi Godala tjungu ngura nyara ilkaringka.

²⁷ Paluru wati tjukurtjara pulka purunypa wiya, panya tjukurtjara paluru putu palya mulapa nyinapai munu kura palyalpai. Palulanguru paluru kuka pungkula tiliwakalpai Godalu nyakula palunya munu anangu tjuta kulu kura tjuta palyantjitjanguru kaly pangku wantinytjaku. Munu tjukurtjara panya paluru alatji titutjarangku palyalpai tjintu kutjupa tjintu kutjupa. Palu panya Jesunya palu purunypa wiya, panya paluru kutjuarangku palyanu munu ngalkilpa ilungu anangu uwankaraku kuranguru, ka nyara palulanguru Godanya anangu tjutaku kalyparingkupai.

²⁸ Nyura uti kulini? Panya Moseku tjukurtu wangkangi wati tjukurtjara pulka anangu tjutanguru ngurkantara tjunkunytjaku. Palu wati paluru tjana titutjara upa nyinangi, panya paluru tjana nganana purunypa anangu alatjitu. Uwa, Godalu ara panya nganmanyitja tjananya ungu, palu malangkalta paluru mulamulangku kalkunu ara kuwaritjaku, munu ngurkantara tjunu palumpa katja tjukurtjara pulka nyinanytjaku ara nyanga kuwaritjangka. Ka paluru panya Godanya mukuringkunytja uwankara tjukarurungku palyara wiyara wiru mulapa titutjara nyinanyi.

8

Jesunya Tjukurtjara Pulka Ara Kuwaritjaku

¹⁻² Palu tjukurpa nyangatjana nyurala nyaaku wangkanyi? Wiya panya nyura kulira tjukurpa pulka kulintjaku nyangatja Jesunya panya nganampa tjukurtjara pulka nyinanyi Mayatja Godala tjungu ngura ilkaritjangka. Munu paluru warkarinyi ngura milmilpa mulata panya Godalu palyantjitjangka ngura panya ilkaritjangka. Paluru tiinta milmilpa panya Moselu tjana nganmanyitju palyantjitjangka warkarinytja wiyatu.

³ Panya nyura ninti Godalu tjunu wati tjukurtjara tjuta anangu tjutanguru mai kuka kulu mantjira palunya ma-ungkunytjaku. Ka uti nganampa tjukurtjarangku Jesulu kulu palu purunytitu Godanya ungama panya paluru nganampa tjukurtjara pulka nyinanyi ilkaringka. ⁴ Palu tjinguru Jesunya mantangka rawatu nyinarampa tjukurtjara wiyatu nyinama, panya tjukurtjara tjutaya nganmanyapa nyinangi wati Levilanguru munu panya paluru tjana Moseku tjukurwanu nyinara Godaku warkaringi tiinta panya milmiltia.

⁵ Palu tiinta nyara palunyaya unytjungku mantangka kanyiningi. Panya tiinta nyara paluru nganananya nintini ngura kutjupa ilkaringka ngaranytja milmilpa mulapa. Panya iriti Mosenya tiinta panya palunya palyantjikitja palyany-palyanyarinyangka Godalu palula wangkangu alatji, “Ngayulu panyanta apu katu wangkara nintinu tiinta milmilpa palyantjaku. Ka panya palu purunypa alatjitu palyala tjukarurungku.” Ka panya Moselu tjana palyanu tiinta mantangka, ka tiinta nyanga mantatjangku ngura ilkaringka ngaranytja nintini.

⁶ Palu Godalu Jesunya warka wiru mulapa ungu, ka paluru ara kuwaritja pakaltjinganu palya mulapa, panya wati tjukurtjara kutjupa tjutangku palyantja purunypa wiya. Panya palurunku walytjangku ungkunytja pulka mulapa tjukurtjara kutjupa tjutangku kuka ungkunytja purunypa wiya. Panya Godalu Jesulawanungku kalkuntja pulka mulapa ngaranyi, Moselawanungku kalkuntja purunypa wiya. Ka nyara palulanguru Jesunya tjukurtjara pulka mulapa nyinanyi tjukurtjara kutjupa tjutangka waintarira. ⁷ Panya anangu tjutangku ara irititja wara putu

wankaringangi. Ka nyara palulanguru Godalu aña kutjupa kuwaritjalta pakaltjingaňu.

⁸ Palu Godalu nyangu palumpa aňangu tjuťa kuraringkunyangka, panya aňangu nyara paluru tjanaya palumpa aña Mosenya panya ungkunytjtja waňalwiyangku wantinyangka. Munu paluru tjanala wangkangu nyanga alatji,

“Kulilaya Jew tjuťangku ngura Israelta munu Judah-la nyinanytja tjuťangku!

Ngayulu ngula palyalku nyurampa aña kutjupa kuwaritja.

⁹⁻¹⁰ Palu aña kuwaritja panya ngaňmanyitja purunypa wiya.

Panya iriti ngayulu aña ngaňmanyitja wangkangu Mosela tjanala ngura panya Ittipalanguru katintytjatjanungku.

Ka panya paluru tjana kuliřa wantira tungunpungu, kaña palulanguru tjananya wantingu.

Palu nyangatja panya aña kuwaritja ngayulu kalkuňi Israekunu tjuťa tjana tiťutjarangku külilkatinytjaku.

Ngayulu ngayuku tjukurpa tjanala unngu nintilku tjana aña nyanga palunya pina alaringkula tjukarurungku kulintjaku.

Kaniya ngayunya kutju mulamulangku walkulku munuya ngayuku walytjapiti mulapa nyinaku.

¹¹ Palu uwankarangkuňi ngayunya tjukarurungku ngurkantankuku, ka kutjupangku aňangu kutjupa arkara wituwituntja wiya Mayatjaku nintiringkunytjaku.

Panya uwankarangkuňi alatjiťu ngurkantankuku, aňangu kuranyitja tjuťangku munu aňangu malatja tjuťangku kuľukulu.

¹² Kaňa ngayulu ngaltunytjungku tjana kura palyantjitjanguru tjananya kaly pangku wantiku, mununa tjana kura palyantjtjaku watarkuriku alatjiťu piřuku kulintja wiya.” *

Alatji Godalu iriti wangkangu aňangu tjuťangka aña kuwaritja palyantjik-itjangku.

¹³ Ka nyura kulini? Panya aña nyanga kuwaritja wangkara utiřa Godalu aña ngaňmanyitja wiyaringkunytjaku wangkangu, ka panya kuvari nguwanpalta wiyaringanyi.

9

Tiinta Milmilpa Mantatja Munu Ilkaritja

¹⁻³ Palu aña ngaňmanyitjangka Godalu tjukurpa tjuťa wangkara ungu tjana kuliřa tjukarurungku palunya walkuntjaku inmangka. Munu tjukurpa kutjupa tjuťa wangkara ungu tiinta milmilpa tjukarurungku palunyatu palyantjaku inmaku. Kaya mulapatu palyanu tiinta panya palunya munuya pala palula inma kanyiningi. Ka tiinta panya paluru kampa kutjaratjara, kampa tjangatitja ngura milmilpa, ka kampa kutjupa munkaritja ngura milmilpa mulapa, ka ngurur-kutjara mantara wiru waraly-waralyngarala angatjunangi kampa nyara munkaritja. Ka kampa tjangatitjangka puňu tili tjutatjara ngarangi. Ka taipula kuľu ngarangi mai nyumatjara panya milmilmara Godanya ungkunytja.

⁴ Ka kampa munkaritjangka ngura panya milmilpa mulata piti goldnguru palyantja ngarangi. Ka piti unngu kutjupa kutjupa ngaringi panya tjana kutjalpai wiru pantintytjaku. Ka pakutja pulka panya kalkuntjtja

* ^{8:12} Jeremiah-ku 31:31-34

ku_{lu} kampa pala palula ngaringi pu_nunguru gold-nguru palyantja. Ka pakutjangka unngu walpayata purunypa gold-nguru palyantja ngarangi mai panya manna-tjara. Ka Aaronku tjukara ku_{lu} ngaringi pakutjangka unngu. Panya iriti pu_nu tjalytjaruru tjuta pakanu tjukara pala palula. Ka apu tjiwa kutjara ku_{lu} pakutja palula unngu ngaringi, tjukurpa panya pulka tjutatjara panya Godalu walkatjura ungkunytja. ⁵ Ka pakutja pala palula katu angelpa purunypa kutjara nyinangi nyalpitjara gold-nguru palyantja. Nyanga paluru pula panya Godanya nyinanytja utini. Munu pula nyalpi kutjara lipiringkula ngaparku nyinara pakutja anga-tjutu_{ra} nyinangi. Ka palula pulala ngururpa nyinara Godalu an_angu tjutaku ngal_aturingkupai, munu tjukurtjara pulkangku pakutja palunya milkalingka kurpinnyangka paluru an_angu tjut_a kura tjut_a palyantjitjanguru kalypangku wantipai pungkunytja wiyangku. (Uwa, tjinguru_{na} tjukurpa kutjupa tjut_a wangkama tiinta nyanga palunyatjara, palu kuwarina wantinyi mutumutu walkatkunkunytjikitjangku.)

⁶ Ka panya tjana tiinta, munu pakutja panya, kutjupa kutjupa tjut_a ku_{lu} tjukarurungku palyara wiyanu. Kaya palulanguru tjintu kutjupa tjintu kutjupa wati tjukurtjara tjut_a tjarpangi tiinta panya kampa tjan-gatitjangka, ngura panya mil_amilt_a, munuya war_aka tjanampa palyaningi.

⁷ Palu kampa panya munkaritja mil_amilpa mulapa, ka wati tjukurtjara pulka kutju tjarpapai nyara palula, kulingka kutju tjut_a-ara wiya, kutjura. Munu paluru maralpa tjarpanytja wiya, kukaku milkali pitingka katira kutju tjarpapai, munu Godanya nintilpai paluru nyakula palunya munu an_angu tjut_a ku_{lu} kalypangku pungkuwiyangku wantinytjaku paluru tjana kura tjut_a watarkungku palyannyangka.

⁸ Ka ara nyanga palula tjanalanguru Kurunpa Mil_amilt_a ngana_ananya nintini nyanga alatji kulintjaku, panya ara nganmanyitja tiinta mil_amilpatjara ngarananyangka ngana_ana pu_nu tjarpansi kampa munkaritjangka panya mil_amilpa mulata. Nyanga paluru ngana_ana nintini panya ngana_ana pu_nu Godala tjunguringanyi. ⁹ Ka pala palulanguru ngana_ana kuvari kulini ara panya nganmanyitjangku ngana_ana pu_nu kurunpa palyani Godala tjunguringkunytjaku. Panya tjana kuka mai katira ungkunyangka Godala tjananya kura palyantjitjanguru kalypangku wantipai, palu kurunpaya Godala tjungu mulapa nyinanytja wiya ngarangi. ¹⁰ Panya ara nganmanyitjangku kutjupa kutjupa tjut_a wangkapai, panya mai kuka kutjupa kutjupa tjut_a ngalkuntjaku munu kutjupa kutjupa tjut_a wantinytjaku, munu kutjupa kutjupa tjut_a tjkintjaku, kutjupa kutjupa tjut_a tjkilwiyangku wantinytjaku. Munu piruku wangkapai yaaltjingara tjananku puntu tjukarurungku paltjintjaku, munu kutjupa kutjupa tjut_a ku_{lu} paltjintjaku. Palu ara nyangantu uwankarangku puntutja wangkapai kurunitja wiya, panya ara nyanga paluru tjana unytju pa_ara ngarangi Godalu ara kuwaritja utintjaku.

¹¹⁻¹² Palu panya Christanya tjukurtjara pulka nyinanyi ara panya kuwaritjaku. Panya paluru tjarpangu Godaku ngura mil_amilt_a ngana_ananya ngalkir_a wiru tjut_a nganampa palyantjikitja. Palu ngura nyara palunya watingku palyantja wiyat_a, panya nyaratja ngura mantatja wiya, ilkaritja wiru mulapa. Ka panya Jesulu milkali nanikutanguru puluka kulinypanguru mantjira katinytja wiyat_a ngura nyara palulakutu. Palu palurunku ilura milkali palurunku tjutingu, munu ngura panya mil_amilt_a ma-tjarpangu kutju-ara alatjitu, tjut_a-ara wiya, munu nyara palulanguru paluru ngana_ananya kuranguru wankarunu ngana_ana Godala mirangka kunta wiya nyinanytjaku titutjara.

13-14 Ara panya ngañmanyitjangku alatji wangkanyi panya watingku kutjupa kutjupa pampuntjatjanu puťu tiinta milmiltä tjarpapai, palu uti paluru wati tjukurtjarangka ngañmanypa wirkanama, ka paluru nanikutaku milkalingka, munu puluka nyitayiraku milkalingka kulu mantjira palunya puntu winki kurpinma, munu tjinguru puluka kungka kulunypa kampara tjuŋparingkunyitja tjuŋpa mantjira minangka urura palunya kurpinma. Ka nyara palulangurulta wati paluru palyaringanyi Godanya walkuntjikitja tiinta nyara milmiltä tjarpara.

Uwa, panya kukaku milkalingku tjuŋpangku kulu wati nyara palunya palyani Godanya walkuntjaku. Palu milkali nyanga kuka tjutanguru unytju kutju ngaranyi mantatja. Palu Christaku milkali palya mulapa uwankarangka waintarintja. Panya Kurunpa Milmiltu titutjara nyinapailu Jesunya kuŋpunyangka paluru wiru mulapa nyinanytjatjanungku puňu kačakutjarangka ilura palurunku puntu winki Godanya ungu milkali tjutira. Nyara palulanguru paluru nganananya unngu tjukarurunu, kala ara panya ngañmanyitja tjuta palyantja wiyingingu, panya ara palunya tjananya wañara ngananaya puťu palyaringangi kuka pungkula rawangku ungzula ungzula. Palu panya Jesulu nganananya mulapa kulintja tjukarurunu ngananaya kunta wiya Godala tzunguringkula rapa nyinanytjaku munu palula wanganarangku kulira war̄karinytjaku, panya paluru wanka alatjiwu nyinanyi witulya pulkanya.

15 Uwa, Christalu ara kutjupa wirkakatingu kuwaritja Godalanguru nganampa palumpa waltya tjutaku, nganana mulamularingkula Godalu kalkuntjita mantjintjaku. Panya Godalu nganananya ngurkantara kalkunu palula tjungu titutjara nyinanytjaku. Palu nyangatjala mantjini nganampa anga-ilunyangka kutju. Panya ara ngañmanyitjangkala nyinakatira puťu kulinigi kura wantintjikitjangku, palu panya Jesunya nganampa ngalkilpa ilunyangka kutjula karalyarira wankaringu.

16-17 Ara nganampa alatji ngaranyi, panya nganana nyiringka walkatjura kalkulpai wanka nyinralpi nyanga alatji ngayulu ilunyangka małangka uti ngayuku tjiti tjutangku mantjinma ngayulu kanyintja uwankara. Nyanga alatjila kalkulpai. Palu tjiti tjutangku ngayulu wanka nyinanyangka puťu ngayuku uwankara mantjini panya nganana tjungu nyinanyi, palu kalkuntja nyanga paluru utiringkuku ngayulu ilunyangka kutju. **18** Ka nyanga palu purunypa ngarangi ara panya ngañmanyitjangka, panya Godalu kalkuntja utiringangi kuka pungkunyangka kutju, palu kuka pungkunyti wiyangka wiya ngarangi. Panya kuka pungkula kutju milkali mantjira Godanya ungzupai, ka nyara palulanguru kutju Godanya tjanampa kalyparingkupai.

19 Panya Moselu tjukurpa uwankara Godalu ungzunyta tjanala wangkangu anangu panya uwankarangka. Munu palulanguru iluntanu puluka kułunypa, nanikuta kułunypa munu mantjira milkali minangka tjungunu. Munu palulanguru puňu miňa tjukutjuku maňkurpa katantanu nyalpitjara munu karpira tjungunu nyalpi winki puturu tjitintjtinta. Munu puňu panya nyalpi winki karpintjija kukaku milkalingka tjalatjunu munu nyiri Godaku tjukurtjara kurpinu milkalingka, munu anangu uwankara kulu. **20** Munu paluru wangkangu, "Nyawayu milkali nyangatja, panya Godalu nyuranya tjukurpa pulka tjuta ungu nyura wanganarangku kulintjaku. Ka nyanga kukaku milkalingku nyuranya nintini panya tjukurpa nyanganpa kuwaringuru ma-ngaranyi." Alatji Moselu tjanala wangkangu mulamulangku kulintjaku. **21-22** Ka panya Moselu kukaku milkali katingu tiinta milmilpa unngu munu tiinta

kurpinu munu unngu panya ngaranytja uwankara kulu. Panya Godaku tjukurtu alatji wangkanyi, "Milkalingka kurpinnyangka kutju kutjupa kutjupa uwankara palya ngarapai Godala mirangka. Ka panya milkali ilura tjutinyangka kutju Godalu anangu tjutangku kura palyantjitjanguru kalypangku pungkuwiyangku wantipai."

Christanya Milkali Tjutira Ilunyangka Kutju Godalu Nganananya Kaly-pangku Wantipai

²³ Ka panya tiinta nyara palunya munu unngutja tjuta kulu tjana arkara palyanu nyara ngura ilkaritjangka ngaranytja purunyapa. Ka wati tjukurt-jarangku kukaku milkalingka kurpilpai tiinta munu unngu ngaranytja uwankara kulu Godala mirangka palya mulapa ngaranytjaku. Palu tiinta nyara ilkaritja kukaku milkalingku putu palyani. Wiya, Christaku milkalingku kutju ngura nyara palunya palyani nganana tjarpala Godala tjungu nyinanytjaku. ²⁴ Panya Christanya tjarpantja wiya watingku palyantjitjangka tiinta panya milmilta. Nyaratja arkara palyantja ngura panya ilkaringka ngaranytja purunyapa. Palu Christanya ngura ilkaritja mulata tjarpangu munu paluru Godala anga-wangkanyi nganampa ngalk-iltu. ²⁵⁻²⁶ Palu wati tjukurtjara pulka kampa panya munkaritjangka milmilpa panya mulata waintara tjarpapai kukaku milkalitjara kuli kutjupa kuli kutjupa. Palu Jesulu yaaltjitu arangku palurunku ungu? Paluru wanyu rawa ilatu-ilatu ilukatingi kuwaripatjaranguru alatjitu panya Godalu manta palyantjalanguru? Wiya, ngula mulapa tjintu watalpi ilaringkunyangka paluru pitjangu munu palurunku ungu iluntankunyt-jaku kutju-ara alatjitu Godanya nganampa kalyparingkunytjaku.

²⁷⁻²⁸ Anangu uwankara kutju-ara ilunytjaku ngaranyi. Ka ilunyangka malangka Godalu nganananya ngurkantankuku. Ka panya palu purunyapa nganana kura palyantjitjanguru Christanya kutju-ara ilungu nganampa ngalkilpa. Uwa, paluru waltya intjanuringu iluntankunytjaku Godalu nganananya kalypangku pungkuwiyangku wantinytjaku. Munu paluru ngula malaku pitjala piruku kuranguru ilunytja wiya anangu panya palumpa patara nyinanytja tjuta wankaru katiku.

10

¹ Tjukurpa panya Godalu Mosenya tjananya ungkunytja, nyara paluru ngatalpa ngaranyi ruwa nguwanpa. Panya tjukurpa paluru kuranyuku-tungku nintiningi ara kutjupa wiru mulapa Godalu kalkuntjtja. Palu-languru, ngatalpa ngaranyangka, Moseku tjukurtu anangu tjuta putu tjukarurulpai tjana Godala mirangka palya ngaranytjaku. Panya tjukurpa paluru wangkapai Godanya ilaringkula walkuntjikitjangku kuka katira pungkula ungkunytjaku palunya. Palu nyanga alatjiya rawangku kuli kutjupa kuli kutjupa ungkula ungkula putu tjukarururingangi munuya kura winkitu ngarangi Godala mirangka.

² Tjinguruya kuka ungkula tjukarururingkulampa Godala mirangka palya ngarama kuntaringkuwiya munuya palulanguru tjinguru kuka piruku katinytja wiya ngarama palyaringkunytjatjanungku. Palu tjana ungkula palyaringkunytja wiya munuya rawatu kuranguru kuntaringangi Godala mirangka, ³ munuya kuli kutjupa kuli kutjupa ungkula rawangku kulinungi panya tjana kura palyantjatjanungku. ⁴ Panya nanikutaku pulukaku milkalingku Godanya putu kalypalpai paluru nganananya kura palyantjitjanguru pungkuwiyangku wantinytjaku.

5-6 Ka palulanguru Christalu mantakutu pitjanytjikitjangku wangkangu alatji Godala,

“Nyuntu mukuringkunytja wiya aŋangu tjutangku nyuntunya rawangku kuka katira ungkunytjaku.

Panya tjana kuka pitjilpangka tjunkula katu kurkaltjura wantipai kampara mulururintjaku nyuntu tjanampa kalyparingkunytjaku.

Palu nyanga kuka pungkunytjitjanguru nyuntu pukularipai wiya.

Panya nyuntunin wituŋu aŋangurira ilunytjaku.

7 “Kanä palulanguru nyuntula wangkangu, ‘Uwa, nyangatjana ngaranyi ngayulu nyuntu witunnyangka wanganarangku kulira palyantjikitja nyuntu mukuringkunytja uwankara.

Panya alatjiya iriti walkatjunu nyiringka, ngayulu nyanga alatjirintjaku.’” *

Nyanga palunya Christalu wangkangu Godala.

8 Palu ařa Godalu Mosenya ungkunytjitjangku wangkangu alatji kuka mai katira palunya ungkunytjaku, kaya wanganarangku kulira palyaningi. Ka panya Christalu wangkangu, “Nyanga palumpa Godanya pukularintjaka wiya, munu paluru kuka katira palunya ungkunytjaku mukuringkunytja wiyatū.” **9** Munu palulanguru wangkangu Godala, “Uwa, nyangatjana ngaranyi ngayulu nyuntula wanganarangku kulira palyantjikitja nyuntu wangkanyangka.” Alatji Christalu Godala wangkangu. Ka nyura kulini nyanga palunya? Panya Godalu ařa irititja wiyaŋu munu kutjupalta tjunu kuwaritja palumpa katjawanungku.

10 Panya Jesulu wanganarangku kulira palyaŋu Godalu wangkanyangka, ka nyara palulanguru Godalu nganaŋanya kura palyantjitetjanguru kaly-pangku wantingu pungkunytja wiyangku. Panya palumpa katja waltyta alatjiču intjanuringu munu nganampa ngalkilpa kutju-ařa ilungu. Ka nyara palulanguru nganaŋa Godala mirangka kunṭa wiya kalyparingkula nyinanytjaku ngaranyi.

11 Panya watı tjukurtjara tjutangkuya rawangku tu tjintu kutjupa tjintu kutjupa kuka pungkula Godanya ungkupai aŋangu tjutangku kura palyantjitetjanguru. Palu aŋangu tjutaya rawaṭu kunṭa ngarapai Godalu tjananya kura palyantjitetjanguru pungkunytjaku paṭara. Panya tjukurtjara tjutangku kuka pungkula Godanya ungkula palunya puṭu kalypalpai paluru aŋangu tjuta pungkuwiyangku wantintjaku. **12** Palu Jesunya waltyta intjanuringu kutju-ařa alatjiču ilura, munu palula małangka paluru wankaringkula anu munu nyinakatingu Godala itingka mayatja pułka mulapa. Panya paluru kutju-ařa ilunytjatjanungku Godanya kalypanu, **13** munu paluru kuvari paṭara nyinanyi Godalu palumpa mirpaṇtju tjuta tjaruntjaku tjanala waintarira mayatja pułka mulapa nyinanytjikitjangku.

14 Uwa, paluru kutju-ařa ilura aŋangu uwankara kutju kutju palulakutu pitjanyangka kuranguru piranmanu palula tjunguringkula tiṭutjara kalypa nyinanytjaku. Panya palunya tjananya Godalu ngurkantanu palumpa waltytjaringkunytjaku. **15** Ka Kurunpa Milmiltu tjukurpa nyanga palunyuṭu nganaŋala tjakultjunanyi, panya paluru alatji wangkangu,

16 “Nyangatja ařa kuwaritja ngayulu ngula nintliku.

Panya ngayulu ngayuku tjukurpa tjanala unngu nintliku tjana ařa nyanga palunya pina alaringkula tjukarurungku kulintjaku.”

17 Ka piroku Godalu nyangatja wangkangu,

* **10:7** Psalm 40:6-8

“Ngayulu tjana kura palyantjitjaku watarkuriku alatjiitu piruku kulintja wiya.” *

¹⁸ Uwa, paluru anangu tjuṭaku kalyparingu munu tjananya kura palyantjitunguru kalypangku wantipai. Kala wanyu Godanya kuka rawangku katira ungama nganampa kalyparingkunytjaku? Wiya, ara panya nganmanyitja wiyaringu panya paluru alatjiitu nganampa kalyparingu.

Utila Raparingkula Godala Titutjara Tjungu Nyinama

¹⁹ Uwa, walytja wiru tjuta! Nyanga palulangurula uti raparingkula Godala tjunguringama, panya Christalunku milkali palumpa tjutira alaṇu nganana Godaku ngura milmilpa mulata rapa tjarpanytjaku. ²⁰ Panya Jesunya ilunyangka kutju mantara panya timpulangka waraly-waralyngaranytjanya tjlpiraranu munu alaringu ngura panya milmilpa mulata nganana waintara tjarpanytjaku. Nyangatja paluru ilura iwara kuwaritja palyanu wankakutu Mamala tjunguringkula wankaru nyinanytjaku. ²¹⁻²² Kala uti raparingkula Godala ilaringama, panya Jesulu tjukurtjara pulkangku Godaku ngura milmilpa kanyini. Munu panya paluru nganananya kurunpa paltjelu Jesulu palumpa milkalingka nganana kunta wiya nyinanytjaku, munulanya piyanmanu kapi kaltara wirungka palumpa walytja mulapa nyinanytjaku. Kala uti alatjinkunyangka kurunpa winki pukularira Godala ilaringama palumpa pulkaṛa mulamularingkula kutju. ²³ Munula uti mulamularingkula Godaku ala-alangku paṭanma panya paluru nganananya kalkunu wiruṛa kanyintjikitjangku munu palumpa ngurakutu katintjikitjangku. Kala uti tungun-tunguntu kulinma watarkurintja wiyangku titutjarangku, panya Godalu ngunti kalkulpai wiya tjukarurungku kutju wangkapai.

²⁴ Wanyula kulinma wiruṛa nyinanytjikitjangku, munulanku wituwitunma anangu uwankaraku pulkaṛa mukuringkunytjikitjangku, munulanku ngaltunytjungku alpamilantjikitjangku kulinma. ²⁵ Munula uti Godanya walkuntjikitja rawa tjunguringama, panya kuwari nyura kutjupatjara ngurangka nyinapai tjunguringkunytja wiya. Palu wanyuya Tjintu Malatja kulinma panya watalpi ilaringanyi Jesunya malaku pitjanytjaku, kalanku uti uwankara rawatu tjunguringama munulanku kunpunma Christanya titutjarangku waṇantjikitjangku.

²⁶⁻²⁷ Ka nganana panya ninti Christaku munu palumpa tjukurku kulu. Palu tjingurula nyanganpa kuliṛa wantira kura titutjarangku palyan-nyangkampa Godanya yaaltjingara nganampa piruku kalyparingkuku? Wiya, panya Christanya nganmanyipa ilungu, ka kutjupa muṇkara palu purunyipa ngaranytja wiya nganampa kuranguru piruku ilunytjaku. Kala yaaltjiriku palunya wantirampa? Wiya kutju nganampa ngaranyi panya nganana ngulu-ngulu paṭara nyinanytjaku Godalu nganananya ngula ngurkantara tjarantjaku Tjintu Malatjangka. Panya Godanya pulkaṛa mirpanariku palula tungunpungkupai tjuṭaku munu paluru tjananya wiyalu, panya waru pulkangku kampara nyarulpai, palu purunytpu uwankara wiyalu.

²⁸⁻²⁹ Panya anangu kutjupangku Moseku tjukurta tungunpungkunyangka palunya pungkula iluntankunytjaku ngarapai. Panya anangu kutjarangku, tjinguru mankurtu, anangu palunya tungunpungkunyangka nyakula wati mayatjangka tjakultjunkupai, ka palunya iluntankunytjaku wangkapai ngalturingkunytja wiyangku. Palu anangu kutjupangku tjin-guru Godaku katja anannyangkampa Godalu palunya tjituru-tjituru pulka

* ^{10:17} Jeremiah-ku 31:33-34

mulapa palyalku. Munu tjinguru paluru Jesunya milkali tjutinytja nguntinmankunyangka Godalu palunya mapalku alatjitu pungkuku. Munta tjinguru paluru Godaku Kurunpa ngaltunytyunja analku, ka Godalu palu purunypa palunya pungkuku. Panya anangu nyara palumpa alatjitu Jesunya ilura tjuttingu milkali, ka nyara palulanguru Godanya palumpa kalyparingu ara nyanga kuwaritjangka. Ka paluru ara nyanga palunya tungunpungkula wantinyangkampa Godalu wantintytja wiyangku palunya pungkuku.

³⁰ Panya nganana ninti Godalu alatji wangkangu, “Ngayuku ara ngaranyi, panya anangungku ngayula tungunpungkunyangka ngayulu palunya pikantankunytyaku ngaranyi.” Munu piruku paluru wangkangu, “Ngayuluña tjukarurungku ngurkantara tjaralku ngayuku walytja tjuṭa.”

³¹ Kaya wanyu kulinma! Godanya wanka alatjitu nyinanyi witulya pulkanya munulanya paluru kuwari nyanganyi. Kala wanyu ngulu-ngulu nyinama anannyangka pitjala nganana nanya pungkunytyaku-tawara.

³² Kulilaya panyatja, panya nyura ngamanypa Jesuku walytjaringkunytya Godalu nintinnyangka. Nyara palula arangka panya kutjupa tjutangku nyuranya pulkara kurara pungangi, ka nyurampa ara wituwitu mulapa ngarangi. Palu ara nyara palulawanungku nyura tunguntunguntu Jesunya wananningi wantintytja wiyangku. ³³ Panya kutjupa-ara tjana anangu tjutangka mirangka nyuranya ana kurara pungupai. Munu tjana Jesuku walytja kutjupa tjuta kulu palu purunymanupai. Palu nyura panya palunya tjananya nyakula nguluringkula paturingkunytya wiyangku wantira palula tjanala tjunguringangi. ³⁴ Munuya Jesuku walytja kutjupa tjuṭa tjailangka tjunkunyangka nyura panya ngalturingkula tjananya wirura kanyiningi. Munu panya kutjupa tjutangku nyurampa ulytja uwankara tjulyara katinyangka nyura pukulpa nyinangi tjanampa mirpanarinytja wiya, panya nyura nintingku kuliningi, “Ngayuku pukulpa kutjupa ngaranyi mantangurutja wiya palu Godalanguru, paluru kalkuntjtita. Ka pukulpa nyara paluru wiyarungupai wiya tiṭutjara ngarapai.”

³⁵⁻³⁶ Uwa, nyura panya Christianity rawangku rapangku wañaneningi, palu pakuringkunytya wiyangkuya wantima. Panya Godalu nyuranya kalkunu wiru ungkunytyikitjangku nyura rawangku rapangku wañannyangka. Kaya tungun-tunguntu wañanma, munuya palulanguru Godala wan-ganarangku kulirampa nyura Godalu kalkuntjtita mantjilku alatjitu.

³⁷⁻³⁸ Panya nyiringka iriti walkatjunkunytya alatji ngaranyi, “Paluru kalkuntjtjanu mulapa pitjaku alatjitu kuwari nguwanpa, rawa ma-nyinanytja wiya.

Kaya ngayuku walytja tjuṭa mulamularingkula tiṭutjara nyinaku, palu tjinguruya ngayulanguru paturingkunyangka ngayulu tjanampa pukularinytja wiya.” *

Nyanga palunya Godalu wangkangu.

³⁹ Ka nganana Godanya wañarampa paturingkunytya wiya panya anangu kutjupa tjuṭa purunypa wiya, panya tjana Godanya wantira ma-paturingkula kawankatipai mirikutu alatjitu. Palu nganana rawa mulamularingama Godaku, kalanya wankaru kanyilku.

11

Godaku Mulamularingkunyta

* **10:37-38** Apakukaku 2:3-4

¹ Palu nya Godaku mulamularingkunytja? Wiya, panya aŋangu Godaku mulamularingkunytja nyanga alatji panya paluru rapangku kulintjatjanungku nyinara paŋanı Godalu kalkuntjtja utiringkunytjaku. Paluru panya puŋu nyanganyi kurungku Godalu kalkuntjtja wirkankunytjaku, palu paluru nintingku kulini, “Mulapa paluru kalkuntjatjanungku palyalku alatjtju.” ² Panya iriti Godaku walytja tjuta palumpa mulamularingkunyangka Godanya tjanampa puŋkarę pukularingi.

³ Ka nganaŋa Godaku mulamularingkula nintingku kulini panya paluru ilkarı manta kuļu wangkara palunu. Kala nyanganyi paluru paluntjtja uwankara, palu puŋula nyanganyi yaaltjinguru paluntja, panya paluru arkayitjanguru palunu wangkangku kutju.

⁴ Uwa, wanyula kulinma aŋangu irititja tjuta Godaku mulamularingkupai tjuta.

Abelnga

Panya Godaku mulamularingkula Abelngu tukarurungku kuka pungkula ungu Godanya palumpa kučangku Kaintu purunypa wiya. Ka Godanya palumpa pukularingu munu Kainnga wantingu munu paluru mulamularingkunyangka wangkangu Abelnga, “Nyuntu ngayula mirangka tjukaruru ngaranyi.” Palu Abelnga iriti mulapa ilungu munu paluru nganaŋanya kuwari nintini Godaku mulamularingkunytjaku.

Inakanya

⁵ Ka Godaku mulamularingkula Iinakalu palunya pukulmanu, ka Godalu palunya wanka katingu. Panya nyiringka ngarinyi alatji, “Godanya pukularingu palumpa munu ilunytja wiya wanka katingu.” Kaya aŋangu tjutangku palunya puŋu nguriningi Godalu palunya katinyangka. ⁶ Palu ngayulu tjinguru Godaku mulamularingkunytja wiya nyinarampa palunya puŋu pukulmananyi. Panya ngayulu Godalakutu ilaringkunytjikitja mukuringkulampa uti palumpa mulamularingama panya paluru mulapa nyinanytjtjaku, mununa uti ngayulu mulamularingkula kulinma panya mulapa paluru aŋangu tjutaku wiru mulapa palyalpai palulakutu pitjanyangka.

Noah-nya

⁷ Ka Noah-lu Godaku mulamularingkula pauta puŋka palyaŋu, panya Godalu palula ngaŋmanytju wangkangu mina puŋka mulapa iyantjikitjangku, mina panya tjana ngaŋmanytju nyakunytja wiyatja. Ka paluru Godala kulintjatjanungku pauta palyaŋu munu walytja tjutatjara uru puŋkangka-tawara tjarpara wankaruringu. Kaya aŋangu tjutangku Noah-nya purunypa mulamularingkunytja wiyangku wantingi, munuya Noah-nya wankaringkunyangka wiyingru alatjtju kura nyinanytjtjanu. Palu Noah-nya Godaku mulamularingkunyangka Godalu palunya walytjanmara wangkangu, “Mulapa nyuntu ngayula mirangka tjukaruru ngaranyi.”

Aipuramanya

⁸ Ka panya Aipuramanya Godaku mulamularingkula parari anu ngura ngurpatjakutu. Panya Godalu ngura palumpa wantikatira ankunytjaku alatji wangkara kalkunu, “Ngayuluŋa ngura kutjupa nyuntunya ungkuku.” Ka Godalu wangkanyangka paluru kulira wangaŋara pakara watarku anu munu puŋu kuliningi, “Yaaltjikutuŋa nyangatja ananyi?”

⁹⁻¹⁰ Munu paluru Godaku mulamularingkula malikitja purunypa nyinangi tiinta palyara ngura panya kalkuntjtjangka wirkara. Ka palumpa

katja Isaacanya munu palumpa pakalì Jacobanya kuì ngura nyara palula wirkara nyinangi, panya Godalu tjananya kuì kalkunuì ngura nyara palula nyinanytjaku. Palu Aipuramanya tiintangka pukulpa nyinangi malikitja purunypa ngura panya palula panya paluru nintingku kuliningi, “Nyangatjana unytju nyinanyi ngura nyanga mantangka, panya Godalu ngura kutjupa pulka palyanu ngayuku wiru mulapa, kaña ngura nyara palumpa pañara nyinanyi. Ka ngura nyara paluru panya kampa kutjuparintja wiya paluruì ngaraku titutjara.”

¹¹⁻¹² Munu paluru Godaku mulamularingkula tjitji utinu, panya paluru wati tjilpi ka palumpa miita Tjiiranya minyma pampa iti puì kanyilpai. Palu panya Godalu kalkunuì tjitjiku, ka Aipuramanya mulamularingu palumpa panya paluru tjukarurungku wangkapai. Uwa, Aipuramanya panya wati tjilpi nyinangi tjitji puì utilpai, palu palula kutjunguruya walytjapiti mungilyiringu kililpi ilkaritja tjuta purunypa, munu paki kuìny-kulunypa tjuta panya karungka ngarintja purunypa, mungilyi mulapa.

¹³ Uwa, wati panya paluru tjana munu Aipuramanya tjana kuì Godaku rawa mulamularingangi titutjara wiyaringkunytja wiya ilunytjakutuwangkara. Palu panya tjana wanka nyinara mantjintja wiya Godalu panya kalkuntja. Palu tjana nganmanytju kuliningi ngula utiringkunytjaku munuya pulkara pukularira wangkangi, “Nganaña unytju akatjari mantangka nyanga nyinanyi.” ¹⁴ Ka panya tjana alatji wangkanyangka nganana kulilpai, “Munta-uwa, tjana nyinara pañanigi ngura kutjupaku.”

¹⁵ Tjinguru wati nyangantu ngura tjananku wantikatintjatjanu kulira watjilarima, munuya mukuringkula malaku wantira anama. ¹⁶ Palu wiya, paluru tjana ngura nyara palunya kulintja wiya panya tjana ngura kutjupaku mukuringangi ngura wiruku, panya ilkaritjaku. Ka palulanguru Godanya palunya Mama walkunnyangka tjanampa pukularipai kuñtaringkunytja wiya, panya paluru tjanampa ngura pulka mulapa palyanu.

¹⁷⁻¹⁹ Ka Aipuramalu Godaku mulamularingkula katja palumpa Isaacanya katingu iluntara Godanya ungkunytjikitjangku. Panya Godalu palula wangkangu arkara nyakunytjikitjangku wanganarangku kuliningangka. Palu panya nganmanytju Godalu Aipuramanya kalkuntjtja ngarangitu palumpa katja Isaacalanguru walytjapiti tjutaringkunytjaku. Ka nyara palulanguru paluru katja palumpa iluntankunytja kuwaripangka kuliningi, “Godalu mulapa ilunyangka wankalku.” Ka Godalu mulapa ungu palumpa katja malakungku. Panya wati ilunyangka Godalu wankalpai, palu purunypa Godalu palunya nguwanpa iluntankunyangka wankañu.

Isaacanya

²⁰ Ka Isaacalu Godaku mulamularingkula katja kutjara pukulmanu Jacobanya pulanya Iitjunya alatji kalkura, “Panya Godalu nyupalimpa wiru tjuta ngula palyalku.”

Jacobanya

²¹ Ka Jacobalu Godaku mulamularingkula palu purunytjutu pukulmanu palumpa katja tjuta alatji wangkara, “Panya Godalu nyurampa wiru tjuta ngula palyalku.” Alatji paluru nganmanytju wangkangu malangka ilunytjikitjangku. Munu paluru patany-patanytju ngarala tjukaratjarangku walkuningi Godanya.

Josephanya

²² Ka Josephalu Godaku mulamularingkula nintingku kuliningi panya Israelkunu tjuṭangku ngula ngura Itjipanya wantikatiku. Munu tjilpiringkula paluru palumpa walytja tjuṭangka utingku wangkangu nguwanpa ilura palunya tarka ngula katinytjaku Itjipalanguru Israeltakutu.

Mosenya

²³ Ka Moseku ngunytjungku mamangku Godaku mulamularingkula palunya kutitjunu pira mankurpa iti wirkankunyangka. Panya Itjipaku mayatjangku Piiraku palumpa tjaultji tjuṭangka wangkangu iti nyitayira tjuṭa iluntankunytjaku. Palu mamangku ngunytjungku pula nguluringkuwiyangku kutitjunu iti panya palunya, panya paluru pula nintingku ngurkantanangi, “Iti nyangatja wiru mulapa.”

²⁴⁻²⁶ Ka ngula Mosenya pulkaringkula paluru kuļu Godaku mulamularingkula Mayatja Piiraku ngura wantikatira palumpa walytja tjuṭakutu anu. Panya paluru alatji kuliningi, “Tjinguruṇa Piiraku walytja tjuṭangka tjungu rawaṭu nyinarampa ngayulu Godaku watarkurira kura tjuṭa unytjungku kutju pukularira palyanma. Palu ngayulu tjananya wantikatira Godaku walytja tjuṭangka tjunguringkula pikangka alatji nyinanyi panya Itjipanya ngurara tjuṭangku nganañanya kurara punganyi. Tjinguruṇa Itjipanya ngurara tjuṭangka tjungu nyinarampa kutjupa kutjupa wiru tjuṭa mantjinma. Palu ngayulu wantira pikawanu nyinanyi ngayuku walytja tjuṭangka tjunguringkula, panya nganañalanguru mayatja pulka ngula utiringkuku nganampa wankarunkupainya.” Uwa, Mosenya nyanga alatji nyinangi panya paluru pirodu kutjupa munkaritja kuliningi ngula Godalu kalkuntjatjanungku ungkunytjaku.

²⁷ Munu pirodu Godaku mulamularingkula Moselu ngura Itjipanya wantikatingu. Panya paluru nguluringkunytja wiya Mayatja Piiranya palumpa mirpañarinyangka. Paluru tungun-tunguntu wañanangi Godanya uti nyakula purunytju. Palu kurungku nyakunytja wiya unngu kutju mulamularingangi.

²⁸ Munu Godaku mulamularingkula Moselu wangkangu anangu tjuṭangka kukaku milkalingka wal̄i tjananku tuwa urilitja nyitintjaku angeltu pitjala nyakula katuwanu ankunytjaku tjanampa katja nganmanyitja tjuṭa iluntankunytjaku-tawara. Nyara palula arangka paluru palyanu inmangka tjunguringkula angelpa katuwanu ankunytjanya rawangku kulintjaku.

²⁹ Kaya Godaku mulamularingkula Mosenya tjana anangu tjuṭa kuļu ngura uru ini Tjitin-tjitinta ngururwanu itipiringu manta piltingka. Kaya wati panya Itjipanya ngurara tjuṭangku tjananya malawanungku wałaparara urungka ngururpatu ilungu urungku malakungku tjananya tjutunnyangka.

Tjatjuwanya Tjana

³⁰ Ka Tjatjuwanya tjana Israelkunu tjuṭa kuļu Godaku mulamularingu munuya Godalu wangkanyangka wangañarangku kulira tawunu panya Jerichola tjintu 7-ara para-arintanangi, ka wall panya pulka para-arintara ngaranytja pilukatingu.

Rayapanya

³¹ Ka minyma panya wati tjuṭangka kampangkaṭu ngaripainya ini Rayapanya Godaku mulamularingkula wankaringu. Panya pilukatinjtja

kuwaripangka Tjatjuwalu wati kutjara iyanu Jerichola tjarpara kam-pangka para-nyakula malaku pitjala tjakultjunkunytjaku. Ka pula Jerichola wirkankunyangka, Rayapalu palunya pulanya Jerichonya ngurara tjuṭaku ngulungku mantjira kutitjunu palumpa ngurangka iluntankunytjaku-tawara. Nyara palulanguru paluru wankaringu, panya malangkalta Israelkunu tjuṭangku Jerichonya ngurara kutjupa uwankara iluntanu Godanya kulira wantinyangka.

Godaku Mulamularingkupai Tjuṭa Iriti Nyinanytja

³² Wanyuṇa pīruku nyurala tjakultjunkuku aŋangu mulamularingkupai kutjupa tjuṭa? Wiya wanti, panya tjuṭa mulapa ngaranyi wangkara wiyan-tjaku wiya, panya Kitiannga, Parakanya, Samsonga, Tjaipatjanya, Davi-danya, Samuelnga munu wangkatjara kutjupa tjuṭa kułukulu panya winki mulapa. ³³ Wati nyanga paluru tjana Godaku mulamularingkula ngura walytjangku anga-kanyiningi warmalangku pitjala tjulyantjaku-tawara ngura kutjupitja tjuṭangku. Munuya ngura tjananku tjukarurungku kanyiningi aŋangu tjuṭa pukulpa palya nyinanytjaku. Munuya nyangangi Godalu panya kalkuntjtja tjuta utiringkunyangka.

Panya kutjupa tjuṭangku Godaku mulamularingkula lion tjuṭa tja patiningi patjantjaku-tawara. ³⁴ Kaya tjara kutjupa Godaku mulamularingkula waru pulkangka wankaru ngarangi kampanytja wiya. Kaya kutjupa tjuṭa Godaku mulamularingkula wankaringangi tjananya tjulangka wakara iluntankunytjikitjangku arunyangka. Kaya kutjupa tjuṭa upa ngarala Godaku mulamularingkula kūnpuringangi. Kaya tjaultji tjuṭa Godaku mulamularingkula witulya pulkatjararingkula warmala ngura kutjupitja tjuṭa pika pitjanyangka pungkula wiyaningi. ³⁵ Kaya minyma tjuṭangku purkutjararingkula Godaku mulamularingkula nyangu Godalu tjanampa tjitji malakungku wankannyangka.

Kaya tjara kutjupa Godaku mulamularingkula ilungi, panya mir-pantju tjuṭangkuya tjananya nguluningi wangkara, "Nyura Godanya wantinyangkala nyuranya walatjunkuku iluntankunytja wiyangku." Kaya kulinigi, "Wiya, nganana Godanya wantinytja wiya. Palyantilanyaya nganaŋanya pungkula iluntanama panya Godalu nganaŋanya wankalku palula tjungu wanka mulapa titutjara nyinanytjaku." Alatjiya kulinigi, kaya mirpantju tjuṭangku tjananya puṭu ngulutjingara pungkula iluntanangi. ³⁶ Munuya mirpantju tjuṭangku Godaku walytja kutjupa tjuṭa ananangi, munuya wiipangka alkaningi, munuya kutjupa tjuṭa tjiinangka karpira tjailangka tjarpatjura kanyiningi. ³⁷⁻³⁸ Munuya kutjupa tjuṭa pulingka atura iluntanangi, munu kutjupa tjuṭa wanka winki kultu karilpa katara kutjaranangi, munuya kutjupa tjuṭa wakara iluntanangi tjuṭa pulkangka.

Kaya tjara kutjupangku tjiipiku nanikutaku miringuru ulytja palyara tjarpangi munuya ngaltutjara tjuṭa purunypa para-ngarangi mani wiya mai wiya paltjatjiratja alatjitu. Kaya aŋangu tjuṭangku tjananya nyakula analpai munu kurara pungkupai. Panya tjanaya mantatjaku mukur-ingkula puṭu ngurkantanangi palya mulapa nyinanyangka. Kaya tjana ilytjingka waara para-ngarangi pilangka puli katu kułukulu. Munuya kulpingka pitingka kulu nyarkara nyinangi.

³⁹⁻⁴⁰ Ka Godanya pulkarra pukularingi aŋangu nyanga palumpa tjanampa, panya tjanaya palumpa pulkarra mulamularingangi. Palu panya Godalu kalkuntja tjana nyakunytja wiyatū munuya ngañmanypaṭu ilungi palumpa mulamularingkula kutju. Panya Godalu ngañmanytju

nganampa palyara wantingu wiru mulapa. Panya paluru mukuringangi nganananya tjanala tjungura wirura palyarungura kanyintjikitja palumpa mulamularingkupai uwankara.

12

Godanya Nganampa Mama Nyinanyi munu Nganananya Tjukarurulpai

¹⁻² Ka tiana kuvari nganananya ngarala nyanganyi winkingku Godaku mulamularingkupai miri tjutangku. Kala ngananña kuļu uti Jesunya tungun-tunguntu wanana. Panya watingku paluru-warara wirtjapakařa wirkankunytjikitjangku mantara arara tjunkupai tarpipungkula punkatjingantjaku-tawara. Palu purunypala uti kura kutjupa kutjupa uwankara wantira Jesunya wanana pakuringkunytja wiyangku titutjarangku ilunytjakutu-wangkara. Panya Jesulu iwara alaňu ngananña kuļu Godala wirkankunytjaku munulanya alpamilani pakuwiyangku palunya wanantjaku munu panya paluru patani ngura nyara palula ngananña ngapartji ma-wirkankunytjaku.

Ka panya kutjupa kutjupa tjutangku mantatjangku nganananya angatjunkunyangkala uti wantima munula titutjarangku Jesunya wanana. Panya paluru pakuringkunytja wiyangku palumpa Mamaku palyaningi munu puňu kačakutjarangka ilunytjikitja nguluringkunytja wiya. Ka panya aňangu tjutangku palunya ananigi wati kura-palku kulira.* Palu paluru rapa alatjitu ilungu panya paluru waintara kulinigi palumpa Mamangku palunya pukulpa pulka mulapa ungkunytjaku. Munu alatji palyantyatjanu paluru kuvari Godala itingkalta nyinanyi mayatja pulka mulapa. ³ Ka nyura uti palunya kulira raparingama, panya Jesunya mantangka nyinanyangkaya aňangu kura tjutangku palunya pulkařa kuraningi munu ananigi, ka paluru tungun-tunguntu alatjitu ngarala palyaningi palumpa mamangku wituntjtija pakuringkunytja wiyangku. Ka nyuranya palu purunypatu kurannyangka Jesunya kulinma, munuya palu purunypatu tungun-tungunpa ngarama tjituru-tjitururira wantinytja wiya.

⁴ Uwa, aňangu kura tjutangku nyuranya arkara kuraňi Godanya wantinytjaku, ka panya nyura tungun-tunguntu tjananya kulira wantinyi. Palu tiana nyuranya Jesunya purunypa pungkula iluntankunytja wiya palunya wanannyangka. Tjinguruya nyuranya ngula pungkula iluntankuku rawangku wanannyangka. ⁵ Palu tjinguru nyura watarkuringu nyiringka panya iriti walkatjunkunytjitetjaku. Panya tjukurpa paluru ngaranyi ngananña kulira raparingkunytjaku, panya Godalu katja tjuta paintja nyanga alatji ngaranyi,

“Kulila! Mayatja Godalu nyuntunya tjitji purunypa tjukarurulpai palulawanu nyinanytjaku,

kan uti palula wanganarangku kulinma panya paluru nyuntunya ngunti palyannyangka pailpai.

Uti nyuntu kuranguru painnyangka kulira tjituru-tjitururinytja wiyangku wantima.

⁶ Panya paluru pulkara mukuringanyi palumpa katja untalpa tjutaku, munu pala palulanguru tjananya tjukarurulpai, munu kuraringkunyangka tjananya pungkupai tiana tjukaruru nyinanytja-tjiratjangku.” *

* **12:1-2** Ngura nyara palula aňangu tjutangku kulipai wati kura tjuta kutjuya iluntankupai puňu kačakutjarangka. * **12:6** Proverbs 3:11-12

⁷ Kulini nyura? Nyurampa kutjupa kutjupa wituwitu ngaranyangkaya mirpañariwyangku Godanya kulinma panya paluru nyuranya Mama wirungku tjukarurunu. Panya wati mamangku palumpa katja tjukarurulpai, palu purunypatu Godalu tjukarurulpai palumpa tjiti tjuta. ⁸ Palu tjinguru ngayunya Godalu wantima tjukaruruntja wiyangku, kaña palulanguru kulilku, “Munta, tjinguruña ngayulu palumpa tjiti wiya, mungutja, matatjara wiya.” Panya Godalu palumpa tjiti uwankara tjukarurulpai kutjupa tjuta wantintja wiyangku.

⁹⁻¹⁰ Panya nganana tjukutjuku nyinanyangka nganampa mama tjutangku nganañanya tjukaruruningi tjana wiru kulintjatjanungku mama panya mantatja tjutangku. Kala tjana wangkanyangka nganañanya wanganarangku kulinlingi. Palulangurula uti Mama ilkaritjangka ngapartji pulkarañtu kulinma mulamulangku palula tjungu pukulpa nyinanytjikitjangku. Panya paluru nganañanya alpamilantjikitjangku tjukarurunu nganañanya kulira palunya purunypa tjukaruru mulapa nyinanytjaku.

¹¹ Ka panya Godalu nganañanya tjukarurunyangka nganañanya pukularinytja wiya kulira tjituru-tjitururipai. Palu utila kulinma panya Godalu nganañanya tjukarurunu palya mulapa nyinanytjaku, kala palulanguru nganañanya nintiringkula pukulpa nyinapai tjukaruringkula.

¹² Uwa, kulinmaya nyangatja munuya kuñpungku tungun-tunguntu Jesunya wañanma. Tjinguru nyura mara walpa-walparingkula muti tjititingkula pakuringanyi, palu paku nyanga palunya kulintja wiyangku wantira Jesunya rawangku tungun-tunguntu wañanma. ¹³ Munuya tjukaruru titutjara nyinama kurunpa uparingkula punkantjaku-tawara, panya nyura tjukaruru nyinara kuñpuringkula witulya ngaraku.

Godanya Kulira Wantintjaku-tawara

¹⁴ Rawangkuya kulinma mirpañtu wiya kalypa nyinanytjikitjangku munuyanku pulkara arkanma Godalawanu wiru tjukaruru nyinanytjikitjangku. Panya nyura tjukaruru wiya nyinarampa Mayatjanya puñu nyakuku. ¹⁵ Godanya panya ngaltunyntju mukulya pulka, ka nyuranku uti pulkara atunymanama Godalanguru paturingkula punkantjaku-tawara. Munuyanku ngulu nyangama anangu kutju nyuralanguru kuraringkunytjaku-tawara, panya paluru tjinguru alatjirira nyuranya uwankara kuralku.* ¹⁶ Munuyanku atunymanama kuri walytjarangka ngarinytjaku-tawara panya alatji wiru wiya. Munuyanku anga-nyangamañtu wati panya Iitjunya purunyarinytjaku-tawara panya paluru Godaku watarkuringu palumpa mamangku Isaacalu palumpa kalkura pukulmankunytjaku ngaranyangka, munu panya paluru tjintu kutjupa paltjatjiratjarira ngatjinu palumpa mañanypangka Jacobala alatji wangkara, “Maini uwa, kanta nyuntunya Mamalu kalkura pukulmankuku ngayunya wiyangku.” Paluru kalkuntja panya wantingu maikitjangku, ka Isaacalu Jacobanya kalkura pukuñmanu Iitjuku arangka.* ¹⁷ Ka nganañanya ninti panya paluru ngulalta malaku mukuringu kalkuntja panya palumpa munu palula puñu ulara pulkara ngatjiningi mamangka, piruku palunya

* ^{12:15} Panya ukiri palya pakalpai, ka tjinguru ukiri kutjupa kutjupa tjuta unngu-unngu pakaní munu panya paluru tjana pakara ukiri palya tjuta tjkurula iluntananyi, ka wiyinganyi alatjitu. Kalanku nganañanya uti nyanga palu purunyarinytjaku-tawara ngulu nyangama. * ^{12:16} Ut iitjulu kalkuntja panya palunya kulinma Godalu ungkunytja. Palu paluru Godaku watarkuringu munu wantira palurunku walytjangku kutju kulinlingi maingka paltjaringkunytjikitjangku. Tjukurpa nyangatja nyawa Genesis 27-ta.

kalkuntjaku. Palu mamangku wantingu. Ka nyuranku wanyu anganyangama Iitjunya purunyarira Godaku ara wantintytjaku-tawara.

¹⁸ Panya nyura kuwari ara kutjupangka nyinanyi arkayitjangka, ara panya irititjangka wiya. Panya iritiya Israelkunu tjuta puli panya ini Tjaniyala wirkara nyinangi, munu panyaya nyangu puli panya palula waru pulka pinpanyangka, munu mungawaluru pulkangku tjutura ngaranyangka ngangkali maru pulkangku. ¹⁹⁻²⁰ Munuya kuliningi turampata pulkara wangkatjingannyangka. Munuya Godaku wangka kulu kuliningi, panya paluru tjananya pulkara wangkangu alatji, “Puli nyangatjaya pampulwiyangku wantima. Munu kutjupangku pampunnyangka nyakulampaya palunya atura iluntanama, munu tjinguru kukangku pam-punnyangka nyakulaya palunya kulu atura iluntanama.” Kaya anangu tjutangku kulira pulkara nguluringkula wangkangu, “Wiya, nyangatja wituwitu pulka mulapa. Wanyu piruku nganañala wangkanytja wiyangku wantima.” ²¹ Ka Moselu kulu nyanganpa uwankara nyakula wangkangu, “Tjitinganyina pulkara nguluringkula.”

²² Uwa, puli panya palulakutu nyura kuwari ankunytja wiyat, palu nyura wirkanu puli kutjupangka puli ini Tjayanta, panya God wankaku ngurangka, ini kutjupa Jerusalemala ngura panya ilkaritjangka. Ka ngura nyara palula panya angelpa winki mulapa pukulpa alatji nyinara wañinyi utulu kutju. ²³ Uwa, ngura pala palula nyura wirkanu Godaku walytja kutjupa tjutangka tjunguringkunytjikitja. Panya nyara palunya tjananya Godalu ngurkantara ini tjuta walkatjunu ngura panya ilkaritjangka tiutjara nyinanytjaku. Uwa, nyura pitjangu God Ngurkantankupailakutu panya paluru anangu uwankara tjukarurungku ngurkantara tjaralku. Ka ngura nyara palula miri tjuta kurunpa nyinanyi panya tjana mantangka Godalawanu tjukaruru nyinangi munuya ilungu, ka Godalu tjananya wiru mulapa palyanu. ²⁴ Uwa, nyura pitjangu Jesulakutu panya paluru nganampa ngalkilarira ara kuwaritja palyanu paluru milkali tjutira. Panya paluru nganañanya palumpa milkalingka paltjiñu Godanya nganampa kalyparingkunytjaku. Uwa, Jesuku milkalingku wiru mulapa palyanu, Abelku milkalingku purunytju wiya.*

²⁵ Ka palulanguru nyura uti tungunpungkuwiyangku kulinma Godalu wangkanyangka. Panya iriti paluru mantangka Israelkunu tjutangka wangkangi, kaya tungunpungkula palunya kulira wantingi, ka nyanga palunya tjananya Godalu pikantanangi, kaya puťu kumpiningi wankakitja. Ka panya Godalu nganañala ilkariringuru wangkanyangka uti nganaña wanganarangku kulinma. Panya ilkariringuru wangkanyangka nganaña kulira wantirampa, ka paluru mulapa nganañanya pulkara pikantankuku, kala puťu alatji kumpilku palulanguru. ²⁶ Panya iriti puli nyara Tjaniyala Godalu manta uritjinganu wangkangku wangkara. Palu kuwari nyanga paluru kalkunu alatji wangkara, “Ngayuluña kutju-aralta piruku manta ilkari kulu uritjingalku.” ²⁷ Kala nyanga palulangurulta kulini, “Mulapa Godalu kutjupa kutjupa uwankara paluru paluntja uritjingara wiyaliku. Ka panya puťu uritjingalpai tjuta titutjara ngaraku wiyaringkunytja wiya panya paluru kalkuntja munu palumpa ngura kulu ngaraku tiutjara.”

²⁸⁻²⁹ Ka kutjupangku Godanya puťu uritjingara wiyaliku munu palumpa walytja tjuta kulu puťu wiyaliku. Panya Godalu ngarañmanytu

* ^{12:24} Panya Kaintu Abelnga iluntankunyangka palumpa milkalingku mantangka tjutira mirara wangkangi ngapartji iluntankunytjaku. Palu Jesuku milkalingku tjutira wangkangi Godanya nganampa kalyparingkunytjaku.

palyara wantingu nganampa palula titutjara nyinanytjaku. Palulanguru nganana uti Godaku pulka pukularima, munula palunya tjukarurungku walkura pulkanmanama palumpa nguluringkula, panya paluru pulka mulapa munu waru pulka purunyntju kura uwankara kampara wiyalpai.

13

Nyanga Alatjiya Nyinama Godanya Pukularinytjaku

¹ Utu nyura Jesuku waltyta nyinarampa nyuranku rawa pulka mukuringama watarkurintja wiya. ² Munu nyura uti anangu ngura kutjupitja pitjanyangka nyakula papulankunytja wiyangku mantjira nyurampa ngurangka pukultu kanyinma. Panya iriti anangu kutjupangku anangu-palku angelpa mantjira kanyiningi palumpa ngurangka.* Ka nyura uti palu purunyntju malikitja mantjira pukultu kanyinma nyurampa ngurangka.

³ Munu nyura uti tjailangka nyinapai tjuṭa kuļu watarkuriyangku kulinma munu tjanampa ngalturingkula tjarpara tjananya alpamilanma.* Munuya Jesuku waltyta kutjupa tjuṭa kuļu kulinma panya anangu mirpaṇtju tjutangku tjananya kuraṇi. Pulkaraya tjanampa ngalturingama munuya tjananya alpamilanma.

⁴ Munu nyura uti kurtjarangku tjukarurungku kulinma munu palyanyku nyinama, munuya kuri altira wirura kanyinma. Utu nyura kuri waltyjangka kutju ngarima waltytjarangka ngarintja wiya. Panya Godalu kura nyanga palu purunypa palyannyangka nyakula ngurkantara wiyaliku. Panya paluru anangu kampangkaṭu ngaripai uwankaraku pukularipai wiya munu tjananya ngurkantara wiyaliku.

⁵ Munuya maniku pulka mukuringkuwantima. Palu panya nyura kanyintjistikuya pukularima, munuya piruku waintara mantjintjik-itjangku kulintja wiyangku wantima. Panya Godalu wangkangu alatji, “Ngayuluña nyuranya wantikatinjtja wiya nyurala tjungu titutjara nyinaku.

Munuña nyuranya watarkurintja wiyangku titutjarangku kanyilku.” *

Nyara palulanguru Godalu nyuranya rawangku kanyinnyangkaya maniku pulka mukuringkunytja wiyangku wantima. ⁶ Munu alatji wangkama kurunpa raparingkula,

“Mayatjalu ngayunya atunymara kanyilpai
kaṇa ngulu wiya nyinanyi,

Kaṇi ngayunya anangungku puṭu kuraṇi.” *

⁷ Kaya kulinma wanyu tjana panya nyuranya atunymara kanyilpai tjuṭa, panya tjanaya nyurala tjakultjunu Godaku tjukurpa. Uwa, arā tjanampa kulinma panya tjana mantangka nyinalalpi Jesunya tungun-tunguntu waṇanigi munu panyaya rapa alatjitu ilungu. Ka nyura nyangatja kulira uti tjananya arkanma munuya Jesunya titutjarangku waṇanma tjana purunyntju. ⁸ Panya Jesunya Christanya kutjupariwiya kuwari palurutu alatjitu nyinanyi. Panya paluru iriti mulapa nyinangi, munu kuwari

* **13:2** Nyawa Genesis chapter 18-ta, panya Aipuramalu anangu-palku angelpa mankurpa pukultu mantjira tjunangi palumpa ngurangka. * **13:3** Panya iritiya tjailangka nyinangi mai wiya, kutjupa kutjupa wiya, tjituru-tjituru pulka, pikatjara pungkunytja pungkunytja. Kaya waltyta tjutangku kutju mukuringkula tjarpara alpamilaningi. * **13:5** Deuteronomy 31:6 * **13:6** Psalm 118:6

paluruṭu nyinanyi, munu paluruṭu tiṭutjara nyinaku wiyaringkunytja wiya alatjiṭu.

⁹ Palu kutjupa tjutangku nyurala tjukurpa kutjupa kutjupa tjuṭa ngunti wangkara nintinnyangkaya kuliṛa wantima ngunti iwara kutjupangka katintjaku-tawara. Panya nganaṇa kurunpa kūnpuringkupai Godalu nganaṇanya ngaltunytjungku rapannyangka kutju. Palu nganaṇa kuka mai kutjupatjara ngalkula kutjupatjara wantira puṭu kurunpa rappingkupai. Panya kutjupa tjutangkuya ara nyanga palunya tjananya waṇaningu munuya kurunpa kūnpuringkunytja wiya alatjiṭu.

¹⁰ Kaya tiinta milmiltā warkaripai tjuṭa puṭu nganaṇala tjunguringkupai Godanya walkuntjikitja. Panya nganaṇa Jesuku mulamularingkula kutju Godanya rapangku walkulpai, panya Jesunya nganampa ilura milkali tjutingu. Kala palulanguru kuka katira ungkunytja wiyangku palumpa mulamularingkula palunya walkulpai. ¹¹ Panya kuli kutjupa kuli kutjupa wati tjukurtjara pulkangku kukaku milkalingka para-kurpilpai ngura milmilpa mulapa panya tiinta unngutja Godalu nyakula aṇangu uwankara kura tjuṭa palyantjitjanguru kalypangku pungkuwiyangku wantintjaku. Palu iltjanpaya urilta katira ngurangka paṭu nguwanpa kutjalpai kampara mulururira tjunparingkunytjaku. ¹² Ka panyaya palu purunypa Jesunya urilta katira ngurangka paṭu nguwanpa iluntanu. Palu paluru nganampa anga-ilungu nganaṇanya palumpa milkalingka paltjintjikitja nganaṇa Godala mirangka palya mulapa nyinanytjaku.

¹³ Uwa, Jesunya nganampa pikatjararingu ngurangka urilta paṭu, kala uti palu purunypa ara nganmanyitja tjuṭa wantikatira Jesula tjunguringkula nyinama, kalanya tjana palyalta palunya nganaṇanya ananma. ¹⁴ Panya mantangka ngura wiru ngaranytja wiya nganaṇa palula tjungu wanka tiṭutjara nyinanytjaku. Palu nganaṇa panya ngura kutjupaku patara ala-alā nyinanyi, munula ngura nyara palula Godala tjungu tiṭutjara nyinaku.

¹⁵⁻¹⁶ Palulangurula uti Jesulawanungku Godanya rawangku walkunma puntu winkingku, panya Jesunya alatjiṭu nganampa ilungu. Ka nyura uti watarkurintja wiyangku palyanyku nyinara aṇangu kutjupa tjuṭa kuļu alpamilanma intjanungku ungkula. Panya alatjingannyangka Godanya pulkara pukularipai.

¹⁷ Ka nyura uti wangaṇarangku kulinma aṇangu panya nyuranya atunymara kanyilpai tjutangka. Panya paluru tjana nyuranya rawangku atunymananyi nyura Jesunya tjukarurungku waṇantjaku. Panya Godalu tjananya ungu warka nyanga palunya, munu tjananya nyanganyi nyuranya wiruṛa kanyintjaku. Ka nyura tjanala wangaṇarangku kulinma tungunpungkuwiyangku, ka tjana nyuranya pukulṭu wiruṛa kanyilkku. Palu tjinguru nyura tungunpungkunyangka tjana tjituru-tjitururira nyuranya puṭu wiruṛa kanyilkku.

¹⁸ Palu wanyuya rawangku nganampa Godala tjapinma. Panya nganaṇa palumpa warka tjukarurungku palyani kūnṭa wiyangku, munula nganaṇa tiṭutjara mukuringanyi tjukaruru palyanyku nyinanytjikitja. ¹⁹ Ka ngayulu nyuranya pulkara ngatjini nyura ngayuku Godala tjapintjaku paluru ngayunya nyuralakutu kuwari nguwanpa małakungku iyantjaku.

Tjanampa Godala Tjapintja

²⁰⁻²¹ Uwa, Mama Godalu aṇangu tjuṭa palumpa kalypa nyinanytjaku palyalpai. Munu paluru Mayatja Jesunya pakaltjinganu ilunytjitetjanguru. Panya paluru tjapata pulkangku nganaṇanya tjiipi purunypa atunymara

kanyilpai. Munu paluru alatjitu walytja puntu winki intjanuringu munu ilura milkali tjuttingu nganampa uwankaraku. Ka nyara palulanguru Godalu Jesunya pakaltjinganu milkali tjutinytjitjanguru, ka arা panya Godalu nganmanytju kalkuntjitjalta utiringu, munu titutjara ngaraku wiyaringkunytja wiya. Ka na nyurampa tjapini nyanga alatji,

“Mama God, nyanga tjananya nintinma wiru tjuta palyantjaku, panya nyuntu mukuringkunytja uwankara wangañarangku kulira palyantjaku. Ka Mayatja Jesu, nyuntu tjananya kuñpunma tjukaruru nyinara Godanya kutju pukulkunytjaku.”

Alatjina nyurampa tjapilpai. Kala wanyu uwankarangku Jesunya Christanya tiutjarangku mirawañima! Uwa, mulapa.

Tjukurpa Malatja

²² Walytja tjuta, tjukurpa nyanga ngayulu nyurampa walkatjunkunytjaya purkarangku palyanyku kulinma. Panya ngayulu alatji walkatjunu nyuranya rapantjikitjangku tjukurpa muñumuñu.

²³ Ka nganampa panya malpa Timitjinya tjailanguru pakañu, ka nyura kulinu? Ka tjinguru paluru ngayula nyangangka warpungkula wirkara tjunguringkunyangka ngali kutjarañu ma-pitjaku nyuranya nyakunytjikitja.

²⁴ Palu nyura tjakultjura anangu panya nyuranya atunymara kanyilpai tjutangka munu Godaku walytja kutjupa uwankarangka kuñu, panya nganana tjananya kulini tjanampa pukularira. Ka panya Italinya ngurara tjutangku kuñu palu purunypañu nyuranya kulini.

²⁵ Uwa, alatjitu wangkanyi. Ka Godalu nyuranya pukultjungku wiruña kanyinma.

Lita Jamesalu Walkatjunkunytja James Nyangatja Nganmanytju Nyakula Wangkanytjaku

Nyangatja Godaku tjukurpa wati ini Jamesalu walkatjunkunytja Jesuku panya malanytju. Panya paluru ngula kutju Jesuku mulamularingu paluru ilunytjatjanu pakannyangka małangka munu nyara palulanguru kutju mulapa kulinu Jesunya Godaku katja nyinanytja. Ka ngula paluru ingkata pulka nyinangi munu Jesuku walytja tjuṭa atunymanangi Jerusalemala nyinanytja tjuṭa. Ka wati panya Paulalu palunya ngurkantanu tjukurtjara Jesulu panya iyantjanya.

Ka Jamesalu lita nyanga palunya walkatjura iyanu ngura parari nyinanytja tjutakutu aŋangu Jew Jesuku walytja kutjupa tjutakutu. Munu paluru alatji wangkangu palula tjanala, “Palya nyura Jesuku mulamularinganyi, palu uti nyura mulamularingkunytjatjanungku palula wanganarangku kulira palyanma paluru wangkanytjita uwankara.” Alatji Jamesalu Jesunya waŋalpai tjutangka wangkangi munu paluru tjanala tjukurpa tjuṭa tjakultjunangi tjana kulira tjukurpa Jesunyatjara tjukarurungku kulintjaku munu palunya mulamulangku waŋantjaku.

Tjukurpa nyanganpa ngarinyi:

- 1:1-18 Godanya pakuringkuwiyangku waŋantjaku
- 1:19-27 Godaku tjukurpa wanganarangku kulira palyantjaku
- 2:1-13 Aŋangu uwankaraku tjungu mukuringkunytjaku
- 2:14-26 Mulamularingkupai tjutangku wiru tjuṭa kutju palyantjaku
- 3:1-18 Tjukurpa wiru tjuṭa kutju wangkanytjaku tjaa kura nyinawiyangku
- 4:1—5:6 Godala wanganarangku kulintjaku tjukurpa mantatja tjuṭa wantira
- 5:7-12 Kurara pungkunyangka pukulpa nyinanytjaku
- 5:13-20 Godala tjukarurungku tjapintjaku

Jamesalu Nganmanytju Wangkanytja

¹ Ngayuluña Jamesanya panya Mama Godaku Mayatja Jesuku Christaku waŋkaripai nyinanyi. Mununa lita nyangatja nyurampa walkatjunanyi Godaku walytja tjutaku, panya nyura ngura kutjupa kutjupa tjutangka parari nyinanyi.

Godanya Pakuringkuwiyangku Wanantjaku

²⁻³ Walytja tjuṭa, kura kutjupa kutjupa tjuṭa nyurala wirkankunyangkampa nyura uti pukularima. Munu kutjupa tjutangku nyuranya kurantjikitja ngunti wituwitunyangkampa nyura uti tjananya kulira wantima, munuya tjituru-tjitururinytja wiya pukulpa nyinama. Panya nyuranya kurannyangka nyura nintiringkuku Jesunya kutju tungun-tunguntu waŋantjikitja. ⁴ Munu nyura uti pakuringkunytja wiyangku tiṭutjarangku waŋanma munu nyara palulanguru nyura paluru mukuringkunytja uwankara rawangku palyara ma-kunpuringkula witu ngaraku.

⁵ Tjinguru kutjupa-ara nyurala alatjirinyangka nyura puṭu kulikku alatji, “Nyaalkuṇa? Yaaltjingaraṇa palyalku?” Palu utin puṭu kulintja wiyangku

Godala tjapinma panya paluru tjapinnyangka wantintytja wiyangku wan-gaṇarangku kulilpai munu alpamilalpai. ⁶⁻⁸ Ka nyura Mama Godala tjapiṛampa uti palumpa mulamularingama alatjiṭu kampa kutjara kulintja wiya munu kulinma alatji, "Godaluṇi mulapa alpamilalku." Panya kampa kutjara kulilpai tjuṭa uren purunypa, panya walpangku unṭunnyangka para-uripai titutjara, nyara palu purunypa kampa kutjara kulilpai tjuta nyinanyi, tjukaruru wiya, kalikali. Munu tjinguru tjana kulilpai alatji, "Ngayulu Godala tjapinnyangka mulapa paluru ngayunya alpamilalku." Palu wiya, kampa kutjara kulinnyangka Godalu putu alpamilalpai.

⁹ Tjinguru Jesuku walytja kutjupa titutjara mani wiya nyinanyi, munu uti paluru pukularima tjituru-tjitururinytja wiya, panya Godalu palunya Christala tjungura walytjanmanu. ¹⁰ Ka palu purunypa Jesuku walytja kutjupa tjinguru mani pulkatjara nyinanyi munu uti paluru pukularima Godalu palunya Christala tjungura walytjanmankunyangka kutju maninguru wiya. Tjinguru Godalu palumpa mani winki wiyaliku, ka paluru ngaltutjara nyinaku mani tjukutjukutjara. Palu uti paluru mani wiya pukulpaṭu nyinama, panya paluru mani pulkatjara pukulpa nyinangi, palu purunypatū uti paluru pukulpa nyinama. Panya mani pulkangku putu Godaku walytjaringkunytjaku palyani. Palu panya anangu mani pulkatjara nyinanytjatjanu inuntji purunypa ilura wi-yaringkupai. ¹¹ Panya tjintungku pakara katuringkula uwankara kampapai. Ka palulanguru inuntji panya wiru tjuṭa piltiringkula punkalpai kamppanyangka. Nyara palu purunypa anangu mani pulkatjara wiyingkuku watarku waṛkarinytjatjanu.

¹² Uwa, kutjupa tjuṭangku nyuranya kurara pungkunyangka nyura uti kulira wantima munu tungun-tunguntu Godanya waṇanma. Ka Godanya nyakula nyurampa pulkara pukulariku, munu nyuranya wanka titutjara nyinanytjaku wangkaku, panya alatji paluru kalkunu palumpa mukuringkupai tjuṭangka.

¹³ Ka tjinguru kutjupa tjuṭangku nyuranya kura palyantjaku wituwitun-nyangka nyura uti ngunti wangkawiyangku wantima alatji, "Godaluṇi unṭuni kura palyantjaku." Panya Godalu kura palyantjaku unṭulpai wiya, panya kutjupangku putu Godanya arkaṇi kura palyantjaku. ¹⁴ Panya anangu nyara paluru alatjiṭu kura palyantjikitja mukuringkupai, paluru kutju, munu paluru unngu kulira mukuringkula palyalpai alatjiṭu. ¹⁵ Uwa, paluru alatjiṭu mukuringkula kura palyalpai, munu palulanguru kura titutjarangku palyalkatinyi wantintytja wiyangku munu kurangka kutju tjakaringanyi. Ka Godalu palunya ngula paira iyalku palula tjungu nyinanytja wiya, ngura kurangka nyinanytjaku.

¹⁶ Ngayuku walytja tjuṭa, anangu kutjupa tjuṭangku ngunti ku-rannyangka nyura uti kulilwiyangku wantima, munu ngayulu panya wangkanytja kutju tjukarurungku kulinma. ¹⁷ Uwankara panya Godalu nganampa palyantja palya alatjiṭu ngaranyi, kura wiya. Godalu panya tjintu, pira, kililpi palulpaingku wiru tjuṭa nganampa palyalpai. Munu paluru kutjuparintja wiya paluru alatjiṭu nyinanyi, munulanya titutjarangku wirura kanyilpai wantintytja wiyangku. ¹⁸ Panya paluru nganampa pulkara mukuringangi nganaṇa palumpa walytja mulapa nyinanytjaku. Munu panya palulanguru tjukurpa tjukaruru Christanyatjara nganaṇala utinu nganaṇa mulamularingkula palumpa walytja mulapa nyinanytjaku.

19 Walytja tjuta, wanyuya kulinma. Añangu kutjupangku wangkanyangkaya mapalku waruringkula mirpañarinytja wiyangku wantima. Palu purkarangkuya kulinma munu mapalku wangkanytjikitjangku kulintja wiyangku wantima. **20** Tjinguru nyura mirpañarirampa Godaku tjukurpa puť tjukarurungku palyalku. **21** Nyura uti kura kutjupa kutjupa uwankara wantima nyura unngu kulintja uwankara. Panya Godalu nyurala unngu tjunu palumpa tjukurpa kutju nyura tjukarurungku kulintjaku, panya watingku unñinypa tjunkupai mantangka pakantjaku, palu purunypa Godalu tjukurpa nyurala unngu tjunu. Ka nyura palula kutjungka wanganarangku kulinnyangkampa paluru nyuranya wankarunkuku palula tjungu tiťutjara nyinanytjaku. Palulanguruwa kura kutjupa kutjupa uwankara nyura unngu kulintja wantima alatjiťu.

22 Nyura uti Godaku tjukurpa wanganarangku kulira palyanma, pinangku kutju kulintja wiyangku. Panya nyura pinangku kutju kulira nyuranku Godaku waltyjanmankupai, palu wiya, nyura alatji ngunti wangkapai. **23-24** Tjinguru aňangungku palurunku yunpa walytjangku kalawatjangka purkarangku nyakupai. Munu palulanguru paluru ankula mapalku watarkuripai palumpa yunpaku. Ka nyara palu purunypa aňangu kutjupa tjutangku Godaku tjukurpa nyakula wangkara purkarangku kulilpai munuya palulanguru ankula mapalku watarkurira palyantja wiyangku wantipai. Nyanga alatji tjana pinangku kutju kulini wanganarangku kulira palyantja wiyangku. **25** Panya Godaku tjukurpa kalawatja purunypa, munu nganananya nintilpai yaaltjin-gara Godalu nganananya kuranguru wankarunu nganana palula wanganarangku kulintjaku. Ka aňangungku palumpa tjukurpa rawangku nyakula wangkara purkarangku kulinnyangka munu wanganarangku kulira palyannyangka kuľu Godalu palunya pulkara pukulmankuku.

26 Tjinguru aňangungku kulilpai alatji, “Ngayulu Jesuku walytja mulapa tjana purunypa wiya, tjukarurungku palyalpai.” Palu tjinguru tjalinypa kurangku wangkara palurunku ngunti rawangku mirawanipai tjukarurungku-palku. **27** Palu nyanga alatji Jesuku walytja mulatu palyalpai panya tjitji tjitula, minyma wanakała tjuta munu ngaltutjara tjuta kuľu mukulyangku alpamilara atunymankupai, munu kura tjutangka tjunguringkupai wiya mauntalpa nyinapai. Nyara palu purunyku Godanya nyakula pukularipai.

2

Anangu Uwankaraku Mukulya Nyinanytjaku

1 Walytja tjuta, nyura uti aňangu uwankaraku mukulya nyinama tjara wantintja wiya, panya nganana uwankara Jesuku walytjapiti, ka paluru nganampa Mayatja witulya pulka mulapa. Wanyuya kulila, kaňa ara nyangatja nyurala wangka nyura kulintjaku. **2** Nyura tjinguru tjunguringkula nyinaku Godanya walkuntjikitja, ka wati kutjara pitjaku nyuralakutu nyurala tjunguringkula walkuntjikitja. Kutju mantara wiru mulartjara munu manyirkitja wirutjara panya gold-nguru palyantjtja. Palu panya wati kutjupa ngaltutjara mulapa, mantara kurakuratjara. **3** Ka tjinguru aňangu kutjungku nyuralanguru pukularira wangkaku wati panya mantara wirutjarangka, “Pitjala nyangangka nyinakati wirungka nyanga.” Munu wati panya ngaltutjtarangka kurara wangkaku, “Nyuntu nyarangka wati-pitjala ngarama nyara patu.” Ka alatji palya wiya. **4** Panya paluru wirutjaraku kutju ngurkantara pukularinyi munu wati ngaltutjara

papulara paini. Ka nyura nyanga alatji palyara puṭu tjukarurungku ngurkantananyi, palu nyura uti pulampaṭu pułkarə mukuringama kutju kurantja wiya.

⁵⁻⁷ Uwa, waltyta tjuta, kulilaya. Nyaaku nyura Jesuku waltyta tjutangku ngaltutjara tjuta ngunti mirpaṇtu kuraṇi? Panya nyura mani pułkatjara tjuta pitjanyangka nyakula pułkarira altira kuranyu nyinatjunkupai wirungka. Palu aŋangu nyara paluru tjana nyuranya pauntjingara wangkapai, munuya nyuranya ngalturingkuwiyangku witira kuotpakutu katipai munu wati ngurkantankupaingka kuranyu ngaratjunkula nyuranya kuranmankupai. Wiya, aŋangu nyara paluru tjana panya nyurampa mayatja analpai, Jesunya panya. Palu panya Godalu aŋangu ngaltutjara tjuta ngurkantanu paluru tjana palumpa pułkarə mulamularingkunytjaku. Munu paluru tjananya waltytanmaṛa wirura aṭunymaṛa kanyini palula tjungu, panya paluru alatji kalkuṇu palumpa mukuringkupai tjuta wirura kanyintjikitjangku. Ka nyura palu puṛunypaṭu ngaltutjara tjuta kurantja wiyangku wirura kanyinma.

⁸ Panya Godalu tjukurpa pułka tjuta iriti walkatjunkunytja ngarinyi nyiringka, palu tjukurpa kutju pułka mulapa uwankarangka waintarinytja nyanga alatji,

“Aŋangu kutjupa uwankaraku pułkarə mukuringama, panya nyuntunkun waltyta mukuringkupai, palu puṛunypa.” *

Ka tjukurpa nyanga palunya wangaṇarangku kulira palyarampa nyura tjukaruru palyanyku nyinaku. ⁹ Tjinguru nyura aŋangu kutjupa tjaraku kutju nyakula pułkarinyi munu tjara kutjupa nyakula wantinyi, ka alatji palya wiya. Panya nyura tjukurpa nyara palunya kulintja wiyangku wantira kuraṇi.

¹⁰ Uwa, Godalu tjukurpa paintitja tjuta nganampa wangkara tjunu. Ka tjinguru aŋangu kutjupangku tjukurpa kutju kulilwiyangku wantinyi, ka aŋangu kutjupangku tjukurpa uwankara kulilwiyangku wantinyi. Palu Godalu palunya pulanyaṭu tjungu kura ngurkantananyi munu paini. ¹¹ Panya Godalu wangkangu alatji, “Aŋangu kutjupangka kampangkata ngariwiyangku wantima, munu kuri waltytangka kutju ngarima.” Munu piṛuku kutjupa kuļu wangkangu nyanga alatji, “Aŋangu iluntankunytja wiyangku wantima.” Ka tjinguru nyupali kuričara tjungu ngarinyi palatja palya, palu nyuntu piṛuku aŋangu kutjupa iluntankunyangkampa Godalu nyuntunya paini alatjiwantintja wiyangku, panya tjukurpa palumpa nyuntu kuraṇu alatji.

¹² Panya Godalu nyuranya kurangka nyinanyangka mantjinu nyura palumpa tjukurpa kutju kulintjaku. Munu tjukurpa nyara palulanguru paluru nyuranya ngula ngurkantankuku, tjinguru nyura palumpa tjukurpa kulinu, munta tjinguru wiya. Kaya palulanguru purkarangku kulinma nyura wangkanytja, munu kulintja, munu palyantja uwankara, panya ngula Godalu nyuranya kutju kutju ngurkantananyi. ¹³ Tjinguru nyura aŋangu kutjupaku nyakula ngalturingkunytja wiya nyinanyi, ka Godanya ngapartji nyurampa ngalturingkunytja wiyareringkuku tjintu panya malatjangka. Palu tjinguru nyura aŋangu tjutaku ngaltunyntju nyinanyangkampa Godalu ngapartji palu puṛunyntjutu nyuranya ngaltunyntjungku altiku, ka nyura palula miṛangka ngulu wiya rapa ngaraku.

Mulamularingkupai Tjutangku Wiru Kutju Palyantjaku

* ^{2:8} Leviticus 19:18

¹⁴ Kulilaya tjukurpa nyangatja. Panya aŋangu kutjupa tjinguru mukulya wiya nyinanyi munu paluru tjinguru wangkaku alatji, "Ngayulu mulamularinganyi Godaku." Palu wiya, paluru alatji ngunti wangkanyi panya paluru Godaku tjukurpa tjukarurungku kulilpai wiya munu aŋangu tjuṭaku ngalturingkupai wiya. Paluru tjaangku kutju ngunti wangkanyi. Ka Godalu wanyu palunya wankalku alatji wangkanyangka? Wiya alatjitu.

¹⁵⁻¹⁶ Wanyu kaña tjukurpa nyangatja nyurala wangka nyura uti kulintjaku. Tjinguru Jesuku walytja kutjupa mantara wiya mai wiya nyinanyi. Ka tjinguru nyuntu palunya nyakula pukulmankuku alatji wangkara, "Pukulpa nyinama, panya Godalunta mai ungkuku mantara kuļu unytjunpa nyinanytjaku." Palu nyuntu alatji wangkangku kutju wangkanyangka paluru paltjaringkunytja wiya munu unytjunarinytja wiya. Kulila, nyuntu palunya pukulmankunytjikitja mukuringkula mai mantara ungama tjukurpa kutju wangkanytja wiyangku. Nyara palulanguru kutju paluru pukuläriku. ¹⁷ Uwa, uti nyura Godaku mulamularingkunytjatjanungku wiru tjuṭa palyanma aŋangu tjuṭaku. Panya wiru tjuṭa palyantja wiyangku wantirampa nyuranku ngunti Godaku walytjanmananyi.

¹⁸ Palu aŋangu kutjupangku tjinguru alatji wangkaku, "Wiya, palya nyuntu wiru tjuṭa palyalpai, palu ngayulu mulamularingkupai kutju." Palu wiya, panya ngayulu Godaku mulamularingkunytjatjanungku wiru tjuṭa palyalpai alatjitu pukultju pulkangku. Ka nyara palulanguru wiru tjuṭa palyannyangka nyakulaya ngayunya ngurkantara kulilpai, "Ai, nyara paluru Godaku walytja mulapa, panya paluru wiru tjuṭa pukultjungku palyalpai."

¹⁹ Uwa, nyuntu mulamularinganyi Godaku, panya paluru kutju pulka mulapa nyinanyi. Palu kulila, mamu tjuṭa kuļu Godaku mulamularingkupai, palu nyara paluru tjana Godala wanganarangku kulilpai wiya munuya pulkara nguluringkula tjitingkupai. Ka nyuntu mulamularingkunytjatjanungku wiru tjuṭa palyantja wiya nyinarampa mamu palunya tjananya purunypaṭu nyinanyi. ²⁰⁻²² Uwa, nyuntu ngunti wangkapai nyinanyi.

Palu wanyu nintiringkunytjikitjangku kulila tjukurpa panyatja, panya Aipuramanya Godalu walytjanmankunytja. Palu nyaanguru palunya walytjanmanu? Wiya, wati nyara paluru panya mulamularingkula wanganarangku kulinu Godalu palunya wangkanyangka, munu paluru palumpa katja katingu alatjitu pitjilta katu tjunkula pungkula Godanya ungkunytjikitjangku, munu panya nguwanpa wakara iluntanu. Ka nganana tjukurpa nyangatja kulintjatjanungku kulinu panya mulapa paluru kutjaratu kuliningi mulamularingkunytja munu wanganarangku kulira palyantja. ²³ Ka tjukurpa nyanga paluru nyiringka ngaranyi iriti walkatjunkunytja nyanga alatji,

"Aipuramanya mulamularingu Godaku. Ka nyara palulanguru Godalu palunya mulamularingkunyangka nyakula tjukarurunmankula walytjanmanu." *

Munu Godalu Aipuramanya wangkangu, "Nyuntu ngayuku malpa nyinanyi, walytja mulapa." ²⁴ Ka aña nyanga palulangurula uti nintiringama munula Godaku mulamularingkunytjatjanungku wanganarangku kulira titutjarangku palyanma wiru tjuṭa kutju. Ka nyara palulangurulta Godalu ngananya walytjanmankuku ngananya mulamularingkunyangka nyakula munu tjukarurungku wiru tjuṭa palyannyangka kuļu.

* ^{2:23} Genesis 15:6

²⁵ Wanyuya kulinma minyma panya Rayapanya. Panya paluru wati tjutangka ngunti ngaripai. Palu nyara palulanguru paluru wati Godaku walytja kutjara kutitjura kanyiningi wati nguratja tjutangku iluntankunytjaku-tawara. Munu pulanya minyma paluru nintinu iwara kutjupawanu kumpira ankunytjaku. Ka Godalu nyangu minyma nyara paluru wiruwa atunyamankunyangka, munu palunya walytjanmanu palula mirangka wiruwa palyannyangka.

²⁶ Kaya nyangatja kulinma panya anangu kurunpa wiya puwu wanka nyinapai munu paluru ilupai alatjitu. Ka palu purunypa anangu kutjupangku mulamularingkunytjatjanungku wiru tjuwa palyalwiyangku wantira ilunytja purunypa nyinanyi. Ka nyura uti mulamularingkunytjatjanungku wantinytja wiyangku wiru tjuwa palyalkatima.

3

Tjaaj Kura Nyinawiyangku Wiru Kutju Wangkanytjaku

¹ Walytja tjuwa, wanyuya kulila. Panya Godalu anangu nintilpai tjuwa pulkara alatjitu nyanganyi palumpa tjukurpa tjukarurungku nintinnyangka ngurkantankunytjikitjangku. Ka nyara palulanguru nyura uwankarangku tjukurpa nintintjikitja mukuringkunytja wiyangku wantima, ka tjarangku kutju nintinma atatjura kulira. Panya Godalu nintilpai tjuwa pulkara nyanganyi anangu kutjupa tjutangka waintara. ² Nganana kutjupa-ara uwankarangku kura palyalpai. Palu panya anangu palya mulapa nyanga alatji nyinapai paluru kutjupa tjuwa kuralpai wiya munu kampangkatu wangkapai wiya, wiru kutju wangkapai. Uwa, anangu paluru wiru kutju wangkarampa palyanyku tjukaruru nyinapai. Kala uti palu purunypa tjalinya urira wiru kutju wangkama.

³⁻⁵ Palu tjalinya panya nyanytjuku purala purunypa, panya watingku nyanytju tjaangka purala tjunkupai, ka nyanytjungku wangaarangku kulilpai wati paluru ilaara pinkurtjingannyaangka. Purala paluru tjukutjuku, palu nyanytju pulkanya puralangku pinkurtjingalpai. Ka palu purunypa nganampa tjalinya tjukutjukutu ngaranyi, palu tjukutjuku nyanga paluru wangka pulkalpai, ka pulkaringkula lipiringkupai, ka anangu tjutangku kulilpai.

Munuya pauta kulu palu purunypa kulila. Panya pauta nyara paluru pulka, palu wati kutjungku uringka pinkurtjingara katirinkupai paluru mukuringkunytjitatjaku. Panya paluru malarkunguru puwu tjukutjuku uritjingalpai, ka puwu tjukutjuku paluru pauta panya pulkanya pinkurtjinggaalpai. Ka palu purunypa nganampa tjalinya tjukutjukutu ngaranyi, palu tjukutjuku nyanga paluru wangka pulkalpai, ka anangu tjutangku kulilpai.

⁶ Wanyuya kulila waru ngapartji. Panya purku tjukutjuku puura tilinnyangka tilingarala pulkaringkupai. Ka palu purunypa nganampa tjalinya tjukutjuku urira wangkanyi, ka wangka pulkaringanyi, ka panya anangu tjutangku kulini. Ka mamungku panya tjalinya kura tjuwa wangkanytjaku palyalpai, ka wangka paluru waru purunytju lipiringkula anangu tjuwa kuralpai.

⁷ Munu kuka tjuwa kuluya ngapartji kulila. Panya kuwaripatjaranguru anangu tjutangku kuka kutjupa kutjupa tjuwa witira nintiningi tjulpu, liru, urutja tjuwa kulukulu tjananya wangaarangku kulintjaku, ka kuwari nintintjaku ngaranyitu. ⁸ Palu wanyu kulila. Kutjupangku tjalinya nyangatja nintintjaku ngaranyi? Wiya alatjitu. Kutjupangku putu nintini

tjalinypha nyanga palunya wiru tjuta kutju wangkanytjaku. Panya tjalinypha nyangatja kura pulkatjara anangu mukuringkunyangka titutjara urira wangka pulkalpai munu anangu iluntankupai alatji, panya lirungku patjara iluntankupai, palu purunypha.

⁹ Ka nganaña kutjupa-ara tjalinypha urira Mayatja Godanya wal Kulpai, munula piruku anangu tjuta warkipai tjalinypha panya palunya urira, anangu panya Godalu palunya purunypha nyinanytjaku paluntja tjuta.

¹⁰ Ka alatji palya wiya. Utu nganaña palya munu kura tjungurá wangkawiyangku wantima. ¹¹ Panya warngalyku kutjunguru mina palya munu kura tjungu pakalpai wiya. ¹² Ka palu purunypha mai alipa tjuta puñu iñingka pakalpai wiya, munu ili tjuta puñu kiripitjingka pakalpai wiya alatjitu. Nganana mina palya puñu mantjilpai mina tjaltutjaranguru. Kala uti ara nyanganpa kulintjatjanungku tjalinypha urira palya munu kura tjungurá wangkawiyangku wantima.

¹³ Anangu kutjupa wanyu nyuralanguru nintipuka nyinanyi tjukarurungku kulilpai? Munu uti paluru tjukaruru nyinama, munu anangu uwankaraku mukuringama munu pukultu alpamilanma kurunpa tjaruringkula, kañany-kañanyarira walytjangku mirawañinytja wiyangku. Ka nyara palulanguru kutjupa tjutangku nyakula kulikku, "Mulapa paluru nintipuka nyinanyi, tjukarurungku kulilpai."

¹⁴ Palu tjinguru nyura anangu kutjupa tjutaku nyakula rawa nyararingkupai munu tjananya kuranmankupai. Munu tjinguru nyura anangu ngaltutjara nyakula kutjupa nyura kanyintja ungkunytja wiyangku ngurtjungku kanyilpai. Munu tjinguru nyura alatji mukulya wiya nyinara kañany-kañanytju wangkara walytjangku wirunmankupai palya-palku nyinara. Palu wiya, nyangatja kura. Utu nyura mukulya wiya nyinanytjatjanungku ngunti walytjangku mirawañiwiyangku wantima munuyanku tjukarurungku kulinma. ¹⁵ Godalu wanyu nyuranya nintinu alatji kulintjaku? Wiya alatji. Nyangatja nyura mamungka kulira nintiringu ara mantatja, panya mamungku alatji nintilpai, Godalu wiyangku. ¹⁶ Panya anangungku walytjangku pulkanmara kutjupa tjutaku nyararingkula pikaringkunyangka pika paluru lipiringkupai anangu winkingka, ka nyara palulanguru kura pulkaringkupai.

¹⁷ Palu panya Godalu nintipuka pulkangku nganananya nintilpai palya mulapa nyinanytjaku pukulpa kalypa mulapa anangu tjutangka tjungu. Nyara paluru kutjungku nintilpai anangu tjutangka purkarangku kulintjaku, munu kuranyitja tjutangka wangañarangku kulintjaku munu tjungungku palyantjaku, munu ngaltunytjungku atunymara kanyintjaku, munu anangu uwankaraku pulkara mukuringkunytjaku tjara wantinytja wiya, munu wangkara kalkuntjatjanungku tjukarurungku palyantjaku, tjaangku kutju wangkanytja wiyangku. ¹⁸ Uwa, Godalu kutjungku nganananya nintilpai anangu tjutangka tjunguringkula pukulpa kalypa nyinanytjaku. Ka nganaña anangu tjuta ngapartji-ngapartji pikaringkunyangka markulku pika wantira kalypa nyinanytjaku. Kaya palulanguru kalyparingkula pukulpa tjungu nyinaku Godalu nyakula pukularinytjaku.

4

Godala Wanganarangku Kulintjaku

¹ Nyaanguru nyuranku pikaringkula pungkula wañinyi, nyaatjiratjangku? Munta tjinguru nyura alatji titutjara pukulpa-palku nyinanytjikitja mukuringanyi munu nyura ngunti titutjarangku kura

palyalpai nyuranku pukulmankunytjikitjangku. ²⁻³ Panya nyura anangu kutjupangku kutjupa kutjupa tjuṭa kanyinnyangka nyakula mukuringkupai munu nyura anangu panya palunya iluntankupai palumpa kutjupa kutjupa tjuṭa mantjintjikitjangku. Munu nyura anangu kutjupa tjuṭaku kuļu nyakula nyararingkupai panya nyura anangu nyara paluru tjana purunyti wiru tjuṭa kanyintja wiya. Nyara palulanguru nyura pikaringkula titutjarangku ngaparku wangkapai.

Palu nyaanguru nyura pala mukuringkunytja palunya puṭu mantjini? Wiya, nyura Godala tjapintja wiyangku wantira puṭu mantjini. Munta tjinguru nyura Godala tjapini, palu Godalu nyuranya kulintja wiyangku wantinyi, panya nyura tjinguru nyuranku kutju walytjangku tjapini walytja pukularintjikitjangku.

⁴ Mulapa nyura Godanya wantinyi. Nyara palulanguru nyura man-tatja kura kutjupa kutjupa tjuṭaku mukuringkula Godaku kuraringku-pai. Nyura panya watingku kuri wantikatinytja purunypa nyinanyi, panya paluru kuri wantira kutjupa tjutangka ngaripai, palu purunypa nyura Godanya wantikatira kutjupa tjutangka tjunguringkupai. Munu nyura kura tjutangka ngunti pukularintjikitja mukuringkula Godaku kuraringanyi munu palumpa malpa nyinanytja wiyaringanyi. ⁵ Panya nyiringka Godaku tjukurpa tjukaruru ngaranyi munu tjakultjunanyi alatji Godalu palumpa panya kurunpa ngananaala nyinanytjaku tjunkunytjatjanu nyararingkupai nganana kutjupa tjutangka kulinnyangka palula kutju kulintja-tjiratja. Panya paluru mukuringkupai nganana palula kutju kulin-tjaku. Munu nganana kutjupa tjutangka kulinnyangka paluru pukularipai wiya. ⁶ Godanya ngaltunyti mukulya pulka mulapa titutjara nyinanyi munulanya kanyini. Panya ngañmanyti nyiringka walkatjunkunytja ngaranyi alatji, “Anangu kañany-kañanyarinyangka Godalu kulintja wiyangku wantipai, palu paluru ngaltunyti jangku kanyilpai kurunpa tjaruringkula kañany-kañanya wiyangku kulinnyangka.”

⁷ Ka nyura uti nyanga palulanguru Godalu wangkanyangka wan-ganarangku kuliṛa palyanma. Munu mamungku wangkanyangka kulintja wiyangku wantima. Ka mamu paluru nyuranya puṭu wituwitura mapalku wantikatira ankuku nyuralanguru. ⁸ Ka nyura Godala ilaringkunyangka paluru ngapartji nyurala ilaringkuku. Kaya kura wantira kampa kutjaparira Godanya kutju kuliṛa mulamulangku wañanma. ⁹ Pulkaraya piiwiyariwa kura tjuta palyantjatjanu munuya kuranguru pukularira ikar-ingkunytja wiyangku wantima munuya pulkarra kuntaringkula tjituru-tjitururira ulama. ¹⁰ Kulilaya, uti nyura Mayatja Godala mirangka kañany-kañanyarintja wiya tjukutjukuringama, ka nyuranya paluru nyakula pukularira pulkanma.

¹¹ Nyura uti Jesuku walytja tjutangku walytja kutjupa tjuṭa nyakula kuranmankuwiyangku wantima. Panya nyura tjukurku nintingku-palku Jesuku walytja kutjupa tjuṭa kura ngurkantara Godaku tjukurpa kuraṇi. Munu nyura tjinguru kulini tjukarurungku wangkara-palku. Palu wiya, nyura Godaku tjukurku mayatja wiya. Nyurampa ngaranyi mulamu-laringkula palunya kutju wañantjaku, kaya ngunti mayatjarira Jesuku walytja kutjupa tjuta kuranmankuwiyangku wantima. ¹² Panya Godanya kutju nyinanyi tjukurpa tjunkunytjatjanu, munu paluru kutjungku ngurkantara wangkaku tjukaruru munu kura nyinanytjanguru. Munu paluru kutjungku tjara wankalku, munu tjara wiyaliku. Nyanga alatji

paluru kutjungku palyalku. Ka nyura nyaaku mayatjangku-palku ngurkantaṛa kuranmananyi an̄angu kutjupa tjuta, panya nyura nyakula ngurkantaṛa kuranmankunytjaku wiya ngaranyi.

Nintingku-palku Nganmanytju Kulira Wangkanytja Wiya

¹³ Ala, wanyuya kulila, panya nyura kutjupa kutjupa tjutatjara anku-pai ngura tjutakutu tjalamilara mani palyantjikitja. Munu nyura wangkapai alatji, “Munta-uwa, kuwarila ma-wirkananyi munta tjingurula mungawinki ngura pala palula wirkankuku. Munula pala palulalta nyinaku yiya kutju tjalamilara mani pulka palyantjikitja.” Alatji panya nyura nganmanytju wangkara tamalmankupai. ¹⁴ Palu kulilaya, alatji wangkawiyangkuya wantima. Nyura ngurpa. Tjinguru nyura ngunti wangkaku, ka mungawinki wiya ngaraku, panya nyura watarku wangkapai nintingku-palku. Palu nyuntu nganana uwankara aruma purunypa, panya arumangku puli angatjunkupai munu mapalku wiyingrupai, nyara palu purunypala nyinanyi wanka tjukutjukutjara munula mapalku wiyingrupai. ¹⁵ Ka nyanga palulanguru nganana uti alatji wangkama, “Wiya, Godanya mukuringkunyangka kutju ngayulu wanka nyinaku mununa ngura kutjupa tjutakutu ankula palyalku, ngayulu mukuringkunytjitjangka wiya.” ¹⁶ Wiya, utilanku nintingku-palku kañany-kañanytju nganmanytju wangkawiyangkuya wantima, panya alatji wangkanyangka Godanya pukularipai wiya.

¹⁷ Tjinguru anangungku nintingku kulini tjukaruru nyinanytjikitjangku, palu nyara paluru tjukarurungku palyantja wiyangku wantira paluru Godala tungunpunganyi, ka Godalu ngurkantananyi palumpa kura.

5

Mani Pulkatjara Tjuta Ngulutjunkunytja

¹ Kuwariña nyurala wangkanyi mani pulkatjara tjutangka. Nyura uti pulkara ulama, panya ngula nyurala tjituru-tjituru pulka wirkankuku.

²⁻³ Panya nyura kuvari kanyintja uwankara wiyingrukku tiṭutjara ngarintja wiya. Ka nyurampa mai tjuta un̄aringrukku, munu nyurampa mantara wiru tjuta akulyungku ngalkuku, munu nyurampa mani tjiilpa gold kuļu kuraringrukku. Ka nyura nyanganpa utiringkunyangka nyakula kulinma panya Godalu nyuranya waru pulka purunytju wiyalu alatjitu. Nyanga alatjiriku panya nyura wiru tjuta mantjira ngurtjungku kanyiningi munu nyuranku kutju pukulanangi. Ka nyara palulanguru nyurampa kuwaringuru alatjitu ulanytjaku ngaranyi.

⁴ Ka panya nyurampa ngurangka nyura wati tjuta tjunkupai warkarinytjaku munu nyura kalkulpai mani ungkunytjikitjangku uwankara palyara wiyanngangka. Munu nyura warika uwankara palyara wiyanngangka mani tjukutjuku tjananya ungkupai, panya nyura tjananya ngunti kalkunu tjukarurungku ungkunytjikitjangku-palku. Kaya nyara palulanguru warkaripai panya tjuta kurunpa tjituru-tjitururira kulira ulangi, “Kuraralanya ungu.” Ka panya Mayatja Godalu tjananya ulanyangka kulira nyanganyi alatjitu munu witulya pulkangku nyurampa tjituru-tjituru pulka palyalku.

⁵ Palu panya nyura nyanga mantangka nyinara kutjupa kutjupa wiru tjuta mantjira kanyilpai nyura kutju pukulpa nyinanytjikitjangku. Palu alatji nyinara nyura Godanya mirpanpa palyani, ka ngula paluru tjintu malatjangka nyuranya kura nyakunytjatjanungku ngurkantara tjarara ngura kurangka waniku. ⁶ Nyangatja kuļuya kulinma. Panya an̄angu

kutjupa tjuṭa wirūra palyanyku nyinanyi, palu nyura kura nyinara tjanampa kuraringkula tjananya ngukalpai wiyanguru alatjiṭu, kaya paluru tjana puṭu wiyanmankupai. Palu nyura tjananya tungunpungkula wangkara iluntankupai alatjiṭu. Ka nyara palulanguru nyuranya Godalu kura ngurkantara wiyalu ngapartji.

Nyuranya Anannyangkaya Pukulpa Nyinama

⁷ Ngayuku waltyja tjuṭa, kulinmaya. Añangu kutjupa tjuṭangku nyuranya anara kuraṛa pungkunyangkaya ngapartji wangkawiyangku wantima. Palu pilunpa purkaraya nyinama kaar-kaararintja wiya, munuya rawangku pukultu ala-alangku paṭanma Mayatjanya malaku pitjanytjaku. Wati panya kaana kanyilpai kulila. Panya paluru uṇinypa tjuṭa tjunkula waṇara wantipai mantangka. Munu paluru nyinara patalpai minangku puyira uṇinypa panya palunya tjananya pakaltjingantjaku. ⁸ Ka nyara palu purunypa nganaṇa rapa pukulpa paṭantjaku ngaranyi pakuringkunytja wiya, panya Mayatjanya mulapa pitjaku kuwari nguwanpa.

⁹ Nyuranya kutjupa tjuṭangku kurannyaṅkaya ngapartji wangkawiyangku wantira pukulpa nyinama nyuranya kuļu Godalu kura ngurkantankunytjaku-tawara. Panya Mayatjanya waṭalpi ilaringanyi nganaṇanya ngurkantankunytjikitja. ¹⁰ Kulinmaya wati panya wangkatjara tjuṭa iriti nyinanytja. Nyara paluru tjana panya Mayatjaku tjukurpa wangangi, kaya añangu tjuṭangku tjananya kuraṛa pungangi munu pikantanangi, kaya wantinytja wiyangku tungun-tunguntu alatjiṭu Godanya waṇanangi. Ka nganaṇa ngapartji palunya tjananya arkaṛa Godanya waṇantjaku ngaranyi. ¹¹ Panya nganaṇa wati wangkatjara tjuṭa kulintjatjanungku wangkapai alatji, “Wati nyaranpaya tjukaruru mulapa pukulpa nyinangi.” Munu panyala wati Tjuupanya kuļu kulini.* Panya wati nyara palula pika kura tjuṭa wirkanangi, ka panya paluru tungun-tungunpa alatjiṭu Godaku mulamularingangi wantinytja wiya. Ka Godalu wati panya palunya alpamilaṇu munu palumpa tjukarurungkuṭu uwankara palyaṇu panya nganmanyitja purunypatu. Kala tjukurpa nyanga palulanguru kulini mulapa Godanya ngaltunytju mukulya pulkanya nyinanyi.

¹² Waltyja tjuṭa, nyangatjaṇa tjukurpa pulka mulapa nyurala wangkanyi kaya purkarangku kulinma. Panya añangu kutjupangku tjukarurungku wangkanytjikitja mukuringkula alatji wangkapai puṭu mulamularingkunytjaku-tawara, “Tjukarurungkuṇa wangkanyi Godala miṛangka.” Ka kutjupangku ngapartji palu purunypatu puṭu mulamularingkunytjaku-tawara tjinguru alatji wangkapai, “Ilkaritja tjuṭaya ngayuku ninti. Kaṇa tjukarurungku wangkanyi.” Ka piṛuku kutjupangku palu purunypatu wangkapai alatji, “Ngayuku mantatja tjuṭaya ninti. Kaṇa nyurala tjukarurungku wangkanyi.” Palu nyangatja palya wiya. Uti nyura ini ilkaritja mantatja kutjupa kutjupa tjuṭa tjungura wangkawiyangku wantima. Munu nyura tjukarurungku wangkanytjikitja mukuringkula uwanmanama kutju munu wiyanmankunytjikitja mukuringkula wiyanmanama kutju. Palu nyura ini kutjupa tjuṭa tjungura wangkanyangka Godalu nyuranya kura ngurkantankuku.

Mama Godala Rawangku Tjapintjaku

¹³ Tjinguru añangu kutjupa nyuralanguru tjituru-tjituru pulka nyinanyi kura kutjupa kutjupa palula utiringkunyangka. Uti paluru Godala

* ^{5:11} Tjukurpa Tjuupanyatjara ngarinyi Bible-ta, palu nganaṇa Pitjantjatjara walkatjunkunytja wiyaṭu kuwaripa.

tjapinma palunya alpamilantjaku. Ka tjinguru kutjupa nyuralanguru pukulpa nyinanyi. Utı paluru inma tjuta inkara Godanya walkunma.

¹⁴ Ka tjinguru kutjupa nyuralanguru pikatjararingkula ngarinyi. Utı paluru anangu kutjupa iyanma wati atunymankupai tjuta ankula altintytjaku tjana pitjala palumpa Godala tjapintjaku. Kaya pitjala palula uwila tjutira mara tjunkula Mayatja Jesula tjapilku palunya palyarunguntjaku.

¹⁵ Panya tjana pułkara Godaku mulamularingkula tjapinnyangka anangu nyara pikatjara Godalu mulapa palyarungulku. Tjinguru anangu nyara paluru kura kutjupa kutjupa palyantjatjanu pikatjararingu, ka Godalu tjapinnyangka palunya kalypangku wantiku paluru kura palyantjitjanguru. ¹⁶ Palulanguru nyura utı kura palyantjatjanungku piiwiyareringkula Jesuku walytja kutjupangka tjakultjunama, munu nyara palulanguru nyura Godala tjapinnyangka paluru nyuranya pikatjara ngarinyangka palyarungulku. Panya Godalu kulisai anangu wiru tjukaruru nyinapaingku palula tjapinnyangka munu palumpa pulka mulapalta palyalku.

¹⁷ Nyura ninti wati panya llaitjaku. Wati nyara paluru panya anangu ngananya purunypa alatjitu. Paluru panya iriti nyinangi Godaku walytja munu paluru Godala tjapinu mina iyantja wiyangku wantintytjaku. Ka Godalu mulapatu kulinu palunya munu mina iyalwiyangku wantingu. Ka yiya mañkurpa minangku puyintja wiya rawa ngarangi. ¹⁸ Munu nyara palula małangka llaitjalu piłku Godala tjapinu mina iyantjaku. Ka mapalkungku alatjitu minangku puyinu ka mai tjuta mantangka pakau. Ka ngananya nyanga palulanguru nintiringkunytjaku ngaranyi, panya anangu tjukaruru nyinapaingku tjapinnyangka Godalu kulira palyalpai pulka mulapa.

¹⁹⁻²⁰ Walytja tjuta kulinmaya! Tjinguru kutju nyuralanguru Jesuku walytja iwara palumpa wantira iwara kutjupangka ankuku, kurangka. Ka nyura utı nyakula palunya arkara alpamilara alima Jesulakutu małaku pitjanytjaku, ngula palunya Godalu ngurkantara paira iyantjaku-tawara. Ka tjinguru paluru kulira mulapa małaku aruringkuku, ka Godalu palunya kura tjuta palyantjitjanguru kalypangku pungkuwiyangku wantiku, ka paluru karalyarira wankaringkuku.

Lita Nampa 1 Peterlu Walkatjunkunytja

1 Peter

Nyangatja Nganmanytju Nyakula Wangkanytjaku

Nyangatja Godaku tjukurpa Peterlu walkatjunkunytja. Paluru lita kutjara walkatjunu, ka nyangatja lita nampa 1 paluru walkatjura iyan-tja Jesuku walytja tjuṭakutu ngura kutjupa tjuṭangka nyinanyangka. Paluru tjana panya ngaltutjara nyinangi panya anangu kutjupa tjuṭangku tjananya rawangku kuraningi munu pikantanangi tjana Jesunya wañannyangka. Kutjupa tjaraya tjailangka tjarpatjunangi. Ka Peterlu lita nyangatja tjanampa walkatjunu tjananya kunpuntjikitjangku tjananya Godaku rapa pukulpa nyinanytjaku kurannyangka ttituru-ttituririra wantintyta wiya.

Munu paluru tjanala tjukurpa tjakultjunangi Jesunyatjara panya paluru kunpu pulka mulapa ngaranyi munu anangu tjuta wankarunkupai tjana palumpa mulamularingkunyangka. Munu Peterlu tjananya wangkangi Godala wangañarangku kuliṛa tjukaruru nyinanytjaku munu pukulpa kalypa wirura nyinanytjaku mukulya alatjiṭu. Panya Jesunya kuwari nguwanpa małaku pitjanyi nyuntunya nganañanya mantjintjikitja.

Tjukurpa nyanganpa ngarinyi:

- 1:1-2 Peterlu nganmanytju wangkanytja
- 1:3-12 Godalu palumpa walytja tjuṭa witulya pulkangku atunymara kanyintja ngula Tjiṇtu Małatjangka wankarunkunytjikitjangku
- 1:13—2:10 Godalulanya mantjinu palya mulapa nyinanytjaku kura tjuṭa wantira
- 2:11—3:7 Jesunya purunypa mayatja tjuṭangka wangañarangku kulint-jaku
- 3:1-7 Wati minyma kurirara wirura palyanyku nyinanytjaku
- 3:8—4:19 Kutjupangku nyuranya kurannyangkaya uti Godaku mulamularingama munu rawa palyanyku nyinama
- 5:1-11 Peterlu wangkanytja Jesuku walytjapiti atunymankupai tjuṭangka
- 5:12-14 Peterlu tjukurpa małatja wangkanytja

Peterlu Nganmanytju Wangkanytja

¹ Uwa, Jesuku walytja tjuṭa, ngayuluṇa Peternya Jesuku Christaku tjukurtjara panya paluruṇi witura iyanu tjukurpa palumpa anangu tjuṭangka wangkanytjaku. Kaṇa lita nyangatja nyurampa walkatjunanyi Jesuku walytja tjuṭaku. Panya nyuranya Godalu ngurkantanu palumpa walytja nyinanytjaku. Palu panya anangu tjuṭangku nyuranya rawangku kurara pungkunyangka nyura ngura walytja wantikatira ngura malikitja tjuṭakutu anu Puntula, Kalaitjiyalu, Kapatu-tjiyalu, Aitjala munu ngura panya Pitjiniyalu tjanalakutu. Kaṇa nyangatja palulanguru nyurampa lita walkatjunanyi. ² Panya Mama Godalu nyuranya nganmanytju kulint-jatjanungku ngurkantanu palumparinytjaku, ka panya Kurunpa Milmiltu nyuranya palyanu palumpa walytjaringkunytjaku. Ka nyara palulanguru Godaku walytjaringkula nyura Jesula Christala wangañarangku kulini munu nyura Godala kalypa nyinanyi, panya Jesunya nyurampa ngalkilpa

ilura milkalì tjutingu, ka milkalì nyara paluru tjutintjitungka Godalu nyuranya kalypangku pungkuwiyangku wantingu.

Ka Godalu nyuranya titutjarangku mukulyangku kanyinma munu nyuranya kurunpa rapara pukulmanama.

Mantangka Nyangaya Nyuranya Kurara Punganyi Palu Godalu Wiru Mulapa Nyurampa Ilkaringka Kanyini

³ Uwa, mirawañimala Godanya Mayatja Jesuku Christaku Mama, panya ngaltunytyju pulkangkulanya palumpa walytjaringkunytjaku palyanu, palumpa katja Jesunya Christanya ilunyangka wankara pakaltjingara. Kala nyara palulanguru nganaña pukulpa rapa pulka nyinanyi ilunytja kulira nguluringkunytja wiya. ⁴ Munula pukultu kulini panya Godalu pulka mulapa kanyini nganañanya ungkunytjikitjangku. Paluru ngura ilkaritjangka nganampa kanyini, panya ngura nyara palula wiru mulapa titutjara ngarapai, wiyaringkupai wiya, ka kutjupangku puþu alatjiu kuralku. ⁵ Panya nganaña Godaku mulamularingkunyangka paluru witulya pulkangku nganañanya atunymara kanyini ngula Tjintu Malatjangka wankarunkunytjikitjangku. ⁶ Ka nyura ara nyanga palunya kulira pulkara pukularinyi. Kuvari nyura tjinguru tjituru-tjiturupai kura kutjupa kutjupa tjuþa nyurala wirkankunyangka, palu nyanga palunya tjananya nyura kulilwiyangku wantira waintara kulini panya paluru nyuranya ngula wankarunkuku. Palulanguru nyura kuvari pukulpa titutjara nyinanyi. ⁷ Panya tjituru-tjituru nyurala wirkankunyangka Godalu nyanganyi munu kulini alatji, “Tjinguruuya ngayuku mulamularinganyitu mutta tjinguruuya ngayuku watarkuringu.” Palu tjituru-tjituru pulka nyurala wirkankunyangka nyura kulilwiyangku wantira palumpa kutju mulamularingkunyangka Godanya pulkara pukularinyi munu kulini, “Mulapaya nyanganpa ngayuku mulamularinganyi watarkurinytja wiya.”

Uwa, Godaku mulamularingkunytjaku wiru mulapa ngaranyi. Panya manta winkingka anangu tjuþangku mani kutju pulkara kulipai, palu mani nyaratja unytju ngarapai, kaya ngula mani wiyaringkunyangka palunya kulintja wiyaringanyi, palu wiru mulapa nyangatja Godaku mulamularingkunytja. Ka palulanguru nyuranya ngula pulkara mirawañira palyanmankuku Mayatja Jesunya maþaku pitjanytja-arangka.

⁸⁻⁹ Nyura panya Jesunya nyakunytja wiya, palu nyura palumpa pulkara mukuringanyi. Munu nyura kuvari kuþu nyakunytja wiya, palu nyura palumpa titutjara alatjiu mulamularinganyi, munu nyura kurunpa winki pukulpa pulka nyinanyi, panya Godalu nyuranya rawa mulamularingkunyangka wankaru kanyini.

¹⁰ Nyanga palunya panya wati Godaku wangkatjara tjuþangku nganmanytju iriti walkatjunangi. Palu tjana puþu kulinigi, “Yaaltjinggara Godalu mukulyangku anangu tjuþa wankarunkunytjikitjangku kulini?” Munuya palulanguru rawangku pulkara kuliningi Godalu tjanala wangkanyangka. ¹¹ Panya Christaku Kuruntu tjanala unngunguru tjakultjunangi alatji, “Ngula Christanya Wankarunkupainya Godalu kalkuntjanya pitjanyangkaya palunya pulkara pikatjaralku munuya iluntankuku. Ka nyara palula malangka Mama Godalu palulawanungku wiru mulapa palyalku anangu tjuþa pukulmankunytjikitjangku.” Kaya palulanguru wangkatjara tjuþangku rawangku kuliningi alatji, “Yaaltjinggara Godalu anangu tjuþa wankarunkuku? Yaalara paluru tjananya wankarunkuku?” Alatjiya rawangku kulira aritiringi.

12 Palu Godalu tjanala wangkangu alatji, “Tjukurpa nyanga nyura kuwari wangkanytja kuwari utiringkunytja wiya, palu ngula mulapa kutju utiringkuku anangu małatja małatja tjutangku nyakunytjaku.” Ala nyangatja, tjana iriti tjukurpa Godaku tjakultjunangi nyura malatja tjutangku kuwari utiringkunyangka nyakunytjaku. Panya kuwari Godalu Kurunpa Milmilnga ilkaringuru iyanu tjukurtjara tjuta witulyankunytjaku, kaya paluru witulyankunyangka nyurala Tjukurpa Palya Jesunyatjara tjakultjunu tjukurpa wiru mulapa. Ka panya angelpa tjuta kuľ mukuringanyi tjukurpa nyanga palunya kuliřa nintiringkunytjikitja, palu puťuya kulini.

Godalulanya Mantjinu Palya Mulapa Nyinanytjaku

13 Palulanguru kulil-kulilpa nyinama Godala wanganarangku kulira palyantjikitja. Munuya watarku nyinawiyangku pukultu ala-alangku patara kulinma panya ngula Jesunya Christanya malaku pitjanyangka Godalu mukulya pulkangku nyurampa wiru mulapa palyalku. **14** Panya nganmanypa nyura ngurpa nyinangi munu nyura kura tjutaku kutju mukuringangi. Palu kuwari nyanga nyura uti kura tjuta wantira Godala kutju wanganarangku kulira palyanma. **15** Panya Godanya palya mulapa nyinanyi. Ka palulanguru nyura uti palu purunypaň nyinama palya mulapa, panya Godalu nyuranya ngurkantanu palumpa walytja nyinanytjaku. **16** Nyanga alatji nyiringka iriti walkatjunkunytja ngaranyi Godalu wangkanytja,

“Palya mulapaya nyinama. Nyanga ngayulu palya mulapa nyinanyi, palu purunypaya nyinama.” *

17 Nyura panya Godala tjapira palunya mamanmara walkulpai. Nyaratja palya, palu watarkurinytja wiyangkuya kulinma panya paluru anangu tjuta tjukarurungku ngurkantankupaiň nyinanyi. Panya paluru anangu uwankara tjungu nyanganyi ngurkantankunytjikitjangku, nyuranya kuľu. Munu paluru wiru palyannyangka nyakula palyanmananyi munu kura palyannyangka nyakula kuranmananyi. Palulanguru nyura uti mantangka nyanga unytju nyinralpi Godalawantu nyinama palunya kutju rawangku mayatjanmara walkura. **18-19** Nyura panya tjamuku arangka nganmanypa nyinangi, palu ara nyara palawantu nyinara nyura iwara kura puťu wantikatingi. Ka panya kuwari nyuranya Godalu iwara kurangka ngaranyangka mantjira iwara palyangka tjunu palumpa walytjaringkunytjaku.

Palu kulilaya, yaaltji-yaaltjingku Godalu nyuranya kurangka ngaranyangka mantjinu munu wankarunu? Paluru wanyu mani pulka ungkula nyuranya mantjinu? Wiya, panya mani mantatja kutju unytju ngarala wiyaringkupai. Palu panya Godalu nyuranya mantjinu Jesula Christalawanungku panya paluru puňu katakutjarangka milkali tjutinytjitjanguru. Nyara paluru panya lamalama wiru mulapa ungkunytja purunypa, panya wati tjukurtjarangku nganampa kuranguru lamalama pungkula Godanya ungkupai palunya pukulmankunytjikitjangku, nyara palu purunypa Jesunya nganampa lamalama wiru mulapa ngalkilpa ilungu Godalu nganaňanya kura tjuta palyantjitetjanguru kalypangku pungkuwiyangku wantinytjaku. Jesunya milkali tjutinytjitjanguru Godalu wiru mulapa nganampa palyanu nganaňa iwara kuranguru kařalyarira iwara palyangka ankunytjaku Godaku walytja mulapa.

* **1:16** Leviticus 11:44-45

20 Panya ngañmanyju manta ilkari paluntja kuwaripangka Godalu kuliningi Christanya mantakutu iyantjikitjangku nyuntunya nganañanya wankarunkunytjaku. Ka mulapañu paluru pitjala nganampa ngalkilpa anga-ilungu. **21** Ka nganaña palulanguru Godaku mulamularinganyi, panya paluru alatjiu Christanya ilunyangka wankaña pakaltjinganu munu panya palunya ngura ilkaritjangka tjunu mayatja pulka nyinanytjaku palula itingka. Ka nyara palulangurulta nganaña mulapa Godaku mulamularinganyi munula palumpa ala-alangku pañara kulil-kulilpa nyinanyi, watarkurintja wiya.

Godalu Altinyangka Palula Wanganarangku Kulintjaku

22 Uwa, nyura panya tjukurpa tjukaruru Jesunyatjara wanganarangku kulintjatjanungku kura tjuta wantira palya mulapa nyinanyi munu nyura kuwari Jesuku walytja tjutaku pulkara mukuringanyi. Nyanga palulanguru nyuranku uti titutjara pulkara mukuringama kurunpa winki.

23 Panya nyura Godaku katja untalpa nyinanyi palumpa panya tjukurpa kulira mulamularingkunytjatjanu. Panya tjukurpa nyara paluru kururopa pampulpai munu titutjara ngarapai wiyaringkunytja wiya. Ka tjukurpa palumpa mulamularingkunyangka Godalu nyuranya katjanmara untalpanmanu. Nyura ngañmanypa iti ngaringi mamanguro ngunytjunguru, ka puntu nyara paluru wiyaringkupai. Palu kuwari Godanya nyurampa mama nyinanyi titutjara nyinapainya, ka nyura kuļu palu purunypa titutjara wanka nyinaku.

24-25 Panya nyiringka ngañmanyju walkatjunkunytja ngaranyi nyanga alatji,

"Tjanpi panya rawa wanka ngaranytja wiya mapalku piltiringkupai,
munu inuntji kuļu unytju wiru ngarala punkara wiyaringkupai.
Ka nyara palu purunypa aŋangu uwankara rawa nyinanytja wiya ilupai.
Palu Mayatja Godaku tjukurpa wiyaringkunytja wiya titutjara alatjiu
ngaraku." *

Ka panyala tjukurpa nyanga wiru palunya nyurala ngañmanyju tjakultjunu.

2

1 Nyanga palulangurya kura tjuta palyalwiyangku wantima. Munuya ngunti wangkawiyangku wantima, ngunti palya-palku nyinawiyangku wantima, munuya kutjupangku wirura palyannyangka nyakula nyararingkunytja wiyangku wantima, munuya kampangkañu tjaalymara aŋangu kutjupa wangkawiyangku wantira wirura nyinama. **2** Munuyanku kurunpa winki Godaku tjukurku mukuringkula nintiringama, panya iti kuļunytju ipiku pulkara mukuringkula rawangku tjikilpai, palu purunypaya Godaku tjukurku mukuringama. Panya iti kuļunytju rawangku ipi tjikira pulkaringkupai munu wirura wanka nyinapai, palu purunytjuya Godaku tjukurpa rawangku kulira nintiringama, ka nyuranya Godalu wankaru titutjarangku kanyilkku. **3** Panya mulapa nyura ngañmanypa nintiringu Mayatja Jesunya ngaltunytju pulka mulapa nyinanytjitja kulira.

Jesulakutu Ilaringkunytjaku

4 Uwa, Mayatja Jesulakutuya ilariwa, panya paluru puli purunypa nyinanyi palu wanka. Panya aŋangu tjutangkuya palunya kura-palku wantingi, palu Godalu palunya ngurkantanu wiru mulapa uwankarangka

* 1:24-25 Aitjayaku 40:6-8

waintarintja. ⁵ Panya paluru nyuranya Mayatja Jesulakutu pitjanyangka mantjira palula tjungura kanyilku, panya wali palyalpai tjutangku puli tjuta tjunkula tatilpai wali wiru palyantjikitjangku, nyara palu purunypa nyura Jesulakutu pitjanyangka Kurunpa Milmiltu nyuranya palula tjungura uṭulu kutju palyani wali wiru purunypa nyura uwankara tjukurtjararingkula Godala mirangka tjukaruru wiru mulapa ngaranytjaku. Munu nyura uwankarangku tjukurtjararingkula Godanya pukultu walkura mirawañipai. Ka paluru pulkara pukularipai nyura Jesuku Christaku mulamularingkula walkunnyangka. ⁶ Panya nyiringka iriti walkatjunkunytja ngaranyi Godalu wangkanytja nyanga alatji,

“Ngayulu puli tjiwa wiru mulapa ngurkantara tjunanyi kuunangka wali panya Tjayanna kunpu mulapa palyantjikitjangku.

Ka anangu kutjupa palumpa mulamularingkulampa Godala mirangka kunṭaringkuwiya rapa alatjitu ngaraku.” *

⁷ Uwa, puli nyara paluru panya Mayatja Jesunya, ka nyura palumpa mulamularingkupai tjuta ninti panya paluru wiru mulapa. Kaya palumpa puṭu mulamularingkupai tjutangku palunya kura-palku kulilpai. Panya iriti nyiringka walkatjunkunytja ngaranyi nyanga alatji,

“Wali palyalpai tjutangkuya wali puli tjutanguru palyaningi, munuya puli kutju nyakula wañingu kura-palku kuliṛa.

Palu nguntiya wañingu, panya puli nyara paluru kura wiya, wiru mulapa wali kunpu ngaranytjaku kanyilpai.” *

⁸ Ka tjukurpa kutjupa kuļu iriti nyiringka walkatjunkunytja ngaranyi nyanga alatji,

“Anangu tjuta puli nyanga palulawanu ankunyangka puli paluru tjananya tarpipungkula mantangka punkatjingalpai.” *

Alatji nyiringka iriti walkatjunu, ka puli paluru Jesunya, panya kuwari-patjara Godalu kutjupa kutjupa uwankara paluntja kuwaripangka paluru mukuringu anangu tjuta Jesuku Christaku mulamularingkunytjaku. Munu palulanguru piruku kulinu, “Palu anangu kutjupa tjutangkuya Tjukurpa Palya Jesuku kuliṛa wantiku, munuya palulangurulta ngayulanguru tiṭutjara alatjitu patu nyinaku.” Nyanga alatji Godalu nganmanytju kulinigi, ka panya palumpa wangkatjarangku nyiringka iriti walkatjunu tjukurpa nyanga pulitjara.

⁹ Palu Godalu panya nyuranya ngurkantara tjunu palumpa walyt-japitiringkula nyinanytjaku palya mulapa, ka nyura uwankara palumpa tjukurtjara tjuta nyinanyi, Mayatja panya pulkaku. Panya paluru alatjitu nyuranya uwankara ngurkantara tjunu anangu tjutangka tjakultjunkunytjaku paluru wiru tjuta palyantjitja. Panya Godalu nyuranya ngurkantanu mungawalurungka nyinanyangka kura wantira palula tjunguringkula nyinanytjaku tili wiru mulata. ¹⁰ Nganmanyapa panya nyura mungutja purunypa nyinangi. Palu kuwari nyanga nyura palumpa walytjapiti mulapa nyinanyi. Nganmanyapa panya nyura ngurpa nyinangi, palu kuwari nyanga nyura nintiringu panya paluru nyuranya ngaltunytju pulkangku atunymara kanyini.

Jesuku Walytja Wiya Tjutangka Palyanyku Nyinanytjaku

¹¹ Uwa walytja wiru tjuta, panya nyura mantangka nyanga unytju kutju nyinanyi malikitja purunypa, palu ngula nyura ngura

* 2:6 Aitjayaku 28:16 * 2:7 Psalm 118:22 * 2:8 Aitjayaku 8:14

ilkaritjangka wirkara ngurara rira nyinaku. Palulanguruna pulka nyuranya wituwituni, "Kulintja kura nyurala unngu utiringkunyangkampaya kura palyantjikitjangku kulintja wiyangku wantima. Panya kulintja kura nyanga paluru tjana nyuranya rawangku mukumukuñi kuraringkunytjaku, kaya palula-tawara kulintja palunya tjananya wantima kulintja wiyangku." ¹² Panya Jesuku waltyta wiya tjutaya ngura winkingka nyurala tjungu nyinara-wañinyi munu nyuranya kutjupa kutjupa palyan-nyangka nyakula tjinguru kuranmankuku. Palula-tawaraya palya kutju tjukarurungku palyanma, kaya palulangurulta nyuranya wiru palyan-nyangka nyakula Godanya walkulku tjintu nyara palula panya Jesunya malaku pitjanytja-arangka.

Mayatja Tjutangka Wanganarangku Kulintjaku

¹³⁻¹⁴ Uwa, Mayatja Jesunya mukuringanyi nyura palumpa waltyta uwankara mantangka nyanga nyinara mayatja mantatja tjutangka wanganarangku kulintjaku. Panya mayatja pulka nyinanyi ngura ini Rome-ala ngura tjutaku mayatja munu mayatja nyara paluru wati tjuta iyanu ngura kutjungka kutjungka mayatjarira kanyintjaku, anangu kura palyalpai tjuta pungkunytjaku munu wiru palyalpai tjuta pukularira mirawañinytjaku. Ka nyura uti mayatja nyanga paluru tjana wangkanyangka wanganarangku kulira palyanma. ¹⁵ Panya anangu ngunti wangkapai tjutangku nyuranya puntura wangkapai Godaku panya ngurpangku. Palu Godanya mukuringanyi nyura tjukaruru palyanyku nyinanytjaku. Panya nyara palulanguruya nyura tjukaruru wirura nyinanyangka nyakula ngunti wangkapai paluru tjana puþu kuliklu nyuranya puntura wangkanytjikitjangku.

¹⁶ Uwa, rawangkuya wiru tjuta kutju palyanma Godaku, panya paluru nyuranya palumpa warkarinytjaku pauntjingara wituwitulpai wiya puritjina purunyapa. Palu nyura panya palula wanganarangku kulilpai pukularira, Christala tjungu nyinara. Palu tjinguru nyura ngunti kuliklu alatji, "Nganana Jesuku waltyta nyinanyangka kutjupangku nganana nanya puritjina purunyapa puþu pauntjingara wituwituni. Wanyula unytjungku kutjupa kutjupa kura palyanma." Palu wiya, nyanga alatji kulintja wiyangkuya wantima panya nyura Godaku warkaripai tjuta munu nyura uti palulawanu tjukaruru nyinama.

¹⁷ Munu nyura uti anangu uwankarangka purkarangku wirura wangkama pauntjingantja wiyangku. Munuya Jesuku waltyta uwankaraku pulka mukuringama wantintyta wiya. Munuya kulinma Godanya panya pulka mulapa nyinanyi nganana ngalypa-ngalyparingkunytjaku wiya. Ka panya mayatja pulka nyara Rome-ala nyinanyi, pala palulaya wanganarangku kulinma kuraringkula wantintyta wiyangku.

¹⁸ Kaña kuwari nyanga nyurala wangkanyi wati warkaripai tjutangka. Uti nyura nyurampa mayatjangka wanganarangku kulira warka palyanma. Tjinguru nyura kutjupa tjuta mayatja wirungka warkarinyi panya paluru nyuranya ngalunytjungku mukulyangku wirura kanyini. Ka tjinguru nyura kutjupatjara mayatja kurangka warkarinyi, ka nyuranya tjinguru mirpantjungku pauntjingara wangkanyi. Palu uti nyura mayatja uwankarangka wirura wanganarangku kulinma panya mayatja mukulyangka kutju wiya, palu mayatja mirpantjungka kuþu.

¹⁹ Tjinguru nyurampa mayatjangku nyuranya mirpanarira pungkuku wiyanguru alatji, ka nyura uti Godanya kulira mirpanariwiya wirura

rawa warkarima, ka Godanya nyakula nyurampa pukulariku. ²⁰ Palu tjinguru nyurampa mayatjangku nyuranya kura palyannyangka pungkuku. Nyaratja palya, panya nyurampa kuranguru paluru nyuranya punganyi. Ka nyuranku uti mirawaniiyangku wantima panya Godanya kura palyannyangka nyurampa pukularinytja wiya. Palu wiyanguru pungkunyangkaya mirpanariwiya rawatu warkarima, ka pala palulanguru Godalu nyuranya nyakula palyanmankuku.

²¹ Panya Jesulu Christalu nyurampa ngalkiltu pika pulka mantjinu nyura palunya ngapartji arkantjaku. Panya Godalu nyuranya ngurkantanu Jesunya purunypa aña nyanga pikawanu nyinanytjaku. ²² Panya paluru kura palyantja wiya alatjiitu, munu ngunti kuлу wangkanytja wiya ngarangi. ²³ Ka tjana anara kurara pungkunyangka paluru ngapartji wangkanytja wiya, munu pungkunyangka ngapartji pungkunytjikitjangku wangkanytja wiyatuh. Paluru wantingi Godalu kutjungku tjananya ngula ngurkantara tjarantjaku, panya paluru tjukarurungku ngurkantankupai. ²⁴ Palu Jesunya panya nganampa kuranguru puñu katakutjarangka ilungu nganampa ngalkilpa, nganaña kura wantira Godalawanu tjukaruru nyinanytjaku. Uwa, Jesulu nganampa ngalkiltu pika pulka mantjinu nganaña nganampa kuranguru wankaringkunytjaku. ²⁵ Panya tjiipi purunypa nyura kawankatingu. Palu kuwari nyanga nyuranya Godalu malakungku arurilyira ngalya-katingu, ka Jesulu Christalu tjamata palyangku nyuranya rawangku atunyti kanyini.

3

Kurirara Mukulya Wanganara Nyinanytjaku

¹⁻² Uwa, kaña kuwari palu purunypañu nyurala wangkanyi minyma kurnitjara tjuñangka. Utu nyura wati kuringka wangañarangku kulinma. Tjinguru nyuntumpa kuringku Godaku tjukurpa kulipai wiya, palu nyuntu wirura nyinanyangka nyakula paluru tjinguru ngula Jesuku mulamularingkuku. Palu nyuntu palunya rawangku wangkara wituwituntja wiyangku wantima, panya nyuntu wirura tjukaruru nyinanyangka kutju wati paluru nyuntunya nyakula tjinguru Godaku mulamularingkuku. ³ Panya minyma kutjupa tjutangkuya wiru mulapa nyinanytjikitjangku mangka rawangku kumamilara wirulpai kutjupa kutjupa wiru tjuta tjunkula, munuya liritja manyirkitja kuлу tjunkupai gold-nguru palyantja. Munuya mantara wirungka tjiarpapai mani pulkatjangka, munuya kulipai, "Nyanga alatji palyarala wiru mulapa ngaranyi." Palu nyura uti alatji kulilwiyangku wantima, panya nyanga palula tjanalanguru nyura wiruringkupai wiya.

⁴ Palu nyura tiñutjara wiru mulapa nyinanytjikitja mukuringkulampa nyuranku kurunpa mukulya pulkatjara nyinama munuya pukultju piluntju nyinama mirpanarinjtja wiya. Ka Godalu nyuranya mukulya winki nyinanyangka nyakula pulkara pukulariku, panya Godalu unngutja nyakupai munu nyara palulanguru kurunpa pukultju piluntju nyinanyangka nyakula pukularipai. ⁵ Panya iriti mulapa minyma Godaku mulamularingkupai tjuña nyanga alatji nyinangi kurunpa pukultju piluntju, munuya tjanampa kuri tjutangka wangañarangku kulinngi. Nyanga palulanguruya wiru mulapa nyinangi, mantara kutjupa kutjupa tjuña tjananya kanyintjitetjangu wiya.

⁶ Palu minyma Tjiiranya kulinma wati panya Aipuramaku kuri, panya paluru palu purunypa nyinangi munu palumpa kuringka wangañarangku

kuliningi munu palunya mayatja kulira walkuningi. Ka nyura Tjiiranya puruny whole nyinanytjikitja mukuringkulampa wirura palyanyku nyinama munu titutjara rapa nyinama nguluringkunytja wiya.

⁷ Uwa, ka wati tjuṭa nyura uti minyma kuri tjuṭa mukulyangku wirura kanyinma tjanampa kuraringkunytja wiyangku, panya minyma tjuṭa upa nguwanpa wati puruny whole kunpu nyinanytja wiya. Panya Godalu wati tjuṭa kutju wankarunkunytja wiya minyma tjuṭa kuļu wankarunkuku wanka titutjara nyinanytjaku. Tjinguru watingku minyma kuri pungkuku munu tjinguru paluru Godala tjpintjikitja mukuringkuku, ka Godalu palunya kulintja wiyangku wantiku. Palula-tawarayanku minyma kuringka wirura tjungu nyinama.

Nyuranya Kurannya Kulira Wantintjaku

⁸ Kaṇa nyangatja nyura uwankarangku kulintjakulta wangkanyi. Kaya kulinma, munuyanku tjungu kalypa nyinama mukulya pulkatjara, panya kuṭa malanyku pulkara mukuringkupai, palu puruny whole mukulya nyinama. Munuyanku kaṇany-kaṇanypa wiyangku ngaltuny whole tjananya kanyinma. ⁹ Tjinguru kutjupangku nyuranya kurannya wangkama munuya Godala tjanampa tjinapinma tjananya wirura kanyintjaku. Panya Godalu nyuranya ngurkantanu munu nyuranya pukulmankunytjikitjangku kalkunu, ka nyura ngapartji uti palulanguru anangu kutjupa tjuṭa pukulmanama. ¹⁰ Panya nyiringka iriti walkatjunkunytja ngaranyi alatji,

“Nyura pukulpa wirura nyinanytjikitja mukuringkulampaya kura tjuṭa wangkawiyangku wantima,
munuyanku ngunti wangkanytja wiyangku tjukarurungku kutju wangkama.

¹¹ Munuya kura tjuṭa wantira kampa kutjuparira wiru tjuṭa kutju palyanma,
munuya kurunpa winkingku kulinma uwankaraku kalypa nyinanytjikitjangku.

¹² Panya Godalu tjukaruru nyinapai tjuṭa atunymara kanyilpai,
munu palula tjpinnnyangka tjananya wangaṇarangku kulilpai.

Palu paluru kura palyalpai tjuṭa kulilwiyangku wantipai.” *

¹³ Tjinguru nyura kurunpa winki mukuringanyi wirura nyinanytjikitja, ka nyara palulanguru palyanyku nyinanyangka anangu kutjupangku nyuranya kurantjikitjangku kulintjatjanungku puṭu kulira wantiku. ¹⁴ Palu tjinguru nyura tjukaruru nyinanyangka kutjupa tjutangku nyuranya rawangku wangkara kuranma. Palu tjanampa nguluringkula tjiturutjitururinytja wiyangkuya wantima, panya Godalu nyuranya pukulmara kanyilkku kura pala palula tjanalanguru. Ka tjananya kulira wantima. ¹⁵ Munuya Jesunya Christanya kurunpa winkingku mayatjanmara walkunma.

Ka tjinguru kutjupa tjutangku nyuranya tjpilku, “Nyaaku nyura Jesuku pukulpa mulamularinganyi?” Ka nyura nganmanytju kulin-tjatjanungku alatji tjpinnnyangka ngulu wiyangku palula tjanala utingku tjakultjunama tiana kulintjaku Jesunya panya nganampa mayatja

* ^{3:12} Psalm 34:12-16

munu wankarunkupainya. Palu tjanala kañany-kañanytju wangkanytja wiyangkuya purkarangku wangkama mukulyangku.

¹⁶ Uwa, tjana nyuranya anannyaangka tjanampa pikaringkunytja wiyangku wantima, panya Godalu pikaringkunyangka nyakula nyurampa pukularinytja wiya, ka nyura kulira kuntaringkuku. Palulanguruuya tjanala purkarangku wirura wangkama, kaya nyuranya anantjatjanungku mala kuntaringkuku nyuranya Christalawanu wirura nyinanyangka nyakula. ¹⁷ Tjinguruuya nyuranya punganyi nyura tjananya kurannyangka palatja palya panya nyurampa kuranguruuya nyuranya punganyi. Palu tjinguruuya nyuranya wirura tjukaruru nyinanyangka punganyi, ka nyara palulanguru Godanya nyurampa nyakula pulkara pukularinyi, panya nyura palula wanganarangku kulira wirura nyinanyi, kaya ngunti nyuranya punganyi.

¹⁸ Wanyuya Jesunya Christanya kulinma, panya paluru kura wiya alatjitu tjukaruru mulapa munu panya nganampa ngalkilpa anga-ilungu kura palyalpai tjutaku nganananya Godala tjunguntjikitja. Paluru nyuntumpa nganampa kuranguru ilungu kutju-ara Godanya nganampa kalyparingkunytjaku. Paluru anangu alatjitu ilungu, palu Kurunpa Milmiitu palunya ilunyangka wankara pakaltjinganu. ¹⁹ Ka paluru kurunpa anu ngura kutjupakutu munu kurun-kurunpa tjutangka tjukurpa wangkangi, panya ngura nyara palula Godalu palunya tjananya tjailangka purunyapa kanyini. ²⁰ Panya paluru tjana iriti Godala tungunpungangi Noah-lu panya pauta pulka palyantja-arangka, ka panya Godalu tjananya uru pulkangka uwankara iluntanu munu tjananya kurunpa tjuta tjailangka purunyapa tjunu rawa nyinanytjaku. Nyara palula arangka Noah-lu pauta rawangku palyalkatinyangka Godanya anangu tjutaku patanangi paluru tjana malaku palulakutu aruringkunytjaku, palu tjana wantingi. Kaya Noah-nya tjana anangu 8 kutju pautangka tjarpara wankaringu Godalu uru panya pulkangka katuра katinyangka.

²¹ Ka palu purunyapa kuwari Godalu nganananya wankarunanyi. Panya anangu kutjupa minangka baptise-katinyangkala nyakula kulilpai palunya Godalu wankarunkunytja. Palu nganananya nyaaku minangka baptise-katipai? Miri paltjira raputji kilinankunytjaku? Wiya, nganananya Godala tjalipai paluru nganananya palula mirangka kunta wiya ngaratjunkunytjaku. Ka mulapatu Godalu nganananya baptise-katinyangka alatjingalpai, panya paluru Jesunya Christanya ilunyangka wankara pakaltjinganu, nyara palulanguru Godalu nganananya wankarunkupai. ²² Ka panya Jesunya pakantjatjanu ngura ilkarikutu anu munu kuwari nyinanyi mayatja pulka mulapa Godala tjungu palula kampa wakungka, munu paluru mayatjarira kanyini ilkaritja kutjupa kutjupa uwankara, angelpa tjuta, mayatja kutjupa kutjupa tjuta kulukulu.

4

Kampa Kutjuparira Tjukaruru Nyinanytjaku

¹ Uwa, panya wati kura tjutangku Jesunya Christanya pulkara pungkula pikatjaranu mantangka nyanga nyinanyangkalpi, palu pungkunyangka paluru rapa ngarangi Mama Godanya mukuringkunytjitja kutju kulira. Ka nyura uti palu purunytjuu kulinma munuya anangu tjutangku nyuranya pungkula pikatjarannyaangka rapa ngarama. Panya anangu kutjupangku Jesunya purunyapa pikangka rapa ngarala Godanya pulkara kulilpai munu kura palyalpai wiya. ² Palulanguruuya nyura mukuringkunytjitja wantima

munuya Godala kutju wangañarangku kulira paluru mukuringkunytjitja kutju palyanma.

³ Panya nyura ngañmanypa kurangka nyinangi Godaku ngurpa. Nyaratja nyura Godaku ngurpa nyinara kuntu wiya añañgu kutjupa kutjupangka ngaringi nyuranku mukuringkunytjitja kutju kulira. Munu nyura tjunguringkula waina pulka tjikira tarangkarira kutjupangka kutjupangka ngaripai kuri mulapa wantikatira. Munu panya nyura kurangku god ngalypa-ngalypa tjuña walkulpai nyinangi.

⁴⁻⁵ Palu kuwari nyanga nyura Jesuku walytjaringkula kura tjuña wan-tipairingu, kaya Godanya kulilpai wiya tjuñangku nyuranya nyakula urulyaranı, panya nyura tjanala tjunguringkula kura palyalpai wiyaringu. Kaya kuwari nyuranya anara kura tjuña wangkara ikaringkupai. Palu nyara palunya tjananya ngula Godalu kuranyu ngaratjunkula wangkaku tjana mantangka nyinara palyantjitja uwankara utingku tjakultjunkunytjaku. Panya paluru mulapa añañgu uwankara ngurkantara tjaralku, wanka tjuña munu miri tjuña kułukulu. ⁶ Panya kutjupangku Tjukurpa Palya Jesunyatjara miri tjuñangka kułu wangkara tjakultjunu tjana kułu kulira Godala tjunguringkula titutjara nyinanytjaku. Paluru tjana panya ngañmanypa ilura wiyaringu. Palu Godalu tjanala Tjukurpa Palya tjakultjunkunytjaku iyanu tjana kułu kulira mulamularingkunyangka Kurunpa Milmiltu tjananya kułu wankarunkunytjaku.

Ngapartji-ngapartjingku Atunymankunytjaku

⁷ Ka tjintu ilaringu ilkarı manta uwankara wiyaringkunytjaku. Kaya purkarangku atatjura kulilkatima tjukarurungku Godala tjapintjikitjangku. ⁸ Palu pulka mulapa ngaranyi nyanga alatji uti nyuranku pulkara mulapa mukuringama kurunpa winki. Panya nyura añañgu kutjupaku ngañmanypa alatjiña pulkara mukuringkulampa palumpa mapalku kaly-paringkuku nyara paluru nyuranya kurannyaangka.

⁹ Ka tjinguru Jesuku walytja kutjupa malikitja ngura kutjupanguru pitjanyi kaya nyakulampa mapalkungku nyurampa ngurangka altira tjunama papulankuwiyangku, munu palunya pukultu kanyinma mirpan-mirpantu wangkanytja wiyangku. ¹⁰ Panya Godalu nyuranya kutju kutju pukultjungku nintilpai munu witulyankupai warika walytjangku walytjangku palyantjaku. Ka nyura uti warika nyanga palunya tjananya nintinnyangka kutjungku kutjungku wiruña palyanma añañgu kutjupa tjuñangku kułu kuñpuringkula pukultu Jesunya wañantjaku.

¹¹ Tjinguru Godalu nyuntunya nintinu tjukurpa wangkanytjaku, ka nyuntu uti tjukurpa tjanala wangkarampa Godaku tjukurpa kutju wangkama. Tjinguru Godalu nyuntunya nintinu añañgu tjuña alpamilan-tjaku, ka nyuntu uti tjananya pulkara alpamilanma, Godalu nyuntunya kuñpunnyangka. Kaya nyara palulanguru añañgu tjuñangku nyuranya nyakula waintara Godanya pulkara mirawaniku munuya wangkaku, “Uwa, mulapa nyara paluru tjana Jesula Christalawanan tjukaruru mulapa nyinanyi.” Munuya nyara palulanguru Godanya pulkara walkulkku. Uwa, Godanya panya mayatja witulya pulka mulapa nyinanyi pitalytji pulkanya. Kala wanyu wantinytja wiyangku titutjarangku palunya mirawañira walkunma. Uwa, mulapa.

Nyuranya Kurara Pungkunyangka Pukularinytjaku

¹² Uwa walytja wiru tjuña, kuwari añañgu Jesunya wantipai tjuñangku nyuranya ananı munu tjinguru punganyi munu kutjupa kutjupa palyani

nyura pikatjararingkula tjituru-tjitururinytjaku. Ka nyura tjinguru tjituru-tjitururira kulini, "Yaaltji-yaaltjingku nyangantu nganañanya kurani? Panya nganaña Jesunya Christiana kutju wañalpai. Kalanya nyaaku nganananya kutju rawangku kurani?" Palu alatji kulintja wiyangkuya wantima panya Godalu nyuranya arkara nyanganyi, "Yaaltji-yaaltji nyanga tjana kura nyanga tjutawanu kuñpu ngaraku? Tjinguruya ngayunya wantintytja wiyangku titutjarangku wañanma, munta tjinguruñiya pakuringkula wantiku." Alatji paluru nyuranya arkara nyanganyi panya paluru mukuringanyi nyura palunya titutjarangku tungun-tunguntu wañantjaku. ¹³ Palu pukularimaya kura nyanga palu purunypa nyurala wirkankunyangka. Panya ngañmanytjuya Jesunya kuraringkula pungkula pikatjarañu munu iluntanu. Ka nyurampa ngapartji palu purunypatü ngarakaninyi. Kaya pukularima Jesunya purunypa pikatjararingkunytykitja. Panya ngula Jesunya Christiana małaku pitjaku witulya pitalytji pulka mulapa, ka nyara palula arå nyura pulkara pukulariku.

¹⁴ Panya añangu kutjupa tjutangku nyuranya Jesunya wañannyangka nyakula anara warkipai. Palu nyaanguruya nyuranya alatji wangkara warkinyi? Wiya, panya Godaku kurunpa nyurala unngu nyinanyi kurunpa panya wiru mulapa, kaya nyara palulanguru nyuranya anañi. Kaya nyuranya warkinyangka kulira wantima munuya pukulpa nyinama. ¹⁵ Palu tjukaruruya palyanyku nyinama kura kutjupa kutjupa tjuña palyantja wiya. Panya nyuranya kuranguru pungkunytyjaku ngaranyi alatjitu. Palula-tawaraya miri pungkunytyjaka wiya, waltytatjara kutitjunkunytyjaka wiya, iñarira wangkanytyjaka wiya, kura kutjupa kutjupa uwankara palyantja wiyangku wantima.

¹⁶ Palu tjinguru nyuranya Jesunya wañannyangka anara pungkuku, ka nyura uti kuntearingkuwiya ngarama munuya alatji kulinma, "Munta-uwa, nganaña Jesunya wañannyangkaya nyangantu nganañanya kurani." Munu nyura uti tjananya kulilwiyangku wantira Godanya pulkara walkunma, panya paluru alatjitu nyuranya Jesuku waltytjaringkunytyjaku ngurkantanu.

¹⁷ Palu kuwari nyanga Godalu añangu uwankara nyakula ngurkantananyi tjana kura munu palya nyinanytjitja-nguru. Munu paluru nganañanya palumpa waltytja tjuña-warara nyanganyi kura palyantjtjaninguru ngurkantara paintjikitjangku. Palulangurula alatji kulini, "Munta, Godalu nganañanya-warara ngurkantankunytyatjanungku añangu panya palunya wantipai tjuta ngurkantara pulkara paira iyalku ngura kurakutu, panya tjana Tjukurpa Palya Jesunyatjara kulira wantingi." ¹⁸ Panya nyiringka iriti walkatjunkunytyjaka ngaranyi nyanga alatji, "Panya Godalawanu tjukaruru nyinapai tjuñangkuya pika pulka mantjira kutju wankaringkuku."

Kaya añangu panya Godanya wantira kura palyalpai tjuña yaaltjiriku? Wiya, Godalu tjananya pulkara alatjitu pikantankuku ngalturingkunytyjaka wiyangku."

¹⁹ Uwa, nyanga alatji Godalu nyurala wangkanyi, panya tjituru-tjituru kutjupa kutjupa tjuña nyurala wirkankuku. Ka tjituru-tjituru nyanga paluru tjana wirkankunyangka nyura yaaltjiriku? Wiya, uti nyura Godaku mulamularingama wantintytja wiya, panya paluru nganañanya palura tjunkunytyatjanungku titutjarangku atunymara kanyini. Paluru nganampa watarkurinityjaka wiya, kala uti mukulya tjukaruru nyinama ngananala tjituru-tjituru nyanga paluru tjana wirkankunyangka.

5

Jesuku Walytjapiti Atunymankupai Tjutangka Wangkanytja

¹ Uwa, kaña kuwari nyurala wangkanyi Jesuku walytjapiti atunymankupai tjutangka. Ngayulu kuļu panya nyura purunypatu Jesuku walytja tjuṭa aṭunymara kanyilpai nyinanyi. Ngayulu panya ngarala nyangangi Jesunya wakara punu kaṭakutjarangka utitjunkunyangka, mununa ngula tjintu małatjangka ngayulu palula tjunguringkula pukulpa mulapa nyinaku, panya nyara palula-arangka Godalu palunya uwankarangka nintliku paluru witulya pulka mulapa ngaranyangka pitalytji pulkanya. Kaña kuwari nyanga nyuranya wangkanyi Jesuku walytja tjuṭa wirūra aṭunymankunytjaku. ² Panya Godalu nyuranya tjunu tjananya aṭunymara kanyintjaku. Ka nyura uti kurunpa winki mukuringkula tjananya wanganarangku aṭunymara kanyinma. Panya wati tjapatangku palumpa tjiipi tjuṭa wirūra kanyilpai, palu purunytyu nyura uti Godaku walytja tjuṭa wirūra aṭunymara kanyinma, panya Godanya mukuringanyi nyura alatji wirūra kanyintjaku.

Palu tjanalanguru mani mantjintjikitjangku kulintja wiyangkuya wantima munuya Godaku tjukurpa tjanala pukultjungku nintinma tjanampa kutju palyantjikitjangku kulira. ³ Munu tjananya wirūra purkarangku kanyinma pauntjingara wangkara wituwituntja wiyangku, panya Godalu nyuranya wirūra kanyintjaku ngurkantanu. Ka paluru tjana nyuranya nyakula nyuranya purunypatu wirūra nyinaku. ⁴ Ka nyara palulanguru ngula nyurampa tjapata pulkangku Christalu malaku pitjala nyuranya anangu winkingka mirangka mirawañira wiřu mulapa ungkuku. Ka nyara paluru kuraringkunytja wiya titutjara pitalytji pulka ngaraku wiřu mulapa.

⁵ Kana nyurala ngapartji wangkanyi wati yangupala tjutangka munu kungkawara tjuṭangka kuļu. Utu nyura tjlipi pampa tjuṭangka wanganarangku kulinma tjana wangkanyangka.

Uwa, uti Jesuku walytja uwankara kañany-kañanypa wiya nyinama ngaltunytyu pulka. Munuyanku pukultjungku ngapartji-ngapartjingku alpamilara palyanma, panya nyiringka iriti walkatjunkunytja ngaranyi nyanga alatji,

“Panya Godalu kañany-kañanypa nyinapai tjuṭa wantipai.

Palu panya purkara nyinapai tjuṭa paluru mukulyangku aṭunymara kanyilpai kañany-kañanypa wiya nyinanyangka.” *

⁶ Pala palulangurya Godala aṭunymankupai pulkangka wanganarangku kulinma kañany-kañanyariwyangku, ka ngula tjintu paluru kulintjijangka paluru nyuranya mirawañira pulka mulapa tjunkuku. ⁷ Palu nyurala kutjupa kutjupa kura wirkankunyangkaya tjituru-tjitururinytja wiyangku Godanya kulinma, panya paluru nyuranya aṭunymara kanyini.

⁸ Munuya kulil-kulilpa nyinama mamu Satantu pikatingku nyuranya kurara punkatjingantjaku-tawara. Panya mamu paluru lion pulka purunypa para-ngaranyi, panya lion pulkangku kuka para-ngurilpai patjara ngalkula paltjaringkunytjikitjangku, palu purunytyu mamu paluru paraṅgarala ngurini anangu tjuṭa kurara punkatjingantjikitjangku. ⁹ Kaya Godaku rawa raparingkula mamu pala palula tungunpungama. Munuya kulinma panya Jesuku walytja kutjupa tjuṭa manta winkingka nyuranya purunypa nyinanyi, panya Godanya wantipai tjuṭangkuya palunya tjananya munu nyuranya kuļu Jesuku mulamularingkunyangka kurara

* 5:5 Proverbs 3:34

punganyi munu pulkara pikantananyi. ¹⁰ Palu nyura pika nyanga palula tjanalawanu tjukutjuku rawa nyinanyangka Godalu witulya pulkangku nyuranya wiru mularmankuku munu nyuranya kurunpa rapa kuŋpu alatjitu palyalku nyura palumpa pulkara titutjara mulamularingkunytjaku. Panya Godalu mukulya pulkangku nyuranya ngurkantanu nyura Jesula tjunguringkula ngura wirungka titutjara nyinanytjaku. ¹¹ Uwa, Godanya mayatja witulya pulka mulapa nyinanyi. Kala wanyu wantinytja wiyangku titutjarangku palunya kutju mirawaŋira walkunma. Uwa, mulapa.

Tjukurpa Malatja

¹² Uwa, nyangatja ngayuku malpa wiru ini Tjaalatjanya ngayula tjungu nyinanyi. Paluru panya Jesunya tungun-tunguntu wanalpai wantinytja wiyangku. Kali paluru ngali lita nyangatja nyurampa muṭumuṭu walkatjunu nyuranya pukulmankunytjikitjangku. Nyangatjana walkatjunu nyura kulintjaku panya Godanya mulapa ngaltunyti pukultju pulka nganampa nyinanyi. Kaya nyanga palunya kuliṛa Godaku rawa mulamularingama wantinytja wiya.

¹³ Kaya ngura nyanga Papilanta Jesuku walytja tjuṭangku nyuranya kulini nyurampa pukularira.* Panya nyanga palunya tjananya Godalu ngurkantanu nyuranya purunypa paluru tjana kuļu Jesuku walytjaringkunytjaku.

Ka wati kutjupa Markanya kuļu mukuringanyi ngayulu palumpa wangka nyurala tjakultjunkunytjaku. Wati nyanga paluru panya ngayuku katja purunypa.

¹⁴ Ka nyura uti aŋangu kutjupa Jesuku walytja nyakulampa palumpa pukularira mara witinma.

Uwa, alatjiṭuŋa wangkanyi. Ka Godalu nyuranya Christaku walytjapiti uwankara kurunpa pukulpa rapa mulapa palyanma.

* **5:13** Ngura Papilannga kunyu ngura Rome-anyā, panya kutjupa-ara aŋangu tjuṭangku ngura Rome-anyā kitikiti wangkanytjikitjangku ini Papilannga wangkapai.

Lita Nampa 2 Peterlu Walkatjunkunytja

2 Peter

Nyangatja Nganmanytju Nyakula

Wangkanytjaku

Nyangatja Godaku tjukurpa Peterlu walkatjunkunytja Jesuku walytja kutjupa tjutaku Jerusalemala paṭu nyinanytja tjutaku. Paluru lita kutjara walkatjura palula tjanalakutu iyanu, ka lita nyangatja małatja paluru ilunytja kuwaripangka walkatjunkunytja. Munu lita nyanga palula paluru wangkara ngulutjunangi tjukurtjara ngunti tjutangka-tawara alatji wangkara, “Kuwari anangu kutjupa tjuta ngunti nintilpai tjuta nyuralanguru pakalku munuya tjukurpa kutjupa tjuta nyurala wangkara ngunti nintilku tjukurpa Godalanguru wiyatja tjana walytjangku kulin-tja. Munuya nyuranya ngunti kurara maunṭankuku nyura Godalawanu tjukaruru nyinanyangka.”

Munu Peterlu tjananya wangkara kunpunungi ngunti nintilpai tjuta kuliṛa wantinytjaku munu tjukurpa mulapa kutju kulintjaku munu wirura palyanyku nyinanytjaku. Munu paluru tjanala wangkangi watarkuri-wiyangku kulintjaku panya mulapa Jesunya ngula małaku pitjanyi palumpa walytja tjuta ngura wirukutu katintjikitja palula tjunguringkula wanka tiṭutjara nyinanytjaku.

Tjukurpa nyanganpa ngarinyi:

1:1-2 Peterlu nganmanytju wangkanytja

1:3-21 Godalulanya ngurkantankunytja Christanya purunypa wirura palyanyku nyinanytjaku

2:1-22 Peterlu ngulutjunkunytja ngunti nintilpai tjutangka-tawara

3:1-18 Jesunya małaku pitjanytja tjukarurungku kulintjaku

Peterlu Nganmanytju Wangkanytja

¹ Uwa, Jesuku walytja tjuta, ngayuluṇa Simon Peternya Jesuku Christaku tjukurtjara, panya paluruni witura iyanu palumpa tjukurpa anangu tjutangka wangkanytjaku. Kaña lita nyangatja nyurampa walkatjunanyi, panya nyura nganaṇa purunypa alatjiṭu Jesuku Christaku pulkara mulamularingu wantinytja wiya. Panya paluru Godanya, nganampa panya wankarunkupainya munu panya tjukaruru alatjiṭu nyinanyi. Kala nyara palulanguru palula wanganarangku kulilpai panya paluru tjukarurungku nganampa palyanu wiru mulapa.

² Uwa, nyura panya Godaku Mayatja Jesuku kuļu nganmanypa nin-tiringu munu nyura kuwari palumpa walytjapiti nyinanyi. Ka Godalu nyuranya tiṭutjarangku mukulyangku kanyinma munu nyuranya kurunpa rapara pukulmanama.

Christanya Purunypa Wirura Nyinanytjaku

³ Nganaṇa ninti Godaku panya paluru witulya pulka alatjiṭu nyinanyi palya mulapa. Panya paluru nganaṇanya ngurkantanu palunya arkara tjukaruru wiru mulapa nyinanytjaku. Munu paluru nganaṇanya kutjupa kutjupa uwankara ungu wiru tjuta, nganaṇa kunpuringkula Jesulawanu tjukaruru palyanyku nyinanytjaku. ⁴ Uwa, Godalu nganaṇanya wirungku kalkunu aṭunymara kanyintjikitjangku nganaṇa Jesunya purunypa wirura palyanyku nyinanytjaku kura uwankara wantira. Panya manta

winkingkaya aŋangu kura tjuṭa nyinanyi panya tjana kuraku unngu mukuringkunytjatjanungku titutjarangku kura palyalpai. Palu Godalu ngananaŋanya kuŋpuntjikitjangku kalkunu nganaŋa kura uwankara wantira Godalawanu tjukaruru nyinanytjaku.

⁵ Uwa, nyura panya Godalawanu nyinanytjikitja mukuringkula nganmanypa palumpa mulamularingu. Munu mulamularingkunytjatjanu nyura uti palya mulapa titutjara nyinama munuya Godaku nintiringama palumpa tjukurku kuļu. ⁶ Munuya palumpa nintiringkula waltytjangku kulira tjukaruru alatjitu nyinama kutjupangku ngunti wituwitunyangka kulira wantira. Munuya tungun-tunguntu Godanya waŋanma pakuringkunytja wiyangku, munuya palulawanu kutju titutjara palyanyku nyinama. ⁷ Munuya Jesuku waltyta tjuṭaku pulkara pukularima munuya uwankarakuṭu mukulya ngaltunytyu nyinama.

⁸ Uwa, alatji nyura uti rawa nyinama Godalawanu wiru mulararinytjikitja. Kaya kutjupa tjuṭangku nyuranya wirura tjukaruru nyinanyangka nyakula kuliklu, “Ai, mulapa nyanga paluru tjana Mayatja Jesuku ninti nyinanyi, panya paluru tjananya kunpuṇu war̄ka wiru mulapa palumpa palyantjaku.” Alatjiya nyuranya nyakula kuliklu.

⁹ Palu tjinguru nyura kutjupatjara palu purunypa wirura nyinapai wiya, munuya wiru mulararinytjikitjangku kulintja wiya. Kaña kulin nyura kuru pati purunypa watarku nyinanyi, panya nyuranya Godalu kura tjuṭa nganmanytju palyantjtanguru kalypangku wantingu nyura kura wantira war̄ka wiru tjuṭa kutju palyantjaku. Palu nyura tjinguru aña nyanga palumpa watarkuringu munu panya aŋangu kuru pati purunypa nyinanyi kulintja wiyatja.

¹⁰ Uwa waltyta tjuṭa, mulapa panya Godalu nyuranya ngurkantanu palumpa waltyta mulapa nyinanytjaku, ka nyura uti palumpa waltyta alatjitu nyinama munu palunya wanganarangku kulikatima wantintyta wiyangku. Panya alatji nyinara nyura punkantja wiya kuŋpu titutjara nyinaku. ¹¹ Ka nyara palulanguru Mayatja Jesulu Wankarunkupailu nyuranya ngula pukultu alatjitu katiku ngura wirukutu nyara palula nyuranya titutjarangku wirura kanyintjikitjangku.

¹² Tjukurpa nyanga palumpa panya nyura ninti nyinanyi nganmanytju kulintjatjanu, munu panya nyura rawangku kulikatinyi. Palu palya, rawangkuña nyurala wangkanyi nyura watarkurinytjaku-tawara.

¹³⁻¹⁴ Panya ngayulu ankunytjaku tjin̄tu waṭalpi ilaringanyi, panya Mayatja Jesuluni nganmanytju tjakultjunu. Kaña palulanguru tjukurpa nyangatja wanka nyinaralpi nyurala wangkanyi nyura rawangku kulikatinytjaku.

¹⁵ Mununa palulanguru nyiri tjuṭangka kuļu tjukurpa walkatjunanyi ngayulu ilunyangka nyura nyakula kulintjaku watarkurinytja wiyangku.

Jesunya Witulya Pulka Nyakunytja

¹⁶⁻¹⁸ Uwa, panya tjakultjunuña nyurala nganmanytju Mayatja Jesunya Christanya małaku pitjanytja witulya pitalytji pulka mulapa. Panya ngananaŋa waltytjangku pinangku kulira wangkanytja wiya, palu ngananaŋa maŋkurtu kurungku nyangu Jesunya puli katu ngaranyangka Mosela pulala Ilaitjala tjungu. Munula ngarala nyangangi Mama Godalu Jesunya pitalytji pulkangku irnyara kanyinnyangka munula kulinu Godalu ilkar̄inguru wangkanyangka nyanga alatji, “Nyangatja ngayuku katja, kaña palumpa pulkara pukularinyi.” ¹⁹ Panya iritiya Godaku wangkatjara tjuṭangku tjakultjunangi watı wiru mulapa mała pitjanytjaku. Kala kuwari

Jesunya nyakunytjatjanu tjukurpa panya tjana wangkanytjitu-pulkara mulamularinganyi.

Ka nyura kulu uti tjukurpa palunya tjananya pulkara kulinma, panya wangkatjara tjutangkuya tjukurpa tilitjara tjakultjunangi. Panya tilingku mungawalurungka irnyara utilpai, palu purunyapa panya tjukurpa paluru nyurala utiringu, ka nyura ulta kulin. Ka tjukurpa paluru titutjarangku utini ngula Jesunya malaku pitjanytjakutu-wangkara. Ka paluru pitjanytja nyaa purunyapa, panya kililpi Katanya tjintukutu pakalpai kala nyakula kulilpai, "Kuwari tjinturinganyi." Nyara palu purunyapa Jesunya malaku wirkankunyangka nyakula nganana kulikku, "Panya paluru wirkanu." Kaya nyara palumpa pitjanytjaku paṭara tjukurpa nyanga palunya rawangku kulikatima.

²⁰⁻²¹ Palu nyangatjaya kulinma, panya wangkatjara tjutangku iriti tjana mukuringkula walytjangku kulintjtja nyiringka tjunkunytja wiyat. Palu Kurunpa Milmiltu tjanala unngu nintinnyangka kutju tjana wangkangi munu walkatjunangi. Ka nyuntu nganana uwankara kulu palu purunyapa nyinanyi, panya Kurunpa Milmiltu nganana nintinnyangka kutju nganana Godalu wangkanytja uwankara tjukarurungku kulilpai.

2

Ngunti Nintilpai Tjuta

¹ Palu panya wangkatjara ngunti tjutaya iriti nyinangi Godaku anangu tjutangka tjungu. Nyara paluru tjana Godalu wituntja wiyatja. Ka palu purunypaṭu kuwari anangu kutjupa tjuta ngunti nintilpai tjuta nyuralanguru pakalku munuya tjukurpa kutjupa tjuta nyurala wangkara ngunti nintilku tjukurpa Godalanguru wiyatja tjana walytjangku kulin-tja. Munuya nyuranya ngunti kurara maunṭankuku nyura Godalawanu tjukaruru nyinanyangka. Panya Mayatja Jesunya tjanampa ngalkilpa anga-ilungu paluru tjana kura nyinanyangka munu tjananya wankarunu palumpa walytjaringkunytjaku. Palu paluru tjana Jesunya mayatja wiyanmankunyangkampa ngula tjintu malatjangka Godalu tjananya pika pulka mulapalta ungguku.

² Palu Jesuku walytja kutjupa tjutaya tjinguru palumpa tjanampa tjukurku mulamularingkuku munuya palula tjanala tjunguringkula kuraringkuku munuya kuri kutjupa kutjupaku mukuringkula ngunti-ngunti altiku. Kaya nyara palulanguru anangu tjutangku tjananya nyakula Godanya anara kuralku wangkara, "Godaku tjukurpa tjukaruru wiya."

³ Panya ngunti wangkapai nyara paluru tjana maniku manyu munuya nyurala ngunti wirura wangkapai palyangku-palku nyura palunya tjananya mani ungkunytjaku. Palu panya iritinguru alatjiṭu Godalu tjananya nyangangi munu kulinngi ngula palunya tjananya pika pulka mulapa ungkunytjikitjangku.

⁴ Panya iriti angelpa kutjupa tjutangku Godala pulkara tungun-pungu munu kuraringu. Ka Godalu tjananya ngura kurakutu wañingu mungawalurungka rawa nyinanytjaku tjiinangka karpira wantinytja purunyapa. Kaya ngura nyara palula rawa paṭara nyinaku ngula tjintu malatjangka Godalu tjananya kura ngurkantara tjarantjaku munu tjananya pika pulka mulapa ungkunytjaku.

⁵ Ka arā kutjupa palu purunyapa ngarangi, panya Noah-nya nyinanytjaraangka anangu tjutangku Godala pulkara tungunpungkula kura kutju palyaningi. Ka wati kutjungku Noah-lu arkara tjananya wangkara puṭu

tjukaruruningi Godalawanu tjana tjukaruru nyinanytjaku. Palu tjana Noah-nya kulintja wiyangku alatjitu wantingi. Nyara palulanguru Godalu tjananya uwankara ngalturingkuwiyangku mina pulkangka iluntara wiyanu, palu Noah-nya munu palumpa walytja tjuta kutju wankarunu anangu panya 8 kutju.

⁶ Kaya piruku kulinma ara kutjupa ngura panya pulka kutjara ini panya Tjatamanya pulanya Kumaranya. Panya iriti tawunu nyara palula pulala anangu winki kura pulkaringu munuya kura kutju titutjarangku palyaningi rawangku. Ka nyara palulanguru Godalu panya waru pulka tjanalakutu iyanu ilkaringuru. Ka tawunu panya palunya pulanya kampara wiyanu alatjitu anangu winki. Nyanga alatji Godalu palyanu anangu ngura wikitjangku kulira nintiringkula kulintjaku, “Munta mulapa Godalu nganañanya ngapartji palula tungunpungkunyangka palu purunypatu palyalku.”

⁷⁻⁸ Munu nyura uti wati panya Lotanya kulu kulinma, panya wati nyara paluru ngura nyara palulatu nyinangi, Tjatamala. Palu nyara paluru wati palya Godalawanu tjukaruru nyinapai munu panya tjananya kura kutjupa kutjupa tjuta palyannyangka nyakula pulkara tjituru-tjitururingu, panya anangu nyara paluru tjana Godala pulkara alatjitu tungunpunggangi. Ka panya Godalu ngura Tjatamanya pulanya Kumaranya waru pulka ilkaringuru iyara uwankara alatjitu wiyanu, palu waru iyantja kuwaripangka paluru Lotanya-wararangku pakaltjingara iyanu ankula wankaringkunytjaku.*

⁹ Uwa, tjukurpa nyanga palunya tjananyaya kulinma munuya nyanga tjanalanguru nintiringama nyanga alatji, panya mulapa Godalu anangu tjukaruru nyinapai tjuta kutju wankarunkupai kura kutjupa kutjupa tjuta tjanala utiringkunyangka. Munu paluru kura palyalpai tjuta wantir'iyalpai pika pulkatjara titutjara nyinakatinytjaku tjirirpi malatjakutu-wangkara, panya nyara palula ara paluru tjananya ngurkantara tjaralku munu tjananya pika pulka mulapalta ungguku. ¹⁰ Panya kutjupa tjaraya Godala pulkara tungunpungkupai nyinanyi munuya tjana mukuringkunytja kutju palyalpai kura kutjupa kutjupa tjuta kutju, munuya kuri walytjatjarangka ngaripai, ngunti wangkapai munuya kanany-kananytju ilkaritja tjuta anara warkipai kuntariningkunytja wiyangku.

Palu mulapa Godalu tjananya watarkurintja wiyangku nyanganyi ngula tjirirpi malatjangka ngurkantara tjarantjikitjangku munu tjananya uwankara wiyanjtaku. ¹¹ Panya angelpa tjutaya witulya pulka mulapa nyinanyi ngunti nintilpai tjutangka munkara alatjitu munuya tjinguru tjananya uwankara anara warkinyangka wantir'iyalku. Palu wiya, tjana alatji palyalwiyangku wantipai, panya nyara paluru tjanaya Godala mirangka ngaranyi munuya paluru tjana ngurkantara tjaralpai wiya. ¹² Panya ngunti wangkapai tjutangkuya putu kulilpai munuya kutjupa kutjupa tjuta watarkungku alatjitu palyalpai tjukarurungkupalku. Munuya kutjupangku tjukurpa wiru wangkanyangka putu kulira analpai alatjitu. Paluru tjana kuka tjuta purunypa nyinanyi, panya kuka tjuta watarku para-nagarapai pungkula ngalkuntjaku kutju. Palu purunypatu anangu ngunti wangkapai tjuta para-nagarapai, ka kuka purunypa tjananya pungkula wiyaliku. ¹³ Panya tjana kura kutju palyalkatinyi, ka Godalu ngapartji tjananya paira iyalku ngura kurakutu pika pulkatjara titutjara nyinanytjaku.

* ^{2:7-8} Genesis 19:1-29

Panya anangu nyara paluru tjana pulkara pukularintjikitjangku tjana mukuringkunytjitja kutju rawangku palyalpai munuya kalala alatjitu anangu tjuangka mirangka mai pulka tjunguringkula ngalkula tjikir tarangkarira mirapai kunta wiya alatjitu. Tjana nyurala maiku palyapaku tjunguringkula pulkara ngalkula tjikilpai ka panya nyura tjananya nyakula pulkara kuntaringkupai tjana kura tju ta rawangku palyanyangka. ¹⁴ Munuya kungka kutjupa tju ta titutjarangku nyakula mukuringkupai tjanala ngarinytjikitja munuya pakuringkula wantintyta wiyangku titutjarangku kura kutju palyalpai. Munuya Jesuku walyta kutjupa tju ta ku npu wiya ngaranyangka tjananya wituwitulpai piruku kura palyantjaku munu Godalanguru paturingkunytjaku. Panya tjana mukuringkula palyalpai tjana mukuringkunytjitja tju ta kutju. Ka nyanga palulanguru Godalu tjananya pungkuku. ¹⁵ Panya tjana Godaku iwara tjukaruru wantira kawankatingu munuya Pailamaku arangka ngaranyi. (Wati nyara paluru panya Piiyaku katja.) Panya nyara paluru manikjangku pukultu kura palyanu. ¹⁶ Wati nyanga paluru panya Godaku wangkatjara nyinangi, palu palumpa tangkiyingku palula wangkangu munu palunya painu kura panya palunya palyalwiyangku wantintyjaku.

¹⁷ Uwa, panya wangkatjara ngunti wangkapai tju taya kapi tjukula pilti purunypa ngaranyi, panya anangu tju ta pitjapai tjanala tjukurpa kulintjikitja, palu putuya tjukurpa mantjilpai tjanalanguru. Munuya paluru tjana ngangkali kapi wiyatjara purunypa ngaranyi, panya walpa pulkangku untpai ka mapalku wiyaringkupai, nyara palu purunypa tjana nyinanyi tjukurpa wiru ra wangkanytja wiya. Ka Godalu tjananya kalkunu mungawalurungka alatjitu tjana titutjara nyinanytjaku maru mulata.

¹⁸ Panya tjana kañany-kañanytju kurakura tju ta titutjarangku wangkapai. Munuya anangu kuwari kutju Jesuku walytjaringkunytja tju ta wangkara mukumukulpai paluru tjana piruku kura panya palunya tjananyatu palyantjaku, panya tjana ngañmanytju Jesuku walyta wiyangku palyaningi, panya palunya tjananya palyantjaku tjananya piruku wituwitulpai. ¹⁹ Munuya tjanala alatji wangkapai, ngunti panya wangkapai tjuangku, "Palya, nyura mukuringkulaya palyanma, nyura mukuringkunytjitja tju ta kutju." Alatji tjana wangkapai, palu paluru tjana pu tu palyanyku nyinapai munuya tjana kura tju ta kutju palyalpai tjana kuraku mukuringkunytjitja kutju. Panya kutjupa tju ta tjailelangka unngu nyinapai kura palyantjatanu munuya pu tu pakanj tjailelanguru, palu purunypa anangu kura palyalpai tju ta pu tu kuranguru pakalku.

²⁰ Panya ngañmanypa tjana Godaku wangkatjara nyinangi Jesuku walytja munuya kura tju ta wantingu alatjitu Godalanguru paturingkunytjaku-tawara. Panya tjana nintiringu Mayatja Jesuku Christaku nganampa panya Wankarunkupaiku. Palu palula malangkaya piruku kuraringkula kurangka anu, ka kurangku tjananya tjiinangka purunypa karpira kanyini. Ka nganalu tjananya wankalku? Wiya alatjitu.

²¹ Panya tjana Tjukurpa Palyaku nintiringkunytjatanu kurakutu malaku anu, ka tjanampa wankaringkunytjaku wiyaringu alatjitu. Anangu watarkitja tju ta iwara palyaku ngurpa nyinanyi, ka ala alatjitu ngaranyi paluru tjana kuli ra mulamularingkunytjaku munu wankaringkunytjaku. Palu nyanga paluru tjana ngurpa wiya ninti nyinanyi ngañmanypa Jesuku walytjaringkula, munu panyaya iwara palya wantira Godaku tjukurpa milmilpa kuli ra wantingu alatjitu, munuya kurakutu malaku

anu. ²² Panya nyiringka ngaranyi tjukurpa palu purunypa anangu tjutangku wangkanytja nyanga alatji,
“Papangku ulkapatjunkula wantikatipai munu piruku malakungku pitjala
ulkapa panya palunyaŋtu ngalkupai.”*
Ka palu purunypa tjukurpa kutjupa alatji ngaranyi,
“Panya pikipiki paltjinnyangka wirtjapakara tjulpirta malaku tjarpara
kuṭinkatira piruku kuraringkupai.”
Ka ngunti wangkapai tjuta nyanga palu purunypa ngaranyi, panya tjana Jesuku walytjaringkula iwara palyangka anangi, palu paluru tjana iwara palya wantira malaku kurakutu anu, panya papa munu pikipiki purunypa.

3

Jesunya Malaku Pitjanytja

¹ Uwa walytja wiru tjuta, ngayulu pulkara mukuringanyi nyura tjukarurungku kutju kulintjaku pina alangku. Panya ngayulu alatji nyuranya wangkara wituwituŋu lita panya nganmanyitjangka, panya ngayulu mungaŋtu nyurampa walkatjura ma-iyaŋu, panya palula. Munu nyanganā kuwari pirukuŋtu nyurampa walkatjunanyi nyura rawangku tjukarurungku kutju kulintjaku. ² Panyatjaya rawangku kulinma, panya Godaku wangkatjara tjutangku iriti wangkangu ngula utiringkunytjaku, munuya piruku kulinma tjukurpa panya Mayatja Jesulu palumpa iantja tjutangka wangkanytja, panya paluru tjana nyurala nganmanytju tjakultjunu.

³ Munuya panyatja rawangkuŋtu kulinma, panya Jesunya malaku pitjanytjaku ilaringkunyangka anangu analpai tjuta utiringkuku munuya tjana walytjjangku kulira kutjupa kutjupa kura tjuta palyalku tjananku mukuringkunytjtja kutju. Munuya paluru tjana nyuranya Jesuku mulamularingkunyangka wiyanmara wangkaku alatji, ⁴ “Mulapa wanyu Jesulu kalkunu malaku pitjanytjikitjangku? Ka nyangatja wiyaŋtu ngaranyi. Panya mamanya ngunytjunya tjana puŋu paṭara paṭara ilungu. Ka nyanga manta ilkari kuļu paluruŋtu alatjiŋtu ngaranyi wiyaringkunytja wiya, panya Godalu nganmanytju palyara wantinytja alatjiŋtu.” ⁵ Alatji tjana nyuranya anara wangkaku, palu paluru tjana kura ngunti wangkapai tjuta. Panya anangu nyanga palu purunypa tjutangkuya tjukurpa panya Godalu paluntjtjtja kulira wantingu mulamularingkunytja wiyangku. Panya Godalu wangkanyangka ilkari utiringu munu paluru wangkanyangkaŋtu manta utiringu uru kutju ngarinytjatanu.

Uwa, paluru manta utiringkunytjaku wangkangu, ka panya urunguru pakaňu. ⁶ Ka panya ngulalta Godalu mina pulka iyara mantatja uwankara uru pulkangka iluntanu anangu nganmanyitja tjuta kuļukulu. ⁷ Palu kuwari wanyu Godalu manta ilkari kutjupa kutjupa uwankara nyaalku? Wiya, paluru tjananya paṭara kanyini tjintu małatjaku panya nyara palula arangka paluru tjananya uwankara palu purunypaŋtu wangkaku, ka wangkanyangka warungku kampara wiyaliku alatjitu. Munu paluru anangu kura uwankara ngurkantara tjaralku munu tjananya wiyaliku.

⁸ Uwa walytja tjuta, kulinmaya nyangatja watarkuriwiyangku, panya Mayatja Jesulu kampa kutjupa kulilpai nganganā purunyti wiya. Panya nganganā kulilpai kuli 1,000 rawa mulapa ngaranyangka, palu Mayatja Jesulu kulini nyara paluru rawa wiya tjintu kutju purunypa. Kala nganganā kulilpai tjintu kutju rawa wiya, palu Mayatja Jesulu kulini tjintu paluru

* [2:22 Proverbs 26:11](#)

rawa mulapa kuli 1,000 purunypa. Alatji paluru witulya pulkangku kulilpai. ⁹ Tjinguru nyura kulini Jesunya rawa ma-nyinanyangka-palku, munu nyura palulanguru kulini paluru ngunti kalkuntja-palku pitjanytja wiya ngaranyangka nyakula. Palu wiya, paluru anangu uwankaraku ngaltunyjtungku rawangku paṭanı tjana uwankarangku kura wantira Godalakutu aruringkunytjaku. Palu wiyangkampa tjintu malatjangka paluru tjananya ngurkantara tjaralku munu tjananya wiyalku, panya paluru ngaltunyjtju pulka tjanampa mukuringanyi kura wantira palunya kulira wañantjaku. Palulanguru paluru rawaringkula ma-nyinara paṭanı mapalku pitjanytja wiya.

¹⁰ Panya ngula Mayatja Jesunya urulyku wirkankuku, panya wati kuitjunkupai walingka tjarpanyangka nyuntu urulyaralpai, palu purunypa. Ka tjintu nyara palula ilkari wiyaringkuku rurku winki. Panya tjintu, pira, kililpi, manta winki uwankara warungku kampara үrulku ka wiyaringkuku alatjitu. ¹¹⁻¹² Uwa, uwankara alatjitu warungku kampara wiyalku manta kułukulu, ka pala palulanguru nyura uti Mayatja Jesunya malaku pitjanytjaku paṭara tjukaruru nyinama Mama Godalawanu kutju, ka paluru tjinguru mapalku pitjaku. Ka tjintu nyara palula Godalu uwankara waru pulkangka wiyalku, ka tjintu pira kililpi tjuṭa kułukulu uwankara waruringkula үruringkula wiyaringkuku. ¹³ Palu palya, panya Godalu kalkunu manta kuwaritja munu ilkari kuwaritja kułu nganampa palyantjikitjangku, kala palumpa ala-alä paṭara nyinanyi. Panya ngura nyara palula anangu uwankarangku Godala wangañarangku kulikku munu tjukaruru nyinaku titutjara.

¹⁴ Uwa walytja tjuṭa, nyura tjintu nyara palumpa ala-alä paṭarampa tjukaruru palyanyku nyinama kura kutjupa kutjupa uwankara wantira. Ka nyuranya Jesulu pitjala nyakuku Godalawanu kutju wiruṛa kurunpa rapa pukulpa nyinanyangka. ¹⁵ Munuya panyatja kulinmatu, panya Mayatja Jesunya rawaringkula kuwaripaṭu nyinanyi anangu tjuṭa palumpa mulamularingkula wankaringkunytjaku paṭara. Tjukurpa nyangatja panya nganampa kuta panya wirungku Paulalu nganmanytju nyurampa walkatjunu Godalu nintinnyangka. ¹⁶ Panya paluru lita tjuṭa walkatjurá iyaningi Jesuku walytja tjutakutu, munu lita panya palula tjanala uwankarangkaṭu tjukurpa palunyatú walkatjunangi. Ka tjukurpa kutjupa tjuṭa lita tjutangka wituwitu nguwanpa ngaranyi. Ka panya Jesuku walytja kutjupa tjuṭa kuṇpu wiya ngurpa ngaranyi, munuya tjukurpa wituwitu panya palunya tjananya puṭu kulira ngunti kampa kutjupara wangkapai, panya palu purunypa, panya tjana Moseku tjukurpa kułu ngunti kampa kutjupara wangkapai, palu purunypa. Nyara palulanguru panya Godalu tjananya tjintu malatjangka paira iyalku pika pulkatjara titutjara nyinanytjaku.

¹⁷ Palu walytja tjuṭa, nyura panya nyangaku ngañmanypa nintiringu. Palulanguruyanku nguļu nyangama munuyanku aṭunyamanama anangu kura tjutangku nyuranya ngunti kurara iwara kurangka katinytjakutawara. Panya paluru tjana Godaku tjukurta tungunpungkula iwara kurangka ananyi munuya tjukurpa ngunti tjuṭa kulira wangkapai. Ka nyura tjanala kulira wantima Godalanguru paṭuringkunytjaku-tawara. Panya Godalu nyuranya wankaru kanyini nyura palula tjungu nyinanyangka.

¹⁸ Uwa, titutjarangkuya Mayatja Jesunya Christanya wañanma, panya paluru nganampa wankarunkupainya nyinanyi ngaltunyjtju pulkanya. Munuya titutjara palumpa nintiringama.

Uwa, wanyula palunya tiṭutjarangku mirawañira walkunma wantinytja wiyangku. Uwa mulapa.

Alatjītuña walkatjunu. Palya.

Lita Nampa 1 Johntu Walkatjunkunytja

1 John

Nyangatja Nganmanytju Nyakula Wangkanytjaku

Nyangatja Godaku tjukurpa wati panya Johntu walkatjunkunytja Jesuku panya mal pangku. Paluru ngañmanytju nyiri kutjupangka walkatjunu tjukurpa Jesunya mantangka nyinanytja munu paluru ilunytja munu ilunytjatjanu pakantja, (nyawa *Johnku Tjukurta*). Munu palulanguru paluru piruku walkatjunu lita mañkurpa Jesuku walytja tjutaku.

Ka nyangatja lita ngañmanyitja, panya nyanga palula paluru wangkara kuñpu-kuñpuningi Jesuku walytja tjuta tjukaruru palyanyku nyinanytjaku munu tjukurpa mulaku Jesunyatjaraku nintiringkunytjaku munu uwankaraku mukulya pułka nyinanytjaku. Munu paluru tjananya wangkangi watarkuriwiyangku rawangku kulintjaku panya Godaku katja ananguringu munu mantangka wati alatjitu uti nyinangi anangu tjutangka tjungu.

Munu nyanga palula malangka Johntu lita kutjupa kutjara walkatjunkunytjatjanungku piruku kutjulta wara mulapa walkatjunu tjukurpa malatja ini *Tjukurpa Jesulu Johnta Utira Nintintja*.

Tjukurpa nyanganpa ngarinyi:

- 1:1-4 Jesunya tjukurpa wankanya
- 1:5—2:29 Tilingka munu mungawalurungka nyinanytja
- 3:1-24 Godaku katja unṭalpa tjuta mukulya nyinanytjaku
- 4:1-6 Kurunpa tjuta tjukarurungku ngurkantankunytjaku mamungkatawara
- 4:7-21 Godanya purunypa mukulya pułka nyinanytjaku
- 5:1-21 Godaku katjaku mulamularingkula wanka titutjara nyinanytja

Tjukurpa Wankanya

¹ Nyangatja walkatjunanyi tjukurpa wankanya panya anangu tjuta wankarunkupainya. Paluru kuwaripatjara mulapa nyinanytja manta kuwaripangka munu panya mantakutu pitjala utiringu. Kala nyangu palunya munula kulinu munula pampunu. ² Paluru anangu tjuta wankalpai pitjangu munu utiringu Godalanguru. Kala palunya nyakunytjatjanungku tjakultjunanyi. Panya paluru wanka titutjara nyinapai palumpa Mamangka tjungu munu panya mantakutu pitjala nganañala utiringu. ³ Kala nganaña nyakunytjatjanungku kulintjatjanungku nyurala tjakultjunanyi munu anangu uwankarangka kulu, nyura nganañala tjunguringkula Mamala munu palumpa katjangka Jesula Christala tjungu pukulpa nyinanytjaku.

⁴ Uwa, lita nyangatja walkatjunanyi nyura nyakula mulamularingkula nganaña uwankaraṭu pukulpa mulapa nyinanytjikitjangku.

Godanya Tili Nyinanyi

⁵ Tjukurpa nyangatjala Jesula kulintjatjanungku nyurala ngapartji tjakultjunanyi alatji, panya Godanya tili irnyañi wiřu mulapa, ka palula mungawaluru kura ngaranytja wiya alatjitu. ⁶ Ka nganaña tjinguru alatji wangkapai, “Nganana Mamala tjungu pukulpa nyinanyi.” Palu nganaña kura tjuta palyarampa mungawalurungka nyinanyi, munula

ngunti wangkanyi Mamala tjungu pukulpa nyinanytja. Nganañalanku tjukarurunmananyi, palu wiya, nganaña tjukaruru nyinanytja wiya. ⁷ Panya Godanya tilingka nyinanyi wiru mulapa. Kala nganaña tjinguru palu purunypa tilingka nyinarampa wirura nyinaku munulanku pukulpa kalypa nyinaku. Ka nganaña kura palyannyangkampa Godalu nganananya palyalku Jesuku milkalingka, panya paluru nganampa ku-ranguru anga-ilura milkali tjutinytjitjanguru.

⁸ Palu nganañalanku walytjangku kura wiyanmankulampa ngunti wangkanyi. Ka nyangatja tjukaruru wiya. ⁹ Palu nganaña kuntaringkula Godala kura palyantjatjanungku walytjangku tjakultjunkunyangka kutju Godanya nganampa kalyparingkuku munu nganana kura palyantjitetjanguru kalypangku pungkuwiyangku wantiku, panya palurulanya nganmanytju kalkunu kuranguru kalypangku wantinytjikitjangku, munulanya kalkuntjatjanungku nganampa paluru palyalpai alatjiitu. ¹⁰ Palu nganaña tjinguru walytjangku kura wiyanmankulampa Godanya anani. Munula palumpa tjukurpa tjukarurungku kulintja wiyangku wantinyi.

2

Christalulanya Alpamilalpai

¹ Uwa, walytja wiru tjuṭa, tjukurpa nyangatjaña walkatjunanyi nyura kulira kura wiya alatjiitu nyinanytjaku. Palu tjinguru nyura kura palyarampa kulinma panyatja, panya nganampa ngalkilpa nyinanyi Jesunya Christanya, panya paluru tjukaruru nyinapailu Mamala angawangkapai nganampa ngalkiltu. ² Ka nyara palulanguru Godanya nganampa kalyparingkupai Christanya nganampa ngalkilpa ilunytjitetjanguru. Panya paluru kura nganampanguru kutju ilunytja wiya anangu winkiku kuranguru ilungu.

³ Nganaña tjinguru Godalu wituntjtja uwankara wanganarangku kulira palyantjatjanungku nintingu kulikku, “Mulapa ngayulu Godaku ninti nyinanyi.” ⁴ Palu tjinguru kutjupangku Godala wanganarangku kulintja wiyangku wantira palu purunypa wangkaku, “Ngayulu Godaku ninti.” Nyara palurunku ngunti nintinmananyi Godaku. Ka palatja tjukaruru wiya. ⁵ Palu kutjupangku Godala wanganarangku kulira palyara kutju Godaku pulkara mulapa mukuringanyi. Uwa, nyanga palulangurula kulini panya nganaña mulapa palumpa walytja nyinanyi. ⁶ Palu tjinguru nganananku Godaku walytjanmankula uti Jesunya Christanya purunypa alatjiitu nyinama.

Wituntja Kuwaritja

⁷ Walytja wiru tjuṭa, ngayulu nyurampa walkatjunanyi mununa nyuranya wituwituni nyuranku mukulya nyinanytjaku. Palu wituntja nyanga paluru kuwaritja wiya, palu tjukurpa irititja, panya nyura kuwaripat-jaranguru alatjiitu kanyiningi munu kuliningi. ⁸ Palu tjukurpa nyanga paluru kuwaritja nguwanpa ngaranyi, panya Christalu nganañala pulkara nintinu tjukurpa nyanga palunya nganaña pulkara mulapa unngu kulin-tjaku. Panya Christalu tilingku irnyara utinu tjukurpa nyanga palunya, ka palulanguru mungawaluru ma-wiyaringanyi panya paluru tili pulka irnyara ngaranyangka.

⁹ Ka tjinguru kutjupangku wangkanyi, “Ngayulu tilingka ngaranyi, Godaku walytja.” Palu nyara paluru Jesuku walytja kutjupaku kuraringkulampa mungawalurungka ngaranyi munu ngunti wangkanyi tilingka

ngaranytja. ¹⁰ Palu nganaña kutjupa tjutaku mukulya nyinarampa tilingka titutjara nyinanyi. Ka nganaña alatji nyinanyangka Jesuku walytja kutjupa tjutangku nyakula punkantja wiya nyinaku. ¹¹ Palu nganaña Jesuku walytja kutjupaku kuraringkulampa mungawalurungka titutjara nyinanyi munula mungawalurungka ananyi panya kuru patingku putu nyanganyi iwarangka tjukaruru ankunytjikitjangku, palu purunyapa.

¹² Uwa tjitji tjuta, lita nyangangkaña nyurala tjakultjunanyi panya nyura kura palyantjitjanguru Godalu nyuranya pungkunytjaku ngaranyi, palu Christanya nyurampa ngalkilpa ilunytjitjanguru paluru nyuranya kalypangku wantingu.

¹³ Ka wati minyma tjuta, lita nyangangkaña nyurala kuлу tjakultjunanyi panya nyura ninti Godaku kuwaripatjara nyinanytjitu.

Ka wati yangupala tjuta munu kungkawara tjuta, nyangatjaña nyurala kuлу tjakultjunanyi panya Godalu nyuranya kunpuñu, ka mamungku nyuranya arkannyangka nyura kulira wantipai alatjitu.

¹⁴ Uwa tjitji tjuta, nyura panya Mamaku ninti nyinanyi. Ka wati minyma tjuta nyura kuлу ninti Godaku kuwaripatjara nyinanytjitu. Ka wati yangupala tjuta munu kungkawara tjuta, nyura panya kuñpu rapa mulapa nyinanyi Godaku tjukurpa mulamulangku kulira, munu mamungku nyuranya mukumukunnyangka nyura kulira wantipai alatjitu.

¹⁵ Uwa, nyura uwankarangku kutjupa kutjupa mantatja tjutaku mukuringkunytja wiyangku wantima. Munuya kulinma panya mantatjaku mukuringkula anangu mantatja kulilpai tjutangka tjunguringkula nyura Mamaku kuraringanyi munu palumpa mukuringkunytja wiya nyinanyi.

¹⁶ Panya mantatja kulilpai tjutangkuya walytjangku unngu kulira nyanga alatjiripai panya tjana walytjatjaraku mukuringkupai, munuya kutjupa kutjupa wiru tjutaku nyakula manyuringkupai, munuya walytjangku kulira kañany-kañanyaripai. Palu Godalu tjananya alatji nyinanytjaku nintintja wiya alatjitu. ¹⁷ Ka ngula manta wiyaringanyi munu tjana mukuringkunytja uwankara kuлу. Kaya Godaku tjukurpa wanganarangku kulira palyalpai tjuta kutju wanka titutjara nyinaku wiyaringkunytja wiya.

Christaku Mirpantju Tjuta

¹⁸ Uwa, walytja tjuta, kuvari nguwanpa Christanya malaku pitjaku, ka manta ilkari wiyaringanyi. Ka nyura panya nganmanytju kulinu Christaku mirpantju utiringanyi. Palu ngañmanypa wirkanu ngura uwankarangka Christaku mirpantju tjuta. Kala palunya tjananya nyakula nintingku kulin panya tjintu małatja watalpi wirkananyi. ¹⁹ Panya Christaku mirpantju tjutaya ngunti palumpa walytja purunyapa nganañala tjunguringkula nyinangi. Munuya tjukutjuku nyinara nganañanya wantikatira anu. Tjinguruya Christaku walytjampa nganañala nyinama, palu wiya tjana anu. Ka nyara palulanguru nganaña uti alatjitu kulin panya tjana nganañala tjungutja wiya.

²⁰ Palu nyura tjananya purunyapa wiya, panya Christalu nyuralakutu Kurunpa Milmilnga iyanu, ka paluru nyurala tjarpala unngu nyinanyi. Palulanguru nyura uwankarangku nintingku kulin tjukurpa tjukaruru.

²¹ Palu tjinguru nyura kulin ngayulu nyurampa walkatjunanyi nyura tjukurpa tjukaruruku ngurpa nyinanyangka. Palu wiya, nyura ninti. Kaña nyangatja nyurampa walkatjunanyi nyura ninti nyinanyangka. Ka nyura nintingku kulin panya kutjupangku tjukurpa tjukaruru wangkara tjukurpa ngunti tjuta putu tjunguni tjukurpa tjukarurungka.

²² Ngananya wanyu ngunti wangkapai? Wiya, panya paluru, panya Godalu Jesunya iyantjanya wiyanmankupai. Anangu nyara paluru Christaku mirpañtu munu Mamanya pulanya Katjarara wantipai. ²³ Panya Katjanya wantirampa Mamanya kuļu wantinyi, palu katjaku mulamularingkula Mamaku kuļu mulamularinganyi.

²⁴ Uwa, rawangkuya kulinma tjukurpa palya panya nyura nganmanyju kulintjanya, munu nyura palunya kulintjatjanu Katjala Mamala kuļu titutjara tjungu nyinaku. ²⁵ Panya Christalulanya nganmanyju kalkunu palula tjungu wanka titutjara nyinanytjaku.

²⁶ Nyangatjana nyurampa walkatjunanyi nyuranya angapaintjikitjangku, panya anangu kutjupa tjutangku nyuranya ngunti wituwitulku kutjupa kutjupa tjutawanungku palyantjaku. Kaya kulira wantima tjanampa mulamularingkuntya wiyangku. ²⁷ Panya Christalu Kurunpa Milmilnga nyurala unngu tjarpatjenu. Ka nyura palumpa kurunpa kanyintjatjanungku tjanala piřuku kulintja wiyangku wantima. Panya Christaku kuruntu nyurala alatjiu tjukurpa uwankara nintini tjukarurungku. Kaya wanganarangku kulira palyanma munu Christala tjungu alatjiu nyinama.

²⁸ Uwa walytja wiru tjuta, Christalaya tjungu nyinama munu nyura kuňta wiyangku kurunpa rapangku paluru pitjanyangka nyakuku tjintu malatjangka. ²⁹ Nyura panya nintingku kulini Christanya tjukaruru nyinapai. Nyara palulanguru kulinma panya tjukarurungku palyalpai tjuta Godaku katja unṭalpa nyinanyi.

3

Godaku Katja Untalpa Tjuta

¹ Palu nyangatjaya kulinma, panya Godanya nganampa mukulya pułka mulapa nyinanyi, munulanya katja unṭalpanmara kanyini. Kala mulapa palumpa katja unṭalpa nyinanyi. Kaya mantatja kulilpai tjutangku nganananya putu tjukarurungku kulilpai, panya Godanya puťu kulilpai munuya wantipai. Palu purunypaya nganananya puťu ngurkantananyi.

² Walytja wiru tjuta, kuwari nganana Godaku katja unṭalpa nyinanyi munula ngula nyaaringkuku? Wiya, nganana ngurpa panya Godalu ngananala wangkanytja wiyat. Palu tjukurpa nyangaku kutjula ninti, panya ngula Christanya malaku pitjanyangka nganana palu purunyariku palunya yunpa ilangku nyakula. ³ Uwa, nyangatjala rawangku kulini Christanya purunypa ngula nyinanytjikitjangku, munula palulanguru mantangka nyanga patara nyinara arkara wirura nyinanyi Christanya wirura nyinanytja purunypa.

⁴ Anangungku kura palyara Godaku tjukurpa kuran. ⁵ Ka nyura nintingku kulini panya Christanya pitjangu nganampa ngalkilpa munu ngananana kura palyantjitjanguru anga-ilungu Godalu nganananya kaly pangku pungkuwiyangku wantintyjak. Palu Christanya kura wiya alatjiu. ⁶ Ka anangumpa Christala tjungu nyinara kura rawangku palyantjaku wiyaringu. Palu tjinguru kutjupangku kura kutju alatjiu titutjarangku palyalkatira nyara paluru Christanya kulira alatjiu wantinyi munu palumpa ngurpa nyinanyi.

⁷ Walytja wiru tjuta, kutjupa tjutangkuya kura titutjarangku palyani munuyanku palyanmankupai. Ka nyura tjinguru tjanala kulira palumpa tjanampa mulamularingkuku, palu wantimaya panya tjana ngunti wangkapai. Panya anangungkumpa tjukarurungku palyara nyara paluru Christanya purunypa nyinanyi tjukaruru mulapa. ⁸ Palu panya kura

palyalpai tjuṭa mamuku tjitji tjuṭa nyinanyi, panya mamu paluru kuwari-patjaranguru alatjitu kura palyalkatingi, kaya palumpa tjitji tjuṭangku palu purunypaṭu palyaṇi. Palu Godaku Katja panya pitjangu mamungku palyantjitja uwankara wiyanṭjikitja.

⁹ Ka aŋangumpa Godaku waltyja nyinara kura tiṭutjarangku palyantja wiya nyinapai Godanya kurunpa palula unngu nyinanyangka. Aŋangu nyara paluru kuraku mukuringkunytja wiya nyinanyi Godanya palumpa Mama nyinanyangka. ¹⁰ Uwa, nyangangurula ngurkantananyi ngananya tjana Godaku tjitji tjuta nyinanyi munu ngananya tjana mamuku tjitji tjuṭa nyinanyi. Panya mamuku tjitji tjutangku tjukarurungku palyalpai wiya, munuyanku kalypa mukulya nyinapai wiya. Nyara paluru tjana Godaku tjitji wiya tjuṭa.

Mukulyaya Nyinama

¹¹ Ka panya nyura tjukurpa nyangatja kuwaripatjaranguru kulinu nyanga alatji ngananałanku uti Godaku waltyja uwankaraku kalypa mukulya nyinama. ¹² Utla wati panya Kainnga arkalwiyangku wantima panya paluru mamuku waltyja nyinara palumpa małanypa pungkula iluntanu. Palu nyaanguru wanyu Kaintu iluntanu? Wiya, kura palyant-jatjanungku palumpa małanytju wiru palyannyangka nyakula pungkula iluntanu.

¹³ Waltyja tjuta kulilaya, mantatja kulilpai tjuṭa nyurampa kuraringkunyangkampa alatji kulinma, “Nyangatjaya tjaka panya nganampa kuraringanyi.” ¹⁴ Panya nganana tjana purunypa wiya, kutjupa nguwanpa munula Godaku waltyja uwankaraku mukulya kalypa nyinanyi. Panya nganmanypa nganampa ilunytjaku ngarangi, palu kuwari nganana wankaringkulalta iwara palyangka ananyi wankakutu. Ka nyara paluru tjana mukulya wiya nyinara iwara kurangka ananyi ilunytjakutu tiṭutjara kurangka nyinara.

¹⁵ Palu ngananya tjana waltyja tjuṭaku kuraringkupai Godaku panya waltyja kutjupa tjuṭaku? Nyara paluru tjana miriputju purunypa nyinanyi. Ka nyura ninti panya miriputju tjuṭa Godala tjungu wanka tiṭutjara nyinanytja wiya. ¹⁶ Palu nyaa wanyu nyanga mukulya kalypa nyinanytja? Wiya, panya Christalunku ungu puntu waltyjangku nganampa ngalkiltu munu anga-ilungu. Nyanga paluru mukulya mulapa. Kala uti palu purunypa Godaku waltyja kutjupa tjuṭaku ngalkilarira iluma tjana ilunytjaku-tawara.

¹⁷ Tjinguru wati kutjupa Godaku waltyja mani pulkatjara mantara wiru tjuṭatjara nyinanyi, munu paluru Godaku waltyja kutjupa paltjatjiratja mantara wiya nyinanyangka nyakula wantinyi. Munu yaaltji-yaaltjingku paluru waltyjangku palurunku Godaku mukuringkunytjan-mananyi? Wiya palatja ngunti wangkanyi. Utu paluru Godaku mukuringkulampa aŋangu ngaltjtjara ungama. ¹⁸ Kala wanyu ngunti winpin-pingku wangkawiyangku wantima munula mulamulangku mukulyangku palyanma aŋangu kutjupa tjuṭaku ngalturingkula.

¹⁹ Uwa, nganana mukulya mulapa nyinara alatji tjukarurungku kulilpai, “Godaku tjukurpa tjukaruru mulapa, kala nganana mulamularingkula Godaku waltyja mulapa nyinanyi.” Alatji kulirala Godala kurunpa rapangku wangkapai nguluringkunytja wiyangku. ²⁰ Palu kutjupa-ara tjinguru nganana kura kutjupa kutjupa palyantjatjanu Godala mirangka rapa wiya ngarala kuntaringkupai munula kulilpai, “Kuraqatju nyinanyi.” Palu utila wantira waintara kulinma alatji, “Munta, Godanya ngayuku ninti

nyinanyi, ngayulu kulintjitja uwankaraku kuļu. Paluru nintingku kulini panya ngayulu palumpa walytja tjutaku mukuringkunyangka. Wanyu kaņatju kurunpa rapariwa.”

²¹ Walytja tjuta, utila Godala miřangka kuňta wiya ngaralampa palula ilaringkula rapangku wangkama nguluringkunytja wiyangku. ²² Ka nganaña kutjupa kutjupaku tjapinnyangka paluru nganañanya ungkuku. Panya nganaña palula wanganarangku kulira palyalpai munu palunya pukulmankupai. Nyara palulanguru paluru nganañanya tjapinnyangka ungkupai. ²³ Panya Godalu nganañanya wangkangu nyanga alatji, “Ngayuku katjakuya Jesuku mulamularingama, munuya palumpa walytja tjutaku mukulya kalypa nyinama.” Nyangatja panya Jesulu kuļu nganañala wangkangu palumpa walytja tjutaku pulkara mukuringkunytjaku. ²⁴ Ka nganaña paluru wangkanyangka kulira tjukarurungku palyarampa palula tjungu mulapa wankaru nyinaku. Ka paluru ngapartji nganañala tjungu nyinaku. Panya paluru palumpa kurunpa nganañala unngu tjarpatjunu, ka nyara palulanguru nganaña nintingku kulini, “Mulapa Godanya tjungu nyinanyi nganañala.”

4

Kurunpa Tjuta Ngurkantankunytjaku

¹ Uwa walytja wiru tjuta, kulinmaya panya kutjupa tjutangkuya wangkapai alatji, “Ngayulu Godaku kurunpatjarangku tjukurpa wangkapai.” Ka nyura warpungkula mulamularingkuwiyangku wantira Godala-warara tjapinma alatji wangkara, “Mulapa nyangantu nyuntumpa kurunpatjarangku tjukurpa wangkanyi, munta kurunpa kutjupatjarangku?” Alatjiya Godala tjapira kulinma panya wangkatjara ngunti tjuta nganmanypa ngura winkingka wirkanu, munuya tjukurpa kampa kutjupara ngunti wangkapai Godaku tjukurnguru. ² Panya wati Godaku kuruntjarangku tjukarurungku wangkapai alatji, “Jesunya Christanya puntu nganañanya purunypa nyinangi manta nyangangka.” Ka nyanga palunya wangkanyangka kulintjatjanungku nyura alatji kulinma, “Munta-uwa, nyanga paluru Godaku kuruntjarangku tjukarurungku wangkanyi.”

³ Ka tjinguru kutjupangku wangkaku nyanga alatji, “Wiya, Jesunya anangu nganañanya purunypa nyinanytja wiya manta nyangangka.” Ka nyanga palunya wangkanyangka kulintjatjanungku nyura alatji kulinma, “Wiya, nyanga paluru Godaku kuruntjarangku wangkanytja wiya, mamuku kuruntjarangku wangkanyi Christaku mirpantjungku.” Panya nyura nganmanytju kulinu anangu nyanga palu purunypa tjuta ngula anangu tjutangka utiringkuku Christaku mirpantju tjuta. Palu panya tjana nganmanypa utiringu munu kuwari nyangaya anangu tjutangka nyinanyi manta winkingka.

⁴ Ka walytja wiru tjuta, nyura panya Godaku walytja tjuta nyinanyi munu palulanguru nyura mamutjara tjutaku puļu mulamularingkupai, panya nyura Godaku kurunpa kanyini witulya pulkanya mamungka muñkara mulapa. Ka mamutjara tjutangku nyuranya puļu kuranj.

⁵ Nyara paluru tjana tjukurpa mantatja kutju wangkapai, kaya anangu mantatjaku mukuringkupai tjutangku tjanala kulisai. ⁶ Ka nyuntu nganaña Godaku walytjapiti nyinanyi. Kaya Godaku ninti tjutangku nganañala kulisai. Palu Godanya wantipai tjutangku nganañala kulintja wiyangku wantipai. Nyara palulangurula anangu tjuta tjukarurungku ngurkantananyi tjana kulinnyangka munu tjana wantinyangka. Panya

mamuku kuruntjarangku ngunti wangkapai alatji, “Jesunya anangu nganananya puruny whole nyinanytja wiya.” Palu panya Godaku kuruntjarangku tjukarurungku kutju wangkapai alatji, “Jesunya nganananya puruny whole nyinangi anangu alatjitu.”

Godanya Puruny whole Mukulya Pulka Nyinanytjaku

⁷ Uwa, walytja wiru tjuṭa, uti nyuranku pulkara mukuringama, panya mukulya nyangatja Godalanguru utiringu. Ka ngananalanku pulkara mukuringkula utini panya nganana mulapa Godaku tjitji tjuṭa nyinanytja. Munulanku mukulya pulka nyinara nganana piruku utini alatji panya nganana mulapa Godaku ninti nyinanytja. ⁸ Palu anangu mukulya wiya nyinara paluru utini alatji panya paluru Godaku ngurpa nyinanytja. Panya Godanya mukulya pulka nyinanyi munu mukuringanyi palumpa tjitji tjuṭa mukulyatjara nyinanytjaku. ⁹ Ka panya Godalu mukulya palurunku ngananaala utinu palumpa katja mantakutu iyaṛa nganana palulawanu wankaringkuny whole paluru nganampa ngalkilpa ilunyangka. ¹⁰ Paluru panya nganampa pulkara mukuringu. Panya nganana palumpa mukuringkuny whole wiya watarku nyinangi, ka paluru palumpa katja iyanu nganampa kuranguru ngalkilarira iluny whole, munu palulanguru paluru nganampa kalyparingu. Kala kulilpai, “Mulapa paluru nganampa mukulya pulka mulapa nyinanyi.”

¹¹ Ka walytja wiru tjuṭa, alatji Godanya nganampa mukuringkunyangka ngananaalanku uti pulkara mukuringamatu. ¹² Panya kutjupangku Godanya nyakuny whole wiya alatjitu, palu ngananaalanku mukulya pulka nyinanyangkampa Godanya ngananaala tjunguringkula nyinanyi. Kala mukulya paluru nyinanytjitu puruny whole alatjitu nyinaku.

¹³ Godalu panya ngananaala tjarpatjunu palumpa kurunpa, kala palulan-guru nintingku kulini panya mulapa nganana Godala tjungu nyinanyi, ka paluru ngananaala nyinanyi. ¹⁴ Ka nganana palumpa katja nyangu, munula tjukurpa palunyatjara para-tjakultjunkupai anangu tjuṭangka alatji panya mulapa Godalu palumpa katja iyanu anangu tjuṭa wankarunkuny whole. ¹⁵ Ka kutjupangku tjinguru mulamularingkula wangkaku alatji, “Jesunya mulapa Godaku katja.” Kala wangkanyangka kulilpai, “Mulapa Godanya nyanga palula tjungu nyinanyi, ka paluru mulapa Godala tjungutu nyinanyi.” ¹⁶ Alatjila palunya kulilpai munula panya nintingku kulilpai, “Mulapa Godanya nganampa mukulya pulka mulapa nyinanyi.”

Uwa, Godanya mukulya pulka. Ka ngananaalanku Jesuku walytja tjuṭaku mukulya pulka nyinarampa Godala tjungu nyinaku, ka paluru ngapartji ngananaala tjungu nyinaku. ¹⁷ Munu paluru ngananaanya nintilpai mukulya pulka nyinanytjaku. Ka nganana mulapa Jesunya puruny whole mukulya pulka nyinara ngula Tjintu Małatjangka Godala kuranyu kurunpa rapa ngaraku ngurkantankuny whole nguluringkuny whole wiya. ¹⁸ Uwa, Godanya nganampa pulkara mukuringkunyangka nganana uti ngulu wiya nyinama. Panya nganampa Godanya kurunpa winki mukuringkunyangka nganana putu nguluringkupai. Palu panya kutjupa tjuṭa nguluringkupai, panya paluru tjana kulintja wiya Godanya nganampa mukulya nyinanytja munu panyaya nguluringanyi alatji kulira, “Ngula panyalanya Godalu kuranyu ngaratjunkula ngurkantara pulkara pungkuku.”

¹⁹ Ka Godanya-warara nganampa mukulya pulka nyinanyangka nganana ngapartji palumpa munu anangu kutjupa tjuṭaku kuļu mukulya pulka nyinapai. ²⁰ Palu nganana tjinguru alatji wangkanyi, “Nganana

Godaku mukulya nyinanyi.” Munula palulanguru Godaku walytja tjutaku kuraringkulampa ngananāa ngunti wangkanyi, munula Godaku kūlu kuraringanyi. Panya ngananāa Godanya nyakunytja wiya, munula palumpa walytja tjuta uti nyanganyi. Palulangurula uti palumpa tjanampa ngaltunyntju mukulya pulka nyinama munu wirūra palyanma tjanampa, panya alatji palyarāa ngananāa Godaku kūlu mukulya pulka nyinanyi.²¹ Panya Godalu ngananāanya wituwituñu alatji wangkara, “Nyuntu Godaku pulkarāa mukuringkulampa uti Godaku walytja tjutaku kūlu mukulya pulka nyinama.”

5

Mantatja Kulilpai Tjutangku Jesuku Walytja Tjuta Putu Kuralpai

¹ Ngananāa Jesuku mulamularinganyi panya paluru Wankarunkupainya Godalu panya kalkuntjanya, nyara palulanguru ngananāa Godaku katja untalpa tjuta nyinanyi. Munula Mama Godaku pulkarāa mukuringkula ngananāa palumpa katja untalpa tjutaku kūlu mukulya nyinanyi. ² Palu yaaltji-yaaltjila Godaku tjitji tjutaku mukulya nyinama? Wiya, ngananāa Godaku pulkarāa mukuringkula munu palumpa tjukurpa wanganarangku kulirā ngananāa palumpa katja untalpa tjutaku kūlu pulkarāa mukuringanyi ngaltunyntju nyinara. ³ Panya ngananāa Godaku pulkarāa mukuringkula palumpa tjukurpa wanganarangku kulirā palyalpai.

Ka tjinguru nyura wangkaku, “Wiya tjukurpa nyangatja wituwitu mulapa pūtu palyantjaku.” Palu wiya tjukurpa Godaku wituwitu wiya uti ngaranyi nyura nyakula kulirā palyantjaku. ⁴⁻⁵ Panya ngananāa Jesunya Godaku katja nyinanytjituñu mulamularingkunyangka Godalu ngananāanya walytjanmankupai munulanya kuñpulpai ngananāa palumpa walytja tjutaku mukulya pulka nyinanytjaku. Ka nyara palulanguru anangu mantatja kulilpai tjutangku ngananāanya pūtu kuralpai Godaku walytja tjutaku mukulya nyinanyangka. Panya ngananāa Jesuku mulamularingkunyangka Godalu ngananāanya pulkarāa witulyananyi.

Jesunya Christanya Utiringkunyta

⁶⁻⁸ Uwa, panya Jesunya Christanya pitjala itiringu mantangka nyanga, ka panya paluru nyinara pulkaringkunyangka palunya urungka baptise-katingu. Ka panya ngula ilura milkali tjutingu. Panya paluru pitjangu minangka kutju baptise-katinytjaku wiya, palu milkali tjutinytjik-itja kūlu puñu kañakutjarangka ilura. Kala nyangatja tjukarurungku kulini Kurunpa Milmiltu ngananāala unngu nintinnyangka, panya paluru tjukurpa tjukaruru kutju nintilpai. Munula Jesunya minangka baptise-katinytjangūu munu milkali tjutinytjangūu kulu nintiringanyi panya paluru pitjala ananguringu munu nganampa ngalkilpa ilungu. Nyanga alatji Godalu ngananāanya nintinu.

⁹ Panya watingku nintinnyangkala mulamularingkupai. Palu Godalu nintinnyangkala pulkarāa mulapa mulamularingkupai. Ka paluru alatjitu ngananāala nintinu palumpa katja alatji wangkara, “Nyanga paluru ngayuku katja nyinanyi.” Kala uti palumpa pulkarāa mulamularingama wantinytja wiya. ¹⁰ Munu panya ngananāa Godaku katjaku mulamularingkula kutju tjukarurungku kulilpai Godalu palunyatjara nintinnyangka. Palu ngananāa tjinguru Godalu palumpa katjatjara nintinnyangka mulamularingkuwiyangku wantira ngananāa palunya nguntinmananyi. ¹¹ Godalu panya wangkangu palumpa katja nganampa ngalkilpa ilungu yangka ngananāanya wankarunkunytkitjangku. Munulanya wankarunu

palula tjungu wanka titutjara nyinanytjaku. ¹² Kala palumpa katjaku mulamularingkula wanka nyanga palunya titutjarangku kanyini, palu palunya wantirampa wanka nyanga palunya kanyintja wiya alatjiitu.

Wanka Titutjara Nyinanytjaku

¹³ Uwa, nyangatjaña nyurampa walkatjunanyi nyura panya tjukarurungku kulintjaku. Panya nyura Godaku katjaku mulamularinganyi munu palulanguru nyura mulapa wanka titutjara nyinaku Godala tjungu. ¹⁴ Panya nganana Godala wangkapai kurunpa rapangku, ka paluru mulapa ngananañala kulilpai palula tjukarurungku tjapinnnyangka palunya pukulmankunytjikitjangku. ¹⁵ Kala nintingku kulini, “Mulapa paluru tjapinnnyangka kulira palyalpai.”

¹⁶ Ka tjinguru nyuntu nyakuku Jesuku walytja kutjupangku kura palyannyangka. Munu nyuntu uti nyakunytjatjanungku Godala tjapila palunya wankarunkunytjaku. Palu kutjupa ngaranyi kura pulka mulapa, panya Jesunya wantira Kurunpa Milmilnga anantja. Ka nyuntu nyara palu purunyapa nyakula wankarunkunytjaku tjapilwiyangku wantima. ¹⁷ Panya kura kutjupa kutjupa uwankara nganana palyannyangka Godalu nyangananyi kura mulapa. Palu kura nyanga kutjunguru Godalu nganananya puñu wankarunanyi, panya Jesuku mulamularingkuwiyangku wantira Kurunpa Milmilnga anannyangka. Kura nyara palulanguru nganana ilura wiyaringanyi alatjiitu. Palu kura kutjupa tjutanguru Godalu nganananya wankarunkuku nganana palumpa mulamularingkunyangka.

¹⁸ Ka nganana ninti panya Godaku walytja tjutangku kura rawangku palyalpai wiya. Panya palumpa katjangku nganananya titutjarangku atunymara kanyilpai mamungka-tawara. ¹⁹ Palu mamungku anangu mantatja kulilpai tjuta mayatjarira kanyini nganananya wiya, kala nintingku kulini panya Godalu nganananya atunymara kanyinnyangka.

²⁰ Panya Godaku katjangku ilkaringuru pitjala ngananañala nintinu God tjukaruru, kala mulapa nintiringu tjukurpa tjukaruruku. Munula palulan-guru palula tjungu nyinanyi palumpa katja Jesula Christala kuļu. Panya paluru God mulapa nyinanyi munulanya paluru wanka titutjarangku kanyini palula tjungu.

²¹ Uwa walytja wiru tjuta, kutjupa tjutangku panya puñinguru puñunguru kutjupa tjuta palyalpai munuya walkulpai. Palu nyura tjanala tjunguringkula puñu palunya tjananya walkulwiyangku wantima munuya mauntalpa nyinara Godanya kutju walkunma.

Lita Nampa 2 Johntu Walkatjunkunytja

2 John

Nyangatja Nganmanytju Nyakula

Wangkanytjaku

Nyangatja Godaku tjukurpa kutjupa wati panya Johntu walkatjunkunytja Jesuku panya mal pangku. Munu paluru walkatjura iyanu minyma Jesuku walytjakutu munu palula tjungu nyinanytja tjuṭakutu kuļu.

Munu lita nyanga palula Johntu minyma palula tjanala wangkangu tjukurpa Jesunyatjara kampa kutjupankunytja wiyangku wantintjaku munu aŋangu kutjupa tjuṭangku ngunti wangkanyangka kulira wantintjaku, panya paluru tjanaya ngunti para-wangkangi tjukurpa Jesunyatjara.

Tjukurpa nyanganpa ngarinyi:

- 1-3 Johntu ngañmanytju wangkanytja
- 4-6 Jesuku walytja tjuṭaku mukulya pulka nyinanytjaku
- 7-11 Ngulu nyakunytjaku ngunti kurantjaku-tawara
- 12-13 Tjukurpa malatja

Johntu Nganmanytju Wangkanytja

¹ Uwa, minyma wiru, Godalu nyuntunya ngurkantanu palumpa walytja nyinanytjaku. Kaña wati Jesuku walytja tjuṭa atunyankupaingku lita nyangatja nyuntumpa walkatjunanyi munu nyuntumpa tjitji tjuṭaku kuļu, panya ngayulu nyurampa pulkara pukularipai. Ngayulu kutju wiya, uwankarala nyurampa pulkara pukularipai, panya Godaku tjukurpa tjukarurungku kulipai tjuta kuļu. ² Panya nganaña tjukurpa nyanga palunya mulamulangku unngu kulintjatjanungku titutjarangku kulilku watarkurintja wiyangku. Nyanga palulangurula nyurampa pulkara pukularipai.

³ Ka Mama Godalu pula palumpa katja Jesulu Christalu nyuntunya nganañanya pukultju ngaltunytju pulkangku kanyinma, munulanya kurnupa rapara pukulmanama. Uwa, alatji nganañanya palyanma nganaña tjukurpa tjukaruru mulamulangku kulinnyangka munu Jesuku walytja tjuṭaku mukulya pulka nyinanyangka.

Jesuku Walytja Tjuṭaku Mukulya Pulka Nyinanytjaku

⁴ Uwa kangkuru, nyuntumpa tjitji kutjupa tjarangkuya kunyu tjukurpa tjukaruru wangañarangku kulira palulawanu nyinapai, panya Mamalu-mantu nganañanya wangkangu wantintjya wiyangku rawangku kulikatinjtjaku. Kaña ngayulu nyangatja kulira pulkara pukularingu.

⁵ Uwa minyma wiru, mulamulangkuña wangkanyi utilanku Jesuku walytja tjuṭaku mukulya pulka nyinama. Tjukurpa nyanga palunya panya Godalu kuwari kutju wangkanytja wiya ngañmanytju mulapa wangkangu, kaña nyangatja piruku nyurala wangkanyi tjukurpa palunya. ⁶ Palu yaaltji-yaaltjingkulanku mukulyangku palyanma? Wiya, mukulyangku kulira palyantjikitjangkula uti Godalu wangkanytja uwankara wangañarangku kulira palyanma. Panya nganmanytjula kulinu Godaku walytja uwankaraku rawa mukulya nyinanytjikitjangku.

Ngulu Nyakunytjaku Ngunti Kurantjaku-tawara

⁷ Palu kulila, panya aŋangu ngunti wangkapai tjuta ngura winkingka tjutaringu munuya aŋangu tjutangka ngunti para-wangkarinkupai alatji, “Jesunya mantangka iti ngarinytja wiyaŋu, kurunpa kutju pitjangu.” Palu wiya, alatji wangkaraya aŋangu tjuta ngunti kuralpai munuya paluru tjana alatjiṭu Jesuku mirpaŋtju nyinanyi ngunti panya wangkapai tjuta. ⁸ Kaya ngulu nyangama kutjupangku nyuranya ngunti kurantjakutawara, panya nyura wirungku palyaningi Godaku war̄ka, munuya wantintytja wiyangku titutjarangku palyalkatima. Ka nyuranya ngula Godalu rawangku nyakunytjatjanungku wiru mulapa ungkuku, panya paluru ngaŋmanytju kalkuntjatjanungku.

⁹ Uwa, Christaku tjukurpa kutjuya wangkama tjukurpa kutjupa tjungura wangkanytja wiyangku, panya nyura tjukurpa kutjupa tjungura wangkara palumpa tjukurpa kuraŋi munu Godanya wantinyi, munu Godanya wantira Katjanya kuļu wantinyi. Palu nyura Christaku tjukurpa kutju wangkara Mamala pulala Katjala tjungu nyinaku. ¹⁰ Ka tjinguru aŋangu kutjupangku pitjala nyurala tjukurpa kutjupa nintilku Christanyatjara wiya. Ka nyura aŋangu nyara palunya nyurampa ngurangka alt̄ira tjarpatjura kanyintja wiyangku wantima. ¹¹ Panya nyura tjinguru palunya alt̄irampa palula tjunguringanyi, munu palyanmananyi ngunti wangkanytjaku.

Tjukurpa Malatja

¹² Uwa, tjukurpa tjutaŋa kulini nyurala wangkanytjikitjangku, palu nyiringka nyangaŋa puṭu walkatjunanyi, panya ngayulu mukuringanyi ma-pitjala nyurala tjunguringkula ilangku wangkanytjikitja. Tjinguruṇa kuwari nguwanpa ma-pitjaku, kala tjunguringkula pulkaṛa pukulariku.

¹³ Ka nyangatja nyuntumpa kangkuṛu nyinanyi, panya Godalu palunya kuļu ngurkantanu palumpa waltyja nyinanytjaku. Kaya palumpa tjitji tjutangku nyuntunya kulini nyuntumpa pukularira. Palya?

Lita Nampa 3 Johntu Walkatjunkunytja

3 John

Nyangatja Nganmanytju Nyakula

Wangkanytjaku

Nyangatja Godaku tjukurpa kutjupa Johntu walkatjunkunytja wati ini Kayitjaku. Panya wati nyanga paluru wirungku tjananya intjanungku mani ungkupai wati Jesulu iyantja tjuṭa paluru tjana ngura tjuṭangka parapitjalira Godaku tjukurpa tjakultjunkunytjaku ngura winkingka. Ka Johntu nyangatja kulintjatjanu pulkara pukularingu munu lita nyangangka palunya wirunmanu. Kala uti nganaña kuļu anangu kutjupa Godaku warkarinytjaku palu purunytju mani ungama wantintyta wiyangku.

Munu lita nyangangka Johntu wati kutjupa ini Tiyatu-pitjanya wangkara painingi paluru Jesuku walytja tjuṭangka ngunti warkarinyangka. Munu paluru wangkangi ngula tjanala ma-pitjala ilangku wangkanytjikitja.

Tjukurpa nyanganpa ngarinyi:

- 1-4 Johntu nganmanytju wangkanytja
- 5-8 Johntu Kayitjanya wangkara mirawaninýtja
- 9-10 Johntu Tiyatu-pitjanya wangkara paintja
- 13-15 Tjukurpa malatja

Johntu Nganmanytju Wangkanytja

¹ Uwa, malpa wiru Kayitja, ngayuluña wati Jesuku walytja tjuṭa atunymankupaingku lita nyangatja nyuntumpa walkatjunanyi. Ngayulu nyuntumpa pulkara pukularinyi panya nyuntu ngali Godaku tjukurpa tjukarurungku kulilpai.

² Kan malpa wiru, palyan nyinanyi? Ngayulu nintingku kulin panya nyuntu kurunpa rapa alatjiwu nyinanyi Godala mirangka. Palu ngayulu nyuntumpa Mamala rawangku tjapilpai nyuntunya wirura kanyintjaku pika wiya. ³ Panya Jesuku walytja kutjupa tjuṭangkuṇiya pitjala tjakultjunu panya nyuntu kunyu Godaku tjukurku pulkara mulamularingkupai munu wangañarangku kuliṛa palyalpai. Kaña tjanala kulintjatjanu pulkara pukularingu. ⁴ Panya tjaka ngayulu tjukurpa nyanga palu purunypa tjakultjunkunyangka kulintjatjanu pulkara pukularipai, panya anangu tjuṭangku ngayulu wangkanytjitetja kuliṛa Jesuku walytjaringkula Godaku tjukurpa wangañarangku kulinnyangkaṇa pulkara pukularinyi.

Kayitjanya Mirawaninýtja

⁵ Uwa, malpa wiru, nyuntu kunyun mulapa Jesuku walytja uwankara papulankunytja wiyangku alpamilalpai. ⁶ Kaya kutjupa tjarangku nyuntu alpamilannyangka nyakunytjatjanungku pitjala nyuntunyatjara tjakultjunnangi ngura nyanga palula nganaña inmangka tjunguringkunyangka, panya nyuntu kunyu mukulya pulka. Ka tjananya wanyu wirungku rawangkuṭu alpamilanma iwarangka piruku ankunytjaku Godalu nyuntunya nyakula pukularinytjaku. ⁷ Panya paluru tjana tjukurtjara mapakanu Jesuku tjukurpa para-wangkanytjikitja ngura tjuṭakutu. Munu tjana nganmanytju wangkara kulinu alatji, “Nganaña Jesunya wantipai tjuṭangka mantjintja wiyangku wantima tjana nganañanya ungkunyangka.” Alatji tjana wangkara kulinu. ⁸ Palu nganampa ngaranyi Jesuku

walytja tjutangku palunya tjananya alpamilantjaku. Panya alatji nganaŋa alpamilara tjukurpa tjukaruru tjanalawanungku lipintananyi.

Tiyatu-pitjanya munu Tumitu-ritjanya

⁹ Ngañmanytu panyaŋa lita muṭumuṭu walkatjuṛa ma-iyaṇu nyuntulakutu nyakula nyara Jesuku walytja tjutangka wangkanytjaku. Palu wati kutjungku ini Tiyatu-pitjalu kunyu kulira wantingi lita palulanguru nyuntu nyakula wangkanyangka, panya paluru kunyu nyurampa mayatja nyinanytjikitja mukuringkupai. ¹⁰ Kaña ngula ma-pitjala nyurala wangkara utilku wati pala palunyatjara. Panya paluru unngu kuraringkula kunyu tjukurpa nganaŋanyatjara nyurala ngunti tjakultjunkupai. Munu kunyu Jesuku walytja kutjupa tjuta ngura kutjupanguru pitjanyangka nyakula pukularira altira tjunkupai wiya munu kunyu nyuranya angapailpai palunya tjananya altira tjunkunytjaku-tawara, munu kutjupangku tungunpungkula tjarpatjunkunyangka nyakula kunyu nyuralanguru palunya paira iyantjikitjangku kulilpai.

¹¹ Malpa wiru, kutjupangku kura palyannyangka nyakula arkalwiyangku wantima munu wiru palyannyangka nyakula kutju arkara palyanma. Panya kutjupangku wiru palyalpai, nyara paluru Godaku walytja. Ka kutjupangku rawangku kura kutju palyalpai, nyara paluru Godaku ngurpa munu walytja wiya.

¹² Kaya aŋangu tjutangku wati panya Tumitu-ritjanya mirawaŋipai tjukaruru nyinanyangka nyakula. Kaña ngayulu kuļu palunya nintingku kulira mirawaŋinyi, kañi kulinma panya ngayulu tjukarurungku kutju wangkapai.

Tjukurpa Malatja

¹³ Uwa, tjukurpa tjuta mulapaŋa kulini nyuntula wangkanytjikitjangku palu nyiringka nyangaŋa puṭu walkatjunanyi. ¹⁴ Panya ngayulu mukuringanyi ma-pitjala nyuntula ilangku wangkanytjikitja. Tjinguruṇa kuwari nguwanpa ma-pitjaku.

¹⁵ Uwa, alatjituṇa walkatjunanyi. Ka Godalu nyuntunya kurunpa rapara pukulmanama.

Kaya nyuntumpa malpa tjutangku ngura nyanganguru nyuntunya kulini nyuntumpa pukularira. Ka nyuntu ngapartji ngayuku pala malpa tjutangka kutju kutjungka nyakula tjakultjura, panya ngayulu tjananya kulini tjanampa pukularira. Palya!

Lita Jude-alu Walkatjunkunytja Jude Nyangatja Nganmanytju Nyakula Wangkanytjaku

Nyangatja Godaku tjukurpa wati Jude-alu walkatjunkunytja Jamesaku pulampa Jesuku malanytju. Munu paluru lita nyangatja walkatjura iyanu Jesuku walytja tjuṭakutu, panya paluru tjananya wangkara ngulutjunangi tjukurtjara ngunti tjutanguru mauntpa nyinanytjaku, panya paluru tjananya tjukurpa ngunti tjuṭa wangkapai Jesunyatjara-palku. Palu panya Godalu kunyu palunya tjananya nyanganyi munu paluru tjananya pikatjaralku paluru tjana kura nyinanytjitjanguru.

Ka Jude-alu Jesuku panya walytja tjuṭa wangkara rapaningi munu tjanala wangkangi, “Godalu palumpa walytja tjuṭa witulyankuku paluru tjana Jesulanguru paturingkunytjaku-tawara.”

Tjukurpa nyanganpa ngarinyi:

- 1-2 Jude-alu nganmanytju wangkanytja
- 3-16 Jude-alu ngulutjunkunytja nintilpai ngunti tjutangka-tawara
- 17-23 Tjukurpa Jesunyatjara rawangku wangkara kulintjaku
- 24-25 Godanya pulkaṛa mirawaṇinytja

Jude-alu Nganmanytju Wangkanytja

¹ Uwa walytja tjuṭa, ngayuluṇa Jude-alu lita nyangatja walkatjunanyi, panya ngayulu Jesuku Christaku waṛka palyalpai, wati panya Jamesaku malanypa. Panya Godalu nyuranya ngurkantanu munu mukulya pulkangku kanyini. Ka panya Jesulu Christalu nyuranya atunymara kanyini. Kana nyangatja nyurampa walkatjunanyi.

² Ka Godalu nyuranya ngaltunyntju pulkangku kanyinma munu nyuranya mukulyangku kurunpa rapara pukulmanama.

Nintilpai Ngunti Tjuṭa

³ Uwa walytja wiru tjuṭa, nganmanytjuṇa kulinigi nyurampa lita walkatjunkunytjikitjangku tjukurpa panya Jesulu nyuntunya nganaṇanya wankarūra kanyintjatjara. Palu ngayulu kulinu kutjupa tjutangku kunyu nyurala wirkara palyangku-palku tjukurpa ngunti tjuṭa nintini. Kana kampa kutjupa kulinu munuṇa lita nyanga palunya kuwari walkatjunanyi nyurala wangkanytjikitjangku nyanga alatji uti nyura ngunti nintinnyangka kuliṛa wantima munuya tjukurpa tjukaruruku kutju nintirinkula wangkama. Panya tjukurpa nyanga palunya Godalu ungu palumpa walytja tjuṭa. Kana nyangatja walkatjunanyi nyura tjukurpa nyanga palunya kutju kulintjaku munu tjana ngunti wangkanyangka kuliṛa wantintjaku.

⁴ Panya tjana Godala tungunpungkupai tjuta kunyu nyurala tjunguringkula nyinanyi munuya Godaku tjukurpa kampa kutjupara kuliṛa wangkapai alatji, “Godanya ngaltunyntju alatjitu nyinanyi, kala palya kura tiṭutjarangku palyanma munula kutjupangka ngarima kuri wiyangka, panya Godalu nganampa ngalturingkula kura palyannyangka kalypangku punkuwiyangku wantiku.” Alatjiya ngunti kuliṛa wangkapai kura tiṭutjarangku palyantjikitjangku. Palu kura nyanga palu purunypa tjuṭa

palyaraya Jesunya anañi. Panya nyiringka ngañmanytu walkatjunkunytja ngarañyi alatji, "Añangungku kura nyanga purunypa palyannyangka Godalu palunyu wiyaliku alatjiitu."

⁵ Kulilaya tjukurpa panyatja, panya Godalu añangu Israelkunu tjuta wankarura katintytja ngura panya Itjipalanguru. Ka nyura ninti tjukurpa nyanga palumpa, palu pirukuna wanyu wangkanyi nyura uti mulapa kulintjaku. Panya Godalu tjananya ngura nyara palulanguru wankarura katintytatjanungku malangka tjananya kutjupatjara wiyanu palumpa mulamularingkuwiyangku wantinyangka.

⁶ Ka piruku wanyu kulila angelpa tjuta ngapartji, panya Godalu tjananya wituningi warika palumpa palyantjaku. Kaya tjara kutjupangku palula tungunpungkula wantingi tjana walytjangku kulira palyantjikitjangku. Ka tjananya Godalu tjiina pułkangka karpira piți maru pułkangka waningu. Kaya mungawalurungka nyinara pañani ngula Godalu tjintu malatjangka tjananya ngurkantara wiyanjaku.

⁷ Kaya wanyu piruku kulinma ngura panya Tjatamanya pulanya Ku-maranya munu ngura ititja tjuta kuļu. Ngura nyara palula tjanala panya, añangu tjuta palu purunypatu nyinangi munuya Godala tungunpungkula kuri kutjupa kutjupangka ngaringi munuya ngunti-ngunti kuļu tjunguringangi panya wati kutjara pula kurirara purunypa nyinangi, ka minyma kutjara palu purunypatu nyinangi. Ka Godalu añangu tjuta kuraringkunyangka nyakula ngura nyara palula tjanala wali uwankara añangu winki tilinu waru ilkaritjangka. Alatji paluru palyanu malatja tjutangku nyakula kulira nintiringkunytjaku.

⁸ Ka panya añangu Godala tungunpungkupai tjuta nyurala tjunguringu. Nyara paluru tjana titutjarangku puntu tjananku kurañi kura kutju palyara, munuya kura tjuta tjukurmankunytatjanungku kura palunyu tjananya ankula palyalpai alatjiitu munuya ngunti-ngunti ngaripai munuya Godaku tjukurpa uwankara analpai, angelpa tjuta kuļukulu. ⁹ Wanyuya kulila angelpa panya mayatja ini Michaelnga Godaku panya warkaripai. Panya paluru mayatja pulka nyinara kutjupa kutjupa analpai wiya. Panya iriti paluru pulanku mamuarangku ngaparku wangkangi Mosenya ilunyangka miri mantjintjikitjangku. Ka Michaeltu mamu palunyu pauntjingara anara wangkanyta wiyangku alatji kutju wangkangu, "God, nyuntu palunyu paila Mosenya miri mantjintjaku-tawara."

¹⁰ Palu añangu nyara Godala tungunpungkupai tjutangku rawangku anara wangkapai munuya kutjupa kutjupa wangkanyangka puļu kulira analpai alatjiitu. Munuya ngultjuringkunytja wiyangku inura purunytykulira wantira titutjarangku alatjiitu kura palyalpai kulintja wiyangku. Nyara palulanguruya ilupairingu kura palyantjatjanu.

¹¹ Kana ngayulu tjanampa ngalturinganyi panya tjanala pika pulka mulapa utiringkuku. Nyara paluru tjana panya Kainku arangka alatjinnanyi, panya paluru nyararingkula palumpa malanypa pungkula iluntanu, kaya palu purunypatu kuwari palyani nyara ngunti wangkapai tjutangku. Munuya paluru tjana wati panya Pailamaku arangka kuļu nyinanyi, panya paluru manikitjangku añangu tjuta wituwituňu Godala tungunpungkula kulira wantirtytjaku. Kaya añangu nyara paluru tjana panya tjana purunytytu kulira wantira kura palyani. Munuya wati panya ini Kuranya purunypatu Godala tungunpunganyi, panya paluru Mosela tungunpunganggi ilytjingka katirkunkunyangka, ka panya Godalu palunyu iluntanu munu kuwari palu purunytytu añangu nyara palunyu tjananya kuļu iluntankuku palula tungunpungkunyangka.

¹² Uwa, tjana kura nyanga purunypa palyantjatjanungku kunṭa wiya alatjiṭu nyurala maiku tjunguringkupai munuya Mayatjaku Tjapa ngunti ngalkula tjikilpai. Munu paluru tjana kutjupa tjuṭa alpamilantjikitjangku kulilpai wiya tjananku kutju waltytjangku alatjiṭu kulira palyalpai. Anangu nyara paluru tjana ngangkali kurakura purunypa ngaranyi, panya ngangkali paluru ngarala wiyaringanyi puyintja wiya, palu purunypa tjana ngaranyi tjukurpa wiru tjakultjunkunytja wiya.

Munu piruku paluru tjana punu mai wiyatjara purunypa ngaranyi, panya mai wiya titutjara ngaranyangka watingku nyakula puṇu palunya waṭa winki warpura wanipai, ka piltiringkupai. Nyanga palu purunypaya anangu paluru tjana kurakura ngaranyi maitjararingkunytja wiya, panya tjana tjukurpa tjukaruru mantjira kanyintja wiya. Ka panya watingku puṇu kurakura mai wiya warpura wanipai ka ngarira piltiringkupai, palu purunypa tjana nyinanyi tjukurpa ngunti wangkara.

¹³ Kaya anangu winkingku tjananya uti nyakupai kura palyannyangka. Panya uru wiṭatjarangku karungka wala pulka ukalingkula unytjunytju unṭura karu tjartjarpangka utilpai, palu purunypa tjanampa kura utiringanyi tjana palyannyangka. Munu piruku tjana kililpi punkantja purunypa nyinanyi, panya kililpi ilkaringuṛu tili winki punkalpai munu irnyara wiyaringkupai manta pampura. Nyanga palu purunypaya Godalanguṛu wirulyarara punkalpai munuya tili wiyaringkula mungawalurungka titutjara nyinaku.

¹⁴ Uwa, nyura panya wati ini llinakanya kulini panya iriti mulapa nyinangi Adamaku waltyta malatja. Nyara paluru panya anangu nyanga palunya tjananya kulira nganmanytu tjukarurungku wangkangi alatji, “Kulinmaya, Mayatjanya pitjaku angelpa mungilyitjara. ¹⁵ Munu paluru anangu winki kuranyu ngaratjunkula ngurkantara tjaralku. Munu paluru Godala tungunpungkupai tjuṭa pungkuku, panya paluru tjana kura titutjarangku palyara Godanya analpai.”

¹⁶ Anangu nyanga paluru tjana panya mulyararipai, munuya kutjupa tjuṭa nyakula wangkara ngukalpai, munuya tjana alatjiṭu waltytjangku kulira kura palyalpai. Munuya kura palyantjatjanungku kañanyakanytu mirawaṇipai, munu paluru tjana anangu kutjupa tjuṭa mukulyangku-palku wangkara ngunti pukulmankupai, kaya kulira wan-ganararingkupai.

Tjukurpa Jesunyatjarayanku Rawangku Wangkara Kulinma

¹⁷ Palu kulilaya malpa wiru tjuta, tjukurpa panya mayatja Jesunyatjaraya nganmanytu tjakultjunu Jesulu panya iyantja tjuṭangku. ¹⁸ Panya tjana alatji wangkangu, “Tjiṇtu malatja ilaringkunyangka anangu panya analpai tjuṭa ngura winkingka tjutaringkuku munuya waltytjangku kutju kulira kura kutju alatjiṭu palyalku Godanya kulintja wiyangku.” ¹⁹ Palu anangu nyanga palu purunypa tjuṭa nganmanypa tjuṭaringku, munuya kuwari Jesuku waltyta tjuṭa tjungu nyinanyangka tjananya kurara punganyi munuya maunṭalpa maunṭalpa palyani, panya tjana waltytjangku kutju kulilpai Kurunpa Milmiltu kulintja wiyangku.

²⁰ Uwa waltyta tjuṭa, ngapartji-ngapartjingkuyanku wangkara kulinma tjukurpa Jesunyatjara watarkurintjaku-tawara, palunya titutjarangku palyanyku wanantjikitjangku. Munuya Kurunpa Milmiltu nyuranya witulyankunyangka Godala rawangku tjapinma. ²¹ Munuya Mayatja Jesunya malaku pitjanytjaku paṭara watarkuriwiyangku titutjarangku kulinma nyanga alatji panya Godalulanya mukulya pulkangku kanyini.

Kalanya Jesulu ngula małaku pitjala nganananya ngaltunyntju pulkangku mantjira katiku palula tjungu wanka titutjara nyinanytjaku.

²² Uwa, Jesuku walytja kutjupa tjuṭaya puṭu nguwanpa pulkara mulamularingkupai, ka nyura uti tjanampa ngalturingama munu tjananya purkarangku wangkara tjukarurunma. ²³ Ka tjinguru kutjupatjara ma-kuraringkunyangkampa nyura uti tjananya warpungkula wangkara tjukarurunma Godalanguru ma-paćuringkula wiyaringkunytjaku-tawara. Panya ngunytjungku palumpa tjitji warungka tjarpanytjaku-tawara mapalku tJulyalpai, palu purunytjuya tjananya mapalku wangkara tjukarurunma, kaya nyurala tjunguringkuku. Uwa, kutjupa tjutangku kura palyannyangka nyakulaya tjanampa ngalturingama munu wangkara ngulutjunama, kaya kulira kura wantiku ilunytjaku-tawara. Palu nyuranku kuļu ngulu nyangama kura panya tjana palyantja nyura palyantjaku-tawara.

Godanya Kutjula Mirawanima

²⁴⁻²⁵ Uwa, Godanyaya kulinma. Panya paluru kutjungku nyuranya kanyilku punkantjaku-tawara. Munu paluru kutjungku nyuranya palyanyku kanyilku. Paluru kutjungku nyuranya ngurkantara tjukarurunmara tjunkuku palula mirangka kunṭa wiya pukulpa ngaranytjaku. Nyara paluru kutjungku wankarunkupai, panya paluru iyanu palumpa katja Jesunya Christanya nganananya wankarura mayatjangku kanyintjaku. Uwa, mulapa Godanya witulya pulka, pitalytji wiru mulapa nyinanyi, mayatja pulka mulapa mantatja tjuṭaku, ilkaritja tjuṭaku, aŋangu winkiku kuļu. Panya paluru kuwaripatjara alatjiṭu Mayatja pulka nyinangi, munu paluru kuwaritu Mayatja pulka nyinanyi munu titutjara alatjiṭu nyinaku wiyaringkunytja wiya. Kala uti wantintjya wiyangku palunya rawangku alatjiṭu walkunma. Uwa mulapa.

Tjukurpa Jesulu Johnta Utira Nintintja

Revelation

Nyangatja Nganmanytju Nyakula

Wangkanytjaku

Nyangatja Godaku tjukurpa Johntu walkatjunkunytja Jesulu palula utira nintinnyangka. Paluru walkatjunu manta tjukutjukungka nyinara ngura ini Patamatjala, uru pulkangka ngururpa. Panya Jesuku mirpañtu tjutangku palunya witinu tjukurpa Jesunyatjara rawangku para-wangkanyangka. Munuya palunya pautangka katira tjunu ngura nyara palula, ka paluru tjailangka puruny whole nyinangi.

Ka ngura nyara palula nyinanyangka Kurunpa Milmiltu paluna nin-tiningi tjukurpa tjuta, ka paluru kuruntu nyangangi munu kuliningi ngula nyaaringkuku manta winkingka. Ka Jesulu palula wangkangu tjukurpa uwankara paluru nyakunytjatjanungku nyiringka walkatjunkunytjaku munu nyiri palunya iyantjaku ngura tjutakutu Jesuku walytja tjutakutu.

Palu nyara palula arangka ngura winkingka Jesuku mirpañtu tjutangku Godaku walytja tjuta pulkara kuraningi, munuya tjananya ananigi, pungangi, iluntanangi, tjara tjailangka tjarpatjunangi, munuya tjanampa tjituru-tjituru pulka palyanangi. Ka tjukurpa nyangatja Jesulu Johnta utira nintinu paluru walkatjura tjanalakutu iyantjaku tjana kulira raparingkula kunpu ngaranytjaku Jesuku Christaku.

Jesulu tjukurpa tjuta Johnta kurunta nintinu tjukurpa wiru tjuta. Kaya Jesuku walytja tjutangku tjukurpa nyanganpa iriti riitamilaña uti kuliningi ngula nyaaringkuku manta winkingka. Palu Jesuku mirpañtu tjutangkuya riitamilaña puña kuliningi panya tjukurpa nyanganpa kumpilpa nguwanpa. Panya Jesulu tjukurpa nyanganpa nintinu palumpa walytja tjutangku kulira raparingkunytjaku pika pulka tjanala wirkankunyangka. Panya tjukurpa nyanga palula tjanalanguuya kuliningi Godalu yaaltjingara palumpa walytja tjuta wankařunkupai, munuya palulanguru pulkara mulamularingkula nguluringkuwiya rapa nyinangi.

Uwa, Johntu kutjupa kutjupa tjuta kuruntu nyangu panya tjiya wiřu mulapa Godanya nyinapai, munu kuka ayinayini 4 nyalpi tjutatjara, munu angelpa tjuta, mamu ayinayini mankurpa, nyiri rulumapi kit 7-tjara, angelpa 7-tu turampata puura wangkatjingannyangka, nyanytju tjuta, munu lamalama, munu kutjupa kutjupa tjuta kułukulu. Ka nyanganpa uwankara Jesulu nintinu Johnta paluru nganana kuļu nyakula kampa kutjupara pulkara nguriřa kulintjaku, munu kulira nguļu wiya Godaku pulkara mulamularingkunytjaku. Panya tjukurpa nyanga palula tjanalanguyu nganana kulini mulapa Jesunya Christanya Mayatja pulka mulapa nyinanyi uwankarangka waintarintja. Munula kulini mulapa Godalu palumpa mirpañtu tjuta uwankara wiylku Jesula Christalawanungku Satanna tjananya kuļu piřuku wanka nyinanytjaku wiya. Munula piřuku kulini mulapa Godalu palumpa walytja tjuta mantjilku tjana Jesunya tungun-tunguntu rawangku wařannyangka, kaya palula tjungu titutjara nyinaku ngura kuwaritja wiřu mulata.

Tjukurpa nyanganpa ngarinyi:

1:1-8 Johntu nganmanytju wangkanytja

1:9—3:22 Jesulu wangkanytja palumpa walytja tjutaku ngura 7-ta nyinanytja tjutaku
 4:1-11 Godanya walkuntja ngura ilkaritjangka
 5:1—8:1 Nyiri rulumapi munu Lamalamanya
 8:2—11:19 Angelpa 7-tu turampata puura wangkatjingantja
 12:1—15:4 Tjukurpa 7-pa kutjupa Johntu nyakunytja
 15:5—16:21 Angelpa 7-tu ilkaringga pika kura pitinguru mantangka tjutintja
 17:1-18 Minyma kura munu mamu kata 7-tjara
 18:1—19:4 Tawunu Pulka Papilannga Pilukatinytja
 19:5-10 Lamalamangku kuri altinytja
 19:11-21 Nyanytju piranta pitjanytja
 20:1-10 Godalu Satannga warungka waqintyta
 20:11-15 Tjintu malatjangka Godalu ngurkantankunytja
 21:1-8 Ilkari kuwaritja munu manta kuwaritja
 21:9—22:5 Tawunu Jerusalemania kuwaritja
 22:6-21 Jesunya malaku pitjanytja

Johntu Nganmanytju Wangkanytja

¹⁻² Kulinmaya Jesuku walytja tjutangku! Panya ngayuluña Johnnga, Jesuku Christaku warkaripai, munuña tjukurpa nyangatja kuvari nyurampa walkatjunanyi Jesulu ngayunya nintinnyangka. Panya Godalu palula utira tjakultjunu kuvari nguwanpa nyaaringkuku nyanga palula malangka. Munu paluru angelpa witura iyanu ngayulakutu arā nyanga palunya ngayula wirkara wangkara nintintjaku. Kaña nintiringkula kuvari nyanga nyurampa ngapartji walkatjunanyi uwankara ngayulu nyakunytjatjanungku kulintjatjanungku, panya Godanya mukuringanyi nyura kuļu kulintjaku tjukurpa nyanga kuvari nguwanpa nyairingkunytjanya. Nyangatjaña tjukurpa Godalanguņu nyurala tjakultjunanyi, Jesulu Christalu kuļu wangkanytja. ³ Ka nyura tjukurpa nyanga palunya nyakula kulinnyangka nyuranya Godalu pukulmankuku. Ka nyura tjukurpa nyangatja wangañarangku kulirampa palya alatjitu nyinaku. Panya arā uwankara nyanga ngayulu nyakula nintiringkunytjanya kuvari nguwanpa utiringkuku.

⁴ Uwa, kaña ngayulu lita nyangatja kuvari nyuralakutu ma-iyanī Godaku walytja tjutakutu manta pala Aitjala nyinanytja tjutakutu, panya nyura tawunu 7-ta nyinanyi munu nyura church walytja walytjangka tjunguringkupai Godanya walkuntjikitja. Ka Godalu nyuranya pukultjungku kanyinma munu kurunpa pukulpa nyinanytjaku palyanma. Paluru panya kuwaripatjara mulapa nyinanytjatanu kuvari nyanga nyinanyitu munu paluru panya ngula pitjanyi. Godanya panya mayatja pulka nyinanyi tjiya wirungka. Ka panya palumpa Kurunpa 7 ngaranyi palula kuranyu. Nyanga paluru tjana kuļu nyuranya pukultjungku kanyinma pukulpa mulapa nyinanytjaku. ⁵ Ka palu purunytjuṭu Jesulu Christalu kuļu nyuranya pukulmara kanyinma. Paluru panya mantakutu pitjala palumpa mamaku tjukurpa tungun-tunguntu wangkangi munu panya ilungu. Ka panya Mamaļu palunya-warara pakaltjinganu munu palulanguru nganananyaalpi ilunyangka palu purunytjuṭu pakaltjingalku. Ka Jesunya mayatja pulka mulapa nyinanyi mayatja mantatja uwankarangka waintarira.

Panya paluru-mantu nganampa pulkara mukuringkupai, ka panya nganananya kura palyantjitjanguru pungkunytjaku ngarangi palu paluru

nganañanya kura nyinanyangka nyakula ngalkilpa ilungu nganañanya karalyarira wankaru nyinanytjaku. ⁶ Munu palulanguru paluru nganañanya waltyjanmanu Godala wangañarangku kulintjaku, munu paluru nganañanya tjukurtjara tjuña tjunu Godaku palumpa Mamaku nganañanya añañgu watarkitja tjuñangka Tjukurpa Palya tjakultjunkunytjaku tjana ngapartji kulira Jesuku waltyjaringkunytjaku. Uwa, Jesunya panya wiru mulapa pitalytji pulka witulya pulkanya nyinanyi, kala uti palunya titutjarangku mirawañima. Uwa, mulapala uti palunya kutju walkunma.

⁷ Nyawaya! Jesunya ngula ngangkalingka malaku pitjaku, kala añañgu winkingku nyakuku, munu puñu katakutjarangkaya wakara utitjunkunytjalu tjana kulu nyakuku. Munuya palunya nyakula añañgu uwankara pulkara tjituru-tjitururira ulaku. Uwa, mulapa nyanga alatjiriku.

⁸ Ka Mayatja Godalu nyanga alatji wangkanyi, “Panya ngayulu kuwari-patjara mulapa uwankara wiyangka nyinanytjanya, mununa kuwari paluruñtu nyinanyi titutjara, mununa uwankara wiyaringkunyangka ngayulu nyinaku alatjiñtu paluruñtu. Munu panyaña ngula pitjaku paluruñtu.” Alatji Godalu palurunku wangkanyi witulya pulkangku.

Jesulu Wangkanytja Palumpa Walytja Tjuñangka Manta Panya Aitjala Nyinanytja Tjuñangka

⁹ Ngayulu Johnnga, nyurampa panya walytja, panya nyuntu nganañanya Jesuku walytja tjuña nyinanyi. Ka panya Godanya wantipai tjuñangku nyuranya kuralpai, palu purunypañiya ngayunya kulu kuralpai, panya nganañanya Jesuku walytjaringkunyangka. Palu tjana ngayunya alatji kurannyañgka ngayulu tungun-tunguntu rapangku Jesunya wañanangi nyura purunytru. Kañiya palulanguru witinu mununiya katira tjunu manta tjukutjukungka uru pulkangka ngururpa ngura ini Patamatjala. Panya ngayulu Godaku tjukurpa ngura tjuñangka para-ngarala wangkangi, tjukurpa panya Jesunyatjara. Kañiya nyara palulanguru ngayunya ngura nyanga palula katira wantikatingu. ¹⁰ Kaña manta nyanga palula nyinangi rawa alatjiñtu, ka Mayatjaku tjirirpi ngaranyangka Kurunpa Milmiltu ngayunya witulya pulkangku nintiningi.* Kaña palulanguru tjañangka wangka kulinu pulkara wangkanyangka, panya turampata wangkatjinggañgalpai, palu purunypañiya wangka kulinu. ¹¹ Alatjini wangkangu, “Nyuntu kuwari nyanga kutjupa kutjupa tjuña nyanganyi, munun nyakunytjatjanungku nyiringka walkatjura munu iyala Jesuku walytja tjuñakutu ngura nyara kutjupa tjuñangka nyinanytja tjuñakutu ini ngura nyangankutu Ipitjalakutu, Muunalakutu, Puukamalakutu, Tjayatiralakutu, Tjaatitjalakutu, Pila-talpiyalakutu, munu Layatiyalakutu.” Alatjini wangkangu.

¹² Kaña kulintjatjanungku kulinu, “Nganaluni nyangatja wangkanyi?” Mununa pinkurarara nyangu puñu panya tili katura kanyilpai ⁷ ngaranyangka. Puñu panya paluru tjana gold-nguru palyantja. ¹³ Ka palula tjanala ngururpa ngarangi wati purunypa mantara waratjara munu paluru pilpirwanungku nanpa purunypa karpira kanyiningi gold-nguru palyantja. ¹⁴ Ka paluru mangka piranpa mulapa tili pulka purunypa irnyaningi ngangkali purunypa, munu paluru kuru waru tili purunypa irnya-irnyaningi. ¹⁵ Munu paluru tjina irnyaningi, panya ayana warungka tjunkunyangka waru tili winki irnyalpai, palu purunypa. Kaña palunya wangka kulinu kapi uru wala rurkuntja purunypa. ¹⁶ Ka paluru mara

* ^{1:10} Mayatjaku tjirirpi panya Sunday, panya tjirirpi nyara palula Jesunya ilunytjatjanu wankaringkula pakañu, kala palulanguru Jesuku walytja tjuñangku tjirirpi panya palula tjunguringkula palunya walkulpai Sunday kutjupa Sunday kutjupa.

wakungku kililpi 7 kanyiningi. Munu tjaangku tjuła wara iři kampa kutjara kanyiningi. Ka yunpa paluru pitalytji pulkangku irnyaningo, panya tjirirpingku kalala irnyalpai, palu purunypa.

¹⁷ Munuña palunya nyakula punkařa ngaringi palula tjinangka miri ilunytja purunypa. Kaňi mara wakunguru pampura wangkangu, "Nguluringkuwiya rapariwa. Ngayuluña nganmanyitja mulapa uwankara wiyangkalpi nyinanytjanya, munuña titutjara mulapa nyinanyi panya manta ilkarı wiyaringkunyaŋkaña ngayulu nyinaku alatjitu wiyaringkuwiya. ¹⁸ Ngayuluña Wanka Nyinapainya. Ngayulu ilungu palu kuwariňa wanka titutjara nyinanyi wiyaringkunytja wiya alatjitu. Ngayulu mayatja pulkangku ngurkantara wangkapai ilunytjaku munuña ngayulu ngurkantankupai ngananya miriku ngurakutu ankuku.

¹⁹ "Uwa John, nyuntu kuvari nyakunytjatjanungku nyiringka walkatjura panya ngayulu nyuntunya nintintja uwankara. Panya ngayulu kuvari nyuntunya nintini kuvari kuranyitja nyaaringanyi munu piruku ngula malatja nyaaringkuku. Ka nyuntu nyanganpa uwankara nyakunytjatjanungku nyiringka walkatjura. ²⁰ Kuwarin nyanganyi kililpi nyanga 7 ngayulu mara wakungku kanyinnyangka, munun piruku nyanganyi puňu nyanga tili katuřa kanyilpai 7 ngayula para-ngařala arintankunyangka. Palu nyanga tjana nyaa nintini kililpi, tili kanyilpai 7-tu kulu? Wiya, nyanga alatjiya nintini. Kililpi 7-tu nintini angelpa 7 panya paluru tjana kanyilpai Godaku walytja tjuta ngura nyara 7-ta nyinanytja tjuta. Ka tili kanyilpai 7-tu nintini Godaku walytja tjuta tawunu nyara 7-ta nyinanytja tjuta." Panya nyanga alatjini Jesulu kuvari nintiningi.

2

1. *Tjukurpa Ipitjala Nyinanytja Tjułaku*

¹ Mununi palulanguru piruku wangkangu alatji, "Panya angelpa kutjungku nyara tjananya kanyini Godaku walytja tjuta tawunu ini Ipitjala nyinanytja tjuta. Ka nyuntu angelpa palulakutu tjukurpa nyangatja walkatjura ma-iyla tjana nyakunytjaku alatji,

Ngayulu kililpi panya 7 mara wakungku kanyintjalu nyurala wangkanyi, puňu tili katuřa kanyilpai 7-ta ngururwanu parapitjalinkunytjalu panya. ² Ngayuluña nyurampa ninti. Nyura panya ngayuku pulkara war̄karipai, munuňi nyura tungun-tunguntu waňalpai wantinytja wiyangku. Munu nyura wati kura tjułangka tjunguringkuwiyangku wantipai wirungku. Ka panya kutjupa tjutangku ngunti wangkapai, 'Ngayunyanı Christalu witura iyanu.' Ka panya alatji wangkanyangka nyura kulira wantipai alatji wangkara, 'Nyan-gantuya ngunti wangkanyi.'

³ Uwa, mulapa nyura ngayunya tungun-tunguntu waňalpai. Panya nyura ngayuku mulamularingkunyangka kutjupa tjutangku nyuranya analpai munu kuralpai, ka alatjirinyangka nyura ngayunya wantinytja wiyangku wirungku titutjarangku waňani. Kaňa pulkara nyurampa pukularinyi.

⁴⁻⁵ Palu kulila! Ngayulu kutjunguru tjituřu-tjitururinyi, ngayuku panya nyura pukularinytja wiyanguru. Nganmanypa panya nyura ngayuku mukulya mulapa nyinangi, palu kuvari nyanga nyura nyaaku ngayuku mukuringkunytja wiyaringu? Uti nyura panya palu purunytjutu ngayunya kulinma, panya nganmanypa nyura ngayuku pulkara mukuringangi. Palu nyura tjinguru rawa ngayuku

pukularintja wiya nyinanyangkaña ngayulu pitjala nyurampa puñu panya tili katura kanyilpai mantjilku.

⁶ Palu nyangatja nyura wiruña kulilpai panya nyura wati ini Nikilatjanya wanalpai tjutaku kuraringkupai, panya nyara paluru tjana Godaku tjukurpa ngunti-ngunti nintilpai. Ka ngayulu palu purunypatu ngunti nintilpai tjutaku kuraringanyi.

⁷ Uwa, nyura pina ala ngaralampa wanyu ngalya-kulinma Kurunpa Milmiltu wangkanyangka Godaku walytja tjutangka. Palu kutjupa tjutangku nyuranya wangkanyangkaya ngayunya kulinma wantintja wiyangku mununi titutjarangku ngayunya tunguntunguntu wañanma. Kaña alatji wiruña wañannyangka nyuranya tjunkuku Godaku ngura wirungka mai wanka ngalkuntjaku. Panya Mamaku ngurangka puñu wankarunkupai ngaranyi, ka nyura puñu palulanguru mai ngalkula wanka titutjara nyinaku.

Uwa, alatji tjanampa walkatjura ngayuku walytja tjutaku ngura nyara Ipitjala nyinanytja tjutaku.”

2. *Tjukurpa Muunala Nyinanytja Tjutaku*

⁸ Munu palulanguruñi piruku wangkangu, “Panya angelpa kutjupangku nyara tjananya kanyini Godaku walytja tjuta tawunu ini Muunala nyinanytja tjuta. Ka nyuntu angelpa palulakutu tjukurpa nyangatja walkatjura ma-iyalta tjana nyakunytjaku alatji,

Ngayuluña kuwaripatjara mulapa nyinangi uwankara wiya ngaranyangka, mununa titutjara mulapa nyinanyitu, panya manta ilkari wiyaringkunyangka ngayulu nyinaku alatjitu wiyaringkuwiya. Ngayulu panyañi ilungu mununa palulanguru wankaringkula pakañu. ⁹ Ngayulu nyurampa ninti panya nyuranya mirpañtju tjutangku rawangku anara wangkapai munu pungkula kuralpai munu nyii-nyiipungkupai. Mununa ninti panya nyura ngaltutjara maralpa mani wiya nyinanyi. Palu pukularimaya panya ngayula nyura marangka alatjitu wankaru nyinanyi pukulpa. Ka ngayulu ninti panya kutjupa tjutangkuya nyuranya kura wangkara analpai. Paluru tjanayanku mirawañira walytjangku wangkapai, ‘Nganana Jew tjuta, Godanya tjukarurungku wañalpai!’ Palu wiyyaya tjana Satanku walytja tjuta munuya palunya wañalpai. ¹⁰ Ka paluru tjana nyuranya rawangku anara wangkara pungkula kurannyangka nguluringkuwiyyaya rapa nyinama.

Kulila! Mamu panya Satantu añañu kura tjuta wituwitulku nyuranya witira tjailangka tjarpatkunkunytjaku. Panya mamu paluru mukuringanyi nyuranya arkara punkatjingantjikitja munu paluru tjintu 10 nyuranya rawangku arkalku tjaila unngu kanyira nyura kuraringkula ngayuku watarkurinytjaku. Palu ngayunyanuya wantintja wiyangku titutjarangku kulinma. Tjinguruuya nyuranya miri pungkunytjikitjangku wangkaku, kañiya ngayunya tunguntunguntu wañanma alatjitu ilunytjakutu-wangkara. Kaña nyuranya puñuru wankanya unguku, panya wati raitjangka wirtjapakara waintarinyangkaya palula katangka puñuru nyalpitjara tjunkupai, palu purunypa, panya ngayulu nyuranya wankalku titutjara ngayula tjungu pukulpa nyinanytjaku.

¹¹ Uwa, nyura pina ala ngaralampa wanyu ngalya-kulinma Kurunpa Milmiltu wangkanyangka Godaku walytja tjutangka. Palu nyuranya anannyangka wantintja wiyangkuñi titutjarangku tungun-tunguntu

wañanma. Ka alatji rawangku wañannyangkaña nyuranya wankaru kanyilku warungka panya ilunytjaku-tawara.
Uwa, wanyu tjanampa nyanga alatji walkatjura ma-iyala panya ngayuku walytja tjułakutu nyara Muunala nyinanytja tjułakutu.”

3. Tjukurpa Puukamala Nyinanytja Tjułaku

¹² Munuṇi palulanguru piruku wangkangu, “Panya angelpa kutjupangku nyara tjananya kanyini Godaku walytja tjuła tawunu ini Puukamala nyinanytja tjuła. Ka nyuntu angelpa palulakutu tjukurpa nyangatja walkatjura ma-iyala tjanā nyakunytjaku alatji,

Ngayuluṇa tjuła wara iři kampa kutjaratjara kanyintjalu nyuranya wangkanyi. ¹³ Ngayuluṇa ninti nyurampa nguraku, panya nyara palula Satannga mayatjaringu, kaya tjułangku palunya wañani. Palu nyura tjukarurungku palunya wantira ngayunya kutju kulini. Ngura nyara palulaya panya wati ngayuku malpa ini Antipanya mungaṭu pungkula iluntanu tjukurpa ngayunyatjara tungun-tunguntu para-wangkanyangka. Kaṇi nyura nguluringkuwiyangku ngayunya rawangku wañaningi wantinytja wiyangku ngura pala Satannga nyinanytjala, kaṇa pulkara pukularingu.

¹⁴ Mulapa nyura ngayunya rawangku wañani. Palu kulila! Ngayulu tjituřu-tjitururingu panya nyura paintja wiyangku wantinyi kutjupa tjarangku ngunti wangkanyangka. Panya tjanā kulira mulamularinganyi wati miri ini Pailamalu wangkanytjituřu. Panya iriti paluru ngunti nintiningi wati ini Pailakala, ka wati paluru ngapartji aŋangu Israelkunu tjuła kura nyinanytjaku wituwituningi. Paluru panya tjananya wituwituningi kuka panya god ngalypa-ngalypa ungkunytja ngalkuntjaku, kaya mulapaṭu ngalkuningi Godala tungunpungkula. Munu paluru piruku tjananya wituwituningi kutjupangka kutjupangka pirtjinytjaku, kaya palunya kulinigi Godalu paintjitja wantira. Ka nyuralanguru kuļu palu purunypa kutjupa tjarangku kuwari palyani Pailamaku panya tjukurpa kulintjatjanungku. ¹⁵ Ka palu purunypa tjara kutjupa kulira mulamularingkupai wati ini Nikilatjalu ngunti wangkanytjituřu.

¹⁶ Palu kulila, tjukurpa nyanga Nikilatjaku pulampa Pailamaku kura ngaranyi, ka nyura wantiwiyangku tjananya painma tjukurpa palumpa pulampa kulintja tjuła. Palu nyura paintja wiyangku wantinyangkampa ngayulu pitjala tjananya pikangku pungkuku tjuła wara panya tjaangku kanyintjtjangka.

¹⁷ Uwa, nyura pina ala ngaralampa wanyu ngalya-kulinma Kuruṇpa Milmiltu wangkanyangka Godaku walytja tjułangka. Munu tjanā nyuranya anara wangkanyangka ngayunya wantinytja wiyangku rawangku wañanma. Ka aŋangungkumpa alatji ngayunya tunguntunguntu wañannyangka ngayulu palunya ungkuku mai kumpilitja ini panya *manna*, mununa pirukutu palunya ungkuku apu piranpa ini palunyatjara, ini kuwaritja. Ka paluru kutju initjara mantjira ninti nyinaku, kaya kutjupa uwankara ngurpa nyinaku ini pala palumpa.

Uwa, wanyu tjanampa nyanga alatji walkatjura ma-iyala panya ngayuku walytja tjułakutu nyara Puukamala nyinanytja tjułakutu.”

4. Tjukurpa Tjayatirala Nyinanytja Tjułaku

¹⁸ Munuṇi palulanguru piruku wangkangu, “Panya angelpa kutjupangku nyara tjananya kanyini Godaku walytja tjuła tawunu ini Tjayatirala

nyinanytja tjuta. Ka nyuntu angelpa palulakutu tjukurpa nyangatja walkatjura ma-iyala tjana nyakunytjaku alatji,

Ngayuluña Godaku katjangku nyurala tjukurpa nyangatja wangkanyi. Ngayulu panya kuру waru tili purunypa irnyańi munuńa tjina ayana yalawana tjalkanymankuntya purunypa irnyańi.

¹⁹ Palu kulila! Ngayulu nyurampa ninti nyura palyantjtjaku, panya nyura ngayuku pulkařa mukuringanyi, munu nyura ngaltutjara tjuta ngaltunytjungku ungpupai. Ngayulu ninti panya nyura mulapa ngayunya kulini, munu nyura ngayuku warka wirura palyalpai. Munu panya nyura rawangku tungun-tunguntu ngayunya kutju wañalpai. Panya nyura nganmanypa tjukaruru nyinara ngayuku wirura palyalpai, palu kuwari nyura kunpu pulkaringkula pulka mulapalta palyani, ngañmanyitjangka waintara.

²⁰ Palu kulila! Ngayulu kutjunguru tjituru-tjitururinyi panya nyanga alatji nyura kulira palyannyangka panya minyma ini Tjiitjipilnga nyura paintja wiyangku wantipai nyurala tjukurpa ngunti wangkara nintinnyangka. Palurunku wangkapai, 'Ngayunyanı Godalu wangkara iyanu.' Palu paluru ngunti nyuranya kurańi nyura palumpa tjukurpa wañantjaku. Panya paluru wangkapai anangu kutjupangka kam-pangkańu ngunti ngarintjaku munu kuka panya god ngalypa-ngalypa ungpunytja ngalkuntjaku.

²¹⁻²² Alatjtuna wangkangu palunya kura wantira kampa kutjur-parintjaku, munuńa patara patara, ka ngayunya wantinyi kulintja wiyangku. Kańa palulanguru pikatjaralku minyma pala palunya pulkara tjituru-tjitururinytjaku, palula panya ngunti ngaripai tjuta kuļuńa pika pulka ungkuku. Palu wati nyangantu mapalkungku kampa kutjuparintja wiyangku wantinyangkańa kuwaritu nyanga palunya palyalku. ²³ Munuńa minyma nyanga palumpa tjukurpa lipintankupai tjuta kuļu iluntankuku. Kaya ngayuku walijta tjutangku tawunu panya tjutanguru nyangatja kulira urulyaralku, 'Awari! Jesulu nintingku nyakupai anangu uwankarangku unngu kulin-nyangka.' Alatjiya kulilkul ngayuku walijta tjutangku. Kańa ngayulu tjananya tungunpungkula kuralpai tjuta warungka wañiku, palu tjukaruru nyinapai tjutanा wirura kanyilku.

²⁴ Ka ngura pala Tjayatirala kampa kutjara nyinanyi minyma panya palunya wañalpai munu ngayunya kulipai, ka nyura ngayunya wañalpai tjutangku wirungku palunya kulilwiyangku wantinyi. Panya palunya kulipai tjutangkuya alatji wangkapai, 'Nyangatja Satanku wangka nganana kulini, tjukurpa pulka milmilpa.' Ka nyura tjukurpa nyangaku nintiringkuwiyangku wantinyangka ngayulu pukularingu. Munuńa palulanguru nyuranya piruku wangkanytja wiyangku wantinyi. ²⁵ Palu panya nyura ngayunya tungun-tunguntu wañani palu purunytjuniya wanyu rawangku wañanma ngayulu pitjanytjakutu-wangkara.

²⁶⁻²⁷ Palu nyura ngayuku wangka rawangku kulira tjukarurungku wañannyangkampańa ngayulu nyuranya mayatja pulka tjunkuku anangu tjuta ngura winkingka kanyintjaku. Panya Mamaluńi tjunu mayatjarira tjananya kanyintjaku, ka nyura palu purunytjutu tjananya mayatjarira kanyilku wirungku. Munu nyura mayatja kunpungku tjananya wituwitura kanyilku, kaya tjinguru tungun-tungunarinyangka nyura tjananya pungkula wiyaliku panya piti pungkula kańantara minya-minyantja purunypa. ²⁸ Kańa nyuranya

mayatja tjunkula ungkuku kililpi panya Katanya tjirirpikutu pakantjanya.

²⁹ Uwa, nyura pina ala ngaralampa wanyu ngalya-kulinma Kurunpa Milmiltu wangkanyangka Godaku waltyta tjutangka.
Uwa, wanyu tjanampa nyanga alatji walkatjura ma-iyala panya ngayuku waltyta tjutakutu nyara Tjayatirala nyinanytja tjutakutu.”

3

5. *Tjukurpa Tjaatitjala Nyinanytja Tjutaku*

¹ Munu palulanguruни piruku wangkangu, “Panya angelpa kutjupangku nyara tjananya kanyini Godaku waltyta tjuṭa tawunu ini Tjaatitjala nyinanytja tjuṭa. Ka nyuntu angelpa palulakutu tjukurpa nyangatja walkatjura ma-iyala tjana nyakunytjaku alatji,

Ngayulu panyaña Godaku kurunpa 7 kanyini, kililpi panya 7 kulu. Munu ngayulu ninti nyurampa panya anangu tjutangku wangkapai nyura kunyu wirura ngayunya waŋalpai. Palu wiya, nyura iluru-ilurungku ngayunya waŋanı mulamulangku wiya. ² Nyura ngayuku war̄ka tjukarurungku palyantja wiya kaŋa nyakula kulini Godanya nyurampa pukularinytja wiya alatji iluru-iluru nyinanyangka. Kaya kulira wankariwa munu piruku kurunpa wangaŋarangku kulira palyala Godaku tjukurpa nyura watarkurinytjaku-tawara.

³ Panyatjaya kulinma tjukurpa panya nyuranya ngañmanytju wangkara nintintja, munu wangaŋarangku kulinma. Munuya kura tjuṭa kulira wantima piruku palyantja wiyangku. Ala, wankariwaya munuya tjukarurungku kulinma panya ngayulu nyurala watarkungka wirkankunytjaku-tawara, munuya ala-alangku nyangama.

⁴ Uwa, ngura pala Tjaatitjala tjuṭa watarku nyinanyi, palu nyura maŋkurtu kutju Godanya mulamulangku kulini. Panya aŋangungku mantara paltjilpai ka palyaringkupai, palu purunypa nyura palya nyinanyi kura wantira. Palulanguru nyura mantara piřantjara ngayula tjungu ankuku, panya Godanya pukularinyi nyura ngayunya wirura waŋannyangka. ⁵ Kaya uwankarangku ngayunya wantintyta wiyangku rawangku wanarampa nyanga palu purunypa mantara piřantjara rawa nyinaku. Kaŋa panya nyuranya ini kanyini ngayuku nyiringka panya wanka titutjara nyinanytjaku. Ini pala palunya tjananya ngayulu kurantja wiyangku kanyilku nyura ngayunya tungun-tunguntu waŋannyangka. Ngayulu Godala munu palumpa angelpa tjuṭangka miřangka wangkaku nyura panya ngayuku waltyta tjuṭa nyinanyangka.

⁶ Uwa, nyura pina alangkumpa ngalya-kulinma Kurunpa Milmiltu wangkanyangka Godaku waltyta tjutangka.
Uwa, wanyu tjanampa nyanga alatji walkatjura ma-iyala panya ngayuku waltyta tjutakutu nyara Tjaatitjala nyinanytja tjutakutu.”

6. *Tjukurpa Pila-talpiyala Nyinanytja Tjutaku*

⁷ Munu palulanguruни piruku wangkangu, “Panya angelpa kutjupangku nyara tjananya kanyini Jesuku waltyta tjuṭa tawunu ini Pila-talpiyala nyinanytja tjuṭa. Ka nyuntu angelpa palulakutu tjukurpa nyangatja walkatjura ma-iyala tjana nyakunytjaku alatji,

Ngayulu kutju palya mulapa, tjukarurungku kulira palyalpai munu panyana kanyini tjamu Davidaku key ngayuku nguraku. Ka key nyanga palula ngayulu alannyangka kutjupangku puṭu patilku. Munu

palu purunypaṭu kutjupangku puṭu alalku ngayulu patinnyangka.
⁸ Ngayuluṇa nyurampa ninti panya nyura ngaltutjara pulka wiya. Palu nyura ngayuku tjukurpa wangaṇarangku kulilpai, munuṇi nyura tungun-tunguntu waṇalpai wantintytja wiyangku. Kaṇa nyurala kuranyu ngayulu tuwa aḷaṛa wantingu nyura tjarpanytjaku, ka aṇangu kutjupangku puṭu patliku.

⁹ Kulila! Nyara nyurampa ngurangkaya kutjupa tjutangku ngunti wangkapai alatji wangkara, ‘Nganana Jew tjuta, munula Godanya tjukarurungku waṇalpai.’ Palu wiya, tjana Satannga waṇalpai. Ka ngunti wangkapai palunya tjananya ngayulu katira tjarulku nyurala tjinangka kuranyu tultjungarakatinytjaku, kaya pina aḷaringkula kulilkku, ‘Mulapa Mayatjanya tjanampa mukuringanyi.’

¹⁰ Palu ngayulu nyurala wangkangu ngayunya rawangku waṇantjaku, kaṇi nyura mulapa ngayunya tungun-tunguntu waṇanigi wantintytja wiyangku. Palu ngula manta winkingka Satantu aṇangu tjuta arkara kuralku Godaku watarkurintjaku. Palu nyara palula aṛa ngayulu nyuranya ngalkira kanyilku nyura panya ngayunya tungun-tunguntu waṇannyangka, ka nyuranya puṭu kuralku Satantu.

¹¹ Ngayulu kuwari nguwanpa małaku pitjaku. Ka panya nyura ngayunya wirūra waṇani, nyara palu purunytyjuna rawangku waṇanma, kaṇa nyuranya wiru ungkuku. Palu kutjupangku tjinguru nyuranya mukumukura ma-katinyangka ngayulu nyuranya puṭu wiru panya ungkuku. Kaya nyanga alatjingka-tawara kulira wantima.

¹² Palu rawangkuṇiwaṇanma kaṇa nyuranya Godala tjungulku ngura panya walkulpaingka nyura tiṭutjara palula nyinanytjaku. Ka nyura ankunytja wiya nyinaku alatjitu. Kaṇa nyurala walkatjunkuku Godanya ini, munuṇa piruku walkatjunkuku ini Godaku ngura, panya ngura kuwaritja Jerusalemanyia. Ngura nyara paluru ilkaritjanguru ngula ngalya-ukalingkuku Godalanguṇu. Munuṇa piruku nyurala walkatjunkuku ini ngayuku, ini kuwaritja.

¹³ Uwa, nyara pina alangku kulirampa ngalya-kulinma Kurunpa Milmiltu wangkanyangka Godaku walytja tjutangka.
 Uwa, wanyu tjanampa nyanga alatji walkatjura ma-iyala panya ngayuku walytja tjutakutu nyara Pila-talpiyala nyinanytja tjutakutu.”

7. *Tjukurpa Layatiyala Nyinanytja Tjutaku*

¹⁴ Munu palulanguruni piruku wangkangu, “Panya angelpa kutjupangku nyara tjananya kanyini Jesuku walytja tjuta tawunu ini Layatiyala nyinanytja tjuta. Ka nyuntu angelpa palulakutu tjukurpa nyangatja walkatjura ma-iyala tjana nyakunytjaku alatji,

Ngayuluṇa Mamaku tjukurpa tjakultjunkupai mulapa. Ngayuluṇa panya tjukarurungku wangkapai munuṇa ngayulu panya ngaṇmanyitja mulapa panya Mamalu ngali ilkarī manta uwankara iriti paluṇu.

¹⁵ Ngayulu nyurampa ninti munuṇa nyangangi nyura kutjupa kutjupa tjuta palyannyangka, panya nyura ngayunya kurunpa winkingku waṇantja wiya nyuuru-nyuuru purunypa nyinanyi. Kaṇa nyurampa mukuringanyi kurunpa winkingku ngayunya waṇantjaku. Palu nyangatja nyura kunkuntu purunytyu waṇani. Utini nyura mula-mulangku waṇanma, munta tjinguru ngayuku mukuringkuwiyangku wantirampaniya wantima alatjitu nyuuru-nyuurungku waṇantja

wiyangku. ¹⁶ Panya alatji nyura ngayunya ngunti wañannyangka ngayulu nyuranya ngula pailku. Panya mai kura ngalkula ulkap-atjunkupai, palu purunypa ngayulu nyuranya wantiku.

¹⁷ Nyuranku walytjangku mirawanipai nyanga alatji, ‘Nganañalanku mani pulkatjara nyinanyi. Alatjiṭula pulka kanyini.’ Palu wiya ngurpangku nyura nyanga alatji wangkanyi. Ngayulu nyuranya nyakula ngalturinganyi, panya nyura mani wiya, munu nyura nikiti, munu kuru pati.

¹⁸ Palu kulilaya, munuya pitjala ngayula mantjila wiru mulapa. Panya ngayula mantjirampa nyura mani pulkatjara purunypa nyinaku. Munuya pitjala mantara piranta mantjira tjarpa kunṭaringkunytjaku-tawara. Munuya mantjila kuru nyitilpai mirantjikitjangku.

¹⁹ Nyaanguruna nyurala nyangatja wangkanyi? Wiya ngayulu nyurampa pulkara mukuringkula paini nyura tjukaruru nyinanytjaku. Kaya mulamula pinkurarala Godalakutu kura uwankara wantira.

²⁰ Kulilaya! Ngayuluna ngarala tuwa punga-punganyi, ka kutjupangku ngayunya wangka kulira tuwa alannyangka ngayulu palula tjarpala tjungu nyinaku munuli mai ngalkuku.

²¹ Uwa, wantintja wiyangkuṇya rawangku wañanma. Kaṇa nyuranya palyanmankuku ngayula itingka nyinara aŋangu tjuṭa kanyintjaku. Panya ngayulu Mamaku tjukurpa tungun-tunguntu palyaningi wantintja wiyangku. Munuṇa ilunytjatjanu wankaringkula Mamala tjunguringkula nyinakatingu palumpa tjiya wirungka. Munuli tjungungku kanyini manta winki. Ka palu purunypa nyura ngula ngayula tjunguringkula manta winki kanyilku.

²² Uwa, nyura pina alangkumpa ngalya-kulinma Kurunpa Milmiltu wangkanyangka Godaku walytja tjuṭangka.

Uwa, wanyu tjanampa nyanga alatji walkatjura ma-iyala panya ngayuku walytja tjuṭakutu nyara Layatiyala nyinanytja tjuṭaku.”

4

Godanya Walkuntja Ngura Ilkaritjangka

¹ Palunyatjanungkuna piruku nyangu nyara tuwa alaringu ilkaringka. Ka wangka pulkara wangkangu ilkariringuru turampata purunypa, panya ngayulanı ngañmanytju wangkangu Jesulu, panya paluru. Mununi paluru altira wangkangu alatji, “Ngalya-pitja ngayulakutu mununi ilangku nyakula kulila, kaṇanta nintila nyaaringkuku ngula nyanganguru nyanga palula małangka.”

² Kaṇi Kurunpa Milmiltu ngayunya mapalku katingu ilkarikutu, kaṇa nyangu tjiya wiru panya mayatja pulka nyinapai ilkariringka ngaranyangka. Ka tjiya nyara palula kutjupa nyinangi. ³ Ka palumpa pitalytjingku irnyaningi puli kala wirutjara purunyti. Ka tjiya panya wirungka tjuṭirangu purunypa para-arintara ngarangi kala puli ukiri-ukiri wirutjara palu purunypa.

⁴ Ka tjiya wiru kutjupa tjuṭa ngarangi panya mayatja pulka kutjupa tjuṭa nyinapai palu purunypatu, ka tjiya nampa nyangatja 24 para-nyinara arintara wañaningi, ka tjiya palumpa ngururpa ngarangi. Ka tjiya nyara palula tjanala nyinangi tjlpi tjuṭa. Paluru tjana mantara pirantjara nyinangi munuya katangka puṭuru purunypa kanyiningi, puṭuru panya mayatjangku kanyilpai gold-nguru palyantja, palu purunypa.

⁵ Ka tjiya panya ngururitjanguru pinpangi wanangara tuu winki. Ka tjiya nyara palula kuranyu waru tjangi ⁷ ngarala kampangi nyara paluru tjana Godaku kurunpa ⁷. ⁶ Munu tjiya palula kuranyu uru pulka kaltara purunypa ngaringi kalawatja purunypa wiru mulapa.

Ka ngururpa kuka nyalpitjara kutjara kutjara ngarangi tjiya palula itingka. Nyara paluru tjana kuru kutjara wiya, kuru tjuta mularljara pilpira munu tjañangka kuļu. ⁷ Munuya titutitu ngarangi, kutjupa lion purunypa, kutjupa puluka purunypa, munu kutjupa yunpa anangu purunypa, ka kutjupa walawuru purunypa nyalpi lipiringkuļa ankupaitjara ngarangi. ⁸ Palu tjana nyalpi kutjara wiya nyalpi mankur-mankurtjara ngarangi, ka kuru panya tjuta mulapa anangungka winki alatjitu ngarangi, nyalpingka unngu kuļu tjuta mulapa. Kuka nyara paluru tjana rawangku tjintu tjutangka munga tjutangka kuļu inma inkara walikuningi alatji wangkara, “Mayatja Godanya milmilpa alatjitu, witulya pulka mulapa uwankarangka waintarinjtja titutjara nyinanyi.

Paluru kuwaripatjara nyinanytjanya, munu kuvari paluruļu nyinanyi, munu ngula pitjaku paluruļu panya kuwaripatjara nyinanytjanya.”

⁹⁻¹⁰ Nyara paluru tjana rawangku tjuta-arangku inma inkara palunya walikulpai nyara tjiya wirungka wanka titutjara nyinanytjanya, munuya palunya wirunmankupai palumpa pukularira. Ka paluru tjana inma tjaatarira inkanyangka tjlpi panya tjuta watungařakatipai tjiya panya palula kuranyu munuya pala palunya walikulpai. Munuya palulanguru puturu panya mayatjaku tjananku kanyira mantjira tjunkupai tjiya panya palula kuranyu munuya paluru tjana wangkapai nyanga alatji,

¹¹ “Nyuntun nganampa Mayatja Godanya nyinanyi mayatja wiru mulapa, ka nyuntunya uwankarangku rawangku walikuntjaku ngaranyi witulya pitalytji pulkanya.

Panya nyuntu uwankara witulyangku palunu.

Munun nyuntu mukuringkula kuwaripatjara tjananya uwankara palura tjunu mantatja tjuta munu ilkaritja tjuta kuļu tjana wanka nyinanytjaku.”

Uwa, alatiya palunya wangkara walikuningi tjlpi panya tjutangku.

5

Nyiri Rulumapi munu Lamalama Kuļu

¹ Munuļa palulanguruļu piruku nyangu tjiya panya wirungka nyinanytalu nyiri kanyinnyangka mařa wakungka. Nyiri nyara palunya rulumapintja kanyiningi. Ka nyiri palula walka kampa kutjara ngarangi kitijita tjakatjura wantintjta kutjupangku kampangkaļu alařa nyakunytjaku-tawara.

² Palulanguruļa nyangu angelpa pulka munuļa kulinu paluru katuwanungku mirara wangkanyangka. Nyanga alatji paluru wangkangi, “Ngananya wanyu anangu palya mulapa nyinanyi nyiri nyangatja kitilampira alantjikitja? Ut i wati tjukaruru mulatu kutju alanma.” ³ Kaya puļu kuliningi kutjupangku nyiri panya mantjira alařa nyakunytjaku, panya ilkarīngka mantangka kuļu kutjupa tjukaruru mulapa nyinanytja wiya alatjitu, miri tjutaku ngurangka kuļu.

⁴ Kanā kulintjatjanu pulkara ulangi panya wati palyaya puļu nguriningi nyiri palunya alařa nyakunytjaku.

⁵ Kanā palulanguru tjlpi kutjungku wangkangu, “Ulanytja wiya! Nyawa nyara ngaranyi Witulya Pulkanya lion purunypa wati Judah-kunu malatja. Nyara paluru nyiri nyangatja mantjira kitengka patintja alařa nyakuku.

Paluru panya pulka mulapa Mayatja Davidalanguru wanapari wanapari ngarakatira wirkankunytja. Nyara paluru uwankarangka waintaringu munu palya mulapa nyinanytjatjanungku nyiri palunya mantjira alalku.”

⁶ Kaña nyangu Lamalama tjiya wirungka itingka ngaranyangka kuka panya nyalpitjara 4-ngka, tjlpi 24-ngka ngurur-ngururpa.* Mununa Lamalama palunya nyakula kuliningi, “Palunya panya kutjupangku iluntankunytjanguru kuwari paluru wankaringkula ngaranyi.” Mununa nyangu paluru yuruwilya 7-tjara munu kuру 7-tjara kuлу ngaranyangka. Kuру nyara 7 panya kurunpa tjuta Godalu manta winkikutu iyantja.

⁷ Ka Lamalama paluru nyiri mantjinu tjiyangka nyinanytjala mara wakungku kanyinnyangka. ⁸ Ka mantjinnyangka kuka panya nyalpitjara 4 munu tjlpi 24 Lamalama palula kuranyu watungarakaningu walkuntjikitja. Munuya kutjungku kutjungku kanyiningi wangkatjingalpai kita purunypa, munu piti gold-nguru palyantitja kuлу. Palu piti palula tjanala tjau purunypa ngaringi panya tilipai puyu panti wiru pantintjaku. Tjau nyanga paluru panya Godala tjpintja purunypa panya Godaku waltyta tjutangku palula tjpinnnyangka Godalu kulira pukularipai puyu nyanga wiru palu purunypa pantira.

⁹ Munu paluru tjana inma kuwaritja inkangi kuka panya nyalpitjara 4-ngku munu tjlpi 24-ngku kuлу nyanga alatji,

“Nyuntu kutju palya mulapa nyinanyi nyiri panya rulumapi mantjira alantjaku.

Uwa, nyuntu kutjungku kit lampira wañira nyiri alalku.

Panya nyuntu kutju anga-ilura milkali tjutingu anangu tjutaku ngalkilpa munun tjananya wankarunu wangka kutjupa wangka kutjupa, miri kutjupa miri kutjupa ngura winkinguru tjana Godaku waltyjaringkunytjaku.

¹⁰ Munu nyuntu tjanampa mayatjarira tjananya tjukurtjara tjuta tjunu nyuntumpa waltyjapiti uwankara tjana Godaku warка wan-ganarangku kulira palyantjaku.

Kaya tjana ngula mayatjarira kanyilku Christala tjungungku man-tangka anangu winki.”

Alatjiya inkara walkuningi palunya kuka panya nyalpitjara 4-ngku munu tjlpi panya 24-ngku kuлу.

¹¹ Mununa palulanguru ngayulu piruku nyangu angelpa winki mungili mulapa ngaranyangka. Paluru tjana para-arintara ngarangi tjiya panya wiru palula, ka kuka panya nyalpitjara 4 munu tjlpi panya 24 kuлу tjungu ngururpa ngarangi. ¹² Ka angelpa tjutangku inma inkangi katuwanungku nyanga alatji,

“Lamalama panya pungkunytjtjanya wiru mulapa nyinanyi.

Kaya uti uwankarangku palunya walkunma.

Panya paluru-mantu mayatja witulya pulkangku uwankara kanyini, munu paluru mayatja kulintja tjukaruru, ninti pulka mulapa.

Kaya uwankarangku palunya titutjarangku alatjitu mirawañinytjaku ngaranyi.”

¹³ Kaña palulanguru kulinu Godalu paluntja uwankarangku tjungungku inma pulkara inkanyangka, anangungku, kukangku, tjulpungku, antip-inangku kutjupa kutjupa uwankarangku mantanguru, manta unngunguru, ilkarunguru munu uru unngunguru kułukulu inkangi, nyanga alatji,

* ^{5:6} Lamalama nyanga paluru panya Jesunya Christanya

“Nyara tjiyangka nyinanytjanya Lamalama kulu pitalytji wiru mulapa tjukaruru alatjitu.

Kala pulanya titutjarangku mirawañinma panya pula mayatja pulka mulapa nyinanyi titutjara wiyaringkuwiya alatjitu.”

¹⁴ Kaya inkara wiyaringkunyangka kuka panya nyalpitjara 4-ngku wangkangu, “Uwa mulapa!” Kaya tjlipi panya 24-ngku kulu palunya watungarakatira walkunu.

6

*Lamalamangku Ki*t*i Nampa 1 Lampintja*

¹ Palulanguruna nyangu Lamalamangku nyiri panya rulumapi ki*t*i 7-tjara mantjira ki*t*i kutju lampira waninyangka.* Palulanguruna kulinu kuka panya nyalpitjara kutjungku wangkanyangka wangka pulka kapi tuu winki rurkuntja purunypa. Paluru kutjupa ma-altira wangkangu, “Ngalya-pitja.” ² Kaña ma-nyangu nyanytju piranpa kutju utiringkula ngaranyangka. Ka nyanytju palula nyinakatingi wati punaratjara, ka palunya ilkaritjangku puturu purunypa ungu, puturu panya pikangku pungkula waintarinyangka katangka tjunkupai, palu purunypa ungu. Ka paluru nyanytjungka ma-pakanu witulya pulkatjara palumpa mirpañtju tjuta pungkula wiyantjikitja, panya paluru nganmanypa anu munu tjara pungkula wiyanu, munu kuwari paluru piruku ananyi mirpañtju panya kutjupa tjuta pungkula wiyantjikitja.

*Lamalamangku Ki*t*i Nampa 2 Lampintja*

³ Ka Lamalamangku piruku lampira waningu ki*t*i kutjupa nampa 2, ka palulanguru kuka panya nyalpitjara kutjupangku nampa 2-ngku ma-altingu kutjupa, “Ngalya-pitja!” ⁴ Ka nyanytju kutjupa utiringu rituwana mulapa. Ka nyanytju palula katu nyinanytjanya ilkaritjangku tjula wara pulka ungu munu palunya witunu añanu tjutakutu ankula tjaatamilantjaku tjananku pikangku pungkunytjaku pukulpa nyinanytja wiyakitjangku.

*Lamalamangku Ki*t*i Nampa 3 Lampintja*

⁵ Ka Lamalamangku piruku lampira waningu ki*t*i kutjupa nampa 3, ka palulanguru kuka panya nyalpitjara kutjupangku nampa 3-ngku ma-altingu, “Ngalya-pitja!” Kaña nyangu nyanytju maru utiringkula ngaranyangka. Ka nyanytju palula katu nyinanytjalu marangku kanyiningi mai tjuta wayamilalpai. ⁶ Kaña kulinu wangka purunypa kuka panya nyalpitjara nyara 4-wanungku wangkanyangka alatji, “Nyanga alatji ngaranytjaku palyala, panya watingku warkarira mungartjirinyt-jatjanungku mani mantjini munu mai pulka payamilantjikitjangku kulini munu titura mai kulunytja wiyaní mani uwankara. Palu kulila, punu alipa tjuta munu punu kiripitji tjuta kulu kalantankunytja wiyangku wantima.”

*Lamalamangku Ki*t*i Nampa 4 Lampintja*

⁷ Ka Lamalamangku piruku lampira waningu ki*t*i kutjupa nampa 4, ka palulanguru kuka panya nyalpitjara kutjupangku nampa 4-ngku ma-altingu, “Ngalya-pitja!” ⁸ Kaña palulanguru ma-nyangu nyanytju miri apakatja nguwanpa utiringkula ngaranyangka, ka palula katu nyinakatingi wati ini *Ilunytjanya*, ka palula malarku nyinakatingi wati

* **6:1** Ki*t*i nyanga paluru nganampa ki*t*i purunypa wiya kutjupa nguwanpa wax purunypa nyitinnyangka tjakatjunkupai munu lampinnyangka mapalku alaringkupai.

kutjupa ini *Warunya* panya *Miri Tjuṭaku Nguranya*. Ka ilkaritjangku pulanya witunu alatji wangkara, “Ankula pula palyala aŋangu kutjupatjara ilunytjaku, kaya kutjupa tjuta pikangku wakannyangka iluku, kutjupa tjuta ailuru pulkangka iluku, kutjupa tjuta pikatjararingkula iluku, kutjupa tjuta inura tjutangku patjannyangka iluku. Alatji pula palyala aŋangu uwankara mulapa ilunytjaku wiya, palu kutjupatjara kutju, aapa nguwanpa* ilunytjaku.”

Lamalamangku Kiți Nampa 5 Lampintja

⁹ Ka palulanguru Lamalamangku piруku lampira wañingu kiți kutjupa nampa 5. Kaña nyangu pitjilta tjaru kurunpa tjuta panya tjananya kutjupa tjutangku iluntankunytja tjuta, panya tjana aŋangu wanka nyinralpi Godaku tjukurpa tungun-tunguntu para-wangkangi, ka tjananya iluntanangi. ¹⁰ Nyara paluru tjana katungku mirara wangkangu, “Mayatja God nyuntu witulya pulkanya, milmilpa tjukaruru mulapa. Yaalařan aŋangu mantatja tjuta nyuntula kuranyu ngaratjunkuku ngurkantankula iluntara ngapartji wiyatjikitjangku nganañanya pungkunytjanguру?”

¹¹ Ka tjananya uwankara mantara piřanpa ungu tjarpantjaku munu tjananya wangkangu, “Pataraya nyinama, panya kutjupa tjuta nyuranya purunypa punganyitu Jesunya tungun-tunguntu wañalpai tjuta. Kaña tjananya kuļu nyurala tjungulku. Mununa palulangurulta tjananya ngurkantankuku nyuranya pungkunytja tjuta.”

Lamalamangku Kiți Nampa 6 Lampintja

¹² Kaña piруku nyangu Lamalamangku kiți nampa 6 lampira wañinyangka. Ka palulanguru manta urira kata-katakatingu. Ka tjintu irnyantja wiyaringkula maruringu, ka kiňara rituwanaringu milkali purunypa. ¹³ Ka kililpi tjuta ilkarininguru punka-punkaňu mantangka, panya mai walpa pulkangku puñunguru punkatjingalpai, palu purunypa. ¹⁴ Ka ilkarı wiyaringu panya nyiri rulumapintja purunypa, ka puli murpu uwankara munu manta kuļunypa tjuta үрungka ngururpa ngaranytja tjuta kuļu urira kampa kutjuparira arangka ngaranytja wiyaringu.

¹⁵ Kaya aŋangu winki kulpingka ngulu tjarpangu. Panya mayatja pulka tjuta manta winkitja, warmalaku mayatja tjuta, mani pulkatjara tjuta, wati kunpu tjuta, mayatjangka warkaripai tjuta, walytjangku kulira warkaripai tjuta, uwankara ngulu tjarpangu, kutjupatjara kulpingka munu kutjupatjara puli pulkangka kumpinu. ¹⁶ Munuya mirara wangkangu apu tjutangka, “Wanyu nganañala punkala munulanya kutitjura tjiya wirungka nyinanytjalu nyakunytjaku-tawara, Lamalamanya kuļu nganampa mirpañarinytjaku-tawara. ¹⁷ Panya tjintu nganampa wirkanu paluru pula mirpañarira nganañanya warungka urkuwaninytjaku, kala putu kulira utjulku, ‘Yaaltjirikulanku?’ ”

7

Israekunu Tjuta Nampa 144,000

¹ Nyangangka małangkaña nyangu angelpa kutjara kutjara ngaranyangka, panya paluru tjana ngarangi nganytjarta kutjara kutjara, kutju kakarara, kutju wilurara, kutju ulparira, munu kutju alinytjara. Munu paluru tjana walpa markura anga-kanyiningi walpangku manta uru puňu kuļu pulkara uritjingantjaku-tawara.

* **6:8** Aapa nguwanpa -one quarter kutju.

2 Kaña ma-nyangu angelpa kutjupa ngalya-wirkankunyangka kakararanguru. Ka paluru marangku kanyiningi puñu walkatjunkupai Godalu ungkunytja, panya aŋangu Godaku tjukurta wanganarangku kulilpai tjuṭangka ngalyangka walkatjunkunytjikitjangku. Munu paluru wangkangu angelpa panya 4-palangka walpa kuwaripangku angakanyinnyangka, panya Godalu tjananya witulyanu manta uru kuļu uritjingara kurantjaku. Alatji angelpa panya paluru tjananya wangkangu, **3** “Wanyu kuwaripa paṭala! Manta, uru, munu puñu kuļu wantima kurantja wiyangku, kaña Godala wanganarangku kulilpai tjuṭangka-warara ngalyangka walkatjunkuku.” Munu mulapatu tjanala ngalyangka walkatjunu Godaku tjukurta kulilpai tjuṭangka.

4-8 Kani kutjupangku tjakultjunu, “Aŋangu nyanga paluru tjana Israelku katja panya 12-nguru tjuṭa mulapa nampa nyangatja 144,000. Panya 12,000 Judah-languru, 12,000 Rupintanguru, 12,000 Kaatalanguru, 12,000 Atjalan-guru, 12,000 Napatalilanguru, 12,000 Manitjalanguru, 12,000 Tjimiyantan-guru, 12,000 Levilanguru, 12,000 Itjakalanguru, 12,000 Tjipulantanguru, 12,000 Josephalanguru, munu 12,000 Pintjimantanguru. Nyanga palula tjanala angeltu ngalyangka walkatjunu Israelkunu tjuṭangka.”

Anangu Winki Tjiya Wirungka Kuranyu Ngaranytja

9 Munuña palula malangka nyangu aŋangu winki mulapa mungiliyi ngaranyangka watingku putu kantamilara wiyangtjaku. Paluru tjana ngura kutjupa kutjupa tjuṭanguru pitjala ngarangi tjaa kutjupa kutjupa, manta kutjupanguru kutjupanguru, miri kutjupa kutjupa. Munuya pitjala ngarangu tjiya wirungka Lamalamangka kuranyu mantara pirantjara munuya marangku kutjungku kutjungku kanyiningi parka wara puñu taitanguru. **10** Palunyatjanungkuya mirara wangkangi alatji, “Godalu tjiyangka nyinanytjalu Lamalamangku kuļu nganaŋanya wankarunu.

Kala palunya pulanya titutjarangku alatji mirawanira walkulkku.”

11 Kaya tjiya panya wiru palula angelpa tjuṭa para-arintara ngarangi, ka kuka panya nyalpitjara 4 munu tjlipi panya 24 kuļu tjungu ngururpa ngarangi tjiya panya palula itingka. Kaya angelpa uwankarangku watungarakatira Godanya walkuningi, **12** munuya wangkangi, “Mulapa Godalu aŋangu tjuṭa wankarunu.

Paluru panya wiru alatji nyinanyi palya mulapa, munu witulya pitalytji pulkanya, kulintja tjukarurunya.

Kala nganaŋa nyuntumpa pukularira nyuntunya rawangku alatji mi-rawanira walkunni,
panya Godanya alatji titutjara nyinapainya.

Uwa mulapa.”

13 Kani tjlipi kutjungku tjapinu, “Ngananya tjanaya nyanga mantara piranpatjara? Yaaltjinguru nyanganpa pitjangu?”

14 Kaña ngapartji palula wangkangu, “Wiya, kuwari kutjuña nyanganyi ngurpangku. Tjinguru nyuntu ninti.”

Kaňi paluru wangkangu, “Aŋangu nyanga palunya tjanaya panya aŋangu kutjupa tjuṭangku pikangku titutjarangku kuraningi, kaya nyanga paluru tjana Jesunya wantintyta wiyangku titutjarangku waŋaningi munuya wankaringkulalta ngaranyi. Munuya Lamalama ilura milkali tjutinytjanguru mantara piranpatjara nyinanyi palumpa milkalingka paltjira piranmankunytja. **15** Pala palulanguruya ngaranyi Godaku

timpulangka palumpa tjiyangka kuranyu munuya palunya tiṭutjarangku walkuni mungangka kalala.

“Ka tjiyangka nyinanytjalu tjananya aṭunymara kanyini munu tjanala tjungu titutjara nyinanyi. ¹⁶ Kaya tjana piruku paltjatjiratjarintja wiya kapi iluringkunytja wiya kuļu nyinaku titutjara. Ka tjananya piruku tjintungku kuļingku kuļu kampanyta wiyaringkuku.

¹⁷ “Panya Lamalama nyara tjiya wirungka ngururpa nyinanyi, nyara paluru tjanampa tjapata nyinanyi munu tjananya wirura aṭunymara kanyilku panya tjapatangku tjiipi tjuṭa kanyintja purunyti. Panya tjapatangku tjiipi kapikutu katipai, tjkira wanka nyinanytjaku, palu purunypa paluru tjananya aṭunymara kanyilku titutjara wanka nyinanytjaku. Munu paluru tjananya pukulpa mulapa titutjarangku kanyilku piruku ulanytjaku wiya. Kaya ulanytja wiya paluru tjana titutjara pukulpa alatjiṭu nyinaku.”

8

Lamalamangku Kiṭi Nampa 7 Lampintja

¹⁻² Munuṇa palulanguru piruku nyangu Lamalamangku kiṭi malatja nampa 7 lampira waninyangka, ka ilkaringga uwankara pilunaringu ka kutjupa wangkanytja wiya alatjiṭu ngarangi.

Munuṇa palulanguru tjukutjuku nyinara ma-nyangulta nyara angelpa 7 ngaranyi panya Godala kuranyu ngarapai tjuta. Ka Godalu tjananya turampata 7 ungu kutjungku kutjungku kanyintjaku.

³⁻⁴ Ka angelpa kutjupangku kanyiningi piti gold-nguru palyantja tjau purunypa tjunkula tililpai puyu panṭi wiru pantintjaku. Munu angelpa nyara paluru pitjala ngarangu pitjilpa gold-nguru palyantjitjangka itingka tjiya wirungka kuranyu. Panya pitjilpa pala palula katu waru tjau kampapai ngarangi. Ka kutjupangku angelpa palunya tjau purunypa pulka ungu waru pala palula tjunkunytjaku. Ka tjunkunyangka warungku kampangu ka puyu paluru kampara katuringkula wiru panṭingu, munu Godaku walytja tjuṭaku pray-ngka tjunguringu tjana palula tjapinnyangka.

⁵ Ka angelpa paluru pitjilpa tjau kampapainguru waru mantjira tjunu palumpa pitingka munu mantakutu waningu. Ka waninyangka rurkuningi munu tuuningi munu pinpangi kuļukulu munu manta kuļu urira kaṭa-kaṭakatingu.

Turampata Puura Wangkatjingantja

⁶ Ka nyara palulanguru angelpa 7 ritiringangi turampata tjuṭa puura wangkatjingantjikitja.

⁷ Ka angelpa nampa 1-tu palumpa turampata puura wangkatjinganu, ka kunata munu waru milkali kuļu tjungu ilkaringga pulkara alatjiṭu tjutingu mantangka, munu kampangu manta kutjupatjara munu punu kutjupatjara kuļu maṇkurpa nguwanpa, palu ukiri uwankara kampangu manta winkingka.

⁸ Ka angelpa nampa 2-ngku palumpa turampata puura wangkatjinganu, ka apu murpu pulka purunypa waru tilingku kampanyta ilkaringga pulkanu uru pulkangka, ka uru kutjupatjara milkaliringu. ⁹ Ka uru pala palula tjanala unngu para-para-ngarapai tjuṭa ilura wiyaringu ka kutjupatjara wanka para-para-ngarangi uru kutjupa tjuṭangka, ka pauta tjuṭa uru nyara palula tjanala ankunytja tjuṭa kaṭakatira minya-minyaringu palu pauta kutjupa tjuṭa palya ngarangi uru kutjupa tjuṭangka.

¹⁰ Ka angelpa nampa 3-ngku ngapartji puura wangkatjinganu palumpa turampata. Ka kililpi pulkanya ilkaringga waru tili winki punkanu.

Paluru punkanu uru karutjangka munu kapi walangka kulu, palu tjarangka kutju punkanu mina kutjupa tjutangka wiya.¹¹ Ka kililpi paluru ini *Mina Kuralpaina* munu panya mina tjarangka punkara mina palunya tjananya kuranu anangungku tjikira ilunytjaku. Ka anangu tjuta ilungu mina nyara palunya tjikira.

¹² Ka angelpa nampa 4-ngku palumpa turampata puura wangkatjinganu, ka kutjupangku tjintu kampa kutjungka maruringkunytjaku palyanu. Munu palu purunypa*tu* pira kampa kutjungka maruringkunytjaku palyanu. Munu piruku kililpi kutjupatjara irnyantja wiyaringkunytjaku palyanu. Ka tjirirpi ngalya-pakara katu ngarangi munu mungartji-mungartjirira piruku irnyantja wiyaringangi tjintu tjutangka ka mungawaluru ngarangi. Ka mungangka palu purunypa*tu* kinarangku munu kililpingku kulukulu irnyara irnyara ngatalpatu wiyaringangi munga tjutangka ka mungawalurutu ngarangi palu purunypa.

¹³ Munuña palulanguru ira-nyakula nyangu walawuru katu mulapa para-ngaranyangka ilkariringka. Munuña kulinu paluru pulkara wangkanyangka nyanga alatji, “Ai, ngalturinganyina anangu mantatja tjutaku, panya pika pulka mulapa tjanampa uwankaraku ngaraku angelpa malatja mañkurtu turampata tjanampa puura wangkatjingannyangka. Ngaltutjara tjuta! Tjanampa kuwari tjituru-tjituru pulka ngaraku manta winkingka.” Alatjina kulinu walawurungku wangkanyangka.

9

¹ Ka angelpa nampa 5-ngku palumpa turampata puura wangkatjinganu, kana nyangu kililpi purunypa mantakutu punkannyangka, ka kutjupangku kililpi palunya key ungu pit*i* ngati pulkanya alantjaku.* ² Ka kililpingku key panya mantjira pit*i* palunya alanu, ka tjunanpa pulka mulapa pakaningi pit*i* panya pulkanguru waru pulkangku kampanyatja purunypa munu tjunanpa paluru anga-pitjala utuwaringku tjutunu.

³ Ka palulanguru tjintilyka tjuta ukalingu puyunguru mantakutu pitikatali purunytju wipungku wakantjikitja anangu panya Godaku waltyta wiya tjuta. ⁴ Ka tjananya alatji wangkangu, “Tjanpi, punu, parka, munu ukiri kutjupa kutjupa tjutaya ngalkuwiyangku wantima, munu anangu Godaku walka ngalyangka kanyintja tjuta wakantja wiyangku wantima. Palu anangu kutjupa tjuta kutju nyakula wakanma. ⁵ Munu wipungku wakara iluntankunytja wiyangku wantima, palu tjananya pikatjaranma kutju rawangku pira 5-arangku, ka panya pitikatalingku wipungku wakalpai palu purunypa tjanampa pika rawa kaarngaraku.” ⁶ Palu pira nyara palula tjanala anangu tjutangku putu ilunytjikitjangku kulilku palu wankatuya nyinaku munuya wangkaku, “Walawi kana mapalku ilu, nyangatjana pika pulkangka tjitjanyi kani kaarngaranyi.” Alatjiya ilunytjikitja mukuringkuku, palu tjana pika pala palunyatjara ilunytja wiya wanka nyinaku.

⁷ Palu tjintilyka nyara paluru tjana anangu pulka nyanytju purunypa munuya riti ngara-ngarangi, panya nyanytju tjuta riti ngarapai pika ankunytjikitja, palu purunypa. Paluru tjana wati yunpa purunypa ngarangi, munuya katangka kanyiningi puturu purunypa, panya puturu mayatjangku kanyilpai gold-nguru palyantja, palu purunypa. ⁸ Munuya

* ^{9:1} Pit*i* nyanga palula panya mamu kurunitja tjuta patara nyinanyi ngula tjintu malatjangka Godalu tjananya warungka urkuwaqinytjaku.

tjana mangka waṛa kungka puruny whole ḫarang, munuya kaṭiti iri pułka mulapa kanyiningi lion tjuta puruny whole. ⁹ Munu tjana pilpirpa ayanatjara puruny whole ḫarang. Ka tjana nyalpi uri-uritjingannyangkaṇa kulinu pułkara rurkunnyangka, panya nyanytju tjuṭa wakina tjuṭatjara rurku winki pikakitja wirtjapakalpai, palu puruny whole. ¹⁰ Paluru tjana wipu pitikatali purunytjara rawa para-ṅgarang aṅangu tjuṭa wakantjikitja pira maṅkurpa kutjara.

¹¹ Ka tjintilyka nyanga palumpa tjanampa mayatja angelpa kutju piṭi ngati pułka kanyilpai ḫarang. Nyara palumpa ini wangka kutjupa lipuru alatji, *Apatannga* munu wangka kutjupa Kuriki ini *Apaliyannga*.*

¹² Uwa, pika pułka panya ngañmanyitja wiyaringu, ka nyanga palula malangka pika pułka kutjupa kutjara piruku wirkankuku.

¹³ Ka angelpa nampa 6-ngku palumpa turampata puura wangkatjinggaṇu, kaṇa kulinu kuuna 4-nguru pitjilpa gold-nguru wangkannyangka, pitjilpa panya Godala kuranyu ḫarapailangu. ¹⁴ Munu paluru wangkangu panya angelpa nampa 6-ngka, “Ara karu uṛu pułkatjarakutu ini Yupuraitilakutu munu angelpa 4 karpintja nyinanyangka nyakula araltjara.”

¹⁵ Panya Godalu tjananya angelpa nyanga 4 karpintja kanyiningi paṭara ngula palumpa taimingka araltjankunytjikitjangku tjana aṅangu kutjupatjara manta winkingka iluntankunytjaku. Ka wangkannyangka angelpa panya nampa 6 mulapatu anu munu tjananya nyakula araltjanu. ¹⁶ Kani kutjupangku tjakultjunu wati warmala winki mulapa nyanytjungka tatirā riti nyinanyangka mungili mulapa nampa nyanganpa 200 million.

¹⁷⁻¹⁸ Kanā tjukurpa nyanga palunya tjananya nyangu, ka warmala paluru tjana pilpirpa kutitjitetjara puruny whole ḫarang. Pilpirpa nyanga paluru tjana ayananguru palyantja kala wirutjara ḫarang. Kutjupatjara rituwana waru tili puruny whole, kutjupatjara puluwana ilkari puruny whole, ka kutjupatjara yalawana inuntji puruny whole. Ka nyanytju tjuṭa kata lion puruny whole ḫarang, ka tjaanguru waru tili pułka pakaningi, puyu pułka kuļu munu pułi kala inuntji puruny whole kuļu tili winki kampangi tjaanguru pakara.

Kaya palula tjanalangu ḫarang aṅangu mungili mulapa ilungi manta winkingka, palu aṅangu mungili kutjupatjara wankaringu. Aṅangu tjuṭa ilungu, ka kutjupatjara wankaringu. ¹⁹ Nyanytju tjuṭangku tjananya iluntanangi tjuṭa mulapa tjaanguru munu wipunguru kuļu panya wipu tjanampa liru kata puruny whole ḫarang munu aṅangu tjuṭa iluntanangi panya lirungku patjara iluntankupai, palu puruny whole.

²⁰ Ka pika nyanga palulanguru aṅangu mungili mulapa ilungu, palu mungili kutjupa wanka nyinanytjatjanu pika nyanga palunya nyakula nguluringkula Godalakutu pinkuraranja wiyangku wantingi. Munuya mamu kurunitja tjuṭa wantir'iyanja wiyangku rawangku mirawañira tjananya pułkanmanangi. Munuya palu puruny whole puñu tjuṭa apu tjuṭa kułkuļu rawangku mukuringkula tungun-tunguntu pupakatira tjananya pułkanmanangi, panya kutjupa kutjupa tjuṭa tjananku marangku palyanu apunguru puñunguru gold-nguru munu tjiilpanguru kuļu. Palu nguntiya watarkungku palyanu tjanan walytjangku kulira, panya nyanga tjanan nyakupai wiya, kulilpai wiya, munu ankupai wiya kuļu. ²¹ Munuya paluru tjanan rawangku kura palyalkatingi Godalakutu pinkurara kuranguru piiwiayingkunytjikitjangku kulintja wiya. Munuya miripungukatingi,

* ^{9:11} Ini nyanga paluru pula ngananala alatji wangkanyi *Nyarulpainya*.

munuya ilpinytji inkangi, kutjupa kutjupa tjuta kuuya palyalkatingi ngangkaringku puunytju ayinayinirira, munuya kampangka tu ngaringi kutjupa tjutangka, munuya kutitjunangi. Munuya kura nyanga palunya tjananya palyantjatjanungku piiwiyaringkula Godalakutu pinkuraranja wiyangku alatjitu wantingi.

10

Angelpa Nyiri Kulunypatjara

¹ Palulanguruna nyangu angelpa pulkanya ilkarunguru ukalingkunyangka. Angelpa nyara paluru ngangkalingka tjutuntja ngarangi mantaratjara purunypa, ka tjutirangu palula katangka ngarangi. Ka paluru yunpangku irnyaningi alatjitu, panya tjintungku irnyantja purunytju, ka tjalpa paluru waru tili purunypa irnyara ngarangi. ² Munu paluru kanyiningi nyiri rulumapi kulunypa ngañmanytju alantja. Munu paluru tjina wakungku paltjunu uru pulkangka munu tjina tjampungku paltjunu mantangka. ³ Munu pulkara mirangu panya lion pulka ngaurmankupai, palu purunypa. Ka paluru mirara wiyingkunyangka ilkarunguru ngalyaalunu kapi pulka tuuntja purunytju 7-arangku. ⁴ Kaña alunnyangka kulira wangka palumpa nguwanpa walkatjunu nyiringka. Palu pirukuna kulinu wangka kutjupa ilkarunguru wangkanyangka, “Nyanga 7-arangku tuura wangkanytja kumpilpa kanyinma walkatjunkunytja wiyangku!” Kaña mulapatu wantingu.

⁵ Ka palulanguru angelpa panya paluru mara waku ilkarikutu katunu tjukarurungku wangkanytjikitjangku. ⁶⁻⁷ Munu paluru wangkangu,

“Kulila! Mayatja Godanya titutjara nyinapai wiyingkunytja wiya alatjitu. Paluru manta, ilkari, uru munu anangu, kuka, kutjupa kutjupa uwankara kuulu palunu. Kaña palula mirangka kuvari tjukarurungku wangkanyi nyanga alatji, ‘Godalu kalkuntja kuvari nyanga utiringanyi. Panya Godalu nyaa palyantjikitjangku iriti kulinu, munu kumpilpa kanyiningi wangkara utintja wiyangku. Munu palumpa wangkatjara tjutangka ngula utintjikitjangku kutju kalkunu. Ka kuvari nyanga angelpa nampa 7-tu palumpa turampata puura wangkatjingannyangka uwankara alatjitu Godalu kalkuntja utiringkuku.’”

Alatji angelpa panya pulkangku wangkangu.

⁸ Kaña palulanguru piruku kulinu wangka panyatja, panya ilkarunguru wangkangi. Alatjini wangkangu, “Ankula mantjila nyiri panya ngañmanytju alantja nyara angeltu kanyini, palunya.”

⁹ Kaña ankula tjapinu angelpa panya palula ngayunya nyiri palunya ungkunytjaku. Kani paluru wangkangu, “Mantjila munu ngalkula! Munun kulilkutjuratja puunypa mayu wirunya, palu kuultjururan kanta tjuni kampaku.”

¹⁰ Kaña nyiri palunya mantjira ngalkula mulapatu kuliningi, “Nyanganatja tjuratja puunypa ngaranyi mayu wirunya mulapa.” Mununatju kuultjunkunytjatjanu mulapatu tjuni pikatjararingu.

¹¹ Kani nyanga palula malangka wangkangu, “Piruku tjakultjura anangu tjutangka Godaku tjukurpa panya nyaa wirkankuku nyanganguru ngula nyanga palula malangka. Anangu tjutangka tjakultjura ngura winkingka wangka kutjupa kutjupangka, miri kutjupa kutjupangka kuulu, munu mayatja pulka tjutangka kuulkulu.”

11

Godaku Wangkatjara Kutjara

¹ Palulanguruṇi puṇu kuļata purunypa ungu tjunkula mitjurumilalpai mununi ungkula wangkangu, “Ma-pitjala Godaku timpulangka puṇu pala palunya tjunkula wanara mitjuramilala, munu palu purunypatū pitjilpa panya kampara pantī wiru pakalpainya mitjuramilala. Munu aŋangu tjuṭa pala timpulangka unngu ngarala Godanya wal̄kunnyangka nyakula tjananya kantamilala. ² Palu yaata urilitja mitjurumilantja wiyangku wantima munu timpula yaata unngutja kutju mitjuramilala. Panya yaata urilitja nyara palunya ngayulu ngura kutjupitja tjuṭa ungkuku, kaya kantura kurara pungkuku yaata palunya ngura milmilpa Jerusalemanyā kuļu. Alatjiya rawangku kurara pungkuku pira 42-arangku.

³ “Kana wati wangkatjara kutjara witulyankuku mununa pulanya iyalku Godaku tjukurpa aŋangu tjuṭangka wangkanytjaku. Ka pula tjukurpa tjituru-tjituru para-tjakultjunkuku rawangku pira 42-arangku. Munu pula mantara walyku-walykungka tjarpara para-ngaraku aŋangu tjuṭangku nyakula kulintjaku tjukurpa tjituru-tjituru tjuṭa wangkanyangka.”

⁴ Palu wati nyanga paluru pula panya puṇu alipa kutjara purunypa munu lampu tili kutjara purunypa ngaraku. Panya alipa kutjara lampu kutjara kuļu tjungu Godala kuranyu ngarapai, manta winkiku Mayatjangka, palu purunypa wati paluru pula Godala mirangka ngarapai. ⁵ Ka tjinguru kutjupa tjuṭangku wati palunya pulanya pungkula pikatjaranyangka pulampa tjaanguru waru tili pakalku munu tjananya uwankara wiyalu pulampa panya mirpantju tjuṭa. Nyanga alatji paluru pula iluntankuku kutjupangku pulanya iluntankunytjikitjangku kulinnyangka.

⁶ Ka Godalu pulanya witulyankuku mina ilkaritja markuntjaku, ka minangku puyintja wiya alatjitu ngaraku pula Godaku tjukurpa para-tjakultjunkunyangka pira nyara 42-arangku. Munu Godalu piruku pulanya witulyankuku mina aŋangungku tjikilpai uwankara kurantjaku kampa kutjuparira milkalirinytjaku. Munu piruku pulanya witulyankuku pika kura kutjupa kutjupa tjuṭa wirkankunytjaku aŋangu tjuṭangka tjana nyakula kulintjaku manta ala lipingka. Alatji Godalu pulanya wangkangu, “Nyupali mukuringkula tjuta-arangku pika kura kutjupa kutjupa tjuṭa mulapa utila mantangka pala.”

⁷ Ka pula Godaku tjukurpa pira panya 42-arangku para-tjakultjunkuku, ka nyanga palula malangka piṭi pul̄kanguru ngati unnungurū mamu pulka pakalku munu pulanya pika-pikalku. Munu palumpa pulampa pikaringkula pulanya iluntankuku. ⁸ Ka pula miri ngariku iwarangka tawunu pul̄kala, ngura panya pulampa mayatja puṇu kaṭakutjarangka utitjunkunytjitetjangka. Kala tawunu nyanga palunya kulira ngura kutjupa kutjara kulilpai ini Tjatamanya mutta ngura kutjupa ini Itjipanya, panya ngura nyara palula pulalaya palu purunypatū kura nyinangi aŋangu tjuṭa.

⁹⁻¹⁰ Kaya aŋangu uwankarangku ngura uwankaranguru nyakuku pulanya iwarangka miri ngarinyangka munuya pulampa pulka pukulariku Godaku war̄karipai nyanga kutjara ilunyangka, panya paluru pula pika kura kutjupa kutjupa tjuṭa tjanala wirkankunytjaku palyaningi manta ala lipingka. Munuya tjunutjunkunytja wiyangku wantiku pulanya urilta ngarinytjaku tjintu mankurpa, kaya uwankarangku nyakuku munuya pukularira mai kuka pulka ngalkulkku munuyanku pukultu ngaparku ungkuku ulytja tjuṭa, kutjupa kutjupa tjuṭa kuļu.

¹¹ Ka tjintu maŋkurarinyangka małangka Godalu pulanya wankańu ngaalypa ungkula ka pula pakara ngarangu. Kaya aŋangu kutjupa tjutangku palunya pulanya pakanngangka nyakula pulkara alatjińu ngulu-nkuluringu.

¹² Ka wangkatjara paluru pula wangka pulka kulinu ilkaringuru altinyangka nyanga alatji, "Ngalya-pitja pula nyangaku!" Kaya palumpa pulampa mirpańtju tjutangku nyangu pula ilkarí katu ankunyangka ngangkaliningka.

¹³ Ka manta pulkara urira kata-katakatingu, ka wali tjuta aapa pilukatingu, ka aŋangu tjuta mulapa ilungu nampa nyangatja 7,000. Ka aŋangu kutjupa tjuta wankaringkula pulkara alatjińu ngulu-nkuluringu munuya wangkangu, "Mulapa Godanya ilkaringka witulya pulka nyinanyi."

¹⁴ Uwa, pika kura nyanga paluru nampa 2 ngarala wiyingu. Palu pika malatja kura kutjupa nampa 3 kuwari nguwanpa piruku utiringanyi.

Turampata Nampa 7

¹⁵ Ka palulanguru panya angelpa nampa 7-tu palumpa turampata puura wangkatjinganu, ka ilkaríngka wangka tjuta purunyap pulkara wangkangi nyanga alatji,

"Kuwari Mayatja Godalu pula Jesulu Christalu witulya pulkangku manta winki nyanga mayatjarira kanyilku tiutjarangku."

¹⁶⁻¹⁷ Kaya tjlipi panya 24 tjiyangka Godala kuranyu nyinapai tjuta pakańu, munuya waṭungarakatira Godanya pulkara walkuningi, alatji wangkara,

"Mayatja God! Nyuntun mulapa tiutjara nyinapainya

munun pulka mulapa ngaranyi uwankarangka waintarintja.

Kala pukularira nyuntunya rawangku mirawańinyi,

panya nyuntu witulya pulka mulapa nyinanyi munun manta winki mayatjangku kanyini,

ka kuwari Satantu tjana nyuntumpa mirpańtju tjutangku nyuntunya puťu alatjińu wiyalu.

¹⁸ Ka kutjupa tjutangku panya nyuntunya wantipai tjutangku pulkara nyuntumpa mirpańarira kuraringu,

panya taimi nyuntumpa wirkanu munu ngaranyi nyuntu tjanampa mirpańarintjaku

munu miri uwankara pakaltjingara tjukarurungku wangkara tjarant-jaku.

Ka tjintu nyuntumpa kuwari wirkanu munu ngaranyi nyuntu tjananya wiřu ungkunytjaku nyuntumpa tjukurtjara tjuta.

Munun nyuntumpa walyta tjuta kulu tjananya kutju kutju ungkuku, aŋangu pulka tjuta, tjukutjuku tjuta kułukulu uwankara nyuntunya walkulpai tjuta.

Ka kuwari nyuntumpa taimi ngaranyi nyuntu aŋangu kura tjuta tjananya ngapartji pungkula wiyanjtaku,

panya tjana manta winkingka aŋangu kutjupa tjuta iluntanangi."

Alatjiya tjlipi tjutangku wangkangi Godala.

¹⁹ Ka Godaku timpula ilkaríngka alaringu. Ka pakutja panya milmilpa paluru kalkuntjtja utiringu. Ka wanangara pinpangi munu kapi tuu winki rurkuningi, kunańa pulka kułu punkaningi, ka manta urira kata-katakatingu.

12

Minyma Kutju Munu Wanampi Purunypa

¹ Ka palulanguru kutjupa kutjupa ayinayini pulka utiringu ilkarìngka. Kaña urulyaraña nyangangi minyma ilkarìngka nyinanyangka, ka tìritja palumpa tjirirpi purunypa ngarangi, ka palula tjinangka tjaru ngarangi kiñara, ka paluru katangka kanyiningi puñuru mayatjìtja kililpi 12-tjara.

² Minyma paluru mukala nyinangi munu iti wañalpi wirkankunyangka kaarngaranyangka mirara ulangi.

³ Kaña piruku nyangu kutjupa kutjupa ilkarìngka utiringkunyangka wañampi rituwana purunypa pulka mulapa kata 7-tjara munu yuruwilya 10-tjara munu kata kutju kutjungku kanyiningi puturu purunypa 7, panya puñuru mayatjangku kanyilpai, palu purunypa. ⁴ Munu wañampi paluru wipungku kililpi kutjupatjara uritjingara ilkarìnguru wañingu mantakutu munu paluru minyma panya palula kuranyurira ngarangi tjitji palumpa wirkankunyangka ngalkuntjikitja.

⁵ Ka palulanguru minyma paluru iti nyitayira kanyinu, panya paluru ngula pulkaringkula mayatjarira manta winki kunpungku kanyintjaku. Palu tjitji palunya mantangkarinyangka kutjupangku wañampingkatawara tjulyaraña katingu Godalakutu palumpa tjiya wirukutu.

⁶ Ka minyma paluru iti palumpa tjulyaraña katinyangka pilakutu wirt-japakanu ngura panya Godalu palumpa palyantjìjakutu, ka palunya atunymankuku tjintu 1,260 ngura nyara palula.

⁷ Ka palulanguru ilkarìngka pika pulka ngarangi. Angelpa ini Michael-nga palumpa angelpa tjutatjara pikaringangi wanampiku panya munu palumpa angelpa kura tjuñaku kuñu. ⁸ Palu wañampi palunya Michaeltu tjana ngulutjingara alatjitu wiyanu, kaya piruku ngura ilkarìngka nyinanytja wiyaringu wañampinya tjana. ⁹ Panya Michaeltu tjana wañampi palunya urilta wañingu. Wañampi paluru panya liru nganmanyitja ini panya Satannga munu ini kutjupa Mamunya, panya añangu manta winitjita ngunti kuralpaina. Panya palunya wañingu mantakutu angelpa kura palunya wañalpai tjuñaku kuñu.

¹⁰ Kaña kulinu wangka pulka ilkarìnguru wangkanyangka nyanga alatji, “Kuwari nyanga Godalu añangu tjuñaku wankañunu panya paluru ilkarìnguru mamu palunya wañingu nyara nganampa kuta kangkuru tjuñaku ngukara wangkanytjanya. Paluru Godala miñrangka tjananya tiñutjarangku ngukara wangkapai kalaña mungangka. Palu kuvari Godalu palunya wañingu alatjitu witulya pulkangku.

Uwa, Godanya mayatja pulka alatjitu nyinanyi, ka palumpa katja Wankarunkupainya panya kuvari kunpu pulkaringkula mayatja pulkañu nyinanyi. ¹¹ Nganampa kuñapiti kangkuruñupiti uwankara mamu Satanta waintaringu. Nyaanguru-puñu tjananya mamungku puñulinangi? Lamalama ngalkilarira milkali tjutintjjanguruña waintaringu ka tjananya puñulinu. Munuya tjukurpa nyanga palunya kuñu tjukarurungku wangkara tjana waintaringu, kaya tjananya kutjupa tjutangku iluntankunytjikitjangku kukanyamanangi, palu paluru tjanaya kulira kurunpa nguluringkunytja wiya rapa ngarangi ilunytjikitja munuya uwankara pikatjararingkula ilungi tjana pungkunyangka.

¹² Palulanguruña ilkarìngka nyinanytja tjuñaku pukulari! Palu ngaltutjara nyura mantangka nyinapai tjuñaku, urungka nyinapai tjuñaku kuñu, panya Satannga nyuralakutu ukalingu nyurampa mirpanpa mulapa panya paluru ninti taimi nyara palumpa muñuringkunyangka.”

Alatjiṇa kulinu ilkarīnguru wangkanyangka.

¹³ Ka wañampi panya paluru kulinu, "Uwa, palyani nyura mantakutu wañingu." Munu paluru kulinu minyma panya tjitji nyitayira kanyintjanya ngulura wañaparantjikitjangku.

¹⁴ Ka kutjupangku minyma panya palunya walawuru pulkaku nyalpi kutjara ungu paluru parpakaṛa wirtjapakantjaku wañampingka-tawara ngura panya pilakutu panya Godalu palumpa palyantjitetjaku. Ka nyara palulaya mai ungkula palunya atunymara kanyiningi kuṛi panya kutjara kutjara wañampi palula-tawara.

¹⁵ Ka palulanguru wañampi paluru kapi uru pulkanya walatjunu minyma panya palunya katira ma-wañintjaku. ¹⁶ Palu Godalu manta alaṇu uru ngatalpatu karalukatinjtjaku, ka minyma panya paluru wankaringu.

¹⁷ Ka palulanguru wañampi panya paluru pulkara mirpañaringu munu pika anu minyma panya palumpa katjapitiku munu unṭalpitiku panya Godaku waltyja tjutaku, panya paluru tjana Godala wangañarangku kulilpai munuya tjukurpa Jesulu wangkanytja uwankara tjukarurungku kulilpai.

Ka wañampi paluru uru pulkangka kantilytja ngarangi.

13

Mamu Kutjara

¹ Kaṇa palulanguru nyangu mamu ngalya-pakannyangka uru pulkanguru kata 7-tjara munu yuruwilya 10-tjara. Ka yuruwilyangka kutjungka kutjungka paluru kanyiningi puturu purunypa panya puturu mayatjangku kanyilpai, palu purunypa, ka ini kura walkatjura wantintjya ngarangi kata kutju kutjungku Godanya anantja-tjara. ² Ka mamu paluru puntu ngaya pulka purunypa ngarangi, ka palumpa tjina bear purunypa ngarangi munu tjaa lion purunypa ngarangi. Ka wañampingku mamu palunya palumpa kurunitjangka witulyanu ayinayiningku palyantjaku palu purunyju. Munu mamu panya palunya wangkangu palumpa tjiyangka nyinara mayatjarira uwankara kanyintjaku. ³ Mamu paluru panya kata tjuta, ka kata kutju pika pulka ngaranytjatjanu malaku palyaringkunytja ngarangi, panya kata pika pulka nguwanpa ilunytjatjanu malaku palyaringkupai palu purunypa. Kaya aŋangu manta winkitjangku nyakula urulyaraṇu munuya palunya wañaningi mayatjarinyangka.

⁴ Munuya wañampi palunya walkuningi panya paluru mamu panya palunya witulyankunyangka. Munuya mamu palunya kuṛi walkura wangkangi, "Aŋangu kutjupa mamu nyanga purunypa ngaranytja wiya alatjiṭu. Ka kutjupangku palunya pikangku pungkunytjaku wiya ngaranyi, panya paluru witulya pulka ngaranyi uwankarangka waintarintjya."

⁵ Ka wañampingku wangkangu mamu panya ngaya puntu purunyta paluru kaṇany-kaṇanytju wangkanytjaku munu Godanya anantjaku, ka Godalu palunya wantingu paluru palya palunya anantjaku rawangku pira 42-ařangku. ⁶ Ka mulapatu paluru Godanya anara warkingi, ngura palumpa munu ngura ilkarīngka nyinanytja tjuta kułukulu. ⁷ Ka wañampingku panya piruku wangkangu mamu palunya pika pungkunytjaku Godaku waltyja tjuta, ka Godalu palunya wantingu paluru palya palunya tjananya pungkunytjaku rawangku pira 42-ařangku ka pungkula pungkula paluru tjanala waintaringu. Ka wañampingku piruku wangkangu mamu palunya mayatjarira ngura uwankara kanyintjaku

añangu winki wangka kutjupa wangka kutjupa mìri kutjupa mìri kutjupa kulu. Ka Godalu piruku palunya wantingu paluru palya mayatjarintjaku munu tjananya kanyintjaku.

⁸ Kaya manta winkingka añangu uwankarangku mamu palunya wal'kulku, palu Godaku waltyja tjutangku kutju mamu palunya mi-rawañinytja wiyangku wantiku. Panya palumpa tjanampa ini Lamalama-mangku walkatjelu palumpa nyiringka ngañmanytju manta palyantja kuwaripangka tjana palula titutjara wanka nyinanytjaku. Lamalama nyanga palunya panya pungkunytjanya.

⁹ Uwa, palu nyura pina ala ngaralampa uti nyangatja mulapa kulinma, ¹⁰ "Godanya nyurampa ninti panya kutjupatjara nyuranya witintjaku ngaranyi munu tjalangka tjarpatjunkunytjaku kulu, kaya nyuranya mulapatu witira tjarpatjunkuku. Munu piruku Godanya ninti nyurampa panya kutjupatjara nyuranya tjuła pulkangka iluntankunytjaku, kaya nyuranya mulapatu tjuła pulkangka iluntankuku."

Kaya nyangatja kulira uti Godaku waltyja tjutangku nguluringkuwiyangku tungun-tunguntu palunya wan'anma kurunpa rapangku.

¹¹ Kaña palulanguru mamu kutjupalpi nyangu manta unnungururu ngalya-pakannyangka. Ka paluru yuruwilya kutjara-tjara ngarangi lamalama purunypa munu paluru wangka wanampi purunyti wangkangi. ¹² Ka mamu ngañmanyitjangku wangkangu mamu panya nampa 2-ngka mayatjarira kuñpu pulkangku añangu uwankara kanyintjaku. Ka paluru añangu uwankara mantangka nyinanytja tjuta wituwituningi pupakatira wal'kuntjaku mamu panya ngañmanyitja panya kata kutju pika ngaranytjatjanu palyaringkunytjanya.

¹³ Ka mamu nampa 2-ngku ayinayiningku miracle pulka tjuła palyaningi añangu tjutangku nyakula urulyarantjaku. Paluru waru pulka ilkarénguru mantangka punkantjaku palyaningi añangu tjutangka mirangka. ¹⁴ Munu paluru mamu ngañmanyitjangka mirangka kulu pulka tjuła palyaningi añangu tjuła ngunti kurantjikitjangku, kaya añangu manta winkitjangku nyakula palumpa mulamularingu, munuya palunya mayatja pulka-palku kulinu. Ka mamu paluru tjananya wituwitunu mamu-mamu palyantjaku mamu panya ngañmanyitja purunypa, panya kata kutju tjuła pulkanguru pika ngaranytjatjanu palyaringkunytjanya, palu purunypa. Kaya mulapatu palyanu.

¹⁵ Ka mamu panya nampa 2-ngku ngaalypa ungu mamu-mamu panya tjana palyantjanya, ka mulapatu wankaringkula wangkapairingu munu añangu kutjupatjara iluntankunytjikitjangku wangkangi palunya pupakatira wal'kuntja-tjiratjangku. ¹⁶ Ka mamu panya nampa 2-ngku wituwitunu añangu uwankara nampatjara nyinanytjaku. Ka kutjupa tjutangku nampa kanyiningi manyirka wakungka, ka kutjupa tjutangku nampa kanyiningi ngalyangka. Uwankarangkuya nampa kanyiningi yangupalangku, tjlpingku, munu pampangku, mani pulkatjarangku munu mani kułunytjarangku, mayatjaku war'karipaingku munu waltyja war'karipai uwankarangku tjana kulu nampa kanyiningi kutjungku kutjungku. ¹⁷ Ka nampa nyara paluru mamu panya palumpa ini ngarangi tjanala uwankarangka. Kaya nampa wiyatjarangku puťu mai munu ulytja kutjupa kutjupa tjuła kulu payamilaningi, munuya puťu kutjupa kutjupa tjuła tjalamilaningi manikitjangku.

18 Nampa nyanga palunya nganalu nintingku kulilku mamu nyanga palumpa nampa? Kutjupangku ninti ngaralampa nampa nyanga palunya kantamilala munu kulila! Panya nampa nyanga paluru kampa kutjupa ngaranyi watiku ini nampa nyangatja 666.

14

Lamalama Munu Palumpa Walytja Tjuṭa

1 Palulanguruna nyangu, “Nyara Lamalama ngaranyi apu murpu katu ngura ini Tjayanta.” Kaya aŋangu winki mulapa palula tjunguringkula ngarangi nampa panya 144,000 tjuṭa mulapa. Munu paluru tjana ngalyangka kutjungku kutjungku kanyiningi Lamalamaku ini munu palumpa Mamaku ini kuļu, walkatjura wantintytja.

2 Kaya wangka kulinu ilkařinguru wangkanyangka kapi rurku winki wararangka punkantja puřunypa munu wanangařa tuuntja puřunypa. Wangka wiruňa kulinu palunya, panya kitaya wangkatjingalpai, palu puřunypaňa kulinu.

3 Kaya aŋangu panya 144,000 ngarangi kuranyu tjiya panya wirungka munu kuka panya nyalpitjara 4-ngrka, tjlpi tjutangka kuļu kuranyu. Munuya ngarala inma kuwaritja inkangi panya tjana kutju ninti inma nyara palumpa. Kutjupa tjutangku puťu inkangi ngurpangku. Panya nyanga palunya tjananya mantangka nyinanyangkalpi Godalu wankarunu, kaya paluru tjana kutju inma nyanga palumpa nintiringkunytjatjanungku inkangi.

4 Panya nyara palunya tjananya Godalu mantangka ngalkilarira wankarunu, kaya paluru tjana-warara wirkana Godala pulala Lamalamala, munuya Godakuringkula palumpa alatjiču ngarangi. Wati nyanga paluru tjana kungkaku ngurpa nyinangi panya paluru tjana tjukaruru alatjiču nyinapai munuya Lamalama panya titutjarangku waňarinkupai.

5 Munuya paluru tjana tjukurpa ngunti-ngunti wangkara anantja wiya nyinapai, panya paluru tjana kuraringkunytja wiya nyinapai tjukaruru alatjiču.

Angelpa Mankurpa

6 Kaya piruku nyangu angelpa kutjupa ilkari katu para-ngaranyangka. Nyara paluru Tjukurpa Palya titutjara ngaranytjanya katingi manta winkikutu aŋangu tjutangka tjakultjunkunyjikitjangku, wangka kutjupa kutjupangka, miri kutjupa kutjupangka kulu, ngura kutjupitja kutjupitjangka. **7** Munu angelpa paluru mirara wangkangu, “Godanyaya walkunma munuya palunya kutju mirawańima pitalytji pulkanya, panya palumpa taimi ilaringu paluru tjukarurungku ngurkantara tjarantjaku aŋangu uwankara. Palunyaya walkunma, panya ilkari manta uru munu kapi waļa uwankara paluru palyara tjunu, palunya.”

8 Ka angelpa kutjupangku maławanungku pitjala wangkangu, “Kulila! Ngura ini Papilannga, panya tjutangku palunya mirawańipai, nyara paluru kuwari pilukatingu, kaya nguraričja tjuṭa uwankara wiyingru. Panya aŋangu tjuṭa nganmanypalpi kura nyinangi ngura pala palula. Kaya aŋangu ngura winkinguru pitjala tjanala tjunguringkula kuraringangitu pala palunya ngurara tjutangku tjananya wituwitunnyangka. Panya kutjupangku waina tjikintjaku wituwitulpai ka tjikira tarangkaripai, palu puřunypaňuya wituwitunnyangka kuraringangi Godanya kulintja wiya. Palu ngura pala palunya ngurara tjuṭa kuwari uwankara wiyingru.”

⁹⁻¹⁰ Ka piruku angelpa kutjupangku małatjangku wirkara wangkangu wangka pulkangku nyanga alatji, "Panya tjana mamu ngaya pulka purunypa pupakatira walkuni, munu tjana mamu palu purunypa mamu-mamu palyantja kułu walkuni, munu panya tjana nampa marangka ngalyangka kułu kanyini, nyara palumpa tjanampa Godanya pulkara mirpanariku. Munu tjananya warungka urkuwaniku puli yalawana waru tilitjarangka kułu, kaya pulkara ulaku pika pulka kulira. Kaya Lamalamangku munu Godaku angelpa tjułangku kułu tjananya ulanyangka nyakuku. ¹¹ Ka warungku tjananya kampanyangka tjunanpa titutjara pakalku wiyingkunytja wiya. Kaya titutjara miraku pika kaarn-garanyangka kulira tjinitungka munu mungangka kułu munuya putu kulira utjulku. Panya paluru tjana mamu ngaya purunypa walkuningi, munu mamu-mamu tjana palyantja kułu walkuningi, munuya mamu palumpa nampa walka kanyiningi." Alatji angelpa małatjangku wangkangi, kaña kuliningi.

¹² Kaya kulinma Godaku waltya tjułangku, Godanya wanganarangku kulipai tjułangku, munu Jesuku mulamularingkupai tjułangku kułu. Tungun-tunguntuya wantinytja wiyangku palunya wañanma titutjarangku!

¹³ Kaña piruku wangka kulinu ilkaringuру ngayula wangkanyangka nyanga alatji, "Walkatjura nyiringka tjukurpa nyanga palunya! 'Kuwaringuруya Jesuku waltya tjuła kutjupa tjułangku iluntankunyangka tjana pukulpa mulapa nyinaku.' "

Ka Kurunpa Milmiltu kulira wangkangu, "Uwa mulapa, panya tjana Godaku warķa pulka palyantitatjanu tjana paku wiyingkula pukulpa mulapa titutjara nyinaku."

Mantangka Mai Kuru Katara Urantja

¹⁴ Nyanga palulanguruṇa nyangu wati purunypa nyinanyangka ngangkali piranta ilkarı katu. Paluru katangka kanyiningi pułturu purunypa, panya pułturu mayatjangku kanyilpai, palu purunypa, munu manyirkangka kułu kanyiningi tjuła kalikali iri pulkatjara.

¹⁵ Ka angelpa kutjupa timpula ilkaritjanguru ngalya-pakanu munu mirara wangkangu wati panya ngangkali piranta nyinanytjala, "Mai kururingu nyara mantangka. Ka ankula katara uwankara urala!" ¹⁶ Ka paluru mulapaṭu mai panya tjuła mantangka pakantja tjułangka katara wañara urańu.

¹⁷ Munuña piruku nyangu angelpa kutjupa timpulanguru ngalyapakkanyangka, nyara paluru kanyiningi tjuła panya kalikali iri pulkatjara palu purunypaṭu.

¹⁸ Palula małangka angelpa kutjupa pitjangu pitjilpa panya palulanguru. Angelpa nyara paluru waruku mayatja. Munu paluru mirara wangkangu angelpa panya tjuła kalikali kanyilpaina, "Mai kiripitji kururingu nyara mantangka. Ka ankula tjuła palangka mai kiripitji tjuła puńu tjułanguru katara urala!"

¹⁹⁻²⁰ Ka mulapaṭu paluru tjułangka mai tjuła katana. Munu urara katira piti pulka kiripitji kantura tjułkulpaingka tjuńu walingka urulta. Ka mai kiripitji tjuła kantura tjułkulpaingka tjuńu walingka urulta. Ka palulanguru milkali pulka pakanu nyara kiripitji tjułkulpaingka tjuńu walingka urulta. Tjukurpa kiripitji nyanga paluru wara pulka ma-ukalingangi 300 kilamita. Tjukurpa kiripitji nyanga

paluru kampa kutjupa wangkanyi panya Godalu anangu kuralpai tjuta palu purunypa palyalku munu tjananya mirpañarira uwankara wiyalku.

15

Angelpa 7-tu Pika Kura Tjuta Pitingka Kanyintja

¹ Munuña piruku nyangu kutjupa kutjupa ilkarìngka utiringkunyangka, panya angelpa 7 ngarangi. Kaña nyakula kawaru-kawaruringu, panya nyara paluru tjana kutjungku kutjungku pika kura 7 kanyiningi. Panya Godanya mirpañaringu anangu kura tjutaku munu angelpa nyanga 7 iyanu anangu tjuta pikatjarantjaku uru manta kulu kurantjaku. Pika nyanga paluru tjana kura mulapa ngarangi pika malatja, Godalu mirpañarira iyantja.

² Kaña piruku nyangu manta kalawatja purunypa parariwanu ngarinyangka uru kaltara purunypa, ka waru purunypa tili-tili ngarala wañaningi manta pala palula unnguwanu. Kaña manta panya kalawatja purunyta kantilytja nyangu anangu tjuta ngaranyangka. Nyara paluru tjana panya mantangkalpi nyinara mamu panya ngaya purunyta tungpungangi, ka tjananya pu tu wituwituningi palunya pupakatira mirrawañintjaku, mamu-mamu panya palyantja ku lu. Anangu nyara paluru tjana mamu panya palumpa walka 666 kanyintja wiya tu. Munu paluru tjana uwankarangku kita purunypa kanyiningi Godalu ungkunyangka.

³ Munuya ngarala wañara inma Moseku inkangi, panya Godaku warkaripai Mosenya wati nyara palumpa inma, munuya Lamalamaku inma ku lu inkangi nyanga alatji wangkara,
“God, nyuntu mayatja witulya pulkanya nyinanyi.

Nyuntun pulka mulapa palyalpai, ka nganana nyakula urulyarara nyuntumpa pulkara pukularipai.

Nyuntu ngura wikitjaku mayatja pulka nyinanyi,
munun nyuntu tjananya palyanyku tjukarurungku kanyilpai.

⁴ Panya anangu uwankarangku nyuntumpa nguluringkula nyuntunya kulilpai,
munu nyuntunya pupakatira walkulpai.

Tjana uwankarangku nyuntunya mayatja pulka kulilpai.

Nyuntun kutju palya mulapa nyinanyi.

Kaya anangu winki pitjaku ngura uwankaranguru nyuntunya mirawañira pulkanmankunytjikitja,
panya nyuntu tjukarurungku palyannyangka tjutangku nyakupai.”

⁵ Nyanga palulanguru na nyangu ilkarìngka timpula unngutja alaringkunyangka tiinta panya milmilpa Godanya unngu nyinanytja.

⁶ Ka angelpa panya 7 pika panya ungkunytjikitja timpulanguru pakanu. Nyara paluru tjana mantara piranpa mulapa kanyiningi irnyantja wiru. Kaya paluru tjana kutjungku kutjungku nanpa gold-nguru palyantja pilpirwanungku karpira kanyiningi.

⁷ Ka panya kuka nyalpitjara kutjara kutjara ngarangi, ka palula tjanalanguru kutjungku angelpa panya 7 kutju kutju ungu piti gold-nguru palyantja. Ka piti pala palula tjanala mirpanpa Godaku tjaalyngarangi, panya paluru pulkara mirpañarinyi anangu tjutaku kura palyalpai tjutaku. ⁸ Ka Godanya witulya pitalytji pulka titutjara nyinapainya timpula unngu nyinangi ka puyu pulkangku anganu. Ka nyara palula arangka timpulangka uwankara pu tu tjarpanytjaku wiya ngaraku,

palu angelpa 7-tu pika kutjupa kutjupa tjuṭa ungkula wiyaringkunyangka kutju palya nyara palula malangka tjarpaku.

16

Angelpa 7-tu Pika Tjuta Ungkunyta

¹ Palulanguruṇa kulinu wangka pulka timpulanguru tjanala wangkanyangka angelpa panya 7-ta. Alatji tjanala wangkangu, “Ankulaya piti pala 7 nyura kanyintjanguru mantangka pupatjura Godanya mirpanarinyta.”

² Ka angelpa ngañmanyitjangku ankula pupatjunu piti munu tjutinu mantangka, ka Godanya mirpanarinyangka anangu panya mamu ngaya purunypa walkulpai tjuṭa uwankara purtjutjararingu, munuya pulkara pikatjararingkula kaarngaṛangi. Panya nyara paluru tjana mamuku nampa kanyiningi munu paluru tjana mamu-mamu walkulpai mamu ngaya purunypa tjana palyantja. Nyara paluru tjana purtjutjararingu angeltu pitinguru pupatjunkunyangka.

³ Ka angelpa nampa 2-ngku piti palumpanguru ankula tjutinu uru pulkangka, ka uru paluru kuraringu milkalı uña purunyarira. Ka kuka kutjupa kutjupa urungka nyinapai uwankara ilura wiyaringu uru pulkangka.

⁴ Ka angelpa nampa 3-ngku piti palumpanguru tjutinu kapi tjikilpai tjuṭangka karu urutjara tjutangka kuļu, ka uwankara milkaliringu. ⁵ Kanā kulinu angelpa kapi uwankaraku mayatjangku alatji wangkanyangka,

“God milmilpa, nyuntu tjukarurungku kulira nyangatja palyanu.

Nyuntu panya ngañmanypalpi kuwaripatjara nyinanytjatjanu kuwari kuļu nyinanyitu.

⁶ Ka panya tjana kuralpai tjuṭangku nyuntumpa waltyapiti munu nyuntumpa wangkatjara tjuṭa kuļu pungkula milkalitjarara iluntanangi. Kan palulanguru nyuntu ngapartji palumpa tjanampa kapi milkalirinytjaku palyanu tjana tjkintjaku.”

Alatji angeltu wangkangu. ⁷ Kanā palulanguru wangka kutjupa kulinu pitjilpa puyu wiru pakalpailanguru wangkanyangka,

“Uwa, Mayatja God nyuntu panyan pulka mulapa nyinanyi.

Nyuntu tjukarurungku kulira tjananya pikatjararingkunytyaku palyalpai.”

⁸ Ka palulanguru angelpa nampa 4-ngku piti palumpanguru katira tjintungka tjutinu tjananya pulkara kampanytjaku anangu tjuṭa. ⁹ Ka kuli pulkaringkula mulapatu tjananya kampangu, kaya Godaku pulkara mirpanarira warkingi panya tjananya pulkara kampanyangka. Utiya pinkurarara Godanya kulira walkunma, palu paluru tjana tunguntunguntu kura palyalkatingi.

¹⁰ Ka angelpa nampa 5-ngku ngapartji palumpa pitinguru tjutinu mamu panya ngaya pulkaku tjiyangka paluru nyinapaingka, ka tjutinnyangka mamu palumpa ngurangka maruringu, kaya mamu palunya kulisai tjuṭangku pika pulka tjananku kulira ankura ulara waningi.

¹¹ Munuya Godaku mirpanarira anara palunya warkingi panya pika pulka tjuṭa angelpa 7-tu ungkunytyanguru. Palu panya tjana tunguntunguntu rawangku alatji kura tjuṭa palyalkatingi Godalakutu malaku aruringkunytyikitjangku kulintja wiyangku.

¹² Ka angelpa nampa 6-ngku ngapartji palumpa pitinguru katira karu uru ini Yupuraitila tjutinu. Ka uru paluru wiyingkula manta piltiringu mayatja tjuṭa warmala winki kakararanguru ngula pitjala manta piltingka itipirira pitjanytjaku.

¹³ Palulanguruṇa nyangu mamu maŋkurpa ngaŋngi purunypa utirringkunyangka. Kutju wanampi panya palumpa tjaanguru, kutjupa mamu panya ngaya pulka purunyku tjaanguru, ka kutjupa wangkatjara ngunti kuralpaiku tjaanguru kulu.* ¹⁴ Nyara paluru tjana mamu kura mulapa, kutjupa kutjupa pulka tjuta ayinayiningku palyalpai. Munu tjana anu manta winkikutu mayatja pulka tjuta altintytjikitja tjana warmala winkitjara pitjala ngura kutjungka tjunguringkula tjana Godaku mirpañarira ilkaritja tjuta pika pulka pungkunytjaku. Pika pulka nyara paluru Tjintu Małatjangka ngaraku palumpa taimingka Godalu Mayatja Pulkalu wangkanyangka.*

¹⁵ Ka Mayatja Jesulu wangkangu, “Kulilaya! Panya wati kutitjunkupai kampangkaṭu pitjapai nyura watarku nyinanyangka, palu purunypaṇa ngayulu pitjaku anangu tjuta watarku nyinanyangka. Palu nyura watarku nyinanytja wiya ngayuku ala-alā paṭara nyinama, ka ngayulu wirkankunyangka Godalu nyuranya pukulmankuku, ka nyura mantara winki rapa ngaraku watarku nyinanytja tjuṭa purunypa nikiti paranganala kunṭaringkunytja wiya.”

¹⁶ Ka palulanguru mamu panya ngaŋngi maŋkurtu mayatja tjuta warmala winki altira katira tjungunu ngura ini Ama-kitanta. Ini pala paluru Iipuru tjuṭaku wangka.

¹⁷ Ka angelpa nampa 7-tu ngapartji piti palumpanguru ilkariringka tjutinu. Ka wangka pulka Godaku tjiya wirunguru timpula unnungunguru wangkangu, “Alatjiṭu wiyaringu.”

¹⁸ Ka wanangara pulkara pinpangi munu tuuningi kulu, ka manta pulkara urira tjlpi-tjlpiraraṇu. Nyangatja pulka mulapa manta urira tjlpirarantja ngañmanyitja purunypa wiya. ¹⁹ Ka tawunu pulkanya ini panya Papilannga tjlpirarara ngura maŋkuraringu, kaya tawunu ngura kutjupitja uwankara pilukatira wiyaringangi. Panya Godalu kuliningi tawunu pulka panya Papilannga ngura nyara palulaya kura kutju palyalpai tjuṭa nyinangi. Munu nyanga palunya kulira pulkara mirpañaringu munu tjananya iluntanu uwankara.

²⁰ Ka manta kulinypa tjuṭa uru pulkangka ngururpa ngaranytja tjuta arkayirira wiyaringu, apu murpu tjuṭa kułukulu uwankara wiyaringu.

²¹ Ka kunaṭa kalka pulka mulapa apu tjungari pulka purunypa punkanu ilkariringuru anangu tjuṭangka, kaya Godaku mirpañarira anara palunya warkingi panya paluru kunaṭa pulka mulapa tjanalakutu iyannyangka.

17

Minyma Kura Wati Tjutangka Ngaripainya

¹ Uwa, angelpa 7 panya pititjara ngarangi. Ka kutju palula tjanalanguru ngayulakutu pitjangu mununi wangkangu, “Pitjala nyawa minyma panya wati tjuṭangka ngaripainya. Nyaratja paluru karu tjuṭangka itingka nyinanyi. Palu kuwari Godalu palunya tjituru-tjituru pulka palyalku ka wiyaringkuku. Palu minyma nyanga palunya kampa kutjupa kulinma,

* **16:13** Wangkatjara ngunti kuralpai nyanga paluru mamu nampa 2, panya anangu tjuṭa wituwituningi mamu-mamu palyantjaku. Tjukurpa nyanga palunya ngañmanyitju tjakultjunangi chapter 13-ta verse 11-ta. * **16:14** Chapter 19:11-21

panya aŋangu tjuṭa tawunu panya pulka ini Papilanta nyinanytja tjuṭa, panya paluru tjana kura pulka mulapa nyinanyi. Tawunu nyara paluru panya karu tjuṭangka itingka ngaranyi, kaya ngura pala palula aŋangu tjuṭa kura mulapa nyinapai munuya Godanya wantira puṇu tjuṭa tjananku palyantja walkulpai. Panya minymangku kuri waltya wantira wati tjuṭangka pirtjipai, nyara palu purunypaya Godanya wantira puṇu tjananku palyantjitja tjuṭaku mukuringkupai pulkara.² Kaya mayatja tjuṭa ngura kutjupa kutjupa tjuṭanguru pitjala tawunu palula tjunguringkula kuraringu minyma kurangka ngarinnytja purunypa. Ka palu purunypatu aŋangu tjuṭa kulu manta winkinguru pitjala kuraringu tawunu nyara palunya ngurarrangku wituwitunyangka. Nyaa purunypa, panya kutjupangku waina tjikintjaku wituwitulpai, ka tjikira tarangkaripai, palu purunypaya wituwitunyangka kuraringangi Godanya kulintja wiya ngura kutjupitja tjuṭa.” Nyanga alatjini nintira tjakultjunangi angeltu.

³ Ka palulanguru Kurunpa Milmiltu ngayunya piruku nintiningi, kani angeltu kurunpa katingu pilakutu. Kanä tjukurpa nyangu minyma nyinanyangka mamu tjin-tjintinta katu. Ka mamu paluru puntu ngaya pulka purunypa munu kata 7-tjara, yuruwilya 10-tjara kulu ngarangi. Ka mamu pala palula aŋangungka ini tjuṭa ngarangi kura tjuṭa Godanya warkira anantja-tjara.

⁴ Ka minyma paluru mantara wiru tjin-tjinipa kanyiningi, munu paluru wiru tjuṭa kanyiningi gold-nguru munu upulanguru palyantja, maratja munu liritja, tjinatja, karilitja kulu. Ka manyirkangku paluru kanyiningi gold-nguru palyantja panikina kura kutjupa kutjupa tjuṭatjara paluru panya palyantja tjuṭa. Panya paluru wati tjuṭangka ngaripai munu kura kutjupa kutjupa tjuṭa palyalpai. Nyara palula tjanalanguru kura palumpa panikinangka tjaalyngarangu. ⁵ Ka palula ngalyangka ini ngarangi tjukurpa kumpilitja puṭu nguwanpa kulintjaku. Nyanga alatji ini paluru ngarangi, “Ngayulu tawunu pulka Papilannga. Ngayulu ngunytyu pulka nyinanyi kampangkaṭu ngaripai tjuṭaku, munu kura palyalpai uwankaraku kulu.”

⁶ Kanä nyangu minyma panya palunya tarangka nyinanyangka. Panya paluru Godaku waltya tjuṭa rawangku iluntara iluntara pulkara pukularingu, munu tarangka purunypa nyinangi. Paluru Jesunya tungun-tunguntu waŋalpai tjuṭa pungkula wiyanjtjanu pulkara alatjitu pukularingu.

Kanä minyma nyanga palunya nyakula pulkara kawaru-kawaruringu. ⁷ Kani angeltu wangkangu, “Nyaakun kawaru-kawarurinyi? Kuwari ngayulu nyuntula utini tjukurpa nyanga kuvari nyuntu nyakunytjitjanguru panya minyma palunya, munu mamu panya palunya kulu kata 7-tjara munu yuruwilya 10-tjara. ⁸ Mamu nyara paluru panya nganmanypa wanka nyinangi munu paluru ilungu, ka palunya piṭi ngati pulkangka tjarpatjunu. Ka kuvari piṭi nyara palulanguru piruku ngalya-pakalku, ka Godalu palunya wiyaliku. Palu aŋangu kura tjuṭangku mamu palunya piṭinguru piruku pakannyangka nyakula pulkara urulyaralku. Panya aŋangu nyanga palunya tjananya Godalu nyiringka ini walkatjunkunytja wiyatü wanka titutjara nyinanytjaku. Ka panya mamu nyara paluru wanka nyinangi nganmanypa munu panya paluru ilungu, palu piruku paluru utiringkuku, kaya nyakula kata paunaralku.

⁹ “Tjukurpa nyangatja nintipukangku kutju kulilkü nyanga kumpilpa ngaranytja tjuṭa. Kata 7 panya apu murpu 7 nintini minyma paluru

nyinanytja. Munu kata 7 paluru tjana píruku kutjupa nintini panya mayatja 7 nyinanytja tjuta. ¹⁰ Ka mayatja 5 nganmanyapa wanapari wanapari nyinanytjatjanu wiyaringu, ka kuvari mayatja kutju nampa 6 nyinanyi, ka kutjupa kuwaripa mayatjarinytja wiyatú ngaranyi. Munu paluru ngula mayatjarira rawangku kanyintja wiya tjukutjuku kutju nyinara wiyarlingkuku. ¹¹ Ka mamu panya wanka nyinara wiyarlingkunytjanya paluru mayatja kutjupa nampa 8. Munu panya mayatja nampa 7 nyinangi, palu purunypatu paluru mala nyinaku mayatja pulka. Palu Godalu palunya warungka urkuwaniku ka paluru wiyarlingkuku.

¹² “Ka panya yuruwilya 10-pa nyuntu nyakunytja. Nyara paluru tjana kampa kutjupa nintini mayatja 10-pa, palu kuwaripa paluru tjana mayatjarinytja wiyatú. Ka mamu ngaya pulka purunypa mayatjarira nyinanyangkaya palula tjunguringkula anangu tjuṭa mayatjarira kanyilku. Palu tjana mayatjarira rawangku kanyintja wiya 1 hour kutju nyinara wiyarlingkuku tjukutjuku alatjitu. ¹³ Kaya 10 nyanga paluru tjana wangkangu mamu pala palunya, ‘Nyuntu kutjungku mayatjarira uwankara kanyinma, kala nyuntula kutju kulira palyanma.’ ¹⁴ Munuya mayatja paluru tjana Lamalamaku pikaringkuku, palu Lamalamangku tjananya pungkula wiyalku, panya paluru mayatja pulka mulapa uwankarangka waintarinitya nyinanyi. Kaya palumpa wañalpai tjutangku palula tjunguringkula tjananya pungkula uwankara wiyalku. Nyanga palunya tjananya panya Godalu ngurkantara altingu, kaya Lamalamanya tungun-tunguntu wañanigi.” Nyanga alatjini angeltu utira tjakultjunu.

¹⁵ Mununi píruku wangkangu, “Panya nyuntu nyangu minyma panya kura wati tjutangka ngaripainya uru karu tjutangka itingka nyinanyangka. Palu karu nyara paluru tjana kampa kutjupa nintini anangu tjuṭa ngura kutjupitja kutjupitja, wangka kutjupa kutjupa, miri kutjupa kutjupa. ¹⁶ Ka panya nyuntu nyangu yuruwilya 10-pa panya kampa kutjupa nintini mayatja 10-pa, munun mamu ngaya pulka purunypa kulu nyangu. Nyara paluru tjana kuraringkuku minyma panya palumpa wati tjutangka ngaripaiku. Munuya uwankara paluru kanyintja araltjara wiyalku, ka nikitiriku. Munuya minyma palunya iltjanpa ngalkuku munuya warungka urkuwaniku. ¹⁷ Panya Godalu tjananya mayatja 10-pa kutjuṇu tjana tjunguringkula mamu panya palunya wangkara mayatja pulkanmankunytjaku, ka mamu paluru uwankara kanyilku Godalu nganmanytju wangkanytja tjuṭa utiringkunytjaku patara.

¹⁸ “Ka minyma panya palunya kuvari nyuntu nyangu. Nyara palunya tjukurpa kampa kutjupa tjakultjunanyi tawunu pulka panya Papilannga. Tawunu nyara paluru mayatja pulka purunytju mayatjarira mayatja mantatja kutjupa uwankara kanyilpai.”

18

Tawunu Pulka Papilannga Pilukatinjtja

¹ Nyanga palula malangkaṇa píruku nyangu angelpa kutjupa ukalingkunyangka ilkaringuru. Ka angelpa nyanga paluru mayatja pulka ngarangi witulya pulka mulapa. Munu paluru tili pitalytji pulkangku pitjala manta winki alatjitu irnyaningi. ² Munu wirkara paluru pulkara mirara wangkangu,

“Tawunu panya Papilannga tjutangku mirawanipai, palu nyara paluru kuvari punkara pilukatingu, munu anangu tjuṭa kulu wiyaringu ngura palula nyinanytja tjuṭa. Ka anangu tjuṭa wiya ngaranyangka

ngura nyara palula mamu tjuṭa kutju nyinanyi munu tjulpu kurakura tjuṭa kuļu małaringkula nyinara waṇinyi.

³ Panya aŋangu tjuṭa kura mulapa nyinangi ngura pala palula, kura tjeta kutju kulilpai. Munuya aŋangu kutjupa tjuṭa ngura winkinguru pitjanytjaku altingi tjanala tjunguringkula kuraringkunytjaku, kaya altingyangka mulapatu tjuṭa pitjala tjanala tjunguringkula uwankara kuraringu munuya Godaku watarkurira palunya kulintja wiyaringu.

Kaya mayatja pulka tjuṭa kuļu ngura tjuṭanguru pitjala tjanala tjunguringkula palu purunypaṭu kuraringangi.

Kaya kutjupa tjuṭa ngura tjuṭanguru kuļu pitjangu kutjupa kutjupa tjuṭa tjanala tjalamilantjikitja manikitjangku, munuya tjalamilara mani pulkatjararingu. Panya tawunu nyara palunya ngurara tjuṭa kutjupa kutjupa tjuṭaku pulka mukuringkupai kurunpa winki, munuya palunya tjananya kutju kulira pulka mulapa payamilalpai.”

Alatji angelpa nyara paluru ngayula wangkangi.

⁴ Kanə piruku kulinu wangka kutjupa ilkar̄inguru wangkanyangka nyanga alatji,

“Ngayuku waltyja tjuṭa, tawunu palatjaya wantikati munuya ngalyapakala. Nyura tjinguru tjanala tjungu rawa nyinara tjanala aañarira kura kutju kulipairingkuku. Ngayulu kuwari tjananya pika pulka ungkuku, kaya tawunu palatja wantikati nyura kuļu pika urantjakutawara.

⁵ Panya tawunu pala palulaya titutjarangku kura pulka mulapa palyalpai nyinanyi. Ka Godalu nyakula palunya tjananya pungkunytjikitjangku kulini kura pulka rawangku palyannyangka.

⁶ Kuwari palunya tjananya ngapartji pungkunytjaku ngaranyi panya nyuranya pungkunytjanguru. Tjana panya nyuranya rawangku punggangi, ka kuwari palunya tjananya ngapartji pulka mulapa pungkunytjaku ngaranyi.

⁷ Panya tawunu pala palula nyinanytja tjuṭangkuyanku waltyjangku mirawaṇipai. Nyara paluru tjana ulytja pulkatjara nyinanyi munuya mani pulka kuļu kanyini. Ka tjananya ngapartji uwankara pika pulka pulka pungkunytjaku ngaranyi.

Panya tawunu nyara palula nyinanytja tjutangkuya wangkapai, ‘Nganāŋalanku minyma mayatja pulka purunypa nyinanyi wiřu mulapa. Munu nganāna wanakalarintja purunypa wiya nganāna pukulpa titutjara nyinaku.’ Alatjiyanku tawunu nyara palumpa tjanampa ngura wangkara mirawaṇingi.

⁸ Palu nyanga tjana alatji kañany-kañanytju mirawaṇinyangka Godalu tjananya mapalku pungkuku pika pulka tjana watarku nyinanyangka. Kaya pulka pikatjararingkuku, munuya ilunyangka pulka tjituru-tjitururiku, ka ailuru pulka kuļu ngaraku ngura pala palula. Panya tawunu nyara palunya Godalu tilliku waru pulkangka, ka kampara uwankara wiyalku. Panya Godanya mayatja pulka nyinanyi munu paluru tjukarurungku ngurkantara ngura palunya warungka tilliku, ka tjananya kampaku uwankara.”

Alatji wangka kutjupa ilkar̄inguru wangkangi.

⁹ Ka mulapa tawunu paluru kampanyangka puyu pulka pakalku, kaya mayatja pulka tjuṭangku ngura uwankaranguru nyakula pulka tjituru-tjitururira ulaku. Panya paluru tjana aŋangu ngura palunya ngurara tjuṭangka pukulpa tjunguringkupai. Munuya palulanguru nyakula pulka ulaku Godalu tjananya uwankara tiliřa wiyannyangka.

10 Paṭunguruya ngarala ngulungku nyakuku Godalu tjananya kuļu tjungu tilintjaku-tawara. Munu nyara paluru tjana ngarala ruuru kulira wangkaku,

“Ai, ngaltutjara tjuṭa. Tawunu nyara palula nyinapai tjuṭa kuwari uwankara wiyaringu. Tawunu paluru pulka mulapa ngarangi panya anangu tjutangku palunya mirawanipai. Ka Godalu kuwari tiliira mapalku uwankara wiyanu.”

11 Kaya wati tjalamilalpai tjuṭa kułukulu uwankara ulaku tawunu nyara palumpa, panya tjanala payamilalpai tjuṭa ilunyangka. **12** Munuya putu kuliklu,

“Nganalulampa payamilalku gold, tjiilpa, upula, apu kutjupa kutjupa wiru tjuṭa? Nganalulampa payamilalku mantara kala wiru tjuṭatjara munu puṇu kutjupa kutjupa paṇti wirutjara tjuṭa? Nganalulampa kutjupa kutjupa wiru palyantja tjuṭa payamilalku apunguru ayananguru palyantja tjuṭa. Alatjiṭu nyaranpa kampara wiyanu anangu winki, ka uwankara wiyaringu kutjupa nyinanytja wiya.

13 Ka nganalu payamilalku wiru paṇtipai tjuṭa nyanga nganampa, munu waina, uwila, mai ulu, wiita, puluka, tjiipi, nyanytju, wakina uwankara nyanga nganana kanyintja tjuṭa? Munu nyanga anangu nganampa warkaripai tjuṭa nganalu payamilalku? Alatjiṭu payamilalpai tjuṭa wiyaringu warungku kampara uwankara wiyannyangka.”

Alatjiya ngarala wangkangi wiru tjuṭa tjalamilalpai tjutangku ruuru kulira. **14** Munuya piruku wangkaku,

“Papilan! Alatjiṭu panya nyuntu wiru tjuṭa kanyiningi ka kuwari uwankara wiyaringu, mani, kutjupa kutjupa wiru tjuṭa kuļu. Kan nyara palu purunypa tjuṭa nyuntu ngula kanyintja wiya ngaraku piruku.”

15 Alatjiya wangkaku tjalamilalpai tjutangku panya paluru tjana tawunu nyara palula tjarpala kutjupa kutjupa tjuṭa tjalamilalpai munuya mani pulkatjararingkupai. Nyara paluru tjana paṭu ngaraku ngulū Godalu palunya tjananya tjungu tilintjaku-tawara. **16** Munuya ulara wangkaku,

“Ai, ngaltutjara tjuṭa. Tawunu nyara palula nyinapai tjuṭa uwankara wiyaringu munu tjana kutjupa kutjupa wiru tjuṭa kanyintja kuļu wiyaringu. Panya paluru tjana mantara wiru tjuṭangka tjarpapai kala wiru tjuṭatjarangka, munuya liringka tjunkupai, manyirkangka tjarpatjura kanyilpai wiru tjuṭa gold-nguru upulanguru kuļu palyantja.

17 Uwankara nyara paluru tjana kanyintja tjuṭa kuwariṭu wiyaringu.” Ka palu purunypaṭu pautangka ankupai tjutangkuya paṭu ngarala nyakuku tawunu panya kampanyangka. **18** Panya pautaku mayatja tjuṭa, pauta katipai tjuṭa, munu tjanala tjungu pautangka ankupai tjuṭa, nyara paluru tjana puyu pulka pakannyangka nyakula mirara wangkaku, “Tawunu nyaratja pulka mulapa ngarangi, ka kutjupa palu purunypa ngaranytja wiya ngaraku.”

19 Munuya nyakula tjunī kuraringkula mantangka tjunpangka katan-guru tjarpangu pulkara tjituru-tjitururira. Munuya ulara wangkaku,

“Ngaltutjara tjuṭa, tjananya tawunu nyarangka nyinapai tjuṭa uwankara wiyanu. Tjananya panya mirawanipai anangu tjutangku ngura uwankaranguru. Ka panya pautatjara tjutangku kutjupa kutjupa tjuṭa katira tjanala tjalamilalpai munuya mani pulkatjararingkupai. Ka kuwari tjana kutjupa kutjupa wiru tjuṭa kanyintja wiyaringu munuya uwankara maralaringu.

20 Kaya kuwari uwankara pukulari ilkaringka nyinanytja tjuṭa ngura nyara paluru wiyaringkunyangka. Pukulariya Godaku walytja tjuṭa

Godaku wangkatjara tjuṭa kuļu munu Jesulu iyantja tjuṭa kuļukulu uwankara. Panya Godalu ngura nyara palula nyinanytja tjuṭa uwankara iluntara wiyaliku ngapartji nyuralanguru.”

Alatjiya wangkangi pautangka ankupai tjuṭangku.

²¹ Ka palulanguru angelpa kuṇpu pulkangku apu pulka mulapa katura uru pulkangka anta-waṇingu. Munu alatji wangkangu,

“Apu nyangatjaṇa waṇira ḫungka tjarpatjunu ka wiyaringu. Ka palu puṇuny whole tawunu Papilannga wiyarinkuku, ka nyura puṭu nyakuku. ²² Aṇangu kita wangkatjingalpai tjuṭa munu turampata puura wangkatjingalpai tjuṭa, inma wirūra inkapai tjuṭa kuļu uwankara wiyarinkuku ngura nyara palula. Munuya kutjupa kutjupa tjuṭangka warkaripai tjuṭa, mai uninypa runyura waṇalpai tjuṭa, nyanga paluru tjana uwankara wiyarinkuku. ²³ Munuya tawunu nyara palula piṛuku lampa tilintja wiya ngaraku, munuya piṛuku kuri altinytja wiya nyinaku panya uwankara wiyarinkunyangka.

Tawunu nyara palula panya wati tjalamilalpai tjuṭa nintipuka nyinangi, ka aṇangu manta winkitjangku tjananya mirawaṇingi. Kaya tawunu palula ngangkari tjuṭangku kuļu aṇangu ngura winkitja ngunti kuruningi ayinayiningku palyara, kaya nyakula kulira mulamularingangi.

²⁴ Palu panya ngura Papilanta nyinanytja tjuṭangku Godaku wangkatjara tjuṭa iluntanangi, palumpa waltyta tjuṭa kuļukulu, munuya aṇangu kutjupa tjuṭa kuļukulu iluntanangi ngura winkingka. Ka nyanga palulanguru Godalu palunya tjananya ngapartji iluntara uwankara wiyaliku.”

Alatji angelpa kuṇpu pulkangku wangkangu.

19

¹ Nyanga palula maļangkaṇa kulinu aṇangu tjuṭa mulatu ilkariringka tjungungku mirara wangkanyangka alatji,

“Aliluya! Godanya mirawaṇima!

Panya paluru nganampa wankarunkupainya, pitalytji wiru mulapa witulya pulka nyinanyi.

² Paluru tjukarurungku kulira palyalpai.

Munu nyara paluru tjukarurungku alatjiṭu minyma panya aṇangu ngura winkitja kurantitja wiyanu.

Panya paluru tjanala pirtjingi munu tjananyat rawangku wituwituningi kura kutju kulira rawangku palyantjaku.

Munu paluru Godaku waltyta kutjupa tjuṭa iluntanangi.

Nyara palulanguru Godanya mirpaṇaringu munu minyma palunya ngapartji iluntanu.”

Alatjiya mirara wangkangi ilkariringka aṇangu tjuṭa mulatu. ³ Munuya piṛuku wangkangi alatji,

“Aliluya, Godanya mirawaṇima!

Panya paluru tawunu nyara palunya tilinu warungka,
ka kampanyangka puyu ngaranyi tiṭutjara.”

⁴ Kaya tjlpi 24-ngku munu kuka panya nyalpitjara 4-ngku watungarākatira Mayatja Godanya walkuningi tjiya wirungka nyinanytjanya. Munuya wangkangu,

“Aliluya! Mulapala Godanya mirawaṇima!”

Lamalamangku Kuri Altinytja

5 Palulanguruṇa wangka kulinu tjiya wirunguru wangkanyangka nyanga alatji,

“Wanyuya Godanya mirawaṇima uwankarangku palunyu wangaṇarangku kulilpai tjutangku, pulka tjutangku munu tjukutjuku tjutangku munu palunya kuliṛa nguluringkupai tjutangku kuḷu.”

6 Kanā palulanguru kulinu aŋangu mungilyingku wangkara waṇinyangka. Nyara paluru tjana kapi pulka tuuntja purunypa wangkangi munu kapi wała waṛaranguru ukalingkula rurkuntja purunypa wangkangi tjuta mulapa. Munuya uwankarangku nyanga alatji wangkangi,

“Aliluya! Godanya mirawaṇima! Panya paluru nganampa mayatja pulka mulatu uwankara kanyini.

7 Kala palumpa pukularira palunyu kutju mirawaṇima pitalytji pulka nyinanyangka.

Panya kuwari Lamalamangku altintytjaku ngaranyi, ka panya palumpa kuri ritiringkula paṭani.

8 Ka pala palunyu ungu mantara piranpa irnyalpai wiru mulapa, ka tjarpa ngarala paṭaningi.”

(Mantara nyanga paluru kampa kutjupa nintini tjukarurungku palyantja tjuta Godaku walytja tjutangku.)

9 Kanā angeltu wangkangu, “Walkatjura tjukurpa nyanga palunyu alatji, ‘Godalu altingu kutjupa tjuta pitjala tjunguringkula mai ngalkuntjaku Lamalamangku kuri altintytjjangka. Ka nyara tjana pukulpa mularariku tjunguringkula.’” Mununi piruku wangkangu angeltu, “Tjukurpa nyangatja tjukaruru mulapa Godaku.”

10 Kanā palula tjinangka waṭungarakatingu palunyu wałkuntjikitja, kanā markunu, “Mirawaṇintja wiyangkuṇi wantima, Godanya kutju walkunma. Ngayuluṇa angelpa Godaku war̄ka palyalpai nyuntunya purunypa, nyuntumpa kuṭa kangkuru tjuta purunypa, panya nyuntu nganaṇa uwankarangku wangaṇarangku kulilpai tjukurpa Jesulu wangkanytja. Tjukurpa nyara palunyu panya Godaku wangkatjara tjutangku kuliṛa rawangku tjakultjunangi.”

Nyanytju Piranta Tatira Ankunyta

11 Palulanguruṇa nyangu ilkari alaringkunyangka, ka nyanytju piranpa utiringu. Ka palula katu tatira nyinanytjanya ini kutjara nyanga alatji *Tjukarurungku Kulira Palyalpaina*, munu ini kutjupa *Tjurkultu Wangkapainya*. Panya paluru tjukarurungku ngurkantankupai aŋangu kura tjuta munu palya tjuta kuļu, munu paluru tjaultji tjutatjara ankupai pika pungkunytjikitja munu tjukarurungku pungkupai aŋangu kura palyalpai tjuta. **12** Ka kuru palumpa waru tili purunypa kampangi munu paluru katangka kanyiningi puṭuru purunypa tjuta, panya puṭuru mayatja pulkangku kanyilpai, palu purunypa. Ka palula ini walkatjunkunyta ngarangi palu aŋangu tjuta ngurpa ini nyara palumpa, paluru kutju ninti. **13** Ka mantara palumpa milkalingku uwankara tjutuntja ngarangi, kaya palunyu ini wangkapai *Godaku Tjukurnga*.

14 Kaya ilkarijtja tjuta pikakitja palula tjunguringkula anangi nyanytju pirantjara tjuta munu nyara paluru tjana mantara piranpa kanyiningi.

15 Ka wati nyara paluru kuranyu ankunytjalu tjaangku kanyiningi tjula iri pulka ngura winkitja pungkula waintarintjikitjangku. Kaya tjana palunyu puṭu ngapartji iluntankuku. Ka paluru tjananya pauntjingara

kanyilku kuŋpu pulkangku. Palu panya Godanya mirpaŋpa mulapa nyi-nanyi palula tungunpungkupai tjutaku. Ka wati paluru tjananya wiyaliku. Panya mai kiripitji kantura tjulkura wiyalpai, palu purunyamankuku tjananya.¹⁶ Ka palumpa mantarangka munu tjuntangka kuļu ini nyanga alatji walkatjunkunytja ngarangi,

Milmilmankunytja Mayatja Godaku Palyantjaku.

¹⁷ Palulanguruṇa nyangu angelpa kutju tjintu-walara-walara ngaranyangka. Ka paluru mirara wangkangi tjulpu tjuta katu para-para-ngaranyangka, “Pitjalaya tjunguriwa panya Godalu nyuranya kuwari kuka pulka unganyi.¹⁸ Munuya ngalkula miri tjuta iltjanpa ngarinyangka nyanytju tjuta kuļukulu. Nyanga ngarinyiya mayatja pulka tjuta, munu warmala pulka, tjanampa mayatja tjuta kulu munu nyanytju tjuta, nyanytjungka pitjanytja tjuta kuļu munu anangu warkaripai tjuta, walytjangku kulira palyalpai tjuta kuļu, anangu winki alatjitu pulka, kuļunypa, ngaltutjara, mani pulkatjara kuļukulu, kaya uwankara alatjitu ngalkunma.” Nyanga alatji angelpa paluru wangkangu tjulpu tjutangka.

¹⁹ Palulanguruṇa nyangu mamu panya ngaya pulka purunypa munu mayatja mantatja uwankara warmala winki tjunguringkunyangka. Tjana tjunguringkula paṭara ngarangi panya palumpa nyanytju pirantjaraku palumpa warmalaku kuļu pikaringkunytjikitja.

²⁰ Ka mamu panya palunya karpira katingu munu palumpa wangkatjara panya ngunti kuralpaina kuļu tjungu katingu panya nyara paluru kutjupa kutjupa tjuta ayinayiningku palyaningi mamungka mirangka. Paluru panya alatji palyara ngunti kuraningi anangu nampatjara tjuta munu paluru tjananya ngunti wituwituningi mamu-mamu panya mamu ngaya purunypa pupakatira walkuntjaku. Ka mamu palunya munu palumpa wangkatjara panya ngunti kuralpaina pulanya waru lipi pulkangka waningu puli tili winki kampapaingka. Ka pula rawa nyinara warungku kampanyangka pika pulka kaarngaranyangka titutjarangku kulikku.²¹ Ka mamu panya palumpa warmala nyanytju pirantjarangku tjula tjaangku kanyintjala pungkula iluntanu, ka miri winki ilunytja ngarinyangka tjulpu tjutangku pitjala ngalkula uwankara paltjaringu.

20

Kuli 1,000

¹ Palulanguruṇa nyangu angelpa ilkar̄inguru ukalingkunyangka, ka paluru marangku karpintjikitjangku kanyiningi ankapa wituwitit munu key kuļu kanyiningi piṭi ngati pulka patintja alantjikitjangku.²⁻³ Munu angelpa paluru mamu panya wanampi purunypa witira ankapangka karpira tjarpatjunu piṭi ngati pulkala munu angatjura key-ngka patira wantingu piṭi palula rawa nyinanytjaku kuļi 1,000 anangu tjuta pakara ngunti kurantjaku-tawara. Wanampi nyanga paluru ini Satannga. Ka kuļi 1,000 ma-ngarala wiyingkunyangka angeltu palunya piruku walatjunkuku unytjungku, ka wanampi nyanga paluru mantangka tjukutjuku paranganala piruku malaku wiyingkuku.

⁴ Palulanguruṇa nyangu kutjupa tjuta nyinanyangka tjiya wiru tjutangka. Ka tjananya Godalu wangkangu anangu tjuta tjanala kuranyu ngaratjura tjukarurungku ngurkantankunytjaku. Mununa piruku nyangu kurunpa tjuta ngaranyangka ngamanypa panya ilunytja tjuta. Panya tjananya kutjupa tjutangku iluntanu Godaku tjukurpa wangkanyangka munu tjukurpa Jesunyatjara kuļu tjukarurungku tjakultjunkunyangka.

Panya paluru tjana mamu ngaya pulka purunyapa walkuntja wiyangku wantingi munu mamu-mamu panya palyantja kulu pupakatira mi-rawanintja wiyangku wantingi. Munuya paluru tjana panya mamuku nampa ngalyangka marangka kanyintja wiya nyinangi. Nyanga paluru tjana wankaringkula Jesula tjunguringkula mayatjarira nyinangi kuli 1,000.⁵ Nyanga palunya tjananya-warara Godalu wankanu. (Palu kutjupa tjuta wankaringkunytja wiya kuwaripa miri ngarinyi kuli 1,000 ngarala wiyaringkunytjaku patara.)

⁶ Ka panya nganmanypa wankaringkunytja tjuta wiru nyinaku pukulpa mulapa. Nyanga paluru tjana panya Godaku walytja mulapa, ka tjananya warukutu piruku ilunytjaku wanintja wiyangku wantiku. Palu tjana Godaku tjukurtjara tjuta nyinaku Jesuku Christaku kulu munuya palula tjunguringkula mayatjarira nyinaku rawa mulapa kuli 1,000.

Satannga Warungka Tjarpatkunkunytja

⁷ Ka angeltu kuli 1,000 wiyaringkunyangka malangka ngula wanampi panya Satannga pittinguru pakaltjingara walatjunkuku.⁸ Ka paluru ankula anangu manta winitjangka wangkara ngunti mukumukulku tjana palula tjunguringkunytjaku. Nyanga palumpa tjanampa ini kutjara ngaraku Kaakanya munu Maikaakanya, ka tjananya ini nyanga kutjaratjara Satantu altiku anangu mungili mulapa palula tjunguringkula pika pulka pungkunytjaku.

⁹⁻¹⁰ Kaya pitja-pitjaku manta lipiwanu munuya pika pungkunytjikitja ngaraku Godaku walytja tjuta ngurutatjura ngurangka nyinanyangka tawunu nyara Godalu mukulyangku kanyintjitjangka. Palu waru pulka mulapa ilkaringuru palula tjanala punkalku munu tjananya uwankara wiyalu, panya tjana Satantu ngunti kurannyangka palunya wanangingi. Ka Godalu Satannga warungka waniku, ka panya palula pulala tjunguringkuku waru unngu mamu ngaya purunyta munu palumpa wangkatjara ngunti kuralpaingka kulu. Ka paluru tjana warungku kampanyangka pika kulira miraku rawa alatjitu mungangka kalala wiyaringkunytja wiya titutjara.

Tjintu Malatjangka Godalu Ngurkantankunytja

¹¹ Palulanguruna nyangu tjiya piranpa pulka mayatja pulka nyinapai. Ka palula kutju nyinangi. Ka pala palula mirangka ilkari, manta, uwankara mapalku wiyaringu.

¹² Kana palulanguru nyangu anangu uwankara mulapa ilunytjatjanu pakara ngaranyangka tjiya palula kuranyu, wati, minyma, tjitji uwankara mayatja pulka munu mayatja wiya kulukulu. Ka palulanguru nyiri tjuta kanyintjatjanungku alara wananu munu piruku nyiri kutjupa alanatu panya nyiri palula anangu ini tjuta ngaranyi paluru tjana wanka titutjara nyinanytjaku. Ka palulanguru tjiyangka nyinanytjalu nyiri tjiyangka nyakula anangu tjuta tjukarurungku wangkangi panya nyiringku tjakultjunangi tjana mantangka nyinaralpi palyantja uwankara. Ka paluru tjananya uwankara tjukarurungku ngurkantanangi tjana palyantjitetjanguru.¹³ Mununa nyangu anangu uwankara mantangkalpi ilunytja wankaringkula pakara ngaranyangka tjiyangka kuranyu. Ka tjananya tjiyangka nyinanytjalu uwankara tjukarurungku ngurkantanangi nyiringuru nyakula tjana mantangka nyinaralpi palyantja uwankara.

¹⁴ Munu paluru Ilunytjanya pulanya Miri Tjutaku Nguranya waru pulkangka waningu. ¹⁵ Munu paluru nyiri wankalanguru anangu tjuta

ini putu nyakula tjananya waru pulkangkaṭu wañingu. Paluru tjana ngañmanypa mantangkalpi ilungu palu nyanga warungka wañinytja kutjupa tjana waru unngu nyinara titutjara miranytjaku.

21

Ilkari Kuwaritja Munu Manta Kuwaritja

¹ Palulanguruña nyangu manta munu ilkari kuwaritja ngaranyangka. Panya manta ilkari ngañmanypa ngaranytja wiyaringu, uru pulka kulu wiyaringu. ² Kana palulanguru nyangu Godaku tawunu pulkanya ngura panya Jerusalemanyia ilkaringuru ukalingkunyangka. Tawunu paluru milmilpa wiru mulapa. Panya kungkangku kuri altintytjikitja paluru mantara wirungka tjarpapai, nyara palu purunypa wiru mulapa tawunu nyara paluru.

³ Kana wangka kulinu tjiya wirunguru mirara wangkanyangka, “Uwa, kuwari Godanya anangu tjutangka tjunguringkula nguradarira tjanala nyinaku, kaya palumpa walytjapiti palula tjengu titutjara nyinaku. Ka paluru tjananya mayatja wiru mulatu kanyilku, ⁴ munu tjananya paluru kuru ilanypa munilku piruku tjunı kañakatira ulanytjaku wiya, kaya pukulpa kutju nyinaku. Kaya piruku ilunytya wiya ngaraku munuya piruku pika kulira nyarintja wiya nyinaku. Panya mantangkalpi nyanga palu purunypa tjuta ngarangi, nyanga paluru tjana uwankara wiyingkuku kaya pukulpa mulapa kutju titutjara nyinaku.”

⁵ Mununi palulanguru wangkangu tjiya wirungka nyinanytjalu, “Ngayuluña uwankara kampa kutjupara wiru palyalku.” Mununi piruku wangkangu, “Ngayulu nyanga kuwari wangkanytja nyiringka walkatjura, panya nyanga paluru tjukaruru mulapa ngaranyi winkingku kulira mulamularingkunytyaku.”

⁶ Mununi wangkangu, “Ngayulu wangkanytja uwankara mulapa alatjiringu. Ngayuluña ngañmanyitja mulapa uwankara wiyangkalpi nyinanytjanya, mununa panya uwankara wiyingkunyangka nyinaku titutjara wiyingkunytya wiya. Ka kutjupa kapi-tjiratja iluringkunyangka ngayulu kapi intjanungku ungkuku kapi wała wankanguru tjikira nyantulpa wanka titutjara nyinanytjaku. ⁷ Uwa, nyura wantintyta wiyangku ngayunya titutjarangku wañannyangka ngayulu nyuranya rawangku wirura atunymara kanyilku. Ngayulu nyurampa Mama Godanya nyinaku, ka nyura ngayuku tjitji mulapa nyinaku.

⁸ “Palu anangu kuralpai tjuta waru pulkangka tjarpaku. Panya kutjupa tjutangku wanara ngatalpatu wantipai kura kutjupa kutjupa tjanala wirkankunyangka, ka kutjupa tjutangku tjukutjuku mulamularingkunytyatjanungku wantipai, kutjupa tjutangku kura kutjupa kutjupa tjuta palyalpai, kutjupa tjutangku miripungkupai, kutjupatjara kampangkaṭu kutjupangka kutjupangka ngaripai kuri wiyangka, kutjupa tjutangku iratingka kuralpai, kutjupa tjutangku puñunguru apunguru palyantja walkulpai, kutjupa tjutangku ngunti wangkapai. Nyanga palu purunypa palyalpai uwankaraña tjarpatjunkuku waru pulkangka puli yalawana kampapaitjarangka. Panya paluru tjana mantangkalpi ngañmanypa ilungu, kana tjananya wankanu piruku waru pulkangka wañintjikitjangku.”

Tawunu Jerusalemanyia Kuwaritja

⁹ Ka angelpa 7 panyatja ngarangi panya pika tjuta ngañmanytju ungangi pititjarangku. Kani kutjungku pitjala wangkangu, “Wañalanı kañanta nintila Lamalamaku kuri panya kuwari altintytjaku.”

10 Ka palulanguru Kurunpa Milmiltu ngayunya piruku nintiningi, kan̄i kurunpa ngayunya angeltu katingu apu murpu pulkakutu mununi katunguru tjukurpa nintinu Godaku tawunu milmilpa Jerusalemany ilkaringuru ukalingkunyangka. **11** Ka tawunu palunya irnyaningi Godaku pitalytjingku, panya upula irnya-irnyalpai ku Lingku kampanyangka, palu purunyapa.

12 Ka Godaku tawunu ngururpa ngaranyangka wall-pa wāra pulka parangarala arintanangi kuunatjara kuunatjara. Ka wall-ta kaita 12 ngarangi, ka angelpa tjutangku kaita kutju-kutjunguru ngarala atunymamanangi. Ka wati panya Jacobaku katja tjūta 12 ini ngarangi kaitangka kutju kutju walkatjura wantintyta. (Katja nyanga palula tjanalanguru panya anangu Israekunu tjūta ma-tjūtaringu malatja malatja.) **13** Ka kaita panya 12 wall-ta ngarangi, kakararanguru mankurpa, munu ulpariranguru mankurpa kutjupa, alintyjaranguru mankurpa kutjupa munu wilurarranguru mankurpa kutjupa. **14** Ka puli walu 12 para-ngarala wanāningi, ka palula tjanala katu wall paluru para-ngarala wanāningi. Ka watiku ini tjūta ngarangi walkatjunkunytja walu pala palula tjanala walu panya 12-nga, panya wati 12 Lamalamangku nganmanytju iyantja tjūta Tjukurpa Palya wangkanytjaku, nyara palumpa tjanampa ini tjūta.

15 Ka angelpa panya paluru ngayula wangkanytjalu kanyiningi punu tjukaruru mitjurumilalpai gold-nguru palyantja tawunu palula tjunkula wanara mitjurumilantjikitjangku wall-ta kaita tjūtangka kūlu. **16** Ka tawunu nyara paluru kuuna-kuuna wāra pulkanya ngarangi, ka angeltu tawunu palunya kakarara mitjuramilañu wāra pulka mulapa 2,400 kilamita,* munu piruku ulpariralku mitjuramilañu palu purunypa 2,400 kilamita, munu palu purunypa mitjuramilañu wilurarralku alintyjaralku kūlu wāra pulka nampa palunyatu 2,400 kilamita uwankara. Munu paluru piruku katukutungku mitjuramilañu nampa palu purunypa wara mulapa. **17** Munu piruku tawunu palunya wall-pa para-arintara ngaranytjanya angeltu mitjuramilañu lipiwanu nampa nyangatja 60 metre.*

18 Kan̄a nyangu wall-pa palunya wiru mulapa ngaranyangka panya puli ukiri-ukiri wirunguru palyantja puli ini Jasper-nguru. Ka tawunu paluru wiru mulapa ngarangi gold-nguru palyantja kalawatja purunypa panya wiitjurulypa nyakupai, palu purunypa palya mulapa.

19-20 Kan̄a nyangu wall-ku tjinangka walu panya 12-nga puli upula tjūta tjakatjura wantintyta kala kutjupa kutjupatjara wiru mulapa. Walu kutjungka upula kala ukiri-ukiri ngarangi, ka kutjupangka kala ilkari purunypa ngarangi, ka kutjupangka piranpa ngarangi, ka kutjupangka tjin-tjinpa ngarangi, ka kutjupangka inuntji purunypa ngarangi ka kutjupangka maru ngarangi. Kala wiru mulapaya ngarangi walu nyanga 12-nga. **21** Mununa kaita 12 kūlu nyangu nyanga alatji ngaranyangka, upula ini pearl-nguru palyantja palu manguri-manguri pulka mulapa, kala piranpa. Mununa piruku nyangu iwara wiru mulapa ma-ngarinayangka gold-nguru palyantja palu nyangatja kutjupa nguwanpa, panya kalawatja unnguwanungku munkaratjara nyakupai, palu purunypa.

22 Palu pūnuña nyangu timpula tawunu pala palula unngu ngaranyangka Godanya walkuntjaku, panya pula Godanya Mayatja Pulkanya Lamalamanya kūlu uti alatjitu nyinanyi tawunu pala palula. **23** Ka tjin̄tungku

* **21:16** 2,400 kilamita parari mulapa nyaa purunypa, Pukatjalanguru munu Melbourne-takutu, palu purunypa. * **21:17** 60 metre nyaa purunypa, panya pałtjura ankunytja 60-arangku, palu purunypa.

irnyantja wiya munu kiñarangku kuļu piruku irnyantja wiya tawunu nyara palunya, panya Godalu pitalytji pulkangku tjananya irnyara kanyini. Ka Lamalamangku palu purunytytu irnyara kanyini tili purunytyju, paluru pula.

²⁴ Kaya aŋangu winki uti para-ngaraku kałala purunytyja Godalu Lamalamalau pula irnyannyangka. Kaya mayatja tjutangku ngura kutjupa kutjupa tjutanguru katiku mani, ulytja, kutjupa kutjupa wiru tjuta tawunu nyara palulakutu. ²⁵ Ka kaita tjuta titutjara ala ngaraku panya tawunu nyara paluru piruku mungaringkunytyja wiya ngaraku kałala titutjara. ²⁶ Kaya ngura kutjupa kutjupa uwankaranguru mani, ulytja, kutjupa kutjupa wiru tjuta tawunu pala palula katira tjunkuku.

²⁷ Palu kurakura tjutaya katintyta wiyangku wantiku munuya wiru tjuta kutju katira tjunkuku. Kaya kuralpai tjuta munu ngunti wangkapai tjuta tjarpanytyja wiya ngaraku tawunu pala palula. Palu panya Lamalamangku nyiringka ini walkatjunu wanka nyinanytjaku, nyara paluru tjana kutju tjarpanku ngura pala palula, munuya wanka titutjara nyinaku Godala tjungu.

22

¹ Kanı angeltu piruku ngayunya nintinu kapi wała wankarunkupainya ukalingkunyangka. Ka kapi paluru pirpi-pirpira ukalingangi Godaku pulampa Lamalamaku tjiyanguru. ² Munu kapi paluru tawunungka ngururpa karuringkula iwarangka ukalingangi.

Ka karu kantilypa kutjarangka ngarangi puṇu wankanya. Ka puṇu pala palula mai ilatı-ilatı pakaningi kinara kutjupa kinara kutjupa titutjarangku ngalkuntjaku, kaya ngura winkitjangku puṇu pala palulan-guru nyalpi mantjira nyitilpai pika wiyaringkunytykitjangku.

³ Ka aŋangu kura tjuta kutjupa kutjupa kura tjuta kuļu Godalu wantinyangka, nyara paluru tjana uwankara nyinanytja wiya ngura nyara palula, palya tjuta kutju nyinaku Godala tjungu.

Ka tawunu pala palula Godaku pulampa Lamalamaku tjiya nyinapai ngaraku, kaya Godaku waltyta tjutangku palunya mirawaniku. ⁴ Munuya palunya yunpa nyakuku, munuya palumpa ini kanyilkü ngalyangka walkatjura wantintyta.

⁵ Munuya ngura pala palula lampa tilira kanyintja wiya nyinaku panya munga ngaranytja wiya ngaraku ngura pala palula. Ka tjintu kuļu ngaranytja wiyaringkuku, panya Mayatja Godalu tjananya irnyara kanyilkü uwankara uti nyinanytjaku. Kaya mayatjarira tjana Mayatja Godala tjungu nyinaku wanka titutjara wiyaringkunytyja wiya alatjitu.

Jesunya Małaku Pitjanytja

⁶ Kanı angeltu wangkangu, "Kulila, wangka nyangatja tjukaruru, ka nyuntu mulamularingama. Panya Mayatja Godalu iriti wangkangi wangkatjara tjutangka tjana aŋangu tjutangka tjakultjunkunytyaku, pala palu purunypańa Godaku waltyta tjutangka tjakultjunanyi ngula kutjupa kutjupa tjuta wirkankunytyaku."

⁷ Ka Jesulu wangkangu, "Kulilaya! Kuwari nguwanpańa małaku pitjaku. Ka aŋangungku tjukurpa nyanga nyiringka walkatjunkunytya wanganarangku kulirampa pukuļpa palya titutjara nyinaku, panya tjukurpa nyangatja Godaku."

⁸ Ka nyanganja ngayulu Johntu nyanganpa uwankara nyiringka walkatjunu nyakunytyatjanungku munu kulintjatjanungku tju kurpa

nyanga palunya tjananya. Panya angeltuńi nintira tjakultjunangi kutjupa kutjupa tjuṭa, kaṇa uwankara nyakula kulira wiyaringkula angelpa pala palula tjinangka waṭungaṛakatingu palunya mirawaṇinytjikitjangku.

⁹ Kanı wangkangu, “Alatjingalwiyangkunı wantima! Mayatja Godanya kutju mirawanima, ngayunya wiyangku! Ngayuluṇa Godaku warkaripai nyuntunya purunypaṭu. Kaya Godaku wangkatjara tjuṭa kuļu ngayunya purunypaṭu nyinanyi. Kaya kutjupa tjuṭangku tjukurpa nyiri nyangatja wanganarangku kulilpai, nyara paluru tjana kuļu ngayunya purunypaṭu nyinanyi. Kanı ngayunya walkuntja wiyangku wantima Godanya kutju walkunma!”

¹⁰ Nyara palulanguruńi angeltu piruku wangkangu, “Tjukurpa nyangatja Godaku panya nyiri nyangangka ngarinyi ka kuitjunkunytja wiyangku tjukarurungku utingku wangkama, panya tjukurpa nyanga paluru tjana kuwari nguwanpa utiringkuku. Ka tjintu muṭumuturingu watalpi aŋangu tjuṭa kampa kutjuparinjtjaku. ¹¹ Kaya kuralpai tjuṭangku titutjarangku tungunpungkula kura palyalkatima, munuya kurakura kutjupa kutjupa tjuṭa palyalpai tjuṭangku palu purunypaṭu rawangku palyalkatima. Kaya wiru palyalpai tjuṭangku titutjarangku wiru palyalkatima, munuya Godala tjukaruru nyinapai tjuṭa palu purunypaṭu tjukaruru nyinakatima.” Alatji angeltu wangkangu.

¹² Ka Jesulu wangkangu, “Kulilaya! Ngayulu kuwari nguwanpa malaku pitjaku. Mununa pitjala aŋangu uwankara ngayula kuranyu ngaratjunkuku tjananya mantangka nyinara palyantjitjanguru tjukarurungku ngurkantankunytjikitjangku. Mununa palulanguru tjanampa uwankaraku tjukarurungku palyalku – ngayunya rawangku waŋalpai tjuṭana mantilku ngayula tjunguringkula nyinanytjaku, mununa watarkitja tjuṭa mauntałpa iyalku ngura kurakutu. ¹³ Ngayuluṇa ngañmanyitja mulapa uwankara wiyangkalpi nyinanytjanya, mununa panya uwankara wiyaringkunyangka nyinaku titutjara wiyaringkunytja wiya.

¹⁴ “Panya anangungku mantara paltjilpai ka kilina mulapa ngarapai, pala palu purunypa nyuntu kurunpa kilina palya mulapa kanyira pukulpa mulapa nyinaku munu nyara palulanguru mai ngalkuku puṇu wankanguru munuya kaitawanu tjarpara pukulpa mulapa nyinaku tawunu pala palula.

¹⁵ “Kaya kuralpai tjuṭa tjarpanytja wiya ngaraku, panya tjana kura kutjupa kutjupa tjuṭa palyalpai, irattingka kuralpai munu miripungkupai, kutjupa kutjupangka ngunti ngaripai, puṇunguru apunguru palyantja ngunti walkulpai, ngunti wangkapai munu ngunti kuļu kuralpai, nyara palu purunypa palyalpai tjuṭa ngura nyara palula puṭu tjarpaku.”

¹⁶ Mununí piruku Jesulu wangkangu, “Ngayuluṇa angelpa nyuntulakutu witunu tjukurpa nyangatja nyuntula tjakultjunkunytjaku nyuntu ngapartji ma-tjakultjunkunytjaku tjanala ngayuku waltyta tjuṭangka ngura kutjupa kutjupangka nyinanyangka. Panya iriti Davidanya mayatja pulka nyinangi, nyara palumpa pakali maļatja ngayulu nyinanyi. Ngayuluṇa kililpi panya tjintukutu pakalpainya, palu purunypa.”

¹⁷ Palulanguru Kurunpa Milmiltu pula Lamalamaku kuringku wangkangu, “Ala, pitjaya!”* Kaya nyangatja kutjupa tjuṭangku kulirampa uti palu purunypaṭu wangkama, “Pitjaya!” Uwa, aŋangu kutjupa kapi

* ^{22:17} Lamalamaku kuri panya Jesuku waltyta tjuṭa.

ilu nyinarampa uti pitjama munu paluru tjikila kapi wankanya Godalu intjanungku ungkunyta.

Tjukurpa Malatja

¹⁸ Kulilaya! Tjukurpa nyanga nyiringka ngarintja nyangatja Godaku alatjītu. Kaña ngayulu Johntu mulamulangku wangkara paini tjukurpa nyiri nyangangka tjukurpa kutjupitja tjungulwiyangku wantima. Panya aŋangungku tjukurpa kutjupitja tjukurpa nyangangka tjungunnyangka Godalu palunya pikatjaralku, panya nyiri nyangangka tjukurpa ngarinyi Godalu aŋangu kura tjūta pikatjarantjaku, nyara palu purunypātu palunya pikatjaralku.

¹⁹ Kaña piruku wangkanyi nyura ngaṭalarintjaku-tawara winki utingku tjakultjunkunytyaku. Tjinguru nyura tjukurpa nyangatja tjukutjuku ngaṭalpa wangkaku winki utingku wangkanytja wiyangku, ka nyuranya Godalu mai puṇu wankanguru ungkunyta wiyangku wantiku munu nyuranya tjarpatjunkunyta wiyangkuwantiku tawunu nyara wiru palula ngura panya milmilt̄a. Panya tjukurpa nyangangku tjakultjunanyi puṇu wankanya munu tawunu panya ngura milmilpa, palu nyura aru kulirampa tjukurpa nyanga palunya ngaṭalpa wangkarampa nyura ngura nyara palula puṭu tjarpaku.

²⁰ Ka Jesulu wangkangu, “Tjukurpa nyangatja tjukaruru mulapa.” Munu piruku alatji wangkangu, “Uwa, mulapa kuwari nguwanpaña ngayulu malaku pitjaku nyuranya mantjintjikitja.”

Kaña ngayulu Johntu kulintjatjanungku wangkanyi, “Uwa mulapa, Mayatja Jesu, warpungkula pitja.”

²¹ Uwa, alatjītu wangkanyi. Ka Mayatja Jesulu nyuranya Godaku waltyta uwankara pukultjungku wirura kanyinma. Uwa mulapa.